

29116/D

A xxxi Hof

FRIDERICI
HOFFMANNI
OPERUM
SUPPLEMENTUM
SECUNDUM

IN TRES PARTES DISTRIBUTUM.

FRIDERICI
HOFFMANNI

CONSILIARII REGIS BORUSSIÆ INTIMI,
ET ARCHIATRI,

PROFESSORIS MEDICINÆ PRIMARIÏ IN ACADEMIA HALENSI,

OPERUM OMNIUM
PHYSICO-MEDICORUM
SUPPLEMENTUM
SECUNDUM

IN TRES PARTES DISTRIBUTUM;

QUIBUS CONTINENTUR

OPERA VARIA QUÆ IN MAGNA OPERUM
COLLECTIONE ET PRIMO SUPPLEMENTO DESIDERANTUR.

PARS PRIMA.



GENEVÆ,

Apud FRATRES DE TOURNES.

M. DCCLIII.

ERDREIC

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE

THEATRE



BIBLIOPOLÆ LECTORI.



UM fat multis jam provectus annis, ætatem ingravescere animadverteret Celeberrimus FRIDERICUS HOFFMANNUS, cujus nomen & scripta immortalitate digna, ad remotissimam usque posteritatem sunt perventura, tunc, & sano quidem iudicio, nec animi errore ductus existimavit Vir nunquam pro dignitate commendandus, se non parum Medicinæ studiosis profuturum fore, si typorum ope publici juris faceret integram omnium Operum suorum Collectionem, quæ omnino comprehenderet quæcumque Virum acutissimo planè & quasi divino præstantem ingenio, medicis in rebus edocere potuisset diuturnum constans & felix quinquaginta annorum in Arte medendi exercitium. Eandem igitur illam Collectionem Nos primùm prelo commisimus anno 1740. & denuò recusimus anno 1748. intactam & prorsus qualem ad nos eam transmittere dignatus est æternâ dignus famâ Borossus Archiater HOFFMANNUS, cui, cùm in primam editionem oculos iniecisset, (vitâ etenim illo fruenta illa prodiit) tantum placuerunt miræ typorum elegantia, & exactissima in expurgandis mendis animadversio, ut pro sua humanitate literis ad nos scriptis non parcè gratulatus fuerit, & plurimas etiam egerit gratias.

Tanta fuit omnium & singulorum illam nostram editionem sibi comparandaviditas, quam nullo fræno cohibere potuerunt aliæ quamplurimæ variorum seorsim & sigillatim cuforum eximii nostri Auctoris Tractatum Editiones, (quæ penitus despectæ jacuerunt statim ac illa prodiit) ut certum & indubitatum nobis fuerit argumentum omnibus Artis medicæ studiosis multùm arris-
sisse, & pergratam fuisse. Ast vero (absit enim pravus dissimulandi animus) non tam abundè publicam expectationem explevit laudata Collectio, quin adhuc superesset quod ægrè admodum ferrent rei medicæ cultores, in illa, licet copiosa, multa tamen omisisse omnibus elogiis imparem Auctorem, Opuscula, quæ antea seorsim in lucem ediderat; vel etiam alios quamplures Tractatus, quos anxie expectabat impatiens æquè ac laudabilis Philiatorum

universa tam excellentis Magistri Opera possidendi cupiditas. Neque herclè leves & vanæ erant tot clamitantium querelæ, prout patet ex *Præfatione primo HOFFMANNI Operum Supplemento annexâ*; & vix aliam hujus omissionis rationem suspicari audemus, quàm modestam nimis ipsius Auctoris mentem, qua dictante, varios illos Tractatus, velut abortivos ætatis immaturæ partus, quoquomodo repudiandos censuit.

His igitur momentis, vel aliis, qualiacumque moverint nihil inconsulto agentem non incerti judicii Virum, religiosè itetimus, nec quidquam in illius Operum Collectione inseruimus præter ea quibus ipse illam conflare voluit. Nec propterea tamen benignam voci publicæ aurem præbere detrectavimus; quinimò enixè cupientes operam nostram navare, & partes etiam nostras agere, ut quam maximè fieri possit, ultimum perfectionis gradum attingat præ cæteris colenda salutifera Medicinæ scientia, hûc mentem appulimus, & moti præcipuè non paucorum lamentis, querentium spem fefellisse exhibitam Doctissimi HOFFMANNI Collectionem, siquidem in ea quamplurima desiderarentur ut omnibus suis partibus expleta evaderet; cujus etiam rei certiores facti sumus acceptis undequaque indiciis variarum Dissertationum & aliorum peritissimi HOFFMANNI scriptorum, quæ vel ipse, vel alii Auctores citaverant, quæque in hætenus semel & iterum recusa Collectione reperire non dabatur; multorum denique sollicitè postulantium votis adnuentes, omnia illa tantopere expetita Opuscula, unum in corpus colligere conati sumus; quod partim, & multo sane labore, præstitimus primo quod anno 1749. *Supplemento* in lucem edidimus; & quod reliquum supererat, illud in hoc altero quod nunc offerimus, planè consecutos fuisse haud temerè confidimus. At verò non leves fuerunt curæ, nec mediocris in inquirendo, atque eas omnes Hoffmannianorum Operum reliquias recolligendo sollicitudo. Quid non enim perscrutandum, quid non movendum fuit, ut nihil lateret eorum quæ typis mandavit, vel etiam manuscripta reliquit à nullo adæquandus toties sed nunquam benè laudatus HOFFMANNUS? Tanta nempe erat distantia locorum, in quibus reliqua illa fragmenta reperiri erant, ut præ tædiosa laboris difficultate in incepto opere inhærentes, vix illud ad finem perducere potuissemus, nisi calcar admovisset bene de Republica Literaria merendi voluntas, nisque multa ope suâ potenter juvisset celeberrimus Dominus NICOLAI, cujus singulari in nos benignitati, sicut & illius ardenti omnibus generatim, & speciatim Medicinæ amatoribus aliquid prodesse animo debuimus omnes omninò illas materies quibus extruitur hoc *alterum Supplementum*. Ille etenim; prout sua est humanitas, nobis subministravit disertas illas & utiles admodum *Dissertationes*, quæ in his comprehenduntur Voluminibus, nec non & *tres eruditos Tractatus manuscriptos* qui primùm hujus Supplementi ope publicam in lucem prodierunt.

Sed non sat erat cogere omnes illas longè dispersas Dissertationes, quæ Hoffmanniano nomine condecoratæ publici juris compotes factæ sunt, quin insuper opus fuit diligenti examine perpendere, utrum lucis communis participes fieri mererentur, & illas eo, quo par erat ordine prudenti judicio disponere. Illud omne præstitit peritissimus Doctor medicus, multùm nobis familia-

familiaritate conjunctus, vir in rebus medicis versatissimus. Ille hoc in se munus suscepit, & rebus undique æqua lance perpenſis, plurimas ablegavit Dissertationes quæ ad nos transmissæ fuerant, utpote quòd attenta lectione compererit nihil eas continere ultra quam quod jam ante dixerat & docuerat Auctor in Medicina sua Systematica, cujus eximii operis non pauca capitula tùm illorum quæ de Theoria, cùm eorum quæ de Praxi medica tractant, jam seorsim edita, publica facta fuerant, & distinctæ Dissertationi anſam præbuerant, quam etiamſi in aliquibus leviter discrepantem, cum cæteris recudi prorsus inutile viſum illi fuit.

His ita compositis, incubuit onus omnes illas Dissertationes adæquato ordine disponendi; & illud primùm menti obvenit, nempe in illis coordinandis illam ſequi temporis ſeriem, quod uniuscujusque illarum publicationi reſponſiſſet; at vero rem propiùs conſideranti celeberrimo Medico qui hanc hujus *ſecundi Supplementi* editionem curavit, ſatius viſum eſt illam intrare viam quam Auctor ipſe in quinto & ſexto Operum ſuorum tomis & in Medicina ſystematica monſtraverat, & eidem ſeſe accommodare ordini quem ibi ille ſecutus fuerat. Quo ita ſtatuto, Primum in hoc Supplemento locum occupabunt *Dissertationes quæ ad Historiam Naturalem & ad Chymiam ſpectant*; Secundum vero *illæ in quibus Phyiicæ notiones & præcepta Medicinæ adaptantur*; Tertium denique *Dissertationes quæ veluti ad Medicinam prolusiones haberi poſſunt, vel ad Physiologiam pertinent*. Poſt eas proximè incedunt *Dissertationes quæ de aquis mineralibus & vario earum uſu tractant*; quas ſubſequentur 1°. *Dissertationes de Regimine*: 2°. *Dissertationes Pathologiæ*: 3°. *Therapeutiæ*; & demùm primo Tomo finem faciunt *Dissertationes quæ de Remediorum efficacia, eorumque virtutibus & effectibus pertractant*.

Dividitur Tomus ſecundus in duas partes, quarum prima continet omnes *Theſes præcticas*, accuratè diſtributæ ſecundùm ordinem quem ſecutus eſt Auctor in Medicina Systematica: altera vero comprehendit *tractatus tres manuſcriptos* & nunc primùm in lucem editos, quorum unus complectitur *Historiam Anatomicam Corporis humani, cum enumeratione & accurata deſcriptione morborum, qui ſingulas illius partes afficere poſſunt*. Cum ſit enim Anatomia unum ex præcipuis Medicinæ fundamentis, præſertim in cognoscendis morbis; ideò quam maximè rationi conſentaneum videtur poſt explicatam corporis humani ſtructuram, quale illud plasmaverunt ſummi rerum omnium Opificis manus, in cognitionem venire omnium affectuum & ægritudinum quæ in illud impetere, atque illius fabricam quoquomodo invertere poſſunt; & hanc ſanè methodum ſtudioſè tenuit Ill. HOFFMANNUS in hoc ſuo Opere, quod ea mente procul dubio ſcripſit, ut certa ex eo accipere documenta poſſent quicumque ex tam puro fonte haurire lætarentur infallibilia illa principia quæ ad medicinam dignè & utiliter exercendam conducunt.

Laudato manuſcripto ſuccedit *Dissertatio de Variis Erroribus in quos incidunt Medici tum in Theoria, tum etiam in Praxi*. Ex ſolo titulo patet maxima illius *Dissertationis* utilitas; præterquam quod materiam illam tam eruditè, tam clarè tamque concinnè eventilat ille ſolertiſſimus admodùm in arte de rebus

BIBLIOPOLÆ LECTORI.

Medicis scribendi Magister, ut nihil omninò desiderandum relinquat illis qui res ad unguem enodatas cupiunt.

Uno verbo, pro summa veluti coronide, totum hujus Supplementi Opus concludit brevis quidem, at nihilominus absolutus & completus *de Materia Medica* Tractatus, hactenus ineditus, in quo de variis remediis suam aperit mentem, suamque profert sententiam, quæ eo majori pollet auctoritate, quo diuturniori praxi stabilita, minus errori obnoxiam se præbet.

Omnia hæc Scripta oculatissimus perlegit, antequam prelo subjicerentur, & à mendis omnibus, quæ vel Typographorum incuria, vel Amanuensium errore irrepere potuerint, sedulo expurgavit ille ipse jam suprà commendatus Doctor Medicus qui illa congruenter ordinari curavit, ita ut correctissimam palàm esse prodituram facile autumemus.





CONSPECTUS GENERALIS HUIUSCE SUPPLEMENTI SECUNDI.

P A R S P R I M A.

Opuscula Physico-Medica varii argumenti, varias Dissertationes complectentia,
quarum Elenchus paginâ subsequenti invenitur.

P A R S S E C U N D A.

Dissertationes Practicæ varii argumenti, *quarum Elenchus post hujus partis titulum invenitur.*

P A R S T E R T I A.

Tractatus tres nunquam hæctenus editi, *quorum Elenchus post hujus partis titulum invenitur.*



CONSPECTUS

PARTIS PRIMÆ.

Opuscula Physica varii argumenti ad Historiam naturalem pertinentia.

Dissertatio Physico-Medica sistens Oryctographiam Halensem, sive Fossilium & Mineralium in Agro Halensi descriptionem.

Pagina I

Dissertatio Physico-Medica de Ebore fossili Suevico-Halensi.

13

Opuscula Physica varii argumenti ad Chymiam pertinentia.

Dissertatio Chymica de Experimentorum quorundam Chymicorum perversâ explanatione.

19

Dissertatio Medica de salis Volatilis genesi, usu, & abusu in Medicina.

24

Dissertatio Chymico-Medica de sulphuribus Metallorum.

32

Opuscula Physica varii argumenti ad Physicam pertinentia.

Dissertatio Medica de necessitate Physices in Praxi Medicâ.

49

Theses selectiores ex Philosophicis & Medicis.

55

Dissertatio Medica exhibens Leges Naturæ in corporum productione & conservatione.

57

Dissertatio tres Demonstrationes Mathematico-Physico-Medicas sistens, de Caloris, Lucis & Flammæ naturâ atque effectibus in res creatas.

64

Disputatio Physico-Medica de causis Caloris naturalis & præternaturalis in corpore nostro.

72

Dissertationes tres de corporibus eorumque motu

I^a. De corporibus illorumque principiis & affectionibus.

79 *

II^a. De corporum motu ejusque causis.

83 *

III^a. De corporum motionibus ex gravitate ortis.

87 *

Dissertatio Physico-Medica de gravitate aëris ejusque elasticitate in machinam corporis humani.

79

Opuscula ad artis Medicæ Prolegomena pertinentia.

Dissertatio de præparatione ad Lectionem Veterum Medicinæ auctorum.

89

De Medicina ab omni hypothese vindicandâ.

98

Dissertatio de difficultatibus in Medicinâ addiscendâ.

100

Dissertatio Medica de Medicinâ Hippocratis mechanicâ.

110

Differ-

CONSPECTUS PARTIS PRIMÆ.

<i>Dissertatio Philosophico-Medica methodo scientificâ conscripta, quâ sistitur verum universæ Medicinæ principium in structurâ Corporis Humani Mechanicâ. reperiundum.</i>	121
<i>Dissertatio Vitæ animalis considerationem theoretico-practicam exhibens.</i>	131
<i>Exercitatio Anatomico-Physiologico-Medica, de admirando sanguinis circuitu, omnis solidæ ac rationalis Medicinæ vero fundamento, quâ ostenditur auricularum & ventriculorum cordis motum nequaquam vere esse alternum, ut communis omnium hucusque fuit opinio, sed prope cœvum atque adeo synchronum.</i>	147
<i>Dissertatio de differentiâ Medici & Medicinæ Practici.</i>	182
<i>Dissertatio Medica de Proceritate Corporis ejusque causis & effectibus.</i>	190
<i>Dissertatio de Usu Respirationis in arte Medica.</i>	201
<i>Theses Inaugurales Medico-Forenses de Anatomia Publicâ.</i>	211

Opuscula de Aquis Mineralibus.

<i>De Aquæ Naturâ ac virtute in medendo.</i>	220	L7
<i>Dissertatio Medica de Fonte Medicato Lignicensi.</i>	227	
<i>Dissertatio Physico-Medica de Acidulis Veteraquensibus in Silesiâ.</i>	233	
<i>Dissertatio Medica de Balneorum artificialium ex scoris Metallicis usu Medico.</i>	239	+

Opuscula Diætetica.

<i>Disputatio Medica de morte subitâ præcavenda.</i>	244	
<i>Dissertatio Medica de Inediæ noxâ atque utilitate.</i>	253	—
<i>Dissertatio Medica de curâ Avenacea.</i>	265	
<i>Dissertatio Medica de necessario sanis Medico.</i>	274	
<i>Dissertatio Medica de Convalescentiæ statu, ejus impedimentis & præsidiiis.</i>	283	
<i>Dissertatio Medica de necessariâ salivæ inspectione ad conservandam & restaurandam sanitatem.</i>	306	
<i>Dissertatio Medica de Curâ Partûs modo enixi & lactentis.</i>	311	+
<i>Dissertatio Medica sistens Valetudinarium Virginale.</i>	317	
<i>Dissertatio Medica de Dietâ Virginum.</i>	326	
<i>Dissertatio Medica de ætate conjugio opportunâ.</i>	340	
<i>Dissertatio Medica de Regimine Pregnantium.</i>	349	X
<i>Dissertatio Medica quâ Senectus ipsa morbus sistitur.</i>	353	
<i>Dissertatio Medica de Athletis Veterum, eorum diætâ, & habitu.</i>	363	
<i>Specimen Physico-Medicum de salubritate Hassiæ.</i>	385	

Opuscula Pathologica.

<i>Succincta Pathologiæ ex principio Medicinæ deductio.</i>	408	
<i>Dissertatio de Morborum ortu & causis eorum proximis.</i>	415	
<i>Dissertatio Medica de corporum dispositione ad morbos.</i>	423	
<i>Dissertatio Medica de aeris intemperie multorum morborum causâ.</i>	430	
<i>Dissertatio Medica de verâ morborum sede.</i>	438	
<i>Dissertatio Medica de morborum transmutatione.</i>	445	+
<i>Exercitatio Medica Pathologiam Duumviratus Helmontiani sistens.</i>	453	
<i>Dissertatio Fermentorum morbificorum é Medicina ejectionem sistens.</i>	465	
<i>Dissertatio Medica de eo quod nemo Ægrotorum moriatur ex morbo.</i>	471	
<i>Dissertatio Medica de eo quod plurimi Ægrotorum moriantur contra Leges artis.</i>	479	
<i>Dissertatio de Medicis morborum causâ.</i>	484	
<i>Dissertatio Medica de morbis à nimia & intempestiva venere oriundis.</i>	492	
<i>Dissertatio</i>		

CONSPPECTUS PARTIS PRIMÆ.

4 Dissertatio Physico - Medica de aëris potentia in Epidemicorum morborum generatione.	pag. 500
Dissertatio Medica de Plethora insufficiente morborum causâ.	506
Disputatio Medica de malignitatis naturâ, origine, & causâ in Morbis acutis.	514
7 De modo Veterum balsamandi corpora.	522
Dissertatio Physico - Medica de affectibus hereditariis, illorumque origine.	523
Dissertatio Medica de conversione morbi benigni in malignum, sive generatione veneni in corpore, per imperitiam Medici.	531
Dissertatio Medica de Pinguedine, seu succo nutritio superfluo.	537

Opuscula Therapeutica.

Dissertatio Medica de medendi methodo varia pro climatum diversitate.	544
Dissertatio Physico - Medica de natura morborum medicatrice mechanicâ.	551
Dissertatio Medica de naturâ optimâ febrium pestilentium medicatrice.	562
Dissertatio Medica de εὐχαιεῖα Praxeos Medicæ.	567
Dissertatio Medica de Morbis peregrinantium.	575
Dissertatio Medica de Morbis incongruis.	587
Dissertatio Medica de Salivâ, & ejus morbis.	594

Opuscula de Remediis, eorum generibus, operandi & applicandi modo, una cum cautelis, & observationibus necessariis.

Dissertatio Medica de modo operandi remediorum physico - mechanico.	605
Dissertatio Medica de differenti medicamentorum operatione secundum diversam corporis humani idiosyncrasiam.	616
Dissertatio Medica de Remediorum evacuantium mechanicâ operandi ratione.	625
Dissertatio Medica de mechanicâ operandi ratione medicamentorum sic dictorum Alterantium.	630
Dissertatio Medica de Purgantibus specificis.	636
Specimen Medicum de cauto & incauto Sedativorum usu.	639
Dissertatio de Opii correctione genuinâ & usu.	648
Dissertatio Medico - Chirurgica de ἰσχαίμοις, seu sanguinem mittentibus.	656
Dissertatio Medica de Anthelminticis.	663
Dissertatio Medico - Practica de Remediis Ant - odontalgicis.	670
4 Dissertatio Medico - Chymica de Nitro, ejus naturâ, & usu in Medicinâ.	680
Dissertatio Medica sistens Sacchari Historiam naturalem & Medicam.	685
Dissertatio Medico - Physica de Caryophyllis Aromaticis.	693
Disputatio de Cortice Cascarille ejusque insignibus in Medicinâ viribus.	704
Dissertatio Medica de Præstantia Malorum Citriorum in Medicinâ.	718
Dissertatio de Noxis ex Remediis domesticis incongruè applicatis.	731
Dissertatio de erroribus circa venena vulgaribus.	737
Dissertatio Medica de cautâ & circumspectâ veneni dati accusatione.	746



FRIDERICI
 HOFFMANNI
 OPUSCULA PHYSICA
 VARIII ARGUMENTI,
 AD HISTORIAM NATURALEM PERTINENTIA.

DISSERTATIO PHYSICO-MEDICA,
*sistens Oryctographiam Halensem, sive Fossilium & Mineralium
 in agro Halensi descriptionem.*

Primum edita anno 1730.

PROOEMIUM.



QUAMVIS Thema Dissertationis præsentis magis ad physicum, quam medicum forum spectet; illud tamen specimini inaugurali non plane incongruum esse puto, cum Physices studium ad Medicinam maxime pertineat, & in ea usum amplissimum habere observetur, de quo ipsa hæc tractatio satis clarum exhibebit testimonium. Si libros Physicorum evolvimus, non pauci inter eos occurrunt, qui specialius de fossilibus certarum regionum scripserunt. Horum singularis industria me quoque permovit, ut in perscrutandis ejusmodi rebus naturalibus multum temporis impenderem. Hunc in finem ager Halensis uberrimam præbuit copiam, ita ut præterlapsis annis magnum variorum fossilium apparatus conquiverim. E quibus cum plurima multis adhuc incognita sint, operæ pretium judicavi, hac occasione *fossilium Halensium enumerationem* pertractare. Sed ne limites dissertationis transgrediar, in recensione quorundam subjectorum brevior ero: quæ vero rariora & notabiliora erunt, pluribus circumstantiis describere non negligam. Cui conatui & labori, sicuti gratiam divinam adjutricem precibus devotis exoro, ita confidenter eandem mihi promitto.

Oryctographia

C A P U T I.

De Situ & natura agri Halensis.

DUM animus est, fossilium & mineralium in agro Halensi descriptionem exhibere, super-
vacaneum hoc loco esset, in urbis Halæ Magdebur-
gicæ denominationem, originem, antiquitatem &
incolas præteritorum sæculorum inquirere. Qui ve-
ro de his certiores esse volunt, hos ad OLEARII *Haly-*
graphiam & ANONYMI cujusdam *Nachricht von der*
Stadt Halle und Universität, remittimus. Per agrum
Halensem itaque non solum angustum illud spatium,
quod proxime urbem ambit, sed passim etiam ad
distantiam trium & quatuor milliarum porrigitur,
intelligo.

Solum hoc nostrum plurima ex parte terra nigri-
cante, pingui gaudet, ob quam præ multis aliis fer-
tilissimum existit. Excipio pauca tantum jugera pa-
rumper lapidosa & arenosa, quæ versus amnem Ely-
strum, *die Elster* / & prope pagos *Giebichenstein*
& *Niedleben* / occurrunt.

Licet ager quoad maximam partem planus sit;
passim tamen quoque *montibus* & *vallibus* distinctus
conspicitur. Ex montibus inprimis eminent mons
S. Petri, *Petersberg* / & qui *Landsbergæ* est, deinde
qui prope *Giebichenstein* situm habent. Ex vallibus
annotari merentur, quæ ad pagos *Beesen* / *Esperstädt*
& *Gimmritz* in via Wettinenfi obveniunt, ubi simul
iucunda vocis repercussio, quam Echo appellant,
frequentissime exauditur.

Sylvis etiam non destituti sumus. Sic habemus
fylvam, quercus maxime comprehendentem, quæ a
pago *Anwendorff* / secundum longitudinem ad ripas
Elystri, usque ad Lipsiam & ultra, continuat. Alia
quercus ferens, sed longe minor, est ad radices
prædicti montis S. Petri. Deinde non procul ab ur-
be nemus oculis se offert, quod præter quercus etiam
pinos, abietes, alnos, betulas, corylos & alios fo-
vet frutices. Verum omnis hic sylvarum appa-
tus tanti non est, ut debitam quotannis ligni co-
piam nobis suppeditaret. Hanc inopiam vero sylva
nostra subterranea, carbonēs fossiles puta, qui pro-
pe Wettinum & Lebeguinum copiosissime eruuntur,
egregie sublevat. At hi etiam cum omnibus usibus
œconomicis non quadrent; lignum insuper aliunde,
partim ex Thuringia, Salæ fluvio injectum, ad nos
venale propellitur, partim autem ex Principatu An-
henino Dessaviensi, navi & curru, in sufficiente
quantitate advehitur.

Vinearum proxime ad urbem parvus est nume-
rus, longe major vero unum vel alterum abhinc
milliare, prope Cölme & Seeburgum; ubi vinum,
licet ignobilius, satis copiose paratur.

Hic a proposito nostro non alienum judicamus,
si agri Halensis diversa strata subterranea, quous-
que hætenus innotuerunt, subjungamus, ex qui-
bus quisque veritatis amicus ad diluvium quoddam
universale conclusionem formare poterit. Huic scru-
tinio subjiciemus primo campos ad meridiem ver-
gentes, qui sequentia strata habent: 1) primum
est humus alens nigricans, unius circiter & dimidiæ
ulnæ: 2) alterum silices & lapides varii generis ha-
bet, sed inordinate compositos, perinde fere, ac si
viam saxi stratam cerneret: 3) sequitur limus pu-
rior & siccus, *Bachofen-Steinen* / trium ulnarum.
4) Limus ordinarius humidior, cum lapidibus cor-
neis, ut plurimum diffractis, quatuor ulnarum. 5)

Limus striatim positus, *Blätter-Steinen* / unius ul-
næ; 6) arena sicca impurior, unius ulnæ. 7) Limus
valde arenosus, quatuor ulnarum. 8) Limus compa-
ctior, fusci coloris, dimidiæ ulnæ. 9) Silices ma-
jores minores, & diversi coloris, *Wasser-Rieß* / cum
aqua pura interfluente; & hæc aqua illa est, quæ
per cuniculos & canales ligneos, *durch Stollen und*
Röhren / ad orphanotropheum derivatur: est vero
hoc stratum quatuor ulnarum. 10) Excipit terra ni-
gra compacta XII. ulnarum, quæ pyritem marialem
vitriolicum, lapides corneos magnæ molis, particu-
las ligni fossilis fusci, pectunculos & alia conchylia,
vestigia cretæ purissimæ & varia fragmenta fovet, de
quibus infra plura dicemus: quin totum hoc stratum
principio vitriolico scatet. Quidam vero agricola-
rum hanc terram pro nitrosa forte habentes, eam
per agros suos pro meliore fœcundatione distribue-
runt; sed spem desideratam non obtinuerunt, ac
potius agri vitriolico principio steriliores redditī fue-
runt, quod in illis adhuc hodie observatur: 11) Are-
na sicca, fusci coloris, duarum & plurium ulnarum.
12) Argilla alba & rubicunda. 13) Tandem lapis
arenarius, ruber & albicans. Et hucusque, ad LX.
circiter ulnas, terræ scrutatores penetrarunt.

In eodem agro versus Salam hæc strata discre-
pant: primo enim terra nigra; deinde mox argilla
alba, vel etiam rubicunda apparet, uti in suburbio
auf dem Lerchen-Felde videre est: huic subjacet la-
pis durissimus, crystallis minoribus sæpe ornatus;
tum flava terra compactior, margæ instar, depre-
henditur.

In campis occidentem spectantibus eodem modo
se habent strata, dum statim humum alentem argilla
copiosissima sequitur. In agro quoque septentrionali
& occidentali parva est differentia, nisi quod limus
ordinarius argillam prius antecedit.

In urbe ipsa autem, inprimis ejus parte meridio-
nali, telluris alia est varietas. Superius plerumque
terra nigra, limus, lapides varii, & præsertim are-
narius, porosus, albicans, occurrere solet: sub qui-
bus latet peculiare stratum, carbonum nempe fos-
silium, vulgo *Thau-Röhren* / quod longe lateque se
extendit, ac non solum magnam urbis & suburbii
partem, *den Stein-Weg* / occupat, sed passim quo-
que per campos, versus meridiem, usque ad pagum
Liebenau / continuat; ubi in puteis fodendis sæpissi-
me eruuntur. Placet de hoc plures circumstantias
communicare. Anno circiter MDCXCII. in
area urbis, *auf dem Berlin* / metallifossores veros li-
thantraces quæriverunt; sed nihil, nisi prædictos
carbonēs inutiles, eruerunt. Postea de novo anno
MDCCXXII. hunc in finem terram in fossa meridio-
nali, non procul a Pædagogio Regio, perscrutaban-
tur: reperiēbant itidem hos carbonēs, quorum superius
stratum varia fragmenta friabilia, *wie versault Reiß-*
Holz / offerebat, cum intermixtis arborum foliis, o-
ptime adhuc conspicuis. Deinde circa ulnam XIV.
& XV. integros arborum truncos secundum seriem
positos offendebant, qui non nisi lignum fossile, fus-
cum, valde compactum erant, ex quibus etiam ma-
ximum frustum ad curiam deferrebat. Porro ab ul-
na XV. usque ad XXVI. carbonēs nostri bituminis
instar, nigri coloris copiosissime sequebantur. Sed
accidit, ut, foramine per terebram, *Erdböhren* / ad
XXVI. ulnam facto, aqua subterranea subito instar
fontis salientis ad viri altitudinem prorumpens, ca-
vernā ad ulnam XVI. repleret, ac fossores media
nocte aufugere & a toto opere desistere cogerentur:
aqua hæc vero, quorum vestimenta commaculaverat,
successu temporis corrodit, ex quo videmus, illam
de vitriolico principio participasse.

Singularis hujus strati jam ante ducentos fere
annos

annos mentionem fecit VALERIUS CORDUS in *sylva observat.* ubi dicit : *Bituminosa terra lenis, arida, & quæ nunquam lutum fit, etiam imbribus maximis, & quæ accensa, ardet carbonum modo, donec in cinerem solvatur tota, odore dum ardet bituminis sulphurei mixti, Hale Saxonie, sub ipsa urbe, maxime autem in fossa versus meridiem, reperitur.* Quidam existimarunt, hos carbones, quos *unreiffe Stein-Kohlen* appellare malunt, post temporis intervallum XX. vel XXX. annorum, ad debitam maturitatem perventuros fore, ut veros tandem carbones fossiles constituent. Sed cum ex citato auctore manifestum sit, eosdem carbones, quos ille bituminosam terram vocat, tempore duorum fere seculorum easdem qualitates adhuc retinuisse, & nullam mutationem subiisse; hinc maxime dubitandum, an unquam desideratam metamorphosin sint passuri.

Plura hic non addimus, cum longe alia, ad scopum nostrum magis pertinentia, restent.

C A P U T II.

De Terris medicis & mechanicis.

Non necessarium judico, omnes terrarum species agri nostri, quæ ex antea prolatis maximam partem constant, hic pluribus enarrare; sed sufficiet, si mechanicas tantum & medicas allega-vero. Has inter primo loco annotanda venit *argilla*, quæ hic in abundantia prostat. Differt autem argilla ratione coloris; alia enim est alba, quæ frequentior, alia rubra & purpurea, alia cinerea & cœrulea, quæ paulo rarior. Dein differt quoque ratione puritatis. Sic argilla ex fodina proxime ad urbem, parumper arena permixta est, quæ conficiendis vasis fictilibus, & præcipue etiam fistulis tabaci inservit. Multo purior autem ea deprehenditur, quæ vix ante decem annos in media sylva, prope pagum *Niedleben* detecta est. Hæc illud singulare habet, quod tam propter puritatem, quam etiam eminentem albedinem, ad purificanda panna a fullo-nibus loco saponis usurpetur, & hunc in finem interdum ad alia loca transportetur. Argillæ usus in Medicina valde infrequens est, & licet virtutem absorbentem & exsiccantem habeat, præstantiora tamen hujus generis remedia alia existant. Ceterum hoc semper de argilla mihi notabile fuit, quod non facile, nisi forte in superficie, lapidibus figuratis ac aliis heterogeneis permixta occurrat, ex quo haud immerito conjiciendum, illam a diluvio plurimis in locis intactam esse relictam.

Rubrica fabrilis, prope *Giebichenstein* in via, mox in superficie, ante paucos demum annos deprehensa est. Hæc utplurimum saxo grysei coloris adhæret, ex quo etiam magnam duritiem acquirit, ob quam ordinariæ rubricæ multo inferior est. Interim tamen novi, quosdam Mechanicorum illam in usum duxisse. Rubrica alias pollet adstringendi, reprimendi & fluxum sanguinis sistendi facultate; unde & in ipsa vulgus communiter in dysenteriae curatione sibi levamen quærit, in quo cum hæmatite multum convenientiæ habet.

Ochra in lapacidina, ad Salæ fluvium, non modo haud procul ab urbe, post humum nigricantem mox in altero strato conspicitur, sed etiam in arvis prope pagum *Seebe* quibus locis a figulis sæpe quæritur ac eruitur. Datur quoque ochra factitia, quæ ex plumbo nigro paratur, dum nempe hoc ignis vehementiæ tam diu committitur, donec

Frid. Hoffmanni Oper. Supplem. II.

colorem ochræ contraxerit. Vid. *HOFFMANNUS in Clave Schræder. p. 136.* Ochra vero nativa usta, rubricam factitiam constituit, de qua vid. *AGRICOLA Lib. III. de ortu & causis subt. p. 40. CÆSIUS de mineral. Lib. 2. c. 2. sect. 3.* Pictoribus & chirothecariis ochra maximi usus est: a Medicis vero parvi æstimatur, quia vis caustica & exsiccans ex aliis subjectis longe efficacior habetur.

Creta, cujus mentionem in antecedentibus jam feci, non tantum lapidibus corneis in allegato strato repertis copiose adhæret, sed passim quoque seorsim peculiaribus frustis eruitur. Quid in mechanicis creta præstet in vulgus satis notum est. In medico foro haud inglorium ejus nomen est inter absorbentia & exsiccantia remedia, ideoque commendatur maxime in soda & bilis acrimonia; hinc etiam basin constituit morsulorum diacretæ *Mynsichti*. *ERTMÜLLERUS* cretam ad drachmam cum vino exhibitam, tanquam palmarium remedium ad necandos vermes, laudat. Externe in ulceribus, hæmorrhagiis & podagra conducere perhibetur. Sed cum, testante experientia, in omnibus his casibus plus noxæ, quam emolumenti afferre soleat, ejus usum largiorem non immerito dissuadeo.

Lac lunæ, terra lenis & friabilis candidissima, ante paucos annos in horto medico Pædagogii Regii passim eruta est. Cum alias noto sic dicto lacte lunæ in omnibus convenit, ac lapidi calcareo nonnunquam firmiter adhæret. Ob terram teneriorem in affectibus quibus cretam mederi perhibent, tutius adhibetur, ac præterea cum crystallo montana præparata mixtum, lac puerperarum augere, neque minus in febribus malignis, ardore urinæ & calculo prodesse dicitur; quod tamen experientia nondum sufficienter confirmatum est.

Si extra terminos agri nostri paululum vagari licet, *terram sigillandam* quoque, ex luteo-puniceam, *lichtbraun* pinguem & purissimam, prope *Numburgum*, in vineis, quinque ab urbe nostra milliariibus, invenimus, cujus varia specimina *Museum curiosum Magnifici Dn. PRÆSIDIS* exhibet. Hæc terra notis bonitatis aliis non facile cedit. Nam I.) pinguis est & levis, omni sabulo & arena destituta; II.) leviter manducata, butyri instar liquefit; & III.) etiam linguæ adhæret. Propterea æque ac aliæ terræ sigillatæ, *Stringensis*, *Lemnia*, *Melitenfis*, *Samia*, in usum medicum trahi potest. Harum autem virtutes deprædicantur alexipharmaca, diaphoretica, adstringens, quæ a manifestis illis qualitatibus derivandæ: a pinguedine scilicet, quæ simul acredinem involvunt; ab adstrictione leni, qua fibras relaxatas adducunt; a porositate, qua aquosum humorem absorbent; a miscela principii martialis, quo ut plurimum hæ terræ imprægnatæ sunt. Sed si Practicos consulamus, singulari illa virtute alexipharmaca eas destitutas esse asserunt, ob quam vulgo in venenis subigendis, febribus acutis, & conjuncta iis diarrhœa, aut dysenteria maligna, extolluntur.

C A P U T III.

De Lapidibus nulla certa figura præditis.

JAm propius ad ipsam lapidum descriptionem venio, & secundum ordinem hoc capite primo loco non figuratos examinabo; e quibus nonnullos quidem infimæ fortis, ut saxum, varii generis, siles, corneos lapides, omittere potuissim, sed ut titulo exacte satisfiat, tamen eorum tantum men-

tionem hic injiciam. Si quis autem metallicos etiam lapides, five sic dictas mineras, quæ pariter certam non obtinent figuram, in hunc censum referendas esse arbitretur; ego quidem non dissentiam, sed quia earum consideratio majoris momenti mihi visa, peculiare caput de illis conscribam.

Saxi arenarii tres singulares species habemus. Primum est *Loderslebense*, fusci & cinerei coloris, ex quo cotes aquariæ, *Schleiff-Steine* / columnæ pro ædificiis, statuæ diversæ magnitudinis & monumenta sepulcraria formantur. Dein *Esperstadiense*, coloris ordinario grysei & subcinerei, interdum & flavi & cœrulei, quod substantiæ tenerioris & firmioris est, eaque propter non solum ratione usus cum priori convenit, sed insuper etiam, (quod polituram recipit) ejus tabulæ quadratæ, *Platten* / pro sternendis procerum atriis, ad remotiores urbes sæpe vehuntur. Postea vero non minus notabile est *Rotenburgense* saxum, ex pallido rubrum, omnium durissimum: e quo cæduntur lapides molares multi & magni, ac Berolinum, in Borussia aliaque dissita loca inde transportantur.

Saxum aliud *glareosum* se offert ad Salæ ripas, non procul a molendino, *bey der Stein-Mühle*. Hoc lapillis rubicundis, cinereis, viridibus & quasi seleniticis undique refertum est, qua de causa nitet ac splendet instar micæ sterilis. Hujus usus frequentissimus est in exstruendis ædificiis, & sternendis saxo plateis.

Saxum calcarium non minori in copia reperitur prope pagum Liscav, ex quo in laterinis violentia ignis diu cremato, calx viva paratur. Curiosum in hoc lapide est, quod ejus superficiei varia conchyliis inspersa sint, de quibus postea. Frideburgi quoque ex tali saxo calx uritur, quæ subtilior & ad dealbandos parietes convenientior est priori; quare & hunc in usum ad nos transportatur. Medicus calcis vivæ usus non est contemnendus. Nam confecta ex ipsa aqua calcis vivæ, in externis multis corporis humani affectibus, egregie prodest, ut in ulceribus venereis, ambustis, tumoribus œdematosis simplicibus, & bubonodeis, non valde duris; in paralyfi vero, doloribus spasticis, non æque convenit. Spiritus dein calcis vivæ, tanquam singulare diureticum, ad calculum, tam renalem, quam vesicalem expellendum, summum a quibusdam habetur arcanum, neque minus ad podagram tollendam laudatur; sed speratum auxilium hætenus nondum præstitit certo ac tuto.

Accedo ad *lapidem tophaceum*, cujus varia specimina se mihi obtulerunt. Primum prope Liscavium, Passendorffium & Querfurthum, in eleganti forma, musci instar petrefacti; alterum prope Islebiam, fungi figuram referens, sæpe cochleis umbilicatis nondum petrefactis prægnans; hocque Sangerhusæ, grossius contusum, ad liquationem & fusionem facilitandam cupri mineris additur. Tertium invenitur Frideburgi, quod cum priori fere convenit. Jo. KENTMANNUS in *Nomenclatura fossilium* p. m. 38. meminit tophi ex cinereo flavi Halensis; sed cum locum natalem ejus accuratius non indicaverit, affirmare non possum, an unus ex allegatis fuerit.

Jam *marmoris species* recensendæ erunt. *Giebiichensteinense* duplex est: unum coloris est grysei, vel etiam fusci, venis rubicundis & carnei coloris passim distinctum, propter quas in tabulas redactum & cote lævigatum, jucundum oculis exhibet spectaculum. Ante octo & plures annos aliquoties maxima frustra hujus marmoris navi Berolinum transportata fuere: posthæc vero nihil amplius effossum est, quod partim valde durum, neque instrumentis facile cedit, partim etiam quod venæ ejus coloratæ

rarius occurrunt, quæ tamen præcipuam illi elegantiam conciliant. Alterum coloris flavi est, instar ochræ, & striis longitudinalibus ac circularibus gaudet, ut crederes, lignum nucis juglandis petrefactum esse, de quo varia specimina ostendere possum. Marmor *Querfurtense* ex lapidina *auf der Rücken-burg* / colorem habet gryseum, sed innumeris subinde concharum speciebus, sæpissime crystallifatis, refertum conspicitur. Nonnulli quidem hunc lapidem ad calcareos referunt, at propter substantiam durissimam, polituram quoque optime admittentem, inter marmora referre malui.

Alabastrum in agro Halensi ordinarie non offenditur, per fragmenta autem novi, ex strato decimo, nigro, *Cap. I.* nonnunquam protractum esse. Si vero ad quintum ab urbe lapidem excurrere licet, *Alabastrum album* & variegati coloris, striis rectilineis & serpentinis pulcherrime ornatum reperimus, in maxima copia, nempe Bottendorffi, non procul ab oppido *Wiehe*. Alabastrum per se ad monumenta varia inde conficienda aptum est; sed ustum, gypsum reddit, quod ad efformandas imagines, & effingendos memoriales nummos, *Medaillen abzugießen* / a gypsariis usurpatur. In re medica parvi est momenti: prostat tamen ex hoc unguentum, alabastrinum dictum, contra capitis dolores, ut & cataplasma hypnoticum D. D. R. in *HOFFMANNI Thesauri pharmac.* descriptum. Curiosum experimentum ex BOYLEO Excellentissimus Dn. Jo. JAC. BAIERUS in *Oryctogr. Norica* p. 26. allegat; quod nempe pulvis alabastrini aut gypsi Parisiensis, æneo ferreove lebeti, prius percalefacto, inditus, gradatim aucto igne, incipiat liquoris bullientis modo undulare, efferverescere, magnamque vaporum copiam spargere, tametsi nec ante, nec inter, nec post ebullitionem istam, pulvis alabastrini humidus revera fuerit.

Frequentius apud nos est *spatum*, sive *gypsum*; Prostat id Cölmæ ad falsum lacum, & Martisburgi, ubi vulgo pro marga, *Stein-Marc* / habetur, ac priori loco reperiendum, crystallos sæpe transparentes, quod raro accidit, exhibet. Minoribus frustis etiam ex arenofodina Schrapelaviensi, ex agro nostro, prope vineam, *vor dem Steinweg* / interdum eruitur, quæ species asbesto filamentoso haud dissimiles sunt. Ex spato in Thuringia calcem vivam, *Spar-Kalch* / præparant, & alias etiam ex eo, si uritur, gypsum proprie sic dictum fit. Usus mechanicum paullo ante jam notavi; quoad medicum autem, spatium subtilissime pulverisatum, a plebejis in dysenteria & aliis alvi fluxibus, item in hæmoptysi &c. adhiberi solet; sed præpostero sæpe effectu, & potius ex foro medico relegandum.

Glacies Mariæ, *Frauen-Eiß* / *Marien-Blas* / a spato in eo tantum differt, quod pellucidior & purior sit: eaque propter combusta pari ratione largitur gypsum. In fodiendis puteis vestigia ejus manifesta in conspectum venerunt ante aliquot annos, in vinea *Magnif. Dn. Cancellarii de LUDEWIG*, ut & in Xenodochio in suburbio, *zu Glaucha*. Majori tamen in copia offenditur Numburgi & Bottendorffi. Naturæ curiosi hunc lapidem fissilem commodissime usibus suis ita adaptant, ut inter duas laminas papiliones includant, & sic aëris accessum impediendo, eos non solum a putredine vindicent, sed & ex utroque latere colorum varietatem egregie oculis & aspectui exhibeant, cujus varia specimina Russica exotica *illustr. Dn. PRÆSIDIS Museum* fovet. Veteres ex hoc lapide speculari fenestras formarunt, uti refert KENTMANNUS *loc. cit.* p. 32. Et AGRICOLA suo adhuc tempore in templo vetusto Martisburgi ejusmodi fenestras offendit. confer. SCHÜTTEI *Oryctogr. Jenens.* p. 60. Fœminis pulvis ejus pro cosmetico est; aliis

aliis usibus medicis rarius servit, nisi quod externe in oculorum caligine, & si pellicula apparet, in subtilissimum pollinem redactum, ab aliquibus cum fructu inflari soleat.

Addo *silices* plurimis agris passim inspersos, nulli vero copiosiores & coloratiores, quam ad pagum *Niedleben* / circa arenifodinam, quorum adspectus curiosiores maxime oblectatur. *Silices* albi & quodammodo pellucidi, in officinis ærariis metallifodinarum recipiuntur ad fluores, vulgo *Glüsse* / quibus minerarum fusio acceleratur; vel etiam subtilissime contusi smaltæ præparationi inserviunt. Chymici ex silicibus calcinatis & plumbo vitrum saturni conficiunt. In medicum usum cedit tinctura nephritica Amelungii, ex his silicibus parata, quæ calculosis levamen adferre dicitur. Alii eodem scopo silicibus ignitis vinum generosum aliquoties affusum mirifice commendant. Ne dicam, Chirurgum quendam, *BALTH. KAUFFMANN*, scriptum de silicibus divulgasse, in quo oleum ex silicibus productum tanquam polychrestum in plurimis morbis laudibus effert. Sed omnibus his commode possumus carere.

Transeo ad *lapides corneos*, a *BÜTTNERO* ita denominatos, vulgo *Feuer-Steine*. Hos si ex imis terræ visceribus eruimus, ubi nullam vim externam passi, plerosque quidem integros adhuc, varie figuratos videmus; non tamen pauci etiam occurrunt, qui in circumferentia, aut per medium, diffracti sunt; qui habitus sine dubio ex diluvio universalis habet originem, quo hi lapides vario modo allisi in fragmenta dissilierunt. Verumtamen inde non evictum, aut concludendum, omnes lapides corneos ante diluvium jam exstitisse, sed credibile est potius, post illud demum plures ex materia fluida coaluisse, quia inter illos reperiuntur, qui intus per totam substantiam coralliis fossilibus, lapidibus Judaicis & echinatis etiam, licet rarius, referti sunt atque prægnantes. Ceterum quum hic lapis nonnisi silex verus durissimus sit, plura de ejus usu non differam.

Tandem etiam hisce lapidibus annuero *Jaspidem*, sanguineo colore tinctum, qui passim in arvo nostro provenit, sed minoribus fragmentis. Ignis ex eo copiose elicitur, quare non incongrue *rother Feuer-Stein* appellatur. Usus ejus, ubi in copia est, satis cognitus; in Medicina autem parum præstat.

C A P U T IV.

De Lapidibus ex lusu naturæ & vegetabilium ac animalium mutatione figuratis.

Cum denique de ipsis figuratis lapidibus acturus sim, prius præmittam illos, qui naturæ lusu figuram quandam, similem vegetabilibus, animalibus & aliis corporibus acquisiverunt, non constanti naturæ lege, sed fortuito & accidentaliter. Hinc petrefactorum sibi similibus magna invenitur copia, sed figurarum raro bina exacte sibi respondentia specimina reperiuntur. Inter hæc refero *silices* in agris & Salæ fluvio occurrentes, quorum multi varias figuras mathematicas repræsentant; aliqui enim sunt rotundi, alii conici, alii oblongi, alii ovales, aut plani, alii porro pyramidales aut polygoni.

Ex omnibus his annotari meretur *Ætites*, *der Adler-Stein* / qui rotundam & globosam figuram habet. Externe scaber & colore varius est, alium lapillum continens, unde concussus, crepans resonat. Invenitur, sed rarius, prope arenofodinam Halensem & *Frid. Hoffmanni Oper. Supplem. II.*

ad lacum salinum Seeburgensem. Frequentior autem est altera ejus species, quam *Geodem* appellamus, qui terram qualemcunque intus fovet. Præter hos vero prope citatam fodinam peculiaris copiosissimeprehenditur lapis, figuræ nempe globosæ, cylindricæ, conicæ, ovalis & oblongæ, crustæ ex flavo rubicundæ, ita, ut eminus nonnulli eorum exacte placentulas, vulgo *Pfann-Ruchen* / mentiantur: malleo autem diffracti, omnes arenam albicantem cum flavescente mixtam offerunt. In Medicina huic lapidi variæ virtutes tribuuntur, sed cum superstitionis relationibus superstructæ sint, ejus usu penitus carere possumus. Ac licet ad abortum præcavendum, partum facilitandum, & foetum mortuum expellendum, tamquam amuletum commendetur, & speratus quoque eventus interdum sequutus memoretur, is tamen lapidi adscribendus est minime.

Huc pertinet etiam *lapis fulminaris*, cuneiformis & interdum pyramidalis, quem vulgus credit decidere & fulminis miros effectus efficere, unde a Germanis *Donner-Stein* / appellatur. Diu inter Physicos disceptatum est: utrum ejusmodi lapis in aëre generetur? Ego cum dubitantibus facio. Nam non opus est, talem fingere, quoniam omnes isti effectus a fulmine solum terebrante & concutiente fieri possunt. Id autem non plane negari potest, vi fulminis aliquando in terra materiam lapideam liquefieri, & in verum lapidem incertæ figuræ concrefcere. Longe vero ab hoc distant, qui vulgo pro lapide fulminari habentur. Illi enim nihil aliud, quam artefactum sunt, quibus veteres loco cuneorum & malleorum ferreorum usi fuere, de quo inter alia foramen, in uno latere amplius, in altero angustius, testatur. Reperitur hic lapis etiam in nostris agris, sed frequentius sine, quam cum foramine. Quidam ad lapides fulminares quoque belemnitem, sed falso referunt, cum hic potius testaceis petrefactis sit annumerandus. Virtutes ceterum nullas singulares habet, licet ad somnum provocandum, victoriam in prælio conciliandam & herniam curandam commendetur, & a plebejis domum, in qua servatur, a fulmine tutam reddere credatur.

Pergo nunc ad illos *lapides*, qui *varias animantium partes referunt*. Hi inter lapides corneos non raro observantur; nuper apud amicum quendam plures videre mihi licuit: quorum aliqui pedes hominum, vertebrae, & unus præ reliquis caput canis, ore, oculis & collo excavato præditum, non male repræsentabant. Ipse possideo lapidem siliceum, coloris grysei, pugni magnitudine, cui in superficie alius accretus est, qui ranæ sedentis effigiem egregie exprimit.

Nec silentio hoc loco prætereundum, saxum eximie molis, ad pagum *Gennetwisk* obvium, quod in superficie duarum manuum vestigia quodammodo exhibet, quæ a diabolo olim impressa perhibentur, eo scilicet tempore, quo templum in monte Sti. Petri a monachis exstructum, uno ictu hoc saxo convellere voluerit. Eiusdem magnitudinis bina saxa videri possunt, unum prope *Wettinum*, alterum ad radices prædicti montis; utrumque horum ungulam ostendit, quas vulgus iterum diabolo tribuit, saxis impressas, cum saltum ex uno in alterum fecerit.

Lusum naturæ porro agnoscunt quidam regni vegetabilis producta æmulantes lapides. Ex his primus est *dendrites*, arborum ramulos, muscum & frutices depictos exhibens. Talis in superficie lapidis arenarii *Esperstadiensis* nonnunquam reperitur, non infimæ elegantiae, de quo *BÜTTNERUS in Ruder. diluv. test. Tabul. XX.* specimen exhibet. Occurrit etiam *Bottendorffi*, in lapide cinereo fissili, qui per totam substantiam quocunque modo diffractus, arbuscula subtilissima oculis offert. Huc etiam referenda erit altera

tophi supra allegati species, quæ musco similis est. Deinde *Zingiberites*, tam ratione figuræ, quam coloris, cum radice zingiberis exacte conveniens, ad vineam, quam proxime Salæ fluvius alluit, item in agro Passendorffienfi, nec non limi fodina Loderslebenfi, & denique in strato decimo capitis primi reperiendus. Coronidis loco his adjungo peculiarem lapidem, inter reliqua curiosa dignissimum, quem prope Schrapelavium deprehendi. Hic alias multis ramis corallii fossilis scatet; sed præterea, quod notabile est, in diffractione contigit, ut accuratissime litteram G, ejusdem fere magnitudinis & figuræ, repræsentaverit; quæ in hoc lapide albicante, colore cinereo distincta, manifesto conspicienda & dignoscenda.

Exordior jam alteram classem lapidum figuratorum, qui specialius *petrefactorum* titulo digni, & partim ex regno vegetabili, partim ex animali originem ducunt. Necessarium autem judicavi, ut paucis prius inquiram, unde & quomodo ejusmodi testacea aliaque animalia & vegetabilia petrefacta in terræ viscera venerint, cum sæpissime talia loca a maribus & aquis sint remotissima. Nonnulli plane negant, hos lapides veras vegetabilium & animalium partes existisse unquam, sed eosdem, ut reliqua mineralia & lapides, generari in ipsa terra putant. At vero conjectura hæc est, nec unico firmo argumento demonstranda; quare a plurimis in historia naturali versatissimis viris merito rejicitur. Solido potius fundamento nititur illorum sententia, qui originem figuratorum horum lapidum ex inundatione partim universali, partim particulari quadam, derivant, qua hæc subjecta inter arenas & varii generis terras ad dissita loca translata, ibique postmodum pro varia constitutione loci & quam offenderunt matricis, a moleculis lapideis admissis, vel succo salino petrificante, indurata, crusta lapidea oblecta, vel in lapides penitus mutata fuerunt. His itaque præmissis, speciales titulos petrefactorum Halensium, & primo quidem ad vegetabile regnum spectantium, sequenti ordine enumerabo.

Principem locum sibi vindicat *lignum petrefactum*, cujus ad amnem Elystrum, *Die Elster* / tantam copiam deprehendi, ut vel trium centenariorum pondus superet; quare non abs re erit, si de hoc plura referam. Obtulerat nimirum amicus, mihi semper conjunctissimus, ante aliquod tempus mihi frustulum hujus ligni dono, cumque simul ejus locum natalem indicasset, statim conjeci, majorem forsitan copiam ibi fore reconditam. Cepi hinc inquirendi ulterius propositum: nec spes me fefellit. Quum enim hoc animo locum, qui paludosus erat, accessissem, mox superiori terræ strato remoto, totus arboris truncus, oblique jacens, oculis se offerebat, quem majoris curiositatis gratia, integrum domum transportare constituebam. Sed frustra. Aqua enim, ibi perpetuo scaturiens, hoc lignum adeo friabile reddiderat, ut truncus integer extractionem & transportationem non admitteret. Ideo tantum frustra ejus, majora tamen, ad longitudinem dimidiæ ulnæ, obtinui. Eruto hoc trunco, in distantia duarum ulnarum a priori, alium forte inveni truncum, erectius positum, non minus curiosum, quem itidem effodi & domum transportari curavi. Hoc fossile peculiare, uti ovum ovo, ita ligno exacte simile est; ac color, striæ annos arborum indicantes & ramorum perfractorum vestigia, id manifesto demonstrant. Ceterum quædam hujus ligni fragmenta siliculis albicantibus pellucidis, instar crystallorum obsita sunt, qui splendorem illis conciliant. Durissimum quoque est, hoc lithoxylon, ut quibusdam cultris acuendis, loco cotis, serviat. Si lapidi autem arenario admovetur, per attritum impensio-rem, foetidissimum & nauseosum spargit odorem,

quod non omnibus ejusmodi lignis solenne, sed singulare est. Ante octo annos in horto quodam Pädagogii, in superficie, mox sub limo, in arena, tale lignum petrificatum magni ponderis effosum est, quod non nisi colore a nostro priori differt. Posthæc minoribus fragmentis passim in nostro territorio repertum est (quod partim ipse, partim alii possident) scilicet in torrente Elystro prope *Ermlich* / inter arenam ad rivulum, *die Rheide* / prope molendinum Discavien- se, in strato subterraneo A. clbcccxiix. agri meridionalis, *hinter den Rirsch-Gärten in der Land-Wehre*; in fossa quæ sylvam proxime ambit; ad pagum *Gennewitz*, in agro, proxime ad rivulum quendam, & tandem in lapidina Querfurthenfi, prope *Weidenbach*; quod ultimum copiosius quidem est, sed non cum ligno exacte convenit, & potius pro spato indurato haberi debet. Nec omittenda specimina in *MYLII catalogo rerum naturalium* adducta; ubi allegatur lithoxylon repertum prope *Giebichenstein* / no. 643. & 655. aliud ex lacu quodam Martisburgensi, *Teuffels- Zumpel* / no. 647. & 653. aliud vitriolo scatens Querfurthi, no. 646. & 656. aliud fossile bituminosum, *ibid.* no. 650. aliud *ibid.* no. 670. 672-675. & tandem aliud Halense no. 661. Nonnulli asserunt, quodvis lignum artificio brevi tempore reddi posse lapideum; de quo duplicem fiendi modum descripsit KIRCHERUS in *M. S. tom. I. lib. V. sect. IV. cap. V. p. 308.* & *tom. II. lib. VIII. sect. II. cap. I. p. 49.* Aliam adhuc methodum docet KENTMANNUS in *Nomenclatura rer. fossil.* fol. 39. his verbis: *Ex alno etiam fit lapis artifice hoc modo: imponitur lignum, quantæ velis magnitudinis, in labra illa ampla aenea, in quibus lupulus coquitur ad faciendam cerevisiam: cumque percoctus abunde lupulus est, eximitur idem lignum, & arena vel glarea in ipsis cellariis obruitur per triennium: inde cum exemptum fuerit, duratum in lapidem apparet: e quo potissimum cotes fiunt, quibus ad ferramenta acuenda mensarii utuntur.* Sic etiam de D. CLAUDERO, Con-Rectore Altenburgensis Gymnasii, pro certo mihi relat-um est, illum ejusmodi liquorem petrificantem habuisse, quo omnis generis vegetabilia in lapideam substantiam transmutaverit.

Non a re alienum erit, si huic tractationi *lignum fossile semi petrefactum* quasi, & ipsos *carbones fossiles* Halenses, supra descriptos, addam. Quod prius attinet, jam satis patescit ex cap. I. quo loco, & quanta copia inveniatur: coloris plerumque est fusci, interdum etiam nigerrimi, quod posterius, aëri diu expositum, flores interdum exhibet vitriolici saporis. Vidi aliquando lapidem arenarium durissimum, ex proxima limi fodina erutum, in cujus medio particula hujus ligni fusci, ad pollicis crassitiem, conspicua erat, quod alias rarissime evenit. Nemo interim mirabitur, quod huc non minus carbones fossiles nostros, *Ehau-Rohlen* / referam, quos alii tamen pro bitumine habent. Ex supra allatis enim circumstantiis abunde patet, illos primario vegetabili regno suam debere originem; licet non negem sulphuream ac vitriolicam eorum subinde indolem, quam tamen demum in terræ visceribus iis superinductam esse, censeo. Idem autem de veris carbonibus fossilibus, *Stein-Rohlen* / asseverare non audeo, qui potius secundum plurimorum Physicorum sententiam, bitumen durum, nigrum & lapidosum constituunt, quare de his hoc capite non agam.

Sequuntur *Lithophyta*, sive plantarum varia genera in lapidem mutata. Hoc nomine nulla magis, quam Manebacensia & Ilmenaviensia hæctenus fuerunt celebrata, sed his Wettinensia, ante duos annos detecta, non immerito ad latus pono. Reperiuntur enim ibi in lapide fissili nigricante, *Schieffer-Stein* / elegantissimæ plantarum impressiones, ut primo in-

ruitu statim rami filicis, polypodii, gallii, equiseti ramosi, arundinis striatæ &c. cognoscantur. Quin non raro omnes hæ species in uno lapide exprimuntur, quæ jucundum exhibent spectaculum, de quo gazophylacium curiosum illustr. Dn. PRÆSIDIS exemplaria habet nitidissima. Est quoque fissilis ejusmodi lapis grysei coloris in nostris agris prope Giebachenstein obuius, qui tamen obscurius & rarius quoque offert suas figuras, quæ ut plurimum arundinis, equiseti non ramosi, ac nonnunquam filicis & gallii, esse solent. Ibidem prope viam, in fossa & agro, multa marmoris fragmenta comparent, & inter hæc sæpius aliqua, arundine striata latiori geniculata, instar arundinis sacchariferæ, distincta. Jam supra etiam dixi, nostris carbonibus multa folia fragmentaque lignea permixta esse, inter quæ folia salicis sunt manifestissima. Neque etiam omittendus est elegans *Fungites*, qui *fungo*, quem *Stein-Pilz* vocant, exacte similis est, & tam in strato decimo, sæpius citato, obuius, quam a me, sed minus nitidus, in campo est repertus.

Incrustata, sunt partes vegetabilium, topho, vel alia materia calcarea & terrestri obductæ, quæ vero longo tempore in lapides mutatae. Hæc incrustata in nostra regione valde infrequentia sunt, quia fontibus & aquis aptam materiam his generandis vehentibus destituti sumus. Nihilominus tamen ad ripas Salæ fluminis, inter acervum arenæ, tale incrustatum reperi, quod ex pluribus arborum ramulis, luto cinereo firmiter obductis constabat. Hujus generis quoque aliud habeo longe præstantius, ex stramine, festucis & aliis quiscuilibus compositum, quod cum aliis lapidibus in repurgatione putei cujusdam nostræ urbis copiose extractum est; quare huic puteo aliqua virtus incrustandi non immerito adscribenda, præsertim cum materiam calcariam in fundo vasorum copiose deponat.

Agmen petrefactorum vegetabilium claudunt *corallia fossilia*, de quibus integrum tractatum conscripsit BÜTTNERUS, sub titulo *Coralliographiæ subterraneæ*. Non opus hinc est, ut plura de iis referam; cum omnes fere species, a citato auctore descriptæ & figuris æneis etiam expressæ, ad agrum quoque Halensem pertineant. Sufficiet potius nominetenus tantum allegasse præcipua corallia, apud nos passim reperibilia, ut sunt corallium globosum, fistulosum, asteriis punctatum, quod astroites dicitur, ramosum, & angulosum, retiforme & nodosum; quæ maximam partem lapidem corneum pro matrice agnoscunt.

Ordo ac instituti ratio nunc me ducunt ad lapides figuratos, ex animantium mutatione productos. Inter quos primum locum occupant *Testacea marina*, quæ sunt vel univalvia, vel bivalvia; univalvia iterum sunt vel erecta, ut belemnites & echinites, vel spirarum in modum contorta, ut cornu Ammonis & nautilites; vel turbinata, ut turbinites, strombites, cochlites, trochites, buccina, neritæ; vel non turbinata, erecta, ut tubulites & entalium. Et hac serie singula prius pertractabo, quam ad bivalvium divisionem progrediar.

Belemnites, sive lapis lyncis, in plurimis Physicorum libris inter lapides ex lusu naturæ formatos relatus legitur; ante paucos autem annos Dn. D. EHRHARDUS in *Tractatu solidissimo de Belemnitis Suevicis*, luculenter demonstravit, ipsum ex profapia testaceorum animalium esse oriundum, cui sententiæ & ego calculum addo. Hic lapis paullo rarior apud nos est; nonnunquam tamen in limo occurrere solet. Usus ejus veteres magni fecerunt in calculo, ictero, fluxibus ventris & pleuritide; & ex recentioribus quidam huic lapidi eximiam vim adscribunt in febribus intermittentibus, si pulvis ejus cum aceto vini ante paroxysmum propinetur. Sed quod effectus hos laudatos re vera præstiterit, observatione & testimonio

Practicorum non confirmatur. Interim tamen virtus absorbens & subadstringens, ipsi non penitus deneganda, licet etiam hæc ex aliis magis usualibus melius haberi queat.

Echinites, sive *Bufonites*, in agris nostris frequentior est, & in vulgus etiam jam satis cognitus sub nomine *Kröten-Stein*. Variæ dantur ejus species. Dividuntur quippe echinitæ in globosos & oblongos; illi iterum in papillosos, & fulcis lineisve ornatos. Papilloso, sive fibulares, nunquam, sed fulcis notati ac oblongi non raro, inter filices reperiuntur, inter lapides corneos autem, invenire illos rarissimum est, & quidem in matrice, quare etiam tale specimen tanquam cimelium inter reliqua curiosa *Magnif. Dn. PRÆSIDIS* asservatur, quod lapicidinis Esperstadiensibus debet originem. Vires hujus lapidis quæ circumferuntur in praxi medica non sunt probatæ. Nudo affricu oculorum inflammationes & rubores auferre, item virulentos morsus & tumores malignos curare & ut amuletum omnem virulentiam atque calculosos dolores præservare dicitur; sed in omnibus hisce casibus vere quicquam conferre non valet.

Ad echinitas pertinet etiam *lapis Judaicus*, qui nihil aliud est, quam radiolus echini fibularis, quod præter alios egregie probat D. WAGNERUS in *diff. de Lapidibus Judaicis*. Invenitur autem in areno-fodinis circa Schrapelau, instar minimi modioli, candidus, cylindraceus, nunc striatus, nunc tuberculatus. Postea non infrequenter in lapide corneo variis locis ejus impressiones instar cavernularum conspiciuntur, quale specimen exhibet BÜTTNERI *Coralliograph. subterr. pag. 46*. Substantia hujus lapidis est selenitica & quasi crystallina, cum particulis salinis intermixta, inde & inter diuretica & absorbentia refertur; cum vero simpliciora & efficaciora hujus generis suppetant, hoc tuto carere possumus.

Nautilites est testaceum univalve, spirarum in modum contortum, ut nulla spira supra alteram promineat: concamerationibus gaudet hemicyclicis & siphunculo in medio posito: externa ejus figura naviculam quasi repræsentat, unde forte nomen accepit. Hoc fossile ex latomiis Querfurthensibus frequentius eruitur, & ordinarie per totam substantiam durissimo lapide est factum, nonnunquam tamen etiam materia pellucida crystallina ejus concamerationes sunt oppletæ. Præterea in Museo jam sæpe citato, alium nautilitem rariorem vidi, ex eadem ditione allatum, cujus interiora omni materia alia vacua, sed crystallis minoribus undique obducta ac desuper cuius concamerationi in medio loco siphunculi globulus crystallinus insidet.

A naulite parum differt *cornu Ammonis*, nisi, quod concamerationibus irregularibus, ramosis quasi & siphunculo ad latus posito, præditum sit. Dividuntur alias Ammonis cornua in spinata & non spinata, quæ variis striis, modo serpentinis, modo rectilineis, vel tuberculis aliquando etiam ornata, conspiciuntur. In nostris autem oris, nempe in lapicidinis prope *Weidenbach* & præsertim *Kuckenburg* tantum se offerunt cornua Ammonis non spinata, striis serpentinis dorsum perreptantibus donata, & sæpe quoque simplici & duplici tuberculorum serie obfusa. Hæc pariter ac nautilitæ, non raro fluore crystallino prægnantia sunt, ac plerumque matrici lapidis marmoreæ consistentiæ adhærent: quare ejusmodi cornua Ammonis rarissime in utroque latere manifeste expressa obveniunt. Notabile in genere de hac lapicidina Kuckenburgensi est, quod omni genere fere conchyliorum mirabiliter inter se concretorum abundet, ut sunt præter nautilitas & cornua Ammonis, pectinitæ, turbinitæ, cochlitæ, chamæ,

mytulitæ ac aliæ, quale quid inter alios lapides non facile deprehenditur. Aliquando etiam, quod curiosum est, in lapide corneo ad sylvam cornu Ammonis, simplici spirâ exornatum, minimum inveni.

Excipiunt *Turbinitæ*, *Strombitæ* & *Buccinitæ*, quas cum parum inter se discrepent, junctim hic recensemus. Optimi & maximi habentur prope *Garrenstädt* & *Weidenbach* / alii vero minores in loco paullo ante nominato, & porro etiam ad pagum *Rölme* & *Liftau* in calcario lapide, ac tandem ad albedinem calcinati, in arenofodina Schrapelavienfi.

A turbinite non multum distat *cochlites* & *trochites*, quia pari modo turbinem, quamvis compressiorem, cum ventre ampliore habent, quibus adhuc accedunt *neritæ*, qui spiris paucis & mucrone parum aut nihil eminente gaudent. *Cochlites* prædictis jam locis, ac postea etiam in agro Passendorffienfi & Niedlebienfi, in lapide calcario, Islebiæ vero in topheo reperitur; *neritæ* & *trochitæ* tantum in arenofodina Schrapelavienfi.

Quod restat testaceum univalve, non turbinatum, erectum, vel uno loco apertum, ut est *tubulites*; vel utrinque hians, ut *entalium*, occurrit utrumque in limi fodina Loderslebenfi & prædicta arenofodina.

Transeo ad *testacea bivalvia*. Hæc valvas habent vel æquales, vel inæquales, valvis æqualibus prædicta sunt musculites, mytulites, solenites, chama, pectinites, ostracites, bucardites, tellinites, trigonella & alia.

Musculites nihil aliud est, quam concha vulgaris fluviatilis *Garben-Muscheln* / in lapidem mutata. *Mytulites*, sive mytulus arcuatus, & *solenites* parum ab hoc differunt: repræsentant vero imaginem illius conchæ in littoribus maris obviæ, quibus in locis marinis instar ostrearum ex tempore vesci solent. Triplex hæc species copiose in omnibus latomiis Querfurthensibus, nec non in Liscaviensibus & in campis Passendorffiensibus reperitur.

Ibidem quoque *Chama* aliis conchyliis remixta occurrit; nullibi vero major & elegantior, quam in lapidina Kuckenburgenfi. Reperi nuper etiam *Esperstadii* corneum lapidem, in quo pars chamæ rugosæ subtiliter striatæ conspicitur, cum tamen alias his lapidibus testacea negentur a curiosis. Pariter quoque rarum existit, quod non ita pridem in crusta ætitis nigricante durissima prope *Niedleben* / duas chamas, totidemque pectinites minores detexerim, quale quid nondum accidisse memini.

Trigonella & *tellinæ* sunt conchitæ minores, & iisdem locis numerosiores exstant. Hujus generis plures, sed calcinati, cum aliis neritis & cochleolis quondam sunt inventi in nostra limi fodina, ubi in unum locum quasi congesti erant, *wie in einen Nest besamen* / ad integri manipuli quantitatem, quod mirum, cum alias in hocce limo ne vestigium quidem conchyliorum deprehenderim.

Bucarditæ rarioris sunt proventus; exhibent figuram cordiformem, & a quibusdam non male ad conchas venereas referuntur. Interdum inter reliqua fossilia Querfurthi occurrunt; deinde & tres peculiares ac majores ipsam martialem mineram constituentes, ex notabili strato nigro supra descripto productos vidi, unus eorum malleo diffractus in cavitate arenam ex fusco nigram exhibebat, alter per totam substantiam martialis indolis erat, tertius vero integer adhuc asservatur.

Pectinites est concha æquilatera striata, & propter striarum similitudinem a pectine etiam nomen habet. Dicitur auritus, vel non auritus; ille rarior, hic autem prope *Weidenbach* & *Ruckenburg* / maxime frequens est, ita, ut quandoque in area unius lapidis, quatuor, octo, quindecim & plures pectinitæ

sefe offerant. Tum quoque pectinitæ tales nummi instar & longe minores sæpe, in dicta arenofodina prostant. Nec tacebo filices durissimos, cinerei & grysei coloris, qui copiosius ex decimo terræ nigræ strato erui solent, & minimis hisce pectinitis argenti instar splendentibus *Silber-Muscheln* / admodum scatent. De *ostracite*, cum nostrum solum non agnoscatur natale, hic nihil addo.

Propero ad bivalvia valvis inæqualibus, qui potissimum sunt sic dicti pectunculi lacunosi & non lacunosi, terebratula, gryphites. Ex *pectunculis* utriusque generis passim quidam in matrice modo dicti filicis observantur; *gryphites* vero, quod scio, hujus loci nunquam; tanto frequentius tamen *terebratula*, sive concha anomia, & quidem prope *Weidenbach* / quæ cum lapide calcario laxè tantum cohæret, ut facili negotio separari possit.

Annumero denique testaceis *Stellam marinam*, quæ neque ad univalvia, neque bivalvia reduci potest, sed plane singularem speciem constituit. Figura ejus optime cognoscitur ex ROSINI Tr. de stellis marinis & ex D. BRÜCKMANNI *Thesauro subterraneo Ducatus Brunsvic.* Reperitur nullibi in nostro agro, quam, prope *Garrenstädt im Lohbruch* / & quia ibi etiam non admodum frequens, magni æstimatur. Corpus ejus non dissimile est aristæ Turcicæ, *Türckisch Korn* / unde a lapidariis *eine Korn-Mehre* dicitur. Caudam hæc stella marina habet unius ulnæ sæpe, mire flexuosum, cujus articuli *entrochi*, Bonifacius *Pfennige* / & *asteriæ* appellantur. Ceterum quia hujus testacei substantia selenitica splendens, cum lapide Judaico convenit, eundem usum in Medicina præstare poterit.

Supereff, ut adhuc *Petrefactorum animalium* varii generis mentio fiat. Ad hæc primo referendi pisces in lapide fissili, cupreæ naturæ, *Rupfer-Schieffer* / cum squamis adhuc conspicui, qui nullo loco forte frequentius occurrunt, quam in nostro territorio. Tales enim exhibent metallifodinæ Mansfeldenses, Islebieneses, Bottendorffenses, Wettinenses, Rotenburgeneses & quæ sunt ad pagum *Schiebzig*. Palmam vero ratione magnitudinis, frequentiae & elegantiae reliquis præripiunt Mansfeldenses & Bottendorffenses, qui squamis aurei & argentei coloris insigniter sæpe splendent. Genus horum piscium variat, & non semper determinari potest: compertum tamen habemus, non tantum fluviatiles & lacustres pisces esse, sed marinos quoque, majores & minores, de quo MYLII *Saxonia subterranea* testatur, ut taceam, quod ipse non ita pridem Bottendorffi fragmentum piscis marini, squamis quasi plumosis, *wie Federn* / exornatum, acceperim, qui, cum integer adhuc esset, longitudine unam ac dimidiam, latitudine vero dimidiam ulnam, æquabat.

Pertinet huc etiam *Glossopetra*, quæ in arenofodina Schrapelavienfi ac interdum in lapide corneo reperitur. Est autem nihil aliud, quam dens piscis canis carcarii, dicti *Hay* / maris mediterranei. In Insula Malta hæc glossopetræ sunt copiosissimæ. Quo factum est, ut, quia hanc insulam serpentibus penitus destitui ferunt, nonnulli putarint, hisce dentibus, perinde ac terræ Melitenfi, virtutem singularem alexipharmacam contra morsus venenatos & febres malignas inesse, quam tamen experientia non confirmat.

Alia dentis piscis marini species est, quam BÜTTNEUS in *Ruderibus diluv. test.* p. 201. Tabul. 18. pro *castanea lapidea* venditat.

Oolithes, sive *Hammites*, a plurimis auctoribus pro congerie ovulorum piscium petrefactorum habetur, qua de causa hic etiam ejus mentio facienda. Germanice appellatur *Fisch-Rogen* / *Stein*. Prostat ad

ad lacum salsum, prope *Muhlendorff* / item in agro Rotenburgenfi, nec non Alslebiensi, ubi tanta copia est, ut muris ac domibus exstruendis inserviat. Si ovula sint majora, dici etiam solet *Pisolithes*.

Sequuntur *Ossa animantium* partim *petrefacta*, partim tantum *calcinata*. Hæc nomen *Unicornu fossilis* obtinent, & ab illis in eo differunt, quod ordinarie albicantis coloris sint, & linguæ admota, adstrictorium edant effectum. Ossa vere petrefacta in plurimis lapicidinis Querfurthensibus matrici inclusa deprehendi solent, ut sunt vertebræ, costæ, maxillæ, scapulæ, tibiæ, &c. de quibus vide plura *loc. cit. Tab. 32. 25. & 30.* Unicornu fossile iisdem locis, sed rarius reperiundum, nonnunquam fusci & paulisper rubicundi coloris; in arenofodina autem magis albicans ac non infrequens est. Ante aliquot annos etiam ad pagum *Giebichenstein* maxilla elephantis ejusdem coloris effossa est; & in arena prope *Hornburgum*, ante quatuor annos, totum fere bovis skeleton, ad albedinem calcinatum, de quo cornu maximum, quod bovis Polonici simile est, in Museo rerum naturalium orphanotrophei Halensis aservatur. Aliud ejusmodi cornu minus, quod rupicapra fuisse videtur, non procul a pago *Wisthal* aliquando eruerunt. Præterea in *MYLII Catalogo num. 1459.* ebur fossile, sive dens elephantis duarum ac dimidiæ ulnæ, recensetur, qui in latomia *Landsbergenfi* repertus. Ceterum quidam Physicorum & Chymicorum ossibus fossilibus nixtionem animalem denegant & pro sola terra margacea habent. At si figuram horum ossium & experimenta cum iis instituta conferamus, quod animali regno debeant originem, luculenter patefcit. Quam in rem inprimis legi meretur tractatus curiosus *D. CARL*, cui titulus: *Lapis Lydius*, quo evincit, hæc ossa fossilis, non secus ac alia recentia, destillatione præbere aliquid salis volatilicis & fluidi, & nonnihil olei empyreumatici; uita dein in occluso nigrescere, aperto igne in albam terram vitrescibilem abire, e qua sal quoddam fixum elui possit; tum calcinata cum nitro hoc sal in alcalinum corpus redigere; ac demum parcius admixta vulgari frittæ vitri, vitrum semiopacum lacteum exhibere. Unicornu fossile usu medico, uti antecedentia subiecta plurima, non destitutum est, & propter substantiam terrestrem teneriorem & salinam, cum cornu cervi & ebore maximam partem convenit, quare, ut illa, facultate subadstringente, absorbente & leniter diaphoretica pollet, ac in alvi profluviiis, febribus & aliis affectibus commendari solet. *HOFFMANNUS* tamen in *Clave ad Schræd. p. 190.* monet: ut cum hoc prius in canibus, quam hominibus offeratur, instituatur experimentum, quia cornua hæc fossilis sæpe aliquid veneni recondant.

C A P U T V.

De Salibus.

EX *Salium* numero pauca quidem; sed tanto præstantiora & medico usui magis accommoda in nostra regione occurrunt, qualia sunt sal commune, nitrum, alumen & quodammodo etiam vitriolum.

Inter hæc salia primum examinabo *Sal commune*, quod nobis fontanum est, & tanta in copia ex salinis nostræ urbi largissime scaturientibus coquitur, ut plurimæ adjacentes regiones nostra ubertate, suam sublevare possint inopiam. Actum vero agerem, si prolixius in fontium horum salinorum

originem inquirere ac salis coquendi parandique modum enarrare vellem, cum de his & aliis circa rem salinariam notandis, ex instituto omnium optime jam scripserit illustr. *Dn. PRÆSES* in *Tract. vom Salz=Werck in Halle* / & eandem etiam in rem conferri possit *HOHNDORFFIUS* in *der Beschreibung vom Salz=Wesen*. Hoc tamen monere haud supervacaneum, originem salforum horum fontium non immediate ex mari, sed verosimiliter ex sale fossili & terra falsa subterranea derivandam esse. Quam sententiam egregie confirmat testimonium *GEORGII AGRICOLÆ* de *Nat. Fossil. l. 4. p. 514.* ita habens: *salis montes multi & illustres sunt in orbe terrarum. Extant tales in Germania juxta Seeburgum & lacum salsum, qua itur versus septentrionem; sed non ceditur, quod ex hoc effluant fluvii, qui salis deferunt ramenta, & illi finitimæ regiones sint, quæ puteos habent salios, e quibus artifices tam adfluentes aquas hauriunt, ut fossili facile carere possint.* Idem *VALERIUS CORDUS* in *sylv. Observ. testatur: falsa terra est circa Seeburgum undique ad salsum lacum, alioquin dulcem, inficiens; Et paulo post: falsa terra, falsique campi sunt circa Langenbogen lacum, cujus aqua e salso fluit lacu: item Salzemunda, i. e. ad falsam mundam pagum.* Ex quibus etiam facile patet ratio, cur non unus & alter tantum fons salinus, sed plures his in oris reperiantur; ex quibus proximi nobis sunt, qui offenduntur ad pagum *Giebichenstein* & oppida *Gröbzig* & *Artern*. Sic notum quoque est, varios puteos suburbii *Glauchæ* & pagi *Liebenau* aquam eminenter falsam continere. De lacu autem salso Seeburgensi id notatu dignum, quod ejus falsedo neque augeatur, neque minuatur, sed mensura aquæ ex ipso semper tres drachmas salis communis comprehendat. Quod tamen nullam aliam ob causam contingere arbitror, quam quod rivulus falsus, prope pagum *Erdeborn* / e cujus aqua ante plures annos coxerunt sal, in lacum hunc influens, aquam ipsius, dulcem alias, falsedine inficit, alius vero e lacu egrediens rivulus, *Gülste* dictus, alveo, ejusdem cum priori magnitudinis, tantundem semper aquæ iterum evehit; eoque ne falsior unquam fieri possit, facit. vid. *illustr. Dn. PRÆSES, l. c. p. 20.* Deinceps id quoque singulare & mirandum habet noster hic lacus, quod pisces in ipso nonnunquam copiosissime moriantur & ex profundo ad ripas propellantur; id quod nostra ætate anno *MDCCXV.* factum esse meminimus, ita, ut opus fuerit, emortuos & semiputrescentes pisces curribus aliunde transportare atque terra obruere. Idem autem jam notavit *VALERIUS CORDUS l. c.* ita de hoc lacu perhibens: *Salus ille lacus omni septennio turbatur: in medio enim ejus abyssus est, emittens ceu usti bituminis & sulphuris fætorem, quo totus inficitur lacus, adeo, ut pisces in eo moriantur, quotiescunque turbatus fuerit.* Usus salis communis tam est necessarius, ut eo carere queat nemo. Constituit enim verum & præcipuum ciborum condimentum, quo alimenta cruda a corruptione vindicantur, cocta vel alio modo præparata sapida ac digestionis apta redduntur. Gaudet præterea virtute resolvente, abstergente & moderate stimulante, eaque propter clysteribus plerumque additur ad stimulandum. Cavendum vero est, ne nimia ejus copia, sub parco præsertim potu, ingeratur, alias enim facile augendæ humorum acrimoniæ favet. Ex præparatis ipsius est maxime spiritus salis, qui ad varios affectus, calculum, urinam pelendam, appetitum excitandum & nimiam sitim laudatur, nec virtute destituitur insigni; quia tamen acor ipsius subtilis ac penetrans ad diffitas etiam in corpore partes operationem suam diffundit, ac nervas maxime pulmonum membranas moleste afficit & tussim movet, cautus ipsius usus sit, oportet. Ac

quia

quia minus promte, quam alii acidi minerales spiritus, cum vini spiritu intinum init connubium, idem fere valet de spiritu salis sic dicto dulcificato. Externe aqua falsa vulnera & morsus canis rabidi ad arcendam putredinem abluere, haud inconsultum. In chymicis sal commune & ejus spiritus magnam præstant utilitatem, & constituunt unicum menstruum, quo aurum, reliquos solventes liquores eludens, dissolvitur.

Altera salis species est *Nitrum*, quod apud nos copiose paratur in officinis nitrariis, *Salpeter-Hütten* / quæ erectæ in area suburbii, *auf den Lerchen-Gelde* / & in pago *Deutschthal*. Terra nitri coctioni apta esse debet pinguis, sulphurea, salina, quæ ex tribus naturæ regnis, imprimis vero ex animali colligitur. Signa vero bonitatis terræ nitrosæ desumuntur ab operariis ex gustu; immissione ferri candentis in ejusmodi terram, quod refrigeratum, maculas albicantes & subluteas ostendit, si nitrum adest; insperione ficcata & in pulverem redactæ terræ carbonibus ardentibus, ubi strepitum & scintillas edere solet; & elixivatione ejusdem, quo lixivio candelæ flamma ad ficitatem redacta, residuo dein ponderato, quantum nitri condant, calculum subducunt. Omisso præparandi modo, me ad usum ejus amplissimum in Medicina converto. Et certe nitrum inter medicamenta polychresta, magnæ, tutæ tamen, virtutis, principem fere locum obtinet. Aestum enim sanguinis temperat, biliosam acrimoniam cicurat, motus & excretiones impetuosiores moderatur, dolores placide componit, resolvit, abstergit leniterque diuresin proritat, eaque propter in quamplurimis morbis effectum edit longe saluberrimum. Exhibetur autem ut plurimum ipsa in substantia depuratum, aut ad obtinendam resolutionem efficacior, antimoniatum, aut diureticam vim intendendam, fixatum. Spiritus dein ex ipso, vini spiritu dulcis redditus, imprimis methodo *illustr. Dn. PRÆSIDIS* paratus, antispasmodicum est præstantissimum & carminativum, ac in colica, calculo, aliisque doloribus, æstu interno, flatulentia, aliisque pathematibus summo cum fructu usurpatur, tanto magis si cum appropriatis aliis remisceatur. Quid præterea nitrum in Chymia, Pyrotechnia & Oeconomia valeat, brevitatis ergo mitto; plura tamen videri possunt, in *Magnif. Dn. PRÆSIDIS diff. de Nitro*, & *Illustr. D. STAHLII Observ. Chym. Phys. Med. Ann. 1698. Mens. Mart.*

Ad nitri genus pertinet etiam *Aphronitrum*, sive flos nitri ex antiquis muris calcariis & in cellarum parietibus passim instar lanuginis efflorescens. Multum hoc a nitro vero discrepat, tam ratione saporis, quam coloris, nec adeo in usum medicum ducitur. Apud nos aphronitrum hoc ad pagum *Morsl* montibus accretum nonnunquam cernitur. Præstantius autem ac nitro nativo veterum valde simile olim (& hodiernum forte) repertum est *Leucopetræ*, *Weissenfels* / in cella quadam profundissima, tota in saxo excisa, e cujus summo aqua continuo depluens & fundum attingens, in nitrum durum & saxeum transmutata est, ut malleo vix obtemperaverit; imo parietes cellæ eodem nitro incrustati fuerunt, uti pluribus ex *SCHELLHAMMERI Comment. de Nitro cap. 3. p. 43.* *SCHÜTTEUS in Oryct. Jenensi p. 88.* refert.

Aluminis minera bituminosa, magna quantitate effoditur prope *Düben* / quartum ab urbe nostra lapidem, quæ in acervos collecta, & diutius aëri libero exposita, sal aluminosum in ingenti copia per coctionem præbet. Magma relictum libero aëri commissum per aliquot annos, denuo principium aluminosum concipit, licet non in tanta copia, ut antea. Curiosa est etiam observatio, quod minera præ-

dicta in magnos acervos collecta, in apertas flamas quandoque erumpat & foetidum odorem emittat. Huic mineræ nostri carbonēs Halenses quodammodo sunt similes, tum ratione figuræ, tum etiam contenti, quippe qui aliquid aluminosi alunt, sed tanti non est, ut cum lucro elici inde possit. Alumen per se adstringentem & incrassantem edit facultatem, ob quam gargarismata adstringentia & liquores stypticos sanguinem sistentes ingreditur. Si vero ustum est, septicum constituit ad carnem luxuriantem absumendam. Internus ejus usus infidus est; attamen ex solutione aluminis, cum lixivio alcalino debite mixta, colata & inspissata, sal neutrum, instar tartari vitriolati, præparari potest, tenerioris substantiæ, ac tanquam diureticum & aperitivum valde proficuum. Sed reliquis ex alumine præparatis carere possumus. In arte tinctoria ejus usus amplissimus. Nullus enim pannus, sericum, pili, coria &c. sine alumine colore quodam tingi possunt. Bibliopegæ etiam eo utuntur inter aquas, quibus chartam immergunt & iterum exsiccant, *zum Planieren* / ne diffuat, utque atramenti acrimoniam melius sustineat.

Vitriolum quidem in agro nostro effective non paratur; sed copiose tamen in vera minera martiali sulphurea latet, qua occasione illud hoc loco inferere volui. Minera hæc martis cum Hassiaca exacte convenit, quare istam jure Halensem appellare possemus. Reperitur in notabili strato decimo, multoties laudato, ad ubertatem plurium centum pondiorum, magnis sæpe frustis, instar filicum majorum, grysei coloris, & nonnunquam ligno fossili fusco circumdata; malleo vero diffRACTA, interior ejus substantia pyritosa flavescens, splendens, saporis fere nullius, in conspectum prodit. Minori quoque copia in forma globulorum occurrit. Ante octo circiter annos ex fonte XXX. ulnas profundo diversorii in suburbio Glauchenfi, *zum güldnen Hirsch* dicti, hæc minera inter arenam & argillam detenta variis globulis majoribus & minoribus eruta est, quorum sæpe duo, tres, imo sex in una serie coaluerant. Postquam hæc minera aëri liberiori diu exposita, flavescere & cinereo colore obducta comparet, tandemque in pulverem grossiorem resolvitur, qui acerrimi saporis vitriolici est, ac si porro in aqua solvitur, inspissatur & crystallifatur, ipsum vitriolum martiale producit. Hactenus occasio quidem non fuit, variis aliis locis territorii nostri telluris viscera perscrutandi, ac in campis meridionalibus per multos annos factum est; sed tamen credibile, hanc mineram martis vitriolicam latius se extendere. Id quod satis confirmant fontes medicati in nostris confiniis scaturientes, Halensis, Lauchstadiensis, & ante duos annos detectus ad pagum *Brachwitz* / qui omnes ex ejusmodi concreto martiali vitriolico virtutes suas acquirunt. Ex vitriolo varia in Medicina prostant medicamina, quorum vulgatissimum ac fere præstantissimum est tartarus vitriolatus, qui resolvit, abstergit, urinam, ac largior exhibitus, alvum, movet: hinc in vitis primarum viarum, febribus intermittentibus & obstructionibus glandularum a Practicis felici successu porrigitur. Vitriolum externe in oculorum affectibus, sub forma collyrii conducit, item ad hæmorrhagias sistendas, ac vulnera sananda, quam ob rem ex vitriolo etiam conficitur per orbem celebratus pulvis sympatheticus. Constituit quoque fundamentum atramenti, liquoris istius immortalis, quo viri eruditi nomina sua aternitati consecrare solent, cujus præparationem sequens distichon indicat:

*Uncia sit gallæ, semisque sit uncia gummi,
Vitrioli pars quarta; his addas octo salerni.*

CAPUT VI.

De metallis & mineralibus.

Nunc tandem ultimo capite ad metallorum & mineralium tractationem progredior. Etsi non paucae in agro nostro metallifodinæ, paucae tamen metallorum genera, & nihil fere, nisi cuprum in illis reperitur. Interim qualiacunque sint, & ubi passim quoque obveniant, jam indicabo.

Si ab *auro*, metallorum nobilium primo, exordior, illud nativum in granis inter arenas & illuvies Salæ fluvii permixtum esse constat, ex quibus etiam lavari & colligi potest. Hæc auriamenta sine dubio e montis piniferi, vulgo *Sichtelberg* / venis, perpetuo aquarum transitu, eluuntur & undis hujus fluvii insinuantur. Hinc etiam fieri arbitror, quod iis locis, quæ monti propinquiores sunt, copiosius, & quæ remotiores, paulo rarius deprehendatur. Ita novimus Salfeldiæ ac Lenæ quandoque ex arena lavatum esse aurum, apud nos vero nunquam, licet satis certum sit, e iam hic loci auri granula esse reperiunda. Multas alias & curiosas relationes de hoc auro habet SCHÜTTEUS *l. c. p. 91. seqq.* Usus hujus metalli medicus a nonnullis quidem maxime celebratur, experientia vero teste tanti non est. Unicum ex eo paratum, aurum fulminans, vere aliquam virtutem præstat, nempe resolventem & stimulantem, propter quam aliis pulveribus salinis, vel pilulis commode additur, ad visciditates primarum viarum educendas, maximeque laudatur in epilepsia infantum a vermibus & aliis torminibus excitata; nihilominus tamen ubi acres humores in intestinis hærent, caute est adhibendum, ne vis ejus rodens inde augeatur ac damnum inferat.

Transeo ad *cupri mineram*, quæ, ut paulo antea monui, apud nos admodum frequens est. Licet autem nullæ magis, quam cupri mineræ variare soleant: in arvo tamen nostro habetur tantum duplex. Una est in lapide fissili nigro, quæ occurrit in comitatu Mansfeldensi, ac Rotenburgi, atque etiam aliquot abhinc annis Wettini, nec non ad pagos *Schiebzig & Brachwitz* / erui coepta est. Altera in lapide arenario varii coloris, præsertim viridis, quam vulgo *Sand-Erz* vocant, Bottendorffi offenditur, ubi tamen ab aliquot annis nihil cupri paratum, quod venæ metallicæ non admodum divites, aquarum autem subterranearum nimius est proventus. Ex omnibus metallifodinis, quæ tam in Saxonia, quam in sylva Hercynia, Mansfeldenses & Islebieneses fere sunt antiquissimæ; quippe quæ ab anno MCIC. quo bini metallifossore cupri mineram primum invenerant, coli coeperunt ac subsequentiis seculis uber admodum fuit earum proventus. Hanc autem antiquitatem, præter historicam fidem, confirmant ipsæ fodinæ, *die Zechen* / ibi numerosissimæ, quæ longo temporis lapsu districtum duorum milliarium occuparunt. Ante bellum tricennale tam divites erant hæ fodinæ, ut quotannis 20000. centipondia cupri largirentur, post illud vero, & in hunc usque diem vix 1200. centipondia, cujus rei causa inter alia quoque ex defectu carbonum derivanda. Quodvis autem centipondium cupri, ordinarie novem, ad quindecim semiuncias (*Loth*) argenti continet: adeoque quatuor centipondia argenti circiter quotannis ibi conficiuntur. Vid. plura in MYLII *Saxon. subt. P. I. p. 1. & seq.* Cupri fodinæ, quæ non procul a Rotenburgo sitæ & nostris temporibus vix ante quindecim annos coepe-

runt, a Mansfeldensibus parum differunt, nisi quod loco lapidis fissilis, sæpe etiam cupri minera instar terræ nigræ paludosæ, eruatur, ex qua ante plures annos coxerunt ibi vitriolum. Cupri usum medicum quod attinet, externe tanquam septicum in ulceribus fistulosis & excrescentiis usibus chirurgicis quadrat, eaque propter in pharmacopoeis parata prostant unguentum *Ægyptiacum* & *Apostolorum*, nec non viride æris. Quoad usum internum, ingreditur quidem, licet parva tantum quantitate, spiritum asthmaticum *Michaëlis*, saponem chymicum *Dippelii*, tincturam veneris, sed tutus nunquam ejus usus internus & rectius ab eo abstinemus. Idem fere de præparatis ex argento ferendum judicium. Etenim bezoardico & tinctura lunæ, a quibusdam in mania & epilepsia commendatis, effectus non respondet & tutius iisdem non uti. CrySTALLI lunæ, vi drastrica & rodente præditæ, itidem in hydropo tanquam diureticum infecuri sunt effectus; melius autem lapidis infernalis præparationi serviunt, qui externe ut causticum vario modo applicari solet. Reliquos cupri & argenti usus mechanicos brevitatis causa jam lubens prætereo.

Ferri mineram territorium nostrum tanta copia quidem non exhibet ut inde ferrum parari posset; attamen eam passim affatim absconditam esse, satis patet. Hoc enim pyrites vitriolicus martialis, fontes medicati & crocus martialis ex iis collectus; item rubrica fabrilis, ochra, & tandem ipsa ferri minera rubicundi coloris, & maxime in pulveris forma, *mulnugte Eisen* / minera, licet pauperior, ante aliquot annos ad pagum *Brachwitz* reperta, comprobant. Tum etiam plurimi montes circa pagum *Giebichenstein* / hoc principio martiali infecti, quod partim ipsi lapides, ex illis avulsi, fusco colore tincti, partim etiam crocus martis, quem rivuli ex his montibus profluentes deponunt, luculenter demonstrant. Neque minus huc referendæ ætitæ, jam supra descripti, qui proxime ad sylvam nostram numerosi reperiuntur. Nam crusta horum nigricans & fusca nihil aliud est, quam vera ferri minera, ne dicam, quod inter illos quædam specimina quasi seminativa ferrea observaverim, quæ admota lima, ferri splendorem ediderunt. Hac occasione non possum non ferri nativi plane singulare, & hætenus a nemine, observatum specimen, commemorare, quod duobus abhinc annis, in dulci patria mea, Potsdamii, in arenofodina, non procul a granario publico, *beym Korn-Hause* / inveni. Offendebam nimirum ibi lapidem corneum, colore cinereum, in quo quum echinitem (quod aliquando accidit,) quærerem, eoque animo malleo ipsum diffringerem, apparuit in medio tubulus pure ferreus, ad pollicis longitudinem & calami scriptorii crassitiem, huic lapidi firmiter accretus, quem adhuc hodie inter reliqua curiosa asservo. Tubulus autem hic utrum nativum sit ferrum, an vero artefactus, & casu, forsan inundatione, huc delatus ac materiæ lapidis tum molli immixtus cum ipso concreverit? certo definire ambigo; posterius tamen videtur magis probabile, quia ferrum in ejusmodi tubularem figuram concrevisse exactam, vix credere licet. Ceterum mars, usu amplissimo, metalla antecellit omnia. In Medicina est præstans ipsius virtus tonica, roborans, adstringens & absorbens, propter quam in fluxibus nimis compescendis, sistendis febribus, in malo hypochondriaco, viscerum obstructione, cachexia, primarum viarum vitiis, omnibusque morbis, qui ab atonia proficiuntur, non immerito mirifice celebratur, modo cum cautelis necessariis adhibeatur. Exhibetur autem tam in forma liquida, quam solida. In hac celebres sunt martis sic dicti croci, inter quos præferendi, qui minus adstrictivi magisque solubiles,

uti

uti est qui a **STAHLIO** nomen habet. Omnibus tamen palmam reddit dubiam simplex martis limatura, sulphure suo ignis tortura non orbata, a **SYDENHAMO** jam jure laudata. Ex liquidis martialibus sunt maxime tincturae, quarum multae, sed praestantiores, quae lenes & tutae, cum succis vegetabilium confectae, ut cum succo pomorum, cydoniorum, citri. Ex aliis non ingloria est tinctura vitrioli martis tartarifata Ludovici, & tinctura martis Zwölfferi, quae posterior tamen pretio, non vero virtute, priorem superat. Externe a quibusdam laudatur aqua fabrorum ferrariorum in scabie, pedum oedemate, ad aphthas infantum, ubi effectum edit adstringentem & repellentem, eaque propter cautione opus est. Laudatur etiam scopo exsiccante & consolidante crocus martis, ulceribus glandulosis ac manantibus inspersus si ante probè mundata fuerint, a **PARACELSO** & aliis practicis auctoribus. In mechanicis & oeconomicis praeterea ferrum, uti inter omnes constat, tantum non aurum & argentum utilitate superat, licet non pretio. Bellicus martis usus martis filiis notissimus est, sed generi humano in perniciem innotuit.

Ex reliquis mineralibus subjectis unicum adhuc restat, *carbones nempe fossiles*, **die Stein-Kohlen**. Constant hi ex plurium auctorum opinione ex bitumine duro, nigro, lapidoso, idque producta ex iis haud obscure comprobant: sunt tamen nihilominus qui eorum natales ex vegetabili regno derivare malunt, & adhuc sub judice lis est, quam vero hic componere non animus est. Interim ejusmodi carbones, sive lithantraces, eximia in quantitate occurrunt prope Wettinum & Lebeguinum. Priori loco ante triginta octo, posteriori vero ante quindecim annos, primum effodi coeperunt, & tunc scripsit de his egregium libellum, Wettinensis quidam, **BÜNTIG**, sub titulo *sylva subterranea, sive von den Stein-Kohlen* / postea sub ulteriori telluris perscrutatione maxima horum carbonum fossilium supellex est detecta, ut jam in solo districtu Wettinensi tanta in copia quotannis eruantur, quae octies millies complet illud mensurae genus, quod nostrates vocant **einen Wispel** / aliquando minor autem in Lebeguinenfi, quin affirmant metallicolae, in terrae visceribus apparatus ad centum adhuc annos esse absconditum. Differunt autem utriusque loci carbones fossiles. Wettinenses firmioris & ponderosioris sunt substantiae, ac plus de bituminoso sulphureo principio foveant, diutius ea propter in igne persistunt & flammam reddunt vehementiorem & constantiorem, unde a ferrariis fabris quam maxime usurpantur. Lebeguinenfes fru-

stis majoribus eruuntur, sed friabiliores, leviores & minus constantes in igne sunt, tandemque in cineres abeunt, cum Wettinenses potius scorias valde compactas relinquunt. Praeterea Lebeguini in terrae superficie bituminosi carbones effodiuntur, quos **Eage-Kohlen** vocant, qui reliquis multo leviores, molliores, & difficilius ignem concipiunt, nec, nisi ad calcem vivam puriorem, **Sparfalk** / parandam, adhibentur. Ceterum inter veros illos lithantraces, praesertim Wettinenses, nonnunquam subtiliores laminae sulphureae, pyritis instar splendentes, **wie Goldstitter** / conspicuae sunt, quae de sulphuris copiosi praesentia testimonium praebent. Paucis abhinc annis in aliis locis etiam agri nostri, quaesiverunt carbones fossiles metallifossiles, ut ad pagos **Morl / Giebichenstein** / nec non in ipsa urbe nostra, uti supra memini, ac tandem ad oppidum **Gröbzig** / sed inani plane labore. Carbonum fossilium usus nobis frequentissimus & omnibus satis cognitus est. Utuntur quippe iis permulti loco lignorum, ad calefacienda hypocausta & coquendos cibos, quem in usum tamen Lebeguinenfes commodiores, quia fumum non adeo ingratum sulphureo-acidum spargunt. Deinde tam Wettinenses, quam Lebeguinenfes, in casis salinariis nostris, **Salk-Kohlen** / salis cocturae serviunt, eoque maxima pars omnium, quae effodiuntur, consumitur. Sunt, qui carbonibus hisce in Medicina virtutem aliquam anodynam, adstringentem adscribunt, eosque in pulverem comminutos, in febribus intermittentibus, haemorrhagiis nimis, dysenteria & diarrhoea, imo externe ad sistendum sanguinem, commendant; sed rudior ipsorum compages & substantia copiosa sulphurea, salina, acida & terrea, plurimos Practicorum ab usu deterrent. Neque tamen illi audiendi sunt, qui eis vim plane deletariam ac perniciosam tribuunt, ac propterea etiam vaporem lithantracum sanitati maxime adversum proclamant, quam tamen opinionem jam dudum solide refutavit *illustr. Dn. PRAESES* in peculiari schediasmate *de Vapore carbonum fossilium innoxio*.

Haec sunt, quae de fossilibus agri Halensis recensere volui. Plura quidem subinde addi, aut pluribus describi potuissent, sed temporis ratio & praescriptae dissertationis limites id vetarunt. Quamobrem in succincta hac praesentis thematis deductione jam acquiesco, Deoque submissas ac devotas exhibeo grates, quod hunc laborem perficere concessit clementer, simulque benignissimum ipsius Numen imploro humillime, velit hunc omnesque reliquos conatus dirigere ad prosperum denique finem.

DISSERTATIO PHYSICO-MEDICA

D E

EBORE FOSSILI SUEVICO

HALENSI.

Primum Edita Anno 1734.

P R Æ F A T I O.



EUM in latebris etiam subterraneis mirandum, venerandumque operosa præbet natura: & quæ in sacris revelata legimus paginis; non raro ex imis terræ visceribus confirmari deprehendimus. Prolixum nimis foret, amplis argumentis hanc corroborare thesin, & sufficere, si paucis duntaxat monstraverimus, non pauca diluvii universalis documenta in terrarum reperiri gremio. Totum, quod summus rerum opifex condidit, universum, triplici potissimum creaturarum ordine, minerali videlicet, vegetabili, & animali compositum esse, neminem latebit; nec quenquam fugiet, cuivis ordini seu regno, suos terminos posuisse Numen tam certos, ut illos absque ipsius vitæ ac naturæ destructione transire neutiquam liceat. Metalla, & quæcunque minerali regno accensentur, tam fixam in terræ penetralibus obtinuerunt sedem; ut illa egressa, vitam si sic loqui licet, ac vegetationem suam amittant. Et qui animali regno tributum sunt fines, aereo tantum, & aqueo includuntur elemento: quo relicto, non nisi mortua, vel saltem morti destinata mineralium domicilio, quod terrarum abyssus præbet, insinuantur cuncta animalium: si talpas, lumbricos terrestres, & quædam insecta, superficiem terræ duntaxat perreptantia, exceperis. Verum enim verò contra has naturæ leges, profundissima terrarum loca plena sunt animantium ossibus, & non raro talium, quæ, dum vivunt, in remotissimis aluntur regionibus, atque jam ab animali mollitie, in lapidem ac mineralem transierunt naturam. Nostra Germania nec Elephantes, nec marina fovet conchilia: quot vero sunt horum animalium, quæ vel in toto, vel in partibus, ex profundo nostrorum locorum eruantur. Testantur id naturæ curiosorum musæa, ejusmodi subjectis rarioribus plena; rerumque naturalium scriptores calculum addunt. Unde vero tanta peregrina, tantaque fere monstra ex dissitis Indiis, ac remotissimo pelago, ad imos nostræ terræ abyssos, quibus vix hominibus accessus datur, devenerunt? Hæc profecto, maximeque marina conchilia, clarissimo sunt argumento, terras olim magnam inundationem passas fuisse; non superficiale, repugnat enim altissimus effossorum animalium situs; nec particularem, refragatur enim eorundem præsentia, in cunctis fere regionibus obvia: sed universalem, profundam, stupendamque. Hanc suggerit naturæ scrutinium, ignarum quale illud fuerit diluvium: sacrae vero litteræ idem describunt ample. Et ex censu horum animalium, ad terræ cavernas damnatorum occurrit quoque sic dictum ebur ac unicornu fossile: de quo, secundante summo Numine jam agere constituimus. Nostro enim instituto præbuit occasionem, uberior, quam hujus fossilis Hala Suevorum suppeditavit, copia: cujus historiam, quantum nobis innotuit, paucis præmittemus.

HISTORIA EBORIS FOSSILIS,

HALÆ SUEVORUM REPERTI.

HAla Suevorum, urbs in angusta valle, quam altissimi montes, densæque sylvæ undique cingunt, sita, atque super solo, salino liquore perfuso exstructa, (unde etiam sal commune ibidem coquitur, cujus naturam D. Lic. HEFFELMEYERUS diff. Aldorfi Noricorum, anno 1731. habita explicavit) non raro multam unicornu fossilis, ex imis terræ cavernis eruti exhibuit quantitatem. Sic annales significant, anno post Christum natum 1494. cum ad ædificandam curiam terra insigni altitudine perforeretur, cornu tale maximum, longumque sine ramis fuisse repertum: cujus meminerunt JOANNES LAURENTIUS BAUSCH *tr. de unicornu fossili pag. 180.* & CRUSIUS *annal. Suev. Lib. 9. pag. 3. c. 5.*

Deinceps anno 1605. haud procul ab urbe in valle quadam, quæ binos pagos, *Neunbronn & Hochstadt* dictos, distinguit, erutum e terra fuit cornu quoddam, ingentis magnitudinis. Fidem fere superat, si dixerò, illud pondere suo, quinque centenarios omnino superare: at publicis testimoniis fultus, hoc asseverare possum: siquidem illud, ferreis inclusum vinculis, adhuc hodie Halæ, in templo, quod S. Michaëli sacrum est, omnium intuentium oculis patet: & in adjecto iconæ ad vivum delineatur. Huic cornui hæc appensa est inscriptio:

Tausend Sechshundert und Fünff Jahr /
Den Dreyzehenden Februarii ich gefunden war /
Bey Neunbronn an dem Hallschen Land /
Am Bühler Fluß zur linken Hand /
Samt grossen Knochen und lang Gebein /
Sag Lieber / was Arth ich mag seyn.

Ceterum intus est cavum, sensim recurvum, anteriorius acutum, & colore subcinereo ossa æmulatur, quæ ex agris passim eruuntur: de quo inferius agemus, quorsum pertineat.

Neque vero hodie solum Halense hisce caret fossilibus: namque prope urbem est fodina, quæ coëtoribus laterum præbet limum, illis conficiendis aptum, ex albo rubicundum. Altitudo illius sex virorum superat longitudinem: dicto autem limo intermixtaprehenduntur varia ossa alba, cinerea, friabilia, magnorum animalium, nostris locis inusitatorum; nec non multa ligna petrefacta; integræ arbores, & permulta unicornu fossilis fragmenta. Hæc proxime ambit arena, tactu gelidissima, illisque firmiter adhærescit: sub terra sunt ponderosissima, & super fornace deposita, ligno fiunt leviora.

Ad hæc non ita pridem nova, sed tristissima, ebur hoc in Halensi solo reperiundi, sese obtulit occasio. Postquam enim anno 1728. mense Augusto, urbs ista gravi incendio, quod per hominum memoriam, exceptis levioribus, ab urbe condita tertium est, ultra tertiam partem deflagrasset; & posthæc in eo essent cives, ut inter alias, communes exstruerent ædes, conventibus publicis tributas: adparuit inter ruinas in profundo terræ, ad altitudinem sedecim cum dimidio pedum perforatæ, limus rubicundus, qui ficcatus, & elixatus sal nitri suppeditavit. Cum hoc ingens copia dicti unicornu fossilis, levis, ex albo cinerei, atque friabilis, non modo in minoribus frustulis, sed majoribus quoque effossa est: adeo ut unum, quod tamen nequiquam integrum e-

rat, longitudine septem cum dimidio pedum, crassitie duodecim digitos expleret. Et hæc est historia eboris fossilis, Halæ Suevorum, diversis temporibus reperti. Neque vero Hala Saxonum vacua est dictis fossilibus, quorum quamplurima, & varii generis ossa, cornua, dentes, diversorum animalium, in illustris PRÆSIDIS musæo exstant, quæ maximam partem in Halæ confiniis reperta sunt. Cum primis inter ea magnitudine reliqua superat dens quidam elephanti, duodecim librarum pondus æquans, quem verbis *Excellentissimi SCHULTZII*, prout in *Commerc. Litter. Norimb. anno 1732. pag. 405.* se habent, sic describimus: *Dens ille, omnibus genuinitatis signis conspicuus, ex lapidicina Esperstadiensi est erutus. Pagus hic est tribus horis hinc distans, in via illa, quæ Querfurtum ducit, comitatui Mansfeldiæ adscriptus. Cæditur ibi lapis calcarius, ad marmor gryseum accedens, cujus multus usus est ad pavimenta ædium sternenda, & scalarum gradus construendos. In medio talis saxi, ad viginti pedum profunditatem, repertus hic dens fuit; sed quod dolendum, ab incautis operariis in tria frustra confractus prodiit. Duas ulnas æquant juxta se posita fragmenta: anterior tamen, quæ in apicem obtusum excurrit, portio, acquiri non potuit; interim conjectura est, illam ad minimum ulnæ quadrantem æquare debere. Ipsam ebur temporis diuturnitate, & aquarum calcariarum virtute, ita molle, & fragile redditum est, ut facili negotio comminui possit. Propterea Vir Illustris, circulis, ex orichalci lamellis circumductis illud muniri curavit. Prope ipsum inventa sunt alia ossa, sed diuturnitate temporis tam fragilia facta, & ab operariis tam male comminuta, ut qualia sint, dijudicari non possit: melior tamen fortuna fuit dentis alicujus, quem molarem puto, qui satis integer allatus est, & cum reliquis asservatur, &c.* Hæc fossilia nobis occasionem dederunt, de iis, speciatim ebore fossili, paulo prolixius agendi; quod Numen ex alto secundet.

§. I.

Diversa sunt, quibus hoc fossile insignitur, nomina; & ex his præcipua, unicornu fossile, ebur fossile, & spodium fossile. Ratio cognominis, quo fossile dicitur, facile patet; quoniam nempe non habetur, nisi ex profundo terrarum effodiatur. At ebur nuncupatur, quia colore ac figura verum ebur, seu quod idem est, dentem elephantinum apprime æmulatur; atque a non paucis non sine ratione pro ipso elephantorum dente, inter universale totius mundi diluvium, a fluctuantibus aquis, ad terræ interiora latibula demandato habetur. Unde etiam spodii nomen derivatur. Spodium enim, licet generatim cinerem, cum primis metallicum denotet; strictiori tamen significatu, indicat ignis tortura calcinatum ebur. Quum vero fossile ebur, plerumque calcinatum ac friabile reperiatur; inde vocatur spodium.

§. II.

Hæc itaque duo nomina naturæ rei omnino convenire videntur: at tertium, quod unicornu audit, respectu originis, vulgi fabulis, figmentisque debetur. Dicunt enim, fossile nostrum, si æmuletur cornu, nihil esse nisi cornu istius animalis, quod rarissimum dicunt, unicornem vel Monocerotem, cui

Einhorn /

Einhorn / olim ab ipso vel deciduum, & in terræ abyssum sepultum, vel in diluvio hinc inde submersum. Si consulamus historiæ animalis scriptores, quatuor in iis recenseri deprehendimus animantium terrestrium unicornium genera. Primum est Rhinoceros, qui cornu reflexo, & adunco præditus, hostisque dicitur elephantorum. Conf. **PLINIUS** *hist. anim. L. 8. cap. 20.* Alterum sunt boves Indici, conf. idem **PLINIUS** *cap. 2.* Tertium asini Indici, de quibus legas **ARISTOTELEM** *hist. anim. Lib. 2. cap. 1.* **ÆLIANUM** *de anim. Lib. 4. cap. 52.* & quartum denique est Origes, seu capræ genus; cuius meminit **BARTHOLINUS** *tr. de unicornu p. 65.* De horum existentia, nullum est dubium, si scriptoribus fides haberi potest, non auritis solum, sed etiam oculatis testibus: quod autem Monocerotem, seu Unicornu κατ' ἐξοχὴν dictum attinet, varia quidem de ipso narrant Antiquiores, sed quivis eorum peculiarem, & ab alio diversam suggerit descriptionem, meram ferre olentem fabulam.

§. III.

Cum primis ridicula sunt, quæ Hebræorum magistri de hac fera, Monocerote, perhibent. **R. JUDA** in libro *Rabba* refert, illam tantæ conditam fuisse magnitudinis, ut a Noacho arcae suæ includi nequiverit. **R. JACOBI** in *Comment. ad Ps. 22. v. 22.* narrat, Davidem pascendo forsan gregi intentum in unicornem dormientem ascendisse, cum corporis & cornu vastitate, montis specie delusus esset. Interea, dum excusso somno eleveretur Monoceros, perterritum Davidem, feræ, quam montem crediderat, insidentem, versis ad Deum votis, templum ejus longitudinis, quam cornu Monocerotis æquabat, centum videlicet cubitorum, serio vovisse, si præsentem eriperetur periculo; Deum precibus annuisse, & in terrorem Monocerotis immisisse leonem; inde ita increvisse timorem Davidis, ut exclamasset: Salva me Domine ex ore leonis; & a cornibus unicornium eripe me.

§. IV.

Forfan hæc, simileve Judæorum traditiones, ansam præbuere tot de Monocerote commentis. Si vero scriptores rerum naturalium evolvamur, occurrunt multi, qui dictæ bestię existentiam defendunt, formamque describunt. Ex horum numero sunt **SOLINUS** *Polyhist. cap. 55.* **PLINIUS** *nat. hist. Lib. 8. cap. 21.* **ÆLIANUS** *Lib. 16. de animal. cap. 20. & Lib. 17. cap. 44.* **ISIDORUS** *Lib. 12. Etym. cap. 2.* **GARCIA AB ORTO** *Lib. 1. arom. hist. cap. 14.* & **LUDOVICUS VARTOMANNUS** *Lib. 1. navigat. cap. 18.* qui se ipsum duos vidisse adfirmat. Verum ob plane variam, quam exhibent, hujus animalis descriptionem, vero omnino simillimum est, auctores istos nunquam nec vivum, nec mortuum vidisse istud. Quare non pauci quoque de ejus existentia dubitarunt, quos inter **MERCURIALEM** *tr. de febribus Lib. 5.* **PAREUM** *Lib. 20. cap. 39.* **SACHSIUM** in *Monocerot. pag. 38. allegasse sufficiat.* Quicquid autem sit, cum ab omnibus Monocerotis cornu colore nigrum describatur, illud vero fossile, quod ex terris eruimus, album sit ac subcinereum, certa sequitur conclusio; hocce fossile, nequiquam pendere a sic dicto Monocerote.

§. V.

Nihilo tamen minus haud statuerem, inane Monocerotis esse nomen, nec ulli animalium competere; sed facio cum aliis auctoribus, qui experientia multiplici fulti, & tanquam αὐτόπτοι testes, affirmarunt, monocerotem, animal & monstrum esse marinum, balænarum genus, in Grœnlandico mari reperitundum: id quod **OLAUS MAGNUS** *Lib. 21. cap. 10.* *Frid. Hoffmanni Oper. Supplem. II.*

THOMAS BARTHOLINUS *hist. anat. Lib. 4. cap. 4. ac tr. de unicornu pag. 264.* **TULPIUS** *Lib. 4. obs. med. cap. 59.* & **SACHSIUS** *Monocerot. pag. 26. seqq.* attestantur; & ipsam animalis anatomiam suppeditant. Huic animali assignant cornu longissimum, mucrone acuto præditum, rectum, durum, cavum, tamque album, ut nitidissimo ebori videatur simillimum. Jam vero ex effossis unicornibus ea, quæ olim celebriora fuerunt, veluti Dionysianum, Venetum, Antwerpense, Helveticum, Ultrajectinum, &c. dicto balænae cornui per omnia fuerunt similia; uti fufius explicat **SACHSIUS** *dicto libro pag. 83.* Ergo verisimile est, ea fossilia, quæ in descripti cornu forma in terræ passim reperiuntur gremio, esse dentes seu cornua illius piscis: de quo infra plura loquemur.

§. VI.

Jam revertimur, unde digressi sumus, & monendum putamus: per ebur, spodium, ac unicornu fossile, intelligi illa subjecta duriora atque ex albo cinerea, quæ ossibus animantium ex ovo similia, ex profundis terrarum cavernis eruuntur: pressius enim illa describendi, hic nondum locus est. Inserta plerumque sunt terræ limosæ ac arenosæ: & quod natalem locum attinet, illum in multis Europæ regnis reperiri, auctores fide digni perhibent. Cumprimis hujus fossilis ferax est, specus ille subterraneus Hercyniæ prope Elbingerodam, quem dicunt *die Baumanns-Höhle*: ubi permulta eboris fossilis fragmenta & olim eruta sunt, & adhuc eruuntur: quorum quædam admodum curiosa in Illustris Præsidis Musæo conspiciere licet. Conf. etiam **GESNERUS** *de lap. figur. pag. 158.* **NEANDER** *Physices Part. I. pag. 128.* **FR. JOEL.** *Præf. T. V. Sect. 3. pag. 139.* Effodi quoque ebur nostrum, in Thuringia, testatur **LIBAVIUS** *part. 3. singular. L. 8. C. 17.* In Misnia, **FABRICIUS** *annal. urb. Misnæ L. 3.* in Hassia, **SCHROEDER** *pharm. med. chym. l. 3. c. 4.* **GESNER** *l. c. pag. 254.* non procul a Spira **EISENMENGER** *tr. de febrib. mal. pag. 36.* porro in Suevia, Helvetia, Bohemia, Moravia, Silesia, Franconia, Italia &c. Conf. **BAUSCHII** *tr. de Unicorn. pag. 189. seqq.* Nec Hala Saxonum destituta in suis terræ cavernis, hoc fossili subjecto est: testante **D. D. LERCHIO** in *diff. de Oryctographia Halensi*, quam sub Illustri Præfide nostro ventilavit.

§. VII.

Hoc loco peculiaris debetur animadversio, illis ossibus, quæ in Siberia reperiuntur, de quibus **NOVELLÆ PETROPOLITANÆ**, maximeque adjectæ ipsis epicrifles, nos certiores faciunt: neque minus in **ACTIS SUECICÆ** *Tom. II. anno 1725.* fufius agitur. Uberrimus ibidem ossium, ex imis montium proventus est, insignisque varietas, veluti crania, vertebrae, costæ, tibiæ, brachia atque dentes &c. tantæ quidem reperiuntur magnitudinis, ut Elephantum ossibus valde sint æqua, quin non raro ea largissime superent. Pleraque porosa ac friabilia conspiciuntur, præter dentes, quos tantæ duritiei inveniunt, ut eadem inde parare possint vasa, quæ verum ebur suppeditat. Quin stupenda est magnitudo dentis cujusdam, in dictis **NOVELLIS** *de anno 1730. pag. 323.* allegata, qui pondere suo 280. libras superavit, & paullo recurvus fuit, sicut & plurimi reliquorum adparuerunt.

§. VIII.

Neque vero alienum erit, ex iisdem **Novellis** hic repetere opinionem, quam incolæ Siberiæ, de horum ossium origine foveant. Putant nimirum, esse quoddam animal, Elephanti magnitudine, colore nigrum, binis cornibus instructum, quod Mammont dictum,

non nisi in profundo terrarum commorari posset; quoniam aëri expositum subito periret. Et his deberi ossa prægrandia existimant, maxime cum illa vetustate diversa, & plus minus recentia adpareant. Erroneam esse opinionem, quis non videt? Verum Eruditissimus Societatis Petropolitanae Collega, BAYERUS egregie monstravit, ortum hujus fabulae in acceptum ferendum esse, *Alcorano Turcarum*, ex cujus 27. *Surata* recenset monstrum Mahomedis, de bestia, terræ exploratice, atque sub finem mundi terram egressura, commentum: simul vero ex MSCtis chronica Ruthenica ostendit, Tartaros olim, Muhamedana religione imbutos, Siberiam inhabitasse: unde eam traditionem derivat.

§. IX.

His in parenthesi allegatis, devenimus ad nodosam quæstionem; num ebur fossile ad animale, an minerale pertineat regnum? Utraque opinio suos invenit patronos. Sunt enim, qui figura horum subjectorum, ossa animalium exacte referente, convicti, illa ad animale regnum numerare voluerunt; sed dum concipere haud quiverunt, unde animalia ad tantam terrarum abyssum devenerint; illa potius ad minerale regnum accensere maluerunt. Habent itaque ebur fossile pro marga, a subterranea aqua seu liquore lapidifico soluta, & posthæc; evaporata subtiliori materia, in lapideam, friabilem, ossibus ustis similem substantiam coagulata. Figuras autem tam varias, tamque mirabiles ludentis naturæ beneficio deberi autumant; prout enim marga illa, adhuc mollior, in hanc vel illam terræ cavernulam, seu cavitatem incideret: augeri atque crescere in illa tam diu, quam multo fortior incumbentis terræ esset resistentia, atque sic explere suam matricem, ejusque figuram æmulari. Defendunt hanc opinionem BOETIUS A BOOT, OLAUS WORMIUS, BARTHOLINUS, BAUSCHIUS, eamque fusius explicare conatur RHIEM *diff. de ebore fossil. Aldorff Noricorum anno 1682. habita §. 16.* Argumento illis sunt variæ figuræ, vel vegetabile, vel animale aliquod æquantes, quæ in lapidibus, quos nemo ex animali seu vegetabili regno generatos diceret, insigni arte impressæ non raro deprehenduntur. Quidni igitur, putant, natura jocans lapides in figura cornuum ac dentium efformare posset: cum illa, teste AGRICOLA *de nat. fossil. Lib. 7. cap. 22.* lapides arborum similes procrearet?

§. X.

GEORG. WOLFFG. WEDELIUS, Vir celeberr. *Progr. de ebore fossili*, distinctione quadam sibi consulturus, dividit unicornu fossile in figuratum, & formam dentis aut ossis cujusdam distinctius exprimens; & minus figuratum, aut irregulari forma præditum. Prius pro veris animalium ossibus, longo tempore ad terram damnatis, omnino habet; alterum vero pro minerali marga, ac vera saxorum medulla, quæ mediæ inter bolum & cretam esset naturæ, venditat. Et denique BECHERUS, unicornu fossile ex aqua sulphurea coagulata generari scribit; *Metallurg. part. 1. pag. 5.*

§. XI.

Verum enim vero, juxta nostram sententiam, chymica horum subjectorum analysi, docere nos debet, cujusnam sint prosapiæ. Prius vero, quam illam perquiramus, monere juvabit, figuras vegetabilium ac animalium lapidibus impressas, nequitiam jocantis, ludentisque naturæ certum testimonium præbere; ut potius confirmet, vera animalia vel vegetabilia, terrarum profundo immissa, earundem

auctores fuisse. Quum enim vegetabile, aut animale quodcunque terra obrutum, incidit forsan in materiam tophaceam, mollem adhuc, & perfunditur postea spiritu seu aqua lapidifica: imprimit sua vestigia matrici suæ, ipsum vero vetustate temporis corrumpitur. Hæc vocantur incrustata; & differunt a petrefactis, quæ sunt partes animalium seu vegetabilium in lapideam revera mutata substantiam. Illa deprehenduntur in tophaceis; hæc calcariis lapidibus. Neque vero ab istis ad ossa, sub eboris fossilis nomine reperiunda concludere licet; quippe quæ ad minerale regnum nequitiam pertinere, eorundem principia, ac alia experimenta confirmant.

§. XII.

Quod si igitur ebur fossile, chymico subjiciamus scrutinio, illud non secus ac alia ossa præbet destillatione sal volatile siccum ac fluidum, & non nihil olei empyreumatici: ustum dein in occluso nigrescit; aperto igne in albam terram vitrescibilem abit, a qua tenerum sal quoddam fixum elui potest: quod cum nitro mixtum in alcalinum corpus redigi, & cum parca frictæ vitri copia maritatum, in vitrum semi opacum lacteum commutari potest: quemadmodum D. PRÆSES & SAMUEL CARL fusius demonstravit. Jam vero cuncta hæc phænomena, non nisi ad animale regnum adplicari posse, perpetuæ est observationis. Ergo ebur fossile, sobolem esse regni animalis nemo negare poterit. Neque enim attinet nos, si sit illud figuratum, si minus tale: hoc enim olim figuratum esse potuit, & forsan vel temporis vetustate, vel effodientium incuria in plures partes diffissum fuit. Interim non negamus, quidam non figurata fossilia, vulgo pro ebore fossili venditata; quæ revera mineralis sunt prosapiæ, & margæ seu medullæ saxorum nomen merentur: verum ebur seu unicornu fossile incongrue dicuntur.

§. XIII.

Quæ cum ita sint, per ebur, spodium, seu unicornu fossile, nihil aliud intelligo, quam osseam, cujusunque sit, animalis partem, olim intra terras absconditam, & in earum profundis speluncis, continua aquarum evaporatione, philosophice calcinatam. Assentitur huic sententiæ HOECHSTETTERUS, dum *observ. medicin. Dec. 5. cas. 9. spodium*, inquit, *non est metallicum, sed ossis cujusdam portio, siccitate terræ exsiccati, sive jam sit elephanti, sive alterius animantis os vel cornu.* Et si conferamus affectiones, quæ huic subjecto competunt, eas omnes ita comparatas esse reperiemus, ut ossibus calcinatis adprime conveniant. Tales sunt 1) ratione consistentiæ, quod sit subjectum friabile, levi unguium rasuræ obtemperans, & ope mortarii in pulverem facile redigendum, 2) ratione coloris, quod sit album, cinereum, punctis nigris notatum: ossa vero animantium ad albedinem omnino calcinari, notum est: 3) ratione odoris, quod carbonibus injectum, empyreumaticum animale spiret odorem; & BAUSCHIUS *tract. de unicornu fossili*, hunc observavit valde gratum, similem ei, quem lac cum amygdalis tritum exhibet: 4) ratione saporis, quod terreum, cretaceumque præbeat, & linguæ adhærescat; & quod 5) denique aquæ immisum cum ipsa ebulliat; 6) quod cum spiritu acido ebulliat: quæ cuncta phænomena a natura ossisusti, seu calcinati nequitiam aliena sunt.

§. XIV.

Neque vero dixerim, cuncta ossa, quæ ex terræ latibulis eruuntur, esse semper calcinata: nam dantur etiam petrefacta, quæ vero ad eboris fossilis classem

classẽm minime pertinere statuo. Præterea calcinationis gradus valde differt: quædam enim adeo friabilia sunt, ut mox manibus conteri queant; quædam vero duriora, ac recentibus fere similia deprehenduntur, ut limæ subjici, ac varii generis vasa inde parari possint. Hæc differentia triplici nititur fundamento: vel enim dependet ab ipsa loci natalis diversitate, vel ipsius ossis varia constitutione, vel denique temporis ratione, prout plus minusve diu ostale a terra sepultum fuit. Sic constat, arenosa loca ad calcinanda ossa esse aptissima; dentesque minus obsecundare calcinationi, quam alia ossa.

§. X V.

His præmissis, jam succedit determinanda quæstio, cujusnam animalis sint ossa, sub terris reperiunda? Mea quidem sententia nequiquam ad certum animantis genus restringere licet effossa passim ossa: sed ea variis animalibus propria reperiuntur. Quæ in forma oblongi cornu conspectui se sistunt, vulgo quidem, sed falso Monoceroti terrestri attribui, supra dictum est: plerumque Elephanti ossa ob magnitudinem accusantur; quid? quod vulgus non raro se Gigantum seu Enackim sceleta videre credat. Verum certitudo in ejusmodi casibus obtinebitur, ex collatione repertorum ossium, cum descriptione ac sceletis aliorum vivorum animalium. Frequentissima sunt elephantorum ossa: unde quoque nomen eboris originem traxit: Hæc cognoscuntur facile, si conferantur cum Anatomia Elephanti, quem Dublini in Hibernia anno 1681. dedit, Anglicoque idiomate publici juris fecit A. MOULINUS. Ad hujus normam examinavit, totius Sceleti anno 1696. Tonnæ in Thuringia effossi figuram, ERNESTUS TENTZELIUS, peculiari epistola, ad Antonium Magliabechium exarata; atque deprehendit, Skeleton illud Elephantino ex ovo fuisse simile. Verum præter Elephantina, aliorum quoque animantium ossa, terræ damnata latere, quis negaverit? Museum rerum naturalium, quod in Orphanotrophæo Halenfi floret, ostendit cornu magnum, bovis Polonici simile; quod integro bovis sceleto, ad albedinem calcinato, & ante aliquot annos in arena prope Hornburgum reperto adhæsit. Non procul quoque ab Hala Saxonum, in pago *Wisthal* / erutum aliquando fuisse cornu rupicaprae, testatur D. D. LERCHE, in *allegata superius diff. pag. 41.* De Sceleto alcis Massæ detecto, eruditam relationem scripsit HERMANNUS. Et quod speciatim cornua ista passim effossa attinet: ea, si descriptioni Monocerotis marini, a SACHSIO in *ejus Monocerotologia* delineati & Narwhal dicti, convenerint; pro hujus cornu, vel potius dente haberi omnino possunt. Conf. THOMAS BARTHOLINUS *tr. de Unicornu*, pag. 112. & OLAUS MAGNUS. Sic JOH. SEYFRID *medull. memorab. nat. fol. 593.* tradit, anno 1663 Quedlinburgi in campo quodam integrum monocerotis skeleton, capite elevato fuisse repertum, cujus fronti cornu plusquam quatuor cubitos longum adhæsit.

§. X V I.

Intricatior vero est disquisitio: unde animantium, nobis plane peregrinorum; ossa, ad nostram devenierint terram? HOECHSTETTERUS *obs. med. dec. V. cas. 9. pag. 651.* non naturæ artificio, sed mercatorum aut diligentia aut astu, erui hoc fossile ebur credit. Neque etiam negandum est, quin sæpius impostorum lucro inhiantium versutia fiat, ut os quoddam animantis, arte calcinatum, arenis profundius mandetur; tumque illud erutum, pro naturæ artificio, ac genuino ebore fossili, caro pretio vendatur: quemadmodum id ipsum in specu illo subterraneo, *Frid. Hoffmanni Oper. Supplem. II.*

quem *die Baumanns-Höhle* dicunt, factum fuisse, ipse testatur Excellentissimus Præses. Verum enim vero, exinde in totum, spodii fossilis, natura calcinati, existentiam negare velle, repugnat experientiæ, qua illud ex profundis terrarum latibulis, ad quæ nemini hominum accessus ferme fuit, erutum esse, non pauci fide digni testantur viri.

§. X V I I.

Quare vero simillimum pluribus eruditorum visum fuit, quod dicta ossa tempore diluvii universalis, sub terra fuerint recondita. Docent nimirum sacræ litteræ, eo tempore non modo totum terrarum orbem undique aquis inundatum fuisse; verum etiam omne terrestrium animantium, quæ Noachus arcæ suæ haud inclusa habuit, genus periisse. Quidni igitur fieri potuit, ut Elephantorum, & aliorum animantium cadavera ex Africa, aliisque remotissimis terris, rapidissimo aquarum fluctuantium impetu, ad Europam, ejusque varias regiones deportata fuerint: quæ vastissima sua magnitudine, defluentibus posthæc aquis, terra specificè graviora, huic se profundius immerferunt. *Namque ne terra quidem potuit firmare suum solum, quin & desuper experta fuerit succussiones illas, eversa, disjecta, disrupta, quassata; neque enim verba suppetunt satis ad id exprimendum: & pressione illa duplicata irati ætheris, & rarefactarum, ebullientium, ferocientium aquarum, motus intestinos in visceribus suis, in centro quasi suo, passa horrendissimos, summa imis, ima summis turbata, confusa, diruta, universa*, inquit WEDELIUS *Progr. de unicornu fossili pag. 15.* Atque sub hoc eodem diluvio factum esse credo, ut monstra marina ad hæc vel illa devoluta, exsiccata paululum aqua, ibidem substiterint.

§. X V I I I.

Neque obstat, quo minus credamus, particulares terrarum inundationes antiquissimis temporibus hinc inde factas, iisque varii generis animantia, præsertim indigena, suffocata, ac in profundum præcipitata fuisse. Sed nec inficias iverim, quin ipsi homines consulto animantium cadavera in profundas devolverint cryptas, quæ temporis vetustate arena, terraque adimpletæ fuerunt. Accedit proximior origo illius eboris ac unicornu fossilis, quod in Italia reperitur: siquidem notum est ex Romana historia, Hannibalem olim quam plurimos in Italiam transfulisse Elephantos; qui mortui, ac tandem terræ demandati fuere. Conf. CÆSALPINUS *tr. de metallicis Lib. 2. cap. 40.* Quicquid vero sit, devenerint hæc fossilia in terram, undecunque velint: satis est, quod pertineant utique ad animale regnum, testante non solum figura, sed & analysi chymica.

§. X I X.

His diductis, specialius consideranda veniunt momenta quædam, quæ circa historiam eboris fossilis, Halæ Suevorum eruti notari merentur. Atque primum occurrit cornu illud sic dictum, in templo S. Michaëlis appensum, de quo videndum, quale sit. Ex prosapia monocerotis marini illud esse, refutat hujus descriptio à SACHSIO *pag. 70.* allegata: siquidem illud recto itinere in acutum decurrit apicem. Nostrum vero cum recurvum paullo sit, videtur referendum esse ad dentes Elephantinos. Sed deterere, fateor, ab exacta determinatione, nos posset stupenda illius magnitudo, qua quinque adæquat centenarios. Interim periculum faciemus, an ex scriptorum testimoniis, & analogia, huic magnitudini aliquam fidem conciliare queamus? Antiquissima historiarum monumenta, de magnis Elephantis, eorumque dentibus multa litteris consignarunt. ERASMUS

FRANCISCI mentionem facit ejusmodi dentis, 150 libras pendentis; & VARTOMANNUS in Sumatra duos vidit; qui appensi 336 libras pendebant. Nec minoris molis illi fuisse debuerunt dentes, quos testantibus PLINIO, ac POLYBIO in dissitis ac extimis Africae oris incolae, postium palorumque loco usurpant. Quamvis enim Elephanti illius, quam tales dentes indicant, magnitudinis nostris temporibus sint rarissimi, quin vix occurrant: forsitan tamen in remotioribus terris, quas nemo nostratum accessit, reperiuntur, aut forsitan antiquissimis temporibus ita reperti fuerunt. Ceterum & color, & acuminata, recurvaque figura, & cavitas Cornu Halensis, significant, illud ad Elephantinos dentes esse referendum.

§. XX.

Quod attinet ea spodii fossilis fragmenta, quae hodie adhuc circa Halam Suevorum eruuntur, cum primis ea, quae fodina limosa praebet: notari mereatur, quod cuncta & ossa calcinata, & petrefacta, tam ligna, quam animalia plerumque deprehendantur, in terra calcarea, argillacea ac arenaria; quoniam haec illis subjectis fovendis aptissima est. Contra incrustata in terris potissimum tophaceis quiescunt: in *Tuff-Stein*. Deinceps memorabilis est altitudo loci, unde effoditur: quae in hac fodina sex virorum longitudinem superat. Observamus enim, hoc fossile subjectum plerumque insigni profunditate sub terra sepeliri. Possidet etiam Illustris Praeses, dentem elephantinum recurvum, qui in pago quodam, *Esperstedt* dicto, haud procul ab Hala Saxonum sito, super lapideis stratis, profunditate viginti quatuor ulnarum ex terra, cum multis aliis ossibus, in frustra discissis, fuit repertus.

§. XXI.

Quae sub ruinis incendio absumptorum urbis domiciliorum reperta sunt eboris fossilis fragmenta: absque dubio talia fuisse, multa sunt, quae testantur momenta. Primum limus rubicundus, qui sal nitri, ejus spiritum quidam lapidificum vocant, praebet, aptus est ad fovenda talia subjecta. Deinceps animalem ejus naturam testantur, friabilitas, color ex albo cinereus, & quod ab Illustri Praefide carbonibus injectum, foetorem sparserit animale. Nec dubium est, quin frustum illud magnum, septem cum dimidio pedes longum, si integrum fuerit, accuratius ostendisset, ad quod animalis genus pertinerit: de quo tamen iusta est suspicio, Elephantis esse dentem, cum primis, quoniam talis adhuc minor, & reliquis frustis recentior in eodem loco fuit repertus. Ceterum adhuc monere decet, fossile nostrum ubi reperitur, non uni cuidam loco includi, sed late dispergi, claro documento, quod in hisce locis numero plura animantia suum obtinuerint domicilium.

§. XXII.

Addemus adhuc pauca de usu medico nostri fossilis: atque primum quaedam de unicornu veri virtutibus ex Veteribus excerpemus. Hujus enim vim contra venena summam, & fere magicam deprædicarunt, adeo, ut auro pretio aequale olim fuerit aestimatum. PHILOSTRATUS LEMNIUS in *vita Apollonii Thyanei* L. 3. cap. 1. & AELIANUS Lib. IV. de *animal.* cap. 52. testantur, Indos ex illis cornubus fecisse pocula, referentes, nullis morbis, nec veneno affici inde bibentes. Unde Poeta cecinit:

*Unaque in fronte superbi
Cornu, quod Reges Indorum protinus aureis
Orbibus includunt, & vina liquentia potant,
At tum nec morbos uti sentire feruntur,
Nec quæ inter menses occulta hausere venena.*

Verum sicuti existentia ipsius animalis dubia est: ita vires quoque ipsius cornu nullae sunt; & si etiam illud revera existeret, nullam tamen aliam ipsi virtutem attribuire possemus, quam quæ cornu cervi ac ebori recenti inest.

§. XXIII.

Majori fundamento itaque de unicornu fossilis effectu medicinali differere licebit; in quo extollendo valde sunt occupati quidam Medicorum, dum illud effectibus simile pronunciant recenti monocerotis cornui; cum primis si recens fuerit. Notabilis est historia, quam de ea refert PHILIPPUS HOECHSTETTERUS, *eum obs. med. decad. V. casu 9. p. 636.* ita scribit: *Obtulimus duobus canibus aequalis stature, utrique nucis vomicae in lacte drachmam unam, uni eorum vero unicornu veri rasura paullo post ad grana duodecim in eodem succo: ambo convulsi miras sensere contorsiones, a quibus alter, cui cornu exhibitum erat, vomuit, & convulsiones leviores sensit, qui vivus & alacer tertio dimissus est die: alter qui solam nucem sumsit, multis agitated convulsionibus, spatio mediae horae periit. Postera die, ejusdem cornu vires experti sumus in alio cane, cujus convulsio multa, at non lethalis, & hic sine vomitu convaleuit. Ab illo tempore innumera cornua, pro vero monocerotis vendita, probæ subjecti, sed frustraneo effectu &c.* Plerumque fossile hoc pro remedio, contra venena, febres malignas, pestilentiam, insignissimo venditur, cum primis à vulgo: quare cordi gratum esse, idque cum reliquis visceribus laxis roborare, à veneno confirmare, huic adversari, pestem abigere, epilepsiam, syncopen, cordisque tremorem perfanare dicitur.

§. XXIV.

Verum supra laudatus HOECHSTETTERUS *loc. cit. pag. 635.* jam dicit: *Fabulantur de maxima hujus Spodii efficacia, ac si cordis spiritus purificaret, corroboraret, animi deliquio prodesset, malignitati resisteret, & plane eas obtineret vires, quas attribunt cornui monocerotis. Ego hæc spodia, ossa ac cornua ditioribus, & fictis gaudentibus libenter relinquo; fidant iis, quantum & quamdiu libet: mihi cum Cratone cornu cervi placet.* Et huic sententiæ plures Medicorum adstipulantur, nostroque fossili cornu cervi, vel os de corde cervi, vel ebur recens substituunt: uti videre est, apud FRANCISCUM DE VERULAMIO in *hist. vit. & mort. pag. 191.* JORDANUM de *phenom. pest. tr. 3. c. 9. p. 594.* Multi exsiccantem, & adstringentem ebori fossili, maxime quod friabile est, tribuunt virtutem: quare teste BOETIO à BOOT *tr. de lap. & gemm. cap. 243.* ad alvi profluvia, gonorrhœam, fluorem album, hæmorrhagias nimias, ventriculi ac jecinoris laxitatem, vermes enecandos, laudatur; externè ulcera ad cicatrices perducere, ad ambusta & intertriginem prodesse, & in pollinem tenuissimum redactum, & cum lacte oculis instillatum, oculorum lacrymis & lippitudini mederi fertur.

§. XXV.

Nostra sententia non plane omni usu medico carere hoc subjectum autumamus; at cum HOFFMANNO in *Clave ad Schræd. pag. 190.* monemus, ut cum eo prius in canibus periculum faciamus; quoniam facile est, ut ab exhalationibus subterraneis, veneni quid-

quidpiam secum ducat. Fovet illud substantiam terrestrem teneriorem, ac salinam: & cum bolis exacte convenit: hinc adstringendi leniter, exsiccandique virtute pollet; & pulveribus quoque diaphoreticis interne adhibendis, aut temperantibus, in nimis sanguinis & humorum profluviiis, cum fructu admisceri potest. Quod vero ejus vim antepilepticam attinet, de hac multum dubitamus. Quamvis enim remedia, ex animali regno desumpta, specificam omnino in morbis convulsivis, & epilepticis inveteratis

possideant vim: attamen crebra experientia comperit Illustris Praeses, ea non nisi recentia hac laude digna esse; nec ullum os calcinatum, eo effectum pollere. Profecto, si verum fateri licet, commode superfedere possumus ebore fossili; & in ejus locum alia absorbentia, viliora & parabilia quae diaphoretica simul pollent virtute, ab animalibus parata, & recentia & usta, majori commodo & minori pretio substituere possumus.



OPUSCULA PHYSICA

VARIi ARGUMENTI

AD CHYMIAM PERTINENTIA.

DISSERTATIO CHYMICA

DE

EXPERIMENTORUM

QUORUNDAM CHYMICORUM

PERVERSA EXPLICATIONE.

Primum edita anno 1697.

§. I.



Apientissimum PLATONEM suae olim Academiae foribus inscripsisse referunt *ἡδὲ αὐτομέτρως ἔσω*, nullus geometriae expers accedito. Pari ratione Medicæ ac Physicæ scientiæ palatio præfigi possent hæc verba: Nullus Chymiae expers accedito. Etenim Chymia vera naturæ clavis est, quæ intimam corporum essentiam, & elementorum, quibus constant, mixtionem referat atque recludit. Unde merito principalior lateque patens physices pars Chymia est, qua qui destituitur, certe ille parum solidi vel laude digni in genuinis reddendis effectuum atque phaenomenorum naturalium causis efficere potest. In corporis humani examinandis humoribus, eorum mixturis & alterationibus pernoscentis, & functionibus inde emanantibus perspicendis revera omne absolvit punctum, ut non immerito mixtorum anatomia saluari queat, solutionibus, præcipitationibus, miscelis, destillationibus eorum crasin atque indolem enucleans. Verum ut præstantissima hæc ars multorum insciorum contemptu diu neglecta minusque excolta jacuit, ita vice versa, qui illam ipsam omni studio excolendam sumserunt, veris autem Philosophiæ naturalis principiis non imbuti fuerunt, parum lucis tam scientiæ physicæ quam Medicæ exinde attulerunt. Experimenta enim Chy-

mico igne cocta si non diviniore rationis radio & maturata sint, mirum frigent. Quocirca si promovere incrementa harum scientiarum animus sit, philosophia maxime mechanica & Chymica amice invicem conspirare & fideli jungi fœdere debent, cum nulla sine altera commode subsistere queat. In promptu esset, operosius ostendere complures hallucinationes ex neglectu solidioris Philosophiæ per iniquam experimentorum chymicorum explicationem promanasse in aliam Physicæ & Medicinæ scientiam. Sufficiat saltim hoc loco perpauca in medium proferrè loco speciminis inauguralis experimenta & medicamenta Chymica præstantissima, quorum iniquam & perverfam explicationem brevi labore demonstrabo, simul subjungens, quo pacto genuinæ horum causæ reddi ac tradi debeant.

§. II.

Antimonium minerale compositum esse ex partibus sulphureis, inflammabilibus, levioris molis, nec non ex gravibus mercurio vel arsenico analogis, qui in regulum coire solent, neminem, qui e trivio saltem salutavit Chymiam, fugiet. Peropportune mercurialis hæc portio a sulphure per fusionem mediante alcali quodam, quod mirifice se cum sulphure jungere solet, sequestratur in regulum, qui non nisi congeries est partium mercurialium gravitate sua fundum petentium. Simplex appellari solet hic regulus,

quando solis alcalibus salibus, v. g. sale tartari, cineribus clavellatis, nitro fixo, vel nitro & tartaro simul junctis, instituta præparatio fuit. A metallis autem nomen suum mutuatur pro diversa admixtione metalli, quod præparationem ingreditur; unde martialis audit, si antimonium cum limatura martis & nitro fusum fuerit; lunaris vel jovialis dicitur, si vel argentum vel stannum admixtum fuerit. Firmissime hic Chymicorum filii sibi persuaderé solent, si hac ratione cum metallis elaboratio adornata fuerit, regulos identidem de ipsa substantia metallica participare, quod tamen non universale est, uti in sequentibus patebit. Quandoquidem si cum argento negotium instituitur, & duæ partes antimonii, atque una argenti assumuntur, & invicem funduntur in crucibulo, parum vel plane nihil reguli obtinemus, qui tamen nihil continet lunæ, sed argentum cum antimonio transit in scorias, quæ instar reguli medicinalis apparent. Nec ratio difficilis prostat; sulphur enim quodcumque minerale mira affinitate gaudet argenti, ita ut promptissime & intime sese cum ipso nectat atque jungat, ut ægre etiam postmodum per se sine additione divelli queat. Ex hoc fundamento quoque pendet artificium illud non vulgare & expers lucri, facili & sicca via separandi per fusionem argentum ab auro. Ita enim in nostra præparatione sulphur antimonii cum regulo sese intime copulat cum argento, ut regulus paucis secedat in fundum. Ex scoriis additione nitri sulphur consumptis facili negotio revocari argentum potest. Patet exinde, perperam bezoardicum lunare, cui tamen magnæ laudes ac virtutes a veteribus tribuuntur propter lunam commixtam, parari ex regulo antimonii lunari & mercurio sublimato, quæ invicem destillata efficiunt crassum liquorem instar glaciei, qui abstractione repetita spiritus nitri dat celebratissimum hoc bezoardicum lunare, quod tamen neutiquam lunæ particeps est, sed saltem proles reguli antimonii, maxime cum Spiritus salis in sublimato etiam non solvat lunam.

§. III.

Ejusdem quoque valoris est regulus antimonii martis, qui plane omnis substantiæ martialis expers est. In contrarium hinc urgere solent, qui ejus præsentiam adstruunt, quod in majori abundantia generetur, si cum marte antimonium fluat, quam si mera salia in consortium assumpta fuerint. Quibus respondemus, proventum majorem inde resultare, quoniam alcali copiosum terreum, quo mars stipatus, magis fortiter principium antimonii sulphureum φλογιστόν imbibit atque detinet, quam ipsum alcali sal, quod non tantum in sulphur, verum etiam in regulinas partes antimonii agit, unde cum salibus copiosis si antimonium tractatur, parum reguli producit; sed ille simul ingreditur in scorias, ex quibus etiam certa encheirisi iterum separatur. Et compertum est, totum regulum mediante nitro in scorias summe causticas, [ex quibus perpulchra tinctura antimonii acris fortiter obstructions expugnans prodit] redigi posse. Cum marte autem, quoniam non tam prompte sese jungit regulus, hinc major producitur ejus copia. Ulterius autem nobis demonstrandum incumbit, regulum sic dictum martialem de marte nihil completi ac continere; quod primo patet exinde, quia hic regulus a scoriis suis per repetitam cum nitro fusionem bene depuratur, si cum tribus partibus nitri detonetur debita facta elutriatione constituit pulverem albissimum instar cerussæ antimonii, quæ ex regulo antimonii simplici eadem ratione resultat. Quod si autem regulus antimonii martialis sumatur, & hujus uncis duabus saltem drachma una martis per fusionem misceatur, &

cum nitri sufficienti quantitate detonatio fiat, pulvis evadit flavescens ochreus, quem obtinemus etiam, ubi cum regulo simplici idem tentamen instituimus; sat luculento indicio, martem cum antimonio mixtum inque calcem redactum exhibere colorem flavum. Accedit, quod, si aqua regis regulo martiali affunditur, solutionem non imbuat sapore vitriolico vel flavedine saturata, qui effectus exurgit atque observatur, si parum martis regulo antimonii simplici admixtum fuerit. Ex his concludere facile est, quid judicandum sit de bezoardico vulgo martiali, cui ceu basi perperam nritur regulus martialis. Miscent enim cum hoc æquali portione mercurium sublimatum, & destillant liquorem sic dictum glaciale, qui confundendo spiritum nitri dat præcipitatum, quod cum decenti spiritus ejus abstractione transit ex illorum sententia in medicamentum antimonio - martiale albissimum, quod tamen nil nisi bezoardicum saltem minerale est, & ne granum martis ob superius dictam rationem complectitur. Ex hisce etiam jam adductis liquidissime apparet, in quantum decipiantur Alchymistæ, qui mercurium suum sophicum, ex regulo antimonii martiali cum mercurio communi, additis binis Dianæ columbis, quæ vel duæ partes lunæ vel salium sunt, conficere & solari igneo sulphure, quod in marte credunt, imprægnare gestiunt. De regulo veneris illud notabile est, quod de suo metallo etiam parum participet, dum omnis ferme venus adjecta remanet in scoriis; in hoc tamen a martiali & simplici differre videtur, quod, si cum auro fundatur, & vehementiori igne dissipetur, vel solo nitro adjecto in puncto temporis in calcem redigatur, auro colorem rutilantiorum conciliat, quam si negotium instituat cum solo antimonio. Quod reguli jovialis examen attinet, hic omnino a stanni consortio non est immunis; quod patet maxime exinde, quia cum nitro calcinatus in calcem leviter coeruleum abit, quæ antihectici Poteriani nomine venit. Et memoratu dignum, stannum, ut levissimum sit metallum, tamen cum antimonio fusum semper petere fundum, adeo ut etiam auro immixtum ab ipso mediante antimonio non queat sequestrari, cum tamen venus, mars, luna, auro immixta associatione antimonii sequestrari queant. Aurum autem solum est, quod integrum & totum transit in regulum, si rite operatio facta fuerit, ex quo etiam integro pondere brevissimo temporis spatio purissimum & rutilantissimum reducitur.

§. IV.

Medicamentum apud Medicos & Pharmacopœos quam notissimum est tinctura salis tartari, quæ etiam in dies a practicis solet præscribi. Creditur vulgo hæc colorem suum habere ex sale tartari. Quamvis itaque hujus tincturæ vires in abstergendis primarum & urinarum viarum sordibus frequenti experimento, si in conveniente quantitate assumatur, satis conspicuæ sint, dependentes a sale tartari subtiliori in spiritu vini etiam rectificatissimo soluto frequenti digestionem ac macerationem. Illud tamen urgeo, tincturam hanc cum colore suo minime a solo sale tartari esse, quatenus purum & sibi relictum est, sed ab aliis corporibus heterogeneis sibi immixtis. Scilicet quando sal tartari recens paratum ex tartaro usto, & ad summum candorem in furno figulino per aliquot dies calcinatum, ut sic reddatur candidissimum, assumatur, ipsique affundatur spiritus vini rectificatissimus, nullus color aureus, nullum sal, diligentissima etiam adhibita digestionem, in spiritum vini transit, sed ille limpidus manet, vel levissima saltem flavedine imbuitur. Quod si autem sal tartari, quod

quod non adeo calcinatum & depuratum eſt, ſed, quod paulo impurius, atque oleoſum principium ex oleo tartari foetido in poris ſuis adhuc recondit, recipiatur, tunc optime ſuccedit negotium & ſaturata rubro colore evadit tinctura, dum ſal alcali ſic ſulphureum redditum prompte recipit accedente digeſtione ſpiritus vini: ſimili ratione, ſi ſal tartari album puriſſimum fundatur in crucibulo, & parum additur de pulvere carbonum vel alio pinguedinoſo ſulphureo corpore; protinus recipit omnem pinguedinem & tranſit in ſal ſulphureum, colore & ſapore a priore alteratum. Hoc injectum in ſpiritus vini rectiſſimum in ipſo ſolvitur, quanvis non per totum, & ſaturato colore flavo, aureo, vel etiam rubro, ac ſapore alcalino ipſum implet. Pharmacopœi nonnulli hac utuntur encheiriſi, & caput mortuum ſpiritus tartari in ignem apertum injiciunt & fortiſſimo igne ad albedinem illud calcinant, cui jam multæ particulæ carbonum aſſociantur, poſtmodum ſal hoc in crucibulo fundunt, & ex tali præparant tincturam ſuam tartari. Adeoque veriſſimum manet illud axioma chymicum: Nullum ſal, quod puriſſimum eſt, & a ſulphuris conſortio tam mediante libero aëre quam igne liberatum, tranſire in ſpiritus vini & ab eo ſolvi. Simul ac autem amicam init copulam cum oleoſo vel pinguedinoſo quodam principio, ſtatim aptum & capax redditur ingrediendi poros ſpiritus vini. Sic curioſum eſt, quando drachmæ duæ ſalis tartari miſcentur exactiſſime cum drachma una olei deſtillati, & huic mixturæ affunditur ſpiritus vini rectiſſimus, totum ferme ſal abire in ſpiritus vini, cum tamen citra aſſociationem cum oleo totum ferme remanet, & plane copulam ſpiritus vini reſpuit. Ex quo fundamento maxime dependet legitima ſal volatile oleoſum præparandi methodus, cujus præparationis genuinæ notæ ſunt, ut cum aqueo menſtruo non præcipitur, ſecundo ratione odoris temperatum ſit, nec tam copioſum ſal volatile ſpiret, & vino Rhenano inditum ipſi perpulchram inducat rubedinem. Inſtare hic quidam poſſunt, quod ex nitro cum regulo antimonii fuſo mediante ſpiritu vini etiam tinctura queat parari, cum tamen ibi ſulphureum principium deſit. Quibus reſpondemus, regulum antimonii non penitus eſſe depuratum a ſulphure, uti nec eſt ſulphur antimonii a regulo ſuo. Et quod ſulphur adhuc inſit, exinde clarum evadere arbitror, quia nitrum tali tractatione degenerat in ſal alcalinum ſumme cauſticum, cujus geneſis dependet maxime a combinatione intima terræ alcalinæ, ſalis acidi, & principii ſulphurei.

§. V.

Ex antimonio elegantiffimum coloris ſanguinei & odoris ſuaviſſimi parari ſolet certa encheiriſi baſamum paucis adhuc notum, quod vires præſtantiſſimas in medendo uſu tam interno quam externo exſerit. Præparatio autem eſt talis: extrahitur ex ſcoriis reguli antimonii cum ſale alcalino fixo paratis mediante aqua ſal ſulphureum, dum ſolutio filtrata leni calore inſpiſſatur. Hujus ſalis recipitur uncia una cui olei juniperi, menthæ, aniſi, ana uncia duæ ſuperfunduntur, addita ſpiritus vini rectiſſimi uncia una. Hæc invicem probe mixta induntur retortæ vitreæ, & leni arenæ calore digeſtio per xii. horas inſtituitur, ita ut forſan unica uncia olei exſtillet. Deprehenditur ſic in retorta baſamum inſtar ſanguinis rubicundum, paulo craſſius, elegantiffimi odoris, nec ingrati ſaporis, quod ad guttas vj. vel viij. interno uſu commendatiſſimum eſt in doloribus, præſertim colicis, & etiam nephriticis, cæteris paribus. Externe vulnera citiſſime ſanat; convenientiſſimum autem apprime eſt læſionibus partium

nervofarum ac tendinoſarum, a quibus periculofa avertere ſolet ſymptomata, tophos quoque in arthritide quam promptiſſime emollit magnæque efficacia diſſolvit. Commodior autem hujus baſami uſus eſt, ſi refracta doſi adhibeatur, & ſaltim paucæ guttulæ, in tinctura tartari vel ſpiritu vini rectiſſiſſimo aut ſpiritu ſalis ammoniaci vinoſo ſolvantur, vel elixiriis aut eſſentiis pro affectuum & circumſtantiarum varietate addantur. Quoad fundamentum præparationis omnes ſibi perſuaſum habent, quicunque baſami hujus confectionem callent, tantam & tam pulchram rubedinem non modo, verum etiam virtutem eſſe ab extractione ſulphuris antimonii deducendam. Verum pace ipſorum dixerim, parum vel nihil plane hoc baſamum participare de ſulphure antimoniali. Parum enim tingit argentum hoc ſive purum ſive cum cupro mixtum, quod tamen ſolenne eſt omni ſulphuri minerali ſoluto. Si autem rubedinem ſuam exinde haberet, maxime etiam atro colore, imprimis ſi ignis calor accedat, argentea vaſa inſicere deberet. Deinde etiam tam pauca quantitas ſulphuris ſali alcalino inhærens tam ſaturatam rubedinem communicare oleis minime poteſt. Ut autem ad oculum demonſtrems, a ſulphure antimonii neutiquam ſolum deduci ac derivari debere hos effectus: fumatur loco ſalis ſulphurei ex ſcoriis antimonii extracti purum ſal tartari, ſeu ſal alcali ex cineribus clavellatis ſolutis paratum, quod fuſum eadem quantitate indatur oleis prædictis, & negotium ſimili ratione inſtituatur, ſic evadit ejusdem indolis, coloris, virtutiſque baſamum; ut adeo ſolum ſal alcali mediante debita digeſtione texturam oleorum ſic intime alterando atque ſubtiliſando tam egregium ac penetrans hoc producat remedium. In memoriam hoc loco quoque incidit mihi præparatio auri ſic dicti potabilis cum oleis quibuſdam deſtillatis aromaticis, quod ceu ſumum confortans celebratur atque commendatur. Videlicet aurum ſolvitur in aqua regis, ſolutio filtrata inſpiſſatur in phiala convenienti calore, poſtea urgendo ignem vehementius in crucibulo arena repleto aſcendit ſublimatum ad parietes phialæ flavescens, quod in aëre aperto promte abit in deliquium; hujus drachmæ ſemis affundantur olei cinnamomi vel olei corticum citri recentis drachmæ tres; leni calore in retorta hæc foveantur per x. ad minimum horas; ſic oleum tingitur rubineo colore, & verum aurum creditur potabile. At vero nihil participat de auro, quod revera totum ex capite mortuo in phiala relicto integro pondere reduci poteſt. Rubedo autem unice dependet a concentrato acido aquæ regis in partibus auri; nam concentratus nitri ſpiritus cum oleo quovis deſtillato mixtus, digeſtione prævia oleum tingit ac imbuat colore rubicundiſſimo.

§. VI.

Curioſum experimentum eſt, oleum vitrioli aquæ inſuſum, vel etiam glaciei additum magno cum calore ac æſtu invicem ebullire, cum tamen utraque actu frigida ſint corpora. Hujus phaenomeni ratio admodum torſit Philoſophorum & Chymicorum ingenia. Plurimi exiſtimarunt, oleum vitrioli eſſe ſpiritum vitrioli concentratum, cui copioſæ particulæ ex vitriolo martiales, igne fluorem adeptæ, inexiſtunt. Judicarunt itaque, efferveſcentiam exinde dependere, quoniam aqua ſal acidum diſſolvit, quod deinde diſſolutum agat in partes martiales, cum quibus deinde conſictum & hunc ſequentem colorem conſtituat. Verum enim vero etſi probabilitatis ſpeciem continere hæc ratio videatur, minime tamen aſſenſum mihi extorquet. Complura enim ſuperſunt dubia, quæ comprobant, particulas martiales ſalva ſua

textura nequitiam inharere oleo vitrioli; minime enim hæc salva sua textura cum acido coexistere queunt. Posito enim hoc sequeretur, ut post effervescentiam aquæ affusionem subsequenter subsequi debeat sapor vitriolicus, seu vitriolum ipsum, quod resurgeret ex solutione martis cum acido vitrioli facta, quod tamen minime evenit, sed potius post affusam aquam in oleum vitrioli præcipationem magis, quam solutionem subsequi deprehendimus. Hinc alia effervescentiæ hujus quærenda est ratio, & nec absolum videtur statuere, salia acida concreta fixiora omnique phlegmate orbata sese habere instar salium alcalinorum ad extremum ustorum, vel corporum terreorum, uti calcis vivæ, concharum, matris perlarum, vel cuiusdam capitis mortui extrema ignis tortura usti, quæ cum quovis humido affuso efficiunt cum calore aliqualem [prout corpus illud magis vel minus ustum fuit] ebullitionem; & quod magis sententiam nostram probat, est, quod oleum illud vitrioli, cum quo experimentum instituitur, debeat esse recentissimum, & ab omni phlegmate liberatum; hoc vero si sit vetustius, diuque in aëre steterit, nisi denuo ab humido illo ab aëre communicato privetur, operatio omni successu caret. Idem etiam accidit in calce viva aliisque terreis extreme calcinatis, quæ si diu aëri humido exposita fuerint, tandem efficaciam suam amittunt, nec amplius cum aqua incalescentiam ac ebullitionem excitant. Quod autem oleum hoc vitrioli recens paratum effectum hunc producat, rationem hanc esse dicimus, quod acida fixa non secus ac alcalina & terrea superius dicta omnique humido exhausta poros habeant materia ætherea copiose refertos, quos si gravitate & uno impetu ingrediatur aqua, materiam ætheream magno cum impetu simul ac semel expellat, ex cuius deinde attritio & impetuoso motu demum subnascitur calor. Quod autem phænomenon hoc non succedat, si oleum vitrioli diu in aëre steterit, hanc rationem reddimus, quoniam successive pori humido aëris replentur, non aliter, uti in calce viva id fit. Et memoratu dignum est, oleum vitrioli non minus ac butyrum antimonii, longo tempore asservatum ponderis sui pati incrementum, nec non subsequi quandam partium ad fundum præcipationem.

§. VII.

Circa oleum vitrioli hoc ulterius notandum venit, quod perperam illud distinguant in oleum album & rubrum, cum nulla realis inter hæc sit discrepantia, sed omne recens paratum album est. Flavum autem vel rubrum colorem facile suscipit, quando vel tantillum corporis, quod phlogiston & inflammabile principium est, injicitur. Ita parum chartæ bibulæ vel straminis rubedinem ipsi conciliare potest. Acida enim cum oleoso principio mixta promptissime constituunt colorem rubrum. Sic spiritus vitrioli cum spiritu tartari oleoso acri recenter destillato mixtus brevi temporis spatio liquorem reddit rubro colore indutum; ut adeo mixtura simplex ex spiritu vitrioli, theriacali, tartari parata rutilantem suum colorem, si legitime processeris, non ab alterius corporis injectione, sed ex propria mixtione mutuari & acquirere debeat. Quocirca in inani consistunt persuasione illi, qui oleum vitrioli rubicundum præferunt albo, quasi sulphur ex vitriolo martis abundantius possideat, cum ille color non tam a sulphure martiali, sed a reactione acidi in corpus sulphureum, lucis radios vario modificante originem suam petat.

§. VIII.

Notissimum apud Chymicos est illud phænomenon, quod aqua fortis vel spiritus nitri confusus cum anti-

monii butyro intentissimum calorem cum forti ebullitione & exhalatione vaporis flammei nec non præcipatione mercurii vitæ suscitet. Nonnulli pro destruenda illa doctrina aliquot ab annis inter eruditos ventilata de acido & alcali, (quæ pro veris venditabantur principiis) experimentum hoc in subsidium vocarunt, quo demonstrare atque efficere annisi sunt, non omnem effervescentiam fieri ab acido & alcali, sed acidum etiam cum acido congregi ac effervescente. Verum ut in hujus hypotheseos partem minime accedam, experimentum tamen, de quo diximus, minime idoneum est labefactare illorum sententiam, quæ potius aliis armis expugnari debet; etenim effervescencia hæc non derivanda venit a concursu duorum acidorum in se invicem agentium, sed longe ab alia causa fluit. Ex miscela nempe spiritus nitri & spiritus salis in butyro antimonii contenti, quod non nisi antimonium est in spiritu salis solutum, resultat aqua regis, quod patet maxime, si confusa hæc invicem destillantur; tunc liquor aurum perfecte solvens elicitur. Perspectum autem apud omnes Chymicos est, aquam fortem vel spiritum nitri minime effervescente cum antimonio vel ejus regulo, sed vehementissime id efficere aquam regis. Sicuti autem spiritui salis inditum nitrum identidem aqua regia pro sole solvendo emergit, ita quoque nitrum pulverisatum ipso butyro additum eadem ratione constituit aquam regis, quæ cum antimonio ebullitionem excitat. Præcipitatio in experimento, quod laudavimus, evenit, quoniam spiritus salis cum nitri terra vel etiam spiritu nitri sulphureo se intime conjungit; unde non potest, quin ex poris portio antimonialis contenta primum præcipitetur, postmodum autem ipse liquor supernatans hanc calcem antimonii aggreditur, & cum ipsa effervescentiæ motum concitatum efficit.

§. IX.

Cum de effervescencia hic ago, memoriam subita alia species effervescentiæ, quæ observatur in commixtione spiritus nitri summe concentrati & spiritus vini rectificatissimi. Notavit *Excell. Dn. Præf.*, cum semel hos spiritus invicem miscuerit pro conficiendo altero mane spiritu nitri dulci retortæ vitreæ incluse-rit, illamque arenæ adaptaverit, sua sponte destillatum fuisse per noctem spiritum nitri penetrantissimum ad dimidiam mixturæ partem. Rationem hic reddere solent vulgo hanc, quod sal volatile recondat quoddam spiritus vini, quæ tamen explicatio mihi ex æquo non satisfacit. Crediderim potius, spiritum nitri concentratum effervescente cum spiritu vini propter oleositatem; nam spiritus vini omnesque *φλογιστοι* vegetabilium nihil aliud sunt, quam olea ætherea sub fermentatione intime dissoluta, & cum phlegmate juncta, ut prolixius rationibus & experimentis id evincere studuit DAVID VAN DE BECK in cip. Libr. I. pag. 14. & sequent. Olea autem destillata, uti v. g. terebinthinæ, juniperi, similiaque, non tantum cum oleo vitrioli, verum etiam cum bono spiritu nitri in aqua forti dephlegmata, levi accedente calore maxima cum spumescentia conflatum exerunt, atque in substantiam resinofam inflammabilem inque spiritu vini solubilem transeunt. Hujus sulphuris & olei dissoluti ratione spiritus vini rectificatus salis acidi spicula & acies in spiritu nitri, vitrioli, salisque, temperare & mitigare solet, ut corrosivi hi spiritus mediante hac spiritus vini copula dulcificantur & mitissimam induant naturam, quoniam omne oleum propter contextum suum anfractuosum & ramosum prompte excipere & quasi in vagina recondere solet acidi spicula.

§. X.

Uterius curiositate ſe mirum commendat experimentum, quo ex metallo quovis rubicundum ſulphur ejuſdemque coloris tinctura confici poteſt ſequenti ratione: Sumuntur ſalis Glauberiani, quod ex oleo vitrioli & ſale communi decenti encheiriſi paratur, partes tres, limaturæ martis vel veneris aut lunæ pars una; hæc fluant in crucibulo; addatur pulveris carbonum pars una ſemis, effunde materiam, quæ ſanguineum refert colorem inſtar hepatis ſulphuris, ſaporem præbet alcalino-ſulphureum. Huic materiæ pulveriſatæ ſuperfunditur ſpiritus vini rectiſſiſſimus, & digeſtione debita evadit tinctura elegantiffimi coloris rubicundi, odoris ac ſaporis non ingrati, parum tamen ſulphurei; virtute fulget egregia aperitiva, diuretica & præcipitante. Simile ſal ſulphureum & ejuſdem conditionis tinctura ex quovis metallo ſimili ratione parari poteſt, quod pro ſummo arcano olim venditatum fuit. Verum enim vero admodum decepti ſunt illi, qui crediderunt ſulphur hoc eſſe extractum ex ipſo metallo, cum potius illud ipſum regeneratum ſit ex ſulphuris acido, quod in oleo vitrioli continetur, & ſal Glauberianum ingreditur, nec non ex principio phlogiſto in carbonibus contento. Quod autem tali ratione verum ſulphur minerale artificiale parari & regenerari queat, curioſe non minus quam ſolide variis argumentis & experimentis id deduxit *Excell. Dn. STAHLIUS in tract. de fermentatione*, ubi ex tartaro vitriolato & carbonibus ſulphur minerale & inflammabile reſuſcitatur. Adeoque noſtra tinctura metallorum non ex metallico ſulphure arceſcenda eſt, ſed potius ex ſulphure tali modo regenerato, & mediante terra in ſal alcali converſo, colorem ſuum acquirit; adeo ut tinctura hæc metallorum ratione virtutis & effectus non differat a tinctura ſulphuris leniore.

§. XI.

Tandem coronidis loco quædam circa ſalia vegetabilia fixa, illorumque generationem, ſubjungenda ſunt. Inſignis inter Chymicos fuit diſſenſio & ſententiarum divortium circa geneſin ſalium fixorum, dum quidam formaliter exiſtere in vegetabilibus hoc ſal perſuaſum ſibi habuerunt, alii vero ex intima unionione particularum terreſtrium cum partibus urinofis volatilibus in ipſo concremationis actu illud reſurgere

arbitrati ſunt. Nonnulli ex terra cum acido mixta & per flammam juncta originem deduxerunt. Noſtra ſententia hæc eſt, ipſa nihil aliud eſſe, quam ſalia plantarum tartarea ex acido & terra conſtantia, cum principio phlogiſto oleoſo, miniſterio flammæ ex corpore concremabili eduſto, intime unita ac copulata. Evincere id poſſunt ſequentia: utpote omnia vegetabilia, quæ ſal ſic dictum tartareum eſſentiale copioſum continent, & hujus ratione martem aggrediuntur ipſumque ſolvunt, ac in tincturam redigunt, mediante concrematione copioſum ſal fixum elargiuntur, & ex adverſo, quæcunque vegetabilia ſale talis modi tartareo acido inſtructa non ſunt, ſed illud ſub jugo ſalis volatilis oleoſi hæret, uti in herbis antiſcorbuticis & aromaticis id accidit, parum vel nihil ſalis fixi concedunt. Quod autem acidum tranſitum faciat expeditum in ſal fixum, mediante oleoſo principio, clariſſime edocemur ſequenti experimento; dum ex cremore tartari acido & ſale eſſentiali acetofellæ ſumme acido, ſola fuſione in igne vel deſtillatione copioſum ſal fixum fit, quoniam oleum mediante igne ex cremore tartari elicatum intime miſcetur cum terra alcalina & acida tartari. Hac ratione etiam ex ſale tartari, ſale digeſtivo Sylvii, tartaro vitriolato, ſale Glauberi, nitro ſolo vel cum oleo vitrioli mixto magna quantitas ſalis pure alcalini haberi poteſt. Quod autem porro fixa nihil aliud ſint, quam ſalia media, tartarea, mediante phlogiſto principio unita & metaſchematiſmum paſſa, exinde etiam convincitur, quando hæc terra ſulphurea ſucceſſive ſeparatur, quod fit per lenem calorem & aëris acceſſum liberum, atque exhalat, ſal alcalinam ſuam naturam, quadantenus deponere, & in ſal neutrum, ſali medio analogum, tranſeat, de quo experimento videri poteſt KUNCKELIUS in *Chymia philoſophica* pag. 247. Ex quibus deinde facile conjicere atque argumentari licet, quo pacto in corporibus noſtris ab alimentis acidis vel illud recondentibus aſſumtis, generetur primo tartareum ſal, multarum obſtructionum & affectuum elementum, ex quo demum ſacili tranſmutatione ſal fixum alcalinum, quod in ſcorbuticis & illorum excrementis abundantiffimum reperitur, confici poteſt. Quæ materia re vera ulteriorem atque ſingularem requirit indagacionem; ſed ſufficiant hæc hoc loco.

C O R O L L A R I A.

Duo dantur rerum naturalium principia, fluidum ſcilicet & ſolidum.

Fluida ſunt æther & aqua, ſolidum eſt terra.

Principia Chymicorum duo ſaltem ſunt ſulphur & ſal.

Unum ſaltem datur acidum primogenitum in rerum natura, ex quo omnia reliqua ſuam habent originem.

Unum ſaltem datur ſal volatile in regno animali.

Unus eſt ſpiritus inflammabilis, qui paratur ex vegetabilibus per fermentationem.

Omne ſal alcali fixum eſt artificiale.

Omne ſal ſecum habet ſulphur.

Terra, ſal, ſulphur & aqua ſunt principia omnium mineralium.

Omnia mineralia volatilia ſunt.

Omnia metalla per ſal & ſulphur reddi poſſunt volatilia.

Vitriolum terræ, ſal commune aquæ, nitrum aëris magis progenies eſt.

Uti ſalia, ſic quoque ſulphura regenerari poſſunt, & ita etiam omnia mineralia.

Ex omni corpore poteſt fieri vitrum.



DISSERTATIO MEDICA

DE

SALIS VOLATILIS GENESI, USU ET ABUSU IN MEDICINA.

Primum Edita Anno 1696.

PROOEMIUM.



MOTUM esse, qui ceu sororio vinculo reliquis corporum effectricibus formarum causis combinatus, in vastissimo hocce extenso sub corporum mira varietate ceu Protheus nostris ludat sensibus, iisque tantum non illudat, nemo unquam abnuet, rerum causas qui expendere suevit curatius. Situm namque, figuram, ac magnitudinem ubi dixeris, dabis equidem aliquid rerum causæ a motu diversum; situatum vero, figuratum, sub hac illave magnitudine spectatum corpus unde habebis, si non a motu? Ita immergitur quasi vasto formarum oceano, ac ubi evanidus submersusque veluti putatur, subito emergendo suam circa nos mutat catastrophem, atque quod suarum est partium, oppido explet. Ita quod nullibi, universo tamen infusum undiquaque idem versando, tot figurâ, tanta mole, tali situ, quæque sua disposita specie ac ordine producit corpora, ut haud abs re, mundum esse concatenatam congeriem corporum & corpusculorum, optime pronuncietur. Quod enim alias divinæ constantiæ ex liberrimo ejus placito gerit characterem, quod permanens est ac perenne (intelligo hoc universum,) id ex ejus lubitu, fluxilitatis sinu suo fovet semina, corruptionis parentem, scil. motum. Duræ namque ac solidæ corporis partes cum ratione suæ figuræ ac magnitudinis ita adaptari neutiquam possunt, quin ex earundem situ ac positu diverso multiplicia oriantur spatia, a minimis replenda corporibus, nec eorum situs ubique rectus & idem sit, impulsus tamen experiuntur, & continuo torrente concutiuntur, tremuloque feruntur motu, eoque tantum non auferuntur, ipso mutationis ac corruptionis autore, motu; egregie id confirmante *Illustri BOYLEO Tract. de Atmosphæris corporum*; nec non adamantino id firmante robore, quando observationem de *Adamante, flavam suam mutante maculam*, posteris reliquit. Salium volatilium usum & abusum, dum inaugurali hocce themate ostendendum sumsi, varium illorum motum in ordine ad corpus humanum pandere gestio, unde usus ac abusus, ortusve eorundem luculenter pendeat. DEUS vero annuat cœptis in nominis sui gloriam, ægrorumque salutem!

§. I.

Minimorum corporum efficaciam ac vim in maximis ac stupendis corporum effectibus quis perspicaci adeo undiquaque perspexit ingenio? Ecquis mente sua cum tenuissimarum partium figuris ac magnitudinibus adeo in diversa abiit, ut terminum harum affecutus admirationem omnem excutiat, earumque scrutinium in posterum habeat insuper? Tene valde est corpus, nec quamdiu cum sui coharet parte, divisionem abnuens, quando mole minimum maximorum nihilo secius corporum effectus multis præcellit parafangis, paradoxon forte videbitur iis, qui vel nunquam attendere ad stupendum auri fulminantis sonitum atque efficaciam; neque quorum mentem subiit, ubi unicum granum auri & flanni solutum debite aliquot mensuras aquæ rubineo colo-

re tingit; nec qui unum mercurii sublimati corrosivi granum amphoras aliquot aquarum suâ austeritate imbuere expertus; nec denique quod unum colocynthidis momentum immensum liquoris spatium effluviis suis contaminare soleat. Et quem non ad stuporem evehit, minimarum sphaularum aërearum expansiva vis, renitentia, & pondus, usque adeo, ut nullum fere sensibus ingeratur phænomenon, cui natales non tribuat aër? Testantur siquidem id experimentorum antliæ pneumaticæ fausti successus, ac totidem veluti symbola afferunt ad gravitatem aëris in sublunaribus ostendendam. Confringit namque ille robustissima vitrorum latera, ut evanuisse potius, quam adhucdum existere ejus partes asseverares; quid denique in corporum gravissimo, hydrargyro, ultra consuetum stationis terminum compressa in campana beneficio antliæ aëris vis polleat, iis,

his, quibus haud læva experimentorum suppetit manus, oppido liquet. Et quid non præstat elastica aëris vis circa vegetationis plantarum negotium, utpote illa succos subtilizando ac præparando ratione gravitatis in tubulos plantarum eisdem impellit, promovendo illos in omnes vegetabilis tubulos, atque utriculos. Nostri denique membrorum motibus non minus quam humorum circulo ac secretionibus quod succenturietur aër, id comprobat fluidum omnium viventium commune pabulum sua necessitate.

§. II.

Difficillimam equidem conceptu reputaveris elastici aërei in terram efficaciam; efficax tamen est sua expansione, dum eandem vegetatione irradiat. Quemadmodum enim terrearum partium arcta adeo unio est ac copula, ut quo plus earum partium majoribus sub punctis & superficieculis eveniat contactus, eo major soliditas exsurgat. Ita aër operationem suam in terram fido interprete lubrica ac tenui nimirum aqua exequitur variis modis; tenues enim ac fluidæ in omnem regionem flexiles aquæ partes facile implicantur ramosis aëris sphaeris, utpote quibus prementis atmosphæræ pondus omni momento incumbit, quæque non politam ubique relinquunt superficiem, sed dum aliæ partes aliis eminentiori positæ sunt angulo, quid rationi magis consonum est, spatiola illa ab elasticis aëris occupari particulis, quæ dum ultra aquæ superficiem planam depressæ, cum tenuissimis aquæ particulis facillimam ineunt unionem ac foedus; quam miscelam atque unionem aëris & aquæ egregie probat BOYLEUS, ubi externi aëris remoto pondere bullulas aëreas ascendere observavit, eoque majores, quo magis appropinquarent ad aquæ superficiem. Hocce unitus socio dum aër continuo tellurem nostram premit, ac premendo ejusdem explet poros, flexiles vero ac lubricæ partes eisdem laxando aditum apparant aëri; ubi cum sphaerulæ ejus aëreæ ob pororum terræ tum angustiam tum angulositatem in arctius collectæ spatium constriunguntur, majori vi ac renitentia versus pororum latera nitendo disjungunt, dividunt, magisque ab invicem remonent terrestres pinguesque partes, ut eo ipso majorem acquirendo superficiem majoris exponantur aëris actioni, qui confringendo ac mutando partium figuram generat atque inducit variam; hæ equidem oblongæ, teretes, atque acuminatæ, illæ sphaericæ, triangulares, quadrangulares evadunt, aliarumque partium indefinita oritur forma atque figura, quæ, prout diverso miscentur modo, mox hos illosve motus sui fortiuntur gradus.

§. III.

Terra igitur tanquam divisionis est subjectum & materia, atque quo majori activitate aëris elasticitas sese in eandem exferit, partiumque oritur motus, earundemque divisio major, utpote quædam a terræ compedibus magis liberæ, magis ligatæ ac vinctæ aliæ existunt, eo major diversitas figurarum oritur, ut mox hoc illove veniant salium titulo; hæ fixæ, illæ volatiles, hæ magis rigidæ, angulares ac scindentes, illæ vero tenues, acutæ, oblongæ ac scabritie aliquali præditæ, illæ motus vi magis veloces confringuntur, hæ vero segniores, terreo adhucdum vestiuntur pallio, illæ urinosa ac alcalinæ, hæ vero acidæ, stypticæ atque austeræ evadunt. Ita fere, ut, quo magis liberatæ fuerint a sua terra, salium volatiliū superbiant nomine; quo vero magis eidem immerse, austeri acidique salis gerant characterem.

Frid. Hoffmanni Oper. Supplem. II.

§. IV.

Sub duplici autem salium classe reliquorum militant species, utpote quæ vel ad urinosa, vel acida, vel denique enixa referenda sunt. Volatilis autem hoc loco scrutabimur genium, ubi consideraturi sumus ejus figuram, motum, ac magnitudinem, altero veluti oculo respicientes ad ejus fixationem ope acidorum, usum denique & abusum; ultimi vero, scilicet enixi, generationem & differentiam.

§. V.

Motus igitur cum omnium ac singulorum effectuum hujus sit causa, pro vario autem subjecto, in quo hospitatur, seu pro varia ejusdem determinatione ac directione varium fortiatur effectum; nulla vero præexistant salia, quæ suum esse non recipiant ab elastico ætheris motu: hinc pro variis mixtorum contemperationibus, vel situ, nexu, ac magnitudine partium mutatâ varia exoriri salium genera, evidens est. Sic quis vel haud semel animadvertit corporum fermentationi obnoxiorum varia producta? Imo quis non mirabitur, tot a se invicem diversa ab eadem provenire causa, ab eadem scilicet ætheris actione? quam diversam asseruero, ubi ad corporum fermentescibilium attendere vel situm, magnitudinem partium, vel figuram. Illas enim sine dubio particulas, quæ ceteris paribus ad motum ætheris suscipiendum magis aptæ natæ sunt, dum ejus elatere ac nisu hinc inde in corporum poris agitantur, neque ob detorsum ac irregularem nexum ac situm partium poros corporum liberior evadere possunt, dum miscentur quassanturque, conteri dividique varie necesse erat, ut, quicquid terreum in suo sovent sinu, propter angustos viarum ductus deponant, atque sic in libertatis statum vindicatæ vel salis volatilis, vel olei, vel spiritus nomine venire soleant. Ita cum inter pororum oblongorum latera comprimuntur, oblongam quoque vel acuminatam vel latam ac scindentem nanciscuntur superficiem. Aliæ enim tardiori, aliæ velociori per fermentationem motu franguntur, attenuanturque, ut magna terræ quantitate relicta liberrimum aëris subeant domicilium; quare motum salium volatiliū velocissimum, magnitudinem vero minimam esse oportet.

§. VI.

Velocioris proinde citatiorisque motus aliæ præ aliis aptæ sunt particulae, & quæ animale, vegetabile, ac minerale constituunt regnum, ceteris paribus in uno magis volatiles, in altero fixiores existunt. Animale regnum quod attinet, ejus particulae id constituentes magno velocique cientur motu, & non adeo arcte ac compacte sibi coherent, ac proinde magis dividi aptæ, maximam tum spirituum tum salium volatiliū nobis suppeditant copiam; ex sanguine enim & fero, urina, carne, ossibus, pilis ac unguibus sat magnam obtinemus quantitatem, ut sunt spiritus urinæ, sanguinis, cornu cervi, eboris, capillorum, &c. quæ urinosa seu alkalium nomine prostant. Huic succenturiatur regnum vegetabile, quod amplissimam pariter salis volatilis largitur segetem, qui imprimis acquiritur ex herbis aromaticis, ut rore marino, spica, serpillio, mentha, majorana, semine erucæ, &c. Tum denique minerale regnum, quod spiritus ac salia quidem suppeditat, magis tamen fixos ac acidos, quam volatiles, ob partium suarum terrestritatem sibi adhuc conjunctam, & velociorem ætheris motum deficientem.

G

§. VII.

§. VII.

Hospitari vero salia in terra, communi eorum matrice, variis patefcit experimentis, si ad ejus depurationem ac volatilisationem, ligationem ac præcipitationem adverterimus mentem. Hinc salium volatilium animalium particulæ terrestres propter motus pernicitatem relictæ sunt sibi ac depositæ, quod patet in spirituum rectificatione ac salium subtilisatione. Quo altius enim cucurbitæ collum & angustius, ac quo altius capitellum positum est, eo purior magisque penetrans obtinebitur spiritus ac sal volatile. Hinc camphora, quæ nil nisi sal volatile oleosum est, luculentum affert testimonium terreitatis suarum partium, quod scilicet in fuliginem nigram sublimatione converti possit. Sic spiritus vitrioli & salis cum spiritu vini rectificatæ mixti destillati ad ficitatem terreum aliquod magma relinquunt. Oleo denique vitrioli & salis si aquam affuderis communem plurimarum terrearum partium præcipitatio fit; quod ulterius confirmat salium genesis, dum corpora antea per solutionem sale suo privata, ac aëri denuo exposita novo embryonantur sale. Imo ex eo quoque pendere videtur, quod spiritus acidi minerales præ reliquis solvendi durissima metalla privilegio gaudeant, quod scilicet rigida ac magis acuta sint eorum spicula, quæ sub majori materiæ quantitate ac mole majoris motus ac impetus capacia sunt irruendi in corporum poros ad particulas dirimendas, ut eas secum, destruendo eorum nexum, auferant, suo in sinu abscondant, oculisque subducant.

§. VIII.

Salis volatilis naturam & essentiam constituunt partes subtilissimæ, ac quarum latera ramulis ac eminentiis hinc inde conspicua sunt, quæque vel ab ætheris vel ignis motu facillime abeunt in auras. Salia vero acida fixioris cum sint indolis, nec aëris nec ætheris motui facile obsequentes, diversa partium dispositione ac majori plane mole præ illis gaudebunt. Rigida enim acidorum spicula lateribus solidis ac planis constant, ac horum soliditas a terræ continuitate, rigiditas vero a partium sibi arctius coherentium nexu, hinc minoribus stipata sunt poris; unde cum corpus quod plus continet materiæ sub sua mole, eò ineptius ad motum existit. Cum enim a motus & ignis vehementia alkalinarum particulæ multum imminutæ, abreptæ ac dissipatæ sint, majorum pororum hiatu, reliquorum corporum actioni exposita erunt magis, quare hac ratione ob pororum copiam ac magnitudinem ætheris activitati magis subjacent, quam salia illa acida, rigida, magisque immobilia, ut pro pororum ac partium convenientia salia potius acida commodum in alkalinis inveniant hospitium. Eminentia enim ac ramuli salium urinosorum cum ceu vaginulæ acidorum cuspidēs abscondant, hisce combinatæ ab eorum detinentur compedibus atque fixantur; unde tertium aliquod sal, seu neutrum, tum effectū, tum partium dispositione ab utroque diversum exurgit.

§. IX.

Veluti autem salia fixa æque ac volatilia, soluta in fluido motum tum hujus tum ætheris perennem sequuntur, ita ex adverso mutantes viciniam, nisi in quantum vorticoso ætheris motu transeunte, partes nonnullæ abraduntur hinc inde tremulo motu, libero inferuntur aëri; unde quoque fixatio atque unio salis volatilis una cum corporibus siccis haud ita absoluta eventura est. Combinantur equidem sicca, Alkali & Acidum sub pulverum forma; ast superficialia saltem cuspidum acidi ab alkalinis receptio

erit. Cum enim salinæ urinosæ partes sub pulverum forma accuratissime licet mixtæ tot numero poros sibi respondentes non offendant, quot requiruntur ad cuspidum suarum receptionem, neque medio seu vehiculo consent, quod in pororum intimos eas inferat recessus: eorum quoque unio non adeo arcta erit. Humido autem donata utraque salia, utriusque versando partes atque in omne convertendo latus, intimiorem ac pleniorē subeunt combinationem. Inter salia autem volatilia cum quoad particularum formam ac magnitudinem haud magna intercedat discrepantia, ac propterea in effectū eadem fere sint, oleis nimirum vel terra sua maximam partem orbata, in quibus tamen fundari eorum differentiam superius monuimus. Ita volatilia salia alium atque alium suæ operationis inducunt modum, prout cum his vel illis salibus fixis, acidis, magis vel minus a terra sua liberatis inierint consortium. Sic combinata cum tartaro vel succo citri, nitro, &c. insignem aperientem vim in morbis hypochondriacorum, primarum viarum, ac mesenterii adipiscuntur. Unita vero cum spiritu vel sale vitrioli, aluminis, adstringentem acquirunt efficaciam. Nimirum quemadmodum omnia salia tum essentialia imprimis in eo specificam sibi vendicant vim, quod terra sua ac cæterarum partium textura, cum qua in plantarum tubulis mediante motu combinata fuerunt, integra adhuc gaudeant: ita salia mineralis classis pro matricis suæ diversitate cum hac illave terra mixta alium ab alio fortiuntur effectum, ut proinde salium volatilium operandi modus in statu neutro existentium hujus terræ modificationi primas merito deferat.

§. X.

Liberari vero salia volatilia è fixorum carceribus posse, familiare valde est, quando tartarus crudus in motum cum sale suo fixo actus spiritum fundit alkalinum volatilem. Sic sal tartari aquæ pluviali immissum institutâ putrefactione in vase quercino materiam ad fundum demittit, quæ destillata spiritum volatilem alkalinum fundit. Ita fixatum sal volatile cornu cervi vel viperarum, quem modum fixandi salis viperarum volatilis observat TACHERIUS, additione tartari fixi salis liberari a spiritu acido potest, atque in libertatis statum denuo vindicari.

§. XI.

Salia volatilia sanguini infusa colorem rubicundum pariunt, quoniam ratione minimarum specularium superficialium copiosius radios reflectunt, & quod expansivo ætheris motu, removendo sanguinis partes ab invicem circa axem suum eos velocius rotent, suæque expansione liberiores radios concedant transitum. Secus faciunt salia acida, quæ ob terreas rigidas partes tum lac tum sanguinem in motu suo sistendo vorticosum ætheris præpediunt transitum, dum ceu pali eorum globulis infixa eandem partes servare viciniam efficiunt. Certam vero ac proportionatam particularum magnitudinem ac figuram inter corpora miscenda intercedere, quam tamen minima variet circumstantia, evidens est. v. g. ubi miscetur urinosus spiritus, vel salis ammoniaci, vel cornu cervi, vel eboris, observatur viridis color; rubor vero, si iisdem admiscueris spiritum acidum, vel acetum stillatitium, cœruleis floribus vegetabilium, vel rubicundis aut illorum solutionibus.

§. XII.

Ostensâ salis volatilis generatione atque illud depurandi, fixandi, atque in volatilitatis statum restituendi methodo devolvor nunc ad ejusdem usum atque abusum, visurus, quæ commoda vel incommoda

moda ſibi ab eodem promittat medentum prudentia. Vere autem, nec minus graviter olim pronunciavit Divinus Couſ, ineſſe nimirum noſtro ſanguini amarum, falſum, dulce, acidum, & ſexcenta corpusculorum genera, quæ, quamdiu mixta ſunt, hominem non lædunt, ſecreta autem & ſeorſim poſita maximum ejuſdem œconomiæ afferunt damnum. Ita nec abs re, illæſam & vegetam ubi dixerimus animalis œconomiæ, maſſæ ſanguineæ corpuscula optimo & ſymmetrico ferri debent motu. Unica itaque œconomiæ ſalus petenda inde eſt, quod ſanguis bene temperatus ac mixtus ſit, & ſalinæ ejus partes cum amaris, hæ cum acidis atque dulcibus, & tantum non magnitudine, figura, ſitu, ac motu infinitis ſibi ex amuſſi reſpondeant, at uniformi & inoffenſo pede tubulorum tranſeant canaliculos atque mæandros, ſic ut ſecernendorum aut retinendorum debita a colatoriis vaſis fiat vel ſecretio vel retentio, ac obſervante SANCTORIO A SANCTORIO pro aſſumtorum copia vel paucitate corporum ſecernendorum augeatur vel minuatür numerus, quapropter labefactatam eam conceperis, ubi quædam ſanguinis elementa ſeu partes vel motus celeritate vel tarditate ab aliis conſpicuæ fiunt, quæque unico nexu ſociatæ ſimul minutiffimorum canaliculos tranſire aptæ erant, reſolutæ hærent, ſicque obſtructionum multiplicium fœcundæ exiſtunt genitrices.

§. XIII.

Duplici equidem conſtare maſſam ſanguineam noſtram partium genere, ſenſuum teſtimonio edocti credimus, fluidis nempe ac ſolidis; quænamadmodum enim, niſi aqueis flexibilibus ec ramofiſ ſanguinis partibus rigidæ ſalinæ activiores impliciæ eſſent, propter motum inteſtinum ſanguinis elementa intime conjungentem tunc deficientem vappelcentia iners oriretur; e contra, ſi rigidæ etiam non laterent ſub involucro aquearum & ramofarum ob prædominium & facilem irritationem, deſciſſionem partium conciliarent, uti id patet in tæcochymicis, ſcorbuticis, & illorum ſymptomatibus. Uti itaque in juſta temperie ac proportionem elementorum ſanguinis, magnitudine, figura ac ſitu diverſiſſimorum illorumque decenti unionem ac motu ſanitas conſiſtit, ſic in labefactata hac proportionem ac unionem morbus verſatur. Salvam itaque ac integram quivis medentum hanc temperiem reſtituere medicamentis annitatur. Quod ſi itaque aqueæ vel terreæ & mucidæ ſanguinis partes prædominantur, cum inertes ſunt ac vappidæ, omniumque morborum chronicorum præbent cauſam, ſalia volatilia uſum habent optimum.

§. XIV.

Sic humidi, æque ac ætheris eläſtico motu actuatæ lymphæ gaſtricæ ſalinæ volatiles partes, impetumque exerentes ſuum in ciborum ſolida, ea diſnectunt, oleofarumque partium vincula recludentes in lactiformem eas redigunt conſiſtentiam, quæ motu perſtaltico e ventriculo expulſa blando ac molli rore maſſam ſanguineam perfundit; quemadmodum autem fale volatili privatus liquor gaſtricus in liquamen putridum ac chylum vappelcentem reſolvit eſculenta ac potulenta, quæ labe ſua ventriculum & inteſtina inficiunt, nihilo minus tamen quod rore microcoſmi combinatum volatile ſal optimum in primis viis producat effectum, ſi a viſciditate & amurca acida liberum ciborum comminuit particulas; ita primis viis ab acido viſcido obſeſſis, multiplicibuſque inſarctis obſtructionibus ſiniſtrum iſdem minatur eventum, ſi per ſe, & in ſuam libertatem vindicatum ventriculo propinetur. Præterquam enim quod motu ſuo nimio notante SYLVIO ingentium materiæ viſcidæ bullarum author exiſtat,

Frid. Hoffmanni Oper. Supplem. II.

unde præcordiorum anxietates, palpitationes cordis, diſtenſio imi ventris, difficilis reſpiratio, conſequuntur, obſtructiones potius augebit, quam aufert, dum agitando materiæ viſcidæ partes in tubulorum imos reſeſſus vi eas adiget, ubi pertinacius hærentes difficiliter curantur. Sic oppleto humoribus acribus acidis ventriculo, quod in cardialgia, bulimia, malo hypochondriaco obtinet, ſalia volatilia exhibita cum acidis efferveſcentiam ineuntes dolores potius augent, quam ſedant; atque in ſimilibus caſibus vix exhibendum volatile ſal, ſi non cum oleoſis imprægnatum particulis, quæ involvendo acidorum ſpicula & motum volatilium ſuo complexu remorando aliqua ratione nimiam ejus ſufflaminant actionem, blandiuſque ſuum exequuntur officium; uti id manifeſte videmus, quando acidus ſpiritus maritatur cum ſpiritu volatili ſalino oleoſo, ubi lenis motus conſpicitur; ſecus fit, ſi ſpiritus volatilis ab oleo vel ſulphuris particulis liberatus ſit.

§. XV.

Sicuti vero dictis in caſibus, ac ubi primæ viæ humoribus ſcatent acribus ac fixis, exhibendum vix eſt ſal volatile, ita ubi liberæ ab ejuſmodi exiſtunt impuritatibus, lympham egregie corrigunt gaſtricam, baſamicoque irrorant fale. Unde non ſolum in primis viis, verum etiam in morbis a pituita viſcida oriundis, ut in apoplexia pituitoſa, paralyſi, vertigine, cephalalgia, egregie ſe ſiſtunt, ſufficienti irrotata humido. Cum enim anguſtiſſimos ſubeant cerebri tubulos, pituitam ibi hærentem ac prædictorum morborum cauſam diſcutiunt, atque motui reſtituunt ſuo, quale exemplum referunt ſpiritus ſalis ammoniaci, naribus ſaltem applicati, E. N. C. dec. II. Ann. 8. pag. 87. Interius vero ne nimia doſi exhibeantur, cavendum, ſed maritanda potius cum fixioribus. Quod enim motus ſui velocitate humidum ſanguinis nimis per ſudores ac urinas diſſipent atque diſcutiant, nimioque motu craſſas viſcidas agitando partes, vertigines, apoplexias, paralyſes producant potius, quam curant, quod nimio motu agitatæ craſſiores particulæ arctius tubulorum impingantur anguſtiis.

§. XVI.

Februm eſſentia cum non tam in circulatione ſanguinis aucta atque in præternaturali ejuſdem calore quærenda ſit, utpote quod februm potius confequens eſt, & ſymptoma jure dicitur; verum potius tardiori motui ſanguinis per minima vaſa ſuum debeat ortum, demonſtrante id *ἀντιβῶς* Excellentiſſimo D. BONTEKOE in pereleganti tractatu, quem poſteritati reliquit *de Febris*: ea omnia convenient, quæ motum ejus imminutum ac tardum reſuſcitant, obſtructionesque tollunt, ac in minimis tubulis ſubſiſtentes humores fluori ſuo reſtituunt, dummodo vacuo paroxyſmorum tempore exhibeantur; præprimis autem, ubi malignitatis ſub herba latitat ſuſpicio, convenient ſalia volatilia ſimplicia vel oleoſa, ut ſpiritus ſalis ammoniaci, cornu cervi, eboris, viperarum, tartari, ſuccini, liquor cornu cervi ſuccinatus, &c. ſpiritus bezoardicus, ſpiritus vini camphoratus, ſal volatile oleoſum, & ſimilia, combinata cum alexipharmacis fixioribus. Sicuti enim minutiffimos tubulos illa mox ſubeunt, & ab obſtructionibus expediunt, ita hæc fixiora conſtantius agendo iteratis inſultibus hoſtem ſubjugant.

§. XVII.

Scorbutus, familiare regionibus ſeptentrionalibus malum, conſiſtit in ſanguine & ſero rancido, acido, vel viſcido, acido ſalſo, quæ in vaſorum extremitatibus

tibus stagnantia non minus in fluidas sanguinis & feri particulas, quam in partium solidarum stamina suam exercent tyrannidem. Rigida enim, austera & terrea scorbuticorum salia, cum, si quid volatilis falis adhuc dum in massa sanguinea reperibile, compedes eidem veluti injiciendo balsamico suo sale eandem privant & exuunt; unde multiplicium in vasis capillaribus minimis obstructionum, feri atque sanguinis hinc instagnantium unica petenda origo, quod confirmant macularum scorbuticarum ob immobilitatem partium variae apparitiones, mox quippe albæ, rubræ, lividæ, pro diversa salium obstructiones causantium miscela. Salia dicta acida, si ab ætheris motu actuata, vel ob feri acidi copiosorem affluxum arroductis suis extremitatibus scindentibus solidorum vasa, eradendo ac discerpendo ulcerum scorbuticorum causa existunt, quæ in glandulosis corporis partibus præprimis suas ludunt tragoedias, uti subaxillaribus, parotidibus, maxillaribus, &c. Conveniunt vero magis huic malo extirpando antiscorbutica amara, & omnia quæ blandum oleosum volatile sal cum resinosis elasticis particulis in recessu sovent, uti sunt ligna & radices lignescentes, ut essentia ligni sancti, guajacum, santalum rubrum, sassafras, radix chinæ, sassaeparillæ, vel in decocto exhibita, cum essentia nasturtii aquatici, beccabungæ &c. Salia volatilia quod hic spectat, eo quod se conjungendo cum salibus acidis, ac fermentationem excitando magni usus non sunt. Dum enim scorbutica irritant salia, acutis extremitatibus versus vasorum latera acta rodunt & tantum non corrodunt eadem, unde hæmorrhagiæ, cruentationes gingivarum ob vasorum ruptionem causantur.

§. XVIII.

A scorbutico ceu fecundissimo morborum parente oritur denique *cachexia*. Omnes enim corporis partes fluidæ cum refertissimæ sint partibus terreis atque acido-austeris, neque volatiliū salium abundant copia, ac proinde organico lymphæ motu destituantur, earum subsidentia pressio sequatur pede necesse est. Quod enim nutrimentum toti corpori, impertit volatile oleosum ac resinofum sal, ob particulas terreas fixas ligatum minus suo præerit officio; unde contabescencia artuum, pallor faciei, atque arthritis scorbutica, atrocissimis stipata doloribus. Quæ enim humoribus circulum libere permittere debeant vasa, a viscidis, tenacibus, atque ramosis particulis obsita, & obstructa obicem eidem ponendo secretionum excretionumque introducunt sufflammationem omnimodam. Demonstratum autem dedimus, ab illis œconomiae animalis legibus salutem hujus solam pendere. Chylum namque crassum, viscidum atque austum cum pro causa agnoscat cachexia, ac qualis chylus, talis sanguis, qualis sanguis, talis lymphæ, & talis denique sequestretur spiritus, hinc errores in sex rebus non naturalibus commissi amplas huic malo pendunt fores. Quare quo malo huic occurramus, commendamus martialia, amara, evacuantia, aperientia, incidentia, eaque fixa potius, quam volatilia salia, nisi cum oleosis maritata particulis, ut v. g. omnia ligna & radices in præced. §. commendata. Spiritus quoque horum, ut spiritus ligni sancti, sassafras, essentiam castorei, absinthii, aloës, cinnabarina quoque, antimonialia, martialia. Circa ultimorum tamen usum notandum, quod parce exhibenda sint; producant enim atoniam viscerum, atque ob partium rigiditatem membranarum constantioribus poris impacta inflammationes & pertinacissimas obstructiones pariunt. Salia autem volatilia forma sicca exhibenda hoc in morbo vix suademus ob defectum suffi-

cientis feri, ceu horum menstrui. Licet enim flexibilibus adhuc lymphæ crassior gaudeat partibus, quæ præ reliquis salibus sese associandi privilegio gaudent, viscidum relinquentes magna obstructiones augent, ac paralyticam membrorum inducunt dispositionem, vel etiam calorem præternaturalem hecticum excitant in corporibus impuris.

§. XIX.

In *syncope* post palpitationem cordis, quod humores totum copus ex tardiori eorum motu velut gravitent, utile est sal volatile, præprimis oleosum, quod ratione particularum salinarum volatiliū motum humorum restituit, ac oleo suo blando acidorum spicula, unde spasmi cordis pendet, veluti involvit, ut irritatio versus cordis musculofas fibras non adeo vehemens sit, ac ratione olei optimam partium miscelam, falis vero exaltationem, lymphæ viscidioris attenuationem procurat, ut sunt tinctura caryophyllorum, macis, croci, castorei, cinnamomi, spiritus falis ammoniaci, vel succinatus, vel oleosus, spiritus salviæ oleosus, majoranæ, &c. Sic in *asthmate* flatulento, ubi pulmonum cellulae viscidis refertæ sunt bullis, egregia se præstant salia volatilia forma fluida exhibita, ut spiritus sanguinis humani, cornu cervi combinata cum balsamicis oleosis sulphureis. In *menstrui suppressio fluxu* tanquam morborum muliebrium largissimo fonte atque symptomatum syndrome, ut sunt pedum gravitas, difficilis ingressus, anorexia, anhelitus difficilis, dolor capitis, atque totius lassitudo, tartarea, martiata cum volatilibus humectantibus combinata fluxilitatem feri restituit, ac turgescenciam ejus augendo lentorem corrigunt. Hinc vero in *nimio fluxu* eorum, quod organum humorum augent, exhibenda non sunt salia volatilia tam sicca quam fluida formæ.

§. XX.

Phtisicis denique atque *hecticis*, ac quorum sanguinis solida blando indigent humidi rore, quod salium cuspides versus vasorum latera vehementius urgeant, quodve humidum absumentes crassiores relinquant particulas, ita ut balsamicum sanguinis rorem vel destruant, ac suarum cuspidum acredine incidant atque resolvant, unde sudorum colliquativorum atque phlogosum vagarum origo observatur, quibus potius blande humectantibus, & mediæ naturæ salibus occurrendum est. Sic *diabetes*, quæ nihil aliud est, quam feri a sanguine fusio, atque per urinarias vias cita nimis excretio, orta ab acredine. Hinc præpostere eandem curant, qui salibus volatilibus ejus aggrediuntur curam.

§. XXI.

Summam particularum teneritudinem cum nactæ sint salium volatiliū partes, ac proinde ad infinitos vasorum anfractus atque mæandros sese facile accommodent, præ cæteris morborum causis, quorum obstructiones in imis vasorum latitant recessibus, auferendis aptæ natæ sunt. *Epilepticorum* tenue ac acre serum cum vasorum anfractus facile subeat, suisque spumosis expansionibus nervorum latera premendo ac pungendo copiosorem causetur spirituum influxum, ut hinc inde concussa fibrarum motricium filamenta diversas in partes trahant, atque sic concussorios musculorum producant motus, quod facilius expedies, quam tenuissimis salium volatiliū particulis, quæ incidendo tenue viscidum serum, ac frangendo acrium salium acuminata latera, motum tam feri, quam spirituum animalium effrænem demulcent? Maritata vero cum balsamicis oleosis particulis non solum suâ elasticitate disjicient visciditatem humo-

rum,

rum, verum infuper nervorum latera oblinendo falia acria invifcant atque ramorum fuorum flexilitate obducunt, ut proinde optimus eventus fperandus fit a fpiritibus tam fimplicibus, quam oleofis, v. g. fanguinis humani, urinæ, tartari, cornu cervi cum fale volatili, & oleo foetido fpiritus tartari volatilif in M. B. conjunctis; fal viperarum volatile, liquor cornu cervi fuccinatus, effentificatus, effentia antepileptica e caftoreo, fale volatili fuccini, cornu cervi, cranii humani, cum fpiritu falis ammoniaci confecta; omnia denique, quæ volatilem refinam in fuo finu foveant, ut effentia guajaci, falſa parilia &c. & eorum fpiritus, vel rorifmarini, fpicæ, liliorum convallium, quæ fingula vi temperandi acrefcerum atque diffipandi tenues viſcidas particulas infigni pollent.

§. XXII.

Vertigo cum nihil aliud fit, quam fpirituum animalium motus in circulum actus, vel quod vafa comprimantur a nimia feri viſcidi & fanguinis copia, vel quod nervorum tubuli actu a materia pituitofa obſtruantur, a quo fpirituum impedito influxu collabafcant membra, hominesque quaſi in gyrum acti ad caſum proclives ſint. Quantum autem ad productionem hujus mali conferant evacuationes confuetæ ſuppreſſæ, omni die conqueruntur, hæmorrhoidum, menſium, lochiorum, ac denique urinæ ſuppreſſione laborantes. Veluti enim a ſolo impetuoſiori fanguinis motu vafa diſtenduntur, ac anguſtatio tubulorum & compreſſio fit: ita, dum arteriæ ab humoribus ſecernendis ultra ſphæram ſuam tenduntur, ſpatium, quod ultra debitam ſuam tensionem occuparunt tubulis minus reſiſtentibus auferunt, unde ſpiritus verſus tubulorum angulos rectè impulſi, circulum deſcribunt ob denegatum tranſitum. Dictæ autem evacuationes cum plerumque oboriantur ab obſtructione organorum excretioni ſervientium, hinc quis non videt, ſalium volatilium tam in vertigine idiopathica, quam ſymptomatica, manifeſtum eſſe uſum.

§. XXIII.

Quod vicibus alternis ægrum afficit, id equidem œconomix animalis ſalutiferum reputandum haud eſſe, coma ſomnolentum ac vigil manifeſte oſtendunt. Qui enim aſſerente HIPPOCRATE *ſeptimo moriuntur die*, iis ſiniſtri quid portendere ſomnum & vigilias, naturales alias œconomix viciffitudines oportet. Ubi enim duplex morborum ſubeſt cauſa ſibi oppoſita, difficillimam hariolari curam quid impedit? Sic ubi pituita obſidentur tubuloſi cerebri ductus, ac effreni motu efferuntur ſalini nimis ſpiritus ſufficienti privati humido, nonne anxius hærebis, ac ubi te convertas neſcius, cuique opituleris? Salia enim vel ſpiritus volatiles in ſoporofis alias convenientes affectibus ſi exhibueris, minorem habebis rationem animæ ac corporis vinculi, ſpirituum ſcil. animalium. Utrique igitur ſatiſfiet indicationi, blanda volatilia oleoſa ſalia ſi combinaveris cum humectantibus roſidis partibus, ut incidas ſimul atque demulceas.

§. XXIV.

Iis vero, quorum vafa ob nimiam fanguinis copiam ultra ſphæram ſuam diſtenta ſunt, accedente inſigni fanguinis & humorum orgaſmo, ſalium volatilium vix ſuaſero uſum, niſi poſt aliqualem detractiorem fanguinis vel depletionem. Cum enim ob impeditum ab obſtructionibus fanguinis circulum ſecretiones debitis haud abſolvantur legibus, ſed potius in fanguinem ipſa redundet humorum copia, quid ſecus inde Tibi promiferis, quam ob compreſſionem & ruptio-

Trid. Hoffmanni Oper. Supplem. II.

nem vaſorum apoplexias fanguineas, hæmorrhagias, lypothimias, ac præcordiorum anxietates? Nimirum cum fanguinis circulatio abſolvatur alterno cordis motu, ſyſtole ſcil. atque diaſtole, hujus receptione, illius vero expulſione, confundi cum ex diſtentione ac repletione vaſorum nimia, liquet; unde fanguinis ſubſiſtentia, ſpaſmus cordis, &c. Quemadmodum autem Venæ ſectio hiſce in caſibus ſalutare exiſtit remedium, ſiquidem fanguinis imminutus motus hoc ipſo citatior fit, quod patet ex pulſu vegetiori, tranſpiratio per conſequens erit liberior; unde obſtructionum inflammatoriarum reſolutio atque diſcuſſio. Ita volatilia ſalia illâ neglecta plethoricis exhibenda non ſunt, eo quod humorum orgaſmum augendo vafa magis diſtendant & obſtructiones inflammatorias augeant, vaſorum extremitates magis ſtringendo & anguſtando, unde ſalium acrium a vaſorum lateribus arctior complexus atque pertinacior hæſio; Peccare vero fanguinem quantitate in plethora, menſium, hæmorrhoidum, ſæpenumero per nares, &c. *Excellent. D. PECHLINO teſte in obſerv. 38. p. 88. Libr. I. menſium in vertice eruptio, indicat. vid. Magnif. Dn. Præſidis, Fautoris ac Promotoris mei Magni, Tractatus quem inſcripſit de viſcidi & acidi inſufficientia &c. cap. XII. p. 67. & 68. item cap. V., ubi obſervationem C. C. vol. exhibet in perilluſtri viro plethorico.*

§. XXV.

Scabies cum nihil aliud fit, quam obſtructio glandularum ſubcutanearum a ſalibus acribus corroſivis facta, ſolventibus ac deſtruentibus partium ſolidarum nexum. Hinc præpoſtere ejus aggrediuntur curam, qui ſalibus volatilibus morbum hunc exſtirpare ſibi præſumunt. Qui enim anodynus, abſorbentibus ac blande temperantibus ſubigi amat affectus, eundem neutiquam vel ſudoriferis acrioribus domabis. Præterquam enim, quod ſalia volatilia acridinem humorum acuant majorem ipſis conciliando motum, copioſiores ſalis acris obſtructiones in glandulis cauſantur, quia ſalium acrium cuspides rigidiores anguſtiſſimis capillarum ductibus, tam veloci pede ſeſe expedire neſcientes, hærendo arctius iſdem impinguntur, quod pari ratione obtinet in variolis & morbillis, qui majores tantum ſcabiei ſunt gradus. Omnes vero hîc abuſi acribus volatilibus, teſtis eſt *Celeberrimus AMMANNUS in Medicina critica, ubi Medicum tribus infantibus ex variolis laborantibus propinaſſe ſpiritum cornu cervi, ſingulos vero morte obiiſſe, meminit*; quod omnia, quæ motus ſui pernicitate humorum augment impetum, inflammationes quoque augeant. Unde *Clariff. D. SYDENHAM Tract. de variolis* calorem lecti intempereſſimum diſſuadet. Imo *incomparabili Virorum pari, DOLAEO ac WALDSCHMIDIO*, ægris ſuis non niſi tenue integumenti genus (Matraze) ſuadentibus, blandumque diaphoreticorum commendantibus uſum. Approbat quoque PECHLINUS eorum conamina, qui moderato calore naturæ velificantes ſolis hordeatis, ſcorzonera & cornu cervi decoctis ægrum ſuſtinent, lentisque & ſecuris ſudorificis id efficiunt, ne viſcoſa oleoſa particula, neceſſarium acrimoniæ deſtinamentum, corpore evaporata, puris facturam deſtinent. *obſ. XV. p. 236. lib. II.* Salinæ enim volatiles partes conſigendo cum acribus obſtructionem cauſantibus, magis commovendo ſeſe in nervorum filamenta incurrentes, altius impactæ tum pruritus tum dolores augment. Quare potius externis hic ſuccurramus unguentis blandis, additis adſtringentibus ac abſorbentibus. *vid. Magnif. Dn. Præſidis, Fautoris ſumme venerandi, obſ. ſalium volatilium puſtulas excitantium, degenerantes in ſcabiem, in Tr. ſuperius allegato.*

§. XXVI.

Quod febrium paroxyfmi alii aliis tardiores velociorefque succedant, id vel maxime a materiæ febrilis vel fixitate vel mobilitate deduxeris. Qui enim *teste OLIG. JACOBÆO in Act. Haffniens.* sanguis antea compactus & nigricans, post exhibitum volatile fal floridus evasit, ita ut motus sui impetu ruptionem vasorum & hæmorrhagias, cordisque palpitationes produxerit; & qui *notante MÖELLENBRÖECKIO in Tr. de scorz. curios.* juveni febricitanti anxietates præcordiorum causavit ob falis volatilis orgasmicam expansionem. Inne paroxysmorum suorum tempora citius explebit & reduplicabit fale volatili exhibito? Nempe falis volatilis motu pernici impulsus febrilis sanguinis, ubi stationum suarum tempora incipit, rarefactus non tam facile subsistet, sed citius despumascens paroxysmos pressò pede sibi habebit insequentes, ita ut ejus duplicetur adventus, *observante id ex Galeno Clariss. Anglo D. SYDENHAM, quando c. V. de febribus intermittentibus p. 116. inquit, quod calidiora citius exhibita vel morbum duplicent, vel in febrem continuam permutent.* Hydropicorum vero atque Cachecticorum serum acribus salinis abundare particulis, viscerum erosiones, sphacelationes, hæmorrhagiæ, & anxietates præcordiales testantur, atque hi abutuntur potius salibus volatilibus, quàm legitimum inde expectent usum.

§. XXVII.

Quantis autem mutationibus habitus nostri corporis, coeli vel inclementiori adspectu, vel tempestatum mutationibus obnoxius sit, id omni die docet fragilis humanæ fortis conditio. Mirum nempe est, cujus natura in partium quiete absolvitur, suæ naturæ oppositum edere effectum, pustularum adustionis analogam scil. productionem. vid. *D. RIEDLINI fil. Linear. Med. Mens. Febr. annum 11. obs. IV. p. 58.* Frigus autem hybernus cum humorum nostri corporis coagulum inducat, in vegeto vero illorum motu hujus quoque consistat vigor atque sanitas, ideo falis volatilis usus hyeme potius convenit, quam fervidis radiorum exæstuationibus. Sicuti enim brumali tempore pori cutis aeris externi frigore ac pondere constipantur, unde transpiratione imminutâ febres oriuntur, ita æstivo calore nimium aperti transpiratione auctâ virium dejectio ac appetitus prostratus, ut inde luculentior pateat falis volatilis abusus. Eo vero tempore, quo humorum blandior est motus, atque ad stasim veluti inclinatio, ut temporibus imprimis nocturnis, ubi motus humorum segnior in senibus pituitosis, crassum habentibus sanguinem, & defluxionibus catharralibus obnoxiiis, conveniunt optimo jure salia volatilia refracta & imprægnata oleoso volatili a scr. sem. ad drachm. sem. Nimia autem exhibita dosi humorum tollunt æquilibrium, atque noctes faciunt insomnes. Senibus enim deest falis volatilis debita quantitas, unde obstructionum multiplicitas, marasmus, lapsus virium, hebetudo sensuum. Hisce vero subveniunt, quæ blando volatili balsamo circulum sanguinis promovent. In *Arthritide autem vaga* cautissime adhibenda sunt salia volatilia, eo quod peccantes acres sales nimîa sui motus velocitate membranarum impingant poris, unde ortum ducunt inflammationes & febres; quare refracta cum blandis oleosis temperantibus resinosis exhibenda.

§. XXVIII.

Modum utendi salibus volatilibus quod attinet, quo scil. vehiculo eadem exhibere magis conveniat, item, an melius sit ante cibum vel post eum iisdem frui, facile patebit, si ad cujusque vehiculi constitu-

tionem attenderimus. Qui enim vino Rhenano atque Francico eadem exhibent, sperato effectû omnino excidunt. Ob eorum quippe aciditatem & terrestritatem, conflictum, & consortium cum dictis acidis ineuntes obtunduntur, atque in falis neutri conditionem abeunt, unde effectû quoque diversa erunt. Simpliciori igitur exhibeantur vehiculo, ut potione Théë vel Caffée, vel oleoso spirituoso combinentur fluido, ut vino Hispanico, quod cum hujus oleosis particulis sese conjungendo non tam cito per transpirationem in auras abeant, suâ operandi vehementia aliqua ratione refracta. Quod ad alterum, cum vigore ac activitate instruat fal volatile liquorem gastricum, atque solutum in ejus fluido intime cum eodem misceatur, dimidiâ circiter horâ ante pastum scrup. sem. adsumi poterit; in superioribus enim demonstravimus optimam chylicationem pendere a sufficienti falis volatilis copia, quâ fœtum est menstruum gastricum, a pastu vero fœcum atque reliquiarum terrestrium partes nimis commovent impellendo easdem angustis primarum viarum poris ac tubulis, unde potius nocent, quam profunt.

XXIX.

Acidum, viscidum, amarum, falsum, secreta plurimorum quidem morborum sunt causa, omnem tamen ea absolvere paginam, atque in recensendis morborum causis sola sufficere, qui demonstraverit, ei phyllida decernimus. Partes enim acres salinæ cum a reliquorum contextu liberæ existunt, fœcundam morborum largiuntur messem. Unde enim quæso morborum acutorum omniumque sui temporum brevem durationem commodius deduxeris, nisi a fale volatili acri. Quod enim sanguis dilutus ac floridus, alius vero luteus observatus fuerit in peste confectis, *notante DIEMERBRÖECKIO in Libro de peste, & CAROLO DA LA FONT in Tr. de veneno pestilenti,* quid aliud indicat, quam falis cujusdam volatilis effectum; cum e contra ab acidis coagulatus, grumofus spectetur, ac ater. Si enim liquorem, in quo fal acre volatile solutum fuerit, venæ alicujus animalis immiseris, citius animal emori; & eodem colore sanguinem imbuere, quam si acidum adhibueris, quod ingesseris, id loquuntur *Acta Phil. Anglicana.* Unde manifeste fluit salium volatilium abusus, si iisdem in copia temet ingurgitaveris. Præterquam enim quod sanguinem debito fluidiorem reddant, partium tollunt harmoniam atque æquabilem motum. Unde rursus scopus falis volatilis patet præservatorius, qui non nisi in morbis a viscido oriundis obtinebit, & in illis, qui feri ac phlegmatis vappidi abundant copia.

§. XXX.

Quemadmodum autem salia volatilia cum ipsis martialibus aut acidulis martialibus exhibenda haud sunt, quod majori motus vehementia prædita, horum rigidas terreas partes ad vasorum mæandros sese velociori transitu accommodare haud valeant, ac ipsasmet validissime vasorum angustias incuneent, præcipationem quoque partium terrearum a metallicis martialibus efficiunt: ita post eorundem usum omnino conveniunt, eo quod partes terrestres ob acredinein salium massæ sanguineæ hinc inde præcipitatas motui suo restituant. Opiatis quoque commode combinantur, utpote quorum operandi energia a tenuibus viscidis dependet particulis, quarum cohæsionem ac contextum cum incidendo & attenuando corrigant ac solvant, tam sanguinis quam spirituum ligationi adeo apta non existunt, ut eâ ratione opiata volatilibus salinis juncta tutius majorique exhibeantur dosi.

§. XXXI.

§. XXXI.

Purgantibus quoque commode admifcentur. Cum enim horum operandi ratio in refina vifcidis involuta paribus confiftat, incidendo egregie illas ex horum contextu evolvunt, ut fuam operationem abfolvant citius atque tutius, neque ob vifciditatem in inteftinorum plicis hærendo immanium torminum exiftant autores. Confiftere vero purgantium vim in volatili acri refina, probat PECHLINUS, ubi metallicorum purgantium efficaciam perire fcribit evocato volatili. *vid. ejus Exercitat. de purgant. cap. XII.*, ubi hanc rem prolixius deducit. Sudoriferorum quoque vim infigniter promovent; partes enim vifcidas feri incidunt, atque ad faciliorem fequeftrationem per cutis colatoria difponunt; non nimia tamen in dofi exhibitæ, quod ferum fanguinis nimis difcutiant. Externum ufum denique quod attinet, non conveniunt, nifi ejus acres partes oleo subtili fuerint immerfæ, & tunc in inflammationibus proficua funt. Ab hisce vero ubi liberiora exiftunt, ob acredinem malum potius augment, quam minuunt, quale exemplum referunt EPH. N. C. *decur. 2. an. VIII. p. 87.* de Spiritu falis ammoniaci oculorum inflammationi adhibito. Tandem vero unguentis commode minori in quantitate haud abs re admifcentur, amicum enim cum pinguibus oleofis ineundo confortium in falia volatilia oleofa veluti abeunt, ut hinc in fcabie optime fele gerant.

§. XXXII.

Quod vero falibus volatilibus, prout ex diverfis animalium partibus elicitæ funt, fpecificas attribuant virtutes, v. gr. fal volatile cranii, cerebri aut fanguinis humani vel ungulæ alcis in Epilepfia & Apoplexia; fal volatile cornu cervi, vel viperarum in malignis; fal volatile hirci in diffolvendo grumofa fanguine; fal Eboris in Melancholia hypochondriaca, & fal volatile urinæ in calculo diffolvendo vel pellendo, mera præjudicia funt. In fuperioribus enim, ubi de falium volatilium genefi egimus, falium diverfitatem a modificante terra deduximus, a qua tamen falia volatilia magnam partem libera exiftunt. Ex fapore denique ac odore argumentum contra fupra memoratum fpecificorum prætenfum operandi modum defumi poteft. Sic fal volatile urinæ, cornu cervi, eboris, cranii humani, eundem & faporem & odorem organis fenforiis imprimunt; vel fi quid in fapore ac odore diverfum ab alio notetur, hoc potius pendeat ab oleis iifdem adhuc admixtis. Oleorum enim partes falium odorem ac faporem infigniter immutant, quod præprimis ex eo patet, quod liberata ab oleis & invicem comparata omnia fere uniformia fenfui fele ingerant.

§. XXXIII.

Demonftravimus in fuperioribus ufum & abufum falis volatilis, ubi fimul animadvertimus, ex variâ falia volatilia adhibendi methodo oleofa ratione operandi in œconomia animali confervanda magis falutaria falibus volatilibus fimplicibus exiftere. Ad il-

lorum igitur accedo præparationem, variosque modos componendi, & quidem duplici plerumque hic Chymiatræ incedere folent via, digeffionis nimirum ac deftillationis. Illius exemplum fequens exhibent. *R.* Effentiæ alicujus vegetabilis cum alkohol vini & oleo tartari per deliquium paratæ, v. gr. menthæ, meliffæ, rofmarini, falviæ, fpicæ, &c. unc. ij. Spiritus falis ammoniaci drach. ij. *M.* & digerantur per aliquot dies, quo ufque fal volatile cum oleofis effentiarum particulis amicum ineat conjugium. Methodo porro digeffionis parat fuum fal volatile aromaticum oleofum *illufte quondam Batavorum fidus*, FRANCISCUS DE LE BOË SYLVIVS, cujus defcriptio fequens traditur a VIGANO in *chymia*. *R.* Salis tartari unc. j., olei cinnamomi aut Ligni faffafras, aut corticis citri, gutt. xxx. *Exactiffime commifceantur in mortario ficco.* Adde Spiritus vini vulgaris libr. iß. paulatim commifceantur cum fale, & impone totum in matraccio; adde libr. iß. falis tartari, agita & digere per duas horas; tum Spiritum supernatantem fepara, & adde Spiritum falis ammoniaci & fal tartari aa unc. IV., digere per horam, & Spiritum volatilem per declinationem fepara. Sed elegantius eft fal volatile oleofum extemporaneum, quod fit inflillando Spiritui falis ammoniaci dulci f. vinofo olei cujufdam ftillatitii guttas aliquot, quas ille promte abforbet, & non minus faporem & odorem eorum adfumit, quam operandi virtutem. Neque ficcum volatile oleofum fal hic omittendum, quod conficitur, fi fali volatili ammoniaco ficco additur oleum Caryophyllorum & accuratiffime mifceatur.

§. XXXIV.

Defillandi methodo fequens paratur fal volatile oleofum & aromaticum. *R.* Cinnamomi acuti, Caryophyllorum aromaticorum, macis, nucis mofchatæ aa unc. ß. Corticis citri drach. iij, falis tartari unc. IV. (& fi penetrantiorum Spiritum defideres, m. j. ri in copia fumendum) falis ammoniaci unc. ij, Spiritus vini vulgaris libr. j. aromata concifa & contufa committantur curcubitæ vitreæ, & affufo Spiritu vini leniffimo igne deftillantur. Hac enim ratione aromatum oleofæ & ramofæ partes a terreftrium vinculis liberatæ, occurrentes tenuibus, rigidis, mollibus fuis ramulis illarum cuspides amplexando involvunt & temperant, ut fic intime falinæ acres, cum oleofis unitæ conflituant volatile oleofum fal. Vel alio modo. *R.* Cinnamomi, macis, nucis mofchatæ, corticis citri, limoniorum aa drach. ij, falis tartari unc. ß. Spiritus falis ammoniaci unc. IV. Hæc omnia viginti quatuor horis relinquenda digeffioni, & poftea his omnibus alkohol vini unc. ij. addenda, & iterum relinquenda digeffioni per duodecim horas, deftillata ferventur ufui; vel fali tartari & fali ammoniaco juffa quantitas olei inflillatur, deftilletur, & fublimate fiat. Tali modo falia volatilia oleofa ex omnibus oleis ficca parari poffunt. Sed pedem hic figo, æquum B. L. exorans judicium. Quod fi enim fingula ad palatum forte non fuerint, eft, quod meliora temporis decurfu expectet.

DEO autem fit Laus, Honor & Gloria!

DISSERTATIO CHYMICO-MEDICA,

D E

SULPHURIBUS

METALLORUM.

Primum edita anno 1716.

§. I.



I quod in hodierno rerum statu corruptissimo est vivendi genus, si quod est studium, cui quis absque conscientiae læsione operam navare, ex quo verum & reale emolumentum in proximum derivare, quodque mentem ad Deum elevandi, & cœlestia spretis terrenis aspirandi occasiones præbere potest plurimas, praxin Chymiae medicæ id esse asseram. Ea enim sobrie, attente & prudenter exercita, egregia subministrat subsidia, morbis & infirmitatibus proximi, selectioribus medicamentis, subveniendi, animum ipsius, fractum forte & prostratum, Christiana paraclesi erigendi, morborum omnium scaturiginem, peccatum inquam, detegendi; ad summum Archiatrum, omniſque vitæ fontem deducendi, & toties inculcatum erga egenos amorem, realiter exercendi, dumque in ægis, tanquam in speculo, propriam quotidie miseriam conspicias, intime temet coram Deo prosternendi & humiliandi. Insuper, dum per ignem recondita rerum penetralia aperit, abstrusa naturæ principia detegit, sublimia artium mysteria & fundamenta manifestat, purum ab impuro separat, naturæ producta magis magisque exaltat & clarificat; non potest non summe gloriosus Creator, agnitione splendida rerum suarum creaturarum & reconditorum thesaurorum, a mente devotâ intime adorari, & glorificari, simul vero ipse homo indignitatis rebellionisque suæ intuitu annihilari & humiliari. Nonne enim intimior chymia Unitatem & Trinitatem Dei in omnibus creatis egregie adumbrat? nonne vestigia immensi sapientissimique Numinis clarissime ob oculos ponit? nonne per ignem purum ab impuro separat? nonne per aquam & spiritum, per ignem & salem omnia regenerat, salit, exaltat & glorificat? nonne in rebus abjectissimis summa naturæ magnalia & vires latere ostendit? Ea est harmonia luminis naturæ & gratiæ! Quin in processu ἀποκαθάρσεως humanæ clarius, quam animam per ignem crucis, tentationum & tribulationum à scoriis peccatorum ὑπερκαύων purificari debere, & in hoc probatorio furno puram demum probatamque inventam exaltari, glorificari? quid magis verum, quam eandem per aquam & spiritum regenerari & renovari, per ignem & salem incorruptam servari & exaltari? Eadem ratione pretiosissimum thesaurum in abjectis & terrenis circumferimus vasibus, Deusque mysteria sua potius simplicibus & contemptis, quam magnis & coram mundo sapientibus concredit. Hoc ergo modo opera omnia Dei enarrant gloriam ejus, & per scalas creaturarum ad Creatorem ipsum as-

cendimus. Hoc ut probemus, non jam in amplum variegatumque regni vegetabilis campum excurrere lubet, sed potius profundum magisque præclusum minerale regnum perscrutabimur, utpote, cui majores potentioresque, præ ceteris duobus regnis, vires inesse, peritiores Chymici testantur ad unum omnes. Ei enim purum luminis & ignis principium copiosius quidem, sed etiam fixius, compactius, intimius, durius, acerba coagulatione impressum & inclusum est, quod vero à tenebrosis suis vinculis & caliginosa matrice debite liberatum, solum & extroversum, maxima energia vires suas luminosas, benedictione plenas, ob oculos ponit. Cui, quantum ad hunc usque diem sagaciores Chymici insudarint, metalla nempe eorumque lucis & ignis principium a compedibus suis liberando & purificando, quantum operæ & laboris impenderint, quam innumeris fere modis & rationibus id quænaverint: abunde satis constat. Neque enim vera metallorum anatomia & reclusio tam exigui momenti, aut tam facilis præparationis est: sed occulta & ardua sane res, cuique opera navetur, ob maximas, quæ inde produci poterunt, virtutes, dum omnia fere medentum desideria complere potest, dignissima. Hinc nec mihi quis vitio vertere poterit, quod huic studio adhuc dum non paucas horas & operas adhibuerim, quin & in posterum adhuc, summo annuente Numine, indefesso studio adhibiturus sim, quodque in hac tractatione, pro ea, quæ mihi hoc in studio est, exigua quamvis, experienciâ, quædam de sulphuribus metallorum differere voluerim. Non equidem ignoro, utpote meæ mihi tenuitatis conscius, quam impar tanto huic proposito sim, quodque meæ vires huic oneri non sufficiant, ut dignum quicquid in tam obscura, inculta totque tenebris involuta materia proponere possim; interim in magnis voluisse, tentasse sat est. Suffecerit mihi si tenuis hæc opella medicinæ tyronibus aliqua saltem vestigia monstraverit, incultum hoc iter adeundi, provectiores & exercitiores autem stimulaverit ut majori studio huic rei incumbant, animique sui dotes & experientiam ad hanc tam dignam tam excellentem materiam majori cum applicatione admoveant.

§. II.

Curiosam equidem inanem & sterilem etymologiam verbi Sulphur, an à σύν πυρὸς cum igne, vel ὅλος πῦρ totus ignis oriatur & quare Græcis θεῖον auiat, divinum quid, Hebræis vero gopher quod oleositatem indicat, (ligna enim gopher oleosa resinosa pingua indigitant) criticis Grammaticis relinquam. Nec multum morabor in magis Cabbalistica, Jac. Böhmii, per Sul & phur designantis, quo partim

partim ipsius jucundum lucidum & luminosum, partim acre corrosivum acidum urens indigitare voluit. Nec detinebor in barbarâ, arabica & obscura Alchymica homonymia, ut Chybur, Kybric, Sarith, Tusiâsi, Tifarum, Averich, Lamere, Aphebiack, caprili, akibum, ahufal &c. quibus qui delectatur, adeat *JOHNSOHN Lexicon Chymicum* Londini impressum. Nec, demum multus ero ut demonstrem tria illa sic dicta principia sal, sulphur & mercurium è metallis elici posse, quod quidem a tot antagonistis impugnatum, a BECCHERO autem aliisque strenue & solide satis propugnatum est, cum liquido satis constet, ea non esse prima simplicissima principia, sed mixta principiata & composita, quæque tantum per compositionem sub hac forma è metallis producuntur. Sed vulgarem sulphuris notionem retinens, intelligo per sulphur metallorum, partem vel terram illorum pinguem oleosam quasi, luminosam, colorem & tincturam metallis impertientem, dicta oleositas durabilissima incombuftibilis, anima, unctuositas in igne permanens, vinculum reliquarum terrarum, cohaesionis principium, lucis & colorum hospitium & matrix; Si cui Cartesianæ vel corpuscularis philosophiæ addicto placeat id per particulas ramosas, hamatas, plicatiles, flexibiles & id genus alias definire, per nos quidem facile integrum ipsi erit. Solet vero inter se variare ratione puritatis, raritatis, volatilitatis, fixitatis. Sic in sulphure communis, propter incoctam, indigestam cruditatem & prævalentem bituminosam pinguedinem, terra hæc volatilis est & combustibilis, præpollente ibi principio φλογιστῶ, in mineralibus jam aliquantulum fixior & coctior: in metallis ignobilioribus magis fixa & constans: in perfectis autem fixissima est & perfectissima. Ex antiquioribus, qui primo sulphurum metallicorum mentionem fecerunt, silentio præteribo obscuros illos Alchymistas, ex *Aureo vellere*, *Turba philosophorum*, ut *Yximidium*, *Pythagoram*, *Avicennam*, *Lilium*, *Rosinum*, *Vometram*, ceteros, quorum hieroglyphica verba famosam illam & sæpe fumosam Alchymiam spectant. Proferam tamen verum illum, quamvis satis obscurum Philosophum ISAAC HOLLANDUM, qui in operibus suis mineralibus (quæ exstant in *Theatr. Chem. Tom. III. p. m. 306. seq.* licet etiam Germanice 1666. Francofurti & ultimo adhuc nuperrime impressa prostant) hinc inde de sulphuribus & oleis metallorum agit. Nec non egregium illum, omniumque Philosophorum verissimum BASIL. VALENTINUM qui in suis scriptis sæpiissime sulphuris auri, ferri, cupri, stanni, & eorum præparationis mentionem facit. Nec ignota ea fuere THEOPHRASTO-PARACELSO qui in *Oper. Germ. Tom. I. p. m. 949.* ait: *Sulphur metallorum est oleitas ex ipsis extracta, plurimis prædita virtutibus pro hominibus, aliud sulphur ex metallis, antequam ignem passa sunt, extrahitur, ut ex marcasitis aureis & argenteis &c. Modus extractionis communis est, ut sumas acetum optime destillatum & corpori metallico pulverisato affundas &c. vel etiam extractio fieri potest per lixivium acre depuratissimum &c. Sed jam fusis & depuratis metallis, elicias ipsorum sulphur, certe nobilior meliorque via non datur, quam per aquam salis seu oleum ipsius, talis quippe aqua extrahit omnibus corporibus metallicis liquorem ipsorum naturalem seu sulphur & crocum præstantissimum tam pro operibus medicis quam Chemicis &c. & p. 1047. p. 1049. 543. 517. seq. p. 824. 884. 906. 1043. quæque hujus discipulus GERARD. DORNEUS *Tract. de Genealog. Mineral. passim.* & PENOTUS *de medicam. Chym. Theatr. Chem. Tom. I. p. 604. & in Theatr. Chem. T. III. p. 533. seq.* EWALD. VOGELIUS *de lapidis Physici conditionibus* præcipue in *Cap. de Oleagine minerali*, & *Autor disquisit. de Elia**

*Artist. T. IV. p. 233. & T. V. p. 662. BONUS in Margar. pretios. de hac materia afferunt. Autoritates recentiorum vero qui cupit, is adeat HELMONTIUM, SYLVIVM, THOMSONUM, POLEMAN. BECCHERUM, STARCKEY, CHRIST. LANGIVM in Oper. p. 118. Excell. WEDELIUM *Tract. de Alchym. p. 39. in Pharmacia p. 203. seq. 205. & adhuc nuperrime in propemtico inaugural. ad Disp. de frustranea medicamentorum exhibitione; Excellentiss. D. D. Præsidis egregias ad Poterium notas p. 550. nec non quæ Præceptor meus nunquam non colendissimus D. D. STAHLIUS Consiliarius & Archiater Regius in Specimine Beccheriano passim ut p. 297. & in Observ. Mens. Septemb. (opusculis ipsius Chymico-Medicis insertis p. m. 361. 364.) de hac materia differit.**

§. III.

Cum autem claustra metallorum tam firma, eorumque repagula tam arcte munita sint, hinc non levem operam & laborem acutumque judicium intimior eorum resolutio poscit. Quod & BECHERUS attestatur in *Physic. Subterr. Suppl. I. p. m. 29.* quod ex metallis hæc principia difficillime elici possint, nisi principiorum additione, metallorumque in primam materiam reductione. Cum ergo tot inanes frustraneas operas & labores in superanda hac difficultate non pauci, etiam magni nominis Chymici, impenderint, desideratamque metam non attigerint; alii autem subtilibus & sterilibus tantum speculationibus intenti, absque debita adhibita operatione manuali, resolutionem tam fixorum corporum capere non potuerint, intimiori quippe naturæ cognitione destituti, & superficiali tantum inhiantes: hinc evenit, ut non pauci sulphura ex metallis elici posse, plane negatum iverint. Quos inter nominabimus, ERASTUM, SCHEKKIUM, PERERIUM, HAGELIUM, ANGEL. SALAM in *Chrysolog. BILlichium in Observ. & Paradoxis Chymicis* (Cato chemicus alias nuncupatum) D. KIRSTENIUM & *Pharmacopœum DETHARDING in Refutationibus Agricola, CONRINGIUM, ROLFINCIUM in sua Chymia & passim Dissert. Chymicis, D. JUNGKEN in notis ad Agricola, UTIS UDENII non Entia Chymica (Elsholtzii destillator. Curiosæ & Rolfincii Chymia adjecta) Illustr. BOYLEUM in Chymista Sceptico, BARCKHAUSIUM in Pyroosophia. D. D. BERGER Prof. Witteb. in Dissert. de Auro potabili, item Chymicum illum alias non inexercitatum KUNCKELIUM in Observ. Chymicis Edit. Londin. Latin. P. I. p. 10. 11. 79. P. II. p. 79. 146. & in Vindicatione sua Spiritus Vini acidi passim, qui tamen potius in verbis tenacissime ludit, nec aliud quidquam demonstrat, quam sulphur non esse primum simplex principium, sed compositum mixtum, quod in superioribus jam concessimus. Quin ipse ibidem p. 11. pinguedinem quandam metallorum concedit p. 49. terram rubram ex auro se accepisse ait, & p. 85. processum aurum in sua principia resolvendi, in elaboratione verum se invenisse fatetur, ubi simul sulphur separatum & in spiritu vini resolutum aurum potabile appellat. Adhæc, quæ audacia est argumentandi, quod ego ignoro, istud nemini omnium cognitum est, vel num a particulari ignorantia ad universalem existentia negationem ulla valet consequentia? una enim eaque solida experientia mille subtilibus & speculativis rationibus præstat. Quale enim pondus habebit thesis illa: quod aurum & argentum corpora sint perfecta, indivisibilia, incorruptibilia, invincibilia, adeo constantia & fixa, ut nullo elemento, nulla corporis cujusdam sublunaris virtute resolvi, inque sua interna compositione & mixtione turbari, lædi, disjungi & destrui queant, cum contrarium abunde experientia testetur. Ut enim chymicorum subti-*

subtiliores per varia menstrua salina labores jam transeam, non ignotum adeo hodie est, ipsum etiam aurum fixissimum, reliquaue metalla omnia cum igne solari per grande vitrum causticum ita liquari & colliquari, ut quædam ejus partes in fumo abeant (id quod ex minuto auri pondere & oculorum visu satis patet) reliquæ autem in cineres seu terram & dehinc in vitrum convertantur, unde liquido satis constat, quod per hunc solis subtiliorem ignem metalla intimius & penetrantius, (quam per debiliorem culinarem,) alterentur, ex sua compositione turbentur, ut pars volatilior mercurialis vel φλογισόν cum fumo abeat, sulphurea vero cum salino in vitrum confletur, de quibus Generos. *Tschirnhausen*, nec non D. GEOFFROY & D. HOMBERGIUS Illustr. Academ. scientiarum Paris. membra *dans l'Histoire de l'Academie des Sciences ad Annum 1702. p. 47. 188. &c.* videantur. Et qua fronte hodie quisquam aurum, argentum &c. in oleis vel alkalibus solvi non posse asseret, cum non pauci chymicorum quotidie id præstent, & fixorum horum corporum volatilisationem, sæpe plus quam cupiunt, experiantur: alia ut jam ejusmodi exempla transeam, quibus ex parte & ipse KUNCKELIUS in *Perspicillo non Entium Chymicorum* respondit.

§. I V.

Missis autem his jam praxi ipsa veritatem & realitatem metallicorum sulphurum adstruam, sequenti innixus experimento. Solve e. g. duas uncias argenti in sufficiente quantitate aquæ fortis, solutionem præcipita cum spiritu vel solutione salis communis in aqua, vel, quod, si non melius, saltem idem est, cum una uncia olei vitrioli, tum injice tres uncias mercurii vivi, & per alembicum ex arena abstrahere, primo lente omnem aquositatem, deinde vero auge ignem ultimo violentissime, idque per aliquot horas, sic Mercurius ex adaperata & reclusa luna partem ejus sulphuream arripit, & cum ea, pro more suo, (lubenter enim sulphura arripit, & cum iis coagulatur) sublimabitur in cinnabarim rubram, quæ sic cinnabaris veram lunæ sulphuream terram in se continet. Neque hac ratione ex argento tantum terra ipsius sulphurea extrahitur, sed processus hic, mutatis mutandis, ad omnia omnino metalla applicari potest terraque ipsorum sulphurea elevari, his modo notatis variationibus. Ad solutionem plumbi aqua fortis prius cum aqua communi debilitanda erit, alias saturnum non aggreditur, & tum, eadem methodo cum spiritu vel aqua salis seu oleo vitrioli præcipitetur & cum mercurio sublimetur. Ad solutionem ferri & cupri, tam aqua fortis, quam aqua regis, adhibetur, cumque veneris & martis solutio notabilem menstrui copiam requirat, hinc prius ad dimidias ex cucurbita abstrahatur, & solutio adhuc calida cum oleo vitrioli (sal commune enim hæc metalla non cornuificat) præcipitetur, & tum addito argento viyo in cinnabarim metallicam sublimetur. Aurum vero ante cornuificationem prius volatilifandum & præparandum erit, sic itidem largietur cinnabarim, quamvis aliqua ex parte adhuc reducibilem. Ex quibus processibus ergo cuivis in chymia vel leviter versato patebit, omnia metalla ita disponi, præparari & recludi posse, ut verum sulphur & terra tingens ab ipsis separari queat. Ratio & fundamentum processus in his consistit: omnia superflua volatilia & imperfecte aut superficialiter tantum mixta metallorum, quæ in mineris adhuc existunt, principia, vehementi illo ignis fluxu, quo cum in corpus reduci solent, in fumum & scorias dispelluntur, ut sola eorum fixa, constantia, debita naturali proportionem mixta principia, firmitus coagulata,

in metallis remaneant, hæc ergo firma naturæ pondere firmata mixtio, non alteratur vel in priora sua principia reducitur, nisi quoddam horum principiorum, per similia homogenea & intime penetrantia additamenta augeatur, extendatur, exaltetur; tum enim tota mixti crasis disjungitur, ex æquilibrio & naturali sua proportionem recedit, & appropriatis mensuris sua sic reclusa & aperta principia concedit. Sic & per convenientia salis tartari volatilis, item mercurii communis vel spiritus mercurialis additamenta sulphurea metallorum pars, liberata mercuriali, elici potest. Metalla quidem in suis corrosivis soluta, aliquatenus, sed superficialiter tantum, non intime, sunt reclusa (post menstrui enim abstractionem, vel corporalem præcipitationem, facillime in unum idemque numero fixum & perfecte mixtum corpus reducuntur:) simul ac autem solutio hæc iusta salis vel olei vitrioli quantitate cornuificatur, tum terra arsenicalis salis communis, vel mercurialis olei vitrioli repente quasi advolat, seseque aliquatenus reclusis metallorum poris insinuat, ejus terram mercurialem vel sulphuream, tanquam sui similem, auget & exaltat, intimius se ei immiscet & associat, ex quo, dum quædam principia supereminet, naturalis proportio mutatur, alteratur, destruitur, resolvitur, ut tam firmiter coherere amplius non queant, & tum injectus mercurius resolutum sulphur metallicum arripit, sese cum isto satiat & coagulat, sicque in cinnabarim sublimatur. Hanc quoque operationem, si recenti semper menstruo repetas, omnem tandem sulphuream metalli partem extrahere, & ex residuo verum metalli illius sal elicere poteris. Notandum etiam flavum illum levem & corrosivum sublimatum, qui in sublimatione superiores partes occupat, a rubro, gravi, insipido metallico sollicitè separandum esse, nihil enim iste ad medicinam, propter acredinem suam, valet. Ast hæc cinnabaris, præprimis si ex perfectis metallis elaborata est, jam per se eximios in re medica edit effectus, si tamen cui volupe sit sulphur hoc metallicum a mercurio liberare, sequentibus fieri id poterit modis. Primo si solutioni, post injectum mercurium, aliquot etiam mercurii sublimati uncias addas, & postea, ut ante dictum, sublimes, omne sublimatum in aqua communi coquas, tum mercurius sublimatus simul mercurium ex cinnabari solvet & extrahet, relicto in fundo sulphure. Vel cum aceto fortissimo, aut sale tartari volatili, vel menstruo quodam oleoso extrahere sulphur ex cinnabari, & mercurius restabit in fundo, solutio vero abstrahi & sulphur in spiritu vini dissolvi poterit, virium non exiguarum. Vel superfunde cinnabari quatuor partes aquæ fortis, & abstrahere ultimo fortiori igne, sic mercurius, dimisso sulphure, arripit salia ex aqua forti, cumque iis in mercurium sublimatum elevabitur. Sulphur autem, cum in aqua forti amplius solvi non queat, [licet totum ante metallum in aqua forti solvi poterit] sed aquam regis postulet, hinc in fundo remanet. Vel addendo alcali quoddam mercurius per retortam abstrahatur, & sulphur cum alcali remanebit. Vel injice cinnabarim in aquam fortem, adde ei sal commune, & abstrahere aquam fortem ultimo ignem sublimationis dando, tum mercurius sublimati instar ascendit, sulphur vero in sale seu potius nitro remanet, ex quo vel cum spiritu vini extrahi, vel ex sale in aqua soluto sulphur cum spiritu vini præcipitari poterit. Nec est, quod quispiam existimet, hanc ita dictam cinnabarim esse mercurium a concentratis salibus ita coloratum & tinctum; quod si enim metalla in suis corrosivis solvas & absque cornuificatione [quæ vera intimior resolutio est] mercurium adjicias abstrahas & sublimes, nihil tamen

men præter album mercurium præcipitatum accipies. Nec a fale vel oleo vitrioli mercurius rubro colore tingitur: ab illo enim fit mercurius sublimatus albus, ab hoc etiam mercurius præcipitatus albus, qui nunquam ab his salibus rubedine tingentur. Ex quo patet principia metalli per cornuificationem vere præparari, disjungi, dislocari. Adhæc cinnabaris ista nullum quendam saporem [quæ tamen omnium salium indoles est] linguæ imprimit, sed plane est insipida, nec fragilis est, more mercurii sublimati vel præcipitati, sed dura & compacta, nec in aqua solvitur, prout mercurius sublimatus, aliaque salina composita, nec denique sunt particulae metalli, per mercurium forte in sublime raptæ, alias enim possibile esset eas per alcalia, pingua, boracem &c. in corpus reducere, quod vero fieri nullo modo potest; &, quod inter præcipua est, metalla iterata ejusmodi tractatione notabiliter pondere decrefcunt, imminuuntur, & tandem ita destruantur, ut extracto demum omni sulphure, reliquum in corpus metallicum reduci plane non possit, sed verum metalli sal largiatur. (a) Quin & BECCHERUS in *Oedip. Chym. p. m. 70.* & in *Physic. Subt. Suppl. II. p. 55.* & 112. per sulphur & mercurium ex omnibus metallis sulphur eorum extrahi & in cinnabarim sublimari posse confirmat, alia quamvis procedat via, dum secundum *Concord. Chym. p. 299.* aurum cum nitro alumine & fale ammoniaco trituro & in aqua communi coquendo solvit, liquorem cum aqua salis tartari præcipitat, liquorem supernatantem filtrat, & denuo cum spiritu salis ammoniaci præcipitat, huncque præcipitatum cum mercurio vel sulphure communi miscet, indeque cinnabarim elevat.

§. V.

Demonstrata ergo jam fundamenti loco veritate sulphurum metallicorum practica, jam in alias faciliores & commodiores methodos ea extrahendi & essentificandi inquirere possumus. Præprimis tamen notandum, metalla omnia, fixiora præsertim, necessario prius subtilisanda, recludenda, aperienda vel volatilifanda esse, ut postmodum menstrua benigniora, ex apertis his metallis, sulphur facilius separare valeant. Hæc ergo præparatio & subtilisatio variis quæsitæ est artificiiis. HELMONTIUS, POLEMANNUS & THOMSON per spiritum salis ammoniaci acidum, metalla cohobando super alembicum, ducunt & ex hoc croco sulphur cum fale tartari volatili extrahere gestiunt. Cum vero præscripta ab ipsis via, spiritum hunc acidum per hæmatiten & spiritum vini præparandi, laboriosa, admodum pretiosa & molesta sit, & decantata illa ignis veneris, id est vitrioli, per hunc spiritum e cupro parati dulcedo adstringentissima fauces præcludat, [teste LUDOVICI *Pharmac. p. m. 52.*] nihilque aliud quam crocum volatilifatum exhibeat: hinc nos multo commodiosius ex oleo vitrioli & fale ammoniaco spiritum ejus acidum protrudimus, cum quo metalla optime volatilifare & in reliquis omnibus secundum methodum POLEMANNI [de *Sulphure Philos.*] procedere possumus. Quanta enim spiritus hic perpe-

tuo fumans potentia metalla volatilifandi præditus sit, experientia ipsa satis testabitur: adducit cum AGRICOLA ad *Pop. P. II. p. m. 142.* & THOMSON in *Epilogif. Chym.* Alii rursus ex nitro & fale ammoniaco spiritum, ad ejusmodi scopum egregium, præparant, ex quibus sunt BASIL. VALENTINUS, AGRICOLA ad *Pop. P. II. p. 143. 144.* CASSIUS de *Auro p. 101.* Autor *Tractatus Sol sine veste*, BECCHERUS in *Concord. & Roseto Chym.* Quo etiam referatur menstruum illud quod BAR. URBIGER in *Script. Chym. p. 90.* ex oleo vitrioli nitro & fale & p. 91. ex oleo vitrioli aqua forti & fale præparat, utraque ad ejusmodi usus non spernenda, imo omnes concentratæ aquæ fortes, aquæ regiæ, spiritus nitri bezoardicus, &c. in hanc classẽ merito referuntur. Alii itidem huic fini accommodant spiritum fumentem ex nitro & mercurio sublimato [aqua *Hemecke* veteribus appellatum] vel ex amalgamate mercurii cum stanno & mercurio sublimato præparatum ut D. KELNER in *Ærar. Chym.* Autor libri, *Sol sine veste*: D. JUNGKEN, in *notis ad Agricol. p. 59.* BECCHER in *Concord. Chym. p. 353.* in *Roset. Chym. passim*: KUNCKEL in *notis ad artem vitriar. Neri p. 179.* &c. Alii ex mercurio sublimato & auripigmento oleum destillant ad metalla volatilifanda, certe ex potentissimis unum conf. AGRICOLAM ad *Pop. P. I. p. 50. P. II. p. 155. 156.* BAR. DE URBIGER in *Script. Chym. p. 96.* Sic & Illustr. D. D. Præses in *not. ad Poter. p. 515.* aurum per spiritum tartari præcipitatum in flores purpureos certa enchiresi elevari asserit, alii denique alios ad præparanda metalla modos servant: hinc jam tacebo eos, qui multis amalgamationibus, calcinationibus, cmentationibus, cum mercurio, fale, sulphure, fale ammoniaco, cinnabari &c. reclusionem hanc perficiunt. [conf. DIGBY in *Exper. Chym.*] Nec morabor circa eos, qui in disanimando præcipue auro, sulphur ejus ante cum sulphure veneris vel martis exaltant & augent, sicque ad faciliorem postea disanimationem præparant. Festinandum enim nobis est ad ejusmodi menstrua, quæ ex his reclusis metallis sympathica extractione solum sulphur, neglectis intactisque cæteris principiis, aggrediantur & extrahant. Sic ante citatus THOMSON p. 68. scribit: *Qui e mineralibus vel metallis NB. reclusis sulphur sincerum elicere studet, semper in consilio t neat, ut menstruum suave extrahens obtineat.* In totum autem menstrua jam [quippe quæ hic omnem absolvunt paginam] dividemus in sicca & humida & hæc rursus in acida & alcalina. Neque enim famoso & obscuro liquori Alcahest diu immorabimur, cujus incognita adhuc dum natura, multa de eo afferre prohibet, quamvis probabilissimæ conjecturæ liquorem hunc naturæ mediæ saturatæ salammoniacalis esse innuant. Describitur enim tanquam liquor salium salinissimus, sine ullo odore, sibi homogeneous & absque reactione operationes suas perficiens, quæ notæ vix alii quam ejusmodi saturato liquori tribui queunt. Hinc PHILALETHA *Tract. de liquore Alcahest* eum ex spiritu urinæ volatili & acido ad saturationem mixto, digesto circulatorum præparare videtur. Alios autem novi, qui ex sapa urinæ, magnetismo aëreo exposta, &, mediante

(a) Equidem non destituuntur fundamento quæ Experientiss. D. D. HERMANNUS in *Collect. Uratislav. T. XI. XII. p. 102.* contra hæc Experimenta injicit monita, quod hæc Cinnabaris potissimum parti inflammabili Acidi Nitrosi suam debeat originem, cui proinde Autor Alchymicæ denudatæ NAXAGORAS in *aureo vellere p. 119.* ut in *Hermeticâ Concordant. speciali p. 166.* nihil verè ad rem faciens respondere potuit, quamvis quasdam discontinuati metalli particulas eidem connecti posse, concedi queat, cum diversitas coloris pro diversitate metalli id indicet. Certè purior separatio principii colorantis ex metallis absque ullâ aliorum principiorum admixtione res est momenti non levis, sed permultis difficultatibus subjecta; ita ut ex tanto eorum quæ hoc scopo commendantur numero, adhucdum vix duo noverim, quæ forte probas sustinere possint, in plerisque verò ejus præsentia non nisi per transumptionem concludi possit, tantum abest ut per hæc liquido planè demonstrari queat: nec vitio mihi verti posse confido, quod omni die paratus sim, meliora edoctus, cedere, quæque fovi præjudicia, seponere.

mediante occulta circulatione, intine coadunata spiritum talem saturatum, menstruumque ut vocant Alcahestinum egregiæ virtutis conficiunt, cuiusque potentia in omnia tria regna se extendit. BECCHERUS contra in *Phys. Subterr. & Clar.* BOHNIUS in *Epist. de Insuffic. Acidi & Alkali* eum puræ primæ simplicissimæ mercurialis substantiæ & naturæ esse & incognito artificio ex mercurio vel sale communi erui, contendunt. Errorem saltem eorum indicabimus qui mercurium philos. cum Alcahesto confundunt, ex quorum numero etiam est Clarif. D. LENTILIUS in *Append. ad Ann. 3. Decur. III. Ephem. N. C. p. 103. seq.* Sed missis his transgrediemur ad ipsius adæquatum & substitutum, sal tartari puto volatile, toties totiesque celebratum. Cum enim sulphura metallorum sint pingua, & oleosa ipsorum principia; hinc sana ratio suadet optime & sympathice ea in ejusmodi pinguibus oleosis & alcalinis mensuris, tanquam sui homogeneis dissolvi, teste Anglo THOMSONO in *Epilog. Chym. p. 71. oleosa salia alkalia fixa & volatilia sulphur vulgare, minerale, metallicum benigne expromunt dissolvuntque.* Ex his autem a multis jam seculis principem sibi locum arrogat sal tartari volatile. Cur autem chymici tantis sudoribus sal tartari fixum volatilifatum quæsiverint, cum alcalia volatilia faciliori longe opera & copia præsto sint; ratio hæc est, quia alcali fixatum per ignem multo potentioris sortis imprefionem & vim accepit, ut eo promptius postea volatilifatum in forma spiritus corpora metallica tam firma penetret & extrahat. Variis autem hoc attentatum est modis, quorum præcipuum censeo per mensuram oleosa teste POLEMANNO *de Sulph. Philos. p. 111. 112. seq.* Ex praxi vero constat olea & alcalia fixa ita nude non misceri & uniri invicem, hinc occultis ea combinandi enchiresibus opus est, in quibus communicandis perquam invidi fuerunt. Verior tamen methodus his probe notandis momenti absolvitur. Præparetur modo communi sal tartari acre, quod, aliquoties cum calce viva cementando, magis igneum reddatur, & cum 3. 4. partibus olei cujusdam ætherei successive imbibatur, sæpe sæpiusque terendo & circumagitando, donec omnes olei partes imbibitæ fuerint, his notatis probe enchiresibus, ut pauca semper olei quantitas affundatur, tritura creberrime reiteretur, & vasculum, cum contenta massa, aëri frigidiori in cella, per totum hoc tempus exponatur, aer enim medium conjunctionis est, quod occultam digestionem vocant, sic tandem massam accipies lacteam saponiformem [qui sapo tanquam corrector vegetabilium pillularum *Starckeyi* præcipuum est ingrediens] sed vix infra semestre spatium. Emunctioris tamen naris Chymici per vinculum amoris paucis diebus eundem saponem elaborare poterunt, ad quod tantum temporis ordinario requiritur. Hic ergo sapo ulterius per 40. dies digeratur ad salinam usque consistentiam, ex qua postmodum spiritum salis tartari volatilis pellere vel spiritum vini cum ea acquare poteris. (b) Sic nactus eris menstruum ad sulphura metallica extrahenda certe omnium fere nobilissimum & famigeratissimum, de hoc enim PARACELsus scribit: spiritus vini non solvit aurum nisi insit sal circulatum, & eo mediante se aurum in forma punice olei per retortam duxisse refert HELMON-

TIUS. Mineralium autem sulphura ut antimonii, vitrioli, electri immaturi seu metalli masculi [quod POLEMANNO cinnabaris nativa, STARCKEYO, zincum, JUNGKENIO minera lunæ *Nohtgilden Erz*, mihi vero optime minera bismuthi esse videtur] ab initio statim operi immisceri, cum oleo æthereo, vel sale tartari [via sicca per liquationem, humida per coctionem] aut utroque simul solvi, & per ante dictas operationes volatilifari poterunt. Sic HELMONTIUS ex metallo masculo sulphur per oleum cinnamomi extrahit, & tum reactioni cum proprio alcali adhibet, alii e. g. antimonium vel caput mortuum vitrioli edulcoratum cum sale tartari liquando solvunt & hoc fermentationi cum oleis exponunt. Idque est, quod TACKENIUS in *Hippocr. Chym. p. 275.* ait: *Alcalia cum propriis oleis destillatis juxta proportionem, debito requisito tempore, artificiosa occultaque circulatione, idoneo vase si coquantur, dant ens mirabile, elixir salis volatile.* Plura de his qui legere cupit, evolvat POLEMAN. *de Sulph. Phil.* DYGBY in *Arcan. Medic. & Exp. Chym. Autorem Lulli redi-vivi*, STARCKEYI *Pyrotechniam &c.* quibus juxte & attente inter se collatis & pensatis non difficile erit, totum artis hac in re fundamentum perspicere. Quidam equidem, ut D. J. W. in *Schlüssel zur Schatz-Kammer der Natur* & ipse BECCHER in *Oedip. Chym. 86.* oleum stillatitium cum oleo per deliquium digerunt ad saponem hunc conficiendum, innixi regulæ; Salia non agunt nisi resoluta, sed ut verum fatear, operatio hæc ita nude non procedit, quamvis enim ante dicta diuturniori digestionem exposuerim, & utraque olea colore saturate rubro tingantur, ut etiam discerni a se invicem vix queant, tamen uterque liquor separatim semper ab altero occupat locum, & combinationem hoc modo constanter renuunt. Alii sal tartari, cum oleo tartari foetido commixtum in liquida massa lege artis digerendo, fermentando & sublimando, conficiunt suum sal volatile album, sed paulo foetidum, quamvis adhuc dubium sit, num sal tartari volatilifetur, aut sal volatile ex oleo separatur, præcipue cum hoc non tam acre & igneum sit, ac desideratur, procedunt tamen hac methodo VIGANUS in *Chym. p. 22. Autor Lulli redi-vivi* aliique. Melior adhuc modus est eorum, qui sal tartari cum spiritu tartari ad saturationem usque imbibunt, & tum per destillationem volatilifant, magna tamen spiritus tartari pars adhibenda erit. conf. VIGANUS *Chym. p. 22. D. CHRIST. LANGIUS in Op. p. 179. CNÖFFELIUS & D. J. W. Schatz-Kammer der Natur.* Qui vero VIGANI. l. c. p. 22. illam methodum ex sale tartari & aqua regis elaborabunt, purum potius spiritum salis recipient, ut & ea, quæ à multis laudatur, ex alumine & sale tartari, potius soboles urinæ, qua in conficiendo alumine utuntur, quam salis tartari est, nam ex alumine etiam per adjectam calcem vivam pars ejus volatilis urinosa separatur, quod eodem quoque modo cum nitro procedit. Eandem censuram meretur modus LANGELOTTII, qui ex fermentatione tartari crudi cum sale tartari procedit, quamvis eum suo quoque calculo BECCHERUS in *Phys. Subt. Suppl. II. p. 93.* approbet addendo: *Spiritus tartari putrefacti aurum solvit & omnia metalla.* Nec longum detinebor in methodo Helbigiana in *Ej. Introitu ad Physic. inaud.* qui lixivium ollæ non vitreatæ

(b) Saponis hujus præparatio equidem sub his vel etiam aliis enchiresibus satis nota est, sed quâ ratione ex eo postmodum sal volatile præparetur, hic aqua hæret, neque enim digestio illa per 40. dies rem hanc absolvit: revera tamen salia fixa volatilifari posse, certus scio; & conf. circa ea WELLING *Opus Mago-Cabalisticum*, & *Traité du Mystère de la Croix*, anno 1732. editus. Jacent meas inter schedas quæ de sapone communi & Chymico consignavi, in quibus de hac salium Alcalinorum volatilifatione fufius egi, quæ forte aliquando lucem publicam aspicient.

vitreatas imbibit, aerique exponit, ut sal volatile (c) hæreat : interim cum nitro fixo hæc aliquando casu mihi evenisse reminiscor. Nec placet mihi sal volatile quod ex fecibus uvarum siccatis capiunt, nec ii, qui ex alcali fixo depurato spiritum extorquent, de quo POLEMAN, & KUNCKEL in *spiritus vini acidi Vindicat.* non dissimulat ad spiritus salis naturam proxime ipsum accedere. Existat quoque modus eorum, (*Balsamus Samech Paracelsi* dictus) qui sal tartari cum spiritu vini (communi, de philosophico enim spiritu vini *Lullii & Weidenfeldii* ad volatilisationem hanc aptissimo in sequentibus plura) rectificatissimo per aliquod tempus putrefaciunt, abstrahunt, idque cum recenti spiritu vini aliquoties reiterant, donec sal tartari saturatum & in terram foliatam conversum sit, cujus nota est, si portiuncula quædam, candentem super laminam projecta, tota absque residuo avolat. *Conf. BOHN. de Acid. Alcal. p. 28. Autor Lulli Redivivi.* quod & alii eadem methodo cum tartaro crudo & spiritu vini efficere præsumunt. Summo etiam digito indicasse sufficiat eos, qui cum spiritu salis ammoniaci urinoso, vel eodem cum aceto destillato saturato sal tartari imbibunt & volatilifant : quam item cum balsamo de Copaiva tartari volatilisationem describit BAR. URBIGER quamque *Celeber. D. D. Præses in notis ad Poterium & in Dissert. de Generat. Salium* per putrefactionem soluti salis tartari in vase quercino, dejectæque ad fundum terræ in spiritum volatilem alcalinum destillationem, docet. Restat adhuc methodus non incongrua eorum, qui sal tartari cum aceto destillato ad saturationem imprægnatum cum spiritu vini solvunt & in terram foliatam redigunt, ex qua postmodum lege artis spiritum volatilem alcalinum destillant. *AGRICOLA in Pop. P. II. p. 15. MATTHIÆ Exper. Chym. p. 52. DIGBY Exper. Chym. p. 139. & D. D. Præses in Diss. de Generat. Salium.* Solent imo hunc spiritum titulo circulati minoris, aceti philosophici insignire, & , ut dicam quod res est, non exiguas in extrahendis metallorum sulphuribus dotes eum possidere experientia comprobât, idque tanto excellentius, si sal tartari istud ante saturationem per repetitas cum calce viva cementationes in oleum incoagulabile conversum prius fuerit, majores enim inde spiritus ex hoc prolectus igneasque vires acquirit, & notum mihi est, cum hoc spiritu factum aurum portabile magni venditum fuisse propter egregias vires. Jam per se enim hic spiritus in calculosis concretionibus resolvendis mira præstat : notatum quoque fuit acetum destillatum, si ex generosiori vino paratum fuerit, multo citius saturationem absolvere, quam si ex viliori, cujus quidem ad hoc multo major quantitas requiritur. Cæterum *conf. DIGBY Exper. Chym. p. 143. LANGELOTT'S Salamander. p. 295. &c.*

§. VI.

Accedimus jam ad menstrua oleosa, quæ in extrahendis sulphuribus vires exercent non contemnendas. Consideranti siquidem oleorum in sulphur vulgare & minerale vires vulgo etiam notas, facile apparet, eadem rite acuata & adhibita ad extrahenda etiam ex metallis reclusis sulphura, non imparia futura. Observandum interim, plurima ex his oleis solite a soluto sulphure separanda esse, antequam in spiritu vini resolvantur (quod autem non leve negotium, ut videri posset, in praxi facessere solet) idque propter ingratum odorem & saporem ori & ventriculo adversissimum, tum propter diureticam &

Frid. Hoffmanni Oper. Supplem. II.

calefaciendi, siccandi, phlogosesque in humano corpore excitandi vim eorum nimiam. Afferam hic *Illustr. D. WEDELIUM in pharmac. p. 225.* notantem : olea vegetabilium solvunt sulphura mineralium & metallorum præparatorum & porosorum & BECCHER. *Phys. Suppl. II. p. 79. 109.* Spiritus terebinthinæ, vel quodcunque oleum, cinnabarim solvit immutatis viribus & sulphuris & mercurii, etsi sulphur taliter extractum non contemnendarum sit virium, abeatque in oleum rubicundissimum : specifica enim metallorum vis & facultas medica in ejusmodi sulphuribus extractis & correctis versatur. Hinc *ELSHOLTZIUS in Destill. curios. p. 36.* annotavit, spiritum terebinthinæ ex cinnabari sulphur in forma rubicunda per retortam secum elevare. Ipsum quidem jam crudum antimonium, facilius tamen præparatum, extrahit. Sic *PETR. FABER. Monspeliens. in oper. suis. p. m. 389.* cum hoc spiritu tincturam antimonii præparat, & *AGRICOLA in Chirurg. p. 644.* ex ipso auro essentiam cum spiritu terebinthinæ evocat. Hinc optime *BECCHER. in Oedip. Chym. p. 68.* Metalla, extractione sympathica, per aliquod menstruum pingue, ut est spiritus terebinthinæ &c. tractata, diverso colore, pro diversitate metallorum, tinguntur, quæ tinctura a sulphure venit, & inspissata siccum sulphur existit. Quibus verbis ii simul refelluntur, qui censent tincturas has per spiritus terebinthinæ a sola digestionem provenire, cum pro diversitate metallorum diversimode etiam coloretur extractio, sic a cupri croco vel minera, viridi imbuitur colore (ex qua solutione quidam sulphur cum mercurio vivo per digestionem præcipitare intendebat) a martis, rubro &c. Huc quoque referatur *URBIGER. p. 94.* qui ex luna cum pumice stratificata, mediante spiritu terebinthinæ per sal tartari fortificato, sulphur extrahit ad lunaris suæ panaceæ parationem. Qua occasione recordor generosissimi cujusdam Philochymici, qui sancte mihi affirmabat, se hac ratione, miscendo scilicet calcem metalli cujuscunque præparatam cum sale tartari, & digerendo cum spiritu terebinthinæ non modo omnium metallorum sulphura in oleum redegissem; sed & ex mercurio (quem ante cum sale marino certis enchiresibus eousque purgaverat, donec ex forma sua corrente in magma albicans immobile lunæ instar mutatus esset) oleum acquisivisse, quod in tenebris, luminosi instar phosphori, luxerit. Meretur quoque hic locum egregia illa vitrioli essentia, quam *KESLER in proc. Chym. p. m. 329.* describit, dum ex oleo vitrioli acuato, & in crystallos concentrato, mediante spiritu terebinthinæ (magnum enim istud notandumque sphalma est, quod ibi spiritus vitrioli positus legatur) cum spiritu vini, sulphur vitrioli elevat : ut & *BLANCKARD in Theatr. Chym. sulphur vitrioli cum spiritu terebinthinæ præparare docet.* Cum interim chymicorum quidam simplicibus oleis non contenti essent, operam dederunt, ut aptius adhuc ea præpararent & exaltarent. Inde *Autor Delic. Medic. Chym. p. 630.* ait : spiritum terebinthinæ & juniperi valde subtiliari, planeque inodorum reddi posse, & *D. D. WEDEL. in Pharmac. p. 227.* Ex pice & refina acidus liquor fit, dissolvens potentissimum, juxta *QUERCETANI Hermet. Medic. C. XV. p. 169.* quo cum convenire videtur *BEGUINUS in Tyroc. Chym. p. m. 133.* qui ex terebinthina, per balneum mariæ, spiritum quendam præparare jubet & *KESLER in proc. Chym. p. m. 379.* aceti terebinthinæ ad solis & lunæ extractionem meminit. Ut & mihi non ignotum est, ex resinis subtiliorem quendam præparari posse spi-

D

ritum,

ritum, menstruum sui generis peridoneum. Nec indignum memoratu est BECCHERI illud menstruum, in *Laborat. Chym.* qui recipit spiritum nitri vel vitrioli, quale lubet, istud super cadmiam rectificat, ut nanciscatur oleum concentratum, cui guttatim affundit ana olei terebinthinæ vel succini vel spicæ, facta reactione digerit ad tempus & postea destillat, sicque menstruum accipit valde penetrans, quod ex metallis & amausis tantum sulphur subtilissimum extrahit. D. D. WEDELIUS in *Pharmac.* p. 226. olea expressa cineribus, calce viva, aliisque alcalibus abstracta, ut vulgatissimum olivarum, acrimoniam & subtilitatem acquirunt majorem, adeoque & virtutem solvendi; sic oleum laterinum hoc modo aurum ipsum solvere potest & argentum, unde à quibusdam corrosivum dulce dicitur. Quod & jam advertit HELMONTIUS in *Oper. P. II. p. m.* 19. Spiritus olei olivarum oleosus, qui prima medietate exit, argenteum filum in lagena dissolvit & TACKENIUS in *Hippocr. Chym.* p. 177. oleum olivarum destillatum rodit solvitque argentum insensibiliter, cum ei injectum per breve tempus fuerit. Nec prætereunda plane videtur præparatio CHRIST. PALINGENII in *Tract. de tinctura corallorum*, qui ex duobus microcosmi excrementis, ministerio lapidis hæmatitis & crebrarum destillationum, elicit clarum, suave, fragrans & dulce oleum, quod omnia mineralia aggreditur, intima eorum quasi viscera benigne penetrat, & in oleum convertit, & antimonium ab ipso brevi in rubrum oleum resolvitur parum fuscae terræ relicto. Nec inepte huc quadrant verba BAR. SCHRODERI in *Unterricht von Goldmachen* / quibus testatur ex saliva & muco destillari Spiritum, qui aurum dissolvat, relicta terra adamica rubra. Ipse ego inde aliquando spiritum aurei coloris per alembicum accepi, alii quoque exinde cum arena oleum destillant magnarum virium. Conf. HELVETII *Diribit. Medic.* TACKII *Chrysolog. & Magnific.* D. D. *Præsidis Tract. de Acid. & Alkali.* Quo & referri debet D. Helwigii aurum potabile reddendi per triturationem cum saliva artificium, (pro quo communicando Autor hic adhuc nuperrime 50. Thaleros ab ejus amatoribus poscit.) Jam enim Clar. D. LENTILIUS in *Miscell. Med. Pract. L. I. p.* 238. aurum modo foliatum à ventriculi fermento, seu alcahesto gastrico, resolvi posse, multis contendit. Sed pergo ad cinnamomi oleum, quo cum ex metallo masculo sulphur extrahunt HELMONTIUS, POLEMANN, qualem quoque eximiam antimonii tincturam communicat *Excellent. D. D. Præses in Tract. de Cinnabari-Antim.* dum sulphur antimonii per sal tartari extractum digeritur cum oleo vel cinnamomi, vel anisi, vel corticum citri & post tota mixtura in spiritu salis ammoniaci vinoso solvitur, emergit enim tinctura spirituosissima, volatilis, elegantissima, quæ in pleuritide & phthisi, debite data, vix par habet; ex floribus quoque hæmatitis, cum oleo anisi solutis, fit tinctura penetrantissima. Olea itidem ex fuligine nec non carbonibus fossilibus destillata, ut & olea petrae & naphthæ, non aspernandas ad sulphura extrahenda dotes possidere, manualis operatio abunde docebit. Quæ autem TILINGIUS in *Prax. Chymiatr.* p. 136. 142. cum oleo cinnamomi & juniperi affert aurum potabilia, tacitus præteribo, quoniam nimium adhuc crudæ sunt istæ præparationes. Eos itidem, qui sulphura extrahenda cum gummate hederæ miscent, ad fucatos & adulteratos modos ablegabimus. Sed perpendemus ea quæ VIGANUS in

Chym. p. 25. seqq. asserit. A mercurio obtineo tincturam violaceam, mediante meo menstruo, quod limpidum est & pingue & minime corrosivum, neque cutim neque vestimenta corrodens &c. per idem menstruum tinctura elicitur ex marte admodum sulphurea, continens sulphur suum fixum & instar sanguinis rubicundum, neque flammam concipiens &c. per idem menstruum ex sole conficitur tinctura addendo sal philosophicum ejusque beneficio per fermentationem quandam in substantiam spongiosam evadit, infundo alcohol vini & statim, sine ulla additione, aurum solvitur in tincturam flavam irreducibilem. Quæ verba clare satis indicant, ipsum non nisi oleosum menstruum adhibuisse, idque eo certius, cum è chymia, attestante quoque SCHRÔDERO, constet, quod mercurius cum oleo juniperi digestus, tincturam violaceam largiatur, proinde VIGANUS, si non ipsum juniperi oleum, saltem menstruum ei parum absimile, hic intellexit. Nec minorem merentur attentionem ea quæ Clarif. D. D. DIPPELIUS in *eximio de vita & Medicina animali tractatu* propalat: olea destillata & rectificata probe, tam animalium quam vegetabilium, in solem, jovem, venerem & martem agunt, solvendo, neglectis reliquis. Quibus sulphurum per hæc mensura extractionem aperte innuit, & si conjecturæ (forte non sine fundamento) locus est, cum ejusmodi oleo animali Autorem hunc præstantissimum, aurum suum potabile, cujus vires ibidem non sine causa deprædicat, conficere asseram. Aurum, enim ait, si solvitur radicaliter in liquore omnium medicamentorum dissolventium potentissimo & ad eum puritatis gradum reducto, qui cum ultimo concoctionis cibo luminoso symbolizat, isteque liquor luminosus & subtilissimus virtute auri collectiva & mediante diutina circulatione artis in fixam substantiam salinam omnibus liquoribus miscibilem rursus constringitur, erit medicamentum omnibus nodis dissolvendis & orgasmis sistendis aptissimum &c. & alibi adhuc clarius: aurum per corrosiva prius calcinatum & elutriatum indissolubili vinculo jungatur cum solvente, potius luminoso quam igneo, ceu cum tali igne potentiali cujus partes luminosæ partes acidæ seu corrosivæ longe superant & hinc dulci & suavi sapore linguam afficiunt &c. Quæ quamvis oculatis clara jam satis sint, majoris tamen luminis & certitudinis causa conferam cum eo, quod ante descripserat, medicamento: cujus sapor grato & aromatico, si corresponderet odoris grave penetrantis conditio, esset equidem unum ex omnibus, quo maxima morborum coagulantium pars uno quasi ictu, cito, tuto & jucunde amputari posset; est istud oleum destillatum & separatum à suo fale ex animalis partibus quibuscunque, ex cornuta, sine ullius rei additione, eo usque rectificatum, donec nihil adustarum secum nigrarum amplius in fundo relinquat &c. Nec est, ut, quas ei virtutes tribuit, in dubium vocemus, cum ipse ego, non una vice, egregias ejus vires in convulsionibus, epilepsiis, febribus intermittentibus, arthriticis, hysteriis aliisque morbis probatas invenerim, unde mihi non est dubium, id, si dextre exaltatum & cum auro soluto fixatum fuerit, quominus longe adhuc excellentiores vires sit exferturum. Et quavis ingenuus Autor adductis in verbis veram præparationem aperte satis tradat, certum tamen est in ipsius elaboratione tot adhuc occurrere dubia & scopulos, ut exercitato Chymico ad ea absolvenda & enodanda opus sit. (d) Nec hac occasione prætermitemus ejusdem antipodagri-

(d) Quod olea nonnulla ex Regno animalia præcipue ob singularem quamdam corporum salinorum mixtionem circa aurum aliâ ratione se gerant, quàm vegetabilium olea, ex experimentis nonnullis dilucescit. Verisimilius autem esse Chr. Democritum hic non tam ad olea, quàm ad phosphorum respexisse jam utique lubens agnosco.

dagricum saponem chymicum, ex tinctura alcalina veneris & antimonii & oleo juniperino lege artis compositum, stupendæ efficaciam tam in sedando dolore podagræ, quam in resolvendo tartaro, qui falsam omnino reddit hypothesein de incurabili nodosa podagra, cujus quoque beneficio Autor clariss. podagram, quæ per 30. annos duraverat, cujusque topi in cubitorum juncturis vel ovi magnitudinem æquaverant, trimestri spatio perfecte se curasse gloriatur. Nec immerito hanc ei laudem impertiit, cum egomet ipse ejus in sedandis doloribus arthriticis, resolvendis etiam durissimis nodis, topis, fungis & debellanda membrorum atrophia & paralyfi potentiam cum gaudio adverterim, quibus suum quoque calculum adjicit *Clar. D. D. GOHLE in Annot. ad Schützii Manud. Chirurg. p. 110.* Liceat mihi huic loco quoque inferere decantatam orphanotrophei Glauchensis Essentiam dulcem, quam itidem sulphur auri resolutum esse, probant, tum ipsius effectus, tum salis solaris, in pulvere nigro dicto, remanentia, tum ea quoque, quæ de ejus præparatione affert *D. D. KÜNSTEL in Dissert. de Salibus Metall. p. 16. 18.* testans: menstruum ipsorum non acidum nec corrosivum esse, nec per se digestum quicquam fecum terrestrium deponere, multo minus per alembicum abstractum vestigium salis relinquere; sed potius & volatilitate & puritate Spiritum Vini rectificatissimum proxime accedere: hoc ergo calci Solari subtiliori affusum diuque digestum, eam intime resolvere, ita, ut mercurius sic digestus, abstracto post menstruo, si per aliquod tempus adhuc in balneo digeratur, & per retortam destilletur, in aquam limpidam & terram fixam dehiscat, aurum vero abeat in substantiam resinofam, quæ tota in spiritu vini diffuit. Quæ verba annon cum ante dictis concordent, ex iisque lumen forte non leve accipiant, peritioribus judicandum relinquo. Videbunt ad minimum, quid indagandum, & qua norma ad hanc metam progrediendum sit & contendendum. Hoc saltem addam, non facile reperiri menstruum, quod abstractum resinofam post se extractionem relinquat, eamque in spiritu vini dissolubilem, quam menstrua subtilia oleosa mercurialia. Quamvis enim Autor Solis sine veste & JUNGKEN ad Agricolum perhibeant spiritum fumantem ex amalgamate mercurii cum Jove & mercurio sublimato paratum, aurum in resinam resolvere: tamen ob corrosivitatem suam nullo modo huc pertinere potest. Restat denique, ut numero oleosorum menstruorum adhuc apponam *ἀνώνυμον* quoddam, hætenus, quod sciam, incognitum, planeque singulare menstruum, cujus Chymicorum omnium aperte & distincte hætenus mentionem fecit nemo. Est autem liquor limpidus, volatilis & purus, ad instar spiritus vini, oleosus, totus enim clarissima ardet flamma, sapore acidus, prout forte acetum, in destillatione floccorum nivis facie transcendit, omnia metalla, præprimis calcinata, in digestionem & cohobationem aggreditur, ipsum etiam aurum rubicundissime extrahit, abstractoque menstruo, residua tinctura, quæ sub resinæ forma apparet, tota facillime in spiritu vini resolvitur, eumque saturate rubro colore tingit, relicta terra solaris nigriuscula est, quæ omnem in reducendo operam illudit, ex qua sal solis confici posse confido. Menstruum hoc omnibus, tam aquis quam oleis, æqualiter & in totum miscetur, corallia in primigenium suum liquorem marino-viridem convertit: natura ejus est duplicata, saturata Salammoniacalis oleo-
Frid. Hoffmanni Oper. Supplem. II.

sa, & si sensa mentis dicere licitum est, eum verum *Weidenfeldii* menstruum, spiritum vini philosophicum, inquam, esse censeo (quam longe enim a scopo aberret JUNGKENIUS in *Not. ad Agricol.* qui ex vino vulgari eum confici debere sibi aliisque persuadere vult, prolixa demonstratione non eget) cum ex eodem subjecto vinum album & rubrum Lullii separatur, ex quibus patet quare *Henr. KHUNRAHT in amphitheatro suo & Tractatu de hyleali chao* lunariam suam appellet ignem aqueum & aquam igneam. Quin ulterius hoc subjectum largitur spiritum quendam urinosum, miræ naturæ, qui in quibusdam indoli urinosorum ordinariæ plane contrariatur, & butyrum quoddam glaciale, quod colore, consistentia, albedine butyrum antimonii exacte refert, saporis amarissimi, volatilitatis mediæ, utraque ad extrahenda metalla existunt aptissima, præparatio quidem est facillima & simplicissima, veruntamen tectissima obscurissima. Interim cum paucum adhuc tempus sit, quo eorum præparatio ad notitiam meam pervenit, hincque naturam eorum intimiorem nondum, quoad omnia, perspectam habeam, sed ulterius adhuc pluribusque experimentis eam indagaturus sim, hinc hac vice plura de iis apponere supersedebō. Caterum præter citatum WEIDENFELD de *Secretis Adeptorum* optime DICKINSON in *Tract. de Chrysopoeia* scopum hunc tetigisse videtur.

§. VII.

Lustrabimus jam menstrua alcalina, quæ itidem virtute hac referta reperiuntur. *Celeber*: quippe WEDEL. in *Pharm. p. 232.* *Salia*, inquit, *alcalia*, *fixa & volatilia*, *solvunt sulphura & sulphurea*, & DE LE BOE SYLVIVS *oper. T. II. p. 463.* *Salia volatilia* apta esse ad elicienda sulphura, quibus narcotica vis inhaeret, prodit: nec abnuat prælaudatus D. DIPPELIUS dum ait: *Alcalia volatilia animalium solvunt & extrahunt aurum, cuprum, ferrum, plumbum, aliquatenus præparata, lunam & mercurium nunquam attingunt.* (e) Principem ergo ex iis locum concedemus notissimo illi menstruo, quod variis modis ex spiritu salis ammoniaci urinoso & spiritu vini rectificatissimo paratur, cujus debite parati efficaciam non possum non commendare, quæ tanta est, ut ex metallis aliquatenus præparatis, sulphura ipsorum potenter satis extrahere & essentificare queat, adeo, ut etiam, mediante ipso, aurum præparatum super alembicum vehi possit, teste *Illustr. BOYLE in Histor. fluid. & firm. Sect. V. & ELSHOLTZII Destillat. Curios. p. m. 28.* diversa autem ratione id præparare solent, hi spiritum salis ammoniaci cum alcali, illi cum calce viva paratum cum spiritu vini combinare solent, alii spiritum urinæ per proprium sal volatile & fixum acuatam, repetitisque cohobiis unitum, cum spiritu vini conjungunt. Nonnulli ex spiritu salis ammoniaci partem tantum volatilissimam, quæ minutissimis guttulis præcedit, separant & operi adhibent, nonnulli etiam spiritum vini hoc vel illo modo præparant & adaptant, tantique olim habitum istud fuit, ut quidam, non nisi hieroglyphicis obscurisque terminis, id manifestare voluerint. Ulteriorem & ampliorem enucleationem qui cupit, adeat TENTZEL *Exeg. Chymiatr. p. 490.* TILINGIUM *Prax. Chymiatr. p. 138. 146.* CROLLII *Chym. p. 214.* HARTMANNUM in *not. ad Croll. p. 387.* SENNERTUM de *Consens. & Dissens. Chym. p. 427.* Ej. *Instit. Medic. p. 1247.* BOLNEST. *Aurora Chym. p. 91.* AGRICO-

D 2

LAM

(e) Aliud verò est si certis subsidis viam paraveris, tum utique spiritus urinosi etiam Lunam & Mercurium solvere poterunt.

LAM in *Pop.* p. 77. 100. 682. JUNGKEN in *not. ad Agric.* p. 17. SCHRÖDERI *Pharmac.* ZWÖLFERI *Manrif. Spagyr.* EKHARTS *ungewissenhaftten Apotheker / Digby in Exper. Chym.* p. 148. 166. KESLER *proc. Chym.* p. 10. LANGELOTT in *Salamander* p. 301. HELWIG *Lex. pharm.* p. 121. & nuperrime D. D. KRÜGER in *Diff. de Auro Medico Oxonii habita.* Imo solus spiritus salis ammoniaci, vel cum sale suo fixo acuat, quædam sulphura extrahit: ex minera bismuti tincturam, saturate aurei coloris, ex venere cœrulei, ex marte flavi producit. Nec opus fuisset KUNCKELIO in *Observ. Chym.* p. 107. ut auri per alcali solutionem adeo irrideret, cum non modo verissimum id sit, sed & ipse p. 121. solutionem lunæ per sulphur calcinatæ cum spiritu salis ammoniaci aperte doceat, cum qua & illa lunæ tinctura quam JUNGKEN in *Not. ad Agric.* p. 26. docet, convenit. Novi etiam quosdam, qui sulphur antimonii, reiterate spiritus salis ammoniaci ab eo cohobatione ita recludunt & solubile reddunt, ut pulchram post inde, cum spiritu vini, antimonii tincturam adipiscantur. Trahi huc potest tinctura quam *Excell. D. D. Præses* in *not. ad Poterium* p. 562. ex scorii antimonii, cum ana salis ammoniaci mistis, per retortam destillat, potens in resolvendis & dissipandis tumoribus, extrinseco & intrinseco usu, medicamentum; cujus similem ex calce viva sulphure & sale ammoniaco BOYLE, sub titulo spiritus fumantis antipodagrici non ignotam, præparat. Quin notum est mihi menstruum compositum alcalino mercuriale, quod, successivis vicibus, totam fere sulphuris communis massam in sulphur solare fixum digerit & excoquit, facillime postmodum ad tincturam egregiam componendam in spiritu vini dissolubilem. Nec ignobile præbet menstruum THOMSONI essentia stomachica, cui tot & tantas in sæpe citatis *Epilogismis Chym.* adscribit vires, cujus ex spiritu salis ammoniaci urioso & sale tartari volatili, mixtis & unitis invicem, præparationem ibidem docet. Alii ex spiritu salis ammoniaci cum spiritu tartari, vel etiam cum tartaro crudo, juxta alios, ad saturationem commixto, menstruum quoddam subtile & penetrans conficiunt, quo cum præparata luna potabilis in scorbuto, mania & lepra foedissima stupendas exhibuit virtutes, conf. ZOBEL. *Medicinisch-Perle.* p. 7. & Autor *Lullii redivivi.* Ab hoc non multum distabit, quod ex aceto destillato cum spiritu salis ammoniaci itidem ad saturationem mixtis sal ammoniacale penetrans conficiunt menstruum, cum quo D. MICHAELIS in *Diff. de ferro C. III. §. II.* egregiam martis essentiam fabricatur. Et quamvis hætenus dicta menstrua non adeo cognita, & a paucis huc dum in usum vocata sint, nihilominus vires in extrahendo ostendunt certe de meliori nota commendandas. Quibus adjici meretur, quod ab aliis, per spiritum salis ammoniaci & olea destillata, evadit magna saponiforme, digestionem unitum & in spiritum destillatum, quodque ex spiritu salis ammoniaci cum sale tartari in offam niveam coagulatis digestisque elaboratur, teste D. BOHNIO in *Epist. de Insuff. Acidi & Alcal.* p. 28. quæque secundum mentem *Vigani* ex sale & spiritu tartari cum spiritu vini conficitur tinctura tartari. Cum quoque ipsa alcalia sulphura, præprimis mineralium, ut antimonii, bismuthi &c. resolvant, hinc e. g. optime caput mortuum vitrioli edulcoratum, cum sale tartari, ad extrahendum vitrioli sulphur, liquari potest, imo *Autor auri auræ* p. 42. 46. cum nitro fixo, ex omnibus metallis, per liquationem, sulphura ex-

trahere audeat, quod idcirco GLAUBERUS, incompetenti licet, Alcahesti titulo, insignire voluit. Imo ipsum spiritum vini, per sal vitis, juxta mentem *Basilii Valentini* acuat, aurum etiam extrahere testatur *Autor Lullii redivivi*, quo cum conferri potest ea, quæ cum tinctura tartari ab AGRICOLA in *Pop.* p. II. p. 39. conflatur auri solutio, item spiritus calcis vivæ *Basilii*, qui, teste CARDILUCIO in *notis ad Febure Chymiam*, aurum reliquaque metalla dissolvit. Ejusdem profapiæ est elegans, quæ ex antimonio, ad rubedinem reverberato, cum spiritu vini extrahitur a VIGANO tinctura. (f) Utque jam alios, spiritum vini cum proprio sale fixo, vel spiritu ejusdem acidulo, prolixos & laboriosos acuendi modos præteream: contentus ero meminisse adhuc spiritum vini, per sal ammoniacum vulgare vel secretum Glauberi (quod ex oleo vitrioli & spiritu urinæ, rectificatissimo utroque, paratur) ita fortificari, ut commodissime ipso ad hujusmodi extractions uti possimus, Confer. GLAUBERUS *concentratus nuperrime editus* & BECCHER *Roset. Chym. proc.* 8°. Nec plane silentio involvemus CLAUDERI aurum potabile, quod in *Tractatu de Balsamat. corporum* p. 201. ex fuligine & auro cum spiritu salis ammoniaci ingenue profert, quippe quod multum in recessu habet, cum & anulum aureum a spiritu fuliginis urinoso corrosum fuisse tradat D. LUDOVICI in *Ephem. N. C. Anno III. miscell.* 248. Nec inepte quidam ex fuliginis principiis separatis, purificatis & redunitis, tale menstruum quarunt: quam autem mediante camphora metallorum intimiorem resolutionem & volatilisationem quidam quarunt, suo relinquam pretio, considerata saltem adhuc proponam ea, quæ D. D. GISE (*ὄν ἐν ἀγίοις*) in libello, quem de sua *Tinctura aurea* edidit, profert p. 52. *Aurum vires suas exhibere nequit, nisi sulphur, quod in eo est, perfectissimum & fixissimum, solvatur, subtilietur, nutriatur, graduetur, multiplicetur & volatilisetur, idque ministerio consanguineorum suorum qui cum sulphure ejus aureo in alimentum convertuntur.* p. 36. Cujus modus & via est, saturnia proles vegetabilis, quæ cum cerbero sibi adjuncto morbos eludere, vitamque sanitati restituere potest. p. 58. maxime si draco igneus, qui in ventre suo chalybem occultum gerit, cum magnete toties rotetur & circumgyretur, donec ex saturni fecibus nigricantibus exemius, in jovis speculo suum nitorem seu albedinem conspexerit, sed, quo non datur accessus, nisi virgo immaculata ingrediatur domum arietis, & ibi fabricet auream & Rege dignam, non sine pugna, coronam, qui tamen omnium quærentium manus & conatus eludit, nisi omnium trium regnorum concursus imploret; nam vegetabilia, animalia, salia, eorumque spiritus sunt claves. p. 64. 76. 77. *Tinctura est volatilissima, subtilissima & penetrantissima, ex acido alcalicis componitur, facillime tota in auras avolat &c.* Quæ omnia a prudenti chymico inter se collata, ex præcedentibus a nobis dictis, & ex processu *Philæthæ* forte non exiguum lumen haurient. Tinctura hæc coloris est flavi, idque ea de causa, quia, quæ cum oleosis præparantur tincturæ, sulphur & colorem exaltant, hinc rubicundum proferunt, secus autem volatilia alcalia faciunt. Supereff ut alcalibus adhuc adjiciam spiritus & liquores mercuriales, quippe mercurium alcalium fere omnium potentissimum esse, pluribus jam non demonstrabo; & quamvis plerique §. 3. citati Antagonistæ, etiam liquorum mercurialium existentiam plane negent, autoritatibus tamen illorum non acquiescet, qui contrariam neotericorum expe-

(f) Sed nisi Spiritus Vini iustâ methodo acuat fuerit, in vanum erit labor, cuique enim notum est spiritum vini etiam rectificatissimum, sibi relictum, metalla & mineralia simplici hæc calcinatione tractata extrahere nullo modo posse.

experientiam novit, & sufficere posset superius citatum D. D. KUNSTELII ex *Dissert. de Salibus Metall.* D. D. WELSCHII in *diff. de Sulphure Vitrioli Corollar.* Mercurius videtur esse aqua mineralis condensata, hinc & peculiari artificio in aquam limpidam reduci potest. Hos autem liquores virtute sulphura extrahendi præditos naturæ facit prædestinatio, qua sui cum sulphuribus saturationem & coagulationem avidissime expetunt, unde & cum ipso mercurio communi sulphura ex suis solutionibus colligere & præcipitare non est insolitum. Nec ignotus est spiritus ille mercurii, qui ex mercurio per retortam tubulatam triplicatam candentem, (aut, secundum KERKINGIUM per retortam ferream ignitam, aut, secundum alios, per cucurbitam candentem tubulatam) conficitur, de quo lege BASILIUM, BOYLEUM, Autorem Lullii rediivi &c. cum eo quoque AGRICOLA suas antimonii, animæ vitrioli &c. extractiones perfecisse videtur, vid. *Ej. Notas ad Popp. & Chirurg.* (g) Notabiliter quoque Autor disquisit. *Helianæ in Theatro Chem.* memorat: facillime mercurius, carbonum tritorum beneficio, per ignem, in liquorem reducitur qui certo artificio postea soli animam extrahit. Imo ex ipso limo facillime menstruum mercuriale parari posse, asserit BAR. SCHRÖDER in *Unter. von Goldm.* Suo quoque loco digna est aqua mercurialis BAR. URBIGERI p. 98. quacum pleraque suas solutiones efficit, fitque ex mercurio septies vel decies sublimato & postea in balneo, vel, quod notandum, melius in cella, in liquorem resolutum, debitique circulationibus coadunato. Et ejusmodi puros, simplices, irreducibiles liquores mercuriales BECCHERUS verum Alkahest esse statuit: interim hoc certum est eos ad resolvenda & regeneranda metalla esse convenientissimos, polychrestos. Quantis ii, qui transmutationi metallorum incumbunt, laudibus & encomiis suum spiritum mercurii philosophicum *κατ' ἐξοχήν* dictum, quo cum sulphur suum philosophicum solare extrahunt & in lapidem figunt, ad coelum usque hyperbolice extollunt, notissimum est, quamvis de subiecto non convenient, & primam ipsius præparationem plerumque alto obtegant silentio, interim beati possidentes, si quis est, cui per specialem Numinis summi directionem licuit adire Corinthum, ut nanciscatur menstruum verum mercuriale metalla intime penetrans & resolvens, fortunam illi suam non invidemus, adeptus enim est menstruum ad sulphura extrahenda certe omnium præstantissimum, quamvis non negemus, ea pro materiarum differentia gradu etiam & viribus differre. Hic enim ex mercurio communi, variis modis depurato, vel ejus aquis aut oleis, alius ex mercurio antimonii vel metallico, eorumve oleis, alii ex mineris quærunt. Quorum præcipui, duce BASILIO, ex vitriolo, vel ejus minera vel oleo vel ipsius semine (quod gur vocant) ut alumen illud plumosum Basili, quod est spiritus mercurii & clavus totius artis, diversis subtilibus enchiresibus capiunt, allaborant. Profapia hujus est essentia solaris D. S. RICHTERI, chymiatrum expertissimi, de qua vide ipsius *Reise, Apothekgen.* Nonnulli eligunt sibi floccos istos salinos, nivis instar parietibus fodinarum metallicarum adhærentes, alii diversas microcosmi mineras, alii venereas mineras & sulphu-

Frid. Hoffmanni Oper. Supplem. II.

reas, marcasitas solares, lunares, alii mineram solis ex Hungaria, vel concreta butyrofa pingua unctuosa ex fodinis quærunt e. g. *Berg-Milch / schmierichte fette Erzen / Letten* / quidam mineras Lunæ vireas & rubineas *Glaß-Erk / roth Guldene Erk* / mineras saturni, mercurii seu cinnabarim nativam, talcum montanum, lapidem calaminarem ejusque vitriolum &c. quisque pro sua cognitione, ad hoc opus adhibent. Quasdam ejusmodi mineras, spiritu metallico refertas, specialius adhuc denominat. D. J. WAIZ in *Bedencken von der Alchymie* p. 38. conf. etiam BECCHERI *miner. arenar.* TILEMANNI *Experim. de solut. auri.* ZWÖLFFERUM, variosque sic dictos philosophos. Pauculis ego tantum subsistam in minera cobalti & bismuthi, in cujus quippe elicto dextre spiritu mercuriali miræ reconditæ latent virtutes, quales de subiecto hoc & inde extracto vitriolo, ejusque spiritu, egregie recenset Autor *Appendicis ad Batzdorffi fil. Ariadn.* Jam quidem CARDILUCIUS in *notis ad Febure Chym.* mentionem facit vitrioli ex minera bismuthi per irrotationem cum rore majali parati (cujus in hydrope vires ibidem deprædicat) quamvis proventus paucitas & longum requisitum tempus non potest non artificem cogere ut breviores vias inquirat, & tale vitriolum esse existimo, de quo clariss. D. WELSCHIUS in *Dissert. de Sulphure Vitrioli in corollar. ait.* Datur vitriolum, quod spiritum non acidum fundit. Notus quoque est ORTHELIUS qui in *novo lumine Chym.* grandes ei dotes assignat & AGRICOLA in *Pop. p. 503.* & RHUMELIUS in *Scriptis suis Chymicis passim Spiritum hunc deprædicat*, quibus cum symbolizat D. J. W. in *Schatz-Kammer der Natur / mineralisch. Gluten &c.* libri consideratu dignissimi. Quæ item D. Fr. CLINGIUS passim in suis editis tractatibus ebuccinat experimenta de hoc subiecto intelligenda veniunt. Quibus calculum quoque suum addit Autor *der Untersuchung der mineralien so zum Stein der Weisen & Tæda Trifida Chymica.* Quibus locis debite inter se pensatis & collatis, veram methodum Philo-Chymicus invenire facile poterit. HELVETIUS etiam in *Traité des maladies les plus fréquentes & des remèdes spécifiques* p. 106. 110. ex vitriolo bismuthi (adjectis quibusdam) destillat spiritum, quo cum veram suam infusatam corallorum tincturam præparat, nec dubito quin idem autor, quod ibid. p. 134. 126. commendat aurum potabile, cum eodem spiritu præparet, modum tamen vitriolum hoc eliciendi sanctæ occultat (h); addam saltem eos, qui cum sulphure, vel spiritu vitrioli, vel liquore salis ammoniaci fixi, vitriolum exinde educunt, quive mineram cum calce viva, ad destillandum spiritum, miscent, eos, inquam, non procedere via debita naturali, quæ absque peregrina additione peragitur. Superfunt ii, qui ex mercurio, additis varii generis acidis, liquores promunt: illi ex mercurio sublimato & amalgamate mercurii cum jove spiritus tales conficiunt; hi spiritus ex hac massa in præpositum spiritum vitrioli philosophicum vel aquam fortem propellunt (quale est Fabri acetum philosophicum) alii mercurium sublimatum cum marte adhibent, alii ex nitro & amalgamate mercurii cum Jove, caute detonando, eos quærunt, alii denique aliis modis de quibus passim auctores e. g. PENOTUS de aquis Mer-

D 3

curial.

(g) Ludovici multique alii jure conqueruntur hanc methodum mercurium in aquam convertendi experientia non re-
spondere, quamvis jam in antiquissimis Raym. LULLII scriptis Chymicis diserta ejus mentio fiat; ut proinde existimem;
clavem quamdam adhuc incognitam pro absolvendo hoc labore requiri.

(h) Conf. si placet de hoc Excell. D. HENCKELII *Pyritolog.* p. 858. & passim: quæ verò de Clingio adduxi postea
per experientiam non confirmata sunt; ut potius jam certum sim ipsum Clingium longè aliud subiectum laboribus suis tra-
ctasse.

curial. FABER in suis operibus passim, BECCHER in Concord. & Roseto Chym. aliisque, AGRICOLA in Pop. & Chirurg. Autor Lullii redivivi, TILEMANN. Experim. KUNCKELIUS &c. Celeber. etiam D. D. Præses in Poter. p. 272. spiritum vini super mercurium, per spiritum nitri præcipitatum, digestum & cohobatum, menstruum vocat excellentissimum ad varia metalla & mineralia solvenda & extrahenda. Sua demum laude privandus non erit spiritus, qui ex sale ammoniaco, per calcem vivam fixato, & in eo soluto mercurio sublimato (quamvis alii crudum etiam sal ammoniacum aut variis modis præparatum adhibeant) inque chartam bibulam vel pumicem imbibito & per cornutam destillato conficitur, quamvis enim non inficias eam, hunc & alios quosdam ante memoratos, plerumque de acido participare: tamen ob particularum mercurialium simul immixtionem, eos intimius resolvere metalla, penetrare, sulphuraque ipsorum extrahere propria me docuit experientia: alii quidem hunc ulteriori digestionem exaltare, nobilitare & dulcificare student.

§. VIII.

Pergendum nunc erit ad menstrua acidia, quæ itidem non plane omni, sulphura metallica extrahendi, virtute destituta sunt; quamvis non negem adeo pura extracta non esse, ac cum præcedentibus, saltem in multis viam præparare & recludere debent, ut postea spiritus vini ingressum, ad extrahendum sulphur aliquanto purius, habere queat. Sic celeberr. D. D. Præses in Tract. de Cinnab. Antim. ponit: cum spiritu blando acido volatili [cujus beneficio ex omnium metallorum sulphuribus tincturam extrahere scio] ex cinnabari fit tinctura flava, sulphureum odorem habens, quæ cum ana essentia anodynæ mixta in epilepsia admiranda est. Quod si licitum sit conjecturam nostram proponere, censemus ipsum Excellentiss. D. Præsidentem descriptionem ejus nobis dare in Tract. de Acido & Viscid. sequentibus: ex sale digestivo Sylvii, adjecto oleo vitrioli, elicitur per arenam spiritus volatilis, qui in epilepsia & obstructionibus tartareis referendis multum valet: & forte per idem menstruum paratur tinctura sulphuris martis, cujus in Diff. Prax. Clin. Februm mentionem facit. Nec multum abludet ab eo, quem ibidem ex magmate vitrioliformi, per coctionem mercurii sublimati cum marte parato, per arenam destillat elegantem spiritum acidum volatilem. Convenient etiam spiritus salis communiter vel adhuc melius cum oleo vitrioli paratus, qui non modo quædam metalla multum penetrat & resolvit, sed & refractiora quædam sulphure suo spoliât, qualia sunt talcum solare, granatus, hæmatites, rubrica, magnes, marcasitæ, mineræ sulphuris (Schwefel-Kiese/) quamvis eorum quædam præparanda prius sint, ut hæmatites & rubrica cum sulphure calcinantur, vel cum antimonio funduntur. conf. AGRICOLA p. 927. D. J. W. mineralisch Gluten, BECCHER passim. PARACELsus quoque sulphura metallica cum eo ipso se extrahere perhibet, veruntamen, quæ cum ipso paratur tinctura sulphuris vitrioli vulgaris, potius pro solutione

martis, astringente corporali reputo, quam pro vero ipsius sulphure, interim minera bismuthi & martis perpulchre cum ipso resolvitur. Communicat quoque in Ephem. N. C. decad. III. An. II. p. 84. D. DAN. CRUGER processum auri potabilis cum spiritu salis paratum, cujusque in comminuendo calculo vires, proprio in corpore expertas, pluribus ibidem describit & D. Helcher Schvveidnic. aurum suum potabile ex auro volatilifato ex parte, per menstruum subtile acidum parat (i). Talibus quoque modis cum spiritu salis essentias suas metallicas & solares præparant, PHÆDRO in quodam ipsius Manuscript. ERBINÆUS A BRANDAU in Grundriss der Natur / BILLICHIIUS aliorumque varias præparationes ex parte habet D. D. KRUGER in Diff. de auro medico Oxonii excusa. Imo huc, ni fallor, referendam censeo tincturam auream D. D. BOLLMANNI. Physf. Quedlinb. quam non veram tincturam & sulphuris extractionem, sed potius nudam corporis solaris solutionem, forte per acida factam, & cum spiritu salis ammoniaci vinoso solutam esse, tum sapor ipsius acris alcalinus prodit, tum, quia, ipso fatente, totum auri corpus resolvitur, & facillime rursus, si lunæ injiciatur, in corpus reducit; cum veræ sulphuris solis solutiones, in corpus reduci non possint (k). KUNCKEL quidem in Obs. Chym. p. 85. seq. itidem resolutionem solis in sua principia, ab ipso probatam, cum aqua regis inchoat, sed non absque aliis additionibus & variis encheiresibus: processum hunc ibi quidem non describit, interim cum quibusdam ejus manuscriptis ad manus meas pervenit unde ista habeo. Ex sulphure quoque communi & antimonio, utrisque ad rubedinem fixatis, egregiam tamen tincturam spiritus salis extrahit DIGBY in Exp. Chym. p. 184. & AGRICOLA in Pop. passim. De meliori adhuc nota commendat BECCHER in Concord. passim ad extrahenda sulphura, præcipue a scoriis antimonii metallicis, mixturam ex spiritu salis & aceto destillato, & ibidem, aliis in locis, ex sale ammoniaco, alumine, & aceto destillato. Notum item est à spiritu salis non multum differre spiritum vitrioli philosophicum, quem sub larva aceti vel spiritus antimonii vel mercurii ad varias essentias minerales adhibent, dum ad extrahendam antimonii tincturam cum minera, vel vitro, vel floribus antimonii rubificatis, digerunt & cohobando ista recludunt, ut suam postea spiritui vini tradat essentiam, conf. FABER in Oper. p. 994. AGRICOLA ad Pop. p. 165. 621. 789. &c. Majori autem, præ omnibus ante dictis, virtute imbutus est spiritus ex oleo vitrioli & sale ammoniaco combinatus, quem supra attulimus a THOMSONO in Epilogis. hoc elogio decoratus: ex oleo vitrioli & sale ammoniaco, in spiritum vini demersis, fit spiritus fragrantissimus, volatilis, stomachicus, in acutis & chronicis cum fructu adhibendus. Ex eodem fundamento, minoris quamvis penetrantia, oritur spiritus, qui ex miscela salis ammoniaci cum vitriolo crudo exstillat, præparationem vid. in Excell. D. D. Præsidis Tract. de Cinnab. Antim. & JUNGKEN. in Not. ad Agricol. Spiritum salis ammoniaci acidum per hæmatitem POLEMANNI supra jam vidimus. Ut hic notasse sufficiat BECCHERI in Physf. Subter. de

eq

(i) Quamvis propterea singularem meum assensum circa hanc Tincturam vanè sibi promiserit & publicè etiam deprædicaverit Autor.

(k) Ipse D. BOLLMANNUS in Tract. contra D. Leporinum p. 15. & Tract. de duobus oleis Auri multis hæc adducta infringere voluit; sed cum ipsi oretenus singula, quæ cum ipsius Tincturâ auri confeceram experimenta, enarrarem, facillè acquievit: dum enim aurum totum solvitur, & hæc solutio Lunæ injecta rursus aurum producit; tamdiu istud non nisi pro reductione auri haberi potest, donec demonstretur plus auri recuperari, quàm in Tincturâ adhibitâ contineatur. Q. E. D.

eo iudicium, scilicet veram eum esse, ad metallorum mercurificationem, viam, & ex hoc cum spiritu isto facto metalli croco levi negotio mercurium revivificari posse, quæ *ἀς ἐν παρόδῳ*. Nec obliviscemur butyri antimonii [quod multorum alchymistarum aqua mercurialis est, cum qua aurum subtiliatum vel in principia resolutum, digerunt figuntque] quod cinnabarim antimonii extrahit, aurum foliatum, cum ipso digestum, mox in nigram putrefactionem tendit. (1) Alii mineras veneris &c. cum ipso extrahunt conf. AGRICOLA & BECCHER. *Roset. Chym. proc. II. 14. 15. 16. &c.* Ex eodem fundamento procedit Glauberi sic dicta proserpina, quam ex spiritu vini per butyrum antimonii acuato parat, quamque ad extrahenda & volatilifanda metalla multum deprædicat, conf. GLAUBERUS & D. HELWIG *Arcan. M. P. III. p. 24.* Summis tantum digitis hic attingam liquamen veneris volatile, ignem veneris sine igne aut menstruo ullo paratum VIGANI, ex quo decantatum adeo Butleri lapidem format in *Chym. p. 10. 57.* lectoremque remittam ad BECCHER *Roset. Chym. proc. 24.* qui prudenti satis forte luminis ad illud conficiendum & tam desideratum Butleri lapidem cum hoc fabricandum præbebit. Occurrunt jam spiritus & oleum vitrioli purissima & primigenia metallorum acida, quæ itidem, si cum sulphure aut vitro antimonii, item bisinuito digerantur, essentiam eorum extrahunt, ut AGRICOLA in *Popp. p. 623. 640.* Et ex antimonio calcinato cum spiritu vitrioli extracto, suum parat febris fugum LANCIOTT in *Salamander p. 169.* Quin certis encheirisis acidum hoc omnia metalla, ipsum quoque aurum dissolvit teste KUNCKEL in *Vindic. spiritus vini, & in Obj. Chym. p. 16. 79.* & *Excell. D. Præsid. Diff. de generat. Salium.* Hinc facile assensum præbeo D. D. KUNSTEL in *Diff. de Sal. Metall.* perhibenti Autorem *der medicinischen Universal Sonne* aurum suum potabile ex auro fulminante per oleum vitrioli vel spiritum salis solutum parare, prout & hoc modo PETR. FABER in *Myrothec. Spagyri.* metallicas suas conficit essentias, quæ omnes tamen solutionis potius corporum titulum merentur, quam & censuram sustinet tinctura auri alba, quæ hinc inde arcani instar servatur, cuius præcipuum solvens est spiritus vitrioli volatilis. Neque tamen laude illam sua, quam in acutis præcipue promeretur, menstrui præprimæ ratione, fraudatam velim. In vitriolo ipso sulphur anodinum tota quærit chymicorum cohors, de quo conf. *Clarif. D. WELSCHII Diff. de Sulphure Vitrioli & Excell. Præsid. not. ad Poter. p. 545.* frustra proinde obstrepentibus BARCKHUSIO in *pyrosoph.* LUDOVICI, aliisque. Tale quid continet Langii liquor cephalicus, cuius compendiosiore viam, dum spiritus vini capiti mortuo vitrioli, in retorta tubulata candefacto, successive injicitur, profert D. J. WAITZ in *Epist. de Alchymia.* MIMMERUS, expertus quondam in Silesia chymicus, ex cremore seu cuticula pingui [anima aliis dicta] mineræ vitrioli, per novam aquæ affusionem, substantiam unctuosam separavit, anodinum eximium. Liceat quoque celebratum celeberrimi D. D. Præsidis Liquorem anodinum mineralem huc trahere, qui ad extrahenda alia præparata sulphura metallica menstruum existit aptissimum, & sulphur antimonii, cum hoc extractum, egregias anodinas & antihystericas vires sistit. HELWIG in *Lex. Pharm. p. 24.* ex remanente [ab oleo vi-

trioli & spiritu vini destillatis] massa picea cum aqua regis ulterius sulphur extrahere nititur, & nuperrime sic dictus NAXAGORAS in *Concord. Philos.* ex sale tartari, per oleum vitrioli saturato & cum spiritu vini in terram foliatam reducto, sulphur vitrioli commendat elegantissimum, ex KESLERI *Centur. depromptum*, ut jam olei vitrioli dulcis D. ETNERI in *manibus Poterianis*, operose valde parati, mentionem ulteriorem omittam. Nec attingam quem quidam ex cobalti calcinati & cum aceto destillato extracti vitrioli destillant spiritum, vel qualem alii ex vitriolo carbonum fossilium, elicere satagunt, cuius tamen destillatum volatilem alcalinum spiritum allegat *Excell. D. D. Præf. in Diff. de Gener. Sal.* Properandum mihi est ad acida dulcificata, dudum enim BASILIUS sulphuris solis extractionem, per spiritum salis dulcem, aperte satis docuit, & certe, si aurum debite prius volatilifatum fuerit, methodus hæc optime procedit, confirmante id *Excell. D. Præside in Not. ad Poter. p. 529.* admirandasque ipsi contra calculum & ad renes purgandos vires afferente; de præparatione vide ZOBEL. *Medic. Perle. p. 10. 178.* Tincturam sulphuris martis cum hoc præparatam extollit D. MICHAELIS in *Diff. de ferro.* & ex terra vitrioli edulcorata CHRIST LANGIUS in *Pathol. p. 548. in Miscell. p. 85. seq. & D. Præf. ad Poter. p. 545.* Jucundum quoque recenset experimentum TACKENIUS in *Hipp. Chym. p. 263.* qui ex vitriolo, nitro, sulphure & sale, leni arenæ igne, destillat spiritum acidum volatilem qui auro colorem, intacto remanente corpore, extrahat. Et notus mihi quidam in Silesia ex spiritu nitri dephlegmato & spiritu vini rectificatissimo, certis encheirisis, parat menstruum [acetum philosophicum appellat ex albo & rubro lumine] quocum ex omnibus metallis præparatis tincturam ipsorum extrahit, easque, pro varietate morborum, quos septem metallis & planetis assignat, in usum trahit, successu non infelici. Et alius Chymiater ex spiritu nitri, aceto vitis & menstruo oleoso, junctis invicem, spiritum ad extrahendas tincturas metallicas & antimoniales non minimum conficit. An vero spiritus nitri ruber, per calcem vivam paratus, quive ex nitro flamman- te, per spiritum nitri & spiritum salis ammoniaci, vel ex nitro fixo & urina paratur, singulare quid præstent, ulteriori adhuc indiget inquisitione. Quam vero BOYLE cum spiritu nitri bezoardico ex auro, remanente corpore albo, extrahit tincturam, multi- potius particulis mercurii & antimonii, spiritui adhuc immixtis & præcipitatis, adscribunt. Offerunt jam sese varii generis acida lustranda. Laudatus enim sæpe DIPPELIUS testatur: *spiritus mellis, sacchari, roris, acetum ligni quercini vel sancti, indiscriminatim omnia metalla lento gradu solvunt, si in solidioribus, prævia calcinatione, viam paraveris.* Hinc non paucae exstant tincturæ antimoniales, cum aceto destillato fortificato, ex ipsius minera, croco, sulphure, vitro, floribus, varioque modo calcinato, extractæ, ut etiam, secundum quosdam, Basilii Asa & Phalaia ex rubificato paretur. Conf. KERCKRING. *Comment. in Basil. DIGBY Exper. Chym. p. 156.* LANCIOT. *Salamander p. 165.* LUDOVICI *Pharm. p. 147. Agricol. p. 726. Et Excell. D. Præses. ad Poter. p. 591.* ex scoriis antimonii martialibus & venereis tincturam veneream, martialem tamen potius vocandam, cum eo extrahit. Qui ex mineris sulphur cupiunt, prægressa ante tostione, acetum

(1) Negare tamen non possum, quod auri cum butyro Antimoniali solutio, quamdiu etiam digerantur, & licet liquor nigrescat, nullatenus hæc ratione succedat, unde alia auri præparatio hæc præmittenda est, aliàs omnis labor inanis est.

adhibent, teste PARACELSO, hinc eadem ratione sulphur mineræ lunæ separat *Autor Alchym. denud. p. 29.* Robustior eo est spiritus æruginis, quem adhibent ZWOLFFERUS, LEMERY, *de myster. Antim.* Spiritum & oleum saturni, à multis quamvis in pretio habita, lubens prætereo, & acetum quercinum adduco, quo utuntur AGRICOLA *in Pop. p. 628. 732. P. II. p. 92.* alique; quod vero, cum nimiam adstrictionem extractis suis imprimat, hinc ego, felicissimo successu, balsamicum magis acetum vitis, loco istius, adhibere solitus sum, si ejusmodi acidiusculis menstruis opus mihi sit, paucis licet hætenus cognitum & in usum vocatum sit. Mitto jam acetum ligni guajaci, saffrafras, aliorumque lignorum, spiritum panis. Spiritum mannæ QUERCETANUS adhibet & cum eo *Illustr. WEDELIUS* ex auro fulminante suam prolicit tincturam. Sacchari spiritum allegat AGRICOLA *P. II. p. 98.* spiritum mellis idem *p. 718. 745. 832. Pharmacop. Augustan.* LUDOVICI *pharm. & Autor Lullii redivi.* Cum spiritu formicarum acido præparatam martis tincturam *D. D. Præses ad Poter. p. 598.* Alii acetum minerale ex antimonio ipso operose quæsi verunt, idque partim addendo & putrefaciendo cum aqua pluvia, vel sæpius in aqua extinguendo ut BASILIUS, KERCKRING *in Basil. EKHART in verlauffenen Chymico, manes poterii &c.* & ejusmodi clar. *D. D. HOFFMAN Medicus Stolbergensis* hodiernum parat & venundat. Alii absque additione, crebra aëri expositione, ut POTERIUS, ETNER *in manibus Poterii, AGRICOLA p. 672.* URBIGER *in Script. Chym. & Clariss. D. D. VOIGT. Bero-lin. &c.* cumque his acetis, præcipue proprio sale acuatis, egregias solutiones perficiunt. Omni jure his accenferi possunt, qui ex terris mineralibus eliciuntur spiritus, ut ex terris pinguibus, figillatis, variis axungis, lutis, limis, margis, filicibus ut AGRICOLA *in Pop. p. 66. P. II. p. 197.* ORTHELIUS, BECCHER, EKBART *in verlauffenen Chymico, Autor der Untersuchung der miner. §. 22.* ELSHOLTZ *in Act. N. C. An. 6. Obs. 18. &c.* Commendant alii mucositatem lapidibus in aqua adhærentem, ut ORTHELIUS & KUNCKEL *in Obs. p. 12.* & novi alium, qui ex salinis floccis, nivis instar, a tegulis tecti abrafis, menstruum parabat non ineptum, & plus, quam solam nitrosam indolem, continentem. Nec minoris famæ est spiritus roris, de quo FABER *in Oper. p. 389. 406. 412.* AGRICOLA *p. 56. 100.* *Autor der Untersuchung der mineral &c. §. 19. multique alii ut* ROB. FLUDD, BORELLUS, RAMELOVIUS, STEEBIUS, HENR. NOLLIUS, NUYSEMENT, DIENHEIM, ETTMULLERUS, *Candida phoenix philos. D. COHAUSEN in Tentam. Med. &c.* Ejusdem conditionis sunt, quos ex pluvia tonitruali, oleositate illa versicolore, locis mineralibus in aquis innatante, parant spiritus, nec excludenda quam cum pruina antimonii tincturam facit HELWIG *Arc. maj. P. II. p. 61.* varique alii, quos ex aëre per halitum & multiplicia instrumenta captant spiritus, RISTIUS *in Phoenix*, BALDUINUS *de Auro Auræ*, EGLINUS &c. Cujus etiam soboles est LANGELOTTI tinctura auri, quæ per acidum aëris, mediante diutina tritura, absolvitur, quantum enim tritura valeat, non modo ex ROTHMALERO & LANGELOTTI *in Tilemannum præfatione* notum est, sed & *Celeberr. Præses in Poter. p. 419. nit.* Notum est mihi artificium amalgama mercurii & auri sola aqua insipida, beneficio trituræ sufficientis, penitus dissolvendi, ita ut totum in aquæ poros transeat, ex qua deinde pulvis, si igni paulatim tradatur, eleganter purpureus magnæque in morbis efficaciæ, extrahitur. Et de Helvvigii auri cum saliva triturati solutione supra locuti sumus, & *Celeberr. DIPPE-*

LIUS mercurium, diutina salivæ aspergine trituratum, in fixum verumque diaphoreticum, tam quæsitum, mutat. Imo & ad altiora occultioraque quædam, quid tritura valeat, ii norunt philosophi, qui opus suum, ludum puerorum & opus mulierum vocitant. Sed claudam hoc caput, si prius notavero, ex urina incognitum hætenus & plane singulare acetum extrahi posse, quod itidem egregiis ad extrahendum viribus dotatum est.

§. IX.

Restat adhuc, ut brevibus menstrua sulphurum metallicorum sicca pervestigemus. Primum nobis erit omne alcali e. g. sal tartari fixum, quod in fluxu mineralia & metalla reclusa ingreditur, ex iisque partem sulphuream extrahit, id quod triviales ejus cum sulphure communi & antimonio operationes clare testantur. Sic e. g. si vitriolum cum sale tartari, via humida, præcipites [quæ SYLVII est methodus & ZOBELII *in medic. Perle p. 193.* multo autem plus recluditur si cum spiritu salis ammoniaci vel urina ipsum præcipitur] vel etiam caput mortuum vitrioli vel aquæ fortis edulcoratum & exsiccatum, cum sale tartari, in crucibulo fundas: tum ex hoc croco partem ejus sulphuream liquatione hac extrahet sal tartari, quod postea, additis addendis, volatilisari, vel ex solutione cum aceto præcipitari, & post alio cuius commodissimo modo in essentiam sulphuris vitrioli converti poterit. Qua ratione STARCKEY sulphur suum vitrioli & postea cum eo mercurium diaphoreticum seu aurum horizontale præparat, quæ methodus ad alia etiam applicabilis est. Nec ignota est virtus salis ammoniaci, quæ fixissima sublimat & sulphura ex metallis reclusis secum simul elevat, hinc BOYLEUS ex capite mortuo vitrioli cum sale ammoniaco suum ens veneris sublimat, cui D. ETTMULLER *in diss. de Chirurg. infus. concl. II. §. 7.* stomachicam anodinam & antiquariam vim adscribit. *conf. MARC. A KRONLAND Phil. Vet. p. 544.* GERBER *diss. de Drieff. Helmon. Erford. 1685.* Longe vero nobilior cum sale volatili urinæ præparant STARCKEY *Pyrotechnie, & Tract. Holland. het præcipiolum.* Mineram quoque antimonii, vel ad rubedinem perductum cum sale ammoniaco, sublimat AGRICOLA & D. ETNER *in man. Poter. verum Poterii* specificum stomachicum ex regulo antimonii solari per sal ammoniacum sublimato, conficit. Minera itidem bisnuhti egregie cum ipso resolvitur. POLEMAN cum ipso conficit flores hæmatitis, decantatum febrifugum. Ex luna & jove, calcinatis invicem, reiterata sæpius sublimatione, sulphur evehitur nobilissimum. Multo majores autem vires exferit GLAUBERI sal ammoniacum secretum ex oleo vitrioli & spiritu salis ammoniaci confectum, quod longe potentius metalla penetrat & evehit. Hinc meminit ejus *Excell. D. Præses in Poter. p. 544.* ipsiusque in extrahendis metallorum antimoniique salibus, ex ipsorum terris, singularem efficaciam extollit, quod & cognovit BECCHER *dum in Concord. Chym. p. 313.* id ad extrahendas metallorum essentias commendat, cujus quoque notatu digna verba sunt in *Append. Laborator. Chym.* ubi scribit: *Menstruum arsenicale vim habet aurum solvendi, tum via humida quam sicca:* Notum jam enim est arsenicum ipsum, cum nitro fixatum, omnia fere metalla in cementatione resolvere, cujus etiam indolis est lapis pyrmison ex sulphure, antimonio & arsenico, per vitrificationem, compositus: quin solum antimonium metalla ignobilia in fluxu resolvit & sulphura eorum extrahit, cum nitro ulterius in scorias redi-

redigenda, vel aliis liquoribus extrahenda. Nec arsenicalium numero excludenda sunt luna & saturnus cornuus, quæ vel ex solutionibus sulphura præcipitant, vel in fluxu ea in se recipiunt. Interim, cum sulphura partim difficilius ex his separentur, partim infecura arsenicali qualitate imbuantur; & plerumque ad alchymiam tantum adhibeantur, quorum in excusis & manuscriptis varii de his occurrunt processus: hinc ea jam seponemus, cum & in vulgus chymistarum passim notæ sint imposturæ quibus veneri suus color quasi extrahitur, ut corpus album, fucata ipforum luna, remaneat, idque vel via sicca, cum arsenico, tutia, bismutho, cadmia, lapide calaminari, zinco &c. vel melius cum salibus alcali, tartari, sale ammoniaco, nitro, mercurio sublimato, borace, vitro veneto, aliisque vitris, terris & calcibus; aut via humida cum varii generis liquidis. Nec diu immorabimur crystallis salis dulcibus, quibus cum aurum solvere & potabile reddere docent BLAUENSTEIN in *Epist. apud Orthelium*, AGRICOLA in *Pop. p. 107. 811. & in Chirurg. p. 440.* Nec duobus istis modis *Autoris Alchym. denud.* qui ex auro in aqua regis soluto, chartæ bibulæ imbibito, per fusionem cum sale & alcali, sulphur extractum fuisse, nec non aurum, cum antimonio & nitro diu cémentatum, sulphure suo privatum fuisse, remanente utrobique corpore albo, scribit, nec pluribus addam quorundam sulphur antimonii cum sale ammoniaco & oleo vitrioli, via sicca, fixandi methodum. Menti enim jam se objicit sal enixum seu mirabile *Glauberi* [hodie plerumque sub salis Anglicani nomine plurimis egregiisque in re Medica virtutibus commendatum] quod pleraque metalla, ipsum etiam aurum, in fluxu resolvit, ut non modo filtrum transeant, sed etiam in spiritu vini aliquatenus resolvantur. Hinc cum eo factum aurum potabile vide in cit. GLAUBERO, URBIGER. *p. 87. DIGBY Exper. Chym. p. 32. 89. 185. 257. seq.* Imo sulphur quoddam ex vitro antimonii cum hoc sale extractum, singularis panaceæ nomine, in loco quodam excelso, asservatum novi. Non possum non hic mentionem facere mei nunquam non colendi Præceptoris D. D. & Consilarii STAHLII, qui primus ex eodem fundamento modoque auri, per hepar sulphuris, reclusionem docuit in *Observ. in Opusc. Med. Chym. p. 605. seq.* Ex eadem ratione nitrum vitriolatum lunam per cementationem resolvit, (m) & inde argentum potabile præparat AGRICOLA. Nec ab his multum abludet processus MONTESNYDERI qui per fulmen ex nitro, sulphure & tartaro paratum, metalla, regulo antimonii illiquata & pulverisata, detonando resolvit, ex iisque sulphur & sal separat. Quamvis autem non sine ratione dubitetur, num hoc modo verum metallicum sulphur & sal, & non potius subtile vitriolum emergat: hoc tamen philochymicis in aurem dicere possum ex experientia, quod, si hæc ita dicta sal & sulphur, secundum tenorem processus, ulterius cum butyro antimonii per gradus ignis ad rubedinem fixentur, præstantissimam inde emergere polyaceam. Digestio tamen hæc intra anni spatium absolvi vix potest, & cave, ne igne fortiori, nimium festinando, opus tuum comburas & perdas; conferri queunt MONTESNYDER, BERLICHII, DIGBY *Exp. Ch. p. 15. Celeber. D. D. STAHL. in Opusc. Chym. p. 602. seq.* Peculiare quid etiam est quod sæpe citatus DIGBY in *Tract. de Immortal. Anim. p. 46.* afferat se, me-

diantе vitro concavo, ex folis radiis pulverem collegisse rubicundum, tantæ subtilitatis ut aurum vi sua penetraverit, cujus compar ex lunæ radiis ad argentum colligere quidam annuntuntur. Sed devenio jam ad mercurium sublimatum, quo cum *Autor Lullii redivivi* non modo lunam in via sicca resolvit ad tincturam inde extrahendam, sed & D. D. JACOBI, in *Hierana quondam Professor, in Diss. de malo Hypochondr. §. 13.* cum eo tincturam martis præparat, imo in tincturis metallicis præparandis universalis menstrui vices supplere posse, prodit, quibus annuere videtur *Excell. D. D. Præses ad Porter. p. 582.* dum corpus ficcum dissolubile, ad calcinandum aurum, vel mercurium sublimatum, vel vitriolum martis cum spiritu sulphuris volatili paratum, esse censet. Alium item mercurium præcipitatum inque omni liquore solubilem communicat GLAUBER in *Tract. de princip. Metall.* dum mercurium in aqua forti solutum cum spiritu salis ammoniaci præcipitat, & hunc ex omnibus metallis sulphura extrahere perhibet, & in *tract. de sale metall. p. 108.* cum oleo vitrioli & butyro antimonii per saturnum in lapidem rubrum coagulato, ait se auro sulphur elicuisse. Sed omnes & singulos hos longis post se parasangis relinquit menstruum quoddam ficcum & in omni liquore solubile, quod ex sale ammoniaco & mercurio sublimato componitur, adeo enim hoc metalla resolvit & ad cor eorum quasi penetrat, ut, qui recte ipso uti noverit, ei menstrui alkahestini vices, ad mineralia & metalla omnia destruenda, commodissime supplere queat. Nam ex ipsis metallorum vitris & amasis, quæ alias corrosivorum omnium vim irrident, sulphur fixum extrahit, metalla etiam fixissima volatilia reddit & recludit, nec quicquam resistere ei valet, hinc miræ cum ipso operationes perfici possunt. Dignum certe menstruum, ut plus operæ a peritioribus ipsi impendatur, cum tantæ in eo reconditæ lateant virtutes, deque meliori nota ad penitus indagandum ipsis commendetur. D. D. DIPPELIUS de eo scribit: *Sal ammoniacum & mercurius sublimatus aqua dissoluta simul, & abstracta aqua in sal fusile redacta, exhibent solvens in frigore siccum quod omnia, sine discrimine, metalla solvit:* plura legi de eo possunt in *Autore Lullii Rediviv. URBIGER p. 86. PENOTO de aquis mercurialibus, BECCHERO passim &c. (n).* Ortum hinc esse duco, quod quidam PARACELSI corrosivum specificum in *Archidoxis* descriptum pro vero liquore alkahest venditaverint, quod paratur ex sale ammoniaco & mercurio sublimato, in aqua forti dissolutis & cum ana olei mercurii combinatis, certe vix quicquam ex his sublunaribus erit, quod huic menstruo resistere valeat, unde quoque ignis gehennæ vocatur. Interim, quamvis alkahestum id esse non existimemus, tamen, si quod ullum, certe hoc ex plurimis nobilissimum esse menstruum, judicamus. Denique non possum non adhuc mentionem facere ficci dissolventis eximii phosphori, cujus resolvendi virtus tanta est, ut & hunc in alkahesti thronum quidam ejus admiratores evectum cupiant, cum non omni fundamento destitutos se sciant. Ita enim *Celeber. DIPPELIUS* de eo: *Horrenda ejus est in alterando & resolvendo virtus, nam solidissima corpora metallorum hac flamma in vase clauso tacta, simul devorantur & elewantur, separatoque per aëris deliquium rursus phosphoro, in mucorem abeunt sulphureum irreducibilem, vel enim avolat, vel*

111.

(m) Vel ad minimum calcinat, præcipue si argentum cum Regulo antimonii prius justè colliquatum fuerit.

(n) Item notæ Germanicæ ad *Chr. Democriti* versionem Teutonicam p. 257.

in forma vitri rubicundi etiam metallis nobilioribus commixtum artificis intentionem frustrabitur. (o) Cuius rei veritatem ipse attestari possum, qui lunam, phosphoro commixtam, ita ab eo resolutam vidi, ut, paucis relictis fecibus, tota cum menstruo, granorum massichis instar, in collum retortæ sublimata fuerit. Optandum esset ut ejus virtutes & indoles penitus perquirerentur, nullus enim dubito, quin egregiæ solutiones, & non inutilia experimenta cum ipso perfici possent, plerisque interim & operosus labor, & exigua, quæ producitur quantitas, deterret, non desunt tamen faciliores etiam, arcaniores tamen, eum parandi modi. Videatur interim BOYLE de Noctiluca, KUNCKEL de Phosphoro, LEMERY in Cours de Chymie &c. & Acta Societ. Scientiar. Berolin.

§. X.

Nihil amplius superest, quam ut usum metallicorum sulphurum exhibeamus. Qua in re sicco pede præteribimus ea quæ alchymistas spectant, quorum alii cum depuratis metallicis sulphuribus aurum colore suo exaltare, alii lunam in aurum tingere, alii cum adjuncto menstruo mercuriali in tincturam figere, alii mercurium communem cum iis in aurum convertere, alii cum mercurio vel sale metallico in lapidem tingentem exaltare nituntur. Tantis enim spinis & latebris hæ res sunt obsitæ & involutæ, ut qui ex labyrintho hoc se extricet, desideratamque metam attingat, œdipo & filo Ariadnei opus habeat. Missis itaque istis medicum tantum ipsorum usum in medium proferemus, qua in re non meas speculationes & conjecturas, sed solas peritiorum experientias afferam; quisque tamen facile conjiciet, omnes adductas sulphurum metallicorum tincturas non uno eodemque modulo & pede mensurari & æstimari posse, multum enim different tincturæ cum acidis paratæ ab iis, quæ cum alcalinis & oleosis conficiuntur. Hinc electio, pro diversitate morbi, instituenda est, & pro diversitate menstrui diversa quoque sulphuri simul indoles imprimatur, & quo nobilius menstruum, eo excellentior tinctura, quod tamen eo extendi non volo, ac si omnis operatio a solis menstruis proveniret, cum sicca quoque sulphura sat nobiles effectus exserant. Sic, quæ cum spiritu salis vel terra foliata tartari elicita sunt tincturæ, specificè magis ad calculum & renes purgandos diriguntur, quæ cum aliis menstruis, alias; in his tamen omnium metallorum sulphura conveniunt, quod virtutem anodinam, nervinam, cordialem, confortantem, naturæ pacativam, collectivam, alexipharmacam possideant. Prima erunt jam verba HELMONTII: *Sulphura sunt quibus correctis tota morborum cohors auscultat, utpote quorum pluralitates in unitatem Archæi, tanquam in pugnantem pugnam contrahitur, hoc pacto in ipsa animæ sede combinatoque duumviratu amentias, apoplexias, caducos, paralyses, vertigines, asthmata, atrophias, immanesque defectus annihilari vidimus, stupentem ipsa natura. Horror itaque tyrones addiscant sulphura spoliare vi peregrina & virulenta, sub cuius nimirum custodia abditur ignis vitalis, archæum in scopos desideratos placidissime ducens.* Id. p. 327. *sulphur vitrioli est dulce, mellis instar, absque odore, vapore & furore opii, quia in ignis cruciatu fixum, excellens, calidum est & somniferum &c. inter arcana ad vitam longam & catervam aliquot morborum su-*

gandam commendabile. p. 561. *Nihil aque victorioso in humidum radicale agit, ac primum ens cupri & ad vitam longam sulphure vitrioli est benignius, utpote quod idcirco sulphur philosophorum indigitatur.* it. *sulphura corporum metallicorum nequaquam nobis indignata colloquia præbent, modo reddantur familiaria: it.* p. 293. P. II. p. 55. p. 82. &c. Nunc audiamus fidelissimum ipsius discipulum THOMSONUM Anglum in *Epilogism. Chym.* p. 59. Famis caninæ curam docet per alcalia lixiviata & mineralium seu metallorum sulphura, quæ austeritatem retundunt, meatus referant, emunctoria recludunt. p. 67. ad pestem commendat sulphura depurata, quæ, radiatione & solo intuitu archæo indulgentia, miram operam præstant. p. 71. Ex antimonio triplex potest elici sulphur emeticum, solutivum & diaphoreticum, hæc tria sub artificis manu ad majorem entelechiam erigi possunt, quæ eximiam claritatem adepta, radios desiderabiles in archæum emittunt. p. 74. Vix credendum, nisi quis explorarit, quam innocue, quanta energia viriumque custodia per secessum, urinam & diaphoresin opus suum peragant antimonii & martis sulphura, cum alcali ex metallis istis deprompta, ac ab immunditie secreta, hæc penitus quidem permista, stomachi digestionem succurrunt, meatus obstructos referant, concretorum analysin faciunt, succos spinosos, asperos hebetant, levigantque, ventrem bis, ter, aliquando quater, absque ambientis læsionis metu, cum euphoria solvunt, fermentis ne quicquam violatis nec spiritibus defalcatis, quare idcirco vitæ, sanitati, tum præsentis tum futuræ, imo longævitati conducere non dubitamus. p. 85. pillulas suas polychrestas, quas ex sulphuribus mineralibus emaculatis malignitatis expertibus, & naturæ consentaneis redditis, conflatas esse, indicat, ait plerisque morbis adversari, abstergendo, referando, subtiliando, discutiendo, corroborando, sordes evehere absque ulla deleteria qualitate, sanguinem nitidum reddere, acidum extravagans, acre, acerbum, asperum, hebetare, retundere, levigare, digestionem promovere, scorbutum subigere, eradicare, hydropicos levare, serum falsuginosum quaquaversum excludere, ejusque regenerationem prohibere, collecti causam antecedentem præcidere, arenam & succos mucaginosos eluere, excutere, luem veneream contumacem & mala ab exhibitione mercurii orta debellare &c. Sic & illustre Batavorum sidus SYLVIVS DE LE BOE in oper. P. I. p. 629. Præ omnibus aliis blande acrimoniam omnem humorum & acidum quoque temperant sulphura mineralium & metallorum fixa & ad summam perfectionem exaltata. p. 260. Incrassatur & figitur bilis & acidum volatile in corpore furens imprimis per sulphura mineralium & metallorum narcotica, vel potius anodina. p. 240. Febris, delirium grave & furiosum comitem habens, curatur per quodvis sulphur minerale vitrioli, antimonii &c. fixi, quod multum præstantius est opio, dum somnum promovet & acrem bilem temperat. p. 370. ad curam icteri commendat, mineralium metallorumque sulphura fixa & anodina, volatiles spiritus blande figentia & tranquilliantia, non sine causa multum à Chymicis peritioribus celebrata. p. 261. in febribus malignis sal volatile acre corrigunt sulphur minerale aut metallicum omne, sed rite præparatum &c. p. 284. in inflammationibus internis sulphura metallica & mi-

(o) Insurrexerunt contra hoc testimonium præcipuè D. KÖLESERUS in *Auraria Romano-Dacica* p. 231. 233. ut & Autor Notarum germanicarum ad f. c. *Democriti Tractatum* p. 115. & seq. verum nemo necesse habet propterea planè animo despondere; certe magnus noster STAHLIUS longè accuratius judicat in *Experiment. Chymic.* CCC. p. 403. quod phosphorus inulitatis hucusque effectibus præsertim in metallico regno materiam præbendi compos futurus sit, rationes habeo potius securius prædicendi quàm solum ominandi.

mineralia fixa conducere afferit. *p. 656.* Præstantissimum atque altioris indaginis est sulphur minerale, idque prius arte fixatum, cujus in figendo sale volatili præstantiam efficaciamque pauci observarunt, paucissimi aliis communicarunt, nec mirum. Illud autem ego omnibus & singulis candide commendo, & ut ex quocunque demum subjecto parare discant optimum, sedulo consulo: habebunt tunc non tantum in peste, sed & in plurimis aliis morbis gravissimis medicamentum excellentissimum, & cui tuto quivis queat fidere, nec tantum figendo sali volatili, sed eidem quoque acriori temperando conducit quodvis sulphur minerale, sed fixum. *p. 460.* quod autem de vitrioli sulphure narcotico, vel potius anodino seu pacativo, narrant multi, satis arguit ignotum esse plerisque hoc sulphur, nunquam tamen satis laudatum, ob vires plane stupendas, utpote quas, expertus loquor, non satis valeo mente assequi, tantum abest, ut queam ore deprædicare, *p. 461.* Quamvis toto cælo differant opii vis narcotica stupefaciens ac anodini ex vitriolo parati vis pacativa & naturalem duntaxat somnum inducens, non autem stuporem, vitrioli enim anodini vis pacativa in bilem effervescentem extenditur, *Hellmontio* furor Archæi vocata. Quærant interim omnes anodinum illud vitrioli, & pro arcano summo habeant, quotquot ipsum invenerint, mirabilia namque præstat in variis affectibus difficillimis curandis. *p. 855.* ad effervescentiam febrium intermittentium comprimendam, sulphura mineralium metallorumque fixa anodina commendo, quæ opio multum præstant, majori licet usurpentur quantitate. Quibus cum convenit testimonium *Clariss. D. DIPPELLII in Tract. de vit. & Medic. animali*; qui de morbis resolutivis, phrenesi, mania, philtis, hydrophobia &c. agens, addit: Si quæ salia metallica ad manus sint, faciliore omnia procedent tramite, vim enim anodinam & somniferam metallis, præprimis fixioribus, indidit propriæ vitæ genius, in colligendis & coarctandis sub suam sphaeram activitatis humoribus apprime conspicuus, quam vim colligendi in concitatas exhalationes corporis animalis exercens, suavi blandimento conturbatam animam demulcet, & ad somnum inclinat securum omnino & recreativum, non ceu ex opio expectandus est stupefactivum & nervis inimicum, ad pestem etiam, morbos malignos & acutos, verum aurum potabile & sulphura mineralia & metallica fixa, multis commendat, ut & ad diarrhæam & dysenteriam malignam anodina mineralia. Hypochondriacis & hydropicis sulphura metallorum, præprimis veneris & antimonii, alcalinorum menstruorum ope collecta: febribus intermittentibus fugandis nihil præsentius operam navat, quam stomachicorum & sulphurum mineralium semper anodinarum, præprimis martis & antimonii concentus, ad arthritidem podagram & calculum extollit medicamenta resolventia, alcalina sulphurum anodinarum metallicorum connubio felicia, quæ lentorem incidunt, acidum temperant, dolores sedant sine ullius orgasmi & fervoris sanguinis metu, præprimis saponem chymicum ex tinctura alcalina veneris & antimonii & oleo juniperino lege artis compositum, in spasmo, podagra, arthritide, paralyfi, contractura, aridura certe eximium &c. Nec non *D. WEISBACH in cura Morbor. p. 259.* capite de podagra ait: Contumaces erroneos & inveteratos naturæ motus in morbis chronicis non aliter tolli, naturamque desuescere, quam per vera metallorum sulphura quorum præparatio, cum ardua & difficilis sit, hinc plura de iis aliquando se edi-

turum pollicetur [sed morte præventum esse dolemus] licet & ex regno animali potentia ejusmodi medicamenta peti queant. Suum quoque his assensum præbet Celeberr. *WEDELIUS in pharmac. p. 204. seq.* dum diaphoreticam, nervinam, anodinam virtutem, sulphuribus metallicis, præprimis puris ex auro, vitriolo &c. paratis concedit. Verum & aliis quoque modis sulphura metallica medicas suas vires exhibent; quod si enim cum iis mercurius vulgi depuratus debite tractetur, nullum est dubium, quin mercurius diaphoreticus fixus, per sudorem tantum operans, inde redundet. Cui sententiæ favere videtur *Excell. Præf. ad Poter. p. 573.* Mercurius depuratus, inquit, cum auro digestionem fixatus, sive cum depurato sulphure minerali purissimo abut in cinnabarim seu æthiopem minalem, præbet remedium sub exilissima dosi efficacissimum, permeando totam corporis sphaeram angustissimosque partium tubulos, ubi obstructions & humores stagnantes egregie dissolvit & dissipat. Sic & *THOMSON p. 67.* Mercurius a metallo eductus, mundificatus & sulphuri philosophico combinatus, admirabiles edit virtutes, eo, quod sulphure ejus proprio externo orbat, aliud nobile, magis graduatum, avide amplectatur, quorum vis unita in archæum, duumviratum & sanguinem radios medicabiles in exhaustos diffundunt, &c. *p. 63.* Sulphur antimonii & martis mercurium, sulphure suo externo spoliatum, in optimam polyaceam evehit. Cum enim tantis cinnabaris mineralis fulgeat virtutibus, quid non faciet mercurius cum sulphure solari coagulatus & fixatus. Et quid *Hellmontii* mercurius diaphoreticus seu aurum horizontale aliud est (de quo gloriatur quod sanet febres unica portione, hæcticam intra lunæ cursum, carcinoma, lupum, hydropem, asthma & omnem morbum chronicum & suppleat omnes tam physicos quam chirurgicos effectus) quam mercurius per ignem veneris, (qui purum sulphur solare veneris est) præcipitatus & fixatus. Hunc quidem alii cum alkahesio, *POLEMAN* cum spiritu salis ammoniaci acido, *VIGANUS* cum magnete ex sale communi, *STARCKEY* cum sale tartari volatili, alii cum oleo vitrioli super proprium caput mortuum aliquoties cohobato, ut fixum suum sulphur simul transvehat, elaborare intendunt. Censeamus autem nullo modo nos soli huic sulphuri veneris necessario adstrictos esse, sed omnia sulphura solaris depurata & subtiliata debite mercurio introducta ipsum in diaphoreticum figere posse. Jam tum enim *AGRICOLA in Pop. P. II. p. 30.* cum solutione sulphuris communis per oleum tartari foetidum mercurium coagulare audeat, quid ergo vera metallorum sulphura non præstabunt? Qui vero mercurium nobiliorem, ex corporibus nempe metallicis eductum, cum sulphuribus solaribus præcipitabunt, multo etiam potentius medicamentum acquirunt. Prout nec ii à scopo aberrabunt, qui verum sal metallicum fusibile redditum, cum sulphure solari, in oleum dulce converso, miscent & per gradus ignis & colorum ad fixitatem perducunt. Notent tamen, ne loco veri salis metallici, nudam metalli solutionem vitrioliformem capiant; Verum enim sal metallicum, per tres continuos dies & noctes, igne acerrimo calcinari potest & debet, absque sui imminutione, quæ vera ipsius proba & nota est. Quo facto fusibile demum reddendum, ut ceræ instar, absque fumo fluat, alias enim cum sulphure suo non coit, nec ingressum in illud habet, hinc intime sese unire nequeunt, ut novum gloriosum productum exsurgere inde queat: *conf. Excell. D. STAHL in Opusc. chym. p. 502.* Sulphur etiam in oleum convertendum & philosophice edul-

edulcorandum est, quæ tum dextre unita & fixata medicamentum porrigunt potentissimum saluberri-
mum. Interim solenniter protestor, nullo me modo his dictis favere empiricis, cinisflonibus, arcanistis, qui ea, quæ hinc inde corraferunt, medicamenta, promiscue, cum irreparabili sæpe damno, ægris exhibent, istum demum verum Medicum reputans, qui debita theoria medica, judicio firmo & discretione practica, prius instructus, morborum historiæ, motuum naturæ, justæ criseos & individualis idiosyncrasie gnarus, selectiora demum medicamenta, justo ordine, tempore, methodo adhibuerit. Optandum simul esset ut prudentiores Medici anatomie metallorum penitiori diligentius paulo incumbere-
rent, propter præstantissimas in hoc regno latitantes virtutes, suæque de iis experimenta luci exponerent. Ego quidem si Deus vires largitur, nunquam defi-

stam, omnem, pro mea tenuitate, industriam studio huic impendere & naturæ penetralia perscrutari. Condonandum mihi quoque erit, quod in hac dissertatione pleraque summis tantum labris attigerim, quod si enim singula debitis enchiresibus, discursibus & epicrisibus deducenda forent, facillime in amplum volumen moles excreveret. Non tamen recuso aliquando, omissa hic & contracta, debite, fusius & apertius in lucem emittere. Deum autem T. O. M. devota mente humillime veneror, gratiasque persolvo debitas pro omni & in his operibus præstito auxilio & gratia, cum ipse omnis boni fons sit, & demisse peto, ut ipse porro praxi, studiis & laboribus meis benedicere, meaque coepta ad æviternam sui glorificationem, proximi emolumentum, animæ meæ salutem clementissime dirigere non velit dedignari.

RESOLUTIO COROLLARIORUM

A Chymico quodam in prioribus citato propositorum.

1] Post abstractum phlegma vini, sequitur Spiritus oleosus volatilis subtilis penetrans.

2] Tam sulphur martis subtilius, quam ejus sal intimius, vel breviori via utraque mediante oleo vitrioli per cohobationem, cum Mercurio sese uniunt, & fere totum figunt, ut reduci non possit.

3] Spiritus Nitri cum proprio Nitro fixo, vel cum floribus Nitri per carbones sublimatis, acuat, aurum & argentum simul solvit.

4] De Volatilisatione fixorum alcalium vide §. 5. hujus Dissert.

OPUSCULA PHYSICA

VARIi ARGUMENTI

AD PHYSICAM PERTINENTIA.

DISSERTATIO MEDICA,


DE

NECESSITATE PHYSICES

IN PRAXI MEDICA.

Primum edita anno 1694.

PROOEMIUM.

 CITUM est, quod sapientissimus medicinæ parens HIPPOCRATES libro de ar-
te disserit: Omnium profecto artium medicina nobilissima: Verum propter eo-
rum, qui eam exercent, ignorantiam, eorumque qui temere de hac judicant,
omnibus artibus jam longè inferior habetur. Et libro de lege inquit: Medici
fama & nomine multi, re verò & opere valdè pauci. Dolendum certè ex
animo est, veritatem horum ante bis mille annos & ultrà à Divo SENE
pronunciatorum etiam ad nostra usque tempora extendi. Quot enim rudes, indocti,
plebeji, omni judicandi & ratiocinandi facultate destituti existunt, qui sanandis mor-
bis operantur? Plures ex desperatione suæ sustentationis impura mente illotisque ma-
nibus ad sacra hæc, quæ sacris, non profanis hominibus olim docebantur, advolant
& saluberrimam hanc ac nobilissimam artem turpiter prostituunt; Magis autem adhuc
dictu turpe est, dari complures etiam inter doctos & qui splendidis titulis ornat
sunt hisce nostris temporibus, quibus ad clarissimam veritatis lucem repurgata conspi-
citur ars nostra, existimantes theoriam & rationem praxi quæ res experientiæ sit
planè esse inutilem, sed morborum medicationem absolvi tantum scientia probatissi-
morum adversus morbum remediorum & superficiali ac generali affectuum ex signis
petenda cognitione. Equidem vehementer optandum esset, veritatem cum hac sen-
tentia convenire, ita enim difficili labore magnoque studio in addiscendis medicæ
scientiæ præceptis supersedere & brevissimo temporis spatio medendi methodum asse-
qui possemus; at vero quando probè perpendimus ordinem, quo Deus in conservan-
dis corporibus animatis inceserit & quam innumeræ causæ externæ corpora immuta-
re & alterare aptæ sint, & ipsam experientiam optimam veritatis magistrā, quæ
huic asserto planè averfatur, consulimus, hos ipsos magna in ignorantia & errore
versari judicare perquam expeditum erit. Verissimus autem hic est fons omnium er-
rorum, sectarum præposterarum, & empiricarum medicationum, quod nempe viri
rerum naturæ parum scientes crediderint & adhuc credant medicinam tantum esse
opus experientiæ, & præsidia adversus morbum dari probatæ & certæ virtutis, un-
de rationibus neglectis & insuper habita omni philosophia morborum curationem ma-
gno cum ægrorum periculo ac detrimento, magnaue cum incertitudine aggrediun-
tur. Cum autem hæc res mereatur altius & subtilius agitari atque expendi, Divina
gratia secundante institui thema hoc in præsentiarum speciminis loco tractare, demon-
straturus necessariam & utilissimam connexionem theoriæ physicæ & per consequens
medicæ cum ipsa experientia ad praxin rationalem tutam & certam perficiendam. Di-
vinum autem numen potenti sua gratia nostro instituto ex alto assistat!

§. I.

Quam necessarium sit Medico ut sit Philosophus, ex Veterum autoritatibus compluribus saltem in medium afferam ipsius HIPPOCRATIS, qui libro de decenti habitu scribit: Δεῖ μεταγχειν τὴν σοφίαν εἰς τὴν ἰατρικὴν καὶ τὴν ἰατρικὴν εἰς τὴν σοφίαν. Ἰατρὸς γὰρ φιλόσοφος ἰσόθεος. i. e. *Decet sapientiam traducere ad medicinam, & medicinam ad sapientiam. Medicus enim philosophus Deo æqualis.* Et libro de sterilitate inquit: περὶ φυσικὸς ἵνα. *Conare ut evadas physicus.* Et GALENUS peculiari libello probat: si quis optimus Medicus est, eundem esse philosophum. Imò ex antiquæ historiæ monumentis scimus, doctos & peritos Medicos olim semper relatos fuisse inter philosophos. Philosophia in genere nobis denotat scientiam & inventionem causarum quatenus influunt in certum effectum, sive deductionem illarum rerum quæ factæ sunt ex necessariis suis & probè invicem connexis causis. Veterum itaque fuit sententia; Medicum, phænomenorum diversissimorum quæ observat circa humani corporis statum sanum, præternaturalem, & morborum sanationem, debere inquirere, invenire & dare convenientes & idoneas causas ac rationes, ut non opinio sed veritas quæ est rei per causas solidas & in intellectu fundatas deductio appareat.

§. II.

Sapientissimi illi homines per philosophiam, quæ Medicus ornatus esse debebat, non modo moralem, qua animi & ingenii habitus, diversitas, & vis exploratur, & quatenus agat in corpus, ejusque actiones insigniter demutet, & valde Medico est necessaria, sed potissimum naturalem qua corporum vires motrices, actiones & reactiones & exinde resultantes varii effectus explorantur, intellexerunt. Quamvis ut verum fateri velimus, hæc philosophia corporum non ad tantum fastigium apud Veteres pervenerit, quam nostris temporibus, interim quam vehementer adspiraverint ad talem scientiam, luculenter ex ipsorum monumentis apparet. Cum autem mihi animus sit ostendere, philosophiam naturalium quæ jam nota & à nobilissimis ingeniis hæc ætate inventa atque exculta est, servire admodum medicinæ & praxi rationali, ita ut ad magnam perfectionem mediante hæc philosophia deducta sit & ulterius deduci possit, placet statim primò limine ne cuidam causa dissensionis vel dubitationis præbeatur, paucis annectere quid per physicam & praxin rationalem intellectum velimus. Quocirca per veram & genuinam naturalium rerum scientiam non volumus sectariam illam sive ex Veteribus Epicuream, Platoniam, Peripateticam, ex Recentioribus Scholasticam, Gassendicam, Cartesianam, cum illa maximam partem in generalibus physices seu potius metaphysicis abstractionibus, entibus rationis, inanibus circa corporum naturam intimam speculationibus versetur, hæc autem non ubique sit sufficiens vel nobis satisfaciatur; sed potius talem, quæ constet ex rectè dictis ab omnibus, in subsidium tamen vocata mathesi practica, chymica & anatomia, item, quæ non tam causas primò primas ipsasque atomos & naturam, structuram & unionem corporum maximè fluidissimorum, utpote qua juxta Dn. Præsidis mentem profundissimè latent, & super vires ac limites intellectus nostri hac in vita existunt, scrutatur, sed magis in specialissimis occupata est, inveniendo causas effectuum proximiores rationi & sensibus manifestas, quæ appellatur à Recentioribus mechanica, dum ex principiis simplicissimis, lucu-

lentissimis, nimirum motu & materia sive corporis in se spectati varia habitudine ad motus, figura, magnitudine, structura, deducit & exponit effectuum naturalium causas.

§. III.

Ordo jam poscit ut quid per praxin medicam rationalem designemus, aperiāmus. Praxis in genere seu therapia est morborum per quædam remedia intenta sanatio, & hæc jam commodè in triplicem classem dispesci potest. Prima est temeraria agyrtarum, circulatorum & vulgi ignari, quæ κατ' ἐξοχήν audit empirica, ubi sine ulla ratione morbi vel naturæ ægrotantis & virium medicamenti cognitione promiscuè sine ulla distinctione, exceptione propinantur remedia. Hæc cæca est, erroribus crassissimis referta, cujus finis plerumque est damnum vel ipsa mors, vel quando interdum fortuna adjuvat temeritatem & remedium ab illis in mortem aut sanitatem propinatum aut forte, aut concedente jam morbo, vel ipso robore ægrotantis profuerit, vulgus credulum & ad judicandum ineptum mirifice hac illuditur atque decipitur. Tali empiria temerare humanum corpus, domicilium animæ ac spiritus sancti habitaculum, atrocissimum esse facinus scribit doctissimus HEURNIUS in *institut. pag. 20.* Altera praxeos species est etiam empirica, sed bono ac sano sensu sumto vocabulo, ubi sine vel minus sufficiente notitia principiorum in physicis, chymicis, anatomicis, sine cognitione status secundum vel præter naturam, virium medicarum, solo usu & experientia sive repetita atque sollicita rerum gestarum & gerendarum observatione aliquis aggreditur morbum sanandum, ubi nimirum ex frequenti observatione tandem addiscit, quænam medicamenta in hoc vel tali morbo congrua sint, quo tempore, quo ordine, qua dosi & quamdiu sint propinanda, quodnam regimen circa usum rerum non naturalium instituendum; Et quamvis hæc praxis soli experientiæ & usui insistent non sua careat laude, sed potius genuinum rationalis & solidioris sit fundamentum, & quamvis etiam hæc inter quosdam nostro tempore doctissimos & celebres Medicos obtineat; nihilominus infidam, incertam, fallacem & periculosam, quatenus non stabilitur ratiocinio, illam pronunciamus, uti inferius id dilucidius patebit.

§. IV.

Praxis itaque rationalis nobis talis est, quæ duobus nititur fundamentis. Primum est modo dicta empiria sive attenta & accurata observatio omnium illarum rerum & circumstantiarum, quæ fiunt, quæ eveniunt, quæ factæ sunt in certo morbo, ut nempe annotet Medicus cujus sit ætatis ipse æger, cujus temperamenti & qualis partium structuræ externæ, quale ejus ingenium & animi habitus, à quibus parentibus ortus, quod vitæ habeat genus, quo victu delectetur, quibus excretionibus, morbis, animi pathematibus assuetus sit; Deinde qualis sit conditio & status morbi, quænam symptomata complicata, quale morbi initium, quæ causæ antecedentes, qualis pulsus, respiratio, quales ejectiones, & a quibus remediis, alimentis, rebusque externis lædatur vel benè sese habeat. Hæc laudatissimæ & necessariae sunt Medico, felicem praxin qui exercere vult, experientiæ, & utique rationi in theoria inveniēda præcedere debent. Alterum fundamentum pathologiæ veræ ac praxeos rationalis est ipsa philosophia seu studium rationis, ut nimirum omnium illarum rerum, quæ attenta & accurata experientia annotaverit practicus, quærat rationes non superficiarias, vanas, in imaginatione plus quam in intel-

intellectu fundatas, sed solidas, convenientes cum ipsa rerum natura, perspicuas, & ex principiis universalibus & clarissimis deductas. Et in hoc consistit vera medica theoria, quæ supponit utique experientiam, & nil est nisi experientia ad solidam rationem perducta. Hisce duobus fulcris innixa medicina incedere debet, quod & vehementer optarunt, statuerunt Medicorum veteres & recentiorum doctiorum scriptorum omnes; utinam & eadem felicitate & facilitate affecuti id propter ignorantiam verorum in natura principiorum fuissent. Omnes enim fermè experientiam & rationem ad rectam mendi methodum exposcunt, quod utrumque per se indigens sit, alterum alterius egeat auxilio, dicentes: quæ absque ratione fiunt, omnia sunt turpia, quæ vero cum ratione, omnia decora, ut sapientissimus PHILO asserit. Inutilis est usus, nisi præceptis firmetur: Quare præclare NAZIANZENUS: imperfecta sunt, tum actio sine ratione, tum ratio sine actione.

§. V.

Rationem autem, quæ ipsi experientiæ medicæ servit, quæ dubiorum occurrentium dissolutrix & difficultatum conciliatrix est, unicè petendam esse existimamus ex principiis naturæ universalibus seu physicis. Eadem enim theoriæ medicæ & physicæ sunt principia; unde optimâ ratione ARISTOTELES in fine physices libr. de sanit. & morbis scribit: *Ubi desinit physicus, ibi incipit Medicus*. Item SENNERTUS Tom. I. Institut. Libr. I. cap. IV. *Medicus sua principia à physica mutuatur, neque alia habet, quam quæ physicus suggerit. Et propterea si physicis principiis contraria profert, vera non profert*. Et idem clarissimus Author Tom. I. libr. de methodo discendi medic. p. 244. scribit: *Inter omnes philosophiæ partes physica Medico maxime est necessaria, & vix aliquid tam subtile traditur in physicis, quod cognitum aliquando Medico usui esse non possit*. Quid enim aliud est medicina rationalis, quam principiorum physicorum generalium, quibus natura utitur in suis operationibus, applicatio ad corpus humanum, quod æque objectum physices est, quatenus nimirum illud in statu sano & secundum naturam, vel in statu morbofo seu præter naturam, & quatenus a causis variis, externis corporibus, variiq; generis motionibus alterari, affici, destrui, vel juvari potest? Cognitis enim veris, quibus natura agit, principiis, ac motuum legibus generalibus perspectis, facile est demum descendere ad speciale corpus & ex iisdem principiis explicationem illarum rerum, quæ desideratur, deducere. Natura enim in modo agendi simplex & semper sibi similis est, eademque motuum leges continuo visuntur & repetuntur, juxta quas constantissima omnium fit & est operatio.

§. VI.

Equidem non negandum est, sicuti in omnibus disciplinis rationis & philosophiæ, ita etiam in mendi scientia maximum & insignissimum ejus esse & fuisse abusum, siquidem ex ignorantia veræ philosophiæ naturalis tanta dissidia, sectæ, opinionum divortia in medicina subnata fuerunt, adeo ut vera incrementa sumere non potuerit, postquam nimirum perversa philosophandi intemperies in medicinam irrepserit: attamen manet sua laus & usus sobriæ & sanæ philosophiæ ac rationi in arte medica stabilienda & perficienda. Mathematicam autem & veram philosophiam naturalem, cui medicinæ scientia inædificari possit, rectissimè desiderat VERULAMIUS libro de augm. scient. p. III. Quo

Frid. Hoffmanni Oper. Supplem. II.

libro etiam p. 98. veram philosophiam naturalem ex mathesi practica seu mixta, quæ pro subjecto habet axiomata & positiones physicas, concinnari debere asserit, dum inquit: *Prout physica majora in dies incrementa capiet & nova axiomata educet, eo mathematica opera in multis indigebit*. Nostra itaque sententia est, fundamenta veræ philosophiæ naturalis, qua explicantur corporum inter se habitudines, relationes, operationes, esse simul principia matheseos mixtæ, nimirum mechanices, hydraulices, statices, optices, hydrostatices, pneumatics, quibus motiones corporum, quæ in omnibus operationibus occurrunt, perspicua, & facili ratione exponi & derivari possunt: secundo esse principia chymica, quibus principia mixtionis & compositionis, quatenus ad certum motum habitudinem habeant, educuntur & in apricum sistuntur. Ita philosophia redditur experimentalis, quæ non insistit inanibus speculationibus, sed per sensus & experimenta demonstrat, probat, illustrat sua ratiocinia. De tali jam physica, quod inserviat medicinæ & praxi rationali firma & stabilis nostra assertio est. Et quidem statuimus Medicum, qui cum certitudine, brevitate, securitate adeoque felicitate & sine magnis sumptibus mederi gestit corporis humani innumeris languoribus & ægitudinibus, & circumspectum ac verum judicium circa eventum morbi & læsiones corpori illatas formare, vel à morbis corpora præservare velit, & ipsis mortalibus ad quos morbos dispositi sunt prædicere, ipsum principia physica & maximè naturam solidi & fluidi, gravitatis & levitatis, caloris & frigoris, rarefactionis & condensationis, indolem salium & sulphurum, regulas & leges motuum, causas motus intestini & progressivi, motus fluidorum per solida, & solidorum in fluidis exacte nosse & ad corpus humanum diversimodè constitutum applicare debere.

§. VII.

Etenim impossibile est, ut cum certitudine & securitate morbos remediis tractare possimus, & artem nostram exercere, nisi naturam ægri, causas morborum & vires remedium probè noscamus & calleamus. Quemadmodum enim nulla ars est mechanica & exerceri potest, nisi objecti, circa quod operatur, supponatur notitia, vel cognitio principiorum in mente præcedat, quibus ars in effectum ducatur; ita etiam artium nobilissima medicina non potest esse destituta notitiâ ipsius ægroti, vel remedium quibus artem suam exercere debet. Et sicuti artifex automatum & horologiorum vitium non scrutari vel ipsi mederi potest, nisi habeat scientiam connexionis horologii, non quoad intimam naturam ferri & æris, sed qualis rotularum magnitudo, figura, coaptatio, positura, it. quale pondus & vis elastica ad finem suum obtinendum id est horas demonstrandas applicari debeat, cognoscat, eadem ratione a Medico non desideratur intima elementorum natura & mixtio ad formationem corporis, sed tantum constructionis modus, quoad diversam habitudinem ad motus præstandos qui dicuntur vitales & in debita secretionem & nutritionem, corporisque conservationem consistunt. Verum obstrepere hic nonnullos video clamantes naturam corporum non confundi debere cum inventis humanis, nimirum artis operibus. Verum enim verò artificium quod sponte provenit nulla arte humana adjuvante: & artificium quod homo sua ratione producit, æquè naturale est, & principia & media agendi eadem habet. Omnes enim operationes artificiales sunt operationes naturæ; nam ad opera externa nihil aliud potest homo, quam ut corpora naturalia admoveat & amoveat

veat natura intus agente. Et structura corporis humani æque artificium seu mechanismus est i. e. coordinatio corporum inter se agentium & reagentium certum in finem facta à ratione aliquâ externâ & quidem hic divina, dici potest, quam aliud hominis inventum mechanicum, organon, modò quod artificium seu mechanismus divinus, ubi infinita ratio & virtus fundamentum posuit constructionis, longissimis parasangis exsuperet rationem humanam, finitam, construente, adeò ut ratio humana assequi vel imitari minime poterit omnia ea, quæ fiunt ab arte divina in corporibus, quæ ars à PLATONE sapientissime vocabulo strictè sumto, vocatur natura, quamvis leges ac regulæ motuum tam in iis quæ sponte proveniunt & Deum authorem habent, quam quæ à ratione humana proficiscuntur & artificialia *νὰρ ἐξ ὀρχῆς* nominantur, valorem eundem obtineant, & corpora eadem & constanti ratione secundum has operentur.

§. VIII.

Hicce deductis jam firma manet sententia, naturam & structuram corporis humani exactè nosse debere felicem practicum, unde naturam corporis artis medicæ principium appellat HIPPOCRATES libro *de locis in homine*. Et libro VI. *de offic. hominis* dicit. *Principium sermonis in arte medica est natura corporis*. Neque etiam citra naturam corporis exactè inventam, si fides habenda GALENO est, de morborum natura invenire quicquam, vel convenientia morbo adhibere auxilia usquam licebit, qua de re elegantissimus locus extat apud VALLERIOLAM in locis commun. p. 23. Hominis universam naturam, hoc est temperiem, habitudinem, formam, structuram, illius elementa, partes, partium positus atque nexus, eorundemque usus & actiones, tum & facultates quibus humanum regitur corpus, earumque in homine functiones scire inprimis Medicum convenit. In quam rem libri de elementis, de natura humana, de temperamentis, de usu partium, de facultatibus naturalibus, nobis suppetias ferent. At cum ex quibus constemus & quibus regamur, scire non satis sit Medico, sed multo præstantius à quibus vel bene vel malè afficiamur, sunt autem hæc, quæ nulla est evitandi ratio & a quibus, ut ait GALENUS, alteratur necessario corpus, horum rationem omnem exactè tenere Medicum convenit. Ac proinde aëris, temporum, ac tempestatum cœli, regionis, ventorum, nubium, anni constitutionis, ortusque & occasus siderum, adhæc alimenterum, quibus foveri substantiam nostram contingit, vires ac potestates omnes, tum somni, vigiliarum, quietis, motionis, plenitatis, inanitionis, atque animi pathematum, iræ dico, mœroris, metus, lætitiæ naturam omnem & quid in nobis efficiant [ut horum omnium congruus ad corporis conservationem usus esse possit] scire Medicum oportet. Et (quod propriè ad muneris sui rationem attinet) ut morborum omnium discrimina, formas, nocendi modos teneat: Insuper causas morborum, symptomataque morbos consequentia, affectas sedes, signaque quibus hæc omnia deprehendantur. Tum denique ut iis cognitis stirpium ac metallorum, si fieri possit omnium, aut saltem quam plurium [quod monet GALENUS] peritiam nanciscatur: sunt enim hæc medicæ materiæ morbo auxilia futura, ut a quibus juvari nos, à quibus contingit lædi, horum notitia profit. Quomodo autem harum dictarum rerum cognitionem assequi quis potest, nisi naturam corporum in genere, materiæ affectiones, proprietates, ad motus habitudines & ipsos motuum effectus, quatenus nimjrum alterant, disponant, & modifi-

cent variè materiam, perspiciat ac noscat? Quomodo læsionem actionum & causas hujus læsionis explicare poterit, nisi anthropologiæ ex scientia anatomica, mechanica & chymica plenariam & sufficientem habeat notitiam? Quomodo scire & penetrare poterit, qua ratione causæ diversissimæ externæ, à quibus unice vitæ & sanitatis nostræ ratio pendet, agant in corpus, quomodo illud alterent, demutent, conservent vel destruant, quod etiam de remediis valet, nisi habeat cognitionem actionum corporearum inter se invicem, nisi principia universalialia circa materiam & motum noscat, nisi etiam ipsa experientia & usu discat, quomodo corpora viva ad hæc vel talia sese habeant.

§. IX.

Ut autem ad rem propius accedamus, constanter asserimus ac affirmamus, totam rerum corporearum naturam, totum mundum, omniaque corpora viva & organica machinas esse, mechanismo absolvi, totamque medicinam perfici instrumentis mechanicis & remedia mechanicè operari, tantum, quod animus noster potentia connata immediate sæpius per vehementes affectus in corpus nostrum agere, illius œconomiam lædere, medicamentorum virtutes suspendere possit per operationes tamen merè mechanicas subsequentes. Legitur in libro sapientiæ: Ex certo numero, mensura & pondere sapientissimum architectum ineffabili ratione & artificio mundum omnesque res corporeas construxisse, i. e. merè mechanicè. Nam omnia corpora certum in finem certoque ordine disposita ac constructa sunt, qui ordo consistit, 1. in partium corpus constituentium debito numero seu quantitate, 2. debita mensura, sive proportionem, mixtionem, qualitate aut temperie, & 3. debito pondere, sive impulsu & motu activo vivo, quo omnia corpora in natura & essentia sua gaudent & instructa sunt. Itaque corpus nostrum elegantissima & artificiosissima est machina, hoc est ex partium diversissimarum, tenuissimarum, fluidarum & solidarum debito numero seu quantitate, mixtione sive temperie & qualitate & motu seu pondere & impetu constructa & coordinata, eum in finem, ut in suo esse se à corruptione conservare, ad quam propter diversissima elementa per se proclivis est, defendere, debite nutriri, augeri & animæ functionibus inservire queat. Quod si itaque debita partium quantitas, qualitas sive temperies & motus adest, & debita invicem connexio, coordinatio, corpus vivum & sanum existat. Hanc structuram itaque & coordinationem partium per anatomiam nosse, principia mixtionis partium solidarum & fluidarum indagare, debitam humorum quantitatem respectu solidarum rimari & leges motuum in corpore, quatenus animus illos efficit & quatenus necessariis causis fiunt, annotare & expiscari debet. Jam autem, si quis ignoret statum naturalem & in quonam consistat vita sanitas & officium cujusdam partis, quomodo cognoscet & demonstrabit læsiones & vitia partium, actionum, effectusque morbosos, causasque morbosas. Vera enim pathologia & morborum ætiologia pro fundamento habet anthropologiam sive exquisitam machinæ humanæ cognitionem quoad partium solidarum structuram, fluidarum temperiem & motum, ex regulis & legibus staticis, mechanicis, hydraulicis, opticis, principiis chymicis derivatam. Quocirca pathologus facile videt, omnia vitia & affectus præter naturam in corpore occurrentes duci ac derivari posse & debere ex quantitate sanguinis & humorum vitiosa sive aucta sive imminuta; ex fluorum intemperie, quæ, prout elementa sanguinem ingredien-

ingredientia varia sunt, diversa quoque est; & tandem principaliter ex motu vitioso, qui plerumque absolvit rationem morborum formalem causamque immediatam. Deprehendimus enim attenta & accurata observatione, in omni morbo vel motum esse imminutum, unde tonus ac robur partium perit, & toni naturalis relaxatio exoritur; vel motum in nervis esse auctum, unde spasmodicarum contractionum & motionum convulsivarum origo profluit; vel impulsus arteriarum & cordis majorem ac citiorem, unde febrilis calor, sanguisque humani intestina exagitatio dependet.

§. X.

Ex quibus adductis liquidissime consequitur, therapiae genuinam rationem ex nullo alio fundamento duci debere, quam ut per remedia illud quod in quantitate excedit absumatur, à temperie discedens per alterantia in temperatum statum reducatur, & motus partium solidarum & consequenter humorum inordinatus, irregularis, inæqualis depresso vel auctus in ordinem & æquabilitatem per remedia spirituosâ, roborantia aut nimium motum sistentia revocetur, ut adeo hæc omnia fiant & peragantur mechanice. Ex quibus jam patet verissime & scitissime ab HIPPOCRATE medicinam esse definitam per additionem illorum quæ deficiunt, & quæ superant subtractionem. vid. HIPPOCRATES *de victus rat. lib. I. Sect. IV. p. 12.* Et doctissimus HEURNIUS in *institutionibus* ex simili mente talem affert medicinæ definitionem, quod sit ars corporis humani vitia per adjectionem & subtractionem emendandi. Ex quibus etiam porro fluit, si quis velit causas cognitâs morborum remove & scopum medicationis attingere, ipsum nosse debere remediorum & auxiliorum genera, ipsorum vires, principia mixtionis & modum agendi, quo sciat hisce præfidiis debito tempore & ratione humores vel evacuare, vel retinere, materiam disponere & alterare, & motus vel promovere vel sistere. Principia autem agendi in ipsis remediis non alia ratione quam ex physicis, chymicis, mediante variâ mixtione, sapore & odore & tandem ipso effectu & experientia addiscet.

§. XI.

Deinceps quando Medicus rationalis naturam rerum corporearum motuumque regulas in genere probe novit, & deinde corporis humani & quidem individualement mechanisum exploratum habet, v. g. ex habitu & structura corporis, ætate, sexu, vitæ genere, constitutione parentum, & variis consuetudinibus, animi moribus & natura excretionum, tunc facillimo negotio præfagire & prænunciare ipsi individuo poterit, ad quos & quales morbos sit dispositum, quo tempore accedent, quomodo sit evasurum. Habent enim & temperamenta & ætates & sexus & certi habitus corporis, varia vivendi ratio, variaque climata suos peculiâres & proprios morbos, ad quos corpora valde disponunt, uti id experientia abunde docet, & HIPPOCRATES in suis scriptis passim inculcat, præcipue autem *sect. III. aphorismorum*; Quin imo si bene Medicus rerum externarum, tempestatum & anni temporum habitudines ad ætates, temperamenta, climata, probe conferre novit, mirabiliter prænunciare poterit, quinam morbi epidemici sint grassaturi, quæ corpora invadent, quænam non, & quibus exitiales & periculosi futuri sint. Et profecto si quid est quod nobilem famam ac splendorem Medico parat, quod distinguit rationalem Medicum ab empirico, est certe prognosîs, cujus apud Veteres maximus fuit splendor, quando nimirum Medicus præsentia, præterita & quæ mox futura sunt, *Frid. Hoffmanni Oper. Supplem. II.*

scit & pernoſcit. Quoniam autem aër, catholicum illud fluidum, spirituum pabulum, omnium animantium vitæ summè necessarium existit, ex cujus varia constitutione vita & sanitas vel mors aut morbi epidemici vitæ insidiantes contagiosi oriuntur & generantur, primum omnium naturam & constitutionem aëris, illiusque gravitatem, elaterem, humiditatem & siccitatem, calorem & frigus mediantibus variis instrumentis & experimentis exacte callere atque tenere debet. Deinceps cum aquarum natura ac indoles sit diversissima pro differentia locorum, ipsæ autem immediate suum vitium fluoribus corporis nostri aspergant; opus etiam est, ut mediante chymia & physica exploret & indaget Medicus aquæ ubi degit naturam, quo spectat etiam examen cerevisiarum, vinorum, & cujuscunque generis potionum. Liquida enim pota, prout natura variant, ad certos & varios morbos disponunt animantium corpora & nonnullis sunt salubria, aliis minus. Simili ratione alimentorum proprietates, locorum situm; soli naturam, vivendi rationes certis populis familiares indagare & nosse decet bonum & rationalem practicum, ita enim magnam adipiscetur lucem explicandi cur ad hos vel tales morbos certi districtus, nationes & populi sint dispositi. Quæ omnia tamen minime recte efficere poterit, nisi tinctus & imbutus rerum naturalium scientia sit. Copiosius cuncta possent deduci, nisi brevitati studere nobiscum constitutum fuerit.

§. XII.

Ordo jam postulat ut breviter strictimque subjungamus differentiam medicinæ rationalis ab ipsâ empiria etiam sano sensu sumta. Non enim me latet complures futuros, quibus non arridebunt dicta, sed pronunciabunt, Veteres optimos fuisse practicos & ex recentioribus adhuc esse, qui in sanandis, dijudicandis & præfagiendis morbis feliciter procedunt, qui tamen destituti sunt philosophia naturali methodo mathematica tractata. Verum contra hos dicendum esse existimo, antiquiores Medicorum diuturno tempore & longissima atque attenta observatione & experientia, quæ memoria est quasi repetita & observatio rei in individuis pluribus eodem modo sese habentis, illud denique obtinuisse, ut in diagnosi & prognosi morborum etiam regimine circa res non naturales utilissimam opem ægrotantibus præstiterint; quando autem rem altius pervolvimus & consideramus, utique nostra praxis majori judicio & ratione stabilita, longissimis parafangis præferenda est Veterum praxi; quot enim morborum distinctionibus, differentiis pulsum, urinæ, quot signis diagnosticis & prognosticis, quantâ copia & sylva remediorum sapius plane inutilium, effœtorum, quantis compositionibus, & formulis absurda etiam contrariarum rerum mixtione concinnatis, scatent Veterum libri? quot tormenta, cauteria, setacea, vesicatoria, fonticulos, excogitarunt, quibus maximam partem sine ratione miserrimè divexarunt ipsos ægrotos. Si illa inspicimus quæ de facultatibus medicamentorum scripserunt, quantæ virtutes adscribuntur plantis & remediis ex vegetabilibus, animalibus vel mineralibus petitis, quæ tamen nunquam re ipsa inveniuntur, sed spem medentis turpiter eludunt. Quot mendaciis scatent botanicorum libri, quot pretiosis, laboriosis & absurdis processibus & operationibus referta sunt chymicorum scripta? Quantis laudibus & encomiis ornantur remedia chymica? Quanta pompa & apparatus instrumentorum inutilium reperitur ad operationes chymicas, chirurgicas &c. Quæ absurda, quos defectus & vitia scientia physica genuina instructus Medicus animadvertit, videt, demonstrat & corrigit; Neque tamen mihi est animus plane rejicere Veterum scripta; multa enim

enim eleganter fideliterque tradita sunt ab antiquis maximè quoad prognosin, historiam morborum & quæ ad prudentiam Medici spectant. Recentiores autem non modo breviori, faciliiori & feliciiori via in explicandis rerum procedunt causis, & in concinniore ordinem tam theoretica quam practica congefferunt, verum etiam remedia selectiora, compendiosius & sine magnis sumptibus præparanda, methodo longè tutiori, breviori, jucundiorique applicant & sic valde rebelles morbos propugnant.

§. XIII.

Sique rem propius inspiciamus, longissimè distat rationalis medendi methodus ab empirica. Dantur enim casus infiniti & morborum maximus numerus pro differentia locorum, individuorum, tempestatum præcedentium, & vitæ subindè de novo propullulantium, ubi Medicus qui nihil nisi quod expertus fuerit & observaverit, ignorat quid agere debeat, sed multa cum periculo experiundo ingenium & mores morbi nosse & medendi rationem invenire debet, cum ex adverso rationalis Medicus, ex collatis probè circumstantiis & rationibus etiam quæ superstructæ sunt experientiæ, facile conquirere & colligere poterit, quomodo morbus tractandus, quæ juvabunt, & quæ nocebunt. Deinceps illud incommodi secum affert sola experientia, quod hæc ipso HIPPOCRATE teste sæpe fallax sit & imponat ipsis practicis. Sæpenumero enim fallacia causæ ut causæ committitur in medicina; & effectus, qui per accidens sequitur, adscribitur medicamento. Accedit, quod unum remedium in eodem morbo, eodem individuo, diverso tempore plane contrarias fortitur operationes, uti de martialium, adstringentium, opiatorum, purgantium, chinachinæ, vomitoriorum applicatione id practicis notum est. Remedia enim, ut optime HEURNIUS in notis ad aphorism. Libr. I. Aph. I. annotat, vim suam amittunt & retinent, aut novam acquirunt pro varia eorum quibus exhibentur natura ac ex morbi motu: imo sæpius medicamentum in eodem morbo quod uni subjecto prodest, alteri infensum est & contrarias producit alterationes. Cum autem, si Veterum libros spectemus, in uno sæpius morbo plus quam centum nobis commendentur remedia, imo cum quivis ferme practicus gloriatur de peculiari experientia, circa certum morbum curandum, non obstante quod & methodus & remedia sibi invicem contrariantur, quis potest emergere ex tanto experientiæ labyrintho, nisi luce rationis accensa? unde rationalis Medicus remedium & ægrotantium ac morbi naturam callens facillimè & optime hæc omnia discernere, remedium utile ab inutili talibus sub circumstantiis seligere, perversam methodum à recta dignoscere & cum certitudine agere poterit. Vice versa empiricus sub talibus ubique hæret, dubitat & nescit quid agendum sit. Et sicuti nimia admiratio & credulitas mater est ignorantia, ita etiam frequentissime ipsa comitatur empiriam. Hi enim valde dispositi sunt ad credendum, maxime in iis rebus quæ cum ipsorum ingenio & cogitationibus conveniunt; nequeunt enim discernere verum à falso, unde videmus empiricos & non sufficienti ratione instructos perlegere innumeros practicos, observationes annotare, formulas & medendi rationes quibus juvabunt ægrotos conscribere, quæ sine ulteriori disquisitione in suis ægrotis imitari solent. Ex quo etiam fluit, ipsos ordinarie

uti in sua cura magna remedium copia & dum unum non juvat, statim ad alterum conveniunt, mutantque sæpius remedia, quod revera magnam Medici ignorantiam loquitur. Optime enim HIPPOCRAT. Sect. II. Aph. 27. *Omnia secundum rationem facienti si non succedat secundum rationem, non transgrediendo citra rationem.* Et præclarissime Excell. Præses in not. ad Poter. p. 20. Philosophica & rationalis praxis successus est felicissimus, quæ paucis eget remediis, satis tamen probatis & selectis, non macerat vel torquet corpora copia inutilium pharmacorum, nec in externis illis cauteriis, fonticulis, unguentis, setaceis, cucurbitulis, vesicatoriis, multum quærit præsidii; Sed magis ad intemperiem sanguinis & humorum tollendam & æqualem ipsis motum procurandum respicit.

§. XIV.

Denique & Medicus philosophus præ puro practico hanc habet prærogativam, quod ille in ignoto ipsi adhuc morbo medicamentum ac medendi viam ex ratione invenire & quæ profutura, quæ nocitura sint discernere potest, quod negatum est illi, qui tantum ex experientia & singularibus notitiam suam contrahit; imo physicus de remediis experientia ignotis ex regno vel vegetabili, vel minerali desumptis, solo gustu, odore, variaque cum liquidis mixtura, chymicaque analysi iudicium ferre poterit non fallibile, quæ vires & virtutes absconditæ sint in tali simplici, item in quo morbo, quo tempore, quâ dosi debeat propinari successu subsequente felicissimo, quod ille, qui non rationi navavit operam, præstare minime poterit. Addimus & illud, quod remedia effæta, inertia, præposteræ compositionis, distinguere à probatis, præstantioribus, activioribus, tutioribus commode poterit, imò ipse novas præparationes, compositiones invenire, Veterum nimiam ignorantiam principiorum redolentes corrigere, ingredientia pretiosa incongrua non miscibilia omittere, & præstantiora ac viliora substituere, sicut id perspicimus in compositione innumerarum specierum, laudanorum, pulverum cordialium pretiosorum, confæctionis alkermes, theriacæ coelestis & ejusdem generis aliorum.

§. XV.

Postremo planè inidoneus est solus practicus theoria physica & medica destitutus rectè judicare de morbo & ejus eventu, sive non disseccetur corpus, sive disseccetur, quod etiam valet circa inspectionem vulnerum vel læsionum ab extra factarum, ille enim non peritus rerum anatomicarum & ignarus usus partium & hujus connexionis ad vitam, ineptum & non fundatum producet iudicium, quod tamen rectum in foro politico & ad administrandam justitiam summe est necessarium. Silentio transmittimus quantum splendoris ac adminiculi scientia physica praxi chirurgicæ afferat, dum istam pompam instrumentorum, emplastrorum & topicorum rejicit Physicus, & paucissimis & præstantissimis remediis contentus est, nec non anatomica scientia instructus brevi tempore & sine omni periculo in medendo id efficere potest, quod Chirurgus empiricus longo tempore, magnoque cum periculo molitur & non præstat. Verum brevitati studentes hic subsistimus, interim Deo T. O. M. pro præstita gratia atque auxilio immensas persolvimus gratias.

THESES SELECTIORES EX PHILOSOPHICIS ET MEDICIS.

Primum editæ anno 1699.

I.

INTER innumeras logicas seu artes ratiocinandi & cogitandi talis adhuc desideratur, quæ regulas exhibeat perspicuas, quibus copiosissimi in theologicis, moralibus, physicis, medicis errores commissi planissime ostendi & detegi possint, & mens ab erroribus ulterius committendis se cavere discat.

II.

Unica perfectio mentis nostræ consistit in inquisitione veritatis.

III.

Principium omnis veritatis & sapientiæ rectissime est dubitatio, quoniam animum ad videndam veritatem præparat præscindendo noxiosissima præjudicia autoritatis, philavtiæ & præcipitantiæ.

IV.

Unicus & essentialis character veritatis est intimus mentis consensus atque convictio.

V.

Quæcumque assertio non invenit consensum & ad convictionem mentem humanam non perducit, sed dubitationem relinquit, illa non cognoscitur ut vera.

VI.

Mens veritatem non percipere ac intime penetrare potest nisi per ideas.

VII.

Omnis itaque scientia consistit & versatur in ideis rerum.

VIII.

Idea nihil aliud est quam vestigium rei externæ cerebro impressum.

IX.

Nullæ dantur ideæ rerum menti connatæ, nihilominus menti humanæ à natura insita quædam vis æquabilis est verum videndi illique assentiendi, & est portio relicta imaginis divinæ qua homo distinguitur à bestia.

X.

Si homo agit contra internam convictionem veri & iusti, agit contra conscientiam.

XI.

Omnis idea pro fundamento & origine & causa habet objecta externa quæ mediantibus sensibus in cerebro sui vestigium relinquunt.

XII.

Rectissime dicitur à Veteribus nihil esse in intellectu quod non prius fuit in sensu i. e. originaliter & causaliter, unde homo sensibus carens omni veritate destituitur.

XIII.

Ideæ commodissime distinguuntur in passivas & activas.

XIV.

Passivæ appellantur quas objecta externa necessaria quadam actione producant mediantibus sensoriis in ipsa mente & dici possunt sensuales.

XV.

Activæ vocantur illæ, quas ipsa mens ex se libera circa sensuales operatur, has variis rationibus abstrahendo, comparando, subtrahendo.

XVI.

Scientia physices, chymicæ, anatomiciæ & medicinæ maximam partem fundatur ideis sensualibus. Mathesis autem pura & metaphysica in activis & intellectualibus maxime est occupata.

XVII.

Ideæ sensuales menti oblatae percipiuntur & ad facultatem mentis imaginativam & memoriam spectant; ideæ autem intellectuales concipiuntur & ad intellectum activum purum & iudicium pertinent.

XVIII.

Perceptio sola sensualis fallit in iudicando: seu potius voluntas iudicandi ex solis perceptionibus sensualibus & inde concludendo ad ipsam rerum naturam perscrutandam fallit & fallitur.

XIX.

Cum effectus semper distinctum quid sit a causa, hinc perperam à pluribus concluditur, effectus sive certos motus in spiritibus animalibus susceptos & inde dependentes sensationes v. g. caloris, frigoris, doloris, dulcedinis, attractionis existere formaliter & eminenter in objectis externis tanquam causis.

XX.

Mens nostra, præter potentiam passivam percipiendi & activam concipiendi, instructa etiam est facultate fingendi sive imaginante, dum varias de novo producit & componit occasione sensualium ideas, quæ tamen non deprehenduntur in re ipsa.

XXI.

Usum habet hæc fictio in elicienda rerum naturalium probabilitate ubi sensibus non penetrare possumus, & ex eo oriuntur hypotheses.

XXII.

Bona hypothesis supposita debet habere intelligibilia coherentia; secundo solvi & explicari debent exinde incogniti effectus atque phænomena ut nulla sequatur absurditas.

XXIII.

Præcipua regula in inquirenda veritate & detegendis erroribus est, ut quis bene noscat distinguere ideas fictas & entia imaginativa ab ideis veris & entibus intellectus atque conceptus.

XXIV.

Omnes ideæ fictæ sunt obscuræ, nec facile à quovis capi & intelligi possunt; veræ autem sunt perspicuæ, faciles & statim concipiuntur.

XXV.

Ideæ, quæ non desunt ex ipsis rebus extra mentem existentibus, plerumque sunt fictæ.

XXVI.

In scientia physica perperam rerum naturalium phænomena explicantur ex ideis in mente formatis; cum potius ipsæ ideæ prius ex rebus naturalibus desumi debeant.

E 4

XXVII.

XXVII.

Falsum est axioma : in idea certa cujusdam rei in mente formata includi & involvi etiam statim existentiam rei externam.

XXVIII.

Ubi sensus & intellectus deficit, ibi plerumque homines incipiunt fingere.

XXIX.

Cum scientia nostra versetur in ideis clavis & evidentibus, ideo opus est uti vocabulis, quæ idearum in mente existentium sigilla esse debent, clavis & perspicuis, quæ similem mox producant in mente ideam.

XXX.

Voces obscuræ, quæ non vulgaribus terminis explicari & definiri possunt, plerumque testantur de ideis fictis.

XXXI.

Origo innumerabilium errorum est, quod quisque secundum arbitrium suum vocabulis attribuat certas notiones.

XXXII.

Complures controversiæ statim deciduntur, & veritas plana & facilis fit, quando terminis vulgaribus & simplicissimis utimur.

XXXIII.

Fons errorum innumerabilium est, quod homo limites intellectus sui nesciat, sed ultra ipsos promoveri scientiam velit.

XXXIV.

Causa præcipuorum errorum in physicis & theologicis est existimare illas res, quæ mente abstrahi possunt & distinctæ sunt, esse etiam extra mentem

res seorsum existentes.

XXXV.

Error maximus & vulgaris philosophorum est, quod naturam & essentiam corporum penetrare velint: cum nullam substantiam, tam spirituales quam corpoream cognitam habeamus.

XXXVI.

Rerum creaturarum substantiam, vim & essentiam unum idemque esse statuimus.

XXXVII.

Optime Physicus & Medicus procedit, quando consequentias deducit ex iis rebus, quæ sensu & ratione certæ sunt, & per gradus non per saltum composita reducit ad simplicia & principia propiora.

XXXVIII.

Vana est philosophandi ratio, quando Medici Cartesiani allaborant rerum naturalium effectus, morborum causas, remediorum modum agendi ex magnitudine, figura, situ particularum explicare.

XXXIX.

Physicus & Medicus contentus esse debet, quando effectus naturales per causas proximiores explicat; quamvis omnia constent ex certa magnitudine, figura, situ partium, impossibile tamen est, propter imbecillitatem sensuum & hinc etiam ratiocinandi defectum penetrare intimam structuram & unionem partium præsertim minimarum.

XL.

Omnis scientia syllogistica, arithmetica, algebraica ratiocinandi & judicandi de rebus, consistit in eo unico, quod sicuti æqualium, ita & inæqualium, una eademque inter se sit ratio & proportio.



THESES SELECTIORES

EX MEDICIS.

I.



animus & corpus est subjectum medicinæ: & moralitas ac motus atque aptitudo animi dependet maximam partem à sanguinis circulo.

II.

Circulatio sanguinis diversa est ratione temperamentorum, ætatum, habitus corporis, vitæ generis, dispositionis hæreditariæ, regionum, alimentorum.

III.

Singula temperamenta, ætates, habitus corporis, vitæ genera, regiones, alimenta, dispositiones ex semine parentum, habent suos peculiare mores, inclinationes, vitia, virtutes; ingenia & variant ratione ipsorum.

IV.

Qui vult corpus sanum servare & ægrotans restituere, merito Philosophus & Medicus esse debet.

V.

Antiquissimi Medici paucis herbis & philosophiæ præceptis utebantur in morborum sanatione.

VI.

Vitæ & sanitatis unicum fundamentum est liber & æqualis sanguinis & humorum motus per corporis minima.

VII.

Fundamentum omnium morborum est inæqualis vel impeditus sanguinis & humorum circulus.

VIII.

Principium movens omnium animantium & corporis nostri rectissime juxta HIPPOCRATEM deducitur ab aëre purissimo sive æthere.

IX.

Seminalis spiritus, ex quo animalia oriuntur, nihil aliud est, quam subtilissima aëris portio, in qua delineata sunt ideæ omnium partium istius animantis in quo semen fuit generatum.

X.

Cum vita nostra consistat in motu sanguinis; nullus autem motus fieri possit nisi sit proportio inter movens & mobile; Hinc facile concluditur convenientem quantitatem, qualitatem & viarum debitam dispositionem requiri, ut homo sit sanus.

XI.

Plethora, intemperies sive cacoehymia & obstructio sunt plerumque causæ antecedentes morborum.

XII.

Sanguis bonus & satis fluidus, licet sit copiosus, per se raro causa morborum est.

XIII.

Venæ sectio præsentissime imminuit plethoram, hinc ubi periculum in mora, adhiberi debet.

XIV.

XIV.

Largior venæ sectionis usus corpora infirmat, ipsaque variis morbis & epidemicis malis obnoxia reddit.

XV.

Præstat parciori victu, ac motu intensiori, sanguinis quantitatem excessivam imminuere, quam venæ sectione, nisi periculum sit in mora.

XVI.

Causa morborum immediata plerumque est motus spirituum & humorum præternaturalis.

XVII.

Solum acidum & viscidum causam morborum proximam esse, sufficientibus rationum momentis adstrui nequit.

XVIII.

Omnes morborum motus febre & spasmo maxima ex parte continentur.

XIX.

Omnes motus morbofi in bonum instituuntur finem.

XX.

Febres & spasmi non tantum ab acrimonia sanguinis, verum potissimum a sanguinis stasi & motu ejus impedito nascuntur.

XXI.

Omnis hæmorrhagia pro fundamento habet im-

peditum sanguinis motum.

XXII.

Remedia, quæ mensium & hæmorrhoidum obstructionem sanant, uti sunt temperata volatilia, martialia, extracta amara, salina, nitrosa, illa etiam præservant à nimis hæmorrhagiis.

XXIII.

Decem ad summum remedia apta sunt omnis generis morbos internos tutò & feliciter propulsare.

XXIV.

Nullum datur remedium, quod solum aptum sit morbum certum sanare.

XXV.

Applicatio remediorum ratione doseos, temporis, ordinis, continuationis, genuinum est & esse debet arcanum Medicorum.

XXVI.

Medicamenta Galenica plus valent in morbis acutis, chymica in chronicis.

XXVII.

Qui probe scit motus instituere & illos sedare, ille optimus est Medicus.

XXVIII.

Medicus plus circa motus quam correctionem materiæ operari debet.

DISSERTATIO MEDICA

EXHIBENS

LEGES NATURÆ

IN CORPORUM PRODUCTIONE

ET CONSERVATIONE.

Primum edita Anno 1707.

I.



UM viderim, Theologos in componendis controversiis provocare ad legem divinam S. Codice contentam; Ictos vero ad jura, placitis, & patetis gentium & civium introducta: equidem optavi semper, ut & Medici corpore quodam legali, cui actiones suas inprimisque curationem ægrorum conformare possent, instructi essent. Hi quidem librum naturæ possident, in quo Deus rationem actionum illarum, quæ tum in hoc universo mundo, tum in nostro corpore citra voluntatem nostram fiunt, quarumque directio, & cura ad Medicos pertinet, expressit: ceterum, quamvis liber iste omnium pateat oculis, dolendum tamen, quod plurimos genuinus ejusdem sensus lateat. Hinc in expandendo hoc volumine, loco legum certarum, plerique hypotheses tantummodo fallaces rerum naturalium tradunt, quæ non ductum naturæ, sed assumpta principia respiciunt. Unde in illorum systematibus Physicis non invenias detectum processum naturæ, quo in suis operationibus utitur; sed potius

figmenta principiorum, & inextricabiles de iisdem disceptationes. Quodsi in causam hujus propositi inquiras, vix reperias aliam, quam eorum in hoc studio ineptiam, qua, neglecto præcipuo rerum naturalium cognoscendarum principio, puta experientia, rationi tantum indulgent. Hinc ampliorem discurrendi campum attingunt, ubi de principiis sermo est, quam ubi de specialibus corporum naturalium operationibus loquendum. Verum ratio, quo vagatur longius, eo semper magis a scopo recedit proposito, & a via veritatis, cui nos insistere divina jubet sapientia, ut cum BOISSARDO [*Theatr. vit. hum.*] loquar. Enimvero præstat, si missis, aut obiter saltem præpositis rerum naturalium principiis, potius earum operationes perscrutemur. Certum enim est, res ipsas nos ignorare, & modos tantum rerum scire, hoc est, ea, quæ accidunt rebus naturalibus, nobis esse cognita; in ipsam vero rerum essentiam, quæ æterna est, nunquam nos penetrare, ut D. G. MORHOFIUS philosophatur. Et quamvis illarum constitutio ex mechanica; sive proportionata constructione fluat; longe tamen subtilior hic mechanismus est, quam ut sensibus nostris percipi possit, multumque differt ab illo rudi, quem Mechanici ma-

ci manuales tractant, cujus fundamenta ex mechanismo animalium sumpserunt. Hic enim tractilium, & solidorum crassiorum, seu continuorum, ille fluidorum, seu contiguum est. Utut ergo de prior e egregiæ virorum doctissimorum demonstrationes prostant: non tamen pari successu in posterioris rationem pervenire potuerunt. Neque mirum, quod ejus demonstratio tantum laboris Physicis afferat, cum secretarum in fluidis operationum evolutio & cognitio maxime sit abscondita, atque involuta, quæ sola tamen maximum Medico & Chymico emolumentum suppeditaret. Sufficit enim his legem, & processum naturæ nosse, eumque cum in præparatione medicamentorum, tum in eorum applicatione ad corpus humanum imitari, licet nullam aliam imitationis suæ causam possint reddere, quam ut effectum allegent contrarium, si alio, & contrario modo processissent. Quæ methodus est Mechanicorum manuariorum, qua de causis laborum suorum nos edocent. Equidem Icti, applicantes actionem quandam ad legem, inquirere necesse habent in causam, & rationem legis, cui adversatur actio, ut videant mentem legislatoris, & num ea difformis sit intentioni rei, observent: hæc tamen ipsa demonstrandi ratio, a priori dicta, non locum obtinet in Physicis. Res enim naturales, seu potius processus, & leges naturæ, nullam aliam demonstrationem admittunt, quam quæ ab effectu, seu a posteriori procedit.

II.

Ego autem, ut propius ad propositum accedam, dixi, me expandere velle leges naturæ: ubi præmonendum duco, me voce legis non intelligere talia præcepta, quibus ad præstandas, vel omittendas certas actiones obligamur: sed indigitare processum & viam, quam natura in suis operationibus elegit, & huc usque inde a condito orbe non interrupto ordine relegit, qui ordo diuturnitate temporis, seu consuetudine, uti in civilibus moris est, vim legis quasi obtinuit. Veruntamen tantum abest, ut naturæ Opificem, Deum, illi ordini adstringamus, ut potius ab ipso positum & sancitum affirmemus. Non vero animus est nobis in omnes naturæ operationes inquirere: non enim sollicitus ero de legibus motus animalium, quas Viri Cl. firmis demonstrationibus explicarunt: neque perceptionis, & modi afficiendi corpora fundamentum eruam, unde animal varia pathemata, variosque gestus, & homo, accedente informatione, voces distinctas, quibus ea, quæ percepit, distincte aliis proponit percipienda, edit: sed illam tantum rerum naturalium affectionem pervestigabo, qua *oriri*, & *interire*, seu *generari*, & *perire* dicuntur, quæ sui incrementum, seu decrementum capiunt. Hæc enim Medico ostendit media conservandi, & ab interitu vindicandi quaslibet corporis nostri partes, pariter ac modum parandi remedia, quibus opus, præscribit.

III.

Jam in constitutione, seu generatione corporis, duo considerata veniunt, nempe constituens corporis, & modus constitutionis. Prius est materia variæ indolis, cujus species, & differentias, gradibus distinctas, determinare non ausim. Recensent quidem Physici varii generis materiam, ex qua tanquam ex principio, corpora naturalia composita fuerint, & in quæ resolvi possint: sed, quod ad primam eorum productionem attinet, erudimur ex sacris literis, Deum non tali modo processisse, ut componendo corpora ad se invicem rerum species

produxerit; sed ex nihilo omnia, prout jam in vigore sunt, prodire voluisse. Quæ vero de resolutione corporum in ultima sua principia quidam jactitant, ea paucorum consequuntur fidem. Quicquid enim nobis ostendunt, illud non simplex, & homogeneous: sed maxime compositum esse, omnes producti illius, quod obtrudunt, affectiones ostendunt. Nam si principia chymica Paracelsi non de solo lapidem Philosophorum præparandi mysterio intelligenda; sed ad omnium corporum naturalium alterationes, ignis, ejusdemque sive actualis, sive potentialis ope instituendas, extendenda sunt: illud quod ope resolutionis hujus remanet, & salis nomine venit, præter sal variæ indolis, terram, & mucilaginem; quod autem avolat, seu in sublime attollitur, & mercurius nuncupatur, præter humidum, sal volatile, & ramenta oleosa continet. Horum tandem vinculum pingue, vel unctuosum, sulphur dictum, quod ignem alit, & eo immisso consumitur, variæ quoque, ut ex corporibus patet compositis, est naturæ. Non video ergo, quid obftet, quo minus asseram, tot, quot videmus corpora, seu potius partes corporum consistentia discrepantes, dari materias, cum non unum ex alio, sed singula seorsim a DEO sint creata. Habent siquidem particulæ figuras, seu formas suas originarias, quas nunquam deponunt, etsi nonnunquam occultent. Licet enim Deus tantam corporum copiam non creaverit, quanta hodie reperitur: secus enim verbum benedicti: Crescite, & multiplicamini, vim atque effectum suum non expleret: tamen certum est, quod tota telluris, in qua corpora crescere, & multiplicari cernimus, non augeatur moles, adeoque novis constituendis impendatur. Quodsi enim, multiplicatis corporum naturalium speciebus, terræ, cui insunt, pondus augetur, verendum esset, ne ista reliquis, quæ circumstant, sideribus præponderet, adeoque motus æterni leges violentur. Unde error illorum patescit, qui sibi imaginantur, quod influxus siderum non solum alterando, sed quoque substantiam suam communicando, in his inferioribus operetur: quod ipsum assertum uti æquilibrationem mundi tollit, ita sufficienter ex iis, quæ dicta sunt, dilui potest. Vere ergo HIPPOCRATES (L. I. de Dieta) dixit: *Nullum corpus perit, neque fit, quod prius non erat; verum permixta, & discreta alterantur. Homines autem putant, hoc quidem ex orco in lucem autum generari; illud vero ex luce in orcum imminutum perire, ac corrumpi.* Quicquid enim videmus oriri, id non nova creatione factum est; sed remotione aliorum corporum, quibus obvolutum delituerat, in conspectum venit. Unde & terra non ubique singulis producendis apta est. Nam, ut VIRGILIUS canit,

Hic segetes, illic veniunt felicius uvæ.

Sicuti itaque sufficiens particularum, quæ in alimentum & nutritionem corporis cedunt, affluxus, & apparatus, ad molem corporis augendam facit: ita illarum defectus diminutionis, & ruinæ corporis causa est. Hinc non mirandum, quod si alimentum inter plurima corpora distribuendum est, genuina ejus segmina parcius conspiciantur: quod ipsum longævæ corporis durationi obstat. Inde vix erraverim, si causam sterilitatis, & vitæ brevioris animalium nimiam partium extenuationem dixerim, & quod plures inconvenientes admixtas habeant particulas. Unde ex illarum mixtione tot novi morbi oriuntur, quorum typos nulla superior cognovit ætas.

IV.

IV.

Circa materiam corporum illud Veterum diſcrimen probe attendendum, quo diſtinxerunt eam in atomos, & ſemina, quorum illas CL. JO. CHRIS- TOPH. STURMIUS materiam inorganicam, hæc vero organicam appellat. De priori ſpecie hoc loco potiffimum erimus ſolicitæ, quandoquidem illa in primis facit ad corporum conſtitutionem, quam hic explanare decrevimus. Sed cum tamen doctrina de generatione ſeminum, quæ in animalibus nomen ovorum habent, ea, quæ jam de mole dixi materiæ, quodammodo illuſtret, pauca & de eadem proponam.

V.

Duæ vero ſunt præcipuæ opiniones de ovorum in animalibus generatione, quæ ceteroquin non minus de vegetabilibus ſunt intelligendæ. Alii autem involutionem ovulorum ſtatuunt, &, progrediendo ad involucrum primum, totum genus humanum in Evæ ovario latuiſſe dicunt, ex quo nova hominum progenies, ceu dentes ex alveolis, cornua, & ungues ex tuberculis ſeu bulbis cranii & tendinum, & pedes cancrorum ex acetabulis, imo, ceu germen ex germine, emerſerit. Quam ſententiam, tametſi alii omni rationi contrariam pronunciant, &, collata inter ſe multitudine partium corporis noſtri, atque anguſto, quod ovulum deſcribit, ſpatio, riſu explodunt: non tamen, ut pro impoſſibili habeam, egomet facile adducor. Nam ſicut intellectui meo non patet terminus, quando corpus aliquod eſt augendum, ſed augmentatio hæc in indefinitum extendi poteſt: ita ejuſdem diminutio in infinitum poteſt contrahi, æque ac ratio multiplicando res in infinitum auget, & e contrario dividendo in infinitum minuit. Nec ex vano, opinor, dixerim, hanc doctrinam dogma fidei de reſurrectione rationi noſtræ quodammodo perſpicuum reddere. Cum enim moles telluris non augeatur, uti antea demonſtravimus, ſed in generatione rerum materia ſaltem permutetur, ita, ut etiam nutritio animalis, ob tranſpirationem perennem, continua dicatur generatio atque mors: homo ſane reſurgens non poſſet cum Jobo carnem ſuam propriam vocare, niſi a tota mole corporea aliquid ſupereſſet, quod alia corpora non fuiſſet ingreſſum, quod ipſum in ovulo præexiſſe probabile eſt. Nec eſt, ut riſu excipias exilitatem corporum noſtrorum, quæ hinc ſequeretur. Nam, quod & hæc exigua noſtri portio clarificando corpori noſtro ſuffectura ſit, pio motu ſum perſuaſus. Quam in ſententiam conf. D. BERN. CONNOR, in Evangelio Medici.

VI.

Altera ſententia ingenioſiſſimi Philoſophi, BE- CHERI eſt, quam *Phyſic. ſubterr. L. I. Sect. IV. Cap. IV.* exhibet, & quæ in HIPPOCRATIS, ſummi Phyſici, judicio fundatur. Hic enim *Libro de Aëre, Aquis & Locis* dicit, *Semen genitale procedere ab omnibus corporis membris.* Hæc itaque leg- menta, & atomi omnium corporis noſtri partium in ovis quidem intœcundis conſuſe jacent; acceden- te vero genitura viri, lymphæ, cui immerſæ ſunt, rareſcit, & atomus quælibet ob gravitatem deter- minatam certum locum occupat. Interca vero, dum nondum firmiter cohærent, atque compactæ ſunt partes embryonis, levi cauſa, & ſola imagi- natione matris facile poſſunt deturbari, ut inde de- ſectus partium aut monſtroſum aliquid exſurgat.

VII.

Sed ſufficiat hæc breviter monuiſſe de initio pro- ductionis corporum animalium atque vegetabilium, id eſt, de generatione ovulorum & ſeminum. Nec enim ex inſtituto de hoc argumento agere conſtitui. Agam vero pluribus de materiæ ſenſualis impræ- gnatæ corporum augmentatione, quam vulgo ex- tenſionem appellant. Hæc autem extenſio duplicis eſt generis, alia nempe nutritionis, quæ animalibus; alia vegetationis, quæ vegetabilibus competit. Utraque tamen eadem ratione, quo mineralium generatio, nempe accretione atomorum procedit, æque ac mors & interitus priorum nihil aliud eſt quam partium reſolutio. Et hic eſt modus conſti- tutionis corporum, idemque alterum, & prima- rium tractationis noſtræ membrum, qui modus non ſolum ab HIPPOCRATE, *Libro de Dieta*, traditur, ubi *commiſceri* idem eſt, ac *generari*, & *discerni* idem, ac *perire*; ſed ab omnibus quoque antiquis Philoſophis, qui quidem de cauſis mutationum, generationum, & corruptionum phyſicarum com- mentati ſunt, unanimi ſententia fuit obſervatus. Horumque primus memoratur MOCHUS Phœnicus, quem ante Trojæ excidium, adeoque ante ipſum Hippocratem, floruiſſe reſerunt Hiſtorici. Is enim hanc de generatione, & corruptione habuit ſenten- tiam: *Corpora naturalia gigni atomorum, ſeu corpuf- culorum inſectilium ovulatione; interire earundem dia- piratione; variari earundem diverſa diſpoſitione, atque ordine.* Quemadmodum enim ex viginti quatuor literis, varie coeuntibus, omnis dictionum varietas exiſtit: ita ex hiſce atomis in rebus naturalibus om- nem oriri mutationem arbitratus eſt, referente JO. SCHARFFIO, *Phyſ. Recogn.* Mochum ſecuti ſunt LEUCIPPUS, DEMOCRITUS, EPICURUS, LUCRETIUS, ANAXAGORAS, aliique, & inter Recentiores ex parte PETRUS GASSENDUS, qui in *Phyſica* ſua vi- deatur.

VIII.

Unio ergo unius generis particularum corpus fa- cit apparere; illarum vero ſejunctio diſparationis ejus cauſa eſt. Quoties enim materia quædam interven- tu alius ſejuncta reperitur, toties ſenſuum noſtro- rum judicium fugit, qui non, niſi de congeſtis, & mole conſpicuis judicant. Sic in herbis ex ſapo- re non percipimus ſal, quod, combuſtis, & igne diſſipatis compedibus, quæ illud diſtraxerant, ex iis elicitur. Nec radii, dehifcentes a corporibus, & per aëra protenſi, conſpiciuntur, niſi interventu diaphani craſſioris iterum colligantur.

IX.

Cauſa unitiois, & cohæſionis particularum eſt homogœnea, & æqua earundem quoad molem, & ſuperficiem conſtitutio, qua ſui juris factæ, & flui- do rarefacto innatantes, ſedato rarefactionis motu, coeunt, & invicem arcte combinantur, atque in hoc nexu, accedente aëre, extrinſecus comprimen- te, tam diu conſervantur, donec vi nova diriman- tur. Videmus hoc in pulveribus variæ craſſitiei, aquæ immerſis, quæ, moto vaſe, aquam continen- te, primum conſuſe circumgyrantur, ceſſante vero hac motione, eo ordine ſubſidunt, ut craſſiores fundum petant, reliquis juxta gradum molis ſuæ hiſ ſuperſtratis, quam cribrationem vocat philoſo- phicam ROBERTUS BOYLE, *de Utilit. Phil. Expe- rim.* Eodem modo dum agricolæ, grana frumen- ti a paleis ſeparantes, illa hiſ permixta ventilabro projiciunt, ſingula hujus mixti genera conjungun- tur, & pro ſua gravitate loca, diverſis intervallis a diſper-

dispergente protensa occupant. Ex quibus patet, quod similitudo corporum sola causa sit conjunctionis intimioris, cujus ratio non in sympathia quadam, & amore mutuo, quo ad se invicem rapiantur, sed tantum in gravitate eorum quærenda. Propter hanc simile petit simile, nullo instinctu alio, quam vi ponderis sui impulsu. Necesse enim est, ut, si varii generis, seu diversæ molis corpora mota aliquo tendant, singula pro varietate molis suæ citius, vel tardius eo, quo vergunt, veniant. Idcirco ejusdem molis particulæ, idem temporis spatium cursu suo absolventes, locum eundem occupant, dum desinunt moveri.

X.

Deinde ad hanc unionem plurimum confert aer circumstans, & particulas probe coherentes coercens, qui e fissuris corporis, ope fluidi illius, cui immerse erant particulæ, exclusus, totius compagis contextum premit, & ne dehiscant, & corruant, præservat. Patet hoc in conjunctione duorum planorum, acriter combinatorum, quod in marmoribus demonstravit BOYLE: &, intercedente medio, nempe mercurio vivo, applicationem folii metallici ad vitrum, in conficiendis speculis fieri videmus. Hoc quippe fluidum terreum, folio metallico superfusum, aerem excludit, dum artifex vitrum apte protrudendo submitit.

XI.

Hæ fuerunt causæ constitutionis, seu generationis corporum; corruptionis vero sunt fluida varia, quæ contextum corporis, poros ejus subeundo, divellunt. Duplici vero modo agunt in corpora. Vel enim laxant compagem ejus, atque illud constituentia successive, citra illorum dissipationem, dirimunt, id quod potissimum ab aqua fit: vel vi & impetu quasdam discerpunt particulas, easque protrudendo ruinam corporibus pariunt, id quod ab igne fieri observamus, sive sit actualis, & luculentus, sive potentialis, per salia, aqua soluta, acquisitus, cujus ignis tamen vis multo sedatior & mitior existit.

XII.

Eadem tamen fluida sunt quoque media, quibus connexio, & conjunctio particularum perficitur, & commodum præbent vehiculum, quo partes ad constitutionem corporis requisitæ deferuntur: hoc tantum observato discrimine, quod pabulum producendorum corporum, in his sufficienti copia latens, exuperet tum vim moventem fluidum, tum heterogeneas, & coitionem renuentes particulas. Ipsum enim fluidum etsi vacuum est omni heterogeneitate, si continue moveatur: accessum tamen partium homogenearum ad se invicem impedit, uti observamus in crystallisatione salium, quæ non procedit, nisi solutio quieti reponatur.

XIII.

Sed exponenda jam venit vis illa movens fluidum, quæ medium hoc unionis, & resolutionis dirigit, vel saltem in fluore conservat. Hanc vim licet diversam primo intuitu concipiamus, unam tamen, eandemque semper esse, & diversas tantum facies a mediis diversis, effectum ejus adjuvantibus, vel retardantibus, induere observamus. Est vero calor, quem ignem naturæ Veteres, Recentiores vero ætherem rarefactum appellant. Hic aquam dimovet, & diluit, ne frigore concreascit, eique calefactæ diversos caloris gradus communicat: idemque, rarefaciendo aerem crassum, pressum ejus a

corporum lateribus submovet, & arcet; ipse vero, propter obstantes diversas corporis resolvendi, vel additi adjuvantis, materias, modo penetrat, modo supprimitur: unde confusus particularum motus subsequitur. In hoc ipso vero motu, & lucta, illæ, quæ reliquas numero superant, coeunt, atque conjunguntur.

XIV.

Calor hic a sole est, qui, rarefaciendo ætherem, corpora omnia, quæ quidem permeat, calefacit, pervadendoque in fluorem redigit, minima eorundem, a se invicem secedentia, continuo agitando. Quemadmodum igitur æther interpositione aeris crassioris varie densari, adeoque calor temperari potest: sic idem conjunctione corporum nonnullorum intenditur, atque augetur. Sunt autem illa, quæ arctiorem contextum habent, & unctuositate sua nulli alii, quam ætheri, aditum permittunt. Hac enim viscositate æther in transitu rectilineo detinetur, & varie cursum suum flectendo augetur. Unde corpora viscosa commodissimum flammæ alendæ pabulum præbent. Hoc vero præstant sulphura, bitumina, resinæ, olea, pinguedines, & quicquid inflammatur. Quæ licet & alia admixta habeant: omnia tamen in unctuositate hac, & tenacitate conveniunt. Ætheream illorum originem, seu complexum, probat elatus, quem in mixtione cum fluidis occupant, locus. Unde illa corpore tenuissimo, minimoque ponderi obnoxio referta esse, patet. Et quamvis inflammabilia mineralia, aquis injecta, subsident, ob nimiam partium terrearum, immo metallicarum, conjunctionem, & absorptionem: tamen in eo convenientiam cum his produnt, quod ope destillationis tota ferme, licet mutata forma, & sub specie salis acidi, phlegmate soluti, evehantur. Et licet spiritus hic acidus, ex iis impetratus, inflammari nequeat, non tamen caret vi urendi, quæ nonnunquam tanta est, ut cauteriorum actualium vicem possit supplere. Inde non immerito ætherem incorporatum sal acidum dixeris, quod eisdem effectus via humida peragit, quos flamma, aut inflammabilia via sicca præstant. Et licet aquæ inditum, illam per se non calefaciat, tamen additione salis acris, notabilem dimotionem, imo calorem ei inducit.

XV.

Atque in eo posita est ratio fermentorum, quibus motus corporum in fluido crassiori, seu massa pultacea adjuvatur, utpote quam duo hæc salia contraria ingrediuntur. Nimirum sal acidum est terra clarificata, seu diaphana, in aqua solubilis, ætherem detinens, atque concentrans: sal acre vero est eadem terra pellucida corporum variorum, quæ, priori ope fluidi aquei conjuncta, ejus contextum dirimit. Unde æther, priore inclusus, diffractis repagulis, totum fluidum, cui immersum utrumque sal est, pervadit, illudque varie impellendo movet. Hic motus, si plures terreæ resistentes particulæ fluido insunt, fermentatio: sin vero purius sit fluidum, effervescentia nuncupatur. Causa, cur agant isthæc salia in se invicem, non alia est, præterquam contactus mutuus, & intimus, ope aquæ inductus. Unde sal acidum dimittit, quicquid ætheris continebat. Sicuti enim sulphur aut pingua augent ætherem, eumque miscent aëri, dum vincula unctuosæ, quibus detinetur, dissipata humiditate, collabuntur, atque consumuntur: ita sal acidum auget, & infert ætherem aquæ, seu massæ pultaceæ, dum hujus contextus prius a sale acris fuit diremptus, quod conjunctione, seu coitione illorum ipsorum, uti jam dictum, contingit.

contingit. Requiritur vero tale menstruum, seu fluidum, ad destructionem, quale ad productionem erat necessarium: qui processus in omnibus naturæ operationibus observatur. Nimirum, si mixto soluto additur corpus novum, menstruo decente solutum, hoc miscetur homogeneis partibus, ceteris, priori innatantibus, ad fundum præcipitatis. Sic, quando lacti, quod nihil aliud est, quam oleum, seu pulpa aquæ mista, immittitur sal acidum, tunc sal acre, cujus beneficio pulpa intime aquæ unita erat, illud aggredditur, unde aqua illam sub specie grumorum dimittit. Simili modo pars oleosa attenuata spiritus vini ex vegetabilibus, aliisque extrahit quicquid inflammabile in iis reperitur: & dum victu implemus corpus, lymphæ ventriculi, saliva, & reliqui in canalem alimentorum effusi liquores, absorbent, & sibi adjungunt illud, quod suæ naturæ est, & ob proportionatam superficiem facile cohæret. Inde, si pravis humoribus corpus scatet, tales quoque particulas, e massa ciborum discerptas, sibi affociant, quæ alioquin cum fecibus alvinis præcipitati, & e corpore eliminati fuissent. Manifeste hoc videmus in generatione calculi in viis quas perluit lotium, aliisque corporis locis, in quibus lapidosa ejusmodi materia non concrevit, nisi prius crassius quoddam corpusculum paulo diutius fuerit retentum, quod sensim sensimque diversis crustis, seu involucris obducitur. Nec raro contingit, ut fermenta, ob vigorem fomitibus sui, puta humoris acido-acris, seu cujusdam luctatoris, quicquid novi succi affluit, subigant, & si non augmentum inde capiant, tamen omnem ejus vim eludant, illudque destruant. Quare sæpe tanta eorum acrimonia est, in primis in ulceribus narium, aliisque cancriosis, ut aquam regiam æmuletur, neque, nisi auro, saturari, & infringi possit.

XVI.

Ut igitur duorum generum fluida habemus: humidum & siccum: ita pariter duplex generationis ratio est, nempe humida, & sicca, sive, ut Chymici loquuntur, per viam humidam, & siccam. Prior modus placidus est, atque naturalis, quippe quem natura in plerisque suis operationibus adhibet: posterior magis violentus, & plurimis corporibus destructivus, dum gradus non observat, quibus natura in productione corporum adstricta est, sed faciendo saltus immutatione corporum momentanea, quasi vi quadam ex iisdem elicit, quod, sibi relicta, successive præbuisse. Prior modus instituitur in aqua, quæ, sive pura, sive vario salium genere armata est, menstrui nomen accepit a Chymicis: posterior fit igne actuali, seu flamma, aucto similiter motu ejus additione salium, quod in cæmentatione contingit. Communis vero utriusque modi finis est removere obstacula, quibus minima corporis desiderati detinentur, & non raro occultantur, quo, disjectis hisce, in lucem & conspectum protrahantur: quam productionem generationem dicimus. Removetur vero, dum, ut dixi, applicato medio fluido, in quo, adjuvante calore compagi corporis conformi, solvuntur, & vel menstruo junguntur, vel ab eo excluduntur, & præcipitantur, vel in auras disperguntur, & vase excepta sublimantur.

XVII.

Ut legis hujus naturæ veritas eo melius pateat, examinemus quædam artis, & naturæ producta, eorumque producendorum modum. Ita vero, omnia se tali modo habere, & ubique nihil, nisi permutationem partium esse, constabit. Sic, si desideramus sal volatile acre, sive siccum, sive phlegmate solutum, quo partes animalium, præcipue du-

Frid. Hoffmanni Oper. Supplem. II.

ræ, & vegetabilia quædam abundant, in quorum tamen oleis æque, ac animalium partibus mollioribus, & gelatinosis, nimis attenuatum est, illud e consortio reliquarum partium tribus modis excluditur, dum nempe vel putrefactioni exponimus mixtum, ubi a motu contrariorum, adjuvante ære externo, exhalat, foetore se prodens: vel uno impetu contextus immutatur igne, seu combustionem, unde elevatur atque sublimatur: vel tandem absorptione acidi, a quo facta fuerat attenuatio, ejusque præcipitatione sui juris evadit. Cumque olea cum acidis pari passu ambulent, hinc & ex illis idem sal volatile acre elicere eo modo contendunt Chymici, quamvis plerumque labore frustraneo, ob nimiam salium istorum in oleis attenuationem. Adhæc in tanta copia in iis reperiuntur, ut sua virtute superent involucra, quæ disjicienda, & immutanda erant: quo fit, ut eisdem effectus, quos acria pura edunt, producant. Atque his modis procedit sublimatio.

XVIII.

Inter producta præcipitationis occurrunt calcinata, & salia, quæ, igne consumptis eorum compedibus remanent, vel per se usui adhibenda, vel debito modo purificanda: id quod in productione salium requiritur. Nonnullis mixtis, quibus hic modus applicatur, additur absorbens, ut ab acido liberentur, siquidem producta ejus mere sunt alcalia. Videmus hoc in fusione regulorum metallicorum, & metallorum a se invicem separatione. Mineræ enim sunt terræ, scatentes succo acido, qui ramenta, quæ illæ continent, metallica discerpsit. Dum ergo terra hæc, quæ in antimonio sulphuris nomen induit, ab additis salibus, præcipue nitro, quod inter operandum fixatur, absorbetur, particulae metalli liberantur, & cessante motu ignis, terram illam in fluore conservantis, ex hac deturbantur, & conjunctim in fundum coni fusorii, vel vasis, in quod massa infunditur, delabuntur. Ex quo elucet, metalla alcalicæ esse naturæ, dum non modo eum, quem acria præstant, effectum in corporibus edunt, uti hoc paulo ante de auro demonstravimus; sed etiam easdem, quas acria, mutationes subeunt. Non enim tantum eadem via e consortio reliquorum extrahuntur, sed æque, ut illa, attenuari possunt; siquidem mercurius vivus nihil est aliud, quam metallum, ab acido subtili attenuatum, quod æqua cum oleis destillatis fortuna gaudet. Nam licet & in mercurio ab acido facta fuerit metalli, uti in oleo salis acris, solutio, cujus beneficio calore in sublime tollitur: tamen præponderat metallum solutum, quod non tam gravitas, quam effectus prodit, dum acidum æque, ac olea destillata, absorbet. Imo oleum vitrioli, spiritum vitrioli absorbens, hoc ipso indicat, quod nihil sit aliud, quam volumen ramentorum metallicorum, quibus minerale illud, ex quo summa ignis violentia expressum est, abundat. Et si cuti fidis observationibus constat, quod metalla, in primis aurum, ex siliceo vinearum fundo, ope succi vitis nutritii extracta, atque evecta, uvarum acinis se admiscuerint, imo in mineris instar vegetabilis efflorescentis reperiantur: ita ars eadem metalla crescere facit, velut Arbor Philosophica id ipsum demonstrat.

XIX.

Videamus jam tertium genus productorum artis a natura adjunctæ. Sunt illa, quæ fermentorum more augentur, & fluido innatant, ut extracta, tincturæ, essentia, & id genus alia. Atque hoc modo potissimum incrementum capere videmus acida, & iis convenientia oleosa, seu inflammabilia, quibus

F

bus

bus addenda sunt viscosa, & quæ facile sibi cohærent, licet maxime mista sint, & ex plurium generum partibus constent, ut sunt pulpa vegetabilium, gelatina animalium, concreta lapidosa, & alia, quorum augendi modum supra ostendimus. Ut hæc coire possint, requiritur blandus fluidi illius, beneficio cujus particulæ conjungendorum deferuntur, motus, qui calore inducitur, sive extrinsecus, sive intrinsecus per fermenta foveatur. Immo, etiam solo externo, & mechanico, seu manuali motu conjunctionem fieri, in confectione butyri videamus, licet.

XX.

Ultimus hic corporum producendorum modus observatur non tantum in concretione, sed præterea etiam in nutritione, & augmentatione vegetabilium, atque animalium, prioribus tamen modis non penitus exclusis, præcipue, ubi alimonia in primis, quod dicitur, viis præparanda est. Quam augmentationem licet supra in explicatione fermentorum quodammodo exposuerimus: tamen hic paulo fusius describemus. Cum primis autem hic requiritur sufficiens alimenti apparatus, in animalibus quidem satis conspicuus, utpote quæ ejus defectum non diu absque interitu sui ipsorum tolerare possunt. Sed, si vegetabilia respiciamus, mirari subit, unde tantum incrementum accedat, cum exempli causa, quercus annosa tantæ proceritatis, & molis sit, nec tamen ullum terræ, cui insita est, decrementum sentiat: nisi quod illam plurimum nutrimenti ex atmosphæra, quam Panspermiam Veteres nuncuparunt, capere probabile videatur, quæ cum rore deciduo ad radices ejus defertur. Maxime, cum videamus semina frumentorum, terræ commissa, tanta ubertate fœnus non deponere, nisi ager emaciatum certis annorum intervallis fimo fuerit fœcundatus, qui ramenta straminea, excrementis animalium macerata, & discerpta, germinanti plantæ majori copia communicat, ut hæc caulem spissiore alere, pluraque grana protrudere queat. An vero tota planta concisa, & ab admixtis inconvenientibus depurata, & deinde decenti caloris gradu fota, iterum absque seminio, solo artis beneficio, (quod præcipue in separatione principiorum ejus, seu partium genuinarum ab alienis, earundemque conjunctione consistere dicunt) possit produci, in ea quidem re, experientia destitutus, nolim certi quicquam definire. Equidem non repugnat palingenesia hæc legi, & ordini naturæ, quem in generatione seminiorum observat, uti ex BECHERO supra tradidimus. Eundem productionis processum invenimus etiam protensum ad genus animalium, dum similia de generatione anguillarum, cancrorum, & vel maxime insectorum legimus. Quin & nonnullorum curiositas dicam, an vesania, eo processit, ut ipsum hominem hoc modo renovari, vitamque ejus, denuo repetendam, prolongari posse, sibi fuerint imaginati. Ceterum hæc dubiam redderent Physicis hodiernis eam, quam de generatione æquivoca alunt, sententiam, in primis si per eam talem tantum intelligant, ubi deficit seminium. Sed, utut in eo quidem veteres falsi sint, si putarunt nihil de nova insectorum progenie, quod ejus naturæ fuerit, præexistisse, cum omnia ferme terræ spatia inconspicuis insectorum seminibus conspurcata, non addam, atomis ipsorum, post mortem residuis, referta sint, unde illa facile udo solis calore excitari, hæc vero coire possunt: attamen conatus eorum laudandus, dum interiora rerum rimari, quam circa corticem, & testam versari, & de ea inventa lætari, consultius duxerunt.

Verumenimvero revertamur, unde nonnihil digressi sumus, ad nutritionem vegetabilium, atque animalium, quæ, uti sæpius dictum, fermentorum more, nempe appositione partium, absolvitur. Ovulum nimirum, seu seminium, quod est volumen particularum, a corpore deciduarum, vesiculis intrusum, vel ab aere externo ambiente crusta obductum, concludit omnem corporis constituendi apparatus, qui tamen nec justo ordine est locatus, nec ob admixtam lympham spissiore, vel pulpam commoveri aptus est: accedente vero calore, qui in vegetabilibus a sole, adjuvantibus salibus fimi; in animalibus a fermento masculi genitali, tenuissima quoque partium ramenta procul dubio continente, sustentatur, inducitur materiæ feminali motus partium. Exinde, ut supra monitum, quælibet suum locum occupat, & ex lymphâ, vel pulpa rarefacta, seu emollita, sibi nutrimentum decerpit, donec embryo, aut germen, ob molem, vel defectum alimonie, receptaculum frangat, & majoris mundi alumnus fiat. Apte vero collocari possunt, durante fermentatione, minima in ovulo, dum crusta externa obstat, quo minus impressionem aliis corporis moti recipere, indeque perturbari possint, quo propugnaculo postea opus non habet fœtus, ubi, adepto vigore, ipse sufficiens est alimento præparando, & admixtis huic incongruis subigendis. Potissimum vero duarum istarum naturæ specierum, nempe vegetabilium, & animalium, constituens est terra fibrosa, filorum instar villosa, quæ ab admixtis aliis varias induit figuras. Sic per se contorta ejusmodi filamenta constituunt nervos, & fibras alias; contexta præbent membranas, quæ convoluta efformant canales, & ductus; aquæ immersa, & subacta generant lympham, quæ si inspissata est, vocatur gelatina; sin partibus aliis crassis, & salinis, pinguiusque scatet, sanguis est. Gelatina vero, fibris intrusa, conficit carnem; crassioribus autem, & salinis mixta, atque humiditate privata, ossibus formandis inservit. Ceterum hujus terræ fibrosæ minima ramenta, humore imbuta, ætheris transitum retardant. Proinde ob anfractuosos meatus iste implicatur, & ramenta illa largiori, quam alia corpora, copia implet, constituitque olea, quæ, folliculis membranaceis inclusa, pinguedo dicuntur. Atque eodem modo partes vegetabilium molliores, & duræ, friabiles, & fissiles constructæ sunt, & illud saltem generale discrimen admittunt, quod crassioribus salibus, aliisque abundant, cum in animalibus, ob fortiores resolutiones, & attenuationes, ista cum reliqua substantia longe subtiliora, magisque subacta existant.

XXII.

Atque ita sufficienter, quoad quidem ejus fieri a nobis potuit, explicatam esse corporum productionem puto. Restat igitur modus conservandi corpora, quem natura arti concessit. Itaque conservantur corpora in esse suo iis, quibus constant particulis, ubi veterum canon obtinet: *Similia similibus conservantur*. Iisdem ergo defectus, si quis subest, suppletur. Quod si vero toti admixtum fuerit contrarium, ruinam minitans, tunc ii mutationum corporum modi in auxilium vocandi & adhibendi sunt, quibus illius, quod disconveniens, & noxæ est, exclusio perficiatur. Sunt illi dissipatio noxii in auras, & ejus præcipitatio, seu detrusio. Ne vero nimis generali tractatione, habito respectu ad singula naturæ regna, obscuri videamur, corpus tantummodo nostrum curandum contemplantur, solliciti non tam de morbis, quam morborum causis.

XXIII.

XXIII.

Primo itaque in corpore nostro occurrunt partes fluidæ, quæ & corruptioni magis sunt expositæ, & noxam ad solidas derivant. In his vero frequentissimum est acidum peccans, dum non modo liquida illa, quæ assumimus, singula, acorem contrahunt; sed & sanguis, fons omnium humorum; cum nihil aliud sit, quam chylus, hoc est, lac digestionem rubefactum, raro naturam suam deponit; verum lactis instar facile acefcit. Unde non per se tantum dolores varios in partibus nervosis excitat, & condensando sanguinem, vel lympham, ductus corporis nostri obstruit; sed & admixtum salibus heterogeneis scorbuticorum, & cacochymicorum, novis fermentis generandis ansam præbet, quæ, motum sanguinis vitalem subigendo, in legem sui motus abripiunt, quod in febribus continuis contingit: imo partes solidas invadunt, illasque vigore suo privant atque exulcerant, quæ ulcera, partem quandam in primis tenuem occupantia, totam sanguinis massam acribus particulis imbuunt, eamque & nimium attenuant, & solidarum partium consistentiam consumendo, earumque pabulum contendo, totum corpus extenuant, & tabescere faciunt. Itaque velut ultimorum horum symptomatum causa est humorum acrimonia: ita priorum faber est aciditas, quæ absorbentia in cura requirit. Cum tamen ea ipsa non unius sit generis, quandoquidem diversam deprehendimus in succo citri, berberum, ribium, diversam in aceto vini, hordei, tritici; diversam denique in spiritibus, acidis, & aquis stygiis: ideo diversa quoque ad illam destruendam remedia requiruntur. Sic in dysenteria tanta interdum canalem alimentorum occupavit acrimonia, ut non secus, ac mercurius sublimatus, crystallo montana vellet domari. Sed cum species acrimoniæ peccantis in corpore difficiles sint cognitu, propterea non immerito pulveres bezoardicos tot absorbentium species ingrediuntur, ut ex hac multitudine acidum sibi conveniens, vel contrarium eligere possit, in quod, elusis reliquis, agat. Nec inepte, ut quidam volunt, auri folia iis admiscuntur, quorum effectum in ulceribus, aquæ regię acrimoniam redolentibus, supra indicavimus. Attamen vim auri, quam nonnulli jactitant, universalem non percipimus, licet eam Medicum quendam, qui inter alia arcana aurum amalgamatum theriaca tincta fantalo, & in pilulas efformata, occultabat, venditasse haud ignoremus. Non tamen semper pura adhibita absorbentia voto Medici respondent, sed incitamento salino, aliove interdum opus habent, illo cumprimis tempore, ubi visciditas, & lymphæ stagnatio adest, quam sola diluentia dif-

fringere nequeunt. Porro nunc fixa magis, nunc volatilia eliguntur, si forte altius pertingere, atque cito ad extrema corporis pervenire debeant. Et, quod sigillatim ad salia volatilia attinet, illa, pro ratione subjectorum, modo simplicia, modo oleosa requiruntur.

XXIV.

E contrario, ubi nimia acrimonia obtundenda est, qua humores, ultra modum resoluti, & rarefacti, ebulliunt, atque liquecunt, tunc acida in auxilium vocanda sunt, eademque modo fortiora, modo debiliora, nonnunquam acribus saturata, quæ falsa vocant, non neglectis conglutinantibus ostracodermis. Hæc acida, amaris potissimum, seu terreo-salinis sociata, tonum fibrarum roborant, dum nimiam, quam imbiberunt, humiditatem, unde laxantur, absorbent, atque exsiccant. Atque horum medicamentorum omnium operandi ratio in eo consistit, ut mixta pravis humoribus corporis nostri hosce invertant, & noxium vel per insensibilem transpirationem, aut manifestum sudorem expellant: vel præcipitando cum reliquis fecibus deturbent.

XXV.

Qui vero partes solidas obsident morbi, hac eas ratione invadere, ac vigore suo privare solent. Nimirum sanguis, omnes partes perluens, in motu suo progrediente impeditus, idque vel a causa interna, tubulos obstruente; vel externa, illos comprimente, aut dilacerante, circa partem illam, ubi læsio facta, stagnat. Unde ab affluxu insequentis cutis elevatur, qui tumor, grumos sanguinis coagulati concludens, si per interna, & externa resolutione discuti nequeat, putrescit & exulceratur. Atque hoc ulcus si levius est, nec cum distorsione fibrarum, & ossium conquassatione conjunctum, facili negotio a sana parte abscindi potest: quam in rem per digestiva, uti vocantur, mucilaginosæ, perpirationem, & resolutionem concreti sanguinis impediencia, putredo carnis promovetur. Ipse enim sanguis, liberatus ab hac remora, resarcit carnem, non secus ac in vulneribus, & ossium fracturis, inducendo callum, separata conjungit, si modo obstacula, reunionem impediencia, removeantur, applicatis balsamicis, acorem corrigentibus, & impositis, quæ ærem arcent, munimentis. Quod si vero pessimæ jam recensitæ circumstantiæ corpus cacochymicum attingant, aut exulcerationis cura protrahatur, tunc fermentum putridum, aucto pabulo, proserpit, &, præter sphacelatas, vividas ac sanas corporis partes, non raro cum totius hominis inter-
necione, pervadit.



DISPUTATIO TRES DEMONSTRATIONES
 MATHEMATICO-PHYSICO-MEDICAS
 SISTENS, DE CALORIS, LUCIS ET FLAMMÆ
 NATURA ATQUE EFFECTIBUS IN RES CREATAS

Primum edita Anno 1694.

THESIS I.



UANDO corpus aliquod movetur, & in hoc motu in aliud corpus impingit, tunc illud vim suam amittit, huic eandem communicans.

THESIS II.

Quando corpus aliquod, e. g. pila, ab alio corpore movetur, tunc motus ipsius corporis non cum motore simul desinit, sed cessante motore externo adhuc movetur.

THESIS III.

Quo gravius corpus quoddam est, eo fortiolem etiam motum illius percipimus.

THESIS IV.

Omnia corpora graviora a motu leniori, sed tamen uniformi & continuo in principio quidem tardius moventur, sed quando ad motum perducta sunt, & vim istam lenem servant, tunc motus iste momentanee crescit & celerior fit.

THESIS V.

Quo gravius corpus quoddam est, eo difficilius etiam movetur. Quando vero semel motum, tunc

multo vehementior iste motus est, ac si corpora hæc subtiliora essent.

THESIS VI.

Quo subtilius corpus quoddam est, eo minus etiam sensibus nostris externis percipitur, & alia grossiora movere potest.

THESIS VII.

Gravius corpus in leviori fluido descendit.

THESIS VIII.

Levius corpus in graviori fluido ascendit.

THESIS IX.

Corpus globosum vacuum internæ vi minime resistit inter omnia corpora.

THESIS X.

Aer a calore expansus majus spatium requirit.

THESIS XI.

Inter omnia corpora ad motum ineptissima sunt ea, quæ valde longa sunt, & minimam crassitiem habent.

THESIS XII.

Quando corpus aliquod in circulum movetur, tunc a centro motus sui recedit, nisi ipsum motus centrum etiam gravitatis centrum sit.

C O N S E C T A R I A.

1. Quo magis particulæ grossiores, acres, vasa sanguifera constringentes, in sanguine fluctuant, eo majorem percipimus calorem internum.

2. Quo magis bullulosa est saliva, eo etiam melior fermentatio fit, si modo quantitas istius justa sit.

3. Panis iste optimus, qui poros habet æquales, nec tenax est.

4. Quo magis particulæ oleosæ volatiles in sanguine fluctuant, eo alacriores fumus.

5. Sanguis nimis fluidus, nimis etiam crassus peccare potest.

6. In spiritibus animalibus multæ sunt particulæ oleosæ volatiles.

7. Cum semine spiritus animales ejiciuntur, & a nimia feminis ejectione vires debilitantur.

8. Calor corpora, quibus inest, extendit, frigus vero ea comprimit.

9. Ignis non est verus corporum analysta, sed potius eorum destructor.

10. Quando aqua per frigus in glaciem mutatur, & sic expanditur, causa expansionis non a frigore, sed a calore est petenda.

11. Si chymicus in physicis non optime versatus, non mirum est, quando uno processu viginti diversi effectus producantur.

12. Qui pituita laborant, obnoxii sunt flatibus, doloribus colicis, arthriticis, melancholia, obstructionibus vasorum lymphaticorum & nervorum.

13. Sanguinis stagnationes quo profundiora loca occupant, eo periculosiores sunt.

14. A frigore nimis & ligamentis gangræna facile oritur.

15. Calor nimius compescitur partim particulis rigidis, motui circulari maxime resistentibus, e. g. nitrosis; partim etiam sudoriferis, diureticis, diluentibus, & pauca venæsectione.

16. Flatus curantur discutientibus, carminativis, nervinis, evacuantibus, & diluentibus.

17. Omnia metalla volatilifata figi possunt.

18. In calcinatione, ubi scopus operatoris ad evaporationem est directus sulphuris, attendendum, ut in principio lenis sit calcinatio, alias nunquam procedit.

19. Calcis vivæ caloris causa ab aqua exsurgentis neque ab acido, neque ab alkali est petenda, sed a modificatione corporum ab igne destructorum.

20. In calcinatione salium fixorum operator pro lubitu salia ista præparare potest, ita ut una vice salia hæc ex diversis simplicibus præparata eundem effectum præstent, altera vero vice specificas habeant operationes.

21. Quodcunque corpus calidum & candens levius est frigido.

22. Quodcunque corpus candens majus est frigido.

23. Salia omnia ignis vim augent.

24. Omnia corpora sublimari possunt.

A. Ω.

Quando altius paulo productionem hujus universi intuemur, non possumus sine sancto honore magnalia Dei in omnibus ejus operibus admirari. Ex hac enim cognoscimus ipsum *Numen Divinum*, quod est incorporeum, incomprehensibile, infinitum, omnipræfens, æternum, sapientissimum; quod per omnipotentiam suam non solum quicquid rerum est ex nihilo produxit, sed etiam omnia ac singula impulsu suo, quem motum appellamus, adhuc hodie conservat & dirigit. Per hunc autem motum etiam hominis animo diversæ imprimuntur imagines. Sine motu enim homo nullas ideas sibi imprimere, nec ullum rei alicujus conceptum formare potest.

Primum, quod homo in creaturis vidit, est, quod Creator seu Deus produxerit ens aliquod activum agens, in passivo, prout ipsius voluntati placet.

Exinde formo hæc Axiomata.

AXIOMA I.

Motus omnium rerum dependet a voluntate Dei, qui omni materiæ determinatum & specificum imprefit motum.

AXIOMA II.

Omnes res, quæ hoc vel illo modo per sensus nostros externos percipiuntur, sunt vel ipsæ diversæ, sive medium aut organon, per quod entia illa percipimus, diversæ sunt constitutionis.

AXIOMA III.

Omnia corpora, quæ aliud corpus movent, etiam ipsa moventur.

AXIOMA IV.

Nihil sensus nostri externi percipiunt, nisi corporeum.

DEMONSTRATIO MATHEMATICO-PHYSICA PRIMA DE CALORE.

OBSERVATIO I.

Percipimus, quod ignis culinaris particulas ligni moveat, ideo ex axioma tertio sequitur, quod id, quod ignem vocamus, moveatur.

CONCLUSIO I.

Ignis naturam percipimus per motum.

OBSERVATIO II.

Percipimus etiam, quod hæ duæ oppositæ qualitates, quas calorem & frigus nuncupamus, menti nostræ diversas imprimant ideas, quamvis videatur, nos distinctas has ideas eodem modo percipere: E. g. Si quis aperto ore halitum leniter emit in manum suam, percipit, aërem istum emissum esse calidum; e contra, si constricto & angusto ore aërem efflat, frigiditatem percipiet.

Ex hoc experimento, addito simul axioma secundo sequitur hæc

CONCLUSIO II.

Quia diversas habemus perceptiones, etiam res ipsa diversa erit.

CONSECTARIUM.

Vidimus in præcedenti observatione, quod aër in manum efflatus idem fuerit; medium quoque & organon in his diversis perceptionibus etiam eadem erant, aër nempe, & manus; igitur necesse est, has duas sensationes non esse ortas ex diversa magnitudine corporum, nec ex diversa corporum figura, neque ex quiete vel motu solum; quare aliter esse non potest, quin hæ diversæ perceptiones vel a celeritate, vel a tarditate, vel a via seu linea motus dependant.

Frid. Hoffmanni Oper. Supplem. II.

OBSERVATIO III.

Sentimus autem, quando constricto ore celeriter aërem efflamus, frigiditatem; sentimus etiam in lapide quiescente frigiditatem; inde fluit

CONCLUSIO III.

Neque in quiete, neque tarditate, neque celeritate motus calor consistit.

Tandem nihil restat, quam via seu linea motus; & hoc certissimum est, quod quando corpus movetur, per hunc motum hanc vel illam viam format; etiam sine dubio verum est, quod unaquæque via certam quandam lineam describat. Sed in natura non dantur aliæ lineæ simplices, quam rectæ & circulares, igitur necesse est (quia sunt duo opposita extrema) ut calor consistat in motu secundum unam harum linearum; sed videmus, halitum constricto ore emissum in recta linea procedere, & aperto ore in rotunda; hinc iterum fluit

CONCLUSIO IV.

CALOREM PERCIPIMUS PER MOTUM CORPUSCULORUM IN LINEA ROTUNDA.

Ex hoc novum fluit consectarium: Motus corpusculorum quo magis ad circulum accedit, eo majorem efficit calorem.

OBSERVATIO IV.

Oculis nostris videmus, quando lignum quoddam resinofum (vulg. *Lindholtz*:) filo quodam annectimus, & mediante hoc filo in gyrum seu circulum agitamus, quo celerior est agitatio, eò citius lignum istud calefieri, & fumum edere. Fornarii etiam hoc docere possunt, quando lignum mollius tornant, & huic ligno tornato durius lignum

applicant, quo celerius illud tornant, eo citius lignum molle colore nigro tingitur, & fumum vehementiorem emittit. In hac observatione sequens fundata est

CONCLUSIO V.

Quo celerior est motus corporum circularis, eo vehementior est calor.

DEMONSTRATIO MECHANICO-PHYSICA

SECUNDA DE MODIFICATIONE ILLA, PER QUAM PERCIPIMUS LUCEM.

IN quo lucis natura consistat, supra humanum captum positum esse videtur. Quotidie lumen videmus; quotidie observamus, lucem esse ens maxime activum, sine qua si esset, nullius corporis calorem perciperemus, quamvis non sensibus essentiam lucis haurire possimus, ab effectu tamen cognoscimus, ex quibus corpusculis consistet. Qualia autem illa sint, & quem motum habeant, operæ pretium erit indagare.

OBSERVATIO V.

Sentimus differentiam inter lucem & tenebras esse, quamvis has duas perceptiones sæpius uno eodemque modo percipiamus; nam si pyriten quandam in chalybem impingimus, & quidem ita, ut motus fiat per angulum acutum, quamvis motus tardior sit, tunc in particulis a chalybe divulsis lumen percipimus. Contrarium vero effectum vidimus, quamvis etiam fortissime & celerrime pyrite chalybem per angulos rectos seu perpendiculariter tangimus. Lumen autem illud e chalybe elicatum statim iterum evanescit, simulac motus ille percussione acceptus in scintillis remittit. Ex hac observatione patet, quod lumen hoc ex intima corporum combinatione ortum non traxerit, quia in diversis perceptionibus materia corporum eadem erat. Porro videmus, quod neque medium, in quo hic motus fiebat, diversum sit, & iterum nihil contribuat ad diversas illas perceptiones. Videmus etiam, has diversas perceptiones oculis non esse adscribendas, quia in diversis perceptionibus eadem erat constitutio oculorum. Celeritati motus etiam non est adscribenda hæc diversa perceptio, quia eadem erat, & in hoc casu, ubi scintillas produximus, motus tardior fuit, quam ibi, ubi nullæ productæ sunt scintillæ. Hinc necessario sequitur, quod hoc lumen non ortum sit ex magnitudine corporum, neque ex quiete vel motu corporum solum, neque ex intima corporum combinatione, nec ex celeritate vel tarditate motus. Quare necesse est, hoc lumen vel a via motus, vel a modo movendi, vel a figura corporum esse productum.

Quod autem motus viam attinet, scintillas quovis modo percipimus, quando chalybem ab imo, vel ab alto, vel a latere percutimus, ergo neque hæc est causa hujus effectus.

Tandem videmus, quod modus movendi in his diversis perceptionibus diversus fuerit, nempe quod unus motus fuerit in angulum rectum, alter in acutum, & quod motus particularum chalybearum à pyrite in primo casu decussarum factus sit per lineam rectam, in altero vero per rotundam; hinc concludimus, quod in hoc casu lumen ortum sit ex motu vehementi particularum chalybearum in lineam circularem.

Sed neque motus in circulo est ea res, per quem lucem percipimus, quia & in ligno salici putrefa-

cto, frigido & in mucro piscium lumen sentimus sine ullo calore, qui tamen secundum ea quæ jam probavimus, in motu circulari consistit.

Ergo nihil restat, quam figura corporum, de qua sentimus, in natura non dari alia simplicissima extreme diversa, quam accurate rotunda & valde longa; ex his duobus enim extremis omnia alia componuntur, sed videmus, quod percussione perpendiculari particulæ decussæ irregulares formentur. Quando vero per angulum acutum chalybem tangimus, tunc microscopio observamus, particulas abscissas etiam per torsionem circularem rotundam figuram esse nactas. Ex hisce sequitur hæc

CONCLUSIO VI.


LUMEN A NOBIS PERCIPITUR PER PARTICULAS CORPORUM ROTUNDAS.

THESIS XIII.

Omnia corpora, quæ in circulum moventur, sese extendunt, nisi sint in puncto quodam affixa, & per hanc extensionem formant in corporibus liquidis bullulas.

DEMONSTRATIO.

Quando corpus B. in circulum gyratur circa centrum, K, tunc per thesin 12. necesse est ut a centro motus sui recedat per puncta H. B. C. D. E. F. G; in quovis autem puncto totius viæ, per quam progreditur, offendat corpuscula istius liquoris, in quo hic motus fit; ergo vi thesis primæ ea propelluntur ad extrema; igitur si per motum circularem ignis particulæ aquæ etiam ubique in circulum agitantur, necessario per thesin primam & secundam. sequitur,



quod hæc corpora per motum circularem a centro propulsa, spatium quoddam relinquunt a materia crassiori vacuum, quia propulsa est; igitur in aquam formant bullulas aëre vel aqua rarefacta repletas, in aëre vero bullulas subtiliori aëre repletas. Q. E. D.

Sic consideravimus, quid sit calor; seu, ut accuratius loquar, per quas corporum modificationes calorem percipimus. Consideravimus etiam, per quas corporum modificationes lucem percipimus. Nunc, antequam ad conclusiones veniamus, restabit, ut etiam consideremus, per quas modificationes corporum flammam percipimus.

DEMONSTRATIO MATHEMATICO-PHYSICA

TER TIA, DE FLAMMA.

OBSERVATIO VI.

Sentimus in flamma calorem vehementissimum; igitur per conclus. quartam & quintam necesse erit, ut circularis motus vehementissimus sit in flamma.

OBSERVATIO VII.

Sentimus etiam in flamma lucem; ergo necessario vi conclus. sextæ flamma consistit ex globulis seu particulis rotundis.

Ex thesi autem 13. fluit, quod hic motus circu-

laris bullulas, i. e. globulos a materia crassiori vacuos formet. Ex hisce iterum sequitur hæc

CONCLUSIO VII.

FLAMMAM PERCIPIMUS PER CONGERIEM INNUMERABILIVM MINUTISSIMARVM ROTUNDARVM BULLULARVM AB AERE NOSTRO CRASSIORI VACUARVM, ET VIRTUTE QUADAM, CUJUS ESSENTIA MIHI ADHUC IGNOTA, EXTENSARVM, QUÆ CUM ALIIS ALITER FIGURATIS, TAM CRASSIS TERRESTRIBUS, QUAM SUBTILIORIBUS CORPORIBUS MIXTA PROPTER LEVITATEM ASSURGUNT.

DE EFFECTIBUS NATURÆ PER CALOREM.

Postquam in præcedentibus probavimus, per quas modificationes corporum *Ignem*, *Lucem* & *Flammam* percipiamus, opus erit, ut etiam perpendamus, quomodo hæ modificationes in aliis corporibus sese habeant, illaque pro sua diversitate varie afficiant.

Ante omnia, non sine voluptate intuemur miros effectus, quos vitra & specula caustica producant.

OBSERVATIO VIII.

Quando vitrum nullo calore imbutum, vel utrinque vel plano-convexum & politum, sive etiam glaciem utrinque etiam vel plano-convexam claræque radiis solaribus exponimus, ut radiorum medius vitri medium perpendiculariter transeat, tunc corpus in foco positum incenditur.

OBSERVATIO IX.

Globus vitreus convexæ seu sphaericæ figuræ repletus claro & diaphano liquore, sive aqua, sive spiritu vini, & radiis solis expositus ita, ut per medium vitri & spiritus vini perpendiculariter radiorum transeat medius, corpus in foco positum incenditur; quo gravior autem est liquor, eo facilius, quo levior, eo difficilius.

OBSERVATIO X.

Animadvertimus etiam, quando v. g. pulverem pyrium in recipiens ab aëre vacuum ponimus, vitro ustario illum incendi posse, sed non tam facile, quam in aëre nostro.

Ratio.

Præsuppono, quod solis radii ex sole in recta linea procedunt. Pono etiam hoc, quod experientia testatur; nempe radios lucis per diversa diaphana transeuntes frangi, & quidem si ex graviore diaphano in levius incidant, ad perpendicularum; sin vero ex leviori in gravius, a perpendicularo. Hinc sequitur, quod multi radii solis in unum punctum concurrere debeant, & quidem in plano convexo focus est ejusdem distantiae cum diametro sectionis Vitri; in utrinque convexo vero focus & semidia-

meter æquidistant. Quod autem in aëre nostro, tam libero, quam occluso celerius & citius corpus aliquod incendatur; quam in diaphano ab aëre nostro vacuo seu in aëre subtilissimo, causa hæc est: Quando globuli lucis rotundi per vitrum transmittuntur, tunc necesse moventur in circulum, uti hoc experientia probat; nam si sol per vitrum aliquod planum radios mittit, statim prope vitrum majorem calorem percipimus, quod non evenit, quando paulo longius est spatium inter vitrum & manum. Nunc dico, quando plures innumerabiles globuli lucis per vitrum cadunt & in circulum torquentur, per thes. 1. & 4. necesse est, ut non modo particulas aëreas, quas tangunt, etiam in gyrum agant, sed &, quo propius ad centrum accedunt, eo fortius ibi etiam moveantur (quia plures in uno puncto concurrunt) in circulum, & particulas aëreas, quibus hunc motum communicant, per theorema 1. secum ducunt. Per crassiores aëris particulas autem vi theor. 5. corpus dilaceratur, particulae ejus in circulum gyrantur, & uno verbo incenditur. In recipiente autem ab aëre vacuo lucis globuli non inveniunt particulas crassas, quibus corpus dilacerare queant, hinc necessario vi theor. 5. sequitur, quod motus circularis non sit tam vehemens, quam in aëre nostro crassiori. Ergo per theorema 6. corpus tam cito incendere non potest in spatio ab aëre nostro vacuo, quam in aëre. Ex hisce concludo.

1. Quando duo vitra caustica ejusdem magnitudinis, sed ex diametris diversis sunt præparata, tunc istud vitrum, cujus sectionis diameter minor est, fortius urit isto, quod ex majori sectionis diametro est.

2. Impossibile est, vitrum causticum præparare, quod per centum passus urere queat.

3. Omnia corpora nigra, quando sunt ejusdem speciei cum albis, citius per vitrum ustorium incenduntur, quam alba.

4. Vitrum causticum, quo magis in loco fumus a terra remoto, v. g. in monte altissimo, eo minus urit, ac si terræ proximi fumus.

5. Corpora nigra citius incenduntur, quam rubicunda & cærulea. Rubicunda & cærulea citius, quam flava & viridia, flava & viridia citius, quam alba.

6. Coloratum vitrum causticum vim causticam amittit. Hæc est ratio; cur his vitris utimur in tubis, ne oculi a sole lædantur.

7. Quando dimidia pars superior thermometri colore tingitur albo, altera vero nigro, tunc pars alba soli exposita spiritum vini non adeo premit, quam pars nigra.

Quod autem effectus varios tam per specula caustica, quam per annulos causticos attinet, nullos alios observamus, quam cum vitro caustico, nec opus est, ut de illorum effectibus prolixi simus, nisi ut hoc addamus, specula caustica quia ex majori amplitudine præparare possumus, quam vitra, etiam sunt aptiora ad talia instrumenta præparanda, quæ magnam & miraculosam vim præstare debent.

Ne nimis prolixi hac in re simus, properamus ad has observationes, quas in igne culinari animadvertimus. Harum sunt tres classēs.

Primæ classis observationes sunt, quod multæ res eundem effectum habeant, sive in occluso sive aperto aëre tractentur.

Secundæ classis observationes ostendunt, multas res alium plane effectum habere in aëre occluso, quam aperto.

Tertiæ classis observationes sunt, multas res alium plane effectum habere in aëre aperto quam occluso.

OBSERVATIONUM PRIMÆ CLASSIS

OBSERVATIO I.

Mulierculæ nostræ, quando coquunt lucios pisces, exinde colligunt, an pisces satis cocti sunt, [hoc est, an aqua salsa, in qua pisces coquuntur, satis inspissata sit] si ahenum ex igne sumptum manu sine læsione apprehendere possunt, etiamsi aqua fervida & ignis ahenum calidissimum reddere valuerint.

Ratio.

Quando particulæ materiæ subtilissimæ in venere seu ferro aheni a motu ignis circulari agitantur, necesse est, ipsas quoque particulas venereas seu ferri simul in circulum agi, per theor. 1. Hic motus autem circularis corpusculorum venereorum per theor. 4. tam vehemens fieri potest, ut etiam fortior fiat, quam ipse motus circularis materiæ subtilissimæ in flamma, uti experientia testatur in cupro & ferro liquefacto. Quando vero corpus aliud aliquantulum resistens in aheni est, nempe aqua & ejus particulæ, non quidem statim celerime moventur, attamen simul ac motum percipiunt, discedunt, & in aërem avolant, aliæ autem particulæ aquæ hunc locum occupant; sic continuè particulæ veneris seu ferri motæ aliud corpus in motum impingunt. Hinc per thes. 1. iterum necesse est particulas veneris seu ferri aheni non tanta vi moveri, quam si nullam haberent resistantiam. Quando denique aqua satis inspissata & falsedine imprægnata est, tunc iterum resistantia fortior erit; igitur cupri seu ferri particulæ per thes. 1. tardius moventur, & frigidiores fiunt aqua ipsa, quæ in aheni est; & quod observatu dignum, quando laminam cupri in aqua a falsedine satis imprægnata coquimus, tunc illa lamina multo calidior fit aheni ipso, quamvis ahenum immediate ab igne tangatur.

OBSERVATIO II.

Omnia metalla citius liquefcunt, quando teguntur materia quadam, quæ citius fluit, & fixa est, e. g. vitro molli, scoriis, nitro, borace, sale, tartaro, &c., uti metalli fusoribus hoc notum est.

Ratio.

Primo intuitu videtur, ac si hæc observatio priori contraria esset, quod tamen nequaquam ita se habet; nam primò materia, quæ fusionem promovet, corpus est, quod, donec liquefcit, aliqualem quidem vim elasticam seu internam extensivam in se habet, sed intima combinatio hujus materiæ tam arcte cohaeret, ut particulæ ejus motæ avolare ne-

queant, i. e. fixæ sint; igitur ex theor. 4. concludo, quod particulæ hujus materiæ gradatim tanta cum vehementia in motum intestinum circularem agitentur, ut motus harum particularum celerior fiat, quam ipsius ignis. Nunc quia ab inferiori parte vehementem motum circularem ab igne, a superiori vero vehementiorem motum hunc ob additam materiam *des flusses* medium interjacens metallum patitur: mirum non est, particulas metallicas etiam in vehementiorem intestinum circularem motum agi, & citius liquefcere, quam ab igne solo carbonum.

Ex hac observatione hæc regula fluit: Quo difficilius corpus aliquod liquefcit, eo calidius est quando liquefactum.

Hanc ob causam vitrum liquefactum calidius est sale ab igne liquefacto; unum vitrum liquefactum calidius est altero. E. g. vitrum crudum difficile liquefcens calidius, quam vitrum saturni liquefactum; omnia vitra liquefacta calidiora, quam stannum & plumbum liquefactum; cuprum liquefactum calidius, quam orichalcum & cuprum album; orichalcum liquefactum calidius, quam aurum & argentum liquefactum; aurum vel argentum liquefactum calidius, quam regulus antimonii liquefactus; regulus antimonii liquefactus calidior stanno vel plumbo liquefacto.

OBSERVATIO III.

Ex mineris metallo abundantibus per fusionem metallum producitur.

Ratio.

Quia per motum circularem ignis æs ipsum etiam in hunc motum agitur, ita ut hujus minutissimæ particulæ per thesin decimam tertiam globosæ vacuæ fiant, qui propter hanc globositatem particularum aëris a se mutuo discedunt, nisi in vase quodam teneantur, hunc motum particularum rotundarum fluiditatem nuncupamus. Sed quia propter liquiditatem unum corpus aliud penetrare possit, necesse est particulas graviores metallicas per theor. 7. fundum petere, & particulas leviores in scoriis per theor. 8. supernatare.

CONCLUSIO I.

Quo subtilius fluunt scorix, eo purius & accuratius metallum a scoriis aris se separare potest.

CONCLUSIO II.

Quo leviores sunt scorix, vel fieri possunt, eo purius metallum ab illis separatur.

CONCLU-

CONCLUSIO III.

Quo diutius scoriæ supra metallum fluunt, eo melius metallum separatur.

Per vim ignis etiam plura metalla a se invicem separamus: E. g. aurum ab argento per sulphur: Argentum, aurum, etiam cuprum a plumbo, quando mixturam cupellæ superimponimus, & ignis vi hanc mixturam liquidam servamus. Sic plumbum transit poros cupellæ & relinquit aurum & argentum, etiam (si operatori ita placet) cuprum in cupella. Cuprum vero ab auro & argento Docimastæ separant, si cupri parva quantitas argento vel auro inest, quando huic mixturæ sufficientem quantitatem plumbi admiscunt & cupellæ imponunt. Sic vi ignis plumbum per poros cupellæ transit, & cuprum

secum rapit, si modo ignis regimen accurate observatur. Aurum vero vel argentum remanebunt in cupella.

Sin autem cupri quantitas magna est, tunc optima separatio fit in furnis istis, quos vulgo vocant *Saiger=offen und darr=offen*. E. g. si in toto cupri centenario quatuor uncia argentum essent, tunc tribus centenariis hujus cupri admiscunt decem centenarios plumbi. Per vim ignis ex hac mixtura formant magnas placentas, quas vocant *Saiger=stücke*; Has placentas iterum ponunt in furno isto, *Saiger=offen* dicto, & carbonum igne plumbum liquefaciunt. Sic plumbum stillatim cuprum deferit, argentum secum rapit, & ita argentum a vinculo suo arctissimo liberatur.

DE EFFECTIBUS NATURAE

PER IGNEM IN AERE APERTO.

HActenus consideravimus ignis effectus, quatenus unum idemque fuit, sive operatio facta sit in aere libero, sive in occluso. Nunc necesse est, ut etiam effectus hos ignis, qui in libero aere aliter quam in occluso sunt, consideremus.

OBSERVATIO IV.

Omnia oleosa, pingua, sulphurea, & resinosa corpora flammam concipiunt, nec ulla alia; & quo magis olei, sulphuris, resinæ, vel pinguedinis corpori cuidam inest, eo citius fortiusque flammam concipit.

Ratio.

Per Thef. 9. a priori videmus, quod, quando istæ bullulæ, quæ nobis flammam imprimunt, tenui tegmento seu cortice præditæ sunt, & tamen internæ vi in motu circulari resistere debent, materia, quæ tegmentum format, valde subtilis, & in se firmiter combinata esse debeat.

CONCLUSIO IV.

Hinc concludo, quod nullum corpus flammam concipere queat, quam istud, cujus particulæ minimæ arctissime & firmiter in se combinatæ sunt.

Credo certissimum esse, quod omnes minutissimæ particulæ corporum pinguium, oleosorum, resinosorum & sulphureorum, imprimis quando flagrant, tenacitate prævaleant aquosis.

Videō quidem novum dubium, quomodo nimirum hoc fiat, quod spiritus vini flagret, mucus vero piscium non ita. In præcedentibus quidem jam ad hoc dubium responsum dedi, sed ut eo clarius fiat, etiam hunc effectum in specie examinabo.

In definitione flammæ dixi, quod flamma consistat in congerie seu congregato minutissimarum bullularum. In proxime præcedentibus monui, quod particulæ istæ, quod nobis flammam ostendunt, valde subtiles & arcte combinatæ esse debeant. Nunc forte, qui adhuc dubitat, concedit, quod spiritus vini constet ex aqua subtili & oleo subtilissimo intime combinatis; etiam concedet, quod particulæ oleosæ in spiritu vini adeo arcte & intime sunt mixtæ, ita ut neque oculis videri neque per destillationem separari possint; tamen experientia testatur, illas adesse.

Quando itaque hæ particulæ oleosæ incenduntur, in gyrum velocissime torquentur & vi thef. 8. asurgunt; per theor. 1. particulas quasdam aqueas in-

time sibi admixtas secum respiunt, & flammæ infimam partem cæruleo, superiorem vero per suppositionem pag. 23. flavo albido colore apparere faciunt.

Unde vero hoc eveniat, quod mucus piscium non incendi possit, quamvis mucositatem seu tenacitatem suam spiritum vini præcellat, jam quaeritur. Hoc autem procul dubio ob causas sequentes fit.

Primo particulæ oleosæ minores arcte combinatæ in muco a crassiori terra & aqua ita munitæ sunt, ut ignem non bene capere possint. *Secundo* hæ particulæ oleosæ non sunt intime mixtæ aqueis, uti experientia testatur, quando per alembicum hunc mucum destillamus, & residuum retortæ committimus. Sic enim oleum ab aqua separare possumus. Igitur quia particulæ oleosæ hinc inde natantes sese mutuo non tangere possunt, & una alteri vim suam acceptam communicare nequit, etiam per theor. 1. fieri non potest, ut flammam accipiant, quamvis etiam proportio olei major esset in muco, quam in spiritu vini.

OBSERVATIO V.

Flamma nullibi flagrat, nisi in aere nostro crassiore.

Ratio.

Per theor. 9. videmus, quod necessarium requisitum flammæ sit externa resistentia, quo flammæ bullulæ integræ maneant, nec facile a movente interno dirumpi possint. Necesse etiam erit, hanc flagrationem fieri in corpore quodam fluido, quod flamma penetrare potest; ad hoc vero officium præstandum aer noster tam propter tenacitatem, quam ponderositatem a creatore destinatus est tanquam aptissimum. In aura enim ætherea externa resistentia valde debilis est; ergo vi theor. 9. necesse est, ut vis interna in motu circulari agens bullulas flammæ dirumpat. Hinc quia bullulæ istæ in aura ætherea existere nequeunt, etiam flamma ibi fieri non potest.

In occluso vero aere per motum circularem aer extenditur, quapropter etiam vi theor. 10. majus spatium requirit. Hoc autem fieri non potest absque vasis disruptione; igitur necesse est, quando vas non dirumpitur, ut bullulæ, quæ alias flammam ostendunt, ab externa vi aeris expansiva comprimantur. Hinc vis illarum interna bullulas extendere nequit, nec flammam producere. Hæc etiam est ratio, cur in profundissimis terræ, neque in cellis per longum tempus occlusis flamma flagrare potest.

In

In aere autem libero alium effectum videmus. Hic enim per vim internam elasticam bullulæ extenduntur; aer noster externus autem easdem comprimit; & quia per thes. 13. bullulæ ab aere nostro crassiori vacuæ sunt, vi thes. 8. affurgunt, per thes. autem 1. multas alias particulas crassiores secum rapiunt, donec tandem ab interna virtute, seu actione entis istius activi aeris vis vincitur, & bullulæ disrumpuntur, materia autem, ex qua bullulæ erant constructæ, speciem suam perdit; cum particulis grossioribus, quæ cum bullulis avolant, in forma fumi se conjungit, altiora petit, & subtiliorem fuliginem producit.

Quamdiu flamma durat, aer circumambiens continuo movetur in circulum, consequenter aer proximus circa flammam subtilior fit, quam antea fuit. Hinc gravior aer magno impetu ad æquilibrium fervandum tentat, flammam a lateribus premit, bullulæ autem flammæ propter levitatem per thes. 8. perpendiculariter affurgunt, & aerem sublimiorem protrudunt; infimus autem aer locum ab aere evacuatum propter conatum ad æquilibrium replet; hinc aer infimus quasi per ventum impetuosum flammam tangit & fumum sursum pellit.

Hæc est ratio, cur in incendiis semper ventus excitetur.

Quod vero flamma in aqua exstinguatur, ratio hæc est, quando particulae aquæ crassiores in flammæ bullulas sese insinuant, tunc necessario eos dispellunt, partim propter gravitatem congeriei, partim vero (quando per aliquas aquæ guttulas exstinguitur flamma) propter volatilitatem aquæ, i. e. materiæ, quæ flammam non concipit, quod etiam experientia testatur, si guttulam aquæ candelæ incensæ injiciamus, cum crepitatione flamma dispellitur & exstinguitur. Illud adhuc examinatione dignum esse putamus, cur jam rubram, jam viridem, jam flavam, jam cœruleam flammam percipiamus, nunquam vero extreme nigram seu albam.

Ratio.

Præsuppono, quod, quando lucis omnes radii in eundem angulum reflectunt, in quem incidunt, nos percipiamus colorem istum, quem vocamus extreme album.

Pono etiam, quando omnes radii lucis in corpore quodam sese abscondunt, ut minima reflexio oculos nostros tangat, nos tunc nigrum percipere colorem. Omnes alios colores percipimus, quando lucis radii per alium angulum incidunt, quam oculi nostri eum percipiunt; hinc diversitas colorum oritur.

Præterea notatu dignum videtur, quod omnis flamma cœrulea aquam seu spiritum quendam clarum in se contineat. Sic flamma sulphuris spiritum ejusdem, flamma spiritus vini rectificatissimi aquam, quæ in spiritu vini est, continet. Omnes aliæ flammæ fuliginem ferunt. Quo autem flamma magis ad rubedinem tendit, eo graviorem; quo vero magis ad albedinem, eo leviolem fuliginem habet.

Ut in veram causam prolixè nimis inquiram, unde sit hæc diversitas flammæ, non puto operæ pretium esse, quia unusquisque, quando concedit flammæ definitionem, & tam nigredinis quam albedinis causam, etiam concedere debeat, quod cœruleæ flammæ causa hæc sit, quando particulae aqueæ claræ oleosis accensis, i. e. globulis rotundissimis, intime mixtæ sunt, ut in spiritu vini observamus, tunc bullulæ istæ præsentant, per suppositionem 1. colorem album; sed quia plurima pars spiritus vini aqua est, hæc bullulæ non tam arcte possunt coire, ut una vi

albedinem præsentarent; ideo ubique inter bullulas flammæ corpora diaphana aquæ in simili proportionem sese insinuant, & quia aer noster per flammam propellitur, ita ut in intermedio harum bullularum aer noster non detur, sed loco ipsius aqua & æther: necessario per thes. 6. inde fluit, quod, quia propter subtilitatem ætherearum particularum lucis reflexio tanta vi fieri non potest, quam alias, si corporibus solidis vel aereis grossioribus hoc spatium esset repletum, color in aqua ad nigredinem se vergat. Quando itaque color albus nigro seu prope ad nigredinem se vertenti colori intime miscetur, ut in hoc casu fit, oritur color cœruleus. Eadem videtur ratio esse coloris cœrulei cœli.

Rubra vero flammæ causa hæc est: Oleum eorum corporum, quæ rubram flammam producant, multas in se habent particulas acidas. Hinc sunt tenaciores, per thes. 8. majori vi sursum avolant, & particulas crassas carbonum, quas scintillas minimas vocamus, per thes. 1. secum rapiunt, quæ rubedinem in flamma præsentant.

Hinc concludo, quod magis flamma ad rubedinem vergit, eo majorem copiam spiritus acidi, olei, & salis fixi ex fuligine istius flammæ prolici posse. Ex ligno etiam isto, cujus flamma rubicunda est, eundem effectum videmus. Restat ut examinemus causam effectus jucundissimi istius flammæ in pulvere pyrio.

Primo consideramus, sulphur esse corpus oleosum, spirituosius acidis mixtum; consideramusque, nitrum esse corpus constans ex particulis rigidis, carbonem vero corpus ex sulphure, i. e. oleo & spiritu acido subtilique terra mixtum. Sic inveniemus in pulvere pyrio accenso (primo) globulos cavos rotundissimos per thes. 13. (propter oleum accensum) qui cum impetu per thes. 8. altiora petunt. Inveniemus etiam extreme contrarias particulas, nempe longas, rigidas, plenas nitri; his etiam mixtæ sunt particulae aqueæ, acidæ. Quando itaque particulae oleosæ incenduntur, bullulas avolantes, quæ in gyrum torquentur, pariunt; terrestres autem etiam hunc motum necessario per thes. 1. patiuntur, & per thes. 5. vehementiorem faciunt motum circularem; aqueæ vero sic motæ flammam distendunt, sed nitrosæ, quia rigidae sunt, harum omnium motui per thes. 11. resistunt, donec tandem fortiores triumphant, & cum impetu particulas nitrosas rigidas dispellunt. Hic est ortus, hæc est ratio pulveris istius, qui horrendum istum effectum præstat.

Ex hisce sua sponte fluunt sequentes conclusiones.

1. Pulvis pyrius, quo utimur ad incendendum, **zund pulver** / quo subtilior est, eo meliorem effectum promittit.

2. Quando in bombardâ vel sclopeto foramen illud, per quod incenditur, ita locatum est, ut pulveris pyrii centrum proxime appropinquet, tunc fortissimum effectum bombardâ præstat.

3. Pulverem pyrium præparare, qui nullum sonum edat, & tamen magnum effectum præstet, impossibile videtur.

4. Bombardâ vel sclopetum nimis longum, nimis etiam breve potest esse.

5. Pulvis pyrius, quo utimur in bombardis, majora debet habere grana eo, quo utimur in sclopetis.

6. Accurata granulatio in elaboratione pulveris pyrii necessaria est.

7. Pulvis pyrius politus meliores præstat effectus, quam iste, qui non est politus.

DE EFFECTIBUS NATURÆ PER IGNEM IN AERE OCCLUSO.

Restat, ut etiam examinemus effectus caloris & ignis in aere occluso.

OBSERVATIO I.

Omnes res quæ in aperto aere flammam concipiunt rubram vel flavam, i. e. ex quibus in aperto aere fuliginem crassiolem separamus, eæ occluso aere destillatæ præbent oleum & spiritum acidum. Quo autem magis ad rubedinem vergit flamma, eo copiosior etiam spiritus acidus exinde elicitur, quando destillationem per descensum instituimus.

OBSERVATIO II.

Omnia corpora, quæ accensa cœruleam flammam præbent, igne occluso a se invicem separari seu destrui nequeunt, uti sulphur & spiritus ardens, sive vini, sive frumenti, sive alius fructus vel herbæ. Ratio, unde hoc fit, ex antedictis facile elicienda erit. Hæc est ratio, cur acidum spiritum sulphuris per campanam, aquam vero a spiritu vini per aliud vas, per quod aer transire potest, separemus. Flores autem sulphuris per cucurbitam, impositis sublimatoriis spiritum ardentem per alembicum eliciamus.

CONCLUSIO.

Omnes resinæ, quando per retortam destillantur, præbent spiritum acidum & oleum foetidum; uti etiam omnia ligna, omnes pinguedines, saccharum, cera, tartarum, & quæ sunt similia flagrantia, quæ crassiolem possident fuliginem. Inter omnes effectus ignis in aere occluso videmus, illos, quos cum instrumento Papiniano observamus, esse notatu dignissimos, in specie quia hoc cum actione illa, quæ in corpore humano est, maximam om-

nium convenientiam habet. E. g. observamus, quamvis igne fortissimo duriora corpora, uti sunt ossa, in aqua coquimus, & quidem in aere libero, longo etiam tempore, tamen ossa non posse ad molitiem reduci, cum tamen videamus, in hoc instrumento istud fieri leni & mediocri igne, etiam brevi temporis spatio.

Ratio.

Videmus, instrumentum illud ubique firmiter esse munitum, ne aqua per circularem motum in vapores reducta exhalare possit. Igitur vi theor. 4. sequitur, quod intestinus circularis motus hic fortior fieri queat, quam in libero aere, ubi aqua in circulum agitata evaporat, & iteratas motiones non patitur.

Hæc fuerunt, quæ benevolum Lectorem de caloris, lucis & flammæ natura scire volui. Non dubito, quin principia dissertatione præsentis suppeditata de hac materia profundius meditantibus conclusiones variæ & utilitate & jucunditate occurrant. Quantum ingenii & laboris nostri conditio permittit, quantum in hoc profundo physices argumento sensus junctis cum ideis seu ratione & experientia præstare potuimus, tantum a nobis accipe.

Deo interim agimus gratias pro concessis clementer viribus. Adesto porro cœptis meis benignissima tua gratia & favore divino, Tu lux, quæ omnia illuminas, intellectum in creaturarum cognitione, quantum nobis salutare judicas, firma & adjuva. Alme Deus, qui ipse amor es æternus, corda nostra vehementissimo erga Te ipsum amoris calore inflamma. Sic nucleum ipsum gustabimus, cum in humanitatis statu saltim rerum creaturarum tangamus corticem.

F I N I S.

DISPUTATIO PHYSICO-MEDICA

D E

CAUSIS CALORIS

NATURALIS ET PRÆTERNATURALIS

IN CORPORE NOSTRO.

Primum edita anno 1699.

P R O O E M I U M.



OPTIMA ratione olim Medicorum sapientissimi pronuntiarunt, vitam consistere in calore; utpote individuus & perpetuus calor vitæ comes est, ita, ut etiam nullum reperire liceat animal vivum, ubi non & calidum quoddam deprehendatur. Persuasi hinc ipsi fuerunt Veteres, calorem esse vitæ causam, & calidum quoddam substantiale animantibus innatum esse, quod actiones ac functiones vitales regat, dirigat atque moderetur. Quamvis autem ab hac sententia, solidiori philosophandi ratione imbuti, discedamus, neque calorem pro substantia habeamus; attamen non inficiari possumus, calorem vitæ indivulse junctum esse, & necessarium ejus existere effectum atque productum, adeo ut mors accedat & vita desinat, ubi calor omnis expiraverit. Quocirca non immerito calor animantium vitalis nuncupari solet, nec sine ratione, utpote calor proficiscitur à motu; vita autem nil nisi motus est tam intestinus partium fluidarum corporis nostri, quam progressivus in circulum abiens, ut adeo per motum talem calor necessariò producat, non quidem ut accidens, sed ut necessarius quidam vitæ conservandæ utilissimus effectus. Calor enim, qui concipitur in fluoribus machinæ nostræ, ad vitam tuendam, servandam atque defendendam pernecessarius est, hoc ipso enim fluxilitas humorum perficitur, spiritusascentia seu generatio materiæ fluidæ tenuissimæ expansivæ procreatur, pori emunctoriorum servantur aperti, ut incongrua & superflua peropportunè queant evacuari. Calor porro est, quo natura utitur ad amoliendum illud ipsum, quod corpori nostro minatur ruinam atque corruptionem: Brevibus, calore optime pugnatur contra læsiones causasque morbosas, quæ mediante hoc vel subiguntur, corriguntur, aut quantitate si peccant expelluntur, unde nullus propemodum visitur motus morbosus, à natura bonum in finem, nempe ad tranquillum & sanum statum corporis recuperandum, institutus ac accommodatus, ubi non excessivus quidam calor excitetur. Omnibus enim ferme morbis febriculosa quædam commotio jungitur, & nullus ferme est, qui non absolvatur vel terminetur calore præternaturali. Cum itaque tam utile & necessarium vitæ, sanitatis & morborum sanationis instrumentum sit ipse calor, operæ utique erit pretium, paulo curatius majorique diligentia ac sollicitudine inquirere in ejus ortum ac causam, ut hac ratione Medicus in servanda sanitate & amissa recuperanda habeat & noscat differentias & causas hujus, & quemadmodum ille ipse prudenter vel excitandus, vel moderandus atque temperandus sit, ut naturæ omnia fiant convenientia. Constitui itaque mecum utilissimum hoc thema in præsentis ventilare, atque à quibusdam difficultatibus & dubiis liberare, sanctissime à Deo immortalis precans per ejus auxilium felices successus.

§. I.

PRIMA omnium autem eaque utilis meditatio erit; dispicere quid calor in genere sit, qui rebus etiam inanimatis competit, & à quibus producat, causis. Existimamus itaque, omnem calorem, quicumque etiam sit, nasci atque progigni à motu. Nimirum existit in natura fluidum quoddam catholi-

cum, tenuissimum, quod aereo-ætherei nomine appellant, in quo omnia corpora solida tenentur vel natant, quod omnium poris ac interstitiis etiam solidissimorum interspersum est, atque motu vehementi, intestino & rapido agitatum, incalescit, si ve sensationem caloris mediante tremulo motu fibrarum nervearum in mente nostra producit, ut adeo calor fluidi istius tenuissimi affectio sit, quod quo vehementer

vehementiori intestino motu exagitur, eo majoris caloris gradum igneum, flammeumque suppeditat. Compertum verò per experientiam habemus, materiam hanc subtilem caloris & ignis principium, in calidum vel etiam igneum motum originaliter abripi duplici potissimum modo, vel quando corpora juxta se invicem alliduntur, colliduntur, atteruntur, & mutuo impulsu in se & juxta se invicem agunt, vel quando particulae aethereae corporibus fluidis ac solidis incolentes, vi quadam expelluntur, uti videmus in fermentationibus, solutionibus, ebullitionibus. Quod primum attinet, perspicimus durissima duo corpora, uti chalybs & lapis pyrites, vehementer invicem collisa, scintillulas, quae nil nisi chalybis particulae minimae motu celerrimo fusae adeoque ignitae sunt, sicuti egregia per microscopium observatio est, produci. Magis autem adhuc admiratione dignum est experimentum curiosum atque perpauca notum, dum baculus ferri, solo motu, ictu ac percussione violentiori saepius repetita mallei super incudem, non tantum calidus sed & ignitus reddi potest. Lignum solo motu in carbonem verti posse, res tornatoribus notissima, neque tam adeo rarum experimentum est, dum currus per motum rotarum circa suam axim concitatissimum, aestivo, sicco tempore accensus visus fuit.

§. II.

Deinceps calor, imo etiam flamma, nascitur ex agitatione rapidiori, expulsionem aetheris ex corporum poris; unde res vulgaris experientiae est, lapides extreme ustos & calcinatos aqueo affuso liquore intensum in modum incallescere cum stridore, strepitu, bullularum emissionem, cujus phaenomeni ratio non aliunde peti potest, quam ex violenta materiae aereo-aethereae commotione. Siquidem igne extremo lapides dum macerantur, omne tam fluidum quam humidum, & quodcunque mediante ignis motu volatile fit, in auras ejicitur, unde multa spatiosa vacua efformantur, quae particulis aereo-aethereis mobilissimis replentur & occupantur; quando jam affunditur aqua, haec gravitate sua statim ingreditur istos poros & exinde expellit magno impetu ac agmine materiam illam subtiliorem, propter impenetrabilitatem corporum etiam tenuissimorum; aether hinc egressus, per aquam producit bullulas, motumque tumultuarium & ex consequenti calorem. Idem fit, quando caput mortuum vitrioli vel sal alcali extremo igne calcinatur, ipsisque mox aqueus liquor adjicitur, ubi notabilis calor deprehenditur. Neque hinc ex praedictis latere potest ratio, quare spiritus corrosivi acidi v. g. spiritus nitri, salis, aqua fortis, cum mineralibus vel etiam metallis e. gr. venere, marte, luna, antimonio, regulo antimonii, mercurio invicem confusa, confictum calidum exerant vehementissimum. Etenim nullum corpus etiam firmissimum destitutum est suis poris, pro quorum amplitudine & multitudine propria & diversa corporum gravitas in fluidis emergit; hisce poris inhabitat fluidum illud universale, mobilissimum, quod si celerrime ejicitur, occupatis poris ab alio congruo fluido, quod ratione particularum diametris pororum corporis respondet, quaquaversum corpora, illorumque latera dimovet, atterit, & ita intensum exfultat cum strepitu & vaporis exhalatione calorem. Res autem adhuc magis videtur mirabilis, quando oleum vitrioli, quod & actu & potentia frigidum aestimatur, glacie injecta incalcescit. Ratio hujus phaenomeni haec apparet: Oleum vitrioli concentratissimum, & phlegmate suo penitus privatum sal acidum est, quod per materiam subtilem copiosissimam in fluore persistit; quando affunditur aqua, vel glacies injicitur in aquam, collis-

quescens humidum in poros salium lubentius recipitur, unde non sine impetu & collisione materia subtilior ejicitur, quae vehementius mixturam commovens producit incalcescentiam.

§. III.

Dictum fuit in superioribus, calorem omnem, praesertim igneum, ex motu rapidissimo aetherei fluidi, sive ille per mutuam collisionem corporum durorum, sive per ejectionem ex poris corporum excitatur, pronasci; ex quo jam liquido consequitur, illa corpora, quae fluidum hoc tenuissimum actuosum magna in quantitate possident, ad calorem vel flammam edendam esse omnium aptissima; talis jam indolis ac naturae sunt omnia sulphurea, pingua, resinosa, oleosa. Horum autem intimam mixtionem & crasin si intuemur, patebit, omnia inflammabilia constare, ex terra alcalina tenuiori, sale acido, paucis humido, copiosissimoque aethere, fitque ex his talis mixtura, quae non tantum facillime motum igneum vel calidum ab alio corpore jam ignito vel ejus flamma recipit, verum etiam quae motu hoc disjici ac dissolvi penitus apta est. Quare perspicuum est, spiritum nitri, qui magnam sulphurei principii recondit quantitatem, longe majorem in ebullitione producere aestum, quam spiritus salis vel vitrioli; item corpus martiale vel venereum, quoniam metalla sulphurea sunt, longe magis calidiorem edunt effervescentiam, quam metalla substantia sulphurea privata. Curiosissimum experimentum est, olea destillata praesertim caryophyllorum, ligni sassafras, terebinthinae, cum spiritu sulphureo concentratissimo acido permixta, intensissimum motum, calorem & denique luculentam flammam producere, oleo coagulato in resinam firmam, stabilemque, sicuti id vidi apud Excell. Dn. Praesidem. Eodem modo spiritus nitri rectificatissimus cum spiritu vini summe dephlegmato confusus, calidam quandam ebullitionem excitat.

§. IV.

Quod autem sulphurea corpora insignem quantitatem aetheris calidi possideant, patet ulterius ex motu intestino fermentationis quem subeunt; siquidem sulphur fermentationis matrix & materiale principium est, adeo ut cuncta fermentescibilia sint sulphurea ac inflammabilia, sive complectantur partes tenues terreas alcalinas, subtile acidum, phlegma & copiosum aetherem. Etenim aether intra poros incarceratus & compressus elastica sua vi expansiva nititur egredi, qua ipsa cohaerentia corpuscula viscida à se invicem disjicit, claustra ipsorum dirumpit, cum molis augmento & intumescencia, praesertim si adjuvetur circumfluo aethere & atmosphaera calida, à quo impulsu, resolutione, comminutione particularum dependet postea spiritusascentia seu spiritus inflammabilis, qui non nisi sulphureum oleosum principium est intime resolutum. Haec fermentatio dicitur vinosa, & locum obtinet in succis vegetabilium dulcibus temperatis, qui ad flammam suscipiendam, si siccati fuerint, apti sunt. Quandocunque sal acidum deficit, & terra sulphurea majorem volatilitatis gradum obtinet, fit fermentatio putredinosa, quae cum foetore sal volatile sulphureum exspirat, uti principaliter fit in partibus animantium.

§. V.

Praemittere haec necesse fuit circa caloris originem ac genesin in genere, ut feliciori successu postea progredi queamus, in causis inquirendis caloris, qui vivis animantium inest corporibus. Si vero ulla res torset atque exercuit nobilissima Medicorum ingenia,

si ulla maximis difficultatibus, dubitationibus pressa atque stipata est, certe est doctrina de causis caloris, qui secundum vel præter naturam afficit nostrum corpus. Non fert instituti nostri modus ac ratio, diversas omnium circa hanc rem sententias, iusta serie ordineque in præsentī enarrare, persequi atque examinare, nobis tantum suffecerit præcipuas & à Recentioribus potissimum receptas breviter strictimque attingere. Notum est Sylvianæ scholæ adductos, à quadam effervescencia vitali, ex congressu lymphæ in cordis sinubus suscitata, caloris animalis ortum ducere atque derivare. At verò si rem probè expendimus, primum omnis effervescencia non naturæ sed artis opus est, illa enim nec excessiva facile & sponte producit, multò minus illa ipsa de novo conjungit, ut adeò neque purum nec manifestum alcali, neque purum sibi relictum acidum, nisi forsan in prima regione ex assumtis congestum fuerit, in animantium succis sit reperibile. Deinde etiam experimento compertum est, bilem cum acido, nisi sit concentratissimum, nullum effervescencie vestigium edere. Tacemus nec patere & demonstrari posse viam, qua bilis, in hepate secreta, transeat ad cordis viscus.

§. VI.

Alii ad calorem demonstrandum, in animantibus flammulam quandam, in cordis ventriculo sinistro gliscentem, vitalem statuunt, quæ aeris pabulo continuo opus habeat, & sanguinem transeuntem calore blando afficiat. Verum nec hæc sententia admitti poterit, utpote docet experientia, lucem in humido, multò minus flammam non posse subsistere, cum humidæ aqueæ particulæ motum illum æthereum vorticosum, vehementem, qui ad lucem vel flammam sistendam necessarius est, admodum labefactent, impediunt vel plane etiam destruant; inde patet ratio, quare phosphorus solidus, ex urina paratus, in aere sereno lucidissimus sit, in humido autem, frigido & denso lucem ac splendorem tantum non emittat, sique in aqua ponatur, iste plane perit. Ita etiam phosphorus secundum descriptionem Baldini, ex spiritu & creta paratus, & igne debite tractatus, aerique humido diutius expositus, vel aquæ immerfus, lucidam suam naturam mox amittit, quæ omnia videre contigit in collegio præsentī chymico *Exc. Dn. Præsidis.*

§. VII.

Cæterum curatius exposcere videtur examen illorum sententia, qui à sanguinis fermentatione, sive corpusculorum sanguinem constituentium intestina juxta se motione, deducunt caloris animalis causam; dicunt nimirum, non tantum in corde eique annexis vasis majoribus, sed præcipue in pulmonibus suscitari fermentativam quandam calidam sanguinis commotionem, quoniam primò hunc in finem, mediante respiratione, ingens aeris subtilis elastici copia fluori purpureo sanguinis communicatur, qui tamen in omni fermentatione, principalis motor, agens ac causa existit; secundò asserunt, materiam fermentescibilem viscosam, variis heterogeneis partibus refertam, præsentem esse, cum sanguis venosus in respectu ad arteriosum longe densior, viscidior sit, & ipse sanguis ex sulphureis, aqueis, salis, terreis, æthereis partibus compositus ac conflatus sit, & porro nec deesse huic negotio congruum fermentum, affirmant, quoniam chylus corpusculis ex tam differentibus alimentis, infinitam partium ratione figuræ, molis, tenuitatis, varietatem admittentibus refertus, in vena subclavia continuo sanguini admiscetur. Ulterius adesse capax satis spatium in corde arbitrantur, ut adeò

omnia necessaria requisita ad fermentativam intestinam sanguinis motionem adsint, quæ deinde calorem, fluiditatem ac spirituascentiam corpori fœneret atque afferat. Quamvis itaque intestinam blandam, placidam, æquabilem particularum sanguinis commotionem non negemus, sed potius plenissimè illam adstruamus, pro conservanda vita, fluxilitate & spirituascentia promovenda, nullo modo tamen fermentationem talem, qualis artificialis vinosa est, admittere possumus, præsertim cum amplum sanguini spatium desit; neque humores, in vasis animalium reperi, ad fermentationem vinosam suscipiendam ullo modo existant idonei, multo minus autem à fermentatione, quamvis etiam vehemens sit, caloris causam in fluoribus derivare possumus, quando perspicimus, fermentationem in succis vegetabilium satis intensam, calorem tamen neutiquam producere posse. Enim verò observamus in vegetabilibus recentibus, ad cumulum congestis, putrefactionem cum intenso calore, quod autem tantum fit in corporibus quiescentibus, neutiquam in fluidis & circulari motu agitatatis. Calor autem putrefactorius hanc habet causam: æther nimirum incarceratus expansiva sua vi exitum affectat, cumque ob resistantiam majoris molis superjacentis, illum libere non inveniat, refringitur, reflectitur, & quaquaversum agitatus incallescenciam producit, in liquidis vero & fluidis, quorum particulæ jugi ac perenni motu juxta se agitantur, cessante illa resistantia, calor ob hanc rationem produci nequit.

§. VIII.

Examinanda jam veniet notabilis illa quæstio, an caloris in corpore nostro causa quærenda sit in circulari seu progressivo sanguinis motu, ut quo celerior sit circulatio, eo intensior quoque calor generetur & contra. Sententiæ huic qui favent, argumentum præcipue inde mutuatur, quoniam excitato motu externo fortiori in membris, dum ambulamus vel currimus, citatior fit exinde sanguinis circulatio, quod partim ex pulsu celeriori, respiratione auctiori & deinde etiam corporis majori incallescencia innotescit, adeo, ut contra frigus membrorum, hybérno tempore, optima ambulatio vel corporis concussio sit medicina. Addunt quod cholericis in quibus sanguis teste pulsu validiori per cor & arterias citius transit, corpus habeant magis calidum præ illis qui temperamenti sunt phlegmatici, melancholici, & quorum cruor longiori eget tempore ad circulandum. At verò neque in hanc sententiam, quasi ex cursu sanguinis celeriori nascatur vehementior calor, ita cito & plenarie concedere possumus, nullum enim nobis prostat exemplum, ubi ex motu progressivo, qui dicitur fluminum, alicujus liquidi, etiam vehementissimo progengeretur calor. Aqua in antliis hydraulicis, per tubulos majores & minores magna celeritate ac vehementia percurrentes, nunquam incalescit. Neque spiritus vini, vel oleum quoddam æthereum, repetè utut vicibus per canales etiam minimos vehementi motu trajectum calorem concipit. Et ut dicamus quod res est, non tanta & celerrima sanguinis circulatio concipienda est in tubulis clausis iisque repletis, quam illa est, quando vena secatur, ubi cruor, liberum inveniens exitum, insigni cum vehementia ejicitur. Nam uncia forte est sanguinis, quæ reciprocè facta diastole & systole cordis, in ipsum infunditur atque effunditur, quæ postea liquidum in arteriis contentum, successive una particula aliam, ut unda undam, trudente promovet ex arteria in venam & contra.

§. IX.

§. IX.

Hiscæ deductis, ut nostram jam de caloris vitalis causis interponamus sententiam, res poscere videtur. Est itaque firma stabilisque nostra sententia, quemadmodum omnis calor in tota rerum natura itaque etiam ille, qui reperitur & viget in sanguine animantium, adscribendus motui fluidissimæ substantiæ aëreo-æthereæ est, ita ut quo major copia ætheris adsit, & majori vehementia in motum cieatur atque exagitetur, intensior quoque suscitetur calor. Quocirca nostrarum fore partium existimo demonstrare, insignem ætheris in sanguine nostro quantitatem hospitari, illumque deinceps à vehementia & variis modis in motum intestinum impetuosorem concitari. Diximus in superioribus, sulphur esse matricem caloris, ignis & lucis, quoniam omne sulphureum inflammabile corpus commixtum ex magna ætheris, terræ subtilioris & salinæ acidæ substantiæ copia est, & quando hic æther vividiori & vehementiori motu actuatur, terreas & salinas teneriores partes ad similem motum subeundum facile disponit, ut ita totum mixtum successivè dissolvatur ac destruat. Quando autem examinamus sanguinem nostrum, in quo residet maxime calor, & per quem dispensatur ille in totius corporis membra, deprehendimus utique non tantum magnam copiam principii sulphurei inflammabilis, cum sanguis exsiccatus promptè flammam suscipiat, & per destillationem copiosum oleum suppeditet, verum etiam ætheris tenuissimi magnam portionem in sanguinis poris contenti observamus.

§. X.

Totum respirationis negotium eo videtur collineare, ut particulæ quædam aqueæ ex sanguine cederent, quod peragitur in expiratione, in illarum autem locum accederent tenuissimi aëris & ætheris partes. Perpetua hæc aëris tenuioris cum sanguine intimè facta communicatio, secundum nostram sententiam, præcipue vitæ, sanguinis spiritusæ, motionisque intestinæ & circularis est fundamentum, adeo ut respiratio, & communicatio talis æthereæ substantiæ cum ipsa vita pari ambulent passu. Videntur pulmones hunc in finem maxime esse constructi, ut magnam portionem aëris subtilioris immittant in sanguinem transluentem. Sunt nimirum pulmones aggregatum quid ex levissimis & tenuissimis membranis, quæ extensæ & sinuatae, vesiculas orbiculares efformant, veluti in apum favis alveolos ab extensa cera in parietes conspiciamus, quæ talem habent situm & connexionem, ut ex trachea in ipsas, mox ex una in alteram patens sit aditus, & tandem desinant in continentem membranam; Videatur MALPIGHIUS *epist. 1. de pulmon.* Has vesiculas aëreas densa ramificatione circumdant, & quasi corymbis vinciunt ramificationes arteriæ & venæ pulmonalis. Vena hæc & arteria non est fistula continua, uti optime observavit WILLISIUS in *dissertatione de respirationis organis ejusque usu*; sed intercapedines & spatia dantur, in quo sanguis ex arteria pulmonali effluat, & quasi stagnet, antequam vena pulmonali absorbeatur, unde fluit ratio experimenti, cur liquor coloratus, arteriæ pulmonali injectus, partim in cordis thalamum sinistrum, partim per venam, partim in tracheæ ductum, in spumam conversus, ejiciatur, luculento indicio, ipsum in transitu per pulmones, intra vasorum oscula hære, cumque particulis aëreis intime misceri, quod experimentum non tantum WILLISIUS loco citato, sed & MALACH. THRUSTON. in *Diatribæ de respirat. usu primario*, ut & SWAM-
Frid. Hoffmanni Oper. Supplem. II.

MERDAMIUS confirmat; *Exc. Dn. Præses* quoque in publica anatomia cum successu hoc demonstravit. Perspicua etiam exinde fit via, qua sanguis in hæmoptycis ex pulmonibus expellitur magna in copia per arteriam asperam, dum nimirum pori arteriæ asperæ foras introspectantes à sanguinis facto ad pulmones impetu nimis distenduntur & aperiuntur. Clarius autem adhuc communicatio aëris cum sanguine fit, quando videmus in pulmonum per arteriam asperam facta insufflatione, & succedente firmiori postea horum constrictione, pulmones successivè fieri iterum flaccidos, & concidere; quandoque autem patula venæ & arteriæ pulmonalis orificia probe prius constringuntur, pulmones ita insufflati, longissimo tempore permanent tumidi. Per hos poros itaque mediante inspiratione subtilior elastica tamen aëris portio, perpetuo sanguini venoso communicatur, qui primum longe densior, frigidior & nigricantior observatur, quam ille, qui ex pulmonibus ejicitur, & in sinistro cordis ventriculo atque arteriis continetur, adeo ut non tantummodo coccineus ille color, sed & sanguinis fluiditas, ac ejus spiritusæ, à vividiori ætheris immixti motu, intra minima sanguinis corpuscula, unice dependeat. Ulterius autem substantiæ æthereæ elasticæ præsentia in sanguine ad sensum patet, quando ille in vasis rarefit & majus spatium occupat, quod ordinariè per calorem externum fieri solet, vel etiam quando condensatur a frigore & minorem locum affectat. Animalia viva aëre sublato in vacuo mirum expanduntur, non aliam ob rationem, quam quod, extèrno aëris pondere detracto, in poris sanguinis contentus tenuior aër sese expandere & partes solidas extrorsum attollere nitatur. Tacemus in lymphæ, saliva, semine, ovulis ætheris & aëris portionem copiosam contineri, quod variis ratiociniis & experimentis, si temporis & instituti ratio ferret, demonstrare possumus.

§. XI.

Postquam itaque sufficienter demonstravimus, materiam ætheream, calidi intestini motus omnis causam, maxima in copia inexistere corpori nostro ejusque principaliori humori sanguini perpetuò ac jugiter mediante respiratione communicari, restat jam ut paulò luculentius determinemus, qua ratione calorem valdè sensibilem efficiat & producat in corporis nostri succis, partibusque solidis. Ostensum in superioribus fuit, à corporum præsertim sulphureorum, quæ insignem ætheris portionem incarcerati possident, mutua collisione, attritu & juxta se fortiori pressione enasci immoderatum, imo ferventissimum calorem. Est itaque & hoc loco nostra sententia, à particularum in sanguine sulphurearum præsertim mutua facta fortiori pressione, collisione, attritu, impulsu nasci atque progigni calorem, animantibus proprium, adeo ut omne illud ipsum quodcunque particulas sulphureas in sanguine adaugget, quodcunque illas ipsas inter se cohærentes à mutua cohæione magis vel minus divellit, atterit, impellit atque exagitat, calorem producat ac generet majorem.

§. XII.

Cum itaque calor sanguinis nostri dependeat à motu, hoc est nisu, quem ad contactum positæ inter vasa particulæ mutuo exercent adeoque intestino & ille ipse increseat motu impulsorio attritivo; necesse jam est, ut perspiciamus, qua ratione iste impulsus externus fiat, unde dependeat & originem suam habeat, & quomodo major vel minor reddatur. Omnis autem motus per impulsione[m] requirit primo
G 2 movens,

movens, secundo mobile, tertio organon, quo motus fiat, quarto vias sive spatium, & quinto tempus. Impellens totius corporis nostri principale & primus totius machinæ motor est tenuissima materia, ætherea, expansiva, elastica vi donata, quæ originaliter inexistit semini, & postea propagatur atque increfcit per continuam aëris tenerioris communicationem & intimam cum particulis subtilibus salino-sulphureis alimentorum permixtionem, quæ materia nuncupari solet spiritus vitalis, vel animalis, & animæ est vicarius ac instrumentum; hæc sanguini primordialiter inexistit, ibique generatur, in cerebro autem ipsique annexis nervis separatim existens majori vi atque efficacia motus eminet atque se exercit; hæc itaque materia tenuis, elastica, spirituoſa, per nervos influens, & derivata in cordis musculos, omnesque corporis fibras motrices, una cum sanguine calido, qui magnam hujus materiæ quantitatem possidet, efficit in aptissimis & geometricè constructis organis motum impulsorium, constrictivum, systalticum, activum, quo mediante fluores corporis nostri in motu progressivo in orbem agitantur & conservantur, qui motus partim ad nutritionem præstandam, partim ad separationem inutilium heterogenearum partium perquam necessarius est ad vitam, & hinc merito vitalis dicitur.

§. XIII.

Organa vero sanguinem impellentia ejusque intestinum motum promoventia varia sunt; principale est cor, quod vehementissima systole sanguinem expellit in arterias; arteriæ per totum corpus innumeris ramificationibus dispersæ ipsum recipientes motu contractorio denuo impellunt ipsum in venas, in quibus deinde partim pulsatione & pressione arteriarum ipsis subjacentium, partim fibrarum musculosarum interjacentium tensione ac renisu rursus impellitur, & ejus regressus versus cor promovetur. Alterum & minus principale organon, sanguinem impellens, sunt, mea sententia, ipsi pulmones, per quos decies, imò magis celerius sanguis circulatur, quam per reliquum corpus, quoniam eodem tempore ex vena pulmonali, brevi canali, respectu totius systematis venosi tantum sanguinis effluit, quantum ex omnibus venis totius corporis simul sumtis in eos adfluit; impulsus autem hic præstatur per inspirationem; quando enim vesiculosum hoc corpus, mediante aëre foras intro hausto, inflatur atque attollitur, ramificationes copiosissimæ arteriæ & venæ pulmonalis non tantum exporriguntur, ut sic sanguis eo melius & liberius angustos hos canales recta via pertranseat, verum etiam distentæ vesiculæ simul comprimunt interjacentia vascula sanguinea, ut tali impulsu facto, sanguinis circulatio per pulmones fiat celerior; accedit quod fluidi ætherei calidi, sub actu inspirationis, simul magna fiat admixtio, unde nullum dubium est, pulmones, ad calorem corporis conservandum & perpetuandum maximum conferre symbolum; hinc fluit ratio, quare animalia calidiora præ frigidis, marinis, piscibus, peculiare sibi hoc vindicent, quod gaudeant pulmonibus, & respirent, item in calidioribus pulmones sint substantiæ compactioris, ex vesiculis & meatulis innumeris ac exilissimis coagmentati, in frigidioribus autem magis vesiculosi; *qua de re videri potest celeberrimus BOHNIIUS in circulo anatomico pag. m. 75.* Ut adeo falsa sit hypothesis, sanguinem in inspiratione ventilari ac refrigerari, cum potius hac ipsa citatiori facta valde incalescat.

§. XIV.

Ulterius ad calorem in sanguine efficiendum ac-

cedit pressio, atque attritura sanguinis fluidi cum partium fibris solidis, unde quo rigidiores, densiores, imò quò angustiores sunt tubuli corporis nostri, per quos sanguis magna velocitate vehitur, eò major fit attritio, collisio, & vehementior excitatur calor. Videmus hinc, corpora, quæ strictiorem vasorum & cutis habitum possident, fibrasque habent spiritu animali turgidiores ac sensibiliores, longe acutiorem habere & persentire calorem, quam quæ prædita sunt habitu laxiori & spongiosiori, ibi enim non tanta fit, propter minorem resistantiam, attritura, nec tantus calor. Ex quibus omnibus hæctenus dictis consequitur, quò magis æther sanguini incolens, per impulsus cordis, artiarum, pulmonum compressionem, partiumque solidarum tensivum motum commovetur atque exagitur, eò immoderatiorem fieri æstus fervoremque. Qua de causa pulsus validus, vehemens & frequens, respiratio citatior, partium solidarum strictura, præsertim sub exercitatione & motu membrorum, testantur de majori sanguinis calore, ejus circulatione atque cursu per tubulos corporis citatiori.

§. XV.

Hæc jam sufficiant de inquisitione caloris, qui fit secundum naturam in corporibus sanis; devolvimur jam ad indagandas atque investigandas caloris, qui præter naturam fit, excessivi, immoderatiore causas ac ortum. Plurimi præsertim ex Cartesiana schola edocti, omnis febrilis & inflammatorii æstus causam, ex mixturæ sanguineæ turbatione arcessunt, existimantes, quando æther per poros sanguinis bene constituti & temperati recta via percurrit & transfluit, calorem tranquillum, placidum & naturalem generari, quando autem mixtura elementorum sanguinem constituentium fuerit turbata, particulis aliam posituram ac situm nactis, porisque inversis vel coangustatis, ætherem in placido suo transfluxu impediri, & propter situm pororum mutatum, majoremque resistantiam, ipsum vario modo refringi, reflecti, sicque motum intensissimè calidum concipere. Verum enim verò tametsi caloris febrilis indoles utique dependeat à motu intestino aucto particularum in sanguine ætherearum, quæstio tamen est, an ille à sanguinis mixtura turbata habeat suam originem, an verò potius hæc effectus atque productum sit istius motus intestini vehementissimè calidi, dum nempe talis modi motu humidum nutritioni & vitæ necessarium dissipatur, & solidum in sanguine nimis dividitur & dissolvitur. Neque sanguinis densitas atque crassities ætheris liberum transfluxum impediens, causa esse potest immodici caloris, sequeretur enim melancholicorum sanguinem, satis crassum, æstum talem ac ebullitionem facile concipere debere, quod tamen non accidit. Neque porro concedere possumus peregrinam materiam ætheris sanguini intimatam, instar fermenti, immediata actione sanguinem pervertere, ejus poros, situm mutare & ita producere calorem. Morbifica enim virulenta tenuissimæ naturæ miasmata immediatè afficiunt spiritus ceu rectores corporis nostri, quibus in crasi vel motu vitiatas, postea labem luunt exinde cæteri machinæ humores.

§. XVI.

Provolvimur jam ad examen illorum sententiæ, qui arbitrantur, calorem febrilem derivandum esse, ex sanguinis motu progressivo celeriori, permoti maxime hisce argumentis, quod in statu naturali ex celeriori facta sanguinis circulatione, sub membrorum validiori motu, labore, in personis cholericis sanguinem fluidum possidentibus, habitumque corporis

poris strictiorem, sanguis celerius circumvolvatur, magno intenso subsequente calore, quod parum ex pulsu celeriori, partim ex respiratione aucta dijudicant; exinde porro concludunt, quoniam in febribus, inflammationibus & ubicunque æstus præter naturam jungitur, ut plurimum frequentior & celerior sit pulsus, inspiratio aucta, circumfusi etiam sanguinem majori cum velocitate per tubulos corporis arteriosos & venosos. Ut autem totum negotium accuratius trutinemus atque examinemus, opus est, ut de pulsu, cui tota res videtur fundari aliquid subjiciamus. Notum est, pulsus celerem & frequentem unanimi fere sententia haberi pro febrili, ita ut signum quasi essentialiale & pathognomicum subministraret. Perspicuum autem est, vocabulum celeritatis & frequentiae, ratione temporis si sumatur, valde coincidere, sive unum idemque esse. Cum enim pulsus sit motus species, utique non aliæ differentiae conveniunt pulsui quam motui, jam autem omnis motus percussione atque impulsu præsertim fluidorum corporum per solida ideoque & pulsus est vel magnus vel parvus, quando nimirum portio liquidi magna vel parva pro una vice in tubulos propellitur; vel est vehemens seu validus, vel debilis quando nimirum vis movens impellens constringens valida aut debilis est; vel est celer seu frequens & tardus, quando nimirum crebrius vel tardius brevi temporis spatio perficitur motus; vel denique pulsus sicuti omnis motus ratione temporis aut vehementiae est vel æqualis vel inæqualis, intermittens vel continuus. Ad has species omnes pulsus illorumque differentiae debent ut opinor unice referri, modo quod ratione graduum major vel minor & conjunctionis debeat distinctio observari. Ex hoc igitur fundamento concludimus, consultius pulsus vehementem & frequentem, febrilem appellari debere, si velimus confusionem evitare. Diximus itaque pulsus validum in statu naturali, si humores sint liquidi, viæ omnes liberæ, efficere circumvolutionem sanguinis citatiorem, nam non potest aliter fieri, quam si cor systole vehementius constringitur, sanguinem in arterias eadem vehementiae velocitate ejici: quæ jam sanguine turgidæ novo accedente extrorsum debent moveri, & ad majus spatium distendi, unde oritur diastole seu pulsus, quem deinde arteriarum subsequitur systole, ubi venæ & cor sunt in diastole, qua systole ex toto arteriarum processu tantum sanguinis quantum cordis systole in arterias fuit injectum immititur in ipsas venas, ex quibus deinde successive, dum una particula sanguinis alteram, ut unda undam trudit, prolabitur in cor, hinc mirum non est, si crebrioribus vicibus & magna cum vehementia fiat sanguinis ex corde in arterias ejectio, & ex illis rursus in venas ac ex his eodem modo in cor celerrime etiam ipsum sanguinem circumduci seu circulari; an autem in febribus, ubi pulsus vehemens & frequens, interdum etiam debilis & frequens est, circulatio eadem ratione æquabiliter per omnes partes velox sit, non immerito potest dubitari.

§. XVII.

Nostri hæc est sententia: in omni calore morbofo, febrili, inflammatorio, sanguinis circulationem per totum corpus non esse æqualem neque semper citatiorem, sed potius quoad maximam sanguinis quantitatem lentiolem, & tardiolem. Diximus antea, si viæ sunt liberæ, sanguis fluidus & impulsus vehemens & creber; addimus hæc, si debita & reciproca proportio est inter systoles & diastoles motum, circumvolvi celerius cruoris massam, & fieri

calorem intensum, non autem febrilem vel præternaturalem. Quandocunque autem viæ non sunt liberæ, neque reciproca & æquabilis ubique est systoles cum diastole cordis & vasorum, circulus sanguinis non evadit æquabiliter citatior; impossibile enim est, si canales sunt obstructi vel constricti, & immissio quædam fluidi fiat in arterias per systolen cordis, non autem eodem gradu sanguis per systolen arteriarum infundatur in venas, promoveri sic satis celeriter sanguinis motum.

§. XVIII.

Jam autem nobis demonstrare incumbit, in illis morbis, qui excessivum, enormem & præternaturalem calorem atque æstum junctum atque complicatum habent, sanguinem non æquabiliter per totum corpus circulari, sed potius in nonnullis partibus ejus motum esse plane impeditum. Primum autem in medium afferre placet inflammationes, quæ febres quasi sunt particulares, totamque massam sanguinis, si major illarum vehementia, in febrilem æstum conjicere idoneæ sunt. Quis vero ignorat, partem quæ inflammatione afficitur, immodico calore, rubore, dolore, tumore tactui resistente & vehementi pulsatione corripitur. Jam verò convenit ferme inter omnes Medicos inflammationis causam esse obstructionem tubulorum capillarium arteriosorum, à sanguine vel sero ibi sive ob abundantiam, sive ob viscositatem congesto, ejusque impeditiori cursu factam. Ab hoc fonte promanant omnia omnino phaenomena, ex quibus inflammationem, adesse judicamus; primum enim efficitur tumor, quando sanguis per arterias majores cordis pulsu impellitur, & minores ramos atque apices spasmo vel constrictas, vel humore obstructas pervadere nequit, adeoque à venis non prompte recipitur, sed novo semper sanguine subvecto, arteriæ non tantum, sed & partes, quibus illæ adjacent, super justam naturalem molem tumescunt atque efferuntur; præterea in partibus inflammatis validissima arteriarum pulsatio cum dolore sentitur, utpote sanguis, quando arterias minus pervias libere transire nequit, retroire cogitur, atque occurrens sanguini à tergo affluentis, inter duos contrarios motus pressus utriusque impetu vehementissime in tunicas arteriarum impellitur, & cum insolenti fibrarum distractione ipsas extrorsum trudit ac urget, unde violenta arteriarum diastole sive pulsatio exoritur, quo motu violento & distensione fibræ nervorum, fluidi elastici copia animata, valde pressæ molestissimum dolorem inducunt. Quamvis itaque inflammatae partes sanguinis copia turgidæ atque infarctæ sint, ipseque in circulatione sua valde impeditus sit, nihilominus intensissimo æstu atque fervore corripuntur, videtur hoc proficisci à nulla alia causa, quam quod sanguis, vehementer in arteriarum pulsatione pressus atque impulsus, item resultu & impetu sanguinis tam ex corde affluentis quam ex partibus regurgitantis renisu agitatus, atque attritus motum intestinum, vorticolum, vehementissimum adeoque ferventissimum concipiat, particulae vero atheræ æstuantentes denso agmine egredientes e poris ardorem non minus quam colorem rubicundum partibus affricent. Non autem hoc loco negamus, illud ipsum, quod valde in sanguine liquidum est calidumque, partim obstructionum claustra perrumpere, partim per laterales arteriarum ramulos apertos & vicinos eodem impetu continuato per tubulos venarum ad cor pulmonesque deferri & citatissime moveri, sicque cor ad systolen & pulmones ad respirationem citatiorem adigere atque invitare, quamvis

vis per vehementem licet impulsus pauca tantum sanguinis portio in arterias tumefactas effluat.

§. XIX.

Ardor ille, qui febribus intermittentibus associatur, à nulla quoque àlia causa proficiscitur quam ab impeditiori ejus cursu per vasorum capillamenta in cute existentia. Quodcumque enim cutis pori, tubulique minimi excretorii, & vasa capillaria infarcta atque repleta sunt stagnante materia, vel spasmo contracta & coarctata, sanguis primum à circumferentia ad centrum sive ad cor, interiora majora vasa atque pulmones deferitur; unde venæ cutis disparent, habitus corporis detumescit, & frigoris atque horripilationis sensus observatur. Postea autem sanguis in magna copia circa cor pulmones & vasa majora congestus, ipsaque distendens, anxietatem oppletivam efficit; adaucta itaque respiratione, & invitato majori & impetuosiori influxu fluidi elastici nervei in cor, systole ejus producit non tantum validissima sed & frequens, quam necessarius subsequi solet in eodem gradu diastole sive pulsus vehemens & frequens; eum nimirum in finem, ut ab onere premente liberetur; quoniam autem per vasa minima minus pervia sed contracta eadem velocitate sanguis peragere nequit, ibi interceptus, majus spatium efficit, cutemque in tumorem attollit. Et quoniam ad obstaculum profectus cruor retroire cogitur, atque novo affluenti occurrit, inter duos motus veluti pressus, non tantum in arteriis expansionem violentiorem & crebriorem diastolen efficit; sed & exinde calorem, à mutuo illo insultu atque particularum sanguinis juxta se positarum impetuosa attritura, immodicum æstum cum rubore parit; quæ phænomena satis tempore caloris apparent. Ubi tamen iterum monemus non plenarie sanguinis cursum esse impeditum per totum corpus, sed utique concedimus, tenuissimam, fluidam, igneamque sanguinis portionem, partim obstructos poros percurrere, partim etiam per vasa aperta adhuc magna celeritate circulari, donec obstructionibus in cute remotis sanguini liber atque æqualis suus circulus restituitur, quo tempore statim pulsus fit naturalis, respiratio & transpiratio liberior, calor immodicus attemperatur, viresque prorsus eriguntur & ita finitur paroxysmus. Febres diarias à pororum cutis obstructione, transpiratione impedita, habitu cutis contracto oriri, adeoque circulatione sanguinis impedita generari in propatulo est. Synocha in plethoricis & sanguineis à sanguine copioso ortum suum habet, qui per vasa minima extremarum partium in cursu suo præpeditur, unde regurgitans ad vasa interiora, anxietatem oppressoriam, dolorem dorsi, pulsationem arteriarum vehementem & inflammatorium tandem æstum ob eandem causam producit. Causus, & febris biliosa cholericæ ardentissima nullam aliam agnoscit causam, quam impeditiorem sanguinis per vasa minima motum, unde ordinariò tam in principio quam in exacerbationibus, horripilatio, sudoris & transpirationis suppressio adest.

§. XX.

Uterius constat experientia, dolores graviores in partibus sensibilibus suscitatos comitari semper febri- culosum simul sanguinis æstum, uti id clarum fit in dolore à calculo, in cephalalgia, arthritide; præsertim si personæ fuerint juvenilis ætatis, texturæ sensibilis & ingenii activioris; in tali vehementissi-

mo dolore semper observatur pulsus validus & frequens, immodicusque calor, vigiliæ, capitis dolor, urina pauca & rubicunda est. Jam autem res dubitatione caret in parte dolente esse sanguinis impeditiorem motum, dum dolor vel à pressione distensioneque nimia membranarum, ob materiam copiosius stagnantem & in parte infarctam, vel à spasmodica fibrillarum nervearum contractione, tubulorumque sanguineorum coangustatione perficitur; unde etiam gravis dolor ferme conjuncta habet eadem symptomata, quæ inflammatio, & dolor gravior semper fere in inflammationem transit.

§. XXI.

Ad confirmationem nostræ sententiæ, quæ nimirum est, in omni immodico æstu, qui & febribus intermittentibus, acutis, inflammationibus, doloribus gravioribus jungitur, partim impeditiorem, partim inæqualem esse sanguinis circulum, & a nimia allisione, impulsione, pressione sanguinis incendium illud oriri, facit inter alia & ratio medendi hisce affectibus, hæc enim in eo tantum versatur, ut si a nimia sanguinis plenitudine impeditior circulatio fiat, sanguinis quantitas per venam detrahatur, quod in inflammationibus gravioribus, corporibus plethoricis, temperaturæ sanguineæ, juvenilis ætatis, remedium semper est præsentissimum; deinde maxima & unica ferme curandi inflammationes, febres, dolores spes ponenda est in blandis diaphoreticis, sanguinem dissolventibus, discutientibus, poros aperientibus, ut hac ratione fluxili reddita materia stagnante, hæc in vasa iterum recipiatur, vel per cutis poros discutiatur & ita vitalis circulus restauretur, quo facto omnia pullulantia symptomata protinus expirant. Talis modi autem remedia sunt illa, quæ sale subtili tenuique plus minus temperato, & sulphureo vaporoso tenui principio constant, quæ blande spirituum tumultuarium motum demulcendo, spasimum, frequentius principem & occasionalem febris causam, tollit, partim etiam materiam crassam fluidificando ac coagulum humorum dissolvendo radicem morbi præscindunt. Et hæc quoque est ratio, quare liquida copiose assumpta, item nitrosa omnis generis, in dictis affectibus quibus complicatur gravis æstus, omnibus ferme palmam præripiant, dum nimirum fluxilitatem sanguinis & humorum per multum adaugeant & sulphureas igneas partes valde contemperent, item cur *Exc. Dn. Præses* pulvere, qui compositus est ex diaphoreticis terreis, nitro purificato & momento camphoræ, quem in aquis diaphoreticis v. g. aqua florum sambuci, acaciæ, papaveris rhœados, scordii, cardui benedicti debita dosi, tempore & ordine propinat, subministrata diætâ tenuissima & humida ac regimine addito temperato ad diaphoresin promovendam necessario, non solum hisce, sed & aliis gravissimis malis securissime, compendiose & felicissimo cum successu medeatur, uti sæpiissime ab *Exc. Dn. Præsidi* apud lectum multorum ægrorum vidi & observavi. Fluit quoque tandem inde ratio, quare omnia externa calide discutientia, poros aperientia, in doloribus, & inflammationibus præsentissimum ferant auxilium; contra omnia frigida, incrassantia, obstruientia malum mirifice exasperent ac adaugeant. Sed hæc jam hac vice sufficiant. Deo interim pro præstita gratia atque auxilio immensas persolvo gratias.

DISSERTATIONES TRES,

D E

CORPORIBUS,
EORUMQUE MOTU.

DISSERTATIO PRIMA,

DE CORPORIBUS,

ILLORUMQUE PRINCIPIIS ET AFFECTIONIBUS.

Primum edita anno 1695.

§. I.



PHYSICA est scientia rerum & effectuum naturalium, methodo mathematica a priori demonstrata, a posteriori autem innumeris experimentis corroborata.

NOTA.

Scientia dicitur, quia est cognitio certa & evidens. Methodi mathematicæ requisitum palmarium est, ut semper a certis per se notis facillimis incipiamus, & gradatim pergamus ad magis ignota, difficilia, composita; quæ Methodus verè Demonstrativa est, & scientiam parit, qua & ipsi Physici uti debent. A priori est, cum effectus ex causa infertur; a posteriori, cum causa ex effectu. Experimenta circa res naturales varia, partim ex Mechanica, Statica, Optica, Chymia petita, satis imaginationem nostram convincere, & assensum extorquere possunt demonstrationum nostrarum, & propter hæc experimenta Physica dicitur Philosophia Experimentalis, seu Mechanica.

§. II.

Principia, quibus Physicus in Demonstrationibus suis utitur, debent esse (1) prima, simplicissima (2) non imaginaria, sed intelligibilia (3) ex ipsis desumpta; (4) ex illis omnia naturæ phænomena explicari debent vel possunt.

NOTA.

Quoniam Physica est Scientia, Physicus causas effectuum ac phænomenorum naturalium certas & evidentes reddere debet ex principiis clavis & distinctis evidentissimis, quæ nulla egent probatione, sed prima vera & immediata esse debent. Bene dicit ARISTOTELES Lib. I. Cap. I. Naturæ Consultatio: Existimamus unumquodque nos cognoscere, quando primas no-

Frid. Hoffmanni Oper. Supplem. II.

vimus causas, & prima principia, & usque ad elementa.

Requisita autem horum principiorum sunt, ut (1) sint Prima, id est, non principiata, nec alterius causæ effecta; hinc bene dicit PLUTARCHUS Lib. X. Cap. II. Principia vocamus ea de causa, quia nihil illis est prius, ex quo fiunt. Nam alias non essent principia, sed illud ex quo facta sunt: (2) Debent esse non imaginaria, sed intelligibilia, id est ab omni sano homine clare & distincte concipi & intelligi debent, ita ut etiam quivis in alio homine similem notitiam & conceptum de illis formare queat, quod de omni re vera & intelligibili valet; e contra autem, quæ beneficio phantasiæ ficta sunt, non clara, sed obscura sunt, hinc ab aliis non tam facile concipi, vel illis infallibiliter demonstrari possunt. (3) Ex rebus ipsis desumantur, id est, principia physica in ipsis rebus naturalibus reperiri & demonstrari debent, nec debent esse saltim abstractæ generaliores rerum notiones a rebus ipsis sæpe distinctissimæ, quibus ut plurimum Logici & Metaphysici ad sua demonstranda uti solent. (4) Effecta & Phænomena naturalia ex illis deduci & explicari debent, alias non essent sufficientia: non opus autem est, ut semper deducantur, sed sufficit ut ostendatur illa exinde deduci posse: Imbecillitas enim intellectus nostri, & ipsa res non semper patitur, phænomena innumera in varietate constituta, & a sensibus aliena, commode semper explicare: Hoc autem non imputari debet incertitudini principiorum physicorum, sed intellectus nostri tenuitati; neque Mathematici semper problemata data omnia, quæ principiis ipsorum certissimis ac verissimis non repugnant, solvere ex illis possunt. Maxime autem in supra-cœlestibus & subterraneis deficiunt demonstrationes evidentes, sed hic magis verisimiles & probabiles hypotheses locum obtinent.

§. III.

Elementa quatuor, itidem Materia & Forma substantialis, Principia Chymistarum, Recentiorum Acidum

dum & Alkali, & Mori spiritus Hilarchicus, quoniam requisitis superioribus carent, merito ex numero principiorum exterminanda sunt.

N O T A.

1°. Peripateticorum *Elementa* mixta sunt, non simplicia; quid per ignem, qui alias corporum & formarum destructor esse solet, intelligant, ipsi ignorant; denique prorsus non sufficiunt effectuum ac phaenomenorum explicationi. Quis enim commode ex illis causam albedinis in vitro contuso, firmitatem ex duobus liquidis confusis emergentem, ex duobus diaphanis colorem, & tandem ex duobus frigidis summum calorem rite explicare poterit?

2°. ARISTOTELES quid per *Materiam & Formas substantiales* intelligit, ipse nescit, sunt generaliores saltim & phantasticae notiones, ex physicis rebus minus desumptae. Materiam dicunt esse ens pure passivum, id est merum nihil; si enim non per se entitatem actualem habet, verbi gratia extensionem in longum, latum, & profundum, actum est de materiae natura, nec potest concipi; quis enim intelligere potest illud, quod nihil est, quod est pura potentia, & nihil habet actus: Deinde non sunt prima, quia materia omnem suam existentiam debet formae, & vice versa formarum origo est ex potentia materiae. Formae Corporum tam mixtorum quam viventium substantiales quid sint, nemo sanae mentis concipere potest, qua ratione enim quis intelligere potest rem incorpoream, extensam tamen, nullas partes habentem, & nihilominus per totum corpus diffusam? Deinde quis intelligere potest transmutationem illarum, dum ex aqua fit planta, ex planta chylus, ex chylo sanguis, ex sanguine caro, ex carne infecta &c.? Dicunt has formas esse incognitas, sed quivis hic facile percipit, qualis futura sit scientia, quae tam obscuris nititur principiis.

3°. Principia Chymicorum non simplicia sunt, sed composita ex aliis, nec ipsi Chymici quid per sal, sulphur, mercurium intelligant, sciunt, dum salia & sulphura in rerum natura diversissima sunt, nec volatile etiam diversissimum, verbi gratia in aqua, spiritu vini, sale volatili, mercurio vivo commode explicare possunt; denique illa sola prorsus non quadrant omnium phaenomenorum naturalium resolutioni, verbi gratia in explicanda corporum naturalium vi elastica & ipsorum gravitate, & etiam ipsis Chymicis, verbi gratia cur aqua praecipitet essentiam benzoës? Item cur sulphur cum Luna, quae alias difficillimae est fusionis, mixtum, illam ad facillimam liquationem disponat; e contra mixtum cum saturno, qui facillimae fusionis est, illum ipsum plane illiquabilem reddat.

4°. Quod attinet *Acidum & Alkali* Neoterico-rum, illa nec simplicia sunt, nec plane sufficientia, non tantum quoad explicanda naturae Phaenomena, verum etiam quoad ipsos chymicos effectus: Nimirum cur sulphur ardeat? quare aqua effervescat cum oleo vitrioli? item cur alcali, verbi gratia, oleum tartari per deliquium praecipitet aliud alcali, nimirum aquam calcis vivae? item cur spiritus vini, quem putant acidum, cum spiritu nitri fortissimo intensissime effervescat? &c.

5°. Nec spiritus ipsius Mori, quem animam mundi & principium corporum activum judicat, admitti potest; desumpta illa sententia ex PLATONE est, & vestigia hujus Philosophiae extant apud BOETIUM:

*Tu triplicis mediam naturae cuncta moventem
Connectens animam, per consona membra resolvis;
Quae cum secta duos motum glomeravit in orbes
In semet reditura meat, mentemque profundam
Circuit & simili convertit imagine caelum.*

Satis strenue hanc Philosophiam aggressus est Cl. STURMIUS in Epistola ad ipsum data, cujus verba haec sunt: *Spiritum aliquem unicum universo mundo ordinarie regendo praefectum esse, effectibus naturae quotidianis & leviculis, quibusque misceri haud necessarium, immaterialem & spirituales hanc substantiam universo coextendi, contradictorium; spiritum intellectu destitutum, οὐδὲν ἔχον, rem brutam & insensatam rerum corporearum species & formas tam varias ac summi in quibusdam artificii conservare & propagare, incredibile; vitam plasticam rem inauditam & inexplicabilem, universum hoc magnum animal dicere absurdum.* Deinde blasphemum dicere est, spiritum hunc mundi esse fabrefactorem, cum solus Deus, auctoritate sacrarum literarum, immediate, coelum & terram & hominem fecerit, & omnia animantia, non mediante quodam spiritu, qui tamen & vim & motum suum ab ipso Deo haberet, necesse esset. Porro cum materiam omnem dicant passivam, omnis actionis expertem, & omnium naturalium effecta, vires, proprietates, qualitates a spiritu ceu activo deducant, cujus notitia cum confusa, rudis & incognita sit, facile videmus qualis scientia & causarum naturalium cognitio in Physicis, Chymicis, & Medicis sit expectanda, id est nulla.

§. IV.

Fundamenta & criteria veritatis in physicis sunt, sensus & ratio.

N O T A.

Sensus sunt conditio sine qua non veritatum physicarum; fallunt autem & falluntur soli absque iudicio & directorio rationis maxime in ipsis opticis, & in essentiis rerum dijudicandis: sic si saccharum gustamus, nescimus an dulcedo sit in saccharo, an in nobis ipsis. Quod autem porro ipsi sensus fallant variis experimentis probari potest opticis, verbi gratia ponendo ducatum in patinam aqua repletam, ubi certo in situ ego constitutus saltim video radium; 2°. Probari potest per microscopia & refractiones rerum positarum in ipsa aqua; sol tempore matutino propter atmosphaeram densiorem & lineam horizontalem longe major videtur quam in meridie. Item optime probari potest sphaera vitrea, cui duo tubuli sunt inserti, qui terminantur statim in principio sphaerae, & tamen si in unum aqua infunditur, descendit in alterum, via vel medio nullo apparente, cujus beneficio id fieri possit, sed a sola aëris compressione id fit, &c. Quapropter in sensuali experientia, cui fidendum est maxime in opticis, organon debet esse bene constitutum; deinde proportio debet esse inter objectum & organon; 3°. medium debet esse ordinarium; adeoque praeter sensus in physicis praecipuum criterium veritatis debet esse ratio certa, evidens, & circumspecta, quae ubi sensus deficiunt, sedula phaenomenorum collatione id supplere debet, & ex sensibilibus, visibilibus notis caute subtiliora ignota colligere, si non vera, tamen verosimilia debet.

§. V.

Physicam, seu cognitionem naturalium in omnibus non habemus perfectam.

N O T A.

Natura admirando artificio a Deo ejus autore sapientissimo constructa est, in cujus abdita & intimiora, partim ob intellectus nostri imbecillitatem, mentem finitam & limitatam in rebus cognoscendis, partim ob experimentorum defectum, & sensuum debilitatem, ac investigandorum remotionem descendere

cendere perfectè non licet. Multa itaque beneficio hypotheseum non secus ac Astronomi scimus, & incognita deducimus, quas eo usque servamus, donec quis meliora adferat. Deinde ultra captum mortalium sunt spirituum & corporum intimiores essentiae, fines mundi, principium corporis, figura & connectio particularum fluida constituentium, idea motus, in quonam consistat, &c. Hic satius est ignorantiam cordate profiteri, quam cogitationum figmentis & chimeris nos & alios fallere: modo in quantum Deus nobis concessit, in ea ritè inquiremus in usum mortalium, & cognitionem Dei, abundè satisfactum puto Physici officio.

§. VI.

Corpus naturale est res extensa in longum, latum & profundum, varia figura, & magnitudine donata, gaudens resistentia, actionis & passionis capax.

N O T A.

Essentia Corporum, in quantum intellectu nostro eam attingere licet, consistit in extensione: formalis enim & quidditativus corporum conceptus est extensio in longum, latum & profundum, sine qua nec corpus cogitari potest, & quæ nulli rei intelligenti, nisi soli corpori inest. Falsum hinc est, dari ens realiter existens saltim longum & latum, non autem profundum: & quamvis longitudo, latitudo & profunditas mente abstrahi & varie considerari possit à Mathematico, negatur tamen, separatim subsistere illa ipsa posse extra mentem. Magnitudo autem & figura sunt saltim modi & accidentia corporum, & utut extensum non sine figura, quæ extensi terminatio est, & magnitudine concipi possit, quoniam autem figuræ sunt innumeræ, & magnitudo, vel major vel minor, hinc certa figura & magnitudo corporis modi sunt ipsorum corporum: Actionis & passionis capax est, quoniam videmus, corpus movere aliud corpus, & etiam moveri, seu impulsu ac motum alterius recipere posse, & variis mutationibus ac alterationibus esse obnoxium. Per resistentiam intelligo vim extensam a Deo concessam, qua unum corpus alteri magis vel minus propter compactionem resistit arttorem, ipsique magis vel minus cedit. Sic aurum magis resistit quam lutum, lutum quam aqua, aqua quam aër & terra.

§. VII.

Corpus omne naturale, quoniam est extensum, divisibile est, & impenetrabile.

N O T A.

Ex extensionis natura fuit *Divisibilitas & Impenetrabilitas*: In extenso enim partes extra partes positæ concipiuntur, & quoniam omnis extensio respicit lineam ex una vel diversis superficieculis conflata, hinc dividi potest, & quoniam absque fine, in partes proportionales minores semper & minores, quia enim extensum non potest dividi in indivisibile, ergo in partes ulterius divisibiles, & quamvis actu physico a nobis, (quia quælibet corporis pars determinatam a Deo suam habet quantitatem) illa divisio fieri nequeat, sufficit tamen, quod sit possibile & ab ipso Deo sic dividi possit, actu nimirum inadæquato, id est, ut post actualem divisionem semper supersint aliæ divisiones possibiles, inde tamen non sequitur, extensionem materiæ seu corporis esse infinitam; illud enim infinitum dicitur, ex quo accipientibus secundum certam quandam quantitatem semper restat accipere secundum eandem.

Ex extensionis natura fluit etiam *impenetrabili-*
Frid. Hoffmanni Oper. Supplem. II.

tas, dimensionum enim non datur penetratio; unius enim corporis extensio ab alterius extensione est diversa, & duo corpora eidem spatio simul inesse nequeunt, si enim essent in uno loco, necesse est ut unum absque extensione concipi possit, quod hic nullatenus fieri potest. Quod corpora sint impenetrabilia inter alia fundamentum primum est totius Philosophiæ experimentalis, & innumera experimenta inferiori loco memoranda id patefaciunt. Ubi aqua est, ibi non potest esse aër, & vice versâ. Utilissimum illud inventum campanæ urinariæ fluit ex eodem fundamento. Sic quoque jucundo spectaculo videmus aërem a mercurio in tubo contento, si invertatur, cogi in bullulas, quæ per mercurium ascendendo superiora petunt; idem procedit cum oleo tenaciori; & quod porro aër non penetret aquam patet ex flamma, quæ in vitro aëre repleto intra mediam aquam ad tempus ardet.

§. VIII.

Stupenda datur Corpusculorum exiguitas.

N O T A.

1º. Probari hoc potest demonstratione Geometrica, dum nimirum duæ lineæ parallelæ describuntur, deinde ducatur a superiori ad inferiorem linea perpendicularis, & in inferiori designetur punctum, a quo ducantur lineæ rectæ per perpendicularem ad superiorem, hinc patet in tot partes dividi posse lineam perpendicularem, quot possunt duci lineæ a puncto; possunt autem in infinitum duci lineæ rectæ. Lineæ enim ita transeunt perpendicularem, ut nunquam duæ illarum eandem lineam secant in eodem puncto, alioquin duæ lineæ rectæ ab eodem puncto ad diversa puncta tendentes convenirent inter se alibi quam in puncto, a quo recedunt, quod tamen est impossibile.

2º. Probatur exemplo actualis divisionis, quæ fit ab Artificibus, qui aurum ducunt, sic enim ab illis diducitur, ut cubus auri quinque lineis altus, in sexcentis mille & amplius partes sensibiles & æquales dividatur.

3º. Videmus lucem per poros vitri, qui tamen arttissimi sunt, & nullo microscopio cognoscuntur, transire posse, & oculos vehementer commovere, quem motum visus vix sufferre potest, & hinc lucis particulæ aëre, qui nullo modo vitrum transit, necessario longe subtiliores esse debent.

4º. Effluvia Magnetis per tabulas ligneas, per solidissima metalla permeantia & acum mirifice ad ulnam suam magnete nostro remoto commoventia fatis claram faciunt particularum subtilitatem.

5º. Subtilitas materiæ cognosci potest ex divisione corporum etiam durissimorum, per ignem & aërem, dum verbi gratia in minutissimas atomos cogi potest mercurius, vel aqua, vel spiritus vini, item corpora resinosa, quæ odores excitant, patefaciunt; nec non menstrua, dum aurum & mercurius in subtilissimas atomos resolvitur, item stannum, cuprum, cujus unum granum solutum totam amphoram aquæ colore inficit caruleo.

Tandem animalcula minutissima fluidis instructa, quæ organa illorum movent, & animalculorum exigua ova sufficientissime stupendam exiguitatem Corpusculorum demonstrant.

§. IX.

Corpora omnia non sunt continua, sed contigua & consarcinata ex pluribus figura & extensione differentibus particulis artificiose inter se concatenatis in certum ordinem.

NOTA.

1°. Quod sint contigua, & ex variis particulis diversis constent, probatur ex intervallis & poris diversis, si enim ex corpusculis similibus & homogeneis constarent, similes essent pori, quod autem dissimiles sint, probatur experimento, dum nimirum in aquam fontanam vel simplicem varia salia, diversa figura gaudentia, immittuntur, & omnia solvuntur in illa; solutio autem nihil nisi discontinuatio, divisio, & in poros receptio particularum est; uti autem est locatum, sic quoque debet esse locus, hinc cum figuræ illæ particularum sint diversæ, necessum quoque est, ut diversa adsint interstitia.

2°. Alii pori sunt in Auro, alii in Argento, alii in Antimonio, alii in Plumbo, alii in Stanno, hinc ratio facile elucet, quare Aqua fortis non solvat aurum, bene autem lunam; Aqua regis aurum & antimonium, non autem lunam; Acetum plumbum, non autem stannum; Aqua regis stannum, non autem bene saturnum.

3°. Etiam in Terra diversi sunt pori, quod probatur, quia cineres ossium porci non inserviunt separationi auri vel lunæ ab ignobilioribus metallis, quod docimasticis notum est, e contra autem optime in hunc finem quadrant cineres ossium bovorum, ex quibus cupellæ suprema superficies adornari solet.

§. X.

Nullum Corpus etiam, quod videtur solidissimum & durissimum, destitutum est poris seu intervallis.

NOTA.

Quod in vitro sint pori probat lucis transitus, item quod a calore liquores in vitris rarefiant, & a frigore condensentur, tertio halitus oris in thermometro subtilissimo in spiras contorto liquores movere potest contentos, & illorum motum etiam pro lubitu suspendere. Quarto vitri permeabilitatem demonstrat optime Dominus BOYLEUS per ponderabiles flammæ partes, quæ transeunt ipsum vitrum, & augent materiam in vitro detentam ad sensibile ponderis incrementum. Testa ovi quod habeat poros probatur, quia calore aquæ albumen ovi induratur; item charta licet sensibiles poros non habeat, quod tamen insint pori patet, quia non incenditur igni imposita, si in superficiem superiorem cum ore fiat inflatio. Adamas, qui omnium lapidum est durissimus, quod poros habeat, probat ejus calefactio & attractio pilorum & aliarum rerum, modo in panno bene fricetur. Quod in corio durissimo pori sint, probat spiritus sulphuris fumans volatilis, qui in momento illud penetrat, & lunam inclusam nigricante colore tingit. In gemmis quod insint pori, probatur ex earum colore; in metallis, ex eorum solutione, deuratione; in ossibus, ex coctione & coloratione; in cute, ex traiectione Mercurii; in metallis omnibus, magnetis effluviorum penetratione; & tandem quod adsint pori in metallis, omnium optime probat illorum levitas & gravitas specifica, hinc unum altero specie gravius est, graviora enim illa sunt, ubi paucissima adsunt interstitia, sed densa ac impacta. In levibus autem pori sunt copiosi & ampli, repleti aëre, vel leviori quadam substantia; nisi enim adessent pori in corporibus, & levior quædam substantia, omnia corpora eandem haberent gravitatem.

§. XI.

Ubique Corporum plenitudo est, hinc non datur vacuum, non tamen absurdum est; quoniam corporum,

quæ contigua sunt, adeoque actu divisa, dari debent principia, existere quoque puncta inextensa & indivisibilia.

NOTA.

Ubique in mundo concipimus & percipimus extensum in longum, latum, & profundum, item motus continuos, ibi autem magnum vacuum fieri & existere nequit. Non negamus tamen extra corpoream hanc molem, quæ mundus est, dari terminos posse nobis incognitos, soli naturæ autori, qui totum systema ipse composuit, notos; in quonam autem illi termini consistant, ultra captum & intellectum nostrum est scrutari; deinde etiam dari in Mundo indivisibilia quædam & inextensa puncta cum acutissimo LEIBNIZIO in sua theoria motus statuimus, quia si omnia plena & continua essent in mundo corporibus, nullus posset motus & extensi principium vel finis intelligi, vel concipi actualis corporum divisio. Datur enim initium finisque spatii, corporis motus, temporis alicujus, & quoniam initium extensi seu punctum corporis dividi adhuc potest, & ipsi adhuc adimi potest, necesse est in extenso non quærendum esse initium, quia ei adimi quid potest extensi, cui autem nihil extensionis adimi potest inextensum est; initium ergo corporis, spatii, motus, temporis, aut nullum, quod absurdum est, aut inextensum erit. Quid autem illud inextensum sit, ultra intellectum est scrutari.

§. XII.

Extensi affectiones & proprietates essentielles sunt magnitudo, figura, motus, quæ etiam vera corporum existunt principia, quibus Physicus ad reddendas operationum causas uti debet.

NOTA.

Præter cogitationem, quæ ad corpus non spectat, homo nihil nisi extensionem ejusque modos, seu in illo extenso magnitudinem, figuram, vel motum concipere potest: sine his ne minimum quidem corpus cogitari potest; sunt itaque catholicæ & radicales corporum affectiones, veraque illorum principia & causæ, ex quibus deinde formæ, operationes, effectus omnes naturales fluunt, quibus principiis mutatis, mutantur etiam effectus; Denique in hæc ultimato omnia corpora resolvuntur.

In Grammaticis literæ sunt principia, quæ innumerabiles formant voces. In Geometricis lineæ, ex quibus omnes figuræ resultant, & in quas demum omnes voces & figuræ resolvi possunt, uti autem sine accurata litterarum cognitione nemo linguam, sine linearum perspecta natura Geometriam addiscere potest: sic nec Physicus aliquid scire vel demonstrare poterit sine notitia figuræ magnitudinis & situs & motus extensi.

§. XIII.

Omnia Corpora composita sunt ex particulis diversa magnitudine, figura, & ordine, seu situ gaudentibus.

NOTA.

Pauca sunt rerum naturalium principia, & simplicissima, quibus debetur innumerarum rerum varietas, quod magis stupendum reddit Dei artificium, nam machinæ omnes artificiosissimæ, quo simpliciore via sunt constructæ, eo magis sunt præferendæ illis, quæ ex variis viis sunt compositæ. Deus, ceu sapientissimus Mechanicus motu produxit rerum diversissimarum universitatem, corporeamque hanc molem. Mathematici omnes lineas, figurasque a motu quopiam describi posse sufficienter norunt, quantaque sit

fit differentia in figuris recti vel curvilineis regularibus & irregularibus, & quam infinita corporum genera ex planorum vario motu rotationeque ratione figuræ oriantur, ipsi demonstrare ex facili possunt, unde non mirum est, diversorum corporum faciem & externam figuram existere & oriri ex tanta diversitate figurarum, concurrente simul ipsa ma-

gnitudine ordineque. Magnitudo prout in corporibus variat, dum nimirum nullum concipi potest, quin eo dari vel concipi possit majoris vel minoris molis, diversa quoque ratione variorum effectuum sistit corpora. Particularum juxta se invicem situs & ordo diversissimus, diversissima producit effecta in corporibus.



DISSERTATIO SECUNDA.

D E

CORPORUM MOTU, EJUSQUE CAUSIS.

Primum edita Anno 1695.

§. I.

NULLUS effectus, nulla actio, vel virtus corporum naturalium concipi potest sine motu.

NOTA.

Quemadmodum Universi productio, sic quoque corporum conservatio, quæ productio est continuata, concipi nequit sine motu, dum enim Deus ex chao varias corporum species & formas eduxit, extensum in diversas partes divisit, figuravit, ac translocavit, id omne intelligi nequit sine motu. Neque ulla in corporibus fieri potest mutatio, destructio, vel generatio, sine motu partium locali. Motus hinc præcipuum naturæ instrumentum est, quo perpetuo utitur in suis operationibus; & totius mundi vicissitudines, & mutabilitates derivari ex motu commode possunt; denique nec Physicus sine motu ullius effectus, vel phænomeni naturalis rationem declarare vel corporum qualitates explicare potest. Medicus modum agendi medicamentorum, Chymicus operationum suarum fundamenta & ætiologias sine motus doctrina utilissima tradere ac exponere vix poterit.

§. II.

Motus est mutatio status Corporum.

NOTA.

Definitio hæc videtur rationem formalem motus, & effecta ejus declarare, nullum enim corpus movetur, quod non post motum aliter sese habeat quam antea, ad minimum ratione situs; & omnis mutatio, alteratio, divisio, diminutio, figuratio corporum, nil nisi motio est. Cartesiani definiunt motum per separationem corporis a contiguo corpore, verum hac ratione & quiescens movebitur; verbi gratia si manum tollis a tabula, secundum hanc definitionem, non tantum manus, sed & tabula movebitur, quod tantum omni sanæ rationi repugnat. Melior videtur illa definitio, dum motus dicitur mutatio viciniae corporum in distantiam aliorum; puta ex vicinia eorum corporum quæ illud immediate contingunt, in viciniam aliorum distantium.

Frid. Hoffmanni Oper. Supplem. II.

§. III.

Omnis motus, & nifus ad motum, requirit Virm Motricem, deinde rem mobilem, porro desiderat medium per quod corpus ferri debet, & denique tempus.

NOTA.

Per se & ex sua natura extensum, ex quo corpora constant, iners est & otiosum, omnis actionis, etiam motus expers, hinc non agere vel movere, vel moveri potest a se ipso, sed causam debet habere aliam, & hæc est vis activa omnibus Corporibus in creatione communicativa, quam Deus immediato concursu suo adhuc constantissime conservat: Hæc autem non extensum quid est, sed potius inextensum, & ipso extenso prius, & corporum principium activum, movens, sine quo nec corporum motus, aut principium, aut finis illorum intelligi potest.

2º. Requiritur ad motum mobile, quod est ipsum extensum in longum, latum, & profundum impenetrabile, quod viciniam corporum deferere & in aliam viciniam corporum transferri debet, & hoc principium corporum passivum recipiens est.

3º. Ad motum requiritur medium, quod constituunt corpora ambientia, per quæ motus fieri debet, hæc autem cum non possint penetrari, saltim dividuntur, & quodcunque corpus non potest dividere ambientia corpora, per illa etiam non potest moveri.

4º. Ad motum requiritur tempus, omnis motus enim est successivus, hinc fit in tempore, nam corpus constat ex anterioribus & posterioribus partibus, quæ per corpora ambientia in instanti percurrere non possunt, sed posteriores sequi debent anteriores: Quo autem plus spatii in corporibus ambientibus absolvit mobile, eo motus velocitas major æstimatur; hinc tempus omne fluit ex motu, & nil nisi mensura motuum est maxime æqualium, quos verbi gratia solis sidus, perpendiculara & transfluxus aquæ vel arenæ per varia instrumenta efficiunt.

Definitur etiam tempus, quod sit mensura successivæ durationis alicujus rei derivata a motibus aliorum corporum æqualibus.

§. IV.

Deus uti extensi, sic quoque omnis actionis & vis moventis in ipso primaria causa & fons est.

* G 6

NOTA.

N O T A.

Deus ceu actus purissimus omnis passionis expers causa prima omnium virium motricium est. Vis activa in primordiis rerum extenso communicata semper adhuc præsens est, viget adhuc & operatur, concursu Dei, sine quo corpus esset mortuum: Limitatur autem ac modificatur hæc varie pro diversitate ipsius extensi figurati, divisi, & situati, secundum liberrimum beneplacitum & decretum ipsius Dei, qui ipse materiam sic statuit, & in natura rerum sic agere voluit; sicque Deus concurrat ad omnes actiones seu motus corporum in se spectatas, ceu causa prima & generalis. Consentit in hoc Sacra Scriptura, quæ docet, nos sine Dei concursu ne manum vel digitum exerere posse. Deus itaque motibus & actionibus nostris omnibus interest, vires ubique suppeditat, prout nimirum a libera mentis determinatione actiones hominis abstrahunt. Mentis enim nostræ functio non est movere corpus, alias si vellet, semper hoc faceret, etiam in ægris, sed saltem determinare motus humorum & spirituum in corpore ab alio principio proficiscentes: Cum itaque Deus ubique præsens sit, cogitemus, ne Numen per pravam mentis determinationem offendamus, & ut possimus olim rationem reddere virium suppeditarum. Jam intelligere possumus, quod D. PAULUS proprie dicit; *In ipso vivimus, movemur, & sumus*: Ubique enim Deus quasi centrum, (nam cunctæ vires motrices corporum in Deo quasi concentrantur) cujus tamen peripheria propter immensam ejus essentiam nullibi.

§. V.

Vis, seu Potentia Activa in Corporibus non est peculiaris spiritus creatus.

N O T A.

Antiquissimi Philosophi annotantes, corpora ut extensa, non habere a se efficaciam, seu vim movendi, illis ipsis, quoniam vel in motu existunt, vel tantum ad illum inclinant, accedere debere vim moventem, materiam inertem animantem, judicarunt. Hinc jam variis insigniverunt nominibus; PLATO mentem; HIPPOCRATES ἐνορμὴν seu unum ex quo omnia; Stoici animam mundi; ANAXAGORAS ignem per totum dispersum; ARISTOTELES ἐντελεχείαν & Intelligentias vocarunt. Ex Recentioribus Robertus DE FLUDD, Marcus MARCI, Henricus MORUS, aliique philosophiam ex Mose jactantes, dicunt esse Spiritum a Deo in principio rerum creatum, qui aquis supernatavit, & maximum illud chaos sustinuit, formasque innumeras corporum exinde eduxit, & adhuc omnium actionum in corporibus causa & fons sit, vique singulari plastica ipsa corpora viva producat. Verum cum Scriptura sacra passim doceat, Deum ipsum formasse mundum, hominem, illumque adhuc elaborare in utero, cunctis dare animam halitum, & vitam, hinc merito illud ipsum dictum de ipso summo Deo & Spiritu sancto, qui totum illud chaos sustinuit, & vivorum radiorum suorum fotu varias rerum formas, quæ mundum absolvunt, eduxit, omnium ferme Theologorum consensu, interpretari debemus, maxime cum in textu vocabulum Spiritus Dei nunquam ventum, usitate Spiritum sanctum indigitet, ut 2. SAMUEL XXIII. 2. ESAI. XLI. 1. & Spiritui sancto passim creatio tribuatur, uti PSALM. XXXIII. 6. Deluduntur illi homines dictorum nonnullorum mala explicatione & applicatione, ubi vocabulum *Spiritus* sacra Scriptura de corporibus tenuissimis, vento, aëre, igne, æthere, quæ vera corpora sunt, in sequentibus patebit dissertationibus, sumit improprie propter summam activitatem

& subtilitatem. Porro non Deus ad sustentationem massæ istius creaturam ullam in consortium adscivisse dicendus est, & spiritus hic creatus præstantior sic esset quovis Angelo, quavis creatura, imo anima ipsius Christi. Et quoniam Spirituum essentiale est, omnibus Theologis Philosophis consentientibus, vellet, intelligere, & cogitare, hinc cogitaret etiam hic Spiritus in corporibus, & faceret cuncta pro suo arbitrio, sicque Providentia Dei in mundo tolleretur; si autem omnem activitatem immediatam habet a Deo, rem per se qua constat nemo capere potest, nimirum formale. Denique Entia non sunt multiplicanda præter necessitatem, & natura semper gaudet simplicitate. Tandem magis adhuc videtur aniles sapere fabulas illorum sententia qui dicunt illum Spiritum esse Ens extensum longum & latum, & complere spatia supra lunam & aërem, in corporibus efficere attractionem, sympathias & antipathias, &c. Hæc omnia jamdudum refutata lege apud omnes ferme Recentiorum Physicos.

§. VI.

Non omnis vis movens corporum dependet à materia subtili.

N O T A.

Statuunt Cartesiani corpora ex massa mere inerte & per se motus experte conflata esse & moveri semper ab alio, ita tamen ut ultima causa sit materia subtilis, cui Deus immediate imprimat motum: Verum præter alia obflare hæc videntur, junctis corporum viribus sic non prodire posse majorem vim motricem, quod tamen est contra experientiam, deinde minimum corpus in motu constitutum etiam maximum quiescens abripere & movere absque mora debere, quoniam massa iners est, indifferens, nulla ad motum repugnatio, nulla reactio, nulla resistentia in illa; denique cum materia subtilis sit extensa, non penetrare aliud extensum potest, ipsique vim addere.

§. VII.

Omnia corpora sunt in motu, vel in inclinatione ad motum; nec datur vera corporum quies.

N O T A.

Corpora semper deprehenduntur in motu, sive in mutatione situs; vel inclinatio & nifus ad motum in ipsis tam ratione intelligitur quam sensibus percipitur; verbi gratia in corporibus gravibus, in tensis, & elasticis. Ubique igitur deprehenditur corpus, ibi impulsus, ibi pressura, ibi conatus ad locum mutandum adest. Nunquam itaque proprie sic dicta quies competit corporibus, quia semper motus causa ipsis inest: Dicuntur tamen quiescere, si locum suum non mutant, & active non transferuntur per corpora ambientia, quod fit, quando intrinsecum motus principium in materia vigen & operans, quasi ab obstaculo impeditur, quo remoto de novo incipit; obstaculum autem illud est resistentia seu reactio corporum ambientium, quibus vires majores insunt, & in contrarium operantur.

§. VIII.

Motus localis, seu mutatio situs corporum fit quando corpus vi gaudens fortiori aliud ambiens proximum minori vi instructum superat, & hoc illi cedere cogitur.

N O T A.

Deus in varias partes extensum distinxit ac divisit, vel in subtiliores, vel crassiores, mole & magnitudine differentes; subtilioribus vim majorem & velocitatem, crassioribus autem impetum concessit, quæ vis ratione structuræ corporum diversissima est, ut hac ratione

motus

motus in universo, sine quo nec illud subsistere & propagari de novo poterant species, vigeat. Ex varietate itaque virium motricium in materia, motuum dependent varietates, & quodcunque potest plus resistentiæ vincere, illud etiam plus habet potentiæ, cum quantitas vis motivæ ex quantitate effectus aestimari debeat. Tandem quies corporis fit, quando corpus minoris vis & efficaciam non potest pertransire seu dividere corpus majoris molis & resistentiæ, sic lapides quiescunt in terra, argentum vel plumbum, aliaque metalla immissa in mercurium, supernatant, aurum autem fundum petit.

§. IX.

Quandiu corpora maxime fluida invicem æqualem habent pressuram, seu vim motricem, tandiu sunt in æquilibrio seu in quiete; simul ac autem æquilibrio illud tollitur, motus incipit.

N O T A.

Quies seu æquilibrio nascitur ex oppositione corporum æqualem vim habentium, uti id videmus in libra, quæ quiescit ab æquali rerum pondere lancibus imposito, simul ac autem illa æqualitas tollitur, & pondus imminuitur, incipit motus, & una lanx ascendit, altera descendit. Sic quoque fluida quævis, quoniam constant ex particulis ejusdem molis & ponderis, semper servant æquilibrio, & æqualiter ad horizontem jacent, libramque naturalem constituunt; hinc mercurius, spiritus vini, aqua in siphone bicrurali stant in æquilibrio, nisi conjunctim sed seorsim infundantur. Ex hoc axiomate jam deducitur ratio, cur in baroscopio seu tubo vitreo cujuscunque capacitatis mercurius ad viginti octo digitos suspensus hæreat ab aëre incumbente atmosphærico æqualis pressuræ, quo ingeniosissimo experimento a TORRICELLIO Florentino Mathematico & aër atmosphæricus ponderari, ejusque gravitas, densitas, humiditas & puritas explorari potest. Ob ejusdem aeris gravitatem aqua per antlias saltem ad 32 pedes ascendit, & non ultra, quoniam aëris atmosphærici, triginta duorum pedum aquæ, & viginti novem pollicum mercurii, (qui quatuordecies levior est aqua) idem & æquale est pondus. In illustrationem hujus axiomatis plura afferri possent experimenta, dum latissimum habet usum in mechanica, quæ tamen in aliud tractandi tempus rejicimus.

§. X.

Nullus motus fit ob fugam, vel metum vacui.

N O T A.

Veteres annotantes ubique esse corpora, & nullibi vacuum, dixerunt naturam abhorreere a vacuo, vel motus varios præstare, ne illud fiat, hinc videntes per siphones & antlias suctorias elevari aquam in altum pistillo retracto, dixerunt illum motum fieri ob fugam vacui. Verum in corporibus intellectu destitutis nullus concipi potest horror, sed optime ille motus deducitur ex æquilibrio corporum destructo, seu viribus corporum motricibus una ex parte auctis, ex altera autem depressis seu imminutis, nam ab emboli extractione omnis aër crassior ex siphone educitur, hinc spatium intra embolum & orificium siphonis subtiliori aëre, vel æthere minus resistente imbuitur, & vice versa aëris atmosphærici externi pondus increscit; ex quo patet aërem graviolem incumbentem aquæ impellere ipsam ad spatium ab aëre vacuum, tandiu donec justum fiat æquilibrio; si autem ascensio hæc fieret a metu vacui, sequeretur aquam posse ascendere ad quamcunque altitudinem in siphonem, extracto embolo, univoca præsentem causam, nimirum horrore vacui; repugnat tamen experientia, in illa longissimis tubis non

ultra 32 pedes sursum verti, luculento indicio, illam ascensionem non a metu vacui, sed ab aëris extrinseci pondere dependere, similis jam ratio militat in reliquis experimentis, quæ ad probandum vacui horrorem adduci solent.

§. XI.

Omnis corporum motus fit mediante circulo.

N O T A.

Quoniam ubique corporum est plenitudo, & non datur ipforum penetrabilitas, sequitur, quod nullum corpus alterum movere possit, nisi sufficientem habeat efficaciam corpora directo ante se propellendi ex locis suis, ita deinde, ut propulsum corpus aliud vicinum pellat, & sic porro ut circulus describatur & postremum in prioris locum succedat; & uti posita successione & circulo corpora transferri possunt, ita sublato illo circulo motus cessat; Hæc corporum circulatio plurimorum effectuum naturalium proxima est causa, hinc facile patet ratio 1°. Cur verbi gratia in siphone orificio superiori clauso pistillum ægerrime retrahatur, imo cum impetu retrocedat, quod in antlia pneumatica etiam accidit? 2°. Cur parietes follium foraminibus omnibus clausis non deduci possint? 3°. Quare ex dolio vino repleto & supra clauso per epistomium apertum nihil effluat? 4°. Cur ex tubo vitreo aqua repleto nulla aqua ore extrahi possit, quæ omnia proveniunt a circulatione aëris impedita, simul ac enim aëri aditus conceditur, ita ut in locum a corpore relictum cedere possit, statim incipit motus, & simul ac aëris accessus impeditur, motus etiam cessat. Ex eodem fundamento effectuum & phænomenorum lampadis Boyleana, fontis salientis seu clepsydre Sturmiana, infundibili & fontis agyrtarum, qui successive salit, & deinde cessat, item istius instrumenti irrigatorii, quo hortulani uti solent, ratio petenda & deducenda est.

§. XII.

Nulla datur attractio in rerum natura, sed omnis motus peragitur pulsione.

N O T A.

Si philosophice loqui velimus, nulla attractio vel suctio datur, nimirum talis, ubi corpus, quod causa motus in alio supponitur, vel quiescit alio corpore ad ipsum accedente; uti verbi gratia putant vulgo, magnetem attrahere ferrum, vel ubi corpus quod movens aestimatur præcedit, altero illo corpore, quod moveri concipitur, consequente, uti putant embolum in siphonibus attrahere aquam; talis attractio nunquam intelligi vel concipi potest; deinde omnis corporis motus & pulsio ex loco suo, requirit corpus impellens majoris vis & efficaciam, & corpus mobile, & nunquam potest propelli corpus, nisi impellens situm sit in eadem linea cum corpore, & quidem retrorsum. Nunquam enim illud corpus, quod a tergo est, moveri poterit; & quæ ad attractionem confirmandam adducuntur experimenta facillime deduci possunt ex æquilibrio corporum destructo, & hinc subsequente pulsione, hinc quod in syringa embolo retracto spatium repletur minoris resistentiæ materia, nimirum subtili. Quod autem hic effectus dependeat ab aëre incumbente, evidentissime demonstrari potest, si per antliam aërem incumbentem removeamus, quod facile fieri potest singulari instrumento vitreo ad hanc rem accommodato, tunc magno conatu etiam syringæ embolo extracto toto ne guttula quidem aquæ aut mercurii intrat tubulum vitreum syringæ annexum. Deinde notum est, in contrarium afferri suctionis exempla, nimirum ore exsugere aquam, mercurium, per fistulas tabaci fumum, ex mammis nutricum lac, &c. Verum si consideramus nullam talem suctionem fieri posse sine inspiratione,

ne, in omni autem inspiratione costæ deducuntur, & in thorace amplius fit spatium, hinc aër gravitate sua per oris & nasi patentes vias in thoracem irrumpit, quo fiat aëris intrinseci & extrinseci æquilibrium; ideoque si jam fistulam tabaci vel vitri appono ori, & circa illam os claudo & inspiro, aër incumbens aquæ vel tabaco accenso, gravitate sua irrumpit per fistulam, intrat os, & secum abripit aquam vel fumum, & quod hæc genuina horum phænomenorum sit causa patet exinde, quia si aër demitur, vel præcluditur ejus aditus, nihil aquæ extrahi potest; deinde si suctio esset causa adscensi liquoris in tubulum, sequeretur, quod per antliam pneumaticam vel fortiorém viri suctionem mercurius vel aqua ad quamcunque altitudinem posset elevari, cum tamen nunquam mercurius suctione ultra 20 & 9 digitos, vel ultra 32 pedes aqua ascendat: Quod autem motus ille, qui dicitur attractionis & suctionis ab æquilibrium corporum destructo proveniat, patet ex sequentibus experimentis, quæ vulgo adscribuntur attractioni, nimirum si ex vitreo globo aër evacuatur & hujus orificio applicatur firmiter tubus vitreus aquæ infra immersus epistomio recluso cum impetu aqua assurgit in globi cavitatem, idem facit ipse mercurius vivus gravissimus, quoniam ille a tota aëris atmosphæra incumbente sursum pellitur ad locum illum ab aëre vacuum replendum & æquilibrium restituendum: Hæc jam porro est ratio, cur in phiolas vitreas calefactas sua sponte ascendant liquores, nec non mercurius, item cur in cucurbitulas calefactas ascendat sanguis, porro, cur mortarium corio obductum adhæreat poculo calefacto, dum nimirum igne expellitur aër crassior, externus aër gravior cum impetu in vasa illa conatur ingredi, sicque fortiori pressione corpora intime ambientia connectit. Eandem rationem applicare jam licet ad sequentia phænomena, nimirum cur succinum attritu calefactum attrahat arenas, adamas pilos, fumus elichnii flammam alterius elichnii, sol sursum moveat vapores aqueos &c. Quod ferrum ad magnetem se applicet, infra excutiendum erit.

§. XIII.

Unum corpus alterum movet & impellit.

N O T A.

Deus prima causa est virium motricium in corporibus, secundariæ causæ ipsius motus sunt ipsa corpora, quatenus nimirum plus vel minus de viribus participant, tunc impetu vel velocitate aliis corporibus, quæ semper tamen aliquo modo reagunt, motum imprimunt: Hinc sequitur 1°. Omne Corpus, quod in motu est constitutum, alterum, quod in motu non est, facilius impellere posse: 2°. Difficilius moveri illa, quæ in contrarium moventur, & 3°. Quando vires motrices corporum sunt æquales, esse quietem. 4°. Corpus motum celerrime alterum mole majus posse impellere, & 5°. Quando Corpus minorem invenit resistantiam facilius motum continuare posse, probatur hoc experimento: Dum acus magnetica verforii ab applicatione magnetis robustioris armati in motum circularem adigitur, in vitro ab aëre vacuo videmus hic longe diutius durare illum ipsum motum, quam si in aëre aperto acus magnetica in motum suscitatur.

§. XIV.

Omne corpus movetur ex se & sua natura per lineam rectam.

N O T A.

Si enim omne corpus per lineam rectam incipit moveri, necessario continuabit, nisi aliam determinationem ab alia causa externa acquirat. Omne autem motus initium aliter vix potest concipi, quam a puncto ad

punctum, & sic fit linea brevissima, quæ est recta. Patet illud maxime in radiis solaribus, qui motum rectilineum semper exercent; hæc fundamentalis est regula totius optices; & quamvis corpus circulariter moveatur, desistens tamen a motu incipit moveri per lineam rectam, uti videmus lapidem funda projectum non circulariter, sed recto motu semper moveri.

§. XV.

Omne corpus motum a linea recta deflectens facile abit in circulum.

N O T A.

Circulus enim ad minimum recedit a linea recta, quod patet & demonstratur ex angulo contactus: Imo corpus a linea recta dum inter movendum detorqueatur, facilius in magnum quam parvum abit circulum, & denique omne corpus, quod circulariter movetur semper recedit a centro motus sui, quia nimirum circulus magnus minus recedit a linea recta quam parvus.

§. XVI.

Vires motrices corporum variè determinantur ab extensi mole, nexu, figura, & mediis seu corporibus ambientibus, quæ pertransire debent.

N O T A.

In istam regionem feruntur sæpius corpora, ubi minor resistendi virtus; angulosum corpus difficiliter movetur sphaerico, porro quo corporis moles minor est, eo facilius potest moveri; & quantum figura corporum præstet, & quales effectus in naturalibus ex ejus mutatione fluant, fusius tractabimus in sequentibus.

§. XVII.

Quo latiore corpus habet superficiem, eo facilius & in majori copia motum admittit, vel etiam resistantiam, & è contra.

N O T A.

Omnis enim impulsus corporum fit per superficiem; quo major enim superficies, eo majorem impetum recipere potest. Hinc ratio fluit, cur aurum limatum, vel alia solvenda contusa facilius solvi à menstruis possint, quam si sunt integra, quia nimirum comminutione majorem acquirunt superficiem; deinde ex hisce liquet, cur cibi comminuti facilius digerantur, quam non bene masticati. Sphærica facilius moventur quam angulosa, quia nimirum corpora ambientia saltim in puncto contingunt superficiem illorum, hinc eo minus sentiunt impedimenti, quod in corporibus planis & angulosis non accidit. Ex hisce jam apparet porro, cur vitrum planum appositum antliæ pneumaticæ orificio, aëre evacuato rumpatur, & diffiliat in minimam frustula, vitrum autem rotundum integrum maneat? Item cur ovum gallinæ pressione fortissima manuum in extremitatibus non possit frangi?

§. XVIII.

Corpora minima celerrime mota, in minimo spatio magnam edunt efficaciam.

N O T A.

Videmus hoc in attritione chalybis, dum scintillæ extrusæ nihil aliud sunt quam ferrum liquefactum, id quod exactissime apparet beneficio microscopii; deinde veritatem hujus axiomatis videmus aperte ex effectu sclopetorum pneumaticorum, vitri caustici, flammæ lampadis, qua metalla & vitra liquefacere possumus; item ex sono tormentorum bellicorum fenestras diffringente; item ex ventis ipsas excelsas arbores eradicantibus.



DISSERTATIO TERTIA, DE CORPORUM MOTIONIBUS EX GRAVITATE ORTIS.

Primum edita anno 1695.

§. I.

GRAVITAS plurimorum effectuum in naturalibus primaria est causa & fons.

NOTA.

Gravitas est totius systematis affectio; phaenomena statica & mechanica ferme omnia ex gravitatis doctrina fluunt; Tota hydrostatica ab ARCHIMEDE primum proposita optime ducitur & derivatur ex gravitate corporum, & hinc plurima phaenomena elegantissime explicari possunt; cur nimirum fluida homogenea libram constituent? Cur unum corpus praeponderet alteri? Cur, verbi gratia, navis in aqua dulci demergatur, in salsa autem non? Porro, quare homines vesicis instructi natare possint nec submergantur, nec hominem vivum mare mortuum patiatur demergi, & submersos homines aqua iterum sursum pellat, & sexcenta alia? Aërostatica, ex qua omnis siphonum, baroscopiorum, antliarum pneumaticarum apparatus, & quidquid stupendi hic fit, dependet, per solam gravitatem, & elaterem corporum explicari commode potest. Metallorum examinatio optime ex specifica illorum gravitate instituitur, uti enim omnibus corporibus gravitas specifica intime adhæret, sic nihil quoque difficilius est impostoribus naturalis historiae ignaris, quam eandem exacte imitari; quodcunque itaque venditur pro auro, & non tam grave est quam aurum, pro ipso non potest haberi, sed est fucatum. Aquarum, liquorum, medicamentorum, acidularum contenta & pondus beneficio hujus doctrinae optime explorari potest: Mineralia an aliquid metalli in se habeant? Utrum infans mortuus an vivus in lucem processerit, identidem ex doctrina gravitatis commode adstrui potest, quamvis hoc ultimum magis probabiliter quam apodictice & indubitate.

§. II.

Quodlibet corpus, sive densum, sive fluidum, grave est, exercetque vim, seu conatum suae gravitatis.

NOTA.

Ex hoc ipsum primum axioma ARCHIMEDIS, ex quo deinde plurima evidentia rationibus demonstrari possunt: In praecedenti dissertatione sufficienter exposuimus omni extenso, tam subtili & fluido quam crasso, in primordiis rerum ab ipso Deo, cunctarum virium centro & Autore, esse communicatam certam vim motricem activam, quae continuo adhuc conservatur, hujus beneficio ipsa corpora pressuram suam exercent, gravitant, unum in aliud agit, & unum alteri resistit, quare hoc sensu omnia corpora ponderant, premunt, unum tamen magis vel minus pro diversa illorum structura, subtilitate, & unione. Et nisi etiam corpora crassiora vi propria instructa essent,

sed omnis illorum vis ac gravitas dependeret a solo motu & circulatione materiae subtilis & ætheris, sequeretur, quod non diversae potentiae & vires motrices in corporibus junctis procederent, & aër non sit gravior æthere, aqua aëre, mercurius aqua, &c.

§. III.

Nulla datur absoluta seu positiva levitas in rerum natura.

NOTA.

Nemo dubitabit de ponderositate hydrargyri, aquae, corporum terrestrium, hæc enim manifeste deorsum tendunt atque descendunt; difficultas autem vertitur circa illa, quae sursum ascendere videntur, ut sunt ligna, aër, vapores, flamma. Verum omnia corpora elementaria, quoniam vim habent sese uniendi ad efformandum systema nostrum, habent etiam facultatem motivam descendendi versus centrum globi terrestris, & premendi corpora, & hujusmodi vis vocatur gravitas; hinc nulla datur absoluta levitas. Levitas itaque nil nisi minor gravitas est, & semper respectiva, quare idem corpus pro diversitate fluidi potest dici & grave & leve; spiritus vini respectu aëris est grave corpus, respectu autem aquae est leve. Et falsum est, grave semper descendere: Nam aurum metallorum gravissimum dissolutum in aqua regis ascendit, & recipitur in ejus poros. Corporum enim ascensus & descensus differt pro diversitate fluidi & medii. Idem itaque principium gravitatis, quod causa est descensus, simul etiam est ascensionis alterius corporis causa; hinc absque levitatis principio natura producit via brevissima, summoque compendio, hosce effectus & operationes. Quod enim corpora sursum moveantur, non fit a vi intrinseca levitatis, sed ab ambientibus corporibus gravioribus, quae sursum pellunt illa; quare ignis flamma quod ascendat, non dependet ex ejus natura, sed ab ambiente aëre graviori, qui sursum illam protrudit, & extremitatem in figuram pyramidalem cogit, quare in *Vacuo Torricelliano*, item in vitro ab aëre vacuo fumus & flamma descendunt, clarissimo indicio flammam & fumum per se non levem esse. Plumæ tenuissimæ facile in aëre volitant, & ab illo graviori sustentantur sursum, aut contentæ in medio cylindri vitrei aëre substracto petunt inferiora, tale etiam contingit circa fumum ex ellychnii flamma emergentem.

§. IV.

Partes inferiores fluidi premuntur a superioribus.

NOTA.

Peripatetici statuunt, elementa in locis propriis non gravitare, quia in loco sunt naturali; hinc dicunt urceum repletum aqua, si in aqua ponderetur, non plus

plus ponderare quam fuerit sine aqua : deinde dicunt urinatores , & qui versantur sub aquis , nullum aquæ pondus sentire , imo si sentirent , ferendo oneri impares essent. Verum illorum Præceptor ARISTOTELES illis aperte contradicit , qui *Lib. IV. de Cælo C. V.* dicit ; *Elementum unumquodque in suo loco pondus habet , levitatem vero non.* Deinde cum omnia corpora etiam minutissima vim gravitatis exercent , necessario sequitur partes inferiores a superioribus superincumbentibus premi & comprimi , quamvis illa gravitas non notabiliter sentiatur cum quodam doloris sensu , cuius rei causam suo loco dabitur ; sufficit tamen experimentis demonstrari posse , inferiores partes premi a superioribus. Campana urinaria , vel vitrum quoddam capax inversum , quo profundius demittitur in aquam , eo magis aer in cavitate existens comprimitur , seu in arctius redigitur spatium ab aqua intrante. Secundo , Barometra in radice montis vel turris , ad 29 pollices mercurium tenent in æquilibrio ; quodsi autem ascendimus ad altissimum montem , sive turrim , delabitur visibiliter mercurius ad latitudinem aliquot pollicum. Idem fit , quando aquæ immergitur , quæ quo profundior est , eo altius mercurius ascendit , & contra. Porro id ipsum comprobatur siphone inflexo , qui , quo profundius aquæ immittitur , eo fortius aqua per alterum ejus crus expellitur , & vice versa. In fontibus artificialibus , quo longior est tubus , & quo magis apertura fit in inferiori loco , eo altius ascendit aqua. Tandem sententia hæc evincitur experimento sequenti clarissime : Sumitur nimirum vitrum oblongum , quod impletur aqua , deinde recipitur tubulus vitreus tenuis oleo plenus , cuius orificium superius digito clauditur , ut suspensum hæreat oleum ; hic aquæ tam profunde inditur , donec in illa remoto digito suspensum hæreat oleum , & tunc existit in æquilibrio ; si autem profundius tubulus inseritur aquæ , oleum sursum versus pellitur , simulque aqua in tubum ascendit , quoniam aqueus cylinder præponderat oleoso. Si autem tubulus oleo repletus attollitur ex aqua , tunc successive oleum descendit , quia cylinder oleosus gravior evadit aqueo , & aqueus minus resistit. Tandem aquam in aqua media gravitate oculis clarissime videmus nostris , si bulleam vitream calefactam prius , ut aer crassus expellatur , occlusam una cum altera lance sub aquas demersam ad æquilibrio reducimur , mox infra aquam aperto leviter orificio videmus , & aquam in bullæ cavitatem illapsam , & bullam sic descendere & præponderare.

§. V.

Levia gravitant super gravia.

NOTA.

Sive liquor levior , si affundatur ponderosiori , premit illum. Rejiciunt , ceu absurdam , hanc sententiam *Peripatetici* ; quamvis convicti sint , lapidem etiam in pavimento positum non cessare gravitare : Vir si in statera stat , manu tenens lapidem , & omnia sunt in æquilibrio , manent in ipso , quamvis vir ille lapidem attollat in altum , sive non. Deinde manifestum id fit sequentibus experimentis : sumitur nimirum vitrum oblongum , & illud impletur aliquantulum mercurio , & inseritur huic tubulus nullo liquore repletus , sed utraque parte apertus , affunditur mercurio spiritus vini , usquedum repletum est vitrum , sic in tubulum ascendit mercurius , & sursum pellitur a corpore leviori , nimirum spiritu vini. Deinde notum est , oleum esse levius aqua , & aquam oleo affusam descendere , quod si tamen vitrum oblongum repletur oleo , & huic tubulus vitreus in utraque

parte apertus , & aqua repletus immittitur ad inferiorem olei partem , aqua non labitur deorsum , sed a superincumbente cylindro oleoso , seu graviori , sursum tenetur ; dum vero tubulus paululum attollitur , aquæ guttæ exstillant , dum aqua minorem ab oleo habet resistantiam. Sic quoque in puteo aqua premitur a columna aërea leviori sursum , quæ , ubi minorem reperit resistantiam , ascendit , non tamen ultra aliquod triginta pedes.

§. VI.

Corpora gaudent specifica gravitate , sive unum præ altero est gravius.

NOTA.

Veteres gravitatis causam ab appetitu quodam sese uniendi cum centro terræ deducebant ; alii , inter quos GILBERTUS Anglus , à vi magnetica & attractiva terræ illam derivant. Verum cum appetitus in rebus non intelligentibus prorsus non sit conceptibilis , & attractio in universo nulla cogitatione capi possit , merito sententias has ceu nullius momenti removemus. Accedit , quod si ab attractione terræ gravia descenderent , sequi , levia non posse sursum ferri , quoniam non minus illis quam gravioribus vis magnetica competeret. Deinde , si tanta esset attractio quam gravium impetus , nullum magnum pondus a terra attolli poterit. Longe itaque felicius causa gravitatis in corporibus petitur ex ipsorum structura & textura , sive a principio intrinseco , item ab extrinseco , seu a corporum ipsi superincumbentium copia , quæ sive quiescant , sive circumgirentur ac rotentur , perinde est , sufficit unum alterum premere , & omnia simul unitis viribus versus inferiora premere. Quocirca corpora eo sunt graviora , quo partes eorum arctius unitæ , poris minus disjunctæ , & pauciores particule subtiles eorum partibus interjectæ fuerint , sive quæ in pauco spatio magnam continent materiæ molem. Deinde quo major est cylinder corporum fluidorum corporibus solidis & consistentibus incumbendum , eo magis deprimuntur versus inferiora , & vice versa. Et in hoc jam consistit specifica & respectiva corporum gravitas , qua mirum inter se differunt. Specie autem graviora dicuntur illa , quæ sub minore mole seu dimensione majus obtinent pondus. Sic mercurius 14 gravior est aqua. Aer aqua specie levior est 840 , juxta computum accuratiorum Mathematicorum. Metalla ratione specificæ gravitatis hanc habent inter se rationem & proportionem : Aurum 100 ; Mercurius 71 ; Saturnus 60 ; Argentum 54 ; Cuprum 47 ; Orichalcum 45 ; Ferrum 42 ; Stannum purum 38 ; Vinum $5\frac{1}{4}$; Aqua $5\frac{1}{3}$; Oleum $4\frac{1}{4}$.

§. VII.

Motus corporum gravium in medio semper fluido fieri debent.

NOTA.

Motus corporum in aliquo spatio , quod occupatum est a corporibus duris consistentibus & continuis , minime fieri posse , apertissimum est , quoniam duo corpora se mutuo penetrare nequeunt , igitur necesse est , ut spatium , in quo corpus moveri debet , aut sit omnino vacuum , vel saltem repletum corporibus fluidis divisibilibus & distrahibilibus , quæ nimirum facile propelli e loco suo possunt , ut locum corporibus , quæ moveri debent , cedere possint. Quo circa omnis motio corporum a gravitate pendens , fit in fluidis vel liquidis , verbi gratia aëre , aqua , spiritu vini , mercurio &c.

§. VIII.

Omnia fluida homogenea in directum , sive aequaliter jacent ad horizontem , & libram constituunt naturalem.

NOTA.

N O T A.

Homogenea fluida ex æqualiter prementibus sive æque gravibus constant particulis, hinc æquali conatu & nisu tendunt ad inferiora, quare in directum & planum jacent ad horizontem, sive ubique stant in æquilibrio. Nimirum libra seu bilanx est vel naturalis, vel artificialis; hac utuntur tabernarii ad merces appendendas; illam constituunt omnia fluida, in quibus etiam exactissime specificæ & respectivæ corporum gravitates optime detegi possunt. Fluida verbi gratia, oleum vitrioli, mercurius, spiritus vini rectificatus, aqua, & quæ sunt generis alia, tubo recurvo vitreo, seu siphoni bicrurali immissa exactissimum semper servant æquilibrio, seu æquipondium. Quinimo duo diversa & diversæ gravitatis fluida se mutuo servant in æquilibrio, quamvis diversæ proveniant altitudines, quæ tamen ponderibus ipsorum reciproce sunt proportionales. Sic Mercurius in tubum recurvum immissus stat in æquilibrio; si affunditur aqua uni crurum majori in copia, mercurius ab ipsa aqua in altero crure sursum pellitur, ita tamen ut sint in æquilibrio; id est ut aqua unius cruris tantum ponderet, quantum mercurius in altero crure. Eadem methodo & encheiresi specifica diversorum fluidorum gravitas optime indagari potest. Deinde uti in libra artificiali æqualium ponderum nulla sentitur gravitas; sic quoque in fluidis gravitas vel pressura manifeste non percipitur, quia ubique æqualis resistentia, & vires æquales. Ex quibus jam manifestum esse existimo, cur nos in aëre versantes, vel urinatores, vel pisces in aqua natantes nullum sentiant pondus, quoniam nimirum cylindri fluidorum ubique æqualiter premunt, sibi quæ æqualiter resistunt; facta itaque pressura inæquali per subtractionem inferioris aut lateralis cylindri, protinus sentitur intensissima gravitas. Sic manus applicata orificio antliæ, subtracto aëre, vix tolli potest: Eodem modo frustum argenti applicatum corio super patellam antliæ jacenti post factas aliquot aëris evacuationes ipsi ita adhæret, ut maxima vi tolli nequeat propter columnam aëris superincumbentem. In aqua pondus gravissimum metalli citra lapsus periculum libere sustineri potest a solo cylindro aquæ laterali, & quo profundius metallum immittitur aquæ, eo majorem potentiam habet cylinder illud ipsum sustentandi, ita ut libere in aqua natet. De quo experimento fusius legi mereatur Clarissimus STURMIUS in Collegio suo *Experimentali*, pag. 23.

§. IX.

Omne corpus, quod in fluido debet descendere, ipsi fluido præponderare, seu specie gravius esse debet.

N O T A.

Fluidorum partes omnes æque graves sunt, seu æqualiter premunt, & hinc sunt in æquilibrio, non secus ac in libra artificiali, si pondera sunt æqualia; quod si autem inæqualia sint, æquilibrio tollitur, & una lanx ascendit, altera descendit. Idem observatur in libra naturali, seu omni fluido, cui specie gravius corpus, seu inæquale pondus immissum æquilibrio tollit, id est descendit, & aquam vicinam superficiæ suæ correspondentem ex loco suo pellit, quandoquidem nullus motus corporis fieri potest, nisi vicinum ex loco suo vi potentiori pellatur. Specie gravius dicitur, quod plus habet ponderis quam alterum, licet æqualis sit portio & mensura, sic mercurius inclusus vitro certæ magnitudinis, plus ponderat quam aqua eidem vitro inclusa. Quodcumque itaque corpus in fluido descendere debet, specie gravius, seu majus pondus quam æqualis portio fluidi

di ipsi ratione molis correspondentis habere debet, quoniam, quod alterum loco pellere debet, majori vi & potentia motrice debet esse instructum, quam hoc ipsum; & vice versa, omne corpus, quod specie levius est certo fluido, in ipso natat, nec descendere potest. Ex doctrina hac gravitatis facillima plurimorum jam phænomenorum ratio depromi ac peti potest. Sic olea, quoniam aqua sunt leviora, ipsi innatant, spiritus vini autem rectificatus oleo olivarum supernatat. Aqua fluminum, seu levior marina in ipso oceano diu satis innatat, & colore distinguitur. Corpora hypochondriacorum flatibus distenta, & satis arida, in aqua sæpissime non submerguntur, sed supernatant, quia leviora sunt mole aquæ ipsis correspondente; idem fit in homine vesicis inflatis instructo, ubi homo cum vesicis totum format complexum, quod levius est, respondente ipsis mole aquæ. Referunt de mare mortuo in Palæstina, quod in illo corpora humana non submergantur, quoniam mare illud bituminoso succo repletum præponderat respectu ipsum hominis corpus. Notum est, corpora animantium submersa in aqua, elapso quodam temporis spatio, iterum in altum ascendere, id quod fit propter fermentationem stagnantium humorum, corporis partes distendentem, hinc tumidiora post mortem fiunt corpora. Navis sæpius ultra centum tormenta bellica continens aquæ innatat, quia tota navis cum omnibus quæ eam implent, eique adhærent, levior est aquæ mole sibi respondente, dum aër vacua in navi spatia replet. Porro observatur quoque, naves quæ in oceano natant, in fluvio sæpius submergi, dum aqua marina propter salis copiam, specie gravior est omni fluviali. Denique notabile est, integrum pumicem in aqua natare, in pulverem autem contusum, illum descendere, quia pumex integer propter pororum copiam levior est aquæ mole; particulæ autem, propter aërem expressum, graviores mole aquæ quæ ipsis respondet. Postremo memorabile est, aurum omnium metallorum gravissimum, aqua regis dissolutum, ipsi innatare, qui effectus dependet a cohærentia particularum fluidarum, quæ tanta est, ut a tali exiguo pulvisculo dividi nequeat.

§. X.

Corporum levitas, seu ascensio in fluidis, fit a fluidis specie gravioribus, quæ vel descensum impediunt, vel illa sursum impellunt.

N O T A.

Quemadmodum in libra artificiali pondus gravius in una balance constitutum alterum levius in altera lance sursum impellit, sic quoque fluida specie graviora corpora leviora in fundo detenta sursum ascendere faciunt. Quare omne corpus quod ascendit illud ab ambiente graviore sursum pellitur; sic ascensio fumi, flammæ, vaporum aqueorum, qui nubes constituunt, debetur ipsi aëri ambienti graviore. Spiritus fumans, qui aëre externo admisso densissimos emittit fumos, intra vas ab aëre vacuum positus, nullum ferme amplius emittit fumum. Quod si itaque arte humana corpora aëre leviora parari possent, spes esset pervenire ad artem navigandi per aërem. Porro notum est, ligneum discum profunditati aquæ intrusum, ascendere, non vi propria, sed quoniam ab aqua graviore sursum premitur; quod si itaque artificio possumus efficere, ne aqua premat superficiem corporum inferiorum, tunc necesse est, ut corpus leve aquæ immersum non ascendat, sed in fundo hæreat; quod peragitur facto inferius foramine; tunc enim propter factam aperturam cylindri aquæ non amplius premunt corpus sursum, sed manet illud

lud in fundo, quia aqua decedit. Experimentum hoc optime demonstrari potest in *stivula* dicta *Helmontiana*. Præterea fluida gravia sursum pellere posse specie leviora, id manifestissime pulcherrima, quæ sequuntur, experimenta evincunt. Nimirum repleatur tubus vitreus longus mercurio, tubus hic immitatur aqua, sic mercurius descendit in aquam, & viceversa totus tubus repletur aqua; quoniam aqua in locum spatii a corpore vacui succedit: Idem fit, quando spiritus vini rectificatus rubro tinctus colore infunditur vitro capaci, & hinc tubus oblongior oleo tartari cæruleo plenus infunditur; tunc pollice remoto spiritus vini rubicundissimus per medium cærulei liquoris, fumi & densæ exhalationis instar, ascendit, & tubum totum replet, cæruleo liquore in supposito vitro existente; quandoquidem oleum tartari gravius spiritui vini leviori incumbens premendo hunc sursum cogit, & ad supremum locum urget. Tubus si repletur cerevisia, & immitatur vino, illa ceu gravior descendit, & vinum facit ascendere. Potest hac ratione quam optime explorari specifica omnium liquorum gravitas. Accedit, quod quo fluidum est gravius, eo celerius corpus ipsi immisum sursum exprimat, quare in mercurio corpora dentata velocius ascendunt quam in aqua. Tandem liquores diversæ consistentiæ & gravitatis invicem mixti & confusi tamdiu moventur, donec quivis suum locum teneat, in quo ratione specificæ suæ gravitatis quiescere possit. Sic pulchro spectaculo observamus, si oleum tartari cæruleum, spiritus vini rubicundus, oleum terebinthinæ aurei coloris, & mercurius vivus invicem in parvo vitro miscuntur ac confunduntur, mox in quiete quodvis fluidum distincto suo colore proprios tuebitur limites, dum gravius semper levius sursum pellit. Sic quoque scimus liquores diversissimæ naturæ plures in uno vase servare citra confusionem, verbi gratia lac, cerevisiam, vinum, oleum, spiritum vini, aquam &c.

§. XI.

Omne corpus heterogeneum ejusdem ponderis cum mole fluidi sibi respondente, cum fluido est in æquilibrio.

NOTA.

Nimirum quoniam ejusdem ponderis est cum mole fluidi sibi correspondente, indifferens est ad ascensum aut descensum, sed lineam parallelam æqualem constituit cum eodem fluido. Si fluido autem immiseris salem, qui solutus fluidum reddit gravius, corpus solidum immisum ascendet: Notabile est, ovum in aqua communi descendere, simul ac autem sufficiens quantitas salis aquæ additur, natat in ipsa, & æqualiter libratur; si magna quantitas additur salis, valde eminet ovum ex aqua. Ex hoc fundamento indagari jam potest quantitas salis in aqua salis, item copia contentorum salium in urina, sacchari in aqua, item gravitas cujuscunque liquidi. Paretur nimirum tubulus ex succino, vel ex vitro, postea addatur ipsi globus, ita ratione ponderis attenuatus, ut tubulus ei annexus simul cum illo in aqua erectus natet. In tubulo notentur accuratissime gradus, postea in mensura una aquæ dissolvatur unica uncia salis, tunc immisso instrumento, videbis ad quem gradum instrumentum ascendat, tubus prout itaque magis ascendit, eo gravior erit aqua, & sale magis saturata. Eadem ratione bonitas spiritus vini, utrum multum participet de phlegmate, nec ne, explorari potest; si nimirum instru-

mentum paretur similis formæ, ita tamen ut tubus in aqua emergat; quo purior itaque & magis dephlegmatus erit spiritus vini, eo profundius cylinder, seu tubus ille descendet.

§. XII.

Minima res, & gravitatem, & levitatem, seu ascensum & descensum corporum efficere potest.

NOTA.

Libra artificialis, quamvis multum onerata sit ponderibus, in æquilibrio constituta, minimò pondere vel impulsu addito, quaquaversum vergi potest. Notum enim est, solo digito balancem centum pondiis onustam moveri posse; item navem in aquis quiescentem solius manus impulsui obtemperare. Eadem ratione in libra naturali, seu quovis fluido minima vis accedens ad heterogeneum, quod ratione molis fluido æquale est, descensum ex facili promovere potest. Et vice versa minima vis decedens ab ipso ascensum quoque efficere potest. Spectat huc quoque experimentum sequens: Nimirum vitrum aqua repleatur usque ad summum, cui imponatur virunculus vitreus cavus præditus cauda, in qua sit apertura magnitudine pili, ille autem cum aqua sit in æquilibrio. Vitrum accurate ligetur vesica; si fortiter manu premitur vesica, virunculus descendit, quoniam compressa aqua portio ejus minima intrat in caudam; manu remota virunculus iterum ascendit, dum aër in cavitate sese expandit, & expellit aquam. Ex eodem fundamento fluit experimentum *Stutgardianum & Florentinum*, cujus descriptionem vide in laudati DN. STURMII *Colleg. Experiment. part. 2. pag. 167.* Illud notatu dignum videtur, bullam vitream, quæ cum aqua in æquilibrio existit, in calida aqua, quoniam levior hæc est, descendere, item in aqua putrefacta, quæ etiam propter motum intestinum plus ætheris admittit, & levior evadit; in frigida autem superiorem locum tenet eadem bulla. Tandem notum est, vulgarem esse persuasionem, animalia mortua graviora esse vivis, verum contrarium potius verum est; semper deprehendimus animalcula ponderata exacte ante mortem graviora esse quam post mortem, luculento documento, illa ipsa quæ in moribundis exhalant corporibus, pondus addidisse.

§. XIII.

Pro diversitate fluidorum diversum observatur pondus corporum.

NOTA.

Quantitas corporum non est absoluta, sed respectiva. Si enim absoluta foret, idem corpus in quocunque fluido ejusdem esset ponderis, quod experientia reclamatur. Nimirum aurum ponderetur in aëre, ita ut cum appposito pondere in æquilibrio sit: Idem aurum manente eodem pondere immergatur vasi aquam continenti, & videbis aurum multum ab æquilibrio suo decedere, cum in aëre æquiponderaret. Idem contingit in plumbo ponderato cum cupro, & in universum in omni corpore quod altero specie est gravius. Nam aurum in aqua minorem locum occupat, quam verbi gratia ejusdem ponderis aliud corpus, unde & minore aquæ mole libratur. Tandem diversum est pondus corporis ponderati, 1º. in recipiente ab aëre evacuato, 2º. in aëre, 3º. in aqua communi, 4º. in aqua salis, 5º. in spiritu vini rectificato, 6º. in argento vivo.

DISSERTATIO PHYSICO-MEDICA

D E

GRAVITATE AERIS EJUSQUE ELASTICITATE IN MACHINAM CORPORIS HUMANI.

Primum edita Anno 1707.

§. I.

PRAXIS medicæ quum fulcra sint *Ratio* atque *Experientia*; quilibet, artem salutarem exercens, muneris necessitate adstringitur, ut mutationes ac phænomena, tam in, quam extra systema corporis humani occurrentia, non solum attendat atque

observeat quam diligentissime, sed in eorum etiam, ope ingenii atque judicii, rationes ita inquirat, ut effectuum causas secundum omnes circumstantias reflectendo ac dijudicando bene habeat exploratas, nec unquam, aliquid esse aut fieri sine ratione sufficiente, pueriliter credat.

§. II.

Sereno eoque quieto existente cœlo, animum, negotiis delassatum, recreandi gratia sive equo currente sive pedibus velocioribus quispiam certum absolvat spatium; sub hoc corporis motu in cutis denudatæ superficie impulsus a re quadam, visus sensus fugiente, majorem vel minorem pro celeritatis aucto vel diminuto gradu, eum percipere, experientiæ est. (§. 1.) Atque hic impulsus non solum cœlo a nubibus libero apparente, sed ubivis etiam locorum sentitur.

§. III.

In conclavi acceleratis moveat se homo versus elychnii flammam passibus, ubi illius directionem corporis invisibilis impulsu (§. 2.) ita mutari, ut non amplius sub coni ascendat forma, sed oblique magis ad latera diversimode flectatur, observabit. Pari ratione si contra pilorum vel rasuræ calami scriptorii fasciculum celeriter moveatur manus, illorum motus versus oppositum fieri latus, observatores non fugit. Idem effectus in araneorum telis, plumeolis, chartulis aliisque corporibus tenuioribus, rarioribus ac levioribus, iis, minima non contemnendis, nunquam non sese manifestabit.

§. IV.

Ex quibus (§. 2. & 3.) necessario sequitur, illud, quod visui nostro sese subducit, per quod nostra libere movemus corpora & quod impellit, invisibile & fluidum esse corpus, quod a Physicis AER vocari solet.

§. V.

Maximi momenti proprietates aeris eruditis prio-

ribus fuerunt seculis ignotæ. Postea vero quam *Antiliam Pneumaticam*, ab OTTONE GUERICKIO seculo anteriore inventam, inter accepta referimus, eæ, maximam in rem Physicam & Medicam afferentes utilitatem, sequentibus sunt temporibus detectæ.

§. VI.

Si vasis metallici, artificis manu confecti, & coni inversi & abscissi referentis formam, superius orbe vitreo non obtegatur solum orificium, sed peripheriæ etiam tam vasis, quam orbis interstitia ceræ seque ovillini commixtione obducuntur, inferius vero angustius apertum relinquitur sicque *Antilæ Pneumaticæ* applicatur, nullam exinde in vitro fieri mutationem, sed immobile permanere, experientia (§. 1.) nos docet. Cujus ratio (§. 1.) in fluidorum æquilibrio unice quærenda. Columna enim aeris, in vase inclusi, vitrum tanta sursum vi, quanta exterior, idem circum ambiens, deorsum premit, ergo frangi non potest. Quamprimum vero æquilibrio, una aeris columna diminuta, tollitur, altera agere non desinit. Quam assertionem in veritate niti, quemlibet experimento experiri licet: aerem ex vase, vitreum habente operculum, una vel altera vice exantlando quis diminuat; sensibus mox percipiet, illud in innumeras, eo cum fragore, ac si quis sclopetum explodat, dissilire partes, & quamvis ictu mallei illud diffingatur celerrimo, nullatenus tamen talis excitari poterit sonitus.

§. VII.

Vitreus porro sumatur globus per quem cylinder angustioris spatii transfigatur, hic vero in ingressu epistomio, ad id adaptato, muniatur, quo exterius cylindri orificium pro lubitu claudi atque aperiri possit. Aer, vitrea in sphaera contentus, evacuetur, dein cylindri orificium in vas, aqua plenum, immergatur, quo facto, aer, aquæ incumbens illiusque superficiem premens, præstat, ut aqua per orificium inferius in cylindro ascendat & per superius sub fontis salientis forma in globum, aere vacuum, maxima cum violentia ac celeritate jucundissimo aquam quaquaversum dispergat spectaculo, ita, ut rerum physicarum ignari ideo in admirationem veniant. Conf. NIEWENTYT *de l'Existence de Dieu Liv. II. Chapit. I. p. 187.*

§. VIII.

Duo, cylindri incurvati mercurio adimpleti, crura, in vas quoddam, cui mercurius innatat, immis-
sa; campanæ committantur, ubi, post unam aeris

extractionem mercurium in siphonis vertice utrinque divelli, cernes, atque si, aerem ex campana evacuando, perges, sensibilibus tandiu descendet, donec mercurius, omni exantlato aere, in cruribus siphonis cum mercurio in vase contento lineam sistat horizontalem. Conf. HAMBERGERI *Elementa Physices C. VI. de aere* §. 202. n. 4. p. 143.

§. IX.

Mercurium in *Barometro* sive MORLANDINO, BERNOULLIANO sive HUGENIANO 27. 28. 29. 30. aut 31. digitorum exhibere altitudinem, experientia (§. 1.) convincit, cum tamen oporteat, ut descendat & planum cum mercurio, capaciore in vase contento, constituat, sed infra digitorum istorum non descendit altitudinem, nisi sub campana aer, barometron ambiens, exsugetur, ubi æque, uti mercurius (§. 8.) in cylindro incurvato, sese demittit.

§. X.

Ergo Physici ope *Antlia Pneumatica* (§. 5. per- scrutati atque experti sunt, aeris columnam (§. 6.) sicuti aquam non deorsum solum premere, & corpora sublato aeris æquilibrio frangere, verum aquam etiam per canalium altitudinem in spatia ab aere vacua (§. 7.) violenter impellere atque in cylindris incurvatis (§. 8.) & Barometris (§. 9.) mercurium suspendere.

§. XI.

Ex dictis (§. 10.) ergo prima aeris proprietas h. e. GRAVITAS patescit. Atque cum omne corpus partes extra se positas habet, quæ illius specificam constituunt gravitatem, aer vero corpus est, (§. 4.) ergo, quod gravis sit, sequitur.

§. XII.

Varii a Physicis, aeris indagandi gravitatem docentur modi, sed pluribus unicum, a *Præceptore* quondam meo Dn. D. ac Prof. HAMBERGERO, insigni *Academice Jenensis* ornamento, cum cucurbita vitrea, paulo majorem habente diametrum, in *Elementis suis Physices C. VII. de aere* §. 305. p. 145. f. exhibitum, præferendum esse, existimo. Curiosorum quilibet ejus imitari poterit experimentum, si nimirum cucurbita, ab aere sub *Antlia Pneumatica* evacuata, uni imponatur lanci, in altera vero tantum pondus, quantum ad æquilibrium conficiendum sufficit, adhibeatur & postea irruptioni aeris, remoto epistomio, in cucurbitam liber concedatur aditus, quo irruptionis momento cucurbitæ pondus descendendo accrescere, alterum vero in altera lance ascendendo diminui, observabit. Conf. WOLFFII *Phys. Experim. T. I. c. 5. §. 136. p. 327. it. §. 86. p. 153. f.*

§. XIII.

Si colli sphaeræ satis amplæ orificium in radice montis epistomio clauditur atque in cacumine illius epistomium removetur, adnota plumula ab orificii latere extrorsum dirigitur; contrarium vero fit, si, clauso in cacumine montis orificio, in radice montis epistomium auferis: nam eo, quo extrahitur epistomium, tempore plumula introrsum vergit. Conf. cit. *Elem. Phys. HAMBERGERI C. VI. de aere* §. 280. p. 129. Quale experimentum datis sub conditionibus omni tempore, omni loco & regione infallax deprehenditur ejusque ratio comprehensu non est difficilis. Ponamus aeris columnam in radice montis incipere inque illius cacumine finiri, nec non in quatuor partes æquales eam divisam esse. Inferior igitur columnæ pars magis premitur & coarctatur,

quam secunda, hæc magis, quam tertia &c. Ergo superior columnæ pars aeris minus compressa & coarctata est, hinc levior minorique vi resistentiæ prædita, quum e contrario inferior, magis compressa ideoque majori vi resistentiæ pollens, quin & ponderosior & gravior dijudicanda. Quare aer in radice montis in sphaeram inclusus, in vertice illius, ubi aer rarior, remoto epistomio, minorem aeris inveniens resistentiam, egreditur, quod aer in cacumine montis exceptus in radice illius præstare non potest. Remoto enim epistomio, aer exterior magis compressus, ponderosior & gravior minus compressum & leviolem inclusum in sphaeram irruendo magis comprimit, coarctat & cum eo spatia occupat.

§. XIV.

Una aeris demonstrata proprietate h. e. *Gravitate* (§. 6-13.) altera nunc experimentis evinci debet. Quæcunque vesica, per calamm sive alium inflata tubum, dein vero manuum compressione ab aere ita evacuata, ut collapsa appareat, ejusque latera se invicem, exceptis minimarum plicarum lateribus, tangant, *Antlia Pneumatica* campanæ, ope sili, colum vesicæ arctissime constringentis, hamo affigatur, ut libere inibi fluctuet; tunc retruso per vices cylindri embolo, aer, vesicam ambiens, ex campana foras propellatur, qua aeris extractione fit, ut aer in vesica paucus, sublata exteriori resistentia & compressione, vesicam non aliter dilatet, ac si illa ab aere per tubum inflaretur: Conf. WOLFFII *Phys. Exper. T. I. c. 5. §. 83. p. 143. ff. & cit. NIEWENTYT L. II. Chap. 1. p. 180.*

§. XV.

Si ex carpione vesica extrahitur illaque in notabili distantia ignis admovetur flammæ, membranæ illius ab incluso aere calefacto mox non sensibilibus modo expanduntur, sed uno etiam vel altero temporis momento cum fragore disrumpuntur. Idem quoque cum vesica suilla, bovina, vervecina aliisve tentare licet. Quod si enim vesica collapsa pauca aeris immisione inflatur, dein collo ejus madefacto filo canissime obstricto, candentium carbonum, illam perpetuo in gyrum vertendo, admovetur calori, calefactam, non aliter ac si exterior aer exantlatus esset, intumescere vesicam animadvertimus. Quando vero illa frigidum in locum reponitur, ibique detinetur, sensim subsidendo iterum complicatur. Quum igitur vesicæ nil nisi aer immixtus ibique inclusus insit, aerem solum vesicam expandere posse, quilibet mente comprehendit. Atque aer, quando calefit, quum vesicam expandat simili plane modo ac si aer in illam cogatur, non potest non esse, quam ut calore aeris partes ejusque interstitia dilatentur. Calorem ergo aerem rarefacere, expandere ipsique majus conciliare spatium, ex jam positis patet. E contrario quum vesica, a calore ignis remota, coarctetur, aer, dum frigescit, angustius occupare debet spatium; hincque eundem condensari, clarum est. Quoniam autem aer calore expansus non adeo facili negotio, uti frigidus, vi experientiae, comprimitur, illius resistentia ac vis calore quod augeatur, frigere vero dirinuatur, sequitur. Conf. WOLFFII *Phys. exper. T. I. C. 5. f. 133. p. 339. ff.* Adde magna aeris in vesicam intrusionem & compressionem, qua ejus vis maxime augetur, nullus adhuc Physicus quamvis experientissimus ejus disruptionem hæctenus obtinere potuit. Conf. WOLFFIUS *c. I. §. 129. p. 325. f.* Contrarium vero experimur in vesica, ab aere calidissimo expansa, quæ, disruptis membranis, liberum aeri permittit exitum. Conf. cit. WOLFFIUS §. 133. Ex quo iterum notum

notum est, vim aeris calore augeri. Nec perceptu difficile est, quod, si unus aer calidus, alter vero frigidus sit, ab eodem pondere eandem minime sustineant compressionem, quod calidior minorem, frigidior vero majorem patitur compressionem.

§. XVI.

Quum paucus in vesica collapsa praesens aer ante aeris exterioris exsuctionem vesicam non expandat, post illius vero extractionem & rarefactionem (§. 14. & 15.) vesicam mirum in modum turgescere sinat, concludere omnino licet, aerem in vesica collapsa, ante aeris exterioris diminutionem atque ablationem, compressum atque in statu fuisse violento. Illud igitur, quod in statu violento compressum est, & sese ablata resistentia, expandit, est corpus elasticum. Atqui aer in collapsa vesica in statu violento compressus est, & , ablata resistentia aeris exterioris, sese expandit; Ergo aer est corpus elasticum. Hinc altera aeris proprietas ELASTICITAS est. Hinc ex datis aer apprimere definiri potest: Quod sit invisibile & fluidum corpus (§. 4.) GRAVITATE (§. 11.) atque ELASTICITATE (§. 16.) gaudens.

§. XVII.

Ex aeris definitione (§. 16.) non sine ratione deducitur, aeris particulas juxta fluidorum naturam 1) sphaericas & 2) intus cavas esse. Aer enim nec fluidus nec elasticus esse posset, nisi ejus particulae sphaericae intusque cavae existerent; quippe ramosae (wie Pflaum & Federger) & spirales, quas nonnulli aeri assignant, fluiditati adversantur. Cavae vero aeris esse debent particulae, cum aer a vi exteriori comprimi atque expandi (§. 14. 15.) sola resistentia ablata possit. Ergo particulae aeris solidae esse nequeunt. Si enim solidae essent, non comprimerentur, sed comprimuntur, vi experientiae; hinc sunt cavae vel intus sunt fibrae uti in spongia, & fibrae hae minimam rotundam constituunt particulam.

§. XVIII.

Nec minus ex aeris proprietatibus (§. 11. & 16.) nullum in superficie terrae locum ab aere vacuum esse, sed illam aere ubique abundare, manifestum est. Et quamvis ejusmodi, nescio quem terrae locum statuere vellem, aeri tamen, in vicinis undanti regionibus, nihil quum resistat, non ob gravitatem solum juxta omnium fluidorum corporum indolem atque naturam, verum etiam ob vim elasticam (§. 16.) is sese ibi moveret, sese expanderet ac tamdiu illuc irrueret, donec sua gravitate atque elasticitate aeri vicino resistendi potentia valeret. Ejusmodi terrae locus, ubi nullus aer esse fingitur, cum vase, ex quo aer exantlatus est, comparari potest. Sicuti enim aer exterior in illud celerime prolabitur, usque dum aer, in vasis contentus spatio, gravitate atque elasticitate est exteriori aequalis, idem in globo ut fiat terraqueo, si fortasse in quadam aer esset regione ablatum, necesse est.

§. XIX.

Hinc aer est fluidum terrae universalissimum [§. 18.] Omnia enim, vi experientiae, replet spatia, ergo omnibus vegetabilibus, fructibus, lapidibus, reptilibus, insectis, brutis, hominibusque inest, nec ullum animal, quod vivere dicimus, sine aere vitam ad notabile temporis intervallum sustinere valet, sed aere exteriori sublato, brevi post mortem succumbit, id quod experimenta physica omnes, qui lectionibus physicis experimentalibus in Academiis interfuerunt, ad oculum convincunt. Quodsi enim bruto, quodcunque tale sit, aer sub campana au-

fertur, pro aeris exsuctionis multiplicatione, varias oculorum rotationes omniumque membrorum contorsiones ac tortuosas flexuras, quin & omnium vasorum sanguiferorum videre licet tumescuntiam, usque dum, omni aere remoto, expiret. Si autem animal non interficiendi voluptas tibi erit, pro aeris diminutione ejusque reiterata immisione mox illud agonizari mox resuscitare poteris.

§. XX.

Fluidi hujus catholici [§. 18. & 19.] beneficio, quod mediante saliva, ciborum potuumque ingestione, nec non peculiaribus vasorum, in cutis cortice terminatorum, osculis in vasa nostra attrahimus, inque his cum sanguine, lymphâ, fluido nerveo reliquisque humoribus commiscemus, omnes corporis actiones vel vigent vel prosternuntur: quare homines mox bene valent, mox aegrotant. Aer igitur quum tantam vim, potentiam atque actionem in nostra exerceat corpora, merito in Pathologicis primus ordo rerum sex non naturalium ipsi debetur, nec ulla tam in Physicis, quam Medicis doctrina huic de aere jure palmam praeripere potest. Quare & haec omnibus medicinae cultoribus in vitae Academicæ ingressu sedulo inculcanda, ut praereliquis hanc sibi commendatam habeant, quod in praxi, eum morbis saepius difficillimae curationis citius, quam remedia praestantissimae alias virtutis mederi posse, experimur. Attamen sicuti aer purus, temperatus atque elasticus corporis sanitati vitaeque inservit diuturnitati; ita & impurus, nimis frigidus, pluviosus, nebulosus, squalidus & gravis naturali corporis constitutioni adversatur; qua mutata, morbo corpus affligitur.

§. XXI.

Sana corporis naturalis constitutio, qua omnes corporis nostri partes suas decenter peragunt operationes, ab anni temporumque vicissitudinibus mirum in modum alteratur, ita, ut alii morbi hyeme, alii vere, alii aestate, alii denique autumnosuum vulgo prodant typum; nihilo tamen secius quodlibet anni tempus hominibus commoda sua atque salubritates affert, quae ratio ex aeris, temperamentorum, sexus atque aetatis natura unice petenda est. Hinc homines in juventutis flore constituti ac robusti melius frigus, quam senes atque infantes perferunt: hi enim citius, isti minus frigore aegrotant.

§. XXII.

Eo tempore, quo sol Capricorni signum attingit, vel a tropico australi versus aequatorem movetur, borealis haemisphaerii incolae, hyemem adesse, dicunt. Sol hyeme a nostra plaga boreali temperata quum sit remotissimus, non radii solum solares per vastissimum aeris spatium maxime oblique in terrae superficiem cadunt, verum eorum partes etiam igneae necessario quamplurimae partim in aere retinentur, partim pauciores, quae in terram cadunt, a frigida absorbentur terra. Atque absentibus partibus igneis, quae caloris gradus sunt causae, statim frigus praesto est.

§. XXIII.

Quamvis autem vis radiorum solarium crescat, ideo tamen calor non crescit: mense enim Januario & Februario vis radiorum crescit, sed calor decrescit, quibus mensibus, vi experientiae, frigus est intensissimum. Ergo distinguendum est inter vim radiorum solarium & calorem ipsum, qui ex ratione [§. 22.] non potest non abesse.

§. XXIV.

§. XXIV.

Hyeme [§. 22.] quo minori in quantitate partes igneae in aëre adsunt, eo intensius frigus esse debet; quo frigus est intensius, partes igneae e fluidis in frigida eo citius transeunt loca, istis egressis, hæc ce motum amittunt, condensantur & coagulantur. Aqua enim fontana, acetum, cerevisia, aliaque fluida, amissis hyeme partibus igneis, coagulantur, atque amittunt fluiditatem. Eodem modo cum corporis nostri fluidis res sese habet, ex quibus pro minori vel majori frigoris gradu vel pauciores vel plures igneae partes, quæ ipsis fluiditatem conciliant, amittuntur, adeo, ut vel increassentur, condensentur minusque mobiles fiant, vel intensissimo coagulentur frigore, quo omnis humorum circulatio atque cum hac cessante vita sufflaminatur.

§. XXV.

Frigus hyemale, cui homines corpora sua præter consuetudinem diutius sæpe exponunt, sanitati perniciosissimum est. Partes enim igneae [§. 24.] tam e pulmonibus, quam tota corporis nostri superficie in aërem, nostrum cingentem corpus, sese movent frigidum, ibique dissipantur, quibus in aërem dispersis frigidum, nostri corporis diminuitur calor, diminuto hoc, corpus nostrum frigus subit, frigus autem subsequitur in tota corporis humani superficie insensibilis transpirationis intermissio, qua partes salinae, sulphureae ferosaeque, in vitae salutem e corpore eliminandae, retinentur, massae sanguineae omniumque humorum condensatio contingit; hinc motus istorum fit lentior, particulae sanguinis non satis conteruntur, trituantur ac diminuuntur; hinc major partium terrestrium cohesio, major vaporum inprimis extremorum obstructio, nec non influxus & sanguinis & fluidi nervei in musculos ac viscera inaequales proveniunt.

§. XXVI.

Diminutis partibus corporis nostri igneis atque impuris retentis particulis falsis, sulphureis ac ferosis, partium solidarum & fluidarum nutritio, quæ succis fit congruis, gelatinosis ac temperatis nullumque gustum habentibus prædominantem, insigniter læditur; pressio hinc pede actionum naturalium sequitur læsio; læsis vero actionibus naturalibus, motus quoque vitales, in cordis atque articularum diastole & systole, thoracisque dilatatione & constrictione consistentes, salvi diu nequaquam esse possunt, unde quamplurima morborum genera tam acutorum, quam chronicorum suos ducunt natales. Et licet omni tempore salutare transpirationis insensibilis opus intercipi possit: nullum tamen tempus ad istam impediendam tam aptum est, quam hyemale; unde observantiæ est frequentissimæ, tunc morbis lateralibus, pulmonum inflammationibus, lethargis, gravedinibus, raucitatibus, tussibus, pectoris, laterum, lumborum capitisque doloribus, vertiginibus atque apoplexiis, sicuti antiquissimus Medicorum parens, HIPPOCRATES *Sect. III. aph. 23.* & LOMMIUS *Observ. Medicin. L. 3. p. 273.* annotarunt, præ reliquis anni temporibus homines divexari.

§. XXVII.

Quo major frigoris gradus, eo major est aëris compressio, quo major hæc, eo gravior magisque elasticus est, & quo gravior aër, eo major in illum e corporibus partium ignearum fit transitus. Senes ergo ob minorem caloris gradum ejusmodi aërem frigidum minus juvenibus sufferre possunt.

Quum enim illorum vasa, humores vehentia, jam jam valde exsiccata, collapsa & pallida appareant, ex quibus lenta sanguinis in iis circulatio atque in plurimis capillaribus nulla dijudicanda, hinc eo cautius corpora sua a frigore ut bene defendant, ipsis consultum est; hinc, quando senes corpora sua frigori hybernali inprimis flatibus borealibus, objiciunt, mirum non est, quod tunc horripilationes, raucedines, tusses, vires delapsas, inquietudines, appetitum prostratum & non infrequenter apoplexiam persentiscant. Juvenes e contra robusti & optima fruantes sanitate, ob majorem caloris gradum, aërem frigidum, graviolem atque elasticum lubentius senibus sustinent. Horum enim vasa legitima adhuc fruuntur nutritione, tono gaudent optimo, pulsus cordis atque articularum vegetissimus est, hinc frigidus, compressus atque elasticus ejusmodi aër in vasa ipsorum delatus, in sanguine calidiore sese expandit, humorum circulum reddit celeriolem flasi- que sanguinis expedite resistit.

§. XXVIII.

Nec sano ex majori sereni sicque frigoris gradu corpori, si vestimentis probe munitum sit suumque aquisiverit complementum, noxa accrescit, alias Norwegiæ, Sueciæ, Finniæ, Moscoviæ aliarumque regionum, quas radii solares de die vel sparsim maxime oblique vel ad multos dies nullatenus illuminant, incolæ præ aliis, regiones meridiem versus inhabitantibus, debiliora haberent corpora maturiusque naturæ satisfacerent, in quibus tamen contraria res est. Maximo enim corporis pollent robore, ossa ipsorum, muscoli, vasa, viscera totaque corporis compositio compactioris est naturæ. Quidam illorum longa corporis incedunt proceritate, alii quadrata nutriunt atque ostendunt corpora; ipsorum sanitas a frigore raro periclitatur, hinc etiam longævus eos esse scimus, ex nulla alia ratione, quam quod serenus, frigidus, compressus atque elasticus aër, in regionibus septentrionalibus hyeme potissimum regnans, cum humoribus permixtus in iis a calore naturali sese expandat, quo solidorum & fluidorum motus atque progressus mirifice adaugentur; hi vero quo expeditiores sunt, eo sanior vita æstimanda est.

§. XXIX.

Quodsi vero aër frigidus atque elasticus (§. 28.) corpora, heterogeneis referta humoribus, cacochymica, calculosa, arthritica, hypochondriaca, scorbutica, malo infecta venereo, immediate tangit, contrarius sequitur effectus. In hisce enim tam solida, quam fluida nec legitimum tonum nec sanguinis possident temperiem, hinc ex corporibus, vestimentis non probe munitis, partes quando igneae (§. 25.) quæ solidis ac fluidis sufficientem adhuc & motum & progressum conciliant, morborumque graviores a corporibus abarcent symptomata, in frigidum exeunt aërem, tam solidorum motus quam fluidorum retardatur progressus; transpiratio impeditur, humores increassantur, condensantur, impuriore redduntur, vasa ob majorem cohesionem opilantur atque a tono suo magis dejiciuntur; hinc cacochymicos mox albor, mox æstus per vices inquietat, appetitus in illis est spurius, eorum corpora occupat lassitudo omnisque corporis animique filel vigor. Calculosi immanes sæpius ab aëre frigido patiuntur cruciatus ac tormina, inprimis si eorum intestina debilitata sunt, quæ a flatibus plerumque ultra modum dolorifica cum sensatione expanduntur. Hi enim quando intestini coli flexuram sinistram versus renem distendunt, hoc sinistram premit

premit renem, qua pressione fit, ut calculus antea immobilis ac in quiete positus e loco suo dimoveatur & in cavitatem pelvis coerceatur, in quibus dein partibus, nerveam irritando, corrodingo ac vellicando tunicam, dolores excitantur exquisitissimi. Quandoque observatur, calculum majoris magnitudinis e loco suo in ureterem intrusum ibique impactum minorem hujus peripheriam in farciminis ampliare peripheriam, qualis casus in *Theatro Anatomico Argentoratensi* a me aliisque Medicinæ Studiosis, qui Anatomicis *B. Prof. SALTZMANNI* interfuerunt sectionibus, visus fuit. Ubi hoc contingit, ægotantes maximo cum ejulatu strangulantur. Nec minus arthriticis frigus officit: in iis enim transpiratio, qua materiæ salino-serosæ ac tartareæ amandari debent, impeditur, qua intercepta, partes tartareæ seroso-salsæ a peripheria corporis ad centrum, hoc est nobiliora viscera retropelluntur, ibique stases, inflammationes, corrosiones, vellicationes, dolorum sensitivorum causas, suscitant; quæ si sphacelo corripuntur, mors acceleratur. Hypochondriaci, quorum systema nervosum debile, ventriculus, intestina ac reliqua vasa tono destituta, cruditatibus, humoribus crassis minusque fluxilibus infarcta, frigoris vim peracute sentiunt: flatuum enim cito datur proventus, qui intestina distendendo in regione lumborum spasmos, ventriculi, nauseam, pectoris, angustiam præcordiorum ac syncopen atque ex consensu nervorum ventriculi, qui ex capite huc excurrunt ac disperguntur, ob partes acidas, tunicam ventriculi nerveam corrodingas, in capite vertigines oculorumque obfuscationes producunt. Mala, quibus scorbutici obnoxii sunt, ob cuticularem a frigore interceptam perspirationem pariter exacerbantur, hujusque sola intermissione maxima humorum impuritas, in qua scorbuti genius situs est, suam, præsertim in iis, qui victu crasso, falso atque infumato utuntur, genesin acquirit; unde major oris foetor, facies lividior, gingivarum major ad putredinem dispositio, ulcera maligniora, maculæ lividissimæ, major ad sphacelum propensio, dolores fixiores, periculosiores spasmi ac convulsiones, tormina ventris frequentiora, tremores artuumque contracturæ enascuntur pertinaciores. Adde miasmate ac venereo conspurcatis inquinamento frigus nullatenus conducibile est. Ratio hujus in promptu est. Glandularum enim ductus, qui lymphæ tenaci caustica obsessi sunt, eo magis coarctantur; lymphæ in iis tenacior, spissior minusque mobilis fit, unde stagnat, ex stagnatione, tumor scroti, in inguine bubones, in gutture uvulæ ac glandularum adjacentium inflammationes; membrorum lassitudines, in facie & pectore pustulæ inque pedibus ulcera mali moris nunquam non florescunt.

§. XXX.

Inter corpora suis in canalibus impuros vehentia succos (§. 29.) merito podagrica, chiragrica, erysipelacea, ischiatica, exulcerato ægotantia cancro referuntur. Hæc quantis ab admissio frigido aere affligantur doloribus, quotidiana docet experientia. Materiæ enim vitiosæ tartareæ acris, qua podagrici scatent, in extremitatibus vasorum pedis minimorum, ob pulsus arteriarum in his partibus debiliorem atque ascensum perpendicularem, cum sanguine progressus sub benigna aeris temperie lentus est: simul ac vero frigus, quod pedes fugere nequeunt, accedit, cruorem mobilem incrassat ejusque motum defraudat. Hæc materia stagnans sub corporis quiete vermium æmulatur morsus; ab hac inflammationes tumoresque in conspectum veniunt. Quodsi vero partes, durante insultu, morbosæ re-

frigerio exponuntur, & materia vellicans acris apulsu sanguinis retrocedit, caput inde dolere, cor vehementer palpitare, pulmones difficultate spirandi laborare, stomachum vomitare, omnesque vires tunc prostratas esse, inflammatione ac sphacelatione denique ventriculi atque intestinorum vitam eripi, observantiæ est. Quæ truculenta in chiragra, erysipelate reliquisque symptomata non minus sapissime contingunt. Æstivo autem tempore, quo fordes excrementitiæ per subcutanea copiosius & liberiorius diffillantur spiracula, paroxyfimi silent.

§. XXXI.

Utriusque sexus personæ, quæ habitus sunt spongiosi, quæ exilia habent vasa & quæ in luxu otiosam frequentius ac sedentariam agunt vitam, plus sanguinis, quam eorum vasa capere possunt, gignunt; hinc in insigne sanitatis emolumentum per ramificationem ac propaginem venæ splenicæ hæmorrhoidalem abundantem & superfluum per anum exonerant sanguinem. Hic si fluit, fluxus audit hæmorrhoidalis, qui ab arthritide, podagra, calculo aliisque corporis morbis præservat ferocissimis. Quodsi vero emanet, dictorum morborum generationi materia præbetur fecundissima. Nulla autem re muneris sui magis obliviscitur ac cohibetur, quam improvida aeris frigidi admissione corporisque refrigeratione. Frigus enim condensationis sanguinis vasorumque collapsionis ac constrictionis esse causam, ex dictis (§. 24. 25. & 27.) patet. Unde, ut fluere desinat, necesse est. Non unum, sed plura mihi nota sunt exempla, quæ post fluxus hujus salutaris factam a frigore emanationem vomitum cruentum passa sunt. Nec id mirum est: Sanguis enim in venis hæmorrhoidalibus nullum inveniens exitum per ramum splenicum in vasa ventriculi breviter copiose recurrit, quæ, disruptis a copia sanguinis eorum lateribus, cruorem irruentem in ventriculum effundunt; hic vero spatimodice affectus, sanguinem e fundo per oesophagum atque oris rejicit aperturam.

§. XXXII.

In sexu feminino per oscula venarum uteri atque vaginæ superfluis sanguis singulis salutariter excernitur mensibus, qui si rite effluit, corpus animusque viget. Sed frequens nos edocet praxis, menses suam multoties mutare periodum vel penitus negligi, unde corpus statim ægotat mentisque vigor atque alacritas perit. Quodsi in irregularis hujus fluxus vel ejus obstructionis inquirimus causam, nimiam corporis refrigerationem præter victus incongrui animique pathematum in culpa esse excessum, audimus. Atque irregularitas vel obstructio mensium a frigore facillime infertur. Sexus enim ignobilioris pudenda præ nobiliore aëri frigido liberior exponuntur, hinc minus mirandum, quando tempus debitum lunare minatur vel jam instat, quod cursus illius ex dictis (§. 24. 25. & 27.) pervertitur vel retinetur. Exinde palam fit, gravissimos corporis pullulare morbos. Periculosissimæ enim vel ex naribus vel ex pulmonibus vel ex stomacho, quæ hujus inversione per os exspuuntur, oriuntur hæmorrhagiæ. Tota massa sanguinea in legitima sua crassi temperieque vitatur, omnia vasa ac viscera nimios ob infarctus tonum ac robur amittunt. Ventriculus chyli alimentosi loco acidus gignit cruditates, inde sapissime ad vomendum conatus, vasa lactea cruditates ex intestinis absorbendo per ductum thoracicum cum sanguine in venam subclaviâ commiscunt; ex quo, quum lymphæ purior, partes nutriens, separari nequeat, malus fit corporis

corporis habitus, facies aspectu luridi lividique fit coloris, animum moeror ac tristitia occupat, ambulando vel ad aedium scalas ascendendo spiritus abbreviatur, appetitus evanescit, & si quidam ad-est, minus sana concupiscit, oedematofus pedes occupat tumor, omnesque vires prostratae sunt. In aliis mala ingravescent. Quibusdam cachexia, febres lentae & hecticae, quibusdam erysipelas ac rheumatici superveniunt dolores. Quae symptomata, mensibus iterum in ordinem redactis, cessant: sed curatio non est minimi, sed maximi momenti: illorum enim vehementia non multum solum Medico facessit negotii, sed saepius etiam, omnibus medicamentis in auxilium vocatis, spem recuperandae valetudinis illudit.

§. XXXIII.

Gravidis, quando parturiendi instat tempus, frigus difficilem & valde laboriosam foetus reddere exclusionem, aequae ex antecessis (§. 24. 25. & 27.) elucet. Nec aliquem latere potest ratio, ob quam, excluso jam foetu, post refrigerationem corporis lochia exstillare sinant, & quare hisce cohibitis in utero ardor & dolor; in regione umbilici tormina & borborygmi; lumborum, punctiones, thoracis, angustia praecordiorum, singultus spirandique difficultas; capitis, cephalalgia, phrenitis, deliria ac denique mors vitam finiat.

§. XXXIV.

Generibus morborum, qui a frigore (§. 26. 27. 29. 30. 31. 32. & 33.) nascuntur, alii praeterea accensentur quamplurimi, qui satis superque de aeris frigidi in corpus humanum testantur potentia. Nos enim, vi experientiae, sentimus, una parte refrigerata, cum toto corpore frigus communicari: huiusque ratio non est occulta: Nam partes igneae frigidas in partes (§. 27.) seu humores transeunt frigidos, hi vero sanguinis circulo iterum redeunt & cum massa sanguinea sese commiscunt, qui aliquo modo ab igneis sanguinis partibus iterum fluidiores fiunt; attamen totam massam non satis calefaciunt, hinc cohaesio partium fluidarum major, hinc minor vasorum expansio, hinc horum collapsio, detumescencia horrorque totius corporis. In primis autem nudi pedes a stratis lapideis & pavimenti refrigerati totum refrigerant corpus. Partes enim igneae ex pedibus in lapides transeunt, unde aliae a partibus corporis superioribus in perfrigeratos transeunt pedes, unde tonus intestinorum, ventriculi aliorumque viscerum damnum capit, in quibus vasa debilitantur ac constringuntur potissimum hepatis, ex quo, constrictione facta, bilis per ductum chodochum in intestinum duodenum majori propellitur in copia atque ob fugatas particulas igneas, quae vasorum tono intervium, & chylus & bilis ibi nimis diu commorantur, hinc chylus cum bile commorata intestinum concipit motum, quem tormina ventris, borborygmi & diarrhoeae sequuntur. Hic ingeniosi Venerisque amantissimi reminiscor pictoris, qui ob pilularum mercurialium abusum ad quinque & sex plerumque dies oclusam habuit alvum illamque pertinacissime constrictam vel penicillo suo, oleo olivarum illito vel pedum denudatione atque ambulatione in pavimenti frigidis pro lubitu reseravit, sicque ad officium suum revocavit.

§. XXXV.

Omnium humorum, quos nostrum corpus in suis vasis recludit, mobilissimae ac volatillissimae naturae sunt Spiritus animales, qui corpori sensationes omnesque motus largiuntur. Hi autem ob mino-

rem respectu aliorum fluidorum particularum cohaesionem partes igneas in aerem frigidum, corpus tangentem, per minima oscula cito ablegant & quo magis corpus a vestimentis est denudatum, eo magis particularum ignearum ex iis fit transitus: quo major enim est aeris contactus, eo major illarum transitus, inde reliqui spiritus animales spissescunt, lentius in partes influunt, hinc minus hae moventur, sensus minuuntur & tandem frigore aucto, omnis motus ac sensus perit.

§. XXXVI.

Pars feri purior a frigore eadem ex ratione (§. 25.) crassior minusque aptus fit ad gelatinam solvendam, quare praeterea saliva & liquor pancreaticus, a ferro trahentes originem, spissitudinem acquirunt, qua ciborum carceres intime minus recluduntur; ex quo chyli cruditates, spissitudines, motus humorum retardatus, stases, atrophia, cachexia, hydrops &c. pronascuntur. Praeter haec, quia constat, sanguinem spiritus animales, serum partesque salino-sulphureas rubicundas constituere, ita, ut hae, in feri interstitiis involutae, per vasa circulum suum peragant, pari modo ob particulas igneas a ferro amissas, Medicum latere non potest, serum coagulari partesque terrestres praecipitari: factio igitur coagulo & praecipitatione stasis infestat, quae ob accedentem novum sed minus fluxilem sanguinem magis magisque exacerbatur, dum nimia vasorum, ob motum intestinum vitiosum, extensione atque expansione, inflammatio, pus, abscessus, sphacelus omnisque motus ac sensationis cessatio, ex his denique mors protuberat.

§. XXXVII.

Partes igneae dum e musculis egrediuntur, hi mox subsident & coarctantur, mox aliquo modo iterum intumescunt & expanduntur. Musculis enim frigefactis & subiectis particularum ignearum ex vicinis novus fit accessus, unde in iis musculis, ex quibus igneae sunt egressae partes, fit subsidentia & coarctatio, in iis autem antea subiectis, in quos particularum ignearum transitus factus fuit, dilata-tio, quae vero iterum non diu durat, quia igneae sanguinis spirituumque animalium particulae de novo transeunt; quae diversa actio apud Medicos tremoris nomine insignitur. Atque, majore frigoris adaucto gradu, majore quoque in copia igneae exeunt particulae, quibus nimia in quantitate amissis, paucae adhuc relictae ad musculorum expandenda vasa ineptiores sunt, hinc ut diversa actio sive tremor cesset, sequitur: sique hic frigoris gradus diu corpus afficit, membra non fiunt solum rigida, sed & musculorum & membrorum rigiditatem atque immobilitatem ea, quae (§. 35.) innui, concomitantur.

§. XXXVIII.

Quum universa cerebri substantia juxta VIEUSSENIIUM in novo suo *Systemate vasorum*, BERGERUM in sua *Physiologia*, RUYSCHIUM in *Epist. XII. & Thesaur. Anat.* variis in locis atque HEISTERUM in *Compend. Anat.* tenerrima ac vasculosa sit, vascula vero cerebri, uti RUYSCHIUS artificiosis suis ea dextre exhibuit injectionibus, stupendae sint exiguitatis, adeo, ut eorum extremitates nec armato oculo, nisi cera infusa coloratae sint, in sensum cadant, hinc facili concludere licet negotio, cerebrum partes igneas refrigeratione citissime amittere, id quod etiam spiritibus obtingit animalibus, unde reliquum fluidum, in vasis cerebri praesens, spissius fit & latera nervorum coarctantur, hinc sanguinis per

per vasa cerebri & spirituum animalium per nervos lentius procedit transitus, unde hemicrania, apoplexia, syncope, paralyfis aliique affectus soporosi derivantur.

§. XXXIX.

Ex inferiori cerebri ac cerebelli substantia medullam oblongatam ad magnum ossis occipitis foramen elongari, perque hoc ab illa per collum & spinam dorfi medullam spinalem in situ erecto perpendiculariter extendi, ex anatomicis res evicta est. Tam medulla oblongata, quam spinalis sunt principium omnium nervorum, qui per totum corpus distribuuntur, quibus si particularum ignearum copia abest, latera ad se invicem coeunt, quibus coarctatis, influxus fluidi nervei pro frigoris gradu vel minor vel nullus, unde vel visus hebetudo vel gutta ferena, auditus difficultas vel surditas, olfactus diminutio vel amissio. A summe perfrigerato collo apoplexia & paralyfis, a refrigerato dorso cessantem ob influxum spirituum animalium in longum intestinorum tractum, tormina ventrisque dolores ob aerem, intestina nimis expandentem, sentiuntur.

§. XL.

Sicuti angustissimi & tenerrimi nervi (§. 39.) a frigore facilius, quam reliqua robustiora eaque capaciora vasa damnum capiunt, ita & minima ac tenerima glandularum vasa, amissis ob frigus igneis particulis citissime subsident, serum in iis stagnat ac coagulum concipit; novo vero humorum accessu earum expanduntur latera, unde tumor parotidum, tonsillarum, glandularum naris, asperæ arteriæ ac laryngis, unde gravedo & rauco, inducitur. Ex quarum obstructione dolores fiunt pungitivi. Quando verò humores stagnantes resolvuntur atque per os illorum fit rejectio, salivatio, & per nases, coryza appellatur. Quodsi e contra ex nulla causa resolvuntur nec fluxiles fiunt, in inflammationem, anginae morbum, & pus tandem degenerant.

§. XLI.

Ad minima & tenerrima vasa (§. 39. & 40.) merito quoque referuntur ea, quæ in membranis & cartilaginibus divaricantur. Hæc quia minimam fluidi portionem vehunt, igneæ partes in frigus, corpus comprimens, transeunt mobilissimæ; hinc coarctantur vasa, quæ in digitorum manus ac pedis excurrunt extremitates, ergo sanguis ibi spissus ac tenax fit, ergo in principio circulus sanguinis in his partibus inordinatus est, ex quo pruritus ac formicatio sentitur. Lympha, quæ articulorum lubricationi inservit, coagulatur & tartarus præcipitatur, quare hic non amplius solutus ad latera apponitur, unde in extremitatibus artuum superioribus, scapula nempe, clavicula, osse humeri, cubito & manu, atque inferioribus, scilicet femore, tibia & pede, dolores, triturationes ob cessantem lymphæ influxum, chiragra, gonagra ac podagra ob tartarum præcipitatum tragœdias suas ludunt sævissimas.

§. XLII.

Nasi eminentia atque auriculæ ob paucorum nervorum vasorumque sanguiferorum minorem numerum præ manuum pedumque digitis sensum citius adhuc amittunt, quæ partes si intenso frigori nimis diu exponuntur, stagnationem ac corruptionem humorum, necrosis, quæ militibus, hyeme, militaria servitia atque excubias agentibus, frigidissima, frequens est, sequitur.

Frid. Hoffmanni Oper. Supplem. II.

§. XLIII.

Sol ab æquatore tropicum versus borealem quo magis sese movet, radii solares in terram eo minus oblique splendescunt. Illud autem tempus, quo radii minus obliqui sunt & sol ad arietem pervenit ab incolis hæmisphærii borealis Ver nominatur. Sol igitur ad nostram zonam temperate frigidam quo magis visu optico propius accedit, illius radii non in majore solum copia in nostram incidunt terram, sed noctes etiam breviores & dies longiores fiunt: ergo aer & terra majorem particularum ignearum absorbet copiam, unde in aere & terra respectu hyemis (§. 22.) major adesse debet calor. Ob majorem vero terræ calorem particulæ aqueæ leviores minusque coherentes ex terra calida in aerem exhalant, quæ in aerem elatæ & ponderosæ satis factæ una cum particulis igneis in terram recidunt frigidumque relinquunt aerem, unde veris tempestatum inconstantia, multorum morborum causa, petenda est.

§. XLIV.

Ob majorem tempore veris calorem (§. 43.) non potest non fieri, ut aer a statu suo violenter compresso (§. 16.) in quo maxime hyemis atque autumnii tempore est, ad naturalem magis recedat, hoc est, vi experimentorum (§. 15.) allatorum, sese expandat, levior & rarior fiat. Aere levior & rariore extra nos existente, aer, in sanguine reliquisque humoribus fluens, vim suam elasticam (§. 16.) exercet. Diminuta enim aeris exterioris resistentia, nostri corporis interior sanguinem atque omnia expandit vasa, quare & circulus sanguinis, pulsus cordis atque arteriarum vegetiores ac celeriores observantur, venæ hyeme collapsæ vere tumidæ apparent, facies hyeme pallida ac cutis superficies rugosa & frigida vere rosacea & calida intumescit, quare & transpiratio felicius ac liberius vere, quam hyeme, qua, ob retentam tunc a frigore transpirationem, magna partium heterogenearum & corpori nocivarum in sanguine generatur copia, futuris pabulum præbens morbis, succedit.

§. XLV.

Salutaris, qua serum tenue & volatile per poros cutis & bronchia pulmonum excernitur, transpiratio vere quidem melius, quam hyeme perficitur, sed ob frequentiores tempestatum mutationes (§. 43.) ea multoties impeditur, qua cohibita, corpus læditur, dum hoc ad morbos edendos fertilitatem acquirit. Nullum autem anni tempus nullaque cœli constitutio tam fallax atque inconstans est, quam ea, quæ in fine mensis Februarii, per totum Martium atque Aprilem in atmosphæra nostra tumultuatur. Dies his mensibus mox calidi & tranquilli, mox frigidi & furiosi, mox pacati & sereni, mox ventosi ac pluviosi sunt, adeo, ut cum flatu austrino pluviae non raro tanta in copia decidunt, ut flumina terræ planitiem inundent, quæ insalubris aeris tempestas variorum morborum, epidemicorum inprimis & febrium, foecunda genitrix est.

§. XLVI.

Frequens vere tempestatum vicissitudo (§. 43.) qua partes ferossæ salino-sulphureæ sive serum tenue & volatile (§. 45.) e corpore transpiratione mox amandatur, mox retinetur, efficit, ut, ex transpirationis irregularitate aerisque vernalis inclementia morbi sint familiarissimi. Humidus enim aer, qui in veris principio in atmosphæra regnat, serum excrementitium in poros suos recipere non potest, quum ejus pori jamjam a particulis aqueis, unde humidi

H

aeris

aeris nomen enatum est, obfessi sint. Imo partes humidæ, in aere natantes, poris cutis, quos immediate tangunt, non adhærent modo, sed in eos etiam ingrediuntur, ergo extremos corporis poros obstruunt, hinc corpus transpirare cessat. Atque aer frigidus-humidus, simplice aere humido, multo peior est: partes enim igneæ e corpore magna in copia in frigidum dum transeunt aerem, serum excrementitium spissum fit, ejus vero spissitudo humido adhuc augmentatur aere, qui poris cutis sese insinuando fibræque relaxando, partibus ferosis, excretioni dicatis cuticulari, egressum impedit. Nec minus venti humidus-frigidi, qui nihil sunt, nisi aeris cum particulis levioribus aqueis ex una regione in aliam vehementior & celerior motus progressivus, cohibent transpirationem. Impeditæ autem hujus transpirationis ratio in copiosiori particularum ignearum amissione, quæ in fugitivum transeunt aerem, quærenda est.

§. XLVII.

Quodsi humidus aer (§. 46.) simul sit calidus, qualem austrini inferunt flatus, corporis nostri quidem calor calore aeris exterioris augetur, ita, ut volatiliores excrementitiæ partes ab humoribus separantur; sed ob aerem simul humidum, qui non solum nullas alias humiditas in se recipit partes, sed poros etiam cutis, in eos se miscendo, obstruit, per filtrum cuticulare transudare nequeunt: hinc primum ibi stagnant, acrimoniam concipiunt malique moris induunt genium, quæ tandem sanguinis circulo atque appulsu humorum fluxiles iterum factæ, a peripheria ad centrum deteriores redeunt ac pro diversitate locorum ac viscerum, quæ occupant & molestant, variorum morborum causæ fiunt.

§. XLVIII.

Morbos, si hyeme serena & tranquilla rariores vel saltem minus periculosi fuerunt, ineunte vere frequentiores esse & periculo non vacare, attentos in causas rerum practicos experientia docet. Atque a morbis corpora quando offendentur, illorum offensio aeris injuriæ atque inconstantia (§. 43-47.) potissimum attribuenda est.

§. XLIX.

In variis vero partibus humanum tempore inconstante vernali offenditur corpus. Aere enim humido eoque calido existente, nostri corporis igneæ partes, quæ semper majorem caloris gradum possident, quam aer humidus, transeunt, excrementitiæ autem ferosæ partes, quum ab aere jamjam humido (§. 47.) recipi non possint, vel in subcutaneis remanent spiraculis ibique rheumatismos ac pruritus excitant, vel ad interiora revehuntur, sique in vasa, lympham pro articulorum lubricatione ferentia, cordis atque arteriarum pulsu coguntur, ibi subsistunt atque ob acridinem, mora auctam, vasa constringunt, vellicant, ac fibras nerveas corrodendo animo doloris sensum imprimunt. Hinc in principio veris podagra, gonagra, chiragra, arthritis vaga & fixa atque ischias vel repetunt vel futuros annunciant paroxysmos. Hinc & CELSUS L. II. C. I. affirmat: *Eos morbos, qui in articulis nervisque modo urgent, modo quiescunt, maxime vere & inchoari & repeti.* Pari ratione materia excrementitia in capitis membranis stagnans easque strictura spastica afficiens cephalalgiam, hemicraniam ac clavum producit. Quin & oculorum inflammatio, aurium tinnitus, rauco, tussis, odontalgia, peripneumonia, pleuritis, cardialgia, colica, diarrhoea eadem ex causa tunc temporis homines graviter affligere solent. Quare optimi Medici CELSUS c. l. atque HIPPOCRATES Sect.

III. aph. 20. *insanias, sanguinis profusiones, morbum comitalem, anginam, arthritides, gravedines, tusses, lippitudines, abscessus, pustulas plurimas ulcerosas, rheumatismos, variolas, morbillos, febres catharrhales & synochas vernali tempore homines invadere, in monumentis suis nobis reliquerunt.*

§. L.

Plerumque fit, ut iniquissimas, impetuosas maximeque irregulares tempestates, amoenissimum atque jucundissimum ultimatum sequatur tempus, ubi benignior, pacatior, lenior ac suavior aer calore suo temperato omnia recreat. Tunc gramina in pratis ac campis crescere ac virere incipiunt, arborum atque herbarum flores resicientem ubique spargunt odorem, copiosissimum volatilium, natatilium ac reptilium genus nec non quodlibet fere animal sui simile eo tempore procreare annitur. Ex quibus temporis salubritas præ reliquis anni æstimanda est tempestatibus. Hocce autem tempus in totos menses, Majum scilicet & Junium, ut plurimum incidit. Ob majorem enim, respectu priorum mensium, partium ignearum copiam aer tunc calidior, ficior, levior magisque elasticus est, qualis aeris temperies omnibus rebus calorem inspirat temperatum atque tam vegetabilibus, quam animalibus æqualem humorum conciliat progressum; hinc transpiratio æqualis conservatur, omnes se- & excretiones feliciter succedunt, corpus omnino viget animoque alacritas inest. Quare hacce vernali gratissima aura, optimos in studiis faciendi progressus, musarum filii opportunum inveniunt tempus. Atque aer superior, quum vi experientia (§. 13.) levior ac purior sit aere inferiore, compressiore, densiore ac graviore, hinc in Academicis Studiosis aliisque, qui studiis assiduam dant operam sicque magis vitam agunt sedentariam, conclavia altiora & in superiore ædificiorum parte ad Orientem spectantia præ humilioribus, ubi aer crassior, impurior ac minus defæcatus est, commendanda sunt. Conf. pl. beati G. W. WEDELII *disput. de Diata Literat.*

§. LI.

Quum maximum hyemale frigus a minimo caloris gradu (§. 22. & 23.) dependeat, vernalis autem calor a majore radiorum solarium gradu (§. 43.) exsultet, æstivus calor a maximo horum gradu ut oriatur, sequitur. Sol enim vertici nostro quo proximior est, radios suos igneos eo magis perpendiculariter emittit, quo magis hi sunt perpendiculares, eo major particularum ignearum in aere & terra est copia; quo major hæc, eo major calor. Atqui æstate sol, quo cum cancro cœlesti conjungitur, vertici nostro proximus est, suosque radios magis perpendiculariter emittit: ergo æstate calor in nostra zona respectu frigidioris maximus, respectu vero torridæ minor est. Ergo aer æstivo tempore levissimus ac rarissimus existit, ergo minori agit in corpora respectu aeris vernalis resistentia, ergo quoque corpora minus premit, remittente vero aeris exterioris resistentia & pressura, sanguinis aer sese magis adhuc expandit: hinc sanguinis fit rarefactio, ex qua ejus resolutio & turgescencia generatur.

§. LII.

Verum est, calorem æstivum calorem sanguinis in pulmonibus temperare haudquaquam, quin potius affirmandum, sanguinis, in pulmonibus contenti, augere calorem, qua in parte sanguinis calore aucto, ejus quoque rarefactio augetur, unde pulsus cordis atque arteriarum celerior observatur, nec minus nimia feri dissipatio ac major spirituum amissio promovetur; quibus vero amissis, sanguis fit spissus atque

que acrimoniam concipit, unde corpus humanum pariter ad morbos disponitur.

§. LIII.

Quamvis vero ex ferventissimo aestu nimii sudores, cum quibus magna spirituum animalium ferique tenuissimi copia (§. 52.) dissipatur, e corpore proliciantur, unde corpus in morbos præcipitatur; hic tamen aestus nec senibus, hypochondriacis, podagricis, arthriticis nec febrî quartana laborantibus aliisque, quorum cutis ob maculas epaticas difformis & quorum viscera infarcta atque obstructa sunt, infestus est. Morum enim omnium massa sanguinis partibus est conspurcata heterogeneis, quæ in ipsorum salutem expediiori ac celeriori sanguinis circulo per apertos cutis tubulos foras protrudi debent; hæc autem excretio non melius, quam æstate perficitur, hinc & ætas senilis optima æstate fruitur valetudine. Senum enim calor naturalis in sanguine non abundat, sed isto potius eget, hinc calore æstivo igneæ aeris partes cum senum sanguine commiscuntur, ita, ut mitis ac lenis cordis atque arteriarum inde proveniat pulsus, quo legitima ac saluberrima eorum transpiratio, quæ in senibus aliis anni temporibus plerumque vacillat, per poros cutis tunc temporis optime procedit; succedente vero legitima transpiratione, quæ innumeros a corpore morbos abarceat, corpus bene valet. Hinc & CELSUS sententiæ meæ egregie adlipulatur, dicens: *Senes æstate & autumnii prima parte tutissimi sunt.* Autumnii vero principium ideo senibus commendabile est ac patrocinatur, quia tunc tempestas sicca adhuc atque calida est, quum e contra omnis aeris constitutio humida & frigida omnibus, natura imbecilibus, quibus etiam senes annumerantur, adversa atque hostilis sit. Conf. *Excell. Dn. PRÆSIDIS, fidelissimi quondam mei Præceptoris, Medicin. Rat. System. P. III. C. VII. §. XXX. Pathol. Gen.* Spasmodum vehementia, a quibus hypochondriaci contorquentur, æstate calida, qua ferum viscidum flagrans atque acrimonia malæ indolis acida dissolvitur & per patulos cutis poros, secretionem urinæ alvumque transmittitur, tolli solet. Immanes & furibundi podagricorum atque arthriticorum dolores, qui ceteris anni temporibus sæviunt, conquiescunt. Pertinacissima febris quartana, quæ medicamentis difficillime profligatur, quæque corpus ægrotans longissimis dierum tractibus, horrescendis inquietavit ac defatigavit paroxysmis, tunc solvitur, flagrans sub cute materia viscida ac livida, maculas epaticas, squamulas ac furfures efformans cutique horripilationem inducens, sub æstivo solis aestu minus apparet, horrorque fileat, atque alii morbi, ab infarctu hepatis, lienis, mesenterii ac reliquorum viscerum orti, calore æstivo vel diminuuntur vel penitus expirant atque exulant, hinc æstas plurimis medetur morbis: quare *Excell. Dn. PRÆSES, Medicorum Germanorum Princeps, c. 1. in schol. §. XVIII.* testatur: *Homines, æstivis mensibus, ubi transpiratio est maxima, & parum ægrotare & paucos mori.*

§. LIV.

Sed virginibus, tributum lunare nondum expertis, atque juvenibus plethoricæ constitutionis, quibus major particularum ignearum copia in humoribus non deneganda, calor æstatis ferventissimus periculi multum minatur. A calore enim tam exteriori, quam interiori aucto nimiam sanguinis expansionem ac rarefactionem patiuntur: quum ergo aer exterior particulis igneis jam jam nimis sit repletus, non multas igneas e corpore plethorico ac calido in sua interstitia recipere potest; hinc majore in quantitate juvenili in corpore retinentur, quibus in

Frid. Hoffmanni Oper. Supplem. II.

tus retentis, sanguis in vasis suis nimis celeriter non movetur solum, sed ob majorem etiam expansionem minima vasa, quæ celeriori sanguinis appulsui aerisque elasticitati resistere non valent, disrumpuntur atque aperiuntur, hinc ætas juvenilis florens frequentioribus, largioribus atque inconspicuis æstate subiecta est hæmorrhagiis, quæ vel per nares vel os vomitu ac sputo cruento vel uterum manifestantur. Præter hæc sanguinis effusiones juvenili utriusque sexus ætati non infrequens est vertigo, tinnitus aurium, obscuritas visus, cordisque palpitatio, quorum morborum causæ simili modo in rarefactione sanguinis inveniendæ sunt.

§. LV.

Æstate durante per diem calore ferventissimo corpus sudore diffuit, post solis vero occasum atque ante hujus matutino tempore ortum pori cutis ob aerem humido-frigidum occluduntur, partesque serosæ salino-sulphureæ ac biliosæ in corpore retinentur. Quod si igitur quis corpus suum æstivanti diu committit solis calori, nec aerem humido-frigidum nocturnum prudenter evitat, sed liberalius se ipsi exponit, partium excrementitiarum, occlusis tunc poris, cohibetur transpiratio, unde morborum genesis non admiranda est. Quare febris ephemera, synocha, causus, tertiana continua & intermittens, biliosa ac cholericæ, quæ humana æstiva tempestate contorquent corpora, a transpiratione, noctu & mane impedita, plerumque proveniunt. Sic ceterorum morborum genera, uti sunt vomitiones, alvi profluvia, lippitudines, aurium dolores, oris exulcerationes ac genitalium putredines ab HIPPOCRATE *Secl. III. aph. 21.* & CELSO *L. II. C. I.* inter morbos æstate familiares posita, ob transpirationem interceptam modum tunc inveniunt locum. Atque febres tertianæ, hac homines inquietantes tempestate, non tam multo horrore, quam potius intensissimo aestu corpora defatigant. Fœminam, ex generosissima stirpe natam, recenti adhuc teneo memoria, quæ, splendido in convivio postquam cum hospitibus generosis generose vinum Hungaricum potaverat, cum amicis suis in scapha, in seram usque noctem navigando, tempus transigebat, sed aliquot dies post febrî tertiana, non magno horrore, sed intensissimo stipata calore, corripiebatur.

§. LVI.

Solis motu ab æquatore versus tropicum fiente australem, vis radiorum solarium decrescit. Post æstatis ergo principium, ut calor diminuatur, sequitur. Sed nequitiam, diminuitur: Augusti enim mense, quo sol jam diu versus tropicum fuit australem motus, vis ac potentia caloris maxima est. Ad quod juxta dicta (§. 23.) contrario æque argumentari possum modo, ita, ut quamvis radiorum solarium vis decrescat, ideo tamen calor non decrescat. Ratio est: quia terra igneis adhuc est particulis repletissima, quæ, vi radiorum solarium diminuta, e terra in aerem copiosissime transeunt atque atmosphæræ tamdiu vehementissimum conciliant calorem, donec, sole radios de die in diem in terram remotius emittente & particulis igneis magna in copia e terra successive egressis atque amissis, caloris gradus sensim sensimque diminuatur. Diminutio hæc mense Septembris potissimum sensibilis fit, quo sol in suo recursum in libram intrat, facto hoc ingressu, incolæ hæmisphærii borealis, autumnii tempus inchoari, dicunt.

§. LVII.

Sicuti vere radii solares respectu æstatis (§. 51.) per immensum aeris spatium magis oblique in ter-

ram (§. 43.) sparguntur; ita quoque autumnus ii aliter vibrari non possunt, hac tamen cum distinctione, ut vernali tempore ad verticem nostrum propius accedant, autumnus vero a vertice nostro remotius discedant. Illo tempore igneae solis partes a terra adhuc frigida atque ab aere itidem frigido absorbentur, hoc vero autumnali igneae particulae e terra minus refrigerata in aerem, ubi minor, ob radios solis magis nunc obliquos, particularum ignearum copia, cum partibus aqueis aliisque particulis minimis eleventur, quae, in ejus altitudine nimia in quantitate congregatae, unitae nimiumque acquisitae pondus, vel sub nebularum vel pluviarum decidunt forma. Hae partes aquosae in poros terrae ingressae, a partibus terrae igneis frigidum in aerem rapiuntur atque vel nebularum vel pluviarum iterum causae fiunt, quae frequentissima tempestatum vicissitudo tamdiu durat, donec partes igneae terra amiserit, hinc in autumnus aeris injurias ad medium usque Decembris experimur sapissime.

§. LVIII.

Aer autumnalis quo magis partibus aquosis aliisque heterogeneis est refertus, eo crassior, densior, impurior, gravior minusque elasticus est, eo magis praeterea corpus nostrum premit, eo citius cutis occludit poros, eoque plures impuritates corporis generantur, accumulatur ac depravantur. Circulus sanguinis fit debiliior ac lentior; ergo pulsus cordis atque arteriarum saltem micat, ergo sanguis non satis conteritur, comminuitur ac trituratur, hinc cohaesio iusto major, hinc sanguinis crassities ac spissitudo, unde vasorum obstructio & fertilium in corporis partibus prompta fit morborum productio.

§. LIX.

Quum ergo vasa corporis ob aerem crassum ac densum (§. 58.) obstructionem patiantur, sequitur, quod humorum affluxu praeternaturaliter expandantur atque a tono suo deficiantur legitimo: tono vero vasorum destructo, humores per diuresin & diaphoresin secernendi hinc inde subsistunt, hinc minus mirandum, ut tempore tranquillo, humido, nebuloso, squalido & pluvioso capitis dolores, aurium tinnitus, auditus difficultas, surditas, ophthalmia, visus hebetudo, odontalgia, epilepsia, paralytis, apoplexia, hemisphera, coryza, gravedo, tussis, angina, catharrus, asthma, pleuritis, peripneumonia, diarrhoea, dysenteria, mensium obstructio, fluor albus, multifariae febres, cachexia, tumor pedum

oedematofus, scabies, morbilli, variolae, purpura urticata, impuritates subcutaneae, affectus arthritici, chragrici, podagrici, ischiatici, scorbutus morbi que epidemii, quos anni praegressi fumus autumnus experti, suas ludant tragoedias. Ex quibus recensitis morborum generibus facile colligere licet autumnale tempus hominibus perniciosissimum esse, nec aliud esse, quod corporibus tam exitialem minetur catastrophem, quam autumnus injuria, quare & CELSUS L. II. C. I. memoriae apprime sic prodidit: *Vix quicquam ex his scilicet morbis hyeme (§. 27. 30. 31. 32. 33. 34. 35. 36. 37. 38. 39. 40. 41. & 42.) vere (§. 49.) aestate (§. 55.) familiaribus, in autumnum non incidit: sed oriuntur eo quoque tempore febres incertae, lienis dolor, aqua inter cutem, tabes, urinae difficultas ac tenuioris intestini morbus. Fit item laevitas intestinorum, coxae dolores morbi que comitiales. Idemque tempus & diutinis malis fatigatos, & ab aestate, etiam proxima, oppressos perimit, & alios novis morbis conficit, & quosdam longissimis implicat, maximeque quartanis, quae per hyemem quoque exercent. Neque aliud magis tempus pestilentiae patet, cujusunque ea generis est, quamvis variis rationibus nocet. Atque Auctori huic gravissimo Medicorum parens HIPPOCRATES Sect. III. aph. 22. calculum ex ratione atque infinitis observationibus adjicit: dicens: autumnus multi etiam morbi aestivi & quartanae febres atque erraticae, lienes, aquae inter cutem, tabes, urinae stillicidia, intestinorum laevitates & difficultates, coxendicum dolores, anginae, crebri anhelitus, volvuli, comitiales ac melancholiae homines invadunt.*

§. LX.

Ex antegressis ergo vis ac potentia aeris in corpus humanum satis superque perspecta est; nec facile quidpiam rerum non naturalium tam celerrime corpora vel ad morbos disponit vel hosce solvit, quam aeris natura, gravitas atque elasticitas, quae pro anni temporibus, terrae locis variaque domiciliorum habitatione diversa existit. Hanc aeris naturam ut calleat Medicus, Physicae, imprimis doctrinae de aere, maxima opera danda est. Quam si negligat Medicus, de rerum corporearum viribus, quae Medico rationali cognitae esse debent, iudicium ferendi, impotentia laborat. Hinc etiam fit, ut maxima Medicorum cohors ex studii physici neglectu aegrotantes non rationaliter sed empirice curet. Quae perversa methodo quamplurimi, qui ad pristinam sanitatem pervenire possent, praemature morbis succumbunt vitamque finiunt.

OPUSCULA

A D

ARTIS MEDICÆ PROLEGOMENA
PERTINENTIA.

DISSERTATIO

D E

PRÆPARATIONE

AD LECTIONEM VETERUM

MEDICINÆ AUCTORUM.

Primum edita anno 1719.

PROOEMIUM.



UTM AD MODUM regnorum & rerum publicarum magnæ sunt vicissitudines, ut ab exiguo ortu progressa imperia ad vim magnam adsurgant, & vicinis longe lateque jugum dominationis imponant: alio vero tempore deficient, ipsæque vel mole sua corruant, vel male cohærentium vitio partium disjuncta impressionem facturo hosti locum parent, vel novarum rerum cupidos cives in spem sese attollendi erigant: ita mirari sane minus decet, quum animadvertimus, omnium artium, quæ inter homines coluntur, idem quasi fatum esse. Singulas nunc perlustrare & in iis adserti nostri veritatem contueri longum foret, video enim retexendam mihi sic esse omnium disciplinarum historiam. Norunt historiæ philosophicæ amatores, quam variam fortunam inter eruditos ARISTOTELES expertus sit, quem cum longo tempore omnes tamquam principem & imperatorem quemdam suspexissent; adeo nunc de folio subjectum, in nostra saltem patria, cernimus, ut vix inter mediocres eruditos locum mereri videatur. Simili aliorum philosophorum forte suam fortunam solari Stagirita potest: immo suam, quæ est prudentia & moderatione, levius perfert privatam calamitatem, quum integris disciplinis, etiam quæ superiores censentur, variæ vicissitudines longo sæculorum decursu acciderint. Et quid sæcula & longos sæculorum decursus commemoro, qui in disciplina illa, quæ salutem & sanitatem hominibus promittit, satis superque video, quemvis fere auctoritatem aliquam, undecunque nactum, novam instituere sectam, & novitate famam sibi vel lucrum aucupantem animas statim hominum, ut cum PLINIO loquar, negotiari. Inter has sententiarum & hominum concertationes vix aliquem videmus, qui sibi non ducat laudi ad HIPPOCRATEM, ad GALENUM, ad CELSUM & ad alios subinde provocare, suaque cum illorum placitis conjungere conetur. Mireris sane ipsos illos, qui Hippocraticam medicinam ubique solent laudare, ubique evehunt, & hypothesium multitudinem serio accusant, quando ab hoc, inter scribendum, enato fervore, refrixerunt, novas condere, quibus universam medi-

Frid. Hoffmanni Oper. Supplem. II.

H 3

cinam

cinam superstruant, hypotheses. Quis classicum majori cum strepitu præcinit, ut in Hippocratica castra redirent nostri Medici, ipso Italiae illo decore, GEORGIO BAGLIVO? & tamen tantus vir ad se potius, suasque novas, de solidorum motu a dura meninge, tamquam prima origine, pendente, satis obscuras hypotheses lectorem ducit, quam ad magnum HIPPOCRATEM, ita prorsus, ut suspicari debeas, tanti medicinae parentis obtentu illum sibi potius adsecras, quam studiosos priscae medicinae quæsisisse. Ego vero, quum nec e veterum libris hauriendam perfectam medicinam existimem, nec recentiorum commentationes videam tam absolutas esse, ut non subinde corrigi & suppleri ex veteribus, recte adhibitis, debeant; illos certe amplector & exosculor, qui omnium, de medicina bene meritorum, operibus studiose evolvendis, considerandis, & in suas ægrotorumque utilitates convertendis incumbunt. Puto autem melius antiquorum studia & bene merendi de posteritate desiderium compensare, qui usum illorum commonstrant, quam qui panegyrica vociferatione magnitudinem meritorum exaggerant. Quum enim augendi cupiditatem præclarorum operum professa laudatio præ se ferat; non injuria minuendi metum facit æquis aestimatoribus. Quare nos, inauguralinis specimis loco aliquid commentari, exorsos, non detinebit antiquorum celebratio, neque committentur a nobis illorum merita cum recentiorum præclaris laboribus, sed conabimur tantum brevibus indicare, quomodo ad veterum lectionem paratus accedere debeat, quisquis fructum ex illo verum exspectat atque exoptat. Rem sane arduam nos adgredi videmus, quam ob rem veniam ab æquo lectore efflagitamus, si, magnis conatibus excidisse nos, observaverit. Faxit autem summum, quod devotissima mente veneror, numen, ut salutarem & exoptatum finem, ad quem hoc labore suscepto tendo, plenissime adipiscar.

I.

Mihi itaque de præparatione ad lectionem veterum medicinae auctorum dicturo, ante omnia opus est designare, quos ego nomine veterum auctorum intelligi nunc velim. Quum enim multi ante HIPPOCRATEM & post ipsum plures conati fuerint salutaris disciplinae præcepta, litterarum monumentis consignata, ad posteritatem transnittere: non eadem fortuna usi sunt ab illis exarati libri. Magnam eorum partem incredibili Medicorum damno periisse constat: supersunt oppido pauca, & utinam salva supersint. Etenim pleraque vel alio nomine prostant, ut passim eruditi notant, illud volumen, quod Hippocratis nomen præ se fert, admixta habere, quæ ab aliis auctoribus profecta sunt: vel tam misere habita sunt superioribus sæculis, ut de pluribus dici possit, quod in Hippocratis librum de capitis vulneribus SCALIGER quondam graviter scripsit, HIPPOCRATI, si suum librum videret, non minus longum commentarium de illius vulneribus institutum fore, quam ipse ille sit, quem de capitis vulneribus consignavit. Quidquid igitur in medicina literis antiquissimo ævo commissum ad nos venit, id, ut lectione non indignum, sic vetustorum auctorum nomine in universum complectimur.

II.

Si vero accuratius dicendum est, quos legendos a nostris & in hominum manus revocandos esse ex veteribus putemus, principem locum adsignamus magni HIPPOCRATIS operibus, quibus aliqua inesse pseudepigrapha jam monuimus. Sequuntur ex græcis, si temporum ordinem spectes, THEOPHRASTUS ERESIUS, qui plantarum philosophiam ad posteros propagavit, Medicorum lectione non indignus scriptor. NICANDER COLOPHONIUS, elegantissimus poeta Medicus, qui, quæ venena veteres noverint, & quæ antidota adhibuerint, optime exponit. CASSIUS, Celso, ut periti judicant, æqualis, ingeniosissimus Medicus, cujus problemata supersunt. EROTIANUS scriptor ad Hippocratis lectionem quasi subsidiarius. SERVILIUS DAMOCRATES cujus non contemnenda

fragmenta ex Galeni vastis voluminibus facile colligere licet, & sane juvat. PEDANIUS DIOSCORIDES ANAZARBENSIS, Plinio majori æqualis, qui de materia medica commentatus est. RUFUS EPHESIUS, vel ob exiguum de adpellatione partium corporis humani libellum, cum paucis, ejusdem auctoris superstitem commendabilis est. ARETÆUS CAPADOX, Galeno, ut multis hodie placet, superior, ac veterum nulli præstantia cedens. GALENUS, cujus, sive in Hippocratem commentaria, sive, quæ de suo ipse composuit volumina, lectorem de aliis rebus utilissimis instruunt, & ad intelligendos veterum plerosque, si quisquam alius doctor, præparant & instituunt. Hunc insequuti ORIBASIIUS, PAULLUS ÆGINETA, ÆTIUS AMIDENUS in locis, quos congesterunt, communibus multa inspergunt, quæ legere non poeniteat, præterea etiam ex deperditis probatissimorum virorum monumentis aliqua conservarunt, quæ, si ibi non exstarent, penitus nos fugerent. ALEXANDER autem TRALLIANUS nescio, an ulli veterum scriptorum inferior sit habendus: certe sive ordinem libri spectes, sive accuratum modum cum debita ubique cautione in morbis commendatorum auxilii generum; fateri cogeris non sua culpa nostris hominibus minus familiariter illum teri. Hos ex græcis laudare nunc decuit, nam qui innotuerunt sæculis sequutis ACTUARIUS, NICOLAUS MYREPSUS videntur longius ab antiquitatis genio ac indole recessisse.

III.

Nec latini destituuntur antiquis libris, qui vel artem medicam ex instituto tradunt, vel attingunt, vel lecti tamen Medicum juvant & instruunt. PLINIUS certe magno historiae naturalis operi multa inseruit, quæ medicos unice juvant, & valde juvant. CELSUS, ille medicorum Cicero, universam artem non magno volumine complexus est. SCRIBONIUS LARGUS compositiones medicas stilo minus eleganti, quam Celsus, memoriae mandavit, ex quo ævi sequioris scriptor MARCELLUS EMPIRICUS multa in suum opus transtulit. Q. SERENUS SAMMONICUS carmine non contemnendo rem medicam, sive morborum curationes,

nes, exposuit. CÆLIUS denique AURELIANUS SIC-
CENSIS, qui nobis Sorani pleraque, quamvis incul-
to stilo, exhibere putatur, lectionis tedium rerum
utilissimarum tractatione compensat.

IV.

Indicavimus quos intelligamus veterum nomine,
& plerosque illorum, qui magis obvii sunt, nomi-
nibus suis laudavimus. Ante vero, quam hunc ser-
monem eo, quo tendit, inclinemus, paucis etiam
dicendum est, de Arabicis medicinæ scriptoribus,
qui per aliquot sæcula in scholis Europæ, exsulan-
tibus nempe Græcis auctoribus, regnaverunt. Jam
olim prudentissimi viri AMATUS LUSITANUS, G. H.
WELSCHIUS, & ex theologorum ordine ABR. HIN-
CKELMANNUS, ut alios præteream, monuerunt, ni-
hil iniustius fieri posse, quam quod vulgo de me-
ritissimis Arabibus contumeliose scribitur & judica-
tur, cum ipsis certe tribui non deberet interpretum
indoctorum & nec linguarum, nec medicinæ satis
gnarorum oscitantia & ignorantia. Quam serio opta-
verit AMATUS LUSITANUS mēliorem Avicennæ ver-
sionem aliquando videre, nolo jam multis repetere.
Utinam, quod illius votum erat, ex germanis ali-
quis arriperet hanc palmam in medio positam, &
quod superiori sæculo VOPISCUS FORTUNATUS PLEM-
PIUS fortunatissime inchoavit, absolutum nobis daret.
At vero negotii hujus magna difficultas in his pa-
triæ nostræ conditionibus spe vetat lactari irrita.
Nos in hac commentatione multa retinent, quo mi-
nus de Arabicis libris plura dicere possimus, quare
ad id properamus, quod nobis propositum est, &
exponere conabimur, quo se pacto comparare de-
beat, qui Græcorum & Romanorum monumenta,
quæ supersunt, cum fructu cupit evolvere, & erran-
di multiplex periculum evitare.

V.

Primo itaque a nemine, spero, reprehendetur,
si dixero, ad lectionem veterum neminem recte
præparatum accedere, nisi qui illius linguæ, qua
scribere ipsi voluerunt, ultra mediocritatem gnarus
fuerit. Quum vero antiquissima monumenta sint
græca, consentaneum est, nos græcæ linguæ co-
gnitionem merito requirere. Equidem puto omnes
mihi daturos esse, superiorum sæculorum barbari-
em profligari non potuisse, nisi Constantinopolita-
ni regni everfio ad Italiæ & alias Europæ nostræ
oras adpulisset CHRYSOLORAS, LASCABES, BESSA-
RIONES, GAZAS, MUSUROS, ARSENIOS, PORTOS,
ANDRONICOS, a quibus litterarum græcarum cog-
nitione imbuti primum Itali, vel exemplo, vel do-
ctrinarum communicatione, in alios quam plurimos
hujus litteraturæ amorem & studia transfulerunt, ut
immortalia VALLÆ, POLITIANI, BARBARI, FICINI
aliorum efflorescerent studia, & ab his Lusitania,
& quidquid cultioris Europæ superest, per notissi-
mos illos cujusvis harum regionum vindices littera-
rum a barbarie pristina repurgarentur. In his Me-
dici non postremum locum sibi vindicabant, quo-
rum aliqui celeberrimi viri ulterius etiam progressi,
quam artis suæ professione cogeantur, universum
ad humanitatem & philosophiam pertinentium dis-
ciplinarum emensi sunt ambitum, prorsus, ut ius-
tam materiam invenerit vir clarissimus, JAC. BUR-
CKHARDUS, *Medicum humanitatis studiorum gravissi-
mum vindicem* peculiari scripto adumbrandi, quo
fratris sui, experientissimi apud Wolffenbuttelenfes
Medici, *medico polyhistori* præluderet. Mihi jam non
licet in hunc exspaciari campum, sed potius incumbit
ostendere, quantum de græca lingua nosse Medicum
oporteat, ut ad veterum lectionem paratus accedat.

VI.

Illud igitur definiturus, vix spero fidem huic sæ-
culo me facturum esse, si dixero optandum esse,
ut ad veterum lectionem non accedant, nisi græcæ
linguæ exactam habeant cognitionem. Sed quor-
um, inquit forsan plures, fructum immensi stu-
dii, quod ad convertendos in latinum sermonem
optimos auctores græcos summi viri contulerunt,
pertinere dices? Adeo nihil præstiterunt JANUS
CORNARIUS & ANUTIUS FOESIUS Hippocratem nobis
interpretati? Et tot doctorum virorum conatus im-
probique labores, qui ad Galenum & ceteros au-
ctores latinitate donandos conspirarunt, an non le-
vare nos hoc studio possunt, & temporis in me-
liora, si diis placet, collocandi facient facultatem.
Verum enim vero nec illorum studia, nisi ingra-
tissimus sim, vili pendere, nec amplissimum fruc-
tum inde capiendum elevare cupio. Utinam vete-
res vel ex bonâ versione adfidue volvant plurimi.
Neque tamen desino optare, ut fontes possint adi-
re & consulere lectores plerique & hi maxime,
qui ad gradum excellentiorem in medicina adspi-
rant, & vel libris edendis, vel docendæ juventu-
ti sese consecrare volunt, ut & ipsi erroribus effu-
giendis sufficerent, & ne ab aliis prolati infinita
multiplicatione ab his propagentur, qui optime &
verum & falsum propagare valent, quoniam fide
& auctoritate publica præfulgent.

VII.

Id autem merito desiderari facile concedet, quis-
quis experiendo didicit, quam multis locis etiam
optimi interpretes a sensu vero scriptorum veterum
aberrarint. Nolo longius abire, sed inhærebo au-
ctori vetustissimo HIPPOCRATI, cujus etiam recen-
tissima editio *Lindeniana*, quam plures studiosi ma-
nibus terunt, hoc laborat vitio, ut versio latina,
quæ ipsi adjuncta est, nec textui græco respon-
deat, nec optima sit, quæ poterat addi. Quum
enim posset LINDENIUS ore FOESII loquentem da-
re græcum Hippocratem, nescio quo consilio, re-
prehendendo certe, prætulit illam a Cornario pro-
fectam. Ex quo factum est, ut græcus quidem
contextus Foesii & aliorum emendationes passim se-
quatur: latina autem versio longissime inde abeat,
quod in græco legitur. Liceat nobis exemplis qui-
busdam id comprobare. Et versionem quidem to-
to cœlo, quod ajunt, a textu græco diversam re-
perire multis in locis licet. Præ reliquis intueamur
illum de *victu acutor*. §. IX. p. 317. ubi græcus,
ut exscriptus est, id de carne ovilla adferit, quod
de suilla interpres, & Galeno præeunte, rectissi-
me pronunciavit. Diceret typhotetæ vitio *ὄσια* in
ὄσια facili errore transisse, nisi & Lindenii in cor-
rigendo, scilicet ex arbitrio, Hippocrate licentia
ab aliis jam cum indignatione animadversa esset,
& alibi a græcis latina discreparent. Sic *epidem*.
VI. p. 806. græca hæc: ἴσως δὲ οὐδὲ λέπραις, ἴσως δὲ
οὐδὲ ἀλλοιοῖσιν, sic vertuntur: *fortassis autem neque le-
pris, fortassis neque vitiliginibus*. Nihil de vitiligi-
nibus in græco est, eratque, si græca & latina
consonare deberent, in hunc modum reddendus
græcus: *neque lepris, neque aliis similibus*. Sed
Cornarius cum hæc interpretaretur, vel legit, vel
legendum putavit, ut totidem fere verbis legitur de
humoribus §. XI. ἴσως δὲ οὐδὲ ἀλφοῖσιν. Porro in lo-
co superius adducto sequitur versio lectionem loci
paralleli: nam græcis certe minime respondet, ὅσαι
ἀλλαι ἀποσάσεις, ὅιον σὺργες, ἢ ἕτεραι, *quicumque alii
abscessus, velut fistulæ, aliorum medela sunt*. Bene
autem omnia habent, si, ut altero est loco, sub-

stituas ὅσαι ἄλλαι ὑποστάσεις ἴτερον ἀκ. Sed hunc locum inferius iterum attingemus. Plura equidem discrepantiarum exempla adferre quam facile esset, tam superfluum hoc loco existimamus.

VIII.

Sed nondum adduximus exempla, ubi correctionem ab aliis tentatam in textum græcum LINDENIUS admisit, neque tamen versionem illi accommodavit. Libro *de morbis* §. XXIX. in fine legitur: λίθος γένεται ἀπὸ κρωφαγίας. Hunc textum ita emendandum MERCURIALIS censuit, quum ante ipsum legeretur γεωτραγίας, pro quo Foësius mallet γεωτρωγίας. Versio certe habet apud Lindenium, *ex terræ esu*, quum, si consonare deberent omnia, reddendum fuisset *ex carniū esu*. Pudendus error *Popularium* IV. §. XII. p. 750. ubi pro κεραιεύου ἵππου legebatur ἵππου & in versione ab equo, in græcis quidem sublatus est, monentibus jam pridem doctis viris & meliorem lectionem indicantibus: sed in latina versione, & indice editionis Lindenianæ sanctissime adfervatur. Idem fatum est prioris loci, qui pariter in indice secundum versionem latinam legitur, vide *puero*. Neque scio sane, an cum ratione iusta in textum admissa fuerit Mercurialis illa emendatio, quum certe terræ esum non uno loco commemorat Hippocrates. *Prædict.* II. §. 39. bis illum commemorat, quem totum locum sine hæsitatione CELSUS repetiit *lib. II. c. 6*. Nec video certe, cur FOESIUS contendat, per terræ esum ea, quæ ex terra oriuntur, intelligi, & hac notione quodvis ablactati pueri alimentum comprehendere, quum historiarum fide constet, fuisse quosdam, qui inordinato adpetitu ad terram & lapillos devorandos ferebantur: neque id solum in feminis, pica laborantibus, contigisse scimus, sed virili etiam sexu non usque adeo raro accidisse hunc morbum, non transitorium, sed ad vitæ finem per multa lustra durantem.

IX.

Ergo, inquires, tam male adornatam editionem, quæ dissona græcis latina proponit, & in errorem conjicit, abjiciemus & FOESIUM teremus. Si quis vero non alium ob finem Foësii exemplaria diligit, quam quod sperat, hoc interprete se carere posse cognitione græci sermonis, mature mutet consilium & sibi procuret aliam, forte nunquam expectandam Hippocratis editionem. Fatemur equidem plurimum reipublicæ profuisse Foesium infinitis laboribus pro bono publico subitis: sed qui frui ab ipso partis cupiunt, debent græcæ linguæ & vocum proprietatis studio quam maxime teneri, ut intelligant, quo loco in latinis dissona græcis adferat, & vel ipsum rationes sui facti in notis reddentem adeant, vel *œconomiam Hippocratis* consulant, ubi plerorumque locorum, qui tales sunt, optimas reddit explicationes, suæque interpretationis causas indicat. Exemplo sit nobis ille textus ex *Epidem.* VI. quem ex Lindeniana jam supra consideravimus. Legit autem eo loco Foësius: καὶ ὅσαι ἄλλαι ὑποστάσεις ὅντι σφίγξες, ἢ ἑτέρας ἀποσκήψεις: & ita vertit: *quod & in reliquis abscessibus, velut fistulis contingit, qui aliorum medela sunt*. Hæc non esse consona græcis, quivis agnoscit, qui vocabula ὑποστάσεις & ἀποσκήψεις considerat. In notis quidem Foësius indicat, cur in textu ὑποστάσεις admisit, in translatione autem reddiderit *abscessibus*: sed cur neglexerit ἀποσκήψεις, & loco ejus lectionem paralleli loci sequutus fuerit ex *œconomia* demum intelligitur. Ex eadem cognosces cur Lindenius loco ultimi hujus vocabuli ἀποσκήψεις reposuerit σκήψεις,

quod versio editionis Lindenianæ minime interpretata est. Ex quo adparebit sane, quod volumus ostendere, nusquam tuto fidendum esse, etiam optimis interpretibus, & suis oculis illum debere uti, qui vult sine erroris periculo aut damno vetusta monumenta consulere.

X.

Sed juvabit pluribus exemplis adductis ostendere, quam parum liceat interpretibus confidere. Si HIPPOCRATIS præcepta de hydropæ pectoris per paracentesin curando libro *de morbis* II. §. LIX. in versione a Lindenio adjecta legeris, illa sane verba, quæ præcipuam cautionem in hac operatione adhibendam tradunt, oportet male intelligere. Quum enim Hippocrates scribat: καὶ ἀφίεναι τοῦ ὕδατος φειδόμενος, *aquam parce emittendam esse*; pro eo in versione disces: sanguinem paucissimum parce emitte. Libro *de medico* §. V. Hippocrates de varicibus pertundendis sermonem instituit, & in hoc casu angustas sectiones facere suadet, subjecta ratione: ὅτι γὰρ ὁδόν τε τὴν ῥύσιν γενέσθαι κατακρήνη. Versio: *neque enim possibile est, ut fluxus in his sistatur*. Vident omnes gnari hoc a sensu verborum græcorum longe abesse. Foësius in *œconomia* hoc agnoscit, neque tamen ipse in sua versione clarius Hippocratem exprimit. Si omnia recte perpendas & locum parallelum *lib. de ulceribus* §. 16. addas, intelliges sane Hippocratem id sibi velle: *neque enim licet sanguinem detrabere quantum sufficit* (ad varicem deplendum): *interim necessitas sepe urget aliando a talibus sanguinis detractionem facere*, quo casu angusta sectio suadetur & commendatur. Nemo mirabitur nos illud ὁδόν τε reddidisse *licet*, quum proprie significet: *fieri potest*: etenim Hippocratem hic non loqui de possibilitate, ut vocare solemus, physica, id manifestum est: notum autem, quam sæpe dicamus, id fieri non posse, quod vel honeste, vel utiliter & prudenter nequit fieri; quo casu, ut noster sane est, idem valent *non licere & fieri non posse*. Quoniam hunc locum attigimus, liceat etiam in altero, qui sequitur §. VI. p. 48. versionis in Lindeniana editione & ipsius textus indicare vitium. Loquitur divus noster senex, vel quicumque demum auctor est libelli *de medico*, de cucurbitulis majoribus. Verba autem hæc innuimus: οὗ γὰρ ὁδόνταί μέγαν εἶναι τὸν κύκλον, μὴ συναγομένης τῆς σαρκὸς ἐν πλείονος τόπου. Hic legendum esse ὁδόν τε apertum fit ex antecedentibus, idque jam agnovit Foësius, qui hunc locum recte transtulit in hunc sensum: *neque enim circulus magnus esse potest, quin caro ex pluribus locis contrahatur*. Præ quo friget interpretatio, quam Lindeniana editio subjungit: *neque enim magnum esse circulum putant, si non ex pluribus locis caro comprehendatur ac contrahatur*.

XI.

Pluribus exemplis probare, quod vitio laborent versiones auctorum veterum, qui medicinæ antistites sunt, puto supervacuum: hæc autem ex Hippocrate potissimum adduximus, quia hujus viri monumenta majori studio a doctissimis hominibus sunt illustrata, polita & elaborata, neque tamen omni hoc nisu impetrari potuit, ut non longe plura, quam nunc explanata sunt, supersint, quæ, posterorum diligentiae acuendæ, illi non absolverunt. Hinc vitio nemo mihi vertet, si ex his concludam, oportere ad veterum lectionem accedere tam instructum græci sermonis cognitione, ut & sine versione legat, & versionem, bona an hæc sit & sensum in hoc loco exhibeat, an vero aberret, dijudicare & id demonstrare valeat. Secus qui faciunt,

ciunt, hos ubique incertos hærere, & dubitare necesse est; aut si confidentius sequuntur duces suos, accidit illis, quod malo MERCURIALIS *var. lect. l. c. 12.* verbis, quam nostris, efferre: *quicumque latinis auctorum interpretationibus contenti, græcorum contextus intelligere non curant, quam graviter sæpe numero errent, ex multis cognoscere licet.* Sed ut propius de comparanda necessaria græcæ linguæ cognitione, quam ad græcos auctores medicos adferre lector debet, accedamus, consultum est hanc adire corinthus cupienti per Ioniam & Atticam iter instituere, id est harum dialectorum cognitionem familiarem quærere. Nec parum prodesse ad hanc impetrandam existimo, si nos extra Græciam degentes eum teneamus modum, quem ipsi olim tenebant Græci, qui suos juvenes ad alios scriptores adducendos Homero familiares olim reddebant. Rideant hujus sæculi compendiis adfueti & innutriti, quantum velint: mihi certe, cur ita putem ad veterum lectionem præparari oportere, causæ sunt satis prægnantes, quas exponere nunc liceat.

XII.

Et Ionicæ quidem Atticæque dialecti familiarem usum requiro, quoniam in HIPPOCRATE & ARETÆO Ionismus regnat, intermixtis, saltem in Hippocrate, multis Atticismis: GALENUS autem, etsi modeste hanc laudem ipse deprecatur, Atticus est, si quisquam alius inter medicinæ auctores. Poetarum principem HOMERUM legi juvat ob multas sane causas. EROTIANUS quidem observat, Hippocratem esse *ἀνδρα ὁμιλῶν τὴν φράσιν*, qui homericas phrasas imitetur. Quod satis esset ad commendandam Homeri lectionem, nisi longe, ut existimo, major utilitas ab lectione hujus poetæ expectanda esset. Nimirum quum omnes veteres Homerica poemata recepissent, & quotidie tererent, factum est, ut hunc quasi communem loquendi magistrum omnes susciperent & ab ipso proprietatem dicendi & vocum usum addiscerent. Videas sane quam frequenter in hoc certationum genere doctissimi viri quasi arbitrum constituent Homerum, & hujus viri clarissimis exemplis omnes de usu vocabulorum controversias componant. Neque vero excludimus etiam aliorum scriptorum veterum lectionem, modo meminerit scopi sui veterum medicinæ scriptorum cupidus, & ad hos tandem sic festinet, ne vel potissimam temporis sui partem præparatione consumat, vel imparatus accedat. Neque enim consenescere in his volumus medicinæ candidatum: neque veremur, ut consenescat & artis ipsius detrimento his operam navet, qui & ingenium docile & memoriam & diligentiam adfert, nec manu-ductione & institutione recta destituitur. Non sunt detrimento & impedimento ad reliqua, quæ *τὸ ἐργον* esse debent, absolvenda, quæ, ut absolvere feliciter possimus, efficiunt, & sine quibus nemo potest scopum attingere. Subjicimus PETRI CASTELLI gravissimum testimonium ex libello de *optimo Medico: linguarum peritia Medico optimo necessaria est, ut sermone latino non possit carere sine magna turpitudine, græco non sine turpitudine solum, sed neque sine magno artis dispendio, quum hujus sermonis ignorantia, quo Hippocrates, Galenus, veteresque ἱατροὶ scripsere, sophismata indissolubilia contradictionesque protulerit infinitas.*

XIII.

Satis, ut existimo, de græcæ linguæ necessitate exposuimus, quippe sine qua veterum græca monumenta nemo intelligere valet. Sed nec ipsa latina Medicorum veterum scripta intelligi posse nisi a

gnaro græcæ linguæ, & in græcorum Medicorum monumentis versato, nihil dubitamus adferere. Exemplo sit nobis ille Medicorum Cicero, CORNELIUS CELSUS, cujus de Medicina octo libri magno reipublicæ medicæ bono ad nostra tempora pervenerunt. Quisquis autem Celsum diligentius evoluit, non potest non infinitis locis deprehendisse, quantopere is Hippocrati addictus fuerit, quem imitandum sibi unice proposuit & ita proposuit, ut integras Hippocratis periodos latine tantum conversas, in opus suum transtulerit. Id quum alii jam abunde notaverint & laudatissima industria FOESIUS in suis ad Hippocratem commentariis subinde indicaverit ipsa illa loca: tum maxime HENRICUS STEPHANUS, ille phoenix typographorum, quum medicæ artis principes post Hippocratem & Galenum uno volumine complecteretur, Hippocratis loca, quæ Celsus interpretatus est, seorsim adjecit. Tanta autem fuit hæc Celsi in imitando industria, ut passim videas, eruditos ita de illo loqui, ut contemptum haud obscure innuant, quando ipsum descripsisse Hippocratem CORNARIUS, NICOLAUS autem MONARDUS simiam Hippocratis egisse non erubuerunt scribere. Sed præter Hippocratis monumenta Celsum etiam legisse aliorum scripta medica & præcipue methodicorum, qui caput extollere tunc incipiebant, apertum est ex multis vocabulis, ab hujus sectæ auctoribus acceptis, & in usum ac sensum eundem adhibitis. Ex quo adparet sane, qua clavi nobis, ad intelligendam Celsi dictionem, nitidam illam & bonam, sed a communi ceterorum latinitatis auctorum usu subinde recedentem, & ut ita dicam, græcismo infectam, opus sit.

XIV.

Nimirum pro certo habemus, illum demum recte ad lectionem CELSI paratum accedere, qui latini sermonis, purissimi illius, ex reliquis scriptoribus gustum acquisivit, ut quidquid in Celfo Græciam redolet, illud ex usu Græcorum, quos illo sequitur loco, intelligatur. Sic puto satis constanter ceteros auctores latinos inter vulnera & ulcera distinguere, ut vulnus dicatur læsio continui in parte quacumque contingens a causâ externa; ipse noster CELSUS tum alibi, tum maxime *lib. V. c. 26.* sæpius hac notione vulneris utitur; ulcus autem denotet continuitatis solutionem a causâ interna enatam. Sed legenti Celsum exempla obvia fiunt, ubi ulceris vocabulo tunc utitur, quando vulneris denominatio commodior videbatur. Sic *libri V. c. 26. §. 27. 29.* possunt adsertum meum probare. Si quis *§. 31.* initium obiter tantum inspexerit, nec usum vocabuli *ulcus* attenderit, posset de vulneribus vere dicta de ulceribus, præter auctoris mentem, accipere. Taceo alia apud Celsum obvia loca, quibus Hippocratem is imitatus, alias distinctas satis notiones ulcerum & vulnerum confundit, quod in Coi nostri libello, quem *de ulceribus* inscripsit, perpetuum est. Idem in Hippocratem studium effecit, ut Celsus quosdam ipsius loquendi modos adsumserit, & in Latium intulerit, de quibus nondum observare licuit, an alius scriptor vetus adeo constanter in eadem significatione adhibeat: recentiores certe parum observant. Sic nihil in Celfo frequentius est, quam illa phrasis *alvum* vel *ventrem* ducere, quam videas a nostri sæculi scriptoribus sæpe adhiberi pro designanda alvi per lene medicamentum catharticum laxatione. Sed Celsus numquam in hunc adhibuit sensum, quippe cui semper denotat alvi per clyisma injectum evacuationem: idque apertissime cognoscas, si *lib. II. c. XII. §. 2.* considerare velis, quo loco tota hujus

evacua-

evacuationis ratio exponitur. Sæpe etiam legas apud Celsum *solvere album*, quæ phrasis ipsi perpetuo significat evacuationem per medicamenta moliri, aut per alimenta medicamentosam virtutem habentia. Utraque phrasis est Hippocratica, qui passim *λύσαι τὴν κοιλίην*, ut *de dieta II. p. 232. ὑπάγειν* de salubri dieta §. 5. *κλύσμα ὑπάγον* *de affect. §. 8. κοιλίην ὑπάγει κλύσμω* *de viēt. acut. §. 44.* prorsus in eodem modum adhibuit, nisi forsan constantior in eo Celsus fuit ipso Hippocrate, qui *λύειν κοιλίην κλύσμοις* etiam dixit *de viēt. acut. §. 47.*

XV.

Quod de Celso dixi, inter latinos medicinæ auctores princeps, id transferri ad reliquos facili labore poterit. Notum enim est, vel PLINII *hist. nat. XXIX. c. l.* disertis verbis, & CATONIS ibidem citati testimonio, a Græcis Romanos accepisse medicinam, & si testes silerent alii, vel res ipsa clamaret, artisque vocabula a græcis accepta testatum facerent, quantum peregrinitatis medicinæ latinorum insit. Sed non vacat singulis immorari, quum putemus satis patere ad Medicos latinos veteres requiri græcæ linguæ peritiam, si illorum mentem plene cupimus adsequi. Progredimur itaque ad aliud præparationis momentum, quod amplissime patet, & in tanta brevitate nostri temporis & ex instituto dissertationem, non volumen scribendi, potius attingere, quam exhaustire conabimur.

XVI.

Nimirum nec Græcos, nec Romanos, nec cuiusvis gentis scriptorem intelligi posse persuasi sumus, nisi lector respiciat ad ingenium, mores, consuetudines, aeris & cæteras climatum, quo quisque scripsit, conditiones, tum etiam ad dogmata & hypotheses, quibus quisque scriptor imbutus fuit, & quorum vestigia in eorum libris ubique obvia esse necessarium est. Quantum opus sit hæc bene perspecta & cognita habere vel ex eo patet, quod illorum scriptorum causa, quos juventuti in scholis prælegere magistri solent, historiæ, geographiæ, antiquitatum doctrinæ, mythologiæ, historiæque philosophicæ multum temporis, & merito, impenditur. Quod si vero in illis libris, quos sermonis potius addiscendi, quam ipsarum rerum gratia legimus, tanto adparatu utimur: quidni hos libros, ex quibus pulcherrimarum rerum cognitionem petimus, hac face illustrare nitemur, sine qua cœcutire nos & res vel prorsus non, vel inadæquate adsequi necesse est? Putamus igitur ad veteres neminem admittendum esse, nisi cui hæc omnia probe perspecta fuerint. Et optandum sane esset, ut, qui historiæ medicinæ se nuper accinxerunt elaborandæ, sibi persuassissent, hæc tamquam præcipuum in hoc eleganti doctrinæ medicæ quasi vestibulo haberi spectarique habere. Sed reprehendere & arguere nunc non volumus, sed potius commonstrare utilitatem harum considerationum, quæ tanta est, ut non injuria necessitatem dixeris.

XVII.

Incipiamus autem ab illo, quod ordine temporis primum est: nempe ipsam temporum considerationem in antiquis monumentis pervolvendis lectori commendamus. Et non fictam esse sed verissimam humani generis per sæculorum decursus infirmationem res est certissima. Explodimus merito commenta illa Stoicismum sapientia de occulta inclinatione in descensum & naturæ senio: certo persuasi satis manifestas rationes corpora hominum deteriora

reddere. Cogitet, quisquis hæc consideravit, quantum in dies vivendi genus mutetur. Et non adfici his corpora & enervari statuemus? Quis miratur minus durabiles esse plerosque nostri sæculi homines parentibus suis, quum videat, illos peregrini orbis potus calidos toto die ingurgitare? quum nicotianæ abusum ubique regnare animadvertat? quorum prius ad transpirationem magis, quam natura requirebat, disponit & invitat, alterum fumum ducendi fugendique exercitium salivalem laticem corporis exhaurit, & multum empyreumatici olei, five cum saliva in ventriculum demittit, five per inspiratum aerem pulmonibus infigit. Miramur purpuræ illam excretionem antea inauditam tam reddi familiarem, sed desinemus mirari, si consideraverimus, vix ulli hunc morbum insultare, nisi quis potibus calidis sese implet, & deside vivendi genere alias in corpore collectas impuritates feri per auctiorem & in consuetudinem redactam diaphoresin ad cutis emunctoria continuo divertere quasi coegit. Et notavimus sane multorum etiam Medicorum incogitantiam eo processisse, ut juberent suoque exemplo alios inducerent, quo largius epotis his calidis aquis sudori per aliquot horas quotidie vacent, quos vel ipsos non revocasse a consilio suo purpuræ continuam in suo corpore vexationem vehementer mirari sæpe subiit.

XVIII.

Hoc recens mutati vitæ generis exemplum proposui, ut convincamur ad fidem habendam, si, superioribus temporibus eadem accidisse inter homines, supposuerimus. Legat, quisquis, fieri ingentes mutationes a talibus causis, dubitat, immortalis CONRINGII libellum *de habitus corporum germanorum causis*, & intelliget sane, multum a pristinis illis temporibus nostra recessisse: sed simul etiam videbit, quibus de causis in pejorem statum devenimus. DIODORUS SICULUS, vir in antiquarum rerum cognitione versatissimus, ubi Herculis facta enarrare incipit, concedit multa fabulosis additamentis, præter veri fidem esse exaggerata, sed prudenter monet, non oportere lectorem magnitudinem veterum operum & heroicæ virtutis facta propterea penitus in dubium revocare, quod ex posteriorum sæculorum conditione hominum vires hæc omnia excedere videat. Et sane pro firmissimo & verissimo adsumimus, longe robustiores & firmiores fuisse homines præcos usque ad Hippocratis ævum, illis ipsis, qui erant illo tempore, quo Celsus scripsit, cuius ætas quinque admodum sæculorum intervallo a superiore distat. Sed illo intersitio, quod ab Hippocrate ad Argonautarum tempora excurrit, & duobus tantum sæculis minus est mille annis, multum decessisse homines a pristino robore & animorum ferocia historiarum fide constat. Nam ad illud usque tempus (loquor de græcis hominibus) fere duravit humani generis feritas, & qui ad moratiorem vivendi indolem revocarent, CADMUS Thebarum conditor, THESEUS Athenarum non fabulosus parens, ORPHEUS & AMPHION, qui musica homines edomuisse creduntur, vel brevi antecessisse hanc periodum vel in illam incidisse videntur. Quantum vero silvestria & fera animalia vincunt cicurata & ab hominibus edomita corporis robore, velocitate, ferocia: quantum in forum Lacedæmoniorum a Lycurgo adductus olim canis ad venationem adfuetus alterum eodem partu editum, sed ignave domi delicateque educatum, alacritate & celeritate superavit: tantum omnino diversos puto fuisse illos homines, qui in naturali illa libertate suo genio & ingenio vivebant, ab illis, quos in societatem & magnas

nas urbes coegerunt, qui magnarum urbium, rerumpublicarum regnorumque auctores exstiterunt.

XIX.

Compositis & in unum corpus coactis societatibus, cum alii agrorum culturæ, alii opificiis & artibus se darent, mercaturam alii exercerent, & omnes suo modo quæstum, & vitæ necessaria parare niterentur, animorum ferocia sensim emollita est, coactaque legibus parere continua belli omnium in omnes & ferarum capiendarum exercitia multitudo deponere cœpit. Ex quo adparet, quam præcipiti lapsu ad infirmiorum conditionem homines tunc venerint. Aucta est hæc imbecillitas, postquam, sollemni mutationum periculo, homines otium amare, eoque ad voluptates excogitandas sibi præparandas abusi sunt. Quæ pestis, postquam humanum genus semel corripuit, contagione ad plures manavit & indies aucta est. Tunc etiam corripuerunt homines morborum agmina, ut mirum non esse debeat, si animadvertimus & hominum societates in Græcia coivisse & medicinæ auctores innotuisse eodem tempore: & quum primi isti artis inventores vix aliud, quam ulcera contrectare & vulnera consolidare nossent: illo temporum intervallo, quod inde ad Hippocratem usque excurrit, aliorum morborum, ex luxuria pullulantium, auxilia dispicere, morborumque historias adnotare cœptum est. Ita Medicis tunc maxime indiguerunt homines, qui adversus internorum, ut dicimus, morborum genera opem ferrent. Ex quibus antiquissimi sunt, qui ex aeris constitutione prava inducuntur, febrium genera, quibus illi maxime affliguntur, qui corpora sua intemperantiæ vitio ad noxam suscipiendam opportuna reddiderunt. Agnovisse autem homines mutato vitæ genere, morbos ipsis plures antea incognitos ingruisse: & propterea diætæ vitia diætæ melioris studio superare & corrigere conatos fuisse, vel ex eo adparêt, quod primæ medicinæ præcipuum fuit diætæ studium: ut luculentius innotescit ex HIPPOCRATIS *de veteri medicina libello*.

XX.

Hæ considerationes clarum faciunt, cur, qui primi medicinæ auctores fuerunt, illud maxime sequuti sint medendi genus, quod ex illorum scriptis intelligimus. Sed præterea etiam declarant, cur corpora illius ævi hominum medicinarum fortium, quæ passim commemorant, usum, in genere facilius tolerarint, & illa etiam dosi, quæ excessiva apud nostros homines esset, noxam ab eis minimam senserint: etenim videas, tamquam perpetuum, fortissima medicamenta, ut elaterium, elleborum, peplium, æris florem illos largiori manu propinasse, quam nostrorum quisquam audeat. Sed hujus rei alteram quoque causam, cum hac tamen conspirantem inferius attingemus.

XXI.

Exhaurire hoc argumentum & omnes, quæ deduci hinc poterant, conclusiones annectere, non est nostri instituti: sufficit digito monstrasse, quam utile sit, huc in veterum lectione animum advertere. Transimus igitur ad exponendam aliam observationem. Putamus autem magnopere conducere ad verum cuiusvis auctoris sensum adsequendum, si quis attendat, quo loco ipse ille scripserit, quem præ manibus habemus. Id quum in aliis scriptoribus commendari merito soleat: tum maxime in medicinæ auctoribus non sine gravi damno negligi potest. Namque dici nequit, nec apud intelligentes rerum naturalium opus est, quam multum locorum indoles & positus ad meridianum, æquatorem vel pro-

pior vel inde remotior faciat ad diversissimos effectus in animantium corporibus, quin etiam in ipsis vegetabilibus edendos. Quam multorum inde morborum origo vel saltem decursus & exitus inter se multum diversissimi pendeant, Illustris & Excell. noster FRIDERICUS HOFFMANNUS passim in suis scriptis inculcat: maxime vero in dissertatione *de morbis certis regionibus propriis*. Et quantum faciat cœli diversitas ad vires eorum, quæ ex terra proveniunt, alterandas, vel solo vini exemplo discimus: idemque excell. noster HOFFMANNUS patronus ac præceptor perpetuo cultu venerandus, in sua *de vini Rhenani præstantia* diatribe palam fecit. Et posset sane hoc argumentum plenissime exhaurire idem Vir illustri plane & singulari doctrina conspicuus, si otium ipsi suppeteret, quo posset a multis annis collectas observationes suas physico-geographicas publicæ luci sistere, quarum partem cum suis auditoribus in prælectionibus physico-œconomico-geographicis communicavit.

XXII.

Quod indicavimus studioso vetustorum auctorum utile esse, si geographica illorum locorum notitia instructus sit, quibus quisque Medicus scripsit, id sane late patet. Nec sufficere putamus ad rectum firmumque iudicium ferendum, ut quis ex elevatione, quam dicimus, poli considerata & comparata locorum in eadem latitudine jacentium indole generalem ideam de constitutione cœli & gradu caloris aut frigoris animo concipiat: sed optandum esset, ut ex vetustorum scriptorum fide liceret certam cognitionem etiam illorum acquirere, quæ cuivis regioni vel urbi peculiaris sive ad salutem, sive ad morbosam constitutionem, tamquam causæ perpetuæ, adfuerunt. Nec desperandum est, posse in plerisque nos illorum notitiam studio consequi: præsertim si plures, incitati etiam post fata illustris LANCISII exemplo, nobiliorum urbium mutationes, ad salubritatem vel insalubritatem momentum adferentes, ex historiarum monumentis vellent eruere. Sed cum hoc votum potius sit, quam ut ipsi augurari possimus quid postera ætas in eo præstitura sit: enitendum tamen est, quantum possumus, ut in hac cognitione multum proficiamus, neque nos nimis cito hujus indagationis poeniteat. Certe si HIPPOCRATES, ut principio libri *de aeribus aquis & locis* inculcat, in Medico requirit, ut urbis, in quam medicinæ faciendæ causâ intravit, situm, omnesque aeris, ventorum & aquarum conditiones exploret, tamquam sanitatis & morborum in incolis causas: non absolum est, eum, quisquis dijudicare conditas ab alio Medico observationes & in usum suum prudenter convertere cupit, pari cum diligentia hæc omnia debere cognita perspectaque habere.

XXIII.

Hoc observato putamus morborum historias perfectius posse digeri & in ordinem redigi, si ea demamus, quæ potius climatis ratio adjecit, quam ad morbi essentiam pertinent. Sumamus pro exemplo unico HIPPOCRATIS effatum *de humoribus* §. 3. *τοῖσι πυρετοῖσιν ἐς ἄρθρα καὶ παρὰ γνάθους μάλιστα ἀποστῶσιν γίνονται. In febribus ad articulos & circa maxillas maxime abscessus fiunt*. Hanc sententiam firma Hippocratis observatione niti, nullus dubito, & ex ipsius scriptis in eo magis atque magis confirmor: sed apud illos, qui artis opera in his maxime regionibus exercent, adeo rara fit ejusmodi abscessuum mentio, ut satis ex hoc silentio intelligas, etiam diligentissimis pauca vel nulla eorum exempla occurrere. Sed secus omnia habent in illis calidioribus regionibus,

bus, ubi veritatem hujus adfert oculis continuo usurpant Medici, ut ex observationibus ipsorum intelligere licet. Quid de aliis regionibus statuendum sit, equidem nondum exploratum habeo. Certe qui nuper elegantes commentarios de febribus ad Hippocratis popularium libros I. & III. dedit JOANNES FREIND, celebris Medicus Londinensis, commentario VI. ita scribit: *morbos abscessu solvi satis vulgare est, qui frequentissime quidem in febribus & variolis supervenit, maxime circa aures & inguina. Nonnunquam & toto corpore diffusa excrescunt tubercula, quæ in pus aliquando resolvuntur.* Sed relegenti mihi SYDENHAMUM, qui diligentissime exponit, quæ in febribus ipse vidit, non adeo frequentem abscessuum commemorationem invenire licuit. Consignavit quidem litterarum monumentis intermittentibus autumnalibus lethales tonsillarum inflammationes accessisse. Sed hæc non est morbi per abscessum solutio, de qua Freindius loquitur. Nec in variolarum & febris variolosa decursu abscessus factos commemorat, nempe diversos ab ipsis illis apostematibus, seu abscessulis, quæ variolarum nomine proprie insigniuntur. Gallia medicus non incelebris NIC. CHESNEAU, qui praxin in Narbonensi & Aquitania provincia fecit, quasi aliud agendo alicubi innuit in constitutione variolosa aliquem convalescere sine reliquiis, quæ tunc erant juncturarum abscessus. Invenio etiam apud RIVERIUM, Gallia celebratissimum Medicum, observationes, quibus elucescit parotides ibi febribus malignis frequentissime accedere, ut plurimum funesto eventu. Sed revera puto in nostris regionibus nec parotidum tumores, si modo Hippocrates illos intellexit, nec alia abscessuum genera tam frequentia in febribus esse, ut, si apud nos suas observationes condidisset, divus senex hunc canonem propositurus fuisset.

XXIV.

Plura sunt, quæ consideratio regionum accuratior Medico rerum physicarum non ignaro suppeditat ad observationes & regulas quasi generales condendas, quibus in lectione veterum quasi ducatur & dirigatur; & ex quibus ipse amplissimum ad praxin fructum sperare possit. Sed quoniam pleraque non solum climatum diversitatem pro fundamento habent: sed insuper eo accedit temperamentorum in illis regionibus viventium & victus totiusque vitæ generis notabilis diversitas: hæcque conjuncta efficiunt, ut non pauca aliter se apud illos quam apud nos habeant: nolo nunc de illis plura adferre, sed properare potius ad exponenda illa, quæ ulterius observanda in lectione veterum existimo, constitui.

XXV.

Temporum decursus in toto vitæ genere integrorum regnorum & rerumpublicarum ingentes mutationes proferre, adeo notum est, ut nihil supra possit. Et vel Græciæ exemplo patet, quam olim florentissimam regionem, hodie mixti Turcis, Græci, Judæique incolunt, magna etiam pars ex Italia & aliis Christianorum oris eo delata inter hos domicilia olim posuit. Ex his prisca moris tenacissimi Judæi, & Judæis in obstinatione moris vix cedentes Turci retinent magis, quibus adfuerunt: sed Græcos certe a prisco vivendi Græcorum genere penitus abiisse certum est, ut hodie nihil minus quam in Græcia Græciam invenias. Tantas in vivendi toto genere mutationes etiam infinitas intulisse in sanitatis negotium nullum est dubium: quare dijudicandum ex veteri more, non ex hodierna Græciæ consuetudine, existimo, quidquid ad sanitatem pertinens Græci scripserunt. Et quia latissime hic

patet dicendi campus, nonnulla ad vitæ genus antiquum pertinentia liceat in medium adferre.

XXVI.

Placet vero, interprete LUCIANI de gymnasiis libello, intuenda exhibere Græcorum corpora, ut intelligatur, qualia illa fuerint. Siftuntur illo SOLON & ANACHARSIS mutuos sermones de consuetudinibus Græcorum ferentes. Et ita quidem Anacharsis ad Solonem: σοὺ θαυμάζω ὅπως γηραιὸς ἦδη ἀνδρῶπιος οὐτε ἰδίῃς πρὸς τὸ θάλλειν ὥσπερ ἐγὼ, οὐδὲ περιβλέπεις οὐσίῃν τι ἐνθα ὑποδίσκῃ ἀλλὰ δέχῃ εὐμαρῶς: demiror, qui fiat, ut tu, quum ætate jam sis confecta, non perinde ut ego propter calorem sudore diffluas, neque umbrosam requiras locum, quem subires, sed ferventem solem adeo facile perferas. SOLON, cujus responsiones in summam contrahere liceat, causam hujus facilis tolerantia refert in exercitationum sub dio consuetudinem, quibus impetrent, ut ferventis solis radios facile tuttoque perferent, neque pileo caput tegere opus habeant. Corpora enim Græcorum vestibus exuta inde a pueritia adfuerunt aëri perferendo, ut neque ferventem solis æstum graviter ferant, neque rursum algoris sint impatientia. Scire se enim ab experientia edoctos, qui non ita ad labores & calores indurati sint illico multo sudore illos diffluere & sub galea anhelare, præsertim sole sub meridiem æstu supra modum calente: ita duratos sero sudare incipere, & raro admodum morbis adfectos decumbere. Neque morbum neque defatigationem tale corpus facile corripere, quod & ab internis probe præparatum sit, & adversus externa firmiter circumseptum, quo minus vis morbi aut lassitudinis ad interna penetrare queat: neque enim æstus neque algorem illa suscipere aliquo detrimento corporis. Præterea lubens, quæ in eadem oratione Solon ad Anacharsin de præstanti exercitationum græcanicarum usu convincendum adducit.

XXVII.

Adparet ex dictis Græcos, inter quos suas observationes Hippocrates condidit, corpora firma & perferendis laboribus, immo aeris quoque injuriis, idonea sibi multa crebraque exercitatione comparasse, idque ut facerent omnes cives, legibus sanxerant, Athenis quidem Solon, Lacedæmone Lycurgus & in aliis civitatibus alii illarum conditores & legum auctores. Accedit, quod apud Græcos nulli licebat civi, antiquissimis saltem temporibus, a militia laboribus vacare, sed omnes æque ad subeunda pro patriæ salute pericula obligati erant. Ita certe in philosophorum vitis crebro invenimus, quod bellicis interfuerint, ipsosque illos, qui alio tempore sacrorum curam agebant, alio spectamus arma pro patria gerentes, vel arma gerentibus imperantes. Quæ omnibus communis necessitas has ad bellum præparationes necessarias faciebat, simulque ad gymnastica vitæ conjunctas unctiones, volutiones in pulvere, frictiones, balnea, & reliquas diætæ athleticæ partes deducebat.

XXVIII.

Jam tibi siste animo hominem ita induratum, quem morbi aliqua vis, ponamus febrim, corripuit. Hunc putas virium tam subitam jacturam esse facturum, sudoribusque finito quovis paroxysmo, velut nostri solent, tam large diffluxurum esse? Agnoscimus sane ex eo, quod virium magna prostratio, & sudoris eruptio certius illis signum salutis vel præsagium interitus dare potuerit, quam in alio, quem cito prostrat morbus, & quivis calor in sudores liquefcere facit. Jam dudum agnoverunt Medici,

Medici, crifes in orientalibus populis certiores & magis conspicuas esse. Sane credo aliquid hic valere clima: sed magis valuisse vitæ genus & corporum ab longa consuetudine habitum pro certissimo & indubio sane habeo. Eadem corporum induratio effecit, ut majus adversus morborum noxas & promptius auxilium invenirent prisci mortales ab usu remediorum diæticorum, quam a medicinarum intro sumendarum generibus. Quare nemini, veteres curiosius legenti, obscurum esse potest, plus præsidii illos posuisse ad sanitatem æque conservandam & periclitantem aut amissam vel redintegrandam vel instaurandam in victus convenienti ratione, exercitationum, balneorum, unctionum, frictionum, vomituum, clysmatum & id genus aliorum prudenti usu, quam in ullo alio medicationum genere. Quin immo, si CELSUM recte intelligimus, illam partem medicinæ, quæ magis medicamentis quam victu pugnat, ab Erasistrato & Herophilo deducti viri, & hi, qui se ἑμπερικῶς nominaverunt, serius aliquanto in orbem invexerunt: cumque nimium his tribui sentiret Asclepiades, horum ex magna parte sustulit usum & ad ipsius victus rationem potius curam suam, quasi postliminio, transtulit.

XXIX.

Quoniam ad medendi methodum priscis familiarem sensim provoluti sumus: omnino debemus agnoscere, quum diverso modo illi in morborum curationibus usi sint, diversum etiam esse debere morborum sub ipsa curatione successum, progressus & eventum, quam apud illos, qui longissime ab eorum methodo discedunt. Quis enim ex illis, qui ubique in febribus cathartica, vomitoria, venæsectiones, sudores scientia & quæ non alia activa adhibent, expectabit, ut is morbus pari ratione decurrat, ut Hippocrates olim vidit decurrere? Miraculo simile esset, si HIPPOCRATIS effata apud illos vera deprehenderentur. Accusarunt jam olim aliqui aphorismum Coi, quo feminas a podagra liberarum pronuntiavit: sed prudenter SENECA respondit & culpam in vivendi genus immutatum transtulit. Eadem ratione liceret recentioribus aliquibus respondere, qui nescio quid præclarum invenisse sibi videntur, si veterum de crisibus observationes exhiberent. Fuere illæ in ista gente, in isto & vivendi & medicandi genere, & firmæ fati & perpetuæ: sed portentum diceret, si inter nos & nostrorum quorundam portentosas medicationes idem eveniret, ubi frustra sane a natura crifes & solutiones morborum postulat & expectat, quisquis naturam in omnibus pervertit, & ab ejus tramite quam longissime recedit.

XXX.

Superius jam attigimus priscos homines fortissimas medicinas secure & facile tolerasse, quum ipsi essent robustioribus a natura vel exercitatione præditi corporibus. In mentem redit alia ratio, nec, ut putamus, contemnenda, quam MERCURIALIS in *lect. variis lib. II. c. XXV.* adfert. Nimirum quum multa adduxisset, ex quibus adparet, veteribus quasi lusum & jocum fuisse elleboro uti, quem nos hodie tantopere reformidamus: causam defectus hujus securitatis transfert ex parte quidem in illam negligentiam veterum, qua præparationem & legitimum ellebori usum consignare intermiserunt: sed prudenter etiam monet, veteres linimentorum, balneorum aliorumque extrinsecus adhibendorum remediorum usu effecisse, ut non solum sine noxa ea purgarent corpus, verum etiam cum majori ju-
Frid. Hoffmanni Oper. Supplem. II.

cunditate, saltem minori molestia. Subjungit: *his autem temporibus nihil pene hujusce generis notum est: & idcirco non est mirum, si, dum medicamenta leviora sectari studemus, valentiora dimittentes, in curandis agris ab antiquioribus tum in celeritate, tum etiam in securitate non raro superamur.* Adeo multum etiam est in therapia veterum, quod a nostris moribus longissime recedit, & ab illo notari cogitarique debet, qui illorum exempla intueri cupit, sive ut imitetur, sive ut judicium de illis legitimum ferre audeat.

XXXI.

Neque vacat, neque consilium est singula, quæ huc pertinent, examinare curatius, quippe sufficere putamus, si indicaverimus, quorum considerationes succurrere ubique debeant in veterum lectione secure & utiliter versaturo. Ante vero, quam hunc locum penitus relinquamus, uno illustri exemplo ostendemus, quam parum tuto ad veteres provocemus, ubi ipsorum moris obliti sumus. Jam supra a nobis laudatus FREINDIUS *comment. IV.* vomitionum ad percurandas febres utilitatem commendans, non obscure provocat ad antiquissimos Græcos & consuetudinem Romanorum frequenter vomendi. Id cum certissimum sit, longe tamen a vero abit, dum in eodem sermone commemorat ipsas medicamenti particulas in sanguinem sese insinuantes, & ita humores resolventes, unde liberior intra vasa tenuia circuitus efficiat, ut quidquid superfluum est, per cuticulares meatus diffuat. Nam quisquis considerat frequentiam vomendi inter priscos homines: invenisse debet hunc tantum non quotidianum vomitum tali artificio provocatum esse, a quo nullæ in sanguinem particulae possunt influere. Quum enim vomere ipsi vellent, vel tepida aqua copiosius epota post cibum, levi irritatione in faucibus quocumque modo facta, exonerabant ventriculum; qui fere frequentissimus modus erat: vel mane vomituri multum antea bibebant, vel hyssopum edebant aut radiculam, deinde aquam tepidam superbibebant. Aliqui balneum a cibo ingressi diutius in eo morabantur, donec exorta virium resolutio ventriculum subverteret. Hæ sunt veterum vomendi rationes, de quibus vere dici potest, quod frequenter illis usi fuerint: Hippocratis saltem ævo frequentissimæ erant: illæ autem a Medicis inductæ vomitiones erant illis hominibus longe quam nostratibus rariores, & non vocabantur in usum, nisi quando visum erat corpus indigere universali expurgatione. Sed & cito satis illæ damnatæ sunt ea causa, quod stomachum valde infestant: unde Celsi ævo vix præter elleborum aliud commendabatur pharmacum emeticum: quem tamen quam gravibus casibus reservaverit, ex ipso illo fati intelligere licet. Plura vide apud DN. D. JOAN. HENRICUM SCHULZE, in elegantissima *dissertatione, de Athletis veterum, eorumque diæta & habitu.*

XXXII.

Progredimur ad aliud exponendum momentum, quod veteres lecturo ante omnia debet præ oculis versari. Nimirum considerare oportet, quantos quisque tum in tota arte progressus fecerit, tum quibus hypothefibus, ceu saxo, inhæserit, ut libere philosophari & nudam veritatem complecti non valuerit. Et quod primum quidem illud attinet, cogitare debemus & HIPPOCRATEM & GALENUM & quis est alius, fuisse homines, quibus multa ignorare, quædam imperfecte cognoscere, in quibusdam quoque errasse & falsum pro vero amplexos esse æque contigit, quam ex nostro ævo cuiquam con-

tingere solet. Ita animatus lector nihil pro tam firmo & constanti adsumet, quin moderatæ dubitationi & inquisitioni omnia prius subicere sustineat, certus æque periculosum esse errorem medicum, quem ad Hippocrate acceperis, quam ille esse possit, in quem quisque per se illabatur, aut ab alio quocumque præcipitur. Adeoque subinde errasse Hippocratem apertum est, & vel unus ille *aphorif. XXXI. sect. V.* de vena uterum gerenti feminae non secunda satis illud convincit. Non omnia scivisse eundem, quæ improbis recentiorum virorum laboribus nobis nunc comperta & plana sunt: multaque eum egisse, quæ non peregit & nobis peragenda supersunt: nisi stipes quis fuerit, oportet cognovisse in Hippocratis & recentiorum doctrinæ studiosa comparatione. Adeoque nec perfectissimam debemus aestimare ejus medendi methodum, quippe theoriæ solidæ nulli superstructam: nec ex ea forte methodo sequutos morborum eventus, hincque in aphorismos relatas omnes observationes pro necessariis regulis reputare, & quia Hippocrates dixit, tamquam natura loquuta esset, suspicere. Nihil profecto dubitamus adferere ex tanta copia & farragine prædictionum & præfagiorum de morborum eventibus vix decimam partem veritatis examen ita sustinere, ut pro firmis regulis valere possint: etiam si demus Hippocrati climatis sui & vivendi generis,

ut & diversæ medicationis causa apud nos pleraque aliter evenire. Non potuit enim unus homo sufficere tot observationibus firmis condendis, quarum certitudo etiam in plurimis constanter eluceret.

XXXIII.

Reservavimus ultimo loco cautionem inprimis necessariam, quam adhibere debet, quisquis ad veteres legendos accedit. Nempe certi esse debemus de illis hypothesebus & opinionibus, quas quisque auctor animo imbibit, & secundum illas philosophatus est. Quam male de Hippocratis scriptis judicent, qui ipsius philosophica placita de diis, de elementis, de anima & alia hujus generis non examinarunt curatius, id in publicis controversiis intueri licet. Quantum hypotheseum reliqui scriptores immiscuerint, vel ex Galeno & Celso conspicuum fit. Ipsos interpretes, etiam bene de reliquo doctos, subinde nimis hic hallucinatos esse, dum notiones vocabulorum certis sectis & disciplinis Medicorum proprias minus recte considerarunt, facile esset ostendere. Sed memores nos angustiis dissertationis limitibus includi, debemus velâ contrahere & filum hic abrumpere. Æqui & intelligentes lectores conatibus nostris saveant: iniquos & quæ non intelligunt ipsi judicare auctores contemnere fas sit.

DE MEDICINA

A B


OMNI HYPOTHESI
VINDICANDA.

QUEMADMODUM veritatis luce menti humanæ nihil dulcius, nihil exoptabilius potest accidere: ita sane dolendum est, paucos admodum esse inter homines etiam eruditos, qui hac luce fruuntur, ac de ea in sinu gaudeant. Ea enim est omnium fere disciplinarum conditio, ut earum interiora altius inspicienti plures sese offerant opiniones ac figmenta, quam certæ & indubiæ veritates. Quod satis abundeque mihi testari videntur crebra illa doctorum dissidia, & acerrimæ, quibus artium professores inter se invicem contendunt, velitationes, quæ quemadmodum cum veritate, quæ simplex, atque unica est, quæ hominum mentes convincit, & amicabili concordia copulat, possint consistere, ego quidem plane non video. Idem vero fatum nobilissimam artem, quæ ægris salutem promittit, jam inde ab ejus ortu & incunabilis ad nostram usque ætatem expertam fuisse, majorem in modum dolemus & mirifice angimur, eam maxime ob rationem, quoniam vita ac sanitas merito rebus generi humano desideratissimis, & quæ omne pretium excedunt, annumeranda est. Pudet enim ac piget dicere, ob veritatis in rebus medicis ignorationem non modo multas & inconstantissimas esse hac in arte opiniones, sed infinitas etiam inter Medicos, qui theoriæ & praxi vacant, vigere dissensiones,

quæ partim in eorum monumentis, partim etiam in colloquiis, ad lectum ægrotantium institutis, subinde conspiciuntur. Rarissime enim inter se conveniunt in morbo, quo æger laborat, designando, in explorandis ejus causis, in adhibenda medendi ratione, in seligendis denique remediis. Nam quid solennius aut frequentius accidit, quam quod unus alterum erroris, culpæ ac damni ægro in curatione illati arguat & criminetur? Quæ dissidia profecto unice ex eo proveniunt, quod remota etiam malevolentia & prava nocendi cupiditate eorum sententiæ ac judicia non adeo firmis demonstrationum nervis fulciuntur, sed pro sua quisque doctrina, quam primis sub annis ex ore magistri hausit & imbibit, vel pro suo arbitrio & licentia ipse commentus est, alia atque alia medicinæ principia, morborum causas & remediorum vires sibi fingit ac fabricat. Atque hinc factum est, ut non prudentibus modo rerum medicarum fides valde dubia & sublesta esse cœperit, sed vulgus etiam de certitudine artis dubitet, quod jam suo tempore notavit Hippocrates, dum *Libr. de Vitu acutor. §. 4.* hunc in modum scribit: *calumniam incurrit tota ars apud vulgus adeo magnam, ut neque omnino medicinam esse putet; nam in acutis morbis in tantum inter se differunt artifices, ut quæ alter exhibet optima esse putans, ea alter jam mala esse existimet: & fere ob id artem vaticinationi similem esse dixerint.* Quamdiu

diu itaque ut sententiam nostram aperte exponamus, è Medicorum scholis non proscribuntur opiniones atque hypotheses, quæ nihil aliud sunt, quam ficta quædam principia, quibusdam tantummodo non vero omnibus phænomenis explicandis idonea, tamdiu etiam dissensiones, dissidia, similitudines ac discordiæ non exspirabunt, quæ tamen omnia veritatis luce, intellectum convincente & illuminante, uno quasi ictu felicissime discutuntur. Tam magna enim, ut verbis Ciceronis utar, vis est veritatis, ut non modo se per se ipsam contra adversarios defendat, sed errorum quoque tenebras dissipet & opinionum commenta deleat, animosque doctorum amicissima concordia conjungat. Nam ex iis disciplinis, ubi veritates regnant apertæ, ut videre licet in mathematicis, discordiæ doctorum exulant, quippe quæ in iis maxime disciplinis dominantur, ubi felix est & uber opinionum proventus, sterilis autem atque exigua messis veritatum. Vehementer igitur optandum & omni cura eo enitendum esse arbitror, ut salutifera ac fere divina nostra ars, quæ tantum emolumenti affert mortalibus, tandem aliquando ab incertis opinionibus, sterilibus ac temerariis fictionibus & commentis purgetur; ita enim fore speramus, ut ad majora incrementa cum summa mortalium utilitate evehatur, & omnes perniciosæ contentiones, quæ sæpenumero in acerbis similitudines & odia exardescunt, felicissime componantur. At vero, qua ratione id præstari debeat, & qua via sit incedendum, dictu admodum difficile videtur. Liceat tamen nobis, quam hac de re fovemus sententiam, explanatius hoc loco proponere. Primo de omnibus dogmatibus, quæ animis nostris inhaerent, prudenter dubitandum est, quum recte dubitatio omnis sapientiæ & antiquissimum & verissimum sit principium. Quamobrem deponenda sunt omnia, ut vulgò vocantur, præjudicia autoritatis, quæ ob auctores, quorum judicia extra omnem dubitationis aleam posita arbitramur, animo concepimus, & quorum sententias velut ex tripode prolatas adoramus & pressius sequimur. Tollenda quoque sunt omnia sic dicta præcipitantiæ præjudicia, quando nimirum nimis propere ante recte institutum rerum examen opiniones in animum admisimus, quas meliora edoctus deferere nemo sibi dedecori ducat. Veritas enim nullis patet affectibus, sed vacua est ab omni odio, invidia, fastu & proprio commodo, quod plures maxime affligit & male habet. Remotis igitur hisce impedimentis, eo alla-

borandum est, ut res intellectus sive notiones claras ac distinctas à rebus phantasiæ, seu notionibus confusis & minus perspicuis secernere & disjungere addiscamus, quod quidem paucissimi eruditorum, nisi primis sub annis mathematicis disciplinis operam dederint, præstare solent. Quemadmodum enim omnis veritas ex intellectu puro proficiscitur: ita omnis error, omnis opinio phantasiæ foetus est. Ea vero est veritatis indoles atque natura, ut res vel mutationes, quæ rebus a causis suis inducuntur, claris & distinctis notionibus & conceptibus sub certo tamen ordine & nexu repræsentet. Et quidem si res facti cum suis circumstantiis debito ordine proponit, veritas dicitur historica. Si vero clarissime sub debito ordine & nexu mutationum causas exhibet, scientia vocatur. Si demum ex cognitis jam veritatibus incognitæ debita facta illatione & comparatione deteguntur, inventio dicitur, ad quam pauci ex doctis perveniunt. Atque illi demum de acquisita veritate in sinu gaudere possunt, qui hac ipsa nova invenire & aliorum errores detegere valent; nam fructus veritatis est inventio. Inter notas quoque veritatis hæc ponendæ sunt præcipue, quod mentes convincere & ad assensum, nisi pertinaciter resistent, perducere, nihilque dubitationis relinquere debeat, deinde ut ex veritatibus cognitis alias incognitas detegere possimus, quibus notis si careant doctrinæ, certissime de earum veritate dubitandum est. Ad veritates vero intelligendas easque promovendas nihil convenientius & commodius est, quam habere in promptu veras rerum definitiones, quæ earum naturam & proprietates apte & distincte proponunt: in promptu quoque habere oportet axiomata sive generales regulas, quæ negari non possunt & demum rerum accuratas observationes & theoremata sive conclusiones ex veris propositionibus elicitas; hæc omnium veritatum & inventionum sunt principia. Et quemadmodum mathematici hac methodo in veritatibus detegendis utuntur: ita etiam hæc ipsa in omnibus disciplinis commendanda & curæ cordique habenda est. Si igitur medicina ab omni dubitatione, opinione & fictione liberanda est, nihil admittere debet Medicus, quod non clare per syllogisticam connexionem possit demonstrari, ubi propositiones ex veris definitionibus, axiomatibus & theorematibus formari debent. In horum itaque copia acquirenda unice occupatus esse debet veritatis amans & cupidus & maxime Medicus.



DISSERTATIO

DE

DIFFICULTATIBUS

IN MEDICINA ADDISCENDA.

Primum edita Anno 1718.

§. I.



DEUS, utpote omnium rerum creator, sine dubio plantis reliquisque medicamentis medicas benignissime indidit virtutes, quas demum explorare & in semet ipsis experiri homines necessitas coëgit. Simulac enim parentes nostri primaevi in imagine divina perfectionem ipsis concreatam amiserant, inter alias infirmitates statim etiam morbi presso veluti pede eos sequebantur. Scilicet appetitus, inordinatâ arboris interdictæ fructum manducandi cupiditate corruptus, moderamen amplius in rebus non observabat, neque his, quæ antea sufficiebant, extinguebatur. Quo factum, ut naturam paucis alias contentam, & simplici vi-ctui assuetam, superfluâ ingurgitatione obruerent, perniciofa alimentorum diversorum varietate debilitarent, & sic magis magisque robur ejusdem destruerent homines. Cum itaque post varia deglutita varias in corpore sentirent mutationes, dubium non est, quin probe easdem animadverterint, alia ad damnum resarciendum adhibuerint, ac effectus omnium assumptorum sedulo postmodum annotarint. Ex his observatis regulæ emergebant diætericæ, quas alter alteri communicabat, quo inexperti sibi a noxiis cavere, & comprobata in auxilium vocare possent. Eodem fere tempore Chirurgiam ortum traxisse, veritati quam maxime videtur consentaneum. Postquam enim Protoplasti impia erga divinum præceptum inobedientia maledictionem summi Numinis sibi accersiverant, terra non amplius ultro alimentum ipsis præbebat, sed in sudore vultus panem comedere illos oportebat. Qua de re paradiso expulsi plantarum ac agrorum curam strenue instituebant, & rerum conservationi inservientium curam gerebant; quem laborem posterius non solum continuare, necessitate quippe coacti, verum etiam alios ad cupiditates, quæ crescente hominum copia magis magisque accrescebant, satiandas & explendas susceperunt. His occupati negotiis non potuerunt, quin corpora, violentiis utpote externis obnoxia, variis periculis, luxationibus, v. g. fracturis, contusionibus, vulneribus, aliisque gravioribus malis exponerent. Quibus dum inter labores afficiebantur quotidie, quilibet omnia instinctu veluti naturali eò dirigebat studia, ut machinam labefactatam restitueret, motusque ejusdem interceptos redintegraret. Hinc unusquisque tale quid perpeffus aut ipse sibi manum variaque ad levamen conciliandum applicabat, aut ab aliis consilium manusque auxiliatrices expetebat.

§. II.

Medicina igitur simul orta est, ac hominum corpora morbis subiecta esse coeperunt. Medici autem stricte sic dicti longum demum post temporis intervallum inclaruerunt. Ab initio enim quilibet adversa valetudine affictus sibi ipsi pharmaca parabat, omniaque sive vigilanti sive somnianti oblata tentans sapissime casu aut ratiocinatione incidebat in medicamentum satis idoneum, quod una cum circumstantiis studiose annotabat, quo non solum ipse in morbo forte recidivo usum ejusdem reiterare, verum etiam aliis pari affectu laborantibus commendare potest. Exinde variæ plantæ ab inventoribus suis obtinere cognomina, ubi v. g. *Mercurialis a Mercurio*, *Paeonia a Paeone*, *Heraclium ab Hercule*, *Chironium a Chirone Centauro*, *Artemisia ab uxore Mausoli*, *Eupatorium a rege quodam Eupator dicto*, *Mithridation a Mithridate Rege* teste PLINIO L. XXV. c. 5. 6. & 7. Præsertim vero consilia medica suppeditabantur a parentibus & senioribus, quippe qui longo temporis tractu plura observaverant & experti erant. Aucto deinde hominum numero ægotantes in compita & vias publicas deferebant eorundem agnati morbi ideam ac remedia a prætereuntibus sciscitaturi, qualem consuetudinem invaluisse apud Babylonios HERODOTUS L. I., apud Aegyptios & Hispaniæ populos Callaicos, Astures, Cantabros STRABO L. 3. & 16. referunt. Postea nonnulli quoque in specie Medicinæ periti ob varias morborum curationes innotuerunt, & quidem apud Aegyptios *Hermes*, *Osiris* ejusque uxor *Isis*, *Apollo*, *Asclepius*, *Zoroaster*, *Prometheus*, *Nechepsus*, *Jachenes* &c. apud Græcos *Chiron Centaurus*, *Thesalus*, *Achilles*, *Aesculapius*, *Podalyrius*, *Machaon*, *Nicomachus*, *Melampus*, *Menecrates Syracusanus*, *Herophilus Chalcedonicus*, *Empedocles* &c., quorum multis in numerum Deorum relatis grata simul & superstitiosa posteritas templa aliaque meritorum monumenta exstruxit. Ad horum deinde simulacra confugiebant ægroti, consilia contra morbos medica efflagitantes, quæ sive per somnium, sive per effatum accepta, tanta veneratione colebant, tantaque fiducia, ac si a cœlo essent dicta, adhibebant. Morbo autem liberati tabulas in templis Deorum suspendebant votivas, quæ non morbi solum denominationem, verum etiam remedium, quo quis restitutus erat, comprehendebant. Hinc factum, ut medicina ad sacerdotes transferit, quippe qui tabulis edocti ægotis remedia tanquam divina oracula communicarunt. Et quoniam tunc temporis religione in superstitionem versâ omnis ferme sapientia apud sacerdotes erat, adeo, ut qui supra vulgus sapere vellet,

vellet, ab illis erudiri necesse haberet, eorum discipuli inter alias disciplinas & scientias philosophicas etiam artem medendi discebant, scil. his hanc maxime requirentibus, qui corporum suorum robora inquieta cogitatione nocturnaue vigilia minuerant, uti optime judicat A. CORN. CELSUS præf. L. I. Multos vero ex sapientiæ Professoribus peritos ejus fuisse, clarissimosque ex his Pythagoram, Empedoclem, Democritum testatur idem Medicorum Cicero. l. c.

§. III.

Hæc medicina nostra primordia habuit, quæ, uti plerumque in rebus magnis fieri solet, satis exigua fuere. Postquam autem HIPPOCRATES primus, teste mox laudato CELSO l. c. artem medendi a sapientia separavit, eamque certis regulis inclusam, experimentis ulterius comprobata, litterisque consignatam posteritati reliquit, sensim sensimque majora cepit incrementa. Licet enim insequentem tempore intervalla satis lucida aut potius tenebricosa habuerit, quibus magis obscurata quam quidem illustrata fuit, postea tamen superata barbarie caput iterum quasi e tumulo extulit, a Philiatris recentioris præsertim ævi adeo exulta, ut nostra ætate longe aliam faciem quam tempore Hippocratis præ se ferat. Imprimis autem disciplinæ sic dictæ theoreticæ stupenda industria & studio perlustratæ & innumeris pene inventis auctæ fuerunt. Quam multa enim quamque egregia a Veteribus ignorata in crebriori cadaverum sectione detexerint oculatiores Anatomici; quam congrua instrumenta & ingeniosa ad structuram partium eo melius indagandam adminicula excogitaverint, ulteriori probatione non indiget. Materia medica novis ex omnibus ferme terrarum partibus adportatis locupletatur simplicibus, & præprimis rem herbariam tanto labore tantaque diligentia curiosiores excoluere Botanici, ut quilibet eorum progressus merito admiretur. Non solum enim in laboriosa satis plantarum tam exoticarum quam indigenarum collectione indefessi, verum etiam difficultates extricare botanicas allaborantes, varias ad studium rei herbariæ facilitandum composuerunt methodos, easque nobiscum communicarunt. Neque in superficialia saltem & exteriori materiæ medicæ cognitione solertia recentiorum acquievit Medicorum, sed quævis ferme triplici regno comprehensa accuratiori ignis examini subjecit, quo structura eorum interior & virtus in morbis medendis eo melius innotesceret. Quibus cognitis in viribus concentrandis, combinandis, exaltandis, variisque ad varios affectus idoneis præparandis medicamentis non infelici successu hucusque sudarunt Chemicæ. Ut nihil jam dicam de compositionibus pharmaceuticis, quæ ad morbos eo felicius curandos a modernis practicis non sine magno ægrorum commodo inventæ & applicatæ fuere.

§. IV.

Quæ omnia, quantum lucis therapie tam pharmaceuticæ quam chirurgicæ accenderint, prolixius demonstrare supervacaneum duco, cum sola circulatio sanguinis, superiori sæculo detecta, testis esse poterit satis sufficiens. Tot igitur inventis, tot prærogativis Recentiorum præ Veterum dum gaudet medicina, mirum profecto est, quod nostri ævi Medici in morborum medela non majores faciant progressus. Paucissimi Hippocratis in praxi experientiam & dexteritatem attingunt, nullus autem hucusque illum hac in re superavit. Plurimi equidem in eo Senem venerandum fidelissime sequuntur, ut medicinam a sapientia, magis proprio tamen sensu, separent; verum numerus eorum, qui pari cum illo

Frid. Hoffmanni Oper. Supplem. II.

prudencia & circumspessione medelam morborum administrant, exiguus admodum existit. Liceat itaque mihi, quantum ingenii imbecillitas permittit, causas investigare, cur tam multi artem medendi discipulorum à via regia deflectant, & in devias abducti per totum vitæ spatium in tenebris & labyrintho ignorantie oberrent.

§. V.

Artem longam, vitam brevem jam suo tempore HIPPOCRATES pronunciat; id quod assertum certissimæ esse veritatis, omnes, qui animum ad medicinam applicant, satis superque experiuntur. Unicus equidem scopus est, quem sibi præfixum habet Medicus, sanitas scilicet hominum aut conservanda aut labefactata restauranda; verum, ut hunc obtineamus finem, profecto non una superanda obstat difficultas. Sanitatem enim, seu quod perinde est, statum naturalem si dignoscere velimus, structuram machinæ humanæ ope cultri anatomici sedulo investigemus; investigata studiose memoriæ commendemus, & ex varia partium conformatione usum earundem judiciose conjiciamus, necesse est. Quantum autem temporis spatium in cadaveribus secandis consumendum! quanta longo demum exercitio acquisita dexteritas in sectione adhibenda! & quanta circumspessione & æquibûs quælibet ponderanda, ut interior corporis mechanismus, utpote cujus indagatio Œdipum adhuc exigit, pateat! Juxta hanc normam omnes quidem, qui ab illa deflectunt motus, morbos esse dijudicare possumus: attamen hæc sola nosse non sufficit, sed omnem potius ingenii aciem omnemque industriam ad illam peritiam acquirendam intendere debemus, ut morbos invicem accurate discernere, veras causas judiciose eruere & prognosin prudenter & circumspecte ferre queamus. Eadem in cognoscendis præparandisque medicamentis occurrit difficultas; Innumera ferme simplicia e triplici regno suppetunt, quorum non solum externas structuræ differentias, verum etiam virtutes pariter ac facultates in morbis sanandis probe perspectas teneamus oportet. Hæc porro ut scite præparare, apte invicem combinare, & dextre separare valeamus, studium & exercitium non per unius anni spatium continuatum requiritur. Quibus omnibus licet cognitis maximum tamen adhuc restat momentum. Remedia convenientia justo tempore, proportionata dosi & cum regimine prudenti morbis applicanda sunt, si cito, tuto, ac jucunde curare velimus; quæ medendi methodus vera equidem est morborum panacea, sed insimul quoque arcanum illud magnum, cujus possessionem multi quidem crepant, paucissimi vero revera adepti sunt. Jasonem enim oportet esse, qui aureum hocce vellus reportare velit. Difficultates studii diætetici, quæ ideo satis arduæ sunt, quia unicuique individuo diversæ in victu præscribendæ sunt regulæ; linguas peregrinas, quarum cognitione Medici eam ob causam indigent, ut eruditorum scripta evolvere, eorum inventa & hypotheses perscrutari, ac propriam suam scientiam exinde augere possint; reliquaue studium medicum amplum & difficile efficientia lubens prætereo, siquidem multis tyronibus etiam ob supra recensita ars medendi penitus inaccessibilis videri posset.

§. VI.

Via itaque ad templum Æsculapii tam diffusa tantisque difficultatibus cum sit obstita, paucissimi eam ingressi ad penetralia pertingunt, sed plurimi in atrio mox gradum figunt, externam hujus palatii structuram admirantes. Nempe Anatomiam non

tanquam medium ex statu naturali dignoscendi præternaturalem æstimant, sed universam artis medicæ scientiam in eo positam esse credentes quisquillas etiam summo cum studio inquirunt, fibras enumerant, continuam omnium membranarum cohesionem demonstrare anxie annituntur, aliisque subtilitatibus vanis ac inutilibus inhærent. Et quoniam ejusmodi Anatomicis structura corporis plerumque nodus gordius esse solet, Alexandrum quoque imitantur, cultro anatomico, quod natura unitum erat, dissolventes, quo saltem nomen suum novo in arte secandi invento posteritati commendent. Simplicia materiæ medicæ non tam ut scite ægris applicare possint, student cognoscere, sed plantas promiscue omnes exoticas & indigenas, curiositatis saltem gratia in hortis asservatas, summa cum cura discernere discunt, nominaque eorum una cum synonymis memoriæ diligenter imprimunt, imo musæum mineralibus, lapidibus pretiosis, insectis, conchis, cochleis, aliisque ejusmodi oculorum illecebris exornant, ut in numero Botanicorum aut naturæ saltem Curiosorum celebrentur. Chemiam colentes corpora naturalia ignis examini subjiciunt, non ut vires simplicium in morbis medendis inquirant, sed ut arcanum illud summum, lapidem nempe Philosophorum benedictum, si Deus velit, inveniant; quæ spe deceptos se ipsos cum postea videant, universalis, polychresta ad minimum, salia macro- & micro-cosmica, aurum potabile aliaque ejusmodi secreta gloriantur se possidere, licet sapissime fumum vendant, & cineres ab opere magno relictos simplicioribus pro panacea propinent. Tale iudicium quoque esto de reliquis, ad Medicinam pertinentibus scientiis, utpote in quibus addiscendis quam multi ita se gerunt, ut neglecto nucleo cortices sectentur, & realem artis medicæ cognitionem spernentes umbratilem affectent polyhistoriam. De his optime FR. BACO de VERULAMIO *Tr. de Augment. & dignit. scient. L. IV. C. II. p. 301.* iudicat: *Dubitandum non est, quin, si Medici, missis paulisper generalioribus, naturæ obviam ire vellent, compotes ejus fierent, de quo Poëta:*

*Et quoniam variant morbi, variabimus artes;
Mille mali species, mille salutis erunt.*

Anatomia enim, physiologia, & reliquæ sic dictæ scientiæ theoreticæ fundamenta quidem sunt necessaria, sed Medici non omnem cognitionem absolunt. Superstruenda est therapia, utpote quæ unicus & verus artis medicæ scopus & finis existit. Curiosiora autem tanquam essentialia, sed ornamenta a Medicis æstimanda, iisque non universum vitæ spatium, sed horæ saltem subcivivæ impendendæ sunt.

§. VII.

Quilibet itaque studio Medico se consecraturus ante omnia opus haberet, ut probe se ipsum inquireret, an etiam ad illud idoneus & aptus esset; propensionem proinde naturalem examinare & facultates animi corporisque vires, an sint sufficientes, accurate prius ponderare deberet. Vanus enim profecto est labor, a quo natura abhorret, & frustra impenditur opera, quæ invita Minerva suscepta fuit. Quam utilis autem & necessaria tam difficilis & ardua existit hæc disquisitio. Propensio equidem nostra naturalis propriam semper felicitatem promovendam intendit, sed media, quæ huic intentioni respondent, valde sunt dubia. Nam licet ex universali, quam ipse rerum Arbiter statim post lapsum promulgavit, lege: in sudore vultus sui homo comedat panem suum, sciamus, nil sine labore ac-

quirendum esse, istud tamen adhuc incertum manet, in quo præ aliis vitæ genere studium nostrum, ut voluntati divinæ sit consentaneum, collocemus, præsertim cum indoles & ingenium humanum tot præjudiciis erroneis pravisque affectibus corruptum sit, ut sæpius nobis eligamus, non quod ratio sibi relicta suavisset, sed quod ad inordinatas cupiditates explendas idoneum deprehenditur. Hinc est, ut multi proverbio, *Dat Galenus opes*, incitati; alii spe amasiam citius amplectendi adacti, alii fortasse dignitate & titulo Doctoris allecti, vel aliis causis domesticis commoti, sine ulteriori habito respectu arti se applicent medicæ, & adeo humeris imponunt ea, quæ ferre plerumque recusant. Vigore enim ingenii & robore corporis ad omnes quidem labores absolvendos opus est, sed præ reliquis in illo, qui Medicinæ operam impendit, desideratur, siquidem hæc ars singularem profecto & idoneam quam maxime requirit indolem. Quomodo namque ingenium difficillima hujus artis penetrabit, quod in vulgaribus addiscendis hebescit? Quid in tam vasto scientiarum oceano perficiet ille, qui per totum vitæ tempus hypochondriacus, aliove modo valetudinarius erit? Quid in Anatomia, quid in Chirurgia præstabit talis, qui sectioni cadaverum, missioni sanguinis, & inspectioni vulnerum absque gravioribus animi deliquis interesse aut effluvia quælibet graveolentia sine nausea & vomitu enormi tolerare nequit? Felicius student, qui bene valent. Sed quis defectus suos agnoscit? Quis proprias imbecillitates observat? *Hodie nos omnes*, inquit SEMPR. GRACHUS in *Herma L. I. Sect. I. p. 40. ad Medicinam applicamus & bardi & scabri & blasi & balbutientes, neque ii, qui juventuti nostræ præsumt, facile nos movent aut debortantur.* Imo ipsi nostri parentes & præceptores, præjudiciis quippe indulgentes, sapissime sive persuasionibus sive paterna potestate nos adigunt, ut studium, non quod indoli nostræ convenit, sed quod præconceptis eorum opinionibus consentaneum videtur, eligamus; quo postmodum accidit, ut studium invitis & imparibus humeris impositum minori diligentia & sine feliciore successu continuetur, unde artis Medicæ remora, unde tanta Medicastrorum copia.

§. VIII.

Plurimis accurata & fidelis in Medicina deest a puero institutio, quæ tamen eo magis necessaria videtur, quo vegetiores animi vires ad quælibet felicius comprehendenda in teneris annis existunt. Ea enim ætate viget ingenium, valet memoria, corporis constitutio est agilis. Qua de re major quoque tunc temporis in cognoscendo cupiditas & attentio, celerior fortiorque rerum perceptarum quarumlibet impressio, & singularis in laboribus suscipiendis alacritas deprehenditur. Sed sinistre ut plurimum Præceptores nobiscum agunt, dum ea proponunt, quæ ætas juvenilis abhorret. Termini sunt, ac maximam partem nuda verba, quæ non nisi ratione soni diversi a nobis distinguuntur; rerum autem ideæ neque per explicationem adæquatam, neque per demonstrationem sensualem communicantur. Hanc ob causam curiositas, quæ magis rerum, quam nominum, cognitionem cupit, languescit; memoria terminis, quorum res significatæ latent, obruitur æque ac confunditur, & iudicium, crescentibus annis subinde crescens, exercitio & ulteriori cultura destituitur, quoniam reales, quos dijudicare possit, conceptus deficiunt. Linguae quidem, ut alios intelligat, ab erudito quolibet necessario requiruntur, & studia humaniora ornamento etiam Medico esse, minime negare sustinebo.

nebo. Propterea tamen non omnis juvenilis aetas in eorum cognitione consumenda erit. Putarem, tempus si rite collocetur, superesse complures adhuc horas, quarum una aut altera veræ philosophiæ & fundamentis Medicinæ ponendis, majori forte cum emolumento quam rhetoricæ inutili, metaphysicæ sterili, & aliis hujus farinae nugis impendi posset. Verum schola Asclepiadea deliit, adeoque postea novi prodire Hippocrates cessarunt. Quid dicendum de illis, qui studium, cui florem juventutis consecrarunt, deferentes ad Medicinam tanquam ad auream confugiunt anchoram, non quod interiori veluti naturæ ductu ad id vitæ genus eligendum ferantur, sed ut fortasse quocunque modo magis comode, ut arbitrantur, vivere queant? Præter hos multi e tonstrinis, pharmacopoliis, aliisque officinis sive ex arrogantia, sive desperatione, quæ, uti in proverbio est, aut militem, aut monachum, aut Medicum facit, transfugæ castra Medicorum petunt, & illotis statim manibus sacraria eorum ad-eunt, priusquam necessariis initiati fuerint principiis. Sufficit enim jam ipsis, si ex formulis quibuscunque Practicorum corrasis didicerint purgare, vomitorium propinare, & clysterium donare, quo infelicitium ægrorum evacuationibus evacuatam marsupium replere & ex aliorum ruina propriam avertere valeant. Plura de damno ex filiis ejusmodi abortivis proferre possem, sed brevior sum, quia res ipsa loquitur.

§. IX.

Cum itaque scholarum Magistri discipuli in necessariis non instruant scientiis, opus est, ut demum in Academiis fundamenta artis medicæ ponamus. Ast tempus huic negotio destinatum plerumque angustius esse solet, quam ut ea, quæ ad realem in medicina cognitionem comparandam pertinent, rite perlustrari & addisci queant. Duo, tres, aut quatuor ad summum anni studiis academicis dicantur, quos plurimi studioforum adhuc ita, ac si totum seculum esset, consumunt. Maxima hujus temporis pars variis deliciis & voluptatibus immolatur, & Medicinæ interea paucissimæ & horæ saltem succisivæ velut parergo consecrantur. Hinc spatium vitæ academicæ aliena agendo fere elapso quod reliquum est, cognitioni praxeos, neglectis fundamentis impendunt, aut studia sua penitus sine studio absolvunt. Alii autem ex autoritate parentum & præceptorum, aut ob suppellectilis angustæ aliufve causæ prægnantis necessitatem consulto currui quadrigas postponunt, de praxi statim solliciti, priusquam requisita ad therapiam necessaria sibi comparaverint. Praxin auream, theoriam sterilem esse existimant, & cum vulgo præjudicio laborantes, quod optimi theoretici plerumque infelicissimi evadant practici, Philosophiam cum veris artis medicæ principiis reformidant, ne fortasse horum cognitio curationibus ab illis administrandis infortunium adportet. Qua de re aut arcanis & panaceis parentum & præceptorum unice confisi eorum virtutes & operationes mirificas ubique extollunt, reliqua vero tanquam inutilia insuper habent, aut his destituti prærogativis promiscue thesauros practicos perscrutantur formulasque medicamentorum quasvis sine discrimine corradunt, quibus instructi Æsculapios se profitentur, qui ægros faucibus mortis eripere mortuosque resuscitare valeant, licet sapissime nequidem Empiricorum nomen mereantur. Non enim remediorum copia, sed utendi ratio Medicum a circumforaneo distinguit. Recte igitur PRIMERO-SIUS *Tr. de Erroribus Vulgi* L. I. C. XIV. ægros monet: *Non est fidendum iis, qui a principio male*

instituti circa remedia tantum sunt occupati, reliquas Medicinæ partes negligunt, & certum est, eos nunquam expertos fore, cum Medici experientia non solum ad remedia, sed & alia omnia, quæ illorum rectam administrationem spectant, extendatur. Vix unquam enim, inquit laudatissimus Autor cap. præcedente, nisi andabatarum more cum morbis pugnet, probe curabit, qui cognitionem morborum, eorundemque certam prognosin parce tantum & leviter novit. Methodus quippe medendi, veris & rationalibus nixa fundamentis, est vera morborum panacea, & qui eam sibi comparavit, nullius præterea indiget arcani. Hanc ob causam CAPIVACCIUS a Germanis rogatus, ut sua communicaret arcana, respondit: Legite meam praxin & invenietis mea arcana. Sed non cuivis licet adire Corinthum. Multis via nimis diffusa, aliis nimis ardua, maximisque difficultatibus obstita videtur; quare statim sub initio deflectunt & devias sibi eligunt. Ne autem aliquis errores illorum detegat, & imperitiæ ipsos arguat, vix uno alterove anno elapso titulum Doctoris soluta pecunia emunt, cujus privilegia ignorantiam eorum immunem & hallucinationes in praxi commissas impunes reddunt.

§. X.

Alii, quibus tempus otio penitus consumere adhuc religioni est, ex libris tantum sapientiam suam hauriunt, & ex his satis, ut arbitrantur, edocti manum operi ipsi admoveere nolunt, fordes, quas vocant, tractare, & labores sustinere abhorrentes. Sectiones proinde frequentiores in mensa, quam in theatro anatomico administrant, in prioribus herodes se gerentes, posteriores autem angue canequæ pejus averfantes. Egregii certe Anatomici! structuram corporis naturalem ex iconibus cognoscunt, & quomodo culter anatomicus sit applicandus, plane ignorant; similes profecto iis, qui aëris tempestates & viarum incommoda evitaturi in tabulis geographicis itinera sua instituunt, & regionum cognitionem ex itinerariis saltem sibi comparant. Utrique enim ultra libros & tabulas non progressi, quos errores narrare auctores, ipsi fideli imitatione strenue quoque narrant. Qua conscientia autem, quæso, de lethalitate vulnerum judicium ferre poterit, qui sectionem cadaverum vulneratorum summa circumspectione suscipiendam Chirurgis seu Barbitonforibus, sapissime ultra scalpellum rasorium & lancetam vix sapientibus, relinquere necesse habet? *Dexteritate enim secandi destituti, quod Magnif. D. BOHNUS, Patronus & Præceptor meus sanctiori mentis veneratione prosequendus, in officio Medici dupl. Clin. & Forens. P. II. c. IV. p. 593. optime docet, vulnera non raro facere potius, quam investigare observantur; quales Chirurgos, nostrates imprimis frequentius experimur, vasa hinc inde, membranas cerebri, ipsumque cerebrum per incuriam ac imperitiæ, dum per laniæna magis modum, quam incisionem artificiosam integumenta corporis externa remonent, lacerantes ac perforantes. Unde etiam suasor forensi Medico conscientioso, & ejusmodi inspectionum directori, ut manibus propriis potius ipsemet eas administret, quam rudioribus illis sociis committat. Mallet siquidem cruentare manus, quam conscientiam, i. e. quod Chirurgi ministrantis est, non sine molestia exequi, quam in deponendo falli fallereque. Sed cum Medicus non raro & Chirurgus hac in re pari ambulent passu, i. e. utrique in arte secandi minus versati sint, accidere etiam solet, ut ejusmodi ineptæ relationes, depositiones & testimonia ex inspectionibus enascantur, quales ab allegato Magnif. BOHNIO*

l. c. AMMANNO in *Medicina Critica*, ZITTMANNO in *Medicina Forensi*, aliisque hinc inde recensentur.

§. XI.

Eodem fere modo res comparata est cum Chemia & Pharmacia. Ex eo enim tempore, quo medicamentorum præparatio ad pharmacopœos transiit, multi Medicorum manus suas pulvere carbonum commaculare sibi indignum, & fumum inspirare sanitati exitiale reputarunt. Sufficit itaque talibus legisse, quomodo comparantur & elaborantur medicamenta, & nosse, quanam præsertim in officinis asserventur. Verum ex hac Medicorum negligentia maximum in medicinam redundare damnum, vix ulla indiget probatione. Præterea enim, quod turpe sit Medico, ut perbene monet QUERCETANUS, sibi Doctoris titulum arrogare, & materiam, qua uti debet, modumque illius parandæ & administrandæ ignorare, patique se a suis ministris superari, occasionem quoque eo ipso negligunt simplicia accuratius examinandi, novis & congruis compositionibus apparatus medicamentorum augendi & variis modis medendi methodum adjuvandi. Imo ex formularum præscriptione tot empiricorum & pseudo-medicorum inter seplasiarios enati qui tanquam simiæ Medicorum præscripta medicamenta aliis agrotis iterum propinant, & quod majoris adhuc momenti, ex his polychresta sibi cudunt, quæ tanquam arcana sub suo nomine & sigillo vendere non erubescunt. Accedit, quod periculosissima sit medicina præscriptoria, utpote cum pharmacopœi sapissime non rite præparent medicamenta, & multoties ex errore vel defectu præscripti alia substituant, quæ agrotis maxima damna, interdum mortem ipsam afferunt, qualia exempla perhibent Celeb. BOHNIUS l. c. P. I. C. XXI. p. 445. TH. BARTHOLINUS in *Gist. Medic. Hafn. Loc. LII. p. 535. seqq.* SEMPR. GRACHUS tr. c. L. I. Sect. III. p. 309. Interim culpa omnis Medico imponitur, si in curationibus, quem intendit, finem non obtineat, myropola vero, nisi error in dispensatione enormis, ab omni suspitione immunis, lucrum ex venditione medicamentorum maximum capit, licet haud raro causa potius in sinistra materiæ medicæ præparatione, adeoque in Pharmacopœo, quam in Medico quaerenda sit. Sicut igitur, qui Pharmacia negligit, non solum valetudinem vitamque agrorum suæ fidei & dexteritati commissorum, verum etiam fortunam, famam & conscientiam propriam seplasiario ejusque famulis concedit, ita e contra omnia hæc pericula, si manum præparationi ipse admoveat, effugere, suamque famam integram tueri potest. Deinde Medicus etiam, cujus inspectioni ac directioni Pharmacopœus per leges publicas subjicitur, medicamenta in officinis asservata, utrum rite an secus elaborata sint, minime dijudicare poterit, nisi ipse in pharmacia practica probe versatus fuerit. Eam ob causam supra jam allegatus QUERCETANUS hæc in re non exercitatos ita alloquitur: *An ignoras experientiam rerum esse magistram? Ergo pharmacopœus eam callens magister erit, tu vero bruta statua cathedræ affigeris.* Ex hac enim imperitia ejusmodi quoque non raro præscribi solent formulæ, quæ, ut sapius all. GRACHUS Tr. c. L. I. Sect. II. p. 127. inquit, in cineres redactæ, egregium quidem constituerent anthelminticum, ædes gliribus & muribus purgans, si præpararetur juxta præscriptum dubium, an essentia, electuarium, rob, vel magna inde proveniat? Prolixius Autores supra allegati Libb. c. & LUDOVICUS in *dissert. pharmaceut.* de damno ex neglecta medicamentorum præparatione proveniente egerunt. Botanices quod attinet stu-

dium, illud ob conjunctam delectationem interdum adhuc invenit suos cultores, licet ut plurimum excursionibus illuc dirigantur, ubi herba nicotiana colitur ac hordeum lupulatum asservetur.

§. XII.

Et quamvis etiam inter Medicinæ studiosos dentur, qui neque tempus otio consumere, neque sola in librorum lectione acquiescere ament, sed potius omnes lubentissime subire labores cupiant, quod demum realem in arte medica scientiam acquirant, deficit tamen sapissime, præsertim nostris in locis occasio manuali operatione in Anatomia, Chemia, Botanica, Chirurgia se exercendi. Raro cadavera ad instituendas demonstrationes publicas suppetunt; & si contingat etiam, ut sectiones in theatris anatomicis administrantur, hæc tamen plerumque cum minori spectatorum fructu finiuntur. Cum enim nobis non frequentior oboriatur ansa cadavera humana secandi, interiorum partium structuram ope cultri anatomici detegere oculisque usurpare non nisi raro licet. Nobiliora quippe viscera, imo omnes fere partes summa cum cura præparantur, & ut insequente tempore auditoribus denuo exhiberi possint, absque ulteriori dissectione certis liquoribus asservantur. Accedit, quod eandem ob causam cadaver unicum per longum temporis spatium manibus tractari debeat, quo spectatoribus potiora demonstrari queant; nam singula in singulis cadaveribus perlustrare horum defectus prohibet. Hinc foetor magis magisque intolerabilis exoritur multorum attentionem interruptit ac deterret; putredo autem, de qua foetor ille testatur, superveniens naturalem partium statum corrumpit, destruit, & sic immutat, ut neque color, neque figura, neque universa cohesio intacta maneat. Quam multis itaque erroribus falsisque impressionibus subinde aperiantur fores, illi satis superque norunt, qui ejusmodi sectionibus intersuere. Idem judicium quoque esto de partibus præparatis & asservatis. Præterea enim, quod pariter color, structura, situs, numerus earundem naturalis non nisi obscure admodum exinde innotescant, varique postea conceptus erronei memoriæ imprimantur. Spectatores etiam semper dubii hærent, an rite & accurate, quæ exhibentur, præparata fuerint. Multoties utpote in præparatis demonstrantur, quæ postmodum in sectione inveniri nequeunt, præsertim cum individua etiam interdum quam maxime invicem differant. Quis igitur sponsor erit, ne aperturæ v. g. & foramina visa cultro demum anatomico facta, ne quædam a natura alias unita arte dissecta & aliquid saltem ex hypothese substitutum fuerit, quod ad similitudinem ipsius rei proxime videtur accedere. Qua de re præparatis cum tam parum sit fides habenda, unusquisque facile dijudicabit, qualis in anatomia cognitio exinde hauriri possit. Sed necessitas durum telum!

§. XIII.

Nec defectum in anatomia, quem modo recensui, supplet crebrior occasio cadavera morbo defunctorum aperiendi. Quo major enim exinde in medicinam redundat fructus, eo rarior nobis conceditur locus exercitium tale instituendi. Vana quippe nostratum superstitio, & solida erga mortuos religio impedit ut plurimum Medicorum industriam, utpote cum magistratu non expresse jubente homines etiam ex infima plebe corpora defunctorum secanda rarissime permittant. Olim preces muneraque Medicis oblata fuere, ut interiora eorum, qui morbis succubuerant, perlustrarent; hodierna

dierna vero tempestate Medicos mortuorum agnatos rogare, precibusque dona addere oportet, si veniam cadavera inspiciendi impetrare velint. Hinc est, quod causæ multorum morborum nos adhuc lateant, plurimorum autem admodum dubiæ existant. Hinc est, quod pathologia tot meris nitatur suppositionibus, adeoque therapia ejusmodi fundata hypothesibus toties incerta evadat. Multorum forte affectuum indoles accuratius nobis innotesceret, multique in medendo errores patefierent, si locum affectum cultro anatomico inquirere integrum esset. Majori etiam cum cura medicamenta seligerent nonnulli, & minor forte medicamentorum copia foret, si sectio post mortem instituta medelæ adhibitæ rationem patefaceret. Sed nostra ætate hallucinationes medentium crassiores Doctoris nomen, subtiliores humus tegit. Cum igitur nobis non liceat exercitia anatomica in cadaveribus humanis frequentius instituere, locum eorum bruta suppleant necesse est. Verum enim vero si accuratius paulo utraque invicem comparantur, haud mediocrem iisdem intercedere differentiam, quam nobis quoque AURELIUS SEVERINUS in *Zootomia Democritea*, & in specie GERHARDUS BLASIUS in pereleganti *anatomia variorum animalium* exhibent, observabimus. Hæc itaque, nisi cum cura animadvertatur, multis in anatomia erroribus occasionem subministrabit. Quamobrem toties GALENUS a VESALIO reprehenditur. Vix enim unius partis descriptio in VESALII Libb. *de corporis humani fabrica* exstat, ubi Galenum insimul castigatum non invenimus, & quidem potissimum eam ob rationem, quod brutorum, imprimis vero simiarum, anatomia deceptus structuram corporis non uti in homine habeatur, sed qualem in illis observaverit, annotatam reliquerit. De iconibus nil attinet dicere, quia jam supra judicium de iisdem aperui. Præterea enim, quod neque dexteritas secandi exinde comparari, neque accurata de naturali partium structura formari possit idea, vix ullæ quoque dantur tabulæ, quæ suo non laborant defectu. Interim tamen non omni destituuntur usu, utpote cum nova inventa & in corpore detecta melius forte earum ope nobiscum communicari, & imagines in cadaveribus aliquando observatorum mediantibus his lineis in memoriam quodammodo revocari queant.

§. XIV.

Par ratio est cum operationibus chirurgicis. Non solum enim multi in ea versantur persuasione, quod chirurgia nostro seculo ad barbitonfores relegata non amplius Medicum politioem deceat, licet tot viri in medicina præclari suo exemplo luculenter satis contrarium demonstraverint; verum etiam nostra nosocomia plerumque non ita ac in Belgio, Italia, Gallia, &c. iustructa sunt, ut discipulis occasionem subministrare valeant operationes manuales oculis percipiendi, ne dicam, in administratione earundem se exercendi. Propterea Doctores & Professores nostris in Academiis chirurgiam docentes demonstrationes suas non in vivis ægrotantibus exhibere, sed v. g. deligationes & repositiones in homunculis ligneis, futuras in pellibus ad id negotium discissis, trepanationem aliasque operationes in cadaveribus ut plurimum brutorum adornare coguntur. Quanta vero sit differentia instrumenta subjectis vivis applicare, mecum fatebitur ille, qui collegio chirurgico edoctus ad medelam morborum externorum se accingit. Hic enim res est cum homine vivo, illic autem de corio saltem inanimato luditur. In collegiis sufficit docuisse methodum instrumenta & remedia applicandi; in praxi vero ea-

dem applicare debemus, ut restituantur ægri. Quade re multi operationes a Doctoribus demonstratas in subjectis vivis imitari non sine insigni animi & manuum trepitatione sustinebunt, quia longe facilius est partes cujusdam pellis dissectas, quam labia vulneris periculosi hiantia consuere, trepanationem, incisiones, repositiones, &c. in cadaveribus ligneisque stipitibus, quam in viventibus exercere. Imo quamvis chirurgica sint maxima ex parte ita comparata, ut felicius demonstrantur, quam explicentur, de paucissimis tamen sensuali perceptione adequatam ideam nobis formare licet, siquidem non raro & operationes plurimæ, & signa diagnostica pene omnia nobis saltem verbis describantur. Quo deinde fieri solet, ut multi inter Medicos præsertim juniores interdum nesciant, quæ, quomodo, & quando instrumenta & topica adhibenda sint, utpote cum morbos externos interdum notissimos vix dignoscere, statum eorum deteriorem aut meliorem non dijudicare, eventum non determinare, adeoque prognosin non nisi incertam ferre possint. Hanc ob causam ejusmodi Medicus, nisi imperitiam suam prodere velit, concurrenti Chirurgo in omnibus assentire, illique summam curationis concedere debet, quia hic propriam experientiam & praxin, iste autem cognitionem ex auditu saltem allegare poterit. Quod si itaque contingat, contingit vero sæpissime, ut etiam Chirurgus præter artem barbarioriam nil amplius intelligat, accidit deinde, ut v. g. hernia inguinalis pro bubone habita lancetata una cum intestinis subjectis incidatur, omenti portio tanquam excrescentia adiposa & inutilis in epiplocele rescindatur, tumores glandularum scirrhusi incisione & corrosivis vexati remediis in ulcera gangrænosa mutantur, alique errores committantur enormes.

§. XV.

Parum abest, quin similes in materia medica cognoscenda occurrant difficultates. Pauci apud nos inveniuntur horti communi & publico usui destinati, qui plantis indigenis & exoticis instructi, tironibus medicinæ ad accuratam vegetabilium cognitionem perveniendam inservire possint. Ad hos enim adornandos & conservandos multæ requiruntur pecuniæ, quas ejusmodi rebus impendere Principes & superiores supervacaneum ducunt, privati vero homines non sufficiunt. Et quamvis etiam forte privati dentur horti, in quibus rariora asservantur, ad eos tamen non cuivis liberior conceditur aditus. Reliqua quidem simplicia tabernæ myropolarum, simplicistarum & materialistarum, uti vocantur, nobis exhibent, verum eadem raro genuina, sed multoties adulterata, multisque fraudibus corrupta ad nos adportantur. Quis nescit? plerumque ab illis *Acorum pro calamo aromatico, pro radice Asphodeli Martagon, pro radice Hermodactyli Colchicum, pro Terebinthina resinam abietis laricisque, pro ligno Nephritico Mexicano Brasilianum, pro gummi Arabico lacrymas ex specie pruni aut cerasi, pro succo Acaciae succum pruneolorum sylvestrium, pro ligno Aloës lignum Oleastri aut lignum sanctum decocto aromatico maceratum, pro Agarico vero spurium, pro styrace liquida expressam e nucleis, pro herba Dictamni Cretici pseudo-dictamnium, pro scordii allium sylvestre, mixturam quandam pro Asphalto, Ebur & Unicornu calcinatum pro fossile, bolum Wirtenbergensem, Noricam Reichenbachensem aut Numburgensem pro Armena, terram quandam communem sigillatam pro Lemnia, argillam istam inque formam redactam pro lapidibus cancerorum, nescio quod artefactum pro lapide Bezoar & verbo quid pro quo substitui.*

substitui. Quomodo adulterentur simplicia, & v.g. *Saceharum amyllumque addatur Mannæ Calabrinæ, Castoreo sanguis renesse Castoris cum gummi ammoniaco subacti, sennæ Alexandrinæ Italica vel etiam coluteæ folia, Ladano terra nimis copiosa, Asæ foetida sagapenum, Opobalsamo Arabico terebinthina, Croco flores carthami, mercurio vivo plumbum stannumque, mercurio sublimato arsenicum, Ambra grisea agallochum, styrax & ladanum, Moscho, Zibetho variisque pretiosis varia mangonia, a multis peritis & cordatioribus annotatum legimus. Alia defraudantur viribus suis, & sic ad nos afferuntur. De styrace notissima res est, quod meliore parte per fortem expressionem depauperetur. Idem fere accidit caryophyllis, dum scil. extracto oleo fatui permiscantur cum bonis, & una venduntur. Ut reliqua præteream, de quibus omnibus singulisque prolixius commentati sunt Magnif. D. RIVINUS, Patronus meus ac Præceptor maximus, in *diff. de Censura Medicam. offic.* JAC. SYLVIVS Tr. de adulteriis simplic. medicam. cognosc., LISETTUS BENANCIUS *Declar. Fraud. & Error. apud Pharmacop. J. ANT. LODETTUS Dialogo de Fraudibus Pharmacopæorum.**

§. XVI.

Dicis ad minimum in officinis materiam medicam genuinam inveniemus, ex cujus perlustratione accurata simplicium hauriri poterit cognitio, quia juramentum, quod pharmacopœi præstare solent, expresse ejusmodi fraudes prohibet. Verum non prolixius repetam, quas modo allegati autores impossuras & errores a seplasiariis commissos enumerant, quomodo scil. iidem non solum simplicia adulterata, variisque fraudibus depravata, conscii probe, ideo quia forte viliori pretio extent, sed etiam medicamenta ipsa pari ratione ac simplicistæ adulterent, quid pro quo substituant, adeoque nihil nisi fumum vendant. Istud saltem monebo, quod pharmacopœi sapissime non voluntario, sed ob imperitiam erronea pro veris & adulterina pro genuinis afferrent, atque hac ratione fallantur simul & fallant. Inter alia supra laudatus Excell. RIVINUS l. c. de Pharmacopœo haud incelebri refert, quod iste ab hortulano horti Medici Lipsiensis tragopogon pro scorzonera, nephetam pro calamenta, & lichnidem viscosam latifoliam seu viscariam pro centaureo minori emerit, quod semen phellandrii sive cicutæ palustris pro semine sileris montani a rustico herbario officinae illatum fuerit. Lepidam satis historiam de inaudita cujusdam Pharmacopœi ignorantia exhibet BENANCIUS in Tr. allegato Hist. 24. p. 92. Pharmacopæus aliquis ignorabat, quid pro oculis populi sumendum esset in compositione unguenti populeonis, unde vice oculorum populi, qui sunt gemmæ seu prima germina arboris populi, sumit oculos ex tribus vel quatuor suspensis extra urbem, pridie antea supplicio affectis, & nisi supervenisset Medicus quidam, stultus Magister pharmaceuticus consecisset unguentum ex suspensis. Medico quærenti, in quem usum collegisset istos oculos, respondit pharmacopæus, valde se fuisse sollicitum in inveniendis oculis populi pro unguento populeo, nec tamen consultum duxisse sumere oculos populi viventis, sed consilium cepisse quærendi oculos illorum, qui suspensi fuerunt extra urbem. Medicus ridens ignorantiam incredibilem pharmacopœi rem ipsi placide aperuit. Ex his & similibus, quæ hinc & inde annotantur, facile innotescit, quænam fides simplicibus in officinis asservatis sit habenda, qualisque materiæ medicæ cognitio ex his fontibus hauriri possit. Dantur quidem adhuc viri cordati inter Professores & Doctores, qui tironibus simplicia non e pharmacopolio desumpta, sed genuina, magno

quippe studio & sumtu comparata, ac inter rariora asservata, demonstrant, & quomodo adulterata falsaque a veris & integris distinguere possint, declarant; sed oppido rariores habentur, licet hæc cognitio omnibus Medicis quam maxime sit necessaria, quo sibi ægrisque suæ fidei commissis a damnis periculisque cavere queant.

§. XVII.

Præparationem autem & compositionem simplicium tam pharmaceuticam quam chemicam sibi solis ferre vendicant pharmacopolæ, & privilegiis donati Medicos (si remedia componant ægrisque dispensent) coram Magistratu quoque accusare non verentur. Cum itaque multoties acciderit, ut seplasiariis monopolium hac in re concessum, Medicis vero a superioribus & præparatio & dispensatio medicamentorum ulterior interdicta fuerit, parum profecto abest, quin pharmaciam pariter ac chemiam nostris in regionibus ex officinis addiscere, & apothecarios ceu nostros hac in parte præceptores æstimare debeamus. Ast infelices certe miserosque chemicos, qui saltem ex laboratoriiis pharmacopœorum sapiunt! Non enim adducam compositiones voluntario ab illis adulteratas & defraudatas, quas magna in copia supra nominati SYLVIVS, BENANCIUS, LODETTUS prolixius referunt, ubi mox pretiosiora ingredientia in minori dosi, quam formula præscriperat, adjecerint, aut plane alia vilioris pretii substituerint pharmacopolæ, eam ob causam etiam quid pro quo-zantes a BENANCIO appellati. Sed hoc præterire non possum, quod sapissime *Aurum fulminans v. g. Tartarus emeticus, Mercurius vitæ, Mercurius dulcis, Crocus metallorum, Syrupus rubi ideus, emeticus, scammonium sulphuratum, Antimonium diaphoreticum, Bezoarticum minerale, solare, lunare, joviale, Tinctura antimonii & metallorum, Cinnabaris, antimonii*, innumeraque alia tam negligenter & imperite in officinis præparentur, ut secure tutoque adhiberi nequeant. Non raro enim observamus, ex usu eorum ægris supervenire hypercatharsin aliaque symptomata graviora, imo mortem interdum ipsam. Sic refert AMMANNUS in *Medicina critica* C. XXII. p. 168. hypercatharsin ab antimonio diaphoretico abortam. Qui igitur in medicamentorum præparatione enchireses a pharmacopolis eorumque famulis tantum addiscit, multis quidem erroribus imbuetur, parum autem sapientiæ exinde sibi comparabit. Pharmacopœi enim laborum suorum & compositionum medicaminum non aliam reddere plerumque possunt rationem, quam quod eorum magistri & antecessores pari modo præparaverint medicamenta, neque amplius inquirunt, utrum bene an male processerint præceptores eorum, quia præter formulas a pharmacopœo, cui servitia præstare, communicatas multoties vix alium autorem chemicum-pharmaceuticum per totum vitæ spatium perspexerunt. Eodem ferme modo Medicus etiam ex laboratoriiis pharmacopœorum saltem edoctus in officinarum inspectione se geret. Omnia quippe medicamenta approbabit, quæ cum præparatis olim a magistro pharmacopœo demonstratis conveniunt, & contra rejiciet, quæcunque colore saltem & externâ structura a prioribus differunt, licet aliam forte rationem allegare nequeat, quam præjudicium, medicamenta in hac vel illa officina fuisse genuina. Hanc ob causam merito quoque inter suas felicitates referre potest Medicus, cui contingit fideli & sincera præceptoris periti informatione æque ac manu ductione in exercitio chemicum-pharmaceutico uti, siquidem sapissime ex adæquata medicamentorum confectio-
ne Medicorum fama & ægrorum vita dependeat.

Interim

Interim tamen non improbo visitationem officinarum, sed omnibus proinde Doctoribus & tyronibus artis medicæ, laboratoria pharmacopœorum ut frequentent, quam maxime suadendum esse existimo, non ut hallucinationes forte eorum imitentur, aut singularem exinde in pharmacia acquirant dexteritatem, sed ut falsa & adulterata a genuinis verisque discernere, & errores in medicamentorum elaboratione eo melius advertere queant.

§. XVIII.

Omnium autem maxima in studio medico existit remora, quod paucissimi methodum, qua Hippocrates in therapia profecit, sequantur. Iste Medicorum Parens non solum differentias regionum, personarum earumque temperamentorum pro illius seculi ratione probe dijudicavit, verum etiam quævis morborum initia, causas, locos affectos, progressus, symptomata, crises, eventus, & remedium facultates singulari circumspectione attendit singulaque fideli manu adnotata posteritati reliquit. Longe aliter procedunt non omnes, plures tamen hodierni Medici; medendi modum, quem sive audiverunt sive legerunt apud Italos, Gallos, Anglos, Belgas, applicant Germanis & vice versa; remedia vero & arcana sua polychresta, quæ Sempronio exhibuerunt, nullo habito respectu sexus, ætatis, temporis, & individui, Caio etiam & Tullia commendant. Obiter saltem initia morborum inquirunt, locos affectos ob imperitiam vix determinare valent, ceu causas læsiones fermenti, virtutis retentricis & expultricis, archei, flammulæ cordis, pylori rectoris, cardinelech, gastaranacis, cosmetorgis, microcosmetoris aliaque allegant & fingunt, symptomata cum morbis ipsis confundunt, motus criticos insuper habent, nec interdum intelligunt, eventus ob finistram medendi methodum sæpius signo †, quam felici asterisco indicandos non annotant, & remedia, utpote præpostere adhibita, communicare verentur. Alii, qui superatis multis laboribus tandem ex devii & labyrintho viam regiam ingressi, feliciori successu medicinam faciunt, aut propter invidiam, aut alias ob causas observata sua publici juris reddere nolunt, sed studio ceu arcana celant, & saltem filiis aut intimiori amico revelant. Cum itaque multi ob imperitiam non audeant, alii vero nolint annotata sua communi publico consecrare, observationes nobis deficiunt, ex quibus accuratam morborum ideam haurire & medicamentorum facultates viresque específicas cognoscere possimus. Ridebis equidem, quod de observationum defectu querar; ego vero dolendum magis esse censeo inter tantas observationum farrâgines tam paucas existere, quæ hunc titulum jure mereantur. De plurimis profecto idem iudicium, quod STRABO de Ctesia scriptis dixit: *Equidem facilius Hesiodo, Homero aliisque tragicis Poëtis fidem habeo, quam Ctesia.* Vereor enim, ne plura in illis sint figmenta, quam vere observata, quibus autores nominis sui famam posteritati commendare annisi fuere, præsertim cum inter has tot reperiantur ab aliis communicatæ, quas propria autoris experientia non confirmat. Inter rariores igitur, uti vocantur, vere inveniuntur rariores observationes, & fortasse major iisdem concedi posset fides, nisi ob nimiam raritatem suspectæ viderentur. Imprimis autem medela morborum ut plurimum feliciter absoluta dubium reddit lectorem, an etiam bona fide communicatæ fuerint, cum & historiæ ægrotorum ab HIPPOCRATE, tanto quippe Medico, curatorum sæpiissime his verbis finiantur: *obiit, mortuus est.* Recentiorum nempe permulti fateri erubescunt, quod multoties Venerando Seni in medela accidit, forte

quia non ubique conscientia propria ipsos ab omni culpa liberos pronunciat. Ut taceam, quod multæ admodum ejusmodi observationes historiam morbi aut plane non, aut ad minimum obscure describant, morbos invicem confundant, remedia tanquam arcana prætereant, aut iisdem effectus affingant, qui forte naturæ potius attribuendi erant, aliosque errores in se contineant. Optime equidem morborum naturam cognoscere eorumque medelam addiscere posset tyro, si illi ægros visitandi, & vires medicamentorum a præceptore ordinatorum oculis perlustrandi copia concederetur. Verum præterquam quod plures ægrotantium variis ex præjudiciis plerumque ægre ferant, si legatos mittant Medici, etiam hi ipsi raro erga discipulos suos ea inveniuntur fidelitate, ut istud officium illis indulgeant. Nonnulli enim arcana sua cuilibet revelare nolunt; multi magis suspicaces sunt, metuentes, ne discipulus praxin aliquando in loco, ubi degunt, ipse exercens numerum clientum imminuat; alii methodum suam inedendi haud raro empiricam aperte palamque facere non audent, alii alias ob causas occasionem ægros visitandi tyronibus subministrare dubitant. Alibi Nosocomia multis variisque ægrotantibus referta cuilibet ferme medentium patent, quæ non solum frequentare & exinde historias morborum addiscere, verum etiam medelam ipsam, moderante ordinario Medico, administrare possunt artis medicæ studiosi, qua prærogativa nostræ regiones ut plurimum destituuntur.

§. XIX.

Præterea simplicium seorsum vires in morbis medendis explorare vix adhuc licet, siquidem consuetudo apud nos invaluit, ut multa invicem componantur, & agris non unicum & simplex, sed mixtura potius ex variis medicamentis composita præscribatur. Quo plura enim formula in se continet ingredientia, quorum unum cerebrum confortare, alterum cor roborare, tertium digestionem ventriculi promovere, & singula in singulis visceribus específicas virtutes exerere dicuntur, eo majorem apud ægros confidentiam obtinebit Medicus, cum primis si præscripta signentur: *Röstliche Visceral - Pulver / haupt und hertz verwahrende Mixtur, sonderliche haupt-hertz und magen-stärkung / vortreffliche lung-und leber-satwerge / &c.* Memini, me legisse, quod juniore cuidam Medico, ægro, quem antea Parens hujus Medici curaverat, medicamentum duorum aut trium ingredientium ordonanti, exprobratum fuisse: *Er könne keine so gute Recepte ver-schreiben / als sein seeliger herr vater / der hätte sie noch einmahl so lang gemacht.* Medicus simplicitatem ægrotantis subridens respondit, *Er könne es eben so gut.* Simulans itaque alia se præscribere, iisdem ingredientibus literis signisque paulo majoribus notatis, totum schedulæ spatium, & hoc modo simul desiderium morbo afflictæ explevit. Ex hoc præjudicio oritur illa difficultas, quod nunquam simplicium vires específicas accurate indagare queamus, siquidem prolixiores medicamentorum compositiones semper nos dubios incertosque relinquunt, a quo præsertim hic vel iste in medendo effectus dependeat. Cogites modo, si medicamenti ex centum & pluribus ingredientibus compositi scrupuli duo pro dosi propinentur, quantum de singulis partibus, quibus confecta est mixtura, una vice capiatur. Profecto vix triplum unius grani erit, ex quo pondere genuina certe cujuslibet ingredientis virtus tibi non innotescet. Ut silentio præteream incongruas & ineptas non raro formularum præscriptiones, in quibus talia combinantur, quæ invicem turbantur, præ-

præcipitantur, adeoque immutantur, vel plane destruantur. Objicies, non opus esse, ut simplicia seorsim denuo experiamur, cum Veteres jam eorum in morbis medendis facultates accurate inquisiverint, suasque de illis observationes nobis reliquerint. Attamen nonne securius propriæ quam alienæ experientiæ fides habenda? præsertim cum tota die videamus, quam facile sit in Medicina, & imprimis experimentis fallere & falli. Accedit, quod remedia permulta a Veteribus adhibita nobis aut plane ignota, aut ad minimum dubia existant, adeo ut nomen quidem adhuc superfit, res autem, quibus secundum descriptionem veterum hæc denominatio competat, inter deperditas sint referendæ. Ecquis enim certe determinare potest, quæ veterum *radix Beben*, *Been alba & rubra*, *Costus verus*, *Rhagenuinum*, *Helleborus*, cum alius *Dioscoridis*, alius *Theophrasti*, alius vero *Hippocratis* sit, *Mezereon*, *Turpethum*, *Malabathrum*, *Entalia & Dentalia*, *Lapis borrachius*, & innumera fere alia fuerint, de quibus recensendis prolixiores videantur *Magnif. D. RIVINUS in Censura Medicam. offic.* *BENANCIUS Tr. c.* *JO. LANGIUS in Epist. medic.* Imo plura adhuc recentiori ævo in materiam medicam relata fuere, de quibus in scriptis veterum plane nulla, in recentiorum autem observationibus quædam experimenta invenies. Sed posito, quod omnia materiæ medicæ simplicia tam a Veteribus quam Recentioribus accurate descripta, facultates eorum exploratæ & diligenter observatæ fuerint; posito etiam, quod experimenta ab illis ita instituta, ut fidem mereantur, anne propterea in his acquiescendum? nonne peculiare adhuc certis morbis medendi vires huic vel illi plantæ inesse possunt, quas Medici nondum experti fuere? Novi quidem, quod multi non audeant experimenta facere, effato quippe *HIPPOCRATIS*, *omne experimentum esse periculosum*, deteriti; sed nescio, quid periculi exia metuendum, si simplex quoddam chemice & physice prius examinatum cum ratione agris propinetur. Præsertim vero ejusmodi experimenta in Nosocomiis optime prima vice institui possent.

§. XX.

Multas autem difficultates, quæ hæcenus recensui, superarent, multos errores & præjudicia evitarent, & longe feliciores in studio medico facerent progressus Filii artis, si regiones exoticas studiose visitarent & peregrinationes rite instituerent. Raro enim in uno loco omnes medicinæ partes æquali industria excoluntur. Quare etiam studiosi non unam, sed plures Academias frequentare necesse haberent, si ad solidam artis medicæ cognitionem pervenire vellent, utpote cum certis locis & diversis Academiis diversa in studiis incrementa majori cum successu capere possent. *Hic enim fundamenta facilius hauriuntur, ibi medica exercitatio floret. Floræ cultura laudatur alibi, alibi pharmaceutica majori cupiditate urgetur. Chemicorum labores alibi curantur magis, alibi copiosior materiæ medicæ proventus, Experimenta naturalia, Anatomica demonstrationes, Chirurgorum operationes exactius videntur*, uti testatur sæpius laudatus *GRACHUS Tr. c. L. I. Sect. II. p. 282.* Deinde quoque eximium & fere singularem ex discursu pariter ac conversatione virorum in arte celeberrimorum fructum haurire potest peregrinans. Permulti scilicet præconceptas mitterent opiniones, si aliorum hypotheses etiam explicare audirent. Multi forte præjudicia noxia de scriptis deponerent, si eorum autores ipsi cognoscerent, & cum illis sermones conferrent, & pauciores certe essent empirici larvatique Doctores, si

peregrinans ex multorum eruditione & experientia verus tandem rediret Medicus. Ast enim vero præterquam quod plurimis curta nimis sit suppellex, ut vix sumtus ad medicinam in patria aut vicinis Academiis addiscendam suppeditet, haud pauci quoque neglecto genuino itinerum scopo peregrinationes ideo instituunt, ut Doctoris titulum, quem forte patria ipsis denegasset, viliori pretio reportent, & vulgus saltem peregre illos fuisse, aliquando crepet. In itinere itaque tales necessaria negligunt, & allotria saltem advertunt, quia illis jam sufficit auram peregrinam captasse, urbiumque struaturam spectasse. Pro me loquatur mox alleg. *GRACHUS Tr. c. L. II. Sect. I. p. 12.* *His (Medicis peregrinantibus) ludicra quævis, obscæna, voluptuosa, luxuriosa, & male sana, ut breviter dicam, arrident. Ad summum ædificiorum nitorem & plateas sordibus purgatas mirantur apud exteros; si de eruditis quæras, quibuscum colloqui debuerent, neminem vident, & nedum cum surdastro collocuti fuere; non audire maxime aliis illustris viri nomen; de libris recens natis edisseras, omnes fere ab epulis incipiunt, vina laudant; alia damnant, hæc accusant criminis, increpant diversoria, de suavi itineris peracti tempore agunt, & sic porro, donec tandem in re meretricia desinant. O lepidum itinerum fructum!*

§. XXI.

Et quamvis certis in locis præ reliquis melior occasio diversas medicinæ partes magis excolendi occurrat, ubique tamen fideles & periti præceptores rariores sunt, adeo ut merito fortunatos se æstimare debeant studiosi, quibus sincera manu ductio absque ambagibus ad templum Æsculapii contingat. Permulti enim Doctorum eâ, qua par erat, fide auditores suos non instruunt, invidi quippe, suspicaces, morosi, avari, aliisque affectibus pleni. Permulti in docendo obscuri, in proponendo confusi, & explicando nimis prolixi, critica, poetica, aliaque allotria Medicis admiscunt, quo saltem tempus protrahant, seque insignes polypragmones, polyhistores inquam, ostendant. Haud pauci præjudiciis & præconceptis opinionibus ipsi laborantes; ea saltem, quæ cum illorum hypothesi conveniunt, laudant, reliqua vero ceu erronea rejiciunt damnantque, licet aliud interdum argumentum nesciant, quam hoc: *stat pro ratione voluntas*. Singuli ferme illorum invicem discordes deprehenduntur, ita ut bellum omnium in omnes apud Medicos existere putares. Alii proinde veteres tantum admirantur, iisdem omnia inventa omnemque sapientiam adscribunt, & ex eorum scriptis unice sapere amant; Recentiores vero contemnunt; quæcunque ab illis proficiuntur nauci floccique pendunt, ipsis nil quam errores, hallucinationes & lapsus attribuunt. Alii vice versa veteres vituperant, ac universam eorum scientiam ceu rudem, insulsam, & plane ineptam repudiant; e contra quaslibet Recentiorum hypotheses & suppositiones velut præclara excellentium ingeniorum specimina magni æstimant, encomiis extollunt, suisque auditoribus in collegiis satis speciose exponunt. Optime horum præjudicia castigat *Excell. D. BOHNIUS in Præf. ad Bellini opera: Invidiæ stultitiæ immerfus ille, cui nova tantum placent, & stulta invidia agitur, cui omnia recentia sordent.* Quantus in Physiologicis autorum sit dissensus, eorum scripta satis testantur. Provocabo saltem ad doctrinam de principio vitali, utpote in uno describendo & determinando vix unus cum altero consentit. Quid dicam de materia medica? Tot ferme de viribus medicamentorum diver-

versæ

versæ observantur sententiæ, quot Medici existunt. Alii mercurialium virtutes ad cœlum usque tollunt, alii vero eadem tanquam summe nociva & venena dissuadent, licet hi sapius cinnabarina commendent. Nonnulli opiata ceu polychresta in omnibus ferme morbis propinant, cum e contra nonnulli eorum usum utpote suspectum ubique penitus rejiciant; quamvis non raro in posteriorum præscriptionibus massam pilularum de cynoglossa invenias. Quidam venæsectionem nunquam adhibent, forte ne balsamum vitæ imminuat; quidam vero missionem sanguinis omnibus fere suadent, quia plerisque affectus a plethora deducunt. Alii vomitoria amplius exhibere non audent, quoniam fortasse ex intempestiva eorum applicatione ægrotantibus damna evenisse perspexerint; alii vero præter vomitoria, purgantia & clysteres penitus nil sciunt. Hi omnia Chemica damnant; illis Galenica, & Pharmaceutica stricte sic dicta sordent. Verbo, singuli singula vel laudant vel contemnunt: quilibet enim ex his aliam fovet opinionem, ex qua non solum omnium morborum ortum deducit, verum etiam secundum eandem methodum medendi instituit, illique tam pertinaciter inhæret, ut prius ægros perdat, quam ab ea vel unguem latum discedat. Sufficit, *ægrotantes lege artis, i. e. secundum hypothesein, moruos esse.*

§. XXII.

Sua igitur dogmata cum unusquisque eorum argumentis corroborare nervos curasque intendat, reliquas omnes hypotheses veluti absurdas, erroneas, falsas, & ineptas refutet, earum autores calumniis afficiat, varios errores & vitia illis affingat, eosdem ridiculos reddat & tanquam imperitos, & plane in medicina hæreticos auditorio suo exponat, adeoque discipulos, ut eorum doctrinam pariter ac collegia angue canequæ pejus fugiant, sub specie fidelitatis singularis moneat, non raro accidit, ut etiam tiro-nes pomposis verbis & speciosis præceptorum persuasionibus præoccupati in verba Magistri jurent, ejusdem placita ceu oracula divina colant, ceterorum omnium dicta scriptaque interdum ex nulla alia ratione, quam *quod ipse dixerit*, improbent, ab horum auditione aut lectione veluti a viro aut peste contagiosa abhorreant, & ut plura paucis comprehendam, mancipia præceptorum evadant. Ex hoc autoritatis præjudicio tot perniciosæ Medicorum sectæ, tot inanes & indecoræ in consultationibus rixæ & altercationes, totque exitiales ægrorum ruinæ. Satis prudenter igitur monet RODERICUS a CASTRO in *Medic. Polit. L. II. c. IX. p. 86.*: *Non ita unius Galeni autoritati simus addicti, ut in ejus verba jurare videamur, sed veris Philosophis æque ac Medicis ea libertas concessa est, ut apud more optima quæque eligant. Perinde enim est, quis dixerit, sive Græcus, sive Arabs, sive Hebræus, sive Latinus fuerit, modo verum dixerit. Non enim religionem, sed Medicinam docent. Amicus Plato, amicus Socrates, magis amica veritas.* Ast plerumque discipuli ab uno extremo ad alterum prolabantur. Deposito enim autoritatis præjudicio alii diversas autorum sententias inquirentes adeo confunduntur, ut per universum vitæ spatium de omnibus dubitent, & ad mortem usque ambigant, cui præ reliquis major habenda sit fides. Alii reliquorum omnium eruditionem despicientes, ne ullum, quem imitentur, dignum judicant, sed *αυτοδιδασκτοι* evadunt, qui nemini, nisi sibi ipsis credunt, novasque hypotheses fingunt, quas demum ceu præclaros magni ingenii partus admirantur, licet sapissime intempestivi saltem abortus & misera potius monstra jure meritoque nominari possent.

Frid. Hoffmanni Oper. Supplem. II.

Sicuti igitur horum parentes sibi ipsis saltem sapiunt, ita plerumque fieri solet, ut etiam progenies postea nemini quam soli genitori placeat.

§. XXIII.

Ad minimum haud pauci tanta inter docentes discordia deterriti ex libris potius eruditionem suam haurire amant. Eam ob causam aliorum omnium conversationem & consuetudinem fugientes, librisque semisepulti eorum contenta verbotenus (significatum nempe sapius non assequuntur) memoriæ commendant, sicque confusam sibi comparant polyhistoriam, quæ in omnibus aliquid, in toto nihil complectitur. Præter ea enim, quod Medicina ut plurimum ejusmodi nitatur fundamentis, quæ felicius demonstrantur, quam quidem explicantur, viva quoque Magistri vox divinum quippiam in se continere videtur, eo quod rerum ideas longe majori efficacia nobis imprimat, quam mutæ mortuorum literæ & characteres: *Nam licet acriora sint, quæ legas, altius tamen in animo sedent, quæ pronuntiatio, vultus, habitus, gestus etiam dicentis affigit*, uti perbene annotat C. PLINIUS SECUNDUS *L. II. Ep. 3.* Imo vix per aliquot dierum spatium tantum ex lectione autorum percipies, quantum vel ex unius oris fidelis sermone in unica sæpe semihorula apprehendes, cujus rei rationem optime reddit SCALIGER, dum in *Exercit. 298. Senec. Ep. 6.* dicit: *eorum notitiam, quam longo tempore multisque laboribus sibi comparavit Magister, exiguo temporis spatio uno velut halitu nobis communicat.* Deinde quam maxime errant, qui libros pro cynosura habent, cujus ductu omnes errorum scopulos omnesque præjudiciorum vortices tuto præternavigare & via quasi regia ad insulam Coos pertingere valeant. Idem, imo fortasse major inter mortuos deprehenditur dissensus, quam inter vivos doctores, adeo ut cui ex tot scriptoribus fides præcipue sit adhibenda, plerumque nescias. Complures multum promittunt in rubro, parum præstant in nigro. Pomposo nempe & splendido titulo emtores alliciunt, ut intus contentæ nugæ bilem postea facilius moveant, cujusmodi librorum titulis non perperam præponere solet GRACHUS *Tr. c. L. I. S. II. p. 101.* illud: *Titule, quod fatum Te huic libello assignavit?* Quam obscura aliorum scripta ex invidia forsitan aut indole auctoris, alia commentis fabulisque referta sint, alia alio labore defectu, innumerisque scateant erroribus, prolixius comprobare nolo, siquidem unicuique lectori eadem sufficientes erunt testes. Ut nihil dicam de iis, qui pretiosis quibuscunque voluminibus bibliothecam & museum exornant, non ut ex illis optima quæque colligant, suamque scientiam exinde adaugeant, sed ut vulgus tandem secundum copiam librorum eruditionem possessoris aestimet. Nimiam illorum libros possidendi cupiditatem suo jam tempore reprehendit SENECA de *Tranquillitate animi c. 9.* ita inquit: *quo mihi innumerabiles libros & Bibliothecas, quarum dominus vix tota sua vita indices perlegit? Onerat discentem turba, non instruit, multoque satius est te paucis autoribus tradere, quam errare per multos.* Filum hic abrumpo, spe fretus, fore, ut occasio imposterum subnascatur ea, quæ hac vice sicco, ut ajunt, pede studiose præterii, supplendi. Interim, Lector benevole, studiis nostris fave, & errores, a quibus etiam hæc Dissertatio non immunis erit, tua humanitate & benevolentia tege, tecum reputans, errare non tantum esse Medicorum, sed in genere hominum.



DISSERTATIO MEDICA,
DE
MEDICINA HIPPOCRATIS
MECHANICA.

Primum edita anno 1719.

P R O O E M I U M.



ENERANDA eruditorum antiquitas rerum naturæ contemplationi minus otiose intenta ita hominem conditum professa est, quasi in eo, tanquam in compendio reliquam universam rerum naturam adumbratam, imo expressam haberet, eamque ob rationem ipsi minoris mundi, sive μικρόκοσμου appellationem à multis retro seculis uno veluti ore tribuit. Neque sane temere viros illos aut levi ratione hoc de homine statuere potuisse, vel voluisse probabile est, sed penitus dubio procul introspecta utriusque natura debuit utrobique adesse ea, quæ ad similitudinem apte deducendam sufficiens esse queat, ita quidem, ut facta nominum commutatione alterum μικρόκοσμον, alterum μέγανθρωπον recte dixeris. Licet enim tota natura mere sit mechanica ac omnia totius universi corpora mathematice constructa splendidissimum nobis repræsentent speculum, in quo Summi rerum Parentis ac Conservatoris existentiam, infinitam potentiam, nec non bonitatem intueri liceat, neque tamen ulli creaturarum excellentiori præfuit artificio quam homini, quem ob hoc divinitatis specimen consummatissimam omnium partium inter se miro modo conspirantium harmoniam, microcosmum, omnium miraculorum maximum, artificiosissimum, perfectionumque Divinarum complementum nuncupatum fuisse non sine evidenti ratione dixerim. Sane si famosus ille atheorum princeps JULIUS CÆSAR VANINUS in theatro morti jam proximus ex assumpto e terra forte fortuito delapso straminis frusto existentiam Dei adstantibus probare conatus est; longe omnino faciliori negotio & certius quidem Medicus rerumque physicarum gnarus (utpote qui ipsius naturæ minister longe altius ad rimanda divinæ sapientiæ provehitur arcaña) eundem ex minima humani corporis parte demonstrabit.

Stupenda hæc humani corporis machina automatica sufficiens præbet argumentum, quod curiosos naturæ mystas ad indaginem penitiorum & allicere, & in ea exercere valet. Equidem nobilissimam anatomen per universa hæcenus secula profundissime excultam fuisse fatendum est, sed quæso quotusquisque annus, ne dicam dies, adhuc huic curæ impenditur, qui novis subinde observationibus multa adhuc tenebris immerfa jacere non ostendat. Quodsi vero ipsa phænomena, quæ ex sublimi mentis cum corpore, duarum toto cœlo diversissimarum substantiarum, unione arctissima resultant, contempleris, proh! quanta ex illis in Democritei putei abyssu latitare (ad quorum propiorem intuitum clarissima etiam eruditi orbis sidera nondum penetrarunt) deprehendes! ita ut facile hic locum inveniant verba Poëtæ LUCRETII ita canentis: *multa tegit sacro involucro Natura, nec ullis fas est scire quidem mortalibus omnia.*

Quæ licet a veritate neutiquam sint aliena, nihilominus tamen experientia teste benignissimum Numen tantam rerum ad veram utilitatem ac necessitatem generis humani pertinentium jam inde ab omni ævo intellectui humano indulgit notitiam, ut, si eam homo excolere, atque usui suo accommodare velit, non possit egregiis excidere commodis, quæ non solum ad vivendum, sed etiam ad bene vivendum defensionemque humani corporis ab externis injuriis exitium minitantibus sufficere possunt.

Præivit hac in re nobis sapiens antiquitas priscique Medicorum eruditissimi, qui licet ex temporis infelicitate non sufficienti experimentorum circa rerum naturalium indolem pernoscentiam copia instructi philosophandi accuratiori methodo caruerint, nihilominus tamen tanta sunt illorum de arte medica merita, ut silentio eos prætermisisse ignoran-

ignorantiam, iniquius autem de ipsis sentire summam ingratitudinem, ne dicam protervam redoleat injuriam: multa enim sunt in illorum monumentis generi humano utilia, ac salutaria, quæ non modo ad exquisitam morborum historiam acquirendam vel prognosin eorum instituendam: sed etiam ad ipsam praxin rationali modo tractandam haud parum conferunt.

Agmen inter hos omnes antiquos artis medicæ peritos merito ducit ipse HIPPOCRATES omnium retro seculorum medicorum consensu medicinæ parens salutatus, cui quantum medicina recentiorum mechanica rationalis debeat, & quantum ipsi eadem suam jam tempore cognita fuerit, paulo pressius loco Speciminis Academici secundum mentem, ac ductum *Excell. D. Præsidis Fautoris ac Præceptoris mei ætatem colendi* pro tenuitate mea inquirere allaborabo. Arduam sane ingredior viam sublimiorique omnino calamo dignam, dum nova ex veteribus eruere intendo. Ardua enim res est, ut cum PLINIO loquar, vetustis novitatem dare, obscuris lucem, dubiis fidem, omnibus vero naturam, & naturæ suæ omnia. Quod si itaque eventus pro voto non successerit, unicum mihi supererit solatium in illo *Propertiano: Quodsi deficient vires, audacia certe laus erit, in magnis & voluisse sat est.* Quisquis itaque es L. B. meis conatibus ut faveas, & de iis candide judices, ea, qua par est, humanitate contendo.

§. I.

Medicinæ HIPPOCRATIS mechanicæ ichnographiam dum delineare apud me constitui, operæ pretium esse existimavi, morem sequi geometrarum, definitionemque, quid in genere per mechanicam, indeque denominationem suam mutuantes medicinam mechanicam intelligamus, statim in limine præmittere: Siquidem non mihi ignotum est mechanismum nonnullis ob vim vocis & rem perperam cognitam & intellectam ita esse odiosum, ut vel ipso nomine audito exhorrescant, bilemque sibi moveri patiantur. Definimus itaque mechanicam, quod sit scientia motuum, tradens eorum naturam, causas ac leges, easque ad varios usus applicans; Medicinam vero mechanicam eam vocamus scientiam, quæ effectus omnes, qui fiunt in corpore humano artificiosissime constructo, ratione vitæ, mortis, curationisque morborum, a causis corporeis earumque vario motu, & dispositione ad motum deducit: mechanica itaque κατ' ἐξοχήν hæc medicina hodiernorum philosophiæ potissimum experimentalis non speculativæ addictorum vocatur, non modo respectu illius, quæ non contenta ad demonstranda corporis humani phænomena rationibus mechanicis, rationale quoddam principium motibus vitalibus præesse statuit; sed etiam respectu veterum magis materiæ ejusque qualitatibus in explicandis morborum causis, quam motui inhærentium, quem hodierna medicorum medicina scrutatur intimius. Ita etiam porro mechanice ille philosophari dicitur, qui evidenter ostendit, quomodo vi legum motus effectus rerum ex structura consequantur; non secus omnes operationes rerum corporearum mechanicæ dicuntur, quia agunt structuræ suæ convenienter. Si quis itaque motuum habeat scientiam solidaque experientia suffultus motuum effectus explicare norit, ut ut nesciat intimam materiæ sive corporum naturam, sufficienti tamen scientia rerum physicarum ac medicarum potiri poterit.

§. II.

Probe hic notari in antecessum velim ad præoccupanda nonnullorum præjudicia, quod, licet omnia in universo fiant juxta leges mechanicas ac mathematicas accurate constructa, patianturque mutationes juxta determinatas naturæ leges, certam ratione ordinis, temporis, actionis, ac receptivitatis proportionem, neminem tamen notiones in medicina ad exactam ac rigorosam geometrarum demonstrationem

reducere posse (quod minime etiam nos facturos promittimus) non propter mechanicorum principiorum insufficientiam, sed propter intellectus nostri imbecillitatem, sicut ex principiis geometricis famosissima illa quadratura circuli (quæ doctorum Virorum jam diu torsit ingenia) ubi mutatio circuli in quadratum, item quadrati in circulum exacte deduci non potest, nequaquam propter insufficientiam geometriæ, sed propter intellectum nostrum arctis limitibus circumscriptum. Pari ratione quoniam ignota nobis est corporum intima ratione pororum & partium figura, dispositio & situs, ignota vis certa cordis impellentis, certaque fluidorum ac solidorum resistentia, ignoti demum differentes liquidorum per singulas partes motus, in quibus vita consistit, ultro fatemur exactis, ac rigidis mathematicis nempe demonstrationibus phænomena in corpore humano ratione vitæ, sanitatis, morborum eorumque curationis neutiquam subjacere, non quia res sua natura esset impossibilis, sed quia data sufficientia deficiunt: Nihilominus tamen non erubescimus dicere, ipsum studium mechanicum, imo in genere mathematicum, non carere singulari usu ad perfectionem ac certitudinem medicinæ, quod quidem minime ea intentione a me quis dictum esse putet ac si illas geometricas figuras triangulares, quadrangulares, & ejus generis plura alia ad felicem praxin, qua talia, aliquid conferre posse, prætenderem; sed sicut in aliis scientiis, ita hic quoque culturam ingenii principaliter mathesis sibi vindicat, demonstrationibus enim ex invictis & evidentibus principiis deductis, veritatibusque iisdem superstructis mentem imbuat, viamque ad judicium de rebus etiam difficillimis ferendum pandit, quo quid Medico rationali nobilius, quidve generi humano utilius excogitari possit, sane non video: rectissime hinc a GALENO medicina perpetuum judicium appellatur, unde patet matheseos studium non parum ad perfectionem medicinæ conferre, hinc etiam ipsum HIPPOCRATEM Medicorum facile principem minime ab hoc studio alienum fuisse testantur ipsius literæ ad filium suum Theffalum missæ, in quibus numerorum scientiam ac geometriam singulariter ipsi commendat.

§. III.

Affirmamus itaque ex præmissis, corpus humanum esse nonnisi machinam automaticam a Deo artificiosissime constructam, in qua omnes motus omnesque mutationes quoad vitam, sanitatem, morborum generationem atque curationem à causis necessariis & mechanicis, id est, æternis naturæ, mo-

tuumque legibus dependent. Quid vero machina sit, definit *Excell. D. Præses in Philosophiæ corporis humani Parte I. Cap. I. §. IX. machina*, inquit, *est corpus ex variis partibus magno artificis ingenio inter se unitis constructum eo consilio, ut certos ac ordinatos motus producat*; ubi addit in *Scholio*: *artificium illud structura sive ingeniosa partium unio & coordinatio ad motum apta à recentioribus dici solet mechanismus*. Talem esse machinam corpus humanum, talemque ex structura ejus sequi mechanisum sana ratio non minus quam experientia demonstrat. Deprehendimus enim in corpore humano actiones, quæ solo motu perficiuntur, ubi nempe corpora inter se mutuis viribus motricibus & innatis agunt, a quarum virium æqualitate, vi ac robore, actione & pressione, quies, ab inæquali vero loci, vel situs mutatio, sive unico verbo motus, in quo totius œconomiae vitalis cardo versatur, dependet.

§. IV.

Ast vero, cum quævis corpora peculiare suos, certos atque determinatos exerant motus atque mutationes plane distinctas, jure merito quæritur: a quonam principio illi motus debeant? Fatendum equidem, principium, causam, ac formam essentialem hujus motus primi æque ac secundi in corporibus, in quo nempe consistat proprie illa activitas ac vis agendi, qua unum corpus alteri prævalet, & quomodo motus unius alteri intimius communicetur, esse rem obscurissimam, sensibusque ac rationi minus obviam. Quam ob rem non levis inde ab omni seculo de hac re inter philosophos fuit controversia: hæc enim philosophandi ratio jam dum ex Stoicorum secta nonnullis præbuit occasionem sententiæ valde ineptæ, dum principium corporum activum cum Deo unum idemque habuerunt, mundumque mente præditum & intelligentem, ideoque Deum statuerunt. Non multum ab hac ipse *SENECA* recessit *Lib. 4. de Benef. Cap. 7.* ubi dicit, nihil esse sine Deo, nec Deum sine natura, sed idem esse utrumque. Horum Stoicorum infauissima in philosophando lambabat vestigia in præterito seculo *BENEDICTUS SPINOZA* substantiam cogitantem & extensam, mentem & corpus unam eandemque rem esse asserens, Deumque cum rebus materialibus confundens, de quo vid. ejus *Tract. Theol. polit. Cap. 2.* Ast majori cum pietate nonnulli Creatori & Enti infinito substituerunt spiritum quendam universalem creatum, tanquam Dei vicarium intimam corporum essentiam ingredientem, à quo tanquam principio omnes in natura mutationes deducere conabantur. Ex quorum classe primas tenet ipse *PLATO*, cui etiam subtilis ingenii ille philosophus *HENRICUS MORUS* in suo *Enchiridio Metaphysico* haud obscure assentitur principium aliquod hylarchicum, incorporeum, Deo subordinatum, totiusque mundi præsidem ac moderatorem statuens.

§. V.

Ast vero speciale illud principium a quo specificæ actiones in corpore humano, vita nempe, nutritio, sensatio, aliaque phænomena ad statum hominis tam naturalem, quam p. n. pertinentia dependent, variis ab auctoribus passim insignitur nominibus. Veteres nempe dicebant naturam, item animam, ut ipse *ARISTOTELES*, *GALENUS* & alii calidum innatum, spiritum insitum, *SCALIGER* sapientissimam vim plasticam, *HELMONTIUS* archæum, quorsum etiam spectant *Cl. DOLÆI* reges, quos diversis corporis cavitatibus præfecerat. Rectius vero inter recentiores *Vir* in rebus naturalibus singularis eruditionis *ROBERTUS BOYLE* in *Tractatu de Natura philo-*

sophari videtur, dum naturam cujuscunque corporis individuale mechanisum, omnis nempe mutationis principium ac causam appellat: Neque omnino sine fundamentali ratione; Deus enim summus rerum Arbiter produxit substantias agentes, seu viribus activis instructas, quæ essent fontes operationum, atque effectuum in aliis, atque sic neutiquam vel ad momentum res materiales concipi posse sine vi activa i. e. nisu, ac conatu locum, & situm mutandi cum *Illustri viro LEIBNITZIO* existimo, nihil obstante, quod non semper propter obstacula illam vim ad sensum nostrum exerere corpora valeant, unde motus causam prorsus non extra materiam querendam esse judico testantibus id vel ipsis experimentis chymicis, ubi ex sola certorum spirituum ac oleorum commixtione talis exoritur calor ac tumultus, ut metus sit diffractionis vitri, in quo continentur. Videntur itaque mihi plurimi Recentiorum in hoc puncto a vero aberrare, dum omnem activitatem corporibus denegant, & sic materiam per se inertem esse, omnemque motum immediate a Deo corporibus communicari statuunt. Nam quid quæso est substantia mere passiva sine vi innata, sine actione, & operatione? Ens enim mere passivum illud est, quod nihil efficit, nullam virtutem existendi vel durandi propriam habet: unde revera nihil est, & nonnisi abstractam forte in ipsa mente, non vero separatam extra eam involvit existentiam.

§. VI.

Ex innata hac rerum materialium vi non facile nos amplius latere poterit verum ac genuinum omnis motus, omniumque mutationum in corporibus principium: posita enim vi corporum innata ex modificatione, & structura partium, certa quoque virium proportio emergit, ex qua originem omnis ducit mechanisum, nec non proportionata in actione & reactione virium corporearum decens harmonia. Quod si jam plures materiales causæ ita fuerint ordinatæ ac dispositæ, ut effectus fluant ideæ artificis correspondentes, recte etiam mechanisum, sed perfectior dicitur. Ita in horologiis certa supposita constructione variarum rotularum, & applicato determinato pondere, vel elasticitate non potest alius sequi effectus per necessitatem naturalem, quam ut intra horæ spatium horam determinatam demonstret, id quod intendebat artifex. Sicut itaque ob motum regularem ac in certum finem ordinatum construuntur machinæ: ita etiam nostri corporis machina omnibus aliis machinis tam naturalibus, quam manu factis superior unice a Deo summo & sapientissimo corporis nostri opifice ad certum & specialem motum contexta est; interim non levis inter machinam naturalem artificialem dictam & Divinam nostri corporis notari meretur differentia. In Divinis enim modus construendi longe est excellentior, infinitisque modis artem humanam superans. Absonum itaque esset dicere, Deum non excellentiorem ideam in ipsis formandis habuisse, quam homo artifex. Impium quoque revera esset, metiri infinitæ illius potentiae vires omnibus numeris absolutas secundum humanæ mentis in construendis machinis umbratilem saltem potentiam ab infinita perfectione Divina infinitis modis depressam, unde facillime patet, parum mechanisum corporis humani stringere objectionem illam: quod nullum automatum artificiale vel se a corruptione præservare, vel destructum propriis viribus se recolligere possit, quod quidem in machina corporis humani fieri quotidiana testatur experientia, unde infertur, machinam corporis humani neutiquam ex se hoc præstare posse, sed nobilius aliud inhabitans rationale, directorium principium necessario ad hoc

hoc requiri. At vero, sicut mechanismus corporis humani infinitis parafangis artificialibus est excellentior, ita etiam effectus ejus mechanisimi debet esse excellentior, scopoque ac fini artificis sublimiori respondens, unde neque mirum, neque rationi ullo modo contrarium videtur a perfectiore machina perfectiores etiam resultare effectus. Denique huc facit etiam notabilis illa differentia inter artificialem & divinam machinam, quod in illa idem plerumque & simplex modus sit operandi, in hac vero variet illa operatio, cujus ratio non alia est, quam quod in humanis machinis semper una eademque dispositio permaneat causalis, ut in horologiis, machinis hydraulicis & hydraulico-pneumaticis, in divinis vero varient causæ. Nemo enim ignorat, externas causas, & inter has præcipue aërem, ætherem & alimenta cujusunque generis varie disponere & afficere machinam humani corporis ejusque ex mechanismo resultantes functiones.

§. VII.

Ultro equidem concedimus, machinæ corporis nostri insitum esse excellentius quoddam principium sentiendi & ratiocinandi facultate præditum, mentem nempe, sive animam rationalem: largimur etiam hanc animam facultatem habere a Deo concessam in certas corporis partes certo sensu agendi, functionesque nonnullas ac motus hujus machinæ modificandi: præesse quoque actionibus spontaneis a veteribus animales appellatis: item pervertere motus vitales æque ac naturales, cujus manifestum videmus exemplum in adfectibus animi, quos universi corporis partes mirifice agitare ac commovere quotidie experimur vel solo gravidarum exemplo, in quibus perversa imaginatio quam mirificos foetui inferat characteres, in vulgus notum est, quæ quidem actiones quomodo in corpore ab anima fiant & ab ipsa dependeant; num per influxum physicum juxta scholasticos & nonnullos recentiores; an per causas occasionales secundum CARTESIUM; an vero per harmoniam a Deo præstabilitam secundum Illustrem LEIBNITZIUM penitus hic inquirere nostri non est instituti, nec ideo cuiquam hac de materia, potius ad metaphysicam quam medicinam spectante, litem movere volumus. Sufficit ad scopum medicum, hæc ita fieri, licet modus, qua ratione hæc fiant, nos majorem partem adhuc lateat. Constanter itaque ex his asserimus, vitam, sanitatem, nutritionem, actum secretionum, atque excretionum, sanguinis & humorum circulationem, motum partium musculosarum involuntarium, morborum denique curationes, quæ naturæ vulgo adscribuntur, aliosque ad finem certo respectu salutarem tendentes motus mere mechanice a causis mechanicis & physicis citra ullum necessarium animæ rationalis concursum dependere.

§. VIII.

Præmissis itaque iis, quæ in genere ad notitiam medicinæ mechanicæ pertinere videbantur, instituti nostri ratio postulat, ut penitus, quo jure medicina Hippocratis a nobis mechanica audiat, investigemus. Ubi quidem in antecessum monendum duximus, minime nobis in animo esse HIPPOCRATI, alioquin medicorum merito principi, omnia ea, quibus hodierna excellit medicina mechanica, quæque post longa secula solertius enucleata vel inventa sunt, unice adscribere. Licet enim Divi hujus Senis de medicina mechanica merita vel subticere, vel penitus negliger habere maximam sanè spiraret ingratitude: ita etiam omnia ea, quæcunque hodierna in scientiis felicior ætas indefesso labore per varia experimenta atque observationes in medicinam contulit, unice

ipsi tribuere non otiosum magis, quam odiosum censer merito posset. Mediam itaque ingredimur viam ea sine fūco prolaturi, quorum testimonia in monumentis suis Venerandus Senex contemplanda reliquit.

§. IX.

Non est, cur me in laudes magni illius Viri HIPPOCRATIS nimium hic diffundam, dum plurimi jam satis superque hoc ipsum præstiter, majora etiam sunt ejus in artem medicam merita, quam ut meo aliquali testimonio vel depingi, vel adumbrari possint; hoc tamen sine injuria celeberrimorum in arte medica virorum tuto dixerim: HIPPOCRATEM esse eum, qui de medicina præ cæteris immortalem reportarit laudem, luculenta ad posteritatem suæ peritiæ atque solertiæ in Operibus suis transmittens testimonia, ita ut nullus facile ex tanto eruditorum numero hætenus repertus fuerit, qui non ipsum vel actu sectetur, vel non saltem de ipso nominari velit, summisque eum evehat laudibus. Merito hic ex recentioribus memorandus venit Celeberr. BAGLIVUS, qui tantopere HIPPOCRATEM æstimat, ut totus in eo esse videatur, quomodo omnibus HIPPOCRATIS imitationem inculcaret, de quo testantur ejus verba in *Animadversionibus suis in Practicem novam* §. I. ego, inquit, *missis cæteris libris totum me Hippocratis studio tradidi, nec sine admiratione deprehendi doctrinæ illius veritatem, tanquam ex tripode prodeuntem.* Et ibidem paulo post ait, *hæ sunt deliciae Hippocraticæ, Tyrones mei, quarum epulis soli fruuntur & saturantur, quibus discendi studium est ab uno Hippocrate, cujus quidem quælibet sententia veluti senatusconsultum litem componit in arduis morborum curationibus.* Similiter in §. II. *Tyrones medici ad perpetuum, vos hortor Hippocratis studium: solus enim ostendere potuit, quid sit sapere, & cum laude in curandis agris versari.* In eandem DURETUS descendit sententiam, dum ait: *Fremant licet omnes, dicam tamen, quod sentio, majorem scientiæ & praxeos ubertatem comparari a studioso Hippocratis uno die, quam ab ipsis pragmaticis uno seculo.* Eximia sunt quæ Professor quidam Regius Parisiensis NICOLAUS ANDRY in *Epistola quadam ad Baglivum data* scribit: *tanti, inquit, est apud me Hippocratis nomen, ut, cum de Tullio audiam Quintilianum, cum dicit: ille se profecisse sciat, cui Cicero placebit, idem de Hippocrate proferre & in hæc verba sæpe mihi contingat erumpere: ille se in re medica profecisse sciat, cui Hippocrates valde placebit.* Neque omnino sine prægnanti ratione viros hos doctissimos illota quasi manu in tantas HIPPOCRATIS laudes provolasse quisquam suspicabitur. Quodsi enim accuratius perpendamus, vix omnium seculorum Medicos tot in morbis phænomena, ne junctis quidem operis, descripsisse deprehendemus, quot nobis reliquit magnus HIPPOCRATES. Verum enimvero licet hæc omnia de ipso dicta nihil præter veritatem spirent, absurdum tamen foret, ita huc convertere velle ac dicere, quod omnia ea, quæ vera sunt nosque meliora dies docuit, exhausit atque absolverit. Ast neminem excusationi illius locum denegare existimo, si debite mente perpenderit infelicem illius ævi statum propter philosophiæ naturalis atque experimentorum penuriam: si quidem nihil in sui initio perfectum esse ex universæ naturæ testimonio recte monet philosophus. SENECA *Epist.* 64. inquit, *multa egerint, qui ante nos fuerint, sed non peregerunt: suscipiendi tamen sunt; multum adhuc restat operis, multumque restabit, nec ulli nato post mille secula præcludetur occasio aliquid adhuc adjiciendi.* Ut itaque me brevibus expediam, dico: HIPPOCRATEM medicinæ parentem minime aliam pro-

feffum fuiſſe medicinam, quam mechanicam, ac proinde latere univerſam medicinam mechanicam in ejuſdem operibus, licet non in eadem forma & ordine, uti hodie eandem conſpicimus, certum tamen, ad eſſe talia mechanifmi ſemina ac principia, ut, ſi quis philoſophia recentiorum mechanica imbutus ad ſolidum rationis calculum ejus ſcripta revocaverit, haud difficulter eadem inde eruere poſſit.

§. X.

Corpus humanum eſſe machinam ſummo artificio divino perfectam (cujus proprietas ac eſſentia in eo poſita eſt, ut parte una affecta ſtatim & altera patiatur) agnoviſſe jam olim HIPPOCRATEM, non obſcure colligi poteſt ex loco qui extat *Lib. de Locis in Homine* §. 3. *ſi quis minimam corporis partem malo afficere velit, totum corpus affectionem ſentiet, qualifcunque tandem ea fuerit, propterea quod minima corporis pars ea habet, quæcunque & maxima.* Pervidit nempe ſapientiſſimus Senex, nihil machinæ magis eſſe proprium, quam harmoniam partium inter ſe, ita, ut quicquid uni vel minimæ parti quoad ſtructuram læſionem infert, illud etiam reliquis vitium affricet. Huc locus etiam referri meretur, qui extat *Lib. I. de Dieta* §. 7. ubi per ſimilitudinem conatur auctor demonſtrare corporis mechanifmum, cum dicit: *ſecant homines lignum per ſerram, alter trahit, alter protrudit, idem autem hoc faciunt & minus facientes, plus laborant ac faciunt, ſic & hominis natura aliud protrudit, aliud trahit, aliud dat, aliud accipit, & alii dati ab alio accipit, & alii quidem tanto plus dat, ab alio vero, nihil minus accipit*, ubi auctor expreſſe naturam artificibus mechanicis aſſimilat; per naturam vero minime immateriale aliquod principium, ſed potius ex elementis conflatam temperaturam vult intelligi. Notatu etiam dignus eſt locus auctoris *Lib. de Aliment.* §. 4. ubi in compendio quaſi ideam mechanifmi in corpore tradit, inquit: *confluxus unus, conſpiratio una, conſentientia omnia.* Conferri etiam in hanc rem optimo jure meretur *Lib. de Veter. Med.* §. 39. 40. 41. ubi prolixè mechanifmum corporis humani inculcat, quæ propter prolixitatem huc afferre incommodum viſum eſt, ideoque ea legenda B. L. committimus.

§. XI.

His circa mechanifmum humani corporis pertractatis ordo nos ducit ad conſiderationem vitæ, quomodo nempe hæc a cauſis mere mechanicis dependeat, quantumque illæ ipſæ HIPPOCRATI noſtro cognitæ fuerint. Vitam itaque cum *Excell. D. Præſide* definiſſe, quod ſit motus progreſſivus circularis ſanguinis & humorum ab impulſu cordis & arteriarum, nec non elatere fibrarum dependens, & corpus corruptibile ab omni corruptione mediante excretionem vindicans. Definitionem hanc eſſe genuinam & realem, non opus eſt multis è longinquo petitis comprobare rationibus: teſtatur enim experientia, motu hoc ſanguinis progreſſivo præſente ad eſſe etiam vitam, eo ipſo vero in toto corpore extincto illico ſenſuum ac rationis uſum cum ipſa vita perire corpusque in putredinem abire. Formale itaque vitæ non in conſervatione mixti a putredine, utpote quæ nonniſi conſequens ipſius motus eſt, ſed directe in ipſo motu inteſtino & progreſſivo conſiſtere judicamus, quod vulgaria teſtantur curioſorum experimenta in animantibus inſtituta, quæ, etiamſi nulla amplius in illis percipiatur vita, inflato in ductum thoracicum vel thoracem aere ad vitam mox redeunt cordis motu reſtituto, quale experimentum etiam adfert Celeb. BAGLIVUS in *Libro de Fibra motrice* pag. 294. neque etiam dubito in hominibus jam actu mor-

tuis tale experimentum ſuccedere certa encheireſi adhibita, ſi modo vaſa deſtructa vel obſtructa partefque ſolidæ nimium rigentes non obſtent, quominus motus propagari poſſit ad partes, quod etiam actu experimento comprobatum eſſe Cl. BRUNNERUS in *Tractatu de Glandulis Duodeni* notabili exemplo teſtatur.

§. XII.

Cum itaque motus hic ſanguinis in circulum actus tam nobile præſtet in corpore humano officium, non ſine ratione quæritur, undenam ille motus, & a quo principio deducendus ſit? ſicuti motum in genere non extra corpus ex aliquo immateriali principio, ſed ex ipſo corporum mechanifmo deducendum eſſe ſupra fuſius demonſtravimus: ita hic quoque in ſpecie idem repetimus, aſſerentes totam œconomiam vitalem, quæ potiffimum motibus ſecretoriis & excretoriis adminiſtratur, nonniſi ab artiſcioſiſſima humani corporis ſtructura & actione ſolidorum in fluida, & fluidorum in ſolida, nec non debita proportionem ac temperie humorum dependere; contemplant enim humani corporis interiora, deprehendimus omnino motuum inſtrumenta, quibus partes fluidæ impelluntur & agitantur, nempe fibras maxime & muſculos vi activa præditos. Jamque in corpore humano excitato ſemel a partibus prolificis ſpermatis elatiſtico motu in ſolidis & fluidis foetus partibus, ob æquilibrium quod fluida inter & ſolida intercedit, nec non ob continuum occurſum fluidorum in ſolida, & ſolidorum in fluida niſum conatumque ſuum ſemel inceptum dictus elater præſatis in partibus perpetuat, maxime vero id ſolidis majori reſiſtentia præditis, quæ peculiari compage ad perpetuandum elaterem, eumque aliis imprimendum prædita ſunt, ſicut eſt cor, & dura meninx. Non parum ad hujus motus cauſam inveſtigandam conſert quoque fluidi nervei conſideratio. Talis enim eſt fibrarum muſculofarum conſtructio, ut irrigatæ tenuiſſimo aëreo-æthereo-elatiſcæ indolis liquido in juſto motu ſe conſervent contrahantque, cujus contractionis vigore ac robore inſtar emboli liquida contenta propelluntur motumque, Græcis ſyſtolen dictum, conſtituunt: alterum vero motum, Græcis itidem diaſtolen nuncupatum, qui priorem ex neceſſitate quadam ſubſequitur, atque a copia & impetu ſanguinis in partes muſculofas illabentis concitatur, poſt ſe relinquunt. Itaque fluidum nerveum fibrarum contractionem, dilatationem vero earundem ſanguinis in vicinas partes appulſus efficit. Notandum itaque, quod ſyſtole ſemper ſit cauſa diaſtoles, & diaſtole rurfus cauſa fiat ſyſtoles, ut hinc continuus fiat motus, quemadmodum hanc materiam ſolidis argumentis deduxit *Excell. D. Præſes in Tom. I. Med. ration.* Et hac ratione facile intelligi poſſe exiſtimo *Hippocratem*, qui hominem circulum deſcriptum nominabat *de Locis in Hom.* §. 1. dicens: *mibi quidem videtur principium corporis nullum eſſe; ſed omnia ſimiliter principium, & omnia ſinis: circulo enim deſcripto principium non reperitur.*

§. XIII.

Ad continuandum hunc vitalem cordis fibrarumque muſculofarum motum merito etiam in conſiderationem venit mirabilis illa cordis cum meninge, hujusque cum illo mutua conſenſio, ex qua harmonia inter cor & cerebrum petenda eſt ratio, cur, ſi dura vel pia meninx gravibus morbis laboret, cor etiam trahatur in afflictionis communionem ejusdemque indicia in pulſu oſtendat. Sic in vigore februm pulſus contrahi obſervamus, in variis capitis morbis, & variis animi operationibus, quæ in cerebro fiunt,

sunt, varie quoque omnibus momentis alterari pulsus conspicimus. Ceterum neque ultimum præbet momentum ad promotionem motuum vitalium æque ac naturalium atmosphære manifesta in corpus humanum potentia, quæ pressione sua in pulmonibus sanguinis cursum summopere promovet & ita cor adjuvat, ut exigua fere vi possit sanguinem e suis sinibus ad remota quæque spatia prolicere, quod vulgari experimento manifestum fit: si nempe animal quoddam vacuo imponatur aërque moderatus subtrahatur, nihil certius, quam mors subsequitur; admissio vero de novo aëre vita, motus, viresque illico restituntur. Ex quibus unicuique secundum rectam rationem philosophanti facile patet, id, quod cor aliasque solidas partes movet viresque iis ac vigorem conciliat, totamque œconomiam vitalem absolvit, a solis materialibus causis dependere, neque penitus necessarium esse concursum entis cuiusdam, quod notitia rerum intima, perceptione, multo minus, quod dirigendi motus facultate gaudeat in corpore nostro.

§. XIV.

Ex notione jam illorum, quæ de summo mechanismi in structura corporis humani reconditi artificio diximus, judicare promptissimum erit per naturam humanam (quæ secundum HIPPOCRATEM omnis sermonis seu ratiocinii in medicina fundamentum est) minime innui intelligens quoddam principium internum, quod ex notitia innata, intentione & directione ad certos fines agat, multo minus animam rationalem, quæ earum rerum corporearum plane non est conscia. Rectius itaque per naturam sensu medico sumtam intelligimus ordinatos ad certos fines à summo & divino Architecto motus ex sapienti structura partium solidarum & dispositione, temperie, ac proportionem, item potentia motrice fluidarum dependentes. Hanc fuisse mentem de natura humana clarorum in medicina virorum antiquiorum æque ac recentiorum ipsiusque auctoris nostri HIPPOCRATIS luculenta comprobant testimonia. Tacemus hic PLATONEM naturam artem divinam in materia dicentem; tacemus ASCLEPIADEM teste CÆLIO AURELIANO naturam nonnisi corpus ejusque motum asserentem; silentio etiam involvimus plures alios antiquos, quorum seriem hic texere possem numerosissimam, similiter de natura differentes, solusque nobis ex veteribus sufficiat HIPPOCRATES. Ex recentioribus eximia sunt, quæ in hanc rem habet Cl. BAGLIVUS *Prax. Med. Lib. 2. Cap. 1. ego, inquit, naturæ nomine non intelligo sapiens quoddam phantasma, quacunque vagans & consilio singula dirigens, sed complexum quandam generalem causarum naturalium; quæ licet consilio destituantur, effectus tamen suos pariunt juxta leges a summo conditore inditas, atque ita ordinate, ut quasi summo regi consilio videantur.* Idem sentit etiam D. SYDENHAMUS *Sect. 2. de Morbis Acutis pag. 158. dicens: ego, quoties naturam nomino, toties causarum naturalium complexum quandam significari volo, quæ quidem causæ, brutæ licet, atque omni consilio destitutæ, non tamen sine consilio summo reguntur, dum suas quæque operationes edunt, suosque effectus exequentur.* Hanc eandem sententiam ipsum HIPPOCRATEM fovisse expresse testatur *Lib. I. de Diæta §. 6. ubi hæc extant: corpora, quæ faciunt, non sciunt, quæ vero faciunt, scire sibi videntur, & quæ vident, non cognoscunt; attamen omnia in ipsis fiunt per divinam necessitatem & quæ volunt, & quæ non volunt: accedentibus vero illis huc, his vero illuc, & inter se permixtis unumquodque destinatum fatum explet & ad majus & ad minus.* Sic etiam *Lib. de Alimento* indoctas animantium naturas

vocat, id est, non consilio, neque delectu agentes, sed profecto quasi edoctæ operantur; per naturam vero hanc licet HIPPOCRATES, juxta mentem GALENI, intelligat temperaturam ex calidi, frigidi, humidi, ac sicci confusione ac mixtione genitam: hoc tamen pro scopo nostro sufficit, illum non aliud per naturam, quam complexum causarum corporearum intellexisse.

§. XV.

Ast fortassis objiciet hic aliquis: quo jure queat adseri, quod HIPPOCRATES per naturam intellexerit eum, quem nos volumus, corporis mechanisum, cum tamen notitia circuli sanguinis destitutus fuerit, sine qua verus de natura corporis mechanica, imo de œconomia totius corporis, conceptus formari neutiquam possit. Novi equidem plures etiam doctissimos inter se hac de re disceptare, utrum nempe circulus sanguinis magno HIPPOCRATI fuerit cognitus, an vero primum sit inventum sagacissimi HARVÆI? verum Hippocratem hunc circulum sanguinis minime latuisse, facile ex ejus monumentis eruitur. Celebris est locus, quem auctor habet *Lib. de Alimento. §. IV. alimentum, inquit, in pilos & ungues extimamque superficiem ab internis partibus extimamque superficie ad interna redit.* Hisce ex verbis manifesto concludere licet, minime HIPPOCRATI circulum sanguinis ignotum fuisse. Quomodo enim, quæso, alimentum (quo nomine sanguinem intelligit) in extimas usque corporis partes fertur, & ab externis ad interna redit sine circulari sanguinis motu. Pergit auctor porro ibidem dicens: *principium magnum ad extremam partem pervenit, ex parte extrema ad magnum principium redit;* ubi per principium magnum in sensu priori sanguis dubio procul intelligendus est, principium scilicet nutritionis præcipuum, in sensu secundo vero cor principium scilicet vitæ, & certo sensu primum movens, & ultimum moriens, ad quod ab externis partibus sanguis refluit. Licet itaque auctor non expresse dicat sanguinis impulsus per arterias, reditum vero per venas fieri, hoc tamen ejus cognitioni parum aut nihil præjudicat. Meretur etiam in hanc rem notari locus, qui extat in HIPPOCRATIS *Lib. I. de Diæta §. 32. Tardiore existente circuitu sensus paulatim allabuntur, & qui acuti existunt, parum commiscuntur propter circuitus tarditatem.* Similis extat locus *Libro de Flatibus §. 13. sanguis enim ipse natura calidus existens vi coactus per angustam viam celerrime transire non potest, cum multa impedimento sint obstacula & oppilationes, quapropter etiam pulsus fiunt circa tempora.* Idem ibid. §. 21. prohibet, inquit, sanguinis cursum, atque alio quidem loco consistit, alio lentius penetrat, alicubi autem citius. It. *Lib. de Sanitate Tuenda ad Mæcen. per omnia viscera venæ currunt, quæ sanguinem vehunt, ex quibus luce omnino meridiana clarius patet, nostro HIPPOCRATI circulum sanguinis probe cognitum fuisse.* Quod si vero ratiocinari velimus (sicut & merito fit) a suppressione, aut inhibitione motus, ut stare sanguis quasi videatur, habemus expressum locum *Popularium lib. VI. Sectione 7. n. 49. αἷματ' φλεβῶντ' ὁρᾶς λεπτοδυσίμν. i. e. sanguinis venarum suppressiones faciunt animi deliquium.* Quod si vero a spirituum motu ac radiatione, evidens est locus *Lib. de Morbo Sacro §. 6. Non enim possibile est spiritum stare, sed procedit sursum ac deorsum.* Plura etiam sunt loca, quæ sanguinis circulum auctori nostro cognitum fuisse certo evincunt, ut sunt *Lib. de Insomniis §. 8. Item Lib. 2. de Morbis §. 8. quæ fufius hic recensere instituti ratio non permittit.*

§. XVI.

Porro auctorem nostrum in hoc circulo sanguinis vitam constituisse, sanguinemque pro vitæ thesauro habuisse, non obscura in scriptis suis evincunt testimonia. Legi hac de re meretur totus liber HIPPOCRATIS de *Corde*, ubi egregie & fatis mechanice vitam, in quo consistat, describit. Inter cætera aurea sunt verba §. 5. *hi fontes sunt humanæ naturæ, & hi flumina sunt, quibus totum corpus irrigatur, atque hi etiam vitam homini conferunt, & ubi resiccati fuerint, homo moritur*; item *Lib. 2. de Morbis*, §. 8. *dum sanguis non movetur, fieri non potest, ut non etiam corpus quiescat ac torpeat, & si frigiditas ac congelatio augeant, penitus congelascit, ac perfrigeratur homo & moritur*. Huc etiam faciunt verba auctoris *l. c. §. 8. mens hominis in sinistro ventriculo cordis insita est, & reliquæ animæ imperat. Nutritur autem neque cibus, neque potibus a ventre, sed pura, & illustri substantia ex sanguinis discretione nata*; ubi notandum, quod Veteres magnam vim caloris ad sustentandam vitam deprehenderint, hinc etiam statuebant, principium vitæ causamque omnium functionum in animantibus *ὑπερὸν* illud substantiale & *ἰμφορτικόν*, quod in corde residere credebant, sicut hoc patet ex loco, qui est *Princip. §. 7. calidum plurimum in venis ac corde inest, & propterea spiritum cor trahit, utpote quod omnium intra hominem calidissimum existat, & hinc animam morientem igneæ indolis esse statuebant, unde HIPPOCRATES Lib. 1. de Diæta. ignem omnia per omnia movere dixit. Hæc vero anima veterum, ut etiam ipsius HIPPOCRATIS calidum innatum aut spiritus impetum faciens non aliud dubio procul est, quam sanguinis pars subtilissima magna potentia elastica donata a calida ætheris materia subtilifata, hinc etiam auctor statuit, hanc materiam pura & illustri sanguinis substantia nutriri, quod vero per animam nequaquam materiæ expers, & rationis particeps aliquod principium intelligat, patet ex loco *Epidem. lib. VI. ubi hominis animam semper produci, id est, vegetari ad mortem usque statuit. Egregius etiam est locus Lib. de Sanitate Tuenda ad Mæcen. §. 2. calore continetur anima, qua vivimus, id est, qua vivi sentimus. Et ibidem: humidus est sanguis, quo alitur vita, per omnia enim viscera venæ currunt, quæ sanguinem vehunt; sanguis animam, anima vitam sustinet. Ast ne gratis etiam fluidi nervei, seu spirituum animalium concursus ad motus vitales supponere videamur, quia rationes pro ea militantes hic adferre strictiores dissertationis nostræ limites non permittunt, pro ratione instituti suffecerit auctoris testimonium in hanc rem allegare. Egregie HIPPOCRATES de generatione hujus fluidi nervei ejusque functione differit *Lib. de Morbo Sacro §. 8. 16. 17. inter cætera memorabilia sunt, quæ habet §. 17. Et propterea judico, cerebrum vim plurimam in homine habere. Hoc enim est nobis eorum, quæ ab aëre sunt, interpres, si sanum fuerit, sapientiam autem ipsi exhibet aër. Quum enim homo spiritum in seipsum attraxerit, primum quidem ad cerebrum pervenit, & sic ad reliquum corpus aër dispergitur, relinquens in cerebro suum ipsius vigorem, & quicquid prudens, & sapientia præditum fuerit. Ubi notandum, quod per aërem hoc loco non intelligi debeat crassior ejus substantia, sed potius, quod in illa continetur, agilissimum & purissimum elementum, quod ætheris nomine venit, quod caloris fons est, robur, motum atque vigorem fluidis & solidis corporis nostri partibus adfert.***

§. XVII.

Perspectis itaque iis, quæ ad vitæ ejusque causa-

rum considerationem mechanicam pertinere videbantur, ordo nos ducit ad sanitatis morborumque causarum mechanicarum investigationem, ad quod etiam præstandum nulla alia nobis, quam mechanica sufficiunt principia, materia nempe & motus: nulla enim mutatio nisi per motum concipi potest, motus vero nonnisi materiæ est affectio, unde videre est, ad demonstrationem tam naturalis, quam præternaturalis status humani corporis, non alia quam mechanica suppetere principia. Sanitatem vero definimus, quod sit integritas functionum vivi & animati corporis dependens a convenienti proportionemotuum fluidorum ad solida & solidorum ad fluida; unde patet, morbum, qui sanitati est oppositus, non aliud esse, quam læsionem dictarum functionum à turbata motuum proportionem originem trahentem, quas definitiones suis gaudere veritatibus probatur exinde, quod sanguinis motu per universi corporis partes moderato ac æquabili existente animadvertamus omnes corporis functiones recte se habere, quo vero motu æquabili sublato illico etiam sanitas labefactatur. Sciendum itaque in antecessum est, maximam solidis vim inesse, quæ, ne ulterius, quam par est, intenderetur, temperari certo liquidorum libramine debuit, quod etiam factum est. Æternæ enim motuum leges nos docent, corpus in motu positum tantum de suo motu amittere, quantum imprimit in illud, in quod incurrit, ut videre est apud BORELLUM in *Lib. de vi percussione*, ex quo constat perpetuam in natura dari actionem corporum & reactionem, sive in corpore humano mutuam dari solidorum in fluida, & fluidorum in solida actionem & reactionem, quæ, si talem proportionem habeant, ut moderato & libero impetu ac motu fluida per minimos tubulos ferantur, sanitatis ratio perfecte inventa est.

§. XVIII.

Cum itaque sanitas in dicta motuum proportionem consistat, facile patet, nutante hac harmonia læsionem & turbationem functionis corporis nostri, sive morbum illico subsequi, intensior enim factus solidorum elater, atque fibrarum impulsus spasmus inducit, quo vasa constringuntur, fluidorum liber motus intercipitur, hincque in vasis capillaribus sanguinis mora, lentor & stagnatio presso pede sequuntur, unde plurimorum morborum phalanges originem suam trahunt. Hanc rem manifesto evincit hypochondriacorum & hysteri corum malorum natura, quorum formalitas nonnisi in motibus spasmodicis & inde dependente inæqualitate circuli sanguinis consistit; tamque multiformis symptomatum facies ex alterna partium spasmodica corrugatione & relaxatione, verbo: a proportionemotus destructa, viriumque abolitione derivari debet. Maxime notabilis etiam est mutua cordis cum cerebro consensus, quæ sensus motusque rationem subministrat, ita ut, si cordis vigor & impetus superet meningum resistantiam, oriatur statim in capite turbatio & confusio. Quodsi vero contingat, duram matrem fortiori textura præditam esse, motuique cordis quodammodo prævalere, mutato inter hæc duo mobilia æquilibrio & proportionem, cor debilius vehementioribus duræ matris pressionibus cedit, ideoque tales homines acutos ut plurimum sensus habere solent, & ob quamcunque mentis agitationem levemque affectum maximis pulsuum turbationibus subjacent. Hac de causa etiam videmus in acutis affectibus, quando nimirum crispatur dura meninx, oriri vigilias continuas, quibus sæpe etiam supervenit delirium ac delirio lethargus. Ita etiam mania, quoniam duræ matris elater ad extremum quasi gradum excrevit, violent-

violentos motus in partibus excitat, ut eo morbo correpti adeo sint validi, ut humanas prorsus vires excedere videantur.

§. XIX.

Posita sic formalitate morborum, quam in æquilibrium solidorum ad fluida sublatione consistere diximus, proximum est, ut etiam in causas hujus æquilibrium sublatis paucis saltem inquiramus, quas quidem commodè secundum mentem *Excell. Dn. Præsidis* ad duas referri posse classes merito censemus, sunt enim vel materiales, vel immateriales, has solo actu idealis anima producit, animique affectus audiunt; illæ vero a causis variis materialibus subalternis dependent, inter quas merito primas tenent venena seu sint extrinsecus assumpta, seu intra corpus genita, plethora, seu nimia sanguinis abundantia, cacochymia seu humorum impuritas; res præterea naturales & non naturales, a quibus omnibus morbos in corpore humano pure mechanice vel immediate, vel mediate dependere, nisi instituti nostri ratio arctioribus nos circumscriberet limitibus, juxta seriem demonstrare res esset facillima: ubi tamen merito monendum duximus, animi quidem affectus nos ad principales morborum causas retulisse (quod forte nonnullis mechanismo contrarium videbitur) ultroque nos concedere, sicut jam supra monuimus, animam motus vitales turbare, ac pervertere posse, ac proinde ad principales morborum causas rite annumerari debere; neutiquam tamen inde sequitur, omnes motuum causas in corpore ab anima dependere, neque hoc quicquam mechanismo humani corporis præjudicat, quamprimum enim illa immaterialis, libere agens causa, nempe anima corpus afficit, totum id, quod producit, nonnisi corporeum est, adeoque legibus mechanicis obediens. Nil itaque refert, causam mutationis non esse mechanicam, cum hac insuper habita effectum, qui est corporeus, cognoscere, excutere atque dirigere mechanico detur Medico, quod omnino pro scopo medici sufficit, non enim Medico, qua Medico in causam illam immaterialem in sanandis morbis quidquam agendi data est potentia, sed ibi potius remedium vel ex verbo Dei vel ex philosophia morali in componendis nempe affectibus rectius deducitur, sicut inter hanc doctrinam, & medicinam amicabilem dari nexum ultro concedimus, de qua re meretur etiam legi *Disertatio Excell. Dn. ALBERTI Præceptoris mei ætatem devenerandi de Medicinæ, & Doctrinæ Moralis nexu.*

§. XX.

Porro jam sequitur pro scopo nostro, ut demonstremus, auctorem nostrum HIPPOCRATEM easdem, quas præmisimus, sanitatis ac morborum, ac proinde non alias, quam mechanicas agnovisse causas, quod quidem ex ejus scriptis perquam facile præstari posse existimo. Totus enim in operibus suis Venerandus Senex in eo est, ut inculcet, proportionem, temperiem, moderationem, æquilibrium in motibus, item in materia mobili proportionem in quantitate, & mixtione pro tuenda sanitate servari debere, contra ab inæqualitate motuum & intemperie ac mutata proportionem humorumurbationes functionum in toto corpore fieri, atque ex eodem fundamento plurimorum morborum ac symptomatum originem dependere mechanice demonstrare conatur. In horum confirmationem legi præclara possunt, quæ auctor habet *Lib. de Natura Humana* §. 5. 6. homo, inquit, constat ex sicco, humido, calido & frigido, quinque sanguinem & pituitam, & bilem duplicem, flavam & nigricantem habet, & sanus maxime est,

ubi temperamentum hæc inter se habuerunt moderatum, tum facultate, tum copia, & ubi maxime fuerint permixta; ægrotat autem, quum horum quod minus, aut amplius fuerit, aut separatur in corpore, & non fuerit reliquis omnibus temperatum. Similis huic locus est de *Prisca Medic.* §. 24. ubi hæc extant: inest in homine & amarum, & salsum, & dulce, & acidum, & fluidum, & alia infinita omnigenas facultates habentia. Atque hæc quidem mixta & inter se temperata, neque conspicua sunt, neque hominem lædunt: Ubi vero quid horum secretum fuerit, tunc & conspicuum est & hominem lædit. Ex his locis clare apparet, gravissimum nostrum auctorem sanitatis causam in temperata mixtione partium sanguinem constituentium posuisse, neque omnino sine ratione; fluidorum enim ratione quantitatis & mixtionis debita constitutio causa est motuum, qui fiunt cum debita proportionem in animantium corporibus; solida enim nonnisi per fluida moventur: simili ratione morborum causas idem auctor primario quærit in mutata illa & præternaturali mixtione & crasi partium, quæ sanguinem constituunt; sic etiam egregie ab inæqualitate circuli sanguinis plurimos morbos mechanice deducere videtur, quando flatibus, qui nostro sensu nonnisi spasmi sunt, eorum generis adscribit, ut hoc videre est *Lib. 1. de Flatibus* §. 21. cum, inquit, in crassiores, & pleniores sanguine venas aer prodierit progressusque diutius maneat, prohibet sanguinis cursum, atque alio quidem loco consistit, alio lentius penetrat, alicubi autem citius. Quæ sane inæqualitate transitus sanguinis per corpus facta omnigenæ inæqualitates per omne corpus contingunt, unde totius corporis subversiones fiunt.

§. XXI.

Ad conservandam vero sanguinis temperiem & ratione quantitatis proportionem utique res a Medicis non naturales dictæ multum conferunt, siquidem certum est, quod ex iis vivamus, ægrotemus, sanesimur & moriamur. Temperiem igitur sanguinis & debitam proportionem temperatus harum rerum usus tam ratione quantitatis, quam qualitatis conservat; Atque in eo jam totus est noster HIPPOCRATES, ut ad sanitatis tutelam moderatum usum ciborum, potus, veneris, aeris, quietis, somni quoque & vigiliarum commendat, siquidem *Epidem. Libr. VI. S. VI. §. 6.* ait: labor, cibus, potus, somnus, venus, omnia mediocria. Elegans quoque hanc in rem extat locus *Libr. I. de Diæta* §. 8. cum inventa fuerit ciborum mensura & laborum ad unamquamque naturam numerus, ita ut excessus neque supra neque infra modum fiat, inventa sane exacte fuerit hominibus sanitas. Item *Libr. de Alimento* §. 8. magna res est ciborum quantitas ad vires solerti ratione adaptata. Similiter de *veteri Medicina* §. 7. multa & gravia ex robusto & ferino victu homines patiuntur, qui intemperatus & magnas vires habens ingeritur. Parallelus huic est locus in *Aphor. Sect. II. §. 17.* ubi p. n. copiosus cibus ingestus est, is morbum creat. Etenim nimia ciborum copia neque a ventriculo bene concoqui (quoniam tonum ejus mole sua labefactat) neque in succum bonum converti potest; accedit etiam, quod nimia chyli copia minus commodè a sanguine subigi possit & sic perspirationem manifesto impediat, sordiumque excrementitiarum ad interiora fiat recessus, unde varia morborum genera pressio quasi pede sequuntur. Recte de hac re FERNELIUS sentit in *Pathologicis Libr. I. Cap. XV.* abdomen infatigabile perniciosam sentinam appellans. Argute etiam idem auctor intemperantiam Medicorum nutricem nominat. Laudari itaque de jure meretur antiqui philosophi PYTHAGORÆ consuetudo, qui suam

philosophandi rationem a sobrietatis studio exorsus est. Sic etiam PLATO temperantiam vitæ custodem esse egregie perhibet. Præclara itidem sunt SANC-TORII verba *Libr. II. aph. 33. si sciveris quotidie, quantum cibi conveniat, scies vitam diutissime conservare.* Pergit noster HIPPOCRATES *de Locis in Homine §. 54. dicens: cibos offeramus ea copia, quantum corpus, cui offeruntur, superare valet: nam, si corpus ipsos cibos superare velit, neque morbus, neque contrarietas fit ex his, quæ offeruntur & hæc est occasio, quam Medicum nosse oportet.* Quadrant huc etiam ea, quæ habet *Libr. IV. de morbis §. 10. si homo parum edit & parum bibit, nullum morbum hoc ipsi inducit.* Præter hæc loca recensita legi meretur totus *Liber IV. de Morbis*, ubi, quomodo sanitas ab ingestis & egestis fiat, clarissime ostendit.

§. XXII.

Verum enimvero non modo simpliciter vitam ac sanitatem, sed etiam ipsam sapientiam humanam plurimum a bona diætâ & sanguinis temperata crasi dependere, variis in locis auctor testatur. Aurea sunt, quæ habet *Libr. de Diætâ*, ubi sedulus in eo est, ut demonstret, ex temperatura, vel intemperatura, item ex diætâ sapientiam & desipientiam procedere, dum §. 29. inquit: *quando in corpore elementa temperamentum acceperunt, sapientissimi sunt homines.* Et recte etiam §. 84. *melior redditur anima rectæ diætæ usu & pejor pravæ.* Experientia enim constat, ex nimia repletione ingenii alacritatem perfundari corporique lassitudinem, torporem, pigritiam ac somnolentiam superinduci, cujus ratio non alia est, quam quod nimia succorum resistentia cordis ac fibrarum tonum ac motum infringat & sic æquilibrium inter movens & mobile manifesto tollatur, functionesque animales æque ac vitales sufflammentur. In hanc sententiam conspirat etiam ipse CELSUS *Libr. I. Cap. 2. dicens: ubi ad cibum ventum est, nunquam tuta est nimia satietas.* A sanguinis vero crasi & circulo æquabili sapientiam dependere, egregie monstrat HIPPOCRATES *Libr. de Flatibus §. 20. opinor autem, inquit, inter omnia, quæ in corpore sunt, nihil magis ad prudentiam conferre, quam sanguinem, qui, quum in constanti persistit habitu, consistit & prudentia, sanguine vero permutato concidit simul & prudentia.* Item *Libr. I. de Morbis §. 28. sanguis, qui est in homine, maximam partem ad prudentiam confert.* Similiter sapientiam hanc a dispositione organorum dependere, fuscè demonstrat in *Libr. de Morbo Sacro §. 16. 17.* Hinc admodum scite etiam CARTESIUS in *Dissert. de Methodo* scribit: *animus adeo a temperamento & humorum corporis dispositione pendet, ut, si ratio aliqua possit inveniri, quæ homines sapientiores & ingeniosiores reddat, quam hactenus fuerunt, credo, illam in medicina quæri debere.* Ex quibus omnibus colligere licet, causas illas, quæ vitæ, sanitati, animique inclinationibus præfunt, nonnisi vulgares esse & ad classem rerum materialium pertinere; nihil enim est communius, quam ut diversitatem temperamentorum, sexus, varii vitæ status atque ætatis, varia etiam animi vis & perfectio subsequatur, hinc mulieres & pueros propter mollitiem cerebri ac fibrarum ad inveniendam docendamque veritatem recte impares judicat BAGLIVUS in *Dissert. de Anatome Fibrarum & Morbis Solidorum pag. m. 411.* Meretur etiam hic legi *Dissert. Excell. Dn. Præsidis de Temperamento Fundamento Morum & Morborum in Gentibus.*

§. XXIII.

Plethoræ etiam nostrum HIPPOCRATEM principalem in morbis producendis locum assignasse, non

obscura in scriptis ejus testantur monumenta. Manifestus est locus, qui extat *de Sanitate tuenda ad Mæcenatem §. 3. sanguis, cum abundat, valetudinem vitiat.* Quomodo vero sanguis abundans valetudinem vitiet, ex mechanicis res explicatu est facillima; siquidem ad omnem motum requiritur, ut resistentia corporis mobilis superetur a virtute motrice, alias motus produci non potest. Quo vero major est resistentia mobilis, eo plus detrahit virtuti motrici, & quo minor, eo minus. Quodsi itaque major justo sit sanguinis quantitas, major quoque fit sanguinis resistentia, plusque virtuti cordis motrici detrahitur & sic lentiore factò sanguinis circuitu non potest aliter fieri, quam ut humorum crassities, vasorum infarctus, obstructions & indurationes & exinde scorbutus, cachexia, mensium suppressiones, asthma, calculus renum, ipsum quoque malum hypochondriacum aliique affectus subsequantur quamplurimi, quæ omnia auctor noster probe cognoscens præclare *Libr. IV. de Morbis §. 10. scribit: accedente ad cor & corpus sanguine, quam satis est, uberiore a cibis & potibus & ad alium humorem admixto, si non ab ipso egressus fuerit per alvum aut vesicam reliquo humori admixtus dolorem corpori inducit; sin autem paulatim copiosior fiat, morbosus efficitur.* Neque dissimilis est locus in *Aphorism. Sect. I. §. 3. athletarum habitus ad summum progressi periculosi, & si in extremo constiterint & quia non ultra possunt in melius proficere, reliquum est, ut in deterius labantur; neque vasorum confidentiæ ad extremum producendæ: nam evacuationes, quæ ad extremum tendunt, periculosa, & rursus refectiones, cum extrema fuerint, periculosa.* Hoc loco auctor egregie sanguinis nimiam abundantiam æque ac nimium defectum morbos procreare athletarum exemplo docet, in quam rem pulchre ipse CELSUS ita scribit: *si plenior quis & coloratior & speciosior se ipso factus videatur, suspecta sua bona habere debet.* Notandum vero hic est ex prius allegato HIPPOCRATIS loco, quod non tantum plethoram, sed & sanguinis inopiam periculosam esse pronuntiet, cujus ratio facile patet: summa enim lex est sanitatis, naturam gaudere temperie, & omnia temperata esse debere tam quoad quantitatem, quam quoad qualitatem, omniaque nimia naturæ esse inimicissima. Quodsi igitur minor sanguinis est quantitas, quam vi motrici solidorum resistere possit, sublata temperie & æquilibrium solidorum ad fluida totam œconomiam corporis humani turbare ex superioribus liquet.

§. XXIV.

Porro ipsum aërem quoque, quem continuo inspiramus, in conservatione vitæ ac sanitatis, ipsaque morborum generatione non postremum occupare locum, egregie in scriptis suis demonstrat noster HIPPOCRATES, sicut hoc testatum faciunt *Libri ejus præcipui de Aëribus nempe, Aquis & Locis, de Flatibus, de Locis in Homine; item de Natura Humana*, in quibus summa cum cura ac diligentia in id incubuit, ut demonstraret, quomodo aër, isque secundum ventos, anni tempora & tempestates mutatus ad morbos generandos eosque feliciter curandos conferat; neque omnino sine evidenti fundamento ac ratione mechanica, siquidem aër & alimenta non tantum corpus nutriunt, sed & robur ac vim motricem partibus solidis æque ac fluidis subministrant. Maxime omnium vero fluidum illud subtilissimum aëreo ætherico-elasticum elementum vires corporis & per consequens æquilibrium inter solida & fluida sustentat, hinc noster auctor *Libr. de Diætâ* ætherem vocat ignem per omnia moventem: habet enim aër subtile quoddam elementum veteribus *πνεῦμα* dictum, quod

quod activitatem calore ac spirituaſcentia ſua animantibus largitur. Eximia quoque ſunt, quæ *Libr. de Aëribus, Aquis & Locis* §. I. de aëris ac ventorum notitia tanquam ad medicinam ſumme neceſſaria proferunt, cum ait: *quicumque artem medicam integre conſequi velit, primum quidem anni temporum rationem habere debet, quantum potentia eorum valeat, deinde ventorum, qui in unaquaque regione ſunt indigenæ, & proprii, urbium ſitus & natura aquarum nota ſit. Hominum inſuper diæta perquirenda, qua maxime capiantur; ex his enim ſingula ſunt inveſtiganda, & qui hæc probe, quantum fieri poteſt, invenerit, ille errare non poterit, ſicubi ad morborum indicationem adhibeatur.* Notari hic obiter merentur eximia *SENECÆ* verba, quæ proferunt *Libr. II. de Ira Cap. 16. in frigora ſeptentrionemque vergentibus immanſueta ſunt ingenia ſuoque, ut Poeta inquit, ſimilima cælo.* Præclare etiam *ARISTOTELES Probl. IV. §. 14.* dicit: *optima temperies aëris non corpori ſolum, verum etiam hominis intelligentiæ prodeſt, deceſſus autem omnes ut corporis, ita etiam mentis temperamentum pervertunt.* Fuſius hac de re legi meretur exaſciatiſſima *Differt. Excell. Dn. Præſidis de Temperamento Fundamento Morum & Morborum in Gentibus*, ut & ejuſdem *Differt. de Morbis certis Populis ac Regionibus propriis.*

§. XXV.

Quodſi igitur tanta ſit aëris puri ac temperati, ſubtiliori calido æthereo elemento imbuti, potentia vitam & ſanitatē dirigendi atque temperamenta hominum moresque ac diſpoſitionem ad morbos modificandi, fane nullus aërem immutatum & præter naturam conſtitutum corpus variis modis afficere & ad multos morbos diſponere in dubium revocabit: quantum enim aëris impuri energia ad morborum epidemiorum, certis temporibus populariter graſſari ſolitorum, productionem conferat, vel in ipſum vulgus notum eſt, cujus nulla alia ſubeſt cauſa, quam quod aër ſupra modum intemperatus & putredinoſa exhalatione vel miaſmate inquinatus corpus putredine inimica vitiat, motum ac robur partium ſolidarum ſubtrahit, corpusque ad ſupervacuorum humorum diſſolutionem ineptum reddit & ſic putredo reſta ex uno corpore in aliud tranſit, ſicut hoc fuſius deducit *Excell. Dn. Præſes in Diſſ. de Intemperie Aëris multorum Morborum cauſa.* Præclare noſter auctor quoque more ſuo *Libr. de Nat. Hum. §. 18.* ſcribit: *morbi partim ex dietis, partim ex aëre, quem inſpirando trahimus, ſunt.* Item paulo poſt: *quando ab uno morbo multi homines corripuntur eodem tempore, cauſam ad id, quod comuniſſimum eſt & quo maxime omnes utimur, referre poteſt. Eſt autem hoc ſpiritus & aër, quem inſpirando trahimus.* Item §. 19. cum unius morbi popularis graſſatio conſiſtit, maniſeſtum eſt, ſpiritum, quem trahimus, id eſt, aërem in cauſa eſſe, palamque eſt inſuper eum ipſum ſpiritum ſive aërem morborum aliquam exhalationem habere. Et quoniam aër quandoque admodum fertilia morborum contagioſorum ſemina fovet, hinc non inconcinne cautelam practicam ſubnectit his verbis: *providendum vero, ut quam pauciſſimus aëris influxus in corpus ingrediatur & ut ipſe quam peregriniſſimus exiſtat; regionum enim locos, in quibus morbus conſiſtit, quantum fieri poteſt, permutare oportet.* Conſideratione quoque digniſſimus omnino eſt locus, qui extat *Libr. de Flatibus §. 4. corpora omnia tum hominum, tum reliquorum animantium a triplici nutrimento ſuſtentantur; horum autem nomina ſunt cibus, potus, ſpiritus; ſpiritus quidem maximus eſt in omnibus, quæ corpori accidunt, & auctor & dominus.*

Item paulo poſt enarratis prius prolixè aëris proprietatibus ſubjungit: *vides ex his, quæ dixi, quanta communio omnibus animantibus in fruendo aëre exiſtat.* Subjiciam igitur & illud, quod non aliunde unquam veriſimile ſit morbos evenire, quam inde, ſi is aut plus, aut minus, aut cumulatior, aut morbidis for-
dibus inquinatior in corpus influat.

§. XXVI.

Pereſpectis ac conſideratis iis, quæ ad vitæ, ſanitatē morborumque cauſas mechanicas pertinere videbantur, ſupereſt jam ultimò, ut etiam de ipſa therapia *HIPPOCRATIS* mechanica nonnulla adjiciamus. Quid vero nos per therapiam mechanicam intelligamus, facile ex ipſa morborum notione ſuperius tradita liquet. *Θεραπεύειν* enim ſive ſanare ex mechanicis principiis nihil eſt aliud, quam cauſas morborum per remedia congrua adjuvante natura tollere; ſiquidem omnia illa, quæcunque æquilibrium, temperiei, mixturæ & motui partium corporis incongrua, improporcionata, ſimul vero activitate imbuta ſunt, cauſam morbificam conſtituunt, motuſque naturæ turbare morbumque, imo ipſam mortem producere apta ſunt. Ad has igitur motuum turbationes a cauſis morbificis concitatas in ordinem redigendas partiumque læſiones redintegrandas opus eſt methodo rationali, opus eſt medicamentiſ vi activa inſtructis & ad cauſas morbificas amovendas directis. Atque in his univerſæ therapie cardo unice vertitur.

§. XXVII.

Auctorem noſtrum *HIPPOCRATEM* Medicorum facile principem non alia methodo in ſanandis morbis fuiſſe uſum, quam rationali, id eſt, mechanica, haud obſcura in ejus operibus evincunt teſtimonia. Cedro hic cumprimis notatu digna ſunt, quæ *Libr. Epidemior. VI. Sect. II. num. 1. & ſeqq.* extant, ubi graviſſimus auctor hunc in modum diſſerit: *dilatare, conſtringere, alia quidem, alia vero non. Humores alios quidem expellere, alios vero ſiccare, alios autem indere, & alia quidem parte, alia vero non. Attenuare, craſſefacere corpus, cutem, carnes & alia: & aliqua quidem, alia vero non. Lævigare, exaſperare, indurare, mollire, alia quidem, alia non. Excitare, torpeſcere & quæcunque alia hujusmodi. Derivare, ſuccedentia ſtatim revellere, reſtitutis concedere. Alium humorem non prodeuntem ducere, prodeuntem vero ſimul effundere: operari ſimile, velut dolor dolorem ſedat. Diſſimilia, ſi vergant ſuſum elevata, inferne ſolvere & contraria per eadem: velut eſt capitis purgatio, venæſectio, quando non temere detrahatur. Pulchre etiam *Libr. de Flatibus §. 3.* medicinam practicam definit his verbis: *medicina nihil aliud eſt, niſi adpoſitio & ablatio, ablatio quidem eorum, quæ excedunt, adpoſitio vero eorum, quæ deſciunt; qui autem iſtud optime facere poteſt, is optimus Medicus cenſebitur, quantumcunque quis ab hoc præſtando deſicit, tantum deſicit quoque ab ipſa arte.* Ubi maniſeſte innuit, totam medicinam practicam in eo terminari, ut proportio, temperies, moderatio atque æquilibrium in motibus æque ac materia mobili procuretur. Quid enim aliud eſt ſuperflua in corpore humano demere & quæ deſciunt, ſupplere, quam procurare, ut æquilibrium ſolidorum ac fluidorum invicem ac temperies naturæ amicitiffima emergat. Huc merito referendus eſt locus *Aphor. V. Sect. II. §. 22.* *quicumque morbi ex repletionē ſunt, ſanat evacuatio, & quicumque ex evacuationē ſanat repletio, & in omnibus contrarietas remedio eſt, quaſi dicat: quicquid rectum eſt,**

est, id moderatum est, omnisque excessus expers. Si quid itaque deest ad temperiem in corpore conciliandam, adjiciendum est, & quod abundat, demendum. Similis extat locus *Libr. de Natura Humana* §. 17. hæc insuper nosse oportet, quod, quoscunque morbos repletio parit, evacuatio sanat. Item: in summa Medicum scire oportet, opponere se contrarium instantibus & morbis & naturis & temporibus & ætatibus & distendentia solvere & soluta distendere & mihi sane hoc ipsum sanatio esse videtur. Ceterum quod natura sit optima sanitatis conservatrix morborumque medicatrix, & quod omne nimium corporisque subita mutatio periculum corpori minetur, æqualitas vero & moderatio ac temperies in curandis morbis naturæ sit amicissima expresse docet HIPPOCRATES *Aph. sect. II. §. 51. multum & repente evacuare & replere vel calefacere vel refrigerare, aut alio quovis modo movere periculosum: omne siquidem nimium naturæ est inimicum*, ob repentinam nempe habitus, temperamentum totiusque œconomiae animalis mutationem, quæ mutatio non solum ægris, sed etiam sanis calamitosa est.


§. XXVIII.

Notari porro meretur, quod naturarum secundum subjecta individua diversitatem in medendo considerari debere magna cum cura ac diligentia in scriptis suis Divus Senex commendat, qualia nempe sint corpora, imbecillia, an robusta? quis sexus? quæ ætas? quæ vires? quale temperamentum? qualis habitus corporis, consuetudo vel hæreditaria dispositio adsit? Sicut hoc paucis quasi in compendio præclarus auctor testatur *Lib. de Steril. §. 18. conare, inquit, ut sis physicus ad hominis habitum ac robur respiciens, nam ex his nullus est, qui non omnia ad amissum faciat*; quod sane non leve documentum præbet, HIPPOCRATEM ex numero vere rationalium Medicorum fuisse. Egregius etiam est locus qui extat in hanc rem *Lib. de Nat. Hum. §. 18. curatio instituenda est habita consideratione naturæ hominis & ætatis & speciei, horæque anni & modi ipsius morbi curationem facere, aliquando detrahendo, aliquando apponendo, & quemadmodum jam dudum a me dictum est, ad singulas ætates & horas & species ac morbos respiciendo tum in exhibendis pharmacis,*

tum in constituenda diætâ. Similia his sunt HIPPOCRATIS verba de *Locis in Homine* §. 55. neque partiendum est medicamentum promiscue, sed singulis secundum naturam, debilibus quidem debilia a natura: fortibus vero morbis fortis naturæ pharmaca exhibenda sunt. Item de *Flatibus* §. 8. differt corpus a corpore, natura a natura & nutrimentum a nutrimento. Non enim omni animantium generi eadem aut conferunt, aut commoda sunt, sed sunt alia aliis magis convenientia. Item *Lib. I. de Diætâ* §. 1. oportet enim scire, quomodo fortium naturæ vim detrahare oporteat & quomodo debilibus robur per artem addere oporteat, prout singulorum occasio se obtulerit. Simili practica consideratione dignus est locus HIPPOCRATIS *Aph. Sect. I. §. 2. in evacuationibus considerare oportet & regionem & anni tempora & ætatem & morbos, in quibus expedit & non. Item Sect. VII. §. 65. Si quis febricitanti dederit cibum, quem sano exhibet, valenti robur, ægrotanti morbus fit. Item Sect. I. §. 11. In paroxysmis a cibo abstinendum esse censet, cum ejus accessio damno sit, cujus aphorismi egregiam tradit HEURNIUS rationem inquires: magis enim eo tempore reflui sunt cuncti succi ad centrum corporis, unde opprimitur anxique fit respiratio ac alvina regio ab impuris succis oneratur.*

§. XXIX.

Fatemur equidem plurima adhuc ex HIPPOCRATIS scriptis ad stabiliendum nostrum thema superesse, sed brevitatis studium arctioribus nos includit limitibus, veremur enim, ne in tantam molem hæ pagellæ excrescant, ut loco Speciminis Academici vastum quoddam volumen lectorum fatiget industriam. Nihil tamen dubito, fore ut ex allatis facile quisque veritatem assertorum pervidere possit, HIPPOCRATEM nempe nonnisi principiis mechanicis totam suam medicinam superstruxisse, neque alias in investigandis vel curandis morbis, quam mere mechanicas ingressum fuisse vias. Ceterum Deo ter Optimo Maximo devotas pia mente pro præstito hoc auxilio persolvo grates, supplexque eum veneror, ut ulterius quoque studiis meis ad nominis sui gloriam proximique salutem unice destinatis gratia sua adesse atque eadem ad optatum finem perducere velit.



D I S S E R T A T I O
P H I L O S O P H I C O - M E D I C A
M E T H O D O S C I E N T I F I C A C O N S C R I P T A ,
Q U A S I S T I T U R V E R U M
U N I V E R S Æ M E D I C I N Æ
P R I N C I P I U M ,
I N S T R U C T U R A
C O R P O R I S H U M A N I
M E C H A N I C A
R E P E R I U N D U M .

Primum edita Anno 1732.

§. I.

§. III.

*Nihil sine
ratione
sufficiente.*



N I H I L prorsus est sine ratione sufficiente. (conferatur WOLFFIUS in Ont. §. 56. & Pf. §. 70.)

Hoc principium quod primus in Philosophiam introduxit Leibnitzius, præter citatam ejus demonstrationem quam dedit Clarissimus Wolffius, ipsa experientia teste indubium est, qua semper quæri videmus, cur hoc vel illud factum sit? nisi enim hoc principium tanquam jam certum supponeremus; semper hoc prius nobis decidendum esset, an hoc vel illud habeat rationem sufficientem, tum quærendum quæ sit ratio! Conferatur etiam Jac. Carpovii Diff. de principio rationis sufficientis.)

§. II.

*Nulla res
est sine
principio
eoque solo
est concep-
tibilis.*

Ex ratione sufficiente dicimur rem sufficienter concipere. Omne quod est, debet habere sui rationem sufficientem. (§. I.) Ergo omne, quod est, in se est conceptibile, & si ejus ratio sufficiens nos non fugiat, nobis se etiam conceptibile exhibet; sin vero minus, manet nobis inconceptibile. Id autem quod continet in se rationem sufficientem alterius, dicitur Principium, & quidem principium existendi, si contineat in se rationem sufficientem alterius existentiae, quod & causa salutatur; cognoscendi vero principium, si contineat in se rationem sufficientem unde alterum & cognosci & concipi potest. Ergo nulla res, quæ existit, est sine principio suæ existentiae seu sine causa. Nec quicquid a nobis concipi aut ullo modo intelligi potest sine rei principio cognoscendi.

Frid. Hoffmanni Oper. Supplem. II.

Facile patet quorsum hæc disputem. Etenim, cum ipso statim laboris titulo promittam, exhibiturum me verum in Medicina universa principium *a)*, idque methodo scientifica, quæ est veritatis e cognoscendi ejus principiis legitima diductio, ante omnia studendum erat, an etiam omne quod est, suum necessario requirat principium existendi, sive sui causam; denique principium cognoscendi, ex quo disci possit, cur sit, cur ita sit? utpote quo destituti fluctuamur, cum nulla certitudo, quod medicis hic rebus eveniat; paucis: dubium est quam maxime, an certum teneant, nedum verum principium, denique an methodo a me promissa conscribi possit. Adjicit insuper titulus; principium in structura corporis humani mechanica reperiundum, quod an ita se habeat, edoceat quod sequitur.

a) Idem hoc Thema Vir Excell. Fr. Hoffmannus, Instaurator ille veræ, & Reformator veteris Hippocraticæ Medicinæ Mechanicæ in erudita Diff. cui titulus: de vero universæ medicinæ Principio, olim solide pertractavit.

§. IV.

Duo aut plura, quorum unum in se continet rationem sufficientem alterius, dicuntur *Quæ dicuntur* connexa; & quidem ratione spatii connexa sunt, si unum in se contineat rationem sufficientem cur alteri coexistat vel cum eo sit simul. Spatium enim dicimus ordinem simultaneorum vel coexistentium (WOLFFII Ont. §. 589.) ; ratione vero temporis connexa sunt, si unum in se contineat rationem sufficientem cur alterum ei succedat. *Tempus*

L

Tempus enim dicimus ordinem successivo-
rum. [WOLFFII Ont. §. 572.)

§. V.

In corpore humano sunt simultanea & successiva. Homo præditus est corpore [per exper.] quod si consideremus in eo deprehendimus 1] res innumeras quæ simul existunt, a) 2] res innumeras quæ sibi invicem succedunt, ita, ut cessante priore veniat aliud b). Illa simultanea, hæc successiva corporis humani dicimus. Nunc an nexum inter se habeant paucis liceat investigare.

a) v. g. in Cajo reperiuntur ossa, tendines, muscoli, arteriæ, venæ, nervi, glandulæ, secretoria & excretoria organa, item varia varii generis fluida. &c. &c.

b) v. g. ex cibo chylus; ex chylo sanguis; ex sanguine nerveum fluidum, bilis, lymphæ, &c. &c.

§. VI.

Simul tamen non sine ratione coexistunt. Unum simultaneorum corporis humani cum altero est simul, vel eidem coexistit [§. 5.]: sed nihil est sine ratione sufficiente [§. 1.]. Ergo, nec sine ratione sufficiente unum simultaneorum corporis humani alteri coexistit.

§. VII.

Quæstio: cur coexistant? debet sibi. Si ad rem sistatur quæstio, cur res sit? dicimus adesse rationem rei sufficientem. Cur unum simultaneorum corporis humani cum altero sit simul ac eidem coexistat, debet adesse ratio sufficiens [§. 6.]. Ergo ad simultanea debet sibi quæstio, cur eorundem unum alteri coexistat.

§. VIII.

Habent coexistentiæ suæ finem. Omnis quæstio, res cur sit, cur ita sit? sistitur in fine rei. Nam id ipsum, propter quod res est denique ita nec aliter, dicimus finem rei. Quæstio cur unum simultaneorum corporis humani alteri coexistat, debet sibi [§. 7.]. Ergo sistitur in fine, quem unum simultaneorum alteri coexistendo intendit obtinere. Ergo unum simultaneorum corporis humani habet finem quod alteri coexistat.

§. IX.

Finis ille quis sit? Unum simultaneorum alteri cur coexistat, habet finem: [§. 8.] alteri coexistendo eidem certum præstat usum cujus rationem sufficientem in se continet [per exper.]. Ergo ille usus, quem unum simultaneorum alteri eidem coexistendo præstat & cujus rationem sufficientem in se continet, est ille finis, quem habet, quod alteri coexistat; & cum in se contineat rationem sufficientem usus, continet eandem in se quoque finis. Ergo unum simultaneorum in se continet rationem sufficientem cur alteri coexistat c). Ergo simultanea sunt inter se connexa ratione spatii [§. 4.]

sunt connexa ratione spatii.

c) v. g. Caput habet in se rationem sufficientem cur reliquo corpori coexistat, nimirum ut per fluidum nerveum, quod in cerebro ejusque corticali substantia secernitur, reliquis partibus corporis vires largiatur ad

præstandos producendosque motus: oculus ut prospiciat corpori suo, quo noxia devitet & non nisi utilia amplectatur; arteriæ ut sanguinem a corde abducant, venæ ut reducant.

§. X.

Connexa per causas finales dicuntur, Et per quorum unum ob certum finem, cujus tamen in se continet rationem sufficientem, alteri coexistit. Unum simultaneorum habet finem cur alteri coexistat, [§. 8.] ejusque rationem sufficientem in se continet [§. 9.]. Ergo simultanea etiam sunt connexa per causas finales. d)

d) v. g. Hepar & Cystis fellea sunt connexa (per exper. Anatom.). In Cystide fellea datur causa finalis, cur hepatis coexistat, nempe bilem in hepate secretam colligere: huic cystidi felleæ annexi ductus continent in se causam finalem cur coexistant Cystidi, nimirum exceptam a Cystide bilem in intestina deducendi; & porro intestina cur coexistant ductibus, ut bile per eosdem recepta, pro chylo attenuando, oleosa cum aqueis miscendo, intestina stimulando, denique acidum chyli ex parte immutando, utantur.

§. XI.

Demonstrato simultaneorum corporis humani nexu, ratione spatii & causarum finalium, videamus, an corporis humani successiva, nexu, & denique quo gaudeant?

§. XII.

Quodcunque potest esse aliter, id dicitur contingens. Adfunt in corpore humano successiva, quæ possunt esse aliter v. g. circulus sanguinis moderatus subinde abit in immoderatum [per exper.]. Ergo successiva corporis humani sunt contingentia. Verum omne contingens debet habere sui causam efficientem [WOLFFII Ont. §. 908.], Ergo omne etiam successivum corporis humani habeat sui causam efficientem necessum est.

§. XIII.

Deprehendimus per experientiam, quod corporis humani successivum quoddam prius A in se contineat rationem sufficientem, cur posterius B sequatur. e) Debent autem successiva habere sui causam efficientem [§. 12. & 2.] Ergo successiva corporis humani ita sunt comparata, ut semper unum sit alterius causa efficiens. Ergo successiva corporis humani sunt connexa ratione temporis [§. 4.] & per causas efficientes. Nam connexa per causas efficientes ea dicimus, quæ ita comparata, ut unum semper alterius sit causa.

e) v. g. Ductibus minimis & fibris per nimiam senectam inducta durities, quæ esto A, in se continet rationem sufficientem cur mors ut successivum B sequatur.

§. XIV.

Ens, quod e pluribus simul sumtis constituitur, id dicimus constare ex partibus. Corpus humanum constituitur e simultaneis

Corpus hominis constat ex partibus inter se & connexis.

& successivis; [§. 5.] quæ simul sumta sunt plura [per exper.]. Ergo corpus hominis constat ex partibus. Denique simultanea & successiva corporis humani sunt inter se connexa [§. 10. 13.]. Ergo corpus hominis constat ex partibus inter se connexis.

§. XV.

Corpus hominis est ens compositum.

Ens quod constat ex partibus inter se connexis dicimus ens compositum. Corpus hominis constat ex partibus iisque inter se connexis [§. 14.]. Ergo corpus hominis est ens compositum.

§. XVI.

Corpus hominis gaudet extensione, magnitudine, figura &c.

Ens compositum gaudet extensione, [WOLFFII Ont. §. 619.] magnitudine, [WOLFFII Ont. §. 624. 625.] figura, [WOLFFII Ont. §. 622. 623.] eaque mutabili, [WOLFFII Ont. §. 634.] spatio [WOLFFII Ont. germ. §. 72.] motu totius & partium [WOLFFII Ont. §. 667.]. Cum igitur corpus hominis sit ens compositum; [§. 15.] ipsum etiam gaudet extensione, magnitudine, figura eaque mutabili, spatio, motu totius & partium.

§. XVII.

Essentia entis in genere consistit in modo possibilitatis.

Primus rei conceptus, ex quo reliquorum omnium quæ rei insunt vel inesse possunt ratio redditur sufficiens, dicitur Essentia rei. Modus possibilitatis cujuslibet entis in genere est primus ejus conceptus, siquidem sine modo possibilitatis non est ens, [per princ. contradict.] ex eoque reliquorum omnium, quæ enti insunt vel inesse possunt, redditur ratio, siquidem ex impossibili reddi nequit, cum ex nihilo nihil fiat [WOLFFII Ont. §. 67. 68.]. Ergo modus possibilitatis in ente est entis essentia.

§. XVIII.

In specie entis compositi in modo compositionis.

Ens compositum debet habere certum compositionis modum [per pr. contradict.]. In illo consistit modus possibilitatis entis compositi; quippe ens compositum sine partium inter se connexione non est possibile: [§. 15.] sed in modo possibilitatis consistit entis essentia [§. 17.]. Ergo entis compositi essentia consistit in ejus compositionis modo. Cum itaque corpus hominis sit ens compositum; [§. 15.] sequitur quod ejus essentia consistat in modo compositionis, qui ex diversitate partium & earum combinatione æstimandus est.

§. XIX.

Essentia est & structura ejus.

Modum compositionis in composito dicimus ejus structuram. Corpus hominis est ens compositum: [§. 15.] & in ejus modo compositionis consistit ejus essentia [§. 18.]. Ergo Essentia corporis humani consistit in ejus structura.

§. XX.

Corpus humanum gaudet actione totius & partium.

Loci mutationem dicimus motum. Corpus hominis gaudet motu totius & partium [§. 16.]. Ergo corpus hominis valet committere loci mutationem in toto & partibus, cujus mutationis rationem in se sufficientem ut mutato continet: [per exper.] sed mutatio, quæ rationem sui habet in illo quod mutatur, dicitur actio. Ergo corpus hominis gaudet actione totius & partium.

Frid. Hoffmanni Oper. Supplem. II.

§. XXI.

Omnis actio supponit conatum agendi: Vi aëtrice (per exper.) quem conatum agendi vocamus vim. Corpus humanum gaudet actione totius & partium. (§. 20.) Ergo corpus humanum gaudet vi aëtrice: & cum nulla fiat corporis humani ut & partium actio sine aliorum corporum commotione; (per exper.) possidet quoque vim motricem in toto & partibus.

§. XXII.

Illud, quo ens compositum motui resistit, dicimus vim inertiae. Non per quamlibet vim ens quodvis compositum movetur (per exper.). Ergo adest in composito aliquid quod motui resistit imprimendo; donec resistantia a vi majore imprimente superetur. Ergo adest in composito vis inertiae. Et cum corpus humanum sit ens compositum; (§. 15.) tuto sequitur, quod ipsum etiam teneat vim inertiae.

§. XXIII.

Corpus humanum gaudet vi motrice (§. In corpore 21.) ut & vi inertiae. (§. 22.) Solet autem humana utraque vis in conflictu corporum secundum certas modificari regulas (per exper.) quas dicimus regulas motus. Ergo in corpore humano, cum in eodem reperiantur successiva, quorum uno cessante venit aliud (§. 5.) obtinent regulæ motus.

§. XXIV.

In corpore humano obtinent regulæ motus (§. 23.) quarum liceat, supponendo regulas motus præcipuas enarrare. quæ?

- 1] Corpus in motu constitutum motum continuat, donec a causa externa vel vi centripeda impediatur. [per princ. rat. suffic. §. 1.]
- 2] Corpus motum eandem directionem & celeritatem retinet, donec non a causa externa vel vi centripeda mutatur. [per Rat. suffic. §. 1.]
- 3] Corpus nequit moveri, nisi per causam externam, quia in se spectatum versus omnes plagas æquali nisu tendit [per Rat. suff. §. 1.] adeoque quiescit.
- 4] Omne corpus actum reagit, hoc est, pressum reprimit [per exper.]
- 5] In ictu partes utriusque corporis debent comprimi. [per exper. & pr. Contradict.]
- 6] Si corpus duplici vi urgetur in aliud simpla præditum; motus sequitur directionem fortioris seu majoris [per exper.]

§. XXV.

Certa mutabilium in ente determinatio, dicitur ejus status. In corpore humano reperiuntur successiva, quorum uno cessante venit alterum, (§. 5.) quæ sunt illa contingentia (§. 12.). Ergo sunt etiam mutabilia. Eorum quodvis v. g. successivum A, quod antecedit, aliter determinatum est successivo B, quod consequitur: [per pr. indiscer.]. Ergo quodvis successivorum alium agnoscit sui statum. Ergo in successivis corporis humani obtinet status antecedens & consequens: & cum

& cum successiva sint connexa per causas efficientes; [§. 13.] idem & de eorundem Antecedenti & Consequenti statu dicendum.

§. XXVI.

In ejus
structura
fundantur
ejus mu-
tationes.

Quicquid enti competit, id vel in essentia entis sola habet rationem sufficientem sui, nempe & qua possibilitatem & existentiam, vel una extra eandem; ita ut qua possibilitatem quidem in essentia fundatum sit, sed qua existentiam aliud quid requirat [WOLFFII Ont. §. 149. 150.]. Essentia corporis humani consistit in modo compositionis [§. 18.] sive ejus structura [§. 19.]. Ergo in corpore humano quicquid evenit, id rationem sui sufficientem habet aut fundatum est in ejus modo compositionis seu structura sola & qua possibilitatem & qua existentiam, vel qua possibilitatem tantum, ita, ut qua existentiam causa adhuc eidem contigua requiratur. Eveniunt autem in corpore humano innumerae mutationes seu operationes: nam uno successivorum cessante venit alterum. [§. 5.] Ergo istæ mutationes seu operationes successivorum fundantur in corporis humani structura, vel qua possibilitatem & existentiam simul, vel tantum qua possibilitatem, ut qua existentiam aliud adhuc requiratur.

§. XXVII.

Idem de-
monstra-
tur.

Eandem hanc propositionem, quod nimium mutationes quæ in corpore humano accidunt, in modo compositionis sive structura sint fundatæ, ita ut ex eodem eorundem ratio sufficiens reddi possit, a posteriori probamus, ita concludendo:

Ex quocunque sequitur mutatio in corpore humano ut effectus, ex illo ratio ejus dari potest, adeoque in eodem fundatur. [per pr. Contrad.]

Sed ex structura seu compositionis modo corporis humani sequuntur mutationes ut effectus. Ergo ratio mutationum ex illa dari potest, hoc est, mutationes in structura fundantur.

Minor probatur:

Quo demto demitur effectus, ex illo sequitur effectus. [per pr. rat. suffici. §. 1.]

Sed structura corporis humani demta, demuntur ejus mutationes [per exper.]

Ergo ex structura ejus sequuntur.

Quod minor propositio experientia doceatur, patet ex exemplis singularibus. Adsunt in corpore humano venæ ut sanguinem per arterias a corde abductum reducant, quas si tollas, subinde debitas in corpore humano operationes, præsertim secretiones, esse cessuras est certissimum. Manet ergo, operationes seu mutationes corporis humani esse fundatas in ejus modo compositionis sive structura.

§. XXVIII.

Corpus
hominis
est machi-
na.

Ens compositum, cujus operationes sive mutationes in modo compositionis seu ejus structura, secundum statum antecedentem & regulas motus sunt fundatæ, dicitur machina. Corpus hominis est ens compositum; [§. 15.] ejus operationes seu mutationes fundantur in ejus structura sive modo compositionis (§. 26. 27.) secundum statum antece-

dentem [§. 25.] & regulas motus (§. 23.). Ergo corpus hominis est MACHINA.

§. XXIX.

Machina cujus operationes sive mutationes in ejus modo compositionis seu structura ductuosa & canaliculoso-solido-fluida fundantur, dicitur machina Hydraulica. Corpus hominis est machina [§. 28.] ejus structura est ductuosa & canaliculoso-solido-fluida [per exper. Anat. & vulg.]. Ergo ejus mutationes in tali structura fundantur. Ergo Corpus hominis est Machina HYDRAULICA.

§. XXX.

Fundatio phaenomenorum entis in ejus structura secundum statum antecedentem & regulas motus dicitur Mechanismus. Et quidem perfectus & universalis, si nullum prorsus phaenomenon alias requirat sui causas. Operationes seu mutationes corporis humani, quæ sunt ejus phaenomena, fundantur in ejus structura secundum statum antecedentem & regulas motus (§. 26. 27. 25. & 23.). Ergo in corpore humano obtinet mechanismus. An vero perfectus & universalis, ita, ut nulla plane sit obvia mutatio, quæ non in structura Corporis humani fundata sit, est quod sumus modo investigaturi.

§. XXXI.

Homo cogitat: (per exper.) sed corpus ne subtile quidem cogitare potest. [WOLFFII in Metaph. germ. §. 739.] nec eidem a Deo potest cogitatio tribui. [WOLFFII Metaph. germ. §. 741.] Ergo aliud ens essentiam hominis ingreditur quod cogitat. Et cum soli spiritui cogitare sit proprium, [WOLFFII Metaph. germ. 896.] spiritum id esse sequitur, quem ab aliis discernendi causa vocamus animam. Ergo homo non corpus modo [§. 5.] sed & animam possidet. Hæc, utrum anima plurimorum in corpore humano mutationum seu phaenomenorum existat causa efficiens, atque ita ejus mechanismum multorum judicio imperfectum a) & particularem efficiat, animæ adfectiones & ejus cum corpore modus genuinus consistendi edoceant solide.

a) Vocola imperfectus, heic nullo alio capiat-
tur sensu nisi oppositio perfecti mechanismi
quem definivimus [§. 30.]

§. XXXII.

Ens quod ex partibus non constat dicitur simplex. *) Anima hominis, negato quod sit corpus & affirmato quod sit spiritus, (§. 31.) expertem esse partium concedatur, necessum est. Ergo anima hominis est ens simplex. Ergo caret magnitudine, extensione, figura, motu intestino, nec spatium replet (WOLFFII Ont. §. 683.)

*) Hanc entis simplicis definitionem videas
fuse defensam a Chr. Wolffio in Ont. §. 673.

§. XXXIII.

Tactus fit mediantibus partibus (per exp.): Anima hominis est ens simplex (§. 32.) adeoque

aliud ens que caret partibus. (§. 32.) Ergo anima ho-
agere na- minis nequit tangi. Ergo nec quoddam ens in
turaliter. illam naturaliter agere potest. Et vice versa,
nec animæ in aliud ens agendi naturaliter
concessa est facultas. Etenim omnis actio
naturalis fit mediante contactu (per exper.)
Fuere adfectiones, sequitur animæ consilien-
di cum corpore modus.

§. XXXIV.

Datur Mutuum inter duo vel plura ita consen-
animam sum, ut amice sibi invicem respondeant, di-
inter & cimus commercium. Adfunt in homine duo,
corpus (§. 5.) & anima; (§. 31.) quibus est
commer- mutuus ita consensus, ut amice invicem sibi
cium. respondeant. Nam facta mutatione in orga-
no sensorio ab objecto externo, statim in ani-
ma oritur repræsentatio de eodem, & talis
quidem, qualis mutationi illi conveniens est;
& vice versa, liberas animæ volitiones se-
quitur statim motus conveniens in corpore
dum modo organum motus se recte habeat
(per exper.) Ergo inter animam & corpus in
homine datur commercium, cujus modum non
omnes eundem explicant viri docti: quis vero
genuinus sit dispiciamus.

§. XXXV.

Systema Modus omnium antiquissimus commercium
influxus animæ cum corpore ita explicandi, ut facta
Physici ab objecto externo mutatione & motu in cor-
quid? re- pore, corpus motum animæ per contactum
fuitur. physicum imprimat ideas; & subortis in ani-
ma volitionibus, ipsa anima motum imprimat
corpori ad motus hos nec alios voluntarios
edendos, dicitur Systema influxus Physici.
Verum cum nullum ens in animam agere
possit, nec animæ in aliud ens naturaliter
agendi concessa sit facultas, (§. 33.) corrumpit
Systema dictum.

§. XXXVI.

Systema Alter modus, qui commercium ita expli-
harmonia cat, quod 1) omnis sensatio in anima per
a Deo ita vim ejus repræsentativam ex præcedentibus
coordina- repræsentationibus, adeoque naturaliter oria-
ta. tur; 2) Omnis motus corporis ex ejus stru-
ctura & vi, motibusque præcedentibus tra-
hat originem; 3) Consensus factarum autem
mutationum in corpore, & repræsentationum
in anima fit a Deo ita ordinatus, dicitur Sy-
stema Harmonia a Deo ita coordinata.

§. XXXVII.

Hoc Syste- Est hoc Systema possibile 1) quoad animam,
ma est pos- quia habet vim repræsentativam universi,
sibile. pro situ corporis sui organici in universo
(WOLFFII Metaph. germ. §. 753.) 2)
Quoad corpus, (per omnipotentiam Dei).
3) Qua consensum utriusque (per omni-
scientiam & Dei omnipotentiam). Hæc de
Systematis possibilitate: an autem etiam sit,
jam jam docebitur.

§. XXXVIII.

Systema Modus tertius explicandi commercium,
causarum ita, ut facta ab objecto externa mutatione
occasionalium. in corpore, Deus immediate convenientem
repræsentationem producat in anima; & sub-
orta volitione in anima Deus immediate con-
venientem motum imprimat corpori, dicitur
Systema causarum occasionalium. Cum autem
Frid. Hoffmanni Oper. Supplem. II.

omnem eventum a Deo immediate præstitum
in universo dicamus miraculum. Stante hoc
systemate, omnia animæ cogitata, omnesque
corporis motus sunt miracula a Deo præstita.

§. XXXIX.

Deus eventum in universo præstare nequit per miraculum, si is naturaliter possit obti-
neri: (WOLFFII Metaph. germ. §. 1041.) sed
omnis cogitatio animæ & quisque corporis
motus naturaliter obtineri potest (§. 37.).
Ergo non possunt a Deo præstari per mira-
culum; Ergo evanescit Systema causarum oc-
casionalium.

§. XL.

Pendet itaque commercium animam inter
& corpus, aut a mutuo in se invicem influ-
xu, quod est Systema influxus physici, aut
ab actione Dei, eaque vel immediata, quod
est Systema causarum occasionalium, vel
mediata, quod est Systema harmonia a Deo
ita coordinata. Sed cadit Systema influxus
Physici; (§. 35.) evanescit causarum occa-
sionalium (§. 39.). harmonia a Deo ita co-
ordinata systema ut possibile remanet (§. 37.)
nec aliud possibile cogitari potest: (per ex-
per.) debet alterum e tribus habere locum
cum existat commercium, (§. 34.) cujus est
modus interpretandus. Ergo Systema har-
monia a Deo ita coordinata est verum Syste-
ma, traditque genuinum animam inter & cor-
pus modum commercii. a)

a) Hic nobis sermo est de Systemate har-
monia a Deo ita coordinata animam inter
& corpus, quatenus anima ideas recipit,
non autem de moralitate ejus.

§. XLI.

Duorum vel plurium ad se invicem respec-
tus, vi cujus unum continet in se rationem
sufficientem alterius, dicitur nexus. Ani-
mam inter & corpus datur talis ad se invi-
cem respectus, vi cujus, ratio sufficiens re-
præsentationis in anima est in corpore, &
ratio sufficiens motus in corpore est in ani-
ma [per exper.]. Ergo animam inter & cor-
pus datur nexus.

§. XLII.

Hunc nexum, si is ita se habeat, ut cor-
pus non quidem per veram actionem repræ-
sentationem imprimat animæ, sed anima ean-
dem producat per vim propriam ex repræ-
sentationibus præcedentibus, hanc tamen nec
aliam repræsentationem quod ita requirat
harmonia cum corpore; & pariter anima
non quidem vera operatione motum impri-
mat corpori, verum eundem corpus propria
vi ex motibus antecedentibus producat, hunc
tamen nec motum alium, quod ita requirat
harmonia cum hac anima, dicimus exigiti-
vum. Sin vero res fiat per veram actionem
animæ in corpus & corporis in animam, ne-
xum effectivum. Sed ita se habet nexus ani-
mam inter & corpus, ut quodvis propria
utatur vi, ita tamen nec aliter, ob stantem
inter se harmoniam (§. 36. 40.). Ergo ani-
mam inter & corpus nexus est non effectivus
sed excitivus.

§. XLIII.

Anima
nullarum
mutatio-
num exi-
stis causa
efficiens.

Habitis animæ adfectionibus, & demon-
strato ejus genuino cum corpore commercio,
an aliquæ corporis humani operationes, ac-
tiones sive mutationes ab anima ad instar ef-
fectus pendeant, sine ullis ambagibus scire
licet. Omnes corporis humani actiones seu
mutationes sunt vel ita comparatæ, ut ani-
ma ipsarum sibi immediate conscia non sit
a), vel ita, ut sit b) (per exper.). Illas
vitales, has animales seu voluntarias dicimus.
Requirunt sui causam efficientem, (§. 12.)
sed animam inter & corpus datur nexus non
effectivus, sed excitivus (§. 42.). Ergo ani-
ma non est causa efficiens ullarum corporis hu-
mani operationum, actionum seu mutationum,
nec vitalium nec animalium sive a voluntate
ipsius animæ pendentium.

a) Quales sunt circulatio sanguinis & fluido-
rum reliquorum corporis humani, item se-
cretiones. &c. &c.

b) Quales sunt, si scribas, legas, incedas.
&c. &c.

§. XLIV.

Quod ip-
sam atti-
net, perfe-
ctus in
corpore
humano
obtinere
mechanif-
mus.

Corporis humani operationes sive mutatio-
nes fundantur in ejus structura, vel qua pos-
sibilitatem & existentiam simul, vel qua possi-
bilitatem tantum, ut qua existentiam aliud
quid ad sui causam efficientem requirant:
(§. 26.) anima hominis in ejus corpore nul-
lam operationum aut mutationum nec vita-
lium nec animalium, existit causa efficiens
(§. 43.). Ergo quod animam attinet, pos-
sunt omnes corporis humani operationes seu
mutationes fundari in ejus structura & qua
possibilitatem & qua existentiam simul. Er-
go quod animam attinet, in corpore humano
obtinere mechanismus perfectus & universalis
(§. 30.).

§. XLV.

Quod ta-
men ae-
rem atti-
net & ali-
menta,
non obti-
net.

Remota anima, videamus an alia quædam
causa efficiens quorundam corporis humani
operationum seu mutationum existat. Per
experientiam edocemur firmam & solidam
existentiam corporis humani viventis multum
dependere ab aëre coexistente & contiguo,
c) bono vel pravo alimento, & potu d).
Concludimus igitur, quod mutationes cor-
poris humani eidem contiguarum causarum
effectus, in structura ejus non fundentur qua
possibilitatem & existentiam simul, aut tan-
tum qua possibilitatem, nimirum multæ exi-
stentiam in aëre & alimentis habent. Ergo
non obtinet in corpore humano perfectus &
universalis mechanismus (§. 30.).

c) Nam is solus est, qui ætherea elastica &
subtilissima substantia motum sanguinis & hu-
morum intestinum, spirituscentiæ, caloris,
roboris & motus fibrarum authorem, tuetur
atque conservat. Is est solus, qui externo
suo pondere expandit pulmones & sanguinis
circuitum per eos ex uno ventriculo cordis
in alterum celebrat. Is solus est, qui ex-
terne incumbens corpori nostro transpiratio-
nem moderatam, fibras & membranas in to-
no conservat & æquilibrio, nimiam expan-
sionem liquidorum internam moderatur, tem-
perat, & ita placidum, æquabilem, mode-

ratum circuitum humorum, debitamque fi-
brarum systolen atque diastolen efficit. Unde
facile patet, quanta ejus necessitas sit ad vi-
tam sanam, & quanta potentia ipsi etiam
insit conturbandi motus habituales atque
naturales. Nec diutius nos heic detinebi-
mus explicando, at remittimus benevolum
lectorem plura desiderantem ad Epidemicas,
Endemias constitutiones, ad historias mor-
borum ex mutatione tempestatum & tempo-
rum provenientium, ubi sine dubio certo cer-
tius nostri asserti veritas confirmabitur.

d) Nam cum caduca sint fluxaque vitæ nostræ
principia, & singulis momentis decedat &
elabatur quædam nostri portio, necessario &
invalida redderentur corpora & dissiparen-
tur tandem atque conciderent, nisi Numinis
Divini providentiæ alimentum ut & potum,
tanquam præsens quoddam exhaustarum par-
tium supplementum, dedisset. Cibo enim,
quicquid humidioris, reparamus. Neque
etiam quantam vim cibus & potus in cor-
pus nostrum exerat, præsertim immodera-
tus, & intemperatus diu usurpatus, paga-
no est ignotum. Plura cupiens legat Excell.
Dn. D. FR. HOFFMANNI Patroni mei sum-
mi Pathologiam rationalem inque ea Par-
tis tertiæ Caput 2. de morborum origine
ex copia & vitio ingestorum, Caput 3. De
alimentis intemperatis, Cap. 4. De noxa
potus spirituosii vel nimis pauci &c.

§. XLVI.

Cum tamen mutationes corporis humani
aëris & alimenti effectus, si non qua exi-
stentiam, tamen in corporis humani structu-
ra mechanica qua possibilitatem fundentur,
(§. 26. 28.) hoc est, ut in corporis huma-
ni machina non aliter sint possibiles quam
mechanice; e) manet hoc respectu perfectus
& universalis mechanismus corporis humani.

Obtinere ta-
men, qua-
tenus mu-
tationes in
corpore
humano
fundantur
qua possi-
bilitatem.

e) v. g. Miasma illud pestilentielle æereum,
quod partim sulphureæ putridæ multiplicati-
væ instar fermenti, partim subtilis valde
acris & causticæ alcalinæ plus quam acidæ
naturæ est, cum aëre haustum, salivali fer-
mentescibili latici se se insinuat, ibique sta-
tim fauces invadit cum dolore vehementi,
eosque cum lingua sanguinolentos reddit,
mox caput, cerebrum, nervos & purissi-
mum illud lymphaticum nervorum fluidum
petens, capitis torporem, gravitatem, som-
nolentiam & acerbum dolorem, sensuum stu-
porem, rerum omnium oblivionem, inquietu-
dinem, vigilias ac virium prostrationem
inducit. Per fauces ad ventriculum vec-
tum, ciborum fastidium, nauseam, vomendi
conatum nec non ipsum vomitum, & per
consensum nervorum, præcordiorum anxie-
tatem & cardialgiæ syncopitæ facit.
Dein per vasa chyliifera ad sanguinem de-
latum omnia inflamat, horrorem, pulsum
languidum, parvum, contractum & fre-
quentem producit &c. &c.

§. XLVII.

Idem ita demonstramus: totus mundus est
machina: (WOLFFII Cosm. 73.) corpus hu-
manum pars mundi, (per exper.) quoque
machina

Et quæ
nus ma-
china cor-
poris hu-

mani est pars machine universalis mundana. machina existit (§. 28.). Ergo corpus hominis spectari potest modo duplici: ut machina, item ut pars machine universalis mundana. Quatenus autem ipsum corpus humanum est machina, omnes ejus mutationes possunt ex illius structura explicari, cum ibidem fundentur (§. 26.). Quatenus vero est pars machine totius mundi, fieri potest, ut quædam mutationes in ipso corpore humano obvenientes sui rationem extra corpus humanum inveniant. a) Attamen mechanice cum in machina universali mundana fundentur (per exper.). Ergo etiam eatenus perfectus & universalis in corpore humano mechanismus potest defendi.

a) v. g. De Solis in corpora humana effectu & virtute minus quis dubitaverit, quanto clarius hæc ipsa ex anni temporibus, veris nempe, æstatis, autumnii & hiemis, item diei & noctis differentia manifestatur. Ita Vere: Insania, Comitialis morbus, sanguinis fluxiones, Angina, Gravedines, Raucedines, Tusses, Lepre, Impetigines, Pustulae ulceroſæ, tubercula, morbi articulares grassantur, teste ipso adhuc olim HIPPOCRATE Sect. III. Aphorismorum. Aphor. 19. Aestate febres continuæ & ardentes, Tertiana, Vomitus, Alvi profluvia, Aurium dolores, Oris exulcerationes, Genitalium putredines adoriuntur. Testis est HIPPOCRATES Sect. III. Aphor. Aphor. 21. Autumno febres quartana, aqua inter cutim, tabes, stillicidia urinae, difficultates intestinorum, coxendicum dolores, angina, asthmata &c. vexant. confer. HIPPOCRATIS Sect. III. Aphor. Aphor. 22. Hieme morbi pulmonum, inflammatio, pleuritides, gravedines, tusses, raucedines, dolores capitis, vertigines, & Apoplexiae vigent. Vide HIPPOCRATEM Sect. III. Aphor. Aphor. 23. Constat porro experientia, sub ortu solis febres Synochas, circa meridiem tertianas adoriri, circa pomeridianum tempus quartana, & vesperi catarrhales solennem paroxysmum exerunt, capiuntque incrementum. Quod etiam tenendum de defluxionibus, doloribus gravativis, & tumoribus, quæ circa vespertinum maxime tempus exacerbantur. De Lunæ ut & reliquorum Planetarum eorumque invicem aspectu, brevitatibus ergo plura recensere, quas exserant mutationes in corpore humano morbosque gignant & curent, non licet. At, plura desiderantem mittimus ad Germaniæ Hippocratem nostrum per totum orbem Celeberrimum, Dn. FR. HOFFMANNUM, qui in erudita Diss. de Astrorum instuxu, solide egit: item ad observationes Astronomico-Medicas ANDRÆ VALFRE. &c.

§. XLVIII.

Machina corporis humani non est perpetuum mobile. Machinam, in qua obtinet perfectus & universalis mechanismus, ita, ut singulæ in ipsa obviæ mutationes fundentur in ejus structura, secundum statum antecedentem & regulas motus, qua possibilitatem & qua existentiam simul, dicimus perpetuum mobile b). Corpus hominis est quidem machina, (§. 28.) verum non gaudet tali perfecto & universali mechanismo (§. 45.). Ergo machina corporis humani non est perpetuum mobile.

b) Hæc definitio mobilis perpetui cum vulgari eadem est, qua id describitur: quod sit alterna productio causæ effectus & effectus causæ. Nam ponamus machinam, in qua nec plures nec pauciores mutationes seu operationes obtingunt quam septem A. B. C. D. E. F. G. subinde clarum est, si omnes hæ operationes fundentur in structura machine, tum per A. produci B. & sic in serie etiam G. ut effectum, & ab hoc effectu produci A. sui causam.

§. XLIX.

Quidquid in omnibus, quæ de eo cogitari possunt, est vel non est, id dicimus omnimode determinatum. In ente existente omnia, quæ de ipso cogitari possunt, vel sunt vel non sunt (per princip. Contrad.). Ergo omne existens est omnimode determinatum. Ergo mechanismus corporis humani existens, (§. 30.) est omnimode determinatus.

§. L.

Cum nihil est sine ratione sufficiente, Idque ob certum finem. (§. 1.) mechanismus autem in corpore humano fit omnimode determinatus, (§. 49.) debet adesse ratio sufficiens, cur mechanismus corporis humani determinatus sit ita nec aliter. Sed ratio sufficiens cujusvis rei cur sit ita o nec aliter, est finis rei (§. 8.). Ergo mechanismus corporis humani quod sit determinatus ita, nec aliter, debet adesse certus finis per eundem obtinendus.

§. LI.

Quisquis finis per media non nisi adæquate determinata obtinetur: (per pr. rationis suff. §. 1.) mechanismus corporis humani determinatus est ita nec aliter ob certum per eundem obtinendum finem (§. 50.). Ergo mechanismus corporis humani debet esse determinatus ita nec aliter adæquate ad obtinendum illum finem, hoc est debent omnes ejus partes ita esse determinatæ, ut singulæ tendant si ve consentiant ad communem illum finem obtinendum.

§. LII.

Consensus omnium partium in ente si ve tendentia ad commune aliquod præstandum dicitur perfectio, & id, in quo consentiunt, si ve ad quod præstandum tendunt, principium perfectionis. Mechanismus corporis humani in suis partibus debet ita esse determinatus, ut singulæ partes consentiant seu tendant ad communem mechanismi finem obtinendum seu præstandum (§. 51.) Ergo mechanismus corporis humani debet esse perfectus & suo fine gaudet perfectionis principio. c)

c) Finis seu perfectionis principium humani corporis aliud non est nisi sanitas, qua inflecta corporis inter & animam harmonia persistit.

§. LIII.

Cum omnis causa una eademque absolute talis nequeat diversos effectus producere, (per pr. Rat. suff. §. 1.) sequitur quod effectum suum determinet, ut sit hic, nec alius. Omnis mutatio corporis humani fundatur in ejus structura secundum statum an-

128 Verum universæ Medicinæ Principium

antecedentem & regulas motus (§. 26. & 23. seq.). Ergo structura corporis humani, secundum statum antecedentem & regulas motus, mutationes in se obvias determinat, ut sint hæc, nec aliæ. Verum hanc fundamentum mutationum in structura corporis humani secundum statum antecedentem & regulas motus, diximus mechanisum. (§. 30.). *Ergo mechanisum corporis humani per structuram secundum statum antecedentem & regulas motus determinatur.*

§. LIV.

Structura & mechanisum eundem finem & principium perfectionis tenent. Mechanisum corporis humani, ob certum finem quo gaudet perfectionis principio, (§. 52.) obtinendum, ut sit adæquate determinatus necessum est: (§. 51.) determinatur autem per structuram corporis humani (§. 53.). *Ergo corporis humani structura & ex ipsa resultans mechanisum eundem tenent finem idemque perfectionis principium.*

§. LV.

Corporis humani natura est ejus structura mechanica. Principium quo mechanisum corporis humani determinatur, dicimus ejus naturam. In corpore humano obtinet mechanisum, (§. 30.) eundem determinat corporis humani structura secundum statum antecedentem & regulas motus, (§. 53.) hoc est structura mechanica (§. 28.) *Ergo structura corporis humani mechanica est ejus natura.*

§. LVI.

Quis corporis humani status naturalis & præternaturalis. Structura corporis humani potest esse aliter (*per exper.*). Ergo mutabilis. Ipsa determinat corporis humani mechanisum (§. 53.). Ergo ipse etiam mechanisum est mutabilis. (*per princip. rat. suff. §. 1.*) Cum itaque certam mutabilitatem in ente determinationem dixerimus ejus statum; (§. 25.) certa structuræ corporis humani & per eandem mechanisimi determinatio est corporis humani status. Et quidem si structuræ corporis humani & per eandem corporis humani mechanisimi determinatio cum eorundem fine & perfectionis principio, (§. 54.) existat harmonica, status corporis humani naturalis, sin vero disharmonica, præternaturalis audit. a)

a) Intellecto fine & perfectionis principio mechanisimi corporis humani, (§. 52.) facile intelligitur: quis corporis humani naturalis, quis præternaturalis sit status? prior est, si in corpore humano obtinet sanitas & per eandem inconcussa animæ harmonia; posterior, si sanitas & sic harmonia laboret.

§. LVII.

Nunquam obtinent in corpore humano simul sed alternatim. Cum autem structura corporis humani atque ex eadem determinate resultans mechanisum vel cum proprio perfectionis principio conspirant, vel vero minus, nec datur tertium, (*per experientiam*); duplex tantum corporis humani status est possibilis nimirum naturalis vel præternaturalis (§. 56.). Cum etiam duo status sibi contradictione oppositi in eodem subjecto simul stare nequeant, (*per pr. Contradict.*) hi duo status in homine non simul sed alternatim sunt possibiles: cumque eos constituent structuræ atque ex illa resultantis mechanisimi contraria determi-

natio, ipsa etiam structura & mechanisum vel naturalis vel præternaturalis est.

§. LVIII.

Cum itaque mechanisum corporis humani vel naturalis vel præternaturalis existit, hoc est, vel cum fine & perfectionis principio totius corporis conspirat, vel vero minus: (§. 57.) eundem vero mutationes corporis humani conficiant; (§. 30.) ipsæ etiam vel naturales vel præternaturales existunt. Sunt autem vel vitales vel animales omnes (§. 43.). *Ergo & vitales & animales corporis humani mutationes sunt vel naturales vel præternaturales.*

§. LIX.

Successiva corporis humani sive ejus mutationes diximus esse inter se connexas per causas efficientes, hoc est, unam alterius esse causam efficientem, [§. 13.] easdem mutationes gaudere statu antecedente & consequente ibidem inter se ita connexo, ut antecedens causa consequentis existat. [§. 25.] Discedunt autem in naturales & præternaturales, [§. 58.] Ergo stante Logicorum Canone: quod valet de genere valet & de specie, mutationes corporis humani cum naturales tum præternaturales sunt inter se connexæ per causas efficientes, seque statu antecedenti & consequenti connexo excipiunt. Omnes vero mutationes simul sumtas, eorundem seriem dicimus. *Tota igitur series mutationum vel naturalium b) vel præternaturalium c) est inter se connexa per causas efficientes, gaudetque statu antecedente & consequente connexo.*

- b) e. g. in statu naturali vel sano, ubi ventriculus recte se habet, is bonum assumptum alimentum bene digerit, bilis bona eandem bene subtilizat, corrigit, bene digestus & correctus cibus bonum chylum, bonus chylus bonum sanguinem, bonus sanguis bonam lympham nutritiam, fluidumque nerveum largitur, sicque corpus sanum conservat.
- c) e. g. ubi bilis male se habet & primæ viæ acido nimium sunt obsessæ, ibi chylus indigestus, crudus, semi-acidus & minime temperatus evadit; ubi chylus crudus semi-acidus & minus temperatus, ibi talem sanguinem gignit; ubi sanguis crudus semi-acidus & minus temperatus, ibi particule sulphureæ spirituosæ in sanguine præcipitantur & coagulantur; ubi coagulatio sanguinis adest, ibi exoriri obstructions viscerum possunt; ubi obstructions viscerum exoriuntur, ibi Anarsaca, Cachexia, Ascites, Tympanitis & ipsa Mors generari potest.

§. LX.

Omnes mutationes corporis humani vel naturales, vel præternaturales, cum sint inter se connexæ per causas efficientes, gaudentque statu antecedente & consequente connexo: (§. 59.) eadem autem causa contrarios effectus nequeat producere (*vi pr. contradict. & pr. rationis suff. §. 1.*); sequitur quod mutatio naturalis non possit esse causa & naturalis & præternaturalis effectus, sed naturalis tantum; denique gradu retrogrado, mutatio præternaturalis considerata ut

ut effectus non pendeat a causa naturali mutatione, nec effectus naturalis mutatio descendat a causa præternaturali mutatione. Ergo omnis mutatio naturalis naturalem, præternaturalis vero præternaturalem sui causam desiderat. Cum etiam dixerimus totam mutationum seriem & naturalium & præternaturalium inter se connexam per causas efficientes existere, (§. 59.) ita intelligendum est: *seriem mutationum naturalium seorsim & solam, præternaturalium itidem esse connexam, non vero commixtim.*

§. LXI.

Cujus oppositum posito altero nequit esse, id dicitur hypothetice necessarium: (WOLFFII Ont. §. 302.) sed omnis mutatio corporis humani sive naturalis, sive præternaturalis, est talis, ut oppositum ejus posita ejus causa esse nequeat, siquidem posita causa mutatione naturali præternaturalis mutatio effectus, & posita causa mutatione præternaturali naturalis mutatio ut effectus nequit existere (§. 60.). Ergo omnis corporis humani mutatio, sit naturalis, sit præternaturalis, est hypothetice necessaria. Quatenus hæc necessitas hypothetica fundatur in structura corporis humani mechanica, (§. 28.) mechanismum corporis humani seu ejusdem mutationes determinante, [§. 53.] dicitur necessitas corporis humani mechanica & omnes mutationes ex necessitate mechanica sequi dicuntur.

§. LXII.

Cum tota series mutationum & naturalium & præternaturalium sit inter se connexa per causas efficientes, (§. 59.) nec mutatio naturalis præternaturalem aut præternaturalis naturalem possit producere (§. 60.), sequitur, quod irrumpente in corpus humanum vel una mutatione notabili præternaturali omnes subsequentes mutationes ut ejus effectus præternaturales evadant & brevi tempore tota naturalium series pervertatur, adeoque totum corpus humanum statum præternaturalem induat, & vice versa, reducta mutatione naturali omnes proxime in naturales revertantur. a)

a) v.g. Quod si spasmus eam partem intestinorum occupet, ubi admittunt ductus, Cysticum nempe & Hepaticum, tum-bilis non poterit in ipsa effundi, at regurgitans ad sanguinem icterum gignit. Sanguis biliosus ad quascunque partes advectus ardorem excitat, ardor sitim provocat, ad caput delatus dolores & vertiginem creat; ad summam cutem perductus, eandem flavo tingit colore. Ubi autem jam spasmus ille per medicamenta sedatur & bili via hæctenus occlusa rursus recluditur, icterus remittit, sanguis non redditur amplius impurus, per consequens neque ardorem nec sitim provocat, capitis dolores & vertigo remittunt, cutis naturalem rursus brevi induit habitum.

§. LXIII.

Hæctenus enarratæ atque demonstratæ corporis humani adfectiones habent locum, quatenus corpus hominis machinam esse docuimus, [§. 28.] sunt etiam generales machi-

narum adfectiones [per exper.]; nunc pau-
cis adponamus quæ specialius obtingunt, quatenus ipsum corpus humanum machina existit
Hydraulica. (§. 29.)

§. LXIV.

Posteaquam supra demonstravimus corpus hominis non modo in genere esse machinam, verum etiam in specie hydraulicam; secundum Logicos autem de specie valeat omne id, quod valet de genere, sciendum est, quod corpus hominis omnia ea quæ de ipso ut machina adstruximus, sibi etiam ut machina Hydraulica vindicet. Ita missis nunc omnibus ceteris corporis humani statum sui vel naturalem vel præternaturalem, (§. 56. 57.) patiatum etiam quatenus est machina Hydraulica, quod constat ex structura solido-fluida (§. 29.). Ergo ipsa corporis humani solida ut & fluida gaudent statu vel naturali vel præternaturali, & omnis in utrisque eveniens mutatio vel naturalis vel præternaturalis est.

§. LXV.

Dum omnes corporis humani mutationes & naturales & præternaturales inter se connectantur per causas efficientes, (§. 59.) ob-
tinent autem quatenus corpus hominis est machina Hydraulica, partim in solidis ductuosis & canaliculosis, partim in fluidis; (§. 64.) sequitur mutationes solidorum sive naturales sive præternaturales influere in mutationes fluidorum, & vice versa mutationes fluidorum in solidorum per causas efficientes. Hinc cum mutatio naturalis præternaturalem & præternaturalis naturalem nequeat producere, [§. 60.] exortæ in solidis præternaturales notabiles pervertere naturales fluidorum, b) & vice versa præternaturales notabiles fluidorum immutare naturales solidorum possunt. c)

b) v.g. Tubulosa & cribrosa cutis substantia, e cujus spiraculis copiosissimi tetri vapores exhalant, spasmus, vel a frigore improvide admissio, vel per consensum ob affectas interiores partes, uti fit in febribus & doloribus, patiente, excrementitiæ illæ salino-sulphuræ putridæ sordes in corpus resorptæ, aut febres catarrhales, coryzam ac tussim cient, aut ad intestinorum tunicas delatæ, & bile acriori reddita diarrhæas cum torminibus concitant; aut ad renes & urinarios ductus appulsæ, copiosorem urinæ fluxum efficiunt.

c) v.g. Causa mediata febris catharralis benignæ est serum seu lymphæ acris caustica in tunicis glandulosis subsistens. Hæc causatur in solidis: cutis inborrescentiam, extremorum, imprimis pedum & plantarum refrigerationem, alvi siccitatem, sitim, difficile deglutitionem, stimulum laryngis, ster-
nutationem, pulsus celerem auctum, tussim violentam, &c. &c.

§. LXVI.

Experientia docet subortas in corpore humano mutationes præternaturales tam solida-
rum quam fluidarum partium sæpe tolli & eliminari, in earumque locum succedere naturales sine admotis remediis, in cujus ratione & causam phænomeni paucis inquiramus.

§. LXVII.

Et natu-
ralis &
præterna-
turalis
hypotheti-
ce necessa-
ria.

Quæ ex
necessitate
mechanica
sequi
dicuntur.

Una nota-
bilis præ-
ternatura-
lis totam
natura-
lium se-
riem per-
vertit; &
naturalis
una totam
seriem
corrigit.

Transitus
ad machi-
nam cor-
poris hu-
mani qua-

Corpus
humanum
machina
quatenus
est hy-
draulica;
etiam ge-
nerales
mechani-
cas pati-
tur.

Sic muta-
tiones soli-
dorum
præterna-
turales
fluidorum
naturales,
& vice
versa per-
mutare
possunt.

Mutatio-
nes præ-
ternatura-
les tam
solidorum

quam
fluidorum
sæpe tol-
luntur sine
remediis,
cujus phæ-
nomeni
ratio in-
dagatur;

§. LXVII.

Ratio sua
est in stru-
ctura cor-
poris hu-
mani me-
chanica.

Sit altera corporis humani mutatio naturalis A. altera præternaturalis B. Fundantur omnes corporis humani mutationes seu operationes tam naturales quam præternaturales in structura ejus mechanica (§. 47. 58.). Ergo utraque mutatio & A. & B. fundantur in corporis humani structura mechanica. Sæpius per se evanescit mutatio corporis humani præternaturalis B. & in ejus locum succedit naturalis A. [per exper.]. Ergo vi structuræ corporis humani mechanica per se evanescit B. in ejusque locum succedit A. Sed mutatio præternaturalis naturalem, aut naturalis præternaturalem nequit producere (§. 60.). Ergo mutatio præternaturalis B. non evanescit vi naturalis & succedentis mutationis A. Evanescit tamen sæpius [per exper.]. Ergo mutatio præternaturalis corporis humani evanescit per aliam sui generis præternaturalem.

§. LXVIII.

Sive cor-
poris hu-
mani na-
tura. Ter-
mini: na-
tura cor-
rigitur,
vel seip-
sam cor-
rigit, ex-
plicantur.

Structura corporis humani mechanica est ejus natura: (§. 55.) per structuram mechanicam eliminantur tam solidorum quam fluidorum mutationes præternaturales (§. 67.). Ergo natura corporis humani tollit & eliminat tam solidorum quam fluidorum mutationes præternaturales. Et cum præternaturali mutatione adhuc durante ipsa etiam structura præternaturalis existat, (§. 57.) nunc autem naturalem seriem mutationum introducendo præternaturalem expellat vel sola, vel etiam additis remediis, naturam priori sensu se ipsam juvasse seu correxisse, posteriori sensu ab extra correctam dicimus.

§. LXIX.

Modum
correctio-
nis natu-
ræ specia-
lius alibi
v. g. in
mechani-
cis & a-
natomicis
quæra-
tur.

Modum autem qui & quomodo ipsa natura corporis humani mechanica possit præternaturales ejus mutationes tam in solidis quam fluidis etiam non auxiliata tollere, generalius docent doctrinæ mechanico-hydraulicæ, item regulæ motus, quæ in corpore humano obtinent, (§. 23.) specialius, quod earundem individua-lem in corpore humano applicationem attinet, doctrina anatomica, quo studiosi brevitatis lectorem ablegamus, in sola fundata thesi acquiescentes.

§. LXX.

Quid
morbus,
quando
gravior,
quando
levior?

Seriem mutationum tam solidarum quam fluidarum partium corporis humani simultaneam præternaturalem, quam ipsa corporis humani natura eliminari nequit, dicimus MORBUM, & pro gradu mutationum, vel gravio-rem vel levio-rem. Et solida & fluida patiuntur mutationes præternaturales, (§. 64.) solidorum mutationes influunt in fluidorum, & horum mutationes in solidorum præternaturales (§. 65.). Ergo possibilis est in corpore humano series mutationum solidorum & fluidorum simultanea præternaturalis. Nec semper eandem natura valet expellere (§. 68.). Ergo in corpore humano etiam morbus est possibilis & actu sæpe existit, [per exper.] & cum mutationes diverso se maxime gradu exferant, vel gravior vel levior.

§. LXXI.

Omnis se-
det in Cor-
poris hu-
mani ma-
teria.

Extensum corporis humani dicimus ejus materiem. Solida & fluida corporis humani sunt extensa [per exper.]. Ergo sunt corporis humani materies. Ergo corporis humani materies conficit ejus structuram mechanico-hydraulicam (§. 64.). Quatenus autem mor-

bus, (§. 70.) in structura fundatur atque sua ducit primordia, (§. 28.) eundem in structura sedere dicimus. Ergo omnis morbus sedet in corporis humani materia. Cum etiam omnes mutationes præternaturales a structura naturali ut sui causa nequeant produci: (§. 60.) structuram autem præternaturalem dicamus vitium materiæ; omnis morbus pendet ex vitio materiæ.

§. LXXII.

Diximus supra, fluidorum perennem motum determinari per solida ductuosa & canaliculosa. (§. 64.) Si itaque morbus pendeat a vitio materiæ solidæ, adeoque ille motus fluidorum naturalis præternaturalis evadat, specialiori respectu morbum vitium motus, sin vero tantum in fluidis sedeat, vitium materiæ generaliori tantum respectu, dicimus. Quimos loquendi est Excell. Dni. FR. HOFFMANNI Patroni & Præceptoris mei ad cineres usque devenerandi, Medici omnium Celeberrimi, in sua Therapia rationali.

§. LXXIII.

Laborante materia solida, ejusdem motus aut in universo corpore aut certa tantum parte nimium intensus aut nimium imminutus deprehenditur [per exper.] Prius Spasmus, posterius Atonia dicitur. Ergo morbus qui pendet ex vitio motus solidorum, (§. 72.) est vel spasmodicus, vel atonicus; ille sedantibus, hic roborantibus tollitur.

Quid roborantia & sedantia medicamenta sint & quotuplicia, vide fusius in Therapia Rationali Excell. FR. HOFFMANNI.

§. LXXIV.

Quod materiem corporis humani fluidam attinet, illa peccat aut qualitate, aut quantitate: fluidæ. [per exper.] illa alterantibus, hæc evacuantibus eliminatur.

Quid alterantia & vacuantia medicamenta sint & quotuplicia, pluribus videatur Therapia Exc. Fr. Hoffmanni.

§. LXXV.

Res, cujus viribus natura corporis humani ad sanitatem dirigi potest, medicamentum dicitur. Quodvis ergo Medicamentum alterando mutat corporis humani naturam. Sed omnis mutatio fundatur in structura corporis humani mechanica, (§. 28.) si non qua possibilitatem & existentiam simul, tamen qua possibilitatem, (§. 26.) hoc est, in corpore humano non sunt aliter possibiles nisi mechanice. Ergo medicamentum mutat structuram seu naturam corporis mechanice. Ergo medicamentum in dirigendo morbosam corporis humani naturam ad sanitatem vires exercet mechanicas.

§. LXXVI.

Scientia corporis humani naturam sanam conservandi, morbosam restituendi, dicitur Medicina. Quod continet in se rationem sufficientem, cur corpus hominis aut sanum aut morbosum sit, dicitur Medicinæ principium. Sed omnis morbus sedet in structura corporis humani mechanica, hoc est, ipsa continet in se rationem ejus sufficientem (§. 71.) Ergo continet in se etiam rationem sanitatis corporis humani. Ergo structura mechanica corporis humani est verum Medicinæ Principium. (§. 3.)

TANTUM.

DISSER-

DISSERTATIO VITÆ ANIMALIS CONSIDERATIONEM

THEORETICO-PRACTICAM EXHIBENS.

Primum edita Anno 1731.

I.



ULTA utique argumenta exstant, quæ dum artis nostræ salutaris splendorem atque decus in sublimiorem quendam locum collocant, id efficiunt, ut cum præstantissimis scientiis non sine aliquali audacia de prærogativa certare valeat. Etenim Divinæ Sapientiæ formatricis opus absolutissimum est, quod Medicus ceu unicum laborum suorum objectum contempletur, & cujus ab interitu vindicationem opera consilioque intendit. At vero quam inanis nihilominus fieret omnis licet operosa pro hoc obtinendo sine speculatio, nisi DEUS immortalis corpus humanum machinam voluisset tanto artificio conditam exstructamve, ut amicabili nexu in unum finem conspirantia organa cuncta sibi in ipsis physica quadam & mechanica necessitate motum imprimant, hujusque, quod mirandum, beneficio, singulis fere momenti quod corruptionem ipsis minatur feliciter excutiant. Machinam dico; quicquid enim stupenda mechanico-hydraulica mortalium opera artificiofi continent, id non modo omne in corpore humano animadvertes, verum etiam longe excellentius conditum spectabis, ita ut nullus pateat locus qui vectes, elateres, trochleas, funes, canales, valvulas aliaque oculo curatius lustranti non exhibeat. Quo igitur præstantius est, quod divinam providentiam ubique loquitur, opus, eo accuratiori industria is qui curam ipsius, quousque durat, suscipit, ejus naturam scrutari, atque quid conservationi amicum, quid minus, penitus nosse tenetur. Ego quidem quoties hoc facio, num organorum omnium fabricam egregiam, situm convenientem, motum determinatum, usum ad totius Œconomiae salutem egregie facientem, num quod corporis partes omnes ex una eademque materia [quamvis quod ipsius elementa spectat hinc inde diversimode mixta] id est glutinoso-pingui terrestri coaluerint, mirari debeam, nescio. Hoc equidem assertum paradoxi quid fovere videtur, attamen ex ipsa hominis generatione, nutritione & resolutione veritas ejus evincitur, cui cum ceu basi totus quem meditor labor sit superstruendus, meum erit paucis eandem clariorem efficere.

II.

Intricatam & difficillimam explicatu generationis materiam, quæ viros eruditissimos semper exercuit, juvenis temere aggredere, si eandem penitus evolvere ausus fuisset; veniam tamen facile impetraturus, quando aliqua ad scopum directa huc saltem traxero. Ex ovo generari hominem plurimi

Autorum statuunt, quamvis quoad situm ovarii inter se non conveniant, quod alii extra uterum, alii circa illius cervicem ponunt; posteaquam enim CL. NABOTHUS posteriorem hypothesein produxit [*Diff. de Sterilitate mulierum*] atque haud levibus argumentis stabilire conatus est, non pauci Celeberrimorum virorum ipsi assensum præbuere, quos inter eminentem *Illustr.* HOFFMANNUM [*Med. Syst. Lib. I. Sect. II. Cap. 12.*] nominasse sufficiat. Mitto tamen hæc libenter, neque etiam huic subtiliori controversiæ me immisceo, num ante conceptionem jam futuri hominis rudimenta exstant, quod ex MALPIGHII cicatricula verisimile evadere videtur, [*Conf. ejus Tractat. de ovo incubato*] cujus etiam experimentis nixus hoc cum aliis afferere non dubitat BOHNIUS [*Circ. Anat. Progygn. I.*] Nec moror animalcula a multis asserta; quæ cum spermate per poros dilatatos glandulosæ ovi membranæ intrare contendit BOERHAAVIUS [*Instit. Med. §. 673.*]; nec inquiri in eorum placita, qui animam sibi ipsi ad certos fines construere corpus ceu habitaculum futurum arbitrantur. Sufficit mihi, quod nulli harum hypotheseum vim inferam, quando assero ex ovuli humore glutinoso & albumini ovorum, secundum supra laudatum NABOTHUM [*loc. cit.*] & HEISTERUM [*in Comp. Anat. p. 44.*] docente hoc etiam ipsa autopsy, simillimo, stamina futuri hominis, quocumque demum tempore hoc fiat, sine dubio efformari, augeri, & quamdiu placenta nondum efficta nullus huic cum uteri vasis nexus est, nutrir; non secus ac pullus testis adhuc inclusus a circumfluo liquamine conservatur. Nec alia efformata jam placenta augendo indies foetui accretionis materia, amnii enim liquor quo ipsum conditis jam digestionis officinis per os nutriri experimento probat HEISTERUS [*in notis Comp. Anat. p. 37.*] docente BOHNIO [*l. c. Progygnas. II.*] in gelatinam leni igne est coagulabilis, sanguisque qui per venam umbilicalem ipsi accedit, eo quod lymphaticum succum ejusdem indolis secum vehit, ad ipsius augmentum facit. Atque hæc ipsa lymphæ defæcata, subtilisata, per omnem hominis vitam fluidorum & solidorum defectus resarciendo unicum positivæ ejus conservationis fundamentum est, id quod ex modo quo Natura vulnera glutinat, celeriorque incremento post eorum, quæ lymphæ proventum liberaliter instaurant, crebriorem usum, aliisque phænomenis patescit. His ita deductis, si porro curatius perpendimus illud BOERHAAVII [*Instit. med. §. 443.*] solida a fluidis non nisi quiete, cohæsiōe, figura, differre, sequetur facile corpus omne ex liquidiori mucosa substantia coalitum, etiam quoad solidiores partes iterum in eandem debere posse resolvi, eo facilius quo recentior

recentior est ipsa particularum concretio & coalitio : hincque ratio fluit, cur RUYSCHIO (*Thef. Anat. VI. p. 32.*) oblatis teneriores embryones sub manibus ejus in ejusmodi liquamen abierint. Imo hæc ipsa partium omnium corporis in glutinosam materiem, ne ossibus durioribus quidem exceptis, resolutio, quamvis difficilior, feliciter tamen & in corporibus adutorum succedit. Testes profero Machinam Papinianam, & eum, hac in parte brutorum corpora, humano æquiparare fas sit, carnes eorum juncula gelatinosa largientes, ossa mucidam substantiam coctione suppeditantia, corium glutini conficiendo adhiberi solitum, ut alia taceam. Et hæc quidem simul spectata ad probandam propositionem nostram sufficere arbitror.

III.

Hoc igitur mucido-pingue & glutinosum magma, ex quo omne corpus animale conflatum observatur, ulterius a nobis spectandum est. Actum sæpiissime ageremus, si ejusdem ex ipsa mixtione pendentem ad corruptionem subeundam proclivitatem describeremus fuisse; ad alia potius properantes in transitu ordinis observandi ergo notamus : oleum, terram, & aquam vera illius esse principia; adeoque corporis durationem ex horum cohæensione & miscela pendere non posse. Etenim oleum & aqua omnem unionem respuerent, nisi intercederet terra; quoties igitur adfuerit id, quod hanc recipiat atque exsolvat, ita ut oleosæ moleculæ, ceu præ reliquis activæ, fiant liberiores, toties aderit elementorum resolutio, vel quod idem corruptio. Jam concipe solius atmospheræ, cui corpus expositum esse tenetur, naturam, ætheris quoque in sulphurea corpuscula vim, & videbis ærem humidum simul & calidum in destructione mixtionis animalis maximum exercere imperium, moxque in eadem nullo alio respectu considerata, hoc posito, poni debere bellum intestinum, unionis rupturam, mutuasque partium a se invicem secessiones; ut ita clarum evadat, corpus, si id per se spectetur, minus esse durabile, sed vel singulis momentis ruinæ obnoxium.

IV.

Hæc omnia meditantes sollicitè maximopere miramur, mentem immortalem, absolutæ omnemque indaginem mortalium excedentis perfectionis spiritum, in æternum, uti ipsa divinitus data revelatione edocemur, duraturum, tam fragile, tam caducum, nactum fuisse domicilium. Equidem, si quantum imbecilles hac in parte humani ingenii vires permittunt, ejus operationes solis cogitationibus & ratiocinationibus absolvendas concipimus, hasque non nisi certis subministratis ideis componendas, ad perceptionem harum necessariam sensationem, hujusque iterum ni organum adsit definite ab objecto feriendum, impossibilitatem, probe pensitamus; Mentem vel hoc solo respectu, quam diu in orbe versatur, organis certis instructo corpore carere haud posse, clarum evadere videtur. At nisi audaces nimis & injurii in sapientissimam DEI providentiam evaderemus, quæstio nasceretur, numne illud ex materia magis durabili, & corruptioni per se minus obnoxia, extrui potuerit? Sane quid hic respondendum veniat, nil fere suppetit. Nihilominus tamen, quando præter digitum DEI omnia ita effingentem ut bona existant, animam solo corporis intercessu sentientem, singulos fines ad quos impetrandos hoc, secundum sentientis & cogitantis nutum, diversimode erat movendum, hincque duplici hoc respectu necessariam teneritudinem, & ad motum aptitudinem, cum his quasi connexam mollitiem & flexilem indolem, atque inde fluentem majorem longe, quam corpori-

bus naturalibus solidioris texturæ est, ad ruinam proclivitatem, consideramus; vis hujus dubii, quod prudentioribus doctius agitandum & excutiendum lubentissime relinquo, aliquo modo minimum corrumpere videtur. His igitur suppositis, si verum est conditum corpus esse propter animam, nexumque inter hanc & illud dari arctissimum, ita ut eo destructo aufugere quasi teneatur; si porro verum est, quod anima ex nutu creatoris ad certum tempus existere in orbe debeat, sequitur, corporis conservationem omni modo præstandam fuisse, quæ, quæ ratione eveniat atque stabilietur, sequentibus videbimus.

V.

Adstructa necessitate conservationis in usus mentis immortalis exstructi corporis, ubi illud ex diversis partibus, generatim vero fluidis & solidis conflari spectamus; quæ harum eandem præcipue efflagitent, videndum erit. Utrasque ex iisdem elementis, licet diversa ratione mixtis, coaluisse, ex §. 2. innotuit, ergo in utrasque etiam cadet corruptio. At vero, cum ea non nisi in mutua principiorum a se invicem secessione, & evolutione consistat, cum hæc præsentibus eam ciere valentibus causis, quo laxius elementa inter se cohærent, eo facilius citiusque, quo arctius autem, eo difficilior, ossibus id testantibus, contingat, hincque præsentente humiditate mire promoveatur; facile clarum est, cur fluidorum ad corruptionem subeundam, quam solidorum, major sit proclivitas. Porro quoniam corpus animale ex natura sua ad corruptionem putredinosam maxime inclinatur, putredo autem semper sui est multiplicativa, omnis vero corruptio fluida præ solidioribus citius contaminat, ita ut horum nulla detur, nisi illorum præcesserit; sequitur, si conservatio corporis præstanda est, & ejus ruina avertenda, fluidorum maxime rationem esse habendam.

VI.

Posito igitur in fluidorum integritate, omni conservationis corporis animalis fundamento; quæ ratione hæc absolvatur, atque absolvi possit, ex dictis hætenus haud difficulter intelligemus. Cum igitur res omnis eo redeat, ut avertatur corruptio, cum hæc maxime sit putredinosa; putredinis autem principium, docente id peculiari Diss. *Illustr. Dno PRÆSIDE (De Putredinis doctrina amplissimi in Medicina usus)* unice quærendum sit, in corpusculorum sulphureorum a terreis compagibus liberatione & evolutione: elucescit abunde, putredinem arceri melius certiusque non posse, quam si hæc evolutio quantum fieri potest caveatur, atque hac cautione non obstante nihilominus sensim evolutæ ejusmodi inimicæ moleculæ, ne vitium latius propagent, quam citissime penitus excutiantur & proscribantur. Atque hæc sunt duo magna illa momenta, quibus omnis fluidorum crasis legitima nititur, & unice niti poterat, & quibus adeo bene se habentibus, ipsa solidorum conditio mixtioque facta atque tecta ponebatur. Verum nondum sufficiebant, sed cum indirecte saltem ad durationem corporis faciant, unum adhuc directe magis illam promovens stabilienisque, requirebatur. Scilicet, probe, ne seditionem moverent, custoditis particulis rebellibus, atque etiam sensim evadentibus ejectis prorsus, ipsa animalis Oeconomia debilior reddita, atque continuam hanc jacturam haud sine damno ferens, nihilominus tandem occumberet, nisi congrua fieret amicarum molecularum accessio. Huic ergo momento, non minus quam reliquis erat prospiciendum. Atque ex his consideratis curatius, emergere incipit maximi ponderis

deris veritas, salutem corporis niti egestionem, & ingestionem.

VII.

Accessionem laudabilium & amicarum molecularum, quam summe necessariam innuimus, jam brevibus indagaturi; qua ratione hæc aliunde corpori suppeditari queant, ulteriori meditatione ut assequamur, allaborabimus. Laudabiles eas esse quæ ad refarciendos defectus, seu quod idem est, ad nutritionem præstandam sunt accommodæ, jam innotuit. Quoniam itaque hæc nutritio nil aliud, quam certam appositionem involvere potest, patet hanc feliciter non cessuram, quam si adfuerint corpuscula ejus indolis, ut connubium, cum iis quibus accedere debent, inire facile possint, id est talia, quæ a natura corporis non abludunt. Cum igitur per §. 2. clarum sit, hoc totum effectum esse ex materia pingui, glutinosa, manifestum evadit, & talem requiri ad ejus nutritionem. Jam circumspiciendum erat, quanam corpora naturalia hac foeta existant, ubi utique varia alimentorum nomine venire solita, obveniunt. Non nimium extra oleas vagari animus est, alias fusius ex hoc capite, facileque demonstraremus, non omnibus eduliorum generibus, sæpissime pro solo gulæ oblectamento confectis, alimentorum denominationem convenire. Brevis tamen monemus, ex hac gelatinosæ materiæ majori, minorive præsentia, ejusdemque blandiore vel rudiore indole, salubritatem & insalubritatem alimentorum egregie posse dijudicari. Hinc igitur scimus, cur animale regnum, præ reliquis, hunc finem promoventia multa exhibeat, cur carnes animalium juniores, lac, ova, robur corporis manifeste instaurant, quomodo & vegetabilia multa animalia nutrant, [licet egregie notante CELEB. JUNKERO [*In Conspectu Chemiæ Tab. de Syncrifi & Diacrisi.*] necessum sit, ut antea mucilago eorum ad acidam fermentationem prona, levi transpositione transeat in subtiliorem materiam, magis ad alcalinas volatiles putridas dissolutiones inclinantem, qualis est gelatina animalis.] Cur vinum licet generosissimum, medicamenti potius, quam alimenti nomen promereatur, cur mineralia, lapides, ligna, ad nutritionem plane sint inepta, & alia quam plurima.

VIII.

Alimentorum naturam latius paulisper, quam scopus noster requirere videbatur, exposuimus; nec tamen ea in cassum protulisse putamus, quæ genuinam & proximam nutritionis materiam clarius exponunt. Progredimur jam ulterius, & dum in omnibus fere alimentorum generibus, ad hanc suppeditandam aptas moleculas, aliis crudioribus inertibusque, hinc ad præfixum finem minus idoneis, immerfas deprehendimus; facile etiam colligimus, quod illæ ex his involucris prius extricandæ sint, antequam usibus congruis inservire valeant. Hæc autem evolutio vix melius succedere poterat, quam intima alimentorum omnium in sua veluti principia resolutione, qua fit, ut bona a noxiis, blandiora a rudioribus egregie separantur. Quis autem non videt, adminiculis variis ad hoc negotium absolvendum opus fuisse; atque hinc pendet omnis organorum masticationi, digestioni, chyli elaborationi, separationi, perfectioni, distributioni dicatorum apparatus, totus ad nutritionis finem obtinendum adornatus. Nos brevitati studentes, his rebus non inhæremus, chylum saltem per consuetas migrantem vias, docente illas Anatome, in venam subclaviam comitamur.

IX.

Hic vero dulcis, blandus, miroque candore splens-
Frid. Hoffmanni Oper. Supplem. II.

dens humor, absoluto hoc itinere, novum ingressus, purpureum offendens laticem, totus in illius amplexus ruit, junctusque ei arctissimo connubio, exuto sensim pristino colore, induit hujus naturam, plane aliam novamque exhibet faciem, sanguis visitur, succedentem sibi, eandemque semitam decurrentem succum pari ratione immutaturus. En ergo novum metamorphoseos in œconomia animali obvenientis specimen, novis meditationibus ansam suppeditans! Subeat igitur præeunte Ill. Dno. PRÆSIDE (*in Observ. physico-chym. Lib. II. Obs. 21. p. 210.*) examen sanguis humanus, & sistet nobis elementa, gelatinosum, sulphureum, terreum, aqueum, invicem quidem confusa, sed levi encheirisi seorsim demonstranda. Nos inde ex posterioribus perspicimus illius summam ad corruptionem subeundam proclivitatem; quid enim aliud si genesis spectes sperandum erat? ex priori, ad nutritionis negotium, quod ipsi una cum chylo humore committebatur, aptitudinem; ex omnibus simul spectatis indolem summe heterogeneam. Atque ex hac abunde apparet, a sanguine in se spectato, & durationem & ruinam corporis pendere posse; cum tamen hæc omni ratione sit avertenda, illa quantum fieri potest stabilienda, videndum, qua methodo scopus feliciter impetretur. Impetrabitur autem, si satisfactum fuerit & circa ipsum sanguinem, tribus illis momentis, quibus §. 6. in genere omnem conservationem corporis niti diximus: hoc est, si prohibeatur molecularum activarum salino-sulphurearum, motumque hinc noxium inducere aptarum evolutio, si sui juris factarum promoveatur excretio, si laudabilium in omnibus partibus, ubi defectus adest, fiat appositio.

X.

Quod igitur evolutionem spectat, illa, quomodo prohiberi possit, discemus ex observatione illius status sanguinis, qui eidem præcipue est expositus; quod si igitur possibile fuerit eundem evitare, præpedietur etiam ipsa evolutio. Jam autem experientia edocemur, sanguinem e vena missum quiescentem & sibi relictum, secessionem principiorum, & extricationem particularum sulphurearum, hujusque pedissequam putrilaginem pati citissime, agitatum autem non æque; inde concludimus hanc caveri certissime debere vitiatione continua quietis. Hæc vero contrariam involvit conditionem, uno verbo motum, ergo sanguinis motus continuus erit genuinum contra putredinem remedium, hujus enim beneficio omnia elementa inter se miscebuntur, & mixta servabuntur; ita ut a se invicem exsolvi haud valeant. Porro quoniam quodvis corporis punctum nutritionem sui postulat, quoniam nutritio accessu gelatinosarum molecularum absolvitur, hæc autem sanguini inexistunt; ille, quem continuo movendum diximus, continuo ad omnes extremitates corporis erit movendus. Denique, quia teste experientia, totus hic sanguineus humor, non solum quodocunque consideratus, sordibus noxiis cum ipso etiam chylo allatis scatet; verum etiam quoad laudabiles particulas, ipso motu & calore in falsum & sulphureum liquamen fatiscit, collectæ impuritates, sensim noxiæ futuræ, erunt segregandæ & excernendæ: (*Conf. Illustr. HOFFM. Obs. physico-chymicæ l. 2. obs. 21.*) Cum vero secretio supponat organa secretoria, sanguis ipse inquinamentis refertus, propter dictos supra fines, continuo & ad omnem ambitum corporis dirigendus, simul ad omnia colatoria movendus erit. Solus ergo motus sanguinis sufficit omnibus præstandis, ad durationem corporis quæ requirebantur.

XI.

Et hujus quidem veritatis inventum læti arti nostræ
M salutari

salutari gratulamur, quippe cujus defectus id olim efficiebat, ut omnis antiquior Medicina in multis cæca, in omnibus manca & mutila deprehenderetur. Nos postquam immortalis HARVÆUS, sine dubio primus, felicissimis auspiciis perenne undarum harum purpurearum flumen detexit; ea, quæ olim obscura & intricata, imo impossibilia explicatu videbantur, facilia cognoscimus, & solide perspecta possidemus, meritoque hinc sanguinis circuitum genuinum vitæ principium salutamus. Quanta itaque sit hujus considerationis utilitas, quanta necessitas Medico prudenti incumbat causas hujus phænomeni accuratius nosse, quanta denique necessitati juncta voluptas, id scrutandi curatius, quod infinita ad artem nostram certiore & feliciorem reddendam elargitur, quilibet harum rerum gnarus satis perspiciet. His igitur deliciis allekti, incitatieque, provehamur ulterius, & ex mechanicis in memoriam revocantes, omnem motum, movendi corporis ad mutationem loci aptitudinem, spatium per quod illud possit moveri, & denique vim motricem supponere; hæc omnia, & circa sanguinis motum, nos inventuros, eo confidentius speramus, quo magis de mechanismo corporis humani persuasi sumus, atque convicti.

XII.

Quod itaque spatium primo attinet, quando omnis fluidorum motus, eorundemque definita, & proportionata ad proposita loca directio, melius haud absolvitur, quam si eadem alveis, tubulis, atque canalibus congruæ magnitudinis, vehenda & dirigenda committuntur: ita idem illud artificium in corpore humano præstare voluit Divinus Architectus, ea quidem ratione, ut aliquibus saltem partibus exceptis, reliquæ omnes ex meris vasis diversæ magnitudinis coalitæ appareant. Equidem ubi ad indagandam veritatem ejusmodi asserti, oculorum acies haud sufficit, fidem illud vix ac ne vix quidem inter eruditos etiam inveniret, nisi ubique hodie, & nemini, nisi plane in anatomicis rudi, ignota extarent perpetuo duraturæ Ruyschianæ diligentiae monumenta, vasculosam partium structuram, beneficio subtilioris injectionis, prorsus admirando artificio demonstratam exhibentia. Imo si his jungantur LEWENHOECKII observationes & experimenta, unice microscopiis accuratis debita, atque hæc ipsa oculum, fabricam cera Ruyschiana impletarum partium lustrantem, arment; stupendum hoc paradoxon elegantissimo spectaculo extra controversiam ponitur. Neque aliquid huic veritati detrahet amica illa dissensio, quæ de fabrica viscerum, vel glandulosa, quam post Malpighium hodie adhuc defendit Cel. BOERHAAVE, vel mere vasculosa, quam RUYSCHIUS cum multis quos nactus est asseclis asserit, fuit enata. (Conf. *Opusculum anatomicum de fabrica glandularum, seu epistolæ BOERHAAVE & RUYSCHII de hac materia. Lugd. Bat. 1722.*) Præter ea enim, quæ hujus partes suscipiens commentatus est Cel. HEISTERUS (*In defensione sententiæ suæ, de glandulis. Comp. Anat. p. 226.*) nil amplius, ad nostrum assertum firmandum desideramus, satis gnari, & glandulam sive conglobatam, sive conglomeratam, si fibrosas forte membranas, quibus involvuntur, excipias, nil nisi congeriem esse minutissimorum vasculorum, ductuumve varie saltem convolutorum, implicatorum, distributorum. Sistitur adeoque cuivis, humanum corpus accurate adspicienti, absolutissimæ & omnem humanam artem excedentis perfectionis opus hydraulicum, cujus canales mire inter se connexi, vitales undas prompte per universum Microcosmum deducunt, mutuisque licet di-

versis admodum officiis, ejus integritati inservientes, stupendam digiti DEI potentiam tacite eloquantur.

XIII.

Neque tamen mare hoc purpureum per vasorum omnium alveos volvi, ac undique se diffundere poterat, nisi conditus veluti in centro quodam extaret fons, perenni scaturigine undas evomens, atque easdem appensis canalibus committens. Jam vero ex dictis hactenus patescit, jugem requiri, continuumque fluminis vitalis ad omnia extrema corporis appulsum; nihilominus in ipso corpore certa tantum, & definita existit, & existere potest sanguinis quantitas, hinc clarum fit, impossibilem esse hujus, e fonte suo, continuum effluxum, nisi debita quantitate ad eundem deductus, ipsi iterum infundatur. Exinde discimus, cur cor animalium hydrantisterii officium ac fabricam, quæ multis modis variari potest, monstrante hoc celeberrimo HAMBERGERO (*in Dissertatione de Deo ex inspectione cordis demonstrato.*) nactus fuerit? cur duplex sit in corpore progressivus sanguinis motus? quem utrumque simul spectatum circuli nomine salutamus: cur duplicia dentur vasorum genera? cur arteriæ, cur venæ? Imo, cum priorum beneficio, partes corporis omnes, earumque extrema, latice vitali sint irriganda, rationem assequimur, cur copiosissimæ, cur minutissimæ conditæ fuerint arteriolæ. Cum per has æquabili flumine, sufficienter & continuo circulari debeat sanguis, causa in promptu est, cur opus fuerit capacibus & majoris diametri truncis. Cum is venulis exceptus, versus communem fontem sit deferendus, quam egregie anastomoses vasorum hoc negotium facilius efficiant, clarum evadit. Cum vero sic emergat iterum maximus venularum numerus, sanguisque quantitate congrua simul cordi sit infundendus, perspicitur sufficientis amplitudinis tuborum venosorum necessitas. Et ex eodem fundamento scitur ratio figuræ vasorum conicæ, ut alia jam brevitatis causa prætermittamus.

XIV.

Spatium igitur quod sanguini decurrendum est, viasque oculo fugitivo postquam lustravimus, jam de motrice vi dicturi, rem aggredimur altioris indaginis, & a multis retro seculis diversa ratione explicatam. Imo quis nostra ætate de motuum, & speciatim vitalium corporis humani natura, eorundemque causis, motas controversias ignoraret? Intacta hæc relinqueremus lubentissime, non omnibus probata prolaturi, nisi speciminis nostri ratio aliud suaderet, neque tamen eorum pudet, quæ methodo plane demonstrativa suffulta nos didicisse impense lætatur. Prorsus vero exuto, & abjecto omni præjudicio, ingenuo homine penitus indigno, candide & modeste, quicquid sentimus, exponamus. Omnis scilicet cardo rei in eo vertitur, num motus, & maxime de quibus jam nobis sermo, vitales, a causa metaphysica moraliter & ad fines agente dependeant? aut, num tanquam effectus necessarii causarum mere physicarum & mechanicarum considerandi veniant? Prior sane hypothesis, antiquitate maxime se commendare videtur; quem enim jam a longo tempore asserti archæi, spiritus vitales, animæque motuum præsidēs fugerent? quo ipso etiam factum est, ut nulla materiæ vis motrix, agendique potentia attribueretur, sed potius, ut tanquam mortua inerisque relicta maneret, & ubi motus explicandus erat, spirituale principium in auxilium vocaretur. Primus vero huic sententiæ ob-

viam tandem ivit *Illustris Dnus. PRÆSES*, (*Vid. ejus Dissertationes de corporibus illorumque principiis & affectionibus : de corporum motu ejusque causis : de corporum motu ex gravitate ortis, habitæ anno 1695. quibus addenda ea, quæ de universali agente in corporibus agit & anno 1697. ventilata est.*) quippe qui adhuc ante LEIBNITZIUM, aliosque celeberrimos circa finem superioris sæculi florentes, ac aliter sentientes Physicos & Mathematicos, felici ausu docere & demonstrare incepit, concreatam & inditam esse materiæ, corporibusque vim, & nifum perpetuum, cujus virtute sola motus certi & definiti produci queant. Et sane, si id saltem probe pensites, corporibus inesse gravitatem, seu quod idem nifum versùs terræ centrum, ita certe, ut posito corpore, mox ponatur gravitas; quamvis specifica, hæcque solo tantum intellectu ab eo abstrahi queat; facile concipies, corpus aliquod virtute hac insita premendo, & gravitando, alterum e loco suo exturbaturum sine dubio, nisi hujus resistentia nifui illius sit superior, quo ipso mox observabis motum, nullam vero in toto hoc universo quietem, nisi cogites concurrere corpora, cujus unius nifus cum alterius resistentia servat æquilibrium. Illustrat hoc uberius Statice; quis igitur negaret? elasticum corpus, alius gravitate nifusque, e situ suo ad certum gradum pressum, connata, intrinseca, & ab ipsa connexionione partium constituentium pendente potentia resilire, resiliendoque quicquid occurrit ipso debilius, impellere, protrudere, movere. Quod si igitur demonstrari potest, & corpus humanum ejusmodi viribus motricibus, ipsi propriis, instructum existere, cur ea, quæ vel sensibus obvia sunt, facile negligeremus? cur causas physico-mechanicas, proximas, manifestas, remotis, metaphysicis, intricatis, & sæpe conceptu difficillimis, præferendas duceremus?

XV.

Sit ergo nobis elater fibrarum, eique ortum debens systole, genuinum motuum vitalium, imo vero omnium functionum corporis, principium. Elasticum Physicis dicitur id, quod nifui alius corporis cedit, eo autem cessante aut imminuto, se iterum in pristinam figuram & tensionis gradum restituit. Hanc vero virtutem omnibus esse corporis fibris, musculosis, tendinosisque, uterus excluso foetu sponte se contrahens, abdomen flatibus distentum iisque exclusis subsidens, aliaque phænomena, uno conspectu ab *Illustr. Dno. PRÆSIDE* exhibita (*Med. Syst. l. 1. sect. 1. c. 4. §. 3.*) satis demonstrant, quibus chordas musicorum, manifeste elasticas, ex fibris animalium confectas, accensere fas sit, ut ea jam, quæ pro illustratione hujus rei ex SANTORINO (*de Structura & motu fibræ.*) huc trahi, BAGLIVIQUE (*Tr. de fibra motrice.*) possent, silentes prætereamus. Elastica ergo est quævis fibra, imo ad contractionem sui, testibus ossibus luxatione facta retractis, labiisque vulnerum hiatum relinquentibus, quasi natura sua proclivis. Jam igitur ubi cor examini subjicimus, illud totum ex ejusmodi fibris contextum spectamus, hinc merito conjicimus, si adfuerit impetus, easdem simul omnes, ab omni parte, distendens ad certum gradum, mox æquali vi, contractionem lege elasticitatis fore insecuturam, eamque, quod cedere aptum est, vehementer excussorum, hinc moturam. Ergo clara est cordis vis motrix ipsi essentialis. Quod si vero probe pensitemus, quam excellens mechanismus in structura hujus visceris, & collocatione harum potentialiarum in fibris repositarum, occurrat; quo factum est, ut ipsius virtus mirum quantum augeatur, eandem longe maximam esse jure declarabimus. *Bre-*

Frid. Hoffmanni Oper. Supplem. II.

vibus jam notamus prærogativam illam, qua cordis musculus præ aliis corporis pollet, quippe simplici motu, & sine vectis auxilio, potentiam suam exerens, uti BORELLI (*De motu animalium.*) demonstrationibus edocemur. Nec prætermittimus orificia arteriosa sanguini exitum concedentia, capacitatibus ventriculorum longe minora, appensosque his tubos longiores; quæ omnia quantum valeant ad motum fluidorum fortiolem reddendum, ex hydraulicis discimus. Referimus porro egregiam fibrarum distributionem, helicis, circa conum maxime, figuram æmulantium, qua factum est, ut maximum accederet potentiæ augmentum; cono enim cum impetu versùs basin accedente, vis cordis omnis circa orificia, quibus exire debet sanguis, quasi in centro colligitur, isque hac ratione stupenda vi ejicitur. Tacemus vero, ne nimis prolixi simus, columnas ventriculorum carneas, ceu totidem parvos musculos eximie visceris actioni succurrentes. Tacemus auricularum, valvularumque, mechanicam fabricam, totam circulationis negotio accommodatam, aliaque, si unquam alibi in corporis machina, hic certe notatu dignissima; & pauca quæ adducta sunt, pro demonstranda cordis virtute absoluta longe maxima, sufficere rati.

XVI.

Quoniam vero omne punctum circa motum cordis versatur in impetu fibras ad certum gradum distendente, & hac ratione contractionem, veram actionem, & motricem vim provocante; unde hic accedat, ut eloquamur, non diu hærebimus, cum eundem in gravitate elatereque ipsius sanguinis collocandum esse, non abs re statuamus. De gravitate nemo facile dubitat, elaterem autem egregiis argumentis evincit *Cel. TEICHMEYERUS* (*Diss. de Elatere Sanguinis.*) quæ inter unum sufficit: sanguinem æthere foetum esse: qua veritate posita, (ut ipsius Autoris verbis utamur) jejenum esset, in eo contenti proprietates denegare, præcipue, (id quod nobis adjicere visum est) si adsit, quod ejus actionem juvat, nil vero quod coercet. His ergo præsuppositis, fingamus tantisper cordis ventriculos cum auriculis plane vacuos & quiescentes, ponamus circa faccos Lowerianos venarum cavæ & pulmonalis, auriculasque, colligi quacunque demum ex causa sanguinem. Hic ergo collectus proprio quasi pondere, nulla præsentē resistentia, ruet in ipsas auricularum cavitates, easque undique gravabit atque distendet. Permittent etiam distensionem donec fibræ summum tensionis gradum acquisiverint, in hoc autem constitutæ, renitentur lege elasticitatis, restitutionem in pristinum ex quo dimotæ erant locum affectabunt, cedet sanguis tanquam corpus fluidum imo elasticum, renisum sustinere haud valens, coarctatoque sic quo continebatur spatio, dum premitur undique, impetuosè aliorsum pelletur. Jam autem in venas continuo refluens cruor resistit valide, nihil autem corde tunc laxato, in ventriculis, valvulis simul tricuspidalibus & mitralibus lubentissime ex fabrica sua cedentibus, ergo mox sanguis auricularum, magna vi intrabit cavitates ventriculorum. Commotus sic constrictione auricularum fortiter, motu calidus factus, hinc rarefactus, summeque expansus, quiescentes, & in eo statu ut impetum ferant, constitutas offendit eorum fibras, hinc premit, distendit, intrat libere, donec renitantur, resiliant. Hinc ipse iterum coactus, compressus, qua data porta proflire gestit, exitum vero cavent valvulæ tricuspidales & mitrales, permittunt semilunares, ergo ejicitur in arterias aortam & pulmonalem. Eodem vero quo hoc contingit temporis momento, lege perpetua au-

riculæ colligunt cruorem mox exprimendum, cordisque ventriculis post constrictionem iterum laxatis committendum, a strictis his denuo ulterius propellendum. Atque sic eadem prorsus per omnem vitam scena luditur, beneque cor, notante laudato supra HAMBERGERO, officium hydracontisterii subit, hac saltem differentia quod nullus hic detur embolus, sed ejus vices suscipiat systole.

XVII.

Virtute cordis ita proposita, quam ab elatere fibrarum, aliisque adminiculis, quibus maxime influxum sanguinis coronarii adnumerandum habemus, deductam stitimus, nunc ulterius provehimur. Cum igitur Mechanici, vires motrices absolutas non tantum, sed quammaxime simul molem corporum movendorum, eorundemque resistentias mensurare teneantur; ut, num illæ his superandis sufficiant, sive minus? certum reddatur: nos, vis cordis absoluta (quam cum aliis KEILIIUS (*In Tentam. med. phys.*) calculo assequi conatus est) quanta sit non inquirimus; sed ardua magis, nobis, & si usum infra clariorem futurum spectes, maximi momenti in arte nostra nascitur quaestio: an illius virtus volvendæ per universum corpus sanguinis humorumve moli par sit habenda? atque an adeo ab illius systole sola omnis pendeat circulus? Nos quidem æstimatis gravibus rationibus, negativam sententiam tueri haud veremur; quando enim minimam vasculorum extremorum compagem, quando intricata eorum hinc inde, & tortuosa itinera, quando figuram conicam intuemur, non exigui ponderis argumenta pro nostra parte stantia, nobis invenisse videmur. Accedit adscensus sanguinis venosi, propria sua gravitate deorsum tendentis, difficilis, accedit ejus perennis, in omni venoso vase versus capillares arterias, pressio & gravitatio, quæ fluidi in his contenti exitum & transgressum prohibet atque moratur. Nec illud prætermittendum, arterias, flexiles, non duras, tunicas fuisse nactas: quibus positis, impetus e corde projecti sanguinis facilius prompte cedentia latera earundem distendet, quam resistentias fluidorum omnium vincet, quo ipso autem reddetur languidus, imo extinctus & emortuus. Unum superest observatu reliquis non minus dignum. Alterna est cordis vibratio, ita quidem ut mox agat, mox patiatur hoc viscus, seu quod idem, mox in systole, mox iterum in diastole sit constitutum. Systole itaque non continua est, sed subinde intermittit, systole vero sola, progressivi motus sanguinis per vasa, causa existere potest, adeoque cordis systole sanguinis motum non continuum, sed interruptum & intermittentem subinde, producere saltem posset; continuus vero est nihilominus versus cor refluxus, quod ex sanguine, ex incisa vena æquali flumine profiliante, apparet, & talis etiam necessario requirebatur, hinc patet cor universam sanguinis massam non volvere. Asserto nostro egregie adfupulatur BAGLIVUS (*de fibra motrice c. 7. p. 308.*) cor parvum membrum, tantum impetum sanguini imprimere non posse contendens. Melius vero BORELLI suffragium (*de motu animalium Part. II. Prop. 72.*) quippe qui eleganter & solide demonstrat, vim motivam absolutam, cordis muscolum constringentem, ad totalem vim, qua sanguis in arteriis expulsiōni resistit, eandem proportionem habere quam I. ad LX. sive resistentiam sexagecuplo majorem esse viribus motricibus cordis.

XVIII.

Opus ergo erit, ut de causis motus progressivi sanguinis solliciti, spectata cordis insufficientia, alibi motivas potentias, suffulcientes illud, coadjuvantisque,

conquiramus. Nec ab hoc viscere longius recedendi necessitatem nobis videbimus impositam, imo potius ingentem elateris vim recenti tenentes memoria, latera vicinarum, & ex ejus ventribus prodeuntium arteriarum, fibris validioribus instructa, oculis usurpare vix possumus, quin extemplo nobis nascatur meditatio, & has sine dubio insita virtute circulum fore instauraturas, & promoturas. Et quid multis? quis negabit easdem hic motuum vigere leges, stricto corde protrusum sanguinem distendere arterias, hincque ab ipsa distensione, proritari debere contractionem per omne earum systema, elateri fibrarum parem, moverique sic vitalem purpuram fortiter, libere, perpetuo, ad ipsa usque venularum principia. En igitur rem primo intuitu difficilem, hujus mechanisimi beneficio feliciter succedentem, nullo spiritali egentem coadjutorio, sed æterna elasticitatis lege necessario productam. Quot ergo numeraveris arteriosos villos contractiles, tot videbis vectes parvulos, potentiis suis cordis virtuti famulantes. Atque hætenus dicta, si attenta mente volvas revolvæque, rationem reddes sufficientem & facilem, cur datis canalibus corporis humani mere passivis circulus sit impossibilis? Cur posita elasticitate, conformatione, connexione auricularum, ventriculorum, & arteriarum positoque ordinario & succedaneo sanguinis per has vias itinere, motus constrictorii & dilatatorii auricularum & arteriarum physica necessitate sint synchroni ventriculorum & auricularum, æque ac ventriculorum & arteriarum achroni. Cur uno ex his organis expanso, aut constricto nimis, mox reliquorum turbetur, cessetque functio? Quomodo diastoles causa sit systole, quomodo systoles diastole? Cur una non possit concipi sine altera, & cur ad humorum circuitum requirantur ambæ? Cur in emortuo & languido corde, si possibile fuerit unicam restituere systolen, ad tempus aliquod excitetur antiquum motuum schema? Cur data sanguinis rarefactione, & expansione definita, mox detur citatior cordis motus, & pulsus fortior? Cur cordis nimia oppletio, depletio, strictura, generet syncopen &c. Sed nunc in eam, ex qua digressi paululum fuimus, redeamus viam.

XIX.

Quem in arteriosas usque extremitates comitatus sumus, moras adhuc ibi necit sanguis, a nobis nunc per vastum illud venosum systema, ad cordis thalamum, laborioso ut videtur itinere deducendus. Duæ sunt inter multas difficultates, facilem omnis negotii successum maxime, & præ reliquis, impediētes. Unam intelliges, si cogitare volueris hydraulicam legem: augmentum celeritatis & tarditatis, in motu fluidorum per canales, se habere, ut se habet diametri ipsius canalis decrementum & incrementum; paucis: minori reddito diametro, celeriores reddi fluidi cursum, & contra. Jam si probe pensites conicam vasorum figuram, animadvertes ex allegata lege, flumen arteriosus sanguinis successive fieri debere celerius, venosi tardius, adeoque inter affluxum ad partes, & refluxum ab iisdem, nullam hoc respectu dari proportionem; quam tamen summe necessariam §. 17. innuimus. Altera difficultas nititur fluidorum, seu omnium corporum gravium, descensione facili, ascensu difficili. Hoc animo tenens, observa vasorum in corpore directiones, & invenies raro adscendere arterias, venas autem maximam partem; hinc colliges motum fluidorum, hoc solo intuitu, in illis faciliorem multo, quam in his. Accedit validus impulsus in arteriarum principio, quo venæ plane carent; accedunt harum debiliores tunice; ut aliam mittam. Hoc igitur qui meditatur, perpendendo

dendo simul necessitatem motus æquabilis, inter sanguinem arteriosum, & venosum, hunc impossibilem fore facile prævidebit, nisi venæ instruantur peculiari quodam mechanismo, aliquibusque iterum præ arteriis gaudeant prærogativis. Varia vero hic consideranda, quæ simul in unum finem conspirantia, feliciter expediendo negotio sufficiunt. Primo quidem non sine insigni usu, anastomosi arteriis junctæ sunt venæ, id quod in plurimis partibus satis manifestum, VIEUSSENI experimentis [*Vide ejusdem novum vasorum systema*], RUYSCHII injectionibus, [*Vide ejus Opera ubique fere*] & HEISTERI laboribus, satis comprobatur; sic enim utrasque ceu tubos recurvos communicantes, motuique fluidorum hac ratione accommodos, considerare fas est. Egrege postea, ne semel superiora versus moti sanguinis portio pondere suo descenderet, valvulis, a FABRICIO ab AQUAPENDENTE [*In Operibus anatomicis & physiologicis*] primo descriptis & depictis, cautum est. Adjacent præterea plurimis venis arteriæ sociæ, pulsuque valido & perenni illas comprimendo, contentum in eis sanguinem, per valvularum constrictionem retrogredi haud valentem, in capaciores ramos urgent. Memoratu insuper dignæ, a muscutorum venas ambientium fibris agentibus pendentes compressiones; quæ demonstrante BORELLO [*de motu animalium Part. II. Prop. 33.*] per valvularum machinam, duplo velociori motu, sanguinem versus cor protrudunt, ac ipse futurus erat, si nullæ darentur valvulæ. Nec omittendum, venas in corpore, & numero, & capacitate multum superare arterias, atque sic, dum duplo fere major semper in illis circulatur sanguinis portio, tarditatem fluxus copia compensat. Forfan denique & huc facit RUDIGERI Mechanismus, peculiari dissertatione [*de regressu sanguinis per venas mechanico*] expostus, ubi post peractam systolen ventriculorum & auricularum cordis, propter depletionem harum cavitatum, facto si non vacuo, spatio tamen rariore saltem materia ætherea pleno, incumbentem aërem, in venoso sanguine detentum, sublato æquilibrio, versus id vacuum ruere, nitique, & fluidum cui inhæret secum abripere, & ad cor movere asseverat. Concurrunt igitur ad unum effectum causæ plures, eo magis vero necessariae, quo magis omnis venosi sanguinis refluxus difficultatibus pressus videbatur.

X X.

Tria in superioribus, speciatimque §. XI. supposuimus, sine quibus nullus motus concipi potest, atque in præsentia ad circuitum applicavimus; spatium nempe, vim motricem, & corporis movendi ad mutationem loci aptitudinem. De prioribus aliqua sumus elocuti, ultimum restat, uno verbo sanguinis mobilitas, tacta tamen jam aliquantisper. Systole causa est motus sanguinis per hætenus dicta, nulla vero datur systole sine prævia diastole, hæc vero ab influente cruore pendere debet; ergo clarum fit sanguinem systoles vi non posse moveri, nisi is gaudeat debita vi expansiva, seu spiritusascentia, pro priortanda diastole causa systoles. En ergo primum sanguinis movendi requisitum! Porro motus sanguinis progressivus succedit per canales definito quodam spatio præditos, ergo opus est, ut ejus quantitas illorum capacitati apte respondeat. Impetratur autem hæc quantitas legitima, non obstante continuo fere novi sanguinis, mediante chylo, accessu nihilominus; per §. X. enim, ille, qui circulabatur antea, sensim resolvitur in serum excrementitium, per colatoria ejiciendum, ergo succedere novus valet, sine æquilibrii inter solida & fluida cessatione. Denique

Frid. Hoffmanni Oper. Supplem. II.

sanguineus humor penetrare tenetur in exigui admodum diametri tubulos, hinc necessum, ut ejus particulæ hunc magnitudine non excedant; paucis, ut ipse gaudeat jussu gradu fluiditatis, quæ obtinebitur globulorum purpureorum parvitate, eorundemque per interpositionem sufficientem serosarum molecularum, motumque continuum, prohibita coactione. Jam vero arteriosus cruor ad organa motus colatoria, jacturam facit serosarum partium, ideoque transfusus in venas his erit ortus, movebitur etiam in his tardius, ergo aderit hic globulorum rubicundorum cohæsiō major, seu quod idem ad spissitudinem preclivitas, hincque nisi hæc removeantur, novum ingressus circuitum, ad introitum facilem in vasa minora erit ineptus. Removebitur autem spissitudo venosi sanguinis, accessione humidæ, & cohæsiōis resolutione: inde discimus quam provido consilio factum sit, quod vasa lymphatica multa, laticem quem vehunt, venosis vasis tradere teneantur, & quod sanguis novo itineri destinatus, per pulmones antea transprimatur, ita ut respirationis beneficio, cujus considerationem uberiori brevitate causa mittere cogimur, floridior, rariorque ad cor redeat; binis enim his redit ei pristinus fluor, & cum eo ad novum circuitum aptitudo. Atque sic ex his simul consideratis patet, mobilitatem sanguinis supponere spiritusascentiam debitam, quantitatem justam, & congruam fluiditatem, quæ omnia, æque ac modum quo impetantur, jam perspeximus.

X X I.

Igitur, quantum limites quibus circumscriptum esse solet specimen inaugurale permittunt, circuitum sanguinis perennem, per innumeros canales atque mæandros, paulisper delineavimus; atque ejus causas & leges ex manifestis principiis deducere fuimus conati. Jam ergo cognitis his, effectus & usus circuli, eaque quæ supra in genere saltem tradi poterant, speciatim nutritionis, & secretionum omnium, unice a differente diametro tubulorum secretoriorum, situ organi colatorii, illius remotione a corde majori minorive, vasorum directione aliisque mechanicis circumstantiis deducendarum historiam, clariorem multo reddere, tradereque facili negotio possemus. Nolumus tamen his, ob ea quæ adhuc exponere meditamur, immorari diutius; sed potius, cum hætenus elateri & robori fibrarum, hincque fluenti earum actioni, omnes functiones adscripserimus, de eodem aliqua adhuc proferamus in medium. Definitam quandam partium constitutarum, & singularem cohæsiōem, ad elaterem corpori conciliandum, necessariam esse, Physici exponunt; ideoque & ab hac fibrarum elasticitatem deducendam esse, nullum est dubium. Nec tamen ubi de harum potentiis loquimur, in his acquiescere nos sinunt, attentione accuratiori digna, quæ circa nervos, de quibus hætenus nil retulimus, occurrunt phænomena. Quis enim ligato phrenico tremulum diaphragma, crurali stupidum crus, laxata ligatura stuporem & tremorem subito ablatum, abscissis vero utrisque, abolitionem motus plenariam, perspicimus, hæc talia facile & oscitanter negligeret? imo potius, quis non exinde summo jure inferret? esse necessario debere in nervis, quodcunque demum illud fuerit, aliquid, quod fibrarum motum instaurat, juvat, minuit, impedit. Jam ego quidem non ignoro, non obstante summorum nostri ævi Anatomicorum infesta industria, qua universum corpus attentis, imo armatis oculis pervestigando, singularum partium fabricam inquirere penitus conantur; nihilominus nervorum principia proxima, structuram, differentias,

aliaque quæ circa eosdem exponenda forent, intricata hucusque, & satis difficilia permansisse. At enim vero nihil proinde eorum præstantiæ decedit, non proinde corruunt omnes effectus, qui ab eorum integritate expectandi erant; quamvis contenti in subtili hac materia esse debeamus, si ea in summo probabilitatis gradu collocata viderimus, quæ sensus quidem fugiunt, attamen ratione percipi possunt. Dicta hæc sunt de cavitare nervorum, ac de fluido, quod in illis circulari celeberrimi Medici contendunt, cujus existentiam sat validis rationibus stabilire, *Ill. Dnus. PRÆSES*, *BERGERUS* atque *BOERHAAVIUS* conati sunt. Etenim sive immensam illam vasorum, cera Ruyfchiana egregie demonstrandorum copiam, quibus cortex cerebri vastus fatis, unice constat, sanguinique huc delati maximam molem, sane ad nutritionem partis haud necessariam, consideres; sive cerebri ipsius, cum aliis organis colatoriis convenientiam spectes; (nihil enim impedit, quo minus medullarem substantiam esse propaginem ultimam arteriolarum corticis afferamus) sive demum cogites, ferri ad caput per carotides & vertebrales arterias, novo accessu chyloli humoris fluidum, vixque e corde, cujus virtute subactus fuerat exaltatusque, egredientem sanguinem; semper tibi si liber a præjudiciis fueris, nascetur fides, secerni intra cerebrum liquidum quoddam, illudque ob ea quæ monuimus, non nisi subtile atque activum existere posse. Quando ergo fibrillæ medullofæ, in fasciculos collectæ, duraque & pia matre involutæ, nervos sistunt; quando hi in minutissimas extremitates distributi, ad omnes fibrosas partes exporriguntur; imo quando ad *BOERHAAVII* (*Institut. med. §. 395.*) mentem, fibræ musculosæ omnes, meræ sunt propagines nervorum, clarum evadit, succum in cerebro secretum, posse derivari ad omnes fibras, hasque in statu naturali eodem plenas atque turgidas existere debere. Cum vero is necessario debeat esse activus, non inconcinne, iisdem robur & energiam largiri credetur.

XXII.

De influxu liquidi nervorum pauca attulimus, nunc influxus perennis causa investiganda est. Quemadmodum igitur a robore cordis & arteriarum, undique per corpus diffusis, atque hac lege organa colatoria singula alluens sanguis, id efficit, ut in ultimis arteriolarum finibus, in secretorios tubulos degenerantibus, filtrentur, & separentur, imo promoveantur, & protrudantur per hos, humores certi; ita etiam cerebri medullosa substantia, propago corticalis, secretionem tenuissimi fluidi non tantum, sed & motum illius, debet impulsui illarum arteriarum, ex quibus cortex totus conflatus visitur; qui tamen motus erit placidus atque tranquillus, secundum naturam, ob crassiorem tunicam musculosam, ante ingressum in capitis osseam capsam, ab arteriis abjectam & depositam. Imo vero, quid obstat, quo minus fibrosam duræ meningis fabricam, a *VIEUSSENIO*, (*Neurograph. l. I. c. 2.*) melius a *PACCHIONIO* detectam huc trahamus. Sane posterior, primus, quantum novimus existit, qui motum duræ meningis accuratius investigare & describere conatus est (*In tractatu de duræ meningis fabrica & usu.*) Mox arripuit inventum novum, qui ubique fere ad illius experimenta provocat, amicus & familiaris *BAGLIVUS*; atque novum systema medicum, vix tamen omnibus numeris absolutum, condens, meningem duram, continuo systolizare, & diastolizare affeveravit. Quamvis vero omnia, quæ de dura matre, ejusque usu, commentatus est *BAGLIVUS*, communi suffragio ab eruditis adsumpta non fuerint; nihilominus tamen non desunt Medici maxime celebres,

qui systolen ejus & diastolen rationi non contrariam credunt, imo ad multos etiam morbosos effectus explicandos, egregie facere contendunt, quos inter *Illustr. Dnus. PRÆSES* eminet (*Med. Syst. T. I. Lib. I. Sect. III. cap. 1. & ante Baglivum, jam Malpighius epilepsia sedem in dura matre posuit & ejus motu turbato. Vid. ejus Consilia de Epilepsia.*) Attamen nos etiam non latet, dari viros eruditissimos, motum hunc plane vocantes in dubium. Equidem moveri duram meningem, ut experimenta *BAGLIVI* in brutis instituta taceam, probat notabilis ille fracturæ cranii casus, quem *SALZMANNUS* peculiari dissertatione (*de mira cranii fractura*) descripsit, ubi quidem factum, ut ablata cranii parte, motus vel manibus palpari potuerit. At vero talem motum non duræ matri proprie deberi, sed arteriis tantum per eandem repentibus, *BERGERUS* (*diff. de Vita & Morte §. 12.*) statuit, systolenque hujus omnem, plane inter figmenta ponit *HEISTERUS* (*in corollariis, diff. de Animi defectione, annexis.*) Imo sunt qui conceptu prorsus impossibilem declarant, cum dura meninx cranio ut plurimum, ad eorum mentem, firmiter adnata invenitur. Nos contrarias has hypothesas probe perpendentes, largimur facile arteriarum motum, observavimus etiam ipsimet aliquot vicibus, meningem duram futuris cranii firmiter adnatam, non vero toti, aut saltem hinc inde aliquot filamentis. Quapropter ubi fibrosa ejus structura manifesta est, fibra vero omnis in corpore vivo, non mortua est, sed agit; non dubitabimus asserere, duram matrem utique gaudere debere fibrarum motu, sed placido admodum, & forsan cum intestinorum peristaltico comparando. Hincque statuemus, ipsam moderari succi nervosi flumen, atque sic quoniam omnes nervos comitatur, imo omnium membranarum est principium, cum toto systemate nervo, motibusque inde pendentibus, maximum & arduissimum alere consensum.

XXIII.

Sufficiant nunc ea quæ diximus, pro theoretica vitæ consideratione qualicunque; ex qua quidem, prono alveo fluere veram ejus descriptionem arbitramur, quod nempe vita omnis in perpetuo motu, a continua fluidorum & solidorum actione pendente, consistat, quibus demum utrisque rite se habentibus, duratio corporis, & conservatio a putredinosa corruptione, impetratur. Atque cum hæc theoria sit simplex, facilis, perspicua, relictis remotis, proximas causas exhibens, ex ipsa corporis natura desumpta, aliisque requisitis instructa, quæ ad verum demonstrandi in Medicina principium ab *Illustr. HOFFMANNO* (*In Prolegomenis Med. Syst. cap. VIII.*) desiderantur; non dubitabimus etiam ex eadem aliqua elicere, atque nonnullis momentis, quomodo ex hac, tam Pathologiæ, quam Praxeos felices fundamenta desumantur, commonstrare. Missis igitur, postquam felici omine calidum innatum semet ipsum consumsit, humidum radicale exaruit, temperies quatuor humorum exolevit, Archæus licet excandescens occubuit, spirituum turmæ fuere profligatæ, & flammula cordis extincta atque emortua. Missis inquam, his & similis fursuris hypothesibus, verborumque monstis, hanc sobriam & demonstrativam vitæ theoriā solam amplectimur, certa spe freti, fore, ut hujus ope, certiorē & solidiorem Medicinam addidicisse, nos nunquam poeniteat.

XXIV.

Ubi igitur ad usum nostræ theoriæ in praxi accedimus, ante omnia, ex legibus mechanicis sanguinis

circulantis, genuinam pulsum doctrinam depromimus atque explicamus. Motus species pulsus est, cum igitur motus omnis in genere, uti §. II. jam annotavimus, supponat vim motricem, corpus movendum, atque spatium, & pulsus sine dubio hæc supponet; imo cum in his absolvatur ipsa essentia motus, absolvetur etiam in iis essentia pulsus, adeo quidem, ut reliqua quæ de pulsu prædicari possunt, non nisi pro accidentibus habenda sint. Si igitur motrix vis fuerit valentior, erit motus vehemens; si languidior, debilis; indeque etiam si systole cordis futura est valentior, erit pulsus vehemens, si languidior, pulsus debilis. Si corpus movendum mole sit magnum, motus ipse fiet magnus; si parvum, parvus; adeoque si magna quantitas sanguinis simul e corde projiciatur, promoveaturque in arterias, eveniet pulsus magnus; si autem minor portio vi systoles cordis arterias intraverit, emerget pulsus parvus. Denique spatii intuitu, si movendum corpus illud breviori tempore emetiatur, erit motus celer; quando autem idem spatium longiori intervallo decurrit, motus evadet tardus, atque eadem prorsus ratione nascentur pulsus celer, & pulsus tardus. Hæ igitur tantum veræ dantur motuum, ergo & pulsum species, reliquæque omnes ad essentiam rei non spectant, quorum etiam inter alias frequens pulsus referendus. Quoniam ergo vehemens & debilis pulsus debetur vi motrici vehementi vel debili, hanc vero vel vivida vel languida diastole necessario insequi debet, quælibet harum digito exploranti pulsum vel vehementem vel debilem demonstrabit. Porro quoniam magnus & parvus debetur magnæ & parvæ quantitati simul projecti sanguinis e corde, sanguis vero projectus ciet distensionem arteriæ, hæc autem pro quantitate ipsius sanguinis eam efficientis gradu differre debet, ex singula etiam diastole magna colligendus erit pulsus magnus, ex parva parvus. Superest diagnosi celeris & tardi pulsus. Celer sane, quia unius ictus celeritas non potest dignosci, ex uno etiam ictu non poterit dijudicari, celeritas vero pulsus involvit sanguinem citius seu breviori tempore iter definitum quoddam absolventem, citior autem hæc circulatio debetur citatoribus vibrationibus cordis, sed citiores vibrationes cordis efficiunt, intra certum temporis intervallum, sæpius sibi succedentes distensiones arteriarum, seu quod idem, frequentiores diastoles; atque exinde clarissime patet pulsum celerem non nisi ex ictuum frequentia dignosci. Cum igitur frequens non possit existere sine celeri, sed potius ubi frequens adest, celer necessario præsupponatur, fundamentum in promptu est, ex quo *Illustr. Dnus. PRÆSES* in praxi celerem & frequentem, pro uno eodemque haberi posse asseveravit, quamvis nullibi neget, mente celerem & frequentem seorsim concipi, imo etiam in motu sibi non semper succedaneo, motum celerem & frequentem distingui posse. Sed in motu continuo semper, uti circulus est, succedentibus sibi sine remissione diastolibus, atque ubi non mens, sed digitus distinguere debet, celeritas non seorsim explorari, sed ex sola frequentia ictuum dignosci potest. Eadem etiam necessitate tardidatem pulsus, sola demonstrabit ictuum raritas. (*Conf. de hac materia Illustr. HOFFMANNI diss. de salubritate febrium it. de theoria pulsum, & Med. Syst. Tom. III. Sect. I. c. II. &c.*)

XXV.

Latissimus jam nobis panderetur campus, si eundo per potiora saltem artis nostræ capita, probatum dare per chartæ angustiam possemus, quam multa inibi reperiantur, abstrusa admodum & intricata visa, facili tamen negotio ex iis quæ præmissimus circuli le-

gibus, quibus omnis Medicina rationalis niti debet, intelligenda; quibus difficultatibus, cum etiam merito arduam aliquantisper de temperamentis doctrinam accensendam putemus, de his pauca quædam exponamus. Sane antiquorum quatuor humores cardinales præter verba nil involvunt, neque etiam adhuc inter multos receptæ, de differentibus fluidorum corporis crasibus, opiniones rem exhauriunt; hæ etenim multis vicibus immutantur, adeoque etiam infinitis mutationibus subiecta esse deberent hominum temperamenta, reclamante tamen experientia. Melius sine dubio ex nostris principiis succedet explicatio, uberiolemque hinc, & pathologicis, & practicis respectibus fructum largietur; ita quidem, ut ii etiam, qui risu hanc materiam excipiunt & pro inani penitus habent, de veritate rei convicti, nil quod opponant habituri sint. Scilicet, a jugi & continuo humorum omnium per corpus circulo, omnes functiones pendere manifestum est, motus autem circulatorius supponit elaterem fibrarum, vasa &c. Concipe nunc duo distincta corpora, atque in uno elaterem hunc majorem, in altero minorem, & mox intelliges, necessario circulum insequi debere in hoc tardiorum & debiliorem, in illo celeriorum ac fortiorum. Finge porro differentia, intuitu diametri, directionis, numeri, vasa; & extemplo assequi poteris, diversam modificationem circuli, variantes secretiones & excretiones, variantemque ut per totum corpus, ita & per cerebrum, ejusque meninges, sanguinis transitum. Hoc posito, variabit liquidi nervosi secretio, indoles, energia, motus; ergo variabunt omnia quæ exinde derivanda. Imo phrenitici, maniacy, melancholici, ebrii, te docebunt, mutato circuitu sanguinis per cerebrum, mutari mox inclinationes mentis, mores, affectus, ingenii vires, judicii aciem, indeque ex his omnibus desumes fundamentum constans, explicandi diversa temperamenta hominum, reddesque facile rationem, cur eadem aëre, victu, motu corporis, quiete, somno, ætate, vitæ genere, morbis, mutari possint, & mutantur.

XXVI.

Atque iisdem circuli humorum legibus, quippe a quo penitus vita pendet, unice tantum inniti possunt omnia illa præcepta, quæ ad sanitatis conservationem obtinendam, tradi ab auctoribus solent. Egredia sane sunt ea monumenta, quæ a magno HIPPOCRATE, CELSO aliisque artis nostræ Patribus posteritati fuere tradita; at vero si dicendum quod res est; magis ex repetita experientia, accurataque observatione, quam solidis & inconcussis rationibus enata: id quod quidem, nisi vehementer fallimur, uti de omnibus Veterum laboribus, ita & de his dicendum putamus. Neque etiam plura jure nostro ab iis, qui Physices genuinæ adminiculis, & maxime corporis humani, genuinæque formalitatis vitæ notitia, plane destituebantur, desiderare atque expectare possumus. Felicius vero nunc, ubi a circuitu humorum, iisque quæ huic famulantur, omnes functiones deducendas esse novimus; sanitatem non nisi in libero, constanti, & jucundo functionum omnium exercitio constare perspicuum habemus; ubi ex his recte concludere didicimus, quo liberior & æquabilior fuerit circulus, eo firmiorem & constantiorem sanitatem futuram; ubi naturam indolemque rerum non naturalium exploratam possidemus, atque horum usum varium, varia ratione afficere & alterare corpus scimus; sanitatis negotium perspicuemus. Felicius inquam, ex consideratione atque scientia, quomodo singulæ res non naturales operentur in solida & fluida corporis, com-

parata & combinata cum ipsis functionibus, earumque legibus, ipsaque individuorum & circumstantiarum varietate, facileque a priori determinabimus, quis rerum naturalium usus sanitatem efficiat, conservet, augeat, quis lædat, labefactet, imo penitus tollat. His nixi fundamentis, hisque instructi præsiidiis, intelligemus aëris frigidi, calidi, humidi, sicci, putridi, subito mutati, noxas; temperati, puri, sereni, campestris, montani, ruralis, commoda. Hinc eruemus alimentorum simplicissimorum præstantiam: multorum, variorum simul assumptorum, nocivam indolem. Hinc ex natura sanguinis, ejusque ad motum requisitis perspicimus, cur defectus & copia potius noceat? cur spirituosior non nisi modica quantitate concedendus? cur tenuior saturationi præferendus? cur frigidus adeo nocivus & quando præcipue? cur calidior, quando, & quomodo salubris? cur aqua limpida, levis, continuo voluta cursu, jure dicatur medicina universalis? Idem principium demonstrabit nobis motus corporis, vecturæ, equitationis &c. usus magnos, ipsamque stabilientes longævitatē; otiosæ & desidiosæ quietis damna, vigilias absumentes & exhaustientes corporis vires, modum legitimum in capiēdo somno. Ex eodem fundamento discemus, quā ratione animus sit sanitatis & morborum faber? quomodo pathematibus distractus agitatufque illi insidiatur? quam misere diuturnus & anxius mœror depascendo solidorum vires, circulantefque morando humores, affligat corpus? quam aperte terroris in circulum actio contrarietur vi vitæ, quam periculosos, brevis ille furor ira, intendendo impetuosē sanguinis flumen, progignat affectus? quomodo e contra mens sana religionis & philosophiæ præceptis imbuta, firma, nec fluctuans unquam, sanum etiam illud cui inhabitat corpus reddat, hujusque integritatem promoveat atque stabiliat? Sic igitur omnibus his doctrinis nixi, unam formabimus pro conservanda sanitate indicationem: circulum æqualem & placidum conservandum esse, suffecturam certo, si modo ætati, temperamento, sexui, idiosyncrasiæ &c. cujusvis subjecti, rite & prudenter accommodetur.

XXVII.

De sanitate plura exponere tempus vetat, jam ergo ad morborum genesin. Sanitas per hæcenus dicta, dependet a liberis atque haud interruptis secretionibus & excretionibus, reliquisque functionibus omnibus salvis. Sanus enim dicitur is, cui actiones homini propriæ, cum facilitate, oblectamento, & quadam constantia exercentur: [*Boerhaave instit. med. §. I.*] Tales autem quando concipiuntur mente, supponunt liberum, facilem, & æquabilem humorum circuitum; ergo a libero facili & æquabili humorum circuitu pendebit sanitas. Cum igitur quivis non sanus laborare debeat morbo, morbus involvet necessario statum sanitati contrarium & oppositum; erit igitur is omnis ea corporis humani conditio, quæ læsionem actionum vitalium, naturalium, & animalium comprehendit. Uti vero sanitas supponebat circulum humorum integrum, ita morbus status sanitati contrarius, supponet causas contrarias; ergo circulum difficilem, inæqualem, turbatum. Eadem igitur necessitate qua sanitas ponebatur posito illo, ponetur morbus posito hoc, & quemadmodum impossibile erat existere sanitatem sine illo, ita impossibile, existere morbum sine hoc, imo uti omne id quod ansam dabit illi, erat causa sanitatis, ita omne quod huic, erit causa morbi. Circuitus vero humorum, tam diu ordinatus est & legitimus, quam diu sibi respondent in omnibus partibus systole & diastole, hinc quam diu præsto sunt ea quæ duplicem hunc motum effi-

ciunt; mox vero interruptus & inordinatus, quando systole & diastole ab æquabilitate recedunt, uniusque actio alterius reactioni non respondet. Duplex autem vitium saltem est possibile, vel aucta nimis systole, quæ comprehendit minutam nimis diastolen, vel aucta nimis diastole, quæ involvit minutam nimis systolen; utrunque vero efficiet circulum inæqualem, hinc etiam adversam valetudinem. Atque ex his spectatis, & curatius perpenfis, evincitur: morborum formalitatem magis in solidorum motu vitiatō, quam in fluidorum crasibus perversis quaerendam esse. Porro cum symptoma morbi essentielle designet omne incommodum præternaturale, quod propter partium commercium, posito morbo, ejusque causa, functionibus reliquis salvis adhuc, accidit; nulla vero alia detur partium corporis sympathia, præter communicationem vasorum, & consensum partium nervosarum, [ab *Illustr. Dno. PRÆSIDE* sole meridiano clariorem redditum in *Med. Syst. Tom. III. Sect. I. cap. 5.*] certum efficitur, non nisi ex duplici hoc fonte peti debere, & peti posse, omnem symptomatologiam.

XXVIII.

Ideam geneseos morborum brevem & succinctam dedimus, generalem quidem, sed genuinam & certam, eo quod nil alieni fovet, sed indoli naturæque vitæ, motuumque in corpore humano legibus egregie & exacte accommodatur. Atque postquam nostra demum ætate, hanc lucem accensam fuisse læti observavimus, non possumus non deplorare veterum Medicorum sortem, qui tenebris undique circumsepti hac deficiente, nulla arte, nullo studio emergere potuerunt. Etenim quid Arabum commenta & nugæ huc faciunt? quid inanes humorum intemperies? quid læsæ facultates retentrices & expultrices aliud, quam sonus vacuus, & transitorius? Quomodo Chymicorum operationes, salia, & sulphura ad motus in œconomia animali obvios quadrant? quid Archæus HELMONTII modo excandescens, modo plane furibundus ad explanationem Pathologiæ? nihil. Absit interea a nobis, ut ingenuorum virorum placita rigoroſe nimis excipiamus & perstringamus; dandū aliquid temporum illorum genio, condonandique haud difficulter errores, ex innocenti magis ignorantia, quam incuria & negligentia prognati. Anne enim in condendis hypothesibus, nullo vero evicto principio, aliud quid supererat, quam rationes, si non invenire, saltem comminisci? indulgere luxurianti ingenio, edere cerebriosos sœtus, commenta commentis superstruere, figmenta figmentis demonstrare? Novum denique præter spem omnium, Medicinæ, patefacto Orbi Harvæano invento, affulgebat jubar; sed cheu! nullum ea inde incrementum sensit (durum dictu, sed verissimum.) Nos equidem nobis temperare haud possumus, quin credamus Artis filios omnes, eo tempore, admiratione stupendi phænomeni ductos, id rimatos fuisse diurno nocturnoque studio, sollicitosque de ejus causis, modo, effectibus: abjecisse hinc pristinās nugas, atque quos Medicina inde fructus sperare possit, quomodo hic perpetuus sanguinis circuitus corpori vel salutaris vel noxiū esse posset, accuratissime investigasse. Sed sœde decipimur. Inanibus intenti speculationibus viri alias summi, nova & aliena penitus parturiebant hypothesium portenta. Prodibat inter alios WILLISIUS excubias spirituum, extinctiones, circumgyrationes, obnubilationes, aliasque lepidas ejusmodi fabellas arti obtrudens. Melius se egisse ratus TACKENIUS, acidum & alcali pro causa morborum venditabat. SYLVIIUS inter acidum, pituitam, & bilem constituebat Triumviratum. Imo circa finem
superior-

superioris seculi, in Belgio adhuc dominans acidum & viscidum caput efferebat. Num vero vel uni diversarum harum sententiarum minimum cum legibus circuitus sanguinis est commercium? aut numne potius, si omnes consideres, perinde erit, si sanguis circuletur, si minus? imo numne jure asserere poterimus, Medicinam hucusque ex demonstrationibus HARVÆI nil profecisse? Ita quidem omnino sentiendum cenfeo, credoque, cum una saltem possit existere veritas, eum demum immortaliter circa salutarem artem meriturum, qui nil fingendo, nil supponendo gratis, causas functionum corporis integrarum, læsarumque, in eodem ipso, ejusque natura posuerit; neutiquam vero aliunde accersiverit, aut in proprio cerebello quæsiverit. Juvenis ego, Illustrium Virorum famæ, laudibusque, nec demere aliquid, nec adjicere valens, quantis prærogativis HOFFMANNIANUM Systema, eas ob causas, præ reliquis gaudere sciam credamque, modeste reticeo: eo lubentius, quo magis persuasus sum, dari æquos rerum arbitros bene multos, qui Medicinam rationalem æstimare rite norunt, eaque quæ circuli legibus, Anatomes accuratæ, Physices, & Mechanices accessu illustratis, nixa, methodo plane demonstrativa conscripta exhibentur, non sine ineffabili voluptate, diurna nocturnaue manu volvere consueverunt.

XXIX.

Nos igitur, firmiter illi, cujus fundamenta §. 26. brevibus evolvimus, insistamus Pathologiæ; atque cum illius ductu motus maxime vitiatos, hinc solidorum vitia considerare debeamus, num res feliciter cedat, ulterius videamus. Non possumus vero hæc talia attenta mente meditari, quin animo illico obversentur notatu dignissima verba, quæ apud BAGLIVUM (*In animadversionibus in Theorice veterem.*) nos legisse bene recordamur. *Et quia in antiquis, inquit, recentioribusque scriptoribus, de causis morborum tractantibus, vix aliquid mihi de solidis occurrit, sed tantum innumera circa fluida nugæ, & somnia se se obtulerunt; mecum constitui, in hac ariditate materiei, nondum nostris Doctoribus familiaris, meo Marte usum observare, vim & potestatem solidorum, in corpore viventi, tum sano, tum morbofo. &c.* Huc usque BAGLIVUS. Neque etiam facile quempiam poenitebit instituisse talibus vestigiis, quibus demum ad cognitionem rerum alias satis abstrusarum pervenire est licitum. Forfan etiam clarior sensibilitatis, cujus in scholis Medicorum ubique mentio fit, idea ex hoc fonte peti poterit. Sane maximum sine dubio Medico faceffit negotium, diversa illa, & mire varians corporum indoles. Videas enim homines, quasunque mutationes salva perferre sanitate, multos vicissim, aëre, victu, cæterisque rebus non naturalibus si præter consuetudinem utantur, extemplo offendi, ita, ut morbofis insultibus undique pateant. Atque talia corpora, quæ ita natura disposita existunt, ut levi data causa, in iis eveniant motus præternaturales, heteroclitici, sensibilia vocitari solent. Jam vero ex antecedentibus patet, motus in corpore omnes deberi solidis, adeoque si corpus unum ad motus magis dispositum est quam alterum, dispositio hæc non nisi in solidis erit quærenda. Loquitur vero experientia, infantem alimento dyspepto, exigua dosi purgantis &c. lædi mirifice, adultum non æque; mulierculam levi percussam terrore, improvise correptam ira, ægrotare mox, virum neutiquam; morbo laborantem fractumque, vel aëris afflatu offendi, sanum non æque. Igitur infans, mulier, fractus morbo, præ adulto, viro, & sano homine erunt sensibiles. Videndum igitur, quæ inter corpora illorum, & horum, intuitu solido-

rum detur differentia, & tunc habebimus illud quod volumus. At monstrat autopsia, fibras partesque nervosas in his inveniri; pulposas, molles, teneras; in illis robustas, duriores, firmiores: ergo in mollietate & teneritudine fibrarum, nervosarumque partium, ponendum erit fundamentum Sensibilitatis. Hinc igitur patet, cur spasmodici affectus, convulsiones, hæmorrhagiæ, excretiones humorum immodicæ, his frequentiores, ac illis.

XXX.

Ex eadem solidorum indole ac conditione, circum moderante diversimode, morbos a sero impuro & caustica fotos, periodis suis & paroxysmis recurrentes declaramus. In abdomine exstructa & consita conspiciuntur viscera, per quæ sanguis trajectus rite a sordibus liberatur & depuratur; docente id Physiologia. Quod si ergo adfuerit in illis ea conditio, ut sanguis trajiciatur lente, ægre & difficulter, erit impedita ipsius depuratio: hinc manebunt in eo quævis liæ, reddeturque sero impuro foetus, ac inquinatus. Pone nunc ob oculos, corpus quodvis ita constitutum, pone committi simul errores in diætâ, hinc nasci, saburram in prima regione, constringi per intervalla corporis corticem, sicque impediri per universale hoc colatorium impuritatum genitarum ejectionem, alvum etiam subinde non respondere, hinc manere intus biliosas scorias; atque exinde colliges facile, aucta colluvie vitiosa, brevi tempore omnem humorum massam scatere debere sero corrupto & acri. Concipe adhuc in ejusmodi corpore dari partem quamcunque debiliorem reliquis, i. e. hujus fibras cæterarum partium villis robore esse inferiores. Nuncque hæc omnia tenens probe, in memoriam revoca, quam supra, ut putamus, evicimus muscoli cordis pro motu humorum insufficientiam; hinc cogitabis mox, canalium villis incumbere hoc officium. Jam perpende illud BAGLIVI (*Specimine de fibra matrice lib. I. Propos. III.*) *Fluida supra & infra nesciunt, sed undique currunt indifferenter, prout hinc inde impelluntur*: Patebit inde impulsus humorum variare, pro variante robore partium. Applica hoc ad dicta, & clarum evadet, per debiliorem partem ferri sanguinem ægrius, impeditiusque, quam per validiorem. Progredere ulterius, cogitando ejusdem Auctoris propositionem. *Proprium est sanguinis circulantis, quando tardiore motu procedit, ut serum ab ejus sinu secernatur, majori vel minori copia, prout motus magis vel minus est retardatus.* Animadvertes inde necessitate physica, in parte debili fieri debere decubitus feri, eumque tunc procreare eum morbum, qui posita hac causa in hanc partem cadit. Durabit tunc morbus donec exhalaverit illud, vel fuerit discussum, restitente vero partis debilitate pristina, imo vero ipsa morbi vi inducta majore, genitoque novo in corpore morbi fomite, sensim is colligetur per memoratas causas, eodem loco; sufficienti tandem copia præsens, novum iterum exclusurus paroxysmum. Una est hæc fiendi methodus, sed multis partibus communis, hinc ex unico fundamento, intelliges plurimorum morborum periodicorum geneses. Fac enim in corpore impuro sero facto, debilitate præ reliquis partibus, vel jam a perpeffo morbo, vel ob causam quamcunque, laborare pericranium, duram matrem cerebri, medullæ spinalis; membranas oculorum, pulmonum, musculorum intercostalium, aliorumque, vesicæ; glandulas articularum, manuum, pedumve: & explicabis recidivantes cephalalgias, hemicranias, epilepsias, intermittentium insultus, ophthalmias, asthmata, pleuritides spurias, rheumata alia, strangurias, arthritides, chiragræ, podagræ paroxysmos &c. Diversos vides affectus, sed loci intuitu saltem, hinc

hinc cognito ipsorum fundamento, præcavebis omnium recursus, aut minimum leviores reddes una methodo, si partem affectam roboraveris, atque sic a decubitu immunem reddideris, sique fomitem morbi subtraxeris, removendo omnes causas quæ ipsius favabant genesi, i. e. restituendo, acidulis maxime, sanguini liberum per viscera depuratoria iter, injungendo moderationem in victu, cavendo saburræ collectionem in primis viis, promovendo excretionem periphericam, servandoque alvum bene respondentem; his omnibus enim simul etiam noxios humores a parte debili avertes. Notatu dignum hic est RIVERIUM, jam eandem plane methodum, circa prophylaxin insultus podagræ, doloris ischiadici, rheumatismi &c. commendasse.

XXXI.

Haberemus nunc quæ de affectuum hæreditariorum natura, de morbis ætatum, temperamentorum, de affectibus refractariis, incurabilibus &c. ex iisdem legibus circuli mechanicis, & solidorum conditione variante, deducere & demonstrare possemus; fertile enim admodum Medicinæ principium selegimus. At vero, cum semper metus nobis sit, ne limites Dissertationis Academicæ excedamus, hæc omnia mittere, & de hæmorrhagiarum genesi, & ex hac sola, rationali fluente curatione, nonnulla exponere placet. Neque hic, si, quomodo, & per quas causas circuletur sanguis, saltem attendere voluerimus, antiquorum vestigiis insistere, semperque rupturas vasorum, & plus quam corrosivam humorum intemperiem, ea erodentem & exedentem statuere opus erit; cum solus motus perversus & inordinatus, periculosissimos ejusmodi affectus progignere valeat. Faciamus periculum. Omnis hæmorrhagia supponit sanguinem extra vasa effusum, adeoque turbatum & inæqualem circulum. Circulus autem per supra dicta æquabilis est, dato sufficiente spatio, seu viis apertis, sanguine ad motum apto, & determinata vi motrice; ergo non erit turbatus, nisi horum unum mutetur aut tollatur. Pone vero vias interclusas, sanguinem ad motum non aptum, & vim motricem auctam nimis, vel imminutam nimis; & mox ponetur circulus inæqualis & turbatus. Quoniam igitur hæmorrhagia hujus tantum est soboles, patet, hanc gigni non posse, nisi dato spatio intercluso, sanguine ad motum non apto, & vi motrice inæquabili; & quia unum horum sufficit, ad efficiendum turbatum circulum, unum etiam sufficiet ad ciendam hæmorrhagiam.

XXXII.

Videamus primo natas hæmorrhagias ex sanguinis vitio. Sanguis ut aptus ad motum existeret, per §.21. esse debebat definite elasticus, fluidus, & sufficiente quantitate præsens: si ergo fuerit rarefactus, nimis, spissus, erit ad motum non aptus, hinc turbabit circulum æquabilem; inæqualis autem circuitus ansam dabit omnibus, qui eum physica necessitate insequuntur, affectibus morbosus, ergo & hæmorrhagiis. Res omnis exemplis clarior evadet. Ponamus juvenem vitæ otiosæ adsuetum, spongioso corporis habitu donatum, hinc plethoricum, vinum assumisse copiosius, corpusque vel saltatione, vel alio motu fortiore exercuisse. Sanguis ergo, ob accessum potus spirituosus, calidior, turgidus, expansus factus; ob corporis motum auctum, validam musculorum agitationem, & inspirationem crebriorem, magis commotus, spumescens & orgasmicus redditus, expandet se ultra modum. Hinc spatium affectabit majus eo, quo continebatur antea. Nitetur ergo quaquaversum, distendet vasorum latera, venosorum maxime, superabit villorum resistentias, indeque perrumpet necessario eo loco,

ubi ea datur minima; sive id fuerit in narium cavitate, sive in ipsis pulmonibus. En igitur hæmorrhagiam a nimio & elastico nimis sanguine. Curam ipsa illius natura suppeditat, quod si enim causam sustuleris, id est turgescentiam sedaveris, hincque id effeceris, ut factus placidus, a vasis se coerceri patiatur, compositam videbis hæmorrhagiam, cui fini impetrandò, sanguinis tempestiva missio, potus demulcens, emulsiones temperantes, potiones acidulatæ, pulveres nitrosi satisficient. Jam, quomodo spissus cruor profluvium suscitet, videamus. Fingamus foemellam ad plethoræ genesin pronam cibo uti rudiore, potum parcius assumere, corpus movere rarius, vitam agere sedentariam, non transpirare rite, moestitiæ etiam subinde indulgere, hincque sanguinis spissitudinem contrahere. Adest ergo sanguis nimis & simul spissus; hinc circulabitur ægre per totum corpus; ægerrime per ea loca, ubi & secundum naturam motus languidus, hinc difficillime per uterum, & maxime illius venas. Venæ igitur, quia in illis lente procedit imò stagnat cruor, non recipient promptitudine congrua, revehentque, vi cordis & arteriarum continuo advectum; ergo affluxus, & refluxus sanguinis uterini, seu flumen arteriosi & venosi, sibi non respondebunt. Hinc ille colligetur sensim, pressusque ob appulsum continuum, transitu in venas intercepto, penetrabit in ultima arteriolarum emissaria, ubi vim non amplius sustinens, per eorum ostiola effusus sistet menses nimios (suppressos producturus si in his stagnatio contingat.) Methodum medendi iterum causa affectus, spissitudo docet; hinc hic indicantur attenuantia, aperientia, gummata temperata, extracta amara, balsamica leniora, imò & pro re nata venæ sectio.

XXXIII.

Vidimus hæmorrhagias culpa sanguinis procreatas, jam culpa viarum nascentes rimabimur. Ponimus hic nobis ante oculos injectiones Ruyschianas, quibus edocemur, omnes fere corporis partes, non nisi ex meris componi canalibus. Jam cum hi omnes sint propagines arteriarum, & venarum, cum corde connexarum, hincque continui, ita ut sanguis unumquemque eorum transire non possit, nisi per alios antea fuerit trajectus; patet, data obstructione tuborum aliquot, enasci necessario debere turbas circuli, eo majores, quo major est obstructorum copia. Concipiamus mente opus quoddam hydraulicum, ex multis diversisque diametri canalibus, continuis ubique, coalitum, in eoque ponamus moveri definitam fluidi quantitatem. Fingamus nunc in loco quocunque ipsi intercludi iter, ad hunc ergo appellens fluidum, inveniens remoram, deferetur duplicato impetu in tubum vicinum, ibique vel resistentiam hujus superans erumpet, vel si hæc fuerit major, collectus nimis ibi, succedentis sibi liquoris cursum tardiorum reddet. Atque easdem leges hydraulicas, in canalibus corporis humani deprehendi, quis est qui negabit unquam? Veritas rei reddetur magis perspicua, adjectis exemplis. Arteria coeliaca, sub diaphragmatis fornice, ex descendente aorta, trunco unico emergens, dividitur in duos, vel secundum recentiorum observationem, in tres principales ramos, hisque varie distributis prospicit hepatis, ventriculo, lienis, omento &c. Sanguis ergo, per trunci cavum advectus, secundum naturam, per hos distribuitur æquali flumine, exceptus demum suis venis, ad venæ portæ truncum deferendus. Apertis his viis omnibus, circulus hic rite succedit; sed videbimus mox plane aliam rerum faciem. Detur nobis Foemina diuturnam mensium suppressionem passa, hujusque culpa oppilatum & obstructum gerens hepatis & lienis viscus, detur porro in

in corpore ægræ major humorum copia, quam ut per salva adhuc vasa libere ferri queat. Fluat nunc lege circuli per truncum arteriæ coeliacæ sanguis, tanta copia, quantam ramificationes omnes postulant, sed ad hepar & splenem abeuntes rami debitam quantitatem, ob infarctum viscerum horum, non recipient, nihilominus a tergo continuum urgebit flumen, hinc omnis vis sanguinis per truncum advecti irruet in canales vicinos; ergo in arterias gastricas, gastrophloicas, breves &c. Impetus igitur & copia ad ventriculum delati minimum erit duplo major solito, indeque quoniam hic ob membranarum teneritudinem, minima, vel saltem nulla datur resistantia, facile effundetur in ipsius cavum, ubi irritando nervosas partes, ciebit motum peristalticum inversum, efficietque sic vomitionem cruentam. Medicus, quid hic facere debeat, ex causa mali prompte dijudicabit, hincque patet, nec acidulata huc facere, nec adstringentia, imo venæ sectionem saltem palliative curaturam. Sola vero apertio viscerum sanationem perficiet, res dictu facilis, executu difficillima, imo sæpe impossibilis. Videas eam ob causam plurimas, sanguinem vomendo, ægram simul evomere animam. Atque ex his principiis suppositis, monstrabimus facile, quomodo præsentem leviori hepatis infarctu, si simul consideremus perpendicularem venæ hæmorrhoidalis situm, ex necessitate, & passive contingat fluxus hæmorrhoidum? cur narium hæmorrhagiæ hepaticis & lienosis familiares? quomodo contigerit citata ab Illustri HOFFMANNO (*Diff. de Hæmoptysi Observ. IX.*) Hæmoptysis, ex labe viscerum funesta.

X X X I V.

Restant hæmorrhagiæ, a vi motrice præter naturam constituta, provocatæ. Equabilem requiri fluidorum solidorumque actionem & reactionem, nisum & renisum, ad liberiores & æquabilem circulum, ex superioribus innotuit. Fiet ergo inæqualis, quoties systole fuerit aucta nimis, vel imminuta nimis; atque cum dato circulo inæquabili, in subiecto disposito metus sit futuræ hæmorrhagiæ, utraque etiam ad eam inducendam par habebitur. Ponamus nunc sanguinem omnem, existente in omnibus vasis proportionata constrictione, circulari ordine debito. Fingamus subito in parte quacunque, fieri systolen, quacunque demum ex causa, iusto majorem; sic cavitas vasorum coarctabitur, sic vis motrix erit aucta; nonne igitur fluidum in constrictis vasis antea contentum, comprimetur fortiter, exprimetur vi, & urgebitur impetuose ad loca opposita? Sane, nisi omnia me fallunt, physica necessitate hoc fiet. Sit nobis iterum Juvenis plethoricus, in canalibus magnam humorum copiam alens, rixetur, corripitur ira, aut quocunque modo sanguinem in citatiorem motum conjiciat, subitoque dein corpus liberius exponat auræ frigidæ; hinc constringetur omnis ejus cortex, exprimeturque & retropelletur ille, quo antea erat turgidus, sanguis. Urgebitur sic is ad interiora, regurgitabit ad truncos majores, vicinos cordi, & insculptos pulmonum lobis. Hic ergo producet palpitantem & respirationem anxiam primo, hinc distendens vasa, maximeque, quia præ arteriis facilius cedunt, venosa; per venas pulmonales ægre redibit ad cor. Indeque in his coacervatus, præsentem præcipue visceris dispositione definita, morabitur arteriosi cruoris progressum in venularum principia, atque sic hic collectus distendet etiam sua vasa undique, imo penetrabit demum in ultima arteriolarum emissaria, sanguinem secundum naturam non velentia, sed ex observatione RUYSCHII saltem transpirationi infervientia, hæc diducet ultra suam sphaeram vi, vel etiam pro re nata rumpet, indeque effundetur in bronchiales

cellulas, irritabit eas laceffetque, hacque ratione provocabit tussim, qua, per arteriam asperam ejectus, hæmoptysin sistet. Quid nunc in hoc hæmorrhagiæ genere consilii? an mox, quæ Medicorum vulgus prompte offert, adstringentia erunt porrigenda? nequaquam; cum enim causæ morbi tollendæ non sint accommodata, morbum non sanabunt, quin potius exasperabunt. Remove vero extremorum spasmus, sanguinisque copiam minue, & in internis partibus spasmos proritantem, atque sic sedatum videbis profluvium cruentum. Si ergo datis antispasticis strictiones composueris, artus foveris, fricaveris, in aquam tepidam immiseris, indeque sanguinem ad ambitum corporis allicere conatus fueris; si interne mixturas discutientes, pulveres diapnoicos, subinde etiam infusa theiformia exhibendo id effeceris, ut leni modore perfundatur cutis, atque simul secaveris venam pedis, sublatum gaudebis paroxysmum, curamque sic perficies ex voto, si in fine pulmones eluere, iisdemque reddere suum robur non omittas. Ex his iterum, quæ nunc suppeditavimus, principiis demonstrabimus causas hæmorrhagarum, variolarum eruptionem præcedentium. Datur enim hic materia acris & caustica nervosis partibus insidens, indeque spasmos & inæqualem sanguinis motum ciens, unde est quod comparentibus variolis, hæmorrhagiæ cessent sponte. Hinc discemus qua ratione pathemata hypochondriaca, utpote spasminis flatibusque ortum debentia, vel hæmoptyses, vel hæmorrhoides, etiam in non dispositis, eamque ob causam mere symptomaticas, gignere valeant; adeoque eo melius in usum convertemus observationes Illustr. Dni. PRÆSIDIS, quas de hæmoptysi hypochondriaca [*Med. Conf. Tom. IV. p. 229.*] & de melancholia hypochondrica, cum hæmorrhoidibus nimis [*l. c. Tom. VII. p. 284.*] publico communicavit.

X X X V.

Tria adhuc verba dicenda supersunt, quomodo vis motrix fibrarum imminuta, seu earum relaxatio nimia generare valeat profusionem sanguinis. Differt in eo hydraulicum corporis nostri opus, a Summo Architecto conditum, ab iis, quæ humana arte effinguntur, quod illius canales non modo fluido concedant transitum, verum etiam cordis vi ad circulum haud sufficiente, actione sua & villorum contractione, eundem moderentur atque juvent. Quando ergo in viscere quodam hæc minuta est, aut deficit plane, sanguis in laxata vasa intrabit iusto majori copia, atque ob eandem causam versus cor non rite retroactus, coacervabitur, creabit infarctus, aut si hoc visceris conditiones permiserint, proprio quasi pondere vasis elapsus excernetur. Illustrat hanc Pathologiam scæmina, vel a puerperiis multis, vel ob abortum, quem perpeffa est, accedente diuturno mœrore, vel alias quacunque ob causas, uterum robore iusto haud præditum, sed laxum admodum, gerens. Is igitur, quem arteriæ copiosius iusto receptum afferent, sanguis, in debili viscere, per quod ex ipsius natura ægre circulatur, hærebit, cumulabitur, effususque demum immanes concitabit hæmorrhagias, ex eadem causa sæpius recidivantes. Si igitur has avertere velit peritus artifex, modum affectus perspicuens unam formabit indicationem, de robore pristino utero languido reddendo. Atque hæc quantum nos intelligimus unica est hæmorrhagiæ species, quæ martialia postulat, & debito modo adhibitis levatur. Nec enim hic antispastica aliquid efficient, nisi forsitan ipse paroxysmus stipetur spasminis, nec pulveres temperantes, nec nitrum, quo laxando fibras jam laxatas nimium, nocebit certissime; nec opiata, viatici potius loco in Charontis cymbam futura. Manebit vero sua laus pilulis balsamicis,

cis, infusis, injectionibus, epithematibus, roborantibus, balneis tenui Martis croco imbutis &c.

XXXVI.

Sufficiant hæc de hæmorrhagiis, e solis circuli legibus turbatis nascentibus, de quibus adhuc illud notandum habemus, quod eæ sæpius, non ex simplici, uti eas depinximus, causa, sed frequenter ex pluribus concurrentibus, adeoque vitio sanguinis, viarum, & virtutis motricis simul generentur. Quod si fit, conjiciens illud artifex, omnes congrua medicina, justoque ordine impugnare, & tollere tenetur. Jam operæ pretium nos facturos arbitramur, si hac occasione, quid ex ea quam retulimus theoria, febrium doctrina, commodi nanciscatur, brevibus inquiramus. Idem hæc, quod aliis morbis accidit, fatum experta est; quot enim commenta & miræ hypotheses, imo sæpe ridiculæ, circa hanc materiam natæ sunt? Modo enim putrilaginem in venis, modo fermentationes, confermentationes, effervescentias, intemperies humorum, cruditates chyli, modo Archæos ira percitos, modo tumultuantes spiritus, allegari videas; sed allegari. Si enim has, & infinitas alias ejusdem cominatis opiniones lustres, nil solidis rationibus stabilitum deprehendes: vel enim audies verba, sesquipedalia quidem & speciosa, at vacua penitus, vel saltem fluidorum vitia animadvertes; de motibus, ex natura corporis, explicatis altum ubique silentium. Nihilominus tamen, si unquam alibi, certe in his morborum generibus, tot motuum vicissitudines occurrunt, ut vel levi oculo attendens easdem observare teneatur. Uti vero per superius demonstrata, omnis morbus, inæqualis, minusve legitime succedentis circuitus humorum fœtus est, ita idem illud de febribus non nisi jure affirmabimus; & uti nullus datur, in quo non solida simul suos patiantur manes, ita & hic ad eorum vitia sollicite attendendum erit. Docet autem autopsia, in omni febris accessu, constringi habitum corporis undique, hinc frigus, hinc constrictio vasorum, sanguinisque pressio ad interiora: indeque tot mala ut anxietas, respiratio laboriosa &c. Loquitur porro experientia, nullam dari febrem, sine succedente suo tempore vehementiori & celeriori cordis & arteriarum motu, sanguinisque directione auctiori ad peripheriam corporis; hinc iterum mala multa. Adeoque in omni febre datur duplex motus sanguinis inæqualis, nimiusque, vel versus interiora, vel versus exteriora; in quo absolvitur ipsa febris formalitas. Prioris causam constrictionem fibrarum esse, sive systolen extremorum auctam, nemo dubitat, neque alter sine systole aucta cordis & arteriarum potest concipi, uterque ergo unam agnoscit causam, systole vero aucta uno verbo dicitur spasmus, ergo omnis febris erit affectus spasticus. Attenta observatione edocemur porro, febre posita, nullam dari corporis functionem illæsam, & salvam, sed omnes laborare, suæque pati symptomata; symptomata vero morborum omnia, per §. XXVI. contingunt propter partium consensum, symptomata febrilia omnia ita se habent, ut optime & luculenter ex natura spasmi possint explicari, [Vid. *Illustr. HOFFMANNI Introductio in Tom. IV. Med. Syst. §. 4.*] adeoque recte asserere poterimus febrem esse spasnum universum, hinc totius generis nervosi affectionem. Quicquid igitur ea tantaque pollebit vi, ut afficiendo nervosam partem quamcunque, omne systema in consensum rapere valeat, gaudebit etiam vi inducendi febrem. Et hæc sane theoria evidens per se, toties mihi comprobata visa est quoties BAGLIVUM legendo inveni, illum varia experimenta cum brutis, pro sua hypothesis stabilienda, instituisse, nervosasque partes, duram matrem, medullam spinalem aut alias quasque, pun-

gendo, laceffendo, aut ipsis spiritus acres, rodentes infillando parva quantitate, mox in corpore animalis tremorem, horrorem, horripilationem, rigorem, palpitantem cordis motum &c. atque sic artificialem quasi febrem produxisse. Clarum itaque vel ex his evadere potest, quantum valeant ea, quæ nervosis partibus inimica sunt. Duæ autem in genere observantur causæ materiales, febriles proritantes spasmos [alias dari quidem non ignoro, ut frigus, animi pathemata &c. sed hæ ubi febrem generant, nulla datur in corpore materia febrilis, nisi forsan simul accedat] vel sanguis stagnans in nervosis partibus, eademque ad motus sollicitans, vel subtilis, acris & caustica materia quamvis mole exigua, ipsos ingenerans. Cum igitur cura rationalis postulet remotionem causæ morbificæ, [nulla enim febris cum salute ægri terminatur, nisi hæc præcefferit, factis tempore critico debitis resolutionibus, ac se- & excretionibus] patet; hanc supponere liberum sanguinis & humorum flumen ad omnia colatoria, tubulosque horum apertos. Sed motus febrilis a peripheria ad centrum tendens, liberum ad colatoria flumen impedit, tubulosque secretorios occludit, imo præterea sanguinem ad interiora urgendo vi, funestas suscitât stases; igitur re vera erit morbosus. Beneficio vero alterius saltem, qui a centro ad peripheriam vergit, felix effectus resolutorius & excretorius sperandus, indeque hic genuina erit Natura febrem curans, aut BOERHAAVE dicta vis vitæ, causam illius tollens, sæpeque per accidens fiet salutaris. Atque cum hæc quæ annotavimus ad omnes febres quadrent, clarum etiam fit, omne curandi fundamentum niti, cautione & aversione prudenti eorum damnorum, quæ minatur motus morbosus, congrua modificatione humorum & directione ad colatoria organa, attentaque, ob variantem naturalem in subjectis variis circulum, ipsius individui ægrotantis consideratione.

XXXVII.

Brevissimis causas, naturam, & indolem febrium delineare conati fuimus, [neque enim cancelli quibus includimur prolixitatem permittunt] generales etiam saltem, ex ipsarum genesi fluentem stabilivimus indicationes, sed nihilominus sufficientes, & jam instar lapidis lydii nobis inservituras, quo, remedia num accommoda sint febribus, nec ne, explorare poterimus. Et sane tali opus est maxime, in tanto horum numero, totque diversis, circa fructus inde expectandos, & damna ex iisdem metuenda, pugnantibusque inter se invicem opinionibus. Neque enim aliquem hæc talia debito studio tractantem fugere poterit, quam aperte maximi Viri sibi invicem contradicant, dum unus summis laudibus effert medendi methodum, quam alter rejicit plane, dum hic medicamento divinas attribuit vires, quod ille penitus negligendum censet; omnibus tamen crebram experientiam allegantibus. Quid vero interea tyro, qui conscientiam olim illibatam servare cupit, atque per mortes & funera experimenta facere crimen reputat, nihilominus tamen in nullius Magistri verba jurans, auctoritatibusque non contentus, rationes desiderat? hæret ubique, prorsus quid credere debeat, quid minus nescius, felix tandem si conquiverit, & invenerit principia solida, ex quibus & morborum geneses, & curationes, conclusionum ad instar possunt elici. Sed ad scopum propius.

XXXVIII.

Quam mirifice circa venæ sectionem in acutis practici dissentiant, notissimum est; ita ut cujus hypothesis subscribendum sit, primo quidem intuitu sat difficile

difficile habeatur. Novimus enim, dari multos, qui necessariam nunquam, nisi in synocha incurfu, quia hic natura ipsa critice sanguinem ejicit, quod in aliis non facit, contendunt: cum interea alii, in omnibus acutis, pro circumstantiarum varietate, & prudenter sectam venam, maximo auxilio fuisse profiteantur. Nos sane si perpendimus probe, eo allaborandum, ut resolutiones stagnantium humorum in inflammatoriis, & in omnibus quibuscunque febribus, secretiones & excretiones promoveantur suo tempore; facile etiam animadvertimus, ad has juvandas placidum, temperatum, & determinatum requiri circulum: hunc vero iterum definitam & congruam proportionem, quantitatemque sanguinis movendi supponere. Hincque perspicimus haud difficulter, febris indolem non determinare venæ sectionem, sive sit synocha, sive inflammatoria, sive exanthematica; sive natura sanguinem critice evacuet, sive minus, sed considerationem subjecti febre laborantis, plenitudinemque vasorum. Ast audimus jam nos temeritatis insimulari, objicique continuo, & ex circuli legibus, quas adeo magni ubique fecimus, probari posse, secta vena collabi debere peripheriam corporis, poros occludi, atque sic salutare illam in febribus, per corticem corporis fientem exhalationem, sufflamari, & excretionem exanthematicam, aut sordium qualicunque diffationem cum damno retardari. Largimur hæc omnia etiam facile, nihilominus tamen novimus, factum esse sæpius, ut detracto sanguine, exanthematica materia, antea haud prodiens libere, mox cum insigni levamine prodierit; stabilemque in ambitu corporis nacta sedem, morbum feliciter solverit. Loquatur pro nobis, & tueatur ea quæ diximus *Illustr. Dnus. PRÆSES*, venæ sectione, puerperas quatuor ex faucibus mortis eripiens, missoque sanguine, purpuram, quod paradoxum videtur, non reprimens, sed provocans (*Vid. Med. Syst. Tom. III. Cap. IX. Theor. VI. & VII.*); variolas copiosiores, sæpius depletis vasis comparere contendens (*l. c. Tom. IV. Sect. I. cap. 7.*), morbillorumque ægre prodeuntium excretionem, phlebotome facilitans. (*l. c. Tom. IV. Sect. I. Cap. 8. Observ. 8.*) Patefcit ergo ex his, venæ sectionem nec nocere promiscue, nec prodesse promiscue: hinc colligitur, rationem, cur aut noceat, aut profit, non in ipsa operatione, sed in corpore ægro, maximeque legibus sanguinis circulantis, quærendam esse; ex quibus etiam illa, ut putamus, clarissime apparitura est. Scilicet sint vasa nimis plena sanguine, & erunt latera distenta nimis, hinc diastole nimium aucta, tantumque sic virtutis decedet systoli, quantum diastole debito major est. Systole vero cordis & arteriarum, causa est motus circulatorii; illa ergo imminuta, hic erit languidus & difficilis, hinc languidæ secretiones & excretiones, adeoque & exanthematicum excretio. Quodsi igitur excretionem hanc salutarem velis promovere, efficere debebis expeditiorem circulum, hinc auctiorem systolen, non vero augebis systolen, nisi minueris diastolen nimiam, nec minues hanc, nisi subtraxeris nimiae causam: erat vero hæc copia distendentis, & ebullientis sanguinis; hinc, si hanc imminuas, voti evades compos. Atque ex his apparet, quando, quomodo, & cur, venæ sectio & in exanthematicis possit esse utilissima, æque ac in inflammatoriis. Ex hoc principio hariolabimur quantitatem subtrahendi sanguinis, dabimusque rationem, cur noceat phlebotome nimis larga, & nimis parca? cur penitus funesta, in corpore laborante defectu cruoris rubri? cur Gallorum methodus minimum in nostris regionibus locum non habeat? cur optime in principio administretur? cur denique & nonnunquam in intermittentibus celebretur cum fructu? cur vero scrupulosa electio venæ medianæ, basilicæ,

Frid. Hoffmanni Oper. Supplem. II.

cephalicæ risum, leges circuli intelligenti, moveat?

XXXIX.

Uti igitur magni adeo momenti res est, secretiones & excretiones promovere rite, indeque pro hoc obtinendo fine, circulum prudenter ad omnia colatoria, maxime ad illud universale, quod cuti insculptum habetur, dirigere, fluminique huic justam temperiem conciliare; clarum fit, ex hac sola consideratione, stabiliendum fore regimen febre affectis injungendum. Atque ex hoc fundamento apparebit, quam absolum sit, ægrum includere conclavi calefacto, stragulisque undique tegere, quo ipso, commoto nimis & exagitato sanguine, non possunt non mala insequi quamplurima. Quod enim de variolis præcipit SYDENHAMUS (*Operum Sect. III. c. 2.*), cavendum esse ne nimium affurgat ebullitio, id sane in omni febrili æstu observatu est dignissimum. Uti vero calor nimius nocet, ita frigus nimium constringendo poros, & cohibendo saluberrimam transpirationem, reprimendo id quod salutari effectu ad ambitum corporis delatum, imo cogendo & coagulando humores, in altero extremo peccat: nobisque hinc observationem suppeditat, cautissime cum lecti & indusiorum mutatione mercandum esse. Felix igitur Medicus hæc observans probe! Felicior æger, tali se sanandum committens, qui & hic applicare didicit tritum illud: medium tenere beati. Sed quid nunc eloquar de absone illa medicatione, qua bezoardica sic dicta & alexipharmaca calidiora, sine discrimine, larga & repetita dosi, febre affectis acuta porriguntur? Equidem foemellis forsân condonandum crediderim, quando misericordia intempestiva erga ægros egenos ductæ, speque plenæ, fore, ut venenum eo citius a corde removeatur, talia collaudant atque obtrudunt; sed & harum benevolentia, laudato jam supra SYDENHAMO notante (*Operum Sect. VI. c. 3.*) charitasque, multo melius in pascendis pauperibus, quam iisdem medicandis collocaretur. At vero, quo fine, & ex qua theoria, Medici hinc inde tam perversa utantur methodo, ignoro penitus: dolendum saltem, quod non raro innocens æger, errores hos, subortis deliriis, inflammationibusque internis, morte præmatura cominonstrare teneatur. Neque minus incongruum erit, viso hoc, in alterum delabi extremum, & refrigerantia, nitrosa, liberaliter, & sine judicio, assumenda præbere. Quando enim taxata supra calida circulum nimium augment, hæc laxando fibras, & globulorum sanguineorum activitatem infringendo, eum retardant, atque hoc ipso inevitabiles, & summe necessarias, pro impetrando salutari febris eventu, secretiones ac excretiones impediunt, imo sistunt. Ne igitur nos impingamus, attenti intueamur circulum, atque ut eum in æquo servemus moderamine, nullam inesse neque alexipharmacis, nec nitro, nec acidis, vim antifebrilem credamus, sed probe considerato, cum quo res est, corpore, hujus indoli remedia accomodemus. Medium ille est, quo morbus debellandus, sed ut hoc fiat, justa is gaudeat temperie necessum est. Hinc id erit Medici officium, ut impetuosum nimis refrenet, languidum excitet. Alia ergo ratione juvenis sanguine calido plenus, alia infans lymphaticis succis fartus erit tractandus. Aliam cholicæ constitutionis æger, aliam phlegmatico temperamento præditus efflagitabit methodum. In hoc proderunt prudenter data alexipharmaca, in illo nocitura sine dubio. In hoc damnosa existent nitrosa, in illo se commendatura certissime. Optima vero ubique erit temperatior & media via, SYDENHAMO duce feliciter calcanda, & invenienda.

X L.

Atque ex hac ipsa necessitate fluminis liberi, per omnes corporis canales, perque omnia colatoria, apparebit magnus ille humectantium & diluentium in febribus usus. Sic enim laxabuntur hostili spasmo detentæ fibræ, sic temperabuntur, involventurque, acria & caustica eum inducentia humorum spicula, sic efficietur sanguis ad feliciter absolvendum constans iter habilis, trajectusque libere, per ultima omnium arteriolarum emissaria, inimicas deponet sordes, fomitemque exuet morbosum. Sed & hic iterum justum observabimus moderamen: Neque enim perspectis his, facile agrum, in flore ætatis constitutum, exaltato turgentem æsuantemque sanguine, aridisque faucibus & adusta lingua levamen efflagitantem anxie, sitientem relinquemus, & cum iis, qui præter rem damna exinde metuunt, a potu capiendi congruo prohibebimus; neque etiam ut torpidi natura, orbique cruore rubro, pituitosos viscidosque gerentes in vasis humores, decumbentes febre, liquida humectandi ac refrigerandi virtute donata, plenis buccis ingurgitando, salutare naturæ medicatricis opus impediunt, vitæque vim fractam & labefactatam prorsus extinguant, autores erimus. Quo igitur magis hæc conservanda, & instauranda, quippe maximam ægro corpori opem promittens, eo magis cavebimus, ne cephalalgias, vigilias, aliaque incommoda omni febris physica necessitate juncta, allevare cupientes, ad opiata confugiamus, hisque perverso consilio adhibitis, suppetias ferentem cordis & arteriarum motum infringamus, naturamque quibus hostem intestinum ejectura erat armis, inconsulta medicatione exutam doleamus fero. Sit potius nobis eo directus labor, ut id quod vitæ fruit insidias, per congrua loca tempestive evehatur; hinc critico tempore fluere alvum non timeamus, sed lætemur, atque cum ipse febrilis æstus, optimos quosvis humores in liquamen excrementitium convertat, cum genitæ sordes perpetuo ad vastum illum intestinorum canalem confluant, per regiam quasi viam ejiciendæ; sub ipso decursu febris, ut alvus segnior justo respondeat suo tempore, laboremus, caute tamen, & ita ut humores ex ambitu non revocentur, sed ut vitiosa saltem colluvies, jam in alimentorum canali hærens, & bono omine secreta, tempestive educatur, ne mora facta pejor, sanguinique iterum affusa purpuraceumque generans exanthema, quem in vado jam constitutum lætabamur agrum, subito versis in deterius cunctis, misere jugulet. Atque hæc de febribus.

X L I.

Antequam specimini nostro inaugurali colophonem imponamus, paucissima adhuc de origine chronicarum affectionum, ex iis, quæ præmisimus principiis, eruenda, adnectere fas sit. Vidimus quid constrictio fibrarum seu spasmus idemque universalis valeat, quæ mala certa occupans loca, & particularis patret, jam inquirendum foret: sed ne atoniam omittamus penitus, aliqua de eadem apponere fert animus. Vides hic matrem, non subito, sed sensim nascentium affectuum, quo vero longius illa, in excludendis his foetibus, absomit tempus, eo magis etiam ii stabiles, durabilesque deprehenduntur. Omnia igitur ea, quæ ita in corpus agunt, ut solidis subtrahendo debitum robur, matri saveant, ad foetuum etiam exclusionem manus porrigunt obstetricantes. Videas inde fatos parentibus agris, tristibus indulgentes meditationibus, curis fatigatos, studiis intemperantius incumbentes, sedentariam amplexos vitam, & in Veneris castris militantes nimis, diuturnis vexari passionibus, miseraque sæpe ad vitæ terminum usque cir-

cumferre corpora. Pone enim systolen solidorum imminutam, & languens mox ac difficilis evadet circulus, cessabit inde vivida agitatio humorum, peribit sic eorum spirituascentia, atque coeuntibus cohærentibusque purpureis globulis nascetur spissitudo. Hærebit ita fluore suo orbus, & ad motum ineptus in vasculis capillaribus sanguis, eorundemque ostiola obstruens ac occludens, viscerum oppilationes infartusque sensim causabitur. Hinc ergo avolans humiditas relinquet scirrhus, aut secedens & stagnans in suis vasis lymphæ, genitis ruptisque hydatidibus evasabitur, aut lymphæ confusum serum mora corruptum, creabit exulcerationes. Inde porro cessabit sanguinis in visceribus depuratio, turbabunturque eæ functiones, quas œconomia animalis ab ea, quæ patitur maxime, parte, expectat; & cum omnes ita conspirent, ut una alteram juvet, facilitetque, brevi videbis universum corpus oppressum morbo. Pro viscerum itaque, quæ atonia occupat varietate, varii enascentur adfectus; mox enim si patiatur intestinorum canalis, famosum illud hypochondriacum malum; si hepar, cachexia, iæterus, hydrops, scorbutus; si pulmones, plithisis; si renes, calculus; si uterus sterilitas, fluor albus &c. excludetur. Cumque iis in locis, quam citissime fieri debeant in corpore disposito, stagnationes, ubi vasorum directiones sua natura difficile reddunt humorum iter, apparebit facile, quam convenienter mille malorum faber dicatur uterus, quam egregie portæ venam, malorum portam, Illustr. STAHLIUS appellaverit. (*in Diss. de vena portæ porta malorum.*) Quid vero tandem possidet ars nostra, quo altius invidulantes visceribus, stabileque, ut videtur, domicilium ibi nactos affectus expugnet, & cedere nolentes, invitosque quasi ejiciat? medicina enim si unquam alibi, certe hic opus est, nisi imbecillem, intestinorum hostium insultibus fractam penitus, & succumbentem lugere velimus naturam. Vividum illud fibrarum robur, cordi & arteriis insitum, quo aucto non raro, ipsa alias aggreditur, quod ipsi infestum est, sæpeque amolitur felicissime; robur illud, quo solo ipsa defendere corporis vitam valet, nunc languet, sensimque emoritur. Sed eheu! emortuo eo spes omnis salutis collabitur, & evanescit, nisi alienum auxilium id instruat iterum, erigat, novis induat armis, refractariumque & rebellem morbum arte & consilio aggrediatur. At quanta hic opus prudentia, quantaque cautione, ne fero nimis, ne nimis præcipites languenti succurramus, imo vero ne tandem, illud, quod cito violenterque hostem excussurum nobis videbatur, eum potius validiorem reddidisse, perinaciorioremque, dolentes animadvertamus. Nulla hic vis locum habet, illeque qui sensim occupaverat sedem, non impetu uno vincetur, sed fatigandus continuo erit morbus, quo tandem aliquando desperabundus quasi, cedere cogatur. Hæc omnia ponderans prudens Medicus, non nisi blanda chronicis malis opponet remedia, quibus adhibitis, & prudenter ad tempus continuatis, cum gaudio animadvertet, & simplicissimis, maximam DEUM indidisse efficaciam, curarique balneis aquæ dulcis, acidulis, decoctis, lacte ejusque fero, motu corporis morbos, qui aura potabilia & tincturas solares eludebant, heroicisque medicinis exacerbabantur. Eximium enim hic præstabit usum observatio illius BAGLIVIANI moniti. (*Can. de Medicina solidorum no. 25.*) Frustra curas chronicos aut acutos morbos per purgantia, diaphoretica, diuretica aliaque id generis, nisi solidorum & liquidorum naturam ad rectum ordinem deducas. In chronicis fibrarum laxitas in pristinam restituenda soliditatem; in acutis vero crispatura & ariditas earundem, quibus liquidorum cursus varie intercipitur, atque

atque turbatur. In utrisque enim liquida prompte current, si solida sint intenta quantum necesse est. Si tamen culpa sui liquidum non currit, eidem tantummodo medendum. Manet igitur in omnibus, circulo humorum legibus certis obnoxio, sua laus, ita quidem ut felix futurus sit Medicus, qui hunc solum pro vitæ principio, sanitatis fulcro, & natura morborum medicatrice habuerit.

XLII.

His igitur obsignamus ea, quæ speciminis inauguralis loco proponere meditabamur, atque dum præfenti labori imponimus finem, DEO immortalis, devota & religiosa mente humillimas grates decernimus, quod gratia sua ineffabili studiis nostris adesse,

& ad cursum eorum absolvendum, vires animi nobis aliquas elargiri benignus voluerit. Totos nos, ubi nunc Academiam relinquimus, illi, quem Supremum fortunæ nostræ Moderatorem agnoscimus, traditos & commissos cupimus. Annuat is porro & benedicat laboribus futuris, faxitque clementissime, ut & leves nostri profectus in Divini Sui Nominis cedant gloriam. Quod superest Benevolum Lectorem, si quis forte futurus debita humanitate rogamus, ut juveniles hos ausus æqui bonique consulat, id quod nos eo certius impetraturos speramus, quando publice pollicemur, nos semper eo allaboraturos, ut crescentibus per DEI voluntatem annis, ii, quos vel nos ipsi hinc inde offendimus, defectus, emendantur ac suppleantur.



EXERCITATIO

ANATOMICO-PHYSIOLOGICO-MEDICA,

DE ADMIRANDO

SANGUINIS CIRCUITU,

OMNIS SOLIDÆ

AC RATIONALIS MEDICINÆ

VERO FUNDAMENTO,

QUA OSTENDITUR AURICULARUM ET VENTRICULORUM
CORDIS MOTUM NEQUAQUAM VERE ESSE ALTERNUM, UT
COMMUNIS OMNIUM HUCUSQUE FUIT OPINIO,
SED PROPE COÆVUM ATQUE ADEO
SYNCHRONUM.

Primum edita anno 1736.

P R O O E M I U M.



X compluribus iis inventis, quæ jam a multis seculis ad usque hanc memoriam, summa Majorum cura ac diligentia in lucem prolata, atque eorum monumentis consignata prostant, non esse ullum, unde major fructuum ubertas Medicam in rem unquam redundaverit, ac plurimum lucis rebus, vel obscurissimis, & abdite latitantibus fuerit accensum, quam illud, quo admirabilis ille liquidorum in orbem motus nobis innotuit, nemini non, qui vel primis, ut aiunt, labris salutaris scientiæ doctrinas degustaverit, perspectum erit atque exploratum. Ecquis enim est, qui ignoret, veterum plurimos, si à Medicorum Principe paucisque aliis discefferimus, meris prope opinionibus ac lascivientis ingenii figmentis innitentes, plura verborum inania atque ingeniose excogitata, quibus tamen in re nihil est argumenti, pro indubitatis soteriæ scientiæ venditasse fundamentis. Infinita se nobis offerunt exempla, quibus hoc adstrui posset, nisi tempori parcerem. De quo qui forte dubitat historiam omnis ævi Medicam respiciens inveniet antiquiores Medicorum, quia divinum hoc ignorabant inventum, opinionum ac hypothesium fluctibus in vasto hujus scientiæ oceano fuisse jactatos. Testimonio nobis esse possunt GALENI, Viri cæteroquin haud indocti, placita de effectis quatuor temperiebus & qualitatibus: HELMONTII dogma de Archæo, quem corpori affingebat humano; PARAGELSI suavia infomnia, qui vitæ, sanitatis & morborum causas sua elementa chymica constituit, quæ vero, cum omnibus, quæ in humano corpore contingunt, enodandis

non suppeterent, astrarum efficacitates arcessivit. Verum enim vero haud facile mirum videbitur, rite aestimanti excellentissimum sanguinis circulum ipsis nondum fuisse cognitum; vel saltem non ea perspicuitate, qua hodierna luce, pernotuisse. Hic enim est filum ariadnæum, quo solo Medicinæ addictus ex labyrintho vel difficillimorum ac maxime perplexorum se evolvere atque expedire valet. Hic solus, si dicam, quod res est, verum ac genuinum sobriæ ac solidæ & Theoriæ & Praxeos Medicæ est fundamentum, cuius insciens, vel temere negligens certe in diffusissimo Medicinæ pelago jacturam faciet, vel saltem in rapidissimos fallacium opinionum, hypothesium ac commentorum vortices incidet, unde emergendi vix ipsi spes superest atque facultas. Est enim cynosura rationalis Theoriæ & Praxeos Medicæ, qua duce Medicinam faciens, facile scopulos ac syrtes prætervehetur. Quod vero ut cognoscatur clarius, non abs re fore duco, brevibus si arguam, quid generatim principium seu fundamentum, dein speciatim, quid Medicinæ principium sit; quo perspecto, omnium oculis erit testatius, sanguinis profluum per corporis vasa motum esse verum ac primarium omnis Medicinæ fundamentum; unde omnium, quæ humano in corpore contingunt, rationes sint petendæ ac unicæ reddendæ. Principium autem, quemadmodum generatim, omne id, quod rationem alterius in se continet, Philosophis vocatur: ita Medicinæ appellabitur principium, quod complectitur rationem, unde nobis innotescit, cur homo vita & corporis incolumitate perfruatur; vel ex adverso morbis affligatur, atque adeo in vivis esse desinat. Jam vero, cum nihil aliud humano in corpore reperitur, ex quo vitæ vel sanitatis, & præsentia, & absentia, perspicui possit, quam humorum in orbem motus, experientia ipsa loquente: nihil quoque clarius atque evidentius esse potest, quam quod admirandus ille liquorum per corporis vasa circumactus sit solidum omnis veræ Theoriæ ac Praxeos Medicæ, cum sobria ratione faciendæ, fundamentum. Exploraturis enim vitæ vestigia, an in in homine supersint, non ullo alio, nisi solo cordis & arteriarum motu, comperire eadem licet: quamdiu enim sanguinis per vasa qualiscunque, vel tardissimus ac minimus, perseverat circuitus, tamdiu quoque anima homini esse dicitur. Similiter quoque hominem prospera valetudine tamdiu videmus utentem, dum fluidorum per omnis corporis canales progressus tam æqualis, constans, liber, ac, pro corporis individui fabrica, temperatus succedit, ut universæ ab eo pendentes functiones cum facilitate ac constantia peragantur: quam vero primum liberrimus hic sanguinis motus undecunque interturbatur, ac pervertitur, ita, ut à sua qualitate, temperie, ordine ac constanti successu quomodocunque desciscat, homines ægrotare experimur. Quod si vero fluidorum per corpus circuitus ita restinguitur atque intercipitur, ut non ulla arte resuscitari inque debitum ordinem redigi queat, de vita omnino actum esse cognoscimus. Quid itaque clarius, quid illustrius ex dictis esse potest, quam quod perennis ille liquidorum in gyrum motus sit fons ac scaturigo vitæ, corporis integritatis, functionum atque omnium, qui ipsi accidunt, morborum, quin ipsius acerbæ mortis: hæc quippe omnia, sanitas scilicet ac vita ex ejus jugi nec interrupto per vasa progressu; morbi vero ex ejus perturbato atque inordinato motu; mors autem ex ejusdem plenaria cessatione ac quiete sola intelligi atque explicari possunt: hoc perinde valet, quasi diceres, sanguinis circuitum comprehendere rationem vitæ, incolumitatis corporis, adversæ valetudinis & interitus. Verum enim vero, cum nec vita nec firma corporis constitutio incolumes atque inoffensæ servari, neque morbi, si corpus invaserint, abarceri & propulsari queant, nisi horum fomites ac causæ perpetim ita amoveantur, ut sanguinis in gyrum concitatio semper perpetua, libera ac salva permaneat; iterum ipsa luce clarius elucet, sanguinis circuitum esse unicum & id solidissimum omnis sobriæ nec ullis figmentis innixæ Theoriæ ac rationalis Praxeos Medicæ fulcimentum, cuius tanta est veritas ac certitudo, ut, an ea verius quid ac certius esse possit, omni jure ambigam. Cum igitur mihi de argumento quodam digno, quod peculiari dissertatione pertractetur, cogitanti, sanguinis circulatio præ ceteris maximi momenti fuerit visa: nullus dubitavi egregium hoc thema pro virili hac diatribe persequi: prius vero, quam ipsi rei dicendæ me accingo, præmonendum esse duxi, me, in admirando sanguinis circuitu exponendo, ab hac usque omnibus recepta de ejusdem per cordis sinus transitu sententia, recessisse, secutum Virum, & auctoritate, & meritis gravissimum, LANCISIUM, ut qui primus in vivis equis, aliisque gravioris molis animantibus, à se dissectis, omnium oculis testatum fecit, cruoris per cordis thalamos progressum longe alio pacto confici, quam plerisque medentium adhuc fuit creditum; quemadmodum id ex dicendis fusius patebit. Faxit Numen Divinum, ut mea qualiacunque conamina mihi ex voto cedant, in sui ipsius gloriam & Medicæ scientiæ commodum.



CAPUT I.

De utilitate ac necessitate circuitus sanguinis.

§. I.

Sanguinis nomine illum purpureum humorem velim intellectum, aspectu quidem homogeneum, reapse tamen ex diversi generis partibus, solidis veluti ac fluidis, gravibus & levibus, valde mobilibus ac minus mobilibus, rotundis, angulosis, & compluribus aliis (a) compositum, canalibus humani corporis coercitum, perque hos, in vita fungentibus, perenni motu decurrentem, quem ex vasis suis, utcunque sauciatis, proficientem videmus.

§. II.

Res est multorum oculis testator, rubicundum hunc laticem (§. I.) tandiu fluxum, calidum ac probe esse permixtum, quamdiu in suorum vasorum alveis jugi circumagitur flumine: quam primum vero extra vasorum ripas evolvitur, gelatinæ in modum concretescens pedetentim, extincto tandem calore omni, in foedam, ac gravissime olentem abit putredinem, vulgari experientia ipsa loquente.

§. III.

Cruorem vero hunc (§. cit.), qui universos spirantis sani corporis tubos jugiter perluit, ex partibus, indole ac natura inter se differentibus, esse conflatum, (quantumvis vel acerrimus videndi sensus discriminis nihil in eo, ex vasis suis prorumpente, prima fronte detegere valeat, quod ubique similis ruber videtur,) attenta observatio testatum facit; qua in comperto est, sanguinem è qualibet vena, quomodo-cunque pertusa seu vulnerata, recens eductum ac pelvi exceptum, si quieti fuerit traditus, in binas dissidentis generis partes sua sponte discedere, quam primum quiescendo congelaverit: in concrementum videlicet solidum, quod in superficie, libero aëris allapsui obversa colore grate nitet coccineo; altera, ab aëre averfa, obscurum atque atrum colorem ostendente: & in liquidum subflavum, cui rubicundum illud coagulum, insulæ speciem præbens, innatat (b); reliquis volatilibus ac subtilissimis partibus fumi seu vaporis specie exspiratis (c).

§. IV.

Rubicundum hoc concretum (§. 3.), a fero superfuso disjunctum, si in loco tranquillo locari jufferis, illud sola quiete ex laxiori suarum partium nexu ferosum in liquamen, supernatanti (§. citat.) simillimum, videbis conversum, quod omnes feri dotes induit (d).

§. V.

Idem quoque contingit fero, coagulum illud rubrum (§. 3. & 4.) in uno hærens contegenti, si istud, a rubicundo cruore segregatum, in loco quodam temperato aliquamdiu collocatum detinueris: ubi pariter ultro in laticem magis tenuem ac subtili-

Frid. Hoffmanni Oper. Supplem. II.

liorem singulis fere horis solvitur, qui, interjectis diebus paucis, in foetidam ac putrem abit uliginem, quam si destillaveris, sal volatilis alcalinus inde elicitur (e).

§. VI.

Quæ cum ita sint, cuicunque satis fore perspicuum inde arbitror, causam, quare sanguineus latex, (qui tamen ad sui dissolutionem impense pronus ac proclivis,) salvus atque integer perseveret, quoad animans vivit, nequaquam sanguini ipsi, verum longe aliis, esse attribuendam: non enim est ullum uspiam liquidum, quod tam facile ad putridam & tetram tendit corruptionem, quam animalis cruor, quippe ex diversæ naturæ elementis, in mutuos suos amplexus ægerrime ruentibus, coagmentatus; quemadmodum VENERANDUS ILLE SENEX, INSTAURATOR ET REFECTOR prope affectæ ac prostratæ Medicinæ FRID. HOFFMANNUS, PRÆCEPTOR AC MAECENAS omni pietate ac reverentia ad cineres mihi colendus, præclare ac solidissime, ut consuetudo ipsius fert, demonstravit (f).

§. VII.

Quantum abest, ut humanus cruor sua ipsius virtute sibi mixtionem & condonare & fartam tectamque servare possit: tantum quoque abest, ut sibimet suas præcipuas dotes, veluti fluiditatem, calorem ac ruborem conciliare ac tueri valeat. Constat quippe ex dictis (§. 3. 4. 5.), illum calore penitus discusso & fugato, in coagulum illico transire, simul atque in orbem moveri desierit, pauloque tandem post putrescere; argumento non ullo alio evidentiori, tam sanguinis mixturæ a foeda corruptione atque interitu vindicandæ, quam ceteris, quibus ornatus est, dotibus tuendis, externa utique ac longe alia vi atque potentia opus esse.

§. VIII.

Cum autem nullæ in humana machina aliæ, præter fluidas, offendantur partes, quam firmæ, quæ, maximam partem, canalibus diversissimæ & capacitatis & muneris, admirando sane artificio ita contextæ sunt, ut alius alii semper nexus, tandem omnes in uno eoque maximo trunco coeant, qui cordi immergitur: nihil quoque est, cur hisce partibus negotium hoc abrogemus; præsertim cum experientia, in dissecto vivorum animalium corpore illam ingentem cordis vim & vasorum actionem, qua humores perpetuo in motum quoquo versus concitantur, inermibus oculis exhibeat. Hoc solidorum, inque primis vasorum ac cordis, munere, quod in sanguine impellendo ac per corporis regiones propellendo consistit, cruoris mixtura atque integritas solummodo atque unice ab omni corruptione custoditur, & farta tectaque servatur: dum ejus globuli a mutuo suo nexu vel jam soluti, vel recessuri in pristinum perpetuo rediguntur connubium: qui vero ita sunt immutati, deformati ac destructi, ut nullo pacto in novas sanguineas sphaerulas reduci & compingi queant, e corpore foras extruduntur per tot innumera colatoria, ubique in corpore obvia: ex chylo autem in sanguinis massam delato, ac vi vitæ satis aptato novæ cruoris mixtionis subeundæ, novi globuli formantur, qui in mutuos amplexus coacti, & rubicundo colore induti, in locum deperditorum surrogantur, ut sanguinis semper moles permaneat tanta, quanta canalibus im-

N 3

plendis

(a) FRID. HOFFMANNUS Med. Rat. System. T. I. L. I. S. I. c. V. §. II. BOERHAAVE Institut. Med. 223.

(b) CAR. JOHAN. MICH. OTTO Dissert. de sangu. human. constit. naturali Præsid. Illustr. D. D. SCHULZII Halæ ventilat. §. II. BOERHAAVE Element. Chem. Tom. II. Part. II. Procc. CXIV.

(c) FRIDERIC. HOFFMANNUS Libr. cit. loc. cit. §. VI.

(d) BOERHAAVE Aphor. 24. 25.

(e) Element. Chem. Tom. II. P. II. Proc. CXV.

(f) Libr. cit. Libr. I. Sect. I. C. V. §. II. V. XII. XV. XVIII. XXIV.

plendis necessaria: quin hi iidem globuli, sempiterno hoc per tot vasorum myriades motu circumacti, inter se agitati, collisi, attriti calore vitali perfunduntur, & a concretione in massulas justo crassiores prohibentur. Jam itaque perspicies, quanti sit usus ac necessitatis solidorum corporis motus, isque haud interruptus, nec immoderatus ad cruoris mixturam æque ac dotes ejus ab interitu custodiendas, quæ profecto omnes brevi perirent, si absque eo forent.

§. IX.

Quamvis vero utilitas, quæ hac constanti cordis & arteriarum agitatione (§. 8.) in ipsum sanguinem redundat, incredibilis existat ac præstantissima: præstantiores tamen multo atque adeo uberrimi fructus sunt, quos ipsæ humani corporis solidæ partes inde capiunt. Hujus quippe solius beneficio corpuscula minima, mutuo suo nexu ultima solidarum ad unam omnium partium stamina non minus eleganter quam mirifice contextentia, suo in situ ac coherencia continentur; alia vero à suis vinculis laxata, vel è suo loco dimota & in sanguineum hoc flumen præcipitata, aut alio pacto detrita, cruore hoc correpta & ad corporis excernicula delata, ibidem excernuntur; in locum vero detritorum, ac deperditorum alia corpuscula, iis lacunis seu interstitiis, in ultimo quoque stamine relictis ac vacuis, de integro reficiendis idonea substituuntur, ut firmæ corporis partes hac via, quoad mortalium vita persistat, perpetim refarciantur & conserventur. Quid? quod ipsius vitæ usuram ac sanitatis divino huic sanguinis circulo unice in accepto ferendam esse, nemini non patebit, qui vel a limine Apollineam artem salutaverit: fidem igitur excedit omnem, quanti usus ac emolumenti in scientia medica sit hujus perennis purpurei liquidi circuitus per corporis provincias cognitio: tamdiu enim vita & sanitas vigent ac florent, dum hæc liquidorum circuitio sit libera, moderata nec inturbata: ubi primum vero libero suo progressu intercipitur, vel aliter præpeditur aut conturbatur, illico hæc jacturam faciunt, periclitantur, quin imo pessundantur. Sanguinis hic circulus quemadmodum complectitur rationes innumerorum, ne dicam fere omnium, in statu inoffenso atque incolumi, phænomenorum: ita quoque Physiologica inter principia, & ea domestica, primum omni jure sibi locum vindicat: quæ cum fundamenta jacent sobriæ ac solidæ Pathologiæ, in aprico est, hunc mirabilem sanguinis motum quoque præcipuum demonstrandi in Pathologicis esse principium. Nihil igitur cuicunque, Medicinam sobrie ac prudenter culturo, antiquius esse debet, quam ut divinum hunc sanguinis circulum sibi habeat commendatissimum atque animo teneat perquam fixum, ita enim fiet, ut nullo fere negotio omnia tam in sanitate, quam morbis quibuscunque sibi obvia, vel abstrusissima aliasque inenodabilia expedire atque intricata extricare valeat. Rectissime igitur Viri, de arte salutari præclare meriti, uno ore ac consensu pronuntiant: Sanguinis circuitum genuinum esse ac verum cunctarum in humano corpore actionum principium. (g)

§. X.

Quidnam igitur mirum, si dignitate, excellentia, utilitate diffusissima ac summa hujus præclari sanguinis circuli necessitate (§. 8. 9.) permotus, hac diatribe

excellentem sanguinis circulum excutiendum suscipere dubitavi nullus. Quo autem facilius intelligatur, quo pacto coccineum illud liquidum per cordis antra, ac sua quæque vasa circumferatur; ex usu omnino erit, ut dispiciamus, quamnam sit cordis fabrica, & motus ab hac profectus; deinde structura vasorum quamnam sit, & qua ratione cruorem per corporis loca quæcunque urgeant? quibus perspectis in eo erit, ut perquiramus, quo pacto ipse sanguinis circuitus tam per cor, quam per adnexa ipsi vasa peragatur.

CAPUT II.

De Cordis structura.

§. XI.

Quid nobis ex adductis exploratius esse potest, quam quod humanus cruor, ut primum ex alveis suis coercentibus effluerit, quoquoersus se diffundat, nisi vase fuerit exceptus, abeundo in spissamentum quoddam, omnis motus expers (§. 2.) quod aliquanto post in dissidentis naturæ partes quiescendo sejungitur (§. 3. 4. & 5.). Luculenter satis inde mihi patefcere persuadeo, sanguinem ex sua natura in motum semetipsum agitare esse impotentem. Jam vero cum experientia eaque indubia ex mechanicis in comperto sit, non corpus ullum quiescens sese movere posse (h), verum ad sui motionem externa semper causa motrice indigere: nihil quoque est dubii, quin rubicundus hic latex (§. 1.) ad sui per canales corporis circumvectionem motore quodam, itidem externo, utatur, quo jugiter impellatur & in motum conjiciatur.

§. XII.

Cor igitur primarium omnium liquidorum humano in corpore esse motorem, inter omnes Medicinæ vacantes convenit, utpote quod præli vice fungitur, quo alternis contracto, moles sanguinis universa in motum & eum assiduum percietur, tamdiu perseverantem, quoad animal spiritum ducit: corde autem a suo motu quiescente, sanguinis quoque progressus in orbem cessat, deque vita actum est. Ut igitur perspiciatur, qui fiat, ut admirabilis cordis machina suos motus alternatim, modo sese constringendo, modo dilatando repetat, compagem ipsius tam mirabilem, ut nihil fere supra, mihi omnium præcipue esse perscrutandam arbitror; brevitate tamen quanta potero maxima, elegantissimum hunc cordis contextum retexere sum allaboraturus.

§. XIII.

Cor, quod in thorace residet, est musculus (i) quadricavus (k), omnium robustissimus (l), a coniformi figura non multum abludens, (m) pericardio laxissime investitus, intra mediastini geminationem collocatus (n) deque truncis vasorum maximis sua basi suspensus, qui ventre suo diaphragmati fere transverse incumbit, ita, ut sinistrum thoracis spatium parte sui maxima, minima vero, eaque amplissima, dex-

(g) FRID. HOFFMANNUS Libr. cit. cap. VIII. §. IX. XI. & XII.

(h) CHRIST. WOLFFIUS Cosmol. general. sect. II. cap. IV. §. 304.

(i) FRID. HOFFMANNUS Libr. cit. cap. II. §. VII. BOERHAAVE Libr. cit. 187. HEISTERUS Compend. Anatomi. §. 261. THOM. BARTHOLINUS Anat. Ren. Libr. II. c. VI.

(k) JOH. MAR. LANCISIUS Tract. de Motu cordis & Aneur. Libr. I. sect. II. Proposit. XXVIII.

(l) FRID. HOFFMANNUS Libr. cit. L. c. §. VIII. Idem Libr. cit. loc. cit. §. XXVII.

(m) WINSLOVIUS Anat. Tom. IV. de Corde No. 40.

(n) GARENGEOT Splanchn. Part. II. cap. III. §. 2.

dextrum occupet, sanguini in arterias appensas alternato motu expellendo, & refluxo per venas recipiendo inserviens.

§. XIV.

Involucrum hoc membranaceum, pericardii nomine salutatum (§. 13.), notabili spatio à cordis peripheria distans, ne libertati ejus motus, quo cor perpetim utitur, sit impedimento, cordis machinam obvolutam communit: intus capacitate, ambitu cordis omni multo ampliore, cui cor inhæret inclusum, est instructum. Superna sui parte in apicem obtusum, vel si mavis, subrotundum (*) desinente, truncos vasorum, cor egredientes amplectitur: inferna vero superficie, latius diffusa, & trianguli speciem præbente (o), anteriori centri tendinei diaphragmatis parti, magis tamen sinistrorsum, arctissime adnascitur, ita ut fibris utrobique protensis, atque inexplicabili serie sibimet mutuo intertextis (p) tam arcte inter se connectantur, ut aciem cultri, hanc firmam connexionem disjungere tentaturi, eludant, nec arte ulla a se invicem divelli patiantur.

§. XV.

Capfa hæc cordis membracanea (§. cit.), præter illam cum vasis totius corporis maximis cohaesionem (§. 14.), tum antica, tum postica sua superficie mediastino conjungitur, quo interveniente, sternum, gulæ & dorsi spinæ adhærescit. Ibi vero vasis speciatim arteriosis inque primis aortæ trunco adnectitur, ubi maximum sanguinis ex corde expulsi impetum sustinet inque arcum flecti incipit, ut aortæ in sanguinem renixum hoc pacto augeat, LANCISIO id omnium præcipue animadvertente (q): postquam enim tres circiter uncias a cordis basi progressa inque arcum curvari coepta est, pericardio munitur. Arteriæ vero pulmonali similiter adnascitur, ubi cruor a corde dextro projectus in ejus latera validissime incurrit: quid? quod hujus ramos prius peculiaribus vaginulis involvit, quam pulmonis viscus intrant, quæ eos per omnes interiores pulmonum recessus usque eo affectantur, donec ad ipsas ejusdem visceris vesiculas, quarum quælibet suo ramulo bronchiali adhærescit, pertigerint. Venæ cavæ autem superiori paulo supra, quam ad saccum descendit venosum, conspicitur accretum: inferiori vero, ubi hæc diaphragma permeat. Hæc enim loci tam arcta diaphragmati cum pericardio intercedit in homine connexio, ut non ulla arte a se invicem disjungi queant.

§. XVI.

Cognito, quibus partibus cordis receptaculum (§. 14. 15.) sit adnatum, ipsius quoque fabrica, nec dum omnibus ita perspecta, ut nihil amplius addi posset, venit perlustranda. Anatomicorum plerisque est persuasum, hoc cordis munimentum [§. cit.] duplici dumtaxat lamella esse contextum (r), quarum exteriorem a mediastino produci; interiorem vero a truncis maximorum vasorum oriri perhibent (*): verum Doctissimus LANCISIUS, qui in elegantissima cordis textura retexenda ac pervestiganda omnium fuit laboriosissimus, membranaceam hanc capsam, quæ cordi propugnaculo est, nequaquam binis, sed ternis, a se invicem, & crassitie, & fabrica, dissidentibus, construi membranis, primus edocuit (s),

cui alter succedit testis WINSLOVIUS (t): Cum his quoque concinit Vir in re Anatomica tum præcipuus ac facile princeps, tum exercitatissimus CASSEBONIUS, quo duce atque auspice, prima mea in Anatomicis rudimenta mihi ponere huc usque contigit, cui cum, non pro eo, ac meretur, gratiam referre possum, habeo tamen habiturusque sum, dum vivam. Extima vero harum pericardii lamellarum, genuina est mediastini proles, vel si mavis, ipsum mediastinum (u), quippe quod gemino pariete, quibus cellulosa quædam substantia conspicitur interjecta, coagmentatum est. Binæ hæc mediastini lamellæ, ad pericardium adventales, a se mutuo discedunt, hoc in medium sinum, qui inter mediastini parietes a se mutuo recedentes, relinquitur, recipiendo & recondendo. Altera lamella, & ea intermedia, est satis crassa ac firma, fibris tendineis albis: [quæ doctissimo LANCISIO musculares visæ sunt] compositissimo ordine ac serie inter se confertis, concinnata, quæ exteriori tunicæ, interveniente cellulosa substantia, in superiori pericardii parte facile visui obvia, in inferiori autem vix ac ne vix quidem conspicua, proxime adnectitur. Utrum vero fibræ hæc tendineæ, vel si cum LANCISIO loqui tibi arriserit, musculares, ita se invicem decussent, ut perspicacissimo huic Viro perhibetur, id mihi oculis usurpare nondum fuit integrum. Tertia tandem & intima, quæ est pericardii, tunica tenuitate ac teneritate reliquis plurimum antecellit, ita, ut ab illis caute atque artificiose avulsa, ac lumini obversa, transluceat. Hæc maximo-pere est expolita ac levigata ea facie, qua cordis machinam respicit: secus vero in illa superficie, qua intermedia agglutinatur lamellæ pericardii. Quod extima membrana natales ducat suos a mediastino, ex dictis liquet: intermedia vero ibi, ubi pericardium vasis pulmonariis, ipsos pulmones jamjam ingressuris, adnatum deprehenditur, ab intima seu tertia substrata pellicula discedit, qua relicta, ramis arteriæ ac venæ pulmonariarum advolvitur, quos peculiaribus vaginis seu capsulis includit & per pulmones comitatur (*). Tertia tandem eaque intima lamina, ab intermedia sic deserta, cor versus reflectitur: vasorum quippe arteriosorum ac venosorum segmenta, quæ intra pericardii spatium delitescunt, investiens, ad cordis basin descendit, unde faciei totius cordis exteriori instrata obducitur, sicque membranam cardiacam efficit exteriorem.

§. XVII.

Haud igitur obscure ex recensitis (§. 16.) cuivis cernetur, præter cor, cum suis auriculis, saccos quoque venarum pulmonalis & cavæ cum spectabili hujus venæ segmento, ut & truncos arteriarum pneumonicæ, atque aortæ, in arcum insignem hæc curvatæ, cui, in aortam descendentem abeunti, tubus sic vocatus arteriosus BOTALLI inseritur, pericardii capacitate esse complexa. De pericardii vasis nihil attinet hic dicere, ne longior sim in hac dissertatione, quam hujus termini permittunt. Me etiam non monente quisque haud ægre perspiciet, quid de illis quinque foraminibus, quibus hoc cordis integumentum a vasis communibus pertundi fertur (x), censendum sit; id saltem genuine atque aperte hoc loco confiteri non vereor, mihi nunquam contigisse tot perforationes in pericardio oculis usurpare: arte-

N 4

riæ

(*) WINSLOVIUS Libr. cit. l. c. No. 80.

(o) GARENGEOT Libr. cit. loc. cit. §. 9.

(p) LANCISIUS Libr. cit. sect. I. cap. III. Propos. VI.

(q) Libr. cit. l. c. Prop. IX. & X. p. 25. & 26.

(r) HEISTERUS Libr. cit. §. 260.

(*) M. JEAN PALFIN Anatom. du Corps Hum. Trait. III. chap. VI. p. 245.

(s) Libr. cit. L. I. sect. I. cap. III. Prop. V. p. 21.

(t) Lib. cit. Tom. cit. No. 79.

(u) Idem l. c. Tom. IV. No. 82.

(*) LANCISIUS Lib. cit. l. c. Prop. VII. p. 23. & 24.

(x) DANIEL TAUVRY Anat. Nov. P. I. c. IV. BARTHOLINUS Lib. cit. Lib. II. c. V. p. 349.

riæ quippe pneumonicae dextra æque ac sinistra prius in ramos se spargunt, quam pericardii cavitatem egrediuntur: ipse vero sacculus venæ pulmonariæ quatuor insignes venas recipit (y).

§. XVIII.

Prius vero quam, quid commodi utilitatisque involucrum hoc (§. 14.) cordi adferat, ostendam, omnino præmonendum duxi, cunctos ejus, quos cordi præstiat, usus a me nequaquam omnes, utpote brevitati hic stude, expositum iri, sed præcipuum duntaxat ex iis ac palmarium, qui inde in cor redundat. Cum enim artificiosissima cordis machina a sapientissimo conditore eo consilio tam affabre constructa, hocque loco collocata sit, ut perpetuis motibus, qui in contractione ejus ac relaxatione positi sunt, concussa impulsu humanis liquidis largiatur, non potuit non ejusmodi situm intra pericardium obtinere, quo ipse antra undique æqualiter ac liberissime coarctari & vicissim diduci possent. Jam vero cum vulgari experientia nemini non exploratum sit, cordis motum humano præcipue in genere non semper esse eundem, sed perquam mutabilem, quid? quod in singulas horas non raro vel nimia corporis exercitatione quacunque, vel animi impetu & commotione, vel quacunque alia causa reapse ita immutari, ut modum interdum excedat; perquam necesse fuit, ut cordi hujusmodi sepes prætenderetur, quæ ipsius motum utcumque, five animi five corporis motu, efferatum atque effrenum refrenaret ac limitibus circumscriberet, quos ipsi excedere non foret integrum. Clare hinc perspicies, quid causæ sit, cur cor pericardio, tanquam clauetro coerceatur, ne videlicet motu suo violentiori atque adeo interdum indomabili, vicinis partibus inque primis præmollihus pulmonibus allidat vimque inferat.

§. XIX.

Ne autem hoc sepimentum cordis superficiei uspiam adnascatur, licet exempla quædam, de utriusque mutua concretionem litteris commendata, disperse extent, a natura sapienter cautum est, ut pericardii concavitas ac cordis convexitas nunquam non madore blando obliniatur, ne utraque exarescant, nec cordis perpetua agitatio forte languescat aut impeditior succedat. Latex hic, qui Anatomes peritis, pericardii aqua cieri solet, in homine sano perquam exigua ut plurimum deprehenditur copia, coloris plerumque limpidi est vel subflavi, sapore insipidus, qui si igni admovetur, in gelatinam cogitur: in ægrotis vero sæpius tanta abundat copia, ut cochleari eximi possit, quin multis modis a sibi usitato colore & sapore deflectit.

§. XX.

Nondum vero inter Anatomicos convenit, ex quo fonte hoc pericardii liquidum (§. 19.) emanet. Veterum variæ de ejus ortu ac scaturigine semper fuerunt sententiæ, quas ad unam omnes mihi recensere conatus, foret metuendum, ne nimis longus sermo esset meus; plæræque tamen eo redeunt, aquam hanc ab humoribus, e corde ejusdemque vasis exhalatis, & intra pericardii cancellos ita condensatis, oriri (z). Si forte cui volupe esset dissidentes illas, in quas vetustiores Medicorum abierunt, de fonte hujus liquidi

opinionem cognoscere, sibi habeat commendatas AND. LAURENTII Anat. Libr. 9. Quæst. 5. & JOH. RIOLANI Anthropogr. Libr. 3. cap. 7. ubi fusius explicatæ leguntur. Nec vero recentiores Medicorum inter se omnes consentiunt, locum designaturi, unde hic liquor promanet. PEYERUS (a), cui M. MALPIGHII succinit (b), eum per foramina, intimæ pericardii tunicae insculpta, quæ emissaria tot exiguarum glandularum, per pericardium disseminatarum MALPIGHIO perhibentur, exsudentem viderunt. Quæ sententia vel inde confirmari videtur, quod ILLUSTR. BERGERUS pericardii glandulas in quodam hydrocardia extincto, sero turgidas moleque multum adauctas suis ipsius oculis comperit (c). PETR. DIONIS glandulas peculiare animo finxit exiguas, in adiposa cordis basi sitas, unde hic latex depluat, quas LOWERUS quoque juxta cordis basin constituit (d), ex quibus hic pericardii humor exstillare dicitur. At vero nullius Anatomici tanta hucusque fuit oculorum acies, tamque acerrimus videndi sensus, ut has glandulas & pericardio, & basi cordis affectas, unquam reperire potuisset. Quid vero sit, quoniam laudatissimi Viri ejusmodi glandulas cogitatione sibi heic loci finxerint, omnium optime planum fecit Cl. HEISTERUS (e). THEBESIO hæc aqua per tenuissima membrana, auriculis cordis circumductæ, percolari fuit credita (f), cui quoque prælaudatus HEISTERUS congruit (g). Verum enim vero LANCISIUS, qui in hujus liquoris fontibus & detegendis, & perquirendis perquam fuit assiduus, veritati convenientius perhibet, eundem in illis glandulis, quæ pericardio extrinsecus atque superne instratæ, & potissimum juxta asperæ arteriæ in ramos divisionem consistæ conspiciuntur, a sanguine secerni; unde postea per peculiare ductus, ad pericardium protensos, inque hujus superficie excavata hiantibus osculis terminatos, intra pericardii capacitatem effundi (h). Patula horum ductuum ostiola, nullo sane negotio, invenire cuivis licet atque oculis inermibus comperire, si modo inversum pericardium, digitorum apicibus intensum, validius fuerit compressum; tum jucundissimo spectaculo illud limpidis guttulis, arctato in loco ex patentibus horum ductuum orificiis prorumpentibus, videbis irroratum. Nec ab eo Doctissimus CASSEBOHMIUS dissentit, utpote cui, data opera abditos hosce ductus, a bronchialibus glandulis ad pericardii caveam exporrectos, quærendo investiganti, aliquoties eos nudis oculis perspicere contigit, quemadmodum hoc ab illo, Anatomico docente, sapius accepi. Non igitur est dubium, quin hæc glandulæ, quæ trachææ in ramos divisioni adjacent, sint vera scaturigo liquoris pericardii, unde per gracillimos tubulos in pericardii cavum indefinenter defluat. His insuper accedit locupletissimus testis WINSLOVIUS, qui aperte asserit: interiorem pericardii faciem infinita exiguarum foraminulorum multitudine scatere, ex quibus perpetim serosum exsudare liquidum, quod a morte pedetentim usque eo exaugeri, ut in defunctis, paucis quibusdam interjectis diebus cultro demum apertis, copia non adeo exigua deprehendatur (i). Quamvis vero hæc ita sint, non tamen inficias eam, fieri non posse, ut serum interdum validissimis ac violentissimis cordis motibus; undecunque arcessitis vel exasperatis, e poris membranae, auriculas investientis, excuteretur atque exprimeretur, quod ideo etiam

tunc

(y) RUYSCHIIUS Epistol. X. Tab. XI. Fig. I. II. p. 7. WINSLOVIUS Libr. cit. Tom. cit. No. 112. HEISTERUS Libr. cit. §. 295.

(z) THOM. BARTHOLINUS Libr. cit. Libr. II. cap. V. p. 351.

(a) Meth. Hist. An. Med. in Schol. ad cap. VI.

(b) Epist. de gland. conglob.

(c) Libr. de Nat. Hum. Libr. II. cap. 28.

(d) Tract. de Cord. cap. I. p. 4.

(e) Comp. Anat. Tom. II. Anadol. 364.

(f) Dissert. de Circul. Sangu. in corde p. 26. & seqq.

(g) Libr. cit. 260. p. 123.

(h) Libr. cit. Libr. I. Sect. I. cap. V. Prop. XVII. XVIII. & XIX. p. 32. 33. & 34.

(i) Libr. cit. Tom. IV. de Thorace No. 83.

tunc temporis subcruenti coloris est. An vero aqua hæc pericardii secundum naturam, unaquaque cordis systole, per poros illius membranæ, auriculas succingentis, transprimatur, valde dubito. Verum ne diutius æquo huic liquori considerando immorer, ad ea progrediar digniora, quæ heic loci perpendantur.

§. XXI.

Cordis sepimento membranaceo (§. 14.) fini nostro convenienter perquisito (§. 15. ad 20.) jam in eo est, ut ipsius cordis, hoc munimento circumsepti, fabricam quam brevissime perscrutemur. Non tamen mihi temperare possum, quin aperte ac genuine confitear, eo timidius me ad fibrosum hujus contextum evolvendum, atque suos in villos rite exsolvendum ingredi, quo magis hi in semet ipsos ita implicati sibi que mutuo intexti sunt, ut inexplicabile quasi textum nodumque Gordium mentiri videantur: series quippe horum staminum, quæ musculosam cordis compagem constituunt, si verum fateri liceat, tam mirifice contortæ, complicatæ, ac suis tendinibus adstrictæ sunt, ut, unde earum nexus incipiat, quove se condant, non alii facile ulli, nisi artis corporum concinne disseccandorum peritissimo, visu percipere sit integrum, testibus iis, qui fibroso huic glomeri revolvendo manus ipsi effectrices admoverunt (k). Quod si ita est, spero fore, B. L. ut æqui bonique faciat, si forte ipsius expectationi in villosa hoc cordis contextu retexendo non item fecero satis, ut mihi in optatis fuit, perbenevole potius expendendo, hic omnino esse artis opus, quæ neutiquam in adolescentem, sed in Viros, magna prudentia, multo usu atque exercitatione præditos, convenit. Pro virili tamen eo annitar, ut in fabrica cordis explicanda, quæ prælucente & demonstrante Doctissimo CASSEBOHMIO, Viro in minimis humanæ machinæ disquirendis ac detegendis perspicacissimo, egomet ipse humano in corde meis oculis usurpavi, proferam.

§. XXII.

Cor (§. 13.) in censum musculorum venire, tam clarum est, quam quod clarissimum: quin jam Medicorum principi cognitum (l), & a LOWERO compluribus argumentis est evictum (m), quibus ex recentioribus Viri magnæ famæ atque existimationis suffragantur (n): GALENO cum suis asseclis frustra reclamantibus (o). Locatum illud esse in thorace ex dictis (§. cit.) abunde liquet. Quod vero speciatim ad ejus positum, quo potitur, attinet, nequaquam silentio esse premendum arbitror, ejus situm, quem in homine obtinet, a cordis brutini collocatione esse disjunctissimum: quippe in quadrupedibus ad perpendicularum fere ita suspenditur, ut ejus apex medio fere in thorace visui sit obvius; cum in homine transverso pene posito diaphragmati ita insideat, ut basi sua dextro, apice vero sinistro thoracis cavo inhæreat, quemadmodum WINSLOVIUS omnium primus rectissime tradidit (p). Motoria igitur cordis machina in homine a septo transverso, tempore expirationis retenso, sustentatur: in brutis vero semper & pendula multoque intervallo a diaphragmate, cui, interveniente mediastini portione, conum quasi excavatum referente, adnectitur.

§. XXIII.

Ut vero nihil in rerum natura otiosum est ac supervacaneum, verum omnia, quæ sunt, sua fruuntur ratione, unde argui semper potest, cur ita se habeant (q): omni quoque caret dubio, quin vel hoc (§. 22.) sua utatur ratione, unde cognosci ac intelligi possit; cur videlicet cor in thorace humanum ita collocatum sit, ut in diaphragmate jaceat transversum; cum in brutis recta fere deorsum pendeat ac suo corpore & cuspide quasi in utramque partem vacillet? Dein, quid causæ subsit, cur cordis involucrium (§. 14. 15.) arctissime ad diaphragma humano in corpore sit adtextum: in brutis vero interjecto quodam vinculo diaphragmati alligatum? Non igitur abs re nec ab instituto alienum fore censeo, breviter perstricturus, quænam hujus rei sit ratio. Vulgari observatione cuicumque patescit, vel saltem facile cognosci potest, homini a Natura thoracem multo brevior, quam brutis fuisse constitutum (r): cum enim soli inter animantia homini os sublime datum atque corpore erecto incedere sit permissum, ut erectos ad sidera vultus tollere atque oculos, prout collibuerit, circumferre possit; ceteris animalibus prono semper & in terram demisso capite progredientibus: pectus humano generi ita fingendum fuit ac constitutum, ne cordis machinæ nimium negotii exhiberetur, sanguinem ad caput recta sursum propellendi: quod procul omni dubio fuisset factum, si hominis thorax longitudine æquaret brutorum pectora. Cor igitur cum in thoracis cavitate necessario fuerit defigendum, ne nimio locorum intervallo a capite esset disjunctum, non aliter fieri potuit, quam ut in spatio, arctioribus ac brevioribus limitibus circumscripto, ejusmodi transversum obtineret situm; alias non ipsi ullus in thorace commorandi locus foret relictus, in quo augeri rursusque imminui seu libere moveri potuisset: quia pulmones plurimum in thorace capacitatis sua mole occupant, & ad sui ab aëre inflationem & compressionem alternantes indigent. Satis inde perspicuum erit, quare non ullus alius cordi situs ad liberrimam sui motionem in thorace fuerit aptior, quam transversus. Multis idem rationibus adstruere ex facili foret, si constituiissem sermone meo longius excurrere. Neque difficilius erit rationem illius arctissimæ coherentiæ, quæ humano pericardio cum diaphragmate est, reddere; hæc quippe nequaquam in curvo & convoluto foetus in utero matris situ oritur, ut LOWERO visum (s); (a prima enim embryonis conformatione hæc jam præsto est; LANCISTO id pluribus argumentis atque experimentis, quæ in ovis incubatis cepit, demonstrante), sed eo consilio a natura videtur facta, ut septum transversum, singulis inspirationibus ex superficie convexa in planam descendens, sustineat, ne viscerum, huic appensorum, mole ac pondere, nimis deorsum tendatur, & distrahatur in homine, recto atque inflexo corpore inambulante (t): quod cum minime in brutis, propendente pronoque capite euntibus, metuendum sit; præterea quadrupedibus cum thorax in majorem sit porrectus longitudinem, unde cordi amplum satis recubandi seque movendi sit spatium, ratio sufficiens non esset ulla, cur cordis machina in cancellis æque angustis, atque in hominibus,

(k) LANCISIUS Libr. cit. Libr. I. Sect. II. cap. I. Prop. XXX. & XXXI.
(l) HIPPOCRATES Libr. de corde §. 4.
(m) Tract. cit. cap. I. p. 15.
(n) FRID. HOFFMANNUS Libr. cit. Tom. I. S. I. cap. II. §. VII. & VIII. WINSLOVIUS Libr. cit. Tom. IV. No. 40.
(o) THOM. BARTHOLINUS Libr. cit. L. II. cap. VI. p. 360.

(p) Hist. Acad. Reg. Scient. Anno 1715.
(q) STRÆHLERUS Comment. Succinct. de Sens. atque usu princip. ration. sufficient. cap. I.
(r) LANCISIUS Libr. cit. L. I. S. I. cap. IV. Prop. IX. p. 25.
(s) Tract. cit. cap. I. p. 7.
(t) Idem L. c. L. I. S. I. cap. IV. Prop. XI. p. 27. & 28.

bus, inclusa teneretur: dein quamobrem diaphragma cum pericardio immediate connecteretur in brutis, rationibus iis omnino cessantibus, quæ, utrumque ut fieret, in homine postulabant.

§. XXIV.

Cunctis fere Anatomiae addictis, si a recentioribus quibusdam recesseris, cor conici speciem figura efficere sua, dicitur, at, vere si dicam, fatendum, illud non ita proximum, ut vulgo perhibetur, conici figuræ accedere: quodsi enim parietem ventriculi anterioris exteriorem, quo diaphragmati ex parte innititur, cordi abstuleris, non animadvertes solum, nihil figuræ cordis conicæ decessisse; sed hoc tum demum, demto ventriculo dextro, perfecti conici faciem induere, RUYSCHIO quoque hoc jam sedulo adnotante (u). Unde etiam WINSLOVIUS effert, cordis formam quodammodo conici figuræ congruere. (x)

§. XXV.

Ut vero, quæ in cordis cortice designanda, facilius mente complectamur, expediet, in quas regiones partesque exterior cordis ambitus describi consuevit, breviter hic attingere. Primum binæ a foris in corde superficies, quarum altera superior, altera inferior salutatae sunt (y), cor contemplanti sese ostendunt. Hæc quæ plana est atque æqua, in ipso diaphragmate, quod proxime tangit, residet (z): illa vero, quæ superior sonat, & convexa ac fornicata existit figuræ, ab eodem hoc septo transverso est averfa. Deinde totidem quoque margines in cordis peripheria veniunt animadvertendi; horum alter, qui anterior margo audit, in modum cunei definit, angulumque satis acutum refert, unde etiam haud inepte margo vocitari posset acutus; hic diaphragmati instratus sterni obvertitur: qui vero posterior margo dicitur, in superna atque à diaphragmate averfa parte est conspicuus, valde obtusus, & non nihil arcuatus est; hinc margo obtusus non immerito nominari posset. Postremo quoque duo in corde extrema, sedulo dignoscenda, hoc spectatum venienti sese dant obvia. Alterum eorum, quod latioris atque amplioris est ambitus, baseos nomine insigniri solet: altero, quod in acumen exit, apicis seu cuspidis nomine satis cognito. Plerique Anatomicorum ac præcipue veterum, si EUSTACHIUM exceperis, perversum fane ac sinistrum cordis humani situm sibi finxerunt, opinando, eum & hominibus & brutis esse eundem. Falsæ huic opinioni, de situ cordis pendulo, occasionem suggestisse præcipuam videtur crebrior brutorum dissectio, unde cuncta fere sibi met observata, nullo habito respectu, in humanam transfulerunt machinam (a); cum tamen EUSTACHIUS genuinum humani cordis positum, suis jam temporibus, adumbratum dederit: quem WINSLOVIUS omnium primus, nostra ætate, ab oblivione vindicavit nobisque reddidit. Cor igitur non recta deorsum in homine pendet, sed transverso situ in diaphragmate recumbit, hoc a sua actione acquiescente: quod si vero diaphragma tenditur, ex fornicata superficie in planam descendens, quod, aëre foris in pulmones irruente, contingit, a corde dimovetur abdomen versus recedendo; unde apparet liquido, cordis molem a diaphragmate tanquam sustentaculo fulciri tempore exspira-

tionis: inflatis vero pulmonibus & diaphragmate in sui contractionem acto, ideoque a corde longius remoto non sustentari. Nec sicco pede transeundum existimo, cor ita in thoracis antro esse constitutum, ut, si in tres æquales concipiatur partes divisum, unam duntaxat earum, quæ crassissima est, in dextro thoracis cavo delitescens; ceteras vero binas, in cuspidem sensim abeuntes, in sinistro ejus cavo hospites videamus (b). Ex quo facile perspicuum est, quid sit, quamobrem cordis pulsus, in sinistro tantum thoracis latere percipiatur: illud quippe cum maximam partem in sinistro thorace abditum hæreat (§. 13.), ubi cuspidem liberrime circumfertur sua, hinc singulis cordis pulsibus, ejus apex illiditur costis, unde est, cur motus ejus hoc in latere sentitur.

§. XXVI.

Quamquam vero cordis machina simplicis musculi speciem præ se ferre videatur, cave tamen, tibi persuadeas, reapse sic se habere: perattenta enim observatione & autopsia Anatomica exploratum est, illud minime ex uno ac simplici; sed quatuor musculis diversis esse compositum (c), quorum suus cuique sinus seu thalamus est insculptus, sanguini capiendi & in appensos canales expellendo aptissimus. Hæc cordis antra ut situ, figura, amplitudine, structura ac robore inter se plurimum discordant: ita quoque diversis cieri denominationibus solent. Quæ igitur quo facilius cognoscantur, eas primo loco horum musculorum bigas, qui maximam, ne dicam omnem, cordis molem sibi vindicant, perlustrare operæ pretium erit; quibus perspectis ad minores quoque cordis toros, capacioribus ventriculis præfixos, qui auriculæ ejus salutantur, ingrediar explicandos. Grandiores igitur cordis musculi, qui amplioris sunt capacitatis, ventriculorum nomine insigniuntur. Horum numero bini sunt humano in corde, (licet aliquibus animalium vel tantum unus, vel terni sint ventriculi, velut testudini (d) qui septo quodam carneo, utrisque interjecto, & a margine posteriori ad anteriorem usque porrecto, a se invicem sejunguntur & dividuntur. Omnes, qui studia sua in Anatome hucusque collocarunt, ob illum perversum, quem humano cordi assignarunt, situm, si EUSTACHIUM & WINSLOVIUM exemeris (§. 25.), alterum ejus ventriculum in dextro latere, alterum vero in sinistro esse constitutum sibi persuaserunt: unde quoque illos in dextrum & sinistram ventriculos distinxere: erant vero cum WINSLOVIUS veram cordis sedem ac situm, qui post EUSTACHII memoriam Anatomicorum animo, nescio quo pacto, exciderat, primus in lucem retulerit, nemo non, vel me conticescente, ex cordis positu nativo (§. 13. 25.) fusius descripto, facillime perspiciet, has appellationes minus in eos convenire, nec veram earum collocationem in homine arguere: majori igitur jure a suo situ, quo utuntur, in anteriorem & posteriorem eos WINSLOVIUS divisit, ut quæ denominationes rectius designant, quis horum specuum vera sedes sit (e). Nam dexter, qui vulgo vocatur, thalamus, diaphragmati innixus ac sterni obversus anticum tenet locum: laevo seu sinistro post anteriorem magis collocato ac pulmones respiciente. Satiùs igitur est cum WINSLOVIO illum ventriculum anteriorem: hunc vero posteriorem salutare.

§. XXVII.

(u) Epist. Anat. III. & Thef. Anat. IV.

(x) Libr. cit. Tom. IV. No. 40.

(y) GARENGEOT Lib. cit. P. II. cap. IV. §. 4.

(z) HEN. ALB. NICOLAI Diss. cit. §. IV.

(a) MORGAGNUS Advers. An. I. 16. p. 19.

(b) WINSLOVIUS Libr. cit. Tom. IV. No. 74. GARENGEOT

Libr. cit. Loc. cit.

(c) FRID. HOFFMANNUS L. c. L. I. S. I. C. II. §. VII. BOERHAAVE L. c. 187.

(d) MORGAGNUS Advers. An. V. Animadv. XVII. p. 25.

(e) Libr. cit. Tom. cit. No. 42. 52. 53.

§. XXVII.

Sunt autem sua cuique ventriculo cordis (§. 25.) orificia, anteriori perinde ac posteriori, in ejus basi, auriculis ac pinguedine ablatis, satis conspicua, quæ amplissimi ambitus sunt. Alterum eorum, quod ad ventriculum anteriorem sanguini viam pandit, in dextram cordis auriculam & saccum venæ cavæ hiat, utpote quibus commune est cum hoc cordis antro: altera vero ejusdem sinus apertura itidem satis spatiosa ad arteriæ pneumonicæ, cui juncta est, truncum ducit. Ambitus hujus foraminis, in arteriam pulmonariam patentis, tendine validissimo, in orbem flexo, ac visui patente, circumtextus offenditur (*f*): An vero illi hujus anterioris specus ostio, cui auricula dextra præfigitur, similis orbiculatus tendo sit circumjectus, quemadmodum LOWEKO (*g*) visum fuit, affirmare non audeo: mihi enim cor humanum, non nihil prius elixatum, etiam atque etiam peruestiganti nihil, quod vel tendinis speciem efficeret, nisi carnem, hoc ostium undique cingentem, cernere contigit; quod etiam MORGAGNUS testatissimis verbis significavit (*h*). LANCISIUS, indagator cordis structuræ acerrimus, illi quidem parti oris hujus, quæ fornici auriculæ dextræ subnectitur, segmentum quoddam semicircularis duntaxat figuræ, quod texturæ vere tendineæ foret, concedit: isti autem connexioni, quæ huic patulo ori cum sacco venæ cavæ intercedit, naturam omnino denegat tendineam (*i*). Quemadmodum vero dextrum, sic quoque sinistrum cordis spelæum, duobus hiatibus, in basi cordis pariter conspicuis, utitur; quorum alter ex auricula sinistra & sacco venæ pulmonalis ad posteriorem ducit ventriculum: per alterum vero patet cruori cor egressuro aditus in aortam. Perquam insigni, validissimo ac visui facile obvio tendine exitus hujus antri, qui in arteriam totius corporis maximam patet, circummunitur; num vero in illo hujus posterioris ventriculi orificio, quo in vestibulum venæ pulmonalis itur, ejusmodi tendo, ut LOWERUS ipsi affinxit (*k*), inveniatur anceps hareo; id saltem fateri non verear, necquicquam ejusmodi tendinem me perquisivisse. LANCISIUS ut ventriculi anterioris ori semicirculatum tendinem largitus est: ita quoque posterioris cavitatis ostio tendinem ejusdem figuræ attribuit, pernegando tendinei quid a semet fuisse observatum in illa portione ventriculi posterioris, quæ cum auricula connexa est. Quo autem pacto tendines orificiorum utriusque ventriculi, cum auriculis conjunctorum, a tendinibus ora arteriosa cingentibus diffideant, ibidem pererudite fusius, quam ut mihi locus ejus verba huc transferendi sit relictus, explicavit, quo B. L. remittamus.

§. XXVIII.

Cognitis iis biventribus musculis, qui ventriculorum nomine cieri assolent (§. 26.), ex usu quoque erit, ut eos, qui auriculæ nominantur, breviter perstringamus. Hæ vero sunt itidem duo concavi musculi, prioribus magnitudine (§. cit.), & capacitate multo inferiores, quæ cordis basi ita adnexæ sunt, ut altera cordis anteriori ventriculo præfiga-

tur; altera vero ejus posteriori thalamo præsideat. Unaquæque auricularum in sibimet substratum hiat cordis specum: dextra in ventriculum anteriorem: sinistra vero in posteriorem. Ea est cuius auriculæ figura, ut suo laciniato limbo cristæ quasi galli speciem præ se ferat. Utraque etiam sua ipsius cavitate, licet multo minori, quam ventriculorum est, fruitur. Altera, quæ ventriculo anteriori imminet, non immerito dextra salutatur auricula: quæ vero posteriori antro affixa est, sinistra eodem jure nominatur. Quamvis enim is ventriculorum cordis positus sit, ut alter, anterior vocatus, sternum spectet, altero, qui posterior audit, resupinato (§. 26.); auricularum tamen situs a ventriculorum plane est diversus: ea quippe, quæ anteriori ventriculo contermina, in dextro eoque anteriori latere residet; quæ autem posteriori vicina, ad sinistram magisque retrorsum declinat. Dextram quoque auriculam sinistra multo capaciores esse, est res omnium oculis testator. Facies interior cujusvis auriculæ est admodum inæqualis & salebrosa, cum exterior magis plena ac lævis existat.

§. XXIX.

Quo autem clarius pernotescat atque ab omni dubitatione vindicetur, cordis machinam ex quatuor musculis, qui in prima ejus formatione, a se invicem plane separati & disjuncti existunt, elegantissimo fuisse constructum artificio ea huc adferre operæ erit pretium, quæ indefesso virorum gravissimorum studio in corde pulli, ex ovo nec dum exclusi, fuere animadversa. MALPIGHIIUS, qui in ovis incubatis aperiundis fuit laboriosissimus, in pullo, ex ovo nondum excluso, sed liquamini adhuc innatante suo, jam cordis structuram minus triginta ab incubatu horis nactus est (*l*), quocum LANCISIUS concinit, quod hoc temporis, qui duo de triginta ab incubatione horis cor ipsum ad spinæ latus situm offendit (*m*), speciem tubuli varicosi atque intorti sua figura referebat, cujus motus exitit tantillus, ut vix ac ne vix quidem, nisi a perspicacissimo visu percipi potuerit. Quam primum vero cor motibus, qui magis sub oculos cadunt, agitari inceperit, & punctum saliens fuerit dictum, figura ejus tibi cernetur diversissima ab illa, quam in pullo, omnibus numeris absoluto, intuitus fueris. Quippe pulli corculum, septimo die ab incubatu elapso, figura ad cornum accedente, demum condonari occipit. Si vero primis ab incubatione diebus, velut altero vel tertio, illud spectaveris, rudem quasi atque indigestam molem adhuc nancisceris: id enim temporis tubum, continuum quidem, sed valde distortum, qui, non ulla æqualitate servata, hinc illinc modo amplius, modo iterum coarctatus est, oculis accipies. Tres vero perquam notatu dignæ hoc in tubo distensiones seu dilatationes, totidem vesiculas eleganter referentes, visui obviæ sunt; quarum prima, a vena cava incipiens, vesiculam ovalis figuræ exhibet, quæ sensim auriculæ cordis dextræ induit faciem: altera vero ejusdem tubi distentio seu vesicula, magis magisque ampliata in ventriculum cordis anteriorem fatiscit: tertia tandem quæ est hujus tubi amplitudo, vesiculæ oblongæ accedens proxima, in ventriculum cordis posteriorem, pedetentim capacitate auctum conver-

(*f*) MORGAGNUS Advers. An. V. Animadv. XIV. p. 20. & 21. LOWERUS L. c. cap. I. LANCISIUS L. c. S. II. cap. II. Prop. XXXII. p. 50.

(*g*) Loc. cit.

(*h*) Advers. An. cit.

(*i*) Libr. cit. L. I. S. II. cap. II. Prop. XXXII.

(*k*) Tract. cit. Loc. cit.

(*l*) Append. repetitas auctasque de ovo incubat. observat. continent. p. 78.

(*m*) Libr. cit. L. I. Sect. II. cap. I. Prop. XXIV. p. 40. & seqq.

convertitur, unde liquido aditus in appensam conceditur aortam. Quanquam vero ternæ hæ vesiculæ aliquo locorum intervallo a se invicem disjunctæ sunt, per diversæ tamen magnitudinis ductus, varie incurvatos, inter se coherent, ita ut fluidis pulli via pateat, qua ex alia ad aliam traduci queat: auricula quippe dextra illi vesiculæ, quæ in ventriculum anteriorem tandem mutatur, per singulare tubi segmentum necitur: hæc vero per alium ductum, pariter tortuosum tertiæ vesiculæ, in ventriculum cordis sinistrum abituræ, adhærescit. Ex jam igitur dictis clarissime perspicies corculi in pullo faciem multis modis a cordis in foetu, enixui suo maturiori, imagine dissentire: illud enim unicum & eum continuum atque inflexum, hinc illinc inæqualiter coarctatum, triplici autem in loco in vesiculas, & situ & figura diversas, per canaliculos tamen connexas, expansum refert tubum: hoc vero unius musculi, cono non ita dissimilis, speciem gerit. Si cui forte, quæ jam de pulli corde commemoravi, non satis aperta ac perspicua esse videantur, MALPIGHII elegantissimas tubulosi ac distorti corculi icones consulat (n), unde ipsi clarius, quod optat, apparebit.

§. XXX.

Non igitur deliqueris, nec a vero aberraveris, ternas hæc vesiculas (§. 27.) in rudi atque informi foetus corpusculo per segmenta duntaxat vasculosa, quibus latici in orbem acto aditus ex alia ad aliam aperitur, sibi connexas, nec dum ad mutuum redactas contractum, totidem corcula salutaturus (o), quæ, cum primum in motum fuerint concitata puncta salientia dicuntur. Neque abludit Viris collaudatis Doctiff. CASSEBOHMIUS, quippe qui in ovo, singulari arte ac more Ægyptiorum fere incubato, ternarium horum salientium punctorum numerum, jucundissimo spectaculo omnium auditorum, (qui in illo collegio, quod de generatione animantium prælegit, intererant) oculis exhibuit, quæ situ suo trigonum prope simulabant: horum primum venæ cavæ saccum cum adjecta auricula fingit; alterum, quod evolutum, & ad aliqualem conspectiorem magnitudinem evectum, anterioris ventriculi nomine innotescit; tertium denique saliens punctum, quod a tergo priorum atque altius circumfuso amnii limpidi immersum jacet, in altitudinem magis spectabilem surgens, ventriculi posterioris nomine venit. LANCISIUS, licet cum Doctiff. CASSEBOHMIO dissentire videatur, dum bina tantum salientia numerat puncta, reapse tamen huic consentit; duo puncta seu corcula, inquiens, salientia intuentium oculis quarta, quinta sextaque luce ab incubatu occurrere, quorum alterum a duobus ventriculis constitui, qui posterius attolluntur & micant, alterum ab auricula dextra, prius saliente. Quæ cum tam clara, tamque perspicua sint in pullis, jam fingi atque forma, suæ speciei conveniente, indui coeptis, nefas fane foret, si forte quis dubitaret, quin cor ex quatuor musculis foret concinnatum, experientia ipsa, locupletissima teste, id ita ostendente.

§. XXXI.

Sciscitanti, qua via ternæ illæ vesiculæ (§. 29. 30.), quæ primis ab incubatione diebus a se invicem dis-

junctæ ac distractæ existunt, tandem ad se mutuo accederent, atque in connexionem venirent? Sciendum tubum hunc inflexum atque inæqualiter ampliatum (§. cit.), qui futuri cordis fundamenta jacet, initio muscularibus fibris extrinsecus nondum deprehendi circumtextum; sed a quinto ad decimum diem multis fibrarum fasciculis eleganter explicatis denique nunc jam pedetentim circumvestiri. Cum igitur distortus ille, ac tribus in locis in vesiculas totidem conspectiores diductus canalis, munimento externo primis diebus sit destitutus, fieri non potest, quin influenti per venas liquido facile cedat, seque ibi, ubi renixus circumseptarum partium est minor, sensim inflecti ac distendi patiatur. Præterea cum hoc corculum, tubuli seu vasis admodum inæqualis atque incurvi speciem efficiens, aliquot ab incubatu diebus fibris motricibus demum circummuniri incipiat: harum vi & contractione ventriculi cordis, antea segregati ac divaricati, in mutuum contactum compulsi concresecunt. Hisce accedit externa, quam cor sustinet, pressio a succrescente pericardio, pleura, costis ac sternum, qua informis atque incomposita cordis machina, hoc ætatis admodum laxa ac mollis, leni modo undequaque intro urgetur, & compingitur. Unde est, cur cordis musculi, qui antea a se invicem distabant, sensim sensimque propius ad se mutuo adducantur, tandemque in unum redacti ita inter se cohæreant, ut unum corpus fibrosum efficere videantur (p).

§. XXXII.

Ventriculorum cordis in homine perfecto non una est eademque facies nec capacitas: parietes quippe dextri cordis thalami sunt longe tenuiores ac paucioribus fibrarum stratis contexti, quam posterioris seu lævi specus, utpote cujus latera multo pluribus fibrarum ordinibus coagmentata sunt; unde etiam saltem ter tanto crassiora anterioris ventriculi lateribus. Eadem fere omnium Anatomicorum est sententia, ventriculi nimirum anterioris antrum non ad mucronis finem peringere; sed sinistro multo breviorum esse: huic vero soli ad apicem usque cordis descendere esse permittum (q). Hoc quidem in corde brutino ita offendi, diffiteri nequeo: id tamen, quod in brutis animadversum fuit, nequaquam continuo ad humana transferri præcordia posse, nullo negotio perspiciet, cui unquam occasio contextus humani cordis dissuendi & curatius perveffigandi contigit. In corde enim humano utrique cordis ventriculi ejusdem longitudinis sunt & ad conum ejus usque pertingunt: neutiquam vero æquali capacitate existunt. Enim vero dextrum cordis sinum capacitate sinistro antecellere, indubiis experimentis ab HELVETIO eo fine captis, extra omnem dubitationis aleam est positum (r). Quid? quod omnia experimenta, a multis iisque Celebratissimis Viris curatiori studio instituta, luculenter arguunt, cavitatem dextri cordis in hominibus perinde ac brutis sinistro semper esse ampliorem. Per Helvetiana enim experimenta exploratum est, dextrum cordis specum binas uncias & drachmam dimidiam esse complexum, lævo ejusdem cordis sinu duas uncias minus semidrachma coercente: eodem vero experimento in alio corde repetito, dextrum ventriculum ternas uncias, sinistrum contra binas uncias cum dimidia cepisse. Excel-

(n) Appendic. citat., Tractatui de ovo incubato subtexta, Fig. 28. 29. 32. 36. & seqq.

(o) LANCISIUS l. c. p. 42.

(p) LANCISIUS Cap. cit. Prop. XXVI. p. 43.

(q) THOM. BARTHOLINUS Libr. cit. Lib. II. cap. VII. p. 398. VERHEYEN Libr. cit. Tract. II. cap. VI.

(r) Dans les Memoires de l'Acad. Roy. des scienc. 1718.

§. XXXIV.

Sua cuique cordis ventriculo, tam anteriori, quam posteriori, bina adfiguntur vasa, quæ omnium maxima sunt ac spectatissima; quorum altero sanguis ad suum quemque thalamum jugiter advehitur: altero autem ex eodem cavo continenter haustus, in totius corporis alveos, creberrimis flexibus fere ubique curvatos, vel minutissimos quosque, velocitate singulis attemperata, diffunditur. Quæ dextrum cordis ventriculum alluit, vena salutatur cava: hæc neutiquam ex ipso ejus specu prodit, sed eum duntaxat recto fere alveo stringit: auricula quippe dextra venæ huic ibi, ubi duo ejus trunci coeuntes speciem insignis ac spatiosi sacci efficiunt, a latere ita est adnexa, ut cruori aditus ex hoc sacco venæ cavæ in dictam auriculam pateat liberrimus. Auricula igitur dextra est, quæ sacco hujus venæ (y), qui aliis vestibulum quoque dicitur (z), affidet, natales venæ cavæ foenerat: unde dextro in thoracis latere binis per quam insignibus ramis protenditur, quorum alter recta assurgit: altero per diaphragma deorsum pergente. Vena igitur hæc, quæ cava cieri affolet, non est unica, sed gemina (a): unde rectius quoque venæ cavæ forent appellendæ. Altera, quæ superior cava vocatur, quatuor digitos transversos propemodum longa (b) fere recta sursum tendit, pericardio pertuso, quæ si e regione cartilaginiis, qua prima vera costa sterni jungitur, pervenerit, in binos notabiles dehiscit ramos, qui subclaviarum nomine insigniti sunt: quæ vero cava inferior sonat, itinere multo longiori per abdomen usque ad os sacrum decurrit. Cava hæc inferior suo intra pericardii cancellos decursu spatium transversum circiter pollicis emetitur, quo confecto pericardium perforat. Jam vero cum membranaceum hoc involutum (§.14.) centro diaphragmatis tendineo arctissimis vinculis in homine connectatur (§.15.), dilucide apparet, eo ipso, quo pericardium a cava inferiori perfoditur, diaphragma quoque ipsi adnatum foramine pertundi ab eadem vena. Longe alia igitur est illius segmenti hujus cavæ inferioris facies in homine, quam in brutis, velut canibus, vitulis ac bobus: quippe ea hujus venæ portio, quæ est inter sacculum venosum & diaphragma humano in corpore non facile pollicis latitudinem excedit (c): cum in brutis contra aliquot uncias in longum colligat, prius quam diaphragma permeat: quid? quod extra pericardii pomœria in hujusmodi animalibus ante egreditur, quam diaphragma pervadit: quia in illis cor longius a diaphragmate distat (d). Superior cava in homine situ fere perpendiculari inferiori cavæ impendet; idcirco illum, quem LOWERUS concursui utriusque cavæ affinxit angulum (e) nequicquam in homine quæsieris; quamvis in brutorum corporibus is ita inveniat. Neque illud LOWERI tuberculum ante limen dextræ auriculæ, quod utrique venæ cavæ, ubi concurrunt, interjectum esse fertur (f), humano in corde se mihi unquam dedit obvium. Suspicio itaque non immerito, illud a brutino ad cor humanum fuisse translatum: unde etiam a MORGAGNO in dubium fuerit vocatum (g), licet locum MANGETI (h) auctoritate tueri suum videatur: Doctiss. quippe NICOLAI, quem haud ita pridem acerba mors in æta-

O

tis

§. XXXIII.

Ante vero quam ventriculorum interiora contemplari camus, illos insignes alveos, quibus sanguis extra cordis sinus evolutus, in cunctas corporis partes diffunditur, perlustrare expediet. Cordis machinam binis spectatæ magnitudinis specubus, qui crasso ac robustissimo quodam septo a se invicem sejunguntur (§.26.), esse dotatam, ex commemoratis liquet. Septum vero hoc intermedium ne foramine quidem ullo esse pertusum, ut aliquibus Anatomicorum vel doctissimorum quondam fuerit creditum (x); sed impervium atque occlusissimum, ipsa autopsia evincit. Cum igitur admiranda cordis machina eo consilio a sapientissimo conditore mortalium pectori indita sit atque insita, ut liquida assiduissime per corporis regiones in orbem moveat, atque inde recipiat: judicatu admodum est proclive, cuivis cordis antro suis canalibus opus esse, quibus sanguineum flumen e corde, tanquam fonte, excurrens, in cunctas corporis partes influere & adduci, & ab iisdem ad cor revehi possit. Sanguinei igitur, qui cordi appenduntur, ductus duplicis generis sunt; videlicet arteriæ & venæ: illæ fluida ex corde suos in alveos elisa in ramos infinitæ multitudinis deducunt, unde quibuscunque humanæ machinæ partibus allabuntur: hæ vero eadem a partibus reflua ad cor referunt. Sunt igitur vasa non minus adducentia, quam revehentia cordi. Cuncta hæc vasa iterum bifariam considerari possunt, sunt enim vel communia, quæ a corde ad omnes corporis partes innumeris sensim sensimque decrefcentibus ramis exporrigunt: vel propria ac privata, quæ soli cordis compagi cruorem perpetuo suffundunt. De illis hoc loco mihi sermo erit, de his vero alibi.

Frid. Hoffmanni Oper. Supplem. II.

(r) Dissert. de Direct. Vasor. in Not. p. 51. & 52.

(s) Loc. cit.

(u) Not. in Comp. Anat. Not. 43. p. 91. & 92.

(x) THOM. BARTHOLINUS Libr. cit. L. II. c. VII. p. 399.

(y) FRIDERIC. HOFFMANNUS Libr. cit. L. I. S. I. cap. VI. §. VIII. WINSLOVIUS Libr. cit. Tom. IV. No. 65.

(z) LANCISIUS L. c. L. I. S. II. cap. II. Prop. XXX.

(a) MORGAGNUS Advers. Anat. V. Animadv. XV. p. 22.

(b) WINSLOW Tom. III. Tract. de Venis No. 19.

(c) RUYSCHIUS Thes. An. IV. No. 1. XCVI. 2.

(d) NICOLAI Dissert. cit. §. V. p. 21. in No. I.

(e) Tract. cit. cap. I. p. 34.

(f) Idem Loc. cit.

(g) Loc. cit.

(h) Theatr. Anat. Tom. II. p. 193.

tis flore abstulit, tuberculum illud, a recentioribus Anatomicorum abdicatum, instauravit suoque pristino loco reddidit (i), in eo tamen a LOWERO dissentit, quod illud nequaquam pinguedine substrata, sed fibris carneis, in ejusmodi eminentiam assurgentibus, formari perhibet. Huic non abludere videtur Illustris SCHULTZIUS, Vir summo ingenio atque exquisitæ egregiæque literaturæ, Præceptor ac Mæcenæ omni observantia ætatem mihi devenerandus, qui, tuberculum quoque hoc humano in corde aliquoties a se fuisse observatum, disertis verbis perhibet (k).

§. XXXV.

Alterum vas sanguineum, quo cruor, ex dextro cordis sinu extrusus ad pulmones fertur, vena arteriosa antiquioribus, recentioribus vero potiori jure arteria vocatur pulmonaria. Truncus hujus arteriæ, admodum spectabilis, ex decliviori baseos cordis parte emergens a dextra sinistrorsum deflectitur: progreditur enim inde obliquo itinere, & caudicem aortæ prætervectus quasi decussat, utpote cujus anteriori faciei, ubi a sinistro corde assurgit, incumbens per membranam connectitur: postquam trium circiter digitorum percucurrerit spatium in duos eosque permagnos discedit ramos, (l) quorum alter, cui dextra pulmonalis arteria nomen est, aortæ arcum subiens & dextrorsum reflexus ad pulmonem dextrum contendit; altero ejusdem trunci ramo, qui arteria pulmonaria nominari solet sinistra, ad lævum pulmonem proserpente. Ille huic longitudine multum præstat (m): hic vero contra illum amplitudine vincit (n). Præter hæc ramorum bigas, qui pulmonum utrique lobo impertiuntur, adhuc alius peculiaris ductus, qui officia duntaxat foetui sua præstat, venit breviter considerandus. Plurimis Anatomicorum in primis vetustiorum, prius quam Anatomes studium curatius & subtilius excoli coeptum est, persuasum fuit, canalem hunc BOTALLI medio ex trunco arteriæ hujus protrudi & descendentem aortæ inferi, quemadmodum quoque illum monumentis suis ita prodiderunt & depingendum curarunt (o): recentiores vero, qui in eodem & describendo & delineando fuere curiosiores, veriora de eo tradiderunt ostendendo, quæ sit hujus tubi arteriosi nativa origo, progressio atque insitio in aortam descendentem. At vero rem non ita omnibus suis numeris expletam atque absolutam mihi dedisse videntur, ut nihil amplius addi vel saltem admoneri posset: clarissimum hujus asserti documentum ex recentissimis nobis esse potest GARENGEOT (p), qui omnibus in re Anatomica palmam præripuisse sibi que soli sapere videtur, contendens, tubum hunc arteriosum ab arteria pneumonica sinistra discedere, cui quoque HEISTERUS adstipulatur (q). Enim vero nobis attentiori oculo hunc BOTALLI canalem inspecturis, negotio sane patescit nullo, illum neque ex arteria pulmonali sinistra, neque ex medio venæ arteriosæ trunco enasci, verum restrictissime ex trunco hujus arteriæ ibi abscedere, ubi in conspectiores illos geminos ramos, quorum quisque lobo pulmonum sui lateris prospicit, dispescitur; ita tamen, ut radici sinistræ pulmonalis propior esse & ab hac proficisci videatur, quam incipienti pneumonicae dextræ; quemadmodum id non pluries solum ita inve-

nire, sed nuper admodum in corde itidem humano, ab Excellentiss. CASSEBOHMIO artificiosissime atque eleganter elaborato, ceraque repleto conspici mihi contigit. Exemplum, quo nihil congruentius, nihil fere similis, unde relata clarius intelligere possis, tibi expetere poteris ab arteria cœliaca, quæ itidem frequentissime, (quin si ordinate dixerò, non delinquam), ternario ramorum numero distribuitur: quemadmodum heic intra binos a se invicem discedentes, & utrobique in abdomine disperditos ramos, tertium eumque medium ex ipso trunco, licet brevissimo, assurgere deprehenderis: eodem ferme modo arteriosus BOTALLI ductus medius intra arterias pulmonales a trunco pulmonariæ arteriæ emergit. Initium hujus tubi in foetu tantæ est amplitudinis ac capacitatis, ut pulmonariam utramque arteriam, quas inter a trunco ipso exsurgit, multum superet; dum vero obliquo ac decliviori progressu ad principium aortæ descendens tendit, sensim sensimque in angustiore cogitur alveum, qui orificio longe arctiori, quam introitus erat, sub ipso aortæ arcu hujus descendenti trunco committitur. Propter hanc aortæ curvaturam sua longitudine duos transversos digitos adæquat in homine, secus ac in ruminantibus (r). Optimam hujus tubi arteriosi figuram, cum nostra adumbratione apprime consentientem, descriptam dedit ac delineatam MERY (s).

§. XXXVI.

Exploratis viis, quibus vitale liquidum ad dextram cordis cavernam adfluit, atque ab eadem recedit: illi quoque ductus sanguiferi nobis sunt investigandi, quibus cruor sinui cordis lævo allabatur, & ab eodem ad cunctas corporis provincias, quin vel minima quæque ipsius puncta deducitur. Sinister vero ventriculus itidem est gemino tubo potitus, quorum alter, qui sanguinem cordi sinistro infundit, veteribus arteria venosa, satius, vena pulmonalis; alter, qui eundem a corde hoc lævo recipit, arteria aorta, & propter excellentiam, magna est vocata. Venæ igitur pulmonariæ truncus, eximiæ magnitudinis saccum referens, auriculæ cordis lævæ a latere appositus ita conjungitur, ut utraque cavitatem habeant communem. Hic venæ pneumonicae saccus, (quod nomen sibi proprie vindicat), perquam spatiosus, ac figura quadrato oblonga præditus, minime in binos, ut aliquibus visum fuit (t), sed in quatuor conspicuos distribuitur ramos (u), quorum bini dextrorsum reflexi ad dextrum pulmonem tendunt: bini vero alii sinistrorsum progressi lobum pulmonis sinistrum petunt. Venæ pulmonariæ saccus (x), qui pariter vestibulum LANCISIO (y) salutatur, venæ cavæ sacco tam arcte agglutinatur, ut saccus uterque, communi septo intermedio, cui foramen ovale est in foetu insculptum, a se invicem duntaxat distincti videantur. Hic quidem occasio se mihi offert de foramine hoc ovato ac valvula, ipsi a latere sacci venæ pulmonalis appensa, plurima, quæ in hanc rem dici possent, differendi: item de valvula EUSTACHII, in anteriore inferioris cavæ parte collocata, cujus figuram, persæpe reticulatam & lunatam, aliquoties conspexi: at quoniam verear, ne sermo longius justo excurrat meus, hæc missa facio, iisque, qui plura scire

(i) Dissert. cit. §. XIII, p. 52.

(k) Commerc. literar. Anno 1731.

(l) RUYSCHIIUS Thef. Anat. I. No. III. 8. p. 11.

(m) WINSLOVIUS Tom. cit. No. 64.

(n) GARENGEOT Splanchnol.

(o) THOM. BARTHOLINUS Libr. cit. L. II. cap. VIII. 410. Tab. VIII. Fig. II. M. JEAN PALFIN Libr. cit. Trait. III. chap. VII. p. 258. Pl. XX. Fig. 12.

(p) Libr. cit. cap. IV. §. 45.

(q) Libr. cit. §. 261. p. 126.

(r) DRACKE Anthropol. Nov. Libr. III. Tab. XX. n. 3.

(s) Observat. sur la manière de tailler, & Nouveau système sur la circulation du sang par le trou ovale dans le fœtus humain. Paris 1700. Fig. 1. lit. H. & Fig. 2. lit. F.

(t) THOM. BARTHOLINUS Libr. cit. L. II. cap. VII. p. 405.

(u) RUYSCHIIUS Epist. X. Tabul. XI. Fig. 1. & 2.

(x) Idem loc. cit.

(y) Libr. cit. L. I. S. II. cap. II. Prop. XXXVIII. p. 58.

scire cupiunt, Anatomicos, in primis WINSLOVIUM (2) & LANCISIUM commendo.

§. XXXVII.

Arteria aorta seu magna, quæ est vas sinistri hujus ventriculi alterum (§. 36.), quod sanguini, summa vi inde prorumpenti, viam aperit, ut in canales corporis universos, vel gracillimos, profluere queat: uno eoque amplissimo trunco ex ipso cordis thalamo sinistro oritur, qui statim ut ex eo emergit, duos ramos musculosæ cordis impertit compagi, quibus missis, assurgens truncus dextrorsum quodammodo inclinat levi ab initio curvatura, qua insigniter augeri, & aliquantillum reclinari cœpta, spatio trium digitorum transversorum confecto, ad sinistram vergens, arcus in modum inflectitur; qui retrorsum simulque deorsum pergens, superato bronchiali sinistro ramo, recta per corporis truncum ad usque os sacrum descendit, vertebriis dorsii sinistrorsum quandantenus incumbens. E convexa hujus arcus facie, (cujus ambitus usque a cordis basi ad eum locum, unde evidenter deorsum tendere occipit, MORGAGNO eum dimetiente, septem transversos digitos æquat) tres spectabiles rami usitate consurgunt angulis, ad sanguinis directionem recte cognoscendam notatu dignis, caput petentes. Pluribus Anatomæ cultoribus consuetum est aortam in ascendentem & descendentem dispertire (a): enim vero ecquis est, quin videret, hanc aortæ divisionem, quæ plerisque veterum Anatomicorum adeo usitata ac celebrata est, e brutorum corporibus in humanum defluxisse, MORGAGNO id recte cognoscente (b): alii, veterum errata qui consideratius emendaverint, illos tres spectabiles ramos, qui ab aortæ arcu exorti recta fere sursum feruntur, aortæ ascendentes nomine velint intellectos, ipso reliquo aortæ trunco, deorsum reclinato inque abdomen demisso, aortæ descendentes nomen retinente (c). Verum enim vero cum aortæ longe alia in homine sit facies ac habitudo, quam in brutis, hinc ea aortæ divisio a recentioribus omni jure est antiquata planeque abrogata (d). Præstat igitur aortam distinguere in ramos ascendentes, qui ex ipso curvamine aortæ exporriguntur; & truncum descendentem, quo nomine aortam usque ab hoc arcuato flexu ad ultimam ejusdem in ramos iliacos distributionem prosequimur. Ac ne plura, quam dissertationis magnitudo permittit, licet huc appositissime adferri possent, confectæ, ad ea explicanda ingrediar, quæ mihi dicenda restant.

§. XXXVIII.

Recessibus igitur auricularum cum conterminis facies (§. 28. 34. 36.), ac ventriculorum (§. 26. 27.) interioribus excutiendis me jam accingo. Auricularum duas esse dextram scilicet ac sinistram (§. 28.), quarum suum cuique venosum adstrui vestibulum (§. 34. & 36.), jam habemus perspectum. Idcirco superest, ut, quid faciei intus ostendant, consideremus. Sciendum vero auriculæ vocem duplici sensu, latiori nimirum atque angustiori accipi. Significantiore enim ac pressiori sensu auriculæ nuncupantur concavæ illæ, quæ cordis basi adherent, appendi-

Frid. Hoffmanni Oper. Supplem. II.

culæ, ambitu suo laciniato cristam galli æmulantes, quæ venis corporis maximis, in corde terminatis; ibi, ubi in faccos ampliantur patentissimos, a latere ita assident, ut communi cum ipsis cavitate utantur. Latius vero auricula accepta tam strictius sic vocitatam auriculam, quam amplum illum venæ faccum, cui auricula adstruitur, simul comprehendit. Liquido igitur apparet, auriculam, ampliori significatione intellectam, ex binis cavitatibus inter se confertis esse concinnatam, quarum altera ipsius auriculæ pressius sic dictæ; altera vero venæ adstruitur. Non quidem nescius sum, esse inter Anatomicos, qui hanc distinctionem parvi atque adeo minimi ducunt: sunt tamen vel optimus quisque Anatomicorum, qui venarum faccos non sine ratione ab ipsis auriculis, quibus instar atrii seu vestibuli præjacent, solite discernunt. (e). Ea vero hujus, quod videlicet auriculas a præfixis venosis faccis curatius dignoscamus, præter alias plures, utilitas est, ut locum recte designare valeamus, cui foramen ovale est insculptum: complures enim Anatomicorum illud inter utrasque cordis auriculas collocant (f); aliis idem in illo communi pariete, qui sacco utrique venoso interjectus est, constituentibus (g). Hæc quamvis prima fronte sibi esse contraria videantur, nobis tamen hanc distinctionem curatius expensuris facile apparebit, ea utique inter se convenire. At ne hac in re exponenda nimius sim, ad interiorum auricularum habitum progrediar collustrandum. Unaquæque harum consulte dissecta atque explicata elegantem sane texturam, ex permultis carneis lacertis seu columnis, totidem parvos musculos referentibus, compositam, intuentibus ostendit (h): funiculi quippe carnei, & ii quam plurimi, interiori ejus faciei intenduntur, qui linearum quodammodo curvarum in modum, compositissimo ordine, per eam feruntur ita, ut conspectiores & crassiores lacertuli quibusdam intervallis a se invicem distincti sint, atque interrupti, quibus innumeri alii fibrarum fasciculi, prioribus longe minores eleganter internascuntur. Hinc quoque est, cur torosæ hæ columnæ tot vacua inter se relinquant spatiola, quibus extrinsecus nuda illa membrana auriculas obvolvens, prætexitur (i); unde tanta est auriculæ præsertim dextræ tenuitas, ut investiens membrana, pluribus in locis, hosce inter torulos internitens nudis oculis pateat, nec ullis fibris instratis ibidem munita sit (k): unde quoque est, cur aliquibus Medentium fuerit persuasum, pericardii liquorem ex hisce potissimum areis, quæ frequentiora multo in dextra, quam sinistra conspiciuntur auricula, exsudare (§. 20.). Cum vero auriculæ potissimum dextræ parietes tam raræ ac teneræ sint texturæ, in proclivi quoque est judicare, qui fiat, ut in corporibus languidis ac viribus undecunque exhaustis, præsertim in malignis febribus, a situ corporis justo elatiori, animi defectiones sæpius oboriantur: quia videlicet cordis machina, cujus vires jam attritæ atque accisæ sunt, non valet sanguinem recta sursum projicere, qui igitur cordis vim suo renixu vincens, anteriorem ejus ventriculum & auriculam præcipue dextram præter modum distendit, hinc istæ lacrymæ (l). Num vero auricularum fibræ gemina serie ac contrario decursu in oppositos

O 2

fitos

(2) *Hist. Acad. Reg. scient. 1717. in 4to p. 17. & Acta ejusd. Acad. 1717. p. 211. MORGAGNUS Advers. An. I. 20. p. 23. & Advers. An. V. Animadv. XVI. p. 22.*

(a) *THOM. BARTHOLINUS Libr. cit. Libell. II. C. II. p. 651.*

(b) *Advers. An. I. 16. p. 19. HEISTERUS Libr. cit. Not. 64. p. 122.*

(c) *M. JEAN PALFIN L. c. Trait. VII. chap. I. p. 307.*

(d) *RUYSCHIUS Epist. Anat. III. p. 30. & Respon. ad BIDLOI vindic. p. 3. MORGAGNUS loc. cit. HEISTERUS loc. cit.*

(e) *FRIDR. HOFFMANNUS Tom. cit. L. I. S. I. Cap. VI. §. VIII.*

RUYSCHIUS Epist. An. X. Tab. XI. Fig. 1. 2. 3. & præsertim 5. Item Thesaur. An. IV. Tab. III. Fig. 1. Lit. D. & G. BOERHAAVE Libr. cit. No. 135. 146. 147. 155. 156.

(f) *HEISTERUS Libr. cit. 161. p. 126.*

(g) *LOWERUS Tract. cit. cap. I. p. 38.*

(h) *RUYSCHIUS Epist. cit. Tab. XI. Fig. 5.*

(i) *WINSLOVIUS Tom. cit. No. 67. THEBESIIUS Dissert. cit. pag. 28. & 29.*

(k) *Idem loc. cit. HEISTERUS loc. cit.*

(l) *FRIDR. HOFFMANNUS L. c. L. I. S. I. cap. II. §. XII.*

fitos ferantur tendines, ut aliquibus creditum fuit (*m*), in suspenso relinquam; id tamen subnectendo, MORGAGNUM, ut asserto huic fidem faceret, non ullo pacto induci potuisse, experientia aliud docente (*n*).

§. XXXIX.

Differentia, quæ auriculæ cordis lævæ cum dextra intercedit, in eo consistit, quod capacitatem quidem dextræ multo inferior: superior tamen longe robore (*o*): accedit, quod sinistrum illud sanguinis diverticulum, si vere dicam, ambitu suo externo cristam gallorum duntaxat mentiat: dextrum vero non perinde (*p*). Cavitas quoque sinistræ auriculæ non est ejusdem ubique capacitatis; passim quippe coarctatur, modo autem rursus dilatatur, tandemque in mucronem incurvum definit (*q*). De cætero intus æque columnis carneis, ac dextra auricula contextitur (*r*).

§. XL.

Prius vero quam ad ipsa thalamorum penetralia deveniam contemplanda, in limine eorum aliquantisper commorari lubet: occurrunt enim heic variæ pelliculæ, quæ, quasi janitricæ, ventriculorum ostiis præfectæ sunt (*s*), eo consilio & artificio, ut sanguini ventriculos ingressuro viam aperiant ad ipsos: regressuro autem eo, unde profluxit, pessulum obdant. Harum membranularum, quæ valvularum nomine celebrari solent, undecim dinumerantur: ex quibus sex ventriculo cordis anteriori usui sunt; ceteris quinque thalamo ejus sinistro subservientibus. Quemadmodum vero situ, ita etiam figura ac fabrica a se invicem distant: quæ venosis specuum cordis ostiis (§. 27.) apponuntur, tricuspidæ valvulæ seu *τριχάχινες* (*t*) vocantur: quia ad trigoni figuram proxime accedere feruntur, cui tamen non ita exacte congruunt. Ea vero est harum valvularum, quæ tricuspidæ proprie in ventriculo anteriori: mitrales autem in posteriori audiunt, positio, ut latiori sua parte seu basi ipsis venosis orificiis, quæ in cordis ventriculos hiant, adnascantur: reliqua sui parte, in apicem satis obtusum abeunte atque agitabili, in cordis cava dependente. Quæ autem arteriarum maximarum (§. 35. 37.) ostiis suffixæ sunt, crescentis lunæ faciem eo margine, qui arteriarum parieti accrescit, induunt; altero foras in arteriæ alveum spectante limbo, ac mobili, binas quasi falcatas lunulas referentem (*u*): unde quoque est, cur Anatomes peritis valvulæ semilunares vel sigmoides dicantur (*x*). Verum enim vero attentiori oculo hanc semilunarium valvularum oram, libere fluctuantem, contuenti admiranda fane structura se offert conspicienda, digna, quæ hoc loco excutatur. Cujusvis semilunaris valvulæ limbus, qui liberrime movetur, duabus lunulis exornatur, quas inter medias corpusculum quoddam subrotundæ vel oblongæ figuræ, quod ARANTIO primo observatum est (*y*), assurgit eas a se invicem disjungens. Valvulæ hæ, quas Veteres una ac simplici duntaxat membrana constare crediderunt (*z*), nequaquam una, sed duplici lamella construuntur (*a*), quas inter manifesto fibræ carneæ & tendineæ (*b*), ab Lynceo nostro Anatomico Excell. CASSEBOHMIO sæpius omnium oculis Anatomico in Theatro obla-

tæ, frequentiores feruntur, quarum aliquot ad illa ARANTII corpuscula pertingunt (*c*); aliæ vero per ipsas valvulas disseminantur. Quo autem clarius cognoscatur, quisnam sit genuinus omnium harum, tam tricuspidum, quam semilunarium, valvularum situs, utpote a quo eorum munus, quod sanguini, cordis ventriculos subeunti, rursusque egredienti, præstant, potissimum pendet; perbelle facturus mihi videor, si illas eo ordine prosequar, quo vasorum alveos, cordi appensos (§. citat.) descripsi.

§. XLI.

Amplissimo illi cordis dextri ostio, quo ex auricula & sacco venæ cavæ (§. 27.) in anteriorem ejus ventriculum aditus datur, tres insignes præsentant valvulæ, tricuspidæ denominatæ, quæ basi sua in hoc orificio ita figuntur, ut margine obtuse acuminato; & deorsum in ventriculum respiciente, funiculis omnino tendineis pluribus ad columnas, quæ ventriculo insunt, carneas alligentur. In illa facie, qua se invicem adspiciunt, æquales, glabræ ac lævigatæ sunt: in altera vero, quæ ventriculi anterioris parietibus obversa est, asperæ ac salebrosæ existunt: hujus ea est ratio; quod chordæ illæ tendineæ, tot quasi habenæ, isti harum valvularum superficiei, quæ cordis dextri parietes spectat, injiciuntur atque adstringuntur, ubi inexplicabili contextu inter semet ipsas implicantur & colligantur ita, ut scabram illam atque inæqualem pariant superficiem. Texturam his valvulis esse tendineam cuivis facile liquet, eas contemplaturo; nullo quippe negotio cognoscet, qui columnarum carnearum tendines, iis intexantur (*d*). Hæ tendineæ pelliculæ, quæ undique limen ostii, quod in ventriculum cordis dextrum fert, cingunt, prædictis hujus columnis ita affiguntur, ut, corde coarctato, relaxari sicque elevari a sanguine assurgente usque eo queant, quoad dictæ columnæ permittunt. Valvularum, ori cordis sinistri, quod in auriculam & sacculum venæ pulmonalis patet, præfixarum duæ tantum numerantur, quæ, licet a tricuspidum forma vix ac ne vix quidem abludant, nomine tamen mitralium insignitæ fuerunt. Hæc cum situ, figura ac structura valvulis tricuspidibus fere congruant, de iisdem heic loci fusius dicere nihil attinet.

§. XLII.

Quæ utriusque arteriæ, pulmonariæ, nimirum atque aortæ, introitu ad sinistrum ventriculum insident valvulæ, sigmoides seu semilunares compellantur (§. 40.). Quæ cum non nisi in quibusdam, infra dicendis, inter se differant, sed figura, structura ac munere consentiant, unde nihil est, quod singulis percensendis tempus consumemus, una quippe earum cognita, ceteras noris omnes. In cujuscunque arteriæ ex cordis specubus exitu, tam pulmonalis, quam aortæ tres valvulæ, satis spectabiles, a sua figura semilunares salutatæ (§. cit.), ita sunt constitutæ ac dispositæ, ut sanguini in earum cava irrudenti viam aperiant, relapsuro autem ei, unde exiit, obicem ponant sicque viam intercipient. Quælibet valvula lunato suo margine inferiori seu basi tendinoso arteriæ principio attexta est: altera vero sui parte ab arteriæ

[*m*] LOWERUS Tract. cit. cap. I. p. 23. BOERHAAVE Libr. cit. No. 148.

[*n*] Advers. Anat. V. Animadv. XV. p. 21.

[*o*] HEISTERUS Libr. cit. 261. p. 125. BOERHAAVE Loc. cit.

[*p*] RUYSCHIIUS Epist. cit. Tab. XI. Fig. 1. 2. 3. & 4.

[*q*] Idem Loc. cit. p. 5.

[*r*] WINSLOVIUS Tom. cit. No. 69.

[*s*] WINSLOVIUS Tom. cit. 58. LOWERUS Libr. cit. cap. I. p. 28.

[*t*] THOM. BARTHOLINUS L. c. Libr. II. cap. VII. p. 403. WINSLOVIUS loc. cit.

[*u*] MORGAGNUS Advers. An. I. 19. p. 21. & 22. & Advers.

An. V. Animadv. XX. p. 30. WINSLOVIUS L. c. Tom. IV. No. 62.

[*x*] RUYSCHIIUS Thes. Anat. VIII. N. XXV. p. 11.

[*y*] Observ. Anat. cap. 33.

[*z*] VESALIUS de human. corpor. Fabric. L. 6. cap. 13.

[*a*] WINSLOVIUS L. c. Tom. IV. No. 61.

[*b*] MORGAGNUS Adv. An. I. 19. p. 21. & 22. & Adv. An. V. Animadv. XXIII. XXIV. p. 35. 36. seq. LANCISIUS Libr. cit. L. I. S. II. cap. II. Prop. XXXIII. WINSLOVIUS Loc. cit.

[*c*] MORGAGNUS Loc. cit.

[*d*] LANCISIUS Loc. cit.

arteriæ parietibus distat & libere moveri potest, ita ut sursum trudi iterumque deorsum, pro urgente rei necessitate, a cruore retundi queat. Concava sui parte, sacculi quasi speciem repræsentante, arteriæ alveo obversa est: convexa autem superficie ventriculorum cordis respicit. In limbo cujuslibet valvulæ duo arcus, leviter incurvati (§. cit.), quos inter medios eminet corpusculum, diversæ habitudinis (e), nodulus VERHEYENO vocatum (f), quod eos dirimit. Textura harum valvularum non est membranacea, ut LOWERO creditum (g), sed tendinea (h): constant quippe per pluribus fibris muscularibus & tendineis, quæ geminam inter earum membranam compositius sunt collocatæ, quarum quædam transversim per valvularum latera promissæ sunt: plurimæ vero a basi earum assurgentes ad usque valvularum limbum, quin ARANTII corpusculum porriguntur (i). Unde quoque corpuscula illa aliquando carnea, alias vero tendinea MORGAGNO visa sunt. Quid? quod valvulis semilunaribus copiosas fibras & musculares & tendineas esse intextas, vel eo satis superque comprobari arbitrer, quod LANCISIUS in cadavere cujusdam præsulis, a se dissecto, has valvulas sarcomatibus obseffas nactus fuerit (k). Egregiis his Viris assentitur quoque Excellentiss. BASSIUS, Professor Medic. & Chirurg. hujus Fridericianæ Celeberrimus, Præceptor ac Patronus, omni honoris cultu mihi pie suspiciendus, qui fibras rubicundas carneas & tendineas, a basi earum usque ad MORGAGNI corpuscula protensas, easque satis copiosas in iis deprehendit, easque depingendas curavit (l). Quæ igitur veritas cum ipsa luce illustrior sit, nihil sane est, cur testium nubem, qui illas fibras, satis conspicuas, suis oculis viderunt, in fidem vocarem, præcipue quia ipsa per se veritatis vis tam magna est, ut parum vel nihil externi subsidii requirere videatur.

§. XLIII.

Nobis, in ventriculorum cordis introitu adhuc subsistentibus, illa obviam eunt vasa, quæ cordis fibrosæ compagi sanguinem largissime suffundunt, ut non eo solum nutriatur, sed novis quoque viribus, quarum perpetuo ad munus sibi met exsequendum indiget, reficiatur. Arteriæ, coronariæ quæ cieri solent, numero usitate sunt duæ (m), aliquando tamen, licet insolentius, tres vel una (n), ex aortæ trunco, cor sinistrum egresso, supra semilunares valvulas (§. 42.) utrinque progerminantes, opposito itinere cordis basin versus excurrunt, quam ambientes, sibi que mutuo occurrentes in unum canalem coeunt, qui cordis basin amplectens, & corona quasi redimiens, innumeros ramos usquequaque ad cordis texturam deflectit (o), qui in propagines, pedetentim graciliores ac subtiliores, atque adeo furculos stupendæ exiguitatis fatiscunt, qui tanta ubertate fibroso cordis contextui intexuntur, incautus ut facile in eam adduci posset opinionem, ejus parenchyma meris vasis esse contextum (p). Ostiola harum arteriarum, quibus in aortæ truncum hiant, sedem suam adeo sæpe mutant, ut ipsis certa ac constans assignari queat nulla (q): quamvis enim interdum super valvularum semilunarium valvulis conspicua sint; non tamen est insolenne, ea statim post harum limbos insculpta cerni, Frid. Hoffmanni Oper. Supplem. II.

idque ut plurimum, referente LANCISIO. Neque inusitati quid est, illa pone valvulas sigmoides tam abdite latitare, ut, trunco aortæ aperto, a valvulis, quæ iis prætenstæ sunt, visui occultentur & subducantur. Quandoquidem alterum coronariarum osculum supra prædictas valvulas aperitur, altero ostiolo post hæc vela altius delitescente. Rami a truncis coronariarum protrusi, & ad fibratum cordis textum serpentino ac flexuoso reptatu proserpti, sibi mutuo conjunguntur frequentissimi: tam arctum enim est connubium, quod inter se ineunt, ut si, vel unum eorum, flatu distendere fueris conatus, amœno spectaculo experieris, statim illum ex uno ramo in plures alios, ipsi mutua anastomosi connexos, transire. LANCISIUS, licet concedat, conspectiores coronariarum ramos cum ipsis truncis, a radice aortæ pullulantibus, non ullis valvulis intus esse dotatos; minus tamen conspicuis propaginibus & tenerrimis ramulis, qui cordis fabricæ altius immerguntur, peculiare valvulas vel si mavis sphincterulos attribuere dubitavit nullus. Enim vero si liceat mea qualiacunque observata, quæ mihi in ramis insignioribus perinde ac minus spectabilibus arteriarum, cum eos data opera pervestigarem, oculis percipere contigit, iis, quæ egregio huic Viro animadversa sunt, subnectere; luculentius ut inde eniteat, spero futurum, qui gravissimi ac Medici de re præclare meriti Viri sententia sit interpretanda. In compluribus exilioribus æque ac crassioribus arteriarum coronariarum ramis, qui per cordis corticem feruntur, caute secundum longitudinem eorum difficilis, interiori faciem admodum complicatam inque rugas transversum positas easque densissimas collectam inveni: simile fere quid spectare licet in intestino jejuno, ubi itidem complures rugæ, vel si mavis, valvulæ conniventes conspiciuntur, quæ situm obtinent transversum. Id tamen discriminis intercedit hisce rugis transversis, in arteriarum facie interna obviis, cum dictis conniventibus valvulis jejuni: quod illæ tot quasi annulos referant; cum hæc potius segmenta circuli, vel saltim semicirculos efficiant. Quid? quod ejusmodi plicaturas in furculis arteriosis, vel tenuissimis, armato oculo usque eo sum persecutus semper consecutus, quoad mihi pervenire fuerit integrum. Illud silentio præterire nequeo, nihil in truncis arteriæ cujusvis coronariæ, quæ cordis basi innituntur, me offendisse, quod plicaturæ speciem præ se tulisset. An vero plicæ hæc, in quas turricula ramorum cujuslibet coronariæ colligitur, commereantur, ut valvularum nomine cieantur, perspicacioribus relinquo dijudicandum. Plura huc adferre possem de illis arteriarum coronariarum ramis, qui per auriculam cordis utramque abundantissime distribuuntur, quos RUYSCHIIUS omnium elegantissime descriptos tradidit atque adumbratos (r); at longius dicendo progredier, quam necesse est, præsertim cum hæc in recentiorum monumentis fufius excussa legantur, nec ullus sit, qui hodie dubitet, quin auriculæ æque ac cordis parenchyma suis vasis utatur.

§. XLIV.

Cognitis itaque iis ductibus, qui cordis flaminibus sanguinem apportant, in eo est, ut breviter dis-

O 3

spicias

(e) MORGAGNUS Loc. cit.

(f) Libr. cit. L. I. Tract. III. cap. VII.

(g) Tract. cit. cap. I. p. 32.

(h) LANCISIUS Loc. cit.

(i) MORGAGNUS Loc. cit. Tab. IV. Fig. 3. lit. b b b.

(k) Loc. cit.

(l) Observ. Anat. Chirurg. Medic. Dec. I. Observ. VIII.

(m) LOWERUS L. c. C. I. p. 9. Tab. I. Fig. 4. VERHEYENUS Libr. cit. Tract. III. cap. 8. RUYSCHIIUS Epist. Anat. III. p.

29. Tab. III. Fig. 1. lit. B. B.

(n) LANCISIUS L. c. S. III. cap. 1. Prop. XXXIX. p. 61.

(o) BOERHAAVE L. c. N. 183.

(p) RUYSCHIIUS Loc. cit. It. Thesaur. Anat. IV. Tab. III. Fig. 1. & 2.

(q) MORGAGNUS Advers. Anat. V. Animadv. XXV. & XXVI. pag. 36. & seqq.

(r) Epistol. cit. p. 29. Tab. III. Fig. 1. lit. C. C.

spiciamus, quibus viis cruor a corde recedat: ex inferius quippe dicendis clarius innotescet, coronarias venas minime omnem purpurei liquidi, a corde refluere (s): verum magnam ejus partem per ramos quosdam venosos, in ventriculos & auriculas apertos, brevissima via, refluere (t). Vena igitur coronaria est, quæ sanguinem a cordis parenchymate reducit: hæc ut plurimum gemina est binisque ostiis in auriculæ dextræ sinum patefcit, observante LANCISIO; haud raro etiam uno ac simplici trunco, qui tum spectatæ amplitudinis est, per cordis basin ad nominatam tendit auriculam (u); aliquando tamen triplici trunco auriculæ antrum, in quod totidem osculis aperitur, adit, qui tamen comparate longe angustiores sunt, quam si uno vel saltem gemino trunco in auriculam hiat (x). A trunco hujus venæ, quæ cordis basin similiter, ac arteriæ (§. 43.), ambit, infiniti ad cordis substantiam reflectuntur rami, qui multitudine arteriis præstant: sæpius enim duo venosi rami se uni arterioso adfoeciant, qui socias inter venas mediis interjacet. Hi rami iterum in propagines gradatim subtiliores atque adeo angustissimas, quæ per fibrosam cordis compagem abundantissime disseminatæ, ultimis arteriis in mutuo inosculatione adnascuntur, sese dispergunt. Ante vero considerabimus illam elegantis fabricæ valvulam, quæ ostio venæ coronariæ præfigitur (y), quam ad reliqua recensenda ingrediamur. Admiranda sane est hujus valvulæ structura, quæ lunæ falcatæ faciem habet: interdum quippe fibris, retis in modum contextis, quæ plurimas inter se relinquunt areas omnino vacuas constituitur; quemadmodum eam humano in corde, quod modo perquisivi, ita offendere mihi contigit: aliquando autem veræ pelliculæ faciem induit: nec insolenne est, quod loco membranosæ valvulæ fibrosa stamina hiatui venæ coronariæ prætexuntur: quandoquidem plane desideratur, orificio coronariæ venæ libere in auriculam hiantem. Quid? quod natura in hac valvula & fabricanda, & aperturæ coronariarum obducenda nulli certæ legi est adstricta; sed admodum versatilis atque inconstans: quod si enim coronaria vena uno eoque patente orificio in auriculæ dextræ cavernam exeat, in suo exitu vel valvula munitur, vel destituitur: sin vero gemino osculo dehiscat, utrique una valvula haud raro obtenditur: interdum vero uni duntaxat coronariæ ejusmodi velum obtenditur, alterius orificio intacto seu immunito. Rami venæ coronariæ grandiores, qui per exteriorem cordis ambitum distribuuntur, carent valvulis, quod vel inde perspicuum est: quia flatus iis immixtus antrorsum ac retrorsum digitis propelli potest sine ulla remora; in iis vero furculis, qui fibris muscularibus abundantissime internascuntur, valvulas utique esse constitutas, LANCISII & (z) THEBESII (a) sententia est. Rami omnes venosi mutuis anastomosibus ita inter se necantur, ut, uno eorum flatu repleto, cuncti illico alii, cum hoc conspirantes rami eximie intumescant, aditus quippe flatui ex alio in alium patet liberissimus. Verum enim vero quod omnium admiratione præcipue dignum videatur, est, quod minime omnes venosi rami laticem sanguineum, qui sibi ab ultimis arteriis fuit redditum, trunco coronariæ venæ remu-

nerentur; sed quod plura emissaria eum immediate in ventriculos cordis atque auriculas evomant, utpote quorum orificia in ventriculorum & auricularum specubus dehiscencia largo penu offenduntur. Quod vero hæc diverticula, quæ cruorem, a cordis substantia reducem, brevissimo & directo itinere ad ejus ventriculos transferunt, nihil aliud, nisi venæ sanguineæ sint, multis experimentis, a LANCISIO ac THEBESIO magna cautione adornatis, ab omni dubitatione & contradictione vindicatum est. Quemadmodum arteriæ, quæ cordis auriculas perreptant, multo breviores sunt, quam quæ ad ejus ventriculos proficiscuntur: ita quoque rami venosi, qui magno itidem numero per auriculas disperguntur (b), via magis compendiaria partim ad earum sinus, partim ad coronariæ truncum redeunt, quam qui cordis compagem peragunt: vitale igitur liquidum multo citius ad cordis auriculas adfertur atque itidem prius reducit, quam quod cordis texturæ infunditur atque ab ea revehitur. Diligentius secum hæc voluturo, habita ratione nervorum, ad cordis compagem contententium, (quippe qui multo citius propagines auriculis, quam cordis specubus, impertiunt), pronum erit augurari, causæ quid sit, cur auriculæ cordis maturius, ventriculis ejus, contractionem aspiciantur suam ac citius tendi desistant.

§. XLV.

Iis perlustratis, quæ in limine thalamorum cordis obvia fuere ac digna, quæ calculo candido notarentur, in eo jam est, ut ipsos ventriculos ingrediamur contemplaturi recessus eorum interiores. Hi vero cum sint cavitates patentissimæ, quæ fibris motricibus, compositissimo ordine & admirabili nexu concinnatis, circumtextuntur, operæ erit pretium prius elegantissimum hunc ex fibris contextum, quoad ejus fieri potest, retexere, quam ad earum faciem interiorem nos accingamus perspicendam: hoc quippe intellecto, haud sane erit difficile judicium de eo ferre, qui fiat, ut cordis machina beneficio suæ fabricæ tot tantisque effectus, quos mente assequi atque ad calculum vocare indubium nullius ingenii vi permissum est, emoliri valeat. Computante enim BORELLO (c) tanta est cordis potentia resistentiam, 135000 librarum superiorem, in unica pulsatione vincere inque motum agere ut queat. Enim vero facere non possum, quin aperte ac genuine confitear, eorum plerisque, qui studia sua in animantium corporibus artificiose disseccandis collocarunt, (si aliquos recentiorum demseris), fibrosam cordis texturam non ea, qua decuisset, ~~anipis~~ revolvisse, neque ad prototypum adumbrandam curasse; vel saltem ea, quæ de fibrarum cordis serie atque ordine literis consignata tradiderunt, a brutis maximam partem mutatos esse, nec ullo fere habito respectu humano cordi affinxisse, RUYSCHIO (d) ac MORGAGNO (e) hoc probe admonentibus. Quæ enim LOWERUS de cordis structura memoriæ prodidit, luculenter arguunt, multa in brutis animadversa, humanum in corpus ab eodem fuisse inducta, quemadmodum prælaudatus Auctor, in MANGETUM, quem Anatomici secuti sunt frequentissimi, animadvertens recte adnotavit. Ne igitur fidem aliorum dictis simpliciter haberem, nec

(s) THEBESIIUS Dissert. cit. RUYSCHIIUS Epist. X. p. 8. It. Thef. An. IX. No. LXXXII.

(t) Idem: Advers. An. Dec. I. VI. p. 16.

(u) Libr. cit. Sect. III. cap. II. Prop. XLII. LOWERUS Tr. cit. cap. I. p. 10.

(x) LOWERUS Tabul. 4. Fig. 2. lit. d. e. LANCISIIUS loc. cit.

(y) MORGAGNIUS Advers. An. V. Animadv. XXII. p. 32. WINSLOVIUS Libr. cit. Tom. IV. No. 73. LANCISIIUS loc. cit.

(z) Loc. cit. No. VII.

(a) Dissert. cit. p. 10.

(b) RUYSCHIIUS Thef. An. IV. Tab. III. Fig. 1. Lit. D. & Fig. 2. Lit. E. D. It. Epist. Anat. X. Tab. II. Fig. 4.

(c) Tract. de motu animalium P. II. cap. V. Prop. 66. seq.

(d) Advers. Anat. I. VI. p. 15. & 16. It. Epist. Anat. X. p. 4. & 5. It. JOH. GAUBIUS Epist. Anat. III. ad Cl. RUYSCHIIUM p. 23.

(e) Advers. An. I. 16. pag. 18. & 19. It. Advers. An. V. Animadv. XIV. XV.

nec alienis, sed hisce ipse meis oculis mirandum fibrarum, quæ cordis cava amplexu suo complicant, contextum acciperem; præsertim cum, CICERONE pronunciante, tardi ingenii sit rivulos confectari, nec fontes rerum ipsos videre: torosis hisce staminibus suo nexu exsolvendis ipse manus admovi, clarius ut agnoscerem, quisnam earum verus ordo sit ac tractus, quo cordis thalamos circumeunt. Postquam enim Doctissimi CASSEBOHMI singulari benevolentia, mihi cordis humani dissecandi copia fuit ab ipso concessa, illud prius leviter elixatum, sicque fibris ipsius facilius expediendis aptius redditum, pinguedine ac membrana, quæ has externe circumvestit, provide ablatis, in musculosa sua fila dissolvi, quorum ordinem, quo cordi circumdantur, paragrapho sequenti suscipio exponendum.

§. XLVI.

Quadricavus itaque hic musculus (§. 13.) qui ex diversa circum determinatæ magnitudinis cavitates fibrarum contorsione & plus minusve spirali advolutione compingitur, varias earum series atque ordines, sibi mutuo incumbentes seque mire interfecantes se contemplanti ostendit, quæ hic loci expendere ex usu erit. LOWERUS fibras, licet paucas ac tenues, per dextri cordis superficiem eamque exteriorē recta sursum ductas, atque in ejus basin terminatas esse, omnibus fere persuaserit (f): at MORGAGNUS rectas hasce fibras cordi humano affictas, omnino submovit ingenue confitendo, nihil esse facilius, quam in corde vitulino vel agnino eas ante oculos statuere; sibi enim, has rectas fibras, diligentia vel impensissima, humano in corde pervestiganti nunquam apparuisse (g). Cum hoc LANCISIUS concinit asserendo rectas cordis fibras maxime in brutis deprehendi (h). Nec WINSLOVIUS abluisse videtur, nisi quam enim harum rectarum fibrarum, quæ per externam ventriculi dextri superficiem sursum elatæ feruntur, meminit. At vero VERHEYENUS alique, LOWERI vestigiis insistentes, easdem cordi tutas præstarunt (i). Cl. HEISTERUS vero quamvis illas rectas, quas LOWERUS dextra cordis superficiē attribuit, de loco suo dimovere ac depellere videatur: iis tamen receptis non antiquam, sed novam in facie videlicet sinistri ventriculi exteriorē, sedem assignat (k). Quamquam vero meam ætatem non condeceat, litem hanc inter tanti nominis Viros componere: id tamen prætermittere nequeo, quin hoc fatear, mihi non licuisse ejusmodi fibras, recta sursum promissas, in alterutra cordis superficie oculis comperire. In medio igitur relicturus, num rectæ fibræ in cordis ambitu digestæ jaceant, an vero mea forte ipsius culpa non sint animadvertæ, ad ipsas cordis fibras explicandas ingrediar.

§. XLVII.

Tres vero potissimum fibrarum series strataque; quæ utrosque cordis thalamos usquequaque circumplectuntur, intuentibus sese præbent collustranda. Exterior harum fibrarum ordo, ab auriculis (§. 28.) facisque summarum venarum (§. 27.) proficiscens, per exteriorē cordis faciem obliquo & spirali quasi progressu, a dextra sinistrorsum ducitur: hoc fibrosum stratum, quod ex fibris densissime compactis colligitur, crassum ventriculorum corticem efficit, paucis quibusdam fibris exceptis, quæ quasi recta, medio in itinere, introrsum delatæ, spiralibus fibris, hinc illinc inter se connectendis ac colligandis inserviunt. Non est unus idemque omnium extimi

ordinis fibrarum in obliquum flexus; quæ enim in superficie anterioris ventriculi exteriorē apicem cordis versus excurrunt, itinere multo magis obliquo eo pergunt, quam quæ sinistri cordis ambitum circumvinciunt, utpote minus oblique progredientes. Neque omnes hæ exteriores fibræ eadem longitudine per utriusque ventriculi convexitatem protensæ esse mihi visæ sunt: complures quippe earum si eo pervenerint, ubi ille sulcus, a sinistra dextrorsum, per exteriorē atque anteriorē cordis superficiem, oblique ad ejus usque conum perductus conspicitur, in quo eximie capacitatis rami sanguinei, a coronariorum truncis exporrecti, decurrunt, in cordis parenchyma se abdunt ejusque interiora petunt, cæteris ejusdem strati fibris exterioribus ad sinistri cordis faciem pergentibus. Cum vero illæ obliquæ fibræ, quæ ad cordis apicem contendunt, ad hunc usque perductæ sunt, facta simplici laxaque supra se ipsas advolutione, intro reflexæ ad interiores ventriculorum facies feruntur (l) quas, ab apice sursum assurgentes sicque interiores fibras constituentes, efformant. Interiores igitur hæ fibræ, quæ a cordis mucrone oblique sursum ascendunt & superficies utriusque ejus ventriculi, potissimum sinistri fingunt, alterum eumque interiorē fibrarum ordinem exhibent, quæ per cordis thalamos mirabili artificio distributæ, vel in columnas congregantur carneas, quibus valvulæ tricuspidēs (§. 40.) ac mitrales (§. cit.) alligantur; vel illis tendinibus, qui ventriculorum orificia circummuniunt (§. 27.), inferuntur. Medios inter hosce fibrarum ordines, quæ exteriori atque interiori cordis superficiē obducuntur, tertium idque intermedium fibrarum stratum interjicitur, quod multo crassius prioribus binis seriebus observatur: multis quippe fibrarum stratis, sibi mutuo agglutinis atque superinductis coagmentatum est, cujus musculosa stamina, a cordis basi profecta, initio oblique deorsum & sinistrorsum pergunt, exiguum vero sui itineris spatium emensa in viam transversam deflectunt. Fibræ idcirco hujus strati, quod exteriori atque interiori fibrarum ordinibus interjacet, fibris transversalibus compingitur; jam vero cum fibratum hoc tegmen diversis fibrarum seriebus inter se confertis confert, hincque in plura strata divelli possit, sciendum quædam earum utrosque cordis ventriculos completi ac circumvestire, quibus caute retextis & sublati, ad reliquas hujus intermedii strati fibrarum series, prioribus substratas pervenitur, quæ neutiquam binis ejus ventriculis sunt communes, sed gratissimo spectaculo inter binos cordis thalamos sese insinuant, septumque ejus intermedium maximam partem constituunt. Præter humanum cum cor quoque vitulinum, prius leniter coctum, eodem modo extricarem, ut, quid discriminis huic cum humano intercederet, comperirem, mihi licuit, fibris illius rectis, obliquis & quibusdam transversalium seriebus, curatius ante evolutis ac remotis, ad illas transversalium series devenire, quæ utrosque cordis ventriculos intermeant, quas cum ulterius in suas quasque series dissolvere tentarem, ecce tibi, binos cordis ventriculos, suis propriis muscularibus fibris circumtextos & eos inoffensos, ita a se invicem distraxi ac sejungi, ut duos fibrosos peculiare saccos, quorum quisque suis ipsius staminibus transversis circumseptus erat, eleganter referrent. Clare igitur jam apparere putem, tres tantum præcipuos fibrarum esse ordines, qui cordis specubus circumtenduntur, exteriores videlicet, quæ ab ejus basi ortæ & spirali quasi reptatu oblique fini-

O 4

stror-

(f) Tract. cit. cap. I. p. 16.

(g) Advers. Anat. V. Animadv. XIV. p. 21.

(h) Libr. cit. L. I. S. II. cap. II. Prop. XXIX. p. 47.

(i) Libr. cit. Tract. III. cap. VII.

(k) Libr. cit. Not. 45. p. 93.

(l) LANCISIUS Loc. cit.

strorsum delatæ, minimam partem ad cordis cuspidem decurrunt, ubi ad interiora ejus reflexæ, oblique sursum rursus affurgunt cordis basin repetendo: quæ igitur alteram fibrarum obliquarum seriem eamque interiorē sistunt. Inter hosce binos fibrarum ordines tertius intercedit medius, in plures lamellas facile dividiuus, qui ex villis plus minusve transversalibus conflatus, quarum quædam utrumque cordis ventriculum circumplectuntur; quæ vero his substratæ sunt duos inter ejus thalamos intercedunt sicque septum medium, quod ipsis interjectum est, cum fibris concurrentibus obliquis interioribus construunt. Perspicuum inde erit, quantum fallantur, quibus est persuasum, hoc cordis sepimentum ad ventriculum duntaxat pertinere sinistrum, dextrum vero hujus exortem esse (*m*). Hæ fibrarum series, quæ medium tenent locum inter exteriores atque interiores, ordine ducuntur plus minusve ad cordis longitudinem inclinato: ita ut quædam angulum, aliæ vero pene rectum efficiant: sed non ea lege feruntur hæ fibræ, ut per cordis apicem intra ejus ventriculos pertingant: quemadmodum de obliquis exterioribus dictum est; transverso enim tractu cordis thalamis circumductæ tendinibus, qui orificia cordis (§. 27.) ambiunt, quippe a quibus, exterius tamen, initium capiebant, iterum interius infiguntur. Nimis longus profecto forem, omnia, quæ hanc in rem dici possent, persecuturus eaque suis ponderibus ac momentis expensurus, qui scilicet fiat, ut parietes antri cordis sinistri tam ingentis crassitie præ dextro sint? cur pauciores fibræ cordis cono impendantur, qui proinde maxime tenuis evadit, quam ipsis ejus ventriculis? quo pacto cordis fibræ se mutuo passim interfecent ac decussent? quod & quare septi cordis pars, quæ sinistri ventriculi est, longe crassior ac validior sit ea parte, quam ventriculus cordis anterior sibi vindicat? pluraque id genus alia. Cum vero LANCISIUS & WINSLOVIUS penitiorem cordis fabricam in suis monumentis fusiis & de industria explicatam nobis tradiderunt, unde hæc facile peti atque explicari possunt, iis exponendis supersedebo progressurus ad cordis interiora brevi contemplanda.

§. XLVIII.

Interna utriusque ventriculi (§. 26.) facies, quæ admodum salebrosa est atque aspera, permultas intuentibus ostendit lacunas ac foveas, eminentiis æque pluribus interstinctas, quas Anatomie vacantes sulcorum nomine appellarunt (*n*). Sulci hi, ventriculorum sinibus perinde atque auricularum nullo ordine certaque lege inerrantes, nec figura ac magnitudine inter se æquales, utrique ventriculo insculpti sunt; multo tamen in sinistro, quam dextro cordis specu frequentiores videntur: neque ipsum ejus septum iisdem est immune, sed potius ditissimum, qui tot scaturigines, unde sanguis ex hiantibus in ventriculos venarum ostiis (§. 27.) profilit, exhibent. Namque illa emissaria, quæ genuina venæ coronariæ proles sunt (§. 43.) in hos sulcos suis ostiolis aperiuntur, & cruorem, quem a cordis substantia relexerunt, evomendo illi liquido purpureo, quod ex cordis sinibus jam extrudendum, refundunt, ne per varios flexuosos circuitus atque anfractus ad venæ coronariæ truncum demum redire ipsi necesse sit, sed compendiaria hac via proxime ad ventriculos reducatur (*o*). Præter ea vero insignes atque elatiores

ibidem cernuntur monticuli, qui Anatomicis columnæ vocantur carneæ vel lacertuli, totidem parvos musculos, qui a fibris interioribus, in ejusmodi fasciculos collectis, formantur (*p*), referentes. Columnæ hæ carneæ, quæ utrique ventriculo insunt, admodum crassæ atque amplæ deprehenduntur in illa parte, qua ex interiorē cordis superficie eminent, sed suo progressu sensim decrescunt inque apicem, perquam obtusum, plerumque desinunt; cui albicantes funiculi appenduntur, qui veri earum tendines sunt (*q*). Hi columnarum carnearum tendines, numero incerti, sunt quasi habenæ, quæ valvulis tricuspidibus & mitralibus injiciuntur (§. 41.), quibus pro re nata & necessitate varie coërcentur ac infrænantur, ventriculis in systolen & diastolen abeuntibus. Artificium, quo valvulæ commemoratæ columnis carneis affiguntur, in eo consistit, quod semper binæ per dictos tendineos frenos uni lacertulo hæreant alligatæ: hinc in dextro plerumque tres, in sinistro autem ventriculo ut plurimum duo tantum lacertuli, qui tamen conspectiores ac multo crassiores existunt, inveniuntur. Tandem quoque silentio non est prætereundum, horum cavorum faciem intus membrana satis valida convestiri, quæ ab intima vasorum tunica videtur esse progenita usque inde ad cordis thalamos protensa; hæc innumeris exilibus venarum aperturis pertunditur: an vero plerisque hisce fulcis, ut THEBESIO visum fuit, valvulæ fuerint præstructæ, id alii viderint.

§. XLIX.

Ut autem, quæ de cordis structura mihi fuere dicenda, ad colophonem usque deducam, leviter duntaxat nervos, qui cordi impertiuntur, attingere conducet. Hi vero natales ducunt suos non a solo pari vago, quæ LOWERI est sententia (*r*), sed potissimum a trunco nervi intercostalis. Rami enim, quos octavum par cordis machinæ largitur, sunt tenues & exigui, neque adeo numerosi, quam pluribus persuasum est, qui a trunco hujus paris, utroque in thoracis latere, egerminantes oblique deorsum pergunt, & illis propaginibus, quæ a trunco intercostali natæ hucque demissæ sunt, connectuntur; unde celebratissimus ille cardiacus plexus paritur. Abscedunt vero a nervi intercostalis ganglio, cui nomen est cervicale inferius (*s*), quod e regione vertebræ colli septimæ situm (*t*) aliquot propagines, numero incertæ, quibus unus alterve nervus furculus, a ganglio ejusdem trunci intercostalis, ubi thoracis cavitatem subit, collocato, quod thoracicum seu dorsale primum WINSLOVIO vocatur (*u*), adjungitur: qui rami in thoracis cavo obliqua via deorsum pergentes, si ad illum trachæe pervenerint locum, ubi hæc in duo bronchia fatiscit, cum ramis fere totidem, vel sæpius pluribus, aliquando etiam paucioribus, a trunco alterius lateris intercostali huc itidem protensis, connexi, cumque paris octavi ramis colligati illum cordis plexum, qui cardiaci superioris nomen sibi asserit, confingunt. Plexus itaque hic cardiacus solenniter pneumaticam inter & aortam arterias deflexus, (quamvis nec exempla desint, ubi inter arterias aliquando magnam atque asperam descendere fuerit observatus (*x*),) ad cordis basin progreditur, unde furculis infinitæ certe multitudinis, qui abundantissimis conjunctionibus undique pene inter se commissis, per cordis superficiem & musculosam compagem difseminantur. Verum enim vero dici vix potest, in quot

(*m*) VERHEYENUS Loc. cit.

(*n*) WINSLOVIUS L. c. T. IV. No. 44. VERHEYENUS Loc. cit.

(*o*) THEBESIUS Dissert. cit. P. XI. seqq. Fig. 2. Lit. AAA. FRIDER. HOFFMANNUS L. c. L. I. S. I. cap. III. §. VII.

(*p*) WINSLOVIUS L. c. No. 56. HEISTERUS L. c. §. 261. p. 125.

(*q*) HEISTERUS Loc. cit. WINSLOVIUS L. c. No. 60.

(*r*) Tr. cit. Cap. I. p. 11.

(*s*) WINSLOVIUS L. c. Tom. III. de nerv. No. 380.

(*t*) Idem ibid.

(*u*) Ibidem No. 381. & 386.

(*x*) VIEUSSENIUS Nervor. descript. cap. 3.

quot ac quantillos nervei hi rami, ad cordis texturam delati, ramusculos dispergantur, qui non ei solum abundantissime intexuntur; sed tota etiam ejus superficie exteriore longe lateque diffunduntur, quos, membrana externa cautissime de cordis ambitu detracta, nudis oculis accipere cuivis licebit. Elegantissimam ac verissimam nervorum per cordis parenchyma distributionem LANCISIUS delineandam curavit; in quam cum oculos ego primus defigerem meos, maxima sane admiratione sum adfectus, tantam eorum abundantiam, tam mirandum reptatum tamque frequentissimas eorum connexiones attendens; subdubitare igitur cœpi, anne potius ficti quid subesset, quod tamen de tam integerrimo Viro suspicari summum foret nefas, utpote cujus virtutem atque animi candorem nulla unquam suspicio violavit; certior hujus rei igitur ut fierem, eos humano in corde perquisivi, & ecce, tantam eorum nactus sum frequentiam, totque incredibiles mutuos nexus, ut profecto admiratione obstupuerim. Nervea hæc fila, quæ tanta ubertate cordis faciei intenduntur indeque fibroso ejus contextui interferuntur, innumerabiles quaquaversum dispergunt furculos, qui, cum aliis propaginibus commissi, exigua genicula ibi, ubi his nectuntur, constituunt, quæ a reliquorum gangliorum imagine parum vel omnino nihil abludunt: nec sine magna voluptate spectare mihi licuit, quomodo nervei ramuli coronariarum ramos, per cordis corticem excurrentes, suo amplexu in modum hederæ circumplacent ac circumvolvunt, quinimo ipsorum tunicis provideant, eodem fere modo, ut LANCISIUS eos suis monumentis memoriæ prodidit. Præter hosce jam recensitos nervorum furculos plures quoque alii, a nervis dorsalibus orti, nec non a nervo phrenico protrusi cordis machinæ condonantur (y). Sermo meus longius proveheretur, quam instituti ratio permittit, cuncta, quæ dici possent, persecuturus: possem quippe, si usus fuisset, vasorum lymphaticorum, quibus cordis fabrica scatet, quæque Doctissimus CASSEBOHMIUS multoties immisso flatu omnium oculis perspicue ostendit, mentionem injicere, nisi metuerem, ne hoc pacto dissertatio modum excederet, omnia, quæ restant de structura cordis explananda, si expromere conarer. Quoniam vero de ejus fabrica ad satietatem, finique meo sufficienter egisse mihi videor, nunc quoque de nativa vasorum constitutione ac compage pauca dicam.

CAPUT III.

De Vasorum Fabrica.

§. L.

DE illis quidem vasis, quæ cordis sinibus universo cum corpore sunt communia, quibus sanguinis flumen coërcitum ad minima quæque corporis puncta non solum decurrit, sed a partibus quoque ejus revertens ad suos fontes revehitur, supra (§. 34. 35. 36. & 37.) mentionem fuisse factam memini. Verum cum eorum compositionem ex tunicis ac constructionem hoc loco tantum pervestigandi mihi sit animus; dein ostendendi in quos diffidentis genii

ac capacitatis canales pedetentim abeant, tandemque qui arteriarum extrema cum venarum initiis connubium ineant? non abs re futurum arbitror, si ea peculiari capite suscipiamus pertractanda.

§. LI.

Arteriarum & venarum structuram quamvis curatius investigatam primus dederit ac descriptam WILLISIUS (z), cujus vestigia plerique Anatomicorum prefferunt (a): non tamen eam omnibus numeris ita esse absolutam, ut ipsi nihil abesset, Recentiorum plures perspicuum fecerunt: Missis igitur eis, quæ de vasorum constructione literis commendata passim prostant, ea duntaxat in medium proferre lubet, quæ egomet ipse in aorta humana, quam circumspicte in suas componentes diffissi lamellas, meis ipsius oculis comperi. Non enim nescius sum, plures scriptorum arteriæ humanæ loco, vitulinam, bubulam, ovillam, vel alterius animantis fuisse delineatam, teste MORGAGNO (b); ne igitur relata ab aliis tantum referrem, neque aliis solummodo crederem, ipse manum arteriæ diffuendæ adhibui. Prius vero cognoscemus; arteriæ quid sint, quam ad earum pelliculas dirimendas atque a se invicem divellendas deveniamus. Arteria est canalis conoides (c), (vel ut aliis placet subconicus (d),) elasticus & pulsans, ex quatuor diffidentis inter se structuræ tunicis conflatus, qui e sinistro corde egressus, & in immensæ multitudinis ramos, creberrimis flexibus hinc illinc curvatos, divisus ad quascunque corporis partes perductus dividitur, sanguineo latici, quem a corde recepit, ad cunctas corporis plagas, quin minima quæque ejus puncta, adducendo serviens. Vena autem dicitur canalis, itidem conoides, qui minoris elasticitatis est nec pulsans, triplici tunicarum serie, quæ robore & crassitie arteriarum involucris longe sunt inferiores, contextus, cruorem a corporis partibus refluxum recipiens, & ad cor dextrum, cui immergitur, revehens.

§. LII.

Enim vero fidem superat fere omnem, in quot diversas Anatomici abeant sententias, sanguineis ductibus certum tunicarum, quibus circumvolvuntur, & numerum, & seriem constituturi: GALENUS quippe sua jam ætate, arterias ex gemina esse tunica concinnatas; venas contra ex una & simplici asserere dubitavit nullus (e), WILLISIUS tam arteriis quam venis quatuor integumenta esse amictui refert, quæ tantum situ in utrisque vasis differant; cui ex Recentioribus plerique accessere, easdem tunicarum quadrigas utriusque generis canalibus assignando. RUYSCIUS recepto huic pellicularum numero quintam suam cellulosam adnumeravit (f). HEISTERUS arteriam quinque membranis frui perhibet (g); totidem quoque ab accuratissimo LANCISIO arteriis attribuuntur (h). At vero si liceat hisce Viris, in re Anatomica facile principibus, qualiacunque mea in segmento aortæ humanæ observata subnectere, non verëar aperte fateri, ternas se mihi veras tunicas, loco ac textura a se invicem diversas, in aortæ trunco dedisse conspiciendas, quibus quarta, si forte cui allubesceret, facile adjungi potest (unde quoque est, cur in definitione arteriæ (§. 52.) ex quatuor eam pelliculis esse conflata dixerim), quæ tamen neutiquam pro vera ac genuina membrana venditari potest. Est enim hæc substantia quæ-

(y) LANCISIUS L. c. Sect. III. cap. III. Prop. XLVIII. p. 75.

(z) Pharmac. Rational. Sect. VI. cap. 3. p. 153. It. de Respirat. organ. & usu S. I. C. I. p. 7.

(a) VERHEYEN Libr. cit. Tract. I. C. IV. MANGETI not. ad Prax. BARBETT. DAN. TAUVRY Anat. nov. Part. I. C. VII. p. m. 119.

(b) Advers. Anat. I. N. 16. p. 19.

(c) MORGAGNUS Advers. An. II. Animadv. XXXVIII. p. 77.

(d) NICOLAI Dissert. cit. §. II. p. 15.

(e) Libr. VIII. Administr. Anat. cap. 5.

(f) Thesaur. Anat. VI. No. XI. Not. I. p. 21.

(g) Compend. Anat. Part. I. §. 291. p. 156.

(h) Libr. cit. Libr. II. cap. I. Prop. VI. p. 85.

quædam cellulosa, vasis cum compluribus aliis corporis partibus communis, quæ omnia vasa laxissime obvolvit: ceteræ vero tres pelliculæ arteriis sunt propriæ, ut quæ, in conum convolutæ, arteriosum alveum efficiunt. Quæ igitur LANCISIO prima videtur esse tunica, est involucrum, meris villis contextum, quod admodum raræ & laxæ est texturæ, linamento rasili seu tomento proxime accedens, quod propriis vasorum tunicis, ipsi substratis, laxè adhæret: unde quoque nemini integrum est, villosum hoc tegmen ulla arte ita ab arteriæ ambitu cultro separare, ut veræ membranæ faciem induat ac referat; sed tantum specie tenuissimorum villorum, alium post alium avellere & de arteria detrahère illud licet. Villosa hæc teges nihil aliud mihi videtur esse, quam illius cellulosæ substantiæ propago, quæ pleuræ in thorace, & peritonæo in abdomine extrinsecus adhærescit. Nec dissentire videtur WINSLOVIUS asserens, aortam perinde ac venam cavam substantia quadam cellulosa circumvolvi (i). Hæc ab JACOB. DOUGLASSIO magis firmantur, omnia, aiente, sanguinea vasa usque ad tenuissimos quosque ramulos distinctis & peculiaribus plicis membranæ vesicularis esse inclusa, in quibus vasa vasorum majorum & maximorum reptare (k). Quid? quod gravissimus testis ipse LANCISIUS est, qui, bombycinum hoc tegmen, arterias extus ambiens, mere villosum, tenuissimis filis & iis perquam raris esse contextum, ingenue fatetur (l), quamvis illud in numero tunicarum, arterias cingentium, ipsi sit prima. Rarum ac villosum hoc textum vasculis sanguineis scatet abundantissimis quæ eleganti reptatu illud perreptant; quin in quibusdam cadaveribus vascula, cellulosa huic capsulæ inhærentia, tanta ubertate nudis oculis cernuntur, ut adspicientibus admirationem injiciant. Doctiss. Dn. Candidatus Medic. WÜRTZBACHIIUS, quo amicior mihi non facile ullus, quique corporum disseccandorum fuit studiosissimus, mihi testatum fecit, haud ita pridem esse, cum se sibi occasio obtulisset, mulierem, aqua intercute extinctam, quæ paulo ante summa spirandi difficultate fuisset misere afflictæ, quam de vita discesserit, cultro aperiendi, in qua, resecato pericardio, arteria magna cum præjacente pneumonica sibi occurrissent, sanguineis vasculis in exteriori sua facie tam incredibiliter abundantes, ut ipsi dubium foret, an artificiosissima quoque RUYSCHII manus hæcce vascula, injectionibus suis fuisset in conspectum clarius data, quam hic inermibus oculis spectari potuerint. Jam quoque elucebit, quid causæ fuerit, cur WILLISIUS hanc villosam vasorum telam, quæ ipsi prima arteriarum tunica est, vasculosa nomine donare non fuerit veritus. Vascula vero hæc, quæ in vasorum convexitate serpunt, sunt soboles arteriarum coronariarum, quippe quæ complures rivulos sanguineos evergunt, qui ad maximorum vasorum truncos deducti in tantæ multitudinis ramulos diffunduntur, quantum nulla assequi valet conjectura (m). Cum igitur sanguinei hi tubuli villosum illud, vel si mavis, cellulosum involucrum duntaxat perreptent, nequaquam vero per ipsam primam, quæ vasis propria est, tunicam ferantur (n), non obscure patebit, quam perverse agant, qui huic villosa textui vasculosa tunica nomen asse-

runt. Jam sequuntur reliquæ, quas arteriæ sibi vindicant, tunicae, quarum prima, quæ albicantis est coloris, (quæ LANCISIO altera ordine putatur, utpote cui villosa seu cellulosa ista substantia prima dicitur arteriarum tunica) admodum densa, compacta & distractionis sui impatiens, licet tenuis existat; hæc WILLISIO glandulosa credita fuit; LANCISIO autem pleuræ propago vel interioris pericardii membranæ proles esse videtur: quia, eo perhibente, similis cum pleura esset texturæ ac soliditatis; pluribus quoque longitudinalibus fibris foret instructa (o), quas tamen oculis in illa percipere mihi eam contemplanti non fuit integrum. Altera, priori proxime subjacens, arteriarum tunica, (quæ LANCISIO tertia vocatur, omnium est crassissima & mere fibrosa; ex compluribus enim fibrarum stratis compingitur; unde diversas in lamellas facile divelli potest. Egomet enim ipse, (absit verbo invidia) in segmento humanæ aortæ, quod ferventi aliquantisper antea immergendo huic fini aptaveram, id periclitans, nullo fere negotio ternas eam in lamellas diduxi. Fibræ hujus tunicae sunt circulares sive annulares, quemadmodum id cuicumque oculis facile judicari poterit, eas decenter devolutas inspecturo: licet ex recentioribus sint, quibus hæ fibræ in spiras esse contortæ videantur (p). At MORGAGNUS contra putat, dicendo sibi in arteriis non ullas alias nisi annulares fibras fuisse observatas (q); cui alii & ii gravissimi testes succedunt, pariter contendentes, fibras eas, quæ arteriarum cava ambiunt, in orbem duntaxat esse convolutas; nequaquam vero in spiram modum circumductas (r). Neque inter Anatomicos convenit, cujus sint naturæ hæ fibræ, num carneæ, an tendineæ; an vero alterius? Plurimis Anatomicorum eas carneas esse, cumque omnibus aliis staminibus musculosis consentire in confesso est. MORGAGNUS quippe annulares has fibras carneas esse disertis verbis pronuntiat (s), quibus alii & ii locupletissimi testes adstipulantur (t), quos inter præcipue Illustr. FRIDER. HOFFMANNUS eminet, qui suis scriptis cedro dignis, tam egregiis ac solidis demonstratum dedit argumentis, arteriis fibras esse musculares, ut certe ambigam, an his aliquid sit testatius (u), nec dissentit ab eo Excellent. CASSEBOHMIUS, utpote qui musculares hosce circulos, arteriam circumeuntes, in aorta humana aliquoties, in frequenti auditorio, omnium oculis clarissime spectandos præbuit. Quæ igitur cum tam apertæ, tam perspicuæ sint, ut oculis nudis accipi queant: permirum est, Viros summæ eruditionis ac perspicaciæ usque eo adduci potuisse, ut has carneas prorsus omnino negarent, tendineas solummodo seu magis elasticas in earum locum surrogando (x): quod carneæ hæ fibræ vel lynceis in hac tunica oculis conspici nequirent, nec ulla foret earum necessitas atque adeo nullus usus (y): conf. VAN HORNE Microcosm. cum notis JON. GUILLIELM. PAULLI p. 96. Quamvis vero hanc litem, inter tantos viros hucusque agitatam ac pendentem, dirimere non ausim; id tamen aperte confiteri non erubescō, eas non me solum meis ipsius oculis evidentissime, tam in aortæ segmento a me retexto, quam ab oculatissimo Dn. CASSEBOHMIO iterum ac sæpius demonstratas usurpasse. Quid? quod cum orbiculata hæ stamina jovi aperto committerem, factum est, ut brevi

(i) Libr. cit. Tom. III. de Abdom. 33. & Tom. IV. No. 301.

(k) Descript. Periton. cit. 19. p. 54.

(l) Libr. cit. Loc. cit.

(m) RUYSCHIIUS Epist. An. III. p. 29. Tab. 3. Fig. 1. 2. & 3.

(n) DOUGLASS. Loc. cit.

(o) Libr. cit. Loc. cit.

(p) DOUGLASS. Loc. cit. MANGETUS Theatr. Anat.

(q) Advers. An. II. Animadv. XXXVIII. p. 78.

(r) LANCISIUS Loc. cit. HEISTERUS L. c. §. 291. & Not. 63. p. 120. seq. BOERHAAVE L. c. No. 132. WILLISIUS L. c.

(s) Advers. An. cit.

(t) HEISTERUS Loc. cit. BOERHAAVE Loc. cit.

(u) Libr. cit. S. I. cap. VI. §. XI.

(x) PECHLINUS de Purgantib. cap. 35.

(y) SCHELHAMMER Epist. ad W. WEDELIUM de Pulsu Prog. III. p. 12.

brevi temporis intervallo exsiccata subrubicundum, vel si mavis obscurum duxerint colorem, ceteris ejusdem arteriæ tunicis candicantibus, quemadmodum HEISTERUS non minus recte, quam præclare est testificatus (z). Si insuper constituiissem a priori hic demonstrare, fieri non posse, ut cruor per vasorum alveos circumageretur, nisi hujusmodi moventibus potentiis forent instructa, nihil sane eodem hoc facilius esset. At si perpendamus nihil rerum in natura esse vel existere, quin ratione sua sufficiente, cur sic nec aliter se habeat, utatur: non profecto ullius ingenii vis assequi, multo minus rationem reddere valebit, quid sit, quamobrem hæc fibræ tam admirabili serie & compositissimo ordine ita conferantur, ut alia ex alia nexa omnesque inter se aptæ colligatæque videantur, nisi concesserit, illas motui per quam ordinato alternis efficiendo, sicque cruorem præterlabentem propellendo esse aptissimas, eoque duntaxat consilio a sapientissimo conditore arteriis quoque condonatas. Quod si enim is tantum foret harum fibrarum; quibus arteriæ adornantur, usus, (quemadmodum aliquibus persuasum est) ut tantum liquidis resisterent sicque impedirent, quo minus arteriarum latera, a rapidissimo sanguinis flumine, ex cordis finibus in ea irruente atque impetuosius illidente, nimium & ultra justam distensionis sphaeram diducerentur: non certe esset ulla sufficiens ratio, cur hæc fibræ tam admirabili ac composito ordine in arteriis fuissent constitutæ & dispositæ: huic enim fini exsequendo satis superque suppetiisset, si modo hæc stamina indigestis atque incompositis seriebus, nullo servato ordine, ita in semet ipsa implicata fuissent ac contexta, ut validum inde emerisset integumentum, quod sanguinis torrentem coercere ac refrenare potuisset. Verum ne hæc longius me ab incepto trahat, ad illud redeo, quod mihi maxime dicendum. Quæ his descriptis arteriæ pelliculis succedit est tandem intima tunica, quæ LANCISIO quarta numeratur: omnium hæc est ceterarum tenerrima, pellucida & albicantis coloris, interea tamen satis valida, quæ suo interiori complexu, quo præterfluentem sanguinem coercet & continet, satis lævigata; textura ac habitudine sua accedere LANCISIO videtur proxima illi membranæ, quæ cordis thalamos intus investit (§. 48), utpote cui continua est & cohæret (a). Multis Anatomicorum tunica hæc nerveæ videtur esse texture, unde quoque tunica nerveæ titulo superbit (b); alii vero eam esse membranaceam volunt (c): at cum Anatomici de nerveæ tunicæ sede adhuc inter se dissideant, dum alii locum ei exteriorem in arteriis assignant (d); alii contra eidem, præeunte RUYSCHIO, interiorem attribuant (e): aliis decernendum relinquo, utrum hæc nervea sit necne? Plerisque Anatomicorum persuasum est fibras hujus intimæ tunicæ in longum esse protensas (f), quæ tamen perspicacissimo MORGAGNO nunquam apparuerunt, ut qui diserte pronunciat, sibi non unquam licuisse in intima arteriarum tunica manifestas longitudinales fibras agnoscere, nec proinde assequi posse, qua ratione, cum non essent, aliis interdum apparere potuissent (g): nec eas LANCISIO hac in tunica fuisse perspectas, inde auguror, quod hanc membranam verbis depingens, de hisce staminibus in longitudinem exporrectis nihil meminit (h); alibi vero de fibrarum in arteriis longi-

tudinalium convulsione disertis verbis commemorat (i); silentio tamen tegit, ubi sint quaerendæ, in extrema an vero intima arteriarum tunica? Illud saltem expromere non verear, nullas se mihi obviam dedisse fibras in ea longitudinales, quamvis microscopio quam diligentissime illos perquisiverim; quid igitur in causa fuerit, cur oculorum obtutum effugerint meorum, cum aliis obviæ fuerint, divinare nequeo. Denique huic tunicarum quaternioni, quibus arteria contextitur, RUYSCHIVS suam adjunxit cellulofam, quam primæ ac secundæ arteriarum tunicis interjecit (k), tantam ejus statuendæ necessitatem sibi persuadens, ut alias non, nisi cellulosa hac in vasis supposita, explicari posset, qui fiat, viscera, meris vasis constructa, velut hepar, lien, placenta &c. ut aliquando a nativo suo habitu desciscerent inque hydatides degenerarent. Nemini non, qui vel a limine Anatomicam salutaverit artem, exploratum esse censeo, omnes membranarum, quæ ex aliis compositæ sunt, lamellas villis quibusdam intervenientibus, vel si magis arriserit, interjecta substantia cellulosa nunquam non compingi ac conglutinari: nihil ergo dubii quoque est, quin arteriarum tunica, quæ sibi mutuo internuntur, ejusmodi ligaminibus ac retinaculis copulentur & conjungantur. Eam vero in verarum membranarum numero censi non posse, ex iis liquidius comparebit, quæ supra fufius declarata exstant de illo celluloso velamine, tunica arteriarum primæ nomine cognito, quod vasa obvolvunt omnia. Hæc, quæ de arteriarum integumentis dicere habui, sufficiant. Mirari hoc loco subit prælaudatum DOUGLASSIUM eo audaciæ processisse, ut Lectori persuadere summopere annifus sit, arterias omnes nihil reapse aliud esse, nisi muscolum concavum: cunctas quippe tunicas, (si ab illo celluloso velamento, sua textura lanæ tonsæ vel vulsæ non ita absimili, discedatur, utpote quod nequaquam pro parte earum constituyente foret habenda) quibus arteriarum cavitates circumsepuntur, proprie unicam duntaxat fingere ac constituere tunicam (l). Verum enim vero quantum abest, ut cunctæ intestinorum tunica, quæ sibi invicem æque ac arteriarum tunica incumbunt, proprie unam efficere membranam unumque proinde muscolum pervium unquam dicantur: tantum quoque abest, ut, vel ulla veritatis specie, idem hoc de arteriarum pelliculis affirmari queat. Ac pro certo habeo, non fore ullum Anatomes peritorum, qui illud DOUGLASSIO aliquando credat, nisi forte ea, quæ tamen inter se longissime distant & differunt, commiscere animum induxerit.

§. LIII.

Ex omnibus, quæ humano in corpore reconditæ jacent, arteriis duæ nobis præcipue veniunt excutendæ, aorta, videlicet (§. 37.) & pneumonica (§. 35.): quotquot enim in humana machina arteriarum se nobis ostendunt, illæ omnes ad harum alterutram referri possunt, utpote quibus continuata junguntur via; quarum hæc purpureum in pulmones duntaxat invehit liquidum: illa vero sanguinem universis ceteris humani corporis partibus apportat, quinimo quibusvis ejus punctis, quæ vel mente in eo fingi possunt, largissime affundit (m). Quisque vero, vel me

silente,

- (z) Libr. cit. Not. cit.
(a) Loc. cit.
(b) HEISTERUS Loc. cit.
(c) BOERHAAVE Loc. cit.
(d) VIEUSSENIUS Nov. Vasc. Syst. BOERHAAVE Lib. cit. N. 132. VERHEYENUS Libr. cit. Tract. I. cap. IV.
(e) HEISTERUS Loc. cit.
(f) WILLISIVS Pharm. Rat. S. VI. cap. 3. & de Resp. organ.

- & usu Sect. I. cap. I. BOERHAAVE Loc. cit.
(g) Advers. Anat. II. Animad. XXXVIII. p. 78.
(h) L. XI. de Aneurism. cap. I. Prop. VI. p. 95.
(i) Libr. cit. cap. IV. Prop. XLIV. p. 119.
(k) Thesaur. Anat. VI. No. XI. Not. 1. p. 21. & No. CIV. p. 48.
(l) Dissert. cit. l. c.
(m) BOERHAAVE Libr. cit. No. 142. 214.

filente, facile animo comprehendet, fieri non potuisse, ut sanguis ex corde ad extrema quaecunque corporis loca adveheretur, nisi aortæ truncus in innumerabiles fuisset ramos dispersus, quorum quisque iterum in abundantissimos alios, licet sensim capacitate decrecentes, abijt ramos; qui rursus infinitos alios quoquoersus extrudunt furculos, suis trunculis, unde pullulescunt, multo minores ac graciliores, qui in ramusculos sensim sensimque angustiores atque adeo ultimos fatiscunt. Quousque vero hæc ramorum in alios incredibiliter multos & magis magisque subtiliores procedat, illud nemini definire integrum est: exploratæ tamen veritatis est non posse ullum humano in corpore designari punctum, quin vasis scateret suis, experientia id abundantissime docente. Sanguini ergo, quem ventriculus posterior (§. 26. 27.) in aortæ truncum expellit, aditus patet ex hoc in omnes inde productos ramos vel minimos quosque. Rami vero, qui ab arteria pulmonali (§. 35.) discedunt, utrosque pulmonum lobos subeunt frequentissimi, in quibus itidem simili apparatu distribuuntur in furculos stupendæ exiguitatis, qui cum ultimis venæ ejusdem nominis propaginibus connexi, unamquamque pulmonum vesiculam eleganti vasorum reti circumtexant. RUYSCHIUS insuper suis injectionibus comperit, ramulos arteriæ, quæ ipsi vocatur bronchialis, ultimis arteriæ pulmonariæ furculis disperse anastomosibus adsociari (n), quibus sanguinem refunderent suum; parum quippe constat, numne semper bronchiales venæ reperiuntur, quamvis meminerim eas videre ab Excell. CASSEBOHMIO aliquoties humano in cadavere demonstratas, ubi a bronchiis profectæ azygam venam patebat. Sed ne ex obliquo in alium differendi campum abeam, ad ea revertar, quæ adhuc commemoranda sunt. Arteriarum rami nequaquam recta per corporis regiones feruntur via ad ejus partes, sed admodum diversa, modo obliqua, modo flexuosa ac tortuosa, tum serpentino itinere; quemadmodum ipsa corporum dissectio differentem illum arteriarum progressum ac reptatum cuiusvis satis superque patet. Quod hi quoque rami quanto longius a suis truncis recedunt, tanto magis gracilescant, ex dictis abunde liquebit: illud vero mihi omnium præcipue videtur dignum, ut animo teneatur fixum, quod hisce ramorum propaginibus, si in ultima vascula definant, in singulis quibusve corporis partibus, alia fere forma ac facies intuitu fabricæ, figuræ, magnitudinis, capacitatis, tunicarum crassitie, ramulorum numeri horumque inflexus, divisionis ac directionis inducatur, RUYSCHIO id omnium optime animadvertente (o). Concinnas enim ac pulcherrimas vasorum figuras, quas laudatissimus hic humani corporis contemplator suis operibus disperse dedit expressas, inspecturo evidentissime apparebit, extrema vasorum in quavis fere corporis parte singulariter esse constructa & admodum varie formata: quæ renibus velut condonata sunt, serpentino ductu, in tubulos BELLINI urinarios transmigrant (p): quæ vero splenem perreptant in concinnos colliguntur fasciculos, penicillo detrito similes (q): extrema autem vasorum, quæ hepatis molem suo contextu constituunt, in succosos seu pulposos

penicillos, quæ in exiguos conglobantur acinos (r), definunt (s): alia vero rursus est facies extremis vasculorum, quæ choroidem oculorum tunicam exornant, quippe quorum trunculi huic tunicæ inserti, sese per pluribus tenerrimis furculis, in orbem dispositis, per eam distribuunt (t). Ac vix dicendi finem invenire mihi liceret, si omnes illas discrepantias, quæ ultimis vasculis in sua quoque corporis parte intercedunt, hic loci indicare conarer: ex facili quippe foret ostendere, qua ratione arteriæ carotides, in recessus cerebri interiores se jam abdituræ, crassiori suo involucro prius exuantur, quam hanc MINERVÆ sedem subeunt (u); quo autem pacto aliis vasis, velut pulmonariis (§. 15. 16.) novum amiculum induatur, quod capsulæ cellulose HELVETII nomine innotuit, licet GLISSONIO jam cognitum fuit. Hoc tantummodo hic subnectere non abs re fore existimo, quod omnes arteriarum rami, ad corporis partes si fuerint perducti, suis extremis abire vel in ductus secernentes atque excernentes; vel in peculiare cellulas & folliculos, ut videre est in pene, clitoride, glandulis sebaceis MEIBOMII & MORGAGNI &c.; vel in venas lymphaticas, vel denique in venas sanguineas, ut quibus natales suos largiuntur.

§. LIV.

Res igitur, locus, tempus atque ordo exigere ac postulare videntur, ut nunc de venis, quæ sanguinem a corporis partibus receptum eo revehant, unde profluxit. Originem hæc capiunt suam vel ex bibulis cuticulæ osculis, vel ex aliis resorbentibus, per omne corpus in membranis, cava constituentibus, vel cingentibus, velut pericardio, intestinis, vesica, thorace, abdomine, oculis &c. largissime distributis ostiis (x), vel a finibus arteriarum (y). Omnes vero venarum rami confluent in venas cava (§. 34.) & pulmonales (§. 36.). Non quidem ignoro esse inter Anatomes doctos, qui contendunt, universas corporis venas ad duas, tanquam matres, referri posse, ad venam cavam & portarum venam (z), quibus alii tertiam, scilicet pneumonicam adjiciunt venam: at vero cum ipsa portæ vena, quem hepati infundit cruorem, per venas hepaticas ad cavæ inferioris caudicem ableget, præstat, ut mihi videtur, dicere, cunctos venarum ramos sanguinem refundere cavis & pulmonalibus venis. Illæ vitale liquidum ab omnibus corporis punctis, exempto pulmone, exceptum ad dextrum cordis specum reducunt: hæc vero sanguineum laticem, sibi ab ultimis arteriæ pulmonariæ ramusculis traditum, a pulmonibus solummodo in cordis sinistram reportant auriculam (§. 28.). Tertia denique quæ est, vena portarum vocatur, hæc sanguinem innumeris ramis a visceribus, suo quæque loco in abdomine dispositis, repetit, quem in suo trunco congestum, abundantissimis ramis per vasculosam hepatis compagem denuo distribuit, ut bilis ibi a sanguine secernatur, qua orbata in venas hepaticas, cavæ inferiori insertas, transfertur, unde se ad ventriculum cordis recipit anteriorem. Non obscure inde liquebit, portæ venam duplici officio fungi, videlicet venæ, iis ramificationibus, quæ per intestina, mesenterium, pancreas, ventriculum, splenem

(n) Catal. Rarior. No. XVII. p. 162. Epist. An. VI. p. 10. Tab. 7. Fig. 5.

(o) Epist. An. VI. p. 6. & 7. Epist. An. XIII. Advers. An. Dec. I. V. p. 14. & Dec. II. III. p. 6. & 7. It. VII. p. 19. BOERHAAVE Libr. cit. No. 132.

(p) Thes. An. II. Tab. VI. Fig. 7. Thes. An. III. No. XLI. p. 22. & 23. Tab. IV. Fig. 3. Thes. An. IV. Tab. I. Fig. 1.

(q) Thes. An. III. No. LXXII. Thes. An. X. No. XCIV. Epist. An. IV. p. 6. seqq. Fig. 2. & 4.

(r) WINSLOVIUS Libr. cit. Tom. III. de abdom. No. 272.

(s) RUYSCHIUS Thes. An. IX. No. LIX. Thes. An. I. Ass. II. No. VII. Not. I.

(t) RUYSCHIUS Epist. An. XIII. p. 12. Tab. XVI. Fig. 8. & 9.

(u) FRIDR. HOFFMANNUS L. c. L. I. S. III. cap. I. §. VII. BOERHAAVE Libr. cit. No. 231. p. 103.

(x) BOERHAAVE Libr. cit. No. 133. p. 68.

(y) FRIDR. HOFFMANNUS Loc. cit. §. XII. p. 107. seq. THOM. BARTHOLINUS Libr. cit. Libel. I. de Venis cap. I. No. IV. pag. 586. BOERHAAVE L. c.

(z) THOM. BARTHOLINUS Lib. cit. cap. III. p. 599.

splenem & omentum disperguntur : arteriæ vero , iis propaginibus , quæ per jecinoris viscus disseminantur ; quæ cum cruorem per dictos hepaticos ramos venæ cavæ reddant , perspicuum erit , cur maluerim universos venarum ramos duabus , quam ternis venarum truncis accenseri.

§. LV.

Meum jam esset , tibi quoque ut venarum structuram sifterem curatius descriptam : at non mediocriter doleo , ejus perquirendæ ac meo ipsius cultro discindendæ mihimet defuisse occasionem : non aliter igitur possum , quin eam , aliorum oculis fidens , tibi hic exhibeam leviter adumbratam. WILLISIUS venam totidem pelliculis , videlicet quatuor , quot arteria gaudet , constare perhibet , eo tamen discrimine , quod prima atque extrema earum foret mere membranacea , nervea vero ipsis plane deesset. Doctissimus HEISTERUS tres iis adscribit pelliculas , membranaceam scilicet , quæ prima est ; altera , quæ ei subdita , vasculosa ; quibus musculosa , locum occupans intimum , accedit (a). Totidem quoque involucra venis assignavit NICOLAI (b) , quæ tamen sicco pede transiit. Voti igitur mei reus leviter tantum eas perstringam recensendo , quæ jamdiu mihi cognitæ fuerint. Extrema earum tunica , quæ venis cum arteriis communis est , nihil omnino abludit ab illo celluloso , vel si satius fuerit visum , villoso involucro , quod laxius vasa obvolvitur , & in numero verarum membranarum sibi locum vindicat nullum (§. 52.) : quæ vero huic subjecta venisque propria membranaceæ est texturæ , cui altera , quæ fibris in orbem nexis contexta est , subtenditur. Hæ fibræ , quæ carneæ seu musculares sunt , multo rariores atque infrequentiores existunt , quam quæ arteriis convolvuntur (§. cit.) , quemadmodum id quoque Viri magnæ famæ ac fidei spectatissimæ abundanter testatum faciunt (c). Tertiam ex propriis , quæ venis asseritur , mihi nondum perspicere licuit. Nec silentio premendum esse reor , has venarum tunicas , præcipue musculosam , longe tenuiores ac crassitie multo inferiores esse , quam quæ arterias circumplectuntur.

§. LVI.

Quamquam venarum rami apparatu ac distributione , arteriarum haud absimili (§. 55.) , per corporis feruntur provincias ; hoc tamen inter utrosque interest , quod venæ arteriis longe plures ac numerosiores sint ; præterea quoque copiosissimis adornentur valvulis , quæ ramorum ostiis ibi , ubi in ampliores truncos , recta sursum elatos patent , prætenduntur , ita ut liquidis , ex angustioribus ramis in patentiores transfundendis , facile viam pandant ; iisdem vero relapsuris eo , unde promanarunt , iter intercludunt. Valvulæ hæ , quæ modo solitariae , modo bijuges sunt , præsertim in canalibus conspectioris capacitatis , non servant crescentis lunæ speciem , sed magis oblongæ sunt figuræ (d) , & digitalis faciem induunt (e). Noli tamen credere , hujusmodi pendulas omnibus venis inesse pelliculas ; venam quippe portarum cum suis quibuscunque propaginibus , valvulis esse destitutam atque immunem exploratæ veritatis est : licet RUYSCIUS in venis equorum meseraicis hinc illinc fuerit valvulas nactus (f). Huic adnumerandæ venæ

Frid. Hoffmanni Oper. Supplem. II.

niunt uteri venæ , quæ itidem valvulis carere HEISTERO , ex solertissimo FANTONO id adferenti , dicuntur (g). Nec insolenter ac raro valvulis orbæ conspiciuntur venæ in viris spermaticæ (h). Venæ insuper amplitudine longe præstant arteriis. Neque silendum est , quod venæ adeo languide atque exiliter micent , ut vix ac ne vix quidem earum motus sentiri queat ; unde quoque est , cur pluribus persuasum , eas nihil omnino moveri. Innumera quidem sunt , quæ de arteriis juxta ac venis huc adferri possent , exempla omnia , quæ dici queunt , confectaturus : at cum non hujus loci sit neque temporis tam late patentem dicendi campum ingredi , iis omnibus recensendis , quæ mererent , ut peculiari diatribe fufius excuterentur , supersedeo , ad ea progressurus , quæ ad sanguinis circuitum clarius intelligendum magis mihi esse necessaria videntur.

CAPUT IV.

De Cordis & vasorum actione.

§. LVII.

Actio seu functio cujuslibet humano in corpore partis quemadmodum generatim illum designat effectum , quem pars vi suæ ipsius fabricæ ac motu humorum suis in vasis , horumque in illos renixu , edit ; vel si mavis , quid per ejus structuram possibilis est (i) : ita cordis quoque & vasorum functio erit ille effectus , quem in liquida , quæ ipsorum cavis continentur , beneficio structuræ , qua utuntur , exercent. Jam vero cum cordis fabrica a ceterorum musculorum constructione nihil omnino , nisi quod cavis insignibus instructum sit , abludat (§. 13. 22.) non quoque dubium est ullum , quin utrorumque actio eodem modo eademque causa peragatur. Omnibus vero Anatomicis exploratissimum est , autopsia ipsa loquente , cujusvis musculi actionem unice innixam esse corrugatione seu contractione fibrarum motricium illarum , quæ inter se collectæ ipsius ventrem constituunt (k) , vi quadam , per nervos & vasa ipsis perpetim accedente , effecta ac sustentata. Quod vero fibrosa cujusvis musculi stamina in undulatam quasi superficiem corrugari sicque breviorum reddi , non est , quod pluribus experimentis atque argumentis demonstratum hic tradamus , quod sane ex facili mihi foret , nisi temporis ratio mihi foret habenda : WILLISII enim observatione cognitum habemus ac perspectum , fibras musculi carneas si , in vivo animali , suis musculis ita exsecantur , atque ab omnibus reliquis fibrillis separentur , ut prorsus solutæ ac liberæ existant , sese in omni motu ita solutas , singulares ac liberas pariter , ac alias , in musculo relictas & compactas , contrahere ac corrugare. Idem quoque SWAMMERDAMIUS ex anatis vivæ dissectione testatum facit docendo , in qualibet musculi fibra , etiam si a reliquo ejus ventre esset separata , ejusmodi contractionem perspicere (l). His assentitur WINSLOVIUS testificando fibras musculi carneas , sub quavis ejus actione , in se mutuo ita contrahi ac breviores reddi , ut plicatam seu rugosam induerent faciem (m).

P Hæc

(a) Libr. cit. §. 298. p. 161.

(b) Dissert. cit. §. 11. p. 15.

(c) FRID. HOFFMANNUS Libr. cit. L. I. S. I. c. VI. §. XVI. VERHEYENUS Libr. cit. Tract. I. cap. IV.

(d) RUYSCIUS Dilucid. valvular. cap. II. p. 10.

(e) BOERHAAVE Libr. cit. No. 133.

(f) Advers. Anat. Dec. II. IV. p. 11.

(g) Libr. cit. §. 236. II. p. 104.

(h) BOERHAAVE Libr. cit. §. 224. p. 94.

(i) Idem Libr. cit. No. 695.

(k) WINSLOVIUS Libr. cit. Tom. II. de Muscul. No. 45. 46. 48. 51. BOERHAAVE Libr. cit. No. 391. 401. 7. 8. 10. 406. seqq. FRID. HOFFMANNUS L. c. L. I. S. III. cap. II. §. XIV. HEISTERUS L. c. §. 306. p. 169.

(l) MORGAGNUS Advers. An. II. Anim. VII. p. 18.

(m) Tom. cit. No. 48.

Hæc vero cum ita clara, ita explorata sint, ut de iis dubitare nefas sit, cum in animantibus vivis diffectis oculis videri possint, iis ab aliorum reclamazione vindicandis non inhærebo ingressurus ad illud demonstrandum, quod videlicet contractio hæc, in singula quavis fibra motrice observabilis & conspicua, cuidam vi, per nervos & arterias iis jugiter suffusæ, accepta, potissimum ferenda sit.

§. LVIII.

Experimentis cognitum est indubitatis cujusvis actionem musculi illico exstingui, simul atque nervus ipsi implicatus filo confringatur circumjecto: quinimo omnes alios musculos, si suis ab eodem nervi trunco ramis potiuntur, una a suo munere & actione quiescere (n). Idem quoque hoc observare licet in musculo quocunque, arteria, quæ per ipsius ventrem ramis suis diffunditur, tam arcte vineta, ut sanguis ab omni in illum ingressu prohibeatur: hoc enim facto, omnis ejus motus item perit, quemadmodum a nervo ligato. Hoc tamen discriminis inter duo illa interest experimenta, quod musculi motus statim cesset, ac ligatura nervo fuerit injecta: quod longe aliter fit, arteria, ad eundem musculum pertingente, vinculo constricta, ubi motus hujus musculi non eo ipso temporis puncto, quo arteria ligatur, evanescit; sed per plura adhuc momenta superstes est, donec funditus pereat, teste omni exceptione majori Illustri BUDDEO (o). Ab omni igitur erroris metu maxime securi inde colligimus, motum omnium musculorum atque adeo fibrarum ejus motricium, soli ejus fabricæ mechanicæ neutiquam esse acceptum ferendum, sed vi cuidam seu potentiae motrici per nervos præcipue atque arterias ad illos traductæ. Liquidum ergo illud agillimum omnium subtilissimum, quod in nervis hospitatur, non excluso sanguine, est vera omnis motus in musculis procreatrix atque effectrix (p).

§. LIX.

Quæ de motu seu actione musculorum generatim (§. 58.) relata leguntur omnium, in cordis quoque machinam, pariter musculosam (§. 22.) apprime convenire, nemo inficias ibit perpensurus, musculosæ cordis texturæ, præter illam spiralem fibrarum ejus contorsionem (§. 46. 47.) ac sinus illos spectabiles (§. 26. 38.), nihil discriminis intercedere cum cæteris musculis: similitudinem vero similem & eorundem eandem esse rationem. Fibræ ideo cordis, in actionem compulsæ, in semet ipsas contrahuntur, crispantur ac longitudine perinde, ac reliquorum musculorum, diminuuntur. Causam vero, quæ laceratosa hæc ejus stamina ad sui contractionem stimulat atque impellit, fluidissimum ac summæ mobilitatis liquidum, quod perenni motu per nervos (§. 49.) ad cordis substantiam appellitur, esse multis jam evictum experimentis. LOWERUS quippe observavit, trunco paris nervorum octavi in cervice ligato, animal interjecto quodam intervallo exspirasse, ob suffocatum cordis motum (q). Idem quoque testatum facit BORELLUS, nervis paris octavi, inquiens, in cervice constrictis, vel penitus abscissis, cor quoque statim ab injecta ligatura palpitasse & contremuisse, licet animal non brevi post, sed uno alterove demum die exacto, perierit (r). WILLISIUS vero idem experimentum aliquoties adornans, prælaudatis Viris adversum tenere videtur, utpote qui, injecto his ner-

vis vinculo, magnum quidem cordis tremorem statim se advertisse dicit, eo autem brevi cessante, animal per plures dies superstes tam diu vixisse, donec præ longa inedia, viribus sensim attritis, fuisset enectum (s). Quamvis vero hæc experimenta sibimet prima fronte adversari videantur, nihil tamen est negotii ea inter se conciliare sine veritatis dispendio. Quod si enim primo consideratius perpendamus, naturam, in nervis pariendis, distribuendis, collocandis ac connectendis cum partibus non ulli adeo adstrictam esse legi, ut non aliquando, quin sæpius, ab ea deflectat, inque eorum origine, numero, dispersu ac conjunctione admodum variet; quemadmodum idem quoque in vasis sanguineis observare licet: dein plures nerveas propagines cordis compagi impertiri, quæ non a pari vago, nec ipso intercostali, sed a nervis dorsalibus & phrenicis prodeunt (§. 49.): ex facili erit hæc experimenta, quæ sibi esse contraria videntur, inter se componere & ad ea respondere, quid causæ fuerit, cur quædam horum animantium, quæ a LOWERO & BORELLO dilaniata sunt, brevi a vinculo pari vago circumjecto, interierint, aliis a WILLISIO mactatis diutius atque adeo per aliquot dies vitam protrahentibus, priusquam interemta sunt. Neque dubitari potest, quin quadripedia hæc continuo vitam exhalassent, dummodo licuisset ipsum cardiacum plexum prius vincire quam cordi committeretur.

§. LX.

Ex adlatis igitur (§. 59.) satis esse perspicuum autumo, musculorum actiones omnium perinde ac cordis motum a vi quadam, per nervos & arterias jugiter in eorum villos derivata musculares, proficisci. Quod si enim illud cujusvis rei causa jure habendum, quo posito nec in agendo impedito, statim ac semper effectus præsto est; & quo sublato, effectus quoque ille confestim cessat: nemini quoque dubium esse potest, quin illa vis seu potentia (§. 59.), arteriis ac speciatim nervis ad musculos & cor delata, genuina ipsis motrix existat causa. Hac quippe in suo ad cor transitu utcunque inturbata, vel prorsus intercepta, cordis functionem actutum quoque impeditam & conturbatam vel omnino abdicatam videmus: ea vero liberrimo, æquali atque ordinato influxu in cordis villos deducta, hujus quoque motum compositissimo ordine ac constantia succedentem deprehendimus.

§. LXI.

Cum itaque cordis actio æque, ut uniuscujusque musculi, suis fibrarum seriebus nitatur (§. 47.), quæ ejus antris obliquo & transversali ductu circumvolvuntur (§. cit.), non difficile erit ex ipso earum tractu judicare, quomodo musculosa cordis agat compages in sanguinem. Namque fibris his, ab infuso nervorum liquido in semet ipsas contractis, crispatis ac longitudine imminutis, aliter fieri non potest, quam ut cordis latitudo diminuatur, & parietes ejus septo intermedio (§. 26.) propius admoveantur: unde ejus thalami coangustantur, qui cum sanguine hoc temporis affluant, non possunt non mechanica necessitate parietes in eum undique agere ac premere, cui idcirco cum in ventriculis nullus commorandi locus relinquatur, eo cedit, ubi minor sibi resistentia est, hoc est, in arterias, quæ ventriculis cordis appenduntur (§. 35. 37.), irruit. Cla-

(n) FRIDR. HOFFMANNUS L. c. cap. III. §. VII. BOERHAAVE L. c. No. 401. 4. & 6.

(o) Dissert. de Musculor. action. §. XLVII.

(p) FRIDR. HOFFMANNUS L. c. L. I. S. III. cap. I. §. X. XI. XIV. & cap. II. §. II. IV. BOERHAAVE Libr. cit. No.

284. 285. 402. & seqq.

(q) Tract. cit. cap. II. p. 60.

(r) De Motu Animal. Part. II. Prop. 96.

(s) Descriptio. Nervor. cap. 24.

Clarissime ergo inde elucet, admirandam cordis machinam, singulis ventriculorum coarctationibus, vitale liquidum undique premendo urgere inque motum concitare: cor igitur emboli munere fungitur, cujus quanta in Hydraulicis sit utilitas ac fructus hic loci dicere nihil attinet. Hinc in corde tot antliae conspiciuntur, quot cavitates sanguini complectendo aptas in eodem nactus fueris. Quamvis vero antliae, quibus Mechanici utuntur; quia lateribus rigidis ac flexionis impatientibus circumstructae sunt, ad fluida in motum agenda & concitanda nunquam non embolo indigeant, qui in earum cavitates intrusus, eas coangustat sicque liquida impellit: nihil tamen est, quod ejusmodi tudiculæ seu emboli peculiares cordi, pro cavitatibus ipsius coarctandis, affingantur, ut quæ parietibus flexibilibus & plicabilibus circumsepuntur, qui propterea facile in mutuos amplexus ruunt.

§. LXII.

Cor proinde, quod machina est motoria, suo alternante motu sanguinem impellit inque vasa sibi at-texta promovet, quoad homo in vivis erit: quem ut pernoscamus expediet, ut hoc loco consideremus, quomodo dividi solet. Tam ventriculis quam cordis auriculis duplex afferi solet motus, altero, qui systole vocatur, arctantur: altero autem, qui diastole audit, diducuntur. Reciproca hac ventriculorum cordis coarctatione ac distensione fluida in motum conjiciuntur. Cum autem musculosa cordis stamina, liquido nerveo perfusa, in ejus systole duntaxat tendantur inque rugosam quasi superficiem contrahantur: in ejus vero diastole a sua actione acquiescant ac retendantur, perspicuum erit, systolen cordi tantum esse violentam, ut in qua ejus fibræ sese efficienter gerunt: ejus vero diastolen, ipsi esse nativam, quippe in qua otiosæ ac laxatæ sunt (t).

§. LXIII.

Utræque cordis auriculæ (§. 38.) simul in systolen abeunt, qua peracta, in diastolen una revertuntur. Nec ipsi venarum sacci, qui auricularum cavis adstructi sunt, alterna hac contractione ac dilatatione carent, ut docet eorum structura, pluribus fibris motricibus circumtexta (§. 34. 36.) ipsaque autopsia: per experientiam enim STENONIS (u) & LANCISI (x), id abunde constat. Namque ille refert, in dissectionis vivis cuniculis se venæ cavæ superioris motum, (corde cum auriculis jam quiescente) perspicue observasse, qui ad folius digiti pressionem perseverasset indeque auriculam versus tendisset: hic vero eundem venæ cavæ motum ad auriculam usque dextram pergentem in vivorum equorum sectione perspexit, qui emoriturus folius calidi halitus fotu, vel calidis quoque digitis fuit resectus ac resuscitatus, ita ut vena hæc peristalticas versus cor constrictiones ac vibrationes quater aut quinquies renovaverit suas.

§. LXIV.

Quemadmodum auricularum systole ac subsequens diastole uno eodemque temporis puncto contingit: ita utrique cordis ventriculi (§. 32. 33.), eodem etiam temporis articulo contrahuntur inque systolen contendunt; qua cessante, statim quoque una dilatantur. Confessæ igitur veritatis est ambas cordis auriculas simul sanguine impleri sicque distendi, unaque etiam depleri ac flaccescere: sic quoque utroque cordis thalamos uno eodemque temporis puncto

Frid. Hoffmanni Oper. Supplem. II.

ampliari rursusque una in systolen compelli.

§. LXV.

Hicce igitur stabilitis ac fixis, illud quoque excutiendum venit, quod omnium, qui Medicinæ operam navant, sermone ac scriptis adhuc celebratum est; videlicet num auriculæ cordis eo ipso constringantur atque in systole sint, quo ipsi cordis ventriculi in diastolen cedunt, contra vero in diastolen abeant, ventriculis systolen perpetientibus? Est enim communis opinio, quæ omnibus hucusque Medentibus fuit recepta & eorum calculis comprobata, auricularum motum cum ventriculorum ad amissum ita reciprocare, & horum systole semper cum illarum diastole consentire: & contra auricularum systolen nunquam non ventriculorum diastolæ esse synchronam. Verum enim vero LANCISIUS, qui eo fine in animalibus vastioris molis ac corporis, velut equis vivis, complura fecit experimenta, nobis omnium primus dedit demonstratum, auricularum cordis motum nequaquam cum ejus ventriculorum motu esse vere alternum; sed illarum contractionem nonnihil duntaxat antevertere horum coarctationem (y).

§. LXVI.

Ut autem asserti hujus veritas ipsis oculis judicaretur, suasor existit atque auctor hoc dubitantibus, animantia, non vero emaciata atque invalida aut viribus undecunque exhausta, sed alacria, ferocia ac vegeta, quæ molis vastioris sunt, quam quæ alias lanienæ Anatomicæ submitti solent, velut equos, boves idque genus alia, ut viva dissecta inspicerent, tum, reclinato statim a sectione sterno & aperto pericardio, nullo sane negotio in iis adverterent, auriculas cordis nihil omnino alternatim, sed fere simul atque eodem propemodum tempore cum ipsis ventriculis constringi ac rursus remitti: ea semper tamen lege, ut aliquanto citius systolen inciperent suam, quam cordis thalami, sicque, singulis cordis pulsibus, sua contractione aliquantisper ventriculorum systolen antecederent. Quod si vero bruta jam languida & quomodocunque enervata, aut quibus vires ac sanguis sub ipsa laniena, longius justo tardata, prius exhauriuntur, quam, recluso pericardio, ad cor collustrandum fessinatur; vel quæ exigui corporis sunt (utpote in quibus partium cordis exilitas impedimento est, quo minus hæc recte cognoscantur), viva eo fine discindantur: tum utique fieri posse perhibet, ut aliquis auricularum ac ventriculorum motus a suo nativo rythmo jam deflexos, maxime ob destructam respirandi machinam, alternantes inveniret, qui tamen multo aliter vigente sanitate contingerent. Atqui hoc potissimum in causa esse confitetur, cur illa de alterna cordis & auricularum constrictione opinio, quæ huc usque invaluit, ac Medicis ad unum omnibus cooptata est, Medicas in scholas irrepperit: quod Anatomici in vivorum extispiciis forte fortuna observassent, (effoetis jam animalium viribus ac perturbatis naturalium motionem legibus), auricularum motus cum ventriculorum sæpius alternasse; hoc statim, nullo habito respectu, ad nativam cordis actionem transfulissent, opinati, auricularum systolen cum ventriculorum coarctatione æque alternis contingere, ut in moribundis vel saltem morti proximis attendissent animantibus.

§. LXVII.

Quo autem facilius, rectiusque intelligatur, nec perversè explicetur, quo pacto cordis auriculæ sua

P 2

systole

(t) BOERHAAVE L. c. No. 187. & 190.

(u) Actis Hassniens. Tom. II. Observ. 46. Num. 7.

(x) Libr. cit. Prop. LVII. p. 84. seq.

(y) Libr. cit. Sect. IV. cap. I. Prop. LIX. & LX. p. 87. 88. seq.

fyftole anticipent ventriculorum contractionem, & citius tendi definant; LANCISIUS præclare admonet, ut, ad majorem hujus rei perfpicuitatem, tam auricularum, quam ventriculorum contractio & distentio æquali temporis mensura dimetiendæ forent, quocirca jubet, ut tempus illud, ad quod ceu mensuram, utrorumque fyftole ac diastole exigendæ sunt, in tria alia eaque æqualia ac distincta tempora iterum dividatur, in principium scilicet, medium, & finem, quæ tamen non tanquam puncta individua essent concipienda, sed ita animo fingenda, ut sua quæque æquali latitudine seu duratione uterentur, quibus cordis motum metiri oporteret. Quo autem egregii hujus viri sensus clarius intelligatur, perbelle facturus mihi videor ad ipsos fontes, ubi hæc dulcius hauriuntur, si accedam, & ipsius verba ex aureo ejusdem libro, qui non omnium manu versatur, huc adferam (z). *Ad clare, inquit, & distincte intelligendam anticipationem motus in auriculis, & perseverantiam ejusdem cum motu ventriculorum, illud præmonendum, quod tam contractio, quam dilatatio auricularum & ventriculorum dividenda sit in tria tempora, in principium scilicet, medium & finem: ita tamen, ut ejusmodi tria tempora non sint puncta indivisibilia, sed habeant singula æquales latitudines, quæ alterno cordis motu metiantur. Ponamus igitur tum diastolen, tum systolen cordis duodecim temporis gradibus absolvi, horum quatuor primos tribus latitudini ipsius principii; secundum trientem vero medio: postremum finii: ita enim perspicue intelligi poterit, quomodo auriculæ sua contractione paululum anteverrant contractionem ventriculorum ac deinceps cum iisdem per spatium duorum temporum simul in systole permaneant.* Paulo post ita pergit: *universum siquidem, & contractionis, & remissionis negotium ea lege transigitur, ut principium systoles auricularum synchronum sit cum fine diastoles ventriculorum: medium vero systoles earundem auricularum sit synchronum cum principio systoles ventriculorum; denique ut finis systoles auricularum metiatur medium contractionis ventriculorum cordis: & vice versa comperiet, finem contractionis ventriculorum concurrere cum principio diastoles auricularum: principium autem diastoles ventriculorum cum medio diastoles auricularum: medium diastoles ventriculorum cum fine diastoles auricularum; tandemque finem diastoles ventriculorum eodem recidere scilicet cum principio, ut dixi systoles auricularum.* Jam promptum erit dijudicare ex LANCISIANA motus cordis dimensione, quanto temporis spatio auricularum imminutio præeat ventriculorum tensioni, ac prius remittat.

§. LXVIII.

LANCISIUS, hanc auricularum fyftolen, ventriculis fere coævam, in vivorum equorum corporibus dissectis ostendisse non contentus, ad prima cordis in ovo incubato stamina recedit, asserens, auricularum motus primis quidem incubatus diebus alternantes cum ventriculorum conspici; corde vero conifiguram induente, non amplius alterne cum ventriculis moveri: sed parumper horum fyftolen præcedere (a). Ex præclaris igitur illis experimentis, quæ LANCISIUS tum in ovis incubatis, tum præcipue in equis vivis aliisque animalibus, quæ vastioris corporis fuere, cepit (§. 65.), abunde jam apparere atque extare arbitrer, ventriculos cordis cum ejus auriculis minime ita alternis constringi rursusque

retendi, quemadmodum omnibus hucusque persuasum fuit; sed eo pacto moveri, ut auriculæ tantum quodammodo citius ventriculis coarctari & vicissim ampliari incipiant. Cognitis itaque iis, quo ordine pactoque thalami atque auriculæ cordis in motum concitentur, ad ea progrediar, quæ jam ulterius expendere operæ pretium erit.

§. LXIX.

Altera, quæ itidem omnium animis altius insidet, de cordis motu opinio est ea, quod putetur, ejus apicem (§. 25.) in unaquaque fyftole, ad ejusdem basin (§. cit.) propius adduci, corde vero in diastolen revertente, a basi iterum recedere: unde musculosam ejus compagem singula quæque cordis contractione semper longitudine imminui; in quavis vero ejus dilatatione nunquam non reddi longiorem. Verum enim vero WINSLOVIUS ex recentioribus primus contrarium docuit ostendendo, ejus mucronem, ventriculis in contractionem coactis, a basi longius discedere & ita costis applicari: contra vero, iisdem reclusis & relaxatis, basi cordis iterum appropinquare: rationem inde esse petendam, dicit, quare cordis pulsus eodem temporis articulo in pectore sentiatur, quo arteriarum alibi in corpore accipitur. Comuni huic omnium sententiæ viam aperuisse videtur perversus iste fibrarum cordis situs, quem Anatomici animo sibi finxerunt, existimantes, eas in uno cordis latere a basi ejus, in modum cochleæ, ad conum deductas ibidemque in se mutuo contortas ac reflexas, in opposito latere eadem specie, helicem oppositum referente, iterum sursum ferri inque basi hujus lateris terminari: uti illud videre est in eis figuris, quas LOWERUS typis expressas dedit (b), ubi perinde delineatæ conspiciuntur, ac si sua in cordis cono contorsione numeri octonarum speciem exhiberent, quam tamen his fibris esse WINSLOVIUS omnino pernegavit asserendo, hunc fibrarum tractum esse mere commentitium cordisque contextui affictum (c). Promptum itaque erit judicare, quid sit, Anatomici periti in eam fuerint opinionem adducti, ut statuerint, cor in fyftole perpetuo decurtari; in diastole vero longius semper promitti. Memoria itaque repetituro, quæ de seriebus fibrarum, cordis ventriculos amplectentium, verbosius exposui (§. 47.), perfacile erit intellectu, quemadmodum cordis fyftolen pariant, eoque ipso illud longius reddant. Quippe cum ex commemoratis (§. 47.) dilucide appareat, tres potissimum esse fibrarum ordines, ex quibus ille, qui transverso ductu cordi circumvolvitur, omnium crassissimus est ac densissime confertus, reliquis binis seriebus longe tenuioribus, utpote ex paucioribus multo fibris conflatis, WINSLOVIO id scitius ostendente (d): deinde si cogitatur, fibras has latitudinem cordis ambientes, ac ventriculos ejus singulos, præsertim posteriorem, seorsum circumplectentes, ejus basi ac mediæ parti densissimo agmine circumdari; deorsum vero conum ejus pergentes numero gradatim imminui & decrescere, ac proinde sensim quoque breviores reddi (e), unde quoque cordis parietes perquam tenues circa ejus apicem evadere: judicatu proclive est, consideratis simul iis, quæ de villorum cujusvis musculi actione (§. 57.) memini, qui cordis perficiatur contractio. Etenim fibris ejus in motum una actis, & uniformi modo contractis, ventriculorum parietes ab omni parte aqualiter constringuntur propiusque

(z) Loc. cit. Prop. LX. p. 89.

(a) L. cit. Sect. II. cap. I. Prop. XXV. p. 43. & Sect. IV. cap. I. Prop. LX. p. 88.

(b) Tract. cit. cap. I. p. 17. & seqq. Tab. 2. Fig. 3. 4. 6. 7. 8.

(c) Libr. cit. Tom. IV. de Thorac. No. 48. & 85.

(d) Libr. cit. Tom. IV. No. 55. & 85.

(e) Ibidem No. 50.

ad cordis septum adducuntur usque eo, donec superficie interiore illud contingant, unde cordis capacitates (§. 26. 32.) coarctando imminuuntur, quæ diminutio Medicis cordis systole vocatur. Paucis igitur adhuc perpendamus, quam vero ob rem fibrosa cordis compago, in systolen redacta, suo apice ita protendatur, ut costis impingat. Ex dictis (§. 57.) clare liquet, cunctas motrices fibras, si in actione sunt, in semet ipsas contrahi inque exiles colligi ac crispari rugas, unde breviores redduntur: cum igitur fibra quæcunque longitudine sua semper decrescat in actionem traducta; ei tantum latitudine accedat, quantum longitudine ipsi decessit, necesse est; quod vel inde perspicuum est, quia omnis musculi agentis venter durefcit, tumet ac protuberat (*f*): ergo singula quæque fibra evadet crassior. Quod cum in omnibus fibris, quæ cordi sunt, eodem modo eveniat, necesse est, ut alia alii proximè a latere adjectæ eo ipso momento, quo agunt, quodammodo cedat sicque plus spatii se expandendi faciat. Omnes ergo musculares fibræ, sic tumidiore redditæ, cum majus spatium occupare conitantur, se invicem urgebunt eo, ubi minima vel nulla sibi objicitur resistentia; cum vero in exteriori cordis ambitu & apice nihil sit, quod ipsis impedimento foret, quin eo cederent, distincte perspicies, quid causæ sit, quare cordis exterior facies, singulis ejus contractionibus, intumescat; apex vero in longitudinem exporrigatur.

§. LXX.

Cessante illa villorum muscularium corrugatione, quod fit, sanguine ex cordis sinibus expulso, parietes ejus in pristinum locum sua ipsius vi elastica, influente liquido adjuta, recedunt sicque ventriculos, antea opertos, rursus aperiunt, quæ ventriculorum patefactio diastole salutatur, quæ nihil est aliud nisi fibrarum a sua tensione relaxatio seu remissio, ob vim motricem, quæ per nervos (§. 50.) & arterias coronarias (§. 43.) adfertur, attritam ac deficientem. Non ita pridem est cum in quandam, a Viro quodam Doctissimo exaratam inciderem epistolam, qua Auctor de industria demonstrandum ac laudabili certe conamine ab omni dubitatione suscepit vindicandum, cordis conum unaquaque ejus systole a basi remotum costis illidi: in diastole vero ad basin reduci. Ut vero hujus phænomeni rationem redderet, non veritus est musculosis cordis staminibus duplex munus deferre, quod diverso tempore exsequantur: fibras quippe, inquit, transversales, in motum concitatas, solummodo cordis antra coarctare, fibris obliquis, (quæ ipsi longitudinales vocantur) interea temporis plane relaxatis ac quiescentibus: his vero in motum coniectis atque agentibus, vim transversalium villorum, qui ventriculos cordis tenent oclusos, adjuvante sanguinis irruentis mole, vinciri ac subigi, proindeque ejus thalamos recludi atque aperiri. Vir itaque Doctissimus cum animadverterit, plurimis in corpore musculis antagonistas esse adjunctos, quorum renixu agentes musculi potissimum retenduntur; musculos vero concavos, velut cor, ventriculus, intestina, ejusmodi musculis antagonistis esse destitutos: nullus dubitavit antagonistarum munus longitudinalibus fibris in hujusmodi concavis musculis imponere. Verum enim vero ex perpluribus, quæ ingeniose huic excogitatæ reclamare videntur sententiæ, pauca tantum delibare placet. Primum repugnat huic dog-

Frid. Hoffmanni Oper. Supplem. II.

mati analogia in animantium corporibus: attenta enim observatione exploratum est, universas motrices fibras, in unum vel cujuscunque musculi ventrem collectas iisdemque tendinibus infixas, in unam eandemque virtutem semper una conspirare (*g*): non enim ullus omni in corpore fingi potest musculus, licet pluribus iisque diversis fibrarum seriebus, miris modis se decussantibus constet, in quo quædam fibrarum series in actionem transirent, reliquis ejusdem musculi villis eodem temporis puncto plane feriantibus atque otiosis. Argumento nobis esse possunt musculus masseter, fibris se mutuo interfecantibus compactus; musculus surarum solæus, qui saltem binis fibrarum stratis, vario tractu decurrentibus, constat; musculi bicipites brachii & femoris &c. quarum fibræ omnes, licet varios ordines exhibeant, una in actionem contendunt. Quod si igitur ne ullius quidem musculi exemplo demonstrari potest, quasdam fibrarum ejus corrugari duntaxat, ceteris laxatis atque quiescentibus: hoc multo minus nec ullo stabili argumento de musculoso cordis contextu probari poterit, analogia omnium musculorum repugnante. Deinde compertum est, anteriorem cordis faciem, si in systolen abripitur, semper pallefcere; eo autem in diastolen revertente, rubore suffundi: jam vero cum fibræ obliquæ exteriores omnem cordis ambitum amiciant, quæ tamen, Doctissimo Viro ita sentiente, remissæ ac flaccidæ sunt villis ejus transversis agentibus ac systolen cordis duntaxat efficientibus; prono ergo alveo inde flueret, quod cordis superficies singula quaque illius systole gratissime ruberet: quia hoc temporis momento obliquæ fibræ sunt laxæ ac viatæ; ex adverso autem, quod unaquaque diastole pallefcere; quoniam tum temporis obliquæ hæ fibræ, cordis superficiei obductæ, tenduntur, experientia tamen contrarium cuivis ostendente (*h*). Tum nec ulla urgente necessitate fibris longitudinalibus, vel rectius obliquis, hæc cura fibrarum transversales debellandi ac vincendi, quæ in antagonistas convenit, demandatur: videmus quippe in morte extinctis, cordis ventriculos nunquam non latissime patentes ac diductos suæque tensioni nativæ redditos, quantumvis nihil cruoris in illis offendatur: cum vero longitudinales fibræ non, nisi vi sanguinis in cordis specus illabentis adjunctæ, Doctissimo Viro perhibente, transversa ejus stamina edomare valeant: quo pacto fieri, jure quæro, possit, ut hic vim transversalium contractilem, longe superiorem, in ejusmodi expiratis infringant ac doment? Doctissimus Dn. Candid. WÜRTZBACHIUS, quem in oculis semper fero, mihi retulit, minus quinquennio esse, cum subdititiæ comæ concinnatorem dissecuisset, cui in inguine iliaca vasa gladio fuissent ita hausta, ut sanguinem cum vita effudisset omnem, cuius in corde nihil cruoris, nec grumum quidem reperire sibi licuisset, ventriculis tamen ejus satis hiantibus. Hic ergo necessario ventriculis fuisset perseverandum in contractione, profuso ac deficiente cruore, longitudinalibus fibris auxilio veniente, ac transversales subigere adjuvante. Accedit, quod LANCISIUS non minus doctè, quam præclare demonstraverit, musculos cavos, quamvis carerent antagonistas seu renitentibus musculis, suo tamen contrariante atque antagonistarum vice fungente non esse destitutos (*i*): hæc vero, quæ antagonistarum munus hic obeunt, sunt partim ipsa contenta atque in motum acta corpora, tam liquida, quam mollia vel duriuscula; partim ipsæ illæ partes solidæ, quæ ea-

P 3

demp

(*f*) BOERHAAVE Libr. cit. No. 401. 7. WINSLOVIUS Tom. II. No. 46. 48.

(*g*) BOERHAAVE Libr. cit. No. 413.

(*h*) BOERHAAVE Libr. cit. No. 401. 7.

(*i*) Libr. cit. L. I. Postulat. VI. p. 5.

dein propulsa excipiunt. Sic videmus in intestino-
rum volumine solas fæces, vel iis deficientibus fla-
tus; in ventriculo alimenta, esculenta & potulenta;
in vasis & eorde cruorem; in vesica lotium &c. an-
tagonistarum vice perfungi; si enim hæ partes hu-
julinodi contranitentibus vacuæ sunt, sua sponte col-
labescunt: iisdem vero vel aliis corporibus earum
cavitatibus inditis, vel in demortuis, illico pro co-
pia ingesti, distensæ ac turgidæ cernuntur. Post de-
monstrandum quoque prius fuisset in vasis sanguineis
fibras esse, in longum exporrectas, quam ipsis sin-
gulare munus injungeretur; eas quippe peripicacissi-
mus MORGAGNUS jam diu a suo munere amovit,
ut quæ animo duntaxat in iis fictæ, non ulli vero
perspectæ unquam fuerunt. (§. 52.): quam raræ au-
tem in musculo ventriculi tunica ejusmodi fibræ
longitudinales existant, neminem fugiet, qui eum
curatius unquam pervestigaverit. Postremo non ul-
la sufficiente ratione affingitur staminibus in conca-
vis musculis longitudinalibus officium, a transversa-
lium munere longe disjunctum, cum eorum relaxa-
tio ac distensio commode nec ullo negotio ex iis,
sive liquidis, sive firmis, quæ ipsorum cavitates sub-
eunt, intelligi atque explicari possit. Plura quidem
alia eodem pondere argumenta, quæ huic hypothe-
si, a fecundissimo hujus Doctissimi Viri ingenio
perbelle enatæ adversantur, huc adferri possent, nisi
temporis penuria & instituti ratio id prohiberent. In
spe tamen non dubia sum, fore ut Doctissimus Vir,
quem semper admiratus sum, haud indigne ferat
nec vitio mihi, ingenii mei vires oblata hac occa-
sione periclitaturo, vertat, quod qualiacunque mea
dubiola proferre non fuerim veritus: proposui quip-
pe hæc non ejus refellendi animo, sed duntaxat
ostendendi, quot quantisque difficultatibus ipsius pla-
cita obstructa sint.

§. LXXI.

Operæ pretium esse excedere paululum mihi vi-
sum est ad enarrandum, quam longissime omnes vel
doctissimus quisque MEDENTIUM, a vero abfuerint,
ventriculorum cordis atque auricularum motus si ex-
plicuerint: communis quippe omnium sententia fuit,
ea alternis motibus ita cieri, ut prius utræque auri-
culæ se simul contraherent, eo autem ipso temporis
momento dehiscerent una ambo cordis thalami, qui
dein sanguine impleti in contractionem contende-
rent; auriculæ vero interea temporis ambæ simul re-
laxatæ aperirentur, quæ motus auricularum & an-
trorum vicissitudo eo usque perseveraret, donec ani-
mal vitam duceret. Jam vero illis, a LANCISIO in
vivi equis aliisque grandioribus animalibus captis ex-
perimentis, satis manifestum ac perspicuum erit, quo
pacto & ordine auricularum cordis & ventriculorum
motus succedant. Restat igitur, ut de vasis sangui-
feris nonnulla adjungam.

§. LXXII.

Corporis canales esse duplices, scilicet advehen-
tes & revehentes ex relatis (§. 51.) abunde constat,
eos in ramos innumerabiles pedetentim abire tene-
riores ac subtilissimos, itidem ex iis, quæ supra re-
censui (§. 53. 56.), liquet; utrosque vero mutua
anastomosi connecti, ita ut humores constanti lege
ex arteriis minimis in venulas itidem ultimas trans-
migrant, dispersæ pariter dictum est. Superest igitur,
ut tantum de vasorum actione heic agam, quæ
in eorum alternante dilatatione ac constrictione con-

sistit. Est vero vetus disceptatio usque a temporibus
fere antiquissimis ducta (k), atque etiamnum
inter Medicos, vel recentissimos, agitata & in utram-
que partem disputata: num arteriæ sua ipsius vi con-
tractili, influente nervorum liquido in ipsarum an-
nulares fibras (§. 52.) fuscitata, sanguinem in mo-
tum profluum urgerent, an vero potius earum con-
tractio soli tunicarum elasticitati accepta esset feren-
da? Sunt, qui jam pridem permultis iisque gravis-
simis argumentis evicerunt, arterias omnes potentia
semet ipsas contrahendi esse instructas, quæ a liqui-
do nervorum subtilissimo, ipsarum fibris musculari-
bus infuso, in motum fuscitaretur; hinc in sangui-
nem undique agerent æquali pressione, quem ita in
motum cogerent (l): his vero alii item magni no-
minis Viri obloquuntur, rationes, quæ non adeo
dissimiles vero videntur, in contrariam partem adfe-
rentes, asserendo: arterias esse corpora mollia, tamen
tensa, indeque flexibilia, quæ nulla propria se con-
trahendi potentia fruerentur; sed sola suarum fibra-
rum elasticitate, si a sanguine in ipsarum alveos im-
pulsio prius forent diductæ, resilirent inque pristi-
num statum se restituerent, ac proinde eo ipso in
cruorem reniterent, qui ita in motum concitaretur
(m). Præcipua argumenta, quibus propriam arte-
riis contractionem recusant, eo redeunt, quod va-
sa carerent fibris muscularibus, ut quæ nullius ocu-
lis, vel lynceis, unquam patuissent: deinde quam-
vis etiam canalibus sanguineis ejusmodi musculo-
sa concederentur stamina, non tamen ullus foret alius eo-
rum usus, quam quod cruori, a corde cum impetu
in arterias intruso harumque parietes illiso, resiste-
rent atque obstaculo essent, quo minus earum latera
nimium a se mutuo dimoverentur: tum, quod sola
cordis machina sanguini non in arterias solum con-
spectiores, sed in minima quæque etiam ipsarum vas-
cula propellendo sufficeret: ad extremum quod cui-
cunque, arteriarum pulsus digitis exploranti, facile
innotesceret, eas non constringi, sed facta dilatatione,
quæ in tangentes digitos incurreret, in priorem dun-
taxat resilire locum, quem ante tenuissent. Hæc
sunt præcipua momenta, quibus arteriis illam sese
contrahendi virtutem detrachere ac pessundare anni-
tuntur, relinquendo ipsis solam resiliendi facultatem,
a vi earum elastica solum pendentem.

§. LXXIII.

Verum enim vero non satis mirari nec ulla asse-
qui possum cogitatione, quid sit, cur musculares va-
sorum villos, ita tamen perspicuos, ut Tiresia cœ-
rior esset, qui eos non videret, in dubium incer-
tumque vocaverint (§. 52.) At enim, fac in vasis
stamina, in orbem contorta, adesse, numne idcirco
statim censendum, eas esse carneas, quin potius ten-
dineas? Fateor hanc objectionem satis esse specio-
sam nec adeo levis momenti: at vero annulares hos-
ce villos, qui recentes albicant, si exsiccatos inspi-
ciamus, observare licet eos subrubicundo colore in-
fectos; manifesto indicio, eosdem antea subcruento
liquido fuisse perfusos, quod, particulis limpidis in
auram dissipatis atque exhalatis, hujusmodi concre-
tum rubellum in iis reliquit; HEISTERO idem testan-
te (n). Quæ vero tandem est illa eximia, quæ
carneis filis cum tendineis intercedere fertur, diffe-
rentia in partibus exsanguibus, ex meris pelliculis
conflatis? ego certe video nullam: quod si enim
forma muscularis fibræ cujusvis colore illo rubicundo
niteretur, (qui tamen est accidens) ex necessaria
colligen-

(k) GALENUS Libr. XVIII. de Placitis Hipp. & Plat. cap. 7.
(l) FRIDR. HOFFMANNUS L. c. T. I. S. I. cap. VI. §. XI. XVI.
& Tom. III. Sect. I. cap. XII. §. 3. BOERHAAVE Lib. cit.
No. 213, seqq. No. 1092, seqq.

(m) SCHELHAMMERUS Epist. de Pulsu Prop. III. & IV. p. 12.
seqq.

(n) Libr. cit. Not. 63. p. 120. seqq.

colligendum nobis esset consequentia, complura animalia, quæ tamen purpureum in suis vasis alunt liquidum, carere fibris muscularibus, atque adeo musculis ipsis in iis partibus, ubi muscularem motum manifestoprehendimus. At ne longius hoc in argumento provehar, quam temporis & loci præsentis ratio postulat, ad ea revertar, unde deflexi. Alterum, quod proferunt argumentum, nimirum, licet arteriis musculares fibræ concederentur, non tamen ullus alius foret earum usus, quam quod sanguinis flumen ita moderarentur, ne nimis impetuose in vasorum latera irrueret eademque distraheret; supra (§. 52.) satis superque convulsum esse mihi videtur, unde non est, quod ei evertendo diutius inhæream, quamvis complura alia ibidem dictis facile adstrui possent, quæ hoc assertum infirmant. Quod vero attinet ad illud cordis robur, quod universæ sanguinis moli per vasa circumvolvendæ, & ad extremas eorum propagines promovendæ solummodo suppetere dicitur; non quidem nego illud utique perquam ingens & validum esse; an vero solum valeat humores per arterias protrudere atque adeo ad capillaria vascula promovere non facile quis, ut mihi persuadeo, crederet, mente duntaxat complexurus quot quantaque cruori, a corde in vasa expulso, objiciantur impedimenta, quæ cordis viribus solis omnia essent superanda. Quod si enim contemplamur conicam arteriarum cavitatem, quæ ad minima fere pergit vascula: in sanguine vero huic alveo recta infuso nobis concipimus tot lineas rectas, quot puncta in arteriarum parietibus fingi possunt; nullo sane negotio nobis innotescet, sanguinis per arterias motum prius extinctum ac suffocatum iri, quam ad ramos earum pervenerit. Ex Hydraulicis enim constat, liquidum quodcunque, per canalem quendam perfluens de suo motu semper tantum perdere; quantum tubi illius, quem ingressum est, latera resistunt, vel quod perinde est, fluidorum motum & adfluxum se habere, ut vasorum resistantias (o). Præter illam vasorum figuram innumeræ aliæ, quæ non minoris momenti sunt, vincendæ veniunt cordi resistantiæ: velut illæ innumerales curvaturæ atque inflexiones arteriarum, ubique fere obviæ: in quovis quippe flexionis puncto, angulus incidentiæ semper immutatur novusque oritur renixus. Accedit his ipsa cruoris vis ac moles, ipsis arteriis inhærens, quippe quæ, vigente vita, semper purpureo liquido plenæ ac turgidæ sunt (p), quæ propterea sanguini in aortam pulso valde resistit retundendo eundem eo, unde projectus est: cui insuper adjungenda sunt ipsa vasorum elasticitas: incredibilis ramorum numerus, capacitate semper magis ac magis decrecentium, tamque variis angulis a suis truncis discedentium: quinimo illa admodum quam varia eorum directio, quæ in singula quaque corporis parte conspicitur (§. 53.): nimius in vasis capillaribus cor versus renixus, ob nimiam eorum angustiam (q): ipsa quoque corpora, vasis extrinsecus circumferta vel adjacentia, quæ itidem suo pondere, duritie, pressione & motu, quovis fere temporis momento mutato, vasa aggravant ac comprimunt. Qui igitur hæc aggregatas in canalibus resistantias, quæ cordis potentiæ motrici forent subigendæ, perpendet consideratius, facile perspiciet, tantum abesse, ut solæ cordis vires sanguini ex conspectioribus vasorum ramis ad minima seu capillaria vascula evolvendo suppetant, ut

ne ad ramos quidem satis magnos & spectabiles eundem propellere valeant. Denique ipsis adversariis tacite confitendum est, in omnibus canalibus contractionis ac dilatationis motum vigere: adfirmant, ipsi enim, cunctos ductus secretorios atque excretorios vi quadam semet contrahendi esse instructos: quid vero nobis est exploratius, quam quod omnes ductus, qui aliquid a sanguine secernunt & egerunt, nihil aliud sint, nisi surculi ab ipsis arteriarum ramis promissi inque certas corporis cavitates, vel in ejus exteriorem habitum porrecti, qui sensim sensimque in tantillæ capacitatis alveos coguntur, ut sanguinis moleculas, rubore indutas, ab ingressu in suas cavernulas plane prohibeant, admittendo tantum, quæ iis moleculis multo subtiliores atque alius generis sunt (r). Non ulla igitur hic apparet ratio, cur ductibus secretoriis & excretoriis ejusmodi motum attribuant; arteriis vero, quarum tamen soboles sunt, plane denegent. Ne autem sermo meus de his immensis evadat, quod certe verendum, cuncta, quibus omni luce clarius demonstrari potest, arteriis inesse vim se constringendi propriam, exprimere conaturus; brevi igitur tantum ostendam, de quibus magis inter Anatomicos ambigitur, an videlicet venæ sanguineæ motu fruantur suo nec ne?

§. LXXIV.

Quisque facile augurabitur, adversarios, cum arteriis propriam se coarctandi vim ad motum abnuerere non erubuerint, eundem tanto minus esse concessuros venis, quo tenuioribus ac rarioribus villis constructæ sunt muscularibus (§. 55.). Verum enim vero mihi est persuasissimum, longe aliud eos iudicium de illis fuisse laturos, si ipsismet earum motus æque fuisset perspectus ac STENONI & LANCISIO. Quorum ille ingenue fatetur, evidentissime se in vivis dissectis cuniculis venæ cavæ superioris motum vidisse, qui, corde licet cum appensis auriculis quiescente, micuisset & ad solius digiti pressionem perseverasset (s): hic vero refert, se eundem venarum cavarum motum in equis spirantibus dissectis nudis oculis accepisse: cum enim vena cava in hujus generis animantibus alba foret atque adeo solida, ut nihil omnino ab aorta in canibus abluderet, multo clarius atque evidentius eum hic, quam in aliis brutis, conspici posse (t). Ea vero, STENONI in corvis observata, omnium maxime digna sunt, quæ huc adferantur: quia nobis maximo esse possunt argumento, venam cavam non moveri solum sua ipsius systaltica vi ab angusto in latum, seu a ramis suis minoribus majores atque adeo maximos versus; sed illum quoque a fibris harum venarum transversis seu annularibus, activa sua se constringentibus potentia, effici. In corvo aquatico, ait, in quo cum circa secundam ab apertione horam inciperet languescere cordis motus, manifeste in illo distinguere poterant, ut auricularum ita & venæ cavæ micationes: omnes tres motus etiam tempore a se invicem distincti. Corde vero tandem quiescente pars auriculæ proxima venæ cavæ diu supervixit, donec & auricula omnino immota, sola pulsaret vena cava infra cor duos a se invicem distinctos plane exhibens motus, quorum alter in parte remotiore exterius conspiciebatur, alter interiori latere in parte cordis proxima: sed quod maxime mirabar, nec in alio inde subjecto licuit observare, id erat, quod, resecto cordis ventriculo dextro omnique exhausto sanguine,

(o) WOLFFIUS Element. Mechan. §. 21. conf. HERMANNI Phoronom. S. IV. p. 277. seq.
(p) BELLINUS Libr. cit. p. 58. 59. seqq. BOERHAAVE Libr. cit. No. 213. MORGAGNUS Advers. An. II. Anim. XLII. p. 83.
(q) BELLINUS Loc. cit. BOERHAAVE Loc. cit.

(r) RUYSCHIUS Advers. An. D. I. III. Thes. An. II. Aff. III. No. 14. Thes. An. VI. No. XXXIII. HEISTERUS Libr. cit. §. 33. 198. 201. 208. &c. FRID. HOFFMANNUS L. c. S. II. cap. I.
(s) Actis Hassnienf. Tom. II. Obs. 46. No. 7. seqq.
(t) Libr. cit.

guine, permanferit, nihilominus in ipsis venæ tunicis, jam penitus in se collapsis, motus, quo fibrarum transversarum una post alteram aliquantulum elevabatur, filum super venam transversim ductum referens, idque cor versus pergendo, qui motus secunda pomeridiana nedum cessaverat, cum tamen ante meridiem hora nona sectionem incepissem. LANCISIUS, qui in vivis equis, gallinis, caponibus &c. experimenta cepit, idem testatum facit. Etenim in equorum vena cava hunc motum evidenter perspexit, quem elanguescentem vel plane moriturum calidis digitis, huic venæ admotis, vel oris halitu revocavit. Nonnunquam quoque vena cava, acu compuncta, intermissum motum reiteravit, & peristalticas versus cor constrictiones (ut intestina solerent) quater aut quinquies repetiit, auricula interim unicam contractionem duntaxat explente. Quid? quod aperte fatetur se in aliis canaliculis post tres horas, cum jam auricula ipsa desisset, spectasse hunc motum: vena autem cava ligata & sanguine ex ea educto illum cessasse: laxatis vero vinculis & sanguine rursus admissio, ramis venæ cavæ statim motum hunc rediisse tam superne, quam inferne. Eundem quoque venarum motum in ramis venæ cavæ in gallinis animadvertit. Sic quoque venam pulmonalem peristaltico motu agitatam vidit. Accedit his locuples testis WALÆUS, qui itidem venam cavam, motibus concussam, in vivis canibus observavit; cum vero de proprio hujus venæ motu dubitaret eum potius auriculæ attextæ attribuens, cor cum auricula a vena cava prorsus refecuit, quibus remotis, dicta vena nihilo secius suos ictus repetiit & singulis vicibus cruoris quid effudit: quinimo adfirmat prælaudatus Auctor, se hunc motum, licet circa cor foret evidentissimus, in toto venæ cavæ tractu ab usque hepate & jugulo ad cor oculis comperisse suis (u). Cum hisce Viris concinit LOWEUS, qui in vena cava sanguinis undulationem, auricula cordis jam emortua, suis ipsius oculis spectavit, quam a nullo sanguinis intestino motu, sed vasorum corrugatione suscitatum esse atque effectui datam, rectissime judicavit (x). Quæ omnia cum tam sint clara, tam perspicua, ut in oculos incurrant, non satis demirari possum, hodierna luce adhuc esse, qui in ipso sole caligant nec illam vasorum contractionem ac dilatationem in dubium vocare atque adeo pernegare erubescunt, quam tamen ipsa autopsia ostendit. At vero cum emendatio illorum desperanda sit, quorum aures veritati clausæ sunt, mihi quoque non est causa, cur vasorum motui, qui a potentia villorum muscularium motrice, quibus vasa abundant (§. 52.), pendet, pluribus argumentis comprobando diutius immorer, præcipue cum ipsa rerum testimonia tanta ubertate adsint, quæ abundanter evincunt, arterias æque ac venas sua solius vi ac potentia se coarctare. Illud verò notabile esse mihi videtur, motum hunc in arteriis multo promptiorem ac validiorem esse, quam in venis, ut quæ mollius ac longe segnius micant: hoc quoque in causa est, cur harum motio digitis ipsas tangentibus non prodatur, cum e contrario arteriarum agitatio vegetior digitis facile accipiat.

§. LXXV.

Vasa igitur hæc (§. 72. 73.) sua dia stole ac systole fruuntur, quæ ea semper lege alternant, ut prægressæ dilatationi seu dia stole vasorum systole seu contractio succedat. Illa contingit, sanguine ex cordis

antris pleno flumine in arterias irruente, unde earum latera a se invicem distracta extrorsum emoventur: hæc vero vasis arcessitur, villi eorum musculares (§. 52.) si rosido nervorum liquido perfunduntur, unde se accurtant, in lineas rectas disponunt & versus axin suæ cavitatis contendunt sicque vasorum capacitatem imminuunt. Quoniam vero arteriæ in viventibus sanguinis semper plenæ, quin refertæ (§. 73.), liquido apparebit, earum parietes, a dilatatione propius ad se mutuo accedentes, undique in sanguinem, qui ipsorum alveis coercetur, esse renixuros, quem proinde Hydraulica necessitate in motum agunt profluum. Clare hinc intelligetur, vasa in dia stolen abire, corde in systolen concitato; contra vero systole corripit, corde in dia stolen revertente. Arteriarum igitur dia stole cordis systolæ est synchrona; earum vero systole consona est cordis dilatationi sive dia stolæ.

§. LXXVI.

Quamquam vero stabilitum fuerit ac fixum arteriarum cavitates semper augeri atque ampliari, corde in sui contractionem veniente: imminui vero & coangustari, eodem desidente & a sua actione cessante (§. 75.): hoc tamen sibi proprium ac peculiare vindicant arteriæ cordis coronariæ, quod exiliores ipsarum propagines, quæ villosæ cordis texturæ maxima multitudine intexuntur (y), in systolen abripiantur, reliquis omnibus arteriis in dia stolen compulsis; contra vero in dia stolen rursus traduci, ceteris arteriis se contrahentibus (z). Utrum vero eadem de coronariarum truncis, quæ de minoribus earum furculis nunc asseveravi, certe statui possint, mox liquebit. Illud Batavorum decus & ornamentum BOERHAAVIUS indiscriminatim asserit coronarias in systole esse, reliquis omnibus in dia stole versantibus, & contra (a): cui quoque THEBESIIUS (b), FANTONUS (c) & NICOLAI (d) assentiuntur. Nec ipse MORGAGNUS ab hisce Viris dissensisse videtur, quamvis varia de inconstanti ac vaga coronariarum in aortam immissione (§. 43.) proferat, quæ huic sententiæ aliquando obstarent; tamen non expromit nobis, quid ipse de alternante coronariarum cum universis aliis in corpore arteriis motu sentiat, sed hæc aliis relinquit dijudicanda. LANCISIUS vero ea est in sententia sanguinem coronariarum ostiolis, quocunque etiam loco in aortam paterent, pone an vero supra valvulas (§. 43.), tam in systole, quam cordis dia stole illabi posse; id tamen discriminis intercedere; quod 1) sanguineus latex, ipsa cordis substantia in systolen abrepta, in truncos earum ac conspectiores ramos, qui in ejus basi proserpunt atque inde per cordis peripheriam disseminantur, duntaxat influeret; 2) quod major sanguinis vis ac moles in coronariarum truncos urgeretur, si supra valvularum limbos (§. cit.) delinquerent, quam si pone valvulas patefcerent. Quæ sententia quemadmodum omnium veri videtur simillima; ita etiam mihi maxime probatur. Quamvis enim sanguis, magno gurgite ex contracto corde in aortam erumpens, valvulas semilunares (§. cit.), elevare & veli expansi instar orificiis coronariarum obducere videatur: quæ sic impediunt, quo minus ea intrare possit: sciendum tamen est, quod ex observatione LANCISII oscula harum arteriarum post valvularum limbos plerumque sint conspicua, ideoque sanguini semper aditus in ea pateat: quod si vero a valvulis contegantur, perpendendum tamen

(u) Epist. de Motu chyli & sanguin. ad THOM. BARTHOLINUM data.

(x) Libr. cit. Cap. II. p. 49.

(y) RUYSCHIIUS Thef. VI. Tab. III. Fig. 1. & 2.

(z) LANCISIUS Libr. cit. Sect. III. cap. I. Prop. XLI. p. 63. seqq.

(a) Libr. cit. No. 183. p. 82.

(b) Dissert. cit. p. 19. & 20.

(c) Diss. Anatom. 12.

(d) Diss. cit. §. VI. p. 23.

tamen est, arterias cruore semper plenas esse (e) ideoque eo ipso, dum valvulae hae a se invicem dimoventur, sanguine cor egrediente, id cruoris, quod jam intra assurgentes valvulas haecque ostiola in aorta fluctuat, in earum truncos intrudi, licet non tanta copia, quanta contingeret, ostiolis illis supra valvulas positus. Ex dictis igitur clare comparabit, truncos coronariarum, cum iis ramis, qui exteriori ejus superficiei circumferuntur, cum omnibus reliquis in corpore arteriis eodem tempore in diastole & subsequente systole esse: eorum vero propagines, quae incredibili abundantia per cordis compagem disperguntur, in systole esse constitutas, cæteris arteriis diastole detentis: & contra in diastole versari, cunctis aliis systole correptis. Fieri enim non potest, ut sanguis eo temporis articulo ex ramis coronariarum ingrediatur illos arteriosos furculos, quae fibris cordis muscularibus affluenter internascuntur, eo in systolen abrepto: quia hoc momento vascula iis interfecta comprimuntur, ita ut sanguini introitus plane intercludatur: qui vero per exteriorem cordis ambitum decurrunt rami, quoniam omni pressione sunt perpetuo immunes ac liberi, cordis parenchyma sive systole adficiatur, sive diastole, semper sanguineo lactici patent. Longior profecto forem in differendo, quam animum induxi, cuncta, quae de vasis coronariis dici adhuc possunt, in medium prolaturus: sed temporis & loci angustia me admonent, ne de eo dicere prætermittam, quod mihi maxime propositum, ingredior itaque ad ipsum sanguinis circulum exponendum.

CAPUT V.

De circulatione sanguinis.

§. LXXVII.

JAm in eo est, ut divinum illum liquidorum per corpus circuitum, cujus tanta est ad vitam & sanitatem corpori conciliandam utilitas, tanta necessitas, ut, eo, in libero suo progressu utcunque interturbato, actionum corporis integritas jacturam faciat, vel penitus sublato, vitae usura amittatur, expendamus. Inventi hujus, quo nihil in re Medica unquam fuit præclarius atque excellentius, gloria magna HARVÆO omni jure asseritur, quippe qui omnium primus admirandum hunc sanguinis in orbem motum, ex inscitiae tenebris in lucem protraxit, ac per pluribus experimentis stabilitum ante omnium oculos posuit. Sunt, quibus ea est sententia, eundem sanguinis circulum antiquioribus atque adeo Medicorum vetustissimis fuisse cognitum ac perspectum, licet non ea perspicuitate, qua hodie cognitus est, quemadmodum van der LINDEN & TH. ab ALMELOWEEN id evincere annisi sunt: enim vero si conjecturae locus detur, non adeo a vero alienum, sed potius ei simillimum videtur, illum veteribus non adeo incognitum fuisse, quam vulgo putatur: quippe non obscura ejus vestigia in eorum monimentis, quae posteritati reliquerunt, disperse inveniuntur, unde id conjicere licet; hinc quoque est, quare genuinus ille atque integerrimus HIPPOCRATIS adfectator, Illustris FRID. HOFFMANNUS pereruditus

suis scriptis hanc cognitionem summo Medicorum Antistiti ac Principi HIPPOCRATI vindicavit (f): quid? quod CORNELIUS CELSUS aureolo suo libello, digno, qui die nocteque omnium, qui AEscULAPII sectatores videri cupiunt, manibus versetur, idem haud obscure significavit, de ERASISTRATO referens, illi inflammationem excitari visam esse, si sanguis in eas venas, quae spiritui accommodatae essent, transfunderetur (g). Equidem non negari potest, fuisse plures Medicorum ante Harvæi memoriam, qui sanguinis circuitionem, licet non omnibus numeris absolutam, literis commendarunt, velut MICH. SERVETUS (h), REALD. COLUMBUS (i), PAULUS SERVITA (k) & CÆSALPINUS (l); nemo tamen fuit, qui hunc sanguinis in orbem motum, clariorem, magisque perspicuum reddidit & per pluribus experimentis atque argumentis, omni luce clarioribus, ab interitu vindicavit, quam illud illustrissimum Britannorum ornamentum HARVÆUS, cujus propterea nominis memoriam nulla unquam delebit oblivio. Quanquam vero hic tam manifesto & evidenter hunc orbicum sanguinis motum demonstravit, non tamen defuere, qui eo audaciae, ne dicam amentiae, processerunt, ut ne erubuerint, veritati omnium oculis testatori reclamare eundemque in dubium vocare, quorum in censu PRIMEROSIUS, PLEMPPIUS atque adeo RIOLANUS cum pluribus aliis fuerunt: at cum nostra memoria nemo MEDENTIUM tantæ sit pervicaciae, ut sanguinis per vasa circumactum negaret, inanem certe suscipere laborem atque illic post HOMERUM canere mihi viderer, hunc profluum liquidorum per corporis canales motum multis ratiociniis atque experimentis hic comprobare conaturo, præcipue cum Viri, jure magni nominis, eundem jam dudum tam egregiis documentis, experientiae & sanæ rationis fulcris innixis, demonstratum dederunt (m). Missis igitur omnibus iis, quibus perennis hic liquidorum in gyrum progressus alioquin probari affolet, ad ipsum humorum circuitum exponendum ingrediar.

§. LXXVIII.

Quemadmodum circuli nomine Matheſeos peritis venire solet ille motus, quem linea ex uno puncto ducta inque idem relata, servata æquali semper a centro distantia, sua circumductione describit: ita quoque sanguinis per corporis vasa progressus ac regressus, ob aliqualem, quæ huic cum Mathematicorum circulo intercedit, similitudinem, circuli nomine fuit insignitus. Sanguineus quippe latex ex corde, tanquam fonte excurrens in vasorum alveos diffunditur, unde in ramos magis ac magis gracilescentes derivatus tandemque ultimis arteriarum rivulis allapsus quaecunque corporis puncta rigat, a quibus in ultimas venulas, arteriis consociatas, refluus ramis sensim capacitate auctis refunditur, qui illum in venas revehunt cavas, unde in cor refluat: quia igitur universa sanguinis moles ex corde per arterias omnibus corporis partibus distribuitur: ab iisdem vero per venas in idem revehitur, unde est, cur sanguis suo accessu ad partes & recessu in cor circum conficere dicitur. Lubens igitur largior, ejus circuitionem per vasa nequaquam cum Mathematicorum circulo exacte convenire, nec aliud quicquam illi cum hoc esse commune, præterquam illud, quod ex uno loco, videlicet corde progrediatur ad corporis partes

(e) Advers. An. II. An. XCIII. p. 83. & Adv. An. V. An. XXV. p. 37.

(f) Libr. cit. cap. IV. Prolegom. §. XII. p. 19. Libr. I. Sect. I. cap. VI. §. II. p. 39.

(g) Libr. de re Medic. Libr. I. p. m. 4.

(h) MOSHEMIUS Histor. MICH. SERVETI p. 231. 234.

(i) De re Anatom. Libr. VII. edit. 1559.

(k) THOM. BARTHOLINUS Epist. Med. Cent. I. Ep. XXVI.

(l) Quæst. Peripat. Libr. V. qu. IV. & Libr. II. qu. XVII.

(m) FRID. HOFFMANNUS Libr. cit. L. I. S. I. cap. IV. §. III. BOERHAAVE Libr. cit. No. 136. seqq. RICH. LOWERUS Tract. cit. cap. III.

partes inque eundem revertatur: cum vero hæc denominatio civitatis jure in re Medica fuerit donata a primis hujus circuli inventoribus, quos penes jus erat ac potestas illum ita denominandi: morosi sane atque obstinati esset ingenii, non ulla urgente necessitate nec ullo alio convenientiori nomine, ab hac appellatione, omnibus jam recepta & usitata, recedere.

§. LXXIX.

Festive non minus, quam vere HIPPOCRATES enuntiavit: descripto circulo nec principium, nec finem inveniri (n). Ego hujus effati memor mihi persuadeo, parum vel nihil interfuturum esse, num sanguinis per vasa circumvectionem a dextro, an vero corde sinistro exponere incipiam, præsertim cum Viri summæ eruditionis in eo mihi præluxere (o); quamvis naturæ rei explicandæ convenientius videatur, a sinistro cordis thalamo si sermonis telam exordiar, quippe a quo sanguis in arterias effluit. Prius vero sanguinis circuli partitionem, Medicis solitam, præmittere lubet, quam ad ipsum excutendum devenio.

§. LXXX.

Ut vero hominis status geminus existit, alter, quo uteri materni claustris cinctus tenetur, nec aëris usura fruitur: alter vero, quo in lucem editus, aëre corpus suum ambiente utitur: ita quoque sanguinis per vasa circumductio eodem in homine duplicata est; aliter quippe sanguis in homine nato & respirante per corpus circumagitur: aliter vero in foetu nondum enixo nec auræ usu gaudente, quippe in quo nihil cruoris, ex dextro cordis thalamo, per pulmones collapsos ad lævum ventriculum transvehitur; cum contra in homine, hanc lucem adspiciente, universa sanguinis vis ac moles per pulmonum viscus transfigatur.

§. LXXXI.

Circularis vero sanguinis motus in homine, in vitam ingresso ac spiritum pulmonibus hauriente, dispesci commode potest in circulum sanguinis majorem, minorem & minimum. Ille est, quo purpureum liquidum, e ventriculo cordis posteriori egressum, per arterias ad quaslibet corporis partes, superiores æque atque inferiores defertur, a quibus per venarum ramos redux factus, in ventriculum ejus anteriorem revehitur: iste vero, qui multo brevius iter conficit, est, quo sanguis ex anteriori cordis specu per arteriam pulmonariam spirandi organo infunditur, unde per venas ejusdem nominis ad posteriorem cordis ventriculum reportatur: hic tandem, quem nuncupare minimum mihi liceat, est, qui per solam cordis substantiam suam absolvit circuitum. Ternis hisce vitalis liquidi circulis facile plures aliæ sanguinis circuitiones, quæ sibi pariter quicquam proprium ac singulare in quibusdam corporis partibus vindicant, adjungi possent, velut peculiaris ejus per corpora penis cavernosa progressus: item singularis ille & admirandus ejus per vasa cerebri motus; arteriæ enim carotides interiores, per peculiarem osseum canalem admirando sane flexu & mechanico apparatu calvariam ingressæ, moxque iterum intortæ & a lateribus ephippii antrorsum exporrectæ, & ibidem denuo incurvatae recta sursum ad basin cerebri ascendunt, ubi in plures sese spargunt ramos, quorum posteriores arteriæ cervicali (p), a binis vertebralibus, simili artificio prius inflexis, quam foramen occipitis magnum subeunt, progenitæ, mutua anastomosi connectuntur; arteriosi

hi carotidum rami tam anteriores quam mediæ & posteriores, sanguinem cerebro per tam stupendæ multitudinis valcula suffundunt, ut fidem superet omnem; unde per venas in peculiare sinus, a lamellis duræ matris constitutos, reducitur. Posset huc quoque adferri singularis ille sanguinis per venam portæ motus aliique, nisi sermo meus longius justo proveheretur, hos peculiare in aliquibus corporis partibus circulos suis ponderibus ac momentis expensurus.

§. LXXXII.

Prius vero fida mente suadeo, quam sanguinis circuitum aggredior, ut ea in memoriam revocentur, quæ de curatori temporis distinctione, quo ventriculi cordis & auriculæ moventur, supra (§.67.) ex LANCISIO fusiùs relata leguntur: iis enim recte cognitis ac perspectis, nihil quoque negotii erit perspicere, quo pacto & tempore illæ valvulæ, quæ vasorum ostiis præfiguntur (§.40.41.), suum munus exsequantur, & qua ratione cruor ex auriculis in ventriculos cordis extrudatur: iisdem vero neglectis & fusque deque habitis, difficile erit intellectu, qui fieri possit, ut sanguis ex auriculis in ventriculos cordis expellatur? cum tamen nihil sit facilius, quam ad hæc respondere, si consideratius perpendetur, ventriculos in medio contractionis tum demum versari, auriculis sine systoles occupatis (§.67.), ideoque satis spatii illis esse cōrem ab auriculis huc detrusum recipere, inque officium arteriæ pulmonalis protrudere. Verum ne his diutius inhæream, sed ad ipsum sanguinis circulum deveniam, illud adhuc præmonendum duxi, me hoc loco duntaxat de sanguinis circuitu in homine nato atque halitum ducente esse acturum; nequaquam vero de ejus in foetu circulo.

§. LXXXIII.

Vitale igitur liquidum per venas cavas (§.34.) aggestum, in saccum ipsarum venosum & auriculam attextam, nunc relaxata, ingreditur. Quæ ergo utraque; vi ac corrugatione circumscitarum fibrarum (§.63.), eo temporis momento, quo dexter cordis thalamus in fine diastoles versatur (§.67.), sese contrahere incipiunt sicque partem sui contenti sanguinis in laxatum cor dextrum, nullis tricuspидibus hoc tempore obnitentibus valvulis (§.40.), urgent. Auricula vero eadem se coarctare perseverante & ad suæ systoles medium contendente (§.67.) plus inde sanguinis in eundem dextrum ventriculum, eo ipso temporis puncto, sese contrahere nunc demum incipientem, detruditur; qui ergo ab impulso sanguine dissentus ad fortiorem renixum in illum exercendum, ideoque etiam ad validiorem incitatur coarctationem: parietes ergo ejus æquabili undique gradu propius ad se mutuo accedunt, funiculi tendinei, quibus tricuspides valvulæ (§.40.41.) columnis carneis (§.48.) connexi, eo ipso laxari ac retendi, sanguis vero jam impulsus premi incipiunt. Eodem hoc tempore, quo ventriculus dexter ad medium suæ systoles venit, auricula finem suæ ipsius contractionis conficit sicque reliquum cruoris, quem adhuc complectebatur, in ventriculum, media in systole nunc occupatum, expellit, qui ita sanguine impletus validius in eundem agit, inque finem suæ constrictionis tendit: sanguis ergo usquequaque a ventriculi lateribus pressus assurgit, atque exitum in auriculam, eo ipso in diastolen revertentem (§.67.) molitur: dum autem in laxatas valvulas, venoso auriculæ orificio affixas (§.40.41.) incurrit, eas extollit atque expla-

natas

(n) De locis in homin. No. 1.

(o) FRID. HOFFMANNUS Libr. cit. S. I. cap. VI. §. VIII.

BOERHAAVE Libr. cit. No. 147. & seqq.

(p) VIEUSSENIUS Neurograph. L. 1. cap. 7. Tab. IV. b. b.

natas inter se ita exacte conjungit, ut viam sanguini, in auriculam regressuro, intercludant; qui proinde, ob interceptum hunc exitum, in arteriam pulmonariam (§. 35.) sibi eo ipso, quo cor dextrum ad finem suæ contractionis pervenit, viam aperit, quippe in qua minor ipsi objicitur resistentia; valvulis enim iis semilunaribus, quæ in hujus arteriæ introitu defiguntur (§. 42.), a suo mutuo contactu dimotis ac diductis, ipsum hujus arteriæ alveum intrat.

§. LXXXIV.

Latex sanguineus a corde dextro in arteriam pneumaticam ita exturbatus (§. 83.), in ejus latera violento impetu irruit, quæ propterea a se violenter distrahit hocque pacto arteriam dispanit (§. 75.): eodem hoc tempore, quo parietes arteriæ ab intruso sanguine violentia quadam diducuntur, villis ejus muscularibus, nimiam distractionem nunc sufferentibus, nova vis ac potentia motrix arcessitur, qua per nervos ipsis adlata & tradita, in contractionem abeunt, sicque arteriæ dilatatæ latera rursus ad se mutuo reducunt, quæ eo ipso momento in cruorem distendentem validius reagunt eundemque in motum profluum cient. Sanguis itaque ab arteriæ lateribus, tanquam prælo, pressus partim propellitur in hujus arteriæ ramos ad pulmonem pergentes, partim eo retunditur, unde effluit; dum vero in dextrum cordis ventriculum, nunc jam se aperientem (§. 67.), recedere nititur, abducit valvulas, quæ in hujus arteriæ introitu positæ sunt, sigmoides ab ejus lateribus, easdemque explicatas in mutuum ita cogit contactum, ut ostium arteriæ accurate claudant, sicque relapsuro latici exitum in cor præstuant. Dum vero interea temporis novus cruor eidem arteriæ a dextro cordis ventriculo, similiter atque dictum est, ingeritur, cui semper alius atque alius succedit cruor, qui eodem modo in arteriæ latera irrumpit, ab iisdem vero resilientibus itidem partim propellitur, partim retrorsum agitur: facile apparebit, qua ratione sanguis ex trunco arteriæ pulmonalis in ejus ramos, per pulmonum viscus disseminatos, sensim provolvatur, ex quibus in propagines arteriosas, paulatim diametro sua decrecentes, tandemque in ultimos furculos, retis in modum in semet ipsos complicatos, progreditur. Commodus sane hic foret differendi atque ostendendi locus, quid mutationis sanguini, per tam stupendæ exiguitatis vascula, qualia sunt, quæ vesiculis pneumonicis abundantissime internascuntur, permanenti accidat, pulmonibus in respiratione alternatim inflatis rursusque subsidentibus; num scilicet ejus moleculæ ibi calore incendantur, quemadmodum sententia quorundam fert; an vero potius aliquantulum deferveant ac refrigerescant? item quæ sit causa, cur truncus arteriæ pulmonariæ multo amplior sit ejusdem nominis vena (q), cum tamen omnes reliquæ venæ arteriis semper sint capaciores (§. 56.). Referri quoque posset, quo respirationis tempore coccineus latex ex ultimis arteriarum ramusculis in venulas, mutua anastomosi ipsis nexas, itidem ultimas, transfundatur, utrum sub expiratione, an vero inspiratione fiat? Enim vero extra oleas vagarer, hæc omnia hic loci expensurus, quippe quæ nec hujus loci sunt, nec ad institutum pertinent nostrum; explicatione propterea eorum superfedens ad reliqua progrediar meque ad meum munus pensumque revocabo. Cruor igitur, a trunco arteriæ pulmonalis ad minima ejus vascula pro- vectus, in ramulos venarum pulmonariarum ultimos traducitur, inde ad ramos gradatim incrementes ac grandiores reductus in quatuor venas pulmonales

(§. 36.) remeat, quæ eum sacco harum venarum, auriculæ sinistræ adstructo, & relaxato restituunt. Purpureum ergo liquidum ex sacco venæ pulmonalis & auricula sinistra, in sui contractionem actis, eadem lege, ac de dextra dictum est auricula (§. 83.), exturbatur in ventriculi posterioris cavum, eodem temporis puncto in diastole commorantis (§. 67.), qui tum demum coangustari cœptat, auricula media jam in via suæ contractionis versante (§. cit.), ergo in sanguinem sibi infusum eo ipso agere incipit; cum vero auricula ad finem suæ coarctationis fuerit adacta, quo tempore posterior ventriculus medium suæ contractionis consequitur (§. 67.), chordæ tendineæ, quæ valvulas binas mitrales (§. 41.) lacerulis hujus thalami illigant, remittuntur; sanguis ab omni parte pressus affurgit inque dictas mitrales valvulas impingit, quas elevatas atque explicatas sibi mutuo suis marginibus ita aptat, ut venosum orificium (§. 36.) occludant sicque cruori exitum intercipient: qui ergo in angustias reductus a cordis parietibus, in finem diastoles (§. 67.) tendentibus per ostium aortæ, valvulis iis semilunaribus, quæ ibi collocantur, a se invicem dimotis & arteriæ lateribus applicatis, in hujus alveum sibi viam pandit atque irrumpit.

§. LXXXV.

Minorem igitur sanguinis circuitum, qui e corde dextro per pulmones ad sinistram absolvitur, si requiris, en habe eum hic paucis quidem explicatum, sed ea ratione, quæ a vulgari & adhuc recepta opinione procul abhorret, qua creditum fuit, cordis ventriculos atque auriculas alternatim moveri, atque ita in alternis suis motibus sibi respondere, ut illis sua tensione lassis & feriantibus, hæc in systolen cogerentur: auriculis vero retensis & a sua actione conquiescentibus, ventriculi in systolen transirent. Atqui ego novissima rerum meditaturus cuivis forte viderer, a sententia, tot tantorumque Virorum calculis hucusque comprobata & civitati quasi in re Medica adscripta, desciscens, nisi perspicacissimus LANCISIUS, qui hac in re mihi præluxit, omnium primus docuisset, sanguinis per cor circuitum maxime esse alienum ab eo, quem Auctores suis in monumentis hucusque nobis tradiderunt: hic quippe plura experimenta in animalibus perfectioribus, in primis autem in equis vivis, ejus explorandi causa, instituit, nunquam vero rem aliter se habere observavit, ac recensui (§. 66. 67.). Quid est igitur opus plurimis argumentis, usquequaque conquisitis, hujus asserti veritatem evincere & ab aliorum reclamazione vindicare, ubi rerum testimonia adsunt omni luce clariora atque illustriora. Et quanquam LANCISIO nonnulla fuerunt objecta, quæ ejus observatis adversari videantur, ea tamen omnia perdocte ac solide diluit & convulsit demonstrando, tantum abesse, ut hic a se observatus ordo, quo auriculæ & ventriculi moventur, institutæ a natura œconomiae præcordiorum repugnet, ut faveat potius plurimumque adjuvet (r): amentatas igitur hastas in adversarios torquerem, prolaturus, quæ in egregio ipsius libro fusius relata leguntur, quo B. L. remittam.

§. LXXXVI.

Cognito igitur minori sanguinis circulo (§. 83. 84.) in eo est, ut, qua fieri potest brevitate declaremus, quo pacto major ejus per vasa circuitus (§. 81.) conficiatur. Sanguis itaque quam primum a corde sinistro vi ejus systolica in tubum aortæ perquam elasticum, subconicum & sanguine semper plenum fuerit impulsus, statim ejus parietes a se mutuo diducit

(q) HEISTERUS Libr. cit. Not. 41. p. 90.

(r) Libr. cit. S. IV. cap. I. Prop. LXI. p. 89. seq.

diducit hocque pacto arteriarum diastolen efficit. Cum enim omnes arteriæ in vivo animali cruore semper sint repletæ & confertæ, atque suo insuper progressu constanter decrescant eo magis, quo longius a suis truncis abeunt (§. 53.): quisque haud difficile cognoscet, illum sanguinem, qui arteriæ alveo continetur, ei, qui ex sinistro corpus specu in aortam propellitur, obstaculo atque impedimento esse futurum, quo minus in magnam arteriam libere queat intrare. Quia vero systaltica cordis potentia longe superior est ac validior renisu sanguinis, arteriam replentis, hinc illud quoque liquidum, quod sinistro cordis sinui inhæret, facile in aortæ cavum extrudetur; omnia quæ sibi in aortæ introitu obiciuntur obstacula vincendo: hoc itaque in arteriæ cavitatem intrusum in sanguinem sibi proxime obvium ut incurset necesse est, quem igitur propellere & ad ejus ramos protrudere conabitur: cum autem resistentiæ, quæ in ipsis arteriarum ramis omnibus sanguini, a corde sinistro expulso, opponuntur, multo majores ac potentiores sunt vi cordis systaltica (§. 73.), ergo illam duntaxat cruoris partem, quæ in aortæ segmento, cordi proximo, reconditur, potissimum urgebit: qui ita pressus in aortæ parietes necessario ruet eoque diducendo atque extrorsum movendo; quod in cunctis reliquis arteriarum ramis a sanguine in earum latera nitente, eo ipso tempore similiter contingit. Dum vero arteriarum latera a sanguine in ipsa nitente violenter distrahuntur, nervorum liquidum per nerveas propagines eo ipso muscularibus fibris subvenit, quas in contractionem adigit. Unde arteriarum latera ad se mutuo propius adducta in sanguinem validius renituntur, qui sic undique ab arteriarum parietibus, tanquam torculari subactus & pressus, in motum concitatur profluum. Jam vero cum, arteriis se contrahentibus, orificiis ipsarum, quæ in cordis ventriculos patent (§. 42.), valvulæ semilunares subtenstæ sint, quæ regressuro sanguini viam ad ventriculos præcludunt; ipsi nulla alia patet via, quam in arteriarum ramos, quò etiam ab arteriis coarctatis urgetur expugnando omnia impedimenta, quæ sibi suo in progressu moras neant.

§. LXXXVII.

Liquido nunc apparebit, qui fiat, ut sanguis in motum cogatur circularem: cum enim latera arteriarum omnium eodem tempore in cruorem renitantur, fieri non aliter potest, quam ut sanguis, usquequaque pressus, in arteriarum ramos vel ultimos promoveatur: hi quippe cum eodem temporis momento suum sanguinem in venulas, sibi immediate insitas & connexas; transfundant, quo arteriæ in systolen abeunt; illi cruori, qui a tergo ex ramis majoribus propellitur, intrandi locum concedunt. Id quod cum eodem modo in omnibus vel maximis ramis atque adeo ipsis arteriarum truncis contingat, in proclivi est intelligere, quomodo sanguis in motum agi queat.

§. LXXXVIII.

Nunc quoque advertemus, quemadmodum sanguis priora sua repetat contubernia per venas, tanquam canales arteriis continuos (s). Sanguis proinde ex arteriis ultimis in extremos venarum furculos translatus (§. 87.), in ramos sensim capaciores evolvitur usque eo, donec omnis ab omni corporis puncto in utrasque venas cavas reverterit, unde in saccum venosum & dextram auriculam, si contractione sua otiantur, refluit (§. 83.). Quanquam vero venæ perinde, atque arteriæ, sua ipsius potentia

se contrahendi sunt instructæ, qua in sanguinem præterlabentem reagunt (§. 74.): non tamen negari potest, eam multo imbecilliorum esse ac segniorum quam vim arteriarum systalticam; unde etiam cruorem in iis languidius tardiusque cor versus moveri. Hujus debilioris in systemate venoso motus nulla subest alia causa, quam quod musculosa venarum tunica villis longe rarioribus & paucioribus, qui tamen in coangustandis canalibus utramque paginam faciunt, sit contexta (§. 55.): dein quod venæ multo sint ampliores & spatiosiores arteriis (§. 56.): accedit his, quod cruor ex angusto in latius & majus semper confluat spatium; tandemque quod sanguis in homine erecto ad perpendicularum in cava inferiore ascendat, in quem tota cruoris in cava superiori columna renititur.

§. LXXXIX.

Ut tamen sanguinis reversio ad cordis ventriculos, obstantibus licet tot tantisque impedimentis, allevetur faciliorque reddatur, sapientissimus humanæ machinæ conditor eam pluribus voluit adminiculis adjutam; e quorum censu, præter illam muscularem tunicam, qua omnes venæ investuntur (§. 55.), potissimum sunt innumera valvularum multitudo, quæ ibi in venarum cavis obviæ sunt, ubi earum divergia ac divisiones in ramos conspiciuntur. His insuper addenda sunt, quod plerisque semper venis arteriarum rami a latere adfati sint, qui singulis suis ictibus venoso liquido aliqualem motum conciliant: quod plurima lymphatica vasa limpidissimum suum laticem immediate venis infundant, unde venosus cruor diluitur & ad motum aptior redditur: quod venæ in artubus inferioribus æque ac superioribus tot musculis stipatæ sunt; qui in vigilantibus omni fere momento, ad mentis voluntatem varie tensi ac moti, venas sibi intertextas comprimunt sicque liquidi in iis regressum accelerant; in abdomine vero idem hoc venis præstant intestinorum convolutiones & musculi ejus cavo circumfati, quippe quæ itidem motum suum cum vasis sibi contiguis communicant: quod venæ nunquam non multitudine arterias superent, quæ igitur sua pluralitate velociorem sanguinis per arterias decursum compensant: notatu enim dignum est, singulas arterias in crure collocatas & usque a pede ad poplitem fibulam inter ac tibiam excurrentes, constante lege & observatione binas saltim, quin ternas pluresve venas sibi adsciscere focias; quod itidem observare licet in ulna, ubi unaquæque arteria, a manu ad cubiti flexuram exporrecta, binis vel etiam ternis semper venis interjecta deprehenditur, quæ segniori sanguinis hisce in partibus recessui auxilio sunt (t). Neque impulsus ille, quem cruor venosus a sanguine, ex arteriis ultimis in venulas sibi consociatas propulso, recipit, contemnendus est, ut qui similiter ad faciliorem ejus per venas regressum suum confert symbolum, licet comparate exiguum. Adsunt igitur permulta adjumenta, quæ tardiorum cruoris per venas remeatum levant ac promovent. Jam igitur quoque, quem majorem salutant sanguinis circulum (§. 81.), habebis cognitum, qui eo ita est vocatus, quod suo itinere per vasa, ex uno cordis ventriculo ad alterum, longius spatium emetitur, quam minor ejus circulus (§. cit.), quippe qui ex multo breviori via ad sinistram cordis antrum revertitur.

§. XC.

Quanquam de cruoris per vasa circumactu brevius mihi

(s) FRID. HOFFMANNUS Libr. cit. L. I. S. I. cap. VI. §. XII.
JO. SAM. BERGER. Diss. de Transít. sanguin. per vasa minima.

(t) FRID. HOFFMANNUS L. c. L. I. S. I. cap. VI. §. XV.

mibi est dicendum, quam tanta res dici possit: quædam tamen iis, quæ hæcenus de sanguinis circumvectione relata sunt, subtexere non inutile neque injucundum fore arbitror, ut ex illis appareat, quæ celeritate cruor per minores & minimos arteriarum canales perferatur: illud enim in comperto est, liquida tanto perniciousius per tubos decurrere suos, quanto viciniore cordi existunt; eo cunctantius vero segniusque per canales circumduci, quo longius a suis truncis recedunt & capacitate imminuuntur. Triplici vero duntaxat modo possunt liquida arteriarum ramos, ab uno eodemque trunco productos, percurrere: vel enim eadem velocitate per ramos ferri possunt, quæ ipsum eorum truncum pervadunt: vel velocius & concitatus ramos, quam eorum truncum, pervolant; vel denique tardius illos, quam hunc perluere possunt. Nec fieri potest, ut, præter hosce tres enumeratos modos, adhuc alii unquam animo effingantur. Quippe Hydraulicis legibus exploratissimum est, posita summa orificiorum, per quæ egreditur liquor, æquali illi orificio, per quod ingreditur, velocitatem liquidi exeuntis per dicta orificia æqualem esse celeritati liquoris, per orificium superius influentis: si autem summa illa minor sit, velocitatem quoque liquidi in ramis majorem esse quam in trunco: si vero major, celeritatem liquoris in ramis quoque minorem existere, quam in trunco eorum, & quidem in ea ratione majorem vel minorem, quæ est reciproce summa orificiorum (*u*). Jam vero cum experimentis sæpius ab JACOB. KEILIO iteratis (*x*), abunde constet, summam orificiorum seu sectionum transversarum ramorum omnium, qui ab uno eodemque trunco prodeunt, semper esse majorem (si in unam colligantur), sectione transversa trunci eorum: nihil quoque dubii est, quin liquores in ramis arteriosis fere semper placidius tardiusque profluant, quippe quorum orificia, in unam summam collecta, semper fere ostio trunci, unde emergunt, capacitate seu diametro præstant, licet constans illa ratio truncorum ad ramos non semper deprehendatur (*y*). Quod si insuper consideremus ipsas resistentias, in minimis arteriis sanguini obvias & superandas, deinde earum divisiones in tot minimos furculos, multiplices curvaturas & serpentinos situs vel obliquitates (§. 53.) efficientes: merito colligitur, sanguinis pernecitatem in exilissimis arteriis, ab aortæ trunco divertentibus ad corporis partes, longe inferiorem esse celeritate ejusdem in aortæ trunco. In eadem quoque sententia sunt JOH. KEILIUS (*z*), JACOB. KEILIUS (*a*), BOERHAAVE (*b*), LAUR. BELLINUS (*c*), MICHELOTTI (*d*), pluresque alii (*e*).

§. XCI.

Neque illud tacitus ullo modo præterire possum, quod sanguineus latex, qui per ramos aortæ ascendentes (§. 37.) caput petat, multo solidior, subtilior ac proinde agilior sit, quam qui per aortam descendentem ad infernas deferatur partes: ex Hydraulicis quippe cognitum est, partes solidiores motum suum impressum, maxime per lineam rectam continuare: crassiores vero, ramosiores minusque mobiles partes ad inferiora descendere (*f*). Si igitur vitale liquidum ex sinu cordis sinistro in aortæ principium fuerit eliminatum, unde in ramos dictos ascen-

Frid. Hoffmanni Oper. Supplem. II.

cendentes & aortam descendentem protruditur, quisque facile perspiciet, moleculas ejus solidiores, in arterias carotides, recta sursum tendentes ac proinde motui earum recto velificantes, multo facilius esse ingressuras, quam in aortam, insigni arcu deorsum flexam: namque in arteriis carotidibus directo tractu ascendentibus, nihil his moleculis obstat, quod ipsarum rectilineo motui remoram faceret; cum ex adverso aortæ inflexio easdem in recto suo limite retardet earumque directionem refringat. Unde quoque est, cur BOERHAAVIUS diserte perhibet, sanguinem tenuissimum purissimum & mobilissimum cerebro suffundi (*g*). Observatu quoque dignum est, tantam esse delibatissimi sanguinis copiam, quæ capiti impenditur, ut tertiam fere omnis cruoris, qui per corpus circumvolvitur, partem compleat (*h*). Verum enim vero non dissertatio, sed ingens forte volumen mihi esset condendum, omnia, quæ huc adferri possent, expromere conaturo; id quod cum a meo instituto plane alienum sit, insuper etiam hæc diatribe præter opinionem, tanta rerum dicendarum ubertate, usque adeo increbuerit, ut libro magis, quam dissertationi, accederet: pauca duntaxat de peculiari sanguinis per cordis parenchyma progressu hoc loco subnectere placet.

§. XCII.

Arteriarum truncos, quæ cordis substantiæ sanguinem impertiunt, tam in cordis, quam reliquarum corporis arteriarum systole, liquido purpureo impleri atque inundari posse, supra (§. 76.) probe stabilitum fixumque est: earum vero propagines subtiliores, quæ fibris cordis muscularibus ingenti copia internascuntur, longe aliter se habere, nec omni tempore vitali latice effarciri, indidem quoque nullo negotio intelligetur (§. cit.). Etenim musculosa cordis fabrica si in contractionem abit, singuli ejus villi motores in semet ipsos contrahuntur, inque rugas exiles complicantur (§. 57.) atque ita quodammodo intumescunt: qui ergo arteriosos furculos, sibi abundantissime interjectos, eo ipso valde comprimunt atque operiunt, unde sanguini in majoribus ramis, superficiæ cordis exteriori instratis, commoranti introitum præcludunt; cui idcirco, corde in contractione versante, tamdiu in illis ramis expectandum, dum cor ad diastolen redit, & arteriosi furculi recluduntur. Quam primum itaque cor relaxatum ejusque vascula aperta fuerint, purpureum liquidum ea ingreditur; (unde quoque apparet, cur cor in diastole occupatum, rubescat) eodem autem rursus in systolen coacto, vascula fibris interstita similiter, dictum est, comprimuntur, unde sanguini nullus; nec in venulis, muscularibus villis intertextis, commorandi locus conceditur, qui ergo partim per orificia venarum THEBESII (§. 44.) in utroque cordis ventriculos effunditur; partim in conspectiores venæ coronariæ ramos, cordis faciei exteriori inhærentes, propellitur, qui illum in caudicem venæ coronariæ (§. cit.) referunt, unde auriculæ cordis dextræ redditur. Dilucide jam apparebit, omne venosum liquidum minime per truncum venæ coronariæ ad auriculam cordis dextram revehi, sed insignem ejus copiam immediate ventriculorum cavis refundi, quod præcipue contingit, corde ad finem suæ systoles tendente (§. 67.): quod vel inde perspicuum

Q

(*u*) NICOLAI Dissert. cit. §. XIX. p. 85. seq.

(*x*) Traët. Anglic. of the animal. œconomie Tent. II.

(*y*) PETR. ANTON. MICHELOTTI de separat. fluidor. in corpor. animal. Phys. Mathem. Medic. Prænot. II. Schol. Artic. II. & III.

(*z*) Introduct. ad veram Physic.

(*a*) Loc. cit.

(*b*) Libr. cit. No. 222.

(*c*) Libr. cit. p. 273. & seqq.

(*d*) Loc. cit.

(*e*) GUIL. COLE Tr. de Secret. anim. cap. 7. NICOLAI Dissert. cit. l. c.

(*f*) NICOLAI Loc. cit. §. VII.

(*g*) Libr. cit. No. 274. 275. seqq.

(*h*) FRIDR. HOFFMANNUS L. c. L. I. S. III. cap. I. §. VI.

cum est, quia cor incipiente contractione pallet, eadem vero ad summum gradum perducta omnino albescit.

§. XCIII.

Sed ut fermo de admirabili hoc sanguinis circulo meus aliquando habeat extremum, finem hujus dissertationis, quæ, me invito nec opinante, præter modum increbuit, facere lubet. Fateor quidem, plura, ne dicam pene innumerabilia, superesse, quæ hætenus fuscè explicatis adjungi possent: verum mihi haud exiguum tum libellus esset excudendus, omnia confectaturo suisque ponderibus ac momentis expensuro; id quod vero cum non animum unquam induxerim, facile quoque veniam me esse a L. B. im-

petraturum mihi persuadeo. Et si forte cui, quæ de sanguinis orbico motu in medium protuli, nova & ab opinionibus omnium *Medentium* aliena esse videantur, is sciat, perplura eorum, quæ hac in diatribe relata leguntur, Doctissimo LANCISIO accepta esse referenda, quod eo aperte confiteri nullus dubitavero, ne quid de gloria, quæ incomparabili huic Viro debetur, detraxisse ac mihi met asseruisse videar. Quanquam vero lubens concedo, hæcce, quæ exercitii tantum Academici gratia in medium protuli, non ita esse elaborata atque expolita, omnium expectationi ut satisfactura sint: tamen spero fore, ut B. L. ea æqui bonique consulat, ac, pro sua humanitate, optime de iis sentiat, memet vero ipsum habeat commendatissimum.



D I S S E R T A T I O

D E

DIFFERENTIA MEDICI
ET MEDICINÆ PRACTICI.

Primum edita Anno 1716.

§ I.



APIENTER non minus ac perite magnus ille naturæ consultus HIPPOCRATES *Lib. de vet. med. §. 2.* prodidit: *Sunt ex iis, qui medicinæ operantur, alii viles, alii longe præstantes; quod sanc non esset, si neque medicina, neque in ipsa observationes essent, neque quicquam inventorum exstaret; sed omnes æqualiter ejus ignari & inexperti essent, & per fortunam omnes agrotorum res gubernarentur. Nunc vero res non sic se habet, sed, quemadmodum aliarum artium opifices multum inter se differunt, tum manu, tum mente; sic etiam in medicina.* Quibus verbis longe gravissimus auctor noster more suo scitissime inter præstantem medicum & inter eum, qui vulgari & vili modo opus artis exercet, distinguit, utriusque exquisitas notas apponendo, siquidem præstantibus & peritis medicis illud adscribit, quod medicina sit ars, quod in illa observationes dentur, quod nova inveniantur, & obscura detegantur; viles autem, medicinæ ignaros & inexpertos & quorum res medendi per fortunam gubernentur, denominat. Non inepte divinus noster Auctor fortunam certitudini opponit; nam *lib. de loc. in hom.* hanc rem dilucide hunc in modum §. 58. explicat: *constans ac firma est optima medicina & doctrinæ optime in ea compositæ & fortuna non eget, nam fortuna sui juris est & nullius imperi subest, neque ex voto ad ipsam pervenimus: scientia vero imperat & cogit facere, & ipsam feliciter assequi facile est, si quis sciens ea uti velit.* Nam si medicamenta clara sunt & manifesta, non expectant fortunam ad sanandos morbos. Ex hac est ratio, quare idem Auctor *l. c. de vet. med. §. 2.* ita concludat: *quapropter non ego censeo, medicinam inani fundamento indigere velut ea, quæ sunt obscura & dubia;*

ex quibus omnibus intelligitur, vero medico pleraque, si non omnia, in arte nostra esse firma, certa; vili vero & minus præstanti medico omnia dubia, fallacia, inexperta; neque ipsum aliquid invenire vel solidas observationes continuare posse, sed omnes ejus curationes fortuna egere.

§. II.

Enimvero, tametsi res sit clarissima & omnibus manifesta, dari etiam in arte nostra salutari, sicuti in cæteris artibus, præstantia ac utilitate longe inferioribus, artifices multum inter se differentes & scientia & judicii acrimonia superiores: attamen non satis demirandum est, quod mortalium genus nunquam in aliis artis operibus tam levis ingenii, ignorantes, quin imo nefandos homines & ad nocendum faciles ac promptos admittat, quam in medicina, quæ ex concordii sententia reliquas artes longissime exsuperat eo, quod pretiosissimam vitam ac sanitatem respiciat. Etenim in illiberalibus artibus optimos artifices a minus præstantibus homines facile distinguunt, & ne detrimentum adferatur, sibi cavent; in artium vero excellentissima & difficillima minus caute se gerunt, sed cuicumque etiam medicum professo statim credunt ac fidunt & pretiosissimum vitæ ac sanitatis thesaurum ipsis curandum committunt. Et quamvis impuri & pessimi illi hominum nesciant, quid sit medicina, quid faciendum vel omittendum sit, imo audacter multos trucidant: nihilominus illis quibus resistendi hisce malis potestas esset, hanc publicam calamitatem, hanc pestem hominum, hæc scelera libere & impune ferunt, eo maxime, quod, uti HIPPOCRATES *lib. de lege* scribit, nulla poena imperitis in rebus publicis statuta sit, præterquam ignominia. At vero videtur hæc summa miseria & cæcitas generi humano inter alia poenæ loco a justissimo numine reservata.

§. III.

§. III.

Verum enim vero, quum hæc omnia sint verissima, ut nulla egeant dubitatione: hinc quoque minime jam nostri erit instituti hanc rem, quæ omnibus in confesso est, operosius hoc loco exsequi; sed hæc maxime meditationis nostræ summa & tractationis scopus erit, ut non cum miseris agyrtis & empyricis rem habere velimus, sed cum doctis, qui Medici famam & nomen habent, re vero & opere non sunt. Ingens enim discrimen esse statuimus inter excellentem Medicum & inter eum, qui medicinam facit vel exercet, licet non sit prorsus rudis & indoctus. Sicuti enim negari nunquam potest, in reliquis professionibus ac scientiis ingens discrimen animadverti: ita etiam in medicina illud observari non alienum videbitur. Neque enim omnes, qui sacrum Dei verbum coram cœtu hominum profitentur vel expli- cant, & viam ad æternam salutem monstrare possunt, statim præstantium Theologorum numero accensentur; neque omnes, qui causas in foro agunt vel innocentes defendunt, statim Jureconsultorum nomen sibi vindicare possunt; neque qui mathematica agunt, agros vel turres excelsas dimetiuntur, aut ædificia exstruere noverunt, Mathematici statim salutandi sunt: pari modo sese res habet cum medicina, ubi non omnes, qui per vicos & urbes obambulando se fatigant, & morborum curationibus præsent, statim Medici titulum promerentur. Quapropter ab instituti nostri ratione & utilitate scopi non alienum erit hoc loco clarissime evincere, quænam ad veri medici nomen obtinendum requirantur, & quam pauci ex iis, qui pro medicis habentur, hoc nomen tueri & sibi vindicare possint. Testor tamen hic solennissime, me hac tractatione nemini velle esse injurium, nec medicorum ordinem aliorum contemptui vel opprobrio exponere. Neque illud asserere propositi mei est, practicum non simul posse esse bonum medicum; sed hæc est mens, hæc sententia mea, quod ut HIPPOCRATES *in cit. loc.* affirmat, magna sit medicorum differentia, quorum alii præstantes, alii viles sint, quos vulgari practicum nomine insignire allu- bescit.

§. IV.

Ut vero hæc differentia & res ipsa paulo clarior evadat, minus alienum, sed maxime consultum esse judico primo omnium, quid per medicum & quid per medicinæ practicum intelligamus, præmittere. Medicus itaque nobis est, qui recte de morbo, ejus causis, eventu, nec non, quid noxium vel proficuum ad sanandum morbum & ad vitam & sanitatem tuendam sit, judicare potest. Practicus vero est is, qui sine recto judicio, sine solida ratione & experientia firma morborum curationes molitur. Hæc definitiones non nominales, sed reales, perspicue medici officium & naturam medicinæ explicant atque declarant, & a falso conceptu & fallaci empyria medicinam veram distinguunt. Quisque sanior medicus perfacile exinde intelligit, me in medico maxime acre judicium, cujus magna vis planeque divina in rebus cognoscendis & intelligendis est, requirere, ne quis boni rectique specie in ægri perniciem erret atque decipiatur. Multa enim, ut DURETUS *in Libr. Hippocr. de humorib. §. 5. pag. 13.* habet, præclare in medicina fieri & apparere videntur ac falso naturæ accepta feruntur, quæ sunt plane symptomata & calamitosa, nec judicium, quod experientiæ canon ac regula est, nisi a summis ingeniis acerrimo studio doctrinæque optima comparatur. Nam judicii maxima in medicina vis est, sed in quo difficultatis sum-

Erid. Hoffmanni Oper. Supplem. II.

ma residet. Nam quicquid solidi medicus præstare debet vel potest, id certissime omne ad judicium est referendum, ut videlicet bene judicet de ægrotantis natura, de morbi indole, origine ac causis, de symptomatum ratione, de remediorum activitate, & postea ex hisce probe perspectis ac cognitis, quid faciendum vel omittendum, quid salubre vel insalubre sit, recte rursus judicet. Neque enim solum theoria medica, qua corporis, sedis affectæ causarumque morbi & virium remediorum cognitio continetur, medici eximium & plane singulare judicium expostulat. Sed maxime praxis, quæ in remedia inveniendi eaque debito ordine, tempore, dosi, applicandi prudentia versatur, magnum judicium exigit. Quid enim aliud est methodus medendi specialis & individualis, quam, quid hoc vel illo in morbo salubre vel insalubre sit, rectum judicium proferre? Nam si unquam recte natura medicinæ tradita vel explicata fuit, certe a medicorum post HIPPOCRATEM principe, GALENO *libr. de præcognit. medic.* id factum est, dum medicinam salubriam & insalubriam scientiam definit. Quæ definitio, quo antiquior, eo minus nostris temporibus cognita est, & tamen optima. Summa enim universæ medicinæ est scire, quid ad sanitatem custodiendam, quid ad pellendos morbos huic vel illi corpori, hoc vel illo tempore salubre vel insalubre sit, ne medicus noceat, sed profit. Igitur quo quis solidiori judicio medico instructus est, eo ad medendum aptior existit. Quare *Thianus*, historicorum sine exemplo maximus, de HOLLERIO pulcherrime scribit, *quod assidua meditatione acerrimum judicium ad medendum attulerit, ut deploratos morbos & ob festinationem ab aliis, per vicos vaga cursitatione mulos fatigantibus, minus cognitos, summa felicitate curaverit.*

§. V.

Quemadmodum vero nemo solidum de quadam re judicium proferre potest, nisi qui rei naturam probe perspectam & exploratam habet: ita etiam medicus non solide, nec recte de morbi eventu, de medendi methodo, deque remediorum salubritate, sive quid faciendum vel omittendum sit, judicare poterit, nisi ægrotantis naturam plane perspectam cognitamque habeat, nisi morbi causas veras investigaverit, & vires remediorum, eorumque agendi modum perspexerit. Nam, ut pulchre more suo CELSUS scribit, causæ morbi investigatio ejusque primordia & occasio in affectionis & remediorum cognitionem deducunt amplissimam. Quia vero nec ullus medicorum in veram causarum morbi notitiam penetrare poterit, nisi qui corporis nostri exquisitam habeat cognitionem, & quomodo vita in ipso celebretur ac sanitas perficiatur, & quomodo ad eam conservandam cum elementa, tum alimenta, aliaque conferant, ac statum sanum immutent, atque interitum corpori minentur: hinc facile patet; sine accuratiori physicarum rerum per experimenta cognitione; sine chymia, quæ corporum texturam ac vires nobis pandit; sine anatomes, quæ structuram, connexionem, & usum partium explicat; sine mechanices, quæ motuum leges tradit, quibus omnes operationes diriguntur, quæ fiunt a corporibus, exquisitiore cognitione nullum firmum ac certum judicium circa rerum salubritatem & insalubritatem, quibus auxiliari & succurrere languenti corpori debet, in medico posse existere. Ex quo conficitur, medicinam rem non tam facilem esse, & quæ tam paucorum annorum spatio addisci possit, ac vulgo quidem existima-

§. VI.

Longe vero aliter de medicina practici sentiunt, qui nudæ experientiæ inhærendo curationes morborum moliuntur, & quamvis interdum rationes, cur hoc vel illud faciant vel facere debeant, adferant, minus tamen solidæ & veræ sunt, utpote quæ nec probari, nec ex certis & perspicuis principiis clare & scientifice demonstrari possunt. Evenit quidem non raro, ut litterarum non sint expertes, ut physicam etiam scientiam vel rem anatomicam ac pharmaceuticam intelligant, & exactam herbarum quoque cognitionem possideant: nihilominus cum hæc non ad causas morbi, ad vires remediorum applicent vel applicare didicerint, a vero medicinæ scopo aberrant, & soli experientiæ fidendo mire fallunt & falluntur. Etenim eorum res in eo tantum agitur, ut, si prosperum remediorum effectum in certo morbo semel atque iterum notaverint, confestim simili morbo occurrente eadem remedia propinent, sinistro tamen & infelicissimo sæpius eventu. Rectissime enim, imo verissime magnus noster HIPPOCRATES in primo statim aphorismo sect. I. fallacem experientiam pronunciat. Equidem experientia in se & sua natura minime fallax est, quia dexter vel sinister morbi eventus, vel remediorum effectus, quod notatus fuerit, non fallit, attamen in eo, & ob id fallax experientia dicitur, quod medicus nimis præcipitanter & incaute faustum vel infaustum, qui remedii usum consequitur, effectum soli remedio assignet; nam fallacia causæ ut causæ, si ullâ in disciplina, certe in medicina, frequenter committitur, inque eo fundamentum omnis empyricæ curationis requiescit. Siquidem ex hoc consequitur, quod omnis generis homines tam faciles ac prompti sint in morbis ad remedium vel auxilium offerendum & commendandum, prorsus ut præcipitantia in judicando vitium corruptæ nostræ naturæ quasi adnatum videri debeat. Pauci enim sunt, qui de effectum & operatione remediorum recte possunt judicare, quia veris circumstantiis posthabitis, & neglecta morbi causâ ac indole, neque agrotantis natura perspecta, virtutem & certum effectum observatum confestim remedio adsignant, qui longe aliis causis sæpe debetur. Quid enim familiarius est, quam quod si dolor aut febris, aut immoderatum profluvium adsumto remedio minuatur vel sistatur, visam protinus virtutem remediis inesse sibi persuasum habeant? Inde fit, ut tantus numerus antifebrilium, antepilepticorum, anthypochondriacorum, alexipharmacorum, stomachicorum, antiphthisicorum, & id genus plurium conficiatur atque celebretur, quæ tamen alio tempore in similibus morbis adhibita spem mendum atque agrotorum validissimè eludunt. Ignorant enim hi miseri atque infelices homines, quod nunquam vires quædam effectrices absolute corporibus vel remediis inhæreant, sed omnes limitatæ, conditionatæ & relativæ sint. Sicuti enim nullum corpus, ita & remedium nullum suam vim atque efficaciam nisi in alio exserit, quo mutato & ipsa virtus ac proprietas ut mutetur necessarium est, nam vires & virium leges mutuis corporum actionibus & reactionibus & æstimari & detegi debent. Quæ de causâ rectissime a veteribus philosophis pronuntiatum est, corpora non tantum agere secundum sphæram activitatis, sed maxime receptivitatis. Et ad edendum certum effectum non tantum agens, sed & certam dispositionem subjecti ad recipiendam actionem idonei concurrere debere. Quapropter, sicuti nullæ res in se & sua natura salubres vel insalubres dici possunt, ita multo minus & alimenta vel me-

dicamenta semper & omni tempore in hoc vel illo morbo salubrem vel insalubrem effectum pollicentur: Atque adeo accidit, ut optimi succi cibi, qui sanis vigorem dant, ægrotis detrimentum adferant. Aqua frigida, alias innocentissima, corpori per motum fortiolem calefacto ingesta instar veneni jugulat. Cortex famigeratissimus Chinæ in quibusdam funditus intermittentes nullâ subsequente noxa extirpat, in aliis vero contumaciorem recidivam vel febre pejorem morbum adfert. Inter mercurialia mercurius dulcis innocentissimus, luis venereæ virus in quibusdam potentissime enervat, in aliis vero diuturnam & immedicabilem corpori noxam invehit. Venæ sectio in continuis febribus, ipsoque variolarum morbo, summa aliquando est medicina, cum tamen in iisdem morbis necem attulisse non semel visa fuerit. Idem medicamentum purgans, eadem dosi, ejusdem ætatis hominibus oblatum, quam dissidentes operationes efficit? Ex hisce perspicuum evadit, virtutem & operationem non tam ex remedio, quam ex corporum diversa conditione, quæ mirum inter se ratione dispositionis & motus partium solidarum ac fluidarum differunt, æstimandam ac deducendam esse. Quare nihil in praxi frequentius occurrit, quam, quod alteri profuit, nocere; neque id tantum valet de medicamentis, sed & alimentis. Quare non mirum est medendi certis morbis viam ac methodum nunquam eandem & perpetuam esse, sed ratione regionum & climatum, anni temporum vel tempestatum præcedentium ingentem in modum variare, adeo ut, qua methodo ante annum epidemicæ febres curatæ fuerunt, ea sequenti anno mala sit & minus proficua.

§. VII.

Ex hisce omnibus miseria & nuditas experientiæ medicæ clarissime detegitur, quod infida & fallax admodum sit, nisi acre medici judicium accedat, quod ex diligenti & attentata circumstantiarum observatione & pensitatione non sine magno labore remediorum vires tandem cognoscit atque distinguit. Et in eo etiam versatur totius medicinæ nervus ac cardo; nam corporum diversitas valde difficilem artem nostram & necessariam efficit, & quod existat, evincit. Sapienter enim HIPPOCRATES Libr. de prisca medicina ait: *Nemo ad medicinam investigandam animum applicaturus fuisset, si eadem victus ratio & ægris & sanis accommodata esset*, aut si certa remedia morbis curandis idonea sufficerent, sicuti id vulgus medicorum existimat. Nam profecto medicamenta & alimenta ad nocendum & necandum tam prompta ac parata sunt, quam ad sanandum & juvandum. Medicina itaque est ars recte utendi remediis, quia ex *Coi* sententia l. d. arte §. VI. tum demum juvant ea, quando recte usurpata fuerunt; nocent vero, si non recte & debito tempore fuerunt administrata.

§. VIII.

In elucidationem hujus rei apprime mihi semper perplacuit dialogus a sapientissimo Platone notatus, qui hunc in modum se habet: *Socrates*: » Si quis » ad patrem tuum progressus dicat, ego scio talia » corporibus adhibere, ut calefaciam si velim & » frigefaciam, & si videatur mihi, vomere faciam, » & si rursus videatur efficiam, ut deorsum per » alvum fiat ejectio, & alia multa hujusmodi; & » cum hæc sciam, pro medico haberi volo & alium » medicum facere posse me jacto, cui harum rerum » scientiam tradidero; Quid putas his auditis dicturos esse? PHÆDRUS; quid aliud quam interrogatos, an insuper etiam sciat & quibus & quando & in quantum singula hæc facere oportet?

» SOCRATES.

» SOCRATES: Si igitur dicat, quod nequaquam hæc
» sciat, sed oportet eum, qui hæc a me didicit,
» per se ipsum facere ea, quæ tu proponis; quid
» dixerint? PHÆDRUS: dixerint, arbitror, insanit
» homo, & ex libro quodam doctus, aut in me-
» dicamenta collapsus medicum se factum esse putat,
» cum nihil in arte sciat. » Ecce! quanta dexteri-
tate summus hic philosophorum verum medicum a
vulgari viro, praxin medicam exercente, distin-
guat eo, quod non ars sit velut purgare, æstum
febrilem reprimere, dolores sedare, immoderatum
sanguinis profluvium compescere, somnum concilia-
re, sic quidem remediis virtus ea efficiendi inest,
sed id demum artis artificisque opus est scire, quo
ordine, qua dosi, quo tempore singula hæc præ-
beri debeant.

§. IX.

Verum ut ad scopum nostrum paulo propius ac-
cedamus, & ut verum medicum ab inexperto & vi-
li dignoscamus, opera non indignum cenſeo notas
qualdam characteristicas utriusque hoc loco adferre,
quibus vera a falsa & fallaci medicina perquam fa-
cile possit distingui. Primo itaque genuinus artis do-
ctor ex observationibus sive morborum historiis,
cum cura, junctis omnibus circumstantiis consigna-
tis sapere & proficere, nec non artis incrementa pro-
movere contendit. Nam morborum historiæ, quæ
& ægri indolem, & morbi naturam, mores & pro-
gressum, ejusque eventum & mutationes, quæ re-
mediorum usum consecutæ sunt, describunt, omnis
scientiæ sive theoriæ medicæ, nec non prudentiæ
& praxeos medicæ, sunt verum & præcipuum fun-
damentum. Ex ejusmodi enim historiis sedula &
attentata meditatione morbos eorumque originem,
primordia, occasiones & causas addiscimus, eorum
quoque sedem & causarum morbificarum perniti-
alem effectum in excitandis symptomatibus penetra-
mus, & dissidentes a se invicem ægritudines apte
distinguiamus, denique remediorum operationes, tam
salutares, quam noxias, & varios morborum even-
tus perspicimus. Quamobrem scitissime HIPPOCRA-
TES *Lib. de decenti ornatu* §. 8. hunc in modum
scribit: *Firma memoria teneto medicamenta & sim-
plices facultates, & descriptas, si modo tales extent.
Sint & in memoria morborum curationes & earum mo-
di, quotupliciter & quomodo singuli se habeant; hoc
enim principium est in medicina & medium & finis.*
Sicut vero historiæ morborum omnis certitudinis,
veritatis, & demonstrationis medicæ, item pruden-
tis prognoseos, nec non inventionis methodi me-
dendi sunt primum firmamentum, ita, qui destitu-
tus ipsis est, nec harum copiam possidet vel has in-
super habet, is nihil solidi & scire & perficere in
medicina poterit. Quot autem sunt ex practicis,
qui in consilium adhibiti, neque in naturam subje-
cti, neque in morbi mores & causas recte inqui-
runt, neque ex præscriptis quale detrimentum vel
emolumentum consequutum fuerit, probe annotant;
plurimi audito tantum morbo, num febris, num
calculus, vel passio hypochondriaca aut mensium
suppressio adfuerit, mox remedia præscribunt, ea-
que, si non juvant, statim mutant & sub varieta-
te & copia remediorum totum morbi decursum con-
ficiunt. Sed profecto illi homines sub amplissima
etiam praxi per centum annos hac methodo nun-
quam recte sapient, vel medicinam comprehendere
poterunt. Nos profecto publicæ utilitatis causa ve-
hementer sapius dolemus, quod viri longæ & am-
plissimæ praxi vacantes morborum historias negli-
gant, nec observationibus consignandis invigilent,
Frid. Hoffmanni Oper. Supplem. II.

in scriptis vero harum loco vanas & steriles theo-
rias aut confarcinatas aliorum opiniones, vel obser-
vationes mancas ac mutilas recenseant, cum tamen
ars nostra salutaris non majora, quam per observa-
tiones, præsertim proprias, capere possit incremen-
ta, & contra earum defectus omnis miseriæ ac infe-
licis praxeos præcipua ac princeps causa sit. Ex his-
ce jam apparet, quam vere & sapienter HIPPOCRA-
TES in libro *de prisca medicina* supra citato præstanti-
bus medicis id adscribat, quod observationes consi-
gnent, & quare per has artificem præstantem a vili
distinguat.

§. X.

Secundo loco excellens medicus non modo in col-
ligendis accuratis morborum historiis sedulus ac dili-
gens; sed & iis in laborantium utilitatem ac fru-
ctum optime uti scit; quod præstatur, cum quis ve-
ra theoria tam physica quam medica instructus est.
Per theoriam physicam intelligimus scientiam effe-
ctuum, quatenus per vires corporum possibiles sunt;
theoria vero medica nobis est scientia, qua quis vi-
tæ, sanitatis, mortis & morborum generationem ex-
quisite novit, & quomodo mortis & morborum cau-
sæ tollendæ & avertendæ sint, apto ordine ac serie
demonstrare potest. Cum vero motus omnium ope-
rationum, quæ in rerum natura celebrantur, in
corpore nostro æque ac in aliis animatis inanimatis-
que præcipua causa ac fons sit; hinc ex motus na-
tura, proprietatibus ac legibus, id est, secundum
recentiorum loquendi modum, mechanice, omnem
mutationem in corpore nostro explicare debet. Igi-
tur perspicaciores nostro tempore ex sanguinis vitali
circuitu, qui a constrictionis & dilatationis motu nec
non a conveniente fluidorum copia & temperie profi-
ciscitur, item a necessariis excretionibus & secretio-
nibus omnium, quæcunque circa sanitatis & vitæ
negotium contingunt, mutationum causas clare &
dilucide explicant.

§. XI.

At vero, qui vera theoria, ex corporis nostri
mechanismo desumta, instructus est, is quam facile
omnia, quæ in morborum historiis occurrunt, dif-
ficultia explicabit; abstrusas morborum & symptoma-
tum causas enucleabit, & ab remediis adhibitis pro-
manantes vires haud ægre explanare poterit. Cau-
sis vero morborum probe prius perspectis & viribus
medicamentorum per multa experimenta practica ex-
ploratis facillimum erit judicare, cur hæc proficiant
vel noceant, & qua methodo ac ordine cura susci-
pienda sit.

§. XII.

Igitur, quo medicorum theoria magis falsa & er-
ronea est, eo minus idonei sunt ex observationibus,
magna solertia conquisitis, multum utilitatis trahere
vel ad usum ægrotantium referre. Piget vero &
pudet hoc loco omnium & singulorum vanas & ine-
ptas theorias & ad explicandas res in medicina pla-
ne incongruas recensere, ne aliis stomachum, aliis
vero nauseam moveam. Illud saltem quærere allu-
bescit, cui usui atque utilitati in explicandis rerum
medicarum causis principia vel plane inexplicabilia
vel sensibus & rationi occulta, & cum rebus cor-
poreis nullam connexionem habentia inserviant! cu-
jus generis sunt τὸ Θείον, anima ratione prædita,
archæus, principium motus, natura sapiens & er-
rans, spiritus seu principium vitale, æther amicus
& inimicus, ens astrale, flammula, lucula seu
phosphorus vitalis & animalis; quanta nomina au-
ro digniora! quæ nec explicari possunt, & nihil
Q 3 expli-

explicant. Ejus quoque commatis sunt ea principia, ex naturæ quidem sinu penitiori deprompta, partim vero nimis remota, partim etiam minus congrua & insufficientia, ut morborum semina & fermenta, specifici morborum sapes & odores, sanguinis abundantia & cacoehymia, acidum & alkali, acidum & viscidum, materiæ peccantis specifica acrimonia & malignitas, bilis intemperata, quæ omnia & singula ad connexionem veræ theoriæ medicæ & explicationem circumstantiarum, quæ in clinicis historiis occurrunt, item ad causas morborum evolvendas & avertendas, nec non ad remediorum vel methodi inventionem plane nullius usus ac fructus sunt. Et ut, quæ sentio, libere dicam, omnis theoria, quæ non usui applicari potest, & ex qua nihil explicare, detegere & invenire possumus, pro vana, falsa, fictitia habenda, vel non æstimanda est.

§. XIII.

Tum inter notas veri & præstantis medici noster HIPPOCRATES in loc. cit. de prisca medic. hanc non infimi ordinis refert, quod aliquid invenire possit. Restant utique in rerum natura multa abscondita pandenda, effectus detegendi; restat in medicina, ut ars nostra in perfectæ scientiæ formam redigatur. Quin imo medici, quando novus & insolens incidit morbus, quando regionem vel clima mutant, & non ante observatæ ægritudines sub tanta corporum varietate, accidentium multiplicitate occurrunt, non tantum efficaciora atque congrua remedia & eorum compositiones inveniant, sed & faciliorem & opportunam medendi methodum singulis affectibus congruentem excogitent, oportet. Quod præstare illi optime possunt, qui rerum cognitionem sibi vindicant, qui corporum naturalium vires per experimenta physica, mechanica, practica, chymica perspectas habent; qui omnium mutationum, quæ fiunt in corpore nostro, causas exploratas habent, qui principia remediorum agendi sciunt, & qui corporis humani intimiorem anatomicam cognitionem possident. Ab ejusmodi vero utilium & necessariarum rerum inventionem plane illi remoti sunt, qui solidis scientiis velut firmo fulcro sunt destituti, qui tantum aliorum inhærent auctoritatibus, & nihil, nisi quod didicerunt, rectum putant, nec ad novi quid inveniendum sunt idonei. Nam qui solida rerum physicarum & medicarum theoria carent, & qui non curæ cordique observationes habent, ii certe parum vel nihil invenire possunt. Solenne exemplum nobis HIPPOCRATES edidit, qui naturæ humanæ & rerum naturalium, ut ex ejus monumentis videmus, perspicax scrutator & observationum concinnator fuit. Quot utilia inventa in salutarem nostram artem ab ipso pervenerunt? Sed cum a Galeni tempore usque ad nostrum seculum plures medici vanis theoriis & rationibus studerent & observationes negligerent, nihil fere incrementi ars Apollinis experta est.

§. XIV.

Denique excellentis ingenii medicus facile pervidet, nullas morborum in genere dari curationes, quia causæ & circumstantiæ mirum differunt; hinc neutiquam ex scriptoribus & libris methodum morbis medendi addiscit, sed ipse suo judicio utitur, & ex probe pensitata morbi historia & ex remediorum jamdum viribus perspectis non modo apta medicamenta, sed & convenientem ea applicandi methodum invenit. Vulgaris vero medicus, quando morbum, paulo insuetis symptomatibus stipatum curandum suscipit, mox ad libros accurrit, & varias hu-

jus affectus curationes evolvit remedia ac methodum ex iis desumpturus, sed raro felici & auspicato successu. Nam quemadmodum climata & vivendi genera regionum, in quibus medici scripta ediderunt, longe multumque inter se differunt, ita etiam sunt diversissimæ curandi viæ, quas ægre in aliis & diversis locis imitari licet. Non jam dicam, differre morbos & naturas corporum & morborum causas atque occasiones atque tempora, quæ, uti singularem medendi prudentiam desiderant, sic in dissimilibus casibus non perpetuam curandi normam subministrant. Regionum in medicina maxima habenda est ratio. Sic medici in septentrionalibus viventes medicamenta longe majori dosi exhibere debent, quam qui præcalidas provincias incolunt. Differunt quoque multum, ut Celsus loquitur Lib. de medic. p. 8. pro natura locorum genera medicinæ, & aliud opus est Romæ, aliud in Ægypto, aliud in Gallia. Populi regionum septentrionalium, qui immobilioris sunt naturæ & rebellibus chronicis morbis magis patent, valentiora ex mineralium regno petita, sic dicta chymica, nec non evacuantia aciora & emetica desiderant, eaque sine noxa ferunt, quibus in Italia, Hispania, Gallia longe tutius est abstinere, & ægritudines ibi grassantes debilibus magis & Galenicis medicinis tractare. Medicus itaque verus & sapiens magno cum judicio libros legit & exinde non minimum fructum decerpit, quo caret alius, qui medica scientia minus recte imbutus est. In genere etiam hic notari velim, omnes, qui sacris medicinæ initiandi sunt, lectione multorum librorum, præsertim dogmaticorum & practicum, abstinere debere, donec pleniori rerum medicarum scientia & judicandi facultate instructi fuerint. Nam dogmatici cum varias discrepantes opiniones & hypotheses foveant, lectorem plus confundunt, quam erudiunt. Practici vero, cum non accuratioribus observationibus & solidæ theoriæ superstructi sint, legentibus immedicabilem sæpius ob præjudicium noxam inferunt. Magna igitur semper cum cautione libros medicorum legere oportet.

§. XV.

Non exiguum quoque inter medicum & practicum differentiam in eo animadvertimus, quod hi mirifice æstiment & omni opera conquirant arcana, specifica, universalia, panacæas, & magno amore remediorum ex metallorum regno petitorum ducantur, falsa persuasione invitati, ac si medicamenta dentur, quæ certos morbos vi quadam abscondita & peculiari propulsandi gaudeant, & quod metallica prævalide in principium vitale penetrent ac operentur. Verum enim vero, quod spe & expectatione harum virtutum arcanarum ruspatores deludantur, eventus & usus, efficacissimus omnium rerum magister, in dies comprobatur. Medicus vero summum arcanum, imo arcanorum arcanissimum rectam morbos curandi legem ac methodum rationalem, quæ in cognitione morbi & ejus causæ & remediorum quoad proprietates & vires notitia, nec non in prudentia naturæ ductum & motum sequendi consistit, æstimat; & prout opus est, vel medicina Galenica languidiori, vel valenti chymica ad propulsandam morbi materiam utitur. Et quia perspicit, longe multumque dissidentes esse unius morbi causas, & corpora mirum variare: hinc inscitias ducit, quod unum medicamentum certo morbo vel pluribus tollendis habeatur sufficiens. Neque sciens & sapiens medicus facile inhiat arcanis compositionibus, multo minus magno pretio eas coëmit, vel juramento silentii se obstringit, quia ipse pro lubitu, cum ex manifestioribus causis & longo usu auxiliorum

rum notitia ipsi perspecta est, optimas, si opus est, compositiones invenire atque excogitare potest.

§. XVI.

Porro bonus & præstans medicus omni ratione & modo cavet, ne medicina sua ægrotis noceat. Uti enim optimi oratoris & prudentis est, omni ratione prodesse reo, imprudentis vero & prævaricatoris causæ nocere, quemadmodum scribit Antonius apud Marcum Tullium: ita circumspecti est medici omni ratione ægrum juvare & saltem non nocere. *Imperiti* vero, uti scribit HIPPOCRATES *Lib. I. Epid. Sect. II. nimis multa moliendo morbos augent & non profligant aut retundunt.* Et certe plus non raro periculi a perversis remediis ægris imminet, quam ab ipso morbo, quare CRATO in *Consil. III. Scholzii* hunc in modum conqueritur: *Sunt, qui cum in imperitos Medicos incidunt, importunis atque intempestivis medicationibus graviter affligantur, siquidem pharmaca exhibita plus damni illis adferunt, quam ex morbo esse poterat, cujus causa medicamentum institutum fuit.* Et homines nonnulli in quadam persuasione perfectæ & integræ sanitatis consequendæ corpus perpetuo medicamentis vexant, naturam verâ non quadam diligentia adjuvant. Et profecto incredibilis est noxa, quam medici minus periti in morborum curatione ægrotis inferunt, & quidem præter omnem opinionem & voluntatem suam, ob nullam aliam rationem, quam quod salutarem remediorum usum a perniciali abusu non recte distinguere sciant. Medicamenta enim in se non nocent, sed tum demum, quando non recte usurpata fuerunt. Si quis vero non sufficienter prius cognito morbo ejusque causa vel ægrotantis indole perspecta, nec naturæ ductu, aut justo ad agendum tempore observato in propinandis remediis, imprimis validioribus; promptus est ac facilis, is quoque quam maxime erit proclivis ad nocendum. Jam vero medicina non nocendi sed juvandi est scientia.

§. XVII.

Prudens & peritus medicus raro violenter & cum vehementia procedit & curas suscipit; sed benigna, leniora & secura maxime amat, æstimat & amplectitur. Practicus vero scientiæ præsumptione, quo nihil est ambitiosius, elatus, temerarius plerumque est, & violentis ac infecuris naturæ quasi imperare & morbos depellere contendit. Per infecura, quæ mali moris medicis lapis offensionis sunt, non indigitamus ea, quæ in se & sua natura semper periculum vel noxam secum conjunctam habent. Si enim ejusmodi essent generis, medicinæ nomen minus sustinere possent, sed, ut ex foro medico ejicerentur, necessarium foret; sed infecura ea dicimus, quæ sunt in se vehementiora vel vehementem vim demum a dispositione humorum in corpore stabulantium nanciscuntur. Cum validis autem semper omnique tempore & occasione cautissime agendum est ob rationem in procinctu positam. Nam si benigna & naturæ amica alimenta & medicamenta abusu nocent, multo magis id validiora, quibus magna vis est, ut HIPPOCRATES *Lib. de locis in homine* §. 55. loquitur, statum corporis transmovendi, præstabant. Incaute igitur & temere ii agunt, qui natura debilibus fortiora admovent. Quare prudenter COUS loco cit. ait: *medicamenta a natura fortia in debilibus morbis dare non oportet, sed fortibus natura fortibus pharmacis utendum est, debilibus vero pharmacis non fortibus, & fortibus morbis fortis naturæ pharmaca exhibenda sunt.* AVICENNA scribit: *gra-*

num prudentiæ medicæ est ad fortes medicinas non pervenire, si debiles suffecerint. Quanta igitur imprudentia & impudentia est ægris a longo morbo, a diuturno animi affectu, a puerperio, vigiliis, aut ingenti sanguinis profluvio enervatis largas venæ sectiones, fortiora purgantia, emetica, & quidem brevi tempore hæc omnia & singula administrare; teneros infantes, quorum intestina succorum acrimonia abundant, quibus absorbentia, clysteres, & rhabarbarina convenientia essent, purgantibus acrioribus resinosis & metallicis non semel, sed reiteratis vicibus exercere; ex febre maligna laborantibus nullo habito temporum nec dierum criticorum respectu promiscue largiores venæ sectiones, emetica, purgantia non tantum in principio, sed etiam in statu adhibere & aliquoties iterare. Igitur prudens medicus non nisi cum cautione & summa necessitate urgente, & tantum in natura robustioribus, ut HIPPOCRATES innuit, valentioribus utitur, & tunc etiam maximo cum fructu ac utilitate.

§. XVIII.

Uterius medicus perspicax & sapiens, non peculiari amore aut odio ex quadam velut privata passione vel scientiæ defectu circa certa remedia fertur, sed singula suo tempore & loco adhibet & æstimat, vel etiam rejicit aut damnat. Novimus, quanta fata habeant quædam remediorum genera. Nonnulli venæ sectionem in cælum quasi attollunt, alii plane vituperant, & ubivis fere dissuadent. Quidam ita delectantur anodinis & opiatis, ut in singulis ferme morbis ea remediis admisceant, alii vero cane pejus & angue oderunt, eaque etiam a foro medico ejicienda jactitant. Quot sunt, qui corticem chinæ in curandis febribus intermittentibus tanquam divinum auxilium extollunt? quot, qui contra eundem damnant atque noxiosissimam febrium medicinam pronuntiant? Quot sunt ex medicorum ordine, qui in desperatis chronicis morbis pervincendis thermarum, acidularum, & id genus aliarum salubrium & medicatarum aquarum usum in cælum ferre evehunt, cum alii parum vel nihil efficaciam ipsis tribuant, sed quaecunque juvamen, quod adferunt, aliis concurrentibus causis adsignent. Ex marte depromptis remediis plures medicorum in morbis fere chronicis depulsandi frequentissime utuntur, quia ob sulphur vividum minerale, quo pollent, peculiarem fibræ solidorum roborandis virtutem ipsis tribuunt. Sunt tamen non pauci, qui martialibus omnia fere detrahunt, ob id, quod emunctoria adstringendo ad morbos longos viam præparent amplissimam. Camphora, salia volatilia oleosa & olea aromatica, subtiliora balsamica, vulgo magnifice, ob roborantem, analepticam & nervinam virtutem, æstimantur; aliis contra ea exosa sunt, ut velut nimis calida & vaporosa raro usurpanda vel prorsus removenda suadeant. Hæc pro dolor! est medicinæ facies, hic status, qui in mera dissensione & discordia consistit. Nihilominus singuli suam sententiam experientia multiplici ac ratione tueri & defendere student, pro aris & focis in utramque partem disceptando. Verum enim vero, si rem paulo altius consideremus, protinus harum discrepantium sententiarum fons atque origo animadvertitur. Videlicet omnia & singula jam memorata remedia valde activis viribus & dotibus a natura donata & ad morbos quoque pellendos efficacissima sunt. Minime tamen negandum est, quin etiam nocere & quidem validissime possint; quod fit, si non recte usurpentur, quum alias circumspecto usu divinam opem adferre possint. Remediis itaque non noxa imputanda,

da, sed medicis, qui ipsis non recte utuntur, & ex præjudicio præcipitantiæ aliis nimium tribuunt, aliis nimium detrahunt. Manet itaque & constat hisce omnibus sua laus & vituperium. Videmus enim optima & saluberrima alimenta, neque minus medicamenta, tam ad juvandum, quam ad nocendum æque prompta ac parata esse. Præstantis itaque medici est hæc omnia probe discernere & ex circumstantiarum ratione eorum damnum atque utilitatem metiri.

§. XIX.

Uterius nobilis & peritus medicus in medendis maxime acutis morbis ministerio naturæ utitur, quia hæc sæpe sola suis viribus usa morbos etiam periculi plenissimos optime sanat, quod non modo sapiens veterum medicorum consensus, sed & ipsa experientia confirmat, qua scimus, plures ab acutis febribus sine medico & sine medicamentis revalescere, & sæpiusculæ harum curationes rectius ac ordinatius succedere, ac si artis auxilia accesserint. Pulchra sunt, quæ DURETUS *Lib. de humorum purgatione* circa hanc rem pronunciat. *Natura, inquit, diligens & conservatrix morbos pepasmo & crisi depellit. Ejus autem convenienter omnia molientis imitatore seu observatore & adiutore fidelissimum præstare is debet, qui artis magister præstantissimus dici & esse velit.* Perpauci vero sunt ex vulgo medicorum, qui illum artificiosissimum corporis nostri mechanismum intelligunt, quo non modo ipsum in se corruptibilissimum ab omni putredine vindicatur, sed & præternaturali & nimis aucto motu, id quod interitum corporis minatur, (& causa morborum est) in ipso morbo certo ordine, tempore & loco removetur atque expellitur. Periti igitur est medici prudenter ipsis morbosus motibus ad vitæ & sanitatis tutelam uti, eosque salutes ab exitalibus, qui perniciem & mortem corpori intendunt, distinguere. Medicus igitur non sine summa ratione naturæ minister vocatur, quia eam omnibus modis adjuvare debet; nam quando nimii & excessivi motus fuerint, eos moderari, si deficient, promovere debet. Imperitus vero, qui naturæ leges & ordinem nescit, multa moliendo sæpe pessima ratione hunc naturæ ordinem laudatissimum intercipit & sic ægrum interimit. Spectat huc eorum nefandum consilium, qui acuta febre laborantibus largas venæ sectiones, purgationes, vomitiones, per totum fere morbi decursum præscribunt, & diebus criticis largas adhuc sanguinis missiones aut vomitum clementia administrant, quibus, sicut tale specimen non ita pridem non sine dolore nobis videre licuit, mortem certissime promovent.

§. XX.

Neque inter notas boni medici essentielles hoc prætereundum est, quod is paucis, parabilioribus, simplicibus, facilibus, selectis tamen & efficacibus utatur, probe gnarus, naturam, sicuti simplicissima via & methodo plane mirabili sua perficit opera, simplicem & facilem tenere methodum in curando, quam si recte medicus investigaverit, paucis & facilibus opus erit, quibus in medendo illam adjuvet. Quanta sanandi virtus in puræ & simplicis aquæ potu, in infusis & decoctis herbarum simplicium, in lactis usu, in potu aquarum medicatarum, in fotibus calidis, clysteribus, in lenioribus laxantibus, emollientibus, in inedia, motu ac labore corporis, aërisque mutatione delitescat, magnis & peritissimis medicis tantum notum est. Vulgares vero id non capiunt, nec intelligunt, qui non nisi multas arcanas, plerumque tamen ineptas compositiones, exotica & pretiosa remedia quærunt, magni faciunt,

& qua fieri potest, sagacitate aucupantur. At scientes & periti, quia facile agnoscunt, naturam in medendo paucis esse contentam, omnem multitudinem & varietatem remediorum, quam illustri VERULAMIUS ignorantiae filiam appellat, respuunt. Vulgares vero practici in præscriptione multorum & variorum remediorum, quotiescunque lectum accedunt, officium medici & naturam medendi positam esse existimant. Hinc, quando vident, quod unum non juvet, statim ad alterum transeunt cum maximo ægotantium detrimento, quia copia & varietas medicamentorum ingentes turbas & mutationes in natura corporis humani nunquam non officit. Optandum esset, ut ad unum omnes practici aphorismum decimum nonum JOHANNIS DAMASCENI ad filium observarent, dum ait: *Medicamenta tibi sint certa & pauca usurpanda, eaque, quibus maxime usui esse possis.* Communiter quoque peccant in eo, quod nimis officiosi vel seduli sint cum in visitando tum in præscribendo. Elegans hanc in rem exstat locus in VERULAMIO *de augmento scientiarum Lib. IV. pag. 110.* *Etsi ex opera medicorum quotidiana, quam in visendo, assidendo, præscribendo ægotis præstant, putaret quispiam, haud segniter illos curationem persequi, atque in eadem certa quasi via insistere: tamen si quis ea, quæ præscribere & administrare solent medici, accuratius introspeciat, inveniet plerumque vacillationis & inconstantiae plena, & quæ ex tempore excogitantur & in mentem illis veniant absque certo aliquo prævisio curationis tramite.*

§. XXI.

Porro præstantis ingenii atque peritiæ medicus in morbis, præsertim acutis, nihil turbulenter, nihil præcipitanter agit, sed omnia facit cum cautione, cum tempore, quod, sicuti omnium rerum difficultiorum, ita etiam morborum, qui multum periculi habent, optimum & præstantissimum est remedium. Quicumque enim medicus cunctari prudenter, expectare ac debito tempore agere scit, is ex omnium sententia magna ratione & prudentia pollet. Nam omnis curatio morbi in melius mutatio, ut & remedii operatio tempus requirit, quia natura nunquam amat saltum, sed per gradus omnia peragit. Minus autem peritus plerumque & violentiam & temeritatem junctam habet, & curam ac naturam cogere vult multa moliendo, pessimo & funesto sæpius eventu.

§. XXII.

Denique peritus medicus, præsertim in acutis, caute prognosin instituit, deque morbi eventu non præceps judicium format. Nihil enim penes vulgum æque famam atque existimationem medici lædit, quam incauta & minus certa prognos. Imperiti vero semper fere in hoc sunt præcipitantes, temerarii in prædicendis ante tempus iis rebus de quibus nondum pro firmo constituendo judicio sufficientia signa atque indicia sunt. Cunctatio itaque & hic vincat præcipitantiam, & recte in usum flectas illud *Thucydidis: inscitia fiduciam, prudentia cunctationem gignit.* Spectat huc quoque pessima illa, quæ apud practicos invaluit, consuetudo, ex urinarum inspectione multa mirabilia circa morbum ejusque eventum pronuntiandi, cum peritus & prudens medicus imposturas has magno odio habeat. Placet mihi circa hanc rem MONTANI in *Conf. 130.* judicium, qui ita scribit: *Stulta pessimaque eorum consuetudo est, qui ex urina tanquam ex speculo, nunquam visis iis, quorum urinæ sunt, non solum statum corporis sanum vel morbosum, sed etiam ætatem, sexum, graviditatem, an filia an masculus utero generatur,*

ratur, se venari posse gloriantur, tantum ut homines argento emungant, & quibus decipi volupe est, eos in fraudes inducant, id quod longe abest a viro gravi atque honesto.

§. XXIII.

Ceterum medicus vere intelligens & doctus principem ac præcipuam medicinæ partem, quæ in valetudinis ac vitæ tutela, inque morborum ac mortis præcautione versatur, curæ cordique habet, magnoque pretio ac loco æstimat. Quid enim pretiosius, quid optabilius est vita longa ac sana? quid miserius, & humanæ felicitati magis adversum, quam brevis & morbis patens? Quam pauci vero ex vulgarium practicum numero existunt, qui valetudinariæ artis præcepta sciunt, qui exquisitam physices rerumque externarum, quæ ad sanitatem & vitam pertinent, nempe esculentorum, potulentorum, aëris, aquarum & id genus plurium, accuratam notitiam habent? Quam pauci sunt, qui morborum occasiones, primordia, originem atque generationem recte sciunt atque intelligunt, neque in quo mortis natura posita sit, & quare homo necessario mori debeat, recte capiunt atque perspiciunt? Quam parum itaque eos idoneos esse, quod maximum medici est officium, ad morbos in hoc vel illo corpore præcavendos & vitam, ne illa abbrevietur, tuendam, haud ægre intelligitur. Morbos sanare omnes volunt, sed paucos possunt. Acuti enim naturæ magis, quam artis beneficio sanescunt; longos vero, & qui radices egerunt, immedicabiles relinquunt; id autem, quod in eorum potestate est, & quod facere possunt, id est, morbos a corporibus avertere, nec sciunt, nec addiscere volunt. Quanta fuerit HIPPOCRATIS & sapientissimæ omnis antiquitatis cura atque solertia in sanitate custodienda morbisque avertendis veterum ipsiusque HIPPOCRATIS monumenta de diætiis, de victu acutorum, & libri physici de alimentis, de aëris, aquarum & locorum natura, perspicue satis declarant. Laudanda quoque in eo est Italorum, inque primis magnatum, magna in excolendis valetudinariæ artis præceptis assidua ac diligentia, qua utique efficiunt, ut, in regionibus licet intemperatis, longissime vivant. At vero nostro ævo & in nostris regionibus divina hæc servandorum hominum ars pene exolevit, ut paucissimi medicorum hanc recte excolendam sibi commendatam habeant.

§. XXIV.

Restat jam, ut etiam de scientia, seu si mavis arte, omnium nobilissima, chirurgica scilicet, quæ externarum partium vitiis recte medendi præcepta tradit, quam necessaria sit medico, nostram sententiam depromamus. Complures medicorum hujus perversæ sententiæ sunt, hanc artem non sui esse fori, sed revera nesciunt, totum hominem tam quoad partes exteriores, quam interiores medicinæ esse objectum, & harum mirificam esse consensionem, ut vitium externarum transeat etiam in internas, neque externæ, salvæ ac incolumes esse possint, nisi interiores recte se habeant. Longe aliter sentiebant veteres, qui chirurgiam medico summe necessariam judicabant, & ob id, qui ex Asclepiadis familia arte medica imbuendi erant, primo se debebant in chirurgia exercere; & HIPPOCRATIS, ÆGINETÆ, AVICENNÆ & CELSI monumenta testantur, quanto pretio olim hæc nobilissima ars habita fuerit. Sed quam pauci sunt, qui hanc artem probe intelligunt! Illi quoque, qui eam ex professo tractant, plerumque prorsus sunt ignari. Ideo medici, qui chirurgorum incertam emendare debent, ut hanc addiscant, &

ratio & necessitas salutis publicæ postulat. Neque vero eam empirice, sed scientifice tractent necesse est. Itaque partium externarum, ut ossium, musculorum, nervorum, tendinum, vasorum, glandularum situm, connexionem, structuram atque usum ex autopsia anatomica primo omnium tenere debent: deinde nec circuli sanguinis, nec nutritionis & conservationis corporeæ atque excretionum natura ac causæ ipsis debent esse incognitæ. Sequitur, ut variarum quoque læsionum naturam, proprietates, nec non remediorum vires & effectus physice ac mechanice intelligant. Tum operationes manuales congruis instrumentis, qua debet fieri dexteritate, administrandas nosse debent, quibus subsidiis medicus suffultus & chirurgum postea bene instruere, & de lethalitate vulnerum firmum, rectum & constans judicium proferre poterit. At quam pauci sunt, qui hæc summe necessaria sciunt! hinc etiam accidit, ut si quando ex dissectionibus cadaverum de lethalitate vulnerum judicium proferre debeant, misere hallucinentur, crassamque suam ac supinam ignorantiam in anatomicis partes minus recte denominando prodant.

§. XXV.

Plura adhuc essent enumeranda, quibus valens, præstans ac bonus medicus a vulgari, medicinam faciente, licet literarum vel etiam partis fuerit cujusdam medicinæ non inexpertus, distinguere debeat; præsertim vero quomodo fortuna practicum res gubernentur. Sed ne prolixitas nauseam moveat, alii tempori & loco id reservamus. Placet autem hanc nostram meditationem eleganti loco CORNARII, quem habet in *dedicatione præfixa tomo II. AETII*, concludere, ut appareat, quibus fati & viles medici & præstantes in societate humana expositi sint. *Videas, alios vel ætate, aut etiam longi usus auctoritate, vel loquacitate ac mira litigandi contentione apud ægros se efferre, & gesticulando obtinere, quo putetur, rem ipsam & morbum optime tum nosse, tum curare posse. Quum interim alius ad hanc rem simul adhibitus, (contingit enim, infelicibus artibus aliquando decem artifices simul adhiberi) ob maturiorem deliberationem, vel ob linguæ parsimoniam, pro illo nihil esse, nihil scire putetur; & contingit sane ita, ignorantem temeritatem a vulgo probari, ditari ac in honore esse, maxime cum fortuna etiam hujusmodi hominibus favere conspicitur, sicut evenisse vel casu, vel confidentia ægri in medicum compertum est, ut aliquando æger convalescat. Sanat enim plures, inquit HIPPOCRATES, in quem plures confidunt; contra vero illum, quem ratio & prudentia cunctantiorum ad rectum rerum judicium facit, nihili fieri, atque etiam irrideri.*

§. XXVI.

Ultimo loco communi illi calumniæ, in qua non modo vulgus, sed & quidam ex doctis deprehenduntur, bonum theoreticum esse malum practicum, breviter strictimque respondendum esse arbitror. Equidem verissimum, plures medicorum ex suis hypothesebus, speculationibus, maxima ex parte fictitiis, rerum medicarum & naturalium causas æstimantes pro doctis medicis & theoreticis habitos male rem in praxi administrare. Hinc utique interpretantem & vera theoria instructum, & inter eum, qui minus solidis & rerum naturæ convenientibus doctrinis instructus est, distinguendum fuerit. Veræ autem theoriæ id signum puto, si quis principia ea habeat, quæ historiis morborum accommodata sunt; & quæ causis morborum applicari possint; porro quæ, cur hæc vel illa in hoc morbo prosint,

in altero noceant, ob oculos clare ponit, remediorum usum & abusum sedulo discernit, aliorum minus securam curandi viam, perquam facile perspicit, neque minus apta remedia medendique viam tutissimam pro differentia circumstantiarum invenit. Quibus omnibus ille, qui non perspicuis aut rebus medicis explicandis minus convenientibus principiis ratiocinandi instructus est, prorsus destituitur. Et hinc utique valet illud axioma inversum: malum theoreticum esse malum practicum, si videlicet ex tali theoria praxin instituat, ex quo non potest non errare & noxas inferre. Datur autem hujus convicii forte alia & communior origo; nam quum solenne sit, quicquid est eruditorum, in certas quasi

tribus, aut, ut loqui solemus, facultates dispecere, factum est, ut multi locum in ordine medicorum adipiscantur, qui tota sua vita unam tantum aut paucas partes ad opus medicinae concurrentes quidem, sed non ipsum opus conficientes, excoluerunt. Hi autem viri, quemadmodum in eo summa laude afficiendi sunt, quod ad omnium utilitatem tantos labores tanta assiduitate superant: ita contumelia ista omnino non sunt onerandi. Nec enim ullum dubium est, quin iidem possent praxin optime etiam administrare, si id quidem voluissent, & eo omne id studium contulissent, quod in rerum naturalium exquisitam indagacionem tanta felicitate consumserint.



DISSERTATIO MEDICA

D E

PROCERITATE CORPORIS,

EJUSQUE CAUSIS ET EFFECTIBUS.

Primum edita Anno 1726.

P R O O E M I U M.



ASCIMUR, nutrimur, morimur. Hac perenni actionum vicissitudine omnium animantium absolvitur vita. Simulac enim hominis in hujus mundi scenam est introitus, vitæ chorea cœpta continuato processu & egressu perennat, nec vivere aliud est, quam continuo consumi & mori. Et licet mors vitæ maxime videatur infensa; tamen eadem nihil magis est proximum: quandoquidem sine motu vivere minime licet, nec moveri sine corporis interitu. Ita eadem causæ, quæ ad conservationem nostræ machinæ adeo necessariae sunt, ruinam corporis accelerant & plenariam tandem destructionem inferunt. Hinc MALPIGHIIUS *anat. plant. p. 112. nescio, inquit, an duris inopiæ legibus, an satis munificentia munere, ita viventium ordines statuerit natura, ut mutuo vivant morticinio & assiduis claudibus instaurentur & consistant.* Cuicumque itaque animantium generi, vi suæ structuræ, huic naturæ legi parendum est. Ne vero hujus animalis machinæ interitus nimis esset subitaneus, nutritione sapienter fuit prospectum, cujus multiplices sunt gradus, quibus a primo ortu ad naturalem vitæ terminum fit accessus. Corporis enim prius fit incrementum, tum status, tandemque decrementum succedit. Haud vulgare hinc operæ pretium mihi facere videntur, qui nutritionis indolem atque gradus accuratius examinare suscipiunt, cum fere totius artis medicæ scopus eo tendat, ut ultimam vitæ metam, quam sero id fieri possit, contingant mortales. Diffusum autem hoc negotium, paucarum plagellarum cancellis coerceri ac explicari in illis pro dignitate minime potest; eaque propter nobiscum constituimus, tantum incrementi corpori rationes, inprimis singularis illius proceritatis, quæ oculos omnium admiratione perstringit, pro viribus ingenii nostri sub examen vocare, & ita simul exhibere fundamenta, ex quibus regulæ diæteticae plurimæ circa educationem infantum deduci poterunt: eo quod rationalem Medicum non empyrice hic, ut consuevit, consulere, oportet, sed consilii sui rationes dare convenientes. Plurimum quidem difficultatis habet hoc argumentum, neminemque facile invenire licuit, cujus vestigia premere potuissimus; quantum tamen in nobis erit, conspectabimur ubique evidentiam & veritatem, principiis indubiæ veritatis innixi, & ab iis omnibus abstinebimus, quæ a doctissimis

etissimis huc usque viris nondum potuerunt determinari, cujus generis sunt, quæ nec sensuum, nec rationis ope, inquirens satis assequi valet. Quare ex generali nutritionis doctrina ea saltem delibabimus, quæ aliquam lucem huic nostro proposito themati scenerare videntur, haud dubitantes, fore, ut æquus lector, de hac descriptione, fere non tantum extemporanea, sæpiusque interpolata, benigne judicet; quin magnum sane fructum nos inde reportasse gaudebimus, si alii, quibus de meliori luto finxit præcordia Titan, ad maturiora doctioraque proferenda in sterili hac materia excitantur, quo vetus Germanorum gloria aliquando nostris redeat temporibus, & corpora ad pacis & belli artes idonea præparentur. Supremum Numen supplices veneramur, ut sua gratia conatibus his nostris benignissime adspiret, quo in humani generis salutem & commoda cedant!

CAPUT I.

Historia incrementi corporis & ejus secundum circumstantias ætatis, sexus, cæli, vitæ generis &c. differentia.

§. I.

Cum de proceritate corporis agere animus est, ante omnia monere nos oportet, quod hac voce excelsam illam & giganteam fere corporis formam intellectam velimus, qua nunc pauci inter plures eminere solent; ita, ut illa corporis celsitudo, quam maxima pars hominum servat, pro norma sistatur, juxta quam, quantum singularis illa altitudo, nostræ genti consuetam superet, mensurari & æstimari possit.

§. II.

Potest vero altitudo corporis ordinaria & obvia in tres ordines dispesci, nempe, 1) in mediam altitudinem, 2) in illam, quæ infra mediam consistit, & 3) eam denique quæ mediam superat. Proceros autem illos omnes vocabimus, qui huic ultimæ classi accensendi sunt, & mediam corporis staturam longis passibus superant.

§. III.

Scire autem omnino interest, quibus gradibus corpus nostrum incrementum capiat, ac longitudinis suæ tandem *ἀκμὴν* attingat, quo exinde eo felicius, quid ad singularem corporis celsitudinem conferat, promi possit judicium, perspectis & recensitis iis, quæ naturalem formam alunt efficiuntque. Ordinem vero, ut aiunt, rem ab ovo, atque initio, quomodo augmentum corporis secundum temporis rationes fiat in ipso utero, brevissimis enarrabimus.

§. IV.

Circa prima formationis tempora haud accurate magnitudo corporis determinari potest, cum exactum conceptionis principium a perpaucis observetur, & sæpe embryones excludantur, qui ante per aliquod tempus in utero mortui delituerunt. Sic RUYSCHIUS *Adv. Anat. Dec. II. p. 29.* refert exemplum embryonis tertio mense enixi, qui tamen grani hordei magnitudinem vix æquavit, quoniam jam ante duos menses mortuus in utero sepultus fuerat. Alii quoque embryones lente, alii citius augentur, ut haud fidum judicium ex magnitudine de ætate foetus interponi queat. Facilius vero hoc judicatur in foetibus trium & quatuor mensium, uti in his a sententia stamus Celeberr. RUYSCHII, *vid. Thes. anat. VI. p. 37. & 92.* cui campus uberrimus in populosissima

urbe quotidie aperitur, accuratiores condere circa hæc observationes. Is autem observavit, in embryonibus paucorum dierum molem corporis tam esse exiguam, ut feminis anisi, lactuæ, hordei que munitati magnitudinem adæquent, & indigestam ac informem massam repræsentent, *id. ib. p. 31. 33.* donec successive tandem caput & artus superiores, tanquam aciculæ capita & exigua tubercula, protuberent atque appareant, *vid. Ejus Adv. Anat. Dec. II. p. 28.* Ita, ut minime THEODORO KERKRINGIO *Anthropog. Cap. 3.* assentiatur, qui in foetu trium aut quatuor dierum, caput a reliquo corpore jam distinctum reliquaue organa per nebulam punctis suis notata, observasse sibi visus est.

§. V.

Augetur vero moles corporis in utero eodem temporis spatio dupla ratione, imo & adhuc ultra; ita ut sex hebdomadum foetus, foetum unius mensis fere dupla proportionem superet: vide KERKRINGII *Anthropog. Cap. 6.* Contra vero simulac homo in lucem editus, liberiori aura fruitur, augmentatio corporis ita imminuitur, ut quidem in longitudinem crescere non cesset, tamen eandem accessionem corporis vix intra duorum, vel trium annorum spatium acquirat, quam in utero mensis unius intervallo acceperat.

§. VI.

Crescit autem homo secundum longitudinem ut plurimum usque ad vigesimum quintum ætatis annum, ea tamen servata proportionem, ut primo, secundo, & tertio quoque septenario omnium maxime augeatur; reliquo autem tempore usque ad dictum terminum, tam parum longitudini accedere videtur, ut vix sensibile sit. Nihilominus tamen nonnunquam, quanquam rarius, contingit, ut primis annis parum saltem crescant, qui postea uno atque altero anno, impetu quasi facto, in eam longitudinem explicantur, cui parandæ decem præcedentes anni alias impendi debuissent.

§. VII.

Communis autem statura nostræ gentis sex pedibus geometricis in longitudinem definitur, quam qui excedunt longi, qui non attingunt, breves dicuntur: v. ELSHOLZ *Anthropometria p. 25.* Utrum vero senescente jam mundo, sensim corpora, quæ antiquis vastiora prolixioraque fuerunt, imminuantur, ut PLINIUS, JUVENALIS, PHLEGON TRALLIANUS, LUCRETIUS alique diserte asseruerunt, vix verosimile est, nec ulla historiarum fide evinci potest, qua constat, antiquissimis quoque temporibus, eandem hominibus fuisse staturam, qualis nunc est. Ipsum enim ob ingens corporis robur, insuetam proceritatem & stupenda facta priscis celeberrimum HERCULEM, septem tantummodo pedum altitudinem at-

tigisse

tigisse omnium scriptorum fide constat. Et A. GELIUS *noct. Att. lib. III. cap. 10. p. m. 232.* refert: Varronem recte summum adolescendi corporis humani modum dixisse septem pedum. Nihil tamen secius inficias ire non possumus, celebratam istam veterum Germanorum proceram staturam, de qua TACITUS multa memoriae prodidit, hodie in nepotibus minime observari. Quod, uti speciales agnovit causas, ita ex immutato cum tempore coelo & aëre derivare minime licet, ut bene jam CONRINGIUS *diff. de habitus germanicorum corporum antiqui & novi causis* monuit. Et facete ELSHOLZIUS nostras *l. c. p. 18.* id inevitabile absurdum inde sequi asserit, quod corpora nostra, nisi opportune pereat mundus, post aliquot secula formicis aequalia sint futura.

§. VIII.

Quemadmodum vero non una omnes gaudemus corporis longitudine, ac de gigantibus & sacrae & profanae historiae memorant; ita haud incongruum erit notare circumstantias, secundum quas magnitudo corporum variare solet. Ita differt secundum regiones corporis statura, quod suo jam tempore notavit HIPPOCRATES *de aeribus, aquis & locis*. Nam qui sub temperato aut frigidiore coelo degunt, longiores observantur illis, qui in meridionalibus plagis aestu velut exurunt. Hispani & Itali Europaeis reliquis statura longe inferiores existunt, quamvis aliae quoque causae hic multum conferant, quae tamen a coeli conditione haud minus quoque pendent. Majora inprimis observantur illorum corpora, qui Alpes incolunt, ut in Helvetiis videre est. Quam in rem etiam HIPPOCRATES *l. c. Text. LV. vers. Alm-lov.* inquit: *quicumque altam habitant regionem, planam, ventis expositam & aquosam, eorum formae magnae, ac invicem similes & erectae sunt.*

§. IX.

Multum quoque ad magnitudinem corporis refert, quibus quis natus sit parentibus. Nam qui a parentibus generati sunt, nondum debita corporis firmitate praeditis, longe debiliores inveniuntur & statura quoque ceteris minores: quae quoque ratio est, quod in calidioribus terris, puta Gallia, Hispania, Italia, ob praeproperam nimis venerem, corpora liberorum fiant debilia; uti vicissim in antiquis Germanis fera juvenum venus & inexhausta pubertas a TACITO celebratur. Haud parum quoque interest perquirere: an quis a parentibus in aetate juvenili, consistente, vel senili constitutis, generatus sit, & quae fuerit corporis constitutio, qualis diata parentum, cum sobolem procrearunt? Hinc enim videre est, liberos iisdem natos parentibus, non tantum statura, sed temperamento etiam & tota reliqua indole, inter se discrepare.

§. X.

Deinde proceritas staturae in parentibus ad corporis in liberis celsitudinem magnas fert suppetias; nam:

*Fortes creantur fortibus,
Nec imbellem feroces
Progenerant aquilae columbam,*

si modo cetera jam memorata consentiant; alias haud rarum est, quod proceri habitus parentes pusillos liberos habeant, id quod inprimis diatae vel educationis culpa accidere solet, qua factum etiam est, ut nostra nunc corpora ab antiquorum degeneraverint celsitudine, vid. CONRINGII *diff. citata*. Rarioris paulo observationis est, ut pusilli vel me-

diocris staturae parentes, proceros liberos producant; prout historiarum fide constat, Wladislaum Regem Poloniae, ob staturae brevitatem cubitalem dictum, filium procerasse Casimirum, cui corporis proceritas nomen magni conciliavit, v. ELSHOLZ *l. c. p. 16*. Eadem quippe animalium, quam vegetabilium videtur esse indoles, ubi arbores tenellae item tenellos fructus ferunt, & procerae quoque inter majores non infrequenter etiam minores fructus praebent.

§. XI.

Cum porro plurimum ad conciliandam proli formam possit constitutio matris, illo, quo utero gerit, tempore, merito & haec attentionem meretur. Oportet igitur ut mater praegnans optima sanitate fruatur & unum saltem foetum in utero gerat. Nam foemina uterum ferens debilis, morbo detenta, aut valedudinaria, eandem plerumque labem foetui communicare solet; eo siquidem accidit, ut foetus in utero non debite nutriatur ac augeatur: hinc infirmus & pusillus plerumque excluditur partus, raro in decoram corporis formam excrescens. Solet etiam matre inculcata in utero suis affici morbis foetus, qua de re consulendus inprimis Illustris atque excellentissimus Dn. Praeses, *diff. de morbis foetuum in utero materno*, eaque ratione pariter pusillus & debilis reddi partus. Excelsiores inprimis alii omnes fieri observantur, qui, in lucem cum prodeunt, sani sunt & corporis debita ac firma mole gaudent, quo multum confert diatae & vitae genus matris, tempore graviditatis observatum, quae, si meri potui indulget & copiam partium volatilium sanguini infert, ejusdem quoque indolis sanguinem foetui communicat, nutritioni & elongationi flaminum minus idoneum, sed maxime insensum. Hinc vulgari observatione constat magnatum filiis haud tantum esse corporis robur ac firmitatem, ac quidem rusticorum proli ineat; *tam corruptis enim primordiis natus infans*, ut verbis utar modo laudati CONRINGII, *quomodo efferat corpus in decoram aliquam prolixitatem?*

§. XII.

Nativitatis tempus, uti ad longævitatē, ita quoque ad corporis celsitudinem facit. Quippe VERULAMIO *Hist. vit. & mort. p. 273.* teste, diuturnitas aetatis & amplitudo membrorum, habent nonnihil commune. Quemadmodum omnes partus, qui debitum nascendi tempus anteverunt, minus vivaces atque breviores aetate observantur; sic eorum quoque corpora longe imbecilliora sunt, & in decentem formam haud eriguntur.

§. XIII.

Neque minus modo in augenda, modo minuenda corporis celsitudine, morbis quoque suae partes sunt; ita ut liberi eo tempore, quo in longitudinem succrescere corpus solet, morbis detenti, quibus materia nutritionis depravatur, absumitur nec rite distribuitur, plerumque haud debitam *ἀρμὴν* suae longitudinis nanciscantur. Hinc rachitici infantes rarissime justam staturam attingunt, sed pusiones manent. Accidit tamen nonnunquam, ut superato morbo, & cum eo simul sublatis impedimentis, quae incremento corporis ante obstabant, corpus postea insigniter augeat, ut in Germanorum quoque proverbium abierit, dicentium: *die Kranchheit habe ihn ausgereckt*. Sic SPIGELIUS *de humani corp. fabrica l. I. c. 7.* refert, nonnullos febrem quartanam in giganteam molem erexisse. Et idem de Antonio quodam

quodam Antwerpiensi testatur, quod cum pusillus & debilis admodum in lucem prodiisset, illico puer, ex morbo in maximum gigantem evaserit.

§. XIV.

Insigne autem præ modo memoratis circumstantiis momentum adfert ad corporis maiorem molem, educationis ratio, in tenera ætate observata. Quando enim primam infantiae periodum repetimus, tenellorum corporum nutritionem nonnisi lacti tribuendam esse patet, quod, si vel qualitate adversum, vel nimis parcum præbetur, ipsi augmento ac firmitudini obex ponitur, insequenti etiam ætate difficulter superandus: ac vicissim, si primum hoc alimentum, & amica crasi, & liberali proventu, debito incremento opportune servit, ad maiorem partium extensionem & lætorem accessionem firmum expeditumque sternitur fundamentum. Patet id luculenter admodum Helvetiorum & Westphalorum exemplo, quippe qui, dum non ex conductarum nutricum, sed matrum uberibus, accommodum intemeratumque hauriunt nutrimentum, ac per duos plerumque & quod excurrit annos mammas sugunt, tam celsa, vasta ac robusta nanciscuntur corpora, ut confines gentes longe superent.

§. XV.

Porro etiam corpora, quæ in tenera ætate haud ita curiose curantur, plerumque celsiora fieri observantur illis, quorum cultui matres plerumque magis quam par est student, quem perversum morem jam olim suo tempore Comicus sale perfricuit, testanturque quotidiana exempla, thoracis inconvenienti constrictione, inprimis etiam fasciarum in cunis, informia pectora gibbosaque corpora fieri, qua de re merito consulendus HILDANUS *Obs. Chirurg.* Et observatione omnino dignum videtur, quod filiae inprimis optimatum & magnatum, quæ curam corporis præ reliquis operose gerunt, hypochondriaque constringunt, ut graciles videantur, plerumque cachecticae sint, & istam magnitudinem minime attingant, quæ in hominibus, neglecto cultu tantum non inter pecora & ruri educatis, reperitur.

§. XVI.

Pari ratione ex alimentorum vitio corporis proceritati & firmitudini alia adhuc injicitur remora. Qualitas enim ciborum insignes in augmentatione exserit vires, ita prorsus, ut quo simpliciores sint cibi, eo non tantum sanitati convenientiores observentur, sed etiam ad incrementum corporis magis accommodati. Veteres Germani vitem ignorabant, simplicique victu contenti erant, quem Alpinis incolis hodie adhuc solennem esse constat, quippe qui lacte caseoque victitantes, firma non tantum, sed procerà quoque corpora alunt; conf. WAGNER in *hist. naturali Helvetiae* p. 143. Sic perversus hac nostra ætate invaluit mos, ut tenelli infantes, tantum non ab uberibus remoti, convivii adhibeantur, ac vini potui aromatibusque quibus cibi condiuntur adsuescere pelliciantur. Quantam vero noxam vini usus tenello corpori adferat & quomodo incrementum impediat, pluribus infra explicabimus, & vel simiarum exemplum docere potest, de quibus Veteres jam tum memoriae prodiderunt, eas minus crescere meri potui adsuetas. Nec ignota ratio educationis, quam Itali servant in catellis Bononiensibus, qui ob singularem parvitatem habentur in deliciis, dum horum abdomen vinculis constringere sæpiusque vinum adustum iis propinare, exterius quoque corpora sæpius vini spiritu madefacere solent, ne in nimiam molem corpora extendantur. Sinensium quoque foemina-

Frid. Hoffmanni Oper. Supplem. II.

rum exemplum probat, posse constrictione partium incrementum impediri; quippe quæ, pedum extrema calceis ita coercere norunt, ut longitudinem pollicis viri robusti in adultis vix excedant, cujus testimonia exstant in gazophylacio regio rerum naturalium & curiosarum Berolinensi.

§. XVII.

Agile præterea vitæ genus, si nimiam exercitacionem exceperis, & liberior aura, maiorem corporis longitudinem conciliant, denegatam illis, qui vitam agunt magis sedentariam. Hinc litteris operam dantes lucubrationibusque dediti uti vitia digestionis & nutritionis incurrunt, ita ratione incrementi ceteris quoque longe sunt inferiores. Præproperea non minus in junioribus annis Venus, non solum robori viribusque corporis multum detrahit, sed etiam decrementi, quod corpus in prolixitate patitur, causa existit primaria. De priscis enim Germanis testimonium præbet C. J. CÆSAR *de bello Gallico* L. VI. *Qui diutissime, inquit, impuberes permanserunt, maximam inter suos ferunt laudem. Hoc ali staturam, ali hoc vires, nervosque confirmari putant. Intra annum vera vigesimum feminae notitiam habuisse, in turpissimis habent rebus.* Ut reliqua omnia & hæc modo memorata paucis complectamur, sciendum est: constanti observatione omnia ea obesse incremento corporis, quæ fibras rigidas reddunt, debitamque flexilitatem citius solito tollunt. Denique quibus debitum alimentum corporis subtrahitur, ut in pauperculis observatur, ii pusiones quoque fieri solent; cum ad debitum augmentum liberalis omnino victus requiratur: hinc infantes appetentiores adultis esse, & facilius largius nutrimentum, quod in ipsam substantiam corporis infumitur, tolerare solent.

§. XVIII.

Haud incongruum quoque existimamus hic notare, quæ reliqua celsitudine superant corpora, haud eandem semper servare in partibus dimensionis ac proportionis rationem. Ita sæpe totum corpus ab axillis ad talos usque, magnitudine cum aliis minoris staturæ convenit, saltem cervix collumque eminere solent; in aliis vicissim thorax altior; in aliis femora & crura prolixiora esse solent, reliquis partibus ordinariam dimensionem servantibus. Rarum vero, etsi maxime decorum est, si procerà corpora omnium partium obtinent symmetriam. Hinc est, quod ex istiusmodi æqualitate ac symmetria, de futura corporis longitudine in crescentibus ferri soleat iudicium. Ita ex manus, digitorumque, addo & crurum longitudine, quale incrementum sperandum sit, augurantur. HIPPOCRATES *VI. Epidem. I. edit. Lind.* ex cervice conjecturam sumit, inquit: *si validam cervicem habet, robusti erunt, tum quoad alia membra, tum ossibus.* Verum, cum, ut modo meminimus, partes haud semper inter se proportionatæ existant; ita ex unius longitudine haud securum ac genuinum de reliquis promi poterit iudicium. Nihilò secius tamen aliqua huic ratiocinio vis inest; quippe cum partes corporis æqualiter augeantur, manibus jam perfectis & sua mole constantibus, reliquum quoque corpus haud amplius crescere, hominemque illum, jam ætatem incremento dicatam, prætergressum esse, vanum minime erit iudicium.

§. XIX.

Perspectis sic circumstantiis, quibus corpora magnitudine inter se differre diximus; ordo nunc nos ducit ad ea, quæ in proceritate eminentibus corporibus per anatomen detegere licet. Ab ossium itaque longitudine, cum basis sint totius corporis, ejus quoque

R

altitudo

altitudo participat. Auctior enim vertebrarum numerus, nunc in collo, nunc in thorace, nonnunquam fuit observatus, de quibus consulantur Anatomici. Memorat RUYSCH *Catalog. rar. p. 153.* ossis fincipitis ex gigante, quod tantæ magnitudinis fuit, ut integro hominis capiti pro galea inservire potuerit. Habent vero & reliqua interna viscera dimensionis rationem majorem. Ita idem RUYSCH *Thef. IX. n. 62. Lit. A. B.* meminit stomachi & portionis intestini coli ex gigantea foemina admirandæ magnitudinis; dum tam immensæ capacitatis hoc intestinum esse refert, ut foetus humanus septem mensium in eo contineri possit. Et hæc sunt, quæ quotidiana observatio de incrementi corporei varietate nobis suggerit, progressum nunc facimus ad causas.

C A P U T II.

De Causis incrementi corporei ordinariis & proceritatis singularis in specie.

§. I.

CORPUS humanum ex duplici genere partium constare, solidis & fluidis, neminem latet; at vero haud statim intellectui obvium est, discrimen quod solida inter & fluida intercedit. Solida nempe nostri corporis, a fluidis nonnisi quiete, cohesione & figura differre, & omni vitæ momento solida in fluida mutari, & ex fluidis rursus fieri solida, prolixius demonstrari posset, siquidem temporis, qua premimur angustia, id pateretur. Ultima enim & minima solida nostri corporis, cum fluidis ejusdem naturæ esse debere, ex sequentibus magis clarum & perspicuum erit.

§. II.

Massa vero fluidorum in tantum superat molem solidorum, ut secundum calculum J. KEIL *in the account of animal secretion* liquidorum sint CXX. libræ, si corpus in totum ponderat CLX. Sic Clariss. RUYSCH *Epist. problem. V. p. 18.* ostendit injectionibus suis, membranas, quæ pro meris solidis olim habebantur, vascula innumerabilia continere, licet albicantes conspiciantur. Ipsa quoque ossa, licet omnium partium solidissima sint, tamen liquido omni, quod in interstitiis & vasculis eorum hospitatur, orbata, in exiguum terræ molem fatiscunt.

§. III.

Cum vero continuo motus in corpore, tum solidorum in liquida, tum liquidorum in solida vigeant, secretiones quoque & excretiones humorum semper fiant, uti SANCTORIUS *in Medicina statica*, ostendit; necessario humores corporis nostri disperguntur & imminuuntur, nutritionisque inde patet necessitas. Corpora enim nostra cistis inclusa, intra longum annorum spatium, non tantum decrementum molis patiuntur, quantum in corpore ægro non nutrito, intra paucillum temporis observatur. Etiam si vero de liquidis corporis nostri res pateat; de solidis tamen partibus idem primo intuitu haud adeo clarum est. Quis autem, quæso, est, qui ignoret, superficiem nostri corporis, aëri expositam, continuo desquamari & deteri; & idem quoque fieri in partibus internis, amplius dubitare potest nemo, qui solidorum nostri corporis structuram in minimis considerat. Omnem enim corporis nostri compagem ex meris vasculis, majora ex minoribus, & hæc rursus ex

minimis, omnem oculorum aciem, quacunque arte adjutam, effugientibus, constare, docent injectiones, vulnera minima, microscopia, consideratio corporis nostri in ipso ortu, comparatio minimorum insectorum, suis omnibus vasis instructorum, incredibiliter licet parvis. Hæc qui secum serio expendit, naturamque inde vasculorum minimorum colligit, quæ tomentosa & pulposa cl. RUYSCHIUS in scriptis suis ubique figurat, comparatque cum his perennem humorum circuitum, necessario consumi & atteri ipsa solida debere, perspiciet. Quod si enim durissima marmora & saxa continuo guttularum aquearum stillicidio consumi & excavari possunt, quidni & extremæ partes vasculorum mollissimæ, a motu & allapsu continuo liquidi per illa circulantis, abripiuntur? Nam ne quid de statu præternaturali memorem, ubi ossa ipsa carie consumi, vel mollia instar gelatinæ fieri constat, lenissimo ignis motu in machina Papi-niana eadem emolliri & friabilia reddi possunt. Preparatio quoque cornu cervi, quod maximam analogiam cum ossibus nostris ratione duritiei habet, philosophici ut vocant, idem ostendit, ubi lenissimo motu, subtilissimoque aquosarum particularum in alembicum adscensu, partes ita dividi & mollescere solent, ut levissimo attritu diffuant. Plura addere superfedemus in re per se clara, quæ, licet sensibus non pateat, tamen ex dictis rationis acie omnino derivari potest ac elici.

§. IV.

Quod si igitur tantum restituitur tam in solidis quam fluidis, quantum adsumtum fuit, simpliciter tantum nutritur corpus, & actio hæc nutritio vocatur; si vero moli corporeæ plus accedit, quam perditum fuit, augmentari corpus dicitur, & actio hæc augmentatio appellatur. Hinc augmentationem contingere posse in partibus fluidis æque ac solidis patet, quæ augmentatio partium fluidarum, corpus potissimum in latitudinem & crassitiem majorem extendere solet, diciturque alias repletio & nutritio spuria; partium vero solidarum augmentum, extensionem corporis in longitudinem respicit. Ex his nutritionem ab augmentatione, nonnisi partium inde conflatarum figura & magnitudine differre, constat, easdemque habere causas.

§. V.

Cum itaque de incremento corporis nobis sermo sit, opus est, præ reliquis considerare nutritionem partium solidarum, & quas ob causas earundem extensio in longitudinem porrigatur? Fatemur ingenuè, arduum atque implicitum hoc maxime esse negotium, multumque habere difficultatis, quæ nondum plenarie dilui potest ac superari, ex certis tamen principiis, quod palmarium est circa nutritionis modum, deduci & evinci potest: nutritionem nempe ita, nec aliter, contingere posse. In superiori §. III. jam mentionem de structura minimorum corporis nostri injecimus, & ostendimus, ultra imaginationem parva vascula existere, ut cl. HOCKIUS existimet illam vasculorum divisionem in infinitum procedere; finem tamen iis omnino ratio imperat. Vascula autem cum consent ex membrana in orbem convoluta, etiam minimum vasculum ex istiusmodi membrana conflatum esse debet, quæ membrana rursus ex fibris solidis, hæc ex fibrillis componuntur, ita, ut ultimato omnes partes ex meris fibris coagmentatas esse pateat. Nutritio itaque solidorum cum contingat in fibris, considerata venit natura & structura fibræ ultimæ, quo de nutritionis modo postea sine errore judicare possimus.

§. VI.

§. VI.

Fibra ultima, quemadmodum ex ejus analysi patet, tam naturali, quam artificiali, est corpus solidum, tenue & simplex. Cum vero nihil amplius de ejus structura sensibus pateat, juvat expendere proprietates ejus, & ex his ratiocinii filo ad ejus structuram intimiorem descendere. Proprietas autem primaria fibræ omnis est flexilitas, nunc major, nunc minor, a qua elasticitas pendet, cujus contrarium rigiditas existit. Jam flexilitas est ejusmodi partium minimarum dispositio atque inter se connectio, qua corpus situm in quo est mutare, & in pristinum rursus se restituere potest, sine ulla destructione. Hac posita flexilitatis idea, corpus minimum, hac proprietate gaudens, partes elementares habere debet in punctis quibusdam coherentes, in nonnullis vero separatas: & hæ partes quidem debent esse minimæ, quandoquidem maximæ levi inflexione rumpuntur, & sic semper metus rupturæ esset, cum arteriarum flexio & extensio, unaquaque cordis systole nempe, vel millies una hora contingat. Ne autem corporis continuïtas in flexione solvatur, debet necessario ex duplici fibrarum serie eadem compingi, quæ ita sibi incumbant, ut nonnisi in extremitatibus se invicem contingant, vacuæque interstitia ab altera parte relicta tegant. Hunc partium in flexibilibus corporibus situm proponit cl. BELLINUS, *de villo contractili*, utiturque exemplo fabrorum murariorum, qui in exstruendis muris lateres ita ordinant, ut in unaquaque serie, singuli lateres secant bifariam laterem alterius seriei. Quare cum hac structura omni flexili corpori in genere competat, etiam de fibra, quatenus flexilis, prædicari debet. conf. SANTORINI *Opusc. med. de structura & motu fibræ* §. 15. 16.

§. VII.

Ad incrementum vero corporis in longitudinem accuratius considerandum; omnino necessarium est, extensionis modum & rationem in fibra minima expendere. Hæc extensionis idea involvit illam, quam modo de flexibilitate dedimus; ita, ut durissima corpora, quemadmodum ligna, lapides, ossa, ubi non tantum partes minimæ componentes arctissime se contingunt, in qua arcta cohæsione unice soliditatis ratio continetur, sed strata quoque fibrarum dense invicem compinguntur, uti flexionis, ita extensionis quoque inhabiles sint; eo quod levissimo flexu & incurvatione eorum continuïtas solvitur & diffinguntur. Simulac autem partes ita disponuntur, ut laxius invicem cohæreant vacuæque interstitia relinquunt, in quæ partes extensione facta cedere possint, plane mutatur natura, & ex duris minusque flexibilibus, flexilia molliorque redduntur corpora. Apparet hoc ipsum vulgari experimento in glutino, quod ex corio & ossibus præparatur, quippe quod exsiccatum, quoad omnem sui ambitum in adductius spatium coit & longe minorem molem exhibet; affusa vero aqua mollius redditum, non tantum majorem molem secundum omnes dimensiones ostendit, verum etiam extensile & flexile fit, ac partes quæ mere terrestres arctissimeque coherentes videbantur, in tam minimas dividi possunt, ut pro sufficienti copia partium aquosarum, quibus veluti totidem cuneis terrestres diffinguntur, ex solido corpore mere fluidum, saltem quoad sensum, reddatur.

§. VIII.

Fibra igitur dum in longitudinem extenditur, magnitudo ejus secundum lineam rectam augetur, *Frid. Hoffmanni Oper. Supplem. II.*

unde sequitur, quod partes coherentes magis ab invicem debeant divelli & majora vacua relinquere spatia. Strata vero fibrarum arctius accedunt, diameter minuitur, idque in omni parte corporis contingit, siue fibra sit, siue vasculum. Ad extensionem autem requiritur non tantum subjectum ita constitutum, ut modo diximus, sed etiam vis, quæ resistantiam a corpore extensili natam superet: non tamen nimia, sed proportionata, debet esse hæc vis resistantiam superans, alias solutio fit continui. Nam si eousque distenduntur corpora, ut strata fibrarum sibi incumbentia a contactu inferiorum plane divellantur, fit ruptura & continuïtas perit; ideoque terminus distensionis & elongationis in ratione punctorum contactus continetur.

§. IX.

In corpore nostro vasa continuo humore per illa fluente distenduntur, cum renisu tamen partium minimarum, præcipue in extremis, dum ex lato fluunt in angustius; quæ tamen distensio, in quantum renisum superat, in tantum vasa in longitudinem distendit, & cum hæc assidue repetatur, etiam vasa hæc minima sensim & fere insensibiliter producentur. Quum vero extensione ista partes minimæ vascula constituentes valde a se mutuo divellantur, prout (§. VIII.) ostendimus: requiritur utique, ut in vacuis istis interstitiis novæ partes adaptentur & quasi cunei intrudantur, tum ut hæc extensio longius prorogari possit punctaque contactus augeantur, (§. VII.) tum quoque, ut pars ita extensa in eodem maneat situ, nec superata vi distrahente, redeat in contactum pristinum. Habent enim partes minimæ fibrarum constituentes, semper nisum ad mutuum contactum, id quod patet ex discissis vasculis, quorum extrema coeunt, suæque longitudinis axin minuunt, ut etiam ex BORELLI observatione, in mortuis arteriæ adhuc plenæ, parietum contractione, sensim fiant inanitæ, quæ vis vocatur contractilis, alio quoque nomine elasticitas.

§. X.

Maximam porro ac prope incredibilem esse vim succi nutritii, in partes vacuas successive impulsæ, ad superandas maximas resistantias, comperimus in plantis, quarum tenellæ radices, fissuris saxorum magni ponderis infixæ, paulatim & insensibiliter crescentes, fissuram, non obstante maxima saxorum soliditate ac mole, insigniter augent; quo exemplo Celeb. BERGER *de natura humana* p. 174. hanc materiam eleganter illustrat, conf. BORELLUM *de vi percussione* & BAGLIVUM *de fibra motrice*, qui, quanta cordi & fibris motricibus insit potestas, pluribus experimentis & rationibus evicerunt. Quamdiu itaque vires cordis majores sunt viribus aggregatis omnium vasorum, quæ renituntur suæ extensioni, tamdiu homo crescit, & hæc minima vascula versus omne punctum magis extenduntur: si autem distensio in vasis majoribus superat resistantiam, quæ partim ex distensione liquidi per vasa minora, hæc majora constituentia, partim a contractione fibrarum propria nascitur, illorum diameter minuitur, latera proximius accedunt tandemque concresecunt. Fibræ igitur vasorum majorum fiunt crassiores, puncta contactus augentur in minimis, hinc major soliditas & resistantia, quæ, si viribus cordis siue impulsus est æqualis, homo consistit in statu, si major, fit corporis decrementum.

§. XI.

Jam tum in antecedentibus diximus, ossium extensionem totius corporis magnitudinem secum ferre; Anatome vero docet, eandem iis, quæ mollioribus

partibus esse structuram, nempe ex fibris & vasis mere compositam, quod ex eorum constitutione in embryonibus patet, ubi membranarum instar tenuia sunt, deinde in cartilaginem, tandem in soliditatem ac firmitatem degenerant. Hinc nullum dubium est, quin pari ratione ac reliquæ partes augeantur, & successive tandem solennem duritiem induant, eadem prorsus ratione, ac in partibus mollioribus accidit, & qua tendines, ligamenta, cartilagines, vasa quoque majora, in senibus ossilem naturam nanciscuntur. Ipsa denique analysi, qua apparet, illa ex lamellis, instar ceparum sibi invicem incumbentibus, constare, evincit, pari ratione, ut in fine §. X. dictum, concrevisse, conf. GAGLIARDI *de structur. ossium*. Ferruminatio quoque ossium fracturæ idem docet; primo enim tenuis mucus se ostendit, qui in membranam, tendinem, callum, ipsum denique os transit, quare in infantibus & ea ætate, qua longitudinis accessio fit, facilius eadem flecti, quam frangi, contingit.

§. XII.

Nolumus nunc in id inquirere: an aliam materiam nutritionis & elongationis postulent ossa, aliam aliæ partes, & qualis illa esse debeat, quam figuram assumere in constituendis partibus minimis? an sanguis, serum, succus nerveus aut lymphæ proxima nutritionis materies? an fibra ultima sit nerveæ profapiæ? & hujusmodi similia; eo quod ad excutienda pro dignitate hæc omnia, majus otium, quam quidem nunc nobis superest, requiritur, & labor hic terminos dissertationis longius superat. Id saltem ex allatis patere & præsentis scopo nostro sufficere arbitror; fibram nempe ultimam omnium partium, sive carneæ sint, sive ossile, ejusdem esse naturæ, partesque elementares quoque homogeneas esse; hoc enim corporis ortus & interitus, ratio & experimenta suadent. Docuit scilicet observationibus suis de ovo incubato, supra omnem laudem positus MARCELLUS MALPIGHIVS, quod ex eodem ovicolligamento, intra XXIII. dies formentur diversæ naturæ partes, ossa nempe, rostrum, pedes, ungues, plumæ, quæ solida, cum vix formari incipiunt, levissimo contactu instar tenuis muci diffuunt. Sic RUYSCH *Thef. anat. VI. p. 32.* de hominum quoque embryonibus testatur, quod ipsi oblata fuerint istiusmodi futuri fœtus rudimenta, quæ sub manibus liquefacta & rursus in nihilum redacta sint. Ergo ex eodem liquido diversissimæ struuntur partes, quæ & quotidie ex eodem cibo nutriuntur, ac augentur. Idem testatur quoque vegetationis plantarum historia; quippe ex uno eodemque terræ succo, solo motu, diversæ figuræ, saporis odorisque figurantur plantæ; in una eademque planta ejusdem succi partes quædam abeunt in caulem, aliæ in fructus, in flores & folia aliæ. Ipsa resolutio naturalis corporum nihil aliud probat; partes enim corporis omnes, cujuscunque naturæ fuerint, in meros cineres fatiscunt. Porro si abluendo & macerando ex partium diversarum vasis fluidum elicimus, tamen eadem massæ solidæ, albæ, per omnia sibi similes, supersunt. Ex his & pluribus aliis, tam rationibus, quam experimentis, quæ hic consulto silentio præterimus, manifestum est, solida corporis nostri inter se non substantia, sed majori vel minori compactione, sive densitate, & fluido transeunte diverso, differre.

§. XIII.

Superest, postquam evictum dedimus, eandem nutritionis materiam deferri ad partes æque duriores ac molles, ut & indolem sive dotes materiæ nutrientis ostendamus, parum de reliquo solliciti, sive

illam serum, sive lympham, sive succum nerveum appellare velis, & huic negotio vel vasa lymphatica, vel nervosa, destinare. Hæc dotes ex nullis fontibus melius innotescunt, quam ex indole vasorum & canalium, per quos, liquidum nutriendum vehi debet, & minimarum partium quæ nutriri debent. Explicuimus jam in superioribus, vascula corporis nostri ultra imaginationem minima dari (§. 3.) & in his minimis vasculis & fibris, quibus illa coagmentantur, nutritionem fieri (§. 4.); sponte hinc fluit, humorum & nutritionis materiam, quæ vascula hæc perlabitur, esse debere subtilissimam, limpidissimam, & in minimas particulas divisam; quare Illustr. BERGER *de natura hum. p. 172.* parum recto deerrasse existimat HERACLITUM atque ASCLEPIADEM, dum per vapores nutritionem fieri putarunt. Cum vero partes minimæ fibrarum ultimarum sint mere terrestres, mucosæ, liquidum nutriendum iisdem quoque partibus debet satis esse onustum: quibus enim constant corpora, iisdem quoque nutriuntur & conservantur, & sola aqua, quamvis subtilissimum liquidum, tantum abest ut nutriat, ut potius ejus potus pro corporis extenuatione commendetur. Quilibet igitur cui indoles humorum corporis nostri perspecta est, ex his facile determinare poterit, cuinam ex notis humoribus corporis nostri dictæ qualitates omnium optime conveniant.

§. XIV.

Ut autem in compendium contrahamus, quæ modo attulimus, & de quibus ostendimus, esse necessaria, tum ad nutritionem, tum quoque ad augmentationem: ea prius recensebimus, quæ ad simplicem nutritionem requiruntur, adjicientes postea, quæ augmentatio in specie exigere videtur, utpote nutritio, ut fieri potest sine augmentatione, ita hæc nunquam sine nutritione, uti ex differentia quam (§. 4.) adduximus patet. Ut igitur nutritio fiat, debet I) in fibra nutrienda esse locus, a perdita solidi particula relictus. (§. 6.) II) in fluido particula, mole, figura & natura, cum parte nutrienda conveniens. (§. 11.) denique III) vis adesse debet, quæ particulam alibilem loco illi intrudat vel impingat, (§. 8.) uti hæc nervosè recenset, magnis in artem medicam meritis Clariss. Vir BOERHAAVE in *Instit. med.* §. 445. Ad augmentationem, præter memorata, porro requiritur (a) fibra extensionis capax, habens nempe partes minimas, laxè inter se coherentes (§. 7.) (b) Vires circulantes fortiores, quæ superent resistantiam partium harum minimarum (§. 8.).

§. XV.

Hæc requisita junctim sumpta constituunt causam proximam nutritionis, ex qua facile rationes reddi possunt eorum phenomenorum, quæ (cap. I.) attulimus. Libet easdem nunc, qua fieri potest brevitate, subjungere, una opera simul causas remotiores, quas hæc proxima supponit, indicando. Laxa itaque partium minimarum cohesio in fibra nutrienda requiritur, alias nec locum dare particulis nutrientibus, nec cedere impulsui earundem potest; ut autem laxa atque flexilis fibra conservetur, debent partes ejus elementares non tantum esse minimæ, sed semper interponi liquidum aliquod, quod concretionem impediatur partesque & vascula minima distenta conservet, illa vero laxitas non nimia esse debet, sed ad vires circulantes proportionata, alias enim destruerentur fibræ illæ minimæ. Ut porro fluidum (§. 14. n. II.) obtineat qualitates (§. 13.) indicatas, atque per minima vascula transire possit, requiruntur non tantum alimenta debita, verum etiam ut actio-

actiones viscerum omnium, quibus hæc præparari, subigi & in inquilinum humorem converti debent, integræ sint & salvæ.

§. XVI.

Rationes nunc daturi de differentia, quæ secundum varias circumstantias in augmentatione corporis ejusque proceritate observatur, repetere ex prioribus necessarium erit: tandiu fieri augmentationem, quamdiu vires impetus resistentiarum vires superant; & quoniam in vasis a corde proximis major semper impetus, in extremis remissior est, ratio patet, quare corpus, quo propius suæ origini, eo plus extendatur. (v. Cap. I. §. 4. 5.) Adest præterea in ista ætate fibrarum laxitas & laudabilis succus nutrens, ob viscerum vasorumque integritatem, quibus secretiones præparationesque humorum laudabiles fiunt. Quo igitur diutius hæc conservantur & majori gradu adsunt, eo corpus reddunt magis excellum. Contra ea eadem causæ (§. II.) indicatæ, quæ in viris consistentis ætatis & senibus augmentationi corporis ac nutritioni obicem ponunt, si citius solito in prima ætate contingunt, efficiunt, ut sui incrementi debitam *ἀκμὴν* haud assequatur corpus. Defectus autem omnis debiti incrementi, est in ratione auctæ nimis ista ætate resistentiæ vasorum minimorum. Resistencia enim in vasis aucta humores impulsu retro pelluntur, vasa angustantur, clauduntur plane; concrescunt tandem, fit fortior fibra, momentum idem resistentiæ magis magisque augens, usque dum momentum impulsus impar existat. Nascitur resistentia major in minimis, tum a fortioribus magisque densis & compactioribus redditis fibris, (flexilitas quippe pendet a multiplicatis vasis, iisdemque occlusis cessat, ac rigiditas adest;) tum quoque a momento impulsus nimis languido; (quantum enim hoc minuitur, tantum intenditur momentum resistentiæ;) denique a pondere aëris incumbente.

§. XVII.

Accidit major fibrarum condensatio, ob plenarium defectum liquidi nutrientis, in fame laborantibus & pauperculis, hinc ratio pendet ejus, quod §. 15. Cap. I. in fine notavimus. Hic defectus partium alibilium quoque oritur ex vitio vasorum recipientium, cum obstructa vel distorta sunt, ut in luxatione partium sæpius contingit, vel a constrictione nimia infantum cum fasciis, vel thoracis in magis adolescentibus, qua inconvenienti ligatura tenellæ adhuc partes distorquentur & debita earundem extensio impeditur. Compressis in partibus quibusdam sic vasculis minimis, eadem, qua sunt mole, persistunt, imo concrescunt magis brevioresque juxta omnem dimensionem redduntur, reliquis interea partibus magis auctis; hinc plane videntur annihilari, quod in corporibus vertebrarum observavit RUYSCH *Obs. Chirurg.* 67. qui & coalitum ossium tali ratione notavit *ibid.* it. *de valvulis C. 4. obs.* 8. Quomodo vero ob defectum liquidi nutrientis vasorum latera coalescere possint, docent urachus, venæ & arteria umbilicalis, quæ in fortissima ligamenta degenerant. Ex his ratio ejus, quod Cap. I. §. 8. & 16. diximus, desumenda.

§. XVIII.

Deinceps alia ratione fibræ rigiditas inducitur vasque concrescunt, scilicet 2) ob qualitatem alimentorum nutrientium vitiatam; vel quod hæc ita sint constituta, ut viribus ingenerandis inservire ac impendi nequeant, vel quod etiam hæc nimis sint languidæ, visceraque chylopoëia & secretoria non debite disposita. Hinc enim evenit, ut chylus non

Frid. Hoffmanni Oper. Supplem. II.

debite attenuatus & in minima divisus partes constituentes obtineat crudas nimis ac rudes, majoresque diametro horum vasorum, unde inania illa manent, & pari, ut in præcedentibus dictum, ratione coguntur. Deinde possunt etiam, licet ad minima ipsa alimenta pertingant, inepta tamen esse assimilationi, partesque habere, neque mole, neque figura, cum nutriendis partibus convenientes, hinc non cohærent & momento impulsus iterum expelluntur; partes vero fibrarum minimæ, deficientes sic quasi cuneo dividente, nituntur in cohæsiorem majorem §. II. Hinc in rachiticis deficit debita nutrimenti materies, nimiusque vini adusti potus, ut fibras constringit callosaque solida reddit & ventriculi digestionem depravat, ita humores quoque nimium cogit & ad coagulum pronos reddit. Nihil itaque pejus de nutritione & augmentatione meretur quam ejusmodi potus v. Cap. I. §. 13. 10. 11. in fine. Ipsæ etiam partes elementares, diffatis vel deficientibus quacunque ex causa liquidis illas comitantibus, ita jam in fluido inter se cohærere possunt, ut in minima vascula adactæ, ob nimiam cohæsiorem partium ad motum cum ineptæ sint, ibidem subsistant, & cum ipso vase in unum solidum corpus concrecant, id quod in laborantibus nimiumque exercitatis corporibus liquido constat, quorum serosa pars sanguinis ita compacta cernitur, ut levi motu gelatinæ instar coeat.

§. XIX.

Idem nimius motus (3) quoque fibras vasque condensat, uti (§. 16.) jam monuimus; hoc enim vasa in fluida, & hæc rursus in latera vasorum fortiori nisu agunt, partes mobiliiores & liquidiores fibras flexiles conservantes disperguntur, crassioribus relictis; lateribus etiam majorum vasorum sic magis expansis, minora, quæ hæc componunt vascula, suo liquido ista pressione continua orbantur, parietes eorundem coalescunt, arctior fit contactus, a quo major soliditas & robur pendent, qui contactus, per impulsus momentum fortius redditum, magis promovetur. Hinc debilis circulatio in pueris laxas & debiles fibras, fortior in adultis fortiores reddit, & in promptu quoque est ratio observationis, §. 8. Cap. I. quod terræ calidiores quoque brevioris staturæ alant incolas, qui in temperatioribus multo longiores sunt.

§. XX.

Quemadmodum in incremento corporis insignem varietatem affert varia motus circulatorii sanguinis conditio, ac inprimis nimius fibrarum resistentiam auget, ita quoque idem efficit motus ejusdem nimis segnis, quanquam dispari prorsus ratione, uti in fine §. 16. diximus. Deficiente enim vi applicante, licet partes nutritivæ adsint, tamen nec nutritio, multo minus augmentatio, fieri potest. Nimirum aut momentum impulsus adeo exiguum est, ut resistentia major, tum nulla sit nutritio; aut æquantur resistentiarum & impulsus momenta, tum nutritio contingit sine augmentatione, fibraque laxa & debilis manet, vi eorum quæ §. 9. attulimus. Hinc otiosis, foeminis, sedentariam vitam agentibus, laxitas fibrarum & corporis augmentum deficiens; it. in ægrotantibus ex diuturno morbo convalescentibus, venere in juvenilibus annis abutentibus, idem motus languet & incrementum deficit, v. Cap. I. §. 10. 13. Quamquam vero in tenellis infantibus, imo embryonibus, motus circularis valde debilis sit, tamen semper major in ratione resistentiæ, ob laxam admodum fibrarum compagem. Ob eundem nimis languentem motum nec isti assequuntur suæ longi-

tudinis debitum terminum, de quibus Cap. I. §. 11. 12. mentio facta est.

§. XXI.

Extensio quoque corporis plurimum variat pro diverso atmosphære pondere, a quo nunc augeri, nunc minui potest in minimis resistentia. Ita æstate calidissima, in aere nimis subtili & rarefacto, vires fere exsolvuntur, ob nimis imminutam resistentiam hinc natam dissipationem liquidissimorum & spirituosissimorum (ut ita loqui liceat) humorum corporis nostri; e contra tempestate frigida, aere existente graviore, a compressione superficiæ corporeæ, augetur resistentia fibræque fortiores fiunt. Hinc HIPPOCRATE jam teste, ventres hieme sunt calidiores; robustioraque corpora in septentrionalibus, quam meridionalibus plagis reperiuntur, v. Cap. I. §. 8. Ex his ibi allatæ observationis ratio patet, quod incolæ Alpium, ob pondus aeris ibi imminutum, experimentis barometro institutis comprobatur, per totam corporis extensionem in majorem molem crescant.

§. XXII.

De causis diversi incrementi in utero & extra uterum nunc adhuc pauca adjicere placet, & ex allatis principiis deducere. Notum est, quod Cap. I. §. 5. indicavimus, majorem esse rationem incrementi intra uterum, quam extra eundem; ita, ut homo in primo conceptu vix granum unum ponderans (Cap. I. §. 4.) intra XL. septimanas ad libras sex increseat, post exitum vero ex uteri claustris, per XXV. annos etsi fere ad ducentas libras perveniat, major tamen ratio incrementi in utero, quam extra eundem per totam ætatem. Nam granum ad 6. libras, sive 33960 grana, majorem rationem habet, quam 6. libræ habent ad 200. libras. Est autem flexilitas tum vasorum maxima, ob numerum vasculorum omnium copiosissimum, & humectationem a liquore amnii perpetuam; præterea liquidum nutriendum adest, subtilissimum jam tum præparatum, ita, ut hac quoque ex parte majus fiat impulsus momentum, quod a resistentia, quæ a partibus alimentosis adhuc minus divisis nascitur, alias infringi & minui solet. Patet igitur, cum requisita (§. 14. a. b.) majori gradu adsint intra uterum, quam extra eundem, majorem quoque ibi esse debere augmentationem; effectus enim semper sunt viribus causarum proportionatæ conf. §. 15.

§. XXIII.

Explicatis nunc incrementi corporei causis & modo, nec non diversitate, quæ secundum varias circumstantias observatur, ordo nunc nos duceret ad indicandas quoque causas, de admiranda & gigantea in nonnullis corporibus celsitudine: verum, cum illa corporis altitudo, eandem fibrarum extensionem, licet majorem, requirat, habebit quoque, ut idem effectus, easdem incrementi causas, licet majores. Itaque jam tum in antecedentibus de hac corporis prolixitate dedimus rationes; addendum his tantum est, quod causæ incrementi majores vires accipiant ab ipsis parentibus & inviolata gestatione in utero. Uti enim primus motus ibi incipit; ita eadem proportionem quoque postea per omnem ætatem perpetuatur. Latent etiam in ipsis flaminibus proceritatis incunabula, uti Cap. I. §. 9. jam notavimus; unde vero hæc flaminum singularis dispositio pendeat, libenter fatemur nos ignorare. Videmus idem in regno vegetabili, quod si ramulum ex arbore minoris altitudinis decerptum, in truncum majoris arbo-

ris inferamus, eundem tamen suam circumscriptam minorem altitudinem fervare, quamvis per arboris truncum idem alimenti genus excurrat. Præter modo memorata ad incrementum quoque majus plurimum facit, quo diutius illud continetur, quod in diuturna remotione & absentia impedimentorum, §. 17. 18. 19. 20. 21. indicatorum, positum est; ita ut ex his regulæ diæteticæ formari possint, quomodo generatio & educatio infantum comparata esse debeat, ut in longiorem & speciosiore formam corporis excrescant; quæ cum facili negotio ex dictis elici queant, easdem addere superfedemus.

CAPUT III.

De Proceritatis in Corpore effectibus.

§. I.

OMnes corporis nostri actiones a motu sanguinis humorumque reliquorum, perpetuo in orbem euntium, tanquam causa principali pendent. Quod autem hæc actio visceris alia est ratione effectus ab altera alterius visceris actione, inter alias causas diversitatis structuræ in minimis debetur. Canales enim diversæ diametri, diversusque eorundem positus & ordinatio ejusdem liquidi vitalis, motum in variis corporis visceribus ita modificant & mutant, ut ex uno sanguine diversi plane generis liquores secernantur. At enim vero structura non tantum minimorum corporis nostri suos habet effectus, sed quoque conformatio integrarum cavitarum & totius corporis habitus, prout nunc ita, nunc aliter se habet, nunc optime, nunc vitiose constitutus est, ita quoque actiones aliæ atque aliæ, sanæ modo ac morbosæ, inde oriuntur; id quod gibbosorum & eorum, qui obesitatis nimie vitio torpent, exempla docent. Hinc a proceris corporis habitu, varios pendere in actionibus naturalibus effectus, nemo mirari poterit.

§. II.

Effectus hi, qui in proceræ staturæ corporibus eorumque œconomia animali, a reliquis differentes observantur, oriuntur vel ab iisdem & communibus proceritatis quoque causis ante indicatis, vel a motu propter vasorum in longitudinem extensionem modificato, qui motus est vel liquidorum per vasa circulantium, vel solidorum per musculos varie motorum. Cum igitur, prout Cap. I. & II. jam ostendimus, omnes causæ eo conspirent, ut temperamentum corpori simul concilietur, aut sanguineum, aut sanguineo-melancholicum, nempe in solidis, partes magis laxiores, fibræ debiliores, nec tensæ, nec elasticæ nimium, deinde quoad partes fluidas, copia partium terrestrium & absentia particularum nimis volatiliū (vid. Cap. 2. §. 13. 14.) patet: eandem conditionem animalis œconomia, quæ dictis temperamentis convenit, & nostris esse debere, eosdem quoque effectus, qui pueris, infantibus omnibusque laxas fibras habentibus familiares sunt. Quæ cum ad satietatem in Recentiorum physiologiis explicata habeantur, nolumus ubivis obvia hic prolixius describere, intelligenda autem hæc sunt de isto tempore, quo corpus extensionis adhuc capax est. Convertimus igitur nos potius ad propriè sic dicendum effectum generalem extensionis fibrarum & vasorum, nempe motum inde diversimode

mode modificatum, tam liquidorum per canales vectorum, quam quoque solidorum.

§. III.

Effectus nimiae hujus in longitudinem extensionis, ex ipsa natura fibrarum, cum extensionis viribus comparata, elucet. Nam fibra quo magis tenditur, eo fit tenuior, (§. 10. in fine) quod quidem primo septenario non adeo animadvertitur, quippe infantes ob vasorum maximam copiam & succi nutritii abundantiam turgidi apparent; simulac vero numerus vasorum decrescit, copia nutritii succi imminuitur, ab ipsa hac fibrarum tensione graciles fiunt, tensis musculis instar membranarum ossibus affixis. Denique ab hac extensione valde angusta redduntur vascula minima, usque dum penitus concrescunt eorum latera, sanguinisque copia, cum omnis, præter excretiones naturales, in corporis nutrimentum absumatur, valde imminuitur, hinc pallor faciei oritur. Ex his binis causis accidit, ut cachectici appareant istiusmodi infantes, qui nimiam corporis extensionem experiuntur. Porro etiam hac extensione persistente, necessario magna copia liquidi nutrientis intra vasa vehi debet, omniaque vasa sanguinea distendi, quod quoque in ipsis contingit ossibus. Quoniam vero circa ossium extremitates, vasorum uberior copia periostium pertransit, evenit, ut ob vasa periostii nimium distenta ipsoque periostio distracto, dolor circa articulos excitetur, quod haud infrequens esse symptoma solet in pueris & juvenibus, inprimis ut genua doleant & tumeant a pabuli largioris affluxu, a quo etiam bubones excitantur, germanica voce *Wachs-Beulen* vocati.

§. IV.

Simulac vero sua corpori jam constet forma, nec istud extensionis ulterioris amplius capax est, motus sanguinis per vasa ob axin suae longitudinis varie mutatur; siquidem quo longius a principio motus distant, ob auctum resistantiarum numerum, eo magis infringitur impetus momentum. Est enim decrementum impetus in ratione multiplicata resistantiarum; resistantiae vero sunt in ratione longitudinis vasorum. Segnius sic in minimis vasis procedente motu, tenaciora & difficilius mobilia ibi subsistunt, in majoribus vasis secedunt ad latera, accumulatur, remoramque succedenti continuo sanguini præbent, & plurima sanitati pariunt incommoda; idque eo facilius accidit, si reliquæ causæ conspirant, vel otiosæ nimis, vel nimium agilis vitæ, quo utroque modo serum sanguinis redditur viscidum, glutinosum magis & ad stagnationes & concrectiones dispositum. Quæ inde mutationes in actionibus omnium viscerum oriantur, & ad quales morbos dispositio, facile peritus perspicit, & longum nimis foret hæc omnia prolixè deducere.

§. V.

Sed in motionibus quoque voluntariis musculorum suos patiuntur manes longioris formæ homines. Hoc ut eo facilius intelligatur, ex anatomicis repetendum est, muscolum omnem constare ventre carneo & binis extremis, sive tendinibus, quæ ut plurimum diversis affiguntur ossibus, & quorum alterum punctum fixum, alterum mobile dicitur. Quoniam igitur in musculis, præcipue extensoribus, locus virium, locus ponderis & hypomochlion concipi potest, natura quoque & proprietates vectis, in mechanicis explicatæ, hic locum habebunt, de quibus consule BORELLUM libro de motu animalium.

Eandem cum vecte comparisonem quoque instituit BAGLIVUS de fibra motrice p. 201. ubi musculos ossa movere existimat per vectem secundi generis, in qua hypomochlion prope potentiam positum est. Notum jam & demonstratum est in mechanicis, quod omne onus eo ponderosius fiat, quo remotius ab hypomochlio sustentetur; incrementum enim virium debet esse in ratione aucta distantiae & hypomochlio. Quodsi igitur in puncto musculi fixo collectam gravitatem ponderis totius vasis concipiamus, prope punctum mobile vero hypomochlion, pondus ossis movendi sane insigniter augebitur in longioribus ossibus, qui major ponderis ab hypomochlio distantia observatur. Ideo ad facilitandum motum quoque sapienter natura corpori de variis subsidiis prospexit. Sic in musculi motui femoris, utpote longissimi ossis, famulantes, eo breviores construxit, ut distantia ponderis a puncto fixo minuatur; sic patella in genu, ossa sesamoidea ad articulationes digitorum, manifesta hypomochlia sunt, quibus natura sublevare voluit vires motrices. Hinc istius effectus ratio patet, quod proceræ staturæ homines ad motum voluntarium inertes videamus, languidiusque artus movere, quam minoris staturæ homines, qui expeditius multo & celerius corpus agitare possunt. Facilius quoque illorum membris a leviori exercitatione languor obrepit, quoniam viribus majoribus ad motum indigent, earundemque jacturam hinc omnium primi sentiunt, quod in lassitudine & somno naturali quotidie observamus, ubi musculis collabescentibus & paralyticis factis, ponderis demum sensum percipimus, quem vigilantes non habuimus.

§. VI.

Ob easdem rationes §. 4. & 5. adductas contingit, ut vincula lacertique spinæ dorsæ, onus corporis erectum servare nequeant, inprimis quando ligamenta musculique laxitatis nimiae vitio laborant, circa incrementi ætatem inprimis, ossibus ceteroquin auctis & in altitudinem succrescentibus; hinc spina nutans curvatur, quæ deinde iisdem ligamentis magis firmis redditis, in isto positu persistit. Quare videre est, quod rarissime excelsæ staturæ homines erecto corpore incedant, sed semper corpus aliquatenus in primum flectant. Longe enim facilius anteriora versus spina incurvatur, quam versus posteriora, ubi processus hoc impediunt spinosi; unde accidit, ut gravitate ponderis superante musculorum vires, hoc cedat in locum, ubi minima invenitur resistantia, nempe anteriora versus. Debent enim musculi erectores, sive extensores dorsæ, superare non tantum vires flexorum, suarum antagonistarum, sed omnem quoque resistantiam, a partis pondere & gravitate natam.

§. VII.

Observamus præterea in istiusmodi hominibus ossa, inprimis tibiæ, interiora versus incurvata, quod ob nimiam inolem corporis, cui sustinendæ hæc ossa imparia sunt, accidit, inprimis si mollioribus adhuc iisdem existentibus, corpus nimium exerceatur. Ex mechanicis autem intelligitur, quare hæc inflexio in medio contingere debeat. Scilicet quum partes superiores gravitent in inferiores, & hæc rursus, sive paribus, sive imparibus viribus, resistant, maximus tamen impetus & vis omnis pressionis contingit in medio. Ex eadem ratione, & quod maxima distensionis vis in medio vasis contingit, intelligitur ortus & progressus soliditatis in ossibus, quæ in medio semper solidescere incipiunt.

§. VIII.

Pares, si non easdem, causas quoque habent Vari & Valgi toties in his hominibus observati. Ex osteogenia enim notum est, apophyses ossium omnium tardissime solidescere, & a corpore ossis solutas esse, vel laxae cum eodem cohaerentes, ipsamque patellam, longo post nativitatem tempore, adhuc cartilagineam observari. Quare cum debilibus adhuc articulis laxisque ligamentis, pondus totius corporis in incessu his partibus innititur, ad alterum latus modo interius, in variis, modo exterius, in valgis, crura inflectuntur, qua parte major est debilitas, & sic pedetentim aetate producta partes coalescunt: vid. M. A. SEVERINUM *de recondita abscessuum natura* p. 429. & RUYSCH *Advers. anat. Decade II.* p. 15. 16. Cuilibet curioso hujus rei exemplum prostat in eminentis staturae singulari & rarissimo sceleto, quod in illustri, Berolini quod floret, theatro anatomico regio, omnium conspectui expositum est.

§. IX.

Et haec sufficiant de proceritatis effectibus in medium attulisse. Coronidis loco adhuc meminisse placet curiosae observationis a cl. MARCO MARCI in *Miscell. nat. curios. Dec. I. A. I. obs. 79.* communicatae, ubi de viro quodam egeno Pragae degente refert, qui lucri causa prolem suam omnem a nativitate circa spinam dorso & articulos inunxerit unguento quodam exsiccante, ex pinguedine gliris, vespertilionis & talpae constante, & sic exsiccata medulla spinali & induratis ossibus, pygmaeos effecerit; simul quoque problema proponit, annon pari artificio quoque proceritatem procurare liceat, & hanc in rem exemplum adducit viri cujusdam, qui in juventute hectica correptus erat, postea inunctione continua spinae dorso & circa costas, in magnam proceritatem excrevit. Quod prognosin spectat, paucis adhuc monendum, esse qui proceros homines brevioris aetatis esse putant: ita CELSUS *Lib. II. cap. I. longa statura*, inquit, *ut in juventute decora est, sic matura senectute conficitur*, conf. etiam BARCHUSEN *collect. med. pract. p. 17.* HIPPOCRATES *S. III. Aph. 54.* Et BORELLUS *Obs. XLII.* refert puerum gigantem, intra XVIII. menses perfecti hominis magnitudinem attigisse, intra septimum tamen annum mortuum esse. His tamen non obstantibus B. de VERULAMIUS *hist. vit. & mort.* eos, qui successive, nec uno impetu, ad magnam corporis proceritatem pervenerunt, ceteris longeviores esse, ex propria observatione asserere nititur; quod ipsum itaque accuratiori adhuc experientiae commendandum esse putamus. Ceterum divino Numini, pro praestito nobis in hoc labore auxilio, maximas grates persolvimus.

NOBILISSIMO ET PRÆCLARE

DOCTO

DOMINO CANDIDATO

S. D. P.

FRIDERICUS HOFFMANNUS.

R Eddo Tibi, quod mihi tradidisti inaugurale specimen, de proceritate corporis, singulari prorsus, & minus huc usque a Medicis & Physicis cvo-

luto argumento. Quamvis enim vasta & incredibilis magnitudinis gigantum corpora, veterum, inprimis Poetarum, scripta, celebrarint, eorundemque inventa ingentia ossa postera aetas admirata sit: fuerunt tamen e posteris quam plurimi, qui priscorum fidem sublestat reddere & fabulas omnia sapere contenderunt, tantum abest, ut curatiori indagine ipsam rem excutere sibi sumserint. Quinimmo oppido multi, erronea & per manus quasi tradita opinione inducti, injurii admodum sunt in proceram staturam & ampliorum habitum, asserentes, in grandi & proluxa ejusmodi corporis mole, raram esse sapientiam & vires ad promte suscipiendos ac diutius sustinendos labores minus accommodas, sed potius dispositionem ad ingenandos graves varii generis morbos expeditam maxime & ipsi longaevitati infensam. Verum falsam esse universalem hanc assertionem experientia docet, qua multiplici historiarum fide constat, ipsos priscos Germanos, & potissimum omnes septentrionales populos, proceritatis laude inprimis conspicuos, & fortitudine, & bellicis, tantum non continuis, laboribus perferendis, ita excelluisse, ut illorum ne quidem aspectum confines ferre potuerint Galli, hi vero vicinis gentibus pulsas, patrios limites amplificaverint & quaquaversum colonias dimiserint. Hinc enim est, quod septentrio plerumque audiat vagina gentium, e qua conferta bellicosissimorum virorum, Gothorum inprimis, Vandalorum, Vinidorum, Sarmatarum & Normannorum agmina educta, non solum Germaniam & Hungariam bello devicerunt, sed etiam Italiam, Galliam atque Hispaniam armis emensa sunt, quinimmo ad Africae oras excurrerunt, & direptis obviiis gentibus, sedem sibi constituerunt. Fortitudo autem sine prudentia est nulla, & victricia semper signa, viribus mox elanguescunt, ubique circumferre, inauditum plane. Id quidem non negandum, celsa & magna ejusmodi corpora, ob remotas nimis a vitae fonte extremas partes, & longius hinc simulque acrius conficiendum sanguinis ascendentem regressum, morbis ex lentiori circuitu & stagnatione oriundis, ut polyposis in vasorum alveis concretionibus, phthisi, aliisque, ex facili patere, nonnunquam etiam agilitate ac virium diuturno robore, minus pollere, quam humiliora: ast, sicuti ipse corporis habitus, nunquam non tam ad sanitatem tuendam & vitam diutius extrahendam, quam constantem ipsius roboris vigorem, plurimum confert: ita neutiquam certe mirum, si excelsa quidem forma praeditus, sed fibris laxioribus, vasis exilibus, tendinibus ac nervis minus firmis instructus, eadem vitia eademque morbofa pathemata incurrat, quam quae ex caussario & pleno habitu in omnes aequae redundant, inprimis si ejusmodi vitae victusque ratio accesserit, qua maxime etiam generosi ad laborem ferendum remollescent ac effaeminantur. Quae quum ita sint, laudandum utique Tuum doctissime Dne. Candidate, institutum, quo eminentem corporis celsitudinem ad rationes medico-physicas revocare, atque ex solidis physico-mechanicis principiis, etiam subtilius paullo, evolvere laudabiliter annisus es. Et quia in exsequendo eo ita versatus es, ut legentem me eximia voluptate hoc Tuum schediasma affecerit, & lecturis luculentis singularis Tuae in doctrinis medicis scientiae documento esse possit: nolui limam, inserendo quicquam, vel expungendo, addere, sed totum Tibi una cum laude relinquere, quod Tuum est, vehementer peroptans, ut quamplurimos aequales habeas & amulos, qui veri & non emendicati audiant dissertationum suarum auctores. Nihil igitur superest, quam ut Tibi de egregiis his quos comprobasti profectibus, & novis quibus dignus ornaberis summis in medicina honoribus, ex animo gratuler, simulque ulterius faustissimos, fortunante

nante DEO, tam in ipsius artis exercitio, quam omnibus Tuis conatibus, successus, enixe apprecer, quo avita & patria illa virtus in Te quoque resplendescat, & WEISLANÆ gentis, veræ medicæ, gloria sic propagetur & magis magisque efflorescat. Vale. Scribebam in Fridericiana IX. Kalend. Februar. An. MDCCXXVI.

EXimium, quem artis salutaris alumni præfixum si bi habent scopum, tanti merito quisquis istiusmodi rerum æstimator faciet, quanti mortalium plerique vitæ, maxime sanæ, usuram æstimare solent. Solent autem tantum non omnia, quamvis carissima ac pretiosissima, dummodo vitæ conservationem, amissæve sanitatis restitutionem sperare ipsis licet, vilipendere ac cum hoc pretiosissimo omnium thesauro lubentissime commutare. Haud proletariam autem illum impendere operam oportet, qui in arduo hoc negotio digne versari & sine mentis macula huic mortalium voto opitulari cupit. Pessime enim omnium illi de afflictis corpore merentur, qui ad artis exercitium imparati, imprudentes & illois quasi manibus accedunt, qui indefessum sollicitumque studium fundamentorum omnium-

que disciplinarum, quæ eo ulla spectant faciuntque ratione, præmitti debebat. Et Tibi quoque doctissime WEISI, quem promerita dudum expectant præmia, quam dignissima non minus, ac maxime ardua summique momenti res sit, ægrotantium variis dextre succurrere noxis, optime cognitum perspectumque fuisse, ex ea, qua hætenus apud me usus es, consuetudine, abunde intellexi. Proinde non est, quod, cum industria hætenus adhibita fructus Tibi reportandi veniunt, campusque aperitur acquisitas & connatas latius explicandi egregias tuas dotes, aliorum, maxime ægrotantium in salutem, & meo annuere dubitem applausu hisce litteris. Gratulor itaque ex animo, tum de iis, qui jam Tibi conferuntur, honoribus, tum de futuris quos ominor, faustis conatibus, voveoque ut multorum benevolo patrocínio & favore adjutus, quo longius, eo magis, ad avita in arte contendere queas merita, & parta hinc aliquando gloria frui. Quicquid mearum esse poterit partium, nec in posterum TIBI negatum iri, persuasissimus esto. Scripsi Berolini die XXII. Januarii Anno MDCCXXVI.

AUGUSTINUS BUDDEUS
Med. Doct.



DISSERTATIO

DE

USU RESPIRATIONIS IN ARTE MEDICA.

Primum edita anno 1714.

PROOEMIUM.



TANTA respirationis est necessitas in omnibus animalibus calidiore sanguine præditis, ut semel inchoata pari deinceps passu cum ipsa vita ambulet, nec unquam sine hujus dispendio penitus cessare possit. Hinc accidit, ut illius disquisitionis omnis ævi Medicos, & Philosophiæ naturalis cultores habuerit sollicitos, nec unam eorum industriæ crucem fixerit.

Veteres, verum sanguinis circuitum ignorantes, & omnia in Physiologicis nudis qualitatibus & facultatibus nominibus metientes, respirationem dicebant esse actum pulmonum, aërem tum attrahentium, ut hujus frigore sanguinis fervor contemperetur & spiritus generentur; tum eundem rursus emittentium, ut e vicino cordis foco natæ fuligines una cum eo explodantur. Stetit hoc dogma, GALENO maxime assertore usque ad HARVEI fere tempora, quo ipso sanguinis circuitum in apricum deducente, alii alio modo respirationis opus explicare aggressi sunt, nonnulli etiam frivolis & monstrosis opinionibus allatis offuscarunt potius, quam apta explanatione illustrarunt. Nostrium jam non est, singulorum hac de re opiniones examinare, neque meliorem asserere, neque falsas confutare, quoniam utrumque & nimis prolixum & forsitan tædiosum foret. Sufficiat nobis hoc loco monuisse, cum plurima respirationis sibi relicta commoda esse in omni œconomia vitali; tum maxime illius, quæ a voluntatis arbitrio fit, non pauciora in universa medendi arte posse expectari; hæc vero a plurimis adhuc neglecta, paucis observata, a nullo denique condigne pertractata sunt. Quæ causa fuit, ut cum altioris indaginis specimen nobis edendum esset, hoc imprimis dissertationis, uti vocant, inauguralis argumentum eligeremus, in quo ita verfabimur, ut primum de negotio respirationis breviter quidem, sed quam fieri poterit exactis-

exactissime agamus : deinde usus ejus explicemus , docendo quænam mutationes æconomix vitali ex illa contingant : hinc varios illam temperandi modos recenseamus , & tandem in emolumenta quæ ex his omnibus ad medendi artem redundant , inquiramus. Quæ dum pro virili a nobis fient , nemo nobis vitio vertat , illa signa diagnostica vel prognostica , quæ a respiratione morbo , vel alio quovis modo , nullo tamen consilio nostro alterata defumuntur , (in quibus recensendis prolixi sunt veterum plerique & in primis HIPPOCRATES ,) vel negligi a nobis , vel obiter saltem tangi , cujus rei veniam , non tam dissimilitudo , quam utriusque argumenti prolixitas & arcti dissertationis limites facile impetrabunt.

§. V.

SECTIO I.

De Physiologia respirationis.

§. I.

Dum animus est de usu respirationis in arte medica tractare , nullum adeo morosum censorum fore confidimus , qui definitionem more scholarum à nobis præmittendam desideret , præsertim , quoniam & temerarium est , re nondum satis explorata aliquid definire velle , & inferius demum clare patere potest , quid per illam intellectum velimus. Sufficiat igitur indicasse , quod nemini ignotum esse potest , respirationem nobis denotare , illum actum , quo aer in pulmones intromittitur , & ex illis rursus expellitur.

§. II.

Neminem posito latebit , eam esse respirationis naturam , ut partim insciis nobis , vel saltem non cogitantibus peragatur : partim etiam voluntatis arbitrio pareat , & pro lubitu institui vel inhiberi ; fortius etiam vel languidius ; celerius , vel tardius ; frequentius , vel rarius fieri queat.

§. III.

Quoniam itaque scopus noster est hac dissertatione in illas utilitates inquirere , quæ ad artem salutarem ex respiratione , quæ consulto a nobis fit , redundare possint , facile perspicimus , nobis non integrum esse eum attingere , nisi exploratum & demonstratum habeamus , quid sit omnino respiratio ? deinde , quomodo fiat ? hinc , quanam ipsius causæ ? tandem , quis usus & finis ?

§. IV.

Ut igitur omnia rite fiant , fac hominem tum ratione probe instructum , tum philosophiæ sanioris & imprimis Geometriæ principiis imbutum nihil scire de respirationis negotio , præter illud , quod initio diximus , & quilibet in se experitur , (aerem nimirum ingredi & egredi thoracem , & hunc moveri ,) ceterum inquirere in illud velle ; is certe primum aeris naturam rimabitur , deinde thoracis structuram examinabit , postea phænomena ejus motuum scrutabitur , e quibus inter se collatis causas & modum fiendi horum motuum exsculpet , & tandem pari methodo adhibita de fine & effectibus illorum statuet. Nemo vero non videt , hanc methodum , utpote rerum naturæ convenientissimam , non posse non claram & distinctam totius negotii ideam suppeditare.

Et primum quidem , quod ad aerem attinet , sufficiat nobis ex infinitis experimentis , quæ ab auctoribus qui in ejus naturam inquisiverunt , & solerter facta & fideliter passim recensita sunt , ea saltem allegare , quæ ad scopum imprimis facere videntur. & fere sunt sequentia : a) Aerem esse vaporum & effluviorum omnis generis commune receptaculum. β) Aerem elatere gaudere seu cum quovis corpore , ipsi expósito , æquilibrari. γ) Calorem cum reliqua corpora omnia , tum aerem etiam expandere. δ) Calorem hinc expellere & excludere ita aerem , ut , quo major ipsius gradus alicubi adest , eo aeris minus ibidem reperiatur : & contra. ε) Caloris itaque atque elateris aeris reciprocum quoddam esse æquilibrium. ζ) Et cum calidiorum , ea sit indoles , ut pro majore calore majorem etiam igneorum effluviorum sphaeram habeant , hinc aerem eo propius remotum ab iis fore , quo minorem caloris gradum sortita fuerint : e contra. η) Aerem ad læviora & polita corpora minus : ad asperiora magis prope accedere. θ) Aerem per illa corpora , quæ e membranis , densa fibrarum sibi incumbunt congerie contextis , constant , transire non posse.

§. VI.

Thoracis partes quam commodissime in continentes & contentas dividuntur. Illæ sunt vel cutis & reliqua integumenta communia : vel ossa & cartilagineæ : vel hæc connectentes muscoli & membranae : vel his intertexti nervi : vel denique omnis generis vasa , ut de glandulis taceamus. Hæ sunt viscera mediæ ventris pulmones & cor cum suis vasibus.

§. VII.

Jam horum omnium accuratam descriptionem anatomicam dare nobis quidem incumberet , nec ab instituti ratione foret alienum : attamen , quoniam non prolixior tractatus , sed dissertatio nobis conscribenda est , ne nimis extra oleas divagari videamur , lectorem harum partium structuræ peritum postulamus , eoque confidentius hujus veniam nos esse impetraturos speramus , quo major exstat numerus celeberrimorum Anatomicorum , qui hoc in argumento sic versati sunt , ut illud plane exhaustisse videantur. E quibus BARTHOLINOS , LOWEROS , MALPIGHIOS , BELLINOS &c. nominasse sufficiat.

§. VIII.

Phænomena motuum inter respirandum contingentium fere sunt sequentia : Observamus incipiente inspiratione. 1) Elevari sternum. 2) Costas attolli superiora versus. 3) Diametrum circuli quem costæ cum vertebis & sterno faciunt augeri eo magis , quo illæ a prima vera & ultima spuria propius ab sunt ; & vice versa. 4) Abdomen intumescere. 5) Aerem dum hæc fiunt ingredi in pulmones. 6) Aerem ibidem subsistere aliquantisper , & tum motus recensitos ferari. 7) Nullum interea tumorem reliquorum

quorum musculorum, qui respirationi vulgo præesse dicuntur, dentatorum & ferratorum e. gr. animadverti. 8) Quin imo omnibus aliis musculis in pectore & abdomine abscissis, si soli muscoli intercostales & diaphragma illæsa sint, æque respirare animal, ac si nullum esset vulnus, quæ observatio est *Pecqueti* ap. *CASP. BARTHOLINUM de Diaphragm. structuræ cap. II.* 9) In expiratione subsidere pectus & sternum. 10) Costas deprimi abdomen versus. 11) Abdomen detumescere. 12) Inter hæc aërem elabi e pulmonibus. 13) Duo hæc motuum genera sic reciprocare, ut inter utrumque status neuter interjectus sit. Hæc uti potiora sunt phænomena, quæ ad actum respirationis naturalis, quæ nobis etiam non cogitantibus fit, pertinent: ita ad eundem, dum voluntatis arbitrio temperatur, plura spectant, jam recensenda eo accuratius, quo propius scopum nostrum attingunt. Deprehendimus autem 1) Respirationem posse fieri omnibus memoratis phænomenis modo recensito sese habentibus, & tunc vel tempus, vel copiam admittendi in pulmones aëris, vel utrumque simul voluntatis arbitrio nos posse moderari. 2) Inspirationem integre posse fieri, thorace solum levato, non abdomine simul, quin & hoc depresso; elevandum autem eo casu fortius thoracem. 3) Inspirationem posse fieri abdomine inter inspirandum consulto tumidiore solito reddito, & hoc pacto thoracis elevationem, aut nullam omnino, aut perobscuram contingere. 4) Expirationem aliqualem posse fieri, thorace vel omnino non, vel obscurius saltem depresso, & hoc casu abdomen deprimi eo fortius. 5) Expirationem integre posse fieri abdomine omnino non subidente, quin etiam inter expirandum intumescere magis: deprimi autem hoc casu eo fortius thoracem. 6) Spiritum posse comprimi intra pectus, nullis motibus sive in thorace sive in abdomine succedentibus. 7) Compresso sic spiritu, abdomen posse pro lubitu sive comprimi magis, sive tumidius reddi: illoque casu thoracem elevari; hoc, deprimi, & quidem utrinque sensibilius circa costas priores veras, quam alibi. 8) Inspirationis & expirationis actum sic alternare, ut inter utrumque status neuter interjectus & protrahi longius voluntatis arbitrio, & brevior reddi possit. 9) Quin integrum nobis esse volentibus utrumque respirationis actum pluribus vicibus statu neutro interpolare, & sic aërem vel ingressu vel egressu prohibere.

§. IX.

Hæc motuum thoracis phænomena, si cum ejusdem structura conferantur, nos docent. 1) Diaphragma esse primum respirationis organon, quoniam scil. illo solo agente, licet reliqui muscoli quiescant, hæc nihilominus succedit. 2) Adjuvari autem illud a musculis intercostalibus, altero respirationis organo. 3) Nullas partes in hoc negotio esse reliquorum musculorum, qui respirationi vulgo inservire ab auctoribus dicuntur.

§. X.

Patet præterea e structura harum partium, respirationem fieri: 1) Diaphragmate sphæroideam figuram, quæ ipsi relaxato propria est, cum plana commutante. Id quod fit ope fibrarum carnosarum utriusque musculi diaphragmatici, quæ in commune centrum tendinosum abeunt, illudque contractæ planius reddunt: 2) Musculis intercostalibus singulas costas singulis, & omnes primæ propiores redendentibus, quo pacto non solum, acuto angulo, quem cum spina descendente faciunt, magis ad re-

ctum accedente, tota thoracis cavitas in omnem sensum amplior redditur, sed sigillatim etiam transversa ipsius diameter, quæ costas ultimas veras bisecat, augetur, hisce circa mediam sui partem, quam in extremis mobilioribus, atque ita altius levandis &c. quod e cartilaginum structura, & capituli costarum cum vertebra per obscurum ginglymum articulatione, consideranti patet.

§. XI.

Dum hæc fiunt, aucto thoracis ambitu, & mutato, quod ipsi cum aëre intercedebat, æquilibrio, hic minus impediendi illic inveniens, sponte sua in pulmones illabatur, illosque dilatat, non secus ac si folli inclusi essent, quod *SWAMMERDAMII* est experimentum. Aër pulmones ingressus ab horum calore eo magis rarefit & expanditur, quo majus est discrimen inter ipsius frigus & horum calorem: adeoque pro hujus modulo fortius etiam vel remissius in bronchiorum & vesicularum parietes impingit, eosque sic distendit, ut collapsi antea, rigidiores & tensi reddantur. Pulmonibus vero aëre turgidis, tenduntur non solum vasorum sanguiferorum majores rami, qui jugiter bronchiorum divaricationes concomitantur; sed minima etiam illorum vasa, quæ subtilissimi retis instar in vesicularum parietibus disseminata esse vidit *MALPIGHII*.

§. XII.

Sed laxato rursus diaphragmate, eoque in cavitatem thoracis retrocedente, & subsidentibus iterum costis, quæ ob articulationem cum apophysibus vertebrarum transversis in statu coacto erant, aër iterum e pulmonibus egreditur, partim cedens collabenti thoraci & minus in circumfuso aëre impediendi offendens, partim etiam vesicularum elatere propressus, & musculosa tunica bronchia & tracheam in vestientis structura inter exeundum adjutus.

§. XIII.

Jam, quod ad finem primum respirationis attinet, illum non novimus alium præter illam sanguinis præparationem, qua ad promptiorem ejus per omnis generis vasa cursum, nec non ad secretiones, & has excipientes excretiones aptus redditur. Fit autem illa unice per ipsius conquassationem & quandam quasi triturationem, quam vitalis hic liquor sub utroque respirationis actu in pulmonibus patitur, (An vero aër atmosphæricus per pulmones in massam sanguineam intromittatur, mox videbimus.) Cæterum multa sunt, quæ ad intimam sanguinis in pulmonibus comminutionem & subactionem symbola sua conferunt. Primum impetum sustinet in majorum vasorum ramis, qui bronchia comitantur, ab his, aëre in inspirato pulmone turgentibus, succussus. Alterum mox in minimis vasis, quibus vesicularum parietes scatent, qui quidem ejus est momenti, ut in ipsius gratiam tota pulmonum compages eam, quam possidet, structuram nacta esse videatur. Hunc enim solum ob finem vasculorum hæc myriades in pulmonibus dispersæ esse dicendæ sunt, ut sanguis per subtilissima ipsorum oscula ad actus & propressus intimiorem solutionem subeat. At vero cum supremus nostri corporis conditor optime nosset, motum sanguinis in his vasculis non posse sibi constare, illumque liquorem intra tenerimos tubulos admittendum ipsum sibi impedimento futurum, nisi hi rite tendantur, sapientissimo consilio eos in parietibus vesicularum sic disposuit, ut his ab aëre immisso expansis, illi non possint non una tendi, & e laxis rigidiores fieri. Sed

una hac fidelia duos dealbavit parietes. Primum enim hoc pacto major utique sanguinis conquassatio contingit in canaliculis hisce rigidis & tensis, quam laxè concidentibus: deinde etiam illa aëris in vesiculas explosio mirum in modum hanc sanguinis comminutionem adjuvat. Ille enim in has irruens, & a vicini sanguinis calore fortius expansus, nisibus suis contra harum parietes sanguinem denuo conquassat & quodam quasi pistillo comminuit. Tertium impetum patitur dum expiramus, cujus effectus optime à similitudine spongiæ sanguine turgidæ & compressæ illustrari potest. Concidentibus enim pulmonibus sanguis reticulato vasculorum opere comprehensus, partim, & quidem venis incipientibus propior, in illas adigitur & ad sinistrum cordis ventriculum amandatur; partim minimas vasculorum diametros nondum prætervectus, vel his detinetur, vel cum allabente per arterias pulmonales sanguine committitur, utrobique intime concutiendus.

§. XIV.

Jam ex his omnibus apparet, sanguinem per tot exilissimos membranularum porulos & tubulos transfadactum sic in pulmonibus atteri atque discerpi, ut qui ad coagulum antea pronus erat, jam liquidior ad cor redeat: cujus partes antea male cohærebant & secessionem minabantur, is, nunc intime mixtus & subactus deprehendatur; qui obscuriore colore præditus erat in dextro ventriculo, nunc rutilo, comminutionis indice, conspicuus ad sinistrum redeat. Ex hac porro ipsius attritione citatiorem minimarum particularum & imprimis sulphurearum motum existere, vividi caloris unicum fontem & originem: cui quidem omnia fere illa phænomena deberi, quæ aëri intra sanguinem per respirationem recepto vulgo accepta referuntur, liquidissimum est.

§. XV.

Quo minus enim multorum sententiæ de aëris atmospherici inspirati cum sanguine in pulmonibus intimiore mixtione subscribamus, quatuor potissimum rationibus impedimur, quarum summa capita sic se habent. I. Nondum ab ullo unquam aëris in massa sanguinea iis argumentis esse demonstratam, quæ non potius de caloris quam aëris præsentia & effectui testificentur: seu, omnia argumenta hunc in finem ab auctoribus allata esse æquivoca & caloris æque ac aëris in massa sanguinea præsentiam arguere. II. Sed, data tantisper aëris in sanguine præsentia, nondum demonstratum esse, ipsi nullam aliam viam præter illam per pulmones patuisse. III. Aëris ipsius naturam obstare, quo minus intra sanguinem per pulmones recipiatur. IV. Structuram partium per quas transire deberet, intra sanguinem recipiendus, obicem ipsi ponere, non nisi ipsis his partibus destructis amoliendum. Quæ quatuor argumenta partim lemmatibus innituntur §. V. hunc in finem allegatis.

§. XVI.

Cæterum, uti primarium respirationis usum in œconomia vitali posuimus, definitam quandam sanguinis immutationem; sic plures admittimus sequioris conditionis & per accidens, ut scholæ loquuntur, contingentes. Inter hos eminet ipsius ad integrum præstandum circulum sanguinis necessitas, quæ tum e pulmonum cum corde cohæsione, tum e momento, quod sanguini per pulmones moto a respiratione accedit, facile innotescit. Scilicet, cum sapientissimo Conditori placuerit, omnem sanguinem in perfectioribus animalibus huic in pulmonibus præparationi exponere, non poterat illud fieri,

quin universa etiam ipsius moles per hoc viscus traduceretur. At enim vero sic necessitate quadam inevitabili contingit, ut uterque sanguinis motus (ille scil. qui fit per pulmones, & alter qui fit per reliquum corpus) sic a se invicem dependeret, ut communia sint utrique fata, & alterutrius mutationem paulo post alter etiam experiri cogatur. Ex datis itaque hoc momento respirationis ad motum sanguinis per pulmones, & mutatione structuræ & situs partium post primam omnium respirationem, problematis Harveani solutionem nullo negotio inveneris, reliquis omnibus, qui sive a denegato aëris in sanguinem commeatu, sive impedita accensione sanguinis precaria, sive prohibitis aut nitrofarum particularum ingressu, aut fuliginum explosione, seu denique a quavis alia causâ illius solutionem repetunt, in cassum sese torquentibus.

§. XVII.

Alternata porro respiratio infervit chylicationis negotio, & sanguinis depurationi, quæ infimi ventris visceribus debetur. Diaphragmate enim alternis vicibus contracto, omnes secretiones & excretiones, quæ illorum ope celebrantur, sic juvantur, ut sine ejus auxilio fere langueant. De quibus uberius disputandi occasio infra suppeditabitur.

§. XVIII.

Hisce de natura & effectibus respirationis sibi relicta, veluti per lancem saturam exhibitis, quoniam animus est, illius tanquam remedii cujusdam usum in arte medica evolvere atque Lectori B. exhibere; absoluta autem & principalis quidem remediorum est conditio, ut sint in nostra potestate: jam nobis hac de re disquirendum erit, & ostendendum, integrum esse jubenti Medico illam diversimode in ægris temperare. Quod sectione sequenti facere jam ingredimur, de variis modis moderandi respirationem acturi.

S E C T I O II.

De variis modis moderandi respirationem.

§. I.

EX illis, quæ supra Sect. I. §. 2. attulimus, respirationem videlicet pro lubitu vel institui vel inhiberi; fortius etiam vel languidius: celerius vel tardius: frequentius vel rarius fieri posse, apparet, primum modum moderandi respirationem a nudo voluntatis nostræ actu pendere.

§. II.

Instrumenta, quæ his motibus famulantur, sunt musculi diaphragmatis, intercostales, laryngis & abdominis, qui pro re nata nunc inspirationem, nunc expirationem vel juvant, vel inhibent.

§. III.

Quo pacto respirationem juvent, e prima sectione apparuit. Inhibetur vero inspiratio, vel feriandis in totum his musculis, post factam expirationem, quo facto status neuter (no. 13. §. 8.) inter expirationem & inspirationem interjectus, fit protractor: vel, non nisi languide & remissius agentibus, quo pacto etiam exspiratio necessario minor fit, & tota respiratio languidius succedit.

§. IV.

§. IV.

Exspiratio vero inhibetur, cum spiritus intra præcordia compressus egressu prohibetur. Consistit autem hæc spiritus cohibitio in statu illo neutro, qui per no. 13. §. 8. inter inspirationem & expirationem est interjectus, plus solito protracto & prolongato.

§. V.

Patet autem ex hac definitione, spiritus cohibiti causam vel a sola musculorum inspirationi inservientium actione protracta & quasi suspensa repetendam esse, musculis abdominis & laryngis prorsus feriantibus, & tum spiritum, libero licet per laryngem itinere, tamen non egredi e pulmonibus, quoniam ad exeundum non cogitur: vel etiam in musculis laryngis obicem constrictione epiglottidis exituro ponentibus, sitam esse, spiritu ad exeundum vel a collabente solum thorace, laxatoque diaphragmate debilius: vel musculorum abdominis actione fortius compulso: & tunc spiritum coactum quidem tamen egredi non posse, ob iter a laryngis musculis ipsi præclusum. Quæ quidem illa est spiritus cohibitio antiquorum Medicorum & Gymnastarum scriptis tantopere commendata.

§. VI.

Ultimæ huic considerationi innititur illud discrimen, quod antiqui inter spiritum debilius & fortius cohibitum ponebant, de quo sic ad mentem Veterum HIER. MERCURIALIS de arte gymn. lib. III. cap. VI. Medici quidem vel Medicorum gymnastæ duplicem spirationis cohibitionem in usu habebant, alteram, in qua universi thoracis muscoli tendebantur, remissis, qui sunt in septo transverso & abdomine, ut facilius excrementa deorsum truderentur; alteram, in qua abdominis quoque muscoli tenduntur, quo videlicet ea, quæ sub septo sunt, viscera, exercitationis fructum sentirent. Obiter hic notamus lapsos esse Veteres & cum iis MERCURIALEM putantes, septo transverso laxato, tenfos thoracis musculos spiritum intus retinere posse, quum tamen sola larynx occlusa, spiritus sic egressu impedito, thoracem, passive hic se habentem, collabi non sinat.

§. VII.

Quænam Veterum de usu & effectibus cohibitionis spiritus opiniones fuerint, apud eundem l. c. videri potest. Nos ejus usum in casibus singularibus infra declaraturi, hic tantisper notamus, omnes illos motus, secretionibus & excretionibus dicatos, qui vel ab inspiratione protracta, vel a nisibus, qui cum illa semper sunt conjuncti, pendent, ab ea juvari eo magis, quo sive fortior sive diuturnior illa fuerit.

§. VIII.

Alter modus moderandi respirationem per motum corporis contingit, qui vel est localis totius; vel laboriosus, partium. Huc pertinent omnia exercitiorum genera, immenso studio ab antiquis exculata, ut corporibus sive sanitatem, sive firmitudinem & robur, sive pulchritudinem & bonum habitum conciliarent, quæ HIER. MERCURIALIS doctissimis de arte gymnastica libris sic recensuit & explanavit, ut totus antiquæ palæstræ apparatus ex iis pateat. Nostri instituti ratio non fert, ut his longius immoremur, sed potius exigit, ut doceamus, quo pacto respiratio ab utroque genere varie immutetur, infra demum ejus sic mutatae usum in arte ostensuri.

Frid. Hoffmanni Oper. Supplem. II.

§. IX.

Effectus itaque utriusque motus, quoad respirationem, est potissimum ejus e tardiore & rariore in celeriore & frequentiore mutatio. Hæc vero unice dependet ab aucto sanguinis circuitu, qui quidem in extremis corporis partibus exercitatis primum incipiens, fibris carnosiss & tendineis musculorum debetur, quibus fortius intra vasa propressus sanguis, celeriore ad cor reditu, frequentioris ipsi contractionis causa existit: quo facto, non solum reliquus, visceribus contentus, sanguis ad celeriores motum sollicitatur, sed ipsi etiam, per pulmones labenti, necessitas imponitur circuitum suum celerius absolvendi; pro cuius celeritatis gradu non potest non respiratio pariter fieri celerior & frequentior. De ipsius ita auctæ usu interea notamus, illam omnes fluidorum secretiones & excretiones, quin & partium solidarum motus, qui utrique respirationis actui debentur, pro vario ipsius gradu diversimode etiam juvare.

§. X.

Tertius respirationem moderandi modus is est, qui fit mediantibus tum aliis, tum inprimis thoracis exercitiis. Sunt autem fere sequentia: potus pedetentim sumtus: sternutatio & cachinnus: tibiæ inflation: vociferatio: cantus: lectio aut recitatio clara: fermocinatio, de singulis seorsim.

§. XI.

Et potus quidem pedetentim sumptus pari modo respirationem afficit ac spiritus debilius cohibitus, epiglottidis rimula inter potandum clausa, spiritum egredi non permittente, quapropter de illo brevioribus esse liceat. Ceterum HIPPOCRATES ipse in curatione tertiæ tabis De intern. affect. cap. XIII. usus est hoc remedii genere, dum ægrotum aquæ mulsæ dimidium congium bibere jubet, & quidem ἀπνους, citra respirationem.

§. XII.

Sternutationis & cachinni, uti par fere est fiendi modus, ita non absimilis effectus. In sternutatione, membranarum, & inprimis organorum sensoriorum, crispationes quasi convulsoriæ ad nervos redundantes, cum diaphragmate communicantur, quo subito laxato, repentina fit exspiratio, convulsis simul colli quibusdam & faciei musculis. In cachinno a titillatione vel lepidæ rei consideratione orto, non simul & semel, sed per vices diaphragma tensum, iterumque laxatum, interruptam respirationem efficit, sub qua nonnulli etiam faciei musculi convelluntur. Ceterum risus etiam inter exercitia relatus gymnasticæ artis cultorum industriam exercuit, de quo vid. MERCURIALIS lib. VI. art. gymn. cap. VI.

§. XIII.

In tibiæ inflatione exspiratio varie determinatur, in ea quippe spiritus, confestim haustus, pedetentim, & ad numeros musicos, non sine quadam contentione rursus emittitur, quod ipsi cum cantu est commune.

§. XIV.

Tria præcipue vocis exercitia respirationem immutare apta nata sunt. Vociferatio aut cantus: Lectio aut recitatio clara, & fermocinatio, quæ gradu saltem differunt. Vociferatio non ultimum locum inter artes gymnasticas olim occupat. Illustis de illa locus occurrit apud AETIUM AMIDENUM Tetrab. I.

S

Sermon

Sermon. III. cap. V. dignus qui hic inferatur, quod ex eo tum modus adhibendi vociferationem, tum commoda, quæ Veteres ab illa expectabant, apparent. Vociferatio, inquit ille, exercitatio est pectoris, & vocalium instrumentorum, insuperque caloris naturalis purgans, attenuans & roborans, & corporis partes solidas & robustas reddens, ut non facile affectionibus impetantur. Utendum est vociferatione in anhelosis & recta cervice spirantibus, tabidisque & doloribus diuturnis pectoris ac dorsi, & in pectoris abscessibus post rupturam, & ad raucam vocem ex plurima humiditate factam, & in febribus quartanis; nam concretum humorem convenientissime excutit, & stomachi humiditatem, quam privatim quartana febris inducere solet, expellit. Convenit etiam stomachicis, præsertim assidue vomentibus & acidum ruçantibus; at vero capitis affectionibus incommodissima vociferatio existit. Cæterum qui vociferatione usus est, alvo prius exonerata, & infernis partibus sensim confectis, lotaque facie placide perfusa, & ubi mox a somno se moderate loquendo & deambulando præparaverit, ita tandem ad vociferationem debet progredi. In ipsa autem vociferatione concinnitas & vocis bonitas ac jucunditas nihil contulerint ad sanitatem, verum graviorum vocum sonus utilis existit: quare in hoc se exercere oportet. Sic enim plurimus aer in respiratione attractus pectus distendit, & alvum & totius corporis meatus dilatat, unde in vociferationibus & concitatis lectionibus redundantium humorum excretionem contingunt: & in iis quidem, qui concitatus legunt, magis, & per sudores; qui vero mitius vocem intendunt, per occultam transpirationem; nam tota corporis moles in lectionibus & vociferationibus intenditur. Contingit item, propter attenuationem ex motu factam, multa sputa resoluta, mucumque ac pituitam excerni. Porro iis, qui propter frigiditatem caliditate opus habent, quodnam commodius auxilium afferri queat, quam actio per respirationem? Oportet itaque sæpe legere, & universum corpus relaxare, fusaque carne ad corporis rarefactionem, asperam arteriam & alios spiritus exitus commode distendere, & gravissimas voces concinne sonare (vertente *Jan. Cornario*). *ORIBASII* quoque *lib. VI. Collect. ad Julian. c. IX. & X.* haud contemnenda de ea habet ex *Antyllo* deprompta, quibus inter cætera modum, quo vociferatio thoracem afficiat, explicare satagit. Cantus a vociferatione differt, quod modulis & numeris magis adstrictus sit, ceterum idem fere utrique est effectus. Par ratio quoque est lectionis aut recitationis claræ, nisi quod thoracem & spiritalia instrumenta remissius fatiget. Sermo autem omnium placidissime pectus exercet, & inter exercitia vix locum meretur, nisi forsan fuerit concitator & contentiosus.

§. XV.

Miras utilitates harum vocis exercitationum & imprimis vociferationis deprædicabant Veteres, (quas ex mente ipsorum diligenter & docte recenset laudatus *MERCURIALIS de art. gymn. lib. III. cap. VII. & lib. VI. cap. V.*) in his ipsis ramen non satis sibi ubique constantes, quin & sæpe contrarii, quod *CÆLII AURELIANI* exemplo patet, qui *chronic. lib. I. cap. I.* vociferationem, (*ἀναφωνήσις* quam Græci vocabant,) doloribus capitis conferre tradit, quum tamen & *AETIUS* & *ANTYLLUS* ap. *ORIBASII* l. c. reliquique omnes, imo res ipsa contrarium prorsus suadeant.

§. XVI.

Interim asserimus, recensita vocis exercitia conferre omnibus iis morbis, quibus auctior sanguinis motus & viscerum infimi ventris a diaphragmate repetitæ succussiones salutare existunt, de quibus pluribus infra videbimus.

§. XVII.

Respirationis sic mutatæ usus triplex deprehenditur secundum Medici triplicem intentionem. Vel enim ea utimur ad explorandum: vel ad evacuandum: vel ad alterandum. De singulis sequente sectione seorsim.

SECTIONIS III.

CAPUT I.

De usu respirationis in explorando.

§. I.

INter reliqua signa, e quibus Veteres de eventu, periculo & diuturnitate morborum colligebant, non ultimum locum apud eos occupabant, quæ a mutatione respirationis desumebantur. *HIPPOCRATES* imprimis & qui illum secuti accuratorem morborum historiam tradere cordi habuerunt, non levem hac in re operam posuerunt. Sic *HIPPOCRATES* in *Coacis Præn.* observavit, dyspnœam ab erysipelate evanescente malam. Locus ipse est: *Ερυσιπέλας δὲ ἐξωθεν μὲν ἐπιγίνεται, καὶ χηρίσιμον. εἰσω δὲ τρέπεται, θανάσιμον. Τρέπεται δὲ, ὅταν ἀφανίζομένη τῇ ἐρυδήματος, βαρύνεται τὸ σῆθος καὶ δυσπνοώτερος γίνεται.* *Erysipelas* foras supervenire, commodum est: intro vero converti, lethale: convertitur autem, quum, disparente rubore, pectus gravatur, & æger difficulter respirare incipit. Sic apud eundem occurrunt *πνεῦμα πυκνὸν, θολερὸν, κοπιῶδες, προσκόπτον, ἀραγὸν, μέγα, προσπταῖον ἐν τῇ ἔξω φρενί.* (de quo vid. *GALENUS de sympt. causis lib. II. cap. II.*) & plurima alia spiritus mutati nomina: de quorum significato & nondum satis inter doctos constat, & nobis per ea, quæ in præfatio attulimus, brevioribus esse licet.

§. II.

Par ratio fere est signorum, e pulmonibus recens natorum, in aquis subsidentibus, de illorum respiratione & vita capeffendorum, quæ pariter huc non spectant, & altioris indaginis sunt, quam ut hic veluti per transfennam considerari queant.

§. III.

Respiratio voluntaria maxime diffusum per totum ambitum artis usum habet, ad explorandum illa omnia, quæ per olfactum a Medicis, Chirurgis & Pharmacopœis dijudicantur. Sine inspirationis enim ope, teneriora *ἀποσπάσματα*, rerum odoratarum, quæ aëri innatant, una cum hoc pituitariæ membranae narium imprimi nequeunt, quod nisi fiat, olfactus sensus in nobis nullus excitatur.

§. IV.

Morborum præcipui, quibus cognoscendis infervit respiratio, jubente Medico ab ægro varie temperanda, sunt affectus pectoris. Inter quos eminet phthisis

phthisis vera ex ulcere pulmonum. Negari quidem nequit, respirationem difficilem saltem æquivocum signum phthiseos esse, dum non solum innumeris morbis est communis, sed ne phthisi quidem semper ita propria, ut nulla occurrat, quin cum dyspnœa sit conjuncta. Observarunt enim auctores in dissectis phthisi extinctorum cadaveribus, sæpe alterum pulmonum lobum prorsus in tabum abiisse, alterum etiam profundo ulcere fere depastum, cum tamen ægro respiratio sic satis libera fuerit. Nota est Serenissimi Juventutis Principis historia, cujus tabe extincti alter pulmonum lobus penitus consumptus deprehensus est, illo tamen, nisi ultimis vitæ diebus, de dyspnœa nunquam querulo. At enim vero, quum utique fieri nequeat, quin sanguinis per pulmones circuitus a profundiore ulcere sic impediatur, ut respirationi sua libertas integra constare nequeat, præsertim, si sanguinis circuitus & cum eo respiratio a qualibetunque causa augeatur, facile patet, libertatem respirationis eodem gradu lædi debere, quo motus sanguinis fit rapidior: Et sic posse respirationem auctam una cum aliis phthisi explorandæ inservire.

§. V.

In pleuriticis & peripneumoniacis dyspnœa summa in reliquis affectus magnitudinem arguit. At, cum determinandum est, quodnam latus maxime laboret, tum demum respiratio, ægro, uni quam alteri lateri incumbenti, longe facilior, illud ipsum, cui incumbens respirat liberius, maxime laborare indicabit.

§. VI.

Polypi cordis nascentis individua comes est dyspnœa. Cum vero illa cum palpitationibus cordis, pulsu interrupto & crebris lipothymiis conjuncta fuerit, jam confirmati mali signum exhibet.

§. VII.

Asthmatis apud Auctores duo præcipue genera occurrunt. Unum, quod vitio nervorum spiritalibus organis implantatorum contingit; & ab eorum sive laxitate nimia, tonoque vitio, sive etiam strictura & spasmi dependet; alterum, quod humoribus lentis bronchia infarcentibus debetur. Illud vulgo siccum; hoc humidum vocatur. Inter utrumque respiratio, jubente Medico paulo profundius ab ægro instituenda, distinguit. In illis enim, qui humido laborant, inter inspirandum plerumque quædam quasi ebullitio aut sibilus in pulmonibus nasci auditur, & sive profundius inspirandi, sive spiritum vel tantillum cohibendi summa difficultas observatur. In sicco asthmate laborantibus, illius ebullitionis sensus, nisi malum jam fuerit confirmatum, non facile occurrit, ægrisque integrum plerumque est, spiritum paulo diutius cohibere.

§. VIII.

Nescio quid sibi velit Jo. CRATO in epistola ad Theod. Zwingerum ap. Scholzum ep. CXXXVI. quando refert, in Divo MAXIMILIANO II. hydrope pectoris extincto, exspirationem ultimis vitæ diebus sic fuisse impeditam, ut ne sesquicyathum bibere posset. Num inter bibendum exspiratio viget? an potius inspirationem legendum est? tum, quoniam vix, nisi ab hausto aëre, bibere licet, tum, quia rationi utique consentaneum, circumfusas pulmonibus aquas illorum dilatationem, quam concidentiam potius esse impedituras, quod insuper testimonio RICHARDI LOWERI de corde cap. II. patet, Frid. Hoffmanni Oper. Supplem. II.

qui inspirationem hoc morbo laborantibus esse difficillimam asserit:

§. IX.

Cartilaginem ensiformem vitiosa structura multis morbis ansam dare, observarunt jam dudum Medici. Ab ossea ejusdem rigiditate, libero diaphragmatis motu impedito, summam respirandi difficultatem obortam esse, observavit P. PAW. de ossib. part. I. pag. X. & part. II. pag. CXXX. In hujus cartilaginis laxitate nimia & ejusdem a sterni separatione spontanea, ægros de summa inspirandi difficultate querulos, idem annotavit l. c. quod BAPT. CODRONCHIUS etiam ante illum viderat. Quibus quidem observationibus docemur, in indagandis causis difficilis respirationis, quæ satis plerumque obscuræ sunt, hujus cartilaginis vitiosum situm & structuram, aliquam etiam considerationem mereri, & in exploratione illorum morborum, qui ab illis oriri præsumuntur, respirationis læsionem symbolum suum conferre, quum fieri vix queat, quin ob diaphragmatis cum ea connexionem, illius vitia liberum hujus motum, & cum eo respirationem ipsam impedian.

§. X.

Permulta sunt alia thoracis, viscerumque in ipso contentorum vitia, quibus explorandis respiratio inservit, observante Medico mutationes, quæ ab illa ægrotis contingunt. Sic in foemina, cui post obitum pericardium arcte cordi adnatum repertum est, tum difficilem & anhelosam respirationem, ad quævis motum, doloremque gravativum circa præcordia & frequentes lipothymias, tum pulsus, post quamlibet inspirationem, intermissionem observavit RICHARDUS LOWERUS de corde cap. II. Tandem in omnibus morbis, qui labem pulmonibus affricare apti nati sunt, veluti febribus lentis, hecticis, catarrhalibus &c. ad explorandum, an pulmones sint illæsi, fac ægrum, quam poterit, profundissime inspirare, quod, si nullo suo incommodo facere possit, pulmones ipsi salvos esse, judicare licet: sin minus, & tussis hanc violentam inspirationem statim excipiat, pulmones læsos esse, concludendum est.

§. XI.

Ad conceptionem obscuram patefaciendam multa Medicorum scriptis commendata exstant, quorum plerumque sublesta fides, nonnulla etiam ridicula & frivola. Omnibus carere possemus, si verum esset experimentum, cujus a P. MONAVIO commendati in epistola Andr. Dudithii ad eund. ap. Scholzum ep. XXXVI. mentio fit, scilicet, cohibendum esse a prægnante spiritum, clauso quam diutissime ore, sic enim fore, ut motus embryonis persentiat. Cujus periculum quilibet, cui id integrum erit, facere poterit.

§. XII.

Plethoram multa produnt. In reliquis non contemnendum ejus indicium exhibet difficilis respiratio, quemlibet leviolem etiam motum corporis & exercitium excipiens. Vitiata sanguinis crasi commune quidem hoc symptoma existit cum plethora, cui vero potissimum debeatur, ex reliquis signis facile innotescet. Interim notamus, eam sanguinis vitiata crasin, quæ œconomiam vitalem turbare apta nata est, sic plerumque cum plethora conjungi, ut hujus potius, quam illius culpa peccetur.

§. XIII.

Tandem in vitiis hepatis, quæ tactu deprehendi possunt, ægroti leniter inspirare, & spiritum comprimere jubendi sunt, sic enim hoc viscus in hypochondrio magis prominens, infarctus & scirrhus, si quos habet, explorantis Medici manui facilius exhibebit. Hæc speciminis loco de usu respirationis in explorando dicta sufficiant. Plura jam afferre, nec tempus nec dissertationis limites permittunt, quibus reliqui usus respirationis in præservando & curando adhuc sunt includendi.

S E C T I O III.

C A P U T II.

De usu respirationis in præservando.

§. I.

Cum in confesso sit apud omnes Medicos, conservationem sanitatis, adeoque præservationem a morbis opus esse Naturæ, tum appetentis & affumentis ea, quæ continuis motibus a corpore deterruntur & pereunt, tum secernentis salubres & vitæ necessarios liquores, & excernentis, quæ vel copia molesta, vel alias corpori exitiosa forent, patet, Medici operæ nihil amplius in hoc negotio relinqui, quam ut Naturæ conatus adjuvet, partim appetitum provocando, si langueat, partim impedimenta, quæ vel nutritioni, vel secretionibus & excretionibus obstant, removendo.

§. II.

Ex omnibus adminiculis, quæ huic scopo inferviunt, ea saltem hujus sunt loci, quæ a respiratione desumuntur. Videndum itaque erit, quantum hæc varie temperata tum appetitum excitet & nutritionem adjuvet, tum secretionum & excretionum naturalium negotio famuletur.

§. III.

Ut itaque fidem *Paragrapho penult. Sect. I.* datam liberemus, e structura & motu diaphragmatis, ejusque cum visceribus infimi ventris, & præcipue oesophago & cisternæ lumbari, cohæsiōe, eque vicinia cum hepate & liene atque pancreate patet, contracto diaphragmate in inspiratione 1) constringi oesophagum, 2) comprimi ventriculum, & hoc ipso illidi sibi invicem eo contentos cibos & atteri, unaque teneriores & satis comminutas eorum partes per pylorum eliminari. 3) Chyli ex intestinis in vasa lactea secessionem juvari. 4) Eiusdem ulteriorem progressum in vasis lacteis facilitari. 5) Cisternæ lumbari contentum chylum & lympham a tendinibus diaphragmatis in ductum thoracicum cogi. 6) Succu pancreatici in intestina effusionem urgeri. 7) Bilis ex universo hepate in vesiculam & ex hac in intestina excretionem juvari. 8) Sanguinis e liene & venis portam constituentibus reditum ad hepar facilitari. 9) Fæcum denique alvinarum excretionem promoveri. In quibus quum totum chylicationis negotium versetur, obscurum amplius non est, quantum illud sit commodi, quod ipsi a respiratione aucta accedat, & quantam opem sanitatis conservatio, quæ primæ concoctioni rite succedenti fere unice debetur, ab illa expectet.

§. IV.

Et cohibitionem quidem spiritus huc aliquid conferre posse, Veteribus persuasum fuit, quod ex loco MERCURIALIS allegato apparet, (in quantum scil. tensi abdominis musculi, & pressioni diaphragmatis contra nitentes, infimi ventris viscera exercent) & HIPPOCRATES testari videtur cujus hæc sunt *de Diet. lib. II. cap. XLIII.* Πνεύματος κατάχεσις τὰς πόρῃς διαναγκάσαι καὶ τὸ δέρμα λεπτύναι, καὶ τὸ ὑγρὸν ὑπὸ τὸ δέρμα ἐξῶσαι δύναται. i. e. Spiritus detentio meatus disparare, & cutim attenuare & humiditatem sub cutim extrudere potest.

§. V.

Utramque vero hic paginam absolvunt, quos secundo loco ad augendam respirationem commendavimus, motus corporis & exercitia, quorum summum usum in præservando a morbis corpore agnoverunt Veteres pariter ac Recentiores, quod non modo vegetior sanguinis circuitus, his ipsis provocatus, exuberantes humores e corpore prosciberet, sed respirationem quoque sic augeret, ut ejus fructum infimi ventris viscera percipere possint.

§. VI.

Ex illis, quos tertio loco proposuimus, respirationem temperandi modis, vocis exercitia sic nostro scopo accommodata sunt, ut fere illis, quibus per munera aliis exercitationibus vacare non licet, sufficiant. Locupletissimus hujus rei testis est PLUTARCHUS, qui *lib. de tuenda valetud. Oper. Tom. II. p. CXXX.* de illis sequentem in modum disse-rit: Ἡ καθ' ἡμέραν τῆ λόγου χρῆσις, διὰ φωνῆς περιγυμνῆν, θαυμαστὸν οἶόν ἐστι γυμνάσιον, ἢ μόνον πρὸς ὑγίαν, ἀλλὰ, καὶ πρὸς ἰσχυρὴν ἢ παλαιστικὴν, ἐδὲ σαρκέσαν, ἢ πικρῆσαν τὴν ἐκτός, ὥσπερ ὁμοδομήματος. ἀλλὰ τοῖς ζωτικωτάτοις καὶ κυριωτάτοις μέρεσι βράμην ἐνδιδάδεται καὶ τὸν αἰσθητὸν ἐμπαισσαν: vert. Xylandr. Usus sermonis voce pronuntiati quotidianus mirum dictu quam utile sit genus exercitationis, non ad sanitatem duntaxat, sed etiam ad vires: non quidem athleticas eas, aut quæ carnes augeant, aut extremas corporis partes tanquam ædificii, condensent, sed quia principibus corporis membris, penes quæ vitæ facultas potissimum est, naturale robur, vigoremque verum ingenerat. Hinc PLUTARCHUS vocis exercitia ad robur quoque conferre aliptarum exemplo demonstrat, cohibitionem spiritus iis qui unguntur, commendantibus. Plures deinde hujus exercitationis usus commendat his verbis: Τὸ θερμὸν αὖξαι, καὶ λεπτύνει τὸ αἷμα καὶ πᾶσαν μὲν ἐκκαθαρίζει φλέβα, πᾶσαν δὲ ἀρτηρίαν ἀνοίγει, σύσσειν δὲ καὶ πᾶσιν ὑγρότητος ἐν εἰς περιττωματικῆς. Calorem augeat, sanguinem attenuat, omnes venas perpurgat, arterialque aperit, atque humores superfluos colligi non sinit. Tandem docet quomodo sit utendum vocis exercitiis, & quænam illorum præ reliquis præstantia & commoda existant.

§. VII.

Sed ne declamationes potius quam vocis exercitia loco allegato commendasse videatur PLUTARCHUS, rhetoricis artibus & facundia clarus, (quod obicere aliquis posset) non patitur illustris CORNELII CELSI auctoritas, qui conceptis verbis *lib. I. cap. VIII.* Concoctionem tardam a lectione clara juvari, asserit, & PLINII testimonium *lib. IX. ep. XXXVI.* se orationem Græcam Latinamve clare & intente, non tam vocis causa, quam stomachi, legere consuevisse, perhibentis.

§. VIII.

§. VIII.

Quæ cum ita sint, nemini profecto mirum esse debet, Oratores sacros & artium Professores, qui sedentariæ vitæ maximam partem sunt addicti, nec aliis æque exercitiis vacare possunt, si modo crassos in diætâ errores evitent, satis plerumque sanos degere, viridemque senectutem attingere. Illis quippe declamationes & conciones omnium exercitiorum instar esse, facile is perspicit, qui eorum quæ attulimus gnarus, paulo diligentius eos perorantes consideraverit. Fervente enim oratione, sensim universus corporis habitus iis tollitur, tumefiunt venæ, efflorescit color, sudores inter hæc erumpunt; præsertim si quos persuadendi studium aut placendi gloria exstimulat. Quocirca monendi sunt omnes litterarum studiosi, reliquique, quibus per vitæ rationem nec exercitiis nec concionibus aut lectionibus publicis vacare licet, ut illorum exemplo invitati, intra privatos parietes, quod sine ullo eorum incommodo fieri potest, sese recitando, clareve legendo, vel etiam cantando nonnunquam exerceant. Cui quidem consilio si obtemperaverint, non dubitandum est, quin respiratio, hac ratione temperanda, eos a multis morbis, quibus alias obnoxii forent, sit præservatura.

§. IX.

Interim negari nequit, non promiscue omnibus commendanda esse vocis exercitia, & multis illa exitiosa fuisse, qui non satis ad omnes circumstantias quæ illa prohibent, animum adverterunt. Sic v. g. multos Oratores sacros & profanos, a nimia inter concionandum contentione, in hæmoptysin incidisse, passim observatum est. Cujus non tam ipsius exercitii, quam hujus temere adhibiti, culpa fuit. Jam notavimus hac de causa CÆLIUM AURELIANUM, in cephalæa ea commendantem, licet aliquo pacto excusandus videatur, quod ἀναφώνησιν quidem, sed leni exercendam voce, iisque saltem suaserit, quibus caput fuerit plurimum revelatum: quo ipso certe ad congestiones, iis, qui cephalæa laborant, familiares, respexisse videtur. Cautiones itaque circa usum horum exercitiorum fere consistunt in sequentibus. 1.) Ut alvus libera & reliquæ excretiones sic satis sint expeditæ. 2.) Ut nunquam instituantur, nisi imminuta prius plethora. 3.) Ut thorace firmo gaudeant, qui illa admittere cupiunt. 4.) Ut evitentur in congestionibus circa caput. 5.) Ut præfente dispositione ad hæmoptysin, seu in congestionibus circa medium ventrem, omni studio caveantur. Quod HIPPOCRATES probe jam notavit, dum in pectoris morbo, ab ulcerata pulmonis arteria, φυλάσσειν βόην, vitare vociferationem jubet *De intern. affect. cap. I.* & AETIUS l. c. his verbis ad mentem Veterum inculcasse videtur: Utendum autem vocis exercitiis, neque temere neque inconsiderate, sed neque pravis & corruptis humoribus corpore repleto: neque in magnis & manifestis cruditatibus ad vocis exercitium progrediendum, ne amplior distributio corruptorum humorum aut vaporum in corpus fiat.

S E C T I O III.

C A P U T III.

De usu respirationis in curando.

§. I.

Quoniam omnis morborum curatio duplici ratione absolvitur, vel evacuando noxia, vel in ordinem redigendo, quæ vel motu, vel crasi, vel structura peccant; duplex quoque nobis erit tractatio, quarum prior utilitatem respirationis in excretionibus, posterior, in alterationibus promovendis, exhibebit. Quibus coronidis loco quædam de ipsius in foro chirurgico usu adjiciuntur:

§. II.

Et de iis quidem excretionibus, quæ secundum naturam contingunt; jam præc. capite dictum est: adeoque nobis saltem dicendum restat hoc loco de illorum evacuationibus, quæ præter naturam corpori inhærentia, morbi alicujus causam continentem constituunt. Quo referenda etiam sunt, quæ certo temporis spatio elapso, absolute e corpore sunt exterminanda: fæces alvinæ & foetus, instante tempore partus.

§. III.

Fæcum alvinarum & foetus exclusio, quamvis primario opus sit naturæ, motibus quasi spasmodicis contiguarum partium eandem promoventis; illam tamen opem exspectat a nifibus, cum cohibitione spiritus inter egerendum & parturiendum conjunctis, ut sine illis fere langueat, quod eorum exemplo, qui alvo difficiliore laborant, & in parturientibus; salutare sternutationis & contrario oscitationum effectum, manifestum est.

§. IV.

Potiores esse diaphragmatis partes in hoc excretionum genere, ex iis, quæ supra de cohibitione spiritus attulimus, apparet, Veteresque jam animadverterunt, & inter eos GALENUS, cui idcirco diaphragma lib. II. de mot. muscul. ἡκρίστος περιττωμάτων ὄργανον, instrumentum excernendi superflua audit. Quo ipso, tum recensita excretionum genera ab ipso juvari, tum superflui humoris per cutim eliminationem, ad quam cohibitio spiritus non parum momenti afferre credebatur, procurari, falsus esse videtur.

§. V.

Plures deinceps sunt excretionēs variorum præter naturam cavitatibus & visceribus inhærentium, quæ a variis respirationis augendæ modis, quos tertio loco recensuimus adjumentum exspectant. Sic e. g. elisio spiritus per nares mucum ipsis inhærentem eliminat: Quo confert etiam sternutatio, quæ paulo violentior etiam peregrina auribus inhærentia ex illis nonnunquam excutit. Sic præter naturam asperæ arteriæ inhærentia tussi eliduntur. Sic multis, qui apostematibus & vomicis laborabant, salutaris fuit effusus risus, ruptis illis a nifibus inter ridendum obortis, quod Erasmo Roterodamo, cum Epistolas obscurorum virorum legeret, accidisse referunt. Singultus nonnunquam post assumptionem acriorum, veluti piperis in pollinem redacti, oboriri observatur,

tur, hunc si quem alium certissime tollit sternutatio, dum valide ventriculum concutit, ejusque tunicas ab irritantibus liberat, ad quod HIPPOCRATIS *Aph. XIII. sect. VI.* notari potest, qui *πταρμὲς ἐπιγινόμενες λύνει τον λυγμὸν* sternutationes supervenientes a singultu liberare perhibet.

§. VI.

Quinimo cohibitio spiritus, & fere omnis respiratio coacta omnes nostri corporis humores, in partium fibrosarum interstitiis hærentes, sic concutunt, ut ad excretionem eosdem stimulent atque invitent. Quod beneficio tensarum a nifibus fortioribus fibrarum fieri dicendum est, & HIPPOCRATES *c. l.* per illud *πύρες διαναγκάζει* denotasse videtur. Sic v. g. vena secta inter tussendum fortius salit. Pertinet huc historia juvenis, qui e pedis vulnuscule sanguinem pro lubitu, cohibens scilicet spiritum, exprimere poterat, quam referunt, ni fallor, *Ephemerides N.C.*

§. VII.

Quod ad alterantem respirationis usum pertinet, quum tria ejus sint objecta, motus scilicet, partes fluidæ & solidæ, de singulis seorsim agendum erit. Et motus quidem deperditus in lipothymia sæpe restitutus est a sternutatione per ptarmica excitata. Motus spasmodicos ventriculi, & diaphragmatis in singultu e. g. a potu frigida, cohibitione spiritus curari jam olim observarunt Medici, quod e convivio Platonis apparet, ubi Erysimachus Medicus eandem Aristophani singultienti commendat, & ARISTOTELES *probl. V. part. II.* confirmat. Sic assiduorum oscitationum medelam esse longam spirationem HIPPOCRATES asseruit *ἰσθήειον ξυνεχέων χασμέων μακρόπνευς. Epidem. VI. Sect. II.* Pleuriticos etiam & sicca tussi laborantes cohibitione spiritus juvari observatum est. Alterum docet TH. SYDENHAM his verbis: Qui pleuritide laborant, solent tussis crebræ, quæ magnum iis cruciatum, ob inflammatarum partium tensionem, affert, prima molimina repressione spiritus coercere. *Oper. Sect. VI. cap. III. de Pleurit. p. 226.* Alterum observavit C. CELSUS, cujus hæc sunt *lib. IV. cap. IV. de tussi*: Oportet spiritu retento currere, sed minime in pulvere, ac lectione uti vehementi, quæ primo quidem impeditur a tussi, post eam vincit.

§. VIII.

Sanguinis, fluidi principalis, motum progressivum varie a respiratione mutari, auctis vel sufflaminatis cordis motibus, jam supra notavimus, & ante nos vidit RICHARD. LOWERUS *de Corde*. In quantum igitur intestinus motus a progressivo dependet, in tantum pariter mutetur necesse est. Uterque si rite succedit, bene agitur de sanitate nostra: sin minus, malorum myrias adest, quæ mali hypochondriaci nomine venit, & infimi ventris viscera, in quæ venæ Portæ rami disseminantur, primum affligere observatur, quod non aliunde fit, quam quod in his venis lentior natura sanguinis motus statim communis circuitus detrimenta experiatur & prodatur.

§. IX.

Quam gravis noxa sit in hoc morbi genere lentæ & raræ respirationis, alii jam indicarunt Viri in arte clarissimi & in reliquis MALACH. THRUSTON in diatrib. de respirationis usu primario, qui solemter etiam annotavit, suspiria hisce esse familiaria & pene necessaria, ut sanguis alias circa præcordia stagnaturus profunda respiratione subinde ad motum rursus sollicitetur. Quamobrem omnibus iis, qui hoc morbo male mulctantur, nec reliquos augendæ respirationis modos admittere possunt, non tam frequentia suspiria, quam fortem & crebram respirationem continuo filo celebrandam commendamus. Illa enim hoc incommodi habent, ut, quantum una manu dant, tantundem fere altera demant, ægris ad genium redeuntibus, & post unum alterumve suspirium lente ac demisse rursus inspirantibus. Hæc & damna lentæ respirationis præcavet, & ægros suspiriis malo omine assuefieri non finit.

§. X.

Quoniam sanguinis laudabilis crasis maximam partem utrique ejus motui rite succedenti debetur, non difficile est intelligere, quantum ad ejus vitiatæ restorationem conferat respiratio, cujus in temperando humorum motu tantas vires esse audivimus. Respirationis igitur usus in alteranda humorum crasi, his positus nulli amplius obscurus esse poterit.

§. XI.

Unicum saltem exemplum vitiosæ diaphragmatis structuræ per respirationem emandandæ proponimus. Observarunt scilicet, qui corpora eorum, quibus, a gravi pectoris morbo superato, dyspnœa relicta fuerat, dissecuerunt; diaphragma ipsis plerumque, ob frequentiore & minus profundam respirationem, altius solito adscendisse, & costis spuris, tertiæ quartæve nonnunquam fuisse adnatum. Quibus si, post profligatum morbum, profundior respirationem commendaveris, meo quidem judicio non solum nihil peccabis, sed fortasse etiam efficies, ut diaphragma, solitis limitibus contentum, eadem, qua ante morbum, libertate sese expandere rursus queat.

§. XII.

Tandem, ut quædam etiam de ejus usu in foro chirurgico dicamus. Pus aut sanguis post trepanationem duræ matri incumbens optime obstructis ore & naribus, comprimendoque spiritum, excutitur. In fistulis thoracis inter pleuram & musculos consistentibus, ne pus tam facile motu continuo ulterius serpat, minor respiratio necessaria putatur a BARBETTE *Oper. chir. anat. part. III. lib. III. pag. 359.*

Exspiratio minor necessaria etiam videtur in vulneribus thoracem penetrantibus & abdominis, ne illo contentæ partes tam facile elabantur, quod, nisi inter exspirandum fieri, non potest.

Atque sic habes L. B. quasdam veluti lineas, quibus respirationis usum in praxi medica adumbrare placuit. Curatius aliquando atque uberius hoc argumentum a nobis pertractabitur, si Deus vitam viresque concefferit, cujus summo Numini devotas grates pro præstito auxilio nuncupamus.



THESES INAUGURALES MEDICO - FORENSES DE ANATOMIA PUBLICA.

Primum edita Anno 1703.

P R Æ F A M E N.



THESES inaugurales Medico - forenses de Anatomia publica tibi, Lector Benevole, impræsentiarum fisto. Primo equidem intuitu ex harum perfectione scrupulum movebis, quod potius ad forum juridicum, quam cathedram medicam, pertineat hujus materiæ suscepta tractatio. At vero & calculum tuum mihi quoque adjecturus es bene perpendens, quam anxie Medicus debeat esse sollicitus de inquirenda studii sui justitia. Quemadmodum igitur Anatomia & oculus & fundamentum palmarium totius reputatur medicinæ, ita quoque mihi haud vitio versurus es, quod illius fundatam in omni jure concessionem fiteque instituendi modum pro virium mearum imbecillitate quadantenus depingere ausus sim. Falcem sane in alienam messem haud immisi, sed provoco ad exemplum Celeberrimi Dn. D. BOHNII, qui non tantum ante aliquot annos hujus generis disputationes Medico - Forenses de officio Medici in Academia Lipsiensi publice habuit, verum etiam nuperrime integrum conscripsit tractatum de Medico clinico ac Forensi. Rem si quis in dubium vocaret, uberius eam ex omnium ferme anatomicorum scriptis declararem, interim tamen Lectorem benevolum ad Celeberrimi ROLFENII dissertationes anatomicas remitto, qui nulli sibi duxit pudori ut Medicus ex asse defendere exercitiorum Anatomicorum legalitatem. Et quod, quæso, thema convenientius ad dissertationem Inauguralem eligere potuissem, quam quod ita exaratum prostat, ut ab omnibus, licet Medicæ arti non addictis, intelligi queat. Id proinde altioris mentis indagine ruminans non potui non hisce includere thesibus ea, quæ B. Parenti meo circa Anatomem publicam ipsi in Academia Lipsiensi demandatam quotidie obveniebant. Fave igitur conatibus meis, altissimum autem Numen benignissime illos secundet.

concessi; per Professore[m] Anatomie publice in
usum spectatorum instituta dissectio; partiumque
rite facta demonstratio.

C A P U T I.

De Definitione & causa Efficiente.

§. I.

Definitio.

Prolixam terminorum unicuique primo etiam intuitu satis superque cognitorum evolutionem jure meritoque ad evitandam nauseam sicco prætereo pede, ac statim definitio *Anatomiam publicam*, quod sit *cadaveris humani, a Magistratu Facultati Medicæ*

§. II.

Hoc institutum omnia approbant jura. *Causa*
Quemadmodum enim non solum *Jus divi-* *Efficiens.*
num omnium hominum cordibus inscriptum, *Remota*
juxta sententiam PAULI Apostoli ad Rom. 2. *Jus divi-*
v. 15. seu *Naturale* ad conservationem gene- *num.*
ris humani tendit, verum etiam id, quod in
sacro codice *promulgatum est*, tum *Eccl. c.*
38. v. 1. *seqq.* artem medicam dignis com-
mendat encomiis, tum DEUM ipsum *Exod.*
15. v. ult. & *Esaie* 38. v. 21. imo Salvato-
S 4 rem

rem nostrum passim in Novo Testamento & ex eo Ecclesia Christiana in cantico :

Ein Arzt ist uns gegeben /
Der selber ist das Leben /

ut summum deprædicat archiatrum; ita sponte sua fluit, Anatomiam jure divino esse licitam, dum absque ea nemo, ne quidem tyro in medicina, ut infra Cap. V. probabitur, evadere potest. Quo vero omnem dubitationis lapidem removeam, provocho ad id, quod exercitium anatomicum nullibi in legibus divinis deprehendatur prohibitum, hincque secundum Jurisconsultorum regulas concessum.

§. III.

Gentium.

Affensum *Juris Gentium* demonstrare haud immerito superfedeo, neque ex GELLII *Noct. Attic.* l. 10. c. 10. Aegyptiorum, neque ex PLINIO l. 19. c. 15. ab ipsis Regibus Aegyptiacis, neque ante ARISTOTELIS tempora, ut hic testatur lib. 3. de *Hist. Animal.* ejusmodi sectiones institutas urgeo; siquidem lectorem benevolum tam ex relatione peregrinantium, quam ex inspectione tot editorum librorum anatomicorum haud latet, quanta industria hodiernum apud gentes, ad minimum moratiores, imprimis vero in Italia, Gallia, utroque Belgio, Anglia, Dania, ac nostra Germania &c. magis magisque excolatur studium anatomicum tot mille dissectis cadaveribus humanis.

§. IV.

Civile.

Jus Civile equidem expressis verbis Anatomicen instituendam haud præcipit. Nihilominus tamen, dum peritos requirit Medicos, hincque, uti eventum mortalitatis eis non imputandum l. 6. ff. de *offic. præf.* §. 7., ita, quod illorum culpa factum, omnino redarguendum censet *dict. loc.* per indirectum Anatomiam permittit secundum notissimum philosophorum canonem: Qui vult finem, media quoque ad eum ducentia concedere intelligitur.

§. V.

Canonium.

Majus dubium movet ex *Jure Canonico* Pontifex Bonifacius VIII. c. l. *Xvag. comm. de sepulturis*, excommunicationis sententia eos persequens, qui corpora defunctorum detestandæ feritatis abusu horribili truculenter exenterant, & ea immuniter decoquunt, ossaque tegumento carnis excutiant. Quæ constitutio & adhuc hodie locum invenire videtur, quoniam secundum mentem Jurisconsultorum jus canonicum juri divino non contrarium in causis conscientiae & ecclesiasticis, qualis & hæc est, præ jure civili in Germania receptum prostat. Ast quis non primo statim intuitu ex ipsis constitutionis verbis colligit, Pontificem neutiquam agere de Anatome in usum publicum a Medico suscepta, verum jam memoratum sepeliendi modum improbasse, ac proinde obicem objecisse abominabili tunc temporis fidelium consuetudini, qui ex impiæ pietatis affectu suos genere nobiles in exteris locis demortuos hoc modo dilaniatos ad patria loca tumulandos mittebant.

§. VI.

Jus Germanicum in specie ita dictum non solum in Nemosi Carolina Art. 149. in casu, quo super lethalitate vulneris judicium medicum ferendum, Judicibus cadaveris humani sectionem injungit, verum etiam Gloriosissimum hunc Imperatorem Carolum V. super justitia Anatomiae Universitatem Salmanticensem consuluisse, eamque, quod licita sit, respondisse, memorat ANTONINUS GOMEZIUS in *Comm. Variar. Resolut. Jur.* tom. 3. c. 14. n. 9.

§. VII.

In *Jure Saxonico Electorali* expressæ profstant hac de re sanctiones. Ita enim verba sonant in *ordinatione academica* sub rubr. Von der Facultät in der Artzeney §. Sonderlich aber soll der Professor Chirurg. Zu dem soll er auch in einer PUBLICA ANATOMIA alle Jahre zum wenigsten 1. mahl in einem humano corpore, wenn es vorhanden / was er gelesen / demonstriren und weisen / und das erste Jahr figuram und compagem omnium ossium, auffß andre Jahr die musculos, cutem, atque una inter secandum intercedentes partes, & intercurrentia vasa, venas, arterias, & nervos; auffß dritte Jahr aber ventrium trium, h. e. capitis, thoracis & abdominis contenta viscera demonstriren und zeigen. Et in *Decret. Visis Academ. Lipsiens.* sub tit. Facultas Medica §. der andre / (Sc. Professor) als Anatomicus und Chirurgus soll jährlich / wenn er subjecta haben kan / ein oder 2. mahl publice seciren und demonstriren, auch dabey die operationes chirurgicas mit berühren.

§. VIII.

Ex quibus omnibus sole meridiano clarior elucescit Anatomiae publicæ justitia. Hac autem non obstante multi exsurgunt nasutuli, qui eam ut factum crudele, inhumanum, foedum, nausæ plenum, in agnatorum injuriam tendens, ac proinde a Veteribus, christianis, & empiricis improbatum depingere annuntunt. Agmen horum calumniatorum ducit HENRICUS CORNELIUS AGRIPPA de *Incertitud. & Vanitat. Scient.* qui, quemadmodum c. 82. litem de præcedentia inter Jurisconsultos & Medicos dirimens hos carnifices, quia latrones ad supplicium deducendos sequantur, appellat, ita quoque c. 86. in specie Anatomiam vocat theatricam carnificinam, Medicosque crudeli diligentia atque spectaculo horrendo & abominabili, nec minus impio in mortui cadaver his piaculis humanum corpus dilaniantes grassari asserit. Quæ contumeliæ adeo in vulgus innotuere, ut ad mortem damnati ardentissimis petere soleant precibus, ne cadaver illorum cultro subjiciatur anatomico, prout liquet ex historia rustici cujusdam, qui in ultimo mortis articulo exclamabat: mann solte ihn nur nicht Rolfincken, vid. ERASM. FRANCISCI HOLLISCHER *Proteus* p. 984. Quantumvis vero ad omnes, quocunque modo moveri possunt, objectiones, facili negotio exacta suppeditetur responsio,

ponſio, & ex cap. ult. luculenter appareat, quam inevitabilis neceſſitas Anatomen inſtituendam urgeat, nihilo minus tamen illas diſſertationi huic inferere prohibeor, ſiquidem alias præſens labor in integrum excreſceret tractatum. Et quoniam hoc inprimis ad cathedram actumque diſputatorium pertinet, interim lectorem benevolum remitto ad GUERN. ROLFINCIUM diſſertat. anatom. l. 1. c. 1. ſeq. Magn. DN. SCHWENDENDORFFERI diſſert. de Medicorum Anatome Jure divino & humano licita. JOH. GEORG. KULPIS Tract. de jure circa cadavera punitorum cap. V. BEIERI diſſert. de cadav. punit.

§. IX.

Cauſa
Efficiens
Proxima
Princeps.

Ad Anatomiam publicam cadaver concedit *Magiſtratus*. Et quidem de ſuperiori, cui ſummum competit Imperium, nemo ſane ullum movebit dubium, quippe qui jus vitæ neciſque & ita etiam poteſtatem aut inhumatum relinquendi cadaver, aut Anatomiae publicae concedendi habet. Exſurgunt quoque caſus, in quibus immediate a Principe impetrandum eſt cadaver, e. g. ſi damnato ad mortem poena ignis, rotæ, &c. remittenda. Jus enim aggratiandi ſoli adſcribitur Principi, ſic, ut nequidem regimen provinciale, die Landes-Regierung / abſque conſenſu intimi miniſterii, des geheimten Raths - Collegii, etiam propter Anatomen publicam in tali caſu diſpenſare valeat, prout patet ex ſequenti reſponſione: Denen Decano, Seniori, und andern Doctoribus und Aſſeſſoribus der Mediciniſchen Facultät zu Leipzig wird auf ihr beſchiedenes ſuppliciren die abſolung des zum ſchwerdt und Radt verurtheilten Straßen-Raubers betr. hiermit zur Nachricht vermeldet / daß man ſolches urtheil ohne eingeholten allergnädigſten beſehl / welchen aber von Dresden zu erlangen / viel zeit verlauffen würde / zu mitigiren nicht vermögen. Wornach ſie ſich zu achten. Sign. Merſeburgk / am 20. Novembr. Anno 1699.

Königl. Pohlniſche und Churfürſtl. Sächſ. Adminiſtrations-Cantzley daſelbſt.

§. X.

Magiſtratus inferior.

De *Magiſtratu* equidem inferiori, cui competit juridiſſictio alta, der die ober-gerichte hat / inter Ictos diſceptatur, an ille quoque hac gaudeat poteſtate? Alii affirmant, ut GOTHOFREDUS ad rubr. tit. de cadav. punit. Alii negant, ut WESENBECIUS, HAHN ad Weſenb. ad diſt. Tit. Alii ſuadent in hoc caſu dubio, quo tutius procedatur, Principis expetere conſenſum, ut BRUNNEMANNUS ad l. 10. C. de Religioſ. & ſumpt. funebr. no. 7. CARPZOVIVS in praxi Criminal. qu. 137. no. 74. Hanc autem litem non facio meam, dum in Electoratu Saxonico res eſt expedita, ſiquidem Sereniſſimus Legiſlator Ano 1662. non tantum omni Senatui urbico, ſed etiam præſectis, ejuſmodi conſeſſionem cadaverum permiſit, imo injunxit. Qua de cauſa maxime Nobiliſſ. & Ampliſſimus Senatus Lipſienſis pro ea, quam fovet erga ſtudioſam juventutem, ſingulari benevolentia haud ita pri-

dem Theatro Lipſienſi conceſſit cadaver ſuris in flagranti delicto interemti.

§. XI.

Gratis autem a *Magiſtratu* conceditur, & eas ſolummodo, quæ *Magiſtrato* pro loculi conſeſſione, veſpillonibus pro cadaveris immiſſione, & aurigæ pro vectura ad theatrum dantur impenſæ, ſolvere tenetur Anatomiae Profeſſor. Hinc nec uxor, neque liberi aut alii hæredes anatomizati quicquam petendi jus habent. vid. KULPIS. all. loc. §. 7. in ſin. Et quis non videt quam male fundata ſit opinio vulgi: man hat dem Körper erkauffen müſſen. Carnificis quoque ſervorum injuſta decem thalerorum prætenſio merito poenis eſt coercenda digniſſimis.

§. XII.

Privatum porro de cadavere ſuo diſponere poſſe, ut ad Anatomiam publicam id tradatur, nemo inficias ibit; longe potius hic meritis extollendus eſt laudibus, quod etiam poſt mortem cadavere ſuo bono publico inſervire intendat. Ex defectu enim cadaverum, dum ordo ad mortem tantum condemnatos tangit, in noſtris provinciis incrementa ſtudio anatomici impediuntur. Hinc ex Nath. Chyræg. Delic. itiner. per Europ. p. 42. Antoniam illam Romanam corpus ſuum, ut exinde ſkeleton fieret, Medicis reliquiſſe, hocque poſtea factum eſſe opera Giesberti Medici, monumentum Romæ in Hoſpitali S. Mariæ de conſolatione erectum teſtari, refert KULPIS. c. 1. §. 17. Excipio autem ad ultimum ſupplicium condemnatum, cujus cadaver in terrorem aliorum aut in patibulo aut furca relinquendum, aut igne comburendum. Quanquam enim id ipſum KULPISIUS diſt. loco de omnibus ad mortem condemnatis ea ex ratione, daß er Leib und guth verwürcket und der Obrigkeit verfallen ſey / ac, quod proinde de corpore ſuo, tanquam de re publica nihil diſponere valeat, aſſerere annititur, nullus tamen dubito, quin etiam in eo caſu alias ſepeliendus delinquens idem diſponere poſſit, ac alius privatus. De jure etenim moderno pariter ac ille teſtandi facultate gaudet. Quando autem privatus de cadavere ſuo hanc relinquit diſpoſitionem, *Magiſtratus* conſenſus nunquam eſt negligendus.

§. XIII.

Nam abſque illius præſcitu *privata* auctoritate cadaver humanum etiam ad Anatomiam auferre jure prohibitum legitur. Jus namque circa hominem demortuum eumque ſepeliendum hodie ad *magiſtrum* pertinet, ejuſque per attentatam huiusmodi ablationem haud leve infertur præjudicium, proindeque factum hoc arbitrarie punitur. vid. CARPZOVIVS p. 4. c. 34. D. 4. no. 7.

CAPUT II.

De Subjecto.

§. I.

Subjec-
tum prin-
cipale Fa-
cultas me-
dica.

A Natomiam publicam instituunt Facultates medicæ in Academiis. Hæ namque singulari quodam privilegio solæ sibi hoc jus acquisiverunt, ita ut aliis in locis ejusmodi exercitium Anatomicum suscipiendi Medicis non detur libertas. Qua de causa, cum Anno 1624. D. Lonerus Weisenfelsæ idem tentaret, statim ad Facultatis medicæ Lipsiensis super hac re motam querelam emanabat mandatum electorale ad Capitaneum & Senatum Weisenfelsensem hujus tenoris: Was an Uns unsere Medicinische Facultät zu Leipzig wegen D. Loneri bey euch fürhabender Anatomie in Unterthänigkeit gelangen lassen / solches habt ihr aus dem Beschlusse zuvernehmen. Weil aber solches sein Vorhaben gedachter unserer Facultät nicht zu geringem præjudiz ihrer habendem Privilegien, bey euch dem gemeinem Mann zum Aergerniß gereicht / zu dem die Barbiergesellen daselbst wegen der Nähe dergleichen Exercitia alle Jahre zu Leipzig mit ansehen können: Als begehren Wir hiermit Gnädigst / ihr wollet gedachtem Doctori Loneri solches sein vorhabendes Exercitium secandi extra Academiam abzustellen auferlegen. vid. AMMANN. prax. Vuln. Lethal. prolegom. VIII. in fin.

§. II.

Professor
Anato-
miæ.

Nomine Facultatis anatomicus hic labor perficitur a Professore hujus studii publico, prout id ipsum liquet ex allegatis c. I. §. 7. constitutionibus Saxonis. Arbitrio vero illius relictum est, an ipse totum velit absolvere negotium, an solam tantummodo demonstrationem una cum directorio peragere, partium præparatione aut Professori Anatomiae extraordinario aut alii Doctori juveni, aut constituto profectori, aut studioso medicinæ in hac arte exercitato, aut chirurgo habili deman- data.

§. III.

Minus
principale
spectato-
res.

Hæc solennia Anatomiae Professor in programme typis impresso intimat, atque ad ea spectanda Rectorem Academiae, utriusque Reipublicæ procures & studiosam juventutem invitat. Illi, qui solennitatis causa comparere videntur, debita gratiarum actione excepti admittuntur. Studiosi autem tesseram, soluto pro præparatione & demonstratione thalero, & pro demonstratione sola dimidia hujus pretii parte in Academia Lipsiensi redimere tenentur. Quemadmodum enim Professore Anatomicum supra cap. I. §. II. allegatas easque, quæ ad comparanda & reficienda instrumenta anatomica, ceram, candelas, prunas, impressionem programmatis, illiusque transmissionem, &c. requiruntur, impensas exsolvere oportet, nemini vero officium suum debeat esse damnosum, sed potius æquitati convenientius æstimatur, ei in solatium tot

exantlatorum laborum aliquid largiri, ita quoque jam dictam tesserarum redemptionem approbavit Potentissimus Rex Poloniae atque Elector Saxoniae sequenti Decreto:

Von Gottes gnaden / Fridrich Augustus / König in Pohlen / Herzog zu Sachsen / Jülich / Cleve / und Berg / auch Engern und Westphalen / Churfürst / etc.

Würdige / Hochgelahrte / Liebe Undäch- tige und getreue / Uns ist vorgetragen worden / was ihr so wol auf derer sämtlichen Studiosorum Medicinæ geführte Klage / daß sie bey vorgehenden Sectionibus der todten Körper nicht zugelassen werden wolten / als auch auf des Professors Anatomiae / D. Petermanns / beschehenes Suchen wegen des gewöhnlichen honorarii bey denen demonstra- tionibus publicis unterm 7. dieses mit Ein- sendung derer sieben wieder zurück kommen- den Acten anhero berichtet. Wann dann hierunter die Anatomiae publicæ oder sectio- nes theatrales von denen sectionibus judicia- libus, so vor dem Magistrat pro vulneris con- ditione & lethali- tate indaganda angestellt werden / zu unterscheiden / und von jenen die Studiosi, sonderlich die dem Studio Medico obliegen / nicht zu excludiren, sondern selbige vielmehr / daß sie zu dergleichen demonstra- tionibus sich fleißig einfinden sollen / anzumah- nen / jedoch aber nicht unbillig / daß dem Professori zu Widerersekung derer Unkosten / und zu einer Ergöcklichkeit das gewöhnliche honorarium davor abgestattet werde: hinge- gen bey diesen / nemlich denen sectionibus, so nach beschehener Verwundung von denen Gerichten verlangt und angeordnet werden / je zuweilen die gelegenheit des orts oder an- dre umstände nicht zulassen wollen / daß die Studiosi solchen bewohnen können / und ihnen daher sich mit gewalt darzu zubringen nicht nachzulassen: Als ist hiermit Unser be- gehren / ihr wollet euch also darnach achten / und die Studiosos dessen bescheiden / daran geschieht Unsere Meynung / Datum Dres- den am 20. Januarii 1699.

An die Universität zu Leipzig.

Gottfried Herrmann
von Reichlingen.
David Thieme.

§. IV.

Magis vero officio suo fungitur Professor Anatomiae, si finita demonstratione solenni chirurgis privatim quoque, (siquidem quam plurimi propter neglectam latinam linguam lectioni publicæ haud interesse valent,) exactam partium humanarum notitiam inculcare allaborat. Illi enim non solum in Academiis directorio jam dicti Professoris sunt subjecti, verum etiam quam maxime hac indigent in- formatione, ni velint censer ab AMMANNO Praxi vuln. lethal. p. 320. quod in sectionibus nihil præstare possint, quam quod spon- gias sanguine repletas exprimant.

Chirurgi.

§. V.

§. V.

Obstetri-
ces.

Nec omittendæ veniunt *obstrettrices*, quæ haud exiguum genitalium sibi comparare opus habent cognitionem, prout id ipsum exoptat *Facultatis medicæ Lipsiensis p. t. Decanus, Magnus Dn. BOHNIUS in tractat. nuper edito de Medico clinico ac forensi p. 2. c. 3. p. 563.*

CAPUT III.

De Objecto.

§. I.

An Bru-
ta?

Brutorum equidem solennem dissectionem haud improbandam judico, siquidem in THOMÆ BARTHOLINI *Act. Hassniens. part. I. Aquilæ observ. 2. p. 6. Equi regii obs. II. pag. 36. Leonis obs. VI. p. 43. Echini terrestres obs. 90. pag. 175. Columbæ obs. 96. p. 185. Rangiferi obs. 135. p. 274. Leporis obs. 136. pag. 278. & parte II. Cercopithecii obs. 9. pag. 13. aci marini obs. 48. p. 149. Pavonis obs. 114. pag. 288. Psittaci obs. 124. pag. 314. it. part. IV. Salamandra & gryllotalpæ obs. 2. pag. 5. partim privatim, partim publice in theatro anatomico instituta legitur. Ast dum melius ex ipso fonte hauriuntur aquæ, haud sine injuria ipsius corporis humani Anatomiae inhæreo.*

§. II.

An quodlibet
cadaver?

Hic autem haud levioris momenti statim exoritur quæstio. *An quodlibet corpus humanum* dari queat diffecandum? Affirmat id ipsum KULPIS *c. l. §. 6. secundum rigorem juris.* Ego vero in præsentiarum non urgebo, quod potens defuncti familia ex ea, quam ex falsa jam memorata plebis opinione exfuxit, sententia facile tumultum excitare ac anatomico Professori reliquisque adjuvantibus quam maxime nociva existere valeat; neque allegabo, quanta facilitate nævi, quos homuncio una secum sepeliri cupit, per universum terrarum orbem circumferantur. Nonne ex sectione Philippi II. Hispaniarum Regis hodiernum adhuc fertur judicium, quod ex justo Dei decreto ob immensas, quas contra Reformatos in Belgio suscepit sævitias, vermibus fuerit corruptus. vid. PFEIFFER *Erquick-Stunden.* Nonne eidem judicio in contrarium Pontificii subjiciunt Christianum Luneburgicum, Administratorem Halberstadensem, arma contra Ferdinandum II. capientem, vid. *Caraffa in Germ. Sac. Relit.* ita ut ex Evangelicis THOMAS BARTHOLINUS *in actis medic. Hassniens. 1673. obs. XIII. p. 25.* statum morbi genuinum tantquam fundatam apologiam pro principe publicandum existimaverit. Et quis nescit, quam ob causam Regina Anglica Elisabetha disposuerit, ne cadaver ejus post mortem lavaretur, multo minus propter alias consuetam exenterationem a Medicis inspiceretur. vid. CAMDEN *in Annal.* Quod si autem personæ illustres haud liberæ existant a sinistris Historicorum relationibus, multo magis sane idem fatum obveniret inferioris sortis

hominibus. Hinc B. *Parens* meus taciturnitatem Medico commendans *in physilog. c. I. §. 31.* refert, non neminem in palum acuminatum scroto irruentem eo curato ac resanato per reliquum vitæ tempus inter omnes audivisse *Glick = Sack.* Verum enim vero, licet non negem, ad ulteriorem pathologiæ cognitionem multum facere omnium demortuorum inspectionem, non tamen ulla postulat necessitas, ut indistincte omnia cadavera ad Anatomiam trahantur publicam, dum ea sufficiunt, circa quæ nullum jam memoratorum nascitur dubium.

§. III.

Qua de causa præprimis in nostris provinciis *ad mortem condemnatorum cadavera* theatro anatomico relinquuntur, quanquam & circa ea varia proponantur argumenta, maxime quod delinquens non solum infamiæ macula sit contaminatus, verum etiam carnificis manu extinctus. Quemadmodum vero ineptias Medicorum nonnullorum, qui cadaveri per ipsius fronti factam impressionem sigilli Facultatis famam quasi reddere sibi persuadent, jure irridere cogor; ita haud immoratus sum prolixis harum objectionum refutationibus, contentus allegatione celeberrimæ Facultatis Lipsiensis responsi ad consultationem des *Rehrmanns* in Paulino, quem ex ea ratione fabrorum murariorum societas amplius tolerare nolebat, in hunc modum concepti:

An dam-
nati ad
mortem?

Hat das Maurer Handwerck allhier zu Leipzig / nachdem ihr vor 14. Jahren zum Rehrmann im Paulino angenommen worden / sich unterstanden bey ihren Quartalen und Zusammenkünfften euch anzuschließen / ihr wollet aber / ob es solches zuthun befugt / des Rechts berichtet seyn. Ob nun wol gedachtes Handwerck / daß es hierzu allerdings guten fuz und Macht gehabt / vermeynet / in Erwegung / daß ihr eure Lebens- Art geändert / und nicht nur auf dem euch anvertrautem Collegio allen Unflath und Rehrig zusammenfegen und wegschaffen / sondern auch in der Anatomie, wenn todte Körper / so öffters unter des Henckers Hand gewesen / daselbst zerschnitten werden / wieder aufraumen / das fleisch samt denen andern reliquien vergraben / und dergleichen verrichten müßet / welches dem Handwercke keines weges anstünde / uber dieses auch ihr / ohngeachtet ihr doch das Meister-Recht erlanget / dennoch vor euch selbst und ohne eines andern Meisters anweisung und ablegung der gewöhnlichen Gebühr die im Collegio vorkommende Bau- Arbeit allein verfertiget / auch sonst Zänckisch wäret / daß sie dannenhero nicht schuldig euch ferner unter sich zu dulden. Demnach aber und dieweil ihr hievor das Maurer-Handwerck ehrlich gelernt / solches auch als ein Geselle nach Handwercks Gebrauch getrieben / hergegen / daß ihr wegen Zänck jemals verklaget oder bestraft worden wäret / eurem Anziehen nach weder aufm Rathhause allhier / noch bey der Handwercks-Lahde etwas sich befindet / wodurch solche Beschuldigung erweißlich gemacht

het werden könnte / nechst dem ermeldtes Handwerck / wenn ihr ihm gleich durch selbst angemastetes Bauen oder sonst einigen Eingriff gethan / dennoch nicht in eigener Sache zugleich Parts und Richters Stelle vertreten / viel weniger / bevor ihr mit eurer Nothdurfft darwider sattsam gehöret / den proces ab executione anheben / und euch ausschließen kan: Massen denn auch die bey dem Rehrdienste euch aufgetragene verrichtung auf dem Collegio bey der Anatomie keines weges in Rechten improbiert werden / sondern vielmehr also beschaffen sind / daß ihr dadurch an euren Ehren im geringsten nicht anrücklich werdet. Wie denn öffters Mäurer zugleich Todtengräber gewesen / auch denen Gerbern nichts präjudiciret, daß sie häute so wol von justificirten Menschen / als abgedecktem Vieh gar machen / und zubereiten / und nichts desto weniger vor wie nach bey ihren Mitmeistern / wie auch andern Handwerckern geduldet werden müssen. So ist auch das Mäurer Handwerck gestalten sachen nach euch von ihren Zusammenkünfften auszuschließen und zu verstossen nicht befügt / sondern anzunehmen / und an dem euch zukommenden Ort wieder einzusetzen schuldig. V. R. W. M. Febr. 1692.

An Christoph Grossen /
Mäurer = Gesellen in
Leipzig.

Ordinarius, Senior, und andere Doctores
der Juristen Facultät in der Universität
Leipzig.

Summo autem jure improbandum esset, si facta cum defuncti proximis collusione ea solummodo intentione ad anatomen expetere- tur cadaver, ne in illorum opprobrium in patibulo, furca, rota, &c. relinqueretur.

§. IV.

An miles? De militibus, in quorum fane favorem multa singularia in jure conspiciuntur introducta, dubium foventi opponere mihi liceat, quod supremus Campi-Mareschallus Saxonicus, illustris Dn. de Schöning cadaver militis ob desertionem ad mortem condemnati theatro anatomico Lipsiensi tradere an. 1696. Mense Aprili jusserit.

§. V.

*An cada-
ver jam
sepulchrum?* Cadaver jam sepulchrum sicuti ad necessariam judicialem inspectionem iterum effodiendum judicat CARPZOVIVS qu. 26. n. 24. quale exemplum prostat in AMMANNI praxi vuln. lethal. pag. 479. ; ita quoque pariter ob publicam utilitatem ad Anatomiam publicam concedere licebit, prout de praxi hodierna testatur BEIERUS in dissert. de cadav. punit. c. 3. n. 19.

§. VI.

*An homo
vividus?* Contra anatomen hominis vivi maxime urgetur 1.) hoc factum præprimis inter Christianos existere crudelissimum, siquidem facillime ad desperationem redigi possit cultro anatomico subjiciendus ob dolores cruciatu- que non satis describendos. 2.) Medicum non agere debere carnificem, ejusque artem non ad perniciem, sed potius ad salutem ho-

minis tendere. 3.) Nullam urgere necessitatem ad talia desperata prolabendi media. At vero 1.) cuinam non constat, quantis cruciatibus afficiantur ob criminis atrocitatem forcipibus ignitis lacerati, aut furcæ, lacertis pedibusque fractis rotæ vivi adhuc relictæ, qui tertio aut quarto demum die moriuntur. Et quid dicam de rustico, qui orta anno 1524. seditione rusticorum ob sententiam de interficiendo Comite Ludovico de Helfenstein latam, postmodum captus palo catenis alligatus per integræ horæ spatium vivus affabatur. vid. Petr. Gnadal. in Histor. sed. rustic. 2.) Multoties accidit, ut tam in partu difficili, quam in aliis operationibus chirurgicis sub manu Medici diem suum obeat decumbens. Et quis quæso carnificem ut ministrum justitiæ infamia notare audebit? conf. B. D. JOH. BENED. CARPZOVII concionem funebrem Christophoro Heinzio, Carnifici Lipsiensi, habitam, ILLUSTR. STRYK in usu moderno ff. de his, qui notantur infamia §. 4. 3. Quis propter detectum ductum thoracicum vasa lymphatica aliaque inventa, quæ adhuc essent expectanda quam plurima, non necessariam judicabit vivi hominis anatomen. Hinc refert ex Riolo ROLFINGIUS in dissert. anat. l. 1. c. 2. pag. 30., Ludovicum XI. Galliarum Regem permisisse Medicis Parisiensibus militem capite damnatum & calculo laborantem vivum in perinæo secare, ac modum extrahendi calculi vesicæ perquirere, anno salutis 1574. mense Januar. Et SENECA Decl. 6. scribit, Medicis licuisse viscera hominum vivorum rescindere, quo vim morbi etiam in ægroto cognoscerent.

§. VII.

Nescio an fabula an historia vera ad nostra usque tempora transtulerit, furem in patibulo suspensum ac postmodum in theatro anatomico aqua calida lavatum vitam iterum recuperasse. Exfurgente igitur tali casu nolo impræsentiarum Juris Consultis relinquendam quæstionem decidere, an fur laqueo suspendendus eo fracto in terram decidens a poena ultimi supplicii liberandus sit; vid. Illustr. COCCEII diff. de hac materia conscriptam. Sed haud immerito judico, quod tunc temporis Medico incumbat redivivum judici extradere, quem fane postmodum decet deliberare, quomodo ulterius contra delinquentem, contra quem sententia, daß er vom Leben zum Tode zu bringen / vires omni modo non obtinuit, procedendum.

*An homo
revivif-
cens?*

C A P. IV.

De Forma.

§. I.

Forma consistit in partium humani corporis dissectione & demonstratione, tum ratione temporis & loci, tum ratione modi rite facta.

§. II.

Tempore ut plurimum hyberno exercitia instituuntur anatomica, quoniam cadaveris conserva-

Tempus

servationi frigida aëris temperies quam maxime favet. Econtrario æstivis diebus ob foetorem intolerabilem partiumque putredinem meta proposita neutiquam attingi potest.

§. III.

Dies feriatus.

Die etiam feriato anatomiae Professore hunc laborem illæsa conscientia continuare posse, probant infra capite V. præprimis §. 7. argumenta in medium producta.

§. IV.

Locus.

In loco autem publico anatomia instituitur. Hinc ut plurimum in academiis exstructa reperiuntur theatra anatomica, hincque actus ut alius academicus sollemnis considerari debet. *conf. cap. II. §. 3.* In eo enim anatomia publica differt a sectione ad inquirendam vulneris lethalitatem a iudice, & ad cognitionem morbi, quo defunctus diem suum obiit, a privatis demandata.

§. V.

Modus.

Ratione *modi* rite absolvere videtur Professor anatomen publicam, si non solum spectatores, maxime in demonstratione partium genitalium muliebrium, ut omnia castis oculis contemplentur, serio admoneat; etiam partes demonstrandas a reliquis, quo unaquavis, prout est, conspici queat, separet, ac postmodum illarum substantiam, interjecto discursu physiologico spectatorum oculis subiciat.

§. VI.

Ordo.

Ordinem autem quod attinet, merito ille iudicio Anatomici relinquitur. Nam si longum temporis spatium elapsum est, quo copiam cadaveris secandi non habuit, partes principales omnes obiter percurrere solet. Quando vero postmodum plura acquirit cadavera, unius partis exactiori ac specialiori investigationi inhæret, simulque ea, quæ antea demonstravit, repetit.

CAPUT V.

De Fine.

§. I.

Curatio ægri.

Finis primarius anatomiae publicæ est cognitio partium corporis humani futuro pratico ad *curationem ægri* summe necessaria. Nam si medicina est ars sanitatem hominis ordinata diæta conservandi; morbis labefactatam aptis remediis restaurandi, sua sponte fluit, duo potissimum a futuro Medico esse acquirenda, nempe cognitionem corporis humani, quod curandum, & deinde scientiam virtutis atque efficaciae medicamentorum, quibus curandum est. Alias fane Medicus deveniret monstrosus ille rusticus, qui aratro reficere intenderet horologium.

§. II.

Institutio operationum Chirurgicarum.

Operationes chirurgicas quis, quæso, instituire, aut e. g. fracturam pedis in pristinum statum redigere valebit, nisi situm naturalem partis restituendæ exacte sciat.

Frid. Hoffmanni Oper. Supplem. II.

§. III.

In *sectionibus judicialibus* requisitus Medicus non solum vulnus, prout repertum est, describere, sed etiam super illius lethalitate iudicium ferre debet. Neutrum vero absque scientia anatomica fieri potest. Hinc notavit AMMANN *in prax. vuln. lethal. proleg. no. 6. & 7.* ad hoc negotium requirendos esse Medicos hujus rei maxime gnaros, illosque, qui illotis manibus ejusmodi negotium aggrediuntur, dignis perstringit elogiis. *conf. dict. tract. pag. 40.*

§. IV.

Nec absque scientia anatomica quempiam Medicorum statum cujusdam *vulnerati*, an scilicet periculum adsit, annon, (id quod tamen Judici ratione capturæ suscipiendæ scitu maxime necessarium est) describere, item, an vulneratus ex inflictio vulnere irreparabile corporis sui damnum sensurus sit, Judicem haud informare potest. Quod tamen haud leve momentum causæ est, siquidem pars lædens læsæ ad restitutionem damni jure obligata permanet.

§. V.

Insuper de impotentia conjugali in causis matrimonialibus, vide AMMANN. *Irenicum pag. 153. & tr. de lethal. vuln. pag. 364.* de statu hominis torturæ subjiciendi, vide TIMÆUM BON GUEDEN & REE *in oper.* Imo de ipso delicto v. AMMANN. *in Med. critic.* Sententia a Judice ferenda multoties solo nititur iudicio Medici, qui vero id ipsum ex principiis anatomicis haurire debet.

§. VI.

Multum autem ad incrementa studii medici contribuerunt ex institutis cadaverum sectionibus quotannis ferme *nova detecta inventa*. Sufficiat rem aliquibus illustrare exemplis. Catarrhi olim unice vaporum sublimationi & novæ condensationi imputabantur, & quidem unanimi scholarum consensu tamdiu, donec HELMONTIUS falsitatem doctrinæ subolfaceret, cui, etsi ingenii acumine præcellentissimo, non licebat esse tam felici, ut errorem hunc eluere posset ob defectum scientiæ vasorum lymphaticorum. His tamen nunc demonstratis omnis generis catarrhorum genuinam genesin apte demonstrare novimus. Calculo laborantibus olim non nisi lithontripticæ calculumque pellentia exhibendo opem ferre jubemur. Verum enim vero sphacelo in talium misere denatorum cadaveribus ob nimios dolores reperto, longe satius cruciatibus hujusmodi sola emollientia atque anodyna opponi, sumus edocti. Et quis, quæso, putasset, uteros maternos certe crassissimos tum sæpe disrumpi per intensiores partus dolores ac labores puerperarum omni sane commiseratione dignissimarum, dum propria privantur vita hanc sobolem servare omnes nervos intendentes, nisi ocularis cadaverum apertorum inspectio jam olim GUILIELM. FABRICIUM HILDANUM tristissimum eventum docuisset; id quod B. parens meus multoties observavit. Hinc ipsi religio fuit, ægre ob situm foetus vitiosum parturientibus ulteriores improbos conatus suadere vel injungere.

T

§. VII.

§. VII.

Cognitio
creatoris.

Per visibilia invisibilia, i. e. Deum ex contemplatione rerum creaturarum cognosci posse, asserit PAULUS *ad Rom.* I. v. 20. Quod si igitur ex nuda subtilitate lineæ in tabula ductæ Protogenes Apellem cognoverit summum artificem, gentili pertinacior omnino esset censendus, qui anatomicis adhærens ex horum administrationibus Deum ipsum non velit cognoscere, ejusque sapientiæ vestigia deprehendere. Nam dum simplicissimam massam, lympham nempe coagulata, considero, quæ structuræ nostræ corporeæ suggerit primordia, quæque paucis interjectis diebus excrescit in venustissimā diversorum schematum delineamenta, ut omnium corporum in tota mundana machina contentorum effigiem mihi sistat, hincque a celeberrimis anatomicis verus microcosmus credatur, quid clarius in omnes sensus meos incurrit ente independente, summe potente, quod expers materiæ sponte sua omnia talia produxit? Hæc si postmodum cum dotibus mentis suæ itidem ex operatione perceptis confert homo, nonne evincitur juxta Paulum æterna quædam potentia atque deitas? Ut inde nec pudeat christianos veteres Theologos, *Basilium, Lactantium, & Chrysostomum*, ex corporis nostri fabricatione infallibilia divinæ providentiæ argumenta depromere.

§. VIII.

Sceleti
confectio.

Peracta anatomia confectum ex ossibus *sceleti* iterum finem haud exiguum nonstat. Quis etenim nescit, quam scitu necessaria ob rationes jamjam allegatas, Medico sit osteologia, quæ profecto nullo alio, quam hoc modo addisci potest.

§. IX.

Cranii
usus.

Et cui ignotum est, qualem in epilepsia usum præbeat *cranium humanum* præparatum, & *spiritus cerebri humani*, item *axungia humana* in phthisi, & *ossa humana* præparata, quæ exsiccant, discutiunt, adstringunt, fluxus quoscunque sistunt, &c. ut & *corium humanum* in partu difficili. vid. SCHROEDER.

§. X.

Respons.
ad objec-
tiones.

Contra jam memorata adversarii studii hujus nihil aliud objicere valent, quam quod omnia typis jamjam sint impressa ac figuris æneis delineata. At vero, ut non attingam jam dicta nova quotidieque adhuc plura speranda inventa, lectori benevolo illustrationis causa considerandum relinquo, an artem saltatoriam ex libris, in quibus figuræ depictæ prostant, sibi comparare queat.

§. XI.

Usus ma-
gicus.

Dum autem in commemoratione finis anatomiae verfor, præterire non possum, quam injustum sit, partem quandam corporis humani ad *magicum* adhibere *usum*. Nolo equidem liti, quæ hactenus de hac materia fuit mota, me impræsentiarum immiscere; quoniam vero ut plurimum circa hoc negotium haud exigua occurrit superstitio, illa quoque summo studio est evitanda, & tanquam species idololatriæ poenis coercenda dignissimis,

prout patet ex responso Scabinorum Lipsiens. mense Nov. 1649. ad consultationem Justitarii Fauchensis Christiani Königii in hunc modum concepti.

Als ihr uns eine gerichtliche Registratur, verfasste Inquis. Articul / darauf der beyden verhassten Hans Scheufflers und Tossels Heydels gethane Antwort / auch gehaltene Confrontation / benebenst einer frage zugeschicket / und euch 2t. demnach 2t. Wird jezo gedachten beyden Inquisiten schuldt gegeben / daß sie um einen daumen / welchen sie vor einen Diebs-Daumen ausgegeben / mit einander gehandelt / und Aberglauben getrieben / indem scheuffler / dessen vater dem vorgeben nach solchen bey einer todten frauen im peltze gefunden haben soll / ihme Heydels übergeben / welcher selbigen daumen zu sich genommen / und ihme etwas dafürbezahlen wollen / inmassen sie denn / als sie articuls weise vernommen worden / dessen nicht in abrede seyn Können. Ob sie nun wol ferner nicht berichten wollen / wozu und zuwas Ende sie den Diebs-Daumen beliebet / und damit vornehmen wollen. Dieweil aber dennoch aus allen Umständen zu vermercken / daß sie ein vertrauen darauf gesetzt / dadurch Glücke zu erlangen. Wie denn beyhm 5. Inquisitionis articul dessen gedacht wird / u. m. J. 2c. So werden sie alle beyde solcher abergläubischen Handel wegen über das ausgestandenen noch ein 6. tage mit länger Gefängniß gestrafft / auch vor ihrer Beleidigung durch den Herren Pfarrer aus Gottes wort unterrichtet und gestrafft / daß sie an solchen abergläubischen Handeln unrecht gethan / zugleich auch von euch mit Ernst gewarnet / von dergleichen sachen abzustehen, damit sie nicht im niedrigen fall mit härterer straff belegen werden mögten.

COROLLARIA.

I.

Fundamenta, quibus innititur vera theoria & rationalis praxis medica, nulla alia sunt, quam 1.) anatomia, quæ structuram partium machinam componentium exhibet. 2.) Physica, quæ naturam ac leges motuum, quibus omnia in corporibus phænomena & effectus proxime debentur, per varia experimenta sistit. 3.) Chymia, quæ corporum mixtionem, texturam, formam, & inde dependentes eorum vires, motus, qualitates, effectus docet.

II.

Medicus hisce fundamentis destitutus nihilominus per longam & accuratam experientiam & observationem earum rerum, quæ contingunt circa morbos, & quæ in iis nocent vel prosunt, sanare potest, sed non tam tuto, tanta certitudine, tanta facilitate, & tam feliciter, quam is, qui notitiam habet dictarum scientiarum.

III.

III.

Quivis ferme Practicus singularem experientiam, eamque sæpius inter se contrariam ratione methodi medendi, ratione operationum medicamenti, pro certo adfert; ubi ex hisce difficultatibus emergere vix poterit, nisi qui præter experientiam fundamentorum dictorum sit particeps.

IV.

Invenire remedia, eorum præparationes, & veram methodum morbis novis aptam nullus poterit, qui caret vera theoria in medicina.

V.

Publico muneri obeundo ego plane ineptum judico Medicum, cui non patet scientia anatomica, chymica & physica.

VI.

Non omnes actiones, quæ in corpore nostro fiunt, fiunt ab anima, sed plurima a causis plane mechanicis.

VII.

Omnes effectus animæ, qui fiunt in corpore, sunt mechanici, quamvis non ipsa anima sit mechanica.

VIII.

Medicus non sanat animam, effectus tamen ejus depravatos in corpore tollere debet.

IX.

Tota medendi methodus mechanica est, omniaque remedia mechanice agunt, disponendo nimirum varie materiam & motum.

X.

Universa classis remediorum ad tria genera, nempe alterantia, evacuantia, & motum temperantia sive sedativa reducenda est.

XI.

In alterantibus non facile delinquit Medicus, circa motus autem promoventia & sistentia majori opus est prudentia.

XII.

Prudentis Medici est scire debito tempore motus provocare & motus cohibere.

XIII.

Empirice applicat remedia, neque cum ratione & certitudine, qui nescit remediorum efficaciam, quomodo nimirum alterent sive materiam disponant, & quomodo motus faciant, & sedent.

XIV.

In diversissimis subjectis morbisque variis hæc facultates remediorum cognoscere longioris observationis ac laboris; neque unius hominis & ætatis res est, unde non sufficit ad scientiam medicam comparandam unius hominis experientia, sed mutuari eam debemus ab aliis accuratis observatoribus practicis.





OPUSCULA

D E

AQUIS MINERALIBUS.



D E

AQUÆ NATURA AC VIRTUTE IN MEDENDO,

Dissertatio primùm edita Anno 1716.

B. D.

PRÆFAMEN.

Ἐξ ἰλίσ ἐβλάστησε χθὼν αὐτὴ, καὶ ἐκ τῆς ὕδατος ἰλὺς κατέστη.



ÆC sapientum fuit sententia antiqua, unde vero THALES Milesius eam mutuatus sit, conjectu facile est. Deus enim omnium creator nemini se incognitum reliquit. Moyſes, scriptor ille divinus & primus, (ex quo forſan cæteri ſua hauserunt) *Rouach merachèphèth gnal-penè ammajim* indigitans, eo ipſo, ſingulare quid de aqua inſinuare voluit, cui S. PETRUS Ep. 2. Cap. 3. eodem Spiritu actus aſſentitur.

Ex hoc fundamento, ni fallor, HELMONTIUS pater & qui ejus ſunt ſententiæ, principium ſeminale in aqua, actorem vero in igne poſuerunt.

De qua re jam diſſerere à ſcopo noſtro alienum eſt, ſufficit enim uſum medicum diſquirere, vel ut clariuſ dicam, commodum ejus reſpectu corporis humani.

Sicut enim in foro Romano maximi delicti pœna æſtimabatur, civi igni & aqua interdiceret; minoris certe non foret damni corpori humano illud latice aquoſo privare.

Idcirco quoniam ſuperiorum conſenſu & pro ratione conditionis problema aliquod, Summo auſpicante Numine, proponere auſus ſum; id elegi cujus fundamentum in ipſa creatione jaceret, hac quidem ratione, ut de aquæ proprietatibus & differentiis, ejus applicatione ad corpus ſanum & ægrotum, nec non de cura affectuum ex defectu aquæ, tum aliunde ortorum, breviffime diſſeram. Deus annue cœpto!

§. II.

Generalis corporis idea conſiſtit in extenſione nitente & renitente & impenetrabilitate, quæ figuram & mobilitatem ſimul involvunt.

§. III.

Per corpus fluidum vero intelligimus congeriem plurimorum corpusculorum (§. 2.) cujus inſenſiles partes vel nullo vel facile mutando nexu inter ſe cohererent & quaquaverſum æqualiter premuntur.

§. IV.

SECTIO I.

De Aquæ ſimplicis proprietatibus, ejusque differentiis.

§. I.

Aqua eſt corpus fluidum, mobile, grave, pellucidum, inſipidum, inodorum, penetrabile, omniſque elatiſcitiſ expers.

§. IV.

Interim motus est successiva inexistencia in hac vel illa parte spatii, & cum absque corpore sensibus non pateat, illud hoc pacto mobile concipitur.

§. V.

Quodsi igitur ex acutissimi LEUWENHOECKII observatione unus aquæ globulus vix millesimam partem unius arenulæ æquet, horum vero maximus numerus laxè sibi invicem sit combinatus, inde mobilis fluiditas aquæ intelligetur.

§. VI.

Fluiditatis porro rationem ex cognitione æthereæ lucidæ & calorificæ materiæ petere licet.

§. VII.

Hæc autem æthereæ lucidæ & calorificæ materia in prima creatione a summo Numine secreta fuit a tenebris, ex qua omnia creata vitam, motum & esse suum habent.

COROLLARIUM.

Ulteriorem ergo hujus subtilissimæ materiæ naturam perscrutari non concessum est, quia rerum simplicissimarum ratio nulla superest, alias non forent simplicissimæ, idemque esset negare hominem optimis instructum oculis in luce nihil videre.

§. VIII.

Omnia corpora in terram gravitare Physicis non amplius est dubium, & nulla dari corpora vere levia inter plurimos jam convenit Philosophos, quæ autem hujus nîsus sit ratio præter phænomenon vix apparet, licet a nonnullis in vi attractrice, ab aliis in vorticum motu ponatur.

§. IX.

Interim hæc actio gravitatis mutua utrinque æqualis est, alias particulæ a se mutuo fecernerentur.

COROLLARIUM.

Sic Aqua generalem & communem cum omnibus liquidis gravitatem habet, quatenus vero respectu aliorum corporum gravior vel levior sit, ex sequentibus patebit.

§. X.

Physicorum & Mathematicorum illi principes NEWTON & BOYLE pondus aquæ & mercurii vivi ad invicem invenere, ut 1. ad 13 $\frac{3}{4}$ circiter, aeris vero ad aquæ ut 1 ad 870 vel ad Boyle mentem ut 1. ad 1000.

COROLLARIUM.

Ergo penetrabilitatis cognitionem ex particularum (coroll. §. 4.) minutiis & gravitate (§. 9.) habebimus demonstratam.

§. XI.

Si aqua nervis linguæ & narium applicatur, nullus sensus gustus & odoris percipietur, & si in vitro purissimo crystallino continetur, præsentia ejus haud observabitur, id quod globulositati ac puritati ejus solum attribuendum, quæ hoc fluiditati mobilitati-que aquæ debent.

Frid. Hoffmanni Oper. Supplem. II.

§. XII.

Supereff ut de ultima proprietate aquæ (§. I.) quædam dicantur, quod facilius intelligetur, quando prius elasticitatis rationem cognoverimus.

§. XIII.

Dicitur vero corpus elasticum quod in minus spatium redigi potest, vel sibi relictum majus aut naturale iterum occupat, uti constat ex experimentis naturæ & artis. Aer enim in frigore & antlia pneumatica comprimitur, è contra liber factus sive igni expositus iterum expanditur.

§. XIV.

Cum igitur machina Boyleana & Ducis Hettriarum hunc in finem ex auro conflata, aqua puriori impleta nullo modo comprimi potuerit, quin potius rupturam acceperit; hinc non amplius dubitandum aquam omnis elasticitatis esse expertem.

COROLLARIUM.

Ergo quæcunque elasticitas in aqua deprehenditur, illa ex combinatione aeris provenit, nec experimentum æolipilæ in contrarium quid probat.

§. XV.

Quando æthereæ materia (§. VII.) minori quantitate aquam pertransit, coit in massam compactam, quæ ratione figuræ, glacies, grando & nix vocatur, hæc vero calori iterum exposita in aquam puram deliquescit. Sic Chymici per expressionem materiæ æthereæ calidæ aquam solidam reddunt, & hyberno tempore hæc massa collecta, in locisque subterraneis occultata & asservata, per totum annum à fluiditate præservatur.

§. XVI.

Differentiæ vero aquæ non quoad essentiam, sed tantum ratione ingredientium sive admixtarum rerum intelligendæ sunt.

COROLLARIUM.

Ergo aqua maris, fontium, fluviorum, pluviarum, acidularum ac thermarum examinari debet.

§. XVII.

Oceani, sive maria aquam continent falsam, quæ multo densior est purâ, dum proportio ejus observatur ut 8. ad 9. seu ut 50. ad 51. Quod ipsum confirmat experientia, quando navis altius tollitur in mari, quam in flumine, uti quoque jam dudum cecinit OVIDIUS in Eleg. 10. de Ponto.

*Innatat unda freto, dulcis leviorque marina est,
Quæ proprium mixto de sale pondus habet.*

§. XVIII.

Mixtio salis cum aqua inde patet, quod non solum per mæandros subterraneos adferantur varia salium genera, sed etiam in ipso fundo maris diversa copia bituminum, sulphuris, recondatur, quæ facile in hoc liquido solvitur.

§. XIX.

Fontium, rivulorum ac fluviorum origo ex pluviis, nubibus, nebulis, rore & pruina petenda est, quia his deficientibus, priores exsiccantur; copiosius vero decidentibus, augmentum majus capiunt.

§. XX.

Fontes igitur plerumque ad radices montium scaturiunt, dum pluviae per varios meatus ac poros terræ percolantur, colliguntur ac detinentur in locis lapideis & argillaceis; quodsi quocunque modo augeatur vis aquæ, profilit atque erumpit scaturigo. De cætero fontes illi in altissimis montium jugis profluentes originem ex nubibus, frigidissimis in locis condensatis, habent.

§. XXI.

Hinc profiliunt rivuli, qui aucti fluvios constituunt, incrementum atque augmentum suppeditant, & deinde, sive tectè sive aperte, in oceanum effunduntur, ita ut. circulatio perpetua observetur.

COROLLARIUM.

Prout ergo per loca paludosa, arenosa, limosa minerisque referta feruntur flumina, eam habent indolem, quæ materiæ sese huic aquæ immiscent.

§. XXII.

Quo celerius autem flumina fluunt eo puriori gaudent aqua. Interim minimam continent piscium copiam: iisque parum nutrimenti præbent. Quo vero lentius moventur & per loca pinguiora & viscosiora incedunt; eo magis animalculis varii generis scatent & abundant, quin imo plus alimoniae iis suppeditant.

§. XXIII.

Pluvia est aqua sublimata per calorem solis. Vapores enim ex mari, fluviis & ipsa terra ascendunt in aerem, motu ejus ibi condensantur & instar nubium pendent, copia vero major cum fiat ferendo aeri haud sufficiens, guttatim decedit aqua.

COROLLARIUM.

Hinc eluzet hanc aquam esse purissimam, inprimis si locis salubribus, vasisque puris colligatur: terrestres enim & salinae particulae simul elevari nequeunt.

§. XXIV.

Quod vero aqua multo aere gravior (sec. §. 10.) tamdiu in illo feratur, hoc rarefactioni sphaerarum ejus attribuendum erit, tunc enim plures superficies aeri exponuntur, quæ ab elasticitate hujus sustinentur, usque dum arctius iterum conjungantur.

COROLLARIUM.

Inde roris ac pruinae ortus non amplius erit obscurus; subtiles enim vapores, vi solis ac caloris dissipati, accedente frigore collecti ac compressi hanc induunt formam.

§. XXV.

Aquæ minerales sunt scaturigines seu fontes (§. 19. 20.) variis principiis mineralibus imbuti, ex quorum immixtione ac motu amaritiem adstrictoriam atque calorem peculiarem habent.

§. XXVI.

Montes enim ac viscera terræ varias continent materias, videlicet lapides, argillas, mineras, metalla, sulphura. Ubi vero fontes reperiuntur salutares, varius apparatus marcasitarum sulphurearum, sive pyritum, ex mente LISTERI aliorumque naturæ indaga-

torum, reconditus jacet, ex quorum intestino motu, actione ac reactione principiorum, vapor sulphureus accenditur, qui subterraneum tractum permeans, primum ingrediens acidularum ac thermarum constituit, unde virtutes speciales derivandæ sunt.

§. XXVII.

Omnes autem recensitæ materiæ martialis terræ sunt participes, id quod demonstratur 1. ex sapore adstringente amaro; 2. ex massa illa flavescente ad ora fontium seposita, ochra dicta, quæ chemice præparata a magnete attrahitur; 3. ex infusione cum fructibus & radicibus adstringentibus, v. g. gallis, radice bistortæ, chinæ chinæ, herba thee &c. &c.

§. XXVIII.

Sal, quod invenitur, pro ratione ingredientium varium est; in aliquibus post levem evaporationem sal neutrum nitrosum amaricans se sistit, quale ex Anglicanis fontibus excoquitur: Plurimi nostrates fontes sal alcalinum fixum & volatile continent, quod vero minime cum animalium sale alcalino volatili confundendum. Probant hanc indolem alcalinam effervescencia cum acidis, mutatio coloris cum syrupo violarum, color purpureus ex admixtione vegetabilium adstringentium.

§. XXIX.

Præterea subtilissimus ille spiritus sulphureus cognoscitur ex odore, sapore, bullulis & penetrantia singulari: ideo facillime evaporat, quo facto turbida & vappida & iners redditur aqua; quæ frigidiori cælo longe penetrantior ac copiosior est.

§. XXX.

Acidularum ortus sic concipitur, quod fumus sive vapor ille sulphureus, per scissuras & rupturas rupium, frigidas præterlabentes aquas imprægnat ac si vitrioli martialis ex pyrite funditus sito solutionem iis communicet.

§. XXXI.

Quando vero incendium illud marcasitarum sive pyritum propriusprehendit aquas, eas calidas reddit, quæ sub nomine thermarum veniunt: cujus rei exemplum ex accensione calcis vivæ cum aqua in promptu est, id quod confirmant montes ignivomi, qui per aquam accensi varias argillaceas sulphureas materias ejiciunt. Chymici denique simile experimentum producunt, quando massæ ex limaturæ martis & sulphuris æquali portione præparatæ aquam affundunt: tunc non solum fumus & calor, sed etiam flamma concipitur.

§. XXXII.

Differunt interim in eo acidulae a thermis, quod sulphur illud embryonatum magis condensatum habeant. Cum è contra in thermis per calorem plus moveatur ac facilius in auram dissipetur.

§. XXXIII.

Probe denique observandum erit hunc spiritum sulphureum à communi sulphuris spiritu foetidi odoris valide differre, quemadmodum enim nativum sulphur purioris est naturæ ac odoris specifici quam vulgare: eadem erit ratio horum spirituum.

COROLLARIUM.

Hinc apparet, quid de acidi præsentia sive absentia sentiendum; patet vero vis aquarum in corpora solida dissolvens, præsertim si salia intermixta hæreant.

S E C T I O II.

*De Statu Corporis humani sano, ex præsentia,
& morboſo, ex defectu aquæ.*

§. XXXIV.

Corpus noſtrum humanum æmulatur machinam hydroſtatico-mechanicam, ad cujus ſanitatē æquilibrium, motus fluidorum, niſus & reniſus ſolidarum partium requiritur, ut omnes actiones cum facilitate & æquabilitate peragi queant.

§. XXXV.

Fluida hæc conſtant, ut baſi ſua, ex aqua, cui olea, ſalia ac terra unita & in ſaponis formam redacta ſunt.

§. XXXVI.

Si enim maſſam hanc fluidam ignis examini ſubjicias, reſolvitur in magnam aquæ copiam, quæ ex experientia Boyle $\frac{4}{5}$ totius maſſæ æquat (§. I. Sect. I.) dum ex unciiſ ſeptem ſanguiniſ ſex unciaſ phlegmatiſ per deſtillationem acceperit, deinde prodiſ ſal alcalinum volatile oleoſum, ſuccedit oleum craſſum nigerrimum, in fundo vero vaſiſ pauca nigerrima terra relicta manet.

C O R O L L A R I U M.

Blanditiæ ergo humorum noſtrorum ex hoc ſubtili phlegmate ſolum proveniunt.

§. XXXVII.

Confirmat ulterius ſanguinem, ſive omnes humores, potiſſimum ex aqua conſtare, experimentum ſequens ſimpliciſſimum. Quando quantitas quædam cruoriſ ex vena emiſſi per tempus libero aeri relinquiſ, quod tunc ſucceſſive in merum limpidum pelucidum laticem deliqueſcat.

§. XXXVIII.

Hinc ex combinatione globulorum omniſ denſitas & calor dependet, ſicque inveniēmus triplicem liquorem unde ſpirituſ per ſecretionem ſecernatur α . cruorem compoſitum ex ſex globuliſ lymphaticiſ β . lympham ex aliis ſubtilioriſ & pellucidioriſ globuliſ conſtantem, γ . ſerum ſaluſ, excrementitiuſ, quod a vitali conſortio inutile ſeparatur.

§. XXXIX.

Ex hoc aquoſo apparatu fiunt ſolida, uti formatio fibræ ejuſque deſtructio clariſſime demonſtrant. Sub incubatu enim ovi embryo ſive ſtamen illud vividum, ſenſibuſ vix obviuſ, nutritur & expanditur per aquam ſubtiliſſime redditam atque reſolutam ope caloriſ, donec, pullo increſcente, omniſ liquor in ovo conſumatur corpusque tam ſenſibile productum ſit.

C O R O L L A R I U M I.

Ergo ex aqua ſit mucus, ex mucō ſtamen, ex hoc membrana, huiuſ convolutione vaſa, hinc muſculi, cartilagineſ ex coalitione, ex hiſ durioriſ factiſ oſſa generantur.

C O R O L L A R I U M 2.

Nihil ergo nutrit, quod non in aquam ſit redactum: unde apparet nutritionem abſolvi in minimiſ fibris.

§. XL.

Totum autem illud ſolidum undique eſt vaſculoſum, ex cujuſ magnitudine & figura mox arteriæ, mox venæ appellantur, priorē ex lato in anguſtum, poſteriorē ex anguſto in latum abeunt, & ſunt tubuli conoidei & cylindracei. Quæ vaſa liquidum (§. XXXIII. α) advehunt ſive revehunt, vocantur ſanguifera; quæ lympham (§. XXXIII. β) continent, lymphatica dicuntur. Quæ denique laticem ſubtiliſſimum vehunt nervorum nomine gaudent, quorum diviſio neque ad ultimam fibrā locum habet.

§. XLI.

Quando omneſ hæ partēſ, licet ficciſſimæ, ad ignem deſtillantur, idem reperiētur quod §. 36. demonſtratum, remanēſ interim terra ſub ultima cohobatione vix conſpicua erit.

§. XLII.

Hæc fluidorum ac ſolidorum compageſ §§. præcedentium, vario artificio conjuncta, conſtituit cerebrum, cor, pulmonēſ, inteſtina, reneſ, hepar, lien, muſculos, glandulaſ, omneſque artuſ corporiſ humani, ubi humor ille ſubtiliſſimuſ aquoſuſ præparatur ac conficitur, ſingulari ſervato concentu, qui ex legibuſ mechanicis atque hydrauliciſ ſolum explicandus erit.

§. XLIII.

Sed hoc ordine corpus vivum atque ſanum conſervatur, dum duoſ elatereſ, cerebri nempe membranaſ ac nervoſ, atque cor ex phyſiologicis aſſumimus, unde motuſ reciprocuſ continuatur: interim liquida, vi gravitatiſ, ſolida impellunt, hæc vero natura contractilitatiſ humoreſ iterum propellunt. Sic cor agitur a cerebro per nervoſ, mediante ſubtiliſſimo liquido nervoſo; cerebrum incitatur a ſanguine per cor expulſo arteriarumque contractilitate propulſo.

C O R O L L A R I U M I.

Ergo motuſ tonicuſ abſque liquidi conſideratione nulluſ eſt; nec allegatio ſpirituſ noſtri immortalis, cujuſ operationeſ altioreſ ſunt, huic negotio quidquam luciſ afferre poterit, quin potiſ meriſ abſtractionibuſ intellectuſ obnubilabitur.

C O R O L L A R I U M 2.

Hinc porro glandularum & corporiſ tomentofi Ruyschiani ſtructura innoteſcet.

§. XLIV.

Quando æquilibrium (§. 29. 33. 36. 39.) inter fluida & ſolida ſolvitur, functioneſ quædam læduntur, qui ſtatuſ nobiſ morboſuſ dicitur.

§. XLV.

Ratione fluidorum nimia oleoſitaſ, falſedo, & terreſtreſ particulæ morbum creare poſſunt; ſi enim aqua deficit, ſalia magiſ acriora ſiunt, olea ranceſcunt & terra tenax iſ combinatur; hinc variæ obſtructioneſ, inflammationeſ, ſcirrhi, cancri, polypi, lapideſ, atrabilis, febreſ variæ, aliique innumerabileſ fere morbi produciuntur.

§. XLVI.

Morbi autem sic dicti aquosi sæpissime ex defectu purioris aquæ oriuntur, serum enim illud putridum ad ignem non exhalat, sed instar albuminis cocti coit, & observatur, quod usus spirituosorum fermentatorum plus disponat corpus ad hos affectus, quam potus aquarum: licet negare nollem, etiam ex abusu alias exquisitissimorum remediorum morbos oriri posse.

§. XLVII.

Ex parte denique solidorum tollitur sanitas, dum vel nimis stricta vel nimis laxa existunt.

§. XLVIII.

Sic laxam dicimus fibram, quando ita parum inter se coherent partes, ut facili motu dissolvi queant, omnemque amittant elasticitatem.

§. XLIX.

Laxitas illa fibrarum, præter alias causas, inprimis ex defectu nutritionis oritur; hæc secundum Coroll. 2. §. 35. peragitur, hinc morborum ex hac causa origo clare patet.

§. L.

Quando quoque sanguis §. 33. in subtilissimum liquidum resolvi nequit, quod minima penetret vasa, laxæ redduntur fibræ.

COROLLARIUM.

Ergo hic est ortus plethoræ, cachexiæ, tumorum & obstructionum varii generis.

§. LI.

Alteram solidorum generalem morborum causam rigiditas nobis sistit, quæ nimiam molecularum terrestrium cohesionem & adunationem habet, unde elasticitas augetur & æquilibrium tollitur.

§. LII.

Nulla autem flexilitas sine aqua in fibris esse potest, ideo, subtiliori fluido absente, plures coalescunt fibræ, quæ rigidiores factæ, majorem impetum humoribus conciliant, unde inflammationes variorum morbumque plurimi (§. 46.) ortum trahunt.

§. LIII.

Tum ex pluribus vasis fit unus, per coalescentiam canalis, hic in cartilaginem abit, cartilagines mutantur in ossa, sic omnis motus cessat, & est mors naturalis senum, ubi arteria aorta in origine plane ossæa, postea cartilaginosa, sub anatomia deprehensa fuit.

COROLLARIUM 1.

Ergo Veterum humidum radicale, si sano accipiat sensu, intellectu non difficile est.

COROLLARIUM 2.

Nec ullus in corpore humano ex materiali principio facile oritur morbus, quando aqua omnibus debite intercedit partibus, & sanguis probe circulator & excernenda foras ejiciuntur.

S E C T I O III.

De speciali Aquæ usu, in curatione recensitorum & plerorumque affectuum corporis humani.

§. LIV.

Aqua secundum proprietates (sect. I. §. 1, 2, 3, 4, &c. &c.) explicatas, mundificat, penetrat, aperit, cum nostris liquidis se miscet, obstructa resolvit & circulationem promovet.

§. LV.

Si enim particulæ quædam oleosæ salinæ ac terrestres, peracta transpiratione insensibili, remansere, ac postea perspiraculis illis ad mentem LEUWENHOECKII vix $\frac{1}{725000}$ unius arenulæ æquantibus, avolantibus aquosis principiis, obstructionem minantur, nihil melius cutim deterget, quam applicata aqua, dum se insinuans sali cum oleo redigitur in saponem sicque terram simul aufert.

§. LVI.

Porro corpus nostrum undique æqualiter premittur ab aere, cui respondet elater cordis; si igitur gravitas ac penetrabilitas globulorum aquæ consideratur, quæ longe gravior aere est, tunc non solum plus premet, sed etiam vasa capillaria penetrare poterit.

§. LVII.

Hæc vero in ambitu externo & interno ex exhalantibus & resorbentibus constant vasis, quæ, si sint nimis laxa, constringi, si nimis stricta, relaxari debent.

COROLLARIUM.

Ergo usus aquæ frigida & calida maxime a se invicem differt.

§. LVIII.

Operatio aquæ frigida sic concipitur, quod resistentiæ in vasis & fibris minimis augeat, hinc majori copia a peripheria ad centrum humores propelluntur, in cerebro fit major secretio spirituum, in corde vires duplicantur postea, vel quod per venas plus sanguinis revehitur, vel quod musculus hunc copiosior liquidi nervosi copia influit.

§. LIX.

Aqua igitur frigida, sive fontana sive fluviatilis sive alia, si pura existit, in omni debilitate fibrarum, levibus inflammationibus, & affectibus, in quibus circulatio ad peripheriam fortior, ad cor vero debilior seu languidior erit, maximam absolvit curam.

COROLLARIUM 1.

Ergo roboratur corpus hujus aquæ usu, sive interne sive externe applicetur, justo loco, pondere ac mensura.

COROLLARIUM 2.

Ergo affusio aquæ frigida in hæmorrhagiis, non ad partes lasas sive proximas, sed ad remotas fieri debet, ut major quantitas ad inferiora derivetur.

§. LX.

§. LX.

Cum igitur tonus partium usu aquæ frigidae restituitur; non immerito à Veteribus Medicis in variis affectibus commendatur. Sic CELSUS in medicina sua *Lib. I. cap. I.* haustum frigidum in vomitu, ructibus crudis, imbecilli stomacho præscribit. *cap. 3. Lib. ej.* assiduo oscitantes mox vinum, mox aquam bibere jubet, sane ex nulla alia ratione, nisi ut remissior tensio seu tonus restituatur, sanguisque stagnationi proximus propellatur. Aqua præterea, propter summam penetrabilitatem, visciditates mucidas facillime resolvit, vasis vero motum conciliat elasticum.

§. LXI.

Quantum autem ad sanitatem conservandam usus aquæ simplicis contribuat, præter rationes superius adductas, exemplis in dies probatur. Sic memini juvenis cujusdam valde robusti ac sani, qui per omne vitæ tempus (præter usum lactis in infantia) nil nisi meram aquam pro potu assumsit, cibus etiam simplicissimis & durioribus semper usus est, interim huc usque optima gaudet valetudine, nullo morbo afficitur, neque remedii quicquam efflagitat, certo argumento hoc liquidum scopo diluendi, resolvendi, fermentandi, dividendi, ac deducendi ad ultimam fibram, solum sufficere.

COROLLARIUM.

Ergo confirmamur, aquas frigidas, sive pluviales sive fluviatiles sive fontanas, interim puras & leves, podagricis, arthriticis, rheumaticis affectibus prodesse quam maxime, si præsertim instar acidularum epotentur. Qua de re uberius instruimur ab Excelentissimo Dn. Præsidente in Dissertatione de Aqua medica universali.

§. LXII.

Nivem quod attinet, usus eum priori generaliter communis, sed cum solidum magis habeat corpus, quod sensu etiam frigidius observatur, idcirco partes refrigeratas restituit; per gelu enim humores coagulati intra vasa detinentur, hæc rigidiora facta nihil transmittunt, tum applicatio nivis revocat motum, impellendo vasa semimortua, sic actio ac reactio fit major, obstructum resolvitur & circulatio seu vita parti conciliatur, nisi jam sit plane destructa, interim tamen circumjacentes partes ab imminente putredine conservantur.

COROLLARIUM.

Ergo omnibus inflammatis & ambustis partibus frigida quævis applicatio majus periculum conciliat.

§. LXIII.

Ætherea vero lucida & calorifera materia (§. VI.) majori copia in aqua collecta, eam reddit calidam, aer enim plus expanditur, globulique in majori actione ponuntur.

§. LXIV.

Ingens saxum fune alligatum, per cujus superficiem spongia aqua malida ducitur, ut humescat (experto BELLINO) sursum tollitur: huic accedit quod aqua tepida durissimo ac siccissimo aspersa corio illud flexile reddat, ejusque poros intret.

§. LXV.

Si habeas etiam massam ex oleo & terra concretam, hancque aliquamdiu in aqua tepida maceres, illa dissolvetur & fluida reddetur.

§. LXVI.

Quando igitur fibræ corporis humani valde sunt contractæ & rigidæ factæ, humores etiam coagulati, interim corpus interne & externe fovetur aquâ tepidâ, non solum laxantur vasa, sed massa crassa in vasis contenta ad circulandum & transpirandum apta redditur.

COROLLARIUM.

Ergo in omnibus inflammationibus in- & externis nullum præclarius præstantiusque remedium, præter aquam calidam, excogitari ac in usum vocari poterit.

§. LXVII.

Sed erit etiam alius aquæ usus qui dicitur derivativus, quando humores locum aliquem nobiliorem obstipant, ubi propter copiam & majorem affluxum transpirare aut dissolvi nequeant, sive periculosum sit hoc in loco discussionem tentare; tunc ex opposita regione derivatio per applicationem calidæ facillime instituitur.

§. LXVIII.

Sit nobis pro exemplo cephalalgia, ex obstructione mensium orta, ubi simul ad inferiora strictura fibrarum peccat: Si partes inferiores sæpius aquæ imponantur calidæ, relaxatis vasis hisce, circulatio ibi fiet celerior majorque copia huc derivabitur, interim pressio versus caput imminuetur, & sanguis stagnans abundansque ex viis naturalibus deducetur: hujus vero veritatis clarius erit conceptus si aquæ miscelam cum sanguine §. 65. 66. demonstratam attendamus.

§. LXIX.

Singularem potro & planè divinam efficaciam aquæ calidæ in febribus ut paucis attingamus, assumendum erit ex pathologia, rationem earum formalem consistere in velociori contractione cordis, cum aucta resistentia ad vasa minima: Ideo hic fibræ erunt rigidæ & humores compacti, densi ac coagulati. Quid ergo consilii? Certe applicatio internâ & externa prudens aquæ calidæ potissimam dabit curam.

COROLLARIUM 1.

Hinc balneorum, fotuum, vaporum verus ac justus usus Medico mechanico satis constat, ne tanquam empiricus secundum aliorum dicta procedere cogatur.

COROLLARIUM 2.

Nec anxie inquirendum quænam aqua præ altera sit eligenda, siquidem ex consideratione hujus vel illius affectus vel simpliciter vel salè quodam acui debet.

COROLLARIUM 3.

Ergo nullum medicamentum effectum salutarem in corpore humano habebit, nisi cum aqua sit mixtum, aut copia ejus nondum deficiat in vasis.

§. LXX.

§. LXX.

Interim medicamenta omniaque nutrimenta, ope aquæ calidæ, ad subtilissimos canales deducuntur, nec vegetabilia sine aqua resolvuntur & in fermentationem rediguntur; solvit vero aqua primo sal plantæ essentialia, quo turgida & acuta reliqua oleosa & terrestria principia unire & in saponaceum & lactescens liquorem miscere ac mutare potest. Extrahuntur hoc modo varia, ex variis herbis, corpori nostro proficua, & hæ solutiones sunt simpliciores ac convenientiores corpori nostro. Quid antecellit decoctum fumarie sive ejus infusum in scorbuto? quid præcipit palmam infuso seu decocto veronicæ, tussilaginis, salviæ in affectibus pectoris? Certe potus ille saponaceus turcarum nomine Caffee jam vulgatissimus, justo modo coctus ac præparatus, in palpitationibus cordis, cephalalgis, morbis inflammatoriis divinum est remedium; quicquid etiam alii obloquantur. Encheirisis enim præparationis in eo latet, ut probe exsiccata fabæ æqualiter ustulentur, olei præcipua quantitas per ignem eliminetur, & iuste deinde coquatur, sic erit saluberrimus potus, liber ab omni periculo & noxa. Nolim autem oppugnare quod nonnullis subjectis noceat, & nimis assumptus noxam inferat, id quod de præclarissimis etiam remediis aliis dici potest.

§. LXXI.

Aquarum mineralium usus medicus ex modo dictis luculenter quidem esset derivandus: sed cum earum tanta sit commendatio, considerabimus quid emolumenti, præter communes aquæ proprietates, secundum principia superius allegata, mutabili & labascenti nostræ machinæ, conciliandum & expectandum sit.

§. LXXII.

Acidulæ æque ac thermæ (juxta Excellent. Domini Præsidis demonstrationem) alcalino & neutro sale turgidæ, vasa secretoria & excretoria roborant, aperiunt, obstructa resolvunt & hoc pacto hypochondriacis, scorbuticis, nephriticis, hydropicis, cachecticis affectibus, nec non febribus intermittentibus obstinationibus, mensiumque vitiis quam maxime conveniunt, neque minus fibræ debilitatis & rigidis opem ferunt.

§. LXXIII.

Ratione vero sulphuris embryonati penetrant hæ aquæ vasa capillaria, conciliantis motum majorem, stimulant, & in aliquibus morbis inflammatoriis interne & externe singularem habent usum, emolliendo duros tumores ac reserando poros cutis; firmas vero reddunt relaxatas fibras, nec non debilibus & languentibus visceribus auxilium suppeditant.

§. LXXIV.

Thermæ, præter jam memoratas virtutes, hoc singulare habent, quod propter subtilem spiritum activum intimius se insinuare queant fibræ subtilissimis; hinc non solum rigiditatem earum solvunt, sed etiam alluendo ac solvendo impactis & obstructis vasis impetum conciliant.

§. LXXV.

Arthriticis igitur & podagricis, ubi serum subtile avolavit, ac restitans lymphæ incrassata est, ubi vasa

minima ac tendines crispaturam acceperere: calidarum aquarum usus summe proficius est: minime autem privabimus nephriticos, calculosos, oculorum vitio laborantes, aliosque variis affectibus ex rigiditate ortis affictos, laudabili thermarum usu.

§. LXXVI.

Nolumus interea fontium frigidorum & calidorum usum distendere ad omnes affectus, vel pro universali remedio venditare; est enim in aprico positum, quod viscera indurata ac scirrhusa resolvere haud queant. Nec hæ aquæ quid auxilii ferre valent destructis partibus, ubi jam extravasationes ac effusiones in cavitates factæ sunt, hinc abstinendum ab iis in empyematibus, abscessibus, apoplexia, epilepsia & hemicrania inveterata, asthma convulsivo, anasarca, lue venerea, ac gonorrhœa virulenta, quia vi stimuli malum potius exacerbant quam leniunt.

COROLLARIUM.

Ergo interest, ut attendantur non solum varia affectuum genera, sed etiam differentie fontium; siquidem nonnullæ aquæ majori spirituum copia scætant, aliæ leniores sunt, reliquæ sale alcalino vel neutro magis abundant.

§. LXXVII.

Nè vero viscera ab usu aquæ labefactentur, nec terrestres minerales particule remaneant; motus corporis, durante usu, quam maxime requiritur; quid? quod evacuationes sanguineæ vel serosæ, pro ratione subjectorum, anticipandæ, aut sub cura institundæ erunt, quin imo, pro re nata & ægrotantium conditione, stomachica, hysterica, resolventia &c. &c. in usum advocari debent.

§. LXXVIII.

Requiritur denique cura præservatoria, ubi plethora corpus occupat, & quidem hoc scopo, ut majus spatium reliquis humoribus & assumendis aquis concedatur, ita enim illi citius circulari, hæ vero eo facilius totam massam corrigere ac noxias particulas educere poterunt. Status autem subjectorum indicabit an venam secare, alvum subducere, urinam ciere, aut sudorem movere; consultum sit.

COROLLARIUM 1.

Generalis ergo ac universalis aquarum mensura singulis individuis ordinari nequit.

COROLLARIUM 2.

Nec alia operatio aquarum mineralium fingi debet; quam illa, quæ ex natura stimuli & solutionis sequitur.

COROLLARIUM 3.

Hinc elucet, cur, sub vario regimine, aquæ minerales mox alvum, mox vomitum, mox urinam, mox sudorem vel solum insensibilem transpirationem promovent.

COROLLARIUM 4.

Apparet denique, quatenus hæ aquæ profint vel noceant tabidis, atrophicis & phthificis, & quomodo usus externus ab interno differat.

DISSERTATIO MEDICA

D E

FONTE MEDICATO
LIGNICENSI.*Primum edita anno 1729.*

P R Æ F A T I O.

INTER tot præstantissimas dotes, quibus divina clementia Silesiam, patriam meam, tam largiter beavit, ut haud immerito cum felicissimis quibusvis regionibus certare possit de prærogativa, haud postremum locum obtinent foteriæ aquæ, tam calidæ, quam frigidæ, quæ passim liberali multiplici vena in ipsa scaturiunt. Ex calidis enim thermalibus aquis celebratissimæ sunt Hirschbergenses, in Ducatu Jauroviensi, a Cl. ADOLPHI peculiari dissertatione descriptæ. Dein salubritatis etiam laudem ferunt minus fervidæ thermæ Sancti Joannis, quarum meminit SCHVVENCKFELT in *stirp. & fossil. Siles. catalog. pag. 404.* nec non HENELIUS in *Silesiogr. part. I. pag. 613.* Quibus accedunt Landecenses in comitatu Glacensi thermæ, quarum vires cum KREMERO edisseruerunt collector. *histor. morb. Vratisláv. anno CIOIOXCIX.* Sed longe major adhuc frigidarum mineralium aquarum numerus. In Ducatu Jauroviensi celebrantur Girense acidulæ, nec non in oculorum vitiis & intestinorum doloribus proficiuus fons pagi Sendorff, *der Kirch-Brunn* dictus. In Ducatu Svvidnicensi nobiles virtute sua sunt Tanhausenses & Reichenovieneses acidulæ, maximeque eæ, quæ in pago Altvasser benigna admodum vena saliant, de quibus in *Silesiographia Heneliana renov. M. N. C. Dec. I. An. IV. obs. XCVII.* nec non peculiari tractatu uberius actum. SCHVVENCKFELT *l. c. pag. 357. sq.* binorum acidulorum fontium, quos vocat *Bier-Brunnen* / mentionem injicit, quorum unum non procul a fluvio Quisso, juxta pagum Fegesbeutel, alterum in pago Liebvverda, undam emittere & utrumque febribus & calidioribus morbis mederi asserit. Alium foterium prope Boleslaviam fontem amœnum, regium dictum, carmine celebravit OPITIUS *Sylv. lib. IV.* & alium prope Nissam CALAGIUS *epigr. Lib. V.* Neque inglorius est ille prope Hirschbergam in pago Straubitz reperiundus, vulgo *der Schwefel-Brunn* / cum miraculoso illo, quem corrupte appellant *den Mörckel-Brunnen* / ad radices montis, quem vocant *den Haußberg.* Salsulam fontem in confiniis arcis Fürstenstein cum SCHVVENCKFELTO laudat HENELIUS *l. c.* & ADOLPHI *diff. de salubr. Siles.* Neque minus magnæ olim virtutis fuisse fertur scatebra in pago Olbersdorff, prope Franckensteinam, hodie tamen minus celebris. Hermsdorffensis autem prope Goldbergam, nec non ille qui in ditione Seiffersdorffiana est, una cum alio, qui circa Fridebergam apud pagum Kunzendorff prodit, nostris adhuc temporibus salubrium nomen gerunt atque tuentur. Ut mittam celebres in Comitatu Glacensi Reichenavieneses, Salzbur-nieneses & Oberlanginavieneses acidulas. Tam uber salutarium fontium in Silesia est proventus. Neque tamen dubitandum, longe plures adhuc, si curatius inquireretur, passim fore reperiundos. Ita enim omnino esse, testatum facit experientia, dum subinde, nonnunquam casu, nonnunquam attentiori investigantium scrutinio, noviter innotescunt scatebræ, medicinali virtute pollentes. De quo domesticum quasi mihi suppetit exemplum fontis illius, qui nostra memoria, in patria mea, Lignicii, coli cœpit, magnamque jam salubritatis famam adeptus est. Mentionem hujus pri-mus quidem, quantum memini, publicam fecit Cl. ADOLPHI, in *dissert. de salubr. Siles. §. XIII. hodie*, inquit, *frequentis usus est fons ille salutaris Lignicensis, in multis morbis apprimè proficiuus.* Inserta etiam est *annalibus medico-physicis Vratislaviensibus,* quas

quas vocant *Sammlungen von Natur- und Medicin-Geschichten anni MDCCXVII. mense Augusto*, brevis narratio de ortu, principiis & effectu salutari in arthritide hujus aquæ, & *anni MDCCXIX. mense Decembre*, delineatio structuræ ædificiorum, nec non machinæ, cujus ope aqua in balnea agitur. Sed neutiquam hæc sufficere possunt iis, qui exactam hujus fontis cognitionem obtinere cupiunt, tantum abest, ut saluberrimam ipsius in medendo facultatem cum recta utendi methodo exhauriant. Quare ego haud infructuosum aut ingratum laborem me suscepturum fore existimavi, si reditum in patriam meditans, ex ipsius sinu argumentum speciminis inauguralis prius exhibendi depromerem, omniaque quæ ad fontis hujus Lignicensis medico-physicam considerationem referenda, penitus excuterem ac uberius exponerem. In quo quidem perficiendo, multum, quod cum grati animi significatione profiteor, me juvit, singularis amici benevolentia, qui absente me, non modo physico-chymicam harum aquarum explorationem instituendo, ipsarum principia curate investigavit, sed & in vires atque effectus inquisivit, tam apud illos, quos iisdem sanatos esse rescivit, quam etiam celeberrimos Practicos, maximeque amplissimum Physicum, Dn. D. HOBERGUM, loci in quo scatebra est, Dominum ac possessorem. Ita autem hanc disquisitionem tractare placuit, ut primum agerem de fontis loco, situ, ortu aliisque circumstantiis externis, dein de natura & principiis ipsius constitutivis, ac postremo de medico ipsius usu & adhibendi modo. Annuat divina clementia conatui & laborem benedictione sua fortunet. Tu vero, benevole lector, suscipe tanquam studiorum primitias, & si forsan alicubi lapsus Tibi videbor, ignosce, aut da meliora.

CAPUT I.

De Loco, situ, ortu & aliis circumstantiis externis.

§. I.

HAud exigua certe est commendatio, quæ fonti nostro, ex loci in quo scaturit, & nobilitate, & amoenitate accedit. Natale enim solum ipsi obtigit Lignicum, urbs ob antiquitatem celebris, Ducatus sui princeps & qua teste HENELIO *l. c. cap. VII. §. 83.* nulla Silesiorum, si solam metropolin Uratislaviam excipias, fortior ac venustior. A mœnibus hujus urbis, ante portam Glogaviensem, intercapedine unius horæ quadrantis, est amœnissimus secessus, quem vocant *das Grün Thal*. Ab uno quippe latere surgit cultus jam & subactus tractus montis, quem dicunt *den Töpfer-Berg* / sive rectius *den Töppel-Berg* / ab urnis sepulcralibus, quas olim & haud ita pridem effossas ibi esse, constat. Ab altero latere horti frondosis arboribus frutibusque confiti & prata floribus herbisque virentia jucundissimum faciunt aspectum. Accedunt rivuli solum passim irrigantes, maximeque ille, qui ob colorem quem refert nigricantem, audit *das schwarze Wasser* / & a brachio Catti fluvii receptus, ob diversitatem undarum quas uterque trahit, spectaculum confluentis præbet maxime amœnum. In viridi hac velle erectum est prædium suburbanum, venustate nulli secundum, in cujus area fons noster laticem suum emittit. Ipsius autem fundi dominus est vir amplissimus atque experientissimus, D. D. MARTINUS HOBERG, Sacræ Cæsareæ & Regiæ Majestatis Aulæ Medicus & Physicus Lignicensis celeberrimus, quo prædium tenente, aquæ nostræ salubritas primum innotuit, scaturigo culta est & ipsius sumtibus commodis ædificiis instructa.

§. II.

Nimirum fontem nostrum soterium esse & mineralem, antehac diu novit nemo, neque etiam in

impressis aut manuscriptis majorum monumentis ulla ipsius fit mentio. Sed anno *MDCCCIX.* salutaris ejus indoles primum patefcere cœpit atque cognosci. Fragrans quippe & sulphureus aquæ odor & adstringens ipsius sapor, curiosius attendentibus movit conjecturam, majoris ipsam esse dignitatis atque virtutis, quam ut, uti eousque factum, domesticis tantum usibus serviret. Conjecturam uberius confirmavit indoles circumjacentis soli, ab aliis longe diversa, argillacea ut plurimum, siccior, arenosa, martiale quid haud obscure prodens, cum repertiundis passim tophis & glebis ferrugineis, ochra lutea martiali refertis. Hæc spectantes admiratione & curiositate permoti, varia instituerunt experimenta, quibus aquæ indoles detecta & salubritas ipsius magis magisque perspecta. De qua sic luculenter convictus laudatus fundi possessor, invitus quidem, anno insequenti, de aptando communi usui fonte cogitavit & in uno scaturiginis latere balnearia cum ædibus pro excipiendis commodis hospitibus peregre advenientibus extruxit. Sed brevi adeo increbuit salubritatis hujus aquæ fama, ut anno *MDCCCXI.* nec balneum, nec ædificia sufficerent multitudini ibi confluentium & salutem quærentium. Unde necessarium fuit, ut in sinistro etiam scatebræ latere & balnearia, & hospitia, erigerentur, eodem modo ac in dextro, eaque propter ædes & dextram *das alte* / & ad sinistram *das neue Bad* / audiunt. Et hæc etiamnum hodie hujus fontis facies est, quam æri incisam exhibent *annales medico-physicae Uratislavienses anno MDCCCXIX. mens. Aug.*

§. III.

Interim quia aqua nostra scaturit frigida & ad balnea prius est calefacienda, haud exiguis sumtibus artificiosa constructa est machina, quæ aquam ad caldaria & balnea advehit, iterumque inde adducit, ne quicquam commodo usui desit. Videlicet binæ anthiæ attractivæ hauriunt primum ex scatebra aquam, quæ dein ope canalibus cuprei infunditur ahenis cupreis ac in iis subdito igne incalescit. Ex ahenis tum per similes canales cupreos in terram defossos, in dextrum æque ac sinistrum balneum agitur & immittitur calefacta aqua. Cujus calorem ut insidentes pro lubitu temperare possint, alius ad-

huc

huc canalis est, qui frigidam advehit & referatus effundit. Abundantem demum aquam ex utroque balneo educit similis alius canalis, eandemque transmittit ad receptaculum viliorum usui dicatum, quod vocant *das Armen = Bad*. Ipsa autem hæc machina, pariter aeri inculpta videnda in *annal. physico-med. Uræslav. l. c.*

§. IV.

Neque prætereundum, binas alias adhuc in confiniis nostræ esse scatebras, notatu dignas. Una salit ipso in ædificio ad dextrum latus sito, & aquam emittit, quæ alvum laxandi facultate, eodem fere modo ac Egranæ pollet, nec sine fructu hunc in finem a balneantibus potari eam posse autumo. Altera, Hedwigæ nomen gerens, est a latere hujus prædii, ubi ad montem, quem dicunt *den Sybille = Berg* / itur. Hujus aqua, mineralis quidem contagii expers, præcipuos tamen bonitatis characteres, puritatem habet & levitatem, quibus innumeri fere alii tam in Lignicensi districtu, quam universa Silesia fontes, sunt præditi. Destinatur autem hæc aqua movendæ machinæ illi fonti foterio adstructæ, eumque in finem per incile ligneum longius quam per ducentas ulnas eo derivatur.

CAPUT II.

De natura & principiis constitutivis fontis.

§. I.

A Qua fontana omnis, quantumvis pura ac limpida, semper tamen in fluidi sinu solidi quippiam, modo uberiori, modo pariori copia, recondit. Neque etiam id aliter fieri potest. Illi enim cœci subterranei recessus varii generis salibus, mineralibus terrisque scatent, quos dum perlabitur aqua, solvit subinde & eliquat ex iis nonnihil atque in sui connubium admittit. Sicuti vero ea, quæ terra in sinu recondit, non unius, sed diversæ admodum sunt indolis atque texturæ, modo laxioris, modo compactioris; ita utique etiam accidit, ut humor aqueus particulas ex ipsis abstergens atque absorbens, aliam atque aliam fortiatur indolem, ac vel copiosius, vel parcius eisdem imprægnetur. Ex quo quum diversa aquæ emergat facultas & virtus, necessarium omnino, ut si medico usui impendenda, prius certi simus de elementis atque principiis ipsius, quo postea iis perspectis, eo rectius de viribus & utilitate judicare possimus. Igitur lustratis fontis nostri incunabilis, instituti ratio nunc exigit, ut de ingredientibus etiam cognoscendis, sim sollicitus. Hæc vero non alia ratione quam per examen physico-medicum innotescunt. Quod quidem a Physicis variis modis, majori, vel minori apparatu, institui solet. Ego vero ad ductum Ill. Dn. PRÆSIDIS in *meth. examin. aqu. salut.* in scrutinio hoc potissimum rationem habebo elementi humidi, κατ' ἐξοχήν, subtilis spirituosi & demum solidi elementi.

§. II.

Primum igitur & præcipuum fontis nostri elementum constituit humidum illud, sive aqueum κατ' ἐξοχήν, quod reliqua in complexu fovet. Quod quidem sicuti copia reliqua longe superat, ita ab ipsius indole magnum utique salubritatis momentum pendet. Jam vero bonitatis aquarum indices

Frid. Hoffmanni Oper. Supplem. II.

certissimi sunt, puritas, levitas & sapor. Et hi etiam de nostra bonitatis testimonium ferunt. Nam ex levissimis eam esse docet ponderatio, instrumento statico facta, qua constat, eandem ad levitatem aquæ pluvialis quam proxime accedere. Puritas dein ipsius tanta est, ut vitro infusa limpidissima compareat, nihilque prorsus habeat, quod radiorum luminosorum transitum impediatur. Sapor porro gratissimus est & sub blanda dulcedine, lenem amicumque adstrictionis sensum linguæ imprimit. Est præterea mollis, non aspera aut cruda, & propterea antequam ad medicum usum traduceretur, domestico & culinari serviit quam optime. Frigida demum est, inprimis æstate, sed hieme subcalida.

§. III.

Alterum quod scrutinium meretur principium, est tenue illud & spirituosum. Hoc uberius incolere aquam fontis nostri, plura sunt quæ confirmant. Ex scatebra enim hausta innumeras bullulas a vitri fundo ad superficiem emittit, ubi vel illico crepant atque evanescunt, vel lateribus sese apponunt & successive disparent. Longe major harum est proventus, si aqua agitur, aut ad evaporandum in patina ampla igni imponitur. Hæ autem bullulæ nihil utique aliud sunt, quam subtilis ætherea substantia in aquæ sinu conclusa, eademque commota ad superiora eluctans & exitum affectans. Idem hoc generosum elementum in causa est, quod aqua nostra nec gelidissima hieme in glaciem densetur, neque etiam tam facile & cito, quam aliæ, hoc spiritu orbæ aquæ, putredinem concipiat. Sulphureus quoque ille & penetrans odor, qui nares in balneis ferit, luculenter arguit, ab aqua in patentia receptacula ex conclusa vena effusa aufugere tenuem hunc & a remissiori aeris compressu non amplius coercendum spiritum. Quin, si aqua recentior ex scatebra hausta in cucurbita vitrea destillationi subjicitur, exspirat vaporem volatilem sulphureum, naribus percipiendum, id quod longe magis accidit, si in ampliori patina carbonibus ad exhalandum imponitur.

§. IV.

Tertium quod explorandum ingrediens est solidum, ad cujus indolem perspicendam hæc faciunt observata & experimenta. Memini jam superius, solum in confiniis scatebræ arenosum, haud obscure prodere intermixta tenuia martis ramenta. Nec vana hæc conjectura. Effossa enim arena & aqua elota, facta calcinatione, genuinum præbet martis crocum. Canales dein omnes atque incilia, quæ transmittunt atque recipiunt aquam hanc, intus dura & densa crusta obducuntur, quæ colorem fulvum, ac ubi proxime aquæ imminet, ex rubro brunum obtinet, diffracta subinde lapillos minores brunni coloris, quos SCHWENCKFELT de *fossil. & lapid. Siles.* ophthalmicos dicit, recondit, totaque ex lamellis sibi invicem instratis composita esse, compareret. Crusta hæc igne cremata rubiginis plane affluet colorem ac servat, linguæque admota, falsum sapit & cohæret, eodem fere modo, ac calcinato sale tartari, cum limatura martis, evenire solet. Neque minus ochraceum hoc concrementum, igne ustulatum, si solutioni salis ammoniaci cum aqua simplici commiscetur, sub mixtione urinosum mordentem dispergit odorem. Quod si vero hæc ex canalibus deprompta materia cruda cum æquali salis ammoniaci portione igni sublimatorio committitur, surgunt flores flavescentes, qui repetita operatione, eundem colorem atque nitorem nanciscuntur, ac

illi chalybeati flavi salis ammoniaci flores Zwelfferi, ad extrahendam etiam spiritus vini ope martis tincturam apti. Quin indusia balneantium flavo inficiuntur colore, & tenui quasi martis rubigine inducta esse videntur.

§. V.

Ipsa aqua, insperfo gallarum pulvere, flavescen-tem tantum induit colorem, ubi vero ad scaturiginem experimentum instituitur tinctura emergit ad rubicundam magis accedens. Instillato in aquam e fonte haustam nitri, aut vitrioli spiritu, nulla prorsus exoritur effervescencia; neque etiam admixtus violarum syrupus cæruleum nativum exuit colorem. Quod si vero major aquæ copia exhalationi committitur, residuum ab ea sal, denuo in aqua solutum, lixivium præbet, quod admixto violarum syrupo viridescit. Idem accidit, quando ochracea illa in aquæductibus concrescens & calcinata materia, in aqua liquatur; cui si postea spiritus vitrioli majori in copia affunditur, sal emergit, tartari vitriolati genium referens. Sal autem evaporatione ex aqua eductum, libero aëri expositum deliquescit & haud secus ac tartari oleum per deliquium diffluit.

§. VI.

Ex quibus omnibus innotescit, aquam nostram nihil, vel parum admodum vitriolici in connubio suo alere, quod alias si inest, adjectis gallis, nigram inducit tincturam. Neque etiam ea alcalini elementi in fonte nostro copia, ut singularis inde virtus expectari, aut ipse acidulis annumerari possit, quippe quæ nunquam non, observante id primum Ill. Dn. PRÆSIDE, cum acidis pugnant, cujus conflictus signum effervescencia, quin indito vino tantum acidulo, numerosissimis bullulis emissis ebulliunt. Martiale autem fixum elementum, cum spirituofo sulphureo in fonte nostro eminere, uberius evincunt observata & experimenta §. IV. & III. adducta. Quæ aqueo vehiculo excepta, genuina ipsius sunt ingredientia, a quibus pendet salutaris & medicinalis facultas.

§. VII.

Quare foterius hic fons merito refertur in classem eorum, qui ferrati audiunt, vel martiati, probe ab acidulis distinguendi. Meminit horum dudum PLINIUS, & passim jam scaturiunt, quos cum nostro ejusdem esse indolis tentamina docent. Sic in Gallia hodie celebratissimus est fons Passiensis, in confiniis Lutetiæ Parisiorum, cujus examen physico-chymicum reperiundum in *historia Academiae regiae scientiarum anno c16ccxxvi*. Potissima huc redeunt. Aqua clara, pura, saporis paululum est adstringentis, cum subtili & penetranti acrimonia, hasque qualitates per tres integros menses servat, si vasis bene obturatis in frigidum locum reponitur; si vero in patente vase aëri libero solaribusque radiis exponitur, vel subdito leni igne incalescit, turbida evadit, flocculi crocei ferruginei ad fundum secedunt, sapor subadstringens perit & leni potius falsedine linguam afficit. Materia post evaporationem residua solida, coloris est flavi, tantisper splendescens & falsum alcalinum sapit. Sal eductum iterumque solutum, syrupo violarum admixtum, viridescen-tem ipsi inducit colorem, & siccatum, in libero aëre, sub diuturna mora deliquescit. Unde quidem recte concludunt, croceum cramatis relictum colorem esse ab intermixtis ferreis & splendorem a seleniticis particulis, prætereaque adjunctum esse alcalinum elementum; sed quia nec pondus aquæ exhalationi commissæ, nec pondus materiæ resitantis

additum, nec proportionem singulorum, nec independentem facultatem, alcalini maxime salis, exacte determinare licet. Ne dicam, difficilius adhuc reddi judicium, ob omis- sam indagationem levitatis aquæ, quæ tamen subtilitatis index multumque effectui medicinali velificatur.

§. VIII.

Longe uberior ferratarum ejusmodi aquarum in Germania est proventus, quæ itidem exacte cum nostro conveniunt. In Marchia celebrantur Freyenwaldenses, quæ humorem habent limpidum, saporis subadstringentis, hieme non congelantur, nec facile putrescunt, calefactæ dimittunt flocculos crocei coloris. Harum examen instituit Dn. PRÆSES & inferuit *Medic. consult. part. I. Dec. IV. Cas. V. pag. 138.* quo constat, ex binis hujus aquæ mensuris, post exhalationem remanere drachmam materiæ flavescen- tis terreæ, cum spiritu vitrioli acriter pugnantis. Martialis quoque indolis est non inglorius prope Dresdam Radebergensis fons, cui quidem nonnulli vitriolum martis inesse putant, sed ill. Dn. PRÆSES tentaminibus rationibusque compluribus in *Medicin. consult. part. III. Dec. IV. cas. III. pag. 177.* demonstravit, potissimam ipsius facultatem esse ab aquæ levitate ac subtilitate, cui martialis terræ nonnihil admixtum, & motas objectiones in *opusc. physico-med. tom. II. pag. 497. seqq.* refutavit. Ab aliquot præterea annis in comitatu Hohenloico innotuit fons Eppacensis, quem uberius descripsit peculiari libello BAUERUS & Dn. PRÆSES etiam in *Medic. consult. part. V. Dec. III. cas. VI. pag. 196. seqq.* Hic pariter in sinu recondit subtilem martis crocum, quem sapor subadstringens, purpureus a gallis color, rubigo indusiis balneantium & putamini ovi injecti adhærens, produnt, cum sedimento, quo eloto ac sali ammoniaco nupto, per sublimationem flores nitidissimi coloris fiunt. Habet vero præterea etiam sal medium amaricans, ad Ebshamensis, seu Sedlicensis genium accedens, in quo tamen alcali eminet, uti patet ex viridescen- te colore, quem syrupus violarum aquæ comixtus inducit, quod alias in fontibus largius etiam alcalinis non contingit. Neque minus in complexu sovet bolarem calcariam terram, quæ cum acido conflictum init, & in causa est, quod a tartari oleo per deliquium parato, pelluciditas aquæ turbetur. Maxime omnium vero martiatorum fontium classem ducit is, qui Lauchstadii in Misnia scaturit, quem primus cum cura inspexit & ad usum traduxit, ill. Dn. PRÆSES. Hoc enim teste in *opusc. physico-med. tom. II. pag. 390. seq.* adeo in eo redundant moleculæ martis, ut non modo linteamina balneantium & injecti ovi putamen croceo colore imbuant, sed & compactæ canalium lateribus sese crustæ instar apponant, quin hieme ad fundum conceptaculi subsideant, ut frustulatum eximi queant. Cui concremento, quod implicitus sit verus martis crocus, patefit experimento, quo ex uncia una hujus cramatis, eloti prius, dein calcinati, ac postea cum æquali parte salis ammoniaci remixti, per sublimationem elegantissimi martiales flores, pondus duorum scrupulorum habentes, elici possunt. Nec prætereundus fons ille, qui ante aliquot annos apud Variscos, in pago *Nieder-Auerbach* innotuit, cujus martialis indoles ex ochra canalium & purpureo ab injectis gallis colore elucescit, eidemque cum spirituofo inhabitante principio & aqua subtili ac levi, virtutem conciliat medicinalem haud exiguam. Ut mittam Bebranam in Thuringia, Sulzensem prope Naumburgum, nec non Weissenburgensem in Fran-

Franconia aliosque forsan adhuc reperiundos fontes, ob incolens martiale principium nobiles & commendabiles.

C A P U T III.

De viribus & usu fontis.

§. I.

HActenus de principiis & ingredientibus fontis nostri; nunc de ipsius viribus ac usu dicendum. Ipsa autem convenientia, quam Lignicensi cum aliis spectatae virtutis & celebribus fontibus ratione elementorum intercedere postremo pluribus adstruxi, planum ultro facit testatumque, ipsum non minus ac illos medica virtute pollere & usus esse saluberrimi. Ut tamen de eo uberius omnibus constet, cuncta sigillatim ordine perquirere juvabit. Jam vero ex allatis experimentis certum est, genuina aquae hujus elementa, a quibus virtus ipsius repetenda, esse aqueum, spirituosum tenue & martiale fixum elementum. De aqua igitur dixi, quod pura sit, levis atque subtilis. Dotes hæ atque proprietates ita sunt comparatae, ut si non præcipuum, saltem non minimum, ad salutarem effectum conferant momentum. Ejusmodi enim aqua expeditissime per omnes quantumvis minimos corporis canaliculos decurrit, promte ubique penetrat simulque penitissimis recessibus absorptas minerales particulas insinuat, nec corpus gravat, sed cito iterum exit. Deinceps magnæ etiam est virtutis ad succos spissos, crudos & finale coctos diluendos, colliguendos, fluxiles reddendos, eluendos atque adeo obstructions a lentore pendentes referandas expediendasque. Neque minus morbosa in corpore salia diluit atque impedit, quo minus pravum exserere possint effectum, eoque egregie corrigit ac temperat, simul atque sordes per congrua emunctoria successive everrit. Fibras etiam passim cum dolore strictas, aut rigidas, laxat, & abstergendo vellicantem stimulum, ad naturalem eas traducit & æquabilem tensionem. Hinc est, quod latices nonnulli, quamvis omnis terreæ & mineralis contagii expertes, præstantissimæ tamen, tam interno, quam externo usu, adversus multos & longos morbos sint virtutis, magnamque salubritatis habeant famam, quorum in numero sunt maxime Schlangenbadenses in Hassia, Tœplices in Bohemia, Schleusingenses in Franconia, nec non fons ille qui noviter admodum in Comitatu Mansfeldensi Danckerodæ inclaruit, & ea methodo quam Dn. PRÆSES passim in scriptis suis publicavit, a MULLERO, Physico Hartzgerodensi, peculiari schediasmate est descriptus.

§. II.

Non minus præstans est virtus, quam fontis nostro foenerat alterum spirituosum subtile elementum. Est hoc soboles fluidi illius catholici, purissimi & maxime penetrantis ætherei, quod non modo universum aëris, seu potius atmosphæræ spatium, sed & subterraneos tractus pervagatur, ubi, quando occurrit perlabentibus aquis, iisdem sese ingerit, in iis sistitur ac demum cum ipsarum vehiculo exsilit. Est autem mineralis hic spiritus quasi anima aquarum mineralium nativamque earum integritatem quamdiu ipsis inest servat; quam primum vero, quod ob tenuitatem suam facile accidit, aufugit, protinus & tota mixtio dissolvitur, sapor & color perit & ramenta mineralia ex aquæ connubio sece-

Frid. Hoffmanni Oper. Supplem. II.

dunt. Idem hoc spirituosum elementum admirabiles plane aquis ad medicum usum vires inspirat. Subtilis enim & elasticæ indolis est, eaque propter quaquaversum nititur, universum corpus pervadit, intima subit & per angustias strenue eluctatur. Quod dum perficit, junctam sibi aquam simul in venas omnes diducit, ut ubique effectus maxime aperiens & referans edere queat.

§. III.

Accedit tertium quod fontem nostrum incolit elementum, martiale-terreum. Ex quo quam egregia facultas aquæ accedat, eo minus est quod dubitemus, quo magis in comperto est, ferrum esse ex metallis fere unicum, quod virtute polleat vere medica & per artem etiam largiatur medicamenta longe præstantissima. Potissima tamen quæ exinde exurgit virtus, est roborans leniterque adstringens. Dum enim martiales hæ moleculæ superfluum humidum imbibunt atque resiccant, fibrasque nimis remissas modeste adducunt, his propius coeuntibus, fit, ut partes ex ipsis coagmentatae compactiores fiant majusque robur acquirant, ut non modo contentos canalibus succos vegetius circumagant, sed & subsistentes passim quatiant, premant, iterumque in motum cieant, quo partes iisdem obsessæ, aut gravatae liberentur & ad naturalem suam functionem iterum traducantur.

§. IV.

Neutiquam tamen periculum est, ne martiale hoc principium roborans & subadstringens, nocivum sanitati adstrictorium edat effectum. Quamvis enim haud levia sint damna, quæ a martialium per artem præparatorum medicamentorum usu subinde accidunt; longe tamen alia est ratio horum, quam aquarum martiatarum, maximeque nostræ. Is quippe qui aquæ inest martis crocus, nec per ignis torturam sulphure suo subtili est orbatus & terra ipsius alcalina in calcem usta, neque etiam per mēstruum acidum corrosivum nocens ipsa facultas communicata, sed nativam habet integritatem, qua neutiquam, nisi usu præpostero, tam facile injungere potest detrimentum. Nec solus & sibi relictus in fonte nostro mars est, sed aquæ copiosæ, nec non alealino sali sociatus, quæ efficaciam ipsius quasi ad temperamentum reducant. Unde licet ipsi in prima corporis regione occurrant acidi succi, eminentius adstrictorio effectui faventes, copiosum tamen succurrit humidum, quod acidum diluit fibrasque mulcet, quo minus strictura affici queant infesta. Alcalini autem salis, quamvis exigua quantitate, connubium facit, quo minus obhærescentes lenti succi, accedente adstringente vi, firmitus impingantur, sed incidantur simul, abstergantur & e latibulis everrantur, simulatque leni suo stimulo fibras sollicitat, ne nimium obrigescant, sed in debita tensione ac motu maneant, eodem modo ac artis peritis solenne est, ad arcendam noxam martialibus commiscere salia alcalina, vel neutra.

§. V.

Quæ quum ita sint, nemo non facile judicabit, Lignicensem fontem, in morbis quamplurimis esse saluberrimum. Duplici autem, externo scilicet & interno usu, conducit. Interne quidem non adeo certæ & multæ utilitatis esse videtur, neque hucusque frequenter & fere unquam hac ratione fuit adhibitus; interim tamen neutiquam etiam ad potationem prorsus est incommodus. Roborans enim ipsius est facultas, eaque propter quando stomacho

cum intestinis languente, appetentia perit, digestio vacillat, venter inflatur, ventriculus viscida rejicit, aut alvus nimis est fluxa, aut cruda & semiconcocta egerit, potum aquae nostrae proficuum fore, non sine ratione arbitror. Neque minus ex usu esse poterit in viscerum abdominis debilitate, qua humorum per ipsa comineatui remora injicitur, in hypochondriaco & hysterico malo, uteri vitiis, mensium nimio, nec non albo fluxu, sterilitate ex laxitate nimia, & ubi excretionem sanguinis per fedales venas, aut mictum succedentem, compescere expedit. Dein aperiente & abstergente, nec non acrimoniam temperante pollet virtute. Hinc non infructuosum fore ipsius potum censéo, lienosis & hepaticis, quos icterus, chlorosis, & cachexia tenet, nec non iis, quos intermittentium, maximeque quartanae contumacia, male habet. Quin dum secretiones sordium promovendo & morbosa salia diluendo succorum impuritati succurrit, in morbis qui huic debentur, scorbuticis & tartareis, arthritide, podagra, ischiatide, nec non renum & vesicae calculo, apprime conducit.

§. VI.

Sed omnes has virtutes, quas fontem nostrum interne usurpatum possidere dicitur ratio, longe superant illae, quas ipsum externo usu exferere, & ratio suadet, & experientia uberrime docet. Omnes autem saluberrimi variis in morbis effectus partim aquae subtilitati, partim etiam martiali roboranti elemento debentur. Quare ubicunque languida, fessa & robore exuta sunt corporis membra, summo opere commendandus est aquae nostrae in balneo usus. Sic quando post apoplecticum insultum paralytica remanet in artubus affectio, aut post multos & diuturnos articularium morborum paroxysmos, partes quas exagitarunt marcidæ fiunt & ad subeundos motus ineptæ, præstans utique est roborans & firmans balnei nostri facultas, qua melius & certius, quam ullo alio auxilio, vitium hoc tollitur. Quæ in infantibus rachiticis, in adultis morbo, aut alia ex causa elumbibus, nec non in senibus, ob ipsam ætatis rationem, præsto est ambulandi & artus expedite movendi impotentia, ab hoc remedio, si non tollitur penitus, eximie tamen levatur.

§. VII.

Vicissim ubi partes rigido spasmo contrahuntur, aut distortæ comparent, idem hoc balneum, causam stricture submovendo, simulatque fibras nimium tensas subtili suo humore laxando, egregie prodest. Arthriticis præterea, podagricis omnibusque qui articularum morbis laborant, balneum hoc eximio est solatio, dum roborante suo effectui impedit, quo minus materia acris doloris causa denuo eo decumbere ibique colligi possit. Quamplura hujus effectus prostant exempla, e quibus allegasse sufficit illorum, qui adscriptis versiculis eundem professi sunt, adducti in *Annal. Uratislav. medico-physic. anno c18ccxiix. Mens. Decembr. class. IV. artic. XIII.* nec non *anno c18ccxxi. Mens. Septembr. class. IV. artic. IX.* In aliis quoque partium externarum doloribus, qui a defluxionibus rheumaticis, in scapulis aut pedibus oboriuntur, nec non post luxationem articularumque distorsionem remanent, aut circa vulnerum insigniorum cicatrices affligunt, eximium levamen affert balnei nostri usus.

§. VIII.

Accedunt tumorum corpus exterius obsidentium varia genera, quibus itidem balneum hoc medetur. Frequentissimæ ex his sunt observationis illi qui pe-

des occupant, oedematosi. Qui quum ab humorum difficili per pedes ascensu & secedente hinc ferroso humido oboriantur, facile patet, stringentem fibras aquam nostram progressum intendere, & stagnantes succos protrudentem commodissime discutere intumescantiam. Neque etiam adeo insolens est, ut ob distracta in luxatione nimis ligamenta, membrum repositum ex facili iterum ex loco naturali discedat, aut ut subsequantur juncturarum tumores, aut plane ex glandularum ibi reperiundarum succo mucilaginoso concreascit callus, protuberet & motum membri intercipiat. Quo in casu nihil certe præstabilius est balneo hoc, quod fibras nimium elongatas adducit, ligamenta firmat, stagnantes ibi succos dissipat, & motum reddit. Illa quoque tubercula, quæ in collo, sub axillis, nec non in inguinibus, haud raro, maxime in scorbuticis corporibus, protuberant, & plerumque catarrhis, ulceribus, scabie aliisque ex impedito lymphæ progressu oriundis passionibus stipantur, promptissime aquae nostrae externo usu discutiuntur, tanto certius, quando simul congrua remedia interna sociantur.

§. IX.

In cutis defœdationibus variis, scabie veteri, ulceribus antiquis sordidis, impetigine, vulneribus non recte consolidatis, resiccans & subadstringens hujus aquae facultas oppido est præstabilis, in balneo, sive lotione adhibitæ, id quod tanto magis cum salute accidit, si interius simul congrua laxantia, diluentia & sanguinem purificantia in usum vocantur. Nec in levi habenda medicinalis ipsius virtus, quam in oculorum vitiis exferit. Si enim oculorum acies ob languorem nervosarum fibrillarum obtusior, si rubent, dolent, lippiunt & nimia humiditate obsidentur, aqua hæc vel lotione applicata, vel linteaminibus ipsa madidis imposita, acres catarrhos hos resiccant partesque debiles leniter adducendo, opem fert eximiam.

§. X.

Tandem etiam mulierculis solatio est noster hic fons, iis quippe, quibus post puerperium, abortum, aut aliis ex causis, uterus remissior & ad novam conceptionem inhabilis redditus, mensium fluxus parcius, aut decolor factus, albus fluor prodit, hysterica pathemata cum præcordiorum anxietate, stomachi capitisque dolore, plumbeo aspectu, alvi que segnitie molestias faceant, quibus totum corpus in languorem & ipse animus in tristitiam datur. Hoc enim balneo admissio, sanguini liber per universum corpus conciliatur comineatus, partesque quibus præter naturam incubuerat liberantur, laxatum uteri robur firmatur, vasa ad recipiendos ac transmittendos rite succos apta redduntur, sicque menstruus fluxus, cum pathematum discessu, revocatur, tanto magis, quando iis quæ excretionem promovent operatio balnei secundatur.

§. XI.

Tam salutare igitur effectus a fonte Lignicensi in multis & difficilibus morbis sunt expectandi, qui, ut ex voto obtineantur, rectus usus accedat, necesse est, de quo jam nonnulla præcipienda. In quocunque autem usu, interno tam, quam externo, necessarium est, ut ante eum primæ viæ a foridibus repurgentur, ne, quod FERNELII, *lib. II. therapeut. §. 20.* monitum est, copia crudi humoris in venis primis hærens, in omne corpus abripiatur. Seligenda hunc in finem corporum constitutioni & causæ morbi accommodata. Utilissimam judicat Dn.

PRÆSES potionem mannatam cum rhabarbaro & foliata tartari terra. Foeminarum corporibus & paſſionibus apprime conducunt pilulæ balsamicæ ad mentem Beccheri confectæ. Ac ubi crudarum craſſarum & viſcidarum ſordium ſuſpicio, aqua Sedlicenſis, aut ſal ex ipſa paratum, nec non Ebſhamenſe ſal, ex uſu ſunt. Neque ſufficit tantum ante uſum alvum ducere, ſed & inter illum, pro circumſtantiarum ratione ſemel aut bis, nec non poſt eum, idem facere expedit. Deinceps etiam ante uſum diſpiciendum eſt, an corpus ſanguine redundet, quod ubi obſervatur, vena pertundenda & ſufficiens copia ſubtrahenda. In omni porro uſu exquiſita vitæ victuſque ratio habenda, & providendum, ne perverſus rerum non naturalium uſus ſpem in irritum cadere faciat. Mitto tamen ſpecialiores diæteticas regulas ac tantum ut potus accommodus eligatur ſuadeo, qualem ſuggerunt ex Dn. PRÆSIDIS experientia aquæ Selteranæ vel Antonianæ, cum vino, nec non decocta ex ſpeciebus appropriatis confectæ.

§. XII.

De interius utendi ratione ſigillatim multa mone-

re ſupervacaneum duco. Rarius enim ex uſu eſt, obſervanda paſſim nota & de aquis martiatis ſpecialiora pluribus inculcavit Dn. PRÆSES in *opuſc. phyſico-med. pag. 405. ſeqq.* Balneum autem inſtituatur mane, ſi paſſio contumacior etiam veſperi; ſit temperate calidum, poſtremo paullo calidius. Laborans deſcendat in illud ſucceſſive, deſideat per horam, in capitis affectibus diutius adhuc. Surgens corpus deterſum ſiccato probe induſio induat, lecto committat, pannis perfricet & ſub ſtragulo aliquandiu ad ſudorem componat, epotis aliquot infuſi thee medicati, aut juſculi patellis, vitetque poſtea aëris frigidioris acceſſum. Ingruente menſium aut hæmorrhoidum ſtillicidio, intermittat, donec ceſſarit iterum. Uſus balnei ad quatuor, vel ſex hebdomades extrahatur, & ſi diu parti inſedit morbus, repetatur. Alvus ſemper libera ſervetur, potiſſimum diæteticis. Sanguis æſtuans pulvere temperante componatur. Nec omittantur interna ſanitati præſidia, ægrotantium rationi accommoda, maxime acidulæ. Reliqua ex medentis judicio ſuppleantur, aut ipſe, ſi tulerit occaſio, forſan ſupplebo.



DISSERTATIO PHYSICO-MEDICA

D E

ACIDULIS VETERAQUENSIBUS
IN SILEZIA,Vulgo *Altwaſſer Sauer-Brunnen.*

Primum edita Anno 1731.

§. I.



Nter innumera, quibus divina clementia præcipuas Germaniæ regiones, in ſalutem generis humani, beavit naturæ dona, haud poſtremum locum fontes ſoterii e terræ viſceribus ſponte ſcaturientes ſibi vindicare videntur, quorum tanta vis eſt & efficacia, ut ſine ſingulari accedente artis adjumento, corpus humanum non modo a morboſis afflictionibus defendant, ſed & præter naturam affectam valetudinem ſæpius in integrum reſtituant. Eximiis & præclaris ejuſmodi naturæ dotibus etiam patriam meam Sileſiam frui & inſtructam eſſe in ſinu merito incolæ gaudere debent: ſiquidem non modo calidi ſed & frigidi fontes inſigniter ſalutari virtute imbuti, liberali & multiplici vena hinc inde ſcaturiunt, licet longo uſque eo tempore plurimi delituerint atque etiam ab ipſo SCHWENCKFELDIO diligenti rerum in Sileſia naturalium ſcrutatore non fuerint animadverſi: quorum tamen mentio in HENELII *Sileſiographia recentiori* reperitur. Inter thermales Hirschbergenſes in ducatu Jaurovienſi, de quibus peculiaris diſſertatio a *Frid. Hoffmanni Oper. Supplem. II.*

Doctiſſimo Lipſienſium Medico D. D. ADOLPHI conſcripta extat, ſamam tuentur ampliſſimam: neque Landecenſes in comitatu Glacenſi virtute & laude inferiores ſunt, de quibus collectores hiftoriæ morborum Uratiſlaviennes Anno 1699. differentes animadvertimus. Inter frigidas ſalubres & medicinali virtute donatas acidulæ in Ducatu Carniovienſi, item in territorio Oberglacenſi *Oberlangenauer* referri merito debent: neque ſilentio præteriri debent ſalutares fontes Lignicenſes, qui utut acidularum nomen non mereantur, ob martialis tamen proſapiæ ingrediens roborantem virtutem poſſident ac ſeſe commendant, de quibus diſſertatio duobus abhinc annis ſub præſidio D. D. PRÆSIDIS a D. D. *Rückert* habita. Ducatus vero Suidnicenſis omnium maxime per Divinam providentiam hiſce perfruitur naturæ beneficiis: ſingulari enim laude propter ſalutarem in morbis virtutem Tannhauſenſes & Reichenovienſes eminent atque celebrantur, quorum principia & ingredientia, accuratori examine & exploratione a celeberrimis Uratiſlaviensium Medicis D. D. NIMPTSCH & KANOLD, vide *Breſlaueriſche Natur-und Kunſt-Geſchicht* / Anno 1724. detecta apparent. Nobis tamen ſuperiores hiſce omnibus quas proſert Sileſia, longeque inſigniores

virtutes Veteraquenses possidere, in ducatu Swidnicensi extantes nostræ acidulæ vulgo *Altwasser Saur-Brunnen* / visæ sunt. Et id est quod ego jam præsentī inaugurali specimine, perspicuis rationibus & curate institutis experimentis, bono cum DEO, qui hisce laboribus ex alto benedicat, in salutare ægrotantium emolumentum, adstruere & evincere conabor.

§. II.

Egregii hujus salutiferi fontis efficaciam jam ante ducentos annos cognitam fuisse, ex Chronico Suidnicensi manifestum videtur, dum mentio fit salubris fontis non procul a finibus Saltzbrunnensibus jacentis, a quibus vix trecentum passibus distat. Ante annos vero sexaginta ejus fama & præclara virtus de novo innotuit cum Parens celebris Medici D. THYMI, qui ante triginta annos scriptum idiomate germanico, pluribus observationibus egregiis refertum, de singulari hujus fontis medicinali efficacia reliquit, in usu habuerit acidulas has frequentissimo. Videmus quoque hujus fontis in M. N. C. Dec. I. an. 10. obs. 97. a Celeberrimo Ura-tislaviensium Medico D. D. GRASSIO mentionem injici, qui virum nobilem contumaci vomitu & morbo ventriculi laborantem hisce acidulis integre restituit: de quo fonte hæc specialia habet idem Auctor: *harum aquarum viribus & sapore invitatus, constituebam propediem ipsum inviscere fontem; & invenimus vix decem pedibus a molendino pagi Altwasser distantem, lignosa arboris excavatæ circumferentia inclusum: a meridie habebat colliculum graminosum & sparsim carbone fossili nigricantem, a septentrione rivum vix ulnis duabus a scaturigine præterlabentem. Aquam affluxu satis largo cito crescentem gustavimus; gustus erat medicamentosus & penetrans, color vero magis lactescens, qui tamen intra horæ spatium ad pelluciditatem revertebatur. Ad computationem satis liberalem nos invicem invitavimus, sed nulli nostrum ventriculo Neptunus hic, licet hospes insuetus, intulit quicquam molestiæ. Reduces salutavimus fontis vicinum Dn. Casparum Thymium, artis chymicæ & rerum naturalium peritissimum, ut ejus judicium audiremus: laudavit acidulas hæc super omnes quas habet Silesia: se itaque ipsum, licet senio gravem, quotannis illarum usu frui: commendavit tandem ita, ut accusaret illos temeritatis & superstitionis, qui tantis impensis accersant Egranas, quæ tamen ob viæ distantiam evaporatione virtutis spirituosæ diuturna non possint non infirmari. Addit GRASSIUS: harum aquarum se uncias tres commiscuisse cum gallæ non contusæ sed concisæ uncia, & mox colorem aquæ limpidum versum esse in obscure violaceum. Miratus, pergit, hoc sum tanto magis, quod aquam hanc per septimanas decem licet incorruptam in vase vitreo detinuerim. Scholiastes vero HENELII, in notis ad Silesiographiam pag. 614. de fonte Altwasserano hæc habet singularia: *Narravit mihi Cl. HELWIG, inquit, a gallis infusis, hæc aquas non exacte nigrum, sed obscure violaceum induere colorem, item a spiritu salis & vitrioli affuso, nec non a cineribus clavellatis ullam observari mutationem. Nostri, porro ait, in omnibus affectibus chronicis magnas his acidulis tribuunt virtutes, ac invenias quibus hæc loco potus ordinarii sunt, & pag. 616. hæc adjicit: utinam liceret Medicis nostris & aliis physicæ peritis rectius examinare aquas, ejusmodi medicis virtutibus gravidas, ita judicare facilius possent quibus morbis & cui agrorum constitutioni conveniant. Præverunt hac in re Germanis Galili, & prostant observationes super aquas minerales**

diversarum provinciarum in Academia Regia. Præterea in laudato tractatu Medici ejusdem loci ordinarii egregiæ laudes de hoc fonte in difficilibus & contumacibus morbis sanatis recensentur, multisque testimoniis fide haud indignis id confirmatur. Neque de hisce dubitandi ullam prægnantem causam licet habeamus, nihilominus cum accuratiori examini physico-chymico horum fontium ingredientia & a quibus eorum efficax virtus dependeat elementa, nunquam adhuc videamus rite detecta & explorata: idque tamen ad proprias & speciales eorum vires & operationes evidentius & a priori ut Philosophi loquuntur demonstrandas & dilucidandas, & valde utile & necessarium sit; operæ utique pretium visum fuit, cum copiam harum aquarum, nobis Illustrissima Baronessa de Schwanenberg / quæ jam ut Domina possidet hunc tractum ubi fons ille eximius scaturit, sufficientem non ita pridem concesserit, accuratum examen instituire atque experimenta & observata curiosis rerum naturalium scrutatoribus ad dijudicandum submittere.

§. III.

Primo itaque commemorandum est, quod fons hic in loco campestri plane amœno situm habeat, cum porrecta planities impendentibus undique montibus clauditur, non sterilibus sed vetustis nemoribus ornatis. Scaturigo est ex loco petroso & arenoso, cujus profunditas duas cum dimidia ulnas complet, suntque duæ scaturigines superior & inferior. Intra horæ spatium centum & ultra mensuræ aquæ instar crysalli pellucidæ profluunt. Inferior scatebra aquam ejusdem virtutis, sed largiori proventu eructat; cum impetu enim ex profundis instar brachii profilit: ex hoc balnea adornantur tam propter majorem ejus copiam, quam quod ejus aqua minus spirituosæ est ac superior quæ calorem minime ferre potest. Aquæ hæc sub decursu, sedimentum modicum, tamen coloris paulisper flavescens, instar terræ sigillatæ deponunt.

§. IV.

Hisce præmissis ordine nunc recensēbimus, quæ cum hoc fonte adornavimus experimenta. Primum autem gustu eum exploravimus, ubi saporem valde penetrantem, acrem, pauloque adstringentem in lingua reliquit. Alterum ad eorum specificam gravitatem explorandam a nobis institutum fuit: levitatem enim & subtilitatem aquæ nosse hoc in examine palmarium nobis ad dignoscendam salubrem indolem fert momentum. Implevimus hunc in finem vitrum satis capax aqua pluviali, idque lanci exquisitæ imposuimus, quod ponderavit viginti uncias, unam drachmam & grana decem: idem postea vitrum nostris acidulis ad idem punctum replevimus, atque in eadem lance, identidem uncia viginti, una drachma sed tantum duo grana prodierunt. Postea ponderatio alio modo, nempe cylindro statico nobis consueto, suscepta fuit; cylindrus vero ita est comparatus, in gradus ac drachmas distinctus ut in mensura una aquæ destillatæ vel pluvialis descendat ad certam lineam. Eundem itaque immisimus vitro capaci, mensura una fontis nostri repleto, & cylindrus ad drachmas tres emiuit, in altiore longē locum delatus. Reliquimus hoc instrumentum in aqua sine ulla turbatione per septimanam & ultra, & cum exactis tribus diebus, cylindrum rursus inspiceremus, drachinæ apparere duæ: postea elapsis sex diebus, una tantummodo drachma in conspectum venit.

§. V.

§. V.

Injecto dein gallarum pulvere sensim paulatimque brunum induit colorem, qui tamen affuso spiritu vitrioli statim evanuit. A spiritu acido vitrioli affuso tam copiosas emisit bullulas ut mixtura inceperit latefcere: sub quiete tamen fuit pellucida red-dita, at sapor remansit acidus.

§. VI.

Denique ab instillata solutione argenti, item sacchari saturni, a solutione quoque mercurii sublimati, nulla plane turbatio vel mutatio secuta est, pelluciditate aquarum salva & integra permanente: neque ad mixturam olei tartari per deliquium ulla coloris mutatio contigit, nulla lactescencia vel præcipitatione facta. Cum vero mixtio facta esset cum violarum syrupo, brevi tempore pulcher viridescens color oculos pascebat. Cum lacte vaccino amicum iniit connubium, nulla præcipitatione vel coagulo apparente. Postea vinum Rhenanum æquali portione cum nostro fonte commiscuimus, insimul portionem sacchari adjicientes: unde mox ingens oborta est ebullitio cum innumerabilium bullularum in altum adscensione & evaporatione, mixtura inde in albescentem colorem abeunte.

§. VII.

Ultimo loco libram medicam hujus fontis in amplam patinam stanneam infudimus & liberiori aëris accessui per septimanam exposuimus, postea experimenta jamjam recensita rursus cum eo, sed frustra & sine omni successu, instituimus: nam perijt penetrans ille sapor, & instar aquæ communis fuit, nec ulla cum vino Rhenano, nec cum spiritu minerali acido secuta fuit ebullitio aut bullularum elevatio, neque violarum syrupus cæruleum suum exuit colorem, sed aqua plane effœta & omni spiritu orbata leviter turbida apparuit, flocculis flavescens in fundum dimissis, qui tamen mox agitata aqua ascendebant. His peractis moderatiori igni acidulas nostras in vase stanneo commisimus, & innumeræ bullulæ instar perlarum lateribus vasis sese apposuerunt, leni vero evaporatione facta, ex uncis XXIV. grana tantum sex relictæ materiæ obtinuimus, quæ levissima, insipida erat, albicans, cui cum affunderetur spiritus vitrioli cum levi effervescencia sapor amaricans emerfit.

§. VIII.

Ex singulis hisce tentaminibus & phænomenis abunde constat atque recte colligitur, has aquas inter veras acidulas referendas esse, ne dicam primum utique locum mereri, eo quod omnes & singulas notas characteristicas cum acidulis famigeratissimis communes obtinent: nam plurimo elemento spirituofo, quod anima fere est fontium foteriorum & maxime acidularum, abundant, ita prorsus ut non facile reperire liceat adeo spirituosum fontem ac noster est, quod largissimus bullularum proventus admixtionem vini Rhenani vel spiritus vitrioli planum atque testatum reddit. Sicut & id inter alia notatu dignum fuit, quod, cum prima vice extracto, quo firmiter cum cera terebinthinacea ampullæ orificium clausum erat, obturaculo aperuimus vitrum, cum impetu quodam & ingenti bullularum ascensione vapor ascenderit, & sola transfusione hujus fontis ex uno vitro in alterum ingens bullularum proventus observatus fuerit. Deinceps, uti omnes acidulæ nunquam non cum acido effervescunt, & viridescentem ad affusionem syrupi violarum induunt colorem, ita etiam id in nostris observavimus: ma-

nifesto documento alcalini quippiam eos in sinu fovere, quod etiam lac affusum a coagulo præservat. Quare rectissime colligitur, incongrue tales medicatos fontes acidulas appellari, ut vulgaris terminus fert, cum effectum semper promant alcalinum, quamdiu nempe salva & integra earum mixtio perseverat.

§. IX.

Præterea, hæ nostræ acidulæ inter subtiles & levissimas referri merito debent, quia exiguum est, quod post evaporationem remanet, & inter alia quoque harum subtilitatem & spirituum abundantiam, hoc quod supra retulimus experimentum comprobatur, dum cylinder staticus, si recentes fuerint, immissus superiora petiit: nam jam pridem id notavit D. D. PRÆSES & forsan etiam primus, quod, quo spirituosiores sint aquæ minerales eo plus cylindri descensum in imum impediunt. Neque causa singularis hujus phænomeni adeo occulta erit, videlicet subtile illud spirituosum aëreo-æthereo-elementum, quod minerales incolit aquas expansivæ & elasticæ est indolis, vis vero elastica, uti quam plurimis physicis & ærometricis experimentis constat, perpetuo æqualis est motui gravitatis sive ponderi. Atque adeo expansiva hæc & elastica virtus ætherei & spirituofo in aqua elementi, haud dissimili modo hydrometricam lancem sursum tenet & urget, ac salina vel terrea materia gravitatem aquis concilians ejusdem descensum impedit. Quare rectissime concluditur, quo plus ejusmodi minerales aquæ stateram elevant, eo subtiliores & usu præstantiores esse; vicissim quo minus spirituosæ sunt & adscensum instrumenti impediunt, eo rudiores minusque salutes esse censendas: inde etiam evenit quod in auras avolante spiritu dimittant instrumentum staticum.

§. X.

Denique, quod ad commixtionem olei tartari per deliquium, solutionis lunæ, sacchari saturni & mercurii sublimati, nulla turbatio, mutatio in pelluciditate vel præcipitatio fuerit consecuta, id puritatem aquæ, eidem scilicet nihil terrei, calcarei, nec salis communis quippiam admixtum esse clare demonstrat; quippe si hisce ingredientibus imbutæ sunt aquæ, ad harum rerum mixturam mox turbidæ fiunt, lactescunt & sedimentum in fundo deponunt.

§. XI.

Postquam igitur curatiorem nostri fontis explorationem adornavimus, & diligentius quæ ejus mixturam ingrediuntur elementa perquisivimus, placet nunc phænomenorum quæ in iis animadvertimus collationem & comparisonem quandam instituere, cum illis quæ per varia tentamina, in acidulis per totam Germaniam longo usu celebratissimis, cujus generis, Schwalbacenses & Spadanæ sunt, non ita pridem a D. D. PRÆSIDE observata & publica dissertatione proposita sunt, instituere, ut eo clarius nostri fontis cum illis convenientia vel etiam discrimen appareat & dilucescat. Primum vero ratione saporis penetrantis quodammodo vitriolacei subadstringentis, qui genuinus aquarum, quæ acidularum nomen tuentur, index esse solet, conveniunt, nec non dein in eo conspirant, quod post injectum gallæ pulverem singuli brunum colorem recipiant. Tum in eo ambo æquipollent, quod neque solutio salis tartari, argenti, mercurii sublimati, neque sacchari saturni admixta & Spadanis & Schwalbacensibus ullam mutationem ratione pelluciditatis aut præcipitationem induxerit.

§. XII.

Atque etiam in eo conveniunt, quod ut in Spadanis & Schwalbacensibus, ita etiam in nostris syrupus violaceus pulchre viridem colorem conciliaverit. Neque cum Schwalbacensibus & Spadanis ratione ebullitionis disconvenientia est: nam in singulis largissimus, instillato spiritu vitrioli, vel admixto vino Rhenano, innumerarum bullularum adscendentium subsecutus est proventus, ita tamen, ut re vera major ebullitionis gradus in nostris quam Schwalbacensibus & minor in Spadanis fuerit a nobis spectatus. Dein in eo discrepantiam nullam videre licet, quod combinatione cum lacte nulla sequatur coagulatio, ut evenit, cum acidis, sed ambo amicum ineant connubium. Tum etiam in hisce exquisita notatur convenientia, quod accessu liberioris aëris paulo longiori, vel si calefiunt, omnem saporis penetrantiam, effervescentiam cum acidis, viridem cum syrupo violarum colorem, & pelluciditatem illam crystallinam prorsus amittant.

§. XIII.

Veruntamen in eo discrepantia inter fontem Schwalbacensem, Spadanum & nostrum visa fuit, quod in hunc recentem immisso cylindro statico drachmæ tres in conspectum venerint, in Schwalbacensi vero drachmæ duæ, in Spadana drachma una. Deinceps quod longe majori cum copia & impetu, vase vitreo, quo exactius inclusi erant, aperto, & fonte ex uno vitro in aliud transfuso, bullulæ se elevaverint in nostro quam in duobus jam dictis. Unde dijudicare haud erit difficile, nostras aquas ratione subtilitatis & spiritus, Spadanis & Schwalbacensibus esse præferendas: ut etiam ob id, nostras exactiori cura opus habere, si in vasis ad longinqua loca transvehi debeant, censeamus.

§. XIV.

Tum in eo quoque discrimen quoddam se sensibus offert, quod in Spadanis & Schwalbacensibus per injectionem pulveris gallarum ex atro brunus color saturior, in nostris remissior sese offerat, item quod illi calefacti, præsertim Schwalbacenses, flocculos crocei coloris majori in quantitate ac nostri dimittant: haud levi argumento, martialis principii majorem hisce inesse copiam ac nostris, quod etiam sapor paulo penetrantior, qui cum adstrictione quadam linguae diutius inhærescit, arguere videtur; siquidem in eo quoque notabilem differentiam deprehendimus, quod ex viginti quatuor uncis fontis Spadani & Schwalbacensis, leniori evaporatione, grana XV. terreæ salinæ materiæ, ex nostro fonte autem grana tantum VI. relicta fuerint.

§. XV.

Quibus omnibus ad liquidum perductis & rectius pensatis, circumspecto & ingenuo iudicio non veremur pronunciare, acidulas Veteraquenses, vulgo sic dictas *Altwasser Saur-Brunnen* / ob summam qua pollent subtilitatem, levitatem, & abundantem quem custodiunt spiritum, ob minorem quoque elementi martialis, vitriolici & salini portionem, & Spadanis & Schwalbacensibus præferendas, atque adeo temperatiores & proinde usu tutissimas ac saluberrimas esse, quia ingentem affinitatem cum succis corporis nostri vitalibus habent, ac insuper eos fluxiles, tenues, ut minimos etiam meatus atque meandros libere pertransire possint, reddunt, tonum quoque & robur solidorum non modo conservant, sed si deficiat reparant, ut adeo

illi, qui œconomiam motuum vitalium, quæ functiones totius corporis integras conservat, recte intelligunt, ex facili dijudicare possint, quod hi fontes non modo securissime in quotidianum usum per totum annum ad illibatam valetudinem conservandam duci, sed & ad avertendas tam acutas quam diuturnas varii generis ægitudines, præsidium ministrare possint efficacissimum.

§. XVI.

Porro præ aliis fontibus medicatis, qui paulo valentioris sunt indolis, ut sunt Pymontani, Egrani, Schwalbacenses, Spadani, prærogativam quandam nostri merentur, dum illorum usus paulo majorem desiderat in rebus externis & nonnaturalibus sive regimine diætetico circumspectionem, si nempe quis iis familiariter & quotidie uti velit. Neque etiam inficiandum est, quod nostræ aquæ ciborum digestionem magis faveant & patrocinentur quam aliæ activioris & plus vitriolacei aut martialis indolis, quod subtili & spirituofo elemento ad alimentorum repagula intime dissolvenda & propter tenue fluidum ad chylosas & gelatinosas partes ex solutis alimentis extrahendum sint omnium aptissimæ. Deinceps hoc meum quoque de harum hospitalium aquarum indole est iudicium, quod feliciori successu & majori utilitate in morbis, qui ex impuritate seri falsa tartarea scorbutica prognascuntur, cujus generis sunt dolores articulares, rheumatici, nephritici, intestinorum spasmodici, item cephalalgici, quando ex eodem fonte proveniunt, scorbutica nempe humorum diathesi, in usum adhiberi & plus præstare possint ac reliqui omnes jam memorati, & quidem ob has satis perspicuas rationes, quia jam dictæ contumaces & dolorificæ affectiones pro causa & fundamento secretoriorum & excretoriorum vasculorum quæ sunt in hepate, in glandulis & cutaneo colatorio, obstructionem agnoscunt, hæc autem a spissescencia humorum tardiorique motu & progressu originem suam trahit.

§. XVII.

In cutis morbis ac vitiis, cujus generis sunt erysipelas, pustulæ, exulcerationes & scabiosæ ac herpeticæ defœdationes feliciter abigendis & sanandis haud postremum nostri sibi fontes vindicare locum videntur: horum enim morborum ortum & causam si spectemus, a sero spisso excrementitio acris causificæ facultatis per congrua emunctoria non excluso eos proficisci, nullum est dubium. Et quemadmodum omnia, quæ humorum acrimoniam temperant, diluunt, demulcent atque excretoria occlusa referant, & porro etiam humorem peccantem per renes ceu convenientissimum emunctorium secernunt, in hisce affectibus sunt indicatissima: ita, quia has omnes facultates nostræ aquæ complectuntur, eas magno in illis debellandis usui esse rectissime colligitur. Accedit etiam illud, quod temperatiores ejusmodi aquæ minerales in eo, præ aliis ad hujus generis ægitudines, quæ a tota humorum massa depravata proveniunt tollendas, meliorem & certiore promittant efficaciam, quod majori quotidie in quantitate & longiori tempore iis uti liceat, idque ad depurandam universam corruptam humorum massam summe necessarium est.

§. XVIII.

Et quoniam nostri fontes operationes suas non tam per alvum colluviem vitiosorum humorum ex intestinis expurgando, sed potius per renes copiam seri falso-tartarei educendo, exerunt, in affectibus renum ac vesicæ & sanandis & leniendis exoptatissimo

ſimo eſſe præſidio & adjumento haud abs re colligitur. Eſt renum affectus, ſenioribus & ubi plethora urget, familiariffimus & ſatis contumax, qui tamen rarius a Medicis rectius cognoscitur, nempe dolor & ſpaſmus nephriticus qui non a calculo in ureteribus hærente, ſed ab infarctu renum ſanguineo oboritur, & hiſce ſignis ſeſe prodit: dolor gravis cum vehementi compreſſione, imo ardore, in dorſo paulo nothis coſtis altior exiſtit, ejuſque tractus uſque ad præcordia, quæ conſtringit & ubi maximam parit anxietatem, pertingit ac hominem valde fatigat, atque cum extremorum frigore certis interdum horris præſertim noctu redit; adest ſimul nauſea, inclinatio ad vomitum, venter arcte comprimitur, inflatur & dolore premitur, urina ſub paroxyſmo tenuis & aquoſa mingitur, pauca tamen in quantitate: quieſcente vero dolore magis rubra, craſſa & mucosa fertur, ſed nihil concrementi calculoſi in eo obſervatur. Ejuſmodi in caſibus præter ſanguinis miſſionem in ſceminis poſt quinquageſimum annum, ſi corripuntur, uſum acidularum temperatarum, quales ſunt Wildungenſes, Sedlicenſes D. D. PRÆSES, paulo diutius continuatum ſemper invenit utiliſſimum: unde ſi recte ab inductione & ſimilitudine, judicare licet, noſtros fontes decenti uſu in dicto affectu utiliſſimas fore rectiſſimè concluditur. Et quia ex tali præcedente renum morboſa afflictione & diſpoſitione leviter inflammatoria, calculorum renalium ortus & generatio, tandem emergit & proficiſcitur, ut alibi id D. D. PRÆSES dilucide deduxit: ea de re recte judicamus, quod noſtris fontibus præſervatricem a calculo renum virtutem adſcribamus.

§. XIX:

In ipſo etiam atroci, quod renum calculus, ſi per anguſtas urinarias vias iter adverſus veſicam affectat, inferre ſolet, tormento, & quod cum dolorificis atque acerbis ſpaſmodicis ſtricturis partium vicinarum ventriculi, diaphragmatis, inteſtinorum & ureterum nunquam non ſolet eſſe conjunctum, mitigando & ſublevando, ſicuti balnea aquæ dulcis & potus largior liquidorum diluentium, temperantium & ſtrictas vias relaxantium, ut ſunt ſeri lactis, fontis Selterani, infuſorum Theiformium, ex herba veronicæ, radice glycyrrhyzæ, ſummitatibus millefolii, deſideratiſſimum levamen afferunt: ita ſapiens & peritus Medicus etiam de noſtris fontibus id juſte & recte dijudicare non dubitabit, eo quod, ex ſimilibus cauſis & mediis, ſimiles effectus producantur.

§. XX.

In miſtus difficultate urinæque retentione, ſive ea a ſpaſtica tubulorum nervoſorum qui vehunt urinam ſtrictura, ſive ab amurca tenaci & tartarea, quæ infarctum & obſtructionem in illis parit, vel a cruore poſt miſtum ſanguineum proveniat, noſtrum fontem uſu interno & externo ſaluberrimum fore, nemo facile erit, qui cauſam addubitandi habeat, niſi qui plane in morborum cauſis & remedium viribus ac principiis agendi inveſtigandis rudis ac minus exercitatus eſt.

§. XXI.

Hiſce deductis videndum jam eſt, num etiam in ſignis in pulmonum morbis ab uſu noſtrorum fontium poſſit effectus ſperari. Mineraleſ aquas inque primis acidulas pulmonum morbis quam maxime ef-

ſe infeſtas, propter vitriolaceam & adſtringentem facultatem, communis eſt Medicorum ſententia: ſed ad recte diſſolvendum hoc problema, dicimus, & diſferre inter ſe aquas minerales & diſcrepare etiam pectoris morbos eorumque cauſas & ſymptomata; unde limitatione quadam opus eſſe facile quiſque videbit. Ecquis enim, ubi magna pulmonum exulceratio adest, ubi illi vomiciſ & duris tuberculis obſeſſi, putredine conſumpti vel fiſtuſoſis ac ſcirrhoſis ſcatent anfractibus, ubi difficilis etiam & convulſiva, ex aquis in thorace ſtagnantibus vel a polypo pulmonum vaſis inhareſcente, eſt ſpiratio, vel ex polypoſo coagulo hæmoptyiſ oritur, curam cum ejuſmodi mineralibus aquis ſuſcipiendam facile ſua-debit. Si vero morbi pectoris, ut tuſſis chronica cum magna expectoratione conjuncta, ſpirandi difficultas cum lento calore, & ubi metus phthiſeos, ab atonia eſt, ab infarctu pulmonum, a deſluxionibus falſis acribus, ab excretionibus, quæ ſunt per alvum; per urinam; per cutim ſuppreſſis, proficiſcantur, D. D. PRÆSES præter ſanguinis miſſionem, potu aquarum temperatarum ſalubrium, ut Wildungenſium, Selteranarum; præſertim quando eum dimidia parte lactis inque primis aſinini miſcentur, nihil utiliſ, nihilque præſentius invenit: & cum noſtri propter ſubtilitatem & ſpirituum copiam, fontibus jam memoratis longe appareant præſtantioreſ, nullus facile erit, qui de ſimili vel eodem effectu cum ratione ſufficienti ambigere poſſit.

§. XXII:

Serum lactis vaccini vel caprini, noſtro præparatum modo, dulce, quam incomparabile auxilium & levamen in ſcorbutica humorum diatheſi corrigenda & ex hac pullulantibus morbis, ſcabie, lepra, gutta ſerena, in rheumatismis, arthritide, in diarrhœis, colica bilioſa renumque vitiis afferat atque præſtet, ii optime norunt, qui, frequenti uſu, hujus remedii vires perſpectas & exploratas habent; quam in rem legi poteſt Diſſertatio D. D. PRÆSIDIS de ſeri lactis virtute longe ſaluberrima. Si quis vero hujus ſeri lactis efficaciam longe eximiorem reddere cupit, quod fit ſi recens lac evaporatione incoctum; non in aqua ſimplici, ſed in ejuſmodi medicinali ruruſ diſſolvatur & tranſcolatione a coagulo caſeoſo & liberetur, is utique in jam dictis morbis uſum ejus atque efficaciam in morbis animadvertet multo præſtantiorem.

§. XXIII:

Præter jam dictos & laudatos inſignes & utiles in medendi arte fontis a nobis examinati effectus, nec ille reticendus videtur, quod in omni febrili æſtu temperando, cujuſcunque ſit generis & ex quacunque cauſa proveniat, pro potu vix eo reperiri poſſit quicquam accommodatius. Nam uti potus aquæ frigidus ſuſimum eſt, ſi quis recte eo uti ſcit, & generoſum remedium, præſertim pro interno depaſcente æſtu compeſcendo, pro leniendâ ſiti, pro reparando partium ſolidarum a calore & ſiccitate deſaſſatarum robore, præſertim in febribus bilioſis, ardentibus, tertiana quoque, dum ſomnum etiam reddit & ſudore vitioſam morbi cauſam diſcutit; uti id clare & ſuſius in diſſertatione de ſalubritate potus frigidi a D. D. PRÆSIDE demonſtratum eſt: ita longe major & præſtabilior in iſſdem affectibus, a potu modice frigido ſed ſufficiente noſtri fontis, ſperandus erit effectus, præſertim ſi adjecto ſyrupo acetofiſcitatis citri, berberum aut rubi idæi, gratior & ad refocillandas vires, ni-

miam-

miamque sanguinis ebullitionem deprimendam, aptior reddatur.

§. XXIV.

Reliquum nunc est, ut etiam dispiciamus, num ejusmodi aquarum potus cum bono & fructu ægrotantium in pathematibus ac motibus convulsivis & epilepticis ad usum proponi & commendari possit. Jam vero ad causas ejusmodi affectuum, si felicem & desideratam eorum sanationem nobis polliceri velimus, advertendum esse, extra omne dubitationis punctum est constitutum, cum non quodvis remedium compluribus & diversis morbi causis respondeat. Sed nos id ingenue fateri possumus, si quis sano alias & vegeto corpore, visceribus adhuc integris, ex improvviso a gravi terrore, vehementi ira, vel alia mentis forti commotione, vel a suscepto in præcordiis frigore, quod sæpius evenit, in corporibus ætate puerilibus, quæ spongioso habitu succis repleto gaudent, convulsivis epilepticis motibus repente affligatur, ad eos compescendos imo ex toto abigendos, solo aquæ simplicis puræ item ejusmodi aquæ mineralis potu frigido, cum vel sine lacte paulo diutius usurpato, vix præsidium certius & efficacius reperiri.

§. XXV.

Ita ante paucas septimanas, ad atroces epilepticas artuum tractiones & motiones compescendas, in Studiofo, qui singulis diebus, per tres fere septimanas, immanes & spectatu horribiles vel decem habuit accessiones, aquæ frigidæ puræ simplicis loco cerevisiæ potum, mitioribus insimul vesicatoriis pedibus applicatis, nec non largiori instituta sanguinis missione, D. D. PRÆSES felici successu adhibuit, ægro plenarie per DEI gratiam restituto. Quod si itaque in simplicis aquæ frigidæ potu, tam incomparabiles in epileptico malo sedando latitant vires & facultates, quidni virtute & efficacia adhuc superiores a spirituosa & subtili aqua expectandæ erunt. Præterea in pertinacibus capitis doloribus, neque minus in deliriis, quæ ex vasorum cerebri opplezione vel infarctu, a sanguine copiose ibi congesto nascuntur, sicuti alii minerales & salutares fontes in medendo magnum ferunt momentum, ita nostros eandem obtinere efficaciam juste & recte concludimus.

§. XXVI.

Igitur, quamvis propria experientia, quid speciatim in medendo valeant vel præstare possint nostræ laudatæ & exploratæ acidulæ, destituamur; sed tamen, quia per industriam rerum naturalium mechanico-chymico-physicam & experimentalem tractationem, ad tale fastigium, rationalis medicina, per DEI gratiam nostro tempore evecta est, ut a priori per varia tentamina & experimenta, cujusvis remedii ad medendum apti indolem atque principia, vires & facultates, quid nimirum præstare vel minus possit, vere & recte definire & determinare valeamus, quas postea, attenta & cum discretionem instituta experientia confirmat, causam omnino habemus, quare de nobilis hujus doctrinæ rationalis sive theoriæ usu juste gloriari possimus.

§. XXVII.

Interea non sicco plane pede præterire debemus, quod salutaris nostri fontis egregiæ in sanando virtutes ac vires, ante aliquot jam lustra, & nonnul-

lis Medicis & aliis quoque rerum naturalium industriis scrutatoribus cognitæ atque perspectæ fuerint. Atque inter alia, supra citata Clarissimi GRASSII in M. N. C. descripta observatio, id planum atque testatum reddit. Harum enim acidularum potu, Vir nobilis, insigni & contumaci ventriculi dolore, cum maxima & præcordiali anxietate, continuo vomitu, ægra spiratione conjuncto laborans, in integrum restitutus est. Præterea prostat Germanico idiomate, a Medico B. THYMIO in vicinia hujus fontis praxin exercente, conscriptus ante aliquot annos tractatus, in quo certe plures notatu per quam dignæ historiæ morborum recensentur, qui harum aquarum convenienti usu tam interno quam externo sanati fuerunt felicissime: inque primis ibi mentio fit, quod dolores arthritici, rheumatici, ischiadici, artuum contracturæ, oedematosi a male curatis epidemiis febribus provenientes corporis tumores, lentæque febres hospitalibus hisce aquis penitus discussi & sublati fuerint. Extant quoque in eodem tractatu duæ epistolæ lectu non indignæ, a duobus celeberrimis Medicis D. RITSCHKE Practico in urbe Lissa Poloniae & D. Güssenbach Practico Hirschbergensi conscriptæ, in quibus hisce aquis magnæ laudes, in mania, in profluvii sanguinis nimis, asthma, arthritide, tophisque sanandis tribuuntur: atque optat laudatus D. Güssenbach ut curatori examine chymico horum fontium ingredientia paulo clarius quisquam eruere & evolvere velit.

§. XXVIII.

Neque reticendæ erunt literæ a Celeberrimo Archiatro D. D. EGGERDES ad Perillustrem Baronessam de Schwanenberg datæ & ab Ipsa mecum communicatæ, in quibus laudatissimus hic vir bona fide testimonium de harum aquarum salubritate exhibet, nimirum quod hic fons inter thesauros rerum salubrium & naturalium Silesiæ sit merito reponendus, propter incomparabiles quos ipse expertus est in gravibus morbis persanatis in compluribus ægrotis, effectus, & satis scite & perite adjicit, quod princeps & primaria hujus fontis virtus a spiritu minerali copiosiori, nec non a subtilissimo Martis croco repetenda sit, quippe etiam ob summam in usu securitatem & salubritatem, omnibus fere aliis Germaniæ mineralibus aquis, nostras antepone-

§. XXIX.

Cum de usu harum aquarum interno satis abundeque a nobis dictum fuerit, & tractationis ordo & instituti quoque ratio poscit, ut etiam de usu ejus externo, qui fit per balnea, sententiam nostram promamus. Scriptor Germanici tractatus, mirifice, balnei cum hoc fonte instituti in morbis sexus sequioris insignes usus commendat, quin, in quibusdam casibus usui interno præfert. Atque id in genere etiam & ingenue mihi fatendum est, quod & tutiorem & præstantiorem perpetuo fere aquarum mineralium usum per balnea externum, in foeminarum quam virilis sexus morbis deprehenderim, eo quod illarum graves & diuturnæ ægritudines potissimum a mensium & uteri vitio, segniore quoque ac impedito sanguinis per hunc & imi ventris viscera circuitu, maxima parte dependeant: accedit quod mulierum morbosæ afflictiones semper sint spasmodicæ. Quid autem balnea moderate calida, tepore suo constrictas nervosas partes relaxando, obstructa vasa referando, humores spissos fluidos servando eorumque circuitum promovendo, in

in ejusmodi morbis præstare valeant, & ipsis mulierculis & Medicis peritis non amplius obscurum est. In eodem quoque tractatu eximiae balneorum virtutes in contracturis, in tophis podagricis solvendis, in doloribus ex calculo sopiendis, tumoribus artuum discutiendis, deprædicantur.

§. XXX.

Neque ulla de hisce dubitandi ratio subest, quia aquæ valde leves & spirituosæ quales nostræ, meo quidem judicio & experientia, mirabiles in balneis, si quis recte uti sciat, effectus exerere solent. Thermarum Toëplicensium summa & plane incomparabilis, in contumacibus etiam morbis oppugnandis, per balneum efficacia per totum orbem celebratissima est, & hæc unice a puritate & penetranti subtilitate, quia manifesto principio minerali carent, venit deducenda; atque ob eandem etiam rationem cum aqua Piperina vulgo *Pfeffer-Bad* instituta balnea, tam mirabilem exerunt in gravibus tam internis quam externis morbis tollendis, effectum: nam tales subtiliores aquæ prompte & intime minima vasorum & pororum subeunt, & facile etiam per emunctoria transeunt, neque minus ad dissolvendas mucidas crassas partes, impuras salinas detergendas atque e corpore evehendas, usui interno valde idoneæ sunt. Præterea usu externo duras & constrictas partes emolliunt, relaxant, poros aperiunt & liberiores sanguinis & humorum affluxum


ad partes invitant, eoque in medendo magnum præstare possunt auxilium.

§. XXXI.

Postquam igitur hujus præclari fontis Veteraqueris magnæ efficaciam elementa atque principia, quæ ejus mixtionem ingrediuntur, multis argumentis & experimentis deteximus, ejusque securum & præstantem usum tam internum quam externum in balneis, per firma ratiocinia atque aliorum constantem experientiam stabilivimus; nihil jam amplius restare videtur, quam ut Medici Silesiæ, fama atque arte celebres & auctoritate eminentes, in multorum misere ægrotantium levamen atque solatium, frequentiore quam antea factum est, has nostras aquas in usum adducant atque commendent, insimul pluribus probe notatis observationibus atque ulteriori experientia, ejus vires ac facultates stabiliant atque corroborent.

§. XXXII.

Ultimo loco id unum adhuc annectere & mone-te volui, quod ad ipsum fontem, harum aquarum usus tam internus quam externus mihi magis probe-tur atque arrideat, ac si ad exterarum regiones trans- portetur: nam ejusmodi spirituosæ aquæ dum ma- gna cura adhibita debent in vasis custodiri, ne spi- rituosum elementum avolet, metus fane est, ne ca- lore externo accedente, si firmiter vasis inclusæ fuerint, ea diffingantur.



DISSERTATIO MEDICA

D E

BALNEORUM ARTIFICIALIUM
EX SCORIIS METALLICIS USU MEDICO,

Germ.

Schlacken-Bädern /

Primum edita Anno 1722.

P R O O E M I U M.



CONSCRIBENTI mihi dissertationem hancce, non deerant materiæ specimi- nis loco explicandæ, quas partim Materia suppeditabat Medica, partim suggerebat Clinica Praxis. Cum vero quam plurima ad nauseam usque ex- posita invenirem Themata, ne crambem bis coctam apponere viderer, con- sultius esse putabam tale exponere argumentum, quod sese probaret pariter novitati præsentis seculi, atque in Praxis Medicæ non exiguum transfiret usum. Hinc operæ pretium facturum ego mihi videbar, si de *Balneorum artificialium ex scoriis me- tallicis paratorum usu Medico* hac occasione quædam dicerem, quæque hactenus circa eorundem applicationem innotuerunt mihi observationes, ulteriori Doctiorum disquisi- tioni subjicerem. Ex alto Numen Divinum gratio suo auxilio adsit & benedicat co- natibus hisce meis, qui in nominis sui gloriam, miserorumque ægrotantium tendunt commodum atque solatium.

§. I.

§. I.

Balneorum, qui ab aliquot retro seculis exoleverat propemodum in Medicina, usus, pristinae nostro avo ita restitutus videtur auctoritati, ut haud immerito addubitem, an detur ullum remedium, quod ad debellandos chronicos & maximè rebelles affectus, prædicetur his ipsis validius. Testimonio mihi sint evidentissimo ingentes agrotantium cohortes, quæ ablegantur quotannis recuperandæ valetudinis causa ad fontes illos salubres Carolinos, Tœplices, Wisbadenses, Freyenwaldenses, Wolckensteinenses, aliosque innumeros, quos omnes recensere, eorundemque virtutes enarrare, jam non permittit propositi mei ratio.

§. II.

Tantum enim abest, ut de Thermis seu aquis illis salubribus, quæ ex abditis scaturiunt terræ cavernis, quæque posthinc sub balnei adhibentur forma, in præsentiarum agam; ut potius sermo mihi erit de balneis artificialibus ex scoriis metallicis paratis, utpote quæ non contemnendum in arte Medica edunt effectum, cumque ubivis facile sint obvia, & parvo insuper parentur impendio, sese imprimis nostro, quo ab ære laboratur, commendant seculo.

§. III.

Supervacaneum autem esse existimo, in recensio-
ne generum balneorum commorari, cum *Excell. Dn. Prasæ in Dissertat. de excellenti balneorum ex aqua dulci usu in affectibus internis*, fusius de his egerit, Veterumque circa hæc adjunxerit divisiones. Sufficit ergo innuisse brevissimis, illud me hic loci intelligere genus, quod *CELSE Lib. II. cap. XVII.* stricto sensu sumtum, dicebatur balneum.

§. IV.

E contrario necessarium esse duco, balneorum istorum, ut palam fiat quid per illa intellectum velimus, aliqualem addere descriptionem. Sunt itaque nobis hæc balnea, quæ post fusionem metallorum vel mineralium, ex diversis eorundem scoriis adhuc candentibus, aut ad minimum de novo concalescentis, deinceps vero in aquam tepidam immersis, in vase operculo probe munito, parantur, & in variis affectibus tam internis, quam externis, æque ac aliæ aquæ minerales, cum iisdem particulis gaudeant constitutivis, sub balnei, infusus, & fusus, adhibentur forma.

§. V.

Hac ipsa occasione monemus, neutiquam à nobis expectandam esse omnium & singularum scoriarum metallicarum, multo minus, quæ ex his usibus Medicis applicari possent, balneorum analysin; sed in animo esse notissimas saltem examini submittere, quæque nobis de his cognita sunt atque perspecta, notare. In sequentibus proinde indagabimus quatuor potissimum scoriarum species, martiales scilicet, nec non venereas, ut & antimoniales, & tandem illas à Cobalti fusione residuas, quas omnes ad ejusmodi balnea efficacissimas esse docuit experientia, certissima rerum magistra.

§. VI.

Antequam vero tractationem aggrediamur ipsam, non abs re erit de generali balneorum operatione prælibasse quadam; quibus positis, de speciali eorundem concludere facile erit effectum. Nostra ita-

que est sententia, in genere balnea duplicem exercere in corpus nostrum efficaciam, per relaxationem scilicet & stricturam fibrarum. Ad has classes factis commode referuntur reliqui actus, qui perpetrantur his ipsis; per priorem nempe viscerum sequitur vitalium apertio, quæque in illis formantur stases, motu sanguinis & reliquorum humorum liberiori reddito, deplentur; cum vice versa per posteriorem concilietur naturale partibus robur, & redundet in corpus, duobus hisce motibus, relaxatorio nimirum & constrictorio, invicem rite sese habentibus, illud commodum, ut secretiones & excretiones promptè succedant, ac omnia sanitati & vitæ nostræ imminetia hoc modo arceantur mala.

§. VII.

Ex his patet, haud indiscriminatim applicanda esse hæc balnea omnibus subjectis, omnibusque morbis, sed cautè procedendum in horum commendatione, ne loco commodi damnum redundet in ægros, Medicus vero laudis loco reportet vituperationem & ignominiam. Quibus quadrent affectibus, ex ulteriori palam fiet, ad quam nos jam accingimus, investigatione.

§. VIII.

Martialium autem supra primo loco mentionem fecimus scoriarum, easque ad balnea utiles esse nostra diximus. Prodeat igitur in scenam ferrum ipsum, metallum fortissimo igne ex variis hujus generis mineris & lapidibus subtilioribus vitrescentibus *Eisen-Stein und Glasse* / conflatum, ratione principiorum constitutivorum è terra multa, sale pauciori & sulphure ortum suum ducens. Fusis verò ejusmodi mineris & lapidibus intensissimo igne, qui immediato illo contactu flammæ ardentissimæ per folles in furnis valde capacibus, & magnam molem carbonum continentibus *Hoh Oeffen* / concitatur, ferrum demum fustum & adhuc crudum *roh Eisen* / sub carbonibus liquatur de novo, & ad debitam deducitur ductilitatem & puritatem, sub qua operatione, *das Grischen* dicta, crassior exuritur sulphurea portio, & subtilior inflammabilis substantia ex carbonibus immiscetur, rudiori terra vitrescente simul in scorias abeunte.

§. IX.

Has ipsas scorias de terreo-salina & sulphurea martis substantia participare multum, quis non videt? quisque accuratius rem animo perpendens, balnea exinde parata vices thermarum, iisdem principiis constitutivis gaudentium, supplere posse neget? Assignamus igitur balneis hisce nostris æque ac aliis aquis salubribus & medicamentis martialibus virtutem mere adstrictivam, per accidens vero aperitivam, cum explosa sit sententia illa de acidi à martialibus absorptione & hinc facta apertione, contra è solidioribus fundamentis mechanicis ad oculum demonstrari possit, per stricturam in partibus solidis à martialibus factam, vias reddi angustiores, hocque modo sanguinem & reliquos humores cogi ad vasa capillaria, in his vero, dum cuneus quasi cuneum trudit, fieri rupturam & apertionem.

§. X.

Ex allegatis rationibus negotio præcipue hæmorrhagico dicanda esse hæc balnea censemus, inque hæmorrhagiis tam provocandis, quam sistendis, horum usum suademus. Hinc præmissis præmittendis multum præstabunt in hæmorrhagia narium suppressa & fluxu mensium imminuto, si totum iis immittitur corpus; contra in evacuationibus hisce sincer

ceri sanguinis nimis, nec non hæmoptysi, vomitu & mictu cruento, nimio hæmorrhoidum fluxu, ut & lochiorum suppressione, si pediluviorum adhibentur instar. Et spondemus sane nobis præsentiorum, aut ad minimum tutiorum de his effectum, quam si per fortiora & æstum in sanguinem introducentia suppressas ejusmodi hæmorrhagias revocare, excedentes contra adstringentibus internis cohibere vellemus medicamentis.

§. XI.

Duo sese mihi in praxi obtulerunt casus motuum hæmorrhagicorum valde anomalorum & rebellium, ex quorum enarratione elucescet, quid valeant hæc balnea ad excretionem illas suppressas revocandas, & excedentes contra moderandas. Nimirum mulier XXXVI. circiter annorum, temperamenti melancholico-phlegmatici, vidua, conqueritur de lassitudine artuum, hemicrania, angustia præcordiorum, respiratione difficili, palpitatione cordis, nausea & conatu vomendi, pathematibus hysteris, doloribus lumborum, nec non suffocationibus cardialgicis, nunc jam per biennium indies increbescens. Sciscitanti mihi confitetur, se per triennium fere laborare fluxu mensium imminuto, per quinque vero menses hunc penitus cessasse. Præmissis sub variis formulis digestivis, aperientibus, laxantibus, balsamicis & tonicis, atque his per tres menses continuatis, non multum vero efficientibus, venæ sectionem in pede jubeo: hac quoque nihil proficiente, post mensem suadeo balnea ex scoriis martialibus parata, quibus per octo circiter dies adhibitis, redibant menses satis largiter cum euphoria ægrotantis, bene sese nunc omnibus habentibus.

§. XII.

Eodem fere tempore metallicus quidam, vir XXXVIII. annorum, temperamenti cholericosanguinei, qui ex violenta pectoris ante tres annos facta percussione per intervalla affligebatur hæmoptysi, meum petit consilium. Porro huic in paroxysmo pulveres temperantes, interpositis lenioribus subadstringentibus, post quorum usum in XIV. dies cessabat hæmoptysis; his præterlapsis recrudescere malum majori cum impetu & periculo ægri. Hinc meum de novo efflagitabat auxilium, secundum quod post horum pulverum usum utebatur tempore vespertino per aliquot septimanas pediluvii, ex scoriis martialibus paratis, quæ affluxum sanguinis ita cohibuerunt, ut nunc sub horum per intervalla usu, ex voto suis incumbat laboribus metallicis.

§. XIII.

Sic explicato balneorum ex scoriis martialibus paratorum usu, ordo nos ducit ad scoriarum venerearum, i. e. à cupri fusione residuarum, examen: ubi pariter in hujus metalli proprietates inquirere, ut & modum fusionis tradere erit necessum, ut principiis elementaribus erutis, balneorum nostrorum confirmetur salubritas.

§. XIV.

Docet autem minerarum cupri docimasia, quod istæ in vase sine additione specialium salium, & sine immediato carbonum concursu ita colliquari haud possint, ut cuprum purum inde emergat; sed faxeæ tantum pars sub scoriarum vitreæ forma, purior vero metallico-mineralis sub reguli nigri secedit consistentia. Melius hoc succedit negotium, si minere hujusmodi sufficienter ustæ, & additione scoriarum cujusdam fusilis adjunctæ, immediate cum carbonibus strato super strato

tum facto, immittuntur furno, subministrato hinc igne atque fuscitato in summum, quantum potest, ardorem folium statu. Neutiquam vero hæc prima fusione ad metallicam suam deductum est cuprum puritatem, sed eam demum in altera specie furni atque foci, *Gar, Offen und Gar, Herd* nanciscitur, dum hoc tempore absque scoriis, quæ hactenus ipsi incumbabant, funditur, & sulphuris adhuc tenacissime adhærentis hoc modo sequitur deflagratio, hinc emergente e multo sale vitriolico & terra, nec non sulphure concreto metallo.

§. XV.

A prima hac minerarum cupri fusione residuas jam in nostrum usum trahimus scorias, sulphure, uti ex antea dictis liquet, multo & sale vitriolico prægnantes. Exerunt autem inde parata balnea roborando tonum in partibus fibrosis, præcipuam suam efficaciam, ut & leni septica pollent virtute. Commendamus itaque illa cum cautela in morbis cutaneis, a corruptione humorum seroso-lymphaticorum originem ducentibus, quales sunt: scabies, serpigo, herpes & achores &c. si affectibus illis laborantes sese committunt hisce balneis, vel eadem cum linteis tepide applicant; qui posterior quoque modus, in subsidium semper vocatis internis, in gutta rosacea & varis non est rejiciendus.

§. XVI.

Non possumus non hic mentionem facere admodum refractarii cujusdam affectus, herpetis scilicet maligni, per usum hujusmodi balnei curati. Miles scilicet quinquagenarius, temperamenti cholericomelancholici, ostendit corpus repletum multis minutissimis limpidi humore refertis pustulis, quæ pruritu & ardore excruciant eundem; erumpentes ulcuscula formabant superficialia manantia, hæc vero exsiccata squamulas relinquebant decedentes. Hunc morbum, quem ipse nominabat scorbutum, herpetem exedentem esse, ex ulceribus in latum & profundum serpentibus, infra cutem tamen non procedentibus, colorem vero è rubro nigrescentem exhibentibus, conjiciebam. Hinc ad vitium feri & lymphæ corrigendum ægrotanti exhibebam succinata, tincturas alcalinas, pulveres absorbentes, decocta lignorum, juncto simul leni sudore, nec omittebam laxationes mercuriales; quæ medicamenta per tres menses continuata, hunc quidem exoptatum edebant effectum, ut ulteriorem proventum impedirent pustularum, prioribus tamen semper in pristino permanentibus statu. Auctor hinc eram ægro, ut ex his veneris balnea sibi parari curaret scorias, & usum simul continuaret decoctorum; hoc cum ageret, sentiebat in fundo ulcusculorum exquisitum ardorem, quem tamen nihil curabat, cum videret, taansitorium hunc esse, sensimque ulcera consolidari.

§. XVII.

Nec dubitamus, has scorias interdum quadrare usibus chirurgicis, ubi scilicet leni quadam opus est sepsi. Hinc in carne luxuriante experti sumus harum efficaciam, si ex illis lixivium paravimus quoddam, & tepide applicavimus illud, non neglecta tamen aliis balsamicis æquali totius superficiæ mundificatione. Et nondum excidit memoria, ejusmodi lixivium tepide adhibitum, ob lenem suam tonicam & repellentem vim, insignem præstitisse mulieri cuidam usum, varicibus à causa activa, congestione scilicet sanguinis, cum magno dolore & ardore inflammatorio laboranti.

§. XVIII.

Prudenti, neutiquam vero temerariæ, in ejusmodi casibus experientiæ ulteriori relinquentes hæc scorias, ut promissis stemus nostris, properamus ad antimonialium minerarum fusionem, earumque recrementa ad nostros applicamus usus.

§. XIX.

Quemadmodum vero hætenus recensitæ immediate igni comittebantur mineræ, eoque fortissimo ex illis eliciebantur ferrum & cuprum, metalla durissima; ita instituitur antimonialium, propter sulphuream & summe volatilem substantiam, in vasis clausis fusio, quando nimirum in frustra mediocria franguntur mineræ, injiciunturque ollis, superius luto & operculo munitis, in fundo autem foramina aliquot habentibus, quibus aliæ in terram defossæ supponuntur ollæ, in quas per ignem superiorem tantum ollam ambientem & obruentem, colliquefcens facile per foramina defluit antimonium, reliquiis mineræ lapideis in superiore olla remanentibus.

§. XX.

Hæ autem reliquiæ lapideæ, scorix nobis vocatæ, per hanc non penitus orbatæ sunt fusionem particulis sulphureis; ut taceamus, non opus esse in hac operatione calcinatorio quodam, sed succedere illi satis commode lentissimo ignis gradu, & per consequens sulphuream antimonii portionem haud dissipari hac ipsa in auras potuisse, cum vasa insuper luto & operculo fuerint munita: ut potius affirmemus, sulphur illud liquatum firmiter satis adherere substantiæ isti lapideæ, & hanc propter sulphuris hujus antimonialis nexum, magnam per balnea in corpus nostrum exerere posse efficaciam.

§. XXI.

Extrusa enim è schola Medicorum illa de antimonio veneno Veterum sententia, indefessus recentiorum labor tam egregia ex hoc metallo protulit medicamenta, ut nullus fere detur morbus, qui non requirat, aut ad minimum admittat antimoniata. Si que à lenissimo horum facimus initium, antimonio nempe sic dicto diaphoretico simplici & martiali, quem quæso illud primum nobis non suppeditat usum in omnis generis febribus, tam benignis, quam malignis, tam intermittentibus, quam continuis & continentibus, ut tutissimum remedium diaphoreticum? cum alterum sese pariter in variis commendet morbis, à viscerum depravato originem habentibus tono. Et quibus herculeis morbis non medentur tinctura antimonii acris & tartarifata, croci & sulphur, nec non cinnabaris ejusdem antimonii, ob vires suas emeticas, catharticas, diaphoreticas, diureticas, anodynas & tonicas? Hospitem sane in chymia & medicina pronunciarem illum, qui antimoniata cane & angue pejus, secundum hanc Veterum superius allegatam sententiam, fugienda esse diceret.

§. XXII.

Hæc jam ad nostros applicamus usus, & concludimus, scorias minerarum antimonialium per fusionem nihil de suo amittere sulphure, æque ac aliorum ex antimonio chymice per calcinationem exquisitissimam preparatorum potius exaltatur, quam destruitur virtus. Antispasmodicam proinde ex his paratis tribuimus balneis efficaciam, dum scilicet sulphur illud antimonii, per aquam dispersum, fibrarum emollit stricturem, quæ, cum fuerit nimia, constituit spasmodum, & tandem maximum efficit toni gradum, nimirum convulsiones. Ex hoc fundamento sese probarunt ma-

xime in contracturis, ariduris & convulsionibus, de quibus posterioribus notatu dignum allegare possumus exemplum.

§. XXIII.

Metallicus quidam XXII. annorum, temperamenti sanguineo-cholericus, tempore hyberno cauponam ingressus, rixas excitabat inebriatus; hora duodecima nocturna domum reversus, magnam ingerebat quantitatem placentæ pinguioris; hora secunda matutina afflictabatur diarrhœa, sub qua immodeste corpus exponebat frigori; in lectum demersus paulo post doloribus corripiebatur colicis atrocissimis, in convulsiones demum abeuntibus. Meum petenti consilium propino sal Ebshamenfe, post, interpositis antispasmodicis, carminativa temperatiora; his per tres circiter dies continuatis, per intervalla tamen redeuntibus convulsionibus, parari curo ex his scoriis balneum, sub cujus usu pristina restituebatur sanitati æger intra biduum.

§. XXIV.

Non minorem merentur laudem in antea dictis affectibus, contracturis scilicet & ariduris membrorum. Cum enim mobilitas pariter ac nutritio partium dependeat unice a fibrarum motricium justo tono, ut succus nutritivus interstitia musculorum intrare, per hos moveri, inque his apponi possit: facile erit colligere, per earundem stricturem nimiam impediri hujus aditum, & per consequens motum simul aboleri & nutritionem. Uterque vero hic actus satis commode restituitur per balneorum nostrorum emollientem virtutem, quod luculenter sequens demonstrat historia.

§. XXV.

Adolescens XIII. annorum, temperamenti phlegmatico-sanguinei, ex retropulsione scabiei intemperativa incidit in successivam corporis contabescientiam, ita tamen, ut brachii dextri non solum voluntarius ægre succederet motus, sed etiam ponderi non magno impares essent vires gestando. Quid quod per intervalla quædam linguæ sequebatur paralyfis, ut non nisi illa balbutiente verba posset facere. Parentibus meum exposcentibus consilium, in subsidium adhibitis medicamentis sanguinem mundificantibus internis, suafor eram, ut filium immitterent in balneum ex hujus generis paratum scoriis. His in tertiam septimanam in usum vocatis, sentiebat æger per universum corpus pruritum aliqualem intercutaneum, quem sequebatur sat magna copia pustularum in corruptelam ulceroso-saniosam transeuntium. Insistebam proinde prioribus internis, balneum vero sub forma fomenti brachio admovebam dextro, nec mittebam congruas laxationes & nervina, quibus omnibus intra duorum mensium spatium eo res perducebatur, ut evanesceret non solum scabies, sed etiam in magnum parentum gaudium brachium ad nutum moveret filius, & linguæ cessaret hæsitantia.

§. XXVI.

Exoptatum pariter in affectibus arthriticis extra paroxysmum ab his nobis promittentes effectum, quem usus palam faciet ulterior, mittimus hæc balnea antimonialia, & nos ad ultimam scoriarum convertimus classem, quas ex cobalti fusionem residuas esse diximus, paucis usum medicum sic dictorum Glas & Bäder indagaturi.

§. XXVII.

Refertur autem cobaltum ad stanni mineras, ef-
foditurque in sat magna copia ex illis tractus mon-
tani im (Erzgebürge) fodinis. De cæteris gaudet
principio salino-sulphureo-arsenicali, nec immerito
adnumeratur venenis, quippe per se calcinatum
valde activum illud præbet venenum, scilicet arse-
nicum.

§. XXVIII.

Procul dubio res grata atque accepta hoc meum
erit assertum impugnantibus balneorum nostrorum
usum, putantes, nos minus fida atque tuta suadere
remedia, hincque propriis armis & telis infringi
posse has nostras theses ac destrui. Confidimus ve-
ro fore, ut in nostram transeant sententiam, si re-
putaverint secum, quas in snalti (Blau-Farbe)
præparatione mutationes subeat cobaltum.

§. XXIX.

Traduntur enim cobalti mineræ vasis valde capa-
cibus, & intensissimo ignis gradu calcinantur ita,
ut omnis arsenicalis in auras abeat substantia, sub
qua operatione in peculiari quodam officinæ excocto-
riæ apposito ædificio den Giff-fang dicto, colligi-
tur instar florum adhærens parietibus arsenicum.
Porro hoc modo purificatæ mineræ novis commit-
tuntur vasibus, & mediante pulvere filicum atque
cineribus clavellatis per ignem fusorium rediguntur
in vitrum coloris elegantioris cœrulei, snaltum vo-
catum, quod secedentibus inter fusionem vitrescen-
tibus impuritatibus, variis operationibus ad suam
demum deducitur bonitatem.

§. XXX.

Ex hac anatomia cobalti chymica innotescit, ni-
hil plane arsenicalis ineffe scoriis hisce vitreis, sed il-
las potissimum e terrea hujus mineræ substantia,
filicibus & sale alcali esse conflatas, nullamque af-
ferre posse noxam, si parentur ex his ipsis balnea.
Neque nos frustrata est spes, qua tenebamur circa
horum usum, cum destinaverimus illa morbis ex
humorum nimia spissitudine & corruptione oriundis,
ulceribus malignis insuper corpus depascentibus. In
lepra enim & lue venerea post usum internorum
abstergente salis latitantis sua efficacia plus præsti-
terunt, ac alia balnea, cujus rei exemplum sequens
sistit casus.

§. XXXI.

Mulier XXXVI. annorum, temperamenti me-
lancholico-cholerici, ante tres & quod excurrit an-
nos, incidit in febrem quartanam intermittentem,
quam illicitis artificiiis suppressam sequebatur totalis
mensium obstructio. Post unius anni decursum in-
cendio hujus consumitur domus, nec non curta su-
pellex, & misera in deplorandam conjicitur calami-
tatem. Hinc cum non haberet, quibus tegeret cor-
pus, vestes, & compitatum quæreret victum, sca-
bie afficiebatur ferina, quæ tandem in lepram transi-
bat cum capillorum defluvio. Miseria mulieris com-
motus ego, studebam primo humorum correctioni,

& hunc in finem usum decoctorum atque essentia-
rum ex lignis & herbis sic dictis antiscorbuticis sua-
debam, interpositis laxantibus mercurialibus, con-
tinuatum. Fieri autem aliter non poterat, quam
ut post tertium demum mensem hæc medicamenta
evidentem exererent effectum, cum summa humo-
rum corruptio morbi causam constitueret proximam.
Interim non levis affulgebat spes restitutionis, cum
squamæ per balnei hujus usum emollitæ deciderent,
cutis redderetur lævis, & capitis cessarent dolores.
Inter spem & desperationem hæsitans hætenus ægro-
ta, per mensem cum dimidio continuabat aquarum
harum salubrium usum, quo termino finito ostendit
ab omnibus fordibus purgatum corpus, & men-
struum fluxum, loturæ carniū similem, se per
quatuor dies expertam esse nunciat.

§. XXXII.

Hæc itaque sunt, quæ nobis circa usum balneo-
rum horum artificialium observare licebant, quorum
autem parandi modum non nostrum facimus, ut
rem plane novam atque minus cognitam; sed lu-
benter fatemur, illa a multis annis in frequenti usu
fuisse peritis Medicis, inter quos nominare lubet B.
Dn. WEIDEMÜLLERUM, Med. Doct. & Phys. olim
apud Freybergenses experientissimum, qui ex scoriis
metallicis parata magni semper faciebat balnea, &
in animo habebat, in peculiari tractatu de balneo-
rum horum agere usu, quo erudito scripto priva-
tus autem est orbis literatus præmaturo ejus obitu,
ut alios taceamus, qui horum experti sint effica-
ciam.

§. XXXIII.

Atque in vulgus sane nota res est, balnea hæc
esse magnæ utilitatis in conservanda & restauranda
sanitate, ut nullus facile detur incola officinarum il-
larum excoctoriarum, Schmelzer / Hammer-schmid /
Blau-Farben-Arbeiter / qui magnis illa non extollat
laudibus atque mactet encomiis, quodque in hoc vel
illo morbo singularem præstiterint effectum, alleget
innumera exempla.

§. XXXIV.


Cum vero hominibus illis plebeiis, principiorum
constitutivorum, nec non inde dependentium effe-
ctuum minime gnaris, neutiquam fidem habendam
esse scirem, ex mineris per fusionem enatas scorias
examini subiciebam privato, ab harum particulis
elementaribus ad paratorum ex his balneorum effe-
ctum concludebam, his vero demum ratione & ex-
perientia probatis, doctiorum in hoc schediasmate
conciliare studebam applausum.

§. XXXV.

Hinc nihil magis in votis habeo, quam ut erra-
ti, cum hæc ad amissim haud esse scripta probe no-
verim, a Te, Benevole Lector, veniam impe-
trem; & Deus Ter Optimus Maximus, cui pro
concessis viribus gratias persolvo maximas, has meas
meditationes cedere benigne clementerque sinat ho-
nori sui nominis, bono salutique hominum, quem
sibi unice propositum habent finem.



OPUSCULA DIÆTETICA



DISPUTATIO MEDICA

DE

MORTE SUBITA
PRÆCAVENDA.

Primum edita Anno 1707.

PRÆFATIO.



QUANQUAM homini nihil magis optari queat, quam prospera æquabilis-
que vitæ felicitas, eidem tamen æque gratulandum videtur, si parem vitæ
exitum, felicem nempe fortunatumque nanciscitur. Quam *ἐὐθανασία* quidem
subita omnino morte metiebantur prisca gentium, eamque tanti æstima-
bant, ut inter præcipua quoque vota illam connumerarent. Itaque sum-
mos Imperatores ac Philosophos hoc mortis genus avidissime exoptasse accepimus, eo-
que processisse eosdem, ut quibus ejusmodi mors contigerat, hisce unice gratularen-
tur, improbos vero indignos plane eadem judicarent. Atque hoc dandum quidem pa-
ganorum caligini, quippe qui nondum consecuti salutaris doctrinæ scientiam, merito
præsentia in bonis posuerunt, parum de animæ salute, cujus immortalitatem minus
recte intelligebant, sibi prospicientes. At aliter sentiunt & sentire debent, qui Christi
nomen profitentur, siquidem salubriori disciplina instituti sciunt, morte mortalitatem
nostram, non vitam finire, adeoque votis unice expetendum esse, ut supremam arduam-
que illam viam cincti paratique subeamus. Cui salutari operi cum nihil infestius sit,
cum nihil magis illud remoretur, quam subitum citumque mortis genus, hinc equidem
omnibus, quibus futura æque ac præsens salus curæ cordique est, enitendum maxime
reor, ut, qua fieri potest providentia solertiaque, contra hoc discrimen corpustuean-
tur. Videor itaque mihi rem utilem, jucundamque cum omnibus, tum illis inprimis,
qui medendi scientiam sibi vindicant, peracturus, quando præsentis disputatione Inau-
gurali rationem, qua mors subita optime præcaveri, penitus exponam, vires inge-
nii in hoc campo tentaturus. Deus autem, qui vitam mortemque nostram nutu tem-
perat, a cujus manu omnium spiritus dependet, dicentis laborem præsentis numine ita
regat, adjuvetque, ut veritas & publica hominum salus inde augeatur.

§. I.

ANte vero, quam ipsam rationem præcavendæ subitæ mortis demonstremus, non alienum imo necessarium videtur, primum explicare, quid mors hominis sit, & in quo ipsa proprie consistat. Cui cum e diametro opposita sit vita, hinc ejusdem natura non clarius patebit; quam ex ipsius vitæ essentia, paucis a nobis proponenda: Neque negamus quidem, de hujus natura ac ingenio exponendo Medicos æque ac Philosophos maximopere inter se dissentire. Plurimi enim ex antiquioribus vitam in unione animæ cum corpore ponebant, imo animam auctorem vitæ pronunciabant, quid anima, quid vita sit, nunquam recte adsecuti. Nonnulli in conservatione mixtionis sive formæ ac craseos vitæ rationem quærebant, alii ex elementis, qualitatibus & inde propullulantibus quatuor humoribus vel calido innato, humido radicali, flammula vitali, aliisque hujus commatis principiis tam mortis quam vitæ naturam deduxerunt. Verum enim vero, cum hæc mera vocabula & somnia sint, quæ neque mente neque ratione concipi possunt, hinc eorundem angustiis medicinæ ac physices latifundia capi ac comprehendere non possunt. Rejctis igitur ceteris opinionibus placet jam ex ipsius rei fonte & natura vitæ notitiam derivare. Jamque primum satis compertum est, vitam proprie minus prædicari de iis corporibus, quæ sunt inorganica, uti loquuntur, multo minus de foliis corporum structuræ & mixtionis conservatione, alias enim lapis, quamdiu conservatur ejus mixtio & omne metallum imo panis dici possent vita frui. Eadem ratione corpus humanum nequiquam potest dici vivum, quatenus ejus mixtio & structura demum conservatur, quippe quod vel frigore intensiori vel balsamatione corporum per liquida spirituosam vel sola earundem exsiccatione fieri potest, sed eatenus saltem de corpore nostro prædicari potest vita, quatenus operationes, propter quas singulari artificio & ordine a natura ipsum constructum est, in illo vigent. Et hæc quidem nihil aliud sunt, quam motus fluidorum per corporis tubulos, quorum præsentiam respiratio, motus ac pulsus cordis & arteriarum testantur, unde etiam hæc actiones Medicis vitales audiunt, quoniam vitam ac motum sanguinis perpetuo comitantur. Licet itaque omnes sensus tam interni quam externi extincti fuerint, tamen corpus adhuc vivum existere & judicari potest, quando actiones modo dictæ vitales, respiratio, motus cordis & arteriarum adhuc observantur. Nempe quamdiu hæc præsentia sunt, tamdiu animal dicitur vivere, ubi vero eadem expiraverint penitus; ubi ita deseruerint corpus ut non possint revocari, tunc homo dicitur mori. Hinc luce meridiana clarius apparet, ipsam vitam primario consistere in circulari sanguinis per corpus motu, huncque non tam instrumentum quam ipsum vitæ fundamentum dicendum esse.

§. II.

Et hanc quidem sententiam nobiscum adprobant uno ore Philosophi, vitam non potentiam sed actum dicentes, nullus vero alius actus datur in rebus corporeis quam motus. Porro autem firmissimum hujus rei argumentum esse potest ipsa ratio, qua ii, qui jam in limine mortis constituti sunt, a fatali meta revocantur. Tales enim morti proximos in vitam integram restitui per ejusmodi remedia, quæ circulationem sanguinis rursus excitant ac promoveant, quotidianæ observationes probant. Sic BARO DE VERULAMIO meminit hominis per dimidiam horam suspensi, qui tamen solis frictionibus & balneis

Frid. Hoffmanni Oper. Supplem. II.

calidis in vitam fuerit reductus. Neque alia ratio est recepti spiritus, quam quod motus sanguinis intestinalis & peristalticus musculorum per remedia hæc excitatus, deficientem jam jam vitam reddiderit. Pariter PECHLINUS notat exemplum mulieris laqueo strangulatæ, cui & respiratio & pulsus jam defecerant, adeo ut spuma in labrum effusa rem pene conclamata significaret, quæ tamen ad inopinatum Medici accessum & largiorem spiritus salis ammoniaci infusionem plane revixit, quoniam agilissimo & penetrantissimo hoc spiritu sanguis in motum concitatus fuit. Ita FORESTUS etiam restituit plures uno simul impetu in aquam collapsos, quos de vita periclitantes, solo decocto ex floribus conservasse constat, siquidem cum sudore, quem inde moverat, & vitam in iis revocavit, inter quos virginem fuisse meminit neque vocis neque mentis compotem amplius, hanc tamen amplexu simul puellæ nudæ, quam in lecto juxta collocaverat, ipsum servasse prodidit. Notum etiam est, quod in animantibus, quibus nulla superesse videtur vita, hæc tamen revocari possit sufflato per follem in pulmones aere, Vid. *Acta Anglicana* p. 436. Quemadmodum & ipse partim Cl. SCHRADERO huic beato, Professore, partim proprio experimento non injucundo conspectu Helmstadii quondam vidi, cor caninum languidum & pene emortuum sufflato in arteriam asperam aere ad motum rediisse. SACHSIUS in *MSto Petri a Castro in Ampelographia* lib. 2. c. 3. recenset binas observationes, quibus testatur submersos antea pronos in terra extensos & plantis pedum baculo percussos revixisse. WEPFFERUS de *Apoplexia* p. 181. describit historiam personæ laqueo jugulatæ, quam Angli Medici a morte resuscitarunt venæsectionibus repetitis. Tandem domestico etiam experimento constat, quod, qui mortuorum instar procumbunt, non raro excitari soleant externa percussione, sternutatoriis, frictionibus externorum cum sale, aceto. Cum itaque his omnibus non nisi muscoli cordis & solidorum impulsus fluidorumque progressus promoveatur & tamen vita hac ratione languidis redeat, hinc apertum fit, vitam etiam nonnisi in solo sanguinis motu ac circulo, qui mutua actione & reactione solidorum cum fluidis perficitur, consistere.

§. III.

Exposita sic vitæ ratione, non opus est latius inquirere naturam mortis, si enim vita consistit in ipso circulo sanguinis, hujusque in corpore præsentia, sequitur mortem, tanquam vitæ oppositam; nihil aliud esse, quam motum istum sanguinis ita destructum, ut in integrum non amplius possit revocari. Circulus enim sanguinis quamprimum plane sistitur, omnes etiam actiones, quæ vitam sequuntur, sic dictæ vitales nempe remittunt, respiratio inhibetur, pulsus denique cordis, & arteriarum, imò totius corporis tam internus quam externus motus segnescit primum, mox plane intercipitur, quo intercepto vita hominis extinguatur. Simplici itaque hac motus eversione mors hominis absolvitur, non destructione mixtionis corporeæ, quippe ab hac corpus sat diu extinctum conservari potest experientia id adprobante, quippe in regionibus polo septentrionali vicinis, ubi acerrimi frigoris beneficio defunctorum corpora minus patent corruptioni vel putredine in auras dissolvuntur. Non minus cadavera animantium in fabuloso quodam Africæ deserto omnis corruptionis expertia reperiuntur, in statum *αφροτίας* degenerata, manifesto quidem argumento, non mixtionis destructione constare mortem, Hinc strangulatione, frigore subito enecati dicuntur, sicuti & sunt, mortui, licet omnibus partibus tam fluidis quam solidis

X 3 integra

integra adhuc sit mixtio & incolumis. Accedit, quod hæc texturæ corruptio, non præfente statim morte, invadat corpora, sed sensim, & nisi ipsi præoccupetur per spiramenta temporum eadem consumat, non obscuro argumento, hanc mixtionis everfionem nequiquam ipsam mortem sed mortis potius effectum rectius appellari. Et quanquam multis variisque modis mors homini accidat, nullum tamen mortis genus, nulla ejusdem species invenitur, quæ non ex hac motus destructione velut uberrimo fonte sit deducenda. Sive enim homo pereat morbo eoque vel acuto vel chronico, sive violenter ferro vel veneno adpetitus extinguatur, ex interceptione circuli sanguinis suffocatur.

§. IV.

Mortem igitur hominis paucis rectissime definire licebit, quod sit extrema circulationis sanguinis stasis sive irrevocabilis vitalis fontis quies. Jam vero, cum iustissimum Numen ita disposuerit, ut hominem post feralem lapsum Adami mors certa atque inevitabilis maneat, ex iis, quæ hæcenus diximus, illud trahi posse videtur, quod, si ex everfione huius motus, quem modo proposuimus, mors sit derivanda, inde sequatur necesse sit, ut quo propior fato homo, eo tardior, eo languidior hic motus deprehendatur. Vita vero humana testante id insuper scriptura sacra intra annum terminatur 70. vel 80mum; quod autem hisce annis sanguinis motus interitui magis adpropinquet, nemini incognitum esse poterit, cum ad oculum fere cuique pateat omnium motuum tam internorum, quam externorum, omniumque actionum in senibus tarditas, remissio ac difficultas, testante id insuper pulsu cordis ac artierum lentiori tardiorique. Quapropter in hoc utique conveniunt Medici, motum sanguinis obrepente senio paulatim identidem senescere, hominemque imbecillitatis suæ maxime admonere, sed rationem solemnis huius ac perpetui in microcosmo ordinis reddere ingeniosissimo cuique maxime difficile semper visum fuit. Cui enim non mirum, non incongruum, non rationi contrarium videatur, quod in provectioni ætate sanguis in motu ordinario languescat, cum tamen eadem alimenta, aliaque vitæ subsidia, quibus in juvenili ceteraque ætate ille motus cum universo corpore non solum sustentatus sed & auctus fuit, senibus suppetant. Cujus quidem rei explicatio defatigavit plures, in qua tamen destituti physica ac mechanica nihil aliud profecerunt, quam ut obscuris terminis obscuram alioquin rem spissioribus tenebris devoverent. Quid enim intelligere possum per calidum innatum, per humidum radicale, flammulam vitalem, horumque defectum & cetera, nescio nugæ an somnia dicam, quæ tamen nostri temporis lux serenior discussit dissipavitque.

§. V.

Inter omnes tamen accuratiori diligentia hanc rem deduxit BURNETUS in *Telluris Theoria sacra*, cujus quidem hæc sententia celebratur: Esse in rerum natura ita constitutum, ut instrumenta mechanica & corpora elastica, quæ facultate movendi pollent, interjecto temporis & continuato nimium motu paulatim debilitentur, movendi vi & actione ac reactione sensim inde deficiente. Parem rationem esse corporis humani, cujus elastice fibræ, dum perpetuo motu atteruntur, sensim contrahendi facultatem perdere, minus recte propellendo sanguini sufficientes. Quo quidem necessario sequi, ut quo gravior aliquis sit annis, eo debiliior sit sanguinis motus, imo ut tandem extinguatur fibrarum robore plane exhausto. Verum ex pluribus, quæ me dubitare jubent

de hac sententia, unicum saltem adducere juvat: nimirum ex dicta Auctoris ratione id consecuturum fore, ut motus sanguinis multo facilius in ætate puerili sit defecturus quam senili, siquidem satis constet, pueros molles, debilesque fibras fovere. Quo magis inde eveniret, ut primis statim annis, perditio fibrarum robore & sanguini motus defineret, & ita vitæ terminus nequaquam ad tot annos extenderetur, quod tamen minus accidere videmus. Deinde, cum in antediluvianorum corporibus ob atmosphæram puriorem ac sereniorum procul dubio quoque celerior motus fuerit, illorum etiam fibræ breviori intervallo debilitatæ arctiori termino vitam eorum circumscripsissent, cujus rei contrarium tamen aperte satis scriptura ostendit. Alii principium spirituale causam actionum vitalium statuentes, uti ex neglectu physices ac mechanices in ceterarum naturalium rerum explicatione hallucinantur, ita etiam circa rationem huius rei tam mirabilis hærent quam maxime.

§. VI.

Nos breviter ita sentimus: Homo quotidie alimenta ingerit, quibus ejus corpus in prima ætate non sustentatur solum, sed & augetur, donec ad justam magnitudinem & staturam perveniat. Idem igitur jam adeptus illam corporis mensuram, quæ a natura ipsi proposita est, nihilo secius tamen eodem cibi ac potus usu opus habet, eo nempe fine, ut vitalis sanguinis fons, qui per varias excretionem continuo circulo & transitu exhauritur, hisce alimentis rursus adimpleatur. Jam cum sanguis subinde ita accedens, omnes corporis partes, adeoque etiam porosum fibrarum genus, quod motum corpori præstat, continuo adluat, verosimile omnino videtur, oleosas ac gelatinosas illius partes nutritioni aptissimas, dum poris harum fibrarum clementer adlabuntur, iisdem paulatim inhære, ita ut fibræ ob conceptam inde compactiorem firmioremque texturam vim contrahendi æque ac expandendi sensim amittant ab accedente novo subinde incremento. Deperdita itaque prompta faciliue movendi facultate, qua prius pollebant fibræ, sanguis vi impellente destitutus in motu primum segnescit, mox tarditate illa, qua corpus permeat, crassam spissamque substantiam induit & transpiratione hinc insuper magis cohibita in corpore accumulatus, mole sua ac resistendi vi ægre simul commovetur. Attritis igitur sub senectute hoc modo vitalis motus subsidiis, idem sensim turbatus, mox interceptus plane, necessitatem moriendi homini imponit. Atque ex hac ratione minus difficulter explicatur, quod supra dictis auctorum sententiis maximam semper peperit difficultatem, cur, qui ante diluvium vixerint, longius vitæ spatium impleverint, quam qui hodie vivunt, cum tum temporis atmosphæra non tantis impuritatibus infecta purum viridemque spiritum corpori suppeditarat, quem promptior vegetiorque sanguinis motus consequebatur, succedente simul fibrarum nutritione, quæ sub motus segnitie magis viget, parciori, ipsarumque hinc firmitate tardiori. Quo minus etiam mirari subit, cur iidem homines centum jam annos consecuti etiam a sacro scriptore adolescentes appellentur, non alia nempe de causa, quam quod lentius tum atque tardius justum corporis robur firmitatemque fortiebantur. Huic equidem sententiæ quanquam nesciam, an alii ex eruditis accedant, iidem tamen accedit Excell. Dn. Præses, qui cum quondam occasione publici actus disputatorii primam mihi præbuit ansam, hanc rem ea, qua proposui, methodo perpendendi, tum etiam ejusdem sententiæ mentionem fecit in ultima disputatione de Anatomies usu §. 7. Fusius hæc

hæc deducere minus difficile foret deducendo simul exinde omnis diversitatis, quæ majorum nostrorum & hodiernorum corpora intercedit, causam, nisi instituti ratio, a quo longius recessi, me ad se revocaret.

§. VII.

Perspecta igitur jam mortis natura in genere, progredimur instituti ratione excitati ad illam speciem, quam subitam citamque appellamus. Sunt vero diversi modi, quibus homo securus nihilque minus quam mortem expectans, morte rapitur. Ut enim taceamus, innumeros mortalium non sua morte defungi, sed violenter perire ferro, igne, lapsu, suffocatione occidentes, quotidianis observationibus docemur mille casus dari, qui homini insidiantur, subita vi eidem spiritum elidentes. Inter hos ante omnia numeramus venena, i. e. ejusmodi pharmaca, quæ in minima dosi assumpta jugulant hominem vehementissimis gravissimisque symptomatibus excruciatum. Atque horum venenorum duo genera sunt, alterum ferali causlicaque vi atque rosione ventriculum ac intestina vellicando adeoque spasmos vehementiores excitando perniciem adfert; alterum humores rarefaciendo hos in motu sistit & corpori stupore maxime atque torpore pestiferum observatur. Ex horum numero sunt sic dicta narcotica, opium, mandragora, datura; ad priorem classem arsenicalia & mercurialia, sale præsertim excitata referuntur. Fatum porro subitaneum sibi accelerant homines non raro illis rebus, a quibus vitæ ac sanitatis præsidia petunt. Quippe & observamus, utilissima alioquin remedia sæpius præter spem lethum afferre, nisi corporum ratio prudenter habeatur. Vomitoria certe, purgantia multum boni corpori præstant, eidem tamen extrema mala subito adferunt, si imprudenter adhibeantur a medicastis, non considerata recte natura assumentis. Alii rursus præter spem ultimum vitæ diem incurrunt, detenti morbo, qui, cum ex morbo nihil periculi ipsis impendere videatur, accedente tamen subita malignitate aeris vel alio errore admisso confestim intercipiuntur, malo, quod nihil mali alioquin portendebat, in pejus abeunte. Sunt, quos ex intemperantia affectuum inopinato sublato accepimus. Et, quod mirabile, non ira, non terror solum, hostes quippe insensissimi corporis, machinam nostram destruere possunt, sed illi etiam affectus, quos cum voluptate, cum singulari animi delectatione percipimus, dulci quasi veneno præter omnem expectationem hominem exanimant. Est lætitia gratissimus & salutaris homini affectus, si modica fuerit, eadem tamen, si repente animo, imprimis mœrore attonito, offertur, non raro quidam pereunt copia atque turba & quasi ruina incidentis gaudii oppressi & exanimati. Transeo etiam alios subitæ mortis casus, qui a diversa causa externa accidisse ab Auctoribus observantur. Ita alii ex pilo in lacte hausto, alii a digito imprudenter œsophago inserto, alii ab evulsione dentis, alii ex alapa inflicta expirarunt, historiis id comprobantibus. Multis porro maligniores exhalationum fumi, quos in conclavibus calce recenter tinctis, in horreis spumante musto atque recenti cerevisia plenis, in metallifodinis, præsertim, quæ venas mercurii & plumbi foveant, ore imprudenter exceperant, finem vitæ ex improvviso attulerunt. Hæc autem subito defunctorum exempla non adeo admirationem & medicam considerationem merentur, cum illorum causæ tanquam externæ & violentæ facile pateant, & quanquam pateant, Medici tamen opem minus desiderant.

§. VIII.

Nos itaque de subita morte dicturi, remotis iis speciebus, quas hætenus enumeravimus, illam nobis pertractandam sumimus, quæ frequentius est, & ab interna atque latente causa accidit, hominem satis sanum belleque valentem, uti ex oris vultusque colore non raro apparet, subito opprimens. Et hæc certe intentio, hoc studium, hic denique labor Medici esse debet, ut ejusmodi mortis naturam atque ingenium exploret, latentem ejus causam persequatur, imminentemque depellat, homini præsentis discrimine erepturus. Videmus sæpe robustissimos homines subito ita emori, cum antea prospera valetudine sibi frui videantur, & ad ultimum vitæ habitum officiis muniisque exequendis sufficiant vix morbi ne dum mortis periculum somniantes. Itaque patrio sermone lepide dicitur de homine ita deficiente: *Der Mann war frisch und gesund / aber ehe man sichs versah / fiel er tod zur Erden.* Neque enim rarum est, quin quotidianæ experientiæ, multos in publicum prodeuntes, alios deambulantes fulmine quasi tactos procidere. Neque novum est, alios in lecto, quem sani firmique conscenderant, mane demortuos reperiri somnum morte continuantes; alios in sella confidentes, alios inter fabulas fabulam vitæ implere, motu ac voce eosdem simul ac semel deferente: Quanquam igitur ejusmodi homines pulcherrima valetudine uti sibi videntur vigore actionum corporearum persuasi, nihilominus tamen venæ ac præcordia aliquid monstri alunt, quod, licet tum ipsos tum Medicum sæpius fallat, adeo tamen, si diligentius attendas, latere non potest, quin uno alterove symptomate latentem quasi in herba anguem deprehendas. Solemne enim est, eos, qui ejusmodi morte occidunt, antea & priusquam ipsum fatum subeant, variis malis, quorum infra meminimus, affligi, quanquam non eo semper procedant vehementiæ, ut languentem lectulo affligant. Jamque apud plurimos pessimus certe mos est, ut, nisi gravitate morbi evicti lecto se continere cogantur, nunquam Medici consilium expetant, sua negligentia fatum, quod alioquin averti forsan poterat, sibi arcescentes. Quam subito vero ipsa hæc mors opprimat, vel illud testimonio fuerit, quod oppressi illius impetu vix verbum sæpe antea, quam plane exsolvuntur, proferre possint, nisi quod correpti repentino malo velut telo confixi hisce verbis ingemiscant: *Ach wie wird mir so übel! Wie wird mir so ängstlich umbs Hertz! Wie wird mir mein Haupt so schwer!* Nonnunquam tamen accidit, ut, licet repente in terram prolabantur, omni sensu tam interno quam externo privati, præterea audiendi ac loquendi facultate destituti, motu insuper corporis turbato impeditoque, interim tamen pulsus cordis, ac arteriarum cum respiratione supersit, vita ad aliquot horas imo dies sæpius perdurante.

§. IX.

Atque hic est celerrimus ille & præceps mortis impetus, quo magna mortalium pars rapi solet, commodissimum jam videtur, interiorum ejus causam persequi, ut hac cognita via nobis pateat cum totius mali historiam, tum quæ idem sequuntur, curatius explicandi. Interiorum nempe causam vocamus, quæ abdita & a natura clausa est, eademque ut in conspectum detur, necessarium est incidere corpora mortuorum eorumque viscera scrutari. Optime igitur & nos facturos arbitramur, si auctores varios, qui homines subito hoc fato extinctos ferro anatomico recluserunt, adeamus, ut ab iis edocti latentis mali sedem atque originem cognoscamus. Sunt vero variæ causæ, a quibus mortem subitam pro-

fectam esse adserunt auctores. Ita Cl. FERNELIUS in duobus corporibus illam evenisse scribit a bile, uti vocat, retorrída, quæ in arterias effusa topi nigri speciem induerat. Eandem mortem alios a rupta intra pulmones vomica occupasse idem adfirmat, sanguine ad interiora cordis redundante suffocatos. JOH. BILGERUS ab hydrope thoracis subitum vitæ excessum in sene quodam, eundemque in puella trium annorum a pulmonum tabe atque consumptione adnotavit. Et BONETUS uxorem quandam a rupta fellea vesicula, quin Rayerus a valvulis ad aortæ principium sitis inque osseam concretis duri- tiem sutorem Parisiensem derepente periisset scribit. Tacemus jam de aliis iisque diversis rebus, in quibus mortis subitæ causam multi ex observationum scriptoribus posuerunt, parum solliciti, an iisdem rebus causa recte innitatur.

§. X.

Cum itaque latissimus diffusissimusque campus pateat, in quo agmen causarum subitam mortem continentium Medici explicant, objiciet forsitan aliquis nobis, cur de præcavenda hac morte loquamur, cum tamen vix fieri possit, ut tot tamque variis causis intra corpus latentibus vera quidem deprehendatur. Hisce quidem primum respondemus, ex illa causarum multitudi- ne, ex quibus auctores hoc malum deducunt, plurimas ita esse comparatas, ut si altius easdem inspicias, statim appareat, illas lubrico fundamento insistere, quippe quæ adeo non effecerunt sæpe subitam mortem, ut potius diuturnum morbum ante extitisse indicent, in pejus subito mutatum. Qui quidem error exinde inprimis fluxit, quod plurimi ex Medicis præsertim veteribus, vel neglecta plane vel minus adcurate exculta Anatomia, parum diligentia attulerint inspiciendis corporibus, causisque morbi mortisque inquirendis. Videmus enim, multos, dum hisce in studiis parum versati sunt, tam gravem interdum admittere errorem, ut quod in corpore naturali posito & ordine se repræsentat, illud nonnunquam velut præternaturale intueantur. Imo, si quid in corpore offendunt leviter a consueto statu remotum, illud defunctum intercepisse mox clamant, & rati se jam invenisse, quod pueri in faba, seu veram mortis causam, ampliori operæ supersedent, fontem atque caput rei negligentes, cum insigni ipsorum dedecore. Quod minus dubitare nos patitur, ex eodem, nescio neglectu dicam, an ignorantia Anatomica evenisse, ut subitus vitæ exitus multis causis, quæ tamen minus rationi respondent, adsignetur. Neque vero id nobis adrogamus, ut ejusmodi viros, qui alioquin multis egregiisque experimentis artem nostram nobilitarunt, eo vituperemus, quod propter sæculi tenebras interdum lapsi fuerint, illud tamen adfirmare juvat, nos, si eos Anatomicos, qui adcuratius solertiusque hanc doctrinam tractarunt, consulamus, exploratiores subitæ mortis causas ab illis nobis demonstrari. Illud tamen adhuc monendum ducimus, nos non negare plane, quin ex ejusmodi causis, quas ab auctoribus relatas supra comprehendimus, subito quandoque pereant nonnulli, hæc tamen huc loci non pertinent, quod hujusmodi causæ rariores sint, cum nos frequentius & quotidianum subitæ mortis genus tractandum sumserimus, exposituri, qua ratione corpus a pestifero hoc malo tueamur.

§. XI.

Itaque illi, qui solertiori studio subita extinctos morte inciderunt, exploratiores hujus rei causas adferunt, ex triplici maxime fonte ejusmodi mortem deducentes. Ubi enim illorum corpora aperias, di-

ligentius viscera persecutus, plerumque observabis vasa in nobiliore corporis parte sanguinis mole distenta turgescere, vel ingentem sanguinis copiam iisdem ruptis extra alveum effusam, intra corporis cava redundare, vel vasa denique, viscida ac solidiori materia, quam polypum vocamus, obfessa atque clausa esse, cum non obscuro indicio mortis inde consecutæ. Atque ex infarctu quidem vasorum plures repente deficere, vel unicum idque gravissimum CL. PANAROLI testimonium suffecerit, qui luculenter prodit, anno 1651. feraci ejusmodi mortium tempore, plures patefacto corpore non aliam tam vehementis strenuæque mortis causam ostendisse, quam insignem vasorum infarctum, a sanguine intra cor nimium retento strangulatos. Idem & aliorum auctoritate subfulcire possemus, nisi abunde esset, Virum infinitæ lectionis BONETUM nominare, qui in *Anatomia practica lib. 1. sect. 2. & l. 2. f. 2.* multis exemplis hanc rem illustravit. Atque ipsa quidem ratio facilis nec diu circumspicienda, siquidem vasa, dum irruentis sanguinis mole fluctuant, nimium inde expansa ac distenta, salutarem illam contrahendi facultatem sanguini expellendo destinatam, sensim amittunt, ita quidem, ut sanguis denudatus impulsiva vi, intra vasa subsistat primum, deinde reliquo sanguini subinde adfluenti iter claudat, novissime in universo corpore turbato fluidorum motu stasim eorundem efficit, cui ceu fundamento mortem insistere supra posuimus. Illud inprimis notare oportet, quod quo nobilior, quo excellentior pars corporis est, quam ejusmodi stasis infidet, eo celerior acutiorque mors exinde consequatur. Quo minus mirabile puto, quam celerrime spiritum elidi, si idem malum in vasa majora, qualia cor inprimis fovet, incidit, quippe hoc, cum quo pollet, robore, vitalem laticem in omnes corporis partes æquali flumine digerat, diuturna stagnatione nimis dilatatum elasticam ac contractivam vim plane exuit atque inde in pulsu ac motu deficiens syncope cardiacæ præbet occasionem. Proximum dignitate caput est, ideoque non minus illi periculi ab ejusmodi stasi propositum, nisi mature succurratur. Ubi enim irruentis sanguinis copia cerebri vasa, maxime plexus choroidei, nimium turgent, mole ac pondere principium nervorum, quod proxime posited est, comprimendo, principii activi influxum excludunt omni mox sensu motuque deficiente.

§. XII.

Deinde pleniorum eorum numerum inveneris, quos ex disrupto vase majori, sanguis cum impetu in cava pectoris, capitivæ delapsus interimat, celerique morte adficiat. Ita PAULUS DE SORBAIT meminit, multos se aperuisse, qui cum ad ultimum fere spiritum non manifesta mortis signa ostendissent, detecto tamen corpore insigne aliquot vas disruptum spectatoribus repræsentasset. Idemque adserit TH. WARTHON in *adenographia c. 2.* referens se in iis, quos apoplexia subito abstulerat, ventriculos cerebri sanguine refertos deprehendisse. De qua re cum plurimas egregiasque historias collegerit, quem supra laudavimus, BONETUS *loc. cit.* merito ad illum lectorem remittimus, non longis ambagibus eundem remoraturi. Minus tamen præteriri a nobis debet ratio, quæ quanto facilior, tanto promptius a nobis præponetur. Facile nempe intelligi potest, sanguinem, ubi aperto vase, majore mole erumpit, in reliquis inde venis arteriisque deficere, unde hydraulicus machinæ humanæ motus pene extinguatur. Quam pernicio- sa vero sit talis vasorum apertio in thorace ac capite, ex ante dictis simul colligi potest.

§. XIII.

§. XIII.

Accedimus jam tertiam eamque frequentissimam subitæ mortis causam, quam qui intensiori cura viscerum sinus scrutantur, in eo positam adfirmant, quod major corporis canalus, per quem sanguis ire debebat, substantia fibrosa membranaceaque occlusus plerumque in ejusmodi corporibus reperiatur. Dicitur hæc polypus atrocissimum invictumque fere malum; siquidem intra cordis sinus & nobiliora vasa pullulans mucilaginosæ tenacique materia eadem obsidet, diffusis in alias partes pedibus, ita ut quamdiu impune oberrare potest sanguis, vita conservetur, mox ubi incremento sumto vel sede sua plane avulsus liberiori sanguinis circulo cordisque motui penitus obstat, ægrum clandestina atque repentina morte suffocat. Atque hisce polypis ingentem mortalium numerum perire diligentior curatioque corporum apertio detexit, qua non obscurum esse potest, eos, qui præcipiti fato obeunt, plerumque ejusmodi intempestivum & fatalem hospitem intra cordis recessus fovere ab eodem interfectos. Quod elegantiori observatione confirmat JOH. GEORG. GREISELIUS *Miscell. N. C. anno 1670. obs. 74.* cujus verba juvat commemorare. Quotquot, inquit, apoplexia aut catarrho subfocativo (quibus homo frequentius subito decedit) mortuos aperui in omnibus corpora illa callosa viscida ac glutinosa aut in cerebro aut in corde deprehendi. Vidit idem CL. WEPFERUS, quo nemo diligentius, nemo frequentius, curatiusque apoplecticorum corpora considerasse videtur, insignem polypum in ejusmodi homine, quem apoplexia jugulaverat, qui non cerebrum solum arcto tenacique complexu occupaverat, sed in omnes etiam sinus ejus ramos dispergebat, imo longissimis carotidum recessibus impingebat. Neque aliter sentit CL. BARTHOLINUS qui *lib. de læt. thor. c. 14.* scribit, ipsum in iis, quos subito fato extinctos examini anatomico subiecisset, majora cordis vasa sanguine concreto repleta invenisse. Plures hujus generis historias diligentes harum rerum scriptores suggerunt, quos studio brevitatæ omittimus, quod vel ex iis, quos adduximus abunde pateat, rarius celeriore morte hominem opprimi quin ejus causa polypus simul sit constituenda. Crediderimque ego eundem etiam in illis, quos vario modo repente defunctos supra commemoravimus, diligentius excussis visceribus semet fuisse ostensurum. Neque enim promptius celeriusque omnis sanguinis motus sisti potest, quam si in majori vasorum ramo ejusmodi obstructio lateat. Quin superius dicta vasorum repletio, imo ruptio, ex nulla alia causa quam ex polypo melius deducitur; sanguis enim transitu prohibitus ad alia loca declinatur cum impetu vasis illi-dendus.

§. XIV.

Formalem itaque mali nostri rationem triplicem omnino statuimus ex nimia vasis cujusdam dilata-tione vel ejusdem ruptione, vel denique occlusio-ne eandem persecuti, necessarium jam videtur, ut materialem etiam causam ex qua nascuntur illæ, paucis proponamus. Est hæc duplex inprimis, nimia nempe sanguinis abundantia, quam plethoram adpellamus, vel, de quo jam locuti sumus, polypus. Utriusque hujus ingenium atque originem penitus jam inspicimus ut tanto facilior via pateat reliquam subitæ mortis historiam ex hoc fonte deducendi. Polypo igitur, quem primum in conspectum dabimus, nomen dedit pedum ramorumque varietas, quibus in alias ac remotiores partes exporrectum majores nostri primum reperiiebant in narium cavi-tate. Est vero polypus concretio fibrosa ac mem-

branacea, pinguior ut plurimum, p. n. in corporis tubulis coalescens. Utque eidem varia figura, quippe modo serpentis, modo vermis, modo alia specie se representans homini imponit, ita varius etiam iidem est color atque magnitudo. Siquidem jam major, jam minor apparet, frequenter albus cine-reusque occurrit rubicundis grumulis distinctus, quos a globulis sanguineis recenter allapsis induisse videtur, interdum tamen coagulatum fere sangui-nem exprimit. Mollis ipsi sæpe substantia, sæpe durior, interdum in lapideam fere duritiem consoli-datur. Et inde est, quod multi de lapidibus intra cordis cava deprehensis scribant, cum polypus in ejusmodi speciem solidam induratus ignaros Ana-tomiæ forsitan fefellerit. Talem lapidem polypum Parisiis e corde cadaveris virilis exemptum Dia-rium Parisiense Medicum vulgo *Journal de Medecine* commemorat. Deinde experientia compertum est, variam esse ipsius magnitudinem eamque sæpius stu-pendam. Ita Eduardus Tyso Medicus peritissimus meminit polypi cujusdam, qui in tam vastum cor-pus excreverat, ut extractus demum integer cum ramulis, quibus in remotissimas etiam venas ex-currerat, singulas fere earum mirabili sane specta-culo repræsentaret. Æque stupendæ molis est ge-minus ille, quem V. Cl. Joh. Cousin, in uno quidem corpore deprehendit, qui cum in utroque cordis sinu velut ferales hostes consedissent, alter quidem ovum gallinaceum, alter anserinum etiam, quod mirabile plane, magnitudine exsuperabat.

§. XV.

Originem trahit polypus a crasso viscidoque fan-guine minus expedito itinere corpus percurrente. Deficiente enim validiori impulsu viscidiores sangui-nis particulæ facile hinc inde hærent asperitate sua venarum & arteriarum lateribus adlabentes, quo fit, ut secedente paulatim fluido in solidam plane figuram indurescant, in fibrillas membranaceasque moles ubi incrementum sumserunt, coalescentes. Jamque in confesso est, foveri hoc malum imo pro-generari quam maximè a quibusdam animi adfecti-bus diuturnis, nempe a tristitia, metu, mœrore & luctu. Neque sane minoris efficaciam hic esse dixe-rim adfectum dictis illis contrarium alioquin gau-dium scilicet animumque plane quietum atque hila-rem vulgo *ein vergnügt und ruhig Gemüthe*. Por-ro huc spectant vita sedentaria otiosaque & somnus copiosior. Retardato nimirum hisce rebus sanguinis motu viscidiores partes facilius secedunt atque coa-lescunt. Materiam copiosam polypo suggerunt vi-ctus plenior atque delicatus cibique amplius enu-trientes, quorum ulterior mentio inferius erit fa-cienda.

§. XVI.

Alterum jam nostri mali fontem, quem diximus, plethoram nempe aperimus. Est hæc nimia sangui-nis abundantia, quæ, quod & vasorum amplitu-dini & motricium partium robori minus respondet, difficulter omnino suum in orbem iter per corpus explicat, multa inde mala adliciendo. Sique ita sanguinis mole vasorum angustiam turgent, de facili fieri potest, ut vehementiore incidente motu quæ-dam illorum pars, præsertim quæ minus firmiori carne munita est, subeuntis sanguinis vi expansa nimium salutarem contrahendi motum plane desti-tuat vel disrupta etiam ingentem humoris vim in cava corporis exoneret, præsentemque periculo vel in expectata sæpe morte hominem opprimat. Et licet plethora per se jam periculosa satis sit, tamen periculosior omnino evadit, ubi viæ, quæ sangui-nem

nem recipiunt, polypo simul sunt obstructæ, restagnationi scilicet humorum vasorumque infarctui magis velificantes. Nimiam humorum copiam sibi facile contrahunt, qui cibo potuque liberalius corpus implent. Faciunt vero huc maximè solidiores cibi, copiosæ carnes, item potus crassioris naturæ minus recte per vias urinarias delabentes. Præterea sanguinem augent omnia fere, quæ motum ejusdem tardiores nimis efficiunt, uti sunt otium vitæque sedentaria umbratilisque aliaque hujus generis.

§. XVII.

Demonstrato itaque jam fundamento nostri mali minus operosum fuerit ulteriorem ejus historiam subicere. Memorabile vero illud est, expositos magis esse subitæ morti, eandemque facilius pati homines obesos, qui molli delicatæque vitæ assueverunt, & vita sedentaria ac otio lætantur, cibus, qui corpus implent, simul nimium innutriti. Hinc merito illis, qui florido vultu apparent, subita mors extimescenda, quod hi plerumque ejusmodi mollitiis delitiisque delectantur, ipso vultu lautitias ipsorum denudante. Et Germani per experientiam edocti eleganti proverbio idem comprobant: *Diejenigen / so wie Milch und Blut aussehen / überfällt öftters der Tod am ehesten / am schleunigsten.* Nec alia ratio est, cur nobiliores, cur qui in principum aulis atque in urbibus versantur, magis frequentiusque hac morte opprimantur, quam viliores homines & qui ruri degunt, quod illi otio lautaque vita adfluentes corpus pinguedine nimia augent, hi contra laboribus dediti accedente levi facilique vita pinguedinem minus contrahant. Quod autem dicti pinguiore, obesiores, otiosi alique, quos nominavimus, tam facile nostro malo corripantur, mirum non est, quoniam omnes illi sanguinem alunt nimis viscidum adeoque pro generando polypo aptissimum.

§. XVIII.

Præter hos obesos autem quos diximus illos etiam inopinata mors frequentius auferre solet, qui licet sæpe tenuioris graciliorisque corporis sint, majorem tamen sanguinis copiam intra vasa foveant, quam quæ eorundem angustiis capi & viribus solidarum partium circumvolvi possit, vulgo dicti plethorici. Hinc etiam est, quod illi, qui de dolore capitis gravativo præsertim post plenioris corporis motum conqueruntur, celeri citoque vitæ exitu periclitentur, quoniam solemne hoc plethoræ symptoma existit. Idemque periculum propositum est in provectiori ætate constitutis non alia de causa, quam quod hi ob tardiores cunctantemque sanguinis motum & quæ inde sequitur languidiorem sordium per spiramenta cutis rejectionem, abundantiam humorum incurrant cum præsentis valetudinis vitæque discrimine. Adeoque minime mirum esse debet, post intermissam sanguinis detractionem cum salubri aliquo levamento, item si sanguis utili naturæ motu per nares aliasque vias effusus constitit, hoc periculum imminere.

§. XIX.

Neque rarius subito fato decumbunt cachectici, quorum nimirum sanguis, qui & viscidior existit & tardiori simul gradu per vasa procedit, promptissime polypum progenerat. Et memorabilis hanc in rem observatio est, quam Dn. Graffium Sere-niss. Electoris Palatini Medicum Castrensem in catervis adnotasse Excell. Dn. Præses in nupera dispu-

ratione de *Asthmate Convulsivo* scribit; Milites nempe, cum varii generis piscibus Rheni exundatione in littus & vicinas fossas ejectis per æstatem vescerentur, & proximo autumnio sub aëre frigido ac pluvioso Landaviam expugnantes cachexiam contraxissent, pleno numero derepente interierunt, ut etiam vel inter cibum vel ipso in somno subfocati fuerint. Et quod notabile, in omnibus ita defunctis, quorum quinquaginta circiter dissecti fuerunt, inventus fuit polypus monstrosa magnitudine.

§. XX.

Uti autem tempus anni vernum atque autumnale ferax maxime morborum est, pluribusque funeribus foedum, ita iisdem temporibus, hyberno tamen minus excluso, mors nostra maxime timeri oportet, non quod non omni tempore sed quod frequentius illis temporibus eveniat. Cujus rei ratio non ex longinquo peti debet. Cum enim cælum tum præsertim variet, & propter ventos boreales ac occidentales, qui tum maxime dominantur, corpora modo humiditate nimia solvantur, modo a frigoris vi constringatur, hinc interclusa sic salutari transpiratione humorum copia corpus accumulatur & ad hanc mortem præparatur. Quod cum crebrior experientia demonstret, tum DOM. PANAROLUS egregia observatione confirmat, malignitatem ejusmodi tempestatum & multos variis morbis afflictos & plurimos subito correptos interceptisse. Et placet observationem in conspectum dare verbis auctoris recentis: Anno 1651. inquit, brevi temporis spatium unus post alium præcipiti ac repentina morte occubuit: anno præterito semper fuerunt ficcitates immensæ & præsertim æstatis tempore cum ardentissimo fervore copulatæ; elapso anni 1650. autumnio aquæ copiosæ statim post calorem & ficcitatem humectantes agros, rigantes prata visæ sunt: post aquas vero ficcitas cum frigiditate supervenit, unde & copia catarrhi & frequentia ophthalmiæ & angina spuria visæ sunt. Anatomica sectio in his corporibus ostendit cor a sanguine suffocatum. Porro experientia constat, nusquam homines frequentius morte sublata jugulari ac in locis septentrionalibus, Suecia, Norwegia atque Dania & in regionibus occidentalibus item locis maritimis aliisque, in quibus aut humidior aut frigidior existit atmosphæra ob dictam antea rationem.

§. XXI.

Quamvis vero in superioribus mortem subitam ex interna causa deducendam esse dixerimus, raro tamen accidere solet, ut hæc causa in corpore delitescens vim suam exerat, nisi aliud quippiam, externum plerumque accesserit, quod facultate validissime sanguinem movendi instructum internæ causæ præbeat occasionem operandi. Nempe jam supra a nobis positum est, immodicos animi affectus interdum sufficere subitæ hominis strangulationi. Quominus mirari convenit, ab iisdem in iis corporibus, quæ jam alioquin proclivia sunt ad mortem subitam, hanc ipsam excitari. Perpetuumque fere est, eos qui ejusmodi fato defunguntur, tale quid antea passos fuisse, siquidem vel impotenti accensi ira vel subito perculsi terrore, imo, quod supra jam monuimus, repentino vehementique gaudio persusi inter suorum manus atque gratulationes perierunt. Quod cum historiæ Medicæ tum quotidiana experientia passim testentur, incongruum videtur multis observationibus id ipsum illustrare.

§. XXII.

Illud vero mirari omnino subit, iram & terrorem,

rem, uti diverso modo animum hominis adficiunt, ita & eosdem diverso plane motu vitæ nostræ insidiari. Nempe animus furore percitus e sede sua quasi deturbatus magno cum impetu ad externa magis ruit, parique modo sanguis sub hoc statu maxima vi e centro corporis corde nimirum expulsus ad externas corporis partes, caput imprimis, diffunditur, ibidemque tragædiam suam ludit apoplexia maxime funestum homini interitum minitendo. Quod vero sub hoc adfectu sanguis ad externas partes magis pervagetur, illud ex habitu irati cognoscere satis licet; quid enim vultus summo rubore suffusus, quid oculi igne quasi micantes, quid æstus ceteras externas partes divexans indicat, nisi sanguinem in iisdem turgescens. Alia nocendi ratio terrori, quippe sub hoc animus ad interiora velut reformidans externa refugit pariterque vitalis humor vi frigoris in summa cute dominantis ad cor & pulmones depellitur. Hinc facies pallet, venæ, quæ in ira intumescunt, hic concidunt, corpus denique totum ferali frigore horroreque occupatur. Atque inde est, quod hic adfectus, cum sanguinis molem ad cor & pulmones premat, catarrho suffocativo & syncope cardiaca homini funestum præcipitemque finem molitur.

§. XXIII.

Neque jam obscurum esse poterit, cur ad excitandam subitam mortem plurimum quoque valeat vehemens corporis motus externus, cum hoc ipso & internus sanguinis motus quam maxime excitetur, adeo ut inde facile subjecta disposita dicta sæpius ratione subito interimi queat. Ita multa eorum exempla constant, quibus in ipso pilæ lusu ludum fecit humana fragilitas ex validiore nempe exercitio subita morte extinctis. Eademque oppressos scimus, quibus ex choreis vehementique saltu corpus incaluerat, ex ipsa hilaritate mortis causa tracta. Porro & illud simul inde eluxerit, nihil paratius, nihil promptius ad hominem ita opprimendum inveniri illis rebus, quæ intra corpus adsumpta vehementer sanguinem concitant. Id quod exempla eorum satis comprobant, qui calidorum atque spirituosorum potu delectati mortem inde subitam sibi contraxerunt. Ita summos etiam viros imo heroes celeri sæpius exitu defecisse ex liberali vini usu scimus. Alexandrum M. uti Seneca, ni fallor, alicubi loquitur, quem neque arma Persarum neque suorum infidiæ fregerunt, Hercules Scyphus, erat is vero ingentis magnitudinis, condidit.

§. XXIV.

Longior fuerim, si diutius deducendis hisce immorarer; itaque ut orbem nostræ dissertationis percurramus, opus fuerit paucis adhuc deflectere ad illas res, quæ non strenue & vehementer sed lento quasi gradu ad mortem repentinam deducunt. Quo spectat omne illud quod sanguinem viscidum crassumque reddit, vel eundem nimium auget adeoque polypo & plethoræ aditum parat. Sique in genere fontem utriusque mali requiras, intemperantia est, illa nempe morborum nutricula, earumque rerum adpetentia, quæ cum modice sumuntur, mirificè reficiunt, enutrient, cum avidius, alimenta morbis suggerunt, vires, quas alioquin excitant, mole sua opprimendo. Ubi enim corpus nimio impletur cibo, humores inde p. n. accumulati minus commode corpus permeant, sed viscidum crassumque perseverant. Potentes hoc in genere sunt cibi gelatinosi succique pleni, quæ multum nutrimenti corpori præstant, & oleosis partibus constant, uti sunt carnes animantium juniorum maxime, imprimis suil-

la, item quæ ex lacte fiunt dapes, ova ceteraque. Ex potu huc pertinent vina dulcia, mustum, cerevisiæ crassæ, fœcisque planæ, quæ lento cunctantique itinere descendunt. Atque hæc omnia materialiter demum viscidum ac copiosum sanguinem supeditant, formaliter vero idem præstant omnia illa, quæ motum humorum retardant, vel ipsorum arcent transpirationem. Quo nomine merito accusari debet somnus largior, vita umbratilis ac otiosa atque ex animi adfectibus diuturnus luctus atque mœror, item aer humidus ac frigidus. Quo promptius vero sanguis hanc labem contrahit, ubi ipse salubriter alioquin per nares, per menstrua, venarumque ora effusus intempestive constitit & suppressus fuit, vel quæ alias adhibita fuit, sanguinis detractio omititur. Hinc sane immediate statim nascitur plethoræ, testantibus id symptomatibus ejusmodi suppressionem mox subsequens, quæ non aliunde nisi ex abundantia sanguinis intra venas accumulari proficiscuntur. Quin experientia etiam docet, illis, qui subito extinguuntur, plerumque ante obitum ejusmodi suppressionem accidisse.

§. XXV.

Supereft, ut decursa mortis subitæ historia, ipsam rationem demonstremus, qua homo a tam vehementi gravique periculo corpus tueri atque vindicare possit. Quod ut adsequatur, necessarium est, ut in primo præsidio ponat temperantiam, hujusque se legibus adstringat ac obliget, ad hanc vitam sanitatemque moderetur. Sit parcus moderatusque ciborum usus, solidorum maxime, eorumque, quæ antea commemoravimus; in potum, qui liberalior esse debet, ille adsumatur, qui tenuioris ac dilutioris naturæ est, & per vias urinarias facile ac expedite redditur, nec caput ferit, nec multo lupulo abundat, quique ex puro subtilique aqua adparatur. Neque negligere motum oportet corporisque exercitium; ab otio autem vitæque sedentaria & copioso somno abstinendum. Accedat quoque aer purus & serenus ventis orientalibus ventilatus, pluvioso frigido humidoque cœlo diligenter evitato. Animus sit moderatus erectusque sollicitudine, tristitia ceterisque adfectibus multum valere jussis. Illud vero quam diligentissime providendum, ne solennes sanguinis effusiones imprudenti modo cohibeantur, vel quod æque periculosum est, sanguinis detractio salubriter alioquin adhibita, negligatur, cum experimentis confirmatum sit, præsens vitæ periculum sæpe hac de causa accelerari. Atque hæc sunt præcepta, hæc leges, quarum si quis diligens fuerit, si ad eas vitam componit, cum tutum se ab ejusmodi subito periculo præstare, tum ad diuturnam prosperamque vitam adspirare poterit, firmam viridemque valetudinem consecuturus.

§. XXVI.

Quo majori jam sollicitudine illis consulendum erit, quibus certis de causis atque signis minus integrum est, securitatem sibi a tam repentino malo polliceri. Neque vero carent periculo, quorum parentes celeriter rapti fuerunt, item obesi, quique jam provectioris sunt ætatis, & ea denique de se signa ostendunt, quibus corpus ad tam præcipitem pronamque mortem præparatur. Sique ex sanguinis copia malum metuendum est, quæ mox ponimus, signa sese manifestant. Vasa sanguinea turgent, facies fusca ac rubicunda est, validus magnusque artèriarum pulsus, viriumque languor & lassitudo. Marcet porro animus, corpus torpet, piget se movere, solitaque munia obire, de capitis dolore præcordiorumque anxietate subinde æger conquiritur.

ritur. Inprimis tamen hæc accidunt, si corpus vehementiore motu exercetur, si loca sublimia intentione gradu adscenduntur, aut caput versus terram inclinatur. Quibus contra ex polypo metus, in his hæc fere notæ oriuntur: Solemnis nimirum est cordis palpitatio ac præcordiorum angustia, pulsus debilis, frequens atque inæqualis. Eademque mala intenduntur post validiorem corporis exercitationem, maxime si scalæ & accliviora adscenduntur, & si animus subito terrore percellitur; siquidem, ubi ejusmodi quid antecessit statim augetur cordis tremor, cui anxius præcordiorum æstus, cordis veluti stertor & præsens suffocationis periculum adjungitur. Quæ quidem mala leviora in principio, mox interjecto tempore, majus semper sumunt incrementum. Polypum vero intra sinistrum cordis ventriculum latentem peculiare quædam notæ indicant, & quidem gravior spirandi difficultas, & quod memorabile imprimis, arteriarum pulsus alioquin imbecillior inter tussendum intenditur augeturque.

§. XXVII.

Quod si itaque ejusmodi malum tam præceps, tam strenuum occupavit aliquem, inter initia statim scire licet, eum de valetudine & de vita maxime periclitari. Quo magis etiam adfectis injungendum est, ut curiosissime eorum rerum usum sibi circumcidant, quæ instructæ sunt facultate sanguinem validius commovendi, quando periculum est, ne, si ejusmodi rebus utantur, subito extinguantur. Quanquam proinde homo, si ex copia sanguinis male ita habet, summo discrimini expositus sit, idem tamen unico remedio sæpe liberari potest, opportuna nempe sanguinis detractione. Demta enim mole illius, robur vigorque corpori redit, actiones reviviscunt & præsens vitæ periculum, quod extimescendum alioquin erat, depellitur. Atque utinam aureum hocce remedium non adeo aversarentur homines, sed vel illud potius cogitarent, quando satius esset pauxillo sanguine a tam multis gravibusque malis se redimere. Sed quæ illorum perversitas est, dum leve vulnus expavescunt, dum cum sanguine vitam viresque effluere putant, diuturnis potius morbis excruciiari malunt. Et quamvis hoc in casu non minus præstet inedia, quippe qua copia sanguinis optime exhauritur, plurimos tamen hanc curam æque minus suscepturos crediderim. Reliqua quæ hic commendanda sunt, quoad diætā, superiora suppeditare poterunt.

§. XXVIII.

Illis, quos polypus terret, æque necessarium est abstinere iis rebus, quæ sanguinem in motum concitare possunt, atque quæ polypi generationi præbent alimenta. Ipsa vero curatio polypi, ubi jam invaluit, magis optanda quam speranda est, cum quisque de facili videre possit, quam arduum opus sit tam solidam compactamque substantiam medicamenti internis retexere. Si quid auxilii sperandum, si quid levamenti adferri potest, id omne intra sequentia continetur. Occurrendum primo est plethoræ, quæ plerumque ejusmodi corpora vexat. Si

ab hoc præsidio discesseris, transire oportet ad diluentia, quæ unicam fere spem præbent tollendi mali, quippe quæ fluidum reddendo sanguinem polypi augmentum impediunt, & pinguedinem eluendo substantiam ejus quodammodo atterunt comminuuntque. Pertinent huc infusa calida liberaliter epota herbæ Thee, veronicæ, maximeque omnium thermæ acidulæque. Sique hoc modo nondum evincitur malum, deveniendum est ad curam inediæ *die Hunger-Cur* / quæ quamvis hodie non magno admodum in usu sit, præcis tamen temporibus suos invenit laudatores. Est vero hic fere modus eam adhibendi: Abstinendum primum ab omnibus cibis, adsumto tantum per diem pauxillo panis biscocti, ut paululum reficiatur homo; deinde singulis diebus tres vel quatuor mensuræ de decocto lignorum adsumendæ, ea cautione adhibita, ut corpus in transpiratione perpetua modicoque sudore conservetur. Decocti reliquiis adfundi potest aqua purior adjectis passulis majoribus corticibusque citri, eademque vel tepida vel egelida in potum dari potest. Hæc cura si diligenter observatur, sique ad 4. vel 6. hebdomades continuatur, tutissima est, & pertinacissimos morbos expugnat, uti Excell. Dn. Præses sua experientia id nobis confirmavit. Est & non leve auxilium in mercurialibus rite præparatis, quæ si prudenter usurpantur, laudem suam in hoc casu inveniunt, quippe resolvendo, qui coierunt, humores, præsens corpori præstant adlevamentum.

§. XXIX.

Traditis itaque hisce jam quoque exponendum videtur, qua ratione etiam ei, qui subito collapsus jamjam moriturus videtur, succurrere oporteat, ut præsentis mortis periculo eripiat. Ubi ergo aliquis concidit, si nihil aliud prohibet, utique sanguis mitti debet, idemque necessitate urgente, repetendum est. Ubi enim ex infarctu nimio vasorum homo prostrernitur, sanguine depleto, vasa vim contrahendi recipiunt, vigorque & motus partibus redit, & jam imminenti mortis discrimini adfectus eximitur. At ubi idem sanguis extra vasa, quæ mole sua aperuit, delatus fuit, vel a polypo id accidit, nihil fere spei superest, & mors certissima adpropinquat. Hucque respexisse HIPPOCRATES videtur, ubi scribit, apoplecticum, nisi venæsectione servetur, plane non restitui; quem secutus CORNEL. CELSUS eleganter ait, sanguinis detractionem hoc in casu vel occidere vel liberare. Post sanguinis missionem adjicienda sunt, quæ resoluta vasa clementer adstringunt reficiuntque. Quare tunc convenit spiritus nuchæ naribusque admove, eosdemque ori ac naribus infundere. Atque ubi ex animi adfectu vel alia causa spasmodica profectum fuerit malum, addi potest medicamentum spasmos delinens. Conducit quoque clysteribus alvum ducere, ut humorum cursus deorsum avertatur. Denique non negligendæ sunt frictiones calidæ, quibus caput nucha extremæque partes diligenter exercere oportet, ut sanguine ex vasis ad summam cutem revocato, curatio feliciter nanciscatur finem.



DISSERTATIO MEDICA

D E

IN EDIÆ NOXA

ATQUE UTILITATE.

Primum edita Anno 1739.

P R O O E M I U M.



MORTALIUM vitam ac sanitatem sine necessarii alimenti usu neque diu persistere, neque fartam ac tectam conservari posse, res est usque adeo nota, ut Tiresia cœcior esse videatur in dubium hoc vocaturus; experientia hæc satis superque arguente. Plura quidem sunt atque disperse in Scriptorum monumentis obvia exempla de hominibus, qui per complures menses, imo annos, omni victu prorsus abstinuisse traduntur: at quid argumenti huiusmodi habeant narrationes & quantum fidei ipsis tribuendum, exquisitius perscrutari, nec meum est, nec temporis angustia, qua circumscribor, permittit. Non tamen facere possum, quin aperte atque ingenue fatear, complura ejusmodi exempla mihi omnino videri perquam suspecta; iis præsertim omnem & fidem & sanam rationem excedentibus, nec dum ab omni suspitione sublatentis cujusdam doli prorsus vindicatis. Non desunt autem exempla, ubi homines mente capti aliquamdiu ab omnibus escis se continuerunt, ita ut non nisi singulari calliditate ad alimenta denuo capeffenda, fuerint permoti. Occurrit mihi ejusmodi exemplum, quod a carissimo *Fratre Professore Medicinæ ordinario in inclyta Kiloniensium Academia* accepi, de præfecto quodam militari, qui mentis impos sibi habuit persuasissimum, se rebus humanis fuisse exemptum: quo nomine, ut haberet, ubi corpus suum jaceret sepultum, in cellam quandam se abdedit, & omni victu sibi abstinentum existimavit. Qui cum nec amicorum precibus, nec hortationibus, ut alimenta assumeret, permoveri potuerit: callido tandem amici cujusdam consilio hac via a stulto suo jejunandi consilio fuit abductus. Hic nimirum se itidem mortuum simulans, funebri habitu indutum & sandapilæ inclusum, in eandem, ubi alter vere amens occultatus jacebat, cellam deferri se jussit. Quo facto, occasionem nactus est cum mente capto colloquendi, atque eidem persuadendi, nec mortuos in suis sepulcris ciborum usum repudiare, sed potius illum desiderare. Postquam itaque edulia varii generis sibi curaverat transmittenda, iisque vesci inceperat: nec alter ille mente perturbatus dubitavit, se iisdem satiare, hocque pacto vires sui corporis valde labefactas reficere. Complura huiusmodi exempla de hominibus, admirandam inedia perpeffis, qui desiderat, adeat MARCELLI DONATI *Observationes, ut & PAULI LENTULI Hist. de Inedia virginis Apollon. Schreiræ*, ubi varia leguntur enarrata; quæ si adducere & dijudicare deberem hoc loco omnia, ingens liber mihi foret excudendus. Mihimet itaque tantum sufficiat hac Dissertatione dilucidius expedire, quid detrimenti humanæ & vitæ & valetudini accedat ab inedia nimis diu sustentata; quidque contra emolumentum ab eadem, in tempore suscepta, nec longius justo protracta, ipsis proveniat.

§. I.

Quid inedia sit?

Nobis jam expensuris, quid & damni & utilitatis inedia tam in sanitate, quam morbis, afferre valeat: prius explicandum erit, quid hoc vocabulo velimus intellectum, quam ipsi rei eo intelligendæ nos accingamus. Præmissa hac explicatione breviter expediendum quoque erit, quomodo ab aliis vocibus, velut a fame, esurie, temperantia, quibuscum sæpe confundi solet, dissideat, ne alio accipiatur significatu, atque usus loquendi vocolæ huic vindicavit. Est vero inedia qualiscunque abstinentiæ ab ejusmodi cibis, ex quibus, beneficio ventriculi, chylus ad partes corporis nutriendas appositus elici solet.

§. II.

Abstinentiæ vocabulum inedia est generalius.

Generis itaque locum hac in definitione tenet abstinentiæ nomen, quippe quod inediæ verbo generalius est; quemadmodum hoc latinos auctores vel elegantissimos evoluturo clarius apparebit. Namque inediæ verbum ad solam esculentorum carentiam respicit; cum abstinentia etiam ad quævis alia, a quibus & animum & manus cohibemus, referatur. Inediam quippe sustinere is dicitur, qui vel nihil ciborum assumit, vel certe parcius iis utitur, quam pro corporis & virium indigentia: abstinet vere se, qui non modo non victitat; verum etiam qui ab animi cupiditatibus sibi temperat, aut manus a re quadam continet neque aliena aufert.

§. III.

Quomodo differat a fame, esurie, temperantia?

Cognito itaque quid inedia sibi velit (§. I.), non alienum quoque erit leviter perstringere illas differentias, quæ fami, esurie, atque temperantiæ cum inedia intercedunt. Quæ vocabula cum persæpe indistincte & promiscue usurpentur: curatior eorum explanatio omnino necessaria est, ut intelligi possit, quam multum inter se differant. Fames enim est naturale desiderium humanæ menti arcescitum a mutuo illo papillarum nervearum, quibus ventriculi parietes abundant, affricu, quo sibi esculenta porrigi postulat. Quod si hac ciborum appetentia impensior est atque immoderatio; esurie nomine appellari consuevit. Sin vero ea usque adeo immodica existit, ut edendi cupiditas vix ac ne vix quidem expleri satiarique possit, bulimi nomine insigniri solet. Nullius quoque est negotii inediam a temperantia distinguere, quippe quæ cibi & potus appetitionibus modum duntaxat statuit: ita, ut homo temperans tantum eorum adhibeat, quantum ad corporis & animi vires reficiendas necessarium. Non desunt vero, qui temperantiæ nomen cum inedia permiscant, hisque binis nominibus indistincte utuntur. Neque nescii sumus, temperantiam latiori sensu intellectam omnium cupiditatum moderationem complecti: strictius vero acceptam gulæ solum ac ventri moderari, ne plus alimentorum capiant, quam pro vitæ & sanitatis conservatione.

§. IV.

Inedia est vel naturalis, vel

Causas a cibis abstinendi pervestigaturo facile liquebit, inediam esse vel naturalem, vel supernaturalem seu miraculosam. Illa,

vel ex ipsa corporis humani constitutione, ^{supernaturalis.} vel certe ex aliis in hoc universo obviis circumstantiis, commode explicari potest: hæc vero a Deo, admiranda profecto ratione, sanctis viris aliquando concessa legitur. Quæ cum ex mortalium natura neque intelligi neque explicari queat: nec ad nos pertinet nec hujus est loci. Naturalis vero iterum concinne dividitur tam in voluntariam inediam, quam coactam seu involuntariam. Illa in ejusmodi hominibus deprehensa fuit, qui aut falsam pietatis persuasionem induentes, aut malo pravoque animo, aut, ut mortem sibi consciscerent, aut alia quacunque de causa inediam ad tempus tolerarunt. Hæc vero, quæ coacta est, hominibus invitis quandoque in variis morbis usu venit aut mortalibus cæterum sanis accidit; summa videlicet rei frumentariæ inopia exorta; ubi non habent, unde urgentem famam expleant. Utraque tandem inedia, sive voluntate suscepta, sive coacta vel diuturnioris, vel brevioris esse temporis observatur.

§. V.

Prius vero quam ad ipsam rem nos accingamus, operæ pretium facturus mihi videor, si breviter & veluti in transcurso ostendam, quanta edendi necessitas animantibus incumbat; nec non, quare fieri nunquam possit, ut vita ipsis integra & diuturna sine sufficienti alimentorum usu perduret. Consistit vero animalium vita in perenni & orbico humorum per corporis canales motu, a cordis & arteriarum contractione & dilatatione alterna concitato. Quemadmodum id solide more suo demonstratum dedit decus illud seculi nostri FRIDERICUS HOFFMANNUS Præses Patronus atque Præceptor (a) ætatem colendus. Quamdiu hic sanguinis per corporis vasa circuitus, quomodocunque perseverat, tamdiu animal spirare animadvertimus. Eo autem cessante & penitus extincto, vivere illud desiisse comperimus. Sanitatis autem forma nititur tam æquabili, constanti, libero & temperato sanguinis per vasorum alveos progressu, ut omnes inde pendentes functiones cum facilitate & constantia peragi queant (b).

(a) Med. system. T. I. L. I. c. I. cap. 2. pag. 68.

(b) BOERHAAVE Institut. §. I.

§. VI.

Ne vero hic sanguinis in orbem motus justo celerior, sive tardior evadat, aut plane cesset, sufficienti & proportionata liquidorum indiget copia; partim, ne canales cruore nimis exhausti collabantur; partim vero, ne sanguinis mole ac vi obruti atque immodice diducti in officio suo, alterna scilicet contractione & relaxatione (§. V.) impediuntur. Ex physiologicis enim abunde constat, sanguinem non in orbem solum concitari ope systaltici & diastaltici vasorum motus; sed in ultimas etiam quasque vasorum propages protrudi. Quarum aliæ varios & diversos a sanguinis consortio segregant humores eosque ejiciunt: aliæ vero corpori nutriendo inserviunt. Quæ duæ functiones, quum utramque paginam in nostro argumento compleant: non inconsultum erit, curatius discipere, quid sanguini jugi motu circumvoluto, in vasis suis usu veniat. Quo perspecto,

Quid vitæ & sanitas?

Quadam vasorum nutritioni, quadam vero secretionibus vacans.

cto, ex facili erit pernoscere, quid causæ sit, quamobrem mortale genus, ad vitam & sanitatem custodiendam, quotidiani fere victus usque adeo egeat, ut eo substracto, utriusque jacturam faciat.

§. VII.

Intelligimus vero per sanguinem purpureum illud liquidum, ex diversæ naturæ partibus conflatum, quod per corporis vasa perenni motu circumagitur. Sanguineus hic latex quocunque vase, sive arterioso sive venoso, e corpore detractus, inque patina, aeri temperato, quiescens demandatus, in duo dissidentis ingenii partes, alteram scilicet rubicundam in imo vasculi hærentem, quæ sanguis stricte dicitur; alteram vero subflavam magisque fluxam, rubicundæ supernatantem, feri nomine appellatam, sua sponte secedit; testantibus illud viris ab omni laude felicioribus nempe HERMANNO BOERHAAVIO (a) & Excell. SCHULTZIO (b), Patrono & Præceptore ævum colendo. Rubrum hoc concrementum, si a sero superfuso fuerit junctum, & in loco temperato collocatum, pedetentim, sola quiete, fatiscit in liquamen quoddam sero superjecto omnibus dotibus maxime geminum, auctore modo dicto BOERHAAVIO (c). Quodsi vero serum illud, quod congelatum purpureum cruorem contegebat, ab hoc separatum quieti commiseris: spectare licebit, quomodo sensim in liquorem magis ac magis tenuem ultro discedat; qui paucis tandem interjectis diebus in putrem ac foetidam abit uliginem, quæ destillata salem alcalinum volatilem porrigit; observante illud BOERHAAVIO (d).

(a) Chemia Tom. II. P. II. Pr. 114.

(b) Diff. de sang. constit. nat. §. 2.

(c) Aphor. 94. 95.

(d) Chem. T. II. Pr. 115.

§. VIII.

Perspecta jam sanguinis natura, sibimet ipsi relictæ, nec ulla violentia exagitati, expediet quoque elementa illius, quæ chemico igni tortus nobis sistit, brevissime perquirere. Quibus exploratis, luculentius postea patebit, qui fieri possit, ut liquidis nostris sub jugi illo motu per tubulosam corporis fabricam temporis tractu aliena indoles inducatur. Si proinde cruor ex qualibet vena missus, omni prius humido exhalato, retortæ inditur vitreæ, & igni paulatim aucto urgetur; primum exhibet flavescentem spiritum, liquamine oleoso foetum, quem deinde sal candidus volatilis subsequitur, qui vasis parietibus se applicans adhærescit; postremo indidem prodit oleum crassum, nigrum & graviter olens, cum sale volatili pariter junctum; remanente, in vasis fundo, carbone exusto nigro & friabili, qui caput mortuum appellari consuevit. Ecce jam tibi illa, quæ sanguis humanus ignis violentiæ commissus præbet principia; testibus Viris Illustribus FRIDERICO HOFFMANNO (a) & HERM. BOERHAAVIO (b) quibuscum concinit Excell. SCHULZE in pererudita Dissertat. de sang. constit. natur. Hisce itaque experimentis discimus, sanguinem, ex diversi ingenii elementis, velut phlegmate, spiritu, oleo tenuiori & crassiori ac denique terra esse coagmentatum. Salem enim illum

Frid. Hoffmanni Oper. Supplem. II.

volatilem, qui cum oleo in sublime latus est, haudquaquam eadem forma in sanguine antea delituisse, sed demum ignis vi productum fuisse, neminem præteribit, qui vel leviter tantum Chemica doctrina fuerit instructus.

(a) Obs. Chem. L. II. obs. 21.

(b) Chem. Tom. II. Pr. 119.

§. IX.

Est vero ea sanguinis natura, ut tam diu integer persistat, dum in suis canalibus assiduo horum motu concutitur & per eos circumagitur. Etenim, simulac motu vasorum in orbem cieri & agitari desierit, a nativo suo ingenio statim deflectit concrecendo inque foedam putredinem abeundo (§. V. VII.) Hæc considerate perpensuro clarius apparebit, quantæ sit & utilitatis, & necessitatis, ut cruor continenter, nec interrupte per tubulosam corporis structuram circumducatur; ne uspiam subsistens cohærescat inque corruptionem transeat; & hac via corporis salutis interitum afferat atque exitium.

§. X.

At vero, quantumvis cunctæ corporis humani partes uberrimos ex hoc sanguinis circumactu percipiant fructus, (§. V. & IX.), si libere, expedite & pro cuiusvis individui temperatura moderate procedat: confessæ tamen est veritatis, easdem plurimum quoque detrimenti ab eodem hoc motu, inevitabili certe ratione, accipere. Purpureus quippe latex, systolica cordis potentia in vasorum alveos magna vi extrusus, violento impetu in horum parietes illiditur; quos a se invicem diducendo extrorsum urget sicque vasorum efficit distolen. At vasorum tunica in systolen abreptæ, valido renixu in præterfluentem agunt cruorem, quem hac via progredi cogunt. Verum enim vero dum sanguinis globuli omni momento vasorum lateribus valide alliduntur: fieri aliter non potest, quam ut nexus ille corpusculorum, quæ vasorum tunicas cohærentia sua conficiunt, sensim sensimque laxetur, tandemque omnino dissolvatur (a). Quæ cum ab omni cohæsione cum sui similibus & contiguis corpusculis liberata sint: a sanguine præterlabente correpta per corporis canales una circumducuntur (b).

(a) HOFFMANNI Med. Syst. Tom. I. L. I. Sect. II. cap. 2. §. 3.

(b) BOERHAAVE instit. §. 434.

§. XI.

Jam vero, quum id, quod nunc relatum est, universis canalibus, vel tenerrimis quibusque, in dies accidat: liquido inde apparebit, quemadmodum solidis a sanguinis circumactu labes pedetentim & pernicies venire queat. Nec arduum est ex his cognoscere, quare mortale corpus, ad sui integritatem & perseverantiam, perpetua indigeat & nutritione & refectione. Nisi enim quotidie vacuis loculis, ex quibus corpuscula commemorata solida sunt evulsa (§. X.), alia subderentur: nihil profecto dubii est, quin brevi de humani corporis fabrica actum foret (a). Nec obscurum erit ex dictis intelligere, quamobrem mortalibus neque vita, neque sanitas possit esse diuturna; nisi quotidie ejusmodi detrita, per innumeras vias, a sanguinis conubio sejuncta, & corpore exterminarentur.

Y 2

Nam-

Quæ necessitas, ut cruor perpetuo motu in corpore circumagatur?

Quid damni partibus solidis accidat sub motu humorum circulari?

Uterior hujus argumenti persecutio.

Sanguis quid sit? ejusque examen physicum.

Sanguinis examen Chemicum.

Namque cum hæc partium solidarum segmenta partibus corporis nutriendis non conducant, verum potius iis vim afferant: nihil sane consultius est, quam ut per diversa emundatoria a sanguinis consortio separentur, & separata e corpore foras eliminentur.

(a) BOERHAAVE instit. §. 437.

§. XII.

Quid detrimenti ad ipsa fluida redundet ex hoc circuitu?

Verum enim vero ipsa quoque fluida, quæ hoc motu per corporis tubulos feruntur, ab illo suos patiuntur manes. Dum enim vasorum latera validissimo renixu cruorem ad profluum concitant motum: eo ipso sanguinis globuli celerrime reperiuntur; qui valido impetu retrusi collisique invicem se atterunt. Sub quo mutuo & infinite reiterato attritu non globosa solum sua figura privantur; verum etiam usque adeo, destruantur, ut in excrementa tandem varii generis fatiscant; erudite illud demonstrante Illustri FRID. HOFFMANNO (a). Quæ proinde, quum neque corpori humano alendo sint, neque per corporis regiones circumvolvendo: non obscure ex eo cernitur, quapropter ista in dies per tot tamque dissona incernicula foras proscribi necesse sit. Humores itaque omnes vel delibatissimi, quum continuo hoc circuitu in varias sordes & impuritates tandem immutentur: fieri aliter non potest, quam ut iis exclusis liquidorum, vasis replendis, & motui orbico servando necessariorum, debita moles ac vis pedetentim decreseat, ac minor evadat, quam pro canalium amplitudine atque indigentia.

(a) Med. Syst. T. I. L. I. Sect. II. cap. 2. §. 3. it. L. II. c. 4. §. 2. it. obs. Chem. L. II. obs. 21.

§. XIII.

Se- & excretiones vitæ & sanitati servandis non sufficiunt, nisi amissa in dies restituantur.

Haud quaquam itaque satis est, ista ut recrementa, quæ humorum circuitu prognata sunt, per infinitæ multitudinis organa excludantur; verum necesse etiam est, incorruptorum atque extritorum locum in dies alia, tam solidis quam liquidis integrandis surrogari: optime illud probante Illustr. HOFFMANNO (a). Quo nomine locupletissimus omnis generis esculentorum mortalibus suppetit penus, ut abundanter habeant, unde vivere, corpusque suum reficere queant. Namque ex assumtis alimentis, beneficio organorum chylopoëorum, chylus præparatur, qui non sanguini modo, in deperditorum locum, novos suggerit globulos; sed detritis etiam solidis partibus ejusmodi corpuscula supeditat, quæ ipsis de integro apponi, sensimque agglutinari possunt.

(a) Med. Syst. T. I. L. I. Sect. II. c. 2. §. 4. it. L. II. c. 4. §. 3. seqq.

§. XIV.

Chylo partes impuræ mixtæ ad sanguinem deferuntur.

Noli autem putare universas chyli in sanguinem dejecti moleculas ad alendum corpus esse appositas. Experientia enim constat, eum innumerabilibus alienæ & peregrinæ indolis partibus, quas secum ex intestinis advexit, abundare; quæ ad sanguinem traductæ heterogeneas illas augent partes, quæ jam in humorum massa præsto sunt. Ex iis, quæ hæcenus ad satietatem de constanti illa omnium partium corporis mutatione in pejus (§. X-XII.) commemoravi, elucebit, ani-

malia omnia vivendo non solum universas, quibus constant, partes perpetim perdere; verum quoque in dies in amissorum locum novas recipere, ideoque sensim usque adeo immutari, ut vix ac ne vix quidem (si constitutivas corporis partes respicias) sibi consentiant. Neque est, quod hæc pluribus argumentis comprobemus, quum nemo sit, qui perpetuas has vicissitudines, quibus animantia sunt obnoxia, suis oculis non compererit; dummodo animum attenderit, tum ad infinita illa, quæ animal sustinet, se- & excretionum genera, quam ad eorum incrementa & decrements, quæ in diverso potissimum ætatis flexu patiuntur. Quod si itaque requiras causam, quamobrem vita & sanitas, obstante licet illa continua immutatione, nihilominus satis diuturnæ haud raro persistant: non profecto ulla hujus rei alia subest causa, quam quod non detrita solum & in acres spurcicies redacta quotidie e corpore egeruntur; verum quia etiam in ipsorum locum alia perpetim succedunt, quæ vacuas lacunas reficiunt, & ipsos, sub hoc circulari motu in acres & impuras sordes, extenuatos humores perpetim refarciunt, hocque modo & firmis & liquidis partibus suam tuentur integritatem.

§. XV.

Hæc mihi præstruenda esse credidi, priusquam ad inedia noxam atque utilitatem explicandas ingrediar. Iis itaque exploratis, clarius pernotescet, quid damni ab omisso victu in œconomiam animale redungere queat. Utræque enim partes suas luunt pœnas, homine prorsus a cibo capiando, quocunque nomine, abstinente, vel certe non tantum comedente, quantum ad labefactas illas nutriendas & integrandas necessarium est. Cave autem existimes, omnem inediam haberi a me noxiam, corporique perniciosam. Sunt enim, ubi modica & tempestiva ciborum abstinentia insignes affert fructus. Id tamen minime negandum, diuturnam inediam plurimum mali vitæ sanitatique inferre. Quod si enim quis, quantumvis sanus, alimenta per multos dies, quin hebdomades assumere desistit: humores ipsius non sensim modo imminuuntur, ut cursum suum conficere vix valeant; sed adeo etiam acres impuri elapso quodam tempore evadunt, ut tam valetudini, quam vitæ ipsi mala eaque gravissima inferant. Quid? quod nec ab eo partes solidæ immunes manent; siquidem vitium ex fluidis paulatim se in has diffundit, utpote quæ ob nutritionem intermissam suo tono ac robore pedetentim exuuntur. Quæ omnia ex jam dicendis luculentius patebunt.

Noxa inedia indicatur.

§. XVI.

In homine enim cum inedia conflictante cum nihil chyli in sanguinem evolvatur: necessaria liquidorum nutritio omittatur necesse est. Verum quum sanguis nihilo tamen fecius in ejusmodi subjectis tam diu in gyrum quomodocunque ducatur, quoad ducunt spiritum: non potest fieri, quin ipsius humores tandem in excrementa fatiscant; (§. XII.) consentiente mecum Ill. FRID. HOFFMANNO in obs. Chem. (a). Quibus excretis, cum liquida nihil in amissorum locum recipiant: causa

Copia humorum quare in jejunctibus decreseat?

causa inde apparet, quamobrem debita humorum vis ac moles in ejusmodi homine decrescat indiesque minor evadat.

(a) L. 2. obs. 21. it. Med. Syst. T. I. L. II. c. 4. §. 2.

§. XVII.

Experientia testimonio confirmatur.

Ipsa quoque experientia hoc facit testatum in hominibus diu jejnantibus, ideoque fame pene confectis & consumptis. Namque si ejusmodi hominem nobis ante oculos ponamus, imprimis quem obesi antehac & amplissimi corporis fuisse novimus: fane miserabit nos ipse, intuentes attenuatissimum ejus habitum, a priori longe mutatum; qui macie confectus atque omni vivido colore & vigore jam exutus conspicitur. Facies quippe ipsius perpallida, cava lumina, acutus nasus, vox tremens & suppressa, vasa exhausto sanguine vix visui obvia, omnium se- & excretionum imminutio atque insignis illa in toto corpore macies, torpentibus atque infractis viribus animi & corporis stipata, satis luculenter arguunt, ubertatem sanguinis adeo exiguum & parvum vasis esse superstitem, ut vix iis patulis servandis & motui suo in orbem per illa continuando sufficiat; argumento evidentissimo, liquidorum legitimam non solum copiam longa ciborum carentia sensim decrescere, atque extenuari; sed alienis quoque eo ipso indui dotibus.

§. XVIII.

Sanguis inedia in acres salinas partes convertitur.

Neque ullius est negotii ex jam relatis clare perspicere, quo pacto sanguini, inedia, praesertim longius protracta, peregrina paulatim indoles & natura induci queat. Supra dictis enim constat fluida sub perenni illo per canales suos transitu, non pauciora solum fieri; sed creberrimo quoque illo concussu in moleculas acres sensim mutari (§. XII.). Acres istae moleculae, primis quidem inediae diebus, a sanguine disjunctae, foras exturbantur: at quantitate purpurei laticis deficiente, partiumque solidarum viribus attritis, in humorum massa detinentur; ubi tardissimo motu circumductae tandem computrescunt inque acerrimas abeunt quinquilias. Ne vero hac temere nobis dicta existimes: in rem erit nostram, experimenta illa, quae Batavorum illud sidus, incomparabilis BOERHAAVE, cum diversis humani corporis humoribus, velut lotio & sero cepit, hoc loco subnectere; quo liquidius intelligi queat, quid sanguini fiat, si hujusmodi recrementa ipsi permaneant remixta.

§. XIX.

Experimenta Boerhaavii cum lotio suscepta.

Observatum vero est indefesso huic naturae scrutatori (a), urinam sani hominis naturalem duodecim horis a pastu redditam, & in vase quocunque, aeri temperato triginta graduum expositam, a natura sua ita desciscere, ut incipiat olere, putrere, colorem citrinum mutare in obscure fuscum; & crassis faecibus depositis, paucorum dierum interjectu, alcalinam lixiviosam induere naturam. Id quod tanto citius, faciliusque lotio contingere animadversum est, quanto tempus, quo experimenta haec instituuntur, est fervidius, velut adulta, aut praecipiti etiam aestate. Ut autem exploratum quoque habeat, quid urinae in vase clauso reconditae, Frid. Hoffmanni Oper. Supplem. II.

& ab aeris ambientis aditu munitae eveniat; istam in vase quodam vitreo, ita ut lagenam repletet, subere arte impresso, in locum moderate temperatum seposuit. Quam deinceps, elapsis tribus mensibus, sua sponte mutatam, atque omnibus iis dotibus deprehendit indutam, quibus lotium in priori experimento praeditum cognovimus. Urina scilicet ita digesta, non a naturali suo tantum colore desciscens, sensim duxit obscuriorem: sed manifestum quoque foetorem spiravit alcalinum, longe ab eo diversum, quem recens prodere solet. Quid? quod cum lotium ita digestum (b) ex cucurbita vitrea destillando urserit: prodiit inde aqua foetida, acris, ignea, prorsusque alcalina & cum acidis admixtis violentissime effervescentes; quae alto ex vase leni igne denuo acta salem album, acrem, solidum penitusque alcalinum exhibuit; remanente in vasis fundo, uligine ingrati & foetoris & saporis.

(a) Elem. Chem. Tom. II. Pr. 100.

(b) item Pr. 101.

§. XX.

Quae urinae obvenisse hactenus vidimus: eadem quoque sanguinis sero, vitro quodam mundo excepto, & quieti atque calori septuaginta graduum commisso accidisse, eodem teste (a) didicimus. Occipit enim in horas mutari, paulatimque tenuius evadere; ita ut triduo vel quadriduo praeterlapsa in liquamen saniosum fatiscat gravissime olens; id quod per aliquot dies in calore definito adhuc detentum in putridam, graveolentem atque alcalinam abit illuviem, quae cum affusis acidis prompte confligit & destillata salem alcalinum porrigit.

Ejusdem experimento cum sero.

(a) Chem. T. II. Pr. 115.

§. XXI.

Experimenta haec qui exquisito examine perpenderit, facile ex illis augurari poterit, quid hominibus inedia diu maceratis contingat. Nam quum ex supra memoratis manifestum sit, liquida vitalia in ejusmodi homine adeo esse exhausta atque imminuta, (§. XVI.) ut ob parvam, quae vasis adhuc superstes, molem, lentissimo motu circumagantur: nemini non patefcat, iusta humorum copia deficiente, minimos vasorum surculos sanguine vix irrigari posse, eosque ita collabi atque evanescere. Id quod etiam satis superque liquet ex illo colore perpallido, quem ejusmodi fame confecti homines ostendunt. Jam vero, quum secretionem omnes in minimis duntaxat fiant vasorum propaginibus: apparet inde, cur his oclusis, vel certe minus patentibus, acres istae & peregrinae sordes, in sanguine hospitantes, ab eo non sufficienter sejungantur atque foras exigantur.

Cur se- & excretionem in diu jejnantibus jaeturam faciant?

§. XXII.

Verum enim vero, quantum detrimenti ab ejusmodi recrementis in sanguine residuis ad solidas & liquidas emanet partes, non obscure patebit praedicta experimenta (§. XIX.) in memoriam revocatur. Non enim dubium est, quin iisdem per complura colatoria, velut renes, cutim &c. alias vacuari solitis, jam vero in massa sanguinea relictis, eadem

Noxa, quae inde in corpus redundat.

eadem mala usu sint ventura, quæ lotio & fero in enarratis experimentis accidisse deprehendimus. Nec video, quid impediatur, quo minus lotium & perspirabile serum, si in sanguine remanent, vel in ipsis vasis, eadem subeant mutationes, quas in relatis experimentis passas esse comperimus; non obstante illo jugi motu, quo per corporis canales circumvehuntur. Testimonio enim illius experimenti, quod BOERHAAVE cum lotio in vase clauso instituit, in confesso est, ejusmodi recrementa, sub perenni sanguinis circulo in corpore prognata, ibique retenta & calore fota interjectu temporis putrescere, acerrima evadere, atque indolem prorsus induere alcalinam. Neque existimem, fore, ut aliquis de hoc dubitaturus sit; dummodo secum reputaverit, quantopere diu jejnantibus sanguinis copia indies imminuatur (§. XVI. XVII.). Qui ergo continenter attenuatus atque diminutus, non ea, qua decet, vi in vasorum latera agit, ipsaque extrorsum urget; unde hæc languidius in cruorem reagent. Infraacta vero vasorum resistentia, non aliter fieri potest, quam ut liquida tardius iusto circumvolvantur. Quæ ergo lentius mota, hocque modo sibi relicta & calore fota quantulocunque, in sales alcalinos oleaque volatilia acria fatiscunt. Quemadmodum enim sanguis motu validiore agitur in hujusmodi acria resolvitur excrementa (a): ita quoque languidiori motu circumductus sibi permixtus sensim a se ipso deficit, inque corruptionem transmigrat.

(a) BOERH. aph. §. 100.

§. XXIII.

Experientia excrementorum acrimonia confirmatur.

Ipsa quoque attentior observatio hæc luculenter arguit in hominum ejusmodi excreta inquirendo; quæ abunde istam prodere solent acrimoniam, qua ipsorum sanguis inquinatus est. Saliva enim, quam exspuunt, luculentum exhibet hujus acrimoniæ testimonium, docente BOERHAAVE (a). Sic quoque gastricum liquidum satis mordax in diu jejnantibus esse deprehenditur, testante eodem BOERHAAVE (b). Exiguum quoque illud lotii, quod reddunt, & foetore nares graviter feriente & sapore suo acerrimo, manifestum est indicium alcalinæ illius corruptelæ, qua sanguis ipsorum depravatus est. Testimonium exhibet PAULUS LENTULUS in historia inediæ, quam toleravit virgo Apollonia Schreiera p. II. Neque ullum est dubium, quin omnes cæteri humores æque manifesta indicia putredinis incipientis fuerint prolaturi, atque illi, quos nominatim appellavimus; dummodo curatius illos contemplari medentibus fuisset integrum.

(a) Inst. §. 66.

(b) Ibid. §. 77.

§. XXIV.

Quæ mala ad solidas partes transseant.

Perspecto igitur detrimento, quod humores ex diuturna inedia capiunt, in eo est, ut brevi dicam, quæ mala ex eodem fonte ad solidas partes manent. Nolo autem dedita opera longus esse in commemorandis calamitatibus, quæ ventriculus & intestina inde accipiunt. Sed istarum meminisse refert, quæ in firmas partes se diffundunt. In eo autem totius rei cardo potissimum vertitur, quod pri-

mo necessaria ipsorum nutritio in ejusmodi hominibus pene cesset; deinde vasa corporis conspectiora, ob liquidorum penuriam in dies ingravescant, sensim coarctentur, minora vero penitus coeant; postremo quod ipsis paulatim subtrahatur, unde robur & vis eorum systaltica maxime pendet.

§. XXV.

Quum enim perpetuo hoc solidorum attritu ab irrequieto sanguinis per illa circuitu, innumerabilia sane corpuscula, quæ cum aliis sui simillimis connexa vasorum parietes constituunt, avellantur (§. X.) lacunis istis replendis alia esse intrudenda necesse est. Jam vero, quum nihil chyli, homine impasto, ad sanguinem accedat: nutritionis quoque cessat negotium. Nec difficile erit etiam intellectu, quamobrem canales corporis insigniores, pedetentim angustiores evadant, ultimis eorum ramulis prorsus collabescentibus. Justa enim vasorum distensio & dilatio solis tandem liquidis, quibus implentur, in acceptis est ferenda. Sanguinis ergo copia quotidie extenuata, nec denuo integrata, vasorum quoque parietes, ut propius ad se invicem accedant, est necesse.

§. XXVI.

Quid tandem causæ sit, quare systole atque diastole vasorum in hominibus inedia longinqua maceratis elanguescat, obscurum non erit cogitatur, quæ de intermissa vasorum refectione necessaria admodum (§. XXV.) dicta sunt; deinde alternantem hanc ipsorum contractionem & remissionem delibatissimo cuidam fluido, per nervos vasis quibusque allabenti; potissimum deberi; fusius illud demonstrante Illustr. FRID. HOFFMANNO (a). Deficiente autem chylo, deest quoque ex quo ejusmodi humor subtilissimus omnium reparari ac refici debet: confirmante illud Ill. FRID. HOFFMANNO (b). Hinc minime mirum est, desiderato hujusmodi liquido nerveo, quod corporis partes movendi potentia instruit, systalticam quoque & diastalticam vasorum vim torpescere, atque adeo a suo movendi officio desciscere.

(a) Med. Syst. T. I. L. I. Sect. I. c. 4. §. 10.

(b) ibidem Sect. III. c. I. §. 5.

§. XXVII.

Postquam ita cognitum habemus, quid vitii, tam solidæ quam fluidæ corporis faciant partes, homine epulis per longum temporis intervallum abstinentes: perspicuum jam inde erit, quantæ sit necessitatis, ut sanguini nostro propemodum indies novus accedat chylus. Ea quippe chyli est natura atque indoles, ut sibimet ipsi relictus facile ace scat; omnibus contra aliis humoribus ad alcalinam corruptionem propendentibus, consentiente Ill. HOFFMANNO (a). Argumento nobis esse potest ipsum lac sanorum animantium; utpote quod nihil aliud est nisi chylus paulum immutatus, solide illud probante Ill. FRID. HOFFMANNO (b). Id quod si sibimet commiseris, in aëre puro & sub tepido collocatum, quiescendo acescere; tandemque penitus in acidum degenerare deprehendes, observante illud Cl. BOERHAAVE (c). Haudquaquam vero sufficit, ut ea tantum resti-

Quare vobur solidorum attenuatur?

Ulterior materia hujus tractatio.

Chyli novi necessitas in corpore humano.

tuantur, quæ solidis & fluidis detritis fuerunt perdita: sed ut acria ista etiam, quæ in corruptelam transeunt alcalinam, oleosis chyli partibus involvantur; ne acrimonia sua sanis adhuc partibus vim inferant easque destruant. Humana vero liquida, quum vel celerius iusto, vel languidius per tubulos corporis provoluta, dotibus alcali volatilii condonari incipiant (d): clare liquet, aciditas chyli partes, si ejusmodi alcalinis corpusculis fuerint obviæ, cum his esse concreturas in salem neutrius generis, humanæ naturæ amicissimum.

(a) Med. Syst. T. I. Sect. I. c. 5. §. 14-17.

(b) Ibid. Sect. c. 14. §. 2. 3.

(c) Chem. P. 2. Pr. 99.

(d) BOERH. Aph. §. 80. & 100.

§. XXVIII.

Et quam ob causam quotidie accedere debet.

Quod si vero causam requiris, quamobrem quotidiana fere chyli renovatio homini cuicunque, vel sanissimo, sit necessaria: habeto chylum sanguini infusum viginti quatuor horarum spatio, necessaria sua utilitate ac præstantia omnino esse exutum, BOERHAEVE egregie hoc annotante (a). Hoc enim temporis tam solidis partibus nutritionem jam præstitit, quam utiles & blandos humores sanguinis & copiam & integritati tuendis idoneos peperit. Quicquid vero reliquum inde fuit, jam in varii generis recrementa acria & spurca abiit. Quocirca, ut ejusmodi acria obtundantur atque involvantur, novus chylus sanguineæ massæ reddendus est, cujus blanda & acescente natura ejusmodi acria velut irretiuntur. At vero, si digestionis negotium aliquandiu intermittitur, nihil profecto erit certius, quam ut talia ramenta in sanguine fluctuantia sensim computrescant, atque tantam contrahant acrimoniam, ut incolumitati reliquarum partium parent exitium.

(a) Aphor. §. 80.

§. XXIX.

Ratio, quare in febribus acidula convalescant?

Omnium itaque oculis erit testatius, quam plurimum referat in omnibus iis febribus, ubi sanguis celeriori cursu canales pervadit, velut in ardentissimis, inflammatoriis atque malignis quibuscunque, alimenta moderate acida ægrotantibus offerri; seu aquosa, cum ejusmodi nutrientibus combinata, quæ blandum atque acidulum sanguini chylum, vel chylo quid proximum, subministrant. Quum enim his in morbis, præcipue vero malignis, humana liquida ejusmodi putrescentibus & alcalinis summæ activitatis sordibus jam redundant, violentissimo sanguinis motu enatis (a): non obscure ex iis comparebit, quam sit necesse, ut aquosa non solum ægris præbeantur; sed ea quoque, quæ sanguini chylum blandum & subacidum, vel certe dotibus ipsi similibus præditum, suggerant, ut accipiant, unde acria ista & salina volatilia figi atque subigi queant.

(a) HOFFM. Med. Syst. T. III. Sect. II. c. 1. §. 13.

§. XXX.

Noxa inedia diuturnæ in febribus.

Vix igitur satis dici potest, quantum ad talia salina inquinamenta perdomanda ptisanæ, ex avenaceis ex hordeaceis cæterisque similibus farinosis paratæ, faciant, cum acidulis blandioribus conjunctæ; quippe quæ,

salina ista acria obvolvendo, & sanguinis particulis se interjiciendo, impediunt, quominus illæ se immediate contingere & mutuo atterere possint. Quamobrem haud obscure inde elucebit, quantopere exquisita ab omni nutriente abstinentia ejusmodi ægrotis officiat, & quam male cum iisdem agatur, si ipsis modico alimentorum usu interdicitur. Hoc enim factum, nihil certius eveniet, quam ut ista salina & oleosa volatilia acria, quæ sanguini innatant, quum sibi met permissa sint, in dies multo acriora evadant.

§. XXXI.

In antecedentibus noxa & solidorum & fluidorum ex continenti sanguinis motu prolixè satis indicata est, quomodo scilicet in varias sordes atque fæces convertantur: quam ob causam istæ perpetuo a sanguinis consortio segregandæ & proscribendæ: & denique quamobrem tam solidis, quam fluidis, nutritione eaque quotidiana fere opus sit. His jam expositis, in eo est, ut breviter quoque dispiciamus, quosnam inedia morbos diutius tolerata humano corpori pariat. Si quid vero his in morbis maxime venit annotandum: certe est illa spontanea humorum corruptio, & in alcalinam naturam mutatio, quam sensim sensimque induunt, si sanguinis penuria ingravescit, & recrementa dicta, ob se & excretiones diminutas, pedetentim aggerantur. Quanta enim, quamque exitiosissima inde humano corpori nascantur mala: cuicunque facile liquebit, experimenta (§. XIX.) descripta considerate perpensuro; ubi lotium, in vase licet occluso, moderato calore fotum, in putrem alcalinæ naturæ uliginem deprehendimus immutatum. Quanta autem alcalinorum volatiliū vis sit atque efficacia ad putredinem vitalibus liquidis induendam, ex chemicis adeo notum est, ut operam sane tempusque contererem, demonstratum illud hoc loco iturus.

Morbi, qui ex inedia oriuntur.

§. XXXII.

In numerum itaque morborum, qui abstinentiæ ciborum diuturniori suam debent originem, maxime veniunt referendæ febres omnis generis putridæ & contagiosæ, velut catarrhales malignæ, petechiales, castrenses, pestilenciales; dysenteria maligna & complures ejusdem indolis aliæ, quas identidem epidemice in mortale genus sævire & per vicos atque urbes, quin imo per multas gentes, late stragem edere, tristissima, pro dolor! experientia comperimus. Non quidem inficias ivero, ferales hos quoque morbos mortalibus haud insolenter a causa quadam externa, nimirum a subtili quodam putrefaciente inquinamento, per aërem disseminato, atque inde vitalibus liquidis tacite subrepente, conflare, cum observatione ipsa hoc sit exploratissimum: at vero consentaneum est, tale miasma, iis hominibus, quos invadit, vix ac ne vix quidem tantam cladem esse illaturum, nisi vim ipsorum vitæ jam undelibet labefactatam & attritam, aut humores largo impuratum & recrementorum proventu contaminatos inveniret, quos igitur in motum intestinum auctiorem conjectos facile ad foedam & funestam traducere valet

Ultior hujus materiae tractatio.

putrefactionem. Jam vero quum mihi sit animus has afflictiones eatenus hoc loco pertractare, quatenus ab inedia pariuntur: nihil attinet, de ejusmodi contagioso veneno per aërem disperso multa hoc loco proferre.

§. XXXIII.

Ratio
quare
morbi
maligni
ex inedia
proveni-
ant.

Perniciosos vero hos morbos sapius quoque ex perpeffa longiori inedia ortum capere suum, nullo extrinsecus in hujus liquida irrepente inquinamento, dilucide apparebit causam & fomitem horum affectuum pervestigaturo. Videmus quippe, ejusmodi mala illis maxime hominibus suboriri, quorum sanguis fordibus salinis & oleosis acribus affluit; quæ in auctiorem motum intestinum & putredinosum, quacunque etiam causa, abreptæ, tam firmas quam liquidas corporis partes corrumpunt ac destruunt. Formalis enim omnium malignarum febrium causa maxime sita est in intima mixtionis partium corporis resolutione, adeoque in perfecta ipsarum putrefactione. Jam vero quum ex iis, quæ supra uberius diximus, perspicue compareat, homines, diuturna fame propemodum absumptos, ingenti recrementorum potissimum salinorum volatilium & oleosorum acrium abundantia esse præditos: nemini profecto mirum videbitur, cur id genus mortalium hujusmodi putridis atque exitalibus morbis omnium præcipue pateat.

§. XXXIV.

Experien-
tia id con-
firmat in
castris &
urbibus
obsidione
cinctis.

Ac profecto, quoties nonne vulgaris experientia hæc, eheu! abunde facit testatum? Deprehendimus enim, illos mortales contagiosis hujusmodi morbis præ aliis tentari, qui ob annonæ difficultatem fame per diu cruciati ac prope enecti fuerunt. Hinc non insoleme est, illas regiones ejusmodi epidemicis & feralibus morbis, id potissimum temporis, infestari, quo longa præcessit annonæ caritas, ubi incolæ, vel famis injuriam diutius perferunt, vel certe obviis quibuscunque, quæ non sunt esui, sese ingurgitant, ut famem urgentem, qua CICERONE teste nihil miserius, utcunque compescant. Sic multo quoque usu cognitum est, febres omnis generis castrenses, inque primis malignas dysenterias, quin imo pestilentiam, per urbes, diutina obsidione ab hostibus cinctas, aut per castra, si hæc commeatu, aut frumento sunt interclusa, incidere, & militibus maxime gregariis cladem inferre; non certe ulla alia ratione, quam quod corpora ipsorum longinqua, quam tolerarunt, inedia, & sanguine & viribus magnam partem sunt exhausta. Purpureum itaque liquidum, quod restitat, quum iter suum in conspectioribus tantum vasorum alveis tardissime conficiat; minimis ipsorum propaginibus, vel plane collapsis, vel secernendo humori minus perviis, ut magno omnis generis sordium proventu pedetentim scateat, sensimque in putredinem ruat, necesse est. Qua itaque in ipsis humoribus corporis humani orta, utique aliter fieri non potest, quam ut tales putridi & contagiosi inde emergant morbi, quorum semina putrida aliis corporibus, quantumvis specie sanis, adspersa & communicata, ipsis similem inducunt corruptelam.

Clare itaque ex dictis liquebit, quare vis hujusmodi morborum longe lateque haud raro se diffundat, atque ingentem mortalium stragem edere soleat.

§. XXXV.

Equidem non inficior, homines, vel robustissimos & sanguine plenos, ejusmodi febribus putridis subinde corripì, si quocunque nomine sanguinem ita commoverunt, ut citatissimus feratur per corporis vasa. Quo in casu liquidis sub constanti & velocissimo motu eadem accidere necesse est, quæ supra fufius (§. XII.) demonstravi. Fluida quippe & solida, velocissimo sanguinis motu detrita, dissolvuntur in sales & olea; quæ, pergente hoc motu, nimis attenuantur & volatilia redduntur. Hæc si in corpore sensim coacervantur, sibi met ipsis permixta, suam sequuntur naturam, abeundo in putrida & summæ activitatis recrementa, quæ tam solidis quam fluidis foedam conciliant putredinem. Hæc vero quum genitrix dictorum morborum sit fecundissima: clare jam intelliges, quam ob causam commemorata mala corporibus ceteroquin prospera valetudine fruentibus, venire etiam subinde possint frequentissima. Unus enim idemque effectus a pluribus interdum ac dissidentibus inter se causis proficisci potest.

Quomodo
oriantur
hominibus
sanis?

§. XXXVI.

De industria tacitus ista damna prætereo, quæ ventriculus & intestina ab intermisso victu accipiunt, ne rebus per se claris atque ex jam dictis intellectu facilibus immorer. Missis his, jam ad utilitates, quas modica a cibis abstinentia quandoque affert, exponendas ingredior. Non enim temere supra (§. XV.) jam dixi, opportunum & in tempore susceptum jejunium, utique nonnullis ægrotantibus magno usui esse. Quemadmodum quoque priscis jam Medicis hoc pernotuisse videtur, utpote quibus inedia jam ab omni memoria in magno semper fuit pretio. Quapropter eam debita sua laude non fraudandam existimavi, præsertim, quum sint, ubi moderata ciborum abstinentia omnino locum invenit.

Usus in-
ediæ.

§. XXXVII.

Magno itaque sanitatis commodo temperata commendatur inedia, per intervalla suscipienda, illis hominibus, qui perquam obesi & crassissimi corporis sunt, ideoque pinguitudine laborant; ubi pingue illud, in cellulis adiposis reconditum & sua abundantia corporis partibus molestum, sensim colliquefciendo, sanguini refundit, atque ita graciliorem ipsis reconciliat habitum. Quamvis enim id hominum genus aliquamdiu cibatu omni se abstineat: tantum tamen abest, ut damnum inde faciant; ut potius permolesto sibi suo corporis onere inedia hac plurimum se levatos sentiant. Non negari quidem potest, liquida, vel in habitioribus hujusmodi corporibus, in dies singulos continenti sanguinis motu itidem sensim deteri, & in salina acria extenuari, quæ pariter involventis cujusdam egent. At quum homines obesi locupletissimo partium oleosarum

Inedia
obesis con-
ducit.

atque

atque nutrientium penu instructi sint; unde natura ipsa, nullo in sanguinem delato chylo, blandas alibiles moleculas depromit, & sanguini immiscet ad acria irretienda: in propatulo erit, quare corpora pingua non multo facilius solum famem perferre queant, hominibus macris; sed indidem quoque magnum fructum percipiant.

§. XXXVIII.

Et plethoricis.

Expedit quoque ciborum usu illis interdicere, qui ingenti cruoris ubertate redundant, modo cautio sit, ne se- & excretiones ipsis imminuantur, vel omnino inhibeantur, quo recrementa illa acria, sanguinis motu progenita, constanti successu per cutim potissimum & renes foras exigantur. Hac quippe via impeditur, quo minus generata ista acria in sanguinis massa accumulari possint. Ipsa vero sanguinis redundantia moderato jejunio, alternis subinde repetendo, paulatim diminuitur, inque excrementitios discedit humores; qui per emunctoria constanter e corpore educti, sanguinis affluentiam sensim sensimque ad justam proportionem perducunt. Qua obtenta, jejunio statim plethorico desistendum, & cibus modice utendum; ne quid detrimenti ab esurie diutius æquo protracta capiat.

§. XXXIX.

Et caco-chymicis.

Magni quoque est usus temperata abstinentia in caco-chymia acida, vel si mavis, scorbutica, ubi acidorum copia delinquit. Quum enim (§. XXVIII.) dictis luculenter constet, eam esse chyli nostri indolem, ut suo ingenio facile coalescat, quin imo, suæ naturæ traditus, reapse in acidum transmigrat: haud difficile cognoscetur, hæc tanto facilius, certiusque chylo in corpore caco-chymico esse obventura, quanto abundantius ejusmodi impuris atque acidis succis scatet. Verum est & compluribus a BOERHAAVE institutis satis evictum experimentis, in sanitate integra, nec acida, nec alcalica; sed salia duntaxat mediæ naturæ in corpore generari (a). Acida enim, cum chylo sanguinem ingressa, vi vitæ ita immutantur, ut non sint talia amplius: id quod etiam alcalinis cum chylo in sanguineam massam devolutis contingit. At vero cum in dyscrasia humorum acida tam largus acidorum proventus in sanguine jam exstet; & illa corporis vis, qua tum acida, tum alcalina, in blandas neutrius generis partes converti debent, in caco-chymicis jam valde labefactata sit: certo certius est, adventantes cum chylo partes in ejusmodi corporibus, acido multo instructis, suam ipsius naturam esse sequuturas, inque acidum degeneraturas.

(a) Chem. Tom. II. Pr. 92. p. 305.

§. XL.

In morbis ab acido provenientibus.

Proinde multum quoque confert modica abstinentia ad omnes illos morbos, qui ab acido in massa humorum redundante suos ducunt natales; quos si autem omnes, mihi nimis longus sermo foret. Ex tanto eorum numero mihi hoc loco tantum sufficiat venereæ luis meminisse. Quantopere ipsi tollendæ abstinentia ab omni cibo conducatur; nemini obscurum esse potest, qui

egregium illum, quem ULRICUS ab HUTTEN de curatione hujus mali evulgavit, tractatum unquam eolverit. Ostendit enim ibi inedia, vel certe parcissimum ciborum usum, plurimis scæda hac lue affectis salutis fuisse, præter quem nihil nisi decocto ligni guajaci & lenioribus alvum laxantibus ad hoc malum debellandum usi sunt; cui etiam BOERHAAVE assentit. (a) Acidum vero quoddam hoc in morbo omni jure accusari posse, omnium doctissime demonstravit Ill. FRID. HOFFMANNUS PRÆSES. Actum igitur agerem, pluribus hic argumentis probaturus; venereum miasma acidæ esse indolis.

(a) In peculiari tractatu & Aphor. §. 1458.

§. XLI.

Neque caret moderata inedia insigni sua utilitate in ventriculi & intestinorum morbis, vel ab insigni hujus debilitate, vel cruditatibus acidis, quin viscidis provenientes. Quo nomine etiam in malo hypochondriaco & hysterico, anorexia, dyspepsia aliisque id genus morbis, qui sedem suam in ventriculo habent fixam, multum prodest, dum modo non nimis diu sustineatur; verum potius, prout corporis & vires, & ipse morbus eam perferunt, per intervalla tantum suscipiatur. Quemadmodum enim quæcunque vel innocentissima, si modum excedunt, nocere possunt: ita quoque ciborum abstinentia, diutius justo extracta adeoque immoderata, vel iis præcepta, quorum vires summopere attritæ atque exhaustæ sunt, plurimum damni affert.

In ventriculi & intestinorum morbis.

§. XLII.

Animus si mihi esset hoc loco in laudes inediæ moderatæ excurrere atque ostendendi, quibus morbis illa subinde sit præsidio latissimus sane mihi pateret differendi campus. Ne igitur sermo de abstinentiæ noxa & usu longius excurrat, quam dissertationis termini permittunt, eam facio missam; breviter duntaxat ostensurus quare vetustissimis Medicis inedia semper fuerit celebratissima. Quanti enim abstinentiam venerabilis antiquitas omni memoria fecerit: nemini ignotum esse poterit, nisi in re litteraria hospiti & ignaro. Constat enim inde, primum ASCLEPIADEM, qui Prusiæ Bithyniæ urbe natus, inde Romam se contulit (a), cum Themisone Laodiceo, famigeratissimo Methodicæ sectæ auctore (b), plures morbos sola sæpe abstinentia feliciter curasse; CORNELIO CELSO memoriæ hoc prodente, ut qui aureolo suo de Medicina libello (c); *Asclepiades, ait, ubi ægrum triduo per omnia fatigaverat, quartum diem cibo destinabat. At Themison nuper, non quando cœpisset febris, sed quando desisset, aut certe levata esset, considerabat, & ab illo tempore expectato die tertio, si non accesserat febris, statim; si accesserat, ubi vel ea desierat, vel, si assidue inhærebat, si certe se inclinaverat, cibum dabat.*

Quantum inediæ antiquitas fecerit?

(a) STOLLE hist. der Medic. Gelahrtheit p. 36. it. Le CLERC Hist. de la Med. pag. 392.

(b) STOLLE L. C. pag. 44. it. Le CLERC p. 439.

(c) L. 3. c. 4.

§. XLIII.

§. XLIII.

*Theſſalus
quantum
fecerit?*

Sic quoque de Theſſalo, qui imperante Nerone vixiſſe dicitur, relatum legitur: ipſum primum omnibus ægrotis, ſe ipſius curationi tradentibus, ſedulo præcepiſſe, ut tribus primis morbis diebus cibis plane abſtinerent; quod jejunium tridui diatriton appellarunt (a). Quo diatrito ſpatium illud ternorum dierum, quibus ægrum victu prohibebant, intellectum voluiſſe fertur; minime vero ipſam a cibis abſtinentiam; uti Goræo perperam viſum eſt, probante illud CLERICICO (b). Quo factum, ut cuncti Methodicorum ſectæ addicti, Theſſalo præeunte, ſe legi huic poſtea adeo exquisiſſe adſtrixerint, ut Diatritarii inde etiam fuerint nominati (c).

(a) Le CLERC L. C. p. 45.

(b) ibid. p. 473.

(c) STOLLE Libr. c. p. 51.

§. XLIV.

*Testimo-
nia Celsi,
Heracli-
dis &
Celsii Au-
reliani.*

Nec ipſe CORNELIUS CELSUS opportunam abſtinentiam improbaſſe videtur, quia abſtinentiam, ſua ipſius experientia edoctus, valde commendat (a). Diſerte enim perhibet (b): *initia morborum primum famem ſitimque deſiderant: & alio loco (c), igitur, inquit, ſi quid ex his, quæ propoſita ſunt, incidit, omnium optima ſunt quies & abſtinentia, proximeque abſtinentiam ſumendus eſt cibus exiguus.* Porro de diverſis curationum generibus (d), æger, inquit, *abſtinendus a cibo primis diebus eſt*: itidem citato capite, *in pluribus*, ait, *ad initium cibi dies quartus aptiſſimus eſſe conſuevit.* Quod haud obſcure prodit, ipſi veterum diatriton haud diſplicuiſſe, quamquam illud non perpetuum exegerit. Quid? quod HERACLIDES TARENTINUS in curatione febris quartanæ uſque eo proceſſiſſe ſcribitur, ut ægrotos ad ſeptimum uſque diem inedia maceraverit, teſte eodem CORN. CELSO, illum ita reprehendente (e): *quo minus etiam curatio Heraclidis Tarentini probari debet, qui primis diebus ducendam alvum, deinde abſtinendum in ſeptimum diem duxit.* CÆLIUM quoque AURELIANUM, qui Sorani diſcipulus fuiſſe (f), ac complura dogmata ex ejus monumentis conſcripta & nobis ſervata reliquiſſe dicitur, veterum diatriton plurimum feciſſe, paſſim in ejus libro *de morb. chron. & acut.* obvium eſt & perſpicuum. Teſtatiſſimis enim verbis proſert, adhibendam eſſe in apoplexia abſtinentiam uſque ad primum diatriton: item eodem loco alternis diebus in hoc morbo cibum eſſe dandum (g).

(a) Libr. 3.

(b) Libr. 2. c. 16.

(c) Libr. 3. c. 2.

(d) Libr. 3. c. 4.

(e) Libr. 3. c. 15.

(f) CLERICUS Hiſt. Med. p. 455.

(g) Libr. 3. c. 5. p. 203.

§. XLV.

*Hippocra-
tis & re-
centiorum
de inedia
ſententiæ.*

Ipfum quoque Medicinæ Parentem magnum HIPPOCRATEM in magno pretio habuiſſe opportunam a victu abſtinentiam, liquido ex ejus monumentis apparet: dum in *L. de vet. Medicin.*: *fames*, ait, *plurimum poteſt in hominum natura ad ſanitatē.* Nec

deſunt ex recentioribus Medicis complures, qui inediæ, opportuno tempore ægrotis præſcriptæ, multum laudis atque utilitatis attribuant. E quorum cenſu nobis hoc loco allegare liceat JOHANNEM FERNELIUM, qui in *L. de Morb. cauſ.* diſertis verbis teſtatur, ſe longiori inedia, aut tenuiori parcioreque victu aliquando morbos vel periculōſiſſimos quoſque & maxime ancipites feliciter debellari, ubi medicamenta nequicquam fuiſſent adhibita. Nec diſſentit ab his Ill. HOFFMANNUS PRÆSES, qui perdocta ſua *Diff. de inedia magnorum morborum remedio*, præclare demonſtravit, quantæ ſit illa efficaciæ, tempeſtive in uſum vocata, ad varios eoſque graviſſimos morbos, & mature prævertendos, & ſi præſto ſint, proſligandos.

§. XLVI.

Nec difficile erit reddere rationem, quæ priſcos medicinæ antiſtiſtes olim permoverit, curationis ſuæ initium, jejunio tridui adornare. Nam quum animadverterent, pleroſque, qui mortalibus evenire ſolent, morbos, victui, vel juſto pleniori & copioſiori; vel inconvenienti, crudo atque inordinato, unde multæ cruditates & impuritates ſtomacho & corpori fuiſſent prognatæ, acceptos merito eſſe ferendos: crediderunt, cruda hæc atque indigeſta, quæ partim in ventriculo, partim in vasis corporis ſtabularentur, non ulla magis compendiarie via corrigi poſſe, niſi ut ægro per tempus omni cibo interdiceretur; quo viſ vitæ eo facilius cruda illa & incocta, quæ ventriculum onerarent, digerere atque emendare valeret. Quibus itaque ſubactis & in melioris notæ ſuccos tractis, oblata ægrotanti medicamina, ipſius morbi vim promptius fore aggreſſura. Quemadmodum hæc non obſcure iis perſpici queunt, quæ in CORN. CELSI & CÆL. AURELIANI monumentis, poſteritati relictis, relata extant.

(a) Libr. 3. c. 4.

§. XLVII.

Quamvis vero commemoratis hiſce veterum medendi præceptis non ita ſubſcribamus, ut inediam quibuſcunque morbis proficuum & ſalutarem exiſtimemus; aut diatriton illud omnino adprobemus: certum tamen eſt, & multorum experientiſſimorum Medicorum ſedula annotatione abunde confirmatur, opportunam largioris victus interdictionem, atque adeo modicam inediam, ad plures eoſque ſatis pertinaces morbos, tam coercendos, quam penitus vincendos, plurimum valere: quemadmodum hoc ex illis, quæ ſupra de abſtinentiæ emolumento in medium prolata ſunt, liquidius adparebit. In eo autem, quod ægrotos primo diatrito ab omni potu & cibo plane detinuerint, iſtis adſtipulari minime poſſumus. Plura qui deſiderat, CORNELII CELSI dignos cedro libros adeat, ubi Aſclepiadis, Themifonis, Heraclidis aliorumque priſcorum medendi methodos fuſius relatas inveniet. Licet vero ipſe CELSUS haud ſane immodicam abſtinentiam pluribus locis, & probaverit, & commendaverit: tantum tamen abeſt, ut quoſcunque ægrotos ea fatigandos voluerit, quemadmodum Aſclepiades; ut potius ægris, quovis morbo tentatis,

*Ratio,
quam-
obrem ve-
teres ad
inediam
commen-
dandam
permoti
fuerint?*

*Judicium
de diatri-
to.*

tentatis, cibos & potionem, prout necessitas exigeret, adhiberi disertis verbis disperse iusserit (a): *potesť*, inquit, *primo die primus cibus dandus esse, potesť secundo, potesť tertio, potesť non nisi quarto aut quinto: potesť post unam accessionem, potesť post duas, potesť post plures. Refert enim qualis morbus sit, quale corpus, quale cœlum, quæ ætas, quod tempus anni.* Et paulo post ita habet: *in morbo, qui plus virium aufert, celerius cibus dandus est.* In eo autem Asclepiades omnium præcipue graviter deliquisse mihi videtur, quod ægrotantes præter inediam, ingenti quoque siti torquere non erubuerit: quum tamen, experientia ipsa loquente, ipsis siti impenſa nihil sit intolerabilius, nihil perniciosius. Satis ego mihi jam dixisse videor de illo pretio, quod Medici vetustissimi omni memoria abstinentiæ statuerunt.

(a) Libr. 3. c. 4.

§. XLVIII.

Postquam hæcenus de abstinentiæ a victu & emolumento & detrimento, quæ animali nostræ œconomiae afferre consuevit, longe lateque differuimus: a nostro instituto non alienum fore reor, hoc etiam loco breviter tantummodo attingere ea subiecta, quæ inediam perferre valeant: quæque contra magno incommodo, quin sanitatis suæ dispendio, eam sustineant. Experientia enim ipsa compertum habemus, alium alio famis longe esse patientiorem. Namque prout homines ætate, temperamento, corporis fabrica, vitæ genere, imo etiam multis aliis inter se dissident: facilius quoque aut ægrius sibi alimenta subduci patiuntur. Sic homines, qui firmam ætatem sunt ingressi, inediæ diutius tolerandæ multo sunt habiliores adolescentibus & pueris: hi vero aptiores fami sustinendæ iis animadvertuntur, qui senectute sunt confecti, consentiente CELSO (a), *Inediam facillime sustinent mediæ ætates, minus juvenes, minime pueri & senectute confecti.* In illo quippe ætatis flexu, ubi humanum corpus in longitudinem excrescere prorsus desinit, nec multum amplius in latitudinem extenditur, moderata victus carentia vix quicquam mali affert jejunantibus, præsertim si habitioris corporis sunt, & sanguine abundant. Aliter vero res se habet in iis, qui gracilioris habitus, nec succi pleni deprehenduntur.

(a) Libr. 1. c. 3.

§. XLIX.

Qui vero nondum ex pueris exceſſerunt, aut adolescentiam demum sunt ingressi, ad sui incrementum in longitudinem quotidiano victu indigent: inediæ ergo perferendæ minus tolerantes sunt prioribus. Senibus tandem quum in dies corporis vires deficiant; ex iis vero alimentis, quæ capiunt, ob languidam in ventriculo digestionem, vix quicquam laudabilis chyli elaboretur, nec tantum quidem, quantum ad vires reficiendas satis est: perspicue jam apparebit, quæ sit causa, quamobrem hi omnium famis sufferendæ sint impatientissimi. Non obscurum quoque erit, ex iis, quæ modo dixi, intelligere, quare nec infantes cibis quotidiana-

nis carere queant; ratio quippe eadem hic subest, quam de pueris paulo ante reddidi.

§. LI.

Convenit quoque dispicere, cur unum temperamentum præ alio jejunium facilius tolerare possit. Est enim in confesso, quædam corporis temperies ad esuriendum multo accommodatiores esse aliis. Qui enim habitioris corporis sunt, atque exilibus vasis dotati, velut sanguinei, phlegmatici, vel quorum temperamentum ex utriusque mixtura emergit, multo facilius esu abstinere possunt, iis, qui macilento corpore sunt valdeque sicco, quales cholericæ & melancholici. Hujus rei vix ulla subesse alia videtur ratio, quam quod laxiores & remissiores, quibus sanguinea temperatura & phlegmatica sunt dotata, fibræ, languidius sanguinem in motum agunt; qui proinde vasorum parietibus minus attritus, nec inter se valide agitatus, maximam partem, suam servat mixtionem; neque in tam multas sordes fatiscit, quam in temperamentis strictioris habitus. Hinc igitur largiore semper sanguinis proventu fruuntur, quam sicciora temperamenta. At vero quum melancholicorum & biliosorum fibræ magis strictæ & adductæ validius in cruorem agant, ipsum fortius conquassando & terendo; non aliter fieri potest, quam ut major ejus copia quotidie in serum convertatur excrementitium. His igitur, ut in dies denuo accedat, unde & solidis & fluidis tantum & tale reddi queat, quantum & quale continuo sanguinis motu ipsis perditum, necesse est. Ecce tibi causam, quamobrem laxiora temperamenta diutius siccioribus & macilentis inediæ injurias tolerare possint.

§. LI.

Quod ad vitæ genus attinet; habeto homines vitæ umbratili ac delicatæ vacantes, desidæ deditos, nec corpus suum assiduis laboribus defatigantes ad inediam sufferendam multo aptiores esse aliis, qui victu tenuiori & parciori utuntur, ac laboribus dediti sunt gravioribus, velut operariis, agricolis, tritoribus, nautis aliisque id genus, quibus res angusta domi & curta supellex: confirmante illud Medicinæ Parente Hippocrate (a), *ubi fames, ait, non est laborandum.* Hi quippe, cum multis & assiduis fere laboribus corpus delassent suum; ideoque purissimos quosque & alibiles succos pedetentim corrumpant; corpus non viribus tantum exhauriunt, sed etiam ex assumtis vilibus minusque nutrientibus vix tantum chyli recipiunt; quantum amissis & humoribus & viribus redintegrandis suppetit, illi vero opipare & apperate edentes & bibentes, ac inertæ & desidæ vacantes, cum majori sanguinis copia indidem obruantur, quam pro vasorum capacitate & corporis necessitate: minime mirum cuidam videri debet, hos percommode aliquod tempus impransos atque incoenatos persistere posse, nulla notabili inde subsequenti noxa; aliis contra, qui cibis vilioribus & paucioribus utuntur, plurimum damni a fame longius perpeſſa accipientibus.

(a) Aphor. S. 2. apho. 16.

§. LII.

Ratione
tempera-
menti.

Ratione
vitæ gene-
ris.

Quæ sub-
jecta in-
ediam fe-
runt? ra-
tione at-
tis.

Uterior
hujus ma-
teriæ tra-
ctatio.

§. LII.

*Ratione
temporum
anni.*

Commemorabile etiam est, hominem eundem alias multo facilius, alias vero longe ægrius, famem tolerare posse, sine valetudinis dispendio, prout anni tempora differant. Explorata enim veritatis est, inediam homini longe esse tolerabiliorem brumali, quam æstivo tempore: nullaque alia subest causa, quam quod corpora hieme minus exhalant, poris cutaneis gelido aere occlusis, nec tanta cruoris copia, ob segniorem intestinum motum, in serum resolvitur impurum, quanta æstatis æstu; ubi homines sudore ferre diffuunt. Æstivo enim tempore, impenso solis ardore usque adeo augetur intestinus ille sanguinis motus, ut haud sane exigua humorum vel delibatissimorum multitudo in subtilia acris & serosa quotidie resolvantur excrementa; quæ per cutis poros, tunc temporis relaxatos, satisque patulos affatim corpore exeunt. Quid? quod consentaneum est, perplures quoque illius liquidi, quod vim atque potentiam solidis præstat, partes una cum recrementis istis e corpore exhalare. Quæ quum ita sint, nullo negotio intelligitur, quare nutritio partium corporis & refectio quotidiana, æstate magis sit necessaria, quam hyeme.

§. LIII.

*Ratione
aeris di-
versi.*

Attenta etiam observatione constat, homines inediæ ferendæ multo esse patientiores coelo existente denso & gravi, quam tenuiori & leviori; crassus enim aer corporis superficie extrinsecus incumbens, poros obsecrando, impedit, quo minus perpetua perspiratio expedite procedat. Si vero aer nimium levis est, vasa & humores minus premendo expandit, rarefacit. Plus ergo feri intestino sanguinis motu generati per corporis ambitum exteriorem foras proscribitur. In hoc itaque casu, quum justæ sanguinis copię plus detrahatur, quam par est; in illo autem minus: in promptu erit rationem proferre, quare homines sub aëre spissiori & pondere suo corpus gravante ad famem sustentandam magis proclives sint, quam eo-

dem rarefacto & levi existente. Eadem quoque hæc causa tibi facile pernotescet, quam ob rem homines sub frigido coeli tractu viventes, ciborum usu diutius se abstinere possint, quam qui sub climate calidiori commorantur.

§. LIV.

Veri quoque videtur esse simile, foeminas maribus haud paulo esse appositiores ad inediam diuturniorem ferendam. Gaudent enim fibris multo laxioribus, nec ita tensis quam viri. Quæ cum remissius languidiusque in cruorem agant, haud quaquam tantum ipsius perdunt, inque recrementa impura convertunt, quantum in sexu masculino nasci observatur. Quippe cum viri validioribus fibris & longe contentioribus sint instructi, quæ validius sanguineum laticem agitant, atque in copiosiores varii generis sordes extenuant: fieri non potest, quin majorem indies sanguinis jacturam faciant. Cui itaque & acribus istis circulari motu productis, involvendis, ut alia blanda & utilia denuo ad sanguineam perveniant massam necesse est. Satis ergo manifestum ex dictis erit, quamobrem mulieres, quæ uberiores semper sanguinis copiam in suis vasis foveant, quam viri, diutius esuriem præ maribus tolerare possint.

§. LV.

Ac profecto vix mihi in tam lato differendi campo exitus pateret, omnia; quæ de damno & emolumento inediæ in medium proferri possent, hac dissertatione confectaturo. Quod si enim unquam argumentum quoddam fructus in re Medica ostenderit uberrimos, tam ad prosperam valetudinem tuendam, quam ad morbos vel perniciosissimos feliciter profligandos: certe est egregium hoc thema, quod præsentī Dissertatione summus elaborandum. Verum angustia temporis mihi imperat, ut velorum sermonis contrahendorum memor sim. Nihil itaque est, quod impensius opto, quam ut L. B. hæc qualescunque meas lucubrationes æqui bonique consulat.

Conclusio.

DISSERTATIO MEDICA

D E

CURA AVENACEA.

Primum edita anno 1714.

P R O O E M I U M.



INUS certe laudanda est illa Medicorum nostri temporis consuetudo, qui exotica atque in alienis terris nata remediorum genera nostris domesticis, quæ omnibus patent atque in promptu sunt, longissime præferunt. Neque vero si peregrina præstantiora & ad sanandum majoribus viribus instructa essent, sollicitudo hæc foret Medicorum culpanda; at vero ut plurimum nostris illa esse virtute inferiora experientia, quæ optima rerum magistra est, in dies fere edocemur. Tanta enim est benignissimæ naturæ parentis sapientia, ac tam providens cura, ut omnibus terræ incolis non modo ad vitam alimentis, sed etiam adversus morbos medicamentis prospexerit. Atque adeo olim singulis terris sua remedia sufficiebant; postea vero quam remotarum rerum atque condimentorum & alimentorum cupidissimi facti sumus, nostra etiam nobis fordere remedia coeperunt, ita ut incredibilem amore in peregrina, neque satis nobis cognita ab aliis vero nationibus intempestive celebrata, nunquam non feramur, ubi tamen plerumque ingens illa, quæ nos lætavit de eorum usu, spes, subinde fallit atque destituit. Laborant autem hoc novitatis studio atque cupiditate imprimis Germani, quibus ferme nulla erga optimam matrem Naturam est fides atque constantia. Ulterius quoque detestandus nostræ Germaniæ Medicorum is mos est, quod simplicia, & quæ in usum atque auxilium alma natura suggerit ubivis obvia remedia, admodum negligant, iisque arte humana excogitata varietate mixta vel chymice elaborata longissime præferant. Equidem Chymia artium longe nobilissima non suo usu ac fructu in Physicis æque ac Medicis destituitur, & sua quoque laus chymicis remediis constat, si tamen comparisonem velimus simplicium & sic dictorum Galenicorum cum ipsis chymicis instituere, certe illorum præstantia atque efficacia in medendo longe his foret superior. Habemus ante oculos quas pedibus calcamus simplicissimas, longe tamen efficacissimas, herbas, quarum virtus recte perspecta ac cognita aliis pretiosis magno titulo superbientibus chymicis arcanis ac præparatis longe multumque est præferenda. Sicuti enim Natura ubique simplex est, & hac simplicitate maximas operationes sapientissime præstat: ita etiam Natura corporis nostri ægrotans simplici medicina gaudet atque contenta est. Equidem in hujus asserti confirmationem plura possent copiosius adduci, nobis tamen hoc loco tantum suffecerit aquam simplicem cum Avena, Radice Cichorii & Nitro coctam, seu præstantissimum remedium in exemplum proponere. Constitui nempe DEO auspice, Specimen inauguralis loco de Potu avenaceo vulgo *Cura avenacea* Haber. Cur/ paulo fusius differere, & quam eximiæ utilitatis hic potus in medendo præ aliis pretiosis remediis sit, clarius & fusius demonstrare. Cui instituto, ut omnis veritatis qui est unicus fons ac scaturigo DEUS suam concedat gratiam, est quod humillima prece efflagitamus.

§. I.

DE *Cura avenacea* acturi, antequam pro more telam ipsam aggrediamur hancque materiam in theatrum disputatorium producamus, omnino necessarium est, ut initium dicendi a consideratione *Erid. Hoffmanni Oper. Supplem. II.*

& notione nominis sumamus. Cum enim voces rerum sint indices, & rerum docendarum instrumenta ac principia, exponere nobis incumbit, quid per Curam avenaceam significare velimus, utpote sine genuino hujus appellationis sensu facile errores propullulare possunt. Cura igitur avenacea a nobis hoc loco sumitur pro potione vel decocto ex Ave-
Z na

na tanquam principali ingrediēte parato ad usum maxime internum accommodato, germanice *der Haber=Tranck/ die Haber=Cur/* quod ad similitudinem Decocti lignorum germanice *die Holtz=Cur/* exprimitur. Vocatur etiam a quibusdam *Pisana* avenacea, Potus avenaceus, Potio avenacea, non quod eadem sit cum *Pisana* illa *Galeni* de qua totum librum conscribere, eamque maximis laudibus exornare sustinuit; sed quod ad imitationem ejus parari & porrigi soleat; parabatur vero illa ex hordeo ejusque cremore cum aqua simplici, & pro portione porrigebatur: nostra vero ex Avena, additis quibusdam adhuc aliis idoneis & salutaribus ingrediētibz mediante decoctione & repetita ebullitione paratur. *Pisana* Veteribus quoque dicebatur cibi genus ex hordeo integro pinfendo ab exteriori cortice mundato & aqua confectum, vulgo cremor hordei dictum; nostra vero ex Avena in forma dilutioni pro potu porrigitur.

§. II.

Interim non negandum etiam veteribus jam cognitam fuisse curam, quam hic tractamus, avenaceam. Et licet plerumque sub *Pisana* nomine ab *HIPPOCRATE* & *GALENO* potus hordeaceus intelligatur: non dubitandum tamen etiam paratam fuisse hanc potionem ex Avena, cui *HIPPOCRATES* humectandi & refrigerandi virtutem adscribit, imprimis *libr. II. de Vita ratione p. m. 356.* dicens: *Avena comesta humectat & refrigerat, itemque in sorbitione accepta*, ubi per *Sorbitionem* quam *ρῶγμα* effert, nihil aliud intelligit quam potionem ex avena decoctione paratam, quæ *ρῶγματα* libro *de Vita ratione in Morb. acut.* summopere commendat, & in acutis quibusvis porrigenda præcipit, uti ex toto citato libro, item libro *de Affectionibus p. m. 526.* liquet: *Sorbitiones autem in omnibus morbis dato, aut pisanam &c.* Successu tamen temporis, nescio quo fato, *Pisana* illa seu potio avenacea adeo in defuetudinem abiit, ut ne quidem ullum Medicorum ejus fecisse mentionem recordemur, & nisi a Recentioribus ob virtutem ratione & experientia comprobata iterum ex tenebrarum squalore resuscitata fuisset, adhuc dum eximius ejus usus nos lateret, & plerisque incognitus esset. Id quod gratiæ divinæ, ac humanitati *RICHARDI LOWERI*, Medicinæ celeberrimi Doctoris & Practici, qui ante paucos annos Londini anno ætatis *XCII.* vitam cum morte commutavit, acceptum referimus, qui primus illud arcanum, uti appellat, in Anglia cum amicis, hinc & cum aliis communicavit, unde cum ceteris ipsius arcanis in lucem publicam emissis in germanicam linguam fuit translatum. Etenim ad summam usque senectutem cum *Lowerus* pervenerit. Potionem hanc toties in Anglia experientia comprobata cum aliis probatis medicamentis mundo erudito offerre decrevit, proximo ægrotanti etiam post cineres inferviturus. Observaverat enim Curam hanc avenaceam in plurimis morbis omnique ætate usum maximum præstitisse, imprimis vero expertus erat in celeberrimo Angliæ Medico *D. de S. Catharina* hujus potionis usum, qui vitam ad annum usque *CXX.* salvam incolumemque conservaverat. Hinc & in Germania nova hæc cura seu potio avenacea innotescere ac ægrotantibus ut potus minus nauseam creans commendari cœpit.

§. III.

Temporibus equidem Divi *Coli* Medicorum facile Principis, potio hæc tantummodo simplex ex Avena cum aqua cocta porrigebatur, & sub nomine

ρῶγματος five *Sorbitionis* adhibebatur, quæ vero tandem, uti supra diximus, plane in defuetudinem abiit, donec nostris temporibus *JOHANNES DE S. CATHARINA* illam in lucem iterum revocaret, qui radicem *Cichorii* addebat & saporem adjecto saccharo gratiorem reddebat, & hoc modo correctam in usum vocans vitam ad summam produxit senectutem. Huic potui postea *LOWERUS* lapidis *prunellæ* quicquam adjiciebat; & hæc est potio illa de qua in præsentī agere ejusque vires & usum inquirere juvante *DEO* instituimus. Compositio vero sequenti modo, quam ipse *LOWERUS* in citato *Tractatu* describit, sese habet:

Recipe Avenæ recentis mundatæ libram unam semis, Radicis Cichorii silvestris concisæ manipulum unum, aquæ fontanæ mensuras duodecim, indantur ollæ firmiori vitreatæ, coquantur ad consumptionem dimidii, & per linteum, sine expressione fortiori, colentur. Colaturæ adde salis prunellæ unciam semis, sacchari non resinati uncias sex, ebulliat adhuc semel, & ab igne remota stet per diem & noctem operta & quieta; sequente die decantetur in vitra vel ollas vitreas, cavendo tamen ne materia crassior in fundo residens potui immisceatur; vitra arctissime claudantur, & in cellam posita usui servantur.

§. IV.

Verum enim vero observandum circa avenam est, quod aliquoties & affusione aquæ puræ & frequenti frictione prius probe sit depuranda, quo potus clarius & ad sorbendum gratior reddatur; particulæ enim terrestres impuriorez sese aqueis flexilibus glabris facile implicant, insinuantque, & sic pelluciditatem, quæ potui gratiam conciliat, impediunt. Expedit quoque, recentem potius quam annosiorē avenam seligere, quod mucilaginem gratiorem adhuc in se contineat. Maxime vero omnium enitendum est ut intermixtum lolium ab ea separetur: sapissime enim vitio agrorum aut ob continuas vernaes pluvias accidit ut simul lolium in magna copia succrescat, & avenæ, quam præ ceteris frumentis appetere videtur, permisceatur. Hoc omni cura ab avena per cribrum, uti Rustici solent, fecerni, sique tempus suppetit diligenter seligi debet. Et hæc unica est causa, cur a multis habeatur avena pro frumento stupefactivo & gravativo, quod vertiginem atque dolores causetur, cum tamen per se plane sit insons, & potius contra vertiginem & dolores teste *TABERNÆMONTANO Lib. I. Sect. VII. cap. 21.* adhibeatur. Lolium vero si admixtum fuerit, imprimis ad cereviciam coquendam, per fermentationem particulæ stupefactivæ, aliis mucilaginosis implicatæ, exaltantur, quæ accedente postea lupulo crudiore, facile caput feriunt & perturbant, neque solum vertiginem, sed etiam dolores, si largius assumatur, inferunt. Ab hoc igitur lolio ubi liberatur avena, nullum amplius periculi aut damni metus locum invenit.

Additione vero salis *prunellæ* vis ejus diuretica & refrigerans magna ex parte augetur. Non enim ignotum est, quam egregios effectus laudatissimum nitrum in morbis præstet. Mihi vero non sine ratione loco salis *prunellæ* placet recipere nitrum depuratum, eo quod hoc ipsum in febribus tam continuis quam intermittētibz, sanguinisque effervescētia minuenda, majoris efficaciat ipso *prunellæ* sic dicto lapide deprehendatur: sub elaboratione enim salis *prunellæ* additione sulphuris nitrum deflagrat, hincque Spiritus volatilis acidus nitri in auras abigitur, & pars ejus quodammodo alcalisatur, unde secundum *ETTMÜLLERUM in Colleg. chymic. Tom. I. Oper.*

Oper. p. 259. minoris pretii medicamentum in illis affectibus qui nitro vulgo adscribuntur, existit.

§. V.

In genere vero notandum hoc loco est, coctionem duplicem seu repetitam ebullitionem juxta præscriptum LOWERI non adeo esse necessariam, siquidem statim ab initio nitrum & saccharum adjici possunt: neque enim video rationem cur demum altera post primam coctionem ebullitione addi hæc debeant. Coctione plenaria, & si placet, ebullitione repetita peracta, ptisana nostra in vasis lapideis vel vitreis in loco frigido, quod imprimis tempore æstivo summe necessarium, asservanda, clausis arctissime eorum orificiis, ne acefcat, & inde saporem vel odorem ingratum acquirat, & insalubris fiat: difficulter enim diu fert ætatem, imprimis æstivo tempore; accedente enim aere calidiore fermentationem subit, saporem acidum & odorem ingratum contrahit, sicque ad bibendum inepta redditur. Cellæ autem potione commissa, particulæ graviores terrestres ad fundum vasis præcipitantur, potus vero intra xxiv. horarum spatium clarus pellucidusque evadit, a facibus seu residentia crassa per decantationem lenem separandus & usui impendendus. Ceterum si cui volupe est potionem colore gratiorem reddere, cujus quidem absentia ptisanæ nihil quicquam derogat, in coctione addi potest radicis anchusæ uncia una, vel rasuræ ligni fantasti rubri uncia duæ, quod fecit *Cl. JOHANNES FRANCUS in der Haber-Beschreibung*. Hæc vero cum ceteris speciebus igni non nimis forti committere, ne oras ollæ transcendat & colorem rubrum in cæruleum mutet, oportet.

§. VI.

Est hæc quam dedimus & jam perlustravimus simplex illa & optima descriptio Curæ avenaceæ, quæ in quamplurimis morbis felici cum successu adhibetur. Neque opus est alia addere specifica, quæ sapius efficaciam ejus magis obtundunt quam augent. Interim si cui libet pro varia intentione huic vel illi morbo dicata alia quædam simplicia jam dictis addere, per nos licebit, modo non sint contraria aut potum invertant. Unde excludi merito debent spirituosæ volatilia aut aromatica calidiora, quia sub coctione maximam partem virium in auras ablegant, & intentioni hac ratione minime satisfaciunt; neque sulphurea fixa seu resinosa addere oportet, quippe in quæ menstrua aquosa nullum vel parvum jus inveniunt. Terreæ fixa vix quoque locum inveniunt, utpote quæ cum aqua posthac collanda parum aut nihil virtutis communicant, sed potius in filtro cum aliis particulis crassis terrestribus subsistunt. Bene tamen adjici possunt ea quæ particulis mucilaginosæ viscidis constant, quæ aqueis solventibus obediunt. Ita Decocto avenæ rasura cornu cervi vel radix scorzonæ in febribus malignis; radix & flores pœoniæ, herba betonicæ, verbenæ in affectibus capitis & nervorum; radix valerianæ in oculorum vitiis; radix glycyrrhizæ, helenium, radix & herba tussilaginis, ficus &c. in pectoris symptomatibus; melissa, pulegium in uteri morbis; petroselinum in calculo; fumaria vel trifolium fibrinum in malo hypochondriaco & scorbuto; radix lapathi in arthritide &c. pro varia intentione simul superaddi possunt; quibus tamen omis- sis etiam nostra ptisana egregie satisfacit. Si quoque certam ob causam volatilia, spirituosæ & aromatica addere animus est, v. gr. aquam cinnamomi spirituosam, ventriculi roborandi gratia, illa sub si-

Frid. Hoffmanni Oper. Supplem. II.

nem, si decantatus a residentia potus fuerit, addi potest.

§. VII.

Perspectis potionis nostræ avenaceæ partibus constitutivis ejusque parandi modo examinato, singulorum nunc ingredientium in specie examen instituemus: horum enim naturâ, principiis ac operandi modo perspectis, facile quoque erit de potione ex hisce composita formare judicium.

Primarium autem nostræ potionis ingrediens *Avena* vilissimum & contemptissimum frumenti genus constituit, equis & anseribus quam homini convenientius a GÜLDENKLEE in *Consilio diætetico* citra meritum æstimatum, cum tamen Veteres Germani avena excorticata pro delicato & usitato cibo secundum *PLINIUM Hist. Nat. libr. XVIII. c. 17.* in jusculis, decoctis & pultibus usi fuerint, ac ex hoc cibo robusti & validi evaserint; quin imo adhuc amyllum ex avenæ semine paratum apud Wallos in cibis æstimatur, & uti *DALE Pharmacolog. Supplemento p. 247.* testatur, ab illis Lummary vocatur: Alpestres quoque avenam mola comminutam in sartagine cum aqua coctam, sale & butyro paratam in deliciis habent, uti *Cl. BEHRENS in Selectis diætet. Sect. II. Cap. II. §. 1.* ex *HOEFERI Herc. L. I.* refert. Et quid opus peregrina afferre testimonia, cum juscula avenacea optimum ægrotis, alios cibos respuentibus, præbeant alimentum, nuncque a plurimis Medicis quotidie commendentur; humectant insuper, spirituumque impetum & sanguinis effervescentiam mitigant, sicque refrigerant. Et jam apud Veteres talia juscula sub nomine *diætæ tenuis* in febribus & morbis chronicis, tam pro nutritione moderata & abstergendis atque detergendis primis viis secundum *ETTMÜLLERUM*, quam temperandis succis acribus commendabantur. In Norwegia & Scotia, referente *Dn. BEHRENS Select. diætet. loc. cit.* ex avenæ farina panis parari solet egregius, saporis grati, ex tritico parato æquiparandus; & multis in locis quoque cerevisia ex mera avena paratur, uti in Polonia & Hungariæ variis locis, quæ sane cerevisia sapore, colore, & viribus se maxime commendat, & in Anglia quoque in frequenti usu est ob vim calculum pellendi. Ubi tamen attendendum, ut bene fermentetur ac defæcetur satis, alias enim flatuosa deprehenditur, ac alvum constipare a GÜLDENKLEE in *Consilio diætetic.* accusatur. Pultes, quibus veteres Romanos vixisse, verbis *PLINII*, manifestum est, exinde paratæ vim nutritivam obtinent, ac uberrimam eamque benignam chyli copiam suppeditant. Facillime enim in ventriculo dissolvitur ex avena paratus cibus, unde & eandem tenuissimi levissimique succi concretionem, molli pellicopertam vocat *Cl. SPONIUS, Comment. in Aphor. nov. Sect. IV. n. 48.* Quare *TABERNÆMONTANUS Libr. I. Sect. VII. c. 21.* testatur experientia comprobatum se habere, infantes cibis ex avena paratis educatos, robore & formæ elegantia cæteris longe præstare, idque *D. TURNERUM* in suis propriis infantibus probasse & expertum esse. Hinc quoque *MOEBIUS Epitom. Instit. p. m. 454.* pultes & juscula ex avena excorticata parata ægris pariter ac sanis utilia commendat. Denique *TABERNÆMONTANUS l. c.* in febribus ardentibus & malignis alimentum benedictum appellat; sique ex jure carniū decoquitur, cibus fit haud ingratus, sapore & virtute restaurativa ægris porrigendus. Verum enim vero pultes avenaceas in nimia copia assumptas flatu in intestinis excitasse deprehensum fuit: massa enim farinacea, ob viscositatem qua pollet, intestinorum plicis & lateribus facile adharet, poros eorum obli-

terat, sicque ob transpirationem liberiores impeditam flatus tunicas intestinales distendentes exoriantur, imprimis si digestio ventriculi fuerit depravata. Huic malo ut obviam eamus, optimum est pultibus aut jusculis semen anisi, carvi vel aliud quoddam adjicere, quibus digestio promoveatur, flatuum generatio inhibeatur, & horum expulsio promoveatur; sique alvus segnis observetur, addi possunt passulæ minores, quæ alvum facile lubricam conservant.

§. VIII.

Ast non solum avena facultate egregia pollet alimentosa, sed etiam medicamentosa possidet non satis prædicandam. Ob virtutem enim temperantem acrimoniam lymphæ in catarrhis, in raucedine egregie prodest, notumque in hac ceu euporiston mucilaginem vel jusculum ex avena cum successu adhiberi; quin imo ad sitim extinguendam, ad tussim a BECHERO jusculum ex avena maximopere laudatur. Sic a TABERNÆMONTANO *lib. I. Sect. VII. c. 21.* farina & ptisana avenacea sive in jusculis, sive in cibo, sive quocunque modo usurpata, ad dolores capitis, item in mania ac vertigine egregie laudatur. Ad tussim, ronchum & phthisin incipientem decoctum avenæ cum liquiritia, vel solus cremor avenæ ceu expertum remedium a COLERO & TABERNÆMONTANO *l. c.* celebrantur, id quod ROLFINCIUS quoque in *Epitom. method. cogn. & curand. partic. corp. affect.* comprobat, ptisanæ nempe cremorem in phthisi convenire. In morbis acutis sapissime usurpari supra jam diximus, & ubi acrimonia humorum peccat, medicamenta ex avena parata felici cum successu adhibentur. Pari ratione in faucium asperitate & exulceratione, in pulmonum & thoracis vitiis viscidam acremque lympham temperat & corrigit, non minus ac in pleuritide, ubi alias quoque potio ex decocto avenæ addita tinctura Papaveris rhœad. vel Bellidis passim suadetur.

§. IX.

Sequitur Radix Cichorii silvestris vel etiam hortensis, alterum potionis ingrediens paucissimis verbis examinandum. Hujus virtutes adeo decantatæ apud Practicos deprehenduntur, ut nullum fere decoctum aperiens præscribatur, in quo non primum sit radix cichorii. Sale enim alcali temperato acriusculo incisivo, sapore amaricante prædita, optimum habetur hepaticum & aperitivum, diureticum, abstersivum. Hinc in omnibus obstructionibus vasorum lacteorum, hepatis, lienis, mesenterii ab hisque dependentibus morbis, malo hypochondriaco, cachectico, melancholico, scorbuto &c. egregie se commendat. Imprimis vero subjectis biliosis, in quibus particulæ sulphureæ oleosæ volatiles salinæ prædominium præ aliis habent, dicata videtur. Ubi massa sanguinea a debita mixtura & proportionem deficit, salinæ acres sulphureæ vero sanguinis & lymphæ partes abundantes phlogoses, incalescentias sanguinis, scorbutum & alia producant symptomata, ibi egregie particulas acres temperat, inertiam bilis corrigit, vasa renalia stimulat & per urinam salino-sulphureasordes expellit. In febribus intermittentibus unum ex præcipuis specificis ab ETTMÜLLERO habetur, propter vim acido resistendi, nec non abstergendi, incidendi viscidum primarum viarum, & ut per inferiora educatur præparandi. Hanc plantam illi qui vitam prolongare conantur sibi commendatam habeant auctor est DEODATUS. Cumque acidum in ventriculo abundans ex digestionem residuum alcali suo blando temperato infringat, & digestionem amaritie sua stomacho gratissima promoveat, hinc in mor-

bis chronicis quibuscunque felici cum successu adhibetur. Plurimi enim morbi depravatæ ventriculi digestionem, hincque collectis cruditatibus acidis, nidorosis, viscidis ac pituitosis originem debent, quibus per medicamenta congrua sublatis, & digestionem rursus restaurata, chyli laudabilis copia generatur, & sic morbi quoque disparent & expugnantur. Quæ igitur hoc præstent inter ea unum ex primariis est radix cichorii ferme tanquam polychresta cum alimenti tum medicamenti loco commendanda. Imo ex præcipuis antiscorbuticis radix cichorii celebratur, ubi videlicet fluores corporis peregrinis imbuti sunt particulis massam sanguineam immutantibus, unde hæc a naturali crasi deflectit, & innumerabilium morborum causa fit, cui optime subvenire licet ejusmodi amaricante, aperiente, & per urinam salia peregrina educante medicamento, quale est radix cichorii. Solertissimus in eadem laudanda est PANAROLLUS *Pentec. 3. Obs. 47.* asseritque: *plurimos simplicis Cichorio silvestri sanatos, quibus tota Pharmacopœa nil quicquam auxilii attulerat.* In morbis a vitiis bilis præ aliis hujus vires extolluntur: activitatem enim ejus promovet, ductum choledochum viscidior & spissior bile obstructum perquam facile aperit, ut iterum debita quantitate cum succo pancreatico ad boni chyli elaborationem in duodeni sinum descendere possit. Bile enim deficiente protinus cruditates acidæ viscidæ in corpore accumulatur, neque chyli separatio succedit feliciter, inde sanguis impurus facile fit. In ictero etiam ex obstructione ductuum biliariorum proficua est, dum ductus bilis referat, & vias ordinarias expediendo regurgitationem ad lymphæ massam impedit.

§. X.

Tertium potionis nostræ ingrediens aqua communis est, qua nihil in vita humana magis necessarium nihilque utilius invenire licet, utpote ad vitam ejusque conservationem si non omne, potissimum tamen momentum adfert, & certe universale nostræ conservationis præsidium existit. Qua de causa doctissimus WALDSCHMIDIUS aquæ simplicis inter omnia potus genera palmam tribuit in *Institut. Med. Rat. p. 108.* utpote quæ jure antiquitatis salubritatis prærogativam obtinet, & in se spectata potus medicus jure meritoque suo dici potest. Hujus eximios, quos præstat, usus satis efferre laudibus vix quisquam poterit; suscepit ante nos id laboris in se D. Præses in *Dissertat. de aqua medicina universali* & medicamentum polychrestum aquam simplicem esse, optimis rationibus demonstravit, hinc quemlibet illic remittimus, & hoc loco tantum quædam afferemus quæ ad nostrum scopum facere videntur. Jam dudum vero apud Veteres aquæ usus in medicina medicamentosus innotuit, & aquam simplicem tam ab HIPPOCRATE quam a GALENO & aliis cum præservationis tum curationis gratia commendatam sapissime videmus. Ad alimentorum extractionem, chyli progressum ad venas lacteas & ductum thoracicum, nec non ejus mixtionem cum particulis sanguineis, nihil aptius in tota rerum natura sola aqua simplici invenitur. Et certe, si hanc pro potu ordinario Majores nostri retinissent, innumeris morbis & affectibus corpora nostra jam carerent. Aqua enim simplex pura pro vehiculo alimentorum omnibus aliis liquidis, cerevisia, vino &c. longe præstat, unde remoto aquæ usu & hujus loco cerevisiis vinisque assumptis acidum copiosum in ventriculo atque primis viis valde noxium progignitur, quo abstemii & aquæ potatores plerumque sunt liberi & alieni. Quid? quo ad longam vitam egregie facere aquæ simplicis potum quamplurimis confirmari

firmari potest exemplis, quale MENZELIUS in *Misc. N.C. Dec. II. An. 10. Obs. 15.* de fene CXX. annorum refert, qui longævitatis suæ causam, nullam aliam proferre potuit; quam potum aquarum simplicium, præsertim illarum, quæ ex scopulis & vividis fontibus scaturiunt, quibus a teneris delectatus fuerat. Et Celeb. Scriptor Anglus JOH. LOCKE, quod vitam tam diu, etiam inter gravissima status negotia protraxisset, & oculorum aciem ad finem usque vitæ integram servasset, soli aquæ potui, qui ipsi ordinarius fuit, adscripsit, teste Dn. BEHRENS *Select. diætet. Sect. III. C. II. §. 1.*

§. XI.

Cum vero aqua sit corpus fluidum, cujus particulæ valde lubricæ & flexiles minutissimis etiam poris se insinuant, hinc solidas & duras partes optime humectat atque emollit; deinde acidum vitiosum temperat, salia omnis generis dissolvit, dissolutaque in poros suos recipit, & secum per varia corporis emunctoria evehit, quare in morbis, qui a salibus nascuntur, aquosorum usus summe est proficiuus. Et inde fit quod in impuritate sanguinis & omnium humorum, in scorbuto, malo hypochondriaco, scabie, lue venerea, pruritu, arthritide vaga scorbutica, stranguria, soda omnibus ferme remedium generibus palmam præripiat. Quod si etiam ob salium acrimoniam fibrillæ nerveæ spiculis pungentibus vellicantur, & inde dolor oritur, egregie diluendo & temperando suum facit officium. Ceterum aquæ potu nihil præstantius; motum celeriore partium sulphurearum, qui fons ac scaturigo immodici caloris est, contemperat atque infrangit, qua de causa in omnis generis febribus tam intermittentibus quam continuis acutis, nec non in aliis morbis quibus calor p. n. ordinario jungitur, uti fit in scorbuto sic dicto calido, doloribus arthriticis, rheumaticis, præsentissimum auxilium fert. In obstructionibus etiam debellandis omnium optime se gerunt diluentia aquea, quæ resolvendo obstructos a lento stagnante humore meatus præstantissime vindicant. Hinc summa cum utilitate in malo hypochondriaco, obstructione hepatis, lienis, mesenterii, renum, mensium, in scorbuto, calculo aliisque longis & gravibus passionibus expugnandis aquæ minerales tam calide quam frigide usurpantur; quarum efficacia non tam ad activum minerale principium quam ad aquæ elementum, quod copia assumitur, merito debet referri. Denique haud ignotum est quam eximium usum infusa herbarum medicarum, potus Thee, Coffe, in morbis chronicis præstent, qui identidem non tam virtuti specificæ herbarum vel calori, sed potius aquæ adscribendus est.

§. XII.

Humectare proprium est aquæ, ut Logici loqui amant, in quarto modo: hinc ubi humiditas in corpore deficit, non aptius quam aqueo potu potest refarciri. Unde pessime ægris suis consulunt ac merito cum LANGIO in *Epistolis medic.* & LINDANO culpanitur, qui in febribus cum intermittentibus tum ardentibus, ubi per nimium calorem & sanguinis ebullitionem humidum dissipatur & per poros ac perspiracula corporis in auras abigitur, ægris omnem denegant potum, cum potius omni modo, si tantum a nimis frigido arceantur, præsertim circa crisin, & ubi inflammationis primarum viarum metus adest, permittendus sit, quo spirituum & sanguinis impetus inhibeatur, & humidum refarciatur, observato saltem hoc, tutius semper esse frequentius & parcius bibere, quam una vice nimium ingurgitare: *Frid. Hoffmanni Oper. Supplem. II.*

hac ratione enim successive alterat, & madorem continuum conservat, unde merito inter febrifuga aqua simplex refertur. Etsi enim simplicissima videatur, summum tamen habet usum, quatenus substantifice, uti WEDELIUS in *Amœnit. Mater. Medic. p. 329.* loquitur, serum in febribus ordinarie deficiens restituit. Cumque serum fluxile, & ad motum aptius reddat, accedente quocunque externo calore poros corporis & integumentorum aperiente, facile transpiratio hoc modo promovetur, & secundum Cl. WEDELIUM *Dissert. de Aqueor. usu & Abusu p. 22.* inter diaphoretica sobrio sensu referri potest, dum serum reddit fluxile; modo accedat calor ambiens, tunc fluxilitas lymphæ prompta ad transpiratum redditur. Neque contradictionem ullatenus involvit quod supra diximus, aquam refrigerare, jam vero diaphoresin promovere: sano enim sensu hoc accipiendum est, non quod simul uno eodemque tempore in uno eodemque subiecto refrigeret & calefaciat; sed pro dispositione & indole contentorum in primis viis, nec non sanguinis & humorum, varium edat effectum. Humoribus enim in proportionata & debita crasi constitutis, calor quoque æqualis & proportionatus existit; spissescens vero illis ad motum ineptiores fiunt, & quo languidior motus, eo quoque calor debilior erit. Exagitato vero motu, serum fluxile reddente, calor quoque exagitur, & excitatur, & sic ad transpirationem corpus aptius redditur, & hac ratione aqua diaphoresin promovere recte dicitur. Salibus vero acerbis in sanguinis massa prædominantibus quæ spiculis suis parietes arteriarum ac cordis ipsius musculosas fibras stimulant, & ad celeriore constrictionem eas sollicitant, motus sanguinis tam intestinus quam progressivus celerior factus calorem intensiorem producit. His igitur salibus per aquam simplicem dilutis & difunitis, eorum operatio quoque inhibetur, & per consequens motus & calor remissior evadit, unde optimo jure refrigerare aqua dicitur. Cum vero diaphoretica & diuretica teste WEDELIO maxime sint symbolica, atque invicem alant affinitatem, hinc inter optima diuretica merito quoque aqua refertur, utpote salia humorum in poros suos recipit, & sanguinem crassosque humores dissolvit, circulationem promovet, atque copiosiore secretionem per glandulas renales & tubulos minutissimos adjuvat, quare major in vesica urinaria hujus laticis copia colligitur. Sed aquæ jam meminisse suffecerit, utpote cum nimis longum foret in omnibus quæ aquæ competunt virtutibus enarrandis paulo operosius occupari, ad alia magis necessaria potius progrediendum est.

§. XIII.

Quamvis autem aquæ efficaciam plurimi concedant, & revera hanc polychrestum esse remedium experientia & ratione convicti fateantur, nihilo minus hoc dubii restat, num ullus effectus ab aqua frigida, sed an non potius a calida proveniat, cum omnia frigida adstringant, coagulent, motum sistant, & nervis sint inimica, vitæ quoque infensa; calida vero ventriculum dum roborant, fluxilitatem & motum promoveant, omnibusque partibus sint accepta. Equidem non negamus, quin caloris efficacia in corpore nostro utique sit eximia, neque minus fatemur, multos dari casus ubi solus calor partes læsas restituere & curare valeat, uti in diarrhoea a refrigeratione, in colica, passione hysterica, dolore ventriculi, erysipelate id subinde evenit; attamen calore tantummodo opus est ubi serum vel humiditas flatuosa in corpore abundat, sanguinis crasi ceteroquin satis fluida existente, aut fibræ musculosæ ac nerveæ nimis sunt contractæ, ibi aqua calida

proficua, ut partes foveantur, relaxentur & tono pristino restituantur. Ubi vero talis indicatio non adest, calor vix sufficit, quin imo tunc aqua calida sæpius magis lædit ac nocet quam prodest. Ab infusis herbarum relaxationem ac debilitationem toni ventriculi, hincque exortam anorexiam, noni semel notavimus. Equidem mihi persuadere nequeo aquam frigidam nocere, nisi ubi ventriculus summe debilitatus est, vel ubi nervosum genus spasmodicis obnoxium a frigore læditur. Apparet id in potu quotidiano quem frigidissime solemus absque noxa ingurgitare, nisi in quantitate excedamus, & quod potus frigidus etiam in copia ingestus non facile damno, sed potius magno præsidio atque salutis sit, acidularum potatores, qui ad tres vel aliquot mensuras iis mane quotidie utuntur, id luculenter confirmant.

§. XIV.

Neque solo ratiocinio vel opinione quadam nostra assertio nititur, sed jam ab incunabilis artis usque ad nostra tempora a peritissimis practicoorum aquam frigidam in quamplurimis affectibus cum laude commendatam legimus. Ita teste GALENO in febribus ardentibus aquæ frigidæ potus maximopere laudatur, & in casu pro summo remedio habetur, affirmante eodem Auctore Comment. 4. de Rat. vict. acut. omnes qui non *ὀλεθρίως καὶ ἀσπασίως* perniciose & incurabiliter decubuerint, fuisse servatos. Confirmatur idem SCHENCKIUS in Observation. lib. VI. aquam frigidam in febribus acutis sæpe unice profuisse. Cum enim calore summo & impetuosiori sanguinis motu omne serum exhaustum fere sit, & sanguis spissior redditus restitutionem humidi exposcat, sine qua consistere amplius nequit, unicum solatium in aqua frigida, spiritus resolutos quasi & extra sphaeram exorbitantes iterum concentrante, & in motum ordinatum redigente est omnino quærenda. Non equidem placet ille modus fere desperatus largiori & continuato potu aquæ frigidæ febres abigendi, quem commendat GEORG. HORNIUS in Arca Mosis p. 124. cujus verba hæc sunt: *ab alcali sitis est inextinguibilis, nisi per acida & puram aquam, crudam, incoctam, copiosissime ingestam, etiamsi vomitu, flamma prævalente, regurgitet, donec aqua in stomacho remoretur, mox sequitur cessatio sitis, caloris, sopor, sudor, sanitas intra 12. horas, quod ipse multoties in acutissimis febribus probavi.* Periculosus enim modus est, quem pauciora subiecta perferre possunt, quia tanta copia potus frigidi ad sanguinem transiens protinus eum coagulat, inque motu & fluiditate sistit, quare nihil ad vitam & circulum sanguinis salvum perniciosius excogitari potest. Ceterum verum est aquam frigidam modice sumptam calorem febrilem egregie temperare, vires deperditas restituere, sanguinis motum nimium spirituumque impetum inhibere, sicque ad sanitatem recuperandam plurima conferre; unde ex Veteribus Cicero Medicorum CELSUS libro I. cap. 5. aquam frigidam maxime commendat his verbis: *neque vero his solis quos capitis imbecillitas torquet, usus aquæ frigidæ prodest; sed iis etiam quas assiduæ lippitudines, gravedines, destillationes, consillaque male habent.* In malo arthritico contulisse potum aquæ frigidæ, MARTIANUS in Hippocratem testatur; Bernerium Cardinalem solo aquæ frigidæ potu a podagra perfecte sanatum fuisse. Id quod & RONDELETIUS in praxi affirmat, multoties se aquæ frigidæ potu podagricos sanasse. Nec minus iis quorum sanguis & lymphæ salibus excrementitiis scatent, aquæ frigidæ potus medicina est, ceu colicæ biliosæ, quam BEHRENS in select. diætet. sect. III. c. II. §. I. p. 311. aqua frigida curatam refert. INGRASSIAS uti libro de frigid. potu post. Medic. re-

fert, Philippum Siciliae Proregem Johannem de Vega, qui sumpto pharmaco segniter purgabatur, super exhibita frigida aquæ libra una cum paucis saccharo, feliciter restituit, pro quo medendi genere non solum magnas Ingrassias egit gratias Pro-Rex, sed & vas argenteum, ex quo frigidam hauserat, pretii 50. aureorum, dono dedit. In arthritide conducere quoque BRUYERINUS de Re Cib. libr. XVI. c. 13. & TRINCAVELLIUS de Curand. Morb. libr. XII. c. 2. testantur, quemadmodum ejus adminiculo etiam a corpulentia nimia se defendunt virgines, corporis gracilitatem affectantes, referente VALENTINO in Dissert. de Filtro lapide §. 5. Agrestes & plebeiae sortis homines, teste CRAMERO in Medicina ducent. & docente p. 107. febribus ardentibus correpti, largissimo limpidæ aquæ potu sanguinis æstum retundunt. Quid? quod ante paucos annos febri ardente laborantem sola aquæ frigidæ ad satietatem ingurgitatione optime restitutum memini, quam & PULVERINUS Medicus Neapolit. in sua Praxi Medic. sæpius commendat, imprimis urgente siti, ut ægro, quantum uno haustu haurire potest aqua frigida porrigatur; quin & in phrenitide eam præcipit. In mania pro somno inducendo ROLENCIUS in Epitom. Meth. cogn. & cur. particul. corp. affect. p. 79. aquæ frigidæ potum largissimum ad aliquot libras deprædicat.

§. XV.

Denique præcipuum fere & princeps decocti nostri avenacei ingrediens est nitrum sal illud ratione virtutis mirabile & omnium laudatissimum. Equidem qui primam hujus decocti compositionem adornarunt lapidem prunellæ adjecerunt, sed tamen hic parum a nitro differt, in eo saltem differentia quædam videtur esse, quod cum sulphur ad ejus præparationem adhibeatur, pars quædam nitri alcalifescitur: & inde fluit ratio quare lapis prunellæ cum acido spiritu confectum edat, quod minime, quando cum nitro puro experimentum instituitur, animadvertitur. Quicquid vero sit, æque proficius lapidis prunellæ ac nitri puri in nostro decocto erit usus. Sunt qui virtutis exaltandi gratia loco nitri suadent nitrum antimoniatum adjiciendum, ut JOH. FRANCUS in seiner Haber-Beschreibung / quamvis vero neque hunc modum improbemus; monendum tamen hoc loco esse censeo, quod hoc ipsum non unius ejusdemque sit salinæ indolis, sed ordinario, ut præparatur, duplex sal, videlicet & sal neutrum arcano duplicato simile figura octoëdria gaudens, & purum nitrum prismaticæ pyramidalis figuræ in eo observetur, siquidem ob defectum sulphuris antimonii sufficientis non potuit omne nitrum quod ad calcinationem antimonii recipitur in sal neutrum converti. Ex quibus jam qui rerum medicarum & chymicarum peritus est, quisque sagacissimus quam facile dijudicabit nitrum antimoniatum optima sane ratione decoctum nostrum præstantissimum ingredi, siquidem duplex exinde virtus, quæ partim aperitiva & diuretica est certe in chronicis affectibus desideratissima, partim etiam bilis acrimoniam infringens & manifesto refrigerans inde resultat.

§. XVI.

Ut vero de virtutibus quas eximias & vere mirabiles in sanando nitrum possideat & autoritate peritissimorum virorum & ratiocinio atque experientia firma subnixæ quædam afferamus, instituti nostri ratio utique poscere videtur. Primo vero est observatione dignissimum, quod in universa rerum conditarum natura non detur hoc ipso præstantius & præsentius refrigerans, quod tam celeriter immodicum

eum corporis fervorem sitimque deprimat atque extinguat; Et hæc quoque est causa, cur in febrili æstu molestissimo sedando, vel etiam inflammatione interiorum partium compescenda, nitrum omnibus adhuc perspectis cognitisque remediorum generibus sit longissime præferendum. Ea enim est partium, hoc sal constituentium, indoles atque textura, ut motum partium sanguinis sulphurearum intestinum, qui omnis caloris fons atque origo est, protinus temperet atque moderetur, neque ut alia solent refrigerantia acida naturæ insensam humorum coagulationem, sed potius eorum fluxilitatem promoveat. Effectus sane hic nitri singularis atque mirabilis est, ac primum, quod sciam, notatus a Dn. D. Præsidente, quod videlicet sanguinem coagulatum nigrum fluidum & floridum reddat, sive solutum sive in pulveris forma ipsi adjiciatur. Et hæc est ratio quare Medicorum peritiores nitrum in refrigerando & deobstruendo omnibus aliis acidis vel refrigerandi virtute instructis nihil præstantius usque eo deprehenderit. Etenim præter refrigerium quod corpori affert simul aridas & exsuccas faucium & oesophagi glandulas humectat; quare non certius in sedanda siti hoc ipso datur præsidium, & quoniam siccas & constrictas partes humidat reddit easque relaxat, hinc antispasmodica simul virtute viget excellentissima. Quid enim in spasmis, qui permultorum morborum parens vel comes est, sedando, plus proficiat, quam fibras nimium tensas ac rigidas rursus emollire ac relaxare, equidem non video? Quare minus mirandum est, cur in dolorum, cujuscunque generis fuerint, atrociam, inque compescendis hæmorrhagiis enormibus, quarum procreatrices sunt plurimumque internarum partium constrictiones spasmodicæ, nullum unquam remedium ipso hoc nitro par reperies. Præterea cum fluxilitatem servet humorum, simul etiam salinis aciebus ac spiculis sensibilibus fibras pungat atque laceffat, egregie obstructa viscera aperit, emunctoria aperta servat, eaque stimulando excretiones tam per alvum quam per urinam promovet.

§. XVII.

Neque prætereundum hoc loco est, nitrum diaphoretica, quod mirum nonnullis videtur eo quod corpus refrigeret, virtute fulgere: at vero quæ sudorem movent, non semper id calore præstare, anodyna sedativa & terrea bezoardica, quorum virtus diaphoretica non ignota est, luculenter demonstrant; quod si enim nimia & prævalida motricium fibrarum & cutis glandularum a calore aucto vel atroci dolore fortis sit constricção, nullus sudor fluit, sed universa cutis spiramenta firmiter clausa & coarctata sunt: simulac vero, temperato vehementiori calore, vel dolore sedato, fibræ evadunt laxiores, protinus liberior sanguinis & feri ad cutis emunctorium fit affluxus, succedente postea longe utilissima perspiratione.

§. XVIII.

Ex quibus omnibus clarissime intelligitur, non sine ratione Practicorum peritiores, præsertim nostro tempore, nitrum mirifice æstimare, tam in omni generis febre, quam inflammatione compescenda, neque minus spasmodicorum ferocia contemperanda. Sed cum omnia hæc copiosius & accuratius deducta sint in nuperime a D. D. Præsidente habita *Dissertatione de Nitri virtutibus*, hinc quemvis Praxeos medicæ cupidum ad hæc legenda remittimus.

§. XIX.

Saccharum etiam additur nostro potui, quod magis saporis paulo gravioris quam virtutis causa sit; cum vero sint quidam, quorum ventriculus & primæ viæ minus dulcia & fermentescibilia ferre possint, sed potius ab iis vehementer lædantur, hinc consultum fore arbitror, ut probe prius naturas ægroantium Medici perscrutentur, ne magis damno quam emolumento sit; præstat tunc semper ea in pariori quam largiori dosi adhibere. Neque tamen in genere saccharum tam insensum naturæ nostræ est & reformidandum, quam vulgo existimatur: firmiore enim ventriculo & tonio ejus ac intestinorum vegetiore existente, novimus quotidie per plures annos ingentem sacchari quantitatem ingestam neutiquam nocuisse. Atque singulari GODOFRIDUS STEEGHIUS saccharum exornat encomio *Art. medic. Medicin. theoret. L. II. c. 27.* inquit *nutrit album, & quia facile dissolvitur, omnis lentoris expers, sequax, ad omnia cito pervadit membra, quæ & a sordibus quasi eluit, fovet calore, & humiditate, pectus faucesque lenit plurimum, estque quamvis melle dulcius; minus tamen siticulosum.* Malunt alii saccharo mel substituere; eo, quod hoc præstantiore abstergendi; emolliendi & consolidandi virtute gaudeat; neque nos ab hac sententia discedimus, modo mel fuerit purissimum ex optimis floribus collectum, quale est Russicum, albißimum, quod fragrantis odoris & gratissimi saporis est, magisque medicamento sæ virtutis, quam ipsum saccharum videtur.

§. XX.

Quum itaque laudatissimus noster potus tam excellentis virtutis constet ingredientibus, nil dubii est, quin ad expugnandas permultas easque graves ægitudines maximam vim atque virtutem obtineat. Etenim ubi obstructions vasorum sunt referendæ, ubi morbofi & excrementitii sales sunt eluendi, viscidum dissolvendum, ac humidum deficiens restituendum est, ibi utique magnum nostra potio auxilium opemque afferet. Quis enim non perspicit hanc ipsam in universam sanguinis & humorum massam agere, & hac ratione etiam partes solidas afficere, quod præcipuum Medici de præstanti remedio desiderium est? Hoc vero non tam ratione earum specierum quas habet & recipit, quam propter aquam puram sinceram ejusque copiam exsequitur. Hæc enim est, quæ fontes sanguinis subeundo ejus motum ac circulum per universi corporis tubulos fluiditatem servando, promovet; hæc est quæ lentos & viscidos humores valide fundit atque dissolvit, hæc porro est quæ sales acres diluit & ex corporis sphaera vehit atque eliminat. Ex quo facile intelligitur, in omnibus morbis a Veteribus sic dictis calidis quos Medici mediæ ævi a bilis copia, Recentiores a salium acrimonia deducunt atque derivant, avenaceum hunc potum saluti atque auxilio esse desideratissimo. Neque negari potest, quin in chronicis permultis passionibus quas viscerum obstructions vel humorum stagnationes sustinent, laudatissimam ferre opem possit, quemadmodum etiam experientia hac in re confirmatur. Placet vero hujus virtutes paulo specialius rimari, ac quid in mendo possit, quid non possit, circumspicere.

§. XXI.

Primo omnium vero non possumus non nostrum potum dignis laudibus ad omnem febrilem æstum extinguendum commendare; quid enim ad sitim sedandam ipsa aqua & nitro convenientius sit, quid ad calidissimam partium sulphurearum sanguinis in-

testinam agitationem temperandam ipso quoque nitro efficacius sit, & quid bilis in primis viis stabulantis acredinem & fervorem magis mitiget ipso hoc nostro potu, equidem non video. Commodissime itaque in paroxysmo omnium, quæ intermittunt, februm pro ordinario potu satis etiam liberaliori quantitate bibitur, utpote non modo primarum viarum sordes, quæ febrilem subinde fomitem augent, egregie abstergit, sed & humores & sanguinem fluxiliores reddendo, neque minus fibras quæ sub omni intensiori æstu valde tensæ & contractæ sunt relaxando efficit, ut corpus ad sudorem, qui remittente febris impetu non sine felici successu profluit, eo melius disponatur. De hujus vero remedii in febre tertiana efficacia ego ipse scilicet testimonium perhibere possum, cum enim nuper admodum tertiana vehementi corripiebar nihil fere medicinae præter unicam hanc potionem avenaceam assumpsi, quam primis statim diebus largissime hausi & per aliquot dies hoc continuavi, ita non modo in sequentibus paroxysmis protinus mitior factus est calor, verum etiam pauco tempore ex toto se febris remisit. Memini quoque in quartanis, quæ sæpius Medicorum scandala sunt, feliciter usurpatum fuisse hunc potum, evacuato imprimis, mox ab initio convenienti vomitorio aut purgante, corpore, ita enim liberius & citius suam virtutem atque efficaciam exercet.

§. XXII.

Quod attinet ad febres continuas, nihil quoque dubii est quin in hisce quoque potus hic sit longe optimus atque convenientissimus, nam quo intensior est calor, eo plus humidi, sale præsertim nitroso exaltati, desiderat, ut humores nimio æstu dissipatos & vires quoque disiectas restituat. Atque etiam hac in re aquam avenaceam mucilagine imbutam plus simplici aqua præstare minime potest negari, siquidem pura & simplex aqua celerrime per corporis tubulos ejicitur, ubi vero mucilagine quadam dulci ac temperata subacta est, diutius in corpore manet, & fluoribus corporis nostri sese associat, humidum substantifice restaurat. Et ut liberius mentem nostram exponamus, profecto in potionibus liquidis congruis & convenienti quantitate ac tempore sumtis, præcipuum sanandi continuas & inflammatorias febres, momentum consistit; si ullius enim morbi, certe febris, natura sæpe sola est optima medicatrix, nec pluribus eget speciosis arte excogitatis aut validioribus remediis, sed simplicissima saltem & liquida amat, quibus nimius æstus temperetur, obstructions solvantur, & materia morbi naturæ inimica per debita loca excludatur: qua de causa etiam HIPPOCRATES *libr. IV. de Morbis* aquam omni febre esse adversissimam pronunciat.

§. XXIII.

Quod de febribus continuis jam diximus, hoc quoque circa variolarum, morbillorum & purpuræ tractationem tenendum est, siquidem in his temperantes potus præcipuum curationis momentum absolvent; neque in hisce nostra avenacea ptisana dissuadenda est, ut potius maximam laudem ac commendationem promereatur. Quamvis vero nitrum, in morbis salinis & ubi expulsiōne valida ad corporis peripheriam opus est, alienum videatur; attamen merito inter ejus debitum usum & abusum in hisce affectibus distingui debere arbitramur. Neque minus temperamentorum & temporum morbi, quæ magna sunt curationis momenta, rationem habere oportet, siquidem urgente nimia sanguinis calidi, sub initio morbi, ebullitione, nitri modera-

tam dosim magno esse auxilio indies observamus, unde etiam non potest non noster avenaceus potus esse utilissimus, hoc unico saltem observato, ne nimia in copia, vel nimis etiam frigide, sed potius tepide offeratur, ita enim corpus in continua perspiratione ac diaphoresi conservatur, quæ medentis præcipua ac princeps in hisce affectibus intentio æstimatur.

§. XXIV.

Num vero hic noster potus truculento pestis morbo correptis conveniat, merito in quaestionem venit. Dubitatio ex eo nasci potest, quod nitrum nimis refrigerando virulentum iniasma magis in corporis sphaera detineat, nedum illud foras expellat. Sed tamen negari nequit pestis venenum in ventriculo & primis viis potissimum atque celeriter, dum cum saliva in eas descendit, inflammationem facile in sphacelum transeuntem moliri, idque magis hoc efficere, si quando corpora sanguineæ cholericæ temperaturæ offenderit. Quis vero hic nitri usum cum ratione damnare velit meo quidem judicio non video. Alia vero ratio est ubi corpora fame & viribus exhausta in peste tractanda sunt, ibi utique omnis generis refrigerantia nec non evacuantia plus exitio quam saluti esse solertium. Medicorum experientia edocetur. Unde in ipsa peste potionem ex rasura cornu cervi, radice scorzonerae & avena paratam & ad gratiam edulcoratam a *Cl. Gottl. BUDÆO Consil. de Peste nuperrim. edit. p. 54. & 70.* præscriptam invenies.

§. XXV.

Quod si vero in ullo morbo, certe in inflammationibus & inflammatoriis omnis generis febribus laudabilem hic noster potus præstat usum. Etenim ex nostra quidem sententia febres ardentes internam plerumque nobilioris partis inflammationem potissimam causam agnoscunt, & inflammatio nil nisi febris cujusdam partis est, quæ postea universam corporis massam ac totum corpus in consensionem pertrahit. Quod si vero funestæ illæ partium inflammationes sanguinis vitæ insensibilissima in tubulis stasi atque incarceratione sustineantur, quam protinus dolor, rubor, ardor partis & pulsus celer sequitur, certe nihil præsentius tali potu, qui sanguinem stagnantem resolvat, diluat, abstergat, inque ordinem reducat, spasmus simul & incendium restinguendo poterit excogitari. Quis enim nostris recentissimis temporibus inter Medicos tam socordis mentis est, qui adversus inflammatorium æstum maximum præsidium esse nitrum ignoret? Inde etiam est quod nitrosa, præsertim sufficiente liquido diluta, in pleuritide, peripneumonia, angina, nephritide, erysipelate, quin imo in ophthalmia, phrenitide atque in inflammatione uteri longe utilissima a solertioribus Practicorum constanti experientia observentur. Accedit & hoc, quod sicuti febrium, ita etiam inflammationum, quæ pari fere cum ipsis passu ambulant, natura unica fere & præstantissima sit medicatrix, modo hæc si opus sit sanguinis detractione & congruo potu adjuvetur, ita enim debito & stato tempore patienter expectato, gravissimus hic morbus usque ad admirationem felicissime sæpe numero vincitur.

§. XXVI.

Quid vero judicandum est de nimis sanguinis per varia loca profluviiis, num etiam in his desideratam noster potus opem afferat? Enormes hæc sanguinis profusiones ab ejus immodica ebullitione, a spasmodicis validioribus, præsertim viscerum abdominalis internis, & hinc inæquali sanguinis circuitu atque

que cum impetu ad quasdam partes facta confectione, proficisci, non ignoratum amplius fore arbitramur, & qui circa hanc rem dubitationem quandam animo concipit, is *dissertationem* D. D. Præsidis de *Hæmorrhagiis* legendam adire poterit. Cum itaque spasmus causam hæmorrhagiarum proximam constituat, & is a sanguinis stagnatione & consuetudine ejus evacuatione suppressa plerumque suboritur, nihil certe est quod tam prompte ac expedite stagnantem sanguinem resolvere & tam celeriter spasticas sensibilibus partium strictiones laxare poterit, quam potus noster laudatissimus, cujus omnia ingredientia hisce prædictis indicationibus satis faciunt. Qua de causa etiam in immodica narium, mensium, hæmorrhoidum nec minus uteri hæmorrhagia atque hæmoptysi non modo nitrum, sed & potus noster nitro conditus desideratissimam fert opem, imprimis prudenter juncta sanguinis detractio. Incidit mihi quam recensere placet curatio: juvenis XX. annorum de dolore lateris punitivo & spirandi difficultate laborans sanguinis copiam ejecit, cui successively aliquot pocula nostræ ptisanæ obtuli, quibus sumptis tertio die cum malo rediit in gratiam.

§. XXVII.

Quum vero graves & longæ quæ corpora nostra affligunt, passionibus viscerum obstructione principaliter foveantur, atque adeo si eæ inveteratæ radices egerint, & non solvi possint, insanabiles fiant; hinc si quando mature talis obstructio tollatur, chronici talismodi mali protinus curatio insequitur. Princeps itaque omnis medentis cura ac intentio in morbis chronicis esse debet ut infarctus viscerum eorumque obstructiones præmaturo consilio aperiatur, id quod optime perfici posse liquido copia assumpto, cum ratio suadet tum experientia confirmat. Quid hac in re thermarum & acidularum conveniens usus valeat, nemini facile ignotum esse poterit, nisi quis experientia, quæ optime quid præstant remedia edocet, destituatur, vel morborum generationem minus perspectam habeat? Cum vero non omni loco & tempore cuivis liceat medicatos fontes adire, utique ut de tali remedio quod similes cum iis habeat effectus ac vires cogitemus necessarium est. An vero convenientius & quod tantum consymbolismum cum aquis medicatis foveat, inveniatur, ac nostra potio, quæ aqua sale potenti nitroso in medicina saluberrimæ virtutis, ac præstanti quadam radice correctæ est, cuivis sagacissimorum Medicorum judicio dijudicandum relinquitur. Maxime omnium vero hanc nostram assertionem experientia optime tuetur: numerosa enim prostant exempla a Cl. LOWERO & JOH. FRANC. aliisque consignata, ubi hic noster potus per aliquot septimanas continuatus in chronicis morbis, præsertim asthma, dyspnœa, podagra, calculo renum & vesicæ, arthritide vaga scorbutica, malo scorbutico & hypochondriaco, ictero, mensibus obstructis, chlorosi, lippitudine oculorum, scabie & omni sanguinis impuritate miracula fere præstitit, modo interdum ejus usui pilulæ balsamicæ amaræ interponantur.

§. XXVIII.

Quam maxime vero cura nostra avenacea scorbuticis convenit; etenim cum grave hoc non minus quam chronicum malum ex sanguinis circulo languidiori, emunctoriorum obstructione, & inde fluorum corporis nostri sequente magna impuritate proveniat, facile intelligitur, ea esse optima mali hujus præsidia, quæ sanguinis circulum promovent, inveteratas obstructiones expediunt, neque minus per omnis generis emunctoria excrementitias salino-

sulphureas sordes evehunt. Id vero an ulla medicina exequi possit felicius nostro laudatissimo potu, valde dubitandum est, utpote cum decantata illa antiscorbutica calidiora ut sunt cochlearia, trifolium fibrinum, lignorum decocta & ex arbore pini deprompta remedia mineralibus aquis & simplici hoc nostro potu longe multumque sint inferiora. Quin imo hæc ipsa plus exitio quam saluti fuisse non semel fuit observatum. Cum vero truculentia doloris arthritici, qui graviter sæpe numero artus exercet vagam vel fixam sedem in iis occupando, plerumque scorbutici morbi & lymphæ impuræ soboles sit, hinc etiam eodem modo hæc est tractanda. Et profecto si in ullo morbo certe in hoc præsentissime efficaciam suam exerit, id quod compluribus experimentis constat. Magis autem proficit, prima regione prius leniori emetico aut laxante evacuata, si per aliquot septimanas paulo liberaliori dosi calide vel etiam frigide a calidioribus præsertim subjectis bibatur.

§. XXIX.

Eadem est ratio aliorum dolorum qui corporis partes, præsertim capitis membranas, divexant, ubi non inferioris efficaciam deprehenditur. Notabile est quod scribit LOWERUS feminam per XV. annos capitis dolore vexatam, omnibus aliis frustra adhibitis, sola hac potione per XIV. dies continuata, in integrum fuisse restitutam. Neque in aliis doloribus, ut colico, odontalgico, ejus usus disuaderi debet, ut potius maximopere sit commendandus, dummodo, ut Veteres loqui amant, non ex causa frigida sed calida fuerint prognati, i. e. si sensibilia fuerint corpora, quibus magna motuum inest energia, & calor ac bilis abundat; tali enim in casu temperando & humectando non potest non summe esse proficius.

§. XXX.

Ceterum in morbis qui ab impuris salibus nascuntur maxime omnium principem noster potus locum sibi vindicat, cujus generis sunt scabies, herpes, serpigo, pruritus, gutta rosacea, quibus, uti omnia humida & aquea, ita maxime potus ex avena, aqua, nitro & radice cichorii est convenientissimus, hoc tamen adhibito monito ut prius vel sanguinem nimium detrahamus, vel alvum ducendo primam regionem prius expurgemus, atque etiam hæc ipsa inter hujus potus usum interponamus.

§. XXXI.

Laudamus vero maximopere ejus insignem usum atque utilitatem in renum & vesicæ vitiis emendandis. Non infensior corporis humani tyrannus ipso grandiori calculo sive in renibus sive in vesica existat, observatur, ob atrociam quibus agros miserrime excruciat symptomata. Hujus vero generationem sufficiens liquidum impedit, quando viscidarum & tartarearum partium urinosi laticis unionem & concretionem continuo fluiditatis motu prohibet, vel etiam si quæ jam levi nexu concretæ fuerint, rursus dissolvit, abstergit, abluit & per urinarias vias educit; neque enim in iis qui potu largiori utuntur peregrinus hic hospes facile habitat, sed vitæ sedentariæ, lymphæ viscidioris & potus parioris plerumque foetus est. Idem statuendum circa dysuriam, & stranguriam est, quæ nunquam non latentem calculum veluti causam agnoscit primariam, quam data ptisana nostra egregie compescit, præsertim liquore carminativo blande diuretico spirituosissimo interposito.

§. XXXII.

§. XXXII.

Ut vero universa, quæ diximus, in pauca contrahamus, dicimus: ad omnia vitia ac morbos in quibus alias non sine singulari fructu aquis salubribus medicatis, mineralibus thermis, & acidulis vel aqua simplici purissima aut pluviali utimur, nostrum decoctum esse summe conveniens ac proficiens remedium. Atque adeo ut sicuti cum illis, ita etiam cum hoc cura per aliquot septimanas institui possit.

§. XXXIII.

Quemadmodum vero circa usum omnis generis remediorum, quæ efficacia pollent debito regimine & methodo opus est: ita etiam circa curam avenaceam hoc non debet negligi. Si quis itaque præservationis gratia hac cura uti & ab imminentibus morbis corpus tueri velit, præstat æstivis mensibus si frigidum expetit potum, hanc curam adornare, alio enim tempore ab ingenti hujus potus frigore cavendum est. Si quando autem morbus vel symptomata id urgeant, expedit mane & quidem calide in lecto hunc potum assumere, ut liberior sit perspiratio; deinceps si loco acidularum hac ptisana uti velimus ad morbos vel præsentis vincendos vel imminentes avertendos, tunc si plethora adest, sanguinem ante detrahendum oportet, & bene laxante primam a fordibus regionem deplere. Deinde in potu successive est ascendendum: sufficit prima die unam libram assumere, altera addi potest libra dimidia, tertia ad libras duas est veniendum, &

ibi quoque persistendum per omnem curæ cursum, quæ tandem balsamico quodam laxante est finienda. Inter hanc curam vero cum omnia aquea tonum ventriculi debilitent, hujus ratio in primis est habenda, quamobrem ante vel etiam post cibum elixir quoddam balsamicum vel stomachicum debita dosi est porrigendum. Peracta vero prandii concoctione, quod plerumque post 4 vel 5 horas sit, dimidiam saltem potus partem haurire licet. Durante hac cura, & aliquo tempore etiam post eam, usum eorum quæ difficilius sunt concoctionis & malum succum præbent circumcidere oportet.

§. XXXIV.

Quemadmodum autem minerales & alias medicatas aquas frequentissime ad potum ordinarium vel etiam in morbis tam chronicis quam acutis subinde summo cum fructu solemus usurpare: eodem modo loco cerevisiæ vel consueti potus inter cibos vel cum vel sine vino nostra ptisana bibenda. In acutis passionibus ad sitim & æstum restringendum loco julpæ vel ordinarii potus vel cerevisiæ datur convenientissime. Et sicuti porro non semper æque felix effectus protinus ab ipsa cura aquarum mineralium visitur, sed demum peracta ea post aliquot septimanarum spatium fiat: ita etiam si graves & radicati morbi sunt vincendi, non protinus effectus, sed successu temporis percipitur. Et uti frequenti opus est, ut morbus longus expugnetur, aquarum continuatione: ita quoque non mox a potu nostro est desistendum, sed habita ratione circumstantiarum repetendus five ad tempus continuandus est.



DISSERTATIO MEDICA

D E

NECESSARIO SANIS MEDICO.

Primum edita Anno 1733.

P R Æ F A T I O.



ENEROR ineffabile omnique veneratione venerabilius summi opificis, rectoris & domini Numen, veritate ac sapientia in toto hoc universo adeo clarum, adeo conspicuum, adeo manifestum atque illustre, ut non possimus id non vel oculis contrectare, vel manibus quasi tentare, seu, uti Apostolus loquitur, *a*) *Ἐπαφέναι*. Veritatem dico, compositam illam, concinnissimo ordine digestam, tot corporum, tot creaturarum varietate splendentem rerum compagem, potentissimi omnium Effectoris & sapientissimi Artificis existentiae veritatem clarissime evincentem. *b*) Sapientia nobis hic est admiranda illa & provida bonitas,

a) Act. XVII. 27.

b) Id quod pagani philosophi non potuerunt non agnoscere, aperteque profiteri: e. g. CICERO *Tusc. quest. I.* Deum inquit *est* non videmus, tamen agnoscimus ex operibus ejus. Et de *DIVINAT.* *Esse præstantem aliquam æternamque Naturam, & eam suscipiendam admirandamque hominum generi, pulchritudo mundi, ordoque rerum cælestium cogit profiteri.* Plura id genus exempla evolvi possunt in selectis & profanis scriptoribus historiis cap. II. III. seqq.

Imprimis huc pertinent quæ PLOTINUS Platonius seculo post natum Christum tertio philosophus, hac de re in scriptis suis consignavit, quæ ita se habent: *Ἐπεὶ ἔν τὸ γινόμενον ὁ κόσμος ἐστὶν ὁ ξύμπας ὁ τῶν διωγῶν τάχα ἂν ἀνέσει παρ' αὐτῆς, ὡς ἐμὲ πιπιόηκει, ὁ Θεός.* i. e. Cum mundus hic universus sit id, quod factum est, qui hunc contemplabimur, hanc profecto quasi vocem ex eo audiet: DEUS ME FECIT.

bonitas, qua rerum creatarum conservationi, secundum finem, unicuique pro sapientissimo ejus, tacitaque veneratione colendo arbitrio & arcana œconomia obtinendum, prospicit; quippe quæ immensissimum potentiae non minus quam sapientiae gradum apertissime indicat commonstratque. Quibus accedit ille σπλάγχων ἐλπίς c) erga mortales adfectus, per ὁμολογούμενος μέγα τὸ τῆς εὐσεβείας μυστήριον d) abunde patefactus, quod introspicendi, & angelos mirum tenebat desiderium. e) Hi fontes, hæ scaturigines, non rivulos, non amnes, non flumina, sed maria, sed oceanos, sed abyssos utilissimarum ac summe necessariarum cogitandi, dicendi, scribendique materiarum efficientes, in quibus contemplantis omnes omnium mundi seculorum mortales stupefacti submerguntur, f) neque ipsis exhauriendis æternum futuræ vitæ sufficiet ævum.

Iisdem illis divinis virtutibus & scientiam, corporis animalis, præcipue vero hominis conservationi ac vindicationi intentam, quam Medicinam dicimus, potissimum in acceptis esse ferendam, neminem revelatæ doctrinæ verum contemplatorem potest latere, cui finem creati a Deo hominis, hujusque a pristina diversam & miserrimam, cui omnes partes atque facultates, divina imagine perdita, expositæ sunt, conditionem paulo penitius licuit introspicere.

Acerbissimo itaque animi sensu deploranda est supina mortalium vecordia, amentissimaque temeritas, tam inconsulte, tam inepte tamque absurde de salutari hac scientia, singulari Dei dono, sentientium. Quosdam enim fatuis fati deliramentis abreptos, prorsus eam neglectui; quosdam vero aut præjudiciorum voraginibus submersos, aut ingenii illecebris occæcatos, sortisque suæ oblitos, omnia omnibus suis partibus ac numeris perfectæ ab imperfectissimis exigentes, derisui habere reperimus. g)

Pervulgatissima vero æque ac perniciosissima omni fere tempore, & hæc de ea fuit opinio, quod præsentibus tantum ægritudinibus depellendis credebatur destinata. Quem exitiosum errorem ex hominum animis eripiendum hac speciminis inauguralis exhibendi occasione sumus conati. Faxit omnis salutis fons, qui & naturalem vitam ad terminum a se cuique præfinitum vult conservatam, ut, quem vehementer optamus, inde redundet fructus!

THESIS

c) Lucæ I. 78.

d) Epist. I. ad Timoth. III. 16.

e) Epist. I. Petri I. 12. collat. ad Ephes. III. 10.

f) Testatum id facit non solum celeberrimorum naturalis Theologiæ auctorum ubertas, sed & immensus aliorum super alios coacervatorum revelatæ Theologiæ librorum cumulus: quorum alterorum potiorum catalogum nobis exhibet Celeberr. atque acutissimus VERDRIES in prolegom. ad introduct. in Phys. p. 34. & 35. quibus addi merentur CALVOER Gloria Dei, nec non ILLUSTR. AC VENERABILIS PRÆSIDIS dissert. de atheo convincendo ex structura corporis &c. alterorum vero quotidie increfciens numerus innumerabilis fere est; quæ tamen omnia ita comparata sunt, ut rem pertractandam non tam exhauriant, quam potius nova tantum admirabilia suppeditent agnoscendi cognoscendique occasionem, ut vere cecivisse videatur Poeta Ebraeus in hymno illo pentecostali, Chaldaeo - Syriaco idiomate composito, hac utens hyperbole:

נ	כורן עלמין ליה ולא ספק פירשו	תא
נ	ויל אלו דקיעי קני כל חורש	תא
ד	יו אלו ימי ופל מי כנישו	תא
ר	יירי ארעא ספרי ורשמי רשו	תא

Cujus sensum metricè ita exprimere placuit:

*Est aeterna Deo superumque potentia regi,
Cui describendæ par nihil esse potest.
Sit licet expansum cœli membrana patentis,
Sint calami silvæ, det nemus omne stilos:
Sint atramentum coeuntia flumina, & ipse
Oceanus, cuncti terrigenæque notent:
Intentique operis manean noctesque diesque:
Vix tamen attingent, quam sit JOVA potens.*

g) Ad priorem classem pertinent potissimum stoici, quorum argumentationem CICERO refert in libro de fato p. 417. & 418. ex edit. Gothofredi, eamque merito appellat ἀεὶ γὰρ λέγειν: his verbis: si fatum tibi est ex hoc morbo convalescere, sive medicum adhibueris, sive non, convalesces, si fatum tibi est ex hoc morbo non convalescere, sive tu Medicum adhibueris, sive non, non convalesces, & alterutrum fatum est, medicum ergo adhibere nihil attinet. Eiusdem commatis sunt, quæ QUINTILIANUS exclamat in D. clamat. VIII. cui titulus, Gemini languentes p. 92. ex edit. Parei, Fato inquires vivimus, languemus, convalescimus, morimur, Medicina quid præstat? Ideo PAUSANIAS medico ipsum visitanti, & interroganti, nihil habes mali? respondisse legitur: id fit, quia te medico non uxor. Conferri meretur hac de re doctissime differens CASP. A REYES in Elysio jucund. quæst. campo quæst. XVIII.

Alterorum numerum præter PLATONEM & PLINIUM, haud optime de Medicina ubique sentientes, præcipue explent, qui satyrico sale quosdam nævos liberalius defricantes, aliqua & arti & ordini gravia excidere sibi passi sunt, HENR. CORNÆ AGRIPPA, Gallorum ille Terentius MOLIERE, ADRIANUS VALESIUS, HIERONYMUS CARDANUS, multique alii.

T H E S I S I.

Phyſice ſanus iſ nobis dicitur, qui omnium functionum, vitalium, naturalium & animalium gaudet integritate atque vigore.

Veritatem in rubro propoſiti thematis ex ipſius ſanitatis rerumque tam ad eam conſervandam neceſſariarum, quam eidem læſionem inferendam idonearum indole demonſtratur mihi, ſubjecti definitionem præmittere opus videbatur. Ut vero, quæ in ea occurrunt, artis vocabula eo facilius ab omnibus intelligerentur, ſequentia ſubnectere placuit.

Corruptibilem vitam motu humorum per omnis generis vaſa, & ex his contexta viſcera, cribra totiusque corporis compagem, nec non per horum in illos reniſum abſolvi, apud omnes ſolertiores Naturæ myſtagogos eſt in conſeſſo. Hi niſus & reniſus vocabulo in ſcholis medicis uſu recepto dicuntur **ACTIONES** vel **FUNCTIONES**. Quarum quia magna, ratione uſus ac effectus, obſervata eſt diverſitas; alia nempe vitæ ſtriſſime ſumtæ inſerviunt præſentiæ; aliæ vero ejus durationi atque conſervationi: inde factum eſt, ut ſecundum ſpecialiora munera **VITALES**, **NATURALES** & **ANIMALES** diſtinguerentur.

Motus, qui vitam ita faciunt, ut hæc iis carere nequeat, **FUNCTIONES VITALES** audiunt. Sunt potiſſimum actio cordis atque arteriarum, nec non pulmonum. His enim præſentibus motibus, vita præſens eſt: quieſcentibus aut ſufflaminatis, & vitæ adeſt finis. **NATURALES FUNCTIONES** conſtituunt, quæ aſſumta alimenta ita mutant, ut in naturæ partem abeant, eamque vel reparent, vel augeant vel propagent. Pertinent huc actiones viſcerum recipientium, præparantium, ſecernentium & excernentium: ventriculum puta cum longo illo inteſtinorum canale, & huic adnexa vaſa, chylum in lactis forma ad maſſam ſanguinis vehentia; nec non alia viſcera, depurationi, excretioni, ut & generationis univerſo negotio deſtinata. Et hinc vitalium functionum duratio atque ſpeciei propagatio. Ad **ANIMALES** denique referuntur, quibus motus & ſenſus ſubjiciuntur: quarum potiſſimam officinam cerebrum cum cerebello & oblongata medulla conſtituunt.

Cæterum quiſque facile intelligit, **VIGORIS** ſignificationem in data definitione nos nequaquam abſolute, ſed relative velle intellectam.

T H E S. II.

Ea harum functionum eſt indoles, ut nec diu ſalvæ atque incolumes permanere poſſint abſque continua novæ materiæ reparatione appoſitioneque.

Functiones in humano corpore abſolvi motu humorum in vaſis, atque horum in illos reniſu, ſupra indicavimus. Jam vero ea motus obſervatur energia & iſ effectus, ut per continuum ſuum attritum & agitationem non ſolum humores reſolvantur, totaque eorum compages diſſolvatur, & in aliam craſin mutetur, ex puris & bonis mali reddantur; ſed etiam quantitas imminuatur, & ſucceſſive materia partium fluidarum & ſolidarum conſtitutiva ſubtrahatur. Niſi itaque nova ſemper materia accedat, qua ſubtracta & amiſſa reparentur & boni quid apponatur, partes ſolidæ & fluidæ corporis in ſe ipſas agerent ſuique deſtructionem promoverent. Patet hinc ingerendi ad omnium motum incolumitatem ac durationem ſumma neceſſitas.

T H E S. III.

Ad perfectam harum functionum integritatem non ſufficit continua mutatorum reparatio, ſed & po-

tiſſimum opus eſt horum e corpore eliminatione.

Sub continuo motu partes corporis bonæ & laudabiles mutantur in malas ac noxias. Id quod in antecedentibus paucis monuimus. Quæ niſi mox e corpore proſcriberentur, labem functionibus, ejus durationi inſervientibus, affricarent certiſſimam, ut infra demonſtrabimus. Quam etiam ob cauſam ſapientiſſimus microcoſmi Architectus machinæ noſtræ proſpexit tot & tam variis organis emunctoriis & excretoriis, quibus partes, laudabilium craſi adverſæ, commode poſſent eliminari.

T H E S. IV.

Ergo functionum, quæ & ſanitatem & vitam conſtituunt, integritatis cardo in perpetuo affluxu ſucorum benigna temperie gaudentium, & effluxu, ſive excretionem intemperatorum atque inutilium vertitur.

T H E S. V.

Res, quæ hanc ſanitatis & vitæ œconomiam ſartam tectamque conſervant, ſunt potiſſimum externæ, vocabulo in ſcholis medicis recepto **Non-naturales** vocatæ.

Harum numerus ſex vulgo perhibetur, hoc ordine: 1) Cibus & Potus ſive alimenta. 2) Aer. 3) Animi Pathemata. 4) Motus & Quies. 5) Excreta & Retenta. 6) Somnus atque Vigilia. Dicuntur non-naturales hanc fortasſe ob cauſam, quia non abſolute ad humanam naturam pertinent, ſed quivis homo ſine iis ad tempus vivere poteſt. Conſuli de hac adpellatione porro meretur Celeberr. atque Doctiſſimi **SCHULZE** diſſert. de rerum non naturalium ad vitam longam recto uſu.

T H E S. VI.

Quemadmodum functionum integritas in perpetuo humorum laudabilium affluxu, & inutilium effluxu continetur (Theſ. IV.) ita hæc res etiam comparatæ ſunt, ut hiſce actibus commodiſſime inſervire queant.

Nimirum alimenta, hilaris animi tranquillitas, ſomnus & quies corporis ad generationem & reparationem ſuccorum corpori utilium, eorumque debitis locis appoſitionem; motus vero & vigilia ad inutilium eliminationem faciunt. Aeris ad omnia hæc munera ſumma neceſſitas per ſe patet. Nam ſanguinis progreſſivus & in circulum quaſi abiens motus præcipua eſt cauſa non ſolum affluxus humorum laudabilium ad omnes interiores partes; verum etiam inutilium effluxus, ſive excretionis, id quod *Illuſtris ac venerabilis* PRÆSES ſolide demonſtravit in *Medic. ſystematica vere rationali* T. I. lib. I. ſect. I. cap. IX. Jam vero hæc circulationis eſt lex, ut ſanguis, per cavam venam ex omnibus corporis partibus revectus, primum auriculæ cordis dextræ inſundatur, & hinc actione ventriculi hujus lateris in pulmonariam arteriam detrufus, actione pulmonum, mediante vena ſua ad cor ſiniſtrum reſſuat, ex quo & hujus thalami & aortæ actione ad omnes corporis partes propellatur. Niſi itaque aer, ſub inſpiratione pulmones ingreſſus, horum ſubſtantiam inflaret atque expanderet, neque cruor ille vitalis, pulmonum arteriæ ramulos, mire complicatos, & ipſius viſceris pondere compreſſos permeare, neque ad antrum ſiniſtrum redire poſſet, ſed omnium motuum ſequeretur abolitio ipſaque mors. Cæterum de Excretis & Retentis infra dabitur plura dicendi occaſio.

THE S. VII.

T H E S. VII.

Sicut vero ad sanitatem & vitam conservandam summa & inevitabilis omnium (Thes. V.) recensitarum rerum est necessitas; ita magna etiam pollet virtute, functiones, illarum integritati ac durationi inservientes lædendi, præsentissimamque eis inferendi perniciem.

Prius hujus thesios membrum nulla eget demonstratione; nam præter ea quæ thes. IV. proposita sunt, ejus veritas vel per se patet: quis enim ignorat se absque alimentis, aere &c. nequaquam diu persistere posse? Potissimum itaque nobis incumbit posterioris ejusdem partis veritatem evincere. Quæ ut eo melius elucescat, indoles dictarum rerum sigillatim erit perpendenda; quod vero non ita volumus intellectum, ac si intimiorem omnium naturam, & proprios cuique effectus secundum individuales & personales (ut ita loquar) rationes animus esset perquirere; obstat enim materiæ præcipue amplitudo, inauguralis speciminis formam longissime excessura (quamquam asserti nostri, in rubro propositi veritas hoc modo multo luculentius enitesceret): sed ita tantum, ut generaliores earum nocendi facultates, vel brevissimis indicemus ac ante oculos ponamus. Esto sermonis initium de Aere.

T H E S. VIII.

Aeris nocendi vis varia est ac vehemens.

Sicut aer ignis anima dicitur, cum ignis sine aere quasi vivere non possit; sic aer si serenus, purus (i. e. nullis particulis noxiis refertus) ac nitrosis particulis saturatus, vitalis caloris, qui in sanguine hospitatur, vita & anima est; impurus autem ejusdem mors & extinctio. Verba sunt RAMAZZINI in *Lib. III. Comment. de tuenda principum valetudine*. Regnat in aere jam excessus, jam defectus, caloris & frigoris, nimia item humiditas & siccitas. Ex nimio ejus calore diarrhoeas, dysenterias, febres biliosas, tertianas, acutas cum deliriis, morbos periculi plenissimos, progigni, docet HIPPOCRATES *Aphor. 16. lib. V.* Si frigoris motus in aere excedit, tussis, catarrhi, obstructions, inflammationes, perniones; grangræna mortales affligunt; & si sanguis justo magis refrigeratur, ipsa mors opprimit. Easdem fere, si non peiores, afflictiones adfert aer humidus & siccus, ut taceamus, quæ ex variis ejus mutationibus ex calido & humido in frigidum &c. producantur mala. Conferri merentur LOMMII *observationes medic. lib. III. p. m. 325. seqq.*

Aer particulis sulphureis & corrosivis repletus homines necat, qua de re egerunt *Illustris PRÆSES* in *dissert. de Metall. morb. & RAMAZZINI de morbis artificum*. Aer, exhalationibus carbonum, in cubiculo clauso accensorum, refertus, mortem conciliat. Rem solide demonstratam legas in scripto *Venerabilis PROMOTORIS*, vernacula exarato, cui titulum fecit: *Bedenken vom schädlichen Dampf der Holtzkohlen*. Conf. MEIBOMII *dissert. de fundam. brevioris vitæ p. 17.* Aerem in conclavibus, calce viva recens obductis, periculosissimum docet, experientia teste, idem *Illustris PRÆSES in Medicina systematica T. II. p. 297.* lethalemque eventum suo exemplo comprobat Jovianus Imperator: EUTROPIUS *X. 9.* Ut omittamus alias aeris constitutiones, multorum epidemiorum pariter ac endemiorum morborum causas, id quod solidissime luculentissimeque demonstravit *Venerabilis PRÆSES in dissert. de Peste*: nec non in *T. II. part. II. cap. IV. part. III. cap. VII.*

Frid. Hoffmanni Oper. Supplem. II.

T H E S. IX.

Cibi & potus vario modo functionibus, sanitati & vitæ patrocinantibus, læsionem inferre valent.

Idque fit vel ex quantitatis vel qualitatis vitio: Nimiam ciborum quantitatem, naturæ nostræ inimicam, morbosque facile producere posse, docet *Illustris ac Venerabilis PROMOTOR* in *dissert. de Diætæ vitio multorum morborum causa*. Bene enim schola Salernitana monet:

Pone gulæ metas, & erit tibi longior ætas.

Qualitas ciborum etiam duplex considerari meretur; temperata, vel minus temperata. Alteram classem constituunt, qui aptissimam humanæ naturæ continent materiam; i. e. qui laudabilem præbent chylum & sanguinem: alteram vero, qui non illius sunt indolis, sed qualitate quadam excessiva imbuta, ut crassa, dura, viscida, austera, coagulo obnoxia, dulcia, mellita &c.

Mala, quæ ex prioris classis alimentis, immodice suntis, in corpus redundant, sat sunt gravia ac fere innumerabilia. Nam, quia laudabilem præbent chylum, eumque copiosum, sanguinem etiam augeant necesse est. Et hic fons, hæc origo est plurimorum pathematum, mortales misere cruciantium, ac utramque pene in pathologia rationali faciunt paginam. Id quod demonstratum dedit *Illustris PRÆSES* in supra laudata *dissert. præsius vero in dissert. de ortu & causis morborum*.

Quæ ex posterioris commatis cibis propullulant noxæ, identidem gravissimæ sunt. Quas fere omnes satis abundeque detectas legas in *dissert. de Diætæ vitio &c. p. 16. seqq. in Medic. syst. T. I. lib. II. cap. IV. nec non T. II. part. III. cap. II.* Ad omnes classes referri potest *cap. I. part. III.* in quo agitur de morborum origine ex copia & vitio ingestorum.

Potus nocendi vis iisdem continetur modis, qui de cibis dicti sunt. Quorum noxios effectus uberime atque solidissime demonstratos invenies in modò laudatis aureis scriptis, nimirum in *dissert. de Diætæ vitio p. 31. seqq. Medic. syst. T. I. lib. II. cap. VI. T. II. part. III. cap. IV. de noxa potus spirituosæ, vel nimii vel pauci*: nec non in *part. II. cap. X. de frigido potu, vitæ & sanitati hominum inimicissimo*. Conferri quoque meretur celeb. FISCHERI *dissert. de homine suæmet vitæ destructore p. 7. §. 7.*

T H E S. X.

Præsentiores ac evidentiores sunt læsiones, quas animi pathemata functionibus corporis inferunt.

Ad animi pathemata referuntur ira, terror, timor, gaudium, mœror, vehemens desiderium, imaginatio, & profundior abstrusisque rebus infixæ cogitatio: Quorum omnium, si gaudium excipias, ea est indoles, ut per se nunquam non magnam functionibus corporis, sanitatem absolventibus, affricent labem, vel omnibus simul vel singulis, quin & præsentissimam minentur destructionem: licet per accidens & rationes corporibus quorundam hominum proprias nonnunquam existant salutaria, qua de re, præter ea, quæ *Illustris PRÆSES* in *Medic. syst. T. II. part. II. cap. 1. §. XXV.* consignavit, legi merentur quæ BARTHOLINUS in *Actis Hassn. Vol. I. cap. 81.* & HILDANUS *Cent. I. obs. 79.* memoriæ prodidere.

Quemadmodum vero ira parva febris, insania & momentanea epilepsia dicta est a veteribus; ita etiam ejus energia id genus affectus producit in corpore: Nimirum febres biliosas, inflammatorias, biliosas colicas, pleuritidem & peripneumoniam: item hæmorrhagias, phrenitidem & lethalem inflammationem;

A a

docen-

docentibus, teste experientia, *Illustri ac Venerabili PRÆSIDE in Medic. syst. T. II. part. II. cap. I. & B. FISCHER* in dissert. jam laudata. Pertinet huc observatio de iracundia, præsentissimæ mortis causa, quam in dissert. sua *de plurimorum hominum morte immatura*, sub Præsidio Excell. D. ALBERTI habita, refert D. STREULIN p. 23. §. VI. Mittimus funestos & lethales affectus reliquorum pathematum animi, ut, terroris, gaudii, mœroris &c. quippe qui ab *Illustri PROMOTORE* partim loco supra citato, partim in *T. I. lib. I. sect. III. cap. VII. & lib. II. cap. II.* luculentissime sunt enodati. Conferatur quoque WERGMEISTERI dissert. *de Imaginatione morborum causa*, nec non B. Chr. Joan. LANGII *de moruis ex affectibus*.

THESES. XI.

Lentiolem perniciem sanitati minantur motus & quies.

Non loquimur de recto harum rerum usu; sed de perverso. Nam *motus* merito a *Venerabili PRÆSIDE optimum corporis præsidium* salutatur *T. I. Med. syst. lib. II. cap. IX.* idem *optima medicina* in peculiari dissert. demonstratus est. Convenit porro & proportionata corpori quies. Si vero motus vel excedit vel deficit, non potest non pessimus evadere destructor. Ab excessu motus hæmorrhagias, febres & inflammationes; a defectu vero motus, i. e. quietis excessu, scabiem, cacochymiam, affectum illum famosissimum hypochondriaco-hystericum, malorum lernam, aliaque id genus mala, Medicorum scandala oriri, docet, duce experientia, *Celeb. FISCHER* in dissert. sæpius nominata. Ad hanc quoque classem propter effectuum analogiam referri possunt somnus & vigiliæ, licet mala ex his oriunda, illis observantur vehementiora, de quibus legatur *dissert. de plurimorum hominum morte immatura. §. V.*

THESES. XII.

Tandem, quæ Excreta & Retenta sanitati ac vitæ inferre valent damna, satis etiam sunt periculosa.

Quæ a sano quotidie ingeruntur alimenta, partim in materiam laudabilem, corpori conservando aptam, chylum puta, sanguinem, lympham, fluidum subtilissimum, sensibus ac motibus destinatum, elaborantur; partim materiam huic scopo ineptam, adeoque, e corpore proscribendam, post se relinquunt in intestinis: nec modica humorum portio, longo motu detrita, in alienam a mixtione nostra naturam fatiscit & mutatur: quare necessarium est, ut per alvum, urinam, sudorem &c. quotidie excernantur. Illa, quia ad tempus in corpore, propter usum eidem præstandum, debent retineri, Retentorum; hæc, quoniam post sui secretionem quantocyus excernenda & eliminanda sunt, Excretorum nomen obtinuerunt. Relata verò hæc sunt a veteribus in non naturalium classem, propter ordinem potissimum, in ipsis quotidie fere servandum. Retentorum vitium, quia plurimam partem excretorum labe nititur, ea hic maxime erunt consideranda. Pertinent ad hanc classem præter jam dictas excretiones, etiam quæ per fauces & nares rejiciuntur: item sperma, hæmorrhagiæ naturales vel artificiales. Naturales sunt, quæ sponte per nares, per vasa uteri & sedis; artificiales audiunt scarificationes, Venæsectiones & alii humores abundantes subtrahendi modi. Quæ autem ab horum vitio corpori imminant pericula, luculenter demonstraverunt *Illustris ac Venerabilis PRÆSES in Medic. syst. T. II. part. III. cap. V. & IIX.* nec non B. FISCHER in dissert. *de homine suæmet vitæ destructore* p. 12. §. 15. seqq. item *Autor dissertationis de plurimorum hominum morte im-*

matura p. 25. Noxæ ex incongrua spermatis excretionem recensentur in dissert. *de fundamentis brevioris vitæ* p. 24. §. 18. seqq. it. in dissert. *de ætate conjugio opportuna*. Neque excretiones sanguineæ, tam naturales quam artificiales, imprudenter cohibitæ aut suppressæ, vacant periculo, cujus rei tristia exempla quotidie fere in praxi occurrunt.

THESES. XIII.

Majus adhuc sanitati a rebus Thesi v. recensitis imminet periculum, si duorum vel plurium simul perversus concurrat usus.

Exemplo potest esse lautior diætâ in corporis habitu spongioso & laxo, motusque voluntarii defectus. Hinc morbi divitum ac dominorum, necessariæ Medicorum nutrices; ita etiam vehementium animi pathematum effectus multo perniciosiores in plethoricis & cacochymicis, quam in minus talibus, observantur.

THESES. XIV.

Quæ motibus regularibus, functionum integritatem, & quæ ex hac resultat, sanitatem constituentibus, a quocumque (Thesi V.) dictarum rerum vitio inferuntur stabiles ac perseverantes læsiones, Morbi appellantur, qui nihil aliud sunt, quam regularium motuum mutatio turbatioque.

Sufficere nobis potest generalis hæc morborum notio absque accuratiori distinctione inter eos ipsos atque eorum symptomata &c. Inesse vero iisdem rebus, ad vitam & sanitatem a benignissimo vitæ autore creatis, magnam etiam nocendi, atque læsiones, quas morbos vocamus, producendi facultatem, vel ex supra dictis satis liquet. Et sane, si accuratiores morborum historias consulimus, non facile reperietur morbus, (exceptis, qui a causis violentis & externis injuriis ortum trahunt) cujus prima initia & progressus, unius vel plurium rerum non naturalium perverso usui non sint adscribenda. Merito enim a rationalis Medicinæ restauratoribus proscriptæ sunt nœniæ illæ veterum, vel spiritus, vel animacula, seu vermes, vel cum Helmontio, Archeum, Gas, Blas, & alia hujus farinae nihil significantia vocabula pro morborum causis venditantium. Experientia satis docet, easdem res, pro sanitate ac vita militantes, si eis non recte utamur, morborum & mortis fieri genitrices.

THESES. XV.

Sicut nulla in tota rerum natura notabilis fit motus regularis mutatio simul ac eadem vehementia, sed suos servat gradus, & invalescendi tempora; ita nec illæ motuum regularium in corpore mutationes, quas morbos dicimus (Thesi XIV.) in instanti fieri, sed suo quæque gaudere tempore, & gradatim quasi crescere atque lædere observantur.

Nata est hinc de morborum temporibus in pathologia doctrina, antiquitus jam culta, qua cuique morbo suum assignatur principium, incrementum, status & decrementum. Principium audit prima & levior quasi ac mustitans motuum mutatio, ubi notabilis functionum læsio nondum adest. Incrementum denotat stabilem & graviolem læsionem, ipsius morbi præsentiam satis manifestantem. Conf. B. COSCHWIZII *Pathol. part. I. cap. VI.*

THESES. XVI.

Quum sanitas functionum integritate absolvatur (Thesi I.) in omnium autem primo initio morborum earum integritas adhuc deprehendatur, (Thesi. anteced.) ergo principium morborum ad latitudinem sanitatis referri potest.

THE S. XVII.

— Morborum ab illegitimo rerum non naturalium usu provenientium ea est indoles, & is effectus, ut, nisi eorum causa rite tollatur, quem semel turbaverunt ac mutarunt, motuum, sanitatem constituentium, ordo atque integritas, quacunque demum causa, vel ægre, vel, si altiores jam radices egerint, prorsus non possit restitui, sed totius corporis destructio acceleretur necesse est.

Audemus in genere asserere, omnes morbos anticipitis esse decursus, & corpus vel simul & semel destruere, vel ad graviora mala illud disponere. Et licet negari non possit, multos affectus ad statum præternaturalem pertinentes, salutarem sæpe habere exitum, quid? Summum præsidium & Medicinam corporis existere, idque a graviore morbo, imo ipsa morte præservare; cujus generis sunt hæmorrhagiæ narium, fluxus hæmorrhoidalis, coryza, febres intermittentes & continuæ, diarrhœa spontanea &c. tamen si totam rem paulo penitus consideramus, facile apparebit, magis esse optabile, si nunquam ab iisdem affligi necesse sit. Nam primo, salubritatis horum morborum cardo in eo potissimum verti deprehenditur, ut motibus suis extraordinariis ac vehementioribus causam morbidam & perniciosam e corpore eliminant: si vero huic negotio non sufficiunt, motus illi morbofi auctiores causæ succumbere coguntur, atque varias corpori afficiant labeas & dispositiones ad graviores afflictiones ac tandem tragœdiam ludunt.

Deinde, si hi morbi, vel maxime sibi relictæ, salutarem habere possint exitum, sæpissime tamen, pro dolor! fit, ut non solum propter varias (ut in schola medica vocantur) rerum naturalium ac præternaturalium rationes, sed etiam ob varias causas externas, maxime vero ab imprudente tractatione, exitiales evadant. Idem de curabilibus alias morbis est statuendum. Pleni enim sunt accuratorum practitorum libri ejusmodi exemplis, quæ satis docent, parvos, salutares ac facili negotio curabiles morbos, ex causis, modo generatim indicatis, mutatos esse in incurabiles & lethales. Persecutus est hanc rem solidissime *Venerabilis PRÆSES* in binis dissertationibus, *de imprudenti medicatione multorum morborum causa*, & *de Medicis morborum causis*, nec non in *Medic. syst. vere rationali* T. III. sect. I. cap. X. *de generatione morborum ex morbis*. Cap. XI. *de commutata morborum, seu potius causarum morbificarum, sede*. Huc imprimis etiam pertinet *dissert. Illustr. STAHLII de morbis consequentibus*.

Quam vero vel arti difficile sit causas morborum efficientes, quas vocant proximas materiales, tollere, earum nos satis docent, quos pro differente sua indole producant, effectus. Non morabimur differentias morborum sic dictas essentielles, ab ipso nimis morbo ejusque causa proxima desumptas, quæ ipsius corporis partes solidas vel fluidas, vel earum motum respiciunt; nam in iis recte collocandis atque secundum hypothesin distinguendis in longe alias alios autores videmus abire sententias: sed rem tantum perpendemus secundum generalissimas accidentales morborum differentias, quarum intuitu morbi dispescuntur in acutos vel in chronicos. Illi audiunt, qui non solum cito ac vehementer incipiunt, sed etiam hoc modo cursum suum absolvunt certisque dierum terminis adstringuntur; pertinent huc febres maxime continuæ, inflammationes internæ, phrenitis, peripneumonia, pleuritis, angina, apoplexia vera & perfecta &c. hi dicuntur, qui vel pedetentim incipiunt, vel, licet ex acuto quodam initium sumferint, aut ejus schemate invaserint, tamen utpluri-

Frid. Hoffmanni Oper. Supplem. II.

mum non cito decurrunt; sed per hebdomades, menses & annos durant. Referuntur ad hanc classem phthisis; febres lentæ & hæcticæ, cachexia, arthritidis, podagra, malum illud hypochondriaco-hystericum, multique alii affectus. Horum causam humorum stagnationem; illorum vero stasim celeberrimi Naturæ consulti adfirmant.

Quam parum ars in hisce causis removendis efficere possit, & quotidiana nos docet experientia, optima rerum magistra, & cordati scientiæ Parentes atque Antistites testantur. Acutorum causas quod attinet, instar omnium esse possunt, quæ de illis tollendis *Venerabilis PRÆSES* tomo & parte modo citatis cap. VI. §. III. in scholio effatus est: *quod pertinet ad curam acutorum, illud sciendum est, quod natura ibi plus sibi vindicet quam ars*. Naturæ vocabulum nihil aliud significare, quam progressivum sanguinis & aliorum in eo contentorum humorum motum, a cordis & vasorum, quibus includuntur fluidæ partes, atque aliarum solidarum partium restrictorio & dilatatorio motu proficiscentem, idem nobis, & fortasse primus, clarissime ante oculos posuit *Illustris PRÆSES* in *Medic. syst. T. III. sect. II. cap. I. §. IV.* Ex quibus conficitur; Naturæ energiam consistere in vegeto systoles & diastoles motu; ejus autem ad stases referendas *ἀνωμαλίαν* ab integra solidorum & fluidorum constitutione pendere. Quod si illa ratione toni internæque integritatis, hæc vero ratione quantitatis & qualitatis recte se habent, tunc natura sæpe sola forte natis morborum causis tollendis sufficit: sin autem minus ita comparata sunt, neque callidissimus artifex multum poterit efficere. Quare, si natura, ita intellecta, arte famulante, stasim inflammatoriam discutere nequit, exitialis plerumque adest eventus.

Multo luculentius artis *ἀνωμαλία* apparet in chronicis affectibus. Horum classem præter phthisin, tabem, & famosissimum literatorum malum, ducunt cachexia, hydrops, scabies, fluor albus, gonorrhœa, itemque hæmiplexia &c. Videmus enim, afflictiones hæc si per aliquod tempus durarunt, & quasi in habitum abierunt, vel difficillime curationem admittere, vel in catalogum incurabilium referri. Omitimus surditatem, guttam serenam, calculum renum atque vesicæ, exulcerationes fistulosas & cacoëtheas, quique ex polypo originem ducunt morbos, ut in hanc malorum classem quam optime quadrare videatur epiphonema illud; *in theoria omnes, ad lectum vero pauciores sanitati redduntur*. Manet ergo sua nostro asserto veritas, quod omnes morbi anticipitis & tragici sint decursus, licet non sua semper natura atque indole.

THE S. XVIII.

Maximum itaque ac certissimum & illibatæ functionum corporis integritatis, & quæ inde sequitur, longioris vitæ durationis fundamentum in eo positum est, ut omnia, quæ regularibus vitalis œconomiae motibus vel aliquam inducere valeant læsionem, quantum per humanam potentiam fieri possit, averruncentur.

Nititur hujus asserti veritas maxime in morborum indole atque natura, thesi anteced. exposita. Verissimum enim est effatum illud: *facilius est sanitatem conservare, quam labefactatam & amissam restituere*. Qua de re infra plura.

THE S. XIX.

Cum vero a perverso earundem rerum usu, quas ad naturalis vitæ œconomiam factam teclamque conservandam hominibus benignissimus Creator concessit, virtuteque donavit, tot & tam varia functioni-

bus, eam absolventibus, immineant pericula: quin & iusto maturior ejus extinctio metuenda sit (Thes. V - XIV.) omni omnino studio & labore providendum est, ut eæ res, a quibus corporis & incolumitas & calamitas pendet, recte adhibeantur.

Præsupponitur, sanitatem & longiorem vitam rem esse omnium carissimam atque pretiosissimam, omnibusque omnino hominibus desideratissimam. Id quod paganorum plurimi bene agnoverunt, quorum verba in sanitatis laudes & optionem prolata peti possunt ex CASP. a REJES *Elysio jucund. questionum campo Q. I. pag. 19. Q. II. pag. 27.* Hinc vera sunt, quæ Cl. JOAN. STAHL præfatus est in proœmio *disser. de conservanda valetudine absque & cum pharmacis* his verbis: *duo extant fata, quæ vitam hominis reddunt deteriore, quæque homo anxie cupit evitare: misera nempe agritudo & brevis vita.* Quid? quod vero ac puriori Dei cultui addicti non ignorant, sanitatem & longam vitam (relative intellectam) summi Numinis esse donum, ideoque nec ejus subsidia & præsidia absque impietatis nota posse negligi.

THE S. XX.

Ad eas res recte adhibendas nequaquam empirica tantum sufficit notitia, ex observatione eorum, quæ corpori aut profint aut noceant, comparata; sed quam maxime rationali opus est; i. e. principiis ac fundamentis, potissimum Physices & dogmaticæ & experimentalis, Anatomæque superstructa; ergo scientifica.

Fundamentum hujus rei nititur in magna illa differentia, quæ non solum in ipsis hominum corporibus, pro ætatis, sexus, temperamenti &c.; sed etiam in ipsis rebus non naturalibus, pro climatis, regionum, locorum & anni temporum diversitate observatur, qua videre licet, easdem res nequaquam omnibus, neque eidem semper homini convenire. Ut omittamus, quam anceps & periculi plena res sit, experimentum in corpore suo instituere. Ergo ratio imbuta scientiis adhibenda est, ad omnia prius bene perpendenda, ne error committatur.

THE S. XXI.

Maxima hominum pars rebus non naturalibus empirice tantum uti novit.

Quia nimirum subsidiis & fundamentis, scientiam constituentibus, plerumque sunt destituti.

THE S. XXII.

Ergo maxima mortalium pars rebus, ad sanitatis integritatem & vitam longiorem acquirendam maxime necessariis, recte uti ignorat.

Testatum id faciunt tot errores, qui his in rebus ab hominibus, & indelibata sanitate, & longiori vita frui vehementer exoptantibus, quotidie committi non absque animi dolore observantur.

THE S. XXIII.

Scientia, quæ rebus non naturalibus recte ac legitime uti docet, ut Thes. XVIII. posita feliciter obtineantur, ab artis Autoribus Hygieine appellata est, cujus præstantia nobilitasque patet per se clarissime.

Non suminus hic inquirere in differentiam inter Hygieinem & Diætam: id tamen indicasse juvabit, cum illa in tres dividi soleat partes, prophylacticam nimirum, morbos imminentes & futuros avertentem, *συντηρητικήν*, quæ præsentem sanitatem tuetur, & analepticam, valetudinarios reficientem, nos duos priores modos tantum velle intellectos.

THE S. XXIV.

Is, qui non solum præsentis morbos arte feliciter, quoad per humanam opem fieri possit, profligare, sed & potissimum scientia, thes. antecedenti descripta pollet, ut morbi præcaveantur, veri Medici explet titulum.

Nomen Medici a Medicina, hancque a Mederi dici, linguæ vel mediocriter gnaros non latet. Sicut vero latini sermonis autores hoc verbo non solum de præsentibus malis avertendis & depellendis; sed etiam de imminetibus ac futuris præcavendis usi sunt (*): ita Medicinæ & Medici nomen eadem involvere notiones certum est. Hinc Artis Parentes universam salutarem scientiam in duas etiam dividere partes, Diætam puta & Therapiam. Quid? quod major semper illius quam hujus apud veros & rationales Artis cultores fuit dignitas atque præmium. Docent hoc eorum posteritati relicta monumenta. Conferri metetur, quæ hac de re præfatus est Celeb. de PRE ad dissert. *de Diætâ nonnunquam salutariter neglectâ & negligenda.* Id quod Medici titulum & significationem satis declarat. Satis itaque mirari non possumus perniciosum vulgi pariter ac multorum eruditorum errorem, Medici officium in depellendis tantum præsentibus morbis consistere opinantium. De quo paulo post plura.

THE S. XXV.

Sanitatis conservandæ, & longioris vitæ potissimum fundamentum maxime consistit in avertendis iis, quæ illius œconomix læsionem inferre valent (Thes. XVIII.); eæ res, quibus homines sani ad sui conservationem uti debent, ea imbutæ sunt facultate, ut, nisi recte adhibeantur, motibus, sanitatem absolventibus, facillime labem inducant (Thes. XIX.); maxima mortalium pars eis recte uti ignorat (Thes. XXI. XXII.); Medicus vero scientia instructus est, quæ talibus recte ac legitime utendi modum docet (Thes. XXIV.); ergo etiam, & quam maxime, hominibus sanis; res ad sustentandam sanitatem atque vitam pertinentes, recte adhibere ignorantibus, Medicus est necessarius.

Uterioris demonstrationis causa nihil amplius addere opus videbatur; sed placuit totam thesin auctoritate *Illustris ac Venerabilis PRÆSIDIS* confirmare, his de hac re in *dissert. de præcavendis morbis & præmatura morte §. I.* utentis verbis, auro cædroque dignis: *Perversa opinio a longo jam tempore multorum animis firmitus infixæ est, quod Medici officium unice sit sanare, adeo ut etiam sollemnis usque adhuc invalens mos, non a Medico consilium vel auxilium prius expeti, nisi ubi magnus vel desperatus morbus corpora humana jam occupaverit. Ignorant autem plurimi, quam parum solidi Medicus arte & scientia sua in difficilibus, sique per longas moras radices egerint, affectibus præstare valeat. Equidem adversus omnis generis morbos passim remedia a Medicis numerosa celebrantur, & magnificis laudibus extolluntur; si vero rem sine affectu consideremus, pauca sunt, quæ laudes suas sustinent, sed pleraque ita sunt comparata, ut famam suam prostituunt, & spem medentium penitus eludant. Ut enim quis ex acutis & periculo plenis morbis convalescat, id certe naturæ potius, quam artis beneficio debetur. Chronicorum vero complures passionibus, minus esse sanabiles, usu & experimento probatur dolor!*

(*) e. g. NEPOS in *Pelopida* dixit: *mederi satietati lectorem*, pro, præcavere, ne satietate obtundantur Cap. I. circa initium.

dolor! quotidiano habemus exploratum. Quæ autem potestas sit Medici, & quid præstare debeat & possit, paucissimi intelligunt, ipsique Medici non recte attendunt. Atque adeo quæ beneficia a Medicis vel Medicina in publicam mortalium rem possint redundare, quam plurimis est obscurum atque incognitum. Per magna certe atque eximia res est, vitam hominum tueri, nec non omni modo cavere, ne illa abbreviatur, & ut sine singulari & corporis & animi aegritudine, illa diu servetur, efficere. Quod si vero candidè fateri liceat, quod res est, vix ex centum hominibus unus ad eam pervenit ætatem, quam naturæ ordine ac cursu possit attingere, si ipsam methodum recte vivendi perspectam haberet, neque ex supina ignorantia sibi ipsi filum vitæ præscinderet. --- Quam plures ex proceribus & principibus, ex sapientibus & eruditis, quique rem publicam re & opere juvant, servari diutissime possent, modo vellent, & doctos Medicos tempestive consulerent. In optatis vero est, ut ipsi Medici id negotii magis curent, eorumque meditatio ad vitam sanam & longam tuendam fiat attentior. --- Quicumque itaque sanioris mentis intelliget, quod longe tutius & facilius sit, corpora humana a morbis præservare, quam illis oppressa restituere.

THES. XXVI.

In morborum principio homines pro fanis adhuc habendi (thes. XIV.): ergo & in hoc statu Medicus maxime est necessarius.

Certe, si qua adhuc periculosissimos morbos præcavendi & præmaturam mortem avertendi spes; si quis consilio & auxilio locus, id omne in hoc potissimum statu positum existimandum. Hic quam maxime valet NASONIS illud tritum:

*Principiis obsta, sero Medicina paratur,
Cum mala per longas invaluere moras.*

Sed bone Deus! quam multi mortales hanc *ἐννεύπια* negligentes, vel *ἀνδροχέρες* vel carnifices fiunt? Et sane, Medicus, cui non vulgatum illud: *dat Galenus opes*, sed hominum salus curæ cordique est, non absque vehementissimo animi dolore ejusmodi ægros adspicere potest, qui aut desidi negligentia, aut perniciofa alacritate, vel præmature in Achærontis fauces, vel, quod interdum pejus, in miserissimam, multisque cruciatibus stipatam vitam sunt dejecti. Sed neque quiritandi, neque id genus exempla producendi hic est locus, res per se ubique proh dolor! obvia.

Liceat tamen animi nostri sensus planius declarare, & verbis Celeberr. MEIBOMII, quæ extant in dissert. de fundamentis brevioris vitæ §. VIII. seqq. exponere; Causas præternaturales si spectemus maturioris mortis, quæ in plurimis hodie notatur, culpa ipsorum hominum illam accidere, quam sæpissime observamus, sive præservationem a morbis, sive illorum curationem perpendamus. Equidem sunt morbi, qui subito homines invadunt, & e medio tollunt, qui humana sagacitate prævideri non potuerunt; sunt tamen alii plures, quos ex constitutione, temperie & circumstantiis aliis Medicus prudens imminentes avertere, & frequenter præcavere posset, si in tempore consuleretur. Hic vero plurimi naturæ confidunt & medicamina spernunt, cum jam præsentem hostem ejicere difficilius sit, quam absentem non admittere. Vel domesticis utuntur remediis, quæ licet non mala semper, attamen absque ratione atque causæ & corporis cognitione indiscriminatim adhibita, effectum optatum edere, aut imminentes morbos avertere non possunt. Ne dicam de vomitoriis, & purgantibus fortioribus &c. Imo morbo jam præsentem, initia ejus a multis *Freid. Hoffmanni Oper. Supplem. II.*

quenter negliguntur, eoque jam altius inradicato, sero Medicina paratur, & venæsectione, vomitorio aut purgante intempestive adhibitis, aut aliis incongruis vel ineptis assumtis, Medicus demum advocatur, ubi natura jam fracta atque debilitata est.

C O N S E C T A R I A.

I. Ergo Medicus a fanis non est fugiendus.

MONTANUS, nobilissimus Italorum seculo XVI. Medicus, non tantum ægrotis ac infirmis, sed etiam valentibus suasse reperitur, ut Medicos & medicamenta fugerent. Qua in re ipsum secutos legimus WEPFERUM & BRUNNERUM, solertissimos identidem practicos. Quid? quod inter leges, quas *Illust. ac Venerabilis PRÆSES* in peculiari differt. de Sanitate tuenda sancivit, & hæc est: *fuge medicos & medicamenta si vis esse salvus.*

Quamquam hæc principum Medicorum assertio thesi nostræ repugnare videatur, si tamen rem cum distinctione secundum datam thes. XXIV. veri Medici definitionem, paulo curatius considerabimus, illos idem nobiscum sentire deprehendemus. Asseruimus enim, veri Medici nomen explere eum, qui non solum præsentem morbos feliciter profligare potest, sed & potissimum scientia pollet, quæ docet res non naturales recte adhibendi methodum, ut fanitas, quoad fieri potest, illibata conservetur, & morbi præcaveantur. Quam pauci vero a primis Medicinæ incunabulis inter eam exercentes reperti semper fuerint, in quos hæc descriptio cadere posset, ipse *artis parens lib. de lege*: fatetur, dicens: *Medici nomine & titulo multi, reapse vero pauci existunt.* Plurimos enim omnium fere retro seculorum Medicos accipimus veri officii ac potestatis suæ oblitos in longe alia abreptos, supra sortem sapere atque potentiores videri contendentes; medicamentorum tantum heroicorum, arcanorum, panacearum & aliorum id genus farragini inhiasse, cum quibus deinde Andabatarum more in ægrotorum pariter ac sanorum perniciem pugnarunt. Quod cacoëthes, ævi nostri Hippocrates, *Illust.* puta PRÆSES satis hinc inde lugens detexit. e. g. in *dissert. de Medico sui ipsius sub finem §. II.* his de hac re utitur verbis: *plurimi (scil. Medici) penitus nobilissima Medicinæ parte, a sapienti antiquitate semper maximi habita, scilicet Hygieine, quæ docet corpus conservare sanum & a morbis ipsum defendere, destituntur.* Utpote nec aëris, nec climatis, nec locorum, nec alimentorum, aquarum, vinorum, consuetudinis denique notitiam vel rationem ullam habent. Ex his tamen rebus vivimus, valemus & ægotamus; multo minus circa has res naturarum distinctionem atque diversitatem attendunt. Sed consuetudo pessima est, crudis studiis, & experientia & scientia solida destitutis prorumpere in forum medicum, & farragine remedium, pretiosis formulis, imo fraudibus & eloquentia male feriata, crumentas ægotantium emungere, & plus re vera nocere quam juvare.

Pressius in *dissert. de præcavendis morbis &c.* ita fatetur §. I. Turpe dictu est, & pudet proponere, Medicos maxime ex parte hujus miseriæ (præmaturæ scilicet motis) causam & culpam esse, quod scientiam suam hoc in argumento (diætetico) non satis excolant, neque talia addiscant, vel doceant, quæ & præmaturam mortem arcere, & infelicissimos morbos avertere possint. Videmus potius plures hisce in rebus parum doctos in forum medicum protrudi, qui omnes morbos sanare volunt; sed paucos possunt; consilium vero, quomodo ipsi præcaveri possint, in promptu ac paratu non habent. Hujus profundæ miseriæ

causa nostris peccatis ac ingenti mentis corruptioni merito debet adscribi &c. Planius adhuc & significantius ulcus hoc tetigit in præfatione ad scripta sua diætetica vernacula, quam & omnium artis filiorum animis infixam optamus.

Bene itaque distinguendum putamus inter Medicum & Medicum, rationaliter nimirum diæteticum & therapeuticum, & inter empirice tantum talem, vel minus talem. Hic omnino peste ac angue pejus fugiendus est formidandusque. Confirmat hanc limitationem ipsius Venerabilis PRÆSIDIS autoritas, verba Montani in dissert. de septem sanitatis legibus §. XII. ita exponentis: *Valet hoc dictum maxime de Medicis imperitioribus, temerariis, qui non victu curare volunt, sed valentioribus adversus morbos omnis generis pugnant, eosque multis remediis præcavere tentant. Neque vero Medici docti, periti & prudentes hunc censum subeunt, quorum conversatio & familiaritas nunquam non omnibus utilis & fructuosa est. Simili modo per Medicinam intelligi debent medicamenta sive pharmaca, quæ secundum HIPPOCRATEM, lib. de locis in homine cap. 55. præsentem statum corporis transmovent, vel naturæ motus & succos valde alterant. Hujus generis maxime sunt validiora evacuantia, aliaque commoventia, quorum usus & rarus & cautissimus esse debet: secus ac plures, qui perversa persuasionē laborant, medicamentorum usum mortem & morbos unice præcavere, ideoque ea frequentius esse usurpanda existimant. Res vero longe aliter sese habet. Admoneo enim, obtestor & repeto, corporis naturam integram, valentem & robustam rectius victu exquisito, vitæ regimine, quam medicamentis servari & a morbis defendi &c.*

II.

Altioris indaginis & themati nostro magis e diametro oppositum videtur illud ipsius veritatis effatum: *Valentibus (aut sanis,) Medicus non opus.* Quod vero non tam ab ipso Sospitatore, quam ab ipsis mortalibus ortum ducere, antiquitatum scrutatores non latet. Nam compertum atque exploratum habemus, effatum hoc multo ante novi fœderis tempora iisdem fere verbis ore atque scriptis hominum celebratum & adagii loco usurpatum. Conf. BOISII *Collatio veteris interpretis &c.* & SCHOTI *adagialia N. T.* nec non quæ GROTIUS ad Matthæi IX. 12. ex profanis autoribus, græcis pariter ac latinis contulit loca. Quæ cum ita sint, facile nos expedire possemus dicendo adagia non esse evangelia. Licet enim in ipsis etiam divinis scriptis reperiuntur; tamen non tam præcepti vim obtinendi, quam res quasdam aptius propter hominum imbecillitatem exprimendi causa relata existimandum.

Deinde admittendus & hic justæ distinctioni ac limitationi locus. Novimus enim, variam vocis Medici acceptionem. Id quod in antecedentibus adstruximus, demonstrando, qua notione vulgo accipiat, & quæ ejus vera sit significatio (conf. thes. XXV. & quæ ad eam adjecimus). Vulgus, cum Medicum præsentem tantum morbos depellere & posse & debere credat; ideo sanis neque necessarium putat, neque utilem. Nos vero potissimum Medici officium atque potestatem, sanitatis ac longævitatæ fundamentum, cum in præcavendis morbis avertendisque ponamus, (thes. modo alleg.) non potest non hujusmodi callidi artificis patefieri necessitas. Quod si vocabulum Medici secundum has diversas notiones atque acceptiones, & adagii ortus curatius pensabitur, facilis erit conciliationi locus, omnisque contradictio exspirabit.

Ut autem porro omnia præjudicia, vel potius omnis ex male intellecto effato metus injustus præ-

scindantur atque eradicentur, quæ male intellecta perniciosæ huic opinioni, ac si bene valentes nihil auxilii vel emolumenti a quocunque Medico sperare aut debeant aut possint, ansam præbuere sacri codicis loca in medium proferre, eaque ad veri sensus trutinam revocare opus videtur. Juvabit vero, ad luculentiorē veritatis explorationem, eorum, quæ hæc loca antecedunt & sequuntur, potissimum habere rationem. Est enim pessimus, idemque fœcunda magnorum sæpe ac exitiosorum errorum mater, plerorumque fere Γραμματέων dicendi scribendique modus, ignorantia ne dicam aut fucata eloquentia, dicta sacri codicis ex sermonis nexu eripere, eaque aliis rebus, nescio quibus accommodare, vel potius vi eo detorquere, & gigantis cothurnum infanti aptare. Quo nihil aliud efficiunt, quam ut falsum, mentique autoris Θεοπνεύστη contrarium rerum rudibus; gnaris vero vehementissimum doloris imprimant sensum. Sed ad rem.

Ipsa, quibus vulgus abutitur verba, & ex ipsius etiam veritatis ore profecta diximus, apud omnes, excepto Joanne, Evangelistas leguntur: scilicet Matthæi IX. 12. Marci II. 17. Lucæ V. 31. idem ubique sonantia. In lingua authentica ita reperiuntur expressa: Οὐ χρῆσαν ἔχουσιν οἱ ἰσχύοντες, ἰατρῶν, ἀλλ' οἱ ἀσθενεῖς ἔχοντες. Quæ, si de verbo ad verbum vertere velis, ita sonarent: Non usum habent valentes medico, sed male habentes. i. e. (ut verbis CASTALIONIS utar) *non egent valentes Medico; sed male affecti.* In eundem sensum ab omnibus latini pariter ac aliorum idiomatum interpretibus translata reperiuntur.

Quod si KEUCHENIUS recte interpretatus esset, nulla porro opus haberemus aut disquisitione aut conciliatione. Hic enim, referente WOLFFIO, viro maxime reverendo, celeberrimo Hamburgen- sium Polyhistorē in *Curis philologicis ad Matthæi IX. 12.* ita verba illa vult accepta: *Non solum sani, sed & ægroti Medico opus habent.* Verum enim vero, præter, quod hæc interpretatio duri quid ac alieni involvat, fateri etiam cogimur, cum ipsius Keuchenii Annotata, Amstelodami MDCCIX. edita ad manus fumeremus, ipsumque locum evolveremus, nihil nobis ibidem hujusmodi acceptionis reperire licuisse. Vir hic eruditus totus ibi occupatus est in eruenda emphasi vocis ἰσχύοντες, cætera ne tetigit quidem. Id quod monendum duximus, salva tamen viri celeberrimi autoritate, cujus improbum laborem, stupendam ac vastam eruditionem in opere illo philologico satis obviam, totus merito miratur literatorum orbis. Est procul dubio כוונה שיצא מרפני

Ut vero rem paucis expediamus, occasio adagium illud proferendi, cum circumstantiis suis paulo altius nobis erit repetenda, quæ hæc fuit: Cum salvator digrediens, hominem quendam, nomine Mattheum (vel Levis) ad publicanorum mensam sedentem conspiceret, diceretque ei: sequere me; hicque dicto obediens eum sequeretur; gaudio repletus excepit sospitatorem atque discipulos ejus celebri convivio, cui etiam alii publicani, hominesque ceteris Judæis non satis probati frequentes adfuere. Pharisei, fucosissimæ pietatis homines, magnam sanctitatis speciem præ se ferentes, ægre ferebant, quod Jesu, spectatæ satis inter eos virtutis, eruditionis ac sinceritatis viro, (Lucæ XX. 21. Matthæi XXII. 16.) contra quem, quid dicerent, non habebant (Marci XIV. 55. Lucæ V. 9. XIX. 48.) plus cum publicanis atque improbis commercii intercederet, quam cum illis ipsis; quumque eum atque simul discipulos accumbentes viderent in nequissimorum, ut existimabant, hominum turba,

non

non potuerunt diutius se continere, sed quæſivere ex discipulis: cur cum istius generis hominibus cibum caperet eorum magister. Quo audito, Salvator, pietatis simulatorum intimos sensus perspiciebat, adagium illud effatus est: non egent valentes Medico &c. cujus verba quo sensu accipienda & quibus singula sint accommodanda, rerum nexus facile docet: nimirum valentes Phariseos, Medicus ipsum sospitatore, & male affecti publicanos denotant atque improbos. Plena itaque salvatoris mens eo redit: vos Pharisei indignamini, quod ego animarum medicus, operam meam non tam vobis, quam improbis locem: sed inique indignamini. Nam vos tales vobis videmini, qui se non solum benè valere putant, (Lucæ XVIII. 11. 12.) sed & viribus vestris impensè gloriâmini, ut iustitiam non ex fide, sed propriam, sed ex operibus vestris ostendetis. (Rom. IX. 32. X. 3.) Jam vero in proverbio, sensu physico, dici solet, valentes medico non egere, ergo & vos, moraliter bene valere vos putantes, mea opera non indigetis. Idem confirmant sequentia, ubi servator addit; *non enim veni vocatum in fontes, sed fontes ad bonam frugem: In fontes*: non qui tales sunt, sed tantum videri volebant, conf. supra laudatæ Curæ philolog. ad Marc. II. 17.

Ex quibus omnibus luculentissime apparere arbitror primo, adagium hoc non eo animo a Salvatore prolatum, ut præcepti instar esset, & doceat, quæ fieri debeant;

sed ex suppositione tantum, & hypothetica quasi opinione, secundum id, quod vulgo fieri solet, ex perversa hominum mente, adeo depravata, ut corruptionem atque pervicaciam suam non sentiat, & semper viribus suis multa fidens, ut Pharisei, non prius salutis auxilium quærere sataget, quam dum insanabile pene sibi inflixerit vulnus, & tristis perversitatis versatur ob oculos eventus, exemplo publicanorum aliorumque improborum, medicinam animarum quærentium.

Deinde, si hoc adagium ita intellectum, ad physicam significationem transferre velimus, is resultabit sensus: homines, qui physice se bene valere putant, neque Medicum, neque ejus auxilia dispiciunt: qua vero ratione, & quo successu id faciant, videant ipsi & experiantur suo incommodo, dum post vulneratam causam sero medicina paratur; cum mala per longas invaluerint moras; aut certa mors vel obrepat vel opprimit inopinantes.

Hæc sunt L. B. quæ speciminis loco in præsentiarum adferri potuerunt. Animus primum fuit, argumentum aliquod historico-philologicum, ex antiquitate & monumentis Hebræorum potissimum erutum; historiæque Medicæ forte non inutile ventilare, quippe huic studio olim fuimus addicti & adhuc ex parte sumus. Sed obstabat temporis ratio. Non tamen deerimus in posterum huic labori, si vires atque occasionem præbebit summus omnium arbiter.



DISSERTATIO MEDICA

D E

CONVALESCENTIÆ STATU, EJUS IMPEDIMENTIS ET PRÆSIDIIS.

Primum edita Anno 1735.

P R Æ F A M E N.



UUM de convalescentia, magni utique momenti argumento, speciminis inauguralis loco, meditationes meas publico eruditorum examini subicere apud animum constituerim; minus ab instituto alienum quid acturus mihi videor, si, ante quam ad ipsius argumenti evolutionem progrediar, prius de causis, quæ ad pertractandum id me impulerunt, deinde de scopo hujus exercitationis, & tum denique de contentis, & ordine, quo singula proposita sunt, brevissimis mentionem faciam. Enim vero non e longinquo petendæ mihi sunt rationes instituti: quippe tam dignitas ipsius argumenti, quam penuria, imo defectus scriptorum, qui convalescentiæ statum, ac regimen ex professo pertractaverunt, utique sufficere mihi visa sunt, ad persuadendum animum, ut in amplissima hac materia penitus evolvenda

virium mearum facultatem experirer. Ego enim cum singulari isto fortunæ usus sim beneficio, ut manucente Venerabili nostræ Academiæ seniore *Illustri & Excell. Dno Consiliario intimo, atque Archiatro Regio, FRIDERICO HOFFMANNO, Præceptore, Hospite, ac Mæcenate meo ad ultimos cineres filiali observantia devenerando*, per integrum fere triennium, & ægrorum conclavia ipse intrare, & historias morborum ab exteris frequentissime ad Illustrē virum missas una cum solidissimis consiliis perlustrare potuerim; gravissimas sane, & maxime pertinaces afflictiones originem inde traxisse, frequentius annotavi: quod a prægressis morbis ægri, vel minus perfecte fuerint curati, vel in convalescentia etiam a perverso rerum non naturalium, aut ipsorum remediorum usu vitium contraxerint. Pertinet enim ad corruptos hujus seculi mores, ut maxima hominum pars, quando post morbi vehementiam imminutam, exigua virium incrementa sentiunt, illico Medicorum præceptis, se vel non egere, vel tam strictam iis obedientiam non debere existiment. Imo vero, quod turpe dictu, nec inter ipsos Medicos rarum hoc est vitium, quod, sublato morbi statu, ægrotum negligentius tractent, & non accuratiori modo examine, sed & præceptis circa legitimum regimen necessariis exhibendis multi supersedeant. Unde non raro hoc paradoxon ab ipsis Medicis enunciari audias: Morbum quidem curatum esse, sed hominem interiisse; quod GALENUS jam *lib. III. ad Glauconem Cap. II.* perito & prudenti Medico maxime indignum judicat. Enim vero quam necessaria & gravis ideo Medici in dirigendo convalescentium regimine est cura, tantopere miror, perpauco extitisse, qui de hoc argumento rite pertractando unquam cogitaverunt. Licet enim non desint inter Veteres æque ac Recentiores, qui in describenda morborum curatione aliquot regulas in declinatione cujuslibet morbi observandas proposuerunt; has tamen & mancas & firmis principiis, quæ ex natura & statu convalescentium unice peti debent, non ubique satis innixas deprehendi. Equidem certior hujus rei facturus, impetrata ab illustri Patrono Meo FR. HOFFMANNO venia, amplissimum ejus bibliothecæ, præsertim dissertationum, thesaurum studiosius perlustrare cœpi; sed præter duas novissimas dissertationes, quarum una est *Excell. Erfurtensum Professoris D.D. DE PRE de cibatione convalescentium*, altera *Excell. D.D. ADOLPHI de statu convalescentiæ Lipsiæ* habita; nihil omnino de hac materia publici juris factum observavi: & perlustratis his laude sua dignissimis scriptis, varia mihi ad exercendas in amplissimo hoc themate vires meas, relictæ esse vidi. His itaque argumentis in proposito meo confirmatus, eo animo ad laboris hujus initium accessi, ut meditationes meas triplici ordine proponerem; ac primo loco expositis, quæ ad naturam, & statum convalescentiæ pertinent, deinde ex his, tanquam principiis cognoscendi universalia præcepta circa convalescentium regimen necessaria deducerem, & tum denique peculiare cautelas juxta differentes morborum classes, convalescentibus præscriberem. Enim vero mirabitur lector, in præsentī tractatione multa quidem de indole, & signis convalescentiæ, nec non causis eam vel remorantibus, vel accelerantibus commemorata; de posterioribus autem duobus membris vix mentionem esse injectam. At quo minus in adjiciendis istis proposito steterim, impedimento fuit membri primi amplitudo ac gravitas, sive rerum, ad convalescentiæ statum distincte definiendum, necessariarum copia, quæ mole sua spem atque expectationem meam longe superavit. Quare contentus indicasse principia, quibus regimen convalescentium innititur, hoc ipsum alio tempore, si qua in Academia publice disputandi occasio fuerit, exponere constitui.

Jam vero ut brevissimam dictorum in sequentibus paginis synopsis B. L. exhibeam, monendum duco, me ad describendam convalescentiæ indolem necessarium vidisse, ut sanitatis, ac morbi notio præmitteretur. Quare exhibitis prius sanitatis, & morbi definitionibus, criteriis & causis §. I-XXVI. & stabilito divisionis morborum in quatuor tempora (initii nempe, incrementi, status & declinationis) fundamento, §. XXVI-XXXVIII. ipsam declinationem in tres periodos divisi §. XXXIX-XL. &

ex his ipsis statum, & tempora convalescentiæ eruere incepti. §. XLI, XLII. quo facto signa tam imminentis quam incipientis, incrementis, & consummatæ convalescentiæ, nec non phænomena singulis ejus periodis peculiaribus ex probatissimorum auctorum & mea ipsius quoque experientia petita commemoravi §. XLIII-LXXXIII. Exinde convalescentes ad ægrotorum classem referendos esse, demonstravi §. LXXXIV-LXXXV. & denique de diversa, qua tempora convalescentiæ absolvuntur, celeritate, & causis eam vel remorantibus vel accelerantibus §. LXXXVI-CXXI. vel interrumpentibus, ut recidivis, novisque morbis, & horum causis & effectibus mentionem feci §. CXXII-CXXXV. Et ex his præmissa regiminis definitione, necessitatem congrui regiminis in convalescentibus demonstravi §. CXXXVI-CXL. Nihil jam superest, nisi, ut exhibitis summo Numini pro efficacissimi auxilii beneficio summis gratiis, benevolum lectorem, ut hæc primitias laborum Academicorum inter frequentes valetudinis turbas concinnatas æqui bonique consulat, observantissime rogem.

§. I.

*Homo est
vel sanus
vel æger.*

Hominem quandocunque medico examini subicimus, varia in eodem sese nobis offerunt signa, vel sanitatem, vel morbum præsentem esse arguentia. Unde duplex statum in homine vivo possibilem ordo nascitur, quorum primus a Medicis naturalis, alter præternaturalis appellatur.

§. II.

*Sanitatis
criterium
universale.*

SANITATEM adesse judicamus, ubi actionum per hominis essentiam possibilem, quas sub animalium, vitalium, ac naturalium nomine comprehendere antiquis Medicis placuit, ea est ratio, ut finibus partium; a quibus peraguntur, singulæ conformes sint.

§. III.

*Specialia
signa.*

Repræsentemus nobis hominem legitimæ organorum omnium tam sensoriorum quam motum cuicunque generi inservientium structura, menteque simul capaci præditum, cui cum libera inspirationis atque expirationis alternatione, pulsus seu motus artèriarum æqualis, liberi scilicet atque æquabilis sanguinis ex corde per vasa circuitus certissimus testis, constanter præsto sit; qui præterea modico alimentorum appetitu, illique proportionata fæcum per alvum, urinam, & sudorem excernendarum evacuatione, debita quoque humorum utilium, bilis, salivæ, aliorumque secretionem, indeque pendente vegeta nutritione, somno quoque placido, & reficiente gaudeat; partes externas, artus, caput, oculos, linguam, omnesque in quas anima imperium habet, pro mentis determinatione, facile ac sine molestia movere possit, denique res per organa sensoria rite repræsentatas bene percipiat, atque ab invicem distinguat, conceptusque, qui rebus congrui sunt, formet, in judicando ac ratiocinando non hebes sit, ceterum hilaris, atque omni adversa sensatione in mente & corpore penitus sit destitutus. Talem vero, si quis forte exstiterit, quippe in quo suis quæque finibus respondent actiones (§. II.) perfectæ sanitatis beneficio frui quis negaverit? En itaque sanitatis humanæ criteria essentialia, certa, & vix ullum unquam deceptura!

§. IV.

Quam firmum vero atque evictum est, in actionum §. II. dictarum cum finibus partium eas peragentium convenientia ac conspiratione sanitatis essentiam esse positam, tam certum quoque existimo, quod absque sufficienti ad talem actionum perfectionem virium copia sanitas perdurare nullo modo possit. Quemadmodum enim omnis, quæ concipi potest actio, vi quadam nititur ad illam ipsam producendam sufficiente, ita nec actiones dictas finibus partium eas peragentium conformes esse posse sine sufficiente virium quantitate manifestum est. At in consensu dicto actionum per hominem possibilem cum sanitas consistat, (§. II.) hinc sanitatis præsentiam, sufficientem in partibus hominem constituentibus vim supponere, ulteriori demonstratione non eget.

*Sanitas
nititur vi-
rium suffi-
cienti co-
pia.*

§. V.

Præsentem itaque ea virium quantitate, quæ singulis hominis partibus ad actiones sibi proprias, finibus suis convenienter peragendas sufficit, præsens est sanitas, quæ imminuta virium quantitate, illico minuitur, ac tollitur.

§. VI.

Diversam vero in singulis hominum individuis virium esse quantitatem, experientia cum rationis suffragio demonstrat. Et quidem animæ vim quod attinet, eam in omnibus hominibus eandem non esse, ex operationum ejus diversitate in singulis obvia satis clare cognoscitur. Vim autem & actiones animæ a corporis vi, atque actionibus maxime pendere, ideoque pro harum differenti indole mire inter homines differre res inter Psychologos, & Physiologos non ignota est. Corporis autem cujuscunque vires in modo, quo partes inter se coherent, quem structuram appellamus, rationem sui sufficientem habere, ex physicis satis constat. Similiter itaque corporis humani vires pro differente partium illius fabrica, ac mixtione differre nullum est dubium.

*Diversa
in singulis
hominibus
virium
quantitas.*

§. VII.

Quam vero diversa sit hominum ratione corporis structuræ indoles, vix hodie quis-

*Ob diver-
sam corpo-
rum struc-
turam.*

piam negaverit, qui consideret, in aliis compactiorem esse fibrarum in musculis, vasis sanguiferis, nervis, membranisque obviarum compagem, in aliis vero laxiorem, ac rariorem; his pauca & capacia, aliis arctiora, exilia, numero tamen plura, magis vel minus elastica vasa esse concessa; porro in nonnullorum humoribus aquæ, in aliis terræ, rursusque apud alios sulphuris copiam excedere; a qua diversa fluidorum ad solida relatione, proportionem, ac inde pendente amborum differente actione & reactione temperamentorum variæ divisiones originem suam traxerunt. Quæ quidem omnia pro parentum, & soli, aut climatis, unde quis natus est, ætatum, sexus, ac vitæ generis indole mirum differre, experientia loquitur. Proinde ab antiquissimo Medicorum parente jam sancitum verissimum apud omnes habetur dogma: *quod corpus a corpore, & natura a natura multum differat*, & nullus fere inter mortales alteri quoad structuram, & mixtionem tam solidarum quam fluidarum corporis partium perfecte æqualis reperiatur.

§. VIII.

Hinc diversa in singulis actionum ratio.

Ex hac insigni itaque hominum ratione corporis differentia, non potest non mira virium varietas proficisci, (§. VI.) & cum pro differente virium ratione, varie quoque actiones cujuscunque partis modificentur; hinc functiones nec animales, nec vitales, & naturales eodem modo se apud omnes homines habere posse, non est mirum. Et uti ratione animæ quidam magis inveniendis & excogitandis, alii addiscendis, ac retinendis, dijudicandis & pensitandis seriis rebus aptiores sunt, & unus alterum semper memoria, ingenio, aut judicio antecellit; ita & corporis quascunque actiones in hoc celerius, in alio tardius, rursus in aliis fortiori cum impetu, in aliis mitiori gradu absolvi, quotidiana experientiæ testimonio confirmatur.

§. IX.

Et diversa cum viribus harmonia.

Ex hac itaque actionum inter homines ratione gradus differentia, satis certe cognoscitur, non eundem apud omnes actionum tam vitalium, quam animalium & naturalium harmoniæ cum finibus partium eas peragentium per consequens nec sanitatis gradum (§. II.) esse posse.

§. X.

Hinc determinata cuilibet sanitas.

Est itaque singulis individuis determinatus quidam gradus convenientiæ, quam actiones per hominem possibiles cum finibus partium, a quibus peraguntur, habent, & ideo sua cuique homini determinata sanitas; proindeque alia infantibus, alia pueris, viris & senibus, alia rursus foeminis laetam, & otiosam vel laboriosam vitam degentibus, alia denique a robustis, & vegetis parentibus prognatis, alia imbecilibus, & in senectute genitis, alia denique sub calidiori, aut frigida, vel temperata climatis constitutione productis, aut degentibus sanitas est adscribenda (§. VII.) Dummodo vero actiones in homine determinato huic gradui respondent, tamdiu homo in statu est naturali, quem singulis hominum individuis diversum esse, nemo jam dubitabit. (§. IX.)

§. XI.

Generalem itaque sed adæquatam simul sanitatis notionem pleniori thematis nostri evolutioni præmissuri, eandem, per actionum, per hominis essentiam possibilem determinatam cum finibus partium eas peragentium convenientiam (*quam brevitatis causa VIGORIS termino in sequentibus insignire placet*) commode definiri posse non immerito existimamus.

§. XII.

Statum hominis sanitati contrarium Medici appellant MORBUM, qui adest, quando a determinato vigoris gradu actiones dissentiunt, h. e. vel recedunt vel eundem sensibilibus exsuperant, quod uno verbo LÆSIONEM ACTIONUM nuncupabo.

§. XIII.

Quare ex relatione vigoris actionum per hominem possibilem ad gradum vigoris consueti (§. XI.) facillime morbi præsentiam judicari posse nullum est dubium. Sit e. g. homo rigidiore ac densiore corporis compage præditus, robustus, cui animi & corporis quælibet actiones vegete, celeriter & fortiter ordinario succedunt, & qui omnibus ad sanitatem pertinentibus requisitis (§. III.) propositis instructus est; Huic, si respiratio solito tardior, aut multo celerior, molesta, sive tarda, urina pauca, pulsus debilis, aut ad insolitum celeritatis & magnitudinis gradum accedens, ceteraque actiones vel solito minus vigeant, aut justo fortiores sint, inque alterutro statu, per notabile aliquod temporis spatium cum molesta hominis sensatione perdurent, is morbo destitutum profiteri se non poterit.

§. XIV.

Ex imminuto itaque, vel aucto nimium actionum per hominem possibilem vigoris gradu, cum morbi præsentia dignoscatur (§. XII.) omnis vero actionum qualitas a virium quantitate pendeat; hinc omni in morbo virium consuetam quantitatem vel imminutam, vel auctam esse debere manifestum est.

§. XV.

Vis adest corpori ejusque singulis partibus sufficiens, dum peculiaris partium structura, & inde resultans elasticitas in determinato gradu constant. (per fundamenta physiol. & physic.) Hinc omnis virium mutatio elateris fibrarum partem constituentium mutationem supponit. Proindeque uti ex imminuta vi elasticitas imminuta, ita ex aucta ultra determinatum gradum virium quantitate auctum elaterem suspicari decet.

§. XVI.

Jam vero cum omnis morbus a nimis aucta, vel imminuta virium quantitate proficiscatur, (§. XIV.) hinc omnem quorumvis morborum originem ab elatere fibrarum, aliis tono dicto, vel ultra determinatum gradum nimis aucto, quem spasmodum Medici appellant, (qui nimia fibrarum expansione aut constrictione se prodit,) vel imminuto eodem,

Sanitatis definitio.

Morbus sanitati contrarius status.

Unde cognoscatur.

Pendet a viribus nimium auctis l. imminutis.

Hinc ab elatere fibrarum nimis aucto l. imminuto.

Ergo oritur l. a spasmo l. ab atonia.

eodem, quem atoniam dicunt, repetendam esse, manifestum est: id quod summa cum industria ulterius excussit Illustre Academiae nostrae decus FRID. HOFFMANNUS, in *Med. syst. tom. III. Sect. I. Cap. XI. de genealogia morborum ex perturbato solidorum & fluidorum mechanismo.*

§. XVII.

Porro a perturbato humorum motu.

Sufficientem vero ac debitum fibrarum cujuscunque generis elaterem a libero, moderato, & æquabili sanguinis, fluidique, quod motum, ac impetum facit, nervei subtilissimi in vasa influxu in determinato, ac proportionato cuivis homini, gradu sustentari, communis summorum physiologorum est sententia. (conf. HOFFMANNI *Physiol. & Hygieinen*;) E contra impeditum, immoderatiorem, aut inæqualem humorum ac dicti fluidi in partes impetum, elaterem partium per consequens vires (§. XV.) vel imminuere, vel augere neminem fugit. Unde collatis antecedentibus paragraphis sponte fluit, cujuscvis morbi genesin nimis vel imminutum, vel ultra consuetum gradum auctum sanguinis fluidique nervei adfluxum supponere. Atque hoc est, quod in immortalem nominis sui famam primus solidissime in scriptis, præcipue *med. syst. tom. II.* laudatissimus noster HOFFMANNUS exposuit, ac demonstravit.

§. XVIII.

Definitio morbi.

His itaque, quæ de primariis atque essentialibus morbi requisitis §. XII-XVII. pro scopo meo proposui, rite expensis, per actionum quarumcunque sensibilem, & per notabile temporis spatium perseverantem (§. XIII.) a finibus partium eas peragentium dissensum ab illegitimo fluidorum motu dependentem (§. XVII.) MORBUM in genere definire quid impedit?

§. XIX.

Quomodo morbus producat?

Quicquid itaque humores nostros, vel immediate proportionem partium eas constituentium invertendo, vel partes solidas internas, externasve ita disponere potest, ut sanguis, fluidumque nerveum in libero atque æquali suo motu intercipiatur, id morbi sufficientem rationem in se continet, ideoque causæ morbificæ nomine insignitur. Et quo minori vi corpus vel totum, vel pars quædam ejus naturaliter gaudet, eo ad morbos vel totum corpus, vel pars quædam facilius disponitur.

§. XX.

Morbi sunt universales l. particulares.

Quod si in homine actiones omnes a determinato vigoris (§. XI.) gradu dissentiunt, morbus vocatur *universalis*; cui subordinamus *particularem*, qui in dissensu actionum partis unius vel alterius e. g. pulmonum, linguæ, hepatis, ab earum finibus consistit. Utamque vero morborum hanc speciem vel ex spasmo, vel atonia, hinc sanguinis fluidique nervei motu, vel nimis aucto, vel impedito, aut inæquali pendere ex antecedentibus (§. XVI. & XVII.) fatis aperte colligitur.

§. XXI.

Læso actionum, quæ vitæ sufficientem rationem continent, quas vitales nuncupamus, vigore, omnes per hominem possibiles actiones lædi, h. e. a determinato sui vigoris gradu recedere, (§. XII.) animum perturbatum, appetitum, secretionem, atque excretionem in statu præternaturali esse, certissima est experientia. Hinc partium vitalium morbos semper universales, & deinde præsentiam morbi universalis perpetuam læsionis partium vitalium indicem esse, luculentissime apparet. (§. XX.)

Morbi partium vitalium sunt universales.

§. XXII.

Gravis ac magnus Medicorum judicio habetur morbus, quando complures præsertim vitales simul actiones a naturali suo vigore insigni gradu dissentiunt. *Minor & levior*, si paucarum partium, earumque ad vitam minus necessariarum, actiones exiguo gradu dissentiunt.

Morbus gravis, ac magnus quis sit.

§. XXIII.

Gravitatem itaque vel levitatem morbi determinabunt primo partium, quarum actiones dissentiunt, indoles, actionum læsarum numerus, & dissensus earum gradus (§. XXII.) ex relatione ad statum cujuscvis individui naturalem cognoscendus (§. XIII.)

Norma dijudicandi gravitatem morbi.

§. XXIV.

Unde id statim intelligitur, morbos universales semper esse graviores particularibus, & ubi multarum partium læsiones simul præsto sunt, quos complicatorum morborum numero adscribimus, eos simplicibus aut unam alteramve partem tantum occupantibus esse graviores. Præterea quoque istas morborum species, quibus vitalium partium vires ad ultimum fere gradum imminuuntur, quales sunt morbi acuti, maligni, reliquos gravitate antecellere (ex §. XXIII.) manifestum est.

Corollaria inde ducta.

§. XXV.

Deinde cum naturaliter in uno homine actiones minori, in alio majori vigoris gradu gaudeant; (§. X.) hinc unum eundemque morbum in hoc levem, in alio sat gravem esse posse apparet: v. g. febris intermittens si juvenem robustum invadit, levior huic erit; si senem, aut magis imbecillum comprehendit, gravis. Neque minus eodem in homine pro differente ejus per ætatem, victum, aliasque (§. VII.) commemoratas causas constitutione, unum eundemque morbum alio tempore gravem, alio levem habendum esse, manifestum est: unde & ratio apparet, cur morbi, qui certis hominum constitutionibus, pro ætatis, sexus, temporum indole familiares sunt, quos congruos appellant Medici, leviores incongruis a vulgo, imo ab ipso HIPPOCRATE habeantur, quippe qui *sect. II. aph. 3. 4.* Minus, inquit, periculose ægrotant ii, quorum vel naturæ, vel ætati, vel consuetudini, vel tempori familiaris est morbus, quam quibus horum nullis affinis cognatusque existit.

§. XXVI.

§. XXVI.

Morbi de-
cursus 4.
absolvitur
tempori-
bus.

Observamus in omni morbo hunc ordinem teneri, ut primo aliquot functiones magis minusve notabiliter a naturali suo vigore dissentire incipiant; deinde aut numerus actionum læsarum, aut gradus læsionis augeatur; tum gradus læsionis, qui semel adest, per aliquod tempus perduret, & denique tam gradus, quam numerus læsionum successive imminuatur. Unde omnem morbum per successivam actionum (tam ratione numeri, quam gradus) læsionem fieri, & successive desinere concludimus. Atque hac observatione innisi veteres Medici morborum decursum in quatuor distinxerunt tempora; quæ sub *initii*, *incrementi*, *status* & *declinationis* titulo comprehenduntur.

§. XXVII.

Quid sit
initium &
incrementum mor-
bi?

Initium morbi dicimus, ubi actiones quædam a naturali suo vigore notabiliter dissentire incipiunt; *incrementum* vero, cum plures actiones majori gradu dissentiant.

§. XXVIII.

Quid sit
status
morbi in
genere?

Status morbi appellant Medici, ubi actiones semel læsæ in eo, quo a determinato & consueto vigore suo dissentiant, gradu non augentur sensibili modo.

§. XXIX.

In specie
in febrilibus &c.

In febribus quidem & aliis morbis per vices & statâ tempora invadentibus, si cui singulos paroxysmos pro peculiari morbo æstimare placuerit, in quolibet paroxysmo initium, incrementum, ac status dignosci potest; si vero, uti Medicis solenne est, omnium paroxysmorum complexum pro morbo febrili agnoscimus, tunc status februm ex relatione paroxysmorum ad se invicem judicatur. Ita v. g. tertiana in statu est, si paroxysmi octo, aut plures dies ratione & durationis & gradus, frigoris & æstus, reliquorumque febriles motus comitantium pathematum sibi sunt æquales. Tempus autem, quod inter paroxysmos intercedit, sicuti in intermittentibus solenne est, si omni febrili impetu vacat, dicitur tempus intermissionis, in febribus vero continuis, ubi pathemata tantum minuuntur, remissionis tempus appellatur. Præterea morbos cum externis efflorescentiis apparentes, cujus generis sunt purpura, variolæ, morbilli, & id genus alii, in statu tunc esse judicamus, cum prævia exanthematum eruptione symptomata, quæ apparuerunt, non augentur amplius, aut vehementiora fiunt.

§. XXX.

Status itaque morbi illud tempus est, ubi summus functionum, quem morbi præsens causa in determinato subjecto efficere potest, dissensus observatur: de quo HIPPOCRATES *aphor. 30. L. II. vigentibus*, inquit, *morbis omnia sunt vehementiora*, & GALENUS idem his verbis confirmat: *Vigor seu status morbi, nihil aliud est, quam morbi quantum ad casus attinet, maximum*; qui & in libro totius morbi tempor. cap. 3. docet: *statum sive vigorem inflammationis esse, quando pars inflammata maximis dolori-*

bus cruciatur, febrisque vehementius solito affligit. Quibus proxime accedit PROSP. ALPINUS *de præsagienda vita & morte agrotantium lib. VI. cap. IX. pag. 379. edit. Boerhaav. ubi*, Tempore, quo morbi status celebratur, morbum ultimas vires exercere, neque amplius magnitudine, & vehementia augeri, disertis verbis testatur.

§. XXXI.

Quodsi dissensus actionum, antea observatus, gradu minuitur, tunc morbum decrecere, seu declinare judicamus, ipsumque hunc statum, morbi decrementum, vel *declinationem* appellamus.

Morbi de-
clinatio
quid sit.

§. XXXII.

Sunt, qui remissiones, atque intermissiones paroxysmorum febrilium, etiam declinationis nomine insigniunt, neque male. Ego vero, quum statum paroxysmorum a statu morbi ipsius, (qui paroxysmorum est complexus) merito distinguendum esse, supra indicaverim; (§. XXIX.) ideo quoque declinationem paroxysmi a declinatione morbi disjungo, & posteriori sensu, declinationis termino hic utor.

Differt a
remissio-
ne.

§. XXXIII.

Dissensum itaque actionum imminutum, sufficiens declinantis morbi esse criterium in §. XXXI. dictum est. Pro differente vero dissensus ratione (§. XIV.) diversa quoque erunt declinationis indicia. Hinc morbos ab imminuta virium quantitate (§. XIV.) proficiscentes sub incremento vigoris actionum declinare, eos vero, qui a vi præter naturam aucta (§. XIV.) propullulant, sub imminuto paululum vigore actionum præternaturali decrescere, nemini obscurum videbitur.

Criterium
declina-
tionis.

§. XXXIV.

Quo minus a determinato vigoris sui gradu dissentiant actiones, eo magis cum eodem consentiunt. (*vi principii contradicti.*) At vero sub declinatione morbi dissensum actionum imminui ex antecedentibus constat (§. XXXI.) Hinc quo ulterius processit declinatio, eo major est actionum cum determinato vigoris sui gradu conspiratio.

§. XXXV.

In omnimoda vero actionum cum gradu vigoris naturali convenientia consistit sanitas (§. XI.) quare declinatio morbi est via ad sanitatem; & quo plura morbi declinantis sunt indicia, sive quo minus actiones dissentiant (§. XXXIV.) eo facilius & certius de morbo in sanitatem transituro est iudicium.

Declina-
tio morbi
est via ad
sanitatem.

§. XXXVI.

Vix dari inter morbos, quorum tempora (§. XXVI.) distincte cognosci possunt, aliquem crediderim, qui, ubi status ejus desinit, illico in perfectam sanitatem mutetur. Nam licet exempla non desint, de atrocissimis ac diuturnis affectibus ex improvviso, seu ut ajunt, fortuito sanatis; qualia de arthritide, podagra, febribus pertinacissimis, per terrorem aut iracundiam, aut rerum vehemen-

Nullus
morbus
absoluto
statu illico
in sanitatem tran-
sit.

mentissimo desiderio expetitarum inopinatum usum, celerrime sublatis ab Ill. Dn. Confiliario Aul. & Prof. ALBERTI *diff. de sanatione fortuita* commemorantur; hac tamen ratione, ex morbo ut integræ sanitati homines illico restituantur, tantum omnino abest, ut multos insuper dies, sæpe hebdomades ægro-
tando consumant, & de summa virium im-
potentia, lassitudinis, aut dolorum perceptio-
tione, appetitus defectu, aliisque statum præ-
ternaturalem indicantibus sensationibus con-
querantur.

§. XXXVII.

Quod con-
firmatur
rationi-
bus.

Neque hæc aliter contingere posse, ipsa sana ratio suadet: Exorbitantes enim ejus-
modi animi affectus (§. XXXVI.) alia ra-
tione morbos tollere non possunt, nisi, quod
sanguinem, fluidumque nerveum vehemen-
tius commovendo, & elaterem ac vim mo-
tricem partium nervoso-musculosarum fortius
intendendo, morbificam materiam, vel e cor-
pore penitus ejiciant, vel ad faciliorem cum
humoribus miscelam disponant. (*per princip.
diætet. & patholog.*) Enim vero, quo for-
tius vires in statu præternaturali intenduntur,
eo majorem earum subsequi remissionem, &
sanguinem vehementissime commotum, im-
minuto vasorum elatere, tardius progredi,
experientiæ medicæ & principiis sanioris pa-
thologiæ maxime est consentaneum. Fac igitur
per talem immoderatam animi & corporis
commotionem (§. XXXVI.) omnem e cor-
pore peccantem materiam ejici; & supererit
tarda sanguinis circulatio, virium debilitas, &
actionum languor. Sic rationem vides effe-
ctuum in fine §. XXXVI. propositorum.

§. XXXVIII.

Quodsi vero commotiones istæ ad omnem
e corpore eliminandam materiam peccantem
non sufficiunt, adeoque, uti sæpe contingit,
pars quædam illius humorum miscelæ mi-
nus idonea in corpore relinquitur, aut ad
aliud locum transfertur; ratio adest, cur pri-
stinus actionum dissensus mitiori licet gradu
aut perduret, aut novus morbus excitetur.
Qua de causâ fortuitas tales curationes (§.
XXXVI.) merito incertas & dubias appellat
Ill. ALBERTI in *differt. allegata*.

§. XXXIX.

Ergo om-
nis decli-
natio fit
per gra-
dus.

Hæc itaque (§. XXXVI-XXXIX.)
satis confirmant, dissensum actionum, qui
in morbis præsto est, per gradus, & suc-
cessive imminui, donec determinato vigoris
sui gradui respondeant actiones: (conf. §.
XXVI.) Ordinem vero successivorum cum
tempus appellent Philosophi, hinc declinatio-
nem æque ac morbum ipsum (§. XXVI.)
in certas temporum classes dispescere optime
decebit.

§. XL.

Hinc ini-
tium, in-
cremen-
tum, &
finis ejus
distinguen-
da.

Initium itaque declinationis constituetur,
ubi tam numerus actionum dissentientium,
quam ipse dissensus earum gradus imminuitur;
& perseverante hac imminutione, cum adhuc
propius ad determinatum vigoris sui gradum
perveniunt actiones, tunc incrementum declina-
tionis, & denique, si omnimode cum natura-
li vigoris gradu conspirant, tunc statum de-
Frid. Hoffmanni Oper. Supplem. II.

clinationis consummatum, cum sanitate eun-
dem (§. II.) dicere congruum erit.

§. XLI.

CONVALUISSE hominem dicimus, qui ex
ægro in sanum mutatus est. *Convalescentem*
vero, qui post perpeffum morbi statum,
(§. XXVIII.) ad determinatum sanitatis
gradum, five ad statum sibi naturalem (§. X.)
tendit, seu, ut ita loqui cum scholasticis li-
ceat, cujus sanitas amissa de novo est in fie-
ri. Tempus autem, quod inter morbi statum
& sanitatis accessum intercedit, *statum conva-*
lescentiæ nuncupamus.

Convales-
centiæ sta-
tus quid
sit?

§. XLII.

Coincidit itaque convalescentiæ status cum
statu morborum declinationis (per §. XXXI.
& XXIX.) Hinc quæ de posteriori in
antecedentibus (§. XXXI-XL.) ex con-
silio præmissa sunt, aut adhuc dici possunt,
ad priorem adplicare commode licebit. Ex
quibus sub initio statim monere juvat, pri-
mo, quod antequam morbi status fuerit subla-
tus, convalescere nemo possit (§. XXXI.);
deinde, quod tamdiu homo sit in convales-
centiæ statu, dum ad determinatum sanitatis
suæ gradum pervenerit. (§. XL. XLI.)
tum, quod omnis convalescentia fiat *per gra-*
du (§. XXXIX.) hinc initium, incremen-
tum & status illius consummatus jure merito-
toque distingui debeant (§. XL.)

Coincidit
cum statu
declinatio-
nis.

Hinc certæ
tempora
compre-
hendit.

§. XLIII.

Quemadmodum vero singula hæc tempo-
ra peculiaribus se manifestant indiciis; hæc
ipsa quoque divisionis temporum convales-
centiæ sufficientem rationem continent: (§.
XXXIX.) ita & statum convalescentiæ mi-
hi descripturo opus erit, ut signa, quæ con-
valescentiam indicant, triplici ordine propo-
nam, primoque de iis agam, quæ immine-
re, & incipere convalescentiam, deinde, quæ
incrementum, ultimo denique quæ ejus perfe-
ctionem arguunt, exponam.

Quæ va-
riis signis
distingui-
untur.

§. XLIV.

Primo quidem cum declinationem morbi
cujuscunque ex actionum sub morbi statu læ-
sarum dissensu imminuto judicandam esse su-
pra demonstravimus (§. XXXI.) ita ex eo-
dem hoc fonte convalescentiæ signa desumen-
da esse, satis patet: Convalescentiam itaque
tunc imminere recte judicamus, si motus sub
morbi statu aucti, imminuuntur, imminuti
autem incrementum capiunt. (§. XXXIII.)

Signa unde
peten-
da?

§. XLV.

Deinde cum omnium reliquarum functio-
num ratio atque indoles a vitalibus pendeat
actionibus, hinc ipsarum successus præ cæteris
in determinando convalescentiæ initio erit
attendendus.

Signa in-
cipientis
convales-
centiæ in-
notescunt.

§. XLVI.

Sufficiens itaque atque universale conva-
lescentiæ in omnibus morbis est criterium,
quando evanescentibus vel saltem imminu-
tis, quæ morbi essentiam constituunt, gravio-
ribus pathematibus, præsertim doloribus, vi-
res vitales, quas ab omni morbo universali
imminutas relinqui certa experientiæ fide con-
stat,

Ex indole
actionum
vitalium.

stat, sensim augeri, & erigi, pulsum ex debili, celeri & inæquali in fortiolem & magis æqualem, respirationem difficilem in faciliorem, nimis vero frequentem in tardio-rem, inæqualem, & interruptam, quæ convulsionum modo fit, quam perpetuo pessimam existere judicat ALPINUS in *libr. de præfag. vit. & mort. ægrotant. cap. 5. pag. 25.* in magis æqualem mutari, & sine molesta hominis sensatione succedere animadvertimus.

§. XLVII.

2.
Anima-
lium.

Post actiones autem vitales, cum animales, quarum ordinem animæ, cerebri & organorum sensibus dicatorum functiones constituunt, statim sensibili ratione immutari soleant, ideo bonum convalescentiæ omen erit, si vehementiores animi turbæ, quæ sub deliriis febribusque acutis, ardentibus, in hominibus maxime calido ac spirituoso multo sanguine abundantibus, solennes sunt, una cum vagis minusque connexis cogitationibus conquiescunt, aut ex mœstitia diuturniore ægri ad hilaritatem perveniunt, familiares agnoscunt, ad interrogata rite respondent, nec suorum sermonum statim obliviscuntur, uti speciatim de maniacis perhibet BELLINUS in *elegantissimis opusculis practicis* sub tractatione *de morbis capitis edit. Boerhaav. pag. 433.* quod tunc ad convalescentiam proni sint, quando rerum sub furore peractarum reminisci incipiunt. Simile convalescentiæ imminuentis criterium suppeditat somnus ex inquieto, anxio, in pacatiorem, & constantem mutatus, insomniis terribilibus vacans, vires reficiens: quorsum & pertinet, si oculorum vagæ ac rapidæ circumgyrationes conquiescunt, aut si defixi antea in unicum objectum, nunc paulo alacrius circumvolvuntur; gustus, qui sæpe sub febribus præsertim ardentibus plane tollitur, denuo se prodit, ac res linguæ oblatae rite ab invicem discernuntur, auditus quoque, qui in maniacorum paroxysmis acutissimus esse solet, moderatior fit, aut si extrema virium imbecillitate nimis suppressus est, iterum erigitur. Ex reliquorum sensuum statu, qui experientia teste post morbos multum variare solet, certa de convalescentia indicia desumi vix possunt, nisi illud de sensu tactus huc referas, quod a paralyssi & soporosis affectibus homines tunc convalescere incipiant, quando doloris sensus aut spontaneus, aut arte factus in affecta parte percipitur.

§. XLVIII.

Hinc vul-
tus &

Quemadmodum vero vultus eloquente FERNELIO *libr. II. cap. 2.* imago animæ est, & facies quasi index & sermo quidam non modo perturbationum animi, sed etiam interiorum corporis affectuum, & juxta HIPPOCRATEM *lib. VI. epid. sect. 4. text. 26.* sicut oculi valent, sic totum corpus: ita ex facie non pauca convalescentiæ indicia desumi possunt. Facies itaque hilaris, oculi magnitudine, figura, situ, colore, motu, visione & splendore recte valentibus non admodum dissimiles, bonam salutis spem pollicentur juxta ALPINUM *libr. V. cap. VII. conf. Excell. D. D. ERNESTI GOTTHOLDI STRUVII Physici Ucaromarchiæ provincialis & Acad.*

N. C. Sodalit, parentis mei pie devenerandi *diff. de facie morborum indice* sub præsidio Ill. Stahlian habitam Halæ 1700.

§. XLIX.

Ab animalium quoque functionum indole pendet motuum voluntariorum ratio, per quos maxime capitis, linguæ, artuumque agitationes hic intellectas volo. Hæ quidem, si sub morbi statu vehementiores fuerint, uti sub convulsionibus, epilepsiis hysteriis &c. solenne est, conquiescentes declinationem morbi indicant: Si vero præ nimia virium impotentia, æger sub morbo sine deliqui metu nec corpus vertere, nec loqui, nec manus tollere, nec pedibus stare potuerit, tunc aucta movendi potentia convalescentiam manifestat.

§. L.

Ex naturalibus actionibus convalescentiæ nuntii sunt, sitis sub morbo inextinguibilis decrementum, aut penitus deficientis, uti in febribus ardentibus malignis, pessimo sane omine nonnunquam contingit, moderatius incrementum; excretionum suppressarum, præsertim urinæ, sudoris & fecum alvinarum, restitutio, saliva non adeo spumescens, atque ad naturalem consistentiam magis accedens; urina ex tenui, & pellucida in spissiore cum sedimento, ex rubicunda in flavam & oleosa ac pinguis in puriorem mutata. Præ ceteris vero ad insensibilem perspirationem, quæ æquali per omne corpus calore ac leni madore se prodit, attendere nos jubet HIPPOCRATES *lib. 5. prognost.* ita perhibens: *optimum est, si corpus omne æque calidum molleque est; æqualis enim totius corporis mollities, distinguit bonum calorem ab aliis non bonis.*

§. LI.

Atque hæc sunt, me iudice, potiora, quæ convalescentiam incipientem denotant signa atque phænomena. Quorum summam HIPPOCRATES *lib. III. prognost. text. 3.* his verbis comprehendit: *Qui convaliturus est, facilius spirat, sine dolore agit, noctu dormit, & alia signa securissima habet; paulo fusius hæc in libr. II. prognost. de suppuratis locutus ita proponit. Bona vero hæc sunt, facile morbum ferre, bene spirare, dolore vindicatum esse, sputum facile extussire, corpus equaliter calidum videri, ac molle, siti non detineri, urinas, dejectiones, somnos, sudores, singula intelligere bona, uti præscriptum est, succedere. Quare pauca, parvaque symptomata cum in principio morborum, tum postea conspecta, debilem morbum, viribusque naturæ imparem significant.*

§. LII.

Pleraque vero ex hætenus allatis signis (§. XLVI-LI.) omnem morborum declinationem sub initio comitari, uti experientia docet, ita & ratio confirmat. Quicumque enim, vel leviter scientiæ medicæ principiis imbutus est, facile perspicit, singula ejus esse indolis, ut dissensum actionum, sub morbi statu præsentem, gradu imminutum esse satis manifestent. Imminutus vero actionum dissensus, cum generale, ac primum de convalescentia indicium sit, (§. XLIV.) hinc signa;

Motuum
volunta-
riorum in-
dole.

3.
Ex natu-
ralium
actionum
successu.

Consensu
Hippocr.
circa hæc
signa.

Et eorum
rationes.

signa commemorata specialia ad cognoscendum convalescentiæ initium satis certa esse, nemo dubitabit.

§. LIII.

Sub initio convalescentiæ multæ functiones languent testimonio externi habitus corporis.

Apparet itaque sub initio convalescentiæ multas adhuc functiones a naturali statu admodum dissentire, neque eas, quæ huic propius consentire inchoant, perfecte ad priorem vigoris gradum esse perductas. (§. XLVI. LI.) quare mirum non est, eo tempore, & externum corporis habitum priori maxime dissimilem esse, & internas æque ac externas partes officio suo minime satisfacere. Ad externum enim corporis habitum quod spectat, homines convalescere incipientes cute admodum laxa, facie pallida, naribus ac genis collapsis, oculis, palpebrisque depresso præditos, graciliores & emaciatos, alios vero tumore maxime pedum cachectico inflatos, hinc copiosis ac delassantibus sudoribus plerumque obnoxios esse observamus. Præterea artus admodum difficulter moveri, laboribus suscipiendis, multo magis sustinendis, & absolvendis impares, manus ac pedes tremore sæpius corripiri, hinc ad scribendum & ambulandum ineptos, caput & totum corpus grave, ægrofque ad jacendum, quam sedendum aut deambulandum procliviores esse in plurimis annotamus.

§. LIV.

Et internarum actionum.

Internas partes naturali sua vi, ac vigore orbatas adhuc esse, varia testantur phænomena. Primo quidem ob debilem cerebri vim, ad meditationes serias inepti, morosi, aut plane hebetioris ingenii, ad terrores, & iram proni, mœsti, timidique observantur, sermonum, aut cogitatorum facillime obliviscuntur, ad somnum proni sunt, & euntes vertigine facile corripuntur. Præterea pulsu parvo, & celeri gaudent, cor sæpius palpitat: quod symptoma iis maxime, qui enormes hæmorrhagias, aut affectus spasmodicoconvulsivos hysterico-hypochondriacos passi sunt, familiare esse frequentius annotavi. Ob ventriculi debilitatem, ructibus, alvi obstructionibus flatibusque, anxietatibus præcordiorum, vomitibus facile infestantur. Porro, qui a convulsionibus aut spasmodicis atrocibus, ut arthritide, podagra, epilepsia convalescunt, contusionis dolorificam sensationem hinc inde in corpore obviam maxime conqueruntur, & quæ his sunt similia: quæ omnia de imminuta partium vi, ac inæquali sanguinis circulo (§. XVII.) testari nemo non facile perspicit.

§. LV.

Omnis convalescentia supponit sublationem causarum morbificarum.

Enim vero dissensum actionum sub morbo præsentem absque prævia causæ morbum sustentantis vel plenaria sublatione, vel imminutione, tolli aut imminui non posse, cuius facile est intellectus. Quare nec signa hactenus adducta (§. XLVI. LI.) prius comparere posse, quisquam dubitabit. Prius igitur, ut id quod morbum fecit, & sustentat, e corpore ejiciatur, est necesse.

§. LVI.

Quæ diversa sunt.

Jam vero si omnes morbum classes studiose percurramus, eorum originem vel a sanguine

Frid. Hoffmanni Oper. Supplem. II.

nis copia vasa sanguifera ac membranas nervoso-musculosas ad spasmos vel atoniam disponente; vel ejusdem cum multis inutilibus, & naturali humorum crassi contrariis particulis, commixtione, vel denique crudis, fordiumque acrium biliosarum viscidarum in primis viis, aliisque visceribus collectione, ultimo repetendam esse, experientia & fundamenta pathologiæ dictant. Imo vero sub ipso morborum decursu plurimam inutilium humorum copiam generari, atque his ipsis morbum foveri, & sæpe augeri, in dies experimur. Quæ cum ita sint, facile patet, quod absque rejecta inutilium rerum sufficienti quantitate morbus in sanitatem permutari nullo modo possit.

§. LVII.

Potissimum itaque ad dignoscendam convalescentiæ certitudinem momentum conferent excretiones five per sanguinis, sudoris, alvi, urinæ fluxus, five per vomitus, five muci per varias congruas tamen vias dejectiones, institutæ, quæ crasium nomine veniunt Medicis. Quas veteres Medicos in prædicendo morbi eventu maxime esse intuitos, in singulis fere scriptorum paginis HIPPOCRATIS atque GALENI, CELSI, aliorumque inviolabilis auctoritas confirmat.

Hinc ab excretionibus judicanda convalescentia.

§. LVIII.

At age, jam prælucente veterum auctoritate commemorabimus summa bonarum excretionum criteria. Proponuntur hæc a PROSPERO ALPINO, Medico vere Hippocratico in eleganti de præfagienda vita, & morte ægrotantium libro Sect. II. cap. 111. edit. Boerhaav. pag. 91. Num bonæ, malæve sint, inquit, vacationes sane ex multis signis innoscunt, quippe ab exeuntium quantitate, qualitate, loco, per quem fit, tempore morborum, diebus in quibus apparent, atque morbi allevatione. Bonæ siquidem sunt, si in ea copia, quæ multitudini humorum peccantium respondet, observantur, atque ubi qualia desiderantur, evacuantur, perque loca convenientia (h. e. ea organa, quæ certæ humorum speciei excernendæ propria sunt) & congruo tempore, quippe in statu, atque in aliquo dierum decretoriorum, fiant, a quibusque morborum, symptomatumque vel sequitur allevantia, vel iisdem plane ægri liberantur. Idem auctor lib. VI. cap. IX. pag. 380. ita loquitur: Optima est excretio morbi naturæ, seu ideæ conveniens, cujusmodi e. c. in ardente febre, & in omnibus viscerum inflammationibus, sanguinis eruptio, aut copiosi sudores, aut vomitus, vel alvi dejectiones multæ biliosæ; quo apparet etiam confirmari hanc bonam excretionem ab ægrotantis natura biliosa, a biliosa victus ante acta, ab ætate efflorescente, atque ab anni tempore æstivo, in calida siccaque regione, atque in tali cæli statu.

Bona excretio qua sit?

§. LIX.

Ex quibus inter se collatis tria potissimum summa criteriorum, quibus bonæ excretionis judicantur, genera elicienda esse, facile est intellectu. Primum erit, ut excretiones morbi naturæ, quæ pro causis eum sustinentibus differt, hinc causæ morbificæ respondeant; alterum, ut ægrotantis constitutioni, qualis vel a nativitate, vel per ætatem, vi-

Tria ejus requisita.

Etum, clima, consuetudinem &c. est, convenient; *ultimum* denique ut morbus minuatur (per §. LVIII.) Quibus scilicet requisitis, si exacte respondet excretionum indoles, tunc certum dierum munerum, quem maxime attendere jusserunt Veteres (§. LVIII.) adeo respici non debere, nemo non intelligit. Quippe excretiones criticae non a diebus pendunt, sed hi ab excretionibus critici vocantur: ubi itaque adest excretio critica, ibi statuitur dies criticus. Conf. Illustr. HOFFMANNI *System. tom. III. Sect. I. cap. 14. De crisis & criticis diebus.*

§. LX.

Quomodo
ad conva-
lescentiam
conferat
sanguinis
excretio?

Quæ quidem, ut luculentius patefiant, agere jam brevibus excretionum varias species percurrere, qua ratione ad convalescentiam singulæ faciant, monstrabimus. Initium sit de sanguinis eruptione, quam salutarem esse in omnibus morbis, qui a cruoris vitalis abundantia, vel universali, vel particulari oriuntur, nemini inter peritos Medicos ignotum est. Equidem experientia teste, nullius unquam mali tanta observata fuit atrocitas, cujus non abundantia sanguinis a lauto & copioso victu, aut per consuetas sanguinis excretionibus, sedis aut uteri vasis, omittas evacuationes collecta, causa esse possit. Hinc corporum gravitates, lassitudines, lipothymias, apoplexia, aut variarum partium inflammationes, imo longinqua & chronica hypochondriacorum ac hysteriarum pathemata enasci, quotidianis observationibus confirmamur. Quæ omnia vero quanta & qualia fuerint, tempestiva ac sufficienti per congrua loca facta sanguinis eruptione felicissimo omine judicari, apud artem facientes non ignotum est. Hinc pueros, juvenes, vel adultos etiam, in quibus consueto tempore narium hæmorrhagiæ emanerunt, ex diuturnis cephalalgias, faucium, pulmonum, hepatis aliarumque partium inflammationibus, febribus acutis, ardentibusque per redeuntem sanguinis per nares effluxum liberari solere, indubia est experientia: quam confirmat HIPPOCRATES l. II. *Epid.* his verbis: *largæ de naribus eruptiones sanguinis liberant fere.* Viros foeminasque, si emanente, aut imminuta hæmorrhoidum aut mensium periodica fluxione, in atroces capitis morbos, dolores, manias, melancholias, sensuum obscuraciones, viscerum infarctus, febres, sanguinis sputa, vomitus, aut alias molestas afflictiones incurrunt, restituto sanguinis per sedis aut uteri vasa stillicidio penitus liberari, tam antiquorum quam recentiorum testimonia confirmant. Quæ inter adducamus HIPPOCRATIS in *aphorismis* effatum: *Insanientibus, si varices, vel hæmorrhoides supervenerint, insaniam fit solutio, qui & de surditate lib. IV. aphor. 60.* testatur: quod quibus per febres aures obscuruerint, iis sanguis e naribus profluens, aut perturbata alvus morbum solvat.

§. LXI.

Sudor copiosus.

Sanguineis evacuationibus succedant aquosæ per cutis poros in universo corpore succedentes quas sudores vocant. His quidem primo aquosam sanguinis partem, deinde cum hac particulas salino-sulphureas, acres, a sanguinis naturali miscela alienas eliminari,

ex sudoris naturæ, foetore & experimentis chymicis cum eo institutis in physiologia demonstratur. Sudores itaque copiose erumpentes in omnibus iis morbis boni ominis esse, qui vel a phlegmatis abundantia, aut humorum salino-sulphurea impuritate oriuntur, præsertim si in homine succis abundante contingant, nemo dubitabit. Hinc morbos omnes a cohibita cuticulari transpiratione natos, cujusmodi sunt corporis gravitas ac lassitudo, partium externarum tumores, inflammationes varii generis, porro capitis dolores, febres denique omnes cum vel sine exanthematibus comparentes, imo omnes morbos quibus partium externarum spasmi junguntur, ut sunt vomitus, diarrhoeæ, colicæ, largo sudoris proventu imminui, aut solvi experientia est consonum. Præcipuum vero, quod de sudoribus salutaribus requirunt Medici, hoc est, ut per omne corpus æquales, calidique sint. Siquidem particulares circa vultum & cervicem, item frigidos, tanquam spasmi nondum soluti, aut putridæ humorum corruptionis testes, cum HIPPOCRATE damnant omnes Medici peritiores. Aequales itaque, copiosi, ac calidi per omne corpus, si contingant sudores, & morbi symptomatumque imminutio subsequatur, hos optimos convalescentiæ nuntios judicabimus.

§. LXII.

Ab his autem pergamus ad alias, quæ ex ventriculo & intestinis fiunt, quarum alia ex ipso stomacho & duodeno, per oesophagum, & os, alia ex intestinis per alvum succedunt. Prioris generis excretiones dicuntur *vomitibus*, posteriores *alvinæ excretionibus*. Utrasque autem ad judicandam morborum plurimorum declinationem, per consequens convalescentiam (§. XLI.) multum omnino conferre, nemo contra experientiam negaverit. In ventriculo enim ac intestinis, quæ primæ viæ vulgo audiunt, plurimorum morborum fomitibus latere, extra omne est dubium: id quod erudite pridem Illustris noster docuit HOFFMANNUS in *diff. de duodeno multorum morborum sede*. Quæ cum ita sint, plurimos morbos evacuatis primis viis tolli aut imminui debere, rationi & experientia est consonum. Atqui plerosque capitis affectus, cephalalgias, vertigines, oculorum obscuritates, auditus gravitatem, imo melancholicas & maniacas passiones; porro viscerum in pectoris cavitate sitarum affectiones, spirandi difficultates, cordis palpitationes, anxietates, aliasque inde originem sumere, aut exacerbare, nemo non novit. Plerasque etiam intermittentes maxime febres, convulsiones, hepatis vitia, icterum, alvi obstipationes, hypochondriorum spasmos, flatulentias, cachexiam, pedum tumores, alia denique innumera pathemata, ex primarum, ut dicunt, vitio viarum enasci, quotidianis exemplis confirmatur.

Vomitibus
& dejectionibus.

§. LXIII.

His itaque singulis largos vomitus, vel copiosas per alvum dejectiones mirum prodesse, quis dubitabit? Ita quidem atrocissima a vermium in primis viis latentium mordicatione excitata pathemata, vermium exitu solvi, vulgo notum est. De vomitu cephalalgias chronicas solvente innumera apud

Exempla
de his.

obser-

observatores prostant exempla. Ipsos autem diuturnos vomitus largo alvi profluvio terminari, certum est, & vice versa in longo alvi profluvio nihil salutaris esse vomitu spontaneo docet HIPPOCRATES *lib. VI. aphor. 15. A longo profluvio spontaneus vomitus superveniens morbum solvit.* GALENUS in *III. aphorism.* convulsis vomitum æruginosum profuisse docet. Similiter de surditate HIPPOCRATES *lib. IV. aph. 28.* testatur, quod biliosæ dejectiones superveniente surditate cessent, & surditas sæpe supervenientibus biliosis dejectionibus cesset. Alio loco *lippientem*, inquit, *alvi profluvio corripitur bonum, nec non lienosis difficultas intestinorum*, per quam largas evacuationes intelligit, *supervenientis, bonum*, & *lib. II. aphor. 29. si a leucophlegmatia detento fortis diarrhœa supervenit, morbum solvit.* Et de ictero, qui familiariter ex obstructa alvo fit, testatur, purgationem vel per vesicam, vel per turbatam alvum mire profuisse *lib. Epid. I. comm. I. text. 33.* Præcipuum vero, quod ad bonas has excretiones ab autoribus requiritur, id est, ut non magis copia, quam qualitate respondeant naturæ contentarum sordium. Hinc biliosis, & ardentibus febribus, biliosas vomitiones, in pituitosis pituitam evacuari merito desiderat ALPINUS *l. c. lib. VII. cap. 8. pag. 462:* & HIPPOCRATES *l. II. prognost. text. 38.* vomitionem utilissimam pronuntiat, quæ pituita ac bile permixta quam maxime est, & non crassa valde, neque multa. His itaque requisitis, si respondeant dejectiones, vel vomitiones; & æger inde levamen sentiat; tunc boni eas ad convalescentiam omnis esse merito contendendo. conf. HOFFMANNI *disp. de diarrhœa in malignis salutaris.*

§. LXIV.

Quid urinae indoles portendat?

Considerandæ jam veniunt *urinarum evacuationes*, quas non modo de renum, vesicæ, ac partium urinarum habitu, sed & de universæ humorum, a quibus quippe urinae secernuntur, massæ conditione, imo solidarum partium dispositione certissimum ferre testimonium ex physiologia satis constat. Ex urinarum itaque inspectione in plurimis morbis; qui vel ex renum & vesicæ vitio; vel perturbata humorum naturali mixtione nascuntur, nec non ubi spasmi, vel atonia solidorum peccat, non contemnendum de convalescentia iudicium feretur. Atrocissima sane sunt pathemata, quæ a calculo, præsertim in ureteribus incluso; ob nervorum consensum, longe lateque in universo corpore observari solent; hinc alvi pertinaces obstructions, vomitus gravissimos, præcordiorum anxietates suffocatorias, capitis intolerabiles dolores, deliria, visus & auditus vitia; & quis enumerandis omnibus par sit, mala orta, memoriæ consignaverunt, cum antiquioribus recentes. Confer. HOFFMANNUS *Syst. tom. III. de consensu partium nervosarum & tom. IV. part. II. sect. II. cap. 6. de dolore ex calculo renum.* Hæc omnia vero; urina ex tenui & aquosa in crassam ac turbidam, multo sabulo permixtam, commutata, ad sensum allevari, aut sedari, hominemque ad convalescentiam mox tendere, communis observatorum est consensus. Similiter a vesicæ aut partium genitalium exulceratione

Frid. Hoffmanni Oper. Supplem. II.

convalescere videmus, quibus lotium, quod in his vel cum dolore mingitur, vel multis striis; ac fibris albicantibus permixtum est, sine dolore clarum & naturali simile excernitur. Porro sub statu inflammationum, febrium, convulsionum, omnium denique spasmodorum, quacunque ratione, & ubicunque se exserant, urinam tenuem, parcam, plus minus rubram excerni solere, inter omnes constat: prodeunte vero majori urinarum crassarum mox subsidentium, & turbidarum copia, dictos morbos imminui, & declinare, ipse in plurimis observavi. Hac itaque ratione, si urina per plures dies continuo excernitur, non leve inde de convalescentia hominis sumetur argumentum:

§. LXV.

Super adhuc sunt variæ humorum species, quæ salutaris scopo e diversis corporis partibus eliminari solent, quas omnes sub communi *Muci* nomine schola medica comprehendit. Hujus generis est liquor in faucibus, & aspera arteria collectus, sive sputum, quod tam ratione consistentiæ, & mixtionis suæ, quam facilitatis qua excernitur, optima in variis pulmonum maxime affectibus prognostica largitur. Ita in affectibus thoracis absque inflammatione, & febre optima sputa ab ALPINO *lib. VII. Cap. XVII.* habentur alba, levia, æqualia, modice crassa, parum viscida, nullo colore pravo infecta & quæ facile excernuntur, absque multa tussi, & quæ tussim, ac difficilem respirationem sedant. Præcipuum vero præter hæc censet, ut facile, promptèque educantur, quod HIPPOCRATES in *l. II. progn. text. 45.* requirit, *secretio*, inquit, *in omnibus doloribus, qui sunt circa pulmonem & costas cito promptèque secretetur, necesse est &c.* Interdum quoque in iis, qui internis vexantur ulceribus *Puris* ejjectionem pro convalescentiæ signo habendam esse, colligimus ex HIPPOCRATE *Lib. 5. aphor. 15.* ita se habente: *quicumque ex morbo laterali sunt empyi, id est suppurati, si quadraginta diebus purgantur, a die qua fit ruptio, liberantur.*

Sputum:

Puris ejectio.

§. LXVI.

Pituita in narium membranis secretæ copioso profluvio plurimos admodum molestos capitis æque ac pectoris affectus a sero stagnante & acri natos, ut cephalæas serofas, torporem, lethargicos ac comatosos affectus; lippitudinem, respirationis, ac loquelæ difficultatem, (quam sæpe a muci in naribus stagnatione aeris liberum transitum impediente ortam vidi,) frequentissimè terminari, nemini ignotum est. Mira hinc est ipsius vulgi in coryzam spes ac fiducia; quia hac multa sponte sanari vident, quæ nullâ medicina tolli potuerunt. Memini ab Illustri Patrô meo FR. HOFFMANNO foeminam curæ meæ traditam fuisse, a repressa purpura asthmaticâ, quæ sub continua narium siccitate, & capitis intolerabiles dolores, & pectoris angustias anxie conquerebatur; quoties vero vel sternutatione, vel ipsa coryza comprehensa fuit, toties magnum capitis ac pectoris levamen sensit. Recenti quoque memoria teneo exemplum virginis sanguineo-phlegmaticæ constitutionis, quæ cum per integros tres

Pituita narium excretio.

menes, consueta narium evacuatione caruisset, molestissimum inde capitis, præsertim in fronte, dolorem sensit, foetidum spiravit halitum, similique sapore in faucibus infecta est: qua de causa nec optimas ciborum delicias sine fastidio deglutire potuit. Prodeunte vero ingenti per nares foetidissimi coloris & odoris materiæ quantitate, simul & semel liberata est. Referri itaque huc merentur, quæ HIPPOCRATES in *coac. præ sag. Lib. V. sect. I. text. 23.* scribit: *Capitis dolores solvit pus per nares effluens, sputa crassa, & sine odore, solvit quoque ulcerum eruptio aliquando, & somnus, & alvi profluvium.*

§. LXVII.

Ergo excretiones bonæ sunt signa imminentis conval.

Sed sufficere hæc de potioribus excretionum speciebus (§. LX. LXVI.) dicta arbitror, ad cognoscendum, quod & quantum ad morborum declinationem, & convalescentiam determinandam conferant. Rationem cur eas in dijudicando morborum eventu respicere debeat Medicus, supra allegavi: (§. LV. LVII.) nimirum ut pateat, an materia peccans, aut morbifica sit sufficienter eliminata. Quemadmodum itaque resitante in corpore materia morbum sustinente h. e. ante excretionem ejus factam, morbus cessare nequit, (§. LV.) ita post absolutam plenariam, & legitimam excretionem, ratio deficit, cur morbus perseveret. Hinc post excretionem sufficientes & legitimas (§. LIX.) actionum sub morbi statu læsarum dissensum imminutum h. e. majorem consensum (§. XXXIII.) fieri necesse est. Hic vero est convalescentiæ initium. (§. XLIV.) Ergo excretionem naturæ morbi, & ægrotantis congruæ (§. LIX.) convalescentiæ imminentis indices erunt. Initium vero ejus vitalium maxime atque animalium actionum auctus vigor, juxta signa (§. XLVI. XLVII. &c.) allegata, quam certissime declarabit.

§. LXVIII.

Nec non metastasis salutaris.

Neque tamen raræ sunt observationes, a compluribus præsertim particularibus morbis homines liberari, materia peccante non quidem e corpore eliminata, sed ad alium locum transvecta, quod morborum *Metastasin* vocant Medici. vid. HOFFMANNI *Med. system. part. III. sect. I. cap. XI.* edit. ultim. de commutata morborum sede §. 2. Cum vero eadem materia ad diversas partes translata, diversas cieat morborum species; hinc mirum non est, quod plures morbi per alios morbos sanentur. Accidit itaque quandoque morbi in morbos mutatio, qui supervenientes comparate sunt boni; proinde ipsi quidam morbi aliis supervenientes, quos & consequentes vocant, Medico indicio esse possunt, de convalescentia ægri incipiente.

§. LXIX.

Quenam illæ sint?

Enim vero, si novus aliquis morbus alteri superveniens convalescentiæ index esse debet: sponte apparet, eum priori esse leviorrem debere, h. e. partem, cujus actiones novo materiæ affluxu læduntur, priori esse ignobiliorrem, & ipsum actionum dissensum mitiorem, (§. XXIII.)

§. LXX.

Per partes vero nobiliores, cum non solum ad vitam absolute necessariæ, sed omnes internæ, in tribus illis, capitis, thoracis, & abdominis cavitatibus contentæ, ut cerebrum, hepar, cor, ventriculus, gula, aspera arteria, pulmones, septum transversum, intestina tenuia, pleura, perhibente ALPINO *lib. V. cap. 13. pag. 335.* intelligantur, eo quod, ut ejusdem verbis utar auctoris, partibus principibus & vitalibus hæc aut proxime ferviant, aut quod sint proximæ, aut cum iisdem magnam habeant convenientiam; manifesto inde cognoscitur, non intelligi hic eas humorum translationes, quæ a partibus externis, tanquam ignobilibus fiunt ad internas, quippe quæ semper sunt periculosiores; sed eas maxime huc pertinere, quæ ab internis nobilioribus modo dictis visceribus ad externas sensibus conspicuas partes, ut superficiem corporis ipsam, aut in superficie sita membra, ut aures, oculos, nasum, labia, pedes atque brachia contingunt.

§. LXXI.

Hujusmodi autem generis consequentes morbos, gravissimis aliis medelæ fuisse, innumera tam apud veteres, quam recentiores observatores exempla commemorantur. Quæ de re primo testem adducamus ALPINUM, qui *cap. I. pag. 6. sæpe*, inquit, *ut nobilia viscera morbo aliquo vexata, ac oppugnata defendantur, ac servantur, natura permittit, aut ipsa procurat, ut ab his visceribus totus morbi impetus ad aliquam partium ignobilium feratur: (& non ita multo post) quo pacto multos tum acutos tum longos morbos judicatos vidimus, nempe in cruribus, cuteque, tum moribus, inflammationibus, exanthematis, variolis, morbillis, scabie, aut aliis hujusmodi abortis, de quibus HIPPOCRATES aph. 37. lib. 17. prognost. dixit: Abscessus, qui ad crura fiunt in pulmonibus vehementibus, ac periculosos omnes utiles sunt, & lib. 2. prognost. text. 64. quibuscunque abscessus fiunt, in pulmonibus morbis circa aures, suppurantur, vel ad inferiora loca, & ad fistulam perveniunt, ii evadunt: & cap. 4. aphor. 25. erysipelas ab interioribus ad exteriora verti bonum perhibet; & anginae supervenientem colli tumorem bono notat calculo lib. VI. aphor. 37. Porro icterum febribus biliosis succedentem bonum convalescentiæ omen esse asserit HIPPOCRATES lib. 4. aphor. 64. quibus in febribus morbus regius septimo, nono, vel undecimo vel decimo quarto die supervenerit, bonum, nisi dextrum hypochondrium induruerit, & libr. 4. de vict. rat. in acutis text. 8. in biliosa febre morbus regius cum rigore ante septimum diem enatus, morbum solvit (si nempe aliæ biliosæ excretiones simul apparuerint.) Purpuram, aliosque cutaneos morbos hypochondriaco & hysterico maxime inveterato malo medelam attulisse, aliquot exemplis ipse compertum habeo. Quartanarios erumpente in labiis ulcerum copia, aut scabie in cutis superficie, convalescere communis est observatio. Et in tertiana ulcera labiorum profuisse observavit PELARG. *Iabrg t. i. pag. 8. 173.* In malignis obauditionem difficilem*

Exempla de morbis per morbos sanantur.

idem.

idem laudat *l. c. a. l. pag. 7. 151. 194.* A spasmodicis diuturnis gravioribus epilepticis convalescere, qui febre corripiuntur, certa est experientia, quam HIPPOCRATES *Sect. IV. aph. 57.* his verbis confirmat: *spasmo aut tetano vexato febris si accesserit morbum solvit, & Sect. II. aph. 26. Febrem convulsioni supervenire satius, quam convulsionem febre.* Dignissima quoque est, quæ hoc loco conferatur Illustris & Excell. D. D. JO. THEOD. ELLERI Consilarii aulici & Archiatri Majestatis Borussiae primarii, Medici eruditionis æque ac felicissimi artis exercitii fama celebratissimi obs. de arthritide sexennali per febrem acutam soluta, quam lectissimis ejus observationibus medico-chirurgicis Berol. editis insertam & solidissime explicatam lege *pag. 15.* ubi simul mentionem illustris Auctor injicit hydropis incipientis per febres intermittentes sæpius sublatis. Et quod HIPPOCRATES *Sect. VI. aph. 51.* de febrium singulari in apoplecticis beneficio prædicat, id laudatissimus modo ELLERUS rarissimo viri sexagenarii cachectici ab hemiplegia per febrem tertianam intermittentem feliciter liberati exemplo luculentissime confirmat, *l. c. p. 18.* Malum hypochondriacum febre maxime tertiana auferri, & aliorum & meo ipsius exemplo cognovi.

§. LXXII.

Similiter cum inter internas partes una respective nobilior ac dignior sit altera, ut e. g. contenta capitis ac thoracis digniora sunt iis, quæ in infimo ventre latent; ideo & internarum partium nobilissimarum morbos, delata ab iis vitiosa materia ad alias ignobiliores internas partes sæpe auferri, compluribus testimoniis confirmatur. Superiorum igitur morbos partium per morbos viscerum imi ventris, maxime intestinorum, ut copiosas dejectiones, vomitus, sanari, supra jam ostendi: (§. LXII.) quibus unicui HIPPOCRATIS *in aphorism. VII. §. 5.* testimonium adjungo, *ab insania, inquietis, difficultas intestinorum; vel aqua inter cutem bonum.* Idem, dysenteriam leviores, lienosis bonam pronunciat *sect. VI. §. 48.* Sed sufficiat hinc exemplis demonstrasse, quod morbi ipsi nonnunquam aliis supervenientes salutem hominibus afferant. (§. LXVIII.) adeoque ceteris paribus pro convalescentiæ nuntiis a judicio & perito Medico jure meritoque aliquando sint agnoscendi.

§. LXXIII.

Serino hætenus fuit de signis convalescentiæ tam imminentis quam incipientis. (XLVI. LXXII.) Imminentis quidem convalescentiæ indices esse diximus humorum morbum sustentantium aut excretiones legitimas sub statu contingentes (§. LXVII.); aut translationes ad loca prioribus ignobiliora. (§. LXVIII. LXIX. &c.) Incipientem autem veram convalescentiam sufficienter demonstrare omnia ea phaenomena probavimus, quæ vitalium, atque animalium sub morbi statu maxime prostratum vigorem de novo erigi nobis manifestant. (§. XLVI. XLVII.) Quod si itaque post excretiones quascunque morbi ac ægri naturæ saltem congruas, (§. LIX.) aut salubres morborum metastases

(§. LXIX.) dicta in (§. XLVI. XLVII.) signa vel omnia, vel potiora comparent, tunc convalescentiæ initium statuere utique licebit.

§. LXXIV.

Ad incrementum itaque convalescentiæ explorandum quæ opus sint criteria, nunc accuratius examinare me instituti jubet ratio. Enimvero, quemadmodum declinationis morborum incrementum ex actionum sub morbi statu dissentientium magis adhuc aucto consensu & vigore ad naturalem statum propius accedente cognosci debere, supra expositum est: (§. XL.) ita ex eodem fonte convalescentiæ incrementis documenta desumenda esse sana suadet ratio.

§. LXXV.

Quare primum illius indicium erit, constans atque sensibilis imminutio dissensus actionum vitalium & animalium, (§. XLVI. XLVII.) seu constans earum recuperati vigoris augmentum. Quod si igitur ea, quæ incipientem convalescentiam denotant phaenomena, vel omnia, vel ex iisdem potiora (§. XLVI. XLVII.) commemorata, præsertim pulsus, & actionum vitalium vigorem per aliquot dies, aut unam septimanam, vel ultra perseverare, atque augeri videmus, tunc incrementum convalescentiæ constitui- mus. Deinde ulterius nos confirmat actionum naturalium, quæ sub initio declinationis mirum adhuc languere, atque a naturali statu dissentire solent (§. LIV.), redintegratus vigor, atque ad naturalem statum propior accessio.

§. LXXVI.

Ex primis itaque est appetitus reditus, qui in nonnullis robustis maxime hominibus, post certos morbos, ut febres quartanas, tertianasque, dysenterias, ac diarrhoeas &c. mox naturalem statum excedit; in aliis imbecillibus maxime, & morbo gravi, ac diuturno exhaustis, lento admodum gradu ad pristinum vigorem redit. Optimum autem semper judicatur, si consuetas, & maxime adamas ciborum, aliarumve rerum delicias; quarum sub ipso morbo odorem aut adspexitum sine nausea ferre non potuerunt, facilius tolerant, aut illas usurpandi desideria exponunt. Præ ceteris vero panis appetentiam recuperare solent convalescentes, quam ultimo in morbis perdi, & finito morbo primum recuperari, plures observarunt. conf. SCHOTTI *phys. cur. lib. III. cap. 27.* Huic succedunt aliarum rerum, quas sani in deliciis habuerunt, spontaneæ cupiditates e. g. fumi tabaci, qui uti ab ipsis patronis, ac summis amatoribus per morbi statum summo habetur odio, ita convalescentibus iisdem faustissimo omine eundem sponte expeti multoties observavi. Alii quoque ad res alienas, ut certas species potuum, peregrinas cerevias, vina, sæpius quoque incongruas, & olim ab iis exosas, haleces, cucumeres &c. incoercibili plane desiderio feruntur; quibus si potiuntur, incredibile convalescentiæ augmentum summo cum gaudio observare licet.

Incrementum convalescentiæ constituendum?

Criteria ejus.

1. Appetitus auctus.

§. LXXVII.

2.
Bona di-
gestio &
egestio.

Adaucto sub convalescentiæ incremento ventriculi robore, & appetitu (§. LXXVI.) ciborum quoque digestio per morbum, & post eum sub initio declinationis admodum imbecillis, successive in meliorem vertitur. Hinc & secretiones æque ac excretiones naturali suo statui magis fiunt similes, ita quidem, ut assumtis tam solidioribus, quam fluidis alimentis, alvinæ & urinarum evacuationes proportionata non modo quantitate respondeant, sed & colore, consistentia, naturalibus similes conspiciantur. Præterea quoque sudores nocturni plerisque sub hoc convalescentiæ tempore familiares sunt; qui, si per universum corpus æquales, calidi, & sine virium decremento contingunt, optimum sanitatis proximæ omen sunt. Nonnullis quoque in medio convalescentiæ aliæ extraordinariæ cum emolumento contingunt excretiones, ut narium hæmorrhagiæ, diarrhœæ, vomitus, quæ dum multa noxia vel a priori morbo relicta, vel de novo accumulata eji- ciunt, sanitatis accessum haud raro accele- rant, convalescentiæque alias diu forsan pro- tractæ brevem exitum imponunt.

§. LXXVIII.

3.
Vegeta
nurtio.

Bonæ ciborum digestionis (§. LXXVII.) indivulsus comes cum esse soleat vegeta nutri- tio, ideo & hanc in convalescentiæ incre- mento optime observamus. Exsuccæ scilicet & a morbo collapsæ carnes fiunt turgidio- res, habitus corporis ex molliori, & flacci- do firmior, facies antea livida & pallida co- lorem assumit jucundior, & vivaciorem, genæ, naresque collapsæ expanduntur, artus denique ad consueta exercitia aptiores, ani- musque ad pensitandas res alacrior reddun- tur.

§. LXXIX.

4.
Alia phæ-
nomena.

Frequentissimi quoque sub augmento con- valescentiæ sunt partium genitalium utriusque sexus hominibus, præsertim in matrimonio viventibus, junioribus & laute cibantibus, matutino tempore pruritus, erectiones, no- cturnæ pollutiones, parum tamen molestiæ procreantes, sed animi, corporisque alacri- tatem inferentes; adeoque non tam imbecil- litatis, quam restitutæ bonorum succorum ge- nerationis indices.

§. LXXX.

Incremen-
tum con-
valescen-
tiæ suos
habet gra-
dus.

Quemadmodum vero omnium actionum & virium augmentum successive fit, (§. XXVI.) ita & ipsum convalescentiæ incre- mentum suos gradus habere manifestum est. Quare contradictorium non est, hominem in statu incrementis convalescentiæ jam esse, & tamen insigni partium quarundam imbe- cillitate, & functionum nonnullarum aliquo dissensu laborare.

§. LXXXI.

Perfectio
finis con-
val. quan-
do consti-
tuenda.

Quodsi convalescentiæ superatus terminus cum ipsa sanitate idem est, (§. XLIX.) facile apparet tamdiu durare convalescentiæ incrementum, donec pristino vigoris gradui singulæ actiones hominis respondent. Quan- do igitur omnibus ante morbum consuetis

muniis animus, corporisque partes sufficiunt, pulsus & actiones reliquæ vitales & anima- les, ingestio quoque, digestio, & egestio cum naturali suo statu consentiunt, tunc ho- minem ex ægro in sanum mutatum, & con- valescentiæ tempora absoluta esse recte judi- camus. (per §. III.)

§. LXXXII.

Multi sunt morbi, qui nulla omnino arte sanari possunt, præsertim, si homines a na- tura, aut per ætatem imbecilles, senes, pue- ros, foeminas sensibilibus constitutionis inva- dant, aut ipse eorum status incongrua me- dendi methodo perturbetur. Conf. STAHLII *Diff. de sanitatis restitutione in integrum*. Hinc fit, ut multi perpetuo maneant con- valescentes, a sanitatis perfectione remoti, aut valetudinarii, imo aliqui pejores fiant corpore, quam antea fuerunt; quod patet exemplo hydropicorum, hypochondriaco- rum, ac hysteriarum nonnullarum foemina- rum: quorsum & pertinent exempla homi- num, quibus post morbos tota corporis com- pages imminuta, collapsaque, ossa mollia, & medullæ expertia fuerunt, atque manse- runt, qui statura breviores facti sunt, qua- lia ex *Acad. Reg. scient. hist. & FERNELIO de abditiis rerum causis lib. II. cap. IX. pag. 121. Excell. D. D. ADOLPHI in diff. de convalescentiæ statu p. 8. commemorat.*

In multis
morbis
perfecta
conval.
impossibi-
lis.

§. LXXXIII.

E contra non paucis morborum impetibus tam salutare sunt, ut post convalescentiam, majorem sanitatis gradum adipiscantur, quam quo antea potiti fuerunt. Ita pueros, & puellas atrophiam laborantes, imo adultiores cachecticos post perpeffas variolas, febres, scabiem &c. non modo vegetiores sibi ipsis factos esse, sed & miranda corporis in lati- tudinem ac longitudinem sumfisse incremen- ta, maritos impotentes ad præstanda conju- gibus officia aptiores, & foeminas steriles foe-undas esse redditas, frequentissimo observa- tionum suffragio confirmatur. Unde ortum videtur proverbium: quod senes a morbo convalescentes, juvenescant. conf. ALBERTI *diff. de morborum salubritate*.

Aliquipoft
morbos
funt sa-
niores.

§. LXXXIV.

Perlustravimus itaque convalescentiæ, quem dicunt, status indolem, temporum succes- sum, & signa, quibus hæc a se invicem di- stinguuntur, singula pro virili exposuimus. (§. XL. LXXXIII.) Quibus rite perpensis nemini jam obscurum fore arbitror, quod convalescentiæ status utique pro morbofo sit declarandus, & ideo convalescentes, ante- quam cum sanitate in plenariam gratiam re- dierint, inter ægrotorum classes summo ju- re sint referendi: quippe sub statu convalef- centiæ plures adhuc functiones a naturali vi- gore dissentire, quod morbi essentielle est, (§. XII.) ex signis supra adductis, (§. LIII. LIV. LXXX.) satis luculenter apparet.

Convalef-
centes per-
tinent ad
ægros.

§. LXXXV.

Eo autem magis miror fuisse tam inter an- tiquos, quam recentiores non incelebris no- minis Medicos, qui statum convalescentiæ ad morbofum, aut sanum referre metuentes, eum

Quod ul-
terius de-
monstra-
tur.

eum ex utroque compositum, adeoque neutrum, medium, aut mixtum, denominandum esse censuerunt; id quod ex crepusculi tempore, velut inter diem & noctem medio, seu neutro, aliisque, nescio quibus, similibus probare annisi sunt. Enim vero præter axioma Philosophorum, quod similia nullam omnino probandi habeant facultatem, & quod tertium comparationis inter crepusculum, & statum convalescentiæ maxime deficiat; hoc me tueri maxime videtur, quod morbus ac sanitas humani corporis sint status sibi e contrario oppositi, (§. XII.) adeoque eodem tempore in uno eodemque individuo ambo persistere nullo modo possint. Homo itaque est vel in statu sano, vel morbofo: ad alterutrum itaque eorum pertinebit status convalescentiæ; atqui ad sanitatem referri non potest, (§. LXXXIV.) ergo ad morbofum, seu præternaturalem statum omnino referendus est. Ergo convalescentes sunt ægris accensendi; atque sic evici, quod contendit §. LXXXIV.

§. LXXXVI.

Signa convalescentiæ differunt pro morbis & subiectis.

Non eadem vero hæc in omnibus morbis & ægotantibus signa dicto ordine (§. XLVI. LXXXIII.) occurrere, sed pro diversa morbi indole h. e. partis læsæ constitutione, læsionisque ipsius gradu, imo causis morbificis, deinde pro differente ægri constitutione, tam naturali, quam per morbum inducta, maxime diversa esse, quisque facile perspicit, cui non ignotum est, pro diverso causarum nexu effectus in rerum natura semper differre debere ac solere. Mihi vero generaliter hic tantum de convalescentiæ statu acturo suffecisse omnino arbitror, potiorum & maxime universalium phænomenorum, quæ a quocunque morbo convalescentibus familiaria sunt, mentionem injecisse.

§. LXXXVII.

Differunt quoque celeritas convalescentiæ.

Neque vero eadem celeritate convalescentiæ periodos omnes ægotantes absolvere, rationi & experientiæ quam maxime consentaneum videtur. Primo quidem certissimum est, omnem convalescentiam niti in dissensu actionum per morbum læsarum imminuto, seu consensu aucto; (§. XXXIV.) hinc virium imminutarum incrementum supponere. Determinatam vero virium imminutionem, ut ad determinatum vigoris gradum redeat, certum & determinatum temporis spatium requirere, nemini dubium erit. Jam vero, cum singuli morbi determinatum virium dissensum involvunt, (§. XIII.) hinc singulos morbos determinato ad convalescentiam tempore opus habere, satis manifestum est.

§. LXXXVIII.

Celeris & tarda convalescentiæ quæ dicatur.

Citissimam dico convalescentiam, cujus inter initium, incrementum, & perfectionem vix notabile temporis spatium intercedit. Hoc autem quo diuturnius est inter singulas convalescentiæ periodos, eo & convalescentiam tardiores esse, quivis perspicit.

§. LXXXIX.

Criteria viri.

Distinguuntur autem tempora convalescentiæ, prout certæ quædam actiones vigoris

sui minora vel majora capiunt incrementa. (§. XL.) Ita si vitalium & animalium functionum consensus quodammodo restituitur tunc initium convalescentiæ constituimus: (§. XLVII. XLVIII.) Cum his autem si naturales functiones ad pristinum vigoris gradum propius accedunt, tunc incrementum convalescentiæ dicimus. (§. LXXV.) ergo, quo longiori tempore, sive quo magis successive actiones vitales, animales, & naturales incrementa capiunt, eo tardior erit convalescentia, & quo minori temporis mensura dictæ actiones ad recuperandum naturalem vigorem opus habent, eo convalescentia erit citior: En igitur criteria celeris & tardæ convalescentiæ!

§. XC.

Enim vero cum impossibile sit, ut omnes ægotantes uno eodemque temporis intervallo convalescentiæ periodos absolvant. (§. LXXXVII.) ideo necesse est apud alios longinquiori, apud alios breviori tempore distinguere initium, incrementum, ac perfectionem convalescentiæ. Certos itaque dari gradus celeritatis & tarditatis convalescentiæ, satis inde manifestum puto. Quo vero fundamento hæc diversitas nitatur, jam dispendiendum est.

Dentur certi celeritatis gradus.

§. XCI.

Fundamentum convalescentiæ in eo positum esse, ut partes, quarum actiones, & per consequens vires læsæ sunt, pristinum virium gradum recipiant, ex superioribus satis liquet. (§. XXXIV. XLI.) Quicquid itaque rationem in se continet, cur vires unius vel plurium partium imminutæ facilius vel difficilius erigantur, & ad naturalem vigoris gradum perducantur, id omne convalescentiam vel citiorem vel tardiores efficere potest. Ejusmodi vero causas varias experientia nobis subministrat.

Fundamentum & cause in genere.

§. XCII.

Primo quidem in genere semper observare licet, partes quo plures & quo digniores sunt morbo affectæ, eo longiori tempore opus esse ad convalescentiam absolvendam. Tardius itaque ab internarum partium, cerebri, cordis, pulmonum, ventriculi, hepatisque &c. vitiis, quam ab externis morbis, nisi hi ipsi ab internarum læsione partium orti fuerint; homines convalescere, inter omnes constat. Breviori quoque temporis spatio particularium (§. XX.) & simplicium quam universalium, & complicatorum morborum declinationem includi, cuivis inde facile est intellectu.

in specie I. Partium affectarum in dolores.

§. XCIII.

Deinde, quo major virium a naturali vigore dissensus, seu, quo gravior morbus est, (§. XXIII.) eo & tardius convalescentiæ periodos absolvi, constans est observatio. Ita quibus ad ultimum fere gradum vitales vires imminutæ, & qui morti proximi visi sunt, longiore ad sanitatis recuperationem tempore uti, quam eos, quibus levior, aut mediocris virium dissensus præsto fuit, nemini ignotum est. Hinc, qui enormibus hæmorrhagiis, diuturnis convulsionibus debilitati, aut quibus

2. Læsionis gradus.

quibus humorum putredinosa corruptione infecta sunt viscera, quales sunt phthisici, hectica incipiente laborantes, aut qui ex alia viscida, salina, scorbutica sanguinis, humorumque impuritate morbos passi sunt, ut sunt lue gallica, scabie, scorbuto, cachexia, & chlorosi infecti, tardissime omnium convalescere, nemini mirum videbitur. Eo quoque longinquiores in declinando moram omnes morbi fervare solent, quo diutius causæ eorum in corpore latere, adeoque vim partium solidarum nimis graviter imminuerunt; quare inveterati, & antiqui morbi omnium tardissime in sanitatem abeunt. Recentiores vero ceteris paribus citius declinationis tempora absolvunt.

§. XCIV.

3. *Dispositio* Tum vero esse inter ipsa hominum ægrotantium individua, ratione tardioris vel celerioris convalescentiæ, insigne discrimen, ex experientia discimus: qua teste unum altero citius vires & robur amissum capeffere, diversosque homines uno eodemque morbo simul correptos diverso ad convalescentiam temporis spatio opus habere, quotidie observamus. Ita, qui tenso corporis habitu, magno fibrarum ac muscutorum elatere, ac magna movendi, ac resistendi potentia instructi sunt, quod genus hominum *robustum* appellare consuevimus, eos si quando morbo, vel gravissimo corripuntur, breviori longe temporis intervallo, quam molliori ac laxiori fibrarum compage præditos, debilesque ad sanitatem redire, constans est experientia. Hinc temperamento, quos provida natura instruxit, cholericis, aut sanguineo-cholericis, cholericis sanguineis, præ phlegmaticis aut phlegmatico-sanguineis, & melancholicis; graciliores a natura præ obesis; vitæ generi duriori adfectos, ut rusticos militesque aut operarios præ mollioribus, ac sensibilibus; ætate juvenes, & viros mediæ ætatis præ senibus & decrepitis; ratione sexus, viros præ foeminis; item eos, qui a sanis parentibus nati, & a gravibus morbis immunes fuerunt, præ imbecilibus, ac valetudinariis; hinc virgines præ matronis crebriori partu aut abortu debilitatis; adolescentes præ maritis; caste & temperanter viventes præ luxuriosis, & libidinosis, perpeffo feliciter morbi statu, facilius ac citius plerumque convalescere, frequentissime videmus.

§. XCV.

Non itaque pro morborum solum diversitate, sed & pro hominum diversa constitutione tardioris vel citioris esse convalescentiam, certissimum est axioma. (§. XCII. XCIII. XCIV.)

§. XCVI.

Quemadmodum vero naturalem corporis dispositionem per varias non modo ætatis periodos, sed & æris ambientis, victus, & vitæ otiosæ aut laboriosæ, rationem multum immutari per experientiam scimus; ita eadem magistra sæpius contingere observamus, quod idem morbus eundem hominem diverso tempore affligens, nunc longius, nunc brevius declinationis spatium requirat. Primo quidem in juvenili ætate facilius hominem,

ac citius morbum superare, quam si eodem morbo in senectute corripatur, partim ex ante dictis (§. XCIV.) partim per frequentissimas observationes constat. Deinde vero, cum singulis ætatum periodis certæ morborum species familiares esse observantur; (uti infantes ad capitis, juvenes & viri ad pectoris & abdominis morbos procliviores existunt,) tum morbos, si ætati ægrotantis conveniunt, facilius ac citius, quam incongruos sanari, communis observatorum est consensus. Puerum scilicet cephalalgias, & capitis defluxiones, convulsiones, quoque & febres facilius tolerare, & citius vincere, quam si iisdem senex factus corripatur, nemini hodie ignotum est. conf. §. XXV.

§. XCVII.

Porro pro æris, cœlique diversa constitutione, morborum declinationis, & convalescentiæ temporum successum multum differre discamus ex observatione Illustr. HOFFMANNI in *Med. system. tom. II. p. 415.* sequenti modo proposita: *Ego sæpius apud ægrotantes observavi, ubi morbus in declinatione fuit, eos non potuisse placidum somnum, appetentiam, & vigorem in animo, & corpore recuperare sub argenti vivi humiliore statu in barometro; cum primum vero loca altiora petiit mercurius, mox languor decessit, & vires incrementum caperunt.* Quod & præsertim de iis affirmat, qui ab arthritide, podagra, febribus, aliisque gravibus & diuturnis morbis convalescunt, in *opuscul. phys. med. Ulmæ impressis tom. I. tract. de ventis p. 78. & 80.* Ascensus autem Mercurii in barometro, cur aerem serenioris, purioris ac magis elasticum, docentibus naturæ scrutatoribus, testetur; hinc sub serena, ærisque pura constitutione citiorem esse convalescentiam, quam sub nebuloso turbido, pluvioque cœlo, quod lapsu mercurii indicatur, nemini jam dubium videbitur. Quo gravior itaque, & minus elasticus est aer, eo tardius ac difficilius convalescunt ægri, quo magis elasticus, levis ac purior aer, eo citius ac facilius.

4. *Aeris constitutionis.*

Pro gravitate & elasticitate ejus.

§. XCVIII.

Frigido existente aëre, temperato tamen, aut mediocriter calido homines optime & animo & corpore se habere, ipsosque ægros alacriores, tranquilliores, & robustiores fieri, e contra frigido-humidum, aut ex calido & humido mixtum aërem, & animi & corporis vires ægrotorum imminuere, appetitum prosterne, pulsum ac omnes denique motus languidiores reddere, adeoque convalescentiam mirum quantum protrahere perpetua est observatio: unde GALENUS *lib. I. de temperamentis, omnium æris ambientis temperamentorum pessimum id esse dixit, quod humidum est, & calidum.* Phthisicos autem, & pectore laborantes, item atroci cephalalgia, odontalgia, & podagra, aliisque sævis doloribus affictos, nec non hectica febre detentos aut sanguinis violento sputo obnoxios sub nubilo pluvioso, & humido cœlo melius degere, quam sicco, & frigido existente aëre testatur HOFFMANNUS *opuscul. phys. med. pag. 79.*

Pro frigore & caloris gradu; ita sita & humiditate.

§. XCIX.

§. XCIX.

Pro ventorum indole.

Dictæ vero aëris qualitates, cum partim in ventorum diversa indole, partim in differente solis versus hanc, vel illam regionem situ, & radiis ejus magis vel minus oblique in illam emissis, rationem sui habeant sufficientem; hinc & pro ventorum & solis situs varietate convalescentiæ temporum successum variare, omnes attenti practici observant. Primo igitur; quod ventos attinet, qui ex oriente, & septentrionali plaga spirant, aërem sicciorem & frigidiorē, austrinos vero seu meridionales, & occidentales humidum eum ac calidiorē reddere; proinde priores corporis robur augere, posteriores fibras relaxare, & imminuto partium elatere ipsam vim motricem imminuere, peritissimi physici contestantur. Quodsi itaque aër humidus convalescentibus plerisque adversus est, temperate autem frigidus, aut calidus optime iis convenit (§. XCVIII.) sane apparet ventos austrinos & occidentales ad protrahendam convalescentiam, meridionales vero, & septentrionales ad eandem accelerandam esse aptissimos. Quod & differte monet VERULAMIUS, *Borea* inquit *flante, magis alacres, sani, & avidiores ciborum evadimus*: & HIPPOCRATES sat multis scriptorum locis confirmat.

§. C.

Pro tempestatum ratione.

Quantum vero ad accelerandam convalescentiam serenus, calidus, aut frigidus etiam aër, & venti talibus aërem qualitatibus imbuentes, si per insigne aliquod tempus absque insigni mutatione perseveraverint, valere solent; (§. XCVIII. XCIX.) tantum frequentes, & repentinas ventorum, & inde ortas aëris calidi in frigidum, hujusque in calidum, sicci quoque in humidum, & vice versa mutationes convalescentibus obesse observamus: quippe sub hac tempestatum varietate, omnes functiones in sanis, multo magis in ægrotis a vigore suo dejici; & adeo convalescentiam admodum retardari constans est experientia; quam unico confirmare liceat HIPPOCRATIS testimonio *sect. II. aphorism. 8. proposito. In constantibus temporibus tempestive, si tempestiva reddantur, morbi constantes, & judicatu facillimi sunt; in inconstantibus autem inconstantes, & qui difficulter judicantur.*

§. CI.

Pro anni temporibus.

In solis versus terram diverso situ fundantur divisiones temporum, quibus annum distinguimus, æstatis nempe, hyemis, veris, & autumnii. Æstate vero, ob aërem serenum, ventorum & tempestatis constantiam; morbos citius finiri, hyeme vero, ob perpetuas tempestatum, ventorum mutationes, diutius immorari, experientia indubium facit. Qua etiam teste, morbos, qui hyeme aut autumnio invaserunt, aut per hyemem cedere nolunt, ingruente veris initio, sponte sæpe abire, vernaes autem æstate propius accedente, citius solvi pridem inter Medicos compertum est. Rationem autem experientiae hujus ex immutato terræ nostræ versus solem situ, & inde emendato aëris statu deducendam esse nemo dubitabit. Atque hinc

etiam concipi potest cur circa æquinoctia & solstitia tantæ ægrorum usu veniant mutationes; quippe plerisque chronicos & pertinaces morbos; salvis saltem ægroti visceribus circa æquinoctia citissime ad exitum perducere, res inter Medicos notissima est. Quod ipse de quartanis cum malo hypochondriaco junctis, tussi phthifica, febribus hecticoideis, sæpius observavi.

§. CII.

In diverso solis versus terræ ambitum situ, aut potius terræ nostræ partium a sole majori vel minori distantia, *climatum* quoque maxime fundatur *differentia*. Quemadmodum vero pro diverso radiorum solarium versus terram motu plus minus obliquo aëris temperies maxime differt, ita suum cuique climati familiare esse aëris temperamentum, nemo non perspicit. Proinde quoque pro ipsa locorum, ac provinciarum constitutione, fluviorum nempe aut montium abundantia, aërem graviores vel leviores, humidiores vel sicciore esse, inter omnes constat. Jam vero ad protrahendam, aut maturandam morborum declinationē diversam aëris temperiem; multum omnino valere, cum supra jam demonstravimus, §. XCVII. &c. hinc pro diversa climatum, & provinciarum indole, & convalescentiam tardius vel citius absolvi debere, omnibus manifestum est. Quod ipsum diuturna experientia omni dubio liberat. Ita malignos morbos omnes, si quando, quod raro tamen fit; meridionalis plagæ incolæ invadunt, breviores esse, & citius declinare confirmat ALBERTI in *diff. de morborum gradu differenti, pro locorum diversitate*. Idem quoque ex illa observatione discimus, quod pertinacissimi morbi, qui hominem, dum in uno semper loco moratur, semper persequuntur, aut saltem hospitii sui vestigia diu relinquunt, citissime & plenarie tollantur, si aliud ad vivendum clima per aliquod tempus eligatur, ac cælum mutetur. Qua de re legi merentur, itinerariorum scriptores, & peregrinationum commendatores, in primis quoque HOFFMANNUS in *diff. de peregrinationibus sanitatis causa instituendis*.

Pro climatum differentia.

§. CIII.

Pari jure experientia teste referri huc merentur locorum, quibus ægri decumbunt, aut degunt, *differentia*. Quippe quo magis humidum, aut gravem vel impurum aërem continent, eo difficiliorem ægrorum faciunt convalescentiam. Impurum autem sensu medico aërem, cum merito vocat Excell. D. D. & Professor noster *elegantiori æque ac Medica litteratura celeberrimus JO. HENR. SCHULZE patronus & præceptor meus ævum colendus*, qui exhalationes varii generis sulphureas & salinas, sive a fermentescentibus, sive putrescentibus, aut alio modo fortius commotis corporibus prodeuntes in se recepit; Vid. *differt. ejus de rerum non naturalium ad valetud. tuendam recto usu Halæ 1734. editam*. Quare quo propiora sunt mari, aut fluviiis; aut quo idonea magis sunt loca vaporibus e terra ascendentibus, aliisque putridis exhalationibus, excipiendis & conservandis, ut sunt conclavia primæ contignationis, lapideis parietibus, & lithostratis, (quibus tamquam solidioribus

Pro locorum ubi degunt constitutione.

solidioribus corporibus diutius frigus ac humidum, omnesque vapores immorantur) instructa, cloacis, aut stagnis, paludibusque putrescentibus propinqua, arctioris spatii, in quibus tam peregrinæ quam propriæ agri & conversantium exhalationes magis condensantur, item, quæ austris exposita, aut diu clausa, & libero aëris transitu penitus intercepta, eo pejora semper convalescentibus observantur. Quæ exemplis uberrimis ex LANCISII libro de noxiis paludum effluviis confirmare grave non foret, nisi hæc omnibus notissima esse, & erudite quoque in *allegata* Excell. D. D. SCHULZII *diff.* exposita esse scirem.

§. CIV.

E contra ad maturandam convalescentiam non parum potestatis habent conclavia a tetris effluviis remota, suffimigiis sæpe expurgata, spatiosa &c. ligneis parietibus obducta, maxime vero sereni aëris accessui patula, & versus boreales & orientales plagas sita. Quibus confirmandis non alienum mihi videtur LANCISII monitum adducere, quod habet *tract. cit. lib. 1. part. 2. cap. 7. §. 4.* *Laudamus inquit imprimis, ut indigena vel hospes, cum procul ac longe a paludibus ire prohibetur, saltem in eo aut oppido, aut villa, in qua degit, ædes mutet, vel in ædibus cubiculum, unde de noxiis effluviis, quam minimum teneatur haurire; potissimum vero caveat, ne janua illius domus, quam incolit, neve ejusdem conclavis fenestræ recta palustrem sinum spectent. Amplissimum necessitatis, ac bonitatis hujusce præsidii argumentum olim nobis præbuit post Hippocratem M. VARRO de re rust. l. i. cap. 5. qui cum Corcyrae esset exercitus, ac classes & omnes domus repletæ essent agrotis ac funeribus, immisso fenestris novis aquilone & obstructis pestilentibus, januaque permutata, ceteraque ejus generis diligentia suos comites ac familiam incolumes reduxit, &c.*

§. CV.

Sæpius quoque in convalescentibus observavi, eos a morbo licet diu liberatos ad pristinum sanitatis gradum redire tamen prius non potuisse, quam relicto, in quo ægrota-runt, conclavi, libero aëri sensim paulatimque se exponere cœperunt. Cujus quidem phænomeni nullam aliam rationem video, nisi quod copiosis impuris a morbo corpore exhalationibus aggravatus aër excretiones, maxime transpirationem, impediendo & liberum sanguinis circuitum retardando solidorum elaterem magis minuat, quam erigat, adeoque viribus recuperandis magis obsit, quam proficiat.

§. CVI.

§. *viæ ratio.* Aëre non minorem vim ad convalescentiam vel accelerandam, vel remorandam exserit, *viæ* ratio, per quem alimentorum tam potulentorum, quam solidorum, quos ciborum nomine complectimur, usum intelligimus. Cibo & potu, tanquam materia, ex qua chylus, sanguis, omnes denique succi, & inde vires per morbum amissæ potissimum reparantur, utique opus esse convalescentibus nemo non perspicit. At diversus iisdem uten-

di modus, diversos in convalescentibus exserit effectus. Sunt, qui in alimentis assu-mendis nimis timidi, ac religiosi, aut egestate vel avaritia, vel quacunque demum causa coacti, cibos optime nutrientes, & suo statui optime congruos vel omnino respuunt, vel parca admodum manu eos porrigi sibi patiuntur. His vero ob defectum sufficientis alimenti vires admodum lento gradu augeri, ac convalescentiam admodum tardam esse, quis est, quin concipiat?

§. CVII.

Sunt etiam, qui vel egregio post morbum sæpe immoderato appetitu (§. LXXVIII.) vel celerioris refectionis persuasione decepti, majorem ciborum ac potuum copiam avidius ingerunt, quam imbecillis adhuc ventriculus ferre ac digerere potest. Hos autem, si non in pejus malum incidunt, saltem convalescentiæ suæ tempora mirum prolongare experientia docet. Videas enim ejusmodi intemperantes homines, vel in incremento convalescentiæ constitutos, nunc de capitis gravitate, aut dolore, nunc de somni defectu, & gravibus insomniis, pectoris anxietate, lassitudine, animo inquieto, & tristi, nunc de imi ventris inflatione, ructibus, alvi obstipatione, aliisque incommodis quotidie lamentari, & Medici infantis opem perpetuis querelis fatigare.

§. CVIII.

Præsertim familiare hoc iis est, qui delicato victui antea adsueta, non unico a Medico commendato ferculo contenti, ad plurimum, ut vulgus inquit, generosorum alimentorum miscelam stomacho intrudendam, vel spontaneo palati stimulo, vel amicorum, aut matrum uxorumque delinimentis atque adhortationibus coguntur. Memorabile hac de re est exemplum ab Excell. D. D. & Prof. SCHULZIO in *diff. de refectione celeri per alimenta liquida* Altorffii edita, allegatum, de duodecim adolescentibus, qui immoderato decocti succoladæ, optimi alias alimenti, usu in febres ardentes gravissimas sunt coniecti. Hæc vero, si sanis accidunt, quæ non convalescentibus tanquam agrotis evenient? Vina diversi generis & variæ potuum spirituosorum species, quantum immoderate utentibus noceant, præsertim, si acida dulcibus, lacticiis, fermentescentibus rebus, ut cerevisiis feculentis superingerantur, experientia loquitur.

§. CIX.

Retardat itaque convalescentiam alimentorum non modo inopia (§. CVI.) sed & nimia copia, (§. CVII.) maxime vero rerum incongruarum (§. CVIII.) immoderatus usus. Contra accommodatam ægotantis statui ac viribus victus rationem, convalescentiam admodum promoveri, tam ex adductis, quam (§. CVI.) luculentissime apparet.

§. CX.

Ab alimentis assumtis, ut vires corpori ægroto restituantur, opus est, ut quædam eorum optimæ partes in chylum & sanguinem

Excretorum & ventorum proportionem

nem mutatae partibus solidis successive apponantur; aliae vero inutiles e corpore per varias excretionibus destinatas aperturas, maxime alvum, urethram, & cutis poros ejiciantur. (*per præcept. physiol.*) His enim diutius & majori in copia retentis, vires vitales, animales, ac naturales successive imminuuntur, & nova ad morbos dispositio corpori inducitur. (*per præcepta pathol.*) Idem vero contingere, si cum inutilibus, boni ac laudabiles succi nimis copiose & frequenter ejiciuntur, exemplo eorum, qui sub convalescentia gravibus hæmorrhagiis, ut mensium, hæmorrhoidumque immoderato fluxu, diarrhoeis &c. corripuntur, corpus ad multos; & diuturnos sudores cogunt, aut semen vel inviti vel ex consilio frequentius profundunt, satis clare cognoscitur. Excreta itaque, si ad retenta ita se habeant, uti convalescentium status, & assumptorum quantitas requirit; tunc citius respective convalescentiae tempora absolvi, necesse est.

§. CXI.

Alimenta humoribus nostri corporis ut assimilantur, & inde vires facilius erigantur, multum omnino quietis & motus, somni & vigiliarum legitimas alternationes conferre; ex hygieine satis notum est. Pro differenti itaque horum inter se proportionem, & convalescentiam citiorem vel tardiorem esse debere, rationi admodum est congruum. (*per §. XCI.*)

§. CXII.

7. Somni & quietis proportio, Quietem, & somnum quidem optimæ confortantis medicinæ vices in convalescentibus gerere, & omnibus animi, corporisque functionibus singularem alacritatem conciliare, nemini inter Medicos ignotum est. Qui vero otiosæ vitæ deliciis nimium capti, integros dies jacendo sedendoque consumunt, aut somno plurimam noctis atque diei partem tribuunt, eos perpetuam corporis gravitatem, ad suscipiendos labores impotentiam, aut post susceptos eos summam lassitudinem, appetitus defectum, conqueri, corporis habitum cachecticum adipisci, atque intellectus acumen successive perdere, constanter observamus. Quæ phaenomena singula cum ratione conciliare, nemini difficile erit, qui cognoverit, corpore extra motum posito, & sub somno, elaterem omnium vasorum, ac partium remitti, hinc admodum tardum esse sanguinis, omniumque humorum per vasa progressum; adeoque fieri non posse, ut vires, quæ celeriore & fortiore humorum impetum supponunt, erigantur, ac functiones ad naturalem vigoris gradum reducantur. Quietis, & somni itaque immoderatum usum perficiendæ convalescentiae quam maxime obesse, quilibet facile concedit.

§. CXIII.

nec non motus & vigiliarum. Tardissime autem vires recuperant; qui diuturnis vigiliis, gravioribus curis; ac meditationibus; aut fortioribus corporis exercitiis; multam illius temporis, quod somno & quieti dare oportebat, partem, spontanea vel diligentia, vel ardua necessitatis vi coacti, statim a morbo consumere non verentur. Præter enim digestionis, & excretionum utilissimam.

finarum vitia, & hypochondriorum spasmodicas tensiones, facillime eos in capitis gravitatem, oculorum imbecillitatem, visus obscuraciones, artuum tremores, aliaque pathemata incurrere, corpore quoque emaciari, animi tandem viribus imbecilliores reddi, frequentius ipse observavi.

§. CXIV.

Atque hæc fere singula nuperrimo generosissimi juvenis exemplo comprobata habeo. Erat nempe Vir juvenis 19. annorum, robusta ac vegeta corporis constitutione, & temperamento vere generoso & optimo, cholérico sanguineo præditus, qui ab ardente vehementissima febre cum gravi diarrhoea juncta liberatus, cum lecto se amplius opus non habere crederet, incoercibili studiorum tandem omnissorum desiderio eo deducebatur, ut plures integras horas, vespertino quoque tempore, legendo, scribendo, vel meditando ad candelæ vel lampadis flammam consumeret, eo tamen eventu, ut non modo insignem memoriæ imbecillitatem, sed & oculorum caliginem, vertigines crebriores, pedumque sub ambulando, manuum vero sub scribendo perpetuum tremorem diu admodum post ipsum morbum experiretur: a quibus liberari non prius potuit, quam meo consilio persuasus, animum servare compositum, & somno, ac quieti paulo diutius indulgere, assuesceret. En! itaque somni, en quietis; en vigiliarum, & motus corporis in acceleranda vel protrahenda convalescentia diversam efficaciam!

§. CXV.

Rectissime itaque divus HIPPOCRATES judicavit lib. II. aphor. 3. quod somnus; & vigiliae utraque si modum exceßerint, malum sint. A damno autem excessuum in hisce rebus ad utilitatem usus legitimi certissime concludere licebit. Convenientes itaque viribus convalescentium, somni & vigiliarum, motus & quietis alternationes, optimo his esse præsidio nemo dubitabit.

§. CXVI.

Vehementes animi commotiones, quas Pathemata vocant, sapius mira convalescentibus commoda afferre, supra (§. XXXVI.) declarandi occasio fuit. Easdem autem frequentius nocere, quam juvare, certa est experientia. Iracundia quidem vires ad tempus manifeste intendi, & sanguinis motum ad sensum velociorem fieri, mox vero imminuto solidorum elatere, tardum & inaequalem humorum motum subsequi, comperitum est. Mœstitia autem, & terrore vim partium imminui, & ad tardissimum progressum humores disponi, exemplis opus non est. Hinc ægros jam in incremento convalescentiae constitutos, ira, vel mœstitia, aut terrore, vel alia gravi mentis turba correptos, mox languore affici, appetitum perdere, & vel in priorem, vel graviolem novum morbum delabi, frequentissime observamus. Gaudium vero mediocritatis limitibus circumscriptum, & animum hilarem, tranquillum mire convalescentium viribus recuperandis favere, in vulgus notum est. Cum ergo & animi affectus vim habeant virium consensum

vel minuendi, vel augendi; hinc eos quoque ad convalescentiam citiorem vel tardiorrem efficiendam (§. XCI.) plurimum valere, jure meritoque contendo.

§. CXVII.

9. *Remedio-
rum usus.* Dantur in rerum natura corpora, quæ vel viribus partium corporis humani, aut alienis viribus a corporis vi diversis adjuta, sanitatem restituendi potentia pollent (per exper.) Atque hæc generali termino REMEDIA appellamus.

§. CXVIII.

*quæ sunt
l. pharma-
ceutica l.
chirurgi-
ca.* Remedia, quæ solis corporis humani viribus adjuta, sanitatem restituendi potentia instructa sunt, dicuntur *pharmaceutica*, seu etiam *medicamenta*. Ea autem, quæ alienis viribus, a corporis vi diversis, adjuta hoc præstant, voco *chirurgica*, consentiente *Excell. D. D. JOH. FRID. SCHREIBERO in elementis physiol.* §. 196. & 275.

§. CXIX.

*Neglectus
eorum re-
tardat
convales-
centiam.* Inesse itaque remediis tam pharmaceuticis, quam chirurgicis facultatem dissentientes convalescentium vires, facilius ad consensum redigendi, adeoque convalescentiam accelerandi (§. XCI.) satis inde (§. CXVIII.) manifestum videtur, & experientiis quotidianis extra dubium ponitur. Vice versa neglectum congruorum remediorum convalescentiam retardare posse rationi (§. XCI.) & experientiæ est congruum. Exemplo sint vina generosa, optimæque indolis, quæ recte adhibita, præstantissimum ægrotantium confortans esse nemo negaverit. Pauperiores vero vini & aliorum pretiosorum confortantium usu destitutos, ideo sæpe ditioribus, (recte medicina utentibus) diutius & tardius vires ac sanitatem recuperare in dies videmus. Balnea, frictiones, venæsectionem, scarificationes, fonticulos, multum ad sanitatem integram restituendam valere; omissa vero hæc justo tempore, ipsos convalescentes, vel novis damnis mulctare, vel a virium saltem celeriori incremento nonnunquam remove, innumeris exemplis edocemur.

§. CXX.

*Nec non
incon-
gruus
usus.* Quemadmodum vero præcipui utriusque generis remediorum (§. CXVIII.) effectus a virium corporis ad vim remedii relatione, maxime pendent, (§. CXVII.) ita pro diversa ægroti conditione optima remedia convalescentibus obesse frequentius observamus. Exemplo sint suaveolentia, ut ambra, moschus, aut ex aliis fragrantissimis corporibus paratæ aquæ, olea, spiritus, aut balsama, quæ vocant vitæ; quibus hos summo cum solatio, interne & externe uti, alios, sensibiliores maxime, foeminas, præsertim hystericas gravissime lædi, atque ad animi deliquia, insultus epilepticos disponi, erudite monstravit *Excell. D. D. FRID. HOFFMANNUS junior, Consiliarius aulicus & Professor Med. in Fridericiana ordinarius Fautor meus estimatissimus* in inaugurali sua diss. de *Malo hysterico* conscripta. Ceterum sanguinis missione, balnea, aliaque chirurgica remedia (§. CXVIII.)

intempestive adhibita, quanto & ipsos convalescentes damno afficiant, exemplis confirmare opus non duco, quia satis tristitia ab antiquis temporibus consignata, hodie quoque cuivis obversantur.

§. CXXI.

Aërem itaque, cibum & potum, excreta, & retenta, somnum & vigilias, motum & quietem, animi pathemata (quæ *rerum sex non naturalium* titulo in medicina celebrantur) nec non ipsa remedia tam pharmaceutica, quam chirurgica, ad convalescentiæ tempora citius tardiusve absolvenda multum habere facultatis, satis luculenter ex demonstratis (§. XCVII - CXX.) apparere arbitror. Multa quidem & exemplis & rationibus adductis, ab instituto minus aliena adjici potuissent; Sed sufficit mihi hic proposuisse principia, ex quibus legitimum convalescentium regimen derivandum est, quod, Deo volente, alterius dissertationis argumentum erit.

§. CXXII.

Sæpe fit, ut convalescentiæ status prorsus interrumpatur, dum vel morbus jam declinans de novo initium capit, quod *Recidivam* Medici appellant, vel *novus* a prioris genio maxime diversus morbus oritur. Præ ceteris vero frequentius redire observantur febres tam intermittentes, quam acutæ, hæmorrhagiæ præsertim uterinæ, inflammationes, & erysipelas, pleuritis, spasmi colici, convulsivi, catharri & rheumatismi, hydrops, &c. testibus *Ill. HOFFMANNO med. system. tom. 3. edit. noviss. cap. de generatione morborum ex morbis pag. 236. & Ill. ALBERTI in diss. de recidiva morborum.*

§. CXXIII.

Eo autem procliviores esse convalescentes ad recidivas, vel novos morbos suscipiendos, quo minori vel a natura, vel post morbum virium gaudent robore, nemo dubitabit. (§. XIX.) Infantes itaque, ac senes præ adultis, foeminas virginesque præ viris, infirmos præ robustis, obesos præ macilentis facilius his posse corripui, collato (§. XCIV.) facile intelligitur. Similiter sub initio convalescentiæ facilius quam sub incremento ejusdem hæc accidere posse, ex si hujus initio (& §. LIII. LIV.) manifestum est.

§. CXXIV.

Præterea ex eodem argumento consequitur, quod morbi, qui per essentiam suam elaterem partium solidarum ad summum gradum imminuunt, facilius cæteris redeant, & ad novos morbos etiam ægros maxime disponant. Scilicet elatere imminuto vis ac resistentia vasorum & canalium omnium imminuitur. Hinc sanguis tarde progreditur, facile stagnat, humorum fiunt decubitus, infarctus, & hinc infinita morborum series enasci potest. Unde ratio apparet, cur memorati (in §. CXXII.) morbi præ cæteris facilius redire soleant.

§. CXXV.

*Ergo res
n. nat. &
remedia
vim ha-
bent pro
vario usu
acceleran-
di l. remo-
randi con-
valesc.*

*Convales-
centia
sæpe inter-
rumpitur
per recidi-
vas &
novos
morbos.*

*Ad quos
convales-
centes pro-
ni sunt.*

§. CXXV.

Causæ
sunt l. re-
liquæ ma-
terię mor-
bificæ.

Præprimis vero ad recidivas, vel alios morbos (§. CXXII.) convalescentes disponunt reliquæ humorum impurorum, acrium, ac solidis partibus firmissime impactorum, qui vel morbum sub initio produxerunt, vel sub eodem generati fuerunt. Quod HIPPOCRATES lib. de morbis II. §. 37. ubi de febre agit, his verbis confirmat: *Revertitur aliquando morbus, si impurgatus permanferit; & sect. I. aphorif. 12. quæ relinquuntur in morbis, post judicationem recidivas facere solent.* Nam elatere fibrarum imminuto, parva humoris noxii quantitate id effici posse, quod magna antea moles effecit, vero admodum est simile. Hinc convalescentes, exigua adhuc in corpore latitante peccante materia, quando ad pristinum locum ea defertur, ad recidivas disponi; eadem aut alius generis materia autem ad alias partes advecta, novos morbos incurrere debere manifestum est. Atque hæc est ratio, quod veteres omnibus iis convalescentibus recidivam prænuntiarunt, quibus extra diem decretorium excretiones fieri annotabant, quippe solis diebus criticis morbificam materiam rite ad exitum præparatam esse autumantes. (§. LVIII.) Similiter excretiones morbi aut ægri naturæ minus congruas, tanquam morbi causam non tollentes, ad recidivas, facile disponere, jure meritoque affirmat ALPINUS tr. cit. Lib. VI. cap. 10. p. 386.

§. CXXVI.

Enim vero ponamus nihil omnino a pristino morbo materiæ peccantis in corpore relictum esse; certissimum tamen est, convalescentes ut debiles ad suscipiendas ejusmodi materias morbificas admodum esse idoneos. (§. CXXIII.) Hinc quicquid ex rebus non naturalibus, aliisque in corpus agendi vi præditis, vigorem virium recuperatum de novo imminuere, & vel solida ipsa, vel fluida, ad præternaturales motus disponere potest, id omne recidivarum, aut aliorum morborum in convalescentibus causa erit. (per §. XIX.)

§. CXXVII.

vel aëris
& victus
incongrua
ratio.

Ex infinita autem exemplorum multitudine, ut pauca adducamus; aërem frigidiorum, humidum, nebulosum, qualis vespertino tempore est, tempestates inconstantes, ventos austrinos, ad febres intermittentes, & continuas, purpuram, diarrhœas, peripneumonias, catharros, omnes denique morbos qui a prohibito transpirationis successu originem trahunt revocandos, & de novo excitandos plurimum valere, ipsi vulgo est notissimum. Diserte hoc innuit HIPPOCRATES lib. de humoribus §. 7. text. 17. *Tempora, inquit, etiam faciunt recidivas.* Alimento- rum incongruorum immoderatus usus, quanto convalescentes damno afficiat, præter exempla supra (§. CVII. &c.) commemorata hoc loco confirmabit observatio III. HOFFMANNI in med. system. tom. IV. part. I. pag. 107. proposita de adolescente, qui febre synocha liberatus, copioso dulcium, lacticiniorum, ac vini hungarici usu, septimo convalescentiæ die, lethalem morbi recidivam sibi con-

Frid. Hoffmanni Oper. Supplem. II.

traxit: cui analogæ p. 108. *ibid. in epicrisi* adjicitur historia de synochæ recidiva lethali per carnis suillæ, & placentarum avidiorem ingestionem excitata. Et columbarum esu febres facillime revocari annotavit PELARG. in *observationibus*, quibus titulum fecit *Medicinischer Jahrgang. anno. I. p. 110. & anno II. p. 193.* Ipse quoque frequentioribus exemplis compertum habeo, ad tertianas & quartanas revocandas, placentis, & carniū, aut farciminum copiosa comestione nihil esse aptius atque efficacius.

§. CXXVIII.

Somnum, vigilias, motum & quietem justam temporis mensuram superantes, aut in defectu peccantes, uti ad protrahendam convalescentiam, & novos morbos inferendos, (§. CXII-CXV.) ita quoque ad recidivas inferendas, concurrentibus maxime aliis in victu & diætâ erroribus, plurimum valere nullum dubium est. Ita a decubitu, aut diutiori commoratione in loci humidis, crasso ac vappido aëre repletis, emphysemata nasci, pluribus exemplis confirmat Excell. D. D. SCHULZIUS in *diff. de Emphysemate*. Eadem ratione febres frequentius revocari experientia loquitur. Et eos, qui vita sedentaria, aut otio & somno liberalius utuntur, ut plurimum hepatis, & renum vitia, hinc calculi dolores, & hypochondriaca pathemata incurrere, aut si ab iis liberati fuerint, facillime in pristinas afflictiones relabi, plurimarum illustrum foeminarum, & eruditorum quoque exempla contestantur. Recenti quoque memoria teneo notabilem casum de juvene generosissimo febre acuta, & creberrimis dejectionibus adeo debilitato, ut extra lectum vix per horæ quadrantem commorari posset, qui primis convalescentiæ diebus eo vires intendit, ut mane aliquo per tres integras horas in museo erectus sederet, & libros consarcinando, nec non ambulando, & vestimenta induendo, animum corpusque diu defatigaret; quo factum est, ut tandem sudore frigidissimo perfusus, immobilis ac marmore frigidior in sellam recideret, pulsu existente celerrimo & inæquali, & epilepticorum simili: quibus omnibus per lecti calorem liberatus, novum febris ardentis insultum experiebatur, a quo postea ægre convaluit. Immoderatio autem corporis motus quantum ad revocandos morbos præsertim spasmodicos valeat, docet historia cephalææ cum immoderato hæmorrhoidum fluxu sæpius repetentis nuperrime inaugurali dissertatione a D. D. CHRIST. CAROLO MULLERO explicata & publicæ disquisitioni sub Præsidio III. HOFFMANNI exposita: in qua memorabile maxime hoc est, quod illustris matrona a mensium parco fluxu hysterica facta, sub diuturniore vectura primo enormi intestini recti hæmorrhagia cum immani cephalæa conjuncta infestata fuerit, & singulis tribus annis post a suscepto novo longiori itinere in pristinum duplex acerbissimum malum fuerit conjuncta.

§. CXXIX.

Sudoris aut alvinarum excretionum suppressiones, febres, pathemata hypochondriaca, & plurimos capitis, pectorisque morbos & revocare, & de novo facere in dies ex-

It. Somni
quietis, vi-
gil. & mo-
tus parci-
or
aut immo-
deratio-
nis
usus.

It. Excre-
ta parci-
ora l. copio-
ra l. copia
re-
tentis.

perimur. Ita malum hyſtericum a menſtrui fluxus ſuppreſſione, vel imminutione facillime reverti, aut in alios morbos chronicos degenerare docuit Excell. D. D. FR. HOFFMANNUS in *diff. de malo hyſterico*. Sanguinis autem, per nares, aut uterum, aut vaſa hæmorrhoidalia, liquoris etiam ſeminalis frequentes profuſiones, ob virium, quam inferunt, debilitatem, plurimis morbis, & recidivis ſæpe anſam dediffe, obſervatorum plurimi teſtantur. Conf. HOFFMANNI *Med. ſyſtem. tom. IV. part. II. Sect. I. de hæmorrhagiis*, & in *tom. III. cap. 8. de damnis ex cohibita cuticulari excretionē*, it. *de morborum ex morbis generatione*.

§. CXXX.

Animi affectus.

Iracundiam febribus bilioſis, diarrhœæ, vomitibusque enormibus, epilepſiis &c. anſam dare, & declinantes eoſdem morbos ſæpe de novo excitare, cuius patet. Ipſe quoque nemini ſceminæ, in hac urbe commorantis ab hydropē cum tympanitide juncta fere liberatæ, quam ira immoderatio in priſtinum malum poſtea inſanabile conjecit. Terrore non minus quam exorbitantis amoris ac deſiderii vehementia, paſſiones hyſtericas convulſivas in diſpoſitis facile excitari & aliis graviffimis pathematibus, ut aphoniæ, cordis palpitationibus &c. jungi exemplis confirmavit *Eruditiffimus junior* HOFFMANNUS in *diff. ſæpius cit. de malo hyſt.* Similia de mœrore diuturno aut inopinato, deſideriis vehentiſſimis paſſim in obſervatorum ſcriptis legere licet.

§. CXXXI.

Remediorum neglectus l. incongruus uſus.

Remediorum ſalubrium tam neglectum, quam uſum incongruum, vires corporis humani a recuperando vigoris incremento ſæpius arcere, ſupra exemplis confirmatum eſt, (§. CXIX. CXX.) Enimvero exinde, & novos morbos, & recidivas ortum trahere, confirmant exempla puerperarum, & a variolis, morbillis, febribus continuis malignis convaleſcentium, quibus neglecta purgatione purpuram familiarem eſſe docet HOFFMANNI *ſyſtem. tom. III.* Sudorifera calidiora, ut eſſentias alexipharmacas hodie ubique celebratiſſimas, purpuram ſæpe abactam revocare, multis triſtibus exemplis confirmare poſſem, niſi hæc multis odioſa fore ſcirem. A forti purgante febris reditum facile proritari poſſe auctor eſt HOFFMANNUS in *ſyſtem. tom. III.* Lucem veneream ex ſalivatione citius ſublata, rediſſe docet FERNELIUS *de morb. contagioſ. lib. II. cap. I.* Fonticulorum præmaturationem concretionem, priores, quibus medelam attulerunt, morbos reſuscitare, aut graviores inferre, rationibus, & exemplis demonſtratum legimus in ALBERTI *diff. de fonticulorum noxia concretione*. Sed meum non eſt per omnes medicamentorum claſſes eundo, ſingulorum pernicioſos ſæpe effectus commemorare. Sufficiat paucis indicaffe, remedia & chirurgica & pharmaceutica, incongruo tempore, doſi aut ordine exhibita ad recidivas & morbos novos convaleſcentibus inducendos plurimum valere.

§. CXXXII.

Sermo hætenus fuit de cauſis ad recidi-

vas, & novos morbos convaleſcentes diſponentibus, quorum in numerum præter ipſam ægrorum conſtitutionem, morborum indolem (§. CXXII. CXXIV. CXXV.) res maxime non naturales & remedia incongrue uſurpata referenda eſſe, (§. CXXVII. CXXXI.) ſufficienter, ut credo, pro inſtituto meo demonſtravi. Jam de effectibus morborum & recidivarum in convaleſcentium corpora pauca adjicere alienum non videtur.

§. CXXXIII.

Prius vero monendum ab experientia hoc duco, quod recidivæ, vel eodem ſchemate, ac morbus ipſe, decurrant, vel novas aliarum functionum læſiones, ſeu novos morbos (§. XII.) ſecum ferant, & nunc leviores, nunc graviores morbo antecedente exiſtant; deinde, quod novi, qui accedunt morbi, vel digniores, vel indigniores partes (§. LXX.) minori vel majori vehementia afficiant, adeoque (§. XXII.) prioribus vel leviores vel graviores æſtimandi ſint.

Recidivæ, & novi morbi l. mitiores l. graviores ſunt antecedentibus.

§. CXXXIV.

Enimvero quicquid ſit, morbo vel recidivante, vel novo ſuccedente vires convaleſcentium ad inſignem gradum denuo imminui, neceſſarium eſt. Ab omni enim morbo vires imminui, & eo quidem magis imminui, quo minori vigoris gradu antea gaviſæ fuerunt, ex ſuperioribus (§. XXXVII.) ſatis clare apparet. At ſub convaleſcentiæ ſtatu vires multum imminutæ jam ſunt. (§. LIII. LIV.) Ergo ut revertente morbo, vel novo accedente, magis adhuc imminuantur eſt neceſſe. Pejores autem eſſe omnes morbos, ſi ſub initio convaleſcentiæ, quam ſi ſub incremento, & fine ejus, confirmatis jam viribus contingunt, & ſi priorem morbum gravitate antecellunt, nemo dubitabit. (§. LXIX.)

Imminuunt vires convaleſcentium

§. CXXXV.

Repetitæ itaque morborum invaſiones non retardant modo (§. XCI.) ſed tollunt plane convaleſcentiæ ſtatum, (§. CXXII.) & vires imminuendo (§. CXXXIV.) ad varios morbos hominem diſponunt, ad quos a natura proclivis non fuiſſet. Hinc poſt perpeſſas frequentiores recidivas, homines imbecillos & valetudinarios per multos annos permanere, conſtans eſt obſervatio.

& valetudinarios eos reddunt.

§. CXXXVI.

Quam gravia itaque convaleſcentibus a recidivis, aut aliorum morborum invaſionibus enaſcuntur detrimenta; (§. CXXXV.) tantum omnino operæ eſt pretium, curare, ut ab utriſque liberi permaneant. Et quantum cuique intereſt, ut a morbo, quam fieri poſteſt, citiſſime ad ſanitatem redeat; tam neceſſarium eſt, ut cauſæ, quæ convaleſcentiam vel protrahere, (§. XCI.) vel tollere (§. CXXII.) omnino poſſunt, ſummo ſtudio evitentur. Rerum itaque non naturalium, & remediorum (§. CXXI.) vires eo dirigere oportet, ut corporis ſanitati non obſint, ſed eandem, quam fieri poteſt citiſſime reſtituant.

§. CXXXVII.

ejus impedimentis & præfidiis.

305

§. CXXXVII.

Regimen
quid sit,
congruum
vel incon-
gruum.

Per REGIMEN in genere intelligo modum utendi rebus non naturalibus, aliisque in corpus nostrum agendi vi præditis. Modum vero dictarum rerum vires eo dirigendi, ut sanitas his vel confirmetur, vel amissa, quam fieri potest citissime restituatur, *Regimen congruum* appello. *Incongruum* vero in tali rerum non naturalium, aliarumque usu consistit, qui sanitatem magis imminuit, quam auget aut confirmat. Pro rerum autem harum varietate diversas regiminis species constituo.

§. CXXXVIII.

Est l. dia-
reticum l.
pharma-
ceut. l. chi-
rurgicum.

Modum rerum non naturalium vires ad sanitatem vel confirmandam, vel citissime restituendam dirigendi voco *Regimen diæreticum*. Modum vero vires remediorum ita dirigendi, ut sanitas inde enascatur, mihi dicitur *Therapeuticum* regimen, quod pro duplici remediorum indole (§. CXVIII.) dividitur in *pharmaceuticum*, & *chirurgicum*, quorum notio ex superioribus satis inclarescit.

§. CXXXIX.

Opus est
convales-
centibus
congruo
regimine.

Incongruo (§. CXXXVII.) itaque regimine sanitatis accessum non modo retardari, sed sæpe omnino aboleri, collatis antecedentibus, (§. XCIV-CXXXII.) indubium

est. Quare congruo regimine (§. CXXXVII.) omnibus iis convalescentibus, qui absque recidivis & novis morbis sanitatem citissime recuperare volunt, opus esse, nemo non perquam facile intelligit.

§. CXL.

Utilissima jam, & magni utique momenti incidit quaestio: *quale* convalescentibus regimen sit congruum? ejus uberiore autem explicatione & decisione, ob paginarum molem præter opinionem, ac spem nimis auctam, hic superledeo, eamque ad aliud tempus mihi reservatam volo. Dignissimum vero est, quod ultimo loco hic adjiciatur Illustris & venerandi senis HOFFMANNI elegans præceptum, quo in *Med. Syst. tom. III. cap. X. de generatione morborum ex morbis* summa regiminis convalescentium capita in compendio proponit. *Haud postrema itaque Medici cura eo dirigenda, quo abactō morbo ejusdem recidivam avertat, eumque in finem cum valetudine in gratiam redeuntibus exactas leges & regulas diæreticas præscribat, has ut observent, serio inculcet, & congruis laxantibus ac roborantibus, aut etiam decenti sanguinis missione imminens periculum prudenter arceat, atque præscindat.* Qua admonitione præsentī tractationi præfixum bono cum Deo imponimus finem.



DISSERTATIO MEDICA

D E

NECESSARIA SALIVÆ INSPECTIONE

AD CONSERVANDAM ET RESTAURANDAM SANITATEM.

Primum edita anno 1698.

§. I.



AXIMAM Artis partem esse, uniuscujusque morbi cognitionem exacte addiscere jam dudum prodidit divus HIPPOCRATES *lib. de diebus judicatoriis*: Quandoquidem princeps Medicinæ scopus est, cujuscunque morbi ortum, causas & genium exquisite scrutari, & inde removendis hinc idoneum invenire & prudenter applicare remedium. Quocirca optime dixit laudatus HIPPOCRATES *lib. de Arte, Medicus qui sufficit ad cognoscendum ad sanandum etiam sufficit*: & *lib. de flatibus. Qui causas corporis affecti probe cognoscit, valde potens est asferre ea quæ corpori prosunt*. Quæ de causa etiam ab omni ævo Medicorum peritissimi in id sedulam collocarunt operam, ut non tantum ex structura partium solidarum seu habitu corporis, & sanguinis humorumque temperie, dispositione Parentum, ætate, sexu, vitæ genere, atque aëris constitutione, sed potissimum e natura excretorum ægritudinis statum ac mores, in quovis individuo, magna cum attentione scrutarentur atque investigarent. Quantum excretiones diversorum humorum in corpore nostro solennes, vitæ & sanitati tuendæ conducant, si legitime ratione quantitatis & qualitatis procedant, neminem qui saltem primis labris medicinam degustavit fugere potest. Impossibile enim est, ut nativa sanguinis mixtio & ipsius saliva & a corruptione immunis persistere possit, nisi variæ res huic mixturæ incongruæ & intensæ continuo diversa sub forma per innumera colatoria sequestrentur & ejiciantur. Ex quo facile intelligi potest, ipsas has excretiones & quidem præcipue sudoris, urinæ, sputi, muci, alvi excrementorum, sanguinis menstrui in foeminis, vel hæmorrhoidalis in quibusdam viris si non legitime procedant, plurimum noxæ vel detrimenti afferret corpori: Unde etiam apud Practicos horum consideratio atque æstimatio in morbis cognoscendis & sanandis maximi est momenti. Illud unicum saltem tam in veterum quam recentiorum fere omnium monumentis desideramus, quod nulla prope in ipsis reperiatur mentio excretionis salivæ quatenus ad morborum indolem pernoscendam facit; cum tamen constanti experientia & suffragante ratione convincamur, maximam curam etiam hujus excretionis in Praxi Medica habendam esse. Decrevimus itaque hancce materiam in præsentiarum breviter strictimque saltem exigui speciminis loco agitare atque pertractare; cui proposito ut Divinum Numen clementissime benedicat ex animo precamur.

§. II.

Salivam fluorem esse limpidum insipidum valde activum ex glandulis numerosissimis in ore secretum, apud Medicos notissima res est: differt autem a sputo saliva in eo quod hæc limpida & fluida sponte & citra singularem commotionem in ore secernatur, sputum vero crassius & mucosius sit & ex arteriæ asperæ glandulosa parte, vel ex ipso ductu narium glanduloso sreatu vel tussi eliciatur & prodeat. Fluorem activum salivam diximus, quoniam ex duplici elemento, uno tenuissimo æthereo, salino-sulphureo, & altero crassiori humido atque aquoso (quod prioris vehiculum existit) componitur. Præsentiam subtilissimi ac mobilissimi principii salivæ existentis varia experimenta comprobant. Primo enim salivæ latex non facile etiam intensissimo frigore abit in glaciem, more aliorum liquorum spirituosorum qui abundant tenuissimis partibus in motu vehementi intestino nullam firriorem quietem admittente, constitutis. Præterea quando vasculum saliva repletum, vitro cui aër mediante antlia pneumatica substractus fuit, imponitur, protinus conspicitur insignis agitatio atque ebullitio nec non spumascentia ipsius salivæ, sicuti contingit in aliis liquoribus spirituoso elemento imbutis: Etenim demoto ambiente atmospherici aëris pondere, tenues & elasticæ salivæ particule libertatem sese expandendi & egressum moliendi acquirunt, unde postmodum dependet dicta ebullitio. Diximus subtilissimum istud principium esse salino-sulphureum, utpote spiritus ex saliva putrefacta certa encheirisi destillari potest, qui metalla adoritur, ipsum aurum nigredine afficit, & a secretioris chymie amatoribus pro menstruo universali venditur. Quantam vim atque efficaciam jejuni hominis saliva in dissolvendis glandulis scirrhis, hæmorrhoidum tumoribus abigendis, scabie aliisque cutis affectibus dissipandis possideat, Practicis compertissimum est. Ad quam vero indolem sal salivæ pertineat controversum adhuc est: Alii acidum esse credunt, quoniam saliva jejuni mercurio currenti (si cum ipsa misceatur) compedes injicere solet: Alii alcali illud pronunciant, quoniam infusionem florum rubicundorum alio colore inficit, & solutionem vitrioli præcipitatione quadam turbat. Nos sal sui generis & neutrum, propter tenuitatem & paucitatem (duæ enim salivæ uncie unicum circiter granum salis acris post evaporationem relinquunt) organo gustus non respondens, adeoque illo ipso non dignoscibile illud statuimus & judicamus. Sulphuris in saliva portio ex foetore qui ejus putredinem sequitur, nec non e splendentibus varie coloratis squamulis quæ putrefactæ

factæ salivæ supernatant, elucescit. Insuper principii activi salino-sulphurei in saliva existentiam sufficientissime probare videtur ejus præpotens vis in excitanda fermentatione corporum ad illam dispositorum: Fermentatio siquidem est motus intestinus dissolvens totam mixti compagem, & excitatur a materia salino-sulphurea, quæ fermenti nomine venit, in motu vividissimo constituta; omne enim (vi axiomatis mechanici) quod alterum quiescens movere debet in motu prius constitutum sit necesse est.

§. III.

Restat jam ut dispiciamus unde originem suam petat salivalis humor. Ex glandulis quibus universa oris & faucium substantia scatet, ipsum prodire nemo dubitabit amplius. Sunt autem glandulæ nihil aliud quam canaliculi tenerrimi invicem contorti & membranaceis fibris firmati, qui ex arteriis immediate prodeunt & ratione ductuum suorum talem salivæ succum qui eorum diametro respondet, recipiunt; nerveum autem ceu tenuissimum facillime admittunt, crassiori sanguinis ac feri portione relicta. Hunc liquorem ita secretum dictæ glandulæ postea per singulares lymphaticos ductus derivant & effundunt in oris cavitatem. Nolumus hic sigillatim commemorare glandulas illas nomine, figura & magnitudine diversas, quoniam ab Anatomicis pluribus abunde hoc jam factum est: Illud saltem curiositatis ergo non possumus præterire silentio, quod glandulæ & ductus salivales a NUCKIO descripti nulla industria in humano cadavere reperiri possint: vicem autem horum videntur sustinere sex glandulæ, pisi majoris magnitudine, recta lignea notabili intervallo ab invicem disjunctæ, supra musculum buccinatorem & infra masseterem collocatæ, quarum quævis peculiari ductu, qui setam equinam admittit, in ipsum os hiat; primum autem horum ductuum orificium statim post orificium ductus Stenoniani recta linea positum est. Novæ hæ glandulæ repetitis vicibus ab *Excell. Dn. Præsidi* publicis in Anatomis demonstratæ fuerunt. Quod ad materiam ex qua saliva producit, in eo facile omnes consentiunt illam esse non tantum humidam sed & subtilissimam Salino-sulphuream sanguinis arteriosi partem & una ipsum liquorem nerveum tenuissimum: Notabile enim est irregularem spirituum animalium motum, qui in vehementibus animi affectibus & furore conspicitur, promptissime cum saliva communicare quæ exinde perniciosam imo virulentam suique multiplicativam mutuatur activitatem, sicuti ex animalium furore & ira æstuantium moribus corporis machinam instar veneni destruentibus id luculentissime apparet.

§. IV.

Quemadmodum autem verissimum est nihil in corpore nostro sine singulari providentia, consilio, fine ac ratione sapientissimi rerum Conditoris factum esse, quippe qui adeo prudenter machinam nostri corporis fabricavit, ut omnia conspirent ad ejus conservationem; ita merito quæstio emergit cuinam usui ac fini tanta salivæ copia secernatur & ipsis cibis inter masticandum rursus commisceatur? Quantum itaque dijudicare possumus, contingit illa salivæ a sanguine separatio primum, ut nimio sero & superfluis salino-sulphureis, activis partibus massa sanguinea privetur & ita a corruptione præservetur. Compertum enim est Mechanica chimica, quam promptum & proclive sit ad putredinem concipiendam excessivum humidum, & quantam potentiam habeant exilissimæ salino-sulphureæ partes introducendi motiones intestinas, peregrinas & ad destru-

ctionem vergentes, in corpora disposita. Alter finis secretionis salivæ in ore est, non ut tanquam inutile quippiam (sicuti accidit in sudore, urina & alvi excrementis) foras ejiciatur, sed ut adhuc usum præstet in alimentis dissolvendis nobilissimum. Nosstra enim sententia est salivam genuinum alimentorum constituere menstruum ipso in ventriculo. Evidem non negamus per tunicam ventriculi glanduloso-villosam separari humiditatem quandam mucosam, quæ tamen pauca est tantæque ciborum molli subigendæ insufficiens; requiritur enim hic menstruum rei solvendæ ratione quantitatis proportionatum: Jam quoniam saliva largissime sub masticationis actu effunditur & intime cum cibus permiscetur, præterea etiam indolis activæ, fermentantis ac solventis est, non video quare pro genuino alimentorum menstruo venditari nequeat? Opus nimirum erat, ut tot tamque diversi generis alimenta, dura, solida, viscosa, item medicamenta quæ non tantum ex vegetabili & animali, sed etiam minerali regno petuntur, dissolverentur, extraherentur & in fluidam substantiam redigerentur; cui fini provida natura destinavit hunc succum valde activum, salivam: Hæc enim non tantum superficialiter in partes integrantes, (sicut alia menstrua chimica faciunt) sed in minimas, mixtum constituentes particulas deglutita resolvit & novam unionem mixtionemque partium efficit; ut adeo quasi menstruum sit universale microcosmicum, intime solvens diversæ naturæ alimenta, illorumque repagula referans, partim subtilitate, partim congrua & conveniente partium quibus constat figura. Sicuti autem ventriculus non solus est chyli officina sed ipsa quoque intestina, sic etiam succus qui ex pancreate in intestina profluit & ejusdem cum saliva naturæ est, ibi vices menstrui ulterius subit.

§. V.

Ex quibus facile colligitur ad digestionis & chylificationis negotium, vitæ conservandæ summe necessarium, perficiendum requiri salivam tam in sufficienti quantitate quam in bona temperie seu qualitate constitutam; a quibus si saliva deflectit, aliter fieri non potest quin multum damni redundet in ipsum chylum, qui sanguinis elementum est, atque ita ad morbos seu statum corporis præternaturalem via pandatur apertissima. Et hæc jam est ratio ac fundamentum, cur maximopere suadeamus & commendemus Praxin Medicam exercentibus sedulam & attentam salivæ considerationem. Quod si enim ex urina, quæ immediate ex sanguine & sero provenit, prompte licet conjicere de mixtione, temperie, motu & statu sanguinis & feri, prout urina vel quantitate vel consistentia vel colore differt: Quidni etiam ex saliva, quatenus illa quantitate, consistentia, odore, colore &c. differt dijudicare possimus statum atque conditionem sanguinis, lymphæ & spirituum animalium, & ulterius quoque de ventriculi digestionis ejusque vitiis atque incommodis præsentibus & futuris præsagium & judicium ferre?

§. VI.

Testem habemus experientiam, primam & præcipuam omnis veritatis in Physica & Medicina patientem, quantum consideratio salivæ tum ratione quantitatis, tum qualitatis faciat ad cognitionem accuratam causarum morbificarum & pernoscendam mixtionem & motionem humorum vitalem. Clarum id facere allubescit per exempla. Nihil frequentius occurrit in Praxi, quam quod hypochondriaci, melancholici & phthisici quotidie salivam ex-

spuant largissimam, ita ut indefinente sputatione illa loca ubi subsistunt fordidissime commaculent, & si materiam per os excretam curiositatis ergo colligere velimus, intra unius horæ spatium (præsertim si jejuni fuerint ægroti) unciam unam & ultra habere possimus. Quæ nimia excretio nobis significat sanguinem humido suo defraudari & sic remanere in vasis suis crassum, fluiditate ac tenuitate debita destitutum: Etenim sanguinis fluxilitatem ab intima partium aquosarum cum reliquis unione & commixtione dependere certissimum est. Ex crassitie autem sanguinis non possunt non ejus stases, viscerum infarctus, colatoriorum obstructions, secretionum & excretionum naturalium imminutiones (quæ singula multorum & gravissimorum malorum causa & origo sunt) proficisci.

§. VII.

Observamus etiam in morborum acutorum, præsertim febrium & variolarum, statu largissimam salivæ magis aut minus tenuis aut spissæ excretionem, & quidem ut plurimum bono faustoque omine: Tali enim in casu serum superabundans vitiosum, mixturæ sanguineæ putredinosam corruptionem minitans, singulari mechanismo (qui ex provida Divini Numinis coordinatione, machinam humanam pro differentia causarum ad motus certos disponente, dependet) per colatoria feri solennia, glandulas nimirum & ductus salivales excernitur atque proscibitur, optimo cum ægrotantium levamine. Unde accuratiores Practici largiorem salivæ fluxum in febribus ardentibus & variolis sponte subortum, ceu criticum, & plerumque saluberrimum dijudicant. Ita febris ardens salivatione spontanea critice terminata describitur a B. ROLFICIO *Ord. & Method. special. Lib. III. Sect. I. cap. 41.* Et WALDSCHMIDTUS *Institut. Med. lib. III. cap. 7.* testatur sputationem frequentem in variolis & morbo Hungarico nunquam a se visam fuisse malam.

§. VIII.

Simili ratione in morbis chronicis creber & frequens salivæ fluxus sæpenumero faustum suggerit indicium. Notissima res est luis venereæ materiam, lympham nempe viscidam sale acido caustico instructam, non felicius ac tutius e corpore propelli quam per salivales glandulas: Quapropter excitata salivatio per medicamenta mercurialia tutissimum fere ac certissimum pessimi hujus affectus remedium est: Neutiquam vero putandum est, mercurium peculiari ratione in fauces operando & salivam movendo expugnare hoc malum, sed ipsa morbi causa per congruum hoc excretorium amandari inclinatur, quod tamen negotium activitate mercurii (qui particulis suis penetrantissimis metallicis fibras motrices vasorum excretoriorum ad motum armat & stimulat) haud parum promovetur. Perspicua hinc fit ratio, quare exigua Mercurii quantitas, in scorbuto vel lue venerea correptis potenter salivam expellere possit, quale quid non contingit in illis, qui bona corporis sanitate & humoribus benignis ac temperatis fruuntur. Pariter febres quartanæ (prout Excellentiſſ. Dn. Præses sæpius observavit) spontanea salivatione, quam tumor & inflammatio faucium comitantur, terminari solent; non aliam fortè ob rationem, quam quod serum acido-viscosum, primaria quartanæ causa, non per convenientius evacuatorium quam salivales glandulas queat proscibi: Unde etiam est, quod pauca mercurii dulcis portio, hoc in affectu intensissimam salivationem provocare valeat; qua de re consuli meretur WILLISIUS *de ferment. cap. 6.* & BALLONIUS *Ephemerid. lib. I.*

Tacemus alios morbos sponte orta salivatione felicissime fuisse expugnatos: sic v. g. vertiginem contumacem hac ratione sublatam commemorant NIC. DE BLEGNY *Zodiac. Med. Gall. Ann. I. mens. Octobr. obs. 7.* & HERM. GRUBE *in arcanis Medicis non arcanis.* Elegans quoque est observatio JOH. PAULI WURFFBAINII *in M. A. N. C. Decur. II. Ann. I. observ. 122.* Mulierem scilicet febre catarrhali, phthisin minitante, correptam, circa diem septimum spontanea suborta salivatione restitutam fuisse. In iisdem *M. N. C. Decur. II. Ann. III. obs. 153.* Joh. Burgius, *Virum*, (scribit) *magni nominis, literatum, novi cui tinnitus aurium, quo sæpius infestatur, non prius discutitur quam salivatione sponte excitata, cumque aliis ob causas acidulis Egranis uteretur Idem, non per urinarias modo vias & intestinorum canales, sed etiam per vasorum salivarium copiosam emunctionem suam testabantur efficaciam.*

§. IX.

Cæterum in praxi Medica nihil familiarius quam quod vernali potissimum vel autumnali tempore, ingentem hominum multitudinem corripere videamus copiosa excretionem salivæ limpidi liquoris, juncta cum inflammatorio faucium tumore. Profecto has evacuationes criticas & salutare esse paucissimi norunt vel attendunt Practici; his enim peractis optime sese habent ac valent ægroti, appetitum & vigorem pristinum recuperant & ita immunes a quamplurimis morbis degunt. Non igitur sistendæ sunt tam salutare evacuationes, sed potius naturæ (ut ita loquar) intentio, quantum possibile, juvanda, quo serum vitiosum & abundans, mixturæ sanguinis contrarium, per vias adeo commodas e corpore propellatur. Quocirca perperam faciunt illi Medici & Chirurgi, qui talem salivæ fluxum statim compescere & suppressere nituntur per gargarismata constringentia, acida, vel collutiones frigidas. Pejus adhuc faciunt, qui eundem in finem opiata & constringentia interna propinant; facta enim feri metastasi ad alias nobiliores partes, gravissimæ cephalalgia, odontalgia, otalgia, pectoris angustia, paralyse, spuria, vertigines, singultus &c. sæpe subsequuntur, non sine præsentis vitæ discrimine: Potius gargarismatibus demulcentibus ac discutientibus, & interne per decocta calida herbarum & radicum convenientium viæ sunt magis aperiendæ, & serum fluxile reddendum, nisi extraordinaria plane & nimia salivæ secessio insignem virium afferat prostrationem, qualis observata fuit & recensetur a JO. LUD. HANNEMANNO *in M. A. N. C. Decur. II. Ann. IV. Observ. 108.*

§. X.

Datur adhuc alius salivæ excessivus & abundantior fluxus, qui tamen merito dicendus est symptomaticus, periculi haud expers & comitatur sæpenumero gravem & anginosam faucium inflammationem, quæ vel per se, vel ut symptoma febrium acutarum & malignarum solet invadere. Apparet nimirum in dictis casibus oris & faucium regio mucosa quodam denso copioso & acri obrita, qui utitur centies gargarismatibus congruis abstergatur, subinde tamen de novo propullulat, mortem subsequitur interdum prænuncians. Idem observatur in gravissima œsophagi, ventriculi aut diaphragmatis inflammatione, dum os copiosa lymphatica humiditate continuo est repletum, conquerentibus simul ipsis ægrotis de insigni ardore circa ventriculi regionem. Derivandus autem merito est largior hic salivæ profluxus ex circulo sanguinis per venas impedito

dito aut valde imminuto, unde sanguis per arterias advectus non potest non abundantissime in glandulis, præsertim salivalibus humiditatem ferream deponere. Cujus asserti veritatem quam optime confirmat experimentum *Cl. NUCKII*, qui venis jugularibus, subducto filo in cane arte ligatis, salivam tam copiose profluere animadvertit, ac si mercurio assumpto iste fluxus concitatus fuerit. Vid. *Ejus Sialograph. Cap. II. p. 26. & 27.* Exinde etiam elucescit ratio, cur (notante *HIPPOCRATE Epidem. Lib. I. Sect. II.*) involuntariæ lacrymæ in febribus malignis admodum sint periculosæ? Nec aliud iudicium de urinæ largiori fluxu in febribus acutis, malignis, & inflammationibus gravioribus ferendum est, utpote qui semper fere funestus esse solet.

§. XI.

Quemadmodum vero quantitas salivæ præternaturaliter de sanitate vitata & morborum eventu diversimodè testatur; ita quoque defectus ejusdem non pauca Medico proficua signa suppeditat. Etenim in febribus acutis, lentis, calore præternaturali hectico saliva parvissime secernitur, & non nisi paucus spissus humor linguam & oris interiora oblinat. Testatur hoc ipsum phænomenon de ardoris & caloris interni, humidum radicale dissipantis, gradu; ut adeo linguæ inspectionem ad dignoscendum feri statum non immerito in pluribus morbis commendet *HIPPOCRATES Lib. VI. de Morb. vulgar. Sect. V.* dum inquit, *Lingua humorum præstantiam colore refert, ideoque per hanc ad humorum dignotionem pervenimus.* Cui hodiernum consentire videntur *Sinenſium Medici*, utpote qui magna cum solertia multorum corporis affectuum naturam non solum e pulsu, sed etiam linguæ diversa constitutione satagunt addiscere, quemadmodum ex *ANDR. CLEYERI Specim. Medicinæ Sinicæ* id ipsum abunde constat. Quod si itaque lingua in morbis supra nominatis exsucca vel muco viscido obſita est, serum sanguinis calore nimio inspissatum proditur, unde sitis inexhausta & saporis abolitio proveniunt. Talis insuper linguæ & oris status, præsertim in febribus lentis & quibusdam morbis chronicis luculentum perhibet testimonium de vitiosa chylicatione: saliva enim adeo pauca & crassa nequaquam par esse potest alimentorum resolutioni & extractioni, unde chylus crudior & viscidus necessario progignitur. Medentis vero intentio primaria hoc loco esse debet ut blandis humectantibus ac diluentibus feri fluorem restituat, nec non intestinam & præternaturalem vehementem sanguinis commotionem temperet atque componat.

§. XII.

In hydrope, diarrhoea, cholera &c. notabilior salivæ defectus indicat serum plus justo a sanguine secedere, dum vel in partium quarundam porosa substantia largius decumbit, vel per excretoria liberalius proscribitur: Hinc quantum de sero aliorum derivatur, tantum decedit materiæ ad salivæ generationem necessariæ, quo ipso digestionis & chylicationis negotium haud parum impeditur. Ceterum in ejusmodi casibus sollicitum esse decet Medicum ut æqualam & liberam sanguini & humoribus reliquis circulationem conciliet, tum vasa obstructa aperiendo, tum nimis relaxata roborando, quo sic æquilibrium ad excretoria restituatur & unumquodque suum præstet officium.

§. XIII.

Perspecta sic irregulari salivæ quantitate accedimus jam ad perlustrandum ejus vitiosam qualitatem. Cum autem hæc non uno modo sese prodatur, opus

erit ut potiora illius genera sigillatim consideremus. Quod si itaque justo tenuior, aquosior & limpidior saliva prodit, in infantibus quidem (præsertim si major ejus copia adsit) lumbricos in ventriculo & intestinis latitantes indicat, qui tunicam illorum & œsophagi glandulosam irritando, largiorem salivæ tenuioris affluxum invitant: in adultioribus vero & ferociorem sanguinis constitutionem ac dispositionem ad cachexiam, affectionem hypochondriacam arguit. Dum enim aquosum Massæ Sanguineæ elementum prædominatur & particulæ sulphureæ supprimuntur, motus humorum tardior, calor debilior, & spirituum defectus subsequuntur, unde postmodum ad cachexiam corpus facile disponitur, præcipue quoniam saliva ejusmodi aquosior, elemento activo salino-sulphureo orbata, digestionis negotio nequaquam rite præesse, nec chylum satis laudabilem ac spirituosum elaborare potest: Qualis autem chylus, talis sanguis, qualis sanguis, talis corporis habitus & sanitas. Cæterum Medici hic officium esse debet ut remediis balsamicis, amaris, blando sale volatili oleoso foetis chyli & humorum spirituoscentiam promoveat, & balsamum sanguini restituat. Vermium vero putredinosa colluvies per specifica anthelmintica & putredini resistentia expugnari debet.

§. XIV.

Consideranda nunc quoque venit salivæ præternaturalis viscedo seu crassities, quæ matutino potissimum tempore post somnum observatur: Tunc enim sæpius lingua & fauces lento viscidoque limbo oblitæ conspiciuntur, & ipsa saliva dejecta in vasculum quoddam vitreum brevi temporis spatio deponit crassum, albicans, copiosum sedimentum, supernatante humore limpidiore aqueo. Talismodi saliva in ægrotis plerumque significat serum spissius particulis tenuioribus fluidis destitutum, sicuti apparet in illis qui febre lenta aut hectica laborant. Longe tamen major salivæ viscositas notatur in febre acuta correptis, propter majorem feri fluidi defectum, qui ut plurimum cum hoc morbo conjungitur. At præter hæc non raro etiam in sanis, tempore matutino, extraordinaria ejusmodi salivæ viscositas est conspicua; hæc autem, nostro quidem iudicio, vel à defectu potus, vel cibis crudiori & viscido succo abundantibus, copiose ingestis, proficiscitur; qualem salivæ mutationem aliasque ejus differentias a victus diverso genere & vario corporis statu pendentes haut ignorasse videtur *GALENUS*, dum *Lib. X. de simpl. Medicam. Facult. cap. 7. de saliva* scribit, *salivæ vis differens est tum in animalium speciebus, tum in hominum unoquoque sano & ægroto, jejuno aut sitibundo, aut potu ciboque sumto. Etenim ut urina & bilis, sic etiam saliva sumto quidem cibo imbecilla est: Valida & acris eorum, qui ingenti aut inedia aut siti premuntur.*

§. XV.

Attendi etiam meretur salivæ præternaturalis spumescencia satis frequenter conspicua in epilepticis, apoplecticis, maniacis, & asthma convulsivo laborantibus, nec non valde iratis. Oriri videtur a citatiore vel anxio aëris inspiratione, dum hac mediante subtiles elasticæ aëris particulæ intimius cum saliva miscentur, illamque continua agitatione in exiguas & copiosas bullas convertunt, non secus ac alios liquores limpidos paululum tamen viscosos v. g. albumen ovi, sola conquaſſatione in spumam abire cernimus. Interdum etiam spumascentia salivæ ab impetuosa spirituum animalium commotione induci potest, quatenus vehementior ejusmodi motus ipsi salivæ

salivæ communicatur, sicut in pluribus convulsivis morbis fieri arbitramur.

§. XVI.

Secundum naturam omnis manifesti saporis exper esse solet saliva: At in statu morboſo varios acquirit sapes, quos inter primum se sistit falsus, de quo phthistici, hectici, nec non atrophia & febribus catarrhalibus correpti sæpius conqueruntur. Quantum vero conjicere licet, ejusmodi falsedo salivæ ex dissolutione seu turbata mixtione sanguinis provenit. Verosimile enim est, sanguinem, per se quidem dulcem ac temperatum liquorem, vitiosum & præternaturali intestina agitatione adeo resolvi posse, ut non tantum in mucilaginem ferosam, putridam, sed & manifestam falsuginem convertatur. Malum igitur plerumque signum est saliva falsa, utpote quæ exitiosam sanguinis corruptionem, mille morborum originem, portendit. Ceterum in quibusdam subjectis acredo salivæ gustu quidem non deprehenditur, ab effectu tamen haud difficulter potest cognosci. Sic v. g. appetitus ciborum insolitus & valde auctus, qui hypochondriacis quibusdam, quartanariis & phthisticis interdum solennis est, falsedinem & acorem salivæ satis aperte arguit. Quodsi vehementior talis appetentia contingat in morbis chronicis, de ipsorum diuturnitate admonet, fin vero extra hos, plerumque catarrhos, vel coryzam, arthritidem, podagram &c. instare prænunciat. Quando enim homines appetitui ejusmodi extraordinario indulgentes largiori & superfluo victu sese replent, non possunt non variæ cruditates morborumque fomites inde produci. Tacemus aphthas, dolorifica oris ulcuscula, de acrimonia salivæ tanquam causa sua testari. Illud saltem hic non possumus præterire silentio, in nonnullis hypochondriaco-scorbuticis adeo acrem esse salivam ut si deglutitur sæpius intolerabilia ventris tormina excitet, quovis remediorum genere non statim sedanda, quemadmodum STEPH. BLANCARDUS *tr. de Scorbuto cap. XI.* annotavit; talis quoque saliva ex ore rejecta non tantum vasa ænea sed & ipsa linteamina quandoque arrodere deprehensa sunt.

§. XVII.

Dulcem nonnunquam saporem in saliva observari vix credibile videretur, nisi experientia crebrioribus exemplis id ipsum confirmaret: Etenim in M. A. N. C. plures referuntur historiae illorum qui saccharinam & ad nauseam usque dulcem salivam in ore

ore senserunt. At vero talem dulcedinem minus esse laudabilem eventus testatur; siquidem ubi diutius illa duraverit ut plurimum oris & linguæ exulceratio insigni cum dolore conjuncta supervenire solet. Molestum hoc symptoma infestat aliquando hypochondriacos & melancholicos, ita ut quæcunque potulenta & esculenta simili sapore imbuta ipsi videantur. Cæterum positivam (ut in scholis loquuntur) hanc esse dulcedinem salivæ, nemo facile sibi persuadere poterit, cum potius ab acrioribus, salivæ præternaturalis implicatis salibus, organon gustus hebetantibus & depravantibus orta videatur. Unde ex tali salivæ constitutione certo possumus colligere abundantiam salis acrioris in massa sanguinea, & hinc metuendam ad varios morbos dispositionem, quæ temperantibus, balsamicis ac diluentibus remediis averti debet.

§. XVIII.

Amarum salivæ saporem non raro Icterici & hypochondriaci experiuntur, quem nos a pertinaci obstructione vel spasmo vehementiori vasorum biliorum ut plurimum provenire putamus, dum hac ratione secretio bilis a sanguine sufflaminatur & sic particulae bilis in sanguine restagnantes facile in salivam quoque transeunt. Interdum tamen sapor in ore amarus dependere potest ab effluviis biliosis e ventriculo & intestino duodeno sursum elevatis. Utroque in casu conveniunt præcipitantia, nitrosa, rhabarbarina, quæ bilis acrimoniam contemperant, & viscerum, præsertim hepatis, obstructions tollunt.

§. XIX.

Evidenti odore, non secus ac sapore, saliva naturaliter in ore constituta caret. Quo si vero vasi polito metallico vel speculo illinatur, aut per aliquot dies, vasculo infusa, temperato aëri exponatur odorem peculiarem, non gratum, sed admodum gravem spirat. Quo citius autem & vehementius odor iste nauseosus sese manifestat, eo magis indicat sanguinem scatere sordibus & excrementitiis particulis, putredinosam corruptionem facile inferentibus. Talismodi saliva ejusque odor in morbis præsertim contagiosis & ipsa peste omni studio vitari debet: Probabile enim videtur, miasmata illa salino-sulphurea putrida, mediante saliva satis promte in corpus alterius derivari posse. Sed hæc jam pro instituto nostro sufficiant, donec fusioem hujus thematis pertractationem aliquando moliri & sistere valeamus.

DISSERTATIO MEDICA

D E

CURA PARTUS
MODO ENIXI ET LACTENTIS.*Primum edita Anno 1731.*

P R O O E M I U M.



SEDULI omnes naturæ indagatores fatentur, quod homo inter omnia & innumera summi Architecti opera, maxime stupendum & admirandum sit opus, quippe in quo, tanquam in Microcosmo, omnia reliqua concentrata concinne comprehenduntur. Nihilominus tamen, si conditionem, quæ soli homini præ brutis statim post partum est propria, perpendimus, illius præ horum longe esse deteriorem confiteri cogimur. Nisi enim homo recens enixus, non primis tantum post partum diebus, sed & multis sequentibus mensibus ac annis, aliorum fulciretur ministerio; nisi a fordibus purgaretur; funiculus umbilicalis ei justo tempore & modo ligaretur; nisi mammis lactantis admoveretur, & quæ sunt reliqua, eidem necessario pereundum esset. Bruta e contrario, quamprimum in lucem sunt edita, pedibus insistant, nutrimentum suum proprio instinctu quærunt & ex uberibus lacte distentis sugunt. Optandum utique esset, ut hæ hominum auxilia-trices manus in recens nati salutem omni tempore porrigerentur: at dolendum est misera infantis fors, quod illorum officia, ex perverso applicandi modo, tenero partui haud raro summum in detrimentum cedant. Hanc igitur miseram tenelli sortem, in quam partim per male & intempestive exhibita remedia, partim ex horum incuria, quibus ejusdem concredita est salus, inconsulto præcipitantur, in præsentis Tentamine inaugurali: *de Cura partus modo enixi & lactentis*, paulo prolixius explicare & cautelas quasdam, quibus parentes sibi ab hujusmodi erroribus cavere & partus saluti consulere discant, simul subnectere mecum constitui. A Te igitur, L. B. etiam atque etiam rogo, velis conamini huic meo æqui bonique consuleré. Reliquum, Summi Numinis efflagito gratiam, ut huic & omnibus meis laboribus benedicat, & in sui Nominis Gloriam, mei, aliorumque emolumentum cedere jubeat.

§. I.

CURAM partus & lactentis primum locum inter parentum officia merito sibi vindicare, nemo sanæ mentis in dubium vocaverit. Leges enim non solum Divinas, christianæ fidei addictis parentibus, horum curam in sacris paginis sedulo inculcare; sed etiam morales & omnium præcordiis inscriptas, ad eandem omnes gentes, cujuscunque sint cultus religiosi, obstringere ac convincere neminem latere potest. Hujus vero curæ cardo in eo vertitur, ut parentes partum in statu naturali, id est, sanitatis conservare & omnes causas status præternaturalis jam præsentis vel imminantis amoliri & præcavere omni studio allaborent.

§. II.

De Cura corporis humani mihi in præsentis tentamine sermonem esse, facile cuivis in aprico erit colligere; cum jam in Dissertationis hujus inscriptione indigitaverimus, eandem esse Medicam, & consequenter humanum corpus tantum pro subjecto habere. Curam enim animæ, in quam directe Medicina nullam habet potestatem, Theologiæ & Moralium Doctoribus jure meritoque relinquimus.

§. III.

Ut autem ordini naturæ in partus exclusione observato inhæreamus, primum quæ circa umbilicalium vasorum ligaturam, statim post editum partum, notatu digna occurrunt, enumerabimus. Jam prolixè explicandum non sumimus, quo loco & qua ratio-
ne

ne hæc vasorum umbilicalium ligatura instituenda sit, cum hæcce prolixè satis a MAURICEAU (a), VARANDÆO, (b) LANGIO, (c) VON HORN, (d) DEVENTER, (e) VELTNER (f) aliisque doceantur & omnibus obstetricantibus tritissima esse debeant. Hanc vasorum umbilicalium ligaturam, sine partus vitæ periculo, omitti vel in longum differri non posse, experientia, multis fulcita observationibus, extra controversiam omnem ponit, & ea propter hujus neglectum violentæ mortis causis Jurisprudentiæ Medicæ Doctores jure meritoque annumerarunt. (g) Nec hujus assertionis veritati quicquam detrudere potest observatio lectu dignissima *Ephem. A. N. C. Ann. 1730. Observ. 50. p. m. 115.* ubi funiculus umbilicalis abruptus, absque partus perniciæ, hora dimidia jam præterlapsa tandem ligatus fuit; nec STALPARTII VAN DER WIEL Observatio (h), qui de masculo infante sine umbilico, imo ne quidem funiculi umbilicalis indicio nati refert: cum casus hi fuerint rarissimi & extraordinarii. Cautelas quidem circa sanguinis in vasis umbilicalibus contenti reprefionem vel emissionem, ut necessario observandas, tradunt; cum vero hæc e diametro sibi sint contrariæ, horum dissensus non potuit non multis facessere negotium, & erroris vel saltem hæsitacionis esse causa. Celeberrimus enim LANGIUS *l. c.* consilium dat, ut sanguis omnis intra vasa umbilicalia circulans a placenta versus foetum cogatur, ne pereat inutiliter quidquam de egregio illo vitæ thesauro; nisi, ut *l. c. §. 3. c. 2.* addit, per moram aliquam inter partus & secundinarum exclusionem intercedentem, ab aëris externi accessu cruor in iisdem jam sit coagulatus. Alii in contrariam partem, hunc sanguinem a foetu tanquam inutilem imo noxium removendum esse censent, inter quos FRIEDEL, (i) qui asseverare non dubitat, quod, si sanguis hic a partu versus placentam reprimatur, idem a variolis per omnes vitæ dies præservetur; cui calculum suum addit HOFERUS. (k) In hanc opinionem forte seducti sunt a Veterum Medicorum & inter eos primorum Arabum sententia, existimantes: Variolarum causam a residuo sanguine menstruo, quo infans in utero matris nutritus fuerit, derivandam esse; de qua sententia plura vide apud MAURICEAU (l) *Ephem. A. N. C. (m)* STALPART VAN DER WIEL (n). FR. DE LE BOE SYLVIIUM (o): Verum enim vero, cum apud plurimos auctores, qui de arte obstetricia scriptum quid reliquerunt, de hac observatione altum sit silentium, & MAURICEAU etiam ut & Cel. D. & P. VATER (p) hanc quarundam obstetricum consuetudinem, sanguinem scilicet in foetum cogendi, pessimam esse declarent, & præterea quoque rationes nullas sufficientes, imo nequidem probabiles suorum præsuppositorum ab utraque parte reddant; tutius concludo: vasa umbilicalia liganda & refecanda esse, absque sanguinis nondum coagulati in iisdem pressione, vel versus foetum vel versus placentam. Si cuidam forte videretur, majorem sanguinis copiam necessario requiri ad omnia vasa pulmonum sanguifera, post funiculi umbilicalis resectionem & concessum respirationis usum, plenius adimplenda; huic

reponimus, quod etiam sanguis in tenello partus corpore jam præexistens, ad eadem ab invicem sejungenda sufficiat. Non enim potest non fieri, quin vasa, quæ saltem superficiæ corporis proxime subjacent, & antea, partu in utero adhuc delitescente, a temperato in eodem calore magis patula fuerunt, post ejusdem exclusionem, ab aëre irruente liberiusque hujus superficiem præmente, arctius comprimantur & consequenter tantam cruoris vim capere non valeant, quantam foetus ex utero nondum egressus. Deinde aëre etiam, per pulmonum substantiam in tunicas vasorum sanguiferorum irruente, vi sua elastica, massa sanguifera rarefit & expanditur, adeo ut hoc pacto verendum, ne a sanguine e vasis umbilicalibus in partum coacto, circulatio impediatur, ejusdem stasis & corruptio, sicque tenelli mors acceleretur. Divinationem vel prognosin, e funiculi umbilicalis flexuris, vel vulgo dictis nodis, quarundam obstetricum fallacem esse & experientiæ raro respondere, inter vulgus hodie notum est. (q)

§. I V.

Vasis umbilicalibus ligatis & resectis res ipsa postulat, ut tener partus foridibus purgetur, quod pro diverso usu recepto vario fit modo, ut in sequentibus patebit. Quod autem hoc negotium attinet, utilissima maximeque commoda hæc mihi videtur purgatio, quæ lotionem in balneo tepido sive ex sola aqua, sive vino & aqua simul mixtis parato instituitur; quia calor balnei temperatus vel tepidus non modo inservit commodæ purgationi partus recentis editi; sed quoque ad æqualem sanguinis distributionem ac circulationem apprime conducit, quæ alias levi auræ frigida afflatu facili negotio impediri posset, si partus in hypocausto calefacto vel coram luculento camino lavandus, aëri libero per totum lavationis tempus exponeretur. Sic quoque in totius corporis tam naturalem quam præternaturalem constitutionem atque conformationem, in eodem hoc balneo tutissime potest inquiri; imo hoc pacto obstetrici etiam commodus conceditur locus & tempus, ut, si quid a partus laboribus male conformatum in capite aut aliis corporis partibus compareat, cum adhuc quasi cerea sunt ossa, ab eadem in melius effingantur & in naturalem formam restituantur. Hæc autem artus omnes blande contrectando explicet, crura & brachia sæpius contrahat & expandat, ut, si quid in articulis muci vel lentoris resideat, dissipetur, ut optime monet VARANDÆUS. (r) Inferior etiam partus venter, eodem lotionis tempore, vola manus obstetricis frequenter mulceri ac leniter fricari, ut & partes excretionibus dicatae ab eadem titillari possint, ad eo feliciorum meconii, urinæ & reliquorum excrementorum exclusionem. Has itaque ob rationes hanc lotionem, quæ fit in balneo, ut maxime commodam, eligendam esse censeo: quam etiam contra auctorem tractatus, *Felix puerpera*, dicti, sæpius citatus LANGIUS (s) defendit. Aliæ obstetrices, quibus hæc lotio in balneo minus arridet, coram igne partum recentem vel aqua sola vel eadem

(a) *Tr. des maladies des femmes.*

(b) *Lib. de morbis mulierum.*

(c) *Diff. de recens natorum regimine.*

(d) *Beh. Mütter.*

(e) *Neues Hebammen-Licht.*

(f) *Neueröffnete Hebammenschule.*

(g) *D. D. Teichmeyer's Institut. medic. leg. & forens. D. D. Alberti System. Jurisprudent. medic.*

(h) *Observ. rarior. part. poster. observ. 32. p. m. 398.*

(i) *Im Medicinischen Bedenken pag. 313.*

(k) *Hercul. med. pag. 425.*

(l) *l. c. lib. 3. cap. 40.*

(m) *Anni 1727. observ. 75. §. 24. pag. 139.*

(n) *l. c. cap. 23.*

(o) *vid. prax. med. append. Tract. l. c. 9. §. 3. & 32. seqq.*

(p) *in. Coll. MSio de cura præservatoria infantum.*

(q) *Joh. Fr. Lövv ab Erlsfeld lib. X. de morb. infans. §. 6. p. 694.*

(r) *lib. 3. c. 1. p. m. 422.*

(s) *l. c. cap. I. §. 7.*

eadem vino Rhenano aut rubro mixta, a sordibus purgant. Antiquorum Germanorum (t) & modernum adhuc, ut traditur, Lapponum morem, statim post partum natos in aquam frigidam immergendi, ut validiores & quasi solidiores, ut ferrum candens in aqua frigida, redderentur; vel GALENI consilium, (u) ut sale corpora recenter natorum adspargantur, ad exsiccandum mucum cutis & robur conciliandum membris; utrumque ut summe noxium & hinc Christianis maxime indignum nemini consuli-mus, ut inuitetur.

§. V.

Post lavationem tener partus, ab aëris injuriis, mollibus linteis & commoda fasciarum involutione præmuniendus erit. In quo negotio, ex muliercularum negligentia vel ignorantia, non levis sæpe committitur error, magnorum successu temporis malorum causa. Præterquam enim, quod teste LANGIO l. c. §. 10. infantes sæpe gibbi fiant & tabefacti moriantur ex nimia pectoris per fasciam constrictione; (quanquam interdum viscidam quandam & purulentam materiam gibbi causam esse posse, egregius ille observator BONETUS (x) nos edocuit) vel sæpius vomant, vel etiam herniosi evadant, ut MAURICEAU (y) testatur: Sic etiam multa circulationis impedimentæ incommoda vagitusque nimii, ab imprudenti arctoque nimis corpus tenelli involvendi modo, derivanda esse Ill. STAHLIUS (z) nobis auctor est. Proverbio quidem dicitur: *Spey=Kinder / Geden=Kinder*; hoc autem cum grano salis accipiendum esse, ex jam dictis adducendisque rationibus patebit. Primis enim diebus ad eliminandum mucum in ventriculo reconditum, immo sub toto lactationis tempore, quoties tenelli lactentis ventriculus nimio lacte, vel eodem coagulato, vel cibo nimio sive crudo oneratur, vomitum maxime conducere facilis largior, immo ut salutare naturæ opus declaro: quando vero miser partus alimentum suum per vomitum reddere cogitur, a fasciarum arcta nimis constrictione, præprimis circa ventriculi seu epigastricam regionem, proverbium hocce minime quadrare posse constat; cum potius optandum esset, ut acceptum suum nutrimentum retinere atque in succum & sanguinem convertere valeret.

§. VI.

Maxima autem incommoda misero partui haud raro eveniunt a retentione meconii. Cum enim hoc, D. D. STORCHIO (a) teste, instar sit picis, quod nisi primis diebus ex intestinis exterminetur, non solum horum tunicis sese tenacissime insinuat; sed etiam eadem non raro conglutinat, adeo ut inde gravissima tormina, continuæ cardialgicæ afflictiones, herniæ, irrelaxabilis fere alvi obstructio, immo spasmus maxillarum, (b) reliquarum corporis partium motus spastici ac convulsivi, sanguinis per anum profluvia, variaque alia, quibus stipantur, gravissima symptomata propullulent. Cura igitur parentum & quibus partus recentis concredita est salus, in id directa sit necessum est, ut opportuna meconii evacuatione huic malorum catervæ provide occurratur.

Hunc in finem nostris in Svecia mulierculis in usu est Saccharum Penidium, quod his Benett & Sæfer audit, in oleo amygdalarum dulcium solutum, quod primis post partum diebus infanti successive propinatur. Gallis ac Batavis vinum rubrum cum saccharo edulcoratum, & Judæis mel butyro subactum hunc in finem haud infelici successu in usu esse MAURICEAU (c) & LANGIUS (d) tradunt. Plura hujusmodi lenia laxantia pro scopo eodem obtinendo enumerat Cel. D. P. JUNCKER; (e) & B. WEDELIUS, *Amœnit. Medic. pag. 271.* refinam Gialappæ ad gr. ij. vel iij. præscribit. Omnium tamen felicissime & tutissime pestis hæc sanitatis vitæque, Meconium scilicet, profligatur a colostro, seu tenui puerperæ lacte. Me equidem non fugit, quod Mauriceau, loco proxime citato, hac in sententia mihi refragantem habeam, quippe cui præstare videtur, ut recens partus, ante quartum vel etiam octavum diem, puerperæ mammis non admoveatur: experientiæ tamen amplissimæ atque vetustissimæ, providæ quoque naturæ instituti sapientissimi, quæ nihil frustra effecit, & tandem Ill. STAHLII, (f) D. P. JUNCKERI, (g) JOH. DOLÆI, (h) SPIGELII (i) aliorumque contra eundem me tueor ac defendo auctoritate. Ita enim SPIGELIUS l. c.: „ ipsum colostrum, ait, ali- „ mentum est medicamentosum, quod natura eum „ in finem generavit, ut modice nutriendo & levi- „ ter, pro infantis scil. imbecillitate, stimulando in „ intestina efficiat, ut meconium adhuc intra cor- „ pus non sine periculo hærens proscribatur & eji- „ ciatur. „ Ut vero nulla regula sine exceptione est; ita etiam in eo MAURICEAU admonitio locum invenire posse mihi videtur, si papillulæ mammarum matris lactantis adeo sint exiguæ, ut tener lactens easdem non commode ore suo excipere, & non nisi vehementi attractione quidquam ex iis alimenti elicere possit; vel crassæ nimis, ut easdem hanc vel alias ob causas capere non valeat. Sin vero mater puerpera partum lactare recuset, & nutricis subordinatæ lac sit spissioris indolis, præstat omnino, secundum B. ETTMÜLLERI (k) monitum, primis viginti quatuor horis puerulum lactentem eodem prohibere, & aliis interea congruis laxantibus alvum meconio suo exonerare. Denique memori mente tenendum, ut alvus infantis semper laxa servetur, ad prævenienda gravia tormina aliaque incommoda, quæ ex alvi obstipatione nascuntur. (l) Caveant tamen simul necesse est, ne continuo applicandis suppositoriis & clysteribus naturam hujusmodi stimulantibus adsuescant.

§. VII.

Cum etiam quædam de aëre partum ambiente attingenda sint, ratio dictitat, medio heic tutissimum iri, seu calorem temperatum infantilis corporis constitutioni optime convenire. Ut enim nimium calorem aëris in hypocausto igne rarefacti, partus lactens non potest non ægre perferre & multa ab eodem sentire incommoda, tam ob mollem solidorum

D d

textu-

(t) *Cæsar de bello Gallico lib. 6. Lavantur in fluminibus. Conf. Conringius de republica Germanor. §. 12. Claudianus II. in Rufum. Et quos nascentes explorat gurgite Rhenus. Conring. l. c.*

(u) *lib. 1. c. 10. de sanitate tuenda.*

(x) *Sepulchreio anatom. p. 713.*

(y) *l. c. cap. 37. p. 492.*

(z) *Tr. de morbis infant. p. m. 16. & 21.*

(a) *Obs. clin. sub nomine Hulderici Pelargi editar. part. 3. p. 61.*

(b) *idem l. c. p. 290. Theodorus Zwingerus Theatr. prax. med. part. post. p. 17.*

(c) *l. c. 24. p. 459.*

(d) *l. c. cap. I. §. 11.*

(e) *Conspectu Med. Theor. Pract. Edit. II. p. m. 1006. seq.*

(f) *l. c. p. 26.*

(g) *l. c. p. 1019. n. 30.*

(h) *Encycloped. medic. dogmat. lib. 6. cap. 1. §. 4. pag. 371. & seq.*

(i) *Tr. de formatione fœtus c. 13. p. 16. Conf. Zwingeri Theatr. prax. med. part. post. pag. 17.*

(k) *Valeudin. cap. 2.*

(l) *conf. Frans. Sylvii prax. med. Append. Tract. 1. cap. 6. §. 72. 73. 74.*

texturam, quam ob humorum ad movendum agilitatem: ita quoque aëris in hypocauſto condenſati preſſio vel linteorum, quibus hic involvitur, frigus poros obſtruit, & conſequenter diaphoreſin ſeu inſenſibilem tranſpirationem impedit vel omnino ſuſflaminat, qua tamen præprimis humores, ad corruptionem natura ſua maxime proclives, a ſui corruptione præſervantur. Omnium autem periculoſiſſima eſt ſubita commutatio aëris e calido in frigidum & humidum, quando nimirum nutrices puerulum ſudore ſub tegumentis madidum improvide e cunis elewant, & vel aëri frigido in hypocauſto vel etiam libero apertis fenestris exponunt, vel in humido denique & nebuloso circumferunt. Quanta enim mala impedita tranſpiratio provocare valeat, ratio & quotidiana teſtatur experientia. (m) Plurimi enim affectus cutanei, ut cruſta lactea, achores, intertrigines, ut & catarrhales, pathemata anginoidea, lethargica, febres ephemeræ, inflammationes, ulcerosa incommoda ac damna, imo & ipſa epilepſia non raro ſuppreſſam tantum diaphoreſin, præprimis capitis, unicam ſui agnoſcunt cauſam. Caput igitur ut inprimis a refrigerio præmuniatur neceſſum eſt, cum ob dentitionem infantes copioſiſſimo lymphæ ſalivalis af fluxui & congeſtionibus humorum verſus caput, commotionibus & excretionibus catarrhalibus ſint ſubjecti (n). Prohibeantur itaque, quantum fieri poteſt, ab omni aëris inclementia & pro anni tempeſtatumque viciffitudinibus commodis muniantur teguminibus, ſitque regimen horum ætati aptum ac conveniens.

§. VIII.

Lucis & luminis rationem etiam habendam eſſe ratio dictat, ne partus recentis fragili oculorum ſtructuræ nimius ejus ſplendor & fulgor officiat. (o) Et cum facile ſtrabones vel luſci evadant infantes, ſi non directe, ſed diſtortis oculis lucem vel alia objecta in ſenſus horum incurrentia intueri iſdem contingant, aut, ſi occaſio ſuppeditetur, ſupinis & limis adſpicere oculis poſt caput ſtantes; quum oculorum muſculis nondum ſatis confirmatis, globi e ſitu ſuo ordinario & naturali facile deturbari vitioſumque recipere poſſint. Pari quoque ratione in ſtrabiſmum incidunt infantes, ſi objecta eis ad intuendum propoſita, oculis eorum nimis prope admoveantur vel ad moveri permittantur. Ut itaque & huiusmodi erroribus, qui in partus regimine ab imperitis frequentiffime committuntur, diligenti admonitione ad nutrices vel gerarias directa, tempeſtively occurratur, parentum eſt officium.

§. IX.

In vulgus etiam notiſſimum eſt, homines jam adultos, non ſolum ſexus ſequioris & præprimis hyſtericæ paſſioni facile ſuccumbentes; ſed & non raro mares odores quorundam non ſine incommoda immo anxia ſenſatione perferre poſſe, quos alii abſque ullo incommodo, immo interdum maxima cum voluptate ſentiunt. Et cum parentum individualis ſeu ſingularis conſtitutio, jure quaſi quodam hæreditario, ad liberos fere ſemper propagetur: cavendum, ne, quæ parentibus olfactu ſunt ingrata vel noxia, teneri parvuli & lactanti exhibeantur vel in eodem conclavi,

quo degit vel jacet infans aſſerventur. Huic noſtro aſſerto calculum ſuum ſuperaddunt multæ obſervationes præcticae, e quibus in præſenti unum tantum a PELARGO obſervatum (p) addere animus eſt; ubi infans a fragrantiffimo liliorum alborum odore in conclavi circumſperſorum, in lethargum fuit præcipitatus. Pari ratione vitanda & fugienda ſunt, quæ foetore ſuo etiam robuſtis natura & adultis non raro fuerunt periculosa, qualia ſunt: foetor candelæ non bene extinctæ, exhalationes ſulphureo-acres, imo venenosa carbonum, quæ non ſolum cephalalgia & naufææ ſæpe exſistere cauſa; ſed etiam totum ſyſtema nervoſum ſopire immo mortem inducere valent. Duo exempla infantum a carbonum vapore in conclavi calce viva illinito ſuffocatorum adducit Illuſtr. D. PRÆSES e MARCELLI DONATI lib. de Medic. hiſt. mirab. (q) Qua propter regula ejusdem diæterica ad ſinem citati tractatus tradita, etiam reſpectu regiminis partus tenelli probe notanda: Man ſchlafe in kleinem Zimmer / ſo erſt neulich gebauet und noch nicht ausgetrocknet iſt / auch nicht / wenn es erſt vor wenigen Tagen übertüncht und angeweiſſet / oder wenn der Ofen entweder ganz neu geſetzt und noch nicht recht trocken oder lange Zeit her nicht geheizet worden iſt. Man hat ſo gar Exempel / daß es denen übel bekommen / die in einem Gemach geſchlafen / da der Fußboden den Tag vorher gewaſchen worden. Denique animis parentum probe inculcandum erit conſilium VARANDÆI (r): Infantes non contrectandos eſſe a vetulis aut ſordidioribus mulierculis, aut aliis, quicunque gravio rem & moleſtum odorem ore exhalant, vel corpore emittunt, quoniam corpuscula illa molliſſima & quaſi ſpongioſa facile ſuſcipiunt exſpirationes omnes circumjectarum rerum, quod & D. STORCHIUS (s) comprobat exemplo partus ſemeſtris, cui ab ancillæ lue venerea infectæ oſculo hujus contagium fuit communicatum.

§. X.

Recens natum puerulum plus ſomno indulgere debere, quam vigiliis, facile omnium conſenſum nos impetraturos eſſe confidimus: Hunc autem muliercularum quarundam morem, plus ſuis propriis, quam partus commodis invigilantium jure meritoque improbamus, quæ miſerum tenellum ſæpe plus juſto ad dormiendum diſponere vel potius cogere multis artibus allaborant, & hac ratione eundem in languorem, ſtuporem vel lethargum præcipitem agunt. Inter peſſimas autem muliercularum artes haud injuria referimus, nimiam cunarum agitationem, de qua ſ. ſequenti agemus; & medicamina quædam eum in finem iis uſitatiffima, qualia ſunt: Theriaca cœleſtis, Diaſcordium Fracaſtorii, Requies Nicolai, & tandem Opium crudum. Quam infelici vero ſucceſſu heroica talia perſæpe fuerint exhibita, prolixum nimis, ut & ſupervacaneum eſſet referre, cum triſtis ubique pro me loquitur experientia. Si vero quis hujus rei teſtimonia deſiderat, adeat SCHENCKIUM, (t) MAURICEAU (u), STAHLIUM, (x) SEPTALIUM, (y) qui, in pueris, inquit, narcoticorum uſus omnis eſt ſuſpectus. Si enim intus ſumantur, quaſi ſtran-

(m) Conf. Differt. Stahl de tranſpiratione impedita.

(n) Conf. Coll. Præſt. Stahl. a D.D. Storchio edit. Sect. 2. cap. 5. §. 7. p. m. 1113.

(o) qualiter ad lucem obverti debeat infans, ne fiat luſcus doc. Joh. Rudolph Camerarius Syllog. memor. med. Cent. 2. p. 40.

(p) Obſ. Clin. pt. 1. p. & pt. 2. p. 288.

(q) in ſeinem gründlichen Bedenken und phyſicaliſchen Anmerkungen von dem tödlichen Dampf der Holz-Kohlen.

(r) l. c. p. 425.

(s) not. ad Coll. Præſt. Stahl. ſub Tit. de Lue Vener. p. m. 1177.

(t) Obſerv. medic. lib. 7. p. m. 873. Obſerv. 7. de importuno Theriacæ uſu.

(u) qui l. c. pag. 248. ſuum & Plinii judicium de Theriaca & Mitridate exponit.

(x) Diff. de impoſtura opii, conf. ejusd. Tr. de morb. infant. p. m. 59. & Præcog. præſt. Coll. Stahl. a pag. 206. ad 213.

(y) animadv. & caut. medic. lib. 3. animadv. 46.

strangulantur; extrinsecus autem memoria multum detrimenti offerunt, quam suam sententiam etiam l. c. (2) e Melsvæi canone 6. cap. 3. confirmat; & observ. Vratislavienses. (a) Aliæ in alterum extremum prolapsæ, lactentem sufficienti & maxime necessario somno prohibere sustinent, atque nimis vigiliis eundem debilitant ac enervant; ut taceam multa alia damna, quæ a nimio infantis vagitu & ploratu sequi solent, qualia sunt catarrhi, oculorum fluxiones & herniæ intestinales ob laxiorem peritonei & musculorum abdominis constitutionem. (b)

§. XI.

Neque minus periculosa est pessima ineptarum muliercularum consuetudo, tenerem partum vehementi velocique cunarum agitatione concutiendi & huc atque illuc conjiciendi. Lubens equidem concedo, moderatum & levem cunarum motum pericula quædam infantis saluti minari non posse; quanquam etiam crediderim, eundem æque placide dormiturum, etiamsi hæc inveterata consuetudo omnino aboleretur, qua in sententia quoque confirmor prudenti MAURICEAU consilio, quod l. c. p. 463. legitur & ita se habet: *Mais pour éviter, qu'on soit obligé à la sujétion de bercer ainsi l'enfant chaque fois qu'on le voudra endormir, il est bon de ne pas lui en faire prendre l'habitude, si l'on le peut dans le commencement, & de lui laisser venir le sommeil naturellement.* Vehemens enim ejusmodi conquassatio non potest non affectus vertiginosos, terrorem, vomendi conatum & similia parere; ut taceam symptomata graviora supra §. 7. enumerata, quæ a frigidioris aëris, inter velocem cunarum motum, appulsu atque afflatu ex impedita transpiratione provenire possunt & solent. Error quoque non minus incusandus est illarum, quæ, ut infantem vel delectent vel plorantem sedent, eundem motu vehementi ac veloci in altum elevant parique modo iterum remittunt; cum verendum, ne puerulus hoc modo pavore percutiatur vel vertiginosus evadat. Et cum jam occupati simus in tradendis quibusdam cautelis, quæ circa motum partus observari debent, observationes quasdam huc pertinentes, de modo eundem in brachio portandi, his annectere animus est. Notissimum est, quod infantes in brachio tantum sinistro ut plurimum a gerariis circumferantur. Cum vero hoc modo manus dextræ applicatio atque exercitium apud tenellum impediatur, sinistra vero liberior concedatur usus; hinc rationem potissimum petendam esse existimo, quod hujus motioni frequentius adsuefiat, lævaque manu etiam paulo adultior factus, eadem conficere velit, quæ dextra ex usu consueto obire solet. Sic etiam in puellis præsertim collobio indutis, ut & non raro in pueris observare licet, tortuosos eosdem esse, vel alterutram coxarum altera altius prominere. Et quanquam interdum hujus alia causa accusari possit, frequentissime tamen eandem ex unico hoc fonte, quod scil. infantes in uno tantum brachio, absque vicaria horum commutatione, a mulierculis seu gerariis suis continuo portati fuerint, derivandam esse, cum MAURICEAU asserere non dubito, l. c. cap. 42. p. 509.

§. XII.

Teneri partui primis post ejus exclusionem die-
Frid. Hoffmanni Oper. Supplem. II.

bus & mensibus, colostrum & lac bonæ notæ matris in sui alimentum sufficere, immo necessarium esse §. 6. indicavimus; & quod primis jam diebus post partum editum, pultem huic propinare periculosum sit, sua MAURICEAU (c) confirmat observatione. Interim tamen D. P. JUNCKER (d) dicto quoque tempore hos pulcica secure ali posse docet, qui & nos facile assentientes habet, cum simul præsupponere videatur: ut mater lactans vel nutrix nihilo minus sufficienti ad puerum nutriendum gaudeat lacte, & pulcica sit admodum tenuis, bene cocta & lactis ad consistentiam quam proxime accedens. Hæc pulcica autem non sit pulmentum ex farina, lacte & saccharo paratum, quod DOLÆUS (e) gluten viscosum pro glutinandis chartis magis aptum, quam nutrimentum appellat; sed e pane triticeo cum lacte & pauco saccharo parari, & monente ZWINGERO (f) in peculiari loco, ab vermium muscarumque accessu muniri debet. Cum vero hujus corpus majus in diem incrementum capiens, successu temporis plus nutrimenti exposcat, & lac nutricis in posterum huic solum sufficere nequeat; necessum est, ut & alia in auxilium vocentur alimenta, tenues nimirum in principio pulcicæ, quæ successive paulo crassioris consistentiæ parantur, donec dentire incipiat, & paulo solidiores cibos masticare ac digerere valeat. Abstineant autem parentes, a multis variisque duris & difficilioris concoctionis alimentis, ventriculum tenelli statim onerare; neque permittant, ut cibus præmasticetur a vetulis vel aliis ingratis oris halitum expirantibus, vel stomacace laborantibus; cum per harum salivam morbi præmasticantium infanti infundi possunt: neque, quod tamen non sine maximo tenelli periculo sanitatis & vitæ ut plurimum fieri solet, totum hujus regimen & diætâ, hoc in negotio, imperitæ committatur mulierculæ. Næ, dolenda omnino & misera fors plurimorum infantum est, quæ turpi inordinatoque nutricis vel puellæ arbitrio tantum conceditur! Hæ enim, quotiescunque tenellus vagire incipit, forte propter dolorem ventriculi, a cibis jam nimia quantitate ingestis, vel a torminibus, vel propter urinæ & linteorum ab hac madidorum ardorem vel alios ob cruciatus, extemplo vel mammas applicant, & lac vel etiam pultem eidem obtrudunt, quoties os suum sub clamoribus aperit, & nisi suffocari velit, eandem deglutire cogunt; malum hoc pacto pejori accumulantes, nulla habita ratione aliarum circumstantiarum, quæ hujus ploratus & inquietudinis causa esse possint. Bene igitur monet BALTAS. TIMÆUS von GULDEN-KLEE: (g) Caveant nutrices, ne pleniori victu, tenella infantum corpora onerent; fieri enim non potest, non quin in morbos tandem incidant, maxime vero in convulsiones. Neque minus deploranda est horum infantum conditio, quibus a matris lactantis vel nutricis appetitu inordinato, a ciborum scilicet acidorum, salforum, crudorum, vini & hujus spiritus abusu, innumera mala, immo, teste Illustr. D. Præside, (h) epilepsia ingenerantur. Et cum, Illustr. STAHLIO teste, (i) bonum & sanum lac, in ventriculo infantis, vitiosam qualitatem induere possit, a cibis minus cum lacte convenientibus, vel paulo ante, vel post lactationem sumtis: probe igitur tenendum VARANDÆI monitum (k), ut horam saltem unam post sumptum cibum, a lactis suctione, detineant infantem.

D d 2

D e

(2) l. c. animadv. 41. & lib. 9. caus. 70.

(a) Mens. Maj. Claf. 4. p. 604. Ubi ex usu decocti Sem. Papav. infans post gravem somnum, convulsion. fuit correptus.

(b) conf. Varandæus l. c. p. 427. & Mauriceau l. c. p. m. 426.

(c) l. c. p. 462.

(d) l. c. p. 1019. n. 31. Tab. de affect. infantum.

(e) Encycloped. medic. dogmat. lib. 6. cap. 1. §. 7.

(f) l. c. pag. 18.

(g) Oper. med. pract. lib. 5. cas. 8. p. 220.

(h) Diff. prax. clin. morb. infant. §. 5. p. 6.

(i) Tr. cit. p. m. 15.

(k) l. c. p. m. 427.

De cerevisia etiam notandum, quod, nisi optimæ sit notæ & tepida, perperam huic concedatur. Cum enim cerevisia non bene cocta & defæcata adultis gravissima caussari valeat tormina, collectu facile erit, mollis adeo texturæ corpusculo, multo majora ex eadem exspectanda esse damna; & potum frigidum, præsertim noctu delactationis tempore huic propinatum, sæpe existere atrophie, immo catarrhorum, & febrium inflammatoriarum causam, teste celeberrimorum practitorum experientia asseverare licet. Conf. Diff. cit. Ill. D. Præf. c. 9. p. 25.

§. XIII.

Ætatem lactentis teneram, ab animi pathematibus omnino immunem & liberam judicare, idem esset, ac omni experientie refragari velle. Quanquam enim infans, non nisi vagitu & lachrymis significare valet, antequam balbutiendo vel signis saltem, licet admodum obscuris, indicare adsuecat, sitim, famem & alia incommoda; observatur tamen non raro, eundem etiam in primis suis incunabulis subito terrore percuti posse. Postquam vero paulo maturior factus, irascitur, quoties ipsi denegantur, quæ appetere videtur; exhorrescit ab objectis antea non visis & eidem aspectu horrendis; in pavorem conjicitur a strepitu, & præprimis si in somno acclamatione dura & sonora turbetur, vel etiam, si motu citiori ac vehementiori in altum elevetur, ut §. II. jam monuimus. Detestandum igitur est, omnium illorum infelicissimum conamen, qui vociferationibus & acclamationibus incompotis, vehementi agitatione, visionibus ac gesticationibus ineptis lactentem terrent, vel ut irascatur, ansam suppeditant, vel tandem immoderata titillatione ad nimium risum provocant. Quapropter VARANDÆUS prudenter cavendum admonet, ne, quando pueruli intueri incipiunt, iisdem objiciantur res, quarum adspectum horrent: quum ex illarum adspectu facile incidant in terrorem & animi pathemata. Nam, quantorum malorum affectus sint prodromus, a provectioni ætate & corpore jam robustæ constitutionis, ad teneriorem colligere licet. Tristis enim, proh dolor! & nimis frequens obvia experientia edocuit, infantes, ad motus convulsivos quam maxime pronos, ab hujusmodi animi pathematibus in eosdem præcipitados & misere tandem vexatos, immo extinctos fuisse.

§. XIV.

Contra instituti rationem me non acturum existimo, si & simul quædam, parentibus in eligenda nutrice observatu digna, opello huic subnecterem. Explicandum autem mihi non sumo, quæ, de requisitis bonæ nutricis; de optima lactis nota, & quæ tandem ex vitioso lacte propullulent mala, celeberrimi jam olim & nostro hoc tempore Doctores prolixè explicarunt, multaque sua experientia confirmarunt; de quibus consuli merentur VARANDÆUS, (l) MAURICEAU, (m) LANGIUS, (n) STAHLIUS, (o) JOH. DOLÆUS (p) & alii. Neque nostram in præsententi tentamine facimus hanc practitorum controversiam: utrum melius sit, ut puerpera, quam nutrix

partum delactet? Conf. DE PREE (q). Sed tantum hæc addere animus est, ut parentes in eligenda nutrice summa scrutentur diligentia, an illa hæreditario quodam, ut phthisi, hæmorrhagiis enormibus, melancholia, epilepsia, &c. (r) vel alio adscititio infecta sit morbo, ut scabie, lue venerea, &c. an hysterici passionibus laboret? ne, ex suffragio Ill. D. Præsidis, hujusmodi morbi in lactentem innocentem propagentur. (s) Notissimum est, parentum individua animi corporisque constitutionem in horum hæredes ut plurimum transferri: experientia quoque comprobatur, pro alimentorum qualitate, corpus humanum affici & mutationem pati. Cum igitur lacte nutricis prima in puero stamina condantur, corpusque ejus augeatur, quid mirum, si in tenellis analogæ dispositiones suboriantur? Hoc assensu suo confirmant FR. DE LE BOE SYLVIVS, (t) REJES, (u) JOH. DOLÆUS l. c. & RAMAZZINUS, qui, l. c. (x) sic loquitur: hæc nutrices vestro venereo concitæ characteres debiles foetui imprimunt, observatumque est, inquit Helmontius, nutricem salacem, furiosam, suam fragilitatem transfuisse in pueros. Parentum igitur est, probe circumspicere, ne negligentia sua, filiolus salus in ipso portu statim naufragium faciat.

§. XV.

De morbis adscititiis nullum est dubium, quin lacte, quod pro varia sanguinis dyscrasia vitiosam induit qualitatem, tenello communicari possint & soleant. Si enim, exempli loco, osculo tantum lue venerea infectæ ancillæ, ut §. 9. indicavimus, eadem, partus semestris correptus fuit; multo facilius morbus hic horrendus in lactentem, a nutrice, eodem polluta, cum lacte transferri poterit. Ex observatione D. D. LAUR. ROBERGII, Medicinæ Professoris Upsaliensis Regii & Ord. longe celeberrimi, quam mecum benigne communicavit, Upsaliæ, duo non ita pridem infantuli, detestabili hoc morbo a nutrice infecti fuerunt extincti. Non levem quoque curam, munus parentum exigit, ut in nutricis diæta atque regimine prudentiæ regulis consulant. Cum enim de plebe tantum nutrices conducantur, quæ deliciarum & otii, quibus tempore lactationis adsuecunt, antea fuerunt ignaræ, evenit inde, ut a cibis euchymis & eupeptis, ut & sedentaria vita, plethora his adeo augeatur, ut paucis post partum mensibus tributum lunare solvere cogantur; quo tempore lac nauseoso infici odore, (y) tenellum languidum fieri & minus commode se habere, (z) immo in convulsiones epilepticas difficulter curabiles incidere, (a) Practici observarunt. Verendum etiam, ne luxuriosæ evadant, & sub falsa persuasionem, quasi tempore lactationis concipere non possent, in illicitum coitum ruant. Observatum est haud multis retro annis, quod puerulus quidam, ad mortem usque horrendis motibus convulsivis correptus fuerit exinde, quia lac hauserat nutricis, quæ eodem momento furtiva venere usa & hac ratione incensa fuerat. Neque minus periculum, tenello, ab animi affectibus iracundæ nutricis impendit. An vero mater

denovo

(l) l. c. a pag. 427. ad 433.

(m) l. c. cap. 43. p. 510. seqq.

(n) Diff. de requisitis bonæ nutricis & Diff. de recens nat. regim. §. 14. seq.

(o) Diff. de requisit. bon. nutr.

(p) l. c. lib. 6. cap. 1. §. 6.

(q) de noxiis nutricum ministerio & Sennertus instit. medic. lib. 4. pt. 2. c. 3. pag. 809.

(r) Stahl Diff. de morb. hæreditar. & habitu; Ramazzin. de

morbis artific. c. 19.

(s) Diff. cit. de prax. clin. inf. cap. 1. n. 12. c. 3. n. 6.

(t) Oper. med. append. Tract. cap. 2. §. 42.

(u) Camp. Elys. q. 47.

(x) l. c. cap. 19. p. 198.

(y) Ramazz. l. c. cap. 19. p. 174.

(z) Joh. Fr. Lövv. ab Erlfeld. lib. X. de morb. infant. c. 1. p. 690. & Pelargus Obs. Clin. pt. 3. p. 666.

(a) Ill. D. Præses cit. Diff. c. 3. n. 5. p. 15.

denuo gravida facta, salva conscientia, in lactando nihilominus perseverare possit, aliis considerandum relinquo; quum D. VERHEYEN teste, (b) cum ipsi matri, tum lactenti & foetui denuo concepto, male hoc pacto consulatur. Præterea multiplici experientia comprobatum est, quod pueruli a matre gravida delactati, vitam suam haud longe produxerint, & quoad vixerint, valetudinarii, immo epileptici exstiterint. Sic eadem magistra verendum, ne foetus in utero conceptus, ex alimenti sufficientis defectu, pereat, abortusque acceleretur.

§. XVI.

Ultimo tandem loco, occasione præsentis considerationis, de muliercularum periculosa medicatione exempla quædam, & simul unam alteramve practicum cautelam annectere placet. Jactant quædam mulierculæ medicinam quandam, contra omnes cutis efflorescentias præservantem: Hanc infanti, paucis post partum diebus, Upsaliæ mulier exhibebat, ast brevi post, omnes ab eadem excretiones naturales sufflaminabantur, partus miser inflationibus, torminibus ac alvi consipatione, noctu dieque exagitabatur & tota ejusdem corporis superficies, squamis quasi incrustata comparebat. Postquam vero Medicus in consilium vocatus, naturales excretiones restituerat, motibus erroneis sedatis, partus vagire destitit, squamæque deciderunt. Obstetricibus quibusdam in usu esse, tenelli frenulum linguæ nimis constrictum unguibus suis relaxare & rescindere; atque hac ratione inflammationem, convulsiones, imo mortem facile accelerare, Cel. HEISTERUS docet. (c) Interim

tamen JUNKENIUS, (d) VATERUS, (e) alique non dubitant, frenuli resectionem vel unguibus vel lanceola, ut rem indifferentem, suadere. Ad crustam lacteam & intertriginem exsiccandas, quibusdam in usu est farina a tincis in lignis crofa. Verendum autem est, ne ovula horum insectorum simul in partem affectam inspergantur. Tutius igitur ab hac abstinetur & loco hujus farinæ, pulvis seminis lycopodii cum paucis tutiæ applicatur; cum & pulveris cerussæ usus, in hoc casu, haud omnibus practicis probetur. (f) Abstineant tamen, necesse est, parentes, ab intempestiva ejusmodi efflorescentiarum retró pulsione; cum hac ratione rhonchum, (g) mictum cruentum, (h) paralytin papillarum, (i) epilepsiam, immo cæcitatem (k) exinde provenisse, practici observaverint. Neque teste LANGIO, minora mala provocare valet decocti herbæ Nicotianæ applicatio ad tineas extirpandas. Facilius tolerari poterit quarundam muliercularum consuetudo, quæ gingivas recens nati meconio ejusdem illinunt, firmiter sibi persuadentes, hoc remedio tenellum ab omnibus difficilioris dentitionis cruciatibus præservari. Quicquid autem sit, optandum, ut omnibus horum animis, quibus tenelli concredita est salus, firmissimè infixæ essent verba, quæ Eph. A. N. C. Vol. I. An. 1727. Observ. 53. p. m. 100. leguntur: *Utinam isti, qui falcem suam in alienam messem non juste immittunt, tandem denique persuaderi possint, de vita hominis agi in arte Medica, ne illotis, quod dicitur, manibus eam aggrediantur, & notam aliquando indelebilem conscientiae inurant!*

(b) Anai. corp. hum. lib. 2. tr. 1. cap. 9. pag. 47.

(c) Chirurgiæ cap. 85. p. m. 572.

(d) Manuale prax. medic. modernæ pt. 2. de regim. rec. nai. pag. 99.

(e) Colleg. MSio. cit.

(f) plura vid. Langii Diff. cit. cap. 2. §. 26. & 27.

(g) Diff. B. Slevogtii, de Rhoncho infantis, ex ulcerum parotidum intempestiva curatione.

(h) Eph. A. N. C. Cent. V. Obs. 60. Hagendorn hist. med. Cent. I. hist. 8. p. 16.

(i) Miscellan. N.C. Dec. I. Obs. 67. p. 118.

(k) l. c. cap. 2. §. 26.

DISSERTATIO MEDICA

SISTENS

VALETUDINARIUM VIRGINALE.

Primum edita anno 1721.

Q. D. B. V.

P R O O E M I U M.



GENUS humanum omnis ætatis, sexus, atque temperamenti variis & innumeris morbis obnoxium esse, omnibus notissimum est, at sexum sequiorem præpotiori, nemo forsan erit, qui negaverit: teste enim HELMONTIO, foemina omnem bis patitur morbum, id est, pluribus affliguntur morbis foeminæ quam viri; idque ob diversam corporis dispositionem & texturam, quæ in foeminis plerumque est spongiosa & rara, vel vivendi rationem, ad regulas diæteticas minime compositam, vel etiam ob partes sexui huic proprias,

Frid. Hoffmanni Oper. Supplem. II.

Dd 3

qualis

qualis imprimis est uterus. Ob frequentiam ergo morborum foeminis infensorum constitui in praesenti hac mea dissertatione inaugurali de morbis sequioris sexus, & in specie de morbis virginum agere.

Statim vero in principio monendum, non omnes affectus, in hac dissertatione pertractandos, tantummodo esse virginales, quia & viris evenire solent, tales nempe sunt epilepsia, melancholia, palpitation cordis, &c. cum tamen in virginibus per consensum uteri contingant, variaque symptomata hysterica conjuncta habeant, ideoque diversam exposcant curationem, merito hinc ad morbos virginales referre licebit; alios vero & mulieres infestare constat, uti v. g. est suffocatio hysterica, epilepsia &c. cum vero virginibus ob denegatum veneris usum, mensiumque inordinatum fluxum, nec non materiae seminalis corruptionem frequentius contingentem magis familiares sint, quam foeminis, hinc etiam eorum consideratio hic commode institui potest.

Cum vero plurimorum virginalium morborum fons & origo plerumque, imo semper sit mensium fluxus inordinatus, licebit statim in principio hujus dissertationis quaedam de hujus fluxus statu naturali, & quoque praeternaturali, proferre. Sit itaque

C A P U T I.

De Mensium statu naturali.

§. I.

SEXUM sequiorem plus sanguinis generare, quam ad proprii corporis nutritionem requiritur, omnibus, qui prima tantummodo medicinae norunt fundamenta, constat; est enim in sexu sequiori arvum humanum a summo artifice conditum, in quo primum incrementum sumunt corpora nostra. Cum vero foetus in utero nutriendus non aliunde, nisi a matre nutrimentum accipere queat, necesse est, ut plus generet sanguinis, quam proprio corpori opus est.

§. II.

Non vero semper, nec omnibus contingit foetum in utero gestare: Conditor ergo noster artificiosissimus sexui huic talem largitus est constitutionem, ut extra statum graviditatis sanguis superfluous per uterum evacuari possit.

§. III.

Puellae juniores, quarum adhuc augmentum capit & crescit corpus, nullos patiuntur menses, cum & ad nutritionem & augmentationem earum corporum omnis generatus sanguis impendatur. Crescentibus vero annis, atque augmentatione cessante, sanguis corpori superfluous, atque molestus fieri incipit, hinc exitum per locum commodum molitur.

§. IV.

Observarunt quidem nonnulli hunc mensium fluxum in puellulis paucos annos, imo menses natis, sed hi casus sunt extraordinarii & rarissimi, qui regulam non faciunt; ordinarie enim menses circa annum 12. seu 14. eruptionem moliantur.

§. V.

Est igitur menstrua sexus sequioris purgatio profluvium sanguinis puri per uterum ejusque vaginam singulis mensibus contingens, in subjectis generationi ratione aetatis aptis, a nimia sanguinis quantitate per uterum exitum affectante dependens, atque corpus ab innumeris malis praeservans.

§. VI.

Contingit etiam non paucis viris, ut singulis mensibus per ejusmodi sanguinis evacuationem purgentur, hoc solummodo discrimine, quod sanguis non evacuetur per genitalia, sed per posteriora ex venis haemorrhoidalibus ductis. Haec vero evacuatio occurrit plerumque in subjectis plethoricis & foemininae texturae.

§. VII.

Magna fuit inter veteres, & recentiores disceptatio, num menses ex utero, an vero ex ejusdem vagina erumpant; cum vero observationes fide dignae adsint, quae profluxum sanguinis & ex utero, & ejusdem vagina testentur, ex utroque illum statuere licebit, cum & vagina & uterus suis instructus sit vas, quae aperturam, & hanc subsequenter sanguinis effluxum pati queunt.

§. VIII.

Singulis mensibus cur prodeat sanguis, variae circumferuntur sententiae; alii enim a lunae phasibus derivant; alii archeum tanquam causam allegant, alii aliam causam quaerunt; sed cum consensus lunae & menstruae purgationis nondum sit demonstratus, neque unquam ostendi queat, archeus vero nihil nisi speciosum nomen sit: potius in evidentiori causa acquiescendum puto, nempe in quantitate sanguinis nimia singulis mensibus accrescente, sic si v. g. per menses effluunt sanguinis librae duae, hic sanguis fuit superfluous, hinc a natura expulsus, qui per mensem in corpore iterum generatur, ideoque exitum rursus affectat: si ergo justa adest quantitas, menses prorumpunt, hocque confirmat, quod non singulae uno eodemque purgentur tempore, quod tamen necessario fieret, si a lunae phasibus dependeret; deinde quaedam citius, quaedam vero tardius purgentur; porro quod gravidae & lactantes ab hoc fluxu ordinarie sint liberae; in illis enim nimia sanguinis quantitas ad nutritionem foetus abit, in his vero multum lactis per mammas emulgetur, deinde post graves exantlatos morbos menses non fluunt: ex quibus concludere licet, nihil causam eruptionis esse, nisi quantitatem nimiam.

§. IX.

Non vero omnibus subjectis foemininis profluunt menses, sed tantum generationi aptis. Puellulae enim, uti antea dictum, juniores ordinarie non purgantur, ob rationem antea allegatam; ita nec foeminae ad senectutem devenientes. In his enim fibrae duriores evadunt, hinc vascula teneriora sanguini

guini non admittunt aditum, nedum effluxum concedunt. Incipiunt vero menses ordinarie fluere circa annum 12. vel 14. & desinunt circa 48. vel 50. in aliis vero citius, in aliis tardius incipiunt, vel desinunt, ob diversam corporis dispositionem & texturam, vivendique rationem. Sic interdum hic fluxus differtur ad annum 20. 24. & ultra; interdum durat ultra 50.

§. X.

Non vero commodior huic evacuationi erit locus, quam per uterum; Uterus autem est corpus istud pyriforme, in infimo ventre inter vesicam urinariam & intestinum rectum hærens, constans substantia musculosa, vasculoso-membranacea, foetui à conceptione ad partum usque domicilium largiens.

§. XI.

Uterus innumeris vasculorum ramificationibus est refertus, quæ extra graviditatis statum valde sunt contorta, ut in gravidis in tantam molem extendi, foetuique justum spatium largiri queant. Si igitur sanguis ex aorta descendente, in foeminis ordinarie majori, quam in viris, ad tortuosa uterina vasa defertur, ob nimiam à corde distantiam justa vi non propellitur; hinc sensim stagnare incipit, & sic vasorum tunicam nerveam irritat, hincque spasimum concitat, qui sanguinem stagnantem ad superiora nempe cor projicit, quod deinde sanguinem per totum corpus fortius propellit, & talem in utero aperturam efficit.

§. XII.

Quantitatem sanguinis per menses excreti accurate determinare est impossibile, variat enim pro diversitate subjectorum, & vitæ generis. Plethoricas plus excernere, quam exsanguis, & ratio & experientia dicunt; ita etiam ratione vitæ generis virgines rusticæ, aliæque assiduis laboribus deditæ ob transpirationem majorem minus excernunt sanguinis, quam quæ lautius epulantur, & corpus majori motu non exercent.

§. XIII.

In justa igitur hac mensium evacuatione omnis fere sexus sequioris salus unice consistit; videmus enim, quam primum hæc cessat, multorum morborum inde evenire farraginem, quam diu vero fluunt menses, foeminæ a morbis præsertim chronicis liberæ permanent, sic enim justa sanguinis quantitas, hinc & liberior ejusdem circuitus, in quo sanitas & vita consistit, conservatur.

§. XIV.

Sanguis hic, per menses evacuari solitus, in statu naturali est purissimus, & talis, qualem ex vena secta effluere videmus: errarunt ergo maxime Veteres, qui statuebant, venenatum esse, idque ob hanc rationem, quia in corpore retentus innumera symptomata instar fere veneni producere soleat, non attendentes, quod demum per stagnationem talem corruptivam naturam induat. Hinc vulgus adhuc quoque virginibus & foeminis menstruatis interdicit, ne accedant ad flores v. g. ad acetum, mustum fermentans, aut spiritus chymicos &c. credunt enim exhalationes harum personarum venenatas, & hinc dictas has res corrumpere, quod tamen, ut jam dictum, falsissimum est.

§. XV.

Facillime vero hic mensium fluxus per res varias & imprimis non naturales sisti potest; quod quotidiana experientia testatur. Quod si hoc fiat, varia & innumera oboriuntur mala, tunc enim sanguis in toto corpore abundat; stagnationes & obstructions in visceribus progignit, tonum cordis & fibrarum aufert, ideo de mensium fluxu impedito nunc agemus, quod erit

C A P U T II.

De Mensium fluxu inhibito.

§. I.

JAm de mensium statu naturali actum, cum vero contraria juxta se posita magis elucescant, de eorum statu præternaturali, & in specie de eorum fluxu impedito agere non incongruum erit. Est enim hoc malum virginibus familiarissimum, hinc sui considerationem maxime exposcit, cum ad reliquos virginum morbos plerosque concurrat. Non semper autem totalis adest mensium suppressio, sed interdum saltem imminutio, ubi symptomata mitiora occurrunt.

§. II.

Mensium suppressio est, quando virgines menses jam aliquoties expertæ sunt, per varios autem diætæ errores commissos iterum emanere; eruptio vero eorum inhibita dici potest, si menses nondum fluxere, ob redundantiam tamen sanguinis nimiam exitum affectant, sed non inveniunt.

§. III.

Si ad causas menses obstruentes respiciamus, multas certe inveniemus; à levissima enim causa circuitus sanguinis in foeminis, præsertim quæ teneioris sunt texturæ, pervertitur, & sic effluxus sanguinis per uterum impeditur. Sic ex rebus naturalibus symbolum suum huc confert naturalis vasorum uterinorum angustia, quæ imprimis adest, si virgines nondum expertæ sunt menses; hæc igitur sanguini aditum ad uterum intercludit; temperamentum sanguineum, si præsertim sit nimis plethoricum, plethora enim præsertim sanguini liber circuitus adimitur, hinc obstructions fiunt, imprimis vero in iis partibus, quæ longe distant a corde, multisque minoribus vasculis instructæ sunt, uti est uterus: ætas junior, & ad senectutem properans; in hac enim fibræ sunt duriores, sanguini affluentem cedere nescientes, in illa vero vasa justo sunt angustiora.

§. IV.

Plerumque tamen ex vitio diætæ hoc malum sibi accersunt virgines; sic ex rebus non naturalibus menses sistere potest aer imprimis frigidior & humidus, tempore mensium, præsertim ad uterum, improvide admissus, item si pedes nudi huic exponuntur; constringit enim poros, & sanguinem ab exterioribus ad interiora propellit, & ad stagnationem disponit. Novi virginem rusticam, quæ tempore mensium per prata pluvia inundata, aëre frigidiori existente, nudis ibat pedibus, ab hoc statim emanere menses, & virgo amaurosi correpta fuit. Aer vero calidior sanguinis circuitum augendo transpirationem promovet, hinc serum dissipat, unde san-

guis ad motum¹ sit ineptus. Cibi acidi, visceri, frigidi, & flatulenti sanguinis fluxilitatem cohibent, & sic hoc malum praesertim in dispositis producant, tales sunt v. g. placentae, panis recens coctus, & nimis humidus, fructus horaei, lacticia, pisces imprimis sale conditi, uti haleces, abusus aceti: pertinent huc etiam adstringentia imprudenter devorata, uti est creta, terra &c. Potus si negligatur, crassus ingeneratur sanguis, praesertim accedente quiete; potus frigidus, post incalescentiam praesertim statim haustus, sanguinem in toto corpore ad coagulum disponit, & obstructions omnium viscerum efficere potest. Quies nimia sanguinis circulum tardiores reddit, hinc omnes secretiones & excretiones impediuntur; idem sentiendum de nimio somno. Vigiliis longius protractis fibrarum destruitur robur & tonus, unde stagnationes eveniunt. Maximum vero momentum addunt animi pathemata, quae saepe eodem momento fluxum sanguinis sistere valent; sic terror sanguinem ab exterioribus ad interiora propellit spasmodice, tristitia vero diuturnior imprimis omnibus visceribus atoniam inferre solet, hinc motus humorum fit languidior, inde stagnationes & obstructions omnium viscerum.

§. V.

Intercipitur itidem hic fluxus a causis praeternaturalibus: sic interdum, quod tamen rarissimum, membrana orificium uteri vel internum, vel externum obducit, ut via ad uterum omnis pracludatur, hinc necessario obstructi sunt menses; nonnunquam latera pudendorum a vulnere, vel ulcere male tractato coalescunt, hinc menses effluere nequeunt. Si graviores morbi sunt praegressi, qui sanguinem corpori suffurati sunt, menses emanant, necesse est; deficit enim causa mensium, nempe quantitas sanguinis &c.

§. VI.

Non statim vero, si menses non singulis profluunt mensibus, dicendum est, quod virgo laboret obstructione mensium scilicet morbifica; reperiuntur enim virgines, quibus vel ob dispositionem naturalem, vel vivendi rationem menses vel non singulis mensibus, vel parcius, vel plane non fluunt, quod tamen rarissimum; item menses ad aliquod tempus desinunt, si virgines gravioribus decubere morbis, v. g. febre continua, vel intermittente, morbis chronicis, hectica &c. Sed demum saltem, quando adsunt signa mensium fluxum prohibitum indicantia; qualia sunt pallor faciei, dolor capitis & lumborum, lassitudo artuum, respiratio difficilis, imprimis sub ascensu ad acclivia, tensio & inflatio praecordiorum, palpitatio cordis, vertigo, tinnitus aurium, tristitia &c. praepriis si contingunt eo tempore, quo menses erumpere alias solent.

§. VII.

Si malum hoc diutius duraverit, curatu est difficillimum, gravior enim subinde evadit obstructio non solum vasorum uterinorum, sed & omnium viscerum, hinc secretiones in corpore impediuntur, & impuri nascuntur humores: si vero brevius adfuerit, facilior est reseratio. Cum gravissima mala cachexiam v. g. chlorosin, hydropem &c. inducere soleat, negligendum minime est, sed quantocyus aptis remediis menses sunt provocandi. Quia & in gravidis menses sistuntur, meretriculae hinc gravidae saepius aegras se pronunciant, & de obstructione mensium conqueruntur; probe igitur caveat sibi Medicus, ne praegnantem pro obstructione mensium

laborante habeat, & sic propinatis emmenagogis foetum perdat.

§. VIII.

Variae sunt causae, a quibus malum hoc dependet, ideoque remedia hic proficua variant pro diversitate causarum. Sic si menses non fluant ob defectum sanguinis post graviores exantlatos morbos, emmenagoga minime sunt propinanda, sed potius analeptica, sive reficientia, & lauta diata est instituenda, quae sanguinem deperditum iterum corpori ingenerat; sanguis enim deficit hic, non abundat, ergo eum propellere minime convenit. Si obstructionis causa sit nimia vasorum uterinorum angustia, quae ut plurimum in virginibus, menses nondum expertis adest, hinc tot tantaque eas corripiunt mala, optima sunt balnea emollientia, & aperientia, nec non suffitus tales; balnea vero possunt esse vel naturalia, vel arte facta ex appropriatis uterinis & emollientibus concinnata. Infarctum vero viscerum, & imprimis uteri tollunt aperientia, humectantia, incidentia, purgantia, hinc optime conveniunt infusa & decocta in sufficienti quantitate assumpta, ex herbis & radicibus aperientibus combinata, haec enim ratione aquae humectant, & imprimis si sunt calida aperiunt; ratione salium incidunt & aperiunt: si purgandi simul sit intentio, addi possunt folia senaria, rhabarbarum &c. & sic pluribus indicationibus satisfieri potest. Optimum vero remedium sunt thermæ, item in hoc casu conjugium legitimum; si enim fecundetur uterus, omnia ejus vasa expanduntur, ut sic transitus sanguinis per illa facilius evadat. Clausuram non nisi chirurgica auxilia tollunt, & quidem non semper; membrana si adsit, provide incisione facta tollenda. Ad imminuendam sanguinis quantitatem commode administratur Venæ Sectio: sanguine enim superfluo per hanc remoto, liberior deinde ejus fieri potest circulatio. Derivationis vero gratia in pedibus, imminuendi autem ergo in aliis quoque locis administranda. Si itaque quis curam rite instituere velit, convenit ante omnia primas vias ab impuritatibus repurgare, deinde humectantia, aperientia propinare, & sic probe humoribus atque viis dispositis demum emmenagoga proficua sunt.

§. IX.

Cum mensium fluxus facillime ab omnibus fere rebus, uti jam dictum, inhiberi possit, virgines probe sibi caveant ab omnibus inter causas non naturales recensitis. Sic aerem frigidiores & humidiores, praesertim tempore mensium, quovismodo evitent nec admittant ad infimum ventrem. Novi exemplum virginis, quae imminente eo tempore quo menses fluere solebant, pavimento frigido podice nudo aestate infedit; & inde in diuturniorem mensium deficientiam collapsa gravissima symptomata, chlorosin & distensiones artuum convulsivas, experta est. Potus frigidus post incalescentiam exulet: temperatum vero commendatum sibi habeant virgines: motum itidem non negligant, sed eo corpus frequenter exerceant, optima enim sicut in omnibus morbis potus & motus sunt remedia praeservatoria, ita & in hoc malo: Animi pathemata imprimis graviora, & inter haec quam maxime iram, terrorem, & tristitiam ceu pestem fugiant.

§. X.

Cognito jam mensium statu naturali & praeternaturali, considerabimus quoque mala, quae statum praeternaturalem presso pede subsequi solent, inter quae

quæ merito primum obtinet locum Chlorosis, seu febris alba.

CAPUT III.

De Chlorosi.

§. I.

Chlorosis est cacochymia virginea, cum coloris vivi & naturalis in pallidum & foedum mutatione, nec non languore virium, artuumque lassitudine, respiratione difficili, præcordiorum anxietate, cordis palpitatione, sæpius calore lento, pulsu frequenti & debili, aliisque gravissimis symptomatibus conjuncta, a mensium prurptione inhibita originem ducens. Vocatur a Latinis febris alba, item amatoria, quia virginibus viro maturis, & amori deditis plerumque contingit: interdum etiam icterus albus, quia totum corpus, uti flavus icterus flavo colore, ita hic foedo & pallido tingere solet, Germ. vocant, *die bleiche Sucht*.

§. II.

Causa hujus cacochymiae est obstructio mensium, five eorumdem impedita eruptio: obstructis enim sic uteri vasis, sanguini via ad uterum præcluditur, hinc nimia ejus oritur abundantia, ergo humores aliorum propelluntur, nempe ad alia viscera, ibique stagnationem efficiunt, unde necessario secretionibus turbantur, & humores in toto corpore fiunt impuri, qui postea ad ambitum corporis delati colorem ejusmodi foedum efficiunt, qui color de humoribus quoque impuris testari potest; quales enim humores, talis color, uti in ictero id videre est.

§. III.

Causas suppressionis mensium jam superiori capite fusius perscrutati sumus, ut paucis tamen eas hic tangamus, mensium eruptionem impedit naturalis vasorum uterinorum angustia, junioribus puellis familiaris, & sic vitium hæret in partibus solidis; in fluidis vero sæpiissime malum est quærendum, quando nempe humores viscosi, lenti, obstructionem viscerum, humorum depurationi dicatorem, efficientes sunt in corpore. Hanc vero humorum *συσπασίαν* efficiunt res non naturales sinistre usurpatæ; sic aer frigidus & humidus id præstat, potus acidi, & nimis frigidi immoderate hausti, præcipue vero fructus horæi, præsertim acidi, nimia copia ingestæ, item abusus acetariorum, quibus maxime virgines delectari solent, nec non potus laudabiles in parca quantitate assumpti, item varia medicamenta adstringentia, quibus virgines ad colorem pallidum sibi conciliandum abuti solent, talia v. g. sunt creta, terra, gypsum, cineres, frumentum, calx &c. nam juxta illud:

Palleat omnis amans, color hic est aptus amanti,
quo pallidiores eo pulchriores se putant; symbolum suum huc quoque confert quies nimia, cui virgines plerumque sunt deditæ; hæc enim transpirationem impediendo humores impuros, crassos, & consequenter viscerum obstructiones gignit. Idem quoque de reliquis diætæ erroribus sentiendum.

§. IV.

Tanta humorum in toto corpore *συσπασία* præsentente, sanguinis circuitus per totum corpus turbetur & pervertatur necesse est, unde gravissima sympto-

mata conjuncta semper videre licet: adest nempe molesta hypochondriorum tensio, cordis palpitatio, languor virium, respiratio difficilis &c. quæ vero omnia ex perversa sanguinis crasi ejusdemque circuitu pravo deduci facile queunt.

§. V.

Præter hæc plura adhuc malum hoc concomitari solent phænomena, ex quibus ejus præsentiam arguere licet; sic statim calor vividus & naturalis mutatur in foedum & pallidum, menses obstruuntur, languor adest virium, lassitudo omnia occupat membra, totum corpus fit subtumidum, pedes oedematosi fiunt, ut digitus, si eo prematur pes, vestigium sui relinquit; sanguis ex vasis emissus serosior est; virgines tandem melancholicæ evadunt, quales antea minime fuere; affliguntur pica, aliisque gravissimis malis, hypochondriacis alias familiaribus.

§. VI.

Malum hoc, si imprimis sit inveteratum, chronicum esse solet; Medicus ergo illius curationem suscipiens debitum sibi exposcat tempus. Cum tota corporis temperies sit perversa, malum minime est negligendum, facillime enim in gravissima degenerat mala, v. g. in cachexiam, hydropem; sterilitatem quoque infert: humores caput petentes insaniam & furorem inducere queunt, unde metus *αὐτοχρησίας*: si vero Medicus profluxum mensium provocare valuerit, salutis spes est, sin minus, malum est deterius.

§. VII.

In curatione igitur hujus mali humores in toto corpore peccantes ante omnia diligenter præparentur & eliminantur, quod præstant 1. lenia purgantia, iterata vice propinata, mixta cum attenuantibus & incidentibus; ut & emetica, nec non clysteres. 2. V. S. quæ, ut purgantia impuritati humorum, ita hæc plethoræ medetur; hic enim affectus cum ex mensium eruptione prohibita provenire soleat, sanguis abundet necesse est, qui non melius, nisi per Venæ Sectionem evacuatur. Hinc ipse HIPPOCRATES jam suo tempore Venæ Sectionem *Libr. de Morb. Virg.* commendavit, ubi, ut restituantur, inquit, curationis ratio sic tenenda, ut cum nihil interpellet, protinus sanguis detrahatur. Videndum vero semper, uti ubique, ita & in hoc affectu, num contra indicans illam prohibeat, an non scilicet vires jam tum nimium sint debilitatæ, vel num adsit nimia ad hydropem & cachexiam dispositio. Si enim hoc fuerit, balsamicæ sanguinis particulæ jam nimis sunt suppressæ; hinc potius dissuadenda, quam suadenda. 3. Lenia diaphoretica, quæ serum stagnans in poris corporis disjiciunt, & sic per cutis spiracula eliminant, hinc ipsas quoque viscerum obstructiones respiciunt, quod maxime necessarium est: viscerum enim, & imprimis uteri vasa quantocyus referanda, ut menies eo liberius effluere queant; in horum enim fluxu libero unica hoc malo laborantium salus existit. Ut hoc consequamur, adhibenda sunt aperientia uterina, qualia sunt infusa & decocta theiformia, ex herbis & radicibus aperientibus combinata, nec non thermæ, atque hæc aquosa omnibus siccis remediis anteposenda merito, ratione enim aquæ diluunt, ratione vero salium aperiunt & incidunt, hinc omne punctum absolvunt; interna hæc, ut felicius operentur, adjuvanda externis, v. g. balneis emollientibus & aperientibus, in superiori capite satis commendatis. Optimum quoque est remedium, si fieri possit, si legitimum ineat conjugium talismodi ægra, & veneri litet; quod & di-

vus senex Cous *Libr. de Morb. Virg.* commendat: ego, inquit, autor sum, ut virgines, hoc malo (chlorosi) affectæ, quam celerrime cum viris jungantur, iisque cohabitent; si enim conceperint, convalescent. Sit vero moderata venus, ne vires jam tum debiles per frequentiore concubitum omnino dejiciantur, & sic pejor fiat status.

§. VIII.

Paucissimi, imo fere nulli reperiuntur morbi, qui tot tantisque stipati sunt symptomatibus, quam chlorosis, omnia enim hic fere concurrunt: convenit ergo quam primum ad ea respicere; sublata equidem causa primaria cessare, atque plerumque sponte evanescere solent, at cum sæpius tanta sint, ut mors præ foribus videatur, nisi cito avertatur, hinc de illis ipsis prius mitigandis cogitandum, quam causa prima auferri queat.

§. IX.

Plerumque, imo semper, præsertim in majori gradu, affectui huic conjuncta est palpitatio cordis, quæ non sine metu mortis interdum est, indicat enim sanguinis circulum depravatum, vel etiam polyposam in corde hærentem substantiam, quæ vitam facillime adimere potest, nisi cito tollatur. Generatur vero hæc, quando sanguis, exitum per uterum affectans, eum non invenit, tunc ad principium suum, nempe cor & partes vicinas regurgitans, ibidem stagnationem molitur, & stasim minuitur, hinc cordis fibras irritat, & ad anomalos ejusmodi motus concitat. Facile hoc symptoma dignoscitur, patet enim tactui, si manus admoveatur pectori, vel etiam ex sola ægræ relatione. Quia autem tam nobile viscum est afflictum, malum minime est contemnendum; differt tamen periculum pro palpitationis gradu: quam citissime ergo ad symptomatis hujus vehementiam mitigandam ad congrua remedia confugere convenit. Proderunt vero hic optime spiritus roborantia, & flatus circa præcordia, nec non grumosum sanguinem discutientia, aliaque cordialia, quæ apud Practicos videre licet: non vero interim omittenda sunt aperientia, emmenagoga, causam primam tollentia.

§. X.

Comitatur etiam chlorosin melancholia, cum insigni tristitia, & metu *αυτοχρησίας*. Causantur hanc, uti antecedens symptoma, humores crassi, a mensium eruptione impedita tales reddit. Symptomatis hujus præsentiam insignis indicat tristitia, cum amore solitudinis, aliisque melancholiæ signis: si major adsit gradus, horrendis cogitationibus, spectrisque vexantur, adeo, ut, laqueos sibi parent, in puteos sese præcipitent, vel alio modo violentas manus sibi immet ipsis inferant. Quia in hoc affectu simul animus laborat, hinc magis moralis, quam physica convenit curatio; quærant nempe ejusmodi ægræ consuetudines & societates personarum gratarum & hilarium, quæ ipsas ab ejusmodi tristibus cogitationibus commodis & suavis persuasionibus dehortentur: convenit tamen bona quoque victus ratio, quæ virgines recreat, item medicamenta roborantia, cordialia nempe & cephalica &c. Si melancholia adsit in majori gradu, ægræ solæ non sunt relinquendæ, verendum enim est, ne se ipsas morti tradant.

§. XI.

Si humores caput petant, cephalalgia sæpius immanis ægras affligit, quæ pro diversa humorum qualitate & motu diversa quoque esse solet. Sic humores acres dolores efficiunt lancinantes & rosfivos, serum vero, quantitate peccans, dolorem infert gra-

vativum, & sic in reliquis. Dolorem ipsa sentit sufficienter ægra, ut itaque signis non sit opus. Per se magis molestus, quam periculosus est, & prognosis ex morbo ipso aliisque symptomatibus junctis formanda. Præter universalia itaque & causam removens conveniunt topica, frontalia, v. g. pro doloris ratione varianda, masticatoria, sternutatoria, nec non pro rei exigentia cucurbitulæ nuchæ, vel brachiis appositæ.

§. XII.

Si humores ad inferiora ferantur, & serum a sanguine nimium secernatur, stagnare illud incipit in vasis lymphaticis, vel si extravasetur & in poris resideat, tunc tumores pedum oedematosi oriuntur, in quibus si digitus imprimatur, vestigium sui relinquit. Commendantur ad hos curandos frictiones, lotiones, nec non ligaturæ, fasciis longis institutæ, initium ducendo a digitis pedum, & sursum pergendo, ad serum in poris stagnans discutiendum & removendum; positus pedum convenit æquabilis.

§. XIII.

Admodum molestum, & non innoxium solet interdum adesse symptoma, quod picam vocare consuevere: Dicitur ab ave Pica, quam hac affligi credebant nonnulli, vel ob varietatem pennarum, quia ægræ quoque tam varias res appetere solent: quidam vocant etiam malaciam, nonnulli vero distinguunt, malaciam vocando, quando ægræ alimenta quidem, sed in nimia & incredibili quantitate devorant; picam vero appellant, quando res absurdissimæ & alias noxiæ sæpius tamen innoxie assumuntur. Sic prostant exempla, quod cretam, calcem, stercora, carnes crudas, insolitam zingiberis quantitatem deglutierint, vel quoque chirothecas, interdum nudos pedes & brachia aliorum dentibus apprehendere appetunt.

§. XIV.

Est autem Pica depravatus appetitus, quo res insolitæ absurdæ magnopere desiderantur, a vitiatis ventriculi humoribus & phantasia læsa dependens. Causa hujus mali est lymphæ gastricæ acor præternaturalis a mensium suppressione, qua vitatur tota humorum massa, proveniens. Non vero tantum corpus, sed & mens ipsa in pica laborare videtur, appetunt enim res tam absurdas tam avidissime, ut, si illas non nanciscantur, sibi moriendum esse credant, quas tamen sanæ mentis compos nunquam appetet, sed potius averfabitur. Provenit etiam ab *ἀπώσσει διαβολίας*, quæ sexui sequiori alias familiarior esse solet, hæc vero magis augeri potest a vitiatis humoribus, animæ enim operationes a corporis & humorum temperie multum dependere testatur HIPPOCRATES *Libr. I. de diætâ*: animæ, inquit, temperamentum sapiens quoque existit, si corpus fuerit sanum, nec a morbis perturbetur. Picam quivis cognoscere potest, patet enim statim ex ægræ ipsius relatione: per se quidem nihil mali portendit, & humoribus vitiatis per vomitionem exclusis statim cessat, quia tamen res absurdissimas, & nonnunquam noxias in nimia quantitate devorare solent, humorum crasis magis magisque subinde depravatur, & sic augetur malum.

§. XV.

Cum prava adsit in hoc malo humorum dispositio, ideo hæc ante omnia corrigenda venit, quod præstant universalia; ad repurgandas igitur primas vias vomitoria & purgantia propinanda, caute tamen: primis deinde viis sic purgatis adhibenda alterantia,

terantia, stomachica, non omiffis, quæ mensium eruptionem promovent, hanc enim impeditam hoc malum consequi consuevit. Jam antea dictum, quod & mens in hoc malo laboret, ideo ad hanc curandam debita remedia adhibenda sunt; ἀρρωστία δια-
volas ab humoribus pravis quodammodo augeri constat, eorum igitur correctio est instituenda; deinde quoque non erit de nihilo curatio moralis, si scilicet à prudenti Medico istiusmodi affectu laboranti dissuasiones proferantur, & mala ex hisce absurdis assumtis evenientia proponantur, & sic ægram ab assumptione eorum serio dehortetur ipse, quod & parentes & amicæ facere queunt. In diætâ ægra probe sibi caveat ab omnibus rebus, quæ humores impuros reddere queunt.

§. XVI.

Notandum, Chlorosin cum suis symptomatibus stipatam plerumque quidem virgines, quæ nondum menstruam purgationem expertæ sunt, infestare; dum enim nobiles evadunt, sanguis corpori onerosus fieri incipit, hinc exitum molitur per uteri vasa, quæ antea nondum aperta erant, hinc difficilius est eorum apertio; nonnunquam tamen & adultioribus evenit; etsi enim menses jam fluxerint, per diætæ errores commissos facile sistuntur, unde idem malum & in his oboriri potest.

C A P U T I V.

De Suffocatione Hysterica.

§. I.

C Ontingit hic morbus, uti in principio diximus, non tantum virginibus, sed & interdum foeminis conjugatis, frequentius autem viduis junioribus; in his enim sanguis plerumque abundat, cogitationes venereæ non desunt, sed crebrius eas divexant, dulcisque mariti memoria sæpius obvenit: sed virginibus adultioribus, quæ conjugium magno desiderio exposcunt, sanguineique & calidioris sunt temperamenti, imprimis si sint moniales, & castitatem vitæ voverint contra temperamenti dispositionem, non infrequens esse solet, hinc de illo in hac dissertatione agere non erit incongruum.

§. II.

Est vero suffocatio hysterica morbus impetuofus cum subitanea corporis dejectione, omniumque actionum, imprimis respirationis, læsione conjunctus, à spasmodica partium nervosarum contractione ortus. Varias habet hic affectus appellationes; alii enim vocant suffocationem hysterica, alii passionem hypochondriacam, alii aliter, & id ob hanc rationem, quia de loco primario affecto inter se non conveniunt; quidam enim uterum plane infontem proclamant; alii vero omnem culpam in eum conjiciunt; alii ob respirationem fere denegatam pulmones accusant, alii universum genus nervosum. Si vero rem penitus intueamur, videbimus plerumque affectus hujus fontem & originem esse ex utero, quamvis & ex aliarum partium nervosarum spasmodica contractione per consensum fieri possit, sed tunc potius suffocatio hypochondriaca, quam hysterica denominanda venit.

§. III.

Causa hujus mali proxima est spasmodica partium nervosarum contractio, quæ præter alias partes or-

gana imprimis respirationi dicata, diaphragma nempe & musculos intercostales, ipsa quoque bronchia, ita constringere solet, ut metus suffocationis adfit, hinc Germanice proferre solent: Es wäre / als ob man ihnen die Kehlen zuschnieren wollte / item es wäre ihnen / als wenn ihnen ein Ball im Halse steckte / hinc putant mulierculæ, uterum ex sede sua ordinaria discedere, & superiora nempe fauces petere, hinc dicunt: die Mutter steigt mir auf. Spasmodica vero hæc contractio in ventriculo & intestinorum volumine potissimum existit & ob consensum, quo cum aliis omnibus in toto corpore partibus gaudet, etiam alias partes longe remotas afficit. Hanc autem contractionem efficiunt sanguinis & humorum stagnationes primo in uteri vasis, deinde in mesaraicis.

§. IV.

Si sanguis vel lympa genitalis in quantitate peccat, facile qualitatem quoque peccantem induunt, quantitas enim nimia turbat justum circuitum humorum, hinc stagnationes efficit, sanguis vero & liquor genitalium stagnantes corrumpuntur, & imprimis hic, qui, si corrumpatur, pessimam induit naturam. Quantitate peccant nimia, si subjectum alias sit plethoricum, & insuper cibis ἐυχύμοις fruatur; qualitatem vero calidiorem & acrem inferunt temperamentum calidius, ætas florida, vegeta & adultior: ex rebus non-naturalibus aëris temperies vel nimis frigida, vel nimis calida, aër itidem variis effluviis suaveolentibus & penetrantibus refertus talem irritationem efficit, cibi & potus dulces, flatulenti, fermentescibiles, calidi, quies nimia transpirationem impediens, plethoram vero promovens & quantitatem & qualitatem vitiat; item somnus nimius; animi pathemata vehementiora, v. g. gaudium, terror, ira, hæc enim totum corpus alterare valent, hinc & materiam in utero hærentem, quæ jam tum peccavit, in motum concitant; pertinet etiam huc ardens veneris desiderium, item suppressio mensium. Ex rebus præternaturalibus est intemperies humorum nimis calida & acris, item flatus peregrini in utero contenti.

§. V.

Hic affectus non tantum præsens, sed & imminens cognosci potest. Imminentem indicant totius corporis lassitudo, crurum torpor, respiratio brevis & crebra, murmura in abdomine, cordis palpitatio, pulsus imminutio, aurium tinnitus &c. Præsentem vero ostendunt signorum imminenti augmentum, lipothymia, faucium constrictio, respirationis maxima difficultas, motus & sensus ablatio, totiusque corporis refrigeratio; in graviore statu instar mortuarum; per aliquot horas, imo dies jacent, ut pro mortuis habitas quasdam sepultas fuisse, exempla testentur. Quia autem & cum aliis affectibus similitudinem quandam habet, hinc ab aliis probe distinguendus: sic syncope distinguitur sudore frigido, qui syncopticos occupat, in suffocatione vero abesse solet; apoplexiam vero discernit nimia membrorum resolutio, & sensus & motus ablatio, quæ quidem in graviore gradu & hic contingit: optime vero dignoscitur in eventu, apoplexia enim relinquit paralyfin, noster vero affectus minime: epilepsiam ostendunt convulsiones & spuma ante os; lethargum vero febris huic conjungi solita; a morte ipsa discernitur, si speculum ante nares ponatur, quod, si adhuc vivat, a respiratione vapore obducitur, vel floccis lanæ carminatæ ad nares positæ, vel etiam sternutatoriis naribus inflatis. Ne vero signa hæc fallant, ante tres, vel quatuor dies ad sepulturam non

non est progrediendum, non nullæ enim post aliquot dies, imo etiam sepultæ revixisse leguntur.

§. VI.

Dantur in hoc affectu gradus; hinc pro varietate graduum variat quoque prognosis. Primus gradus est, si levis sit, & cito solvatur, respiratione nondum oppressa: secundus est, quando respiratio fit difficilior, atque sensus & motus imminuuntur: in tertio vero gradu instar mortuarum jacent sine respiratione notabili, atque sensu & motu omnino orbatae sunt. Sic ergo in genere quo major est gradus, eo majus portendit periculum; a semine corrupto periculosior est, quam a sanguine, quo subtilior enim & nobilior est liquor, eo deteriorem induit naturam, si corrumpatur. HIPPOCRATES *V. aph. XXXV.* Si sternutatio superveniat hystericae strangulationi, bonum; ostendit enim robur naturæ, & materiam dispellit. Alia itidem est simplex, alia symptomatibus stipata; hæc periculosior est illa.

§. VII.

Curatio variat pro diversitate causarum, symptomatum, nec non temporis; aliter enim est instituenda tempore paroxysmi, aliter extra eundem. In genere tamen videndum, ut quantocyus constrictio sicuti omnium partium spasmodica, ita præcipue faucium strangulatio tollatur, vaporesque peregrini irritantes eliminentur. In paroxysmo conveniunt aperientia, discutientia, antispasmodica, uterina, sale volatili urinoso pollentia, ut spiritus salis ammoniaci, spiritus cornu cervi succinatus, spiritus fuliginis &c. item carminativa & aromatica. Externe adhibenda revocantia, excitantia, v. g. acclamationes, frictiones membrorum, & præprimis pudendorum, evulsio pilorum ex vulva, & omnia, quæcunque sensus fortius afficere queunt, ut sunt graveolentia, v. g. asa foetida, corium accensum, pennæ accensæ, aliaque hujus tenoris. Extra paroxysmum profunt, quæ causas respiciunt: si igitur semen in matrice abundans stagnet & corrumpatur, hujusque mali causa existat, tunc ejusdem correctio & imminutio est tentanda per evacuantia, nec non diætam tenuiorem & refrigerantem, si vero fieri possit, venus legitima est suadenda. Si sanguinis menstrui suppressio in causa sit, sanguinis fluxum restituentia in usum vocanda; convenit scilicet purgatio, item V. S. & tunc menses pellentia. Si a flatibus uteri proveniat malum, conducunt flatum discutientia, v. g. clysteres ex herbis uterinis, & carminativis concinnati. Si a suaveolentibus, v. g. moscho, ambra, zibetho &c. dependeat, statim sunt removenda, & aer purus admittendus.

§. VIII.

In diætâ ægra probe sibi caveat, ne peccet in usu sex rerum non naturalium. Fugiat ergo aërem intemperatum, & imprimis frigidum, si sit simul humidus; cibus & potus ne sit nimis calidus, hinc abstineat a potu vini, & omnibus aromatibus acrioribus, victum potius tenuem, & frigidum eligat; motus minimè est negligendus, animi pathemata, vehementiora præsertim, exulent quæcunque, excretiones debito modo sese habeant: odores naturæ suæ inconvenientes & inimicos quoque modo evitet.

CAPUT V.

De Furore Uterino.

§. I.

FUror uterinus est nimium ad veneris usum desiderium cum delirio & pruritu uteri, ab ejusdem humorum intemperie dependens. Vocatur a non nullis etiam amor insanus, quia ejusmodi virgines amori maxime sunt deditæ, ita ut ob cogitationes venereas continue affligentes recta ratione frui amplius non valeant: item nymphomania, nomine a nymphis & delirio isto, mania dicto, desumpto. Adest in hoc malo delirium, seu phantasiæ & ratiocinationis depravatio, sed sine febre, & versatur tantum circa intensum veneris desiderium; circa reliqua ratiocinatione salva manente.

§. II.

Causa hujus mali proxima est humorum in utero stabulantium intemperies, & quidem maxime calida & acris, quæ partes muliebres subinde vellicat & irritat, hinc non nisi de rebus venereis cogitationes fovent ejusmodi virgines, quæ efficiunt, ut mentis abalienatio circa veneris desiderium contingat. Intemperiem vero hanc efficiunt ex rebus naturalibus itidem ætas florida, & generationi jamjam apta; temperamentum sanguineum, calidius, biliosum simul, ex hac enim humores omnes uti in toto corpore, ita & in utero calidi & mordaces evadunt. Ex rebus non naturalibus huc pertinent aer calidior, cibus & potus multum & bonum nutrimentum largientes, præsertim si simul calida qualitate gaudeant, in nimia quantitate assumti; vita otiosa, in qua cogitationibus venereis magis conceditur locus; amor assiduus, & conversatio continua cum gratis juvenibus, lectio itidem & auditio rerum lascivarum & venerearum. Ex præternaturalibus symbolum suum huc conferunt mensium suppressio, seminisque stagnatio, quam quædam corruptio & mordacitas subsequi solent. Ad hujus affectus proventum & augmentum multum quoque facit prava ista consuetudo, qua virgines & imprimis lasciviores, quæ alias ad hoc malum procliviores sunt, subinde muliebria & vigilantes & dormientes digitis contrectare solent.

§. III.

Facile hic affectus cognoscitur ex nimia virginum lascivia, quam non omnino occultare valent. In principio quidem sunt taciturnæ, & melancholicis similes, mente nondum admodum abalienata præ pudore à tali lascivia continere sese conantur: crescente vero malo, omnem ponunt pudorem, garrulæ evadunt, non nisi de rebus venereis loqui & audire amant, viros quoscunque obvios invadunt, & ad coitum invitant, imo cogunt, & si voti sui compotes non fiant, irascuntur, vociferantur, quin etiam interdum violentas manus sibi met ipsis inferre solent.

§. IV.

Interdum hic affectus est remissior, interdum vero intensior; si est remissior, virgines præ pudore hunc affectum patefacere erubescunt, hinc si diutius duraverit, præ pudore contabescunt: In gradu vero intensiori sunt, ut in diagnosi dictum, garrulæ,

læ, muliebria manibus subinde contrectant, & hinc majorem reddunt titillationem. Si ergo malum adhuc sit recens, & in remissiori gradu, si statim auxilium quæatur, non omnem respuit curationem, sed sæpius tollitur; inveteratum vero, & quod altas radices egit, facile in maniam veram degenerat. Si corpus, quod jamjam emaciari incepit, restauretur, sermonesque venerei definant, salutis spes est.

§. V.

In curatione ad humorum intemperiem tollendam quam primum est respiciendum, hæc enim temperetur necesse est quam maxime. Ante omnia vero primæ viæ erunt repurgandæ, vel leni emetico, quod præcordia liberando præsentaneum interdum remedium observatum est, vel purgante per alvum; repurgatis sic primis viis humores in toto sunt contemperandi: Si ergo sint nimis calidi, conveniunt refrigerantia, & leniter aperientia: contra humorum acrimoniam commendanda modo laudata purgantia cum absorbentibus. Si corpus sit plethoricum, V. S. institui debet, vel in brachiis vel in pedibus, sanguinem vero in largiori quantitate educere convenit. Menses si sint obstructi, ante omnia aptis remediis eorum fluxus est restituendus. Plerumque etiam in hoc malo alia præter uterum obstructione laborant viscera, hinc non absolum est, aperientia, aut hypochondriaca ad hanc tollendam propinare. Optimum vero & præsentissimum remedium est legitimum conjugium, & sic Veneris usus.

§. VI.

Quoad diætam eligat ægra aerem temperatum, purum, potius ad frigidum, quam calidum inclinantem; cibos & potus bene nutrientes, & imprimis calidos evitet, hinc a vino & aromatibus abstinere, refrigerantes vero assumat; motu frequentiori & fortiori quoque corpus exerceat; amoris ne sit nimis dedita; cogitationes lascivas & venereas, quantum possibile, releget, serias e contra & ad pudorem spectantes diligenter foveat; consortia cum juvenibus, & personis lascivis procul absint; excretionem omnes, & præsertim mensium iusto ordine sese habeant. Præterea virgines sedulo à Parentibus, aliisque honestis personis monendæ sunt, ut probe sibi caveant, ne famam lædant, & sic hominibus opprobrium fiant. Frictiones, quibus antea adsueta erant manibus, quovis modo sunt impediendæ: uno verbo omnia, quæ ad Venerem excitare queunt, fugienda.

CAPUT VI.

De Epilepsia hysterica.

§. I.

Epilepsia hysterica est motus inordinatus convulsivus, cum sensus & rationis ablatione, a materia quadam cerebrum atque nervosum genus irritante, & ex utero proveniente dependens. Omnes equidem homines epilepsiæ obnoxii sunt, sed fomes mali alio in loco sedem habet, quam in utero, nempe in cerebro, & tunc malum est idiopathicum, vel etiam alibi est origo & tunc fit per consensum; hæc vero, de qua in hac dissertatione agitur, ex utero, & quidem materia cerebrum, nervosque irritante, ibique hærente, provenit, & imprimis virgines πολυσπειροτέρως vexare solet.

Frid. Hoffmanni Oper. Supplem. II.

§. II.

Causa proxima hujus mali est materia quadam specificè acris, cerebrum, nervosumque genus irritans, & ad anomalos ejusmodi motus concitans. Provenit vero hæc materia ex utero, cum scilicet semen, vel sanguis ibidem stagnet & corrumpatur, qui deinde cerebro, nervosisque partibus communicatur: est igitur hic affectus sympathicus, siue fit per consensum, & quidem partis sexui sequiori propriæ, nempe uteri, ideoque inter affectus muliebres merito est referendus. Sanguinem vero & semen quæ stagnare & corrumpi faciunt, jam in antecedentibus capitibus fufius tradita sunt, hinc hic omittere licebit. Pro varietate autem qualitatis materiæ corruptæ, & subjectorum, quæ hac materia sunt repleta, nunc hic, nunc ille oritur affectus.

§. III.

Signa, epilepsiam alias indicantia, & hinc occurrunt communia; adsunt nempe convulsiones, ægræ concidunt in terram, oculi contorquentur, sensus auferuntur; & quæ sunt alia horrenda phænomena hoc malum concomitantia: Præter hoc vero alia adhuc occurrunt indicia, ex quibus malum hoc per consensum & quidem uteri evenire colligere possumus; adsunt enim aliæ adhuc uteri affectiones, mensium obstructio. HIPPOCRATES: si ex utero, inquit, sint affectiones; adsunt ructus, strepitus circa ventrem, lumborum tumores, dolores circa renes & coxas. Quando vero imminet paroxysmus, adest vertigo, nausea, cordis palpitatio, lipothymia &c.

§. IV.

Epilepsia in genere omnis est malum periculi non expers, ob tam nobiles corporis partes affectas, non quidem quod statim è medio tollat, sed quia sæpius invadit, & plerumque curam omnem præsertim in adultioribus respuit; Eadem ergo prognosis & hic formanda. Si diutius perseveret, ex sympathico in idiopathicum malum transire solet: si tamen à mensium retentione, aut seminis stagnatione, & corruptione originem ducat, hisce malis sublatis, cessare quoque interdum solet: nonnunquam vero, si frequentiores sint paroxysmi, in apoplexiam aut paralysis terminatur. Si materiæ qualitas valde peccet, evadunt nunc furibundæ & procaces, nunc sese devotent, nunc turpia & inaudita loquuntur, ut ab immundis quoque spiritibus divexatæ sæpius credantur.

§. V.

Curatio in hoc affectu iterum duplex est institueda, vel in paroxysmo, vel extra eundem. Si paroxysmus imminere indicatur, ægra sola non oberet, præsertim in locis periculosis, sed quæta in locis, ubi nullum est periculum, permaneat. In paroxysmo ante omnia videndum, ut materia irritans cito dispellatur, quod fit frictionibus pedum & crurum, cucurbitularum in hypogastrio, & cruribus appositione; hisce non juvantibus, clysteres per alvum & uterum injicere non erit incongruum: naribus admoveantur gravem odorem spirantia & foetida, ut v. g. sunt castoreum, asa foetida, & alia in affectibus hysteris proficua. Cessante tunc paroxysmo ad causas respiciendum, quos in utero repositimus, & quidem vel in semine, vel sanguine corrupto. Sanguinis & seminis vitia quænam corrigant, in antecedentibus dictum est, quæ & hic conveniunt, mixtis simul specificis antepilepticis. ROLFINGIUS in *Ord. & method. comment.* exemplum

E e

refert

refert de virgine nobili, quæ ex abundantia & intemperie feminis variis gravibus affligebatur symptomatibus; hæc variis & probatissimis alias utebatur remediis, sed incassum, hinc accepit consilium, ut ope digitorum pollutionem procuraret, & sic semen imminueret, & hoc facto sana evasit. An vero hujus generis remedium sit suadendum, num potius contra religionis principia pugnet, Theologis relinquere; interim tamen, si non ad lasciviam, sed ad sanitatem potius restituendam adhibeatur, concedi posse persuasissimus sum. Notum mihi quidem est illud: Non facienda sunt mala, ut eveniant bona: sed notum quoque est: Ex duobus malis, si non utrumque evitari potest, minus est eligendum.

§. VI.

Diæta instituatur bona, & usus sex rerum non naturalium sit legitimus. Conjugium, si occasio sese obtulerit, est ineundum, quod sæpissime utilissimum remedium visum fuit. Hæc sunt, quæ de præcipuis virginum morbis proferre libuit, sunt quidem & alii, qui in virginibus interdum occurrunt, quia tamen sunt rarissimi, & chirurgicum potius, quam medicum auxilium exposcunt, uti v. g. est clausura uteri, vel ejusdem nimia à vitio conformationis angustia, brevitati studentibus omittere licebit.



DISSERTATIO MEDICA

D E

DIÆTA VIRGINUM.

Primum edita Anno 1729.

PRÆFATIO.



VERISSIMA profecto sunt verba CELSI Lib. I. Cap. I. ubi ait: *Homo robustus & ex omni parte sanus, non se tam stricte obligare debet legibus diætetis, sed varium vitæ genus habere omnibusque adsuescere oportet.* Reprehendit præclare laudatus auctor hisce verbis illos, qui nimium meticulosi sunt in usu rerum nonnaturalium, & vel minimam cœli turbationem expavescunt, semperque verentur, quoties cibum potumque assumunt, ne quid adversi sanitati ipsorum exinde redundet, cum ceteroquin optima corporis gaudeant constitutione. Hujusmodi homines sæpe propter perversam imaginationem a variis rebus læduntur, quas optime ferre potuissent, si animus eorum a tali præjudicio fuisset liber. Scrupulosam itaque diætam & ego rejicio atque cum CELSO moneo, ut robusti legibus diætetis non adeo stricte obediant. Per robustum autem intelligo illum, qui valida motuum potentia instructus est, qui fibras habet duriores, tendines firmiores, ossa compacta, vasa ampla, pulsum æquabilem & magnum, nervos stricteiores, qui magna pondera ferre potest, & a duris laboribus non facile defatigatur. Tandem, ut omnia vel uno verbo exprimam, qui bene ingerit, bene digerit, bene egerit. Si enim hæc tria in homine reperiuntur, robustus & sanus utique censendus est, & nulla eget medicina, quia natura sese ipsam conservat. Debiles vero, qui benignorum succorum inopia laborant, qui nervis præditi sunt laxis, habitum corporis spongiosum cum multis & exilibus vasis circumferunt, in motuum anomalias proni sunt, & facile a rebus externis læduntur, nullosque perferre possunt labores, medicamentis opus habent & alimentis suæ naturæ accommodatis. Non enim pro lubitu, ut robusti, uti possunt rebus nonnaturalibus, sed leges diæteticas exacte observare tenentur, nisi magnas molestias & incommoda, & nonnumquam etiam mortem sibi velint parere. Optime itaque fecerunt Medicinæ Patres, quod regulas consignaverint diuturna experientia confirmatas, secundum quas quilibet pro diversitate ætatis, temperamenti, sexus, anni temporum, rebus nonnaturalibus uti debeat. Interim tamen miror, pauciora, quam quidem necessarium & utile, de diætâ sexus sequioris esse tradita, adeo, ut, quantum ego scio, nulla fere de hac materia conscripta sit dissertatio, cum tamen quilibet, quem corporis humani structura, conditio & affectiones non fugiunt, facili negotio concedet, sexum sequiorem præ

præ nobiliori esse longe debiliorem, & idcirco etiam pluribus morbis obnoxium. Siquidem secundum *Divi Senis* effatum *mulier omnem morbum bis patitur*. Si enim earum machinam paulo penitius introspicimus, videmus, earum corporis habitum esse ut plurimum laxum spongiosumque, fibras esse teneras atque laxas, vasa exilia & copiosa, pulsum debilem, & omnia in illis offendi, quæ supra in debilibus annotata sunt. Exinde igitur penitissime conficitur, magis necessum esse, sexui foemino, tam illis, quæ in conjugio vivunt, quam his, quæ virgines appellantur, & numquam virum expertæ sunt, peculiare diætericas leges præscribere, quam virili nobiliori. Non solum enim corpore sexus masculinus præ foemino est magis firmus, sed etiam animo & iudicio, ita, ut viri tali vago appetitui locum non relinquant, cui virgines & mulieres haud paucae indulgent, quæque vulgo pica vocatur, & idcirco etiam tales errores diætericos non committant, quales foeminæ vel virgines ob perversum appetitum & affectuum intemperantiam, quibus frenum injicere nesciunt. Hac de causa ego, (quamvis tenuitatis meæ sim conscius) illustris Medicorum in hac Academia Fridericiana Ordinis consensu, agere pro viribus a summo Numine concessis mihi proposui DE DIÆTA VIRGINUM, motus ad hoc opus suscipiendum non solum materiæ jucunditate, sed etiam sperata utilitate. Prius vero monendum esse censeo, me hac dissertatione diætā non esse præscripturum virginibus in genere omnibus, absque ullo respectu ad earum conditionem & sortem, sed tantum in specie iis, quas *κατ' ἐξοχήν* virginum titulo ornare solemus, quasve tam natales quam etiam vitæ victusque genus, nec non tenerior & exquisitoris sensus corporis constitutio, ab aliis vilioris sortis, robustis, & ad labores duriores natis, distinguit. De ancillis igitur & servis mihi sermo non est, nam illas præsertim rusticas, ad robustas etiam refero, quæ non facile a rebus externis læduntur. Supervacaneum etiam foret his diætā commendare, cum partim eam observare propter officia & labores suos non possint, partim nolint, partim etiam sumtus iis deficient. Possunt quidem præcipue ex prioribus duobus capitibus etiam ad ancillarum statum nonnulla applicari, sed multa etiam in hisce paginis exstant, quæ tantum virginibus quadrant. Neque mens mea est, ut regulæ meæ ad virgunculas sive puellas extendantur, quamvis etiam hæc varia ex hac dissertatione in usum sibi capere possint, sed potissimum intentio mea fuit in usum earum virginum hæc elaborare, quæ vel mensium fluxum jam sunt expertæ, vel quibus proxime imminet, quod solet fieri circa annum decimum tertium & decimum quartum. Melioris vero Ordinis causa hanc dissertationem dispescere placuit in IV. Capita, quorum primum agit: *De vitandis mensium fluxum sistentibus*. Secundum: *De fugiendis mensium fluxum nimium excitantibus*. Tertium: *De consuetudinibus virginum sanitati insensis*. Quartum: *De optima & recta virginum diætā*. Quæ ut cedant in Dei gloriam & proximi emolumentum, SUPREMUM NUMEN supplex posco, ne gratiam suam velit denegare & huic meo conatui, & si qui alii postea futuri sunt.

C A P U T I.

De vitandis rebus nonnaturalibus mensium fluxum sistentibus.

§. I.

TOtam fere virginum sanitatem positam esse in sanguinis per uteri venas evacuatione sufficienti & ordinata, exinde perspicimus, quoniam simulac menses non sufficienter fluunt, aut diutius aut penitus retinentur, statim varii impetunt morbi. Nam si superflui humores non debite per uterum eliminantur, nimium non modo in corpore accumulantur, sed & universa ipsorum massa sensim multis inquinatur impuritatibus, eo quod, repletis adeo vasis, cordis & arteriarum systole renitentem validius molem succorum non expedite circumagere, neque etiam in minimos tubulos ad subeundas secretiones & excretiones potest pellere. Ex quo oriuntur passim stagnationes, obstructions, spasmi, dolores & sexcenta alia inde pullulantia pathemata. In capite qui-

Frid. Hoffmanni Oper. Supplem. II.

dem vehementes cephalalgia, vertigines, visus imbecillitas, odontalgia, erysipelata, apoplexia. Hilaritas lætitiaque transit & successu temporis inducitur melancholia. In pectore faucium constrictio, spirandi angustia, hæmoptysis & cordis palpitationes, nec non syncopes. In ventriculo & intestinis anorexia, vomitio, nonnumquam cruenta, inflationes, ructus, borborygmi & tormina. Color præterea floridus evanescit in facie, ac in lividum luridumque mutatur, totum corpus grave est, succrescit sensim cachexia cum febricula, quæ Medicis chlorosis nomine venit. Omnia vero hæc multa & dira mala subito discedunt atque expirant, simulac menstruus fluxus iterum revocatur. Ut adeo pateat, quanta commoda virgines ex salutari hac uterina excretionem percipiant, & quam gravia damna ex ipsius sufflamine, minusque legitimo successu in ipsas redundent. Quare nihil profecto Medico, cui virginum salus curæ cordique est, magis incumbit, quam ut eas doceat, quomodo rebus nonnaturalibus recte & prudenter uti debeant, ne huic evacuationi ponant obicem.

§. II.

Nihil vero magis salutarem hunc fluxum suppressere valet quam ipsum frigus imprudenter ad inferiores

riores præsertim partes admissum. Nam frigoris natura ea est, ut fibras constringat, & sanguinem a partibus exterioribus ad interiores repellat, nempe ex ramificationibus tenuissimis arteriarum & venarum ad truncos. Et quamvis omni tempore noceat, longe tamen majus damnum infert, instantibus vel jam prorumpentibus mensibus, siquidem tunc totus naturæ motus invertitur, & cum sanguis antea a corde ad uterum ferretur, jam, quia fibræ & vasa uteri a frigore crispantur, contrahunturque, is regurgitare cogitur, & recedit a peripheria ad centrum, qui motus inversus præternaturalis est, & vitæ valde inimicus. Male igitur agunt lotrices, quæ nudos pedes aquis immergunt, dum lintea eluunt, sed quoniam successu temporis natura huic delicto adfuecit, multæ earum dantur, quæ nulla incommoda exinde persentiscunt. Virginibus vero tenerioribus, debilioribus, sensibilibusque auctor suaviorque non essem, ut, tempore æstivo licet, pedes frigida temere abluerent, quippe quibus sæpe sola deambulatione nudis pedibus spasmos & tormina abdominis creat. Solent enim nonnullæ, etiam media hyeme, quando noctu surgere e lecto coguntur, nudis pedibus, relictis sandaliis, in gypseo ambulare pavimento. Aliis in usu est pedibus stragulum remove-re, & per totam noctem nudo pectore abdomineque dormire. Quantæ vero noxæ a tali refrigeratione propullulent ab *III. PRÆSIDE in Pathol. generali Part. III. Cap. V. de excretionum defectu præcipuo morborum fundamento in Scholio §. VII.* sequentibus est demonstratum: *Cohibita paulo diutius vel imminuta perspiratione falsi & tenues humores feruntur ad caput & pectus, & alias quoque corporis partes infestant, & liberio-rem motum & circuitum minuendo languorem & lassitudinem, capitis gravitatem, mentis torporem, coryzam, gravedinem, tussim, inquietas noctes, lentum calorem cum extremorum refrigeratione & urina acri concitant. In quibusdam ventris termina cum crebrioribus defectionibus oriuntur.* Haecenus *Illustris PRÆSES.* Si vero corpus tali modo frigori exponitur circa tempus fluxus menstrui, necessario non solum ejus suppressio, sed etiam alia longe graviora mala subsequuntur.

§. III.

Dehortandæ vero ulterius sunt virgines, ne eo tempore, quo tributum lunare solvunt, versentur vel somnum capiant in locis humidis. Id quod illis potissimum dictum sit, quæ in cellis habitant, prout in majoribus urbibus solet fieri, in quibus sæpe, præsertim tempore æstivo, fere par hominum multitudo in cellis, quam in superstructis domibus degit. Virgines vero oportet, quando per uterum purgantur, talem humidum aërem vitare. Nimia enim aëris humiditas fibras motrices nimis relaxat, & corpori languorem inducit, omnesque excretiones sufflaminat. Hinc si fieri potest, eligant sibi conclave non ad terram situm, sed in medio domus, non nimis calidum neque frigidum. Melius adhuc est, si pavementum non ex gypso, sed ex asseribus est confectum, nam illud semper hoc frigidius humidiusque esse solet. Si vero locus hoc non permittit, sufficit, pedes & abdomen probe a frigore defendere.

§. IV.

Non solum vero frigus in virginibus solam menstruum suppressionem, sed etiam varia alia mala pro varietate partium, quibus admittitur, solet producere. Quapropter mihi hac occasione etiam quædam monita virginibus circa refrigerationem servanda annexere licebit. Primo itaque reprehendendam esse

censo, pessimam quarundam virginum consuetudinem, quæ, quando corpus fortiori motu exagitaverunt, & sudor largus prorumpere incipit, statim in frigidiora loca concedunt, & remoto velamine collari nudum collum pectusque aëri frigidiori exponunt, id quod præcipue in conviviis conjugalibus observari potest, quando virgines saltationibus nimium æstum sibi contraxerunt, qui eo vehementior est, quo magis sanguinem calidis & spirituosius aut multo mero in orgasimum concitarunt. Quæ pectoris collique refrigeratio, licet excretionem sanguinis per uterum non cohibeat, nihilominus tamen graviores adhuc vel etiam funestos inducit affectus. Ali-ter enim fieri non potest, quam, ut sudor reprima-tur, sanguisque in motu sistatur, & hac ratione va-riæ periculosæ inflammationes subsequantur. Frigus autem pectori adeo infensum esse etiam *Medicina Pater Aphorism. 23. sect. V.* testatur, ita scribens: *τὰ ψυχρὰ εἶναι χιὼν κρύσταλλος τῷ στήθει πολέμια, βηχέων κινητικά, αἰμορροϊκὰ, καταρροϊκὰ.* *Frigida, cujusmodi sunt nix & glacies pectori sunt inimica, tusses movent, san-guinis profluvia cicut, catarrhos excitant.* In cujus Aphorismi commentario *Celeb. HEURNIUS* sequen-tem inseruit historiam: *Hodie obiit juvenis cui jam 14. dies inflammata fuerant membrana diaphragmatodes ad pectus, quod choreis exsudans se aëri frigidus ex-posuisset aperto thorace.*

§. V.

Non melius sanitati suæ consulunt illæ virgines, quæ post talem fortio-rem corporis motum frigidum potum avidis faucibus ingurgitant, subito enim san-guis in vasis oesophageis, pulmonalibus, diaphrag-maticis, præcipue autem in coronariis ventriculi si-stitur, & a frigore coagulatur, ex quo dein non solum mensium obstructio, si circa tempus menstrui fluxus contingit, sed etiam faucium inflammationes anginoideæ, singultus, cardialgia, colica, iliaca pas-sio, dysenteria, pleuritides, peripneumonia, ven-triculi inflammatio & fere innumeri alii morbi incu-nabula trahunt. Ipse novi exemplum viri cujusdam, qui cum in convivio nuptiali saltationibus corpus ni-mium calefecisset & frigidum potum ad æstum ex-stinguendum hausisset, lethali correptus est angina & inter breve tempus extinctus. Possem quidem ad ulteriorem probationem multa exempla & testi-monia afferre, sed sufficiat tantum unius gravis au-ctoris suffragium in auxilium vocare, ut exinde ap-pareat veteribus etiam noxam ex tali frigida potio-ne non fuisse incognitam. En! *CELSUM* adduco, cujus verba *lib. I. Cap. 3. p. 28.* hæc sunt: *Illud nosse oportet; quod ex labore sudanti frigida potio sit perniciosissima, atque etiam cum sudor se remisit, iti-nere fatigatis inutilis est.* Cujus dicti veritatem etiam suo damno experta est virgo quædam Pastoris in no-stra vicinia filia, quæ cum rus ivisset, spectatum, quomodo messorum labores suos perficerent, domum reversa ad sitim æstumque sedandum, poculum ce-revisiæ frigidioris evacuavit. Quo facto statim men-ses restringebantur, & calor lentus præternaturalis internus cum frigore externorum oboriebatur, pul-monum bronchia materia quadam tenaci viscida ob-sidebantur, quæ respirationem reddebat difficilem. Tandem emaciata adeo, ut præter cutem & ossa ni-hil appareret, e vita discessit.

§. VI.

Experientia & observationes præterea testantur, virgines perquam facile phthisin incurrere, a vento-rum frigidorum præsertim septentrionalium vehemen-tiori

tiori in pectus ingressu, siquidem talis aer frigidus lympham & sanguinem in pulmonum vasculis coagulat, & hac ratione stases & suppurationes producit. Id quod eo facilius contingit in iis quæ facie gaudent rubicundo-lactea & temperamenti sunt sanguineo-cholericis, habitus corporis spongiosioris, quæ contractum & compressum pectus habent, & scapulas intra alas eminentes, & quarum parentes eodem morbo laborarunt, vel intererunt sunt. Caveant sibi itaque virgines ne adversus ventum cursum dirigant, sed linteolo nares & os munientes vento ingressum prohibeant.

§. VII.

Hucusque proposui cautelas circa usum aeris præfertim humidi & frigidi observandas. Sequitur, ut de erroribus virginum in cibo agam. Certe dolendum est, homines, præcipue vero sexum sequiorem, adeo perversi esse judicii, ita, ut omnia, quæ gratum linguæ imprimunt saporem, statim pro bonis innoxiiisque habeant, & ambabus arripiant manibus. Illa enim, quæ merito inter medicamentorum classem referuntur, & idcirco cum judicio, debito tempore, ordine & dosi in usum vocari debent, quoniam æque prompta sunt ad nocendum, ac ad juvandum, pro alimentis habent, & quæ vix uncia haurire debuissent, ad integras mensuras ingurgitant. Videmus id in spiritus ardentis potatoribus, cujus abusus longe frequentior est recto usu. Et quamvis sæpe judicium eorum non fallatur, ita, ut ipsi prospiciant, atque fateri cogantur, periculum sibi a tali victus ratione imminere, voluntas tamen adeo corrupta est, ut ea, quæ ratio sana pro nocivis declarat, nihilominus velit & faciat. Exemplum hujus rei præbent virgines, quæ, quamvis ipsæ non ignorent, & sæpe suo damno expertæ sint, acida sibi non conducere, nihilo secius tamen, quia palato suo jucundam sensationem & refrigerantem imprimunt, ea in deliciis habent. Nonnullæ appetitui suo adeo indulgent, ut integra cochlearia aceti vini assumant. Aliæ acidum corrigere volunt per dulcia, mellita & saccharata, sibi que persuadent valetudinem suam hac ratione nihil adversi exinde pati posse, sed falluntur. Nesciunt enim acetum per additionem sacchari majorem acorem concipere, & per spicula salina sacchari magis arinari & fere corrosivam & causticam qualitatem induere, accedente nimirum fermentatione in ventriculo. Nesciunt, dulcia in sinu gerere in maximam aciditatem, & per analysin chemicam spiritus acidus largiri. Talem vero mixturam acidorum cum dulcibus atro carbone notat *III. PRÆSES*, quando ita scribit in *Cap. V. de Diet. §. XV. Cavendum maximopere est, ne dulcia cum acidis & potibus fermentescibilibus, cerevisia nempe recenti, invicem ingerantur. Vidimus hac ratione in corporibus præfertim imbecillioribus, biliosis & iracundiæ deditis cholericas passiones ac ventris & colica tormenta atrociter non sine periculo excitata.* Non tantum vero simplex acetum quod vel ex cerevisia, vel ex vino successu temporis nascitur, virgines lædit, sed etiam omnes cibi, qui cum eo parantur, nimia copia & nimis frequenter ingesti, ut est e. g. lactuca. Incurrit mihi in mentem hac occasione *Cl. D. SPIES Prof. Helmst. Patronum & Præceptorem meum in ætatem colendum*, narrasse olim in collegio, se vocatum esse in consilium a nobili quadam virgine, mensium suppressione cum febre alba laborante, quæ hoc malum a nulla alia causa, quam a frequentiori lactucæ cum aceto præparatæ esu sibi contraxerat. Hunc censum etiam subeunt uvæ, præsertim non satis maturæ, & omnes fructus horæi, acidi & adstringentes, quales sunt mala cydonia, punica, mespili, fructus acaciæ & myrtillorum, pira valde constringentia austera, *Frid. Hoffmanni Oper. Supplem. II.*

qualia sunt sylvestria, vel etiam ex horæis ea, quæ multis calculis referta sunt, & parum succi largiuntur. Novi ego virginem *XV.* circiter annorum temperamenti cholericis, cui menses nondum proruperant, quæ circa novilunium variis doloribus spasticis in abdomine affecta erat, præterea satis belle sese habuit, & meridie ad mensam sedens cibum, ut antea, cum appetitu assumpsit. Tempore vero pomeridiano uvarum cupida erat, quæ ei etiam concedebantur. Quibus comestis versus vesperam tantis stricturis spasticis abdominis, pectoris, colli totiusque corporis cruciata est, ut artus mox illuc involuntarie traherentur. Conquesta est semper de nausea & vomitione, petiitque, ut ipsi vomitorium propinetur. Tandem, cum paroxysmus ultra *IV.* horas durasset, sine sensu & motu rigida & immobilis erat, ita, ut a circumstantibus pro mortua haberetur. Adstans autem Chirurgus cochlear unum essentiæ caryophyllorum ori ejus infudit, quo facto cor iterum incepit moveri, sensus redire, & altero die a perito in usum vocato Medico pristina sanitas est restituta. Ex hoc itaque casu sole clarius elucet, acida, præprimis circa tempus eruptionis mensium, in virginibus periculosa excitare symptomata. Attamen multæ reperiuntur, quæ, ut pallorem faciei sibi fœnerentur, quem colorem aulicum germ. *Die Hof-Farbe* appellant, ex mera superbia acidis crebrius utuntur. Verum, per quod peccant, per idem puniuntur, ita, ut colorem rubicundum, quem ex despectu rusticum, vernacula *die rothe Bauer-Farbe* vocant, ex toto amittant, & plus satis inde palleant & albicent, atque in mensium suppressionem, cachexiam & chlorosin præcipitentur. Ne dicam, quod ex assumptione acidorum crebriori dentes fragiles reddantur, & ad cariem & odontalgiam disponantur, sed omnia hucusque prolata, ut & sequentia, de abusu, non de recto usu intelligenda sunt. Non in totum virginibus interdiciuntur acida, sed tantum moneo, ut iis tamquam medicamento utantur, non ut alimento, simul vero respiciendum est ad temperamentum. Nam cholericis & sanguineis non adeo nocent quam phlegmaticis & melancholicis. In illis enim sanguis velociori cursu per arterias venasque agitur, estque floridior, fluidior atque tenuior, & multis particulis sulphureis refertus; in his vero purpura vitalis est magis spissa, viscida, lenta, crassa, terrestris, & tarde magis circulatur, quæ ab accessione acidi magis talis redditur.

§. VIII.

Pertinactis sic acidis atque dulcacidis conféro me nunc ad dulcia, quoniam contraria juxta sese posita magis elucescere dicuntur. Video jam virgines frequentem in modum ratiocinari: Dulcia acidis sunt contraria, ergo, quia acida nobis obsunt, certe dulcia profunt. Sed permittant mihi, quæso, ut hujus ratiocinii falsitatem in aprico ponam. Prius vero inter nos convenire debemus, quid per dulcia intelligendum sit. Accipitur enim vocabulum dulce primo pro insipidis, ita aqua audit dulcis, serum lactis vocatur dulce, nec non emulsionem & omnia, quæ manifestum & evidentem linguæ non imprimunt saporem. Hæc ambabus virginibus concedo manibus, quoniam bonum chylum & sanguinem suppeditant. Verum enim vero dulcia eminenter talia a me vituperantur; in quorum classem referuntur primario saccharata & mellita. Nequaquam tamen illa in totum damno, sed tantum eorum abusu, qui adeo invaluit inter virgines nobiliores & quarum loculi argento turgent, præcipue vero inter mercatorum ditiorum filias, ut fere per totum diem

non solum saccharo obducta e. g. amygdalas & varia femina incrustata, nec non placentulas saccharaceas, vulgo *Zucker-Meßen* / comedant, sed etiam saccharum sibi relictum & ejus varias species, candi, aut cum amylo in pastillos redactum, germ. *Marcipan* / deglutiant. Quod vero ex tali saccharorum abusu paria damna ac ex acidis redundare possint, docet nos analysis dulcium chemica. Videmus enim ea constare ex sale acido & sulphure æquabiliter mixtis. Occultant itaque & involvunt sulphuræ particulæ acidi salis spicula tam diu, donec motu intestino fermentativo separentur, volatiles sulphuræ abigantur, & acida a vinculis suis liberentur, suique juris fiant. Videmus tale quid in cerevisia acescente. Simile quid contingit in ventriculo. Nam dulcia saccharata a saliva, menstruo ventriculi & succo pancreatico in fermentationem conjiciuntur, de qua ructus supervenientes testantur; qua mediante particulæ sulphuræ ab actuatis salinis acidis subiguntur, & sic saburra acida generatur, quæ, si ad sanguinem defertur, illum inspissat, ex qua sanguinis tenacitate & visciditate dein variæ obstructions, mensium suppressiones, scorbutus, malum hypochondriacum sive hysterica passio, inflationes præcordiorum, cachexia propullulant. In specie vero caveant sibi virgines hystericæ a dulcibus, siquidem paroxysmi frequentiores acerbioresque per talia redduntur. Quod vero etiam mellis & exinde paratorum, quamvis non adeo noceant ut saccharata, usus crebrior non proficius sit, Medicorum Pater HIPPOCRATES lib. de intern. affect. Cap. 45. t. 5. sq. perhibet. *Mel coctum, inquit, æstuosum est, & ventri adhæret, postea, cum concoctum fuerit, in ventre effervesceat, & venter derepente attollitur, & ardet, & disrumpi videtur.* Accedit adhuc ad incommoda, quæ virgines ex saccharo patiuntur, denigratio dentium, dum hosce primum crusta viscida obducit, pedetentim vero ratione spicularum salinarum acidarum per salivam successive evolutarum corrodit atque nigredine imbuat, & sæpe adeo fragiles reddit, ut frustulatim excidant, & ita partem pulchritudinis haud spernendam amittant virgines, quandoquidem jactura dentium loquelam quoque reddit ingratham & molestam.

§. IX.

Sequitur, ut alium errorem virginum diæteticum censeam, qui non minus vulgaris est, quam antecedens. Solent scilicet haud paucae virginum panem, placentas, aut similes, statim, quando ex furno extrahuntur, & adhuc fumant, butyro illinere, & ita calide comedere. Feruntur præterea magno appetitu in crustam illam panis mollem interiorem, duriori exteriori substratam, quam Germani vocant, *die Wasser-Kinde des Brodts* / & in placentas quibus myrtilli, vel baccae ribium sunt superinspersæ, lingua vernacula *Heydelbeeren und Johannis-Beeren Kuchen*. Amant opera pistorum, panem Hispanicum, bis coctum saccharaceum, *Spanisch Brodt und Zucker-Zwieback* / & reliqua panificia. Quanta vero damna virginum sanitas exinde patiatur, passim practicoꝝ testantur observationes, qui exinde non solum mensium obstructionem, sed etiam ipsam atrophiam annotarunt. Viscida enim farinacea massa a menstruo ventriculi dissolvi rite non potest, sed in glebas abit, & intestinorum tunica villosa sese applicat, eorumque plicis firmiter inhæret, hinc obstructions orificiorum vasorum lacteorum, & tandem consumptio corporis ob nutrimenti defectum oriuntur. Id quod eo facilius contingit, si virgines post comestas tales farinaceas massas & imprimis calidas placentas, non sufficientem potum hau-

riunt, ut massa ista diluatur, sed pro more suo pitissant, vel plane non bibunt. De qua perversa consuetudine inferius plura dicenda restant. Non melioris sunt notæ ova ad duritiem cocta, nimia copia ingesta, item castaneæ tostæ, quæ præcipue circa mensium fluxum comesta, illum imminuere, vel plane suppressere valent. Eundem censum subit casei nimius usus, imprimis calcarei vulgo *Kalkfichte Käse* / vel etiam ejus, qui per longam moram foetidus tenaxque factus est, germanice *der zache gebrannte Käse* / & a multis magni æstimatur, sed a liquore gastrico subigi non potest. Ipsemet enim vidi Studiosum, qui nimium casei assumserat, & post quartum diem nausea correptus, integra frustula vomitu rejiciebat. Tandem, ut brevibus me expediam, abstineant virgines præcipue circa instantem purgationem uterinam, ab omnibus crudis, viscidis, tenacibus, acidis, flatulentis, ut sunt massæ frixæ minus fermentatæ, nimis pingua, fumo indurata, caro suilla, cucumeres, melones, brassica alba capitata muria condita, pultes ex pis, fabis, lentibus, quæ non rite concoqui possunt, & cruditates relinquunt. Nam qualis cibus, talis chylus; qualis chylus, talis sanguis; qualis sanguis, tale liquidum nerveum; quale liquidum nerveum, talis motus, tonus & robur partium solidarum, a quo tono se- & excretionem varie modificantur. Nam a systole cordis & artiarum languida languidus sanguinis circulus proficiscitur, hinc particulæ sanguinis non satis attenuantur, massa humorum fit spissa, lenta, tenax, viscida, ad se- & excretionem minus apta. Nihil itaque magis incumbit virginibus, quam, ut ea fugiant, quæ partium solidarum robur infringunt, & massam humorum ad coagulum disponunt, & ad excretionem per uterum ineptam reddunt.

§. X.

Tandem & hoc circa usum ciborum est monendum, quod multum intersit, quo tempore & quâ copia assumantur; hoc enim si negligitur etiam optimi succi alimenta varios morbos causari possunt. Carpendæ itaque jure meritoque illæ sunt virgines, quæ per totum diem ex marsupio delicatulos bolos promunt, & quemadmodum nostrates loquuntur, *den ganzen Tag aus der Sicken naschen*. Siquidem hac ratione ventriculus numquam a labore suo vacat, & dum cruda semicoctis admiscuntur, digestionis & chylificationis opus læditur, flatulentia generantur, ructusque molestiam creant. Humor enim cruditas secundum HIPPOCRATEM lib. de vet. med. non aliunde venit, quam quod non expectetur justum tempus, donec venter ingestos cibos perfecte consumserit & evicerit, & evacuatus fuerit, & quieverit, sed in fermentem adhuc & fermentatum novi ingerantur. Quin etiam AVICENNA præclare ita scribit: *Nemo sanitatis suæ studiosus aliquid comedat, nisi ad hoc certo prius invitante desiderio, & ventriculo una cum reliquis superioribus intestinis a præsumpto cibo vacuatis.* Possem quidem plura in medium proferre doctissimorum virorum de hac re testimonia, sed sufficiant hæc. Interea commendatam sibi habeant virgines, sequentem insignem SCHOLÆ SALERNITANÆ regulam:

*Tu numquam comedas, stomachum ni noveris esse
Purgatum vacuumque cibo, quem sumseris ante.
Ex desiderio id poteris cognoscere certo,
Hæc sint signa tibi subtilis in ore saliva.*

§. XI.

Haud possum superfedere hac occasione illius perversi moris facere mentionem, eumque atro notare carbone, qui in conviviiis fere omnibus receptus est, dum post pastum & assumptos cibos plurimos, adeo-

adeoque tempore incongruo, saccharata & varia pistorum opera, vulgo *Confect* dicta, mensae imponant, & quoniam haec palato arrident, quamvis fere nullus amplius in ventriculo locus vacuus superfit, illis tamen instar farciminis eum replent. Et si vero hac ratione in omnibus concoctio laedatur, qui talem errorem diateticum committunt, virgines tamen gravius exinde luunt, in quibus ventriculi tunicae natura sunt laxiores flaccidioreque, quam in sexu nobiliore, quaeque per thoraces abdomen nimis constringunt. Quapropter aliter fieri non potest, quam, ut cruditates gignantur, ex quibus innumeri fere morbi postea incunabula trahunt.

§. XII.

De cibis satis. Perspiciamus nunc potulenta, quae aequae ac cibi necessaria sunt ad valetudinem vitamque conservandam. Nam solida & fluida sunt praecipua vitalium humorum elementa. Ergo, si alterutrum horum deficit, statim temperies & legitima humorum mixtio vitatur. Peccatur vero in potu vel quantitate vel qualitate. Quantitate, dum vel nimia potus copia ingurgitatur, vel nimis parce bibitur. Excessus in potu sexui nobiliori est magis familiaris, quam sequiori, & modo sit congruus & mixturae animali non adversus, non adeo noxius est, quam quidem defectus. Hoc vero impugnare mihi videntur illae virgines, quarum haud paucae reperiuntur, quae, partim ut speciem temperantiae aucupentur, partim ne per largiorem potum habitiores fiant, & gracilitatem perdant, fere numquam bibunt, aut saltem tantum pitissant. Verum, non solum experientia, sed etiam ipsa ratio, si modo eam adhibere velint, eas convincere posset, talem dietam esse multorum morborum, praesertim chronicorum, scaturiginem. Cum enim vita nostra conservetur, per continuum, liberum & non impeditum sanguinis per omnia viscera circulum, eoque sufflaminato morbi, penitus vero sublato, mors ipsa succedat, sequitur, illum, qui vitam suam prorogare, & morbos avertere cupit, omnem operam navare debere, ut sanguis ad circulationem non ineptus reddatur, sed in fluiditate & tenuitate conservetur, ut per omnes canales, etiam minimos, prompte progredi queat. Nunc vero ipsis tonsoribus notum est, ad fluiditatem sanguinis requiri sufficientem feri copiam, & sanguinem humanum e vena emissum tres partes ad minimum liquidi, ad unam partem solidi elementi referendas continere. Quomodo vero fluida in sanguine portio, quae continuo, partim per transpirationem, partim per urinam & salivam imminuitur, nec non per intestinorum glandulas, per mucum natium, expirationem expurgatur, restaurari potest, quam per potum sufficientem? Hoc vero si negligitur, sanguis evadit tenax, spissus, glutinosus, viscidus, ad circulationem ineptus, ad stases pronus; hinc varii generis morbi, uti sunt obstructions viscerum, scirrhi, graves inflammationes, melancholia, malum hypochondriacum, obstructions alvi, & praecipue in virginibus graves & pertinaces mensium obstructions progerminant. Nota mihi est honesta quaedam matrona, quae in juventute sua & virginitatis annis saepe per tres dies a potu abstinuit. Sed incurrit cacochymiam mensiumque suppressionem adeo contumacem, ut nullis medicamentis restitui potuerit. Est quidem adhuc in vivis, sed ne unum quidem se numerare posse diem asseverat, quo gravibus non crucietur pathematibus. Torquetur enim immanibus plane cephalalgis, colore faciei parietem dealbatur refert. Et sic vita ejus morbus est perpetuus.

Felix, quam faciunt aliena pericula cautam!

§. XIII.

Accedo nunc ad potus qualitatem, ostensurus, quinam a virginibus fugiendus sit, & quare. Optandum sane foret, ut homines potu antiquissimo, omnium primo, & communissimo, & ad vitam & sanitatem commodissimo, nempe aqua fontana, uterentur, tunc non opus esset, ut peculiares regulae diateticae circa usum potus praescriberentur. Sed quoniam tanta potulentorum varietas est, merito etiam inquiritur, quodnam ex his virginibus incongruum sit, & idcirco ab iis vitari debeat. Vulgaris vero hoc tempore potus est cerevisia, eaque duplex, vel amara lupulata, germanice *braun oder bitter Bier* vel dulcis, vulgo *weiß Bier* dicta. Utraque cerevisiae species in se satis bona est, si modo possideat bonae cerevisiae requisita, de quibus plura capite ultimo. Jam paucis tantum monendum esse censeo, quod virgines abstinere debeant a cerevisiis crassis, turbidis, feculentis, acidis, & quae non sufficienter coctae fuerunt, & caput gravant, flatuque procreant. Tales enim cerevisiae non satis fluidum servant sanguinem & excretorios tubulos apertos, sed potius viscositate sua obstruunt, & humores inspissant, pituitam augent, & eapropter etiam menses cohibere valent. Inprimis vero calculosis plurimum nocent, quoniam meatus urinarios obturant. Quid? quod etiam recentiores Practici statuunt, scorbutum populis septentrionalibus adeo familiarem atque endemicum, maxima ex parte cerevisiarum non salubrium potui esse adscribendum. Non adeo frequens est vini potus nostris in regionibus, illis autem, quibus in usu est, virginibus suadeo, ut missa faciant vinum austera, acida & adstringentia, nam teste GALENO *Comment. 8. lib. 3. de vict. rat. in morb. acut. excretionibus omnes cohibent*. Quam maxime vero in virginibus, dum saluberrimum mensium fluxum retardant, innumeris malis quibus affligi solent, praebent occasionem.

§. XIV.

Neque potus Coffee sicco pede est transeundus, sed potius eruendum, num virginibus obsit, an vero profit? Haud pauci stabilire conantur, infusum Coffee salubre esse naturaeque amicum, & ad corrigendas acidas primarum viarum cruditates multum facere. Posterius concedo. Verum multa dantur medicamenta, quae, quantam ab una parte utilitatem, tantam ab altera parte afferunt noxam. Huc etiam pertinet nostrum infusum. Absorbet quidem acidum, sed simul nervos debilitat. Obstant adhuc plures causae, quo minus statuere possim, ejus usum naturae esse amicum atque salubrem. Quicquid enim naturae amicum est, illud etiam iis, qui prima vice illud assumunt anxietates creare non debet. Nunc vero experientia testatur, inconsuetos, qui prima vice hoc infusum hauriunt, ut plurimum non solum de tremore, gravitate artuum, vigiliis conqueri, sed etiam non raro convulsivis motibus & vomitu corripri, id quod etiam sub primo tabaci usu observatur. Ergo naturae non est amicum, & melius esset, si ab eo abstinerent. Neque exinde probari potest hujus infusi salubritas, quia in consuetis nulla parit incommoda. Consuetudo enim est altera natura. Hoc apparet exemplo Turcarum, qui per continuum opii usum, ita ei assuescunt, ut drachmam sine periculo assumere possint. vid. BELLONIUS *lib. 3. obs. cap. XV*. Quis vero inde concludet, opium naturae humanae esse amicum. Commendant praeterea

Practici hunc Coffee potum ob usum diluentem, obstructiones referantem, aperientem, sed hic effectus potius aquæ, quam farinæ fabarum est tribuendus, quippe quæ ob crassitiem particularum oscula vasorum lacteorum intrare non potest. Suspectum itaque merito est infusum Coffee, & potius ut medicamentum, quam alimentum usurpari debet, magnaque insuper cautione opus est circa ejus usum. Nam ubi acidum in ventriculo non exsuperat, numquam est hauriendum, ni chylicationis negotium velis destruere, neque convenit plethoricis, sanguineis, cholericis, & illis, qui ad tremorem artuum vertiginemque dispositi sunt, & debile genus nervosum possident. Quamobrem cum virgines pleræque sanguinis gaudeant abundantia, nervisque præditæ sint debilioribus, quilibet facile perspiciet, infusi Coffee usum, quidem moderatum, vix plerisque virginibus esse suadendum. Multo minus vero abusus est approbandus, qui adeo communis est, ut a multis non semel vel bis, sed aliquoties in die forbilletur. Audiamus modo de hoc abusu *Ill. Dn. PRÆSIDEM in Pathol. general. part. III. Cap. 3. §. 19. in Scholio: At ego quidem, inquit, non possum non hoc loco solennem sed detestabilem consuetudinem improbare, qua feminae, præsertim quæ debile genus nervosum obtinent, infusum fabarum Coffee non semel, sed bis, vel aliquoties die hauriunt. Hac enim ratione efficiunt, ut, cum infusum illud ad acidum primarum viarum domandum alias non sit inutile, nervoso tamen generi inimicum, immoderatiore usu toti corpori & maxime nervis inducat imbecillitatem, unde, si in morbum acutum incidunt, rarius, quod expertus sum, evadunt. Qui plura desiderat, conferat D. D. MEISNERI tractatum de potu Thee & Coffee, nec non diss. de fabis Coffee earumque sub infuso usu & abusu, sub Præsidio D. D. Hieronymi Ludolf ab auctore David Gottlob Herold anno 1724. Erfordiae conscriptam, in qua simul casus enarratur de matrona quadam, quæ quovis mense non solum per uterum, sed etiam per vasa hæmorrhoidalia purgabatur, cui uterque fluxus ab infusi Coffee nimio usu suppressus est. Minus firmo itaque stat talo sententia quorundam Medicorum, qui Coffee virtutem emmenagogam attribuunt. Et si forsan tale quid ab ejus usu notatum sit, hoc potius beneficio aquæ atque caloris, quam farinæ fabarum peractum esse censeo. Sunt porro, qui virginibus infusum Coffee idcirco dissuadent, quoniam eas inde sterilescere arbitrantur, verum cum hoc assertum per experientiam nondum sufficienter sit confirmatum, inter argumenta mea dissuasoria locum non meretur.*

§. XV.

Quoniam motus & quies, somnus & vigiliæ etiam merito ad res nonnaturales referuntur, hinc, ne quid prætermisisse videar, etiam de eorum abusu breviter differam. Opus est quiete & somno, ut vires reficiantur, & succi utiles & nutritii colligi & apponi possint, motu vero & vigiliis, ut superflui humores excernantur, perspiratio augeatur & humores attenuentur. Ab utraque parte æquilibrium est servandum, motus respondeat quieti, vigiliæ somno & vice versa. Hoc enim si tollitur, statim morbi invitantur. Mediocritas, uti in quavis re, ita etiam in hisce est optima. Excessus atque defectus damna afferunt. Hinc etiam HIPPOCRATES *Aphorism. 3. sect. 2.* pronunciat: *Υπνος ἀγρυπνία, ἀμφοτέρω τῷ μετρίῳ πολλὸν γινόμενα κακόν.* Somnus & vigilia utraque, si super mensuram fiant, malum. Ubi enim modum excesserit quies, sanguis non rite circulatur, neque attenuatur, excretiones atque secretiones salutares retardantur, corpus non rite transpirat, impuritas humorum, catarrhi, affectus pituitosi, malum hypo-

chondriacum, cacochymia, mensium suppressiones & varia alia mala, quæ ex sanguinis spissitudine proveniunt, oriuntur. Quilibet itaque ex dictis facile colligere potest, pessime agere illas virgines, quæ per totum diem sellis insidentes acu pingunt, aut fila ducunt, aut plane otiosæ sunt, & nihilominus largiter cibos capiunt. Hac enim ratione uber cruditatum fit proventus, & plethora gignitur, quia multum assumunt, & nihil fere per motum consumunt. Magis vero adhuc peccant contra propriam sanitatem illæ virgines, quæ non solum horis diurnis quiescunt, sed etiam somnum longius fere usque ad meridiem protrahunt, siquidem iis caput gravatur, mens hebetatur, pituita generatur, corpus infrigidatur, robur partium solidarum infringitur, humores crassescunt, excretiones cohibentur, alvus constipatur, transpiratio sufflaminatur, uterus sanguine infarcitur, ex quo dein mensium decoloratio, vel totalis suppressio, aut fluor albus oriuntur. His nunc perspectis facile dari potest ratio, quare virgines in pagis degentes, longe meliore frui soleant valetudine, quam urbanæ. Laboribus enim corpus exercent, cibis utuntur simplicioribus & officia sua peragenda domestica illas non ultra septem horas quiescere sinunt. Quemadmodum vero excessus in somno & quiete noxius est virginibus, & menstruam evacuationem cohibet, ita etiam nimix vigiliæ atque labores eas in varios morbos præcipitare possunt. Vigiliæ enim immodicæ concoctionem destruunt, corpus emaciant, faciem fœdo pallore imbuunt, oculos reddunt concavos, succum nutrientem attenuant, & totam sanguinis crassam resolvunt, & successive partes volatiles spirituosas per cutis poros eliminant: quoniam itaque particulae fluidæ cum spirituosas avolarunt, tonus partium fit languidus, relictæ particulae fixæ terrestres ad motum non satis aptæ constituunt sanguinem nimis spissum, ad obstructions pronum, non satis mobilem, ex quo successu temporis, continuatis sic vigiliis, perfecta mensium obstructio nascitur. Hoc potissimum sibi dictum putent illæ virgines, quæ ex avaritia & pecuniarum cupidine, unam aut alteram tantum horam in nocte somno destinant, non considerantes, sanitatem opibus esse cariorem.

§. XVI.

Restant adhuc animi pathemata, quæ rectissime inter causas, quæ morbos inducunt, primum & principem locum sibi vindicant. Quomodo vero spiritus in corpus agere, & hoc vicissim eum afficere queat, a nullo Philosophorum satis est exhaustum. Effectum nemo, nisi qui Scepticismo laborat, negaverit. Quotidiana enim convincimur experientia, vitales & naturales actiones ab anima multum perturbari posse. Quoniam itaque propter commune commercium, quod animam & corpus intercedit, una pars ab altera in consensum trahitur, merito hic loci investigatur, quænam ex animi pathematibus virginibus maxime sint infensa. Si quis me iudice certet, nihil æque ex animi pathematibus, tum omnibus hominibus, tum præcipue virginibus, adeo noxium declararem, quam terrorem. Sanguini enim motum inducit sanitati corporis nostri inimicissimum, propellendo eum a peripheria versus centrum, cor puta & pulmones, atque hac ratione omnes cohibet excretiones. Experiantur hoc sæpe virgines, quibus nihil æque perniciosum est, ac si vehementi & improvise terrore percelluntur, præcipue, si illud instantibus, vel jam prorumpentibus mensibus contingit. In momento enim salutaris hæc evacuatio sistitur, partes externæ spasmodice contrahuntur, uti in rigore febris, corpusque infrigidatur, & quoniam massa sanguinea in interioribus visceribus congeritur, & simul

§. II.

Simul menses restricti sunt, non possunt non varia exinde periculosa symptomata procreare. Incon-
fuetas enim sanguis quarit vias e. g. per oculos *vid.*
MERCATUS lib. I. de morb. mulier. cap. 2. per lacry-
mas *DODONÆUS cap. V. Obs. Medic.* nec non per
aures, nares, pulmones, & vasa brevia ventriculi.
Qui ulterius casus desiderat, reperiet notabile exem-
plum suppressionis mensium ex terrore & aspectu
agonizantis in *A. N. C. Dec. 2. Anno 5. Observ. 222.*
Nec non in *HAGENDORN Cent. 2. hist. 85.* exstat
casus obstructionis mensium a viso funere. Parem
effectum, licet tardiore, exferere solent diuturna tri-
stitia, curæ, & cogitationes profundæ, tonum enim
& robur partium solidarum solvunt, appetitum at-
que chylicationem destruunt, transpirationem im-
pediunt, excretiones cohibent, sanguinis circulum
pulsuque reddunt difficiliorem, & menstruum flu-
xum sistunt. Quale exemplum *GABELCHOVERUS* re-
fert in *observat. Cent. I. Curat. 81.* de femina, cui a
tristitia ob obitum filiae sibi admodum caræ menses
substiterunt, & sputum sanguinis cum dolore sinistri
hypochondrii abortum est. Vituperandæ itaque &
perstringendæ illæ sunt virgines, quæ lascivis cogi-
tationibus & desideriis locum relinquunt, & tempore
nocturno, cum somnum capere deberent, variis ob-
coenis imaginationibus indulgent, & conjugium ma-
gna anxietate exposcunt atque anhelant, aut cru-
ciantur, quod amati juvenis compotes fieri neque-
ant. Siquidem ex tali animi inquietudine mensium
suppressio, chlorosis, furor uterinus & insania pro-
deunt.

§. XVII.

Priusquam autem huic capiti terminum constituam;
adhuc cautelam quandam adjiciendam esse reor, quæ
in eo consistit, ut virgines probe observent, ne eo
tempore, quo mensium fluxus imminet, venam fe-
cent in brachio. Nam sanguis hac ratione ab utero
revulsus & ad partes superiores retractus, non solum
excretionis per uterum obliviscitur, verum etiam ad
cor & pulmones ruens, palpitationem cordis & hæ-
moptysin sæpe efficit. Qualem casum de fluxu men-
struo a sectione venæ brachialis obstructo & per se-
ctionem in pede restituto *FORESTUS Observ. 3. lib.*
28. de mulierum morbis consignavit.

C A P U T II.

*De fugiendis rebus nonnaturalibus nimium
mensium fluxum excitantibus.*

§. I.

Quemadmodum innumera fere mala ex suppres-
sis mensibus proveniunt, ita etiam hæud pau-
cæ afflictiones & dira symptomata ex eorum fluxu
nimio propullulant. Quando enim sanguis nimia co-
pia & impetuosè ex utero fertur, notabilis statim vi-
rium jactura subsequitur, quam lipothymia graves,
Medicis non raro terrorem incutientes, indicant, cor-
pus emaciatur, & si immodicum hoc uteri proflu-
vium diutius protrahitur, plane contabescit, color
faciei mutatur in plumbeum, lividum atque luridum;
oculi apparent concavi, splendoremque plane amit-
tunt, & cachexia, febris lenta, oedemata pedum,
hydrops, hæctica, & tandem ipsa mors succedunt.
Meum itaque, qui de virginum sanitate per salubrem
diætam tuenda ago, omnino duco, ut causas eruam,
quæ adeo periculosum effectum progignere valent,
quo virgines sibi ab illis possint cavere.

Non vero aliæ sunt causæ immodici mensium flu-
xus, quam aliarum hæmorrhagiarum. Causæ sunt
communes cum reliquis. Differentia tantum consis-
tit in loco, ubi excretio perficitur. Statuo itaque
tum reliquarum hæmorrhagiarum, tum etiam hujus
uterinæ, quatuor causas proximas; plethoram scili-
cet, orgasmum sanguinis, vel cum, vel absque ple-
thora, spasmus; & humorum acrimoniam, quam-
vis hæc ultima non adeo frequenter observetur.
Quod autem sola plethora sive accumulatio sangui-
nis in vasis talem immodicum mensium fluxum ex-
citare queat, apparet exinde, quod iste obstructio-
nem mensium plerumque excipere soleat. Ita enim
scribit *D. JUNGKEN in praxi: Observavi in quam-
plurimis, quando per tempus mensium fluxu retento;
postea uno impetu tantam perdiderunt sanguinis copiam,
ut omnem sanguinem corpore exiisse putasses.* Quæ-
cunque ergo virgo fluxum menstruum in ordine ser-
vare studet, easque res nonnaturales fugit, quæ eum
adstringunt, quæque in superiore capite enarratæ
sunt; illa, præcipue, si sequentes cautelas curate
observat, non tam facile morbo hoc satis periculoso
corripitur.

§. III.

Alterâ causa hujus hæmorrhagiæ est orgasmus san-
guinis, vel cum, vel absque plethora. Miraberis
forte, quod ego mihi orgasmum sanguinis absque
plethora concipere possim, sed probatio non est adeo
difficilis, si enim a sola sanguinis abundantia orgas-
mus excitaretur, sequeretur, quod subtracta quan-
titate, statim hæmorrhagia quiescere deberet. Ve-
rum enim vero experientia testatur, sæpius multis
sanguinis libris excretis, nihilominus tamen fluxum
urgere. Non vero sufficit, ut causæ hæ proximæ
tantum indicentur, sed etiam opus est, ut causæ
harum causarum examinentur; & inquiretur, quæ-
nam ex ita dictis causis remotis, materialibus, nonna-
turalibus, talem orgasmum sanguini possint induce-
re. Observaturus itaque eum ordinem, quem in
priori capite tenere placuit, primo loco investigabo,
qualis aer & quomodo ad mensium fluxum nimium
aliquid conferat.

§. IV.

Notum est ex Physicis calorem esse validam æthe-
ris in intestino & gyratorio motu consistentis in par-
tibus sulphureis actionem, qua mediante particulae
crassiores subtilisuntur atque expanduntur. Ex quo
theoremate sole clarius elucet, qualis aer & quomo-
do orgasmum humorum & per consequens nimiam
sanguinis per uterum excretionem producere possit.
Fervidus scilicet aer, qualis est æstate circa solsti-
tium æstivum, subtilem æream in corporis nostri
humoribus materiam in similem vorticosum motum
rapit, quæ præcipue sulphureas massæ sanguineæ mo-
leculas in similem motum pertrahens, intestinam non
modo motionem cum calore suscitatur, sed & ob ela-
sticitatem quaquaversum nitens, succos rarefacit at-
que expandit. Hinc vasa turgescunt & sanguis ni-
mis resolutus majusque spatium desiderans, exitum
sibi quarit, quem in virginibus nullibi melius inve-
nit, quam per vasa uterina. Si autem perumpit,
qua data porta ruit, tanta vehementia, ut vix ac ne
vix quidem sibi possit. Caveant itaque virgines,
præsertim plethorica, & quibus purgatio uterina im-
minet, ne æstate horis meridianis ferventibus solis
radiis sese exponant, aut eo tempore exspatientur,
aut tempore hyemali conclavia nimis calefaciant;
aut, quod rusticis in usu est, ad fornacem candem-

tem dormiant, siquidem sanguis nimis exagitatus, non solum graves cephalalgias, sed etiam hæmorrhagias uteri procreare solet.

§. V.

Idem effectus observatus est a balneis nimis calide usurpatis. Nam quemadmodum balnea temperata in macilentis & calidioris naturæ hominibus non sine insigni fructu adhibentur, & ad menses provocandos sæpe instituuntur, ita nimis calida, præsertim in mollioris texturæ personis, quæque vasa sanguine turgescencia obtinent, qualis temperaturæ maxima virginum pars esse solet, magnam sæpe afferunt noxam. Vasa enim per calorem nimis expanduntur, fibræ relaxantur, massa sanguinea in orgasmum concitatur, & versus uterum congeritur, tandemque immodice ex utero effunditur. Hinc ab *Ill. PRÆSIDE in Medic. syst. Tom. III. Sect. 2. Cap. de balneor. pediluv. & Clyst. usu medico* cautelæ adjunguntur sequentes: primo, *ne nimio lavacri calore corpora exæstuentur*: dein: *ut, antequam balnea administrentur, semper prius solvatur plethora, ne sanguinis ad partes debiles congestiones fiant.*

§. VI.

Jam vero ex dictis facile apparet ratio, quare etiam motus corporis fortior, uti est saltatio immoderata, hæmorrhagiam uteri nimiam provocare possit. Quale exemplum refert *B. WEDELIUS in Amœnit. Mat. Medic. Lib. I. Sect. 3. Cap. X. pag. 202.* ita scribens: *serenissima persona, sexto mense gravida, cum choreis ducta longius incaluisse, hinc sentit menses extraordinarie profluere, adhibentur roborantia, stiptica, frustra omnia, donec tandem ad V. S. tamquam sacram anchoram fieret refugium.* Ex inde itaque hac ratione concludo: quod potest majus illud etiam potest minus. Si fortior corporis motus hæmorrhagiam uteri in gravidis, quibus alias menses non fluunt, excitare valet, multo magis eam in virginibus, præcipue instantibus, vel jam prorupentibus mensibus, producere aptus est. Abstineant itaque virgines a talibus fortioribus corporis exercitationibus, qualis vero motus iis conveniat, infra indicabitur.

§. VII.

Progredior nunc ad esculenta, investigaturus, quænam ex iis orgasmum sanguini inducere, & consequenter nimium in virginibus sanguinis profluvium ciere possint. Inter hæc profecto primarium sibi vindicant locum aromata, uti sunt cinnamomum, quod sæpe a virginibus ad halitum oris gratum sibi conciliandum in nimia copia masticatur & deglutitur, nec non caryophylli, baccæ lauri, juniperi, cubebæ, cortices citri, aurantiorum, cardamomi, *N. M.* macis, zedoaria, zingiber, crocus, item semina carminativa e. g. cuminum. Quæ omnia jam recensita inter medicamenta efficacissima & generosa referri & idcirco non in magna quantitate, sed parce & caute, in usum vocari debent. Verum, proh dolor! abusus aromatum nostro tempore adeo increbuit, ut fere omnes ditiorum cibi plus justo aromatibus condiantur. Neque hoc solum, sed etiam varia saccharo obducta aromata & semina, nec non morsuli stomachici, *Magen-Morsellen* mensæ apponuntur secundæ, quæ quoniam palato grata sunt, a virginibus sæpe non ut medicamenta, sed ut alimenta assumuntur. Quod vero talis diæta aromatica virginibus non conducat, ipsæ aromatum partes constitutivæ docent. Particulas enim salinas volatiles oleosas in sinu gerunt, mediantibus quibus, præsertim si nimia copia ingerantur, san-

guinem rarefaciunt, ita, ut plus justo incallescens, majus spatium affectet, & per fortem pressionem & appulsum vasa uteri rumpat, quo facto, tanto impetu proruit, ut etiam animi deliquia subsequantur.

§. VIII.

Idem sentiendum est de Chocolada, quæ ex nucle Cacao, Cinnamomo acuto, caryophyllis, pipere mexicano, pauxillo Vanillæ & Achiottæ cum sacchari q. s. paratur, & ditioribus frequenti in usu est. Fugiant vero ejus crebriorem usum virgines, præcipue cholericæ, sanguineæ, & in quarum primis viis bilis abundat, cum in his facile, ob aromata admixta, vel insultus febriles cum pectoris gravitate, vel mensium fluxum nimium excitet, siquidem valde nutritivum est, & plethoram ingenerat. Fugiant præcipue illam chocoladæ speciem virgines hysterice passionibus & motibus convulsivis obnoxia, quam Ambra & Moschus ingrediuntur, quoniam illæ, dummodo ejus odorem naribus percipiunt, statim paroxysmis suis torquentur. Fugiant præterea virgines idcirco frequentiore succolata potum, quoniam ad venerem stimulat, & varia libidinosa desideria suscitatur, a quibus virgo, frenum affectibus suis injicere nescia, facile vinci potest & superari.

§. IX.

Dantur etiam cerevisiæ quædam species, quæ motum, tum intestinum, tum progressivum sanguinis augendo, immodicum uteri profluvium excitare possunt. Neque est, quod quis arbitretur, me mihi ipsi hoc loco non constare, qui §. XII. superioris capitis dixi, a cerevisiis crassis, acidis & fœculentis menses obstrui. Sermo enim mihi jam est de cerevisiis spirituosiss & inebriativis, siquidem non omnes cerevisiæ crassæ inebriant, neque omnes particulis sulphureis volatilibus abundant. Intellego autem per cerevisias spirituosas illas, quæ in modica quantitate haustæ nihilominus caput perunt, & insignem, propter particulas sulphureas volatiles, quibus refertæ sunt, commotionem in sanguine efficiunt, Germani vocant tales *Niedbelköpfische* sive *Kopfbrechende Biere*. Hujus farinæ sunt nimis lupulata, lupulum enim menses ducere nemo negaverit, dein etiam illæ, quæ picis fumo sunt infectæ. Solent enim hic Halæ & in vicinis urbibus pessimo consilio dolia illinere ardenti pice, & ne fumus exire possit, foramina eorum obturare, quo facto statim cerevisiam illis infundunt, quæ dein propter particulas picis admixtas, non solum in inconsuetis doloribus capitis, sed etiam ebullitionem sanguinis, gravitatem artuum, torporemque creat. Hinc etiam plerique Studiosi cerevisiam hac in urbe coctam bibere reformidant. Virginibus itaque suadeo, ut tales cerevisias missas faciant. Idem tenendum de vinis generosis in nimia quantitate haustis & de aquis spirituosiss, quales sunt Aqua Cinnamomi, aqua vitæ Matthioli &c. quibus nonnullæ, tum feminæ, tum virgines delectantur, quæ vero menses nimium movent. Non destituuntur quidem hæc suo usu in virginibus cachecticis, & quibus menses non sufficienter fluunt, ad illos promovendos, & stomachum roborandum, sed virgines plethoricæ, & in quibus mensium negotium recte succedit, abstineant a talibus calidioribus, tum medicamentis, tum alimentis, ne sanguinis nimia per uterum fiat excretio.

§. X.

Hactenus excussi ea, quæ propter orgasmum, quem massæ humorum inferunt, menses immodice ducere

ducere solent, nunc illa explananda restant, quæ propter spasmos, quos in partibus nervosis excitant, hæmorrhagias uteri pariunt. Inter quæ principem locum facile obtinet ira, quæ partes nervosas, membranaceas & musculosas stringendo, fluidorum motum intendit, ut sic ad partes debiliores & minus resistentes, qualis in virginibus est uterus, magno impetu ruant, & venarum ibi existentium orificia aperiendo, hæmorrhagias enormes efficiant. Longe vero periculosior est ira virginibus stillante jam sanguine ex utero. Quapropter virgines ab affectibus animi sibi temperare discant, & circa evacuationem lunarem vitent omne consortium hominum sibi exorum.

§. XI.

Inter illa, quæ spasmos creant, & idcirco instante tributo lunari fugienda sunt, merito etiam referuntur purgantia atque emetica, quæ propter particulas salinas acres, quas possident, non solum ventriculum atque intestina spasmodice afficiunt, sed etiam in alias partes & in primis uterum efficaciam suam exferunt. Insignis enim ventriculo atque intestinis cum utero intercedit consensus, id quod exinde videre est, quod haud raro a fortiori purgante ipse foetus exturbetur. Monendæ itaque sunt virgines, ne eo tempore, quo per uterum purgantur, purgans a Medico expetant, aut emeticum, quoniam non semel est observatum, fluxum menstrua-lem inde nimis esse auctum. Natura enim tunc est in motu & adsunt jam spasmi in utero, qui, si a dato drastico intenduntur, non potest non major sanguinis, quam fas est, copia exprimi.

§. XII.

Venio nunc ad causam ultimam mensium fluxus immodici, quæ consistit in acrimonia sanguinis & humorum. Quæritur itaque, quænam ex alimentis talem acrimoniam sanguini inducere possint? Illa respondeo, quæ particulis gaudent salinis, acris & morficantibus, uti sunt, piper, allium, cepæ, sinapi, raphanus, tum niger, tum rusticanus, cibi fumo indurati, pisces marini, siccati, vel muria conditi, uti haleces, & tandem etiam sal commune. Novi enim quasdam virgines, quæ mirum quantum sal hoc culinare amant, & sæpe ejus aliquot pugilos ita crude deglutunt. Hæc vero omnia jam recensita, si in nimia copia & sæpius assumuntur, sanguinem reddunt acriorem, imo ipsum scorbutum successu temporis progignunt. Sed objiciat aliquis; interim tamen multa ex jam memoratis a prædicis vulgo commendantur ad depurandam in scorbuto massam sanguineam, exemplo sit raphanus rusticanus, non itaque video, quomodo sanguis ex horum usu acrimoniam concipere possit. Verum regeo, distinguendum esse inter scorbutum calidum & frigidum. In frigido quidem, qui pituitam viscidam & nimiam sanguinis spissitudinem pro causa agnoscit, ad attenuandam & resolvendam lympham non absque sperato affectu adhibentur, verum ille, qui in scorbuto calido ab accumulatione variorum salium heterogeneorum causticorum orto, talia in usum vocare velit, profecto malum exasperabit. Firma itaque stat mea sententia, acrium ab usum virginibus esse vitandum, quoniam propter irritationem, quam in utero efficiunt, menses immodice provocant. *vid. WEDELIUS Theor. sapor. med. sect. V. De acrium abusu. §. 3. Quid? quod etiam gravis SENEX abortum inde insequi inprimis a fortioribus asserat libr. I. De morb. mulier. cap. 42. t. 2.* Sed tum hæc, tum etiam reliqua hæcenus culpata non de moderato usu, sed de excessu sunt intelligenda.

C A P U T III.

De Consuetudinibus virginum sanitati infensis.

§. I.

M Iratus sæpe sum, nullam fere in libris diæteticis vestium fieri mentionem, cum tamen quotidiana experientia confirmetur, illas, pro varietate sua, varia etiam, vel bona, vel mala corpori afferre. Quamobrem non sine ratione judico, Medicum etiam vestium quadam notitia debere esse instructum, ut commoda, vel incommoda, exinde oriunda perspecta habeat. Non solum enim vestes multis morbis ansam præbent, sed etiam nonnunquam curam ægrotorum, vel promovere, vel impedire possunt. Nemo itaque vitio mihi vertet, si hoc capite paucis virginum vestitum perlustravero, & fortassis hanc aut illam vestium speciem atro carbone notavero. Recte enim etiam amictus ad res nonnaturales refertur; quoniam nemo, præsertim in nostris locis borealibus, eo carere potest, sine sanitatis detrimento.

§. II.

Sed offert sese statim oculis vestis illa, quam nostri gallizantes a Gallis acceperunt, & quæ virginibus nobilioris altiorisque conditionis familiaris & propria est. Dicitur Latinis *thorax*, germanice vero *Schnür-Leiber*. Usus ejus est, ut pectus atque abdomen in angustias cogatur, & hac ratione decens gracilitas obtineatur. Gratulantur scilicet virgines sibi de optima statura, si hypochondria non ultra spithamas duas in circumferentia habeant, & , ut thorax fiat erectior speciosiorque, ventem autem compressior, instrumento quodam utuntur gallica lingua *Planchette*, vernacula vero *Blänscheid* vocato, quod vel ex materia lignea, vel eburnea, vel cornea, vel etiam quandoque ferrea constat, prout optime delineatum est a D. GEORGIO FRANCK de FRANCKENAU *satyra XII.* Sed misera, dum pulchritudini student, sanitatem perdunt. Et quamvis ipsa sana ratio illis dictitet, talem abdominis pectorisque constrictionem non sine periculo institui, nihiloscilicet tamen amore pulchritudinis, sive, ut scapham scapham appellem, superbia, ita sunt captæ, ut illam molestiam, pressionem, dolorem, ne dicam torturam, lubentissime perferant. Et quamvis nonnullæ teneriores in principio tales *cataphractas* gerere renuant, imo & sæpe, quod ipsemet oculis meis vidi, doloris impatientes lacrymas effundant, matris tamen voluntas, promissiones & bona verba hoc efficiunt, ut successu temporis illis adsuescant. Accedunt matris persuasiones, quæ filiam ad speculum ducit, ut ipsa pulcherrimam suam intueatur formam, & , si de angustis pectoris & pressionibus conqueritur, solatur hisce verbis: *Ja für den Hoffarth muß man wuß leiden.* Jam vero constat ex physiologicis atque anatomicis, in inspiratione constas cum musculis elevari thoracemque dilatari, in expiratione vero iterum concidere. Hic motus si impeditur, id quod fit per vehementiorem constrictionem, respiratio non rite succedit, sed anxie trahitur spiritus, quia pulmones sese non satis expandere possunt; hinc sanguis in pulmonibus cogitur stagnare, unde pleuritis, dyspnœa, orthopnœa, cordis palitationes & non raro etiam ipsa phthisis oriuntur. Et quis dubitet, sæpe etiam asthma in virginibus

ginibus a concretione pulmonum cum pleura, quæ facile ob impeditam pulmonum expansionem contingere potest, provenire. Dein etiam quilibet qui Hygieam vel a limine tantum salutavit, non ignorabit, ventriculum & intestina prædita esse motu quodam systaltico & diastaltico, qui ad digestionem ciborum in ventriculo partim aliquid contribuit, partim quoque in intestinis propulsioni chymi, fœcum, & flatuum inservit. Nunc vero, si abdomen nimis arcte ligatur & comprimitur, non solum propter sufflaminatum ventriculi & intestinorum motum concoctio læditur, alvusque retardatur, sed etiam flatus incarcerantur. Hinc borborygmi ventrisque murmura in virginibus, ut quasi ventriloquæ sive *εγγαστριμύθαι* videantur. Nonnumquam etiam, si forsitan paulo majorem ciborum, præsertim flatulentorum, quantitatem assumsere, corripuntur vomitu, vel lipothymiis, neque ad se redeunt prius, quam thoracis ligula sit soluta: quæ animi deliquia partim a regurgitantibus flatibus, partim ab inspiratione insufficiente, partim a sanguinis libero progressu per abdomen intercepto & facta inde ad cor regurgitatione originem trahunt. Cum enim circulus sanguinis imprimis per vasa mesaraica & venam portæ per se jam languidus sit atque tardus, ut eum per corporis motum promovere necesse sit, quilibet emunctioris naris facile perspiciet, per talem nimiam abdominis coarctationem iter purpuræ vitalis per vasa ibi existentia longe difficilius reddi, ut necessario variæ stagnationes, stases, scirrhi mesenterii, abscessus, inflammationes & congestiones sanguinis ad pectus & alias partes insequi debeant. Neque etiam hoc prætermittendum est, quod virgines tales junceæ soleant facile prima vice imprægnatæ abortum pati. Ita enim HIPPOCRATES *Libr. V. Aph. 44.* *Ουόσαι ὡς φύσιν λεπταὶ ἔσσαι, ἐν γαστρὶ ἔχουσιν, ἐκτιγέσκουσιν, πρὶν ἢ παχυνθῆναι.* Quæcunque gravidæ præter naturam sunt graciles, abortiunt, priusquam habitiores fiant. Quod si vero fœtus ad perfectionem pervenit, partus plerumque est periculosissimus, cum doloribus immanibus conjunctus, ita ut non raro fœtum vivum frustatim ex utero exscindere atque extrahere dura jubeat necessitas. Quale triste fatum feminam quandam generosam, primiparam, admodum gracilem expertam esse novi. Nec satis malorum: monstra item inde nasci possunt, quando feminæ tempore gestationis nihilominus thoracibus nimium constrictis incedunt, quoniam fœtus, tam arcto spatio inclusus, libere sese movere nequit. Quem plura de hac materia legere juvat, mitto ad jam laudati D. G. FRANCK de FRANCKENAU *Satyræ XII.* ubi plura exempla atque celeberrimorum virorum testimonia allegata sunt. Licet igitur non omnem cataphractarum usum erectæ & proportionatæ staturæ fervientem rejiciam, serio tamen moneo, ut excessus tollatur, ne nimia fiat thoracum per ligulam constrictio & juncea affectetur gracilitas.

§. III.

Occurrit alia perversa virginum consuetudo, quæ circa calceamenta versatur. Ponunt scilicet haud exiguum pulchritudinis partem in bene proportionatis pedibus. Hos vero vocant eos, qui gracilitate & brevitate præ aliis eminent. Omni itaque studio allaborant, ut etiam hanc formositatis partem assequantur. Quapropter futoribus imperant, ut calceamenta ipsarum non ampla, sed satis angusta & arcta conficiant. Dictum, factum; futores ut aucupentur virginum favorem, adeo eleganter calceamenta consuunt, ut magna cum molestia propter angustiam pedibus accincta, annata quasi videantur. Exprimunt hoc: *Ev der Schuh siget/ als wen er*

über den Fuß genehet wäre. Præterea quoniam puellæ hoc potissimum habent in votis, ut in decentem venustamque proceritatem adolescant, ac jam maturæ aptæque matrimonio censeantur, atque a procis desiderantur, futores articulos calceorum parant adeo longos, ut virgines summis pedum digitis insistentes incedant. Non vero opus est, ut hunc ridiculum morem pluribus delineem, quoniam adeo vulgaris est, ut toto die a cuivis haud paucae virgines grallis quasi innitentes conspici queant. Medium potius esse ducō, ut disquiram, num talia arctiora calceamenta sine sanitatis detrimento a virginibus possint adhiberi. Physiologia hanc quæstionem solvat, quæ hoc theorema tam per rationem quam experientiam confirmat: circulum scilicet sanguinis in partibus a corde remotioribus tardius progredi, quam in iis, quæ cordi magis vicinæ sunt: systole enim arteriarum successive fit languidior. Exinde per firmam consequentiam elicio, circulum sanguinis debilissimum esse debere in extremo pedis, quoniam hoc longissime est a corde remotum. Promovendus itaque esset in pede purpuræ vitalis circuitus, non impediendus. Quilibet ergo facile concludere ulterius potest ex præmissis, illas sanitati suæ pessime consulere virgines, quæ arctioribus calceamentis delectantur. Quandoquidem per compressa hac ratione vasa sanguifera sanguinis circuitus sufflaminatur, infirmitas, contractura, immobilitas, spasmus & stupor pedum nonnumquam inducuntur; & quoniam digiti pedum in tam arcto spatio, uti est calcei apex, invicem atteruntur, intertrigines & clavi proveniunt. Majus vero periculum imminet, si simul cinguli, quibus tibialia firmari solent, arctius contrahantur. Sanguis enim, superius inferiusque interceptus, stagnat & coagulatur, serumque a partibus terrestribus secedens tumores efficit oedematofos.

§. IV.

Descendamus nunc relicto vestitu arctiori ad alium virginum ritum non minus vulgarem quam noxium. Moris enim his nostris in regionibus est, ut virgines etiam media hyeme caput nudum relinquant, & tantum ferto, reticulo, tænia, vitta, vel frontali obiter tegant. Præterea aures, collum, mammaeque frigoris exponuntur injuriis. Neque brachia, manus & humeri satis sunt munita, licet enim chirothecis & manicis sint investita, tamen hæc sunt adeo tenues, ut frigus arcere parum valeant. Pessimam vero hanc consuetudinem temere nostræ receperunt a Gallis, non considerantes, cælum ibi benignius esse & hyemem mitiorem. Mirum itaque non est, si nostris in regionibus borealibus, frigidioribus, ex talis capitis auriumque refrigeratione cephalalgia, otalgia, dolores dentium, memoria nervorumque capitis imbecillitates, defluxiones catarrhales & varii alii morbi proveniant. *vid. FORESTUS Obs. 4. lib. XII.* Adhuc plures illique periculosiores affectus succedunt, quando simul collum & pectus denudantur. Hac enim ratione tumores glandularum colli, germanice *Hagedrüsen* / cum scabie capitis ut plurimum conjuncti, nec non amygdalarum & uvulæ, tussis & raucedines, inflammationes faucium, pleuritides & peripneumonia, empyemata pulmonum, & nonnumquam etiam ipsa phthisis invitantur. Neque silentii peplo censeo involvendas esse illas molestias, quæ ex refrigeratione mammarum originem trahere & possunt & solent. Ecquid frequentius, quam quod primiparæ tumoribus torqueantur & inflammationibus mammarum, quæ sæpe in ulcera abeunt cancrofa. Unde hæc lachrymæ? Non aliunde sæpe, quam quod per

per tubulos glandularum mammillarium a frigore ad-
misso nimis constrictos, lac liberum transitum non
inveniat, & idcirco stagnare cogatur. Quilibet ita-
que videt adeo noxiam consuetudinem virginibus
omnino quavis ratione esse dissuadendam.

§. V.

Eadem censura dignæ sunt illæ virgines, quæ sub
ipso veris initio statim vestes hybernas rejiciunt, &
levi saltem incedunt habitu, qualis tempore æstivo
in usu est. Magna enim tunc temporis est cœli va-
rietas, ita, ut serenum diem mox frigidus & ne-
bulosus excipiat, & vice versa. Si itaque calida
tempestas mox in gelidam transmutatur, frigus, po-
ros constringendo, saluberrimam illam excretionem,
transpirationem nempe cutaneam, intercipit. Hinc
varii morbi ab exhalationibus impuris salino-sulphu-
reis in corpore retentis nascuntur, uti sunt omnes
febres exanthematicæ & catarrhales, gravedines,
tusses, rheumatismi. Hortor itaque virgines, ut
vestes hybernas tam diu gestent, donec stabilis &
constans tempestas eas deponere jubeat.

§. VI.

Hucusque argui illas virgines, quæ vel membra
quædam omnino nuda relinquunt, vel vestibus non
sufficienter contra frigus defendunt. Nunc obviam
mihi veniunt aliæ, quæ nimis sollicitè partibus suis
inferioribus prospiciunt, &, ne a frigore lædantur,
ollas carbonibus repletas, vulgo *Kiecken* / sive *Seuer-
Töpfe* dictas, intra vestes abdunt, pedibusque subji-
ciunt. Præservatio hæc a frigoris injuriis laude sua
non esset privanda, si modo recte institueretur.
Quod vero ad hoc negotium prunæ candentes ad-
hibentur, vituperium omnino meretur. Vapor enim
carbonum, poris vasculorum uteri sese insinuans,
more omnium aliorum narcoticorum, statim elate-
rem & systolen arteriarum in utero existentium
infringit, & tandem penitus tollit. Hinc sanguis
in utero stagnat & congeritur, & sic immodicus
mensium fluxus ut contingat, necesse est. Quoniam
vero exhalationes illæ carbonum non solum uterum
sed etiam nares petunt, caput quoque graviter in-
de luit: afficitur enim dolore, gravitate, torpore,
& somnolentia; quandoquidem illas virgines, quæ
ollas tales intra vestes absconderunt, facillime præ-
aliis in templis somno submergi videmus. Longe
vero major noxa ex carbonibus fossilibus redundat
quam ex ligneis, siquidem illi plus sulphuris vapo-
rosi in sinu gerunt. Melius itaque esset, ut virgi-
nes vestibus abdomen & tibialibus pedes probe mu-
nirent contra frigus, tunc non opus esset hujusmodi
præfidiis. Verum sæpe miratus sum, eas, quæ
mammas, caput & collum frigori exponunt, & ni-
hil molestiæ inde sentire videntur, in pedibus om-
nem sensum tactus habere, & nihil frigoris in iis
sustinere posse. Quapropter judico, virgines potius
ex ritu, quam necessitate hæc ollas in usum voca-
re; si vero quædam foret, quæ adeo sensibilibus
pedibus prædita esset, ei suadeo, ut loco ollarum,
carbonibus refertarum lagenam aqua fervente reple-
tam adhibeant, nobis *eine Warm-Flasche* dictam.

§. VII.

Superfunt adhuc varia circa ornatum virginum
monenda, quorum primum erit conspersio capillo-
rum amylo, germanice *das Pudern*. Veteres qui-
dem perfundebant caput unguentis suaveolentibus,
aromaticis, nervinis, ad cerebri nervos roborandos;
sed in quem usum nostræ virgines amylo caput con-
spargant, nescio, fortassis idcirco, quoniam ad pul-
chritudinem facere putant? Verum hæc cujuslibet
Frid. Hoffmanni Oper. Supplem. II.

nititur imaginatione. Ita aliæ gentes nostras con-
suetudines & nos vicissim earum ritus ridemus. Sed,
posito talem capillorum dealbationem virginibus esse
ornamento, mea tamen sententia valetudini elegan-
tia est postponenda, quoniam certo certius est, po-
ros cutis cranii inde obstrui, & ita transpirationi ca-
pitis obicem poni. Quanta vero exinde damna pro-
crescere queant, quilibet facile judicare potest. Cum
autem hæc consuetudo adeo communis sit, ut fere
nulla ratione mutari queat, hoc tamen virginibus
dabo consilii, ut, quando caput amylo consperse-
runt, illud non in eo relinquant, ne per sudorem
accedentem in massam glutinosam poros obstruen-
tem convertatur, sed tempore vespertino pectine an-
guustiore eburneo abradant. Tandem etiam multum
interest, quale amyllum adhibeatur. Dantur enim
ejus variæ species, quarum nonnullæ oleis suaveo-
lentibus & odore moschi sunt imprægnatæ. Absti-
neant virgines a talibus, ne forsitan hystericae ejus
odore in paroxysmos suos conjiciant. Sunt vero in-
ter virgines haud paucæ in eo laudandæ, quod amy-
lum capiti non injiciant, in eo vero reprehendendæ,
quod denigratione capillorum sese decorare studeant.
Efficiunt hoc vel per ficca e. g. per pulverem car-
bonum, vel per lotiones, quas nonnunquam vitrio-
lum aut alumen aut alia adstringentia ingrediuntur.
Sed hæc non minus quam amyllum poros obstruunt,
transpirationem capitis impediunt, atque cephalal-
gias, nec non varios alios morbos pariunt. Qua-
propter talia merito a qualibet sanitati studiosa vir-
gine sunt vitanda.

§. VIII.

Dicenda porro nonnulla sunt de iis, quæ virgines
passim adhibere solent ad venustatem faciei & cuti-
nitorem conciliandum. Si quis destillatis acrimoniæ
expertibus pro hoc scopo utuntur, quales sunt Aqua
florum fabarum, tilia, liliorum alborum, rosarum, si-
gilli Salomonis, omnium florum, non sunt culpandæ.
Hæ enim nullam inferunt noxam, & tantum cutim
asperam emolliendo agunt. Illæ vero quæ Mercuri-
alibus & repellentibus, qualis est Mercurius præ-
cipitatus albus, saccharum saturni, lac sulphuris, a-
qua calcis vivæ, faciem illinunt, vel ad varos sive
jonthos germanice *Sinnen* / vel lichenes *Sommer-
sprossen* absumentos, non solum sæpe sperato effe-
ctu destituuntur, sed etiam, quando hæc exanthe-
mata retropelluntur, in varios alios affectus, nempe
odontalgias graves & tumores glandularum colli
incidunt, ne dicam cutim ab horum usu ita constri-
gi & corrugari, ut aniculæ esse videantur. Id quod
etiam post infucationes germanice *Schmincken* obser-
vatur, quæ non solum virginum faciem asperam
rugosamque reddunt, sed etiam animum inhonestum
indicant & voluptuosum.

§. IX.

Agmen tandem claudat perniciosissima virginum
quarundam consuetudo cretam devorandi, & qui-
dem eam ob causam, ut amantium faciem conse-
quantur: Ita enim *Poëta*:

Palléat omnis amans, color hic est aptus amanti.

Ast miseræ non solum voti sui imprudentis compo-
tes fiunt, verum etiam varios alios sibi ipsi contra-
hant morbos, præcipue vero atrophiam. Anatomici
enim ventriculum & intestina tenuia eorum, qui-
bus absorbentia terrea in nimia dosi exhibita sunt,
crusta quadam solidescens materiæ obducta inveni-
runt, quæ chyli ad sanguinem transitum prohibuit.

CAPUT IV.

De Recta & optima virginum diæta.

§. I.

QUAMVIS quilibet, qui usu sanæ rationis gaudet, facile ex vitandis agenda colligere possit, nihilominus tamen virginibus paucis regulas quasdam positivas diæteticas præscribere animus est, quibus rectus usus sex rerum nonnaturalium indicabitur, ne virgines ex uno extremo in alterum delabantur, sed media viâ incedant.

§. II.

Quoniam fanitas in æquilibrio, mediocritate & temperie consistit, extra omnem dubitationis aleam positum esse duco, aërem temperatum purum & ferenum virginibus maxime esse accommodatum. Nunc vero exsurgit quæstio; qualis ille sit, quem commendo, aër? Illum intelligo, qui particulis heterogeneis non est refertus, in quo nulla excessiva qualitas eminet, qui neque nimis calidus neque frigidus, neque humidus, neque ficcus est, sed in quo hæ qualitates iusta temperie sunt mixtæ. Talis enim aër motum solidorum systalticum & diastalticum conservat; neque enim fibras & vasa uteri constringendo suppressionem procurat, neque massam sanguineam nimis commovendo, nimiam sanguinis ex utero excitat evacuationem. Quæ cum ita sint, virgines semper, præcipue circa purgationem uterinam, loca sibi eligant, quæ aërem temperatum tenuiorem & purum alunt.

§. III.

Quando sanguis ex chylo & chylus ex alimentis generantur, sequitur, ea alimenta esse optima, quæ convenientem cum sanguine naturam & mixtionem habent. Nunc vero sanguis gelatinosæ temperatæ indolis est & consistentiæ, & nulla excessiva qualitas in eo eminet, ex quo conficitur etiam alimenta, quæ talem temperatam gelatinam largiuntur, & ad naturam sanguinis proxime accedunt, omnibus hominibus, & in primis virginibus, in quibus ventriculus non adeo robustus est, esse saluberrima; quemadmodum III. PRÆSES illud optime demonstravit in *Diæt. Cap. IV. De salubr. & insalubr. esculent.* Ad hanc vero classem gelatinosorum præcipue pertinent ex regno animali variæ carnes, ut caro columbarum, gallinarum, caponum, agnorum, vitulorum & vaccarum juniorum, imo ex sylvestribus cervorum leporumque, & tandem ipsum lac & ex eo præparata; quod vero iis virginibus non convenit, quæ multum acidorum succorum in primis viis fovent; ex regno vegetabili, variæ seminum species, milium, hordeum excorticatum, avena, & principaliter panis ex farina secali, qui optimum & quasi universale constituit alimentum; quæ omnia tum per se tum etiam iuscula exinde præparata facile concoquuntur, & bonum eumque temperatum chylum suppeditant. Sunt etiam adhuc in regno vegetabili alia, oleracea scilicet, quæ, quamvis non adeo nutriant, nihilominus tamen virginibus proficua sunt, qualis est brassica crispa, quæ cum virtute laxante etiam aperientem conjunctam habet, nec non spinachia & asparagus. Ex radicibus vero radix Petroselinii &c. Caveant vero virgines, ne cibis superius recensitis valde nutritivis nimium sese infarciant, quoniam hac ratione plethora consequenter

etiam mensium immodicus fluxus procreatur. Interim hæc non mea est intentio, ac si virgines nullos alios cibos quam heic recensitos capere debeant, hoc tantum est, quod assero, hæc memorata esculenta facilioris esse digestionis, & majorem eamque meliorem sanguinis copiam generare. Neque ego virginibus omnes interdico cibos duriores, sed tantum moneo, ne nimis frequenter & nimia copia iis utantur. Ceteroquin una hirundo non facit ver. Hæc vero cautio si negligitur, & si victus maxima ex parte crudus est atque durus, facile menses obstrui possunt. Suadeo etiam, ut cibi, duriores præfertim, aromatibus condiantur, ad digestionis negotium promovendum, sed ita, ne nimia quantitas iis admisceatur, alias menses nimium cient. Si vero modice cibis adjiciantur, non solum ventriculum roborant, sed etiam subtilissimum illud nervorum fluidum augent, & sanguini balsamum & spiritualescentiam conciliant.

§. IV.

Superius & quidem in primo capite §. XII. & in secundo §. IX. actum est de cerevisiis virginibus noxiis, & vel menses supprimentibus, vel nimium commoventibus, ubi simul promisi, me sub fine hujus dissertationis criteria salubris cerevisiæ esse expositurum. Consistit vero bonitas cerevisiarum in eo, primo, ut aqua, cum qua frumentum coquitur, sit levis, salubris, pura, nullis particulis heterogeneis referta. Dein, ut frumento, ex quo cerevisia paratur, lolium non sit admixtum, aut aliud quoddam noxium, sed ut grana sint pura nec corrupta. Tum ut debite cocta sit & fermentata. Post, ne caput gravet, torporemque inferat, in ventriculo acefcat, aut flatus gignat, sed, ut cito ventriculum & omnia emunctoria permeet, & mox post asumptionem per urinam excernatur. De quibus cerevisiæ notis sequentes insignes exstant in *Schola Salernitana* versiculi:

*Non acidum sapiat cerevisia, sit bene clara;
Ex granis sit cocta bonis satis & veterata.*

Et capite sequente:

De qua potetur stomachus non inde gravetur.

Omnis itaque cerevisia hisce prædita qualitatibus tuto a virginibus hauriri potest, sine sanitatis detrimento & mensium perturbatione.

§. V.

Ad potum porro pertinent hodie usitata decocta & infusa. De potus Coffee & Succolatæ abusu superius jam quædam in medium sunt prolata, nunc de recto usu quædam adjiciam. Quando §. XIII. Cap. I. potus Coffee usum virginibus non suadendum esse asserui, hoc non ita accipiendum est, ac si ei assuetæ ab eo plane abstinere debeant. Quæcunque enim virgo ex usu ejus non sentit tremores artuum & vertiginem, item, cui saburra acida in ventriculo hæret, potest quidem hoc infusum haurire, sed hac adhibita cautione, ne nimis saturatum sit, aut nimia copia forbilletur. Illis vero, quæ nunquam infusum fabarum Coffee biberunt, auctor suasorque non essem, ut illud prima vice ingurgitarent, quoniam nemo a priori accurate prælagire potest, num illud infusum bene aut ægre laturæ, aut qualia symptomata ex ejus usu proditura sint. Neque succolatæ rectus usus est rejiciendus, sed nimius. Modice enim usurpata stomachum confortat, nervosque roborat. Tutius vero est, imo melius, infusum

infusum Thee, quippe quod omni ætati, sexui, temperamento convenit, & nunquam, nisi nimia copia hauriatur, nocet, sed semper utile est, atque tempore matutino haustum, cruditates a concoctione in ventriculo relictas eluit, alvum movet, urinam ciet, oscula vasorum lacteorum aperit, & mucum abstergit, salia excrementitia in massa sanguinea accumulata diluit, in se recipit, & per renes exturbat. In primis vero virginibus conducit ad saluberrimum mensium fluxum facilitandum, promovendum & in ordine servandum. Quid? quod etiam obstructum restituat, sanguinem enim spissum diluit & resolvit, & ad excretionem per uterum aptum reddit. Majoris adhuc sunt efficaciam infusa Theiformia, quæ ex herbis solventibus, incidentibus, aromaticis, balsamicis concinnata sunt. e. g. ex herba Melissæ, Veronicæ, Salviæ, floribus Cheiri, radice Cichorii, Caryophyllatæ, Cortice ligni sassafras, Cinnamomi & Citri recentibus. Tale infusum, præcipue circa instans tributum lunare sumtum, non caret effectu, quapropter virgines mensium obstructione aut emansione laborantes, sibi hoc commendatum habeant. Illæ vero virgines, quæ vino pro potu utuntur, eligant sibi Hungaricum, hoc enim nec nimis spirituosum, nec acidum est, sed temperatum & facile transpirat, neque languorem artuum aut torporem capitis post se relinquit, de cujus præstantia videri potest egregia *Ill. PRÆSIDIS de vino Hungarico dissertatio*. Diluendum vero est hoc vinum cum aqua ex fontibus vivis scaturiente, aut destillata, alias purpuram vitalem nimis exagitando, mensium fluxum concitat immodicum.

§. VI.

Rapiunt me jam ad sui considerationem somnus & vigiliæ, motus & quies. Explanandum itaque est, quomodo virgines hisce recte uti debeant. Veteres VII. horas somno destinarunt. Sed temperamentorum varietas non permittit, ut in genere tempus aliquod constituatur. Virgines cholericas, sicciore, macilentas somnum diutius protrahere oportet, quam phlegmaticas aut sanguineas obesiores. Sub somno enim concoctio melius succedit, & hinc vires restaurantur, succus nutritius colligitur, & visceribus apponitur. Ego itaque arbitror, phlegmaticis & obesis VII. horas ad somnum sufficere, alias nimis pinguescerent, & nimia humorum colligeretur quantitas. Graciliores vero horam unam aut alteram superaddere possunt. Infallibile autem & certum signum est somni sufficientis, si mens est alacris & corpus agile. Languor corporis post somnum, vel non sufficientem, vel nimium somnum significat. Quæcunque ergo virgo horas IX. vel X. dormivit, & somno ex oculis excusso nihilominus oscitabunda est, & somnolenta, illa, ne denuo quieti se tradat, caveat, opinans, somnum ad recreationem sui corporis nondum sufficere, sed ei contingit, quod trito Germanorum proverbio dicitur: *Je mehr man schläft / je mehr man schlaffen will*. Verum illa, quæ tantum per VI. horas quievit, & abrupto somno adhuc languida & lassæ est, illi ulterior somni continuatio non est dissuadenda. Quod ad vigilias attinet, ego quidem censeo vespertinas & nocturnas virginibus non ita convenire ac matutinas. Vespera enim ingruente, cibi adhuc non sunt concocti, præcipue, si cœna lautior fuerit, quapropter opus est, ut ad digestionem assumptorum promovendam somnus capiatur. Mane vero ventriculus est vacuus, & corpus, per antecedentem somnum recreatum, perferendis vigiliis magis existit idoneum. Melius itaque agunt virgines, quæ vesperi hora IX. membra ad quietem componunt, & mane hora V.

Frid. Hoffmanni Oper. Supplem. II.

furgunt, illis, quæ dimidiam fere noctem usque ad horam XII. vigiles transigunt, & mane hora VII. aut VIII. strata relinquunt.

§. VII.


Supra & quidem §. XIV. primi mei capitis demonstratum est, innumeros fere morbos ex nimia virginum quiete incunabula trahere. Nunc instituti mei ratio exigit, ut virgines doceam, quomodo per motum sibi convenientem fluxum menstruum in ordine servare, & sanitatem suam confirmare queant. Motum optimum esse sanitatis præsidium, nemo inficias ibit, qui modo considerabit, vitam nostram consistere in motu & actione solidorum in fluida, nec non fluidorum iterum in solida reactione. Omnes se- & excretionem per motum fiunt, & quando motus in corpore cessat, corpus dicitur mortuum. Præterea contumacissimi iique chronici morbi, uti est malum hypochondriacum, per motum corporis optime eradicantur. Tandem etiam in virginibus saluberrimus mensium fluxus per motum in ordine servatur, facilitatur, & suppressus restituitur. Sanguis enim per corporis exercitationem conquassatur atque attenuatur, ut per uterum facilius excerni queat. Novi ego virginem cachecticam, mensium emansione laborantem, quæ motu, potu, liberaliori scilicet, & fotu, id est pediluvii, tantum effecit, ut non solum mensium fluxus succederet, sed etiam bonus corporis habitus & venustas faciei redirent. Quemadmodum vero in omnibus aurea regula; *Ne quid nimis*, est observanda, ita etiam circa motum attendi debet. Dixi enim jam antea, a motu fortiori, in consuetis mensium fluxum immodicum concitatum esse. Dantur autem variæ motuum species, quarum nonnullæ ad sexum potissimum nobiliorem pertinent, uti equitatio, lusus pilæ, globorum lusus, germanice *das Regeln* / exercitationes athleticæ. Dispiciendum itaque est, quinam motus virginibus maxime congruus sit. Mea quidem sententia deambulatio in plano, sive exspatiatio, virginibus maxime est accommodata, item vectura & peregrinationes, nec non saltatio modica. Ulterius quoque virginibus suadeo, ut tempore otioso carmina canant, non lasciva neque obscœna, quæ animum perturbant, sed jucunda, honesta, jocosa. Vocis enim exercitatio peculiarem etiam motus constituit speciem, quoniam sub ipsa sanguis celerius per pulmones & totum corpus agitur. Duplicem itaque fructum ex tali cantatione percipiunt virgines; nam primo sanguis subtilisatur, transpiratioque augetur, dein etiam animus recreatur, atque erigitur, curæque ventis traduntur. Hæc autem animi tranquillitas multum profecto confert ad sanitatem. Laudandæ itaque illæ sunt virgines, quæ fidibus canere norunt, & organon digitis impellere didicere. Simulac enim sollicitæ sunt, dulcis musica omnes ex earum animo curas eximit.

§. VIII.

Antequam vero huic meæ dissertationi colophonem imponam, vile quidem, ut apparet, sed maximæ utilitatis virginibus dabo consilium, ut scilicet semper circa instantem excretionem uterinam curam gerant, ut alvum habeant apertam. Observatum enim est, recte succedente alvo, menses quoque bene evacuari, constricta vero ea, hos quoque vel imminui, vel suppressi. Possunt vero alvum lubricam servare vel per infusum Thee, vel, si hoc non satis efficax sit, per clysterem emollientem ex solo decocto avenaceo addito sale communi & oleo olivarum, vel per pilulas balsamicas *Ill. PRÆSIDIS*, quæ efficaciter mensium fluxum facilitant. Condu-

cit etiam pulvis ex Magnesia alba, Tartaro Vitriolato vel sale Tartari, præprimis, quando adstrictio alvi a multis cruditatibus acidis originem ducit. Confert quoque tunc temporis plus liquidorum quam solidorum ciborum assumere & sufficientem potum haurire, atque abdomen probe a frigore defendere. Hæc si observantur, una cum iis quæ supra monui, menstrua purgatio in ordine servatur, & virginum sanitas manet incolu-

mis. Possem quidem adhuc plura adjicere, sed, ne dissertationis limites transgrediar, hic acquiesco, DEO O. M. humillime gratias agens, pro benignissime ad hunc laborem concessis viribus. Ille DEUS, qui hucusque studia mea secundavit, quique mentem sanam in corpore sano largitus est, velit & impofterum gratia sua divina mihi adesse, ut omnia cedant in summi NUMINIS sui gloriam & proximi emolumentum.



DISSERTATIO MEDICA

D E

ÆTATE CONJUGIO OPPORTUNA.

Primum edita Anno 1729.

§. I.

Longævi-
tas optabi-
lis.



A semper a priscis jam temporibus ad nostra usque secula mortalium fuit cupido, vitam ut acquirerent non felicitatem solum, sed & diuturnam. *Jucunda enim vita, hacque diu durante, quid est ju-*

cundius? Hunc vero scopum plurimi attingere haud potuerunt, exceptis Patriarchis, illisque fere cunctis, quibus a creatione hujus universi ad diluvium usque vitales carpere licuit auras. Etenim *in lauto victu* alii, *plenaque diata*, alii *in otio*, *corporis quiete mentisque oblectatione vana*, & *in sexcentis* aliis, quibus felicitatem anhelantes, se infelices magis, quam felices reddunt, vitæ jucunditatem latere putant. Raro inde nostris reperies mortalium seculis, qui *octuagesimum*, rarius *nonagesimum*, ac *centesimum*, rarissime, qui *hunc* superant annum, cum e contra Patriarcharum haud pauci *octingentesimum* sint affecuti. Nec e longinquo differentia inter nostram brevem & longam illorum vitam ratio est accersenda: latet vero illa potissimum in rerum non naturalium legitimo usu vel illegitimo. *Victum* enim illorum intimius paulo si intueamur, simplicem illum ex vegetabilibus, fructibus, herbis, oleribus ac radicibus fuisse, antiquissima fide constat: carniū vero varii generis usus, quibus corpus vario modo læditur, nosque hodie delectamur, illis plane fuit adversus, cibisque & potibus non in voluptatem, sed vitæ conservationem fruebantur. *Potum* vero illorum nil nisi aqua, sed tenuissima atque purissima constituēbat, qua non tantum ad sitim extinguendam, sed & ad reliquum corporis incrementum utebantur; aquam e-

nim potum corpori nostro convenientissimum, quia facile viscera corporis & vasa permeat, & consequenter universale quoddam esse remedium, omnes uno adfirmant ore Medici, illamque longævitatis causam ex sua parte constituere, optime suo jam docuit tempore PROSP. ALPINUS; & TIBULLUS de prisca ætate, quæ loco potulentorum sola usa fuit aqua, & longævitatem acquisivit, ita canit: a)

Glans alat, & prisco more bibantur aquæ.

§. II.

Ærem porro vitam tueri, nemo sana ratione præditus in dubium vocabit. Nullum enim per paucissimum temporis momentum sine aëre vivere potest animal, ob respirationem impeditam, ad vitam peragendam absolute necessariam: ad vitam vero *longam* adipiscendam non aër solum, sed ille purus, temperate siccus & humidus, particulis heterogeneis orbatus requiritur; talem vero fuisse illum, quem Veteres ante diluvium hauriebant, in dubium vocare ausus non essem; natura enim tunc tota quasi recens fuit. *Æris* quoque beneficio una regio ætate provectiores atque optima sanitate fruētes alit præ altera, quod corroborare haud foret difficile, diversarum regionum si placeret recensere historias: cum vero nec instituti ratio, nec metus, ne in nimiam molem excrescat foetus, id permittant, nec crambem bis coctam recoquam, B. L. perlegendam commendo Ill. Dni. PRÆSIDIS Dissertationem de *Methodo vitam longam acquirendi ejusque causis*, in qua de diversa salubritate ex differentia situs regionum proveniente, fusius actum. De *affectibus animi, somno & vigilia*, ut & de Motu

Ære puro,

*qui vitam
& sanita-
tem dis-
pensat,*

a) Lib. 2. Eleg. 3.

Patriar-
charum.

Ex victu
salubri.

cum aliis
rebus n.n.

Motu & Quiete, multis hic agere non necesse duco, de utilitate vero omnium atque noxa exinde redundante concinne differit G. D. COSCHWITZ, olim Professor hujus Aca-
demiae Celeberrimus, cujus cineres, ut *Præceptoris fidelissimi*, sempiterna memoria ve-
neror. b)

§. III.

Et inter
retenta &
excreta po-
tissimum
semine.

Nec de *Excretis* atque *Retentis* prolixè a-
gere, nec de variis corporis nostri humori-
bus, præsens jubet institutum. Est solum
sperma virile, de quo hic agendum, humor
nostri corporis subtilissimus, laudabilis atque
lymphaticus, *masculis* solum communis, non
frustra, sed certum in finem a sapientissimo
CREATORE destinatus, ut mediante illo pro-
ducat homo sub licito conjugio sui similem.
Incurrit utique liquor iste medicam disquisi-
tionem, cum non ex nimia tantum illius at-
que intempestiva excretionem, sed & diutur-
niori illius retentione, varia oriantur sanita-
ti nocumenta. c) Etsi vero roscidum hoc
liquidum certo tempore excernatur, non ta-
men inde ad excrementitios humores est re-
ferendum, sed ad utilissimos, in conjugali
demum societate in usum supra dictum ex-
cernendum. Cum enim corpus nostrum ex
lymphatico gelatinoso succo capiat nutrimen-
tum, noster vero laudabilis humor similis fe-
re sit indolis, hinc merito sequitur, eo tem-
pore, illisque quibus evidenter adhuc corpus
nutritur & crescit annis, nec non iis, qui-
bus corpus ob ætatis rationem blandis rosci-
dis succis jam tum destituitur, eundem non
esse evomendum ac ejiciendum. Evidens
itaque est & sole clarius, rerum non natu-
ralium legitimum usum non priscis solum tem-
poribus ad Patriarcharum longævitate[m] mul-
tum contulisse, sed & nostris seculis ad sa-
nitatem conservandam & diuturnam vitam
adipiscendam, omnem fere absolvere pagi-
nam: d)

§. IV.

Cujus in-
tempesti-
va emissio
nociva
notanda.

Eo vero proh dolor! pervenit nostris tem-
poribus effera libido & pessima consuetudo,
ut utriusque sexus homines, quamprimum
duplicem dari sexum experti sunt, annosque
pubertatis vix attigerunt, concubitus vel li-
citus vel illicitus celebrare cupiant, se ip-
sos exinde summis sanitatis & vitæ periculis
exponentes. Sunt etiam ex *senibus*, qui,
licet canities, rugæ viriumque decrementum
ipso admoneant, ut succos vitales potius cu-
stodire, quam profundere satagerent, quin
mortem potius, quam nuptias meditentur:
nihilo tamen secius venereis obsequuntur sti-
mulis, & concubitu *mortem* accelerant. Hæc
vero res, cum haud ita parvi sit momenti,
multumque generi humano intersit, vitam
non felicem solum agere, sed & longam,
medicamque haud raro incurrat consideratio-
nem: mecum reputavi, cum mihi, more an-
Frid. Hoffmanni Oper. Supplem. II.

tiquis consueto, ad capeffenda Jura atque Pri-
vilegia Doctoralia, Thema inaugurale sit ela-
borandum, hanc maximi ponderis materiam
disquisitioni subicere. Agam itaque indultu
Clementiæ divini de *ÆTATE CONJUGIO*
OPPORTUNA, & annitar demonstrare, in-
tempestivum conjugium haud proficuum sani-
tati, sed *longævitati* esse impedimento: omit-
tendo reliqua, quæ circa conjugium *ineun-*
dum vario modo Medici requirunt attentio-
nem. DEUS vero T. O. M. qui ab incu-
nabulis ad hunc usque diem benedictione sua
divina mihi semper adfuit, adsistat quoque
benigne scribendis!

§. V.

Ætatis vox alio sensu sumitur a Theolo-
gis, alio a JCtis, alio a Politicis, alio a
Medicis. Mihi vero cum his denotat: *cer-*
tum vitæ spatium; in quo corporis & animi
peculiare vigent actiones. e) Quid sit *Con-*
jugium, vel quod idem, matrimonium, id
fufius explicare non duco necesse: interim,
ne hac ex parte aliquid omiffisse videar, sci-
to, quod ex mente JCtorum celeberrimorum
f) sit *unius maris & feminae legitima & in-*
dissolubilis conjunctio, mutuo utriusque consen-
su inita, ad generis humani propagationem,
& mutuam vitæ adjutorium. Quumque adeo
duplex sit matrimonii *finis*, primarius sobo-
lis procreatio, secundarius, mutuam adjuto-
rium, facile patet, opportunam conjugio æ-
tatem eam esse, quæ fini potissimum prima-
rio obtinendo apta est atque accominoda.

Explicatio
Tituli.

§. VI.

Ad conjugium igitur requiritur sexus uter-
que; ideoque quænam in utroque ad impe-
trandam scopum opportuna sit ætas, dispi-
ciendum. Incipiam a nobiliori virili. In hoc
præcipuum ad matrimonium & generationem
momentum repositum est in semine: quare
necessarium erit, ut prius nonnulla de sper-
matis *origine & indole* ex anatomicis & phy-
siologicis præmittam. Est autem *semen viri-*
le liquor albicans, spissiusculus, activæ & pe-
netrantis indolis: g) fecernitur hoc sperma ex
sanguine, estque hujus subtilior & delibatis-
sima portio. Sicuti vero ad reliquos varios
nostri corporis humores separandos, asservan-
dos & excernendos certa requiritur partium
structura mechanica, ita artificiosissima pari-
ter hæc reperitur in nobilissimo spermatico
liquore. Huic enim dicatæ sunt partes, quæ
illum *secernunt, asservant, & denique excer-*
nunt. Ad *primas* pertinent *Testiculi*, corpo-
ra ovo similia, e mirabili congerie vasculo-
rum constructa. Hæc vascula sanguinem ac-
cipiunt ab arteriis spermaticis, ex arteria ma-
gna descendente, infra emulgentes exeunti-
bus, ex quo elaboratur, præparatur & fe-
cernitur in hisce vasculis spermaticis liquor,
reliquo superfluo sanguine per venas itidem
spermaticas dictas ad venam cavam recurren-

Partes
spermatis
secretionis
dicatæ.

F f 3 te:

b) vid. Org. & Mech. sect. 2. Cap. 2.

c) conf. G. D. COSCHWITZ Org. & Mech. l. c.

d) ita CHRIST. WARLITZ L. de morb. bibl. lon-
gævitate Patriarcharum causam hanc reddit:
quod sera usi fuerint venere, & anno demum
70. 80. 90. & supra conjugium intraverint, &
liberos procreaverint.

e) vid. PAUL. ZACH. Qu. med. leg. Lib. 1.
T. 1. Q. 1.

f) vid. G. AD. STRUVII Jurispr. for.

g) vid. B. COSCHWITZ Org. & Mechan. Sect. I.
cap. II.

affervationi :

excretioni.

Spermatis
secretio
quando
incipiat.

te : *postea* vero liquor hic ad destinatum actum non commodus satis & aptus , ad corpus defertur *Highmori* , & ex hoc per varios canaliculos ad *Epydidimidem* , quæ aliis *Parastata* audit ; ubi amissis ipsi adhuc inhærentibus particulis serosis , purior redditur , quo facto per vasa deferentia ad *vesiculas* denique demandatur *seminales*. Et hæ sunt partes affervationi liquoris istius consecratae. Affervatur enim in futurum usum , nempe matrimonialem : exstructæ sunt hæ vesiculæ ex membrana satis valida , peritonæo exterius cincta , ad collum vesicæ urinariæ situm habentes : formant vero cellulas , quæ invicem inter se conspirantes & communicantes in unum tandem coeunt ductum excretorium , quorum in utroque latere unus , in *urethram* hians , per quem denique sub constrictione aliqua vesicularum seminalium liquor huc usque servatus in urethram , & per hanc in ar-vum muliebre sub conjugali actu propellitur. Et hæc urethra constituit *ὀργανὸν excretionis* spermatis , non autem sola , sed pluribus juncta. Generaliter itaque organum excretionis & emissionis seminis est membrum virile ; *hujus* vero principaliores partes sunt corpora duo nervosa dicta seu cavernosa , quæ quando sanguinem ingredi patiuntur , accedente variorum muscutorum adjacentium motu , intumescunt , & rigida redduntur , sub qua rigiditate sperma virile , cui in via secretus in glandula prostatica liquor admiscetur , per urethram excernitur , & sub necessaria conjunctione utriusque sexus in uterum immittitur.

§. VII.

Jam quidem omnes variorum humorum secretiones in corpore naturaliter continuo celebrantur , sed hic feminalis liquor demum in illis , qui pubertatis terminum attingunt , fecerni incipit , & postea maturiori ætate accedente , copia elaboratur uberiori , ut etiam excretioni sufficiat. Primis enim vitæ nostræ annis corpus evidenter augeri , testantur infantes , quorum corpora valde crescunt , ex hac nempe ratione , quia omnes illæ particulæ gelatinosæ lymphaticæ , e quibus in posterum sperma præparatur , in hisce annis non secretioni hujus humoris impenduntur , sed nutritioni atque incremento solidarum partium serviunt. Obesos inde deprehendimus infantes , alias sanos ad pubertatis usque annos maximum incrementum sortientes , his vero superatis , in tantam molem , quam antea , non crescit eorum corpus , quoniam spermatis secretio nunc est uberior , & illæ particulæ lymphaticæ gelatinosæ partium solidarum incremento & nutrimento antea inservientes , nunc ad spermatis elaborationem destinantur : elaboratum vero sperma , cum in testiculis habitare nequeat , ad vesiculas demandatur

seminales , & hic affervatur. Affervatur vero duplicem in finem atque scopum : prior est sobolis procreatio annis accedentibus huic actui commodis , finitis nempe pubertatis annis : alter vero , ut sperma hic habitans , necessitate id exigente , augmento corporis & nutrimento inserviat. Inservit vero , quando ex feminalibus capsulis ad sanguinem regreditur : testantur de hoc regressu illi , qui nimiae & intempestivæ indulgent excretioni spermatis , inprimis si inedia simul laborant , quos cachecticis similes & sceletis videmus ; hæc enim laudabilis materia , nunc excreta , corporis nutritioni inservire potuisset. *b)* Ex intemperata & nimia sanguinis excretionem ingentem fieri virium cum corporis summo detrimento jacturam , quis dubitat ? vitæ enim est thesaurus , & sine dubio sufficiens ejus quantitas ad corporis conservationem requiritur : si vero summum in corporis & vitæ conservatione habet usum sanguis in concreto dictus , variis particulis stricte ad corporis nutritionem non quadrantibus constitutus ac refertus , quid mirum ! quando liquori spermatico , delibatissimæ atque purissimæ sanguinis parti , tantæ in corporis nutritione laudes , ex adverso autem damna in sanitatem redundantia illius nimiae & intempestivæ excretioni tribuuntur , cum minima spermatis pars tantam contineat lymphæ purissimæ partem , quantam capit magna sanguinis in concreto considerati portio , uti placet GLISSONIO. *i)*

§. VIII.

Positis itaque , quæ ex multiplici observatione comperta habemus de regressu seminis ad sanguinem , nunc transgressum faciam ad observationes anatomicas , videndo , quodnam de illo ferant judicium. Sic ex Anatomiae Scriptoribus statim inecum sentientem allegabo DAN. TAUVRY. *k)* Nec non , quomodo ille fiat regressus luculenter expertus est experimentis institutis anatomicis Ill. DN. PRÆSES , dicens : *l)* quando in corpore infantis tubulo insufflatur validius aër in vasa deferentia semen , non vesiculæ tantum seminales , sed & omnia in abdomine vasa lymphatica cum ductu thoracico simul flatu distenduntur , & pulchre conspiciuntur. Si itaque seminales capsulæ , hoc spermatico liquore turgent , qui foras non ejicitur , subtilissima illius pars in vicina & proxime apposita lymphatica vasa resorbetur. Hinc non dubitandum , liquorem hunc propter summam ejus subtilitatem & ineffabilem , qua gaudet , energiam , per vasa minima penetrare , sanguini admisceri & consequenter ad corporis nutritionem , robur atque vigorem utique symbolum suum conferre. Et cæcus est utroque oculo , & in re medica minime versatus , spermatis regressum ad sanguinem , concipere qui nequit.

§. IX.

h) HIPPOCRATES L. de Genit. geniuram ab humido provenire , dicit , quod in corpore robustissimum est. Quod robustissimum secernatur , argumentum hoc est , quia Veneris usu tam pauca materia emissam imbecilles reddimur. & DAN. TAUVRY Anat. nov. Part. I. cap. II. Inde est , inquit , quod postquam insignis hujus olei (loquitur de spermate) copia in actu venereo pluribus repetitis actibus est profusa , spiritus aufugiant , & ex hoc principio debilitas illorum , qui hoc liquore destituuntur , debet explicari : semen enim roborat partes membra-

naceas , & pilos crescere facit.

i) L. de Anat. hepat. dicit : exiguum seminis dispendium plus damni infert spiritibus , ac si vigesies tantum sanguinis detractum fuerit.

k) I. c. dicit : Quando semen in massam sanguineam revertitur , mutationes in illa producit , quod non potuisset , nisi in vasis feminalibus exaltatum fuisset.

l) Diff. de morb. ex nimia & inempestiva veneris oriundis. Medicin. ration. system. Tom. I. lib. I. Sect. II. cap. XII. §. 7. in schol.

Semen regreditur ad sanguinem.

§. IX.

His præmissis, determinanda nunc ætas ad spermatis excretionem & matrimonium ineundum apta. Disperscitur autem plerumque in scholis secundum septenarium annorum numerum universum vitæ humanæ spatium in septem ætates: *Infantiam, pueritiam, adolescentiam, juventutem, virilitatem, senectutem*, & tandem *decrepitam ætatem*: sed quæ brevior & scopo nostro magis accommodata divisio, est illa, qua quatuor tantum numerantur ætates; 1. *puerilis*, quæ complectitur simul *infantilem*; 2. *adolescens*, eousque extenta, quamdiu homo evidenter crescit; 3. *virilis* sive *consistens*, qua maximum corporis robur, incrementum vero evidens absolutum; 4. *senilem*, qua vigor & robur vergunt ad decrementum ac minuuntur, donec moris faciat finem. *Primam* ex his in considerationem hic adduci non mereri ex superioribus §. VII. jam abunde constat, deficit enim in hac spermatis *secretio*; consequenter *excretio*: Absoluta vero pueritia, & quando *pubertatis* & *adolescenciæ* terminus instat, tunc potissimum & notorie incipit spermatis *secretio*, (quæ tamen ratione *temperamenti* calidioris aut frigidioris, *victus* & *morum*, diversitate gradus atque successus differre potest) cujus indicia per varias tunc temporis mutationes in corpore contingentes sese produnt. Tum enim videmus, quod vox reddatur gravior, barba crescat, & pili prodeant circa partes obscœnas, ingenii quoque & iudicii facultas sese exferat, atque reliquum corpus robur accipiat & fortitudinem: *quum* contra castrati, eunuchi alacritatem & corporis firmitudinem ob defectum huius liquoris roscidi generosi adipiscantur nunquam. Incipit; inquam, *secretio*, non *excretio*, paulatim enim crescit spermatis secreti in capsulis id aservantibus copia, ut demum transactis pubertatis annis, præsentē virilitate, ejici atque expelli possit. Nequaquam vero nego, dari nonnullos, ante hunc pubertatis terminum spermatis excretionem experientes, quo variæ illæ pertinent observationes, quibus constat, pueros decem vel undecim annorum, non coitum tantum celebrasse, sed & sobolem procreasse. Hæ vero, cum sint rariores, & ab extraordinario ad ordinarium non valeat consequentia, huc non quadrant: hinc circa talia, quæ raro fiunt, non immorabor, sed *pubertatis* annum in utroque sexu in anno XIV. pono cum aliis Physicis & Medicis celeberrimis. *m*)

§. X.

Hac itaque ætate sperma quidem provenit cum reliquis pubertatis signis, sed inde non sequitur, quod jam tum expediat semen excernere, & copulamnectere in matrimonia-

lem. Notum enim est, hominem per totum *sed non* vitæ decursum a prima juventute ex sanguine suum capere nutrimentum: hic est salutaris ille liquor, qui corpori robur debitum præstat & incrementum, appositione particularum alibilium gelatinosarum ex sanguine secretarum: ad hunc actum vero haud levis requiritur lymphæ nutritiæ portio, inprimis corpore adhuc tenello: appropinquante demum pubertatis termino, quo tanta, quantahactenus non requiritur corporis nutritio, quia corpus ad maiorem nunc pervenit perfectionem, spermatis secretio capit ortum. Cum vero & his annis corpus adhuc tam in longitudinem quam in latitudinem crescere videamus, necessario portio illius spermatis secreti, inprimis deficiente in præternaturali statu sanguine, ad hunc actum requiritur: *hinc* observamus, illos, qui his annis excretioni spermatis largiori favent, ut plurimum marcescere, & evidenter decrescere: *ex adverso* eorum corpora qui his nondum venerem exercent annis, robusta fieri atque extendi. Quamprimum enim & quoties coitus celebratur præmaturus, toties haud exigua lymphæ laudabilis pars, quæ corporis nutritioni inservire potuisset, excernitur, & varia excipiunt *cum* animi tum corporis incommoda, quæ ad senium usque durant: quod DEMOCRITUS suo jam ævo monuit, *n*) nec ERASMO *o*) & BEHRENS *p*) fuit incognitum, ut postea provecta ætate & appropinquante senectute defectus sit sufficientis corporis roboris, quod in prima perditum fuit juventute, & multi decrepitis similes anteaactam tunc vitam ita deplorare cogantur:

O mihi præteritos referat si Jupiter annos.

§. XI.

Deinceps sperma, quod *hac* ætate provenit, ita non est comparatum, ut ad sobolem sanam generandam sit aptum. Crudum potius est, nimisque aquosum, tum quod viæ ipsæ & organa secretionis nondum recte disposita, sed laxa nimis & remissa, succi corporis ipsi, e quibus elaboratur, minus subtiles, sed multo sero scatentes, tum etiam, quod utile fere omne infumatur ipsi corporis nutritioni, nec organa spermatica in debita quantitate subeat. Hinc est, quod liberi a pueris geniti etiam *pueri* moriantur, nec longævi sint, nec sani. Ne dicam pubertatis annis firmari non modo corpus, sed & ipsum animum, tum per prægressam institutionem cultum reddi, ut rationis sese exferat exercitium, & pueriles inclinationes discendant: quo permotus PLATO hanc ætatem primam mentem habere affirmavit: *q*) Quum vero liberorum educatio maximam requirat prudentiam, ac nonnisi exquisito cum iudicio administrari possit, quivis facile iudicabit, an adolescens primum sapiens & ipse sapius

F f 4

m) vid. Arist. L. VII. hist. anim. C. 1. putans, quod pari tempore, id est, bis septimo anno protuberet semen, cum femina, tum masculo.

n) Qui coitum parvum vocavit Epilepsiam.

o) (inquiens: minor vis est in radicibus herbarum salubrium; cum semen maturet, ita deterior fit ingenii naturæque vis, quoties liberis gignendis datur opera.)

p) (Sel. diæt. S. 8. C. 2. immaturus, dicit; semi-

narum complexus vitam fragilem ac breviorē reddit, quod per seminis ejaculationem spiritus animales fibræ subtrahantur, quibus tamen adolescere debiumque robur acquirere debent.)

q) Dicens sub persona Pausaniæ, Non amant pueros, priusquam inceperint mentem habere, hoc autem tempus vicinum est illi, quo pubescentes barbam producere incipiunt.

Actus
divisio,

alia, hæc
que bre-
vior.

Pubertatis
initium.

Pubertatis
ætas ad
coeundum
habilis.

pius rectore indigens, præcipuo hoc parentum officio rite possit perfungi.

§. XII.

Virilis
ætas con-
jugio est
opportu-
na.

Quum itaque ob allatas rationes adolescens ætas ad conjugium non sit apta, dispiciendum nunc porro, an virilis ætas eidem sit opportuna. De fine adolescentiæ & initio pubertatis differunt quidem auctores: Sic CELSUS r) *firmam* ætatem declaravit a 12. ad 35. annum; & *perfecta* inde hæc ætas vocata est, quia tunc maxime animal perfectum videtur. GRATIANUS s) perfectam ætatem ex urbis Romæ statuto in *vigesimo* anno positam esse dicit: MACROBIUS in *somn. Scip. Lib. I. Cap. 6.* interim *perfectam* statuit ætatem tunc demum, quando *septenarius* numerus se ipsum multiplicat, nimirum XLIX. t) Ipsi vero hanc componant litem de *perfecta ætate* Auctores, nulla eorum mihi arridet sententia. Mihi *virilis* ætas ea est, qua corporis cessat *evidens* in longitudinem incrementum, quod *vigesimo* quinto *plerumque* observatur, teste etiam Magnifico Dno. PRÆSIDE u) & Veterum compluribus, quibus hæc ætas fuit *perfecta* eam ob rationem, quia velut finis *facilitatis*, qua adolescens facile decipitur. Igitur virilem ætatem matrimonio opportunam declaro, & nemini masculorum, qui nondum *vigesimum quintum* ætatis ingressus est annum, matrimonium inire suadeo, & quidem ex illis, quas supra receñsui rationibus. Majorem adhuc ille meretur laudem, qui Veneris stimulum ad trigessimum usque annum coercere satagit: qui ætatis terminus placet PLATONI, qui ut morum Magister utilissimum & optimum, non vero, quod *jure* licet & fieri potest, proponit, nec non HESIODO, x) qui, quando de pubertatis fine loquitur, præcise tempus pubertatis, seu quando tempus generandi incipit, definit, cum Viris XXX. annum præfixit, quos longe maturius generare posse apparet, sed quo tempore nuptias fieri expediat, hocque ponit, quando corpus in debito robore atque vigore existit. Hinc ita canit:

*Junge Tibi uxorem, dum firmus adhuc vigor adsit,
Annos cum numeras ter denos plusve minusve,
Aptum est conjugium.*

r) Lib. Med. 3. Cap. 22.

s) Disc. for. Cap. 555.

t) Notandum, inquit, quod cum numerus septem se ipsum multiplicat, facit ætatem, quæ proprie perfecta & habetur, & dicitur, adeo ut illius ætatis homo & consilio aptus sit, nec ab exercitio virium alienus habeatur.

u) Diff. de Procer. Corp. dicens: hominem secundum longitudinem crescere ad annum XXV.

x) Lib. 2. Oper. & diæ.

y) Polit. 7.

z) Genes. V.

aa) Genes. XXI.

bb) l. cit.

cc) ibid.

dd) Gen. XXV. 20.

ee) Libr. Histor. III. Cap. 3. Pueros puberes non in forum, sed in agrum, deduci præcepit LYCURGUS, ut primos annos non in luxuria, sed in opere & laboribus agerent. Nihil eos somni causa

Nec ARISTOTELES y) contrarium sentit, quando vult, ut anno ætatis XXX. uxorem ducant.

§. XIII.

Quodsi etiam vetusta sacra æque ac profana historiarum monumenta evolvimus, veterum priscorum fuisse conjugium, & inde haud immerito causam roboris & longævitatatis ipsorum esse cum aliis derivandum. De Veteribus id abunde constat ex sacris literis: recensentur z) eorum nomina illorumque ætas ab ADAMO ad NOACHUM usque quorum permulti *nonum seculum* & plures supra attingere annos, & ætate jam provectiore liberos procrearunt. Porro NOACHI describitur ætas aa), quæ adulta satis fuit agebat enim moriens *noningentesimum* annum & *quingagesimum*: *centesimo* vero *secundo* procreavit filium SETH vocatum. Post diluvium vero stupendus hic annorum numerus decrementum jam cepit insigne, Noachi enim posterii *quintum* vix attingere potuerunt seculum: nihilominus & hos *intempestivo* non afflictos fuisse veneris stimulo patet bb), ante trigessimum enim annum sobolem non procrearunt, licet tunc temporis opus fuisset citius inire matrimonium, ob nimium hominum post diluvium defectum. Quanta quæso! fuit PATRIARCHARUM ætas? ABRAHAM enim, cum in lucem ederet ISAACUM, annum jam agebat *centesimum* cc): hic *quadragenarius* fuit, cum duceret REBECCAM dd), JACOB vero *septuagenarius*, cum mutaret coelibatum. Nec pauciora ex profanis scriptoribus hanc in rem suppetunt testimonia. Ita de legibus, quas LYCURGUS Spartanorum Legislatores illis promulgavit, diserte differit JUSTINUS ee) & SCHURIGIUS ff) de *immature* foeminarum complexu dicit, quod vitam reddat fragilem & breviorē. Sapientissimum inde Lacædemoniorum & Ægyptiorum erat consilium ac vere *πολιτικόν*, illis XXV, his vero XXXV ætatis annum matrimonio ineundo destinantibus. De Ægyptiorum autem longævitate, quis est, qui dubitat? Germanorum dein mores circa ineunda matrimonia summis extollit laudibus TACITUS gg): & JUL. CÆSAR de priscis Germanis optimum præbet testimonium hh): E contra vero, si paululum considerationi nostræ subjiciamus alias gentes, Gallos, Hispanos & Italos, ad tantum ætatis fastigium illos raro evehi, comperimus, ob *properam* nimis, ut loquitur,

Veterum
serumcon-
jugium
probat
ex sacris
literis.

& ex pro-
fanis hi-
storis.

substernere, & vitam sine pulmento degere, neque prius in urbem redire, quam viri facti essent, statuit. Virgines sine dote nubere jussit, ut uxores eligerentur, non pecuniæ, severiusque matrimonia sua viri coercerent, cum nullis dotis frenis tenerentur. Maximum honorem non divitum & potentium, sed pro gradu ætatis esse voluit. Nec sane usquam terrarum locum honoratiorem senectus habet.

ff) Spermatol. Cap. V.

gg) De moribus Germ. C. XX. Sera juvenum venus, inquit, eoque inexhausta pubertas: Nec Virgines festinantur &c.

hh) L. IV. de bello Gallico: qui diutissime impuberes permanserunt, maximam inter suos ferunt laudem. Hoc ali statutam, ali hoc vires nervosque confirmari putant. Intra annum vero 20. foeminae notitiam habuisse, in turpissimis habent rebus.

tur, III. Dn. PRÆSES ii) venerem, quia ex illa liberorum corpora fiunt debiliora: sic de Hispanis eorumque vivendi genere memorat MELISSANTES. kk) His vero longæviores esse Anglos & Scotos testatur VERULAMIUS: ll) & de longa vita memoratu dignum recenset casum THEOD. ZWINGER. mm)

§. XIV.

Sed ordo nunc postulat, ut postquam quod masculo convenit, circa ineundum matrimonium pertractavi, & illa, quæ circa sexum sequiorem hac in re notanda sunt, attingam. Jam, sicuti mares, ita fœminæ quoque certo adstrictæ sunt *pubertatis* termino, de quo iterum multum inter se disputant Doctores. Sic JCTi, qui illis XII. constituunt pubertatis annum, non corporis sed animi potius vires respicientes, me non habent dissensientem. Et Medicorum fuere, qui *decimo* jam anno puellam pubescere affirmare haud erubescunt: ego vero pubertatis fœmellarum terminum cum compluribus Medicis expertissimis in anno *decimo quarto* pono: sicuti vero masculus tunc primum pubes vocatur, quando emittit semen, quando barba crescit, & circa pudenda pili prodeunt, sic etiam virgo viripotens nunquam habetur, quæ mensium nondum experitur fluxum, atque adeo dispalescit, *mensēs* prodeuntes in virginibus certissimum esse pubertatis signum: quod placuit Medicorum parenti HIPPOCRATI, qui *Lib. de Genitura* menses virginibus non prodire dicit *intra*, hoc est, ante pubertatis tempus: sic marem non posse generare, priusquam semen emittat, nec mulierem, antequam menstrua patiat, abunde testatur GENTILIS. nn) Hinc præcox nimis pubertatis, quem Medicorum nonnulli statuunt, terminus. Observationes vero quotidianæ, si his credere licet, unanimiter fere testantur, duodecimam vix puellarum partem duodecimo purgari, nedum citius anno, quod confirmat P. ZACHIAS, oo) & MACROBIUS, pp) ut & PAULUS. qq) Nec tædet hic allegare auctoritatem ARISTOTELIS, rr) qui eodem tempore fœmellas purgari putat, quo masculi feminis excretionem experiuntur. Ultimo vero adducere libet HESIODUM ita carentem: ss)

- - - Decimo, sed fœmina quarto Anno pubescit.

ii) Diff. de Procer. corp.

kk) Geograph. P. I. von Spanien / dicens: der Geilheit sind sie / (die Spanier) ungemein ergeben / daß auch Knaben von 14. bis 16. Jahren schon anfangen Benschlaferinnen zu halten / daher aber sehr viele Leibes- & Krankheiten erwachsen.

ll) In hist. vit. & mort. apud nos, inquit, in Anglia non existere arbitror villam paulo populosiorem, in qua non reperitur aliquis vir aut mulier ex octogenariis. Et pergit: Ante paucos etiam annos in agro Herfordiensi inter ludos florales instituta, erat chorea & saltatio ex Viris octo, quorum ætas simul computata 800. annos implebat, cum quod aliis ex iis decederet annorum, alteri superesset.

mm) vit. hum. Vol. 3. L. II. de fœmina nobili a Dalluvig, adeo facta senex, ut sexti gradus nepotes sana & incolumis salutaverit: cujus matronæ felicitas germanico idiomate ita est descripta:

Meine Tochter / saget eurer Tochter / ihrer Tochter hinterbringen / daß ihr Tochter-Kind weine.

§. XV.

Quando porro quæritur: quænam puellis fit *commoda* nubendi ætas? Eandem, quæ masculis licet coire statuere non audeo, ni velim irridentium commovere cachinnos: virgo enim *decimum octavum* annum agens, ut plurimum jam habetur perfecta, id est, crescere evidenter quoad *corpus* desinit, quoad *animi* vires vero ad summum fere pervenit gradum. Sit inde & *hæc* ætas, quæ commodissima ad nubendum, minor neutiquam, nulla enim Medicis datur ætatis venia. Hic iterum differentia occurrit probe notanda inter ætatem, qua virgo nubere potest, & illam qua expedit: *prius* potest instante pubertate; & licet observationes prostant variæ, quæ testantur, nonnullas fluxum menstruum nondum expertas edidisse partum, hæ pro rarioribus sunt habendæ, & non sequitur, ut conducatur, ætate ad conjugium ineundum nimis matura veneris castra sequi. Supra enim, quod de noxis ex intempestiva masculorum venere oriundis afferui, & hic habet locum: sicuti enim masculus tunc nondum ad perfectionem corporis & animi pervenit, quando pubes factus est, ita nec puella, licet fluxum experiatur menstruum. Crescit enim & extenditur corpus adhuc evidenter, menstruis jam accedentibus, ad quod negotium haud parva requiritur sanguinis, qui corpus crescere facit, quantitas. Et quemadmodum in nobiliori sexu non ad *præsentiam* tantum spermatis, sed & ad illius *consistentiam* ad generandum aptam respicitur, ita in *sequiori* sexu illa materia, quæ generationi inservit est consideranda, quæ sub ovuli nomine nobis nota. Sicuti vero semen virile bene coctum requiritur ad generationis actum, & procreandum foetum robustum, ita muliebre semen seu ovulum *maturum* requiritur & recte constitutum. Hinc optime LYCURGUS Spartano- rum Legislator, quum certum tempus præscripsisset, quo puellæ nubere, juvenes ducere deberent, interrogatus, cur id statuendum putasset? Ut, inquit, soboles ex adultis, perfectæque ætatis parentibus nata *valida* sit & *vegeta*. tt) Idem monet JUL. ALEXANDRINUS. uu)

Commoda nubendi ætas.

§. XVI.

nn) quæst. med. 39.

oo) qu. med. leg. L. I. T. I. qu. 6. dicens: multas ex iis, quibus etiam calidius temperamentum a natura inditum est, vix in ipso XIV. anno in hisce nostris regionibus purgari, diligentem adhibita cura cognovi.

pp) de somn. Scip. C. 6. Post annos, inquit, bis septem ipsa ætas necessitate pubescit, tunc enim moveri incipit vis generandi in masculis, & purgatio fœminarum.

qq) Sux med. L. 3. putat, mulierum plurimis menses anno XIV. fluere incipere, paucis vero ante XIII. aut XII. plerisque autem post XIV.

rr) L. I. de Gen. anim. C. 2.

ss) Lib. 2. oper. & dier.

tt) vid. Plutarch. in Lacon.

uu) Lib. XXII. salubr. dicens: Ex immaturo semine, quale teneriorum annorum aut senili homini, non satis utilis & rebus gerendis imbecillis generatur homo. Quare nondum natorum incolumitati consulere semper debemus.

§. XVI.

*Damna
fœmellis
citò coeun-
tibus
oriunda.*

Cum vero uti supra monui, masculus, qui nimis cito veneris castra sequitur, variis sub-jicitur sanitatis & vitæ incommodis, ita nec fœmella libera est, quin potius majora experitur. Huic enim, si nimis *juvenis* virum patitur, & concipit, maternus sanguis, qui ad alendum fœtum consumitur, & tamen ad *proprii* corporis augmentum adhuc deberet impendi, detrahitur, ut dein *vel* mater, *vel* fœtus, *vel* ambo, sanitatis detrimentum ex sanguinis defectu patiantur. Nimirum omnia fere damna, quæ fœmellæ nimis *juvenes coeuntes* experiri solent, ut plurimum nutrimenti defectum pro causa agnoscunt. Corpus enim si hisce annis ad *plenariam* nondum pervenit perfectionem, partes generationi dicatæ consequenter non ita sunt expansæ, ut virum admittere, & commode fœtum excludere possint. Quænam vero & *quanta* sæpius incurrant sanitatis & vitæ pericula *ex difficili partu*, id unicuique erit notum: ad quod accedunt *labores* atque *dolores* parturientibus familiares, quibus corporis vires ita debilitantur, ut ejusmodi teneras puellas ob virium defectum sub ipso partu succumbere sæpius videamus. Partum dein preffo sequitur pede *lochialis fluxus*, naturæ ordine cunctis puerperis consuetus, sub quo iterum magna excluditur cruoris salutaris copia, si ex voto procedit *negotium*: ne dicam *de nimio* hoc præter naturam durante *fluxu*, utpote qui summam corpori debilitatem inducit, ut ex illa teneræ ejusmodi puerperæ vix vivere valeant: vel *suppressione* illius, cui multoties subjiuntur parturientes, ex illa sæpius mortis vim experiunt. *Lactationis* quoque aliqua hic est mentio adjicienda, quæ ad exclusum fœtum nutriendum requiritur. Lac vero humorem esse ex pinguibus & alibilibus cum aquosis particulis compositum, id abunde docent Medici Physiologi: itaque lac ex sanguine materno in nutrimentum fœtus conficitur, mater iterum patitur defectum, dum sanguis ille, qui ad fœtus augmentationem sub lactis forma impenditur, *materno* corpori subtrahitur, quod tamen tunc temporis nondum adeo est perfectum, ut alieno nutrimentum præbere possit corpusculo.

§. XVII.

Optime inde faciunt illæ *puellæ*, quæ ad illam usque ætatem libidinem coërcent, donec corpus ad justam pervenerit perfectionem: Fluxum enim menstruum nunc *largiorem* experiuntur, qui *antea* paucus erat, nunc sufficiens adest sanguis ad fœtum nutriendum, nunc partes generationi & partui consecratæ ita sunt constitutæ, ut partus facilius possit excludi: sanguis, qui in fœtus

nutrimentum impenditur, sub lochiali fluxu excernitur, & lactis generationi inservit, non ita necessario, quam antea, ad corporis incrementum requiritur. Ad quod accedit, quod ad sustinendos labores sub partu sint magis robustæ, ex corporis constitutione *firma*, & ratione reliquarum partium *perfecta*. Hanc mecum fovet sententiam P. ZACHIAS xx) & PLATO, qui itidem fœminas non nisi XX. anno nubere voluit. yy)

§. XVIII.

Explicata itaque mente de ætate utriusque sexus ad matrimonium ineundum apta & commoda, adductis simul rationibus, propter quas *citius* coire non expedit, si vitam velis assequi felicem & longam: nunc merito nonnulla adhuc restant circa hanc materiam consideranda. Cum enim nulla regula sit, (ut vulgo dicunt) sine exceptione, ita negare neutiquam possum, & meam variis exceptionibus esse subjectam. Id enim quotidie accidit Medicis praxin exercentibus, ut masculis æque ac puellis hanc ætatem supra commendatam & ad coeundum commodam nondum superatis, variis morbis afflictis, coitum suadere se coactos videant. Et quamvis hic quæstio a JCtis sæpius mota incidat; An Medicus salva conscientia suadere possit coitum? ego circa decisionem hujus quæstionis non immorabor pro nunc, sed *binis* tantum verbis, quid de hac quæstione sentiam, absolvam. Distinguendum nimirum esse inter coitum *licitum* & *illicitum*, hunc omni jure dissuadendum, *illum* vero consideratis probe cunctis circumstantiis individualibus, & adhibito judicio utique esse suadendum & concedendum. Uterque sexus ex denegato sæpius patitur coitu: *nobilior* ex spermatis retentione, ut sunt *testiculorum tumores*, *priapismi*, atque *tentigines membri virilis*, nec non *phantasia læsiones*, quæ vero damna non soli spermatis retentioni, sed potissimum speculationibus *lascivis* sunt adscribenda. zz) His utique nullo jure coitus est dissuadendus, quod suo jam monuit tempore CELSUS a) & SCHURIGIUS, b) qui quando varias atque multas morborum species ex spermatis retentione ortas, easdemque per *coitum* curatas, assert, *moderatum* coitum ad longævitatem esse suadendum, dicit. *Sequior* vero sexus variis quoque subjicitur morbis ex denegato concubitu, quos omnes hic recensere prohibet temporis ratio. *Utplurimum* vero *Chlorosi* miseras ejusmodi puellas laborantes hoc remedio curandas esse, suadet HIPPOCRATES, c) nec injuste, id enim sæpius observamus, virgines pallentes & fœdas, *mulieres* fieri elegantes & pulcherrimas, exemplo uxoris ARISTONIS apud PAUSANIAM, quæ Spartanarum omnium virgo turpissima, mulier vero pulchritudine omnium præstantissima, & quæ cum Helena certandum

*Exceptio
a regula
præscripta.*

*An sua-
dendus
coitus.*

*Damna
ex dene-
gato coitu.*

xx) Qu. med. leg. Lib. IV. T. 2. q. 4. dicens: expedit reipublicæ, ut virgines non ante 18. annum, saltem ut plurimum nubant.

yy) 5. de republ.

zz) Vid. B. COSCHWITZ. Pathol. P. I. C. V.

a) de Med. L. I. C. I. scribens: Concubitus neque nimis concupiscendus, neque nimis periimescendus

est: rarus corpus excitat, frequens solvit.

b) Spermatol. C. V.

c) Lib. de morb. Virgin. Virginibus, quibus tale accidit, suadet, ut citissime cum viris conjungantur; si enim conceperint, sanæ evadunt, quod nisi fiat, una cum pubertate, aut non ita multo post his tentabuntur, nisi viro jungantur.

dum haberet, fuisse legitur. Idem de Vir-
ginibus in insula Formosa, scribit GEORG.
PSAALMANAAZAR Formosanus. d) Interim
& in tali casu iudicium adhibere debet Me-
dicus, ne forsan omnibus masculis & virgi-
nibus his morbis laborantibus coitum sua-
deat, *omnibus* enim non licet, inprimis il-
lis, quibus labes aliqua est in viscere aliquo
notabili, quod olim jam monuit SENNERTUS.
e) Ex his vero unusquisque perspiciet, eo
meam non tendere mentem, ac si nemini,
supra citatos annos qui nondum superavit,
coire liceat. Occurrit enim in tali casu *du-
plex* malum Medico considerandum: *primum*
consistit in immatura venere, quam longæ-
vitati obesse supra probavi, & spectat *futu-
rum*: *alterum* vero *præsens* respicit tempus,
si nempe ex denegato concubitu corpus nunc
nunc læditur. Ex duobus vero malis cum
minimum sit eligendum, concubitus est sua-
dendus & concedendus. Superat enim *hoc*
malum, præsens nempe corporis afflictio,
illud, quod oritur ex nimis matura venere;
quid enim juvat, si longævitati studemus,
& præsens, quod præ foribus expectat ma-
lum, non removemus. Habes itaque ex-
ceptionem a regula, quam suppeditavi de cer-
ta ad ineundum matrimonium & commoda
ætate.

§. XIX.

Alia ex-
aminatur
objectio.

Alii vero adhuc præveniendum dubio, quod
alicui forsan oriri, mihi que objici possit, &
quidem: experientiam testari quotidianam,
multas præ aliis citius fieri puberes, hinc re-
gulam meam suppeditatam nullius esse valo-
ris. Cui respondeo: a potiori fieri denomi-
nationem, & a particulari ad universale non
valere consequentiam. Id vero supra jam
demonstravi, *plurimos* & *plurimas* pubescere
demum anno XIV. huic vero, quod expe-
rientia nos docet, contrariari, nefas duco.
Id interim ambabus largior manibus, plures
dari, qui ex utroque sexu citius pubescunt,
pro ratione *climatis* & *temperamenti*, hi me-
rito sunt excipiendi, quia ad corporis & ani-
mi vires citius perveniunt, de eo vero mihi
sermo est, quod sit *ut plurimum*. Nec infi-
cias eo, præcis jam temporibus varias vixisse
gentes, quæ ex lege quasi obligatæ fuere ci-
tius inire matrimonium, quibus vero finis fuit
peculiaris & politicus. Sic de JUDÆIS no-
tum, quorum juvenes post annum ætatis XX.
adhuc coelibes pro legum transgressoribus ha-
bebantur: Legislatoris vero finis respiciebat ho-

minum multitudinem, hinc ejusmodi uteban-
tur mediis, suadendo nimirum *citum* conju-
gium junioribus: quo factum, ut illa gens
adeo se per universum extenderit orbem, ut
ubique fere innumerum Judæorum reperias
numerum. Sic alia fuit ROMANORUM inten-
tio de cito ducendi termino: exstructa enim
Roma, & postea exhausta Martis furore gra-
vissimo civium copia, deficiebant, qui inco-
lerent urbem, & colerent agros, hinc *leges*
latæ de procuranda *πολυτενία*, & liberorum
multitudine, f) inde *privilegia* & *præmia* data
patri trium aut quatuor liberorum, qui simul
in honoribus capiundis præferebatur improli,
seu *ἀτενία*: hinc mulctati *coelibes*, quod æs
vocabatur *uxorium*: præmia posthac data a
JUL. CÆSARE parentibus ob *πολυπαιδίαν*, quod
mandatum dein repetitum ab OCTAVIO AU-
GUSTO, & adprobaturum PAPIO & POPPÆO
Consulibus, confirmatum denique a Populo
Romano. Ad quod accedit *libido* Romano-
rum summa atque uterorum *sterilitas*, hinc
domitore opus fuit, ad fœdus connubiale re-
cte & rite celebrandum: hoc enim est, de
quo legis Papiæ & Poppææ autor querelas mo-
vit, quod summa Romanorum *libido* illiusque
vaga *licentia* reddiderit illorum matrimonia *in-
visa*; inde non immerito leges datæ, & præ-
scriptæ fuere poenæ, ex aliqua parte non ac-
cusandæ. g) Eadem fere fuit HISPANORUM
intentio in præscribendis legibus de cito con-
jugio. Pulsi enim fuere ex Hispania novi
Christiani, qui ex Mauris, abnegato Ma-
homete, Christianam amplexi fuerant religio-
nem, quorum numerus superavit plus quam
1200000. hominum, ita ut integra in His-
pania provinciæ olim populosissimæ desolatæ
fuerint. Patet vero ex his, alium & plane
diversum fuisse harum gentium finem, circa
suadenda *junioribus* conjugia. *Finem vero qui
vult, vult & media*. Dubio itaque huic vel
alteri me satisfecisse arbitrator.

§. XX.

Sufficiant vero hæc de illis, quibus ob *te-
neram* non licet Veneris castra sequi ætatem.
Nunc paucis de illis, quibus ob *provestam*
nimis non licet, agam, quorum tamen (quod
mirandum) haud pauci utriusque sexus ho-
die dantur, qui nescio quo fatuo amore &
veneris stimulo irritati, pedem alterum in
cymba Charontis jam habentes matrimonium
vel cum sui similibus, vel sæpius cum ju-
venculis inire cupiunt. In limine vero mo-
neo, non omnes sine exceptione me subje-
cturum

Romano-
rum.

Hispano-
rum.

Quibus
ob prove-
ctam non
licet coire
ætatem.

d) In descript. ins. Formos. edit. germ. c. 22. die mel-
sten Jungfern / inquit, auf dieser Insel / wenn sie
18. oder 20. Jahr alt werden / bekommen eine gewisse
Krankheit / welche wir Chatarsko oder die Bleich-
sucht nennen / oder das weisse Jungfer Fieber:
Sie machet dieselbe melancholisch / und benimmt
Ihnen allen appetit, ausgenommen zum Ehe-
stande nicht: sie corrumpt das Geblüt / und
macht sie gantsblaf / diese Krankheit ist nur dem
weiblichen Geschlecht gemein / und ist kein besser
Mittel / als der Ehestand.

e) Prax. med. Lib. IV. P. 2. Sect. 4. dicens: Si ex
mensibus vel semine retento valetudo illa adversa
ortum habeat, tutissimum est, marito virginem

conjugere, ita enim semen retentum evacuat, &
uterus expurgatur; si vero in viscere aliquo
notabili præcipue Hepate vel Liene, aut etiam
toto corpore vitiosa aliqua dispositio adsit, illa Ve-
neris usu non tollitur, sed potius augetur.

f) Sozomen. L. i. histor. Eccl. c. 9. Tulerunt, in-
quit, hanc legem veteres Romani, cum specta-
rent, futurum hac ratione, ut urbs Roma & re-
liquæ provinciæ imperii romani hominum multitu-
dine abundarent. Etenim paulo ante hanc legem
quamplurimos homines amiserant bellis civilibus
absultos.

g) vid. Ill. J. P. de LUDEWIG, Fridric. Canc.
Diff. de jure Hagenstolz.

Judæorum
ætas, qua
uxores du-
cebant.

cturum esse disquisitioni senes, sed illos solum, qui *duplicem* in finem, quorum primarius sobolis procreatio, matrimonii copulamnectere non erubescunt, cum hi junioribus potius, illisque qui florida adhuc fruuntur ætate, hocce committere potius deberent negotium: nec illos excipio, qui vagæ *libidinis* causa extra connubium viventes exercitio Veneris indulgent. Ita vero tractabo de illis, ut non masculorum solum, sed & foeminarum mentionem faciam, utriusque sexus, certam ætatem, quæ finem illis imponit generandi & procreandi sobolem, explicaturus.

§. XXI.

sexu
nobiliori.

Prodeat itaque primum in scenam *sexus nobilior*, & videamus *primo*, quo anno huic expediat odisse venerem & vitare: *dein* quænam rationes sint illam dissuadentes. Circa primum occurrit termini finiendæ virilitatis & incipientis senectutis consideratio. Quæritur inde, quinam nobis sint viri, quinam senes. Viri illi audiunt qui intra XXV & LVI. annum constituti, quo vitæ spatio corpus nec crescit, nec *evidenter*, sed *vix* decrefcere videtur. Vocatur inde hæc ætas *consistens*, ita ut homo in prioribus corporis viribus adhuc consistere videatur: ita quoque vocata ab HIPPOCRATE *h) κατεστηνία*, *constans* seu *consistens*: porro *media*, quod hac constituti medii sint inter *ἀνὰ ζῴντας καὶ γέροντας* quod placet GALENO *i)* & CICERONI *k)* & denique *virilis* a viribus, quia tunc vires in homine vigent, quando adeptus est perfectionem suam. Non equidem defendam, corpus hac ætate ad senectutem usque non decrefcere, sed ex adverso dico, decrefcere quidem, sed *paulatim* non *manifeste*, manifesta vero declinatio fit accedente senectute. Inde senectus mihi est illa ætas, qua homo evidenter decrefcere incipit: hinc recte ARISTOTELES *l)* senescere dicit, viam esse in corruptione: cui assentit GALENUS. *m)* Sapienter inde ille senectute *confectus* interroganti cuidam, quid ageret? respondit: *paulatim morior*. Voco itaque senem illum, qui LVI. attigit annum, quod idem vult Magn. Dn. PRÆSES. *n)*

§. XXII.

Rationes
senibus
conjugium
dissuadentes.

prima.

Talis autem est, qui veneris castra vitare debet, quod patet ex rationibus sequentibus: *prima* consistit in decremento corporis senilis, decrefcere enim evidenter senes toto die videmus, hujus vero decrementi *causa* latet in prava solidorum dispositione & sanguinis succorumque temperatorum defectu. Tametsi enim, quod in permultis senibus videmus, sanguinis copia non deficiat sed sæpius abundet, ut venas illis optimo successu secari videamus, ob fibras tamen sensim magis durascentes, tubulosque in arctius spatium coeuntes, secretiones & excretiones per eos cum *nutritione* vacillant, succi fiunt impuri, robur corporis labefactatur & quo magis au-

gentur anni, eo magis ingravescit mala corporis dispositio, moriendi tandem imponens necessitatem. Quando itaque senes corpus suum decrefcere manifeste vident, nonne id potius agerent, ut omnes, qui adhuc feceruntur roscidi blandi succi, in totius corporis nutrimentum transfirent, quam ut spermatis excretionem per coitum illos effunderent, virefque inde graviter convellerent.

§. XXIII.

Alter causa senibus matrimonium & concubitus interdicens, in ipsa indole & *crasi* liquoris ipsorum spermatici incongrua quærenda: Etenim ad procreandam sobolem sanam & robustam semen requiritur recte *excoctum*, temperatum & consistens. In senibus autem ob fibrarum rigiditatem tubulorumque angustiam & coalitum, nec succi ad subeundas secretiones & excretiones rite influere, nec in emunctoriorum ex minimis tubulis *conflata* compage acres, recrementitii, inutiles succi rite sequestrari, neque etiam in colatoriis tubulosis utiles ac tenues humores, adeoque etiam nec sperma in canaliculosa testium substantia, rite secerni possunt. Hinc restitant non modo in vitalibus succis sordes, ipsumque semen subeunt atque conspurcant, sed & semen elaboratur aquosum atque *effoetum*, quod vel plane ad genituram ineptum vel minimum nonnisi debili & morbo foetui generando aptum, uti monuit supra laudatus JUL. ALEXANDRINUS. *o)* Ne dicam tantum vitæ spatium non amplius superesse senibus, quo possint natorum absolvere educationem, sed pusillos plerumque orphanos aliis relinquere educandos, aut si diutius supervivunt, repuerascere, & ob virium animi defectum, curam liberorum minus quam ipsis ex usu gerere posse.

§. XXIV.

Adductis itaque his rationibus, sole clarius est, nimis serum matrimonium esse valde noxium & exitiosum. Licet enim ob lymphæ forsan seminalis majorem falsedinem, quæ senibus ut plurimum familiaris, stimulos veneris sentiant ætate *confecti*, attamen, si naturæ vim inferant, hosque promovent & illis indulgent, certissima sequitur virium jactura, quæ non nisi ad difficiles morbos, quin ipsum interitum januam pandit. *Præprimis* vero illi pessime agunt, qui, ut præstanda præstent aphrodisiacis utuntur remediis, hi enim varia sanitatis & vitæ pericula facillime incurrunt. Procul tamen absit, ut cunctis ætate provecta jam gaudentibus dissuadeam matrimonium, idque reddam odiosum, puta illud, quod ob finem saltem *secundarium* contrahitur, de hoc enim mihi non est sermo. Nec omnes regulæ præscriptæ inclusos volo, hunc ætatis terminum jam superatos, animum licet ad sobolem procreandam intendant; sed merito illos excipio, qui primos vitæ suæ annos

Excipiuntur
a regula.

h) Aph. S. I. aph. 13.

i) Comment. I. aph. 13.

k) Lib. de senect. nam, inquit, ea jam *constans* requiritur ætas, quæ *media* dicitur.

l) Polit. 7.

m) de Temperam. 2. C. 2.

n) Diff. de Valet. senum tuenda.

o) vid. loc. cit. §. XV.

nos non *libidini* consecrarunt, sed *castitati* studuerunt, nec juvenes Veneris castra sunt secuti: qui *luxuriæ* haud dediti, sed *bona diæta* à puero ad hanc usque ætatem usi sunt, & adhuc utuntur, seque quoad animi & corporis vires adhuc sentiunt firmos atque robustos. Haud enim rara sunt exempla illorum; qui *sexagenarii* & supra robustos procrearunt liberos eosque firmos, quorum plura adducunt varii Scriptores. Unicum hic allegare non tædet casum memoratū dignum, de carbonum sulphuratorum fossore in oppido Wētinenſi, qui anno ætatis *centesimo secundo* cum uxore *tricennaria* haud ita pridem masculum, & biennio post fœmellam genuit.

§. XXV.

E sexu
sequiori.

Transeō tandem ad sexum *sequiorem*, videndo, quando sit ipsis senectutis initium, & quando cesset generandi vis in fœmellis. Hæc vero cum masculis sint imperfectiores, & quocitius ad perfectionem corporis & animi perveniunt, eo citius decreſcant, inde in *tantum* spatium non extenditur generandi terminus, in *quantum* virorum. Est vero fœmellis adscriptus certus generandi terminus, quinque continens à pubertate septenarios. Vir vero *quingagenarius* & adultior ad generandum existit ut plurimum adhuc aptus. Non inde opus esse duco, circa certam fœmellis præscribendam ætatem, qua veneris exercitium intermittant, diu immorari. Ipsa enim naturæ energia monstrat, nunc actum esse de procreatione liberorum, sanguinem *menstruo* tempore hucusque effusum, ad nutrimentum fœtus destinatum, sub lochiis excretum, & lactis secretioni olim inservientem, ad *propriæ* corporis nutritionem viresque illius conservandas nunc esse impendendum.

§. XXVI.

Utut vero hæc ætas testetur de termino procreandi liberos, non inde sequitur, ut ad hanc usque ætatem huic procreationi studeant, sed *expedit*, ut annos tres vel quatuor, antequam naturalis fons exsiccet, coeundi libidinem in exilium mittant. Id quidem non infringam; post hanc ætatem fœminas ad concipiendum & partum excernendum non esse aptas, imprimis illas, quæ serius puberes sunt factæ: hic vero, quando de *ætate opportuna* sanitati accommoda agitur, non præſens respicitur sed *futurum* tempus. Quanta enim sanguinis & succi roſcidi nutritii quantitas ad generandi negotium requiratur, id ex superioribus constat, qui succi utiles ad conservandum corpus nunc decreſcens essent reservandi. Ut taceam alios affectus ex animi pathematibus, sub veneris exercitio, & *inordinato* mensium fluxu, hac ætate imprimis considerando, oriundos, quos facile incurrere solent ineptæ tales vetulæ.

§. XXVII.

Plura quidem circa matrimonium ineiundum adhuc supereſſent considerata, quæ Medici requirunt consilium, quo spectat inter alia plura *commodissimum*, quo debitum solvere matrimoniale expedit, *anni tempus*, aliaque: illa vero, cum pagellarum inopinata multitudo id prohibeat, nec ad præſentem scopum stricte pertineant, sicco prætereo pede, & potius præſenti addo tractationi colophonem. DEO vero TRIUNO sit pro concessis viribus Laus, Honor & Gloria.

DISSERTATIO MEDICA

D E

REGIMINE PRÆGNANTIIUM,

Primum edita anno 1699.

P R Æ F A M E N.

ETIAMSI gestationis tempore variis iisque singularibus pathematibus aliisque, facile a sexu sequiori committi solitis, erroribus obnoxia sit gravida; illa tamen omnia tenerrimum fœtum plus, quam ipsam prægnantem afficere, præter alia vel frequentes abortus, ut plurimum cum fœtus, non æque matris exilio, contingentes, atque nævi seu stygmata, satis nonnunquam fœda monstroſaque, persuadere nos possunt. Ex quo apparet, ne per inexcusabilem incuriam nobilissimum illud donum divinum, vel deforme, vel etiam ex matrice sua justo citius immaturum excludatur, gravidam oportere præ cæteris peculiarem, & quoad fieri potest, strictam observare diætam. Experientia enim in

Frid. Hoffmanni Oper. Supplem. II.

Gg

genere

genere constat, si non per decentes vivendi regulas cuivis individuo, sexui, ætati ac tempori accommodatas, vitales imprimis humores in debita proportionem, temperie & motu conserventur, innumera exinde propullulare damna. Quid itaque mirum, si grvida ob singularem & ad varios affectus præternaturales suscipientes magis per se jam proclivem dispositionem, diætæque insuper negligentiam gravissimas potissimum luat pœnas inque sævissimos incurrat morbos cum præsentī haud rarò tam matris quam infantis foetus periculo, imo utriusque mortē ipsa conjunctos? Hisce itaque commoti atque Prægnantium in gratiam, Thema nostrum inaugurale de REGIMINE PRÆGNANTIUM elegimus, quod Benevolus excusabit Lector, si non pro artis, sed virium facultate, Deo auxiliante, fuerit elaboratum.

§. I.

Gravidis non tam ob sui individui conservationem, quam speciei propagationem, h. e. ob debitam foetus formationem, atque nutritionem præscribituri regimen hocce secundum sic dictas res non naturales dirigendum putavimus: Autoribus Ductoribusque imprimis utentes, RODERICO à CASTRO, SENNERTO, RIVERIO, ETTMULLERO, atque Viris Magnificis, BOHNIO puta & hujus rubricæ Præsīde HOFFMANNO, Patronis, Præceptoribus & Promotoribus meis ætatem devenerandis: Plures enim quid recenseamus?

§. II.

Missis itaque omnibus ambagibus, aerem, utpote spirituum pabulum, primo sistimus examinandum. Ille autem, sive naturalis, sive arte modificatus, sit purus, serenus, temperatus, consuetus, naturæque ac temperamento cujuslibet gravidæ adæquatus; sic v. g. pituitosis laxiorisque habitus ficcus, humidus vero ficcis & strictioris texturæ magis conveniet; natura ita, non semper licet consuetudine postulante. Hac siquidem ratione fluidorum motu debita sub proportionem & temperie in partes solidas influente, functiones quoque omnes, secretoriæ præprimis & excretoriæ harmonico expediuntur modo, atque per consequens tenero foetui nulla infertur injuria. E contrario peregrinus, excessivus & insolitus, omnia inordinate commovendo, premendoque varias præprimis in grvida excitare potest ac solet vicissitudines, stases, obstructions, motus spasmodicos ac convulsivos, hæmorrhagias, omnes tamen magis foetui, ob tenerrimam constitutionem, quam matri damno existentes. Sic aer nimium calidus, ficcus atque rarefaciens, laudabiles humores atque spiritus nimis commovendo, dissipando, sicque foetum turbando, hunc reddit debilem vel etiam ad abortum disponit. Quare hoc in casu externe spongia aceto similive confortante imbuta naribus iterum atque iterum applicari; internè vero remedia orgasmum temperantia v. g. tincturæ florum rosarum, florum papaveris erratici modice acidulatæ, item pulvis absorbens nitrosus propinari possunt. De cætero, si rei conditio permittat, in locum temperatiorem sese recipiat detineatque prægnans. Frigidus contra aer, flantibus cum primis ventis asperioribus, v. g. aquiloniis, poros cutis vasæque constringendo non solum insensibili transpirationi obicem ponit, indeque humorum excernendorum præter modum collectionem & varii generis obstructions parit, sed etiam in plethoricis cum primis, sanguinem versus interiora pellendo, hæmorrhagias uteri enormes & consequenter abortum causari solet. Quoad aerem humidum, is affectibus catarrhalibus imprimis pituitosis, seu immodicæ humorum coacervationi, præcipitationi, aliisque benè multis ansam præbere potest, ut ita per consensum quoque uterus eique inclusus foetus malè afficiantur. Ita HIPPOCRATES

Lib. 3. aph. 12. austrinam pluviosam & tepidam hyemem, item ver ficcum & aquilonium gravidis exitiosum pronunciat. Præstat itaque in ejusmodi cœli inclementia a frigore sive humido sive sicco exorta, vestimentis varii generis corpus induere, nec adeò nude more quarundam muliercularum incedere: aerem suffimigiis convenientibus corrigere, ac denique per hypocaustum calidum eundem temperare. Ex quo & id edisci potest, omnem subitanæ à frigido in calidum, & vice versa, mutationem gravidæ potissimum esse inimicam, ob infuetas tunc & diversas in corpore contingentes, ratione sanguinis circuli & in partes influxus, vicissitudines.

§. III.

Occasione aeris, sine quo haud fit olfactus, erit paululum de odoribus dicendum. Ratione itaque horum cujuslibet individui idiosyncrasia est attendenda. Plurimæ enim foeminarum graveolentia præ fragrantibus tolerant; pauciores hæc præ illis; quædam potentiora sive sint suaviora sive graviora, sive foetida non ferunt; quædam indifferenter omnia ferme admittunt. Ergo juxta has circumstantias illorum exhibitio dirigenda; utpote cum incongrua applicatio facile pathemata spasmodica convulsiva indeque abortum gignere possit. Sic quædam suavitatem ambrae, moschi &c. non respuit; vid. SENNERTUS *de Morb. mul. l. 4. p. 2. Sect. 1. c. 4.* alia gravem asæ foetidæ, castorei, pulegii, menthae &c. sed refracta dosi potius tolerat odorem, quæ tamen alio tempore si in copia adhibentur, neutra illarum ferre potest. Deinceps & id notatu dignum est, quasdam foeminas, si non omnes, odoribus suaveolentium ambrae v. gr. moschi, zibethi, suffocationem atque concussionem uteri pati, si naribus offerantur; E contrario, si eadem pudendis & foetida naribus admoveantur, potius hoc affectu liberari. Ex quo igitur liquet de odoribus in genere nil certi atque universale quid ponere licere, sed singularis hujus vel illius foeminæ indolis rationem esse habendam. Licet interim negandum haud sit, plerasque foeminarum ad uteri suffocationem pronas suaveolentia, aut nimium fragrantia aut potentiora; v. g. sulphuris accensi fumum, aut foetentia, v. g. candelarum lucernarumque fumum, adde nauseosa, non ferre, indeque, uti diximus, uteri commotionem ut plurimum cum abortu esse metuendam.

§. IV.

Alimento utatur Grvida bono, mediocri, digestuque facili; ob debilem ejus ventriculum durioribus tenacioribusque dissolvendis imparem; hinc esse puto quod gravidæ primarum viarum cruditatibus & inde ortis flatibus sæpe numero sint obnoxia; deinde quod tenerrima foetus habitudo succum laudabilem beneque subactum requirat. Sciendum tamen, alimentum primis mensibus esse parcius debere,

re, uberius mediis, paulo largius, ob foetus incrementum, ultimis; nisi plethora vel alius obstet morbus, v. SENNERTUS *L. IV. P. 2. Sect. V. c. 3.* hujusmodi autem generis sunt, carnes & jusscula caponum, avium, gallinarum earumque pullorum, ova forbilia, ptisana amygdalina; & quibus stomachus imbecillus atque quoad appetitum perinde est, quovis uti pane, eæ similagineum præ furfuraceo utpote difficilius digestionis ac succi crudioris, imprimis quod rarissime bene & æqualiter subigatur, fermentetur, coquatur, eligere valent. Quamvis hic maxime consuetudinis, quæ altera est natura, & vitæ generis, quod legibus nonnunquam eximitur ratio sit habenda; ita ut, quæ ex quovis ferme alimentorum genere, mediocritate observata, bene victitatur, illa, juxta CELSUM se certis legibus adeo obligare non habet necesse, ipsa quoque benigna natura refragante. Nec semper tutum, absque singulari indicante, mutationem alimentorum subitanæ instituire, ab assuetis ad insueta transeundo; quippe quod illam vix sine manifesta totius œconomiae animalis alteratione contingere verisimile sit. Namque singularem solidorum pariterque fluidorum concipere licet dispositionem, quæ per longum temporis usum, assuetis, quæcunque etiam sint, magis, quam inusitatis respondeant alimentis. Ex quo & id fluit, salubritatem atque insalubritatem alimentorum non semper ex re ipsa, sed individui consuetudine aliquando venire metiendam. Porro in congruum quoque foret, rusticis aliisque vilioris conditionis hominibus, multa euchyma ac eupepta lautiora præ simplicibus, quæque ejusmodi subiecta quasi indurata, meliori utpl. fruantur sanitate atque rarius abortum patiantur, quam delicatiori & lautiori vitæ generi addicta. Uno verbo: selectus nimis curiosus, & rigidus ciborum non adeo necessarius, modo semper quantitate non excedatur. Interea multa occurrunt inter alimenta quibus circumspicte esse utendum, gravida monenda venit. Ex quibus frequentiora erunt 1.) Diuretica, v. gr. petroselinum, passinaca, seleri, asparagus, baccae juniperi &c. 2.) Aromata fortiora & acria, crocus v. gr. & quæ alias menses pellere solent; quæ cuncta in personis biliosis, tenerioribus & sensibilibus parca manu, vel plane non concedenda sunt; modicus autem usus cinnamomi, macis, piperis, feminum anisi, pro corroborando ventriculo erit concedendus. 3.) Flatulenta facile fermentescibilia; qualia sunt saccharata, alliacea, rapæ, pisa, lentes, fabæ, castaneæ, ciceres, fructus horarii, cappares, phaseol. sexcentaque alia, vid. ROD. A CASTRO *L. 3. c. 22. 4.*) quæ alvum nimis vel constringunt vel laxant. Nec 5.) tuta semper sunt acida austera, utpote transpirationem cohibentia & generi nervoso, nec minus tenero foetui, inimica. Nec 6.) crassa, viscida, fumo indurata, oleosa, frixa, asellus & piscium salitorum genera matrem ac foetum ab omni liberant periculo. Amarorum fortiorum denique intempestivus usus omnino fugiendus; quippe quæ, si non bilem augendo, facile tamen humores ad orgasmum excitando, febres ardentes & alterationes varii generis gignere possunt. Subjectis tamen frigidis & pituitosis amarorum modicus usus planè non est denegandus. Sciendum tamen, quod si horum incongruorum quid prægnans impense atque anxie desideret, hoc illi omnimode haud esse denegandum, modo intra terminos mediocritatis sese contineat ipsa: nam si plane omnia negentur, sese moderare nesciens abortum sibi pariet; sic in Pica aliquid concedendum, interim persuasionibus variis & bonis dolis succurrendum.

§. V.

Quod ad potum attinet, constat circa hunc foeminas in genere fere omnes ut plurimum magis in defectu, quam excessu peccare, ob vitam forsitan sedentariam insensibili transpirationi aliisque excretionibus necessariis obicem nonnihil ponentem. Quare gravidis præ reliquis largior potus usus, cæteris paribus, erit suadendus; utpote quæ, ob binorum individuum nutritionem, novum atque vegetiorem quotidie requirunt succum. Qui & id commodi habet, quod segnitiei alvi, qua nunquam fere non, haud raro cum abortus metu, prægnans vexari solet, medeatur. Cujusnam autem speciei debeat esse potus, in genere vix licet determinare; quippe quod hic quam maxime consuetudo atque subiectorum diversitas sint perpendendæ. Hujus enim intuitu mox hoc, mox aliud potus genus eligendum est; sic v. g. biliosis vix amara, ut cerevisia potenter lupulenta, sed potius temperata tenuis & abstergens v. g. secundaria prodest. Cachecticis contra, visciditate roscida laborantibus amara atque lupulata magis erunt appropriata. Ad scorbutum inclinantes, iterum uti possunt abstergentibus, cerevisia v. g. tenui, fero lactis. Nimis autem obesitas nil, nisi aqua probe diluta porrigenda, omni pinguedine & particulis nutritivis destituta simulque vi abstergendi prædita v. g. potus thee, veronicæ, vinum moderate dilutum atque clarum, cerevisiæ acidulæ, Reuterling & quæ sunt id genus, alia. Circumspicte interim gravida utatur cerevisia recenti nondum defæcata, musto, vino austero, quæque alias flatus, tormina, varias sanguinis commotiones translationesque gignere solent. Nec spirituosiora potentiora spiritus vini, v. g. vinum generosum, imprimis si larga in quantitate assumantur, erunt concedenda ob metum hæmorrhagarum, phlogosis, capitis doloris, & quæ sunt hujus commatis plura.

§. VI.

Modicam porro corporis motionem, quæ nullo non tempore apprime conducit, eo magis prægnantibus, cæteris integris, suadere possumus, quo magis hæc ad quietem sunt pronæ. Etenim per motum quicquid torpidum excitatur, omnia in debito circuitu atque amabili calore conservantur, digestionis primæ nec non secundæ, item excretionis solenniores v. g. insensibilis transpiratio maximopere promoventur. E contrario, Quies matrem & foetum torpidum reddit; excretiones, si non plane sufflammat, tamen retardat. Hinc est, quod gravida obstructionibus, tumoribus œdematosis &c. facilius, quam quivis alius homo, sit obnoxia. Notandum tamen, in principio gravidationis in motu mediocritatem esse observandam, quum eo tempore ob debiliorem adhuc cum utero nexum, foetus ad abortum maxime fiat proclivis. Ultimis nihilominus mensibus magis motui indulgeri posse Practici celeberrimi passim proponunt, quo enim fit, ut foetus mature excludendus ad faciliorem enixum comparetur. At vitentur omni studio motus vehementiores, saltationes v. g. concussiones, extensiones, elevationes, gestationes gravium ponderum, labores ardui, item pertinent huc impetuosæ sternutationes, gravis sonitus, clamores penetrantes, similesque commotiones, quæ singulari vi atque robore peraguntur.

§. VII.

Somnum atque Vigiliis quod concernit, notum, tempore vigiliarum integrum hominem per continuam mutuamque mentis atque corporis cooperatio-

nem tandem debilitari, per somnum vero in integrum iterum restitui atque recreari; adeoque iusto tempore, somno nihil homini conducibilius nihilque utilius. Qui equidem ordinarie per sex septemve horas cuivis proficius imo necessarius censetur; Gravidis tamen, cæteris paribus, largior concedi potest. Namque somni tempore, compositis atque recollectis iterum omnibus, vix dici potest, quantum roboris atque vigoris toti corpori accedat, maxime vero foetui. Siquidem principium vitale ad voluntarias functiones non adeo concurrens, magis nunc formationi atque nutritioni foetus incumbere ac præesse valet, quam si vigiliis distractum mentis imperio nunquam non sit subiectum. Qua de causa nec facile gravidarum somnus per nuncium minus gratum, vel repentinis terculamentis v. g. ex incendio, fulgure, tonitru, evenire solitis, inopinato turbandus. Quatenus mens æque ac spiritus, tranquillitate secure fruenter & nunc cum impetu quasi excitati tam expedite sese colligere non possunt, quin motu inordinato ad functiones ruant, sicque non levem totius œconomiae alterationem, foetus teneritudinem potissimum afficientem, excitent. Quoad decubitus inter dormiendum, præstat ut acclivi & obliquo trunco decumbat gravida, & mox in sinistrum mox ad dextrum magis latus se flectat. Quodsi enim horizontaliter, ut ita dicam, plumis incumbat, facile ventriculus à mole uteri comprimitur, sicque motu libero diaphragmatis sufflaminato, respiratio difficilis redditur ac insomniis terrificis datur occasio. Deinde si supra dorsum vel in latere alterutro omnem absolvat somnum, vasa a pondere incumbente pressa, stuporem partibus conciliant & liberiores transcursum impediunt.

§. VIII.

Circa Excernenda & Retinenda, insensibilis transpiratio, urinæ excretio, fecum denique alvinarum depositio, probe sunt observandæ. Quoad priorem, constat, illam in foeminis cum primis gravidis, variis ex causis iusto esse parcior: ob cutem nempe teneriorem ac strictiorem; ob vitam sedentariam, statum ut plurimum plethoricum & cacohymicum; deinde quod parum bibere soleant; porro spiritus ad interiora magis, quam peripheriam moveri pro nutriendo foetu, verisimile est. Quum autem exinde multa propullulent incommoda, ut erysipelas ob stagnantes in poris cutis humores, febres, lassitudo totius, tumoresque, adde, quod coacervatæ cruditates ferossæ hinc magis ad organa urinaria, propter affinitatem facile uterum in consensum trahentia, præcipitentur, multum certe interest, insensibilem transpirationem retardatam commodis auxiliis promovere; frictione v. g. calidorum, levi sudorifero, motu modico, usu potus calidi vel saltem temperati paululum largiori, conversationibus jucundis & quæ sunt id genus plura. Urinæ vero excretio vel excessu vel defectu foetui esse damno potest; excessu, quatenus, propter intimam vesicæ cum utero connexionem, hic a nimia & continua feri falsi atque irritantis alluvie simul afficitur: ejus defectus contra arguit multarum functionum plus minusve læsionem, hincque multas easque exitiosas in massa sanguinea manere cruditates; vel etiam, idem, ultimis imprimis mensibus, evenire potest, quod vesicæ collum a foetus mole compressum, ægre urinæ exitum permittat. In priore itaque casu gravidæ abstineant aut parce saltem utantur cibis insigni vi diuretica præditis; potius assumant, quæ ad peripheriam, de quibus supra, movent; quo etiam spectant temperate spirituosæ balsamæ sic dictæ embryonum, quibus frequenter abdomen calide inungendum; in posteriore vero, modo non plane supprimatur urina, expectanda foetus exclusio; interim si

urgeat, ope catheteris, vel decubitu obliquo supra dorsum urina erit promovenda. Alvus denique sit neque laxa, neque stricta nimis; sed media; Nam utraque irritando uterum abortum parit. Nimirum scybala diutius, quam par est, retenta mole atque compressione foetui molesta satis sunt: deinceps arida facta majori vi atque conatu, haud raro cum immaturo foetu simul excluduntur. Præstat igitur, pro alvo aperta servanda, assumere esculenta humectantia atque lubricantia: qualia sunt juscula pinguiora, quibus incoqui possunt flores liliorum alborum, violarum, borraginis, malvæ, addendo oleum amygdalarum dulcium: porro huc pertinent decoctum prunorum, passularum nec non infusa ex tamarindis cum Rhabarbaro; item digestiva ex cremore tartari, liquore terræ foliatæ tartari, &c.; ac denique clystères emollientes non adeo in quantitate excessiva immixti, & globuli moschi, aliaque laxantia blandiora pro rei necessitate usurpanda. Nimium autem laxam prudens Medicus curabit v. g. succino, terra catechu.

§. IX.

Superfunt brevibus expedienda animi pathemata potentiora, quæ inter res non naturales omnium frequentissime abortum causari solent. Et quidem ex his lætitia atque gaudium primo occurrunt; quod quamdiu terminis suis includitur omnino admittendum, imo suadendum; hilaris enim animus vix dici potest, quantum recreet adque sanitatem conferat: at dum in cachinnum effusissimum abit, haud raro abortum, ob concussionem & subsaltationem totius, produxisse Autorum observationes testantur. Lætitiae opponitur tristitia sive mœror, qui circa minus gratam ideam occupatus, spirituum æque ac humorum motum atque activitatem non figit solum torpidamque reddit, sed illos quoque a conceptione evocando vires summopere consumit indeque foetus nutritio negligitur. Tristitiæ v. solatium optimum esse solet amor debitus conjugalium, qui omnis generis confortante atque cordiale potentior. Amori vero contrariatur odium, quo mens nec non spiritus ingrati & morosi reddit, si non foetum expellunt, ad minimum eum turbant, imo similem haud raro morosam indolem flexibili foetus animo ingenerant. Nec leviter cupiditas seu desiderium, quod hic speciali nomine malacia audit, prægnantem vexare solet, gulæ atque phantasie nimium indulgentem. Namque mox hæc, mox alia appetit, aliquando satis incongrua absurdaque, ita ut si horum non statim particeps fiat, animi deliquiis, aliisque intranquillitatum generibus vexetur. Quare hoc in casu id quam maxime agendum, ut si bonum atque parabile fuerit, quod desiderat, mox ei subministretur; sin vero minus conveniens, vel dissuadendum, vel aliquid etiam præbendum, modo ne quid nimis. Desiderio adversum est fastidium, quod frequentius post conceptionem & primis gestationis mensibus in prægnantibus observamus, ita ut, quod antea quam maxime gratum fuit, nunc illis nauseam conciliet. Et experimur si id, quod fastidiunt, offeratur, vomitu haud raro enormi & cum abortus metu, corripiantur. Quamobrem ad talismodi ingrati minime cogenda est gravida, modo non plane & diu abhorreat a reliquis alimentorum generibus ad sustentationem matris foetusque necessariis. At Ira præprimis gravidæ est exitiosa; qua enim correpta furibundo similis non enormem solum orgasinum fluidorum patitur, sed & in foetum sæviens hunc epilepticum & ad abortum proclivem reddit. Quem igitur in finem ad manus sint remedia sic dicta præservatoria excandescientiam temperantia inque principio statim sumenda e. l. *Rec. pulveris corallii rubri, arcani duplicati ana gr. XV. extracti ca-*
storei

stroci gr. IV. M.; aut potio ex antispasmodicis v.g. aqua florum tilia, liliorum convallium, primulae veris, pulvere Marchionis, nitro purificato. Nec benignioris indolis est terror, in quo, retrocedentibus spiritibus, & partibus externis, ad motus constrictivos a comprimente & ambiente aere oriundos, dispositis, sanguinem ex vasis minoribus ad majora, i. e. a peripheria ad centrum magis magisque urgeri, sicque internas quasdam partes earumque functiones nimio sui & impetuoso influxu turbari, indeque anxietates præcordiorum, uteri motus spasmodicos &c. produci verisimile est. Quapropter hic præter sanguinem resolventia atque V. S., quam maxime quoque quadrant Analeptica mitiora simulque Antispasmodica, quibus externe robur fibrarum, interne vero regularis fluidorum motus ad peripheriam iterum conciliatur. Nec plane hic contemnenda amuleta sunt, *die Schrecksteinn* / quorum operatio idealis in eo consistit, quod terrore affecta & amuletis maximopere confusa meticulosam ideam dimittat, iterumque ad se redeat, omnia bona sperando. Timori futura metuenti optima erit medela persuasio atque dissuasio. Singularem denique & pene imperscrutabilem in prægnante vim atque efficaciam habet Imaginatio vehemens, quam tenerimus ut plurimum foetus variis nævis seu stigmatibus maternis luere insons solet. Ejusmodi exempla plura pepes Autores imprimis STALPARTUM VAN DER WIEL *obs. rarior. T. I. obs. 72. & T. 2. obs. 36. seqq.* MARCUM MARCI, DIGBY *de pulvere symp. it. in Theatro sympath.* legere licet. Sic notatu dignissima est obs.

illa prima allegata VAN DER WIEL, qui refert, foeminam ex sola imaginatione concepisse & in lucem edidisse canem. Nec ignota est historia Reginae, quæ Æthiopem peperit, cum uterque conjux albi essent; ob depictam circa lectum Æthiopis imaginem. vid. GAFFARELLI *Curios. inaud. p. 119.* Fugiat itaque omnem occasionem, qua aspectu horribilia & insueta occurrere unquam possunt, imprimis si gravida ab ejusmodi rebus facile afficiatur; aut, oblato præter spem incongruo, illud animo, quoad cito potest, eximat, vel tangat saltem partes sui corporis, quæ ad pulchritudinem non faciunt: quum experientia constet, in illas partes deforme oblatum imprimi, quas eo momento, quo offeruntur, gravida manibus contrectat. Concubitus tandem neque nimis amplectendus, neque nimis respuendus, de quo egregia CELSUS *l. I. c. I.* habet. Sciendum tamen frequentem non juxta numerum, sed vires cujuslibet individui esse metiendum. Qui itaque ægre & cum corporis languore sit, fugiendus; quem nihil hujus sequitur, frequentius, ultimis cum primis diebus, cæteris paribus; admittendus; quod foetui viam ad faciliorem mox exclusionem, aperiat. Cavendum quoque, ne foemina viri ebrietate vel alio animi & corporis affectu valdopere correpti amplexum admittat, cum experientia doceat, virum v. g. ebriosum conceptionis actu generasse infantem sibi similem, h. e. mentis haud compotem per omnem vitæ diem: & quid dicam de Morbis hæreditariis? sed hæc dixisse quoque sufficiant de frequentioribus animi affectibus prægnanti & foetui potissimum obesse solitis.



DISSERTATIO MEDICA QUA SENECTUS IPSA MORBUS SISTITUR.

Primum edita Anno 1732.

P R O O E M I U M.



NSIGNIS hodiernorum & antiquiorum Philosophorum æque ac Medicorum quæstio torfit & exercuit ingenia: cur homini necessario moriendum sit? Diversi in diversas abierunt sententias. Recepta jam per aliquot secula ad hanc quæstionem fuit responsio, mortem homini idcirco necessariam esse, quoniam anima a corpore suo dissolvatur, quare & mortis natura in dissolutione animæ a corpore a multis Philosophis est collocata. Verum ubi urgetur ulterius, cur anima dissolvatur a corpore? nihil lucis ex antiquitus usurpata hac mortis definitione ad naturam ejus intelligendam derivari potest. Nonnulli cum HELMONTIO & affeclis flammulae vitalis & calidi innati defectum pro causa allegarunt; quæ vero nihil præter puram vocem habent in recessu. Alii plus lucis ex revelationis lumine hausturi respondent, constitutum esse ab æterno Numine, ut homo moriatur, ob fatalem protoplastorum lapsum; sed nec hinc, in quonam mors consistat, quispiam intelliget. Quibusdam placet animæ motus vitales administrantis languori & fastidio ulterius in corpus agendi id tribuere; sed longe nimis petita est ratio, & claro ac distincto conceptui penitus contraria. Quis enim

creder, Deum T. O. M. animæ, seu naturæ humanæ eam vim concessisse, ut pro lubitu corpus morti exponere possit? annon hoc pacto quivis hominum *αὐτόχειρ* habendus? cur, si habet hanc potestatem, non discedit anima a corpore in his, qui violentis suppliciis morti traduntur, & qui mortem valde anxie expetunt? Sed ex quo fabrica corporis humani per solertiores anatomen accuratius lustrari, & in Philosophia nihil, quod claro conceptui repugnat, pro vero haberi cœpit, aliam & solidiorem mortis rationem reddendam esse, judicatum fuit. Præstitit id primus Illustris ac Celeberrimus Dn. FRIDER. HOFFMANNUS, Patronus ac Præceptor ad urnam colendus, & claram ac distinctam mortis explanationem exhibuit, ex qua ratio reddi etiam potest, cur homini absolute moriendum sit, & quomodo successu temporis ætas ipsa ad mortem disponat sine concursu ullius causæ violentæ & morbosæ. Ego cum in præsentiarum Inaugurali quodam specimine profectus meos in arte salutari sim declaraturus: minime inutile negotium suscipere me arbitratus sum, si *senectutis considerationem* eligerem, quæ via secundum ordinem naturæ est ad mortem, & afflictiones, quæ ex Senectutis vitio in corpus redundant exponerem, causas vero, cur fiant, subjungerem. Inductus sum vulgari illo proverbio, quod ipse jam professus est TERENTIUS: *Senectus ipsa morbus est*. Sistam itaque in præsentiarum senectutem ipsam morbum. Divinum autem Numen benedictione sua cœlesti mihi adsit.

§. I.

TRactationis nostræ ordo exposcere videtur, ut cum in præsentia Inaugurali Dissertatione de *Senectute ipsa morbo* acturi simus; quid per Senectutem intelligamus, deinde quomodo Senectus morbus nominari possit, explicemus. Quantum itaque ad Senectutem attinet, res est in vulgus adeo nota, ut nulla opus habeat declaratione. Quis enim est, qui ignorat, per eam denotari hanc ætatem, in qua vitæ finis secundum ordinem naturæ imponitur. Nemo est, qui ignoret, vitæ nostræ curriculum ab ipsis antiquissimis etiam Medicinæ Scriptoribus in certa intervalla distinctum fuisse. Sic HIPPOCRATES in Libro de ætate in diversas ætates vitam humanam dispescit, & quamvis harum septenario annorum numero metitur. Nam in ejusdem fragmento ex PHILONE JUDÆO hæc exstant verba: *In hominis natura sunt septem tempora, quas ætates vocant: Infans, puer, adolescens, juvenis, vir, senior, senex: Infans est usque ad septem annos ad dentium amissionem; puer vero usque ad genituræ ortum; adolescens usque ad barbæ lanuginem ad ter septem; juvenis usque ad autionem totius corporis ad quater septem; vir usque ad unde quinquagesimum ad septies septem; senior usque ad quinquaginta sex ad septies octo; deinceps vero Senex est*. GALENUS vero in aliam abit sententiam dum in *Libro de tuenda sanitate Capite II.* inquit: *ætates exquisito annorum numero alligari non possunt*. Rejecta itaque hac HIPPOCRATIS distinctione in tres periodos vitæ humanæ spatium dispescit. Nam *Libro II. de temperamentis Cap. 2.* vitam hominis distinguit in *statum incrementi, vigoris, & decrementi*. Unde vero factum sit, ut ipsis Medicinæ patribus placuerit vitam humanam in certas ætates dividere, & quid per ætatem intelligendum sit, erudite exponit Cel. VERULAMIUS *Lib. III. Cap. X. de ætate in-* quiens: *Dum ad extremum vitæ spatium homo contendit, plurimas mutationes necessario sustinet, has qui annorum spatiis & intervallis*

dimensi primum discreverunt, simul ætates appellarunt, ut sit ætas id vitæ curriculum, quo luculenter corporis constitutio per se suoque nutu mutatur. Nos itaque eam ætatem hic per Senectutem intelligimus, quæ secundum GALENI sententiam status decrementi dicitur; secundum HIPPOCRATEM vero ab anno unde quinquagesimo numerari incipit & ad finem usque vitæ protrahitur. Fusius quoque & uberius hæc explicuit Illustris Dominus FRID. HOFFMANNUS in *Dissertatione de annorum Climactericorum rationali & medica explanatione*.

Quænam ætas Senectus dicatur.

§. II.

Cum vero jam mentem nostram exposuerimus, quid per senectutem intelligamus: ere est, ut quomodo, & cur senectutem morbum nominemus, declaremus. Sunt autem hæc verba: *Senectus ipsa morbus est*, multæ & amplæ significationis. Non enim dicitur, Senectus est morbosus, seu Senectus habet magnam ad morbos dispositionem, verum expressis verbis inquit: *Senectus ipsa morbus est*. Neque vero a vero hæc TERENTII verba aberrant; cum in sequentibus sim ostensurus, quod sicuti morbus vires depascit, & functiones totius corporis pervertit; non secus ipsa senectus agit, & œconomiam motuum omnium turbat & impeditam efficit; quin causa per se est, cur homo moriatur.

Cur Senectus morbus nominetur.

§. III.

De Senectute autem tractaturis necesse est, ut eam cum HIPPOCRATE *Secl. I. aph. 13.* in duas periodos dividamus; quarum prima non tanta virium debilitate & naturali imbecillitate secundum ordinarium naturæ cursum laborat; verum viribus adhuc tam animi, quam corporis pollet; altera vero virium tam animi quam corporis successivo decremento vitam molestat; illa viridis seu cruda secundum quosdam appellatur, & ab anno quadragesimo nono ad climactericum magnum numeratur; hæc vero matura seu decrepita dicitur, & ab anno LXIII. ad vitæ terminum

Senectus dividitur in duas periodos.

num pergit. Quo minoribus vero sanitatis incommodis prior, si hac in ætate constituti congruo vitæ victusque regimine sibi ipsis consulant, premitur, eo majoribus pluribus & gravioribus afflictionibus posterior est obnoxia; & si de priori non semper, de posteriori verum perpetuo est TERENTII effatum, quod Senectus ipsa morbus sit.

§. IV.

Quo ordine in tractatione procedamus, ostenditur.

Hæ vero afflictiones, quæ Senectuti ex ætatis vitio sunt propriæ, non solum corpus humanum premunt; verum dispositionem imò causam subinde præbent, quo senectus variis morboris etiam affectionibus sit exposita. Hanc itaque materiam hoc modo pertractare nobis visum fuit, ut primo loco recenseamus eas afflictiones, quæ Senectuti ex se & sua natura sunt propriæ; & causas al legemus adæquatas, ex quibus hi effectus non possunt non consequi; secundo de iis affectionibus agemus, quæ præter naturam ætatem senilem infestant & morbos ita dictos senum constituunt; tertio autem therapeutica tractatione vel magis ex Hygieines fonte deprompta ostendemus, quomodo ætas senilis a morbis præservari, & quomodo a senectutis etiam afflictionibus defendi per aliquod tempus senes possint. Non vero practicam uniuscujusque morbi pertractationem tempus & instituti scopus permittunt.

§. V.

Senectus instar morbi agit in corpore.

Turbat actiones vitales.

Nunc ordo fert, ut incommoda senectutis, quæ efficiunt, ut ipsa morbus sit, ac sine alia accedente causa morbofa eam dixerant, enumerem. Antequam prolixiori tractatione id persequar, ostendam in compendio, quod Senectus omnino morbus sit, & instar morbi in corpus agat. Nullus enim morbus est, qui non actiones vel vitales, vel naturales, vel animales turbet, pervertat, deprimat, impediat. Quod Senectus pari modo in corpus agat, sequentes lineæ docebunt. Primo recensendæ sunt alterationes, quas motibus vitalibus inducit. Circulus itaque sanguinis, vitæ animalis principium, in senectute est impeditior, tardior, ultimato vero plane languidus, hinc pulsus etiam si durus sit, tardus tamen percipitur; calor corporis multum deperditur, vires consumuntur, & deperduntur, motus systalticus & diastalticus, qui in omnibus canalibus viget, peristalticus quoque, & fibrarum etiam musculosarum, elasticus seu tonicus debilitatur, & deperditur.

§. VI.

Turbat etiam naturales.

Transimus ad naturales a Medicis ita dictas functiones, quæ multum etiam in ætate senili depravatæ observantur. Notum est vitam nostram cum sanitate periculis exponi, nisi ingestiones, retentiones & egestionem legitime sint constitutæ. In senectute autem, etiam si adsit quædam ciborum appetentia, quæ vero sæpe languet, semper tamen multis incommodis laborabit ciborum solutio, digestio, & chyli elaboratio. Secretiones languent; excretiones imminuuntur, præprimis ea quæ fit modo insensibili per cutis colatorium. Potentia generandi deficit. Habitus corporis successive exsiccatur, exarescit, &

lento quasi igne depascitur, cutis durior, densior fit, & rugis exaratur. Somnus multum est laboriosus & interruptus, in quibusdam vero nimius nec vires tamen reficiens.

§. VII.

Quod de vitalibus & naturalibus dictum est functionibus, id asserendum etiam de animalibus. Nam sensus omnes in senibus vigorem suum amittunt, quorum luculentum exemplum præbent sensus visus & auditus, qui multum in decrepita ætate imminuti deprehenduntur, quin non raro plane abolentur. Motus voluntarius etiam difficilius exercetur, quoniam a minimo labore magnum virium experiuntur decrementum. Membra sæpe tremor occupat. Sed ætatis injuriæ non solum corpus humanum & ejus functiones alterant; verum animæ quoque facultates imminuunt & alterant. Hinc memoria successive decrescit, ingenii vigor deperditur, & judicii acies, decus consistenti ætati & in priori senectutis gradu constitutis proprium obstupescit, & vigore suo orbatur. Sunt hæ præcipuæ illæ afflictiones, quas senes ex ætatis vitio sine ullius causæ morbofæ inventu experiuntur, quæ evictum satis dant, quam verum sit dicterium; Senectus ipsa morbus est. Has vero senilis ætatis affectiones eleganti allegoria proponit sacer codex apud Ecclesiast. Cap. ultimo.

§. VIII.

Recensuimus jam, ni fallor, varia & præcipua incommoda, quæ senectuti ex sua natura & ætatis injuria accidunt, quæ in senectute decrepita ordinario observantur. Licet autem quædam subjecta non obnoxia sint his afflictionibus, id minimum veritatem sententiæ, quam hic statuimus, valet infringere; cum accedant tamen ætate appropinquante, nec certum annum, cui propriæ sint hæ ægritudines, assignemus; in ætate enim decrepita hæc observari asseruimus & in hac omnino evenit semper, ut motuum vitalium, naturalium & animalium exercitium sit imminutum, quare necesse est, ut magnis mutationibus sit expositus homo. Pulchre de hac re scribit SENECA in Epist. 28. Nemo nostrum idem est in senectute, qui fuit juvenis; nemo mane, qui pridie; corpora nostra rapiuntur fluminum more; quicquid vides, currit cum tempore; nihil ex his, quæ videmus, manet; ego ipse, dum loquor ista, mutatus sum. Corpus humanum transit ad perfectionem, transit etiam rursus ad interitum. Cum autem insigne illud veritatum omnium indagandarum principium rationis sufficientis in omni scientia memori semper mente tenendum sit; hinc ad nostram etiam tractationem referendum erit. Cum itaque vi hujus principii nullus motus, nulla mutatio, imò nihil fiat sine ratione sufficienti, hinc nec hæ, quæ in senibus observantur mutationes & alterationes contingunt sine causa, quæ potis est eas producere. Nostrum vero est hanc inquirere, quæ vera est & adæquata, harumque turbarum rationem sufficientem declarare.

In ætate decrepita hæc eveniunt.

Ratio harum mutationum inquirenda est.

§. IX.

Causa vero mutationum harum non longe requirenda nobis venit, cum in propinquo sit, imo in uniuscujusque sinu recondita, de qua eleganter SENECA l. c. inquit: *Indita corpori nostro est talis causa, cujus necessitate in viribus augetur, deficit, & etiam interit.* Corporis itaque fabrica lustranda est ei, qui hoc in genere veras rationes reddere & ætatis vitia explicare allaborat, & quasnam ea mutationes progressu temporis subeat, & quænam hinc in totam vitæ animalis œconomiam alterationes redundent, attendendæ. Nam hæc alterationem & mutationem ex necessitate subit, dum a variis causis corporeis diversis modis afficitur, & dum ipsa in se mutatur, quam si conspectam habuerimus, rationem quoque, cur corpora senum his afflictionibus sint obnoxia, invenimus.

Quæ in corporis fabrica reperitur.

§. X.

Ubi itaque, causa alleganda est, quæ in senili ætate corporis nostri vires frangit & debilitat; non meliori ratione id fieri posse scio, quam si causam ex solidis medicinæ rationalis principiis inquiramus, quæ vires has producit, & sustentat in corpore sano. Sic enim facili negotio apparebit in defectu hujus causæ sitam esse etiam rationem, cur hæ cessent. Non meliori via id autem perficere me posse persuasus sum, quam si constitutam habeam veram & adæquatam sanitatis definitionem. Uti enim ex vitæ definitione reali illico status & natura mortis elucescit: ita ex sanitatis definitione omnes, quæ ipsam turbant causæ, & per consequens hæ etiam, quæ senili ætati propriæ semper sunt, afflictiones, legitima connexionione possunt deduci. Sanitas autem est vigor omnium functionum corporis nostri, dependens a solidorum convenienti ac moderato motu atque fluidorum legitima mixtione ac debito in omnes corporis partes influxu. Si itaque motus cordis & annexorum vasorum reciproci systoles & diastoles est æquabilis; si fluidorum mixtio est talis, ut partibus gelatinosis, insipidis, spirituosis & terreis imo aqueis sufficienti in copia & proportionem adæquata sint prædita; si puri sunt humores & ab omnibus heterogeneis eminentibus partibus defecati; si datur liber sanguini per universas corporis partes aditus; si hæc omnia se habent moderate & ad naturæ ordinem viget sanitas, ad sunt vires integræ; quin omnes functiones in corpore fiunt legitime & sufficienter. Contra vero si solidorum motus vel debiliior, vel excitatior est, verbo si ab æquilibrio recedit; si humores vel in crassi vel in copia peccant; si fluida non possunt corporis partes singulas subintrare: contrarium evenit, & vita cum sanitate periclitantur.

Ex sanitatis definitione causæ, quæ ipsam turbant, facili negotio invenienda sunt.

§. XI.

Ratio redditur, cur actiones vitales in senectute sint depravate.

Unde igitur actiones corporis nostri vitales imminutæ in senectute deprehenduntur? Ex Physiologia rationali & Mechanica notum est, harum actionum vigorem dependere non solum a solidorum, per quæ canales, nervos,

musculos, verbo omnes fibras elasticas intelligimus, convenienti constitutione & structura, ita ut hæ nec nimis flaccidæ, molles sint, nec nimis tensæ, duræ & rigidæ; verum etiam a sanguinis boni temperati sufficienti in partes solidas influxu. Non vero hæ duæ causæ sufficiunt ad motus vitales legitime præstandos, nisi simul accedat fluidi subtilissimi ætherei naturæ valde elasticæ, quod in cerebri tubulis secernitur, sufficiens & adæquata copia, & placida ad partes solidas advectio. Si quis sit, qui de causarum harum efficacia ad motus vitales producendos dubitet, is adeat Illustris & Celeberrimi Domini FRID. HOFFMANNI *Med. System. Ration. Tom. I. Lib. I. Sect. Cap. III. de motuum vitalium causis.* Cur ego minus huic probationi immorer, ratio est potissima, quod nihil melius præstare possem, ac si integra Viri Illustris verba transcriberem. Constitutis itaque legitimis actionum vitalium causis, cur hæ in senio vacillent, ratio reddenda est. Jam autem experientia docet, fibras corporis nostri successive indurari, rigidiores fieri; docet eadem, tubulos capillares & poros collabi & obstrui. Probat id vulgare experimentum, quo carnes juniorum animantium molliores semper deprehenduntur, quam annosiorum, quod inter alia Illustris FRID. HOFFMANNUS *Med. System. Ration. Tom. II. Cap. I. §. 24. in Scholio* probavit. Uti id vero in corporis habitu fibroso & musculofo per experientiam clarum est: ita per analogiam non sine ratione de fibris cordis & canalium asseritur, præsertim cum non rara sint exempla, ubi arteriæ aortæ fibræ a cordis exitu vicinæ in ætate provectioribus in vera ossa degenerari observentur. Deest itaque in solidis naturalis & legitima ad motum edendum dispositio, & quoniam ex digestionis vitio & secretionibus ac excretionibus impeditis sanguis alienam mixtionem & dispositionem induit; ubi etiam ob tubulos subtilissimos in cerebro collapsos & obstructos fluidum illud æthereum & elasticum non satis secerni, consequenter nec ad partes vigorandas advehi potest: hinc motus vitales languent, & circulus sanguinis est tardior & impeditior. Quare autem pulsus in senibus est tardus? Fit hoc ob circulum sanguinis tardiolem & languidiorem. Durus autem est ob fibrarum ex quibus arteriæ componuntur rigiditatem ac duritiem. Quoniam autem vires in corpore fiunt a sanguinis & fluidi nervei sufficienti copia, & naturali crassi, liberoque in partes solidas legitime etiam constitutas influxu: hinc sublatis in senio his causis ipsæ vires etiam deficient. Et quia circulus sanguinis est languidus, & vascula in habitu corporis minima, collapsa ac obstructa: hinc sanguis ad partes externas in sufficienti copia advehi non potest, quare calore etiam debito hæ partes privantur, & frigidæ magis observantur. Motus tonicus sive elasticus fibrarum etiam pendet a solidorum mobilitate & structura legitima, atque a sanguinis & fluidi nervei sufficienti appulsu. Hæc vero requisita in ætate senili cessare supra docuimus, quare & motus tonicus depravatus in senibus deprehenditur.

§. XII.

§. XII.

Cur natura-
les ac-
tiones in
corpore se-
num lan-
guent.

Pertractatis jam causis, quæ motuum vitalium functiones turbant, facili negotio rationes reddendæ erunt, cur actiones, quas Medici naturales appellant, in senibus multis premantur difficultatibus, imo cur denique plane cessent, quo efficiunt, ut vitales etiam motus brevi aboleantur & vita cum morte commutetur. Est enim machina & fabrica corporis humani ita constructa, atque a Sapientissimo Opifice ordinata, ut omnes in ea partes consentiant, omnes motus confpirent, omnes actiones invicem connexæ sint. Unde & HIPPOCRATES *Lib. de alimentis §. 4.* dicit: *Confluxio una, conspiratio una & consentientia omnia.* Hac sancitum est harmonia, ut motus naturales dependeant a vitalibus, sed & vice versa alteratis motibus naturalibus ipsæ etiam actiones vitales non rite in corpore administrentur. Luculentum huius rei exemplum se offert in iis, qui ictero laborant, in his una motuum naturalium species male est affecta, dum secretio bilis in hepate non fit, & sublata est; quam varia tamen & gravia ex hac secretionem impedita in corpus redundant incommoda, iis satis cognitum est, qui aliquem ictero laborantem viderunt. Contra etiam sublatis ad tempus motibus vitalibus, omnes in corpore actiones, ergo & naturales cessant. Cum itaque in senibus illæ depravatæ deprehendantur, conclusione facili elicimus has quoque a naturali suo statu deflectere.

§. XIII.

Cur spe-
ciatim va-
cillet appe-
titus.

Cur dige-
stio.

Cur itaque in senectute provectioni constitutis appetitus est depravatus? Fit id ob robur stomachi dejectum, quod in causa est, cur iste multis eminentibus impuritatibus viscidis, mucidis ac biliosis sit obsessus, quæ appetentiæ debitæ sunt insensibilissimi hostes. Sæpe vero gravior subest causa, sed magis etiam formidolosa. Non raro enim evenit ut in senectute decrepita non secus ac in morbis chronicis viscus quoddam & ut plurimum lien abeat in corruptionem, & tum omnis perit appetitus, estque hoc symptoma tam in prædictis morbis, quam in senibus a tali causa ortum mortis non multo post venturæ securum indicium. Interdum vero, si acidis & ponticis humoribus prima regio sit referta, nimium est valens appetitus, quod in his etiam contingit, qui malo hypochondriaco sunt obnoxii. Vitiatus appetitus alimentorum subactionem etiam depravatam indicat, quare vero ciborum solutio & digestio vacillet, videndum. Ad alimenta solvenda requiritur stomachi & intestinorum sufficiens robur, requiritur ad hunc usum etiam liquoris salivæ naturæ valde fermentantis, neque minus liquoris gastrici & pancreatici ac biliosi sufficiens copia & satis apta ad solvendam ciborum massam mixtio, non excluso potu etiam sufficienti. Sed quia in ætate provectionibus ob vires totius corporis labascentes ipsius quoque stomachi & intestinorum robur est dejectum; quoniam ob collapsos, quin obstructos tubulos subtilissimos in glandulis quæ secretioni salivæ, & succi pancreatici dicatæ sunt, liquorum horum copia suf-

ficiens deficit; quoniam ob hepatis idem vitium bilis adæquata copia ut & ob induratos minimos acinos glandulosos liquor in ventriculo secernendus deest, ipsa etiam ciborum concoctio depravata sit, est necesse. Ex digestionem vero his de causis vitiata chylus etiam impurus, minus spirituosus elicitur, quare & sanguinis spiritualcentia debita deficit.

§. XIV.

Quod secretionem in senibus sint imminuta, diximus, §. etiam proxime præcedenti brevibus, cur id contingat, attigimus. Fit autem istud, quoniam & organa secretoria & humores secernendi a naturali sua constitutione deflectunt. Omnis enim secretio requirit organi, in quo ipsa fit, legitimam dispositionem, quæ est ut canales, in quos impelluntur fluida, sint sufficienti robore ad humores regendos præditi, sint etiam sufficienter patuli ut humor eos ingredi possit; requirit etiam fluidorum mixtionem & consistentiam debitam. Sed in senectute partes omnes tono suo dejiciuntur, ergo & organa secretoria; tubuli & canales minutissimi in toto corpore coeunt, obstipantur, occluduntur, ergo & in organis secretoriis humores, quia tardius moventur & multis impuritatibus contaminantur, etiam a naturali sua schemate deflectunt; hinc secretionem per totum corpus imminuuntur. Hæc est causa, cur in senibus liquidi nervei secretio deficiat; cur liquidi subtilissimi seminalis secretio deficiens & sublata potentiam generandi tollat; cur secretio salivæ, succi pancreatici, bilis, imo muci in intestinis etiam sit impeditior. Excretionem etiam his de causis sufflamantur. Quoniam enim tubuli & pori in cortice corporis constituti minutissimi angustantur & obturantur, humorem transmittere nequeunt, hinc transpiratio insensibilis depravatur. Alvina excretio tardior est in senibus, quia intestina tono debiliore sunt instructa & quia lymphæ mucosa in intestinorum glandulis secernenda propter obstructos & induratos subtilissimos acinos glandulosos deficit, quæ lubricationi fecum aridarum inservit; hinc etiam excrementa duriora semper conspiciuntur. Ob chylum, autem & sanguinem impurum, ob tubulos & canaliculos minutissimos obstructos & angustatos cessat nutritio corporis; hinc habitus corporis exarescit, pinguedo absumitur, & corpus macie conficitur. Cum itaque coeuntibus vasculis minimis humorum appulsio abolita sit, cum pinguedine absumpta etiam cesset causa, quæ ipsam cutim in debita distensione contineat: hinc ipsa, ceu corpus elasticum sese contrahit, & sic in facie & habitu corporis rugæ producuntur. Somnus vero senum inquietus est, quia ob angustatos & obstructos tubulos ac porulos cerebri subtilissimos lymphæ illa tenuis, roscida, quæ cerebri & nervorum tubulis sese insinuans liquidi nervei influxum aliquo modo languidiorem efficit, & sic somnum producit, secerni, adeoque prædictis porulis sese insinuare nequit. Si vero propter humorum motum lentorem & impeditum sero crafiori, viscidiori, meatus, quos jam diximus, obstipantur, somnus est quidem nimius, & affectus soporosi velut æmulus, sed ob im-

Cur secre-
tiones &
excretio-
nes immi-
nuta &
depravata
sint.

peditam

peditam & paucam fluidi illius ætherei, elastici secretionem vires nullum percipiunt augmentum, cum præsertim ipsius etiam sanguinis massa impura & variis sordibus inquinata sit, & impuritas sanguinis virium lapsum semper producat.

§. XV.

Cur actiones, quæ animales dicuntur etiam in senibus deficient.

Cur actiones animales in senibus multum vacillent, id facili negotio, ex iis repetendum venit, quæ de vitalium & naturalium functionum defectu in causali pertractatione dicta sunt. Nam quod ad sensus attinet, ii requirunt membranarum & fibrillarum nervearum, quæ genuina sunt omnium sensationum sedes, debitam tensionem & expansionem, debitam etiam flexibilitatem & fluidi nervei, imo sanguinis subtilis, sufficientem influxum. Si vero prædictæ hæ membranæ, vel nimis relaxantur, vel nimis tenduntur, vel nimis condensantur & indurantur, sensatio quoque in priori & posteriori casu deperditur, quod etiam accidit, si liquidus nervei, vel sanguinis adæquati influxus sistitur, & prædictæ hæ partes sero mucido & lymphâ viscosa tenaci imbuuntur; in secundo vero casu, ubi scilicet partes nerveæ ultra naturalem tonum expanduntur & distenduntur, sensatio nimis aucta tristis & dolorifica producit. Ex his præmissis facili negotio cur in senibus sensus depraventur, apparet; fibrillulæ enim nerveæ & indurantur, & a tono deiciuntur, & sanguinis sinceri & liquidus subtilissimi influxu orbantur, & materia serosa tenaci obstruuntur, quod pro differentia subjectorum in iis sensus tollit. Nam ubicunque sensus depravati & imminui observantur, una causarum harum semper deprehendetur, quod ex individui cuiusque examine patebit. Motus autem voluntarius in senibus his de causis non est tam facilis & expeditus: dum vires ipsorum vacillant & imminutæ sunt, dum sanguis minus purus & spirituosus in venis alitur, dum ob angustatos & obstructos canales minutissimos & sanguinis & liquidus nervei appulsus intercipitur, dum musculorum fibrillulæ duriores & ad motum edendum ineptiores redduntur, & partes omnes debito tono orbantur, qui tonus partium musculosarum vitiosus & irregularis in causâ etiam est, cur membra tremore in multis corripiantur.

§. XVI.

Cur facultates animæ etiam in senibus vigore suo orbentur.

His pertractatis quæstio exsurgit, cur in senibus decrepitis postremo eveniat, ut actiones etiam illæ, quæ a mente, seu anima rationali in nobis producuntur alterationes subeant & immutentur, ac interdum plane aboleantur, de quo VIRGILIUS in *Eclogis* inquit: *Omnia fert ætas animum quoque*, & quod causam dedit vulgari proverbio: Senes bis pueri sunt. Jam vero fateor, difficilem videri ad factam hanc quæstionem responsionem cum omnium Philosophorum consensu nec spiritus in corpus, nec corpus vice versa in spiritum agere possit. Hinc alterato corpore, & per ætatis injuriam depravatis ipsius functionibus, ex nulla necessitate animæ functiones imminui quispiam asseret. Verum enim vero attendenda est lex illa &

harmonia, quæ ab omnipotenti Creatore in corpore humano stabilita est, dum corpori ad motus edendos artificiosissime constructo spiritum seu animam rationalem uniret, ut ex hisce nos expediamus difficultatibus. Hac lege sancitum est ut immutatis & depravatis corporis actionibus in ipso etiam spiritu turbæ ac anomalix exoriantur. Eadem lege fit, ut turbato & præter naturam affecto spiritu illico turbæ in corporis actionibus oboriantur. Hoc satis demonstratum dant animi pathemata vitæ & sanitati insensissima, illud maniaci, melancholici, vino madidi confirmant. Si vero omnia in corpore fiunt placide & moderate, verbo si corpus sanum est, animi etiam facultates vigent, & legitime exercentur. Contrarium evenit, si actiones corporis a naturali regula deflectunt. Quoniam itaque, quod in superioribus deductum fuit, in senibus circulus sanguinis per totum corpus est languidus & impeditus, non secus in cerebro etiam variis premitur difficultatibus; quoniam etiam impurus & minus spirituosus in ætate decrepita observatur; ad sanitatem vero tam animæ quam corporis circulus sanguinis liber & humores puri blandi requirantur: mirum non est, si in senibus circulus sanguinis propter obstructos tubulos cerebri subtilissimos sit impeditus, & si præterea adhuc sanguis impurus minus spirituosus animæ facultates impediat & imminuat. Cognovit id suo jam tempore HIPPOCRATES qui *Lib. de flatibus* §. 20. ait: *Opinor inter omnia, quæ in corpore sunt, nihil magis ad prudentiam conferre, quam sanguinem, qui ergo cum in constanti habitu persistit, consistit etiam prudentia; sanguine vero permutato concidit etiam prudentia.* Idem gravissimus Autor *Lib. I. de dieta* inquit: *Si sanum fuerit corpus, & non a morbis perturbetur, animæ quoque temperamentum sapiens existit.* Requiritur vero circulus sanguinis per cerebrum liber & moderatus, sanguis etiam blandus, temperatus, sed spirituosus, quoniam his præsentibus in corpore liquidum illud æthereæ naturæ subtilissimum sufficienti in copia secernitur, quod ad animi functiones legitime obeundas non minus, quam ad vitale negotium est necessarium.

§. XVII.

Vidimus jam incommoda senectutis, quæ ex ætatis vitio corpus variis modis affligunt, & alterant sine causæ ullius morbosæ & præternaturalis concursu; his vero incommodis quidam senum magis, alii minus laborant. Adeoque dubium forte quis movebit, quod non omnes senum istis, quæ ex senectutis vitio in corpus redundare diximus, afflictionibus sint obnoxii; hinc minus verum esse assertum, quod senectutem morbum esse pronunciat. Sed facilis est modus, quo huic objectioni obviam ire possumus. Id equidem ultro largior, non omnes eos, qui in senio constituti sunt, senectutis injuriis ab ipso statim puncto, quo L. annum confecerunt, expositos esse; verum multi valetudine satis fruuntur alacri, etsi LX. annum prætergressi fuerint. Ex superioribus autem repetendum censeo, quod senectutem §. 3. in duas distinctas periodos diviserimus, unde

Obiectio quadam refellitur.

de patebit etiam, quod prima seu viridis ætas minime his expofita fit injuriis; nam in ea conftituti viribus tam animi, quam corporis pollent adhuc; pofterior vero decrepita, quæ ad finem ufque vitæ numeratur, nunquam his, quæ recensuimus, carebit incommodis. Neque vero hic dubitamus, quin natura robusta & vegeta, accedente congruo in rebus non naturalibus ufu, fenectutis has afflictiones per aliquod tempus a corpore remove re poffit, id quod in tertio Tractationis membro, ubi de præfervatione harum afflictionum agetur, apparebit.

§. XVIII.

Transitus
ad alteram
tractationis
partem.

Cur mor-
bos senum
specialim
pertra-
ctem.

His jam abfolutis tranfeundum eft ad alteram Differtationis noftræ partem, in qua confideraturi fumus eas afflictiones, quæ inter morbos senum a Medicis referuntur, & præter ea, quæ pertractavimus incommoda, fenilem ætatem sæpe graviter divexant. Antequam vero pathologicam pertractationem afflictionum morbofarum, quæ senibus propriæ funt, & ex corporis functionibus per ætatem vitiatas in senes redundant, aggrediar, e re fore arbitror, ut oftendam, cur morbos specialim pertractaverim, & ab afflictionibus, quas ætas corpori infert, separaverim. Nam & hæ afflictiones tres motuum species, quæ in omni funt homine alterant & turbant, & in quibusdam etiam fubjectis nonnunquam motuum horum exercitium valde impeditum efficiunt, & etiam ex ætatis vitio homines affligunt. Verum his inductus fum rationibus, ut morbos senum feorsim pertractarem quæ hic fequuntur: Illa, quæ fupra tradidi, incommoda, in nulla alia ætate, quam in fenili reperiuntur, præfertim ita, uti fenectutem infeftant, unita, vel fi in illis accidunt quædam, inter morbos incongruos referuntur, fenii vero ordinarii funt comites; deinde poteft præfervari fenectus a morbis senum ita dictis, ne per totum vitæ fpatium ipsis corripatur; nulla vero arte pathemata fupra tradita ab ætate decrepita, ne unquam ipfam invadant, poffunt abarceri; multi denique senum diem fuum obeunt, antequam ulla morborum horum specie laboraverint, fecus fe res habet cum afflictionibus ex ætatis vitio ætati provectæ propriis. Quod vero etiam hi morbi ex ætatis injuria corpori ingenerentur, largior quidem in tantum, quatenus ætas causam mediatam conftituit, dum fcilicet corpori talis difpofitio ingeneratur, quæ concurrentibus aliis etiam circumstantiis, morbos hos producere poteft; minime vero ætas caufa per fe eft, quo hi morbi fenilia corpora impetant.

§. XIX.

Causæ
morbo-
rum gene-
rales præ-
mittuntur
specialim
Plethora.

Ad fpecialem jam morborum pertractationem ubi tranfeundum eft, moneamus, nos de iis morbis etiam acturos, qui fenectuti viridi funt infefti, & de istis, qui decrepitam invadunt. Ubi autem id acturi fumus, vifum eft inquirere primo loco an causæ morborum generales in senibus deprehendantur; nam hoc comperto facili negotio reliquorum morborum genesis venit deducenda. Duæ potiffimum causæ morborum generales a Me-

dicis ftatuuntur, quarum altera Plethora, altera Cacochymia appellatur. Plethora dicitur ea fanguinis abundantia quæ major eft, quam ut a vasis fufficienter regi & circumagi poffit. Hæc in corpore fenili variis de caufis producit. Non omnes enim senum funt, quorum appetitus eft dejectus, verum quidam fatis adhuc appetunt. Ubi itaque cibos nutrientes, copiofa gelatina præditos ingerunt, ubi potibus quoque nutrientibus utuntur, ubi motu voluntario corpus non fatis exercetur, qui utile valde eft auxilium ad humores abundantes confumendos, ubi excretiones tam peripherica, quam fanguinis etiam confuetæ, imminuuntur, nec fanguis per venam educitur facili negotio plethora his confpirantibus caufis in senibus producit, quæ variis morbofis afflictionibus causam fubminiftrat.

§. XX.

Ex plethora itaque in fenili corpore deprehenfa quænam morborum species confequantur, videbimus. Membra primum gravitate & lassitudine premuntur, quæ provenit a fanguine nimio elateri folidorum renitente & adæquatam eorum contractionem impediende. Fit ex hoc, ut multis in locis fanguis ftagnet, quod præfertim fit in iis, ubi fanguis ordinario tardius movetur, qualia funt in abdomine potiffimum & fpecialim in vasis, quæ ad venam portæ fanguinem revehunt. Nullibi vero facilius id contingit, quam in his, quæ fanguinem ab intestinis præfertim colo & recto per venam portæ ad hepar revehunt. Nam vafa hæc venofa perpendiculararem legunt ferme viam, dum fanguinem trunco, a quo nafcuntur, infundunt, & defunt adminicula, de quibus aliis venis natura profpexit. Si itaque circuitus fanguinis per hepar eft impeditior, ut vena portæ fanguine fe promte exonerare non poffit, ftagnat facillime in vena, quæ ex inferiori abdominis & intestinorum regione adductum cruorem ad truncum fuum vehit, & in ea, quæ ex liene receptum fanguinem in hepar ducit. Quodfi vero in priori cafu fanguis in vena fubfiftat quafi, & ftagnet: tum impedit, quo minus ex arteriis accedens in venam concedere poffit, & cum a tergo arteriæ fanguinem adducere non definant, fit vaforum diftenfio & dilaceratio, quam denique cruoris finceris fluxus confequitur, qui contingit in intestino recto & hæmorrhoidalis nominatur. Hic autem in senibus ideo potiffimum ut plurimum contingit, quoniam difficilius fere fanguis per viscera movetur, & quia motui voluntario parcent, quo magis adhuc fanguinis iter per viscera impeditur. Quamdiu autem hic dictus fluxus hæmorrhoidalis legitime fit, infigne eft naturæ bene valentis opus, ceu a SOLENANDRO Conf. 20. Sect. 4. tanquam falutare naturæ opus extollitur de quo JULIUS CÆSAR CLAUDINUS Confil. 20. afferit, quod hæmorrhoides fluentes funt auxilium pro longa fanitate, & a multis morbis præfervent, nam corpus fanguine nimio deplet, & plus quam V. S. in difpofitis proficit, dum fanguinem e loco, ubi morbos parare poffet, proxime educit. Sed periculofus eft hospes, & latet omnino anguis in herba. Si enim fubfiftit,

Qui mor-
bi ex ple-
thora ori-
undi fe-
nes dive-
xent.

Hæmor-
rhoidum
genesis.

Suppressæ
hæmor-
rhoides
quid cau-
sentur.

trucu-

truculentos spasmos, stagnationes, infarctus viscerum, intestini recti exulcerationes, colicam convulsivam, quæ hæmorrhoidalis dicitur, producit, vel mictum cruentum generat, quod levissime & sæpissime in senibus contingit, quorum hæmorrhoides anomalis motibus sunt obnoxii, uti morbi ex hæmorrhoidum anomaliis fufius ab Excell. Dn. ALBERTI sunt recensiti, qui hoc negotium in *Tract. de Hæmorrh.* pertractavit, & multis observationibus ex Autoribus tam antiquioribus, quam recentioribus collectis comprobavit.

§. XXI.

Quomodo
Cacochy-
mia in se-
nibus ge-
neretur.

Plethoram & morbos, qui ex ea corpus adoriuntur, breviter vidimus, nunc opus est, ut cacochymiae productionem consideremus. Hujus origo derivatur potissimum ex tribus causis: si vel viscera, per quæ speciatim hic hepar & lienem intelligo, in functionibus suis langueant, & sanguine crasso copioso infarcta sunt, vel quod adhuc pejus plane indurata, scirrhusa; vel si digestionis vitium variis mucidis sordibus chylum inquinat; vel si secretiones utilium ab inutilibus, & horum excretiones languent. At vero in senili corpore secretiones cum excretionibus impeditas & digestionem vitiosam esse, supra tradidimus; in senili corpore circulum sanguinis per viscera & abdomen ordinario languere, & attenta observatio, & sana ratio abunde docet, quin ipsa nimia sanguinis in corpore copia cacochymiae causa sæpe fit. Non vero solum in vasis vitiosos humores alunt senes, verum in prima etiam regione, quæ ciborum solutioni & digestioni dicata est, variæ sordes mucidæ, biliosæ, acidæ stabulantur, quæ omnes, ex eo quod digestio in senibus est impedita & difficilis, in corpore generantur.

§. XXII.

Morbi ex
cacochy-
mia oriundi.

His vero de causis, quod impuri humores in venis & prima regione stabulantur, varii senum morbi resultant. Quodsi enim vitiatas sic humoribus & impuritatibus salino-biliosis & tartareis inquinatis accedat ulterior perspirationis suppressio, quod variis de causis contingere solet, & facillime si sola aura frigidiuscula ad corpus admittatur; tum subito serosæ defluxiones partes infestant, & rheumatismorum parata est genesis; huic enim causæ natales debent coryzæ, gravedines, odontalgia quoque sæpius, imo non raro tussis, raucescences & catarrhi. Si in articulo- rum partes nerveas & sensibiles vitiosum impurum serum delabatur, articulo- rum dolores oriuntur; si vero ad ductus urinarios, renes & vesicam feri tartarei impuri secessio fiat, varii producuntur spasmi; si enim urethram & sphincterem, immo ipsius vesicæ membranas valde sensibiles, salinæ acres hæ partes lace- sent, oriuntur inanes sed dolorifici ad mingendum stimuli, stranguriæ, imo vesicæ sæpe ar- rosiones, quod ex moleculis urinæ instar fur- furis innatantibus comparet. Si vero materia tartarea crassior, cum mucidis partibus in ve- sica combinetur, excluditur calculus. Quando autem perspiratione impedita salini acres hu- mores in corpore accumulati ad intestinorum devolvuntur compagem, & in ipsis inte-

stinis continentur impuritates & inquina- menta varia, tum spasmodicæ intestinorum affectiones, diarrhœæ, lienteria & passionis coeliacæ proveniunt. Huic impuritati sangui- nis insigni debentur etiam pruritus cutis, exul- cerationes & difficiles partium læsarum con- solidationes. In oculis vitiosi acres humores produciunt lippitudines & graves alios ocu- lorum morbos. Hos morbos totidem fere verbis recenset HIPPOCRATES *aph. 31. Sect. III.* Senibus autem inquit talia contingunt: *Spirandi difficultates, & defluxiones cum tussi, urinæ stillicidia, urinæ difficultates, articulo- rum dolores, nephritides, vertigines, sidera- tiones, mali habitus, pruritus totius corporis, vigilia, alvi, oculorum & narium humidita- tes, visus hebetudines, glaucescences, auditus gravitates.* Et CELSUS *Lib. II. Cap. I.* ita habet. *In senectute spiritus & urinæ difficul- tas, gravedo, articulo- rum & renum dolores, nervorum resolutiones, malus corporis habitus cachexiam græce appellant, nocturnæ vigilia, vitia longiora aurium, præcipueque soluta al- vus, & quæ sequuntur hæc, tormina, vel levitas intestinorum, ceteraque fusi ventris mala.*

§. XXIII.

Si vero incrementibus ulterius successu tem- poris sanguinis impuritatibus & coeuntibus vasculis minimis vires deficiunt, imo plane prosternuntur, dum causæ a quibus fiunt evertuntur, sanguinis motus qui antea fuerat tardus & impeditus jam evadit debilis & lan- guidus. Et quia ad habitum corporis non satis propelli potest, ad vasa majora & no- biliora fertur, propulsus vero ex his nullibi difficilius, quam per abdominis viscera mo- vetur, in quibus etiam tandem plane stagnat & in liene ut plurimum subsistens impedit, quo minus is, quem vasa brevia ex ventri- culo recipiunt, ad lienem ferri possit; dum vero in ventriculi tunicis impactus manet san- guis, ab it in sphacelofam corruptionem, in liene vero pariter producit putredinem, hinc fit, ut, si senio confectos post mortem in- tueamur, lien ita corruptus sit, ut digitis di- rimi & perforari possit. Hæc est causa mor- tis reperiunda in omnibus, qui ob provectam valde ætatem moriuntur, & mortis venturæ nuncius est appetitus & virium plenarius lap- sus. Si vero viscera ante minus salva in se- nibus in corruptionem ulcerosam fatiscant, exoritur febris hectica, quæ hac in ætate aliud nomen accipit, & marasmus senilis appel- latur.

Mors ex
ætatis vi-
tio gene-
ratio.

& maras-
mi.

§. XXIV.

Cum autem tractatio nostra Medica sit: non sufficit nosse tantummodo afflictiones, quæ senibus ex natura corporis mutata, & per senium alterata sunt infestæ; non suffi- cit etiam nosse morbos, qui ex hac dispo- sitione in corpus irruunt; verum opus est ut medice tractaturi medicam subjungamus con- siderationem. Et quia curam uniuscujus- que affectus, de quibus hic sermonem insti- tuimus, tradere est opus, quod Dissertatio- nis limites longe excedit: satisfacturum me titulo tractationi huic præfixo reor, si ex fon- te diætetico consilia & auxilia depromam, quæ

An possit
senectus
ab ægri-
tudinibus
præserva-
ri.

quæ omnes senum afflictiones abigere per aliquod tempus possunt, & a morte, si non præservant, præservant tamen a tempeſtiva & immatura. Sed putabit quispiam frustra hæc ad vitam incolumem magis & longiorem tradi adminicula, cum secundum TRALLIANI effatum, quod *Lib. XII. de marasmo* habet. *Senium nulla medicina tolli possit*, quam in rem erudite Cel. VERULAMIUS loco supra citato ita differit: *Hæc intestina illa calamitas, quam nulla ars, nulla humana industria effugere, imo ne reprimere quidem possit. Etenim si cui ab ortu temperato vel ipse Aesculapius præsit, qui illum ab iis, quæ foris sunt, aut quæ intro sumuntur, saluum & incolumem sic tueatur, ut nullum corpus inde detrimentum capiat, is tamen a semet ipso, suaque sponte magis conficietur, consumeturque donec extremum vitæ spiritum edat.* Verum enimvero dictitat id sana ratio, & attenta indies confirmat experientia, quod ii, qui naturam nacti sunt robustam nec violento velut modo per varios in rebus non naturalibus excessus eas prostraverunt, diutius vivant præ iis, qui corpore sunt valde debiles; eadem docet experientia debili etiam constitutione præditos, si diæteticis præceptis obtemperent, diutius vivere, quam si robusti quidem fuerint, sed nimium viribus fidendo, per abusus in diætâ victusque regimine insignes, corpus debile reddiderint. Rationi quam optime consentaneum est, in tempore remotis impedimentis sanitatem ulterius conservari posse, quam si nihil sit, quod morborum generationem impediat, nec novum forte in medicina dogma est, quod præcipit, ut defectus naturæ ars suppleat. Ex his itaque præmissis concludimus non inutile opus suscepturos nos esse, si remedia pro senectute incolumi ducenda & morbis a corpore protelandis suppeditemus.

§. XXV.

Si itaque in artis potestate situm est, ut præservet corpus per aliquod tempus a senectutis incommodis, & a morbis, qui ex senum dispositione ipsis insultant: videndum merito est, quibus auxiliis impetrare id possimus. Naturæ humanæ sapientissimus artifex nobis quid sequendum sit præscripsit, dum machinam nostram ita coordinavit, ut circulus sanguinis præservet corpus ab omnibus ægitudinibus, & in sanitate, si liber & æqualis per totum corpus fuerit, conservet. Ex hoc itaque fonte depromemus omnia consilia & auxilia, quæ in præsentiarum præscribentur. Primum quippe præceptum diæteticum nostrum erit, ut circulum sanguinis per totum corpus liberum & æquabilem præstemus; alterum quod ex hoc legitime constituto necessario consequitur, est secretionum & excretionum incolumitas; tertium est novorum humorum sed congruorum in corpore generatio.

§. XXVI.

Qua ratione motus sanguinis circularis per corpus universum salvus & incolumis sit con-
Frid. Hoffmanni Oper. Supplem. II.

servandus, res est dictu facillima, sed ubi præstandum est & in corpore sanguinis iter liberum & æquabile reddendum, pluribus obruta difficultatibus. Manet quippe sanguis in legitimo & naturali suo motu, si solidorum motus est moderatus & temperatus; si vascula & ductuli minimi sunt aperti, ut humorem appulsum recipere possint; si solidorum robur est par movendo sanguini, & si humores adæquatam habent consistentiam, spirituascentiam & si copia nec excedunt, nec deficiunt. Si viget circulus sanguinis, valent etiam omnes functiones in corpore, ergo & se- ac excretiones. Si autem tam circuitus sanguinis, quam se- & excretiones per totum corpus legitime fiunt; necessario humores consumuntur, & alienam indolem induunt; quare necesse est, ut ad sanitatem & vitam conservandam novi humores corpori ingenerentur blandi ac temperati, & partibus spirituosius sufficienter instructi. Non meliori igitur viâ procedere me posse arbitror, quam, ut tritam illam sex rerum non-naturalium classem pertractando, quid ex his senibus proſit, vel noceat, ostendam. Si enim harum observatio fit accurata, tria supra tradita sanitatis conservandæ fundamenta vigent, & corpus in sano statu conservant.

In diætâ
senum or-
dinanda
sex res n.
n. pertra-
ctantur.

§. XXVII.

Hoc ordine acturis primo loco sese offert *Aër*. Est iste vitæ illud pabulum, quo intercepto tollitur respiratio, & vita cessat. Non sufficit vero tantum, ut senes aëre libero gaudeant, verum, cum ipse aër variis mutationibus sit obnoxius, quas illico in corpus nostrum transfert, e re est videre, quinam aër pro senum sanitate sit potissimum commendandus. Aër purus, serenus, temperatus est insigne ad incolumitatem, imo ad longævitatē, auxilium; quamobrem in senibus etiam hauriendus est. Nam aër, qui multis impuris exhalationibus inquinatus est, promtam morborum causam suppeditat. Testantur de aeris salubritate loca montosa, elatio-
ra, in quibus aër purior & serenior, temperatus tamen hauritur, horum incolæ multo vegetiores & alacriores observantur, quam ubi paludes & stagna reperiuntur. Eligendus etiam est aër temperatus, nec nimis frigidus, neque vero excessive calidus; nam ille impeditam transpirationem magis adhuc sufflammat; hic vero nimias ebullitiones in sanguine excitat, viribusque est inimicus. Moderate autem calidus pororum apertioni, & perspirationis successui multum velificatur. Hac de causa CELSUS *Lib. II. Cap. I. Senes æstate optime valere, & quod hyems ipsis inimicior sit* pronunciat, quoniam in illa excretio cuticularis promovetur, in hac supprimitur. Conclavia etiam habitanda senibus aere sereno & temperato, quoad fieri potest, sint referta, & contra aeris vicissitudines corpus probe vestimentis contegendum. Inimicus vero omnibus ætatibus, sed præsertim senili, est impurus, tetrus, vappidus exhalationibus inquinatus aër, nimis frigidus, vel æstuolus, nebulosus, pluviosus, inimicæ etiam subitæ aeris mutationes.

Qualis aër
senibus
conducatur.

quinocet.

§. XXVIII.

Hh

Tres regulae,
quæ
corpus sa-
num con-
servant.

§. XXVIII.

Quæ circa
cibum te-
nenda sint.

De cibo & potu hæc tenenda sunt. Alimenta semper exigunt exquisitam ad vires stomachi, imo totius corporis, relationem tam ratione copiae, quam substantiæ. Cum igitur in senectute viridi constituti satis adhuc vitibus valeant, tum non opus habent, ut tam stricte legibus diæticis hoc in genere se adstringant; suadenda tamen magis est mediocritas. Senes vero decrepiti, naturæ debilioris, accuratori diætæ ratione utantur oportet. In genere autem cibi mollioris & ad solvendum aptioris substantiæ sunt præferendi durioribus, viscidioribus, compactioribus. Consulimus itaque ex animantibus junioribus depromptas carnes, juscula, gelatinas, item ova sed forbilia, ex lacte parata juscula, sed ne adsit acidum in ventriculo copiosum. Ex fluviatilibus pisces, quorum carnes sunt duriores, nec in mucosam pul-tem desciscunt, & qui in fluviis, non vero stagnis vivunt, cancos etiam fluviatiles, sed ne ventriculus nimium sit debilis & impuritatibus obsessus suademus. Ex vegetabilibus conducunt; quæ oleum subtile in se recon- dunt, qualia sunt semina, sed remotis, quæ una cum oleo multum viscosi crassioris prin- cipii in se continent. Ex oleribus & fructi- bus, quæ facile coctioni obtemperant & vim lenem medicam habent, laudantur, sunt ta- lia; herba & radix petroselini, siferis, na- sturtii species, acetosa, passulæ, pruna &c. Carnes vero infumatae & salitæ non nimis sunt reformidandæ, si ventriculus adhuc of- ficio suo fungitur, & si assuetum iis sit sub- jectum, sed non peccent copia, nec fre- quentius ingerantur. Generalis enim est re- gula, & senibus quam maxime observanda quam ex CELSO didicimus: *Lib. I. Cap. II. ubi ad cibum ventum est, nunquam utilis est nimia satietas.* In assumptione etiam ali- mentorum hic ordo tenendus est, quod in prandio durioris substantiæ alimenta, major etiam portio ingeri possit; in cœna autem juscula & mollioris substantiæ par- ciori in copia; sic ventriculo & digestionem magis consulitur, sic somnus etiam est placidior. Ab his autem alimentis senes ab- stineant, quæ multas in primis viis relin- quunt cruditates, quæ ægrius solvuntur, & ventriculum gravant, quæ in flatus facile ex- plicantur, quæ facile fermentant, & alvi ob- structionem promte inducunt. Sunt talia: carnes induratae, pisces præsertim marini ex- ficcati; farinacea, pisa, lentesc, fabæ, legu- mina crassiora; mellita, sacharata, fructus horraei, melones, cucumeres; fructus ad- stringentes, mala cydonia, & cætera ex ve- getabilium familia austero vel acerbo sapore prædita. Aromata vero & quæ cum alimen- tis misceri solent ad ventriculum roboran- dum & stimulandum, ut sunt, zedoaria, radix armoraciæ, porrorum & allii species in convenienti proportionem, nec nimis fre- quenter assumpta, usum habent insignissi- mum.

§. XXIX.

Inter potulenta ea sunt saluberrima, quæ puriora sunt & leviora. Laudem itaque præ omnibus meretur aqua simplex, sed pura, levis, & subtilis. Nam præbet menstruum subtilissimum, quod poros ciborum penetrat, ac intine recludit, & chyli boni generationi valde velificatur. Est præterea potus, qui cum omnibus alimentis sumi potest, ac sem- per innoxius; nec solum diæteticè usurpari potest, verum medicinam etiam præbet val- de efficacem, ubi obstructi canales expedien- di sunt, & fluiditas sanguini concilianda, quod pro more suo solide evictum dedit Il- lustris ac Cel. Dn. FR. HOFFMANNUS in Dissertat. de aqua medicina universalis. Si vero ventriculi debilitati consulendum, egre- gie juvat eam cum vini adulti, generosi par- te dimidia, vel tertia miscere atque sic in usum ducere. Ex cerevisiis subtiliores eli- gimus, rejectis valde lupulatis, crassis & ni- mis pinguibus, item quæ flatulentias causan- tur. Vinum vero lac senum dictum ita usur- pandum, ut vires erigat, non autem in tan- ta copia, ut eas prosterneat. Præstat medi- camenti loco eo uti, in moderata proportio- ne, ita enim chylo spirituacescentiam inge- nerat, ventriculum firmat, & circulationem sanguinis promovet. Eligenda autem sunt ea, quæ magis sunt adulta, generosa, pura & spirituosæ; rejicimus ignobiliora, recen- tia, quæ acida sunt, & multum terræ cal- careæ in sinu recondunt. Quod ad potus reliquos spirituosos & spiritus arduos atti- net, eorum usum plane improbamus, nisi in vini defectu, quando cibi duriores, com- pactiores ventriculum gravant, ad digestio- nem facilitandam, sed ingestio prius potu te- nuis sufficienti assumantur; nam viscerum indurationes & infarctus producant. Potus Théë & Coffée in se non nocent, imo, quod priorem præsertim attinet prodest, saltem ca- vendum ne nimium sint saturati, nec sachar- o nimium edulcorati. Succolada autem cum lacte cocta plus nocet, quam prodest; cum aqua vero cocta additis congruis aromatibus magis prodest, cum vino frustra coquitur, nam sub coctione partes spirituosæ avolant, præstat igitur post coctionem cum aqua tantil- lum vini generosi addere.

§. XXX.

Tertio loco circa motum & quietem pauca præscribenda sunt. Motus nimis nocet, nocet etiam quies nimia; quare moderamen hic quam maxime suademus: Ea autem mo- tus species eligenda est, quæ corpori pro sui constitutione maxime est conveniens, ut debilibus debiliorem, valentioribus autem fortiorem motum præcipiamus: Ex omni- bus speciebus vecturam & equitationem, utpote sub qua sanguini iter facilius per par- tes abdominis conciliatur. Deambulatio etiam in plano ad moderatam usque diapnoen in- stituta multum prodest; neque minus lectio vel locutio voce altiori facta juvat, quam HIPPOCRATES a cœna si instituatur, multum laudat in *Lib. III. de diætâ* inquiens: *vocis exercitatio a cœna valde commoda est.* De omnibus

Quid cir-
ca potulen-
ta obser-
vandum.

Motus &
quietis
considera-
tio.

omnibus motuum speciebus tenendum, quod sub aere sereno & temperato sint instituentia, & digestionem absoluta ac ventriculo vacuo. Multum etiam juvat post motum absolutum infusum calidum forbillare, sic enim perspiratio augetur, sanguis magis diluitur; unde e re erit ex herbis diaphoreticis & resolventibus cum roborantibus junctis ea concinnare, v. gr. herbis veronicae, betonicae, melissae, corticibus citri, aurantiorum. Ubi vero virium debilitas motum non permittit, insignis utilitatis sunt frictiones cum pannis calidis institutae, praesertim in conclavi temperate calido; hoc pacto enim intenditur motus sanguinis & excretioni cuticulari consulitur.

§. XXXI.

Circa somnum & vigilias quae tenenda sint, expono.

Somni & vigiliarum ratio habenda est ita, ut hoc in passu quoque mediocritas observetur. In somno modus tenendus est iste, ut nec nimius sit, nec nimis brevis. Non vero certo horarum spatio hic senes alligamus, verum tamdiu dormiendum ipsis esse censemus, donec nulla in somnum ulterior sit propensio. Et si corpus post somnum levius sit factum, viresque recollectae, finiendus est; si vero adhuc caput torpet, & membra gravia sunt, plus somno indulgendum censemus, id saltem monemus, ne nimius sit, nam sic etiam capiti temulentia, & membris gravativus sensus inducitur. Deinde, quoad fieri potest, jubemus, ut somnus capiatur in conclavi satis spatioso & aere puro imbuto, & corpus stragulis bene muniatur; sic enim salutaris saepe fit diapnoe, quae post absolutum somnum non est intercipienda; verum infuso calido promovenda, & corpus in lecto detinendum, usque dum mador remiserit. Somnus meridianus utilis etiam est, praesertim si is de nocte fuerit interruptus, & corpus agilius reddat. Vigiliae praeepto novo opus non habent; nam ingruente somno finiendas censemus; nec in longius tempus protrahendae sunt, damnum enim in corpus inferunt.

§. XXXII.

Excretiones quomodo curandae, & quae retentionum sit conditio.

Excreta autem & retenta ita se habeant, ut illa his sint aequalia. Retenta vero sint blanda, dulcia, & temperata, verbo, naturali crasi praedita. Excretionum autem praepriis tres species sunt custodiendae; ea, quae per cutim, alvum, & urinam fit. Illa, si corpus ab aurae frigidioris accessu muniatur, viget; per motum vero convenientem, infusa calida, & saepe sub somno corpore probe tecto intenditur; ista sub intestinorum robore salvo, ciborum congruorum ingestione, & sufficienti potu legitime se habet; per cibos vero lenientes, stimulantibus leniter etiam excitatur; haec motu & potu sufficienti etiam salva est. Praepriis vero alvina officii sui solet oblivisci, quod morbi venturi est indicium; quare laborandum est, ut ea quanto citius in ordinem redigatur, per juscula pingua, gelatinosa, prunata, & passulata. Nam curandum est semper, ut semel minimum intra diei spatium alvus officio suo fungatur. Reliquae excretiones, quae periodice fieri solent, & praepriis sanguineae etiam custodiendae, & praesertim circa id tempus, quo

Frid. Hoffmanni Oper. Supplem. II.

fieri consueverunt, accurata in victus vitaeque regimine tenenda est diæta, & si segnius fluant, moderate sunt excitandae. Si vero demum cessent, sed nimia in venis alatur sanguinis copia: artificialis excretio per Venae sectionem in talo tentanda, quod in iis etiam jubeo, qui spontaneas sanguinis evacuationes non habent; sed circa consuetum tempus reiterandae sunt, nisi virium imminuat defectus. In quibus certis temporibus coryzae, sudores, diarrhoeae fieri solent, iis etiam accuratum regimen praecipio in sex rebus non-naturalibus, neque vero haec excretionibus supprimendae sunt; verum potius fludendum, ut quod ad diarrhoeas, coryzas attinet, ea purgato corpore avertantur.

§. XXXIII.

Ad vitam incolumem ducendam multum valent animi tranquillitas & quies; quantum enim motus corporis valetudini inservit, tantum animi quies sanitati etiam conducit. Studendum itaque ut animus sit pacificus, laetus, decora voluptate perfusus & in quiete compositus. Contra omnes immoderati animi affectus sanitatem violento velut modo convellunt; sunt ex horum censu moeror diuturnus & angor; terror, ira, invidia &c. Imprimis vero senibus autor sum, ut a venere sibi caveant; nam vires hoc pacto prosteruntur & mors, quae diu protelari adhuc potuisset, subito acceleratur.

Animi quies conservat, motus destruit sanitatem.

§. XXXIV.

Ex medicamentorum penu pro senum valetudine tuenda & conservanda haec laudo, quae digestionem succurrunt; excretionibus promovere; obstructions reserant; sanguinem depurant, nimium imminuunt; & in decrepitis vires custodiunt. Ad digestionem juvandam nec non chylum depurandum & spirituosos paribus imbuendum praee omnibus laudem merentur amara cum aromatibus ventriculo amicis nupta. Instar omnium esse potest Elixir stomachicum Illustr. & laude mea majoris Dn. FR. HOFFMANNI, vel ad ejus exemplar compositum cum menstruo vero alcalino potius, quam spirituofo extractum, ex Extractis centaureae minoris, Corticis cascarillae, pimpinellae albae; calamo aromatico, radice arianae unc. j. cardamomo, cinnamomo, cortice aurantiorum recenter inciso ana drachm. vj. croco orientali drachm. iij. Extrahe lege artis: multo praestantiores vires acquirit, si cum spiritu salis dulcis nuptum propinetur. Excretionibus promovere & speciatim transpirationem, infusa herbarum calida, quale est quod §. XXX. laudavimus; vel quod acui etiam cum cinnamomi, cardui benedicti & scordii parte potest, neque pro pectoris impuritatibus falsis emolliendis & involvendis inutile erit radicem glycyrrhizae & anisum stellatum addere. Ea vero quae per urinam & alvum fit excretio, optime aquis mineralibus temperatis, intenditur, quales sunt Selteranae, imo si vires adsunt, Carolinae etiam; praeter virtutem enim alvum & urinam moventem, obstructions reserant, corpus depurant, & digestionem etiam juvant, si scilicet sub debito regimine usurpentur.

Ex medicamentis haec senibus proficiunt.

Salubriorem virtutem acquirunt hi fontes, si cum sero lactis dulci, vel insignius cum lacte asinino miscentur; non tamen laude sua, defraudamus pilulæ balsamicæ, infusa man- nata cum rhabarbaro &c. Sanguinis quan- titatem optime V. S. prudenter instituta im- minuit; quod divinum est pro vita prolon- ganda remedium, sed cautione opus est. Vi- res labascentes erigit Balsamus vitæ Illustr. FR. HOFFMANNI saccharo si instillentur ali- quot guttæ, vel etiam in Elæosaccharum redi- gantur, aut liquor analepticus, quem pro senibus compositum exhibet Illustris & Ce- leberrimus Dn. FR. HOFFMANNUS in Diff. de valetudine senum tuenda. Sed non pau- ci sunt, qui usum aquarum mineralium con- temnunt, & multi lactis asinini usum deri- dent. Verum ut iis obviam eamus brevibus affirmo, quod vel in dictorum remediorum principia non inquisiverint; vel experientia, quid præstantissima hæc simplicia possint, destituti sint. Quantum autem ad aquarum medicinalium usum attinet, de iis longe mi- nor jam est controversia, & lites ferme ob- mutuerunt, ex quo Celeberrimus Dn. FR. HOFFMANNUS per diversa cum dictis his fon- tibus instituta experimenta a priori docuit, quam salutaria contineant principia, qualia in nullo summa etiam arte composito medi- camento pharmaceutico sunt unita, ad humo- res diluendos, depurandos, obstructions & infarctus expediendos, excretiones facilitan- das, partes roborandas; & ex quo frequen- tissima praxis & felix confirmavit cum sum- mo plurimorum ægrotantium levamine, dum congruo & prudenti aquarum harum usu contumaces & rebelles chronici morbi sunt expugnati, quam divinum in his fontibus tam calidis & frigidis lateat auxilium. Quod ad lactis asinini usum attinet, illius etiam in- gredientia saluberrima Idem Clariss. Autor in *Dissertatione de mirabili lactis asinini in medendo usu* pro more suo erudite exposuit, & quantum humoribus acribus, falsis depu- randis convenient, & ad vires erigendas de- monstravit. Si ab experientia petatur testi- monium, instar omnium esse poterit insignis locus, quem sæpe laudatus Vir in *System. Med. Tom. III. Sect. II. Cap. VIII. de Specif. §. XXIV.* recenset ex PATINI Epist. Tom. II. neque desunt observationes satis celebres & insignes de mira ad sanitatem tuendam & morbos curandos lactis hujus ef- ficacia. Neque vero credendum est, ac si dicta hæc remedia absolutam habeant vim & potentiam sanitatem conservandi vel restituendi; discrimine enim opus est, & attendenda corporis constitutio, & viscerum conditio,

temporis etiam habenda est ratio, & præpa- randum corpus ad horum usum, si salutaris expectandus sit finis. Quodsi enim in cor- pore viscera jam sint corrupta, vires feren- dis aquis impares, & stomachus nimium ener- vatus, plus detrimenti accipitur ex horum usu, tantum abest, ut salutaris attendatur eventus. Sed nemo hinc culpam in dicta hæc auxilia conjiciet, cum corporis conditio, & minus accurata indicationum dijudicatio hunc errorem pepererint.

§. XXXV.

Cum autem in superiori §. mentionem inje- cerimus medicamentorum quorundam, quæ vi- ribus labascentibus sint auxilio, atque eas sus- tentent, non possumus non monere, ne eorum usus sit frequens nimis ac reiteratus; neque e- tiam largus; verum ita hoc medicamento uten- dum, ne æstum nimium augendo vires depau- peretur potius, quam augeat. Idem de omnibus aliis confortantibus, & cordialibus tenendum. Hic vero taxandum etiam non immerito quo- rundam pessimum morem censeo, quibus præ- fertim si ætate adultiores fuerint, in usu est, ut superingerant semper absoluto cibo potum aquæ cujusdam ita dictæ vitæ, qua roborari stomachum, & vires incrementum persuasum ha- bent. Nonnullis vero placet jejuno ventri- culo eas haurire pessimo etiam ausu. Nam cum per digestionem succus lactiformis ex ali- mentis sit extrahendus, qui etiam cum lacte maxime convenit; omne autem lac affuso spiritu vini, ex quo prædictæ aquæ paran- tur, in coagulum abeat; hinc judicatu fa- cile est, quam noxius ad sanitatem sit hic potus. Quare non possum non ab ejus usu frequenti & repetito dehortari, nisi forte sub ea, quam superius tradidimus, conditione. Non enim opus his auxiliis habet, qui rerum non-naturalium usum ita, ut præscriptum est, dirigit, atque a nimis lucubrationibus, mentis fatigationibus & sollicitudine sibi ca- vet.

§. XXXVI.

Dicta hæc consilia & auxilia insigni gau- dent virtute ad sanitatem conservandam & vitam prolongandam. Sed opus est, ut in tempore iis utamur, nec in annis valentiori- bus senectutis præsidia consumi debent, ne- que vero tamdiu ab horum usu desistendum, usque dum dicta in corpore se sistant incom- moda; nam præservationem non curam pro- mittimus. Hæc qui attente considerabit, is efficiet, quo in longam annorum seriem vitæ suæ protrahatur.

*Monitum
quoddam
necessa-
rium.*

DISSERTATIO MEDICA

D E

ATHLETIS VETERUM,
EORUM DIÆTA ET HABITU.*Primum edita Anno 1717.*

P R O O E M I U M.



OGITANTI mihi quid ex latissime patente rerum naturalium & medicarum suppellectile inprimis expoliendum elaborandumque eligerem, quo & ipse inquirendo mihi prodessem & lectori meo aliquem utilitatis aut honestæ delectationis fructum adferrem: visum fuit ea potissimum excutere & in ordinem aliquem redigere, quæ, in optimorum scriptorum monumentis dispersa, passim notaveram de gymnastica antiquorum vita, diæta & corporum athleticorum singulari habitu. Quum enim studii qualiscunque nostri, quod in bonas litteras, inde ab aliquot annis, posuimus, id quasi fatum fuerit, ut potius per longos errores &, ut spero, non pœnitendos, quam rectissima via, ad illum portum per-tigerimus, quem nunc invehi videmur: pridemque conceptum salutaris artis desiderium ab aliis oblati laboribus aliquas moras perpeffum sit: factum est, ut id maxime verum esse sentirem, quod prudentes viri graviter asserunt, omnium eruditionis partium esse amicum aliquem nexum, & vinculis cohærere indivulsis, adeo ut lucem sibi invicem fœnerentur clarissimam; nullam autem perfecte aliquis inspicere & familiariter cognoscere possit, si reliquarum auxilio prorsus destituatur. Quare mihi infelices omnino ii videntur, qui, cum summa consequi possent, modo præcipitanter se gerere nollent; impatienti desiderio unam sibi, ex litterarum longe patenti campo, percurrendam destinant particulam, pro suo quisque judicio aut amicorum suasu; eamque, intactis reliquis aut contemtis, ita excolere satagunt, ut panem quantocyus, & quam maximo fieri potest proventu, lucrentur. Non jam animus est per singula nunc ire rationum momenta, quibus dissuadere infaustam hanc festinationem possim, aut remove ea, quæ ab illis objici possent, qui contrarium serio statuunt: id tantum dicam, adeo non obesse Medico, quo minus omnibus sui muneris & nominis respondeat partibus, si in aliis rebus, quæ ad medicinam directe non facere videntur, aliquot annos impendat; ut potius aptior reddi sic possit ad reliqua, arti suæ domestica & propria, melius percipienda, digerenda, disponenda, &, si occasio ita postulet, cum aliis etiam communicanda. Talia asserens fidem facillime, credo, inveniam, si ex illis, qui immortalem sui memoriam apud omnes reliquerunt, summis Medicis, aliquos producam, quos non minus medendi scientia posteritati Machaoniæ admirabiles facit, quam reliquæ eruditionis incomparabilis elegantia apud omnes commendat. Ut enim vivorum modestiæ parcam, quis JOANNIS CRATONIS eximium nomen nescit & pervulgatam apud omnes gloriam? felicitate autem tanta medicinam fecit, ut trium augustissimorum Imperatorum Medicus esse meruerit. Huic tanto viro non obfuit improbus labor, quem in theologiam & philosophiam, & illa studia, quæ humaniora vocare solemus, optimis usus præceptoribus, per plures annos impendit: nec dubium est, quin potuisset plura in usum discipulorum scribere, si per negotia licuisset fœtus suos ipsi exponere & luci publicæ sistere. Quid de OLAO BORRICHIO dicam, incomparabili viro, & in multis scientiis versatissimo, Medico autem inter præstantissimos numerando? aut quid de HERMANNO CONRINGIO, Germaniæ nostræ fulgentissimo sidere, quem theologi suum esse dicunt, jurisconsulti

& politici suum vindicant, philosophi repetunt, Medici habent retinentque. Justum autem opus mihi enasceretur, non terminis angustissimis circumscripta præfatio, si ZWINGEROS, GESNEROS, PATINOS, BARTHOLINOS, MERCURIALES, HOFFMANNOS, CONSTANTINOS, FOESIOS, LANGIOS, FRACASTORIOS, DIETERICOS, WELSCHIOS, MEIBOMIOS, PECHLINOS, ceteros, enarrare vellem: quare hoc quidem labore supersedeo, & ad id redeo, unde digressus & cujus gratia hæc præfatus sum. Unicum modo, ante quam hunc sermonem abrum-pam, dicere liceat, ita me intelligere optandam & laudandam rem esse, si quis omnium aut plerarumque disciplinarum ambitu perlustrato ad certam aliquam se de-mum conferat, quam solam integro deinceps studio colat & perdiscat, nimirum si ætas & occasio opportunitatem suppeditaverint. Nam cui hæc minus favent, quis illi vi-tio vertat, si uni rei totum se, quantus est, statim tradat, aut ex reliquis ea tantum feligat, quæ huic provinciæ, quam suscepit, tuendæ ornandæque proxime inserviunt. Mihi autem propositum nunc est, pro virium ingeniique modulo, & pro ea copia temporis, quæ elaborationi tam nobilis argumenti suppetit, illa in medium proferre, quæ ad priscae medicinæ antistites *Hippocratem*, *Celsum*, *Galenum* aliosque sequiores illustrandos idonea, apud philosophos, poëtas, historicos, & si qui alii sunt, sese mihi obtulerunt: eaque sic inter se conferre & conjungere, ut quilibet intelligat, quid illud sit, quod athleticum & gymnasticum veteres dixerunt, quid boni subsit, quidve vitiosi secum ferat, quid denique bonarum considerationum in physicam & medicam doctrinam inde redundet. Laborarunt jam in hoc argumento illustrando duo clarissimi viri, alter medicus, **HIERONYMUS MERCURIALIS**, gente Italus, qui de arte gymnastica sex pulcherrimos libros nobis reliquit; alter autem Gallus, profes-sione Jctus, **PETRUS FABER**, cujus *agonisticon* tribus libris ea ulterius prosequit-tur, quæ prior non penitus excusserat. Existat etiam **LAURENTII JOUBERTI**, itidem Galli & inter Medicos non infimi, *de gymnasiis & generibus exercitationum apud antiquos celebrium* brevior quidem liber & non contemnendus, quamvis ultima lima ipsi defuit: sed cum duobus, quos commemoravimus, & inter quos ordine tempo-ris medius est, haud comparandus. Et hunc cum nostris, tum jam maximam partem elaboratis quum ejus copia fieret, diligenter contulimus. Enimvero prius laudatorum duumvirorum is videtur in scribendo finis fuisse, ut, quicquid ullo modo ad veterum certamina, exercitia, ludosve spectaret, oculis lectorum subjicerent: quum nobis ni-hil aliud curæ futurum sit, quam si quid ad ipsum habitum athleticorum corporum præfigurandum facere visum fuerit, aut ad illud vivendi genus pertinere, quo se juvari posse ad habitum illum acquirendum veteres existimabant. Historiam ejus argumenti, latissime omnino patentem, non nisi paucissimis & strictim consignatam, præmisimus, quia ad reliquorum intelligentiam necessaria videbatur. Faxit autem sum-mum, quod veneror, Numen, ut salutarem & optatum finem, ad quem hoc labore suscepto tendimus, plenissime consequamur.

§. II.

§. I.

EXercitationum varia genera antiquissimæ consue-tudinis & cum ipsis hominibus nata pariter esse & educata, plurima sunt quæ facillime persuadent. Quum enim in toto hoc genere voluptas, æmulatio, odium & conservandæ sanitatis desiderium, tanquam causæ illarum & origo, pro cujuscunque ingenio, spectari debeant: hæc quovis tempore omnibus inesse quilibet facile intelliget. Nec historiarum fides nos destitueret, si illud quidem demonstrare nunc velle-mus, & non potius ad illum sermonem, quem de habitu & diætâ athletarum animo concepimus, in medium nunc proferendum ita festinaremus, ut bre-vissimis verbis de athleticorum hominum, ipsiusque eorum, tantopere olim celebratæ, artis origine, con-ditione ac fati aliqua præmittenda existimarem, quæ rudem potius designationem facti sistant, quam accuratam & omnibus numeris absolutam enarratio-nem.

Quemadmodum vero omnium artium id quasi fatum fuit, ut res ipsæ sint artibus longe antiquio-res, nihilque simul inveniatur & ad perfectionem perveniat illam, ut artis mereatur nomen: ita cum omnium exercitationum generibus idem accidit. *Hermetem* vero *Ægyptium* primum fuisse, qui in artis formam ea deduceret, gravium scriptorum ^{a)} fide & testimonio confirmamur. Ab *Ægyptiis* igitur, quibus Græci tantum non omnia debent, quæ in ipsorum monumentis admiramur, ^{b)} in Græciam pervenit illud studium corporis ad robur & vires exercendi & indurandi, primique, qui illud susciperent, Spar-tani videntur fuisse, quorum plurimæ leges & insti-tuta

a) *Diodor. Sicul. biblioth. lib. I. palæstræ inventor (Hermes) numerosa, concinnitatis, & corporis decore effingendi stu-diosus artifex. conf. Cl. Fabricium Bibliothec. Græc. Lib. I. p. 84.*

b) *Quod Olaus Borrichius satis evicit peculiaris de Her-metis, Ægyptiorum & chemicorum sapientia libri capite octavo.*

tuta ab *Lycurgo* tradita, debentur *Ægyptiis*, quod uno ferme ore Veteres c) nobis declarant. In hac autem urbe præ reliquis viguisse exercitationes, notius est, quam ut probatione egeat.

§. III.

Reliquæ nationes Græca lingua utentes, siue illæ in Græcia proprie dicta confederint, siue Asiam tenuerint, siue magnam Græciam, par institutum amplexæ sunt, vel a Spartanis edoctæ, vel quod ex his plurimi, qui *Ægyptum* adierant, rem ibi acceptam cum suis civibus communicaverint, vel denique quod Phœnicum antiquissimæ coloniae, quas magnus ille *Samuel Bochartus* nobis indicat, hos mores invexerint, frequentibusque commerciis deinceps foverint. Fuisse enim illam gentem in omne voluptatum & spectaculorum genus propensissimam, res est aliunde notissima. d) Ab Græcis igitur communi animorum æmulatione in exercendam hanc artem itum est, cui fovendæ rectores populorum & civitatum religionem prætexebant, laudesque honores & præmia proponebant, quæ cum sua voce ἀθλα dicerent, athletæ vocabulum enatum est, quo homines ad hæc præmia adspirantes designabantur; qui vero artem præmonstrabant gymnastæ, γυμναστῆς, vocabantur, quia corpore nudato, ut minus impeditum esset, præstitutos labores peragebant οἱ γυμναζόμενοι, ad artem in gymnasiis adducendi. *Plato* eos vocavit ἀσκητῆς, vocabulo apposite significante, quia longis crebrisque exercitationibus opus erat, si quis artem hanc corporum, ut ita cum *Tertulliano* loquar, totam vellet perdiscere. Frequentissimum denique vocabulum, quo ad certamina utebantur designanda, erat ἀγών, cujus latissime fere patet significatus, ita ut musica etiam & theatralia certamina sub se comprehendat. Reliqua nomina, passim obvia, omittere liceat, quum eorum ratio ex infra dicendis satis sit apparitura.

§. IV.

Ortæ sunt igitur veterum decantatissimæ sollemnitates, Olympia, scilicet, Nemea, Pythia & Isthmica certamina, ad quæ omnis confluebat Græcia. Horum autem religionem, leges, aut, quæ de tempore illorum agitantur, controversias nostri propositi lege detinemur, quo minus hic possimus attingere. Unicum adjicere non incommodum fuerit, exercitationes has liberos tantum admisisse homines, eosque fere nobilissimos & qui cives essent, magnaque ductum fuisse tota Græcia laude victorem in his ludis citari. Quin immo ex publico his hominibus annua solvebantur stipendia, ut nos *Galenus* e) docet; idemque sub Romano imperio apud Græcos populos obtinuisse ex *Plinii* f) ad Traianum epistola quadam licet colligere.

§. V.

Jam vero non intempestivum fuerit considerare, quibusnam exercitationibus tam celebres ludi peracti

sint. In quo video plerosque scriptores valde inter se dissidere, aliosque alia enarrare certaminum genera. Quam quidem inter eos dissensionem ex eo ortam putaverim, quod non eodem tempore iisdem usi fuerunt occupationibus, sed temporis progressu, ut fieri in rebus humanis solet, quædam nova addita sunt, vetera autem aliqua mutata vel abolita. De quibus certum est, quod in sacris antiquorum certaminibus, Olympiæ, Delphis, Corinthi aut Nemeæ commissis, fuerint, sequentia sunt. *Cursu* præcipue exercebantur, huicque certaminis generi is habitus est olim honos, ut ab eo Olympia certamina ordirentur. Triplici autem genere constabat illud certamen: si quis enim inde ab carceribus ad metam tantum properabat, stadium percurrisse dicebatur, cui secundum veterem dimensionem sexcentorum ambulationis pedum longitudo tribuitur: si quis idem spacium a metis ad carceres remetiretur, diaulon absolverat: quum vero quisquam, nulla interposita requiescendi mora, stadia percurrisset plura (in numero non convenit, *Suidas* g) viginti quatuor, alii duodecim tantum numerant) is dolichodromum perfecisse censebatur, plenissimique certaminis in hoc genere decurfor. Verum etiam illi sunt cursoribus adnumerati, qui equos aut mulos agitando eadem spacia decurrebant, hinc *Phavorinus* h) ubi cursuræ species enarrat, præter δίαυλον & δολιχόν etiam τεθρίππον, quæ fit quadrigis, κέλῃα, quæ equo desultorio, & ἀπήνην, quæ rheda mulis vecta peragitur, enarrat, idemque auctor, cum *Suida*, i) δολιχόν exponit τὸ ἵπποδρομιον, quod non alia de causa factum puto, quam quod pedibus non minus, quam animalium & curruum ope, apud Græcos olim hoc cursus genere decertatum fuit. Ceterum *Plutarchus* k) omnino non satis caute scripsit: Τῶν ζώων μόνῳ τῷ ἵππῳ μετουσίᾳ εἰσάγων καὶ ἀγῶνος εἶναι. Ex omnibus animalibus soli equo licet in partem certaminum & coronarium venire; apud *Pindarum* enim etiam in eos epicinia videas, qui rheda mulis vecta victores fuerunt.

§. VI.

Cursum excipit ἄλμα, saltus, qui non modo simplicem corporis, ad certum aliquod spacium, cum celeritate translationem denotat, sed quoque illum motum, quum in altum exsilimus. Saltum autem facientes juvari se magnopere halteribus sentiebant, quos manibus tenebant, ne brachia libere fluctuarent. Quæ autem de halteribus leguntur incerta pleraque sunt & controversa, de quibus illi consulantur l) qui ex instituto talia describunt. Illud notamus ab hoc exercitio differre plurimum saltationem, cui veteres deditissimi quidem erant, non autem athleticum putabant. *Petrus* tamen *Faber* m) saltationem Pyrrhichiam, quæ fit cum armis, referendam huc monet.

§. VII.

Ab hoc ad tertium genus progredimur δίσκον seu Hh 4 jactum

c) Vide *Plutarchum* in *Lycurgo* p. 41. & *Isocratem* in *encomio* *Busiridis*.

d) Conferri de hoc meretur elegans apud *Herodianum* locus libr. II. Φιλόστοι δὲ φύσει Σύροι, μάλιστα οἱ τὴν Ἀντιόχειαν κατοικοῦντες, μεγίστην πόλιν καὶ εὐδαίμονα, σχεδὸν παρά πάντα τὴν ἐνταῦθα ἐστράτευσαν.

e) Suasoria ad artes orat. pag. 3. lin. 58. Τὸ τῶν ἀθλητῶν ἐπιτήδευμα ὑποπλύνει, μήποτε ἄρα τοῦτο, τὴν παρὰ τοῖς πολλοῖς δόξαν ἐπαγόμενον, δημοσία παρὰ τοῖς πᾶσι τιτιμυμένον ἡμερησίοις ἀργυρίου δόσει, καὶ ὅλως ἴσα τοῖς ἀεστυοῖσι τιτιμυμένον, ἐξαπατήσῃ τινὰ τῶν νίκων.

f) Lib. X. ep. 119. vide ibi ab Cl. viro & hujus academix immortalis decore, B. Chr. Cellario adnotata, adde etiam, si placet, *Plutarchum* Tom. II. p. 639. E.

g) voce δολιχόν.

h) voce τεθρίππον.

i) Hic quidem l. c. ille in voce δολιχόν. Ad *Suidam* doctissimus *Küsterus* ita subnotat: nescio an hæc lector sine censura dimissurus sit, certe mihi non probantur.

k) Loco superius citato.

l) *Mercurialis* de arte gymnastic. pag. 162. seqq.

m) *Agonistic*. lib. I. cap. 5.

jaſtum diſci, qui, ut *Phavorinus* n) deſcribit, vel ex lapide factus orbis erat, vel ex ære, vel denique ex ferro, in medio perforatus, ut lignum poſſet indi, quo prehenſo quam longiſſime in altum protenus jaceretur. Sed de forma apud omnes non convenit auctores, forte nec conſtans fuit & idem illius apud omnes uſus: videri interim *Mercurialis* o) poteſt. Nec multum a diſco reſeſſit *ἀκων* ſeu *ἐκόντιον jaculum*, ſeu miſſile quodvis inſtrumentum, quo, tamquam certaminis quarto genere, ſolebant exerceri, ad certas leges projiciendo.

§. VIII.

Enarrata jam quatuor genera *levibus exercitiis* puto eſſe adnumerata, de cujus nominis ratione inferius dicendum erit; nunc illud modo, antequam ad gravia progrediar, addo, pilæ etiam ludum in ipſis Pythiis ſacris apud Apolloniatas olim eſſe exhibitum, qui inter enumeratos fere leviffimus, & quamvis privatis magno uſui & delectationi fuit, proinde etiam a Medicis haud raro magnopere commendatus: tamen inter athletarum propria exercitia a nemine, quod ſciam, pila refertur. Vide *Petri Fabri agonifticon*. p) *Hieronymus* autem *Mercurialis* q) pilæ Græcæ diverſam a Latinorum conſuetudine rationem, pro more ſuo, eleganter deſcribit, & non ſine ratione cum ſaltatione conjungit; ibidemque de hujus exercitationis apud Romanos uſu pluribus exponit.

§. IX.

Ex *gravibus* certaminibus erat *πάλη luſta*, unde palæſtra vocatur ille locus, ubi ad colluctandum homines inſtituebantur, & neceſſaria ceromatis inunctione ac pulveris inſperſione, quod luſtæ proprium eſt, præparabantur, quamvis non ignorem, vel *Plutarcho* r) teſte, palæſtram alibi tam late ſumi, ut designet *τίπον ἐν ᾧ γυμνάζονται πάντες οἱ ἀθληταί*, locum exercitiis omnium athletarum deſtinatum. Erat autem luſtatorum in eo ſita exercitatio, ut mutuis complexibus ſeſe devincirent & concertationis majorem partem variè miſcendis atque conſtringendis invicem corporibus peragerent, donec in terram alteruter vel uterque proſtrerneretur; quod *τραχηλίζεσθαι* Græco vocabulo dicebant. Hæcque fiebant in luſta dejectoria, cujus hic finis erat. Erat autem alia etiam luſtæ ratio, quam *ἀκροχειρις* priſci appellabant, ubi ſtantes & manus protendentes vincebant adverſarios, quo *Ovidius* s) reſpexit, quando Acheloi luſtam cum Hercule deſcribit:

Cum pede pes junctus, totoque ego pectore pronus,

Et digitos digitis & frontem fronte premebam.

§. X.

Succedit *πυγμαχία*, *pugilatus*, qui cruentum præbebat ſpectaculum & cum fanitatis & integritatis pe-

riculo conjunctum, quare in celeberrimis Græcorum agonibus vix receptus legitur, quum indidem proſcriberetur, mox tamen poſtliminio recipiendus. *Pugiles*, inquit *Plutarchus*, t) quando inter ſe congregiuntur, οὐδὲ πᾶντο βουλομένους εἶναι οἱ βραβεύσαι συμπλέκεσθαι, i. e. non licet ſe invicem complecti: ſolis pugnis res erat peragenda, quibus antiquiſſimi homines nudis utebantur: ſubſequenti ex corio bovino crudo, implicatis arte quadam lorulis & ad volas revinctis, manuum robur augebant, cujus rei exemplum nobis *Pausanias* u) enarrat. Poſtremi autem caſtus invenerunt, qui vocabantur, ut *Mercurialis* x) nos docet, laminæ æneæ manibus alligatæ; quibus autem alligabantur, erant lora quædam punctis interſtinctæ, quæ manibus & brachiis circumcirca alligabantur, ut non modo pondere aliquo & craſſitie, verum etiam ſoliditate, caſtibus certantes ſeipſos ferirent. Hactenus *Mercurialis*, apud quem ipſa pictura, quam appoſuit, y) rem clarius præmonſtrat. In univerſum itaque hæc pugna *ἁγροσάδην* abſolvebatur, finisque is erat, ut ille, qui gravius læſus aut primus viribus deſtitutus eſſet, victum ſe manu, ſermone vel alio geſtu profiteretur, quod in hoc ſolo pugilum, non alio certamine, locum habuit.

§. XI.

Ex luſta & pugilatu aliquod quaſi compositum certaminis genus erat, quod *pancratium* dixerunt veteres, quo illi, qui inter ſe dimicabant, non ſolum, ut res ferebat, pugnis ſe invicem percutiebant, ſed quoque manus ſibi injiciebant & dejicere alterum conabantur, dejecti etiam, inter firmos complexus, eo nitebantur, ut alterum depreſſum ac ſuppoſitum retinerent, nihil intermittentes, quo ſe ad hoc poſſe juvari putarent, adeoque nec unguibus nec dentibus abſtinentes. Atque hoc genus, ut dixi, *pancratium* & ſæpe cum additione, *volutatorium* appellabant.

§. XII.

Tribus adhuc verbis de *pentathlo* addendum eſt, quod nomen illi imponebatur, ſi quis poſſet omni agonistica facultatis genere, quæ ſuperius enarravimus, decertare & victoriam reportare. Ceterum dicendum nunc eſt etiam pauciſſimis, quod, qui ſe eo comparabant, ut victores horum publicorum & ſolemniū ludorum fierent, multo tempore ſeſe antea magiſtris harum artium tradiderint formandos & præparandos, quo tempore multa facienda & ferenda erant, a multis etiam ſeſe abſtinere debebant. Quin immo ante illud ipſum tempus, quo pro corona decertare vellent, oportebat per præſtitutos dies præparari & præexerceri, quod *προαγῶνα* ſeu *προγύμνασμα* dicebant. *Phavorinus* z) illud ſpaciū triginta dierum fuiſſet docet, ſed multo illud longius & decem menſium fuiſſe *Petrus Faber* aa) ex *Pausania*, comprobat, ſimulque id docet jurisjurandi religione in templo Jovis *ἑρκίου* fuiſſe adaſtos, ut omnibus

n) In *Ἰστικοὶ & Ἰστικὸς ἐκ σιδήρου*.

o) de arte gymn. p. 166. 167.

p) lib. I. cap. 6. p. 21.

q) lib. II. cap. 4. rationem pilæ Græcæ exponit, capite autem quinto, Latinæ addi poteſt *Galenus* eleganti de exercitatione, quæ ſit parva pila, libello.

r) *Sympos. lib. II. probl. 4.*

s) *Metamorphos. Lib. IX.* ineunte, qui locus totam luſtæ rationem eleganter exponit, & ejus, quæ *ἀκροχειρις*

vocatur & alterius, quum mutuis complexibus certantes ſibi invicem complicantur, a verſu 29. ad 62.

t) Loco ante citato.

u) *Arcadic. cap. XL. pag. 682. edit. Lipſ.*

x) *Libr. II. cap. IX.*

y) pagina 154. 155. 156. editionis Amſtelod.

z) in *ὀλύμπια*.

aa) *Libr. III. cap. 4. & cap. XXIII.*

nibus artis antiquæ statutis ac legibus, quam fieri posset accuratissime, per totum hoc tempus satisfacerent. Sed idem auctor alio loco *bb)* cum *Phavorino* sentire deprehenditur. Quod quidem legitimum tempus ab ipso tirocinio diversum esse, vel ex eo satis apparet, quod longe minus sit, quam ad illum habitum tum artis tum etiam corporis comparandum sufficiat. Sed de præparatione & habitu illo mox dicemus, quum prius viderimus rei athleticæ apud Romanos faciem. Quum enim non Græcis solum, sed Romanis maxime monumentis, ad harum rerum intelligentiam, uti debeamus: necessitas ipsa nos cogit rem hoc modo instituere.

§. XIII.

Romana igitur civitas, ut omnium deorum religiones susceperat: ita quicquid alicubi ludorum & voluptatum erat eo magis ad se transfudit, si essent cum religionis prætextu & honore conjuncti. Quemadmodum vero non eadem se nobis forma, & moribus iisdem, Roma semper offert: ita, si hoc institutum spectes, invenies sane eandem rem, sed longe minori pretio habitam, quamdiu libera fuit. Antiquissimi Romani non destituebantur pugilum exercitationibus, theatrum etiam admittebant & circi ludis delectabantur, quæ videntur a Græcis moribus non aliena; in hoc tamen haud levem deprehendas diversitatem, quod nobiles cives suam gravitatem minus decere tales occupationes, saltem in publico exercendas, arbitrarentur. Unde viliores fere tantum homines erant, qui his rebus publice operam dabant. Maxime autem bellicosa natio delectabatur cruentis gladiatorum spectaculis, antea apud Campanos & Etruscos familiaribus, adeo quidem, ut nullum facile magis placeret, quam quo plurimum sanguinis profunderetur, nec coena satis in convivio suavis videretur, nisi aliquot gladiatorum paria caderent. Hi vero gladiatores vel bello erant capti homines, vel ære a barbaris nationibus ad id comparati, ut, in ludo prius saginati & ad horrendam artem eruditi, vel cum publica munera populo ederentur, vel cum privati a lanistis eos sibi emere vellet, in promptu essent. Quando autem depugnabant ut plurimum pedestres quidem erant, sæpe tamen effedis impositi stantes, aurigante interim servulo, inter se decertabant, quod ex *Suetonio cc)* clare discimus. Ii vocabantur effedarii.

§. XIV.

Postquam autem hæc urbs, orbis jam domina facta, in unius domini seu Imperatoris potestatem devenit: horum intererat bellicosum populum aliis imbuere moribus, & multitudinem quidem otiosam spectaculis variisque oblectamentis delinire, ut servitutum moderatius ferrent, nobiles autem sensim eo deducere, ut suæ gravitatis obliviscerentur. Cujus quidem rei in Jul. Cæsare jam inspicimus clarum documentum, qui, quum in privatis domibus ludos pro gladiatoribus instituisset, eos non per lanistas, sed per equites Romanos, ac etiam per senatores armorum peritos, erudiebat; *dd)* immo eodem sub

principe senatores jam & equites Romani, publicis in foro muneribus, se intermiscabant gladiatoribus; post hunc Augustus senatoribus quidem interdixit, equitibus vero permisit gladiatoribus interesse. *ee)* Quo res tandem temporis progressu devenerit, obscurum nemini esse potest Neronem intuenti aut Domitianum aut Commodum, qui se abjectissimis mancipiis intermiscere ipsi non verebantur, ut multitudini inconditæ suis insaniis placerent. Maxime autem Domitianus ex his insignis est, qui aliquamdiu intermissum pugilatum revocavit, cui *Martialis ff)* quidem ob id gratulabundus blanditur, tamquam *veteres Latiae ritus renovanti arenæ, qua pugnet virtus simpliciore manu*, quod non ita voluit, ut gladiatorum antiquaverit certamina, sed, tamquam non satis esset in urbe ludorum, hos, oblivioni fere traditos, addidit prioribus, & hoc insuper adjecit, ut feminae etiam pugnare gladiatoribusque interesse debuerint, quod ex eodem *Martiale*, ut & *Juvenale, gg)* discimus.

§. XV.

Pugilatus autem, ut frequenter hoc ævo exercebatur; ita non minus certe erat ipsa gladiatura infamis, ut fere plurimos hujus generis homines ære ad id comparatos, aut sententiâ judicis addictos, inveniamus. Legimus a *Petro Fabro hh)* ex optimis historicis relatum, sub Galerio & Maximino Imp. Christianum nomen professos, tamquam nocentes homines, agoni pugilatus, apud Cæsaream subeundo, esse adjudicatos, cujus impii instituti legibus quum nec vellent nec possent se subicere, oculis fuerunt orbat. Mirandum tamen non defuisse, qui sponte se & libera voluntate pugilari & gladiaturæ subicerent, levi auctoramento inducti, & quod magis mireris, homines proavorum laudatissimorum stemmate ortos, auctoratos jurasse uri, vinciri, (*Lipsius* mavult legere virgari) ferroque necari; quos quidem digne exagitat *Juvenalis. ii)* De gladiatoribus, eorum conditione, variisque generibus, pauciora attulimus, quoniam de iis doctissimus vir *Justus Lipsius, Saturnalium sermonum duobus libris*, copiose egit.

§. XVI.

Sed ut ingeniosi sunt homines permütandis voluptatibus; ita nihil diu delectare admodum potest, quotidieque talibus studetur, quæ novitatis gratia blandiuntur. Aurigationum itaque spectacula circensia reliquis tandem ita prævaluerunt, ut unice hominum favorem mererentur, subortæque hinc factiones *kk)* non raro ipsam rei summam ad arbitrium suum flecterent, quod obscurum non est Imperatorum usque ad Justinianum historiam pervolventi, aut unicam modo *Procopii arcanam historiam* legenti. Quo magis factum existimo, ut insequuti Imperatores cogitandum sibi statuerint, qua possent ratione, cum estimatione harum exercitationum, rem tandem ipsam prorsus abolere. Qui enim Juliani temporibus scripsit, *Oribasius ll)* medicus, pueros quidem adhuc exerceri tunc ad bonum habitum solitos, & ipsos athletas, commemorat; quo autem tempore *Eustathius*

bb) Libr. III. cap. VII.

cc) in Caligula cap. XXXV, 8.

dd) Suetonius in Jul. Cæs. cap. XXVI, 8.

ee) Idem in J. Cæs. cap. XXXIX. & Augusto c. 43.

ff) Libro VIII. epigr. 80.

gg) Conf. *Martial. Spectac. epigr. 6. libr. 6. epigr. 66. Juvenal. Satira 6. v. 246. seqq. addi potest Suetonius Domitia-*

no cap. 4.

hh) Libr. III. cap. XI. pag. 271.

ii) Satira VIII. v. 190. seqq.

kk) de his legi potest ad C. Plin. l. IX. ep. 6. B. Chr. Cellarius, & præter ibi citatos Nicolaus Alemannus annot. ad *Procopii historiam arcanam* p. 25.

ll) Synops. lib. I. præfatione ad *Eustachium filium.*

stathius ad Homerum mm) commentatus est, eo res devenerat, ut athletarum nomen & professio essent deridiculo. Gladiatorum quidem spectacula cruenta Constantinus M. edicto sustulerat, sed quod ipse nimis libenter vetitis certaminibus oculos palcebat, exemplum magis quam edictum valuit. Honorio autem imperante penitus sunt abrogati & e Republica proscripti, ex quo tempore gladiatores dicti sunt carnifices. *nn)* Quid reliquis certaminum generibus exitium attulerit, an principum edicta, an vero turbulenta & bellis inquieta tempora, exterarumque gentium in Romanas ditiones illuvies, non vacat inquire. Equidem cenfeo ad hanc rem maxime fecisse Christianæ religionis sanctitatem, quæ plurima in his exercitatoribus fœda, & hanc religionem professio indignissima, patefecerat, usumque severis constitutionibus ecclesiasticis coercuerat.

§. XVII.

Non licet nunc alias etiam intueri, post Græcos & Romanos, gentes & præcipue antiquissimorum in Germania nostra hominum mores considerare, & quibus, qualibetve ipsi exercitationum generibus fuerint dediti, multum expendere; quamvis forte aliquid deprehendi non dissimile antiquorum exercitationibus posset, si quis in ludorum equestrium, quos torneamenta dixerunt, ultimam originem vellet inquire. Superfedebimus autem hoc labore ulterioris investigationis & potius ad ea accedemus, quæ medica consideratione, in athletica re illorum populorum, quos præ manibus habemus, digniora videntur.

§. XVIII.

Omnium scilicet minime otiosi spectatores tantum rei athleticæ Medici erant, sed in partes omnino ipsi etiam abripiabantur. Hi enim nascentem quasi suscipiebant artem, & salubribus præceptis formabant, ut corpori quam maximum afferret emolumentum. Sed non præceptis tantum, ad diætam rectissime instituendam, ejus incrementa juvabant, verum etiam pluribus corporum, tali arti deditorum, morbis & affectibus, tam internis quam externis, succurrebant. Quod minime dissimulat *Galenus, oo)* vitiosæ gymnasticæ, quæ suis temporibus invaluerat, acerrimus alioquin insectator, legitimæque auctores non contemnendos laudat *Hippocratem, Dioclem, Praxagoram, Philotimum, Erasistratum* atque *Herophilum*, clarissima fane in Medicorum scholis nomina. Quin immo *Platonis pp)* gravissimo testimonio constat *Herodicum*, paullo ante Hippocratis tempora, illam disciplinam medicinæ adjunxisse, seu ad boni habitus acquirendi finem transtulisse.

§. XIX.

Medici itaque athleticam rem primo direxerunt; & cum multa ex illorum temporum usu essent viliora, utpote in balneis, frictionibus, inunctionibus, manuum opera, ab homine tamen non imperito, peragenda: ad hoc ministerio suorum mediastinorum utebantur. Quum etiam non minus frequenter luxationes & distorsiones membrorum acciderent; ad illas percurandas famulorum quoque utebantur opera. Sed hæc res cum tempore multa peperit incommoda Medicis. Quum enim hi homines in his rebus aliquam usu multo exercitationem acquisivissent; insolentius se gerere in magistros cœperunt, totamque

rem in suam possessionem abriperunt. Unde a tam longo jam tempore cœpit chirurgia quasi *βδραυρος*, & vile opificium reddi. Sed non contenti hoc ipso spolio, universam artem medicam involare & ad se rapere annisi sunt, postquam audaces esse in vilissima ejus parte didicerant. Sed & prorsus in contemptum universæ medicinæ res hæc accidit. Quum enim ipsi illi, qui se sic gerebant, viles essent homines, & libenter se nobiliorum servitiis darent, quorum fere quilibet domi locum pro exercitando corpore eoque lavando perungendoque habebat; in familiam sibi adsciscebant tales iatraliptas: unde fabula inolevit Medicos olim Romæ servitutem servivisse.

§. XX.

Vidimus quam varia fuerint certamina, quibus prisca mortales vel spectandis vel subeundis tantopere delectabantur. Tempestivum nunc videtur dispicere quinam ex illis intelligendi sint, quando apud Græcos pariter & Latinos scriptores mentio athletarum occurrit. Equidem fateor difficillimum mihi heic visum fuisse aliquid statuere, quod antiquitatum cultoribus omnibus satisfaceret, si rigidius velint mecum agere. Tandem autem rationes ita subduxi meas, ut neminem me reprehensurum sperarem, si, quoscunque habitus & diætæ illius, quam considero, studiosos invenirem, in hac tractatione athletas dicam, adeoque gladiatores etiam, aut si quos alios Roma apud Græcos notis athletis adjecerit, aut in aliam formam transmutaverit, in hunc numerum recipiam.

§. XXI.

Sed hic aurem vellicat *Joubertus, qq)* qui illos tantum statuere videtur hujus acquirendi habitus causa athleticam diætam observasse, qui gravibus exercitiis dediti erant, quæ propterea putat nomen hoc accepisse, quod gravitate, ex corporis maxima mole comparata, indigerent. Ita solis pugilibus, luctatoribus & pancratiastis nomen illud remaneret, cūrsores autem cum salientibus & jaculatoribus, ex parte etiam, & *Jouberti* judicio, gladiatores exciderent nobis. Verum enim vero quicquid sit de nomine gravium certaminum, illud non evincet *Joubertus*, quod voluit: quum de gladiatorum quidem sagina tam clara essent testimonia, ut dubitandi nullus omnino supersit locus. Videri autem illa apud *Lipsum rr)* possunt. De ceteris ex eo certiores de diætæ studio reddimur, quod iidem, qui levioribus vicerunt, etiam gravioribus victoriam sæpe sunt in iisdem certaminibus adepti, adeoque quinquertiones celebrati; Si autem graviora nemo vincere sine corporis gravitate potuit, quod *Joubertus* admittit; & tamen illi graves, & mole corporis macti homines, levioribus vicerunt eodem tempore, quo in gravibus victoria potiti sunt; sequitur sane ut molem corporis eam fuisse sentiamus, quæ nec pernicipitati pedum, nec reliquorum membrorum agilitati, quicquam officeret. Ne nunc dicam quæ virium ostentatione saltum exercentes se offerant, qui certamina non expediti suscipiebant, sed vel calceis ex plumbo factis vel massis plumbeis prægrandibus circa humeros adaptatis, aut brachio vel alia corporis parte gestatis, impeditissimi prodibant. Qui vero discum jaciebant aut jaculum torquebant, aut halteribus exercebantur, iis certe non minimis lacertis

mm) *Iliados* ↓ seu penultimum.nn) *Barthius Adversar. lib. XVI, cap. 12.*oo) *ad Thrasybulum.*pp) citante *Mercuriale* pag. 17.qq) *de gymnasiis* cap. V.

rr) loco sup. cit.

tis aut languidis, sed oppido torosis opus erat. Ipsos denique cursores, ut velocitatibus se commendarent, maximeque cum dolichon decurrebant, non languidos fuisse oportet. Denique omnem dubitationis scrupulum eximit Milonis Crotoniatæ decantatissimum robur & voracitas plus quam athletica. Hunc, cum bovem humeris suis gestans stadium decurreret, non gravi certamine occupatum fuisse clarum est; sed nec hoc obscurum quod reliqua vita ἀθλητικώτατος fuerit.

§. XXII.

Fortē autem in gratiam cum Jouberto redibimus, si ipsi demus levioribus exercitiis primo subactos esse, qui ad perfectionem athleticam aspirarent, tantisper donec cum tempore ad graviora promoverē liceret; intereaque operam dedisse, ut, per debitā momenta progressi, diætā ipsam penitus tolerarent, & sic robur majoribus ferendis par acciperent: illē vero nobis concedat, quod provectiores in arte, fovendis viribus & acquisiti habitus conservandi gratiā, ad leviora subinde redierint, vincendique tandem studio ea etiam, quæ in levioribus his difficilissima sunt, obierint. Quod tamen non ita contendō, ut obtinere velim etiam quum de iis sermo est, quos sub Romano imperio, propter commissum aut obiectum crimen, ad gladiaturam vel pugillatum damnatos dixi: hos enim suspicor non per totum orbem exercitationum gymnicarum, sed, quam proxima fieri poterat via, ad faginam & miseræ artis perfectionem ductos fuisse: & vix alia habuisse laborum, quibus durarentur, genera, quam ut per omne tempus inter se rudibus, præmonstrante lanista, batuerent; aut ad palum exercerentur: sed de iis potissimum, qui, apud Græcos Romanosve, libera voluntate & gloriæ cupiditate adducti, celebrium certaminum victores evadere suslinebant.

§. XXIII.

Ne autem sine testimonio minorem fidem mereat, duos pro me adferam sententiam ferentes, quos credo illud plene evicturos, quod in hac tota re controversum est. Primus esto integerrimus Philosophus Epictetus §) inducit ita loquentem: Θέλω ὀλύμπια νικῆσαι. ἀλλὰ σκοπεῖ τὰ καθηγούμενα καὶ τὰ ἀνόλουθα: Vellem, inquis, Olympiæ victor citari; sed considera quæ antecedunt, quæ consequantur. Hæc vero dum enarrat, simul omnem diætā athletarum recenset: quem locum integrum huc non transferam, quia commodius alio tempore proferetur. Alter jam audiendus est Athenæus. ii) Is, quum Milonis robur & voracitatem exposuisset, ita subicit: καὶ οὐδ' ἐν παράδοξον τοῦτους τοὺς ἀνδρας ἀδιδραγούς γενέσθαι. ΠΑΝΤΕC γὰρ οἱ ἀθλοῦντες μέλα τῶν γυμνασμάτων καὶ ἐσθίειν πολλὰ διδάσκονται. Mirum non esse hos homines multi cibi capaces fuisse; OMNES enim athletas cum exercitationibus simul etiam doceri multa edere. Itaque confidenter adserimus certaminum diversitatem non illud efficere ut idem vitæ genus non fuerit omnibus legitimis athleticis, ut nec vitæ genus, corporisque habitus, per se ullum prohibuit ab consuetis exercitiis, qui gymnycorum & palæstricorum nomine uspiam censentur.

§. XXIV.

Galenus iii) videtur omnem hunc scrupulum iniecit, idem igitur eximit attente consideratus & recte intellectus: Οἱ ἀθληταὶ τροφὰς μὲν οὖν (vulgo, sed male legitur οὖν) εὐχυμοτάτους λαμβάνουσιν, ἀλλὰ παχέας καὶ γλισχροὺς, οἱ γὰρ βαρεῖς αὐτῶν (ὀνομάζουσι δ' οὕτω μάλιστα μὲν τοὺς παλαιούς, ἥδη δὲ καὶ τοὺς παγκρατίας καὶ πυλίας) θείου τροφῆς δυσθάρτου καὶ δυσδιαφορήτου, τοιάυτη δ' ἐστὶν ἡ τῶν παχέων καὶ γλισχρῶν χυμῶν, ὅποια μάλιστα ἐστὶν, ἥτε ἐκ τῶν χοιρείων κρέων καὶ τῶν, ὡς εἴρηκα, σκευαστῶν ἄρτων, ὅσπερ οἱ νομίμως ἀθλοῦντες ἐσθίουσι μόνοι. Athletæ cibos capiunt boni succi, sed crassi ac lenti, saltem ii, qui ex illis graves dicuntur (attende hic primo vocari omnes athletas; hinc κατ' ἐξοχήν graves designari.) i. e. præ reliquis palæstrici, sed, ut nunc loqui consuevimus, etiam pugiles & pancratiastæ, opus habent cibo, qui nec facile corrumpatur, nec transpiret. Tales autem sunt, qui crassum habent succum, cujus generis, præ reliquis sunt carnes suillæ, & panes, supra exposito modo confecti, quos (cibos) illi soli comedunt, (nempe ad præscriptum & ex necessitate) qui leges athleticas strictè observant. Hi autem non sunt alii; quam, in universum dicendo, qui se certaminibus sacris præparabant, ex his vero præcipue, qui ab exigui momenti laboribus ad summos transierant, id est palæstritæ, pugiles, pancratiastæ, & hi omnes eo maxime tempore, quando ad τὴν ἀκμὴν τῆς ἀσκήσεως, ultimum præludiorum articulum, perventum erat: quippe in ipso loco habendi certaminis, per legitimum τοῦ προαγωνίας spacium, accuratissime vivendum erat. Illud enim νομίμως ἀθλεῖν non ad ipsum actum pro corona decertandi restringi debet, sed, ex usu Græciæ, ad omne, quam late id patuit, institutum athleticum. Idem esto etiam de gladiatoribus, & si quid aliud Roma Græcanico instituto adjunxit, sensus, idem iudicium.

§. XXV.

Sed non leve dubium superest de circensibus Romanorum certaminibus, ubi equis agitandis & aurigationibus occupabantur, utrum his dediti athleticam quoque vitam vixerint? Equidem, si Græcorum mores respicio, rem, ut supra vidimus, inter cursus certamina apud athletas reperio: si Romanos adeo, eundem Commodum aurigando se exercentem invenio & cum bestiis luctantem (Herodianus notanter scribit: θηρίων ἐξ ἀντιστάσεως μάχας ἐπαυδιέμετο) & gladiaturæ ita deditum, ut nemo supra posset: verum tamen, quo satis claro & omnem ancipitem curam submovente testimonio confirmem, omnes illos aurigatores veterum circenses diætā athleticam tenuisse & habitui studuisse, fateor me nondum potuisse inquirendo assequi. Ovidius xx) quidem, ubi Phaetontis fatum enarrat, ita fabulam explicat, ut non obscurum sit suspicari, ipsum, pro poetarum more, ad sui temporis aurigatores respexisse: de Phaetonte autem sic canit:

Occupat ille levem juvenili corpore currum,
Statque super, manibusque datas contingere habenas
Gaudet.
Sed leve pondus erat, nec quod cognoscere possent
Solis equi, solitaque jugum gravitate carebat.

Gravi-

ii) Dissert. Epict. libr. III. cap. XV.

iii) Deignosophist. Lib. X. cap. II. p. 412. ed. Casaub.

iii) de aliment. facult. lib. I. cap. II.

xx) Metam. II. v. 150. seqq.

Gravitate autem corporis & non mediocri robore opus fane erat, si quis quatuor generosos equos, tot enim plerumque adhibebantur, levi & versatili vehiculo junctos; aut, quod in Jovis honorem factum legitur, sejugem; aut denique, quod Mithridates olim & Nero Claudius Olympiis instituit, decemjugem, ita vellet regere, ut, habenis per tergum circumdatis, totius corporis nisu, & manuum ope, sic temperaretur cursus, quo flecti ad arbitrium sistique possent. Enimvero de rei athleticæ constitutione satis videmur multum loquuti, & plus fortasse etiam, quam ferre omnes poterunt: pes tandem figendus est, ut ipsum nunc vitæ genus seu diætam athletarum consideratius proponamus, & exinde ad habitum intelligendum progrediamur.

§. XXVI.

Diætæ vocabulum Græcum est, & medica acceptione significat justum regimen circa omnia illa, quibus tum ad conservationem corporis absolute opus est, tum etiam ad statum & habitum illius aliquem consequendum indigemus. Adeoque hic latius aliquanto accipienda nobis vox est, ut præter illas res, quas non-naturales dicere solemus, & quibus omnibus opus est, ea etiam complectatur, quæ his tantum hominibus præ aliis commendata, & solemnia erat, qui ad habitum athleticum exercebantur consequendum. Ita nobis etiam balnea, frictiones, vomitiones, & id genus alia artificialia, in hunc censum erunt ferenda.

§. XXVII.

Vario autem modo circa diætam veteres occupati fuerunt, & est fane hæc pars, quantum ratione consequimur, omnium, in toto medicinæ ambitu, antiquissima. In universum autem constabat olim duabus speciebus, pro totidem finibus, quos obtinere contendebant; aut enim replere corpora infirma & exsanguia conabantur, aut deplere & attenuare nimia mole obrutos. Athletas autem ad priorem finem ita contendisse, ut nemo magis posset, in propatulo est, nosque hanc solam, altera dimissa, spectaturos esse consequitur.

§. XXVIII.

Quod dum conatur, per singula ire oportet, quæ ullo modo huic pertinent; faciemus autem initium a cibo & potu athletarum, quippe præcipuum, quod iis objicitur, est insignis voracitas in artis quasi formam redacta. Si antiquissima tempora inspicimus, quantum scilicet originem diætæ hujus possumus proxime attingere, simpliciorum victum athletarum deprehendimus, forte etiam minus reprehendendum. Quæ enim in rebus humanis communis est calamitas, ut omnia potius in deterius ruant, quam in melius vergant: hic quoque accidit. Sed audiamus veterum idonea testimonia: Ita vero: yy) *corpus & vires adjuvant ficus; ob id ante athlete hoc cibo pascebantur. Pythagoras exercitator primus ad carnes eos transtulit. Plinio adstipulatur Diogenes Laertius de Pythagora dicens: zz). Δέγλαι δὲ πρῶτος κρέασιν ἀσκήσαι ἀθλητὰς, τῶν πρότερον ἰχθῶσι ξηραῖς καὶ τυροῖς ὑγροῖς, ἀλλὰ καὶ πυροῖς σωμασκούτων ἀνθρώπων. Dicitur Pythagoras (non Samius philosophus sed Phliasius, quem ipse inferius σωμασκήλην ἀλκιμὴν vocat, Plinius exercitorem) primus ad carnes vorandas exercuisse atletas,*

quum prisca gymnastæ caricis siccis, & caseo recenti, quin etiam tritico, eos educaverint. His addamus Pausaniam a) cujus testimonio Stymphalius Dromeus primus carnibus vesci coepit, quum athlete ante ipsum caseo & fuscis vescerentur (τέως δὲ τοῖς ἀθληταῖς σίλια τυρόν ἐν ταλάρῳ εἶναι.) Adeoque antiquissimum athletarum simplicem victum videmus ex caricis, caseo recenti & tritico. Sive autem Pythagoras sive Dromeus primus immutavit illum; nostra parum refert.

§. XXIX.

Illud potius juvabit, paullulum considerare ea, quæ primis athletis ad molem corporis suffecerunt. Initium faciamus a ficuum seu caricarum examine, quarum usum & in alimentis hominum & in cibo animalium multis verbis prosequitur laudatus Plinius. Non autem multis inquiremus an hominibus earum virtus alendi & saginandi per se innotuerit, an vero ab animalibus eam didicerint; illud constat hominum & brutorum usibus insignibus inde ab immemorabili tempore inservisse. Galenus, quo volumine alimentorum facultates enarrat, ita de ficibus: *Quum omnes, inquit, autumnales fructus exiguum corpori præbeant alimentum, id omnium minime ficibus usu venit: & quando, non multis interjectis, de uvis sermonem instituit, ficuum memoriam revocat, & utrumque fructum nutriendi quidem facultate conjungit, sic tamen ut primas ficibus tribuat. Quod, inquit, nutrant, maximo argumento sunt ii, qui vinearum fructum custodiunt, qui, cum duos menses solis uvis ac ficibus, quorum custodiæ præsumt, vescantur, nisi forte panis quippiam cum illis addant, corpulenti tamen admodum sunt.*

§. XXX.

Non autem solum homini præstant hunc usum, sed animalia etiam eundem experiuntur. Italicae deliciae sunt ficedulae, ab ficuum esu nomen adeptæ, hodie *beccafigi* vocant, quas eo maxime tempore in dapes expetunt, quando, maturis ficibus & uvis multum ingurgitatis, pinguiissimæ sunt redditæ. Horum forte exemplo didicerunt veteres in domesticis etiam animalibus hanc saginam adhibere. Et feliciter fane res cessit in anseribus & porcellis, quibus in cibum datae caricæ, tantopere veteribus expetita jecora, stupendæ magnitudinis, non postremas delicatiorum dapes, progenerarunt. De anseribus Plinius: b) *Nostri eos jecoris bonitate novere. Fartilibus in magnam amplitudinem excrescit, exemptum quoque lacte mulso augetur. Nec sine causa in questione est, quis primus tantum bonum invenerit. Nos vero tanti boni inventorem non quærimus, sed unde constet ficibus eos esse saginatos? Docet illud Horatius Flaccus: c)*

Pinguibus & ficis pastum jecur anseris albi.

Jecinorum autem horum magnitudinem Martialis d) admiratus ita loquitur:

*Adspice quam tumeat magno jecur anseris majus
Miratus dices, hoc, rogo, crevit ubi?*

Quo vero pretio olim sit habitum, Juvenalis e) docet, quando hominem fordidum simul & sumtuosum reprehendit, qui in coenam vocatis sodalibus viliora destinarat, quum esset.

*Anseris ante ipsum magni jecur, anseribus par,
Atilis.*

§. XXXI.

yy) Hist. Natur. lib. 23. c. 7.

zz) Libro VIII. p. m. 575.

a) Eliacor. post. c. VII. sub finem.

b) H. N. lib. X. cap. XXII.

c) Serm. II. Sat. 8. v.

d) Libr. XIII. epigr. 58.

e) Satir. V, 114.

§. XXXI.

Sed de porcis etiam dictum est, quod honos habitus eorum jecoribus sit. f) *Apicius* auctor est fycotum seu ficatum, inter delicatissimas epulas habitum, esse jecur suis fico faginatae. Cum *Apicio* plane consentit *Galenus* g) qui nec a laude ficati abstinet, nec dissimulat hoc maxime fieri in suis. Non autem de solo suis hepate id nomen esse acceptum, sed aliis quoque attributum, *Cl. Salmasius* nos docet, cum Graecorum exemplo, apud quos posteriori ævo omne hepar *συκωλὸν* vocabatur, adeo ut aloen, quam prisci *ἡπατῖτα* dixerant, optimam designaturi, posteriores *συκωλὴν* vocarent: (quod cum ignorarent recentiores quidam succotrinam ab insula Sucotra appellatam contenderunt, immo diversam ab hepatica speciem commenti sunt); tum etiam Gallorum suorum, quibus *foye* hepar dicitur, quod a ficato esse credidit. Itali etiam ex eadem ratione hepar hodie *fegato* appellant. Quare autem jecinora his animalibus in tantam excrescant molem, inferius dicendi locus commodior forte recurret.

§. XXXII.

Videndum jam est de caseo, quem inter cibos athletarum non immerito relatum esse, multa mihi persuadent. Prius autem videndum est, quale concretum prisci homines caseum dixerint. Quo enim in nostris regionibus modo caseum conficimus, ut lactis pinguitudinem seu florem primo demamus, & deinde illud coagulum, quod subest, in caseum, expressa vel sensim, effluxa humiditate, & exsiccatione moderata præparemus: ille prorsus antiquis temporibus, forte etiam hodie, in Græcia & Italia incognitus, ac merum fortasse Germanorum est inventum, de quo pluribus & erudite, pro suo more, alicubi disputavit *Hermannus Conringius*. h) De Græcanico caseo dicere non possum, quæ enim apud *Galenum* lego, in dubium revocari posse videntur, utrum ad Romanum potius an ad Græcum morem, illa scribens, respexerit; puto tamen ejus parandi rationem parum ab Italica, quam brevibus attingam, esse diversam. Hi nempe non expectabant floris a crassiori parte separationem, quo non indigebant, quum butyri in cibis usum fero tandem a Germanis quidem didicerint famam, vix tamen in usum, etiam hodie, admittant; quoniam de oleo præstantissimo ipsis abunde prospectum est: sed lac, coagulo quodam adhibito, condensabant, sicque cum pingui & butyrofa parte simul in caseum, premendo ficcandoque, redigebant, quæ ratio apud Frisios, Batavos & Rhætos hodieque obtinet.

§. XXXIII.

Ejus generis caseus, recens pressus, intelligitur in cibo athletarum fuisse, quod adjectæ voces declarant apud *Diog.* quidem *Laertium* *ὕργος* apud *Pausaniam* vero *ἐκ τάλανων*, quod, ut *Kuhnii* in notis admonet, caseum recentem significat, *τάλαντος* enim, ut a Polluce in Onomastico redditur, est *ἀργεῖον*; *ἐν ᾧ ὁ χλωρὸς τυρὸς ἐμπήγνυται*, vasculum, in quo caseus recens premitur. Illi autem vim inesse magnopere alendi, vel ex lactis indole colligitur, quo præstantius alendo animali nihil natura excogitare potuit, quippe lac plane *ἀδελφὸν καὶ συγγενὲς* sanguini

Frid. Hoffmanni Oper. Supplem. II.

est nutrimentum, & in illum facillime transit. Quod cum majoribus nostris inter præcipua alimenta olim fuerit, hodieque in Helvetia multis unicum fere sit alimentum: quid mirum magnitudine & robore hinc admirabiles fuisse? De hoc autem plura volens adeat magnum *Conringium*, pulcherrimo libro quem *de habitus corporum Germanicorum causis* in publicum edidit. Verum hic nobis dubium haud leve sane injicit magnus *Hippocrates*, i) qui de caseo minus, quam nos, præclare sentire videtur: *τυρὸς*, inquit, *φύσαν ἐμποίει, καὶ ξηρότητα, καὶ σιτίων ἑξάψιν ποιήσει, καὶ τὸ ὤμὸν καὶ ἀπὸ πύλον.* Sed salvus est caseus per commentatorem *Galenum*, qui has accusationes in veterem restringit, recentem vero mitiorem declarat. Ne vero dubitemus de constanti sententia, eadem in libro repetit, quem de alimentorum facultatibus conscripsit.

§. XXXIV.

Venimus ad tertium, quod in cibis athletarum priorum refertur, nempe triticum. Non quidem adjectum illo loco est, qua ratione in alimentum illis hominibus cesserit; non tamen putandum crudo illo & tantum aqua elixo cum sale esse vesci solitos, quamvis hoc cibi genus non incognitum veteribus fuit, quod ex *Galeno* k) qui ejus ipse experimentum ceperat, accusante & improbante licet cognoscere: sed potius putarim, quando nudum nomen hic ponitur, ex eo paratorum panum communissimam speciem esse intelligendam, quam frequenter antiqui nominant, optime autem omnium exponit *Galenus*. l) Ea vero est illa panum ex tritico confectorum species quam dicebant *ἀντοπιῦρος*; quod *ὅλος ἀνός ὁ πυρὸς*, id est totum ipsum triticum, nulla parte ejus demta, in panificium cedat. Medici veteres ipsos vocarunt *συγκομιστοὺς*, quod ad ipsos conficiendos tota farina, nusquam a furfure sejuncta, *συγκομιζέται*, confertur, fermento modico subigenda & in fornice mediocriter percoquenda. Talem enim speciem pro athletis antiqui maxime probabant, quod optimum quidem, sed crassiolem succum præbere credebatur. In triticeo vero hoc pane fermentum & furfures optimo consilio addi intelligas ex iis, quæ *Simon Paulli* m) de panibus in universum docet, & quæ singulari *programme de pane Westphalorum grossiori*, scripsit *Excell. Dom. Præses*; præceptor vereque patronus immortalis gratia demerendus. Sed de pane athletarum iterum dicendi occurret locus.

§. XXXV.

Vidimus simplicissimum victum eorum, qui primi ad habitum athleticum exercebantur. In quo, puto equidem, illud quibusdam videbitur reprehendendum, quod dulcibus, ut caricæ sunt, vehementer nutriendi facultas fuerit tributa, quum nulla sit dulcibus, utpote sal sui generis habentibus; qui in crystallos abit & in aqua facile solvitur, cum textura chyli nostri convenientia. Enimvero, utut rectissime hæc præcipiuntur, caricis tamen, uvis, dactylis & id genus aliis, in quibus admodum moderata dulcedo hæc glutinosis succis immersa, & conjuncta est, parum obsunt, præsertim quum aliis, in cibo adjunctis, magis obtundatur hæc acrimonia dulcis salina; præcipue autem caseo molli, ad lactis indolem proxime accedenti. Quin etiam dulcedo talis, gustui

I i obvia.

f) de re culin. l. VII. c. 3.

g) de alim. fac. III. cap. 12.

h) de hab. corp. Germ. caus. p. 73.

i) de victu acut. §. 49. & Galen. comment. in h. l.

k) de aliment. facult. lib. I. c. 7.

l) de aliment. facult. lib. I. cap. 2.

m) Quadrip. Botanic. pag. 537.

obvia, adeo non excludenda absolute a corporis nostri laudabili nutrimento videtur, quum per artem videamus ex lacte saccharo simile concretum parari, cui propterea sacchari lactis nomen in quibusdam officinis tribuitur. Ipsum quoque saccharum, si recte utaris, non est corpori inimicum, & sanguinis nostri indolem aliquam habet, quia igni admotum, non aliter quam sanguis exsiccatus, ardet. Quod quidem *Beccheri* n) argumentum non penitus meum faciam; videatur ipse, qua ratione saccharum commendet, tamquam naturæ commodissimum, & alimentum sanguini conveniens.

§. XXXVI.

Antequam ad recentiorum athletarum transeamus victum, aliqua sunt, quæ considerationem nostram mereri videntur. Et primo quidem dispiciendum nobis est, sit ne hæc illa athletarum *ἑρποφαγία*, quam auctores nobis commemorant. Equidem fateor studiosè multumque inquirendo de vi hujus vocis, & rei significatæ vera conditione, nusquam expiscari me potuisse, quod implicatam hujus vocis notionem plene potuerit evolvere & ad nostros athletas accommodare. Nullam aut *Hippocrates* aut *Galenus*, quod mihi quidem constat, lucem hic adfert, nec adeo vel *Foesius* vel *Goræus* consulti respondere potuerunt. Lexicographi, quorum maxime mihi hic placuit *Rob. Constantinus*, ipse scilicet professione medicus, *ἑρποφαγίαν* exponunt, ut duplicem sensum habeat, & non minus arida & sicca epulari, quam comedere, quæ siccandi vim habeant, designet. *Terullianus* autem laudatur auctor hujus vocis, qui idem Latine *aridam saginationem* alio loco exposuit, agens, ut ex *Petro Fabro* o) colligere possum, de athletis; ipse autem *Faber* de eo exponit, quod coliphio & carnibus assis pasti fuerint, non vero elixis. Quid igitur vetat, si de alimentorum tantum genere sermo est, hanc saginationem siccae nomine potissimum intelligere.

§. XXXVII.

Maxime autem xerophagia celebrari inter Christianos cœpit, adeoque posteriori potissimum ævo innotuit res cum nomine, & ad nos nihil proprie pertinet. In universum illud notandum, agymnastica paganorum vita, ad asceticam Christianorum, multa vocabula & dicendi modos esse translatos, in quibus caveri debet, ne quid in alterutram partem confundamus. Quid vero Christianorum ritu xerophagia fuerit, expositum videas in *B. Christoph. Cellarii Thesouro Fabri*, tertiis curis recognito. Nimirum prorsus adversatur nostrorum athletarum instituto, qui impleri quam maxime quærebant, quum Christianis designet aliquam abstinentiæ speciem, qua sperabant id obtinere, ut ne nimium saginatus venter animo officeret, aut, ut dulcissimi poetæ p) Christiani verbis loquar:

*Arvina putrem ne refudans crapulam
Obstrangulatæ mentis ingenium premat.*

Quod autem *Saubertus*, quem illo loco citat, Xerophagiam athletarum ita exponit, quasi eas animalium partes selegerint, quæ siccae essent, ut pedes bubulos, non quæ succi plenæ & pingues; nulla auctoritate puto posse probari de veteribus gentilium

athletis: quod autem addit carnibus & pulpis vesci solitos esse atque condimentis & jusculis, prorsus (nisi de carne assa) veritati rei repugnat, & puto excidisse ibi describendo negandi particulam. In Christianorum vero ascetas quosdam quadrare priora hæc facilius admitto, quia memini alicubi q) me legere, in Hispania, mediterraneis præsertim locis, ubi piscium est inopia, diebus illis, quibus a carnibus abstinentia, Romanæ ecclesiæ decretis, injuncta est, antiquo ritu in cibum venire animalium capita, pedes & viscera, quoniam hæ partes minus nutrire putantur, adeoque a *Joanne Caramuele* piscium moralium nomine fuerunt insignitæ.

§. XXXVIII.

Deinde circumspicendum etiam de potu esset. Nullibi autem memini me legere, qualis ille antiquissimis fuerit, nec satis de recentioribus illud constat, quare, quantum ejus investigando scire licuit, ad illum locum omne reservamus, quo ordine de illo sermo erit instituendus. Ante vero quam ad eos progrediamur, quærere liceat, quare antiquum morem deseruerint athletæ & ad alium victum profuerint. Rationem videor ex *Galeno* haurire, quem audiemus. Is vero, quum, loco superius adducto, de ficibus, quod copiose nutrant, docuisset, mox subdit: *carnem tamen non compactam neque firmam generant, ceu panis & suilla, sed sublaxam ac subinanem, ut faba.* Οὐ μὲν ἐνσχυμένον ἢ στερεὸν ἀλλὰ ὑπόσφυον. Quum vero hi homines quam firmissimam desiderarent, ratio facile patet, quare ad ea transierint, quæ talem possent producere.

§. XXXIX.

Progredimur ad diætam recentiore, quæ, five medice rem æstimes, five ad regulas Christianæ pietatis & sanæ rationis rem exigas, priori, quam recentuimus, longe deterior reprehenditur. Sed considerabimus prius ea, quæ in cibum expetierint, tum quoque videbimus quo modo, qua mensura, quibusque legibus. Antea dictum quis ad carnes athletas traduxerit. Ceteri itaque, quos simile studium tenebat, illum videntur imitati, in carnum esum, unanimi consensu, ivisse. Utrum vero priorem prorsus reliquerint victum, an potius carnum esum prioribus adjunxerint, non ausim dicere; puto tamen eos retinuisse priora & addidisse carnum voracitatem. In universum illud æstimantibus nobis, non credo aliquem vitio daturum, si asseramus prudenter eos in hoc fecisse, quod ad eum, quem intendebant finem, carnes adsumserint. Etenim illud extra controversiam puto esse positum, carnes ad nutriendum humana corpora multo esse aptiores, quam quævis alia, quæ ex vegetabilibus aliquis in cibum expetat. Ea enim est partium, ex animalibus sumtarum conditio; ut longe elaboratiorem dent succum & illam naturam jam indeptum, quæ nostræ est simillima: quum vegetabilia longe sint crudiora & terrestribus, ac chylo prorsus ineptis, pluribus sociata. Hanc rationem intuitus *Hermannus Conringius* inter præcipuas causas proceritatis in proavis nostris, etiam hanc retulit, quod multis carnibus usi in cibo fuerint.

§. XL.

Inter carnes autem eas tantum seligebant, quas usus

n) *Psychosoph.* p. 251.

o) *libr. III. cap. 3.*

p) *Prudentii Cathemerin. VI. v. 9. 10.*

q) *P. Antonii Zucchelli descriptio itineris, in Congo Æthiopum suscepti. relat. III. §. 4.*

usus maxime probaret esse nutriendo aptissimas. Pauci memorantur alia, quam suilla, vesci soliti, quos primo attingemus. *Athenæus* r) igitur Thebani aliqujus mentionem facit, qui caprarum carne vescébatur, idque de eo confirmat, quod robore omnibus fuerit superior, sed nidorem de se talem sparserit, hircum redolentem, ut ceteris fuerit omnibus abominabilis. Milonem etiam Crotoniatam bubulam in cibum sumfisse, superius dictum est.

§. XLI.

Utraque caro veteribus male audit. *Hippocrates* s) de bubulis carnibus graviter pronunciat: ἀνυπέρβλητος ἡ φύσις βοείων κρεῶν καὶ οὐ τῆς τοχούσης κοιλίης καλοπέψι. *insuperabilis sunt naturæ & non est cuiusvis ventriculi eas concoquere.* Idem pro caprinis fere molestius pronunciat. Αἰγεία δὲ κρεῖα ξυμφορώτερα, πλὴν ὅσα τε βοείοισιν ἐνὶ κακῇ, πάντα ἔχει: *Peiores sunt caprarum carnes, quin illas noxas, quæ in bubulis sunt, omnes etiam inferunt.* Has autem omnes ordine recenset, nec opus est huc transcribere. Nolumus autem tanti doctoris accuratius examinare sententiam, aut codicum, hac eadem pagina mirum in modum a se variorum, fidem labefactare: forte tamen minus concoquetur, quod de bubula audentius pronuntiavit, & ex hoc carniū genere eas maxime probavit, quæ sunt ὡς παλαιότατα, quam vetustissima.

§. XLII.

Nec prorsus negligenda videtur foetoris in Thebano athleta ratio. Longe minus enim Medico, circa ea occupato, quæ corpori humano accidunt, turpe est lucro scientiæ & artis ex re vili & contempta inhiare, quam Romano Imperatori fuit, ex obsceno liquore hominum, opes & aurum corradere. Dubium autem non est illud, quod oluit, virus, ex cutis perspiraculis prorupisse, quando effluentibus ex corpore tenuioribus partibus homini incumbens aër perfusus est. Incredibilem autem copiam humoris in tam subtiles partes, ut sensum effugere fere soleant, attenuati, continuo exspirare, nolo ex *Sanctorio* repetere. Illud tantum dicam, non meram esse humiditatem, sed in tanta subtilitate sua etiam particulis imbutam, quæ sanguinis nostri qualitates quasdam sensibus imprimere possint. Canes, quos natura nobis sagaciores in hac parte fecit & olfactu teneriori præditos, dum heri longe absentis personam requirunt, aut feram in quam mittuntur, investigant, hoc præcipue feruntur duce & indice. Hoc, ut perpetuum esse dicas, illud tamen singulare est a certis adsumtis mirum mutari & augeri illam expirationem, ut odore manifestius deprehendi possit. Qui enim allium aut cepas comederunt, dissimulare factum suum nequeunt, si maxime velint, præsertim cum motus paullo vehementior, aliquot ab cibi tempore horis, sanguinem in celeriore cursu concitaverit; non enim solum ex pulmonibus rediens spiritus assumpta olet, (si maxime os eluerint & nihil eructaverint); sed sudor, qui toto corpore erumpit, eodem nidore indusia complet, & urina manifesto odore illo nares ferit. Idem accidit forte plerisque carne vervecina pascis. In vaccarum etiam lacte, & ex hoc confecto butyro, gustus deprehendere valet si forte illis inter pabula pratis non infrequens allium obti-

Frid. Hoffmanni Oper. Supplem. II.

gerit. Ex quo id mihi quidem videtur consequi, illos succos, quos natura solvendis digerendisque cibis in ventriculo, duodeno, aliisque intestinis affundit, etiam in sanissimis, ita non valere, ut omni manifesta qualitate, quam extra corpus habebant, omnia in corpus assumpta, privare possint & exuere, sed aliqua omnino dari, quæ illorum vim in hac parte eludant, & suas qualitates in ipsum chylum & sanguinem transmittant.

§. XLIII.

Sed in viam e levi diverticulo redeamus, & suillam carnem, athleticis quasi proprium alimentum, expendamus. *Galenus*, ubi tertium de facultatibus alimentorum orditur librum, ita inquit: *Carnes, quum probe concoctæ fuerint, optimum gignunt sanguinem, & potissimum si animalium boni succi fuerint, cuiusmodi est suum genus. Omnium itaque ciborum suum caro potentissime nutrit: cuius rei athlete certissimum tibi præbent indicium.* Si enim, paribus exercitationibus, parem molem alterius cibi diem unam comederint, postero die statim sentient sese redditos imbecilliores. Quod si pluribus deinceps diebus id fecerint, non imbecilliores modo, verum etiam alimenti penuria macilentiores palam conspiciuntur. Idem etiam de eo, quod dicimus, potes in pueris, qui in palastra sese exercent, experiri, & in aliis, qui quamlibet actionem fortem ac vehementem, cuiusmodi est fodientium, obeunt. Pluribus Galeni adducendis locis abstinere; sed consensum *Hippocratis*, t) liceat adjungere. Porcinæ, inquit, carnes, (χοίρεια) pravæ sunt, quum fuerint crudæ aut ambustæ: suillæ autem (ῥεία) sunt optimæ omnium carniū, sed præstant ex his, quæ non vehementer pingues sunt, cetera. Ubi primo paullisper immorari liceat verbis. Turbant enim hic codices & *Lindenius* nobis legendum exhibet *ῥεία*, quod ovillas designat, quamvis versio, (ut sollemnè est in hac editione a verbis Græcis discrepare Latina) suillam exhibeat. Sive igitur mendum sit, sive corrigere hic aliquid editor voluerit, *Galeno* teste, nihil hic mutandum statuo: nam χοῖρον ἐξαγέτωσιν ὠνόμαζον οἱ παλαιοὶ τὸν μικρὸν λίαν, τοὺς σῶλους, τοὺς ὑπὲρ τοὺς τελείους ὠνόμαζον. Χοῖρον veteres maxime vocabant admodum parvulum porcum, qui vero perfectam ætatem superassent, σῶλοι vocabantur; relinquitur igitur ut ῥεία, quorum caro laudatur, sint, qui in medio confisterent neque ætatem veteris victimæ haberent.

§. XLIV.

De modo utendi etiam dicendum est. Athletæ autem non adhibebant facile has carnes elixas, verum assis adsueverant. u) Rationem, qua inducti assa elixis prætulerint, reddit *Galenus*, x) ὅσα μὲν γὰρ ὀπτῶντες ἢ τηγανίζοντες ἐσθίουσι, ξηροτέραν τροφὴν δίδουσι τῷ σώματι: *assata aut in sartagine frixa siccus dant corpori alimentum*, de iis autem, quæ in aqua decoquantur, humidius sibi alimentum promittebant.

§. XLV.

Si omnem antiquitatem excutias, invenies sanè assatis maiorem semper habitum fuisse honorem, quam elixis. *Homerus* heroum epulas describens, assis eas instruit. Germanos nostros assatis carnibus frequentissime se saturasse *Conringius* y) addocet. Ratio non solum ex eo petitur, quod faciliori appa-

r) *Deipnosoph. lib. X. c. 11. p. 413. seqq.*

s) *de victu acut. §. 60. p. 317.*

t) *de victu acut. §. 60.*

u) *Petr. Faber agon. lib. III. cap. III.*

x) *de alim. facult. tertio ineunte.*

y) *de habitus corp. Germ. c. pag. 76.*

ratu possint in usum confici: sed medice etiam nobis rem considerantibus, apparet, longiori coctione, præcipuam vim nutriendi in aquam, coquendo adhibendam, ex carnibus, præsertim in frusta minutiora concisis, transire debere, utpote partes mucilaginoso-pingues facile in illam migrant, remanente ut plurimum fere effoeta, aut minus saltem nutriendo apta. Quod videmus ubi aqua, inter elixandum adhibita, refrigerat; facile enim gelatinosam consistentiam induit. Sed secus fit ubi affantur carnes, remanet ibi gelatinosa pars interius conclusa, & paucum illud, quod exstillat, saniosum, in pulcherrimam concrevit gelatinam, alendo corpori, si quicquam aliud, idoneam. Quare iis, qui maxime nutriendi alimentum sub minima mole expetunt, apparet commodissimum esse assis uti carnibus.

§. XLVI.

Verum athletæ in eo singularem coenam habebant, quod coacti, tum alia, tum carnes, & ad certam mensuram, quantam scilicet quisque capere posset maximam, devorare debuerint. Et hæc est notissima illa ἀναγκοφαγία, quam gymnastæ seu epistatæ imperabant, & unicuique præscribebant. De ea Epictetum, superius citatum, porro audiamus loquentem: *Θέλεις ὀλύμπια νικῆται; δὲ σε εὐλατῆιν, ἀναγκοτρφεῖν, ἀπέχεσθαι περμμάτων, ἀπλῶς, ὡς ἰατρῶν παρὰ δὲ δωκίμῳ σεαυτὸν τῷ ἐπιστάτῃ.* Vis olympia vincere? - debes strictum ordinem observare, coactus edere, abstinere coctis eduliis - teque simpliciter magistro, tamquam medico, tradere. Sed Galenus 2) pluribus locis clarissime hæc indicat. *Οἱ ἀθληταί*, inquit, *προφὰς προσφίρονται σὺν ἀνάγκῃ, πολλὰς ἀρχιμίσων νυκτῶν ἐκτείνοντες τὴν ἰδωδὴν.* Athletæ coguntur edere, & sæpe in medias noctes coenam protrahunt. Paullo post suis proinde similes pronunciat tam miseros homines, aut suis in hoc multos peiores, quoniam hæc bruta nemo ad nimios labores, nemo ad nimium devorandum compellit. Ne quis autem rem nimis recentem putet, antiquiora afferemus duo testimonia. Audiatur itaque Hippocrates s. Polybus, quisquis eorum est vetus auctor libri de salubri diæta, ubi hæc verba legimus: *ὁκόταν ἀναγκάζηται ὁ ἀνθρώπος κρηφαγεῖν*, quo loco commentator Galenus innuit athletas hic esse intelligendos. Aristoteles similiter in politicis libris *τὴν βίαν προφὴν καὶ τοὺς πρὸς ἀνάγκην πόρους*, itemque *τοὺς πόρους καὶ τὴν ἀναγκοφαγίαν* (quæ duo fere semper conjungi ab auctoribus solent,) commemorat, & de iis disputat, utrum & quando pueri in gymnasia ad hæc traduci debeant. Pluribus testimoniis opus non esse arbitror, plena enim eorum sunt omnia veterum monumenta, ut non facile lector in his versatus ea ignorare possit.

§. XLVII.

Enarravimus potissima, quæ in alimentis athletarum expetebantur. Equidem nullus dubito, pauca his, quædam ex iis, quibus antiqui tribuebant ficiendi facultatem, forte adjecta fuisse; sed clara me destituunt veterum testimonia, sine quibus loqui in re, quæ historiarum fidem supponit, nefas existimo. Sed redit in memoriam, abruptum superius fuisse de pane sermonem, quem heic pertexere juvabit. Nimirum recentioribus scriptoribus Latinis non adeo rara est mentio coliphiorum; a Græcis,

quod ego sciam, nullibi commemorantur, quum tot aliæ panis species ab Hippocrate & Galeno celebrentur suis nominibus. Hanc vocem docti viri Græcæ originis putarunt, ab κῶλον, membrum & ἰσχυρία, robur derivatam; sed magnopere vereor, ut iis acciderit, quod etymologis in infinitis fere solet, ut verosimile confectati sint, verum non attigerint. Ego mihi vix persuadeo Græcam esse vocem, quum præter Martialem, Juvenalem, Latinosque alios non reperiam, qui ea sit usus. Quicquid sit de origine ejus; nec illud satis constat, an vox hæc panem solum significet athletarum, an integrum eorum victum, aut determinatam victus portionem. Auget & fovet hoc dubium Petrus Faber, aa) qui ita, quamvis præter fere morem suum, sine auctore scripsit: Pythagoras (de quo supra) panes ἀζύμους & ἄσας carnes comedere athletas docuit, quæ coliphia vocabantur.

§. XLVIII.

Sed esto de coliphiiis jam satis, quia certum de eo afferre quicquam nequimus, an vero illud recte dicit magnus vir, in cibo athletarum fuisse panes ἀζύμους? Equidem pernego, quum Galenus, bb) harum rerum, si quis alius, imprimis gnarus, aliud me doceat. De panibus quidem sine fermento ita exponit, ut intelligas esse illos sic confectos, ut aliquid casei adderetur. Rusticos autem festis diebus solitos fuisse eos apparare. Si bonitatem scire desideras ita illos commendat: *ejusmodi panibus promte omnes leduntur, etiam si qui fortissimo sunt corporis habitu, cujusmodi sunt messorum ac fossorum robustissimi.* Eodem loco athletarum panem sic nobis tradit: *panum is athleta quidem est accommodus, qui neque bellissime est assatus, neque multum habet fermenti; privato autem & seni, qui bellissime quidem in clibano est assatus, fermenti autem habet multum.* Ita quidem de fermento, at modico, obtinebimus: sed nunc Hippocrati Galenus erit contrarius. Ille enim, de salubri diæta libello, ubi in eos incidit, qui in gymnasiis exercentur, ita scribit: *ἔστω τούτοις τὰ σιτία ἄρτος ὡς ἐξοπτότατος ἐν ὄνῳ ἐντεθρυμμένος.* Sint his cibi, panis quam bellissime assatus, cet. Sed constat de eorum pane, si animadvertamus illo loco sermonem Hippocrati esse de athleta minus bene affecto, alvique profluviis correpto.

§. XLIX.

Ne quis vero miretur, cur in fermenti additione & coctione tam curiosos se præbuerint præcæ medicinæ antistites, audiamus Hippocratem causam hanc exponentem: *αὐτῶν τῶν ἄρτων, ὁ μὲν ζυμῆτις κοῦφος καὶ διαχωρεῖ. ὁ δὲ ἀζύμος διαχωρεῖ μὲν ἥσσον, τρέφει δὲ μᾶλλον.* Fermentatus levis est & facile secedit; non fermentatus secedit quidem minus, magis autem nutrit. Medium itaque inter hæc tenere panis debuit athletarum, ut & multum nutrimenti suppeditaret, nec tamen cito nimis, emulsa breviori tempore nutritiva parte, in faeces fatisceret & extra corpus, natura sic impellente, projiceretur: aut, si tu id mavis, ne alimentum sanguini hinc adjectum aucta celerique circulatione nimis cito attritum & in serum inutile fatiscens, per cutis poros expellatur.

§. L.

Galenus cc) in hanc rem clarum testimonium supra jam

2) Suasoria ad artes oratione.
aa) Agonist. libr. III. cap. 3.

bb) de alim. facult. lib. I. cap. 2.
cc) vide §. 24.

jam totum retulimus, hic autem repetere supervacuum putamus. Ex eodem *dd*) itaque aliud potius attingemus dictum, quo nos docet de gladiatoribus, quos superius diximus breviori fere via ad habitum corporis diffusum & artis perfectionem esse ductos, quam ceteros athletas. *Εκ κνάμων ἐστὶ τις σκευασία, μετὰ πτισσάνης γιγνομένη. Καὶ πλείω γε τοῦ τῷ ἐδέσματι καθ' ἑκάστην ἡμέραν οἱ παρ' ἡμῖν μονομάχοι ῥεῶνται, σαρκούντες τὴν τοῦ σώματος ἔξιν οὐκ ἐσφιγμένην τε καὶ πυκνὴν σαρκί, καθάπερ ὁ χοίρειον κρέας, ἀλλὰ χαυνοτέρᾳ πῶς μᾶλλον.* h. e. Ex fabis paratur aliquod cum ptisanā edulium. Hoc quotidie multum sumunt gladiatores nostri, qui corporis habitum carnosum reddunt, non carne solida & compacta, qualis suilla, sed multo laxiori. Fabæ alias non optime audiunt veteribus; Pythagoras earum esu interdixit penitus; Galenus autem, qui talium gladiatorum Medicus, & ipse athleticis studiis deditus fuit, fidem merebitur de earum facultate ita scribens: qui animum attendunt, easque corporis dispositiones, quæ singulos cibos subsequi solent, observant, sentiunt in toto corpore, velut a spiritu flatulento, tensionem quandam, potissimum si quis huic cibo non est adsuetus, aut ipsum non belle percoctum sumpserit.

§. LI.

Vidimus cibos athletarum: nunc audiamus etiam, quam pulchris sermonibus & confabulationibus condire eos soliti fuerint. Quid autem ab hominibus, in vilissima sui parte occupatis, expectari possit, per se quisque intelliget, sed *Plutarchi*, illorum temporum scriptoris, testimonio plenius constabit. Is vero, de sanitate tuenda pulchro libello, hæc habet: *Ἀλειπτῶν δὲ φωνὰς καὶ παρορριζῶν λόγους, ἐκαστοτε λεγόντων, ὡς τὸ πρὸς δεῖπνον φιλολογεῖν τὴν τροφὴν διαφθείρει, καὶ βαρύνει τὴν κεφαλὴν, τότε φοβητέον, ὅταν τὸν ἰνδὸν ἀναλύειν ἢ διαλέγεσθαι πρὶ τῇ κυρίῳ ὅν δειπνῶ μέλωμεν.* Aliptarum vero voces & paedotribarum crebros sermones, quibus subinde inculcant cibum corrumpi & caput gravari, si quis inter cœnandum eruditos sermones misceat, tunc extimescamus, quum dialecticas tricas, in cœna evolvendas, aggressi fuerimus. Nam, ita pergit, dialectica in cœna bellarium est minus dulce, sed quæ vehementes capitis dolores & lassitudines possit inducere. Quod si isti, nihil etiam aliud sub cœnam quærere ac philosophari nobis permittunt, de iis rebus, quæ pulchræ juxta sunt & utilem præbent oblectationem; jubebimus ut molestiam nobis faceßere desinant, inque Xysto & palæstris apud athletas disputent, quos, a libris abalienatos, totos dies facilius ac scurrilibus jocis exigere adsuefaciunt, & ut scite *Aristo* dixit, similes columnarum in gymnasio, nitidos scilicet lapideosque fecerunt. O miseros homines, quorum corpora in sagina sunt, animi autem in macie ac veterno.

§. LII.

De potu athletarum, quantum ex fide dignis scriptoribus accepi, nunc est subjiendum. *Galenus* loquitur: *Athletæ non ita statim ab exercitationibus vinum bibunt, sed aquam prius, experientia sic edocti.* Aquam igitur biberunt, eamque ab exercitationibus adhuc calentes, primo calidam, inde frigidam & tandem vinum, sæpe etiam vinum aqua temperatum. In quo nihil est, quod non optimo consilio

Frid. Hoffmanni Oper. Supplem. II.

institutum fuerit. Aqua enim diluendis in ventriculo cibis est convenientissima; bene quoque id factum, quod frigida abstinerint, dum corpus caluit: præsentissimam enim hoc inducit noxam; nec hoc male, quod, extra hoc periculum positi, frigidam sumserunt; calidæ enim præferenda est frigida, si modum non excedat; quippe & nos experientia novimus, multum ingurgitatam calidam ventriculum totumque corpus enervare. Vinum itaque considerandum nobis solum restat. Si *Horatium* audimus, abstinentum a vino & venere fuit, quo loco tamen non plus puto dici, quam certis corporibus, certo tempore vino fuisse interdictum. Et illis quidem, qui ad justam staturam & longitudinem nondum pervenerant, parcus eo aut plane non licuisse uti: ita enim videtur intelligi velle poeta, quum puerum dicit, hoc est ad pubertatis annos jam accedentem: nisi enim hunc vellet, non opus fuisset de venere mentionem injicere. Nec tamen hos rigide adeo observasse abstinentiam a vino, *Arati* apud *Plutarchum* ee) docet exemplum: neque reliquos vini caruisse usu, Medicorum præcepta confirmant. Quo autem genere vini usi sint, non facile indicaverim, nec credo multum referre, si quis hæc sollicitius ex antiquis velit exsculpere.

§. LIII.

Vini tamen usum, posterioribus Romæ temporibus, ubi luxuriantes adeo etiam feminae gymnasia subibant, admodum copiosum & immoderatum, & a cœna præcipue largius perpotatum fuisse, facile ex *Seneca*, *Martiali*, *Juvenali*que possem probare, si hoc ad ordinariam diætam pertinere arbitrarer & non potius incredibili hominum libidini perversitatisque tribuerem; sed iterum hæc attingenda erunt, quando ad vomitiones athletarum fuerit perventum.

§. LIV.

Non immerito aliquis quærat, quodnam tempus cibo sumendo destinatum fuerit, & an diverso tempore eadem assumere debuerint. *Galenus* ff) adnotat ciborum varietatem nocentissimam esse: subdit: *Φυλάσσονται δὲ αὐτὸ μάλιστα καὶ οἱ γυμνασταί. Καὶ οἱ γε νομῶντες ἀθλοῦντες, ὅτι μὲν τοῦ ἀρίστου τὸν ἄριστον μόνον ἐδέουσι, ὅτι δὲ τοῦ δεῖπνου τὸ κρέας.* Observant id maxime gymnasiorum præfecti: ii saltem, qui ad leges athleticas recte vivunt, in prandio panem solum comedunt, carnem autem in cœna assumunt. Vides prandium & cœnam commemorari, diverso modo instructum, illud quidem frugale, alterum lautius, in quo προφὰς προσφέρονται σὺν ἀνάγκῃ, πολλάκις ἄλλε μέσων νυκτῶν ἐκτείνοντες τὴν ἐσθλὴν. Coacti vorant, sæpeque ad medius noctes alimenta ingerunt. Jentaculum autem non sumserunt, ἵνῃκα γὰρ οἱ καὶ φύσιν βιοῦντες ὑπὸ τῶν ἔργων ἔχουσιν, ἐδεσμάτων δεόμενοι, τὴν καὶ οὗτοι διακρίσανται τῶν ὑπνῶν. Quando enim homines, ad naturæ ductum viventes, a laboribus cessant tantisper donec cibis se recreaverint (h. e. circa prandii tempus) tunc demum hi a somno resurgunt gg) Elegantissimus poetarum Christianorum, *Prudentius*, hos homines, aut horum mores proxime sequutos, videtur innuere, pulcherrimo carmine in luxuriæ & sobrietatis pugnam conscripto. hh) Ita enim luxuriam nobis sistit ad prælium prodeuntem:

li 3

Ac

dd) de facult. alim. libr. I. cap. 19.

ee) iom. I. pag. 1028.

ff) de victu acutor. com. I. §. 18.

gg) Verba sunt Galeni orat. suaser. ad artes.

hh) Psychomach. v. 316. seqq.

*Ac tunc pervigilem vultabat marcida cœnam,
Sub lucem quia forte jacens ad fercula, raucos
Audierat lituos, atque inde, tepentia linquens
Pocula, lapsam per vina & balsama gressu
Ebria calcatis ad bellum floribus ibat.*

Longa enim & in noctem producta cœna, somnus in multam diem protractus, a somno tepida pocula ad vomitum ciendum & post vomitum vino reple-ri: omnia sunt *γνώσις* athletica.

§. LV.

Sponte ad somnum eorum considerandum sermo decurrit, ante vero quam illum penitus exponamus, quædam supersunt absolvenda ad cibum pertinentia. Quum enim supra modum cibus ingestis se oneraverint, necessarium est illud evenisse, quod iis fere omnibus, qui à consuetis ad minus sibi usu familiaria transire debent, & eo saltem tempore, quo aliquam in voracitate perfectionem nondum attigerunt, male ab hoc habuisse instituto, adversus naturam, paucis alias contentam, tantopere pugnante. Equidem, hæc apud animum cogitans, multum ad rem fecisse arbitror, si quis eo corporis habitu a natura fuerit instructus, ut non facile ab rebus novis, si quæ incidunt, damnum patiat. Hi autem sunt, quibus caro laxa est, vasa autem minora: animus vero hilaris & obsequens, saltem non præceps & consueti admodum tenax. Quum enim corporis habitum animi mores sequantur, ut *Hippocrates* sapienter monet, ea solemus, in indole hominum designanda, plerumque conjungere. Tales autem communibus & in arte receptis vocabulis sanguineos & phlegmaticos solemus vocare. Hos autem puto maxime huic instituto aptos fuisse, ex reliquis vero, si quis plurimum de temperatura hac obtinuerit. Nec destituit nos in eo experientia, quippe ex omnibus, in quibus aut magnum & prolixum corporis habitum deprehendimus, aut magnam in tolerando ac appetendo vario & multiplici, immo copioso alimento, videmus naturæ patientiam; paucissimos deprehendimus, qui sint eminenti aliquo gradu cholericici vel melancholici: nec auctoritas *Hippocratis* ii) nos hic fallit, qui inter homines gymnasticos, a coacto carniū esu male multatos, refert τοὺς πυκνοσάρκους, quorum naturam esse acutam tradit, & in utramque partem versatilem, quæ non diu in eodem persistat, si quem etiam habitum induxisses: contrarium evenire in hominibus rariori corporis habitu præditis, qui ut plurimum sunt hirsutiores, & tum carniū esum facilius admittunt, tum vero etiam laboribus tolerandis & conservando bono habitui, sunt aptiores.

§. LVI.

Naturæ accedit consuetudo, quam sæpe conando, tentando, agendo, repetendoque acquirimus. Hujus quanta vis sit, & quanta in utramque partem, non opus est hic exponi, quum de ea inter omnes conflet. Quid itaque mirum, si his hominibus, longiori temporis spacio, in quantitate assumentorum, ex magistri præscripto quasi per gradus, progredientibus, ventriculus & intestina magis magisque expandi se dilatarique passa sunt, ut quantitatem ciborum caperent, quam non crederet aut posset alius; quum ii Medici, qui dissectionibus

corporum diligentius vacarunt, non pauca edonum bibonumque corpora offenderint, quorum hæ partes insigni præ reliquis & ordinaria hominum magnitudine & capacitate conspiciebantur. Nec solum copiarum ciborum sensim adsuescimus, verum etiam eorundem conditio & qualitas cum tempore familiarior nobis & tolerabilis reddi potest. Si autem de copia succorum, in corpus hinc affluentium & cumulandorum, quæris; de eo suo loco circumspiciemus.

§. LVII.

Ut vero melius ferrent tam copiosum alimentum, novoque, ad statam horam ingerendo, idonei essent: in hunc finem multum sane laborarunt, ne quid excrementitii sordidique in corpore diutius hæreret, sed, quam fieri posset, celerrime ejiceretur. Hoc quidem impetrarunt frequenti cataclysmatum usu & vomitionibus, tantum non quotidianis. Ad horum itaque historiam tradendam, usumque investigandum, debemus accedere, & tantisper somnum athletarum porro differre. Utriusque sane usus est admodum vetus, & si quid historiis fidendum, ab Ægyptiis crebrior eorum usus, ad Græcos pervenit, quod inter *Hermannum Conringium* kk) & *Olaum Borrichium* ll) ex parte jam agitatum est, quorum omnes concertationes plus sane reipublicæ medicæ, ad sua incunabula noscenda, profuerunt, quam innumerorum otiosa & iners concordia.

§. LVIII.

Stetit autem, priorum athletarum tempore, hæc res, quantum inquirendo addidici, intra mediocritatis terminos, ut nimium illis non reperiam adeo tributum. Quippe *Hippocrates* mm) eorum usum sic temperat, ut alvi per infusa elotiones & τὴν ἀνακαθαρσιν per vomitum, secundum anni tempora distribuat; bis vero singulis mensibus alterum ex his, in usum vocare permittat, etiam τοῖς ἰσχυταῖς, id est, suo more & ritu, sine certa lege, viventibus, credo autem magis hoc in hominibus vitam ἀεὶ ἀλίσκοις degentibus admisisse veteres, si necessitas etiam aut usus sapius expeterent. Juvat quoque cernere, quibus subsidiis utrumque præstiterint. Infusa erant vel crassa & pingua ex lacte, cicerum decocto & aliis hujuscemodi; vel tenuia & salsa, ex aqua marina, muria & similibus. Vomitum ciebant, si quis hyssopum contritum in aquæ congio bibisset, cui, ad gratiam, aliquid aceti & salis miscebatur: & is erat modus quo jejuni vomebant, athletis proprius. Quare alterum ab eo descriptum modum hic non afferro. Non multum est diversus ille modus, qui in epistola ad Antiochum ab *Hippocrate*, ut fertur, scripta, legitur, cujus verba suo afferam loco. Laudanda in his simplicitas fini obtinendo per omnia sufficiens: & quanto melius egerunt, qui talia, ventriculo tantum evacuando, dederunt, a quibus nulla noxa fieret, quam nostro tempore plurimi, qui nihil nisi σπᾶσμα ad evacuandum propinant, præsertim ubi vomitum proritare constituerunt. Veteres talia numquam dederunt καθάρματα, nisi opus videretur ex toto corpore vacuare humores, & prudenter illos tunc quoque selectum instituisse legimus: in quo nos utilius imitemur eorum prudens consilium & canam experientiam admitteremus, quam nunc eos ridemus, quando verbis βαρβαροφωνότεροι ali-

ii) Libello de diata salubri.

kk) de Hermetica medicina lib. I, cap. XL

ll) in Hermetis, Ægypti. & Chemic. sapient. vindicata. cap. VII. §. 3.

mm) de salubri diata & alibi.

aliquando delicatas aures nostras videntur percellere.

§. LIX.

Frequenter itaque vomendi & alvum infusis eluendi consuetudo antiquissima est, nec athletarum demum Græcorum. Romanorumve inventum cenferi debet. Hi autem, ut solent omnia in deterius verti, ad *κακοτεχνίαν* rem deduxerunt & quotidianum fecerunt, quod antea bis singulis mensibus exercebatur. Fidem hic non merear, nisi claris testimoniis evicero. Adsit igitur Medicorum disertissimus C. Celsus *nn*) qui nos ita instruit: *Vomitum luxuriæ causa fieri non oportere confiteor; interdum valetudinis causa recte fieri, experimentis credo. Commoneo autem, ne quis, qui valere & senescere volet, hoc QUOTIDIANUM habeat.* Idem brevi antea hæc protulerat: *rejectionem esse ab Asclepiade vomitum in eo volumine, quod de tuenda sanitate, composuit, video: neque reprehendo, si offensus eorum est consuetudine, qui QUOTIDIE ejiciendo vorandi facultatem moliuntur.* Paullo etiam longius processit. Hanc vere consuetudinem ita reprehendit Seneca: *oo*) *Æque luctatores & totam oleo ac luto constantem scientiam expello ex his studiis liberalibus. Quid enim, oro te, liberale habent isti jejuni vomitores, quorum corpora in sagina, animi in macie ac veterno sunt.*

§. LX.

Si cui hæc non sufficiunt, quantumvis clara satis & certa testimonia; hunc pluribus obruere possunt Suetonius, qui Imperatorum Romanorum historias ea narrat libertate, qua ipsi vixerunt, & tres nobis Imperatores Neronem, Tiberium Claudium & Vitellium perhibet præ cæteris gymnasticæ rei, adeoque voracitati quoque, multum deditos; de quibus singulis vomendi familiarem frequentiam commemorat; *Martialis* etiam & *Juvenalis*, qui non uno loco viros & feminas objurgant gymnastice vorantes & vinum adeo etiam jejuno ventriculo infundentes, ut vomere possent. Sed non solum ante cibum vomebant, verum quoque a cibo illud sæpius perpetrabant. Nolo autem ipsa verba inferere, ne sim longior, præsertim cum adducenda nunc de instrumentis, vomitui proritando inventis & hinc per longa sæcula, ad nostram quoque ætatem, vel superstitionibus vel revocatis, abunde fidem facient, quam non formidaverint Veteres ciborum aut cruditatum per os rejectionem.

§. LXI.

Veteres igitur familiari usu habebant quandam quasi chirurgiam aut mechanicam, qua se ad vomendum facilius juvabant. Vidimus eos vehiculum assumere rejiciendis cibis esse solitos, maxime aqueum, paucis medicamentosis, iisque blandis, alteratum, qui vero plus essent sumptuosi & luxuriæ dediti, copioso prius vino distendisse ventriculum. Jam post brevem deambulationem indigebant stimulo aut irritamento, cujus ope ea produceretur in faucium, œsophagi & ventriculi musculosis tunicis contractio & compressio, quæ fursum impellendo contenta projiceret. Id promte satis fiebat digito, quam longissime fieri posset, in fauces intruso, ibi-

que, quantum satis esset, retento. In hunc sensum auctor vetustæ ad Antiochum epistolæ, quæ Hippocrati tribuitur, scribit: *qui mane vomiturus est, debet minutatim raphani radices manducare easque, vel succum earum transmittere: cardamum quoque, id est nasturtium, sed & sinapi & erucam, devorare & aquam inde tepidam superbibere ac digito vomitum provocare.* Digitos autem alii, & plerumque quidem, nudos adhibebant, alii irritante aliquo succo, ut scammonio, illitos. Quibus hoc non sufficiebat, *digitale vomitorium* commenti sunt, quod *δακτυλίδειον* vocabatur. Hoc nobis Vir *χαρίεσται* Jo. Rhodius *pp*) ex Oribasii collectaneis medicis, ita describit: *Consuuntur digitalia ex corio carthaginensi aut alio quovis molliissimo, ad longitudinem digitorum decem aut duodecim (latorum) instar digiti. Ex his spatium senum digitorum lana impletur, reliquum vero, quod quaternum digitorum est, inane relinquitur, ut digitis apietur. Hæc igitur unguentis (cyprino aut irino) intincta in stomachum immittemus.*

§. LXII.

In eundem finem alii utebantur penna, seu ut scriptum apud plerosque veteres videas, pinna, oleo madefacta. Idem, quem modo citavimus, Oribasius rem clarius describit: *pennas anserinas ex cauda, octo aut decem, cyprino aut irino tinctas, indemus; quod ex eodem repetit quoque Ægineta.* Longum esset in hanc rem coacervare Suetonii, Athenæi, Taciti, Suidæque testimonia, quæ in promptu sunt, quare illud tantum, ut videamus durationem hujus remedii generis; adducemus, Arabum Medicorum principem, *Ibn Sinam qq*) quem *Avicennæ* nomine vulgo cognoscimus, hujus quoque meminisse, quem interpretis ore balbutientem exhibebimus, quum jam non liceat Arabicum exemplar intueri melioremque expositionem moliri: *Et, si cum penna vomuerit, bene erit; & si non, moveatur parumper, & si non, in balneum mittatur. Penna quoque, qua fit vomitus, inungenda est ex aliquo, quod sit sicut oleum sisaminum.* Quin ex recentioribus *Christophorus a Vega, rr*) Hispanorum Medicorum facile clarissimus, in subitis, ubi celeri vomitu opus est, id procurare suadet aut digitorum in os immisione, aut penna oleo madefacta. Solent etiam apud *Martialem ff*) hæc verba huc trahere:

*Stat exoletus, suggeritque ructanti
Pinnae rubentes cuspidesque lentisci.*

Magis autem videtur locus de dentiscalpio esse accipendus, quod vel ex pennis, rubro colore infectis, parabant, ut apud nos quoque fieri solet, vel ex lentisci cuspidibus. Exponat autem semet *Martialis tt*) ita in dentiscalpium ludens:

*Lentiscum melius, sed si tibi frondea cuspis
Defuerit, dentes penna levare potest.*

§. LXIII.

Commemorant etiam Veteres lorum vomitorium, penna multo efficacius, hoc est corrigiam, a coriariis nautea herba tractatam, quæ, in os demissa, tetro sapore vomitum concitaret, nec non funiculum ex papyro confectum, quinimo ferreum instru-

li 4

men-

nn) libr. I. cap. III.

oo) epist. LXXXVIII.

pp) ad Scribonium Largum not. p. 267.

qq) Canon. libr. I. Fen. IV. cap. XI.

rr) art. med. III. f. V. cap. 8.

ff) libr. III. epigr. 82.

tt) libr. XIV. ep. 22.

mentum: de quibus plene & docte ad *Scribonium Largum* commentatus est *Jo. Rhodius*, cujus verba huc transferre non putamus esse necessarium. Idem quoque attingit aliam Arabum machinam vomitoriam ab *Avicenna* uu) quoque descriptam, quam is refert in apparatu chirurgi venam secturi: habeat, inquit *Avicenna*, glomerem ut frustum rotundum ex serico grosso (quod *And. Alpago* auctore vulgariter *struso* dicitur) aut serico subtili, & cum eo habeat etiam instrumentum vomitivum ex ligno, aut penna: ideo ut si syncopis acciderit, quæ est una ex rebus, quæ ex minutione timentur, & fortasse habens hoc non excitatura syncopi, succurrat & glomerem in os ejus mittat & ipsum cum instrumento vomere faciat. Constat, ni fallor, de mente & consilio *Avicennæ*. Quo magis dubito *Rhodium* recte inspexisse auctorem, cum ita scribit: *Sic Medicorum Arabum princeps--verum ουδὲν ὀπὸς δίδωσιν. Toto enim capite describitur de venæ sectione, quid vero ipsi est cum vomitu? librarii culpa esto: plura non adjicio.* Sed nec nos plura de vomitoriis instrumentis, quorum antiquissimi natales satis cogniti sunt. Potius ad athletas redimus, quorum causa hæc inserta sunt. Nulli enim dubitamus hos maxime ex enarratis usos esse aliquibus, quibus subinde ventriculum excuterent, & ad novæ repletionis desiderium sollicitarent.

§. LXIV.

Si toties vomuerunt athletici homines, annon consequens fuit, ut alvus valde adstringeretur? Est enim illud inter doctrinas Medicorum, ventrem comprimi & stipari, quando ejectiones per os moliti sumus, aut illæ sponte acciderunt. Enimvero *Celsus* xx) nobis hunc scrupulum eximit: *Illud scire oportet, inquit, quod ventrem vomitus solutum comprimit, compressum solvit. Itemque comprimit is vomitus, qui statim post cibum est; solvit is qui tarde supervenit.* Nihil itaque est quod hic timeamus, quum non nisi tardissime vomitum moliti sint, quando nempe ab hesternæ cœna in ventriculo forte relicta rejectare visum fuit, ut nova, in prandio assumenda, possint locum invenire vacuum. Eadem igitur opera puto superius eos rejecisse per os, & inducta per vomitum concussione & pressione partium in abdomine, etiam crassorum intestinorum contenta ad exitum esse compulsa. Si vero hæc spei & voto minus respondissent, tum demum clysterum operam fuisse expetitam.

§. LXV.

Ex *Avicenna* superius intelleximus iis, qui a pennæ usu non vomuerint, suaderi balneum. Revocavit hoc in memoriam, quod apud *Prosperum Alpinum* yy) de usu balnei apud *Ægyptios*, in illum finem ut vomerent, legerim, quem eo magis adeundum iterum mihi putavi, quod frequenter vomendi consuetudo ab *Ægyptiis* fuit. Is igitur nobis auctor est hodieque in his terris operam dari corporum saginæ, præsertim a feminis: sed vomitandi adeo frequentem esse usum, ut multi singulis hebdomadibus hoc faciant, plerique bis quovis mense, aliqui etiam semel hoc facere satis habeant. Ut vero facile vomant, ad decem usque libras aquæ, in qua glycyrrhizæ radix seminaque fœniculi sint percocta, epotant, sicque evomunt multa & quam facile. Sed instituunt hanc evacuationem balneo a-

quæ dulcis tepidæ insidentes. Lucem hæc dant *Hippocrati*, ad intelligendum, quo fine jubeat τὰ παλῖα τὰ νήπια βρέχειν ἐν τῷ θερμῷ ὕδατι ὅπῃ πούλὸν χέρον, καὶ πίνειν διδόναι ὑδαρία τὸν οἶνον καὶ μὴ ψυχρὸν πίνειν. *Puerulos admodum infantes multa aqua calida per longum tempus fovere, & vinum bibendum dare copiosius, hocque non penitus frigidum.* Nempe is finis & exitus hujus consilii fuit, ut infantes vomerent; cur autem vomerent tenelluli? Ipse addit: τὰυτὰ δὲ ποιεῖν, ὅπως δὲ τε σπασμοὶ ᾗσον ὀπιλάβωσι, καὶ μείζονα γίνηται καὶ ἰσχυρότερα (*Galenus legit ἐυχρώτερα.*) Fieri debet hoc, ut convulsionibus minus sint obnoxii, & majores evadant meliorique colore & robore præditi. Non autem ex vana conjectura ita *Hippocratem*, etiam contra *Galenum*, expono de vomitu proritando, quoniam eo loco, qui cum hoc arcte coheret, de modo vomitum (diæticum non pharmaceuticum) salutariter provocandi præcipit; deinde, quia ex eo, quod præscripsit, regimine nihil aliud quam vomitus consequi potest; denique quia insanam esset de summo *Hippocrate* existimare velle, quod tenellulis puerulis vinum pro quotidiano usu præscriperit: tandem, quod is modus, secundum omnes artis regulas, ad præcavendas convulsiones est aptissimus.

§. LXVI.

Confer cum his, si placet, superius laudata *Conringii* & *Borrichii* loca, & mirare durationem consuetudinis frequenter, sed sine violentia & virulentia medicamenti, vomitum proritandi. Pulchrum specimen *Ægyptiæ* medicinæ οὐ διακεκινδυνευμένοις φαρμάκοις χρωμένῃς, ἀλλὰ τοιοῦταις, ἃ τὴν μὲν ἀσφάλειαν ἔχει ὁμοίαν τῇ τροφῇ τῇ κατ' ἡμέραν, τὰς δὲ ἀφελείας τηλικαύτας, ὥς' ἐκείνους ὁμολογουμένως ὑγιεινοτάτους καὶ μακροβιωτάτους εἶναι. h. e. Quæ non vitur medicamentis cum multo periculo conjunctis, sed talibus, quæ tuto usu cibis conferas, tanto tamen cum fructu sumantur, ut in confesso apud omnes sit, hos homines esse omnium sanitate firmissima & longissima vita. zz) Nec solum vomitus frequens est hodieque apud *Ægyptios*, verum etiam clysterum usus adeo obtinet, ut eos, incrassari cupientes, bis terve quaterve, in balneis, uno die, adhibeant.

§. LXVII.

Non indigna res videtur, cui paullisper immoremur. Et primo quidem illud *Ægyptii*, ex antiquissima medicina, rite tenent, ut pro diverso fine, temperare usum balneorum, vomitionum, frictionum calleant, ut æque ad pinguefacienda & incrassanda faciant, ac iisdem extenuare hominem nimis obesum noverunt; scilicet pro temporis diversitate, quo ad hæc veniunt, ut & pro gradu caloris in balneo, intermissa unctione vel adhibita, & denique frictionum diversa ratione. Quæ omnia pari ratione ex *Hippocratis* & cœvorum, ut & subsequutorum, praxi possem comprobare, si hic locus pateretur longiorem a proposito excursionem.

§. LXVIII.

Deinde etiam clysterum usus, ad carne & pinguedine inducenda corpora, veterum constat experientia & comprobatione. Videndum autem est quam distincte eodem remedio usi, diversum finem obtinuerint, ut habitiores fierent homines & gracilentiores ab eodem medicinæ genere. Nam crassioribus

uu) *libr. I. Fen. IV. c. XX. pag. 79. b. edit. Junti.*
xx) *Libr. I. cap. III. pag. 34.*

yy) *de medicina Ægypt. libr. III. c. 17.*
zz) *Isocrat. epistom. Busiridis.*

ribus, qui augeri non debebant, tenuiora & falsa infundebant, veluti muriam, aquam marinam & ejuscemodi: gracilioribus, quos desiderabant auctos, adhibebant crassa & pingua ex lacte, cicerum decocto, & pluribus hujus generis. Omnia autem hæc talia sunt, ut, frequentius etiam adhibita, nihil violenter in corpore aggrediantur, sed ita blande corpus purgent, ac pituitam bilemque educant, abluendo; veluti balneatores, ut *Galenus* verbis utar, se balnea purgare dicunt, quum ab illorum lapidibus coenum abstergunt & sordes.

§. L XIX.

Tandem in universum æstimare hoc crebrarum evacuationum artificialium debemus inventum. Equidem video hic etiam nimis communem inter Medicos dissensum admodum elucere, quando de vomitoriis quæritur. Si autem rationes ab iis allatas perpendimus, hodiernorum omnis dissensio nihil tangit veterum circa hanc rem usum. Quotus enim quisque Medicorum, de vomitoriis dicens vel scribens hodie, non intelligit pharmaceuticum medicamentum, quod intra corpus assumptum, spasium fibrosarum partium, indole sua volatili salino-sulphurea acri, provocat, & hac contractione ejectionem per superiora concitat. Veteres autem, quum tot millies mille vomitus uno anno peragerent; numquam talibus indiguerunt, nisi quum universa humorum massa videretur expurganda & serum toti corpori detrahendum. Si itaque ille vomitus veterum diæticus diversissimus a nostro fuit, consequens est, ut nec in novum nostrum vomendi genus ea quadrent, quæ antiquorum vomitionibus conveniunt, nec ea in veterem modum conjici debeant, quæ effecerunt ut vomitoria pleraque multis præclaris viris & in artis operibus versatissimis suspecta reddita sint, adeo certe, ut non sine magna cura & ægre plerumque ad ea veniant. Ortum hæc differentia, nisi magnopere fallor, Chymicis debet suum, qui magno studio id agunt, ut medicamenta inveniant parva mole efficacia, quo ipso studio nimis jam feliciter impetratum est, ut Galenicorum, diffusiori mole propinandorum, omnes invaserit tædium atque odium, & vomitum pauci hodie, nisi croco metallorum aliisque antimonialibus aut metallicis, provocent. Spero tamen fore id tempus, quo, inito per talia virulenta jugulatorum calculo, nimis mature abjecta requisitum in veterum vestigia & vias frequentius redibimus & *Baglivo* a) credemus: *praxin Galenicorum maximis propemodum intervallis recentiorum praxin antecellere.*

§. L XX.

Ante paucos annos magno, ut in rebus, quæ novæ videntur, fieri solet, conatu ad excutias ventriculi in usum revocandas quidam iverunt; sed unus vel alter infelix casus ipsas fere nascentes suppressit & hominum manibus excussit. Accedit autem illud instrumentum ad antiquitatis usum quam proxime, & posset sane ejus magna utilitas esse, si recta cum ratione adhiberetur, & ipsum sic præpararetur, ut ab ejus applicatione nulla in faucibus vel ventriculi tunicis læsio posset consequi. Si tamen omnino huic diffidendum videtur, digitale certe vomitorium, superius descriptum, tale est, ut nihil incommodi ab usu ejus pertimescendum sit.

§. L XXI.

Circumspiciendum nobis nunc est de reliquis. Vidimus quam multa & quænam athletæ in cibum sumserint, & qua ratione in tanta assumptorum copia caverint, ne appetitus novi cibi ipsis eriperetur, aut venter totus oppletus a recipiendo novo prohiberetur. Videndum superest, quomodo tam multi cibi digestionem promotum iverint. In quo reliquæ omnis diætæ rationem universam videbimus inclusam. Ea sic erat instituta, ut corpori augendo mole idonea esset, & tamen molem non inertem ac pigram, sed robore debito præditam, procuraret. Ad primum obtinendum somnum copiosum, post maximam in cœna repletionem, illis præscribebant; alterum autem impetrabant laboribus vehementibus & assiduis, non minus, quam de cibo diximus, coactis, & necessario subeundis: qua ratione id consequerentur, ut & per illos labores viriumque consumptionem locus novo incremento fieret, & assumptum illud, pro ulteriori alimento, pabulum, securum & profunda per somnum quiete, in varias abripi & per totum corpus posset distribui.

§. L XXII.

Videntur autem athletæ illud maxime ex salutariis artis habuisse fundamentis, quod largiorem partem non in prandio assumpserunt, sed cœnæ eum reservarunt. Nam a prandio, quod veteres ante meridiem sumebant, una vel altera hora, debebant ad duras & continuas exercitationes venire, iisque toto corpore vehementer moveri, qua ratione multum crudi chyli & præcoci in venas fuisset abreptum & humores impuros reddidisset. Quod intuitus *Plempius* b) inter nostrum prandium & cœnam non satis intercedere temporis, ad exercitationem corporis subeundam, statuit. Nec proinde male sibi consulere, in Saxonia præsertim inferiori, videntur homines, durissimis laboribus agriculturæ dediti, ut & plerique omnes reliqui, quod prandium habent modicum, cœnam pleniorum assumunt. Sed otio languentibus, aut vitam magis sedentariam habentibus quam activam, si hac ratione victum distribuerent, verendum esset, ne corporis inertis mole nimium distenderentur. Pulchre *Plinius*: c) *somno concoquere corpulentiam quam firmitati utilius.* At vero nihil a prandio, præsertim copiosiori, magis noxium, quam celerior motus & ad anhelitum sudoremque productus, quod, jam laudato *Plempio* auctore, & experientia teste, morbi cutanei, pruritus, scabies, glandularum maxillarium tumores, & intus obstructions inde oriuntur, præsertim ubi simul ac semel a motu desistendum est, ut transpiratio concitata subito desinat. Idem de cœna locum habet, eoque magis, si æstivo tempore, ad aerem tunc humidiorum fiat. Sed ad athletas est revertendum, de quibus inferius paullo videbimus plenius, qua ratione ab hoc errore sibi caverint, si prius de somno expediverimus.

§. L XXIII.

Somnus itaque athletarum, quod multus & longus fuerit, ex Galeno supra jam intelleximus. Is igitur institutus est, ut pinguescerent maxime, & saginam corporis foverent. Videmus hoc exemplo animalium, quæ volumus pinguescere, hæc caveis inclu-

a) *Prax. med. lib. I. cap. X. §. 5.*b) *de sanitate tuend. pag. 288.*c) *H. N. Lib. XI. cap. 53.*

includuntur, ut minime possint moveri. Præclare de hoc *Seneca*: d) *Aves*, quæ conviviis comparantur, ut immotæ facile pinguescant, in obscuro continentur: ita, sine ulla exercitatione jacentibus, tumor pigrum corpus invadit, & super membra iners sagina succrescit. Vidimus apud Judæos anseres ita saginari, ut sacco, nisi qua parte excrementa ejici debent, toto corpore insuti, appendantur loco obscuro, statoque tempore turundis frumentaceis, in os intrusis, repleantur. Qua ratione pinguiissimi evadunt & antiquas delicias, jecora quam maxima & delicatissima, acquirunt.

§. LXXIV.

Ne vero per somnum venereis ludibriis vexarentur, & pollutionibus nocturnis virium magnam jacturam facerent, (nam a venere toto tempore exercitationum prorsus erat abstinendum; quin plurimi memorantur athletæ, qui per totam vitam sese continuerunt) curiose ab illis procurabatur laminis ex plumbo, renum ac lumborum regioni per noctem applicatis. Credebant autem prisca homines tantam inesse plumbo frigiditatem & siccandi potentiam, ut possit, etiam externe adhibitum, calorem partium, elaborando semini dicatarum, extinguere & humiditatem superfluum consumere. Horum enim amborum copia opus esse, ad generationem perficiendam, rebantur. Nec alia deerant remedia suppressendæ veneri destinata, sic uncti ad balnea prodibant, ibique gelida virgine perfundebantur, id est aqua pura, quam frigidissima illa profuit. Constat hoc *Martialis* testimonio, quod non adducemus, quia cum obscœnitate conjunctum est. Quantum his artificiis profectum sit, dicere nequeo, nolo tamen experientiam labefactare. Memini me quoque legere multos, ex religionis studio castitatis voto obstrictos, plumbi gestare laminas esse solitos. Ego vero adversus libidinem ac lasciviam nihil æque facere credo, quam irritationum omnium occasiones fugere, & herba perimente lasciviam continuo uti. Prius in pædotribis laudat *Magnus Basilius* ab *Mercuriali* e) citatus, quod considerantes, ex veneris voluptatibus corpus imbecillius & ad necessariorum operationes pigrum atque debile reddi, temperantiæ legem promulgaverint, quæ adolescentum corpora a voluptatibus tuta conservaret & decertantibus ipsis, ne aspicere quidem venustas formas permetteret: alterum remedium frequenti sermone inter familiares laudare solitus erat *Melchior Canus*, Hispanorum Theologorum haud postremus, ejusque virtute ordinis, a Jesu nomen habentis, socios primos custodiri, ne ab necessaria cum sequiori sexu conversatione ad flagitia perducerentur. Pervenerunt ad Regis Hispaniarum aures hi sermones, qui percunctatum ad homines hujus ordinis aulicos misit, quo nomine herba hæc diceretur; responsum autem tulit, vocari illam: timorem domini. f)

§. LXXV.

Ceterum venerem corporum incrementis maxime obesse, præsertim frivolam illam & intempestivam juventutis, maxime apparet ex prisca Germanorum corporibus, quorum hæc laus erat, quod quam diutissime impuberes manserint, magnusque apud illos continentiae sit honos habitus, in quam rem iterum conferendus est sæpe laudatus *Hermannus Conringius*. Sed athletas omni tempore æque fuisse a

venere alienos, non est verosimile, illud potius maxime ad finem primum, finito exercitationum tempore, & certaminibus absolutis, ad uxores eos esse reversiones, a reliquæ etiam diætæ rigore aliquid defecivisse. Maxime illud de Græciæ athletis liberis certum est; qui autem apud Romanos athleticè vivebant, eos videor mihi in plerisque deprehendere legibus severioribus minus obtemperantes, nisi forte adductius illi vixere, qui ludis inclusi erant gladiatores, & pugiles, judicis sententia eo detrusi, vel ære ad hoc emti.

§. LXXVI.

Qua ratione moli corporis comparandæ & conservandæ studuerint, consideratum est: restat jam videre, quo potissimum modo effecerint, ne iners & inutile pondus esset corpori tanto studio acquiritum. Illud igitur laboribus præscriptis quærebant. Græcis, termino fere usitatissimo & proprio, vocantur *παραπορία*, quæ vox alias etiam miseriam designare solet, & nisi fallor, propterea eis indita fuit, quod essent ex necessitate obeundi & valde molesti viderentur. Quales illi fuerint ex superioribus satis superque, credo, constabit: nunc ordinem, quem in subeundis observaverint, tantum recensebimus, eademque ratione totius diei decursum, uno quasi obtutu, inspicimus. Ante prandium nullam exercitationem obibant, quod serius a somno surgere consueverant, & si quod tempus superesset, vomendo & exonerando alvo conterebant; tum etiam, quod, docente *Galeno*, *jejunum exercitare aperte vacuat*. In prandio panem tantum sumebant, ut vidimus, & ad exercitationes, brevi interjecto tempore, quod deambulationibus in gymnasio conficiebant, se præparabant. Interea puto eos, qui inungi debebant, esse perunctos ceromate, & happe conspersos. Ungebantur autem tantum luctatores & pancratistæ, qui vehementissimis motibus debebant se exercere. Cursores autem, saltatores, discoboli, jaculatores & pugiles non putabantur hoc egere auxilio. In ipsis laboribus is in universum ordo erat, ut, qui exerceri inciperet, levioribus daret operam, & per gradus ad altiora gravioraque anniteretur. Idem in quotidianis laboribus observabatur & levius primo, deinde vehementius, labore contendebant, in suo quisque genere, quod, præscribente magistro, tenendum erat. Quum jam tempus monebat exercitationibus desistere, & ad coenam venire, *ἀποθεραπεία* instituebatur, seu cura corporis illa, qua plene ex corpore & sine molestia expelleretur, quod in motu fuerat, tum etiam ut lassitudo, motibus peractis fortioribus, subsequi alias solita præcaveretur. Sicque ad coenam, a coena ad somnum redibatur. Ita non male *Galenus* dixit: *omnem ipsorum vitam in hoc circo versari conspexi, aut edentium aut bibentium, aut dormientium aut ventrem exonerantium, aut sese in pulvere lutoque volventium*. Sed plura video me inclusisse paucioribus verbis, quare nonnulla ex dictis pluribus erunt enarranda.

§. LXXVII.

Itaque de ratione unctionis breviter exponemus, quoniam copiose jam illud & optime fecit *Hieronymus Mercurialis*. Qui enim gravioribus exercitiis, & maxime defatigantibus, volebant occupari, ne nimium extra corpus per transpirationem expelleretur, tum vero etiam ut fibras molliores redderent,

per

d) *epist.* 122.e) *art. gymn. lib. I. cap. XV.*f) *Basilius diſt. voce: Mariana. not. C.*

per totum corpus inungebantur. Ad hunc usum erat in gymnasiis alipterium seu unctuarium. Ipsum vero, quod illinebatur corpori, vel simplex erat oleum, vel cera temperatum, ut minus facile a corpore diffunderet. Ita ad pugnam prodire solebant, quando prius pulvere corpus ita perunctum consperferant, ad quem usum vel Puteolanus adhibebatur, ex notissima crypta Neapolitana, vel ex Ægypto advectus. Dicebatur is happe, vocabulo Græco in Latinum migrante: ob eam vero causam inspergebatur, ut facilius continere se invicem luctantes possent. Utriusque meminit *Seneca*: g) *totum athletarum fatum mihi illo die perpetiendum fuit: a ceromate nos happe excepit, (in crypta Neapolitana.)* Quo loco in suum iter jocatur, quippe post lutulentum illud, quo totus fuerat sordibus conspersus & madens factus, pulvere illius cryptæ quasi rescatus fuit.

§. LXXVIII.

Apothetapiæ quoque ratio est habenda, quæ exercitationibus finem imponebat, quamvis aliquando etiam legimus, ipsis exercitationibus nondum absolutis, si quis nimis videretur delassari, aliquam huius curam, ita iubente & probante epistata, fuisse institutam, qui post illam ad labores tamen redire debuit. Quod quidem consilium gymnastarum vehementer laudat & rationibus comprobat *Galenus*. h) Duplici instituebatur fine, ut lassitudinem demeret, & impuritates ex corpore educeret: non autem uno gradu eodemque modo, sed & hic gymnastarum valebat præscriptum. Præmonemus autem nos apothetapiam hominum, tantum sanitati studentium, hic non attingere; sed ad solos respicere eos, qui exercitabantur in gymnasiis. Primus ejus is erat gradus, ut ab vehementissimis exercitationibus ad leniora sensim veniretur, exempli causa, si qui decertassent lucta vel pancratio, & ab hac essent defessi, ad cursum vel iactum, tandem ad ambulationem progrediebantur. Hoc satis jam facto in gymnastiarum illam partem veniebant, ubi frictiones instituebantur. Hic ante omnia illis, qui oleo & pulvere usi antea fuerant, strigilibus, ex ferro vel alia commoda materia paratis, abradebantur sordes multo jam sudore perfusæ, deinde quoque fricabantur. Quum jam satis sudor evanisset, ungi solebant. Si quibus lavari placeret calida, ante unctionem faciebant, detergi vero statim unguentis illinebantur. Plurimum autem amasse athletas frigida balnea certum est, quoniam hoc ad carnes augendas fovendasque in primis facere persuasum habebant. Qui lautiores erant & divites, adhibebant unguenta varii generis odorata: credo autem athletas tam sumtuosos non fuisse, ut, qui in reliquis viverent simplicissimis contenti, hic odores valde concupiverint.

§. LXXIX.

Dici vix potest quam curiosi fuerint præci homines in frictione administranda. Varii erant modi, varii gradus, tantum abest ut perfunctorie in hoc negotio aut turbulenter versati fuerint. Mox spiritus debebat inclusus cohiberi, mox subito emitti; partes vario modo tendi, remitti. Ipsa frictio vel a pro-gymnasta fiebat, vel unus alterum, mutua opera, fricabat, idque vel manu, vel panno crassiori. Sæpe etiam fasciæ abdominis lumborumque regioni circumjiciebantur, &, trahendo in utraque earum ex-

tremitate, hac agitatione calor excitabatur. Eaque omnia diversa, pro hominum differentia. Obesioribus frequenter sic fiebant frictiones, ut manus valenter injicerentur parti & subito retraherentur, quo *Martialis* i) respexit:

*Et putri lutulenta de palæstra
Uncti verbere vapulat magistri.*

Quæ omnia pluribus describit *Galenus*. Adde, si placet, *Prosperum Alpinum*, k) quo teste discas eadem hodieque in Ægypto fieri.

§. LXXX.

Restat in consideranda athletarum diæta, ut circumspiciamus, quo modo se gesserint aut adfuerint aëris mutationibus & animi affectibus tolerandis, in quo breves erimus, ne nimium excrescat differtatio. Et aëris quidem rationem in gymnasiis extruendis, ad loci commoditatem, fuisse habitam, quivis facile intelligit. Sed non prorsus abjectam fuisse hanc curam, præsertim apud Romanos, ex eo apparet, quod ludos pro gladiatoribus maximos Capuæ & Ravennæ habuerunt, quorum locorum magnæ salubritatis argumentum *Strabo* hinc ausus est desumere. Ceterum athletas Græcorum aëri qualicumque ferendo & maxime calorem tolerando fuisse insigni modo aptos, ex eo facile apparet, quod in olympicis ludis, ubi per totum diem decertabatur, æstus tantum perferre potuerunt. Illæ autem sollemnitates celebrabantur media æstate, quando calor est intensissimus. Frigus autem non minus tolerabant, quippe nudi per totum fere annum, aut leviter saltem vestiti, exercitabantur & noctem sæpe etiam nudi sub dio exigebant. Non dissimulat hoc *Epictetus* ad suum olympicæ coronæ candidatum ita differens: *δεῖ σε γυμναζεσθαι πρὸς ἀνάγκην ἐν ὥρῃ τεταγμένην, ἐν καύματι, ἐν ψύχει.* Debes ex necessitate exercitationes subire, ad calorem, ad frigora.

§. LXXXI.

Animi etiam affectus, quod mireris, curæ habebant, & maxime iram compescere quavis ratione studebant, de quo nos *Seneca*, libro de ira, certiores reddit. Cum enim viderent iram ipsis maxime obesse, ad finem artis obtinendum & æmulum devincendum, excandescens illam studiose curabant suppressere. Et erant sane plurima, quæ ipsis occasionem se hic exercendi ad patientiam suppeditabant. Taceo quæ toti instituto aderant incommoda, satis gravia homini sibi vivere adueto: illud certe non leve fuit, si quid peccatum esset, cædi flagellis, *μαστιγασθῆναι*, ut *Epictetus* auctor est, aut rhododaphnis tergora percuti, ut *Galenus* loquitur. Ad hæc intuitus *Epictetus* ita pergit futuro athletæ difficultatem artis exponere: *δοκεῖς ὅτι ταῦτα ποιεῖν ὡσαύτως δύνασθαι ἐδίδειν, ὡσαύτως πίνειν, ὁμοίως δυσχερεῖν; ἀγρυπνεῖν δέ, πονεῖν, δὲ τῶν οἰκείων ἀπελθεῖν, ἐπὶ παιδαρίου καταφρονεῖν, ἐν παντὶ ἥπλον ἔχειν κ. τ. λ.* Putasne te, quando hoc vitæ genus aggressus fueris, perinde ut nunc posse edere, bibere, aversari? Vigilare oportet, laborare, domo excedere, a puerulo contemni, in omni re inferiorem aliis esse, cetera.

§. LXXXII.

Mentio facta est τῶν ῥοδοδαφνῶν, quam vocem *Galenus*

g) epist. 57.

h) de sanit. tuenda libr. III. cap. 2.

i) libro VII. epigr. 66.

k) loco supra citato.

lenus h) in tam dubio sensu posuit, ut inde interpretes, alique eruditi mirum in modum inter se dissideant. Forte ad rem aliquid faciet, si summam earum opinionum ex doctissimis Jo. Rhodii ad Scribonium Largum notis proferam & de meo aliquid subiungam. Fuere qui putarent hoc frutice flexili (intelligunt autem illum, qui notiori nobis vocabulo rhododendron seu nerion appellatur) tergora athletarum caesa fuisse, ut, pleniori habitu, veluti scarificatione, sanguis eliceretur. Sed hæc esset molesta fane scarificatio & cucurbitulis ac scalpello commodius ad hunc finem perveniri poterat: Alii ad venustatem nudis decertantibus conciliandam floribus fruticis hujus terga infecta fuisse credunt; sed historia filet: Alii ad ruborem esse percussos athletas putant, ut sanguis magis attraheretur, habitioresque fierent: Rhodius denique foliis, tamquam strigili, a fordibus palæstræ esse fricando depurgatos sentit, non tamen repugnat, si cui præcedens sententia magis arrideat. Enimvero mihi, Galeni mentem consideranti, clarum videtur illud, inter miseras athletarum hoc referri, quod rhododaphnis eorum terga dirumpi debeant. Ex hoc ita subduco rationes meas, instrumentum poenæ fuisse, quo in illos animadvertebatur, qui vel segniores essent, vel adversus instituti leges quicquam admisissent. Sive igitur illud vere ex frutice hoc desumptum fuerit, vel homonymia aliqua, ut in artis terminis non est infrequens, nomen hoc simul illud instrumentum & illum fruticem signaverit: parum refert. Notum est hodie cuivis fere militum generi suas esse poenas; multum sæpe inter se & ab aliorum hominum poenis discrepantes. Ita Romanorum militum poena erat vite percuti, si extra ordines deprehenderentur. Plinius m) de eo sic scribit: *centurionum in manu vitis—atque etiam in delictis poenam ipsam honorat: & Livius, n) Scipio, inquit, quem militem extra ordinem deprehendit, si Romanus esset, vitibus cedebat, si extraneus, fustibus.* Quid impedit, quo minus idem de athletarum poenis statuamus? Galenum autem, qui tempore eo scripsit, quo hæc erant notissima, nemo accusabit, si nobis obscurius hæc, non tam medica quam domestica, tradidisse videtur; accusandus autem majori jure esset, si tot locis, ubi athletarum res, ad medicam considerationem aliquo modo pertinentes, exponit, nullibi rem, tanto consilio susceptam, ex merito perpendisset, si omnino sanitatis, aut comparandi habitus aliquem habuisset finem.

§. LXXXIII.

Quum plura sint in diætâ & vivendi toto genere ac instituto athletarum, quæ non inutiliter forte possent huc transferri; pedem tamen consulto hic ponere constitui, ut reliqua tempestive subnectam, nec terminos constitutos nimis transgrediar. Illud, antequam finem hujus sermonis faciam, admonere volo, me hic in considerata re athletica ad viros potissimum respexisse, & quæ in eos quadrarent, adduxisse. Quod, si quis attenderit, vitium mihi non imputabit si quis forte apud Plautum legerit:

*Ante solem exorientem nisi in palæstram veneras
Gymnastii præfecto haud mediocres poenas penderes:*

l) orat. suaseria ad artes.

m) H. N. 14. l.

n) lib. 57.

& in nostris invenerit somnum in longam diem athletis frequentem fuisse. Erant enim, ut apparet, diversæ puerorum a virilibus exercitationibus & ab utrisque eorum, qui media inter hos ætate constiterant, diversa autem singulis quoque instituta, diversissima diætâ. Huc semper oportet respicere. Adscribam de puerorum certaminibus elegantem Plutarchi o) locum: *παρ' ἡμῖν καθ' ἑκάστην ἀθλημα τοὺς ἀγωνιζομένους εἰσάγουσιν ὅτι πᾶσι παλαισταῖς ἀνδρα. παλαιστας, καὶ πύκτας ὅτι πύκταις, ὁμοίως καὶ πανκρατιαστὰς. ἐκεῖ δὲ, ὅταν οἱ παῖδες διαγωνίσωνται, τότε ἕως ἀνδρας καλεῖται.* Apud nos (Romæ) in singulis concertationibus introducunt post pueros luctatores, viros luctatores, & pugilibus sufficiunt pugiles, itemque pancratiastis pancratiastas: ibi autem (in Olympiis) ubi decertaverunt prorsus pueri, viros demum vocant. Similiter quæ de tempore exercitationum dicta sunt, debent de ordinaria illorum vita capi. Alioquin Galenus p) de extraordinaria exercitatione ita nos docet: *Athletis necesse est, (quo ad immodicos labores, etiam toto die aliquando continuandos, præparato jam corpore sint,) absolutissimum illud exercitium, (ipsi κατὰ σκευὴν vocant) ALIQUANDO obeant.*

§. LXXXIV.

Absolvimus de diætâ athletarum, in quo sermone multa debuimus silentio prætermittere, quæ ab aliis minus recte dicta sunt, ne volumen pro dissertatione enasceretur. Sed id unicum præjudicium non est prorsus reticendum, ordinem nullum aut perpessillum athletas in comedendo servasse, ut & temporis nullam rationem habuisse, quod summo viro Hieronymo Mercuriali q) excidit. Tantum vero abest ut hac fuerint negligentia, ut nullum vitæ genus magis fuerit strictæ & mensuratæ rationi cuidam, a gymnasta dirigendæ, obnoxium, quam hoc ipsum athletarum. Et hæc ratio fuit, quare ab antiquis crebro exagitatum illud legimus & reprobatum ab illis, qui se muneribus Reipublicæ gerendis aut militiæ dedicaverant. Nulli comparandum heic est Plutarchi testimonium, qui Philopæmenem propterea narrat gymnasticam fugisse vitam; quin, in potestate constitutum, contumeliis affecisse, quod juvenis ab amicis perciperat, militarem ab athletica vita secundum omnia absolute differre; athletarumque diætâ, exercitationes, multum somnum, continuas repletiones, stricta lege præscriptas corporis quoad motum & quietem vicissitudines, habitus denique, ab omni nova re incidente, subito metuendas alterationes, cum sollicita omnis excessus fuga; hæc, inquam, omnia sic constituta esse, ut minime juvent hominem, qui deberet omnibus perferendis idoneus esse, & non solum quovis tempore motibus suscipiendis continuandisque paratus, sed inopiæ etiam & defectui ciborum ac potus, si res ita postulet, quam maxime adsuetus. Idem quoque apparet; si quis in Hippocrate & Galenō attendit, quoties hi sibi opponant τὸν ἰδιώτην i. e. hominem suo ritu suaque libertate viventem, & athletam, ad necessitatem ac præscriptum magistri vitam instituentem.

§. LXXXV.

Rectissime id vidit Italiæ medicorum decus Baglivus.

o) Sympos. lib. II. probl. 5.

p) de sanitat. tuenda lib. III. c. 23.

q) art. gymn. lib. I. cap. XV.

glivæ, r) qui eo loco, quo in diætâ Pythagoreorum incidit, hanc brevibus verbis sic complectitur: *singulæ diei horæ ita distributæ erant, & victui ita accommodatæ GYMNASTICE*, ut quilibet, vel negotiosus homo, nihil a negotiosa vita detrimenti caperet. Qui tamen ipse locus ita intelligendus est, ut athletica seu gymnastica vita, cum laudata Pythagoreorum diætâ in stricto dimensioque vitæ genere tantum conveniat, quum de reliquo, si finem præsertim spectes, toto instituto inter se diversa sint. Nam athletæ corpus maxime habebant curæ; hi unice quærebant, ne animo corpus foret gravis carcer: athletæ magnam carniū comparare studebant molem; hi, *Pythagora* f) jubente, fugiebant *σαρκῶν πλεονασµόν*. Sed hæc pluribus proponenda erunt, si, quam meditor, *de Pythagorica diætâ*, prodierit dissertatio.

§. LXXXVI.

Audio jam voces quorundam, qui Cassianum illud: *CUI USUI?* ingeminant, & quærere videntur, quare tam longa opera de re diu obsoleta nunc differuerim & plura etiam animo volvam? Hos vero, si ignorant historiarum, in omni disciplinarum genere, luculentissimum fructum, longo sermone

vincere nunc non licet; miseret potius eorum, quorum cæca studia tristi præfagio relinquenda sunt. Utile enim hoc genus hominum nihil putat, quam quo maxime ad empiricam praxin armantur, ut quam primum in mundum omnem profiliant, iis operam laturo, quos fortuna servare, eorumque imperitiæ victimas cadere nondum voluit. Si tamen bono animo quærunt proxime inservitura, non carent sane optimorum virorum optimis scriptis iisque utilissimis. Hos legant & ab iis mecum discant, quamdiu volent; tamdiu autem velle debebunt, quoad eos, quantum proficiant, non poenitebit. Ita vero oculis cernent, quam crebro ad Hippocratem aliosque veteres ablegantur. Quos, si per se intelligunt, non indigent sane hujus generis lucubrationibus: si vero alicubi hærent, commode licebit, quando placet, ad talia recurrere. Ex ipsis vero artis salutaris coryphæis & principibus neminem, spero, reprehensurum illud propositum meum, historiam medicinæ paullisper perlustrandi, & si occasio sic feret, publicis speciminibus, pro virium modulo, exhibendi. Faveat modo DEUS huic consilio, ut non solum, quæ nunc prætermittenda sunt, *de habitu athletico*, proxime addam, sed plura deinceps excutere quoque valeam.

r) de fibr. mot. p. m. 180.

f) confer. Diog. Laertium vit. Pythag. p. m. 582.

SPECIMEN PHYSICO-MEDICUM

D E

SALUBRITATE HASSIÆ.

Primum editum anno 1706.

P R O O E M I U M.



SUMMI nostræ naturæ condimenti, sanitatis integræ, proximam causam jure statues (1) humores in justa crasi constitutos; (2) principium vitale movens sive id materiale, sive immateriale statuatur, & (3) legitimam cujusvis partis solidæ structuram, tonum ac proportionem. Sustinent hanc sex *Res non naturales* ita ab autoribus dictæ, quod ad naturam individui humani constituendam proxime quidem non concurrant, sine his tamen illud vitam & sanitatem trahere nequeat. Sunt illæ ex communi sententia *Aer* (s. potius *atmosphæra*) *Cibus*, *Potus*, *Motus*, *Quies*, *Somnus*, *Vigiliæ*, *Excreta*, *Retenta*, *Animi pathemata*; quibus tanquam cognata connumerari solent *vivendi genus*, *Clima*, *Situs Regionum* & *locorum*, *balnea*, *vestimenta*, *aliæque res externæ*. Ex his omnibus eminentior profecto sanitatis causa *situs Regionum salubris* est, quem una præ altera meliorem obtinuit, hominibus robustioribus, sanioribus & longævioribus hujus vel illius loci regionisve præ aliis id abunde probantibus: non obstante, quod & in insalubrioribus longævi quidam reperiantur, quale quid ex consuetudine potius & rarius contingit; accedit, hos ipsos ut plurimum ægram vitam trahere. Salubriorem autem provinciam alteram altera existere, vel exinde sufficienter demonstratur, quod Medicis solenne est, transmittere ægros, morbis chronicis diuturnioribus, v. g. *Phthisi*, *Scorbuto*, *cacochymia* quacunque (vid. HIPPOCRATIS *Epid. VI. S. 5. §. 2.*) affectos, in alia loca, ex

quibus (nisi forte morbus altissimas radices egerit,) si non penitus sanitati pristinae restituti, saniores tamen, quam fuerunt, redeunt. Prostat de Peregrinatione sanitatis causa instituenda *dissert. egregia Excell. Hoffmanni, Patroni, Promotoris atque Manu ductoris mei in arte salubri fidelissimi*, quam evoluisse non poenitebit. Noli ergo mirari, L. B., me, (HASSIAE Patriae meae dulcissimae, uti spero, incolam Medicum aliquando futurum,) de ejus salubritate adeo sollicitum esse. Indidit huic labori suscipiendo praeceptum HIPPOCRATIS Medicorum Patris tract. de aere, aquis & locis, stimulum haud levem; verba ejus e versione Lindeniana p. m. 327. 328. huc transferre non piget. Quicunque (inquit) artem medicam integre assequi velit, primum quidem temporum anni rationem habere debet &c. deinde ventorum calidorumque & frigidorum, maxime, qui ex his omnibus hominibus sunt communes, & mox, qui in una quaque regione sunt indigenae & proprii. Neque vero negligentiores se circa aquarum facultates cognoscendas exhibere convenit: &c. Quare si quis ad urbem sibi incognitam perveniat, circumspicere oportet ejus situm, quomodo scilicet ad ventos & solis exortus jaceat; &c. Haec itaque diligenter oportet perscrutari ac simul quomodo habeant circa eam aquae &c. Terra etiam ipsa consideranda &c. Ex his enim singula sunt investiganda. Nam, qui haec omnia probe, quantum fieri potest, cognoverit, aut horum plurima, eum non latere possunt, quum in urbem etiam ignotam sibi pervenerit, neque morbi regioni peculiare & patrii, neque communis regionis natura, quaecunque tandem ea fuerit, ut non possit in cognoscendis morbis dubius haerere aut errare, sicubi ad morborum medicationem adhibeatur. Quae ambo illis evenire solent, qui non prius providi haec diligenter cognoverunt &c. Eo usque igitur praeceptum istud Hippocraticum exsequar, ut in HASSIAE, praepimis ejusdem atmosphaerae salubritatem istiusque causas in hac ipsa dissertatione mea inaugurali jam inquiram, evidentiusque demonstrem, quantum emolumenti ex hac in incolas istius regionis redundet: certissimum namque est, pauciores hominum illic degentium numerum atmosphaerae injuria aegre habere vel interire; maximam vero eorundem partem ex perversa dieta rerumque non naturalium usu illegitimo ac noxio perniciem morbosam contrahere, vitaeque filum sibi abbreviare: sunt enim & illic otio dediti, affectibus animi nimium indulgentes, bibuli, lurcones, ciborumque ac poculorum, veneris item plus appetentes, quam natura tolerare valet. Eo tamen dementiae non procedo, ut Hassiae salubritatem simpliciter talem dixerim, ratione cujus morbis & morti leges positae sint; habet Hassia nostra morbos suos vernaculos & epidemicos quandoque etiam, siquidem ibi quoque tempora & astra mutantur ac annorum constitutiones inordinatae & praeternaturales fiunt, est hyems aliquando tepida nimis & humida, aestas justo calidior & siccior, &c. ut vel propterea homines ibidem subinde aegrotare, & in ipsa etiam florida aetate aliquos vitam cum morte commutare necessum sit. Quicquid ergo in specimine praesenti prolatum: intuitu aliarum regionum insalubriorum & quae deterius conditionis sunt, (atque ita comparative,) intellectum volo. De tractationis methodo multa praefari supervacaneum duxi, absolvitur enim tota disputatio paucis plagulis exiguum perfectionis tempus requirentibus. Praemisi quidem & commiscui singulis capitibus generalia quaedam Medico-Physico-Mathematica: sed quae ad thematis hujus planiorem & plenioram enodationem non incongrua, quin potius convenientissima judicavi: quorum ipsorum etiam perlustrationi vacare lectorem, conterraneum praepimis, non pigebit. Esto itaque sub Divini Numinis auxilio.



C A P U T I.

De Salubritatis natura & essentia.

§. I.

Salubre & salubritatem à salute (Germ. Heil. Gesundheit) proficisci ipsa vocis natura indicat; qui salubris & salubritatis terminus in genere pro quolibet bono & utili (etiam in civilibus) usurpatur: hoc sensu HOMERUS alicubi:

Vir Medicus multis aliis tibi dignior esto: &c.
Multa salubria miscens, - - -

Item LIVIUS 3. cap. 62. Et trahi bellum salubriter & mature perfici potest. Specialiter autem & proprie magis de rebus sanitatem concernentibus saltem dicitur, sub diversimoda quamvis ejus acceptione & significatione: quatenus (1) applicatur ad ea, quae possunt sanari, sive salutis seu futurae sanitatis spem praebent: ita LIVIUS L. I. C. 10. Sopitum fuisse Regem (inquit,) subito ictu, ferrum haud alte in corpus descendisse: jam ad se redisse. Inspectum vulnus absterfo cruore: Omnia salubria esse. Item L. 3. ab urb. Graviore tempore anni circumacto defuncta morbis corpora salubriora esse ceperunt. CICERO de senect. haec habet verba: Ubi enim potest illa aetas aut aequae calefcere, vel apricatione melius, vel igni, aut vicissim umbris aquisque refrigerari salubrius? (2) Extenditur ad haec, quae sana sunt, ac habitu athletico & bono gaudent atque sanitatem ipsam: Sic TACITUS Hist. L. V. C. 6.

Salu-

*Salubria corpora, h. e. sana, & SALLUSTIUS in descriptione Africa: Genus hominum salubri corpore, pronunciant; præterea Auctor Dialogi de causis corruptæ eloquentiæ C. 41. ita scribit; Minimum usus minimumque profectus ars medentis habet in iis gentibus, quæ firmissima valetudine & saluberrimis corporibus utuntur. Quid, quod ipse GALENUS L. de Medic. Art. Constit. C. XI. Salubria corpora valetudinariis contradistinguat, & habitus salubris L. ad Thrasibulum C. XXXIV. mentionem faciat. Ipse tantum itinerum faciebat, quantum satis esse ad mutationem locorum propter salubritatem (sanitatem) existimabat; scribit CÆSAR. bell. Gall. L. VIII. (3) Accommodatur rebus sic dictis non naturalibus omnibus, tum materialibus tum immaterialibus, easdem res (causas) salubres indigitando, imo toti medicinæ conservatrici, quam *ἐπιμενν* dicunt, potissimum autem parti ejus gymnasticæ seu exercitatoriae, artis salubris (item salutaris) nomine insignitæ: unde & medicina HEROPHILO scientia salubrium, insalubrium & neutrorum salutatur; salubrium quidem, quod ista humani corporis constitutionem ita præparant, ut ex iis pulchrè invicem aptatis sanitas concilietur, &c. sicuti hæc omnia fusiùs legi poterunt apud GALENUM L. introd. s. Medicus C. VI. & VIII. Item L. Num ars tuendæ sanitatis ad artem medicinalem spectet à Cap. XXX. usque XXXVI. (4) Denique & quidem propriissime attribuitur seu adaptatur secundum VAL-LAM rebus sanitatem præbentibus ac juvantibus materialibus per naturam productis, cælo puta & stellis, aëri, locis, aquis, fluviis, cibis, herbis &c. quæ res singulæ à celebrioribus autoribus idoneo termino salubres nominantur: sicuti reliquæ omnes, arte, ingenio aut alio modo parabiles salutares vocantur; probe ita discernente CORNEL. FRONTONE de different. vocabulor. Ita PLINIUS H. N. L. XXXVII. C. 13. Jam situ ac salubritate cæli atque temperie &c. Item COLUMELLA L. II. C. 4. Fundum, sicuti ne fecundissimi quidem soli, quum sit insalubris, ita nec effecti, si vel saluberrimus sit, parandum. Aquæ salubres extant apud HORATIUM in Carm. secul. Fluvius saluber apud VIRGILIUM I. Georg. aura salubris apud OVID. & Chelidoniam visui saluberrimam hirundines monstrasse modo memoratus PLINIUS L. VIII. C. 27. protulit.*

§. II.

Sub hac postrema significatione propriissima salubre & salubritas à Medicis & physicis nostrorum etiam temporum consideratur. Dico autem proprie salubre illud, quod non lædit vel imminuit actiones corporis s. n. sed potius eas constituit, perficit atque exaltat; tale autem est illud, quod causam harum actionum, intellige naturam nostram, auget, conservat atque erigit; per naturam autem hic maxime intelligitur Circulus sanguinis & æconomia omnium motuum corporis organici, quæ si recte sese habet, est sanitas præsens, & hoc, quod ipsam conservat, sanum ac salubre dicendum. Deinde cum sanitas in humorum fluxilitate, debitoque illorum circulo, partium solidarum robore, emunctoriis apertis, excretionibus legitimis, conquiescat, hinc omne illud, quod humores fluxiles servat, quod excretiones promovet, vias patulas reddit, necessario salubre esse debet. Qui sanitatis effectus omnes cum ex atmosphæra Hassiaca in incolarum corpora redundant, aptissime titulum salubritatis differentiationi meæ præfixum puto.

CAPUT II.

De situ Regionis Hassiacæ versus Cæli plagas ejusque climate salubri.

§. I.

AD Regionum salubritatem non minimum confert benignior harum situs, sereniorque cæli ac siderum versus easdem positus afflatus & contactus; qui si cum aliis, solo puta, hujusque effluviis, ventis, alimentis, reliquisque vitæ humanæ conducibilibus, concordet, sedem sanitati & longævitati conformem fore, nemo nisi mente inops inficiabitur.

§. II.

Unicum quidem cælum orbem nostrum undique ambit, non ubivis tamen & semper eadem illius facies, atque conditio, sed pro diversitate loci, cursus, motus, altitudinis & conjunctionis astrorum diversa admodum est. Ea propter (utor verbis DICELII in Pæd. Geogr. gen. p. 8.) adminiculo circulatorum (cælestium) locus nostrarum actionum, ubi nos habitamus homines, in varias zonas, climata, parallelos, imo in multivarias Regiones, Provincias, Ducatus particulares, & Imperia sexcenta alia distingui atque describi solet. Et cum apparentiæ quæcunque cælestes ad nos referantur, qui secundum variam Cælestis Sphæræ posituram in diversis terræ locis habitamus; tantæ dierum & noctium varietas accidit, tantaque in ortu & occasu siderum differentia, & quæ id genus plura sunt alia.

§. III.

Perquisitio itaque positus cæli in describenda locorum & regionum proprietate summe est necessaria, maxime, cum nullum amplius sit dubium, omnisque dies doceat, motum corporum cælestium, (Solis præprimis & Lunæ, reliquorum etiam Planetarum,) pro diverso eorum positu varium, varios quoque, interveniente æthere, causari motus in locis nostris inferioribus, unde temperaturæ regionum hominumque adeo discrepantes exsurgunt. Quadrat huc elegantissimus STRABONIS locus, quem habet L. I. Geogr. è versione Xylandri ita sonans: Quicumque locorum proprietates aggreditur, proprie eo accommodat expositionem cælestium rerum, Geometricarum delineationum, magnitudinum & intervallorum ac inclinationum, calorum, frigorum, denique constitutionis ac naturæ aëris. Quando & domum ædificaturus faber hæc ante prospiciat, & urbem condens architectus: nedum totum terrarum orbem animo concipiens vir: nam multo magis huic ea conveniunt: nam in exiguis spatiis non magnam parit diversitatem versus Septentrionem aut Meridiem inclinatio. In universo terræ habitabilis circulo versus Septentrionem sunt usque ad extremas Scythiæ vel Celticæ, versus Meridiem inclinant usque ad ultimos Æthiopes, in hoc permultum est discriminis; itemque plurimum interest, apud Indosne habitetur, an apud Hispanos: quorum alteros maxime Orientales, maxime Occidentales alteros, ac quodammodo hos illorum antipodas esse scimus. Quæ hujus sunt generis omnia, cum Solis Astrorumque reliquorum conversionem, nec non motum versus centrum principii loco habeant, suscipere nos ad cælum jubent, & ad ea, quæ in cælo unicuique nostrum apparent, in quibus sane magna admodum pro diversitate habitationum conspiciuntur

discrimina. Quis ergo differentias locorum recte & sufficienter docere atque explicare possit, horum omnium ne parumper quidem habita ratione? haecenus STRABO.

§. IV.

Hic tamen simul observandum astrorum dictorum motum & exinde profluentes effectus, multum per corpuscula sublunaria seu atmosphaerica limitari, ita quidem, ut idem saepe positus astrorum in consitis vel iisdem etiam regionibus nihilominus diversitatem constitutionis atmosphaerae pariat, rectissime ita monente SENNERTO *Instit. Med. L. IV. P. I. C. 2.* cujus verba sic habent: *Varia autem ob causas constitutio aëris variatur, neque ubique ac semper eadem est. Primo aëris constitutio pendet à locorum situ & natura. Ad locorum situm autem pertinet primo situs versus cœli plagas. Aliæ enim regiones aliis calidiores, aliis frigidiores sunt, prout magis vel minus à circulo æquinoctiali vel tropico cancri apud nos remotiores sunt, majoremque vel minorem, ut appellant, latitudinem habent. Nam quando rectiores radios Solis regio aliqua excipit, & quo diuturnior Solis supra horizontem mora est, eo regio est calidior, frigidior vero contrariis de causis. Verum etiam si ex hoc situ varia aëris proveniat constitutio, atque aliud Clima aliam aëris temperiem habeat: tamen alia præterea concurrunt, quæ in eodem etiam Climate diversam aëris constitutionem faciunt. Hinc non in omnibus sub eodem parallelo regionibus plane eadem est aëris constitutio; & nusquam sub eodem parallelo, quam in Æthiopia Æthiopes habitant, ob peculiarem loci naturam. Nam ibi ad alias, quæ omnibus sub illo parallelo habitantibus communes sunt, caloris causas, accedit loci natura arenosa & sabulosa, quæ conceptum calorem diutius fovet ac retinet, atque inhabitantium corpora exsiccat atque adurit. Secundo itaque loco terræ facies propria ac natura ad aëris temperiem constituendam facit: in qua spectatur, quæ soli sit natura, an locus sit editus & altus vel humilis, quem montium & convallium situm habeat: quos ventos à quibus mundi plagis admittat & frequenter accipiat, an mare vel lacus vicinos habeat. Nam multum refert, an solum sit pingue, cœnosum, glareosum, saxosum, arenosum, macrum; an ferat metalla, an vero iis destituatur. Succenturiatur MUNDIUS de Aëre vitali C. III. §. 6. dum inquit: Exhalationibus acceptum feras præter locorum situm; quod gentes eisdem parallelis incluse talem aëris anomaliam, qualem videmus, patientur, aliæ æstum majorem, aliæ frigora magis intensa, quam solis vicinia aut distantia poscere videatur. Josephus Acosta narrat se in Indias Occidentales navigantem sub Sole in Zenith imminente cum sociis apricari præ frigore coactum, & tum demum poëtas & aliorum deliramenta risisse, qui eas plagas præ æstu intolerabiles statuerunt. Idem Autor Peru, inter Æquatorem & tropicum Capricorni sitam, ob amœnitatem & optimam cœli temperiem mire laudat: Potosiam autem regionem ejusdem metalliferam frigidam esse asserit; cum interea Brasilia in altero Peruviana littore, Africa australi opposita, perpetuis ardoribus torretur. Australe Africa promontorium incolas habet nigerrimos, & sua hyeme graviter alget, etsi polum antarcticum non supra gradum 34. elevatum spectat. Mauritania vero & Numidia à Sole non minore intervallo distantes, nisi in montium jugis, semper æstuant, aut certe vel hyeme sua tepent; at incolis fere candidis gaudent. Notum est, quam flebiliter NASO littoris Euxini frigora descripsit: AUSONIUS autem Aquitania suæ eidem sideri subiectæ breves facilesque hyemes laudat. JAMESIUS in Insula, quam Charletoniam appellavit,*

hyemare coactus est: in qua licet eodem intervallo ac Hibernia (quæ hyemes habet mitissimas,) à sidere polari distet, tamen ille cum sociis non minora incommoda à frigore passus est, quam Batavi in nova Zembla 23. gradibus polo viciniore. Est hinc, quod plures regiones australes calidissimæ sub Zona torrida, & quibus Sol in Zenith imminet, sint habitabiles; ita quidem, ut AVICENNA cum aliis Paradisum terrestrem sub æquinoctiali posuerit. Quin refert modo laud. MUNDIUS cit. tr. C. II. §. 2. p. 8. Terras inter tropicos, etsi Solis orbitæ sint subditæ, (quas omnes veterum rudiorum nonnulli torridas & præ æstu inhabitabiles autumarunt) non modo habitabiles, sed etiam salubres esse, & omnium rerum ad victum cultumque imo ad voluptatem pertinentium abundantia florere, adeo ut, qui à septentrione profecti istas regiones adierunt, locum gustasse videantur, nec facile ab Austri Sirenibus avelli queant. Inde est, quod tot Europæorum Coloniae in calidis regionibus inveniantur. Lusitani in Africa, Brasilia & Indiae oris maritimis sedes passim posuerunt, quarum nonnullas Batavi occuparunt. In America inter tropicos pleraque possident Hispani. Angli, Batavi & Galli in insulis Caribæis sedes habent amœnas & perquam fructuosas, quibus Campania vel Sicilia invideat: Vere enim & virore perpetuo fruuntur, solesque alioquin ardentis (NB.) ventis apogæis & tropæis mitigantur; terra etiam imbre assiduo aut rore copioso ita rigatur, ut arbores fructus toto anno producant, veteribus pomis decerptis aut deciduis novis statim succedentibus; & in tanta terræ fecunditate magna est incolarum sanitas, ac, nisi filum vitæ externa vi abrumptur, fere longævitæ. Et in fine Cap. in tractibus irriguis ac fecundo solo præditis sub æquatore satis commode, imo nusquam salubrius aut delicatius, habitatur. Illic etiam invenitur uberrima pharmacorum sylva, quibus pharmacopolia totius orbis instruuntur.

§. V.

Necessariis his ad scopum meum prælibatis, inquisiturus primo loco sum in situm regionis Hassiæ terrestrem: ubi quidem de Origine Hessorum seu Hessorum, item de veteris Hassiæ terminis, non ero sollicitus: siquidem hæc ad rem præsentem non faciunt; remitto lectorem curiosum circa hæc inquirenda ad ALTHAMERUM de reb. German. in Tacitum, CARIONEM in Chronico, CONRAD. CELTEM, CLUVERIUM de antiquit. German., HERODOTUM, POMPON. MELAM de Situ Orbis, MUNSTERUM, REUSNERUM de Orig. Misensorum, PLINIUM, PTOLOMÆUM scriptorem Græcum, SCHOPPERUM in Cosmo & Choro-graph., STRABONEM in Geogr., VELLEJ. PATERCULUM, PIRCHEIMERUM in Tacitum, CORNEL. TACITUM de German. JOACHIMUM VADIANUM Comment. ad Melam &c. imprimis autem WINCKELMANNUM in Chronic. Hassiæ germanice conscripto P. I. C. 3., qui ubertim satisfacient.

§. VI.

De hodierna Hassia vero sciendum; eam in parva, præstantissima tamen Orbis nostri quarta, (Europam indigito, inter quintum & duodecimum clima ab elevationis polaris 33. gradu cum semisse ad gradum ulque fere 60. inter tropicum cancri & circulum arcticum jacentem, ab oriente mari Ægeo & Euxino, a meridie mediterraneo & Gaditano, ab occidente Atlantico, a Septentrione Hyperboreo seu glaciali terminatam,) magnæ Germaniæ (dividitur enim antiquitus Germania in primam seu superiorem, secundam seu inferiorem, & magnam) regionem seu provinciam celebrem & insignem admodum existere. Termini ejus, prouti a laud. WINCKELMANNO

CKELMANNO cit. loc. describuntur, a latere orientis dextro Thuringia, dehinc meridiem versus Franconia, trans Mœnum Palatinatus, occidentem versus a latere sinistro Rhenus cum Trevirensi, Coloniensi ac Montium Dominatibus, & pars Westphaliae, septentrionem versus rursus pars Westphaliae, Visurgis, ditiones Brunsvicensis, Paderbornensis & Mindenensis sunt. Superior Hassia una cum superiori & inferiori comitatu Catinelibocensi, Diezensi & Niddensi terminos agnoscit versus meridiem Franconiam & Mœnum fluvium, qui cum Rheno intuitu Dominatuum relatorum ad occidentem tendit; versus septentrionem Episcopatum Coloniensem; versus orientem ad latus septentrionis (*Nord-Osten-werts*) Hassiam inferiorem cum Dominatibus Ziegenhaynensi & aliis plurimis. Inferior Hassia e contra terminos agnoscit orientem versus Buchoniam, Thuringiam, Eichsfeldiam, versus septentrionem territorium Brunsvicense, Paderbornense, Westphaliae partem & Hassiam superiorem, &c. Specialiores qui desiderat terminos divisionemque Hassiae ampliorum, adeat eundem WINCKELMANNUM *P.I. C.4. p. 22. 23.* Tota interim *Hassiae Regio* magis in longum quam latum extenditur; longitudo incipit a terminis occidentalibus Braubachi vel ad oppidum Goar sub 29. gr. 30. min. terminaturque ad orientem Smalcaldiae sub gr. 32. min. 50. & complet numerum milliarium Germ. 33½. latitudo vero exordium sumit ad plagam meridiei sub gradu 50. min. 10. & finitur versus Septentrionem ad novam urbem Carolo-Diemelam circa Visurgim prope fluvium Diemelam, non procul ab urbe Munda, conficiturque milliaria Germ. 27. usque 28.

§. VII.

Exhibito sic situ *Hassiae terrestri* confero me ad positum ejusdem versus cælum & sidera; pro hoc accuratius sistendo prius locatio Germaniae delineanda est. Sitam cernimus *Germaniam* nostram in temperato climate, sub zona nimirum temperata seu collateraliter inter zonas frigidam & torridam collocata, sub 36. & 40. circulo meridiano, magis versus septentrionem quam meridiem; quæ cum in obliquo sphaeræ posita existat, & unam saltem solis umbram ab uno semper latere recipiat, incolæ hujusdem heteroscii, quasi alterumbres, Germ. *ein schattige* / cluent: Unde & in maximo isthoc Germanorum regio mitius longe frigus, quam in regionibus borealibus Norwegia v. g. Lapponia &c. moderatiorque æstus, quam in australibus, v. g. Ægypto, pluribus Asiae & aliquibus etiam Europæ provinciis observatur, atque atmosphæra ex calore & frigore temperatur. Hujus *Germaniae* meditullium fere constituit *Hassia nostra*, Zodiacali signo capricorni subiecta; cujus Climatis, paralleli &c. inveniendi gratia ex medio regionis puncto, quod est celebre studiorum emporium *Marpurgum*, computum instituiam. Antequam vero id effectum dem, monendum, veteres Astronomos Zonas divisisse in 7. saltim climata, quorum denominationem videsis in MICRÆLII *Lexic. Philos.* modernos autem eorum ad circulum polarem arcticum numerasse 24. imo quosdam alios adhuc 24. trans æquatorem addidisse, & sic 48. constituisse. Hanc quidem doctrinam climatum parallelorumque *Ingeniosissimus* STURMIUS in *Geogr. Mathemat. præfat.* tanquam inutilem & maxima cum confusione ab Autoribus tractatam e Geographia eliminandam potius censet, quippe qui nova plane & accuratiora globorum schemata promittit: quam nihilominus cum plures e modernis Geographis admittant, aliosque edoceant, hic negligere nefas judicavi. Distat ergo *Marpurgum* ratione longitudi-

Frid. Hoffmanni Oper. Supplem. II.

nis ab extremo meridiano gr. 32. & 35. min. vel juxta STURMIUM *Geogr. Mathemat. p. 100. 28. gr. 17. min.* ratione latitudinis ab æquinoctiali seu altitudine poli 50. gr. & 43. vel juxta eundem STURMIUM 41. min. subjacetque octavo climati & 17. parallelo; proximum locum a climate septimo temperatissimo, (inter 12mum & 14mum parallela constituto, ubi elevatio poli a gradu 43. ad 47. usque & paulo amplius se extendit, de quo consule RENATUM MOREAU *tract. de conserv. valetudine S.I. C.I. membr. 7.*) occupante. Tempore Solstitii æstivi sole in 69 transeunte, quod circa 20. Junii instat, lux diei ibidem ad summum durat 16. horas & 9. min. circumferentia in milliariibus germanicis 3471. minutis primis 3. secundis 57. tertiis 36. circumferentia in minutis primis 208263. additis secundis 47. tertiis 36. circumferentia in minutis secundis 12495837. additis tertiis 36. circumferentia in meris tertiis 749750256. Milliaria germanica singulorum graduum 9. Minuta milliariibus adjicienda 38. Residuum milliarium non divisorum 231. Minuta prima singulorum graduum 578. Residuum minorum non divisorum 783. Minuta secunda singulorum graduum 34710. Residuum secundorum non divisorum 237. Minuta tertia singulorum graduum 2082639. Residuum tertiorum non divisorum 216.

§. VIII.

Ita comparata est locatio regionis *Hassiacæ* ad plagas cœli, quam intuitu aliorum Dominatuum plurium; præprimis si simul conditio terræ attendatur, longe *salubriorem* imo *saluberrimam* esse nemo non profitebitur. Ob hanc siquidem cœli benignitatem benignissima quoque quoad frigus hyemale, (quod ibidem sic satis est tolerabile) calorem siccitatem & humiditatem æstatis reliquarumque anni partium Principatus istius temperatura est; &, quod notabile, animalibus atque insectis, quæ *venenata* vulgo audiunt, ferme caret. In primis autem huic applicari merentur verba GALENI *L. Anim. mor. seq. temp. corp.* sic habentia: *Quis nescit, qui inter hos* (loquitur autem de hominibus loca septentrionalia & ad zonam torridam inhabitantibus,) *medii regionem bene temperatam colunt, & corpore esse & moribus animi, ingenii felicitate & prudentia illis hominibus præstantiores.* Qua salubritate & temperamenti jucunditate magnam partem modo laudatum *Marpurgum* fruitur. Fusiora omnia exhibebuntur Cap. seq.

CAPUT III.

De Atmosphæra Hassiacæ constitutione salubri, hujusque causis variis, positu scil. siderum, ventis, montibus, sylvis, pratis, vallibus, fluminibus, &c.

§. I.

V Iso situ & locatione regionis nostræ quoad cœli & terræ plagas, operæ pretium jam est, *Atmosphæra Hassiacæ naturam & constitutionem* perpendere. Oportet autem melioris notitiæ ergo generalia quædam præliminari. Ne tyroni itaque Medico quidem ignotum puto, *aërem mixtum* intro & foris homini advenire; inspiratur siquidem, cum alimentis ingeritur, & ab extra corpus immediate tangit. Cujus quidem inspiratio & contactus eidem adeo necessarius est, ut, si aliquot tantummodo momenti intercipiatur, derepente vitam cum morte commutare cogatur. Intuitu itaque inevitabilis æ-

ris ad vitam conservandam præsentiæ fufius paulo de hoc ejusque natura & effentia ac alterationum caufis differendum, atque demum hæc themati præfenti applicanda erunt.

§. II.

Duplicis acceptionis vox *aëris* Physicis est, mox enim *aër* & *æther*, mox *aër* & *atmosphæra* iisdem sunt fynonyma: *priori sensu* corpus rarissimum & purissimum, *posteriori* densius & variis ac heterogeneis effluviis inquinatum significat. Verum melius faciunt illi, qui *aërem*, termino *generaliter* sumto, dispescunt in simplicem & purum, h. e. *ætherem*, ab omnibus peregrinis effluviis plane liberum; & *compositum* seu *mixtum*, i. e. partibus heterogeneis maritatum. *Prior* definitur ab omnibus Physicis & Mathematicis hodiernis quod sit corpus rarissimum, fluidissimum, celerrimæ agilitatis, & pellucidum, ex subtilissimis particulis homogeneis conflatum, atque adeo tenue, ut quibuslibet motibus obsequatur: ob quam sui uniformitatem semper etiam bene dispositus anima quasi hujus universi est. *Posterior* denotat idem fluidum æthereum &c., in cujus substantiam vapores & effluvia è globo terraqueo sublimate penetrarunt, ibidemque dissoluta ac dispersa cum partibus æthereis in unam massam compositam coiverunt. Quæ ipsa aëris homogenei subtilioris & heterogenei densioris differentia vel ex hoc abunde probatur: quod aër heterogeneus tanta præ aëris homogenei particulis atomorum magnitudine & crassitie polleat, ut in has incidens lumen fiderum resplendescantiam quandam causetur, quæ non item in æthere occurrit; istæ etiam vitri aliorumque corporum poros minores pertransire nequeant, quos tamen illæ transeunt; & ope antliæ pneumaticæ hæ è vase recipiente, illæ vero neutiquam educi possint; præterea quoque heterogeneæ, sicuti quidem æthereæ, nec productioni nec propagationi luminis inservire valeant.

§. III.

Massæ totius aëreæ immenso spatio diffusæ, terram & planetas complectentis, partem superiorem à terra remotam & fideribus propinquiorem purissimam ac à miasmate quovis terrestri immunem cum MUNDIO *cit. tr. C. I. §. 1. Cælestem & ætheream*; alteram vero terræ propiorem, vaporibus & exhalationibus quibuscunque repletam, *atmosphæram* nominamus: cujus altitudinem KEPLERUS 8. milliarium, RICCIOLUS 50. Italicorum, GASSENDUS vero & MERSENNUS 40. æstimant.

§. IV.

Hanc atmosphæram rursus in tres regiones dirimunt Peripatetici, & cum his etiam aliarum sectarum Philosophi, (*Mundus* *cit. loc. §. 2. in duas saltim dividit, videturque primam ætheri annumerasse*), non loco & situ saltim, sed natura & qualitatibus quoque differentes: *Primam* videlicet seu *supremam* ætheri contiguam, perpetuo calidam (quod assidue edisserit MALLET *in libr. Beschreibung des Welt-Kreisses P. I. C. IV. p. 76.*) tum ob ætheris viciniam, tum ob motus perpetuitatem cum astris primoque mobili communem, nubibus vacuum & immunem, partim propter remotiorem præ reliquis a terra distantiam, partim propter continuam motus dicti calorifici perennitatem; leviorum exhalationum calido-siccarum minime expertem, quibus hinc inde ab æthere proximo aliquando accensis variæ spectantur nobis cœli formæ igneæ, quas prolixè enumeravit DEODATUS *in Panth. Hyg. L. I. C. XIV.* Hanc regionem ultra cacumina montium per 13. milliaria

germ. elevari, legere est apud MICRÆLII *Lexic. Phil. p. 66. Secundam* seu *mediam*, sedem exhalationum & vaporum crassiorum, unde nubes fulmina & ventorum materia potiore partem proveniunt; quare & frigidior reliquis, imo secundum ARISTOTELEM valde algida perhibetur, quia reflexos radios solares non percipit, nec ab æthere ob nimium intervallum atque interpositam atmosphære regionem primam, nec etiam circulari motu, inclescere potest. *Tertiam* seu *infimam citimamque*, temperaturæ variæ, ac eousque extensam, quo usque moleculæ resplendescentes ascendunt, & radii solares reflexi penetrant, quod spatium quidem ad amissim determinabile non est, ad summum tamen vix 4. milliaria germ. excedere creditur: scilicet, cum inordinate admodum vapores & exhalationes globi terraquei ascendant, (dum, testante experientia, mox hic copiosiores & vehementius, mox illic pauciores & tardius &c. in auras eleventur,) conjectu haud difficile est, exinde quoque altitudinem atmosphære infimæ variari, præsertim, quando diversa radiorum solarium in hanc actio, hujusdemque rarefactio, condensatio, halituumque diversa gravitas accedit. Licet itaque non *positive*, *negative* tamen, (i. e. ita, ut altius 4. milliariibus teutonicis non sit,) ex initio & fine crepusculorum solisque sub Horizonte profunditate, tertiæ atmosphære regionis spatium quodammodo determinari potest, calculum sic faciente WEIGELIO *Sphæric. Euclid. L. III. obs. 16.*

§. V.

In hac infima aëris mixti regione idoneum semibus rerum fovendis & aptum eorum in vitam productorum conservationi focum DEUS Altissimus constituit; in hac sanitatis & morborum, salubritatis & insalubritatis media ac instrumenta secundum certas hujus affectiones ab eodem Celsissimo Numine posita sunt: aliter enim in corpora humana agit atmosphæra calida, aliter frigida, sicca & tenuis aliter, aliter denique humida & crassior, aliter si particulis diversis heterogeneis insalubribus, plus justo gravibus atque nimii & ferventis motus &c. aliter, si salubribus ac temperati motus, &c. imbuta sit.

§. VI.

Has igitur atmosphære tum affectiones proprias tum accidentia delibaturus in propriissimas illius, gravitatem nempe & elasticitatem, quæ posterior in ejus compressi aptitudine ad rarescendum consistit, evitandæ prolixitatis gratia inquirere easque probare superfedeo, tantis siquidem hætenus experimentis & rationibus à probatoribus Physicis hæ ipsæ, contra Peripateticos præprimis, levitatem aëris absolutam defendentes, demonstratæ sunt, ut nihil amplius fere ad eas impugnandas supersit; evolvi circa has possunt inter alios BOYLE *de Vi aëris elastica experim. V. it. experiment. de aëre continuat. 2. Machin. Papin. nov. CORNEL. CONSENT. de circumpuls. MARIOTTE de aëre p. 5. 6. 12. 45. & 46. PASCHALIUS de gravit. aëris C. I. SENGVERD. Philos. Nat. P. III. C. I. §. 2. & 4. & C. II. §. 1. 3. 5. & 6. WEIGEL. tr. cit. L. II. Observ. 15. Coroll. 2. MUND. L. cit. C. VII. DE LANIS Magist. Nat. & art. tom. 2. L. VI. C. II. propositione potissimum 19. append. 1. 2. & 3. &c. JOH. ALPHONS. BORELLUS de vi percuss. propos. XII. DU HAMEL Phys. gen. tr. 1. Disp. 3. quæst. 3. concl. 1. In specie Dissert. de Potent. ventor. in corp. hum. Cel. HOFFMANNI §. 2. 3. & Dissert. de Elat. aëris Eruditissimi Dn. HAMBERGERI Professoris mei quondam in Physicis & Mathematicis solertissimi. Ejus potius caliditatem humiditatem frigiditatem*

gilitatem & siccitatem, (quippe quæ consideratio multum ad rem præsentem facit,) lustrabo. Tribuunt affectiones hæc singulas Peripatetici, *aëri ut tali*, seu verius, *simplici*, tanquam qualitates primas, proprias, atque ex natura sua profluentes: verum quamvis, quod *siccitatem* hancque semper fere concomitantem *tenuitatem*, item *frigiditatem* concernit, cum PETITO *de frigore & calore art. 4.* illis sub certa limitatione concedi posset, aërem per se & naturaliter frigidum, (quod frigus tamen MUNDIUS *cit. tr. C. III. §. 4.* aëri proprium esse æque negat, sed potius particulis nitrosis certo modo dispositis adscribit,) per naturam etiam siccum & tenue, i. e. ad recipiendas exhalationes aqueas habilem, existere; quoad tamen *caliditatem & humiditatem* assertum minus videtur probabile: quatenus omnem calorem ab extra à Sole & effluviis siccis volatilioribus motis advenire meridiano lumine clarius est: dum pro illius radiorum præsentia & propinquitate, horumque modo perpendiculari modo obliqua magis incidentia atque reflexione, aëris temperies plus minus calida existit, de cætero vero sole absente vel remotissimo frigida, imo frigidissima deprehenditur. Probant hoc noctes ob carentiam radiorum solarium præ diebus semper frigida, probant orientalibus longe frigidiores imo frigidissimæ regiones plures septentrionales & meridionales, ob radios solares longa via diffitos & exinde productum frigus immensum plerumque non habitabiles; quale frigus in plagis extremis poli arctici & antarctici perpetuo regnat, tanta quidem cum sævitia, ut nautæ in mari hyperboreo f. glaciali balænarum capturæ operam dantes moles glaciei montium æmulas, ab æstuariis aut vastis fluminibus illuc delatas & acervatim congestas, quasi insulas in mari natantes ac veras symplegades, passim navigantibus interitum minantes conspexerint. In moles istiusmodi, fronte minaci mali navis summitatem superantes, (nihilominus tamen septimam tantum partem è mari extantes, prouti recensente MUNDIO *Lib. vit. C. 4. §. 2.* experti narrant,) se impigisse scribit JAMESIUS *in ephemeride de navigat. septentr.* Gelidus hicce aër in oleum, cerevisiam & vinum, (generosissimum etiam, non autem spiritum vini rectificatum,) tantopere sævit, ut pene fiant inutilia; quin arborum quoque truncos maximo cum fragore, ac si machinam muralem pulvere pyrio disploderes, diffundit, lapides dissilire, humumque in *Mosciforo* magis, quem in nostris provinciis ab æstu, dehiscere facit, & quod stupendum, ignes ægre ardere, nec homines nec aquam ad hos (vel profecto tarde,) calefieri permittit. Refert enim id. MUNDIUS *l. c. §. 3.* Anglorum & Belgarum in Charletonia & Nova Zembla hyemantium ignes in hybernis accensos præ aëre ambiente intensissime frigido adeo languide arfisse, ut affidentes eisdem ne calefierent quidem: notavitque laudatus JAMESIUS *tract. memorat.* partem alteram aquæ aheni infusæ igni proximam ægre calefactam, alteram vero eodem aheni detentam priori oppositam & aëri objectam glaciem pollicis crassitie contraxisse. Similia narrat MARCUS PAULUS VENETUS de quadam *Tartariæ Valle*, montibus in orbe editissimis subiecta, in qua ignis ardere nequit; it. DIODORUS *de Scythia circa Tanaim*, ibidem mirum præ frigore ignis splendorem nullum, hominumque oculos obfufcari, & quod fabulosum forte quibusdam videbitur, fimbrias vestium aliquando à gelu detritas decidisse. Imo *metallis* quoque vim inferre frigus ejusmodi horrendum testis est STRABO, qui *æneas hydrias* à frigore in *Ponto* diruptas recenset. Dicuntur propterea loca isthæc frigidissima *periscia*, quasi *circumumbria*, germ. *umbschattige* / ex

eo, quod ob solis defectum perpetuam fere umbram habeant.

§. VII.

Quemadmodum autem remotissima ex obliquo Solis distantia, ejus item radiorum absentia, frigori vel minori vel majori, uti allata exempla evincunt, ansam præbent, (ad cuius tamen vehementiam aliquando vapores aqueo-salinos in aërem elevatos, hujusque motum ultro impediētes, ipsis tempestatibus hyemalibus hoc monstrantibus, inultum conferre, nullum est dubium:) sic è contrario *Solis præsentia, radiorumque illius plus minusve directæ & perpendicularis seu acuta incidentia atque reflexio*, (non exclusis tamen effluviis terræ siccioribus elevatis, simul concurrentibus,) *caloris vel levioris (teporis), vel temperati, vel etiam excedentis, imo intolerabilis, causa fit.* Exempla nobis (positis ponendis) exhibent *zonarum torridarum* (septentrionalis scil. inter æquatorem & tropicum cancri, & australis inter æquatorem & tropicum capricorni, inclusarum) *regiones*, quas Africanas, Asiaticas, & Americanas potissimas enumerat DICELIUS *Geogr. gen. p. 106.* in quibus Sol ex Zenith certo tempore verticalis est, & radii ejusdem reflexione per angulum acutum imo acutissimum duplicantur. Notum namque mercatores per desertæ Arabiæ arenas proficiscentes vehementi Solis æstu cum camelis suis in ipso itinere extinctos concidisse, ob quam causam tot illic sunt solitudines; quarum accolæ (incolas enim illæ regiones non habent, nisi prædæ gratia mercatoribus insidiantes Arabes, desertæ illa hinc inde per aliquod tempus pervagantes,) caloribus misere cruciantur: quin intolerabiles habitationum accolarum istorum æstus fore scribitur, nisi multo artificio eos mitigarent; etenim sub dio ambulantes Soli ardenti umbracula opponunt, dormientibus dominis servuli adstantes flabellis ventos afflant, multi speluncis interdum se defendunt, noctu sub dio dormientes, alii in ductibus auram captant. *Ormusiæ* (Lusitanorum in sinu Persico celebris emporii) tum cives tum advenæ in hypogæis frigida mento-tenus demersi de die dormiunt, aut otiantur, de nocte vero surgentes mercaturæ & aliis negotiis vacant; quidam aëris inspirati fervorem tolerare nolentes in umbra desident, & frigidam (nivalem etiam, ubi ex vicinis montibus haberi poterit,) avidissime & ad nauseam non bibunt sed corporibus infundunt, & ne sic quidem sitim inextinguibilem restinguunt, quin ventrem potius adeo his replent ac distendunt, ut à Lusitanis dolia appellentur. Ad eandem urbem *Ormusiam* auræ candentis, ab arenosis desertis delatæ; ardentissimo afflatu integer aliquando exercitus suffocatus periit. Appellantur dehinc sub zonis istis torridis degentes *ascii* seu *nullumres*, (*ohnschattige*) item qui in medio harum sunt *amphiscii*, *utrinquimbres*, (*zweischattige*) quia cum sol ultra citraque Zenith digreditur, umbras meridianas interdum in Boream, interdum in Austrum, interdum versus occasum, versus ortum interdum, (hocque vespertino illud matutino tempore) videant cadentes. Insanire *proinde calorem aëri ex ejusdem tenuitate proprium* statuere volens videretur, qui potius velocissimo *radiorum solarium* variæ incidentiæ motui, tum quoque rapidiori ab his *corpusculorum sulphureorum aliorumque calidorum* elevationi atque agitationi adscribendus est.

§. VIII.

Parem difficultatem patitur & illa assertio, quando ARISTOTELES *L. de generat. animalium* & alibi cum suis affectis *humiditatem aëri propriam & essentialem*

tialem tribuit, quam tamen pure accidentalem esse vel unicum hoc evincit: quoniam sibi relictus ad absorbendas & imbibendas multas humiditates aliorum corporum aptus observatur; quod fieri nequaquam posset, si natura sua humidus existeret, id quod pluviae frequentes, flumina & stagna, abunde commonstrant, quatenus hæc sæpius radiorum solarium, moleculas aqueas in auras elevantium, auxilio penitus exsiccantur.

§. IX.

Hæ qualitates seu affectiones generales atmosphærae adeo sunt necessariae, ut nunquam ab his libera sit: propterea tamen nullatenus, uti dictum, spectant ad aëris homogenei essentiam; hunc namque sine illis existere facilis probationis est.

§. X.

Aliter paulo se res habet cum qualitatibus specialibus, id est illis, quæ propullulant ex separabilibus in atmosphæram elevatis effluviis, utpote quæ omnia ex hac abesse poterunt, plurima etiam in multis regionibus absunt, (quamvis aliqua eorum locis certis sint quasi propria, uti *Londini* in Anglia & hic *Halis* effluvia salina atque carbonum fossilium; circa metalli-fodinas effluvia volatilia metallorum & mineralium; circa civitates effluvia fumosa acida ex lignis combustis, nullo anni tempore ne per diem quidem absentia.) Talia effluvia variæ & innumeræ pone sunt indolis, caliginosa nimirum, fuliginosa, marcida, foetentia atque gravem mephytim spirantia, paludinea, uliginosa, nidorosa, putredinosa, venenosa, contagiosa, pestilentia ac deleteria varia; è mineralibus exurgentia, sulphurea, mercurialia, arsenicalia antimonialia &c., salina varia, vitriolata puta, falsa, acria, corrosiva, acida, alcalica, nitrosa &c. diversis meteororum impressionibus alterata, ignea, terrea; it. è plantis & animalibus redundantia; rorida tandem (rosida) suavia, odoris omnis generis, fragrantis, salubrioris, spirituosius ac volatilis, & quæ id genus innumera sunt alia.

§. XI.

Imprimuntur vero aëri puriori qualitates istæ atmosphæricæ, si non omnes atque singulæ pleræque tamen, *primario* per motum siderum, uti quidem superius hinc inde demonstravi, quatenus nempe hic, totum aëra in intimis etiam terræ visceribus & aquis commovendo, separat ac elevat diversissimi generis halitus & vapores, tum salubres tum noxios; de quorum præcipuorum tantum non omnium jam enumeratorum diversissimo effectu, operationibus & virtutibus in hominum corpora adeas solertiss. *MUNDIUM tr. alleg. C. 2. §. 2. C. 4. §. 4. C. 6. §. 5. capitibus denique 5. 8. 9. 10. 11. 12. integris, ex asse profecto satisfaciendem: Secundario* affricantur per motum aëris ipsius violentum, *ventos* nimirum, effluvia talisnodi hinc inde dissipantes, inque alia loca transferentes: quorum naturam, quantumque hi in inficiendo & alterando aëre valeant, paucis enodabo.

§. XII.

De cardinalibus vero potissimum fermocinandum est, siquidem ab his aëris immutati & mixti cardo dependet, cum quovis anni tempore spirent, hincque cum suis collateralibus ab *HIPPOCRATE tr. de aëre aqu. & loc. νόβα πνεύματα venti communes* audiunt, & particularibus seu vernaculis contradistinguuntur. Dicuntur vero cardinales, quod à quatuor mundi cardinibus flare soleant; ab ortu nimirum æquinoctiali *Subsolanus*, (*Ostwind*), ab occasu

æquinoctiali *Favonius*, (*Westwind*) à meridie *Auster*, (*Sudwind*) à septentrione *Aquilo* seu *Boreas*, (*Nordwind*): reliquos ventos *XXVIII. cardinalium* nimirum collaterales, integros, dimidiatos, & quadrantes si addiscere cupias, evolvere poteris elegantissimum ventorum schema seu typum horumque omnium denominationem apud *RENATUM MOREAU Comment. scholæ Salernit. C. I. membr. 4. STURMIUM Geogr. Mathem. Tab. III. fig. I. & MARCEL. Consp. Geogr. C. V. p. 14. Ventis communibus annumerantur venti anniversarii, certo tantum tempore se manifestantes, chelidoniæ nimirum vere, ethestræ æstate, (hos procedunt præcurrentes,) *Orithis* post brumam & alii singulis mensibus spirantes, quos descripsit *Blondus Lib. de navigat. Particulares seu vernaculi venti ἐπιχώρια πνεύματα* laudato *HIPPOCRATIS* dicta, certas differentias vix habent, cum nemini singularum regionum naturam indagare, ventosque illic flantes adeo accurate observare concessum sit: ad duo nihilominus capita commode revocari, & in *aquosos* atque *terrestres* dispesci poterunt: priores sunt primo *sinuales* seu *encolpiæ*, qui scil. juxta flumina fiunt, vel è sinu quodam exeunt; secundo *illi*, qui è mari *prodeuntes vicina loca asslant*: Posteriores (1.) è terrarum plano elevantur, & *PLINIO H. N. L. II. C. 43. atque Autori Lib. de Mundo altani* nominantur: qui, cum ad mare pergunt, *apogæi*, si vero à mari recedunt, *tropæi* audiunt; (2.) è speluncis & antris subterraneis prodeunt, quos ideo *Charonias* vocant. Alios quosdam regionibus aliquibus, exteris præprimis, magis proprios & vernaculos evolutum ibi apud *HIPPOCRATEM loc. alleg. PLINIUM l. a. C. 47. SENECA in Lib. V. natural. quæstion. C. 17. & laudat MUNDIUM L. mem. C. XIII. p. 84. seq.* Pollent hi venti omnes atque singuli tum cardinales tum collaterales & vernaculi ratione naturæ suæ, motus plus minus vehementis, atque elevatorum corpusculorum, variis viribus & facultatibus regiones earumque incolas efficiendi: *Dedit enim*, inquit *SENECA quæst. nat. L. VII. C. 18. summus ille rerum artifex ventos ad custodiendam cæli terrarumque temperiem. Et quamvis HIPPOCRATES L. de diæta text. 4. §. 2. usque 10. statuatur, ventos omnes ex constitutione sua propria humectare & frigefacere, quoniam singuli à locis glacie & nive oblitis geluque vehementi affectis, à fluminibus & stagnis, prodeant: nihilominus tamen eosdem propter situm regionum ac locorum, quos perflant, diversas vires acquirere, & alium alio calidiorem, frigidiorum, humidiorum, ficiorem, ob varia effluvia morbosiorum, salubriorem esse §. 11. 12. rectissime scribit, posterioribusque textibus duobus erudite admodum deducit. Quatuor proinde cardinalium facultates exhibiturus dico; *Aquilonarem* à septentrione spirantem (eis æquinoctialem inprimis & in nostro hæmisphærio) frigidum, ficium, serenum, limpidum & subtilium partium esse, suisque particulis nitrosis copiosissimis aërem summopere purgare, nubesque fugare, atque corporum profundum subire, dehinc putredini resistere, constingere, densare, superfluum humidum consumere, appetitum excitare, sudores & fluxiones cohibere, virtutem generativam augere, & ut verbo *HIPPOCRATES Lib. de sacr. morb. efferam, saluberrimum omnium ventorum existere, COELIO RHODIGINO L. 20. C. 18. exemplo manifesto id probante: quando in Lesbo insula flante Austro & Coro incolas ægrotantes & tussientes superveniente vento Aquilonari protinus convalescere memorat: unde mirum non est ventum Aquilonarem homines roborare, ut vegetiores longe majores & robustiores reddantur, more Germanorum, quorum corpora exinde & viribus & mole præstantiora***

conspici non inepte concludit DEODATUS *Panth. Hygiast. L. I. C. 15.* qui propterea, referente JULIO CÆSARE, *Romanis fere terribiles extiterunt.* Nocet tamen & is, multum nimirum invalescens, (*ὁσόν-τεν δυνάστων* dicit HIPPOCRATES) diutiusque durans, senum præcipue & tenellorum atque reconvalescentium generi nervoso, alvum indurat, venas rumpit, difficultatem urinæ causatur, stuporem inducit, fauces exasperat, oculos, latera & pectus lædit, tussis movet, unde phthificis obest, præterea flores & fructus corrumpit fementemque adurit. Proximus ab hoc ad latus sinistrum est *Subsolanus*, (*MUNDIO Eurys*,) ab ortu æquinoctiali spirans, qui secundum LEMNIUM antelucano subfrigidus, meridie vero Sole in Austrum vergente tepescens, & caloris languidi est ac moderati, humectans, aliquando æqualis & mitis, de cætero aquas salubritate donat, sensus vegetat, fœcundat, humores attenuat, expurgat; dehinc plurimorum confessione *aquilonari* salubritate minime cedit, quin omnium ventorum *temperatissimus* & saluberrimus æstimatur, calculum adjiciente ARISTOTELE *L. VII. Politic.* qui *urbes ad auroram sitas & vel ad orientales vel ad aquilonares ventos spectantes decernit saluberrimas*: quamvis interim & is quoque (causam allegante laud. *MUNDIO C. XIII. §. 15.*) *occiduis Europæ partibus & occidentalis Africæ incolis* aliisque quibusdam gentibus, earumque frugibus vere præsertim ineunte, minus salubris deprædicetur: unde forsitan & Hebræis ventus tenuis, exurens & exsiccans sanitati-que maxime infensus audit, ex eo, quod exhalationibus asperis, salinis, terrestribus, arenosis, calidis ac retorridis variarum regionum æstuantium stipatus longo ab oriente tractu accederet. *Subsolano* è diametro ad latus Aquilonis dextrum opponitur *Favonius* seu *Zephyrus*, propter beneficia ita dictus, ab occidente æquinoctiali flans, moderate frigidus & humidus, exhalationum terrestrium expers, blandus, lenis, amœnus, suavis, frugum nutritor: quippe qui flosculos elicit, omnia revivificat, sanguinem aliosque humores corporis sinceros procreat, eosque lætitia perfundit, hinc admodum salubris censetur nobis Europæis, verno præsertim tempore: minus tamen salutaris & noxius evadit is, quando ob immodicam vaporum ab oceano elevatorum & dilatorum copiam vehementia *fratribus suis collateralibus*, *Africo* & *Coro* potissimum, non cedit, quin hœc nonnunquam superat, quod ex *relatione SCALIGERI exercitat. 285. ad Cardanum in Vasconia* usu venit, ubi raro sine incolarum pavore & detestatione ingruit. A latere Subsolani sinistro & Favonii dextro ex opposito Aquilonis a meridie flat *Auster*, nobis Europæis, Germanis potissimum, *omnium ventorum insaluberrimus*, intemperate calidus & humidus, ex eo, quod per longissimos maris tractus & aridissima terræ loca spiret, ciet hinc pluvias impetuosas, imbres & procellas, magnarumque tempestatum autor est, præterea vires corporis dejicit, meatus cutis referando miasinata sulphurea insalubria, quibus scatet, corpori immittit, humores liquat turbatque; & teste HIPPOCRATE *III. aph.* sensus gravat, motus segnes reddit, articulorum rebur laxat, febres ac putredines causatur, & quæ magno numero incommoda plura recenset DEODATUS *L. I. Panth. Hyg. C. 15.* is tamen & ipse populis Antœcis, Africanis, Lybicis præprimis gentibus, salubris est, quippe frigidus ibidem aërem ferrenat. Plura & experimentis accuratioribus confirmata circa motus operationes & virtutes ventorum cardinalium videsis in dissert. *de Potent. ventorum in corpus humanum acutiss. nostri* HOFFMANNI à §. 9. usque ad finem, in qua dissert. §. 7. 8. de causis &

origine ventorum conceptus etiam invenias ingeniosissimos itidem experimentis pluribus deductos. Virtutes & facultates collateralium intermediorum seu majorum & collateralium dimidiatorum &c. quod attinet, eas (ne tractatum conscribere videar,) speciatim tradere nolo, potissimum cum a cardinalibus ventis, quibus hi interjecti sunt, pro ratione viciniae, qua huic vel illi magis junguntur, has mixtas participant: quamvis & hic diversitatem quandam pro varietate locorum subesse demonstret *MUNDIUS l. c. §. 8.* Exhibet qualitates ventorum horum, ut & anniversariorum, particularium item seu vernaculorum, atque regionibus quibusdam propriorum, fuscè satis præter jam adductos Autores varios locis allegatis omnium optime *Eruditissimus Angliæ Cancellarius* DE VERULAMIO in *Hist. Vent.*

§. XIII.

Limitatur atmosphæræ & ventorum constitutio ac virtus insigniter per *montes, sylvas & aquas defluentes*, &c. *Montes* plerumque saxosi sunt vel fabulosi, variosque continent lapides pro varia succi lapidescentis accepti natura, quem subiens major minorve calor excoquit vel indurat. Hos inter sunt etiam venæ, refertæ pinguiore liquore sulphureo & salino mercuriali, atque æthere spirituoso minerali, tempore ingressionis metallorum semper præsentē, ex quibus diverso caloris gradu & motu diversatum mineralia tum metalla, diversique fluores, sales, &c. pro conditione terræ plus minus puræ, efformantur procreanturve. Ingressus talis metallorum (*der Einzug der Metallen*) loca montana admodum nobilitat, fertilitateque ac salubritate aëris insigni donat, inprimis si liquor ille æthereo-metallicus circa metalla ascendente occupatus sit, (*wenn er das aufsteigende Erz im Berg hat* / probe hoc animadvertente BASILIO VALENTINO *Lib. Von Bergwerck / dessen Ursprung &c. C. V. & VII.* afficiunt enim tunc atque emolliunt quasi exhalationes metallicæ subtiliores ac spirituosæ (*die Auswitterung*) usque ad superficiem terræ penetrantes hanc adeo: ut pulcherrimos fructus & flores balsamicos, citius etiam maturescentes, protrudat; obducuntur hinc ejusmodi regiones metalliferæ in superficie terræ calce quasi quadam ab exhalationibus talibus & resolutis terreis partibus concreta, quæ humiditate aquea accedente (*wenn die Wasser zu Tag auff den Boden hinein kommen*) leniter incalescendo in terram summæ fertilitatis & salubritatis transit, in cujus rei exemplum *idem* BASIL. VALENTINUS *l. c. C. XXIII. Hungariam*, regionem per totum metalliferam, tanquam frugum omnium fertilissimam saluberrimamque in medium producit. Cum grano itaque salis legenda sunt verba SENNERTI loco supra cit. quando *loca metallica venenosam sæpe & malignam auram expirare* scribit.

§. XIV.

Quid itaque mirum? Editiora & montana loca pleraque variorum vegetabilium, florum, fructuum balsamicorum, odoriferorum atque penetrantioris energiae ut plurimum esse fertilissima; quæ vegetabilia amica sua & gratissima suavitate *atmosphæram* (vel extra hoc liberioris ac sanioris jam usuræ,) illic afficiunt, & commodissimas atque saluberrimas hominum habitationes tum in jugis, tum ad latera sui exhibent: ut taceam commoda locorum editiorum alia plura, ob quæ reliquos terræ tractus præcellunt, aquarum videlicet & fontium puriorum præsentia, fructuum omnis generis laudatissimorum ubertas, vinorum præstantia, diversissimorum animantium lignorum etiam sylvarumque copia, pascuorum salubritas

tas & elegantia, prospectus longi latique amoenitas, homines locorum istiusmodi editorum inhabitatores mirum quantum recreantia; quæ recreatio ad sanitatis conservationem & longævitatē non parum confert. Cernimus ea propter *monticolas* (montes inprimis mediocriter elatos & libere perflatos inhabitantes) *cæteris ut plurimum saniores, robustiores, alacriores & vivaciores existere*, cum AVICENNA per experientiam ita loquente DEODATO PANTH. *Hyg. L. I. C. 19.* istudque uberius confirmante *Præcell. HOFFMANNO dissert. de Peregr. sanit. caus. instit. C. III. §. 4. p. 16. & 17.*

§. XV.

Diversa tamen *montium altitudo situsque ad mundi plagas*, radiorum solarium & ventorum etiam hinc inde spirantium atque in hos illidentium, dehinc auræ quoque atmosphaericæ, nativam virtutem insigniter alterant ac limitant, sæpius non sine insigni commodo, prout nimirum urbes, oppida, arces & pagi ad hoc vel illud montium latus situm suum obtinent: audiamus hac de re acute satis differentem SENNER-TUM *l. supr. cit. Loca* (inquit) *editiora frigidiora fere sunt, ventisque magis perflantur, humiliora vero calidiora sunt, radiorumque Solis repercussionem citius ac vehementius excipiunt; & qui ad radices montis meridiæ & orienti obversi habitant, longe majorem calorem sentiunt, quam qui post montem versus meridiem ortumve situm habitant, quibusve septentrio & occasus patet, oriens vero & meridies monte clauditur. Nam qui priorem loci situm habent, mox matutinos Solis radios excipiunt, ejusdemque meridianis radiis & æstui obijciuntur: qui vero posteriorem situm obtinent, majorem diei partem sine radiis transigunt, atque interim septentrionali auræ patent, demumque Solis ad occasum declinantis radios excipiunt. Montium quoque situs facit, ut quedam loca quorundam ventorum flatibus magis vel minus exposita sint, atque ita juxta ventorum, quos magis excipiunt, naturam magis frigeant vel caleant. Nam si montes Boream arceant, admittant vero Austrum, accidit, ut loca sint calidiora & humidiora; contra, si ob montium situm, Austro aditus intercluditur & Boreas admittitur, locus erit frigidior & siccior. Evidentius paulo hæc proponit RENAT. MOREAU *l. all. membr. II.* dum ait: *Montes humiles (colles) non admodum mutant naturam locorum; alti vero nivosi sunt, atque quod notandum est, vel ad Aquilonem siti sunt, vel ad meridiem, vel ad orientem vel ad occidentem. Cum sunt ad Aquilonem positi, loci naturam calidam reddunt, quia reflexio radiorum Solarium ad illos montes calefacit illos montes vehementer, quo fit, ut vina generosa in parte meridionali locus ille producat. Cum montes plurimi sunt ad meridiem, & à septentrione flant venti, locus est valde frigidus, tam propter nives quam ventos; erit præterea siccus & sanus, nisi alia prohibeant accidentia. Montes in parte orientali positi, locum reddunt frigidum & humidum ejusque aerem crassum, impurum & insalubrem. Frigidus quidem locus erit, quia tectus ab oriente, crassus vero aer tum quia vicinus montibus, tum quia ventis occidentalibus apertus est. Denique cum montes ad occidentem positi sunt, locus salubrior est, quod ventis affletur orientalibus.**

§. XVI.

Inprimis autem si *sylvis ac nemoribus luxuriant montes* è fagis præsertim & betulis atque arboribus ac fruticibus gummosis resinosis balsamicisque constantibus, sanitati incremento sunt maximo, partim, quod effluviis suis refragantibus atmosphæram insigniter temperant, partim ventorum quoque vehementiorum atque irregularium quorumcunque allisus infringunt:

quod tamen aliter contingit in locis declivibus palustribus ac cœnosis; illic enim positæ sylvæ densæ arboribus proceris, quercubus potissimum, instructæ Solis & Lunæ radios à tellure arcent, ac ex fundo humido vaporoso cœnosoque auram atmosphaericam spissam & suffocatam aerem, nebulosam ac turbidam quasi urbibus &c. (in plano præsertim) sibi adjacentibus communicant, hujusque motum & ventilationem, omni putredini foetori ac corruptioni alias adversum, impediunt.

§. XVII.

Fluvii tandem & torrentes ex montibus præsertim petrosi ac arenosi scaturientes locaque arenosa & faxea alluentes ac transeuntes atmosphæram vicinam tantisper agitando & humectando salubrem efficiunt, modo non confita sint loca palustria & lacustria, per quæ vehantur: hoc enim modo tetrus exin vaporibus elevatis nocent, quotidiana experientia hoc abunde testante, & VARRONE *L. I. de re rust. C. XII. ex Avicenna & Rhafi* id ipsum confirmante; potissimum autem quo rapidioris decursus sunt flumina, ea salubriora habentur: audiamus hac de re differentem CARDANUM *L. II. contrad. Flumina* (inquit) *velociter currentia aerem attenuant, faciuntque corpora tenuia, macilentia, mobilia; &c. cœnosa vero & quæ tarde moventur, ut Padus, corpora minus valida reddunt & sana &c.* Nimirum: id commodi flumina rapidiora impertiuntur, ut sub vaporum specie elevatæ particulæ aqueæ humectando infigident quodammodo aeris mixti regionem, quo ipso ardentissimus Solis æstus æstivis temporibus mitigetur, & effluvia alia peregrina, tempore sicciore noxia & maligna sæpius, è poris aeris mediantribus dictis vaporibus, quibus combinantur, præcipitentur & quasi figantur, sicque immutata pereant, nec amplius noceant.

§. XVIII.

Prolata hæc generalia de aeris mixti variis affectionibus earumque causis faciliori jam temperamenti atmosphaeræ Hassiæ examini ac cognitioni inservient: inprimis autem quod caliditatem, frigiditatem, humiditatem atque siccitatem hujus concernit, qualitates istæ temperatæ admodum ibidem sunt. Elucet hoc ipsum vel exinde, quod gravia ejusmodi corporis incommoda atque tyrannidem ex morbis non experiantur provinciæ istius possessores, qualem calidarum directis Solis radiis subjectarum regionum incolæ ab aere atmosphaerico illic locorum intensius calido persentiscunt; adeo enim rapidos motus sulphureæ aliæque subtiliores & volatiliores aeris mixti partes ibidem à radiis Solaribus è Zenith missis concipiunt, ut sensui sint molestissimæ, & vitæ sustentandæ minus idoneæ. Perpetiuntur eapropter crebro & in atrociori gradu elephantiasin seu lepram, foedissimam & exedentem morbi speciem, de qua pauca tradidit è GALENO BLANCARDUS in *Lexic. sub tit. luem Tartaream, choleram & dysenteriam malignam, morbum iliacum, ardentissimos causos, aliosque à bile oriundos affectus atrocissimos atque malignos; quin morbi pestilentes, in regione nostra temperata vix nisi contagione & rarius propagabiles, sub calidioribus hisce climatibus spontaneo ortu eveniunt, exemplo urbis Ægypti maximæ, Alkair, ubi quotannis grassantur. Illum vero saltem (majorem quamvis,) regionum calidarum & zonarum torridarum tractum afficiunt, qui aquis & humida ferme destituitur ac squalet: reliquæ namque (fecundiores scilicet,) eodem sub æquatore atque zonis torridis sitæ, imbribus tamen ac fluminibus irriguæ regiones, montosæ præsertim, benigna etiam utuntur atmos-*

atmosphære temperie, prouti supra indicavi; superant namque Americani, calidæ zonæ incolæ, vegeta senectute Nestoris ætatem; & insula S. Helenæ in mari Atlantico inter tropicos sita adeo est salubris, ut ægri moribundi pene & tantum non conclamati in terram ejus è navibus ex India redeuntibus expositi illico convalescant; quæ salubritas in pluribus aliis zonæ hujus insulis animadvertitur, in quibus incolæ morbum nullum præter annosam senectutem norunt, ita, ut notabile sit, quod scribit BONTIUS *de Medic. Indorum: Indiam & insulas adjacentes nunquam peste tentari.* Qua sub limitatione forsitan etiam interpretandus est locus ARISTOTELIS in libello, qui inscribitur *Ἐν τῇς μακροβιωτέραις*: quando eadem animalia in calidis locis diutius quam in frigidis vivere scribit.

§. XIX.

Neque percipiunt nostri atrocissimos illos morbos & neces à frigore oriundos, quos pati coguntur populi septentrionales, polo arctico, & meridionales, antarctico viciniore. Ibi enim tanta tamque gravissima cœli inclementioris incommoda sunt, ut flammulam vitæ præ immani frigore incolumem subsistere vix sperare possis, cum notissimum sit, quod pluribus in *Sarmatia* extremitates membrorum algentium gangræna & sphacelo corruptæ misere decidant, ibidemque & in aliis confitis regionibus quotannis multi trahis vecti in itinere (etiam breviori) extinguantur, rigentesque per jumenta vel alces (*Nenithiere*) in urbes deportentur. Refert JAMESIUS *tr. alleg. nonnullis sociorum suorum à nimia sub dio inter nives mora pustulas quasdam (phlyctænis non absimiles, quæ ab ambustione oriuntur,) adeo graves & difficiles accidisse, ut labori facti inutiles vix 14. dierum spatio sanati sint*; & PAREUS in *Chir. Multis in nive aut glacie in regionibus, ubi frigus vehementer sævit, diu commorantibus partes extremas adeo mox in totum corrumpi, ut, si incauti ad ignem nimis propere accedant, eisdem priventur: quamprimum enim incalescunt, protinus quasi ferro abscissæ decidunt.* Narrat porro XENOPHON in *anabaseos* L. VII. Nonnullos Græcorum, qui post reditum è Perside in Thracia meruerant, naves & aurium partes præ frigore vehementi amisisse; & CORNEL. TACITUS in *annal. Militi cuidam Romano exercitus illius, quem Corbulo adversus Parthos duxit, à lignatione in hybern. redeunti utrasque manus gelatas onerique hærentes simul avulsas esse.* Recenset quoque MUNDIUS *tr. sapius alleg. C. V. §. 1. Sibi à Scoto generosæ familiæ in regnis borealibus militante relatum esse: sub expeditione quadam plerisque militibus pedes & manus ex gelu adeo contractas fuisse, ut multi ægre incedere, aliqui plane ne quidem ambulare vel arma tractare potuerint; quod malum Græcorum termino Malce is appellat.* Taceo jam morbos internos plurimos, viscera humores & spiritus infestantes, quorum primarii sunt spasmi, tetanus, apoplegia, paralyxis, peripneumonia, dyspnoea, colica, bulimus, istis in locis ab atmosphære supra modum frigidæ asperitate creberrimi & vehementissimi: à quibus incolæ regionis HASSIÆ rarius ac mitius longe afficiuntur: cum in hac hyemes sint longe tolerabiliore; atque aeris mixtura pro ratione partium anni in mediocritate temperaturæ veluti omnium qualitatū constituta cernatur: & licet tempestatum quoque vicissitudo adsit, moderatior tamen & sine ullo tali excessu atque tolerabilis semper animadvertitur.

§. XX.

Insignis præterea momenti res est, quod maxima regionis pars ventis salubribus affletur, *Subsolano* potissimum ab ortu, ventorum saluberrimo, quem ha-

bet patientiorem, deinde & *Zephyro* seu Favonio ab occasu, æquinoctialibus; *Aquilonio* etiam à septentrione è loco ursæ majoris, non nimis frigidus, regionis nostræ propiore & salubritate *Subsolano* minime cedente: prædicantur siquidem ab HIPPOCRATE L. *de acre, aq. & loc. incolæ regionum, quos venti frigidi & sicci afflant, diuturnioris vitæ quam alii*; ex eo forsitan, quod externa illa frigiditate intro quasi cogeretur calor & augetur: quo fieret, ut nec congelari nec extinguī possit, atque putredini maxime resistat; (tum quia copiosius est, tum quia excrementitiorum humorum cumulationem inhibet.) His afflatibus loca præprimis editiora in singulare recreamen fruuntur, atmosphæraque istis ipsis egregie mundificatur & ventilatur. Et quamvis subinde etiam appulsum ventorum meridionalis austrini & occidentalium collateralium rarissime salubrium patiatur, cohibetur tamen multum eorundem vis atque temperatur per loca montosa atque nemorosa, quibus Hassia abundat, hinc inde interjecta, ne tantopere noceant.

§. XXI.

Positi sunt namque ad meridiem versus Franco-niam, quam ab Hassia separant, & tractum Moeni, tantisper etiam ad orientem, montes PTOLOMÆO L. II. *Geogr. C. II. Abnobii* dicti, nunc *der Spessart* secundum WINCKELMAN *Chronic. L. I. C. VI. p. 34. it. Melibocus* ad Zwingenbergam, simul versus occidentem se extendens, intra Hassiæ terminos situs, Germ. *der Malchen*, aliis *Spitz*: it. *Sticfel-Berg*; ad quem montem Hessiones seu Catti antiquitus habitantes juxta RHENANUM *rer. Germ. L. I. p. 56. Cattimelibocenses* dicti sunt, quorum Comitatus hodiernum adhuc hoc nomine celebris est. Determinat quasi hic mons Comitatum superiorem Cattimelibocensem a Palatinatu, Archiepiscopatu Moguntinensi, Franconia etiam, & ex parte sylva semana; in medio Francofurtum inter & Heidelbergam conspicendus. De hoc monte notat *Topogr. Hassiæ Mariani* p. 150. eum à decem aliorum montium cacuminibus sustineri & portari quasi, tantæque altitudinis esse, ut ab ipsius jugo summodum Decem Dominatum urbes, oppida, arces & pagi numero innumero conspici possint. A Rheno prope Monasterium *Lorch* / ut habet DILICHIIUS in *Chronic. Hass. p. m. 59.* ex inferiori Comitatu Cattimelibocensi juxta *Wißbaden* per Wetteraviam in Hassiam usque protenditur *mons sylvofus*, qui CORNEL. TACITO L. I. & XII. *annal. Taunus* hodie *der Seibberg oder die Höhe* / ab altitudine insigni audit; tempore Caroli M. *Heinrichia* sylva dictus est, & pro portione Meliboci habetur; ad cuius latus deorsum versus alius mons quem *den Hanrich* vocant, conspicitur, quod nomen tamen simul toti *Tauno* impositum legitur. Ad latus septentrionis extant montes Hassiæ *Obnobii* à vucula Saxonica *Obernob* ita salutati, prope fines superioris & inferioris Hassiæ deorsum ad Occidentem tendentes, Sylvæ *Hesperia* (*Westerwald*) adjacentes, ex opposito sylvæ *semana* (*dem Odenwald*) & Westphaliæ ab Hassia determinantes; cuius partem ad Rhenum constituit mons *Lurlejus Lurley* / vinetis & eccho multiplicato clarus. Ad latus orientis in conspectibus *Thuringiæ* aliqui etiam, enumeratis tamen magnitudine multum cedentes montes versus Hassiam nostram deprehenduntur, quos quia plurimi & celebriores eorum extra territorium Hassiacum positi sunt, nostrum describere non est. Denominavit potiores MERIAN. *Topogr. p. 7.* Præter vero recensitos grandiores & celebriores magnus in regione hinc inde extantium montium (quorum plurimi portiones dictorum majorum sunt,) adhuc est numerus; eminet ex his (1) *avimons, der Vogelberg* / in præfectura *Ulrichstein* / quæ

quæ propterea avimontana eluet, longus, altus & frigidus, nivesque in Majum usque fovens, versus occidentem & meridiem potissimum directus; hunc ea de causa portionem Tauni WINCKELMANNUS *l. cit.* cum DILICHIO æstimat. (2) Mons ad occidentem, milliari Gießa distans prope oppidum Kinzbergam, quem *den Dynsberg* vocant, (ex eo fortasse, quod vaporibus circa illum collectis tempestates significari soleant,) tantæ altitudinis, ut serena tempestate ultra 12. vel 15. milliaria usque ad Melibocum summa cum jucunditate prospectus in hoc extendi queat; montem istum descripsit oratione speciali CONRAD. DIETERIC. *Instit. orat. p. 64.* (3) Mons Eischwigen-sis, quem *den Meißner* / rectius *Weißener* (*montem album*) nuncupant, eapropter, quod sylvosus in longam æstatem nivibus obtegatur; uno milliari Eischwiga, (à fraxinis *Eschbäumen* cognominata,) haud procul à *Wald-Cappel* locatus, & maximus Hassiæ inferioris mons est, è quo in aliquot Principatus & Dominatus ad multa milliaria prospectus patet; plura habet hinc inde promontoria, quorum celebrius ad urbem Allendorffium dicitur *die Hohe-fürste*. (4) Mons alius ex altioribus unus ad sylvam, quam *accipitrinam den Habichtswald* nuncupant, situs, nomine *der Dörneberg* quasi dicas *Dürrenberg* / quia undiquaque calvus, & vegetabilibus atque arboribus orbatus est; aliam denominationis causam exhibet DILICH. *Chron. Hass. p. 140.* Ante montem istum in colle quodam spectatur rupes altissima & glabra, cujus suprema superficies æleni majoris instar aperta profundo specu aqua semper pleno gaudet. (5. & 6.) Ad urbem Schwartzbornam, versus septentrionem ad latus orientis (*Nord-Ostwärts*) sitam, ab utraque ejus parte locati *montes duo maximi*, quorum alter *der Knoll* dictus, alter *glacialis der Enßberg* / à glaciæ, quæ prima æstate quandoque adhuc ibi reperitur, cognominatus est. (7) Milliari à Fagio (fagorum oppido, *Bach* / ob fagos illic in copia provenientes ita nominato) non procul à monte glaciali, mons insignis altitudinis *Taurus*, *der Ochsenberg* / cum quo & glaciali mons grandis Fulden-sis *der Dietersberg* / triangulum format. (8) Ad pagum *Ellenbach* *mons* quidam præaltus, quem incolæ *juniperinum den Bacholderberg* vocitant, in cujus jugo plano lacus profunditatis ferme immensurabilis cernitur. (9) *Mons Altheimensis*, præfecturæ Rotenburgen-sis altissimus, ex quo plurima Hassiæ pars conspici potest. (10.) *Mons* in præfectura Smalcaldica à carbonibus *der Kohlenberg* denominatus, ad cujus radices copiosi adamantes, Bohemicos splendore & bonitate superantes, reperiuntur. (11. & 12.) *Montes bini* inter maximos Hassiæ collocati, quos *Lohr & Utsch-Kopff* nuncupant. (13.) *Mons harius*, non procul ab his, germ. *roth Hâer* / qui ab occidente ad orientem usque ad dictos binos montes & principium fluminis Worrae extensus dein incurvatus meridiem versus ad avimontem protenditur, tandemque cum his & Tauno unitus Loganam fluvium ambit. (14.) Ad pagos Wickerodam, Rommerodam, Kauffungam & *groß Almeroden* *mons* nomen à cervis *nactus* *der Hirschberg*. (15.) Non longe à Gudensberga ad pagos Ritta & Pess *mons* magnæ celsitudinis, cui nomen impositum *der Langenberg*; it. (16.) *Alius* prope Gudensbergam priori confinis, *der Odenberg*. (17.) In præfectura *Haunack* *Mons* altus & rotundus, *der Stoppelsberg*; & (18.) huic ex opposito jacens *mons* itidem altus & præceps, quem *den Soestberg* vocant. (19.) In Dominatu Ortenburgen-si *mons* excelsus *der Glauberg*. (20.) Juxta Urbem Spangenbergam *mons* dictus *der Spangenberg* item *der Knorren-Berg* / in quo lapilli rotundi (trochitides,) ornamentum circulare, quod germ.

Spangen audit, præsentantes, copiosi inveniuntur, de quibus curiosa conscripsit WINCKELMANNUS *Chron. alleg. p. 269. 270.* item (21.) *alius* quem *den alten Burg-Berg* nominant. (22.) *Mons* nemorosus ad Alsfeldiam sub nomine *der Rommeroder Berg* / qui 1200. jugera explet. (23.) *Mons* alius, *der Jahrensberg* vocatus, non procul à monte calvo, n. 4. indicato, conspiciendus, in cujus jugo aliquo saxum excavatum deprehenditur, in quo tanquam in cellam introitus patet, mox vero præceps & profundum foramen putei instar à natura curiose ita formatum sese manifestat. (24.) *Mons S. Cyriaci* cui Eischwiga inædificata est. (25.) *Mons* quem *den Badestein* dicunt, versus Witzzenhusam, ex arbore taxo celebris. (26. & 27.) *Montes* duo *der Stauf-fenberg & Garnberg* / nemorosi & portiones sylvæ, dictæ *Reinhartswald* / versus *Visurgim & Fuldam* fluvios. (28.) *Mons* alius ad oppidum Zierenbergam; cui ab urfis nomen imposuerunt, & *der Bähren-Berg* dicitur. (29.) In præfectura Blanckensteiniana *der Kirchberg*. (30.) *Gofus der Gößeberg* vel *Gosiberg* / ad Franckenbergam, vinetis abundans. (31.) Ex opposito urbis Drivordia ad amnem Verram *mons* altus & præruptus *der Hellerstein*. (32.) In præfectura Smalcaldensi *der Insul-Berg*; ibidem (33.) *die bloesse Laube* / uterque altus & media æstate adhuc nivofus. (34.) In præfectura Melsungen-si *der Erlesberg*. (35.) *Der Mosenberg* non procul ab arce *Falckenberg* ad planitiem altam, quam *die Wolfs-platte* dicunt. (36.) *Mons* versus prædium Faram trans Fuldam *der Wildsberg* / (37. 38. & 39.) *Montes* tres circa Hersfeldium quos *den Peters-Johannis- & Frauen-Berg* vocitant. (40.) In præfectura Friedewaldensi *der Drenenberg*. (41.) *Mons* ad Rauschenbergam im *Burgwald* / *der Castors-Berg* ab idolo Castore nuncupatus, qui postea tempore Caroli M. à Christo cognominatus est *der Christen-Berg* vid. *Specul. Histor.* (42. & 43.) In Dominatu Eichfeldensi *montes bini* *der Goburg* & portio montis Thuringici *des Hohebergs*. (44.) *Mons* Olivarum *der Delberg* / cui ars Schauenburgica inædificata est. (45.) In confiniis Waldeccen-sibus *mons Keller*. (46.) *Mons* custodiæ *den Hüttenberg* in Wetteravia (47.) Oblivioni minime tradendus supra Germerodam situs à carbonibus fossilibus *der Steinkohlen-Berg* nuncupatus, qui ex relatione *Topographi Meriani* superiore seculo ob copiam sulphuris aliquando accensus per aliquod tempus & adhuc anno 55. imo, quantum ego recordor, ante paucos annos denuo arsit. Taceo jam montes & colles viliores, item anonymos, innumerabiles pene, quales sunt 7. ad oppidum Biedencap, &c. Ut proinde germanicum *Hessen* non inepte derivatum videatur ab *Höhessaen* / quoniam in alto Hessi habitant. Conf. CLUVERIUS *antiq. germ. L. II. C. 19. & L. III. C. 5.* Hanc regionis altitudinem TACITUS quoque *de moribus Germ. C. XXX.* animadvertit: Quando *Cattos* editiorem regionem præ aliis germanorum populis, (Westphalis v. g.) tractu longo possidere scribit.

§. XXII.

Singuli hi montes, paucissimis exceptis, vel per totum sui tractum vel ex parte *sylvis ac saltibus* instructi sunt fertilissimis & amoenissimis; qualibus pluribus aliis universa *Hessorum* regio inferior præsertim ejus Principatus, hinc inde gaudet. Celebriores saltuum certis nominibus insignitorum sunt sequentes: Primus, quem dicunt *Sylvam Semanam* *den Oden* vel *Oster-Wald* / falso à JOH. FRANCISCO RIPENSI ottonicam appellatam; Hunc saltum ex mente TACITI *l. all. & POMPONII Melæ L. III. de Germ.* non inepte

inepte partem Hercyniæ sylvæ, seu juxta JUL. CÆSAR. L. VI. de bell. Gall. erycini montis dixeris, accurate hoc demonstrante WINCKELMANNO (*Chron. alleg. P. I. C. VIII.* Franconiam inter & comitatum Cattimelibocensem locatum. Ildus ab hoc est, quem *sylvam Hesperiam montium Obnobiorum* den **Westerwald** cognominant, ad occidentem Westphaliæ versus & Visurgim extans, cujus, si recte meminero, pars aliqua ad Hassiam nostram spectat. Illum pono *Saltum Reinhardinum* den **Reinhardts-Wald** / inferioris Principatus, septentrionem versus prope Ducatum Brunovicensem situm, qui circa oppida Immenhausen & Grebenstein incipit, latitudineque sua duo ferme milliaria complet, ac secundum tractum fluminis Fuldæ & Visurgis Munitium seu Mundam versus ad 4. leucas in longum extenditur. IVtum dicunt den **Suhlings Wald** / collibus variis instructum & maximum in inferiore Hassiæ Principatu: à Fulda namque fluvio è regione meridionali sub urbibus Hersfeldia & Breitenbach versus oppidum Heringen ad fluvium Wierram usque per tria milliaria in longum, & in præfectura Rottenburgensi ut plurimum unum milliare in latum protenditur, terrasque Thuringiæ tangit; hunc æque pro parte Hercyniæ sylvæ venditat *laud.* WINCKELMANNUS *loc. all.* alterum ejus dimidium ad Fuldam, alterum ad Vierram in vallem definit. Vtus saltuum nominatur der **Abtswald** vel **Brandhorst** / altus & frigidus, cujus principium ad scaturiginem fluminis Schwalmanæ in præfectura Avimontana est. VIus & VIIus circa urbem Alsfeld situm nacti sunt, quorum alter der **Homburg** nuncupatus 2000 jugera, alter der **Steinforst** dictus 600 jugera complent. (Tertius his adjacens est mons sylvestris der **Kommieröder Berg** / de quo præc. §. n. 22. inter montes actum. VIIIus est Saltus quidam Principatus Hersfeldensis ad arcem Landeck / quem den **Landecker Berg** vocitant, unde & montibus annumerari posset. IXmus eluet der **Kauffunger Wald** / qui initium nactus prope urbem Witzenhusam usque ad Kauffungam & fines ditionis Brunovicensis producit. Xmus ab accipitribus dicitur der **Habichts-Wald** / saltus altissimus, Monasterio **Burghausen** ex adverso positus; incipit ab uno latere arcis amoenæ **Weissenstein** / tenditque quasi per circulum (montem longum den **langen Berg** varios pagos vicos & oppida adeundo) rursus ex altero latere ad eandem arcem. XIus è maximis unus, qui audit der **Soer-oder Nied-Forst** seu **Horst** / inter urbem celeberrimam Casselium & vicum Kauffungam; hic dimidia sui portione duas præfecturas Spangenbergensem & Milsungensem tangit. XIIus haud procul à Nidda situs die **Harb** vocatur. XIIIus extat in præfectura Alsfeld / magnus admodum & è præstantioribus unus, ab altitudine der **Hochwald** dictus, muro cinctus. XIV. & XVus apud Grunbergam der **Neue Hoff** & der **Brand**. XVIus prope Marpurgum der **Burgwald** / saltus prolixus & aliquot milliaria longus. XVIIus ad Raufenbergam conspicitur, die **Hehewart** nominatus; cui XVIIIus proximus est, ex abietibus clarus der **Tannen-Wald**. XIXus positus est penes Battenbergam, nomine die **breite Struth**. XXus apud oppidum Biedencap der **Mertens-Wald** cum aliis collibus sylvestris pluribus. XXIus Saltus decantatus admodum ad oppidum Stauffenbergam, à foro boario quondam illic constituto der **Kuhmarck** nuncupatus. XXIIus ad urbem Spangenbergam, (quem & inter montes collocare liceret,) sub titulo die **Silberkaufthe**. XXIIIus ad urbem Milsungam sub nomine des **Schönbrgs** clarus. XXIVus Principatus inferioris in præfectura Felsburgensi versus Frizlariam, ubi in planitie constitutus die **Elbischschölzer** / *Frid. Hoffmanni Oper. Supplem. II.*

versus vero Milsungam ac Homburgum, ubi montosus, der **Quiller / Beuer-Holz / und Harlen-Berg** vocatur. XXVus in Principatu ad Lanum prope Franckenbergam, trans Visurgim secundum longitudinem hujus fluminis extensus, cui nomen der **Sohling** impositum est; (quem ab aurifodinis illic seculo decimo jam notis montem aureum den **Murer-Muler-oder Gold-Wald** dixerunt; montibus eapropter etiam annumerandum.) XXVlus circa præfecturam Drivordianam saltus prolixus der **Heinich**. XXVIIus in præfectura Lichtenavienfi der **Kohr-Berg**. XXVIIIus die **Kehmeler-Heide** ad oppidum Kehm. XXIXus der **Ober-Rosbacher Bau-Wald**. XXXus der **Neuburg** in Dominatu Wetteraviæ Epsteinensi. Saltibus & sylvis hisce celebrioribus non immerito junxeris sylvas alias v. g. den **Ellenbacher-Forst** in præfectura Rottenburgensi; den **Erieker-Forst** in der **Bogthey Herren-Breitungen**; *sylvam nobilem* ad arcem montanam Pleß, orientem versus in declivi planitie sitam, ad cujus sicuti & Boyneburgensis arcis montes arborum taxorum, alias rariorum, magnus est provenus; præterea egregiam *fagorum* sylvam montosam den **Buchwald** in præfectura Gleichenfi; *sylvas* tandem *abietinas* in inferiore Principatu in præfectura **Kotenberg am Mildecker-Forst** / item auff der **Trotten und Baumbacher gehölze**; & in superiori comitatu Cattemelibocensi, ubi aliquot earum reparias; *sylvas* item *anonymas* Principatus Hersfeldensis & Comitatus Ziegenhaynenfis, præfecturarum **Homburgensis** & **Smalcaldensis**, quarum posterior pluribus gaudet, in primis ad utrumque fluminis Fuldæ latus easdem copiosas cernas: taceo jam sylvas saltusque particulares & minores, urbibus, oppidis & pagis hinc inde vicinos eisque proprios, quorum omnium mentionem facere prolixum foret; sunt è numero horum die **Kehböcke** ad Lippoldisbergam. Evolvi potest circa montes & sylvas Hassiæ *Cosmogr. Rauen. C. XIV. p. 408. seq. & Chronographi supra alleg.*

§. XXIII.

Relati montes & saltus sylvæque memoratæ varii generis arboribus exornati sunt: præter enim arbores communes & cæduas tiliis etiam, aceribus, fraxinis, populis, sorbis, aliisque pluribus; *frugiferis* item, in locis potissimum vinetorum & hortorum, ad radices montium hinc inde copiose & cum diligentia constructorum, castaneis nempe, nucibus, pyris, pomis, prunis, cerasis, aliisque innumerabilibus; præterea etiam *fruticibus*, juniperi præprimis, sambuci, dictamni, rosarum sylvestrium, &c. copiosissimis, & *herbis floribusque* balsamicis refragantissimis permultis superbiunt, montes præsertim majores, quorum juga pratis passim prolixissimis abundant: reperiuntur namque ibidem copiose carvum, origanum, horminum, hyssopus, lilium convallium, hepatica nobilis, fideritis, pulegium, polium montanum, caryophyllata, serpillum, caryophyllus montanus, angelica, scorzonera, coronopus, iva arthetica, solidago farracenica, aconitum pardalianches, damasonium nothum, uva inversa Dodon. chamædrys vera, asarum, genipella, lunaria minor, lotus, melilotus, millefolium, tanacetum, scabiosa, stoechas citrina, viola, pluresque herbæ odoratæ ac balsamicæ aliæ à D. DIETERICO TABERNÆMONTANO in herbario diligenter hinc inde descriptæ.

§. XXIV.

Inter hos montes, & sylvas elegantia quoque in vallibus extant prata & loca campestria in longum & latum diffusa, sicciora, paludibus expertia, quin fluvii majoribus, torrentibus & rivis limpidis è montium cavernis & cryptis atque arenis scaturientibus, & ad radices illorum hinc inde per totam regionem & confinia ejus, in fundo ut plurimum arenoso & petroso, defluentibus irrigata.

§. XXV.

Primas tenent inter hos majores duo, *Rhenus* & *Mænus*, quorum prior ab aquæ puritate *Rhein* dictus superiorem & inferiorem Comitatum Cattimelibocensem alluit, & ex altissimo Helvetiorum monte *Adula* (ita eundem vocitat *STRABO*, *PTOLOMÆUS* & alii) germ. *S. Gottharts Berg* / scaturit; posterior *Mænus* (*Mann*) *PTOLOMÆO* L. III. Geogr. C. 9. *Obringa* ab aliis *Moganum* nominatus *Wetteraviam* adit, & in celeberrimo monte pinnifero *Variscæ*, *Sichtelberg im Voigtlande* / scaturiginem suam nactus est. Ab his in superiore Principatu celebrior est fluvius, quem *DIETERICUS* instit. Orat. p. m. 61. *Lanum*, *CÆSARIUS* & *HEISTERBACHIUS*, item *FREHERUS* origin. Palatinar. P. II. C. 6. *Loganum* seu *Loganam* item *Logonam*, aliqui *Loynam* (*Lohn*) nuncupant; è radice montis *Harri Roethhaar* / jactu lapidis à fonte, quem dicunt *auff dem neuen Ohr* / ad *Wittgensteinium* in sylva *Hesperia* orientem versus scaturiens, & 30. rivis auctus, (quatuor potissimum principalioribus, quos Germani vocant *Ohm* *Dill* *Elß* *Nahr* / *Hassiam* superiorem nobilioraque ejus loca adit: hunc *CHRISTOPH. BROWERUS* p. 181. amœnissimis utrinque ripis collium & rupium alicubi surgentium asperitate ad pulchritudinis & variantis naturæ temperamentum interpolatum, & *VENANT. HONOR. FORTUNAT.* L. VII. carm. 7. *Laugonæ vitreas* i. e. purissimas esse aquas, scribunt. Super hoc flumine 1617. à 15. usque 17. Octobr. ad urbem *Marpurgum Chimæra* seu monstrum comparuit, quod *OLAUS WORMIUS* monument. Danic. fol. 17. *Dæmonem* seu spectrum aquaticum, vulgo dictum *Wasser Nix* fuisse judicat. Proximus ab hoc est *Nidda*, (*Nidda*) urbem *Niddam* in Comitatu *Nidda* alluens, à quo flumine hic nomen acquisivit; Oritur in avimonte *Vogelsberg* &c. Fluvium hunc excipit *Ohma*, *NICOL. ASCLEPIO* *Ohmum*, *SERARIO* L. III. rer. Mogunt. notit. 27. p. 496. *Amana*, *Ohm*; scatet è fonte ad radices montis præcitati juxta pagum *Ober-Ohmen* / præterfluit in amœno prato urbem *Homburgum*, quæ propterea *Homburg an der Ohm* vocitatur. Inferior quoque *HASSIÆ* Principatus plurimis præditus est fluminibus è quibus hætenus inclaruerunt quinque. Primum & nobilius atque aurifluum est *Aderna* seu *Ædera*, *TACITO* L. I. annal. *Adrana die Eder*; originem ducit è Comitum *Wittgensteiniorum* ditione, haud procul à scaturigine *Loganæ*, præterfluendo varias urbes, pagos, veteres item aurifodinas, Dominatum *Itter* &c. allabitur. Proximum dignitate flumen ab hoc est *Fulda* (*Fulde*) è ditionis *Fuldensis* promontorio aliquo, milliaribus duobus supra urbem *Fuldam* in *Buchonia* (*Buchen*) ortum ducens; fertur per Principatum *Hersfeldensem* diversa oppida adiens; prope Metropolin *Cassilium* *Anam* (*Uhne*) & *Trusillam* (*Trusel* vel *Drausel*) (à *Drufo* nominatam,) utramque è saltu, quem *Habichts Wald* dicunt, profilientem, recipit. (Quomodo flumen istud mortem Principum *Hassiacorum* indicet, videre est apud *WINCKELMANNUM* loc. all.) Hunc amnem excipit *Vierra* seu *Werra* item *Guerra* (*Werra* /) quam *Visurgim* (*Weser*)

esse acute satis evincit *WINCKELMANNUS* eod. loc. p. 59. seq. quod nomen tamen proprie ad urbem *Luneburgensem Mundam* cum flumine *Fulda* unita acquirit; profluit illa è *Principalis dignitatis Comitatu Hennebergico* in *Franconia* non procul à *Schleusinga* ad *Bacenim sylvam Thüringer Wald* / dirigitque cursum suum sub oppido *Werra* ad diversas urbes *Hassiae*. Quartum locum occupabit *Diemela*, (*Diemel* /) ortum trahens è purissima jugi acuti montis cujusdam Comitatus *Waldeccensis* juxta *Coloniensem Ducatum Westphaliæ*, alluendoque inferiorem *Hassiae* Principatum hunc ab *Episcopatu Paderbornensi* separans; ad istius fluminis terminum, ubi *Visurgim* intrat, haud procul à confiniis Ducatus *Brunovicensis* & *Luneburgensis emporium* & urbem celebrem ædificari hætenus curavit *Serenissimus ac Potentissimus Princeps CAROLUS, HASSIÆ LANDGRAVIUS* &c. &c. Dominus meus *Clementissimus*, in cujus extructionis memoriam *Carolo-Diemela* appellata est. Ultimum tandem fluminum celebriorum est *Schwalmus*. à *NICOL. ASCLEP. BARBATO* *squalmus*, in donationibus *Fuldens. Swalmæna*; (*Schwalm*) nuncupatus; scaturit hoc in promontorio aliquo avimontis in sylva, quæ *Gliesen-Borner* seu *Abtswald* audit; miscentur ipsi ad oppidum *Alsfeldiam Iffa* (*Eisse*) & *Berfa* (*Berff* /) torrentes duo majores, quibus cum junctum comitatum *Ziegenhaynensem* permeat. His annumerari merito debet *Wobra* (*Wohre* /) originem ducens è radice cervorum montis, in præfectura *Lichtenaviensi* ad pagum *Romerodam* ex opposito montis albi; argumentatur hinc inde variis rivulis, inferioremque Principatum transfluit.

§. XXVI.

Amnium reliquorum minorum ac viliorum, torrentium, rivorumque *Hassiae* ingens adhuc est numerus; *Amnium* præcipui sunt *Amaso*, *Amisia*, aliquibus sed falso *Amasia*, (vid. *DILICH. Chron. p. 31. & Zeileri itiner. P. I. p. 362.*) (*Emß*) circa montem longum non procul à *Kirchberga* profiliens; *Ulstra* (*Unster* vel *Ulster* /) amnis præceps & periculofus, oriundus ad montem *Taunum* & glaciale; *Arda* (*Urde* /) *Vettera* (*Wetter*) per *Wetteraviam* defluens, unde nomen hæc acquisivit; alluunt *Wetteraviam* præterea quoque *Kinciga* (*Kink* /) *Niddera* (*Nidder* /) *Ufa*, (*Use* /) aliique rivi plures; *Hauna* (*Haune*) ad oppidum *Hauneck* in *Episcopatu Hersfeldensi*; *Gespentia* (*Gerspenk*;) *Lossa* (*Losse* /) juxta *Lichtenaviam* ex aquis diversorum fontium, & piscinarum enata; *Leina* (*Leine* /) *Warma* (*Warme* /) *Bauna* (*Baune*;) quorum *amnium* posteriores duo è fonte sylvæ, cujus nomen ab accipitre est, scaturiunt; *Essa* (*Esse*) & *Leupa* (*Leipe* /) *Ittera* (*Itter* /) ad urbem *Itteram* unde hæc nomen indepta est; *Effza* (*Effze* /) è montibus *Rottenburgensibus* prorumpens; *Frida* (*Fride*) præfecturam *Wanfridensem* percurrans, ortum hæc nata est in ditione *Eichsfeldensi*, (*auff den Eichsfelde*;) *Geysa* (*Geysa*) in Principatu *Herolfesfeldensi*; flumen anonymum ad urbem *Treburium* in Comitatu *Cattimelibocensi*, è quo navigiis in *Rhenum* trajiciunt. E torrentibus & rivis potiores sunt, quos in vernacula nostra exprimunt, *die Bink* / *Wahlbach* / *Hirsaler Bach* / *Schmalkalde* / ad urbem *Smalcaldiam*, unde huic nomen: scaturit haud procul à monte nominato *Insul-Berg*; *die Glæna* & *Niesfa* / in sylva *Kauffungorum* exoriens; *die Garða* / *Bever* / *Gelster* / *Sontra*, cursum suum per oppidum *Sontram* dirigens; *die Pfeiffe* / *Grenff* / in comitatu *Ziegenhaynensi*; *die Schlit* / ad *Silitiam* seu *Slitissam*, oppidum in *Buchonia*, unde hoc nomen sortitum est; *die Lomda* unde *Allendorff an der Lomda*; *die Gult* / *Treysa* /

Trensa / Tonna / Bibra, oriunda ex avimonte; ulterius die Schwarzh-Vier-Rupfer-Nider & Linder-Bach; quorum quatuor postremi è jugo montis albi profiliunt; item rivus ad Willenbusam & alius in Dominatu Pleß / inter pagos Edigehausen & Angerstein / è fonte aliquo arenoso cum aquarum impetu exiliens, quem Mariensprunge vocant; Sex vel 7. rivi ad radices montis Barn-Berg oriundi, & in sylvam Reinhardinam se diffundentes; pluresque alii, praefecturas potissimum Milsungensem, Wolsthagenensem & Rottenburgensem, item oppidum Schwalbacum, quod undique rivis cinctum est, alluentes.

§. XXVII.

Isthanc montium saltuum ac sylvarum fluminum torrenrium rivorumque enumerationem, quantum quidem fieri potuit, ea de causa necessariam duxi: quoniam pauca in regione Hassiaca reperias loca, quae non in montibus istis, vel ad horum latera, aut radices, simul prope sylvas, & aquas fluviales, sita reperiantur: nullum vero ferme, cui vel unico horum saltum, loco videlicet editiore, vel sylva, vel aqua fluente, non prospectum sit. Praecipua triplici hoc naturae situsque (montium puta sylvarum fluminumque) beneficio cum emolumento sanitatis singulari utentia loca praeter hinc inde in his superioribus jam enumerata sunt Metropolis Principatus inferioris & fedes SERENISSIMI ac POTENTISSIMI PRINCIPIS CAROLI, LANDGRAVII HASSIAE &c. &c. Domini mei Clementissimi, Cassilium, cujus delineationem accuratissimam exhibet WINCKELMANNUS, Chron. alleg. L. II. c. 10. p. 273. Marpurgum, Alsfeldia, Amasia (Emß /) Eischwiga, Goarium (S. Goar /) Renofelda (Rheinfels /) Hufnia (Gewershausen & Raß /) Smalcaldia, Stauffenberg, Sabbaburgum, Zwingenberg, Umstadium, Hatzfeldia, Ittera, dulcis mea patria Spangenberg, Melsungum, Rosbachium, Wetteravia, deinde arces Ulrichstein / Gleichen / Ludwigstein / & urbes ac oppida &c. alia plura, quorum omnium enumeratio tædiosa foret: expressit illa DILICHUS & WINCKELMANNUS in Chronicis passim. Schwalbacum speciatim hic attendendum, cujus tum atmosphaera tum soli benignitatem ad stuporem ferme descripsit MERIAN Topogr. Hassia p. 122. seqq.

§. XXVIII.

Cum itaque nihil plane, quod ad bene esse regionis nostrae, praepriis autem atmosphaera ejusdem, facere possit, deficiat; quis quaeso de salubritate ejus dubitare aufit? Adest enim ut paucis, quae praecesserunt, repetam, ibidem positus astrorum benignus, dehinc Clima optimum, quippe à temperatissimo proximum; afflatus ventorum salubrium, Subsolani nimirum liberior, & Aquilonaris propior: regio siquidem orienti hinc inde patet, & septentrionem versus inter tropicum cancri & polum arcticum sita est, a ventis vero meridionalibus montibus altioribus satis protecta; est de caetero in visceribus suis variis in locis montosa; terraque maximam partem petroso-arenosa, argillacea, ac ubique fere metallifera abundat, solerter hoc demonstrante WINCKELMANNO tr. ali. c. 6. p. 29. seqq. cujus exhalationes ascendentes leves admodum sunt, purae & siccae; gaudet saltibus & sylvis pluribus editioribus versus meridiem potissimum ac occasum squalorem austrinum sustinentibus & suffocantibus, aliquibus etiam septentrionem & orientem versus erectis ventorum impetum temperantibus; 2. plurimae urbes, oppida, arces atque pagi maxime orientem vel septentrionem spectant; & in montibus mediocriter elatis, vel ad latera aut ra-

dices montium excelsiorum, ad flumina limpida, particulas humiditas leves & puras emittentia, exstructa cernuntur. Quid, quod tota regio ob arborum; fruticum ac herbarum refragantissimarum supra §. 23. potiore partem enumeratarum ubertatem effluviis sulphureo-balsamicis copiosissimis atmosphaera singulari suaveolentia afficientibus ac depurantibus, referta sit: quapropter rariores quoque inibi sunt morbi ex putredine oriundi, maligni, pestes; nec, si forte aliunde illuc transferantur, diu durantes, Chronographis Hassia id abunde testantibus, utpote per integrum seculum unius tantum vel alterius contagii pestilentis mitioris & brevioris ac particularis magis mentionem injicientibus, dum interea alibi locorum, aere mixto insalubriore utentium, multoties horribilibus caedibus grassatum est; exemplum exhibet Lipsia, ab Anno 1597. usque 1681. primo praesertim seculi dimidio toties pestem passa, ut 11000. pene homines consumti sint, schedula funerali illius urbis id probante.

§. XXIX.

Fruitur ergo Regio Hassiaca atmosphaera ex humido potissimum & sicco i. e. partibus nitrosis humidis & sulphureis siccis, (quas huic inexistere MUNDIUS saepe cit. tr. C. I. §. 4. ex experientia defendit,) temperata, puriore ac defecatiore, mediocriter tenui, sanguinem mirum quantum, motum illius intestinum naturalem & spirituascentiam blande promovendo, reficiente, viresque ipsius efficaciter conservante, hocque pacto transpirationem simul juvante. Laudabile hinc quoque Hessorum temperamentum est, quippe in sanis ut plurimum sanguineum aliquali phlegmate permixtum homines bene coloratos ac robustos moribusque jucundos sistit.

§. XXX.

Ejusmodi aeris puritatem & salubritatem Marpurgo speciatim tribuit WINCKELMANNUS Chron. P. I. C. 3. p. 12. col. 1. cui interim contrarius est DIETERICUS in Jatreo p. 1412. ex Doctoris Danielis Horstii manu-ductione; montanam Marpurgum pluries, quam depressam situ & in ipso luto quasi jacentem Giesam morbis pestilentibus vexatam scribens: & hoc exinde, quoniam circa Marpurgum montes montibus colleisque collibus per flexuosa intervalla obscurarum vallium jungerentur, sicque saepius mephytis exhalationum urbem incommodaret. Verum utut libenter concedatur, nullum terrae tractum adeo salubrem esse, cui non aliquid, licet levioris vitii vel insalubritatis adhæreat, (id quod de regionis nostrae locis quibusdam alienum non dixerim:) nihilominus tamen cum (1) Marpurgum ad Loganam, flumen inter saxa & arenas velocius decurrens limpidissimum, situm sit; (2) ipsius valles latiores & siccae; atque (3) montes fruticibus ac herbis odoriferis arboribusque fructiferis magno numero in pomariis (undique circa urbem copiose constructis,) supra modum scateant; unde (4) vix possibile sit per naturam illius soli saxei & atmosphaerae humido-nitrosa & balsamica effluvia spirantis mephytim exhalationum exoriri posse, quin potius aliunde per ventos meridionales, quibus à latere objecta quodammodo est urbs, miasmata maligna asportari; & (5) Circumstantiarum potiorum, quam nempè urbium dictarum morbis talismodi malignis vel pestilentibus, sicubi alterutram earum invaserunt, atrocius infecta sit, & in qua citius etiam cessaverint, nulla facta sit mentio, quod tamen ad cognoscendam unius praeter altera salubritatem summo opere observandum fuisset; in hoc vero passu ipsa terrae Marpurgensis natura & constitutio pro salubritate ejus pug-

net; nullus dubito à partibus WINCKELMANNI stare & salubrem *mixturæ aeris Marpurgici* conditionem, tum per se quam intuitu *Gießæ* pronunciare, apprime cum maxima sui parte ad marginem elatiorem montis urbs sita sit.

§. XXXI.

Experimenta quidem aliqua circa *atmosphæra Hassiæ* gravitatem, elasticitatem, aliasque ejusdem qualitates, & affectiones instituere, ampliorem etiam magisque specialem situs locorum præcipuorum descriptionem, quomodo nimirum ad montes, ventos, sylvas, flumina, mundi plagas, &c. jaceant, qualisque sit cujusvis *atmosphæra* vernacula constitutio, subungere fas fuisset: cum tamen occasio hæcenus in ista inquirendi defecerit, commodiori tempori tentamina hæcce reservantur. Sufficit ex ubique obviis & perceptibilibus causis salubritatem horum omnium quoad possibile, generalius quamvis paulo, demonstrasse. Legi interim circa materiam ponderationis aeris mixti meretur de LANIS *Magist. Nat. & artis tom. 2. L. VI. artif. 34. seqq. à p. 283. usque 290.* cui apte junxeris *Celeb. nostri* HOFFMANNI *observat. Barometricas.*

CAPUT IV.

De Alimentis Hassiæ salubribus eorumque causis Atmosphæra potissimum in hæc efficacia.

§. I.

DEducta in prioribus *atmosphæra Hassiæ* salubritas in alimenta ejusdem Regionis quoque eadem salubria efficiendo redundat, tam esculenta quam potulenta, è *vegetalibus animalibus & aquis* desumenda: insalubrem quippe aeris mixtionem quamcunque insalubrium, salubrem autem salubrium alimentorum causam existere, neminem ambigere credo, qui vel istud solum ponderaverit; nullam prorsus in hoc universo terrarum orbe existere materiam vel naturalem vel artificialem, vel simplicem vel compositam, vel duram vel mollem, &c. cujus substantiam *aer mixtus* non feriat, ita, ut per experientiam condocesiamus, ipsas etiam *cerevisias* sub coctionis & fermentationis actu nec ab ingredientibus nec à tractationis modo, sed profecto ab *atmosphæra* cuilibet loco propria saporem & odorem specificum quandam ac virtutem etiam peculiarem contrahere, rectissime hoc animadvertente *Excell. HOFFMANNO* in *diff. de peregr. sanit. caus. instit. C. III. §. 6. p. 24.* novi enim exempla translatorum de loco in locum omnium ingredientium, polentæ, lupuli, aquæ &c. instrumentorum item & vasorum æheneorum, in quibus alias coqui *cerevisia* consuevit, lignorum comburendorum, laterum, lapidum, limi pro construendo furno, & quæ alia nominari possunt, perfecerunt opus coctionis iidem artifices, qui in loco priore: nihilominus non illius, unde hæc allata, sed alterius, ubi coctionis actus celebratus est, loci *cerevisia* & odore & sapore emerfit; id quod etiam circa pisturam panum diversorum locorum obtigisse, relationes ferunt. *Vinorum* itidem dulcium ac acidorum progeniem variam non solo tantum ficciori sed *atmosphæra* quoque *plus minus calidæ & sicca* tribuendam esse vel hoc unicum evincit: quod, quo proprius vinetorum loca & regiones ad tropicum cancri & æquinoctialem accedunt, eo etiam dulciora & generosiora

procreantur vina, qualia sunt Hungarica, Gallica, Italica, Hispanica &c. quorum tamen dulcedo pro diversitate propinquitatis ad dictum tropicum & ipsa differt.

§. II.

Quo itaque *atmosphæra est temperatior, levior, purior, defecior & ab effluviis sanitati officientibus remotior*, eo etiam commixtio & contactus ejus cum substantiis corporeis est salubrior, sive in aquis sive in visceribus aut superficie terræ is celebretur; qualem concursum salubrem cum alimentis quoque nostræ Regionis fieri, neminem dubitare putem. Etenim *vegetabilia alimentosa*, quæ terra Hassiaca hinc inde copiosa profert, radices puta, bulbos, fungos, tubera, olera, herbas, folia, flores, caules, semina, fruges, grana, legumina, baccas, fructus arborum, fruticum, herbarum oleracearum &c. quod concernit, proveniunt ea è solo tum montano saxeo arenoso, tum plerumque argillaceo pingui, *atmosphæra* tamen tenui levi, ex humido & sicco temperata, quæve effluviis uliginosorum, cœnosorum, palustris, foetidorum, humentium nimis & fervidorum expers est, referto ac perflato. Reperitur terra talismodi vegetabilium esculentorum fertilissima *aere mixto temperato aprico atque salubriore* utens in *Principatu Hersfeldensi*, utroque Comitatu *Cattimelibocensi*, *Wetteravia*, *Dominatibus Franckenstein & Pless*, in *præfecturis Cassellana Felsburgensi*, *Grebensteiniana*, *Homburgensi*, *Rottenburgensi*, circa monasteria *Cornberg Heyna Hectelem & Steina* ad oppida *Biedencopiam*, *Eischwigam*, *Gismarum*, *Gudensbergam*, *Sontram*, *Schwalbacum*, *Witzenhusam*; sunt enim agri, horti, viridaria, prata, locaque campestria alia districtuum horum tantisper elata ac sublimia, & quæ longiori terrarum fastigio latenter assurgunt ac exporriguntur, plana etiam quædam, minus tamen paludosa; unde quæ hic crescunt grana & frumenta, lolii semine, nigella &c. rarissime inquinata teneiora minusque viscosa existunt. Patet hinc, quantum sanitati intersit, qua *atmosphæra* quove solo vegetabilia, frumentacea potissimum, proveniant, macrone an pingui, humido an uliginoso, an sicco ac liberius perflato, &c. plane enim vitia *auræ atmosphæricæ ipsiusque soli* frumentum secum defert, ex quo vel sincerum vel zizania mistum, vel aridum nimis aut tenue, vacuum, aut pingui nimis humore densatum, cortice furfurisque parte plurima farinæ exigua constans &c. protruditur.

§. III.

Ob hanc *atmosphæra solique salubritatem* frumentis communicatam panes in Hassia pinsuntur optimi: primas inter hos tenet *Schwalbacensis*, qui adeo lautus tamque salubris est, ut ad aliquot milliaria dono mitti soleat: quanquam aquis etiam regionis limpidissimis levibus salientibus ac spirituascentibus quasi, hinc fermentationi massæ panis aptioribus, (cujus virtutis & efficaciam æque ab *atmosphæra* puriore ac tenui ejusque sale aereo-volatili intersperso bonam partem participes fiunt,) id beneficii simul acceptum ferendum sit: quod panes suaviores longe, leviores ac spongiosi ibidem pinsantur, qui & leviter alant, & obstructions viscerum ac alvi nullas creent. Magnum vero esse momentum aquarum laudabilium in conficiendo pane salubri demonstrat luculenter post experientiam *REN. MOREAU* *tr. supr. all. S. II. C. 17. p. 273.* quando pistores pagi Gonetiani præ pistioribus urbis Parisinæ, aliquot solummodo miliaribus ab illo distantis, ex eodem tritico ob aquas Gonetii puriores & meliores

meliores panem & suaviorem & salubriorem pinferere refert.

§. IV.

Isti panum Hassiacorum salubritati opitulantur in-
simul lapides regionis illius molaes durissimi & sa-
xei, multum ad puritatem & levitatem farinae con-
ferentes; dum è contra molliores & teneriores, uti
BRUYERINUS de re cibaria L. VI. C. 2. ait, (cito
nimis) atteruntur, eroduntur, semperque aliquos cal-
culos versando ac rotando relinquunt, qui farinae con-
fusi ac mixti gratiam & salubritatem panificio adimunt;
& plerumque dentibus admodum noxii sentiuntur, ci-
bisque ex ea confectis commendationem detrahunt; ad-
do: panes exinde confectos graves admodum mi-
nusque spongiosos, adeoque difficilis concoctionis;
esse. Deinde & ipsarum molarum Hassiacarum ro-
tationes salubriorem producere farinae, omnes me-
cum confitebuntur, qui considerabunt, molas ibidem
fluminibus ac torrentibus plerumque velocioribus, im-
pelli: deteriores namque cum modo citato MOREAU
loc. all. p. m. 279. aestimo farinas molarum per rotas
pensiles vi aëolica versatarum illis, quæ in molis aqua-
rum fluentium (rapidiorum præsertim) vi impulsis
parantur: uniformis siquidem ac pene semper æqua-
lis agitatio molarum per aquas, inæqualis valde per
ventos, modo validius, modo segnius spirantes; unde
& in prioribus farina æqualium, in posterioribus inæ-
qualium molecularum conficitur; ex illa vero pistum
panem æqualis, ex hac inæqualis digestionis, hinc in-
salubriorem esse vel tyro comprehendit.

§. V.

Præmemoratum atmosphære & aquarum concursum
benignum animadvertere insuper licet circa coëcturam
cerevisiarum; salubres siquidem in plerisque Hassia
urbibus coquuntur cerevisiæ, non tam ob frumenti
grana minus viscosa & levioris farinae, quam ob at-
mosphære potius & aquarum è fontibus arenaceis &
argillaceis purissimis prorumpentium sinceritatem at-
que spirituosam levitatem. Præstantiores harum sunt
(1) Raufchenbergica, (quod oppidum milliari Mar-
purgo distat) propter aquarum è rupe prosilientium,
virtute carminativa & pellendi sabulum calculosum
(à particulis forsitan subtilibus aëreo-nitrosis copio-
sioribus procedente) præditarum excellentiam tanto-
pere salubris, ut mensæ SERENISS. ac POTENT. PRIN-
CIPIS CASSELLANI etiam inserviat. Extollunt hanc
Medicus Silesius JOH. JONSTON in id. med. univ. L.
I. C. I. p. m. 44. & GUER. HAPPEL. relat. curios. p.
221. Hanc excipit Grebensteiniana, ejusdem virtu-
tis, quam nasturtium ad fontem copiosissime virens
simul commendat: descripsit fontem istum WINCKEL-
MANNUS Chron. mem. p. 67. Succedunt denique Mar-
purgensis, Franckenbergensis, Eischwigenensis, Cassel-
lana, Milsungenensis, Gyxhagensis, oppidorumque alio-
rum plurium, cerevisiæ tum albæ, quos vulgo bro-
janas (Brühau) dicunt, tum nigræ, (schwarz vel
braun Bier) ex iisdem aquarum & misturæ aeris
salubribus causis & ipsæ saluberrimæ.

§. VI.

Ab eadem atmosphære benignitate vinorum quo-
que Hassia qualitas salubris maximam partem depen-
det; utut enim in parte regionis septentrionali fri-
gidior & in Principatu inferiore ad flumen Werram
circa Allendorffum, Wützenhusam, Roitenbergam;
eadem acidiora crescant, (quæ nihilominus subjectis
calidioribus & sanguine æstuante laborantibus fluxi-
bus item ventris & hæmorrhagiis, rubra præsertim,
proficua admodum sunt) ad Eischwigam tamen, in
eodem inferioris Hassia Principatu sitam, & in reli-
Frid. Hoffmanni Oper. Supplem. II.

quæ ditionis tractibus pluribus, meridionalibus præ-
cipue, Rhenum versus ac Moenum, (ubi loca vi-
netorum Soli orienti & meridiano usque ad occasum
ejus patent; atque montes saltusque à tergo objecti
eadem à ventis frigidioribus tuentur,) in Comitatu
videlicet Cattimelibocensi ad urbem Rhenofeldam, in
Dominatu Epsteinensi, in Goso prope urbem Francken-
bergam, notante GERSTENBERGERO Chron. Franckenb.
fol. 13. quippe aere mixto temperatiore & calidiore
paulo affectis, generosa satis ex flavo albescentia ac
mitioris saporis producuntur & Rhenani æmula in va-
rias regiones transportantur.

§. VII.

Efficacia isthæc atque operatio atmosphære salubris
ad animalia quoque esculenta, quadrupedia altilia
reptilia & in aquis degentia se extendit: duplici qui-
dem modo ad quadrupedia & altilia, tam domesti-
ca notissima, quam (& magis forsitan) agrestia,
(quia hæc toto anni tempore libere hinc inde va-
gantur,) cervos scilicet, damas, capras & hinnu-
los apros, lepores, &c. tetraones, tardas seu otes,
phasianos, perdices, attagenes, rusticulas, turdos,
turdulas, alaudas, palumbes, &c. loca plerumque
altiora sylvestria & campestria sicca numero innu-
mero incolentia & pervagantia, anates præterea, an-
seres & gallinas aquaticas, aquis innatantes & arun-
dines ac scyrpos gregatim inhabitantes: hæc siqui-
dem animalia omnia atque singula sylvestria & do-
mestica (quorum posteriora, quadrupedia præprimis
porci & sues, verveces, oves & agni, capræ, bo-
ves & vituli, magnam etiam anni partem in saltibus
& locis montanis, campis & vallibus siccioribus dies
noctesque ut plurimum degunt:) non solum aerem
liberorem effluviis salubrioribus balsamicis mixtum
immediate inspirant: verum mediantibus vegetabi-
libus, (quibus aere sicciore, particulis tamen hu-
mido-nitrosis in tantum temperato, tactis & perfla-
tis, in alimentum utuntur,) & aquis etiam puriori-
bus, salubrem atmosphæram continuo hauriunt, hoc-
que pacto carniū constitutionem saluberrimam ac-
quirunt. Dicit enim nequit, quantum atmosphæra
& pabula montium, dumetorum, vallium, camporum
atque pratorum siccorum, herbis odoriferis, (qui-
bus in vescendo nihil est laudatius,) scatentium in
animalium (ferarum præsertim, maxime secundum
naturam viventium) gignenda carne suavi & salu-
bri valeant: siccior namque & excrementitii humo-
ris penitus ferme expers exin efficitur, exemplo ver-
vecum Gallia Narbonensis, de quibus QUERCETA-
NUS Diet. Polyhist. S: III. C. 4. p. m. 430. refert:
hos in sterilibus atque thymi tantum, serpilli & id ge-
nus odoriferarum herbarum feracibus pascuis educatos
carnes sapidissimas & saluberrimas atque lanas etiam
pro conficiendis vestimentis optimas præbere; id quod
itidem de ovibus & vervecibus Hassia Schwalbacen-
sibus inprimis, jure prædicaveris; cum notum sit, ani-
mantia ista pabulis herbaceis optimis refragantibus
atque siccioribus aquisque purissimis enutriti, quorum
usu non solum carnes ipsorum salubres evadunt,
sed lanæ quoque tenerascunt, quam ob teneritudi-
nem & subtilitatem, scribente sic STEPHANO RITTER
Cosmogr. metric. L. IV. p. 482. ab Anglis (lanas
alias egregias possidentibus) olim abhinc petita sunt.

§. VIII.

Atmosphære hujus atque pabulorum bonitas & glan-
dium faginarum quernarumque, quibus porci & sues
Hassia largius aluntur, ubertas carnem etiam suil-
lam delicatissimam, longeque salubriorem, nec non
à corruptione diutius immunem præstat, ac est illo-

rum, quos alibi locorum oeconomi & lanii domi inclusos quibuscunque quisquillis ac immundis pabulis faginant, ex quibus lentorem & ulcuscula carnes contrahunt, alimentumque crassum & insalubrius præbent.

§. IX.

Deprehenduntur ea propter etiam insignis salubritatis *utilium ova, vaccarum, ovium & caprarum lac, butyrum item & caseus* ex hoc parata, (siquidem gramine, granis, herbisque bonis adeo atque laudabilibus in atmosphæra salubri pascuntur;) ut nullum sit dubium, *lac istiusmodi curæ arthritidis & podagræ* commodissime adhiberi; de qua cura lactea præter Greifselium tractatum conscripsit *politissimum Vir Consultiss. JOHANN. DOLÆUS, Archiater Cassellanus, Patronus meus summus, sub tit. Furia podagræ lacte victa & mitigata, cujus §. 3. C. 2. p. 24.* huc facit.

§. X.

Quanta præterea *mellis Hassiaci* è succo florum fragrantissimorum, atmosphæra rorida ubertim affectorum, ab apibus collecti sit ex puritate & balsamico odore præstantia, norunt illi, qui id magno studio colligunt, aliarumque regionum mellibus multis parasangis anteponunt.

§. XI.

E *reptilium* genere *limaces*, (soli fere esui destinati,) ut plurimum sub terra limosa impuriore reperi cibus minime salubris censentur: in nostro vero solo arenaceo & argillaceo in vineis potissimum & circa sepes hortorum evulsi ob ficciorem telluris temperaturam eique inexistentem atmosphæram vaporibus uliginosis foetidis atque noxiis expertem esui & sanitati etiam commodiores existunt.

§. XII.

Aquarum tandem *incolas* in cibum destinatos quod respicit, quis quæso de istorum salubritate dubitare auit? Etenim lacus & piscinæ regionis pleræque, fluvii & torrentes rapidiores, inter saxa & arenas constituti, aquarum frigidiorum, atmosphæra nitrosa refertarum ac ventis crebrius agitatarum, limpiditate & levitate pollent, in quibus *pisces saluberrimi*, maxime, quos *saxatiles* vulgo nuncupant, (carnis consistentioris friabilis ac lentore & visciditate destitutæ,) maxima in copia enutriuntur: *Salmones* scilicet seu *esoces*, *truttæ vel auratæ*, *lucii*, *percæ*, *funduli*, *cobites*, *barbatulæ*, *thymalli*, *cyprini* seu *carpiones*, *barbi*, *coracini*, *canceri*, & id genus plures alii.

§. XIII.

De cætero *vegetabilium & animalium* recensitorum in alimenta cedentium virtutes atque qualitates singulatim describere prolixum nimis & inutile iudicavi, quoniam eas *autores botanici & alii in arte diætetica alimentisque describendis solertes* fusissime tradiderunt; unius tantum curiositatis ergo meminisse sufficiat pomi miraculosæ, ad urbem *Triburium* in campis Mersheimensibus, ante aliquot annos à nequissimis nebulonibus detruncatæ; quæ quotannis præter consuetos æstatis fructus nocte festum Nativitatis Salvatoris nostri præcedente intra horæ spatium folia, flores & pomia minutula instar pisi (aliquando fabæ) protulit. Consuli potest de hac arbore ABRAH. SAUR in *Theatr. urbium* p. 151. ZEILERUS *Itinerar. Germ.* p. 485. HAPPELIUS *relat. Curios. P. I.* p. 60. & 223. atque CAMERARIUS *horar. subcis. P. II. Cap. 95.* Alias adhuc in *Hassia* hujus

generis *pomos* reperiri scribit WINCKELMANNUS in *all. L. I. Cap. V. p. 26.*

CAPUT V.

Rerum & simplicium Hassiæ salubrium ad materiam medicam spectantium sciagraphiam sistens.

§. I.

Restat describenda *materia rerum & simplicium Hassiæ*, sanitati præcipue recuperandæ proficuarum, quam juxta classes trium regnorum, mineralis scilicet, animalis & vegetabilis, enucleatius proponere mecum quidem constitueram: verum cum perlustranti mihi spatiosissimus hic scribendi aperiretur campus, & pagellas dissertationis meæ his tradendis minime suffecturas animadverterem, (cum singula horum tractatum mereantur,) consilium mutavi, satiusque duxi, eadem ulterioribus & prolixioribus meditationibus cum DEO & die aliquando conscribendis destinare, nunc vero paucis tantummodo farraginem rerum medicamentosarum *Hassiæ* indicare, easque aliquo modo adumbrare.

§. II.

Habet illa *aurum* in visceribus montium, item prope *Sairam* (*Sair*) torrentem majorem juxta *Helisperium* (*Helispeer*) duobus miliaribus *Cassilio* distans, sub ejus ponticulo in arena nigra, referente KELLNERO in *Berg-und Saltzwercks-Buch* p. 500. & in *Adrana* quoque fluvio; quod posterius sincerissimum, nulla depuratione indigens, cursu ipso, ut cum PLINIO *H. N. L. XXXIII. C. 4.* loquar, tritum perpolitumque, ad medicinas parandas aptissimum est, de quo & moneta exinde cusa evolvi poterit WINCKELMANNI *Chron. Hassiæ P. I. C. 8. p. 57. seq.* Aurum ejusmodi fluviale ex aquis fluminum opitulantis Sole & elementis generari defendere fatagit CARDILUCIUS in *append. ad Erckeri aulæ subterr. librum secundum* p. 115. argumentis non adeo validis, sicuti inspicienti patebit: cui præter alia principaliter obstat, quod in illis præsertim regionibus aurum fluviale deprehendatur, ubi montes auriferi reperibiles sunt, quorum fundum & radices, arenulis auri scatentes, flumina quocunque modo tangunt, quod per Tagum Hispaniæ, Hebrum Thraciæ, Pactolum Asiæ, Adranam Hassiæ, & plures amnes ac torrentes Hungariæ, &c. montes auro divites alluentes, facile probatur.

§. III.

Habet *argentum, cuprum, plumbum*, testimonium exhibente PETRO ALBINO in *der Meissnischen Berg-Chronica* tit. 13. fol. 115. *ferrum* præsertim & *chalybem* copiosissimum ac optimum, lapidem item *Hæmatiten* (*Blutstein*) scribente AGRICOLA *de natura fossilium* l. c. p. m. 297. quorum metallorum fodinæ in montibus Hassiæ hinc inde conspiciuntur plurimæ; enumeravit easdem industrius WINCKELMANNUS *tr. cit. P. I. C. 6. p. 29. seqq. & P. II.* in descriptione locorum particulari passim, cui merito sociaveris profundissimæ scientiæ metallicæ plenam dissertationem, *Metallurgie Pyrotechnica & Docimasie metallicæ fundamenta* sistentem, incomparabilis hac in arte viri, Dn. D. STAHLII, *Profess. Med. Fridericianæ nostræ famigeratissimi, Patroni & Pedentæ*.

Pedeuta mei colendi, in qua varia etiam circa metalla & fodinas *Hassia* hinc inde invenies notabilia.

§. IV.

Ex hisce metallis medicinae parari consueverunt efficacissima; speciatim hic notanda venit virtus *minerae marti-solaris*, qua per 14. praeter-propter dies & ultra atmosphaerae frigidae exposita sal acreum ad aliquod uncias acquiritur, quod cum particulis alcalicis martialibus unitum, ab illa per aquam pluviam separatum, salem dulcem & vitrioli aemulum sub colore viridi exhibet; vid. *Anonymi Aurum auræ* C. II. p. 12. 13. & B. HOFFMANNI *Clav. Pharmaceut. L. III. C. 17. §. 180. p. 317.* praepimis a C. II. in fine p. m. 139. Ex hac ipsa minera egregia quoque conficitur *tinctura extemporanea* hoc modo: infillatur nempe liquori terrae foliatæ tartari tantum liquoris mineræ martis Hassiacæ, usque dum in momento mixtura hæc tincturam rubicundissimam acquirit; item *alia* non minus laudabilis: quando nimirum minera dicta; postquam pulverisata atmosphaerae ad sufficientem vitrioli martialis productionem exposita fuit, cum aqua quadam destillata calida infunditur, filtratur, & aquositate tertia vel dimidia pars ad olei fere consistentiam abstrahitur; dilutiorem & jucundi coloris cum spiritu roris marialis elaboravit *prælaudat.* HOFFMANNUS *loc. cit.* quæ medicamenta omnia in morbis chronicis extirpandis sunt singularissima. *Aquam spirituosam* quoque exinde elici testis est idem HOFFMANNUS *lib. cit. C. II. §. 85. p. 227.* Methodum hanc destillandi pete ex SCHROEDERI *Pharmacop. L. III. C. II. n. 3. p. m. 372.* Commendat aquas tales martiales insigniter ad transmutanda metalla MAZOTTA in *tripl. Philos.*

§. V.

Habet præterea *mercurium*, *cinnabarim* etiam, quam in flumine prædicto *Adranæ* in granis reperi certo scio:

§. VI.

Possidet *terram sigillatam albam*, *spadiceam*, *rubram*, (quam posteriorem axungiam solis & auri semen alchymistæ appellitant,) *Lemniæ* æmulam; de hac D. ANDREAS BERTHOLDUS OSSATIENSIS; ejus detector, sequentia conscripsit disticha:

*Mittat ut posthac quævis gens munera vobis
Quælibet; Hassiacis non potiora dabit.
Cætera enim tantum solari axungiae habebunt
Ejus, quantum ipsis cedere terra polis.*

Aliam item ex alba & rubra mixtam *Marpurgum* & *Suenisburgum* inter, referente AGRICOLA *de re metallica lib. II. de fossilium natura circa fin. p. 583.* reperias. Tantæ virtutis terra rubra æstimatur, ut pro scopo conficiendi aurum potabile & medicinam universalem ejusdem ad *Laubacum* (*Laubach*) dimidio milliari *Grunberga* effossæ magnam quantitatem iteratis vicibus *Regiomontium* in *Borussiam* sumtibus haud exiguis deferri curaverit ante multos annos Consul quidam & Chymicus illius loci præclarus. Sigillatæ isti affines sunt terræ argillaceæ medicamentosæ aliæ plures, (*Letten / Thon Erde*;) altera pellucida, vasorum pulcherrimorum (illis, quæ *Porcellan* dicunt, similia,) elaborationi *Cassellis* inserviens; altera reperibilis ad *Husum*, (*Hausen*) pagum inter *Kirchanium* & *Gießam*, ex qua decantati illi conficiuntur urcei, quos *Häuser Krüge* vocant: quam posteriorem magnæ adeo in defendenda sanitate humana efficaciae expertus est medicus gravissimus, D. HELVICUS DIETERICUS, &c.

ut aliquoties ejus ingentem copiam *Hamburgum* transfulerit, referente hoc WINCKELMANNO *loc. cit. C. VI. p. 40. e literis B. Dieterici.*

§. VII.

Possidet insuper *bolum rubram albam* atque *terram crucibulis compactissimis* construendis aptam, *lapidem calcarium*, *Osteocollam*, (*Ossifragam*, *Ossisanum*, *Bein-Bruch / Bein-Welle* / &c. de cujus differentia & virtutibus evolvi poterit QUERCETANUS; CROLLIUS, maxime ANSELM. BOETIUS DE BOODT in *Hist. Gemm. & Lapid. C. 233. &c. p. 204. seqq.* qui speciatim *Ossifragæ Darmstadiensis* meminit, eique nomen *Stelechitis* imponit; de hac THOM. ERAS-TUS *Prof. Heidelberg.* commentarium doctissimum conscripsit, eamque lapidem fabulosum nuncupat; his addi meretur LAZ. MEISSONERIUS in *Pentagon. Philosoph. Medic. p. 77.* & D. JOACH. STRUPPIUS, *Gelhusianus*, in *consensu scriptorum histor. mun. lit. b. 3.* e quo tractatu momentula quædam epicrisi sub-juncta recenset *Eruditiss. Polyhistor* WINCKELMANNUS *loc. all. p. 31. seqq.* ubi tamen notandum, *Osteocollam*, quam à *Nettero* Pastore *Bessingenfi* *Struppius* accepit, ab *unicornu fossili* non differre, & tertiam illam speciem *Ossifragæ*, quam BOODT *loc. cit. enosteum* vocat, constitutere: confer huc D. SCHRODERI *thesaur. Pharmacol. ex editione Wüzelii L. III. C. VIII. no. 20. not. ult.*

§. VIII.

Gaudet porro *Gypso*, notante *præcit.* AGRICOLA *loc. all. p. 250.* gaudet *Alabaastro*, (quod vulgare, sculpturis nimirum destinatum, facillime ustione in *Gypsum* convertitur;) ab hoc nomen sortitum est *Unguentum Alabastrinum*, insigne in doloribus re-num inflammatoriis remedium externum.

§. IX.

Superbit itidem *marmore variegato*, *spadiceo*, *albo*, *rubro*, circa quod postremum tum crudum tum potissimum calcinatum observatu est singulare, quod magnetem aquæ salino-spirituosæ ex aëre copiosissime colligendæ præbeat; modum Chiliarchæ *Lucano* in *Morava* superiori seculo communicatum instrumentumque delineatum videsis in *STARICII Helden-schaz p. 101. seqq.* cui ob paritatem materiæ junge HOFFMANNI *Clav. Pharmaceut. p. 149. seqq.*

§. X.

Uterius geminis quoque potitur, *adamantibus* scilicet, *achatibus*, de quibus posterioribus præter virtutem ipsam alexipharmacam notatu dignum est, quod (femitranslucentes aliquando) lineis aut maculis diversorum colorum, variarum rerum figuras & imagines representantium, mirabili modo à natura exornatæ sint; inveniuntur enim, quæ flumina, nemora, arbores, fructus, flores, herbas, nubes, animalia, certas personas, imo quicquid excogitari potest, non obscure referunt. Ex *achate* istiusmodi variantium, colorum figurarumve, sicuti rumor fert, *Cassellis* construi jam curat conclave curiosissimum ac pretiosissimum *Sereniss. &c. Princeps CAROLUS*. Gaudet etiam *Jaspide*, quæ quamvis pares cum *achate* colores recipiat, mollior tamen aliquid tisper & obscurior est, nec adeo exacte poliri potest, sicuti *achates*; stupendi nihilominus effectus memorante laud. BOODT *tr. all. C. CII. p. m. 127.* cohibendis hæmorrhagiis quibuscunque *Jaspis* est illa, quæ per totam sui substantiam sanguinis instar absque alio colore rubet; verba scriptoris, quoniam liber ejus rarior in paucorum est manibus, thesi inferere lubet: *Testari* (inquit) *possum, me;*

qui alias lapidibus & gemmis tantas vires, quantas vulgus solet, non tribuo, cum in Frisia orientali apud Illustriss. Baronem à Kniphausen ad aliquod tempus degerem, credibile vix de Jaspidis viribus observasse. Nam cum ancilla Domine fluxu menstruum ita laborasset per aliquot dies, ut nullo modo sisti posset, jaspidem rubram, quam Dominus multis annis, ut agebat, apud se habuerat, impolitam & crudam femori alligari jussi: quo facto subito mensum fluorem substituit, nec rediit. Alius ex ipsius familia, cum in pede vulneratus esset, nec sanguinis fluxus cohiberi posset, ad moto lapide extemplo impeditus fuit, licet vulnus non regeretur. Memini me virginem Pragæ curasse, quæ sex annis hæmorrhagia laboraverat ita vehementer, ut vix unquam hebdomada præteriret, quin aliquoties illi sanguis efflueret. Hæc cum nullis remediis juvari posset, à me consilium petiit; qui prætermisissis aliis omnibus, quæ à medicis præscribi solent, ut pote quibus ad nauseam jam diu usa fuerat, JASPIDEM, cujus facultas ad hujusmodi symptomata mihi experientia nota erat, illi commodato do, ut collo appensam gerat: paret illa, sanguinisque fluxus illico sistitur; gestat per aliquot hebdomadas, nec redit fluxus: cum itaque se prorsus curatam opinaretur, deponit gemmam, post paucos dies redit fluxus, iterum appendit JASPIDEM, cujus beneficio mox liberatur: cum vero singularem hujusmodi facultatem & divinam miraretur, (ut mihi retulit,) experiundi gratia aliquoties à collo deposuit gemmam, ac semper animadvertit redire fluxum, nec curari, quin iterum appenderet: observavit tamen, non statim seposita JASPIDE redire, sed post multas prius elapsas hebdomadas, appensa tamen statim sisti, ita, ut nulli alii causæ fluxus inhibitiō adscribi ab illa potuerit, quam JASPIDI: tandem, cum per aliquot menses à corpore gemmam non deposuisset, nec unquam hæmorrhagia rediisset, mihi gemmam reddidit, ac affirmavit, per semianni spatium se liberam fuisse: postea, cum illam sæpius convenirem, affirmavit, non redire amplius fluxum, ac se omnino curatam esse. Tribuunt alii etiam VIRIDI JASPIDI, quæ maculas rubicundas habet, hanc facultatem, sed ego, quod multoties expertus sum, refero. Non incongruum proinde fuerit, gemmam hancce ex autorum quorundam mente interne etiam ad drachm. i. pro sistendis mensibus exhibere. Rubræ hujus jaspidis æmulam ad pagum Kauffungam reperiri, idem autor præcedente cap. consignavit. Nonus Medicus JASPIDEM VIRIDEM epilepsiam quoque arcere scribit, idque ab aliis plurimis etiam asseritur: quæ, si circa ensiformem cartilagine per diem & noctem ab epileptico gestetur, eum, si sudore corripitur, à paroxysmo liberari, sin minus, emori ajunt, idque multoties fuisse probatum: vires has omnes augeri putant, si argento (non alteri metallo) includatur. Cum emolumento ergo in talibus & similibus morbis pocula Hassiaca, è durissima jaspide, (ob quam invincibilem fere duriem achatis potius nomen mereretur,) confecta pro potu quotidiano ex iisdem hauriendo usurpabuntur.

§. XI.

Abundat carbonibus fossilibus, quos præter commodum in re œconomica oleum ad maturanda ulcera emolliendosque tumores aptissimum exhibere non sine ratione autumat SCHRODERUS cit. tr. L. III. c. 33. p. m. 508. col. i.

§. XII.

Præbet alumen, terram clavellatam fossilem, recensente WINCKELMANNO loc. proxime all. p. 37. & factitiam seu cineres clavellatos, nigrum, vitrio-

lum, & hoc quidem optimum, quia multum de marte participat; sulphur, ex quo salutare illud & per orbem celebre conficitur Balsamum sulphuris Smalcaldicum.

§. XIII.

Sal commune diversis in locis exhibet, quod non condimentum solum ciborum optimum est, sed ad recuperandam sanitatem insimul remedia suppeditat excellentissima; inprimis oleum dulcissimum, singulari encheirisi addito aceto destillato vini, ad hoc opus specialiter parato, elaboratum; quo ipso aurum, metallorum compactissimum, adeo subtiliter solvi scribitur, ut id destillatione per alembicum 18. unciarum altum una ascendat; quod aurum ita volatilatum, cum salis isthoc oleo per aliquod tempus circulatum, & peculiari modo fixatum; medicinam reficiendo corpori non potest non præbere incomparabilem. Præparavit hoc arcanum elapso seculo XV. Pater Gregorius de Lochovv, cujus ope is vitam longam eamque viribus præstantissimam consecutus esse fertur. Curiosum observatu est de aquis Salinarum Allendorffensium (vel Hallendorffensium; solent enim loca, ubi sal conficitur, germani appellare Halas; causam appellationis suppeditat ALTHAMERUS comment. Germ. p. m. 361.) quod auctis aquis fluvii Werræ earundem ipsarum falsedo augeatur; cujus rei rationem reddere difficile admodum est; licebit tamen aliquid pace aliorum prudentiorum hariolari: nimirum, mineras salis potiores in altioribus forsitan terræ locis, circa fontes præprimis, delinescere, quas, dum altius affurgentes aquæ, jam tum aliquantisper falsæ, denuo alluunt, hæ novis salium partibus resolutis accedentibus potentiores evadunt: quæ rursus cadentes ob contactus mineris his defectum, sensim sensimque efficaciam acquisitam amittunt, viresque pristinas saltim iterum acquirunt. Duplici igne vel carbonum fossilium vel lignorum sal ex aquis istis coquitur, quorum quidem posterius priori præstat, rationes vid. apud WINCKELMANNUM loc. all. C. X. p. 70.

§. XIV.

Scaturiunt præterea in diversis regionis Hassiacæ districtibus acidulæ saluberrimæ, à WINCKELMANNO L. I. C. 12. & L. II. passim exhibitæ; in Comitatu præprimis Cattimelibocensi: harum celebriores sunt, quas hauriunt è fonte, quem dicunt den Duncelholder Brunnen / prope Braubachium ad Rhenum; de cujus virtutibus evolvi poterit ANDERNACUS de balneis & aquis medicat. p. 146. Omnibus vero palmarum præripiunt Schwalbacenses decantatissimæ, variorum fontium, & adeo celebres, ut ad multa milliaria in Bohemiam, Saxoniam, Silesiam, Helvetiam & Galliam, &c. magnis sumptibus deferantur: quanquam id cum insigni virium suarum jactura fieri putem, quippe in itinere tam longo spiritus æthereo-minerales, in quibus potissima illarum virtus consistit, maximam partem, tantum non penitus, consumi, nullum est dubium: tanto siquidem spiritus memorati robore & copia pollent, ut recenter ex ipso fonte haustæ acidulæ nares ad sternutationem usque afficiant: quin illæ, quas è fontibus, à tilia den Linden & vinoso sapore den Wein Brunnen salutatis, promunt, ob turgescentiæ spirituosam vitæ respuunt, eaque diffingunt; confer huc disput. sapius alleg. de aqu. salubr. examine Præcell. nostri HOFFMANNI th. 6. & 8. p. 11. & 13. Circa harum acidularum usum in specie notandum, eas cœlo sereno longe præstantiores esse quam nubiloso, item si ad fontem bibantur. Descripserunt has D. DIETERICUS, a Patria TABERNÆMONTANUS dictus;

etus, D. HORNICK, D. JOH. BERNHARD. GLADBACH, *Phys. Francofurt.* D. JOH. DAN. HORSTIUS, D. JOH. GOTTFR. GEILFUS, peculiaribus tractatibus; quibus jungenda *Responsa varia Medicorum Celeberrimorum de probatione, facultate & usu acidularum ac fontium Schwalbacii* susurrantium a D. HELVICO DIETERICO Archiatro Hassiae edita, & D. MELCHIORIS *hydrolog. Sectio II. C. 5. p. 178. seqq. & sect. I. c. 2. p. 14. seqq.* Mira sunt, quae de aquis istis Schwalbacensibus mineralibus narrat MERIAN *Topogr. suae p. 123. & 127.* ranas nimirum, cancos, pisces quoscunque, in his incontinentes emori; & quod notabile admodum, quousque effluvia acido-sulphureo-spirituosa in aëre diffunduntur, muscas, mures, glires, serpentes, bufones, caecilias, lacertas, vermes, nullatenus subsistere posse: imo, quod maximum, in cellis Schwalbacensium, exhalationibus ejusmodi vitriolico-martialibus refertis, in aestuosissima etiam aestate carnes quascunque absque omni putredine & foetore conservari. De fonte Soterio, acidularum aemulo, in campis Gismarorum, duobus milliariibus Cassilio distante, ejusque effectibus stupendis, tractatum edidit M. GEORG. SCHULTZ. *Prof. Matth. Erfurtinus*, quem *theatro Europaeo fol. 78.* insertum cernes. In vicinia quoque Principatus Hassiaci hinc inde quidam offenduntur fontes acidi salubres, de quibus sermocinari nostrum jam non est: praecellunt *Pyrmontenses* in finibus Comitatus *Schauenburgici*, quos GEORG. BOLLMANNUS & D. CUNÆUS Medici peculiaribus tractatibus descriptos nobis reliquerunt.

§. XV.

Thermis tandem egregiis pollet Principatus noster Hassiacus: praecipuae sunt *Emsenses*, quae tepidae haud procul à *Sanstein* in Comitatu Diezenensi prodeunt. De harum situ & facultatibus vid. JOH. TEXTORIS *Chron. Nassoviense p. 7. it.* D. JOH. DAN. HORSTII tractatus de *his thermis* peculiare, praeterea D. GREGOR. HORSTII *obs. medicin.* atque RULANDI *Hydriatr. Sect. III. fol. m. 49. & seqq.* Sequuntur *prosilientes* in Comitatu Cattimelibocensi, haud procul à vico *Berstadt* / qui *Schwalbaco* dimidio praeter propter milliari distat, calore *thermis Piperinis* similes; his à serpentibus seu viperis, quae delitescere ibidem & capi catervatim olim solebant, impositum est nomen *Schlangen-Bad*; descripsit has succincte quidem at erudite praecit. MELCHIOR, *Archiatro Hassiacus & Nassovicus*, *Hydrol. part. III. à C. 5. usque ad finem.* Jucundum lectu est, quod annotavit WINCKELMANNUS *loc. all. p. 76.* cancos nimirum in rivulo scaturiginem thermarum istarum, tepore suo lac recentem emulctum aemulantium, praeterlabente, postquam is cum aquis thermalibus unitus est, captos sub elixatione minime communem illum colorem rubicundum, sed flavum penitus acquirere. De *thermis Wisbadensibus* Nassoviorum calidioribus in confiniis Hassiae scaturientibus tractatus speciales ediderunt PHILIPPUS WEBER. LUD. HORNICK & J. G. GEILFUS. Med. Doctores, harumque virtutes & facultates prolixè deduxerunt. Thermarum istarum, sicuti e PLINIO & AMMIANO MARCELLINO *L. XXIX. p. m. 479.* innotescit, olim *fontium Mattiacorum* item *aquarum Mattiacarum* nomine inclauerunt, à Metropoli Cattorum *Mattio* & populis *Mattiacis* hoc mutuantes; cuius rei historiam controversam è monumentis veterum sufficienter admodum enodavit id. WINCKELMANNUS *loc. cit. p. 79. seqq. & cap. 3. p. 15.*

§. XVI.

Denique aqua etiam regionis nonnullae dulces me-

dicatae inveniuntur: talis est aqua *Lani* fluvii, quam PETR. BERTIUS *Comment. rer. germ. lib. 3. p. 192.* in affectibus cutis scabiosis illiusque asperitate praeter aliis fontibus soteriis & thermis insigniter extollit; aqua *fontium Rauschenbergensis & Grebensteiniani*, quarum vis carminativa, antinephritica & antiscorbutica jam indicata est; aliarumque scaturiginum aquae plures. Causam virtutis medicae fontium talismodi soteriorum potiore non inepte in terra argillacea, (alcalifata,) obiter quandoque etiam martialibus particulis subtilissimis impraegnata, post eorum levitatem spirituosa &c. annuente experientia collocaveris: quandoquidem in ejusmodi aquis salubribus dulcibus examinatis semper argilla subtilissima manifestatur: testatum id faciunt fontes duo soterii dulces, qui superiori seculo in Comitatu Nassovico ad *Herbornam* & Comitatu Stolbergeni retro *Niddam vel Lisbergam* prodierunt: quorum aquae terrae argillaceae optimae erant feracissimae; quamvis hi aliquot annis elapsis rursus evanuerint. Testatum id insimul faciunt aquae thermales *Berstetenses*, dulces & pingues, quae à *Prelaud.* Archiatro MELCHIORE *cit. tr. S. III. c. 8. p. 202. seqq.* examinatae terram exhibuerunt argillaceam purissimam & levissimam: qualismodi argilla, quam *terram Adamicam* is appellavit, totum montem è quo thermarum dictarum salium, repletam esse refert. Idem format iudicium *profundissimae eruditionis Vir*, HOFFMANNUS in *methodo examinandi aqu. salubr. dissertationis §. 25.* cui junges quoque §. 19.

§. XVII.

De rebus medicamentosis è corporibus animalium petendis in genere notandum, vix unum horum dari, quod non sanitati humanae aliqua sui parte succurrat. Inprimis autem copiosa ibidem haberi poterunt medicamenta ex *cervis* & *apris*, quorum aliquot millia annuatim trucidantur; ex *viperis* praeterea optimae notae, in montibus *Smalcaldiae* abundantissime captis, quibus non haberi pares in Germania scribitur: vim istarum singularem in extirpanda cutis foeditate leprosa ex impuritate sanguinis experientia confirmatam tradit GALENUS *lib. simpl. II. & de antidot.* Ex *apibus* item, *mel* & *ceram* depuratissima suppeditantibus; quin imo ex *aquilis* etiam, quas subinde in montibus altioribus ibidem invenias, de quarum usu Medico videtur ALDROVANDUM *ornitholog. L. I. p. m. 44.* Taceo animalia exotica, *Cassellis* & alibi in diversis Principum arcibus & praediis alta: est ex horum numero *Casuarus* avis maxima & rarior, quem FRANCISC. WILLUGHBEIUS è CLUSIO *ornitholog. L. II. §. 3. fol. 105.* descripsit. Reliqua animalia vulgaria innumera eorumque usus medicus à scriptoribus Medicis plurimis in libris Pharmacologicis ad nauseam exhibita sunt.

§. XVIII.

Vegetabilium tam rei domesticae & culinae simulque sanitati opitulantium (qualia sunt v. g. *varia frumentorum genera*, porrum, allium, cepae, nasturtium, lupulus, *Nicotiana*, linum, *glasum* seu *isatis Weid* / cuius virtutem vulnerariam deprædicat *Historia gen. plantar. lib. IV. p. 499. 501. &c.*) quam plane medicamentosorum, montanorum partim, utpote praecipuorum, (quorum aliqua supra §. 23. C. III. recensui,) partim etiam in locis declivibus progerminantium, ingens in Hassiae Principatu ejusque ditioribus est proventus, quae omnia vel nominare tantum (nedum describere) hic est impossibile; inprimis copiose illic crescunt *Sennae sylvestris* species quaedam, quam fortasse non inepte inter coluteas referas; *ebulus*, *acorus*, *buxus repens* vel *minor*, *viburnus*,

nus, ribe-sambucus rubeis fructibus, & alia plura. Instar omnium de vegetabilibus *Hassiae* eorumque virtutibus & usu evolvi potest D. DIÆTERICUS TABERNÆMONTANUS in *Herbario*. Præter vegetabilia isthac regioni nativa exotica quoque plantæ frutices arboreæque plurimæ in hortis Principum, *Cassellani* præsertim, aliorumque incolarum dignioris conditionis visuntur, ut sunt tuberosa, malus citria, aurantia, granata, ficus, Myrtus, Laurus, Jasminum, olea, cupressus, Aloe, & id genus alia: quorum folia, flores, fructus & cortices, usum in medicina multum & magnum pro scopo imprimis alterandi & confortandi præbent.

§. XIX.

En abundantiam rerum simplicium sanitati humanæ restaurandæ proficuarum in *Hassia* pronascentium: e quibus perquam utilissima educi & parari posse remedia libri medicorum practici & pharmaceutici ubertim edocent; nec deficiunt his comparandis ibidem instrumenta chymico-pharmaceutica quæcunque: exstructas namque cernas officinas viatrias & ferrariorum complures (*Glaß-und Eisen-Hütten*) in quibus instrumenta vitrea & ferrea, *Almerodæ* vero terrea, optima conficiuntur, insimul saxa & lapides cocti, calx, ligna & carbonēs, vili pretio prostant; unde varia etiam hinc inde in urbibus adornata sunt pharmacopolia laudatissima: *Cassellani* inprimis *aulicum*, per orbem celebre, quod consummatissimum & ornatissimum præ omnibus Germaniæ & Italiæ pharmacopoliis QUERCETANUS Pharmacop. p. m. 509. 510. suo jam tempore deprædicavit, ad cuius normam is pharmacopœiam suam se concinnasse fatetur. Facile proin conjectu, quantis illud nostro hoc seculo, (quo medica ars longe majus incrementum acquisivit,) quamque generosis auctum perpolitumque sit medicamentis: cum in hunc finem *Sereniss. &c. Princeps CASSELLANUS* magnis sumptibus laboratoria chymica construi curaverit, omnibus requisitis instructissima & absolutissima. Nec deficiunt in regione nostra directores & restauratores sanitatis humanæ ingeniosissimi; ibi siquidem eruditionis emporia habentur tria celebria, *Marpurgense* scilicet, *Rinthelianum* & *Giesense*, in quibus hætenus artem salutarem profitentur & exercent Viri Celeberrimi, & è quibus prodierunt Medici practici prudentissimi pariter ac experientissimi: in medium adduco Illustrēs Archiatros, DOLÆUM *Cassellani* & HERTIUM *Darmstadiensem*, viros multa lectione & profunda experientia practica Clarissimos: cuius rei insignis specimen exhibent prioris *Opera Medico-Practica*, *Encyclopædia* præsertim *Medica & Chirurgica* ante multos annos diversis in locis sæpius evulgata; sisto præterea Professores Academiarum Excellentissimos, WINTHERUM *Rinthelensem*, DORSTENIUM & NEBELIUM *Marpurgenses* atque VALENTINUM *Giesensem*, è praxi & scriptis celebres. Possem nominare plures, ni pagellarum angustia id prohiberet.

CONCLUSIO.

Udica jam ex hætenus propositis, mi Lector, annon recte dixerit Clariss. WESTPHALUS, HERMANN. BUSCHIUS, sicuti de eo refert JOACH. CAMERAR. F. L. III. *epist.* quando aërem *Hassiacum* rosas spirare dixit; & num falsum non scripserit cum TACITO SENECA L. cur. bon. vir. mala fiant C. IV. sub fin. quando Germanos perpetuam hyemem, triste cælum premere, maligne solum sterile sustentare,

scripsit. Quadrat ea propter *Hassiae* apposite delineatio situs loci salubrioris, quam suppeditat SENNERTUS loc. supr. cit. in fin. cap. sequenti verborum tenore: *Ex his omnibus non difficile est colligere, quis locorum situs sit salubrior & corpori nostro commodior; in quo scilicet ea est aëris constitutio, ut siccitas & humiditas bene temperata sint, ad colorem vero nonnihil declinet, & quæ nec nimio aestu corpora torreat, nec frigore gelida reddat, sed moderate calorem refocillet, & spiritibus gignendis optimam materiam suppeditet, occursumque suo suaviter ac blande corpora nostra afficiat. Ver sit temperatum, aestatis calor frugibus & fructibus maturandis sufficiens: Autumnus frigidior: Hyems quidem frigida, sed quæ tamen nimia frigiditate corpora nostra non lædat. Talis ubi est aëris constitutio, ibi procul dubio soli adest fecunditas rerumque omnium copia, ibique reperiuntur statu corporis decoro præditi homines, facie bene colorata, moribus nec feris, nec mollibus nimis, ingeniosi atque ad omnes artes excolendas apti, & proinde sanitatem majori ex parte inculpatam obtinent.* Non incongrue hinc TACITUS de Germ. c. 30. *Genti nostræ duriora corpora, strictos artus, minacem vultum, magnum animi vigorem, multumque rationis ac solertia in expediendis rebus tribuit.* Quibus omnibus probe pensitatis neminem mirum habebit, quando incolæ *Hassiaci* (dieta perversa non utentes, nec morbo hæreditario affecti,) sani ut plurimum ad septuagesimum & octuagesimum, multoties centesimum ætatis annum & ultra perveniunt; Potiuntur hoc beneficio in excellentiori gradu *Schvvalbacenses*, qui macilenti quidem, robusti tamen, morbos atrociores tum chronicos tum acutos, v. g. catarrhos, cephalalgias, inflammationes & obstructiones viscerum, hepatis, lienis, calculos, febres &c. certe rarissime perpetiuntur, sicuti præter experientiam de iis confirmat MERIAN. *Topogr. Hassiæ* p. 123. Stupenda summæ ætatis exempla congeffit WINKELMANNUS *Chron. all. P. III. C. 3. p. 365. seqq.* *Palmaria* saltem & notatu dignissima hic commemorare lubet: anno 1597. 30. Martii *Marpurgi* coram judicio aulico comparuit testis Georg. Burckhardus, Wettelingensis, e Præfectura Zierenbergenfi, qui Centum octuaginta annorum senex testantibus actis forensibus judicio adhuc pollebat; Anno 1637. in Præfectura Rommerodenfi Andr. Bohnius & Catharina conjuges matrimonium 91. annorum compleverunt, & ambo anno ætatis centesimo sexto diem supremum obierunt; Anno 1610. Jo. Mylius Senator Allendorffensis ad Lomdam centum trium annorum senex ejusque uxor Catharina 100. annorum vetula, postquam per 80. annos vinculo conjugali juncti fuissent, vita excefferunt; Anno 1666. Job. Hilesius Gismarus annos ætatis 120. complens obiit; Job. Martius, Diaconus Daurnheimianus, anno ætatis suæ centesimo quarto vitam cum morte commutavit; Joannes Zungius Novi-Cattimelibocensis, Martin. Schreinerus, Catharina Reitzing / Geravienfes, annos ætatis 105. consecuti sunt. Curiosissimum est, quod de fœmina Nobili a Dalwig M. THEOD. ZWINGER *Theatr. vit. hum. vol. 3. Lib. II.* annotavit: eam nimirum senem adeo factam esse, ut sexti gradus nepotes sana & incolumis conspexerit; depingit felicitatem Matronæ sequens distichon ingeniosissimum:

1.) Mater ait 2.) Nata : dic 3.) Nata, filia, 4.) Natam
Ut moneat, 5. Natae plangere 6.) filiolum.

Quod Germanico idiomate ita exprimitur: Die Mutter sprach zur Tochter: meine Tochter / sagt eurer Tochter / ihrer Tochter zu hinter bringen / daß ihr Tochter-Kind weine.

Tantum de Salubritate Hassia.


COROLLARIA.

I. Influxus Coeli decantatus non effluviis corporum coelestium descendantibus, uti Medicorum quidam & Alchymistarum plerique somniant, sed motu solo per aërem expeditur. Defendere quidem illi assertum conantur ex *Deuter. C. XXXIII. v. 14.* ubi verba *mègèd thevouoth schamèsch* extant, quæ aliqui per *pinguedinem seu florem stillantem Solis* interpretantur; quibus effluuium sideris huius manifesto significari contendunt: verum errant & falluntur, si aliter quam de effectu Solis in his sublunaribus secundum ALEXANDRINUM DE VINCENTINIS *de Cæli influxu in sublunaria C. V. solo lumine & motu producto, verba scripturæ intelligant*: Sol namque corpus lucidissimum ob vehementiorem sui motum ac radios penetrantiores & calidos totam hanc universitatem fovendo peculiaria & balsamica magis excitat & quasi scaurire facit effluvia, quæ hinc inde condensata materiam roridam & pinguem constituunt. (*De admiranda Solis energia* adi si lubet *fusus discurrentem DIONYSIUM AREOPAGITAM lib. de divinis nominibus.*) Etenim ab astris terræ globum ver-

sus effluvia dimitti vel ex hoc non est verisimile; quia per quotidianum & copiosum adeo discessum particularum minimarum, quarum nulla est restitutio, tandem absumerentur; imo per adeo longum secundum pristina tempora annorum decursum fere jam absumta forent. Qui etiam posset fieri, ut imminutis his æqualis eorum cursus sustineri valeret? Imminuta namque leviora, dehinc velocioris longe cursus forent, & totam cœli harmoniam turbarent. Astralium vero effluviis recedentium restitutionem secundum GASSENDUM nullam esse, evincit longissima illa distantia inter locum astrorum & corporum sublunarium, quæ sola apta nata sunt, ut incrementum aliquod rursus corporibus addant; cum superior & astris propior locus nullis plane scateat corpusculis, ut ita loquar, nutritilibus, neque ex atmosphæra inferiore adeo alte ascendant; sicuti jam dudum per experientiam edocuit A COSTA, ex cujus observatione in summis montium cacuminibus atmosphæra jam adeo est tenuis, & effluviis gravioribus ac solidioribus orbata, ut ne respirationi quidem sufficiat. Quod si quispiam instaret, ab æthere ipso hoc incrementum præstari: isti regerendum; ex ætheris corpore subtilissimo, siccissimo ac fluidissimo non posse coagmentari corpus tale densum & solidum, quæ sunt astra; nec unquam ex hoc etiam in sublunaribus corporibus incrementum aliquod animadversum esse: licet enim corporibus solidis omnibus eorum potissimum conservationis gratia æther universalis insit, pars tamen ipsorum constitutiva non est, cum corpora dicta ex partibus solidis & sensibilibus magis ac immutabilibus, minime coagmentabilibus constent.

II. Vita durare potest sine cibo & potu, ast non sine atmosphæra, quæ etiam nutrit.





OPUSCULA PATHOLOGICA.



SUCCINCTA PATHOLOGICÆ EX PRINCIPIO MEDICINÆ DEDUCTIO.

Dissertatio primùm edita Anno 1715.

§. I.



ATURAM corporis nostri omnis rationis in Medicina esse principium, scitissime ab HIPPOCRATE proditum est libro *de locis in homine* §. IV. Quandoquidem in medicina experientia etiam accuratior non omnes absolvit partes, sed ut Medici ratio & judicium accedat, summo opere necesse est. Neque enim sufficit scire quod res hoc vel illo modo fiant: sed opus quoque est, quo majori cum certitudine procedat Medicus, ut eorum, quæ fiunt & facta sunt, rationes reddere possit, & quare hæc noceant vel prosint; & cur hanc vel illam medicationem suscipiat, solide ostendat atque demonstret. Sicuti vero ad omnem solidam demonstrationem scientificam opus est quodam principio, seu causa prima, ultra quam non facile progredi possumus, cum quæ reliquæ dein subalternatæ causæ connecti, & phænomena, effectus ac problemata deduci debent: ita etiam certum quoddam, clarum tamen & perspicuum demonstrationis & ratiocinationis in medicina constituendum est principium. Hoc vero HIPPOCRATES, & qui tantum ducem sequuntur, naturam corporis humani salutarunt. Et quidem recte, nam utique ea causa, quæ omnium effectuum, qui contingunt in nobis, origo ac mater est, in ipso corpore nostro debet contineri, & ex eo desumi. Inepte enim illi agunt, qui non ex ipsarum rerum, de quibus tractatio suscipitur, natura, veritatem petunt fundamentum; sed ad cerebri quoddam figmentum ipsarum rerum naturam & operationes referre, vel potius detorquere contendunt. Verissime enim a Philosophis dictum est, veritatem esse nostræ cogitationis cum ipsa re accuratam convenientiam.

Antequam igitur principium seu primam causam omnis sermonis in medicina constituamus; necesse est ut prius in ipso corpore, accuratiori facta indagine, quæ causa sit actionum & functionum corporis nostri, inquiramus. Quid vero jam sit natura corporis nostri, de eo non concors inter auctores est sententia, neque etiam ipsi, ut verum fateamur, in quo natura corporis nostri posita sit, ob incertitiam anatomes atque experimentalis & mechanice philosophiæ cognoverunt: quare etiam in demonstratione admodum exiguos fecerunt progressus. Quum vero jam serenior lux nostris temporibus affulserit, dum physices, chymicæ & anatomes scientiæ divinis & admiratione dignis inventis in magnum fastigium sint perductæ: naturam corporis nostri, & quæ omnium actionum sit causa, longe melius explicare possumus. Præstitum quoque id ipsum fuit in altera dissertatione, ubi clarissime ostendimus, motum solidorum, qui in constrictione & expansione consistit, & omnis generis fluida per compagem corporis nostri vasculosam propellit atque in circulum rapit, nec non inutilia excernit, esse primam & sufficientem causam omnium, quæ in corpore nostro celebrantur, functionum. Exinde quoque perspicue & clarissime vitæ, sanitatis, morborum, temperamentorum, mortis quoque rationes deduximus, quare nunc sequitur ut etiam ad statum morbosum, seu qui præter naturam fit, illud applicemus, & ex hoc omnium ac singulorum morborum formalem & proximam causam assignemus.

§. II.

Quicumque autem vult cognoscere statum morbosum, is utique prius scire debet in quonam corpore nostri, ejusque partium sanitas versetur, sive quam causam agnoscat. Diximus vero sanitatem esse

esse actionum, tam animalium quam vitalium ac naturalium, debitum exercitium, (quod maxime per convenientes ingestiones, digestiones, egestionem & vires corporis nostri sufficientes tam in anima quam corpore cognoscitur) a moderato & æquabili solidorum nisu, renisu, sive tono & pulsu, vel potius earum debita systole & diastole, seu contractione & dilatatione, cum libero, æquabili & moderato fluidorum circulo & debitis excretionibus proveniens. Quoniam vero solidorum motus, tonus ac pulsus, fluidorum naturam, motum, impulsus, progressum regit ac moderatur: hinc non modo sanitatis, sed & morborum præcipuam causam in natura solidorum principaliter esse quærendam facile intelligitur. Sicuti vero moderata & æquabilis cordis & arteriarum constrictio & dilatatio, & fibrarum debita tensio ac tonus moderatum, liberum & æquabilem sanguinis cursum & circulum, qui sanitatis faber est, efficit: ita in omnibus morbis principaliter pulsus & tonum partium esse læsum, & inde impeditum vel immoderatum aut inæquabilem fluidorum in morbis progressum fieri, unde turbatio totius œconomiae corporis exoritur, nihil est dubitandum.

§. III.

Quum vero tonus ac motus solidorum duplex sit, unus activus constrictiois sive systoles, alter passivus dilatationis seu diastoles: hinc morbi in universum commode in tria genera possunt dispesci; quorum prius ab aucta systole & diastole cordis & vasorum; alterum a nimia, validiori ac intensiori systole seu fibrarum constrictione; tertium a nimia earum resolutione, relaxatione sive diastole provenit. Priorem speciem febrem, alteram spasmodum, tertiam atoniam appellamus. Ideoque omnes morbi vel ad febres, vel ad spasmos, vel ad atoniam sive resolutionem optimo jure referuntur.

§. IV.

In nostra igitur tractatione exordium a febribus capiemus. Quodcumque cordis & arteriarum systole & diastole reciproca, nec non tonus fibrarum totius corporis musculosarum nimis augetur atque intenditur: tunc pulsus seu motus cordis, & consequenter sanguinis & fluidorum circulus fit undique celerior atque velocior, unde sanguis & totum corpus incalescit. Et hic status dicitur febris. Nam in febre longe celeriore esse sanguinis per vasa decursus, quam in statu sano, pulsuum frequentia indicat quæ ex singulorum ictuum subita & minimis intervallis repetita celeritate provenit. Per singulos enim pulsus, qui sunt dilatationes arteriæ, factæ ab influxu sanguinis, mediante cordis systole, eum in ductus arteriosos exprimente, semper a corde recipi sanguinem & postea earundem constrictione ad venas reduci certissimum est. Quo frequentior itaque certo temporis intervallo est pulsus, eo frequentior & celerior quoque sanguinis ex corde expressio & per venas refluxio est, adeoque sanguinis auctior circulatio. Quo autem celerius sanguinis per fibras corporis tensas earumque poros ac vasa angustiora reddita trajectio & decursus procedit: eo major ac intensior fit intestinus partium sulphurearum in sanguine motus, & quod necessario consequitur, vehementior fit calor, unde nulla febris est sine vehementi calore præternaturali. Et quoniam vehementior calor humidum nimis exsiccat atque absumit, nec non ipsum gelatinosum sanguinis & partium succum dissolvit inque excrementitium falso-sulphureum serum tandem convertit: hinc in

Frid. Hoffmanni Oper. Supplem. II.

omni excessivo calore præternaturali sitis seu appetitus humidi & corporis extenuatio ac macies adesse solet. Tunc quoque urina, ob defectum humidi, ac salium excrementitiorum majorem proventum parior, & cum coloris intensione saturatior deprehenditur, quæ frigoris accessu sedimentum copiose deponit.

§. V.

Febris vero est vel continua seu acuta, vel intermittens, & minus periculosa. Nam quando celeritas pulsus cordis & arteriarum nec non intensio toni fibrarum universi corporis continuo per aliquot dierum spatium vel hebdomades durat, cum dictis symptomatibus, tunc febris audit continua. Quando vero toni fibrarum intensio ac pulsus cordis & arteriarum auctior & celerior ad certum tempus plenarie intermittit, cum cessatione symptomatum, febris vocatur intermittens.

§. VI.

Acuta vero & continua febris a causarum differentia diversum genium, naturam, vel nomen etiam adipiscitur, nec idem semper periculum affert. Complures enim sunt interius causæ, quæ, quomodo-cunque etiam fiat, tam cor & vasa, quam fibras universi corporis, ad motum concitatioem, adeoque ad febrem irritant. Inter eas vero primum locum tenet putredo, quæ corpori inimicissima, quia & crasin fluidorum & structuram solidorum destruit. Hæc si subito ingeneratur, & præcipue interna quædam viscera sphacelo corripit atque ipsum sanguinem ac fluida putrida labe contaminat, dicitur maligna, & virium summa prostratione, & impotentia cognoscitur. Hæc vero partim in actionibus animalibus ex sensationis, ratiocinationis & somni defectu; partim etiam in actionibus vitalibus, ex pulsu parvo ac debili, animi deliquio, impotentia se movendi, nec non in actionibus naturalibus ex calore cum frigore intermixto & appetitus plenaria abjectione, urinaque minus saturata manifestatur.

§. VII.

Quando hæc malignitas, putredo & viscerum subita sphacelatio fit ab causa externa atque hausto miasmate, in fermentationem putredinosam fluores corporis nostri conjiciente; tunc febris dicitur maligna contagiosa, quippe alios simili facile labe inficit; & in se periculi est plenissima. Si vero maligna hæc febris ab intus genita putredine, v. g. in cachexia, scorbuticis vel a stagnante extravasato sanguine gignitur, tunc minus est contagiosa. Si vero ob viscerum lentiores corruptionem lentius procedit hæc putredo & febris, hæctica dicitur & periculi quidem plenissima est, minus tamen contagiosa.

§. VIII.

Non raro etiam febris causa est tenue quoddam instar halitus seu vaporis principium, quod vel putredinosa corruptione vel acri quadam fermentatione in corporis nostri partes tam fluidas quam solidas agit. Quando sub febre hostile ac peregrinum illud principium seu fermentum ad habitum corporis exterminatur, tunc dicitur febris exanthematica, quia natura ab centro ad circumferentiam salutariter & critico motu, quod hostile est, a corpore secernit. Hujus febris exanthematicæ causa si fuerit miasma summe activæ putredinis, sive malignum, & ad glandulas, tunicas vel membranas musculorum glandulas

Mm

dulosas

dulosas fecernitur, morbus dicitur pestilentia, quæ per bubones seu tumores glandularum & carbunculos sive anthraces in superficie musculorum sub cute sese exferit, & est hæc acutissima, malignissima & summe contagiosa febris. Propulsa vera materia putrida ad ipsam cutim glandulasque subcutaneas, formula macularum, febris dicitur petechialis seu purpurata. Materia vero secernenda & secreta acri inflammatoria existente, morbus dicitur variolarum, qui numquam sine febre & crisi fit; acri vero viscida, minus inflammatoria qualitate si fuerit, maculae tantum fiunt cum pruritu, quæ morbilli appellantur.

§. IX.

Si serum tenue acre ad superficiem cutis majori latitudine effunditur, levior fit inflammatio cutis, & sic febris dicitur erysipelacea, quæ quandoque glandulas inguinales simul occupat, easque in tumorem extollit; sicque peioris moris est. Si vero talis naturæ serum ad ligamenta, articulos & glandulosas partes emittitur, arthritica febris est. Nunquam enim arthritidis sine febre & critica secretionem ad articulos feri acris contingit. Lympha vero stagnans corrupta, vappescens, acida, critico febrili motu ad cutis glandulas propulsa, facit purpuram albam, quæ mali moris est: si vero magis acredo quam corruptio adest, purpura rubra fit: quæ si a falsedine interna humorum proficiscitur, chronica & benigna est: si vero ab adventitia, acuta fit & breviori tempore definit.

§. X.

Vel etiam febris continuæ & acutæ causa est nimia tensio membranarum nervosarum, quæ subtiliori sensu præditæ sunt a sanguine in vasis hærente, incarceratione & stasi ac inflammationem moliente. Et tunc non modo febris in universo corpore, sed & dolor, ardor, tumor, rubor, arteriarum pulsatio in parte affecta, quæ pathognomonica sunt inflammationum signa, excitat. Pro diversitate autem partium, quæ magis vel minus membranosæ, nerveæ, nobilioris vel ignobilioris usus sunt, variat quoque ratione periculi inflammatio ac febris inflammatoria. Periculosissima est ventriculi, quæ cum maxima anxietate præcordiorum, vigilia, dolore fixo sub ventriculo, extremorum frigore, & symptomatum horum post assumptum cibum vel medicamentum exacerbatione fit. Hæc epilepticas & funestas tandem post se trahit convulsiones, & complurimis acutis morbis ceu symptoma lethale associatur. Estque affectus, quo complures pereunt, frequentissimus quidem, sed rarissime a nostris Medicis cognoscitur.

§. XI.

Sequitur inflammatio meningum cerebri, quæ nunquam est sine febre, & quum ingens in capitis vasis sanguinis fiat congestio, hinc non modo vigiliæ assiduæ; capitis inflatio, rubor, oculi fixi & flammei, delirium & præceps mentis alienatio ac motus in cerebro pulsatorius percipitur, quæ valde periculosa inflammatio sæpissime etiam sese associat morbis aliis acutis, præsertim in statu, ac præsentissimum vitæ infert periculum. In intestinis consistentes inflammationes plerumque sunt acutarum febrium causæ, quod in dissecis post mortem cadaveribus conspicitur: ubi foeda sphacelatione infecta apparent.

§. XII.

Talis stasis profundior sanguinis in pulmonum vas-

culoso viscere dicitur peripneumonia, quando vero magis est superficialis, pleuritis vera appellatur. Utraque nunquam est sine febre, nimiaque ibi sanguinis congestio & stagnatio tussim, respirationis difficultatem, dolorem gravativum, punctorium, tensivum, ex quibus ceu notis essentialibus hic morbus cognoscitur, efficit. Sunt quoque in aliis sanguine ac vasis refertis visceribus inflammationes, sed paulo rariores, atque in hepate, hepatitis, in renibus nephritis appellantur. In illa dolor est in latere dextro infra costas spurias, cum singultu, vomitu sæpe, anxietate, tussi sicca, & mutato faciei colore: in hac vero febris continua magis ad lentam accedit, comitem habet dolorem fixum ac ardentem in lumbis cum urina difficili, purulenta, ac difficultate in mingendo. Frequentior vero est inflammatio, quæprehendit uterum, præsertim in puerperis: unde febres, quæ ipsis accidunt, plerumque sunt inflammatoriae, ex stasi foeculenti sanguinis circa uterum, a lochiis suppressis, ac in vasculosa uteri compage fixam sedem habentibus, enatae.

§. XIII.

Cæterum febres ardentes sive causæ, cholericæ seu biliosæ, item tertianæ continuæ, quæ ex horrore & sicco æstu, cum angustia & ardore circa præcordia, agrypnia continua, urina flammea, intolerabili siti, alvo adstricta, capitis dolore, vomitu etiam quandoque bilioso, seu conatu ad vomendum dignoscuntur; secundum nostram sententiam ex inflammatione intestini duodeni & ductuum biliariorum, tam cholodochi, quam cystico-epaticorum nascuntur: quæ si gravior fuerit, ut a natura vincinequeat, convulsiones, extremorum refrigeratio, cum internorum intensissimo dolore, delirium quoque, nec non singultus finem vitæ imponunt. Pertinet huc quoque dysenteria quæ non nisi febris intestinorum inflammatoria est, cum crebris, mucosis & cruentis dejectionibus, atrocibusque torminibus ventris juncta.

§. XIV.

Sunt quoque febrium causæ graviores dolores, seu validiores generis nervosi irritationes, unde totum nervosum genus in consensum trahitur, & per totum corpus solidorum constrictio augetur. Patet hinc ratio quare gravioribus partium, præsertim nerveo-membranosarum, læsionibus, punctiõibus, vulnerationibus febres excitentur. Maxime omnium vero partibus extremis, propter tendinum ac nervorum copiam, læsis superveniunt. Ita quoque febres sic dictæ catarrhales, rheumaticæ, arthriticæ & quæ tumoribus glandularum, ut parotidibus, itemque jugularibus accidunt, ex dolore tensivo propter decubitus & stagnationem feri acris viscerum ibi factam, qui universum systema fibrosum & vasculosum in communionem doloris trahit, excitantur. Profecto enim notabile est, quod omnibus atrocioribus doloribus vel manifestæ febres, vel motus quidam febriles, cum extremorum frigore ac constrictione & internorum æstu ac sanguinis congestionem associantur.

§. XV.

A febribus continuis ad intermittentes progressum facimus, quæ tales dicuntur ubi intensior systole ac diastole per genus vasorum & fibrarum ad certum tantummodo tempus durat, posteaque plenarie intermittit. Solet vero in hisce febribus fluidorum circuitus maxime esse inæqualis, siquidem sub frigore & horrore non modo corporis extrema, sed maxime.

maxime universa cutis spasmodice contrahitur, vasa angustantur, & sanguis ab exterioribus ad majora vasa in pulmonibus, corde, dorso & capite congeritur. Unde in præcordiis consipatus sanguis facit anxietates, ipsumque tandem cor cum annexis vasis ad intensiorem motum irritat. In vasis majoribus dorso facit dolores & sensum in ea regione tensivum, in capitis membranis cephalalgias, donec tandem motu cordis auctiori & validiori a centro ad circumferentiam, i. e. corporis habitum vehementissime revehatur, intensissimo mox æstu subsequente. In harum vero febrium principio spasmodicæ illæ cutis & membranosarum partium constrictiones causam quoque dant pandiculationibus, nauseæ, vomitibus, anxietatibus, doloribus partium extremarum contusivis, alvi pertinacius adstrictæ, ac cutis horripilationi. Pro differentia vero temporis, quo redit accessio, febris varia sortitur nomina. Si enim alternis diebus paroxysmus revertitur, dicitur tertiana, & quidem, si non ultra x. vel xii. horas extenditur, legitima, si ulterius progreditur, notha vocatur; quum denique talis febris singulis diebus invadit, tertiana duplex audit. Quod si duobus integris diebus paroxysmus quiescit, & maxime pomeridianis horis invadit, dicitur quartana, cui ut plurimum magna ac contumax alvi adstrictio, capitis dolor, ac siccus æstus jungitur. Quando, maxime circa vesperam, singulis diebus, quod tamen rarius accidit, febris cum horrore subsequente male corpus habet, febris dicitur quotidiana intermittens, quæ a tertiana duplici intermittente in eo distinguitur, quod illa statim in principio singulis diebus ægros invadit, hæc vero tertianæ supervenit & invasionis tempus quasi duplex & alternis diebus varians observatur. Præterea datur quoque tertiana continua. Hæc species acutæ non inepte putatur, & ex simplici succedere solet, quando videlicet paroxysmi æstus etiam per vacuum diem se extendit, ut intra lectum æger hæreere constanter debeat. Quotidianam continuam, quæ cum horrore & tussi, capitis quoque dolore, circa vesperam solenniter invadit, ita tamen, ut languidus calor perpetuo duret, pituitosa etiam veteribus seu catarrhalis vocari solet. Ita etiam continua quartana dicitur, ubi calor lentus fere perpetuo durat, quarto vero die sensibilis rigor & caloris intensio denuo supervenit. Suscitantur autem hæc febres intermittentes, ab humoribus corruptis, vel in ventriculo, & intestino duodeno vel in visceribus hærentibus, ubi inflammationem membranaceis hisce partibus inferre intendunt. Valet etiam bilis ad febres incendendas; corrupta enim & pituita commixta quotidianas facit, acredine vero peccans tertianas provocat, non magis simplices quam duplices & continuas. Quando sanguis viscidus tenax in visceribus, præsertim hepate & primis viis hæret, febris quartana simplex nascitur. Idem sanguis stagnans ad corruptionem tendens, gignit quartanas continuas, ad naturam lentarum & hæcticarum accedentes.

§. XVI.

Evoluta sic febrium natura ad explicandum alterum morborum genus, quod a spasmo originem ducit, devolvimur. Per spasmum vero intelligimus fortem ac constantem fibrarum strictionem & crispaturam, sive validiorem constrictionem & contractionem a circumferentia ad centrum tendentem. Hæc si fit in membranis nerveo-tendinosi vel etiam carneis, oritur molesta ac tristissima perceptio, quæ doloris nomine venit, qui pro differentia locorum, quæ affligit, varia etiam sortitur nomina. Nam si pericranium corripit, fit dolor capitis, qui cephalæa

Frid. Hoffmanni Oper. Supplem. II.

seu clavus dicitur; quando firmitus hisce membranaceis insedit, cephalæa idiopathica nomen accipit: quod si in remotis partibus, v. g. primis viis causa hærens nervos pariter vagi obsidet, symptomata est, sive ex consensu suboritur: & quum dimidiam tantum cranii partem obsidet, dicitur hemicrania, quæ sæpius tempora invadit. Quandoque in maxillas & dentes vagus dolor defertur, unde odontalgia nascitur: aut oculorum tunicas exagitat, sicque ophthalmiam facit, aut eam membranam insidet, quæ meatum auditorium cingit, ex quo otalgia evadit. Idem spasmus, quando nervosas ventriculi partes, seu orificia exagitat, nascitur cardialgia. In intestini ilei membranis molliori ac delicatiori sensu præditis quando intensior spasmus residet, & circa regionem umbilicalem atrociora ciet tormenta, vulgo vocari solet dolor colicus, qui tamen potius iliaci meretur nomen; quum alter ille inflativus & tensivus circa hypochondrium dextrum & sinistrum, ubi colon situm est, & qui hypochondriacos etiam valde affligit, potiori jure colici adpellationem admittat. Neque intestinum rectum ab acerbiori dolore immune est, quem stases sanguinis in vasis hæmorrhoidalibus, sub nomine hæmorrhoidum cæcarum creant. Est quoque ibi alia spasmi species, quæ vocatur tenesmus, & ad continuam dejectionem homines impellit.

§. XVII.

Sunt quoque viæ urinariæ, ureteres & vesica ex valde sensibilibus membranis compositæ, quæ si fortius constringantur aut distendantur, dolor fit intolerabilis; sicuti videmus in dolore calculi & vesicæ. Sphincter vero vesicæ si molesta crispatura afficitur, dolor in meiando seu stranguria fit. Habent præterea articuli membranas & ligamenta exquisitioris sensationis, quæ spasmodica crispatione affecta dolorem arthriticum, qui in manibus chiragra, in pedibus podagra, in genibus gonogra, in ossibus ischii malum ischiaticum nominantur, solent producere. Denique musculorum involucrium est membrana sensibilis etiam naturæ, fibras carneas investiens. Hæc si præter naturam spasmo afficitur, dolorem, qui rheumatismus dicitur, ingenerat. Tandem universi corporis nostri ossa membrana acutissimi sensus cincta ac investita esse diligentior inspectio anatomica nos reddit certiores: hac irritata, vel humoribus vitiosis arrosa aut nimium extensa dolores, qui *osteo-dynoi* dicuntur, quandoque intolerabiles; præsertim in lue venerea affectis, excitantur.

§. XVIII.

Monendum vero hoc loco est, quod non modo a fortiori membranarum strictione, sed & ab earum nimia distensione, quam veteres continui dissolutionem dixerunt, dolor oriatur. Sicuti vero spasmus a causa magis immateriali, v. g. animi affectu, vel a tenuiori, activa salina caustica: ita nimia distensio a causa magis materiali, præternaturali scilicet sanguinis & humorum congestionem & stagnationem nascitur. Neque hoc notatu dignissimum prætermittere debemus, quod spastica istæ membranarum, quæ dolorum genitrices sint, contractiones, per consensum sæpe fiant, quo nervorum paria connexa gaudent, causa sæpius dolorum in remotis partibus residente. Sicuti enim prima regio causis morbificis aptissimum domicilium ac sedem præbet: ita etiam dolor, qui in capite fit, frequentissime ex ventriculo male affecto oritur.

§. XIX.

Ultimo loco & hoc tenendum est, quod omnes

Mm 2

dolo-

dolores, præsertim si acutiores & pertinaciores fuerint, id habeant incommodi, ut alias etiam partes membranaceas & sensibiles per consensum simili modo & motu vitioso spastico afficiant: inde fit quod ut plurimum dolorum atrociam anxietas circa præcordia, alvi adstrictio, extremorum frigus, pororum cutis obstipatio, utina quoque propter renum poros nimis angustatos tenuis, inquietudo, vigilia, febris, interdum etiam conatus vomendi comitetur. Et perpetuæ fere est observationis, quod, quo acerbiores sint dolores in podagra, arthritide, calculo, rheumatismo, pleuritide spuria, eo celerior fit pulsus ac intensior calor.

§. XX.

Sunt quoque spasmi enormium sanguinis effusio-
num seu hæmorrhagiarum causæ. Nam quando hi viscera, præsertim infimi ventris, videlicet intestina vel etiam partes extremas fortiter constringunt, fit ut vasis sanguine plenis simul coarctatis, liberiores sanguinis cursum impedian, eumque plane inæqualein reddant, adeo, ut aliæ partes constrictæ sanguinis influxu destituantur; ad alia vero vasa & loca fortiori impulsu, immo regurgitatione sanguinis facta, is cum copia & impetu ruat. Hinc extrema orificia vasorum nimia sanguinis distensione aperiuntur, & ingens sanguinis fit profusio. Quapropter non facile visitur hæmorrhagia insignis ab causâ interna orta, ubi non vel partes extremæ, manus aut pedes manifesto frigeant, vel in abdomine flatulentæ, torminosæ aut spasticæ affectiones percipiuntur, pulsu interea arteriarum magno & vehementiori facto. Si itaque sanguis a partibus exterioribus vel interioribus nimium urgeatur ad caput, oscula vasorum in naribus aperta stillant copiosiores cruorem: & sic narium fit hæmorrhagia, cujus indicia & prodromi sunt intumescencia capitis & rubor faciei, cum dolore gravativo, pulsatione arteriarum temporalium auctiori, nariumque pruritu & siccitate: Si vero ob fortiorem sanguinis impetum, præsertim in juvenili ætate & congestione in pulmonibus factam, vasorum pulmonalium orificia, quæ in asperam hiant arteriam, nimis dilatentur, tussi larga copia sanguinis ejicitur, & fit hæmoptysis. Quandocunque vero ob spasmos & dolores in hypochondriis congestio & restagnatio sanguinis in venæ portæ ramis fit, quod in hypochondriacis vel mensium & hæmorrhoidum obstructione laborantibus solemne visitur: tunc vasa splenica brevia, quæ in sinistram satis tenuem ventriculi partem hiant, aperta, cruorem in ventriculi cavum effundunt, & sic vomitus gignitur cruentus. Quando simul in intestinis tenuibus, præsertim ileo, vasorum apertio accidit, & ad alvum cruor foetidus & niger fertur, morbus ab HIPPOCRATE niger dictus efformatur. In senili ætate vel hypochondriaco vere spasmodico affectu, quando sanguis nimium urgetur ad intestina crassa, præsertim rectum, neque ob venas constrictas æquali motu revehitur: tunc vasa quæ in anum hiant & hæmorrhoidalia dicuntur, magnam sanguinis profusionem faciunt, & sic nimius fit hæmorrhoidum fluxus. Quod si autem propter obstructa hæmorrhoidalia vasa idem nifus ac impetus ad renes divertitur: tunc, ad apertis & ibi vasculis, sanguis descendit ad vesicam & cruenta fit mictio. In sexu vero sequiori, quum singulis mensibus superfluus sanguis per uteri venas exoneratur; semper spasmi circa lumbos præcedunt, atque extremæ partes refrigerantur: si vero hic nifus & spasmus internus nimius fuerit, ut majori copia, quam par est ad uterum ejusque vaginam seratur: tunc immoderatum sanguinis per uterum fit profluvium. Accidit

etiam interdum, ut, præsertim inclinante jam ætate hæmorrhoidibus suppressis, ob urgentes spasmos sanguis regurgitet, nimiaque copia adducatur ad caput, ibique tenuissima plexus choroidei vascula perumpens, sanguinis portionem in cerebrum deponat, unde oritur apoplexia sanguinea, ut plurimum funesta. In gravidis, si ob validiores stricturas sanguis nimio impetu ad uterum fertur, & hæmorrhagiam concitat; tunc fit abortio.

§. XXI.

Præterea spasmi quoque, qui sunt in abdominis visceribus, vel externis partibus, tumorum, gravativorum dolorum, præsertim in capite, causâ existunt, qui sæpe in inflammationes abire solent. Nam quando sanguis congeritur in capite, nec ibi per nares excernitur, vasa, quæ membranas, pericranium & meninges intercurrent, admodum distenduntur, qua nimia congestione & distensione vasorum vehementissimi capitis dolores multo sæpius unice pendunt. Videmus id manifesto in hypochondriacis, hysteris feminis, omnis generis febribus, & quando primæ viæ se male habent, hoc est spasimis vel flatulentis urgentur. Quod si vero ad ipsum pectus & pulmones sanguis majori, quam par est, copia influit, ibique congeritur: tunc spirandi facit difficultatem pectorisque angustiam, & fit asthma sanguineum plethoricis familiarissimum. Secedens vero humiditas si per bronchia secernitur, asthma humidum efficit. In debilioribus vero, & ubi vires penitus vacillant, nimia sanguinis congestio ægrum suffocat, qui morbus catarrhi suffocativi nomine extimescit.

§. XXII.

Sunt quoque spasmi, qui visceribus internis, præsertim abdominis, ut ventriculo, intestinis insident, frequentissimæ causæ gravissimarum palpitationum, quæ numquam non hypochondriaca & hysterica corpora, præsertim si natura frustra molitur superfluum per hæmorrhoides aut uterum sanguinem excernere, infestant. Nam identidem a nimia sanguinis ad cordis cavitates congestione plerumque accidunt. Si que sanguis viscidus ac glutinosus est, fortiterque thalamis cordis impactus hæret, polyposa concretio, perfrequens subitæ mortis causâ, generatur. Neque sine ratione syncopes crebrior causa a nimia sanguinis ad cor congestione derivanda est. Nam si sanguis v. g. a gravi terrore in corpore plethorico ad cor pellitur, idque motu ac viribus deficiens eum expellere non valet: tunc plenaria omnium actionum vitalium & animalium ad tempus fit abolitio, sensu, pulsu ac motu disparentibus. Lipothymia vero sive animi deliquium, quod levius syncope est, virium vel sanguinis defectum plerumque pro causâ agnoscit.

§. XXIII.

Ulterius spasmi quoque inæqualem lymphæ faciunt motum, sive potius serum falsum acre nimia in copia ad fauces, laryngem, asperam arteriam, nares detrudunt, unde gravedines, tusses, coryzæ, raucedines, maxime ubi dictæ partes stricturam ob intemperiem & subitam aëris mutationem patiuntur, proveniunt.

§. XXIV.

Sunt quoque aliæ adhuc tragœdiæ, quas spasmi ludunt in corpore nostro. Videlicet si illi in emunctoriis, seu locis, quæ secernere humorem utilem aut excernere inutilem debent, contingunt, saluberrimas istas secretiones & excretiones magno sani-

tatis dispendio intercipiunt. Quare alvi contumax etiam constrictio in affectibus spasmodicis hypochondriacis, in doloribus etiam & febribus familiarissima est. Sique ob graviores dolores spasmos vel febres, cutis publicum illud & universale corporis emunctorium nimis stringitur, sicca & arida fit cutis, & non modo perspiratio sed & sudoris profluvium plane impeditur. Renum glandulæ spasmō affectæ & angustatæ urinam aqueam dimittat, quod in abdominis strictionibus & dolorum ferocia sæpe accidit. Spasmo ad ureteres pertingente, difficultas mingendi seu dysuria vel etiam ischuria evadit. Lactis in mammis secretionem pro nutriendo infante, sola stritura a terrore vel validiori refrigeratione intercipere potest. Ita quoque bilis ex ductibus biliariis ad duodenum descensum solus spasmus ab iracundia, veneno vel purgante aut vomitorio fortiori assumpto præcludit, ut subito sæpe icterus generetur, qui tamen, quum ex spasmodicis habeat originem, facile quoque his evictis e medio tollitur.

§. XXV.

Longe autem truculentiores in cerebro, medulla oblongata vel spinali consistentes morbos proferunt spasmi. Si enim fortior adstrictio apprehendit tunicas, quæ cerebrum, cerebellum & medullam oblongatam investiant, fit epilepsia. Nam nimium compresso cerebro, fluidum, quod ex eo in nervos influit, maximo nisu præter rationem & voluntatem in partes musculosas quas movet infunditur. Si vero ob nimiam spasticam tensionem membranarum cerebri sanguis crassus difficilius per ejus vasa progressu fertur, timidæ & anxie fiunt cogitationes, unde melancholia. Ubi vero per cerebri membranas valde tensas & constrictas sanguis cum maximo impetu fertur & circulator tunc furor fit. Nam qualis est sanguinis motus & circulus per cerebri vasa, talis quoque est animæ actio & phantasia. A medulla vero oblongata & ad tempus constricta oritur catalepsis, ubi nihil sentiunt vel percipiunt ægri, membra vero corporis in eodem situ ac positura permanent. Et quandocunque ob meningis cerebri spasmō diutius detentus sanguis in vasis stagnat, apoplexia spasmodica, hysterica familiarissima, extimescenda est, quo casu cor pulsatur & exspiratio salva est, sine sensu vero ac motu foeminae jacent. Ulterius membranæ nerveæ, quæ auditus ossa interiorius ambiunt, spasmō tentatæ aurium faciunt tinnitum. Haud dissimili modo nervi optici, & quæ ex ipsis nascuntur membranæ spastice constrictæ vertiginem, visionem duplicatam, aliasque visus læsiones inferunt. Nervi vero sublinguales crispatura præter naturam affectu aphoniam excitant. Laryngis muscoli, & partes faucium nervosæ eodem constrictiois spastice motu affectæ metum stranguationis, præsertim hystericae injiciunt. Non minori periculo spasmus infestus est pulmonalibus membranis ac nervis, illi enim si fortissime stringantur, asthma siccum seu convulsivum fit, quod plus periculi habet, si diaphragmatis musculosæ & nervosæ partes simul affliguntur. Præterea diaphragmatis musculus vehementissime adstrictus mortis subitæ inferendæ aptus est, quod factum meminimus a vehementissima percussione cum fuste ad scrobiculum cordis.

§. XXVI.

Nulla vero pars corporis magis & vehementioribus spasticis contractionibus patet & obnoxia est, præter ventriculum & intestinorum totum canalem. Gaudet hæc partes quæ ex membranis valde sensilibus & motricibus constructæ sunt, suo motu ac

tono, qui peristalticus audit, ac in successiva & reciproca constrictione & dilatatione consistit: quo salvo non modo excretiones per alvum recte sese habent; sed etiam secretio succi chylosi ex alimentis, ejusque in vasa lactea infusio rite peragitur. Si vero hic tonus & motus penitus est destructus, innumera mala, non modo in abdominis regione sed in toto corpore nascuntur, quod patet in affectu sic dicto hypochondriaco, qui perpetuis flatulentis in primis viis coortis innumerabilium malorum faber est, sicuti id in praxi medica perspectissimum est. Atque hujus mali truculenti & familiarissimi domicilium ac sedes unice ventriculus & intestina existunt.

§. XXVII.

Alia vero spasmi deterioris species est, ubi partium musculosarum vehementiorem constrictioem fortior relaxatio excipit, unde motus localis præter voluntatem intenditur. Medici hanc passionem convulsionem adpellant, quæ si universalis est dicitur epilepsia, si vero particularis alia sortitur nomina; nam in pectore vocatur tussis, in corde palpitatio, in diaphragmate singultus, in ventriculo vomitus, in intestinis colica convulsiva, cui nimia alvi fluxio jungitur. Quando vero præter voluntatem artus cum motu intensiore nimium contrahuntur & e loco suo moventur, motus convulsivi adpellari solent. Si convulsio ad uterum transit, foetus maturus cum violentia expellitur & sic fit partus, nam partus nunquam fit sine convulsione uteri partiumque annexarum, si vero immaturus foetus fuerit, dicitur abortio.

§. XXVIII.

Circa spasmodicorum naturam hoc quoque tenendum est, quod in pathologia æque ac praxi maximum habet usum, videlicet quod spasmō partium, quas vehementius paulo exagitavit, remittente vel cessante mira debilitas & atonia earum sequatur, utpote intensiore motuum vis ipsa motrix quasi consumitur, ut deinde tono ac robori partium rite amplius præesse nequeat. Ita observamus ab epileptico insultu ingentem artuum sequi languorem atque debilitatem & ad motus obeundos impotentiam. Impetu cessante febris, sub qua pulsus magna est celeritas, intermissionis tempore languidius & tardius arteriæ pulsant. Quiescentibus tormentis & spasmodicis intestinorum tanta fit horum resolutio atque debilitas, ut flatulentia ea vehementius divexent. Dolores ac cruciatus partium atrociores tumor plerumque excipit a nimia laxitate fibrarum oriundus. Et cessantibus in hypochondriacis & hystericae spasmodicis pathematibus, pulsuum fit non modo tarditas, sed & alvi pigrities, digestionis imminutio & flatulentiarum copia. Notissimum etiam est, quomodo a perpeffo morbo, vires corporis nostri vacillent, adeo, ut non modo ventriculi & digestionis vis minuat, sed & atonia in omnibus partibus excretioni etiam vacantibus observetur. Qua de causa, qui convalescere e morbo, facile in alium, præsertim chronicum, incidunt, nisi cum cura diætæ habeant rationem & virtutem deperditam idoneis & alimentis & medicamentis restaurent.

§. XXIX.

Provolvitur jam ad tertium morborum genus, quod ex nimia fibrarum corporis relaxatione, atonia & motu solidorum imminuto derivari debet. Et quemadmodum motus omnes morborum paroxysmi & insultus febiles a motu auctiori & systole fibrarum intensiore fiunt: ita a motu inertia, fibrarum debilitate, flaccescentia, tonique remissione morborum

lentorum & chronicorum principium magis est deducendum, siquidem ab hac sanguinis & humorum stagnationes & decubitus, vasorum obstructions, viscerum indurationes, scirrhescentiæ, corruptelæ; neque minus excrementorum retentiones & fluidorum ac sanguinis impuritates maxima ex parte dependent: quæ cuncta ad gravium & chronicorum morborum generationem viam pandunt paratissimam. Etenim si ob cerebri ac nervorum debilitatem sanguinis stagnationes fiunt in capite, periculi non expertes ibi morbi progignuntur; Atque ideo, si sanguis serosus in capitis vasis stagnat, membranas molles afficiens, capitis dolor fit gravativus: & ubi in sinibus capitis osseis sanguis cum sero decumbit ac stagnat, diuturnæ cephalalgia, quæ ægre tolluntur, fiunt: sique ob stagnantem in vasis cerebri sanguinem serum secedit inque medullam spinalem descendit, paralyfis fit, quod ubi unum tantum latus occupat, siue dextrum siue sinistrum, paralyfis inde dextri vel sinistri lateris nascitur. Itemque si id in cerebri corticem effunditur juncta inflammatione, lethargus multum habens periculi, oritur; si sine febre & inflammatione serum viscidum corticem cerebri obfidet, carus fit; serositatem autem in cerebrum penetrante, tunc mentis, memoriæ & sensuum fit impotentia, quæ crebrius ab apoplectico insultu remanet. Quando vero sanguinis crassi copia ad caput a spasmis infimi ventris urgetur, isque tardius provolvitur, melancholiam siue fixas & timidas sine ratione cogitationes facit.

§. XXX.

Ubi vero intra nervorum opticorum teneras radices feri portio relinquitur, guttæ serenæ inde cunabula sunt accersenda. Nervi auditus vel membranæ, quæ hoc organon cingunt, ab humiditate admodum relaxatæ difficultatem hujus sensus adferunt; quo major autem feri est stagnatio, eo magis auditus læditur. Quando humiditas eam comprimit regionem, ubi nervi officio linguæ destinati situm suum habent, loquendi impotentia & aphonia sese exserit. Nimia vero laxitas membranarum, quæ narium squamosa ossa investiunt, odoratus vel læsionem vel plenariam abolitionem infert. Ceterum convulsiones motusque epileptici chronici identidem ad cerebri & nervorum debilitatem & inde factam feri acris viscidum secessionem suos natales referunt.

§. XXXI.

Quando pulmonum viscus nimia ex atonia laborat, ingens sanguinis & humorum fit ibi decubitus, unde tussis humida, asthma pituitosum, nimiaque viscidæ materiæ expectoratio est, stagnans vero ibidem sanguis, quando corrumpitur, tubercula, abscessus, ulcera fistulosa etiam parit, quæ pulmonum substantiam facile exedant, consumunt: & sic phthiseos morbum habemus.

§. XXXII.

Viscerum abdominis, præsertim hepatis, debilitas & vis motrix deperdita efficit, quo minus promte per venam portæ, quæ arteriæ munere defungitur & pulsu caret, sanguis circuletur, unde hepatis vasa infarciuntur & paulatim obstructions, ac indurationes proferuntur. Et cum circulus lymphæ illiusque debita secretio & excretio simul turbetur, ad cachexiam, leucophlegmatiam, hydropem & icterum fit dispositio. Simili modo, quando per lienem, qui ex meris vasculis in homine compositus est, ob ejus atoniam, non expedite cruor fertur, tunc mire hujus visceris vasa sanguine infarciuntur & in magnum tumorem lien attollitur, qui cum sensu pressorio dolorem in sinistro latere quandoque pro-

gignit. Atque adeo hoc viscere læso cachexia & scorbutus capit incrementa.

§. XXXIII.

In mesenterii & intestinorum vasis stagnans sanguis motus spasticos facile auget, a quibus postea vasa hæmorrhoidalia distenduntur & sanguinis per hæc excretiones male se habent. In phlegmaticis vero & torpidioribus sanguinis stasis in mesenterio abscessus, qui hæcticas febres post se trahunt, progignit. Pancreatis glandula facile corripitur tumore & scirrhescentia, unde succus ex pancreate descendens acidior factus acidissimam in primis viis alimentorum reddit fermentationem, quæ hypochondriaca pathemata & suscitatur & intendit, neque minus firmiores chronicorum affectuum radices ponit.

§. XXXIV.

Renum tonus deperditus & sanguinis tardior ibi progressum facit & urinam parcius secernit, quæ postea ingenti in renum tubulis mora tartarum deponens calculos conglomerat. Quod si glandulosa & vasculosa renum substantia nimis dilatata pori secretorii valde aperiuntur & sanguinis cursus lentior est, serum plus justo dimittitur, hinc urinæ fiunt largiores & diabetis morbus inde sua petit incunabula.

§. XXXV.

Neque uterus a tono deperdito est immunis, quod si enim per hoc viscus maxime vasculosum non recte procedit sanguinis circulus, sed ob læsum ejus robur, præsertim a partu & in puerperio, sanguis in vasis uteri stagnat, multa & magna mala inde nascuntur. Hinc enim enormes sanguinis profusiones, polyposæ concretiones, frequentes abortiones, sterilitas quoque & nimium feri viscidum, putridum, profluvium, exoriuntur.

§. XXXVI.

At ventriculus cum intestinis silentio minime præteriri debet, si enim ipse robore suo destituitur & cessat vis ejus expultrix, tum stagnant humores, accescunt, vappescunt, ac nauseam, ructus male olentes & dolorem gravativum creant. Ciborum quoque inde digestio minuitur, maxime omnium vero atonia, molestissimum malum, ut puta ventriculi inflationem, quæ mire torquet hypochondriacos, adfert, sique diaphragma comprimit ingentes anxietates cum spirandi angustia evadunt. Est quoque ventriculi atonia causa frequentissima nausæ & vomitionis. Intestinorum vero tonus relaxatus non recte & suo tempore excrementorum progressum promovet, sed flatulentias, quæ abdomen valide tendunt, item dolores coli & ilei, inflationes tensivas circa dextrum & sinistrum hypochondrium, nec non, si deterius malum fit, tympanitidem infelici partu excludit; Atque vacillans intestinorum tonus primo tarditatem alvi efficit, sed tamen postea nimium alvi fluxum, imo ipsam dysenteriam perfacile creat, quandoquidem mora detenti humores acriores redduntur.

§. XXXVII.

Neque glandulosa loca, si ea atonia nimiaque laxitas occupat, morbis proferendis carent. Primum enim cutis ex glandulis confitus cortex, quo subtile aqueum transpirat, si a debito tono ac robore deflectit largiorem sudorem, admodum debilitantem, producit, sicuti id videmus in viribus fractis, præsertim in hæcticis, & ubi definit febrium paroxysmus, quia perpetuo fortiolem fibrarum adstrictionem debilitas postea illarum subsequitur; in glandulis quoque subcutaneis, si ob nimiam laxitatem excrementum sudoris salsum diutius remanet, variæ cutis exul-

cerationes fiunt. Sal erodens multum viscidum secum si habet, scabies fit humida: si vero acrius & siccum fuerit, scabies sicca cum ingenti pruritu nascitur; causticæ vero indolis si fuerit peregrinum sal, in superficie herpes; si profundius insidet lepra materiam acquirit: facta in faciei glandulis erosionem cum leviori inflammatione pustulæ oriuntur & guttæ rosaceæ origo fit. Quod si vero lymphæ valde corrosiva tunicæ glandulosæ & pituitariæ infixæ, narium ipsaque ossa squamosa depascit, ulcera mali moris oriuntur; si ejusmodi feri decubitus & erosio in proflatis virorum est gonorrhœa maligna, si salia minus corrosiva fuerint benigna oritur. Haud dissimili modo in mulierum proflatis nimium relaxatis quando serum viscidum decumbit, fluor albus est, qui sero acriori factus, in lue venerea infectis deterior & mali moris fit. Testium nimia relaxatio ingentem gignit tumorem: neque minus lac in glandulis mammarum subsistens distendendo in tumores eas attollit, qui sæpius in abscessus & ulcera erodentia transeunt; si eas glandulas malignus, putridus & corrosivus humor occupat, fit cancer. Ingens quoque laxitas & debilitas est parotidibus, neque minus in bubonibus qui glandularum inguinalium sunt præternaturales tumores.

§. XXXVIII.

A nimia quoque debilitate & toni dejectione fibrarum musculosarum, tumores hinc inde in partibus, præsertim in pedibus, œdematosi generantur,

eo quod in partibus hisce a corde valde remotis lentior ac difficilior sit sanguinis per venas adscensio; si vero in universo corpore fibrarum musculosarum ingens est debilitas, ob circulum sanguinis lente admodum procedentem, fit tumor in toto corpore sive anasarca, dum nempe serum a sanguine secedens in musculorum & membranarum interstitia descendit. Sunt vero adhuc aliæ tumorum species, quæ ab extravasione sive ruptione vasorum dependent, quorum etiam pro differentia locorum differens est appellatio, nam si abdomen tumore turget ascites nominatur, in thoracis cavitate aquosus tumor si subsistit thoracis hydrops, intra cor & pericardium hydrops pericardii, in scroto hydrocele, in capite hydrocephalus, intra uteri membranas & ligamenta ejus, uteri hydrops vocatur.

§. XXXIX.

Ex his ita dictis & adductis clarissime intelligi posse arbitror, causam sic dictam primariam & formalem seu proximam morborum, qua posita ponitur effectus, in solidorum vitio ac motu turbato, quem fluidorum a regula deflectens digressio pressio sequitur pede, esse quærendam. Adeo ut ad tres classes omnia morborum genera videlicet ad pulsum & tonum auctum, ad spasmus, & motus remissionem peropportune reduci possint. Adeoque proximum jam erit, ut de causis, quæ motus hos inferre corpori potentes sint; sermonem instituamus: quod proximis B. C. D. dissertationibus faciendum promittimus ac recipimus.



DISSERTATIO

DE

MORBORUM ORTU ET CAUSIS EORUM PROXIMIS.

Primum edita Anno 1715.

§. I.



CIRCULUM sanguinis, qui à systole & diastole solidorum, nec non fluidorum convenienti quantitate ac temperie dependet, esse vitæ & sanitatis fulcimentum, eumque mutatum morborum fieri fabrum, explicitum antea fuit. Vitalis vero hic sanguinis motus, in circulum abiens, trifariam potissimum læditur, quando vel intensiori systole & diastole cordis atque articularum, celeri admodum cursu fertur, vel aucta nimis partium systole inæqualis fit circuitus, vel denique ubi nimia facta solidorum relaxatione progressio sanguinis intercipitur, & inde decubitus & stagnationes fiunt. Ad tres has classes, quæ febre, spasmis & atonia continentur, omnia internorum morborum genera retulimus. Proximum jam est, ut causas, quæ circulo sanguinis, neque minus solidorum motui, turbando & invertendo, potentes sunt, afferamus, easque paulo distinctius explicemus. Quia vero fluidorum motus maxima ex parte a solidorum motu ac impulsu, deinde quoque a fluidorum copia & temperie, & denique a vasorum seu

viarum habitudine dependet: hinc etiam triplicis generis esse morborum causas, quarum aliæ ad solidorum, aliæ ad fluidorum, reliquæ ad viarum vitium pertinent, facile intelligi potest. Quo vero solidorum actio ac motus in fluidas partes plus habet imperii: hoc magis, quæ pulsum vel tonum solidorum celeriter immutandi potentia gaudent, causis morborum proferendis efficacia sunt.

§. II.

Ex his vero, quæ celeriter pulsum & tonum mutant, & magnas mutationes ac læsiones in universo corpore efficiunt, animi pathemata principem ac primum meritissimo jure locum occupant. Permira certe, imo stupenda res est, quod perversa in animam incidens impressio vel phantasia, aut rationis expers cogitatio, sive ingens rei desiderium, tam celeriter, tamque fortiter in corpus nostrum agere possit, ut in sanissimo homine, sine cujusdam perniciosæ materiæ accessione, gravissimi morbi, vel etiam subita mors inde oboriantur, quemadmodum a vehemente & subito terrore vel validissima ira pluries factum esse, cum experientia tum auctoritas eorum, qui de hac materia notatu digna prodiderunt,

runt, comprobatur. Agunt vero inordinatæ ejusmodi commotiones proxime & primario in partes solidas, quarum pulsus ac tonum, seu systolen & diastolen, subito immutant, unde gravissimæ actionum læsiones fiunt.

§. III.

Primum vero vehementior iracundia ejus est naturæ, ut intensiorem systolen & diastolen pulsus & toni in universo corpore faciat, ut sanguinis hinc cursus citatior evadat. Quare etiam, non secus ac in febre, a vehementi iracundia pulsuum singulorum celeritas; (quæ ex eorum frequentia cognoscitur) respiratio anxiosa, calor ac æstus corporis intensior, cum rubore faciei, ac vigilia & actuum rationalium præcipitantia observatur. Ideoque ira non solum furor brevis, sed etiam febris brevis meretur salutari. Ob sanguinis itaque circulum, ab ira auctum, in plethoricis nec non in cacochymicis, & prout corpora differunt, varia mala suscitantur. Nam ira in senibus sanguine plenis, & qui infirmioris capitis sunt, frequenter, plexum choroideum aperiendo, in cerebro lethalem adfert sanguinis profusionem, quæ apoplexiæ nomine venit. Et ubi in iis, quorum venæ pravis scatent succis, materiam alienam ad summa cutis vel artuum magno impetu propellit, arthritides, erysipelata, variolæ, morbilli itemque purpura fiunt. Quibus sanguinis certis in locis evacuationes consuetæ sunt, in iis vehementior iracundia vel narium vel hæmorrhoidum aut mensium nimium profluvium, in juvenilibus corporibus quandoque hæmoptysin excitat. At, si sanguis glutinosus & tenax cum impetu ad minima vascula protrusus ibi hæreat, tum varii generis inflammationes, pro locorum differentia, suboriuntur. Ubi vero calculus vel in renibus, vel in cystide fellea latet, tunc auctiori fibrarum ac vasorum systole ira ipsum vel in ureteres vel in ductus biliosos, non sine maximo tormento, præcipitat. Maxime vero omnium ira forti constrictione bilem ex hepatis ductibus majori, quam par est, copia in duodenum protrudit, ubi vel nauseas cum oris amarore, vomitiones, anxietates, alvi quoque frequentes dejectiones, imo cholerae morbum, vel periculi plenam intestini inflammationem cum febre concitat. Tacemus, cum motus in iracundia mere febrilis sit, ipsam ad febres maxime ardentes, biliosas, tertianas, continuas, intermittentes, quæ omnes a bile impura vel oriuntur, vel foveantur, exacerbandas, paratissimam esse. Et, quos frequentes spasmi & flatulentia exercent, hypochondriaci, ab ira ingens subinde symptomatum augmentum patiuntur.

§. IV.

Ut vero in ira vehementiori sanguis, cum magno impetu, per universum corpus, non aliter ac in febre fertur, & a centro ad circumferentiam pellitur, sic alia est terroris indoles, ubi partes extremæ spasmatica strictura ad interiora cruorem pellunt, ejus circulum ac cursum plane inæqualem efficiendo; fiunt hac ratione ingentes in partibus internis congestiones & humorum metastases, gravium morborum genitrices. Atque in sanguine abundantibus senibus apoplexias si infirmum & laxius cerebrum habent, in aliis epilepsias, vertigines & convulsivos motus concitat. Ad cordis vero & pulmonum vasa compressus, anxietatum, cordis palpitationis, syncope, animi deliquii, pulsus parvi ac debilis, spirandi angustia, vel etiam catarrhi suffocativi, in dispositis hæmoptysos causa fit. Quando vero fortiori nisu ad uteri vasa urgetur, tunc cum enormi sanguinis profusione fiunt subinde abortiones. Neque minus periculi a terrore in omnibus contagiosis & malignis

morbis extimescendum est, siquidem is non solum vires prostermit, sed & sanguinem contra naturam ab ambitu ad centrum, videlicet cor & majora vasa, compellit, quo facile fit ut miasma foras expellendum, intus remaneat, & corruptionem ac sphacelationem, quæ malignitatis naturam vere absolvit, inferat. Tum terror subitus etiam ordinarias & criticas sanguinis evacuationes, ut hæmorrhoidum vel mensium sistit, & excretiones per alvum, urinam, perspirationem supprimit. Cujus rei causa est, quod hic adfectus ordinario corporis habitum nimium constringat, vasa angustando. Qua de causa a terrore facies fit pallida, vasa detumescunt, horror est in cute, unde Germanice dicitur, *ich bin so erschrocken / daß mir die Haut schauert* / pedes fiunt frigidi, contremiscunt. Quia vero, ut alibi exposuimus, vehementes spasmi partis, quam exercent, laxitatem & debilitatem relinquere consuecunt, hinc plerumque a gravi terrore partes extremæ, præsertim pedes, valde debilitantur, ut factis ibi humorum decubitu tumidi, dolentes & languentes fiant, Germani efferunt *es ist mir der Schreck in die Füße geschossen*.

§. V.

Longior vero & gravior tristitia ac metus, animique angor eos maxime morbos, qui a laxitate & atonia proficiunt, fovet atque sustentat, eo quod occulta quadam vi, vires consumit, fibrarum tonum ac robur solvit, & ita fluidorum circulum lentorem facit, quare stagnationes & decubitus humorum accidunt. Uti vero timor & ira magis acutas, celeres & præcipientes motiones facit: ita tristitia ad longas & lentas ægitudines plus disponit: & quia vires depauperat, morbis benignis facile malignitatem, quæ in sphacelosa corruptione consistit, ingenerat. At, si ventriculi & intestinorum tonum tristitia imminuit, appetitus dejicitur, & ad crebras alvi dejectiones, flatulentias, imo malum hypochondriacum via paratur. In hepate dejectus a tristitia tonus ad hydropis, in liene ad cachexia, in renibus ad calculi, in pulmonibus ad phthiseos generationem, in utero ad mensium suppressionem disponit; relaxatus vero nimium ob tristitiam corporis habitus, macilentiam, sudorem frigidum, præsertim in inferiori corporis parte inducit. Neque minus diuturnus animi angor cerebro ac generi nervorum noxius est, unde ad melancholiam, ad maniam, morbos soporosos & fortem apoplexiam disponit. Vidimus quosdam longiori tristitia affectos guttam serenam, alios mentis abalienationem, alios paralytin artuum sibi contraxisse.

§. VI.

Ceterum profundæ literarum meditationes, nocturnæ vigiliæ & inquietæ cogitationes, quemadmodum ventriculo & universo corpori robur subtrahunt: ita ad melancholiam, malum hypochondriacum, aliasque graves ægitudines aditum præparant, quod tam notum est, ut nulla egeat probatione. Immoderatus amoris affectus modo nimium motum in partibus fluidis suscitatur, modo etiam vires & robur partium resolvit ac plane dejicit, unde quasdam feminas in furorem conjicit, quasdam etiam in cachexiam seu chlorosin, tabem, & melancholiam præcipitat. Quid perversa phantasia & imaginatio in impedienda valetudine possit, hypochondriaci documento sunt, qui ob perversam impressionem agrotant, & perpetuo valetudinarii sunt. Plures viso epileptico inciderunt in epilepsiam, non pauci ex solo aspectu variolosi in eundem morbum prolabantur. Quot sunt, qui, cum ex metu solo cum peste infecto se conversatos sibi persuaderent, eam ipsam fuerunt

runt correpti. Ex quo utique potentia affectuum in lædendis corporis actionibus satis fit manifesta. Quapropter passionum animi vehementia interdum venenorum vim exsuperat, nec visitur, cum quandoque a venenis non tantum periculi, quam ex animi commotione extimescendum sit. Et profecto animus in concitandis morbis aliis fere causis prævalet, quod satis intelligimus, cum, majori solertia ortum morborum inquirendo, in accuratis morborum historiis concinnandis occupati sumus.

§. VII.

Ab animi passionibus, veluti causis immaterialibus, transitum facimus ad eas, quæ materiali magis contactu agunt, potentissime tamen, in exiliori etiam dosi, solidorum motum & tonum invertendo cito interitum vel perniciem corpori inferunt: & hæ veneni nomen sibi vindicant, quorum non alia nisi in partes solidas principalis est actio, cum vel vehementissimum spasmus vel summam atoniam universo corpori adferre consueverint.

§. VIII.

Duplicis vero generis venena dantur, alia penetranti caustico sale fibras corporis, præsertim ventriculi & intestinorum lancinando, in vehementes spasticas contractiones universum corpus conjiciunt, alia vero omne robur nervis præsertim & cerebro demunt, & motus vitales interimunt, & sulphure vaporoso naturæ inimico id præstant. Ad priorem classem spectant ex mineralibus, quæ mercuriali substantia imbuta sunt, quæ sale soluta deleteriam causticam vim acquirit: quo nomine celebria sunt mercurius sublimatus, vel quomodocunque salibus sociatus, arsenicum, cobaltum, regulus & vitrum antimonii, quæ quodammodo soluta primis in viis; septica sua vi, tunicas ventriculi & intestinorum arroddendo, lethales subinde spasmos ibi & convulsiones in diaphragmate & capite concitant. Nam probe notandum est, quod venena hæc spasmis, non vero inflammatione ventriculi, quæ tantum spasmi effectus est, interimant. Plumbum quoque salibus acidis solutum, quia spasmodyce constringit ventriculi & intestinorum membranas, non immerito venenis adnumeratur, siquidem tormina illa convulsiva & asthmata, præcordiorum artuumque paralyse ac pertinacissimæ alvi adstrictiones, quæ a fumis plumbi improvide haustis, in metallicæ rei addictis frequentissime suscitantur, hujus rei clarissimum documentum præbent.

§. IX.

Ex animantibus infecta sale acri subtilissimo caustico copioso scatent, unde exterius admota vesicas excitant, intra corpus vero sumta, mictum cruentum, stranguriam, inflammationem, dolorem, febrem, vomitum inferunt. Longe vero deterioris generis sunt ictus & morsus bestiarum, item insectorum punctiones, quando ira vel furore agitantur v. g. viperæ, canis rabidi, lupi, tarantulæ, scorpii, hæ concordi sententia auctorum & respondente experientia, venena sunt, neque aliter quam spasmis, quos vehementissimos cient, agunt, quos postea febres, convulsiones, deliria, inflammationes, excrementorum suppressiones, dolores subsequuntur.

§. X.

Ex vegetabilium censu emetica & purgantia valentiora, vel etiam alia, sale subtili caustico spasmodycas ventriculi & universi generis nervosi stricture faciunt, adeo ut majori dosi data, homines e medio

tollant. Quo numero sunt elaterium, esula, helleborus albus, euphorbium, cicuta, napellus, fungi venenati, scammonium, colocynthis, semen cataputiæ, granatillæ, gummi guttæ, quorum virulentam noxam pulchris experimentis & exemplis magni nominis WEPFERUS in *Tr. de Cicuta aquatica* nobis commonstravit.

§. XI.

Alterius vero generis venena sunt, quæ vitales motus, pulsum videlicet & tonum solidorum, extinguunt, vires & robur universi corporis minuunt, fluidorum progressum ac circulum intercipiendo, idque elemento vaporoso sulphureo naturæ inimicissimo exsequuntur; utpote vapor venenatus ad sanguinem & fluidum nerveum delatus, mox tonum & systolen vasorum, fibrarum & membranarum minuit ac sistit, quo deficiente sanguis stagnat, inque capite torporem, soporem sensuumque imminutionem affert, in ceteris vero partibus & visceribus humores ad stasim corruptivam disponit. Hujus generis venena vocari solent narcotica, seu melius putrefactiva, quia a motu fluidorum extincto sequitur eorum corruptio. Hæc in vegetabilium regno maxime sunt conspicua hujusque census sunt omnes hyoscyami, mandragoræ, strammonei seu daturæ, solani & papaveris species & ex hisce parata, quorum certe tanta vis est, ut majori dosi admixta brevi tempore hominem jugulent.

§. XII.

Nos perlustravimus ita venena κατ' ἐξοχήν sic dicta, & quæ magis nobis sunt externa, & hæc vel nimia intensione motuum sive spasmis, convulsionibus, febre aut inflammatione nos interficiunt, vel motuum imminutione aut extinctione, quam corruptio & sphacelatio in fluidis æque ac solidis partibus subsequitur, homines e medio tollunt. Prioris generis caustica, posterioris vero narcotica & putrefactiva appellantur. Etenim quia vita versatur in sanguinis & humorum progressivo motu, qui beneficio systoles & diastoles solidorum fit, & sanitas horum motuum æquilibrio ac moderatione continetur, hinc quodcunque violentissime vel nimium hos motus intendit, vel subito eos extinguunt, veneni titulum meretur, quia sanitatem æque ac vitam tollit. Prius subtilissimum causticum, alterum sulphur vaporosum & peregrinum præstat, illud spasmis & convulsione necat, hoc vero virium defectu, syncope ac putredine.

§. XIII.

Quamvis vero rarissime hæc quæ jam exposuimus, duplicis generis venena nostra corpora afficiant, nisi per imperitiam Medicorum id fiat. Tamen alia in rerum natura dantur venena similem naturam cum istis fœventia, & quorum actionem & influxum in corpus minus effugere possumus. Sunt enim alia ejusmodi generis, quæ vapore naturæ infestissimo motus vitales labefactant vel sistunt, & ita ad putredinem & corruptionem disponunt, cujus generis sunt miasmata illa & contagia in pestilentia, in febribus petechialibus & aliis malignis contagiosis morbis, quæ nihil aliud sunt, quam vapores ex infectis corporibus ad aerem delati. Etenim in omnibus morbis, qui maligni dicuntur, & contagio infesti sunt, uti quandoque variolæ, purpura, morbilli, ex putredine tenuissima mox se multiplicante nascuntur, & sphacelo ac virium defectu necant: nam subtilis ex ejusmodi corporibus exhalans vapor ejus est indolis, ut fluidas corporis partes, si eas subierit, mox ad corruptionem, solidas vero ad sphacelum disponat. Et quia naturæ nihil magis infestum est, quam putredo,

do, quæ ipsam crasin & mixtionem partium fluidarum æque ac solidarum dissolvit, hinc, quod cito corpori infert putredinem, id omnium pessimum & venenis primi generis annumerandum est. Qua de causa etiam tantus contagii pestilentialis metus est.

§. XIV.

Dantur vero adhuc alia etiam putrefactiva venena, contagio nobis infesta, sed quæ paulo lentiori gradu incedunt ac nocent, & talia existunt in morbis malignis chronicis, ut sunt lepra, lues venerea & scabies maligna, quos morbos mediante exhalatione etiam ab uno corpore in aliud transferri posse clarissimum est. Hæc ipsa identidem putredine ac corruptione humorum suas ludunt tragoedias ac symptomatum sævitiam exercent, ea tantum differentia, quod successive & paulatim partes corporis nostri solidas & fluidas corrumpant.

§. XV.

Progressum jam facimus ad alias virulenta materias & morborum causas, quæ minima nocent mole, & solida corporis nostri partiumque structuram aggrediuntur, & subinde nobis non advertentibus communicantur. Res namque notissima in re medica est, certis anni temporibus, variante cœlo & tempestate, certos in conspectum prodire morbos, qui plures simul uno tempore corripunt, hos epidemicos Græci adpellant, & ex horum numero sunt, febres fere omnis generis, maxime vero intermittentes, tertianæ continuæ & quartanæ, biliosæ ardentes, purpuratæ quoque & catharrhales, itemque variolæ, morbilli, dysenteria. Hos ex communi causa, videlicet aere, proficisci veri est simillimum, etiam si non negandum est, in corpore utique ad hos fovendos requiri dispositionem. Cujus vero materiae & indolis hoc morborum elementum sit, quod in aere vehitur, rem profundæ indaginis esse non diffiteor. Solus qualitatum excessus, ut puta nimia siccitas, caliditas, humiditas aut frigiditas ejusmodi morbis gignendis non sufficit, sed potius credibile est, materiam quandam indolis salino sulphureæ, causticæ, agilissimæ, fermentativæ certis temporibus ex variis exhalationibus per mixtionem in aereo fluido generari, quæ suscepta in corporis nostri poros, vel cum alimentis aut saliva in ventriculum descendens, pro differenti ejus natura ac modo, varie in corporis nostri fluidas & solidas partes agit, certæ speciei morbos producendo.

§. XVI.

Et nobis fermentativæ & causticæ indolis videtur hæc esse materia, quæ occurrentes prima in regione succos salivales & biliosos instar fermenti inficit ac corrumpit, qui postea in membranosis & nervosis partibus spasticas contractiones, febres, dolores, inflammationes suscitant, sique felici successu hæc inimica materia ad corporis habitum defertur, variæ nasci solent exanthemata. Quod vero ipso in aere variæ naturæ semina morbosa & materia sæpius corpori nostro infestissima progengerentur, rores & pruinae certis anni temporibus ex alto in vegetabilia delapsæ comprobant. Hæc enim ejus sunt ingenii, ut non modo sua corrodeute virtute varias maculas foliis inurant, sed & omnem fecunditatem & incrementum auferant. Præterea non novum est ex hujusmodi pruinis erucarum & insectorum varii generis subito copiam progigni, quæ exitio non modo sunt vegetabilibus, sed & effluviis suis alienis aerem inficiunt, ut animantibus fiat perniciosus. Nam res perpetuæ fere observationis est, quod, quo major

copia insectorum, quibus plantarum incrementum impeditur, in certo districtu observetur, hoc etiam major morborum proventus sit expectandus. Ex quo facile intelligi potest, pro differentia materiae peregrinae, quæ in aere gignitur; morborum quoque inde grassantium genium ac morem differre, unde raro iidem morbi, sed potius natura diversi, certis anni temporibus & constitutionibus oriri solent, neque tum in omnibus omnia conveniunt remedia.

§. XVII.

Diximus jam de venenis, quæ extrinsecus corpora adoriuntur: jam ea virulenta morborum principia accedimus, quæ intra corpus progignuntur. Hæc vero identidem duplicis generis sunt, vel enim sunt putredinosa seu corruptiva, vel sunt acria caustica: illa plus fluida, hæc vero solida & structuram partium aggrediuntur, illa corruptione & sphacelatione, hæc vero spasmus & inflammatione sunt infesta. Putredinem foetidissimam ex sanguine vel humore extravasato in corpore nostro de facili progigni, inter alia sectiones morbis chronicis defunctorum, vel qui violenta morte perempti sunt, testantur. Nil enim frequentius est, quam sanguinem, ex vasorum dissectionibus in cavitate collectum, corrumpi. In multis chronicis morbis & nominatim phthili sphacelatos & corruptos pulmones, in hydropse fere omnia abdominis viscera invenimus. Et subito interdum, vel a veneno assumpto, vel a potu frigido sanguinis cursus in viscere sistitur, ipsaque corrumpit, ut in foetidissimam abeant putrilaginem. In puerperis secunda retenta putrescit, ut foetidissima ex utero materia promanet. Quales non corruptiones in scorbuticis & gallico morbo correptis visuntur? Cancrum exulceratum intolerabilem spargere foetorem, notissimum est. Tacemus jam in majoribus viscerum vel partium abscessibus stagnantes humores, in foetidissimam corruptionem transire. Quandocunque itaque putredo in corpore est, tunc protinus grassatur in vires, pulsus fit debilis & languidus, lassitudo omnes artus occupat, virium & appetitus fit prostratio, & animus facile deficit, summa cutis diffluit sudore, somnique est absentia. Et quicumque ex his putridis morbis decedunt, hi plerumque syncope seu totali virium defectu extinguuntur. Dicit enim vix potest, quam graviter vapor ille sulphuris foetidi motus vitales extinguat, tenuissimum illud impetum faciens, quod nervos, membranas & fibras motrices incolit, sine dubio contaminando.

§. XVIII.

Sunt vero quam maxime primæ viæ, quibus ventriculus & totum intestinorum canalem cum annexis partibus comprehendimus, corruptioni humorum obnoxia, atque adeo causis morborum fabricandis aptissima, unde quoque plurimorum morborum sedem ac domicilium præbent. Nam cum diversissimæ indolis alimenta assumuntur, & dissidentis naturæ succi, fermentali agilitate donati, hinc inde ex corpore ad intestina & præcipue in duodenum influunt, non potest aliter fieri, quin si ob vacillan-tem eorum tonum longiorem moram capiunt, neque propelluntur, ipsi corrumpantur, aliud genium induendo. Qua de causa etiam non sine ratione multos morbos, præsertim febres, a corrupta bile & pituita HIPPOCRATES gravissimus autor deduxit. Et profecto omnes fere quæ intermittunt febres, item quotidianæ nonnullæ, malignæ, lentæ, putridæ, verminosæ putridum fomitem in primis viis habent, quod etiam ex oris halitu solet a solertioribus cognosci; Itemque variolas, morbillos, purpuram a corrup-

corrupto & putrido in primis viis delitescente humore foveri, extra dubium est, quare etiam leviora emetica inter horum morborum initia propere data, faciles hos morbos reddunt. Verminosa putredo pluribus benignis aliis febribus malignum quendam characterem addit, & vitæ periculum minatur. Et quod pertinet ad morbos, qui suis periodis gaudent, vel statis horis aut diebus revertuntur, illi certe secundum nostram sententiam domicilium suum potissimum primis in viis nati sunt, a corruptis ibi humoribus oriundi. Quinimo paroxysmi intermittentium maxima ex parte originem suam inde trahere videntur, nam mirifice semper post paroxysmum ab intensiori spasmo, non modo universi corporis, sed præcipue ventriculi tonus dejectus est, unde febrili calida motione biliosi & salivalis naturæ humores intemperiores redditi ibi confluunt, & ulteriori mora valde putridam acrem indolem assumunt, & sic fomitem novo paroxysmo subministrant. Maxima itaque medentis prudentia in persanandis iis morbis eo dirigi debet, ut primarum viarum ante omnia habeatur ratio, eas maxime ab excrementitiis sordibus vindicando.

§. XIX.

Neque vero tantum putridi humores, sed & acres, caustici & corrosivi ibi prognerantur. Quanta enim acrimonia illa caustica est, quæ in quibusdam hypochondriacis, in cholera vel dysenteria morbo laborantibus visitur! Annon infantum lactantium funesta symptomata, ut atrocia ventris tormina, epilepticæ convulsiones acrimoniæ suæ incunabula referunt! monstrant id faeces viridissimæ linteamina corroden-tes, quarum color a nulla alia causa quam a caustico acido cum bile remixto oritur. Hypochondriaci, quartanarii etiam, hystericae foeminae, melancholici modo ructus acidus habent, modo acidissimam evomunt pituitam, & faeces reddunt albidas rectum intestinum arrodentes.

§. XX.

Neque minus dubii est tussis stomachales, imo infantum convulsivos motus ab acidis corrosivis primarum viarum succis foveri, quin imo febres biliosas cholericas ex tenuissima biliosa caustica acrimonia primis in viis subsistente progigni & sustentari, non modo ex symptomatum sed & curandi ratione, si differendi jam locus esset, possemus comprobare.

§. XXI.

Præter hæc, quæ in corpore fabricantur venena, adhuc alia sunt recensenda, quæ magnis morbis fomitem & materiam suppeditant. Et hæc sunt excrementa, quæ alias provida natura saluti consilio amandare consuevit, si præter naturam stagnant, neque ejiciuntur, tunc enim ex facili deteriore indolem assumunt, & rursus cum sanguine a quo ejecti fuerunt, combinantur. Solet enim natura quam optime illud quod corruptum, quod putridum, quod superfluum est, quod intemperata acredine insensum tanquam noxium e corpore eliminare. Hoc si variis de causis minus contingit, excrementa hæc per moram pejora facta, dolores, flatulentias, spasmos, convulsiones, febres concitant. Ita notissimum est, quam graves passiones adstrictior alvus concitet, adeo, ut sæpe numero prima origo chronicorum, & magnorum morborum ipsi sit adscribenda. Nam si morborum, qui nos diutius torquent, historias & casus diligentius paulo annotamus, nunquam non alvum suppressam diuturnum malum vel induxisse vel in dies augere deprehendimus. Quanta enim

putrida & foetida colluvies est, quæ quotidie per sedes ejicitur? hæc ubi remanet in corpore, non poterit non & fluidorum temperiem & solidorum motum offendere, & multas turbas atque incommoda ciere. Corporis perspiratio agilissimas sordes subinde ejicit, & quo corpori plus est necessaria & salutifera, hoc plura, si suppressa fuerit, incommoda molestiasque excitat. Nonne enim gravedines, lipitudines, coryzae, destillationes, tonsillarum & palati affectus, raucedines, tussis, febres quæ catarrhis jungi solent, alvi quoque celeres fluxiones atque intestinorum tormina inde suum ortum mutuuntur? Non dicam jam, quod impedita perspiratio ad generationem multorum malignorum, & qui epidemice corpora infestare consuecunt, morborum, ut sunt variolæ, morbilli, omnis generis febres etiam cum purpura junctæ, dysenteria, arthritides, multum faciat. Consueta transpiratio repressa quot non mala in corporibus infantum profert? videmus exinde aphthas, tineam capitis, crustam lacteam, achores, favos, erysipelata, aurium & oculorum fluxiones & tonsillarum tumores concitari. Purpuram in senibus solo transpiratu impedito enatam fuisse observatione constat, quin imo scabies & alii, qui descedare solent cutem, morbi externi, faciei quoque pustulae, quæ guttae rosaceæ nomine veniunt, inde sua petunt incunabula.

§. XXII.

Longe vero deterioris generis sunt ii morbi, qui ex materia, quæ e corpore provido consilio certo tempore & ut loquuntur, cruce in morbis amandari solet, repulsa, subnascuntur. Quanta symptomatum sævitia inde sequatur, quotidiano practico exemplo edocemur. Id quod sapissime fit, si variolæ, morbilli, purpura, petechiae, erysipelata, arthritides, scabies, vel etiam sudor foetidus inguinalis vel glandularum sub axillis repellitur. Si febricitantium sudores critici vel declinante febre supervenientes alvi fluxus improvide cohibentur, tunc res periculi plenissima est. Nam ejusmodi excrementum postquam separatum a sanguine fuerit, semper pejoris indolis ipsa quiete & mora fit, sique in corpus revertitur, instar veneni in sensibiles præcipue nerveas ac membranaceas partes grassatur, easque spasmodice constringendo, gravissima in scenam producit pathemata. Igitur si fertur ad meninges, vertiginem, convulsiones, sopores, phrenitidem parit, si ad pericranium acutos capitis dolores gignit. At si diaphragmatis & pulmonis atque cordis nervos invadit, asthma convulsivum, cordis palpitationem, tremorem & syncopen profert. In ventriculo inflammationem, inflationem, singultum & anxietates progignit molestissimas, in intestinis atrocia tormina, invincibiles flatulentias, alvi pertinacissimas constrictiones vel etiam inflammationes procreat.

§. XXIII.

Sunt adhuc aliæ causæ levissimæ visæ, sed gravissimis morbis proferendis aptissimæ, & quæ magis ex accidenti veluti in corpus nostrum incidentes, illud gravissimis molestiis afficiunt, & nominatim calculi, vermes, & flatus. Concrescunt vero calculi & quidem in renibus ex tartarea urinæ materia, in cystide fellea ex bile nimis tenaci, glutinosa, in vesica ex urina duriori & sabulosa terra referta. In cavitate pelvis renalis & vesiculæ felleæ diu hædere sine omni sanitatis offensa possunt, sed quam primum per ureteres vel biliarios ductus descendunt, protinus gravissima tormenta sunt, quæ spasmodicis contractionibus universum corpus male habent, neque semper sine periculo, cum plures magnæ celebritatis viros, calculo

calculo miserrime extinctos, historiarum monumentis proditum sit. Equidem dolor ille, quem calculus ex cystide fellea progrediens, & per bilis ductus in duodenum descendens, concitat, non adeo communis est, sed si incidit atrocissimus, & qui raro a Medicis dignoscitur, sed pro cardialgia vel hepatis inflammatione, quæ interdum associatur, habetur. Is vero dolor qui a vesicæ calculo fit, fere perpetuus est, cum vesica ceu pars membranacea ejus pondere non minus ac asperitate semper exagitur. Intenditur tamen hic dolor, si genus nervosum variis ex causis v. g. ex affectu animi vel aere frigidiori plus justo tensum fuerit.

§. XXIV.

Vermes variæ figuræ & longitudinis, in pueris præsertim & otiosis, & qui alimentis dulcibus nimium indulgent, generari & intestinorum peregrinos esse hospites, res per se quidem nota est; ast symptomatum sævitia quam afferunt, non facile a vermibus prodire dijudicatur. Utpote per experientiam clarum est, nullum morbum magis Medicis imponere, quam qui a vermibus. Etenim horrendæ artuum convulsiones, corporisque stupendæ jactationes, quas diabolicis artibus incauti subinde solent adscribere, epilepsiæ, asthmata, tussis convulsivæ, mentis alienationes, aphoniæ, artuum tremores & refrigerationes, cardialgiæ, nausæ, vomitiones, abdominis inflationes, alvi fœtentes dejectiones, phlogoses, febres, fœtidi oris halitus, tormina ventris unice a vermibus in intestinis stabulantibus proficisci posse, res extra dubium posita est. Nocent vero pessima hæc animalcula non alio modo vel ratione, quam quod sensibilissimas intestinales interdum quoque ventriculi tunicas, lancinent, arrodant. Quo clarissime patet, quanta confensio universi corporis cum ventriculo & intestinis vigeat.

§. XXV.

Denique lubrici flatus, præsertim in ventriculo & intestinis incarcerati, quantas molestias, dolores, anxietates & torturas afferre possint, nemini, qui in artis operibus leviter versatus est, ignotum esse potest. Proveniunt ipsi ut plurimum ex nimia atonia seu tono dejecto ventriculi & intestinorum, post graves præcedentes harum partium dolores & spasmos, unde deficiente motu peristaltico, illi non propelluntur, sed fixissimi in flexuris præsertim intestinalibus hærent, & dum latera intestinorum vel ventriculi nimis distendunt & inflant, nervi intercostales & paris vagi, molestissime trahuntur, tenduntur, & inde intolerabiles molestiæ nascuntur, quas subinde hypochondriaci, quibus ventriculi inflatio frequens est, gravi damno experiuntur. Ex quibus omnibus deductis patet, quam gravissime nostram valetudinem lubricæ & leves causæ impedire, & corpora nostra affligere possint, quarum actio non alia, est quam quod solidas, nerveas & membranaceas partes vel nimium tendant, vellicent, vel rodant, & lancinent.

§. XXVI.

Prævisis & consideratis omnibus, quæ pertinent ad morborum ex materia virulenta, in parva quantitate maxima nocendi potentia instructa, originem, jam ad eos, qui materiam magis mole peccantem desiderant, descendendum est. Uti enim breves & acuti morbi, qui cito finiuntur, vel cito tollunt hominem ab activa & virulenta minimæ tamen molis materia magis sustentantur: ita longi, sub quibus neque sanitas in propinquo neque exitium est, co-

pia materiæ plus fovetur. Sunt vero ejusmodi, qui ex stagnatione, decubitu, infarctu, obstructione & induratione viscerum fiunt, curatu admodum difficiles, atque abundantiam vel etiam impuritatem simul sanguinis & feri pro causa materiali agnoscunt.

§. XXVII.

Morborum itaque chronicorum, qui lente fiunt & lente quoque curantur, humorum abundantia quam Græci plethoram efferunt, vel eorum impuritas, quæ nomine græco cacoehymia appellatur, potissimæ causæ sunt. Quemadmodum vero duæ hæ morborum species morbos progenerent, dispiciendum jam est. Primo loco monendum esse duco, per plethoram quatenus morborum mater sit, nos non in genere quamcunque sanguinis intelligere copiam, sed eam tantum, quæ inutilis, quæ superflua, & quæ ad sanitatem vel vitam tuendam magis noxia est. Et talis est, quæ ob nimiam copiam, fibrarum motricium, quæ in corde, arteriis & musculis sunt, robur ac vigorem & systoles potentiam resistentia nimia debilitat, sicque languidiorem sanguinis universi circulum facit. Nam quamdiu viæ sanguini capiando & vires cordis fibræque motrices huic regendo suffecerint, tunc copia minus lædit, sed tum demum, quando motus & robur partium languescit, viresque deficiunt. Ideoque plethoram, quatenus noceat & morbum inferat, Veteres non sine ratione proxime quidem ad vasa, originaliter frequentius ad vires æstimarunt. Siquidem in languidis & debilioribus superflua humorum quantitas facile increfcit, quod minus in robustioribus accidit, hinc ex sexu foeminae, & omnes qui habitudinis sunt corporis laxioris, magis idonei sunt quam robusti superfluo sanguini alendo. Uti vero a minus valente fibrarum robore seu virium magis magisque defectu plethora suam habet originem, sic hac ipsa incrementum fibrarum tonus & elater nimia resistentia ac distensione plus debilitatur, adeo ut systole cordis arteriarumque debiliori, cursus sanguinis per universum corpus languidior fiat, quare etiam plethoram ordinario languor & lassitudo universi corporis comitatur, & ex nimia vasorum distensione, spirandi difficultate, faciei rubore, pulsu magno quodammodo tamen depresso, pedumque gravitate recte nimia sanguinis redundantia dijudicatur.

§. XXVIII.

Solvit itaque nimia sanguinis abundantia tonum partium & hinc ad obstructions, decubitus, vasorum infarctus, viscerum obstructions, scirrhefcantias multum facit, & pro differentia locorum ac viscerum varia morborum genera progignit. Nam si hepatis vasis copiosior cruor insidet, tardiusque progreditur, ad icterum flavum & nigrum, ad cachexiam, hydropem, ad generationem calculorum in vesicula fellea dispositio est. In lienis vasculoso viscere subsistens superfluous sanguis, ibi ingentem facit tumorem, neque solum ad cachexiam, sed ad vomitum cruentum, morbumque nigrum & varii generis spasmos, nimium hæmorrhoidum fluxum via panditur. In renum glandulosa & vasculosa substantia si hæret sanguis, tardiusque circulatur, dispositio fit ad calculum, inflammationem, ulcus renum atque urinæ suppressionem. At si in magno illo venæ portæ vase tardius progreditur, & pancreatis glandulam successive indurat, pathemata hypochondriacis familiaria atrocia fiunt, digestionis virtus minuitur, atque alvina excretio multum turbatur.

§. XXIX.

§. XXIX.

Quod si in flexuoso illo & intricato vasorum uteri contextu sanguis nimium congeritur, ejus circulatione prompta ac libera intercepta, tunc varii proveniunt morbi; vel enim ad nimium mensium profluvium, vel ad eorum defectum occasio datur, neque sub hujusmodi sanguinis congectionibus foetus facile retinetur, & increfcit, sed frequens abortio est; si altius vitium vel obstructio adest, tristis & insuperabilis sterilitas fit; si quando ex sanguinis tardiori progressu serum secedens in muliebres prostatas descendit, molestissimum illud albidum feri oritur profluvium. In puerperis restagnans nimis sanguis ad periculosas inflammationes & febres uterinas causam dat efficacem.

§. XXX.

In vastissimo illo vitali pulmonum viscere copiose collectus sanguis, gravibus morbis proferendis idoneus est, inde enim asthmata, tussis chronica, hæmoptyses, phthises, hæctica, pulmonum ulcera, vomica, dura tubercula, quæ aperta canceri naturam æmulantur, suos natales inveniunt. Ex quo facile cuilibet apparere poterit, quam graviter omnes partes a nimia sanguinis redundantia luant, & læsiones enormes patiantur.

§. XXXI.

Verum enim vero sanguis supra modum exundans non tantum diuturnas visceribus infert læsiones; sed & in agrioribus & subtiliori sensu præditis, præsertim ætate juvenili & vegeta, vehementes suscitatur spasmos, qui cum sanguinis circulum inæqualem reddunt, variis & gravibus quoque vitiis ac morbis proferendis apti sunt. Hoc vero perpetuum est, quod quamdiu copiosus etiam sanguis per vasa libere & expedite fertur, nil creet incommodi, simul ac vero ob partis debilitatem vel nimiam copiam stagnare ac subsistere incipit, ob nimias membranarum tensiones, natura, ut sic loquar, ad fortes strictiones armatur, quæ non leves in œconomia animali inferunt turbas. Et ex hoc fundamento saluberrimæ illæ criticae sanguinis per uterum evacuationes, in viris per hæmorrhoides, certo tempore contingunt. Nam sanguis redundans, circa uteri contextum vasculosum & mesenterium quoque hærens, nervorum ibi plexus afficit, unde non modo partes affectæ, sed præcipue extremæ ob consensum stringuntur, & hac ratione magno impetu nimius ad excretionem sanguis urgetur, quod si debito tempore & per congrua loca fit, magno præsidio ac salutis est talis evacuatio, quod si vero ea non ex voto, plures ob causas, succedit, neque per congrua loca, neque debito tempore aut mensura excretio fit, vel plane intercipitur, tum sanitas valde periclitatur. Habent enim inde ortum suum pathemata illa diuturna molestissima, quæ in sic dictis hysteris, mensium suppressione laborantibus, visuntur, aut quæ contingere solent ordinario hæmorrhoidum fluxu suppresso. Nam si spasmi sanguinem urgent ad caput, isque ibi non excernitur, cephalalgia, vertigines, aurium tinnitus, phantasie turbationes, insomnia turbulenta suboriuntur; sique ad thoracem per spasmos pellitur sanguis, asthmata suffocativa, syncopæ, cordis palpitationes, præcordiorum angustia, diaphragmatis constrictiones fiunt. In ventriculi & intestinorum membranis si hæret infixus, & hæ partes vehementi spasmo afficiuntur, cardialgia, nausæ, anxietates, inquietudines, alvi pertinaces adstrictiones, ventriculi perniciosissimæ inflationes fiunt. Quo patet, quam gravibus spasmis infesta sit plethora, præsertim in sensibilibus

Frid. Hoffmanni Oper. Supplem. II.

corporibus, qui animi accedente commotione exacerbantur.

§. XXXII.

Ceterum non ineptè Veteres plethoram in puram five exquisitam & impuram five notham distinguere voluerunt. Prior fit, quando bene temperatus & gelatinosus sanguis in valis abundat; posterior dicitur, quando ipse manifesta intemperie laborat, & tunc vocari solet cacoehymia, quæ nunquam non, successu temporis, plethoræ est soboles. Impurus vero sanguis fit, quando ipse lentius progrediens spissescit, & oscula emunctoriorum, quibus alienum foras excerni debebat, obstruuntur. Prout itaque hæc impuritas varia est, ita etiam causam materialem multorum præbet affectuum.

§. XXXIII.

Primo enim impuritas hæc sanguinis, si fuerit viscida seu glutinosa, quod apparet in sanguine ex vena misso, si glutinosa quasi tunica tegitur, tunc graves viscerum fovet obstructions, ad scorbutum, cachexiam disponit. Sub tali quoque sanguine facile menses supprimuntur, & polyposa in majoribus vasis nascuntur concreta. Eiusmodi quoque sanguis inflammationes & periculosissimas febres affert. Sequitur impuritas seu cacoehymia serosa, ubi multum feri in sanguine visitur, quæ feri copia ex virium potissimum defectu & ventriculi imbecillitate, præsertim ob morbos longos aut enormes hæmorrhagias, nata, languoris, lenti caloris, tumoris pedum oedematosi, atrophie, cachexie, catarrhorum, chlorosis, paralyse, & soporis materiam & occasionem subministrat.

§. XXXIV.

Datur quoque impuritas biliosa, ubi calidis sulphureis partibus massa sanguinis & humorum onusta est. Hæc vero ad febres ardentes, inflammationes, nauseas, vomitiones, nimias alvi dejectiones, dolores, hæmorrhagias quoque, tertianam continuam ac duplicem alimentum subministrat. Quæ impuritas biliosa, si quando salium subtilium consortio fit caustica, tunc pustulas, scabiem, lepram, purpuram, cutis varias erosiones, dysenterias, choleras, ulcera & gravia scorbuticorum symptomata fovet atque sustentat.

§. XXXV.

Alia impuritas humorum salina tartarea est, quæ ex acido sale, primis in viis non infracto, cum particulis terreis & alcalicis sanguinis concreto, oriri solet. Hæc materiam calculosis concretis in renibus, in vesica tam biliaria, quam urinaria, neque minus topis in articulis subministrat. Et dolores artuum fixi, podagrici, ischiadici sæpe a tartareo elemento articulorum ligamentis impacto fiunt. Impuritas vero quæ pure acida est, in sanguine admitti non potest.

§. XXXVI.

Deterrima vero humorum est impuritas, quando non modo ipsi fuerint intemperati, sed & ad putredinem & corruptionem inclinant, & hoc modo serpit epidemium illud perniciose malum scorbuticum, quod corpora præsertim otiosa & in demissioribus locis ac circa maria degentia, & quæ diætæ duræ salis adsueta sunt, misere affligit, siquidem molestissimæ illæ exulcerationes & rosiones, scorbutico familiares, non tantum salium acredini, sed potius humorum putredinosæ corruptioni adscribi debent.

N n

§. XXXVII.

§. XXXVII.

At vero non satis est spectare intemperiem vitiosam in sanguine & humoribus, sed etiam ea consideranda, quæ succos, qui in primis sic dictis viis, utpote ventriculo & intestinis continentur, occupat. Et tametsi varii generis alimenta adsumantur, nihilominus peculiaris in prima regione visitur intemperantia. Quorundam enim ventriculis tanta aciditas insidet, ut nullo fere negotio possit extinguere, quæ omnis fere generis alimenta in acorem transeunt. Et excessivus ac corrosivus hic acor est, qui sodæ, algoris, appetitus canini, cholerae, torminum, spasmodorum, flatulentiarum & spasticae alvi constrictionis ac viridis & acidi vomitus materiam & causam subministrat. Ea vero primarum viarum intemperies, tam ab alimentis acorem habentibus fit, quam quod fermentalis ex obstructo pancreate acidior descendens succus intensiore fermentatione acidum nimium generet. Visitur quoque primis in viis crebrior intemperantia biliosa, eaque sæpius caustica, quæ identidem cardialgiae, oris amaroris, cholerae, sitis, nauseae, vomitionis biliosae, compressionis dextri hypochondrii, tussis ferinae & tam facilis promptitudinis ad iracundiam, item alvi fluxuum, caloris lenti causa est. At si nimis tenax, viscida primis viis insidet materia, infirmitas fit ventriculi, læditur digestio, fiunt ructus, in intestinis flatus, tussis fit humida & diuturna, inappetentia & dolor.

§. XXXVIII.

Consideravimus hætenus, eas morborum causas, quæ vel maxime, inque minima mole solidas partes afficiunt, gravissimas læsiones inferendo. Perspeximus quoque eam causarum morbiferarum classem, quæ in sanguinis & fluorum nimia quantitate ac intemperie continentur, & variis modis nos lædunt. Reliquum jam est, ut seorsum de aliis adhuc causis dicamus, quæ etiam vitæ insidias struunt. Hæ vero maxime ad motum & progressum sanguinis, sine quo salva & incolumis vita esse nequit, pertinent. Tales sunt stases sanguinis, quæ fiunt, quando ille coagulatur, inque vasis hæret, & ulteriori progressu caret. Fiunt exinde perniciosissimæ inflammationes in partibus membranosis, ventriculo, intestinis & meningibus. Tales vero sanguinis stases facile in sphacelum vitæ insensissimum abeunt, præsertim in infirmis atque invalidis corporibus. Ad has vero mortiferas stases referamus præter alia frigus omnibus supremum, idque variis de causis. Primo enim ipsum sanguinem protinus coagulat, ut e loco & sede sua amplius dimoveri nequeat. Deinde fibras corporis constringit, ac poros ita obstruit, ut occlusis

viis & meatibus, difficilior fiat progressio. Quo magis patet ratio, cur a frigore penetrantiori exterius admissio, præsertim in corpora motu & exercitatione calefacta, longe magis vero a potu liberaliori frigidum tantum, subitæ & graves noxæ consequantur. Certe dici vix potest, quanta damna a frigore proveniant. A potu frigido multos extinctos repente fuisse, experientia loquitur, siquidem ventriculi & intestinorum facile inflammationem & febres acutas suscipit. In visceribus, hepate, liene parit obstructions & infarctus, inde hydrops & hæctica sequitur. In pulmonibus, si sanguis sistitur in motu, phthises identidem & hæcticae profluunt, interdum subito viscera corrumpit & sphacelosa reddit, & mortem brevi tempore infert. Sicuti tale exemplum recensuimus in *Diff. de remedium benignorum abusus & noxa*.

§. XXXIX.

Præterea quantas noxas & damna inferat improvide admissum frigus, in propatulo est. In pectore a nimio frigore convulsiva asthmata, pleuritides spuria & veræ, peripneumoniae quoque fiunt. In infimo ventre tormina, colicam, ventriculi inflationem suscitatur; sique ad uterum frigoris vis penetrat, in puerperis inflammationes fiunt periculosissimæ, mensibus vel lochiis suppressis. Novimus in mulieribus, imprudenter admissio ad uterum frigore, mensium fluxum penitus fuisse cohibitum, unde gravissima postea secuta sunt mala. Non dicam jam, quomodo ad catarrhos, rheumatismos, defluxiones, gravedines, dolores pertinacissimos conferat.

§. XL.

Postremo superest, ut etiam de causa, quæ cursum & circulum sanguinis plane impedit, & vitam aufert, dicamus: quæ nempe est sanguinis polyposa concretio. Plures sæpe subito moriuntur ex polypo intra cordis venas vel auriculas subsistente, si forsan ipse ostia venarum claudit, & omne iter ac cursum sanguinis sistit. Plures etiam longi pertinacesque ex polypo sunt morbi; inde enim cordis insuperabilis palpitatio, asthmatis contumacia, hæmoptysis, peripneumonia, mensium irregularis vel etiam eorum immoderata profusio. Quæ mala a polypo in laborantibus partibus subsistente creberrime foveantur.

§. XLI.

Deductis sic morborum proximis causis, proximum erit, ut de dispositione corporum ad morbos dicamus; id vero laboris sequentibus bono cum DEO dissertationibus persequemur.

DISSERTATIO MEDICA

D E

CORPORUM DISPOSITIONE
AD MORBOS.

Primum edita Anno 1715.

§. I.



N superioribus, qua potuit fieri perspicuitate, eas morborum causas, quæ proxime solidorum impulsu ac tonum & fluidorum progressum invertunt ac turbant, persequuti sumus, insuperque ostendimus, qua ratione omnes illæ causæ, quæ gravibus morbis proferendis idoneæ sunt, primario in solidas partes agant, earum motum vel nimium augendo, ut sit in febre; vel fortiter constringendo, ut sit in spasmo; vel nimium relaxando, sicut sit in atonia. In febre circulatio per universum corpus citatior fit, in spasmo inæqualis, in atonia vero impedita existit. Nunc sequitur, ut dispiciamus, quænam requirantur ad has causas in actum deducendas, siquidem compertum est, neque graviorem animi motum, neque aerem vapore maligno refertum, neque sanguinis abundantiam aut ejus impuritatem aut transpirationem prohibitam manifesto semper lædere, aut certos morbos, nedum eosdem continuo proferre. Non vero aliunde hujus rei causa peti potest, quam quod non sufficiat causas morborum adesse; sed in corpore quoque humano talem requiri dispositionem, quæ causis hisce in effectum traducendis inserviat. Si enim unquam Philosophorum canon cujusdam momenti est, certe in explicandis rebus medicis hic quam maxime necessarius videtur, quod causæ non agant secundum modum activitatis, sed etiam receptivitatis, quæ in objecto deprehenditur. Siquidem ad effectum proferendum non tantum agens requiritur: sed & conveniens illi patiens quoddam, in quod actio instituitur, desideratur, quo deficiente omnis actio agentis est supervacanea. Et sicuti medicamenta pro differentia corporum dissidentes edunt operationes: ita etiam morbificæ causæ pro varia corporum dispositione in effectibus mirifice modificantur. Et profecto divinæ sapientiæ res est, quod ad proferendum morbum non una sufficiat causa activa, sed plures simul, ut corpus dispositum fiat ad effectum recipiendum, concurrere & conspirare debeant, alias enim hominibus perpetua fere agrotandi esset necessitas, imo innumerabilibus morbis corpus humanum esset obnoxium, quod tamen minime contingit, cum experientia comprobet, hominem sæpe per totam vitam cum paucis morbis confictari.

§. II.

Nostrium igitur jam erit, eam corporum dispositionem determinare, quæ apta sit velificandis morborum causis, quo certus morbus subnascatur. Adferimus vero hanc dispositionem ad morbos in solidorum conditione & aptitudine ad motum primario contineri; nobis hinc esse naturalem, internam & immanentem; quum vitia, quæ fluidas partes afficiunt, magis sint externa & transitoria, quæ de causa etiam sapiens antiquitas has res, quæ fluidas corporis nostri partes modificant, *non naturales* adpellavit.

§. III.

Ante omnia vero scire debet Medicus corpora humana ratione roboris & imbecillitatis mirum inter se differre, & quod imbecillia præ robustis multis & magnis vitiis obnoxia sint: quæ differentia quo majoris in pathologicis ac practicis usus est, hoc minus, quod sciam, a Medicis tacta & agitata adhuc fuit. Unicum vero ex veteribus CELSUM novimus, qui *L.I.C. II.* quæ imbecillis ad valetudinem servanda sint, insinuat. Hic gravis auctor pulchre etiam, more suo *Cap. III. l. c.* effatur: *quod omnibus morbis obnoxia maxime sit infirmitas.* Etenim in medicina fere perpetuum est, quod corpus imbecillum præ robusto promptius & facilius vitium & læsionem recipiat, sive a medicamento, sive ab animi motu aut aeris vel diætæ vitio hæc noxa subnascatur. Minimum sæpe est, quod imbecillum corpus graviter offendit, robustum vero plane non adficit. Neque ratio hujus rei a priori est difficilis; nam quod robore & potentia motus instructum est, id magis insultibus externis resistit, multoque minus a minori movendi potentia adficitur vel immutatur.

§. IV.

Operæ igitur nostræ pretium erit; si primum, quæ imbecillia dici debeant corpora & quænam ea reddant; tum quibus morbis hæc pateant, perspicimus. Quemadmodum vero in natura omnis vis & omne robur ad motus potentiam referri debet: ita etiam robustum illud corpus dicitur, quod multum potest & magna potentia motus instructum est, sicut contra imbecille & infirmum corpus dicitur, quod exiguum habet movendi potentiam sive non multum viribus valet. Merito itaque debile & imbecillum illud corpus vivum dicimus, quod non multos &

N n 2

diu

diu labores perferre potest, vel exiguam movendi alia corpora vim habet, cui cordis & arteriarum motus debilis & languidus est, neque ventriculus cum intestinis alimenta probe digerere & propellere valet.

§. V.

Quænam igitur corpora reddant imbecillia dispiendum erit. CELSUS *L.I. Cap. II.* imbecillis urbanos & omnes literarum cupidos adnumerat, eo, quod literarum disciplina, sicuti pulchre in præfatione scribit, animo quidem necessaria, sed corpori inimica sit, cum inquieta cogitatione nocturnaue vigilia literati corporum suorum robora minuant. Quibus excelsæ indolis ille CELSUS innuit: animæ fatigationes præcipue hominum corpora debilitare & ipsis robur subtrahere. Verum enimvero, id non tantum de literarum studiis, sed in genere de omnibus animi torturis & commotionibus valet, ex quibus tamen maxime diuturnus & anxius moeror tonum partium resolvit & robur universi corporis partibus suffuratur, ut non modo ventriculo & intestinis, sed & omnibus partibus sua virtus ac robur pereat. Videmus itaque longiori tristitia affectos, si ægrotant, ægrius revalescere & morbos benignos in malignos facile converti, siquidem in ejusmodi infirmis corporibus humores facile in corruptionem incidunt, solidæ vero partes sphacelationem subeunt. Ita etiam porro diuturniori tristitia imbecille redditum corpus, si juvenile est, hypochondriacis, inque feminis, hysteriis pathematibus obnoxium fit. Et cum ex longiori tristitia etiam capiti ac nervorum generi infirmitas accedat; hinc facilis est ad apoplexiam, hemiplexiam, paralyin, memoriæ abolitionem, guttam ferenam, imo melancholiam transitus. Ab intempestiva quoque tristitia appetitus perit, digestio minuitur, sudore, præsertim inferior corporis pars, quandoque frigidus diffluit.

§. VI.

Validus quoque metus & terror tam celeriter vires & motum corpori sæpe subtrahit, ut nunquam ad pristinum robur corpora redeant. In corporibus ita constitutis facile iniasmata, quæ in aere vehuntur, maligna admissionem nanciscuntur, quin imo aura frigidior vel flatus septentrionalis incidens aut fortius datum medicamentum tantas turbas concitare potest, ut eis vix ferendis corpora sufficiant.

§. VII.

Sunt adhuc aliæ causæ, quæ corpus infirmum morbisque obnoxium faciunt & inter has primas fert acuta vel diuturnior febris vel alius longior morbus, qui vires & succos consumsit. Res hæc namque perpetuæ observationis est, quod a morbo præcedente imbecille redditum corpus facillime offendatur & ad novos morbos prognerandos aptissimum sit. Si quidem ventriculus non bene ingesta digerit, unde cruditates in eo collectæ, ructus, flatulentias, anxietates & inquietudinem adferunt, corpus fit lassum & defatigatum, laboribusque sustinendis minus aptum, & quod facillime sudore perfunditur. Ejusmodi corpora, si neque in diætâ, neque in animi affectibus sibi temperant, facilis fit ad diuturnum morbum, ut cachexiam, lentam febrem, colicam spasmodicam & affectionem hypochondriacam transitus. Feminae a febre vel alio morbo debilitatæ ordinario mensium vitio laborant, unde via ad graves & multos morbos est amplissima.

§. VIII.

Sunt quoque enormes sanguinis profusiones ejus

generis, ut mire corpora alias robusta infirmant. Vidimus id plus vice simplici in feminis ab abortu, in puerperis a nimio lochiorum fluxu vel a gravi vasorum vulnere. Et nisi in tali casu exquisita victus & ventriculi ratio habeatur, mox ad periculosas stagnationes, viscerum obstructions & infarctus est aditus, inde enim cachexia cum tumore pedum œdematoso, hydrops, lenta vel hæctica febris, in hypochondriis consistentes spasmi & flatulentia prodeunt. Et ex eodem quoque fundamento ingens corpori accedere solet infirmitas ab intempestiva & liberaliori sanguinis missione præsertim in iis, quibus vitalis hujus succi est defectus. Vidimus hinc a præpostera tali venæ sectione, præsertim si protinus in auram frigidioram & septentrionalem facta fuerit secessio, febres catarrhales cum diuturna tussi, intermittentes quoque subnatas. Nullum quoque corpus est, quod tam facile epidemicis malis pateat, quam quod languidum est & virium imbecillitate laborat.

§. IX.

Sunt adhuc aliæ causæ, quæ corpora imbecillia & morbis obnoxia reddunt, & inter has merito famæ, assidua vigilia, nimius labor & corporis fatigatio ac incongruorum alimentorum adsumptio referri debent. Experimur id in dies apud illos, qui castra sequuntur, quam graves & funestas ægrotudines, si ad hiberna revertuntur, sustinere debeant. Cujus rei causa non aliunde petenda est, quam quod in ejusmodi extremæ debilitatis corporibus facile corruptio, tam in primis viis, quam in vasis, suscitari possit. Ventriculus enim eorum valde languidus, alimenta postea nimium ingesta nec digerere nec vincere & utile ab inutili separare potest: unde impuritas & corruptio pressio sequi debet pede & hinc febres catarrhales malignæ, contagiosæ, petechiales, & sic dictæ Hungaricæ, militiae addictis, præsertim inclinate autumno, sunt familiarissimæ. Neque pestis forsan aliam originem vel potius progressum habet, quam quod ob famem, quæ ut plurimum pestem antecedit, infirmiora facta corpora ad putredinem concipiendam, fovendam & vim contagii propagandam sint aptissima. Qua de causa etiam hujus mali truculentia plus in pauperes & egenos, quam in opulentiores, nisi valde timeant, grassatur, hincque nomen pestilentia accepit, ut dicatur morbus pauperum. Tandem vero & illud scire oportet, quod non solum imbecilliora corpora facilius offendantur, inque morbos incidunt, sed & gravius decumbant & difficilius a morbo vires resumant.

§. X.

Uti vero imbecillitas, quæ motuum est impotentia, corpora morbis obnoxia facit; sic contra nimia corporum sensibilitas, sive promptitudo ad anomalos suscipiendos motus, pariter corpus aptum reddit ad varia vitia. Hæc ipsa vero corporum sensibilitas non tantum ex teneritudinis aspectu, sed & ex animo ad subitos affectus, nempe impatientiam, iracundiam, tædium, anxietatem, & quod corpus tam facile ab aere, alimento vel medicamento lædatur, judicari poterit. Subtilior vero hæc nervosarum partium sensatio mihi videtur quædam imbecillitatis species: nam imbecilles, qui a natura tales sunt, vel a morbo facti, si activioris indolis fuerint aut ætate juvenes, adoritur. Et quemadmodum tam tenera & mobilis partium constitutio plerumque a parentibus ingeneratur: ita etiam per animi repetitos affectus, quibus imbecilles sunt obnoxii, acquiritur. Sunt vero maxime, ratione ætatis, juvenes; ratione habitus corporis, macilentiores; ratione sexus, feminae; ratione

temperaturæ, cholerici; ratione vitæ generis, literati & urbani; maxime vero omnium aulici naturæ ut plurimum sensibilissimæ. Neque negari potest, quin diuturniores spasmi, dolores, febres habitum quasi sensationis subtilioris partibus corporis nostri adfricent.

§. XI.

Et uti imbecilles, ita etiam valde sensibiles, facile a minimo offenduntur, quod robustiores, agrestes & operarii sine sanitatis offensa ferre possunt. Nam sensibiliora subjecta protinus ab aura paulo frigidiori, ab odore forti & insueto, ab acido adsumto, a cerevisia feculenta vel crudiori cibo mirum offenduntur & levis quoque animi motus, nausea ac fastidium plurima mox turbas, anxietates, dolores, inquietudines, spasmos, motusque febriles concitant. Neque ullum corpus spasmodicis passionibus, hypochondriacis & hystericiis, gravioribusque doloribus podagricis, arthriticis & cephalalgis patet, quam quod fibris admodum distentis & sensibilibus est præditum. Vidimus in sensibilioribus ex solo interdum auditu vel visu rei fastidiosæ nauseas, vomitiones & præcordiorum anxietates subortas. Feminae, quæ molliori sensu gaudent, ex levi terrore mensium, si fluunt, suppressionem patiuntur non sine magno fanitatis incommodo. Novimus agilioris indolis homines, qui ex iracundia leviori cordis palpitationem, artuum tremorem & refrigerationem passi sunt. Quod feminae hystericae sensibilissimæ naturæ a solo suavi odore in summas præcordiorum anxietates, ipsamque lipothymiam incidant, res est notissima. Maxime vero omnium ex imbecillitate, quæ factæ fuerunt sensibiles naturæ, ad affectus animi, iracundiam, metum aliosque maxime sunt proclives, eosque mox in promptu habent. Denique, quæ teneræ & sensibilioris sunt constitutionis ad motus convulsivos, stupendas artuum jactationes, ut vel a diabolo inductas crederes, admodum pronæ sunt. Ejusmodi quoque corpora omnes fere in aere mutationes persentiunt, adeo, ut etiam animus easdem experiatur & morbi epidemii nulla corpora plus, quam quæ sunt delicatioris sensus, adoriantur. Ejusmodi quoque naturæ facile patent doloribus arthriticis, colicis, podagricis, quos semper longe graviores experiuntur.

§. XII.

Ceterum nulla corpora, præterquam sensibilia, a medicamentis tam facile alterantur. Exigua dosis purgantis vel emetici est, quæ eos vehementer exercere potest: medicamentum calidum & spirituosum cito & celeriter ipsorum venas subit & æstum ac cephalalgiam excitat, adstringens mox claudit ipsam alvum & opiatum ingentem adfert torporem; sique hujus generis remedium durante mensium fluxu usurpatum fuerit, non modo sanguis ad caput & ventriculum gravi periculo irrui, sed ex toto etiam hujus fluxus emanatio pertimescenda est. Et profecto Medicus remediorum vires non exactius, nisi in iis, qui delicatiori sensu præditi sunt, poterit explorare.

§. XIII.

Est vero corpus humanum compluribus, ex hæreditaria quadam parentum mala constitutione, malis expositum. Stupenda res est, & quæ omnem humanum captum longissime exsuperat, quod geniti tam exquisitè parentum naturam, siue bona siue mala fuerit, æmulentur. Neque enim tantum corporis forma partiumque solidarum figura, structura ac sic dicta lineamenta, sed & quæ in animum ac men-

Frid. Hoffmanni Oper. Supplem. II.

tem incidunt, siue virtutes siue vitia fuerint, in liberos transmittuntur, ingenii quoque vires, mores, inclinationes, affectus item animi in liberos abeunt, quin imo ex pituitoso pituitosus, ex bilioso biliosus, ex sanguineo sanguineus progignitur. Et sani ac robusti parentes tales etiam liberos progenerant, qui vero natura imbecilles sunt, ejusdem naturæ quoque infantes gignunt, atque adeo multum refert, si quis longam & a morbis immunem agere velit vitam, a quibus parentibus sit prognatus. Quapropter non mirum est, si quando debilis & ex certo morbo laborans parens filium, qui ad similem morbum dispositum habeat corpus, suscipiat. At vero hoc probe notandum est, quod maxime animi inclinationes vel etiam corporis constitutio, quam pater, dum filium generat, tenuit, in ipsum demum transferantur, quod de iis affectibus, qui longo ante generationem vel etiam post eam patrem adfluxerunt, non sit intelligendum. Tametsi vero causas horum stupendorum effectuum, a quibus & quomodo prodeant, mentis nostræ acie penetrare aut adsequi nequeamus: ipsa tamen res non negari potest; cujus potius consideratio maximum in medicina habet usum atque utilitatem.

§. XIV.

Quemadmodum vero passionēs chronicas, quæ proprie a parentibus proveniunt, in duas classes distinximus, dum aliæ a spasmo, aliæ ab atonia partium proficiscuntur: ita etiam affectus, quos parentes in liberos transferunt, duplicis esse generis, cum alii a solidorum nimia strictura, alii ex earum nimia relaxatione & atonia proficiscantur, animadvertimus. Et quod pertinet ad dispositionem eorum morborum, qui ex spasmodica solidorum crispatura proveniunt, deprehendimus proclivitatem ad hæmorrhagicas excretiones admodum esse hæreditariam. Ita qui narium frequentius hæmorrhagiis adficiuntur parentes, gignunt etiam liberos ad eundem fluxum pronos. Qui ad hæmoptysin vel phthisin inclinat parens, is quoque ad idem malum filium proclivem generat. Matres, quæ primis statim annis menses habent, vel eosdem tardius experiuntur, in earum quoque filiaribus idem modus, tempus & ordo in mensem negotio observatur. Apoplexia moriuntur facile filii, si patres hac extincti fuerunt, siquidem hic morbus secundum nostram sententiam ad hæmorrhagiæ speciem, dum intra cerebrum plexus choroideus disruptus cruorem effundit, referri potest. Quod vero sanguinis tam ordinariæ, quam extraordinariæ excretionis mediante spasmo fiant, quo majori copia & impetu ad alia loca sanguis urgetur, ut vasa eo distenta aperiantur, in pathologicis a nobis satis superque ostensum fuit.

§. XV.

Epilepsiæ malum, concordī sententiā Medicorum, hæreditariis quoque morbis adnumeratur; hæc vero nihil aliud esse videtur, quam universi corporis membranarum, quæ musculos cingunt, & tendinum spasmus, a violenta duræ matris constrictione, veluti membranarum itatre, dependens.

§. XVI.

Ex omnibus vero nullus frequentior affectus in liberos descendit, quam hypochondriacus, quare nihil magis in praxi occurrit, quam quod pater hypochondriacus vel mater hysterica liberos habeant eodem morbo laborantes. Quid vero aliud est hæc passio, quam quod ventriculus & intestina, seu partes valde membranaceæ, motuque ac sensu præditæ, a naturali & moderatiore motu sic dicto peristaltico ita de-

clinent, ut mox, vel nimia atonia, quæ flatulentiarum mater est, vel validiori strictura, spasmodorum genitrice, adficientur. Omnia enim hypochondriacis vel hysteriis contingere solita pathemata, plus ex motuum & solidarum partium vitio, quam fluidorum intemperie & motu depravato deducenda veniunt.

§. XVII.

Alvi contumaci adstrictione non facile ullum pejus & frequentius malum datur, quæ individua comes & mater etiam affectionis hypochondriacæ est; hanc vero, ut plurimum ex læsione motus peristaltici & nimia intestinorum strictura proficisci, notissimum est. Diligentiori vero observatione didicimus & hunc quoque affectum hæreditarium esse, adeo, ut si mater alvi contumacia labore, liberos quoque eodem malo premi observentur.

§. XVIII.

Melancholiam, quæ sæpe post se trahit maniam, sobolem ut plurimum esse affectus hypochondriaci & spasmodici, minus dubitandum est, quin imo hunc morbum, si gravior fuerit, in ipsius cerebri membranis, vasis ac nervis suam radicem habere, veri videtur simillimum; illum vero a parentibus etiam in liberos facile transire certissimum est.

§. XIX.

Denique podagram inter principales, ex nativitate qui proveniunt, morbos posse referri notissimum est. Hanc vero non tam in feri impuritate, quam in articulorum & partium solidarum imbecillitate & ad anomalas spasticas motiones proclivitate consistere, nemo facile, qui podagræ historiam perquisitus inspexerit, in dubium revocabit, siquidem nihil frequentius est, quam quod in liberis ex prosapia podagricorum natis, etiam sub adolescentia vel juvenili ætate, jam tum atroces artuum dolores, præsertim si vino aut veneri nimium dediti fuerint, suboriantur. Neque hoc loco prætereundum est, eximiam illam, qua nonnulla corpora prædita sunt, sensibilitatem, sive ad motuum anomaliam promptitudinem a parentibus in liberos descendere & jure meritoque pravam hanc corporis dispositionem inter mala etiam hæreditaria referri posse.

§. XX.

Perspectis iis hæreditariis vitiis, quæ a spasmo fiunt, nunc ad eam hæreditariorum morborum classem properamus, quæ ex nimia imbecillitate motus sive ex nimia relaxatione & atonia partium veniunt, quales sunt, qui ex obstructione, tumore & infarctu viscerum & sanguinis atque humorum stagnatione in scenam prodeunt: & inter hos primo referimus cerebri debilitatem, quæ, si spasmi simul in primis viis fuerint, apoplexiæ, paralyfi, maniæ, melancholiæ, guttæ serenæ, quos omnes affectus novimus hæreditarios, velificatur: ita etiam nativa pulmonum debilitas ad tusses humidas & contumaces, ad apostemata, ulcera vetusta & phthisin disponit: vasa vero mesaraica & venæ portæ, si ex nativitate debito robore carent & hepatis quoque ac lienis viscus relaxatum non modo ad chronicos spasmos juvenilia præsertim corpora, senilia vero ad cachexiam, scorbutum & hydropem disponit. Calculum esse hæreditarium etiam per experientiam comprobatum fuit, nisi vero adfuerit renalis substantiæ nimia laxitas, tunc nec serum urinale ibi morari, nec tartaream calculi materiam facile deponere poterit. Hunc vero pravum renum habitum ab ipsis quoque parentibus liberis ingenerari, extra omnem dubitationem est.

§. XXI.

Uterus, qui a tono dejectus est, nec diu retinere, nec commode alere potest foetum, neque exundantem sanguinem convenienti tempore recte & ordine excludit, quædam autem vitia feminis magis esse hæreditaria, præterquam hæc ipsa, equidem non video. Id vero in genere de morbis hæreditariis tenendum est, quod & ratione ætatis maturius accedant & ratione impetus gravius invadant, neque tam facile a medicamentis expugnentur.

§. XXII.

Accedimus jam ad eam morborum dispositionem, quam singulæ ætates corpori adferunt, nam sub certis ætatibus, quibus vita hominis continetur peculiare etiam morbos pronasci non modo indubitata experientia clarum est, sed & dudum HIPPOCRATIS auctoritate confirmatum, *Sect. III. in fine aphorism.* ubi ætatum morbos recenset. Horum vero non aliud est fundamentum, quam quod solidæ partes, quæ fluida regunt ac movent, ratione motus & impulsus sub certis ætatibus magnam mutationem suscipiant, dum solidorum actio vel nimium augetur vel nimium minuitur, unde etiam ætatis morbos commode in duas classes dispescimus, quarum prior ea vitia, quæ a solidorum relaxatione seu resolutione fiunt, completitur, altera vero eos comprehendit affectus, qui a valida fibrarum tensione, strictura motuque aucto, & uno verbo, spasmo excitantur. Sciendum vero hoc loco est, quod infantilis & senilis ætas hos morbos maxime foveat, qui in partium imbecillitate, & circulo sanguinis tardiori consistunt, eo, quod sub hisce ætatibus vigor ille & tonus partium decrementum patitur, juvenilis vero & virilis ætas eos morbos habeat, quibus intensior & auctior solidarum ac fluidarum partium commotio est, quia vires in hisce ætatibus sunt magis integræ, & fibræ partium tensiores & strictiores observantur. Qua de causa facile patet ratio, quare secundum HIPPOCRATEM *Sect. III. Aph. 26.* infantibus achores capitis & tineæ, aurium ulcera, oculorum fluxiones, abdominis inflationes, tumores circa aures, tusses, lumbrici, asthmata, epilepsiæ mala sint perquam familiaria.

§. XXIII.

In senectute vero, ubi ingens fibrarum visitur debilitas & lentior sanguinis cursus ac feri excrementi tardior secessio est, secundum eundem HIPPOCRATEM *l. c. aphor. 31.* asthma, defluxio cum tussi, urinæ difficultates, articulorum dolor, nephritis, vertigo, sphacelatio, malus habitus, pruritus totius corporis, vigilia, alvi, oculorum & narium humiditas, visus hebetudo, glaucudo, auditus gravitas conspiciuntur. Præter hos vero dictos morbos senes quoque ad vesicæ calculum, mictum cruentum, difficilem hæmorrhoidum secessum, podagram, paralyfin, apoplexiam, atrophiam, peripneumoniam, marasmodum & hujus generis plura mala inclinant. Quid denique frequentius visitur, quam quod etiam levissimæ partium externarum læsiones facillime abeant in sphacelum, qui etiam sine omni externa causa funesto eventu multo sæpius senum extrema adortur. Et nullum certe ætatis tempus incommodis tantis, molestiis & morbis expositum est, præterquam ætas senilis, quæ quasi perpetuus & lentus morbus est, eo quod vigor & virtus corporis paulatim evanescere in senibus incipiat.

§. XXIV.

At vero longe alia eorum morborum est ratio, qui in adolescentibus, juvenibus & viris proferuntur.

Ibi enim adhuc magna est virium copia & fibræ ad motus admodum aptæ & pronæ sunt, unde istis ætatibus, qui a nimia strictura fibrarum fiunt morbi, creberrime accidunt. Hujus generis sunt omnes fere hæmorrhagarum species, per nares, per uterum, per hæmorrhoides, quo etiam spectant pernicioles illæ per vasa brevia ventriculi in vomitu cruento, per vasa iliaca in morbo nigro, per pulmones in hæmoptysi, quibus malis istæ ætates graviter divexari solent; sique exuperans sanguis, propter varia impedimenta, non satis valenter & sufficienter rejicitur, in capite proveniunt cephalalgia transitoria & fixa, in pectore tussis, rauces, pleuritides veræ & spuria, asthmata, dolores scapularum rheumatici, diaphragmatis molestæ constrictiones, ventriculi & coli inflationes, in parte vero corporis inferiori, si hæmorrhoidum fluxus non rite se habet, dolores lumbares, coxendicis, calculi renum, hæmorrhoides cæcæ & apertæ prodeunt, & podagræ & gonagræ initia fiunt. Sunt vero, quibus vigor inest, ætates febribus ardentibus, alvi profluviiis, cholerae, dysenteriae, phrenitidi, maniae admodum obnoxiae.

§. XXV.

Notandum vero circa morbos ætatum est, quod in infantibus caput, in juvenili & virili ætate media corporis regio, in senectute vero abdomen magis affligatur ibique sedem suam fixam ut plurimum ægritudines habeant. Neque hæc res ratione destituitur. Nam in prima ætate multum feri & sanguinis adfluere debet ad capitis crassitiem & magnitudinem perficiendam, in juvenili vero & virili corpore, propter cordis & arteriarum vigorem, maxima fit sanguinis ad pulmones & per universi corporis canales pressio, unde etiam febres, dolores & spasmi ipsis sunt familiariores: in senibus vero, ob vigorem perditum, sanguis non modo per pedes, sed & in ramis venæ portæ per hepar tardius progreditur, unde ejus stagnationes & decubitus in abdominis visceribus inque vasis, præsertim hæmorrhoidalibus, fiunt, quæ amplissimam multis & magnis morbis causam & occasionem subministrant.

§. XXVI.

Neque vero prætereundum hoc loco esse arbitror, quod circa annos climactericos, qui septenario numero continentur, certa quandoque ad morbos fiat dispositio, siquidem eorum annorum potentia in corpus nostrum, non infimæ considerationis esse debet. Tantum vero abest, ut numerorum viribus hunc effectum adscribamus, ut potius ad ipsas ætates, quæ septimo anno incidunt & mutari solent, referri debeat. Et ut res clarius fiat exemplo: circa septimum annum dentes in infantibus decidunt & novi progerminare incipiunt; circa decimum quartum annum in feminis menstruus sanguinis fluxus incipit & mammae turgidulae fiunt, qui fluxus anno quinquagesimo iterum cessat, ab anno vero decimo quarto ad vigesimum primum solidæ partes suam extensionem & magnitudinem accipiunt; circa annum vero sexagesimum tertium, qui magnus dicitur climactericus, virium notabile fit decrementum, excretiones minuuntur, unde sanguis præter naturam incrementum, & ita ex morbose plethora apoplexia, cachexia, hydrops, peripneumonia facile incidunt vitamque tollunt. Hinc etiam accidit, ut, si post annum decimum quartum non recte menses procedant, virgines varia incommoda circa ventriculum & pectus sentiant & malum habitum corpori contrahant. Et quibusnam malis non expositæ sunt feminae ab anno quinquagesimo; ob mensium defectus, magnas abdominis visceribus ac toti corpori inferentes molestias?

Nam quoniam divina sapientia providenti consilio rerum corporearum indolem ac œconomiam sub certo tempore & numero temporis voluit administrari: hinc quoque corpus nostrum, imo animus ac ingenium, sub certis temporibus successive & augetur ac perfectionem suam acquirit & rursus quoque decrescit ac imminuitur, qua de re fusius in *Dissertatione de annorum climactericorum rationali explicatione* egimus.

§. XXVII.

Neque sexus a morbis immunis est, siquidem & feminas & viros suos proprios habere morbos, unice ex dispositione solidarum partium provenientes, experientia comprobatum habemus. Multum enim feminae & viri ratione habitus corporis differunt, differunt quoque ratione partium genitalium, secundum quas uterque sexus peculiares passiones exeritur. Feminarum corpora ordinarie carne laxa, spongiosa & porosa prædita sunt, vasa habent copiosa, sed exilia, fibræ motrices tam carneæ, quam membranaceæ magis sunt teneræ, subtiles, quam in ipsis viris, ubi solidæ partes majorem densitatem, magnitudinem & robur habent, vasa sunt majora & habitus corporis strictior, feminae igitur ob hanc laxiorem solidorum structuram sanguinis & humorum generationi, inque venis majori, quam par est, accumulationi sunt aptæ, quare post annum decimum quartum constanter fiunt plethoricæ. Gaudent enim cursu sanguinis placido & moderato calore, qui gelatinosum sanguinis succum non consumit, quemadmodum in viris non accidit, quibus citior sanguinis motus, intensior calor & excretio largior est, nisi itaque provida naturæ consilio inutilis & superfluous sanguis e corpore singulis mensibus ejiceretur, vel in foetus nutrimentum cederet, perpetuo fere ut ægrotarent necessarium esset, sicuti etiam illud accidit mensium negotio non rite succedente. Sanguis enim redundans & stagnatione in visceribus hærens & habitum & colorem corporis mutat, atque lassitudinem & languorem omnibus partibus infert, pedum identidem facit tumorem, appetitum prostermit, necessarias excretiones minuit. In iis vero, quæ sensibilibus indolis sunt, membranas ad spasmodicas stricturas; quin imo ad convulsiones, sollicitat, unde sanguis, inæquali itinere cum impetu ad hæc vel illa loca protrusus, symptomata concitat, nam in capite cephalæam, tumores capitis erysipelaceos, odontalgias, vertiginem, melancholiam, producit, animumque maxime timidum & anxium reddit, in regione cordis palpitationem, lipothymiam, asthma spasmodicum & strangulans, quandoque etiam hæmoptysin adfert, in superiori abdominis regione diaphragmatis constrictiones, cardialgias, nauseas, ventriculi inflationes, ructus, vomitiones etiam cruentas excitat. In inferiori vero abdominis parte dolor dorsi, inflatio hypochondriorum, tormina ventris, pertinax adstrictio, inflatio abdominis producuntur; in ipso utero & partibus ipsi vicinis causa est interdum nimia sanguinis effusionis, fluoris albi, uteri exulcerationis, venarum hæmorrhoidalium tumoris. At si ipse spasmus principium vel partem spinalis medullæ occupat, convulsivæ artuum tractationes conspiciuntur. Tantas tragedias in corpore sensibiliore abundans sanguis, præsertim ubi genus nervorum & membranarum læsum vel primarum viarum tonus destructus fuerit, proritate potest.

§. XXVIII.

Deinceps complures sexus sequior peculiares ægritudines, quibus viri non expositi sunt, ob uterum patitur. Ita fluor albus, abortus, uteri prolapsus,

ejus inflammatio, exulceratio, furor quoque uterinus in sexum virilem prorsus non incidit & cum feminæ præ viris humidioris sint naturæ, hinc morbis etiam putridis, & qui ex feri abundantia & stagnatione fiunt, plus sunt obnoxia. Igitur in peste & petechialibus febribus majorem numerum feminarum, quam virorum sublatum fuisse, auctorum, qui de peste scripserunt, monumentis proditum est. Feminæ quoque ad lumbricos vermesque generandos sunt viris procliviores. Incidunt porro feminæ in pedum & abdominis tumores inque cachexiam, in rheumatismos & catarrhales defluxiones, glandularumque tumores longe facilius quam viri.

§. XXIX.

Quia vero in sexu nobiliori fibræ sunt robustiores & membranarum nervearum major tensio, hinc a celeriori sanguinis cursu ad morbos præcipientes celeres & acutos plus viri quam feminæ expositi sunt. Quare frequentiores ipsis sunt narium hæmorrhagiæ, hæmoptyses, hæmorrhoides nimium fluentes, febres ardentes, biliosæ, tertianæ continuæ, imo intermittentes, arthritides, podagra, pleuritides, peripneumoniæ, phrenitides, angina, ventriculi & intestinorum inflammationes, mania, apoplexiæ. Præter hæc viri semper dolores acerbiores in colica, in calculo, in arthritide, in odontalgia patiuntur & cruentæ vomitiones, convulsiones quoque ac epilepsiæ huic sexui magis sunt funestæ.

§. XXX.

Multum quoque ad morborum dispositionem corporum habitus contribuit, per quem solidarum partium structuram, maxime vero earum, quæ motibus vacant, intelligimus. Aut enim vasa sunt nimis ampla, aut sunt nimis angusta, aut fibræ sunt nimis densæ, crassæ aut nimis teneræ, subtiles, aut ipsæ tam carneæ, quam membranaceæ sunt nimis constrictæ aut nimium relaxatæ, unde caro vel nimis flaccida, spongiosa & porosa, vel nimis stricta, compressa duraque redditur. Qui habitu corporis laxiori præditi sunt & vasa copiosa ac exilia obtinent, illi ex morbis acutis, putridis, & ubi sphacelatio pertimescenda est, facile laborant, tumque periculose decumbunt; febribus quoque catarrhalibus, petechialibus, quotidianæ, intermittenti & continuæ, catarrhis, coryzæ, diarrhœis, rheumatismis admodum patent. In his quoque facile generantur apostemata, quæ febres lentæ & hecticæ consequuntur.

§. XXXI.

Ex chronicorum numero spongiosa corpora morbos, qui ex obstructione viscerum & humorum stagnatione fiunt, promptissime experiuntur, quales sunt pedum oedemata, cachexia, hydrops, scorbutus, tumores glandularum strumosi, ulcera, scabies humida, hæmorrhoides cœcæ, tonsillarum tumores. Et quoniam cursus sanguinis in hisce corporibus ordinario lentior est, hinc quoque ad omnis generis hæmorrhagias &, quæ ex istis suppressis sequuntur, pathemata inclinant, calculis itidem, tam renum quam vesicæ, plus sunt obnoxii propter renum tonum relaxatum & vasa emulgentia & secretoria a pinguedine pressa, difficilius quoque per ureteres angustiores & pinguedine tectos calculus pertransit, sævissimos dolores creando. Quod vero maximum est, in ejusmodi corporibus sanguis & humores perquam facile in polyposas concretiones abeunt. Hæc vero quam graves & contumaces chronicas passiones pariant, & subitæ morti frequentissime causam subministrant, ex attenta anatome defunctorum discimus. Quapropter non sine ratione & experientia HIPPO-

CRATES *Secl. II. aph. 44.* crassos admodum citius mori, quam graciles, & difficilius quoque ex morbo revalescere prodidit.

§. XXXII.

Ubi vero corpus magis est strictum ac gracile, ibi tabes, dejectiones, defillationes, laterum dolores, phthises, pleuritides, rheumatismi magis fatigant, præsertim si propter defectum pinguedinis frigidus aer ad nervosas partes facilius penetrare & fluidas coagulare inque motu sistere potest. In quibus autem vasa sunt ampliora, ibi hæmorrhagiæ fiunt enormiores, & ob id non carere solent periculo. Igitur macilentæ & amplis vasibus quæ gaudent feminæ incredibilem sanguinis copiam sæpenumero in abortu, in puerperio, item in mensium fluxu profunderè consuecunt, cum magna corporis imbecillitate, quæ dein ad morbos, quos supra explicuimus, aditum præparat. Viri, qui capaciora & magna obtinent vasa, si sanguis nec a natura nec per artem emittitur, in juventute vehementes hæmoptyses, in provectiori ætate largam sanguinis per sedis venas profusionem patiuntur, sique forsitan ejus consueta & solennis vacuatio intercepta fuerit, viscerum læsione vel internis spasmodis concurrentibus, tunc vasa ventriculi brevia aperta vel in intestino ileo venæ sanguine turgidæ ruptæ, ingentem ejus quantitatem, non sine vitæ discrimine, in stomachi vel intestinorum cavum effundunt, quem cruorem veteres, propter colorem, nigræ bilis nomine insigniverunt. Observavimus quoque, quod ii, qui majoribus instructi sunt vasibus, ad vomitus, nauseas, febres ardentes, biliosas, cholericas, tertianas duplices ac continuas, item ictericam, procliviores sint, nullam, ut videtur, aliam ob causam, quam quod sub tali corporis habitu citatior sanguinis cursus & circuitus celebretur, unde ob auctiorem calorem major bilis copia generatur, quæ etiam ob poros & ductus secretorios hepatis tunc ampliores magna in quantitate ibidem secernitur. Solent quoque, qui strictioris sunt habitudinis, in iracundiam, illi vero, qui spongiosam carnem habent, in timorem, terrorem & tristitiam valde proni esse.

§. XXXIII.

Magnam quoque esse temperamentorum vim atque potentiam in producendis morbis, cum experientia ostendit, tum veterum Medicorum constanti sententia corroboratur. Corporum esse humanorum magnam differentiam, ut unum præ altero ad hos aut illos morbos magis sit dispositum, ex temperamentorum doctrina olim fuit deductum; quid vero antiquiores speciatim per temperamentum intellexerint, non adeo clare ad veritatem explicitum fuit, neque enim ullo modo ille humorum quaternio huic rei explicandæ conveniens erat. Recentiorum vero chymica elementa, ut sulphur, sal, terra & aqua, utut ad sanguinis constitutionem faciant, minime tamen temperamentorum ratio exinde petenda est. Vehementer enim ii errant, qui temperamentorum seu variarum constitutionum diversitatem in fluidorum natura, habitudine & proportionem quærunt, eo, quod hæc pro ingestorum modo continuis mutationibus pateant, sed potius ex solidorum structura & promptitudine ad motum temperamentorum diversitas explicanda est. Nam sicuti motus, in universo inque corporibus animantium, omnium functionum & effectuum præcipua est causa: ita etiam solidorum motus & fluorum circuitus ac progressio, quam Veteres ignorabant, efficit, ut unus homo ab altero, ratione actionum & animi & corporis & morum quoque multum differat. Et quemadmodum omnis motus sive solidorum sive fluidorum fuerit, vel celer vel

§. XXXVI.

Cholerici, ob celeriores in solidorum & membranarum systemate motum, iracundia facile exagitantur, quæ postea illa mala, quæ hanc consequi solent, excludit. Ceterum febres ardentes, tertianæ simplices & continuæ, cholericæ & omnes inflammatoriæ, dysentericæ quoque, item diarrhœæ biliosæ, phrenitides, pleuritides, arthritides, cholericæ temperaturæ homines admodum fatigare consuecunt.

§. XXXVII.

Melancholici vero, & quibus sanguinis copia adest, sanguineo-melancholici ad infarctum viscerum, hepatis, lienis, pancreatis, inclinant. Præterea ad cachexiam, scorbutum, malum hypochondriacum, quartanam, mala erysipelacea, cancrum, lepram, scabiem siccam, arthritidem fixam, calculum, malum ischiadicum, appetitum caninum, alvi obstructions, corpora habent disposita atque parata.

§. XXXVIII.

Deterior vero temperatura est phlegmaticorum, qui ob fibrarum inertiam & languidiorem sanguinis progressum tardas habent excretiones, & hinc plures cruditates & humiditates accumulantes. Qua de causa morbis putridis, etiam contagiosis, pestilentibus ac petechialibus febribus aliisque malignis patent. Præter hæc in catarrhales defluxiones, tussis humidas, raucedinem, tonsillarum & glandularum tumores, crebras alvi dejectiones, lienterias, fluorem album, gonorrhœas, procidentiam ani, uteri, & catarrhos suffocativos, affectus soporosos, tumores pedum œdematosos, hydropem, paralyin, ulcera foetida manantia quam prompte ac facile incidunt. Febres vero lentæ, quotidianæ continuæ & intermittentes, catarrhales, lentæ ipsis familiariores sunt. Quando phlegmatici & melancholici scorbutum vel lue venerea tanguntur, pessima adhuc fiunt symptomata, cum longe lateque putredo serpere & contagio suo vicinas partes contaminare soleat.

§. XXXIX.

Ultimum jam est, ut de validissima consuetudinis efficacia, quatenus corpora nostra ad morbos disponat, agamus. Per consuetudinem nihil aliud intelligimus, quam singularem in partibus solidis ad certos motus promptitudinem, repetitis actibus acquisitam. Equidem tanta vis est consuetudinis, ut non tantum ad corpus ejusque actiones, sed ad ingenii animique facultates & ad morales actiones sese extendat, adeo, ut educationis, imo eruditionis fundamentum in nulla alia re, quam in adsuetudine, impressione & promptitudine ad agendum consistat. Quod notabile argumentum hac vice excutere nostri non erit instituti, sed potius labor noster unice in eo erit defixus, ut, quid in morbis proferendis consuetudo valeat & possit, perspiciamus. Illud vero maximopere interest scire, quod etiam consuetudo ad certa tempora sese extendat, adeo, ut eo tempore, quo certus motus vel actio in corpore nostro prodierit, redeunte, protinus ipse motus vel actus repetatur, quemadmodum id luculentissime patet, cum si quis certa hora cibum sumat aut somnum capere aut evigilare consueverit, ad eam hora revertente, valida edendi cupiditas ciat aut somnolentia vel excitatio ex somno pater omnem voluntatem atque opinionem oboritur. Hanc adsuetudinem quoque in excretionibus, si quis certo tempore urinam vel alvum deposuerit, multum valere, ut ipsa hora accedente ad deponenda hæc excrementa stimuletur,

vel tardus ratione temporis & virium intensioris est, vel magnus aut debilis ratione virtutis moventis & massæ movendæ existit: ita etiam ex his motuum speciebus Veterum quatuor temperamenta explicare ac definire possumus: quodsi enim systole cordis & arteriarum celerior est, adeoque sanguinis velox per venas cursus fit, tunc temperamentum dicitur cholericum. At si is motus paulo validior est, ut magnam sanguinis massam expedite & celeriter per vasa circumvolvere possit, tum temperamentum cholerico-sanguineum oritur. Pulsu vero cordis & arteriarum tardiori existente, sanguis segniori itinere per venas volvitur & sic nascitur melancholicum; si vero huic tarditati pulsus magnitudo juncta fuerit, quod fit si sanguis copiosus sit, tametsi tardiori motu circumagatur, exurgit temperamentum, quod sanguineo-melancholicum dicitur. Quando vero motus tardus & debilis tam solidarum quam fluidarum est, temperamentum nascitur phlegmaticum. Ubi vero, nec celeriter, nec tarde, sed moderatiori motu vitalis liquor libere & placido cursu per venas fertur, temperamentum sanguineum exurgit, quod omnium optimum censetur. Quod vero temperamentorum diversitas ex solidorum natura & motus indole deducenda sit, vel id documento esse potest, quod ratione ætatis vel etiam vitæ generis admodum temperamenta mutantur. Et quia in infantibus languida & debilis est humorum progressio: hinc actiones in ipsis sunt phlegmaticorum, in adolescentibus ob auctiorem & moderatiorem sanguinis cursum actiones sanguineorum, in juvenili & virili ætate cholericorum, in senibus melancholicorum similes conspiciuntur. Atque hæc est causa quare mores, qui temperamentum hominis sive potius sanguinis cursum & solidorum impulsus sequuntur, secundum ætates mire soleant variare.

§. XXXIV.

Differens hic solidorum in temperamentis motus atque impulsus, non tantummodo singularem ad morbos dispositionem producit, sed & humorum indolem valde immutat: nam in temperamento sanguineo sanguis est temperatus, & valde gelatinosus: in melancholico crassus & terrestris: in cholerico valde tenuis, fluidus, sulphureus: in phlegmatico aquosus & mucidus. Sicut enim intensior motus ob calorem omnia corpora subtilizat, eaque tenuia & sulphurea reddit, ita languidior & tardior motus humores crassos, fixos, inertes & terrestres relinquit.

§. XXXV.

Sequitur jam ut ad quosnam morbos quodvis temperamentum disponat, dispiciamus. Adferimus itaque sanguineos & sanguineo-cholicos ob sanguinis, quam producant, abundantiam, facile in plethoram incidere, & hinc iis passionibus obnoxios esset, quæ a plethora suam originem mutuuntur. Ex quo numero sunt omnes hæmorrhagarum species & morbi, qui harum salutes excretiones suppressas consequuntur. In adolescentia igitur ad narium fluxum proni sunt, quo cohibito cephalalgia, ophthalmia quoque, aurium tinnitus, tumores capitis & glandularum colli infestant: adultiores facti si fuerint, ad hæmorrhoides inclinant, quarum fluxus ubi minus rite succedit, astma, arthritidem, podagram, colicam convulsivam, pathemata spastica & flatulenta circa hypochondria producit. Tum sanguinei in polyposas concretiones, in febres synochas, in apostemata, feminæ in abortus proniores sunt.

muletur, animadvertimus. Mensium certa lunæ phasi per uterum excretio si contingat eadem revertente natura idem negotium excretionis rursus suscipit. Novimus quoque sub certis anni temporibus & hæmoptyses & hæmorrhoidales fluxus quosdam graviter fatigasse. Idem fit in insultibus apoplecticis & paralyticis, qui si semel invadunt, sæpius revertuntur: apoplexiam vero hæmorrhagiæ internæ speciem esse, a nobis diu ostensum fuit. Qui adfuerunt certo anni tempore sanguineis missionibus ac scarificationibus, eodem quoque tempore accedente iis omiſſis magna incommoda patiuntur.

§. XL.

Impetus febrium intermittentium certis & stasis diebus ac horis invadere, in praxi perquam notum est, neque dubitandum, quin multo sæpius a materiæ febrilis certa proportione & activitate, tanquam causa, proficiantur, nihilominus tamen causis etiam subjugatis consueto invasionis tempore motus febriles denuo fieri, certissimum est. Cui phænomeno non aliam possumus assignare causam, quam fibrarum ab spasmos febriles promptitudinem.

§. XLI.

Permagna quoque consuetudini vis inest in ciendis doloribus, si quis semel vel iterum ventris tormina expertus vel gravem cephalalgiam passus fuerit, tunc levi data causa eadem dolorum atrocitas recurrit. Quod vero in hypochondriacis & morbo hysterico affectis a leviori diætæ vitio, aura frigidio-

re, animi motu, acido vel flatulento cibo adsumto protinus tanta dolorum & spasmodorum vehementia corpus affligat; id non tam istis causis, quam promptitudini membranacearum & nervosarum partium ad hos præternaturales motus subeundos, adscribendum est. Epilepsiam & motus artuum convulsivos stasis temporibus & lunæ phasibus respondere, non novum est, quod partim ad promptitudinem solidarum partium ad hos motus, partim etiam ad materiæ subtilioris, quæ certis temporibus influit, agitationem referendum esse existimaverim. Feminae, si semel vel iterum abortum passæ fuerint, in hunc postea ex facili causa pronissimæ sunt: ubi animus semel & iterum terrore & ira validissime corripitur, tunc paratissima ad eosdem effectus ex facillima causa oritur dispositio.

§. XLII.

Ex quibus omnibus perspicue apparet, consuetudinem potentiam suam in motu sive habitudine ad motum partium solidarum habere & ad morbos & paroxysmos, qui ex spasmodis fiunt, multum facere. Hanc vero consuetudinis in proferendis morbis efficaciam quemvis sagaciorum Medicorum & scire & sedulo observare oportet, cum ad iudicium de morborum eventu formandum, neque minus ad curationem, maximi momenti sit, tametsi, unde illa dependeat vel quomodo fiat & qua ratione, certo tempore revertente, ipsa sese exserat, exactius ob intellectus nostri imbecillitatem, qui in minimis maxime hallucinatur, id penetrare non valeamus.



DISSERTATIO MEDICA

D E

AERIS INTEMPERIE
MULTORUM MORBORUM CAUSA.

Primum editum anno 1715.

§. I.



ACTENUS eas causas, quæ motuum vitalium œconomiam in corpore nostro directe & vehementer turbare ac morbos proferre valent, in conspectum adduximus, neque minus, quomodo corpus ad hasce causas in actum descendas dispositum esse debeat, ostendimus. Proximum jam erit, ut de iis causis, quæ nobis externæ sunt, sine quibus tamen nec vita, nec sanitas consistere potest, quomodo corpus nostrum morbis obnoxium reddant, agamus. Hæ causæ a veteribus Medicis non naturales adpellatæ sunt, quia ad naturam corporis non spectant, nec immanentes sunt, sicuti temperamentum, habitus corporis, congenita partium dispositio, quas naturales vocabant: sed externæ & mutabiles, a quibus nihilo-

minus & vita & sanitas & morbus & mors, ipsaque curatio morborum dependet. Inter has vero principem aer & alimenta locum sibi vendicant. Corpus videlicet nostrum nec salvum nec integrum sine aere, cibo & potu esse potest, ut potius sub horum perpetuis ingestionibus & egestionibus vigeat ac sustentetur. Aeris tanta corporibus animantium necessitas existit, ut non multo tempore illo carere, sed interire animal debeat, quemadmodum id pulchris exemplis beneficio antliæ pneumaticæ ad oculum manifestum fit, dum pro nostro arbitrio, addendo vel subtrahendo aerem, animantibus vel vitam demere vel eam largiri possumus. Neque ullum animal sine alimentis diu vivere posse tam clarum est, ut nulla egeat probatione. Aer enim & alimenta ejus naturæ ac indolis sunt, ut non tantum corpus nutrant, sed & robur ac viam motricem partibus solidis & fluidis, quæ circumagi, & vitalem circulum conficere debent,

bent, materiam subministrant. Maxime omnium vero fluidum illud catholicum aereo-athereo-elasticum elementum vires corporis nostri sustentat, & secundum HIPPOCRATEM *Lib. de morb. sacro* sensum & motum præstat partibus; & spirituum ac virium, ut AVICENNA loquitur, pabulum, & præcipuum movens ac agens corporis nostri est. Et, si quod res est eloqui velimus, aer illius calidi, quod HIPPOCRATES *libro de principiis* dicit immortale, quod videt, audit, quod omnia percipit, hoc est animæ, quæ movet & sentit, vehiculum est, & *lib. de dieta* ignis omnia per omnia movens dicitur, siquidem aer elementum quoddam longe subtilissimum, mobilissimum quod πνεύμα, vel ætherem veteres adpellabant, secum gerit, quod caloris, spiritusascentiæ, fecunditatis, virtutis motricis in corporibus animantium causa ac fons est. Etenim quod ex aere quidpiam in vita corporis nostri & animi vigoris secedat, vel id documento esse potest, quod aere sereno & puro existente & corpore & animo rectius valeamus. Et vulgus hoc non ignorat cum cœlo libero & sereno alacriorem sentire animam, & languore mentis ac tristitia cum obscuro & nubilo aere se premi queruntur. Et quandocunque in aere sereno & rusticano versamur, protinus vis & robur universo accedit corpori, appetitus augetur, pulsatio arteriarum est expeditior. Cœli mutationem inter præsentissima ad recuperandam sanitatem in gravissimis & rebellibus chronicis passionibus auxilia esse referendam cum HIPPOCRATIS auctoritate, tum experientia optima rerum magistra edocemur. Aliud enim cœlum fere universi corporis naturam immutat. Ingens illa populorum diversitas ratione roboris corporis, morum, quin imo dispositionis ad morbos, non aliunde petenda est, quam potissimum ab aere, qui ratione tenuitatis, elasticitatis, densitatis, caloris & frigoris, pro diverso regionum situ, mirifice variat, & non tantum in vegetabilibus eorumque fecunditate, sed & in omnium animantium genere corporum diversitatem producit. Quodsi itaque aer temperatus ac purus, subtiliori calido aethereo elemento imbutus, præcipuum vitæ & sanitatis fomentum est; atque tonum, motum, robur & pulsum solidorum moderatur & fluidorum quoque crasim ac temperiem constituit, quidni aer immutatus, intemperatus & præter naturam constitutus corpus nostrum afficere, alterare & multis morbis proferendis idonea causa existere poterit? Non sine ratione itaque scribit HIPPOCRATES *Lib. de flatibus* §. 6. aer mortalibus vitæ & morborum ægrotis solus est auctor; & *Lib. de nat. hum.* §. 18. inquit: morbi partim ex diætiis, partim ex aere, quem inspirando trahimus, fiunt. Nostrium itaque hoc loco erit, quas mutationes & dispositiones ad morbos aer varie constitutus corporibus humanis possit inferre & quod plurimorum morborum causa existat, paulo majori cum cura explicare.

§. II.

Ex omnibus vero, quæ corpus nostrum afficiunt, inque illud influxum habent, nihil magis ad morborum generationem & statum præter naturam conferre posse, præterquam aerem, huius satis luculento documento esse poterit, quod non modo quatuor anni tempora, sed & venti & hos excipientes variorum tempestates, ipsaque climata sive locorum situs mirifice corpus nostrum immutent & ad peculiare etiam morbos disponere soleant. Cum vero ne quidem ullus Medicorum hoc negotium præstantius, inque medicum usum accommodatius pertractaverit ipso HIPPOCRATE & quidem in suis operibus, nominatum *Secl. III. aph.* hinc etiam tantum ducem sequi

& imitari fas erit. Ante vero, quam id præstemus & veritatem eorum, quæ graviter dixit, expendamus, utile fore iudico, qualem mutationem & damnum solum frigus & intemperata humiditas humanis corporibus invehere possit & invehat, exponere.

§. III.

Maxime omnium vero vehemens frigus & nimia humiditas corpus nostrum lædit, illudque ad graves morbos disponit, siquidem morborum, qui nos graviter adfligunt, indolem in vitio solidorum, spasmo nempe & atonia versari, in superioribus dissertationibus accurate satis & copiose discussum est. Jam vero ipsum frigus eos maxime fovet morbos, qui a spasmo seu nimia fibrarum strictura proficiuntur, humidum vero excessivum ob id maxime inimicum est corpori, quia solidas partes & fibras nimium relaxando, tono & robore suo exuit, ut deinde ad decubitus, stagnationes, obstructions, corruptiones & chronicas passiones pateat aditus paratissimus. Etenim si quid vitæ & sanitati est adversum & infestum, sane est ingens & acre frigus, si in solidas vel fluidas partes penetraverit. Quid enim est, quod tam potenter sanguinem in motu suo progressivo, in circulum abeunte, sistere & vel universum corpus vel ejus partes enecare possit, quam intensum & validum frigus, eo quod intestinum illum calidum motum, qui & fluiditatis & spiritusascentiæ ac virium in nobis auctor est, penitus extinguat.

§. IV.

Nocet vero vehemens quam maxime frigus ipsis solidis & exquisitiori sensu præditis partibus, quales sunt illæ, quæ tenuissimum illud fluidum, quod sensum & motum præstat, complectuntur, ut sunt nervi, membranæ, cerebrum, spinalis medulla, ventriculus, intestina, vesica, quas mirifice lædit, dum non modo fluidissimam illam calidam materiam in motu turbat, sed & ipsos poros ac tenuissimos meatus obstruendo, stringendo, contorquendo vitiat, ut pristinum robur ac tonum ægerrime recipiant, atque adeo rebelles plane & invincibiles morbi exinde subnascantur.

§. V.

Capitis & quæ cranium cingunt membranæ, si intenso frigore tanguntur, sæpe ita vitiantur, ut inexpugnabilis hemicrania inde subnascatur. Pectus si vehementiori frigori diu exponitur, ita nervi præcordiales læduntur, ut convulsivum asthma exinde propullulet, quod ne ulla quidem medicina facile superatur. Ventriculi & abdominis regio frigidiori si crebrius objicitur aeri, stomachum inflatio, intestina colica spasmodica & flatulentæ tensiones ita exercere solent, ut ægre mali vis discutiatur. Ad uterum paulo liberius frigidus admissus aer, ejus vasa ita constringit ac lædit, ut postea difficillime superfluum, qui singulis mensibus ejicitur, sanguinem emittant, irreparabili sanitatis feminarum damno. Quam grave detrimentum puerperis adferat frigus, ubi lochiorum fluxio est, funestæ inflammationes & febres, ex lochiis suppressis ob frigus receptum natæ loquuntur. A vento boreali perquam frigido in membranas musculorum penetrante frequentissime gravissimus rheumatismus vel ischiadicus dolor difficulter sanabilis inducitur. Ad excretionem criticam febrium cohibendas vel exanthemata reprimenda nihil frigore est pestilentius, hinc sæpe unica causa mortis existit. Et notabile est, quod frigoris ea sit natura, ut, si quædam tantum corporis pars ab ipso tangatur fortiter, totum

totum corpus in consensum trahatur, ut coctio & totius perspiratio minor fiat, quemadmodum SANCTORIUS *Sect. I. aphorism. 3.* scite prodidit. Denique omnibus affectibus spasmodicis, convulsionibus, doloribus tam colicis, quam qui fiunt a calculo, in podagra, in capite, in dentibus frigus est inimicissimum. In hæmorrhagiis nihil deterius est, quam pedes vel manus frigido aeri exponere, eo, quod spasmi principales sint sanguinearum excretionum causæ, qui quanto vehementiores sunt, tanto major fit sanguinis profusio. Symptomata, quæ hypochondriacos exercere solent, potissimum spasmo ventriculi & intestinorum debentur, vix unquam vero illa, præterquam hieme, & sub frigore, sæviora experiuntur. Cum primis autem aer frigidus intestinis est hostilis, unde, qui ad colicam vel diarrhæam sunt proclives, flante borea, vel si tantummodo pedibus super stratum frigidum ambulant, protinus hujus mali truculentiam patiuntur.

§. VI.

Deinde aeris diuturna & nimia humiditas valde est solidis nostri corporis partibus, fibris, nervis ac membranis insensæ, eo, quod ipsas nimium relaxet earumque tonum destruat, hinc in capite gravitatem, torporem, somnolentiam, auditus difficultatem infert. At si pulmonis vesiculas relaxat, ingens fit sanguinis ibi decubitus, unde respiratio fit anxiosa & citatior cum dolore. Totum porro corpus fit hebes, fit languidum, ad labores sustinendos minus aptum, appetentia decrescit. Quod maximum vero, omnes morbi, qui ex atonia fiunt, ex tali statu aeris diuturno & generantur & incrementum capiunt; sicut infra id fufius deducemus. Pessimus autem ille aer, qui frigidus & humidus est, talis enim, ubi pervenit ad interiora corporis, ad stagnationes, stases sanguinis & humorum inferendas, est aptissimus, nam ratione humiditatis fibras relaxat, & ratione frigoris humores coagulat eorumque motum sufflaminat.

§. VII.

Quum itaque tanta ad lædendum corpus nostrum perfrigido neque minus humido aeri insit potentia: hinc facile patet, cur aquilo frigidissimus & auster cum zephyro mixtus, humido suo calore tam insensibilis sint sanitati, ut nos ad multos & maxime periculosos morbos disponant. Equidem venti aquilonares & orientales iis, qui ex plaga occidentali & meridionali feruntur, longe sunt salubriores, quia multum expansivi ætheris secum ferunt, quo, nebulas & nubes dissipando, serenitatem inferunt; nihilominus iis corporibus, ubi fibræ motrices nimis tensæ, constrictæ & pressæ sunt, nocent, præsertim si rara & juvenilia fuerint, & austrina ac humida aeris constitutio præcesserit: ibi enim redundantem in vasis sanguinem una cum sero, & sæpius serum solum in præcordia & vasa majora magna vi pellunt truduntque, unde viscera non modo ab ipso sanguinis infarctu intumescunt, sed & serum separatur, hinc catarrhi, defluxiones, arthritides, crebriores mictiones & alvi dejectiones fiunt. Ubi vero corpora strictiora & sensibilia sunt, ac pori angustiores, uti in cholericis, tunc aquilo transpirationem omnesque excretiones magis sistit, quare recte CELSUS *Lib. II. Cap. I. §. 20.* scribit: *Aquilo tussim movet, fauces exasperat, ventrem adstringit, urinam supprimit, horrores excitat, item dolorem lateris & pectoris infert, sanum tamen corpus spissat & mobilius atque expeditius reddit.* Et RHASIS *Lib. V. de re med. Cap. IV.* prodidit: *ab aquilonaribus ventis ille custodiendus est, qui in pectore asperitatem sentit, aut tussim patitur, vel quibus*

pulmo aut pectus debile est, hic enim, si aerem attraxit frigidum, ad tussim vel ad sanguinem spuendum velociter perveniet. Illud porro sæpius animadversum est, quod borea flante facile fiant febrium intermittentium recidivæ, præsertim, si quis paulo liberius frigidus vento corpus exposuerit: succedunt mox horripilationes, dolores in dorso & tensivæ inflationes circa abdomen, & sic de novo paroxysmus febrilis recrudescit. Jam vero nihil notius est, quam quod omnia hæc pathemata, quæ calorem antecedunt febrilem in intermittentibus, ut sunt refrigerationes partium, horrores, rigores, dolores dorsi & pedum contusivi, conatus ad vomendum, inflationes ventris nonnisi partium membranarum strictione debeantur.

§. VIII.

Notabile porro in praxi est, quod dolores, qui ex calculi renalis descensu per ureteres nascuntur, maxime sub flatu ventorum aquilonarium fieri soleant: quia corpus, hac ratione strictius redditum, facilius e sede sua dimovere peregrinum hospitem conatur, vel si dolores calculi jam adfuerint, ii superveniente borea sæviores evadunt, quia, quo major fibrarum membranarum est tensio, eo acutior in illis oritur dolor, qui a tremula & tensiva harum partium agitatione proficiscitur. Perquam curiosa porro est observatio, quod is, qui ex calculo vesicæ laborat, semper spirantibus ventis borealibus majores molestias sentiat, quæ sub austrino & humido aeris statu levantur. Ex quo clarissime intelligitur, ventorum potentiam non modo in externas, sed etiam in interiores partes & omne corpus permanere & tum fluidas tum solidas pro natura sua adficere, & motum earum conturbare.

§. IX.

Quem arthritici, odontalgici aut podagrici dolores exercere consuecunt, is semper suo damno experitur, majorem sævitiam hieme, & vento boreali flante, quam alias observari. Qui apoplectico insultu tentantur, sanguine copioso præditi, hi sub plenilunio, ubi major fit humorum turgescencia, flante borea & tempore hiemali, illum patiuntur: siquidem apoplexia nostro quidem iudicio hæmorrhagiæ cerebri species est, quæ raptu sanguinis ad caput, ob spasmos remotiorum partium suscitatur. Omnes inflammationum species, ut anginæ, ophthalmiæ, pleuritides, peripneumoniam in plethoricis & raris corporibus, quæ facile sudore diffuunt, aquilonari flatu producuntur, non aliam ob causam, quam quod hic sanguinem cum vehementia ad vascula capillaria urgeat, ibidemque eum in motu sistat. Notandum & hoc est, quod omnes, qui pectore laborant, & qui inflammatione aut febre inflammatoria detinentur, sub aquilonari serena frigida tempestate semper pejus se habeant, siquidem in omni inflammatione valde tensæ sunt & rigide fibræ, quas rigidiores, & hinc quoque sensibiliores hic ventus efficit.

§. X.

Longe vero alia ratio est ventorum, qui ex oceano Atlantico & mari mediterraneo ad nos feruntur, hi enim valde levem ac raram reddunt atmosphæram, aerisque elatere & pressionem debilitant, & multis vaporibus & aqueis exhalationibus eum implent, hinc etiam turbidum, nubilum ac pluviosum reddunt coelum. Quandocunque hi venti in atmosphæra nostra regnare incipiunt, tunc protinus argentum vivum in barometro dimittitur, manifesto indicio, levioris & minoris pressionis factam fuisse atmosphæram. Omnia animantium genera horum itidem virtutem in corporibus suis illico experiuntur.

Homo

Homo nempe anxio quasi calore premitur, largius sudat, respiratio fit citatior, corporisque habitus intumescit: animalia autem tam terrestria quam aëria & aquatilia, varias insolitas & extraordinarias motiones, actiones, agitationes, vociferationes, clangores edunt & efficiunt, ex quibus etiam vulgus tempestates impendentes præfigere solet. Qua de re latius videri meretur VERULAMIUS in *Hist. Vent.* Nam sub tali statu aeris humido tepidoque corporis habitus relaxatur, & tensa quæ fuerunt, flaccescunt, cutis spongiosa ac rarior redditur, ad sudorem disponitur, calceamenta & tibialia laxiora fiunt, coria molliora.

§. XI.

Sub tali itaque aeris statu, cum fibræ motrices laxantur, earumque robur & pressio minuitur, non potest aliter fieri, quin circulus sanguinis, ob cordis & arteriarum robur fractum, lentior & segnior evadat & inde cum eo pari passu ambulans transpiratio retardetur, sicque multæ impuritates in corruptionem pronæ in vasis colligantur. Denique, quia membranarum, quæ sensationis subjectum sunt, ex nimia humiditate fit relaxatio, hinc vigor sub tali aeris constitutione omnium sensuum minuitur. Venter quoque & intestina suum inde patiuntur detrimentum. Nam quia motus eorum peristalticus labefactatur, hinc appetitus, digestionis vis & facultas fecernendi inutilia, eaque per alvum excernendi, minor evadit, unde etiam multarum fœdium in prima regione accumulatio, quæ multis morbis fomitem præbet, originem suam habet. Disponunt itaque hi venti quam maxime ad morbos putridos, malignos etiam & ex chronicis ad scorbutum, ad cachexiam, tumores œdematosos, in capite ad epilepsiam, paralyfin, affectus soporosos, memoriæ abolitionem, surditatem, guttam serenam, dolorem capitis gravativum, catarrhos & glandularum tumores.

§. XII.

Neque vero erit inconsultum has veritates auctoritate summorum virorum corroborare. Et inter hos primi merito ordinis est gravissimus noster parens HIPPOCRATES, qui *Sect. III. aph. 5.* austrum auditum gravantem, caliginosum, caput molestantem, torpidum, dissolventem describit. Et RHASIS *Lib. III. Cap. XXV.* de vento australi hæc habet: corpora dissolvit, sensus turbat atque dolorem capitis & oculorum ægritudinem facit, epilepsiam quoque ante consueta tempora accelerat & febres identidem parit putridas. Et CELSUS *Lib. II. Cap. I.* hæc scribit: auster aures hebetat, sensus tardat, capitis dolorem movet, alvum solvit & totum corpus efficit hebes, humidum & languidum. Apud HORATIUM *Lib. II. Sat. III.* hic ventus plumbeus adpellatur, quod etiam jam suo tempore notavit GALENUS, qui scribit *de theriaca ad Pisonem Cap. XI.* quendam ex suis sodalibus in lecto cubantem solitum divinari, quis ventus spiret, nam quoties sibi gravari caput sentiebat, statim dignoscebat, ventum austrum esse.

§. XIII.

Igitur sub ejusmodi tempestate præhumida & calida ac pluviosa, præsertim vernali & autumnali, pituitosi, senes, infantes & qui spongiosi habitus corporis sunt, inde poenas luunt, cachectici tunc majorem virium languorem & ingentem membrorum lassitudinem percipiunt; qui imbecillos habent pulmones, ii per tussim ingentem viscidæ pituitæ copiam ejiciunt, gravidæ longe grandiore ventrem

Frid. Hoffmanni Oper. Supplem. II.

gerunt & morbidos infantes progignunt, inque puerperio facile in purpuram vel alios putridos morbos incidunt. Quibus colli glandularum & amygdalarum tumores familiares sunt & qui faucibus laborant, iis sub tali tempore facile hi affectus recrudescent. Qui ulcera habent manantia & serosas putridas excretiones, ut fit in gonorrhœa virorum benigna vel maligna vel fluore albo, illi copiosiorē & magis fœdum fluxum experiuntur.

§. XIV.

Postquam itaque naturam ventorum eorumque vires in morbofis reddendis humanis corporibus perscrutati sumus, ordo jam poscit, ut etiam anni tempora, quæ differens solis status efficit, consideremus & qua ratione illa corpora ad morbos præparent, dispiciamus. Placet autem in eo sequi divum nostrum Cœum, qui *Sect. III. aphor.* morbos cuivis anni tenori convenientes fideliter & dextre recenset. Tametsi vero ejus clima, ubi vixit, a nostro sit diversum, quod perpetuo in lectione auctorum medicorum servandum est, nihilominus multa ibi invenimus, quæ unque ad nostrum clima etiam spectant, cum similes morbi ibi deprehenduntur. Idem Auctor *aph. 20. cit. Sect.* ita eloquitur: *vere insaniæ & atrabiles & comitiales & sanguinis fluxiones & anginae & gravedines & raucedines & tusses & lepræ & impetigines & vitiliginis & pustulæ ulcerosæ plurimæ & tubercula & morbi articulares.* Quæ ægritudines in tres classes, re bene perspecta, quam opportune reduci possunt, siquidem aliæ a sanguine redundante, eoque per spasmos ad superiores corporis partes congesto, fiunt, cujus generis sunt insaniæ, melancholiæ, epilepsiæ, hæmorrhagiæ & anginae. Aliæ a sero stagnante & in partibus glandulosis faucium & articularum decumbente fiunt, ut gravedines, raucedines, tusses, arthritides. Quædam a viscido, impuro & falso sero, ad summam cutem ejusque glandulas protruso & cutis texturam dissolvente, enatæ fuerunt, ut lepra, impetigines, pustulæ ulcerosæ, tubercula. Videlicet vernali tempore atmosphæra valde temperata, humida & calida est: hinc sanguinis & humorum facile gignit abundantiam & orgasmum, quare non mirum est, si prioris ordinis morbi in sanguineis, secundi ordinis in pituitosis & tertii ordinis in melancholicorum corporibus suscitentur.

§. XV.

Devolvitur jam ad eos morbos, quos æstivum tempus progignit, e quibus sequentia *Sect. III. aphor. 21.* HIPPOCRATES memoriæ prodidit: *æstate & febres continuæ & ardentes & tertianæ plurimæ & quartanæ & vomitus & alvi profluvium & ophthalmiæ & aurium dolores & oris exulcerationes & pudendorum putredines & papulæ sudorosæ;* ratio hujus aphorismi videtur hæc esse: æstate scilicet, ob ferventissimum solis æstum, intestinus calidus partium sanguinis motus major fit & increscit, quo sanguis & humores in copiosum bilioso-falsum excrementum dissolvuntur, quod cum bile & succo pancreatico ad ventriculi & duodeni cavum descendens, ob moram, quam trahit, corrumpitur, & lancinando ac inflammando has nerveas partes, partim febres continuas, ardentes, partim tertianas exquisitas & nothas simplices & duplices vel etiam continuas, in cholericis præsertim & iracundiæ deditis, sique in diætâ delinquant & auræ nocturnæ frigidiori sese committunt, suscitant: Ab hisce excrementitiis, biliosis, acribus fœdibus, vomitus & alvi profluviorum origo est, in melancholicis vero intermittentes quartanæ magis conspiciuntur; in serosioribus vero biliosæ & falsæ impuritates ad partes extremas, utpote aures, fauces, oculos, pudenda

propulsæ, intercepta simul transpiratione, lippitudines, aurium dolores, oris & faucium exulcerationes, pudendorum putredines & papulas fudorosas faciunt.

§. XVI.

At alius status aeris est sub autumnno, ubi atmosphæra valde humida & mutabilis existit, cum, ipso barometro teste, mox levis ac rara, continuam in argenti vivi motu mutationem facit; hinc cœlum serenum haud multo post pluviosum, nubilum & turbidum evadit, & modo calore, modo frigore corpus nostrum afficitur. Sub tali itaque aeris frequenti mutatione, ob tonum fibrarum & cutis deperditum, multæ excrementitiæ, & humidæ sordes in corpore accumulatur, qua de causa autumnus fœcundo sinu tales profert morbos, quales HIPPOCRATES *aph.* 22. *Seçt. III.* describit, dum ait: *autumno multi morbi ex æstivis & febres quartanæ & erraticæ & splenes & hydropes & tabes & urinæ stillicidia, & intestinorum lævitates, & dysenteria, & coxendices, & angina & anhelationes & volvuli & comitiales & insania & atra bilis.* Etenim in melancholicis, qui sanguine viscido abundant, ob relaxatum viscerum tonum, perquam facile tumores lienis, in hepate hydrops, in pulmonibus phthises & tabes fiunt. Sique bilis corrupta & acrior, cum acido & viscido humore mixta, in duodeno diutius hæreat, febres quartanæ & erraticæ fiunt. In phlegmaticis vero, transpiratu liberiori intercepto, si impurum serum ad vesicam fertur, strangurias; ad intestinorum membranas delatum crebras dejectiones vel etiam dysenterias parit. Ubi autem ad articulorum ligamenta & ad ipsum os ischii impuritas descendit, arthritidis & mali ischiadici fit origo, in faucibus vero idem serum quando decumbit, anginam & asthma suffocatorium progignit. Quodsi vero sanguis crassus, ob inferiorum partium spasmos, rapitur ad caput, insaniæ, mania & melancholia in conspectum veniunt.

§. XVII.

Alia vero adhuc est aeris intemperies tempore brumali, ubi propter acre gelu cutis pori ac meatus stringuntur, clauduntur & fibræ universi corporis rigidiores evadunt, ipsique humores facile coagulantur atque in motu sistuntur. Eaque propter in scenam prodeunt hi morbi, quos HIPPOCRATES *aph.* 23. *ejusd. seçt.* recenset & sunt: *pleuritides, peripneumonia, lethargi, gravedines, raucedines, tusses, dolores pectoris, laterum, lumborum, capitis, vertigines, apoplexia.* Etenim in iis, qui sanguine crasso redundant, præsertim si paulo ante corpus incaluerit, frigus hybernium sanguinem in pulmonum vasculis sistit, & vel inflammationem superficiariam, pleuritidem, vel profundiorē, peripneumoniam, inducit; in corporibus vero repletis & phlegmaticis frigus humores ad partes glandulosas retundit, ubi stagnans gravedinem, raucedinem & tussim adfert. At, si illud ad membranas pellatur, tunc intra costas pleuritis spuria, intra membranas muscutorum rheumatismi, inque capitis membranis varii dolores resultant. Sanguinei vero, præsertim senes & spongiosi corporis habitus, congestiones sanguinis ad caput experiuntur, inde ejus dolores gravativi, vertigines, apoplexiæ, lethargi fiunt.

§. XVIII.

Cum vero AVICENNA de anni temporibus, quomodo corpora mutant & causas interiores morbosque excitent, præclara scripserit in *Canon. Med. lib. I. Seçt. II.* rem haud inutilem fore arbitror, egregia hæc loca adducere. Vere, inquit, morbi ex sanguine fiunt & sanguinis per sedem & per nares profu-

sio, anginae, furunculi, hæmoptyses, tusses, phthifis, articulorum dolores, quos concitant animi vel corporis immoderata motio & calefacientia. Et nihil æque tuetur à morbis veris, quam venæ sectio, purgatio, cibi parvitas & potus largitas. Aestas vero bilem generat, acuit & nigram facit, dum exhalat tenue. Senes æstate valent. Morborum tempora reddit breviora. Febris tertiana, ophthalmia. Si vento vacat id tempus, erysipelata pustulæque erysipelatis naturam habentes. Austrina æstas pestilentia & variolarum fœcunda est. Autumnus pluviosus morbis patet, quod homines id temporis in calido sole subinde apricentur, frigore postea excipiantur & quod magna tunc fit ubertas fructuum, e quibus pravi progignuntur humores, quod denique vires æstate sint dissolutæ. Humores ergo propter mala cibaria corrumpuntur, quia tenuis portio absumitur & crassior relinquitur & adurit & si natura evacuat humorem, frigore disreprimatur & intus coercetur, paucus quoque adest sanguis. Morbi sunt scabies, arthritides, cancri, quartanæ, febres complicatæ, urinæ difficultas, diarrhoea, angina, ischias, apoplexia, pulmonis morbi, dolores dorsi. Grassantur variolæ, si autumnus siccus fuerit atque æstas prægressa calida. Est vero nocentissimus autumnus iis, qui pulmonis habent ulcera & jam phthisi laborant, detegit quoque hunc affectum incognitum. In hieme, quia fructuum est penuria & homines edulibus alibilibus vescuntur atque saturato ventre se exercent, arctissima compingitur materia & tunc incidentia adsumere est necesse, tumores sunt subalbidi, gravedines, pleuritis, raucedo, faucium dolores, dorsi dolor, dolor capitis diuturnus, epilepsia, apoplexia, senibus vero hiems est inimica. Hic est egregius ille AVICENNÆ locus, quem totum adscribere non pigeat, quia & in experientia & in solida ratione fundamentum habet.

§. XIX.

Magnam itaque aeris vim & efficaciam, non modo ad morbos infligendos, sed & ad eos facilius vel difficilius profligendos esse, usu atque experientia compertum est. Hieme enim quartanam vix ac ne vix quidem curari posse in aprico est. At quartanæ æstivæ, etiam secundum HIPPOCRATEM *Seçt. II. aph.* 25. maximam partem sunt breves & autumnales longæ. Quin etiam quartanæ, quæ per totum autumnum, hiemis & veris cursum durarunt, circa solstitium æstivum sua sponte finiuntur. Tardat enim hiems morbos, æstas vero maturat & ad colliquandos humores morbosos, atque ad obstructions referandas aptissimus est. Neque ignotum in praxi est, tertianas, quæ proveniunt autumnno, semper difficilius esse sanationis, iis, quæ vere vel æstate proveniunt. Quemadmodum enim æstate semper plus & liberius perspiramus: ita ab æquinoctio autumnali & solstitio hiemali semper paulatim perspiratio decrescit, & ideo etiam SANCTORIUS *Seçt. I. aph.* 150. diligenter & curiose observavit, corporis pondus in autumnno subinde augeri, quod æstate diminuitur. Ex hisce omnibus evidenter colligimus, cum natura ad sanandas intermittentes liberiori perspiratione utatur, quod eam quoque imitari & arte hanc etiam adjuvare convenienter debeat Medicus, si feliciter harum febrium contumaciam expugnare velit.

§. XX.

Temporum igitur mutationes potentissime ad sanitatem & morbos facere, cum ex superioribus, quæ adduximus, tum etiam exinde dilucescit, quod æquinoctia & solstitia mirifice corpus nostrum afficiant & mutationem sensibilem inferant. Sunt in no-

stris regionibus vero naturæ maxime infensa æquinoctium autumnale & solstitium hibernum : sub his enim natura videtur imbecillima, quare etiam HIPPOCRATES monet a medicamentis fortioribus & purgantibus tunc esse abstinendum. Observavimus in plethoricis circa æquinoctia febres tertianas duplices, defluxiones ad tonsillas, dolores dorsi, motus hæmorrhoidales, abdominis inflationes, nisi matura venæ sectione vel purgatione præveniamus. Sani plerumque epidemicis malis corripuntur : chronicis vero laborantes circa æquinoctia vel solstitia, vel in melius vel deterius labuntur. Et diligenti observatione animadvertimus, solstitii æstivi tempore corpora nostra lassari & ad omnia consueta munia inutilia existere : infantes quoque istis temporibus conceptos constitutione corporis imbecilliori existere notatum fuit. Plures ordinario rerum cursu in æquinoctiis mori notamus, scribit LICETUS *de subita morte*. Id quod etiam confirmat experientia, nam eos, quos servavit æstas vel hiems morbis chronicis adfectos, æquinoctium accedens tollit & nunquam homines plus ægrotant, quam in autumnii & veris principio : & tunc temporis & Medici & Pharmacopœi & vespillones suam habent messem. Menses enim non dantur sanitati & vitæ infestiores Martio & Octobri, ubi ingens aeris est mutatio, ex calore in frigus, ex frigore in calorem, ex tranquillo in ventosum & impetuosum, ex sereno in pluviosum & caliginosum, & contra. Tum argentum vivum in barometro modo adscendit, modo descendit & crebrius stationes suas mutat, argumento luculento, modo gravem & compressam, modo levem & raram esse atmosphæram. Aestivis vero mensibus raro ægrotant homines. Chronicæ fere omnes passionēs conquiescunt & messis frugalis tempore & Medicorum & Pharmacopœorum vespillonumque messis etiam quiescit. Atque adeo vel ex hoc solo sagax Medicus addiscere debet, quid moveat, quid mutet corpus nostrum, quid in eo inprimis sanitatem præstet & morbos inferat. Quin etiam ex hoc unico discere debet medicinæ initiandus, ad hanc artem recte faciendam non esse aptius subsidium exquisita rerum physicarum cognitione, quam nonnulli nostris temporibus, pessimo more & fato, secludere contendunt, non advertentes & vitam & sanitatem & morbos eorumque faciliorem & difficiliorem curationem unice fere a causis externis physicis dependere. Eaque propter non satis laudare possumus HIPPOCRATEM nostrum, qui indefesso labore ac diligentia, quomodo aer, isque secundum ventos, anni tempora & tempestates mutatus, quomodo etiam locorum, aquarum & victus differentia ad morbos inferendos eosque sanandos conferat, observationes in immortalem nominis sui celebritatem monumentis consignavit & posteritati reliquit, quemadmodum libri ejus, quos scripsit *de aeribus, aquis & locis, de flatibus, de diæta, de locis in homine, de natura humana*, id clarissime evincunt.

§. XXI.

Defuncti jam horum tractatione, ad generationem morborum, qui Græce epidemii adpellantur & certis temporibus populariter grassari solent, devolvimur. Horum morborum magnus est numerus, iisque maxima pars hominum affligitur atque e medio tollitur. Non vero alia horum, quam ex aere origo est. Recte enim scriptum ab HIPPOCRATE *lib. de nat. hum. §. 18.* legimus, quando ab uno morbo multi homines corripuntur eodem tempore, causam ad id, quod communissimum est, & quo maxime omnes utimur, referre oportet. Est autem hoc spiritus & aer, quem inspirando trahimus, quem mor-

Frid. Hoffmanni Oper. Supplem. II.

bosam aliquam exhalationem habere par est, ideoque §. 19. hanc cautelam adjicit : providendum tunc est, ut quam paucissimus aeris influxus in corpus ingrediatur & hinc regionum locos, in quibus morbus consistit, quantum ejus fieri potest, permutare oportet. Sicuti enim aer tantam potentiam in solidas & fluidas universi corporis nostri partes habet, ut supra ostensum est : ita quoque ejus mutationes temporumque varietates ac multivariæ tempestates, quas ventorum flatus maxime exhibent, mirifice naturam nostram, hoc est corporis nostri quoad solidas & fluidas partes dispositionem permutant : atque adeo verissime scribit HIPPOCRATES *Lib. de humoribus §. 7.* qualia sunt tempora, tales etiam erunt ipsi morbi & constitutiones ex ipsis. Si tempora tempestive & ordinate se habuerint, morbos judicatu faciles faciunt. Vernaculi autem temporum morbi indicant mutationes & prout evariaverit tempus, similes aut dissimiles erunt morbi, qui in hoc tempore oriuntur.

§. XXII.

Quemadmodum vero omnis bene temperatus, purus & serenus aer corpori nostro est amicissimus, dum cordi & fibris motricibus robur & vim suggerit, mentem serenat, appetentiam, concoctionem, supervacuorum dissolutionem, expurgationemque procurat : ita omnis supra modum intemperatus vel aliena permixtione inquinatus, præsertim si diu regnaverit, aer ad morbos infligendos est aptissimus, motum ac robur subtrahit partibus, corpusque gravat atque densat & supervacuorum dissolutionem cohibet. Et quoniam plurimos pariter attingit, ejusque non ut ceterorum incommoda, facile declinare possumus, hinc in corpus penetrans suis vitiis omnia perfundit & aer epidemicorum fere morborum auctor est. Ad horum vero classem fere omnis generis febres, inflammationes, fluxiones, & exanthemata referimus, ut sunt pestis, febres petechiales, purpuratæ, variolæ, morbilli, erysipelaticæ, arthriticæ, catarrhales, itemque continuæ, malignæ & benignæ, ardentes, biliosæ & omnis generis intermittentes, neque minus inflammationes, pleuritides spuria & veræ, peripneumoniæ, angina, ophthalmiæ, item dolores rheumatici, ischiatici, articulares, cephalalgia & fluxiones, ut diarrhœæ, dysenteria, coryzæ, gravedines, tussis, qui morbi certis temporibus grassantur & disposita corpora adoriuntur & maximam solent edere stragem, nullam aliam nactæ originem, quam quod vel intemperatus aer diu regnaverit, vel quædam præternaturalis aeris constitutio & temperies cum altera contraria subito permixta fuerit.

§. XXIII.

Quod attinet vero ad tempestates inordinatas & morbosas, inter eas nulla corpori nostro infensior est, quam diuturna humida & pluviosa, quam venti australes & occidentales diu regnantes exhibent, utpote quæ tum fibras exuit robore suo, tum fluidorum progressum & supervacuorum excretionem tardiores & impeditiores reddit, unde corpus humiditatibus impuris accumulatur, quare facilis ad morbos putridos est transitus. Longo itaque jam tempore animadversum & historiarum ac chronicorum monumentis diu consignatum est, diuturnas humidas & pluviosas tempestates malignos morbos, ino ipsam pestem ingenerasse. Ita HIPPOCRATES in *Epid.* libris scribit, aliquando post diuturnas pluvias ingentem ortam fuisse pestem, totam civitatem Abaton pervasantem. Et GALENUS *de temporibus cap. IV.* annum plus justo humidum pestis esse prænuntium prodidit. Verum

enimvero probe hoc loco animadvertendum esse arbitror, quod sola aeris humiditas, etiam excessiva, tametsi corpori sit inimica, nihilominus ipsi pestilentiae inducendae minus sufficiens sit. Res autem ita sese habet. Quando a nimis pluviis vel inundationibus aquae stagnant, praesertim in declivioribus, ventisque minus objectis locis & solis aestus accedit, tunc incipiunt aquae putrescere, unde putridis, naturae corporis nostri insensibilissimis exhalationibus aer inquinatur & ita maligni morbi, quorum origo ex tenui & facile diffundenda putredine est, procreantur.

§. XXIV.

Ex hisce jam fluit ratio, quare olim austro tanta potentia adscripta fuerit pestilentiam progignendi, quia nempe humidus & calidus est, quo nihil ad putredinem efficiendam aptius esse ipsa rei natura edocet. Pestis, quae quotannis in Aegypto oritur, non aliam habet originem, quam quod Nilus increfcens regionem inundet & aqua super terram stagnans paludosa fiat, unde accessu australium ventorum & aestus, aer putridis inquinamentis conspergitur, quae sanguinem & humores ad putredinem, quae pestilentiae natura continetur, disponunt. Putredo enim semper procreatrix pestis est & hac quoque in corporibus, ad eam recipiendam habilibus, efficacissime propagatur. Febres malignae pesti non absimiles, quae in castris oriri solent, contagio maxime infestae, maximam partem putridis exhalationibus, quae ex hominum & animantium excrementis & aquis stagnantibus, aliisque sordibus proveniunt, quoad primam originem debentur, quae si in corpus penetraverint, illud putredine vitae inimicissima contaminant, quae postea mirifice propagatur & ab uno corpore in alterum transit. Ea loca & urbes, quae aquis paludosis & stagnantibus circumcincta sunt, perpetuo mali moris morbis, videlicet petechiis, variolis, purpura infestantur, qui tanto acerbiores & frequentiores sunt, quanto magis loca humilia & incolae gulae & abdomini dediti sunt. Longa quoque & irrefragabili experientia, quam chronologiae scriptores nobis suggerunt, compertum est, insolitas & praeternaturales aquarum diluviones & terrarum inundationes, superveniente solis aestu, plures epidemias mali moris proferre febres, quae non modo insuetis symptomatibus homines adoriuntur, sed & difficilioris judicationis sunt.

§. XXV.

Pessima vero nota est epidemicorum morborum, si sub tali humida & calida tempestate copia insectorum conspiciatur, utpote quae de putredine in aere existente clarum testimonium exhibent. Verissime itaque non minus quam perite JOH. DAMASCENUS *aphorism.* 132. scribit: ubivis gentium, quocunque anni tempore phalanges muscarum redundaverint, ibidem & aegritudines, quae ex putredine oriuntur, in corporibus indigenarum redundabunt: ita etiam RIVERIUS *Observ.* IX. pag. 697. post insectorum innumerabilem congeriem, febrem epidemiam mali moris grassatam fuisse, testatur. Et VERULAMIUS in *Operibus* pag. 923. auctor est, annos insalubres fore & pestis suspitione infamari, quando ranarum, muscarum, locustarum multitudo est, quia haec animalia ex putredine oriuntur, hinc quoque rectissime VALERIOLA *Obs.* I. L. II. pag. 95. ex insectorum & locustarum copia morbos epidemios praenuntiavit.

§. XXVI.

Præterea diligentiori & attenta observatione constat, quod hieme existente tepida & austrina, si ve-

ris initium valde fervidum fuerit, subito febres symptomatibus infestas per regiones subnasci soleant. Hujus experientiae ratio esse videtur, quod stagnantes hieme aquae putredinem induerunt, quae aestu elevata & subtilior facta corporum interiora pervadens pessimae notae febres producit. Ita anno MDCCXI. notabile & singulare omnino hac de re habuimus exemplum, ubi hiems erat valde austrina, nive & glacie vacua, postea mense Aprilis ingens per aliquot dies erat aestus, quem excepit frigus, hunc postea rursus magnus atmosphaerae fervor sequebatur absque ulla pluvia; excitata tunc fuit febris per universam ferme Germaniam, ita ut non facile ullus locus liber permanferit. Qui libero sua corpora, praesertim sole occiduo, exponebant aeri, non multo post tempore in febrem gravem cum summa debilitate, dolore capitis, dorsi, vomitu, anxietate, pectoris oppressione incidebant, quidam delirio adfiebantur. Subsistebant haec symptomata per tres vel quatuor dies. Propinatis bezoardicis fixioribus cum nitro mixtis, vehementia symptomatum protinus exspirabat & ad vires pristinas se recipiebant, paucis mortuis. In *Misc. Nat. Curios. Dec. I. An. VI. Obs.* 145. commemoratur, quod Anno MDCLXIV. post hiemem mollem & pluviosum, ver aestuosum plurimos infantes faucium inflammatione & tumore oedematoso trucidaverit.

§. XXVII.

Grassari quoque solent sub autumno multi epidemici morbi, praesertim diarrhoeae, dysenteriae, quae originem sumere videntur a pruinis sale corrosivo imbutis. Solent enim aestate, fervidissimo sole, ex commixtione variarum particularum sulphurearum & salino-acidarum variae indolis salia, praesertim caustica subtilia in aere generari, quae accedente frigore principio autumni cum pruina descendunt & saepe frumenta, arbores, frutices, & fructus inprimis rubigine adficiunt, quae degustata nauseam vel vomitum movent, aut in labiis ulcuscula excitant. Qui nudis pedibus incedunt, pustulis pedum vexantur & qui diutius in campis morantur, febribus ardentibus corripuntur. Talem observationem *Misc. Nat. Curios. Dec. III. An. IX. Obs.* 93. exhibent. Rorem sapissime ex alto defluere fructibus & plantis infestum; ex quo innumerabilis vermiculorum & insectorum copia pronascitur, horti culturae dediti norunt, quo rore perfusis plantis si vescuntur pecora, vel vehementer agrotant vel plane extinguuntur. Idem fit, quando homines olera verminoso rore infecta inter cibum sumunt, gravis dysenteria oritur, quae superiori anno ex tali causa in quibusdam districtibus Ducatus Brunsvicensis suborta fuit. In Italiae regionibus aestivis noctibus in libero aere dormire non sine vitae periculo homines possunt, non alia de causa, quam quod tunc uredo five Germ. *Der Mehl-Thau* delabatur, summe subtili corrosivo sale delibuta, quae poros corporis subeundo, nervosaeque partes infestando febrilem impetum, variis symptomatibus comitatum, invehit, maxime omnium vero Romanus nocturnus aer aestatis tempore humanae naturae infestissimus est, qui saepe incautos in vitae discrimen conjicit.

§. XXVIII.

Sicuti vero subitae mutationes aeris in calidum & frigidum, vel in siccum & humidum quam maxime nocent, ita etiam tempestates diuturnae, facta mutatione in contrarium, in vehendis morbis aptissima sunt. Placet vero ante omnia ea, quae hunc in finem magnus noster HIPPOCRATES annotavit in conspectum producere. Hic *Lib. de aeribus, aquis & locis*

locis §. 25. & aph. II. S. III. ita scribit : Si hiems sicca est & borealis, ver autem pluviosum & australe, necesse est, astatem febriculosam fieri & ophthalmias & dysenterias inducere, maxime mulieribus & viris natura humidioribus. Ratio nempe hujus observationis facilis est : nam si hiems sicca parum humiditatis subministrat, ver autem valde pluviosum & australe est, tunc mirifice corporis nostri fibræ relaxantur, serum incipit abundare, excretiones retardantur, unde nascuntur impuritates, quæ in pituitosis & mulieribus maxime, in primis viis accumuluntur & putrescunt, & ita febribus malignis, continuis, lentis, verminosis, item dysenteriae fomitem subministrant.

§. XXIX.

Porro in *l. c. §. 26. & aph. XII. S. III.* scribit HIPPOCRATES : Si hiems australis fiat & pluviosa & clemens, ver autem boreale & siccum & tempestuosum, tunc mulieres facile abortiunt, vel morbidæ ac impotentes pueri gignuntur. Ratio est in procinctu : hieme videlicet pluviosa vasa tum copia, tum impuritate humorum infarciuntur, superveniens vero borealis aeris flatus, stringendo corporis poros & fibras, pellit sanguinem copiosum ac impurum ad interiora, & quidem in gravidis ad uterum, ubi vasa disrupta enormem sanguinis profusionem & abortum efficiunt : infantes vero, si ejusmodi sero putrido nutriuntur, fiunt languidi & morbofi. Et §. 28. *l. c.* hæc habet : Si æstas pluviosa sit & austro multo perfletur, similisque sequatur autumnus, necesse est hyemem morbidum esse. Etenim sub austrina aeris constitutione in corporibus copia fit impurorum humorum, quos frigus & aquilonaris hyems detinet, reprimit ad interiora, inque motu & circulo sistit, unde origo est febrium, inflammationum, catarrhorum. Simili quoque ratione, quando æstas est pluviosa & insequens autumnus est borealis, tunc catarrhi valde exercent homines, qui cum horrore & calore præternaturali invadunt, intra viginti quatuor horas soluta coryza, tussis & faucium inflammatio conspicitur. Annus MDCCVII. erat siccissimus; grassabantur tunc febres tertianæ per universam fere Germaniam. Menses vero Januarii & Februarii humidi ac frigidi, sine ulla glacie erant, tunc diarrhææ & ventris tormina, item febres catarrhales, catarrhi, anginosæ faucium inflammationes & purpuræ valde infestabant. Ex quibus intelligitur, aerem ejusque repentinas mutationes & differentes mutuo se excipientes tempestates, diversissimæ indolis nec non curationis, imo difficilioris judicationis morbos proferre. At nihil magis optandum in incrementum artis nostræ salutaris est, quam ut nostris temporibus sagaciores Medicorum magnum ducem nostrum HIPPOCRATEM sequantur & simili modo epidemicorum morborum observationes conscribant, perpetuo antecedentes temporum & tempestatum rationes adnotando. Neque etiam aliter possumus, quin laudatissimos istos conatus & labores celeberrimorum Virorum Sydenhamii, Ramazzini & collectorum Actorum Curiosorum & Vratislaviensium, quibus summa cum laude defuncti sunt, collaudemus & horum exempla ad imitandum aliis proponamus.

§. XXXI.

Incidit vero hoc loco, cum de temporum & tempestatum mutationibus tractamus, quæstio non minoris momenti, quanam harum mutationum, quæ singulis fere annis diversæ conspiciuntur in aere, sint causæ. Veteres, & inter eos summi viri, siderum in corpora influxui, tempestates & inde dependentes in sublunaria effectus adsignarunt. Sunt vero, qui hunc influxum plane negent ac explodant, & ita negent, ut

Frid. Hoffmanni Oper. Supplem. II.

solis duntaxat vim ac efficaciam in corpora admittant atque tueantur, eo, quod hic calore suo plantas atque animalia foveat enutrietque. Enim vero nos sumus hujus sententiæ, utique astris diverso situ conjunctione ac positu varie premere, imo dirigere atmosphæram, & hac ratione ex diversis plagis ventos suscitare, eorumque efficaciam ac motum quoque augere vel minuire posse. Optime enim GALENUS astrorum influxum in hac sublunaria *Lib. II. Proceret.* hunc in modum demonstrat. Si mutui stellarum aspectus operaretur nihil, soli duntaxat, qui fons luminis ac vitæ est, concessio imperio in hæc inferiora, quatuor anni tempora singulis annis eandem faciem eandemque temperaturam servarent, cum sol non alium uno quam altero anno cursum suum peragere soleat, quod tamen non accidit. Illud vero non possumus non monere, quod astrorum illa doctrina, quam vulgo profitentur, dum ex aspectibus planetarum cum luna prædictiones suas formant, nihili sit habenda. Deinde sciendum & hoc est, quod solus siderum aspectus non sufficiat ventis & tempestatibus excitandis, neque causa proxima sit, sed potius remota, quæ ad effectum disponit, quem vero non necessitat, quin potius, ad certas tempestates invehendas, plures ut concurrant & consentiant causæ necessarium est. Quo numero habemus regionum diversum ad solem & polum situm, deinde ipsius loci positum, quoad vicina montium juga, aquas, maria, tum solis variantem pro anni temporibus ad certum clima situm & influxum, denique terræ motum, & tandem etiam exhalationes cuius regionis peculiare, præsertim, quæ ex polo arctico videntur magno agmine & copia prodire : postremo etiam, quando tempestates certas prædicere volumus, necesse est, ut præcedentes aspectus planetarum, & ventorum, qui diutius in atmosphæra regnarunt, naturam ac virtutem probe ponderemus. Nam hæc ipsa, adhuc in aere detenta, subsequentes ventorum facultates & siderum potentias varie modificat ac immutat, quæ omnia debent simul probe respici ac considerari in astronomicis observationibus conficiendis. Illud etiam vehementer desideratur, quod rerum naturalium scrutatores indefesso studio ac diligentia in multis locis & climatibus diversis accurate observationes meteorologicas, notando insimul motum argenti vivi in barometro & caloris gradus, concinnare & invicem postea conferre debeant. Ita futurum est, ut ad majorem perfectionem hæc astrorum scientia, quam jam conspicitur, perveniat.

§. XXXII.

Interea tamen illud diligentiori & attentiori observatione, cum primis clarissimorum Anglorum GOAD & COCK constat, quod aspectus planetarum inter se considerati insignem in atmosphæram inferant mutationem, & quidem hoc modo : quod Saturnus maxime excitet ventos septentrionales & frigus inducat, Jupiter vero ventosus & procellosus sit, præsertim si cum Mercurio vel sole jungatur : Venus vero humidam atmosphæram reddat, concitando maxime ventos autumnales. Et Mercurius quoque, cum atmosphæram tenuem reddat & levem, est inconstantis naturæ ratione effectus, qui potius pro ejus diversa cum aliis planetis conjunctione differens est. Sol vero & Mars fere concordiam omnium Astronomorum sententia atmosphæram calidam & siccam reddunt & ventos ex austro & oriente flantes suscitant.

§. XXXIII.

Superiores itaque planetæ, quum atmosphæram valde compressam, frigidam & ventosam reddant,

hac ex causa, fibras corporis tendendo & stringendo, omnis generis spasmos doloresque exacerbant, & faciles sunt excitandæ arthritidi ac inflammatoriæ & erysipelaceæ febri, item epilepsiæ & hæmoptysi. Mars vero & Sol cum aliis juncti, calorem & ferentiam afferunt atmosphæræ, calidos morbos fovunt, sanguinemque commovent. Inferiores, ut

Luna, Venus, Mercurius atmosphæram sistunt leviores, & ob id vaporibus implent. Inde fibræ relaxantur & primum fit iter ad morbos ex atonia, ex stagnatione & circulo sanguinis languido provenientes. Luna crescente fibræ relaxantur, & hinc tumores crescunt: decrescente vero fibræ stringuntur.



DISSERTATIO MEDICA

D E

VERA MORBORUM SEDE.

Primum edita Anno 1715.

§. I.



ACTENUS omnes causarum, quæ foecundo sinu morbos proferunt, classes ac ordines, quæ potuit fieri, brevitate & perspicuitate, agitavimus atque explicuimus. Proximum jam est, ut quoque de earum sede ac domicilio,

unde perniciosam suam vim in corpus dispergunt, solliciti simus. Nam inventa materiæ peccantis sede, non modo facilius est, symptomatum, quæ velut effectus causæ sunt, rationem inde ducere ac derivare, verum etiam Medicus clarius exinde intelligit, quem locum medicina adgredi & ubi nocentem causam invenire & à corpore foras eliminare debeat. Quo majoris utilitatis vero hæc, tam in theoria quam in praxi, apparet tractatio, eo minori solertia a Practicis in eorum monumentis suscepta reperitur. Plures certe morbum, causam ejus & symptomata valde confundere solent & aliud subjectum causæ, aliud subjectum morbi statuunt. Nobis videtur morbus læsio partis, cui causa morbifica infidet, siquidem maxime omnium eam partem, quam occupavit, afficere & mutare debet; symptomata vero sunt læsæ actiones seu functiones partium, quæ morbo laborant, & hæc sæpiusculæ in longe dissita loca vim suam exerunt. Deinceps hoc loco monendum esse duximus, nos maxime de sede & affecto loco illorum morborum, qui intus generantur, non vero, qui ab externa violentia vel etiam miasmate summam cutem invadente gignuntur, agere velle.

§. II.

Cum itaque de vera morborum ac causarum morborum sede ac loco constituendo nostram meditationem proferre animus sit; sciendum ante omnia est, omnes, quæ morbo proferendo sunt idoneæ, causas, ejus esse naturæ, ut motus sint expertes, sed in quiete positæ & fixioris sedis esse debeant. Nam quamdiu intemperatus & nocente potentia imbutus humor, cum sanguine vel lymphâ mixtus, continuo progressivo motu agitur, & per vasculosam corporis substantiam fertur, nullam noxam partibus solidis adfricare vel earum actiones ac mo-

tum facile turbare aut pervertere poterit. Quandoque vero humor extra vitalem progressum & circuitum positus est, vel excrementum quoddam a puro sanguinis fonte rejectum certis in locis subsistit ac firmius inhærendo quiescit, tunc omnino aptum atque idoneum fit, ut partibus solidis aque ac fluidis vitium ac labem invehere possit.

§. III.

Statuimus itaque sedem morborum, eorumque causarum ferme omnium, in cavitatibus sive tubulis ac vasis, quæ humorum stasi & quieti commodissimum domicilium probent. Deprehendimus vero duplicis generis cavitates in corpore nostro: prioris sunt vasa sanguinea tam arteriosa, quam venosa, item lymphatica & tubuli ac meatus secretorii & excretorii. Posterioris ordinis sunt tubuli majoris amplitudinis, per quos universum illum canalem, qui ab œsophago usque ad anum exporrigitur, & œsophagum cum ventriculo ac omnibus annexis partibus comprehendit, intelligimus. In hisce itaque varii generis cavitatibus & canalibus omnium morborum causam residere, sedemque habere fixam, statuimus, id quod in sequentibus adstruere, omni cura ac studio allaborabimus.

§. IV.

Quia autem tenuissima & capillaria vascula facilius obstruuntur, & fixum humorem tenere possunt, hinc animadvertimus, morbos eorumque causas maxime ea viscera ac partes occupare, quæ ingenti vasculorum minimorum copia prædita sunt. Quæ propter hepar, lien & pulmones, propter vasorum minimorum copiam & faciliorem humorum stasim multis & magnis morbis scatent, atque obnoxia corpora faciunt. Glandulas esse ex variis membranis & innumeris vasculis sanguineis coagmentatas, subtilior anatome docet. Ex iis vero, quæ in corpore reperiuntur, nulla major est pancreas, quod ob minimos, quibus constat, ductus, perquam facile in obstructionem, indurationem etiam scirrhosam propensum est, eo quod non tam sanguis, quam lymphaticus vel serosus humor ibi firmiter compactus coalescat. Neque spongiosa uteri substantia a morborum sede

sede atque hospitio immunis est, siquidem copiosissima illa & varie intertexta ac implicata, quibus componitur, vasa, sanguinis & humorum stasibus perquam expedite patent. Eiusdem quoque naturæ sunt renes, qui nonnisi ex meris vasculis arteriosis & venosis, neque minus glandulis & ductibus urinariis compositi sunt, & ob id morbis ex obstructionibus & inflammationibus sedem præbent amplissimam.

§. V.

Quemadmodum vero vasa, quæ commodum morborum causis receptaculum atque hospitium præbent, variis modis ab hisce adficiuntur & læduntur: ita etiam diversæ speciei morbos procreant. Primo itaque, quando sanguineus humor firmiter arteriosis vasculis impactus hæret ac stasim concipit, inflammationes, quæ nunquam vacant febre acuta, eveniunt. Atque profecto plurimæ acutæ febres, quæ corpora nostra graviter & periculose adfligunt, plerumque & fere semper nobilioris cuiusdam partis vel visceris inflammationem pro causa & fundamento habent. Quando pulmones, uterus, renes, hepat inflammatione correpta sunt, semper adesse febrem noto notius est. At vero sæpenumero in acutis febribus, vel in ventriculo vel intestinis vel etiam mesenterio inflammationem consistere diligentior anatome eorum, qui ex acutis morbis fato functi sunt, nos clarius edocet. Neque continuus ille, qui adfligit, calor & celeritas sanguinis motus aliam agnoscit causam, quam quod in ipsis vasis sanguineis vitium hæreat, quo videlicet vitalis ille sanguinis circulus turbatur atque pervertitur, cum potius eæ febres, quæ certis periodis exacerbantur, & certo quoque tempore suas intermissiones habent, magis extra sanguinea vasa suam causam positam habeant & quidem secundum nostram sententiam, in ingenti illo alimentorum & excrementorum canali, sicut id infra clarius demonstrabimus.

§. VI.

Aliter vero sese res habet, quando in sanguineis vasis, arteriosis æque ac venosis, non firmam stasim sanguis & humor habet, sed ibi stagnans, nimium vasa implendo & distendendo, tardiori tantummodo motu & circulo per hæc ipsa fertur, & tum, pro differentia viscerum, differentes morbos fovet ac suscitatur. In pulmonibus enim ille infarctus respirationis difficultatem, pectoris oppressionem, asthma, suffocativum catarrhum, quando nempe serum separatur bronchia occupando, vel etiam hæmoptysin, si vasa disrumpit, ingenerat. In cordis thalamis ejusque majoribus vasis congestus & infarctus sanguis syncopen cordisque palpitationem parit. In hepatis vasculoso contextu sanguis si stagnat, vel in venæ portæ ramis hæret, cachexiam seu malum corporis habitum, depravatum faciei colorem, hæmorrhoidum fluxum & spastica quoque & flatulenta intestinorum pathemata inducit. Ingens vero in liene, corpore mere vasculoso, sanguinis infarctus facile melancholiam, scorbutum, vomitiones cruentas, sedes nigras sive atram bilem veterum, præsertim si diuturnior fuerit, producit. Uterina vasa a copioso sanguine nimium distracta vel enormia faciunt sanguinis menstrui profluvia vel in gravidis incompossibiles hæmorrhagias, quas abortio sequitur, proferunt. Si in renibus nimia vasorum emulgentium a sanguine est distensio, facilis ad mictionem cruentam est transitus.

§. VII.

Longe vero difficiliore & graviores morbi evadunt, quando viscera, præsertim glandulosa, humore tenaci ita impacta sunt, ut in duritiem & scirrhum abeant. Et hoc modo hepar affectum immedicabilem excludit hydropem cum ictero nigro. Pulmonum quædam portio in dura ac scirrhusa abiens tubercula, continuam & ferinam tussim facit, sique hæc tubercula exulcerationem subeunt, naturam instar canceri maligni serpentis acquirunt & integros lobos depascuntur, sique fit vera phthisis. Pancreas, more aliarum glandularum, facile abit in scirrhum, qui ad affectum chronicum hypochondriacum & continuam digestionis depravationem & perpetui acidi in ventriculi sinu præsentiam multum confert. Glandularum, quæ sunt in mesenterio, & plexuum glandulorum in intestinis intumescencia tabem & atrophiam fere semper post se trahit. Uterus in scirrhum abiens immedicabilem sterilitatem & irrevocabilem mensium fluxum accersit.

§. VIII.

Quodsi vero sanguis firmiter hærens in inflammationibus & febribus non resolvitur, tunc ordinaria via in abscessum vel corruptionem abit, unde post pulmonum inflammationem frequentissima sunt abscessus, vomicae, empyemata. Similiter in mesenterio frequentiores fiunt abscessus, neque minus renes atque uterus crebrius iis vitiis patent, rarius autem lien, hepar & pancreas, in purulentum tumorem, sed potius in fœdam transeunt corruptionem, quæ lethiferam hecticam perpetuo comitem habent: sicuti etiam grandiores abscessus hecticam febrem perpetuo fere progenerant.

§. IX.

Neque suprema corporis nostri regio silentio transmitti debet, siquidem & capitis & cerebri vasa multorum & gravium morborum domicilium constituisse observatum est. Quis enim ignorat, sanguinis in vasis meningum firmam & fixam statim febrem cum delirio, quod phrenitidis nomine venit, proferre. Si vero cerebri vasa nimis sanguine fuerint infarcta, mens turbatur, melancholia fit, sique serum secedit, affectus soporosi memoriæque ac sensuum abolitiones fiunt, sique vasa ista nimium distenta interne rumpuntur, funesta fit apoplexia. Nimia vero a stagnante sanguine sedens serofitas ad latus spinalis medullæ quodammodo descendens, excitat hemiplexiam, & ubi serum ad nervorum opticorum vel acusticorum principium defertur, gutta serena vel plenaria surditas exoritur.

§. X.

Quin cavitates in corpore nostro idoneam morborum sedem constituere, firma sit nostra adsertio & hactenus eos morbos, qui in sanguineis vasculis generantur, persecuti fuimus: sequitur jam, ut alias, quæ adhuc insunt corpori, cavitates, quibusnam morbis sedem subministrent, circumspiciamus. Deprehendimus vero primo in renibus manifestam & satis amplam ex membranis constructam cavitationem, quæ dicitur pelvis: hæc sequestratam urinam excipit & infundibuli vicem gerens in ureteres infundit. Hæc pelvis cum suis annexis siphunculis urinariis tartareo calculi coagulo maxime locum præbet, ubi etiam diu citra noxam quiete hæreere potest. Quandocunque vero per ureteres, velut genuinos urinæ canales nervæ exquisitæ sensibilis texturæ, viam ac iter affectat, truculenti isti cruciatus atque tormenta variis

stipata symptomatibus excitantur. Vesicæ vero urinariæ ampla admodum cavitas grandi calculo locum valde idoneum præbet, & quales ibi continuo attritu & urinæ fluxus impedimento torturas efficiat, res est notissima. Neque vesicæ felleæ cavitas a morborum sede immunis est, hæret enim ibi sæpissime calculus ingentis magnitudinis ex viscosa bile productus, gravissimorum & abstrusorum pathematum causa, siquidem miræ asthmaticæ anxietates miserrime & diu ægros adfligentes ex solo in vesica fellea calculo, pulmone alioque viscere infonte, inde visa fuerunt. Qua de re legi meretur *obs. II. Dec. I. A. IV. Miscell. Nat. Curiosor.* In ductibus vero cholocho vel etiam hepaticis, qui bilem ferunt, præsens obstructio cachexiam icteritiam alvique segnitiam suscitatur.

§. XI.

Quum nullus vero canalis in universo corpore amplior & capacior sit præter eum, qui alimenta recipit, coquit & utile ab inutiles separat, quo nomine ventriculum & omnia intestina complectimur, hinc quoque non mirum est morborum fertilissimam hunc esse sedem, quandoquidem hic diversissimæ naturæ alimenta, quæ variam temperiem, crasim & facultatem habent, complectitur. Deinde ex diligentiori anatomica contemplatione non ignotum est, ingentem diversorum & alienorum humorum colluviam ex universo corpore ibi confluere, qui partim fermentescibilis, corruptibilis, partim etiam acris causticæ vel etiam viscidæ mucidæ naturæ sunt, siquidem ductus biliarii sulphureas sanguinis calore quasi adustas & salino-alcalinas partes ingenti satis copia advehunt. Præterea tunica glandulosæ, quibus ventriculus constat & ductus, qui ex pancreate prodit, succum, qui fermentescibilis & agilissimæ naturæ est, salivalem suppeditant & glandularum acinî, crassioribus intestinis inhærentes, viscidum mucum sequestrant. Accedit, quod, si præter naturam perspiratio corporis fuerit suppressa, tenuissimæ excrementitiæ salino-sulphureæ sordes, quæ per summam cutem evehuntur, ad has vias converti ibique deponi soleant. Ex quo apparet, quantus sit in publico & solenni hoc emunctorio diversarum & valde nocentium sordium confluxus, quæ, si vigore motus peristaltici secundum naturam constituti bene & expedite ejiciuntur, sanum & incolume manet corpus, ubi vero hic motus languescit vel vitium capit, alvina excretionem non recte succedente, excrementa ibi remanent, & ex mora ac stagnatione per fermentationem & corruptionem pejora fiunt, & hoc modo multorum & magnorum morborum semina ac fomenta præparantur. Profecto enim nulla universi corporis pars tam solenne morborum causis ac mineris hospitium, quam prædictus canalis, præbet: nulli enim tantam confusionem & copiam materiarum diversæ & alienæ indolis, quam inibi offendes, neque ulla pars tot plicis, valvulis, flexuris, anfractibus, ubi impura colluvies hæreret possit, abundat, quam ventriculi & intestinorum cavitas, neque ulla pars in corpore tam sensibilis est naturæ & tanto commercio ac consensu cum capite & nervoso genere gaudet, præterquam dictus ex meris membranis nerveo-musculosis compositus canalis. Qua propter, qui in artis operibus feliciter rem agere volunt, ad primas has vias primario & principaliter semper attendant, summe necessarium est. Et quicumque hanc publicam & regiam sordium viam ac officinam morborum & causarum morbificarum non pernoscat, neque curationem suam eo dirigit, is profecto mirum a scopo suo aberrabit & auspiciato fine frustrabitur.

§. XII.

Nullum vero ex intestinis producendis morborum seminibus magis accommodatum est, quam duodenum, tum ob flexuram singularem, qua succenturiatum quasi ventriculum exprimit, tum ob concurrentes diversæ indolis succos; quare cum nos de hac nobili materia, quod videlicet duodenum plurimorum morborum sedes sit, dissertationem jam olim conscripserimus; nostrum jam erit, breviter & summatim ostendere, quinam præcipui morbi ibi agant suas radices & fixam habeant sedem. Et, ut à malignissimo morborum, pestilentia incipiamus, profecto hujus sævitia primo omnium in ventriculi ac duodeni sinu sese exserit. Nam virulentus ille contagii vapor aere subvectus & ore haustus, salivali sese admiscet latici & ad ventriculum dimittitur, ubi, quando humorum colluviam ad confermentationem putridam recipiendam aptam invenit, protinus ejus vis mirifice se multiplicat & cum sanguine & nervosis partibus communicata, gravissima infert symptomata. In quibusdam vero mox ventriculum vel intestina in inflammationem aut in funestum sphacelum conjicit. Illi enim, qui peste extinctos dissecuerunt, ut HELMONTIUS *Tract. de tumulo pestis* pag. 182. & DIEMERBROECKIUS *tract. de peste* escharas nigras se reperisse adfirmant. Nausea quoque, vomitiones & alvi fluxus ac summæ præcordiorum anxietates & inquietudines, quibus peste infecti adfliguntur, nervosæ ventriculi partes a veneno pati sufficienter testantur. Morbus quoque sic dictus Hungaricus & castrenses malignæ, petechiales & purpuratæ febres, ibi quoque nidum suum agnoscunt, qua de causa nullum præsentius a peritis practicis præsidium inventum fuit, quam statim, sub primo morbi insultu, datum emeticum, quo prima, ut dicunt, in herba, suffocetur malum, facta corruptorum humorum educatione. Quo sæpius effectum est, ut unico hoc auxilio & subjuncto alexipharmaco mali vehementia uno quasi ictu ectu extincta fuerit. Eo magis vero abstinendum a valentiori emetico est, ubi jam virus in universum sanguinem & nervosum genus fuerit dispersum, ne inflammationem faciat majorem.

§. XIII.

Deinceps febres sic dictæ ardentes, biliosæ seu cholicæ, tertianæ continuæ, sedem suam quoque hic habent fixam, siquidem præcordiorum cum ingenti siti ardores, anxietates, dorsi dolores, extremorum frigora, color faciei flavus, compressio diaphragmatis, convulsivæ tussis, vomitiones, inquietudines & alvi fluxiones, satis luculento hujus rei sunt documento. Etenim bilis tum acrior corrosiviorque facta, tum corrupta & fermentescens, recte harum febrium causa censetur, quare etiam jam olim ejusmodi præter naturam constituta bilis atro carbone notata fuit ab HIPPOCRATE *Lib. de nat. hum.* pag. 182. qui ita sentit: *Viridis bilis juxta hepar manens, ubi superebullit, humani corporis corruptio est ac noxius atque inutilis corporis humani inquilinus.* Et similis locus hac de re extat *Lib. de medic. veter.* pag. 34. qui hic est: *Cum bilis amara diffusa fuerit, statim anxietates & æstus & impotentia corpus occupant: verum ubi liberati fuerimus ab illa & repurgati aut sponte, aut per medicamentum, si modo tempestive quid ipsorum fiat, manifesto & a doloribus & a calore liberamur; quando autem tempore eodem elevata fuerit, & cruda est, meraca ac intemperata, nulla arte neque dolores neque febres sedaveris. Et quos quidem acuta acrisque ac æruginosa bilis adfligit, eos mox rabies & morsus viscerum ac pectoris corripit desperatio. Non sedantur autem hæc priusquam eadem expurgetur & aliis permisceatur.*

§. XIV.

§. XIV.

Quin imo febrium intermittantium omnis generis sedem in primis viis merito collocandam esse, non modo ex symptomatum, sed & curandi ratione confirmamur. Quotidianæ enim, tam continuæ, quam intermittentes, phlegmaticis & segnioribus naturis familiares & quæ circa noctem suas habent exacerbationes, cum tussi stomachali, turbulento somno, præcordiorum anxietate infestæ, sudoris ut plurimum & alvi fluxu terminantur. In tertiana exquisita & notha, simplici & duplici, dolor dorsi & capitis fixus, nausea, abdominis durities & flatulentia, præcordiorum anxietas, vomitus & alvi fluxus biliosus, urina flammea, color faciei flavescent a saburra biliosæ acris materiæ originem suam habet, qua de causa etiam non præstantius harum febrium auxilium est, quam in iis medicamentis, quæ acrimoniam bilis obtundunt, acorem temperant & quæ clementer vomitu aut vacuatione per alvum primas vias deplent. Solent ut plurimum hæ febres oriri æstate in hominibus cholericæ temperaturæ & qui vino & calidioribus alimentis nimium usi fuerunt, in iram proni sunt, præsertim, quando corpora auræ nocturnæ frigidiore commiserint, ventis maxime flantibus borealibus, unde, ob suppressam transpirationem, per summam cutem evacuari solitæ acres sulphuræ excrementitiæ sordes ad duodenum delatæ & corruptæ, fomitem febrium subministrant. Solent quoque ordinario & intermittantium & aliarum specierum febres cum alvo segniori & suppressa præcedente invadere, unde evenit, ut, contracta alvo, biliosum excrementum mora pejorem naturam induat. Ex hisce etiam jam facile deduci potest ratio, quare adstringentia, inter quæ etiam merito corticem chinæ referimus, intempestive, ante sufficientem primarum viarum vacuationem usurpata, tam graves noxas post se trahant, & vel recidivas vel lentas febres aliaque circa primam regionem spastica & flatulenta incommoda relinquant.

§. XV.

Lentæ, quæ dicuntur, febres certe non aliam habent originem, quam quod multi, crudi, biliosi & corrupti succi in duodeno tenuibusque intestinis restagant. Nam, segnescente duodeni tono, humores ingenti in copia ibi congeruntur & meretur hac de re notari egregius locus ex *DIEMERBROECKII anatom. pag. 53. quotidiana, inquit, anatomica sectiones docent, duodenum nonnunquam laxitate & amplitudine insigni præditum reperiri, a succis fermentaceis acrioribus in illud delabentibus, a quibus non solum ipsum valde distenditur, verum etiam molesti rugitus, magni dolores, lancinationes & summæ anxietates oriuntur.* Hæc biliosorum succorum congestio sæpe causa est lenti caloris, & quando ventriculus aggravatur alimentis, statim fit major anxietas, angustia præcordiorum, phlogosis, dolor circa scrobiculum cordis & circa latus dextrum, adest quoque cibi fastidium, capitis torpor, pertinax vigilia, somnus parvus. Quo casu nihil præsentius est, quam leni emetico primas vias vacuare, vel clementer alvum ducere, subjunctis roborantibus stomachicis: ita protinus symptomatum expirare visitur sævitia.

§. XVI.

Quartanam intermittantium esse contumacissimam & sæpius male curatam hydropem procreare, per experientiam compertum est; nihilominus, si mox in principio potentiora e mineralium profapia administrantur, quæ pituitam viscidam colliquant vel vo-

mitu aut fede eam evacuant, remedium aliquoties reiterando, non infelicem Medicus effectum sortietur. Quandocunque vero Medicus in hac & omni contumaciore intermittente venæsectionem, præsertim si copia adest crassi sanguinis, timet, nec viscera ab infarctu liberat, aut nimis cito febris motum adstringentibus reprimat, aut calidiora & acriora propinat, tunc utique labes viscerum, obstructio nempe, induratio, & exinde cachexia & hydrops extimescenda sunt.

§. XVII.

In genere quoque hic notandum est, quod omnes illi morbi, qui statuta tempora ac periodos servant, ut nonnulli dolores capitis, hemicrania, oculorum, dentium, colici, cardialgici, asthmata quoque, tussis, radicem suam in primis viis infixam habeant. Quare, qui has recte & feliciter adgredi velit, opus habet, ut primas vias respiciat & ibi causam morbi inquiret, eamque submovere allaboret. Videtur enim ob alia emunctoria occlusa & suppressas excretiones, excrementum per ductus glandulosos & bilarios in intestinis confluere, ubi, quando sufficiens certo tempore facta fuerit quantitas, causa morbifica incipit agere & nervosas partes offendere, unde ratio paroxysmorum petenda. Et videtur mihi china chinæ in cohibendis febrium accessionibus non alia ratione operari, quam quod paululum constringendo ductus, novi excrementi, quod sub ipsa febrili incandescencia in sanguine productum fuit, liberaliorem descensum ad intestina præpediat, & simul quoque constrictione crustæ villosæ, per quam tanquam colatorium omnia fluida abeunt ad sanguinem, impedit, quo minus materia febrilis in intestinis delitescens ad sanguinem & genus nervosum feratur, unde morbus quidem non curatur, sed duntaxat ejus impetus suspenditur. Quicunque vero Medicus vel ante vel post chinæ chinæ usum evacuationi sordium omnis generis, per convenientia emunctoria, simul studet, is feliciter procedit, tantum abest, ut quicquam noxæ postea a chinæ laudatissimo cortice timere debeat.

§. XVIII.

Tussis, quæ dicuntur ferinæ & diu satis homines exagitant, plerumque prima in regione suum quoque habent domicilium. Sæpissime accidit, ut ejusmodi tussis febribus, præsertim intermittentibus, sese adfocient, ubi omnia dulcia pectoralia viscidam materiam augendo plus obsunt, quam profunt. Sæpe quoque numero hæ tussis solent esse periodicæ, adeo, ut certis horis de die vel de nocte revertantur. Nam quando acidus stimulans in ventriculo residens fluor temperato, qui ex alimentis provenit, succo contemperatur, tussis quiescit, at, ubi hic alimentaris succus per chylosos ductus influit in sanguinem & ille corrosivus relinquitur, tunc tenerrimas membranas rursus adgreditur, & quia plexus pneumonicos & stomachales in consensum pertrahit, tussis fit violenta, sæpius cum vomitu & suffocationis metu, dum feri viscerum a sanguine in pulmonibus infarcto secedentis copia in bronchia cum vehementia descendit. Quare in hujusmodi periodica stomachali tussi, plus vice simplici, a liberaliori lapidum cancrorum cum balsamo nostro vitæ mixtorum dosi circa noctem oblata præsentissimum levamentum attulimus. Et quoniam tussis, experientia teste, a boreali frigore, austrinum aeris statum excipiente, in corporibus, præsertim plethoricis, & ubi ventriculus cruditate laborat, fiunt; veri videtur simillimum, acre serum, quod per cutis cribrum debebat excludi, non modo in asperam arteriam, sed etiam in ventriculi & intestinorum sensibiles membranas deferri & sic pertinacem tussis

tussem causari, quæ non aptiori quam diaphoretico præsidio cum anodyno mixto poterit expugnari.

§. XIX.

Sub catarrhis, catarrhalibus defluxionibus, gravedine, coryza, sæpissime simul primas vias pati, plura id comprobare videntur: borealis enim aer sub vere & autumno confestim oriens ut plurimum horum causa est, dum serum falsum ex habitu corporis non modo ad faucium & asperæ arteriæ, sed & ad tunicas glandulosas ventriculi & intestinorum repellit & levem quasi ibi moliendo inflammationem febrem catarrhalem facit. Solet quoque protinus sub catarrhi accessione tensa & dura fieri alvus; sique fortiori metallico cathartico irritetur, tunc gravissima non sine periculo symptomata, ut anxietates, inquietudines, cardialgiæ, nascuntur, sicuti id non semel in praxi adnotavimus. Et quod catarrhi etiam sæpius ex primis viis proveniant, inter alios RIVIERUS *Cent. I. obs. 66.* ostendit, dum inquit, *quoties alvus restitabat, catarrhus graviter adfligebat, & fluxu alvi redeunte catarrhus cessavit.*

§. XX.

Diarrhœam & dysenteriam, nec non cholericam passionem fomitem atque mineram suam non alio in loco, quam in primis viis habere, plura sunt, quæ id evincunt. Peccant ut plurimum acres, corrosivi, biliosi humores, qui intestinorum tunicas lancinando, exedendo, non modo violentas spasticas contractiones, sed & quod deterius est, inflammationes, sphacelationes & crassorum intestinorum exulcerationes efficiunt. Pessimum vero ex istis malum est cholera, cujus sedes potissimum est in ventriculo, cui nisi cito succurras medicina, funestam inducere inflammationem consuevit. Morbos hosce maxime autumnus profert, qui propter aeris inæqualitatem transpirationem lædit & varii generis adfert fructus, quorum non lotorum copia, cum aqua vel frigido potu, intestinorum tonum destruit, unde subsistentes & stagnantes, adfluente præsertim bile male se habente, summe causticam indolem recipiunt, laudatissimam vero opem mox in principio clemens emeticum ex radice Ipecacuanhæ vel benignum laxans ex pulvere rhabarbari cum absorbente datum adfert. Præterea, quæ demulcent & temperant acrimoniam, ut potus lactis calidi cum decocto cornu cervi mixtus, pulveres absorbentes, clysteres demulcentes, qui axungiam cervinam habent, præsentissimum allevamentum conferunt. Quod si vero nimis propere & præpostere per adstringentia ejusmodi alvi fluxio sistitur, a retenta humorum acrimonia in sanguinem & nervos penetrante, varia videbis producta pathemata, ut sunt singultus, præcordiorum anxietates, languores, tabes, epilepsiæ, pleuritides, ophthalmiæ, intestinorum spasmi ac flatulentia, quæ cuncta mala clarissime metastasin acris causticæ materiæ ad alia loca factam demonstrant.

§. XXI.

Plurimi, qui infantes excruciare solent, affectus, ut sunt graves dolores, tormina, flatulentia, convulsiones, febres, epilepsiæ non aliam habent originem, quam quod summus acor a stagnante lacte cum bile mixto in tenerrimis ventriculi & intestinorum partibus resideat, cujus testes non modo sunt viridescentes feces, sed & quod lintamina arrodant, quare omnia ea, quæ acrimoniam temperant & demulcent ac lenissime evacuant, celerem & exoptatam opem collocant. Quæ gravia mala iracundiæ affectus non profert, utpote qui non modo spasmo intestinis insensus est, verum etiam nimiam bilis copiam in duo-

deni sinum effundit, ubi, dum stagnat nec alvo nec vomitu ejicitur, multas anxietates, præcordiorum compressionem cum oris amarore, nausea vomendique conatu procreat; & quando spasmus ductus biliosus claudit, a bilis regurgitatione ad sanguinem icterus fit. Tali casu absorbentibus, rhabarbarinis & nitrosis nihil est præsentius. Nihil vero tunc pejus est, quam valentiora emetica vel purgantia dare, aut sudoriferis vel spirituosius corrupta acri bile succos & nervos contaminare. Alvi segnitiam ac tarditatem fecundam multarum & chronicarum passionum matrem esse, in praxi quotidiana res est notissima. Hujus rei non alia subest causa, quam quod retentæ impuriore hæ sordes, mora factæ alieniores benignos succos in corpore collutulent & capitis maxime morbos foveant.

§. XXII.

Indurata alvi scybala & pingua alimenta cum corrosivo acido in globulos redacta, si infarciunt tenuia intestina, quantas molestias, cruciatus, anxietates, languores, animi deliquia inferant, multiplici experientia fide confirmatum habemus. Quoniam vero magna consensio inter ventriculum, primas vias, & capitis nervosas partes viget, hinc vitiosi prima in regione residentes acres biliosi succi graviter caput offendere solent, siquidem apoplexiæ prima origo sæpissime est in ventriculo eique annexis intestinis; nam ubi hæc per colluviem humorum vitiosam spasmus patiuntur, tunc sanguis valide ad caput pellitur, qui in senili, debili & plethorico corpore facile subsistit, vasaque disrumpens effunditur. Quare HENRICUS AB HEER *Obs. 18.* optima ratione scribit: plurimi nostratium incurrunt apoplexiam ingluvie & comestationibus. Atque hic affectus bene notante CAROLO PISONE *in affect. serof. pag. 92.* aquilone crudeliter sæviante oritur, circa solstitium præsertim hybernium. Præcedit ut plurimum horripilatio cum lassitudine, urinis copiosis tenuibus & inclinatione ad vomitum, succedit postea faciei rubor, oblivio, stupor. Simili modo quoque paralyticus gignitur affectus, unde dicit RHASES se multos paralyticos ex diarrhœa superveniente curatos vidisse. Qua de causa ANGELUS SALA & LANGIUS non sine ratione in principio apoplexiæ emetica & quidem gillam vitrioli commendarunt. Illud certum est, quod quando apoplectici vomant, ut plurimum ingens saburra corruptorum usque ad nigredinem etiam humorum conspiciatur. Et HELMONTIUS *in Lib. de morb. sede* scribit, se apoplexiam recentem vomitu sæpius rebusque aromaticis curasse. Et Clar. WEDELIUS *in Patholog. dogmat. pag. 135.* testatur, tegularium Jenensem, qui in apoplexiam inciderat, adhibito vomitu plenissime fuisse restitutum.

§. XXIII.

Quid frequentius in praxi visitur, quam caput ex ventriculo male habere & dolere, si nempe ille acidorum succorum copia onustus est, vel si flatibus nimium fuerit distentus, quod probe MARTIANUS *in Hippocratem pag. 182.* notat: quod in iis, in quorum ventriculo cibi acecant, communiter caput doleat. Et scribit porro: mulieres variis symptomatibus conflictatas vomitu acetosorum e vestigio liberatas fuisse. Et BORELLUS *Cent. II. Obs. I.* testatur: vomitum bilis, quæ instar aquæ fortis ebulliebat, causam fuisse hemicraniam. Memorabilis est *observatio 27. Cent. I.* RIVERII: laborabat quidam tertiana & gravi capitis dolore pungente ac lancinante, dimidiam capitis partem occupante, vomitorio sumto ejecit libram unam bilis & rursus pari quantitate sequente accessione redacta, omnis capitis doloris plane expers reddebatur.

Vertigo

Vertigo quoque sapissime causam suam habet in primis viis, unde, qui hoc morbo premuntur, si jejuni sint, plerumque pessime se habent & nausea acoris amarities adest, cibis vero adsumtis affectus mitigatur, quare meminit PISO *de morbis ex sero pag. 69.* vertiginem a vomitu superveniente sublatam fuisse. Aurium tinnitum cum ventriculi imbecillitate, intestinorum murmure & acidorum succorum copia cancrorum lapides cum balsamo vitæ mixti & pillulæ nostræ balsamicæ sustulerunt. De convulsionibus, fomitem in primis viis habentibus, legi merentur *Miscell. Nat. Curios. Dec. III. A. III. Obs. 88.* In melancholico affectu peccat maxime faburra in ventriculo, unde nihil præsentius emeticis observavimus. Quod epilepsia ex ventriculo fiat, observationem habet MONTANUS *Cent. II. Conf. 19.*

§. XXIV.

Neque exigua est consensus ventriculi & primarum viarum cum media regione, ibique contentis pulmonibus atque corde. Ita TULPIUS *L. IV. C. 47.* auctor est: febrem syncopalem a bile porracea ortam fuisse. In asthma convulsivo periodico, nec non in ruffi convulsiva pulmones frequentissime, teste WILISIO *de morb. convuls. Cap. XII. pag. 140.* sani & integri reperiuntur, stagnante in stomacho mali causa. Inde RIVERIUS *in observat.* vomitoria eximie commendat. Sunt vero certa asthmatis stomachalis signa, quod ab adsumtis alimentis paroxysmi recrudescant & humoribus vitiosis vomitu rejectis compescantur. Ubi enim cruditates in flatu resolvuntur, diaphragma comprimitur, hinc in convulsivo asthma, quod lactentibus præsertim infantibus est peculiare, optimum in emetico est auxilium. Sanguinis per pulmones rejectioni, quam Græci hæmoptysin adpellant, occasionalem causam prima sapius regio exhibet, ubi enim bilis acris spasmos concitat, sanguis ex inferioribus & quidem dextro latere, ipso quasi sensu teste, ad pulmones adscendit, adeo, ut hypochondriis manu blande contactis pulsus percipiatur. Quare salutari certe consilio alvum clementer ducuntia, ut sunt pillulæ Beccherianæ correctæ, item sal prunellæ, quod bilis acrimoniam temperat, offeruntur. Cl. RIVERIUS *in Praxi Med. pag. 279.* purgans ex tamarindis, rhabarbaro, floribus spicæ, syrupo rosarum in affectu inveterato semel in septimana commendat. Et egregie scribit BALLONIUS *Lib. I. Epidem. pag. 62.* sæpe expurgata colluvie ex primis viis occasio rejectionis sanguinis præripitur. Trahit quoque materia, quæ in vitio est & in ventriculo residet, diaphragma in consensum, unde singultus fit, qui, observante RIVERO *in Praxi pag. 120.* contumacissimus curatus emetico est, immensa quantitate bilis æruginosæ exclusa.

§. XXV.

Progredimur jam ad affectum primis viis maxime proprium, qui misere sæpe perpetuis spasmis ac flatulentis ægros exercet & vocari solet hypochondriacus, apud foeminas hystericus. Quoniam magna consensus ventriculi & intestinorum cum genere nervoso est, hinc truculenti ibi residentes spasmi & flatu etiam in dissitas partes efficaciam suam exserunt. Et tametsi a sanguine in vasis mesaraicis restagnante, neque per hæmorrhoides evacuato, plura convulsiva pathemata etiam fiant, quæ sunt transitoria, tamen ille affectus, qui corpora variis symptomatibus, flatibus, ructibus, diaphragmatis compressionibus, melancholia, alvi tarditate, phlogosi, anxietate continuo exercere solet, causam suam potissimam habet in vitio ventriculi & intestinorum tono, unde alvus non bene respondet, contenta in

ventriculi & intestinorum cavitate subsistunt, acescunt, corrumpuntur, neque per crustam villosam vitio affectam decenti modo fit chyli separatio & succorum lymphaticorum fementescibilium infusio. Natales suos hic affectus plerumque accipit a febre vel etiam dysenteria male curata, a purgantium, emeticorum, frigidorum & acidorum abusu, a nimia venere, moerore, vita sedentaria, opiatorum & adstringentium noxa, adoritur maxime corpora imbecillia a morbo antecedenti reddita. Perpetua adest in primis viis & acidorum, & viscidorum, biliosorum humorum exsuperantia. Ex veteribus optime hunc affectum *Diocles apud GALENUM Lib. III. loc. affect.* descripsit. Oritur, inquit, a ventriculo morbus, qui flatuosus dicitur, quem copiosum sputum comitatur, maxime sumto cibo coctum difficili, item ructus, flatu, æstus in hypochondriis, interdum ventriculi dolores vehementes, qui nonnullis ad dorsum usque procedunt, concoctis cibis mitescunt, mox aliis ingestis recrudescunt, interdum a coena molesta evomunt acida acria phlegmata, ut ab eis dentes torpedine afficiantur. Neque vero melius præsidium, quam in aquarum mineralium acidularum & præsertim thermarum usu reperitur, quippe si ulla, certe hæc motum intestinorum peristalticum turbatum & perversum restitunt, obstructions referant, intestinorum canalem eluunt & ab omnis generis quisquiliis & fordibus eum liberant. Si viscera labein acceperunt, præsertim pancreas, quod plerumque scirrhum deprehenditur, malum fit inveteratum & immedicabile, unice solamen a lenioribus laxantibus & temperantibus accipiens. Ceterum mirifice mihi hac in re placuit MESUÆ monitum, qui scribit: In ægritudine melancholica non bis, non semel, sed per intervalla facienda est evacuatio, ita ut natura regat evacuationem, non evacuatio naturam.

§. XXVI.

Postremo neque hic prætereundum est, quod morbi, imo febres, quæ cum exanthematibus critico motu expulsi sunt, stabilem & fixam suam sedem maxime in prima regione habeant. Et primo, quod attinet ad erysipelas, illud circa æquinoctia, vere & autumnis, sapius in cacoehymicis & cachecticis obvenire solet, facile autem venæsectio ac purgatio avertere poterat; incipit sapissime cum magna horripilatione ac vomitu bilioso. Purpura, tam rubra, quam alba nidum suum, nostra sententia, plerumque prima in regione habet. Solet ut plurimum morbis acutis, item morbis puerperarum, variolis, morbillis, si diutius clausa alvus fuit nec bene sudor fluit, supervenire. Foeminis magis infecta est, quam viris, ob ingentes cruditates, quas ex fructuum horarum, acidorum & lactis abusu, item si menses deficiunt, sibi contrahunt. Quandoque alvo, vel ex morbo vel alia de causa languescente, ulterius hæc sordes corrumpuntur & ad sanguinem abeunt, primo genus nervosum infestando ingentes ad syncopen usque faciunt anxietates, donec materia calore aucto & poris apertis ad habitum corporis propellatur. Præcaveri hoc malum potest convenienti alvi ductione, vel ipsa crebrius per clysteres evacuata, & nihil præsentius est decoctis temperantibus & pulveribus acrimoniam corrigentibus blandisque diaphoreticis.

§. XXVII.

Variolarum & morbillorum morbus iis anni temporibus, ubi magna aeris est inæqualitas, ubi tempestati diu austrina borealis frigida supervenit, & quando

catarrhi, rheumatismi, arthritides variæque fluxiones corpus exercent, nasci solet. Neque videtur horum morborum alia origo, quam quod sordes, per transpirationem emitti solitæ, retrogrado motu in primam regionem cum lymphæ & bile projectæ fuerint, ubi anxietates, in quibusdam vomitus, etiam alvi fluxus, capitis & dorsi dolorem, hæc enim signa sunt variolarum, proritare solent. Tandem circa tertium & quartum diem, alvo constricta & clausa, delata in sanguinem materia peccans febrili & critico motu, salutariter in summam cutem ejicitur. Morbi vero & symptomatum vehementia atque periculum unice in copia & qualitate harum sordium, nec non dispositione sanguinis ad has corrigendas ac temperandas quærenda est. Igitur illi Medici non male agunt, qui mox inter initia materiæ variolarum minuendæ aut temperandæ per leniora emetica & laxantia contemperare student, quo fit, ut morbus succedat mitior, lenioribus symptomatibus stipatus. Nam si multas offenderit sordes & cruditates in primis viis, semper pejoris moris fit & partim pustularum majore copia, partim difficiliore earum suppuratione, plus minus infestus est. Plures hunc in finem, non sine ratione & fructu mercurium dulcem cum extracto rhabarbari & ejus syrupo mixtum mirifice commendare solent.

§. XXVIII.

Quanta incommoda atque molestias ardentes vesiculæ & ulcuscula, quæ Græcis aphtharum nomine veniunt, in ore & faucibus, non modo penes infantes, sed etiam adultos, præsertim hypochondriacos & scorbuticos concitent, hoc in praxi frequentissime animadvertitur. Neque ulla constantem opem externa mitigantia promittunt. Horum vero ulcusculorum fomitem primis in viis hære, vel exinde cognoscitur, quod acrimoniam temperantia & quæ blande ac successive eam educunt, omnibus remediorum generibus sint superiora. Simili ratione acres in palato & faucibus consistentes inflammationes, quæ scorbuticos, præsertim vere & autumnæ, exercere solent, vel aliis acutis superveniunt, protinus alvo vel per clysteres vel per mannata & rhabarbarina laxato mitescunt. Scabies, præsertim humida, & quæcunque cutis texturam defœdare solet exulceratio, item crusta infantum lactea, capitisque tinea identidem ex cruditatibus & pessimæ naturæ humoribus ibi stagnantibus admodum fovetur: solent enim laborantes plerumque cum magna aviditate cibos adsumere, qui, quo magis fermentescibiles sunt, ut fructus horæi, hoc impuriore, acidos & vappescentes succos in sanguinis & humorum massam invehunt, qui postea, ad glandulas & meatus subcutaneos delati & subsistentes fœdam exulcerationem faciunt. Optimum itaque & antiquissimum horum affectuum auxilium est in diligenti corporis purgatione & scorborum acrimonia delinienda.

§. XXIX.

Arthricos & podagricos consueti insultus vere & autumnæ adoriuntur & febrili quadam sanguinis exagitatione præcedente, tartareum acre serum ad articulorum membranas transmittitur. Incipit morbus plerumque a languore & lassitudine corporis, appetitu aucto, nausea & horripilatione. Causa itidem est transpiratio prohibita & ex hac proveniens impurarum sordium ad primas vias confluxus, quæ alvo tardiori facta propter stricturam, quam acris materia peccans tenerrimi sensus membranis infert, subsistentes & postea in sanguinem delatæ febrili motu ad habitum corporis ablegan-

tur, atque ubi materia ad sensu præditas articulorum membranas delata est, acerbos dolores & febrem de novo suscitatur. Quicumque itaque hunc molestissimum affectum & dolorum sævitiam mitigare exoptat, is maxime omnium primarum viarum rationem habeat, necesse est. Dicit enim vix potest, quantum utilitatis & fructus a temperantibus & alvum ducentibus, nec non emeticis, statim invadente morbo subministratis expectari possit. Et veteres quoque eum in finem vomitoriorum usum mirifice laudarunt. Ita HILDANUS *Cent. VI. Obs. 84.* scribit vomitorium sub principium podagræ datum omnem dolorem absumpsisse. Et ALPINUS in *Medicina Ægyptior. pag. 120.* animadvertit, plures se vidisse, qui cum a podagræ calculique doloribus excruciatii fuissent, usu vomitorii crebro egregie adjuti fuerint. Et scite hanc in rem diligentissimus Hippocratis commentator MARTIANUS scribit: in arthriticis doloribus, ob acorem in ventriculo peccantem, a doloribus correptos memini: qui ab iisdem liberati vel levati fuerunt, ubi acida evomuisse. Et notatu dignissima sunt, quæ BAGLIVUS in *Praxi medica L. I. pag. 114.* scribit: ischiade correptis paucis elapsis horis a prima doloris invasione, si purgans medicamentum dederis, ager mox sanabitur; non ita vero, si morbus ad plures dies & menses fuerit protractus. Ad rheumaticos dolores compescendos RIVIERUS mercurium dulcem, cum resina jalappæ in pillulas redactum, valde commendat. Quadratur quoque huc pulcher locus apud HIPPOCRATEM *Prædict. II. §. 44.* dolores in humeris oborientes, qui quidem ad manus descendunt, torporesque ac dolores inducunt: his abscessus non succedunt, verum nigram bilem vomentes sanantur.

§. XXX.

Prævisis jam & perspectis ferme omnibus iis morbis, qui suam nocentem causam prima in regione positam habent, ut moneamus adhuc necessarium est, pessimo consilio Medicos procedere, qui, si primæ viæ sentina & confluxu ac copia impurorum humorum scatent, adstringentia, opiata, refrigerantia vel etiam sudorifera suadent, atque in usum trahunt. Et maxime omnium calida sudorifera, attenuando materiam nocentem eamque in minimos nervorum porulos impellendo, graves noxas adferunt. Qua de causâ etiam balnea tunc magnum detrimentum corpori adfricant. Extat hac de re elegans locus apud MARTIANUM *Lib. VII. pag. 375.* & ita se habet: *Succi in ventriculo corrupti tantæ pravitatis aliquando participes fiunt, ut veneni facultatem imitentur. Balnei incongruus usus succos in ventriculo corruptos attenuavit & diffudit, unde dolor pectoris & sopor, delirium.*

§. XXXI.


Ex hisce jam dictis & adductis clarissime intelligi posse arbitror, primas utique vias esse scaturiginem & fontem plurimorum morborum, ob plures supra rationes adductas. Atque adeo, qui summam praxeos medicæ per crebras exercitationes & attentam observationem atque experientiam recte tenent, ii optime norunt, præcipuum curationis momentum, fere in omnibus morbis, ut prima regio observetur & expurgetur, consistere, & nonnulli certe ut singulare arcanum hanc methodum primis viis bene prospiciendi reservant. Sed quam pauci doctores medici & practici sint, qui morborum causas recte intelligunt, aut earum sedem pernoscunt, vel ex eo intelligitur, quum in eorum scriptis & dictis fere vix unquam primarum

viarum mentio reperiatur. Unicum vero ex omnibus novi RIVERIUM, & ex veteribus MARTIANUM & BALLONIUM, qui primarum viarum in morborum curatione rationem attendunt. Ex deductis quoque liquidissime constat, quod utique in morborum causis intemperies & qualitates perversæ salinæ, acres, causticæ vel etiam sulphureæ & putridæ ac corruptivæ potentia, maximum & vere principem habeant locum, quod illi attendere debent, qui ex pathologia & praxi medica eas fere expellere contendunt. Profecto ad scientiam & conscientiam omnium solidorum & medicorum & practicum provoco, si per artem in morbis curandis solidi quid aut notabilis effectus præstari & demonstrari debet, annon a venæ-sectione, dein a primarum viarum aut per vomitum, aut per alvum evacuatione, tunc diaphoresi ac demum humorum contemperatione id fieri debeat. Et quicumque his præstantissimis remediorum generibus convenienti tempore, quantitate, ordine, regimi-

ne recte uti scit; is non facile a felici & auspiciato scopo aberravit.

§. XXXII.

Sequitur quoque ex hisce omnibus propositis, quod qui integram & prosperam valetudinem vult conservare & corpus a morbis avertere: is bene attendere debeat ad id, quomodo prima se habeat regio, & alvina excretio recte ac ordine succedat. Quæ, si ullum, certe hoc maximum est futuri morbi signum. Nam omnium fere morborum initia ex alvo non bene constituta cognoscuntur. Ad primas autem vias ab omni impuritate liberas servandas non modo leniora emetica, laxantia, sed & deambulationes, laboriosiores motiones, nec non abstinentia a cibis diuturnior mirifice conferunt. Si quidem nimia ab alimentis repletio & retardatæ exinde excretiones primas vias sordium copia onerant atque accumulunt.



DISSERTATIO MEDICA

D E

MORBORUM TRANSMUTATIONE.

Primum edita Anno 1716.

§. I.



STENDIMUS alibi, quomodo morbi ex morbis generentur, cum videlicet in partibus, ubi sedem posuerunt & tyrannidem suam exercent, læsionem atque debilitatem relinquunt, quæ postea, concurrentibus aliis causis, ad novum suscitandum morbum parata ac prompta est. Jam vero noster labor in eo erit occupatus, ut exponamus, quemadmodum unus morbus in alterum, qui plerumque deterioris indolis ac conditionis est, abeat ac transmutetur. Quid enim in artis nostræ exercitio familiaris occurrit? quam quod, priori morbo quiescente, alius in ejus locum succedat, materia ex una parte in aliam transmutata. Nec quicquam attentiori observatione magis deprehenditur, quam quod ex morbo benigno malignus evadat, idque frequentissime vel per imprudentem medicationem vel erratum in diætâ & præscripto vivendi ordine commissum. Idcirco non parum utilitatis ac fructus hæc tractatio in praxi medica nobis pollicetur, quia, quando nota erit vera & proxima morbi antecedentis causa, notam pariter illius, qui eundem subsequitur, originem faciet. Sicuti vero causarum inquisitio ad veras curandi rationes & indicationes planam sternit viam: ita etiam perspectis causis morborum, qui alios excipiunt, facilior utique erit tam antevertendi, quam tollendi eos via ac methodus. Prius vero quam ad rem ipsam institutique rationem propius accedamus, non alienum, sed maxime e re fore judico, differentiam, qua morborum transmutatio ab eorum successione

Frid. Hoffmanni Oper. Supplem. II.

distet, brevibus exponere. Nostra sic fert sententia: quando unus morbus nascitur ex altero, id accidit, vel quod causæ morbosæ reliquæ adhuc in corpore consistunt, ob denegatam ejus sufficientem exclusionem, vel quod prior morbus, in fluidis pariter ac in solidis partibus, ejusmodi vitium ac læsionem reliquerit, quæ novo morbo prognerando materiam atque occasionem subministrat. Ubi vero unus morbus in aliam transmutatur, tunc integra adhuc materia peccans in corporis sphaera subsistit & tantummodo ab uno loco, maxime exteriori, in alterum interiorum transportatur, ut ibi tragœdiam suam ludat. Solent vero, plerumque transmutati sic morbi pejorem ac pertinaciorum naturam induere eoque formidinis plus ac periculi habere. Nam primitivi illi affectus & longe promptius ad salutem succedunt & magis obediunt sunt; qui vero alium habitum vel schema acceperunt, rebelles sæpe fiunt & plane contrarium ingenium adipiscuntur & hinc majori vehementia sese exerunt. Prudentis itaque Medici est, hæc omnia probe considerare & qua decet solertia, perniciosam hanc transmutationem, convenienti auxilio & consilio, præcavere. Et hoc est, quod, sub divino favore, in præsentis docere suscepimus.

§. II.

Primo vero omnium, & antequam in ulteriorem hujus tractationis progressum descendamus, ad majorem rei dilucidationem fore judico, breviter strictimque causas ac fundamentum transmutationis morborum indagare atque præmittere, ut appareat, cur & quomodo unus morbus in alterum transfiguretur. In universum vero res ita sese habet. Quandocumque corpus nostrum

Pp

à

à morbi vehementia vindicatur, necesse est, ut materia, quæ in vitio est & quæ tantas turbas ac læsiones in tota corporis œconomia effecit, penitus amoveatur, quod fit, quando ejus qualitas aliena & pernicialis in blandam & naturæ amicam convertitur, vel quando penitus ex corpore foras excluditur. Quemadmodum vero magis ardua ac difficilior res est, materiam morbi malignam blandam naturæque convenientem reddere: ita potius provida natura sapientissimo consilio illud, quod perniciem minatur & molestum est, per varia loca & emunctoria, pro differente materiæ peccantis natura, fecernit atque demum ejicit. Et hoc præstat maxime per hæmorrhagias, per evacuationes alvinas, per sudorem, aut copiosum urinæ & feri excrementitii e variis locis glandulosis profluvium. Quia vero materia peccans sæpius ejus est naturæ, ut minus apte per poros & canales cutis excretorios secedere & excerni possit: hinc alicubi hæret, sicque varia in habitu corporis ejusque cortice exanthemata vel ulcera nascuntur, aut, si materia ad ligamenta tendinosa vel membranas articulorum amandatur, dolores & tumores in iis proferuntur. Igitur sapiens & provida natura semper laborat, inque perpetuo est motu quo ab interioribus, ubi vita potissimum residet, ad exteriora & ad corporis ambitum materiam, & qualitate & quantitate peccantem, tanquam alienam atque inimicam, propulset atque depellat, ut vita duret & corpus in se corruptibilissimum ab omni corruptione ac detrimento immune præstetur. Siquidem sapientissimi, quod in structura corporis nostri panditur & visitur, artificii scopus ac finis maxime eo collineat, ut purum ab impuro, & omne, quod naturæ adversum est, a vitali consortio separetur, excludatur & foras eliminetur. Inque eo etiam virtus corporis nostri medicatrix, qua sua sponte natura sæpius morbos curat, consistit, ut motus in se & sua natura mali & ab ordine & regula naturali deflectentes, id est morbofi iique auctiores & intensiores facti, ut sunt febriles passivi, ad ipsam causam, a qua proficiuntur jugulandam & expugnandam inserviant. Quapropter princeps & præcipua medentis ratio ac intentio in eo consistit, ut motus præternaturales, qui in salutem corporis vel in ejus perniciem & destructionem vergunt, probe inter se distinguat, illos convenienti ratione adjuvando, promovendo & dirigendo, hos vero sistendo & auferendo.

§. III.

Morborum igitur transmutatio, quæ plerumque fit in deterius, ab eo maxime dependet, quando salutaris naturæ motus atque expulsio materiæ exitiosæ, & quæ in vitio est, imprudenter sistitur, ejusque evacuatio, maxime per emunctoria & extrema corporis, cohibetur, atque adeo ab extremis ad interiora aliaque corporis loca repellitur, ubi ut plurimum tyrannidem majori cum vitæ discrimine exercet. Quod si enim in externis partibus hærens, dolorem, tumorem vel inflammationem movet, multo majori periculo id efficiet in partibus internis. Omnis itaque morborum pessima transmutatio interceptam materiæ peccantis exclusionem pro causa agnoscit, sive id ex virium defectu, sive ex malo ægrotantis regimine, aut Medici imperitia fiat. Quibus vero modis mutua morborum inter se conversio & transfiguratio perficiatur, & quinam exinde morbus alterum excipiat & quæ mala ac symptomata a cohibita excrementorum & superfluum humorum evacuatione excitentur, res erit non perfunctoriæ aut inanis, sed maxime utilis indaginis.

§. IV.

Sicuti vero omnis inimica naturæ, & quæ morbis invchendis apta est, materia vel mole seu quantitate vel textura sive intemperie & qualitate perversa infesta est: ita evacuatio, quæ in morbis salutariter fit, vel quantitatem nimiam vel qualitatem materiæ insensam respicit. Quare sanguinis per nares, menses aut hæmorrhoides evacuatio plerumque a nimia & molesta sanguinis copia fit, feri vero præter modum biliosi viscidæ copia non male, sed salutariter per alvinam regionem ducitur; at serum falsum & tartareum redundans per urinarias vias non incongrue fertur atque eliminatur. Pariter feri falsi vel viscidæ copia per varia glandulosa loca in faucibus, in arteria aspera, in naribus, non sine fructu atque allevatione, educitur. Materia vero morbi, quæ tenuitate atque agilitate & majori ad nocendum proclivitate instructa est, per cutis glandulosos tubulos ac poros magis solet amandari. Jam vero quos morbos & quæ mala singulæ hæ excrementorum evacuationes post se trahant, & auctoritate & experientia gravissimorum Medicorum adstruere & rationum momentis corroborare allaborabimus. Quia vero nihil æque motibus vitalibus perennandis, & constanti sanitatis negotio adversum est, quam nimia sanguinis & humorum copia, eo, quod cordis fibrarum & arteriarum elateri, adeoque expeditiori sanguinis motui, admodum resistat: hinc sapienti naturæ consilio fit ut in sexu sequiori, qui plurimum sanguinis generat, singulis mensibus superflui per uteri vasa fiat evacuatio. In ætate puerili, si quid nimium est sanguinis, non sine magno sanitatis emolumento, certis temporibus per nares ferri solet. In adultioribus vero per sedis venas, quas Græci hæmorrhoides vocant, statis periodis evacuari solet: quæ solennes sanguinis vacationes instar medicinæ sunt corpori nostro, quia meliorem & salubriorem, in præservandi, atque curandi negotio, omni medicina præstant effectum, adeo, ut ex sanguineæ excretionis convenienti successu ac ordine corporis nostri vigor ac sanitas non immerito æstimari debeat. Atque adeo facile patet, saluberrimis hisce evacuationibus cohibitis gravissimos propullulare morbos.

§. V.

Equidem dubium ex hisce nasci posse, non diffiteor, quare, cum animus nobis sit, de mutua transmutatione morborum agere, hos naturæ salutares motus inter morborum genera referamus. At vero ut huic non ineptæ dubitationi succurramus, dicimus, hæmorrhagiarum species, quæ à causa proficiuntur interna & saluberrimæ sunt, non fieri sine status secundum naturam mutatione & motuum qui vitæ & sanitati præfunt, turbatione: hinc jure meritoque ad morbos, quamvis leviores, reduci debere arbitror. Annon enim feminæ ante mensium eruptionem, viri ante hæmorrhoidale profluvium male se habent, dum de torpore & languore totius corporis, præsertim partium externarum, & dolore in dorso & circa lumbos, satis sæpius molesto, conqueruntur? Præterea, quid frequentius visitur, quam quod ante imminentem hæmorrhoidalem vel mensium fluxum partes externæ frigeant, appetitus dejiciatur ac ingentes anxietates & flatulentia præcordia occupent? Hæc omnia autem apparent & fiunt acerbiora si corporis vires non sufficiunt sanguini superfluo evacuando. Hinc utique omnes illi, qui menses vel hæmorrhoides experiuntur, morbum quendam, licet leniorem, patiuntur.

§. VI.

§. VI.

Hicce discussis, ordinis ratio jam poscere videtur, ut, quinam morbi narium solennem hæmorrhagiam suppressam consequi soleant, indagemus. Solent vero exinde non modo gravissimi capitis dolores, sed & apoplexiæ lethales & paralytici subsequi, sicuti tale exemplum prostat apud HILDANUM in *Obs. XI. Cent. III.* ubi post mortem sanguis per os & nares excretus fuit. Neque ratio est difficilis: nam sicuti in omni spontanea sanguinis effusione, ita quoque in ea, quæ fit per nares, sanguis, ob spasmus ingentem in lumbis & mesenterio consistentem, fertur atque urgetur ad caput, cujus vasa, teste tumore, rubore & forti pullatione, nimium infarciuntur. Quodsi itaque per extrema narium oscula nimium congesto sanguini exitus præcluditur: tunc non potest aliter fieri, quin in totius capitis vasis stagnet, & membranas capitis ac cerebri distendendo, dolorum faces accendat. Et hinc patet jam ratio, quare sanguinis e naribus profusio gravem capitis dolorem solvat, sicuti magnus noster HIPPOCRATES perite *Sect. IV. Aph. 10.* pronuntiat, vel vena in fronte secta juvet. *vid. Aph. 68. Sect. V.* Ubi vero sanguis in vasis cerebri nimium stagnans fluidi nervei secretionem atque influxum intercipit, apoplexia, minus tamen funesta, sequitur, quæ celeri sectionis venæ administratione protinus decremenda capit, vel plane discutitur. Ubi illud notabile, quod, si paulo diutius hoc præstantissimum præsidium differatur, paralytici vel insignis memoriæ ac capitis debilitas remaneat, quia, quo diutius sanguis in vasis cerebri congestus stagnat, eo facilius serositates suas, per venarum poros, in substantiam cerebri & sensorium principia transmittit. Adscivit nos non ita pridem in consilium vir honestissimus aliquot abhinc milliaribus degens, antea sanus, vegetus ac robustus, quinquaginta aliquot annorum, temperaturæ sanguineæ, qui in primis ætatis annis liberales sanguinis profusiones expertus est, postea singulis annis semel vel bis sanguinem emitti curavit, præsentis vero anno omisit, hinc circa exitum Martii, corporis facta refrigeratione & difficiliore solutionis cibis repleto ventriculo, præter omnem opinionem sensu & motu privatur, nullius rei conscius, elapso duarum horarum spatio sanguis e vena brachii, magna apertura facta, emittitur, unde mox ad se redit & paulatim loquelam sensum ac motum recipit, capitis vero ingentem imbecillitatem & memoriæ defectum ab hoc insultu passus est, adeo, ut ex moderato etiam vini usu valde offendatur. Quodsi vero a sanguine intus congesto subtiliora plexus choroidei vascula dirumpuntur, propter extravasationem immedicabilem, funesta fit apoplexia. In pueris vel etiam viris plethoricis, sanguinis e naribus fluxui adfuetis, si is emanat, diuturnas oculorum defluxiones ob nimium feri factum secessum inque has partes descensum, annotavimus. Quandoque, cum violenter narium hæmorrhagia cohibetur, sanguinis impetus in thoracem fertur, non sine suffocationis periculo, quale exemplum in GABELCHOVERO *Cent. V. Curat. 37.* legitur.

§. VII.

Mensium in foeminis profluvium quibuscunque ex causis suppressum, facile in alias, maxime insuetas hæmorrhagias, transmutatur, quemadmodum ejusmodi exempla ac observationes passim ab Auctoribus memoriæ proditæ sunt. Ita a mensium regurgitatione sanguinem ex auribus critice excretum HORSTIUS in *præfatione ad part. II. Obs. SCHENCKII Lib. IV. pag. 698.* ex gingivis dentifve alveo HOLLERIUS *Comment. II. Sect. II. Lib. II. §. 18.* COAC. & Frid. Hoffmanni *Oper. Supplem. II.*

JOANNES RHODIUS *Cent. III. obs. 51.* annotarunt. Simili ratione sanguinem, qui per uterum ferri debebat, ex ventriculi venis per vomitum HIPPOCRATES *Lib. I. de morbis §. 32.* FORESTUS *Lib. XVI. obs. 25.* PANAROLUS *Pentecost. I. Obs. VI.* RODERICUS A CASTRO *de morbis mulierum L. I. Cap. III.* HOECHSTETTERUS in *Obs. D. II. Cas. VI.* STALPART VAN DER WIEL *Cent. II. obs. 17.* ejectum fuisse scripto reliquerunt. Neque novum est, menstruum sanguinem, majori vehementia ad pulmones delatum, per eadem vasa dilacerata, tussi rejici, sicuti ejusmodi exempla HOLLERIUS *Lib. I. de morb. intern. Cap. 29.* RHODIUS *Cent. III. obs. 30.* SALMUTHUS *Cent. II. obs. 18.* narrant. Quisque vero peritior Medicorum redundantis sanguinis, per hæc minus convenientia loca, exclusionem non adeo tutam, sed majori periculo ac difficultati expositam esse, haud difficulter judicabit. Quo enim pars corporis nobilior & vitæ perficiendæ aptior ac magis necessaria, eo gravior quoque ejus læsio est, & plus periculi alit, quare, si pulmones a sanguine stagnante labem accipiunt, facile phthisis nascitur, vel quando inter ventriculi sensibilissimas membranas forte subsistit, & ibi corrumpitur aut coagulatur, periculosa ejus inflammatio aut hectica febris emergit. Præterea in feminis annosioribus, quando cessat mensium per uterum excretio, vel in viris, si consuetæ hæmorrhoides non amplius fluunt, cruenta non raro mixtio oboritur, interdum non insalubris. Quare non sine ratione hunc sanguinis fluxum renum hæmorrhoides MERCURIALIS in *Praxi Lib. III. Cap. 31.* SENNERTUS in *Instit. Lib. III. P. I. S. III. cap. V.* appellarunt. Prostant exempla, ubi in senibus sanguis, singulis mensium intervallis, cum urina, partim fluidus, partim grumofus, redditus fuit, qui vel equitatione vel vini generosi usu facile promovebatur.

§. VIII.

In genere vero tenendum est, ut caute & circumspicte tractentur, nec temere ac turbulenter adstringentibus vel aliis modis cohibeantur, nisi funestos effectus inde velimus expectare. Nam sicuti illa sanguinis evacuatio, quæ per partes externas, nares, menses, ani venas, ordinario naturæ cursu fit, circumspicitionem in diætâ ac vitæ regimine, neque minus in medendo desiderat, multo majori opus erit cautione, ubi internæ & principales partes sanguinis effusione adfliguntur. Consultius est omnibus viribus eo anniti, ut in sanguinis vomitu menses restituantur, hinc perite ac verissime scribit HIPPOCRATES *Sect. V. aph. 32.* mulieri sanguinem evomenti, mensuris erumpentibus, vomendi finis est. Apparet quoque ex eo, quam parum expediat & res non periculi expers sit, circa tempus mensium consuetum vomitorium, præsertim vehementius, exhibere, vidimus exinde vomitum cruentum & mortem. Apparet quoque porro in mensium suppressione cautissime, vel prorsus non, præscribenda esse emetica, præsertim valentiora, quod facile ad hanc nobilissimam partem sanguinis impetum trahunt. Simili ratione periculosum est, retentis ex refrigeratione abdominis mensibus, fortissime corpus movere, vociferari aut irasci, præsertim in corporibus macilentioribus & quæ vasa sanguine turgida habent, in quibus facile hæmoptysis potest excitari, multo magis medicamentis pellentibus iisque calidioribus ad mensium fluxum restituendum administratis. Memorabilis locus, quod mensium retentio in hæmoptysin & phthisin abeat, existat in ALPINI *medicina method. pag. 273.* qui ita scribit: ob immoderatam sanguinis evacuationem, vel diuturnum morbum menses

supprimuntur; quod, si diu durat, mulieres in graves morbos incidunt, aliqua in sputum sanguinis, ex quo deinceps phthisi intereunt, quod proximo anno Aemilia, nobili virgini, accidit, cui, cum menstruae purgationes ex mœrore assiduo defecissent, cum spato sanguinis & assidua tussi orta est febricula, qua paucos post menses interiit.

§. IX.

Plura autem & longe gravissima sunt mala ac vitia, quæ suppressum mensium fluxum excipiunt, in cuius asserti confirmationem ad quotidianam provocamus experientiam, differunt autem hæc ipsa non tantum pro diversa natura corporum, sed & partium, in quibus superfluous sanguis restagnans malitiam suam exserit. Nam quodcumque ad caput paulo infirmius sanguinis impetus delatus fuerit, funesti in eo morbi, ut hemicrania, mania, melancholia, vertigo, cephalalgia, apoplexia inde proficiunt. Epilepsiam ex retentis mensibus describunt *M. N. C. D. I. A. I. obs. 85.* & obstinatum inde factam oblivionem *Acta Hafniensia Vol. II. obs. 78.* annotarunt. Ubi vero ad thoracem regurgitans sanguis cordis & pulmonum viscera occupat, syncope, cordis palpitationes, ejus polypi, asthmata, pectoris angustiae ejusque hydrops producuntur. Si vero in visceribus abdominis copia viscidum sanguinis restagnat, inde fit malus habitus, ictertia, hydrops, tumores pedum oedematosi. *vid. HILDANUS Cent. V. Obs. 41.* Sanguine vero ad ventriculum & intestinorum canalem translato, fiunt inde anxiae & molestae ventriculi inflationes & cardialgiae, & spasticum ac flatulentum gravissimum malum quod totum genus nervosum occupat, praesertim vero miseras feminas crudeliter affligit, vulgoque hypochondriaci vel hysterici nomine innotuit. Ipse quoque uterus a cohibitis mensibus non leve damnum subinde accipit, in eo enim hydropem hac de causa excitatum fuisse in *M. N. C. D. II. A. I. obs. 79.* legitur. Ingentes quoque hujus partis tumores, eosque scirrhosos, cum exulcerationibus fieri experientia discimus. In serosioribus & phlegmaticis menstruus sanguis in feri albi copiosum profluvium crebrius transmutatur. Neque partes externae a vitiis immunes manent, siquidem retardatos vel suppressos menses in scabiem, elephantiasin, vel scirrhosos tumores abiisse experientia confirmamur. Nihil vero in praxi frequentius animadvertitur, quam, quod post annum quinquagesimum, ubi critica hæc sanguinis evacuatio sponte cessare solet, ejus defectus in jam commemorata pathemata transmutetur.

§. X.

Ex his dictis atque adductis multa præclara ad felicem praxin instituendam monita elici posse arbitror. Etenim si quis ab omnibus hisce malis, in quæ menses transmutantur, foeminam præstare velit immunem, eo allaborandum est, ut, si deficient vel non ordinem ac tempus servant, convenienti medicina ac vivendi ratione restituantur. Nam quo diutius hoc protrahitur, eo graviores fiunt viscerum atque actionum læsiones, ægrius postea restituendæ. Sicuti enim facile est hæc omnia mala præcavere: ita difficilior ea, si radicem egerint, tollere. Et uti in principio sanguinis restitutus fluxus omne malum avertere potest: ita hoc ingravescente malo restitutus postea etiam fluxus allevationem quandam, plenariam tamen mali aversionem minus procurat.

§. XI.

Idem fatum cum mensibus habent hæmorrhoides, quæ in magna & gravissima mala transmutari solent.

Præclara sunt & memoratu digna, quæ hac de re CELSUS *Lib. VI. Cap. XVIII.* prodidit, dum inquit: In quibusdam hæmorrhoidum fluxus parum tuto suppressitur, qui sanguinis profluvio imbecilliores non fiunt, habent enim purgationem hanc non morbum, ideoque curati quidam, cum sanguinis exitum non haberent, inclinata in præcordia ac viscera materia subitis & gravissimis morbis correpti sunt. Nam sicuti hic per salubris fluxus corpora à gravissimis vitiis præservat ac vindicat, ita ipse imprudenter cohibitus atrociam, periculosa nec non chronica mala accersere solet. Nam quando sanguis superfluous, & qui remoram circulationi liberiori injicit, per solennes has vias minus excluditur, ejus palindrome vel metastasis fit in varias corporis partes, sique inclinat in caput, mania, melancholia vel etiam apoplexia nascitur; si vero in pectus copia sanguinis dilabatur, pleuritis, peripneumonia, phthisis vel asthma oritur; si palindrome fit in hepar, scirrhus & hydrops producitur; & ubi in vasis mesaraiis & intestinorum membranis sanguis crassior & impurior congeritur, spastica & hypochondriaca flatulenta symptomata & atroces dolores colici progignuntur; si vero ad renum viscus sanguis suppressus regurgitat, nephritis & calculus nascitur. At, si in habitum corporis protruditur, phagedæna & mali moris ulcera exoriuntur; quare, qui cum ratione & felicitate hos rebelles morbos expugnandos adgredi, vel eos avertere velit, is ante omnia eo curationem suam dirigat necesse est, quo consuetum hunc fluxum suppressum restituat, vel eum, si natura huc inclinat, promoveat. Quare non minus perite ac prudenter melancholicis hæmorrhoidalem fluxum commendat HIPPOCRATES, dum *aph. 21. Lib. VI.* ait: melancholicis, id est, si qui sine febre insaniant, si varices aut hæmorrhoides superveniunt, insaniam solvunt. Unde etiam porro ad curandam nephritidem hæmorrhoides idem HIPPOCRATES, ceu summam medicinam, prædicat, dum *lib. VI. aph. 11.* inquit, Nephriticis hæmorrhoides supervenientes magnam opem ferunt. Et *Lib. de humoribus & de morb. popularib. Lib. VI.* earum fluxum ad præservationem pleuritidis & morborum, qui cutim defœdare solent, dilaudat, cum ita scribit: qui habent fluentes hæmorrhoides neque pleuritide, neque lepra, neque furunculis &c. corripuntur. Utilem quoque ad sublevandam molestissimam illam hypochondriorum tensionem idem gravissimus auctor in *Croacis* dijudicat, ita scribens. Quibus dolores hypochondriorum, oris ventriculi, hepatis & partium circa ventriculum sunt, hi sanguine per inferiora excreto sanantur. Neque deficient aliorum gravissimorum Medicorum auctoritates, qui idem confirmant & inter hos primus prodeat HILDANUS, qui *Cent. VI. obs. 28. pag. 531.* ita se exprimit: Ego sincere scribere possum: experientia me comprobasse, eos rarissime apoplexia, epilepsia aut vertigine & oculorum inflammatione correptos fuisse, quibus hæmorrhoides fluebant, imo apertione hæmorrhoidum gravissimos sublato esse morbos & in aliis & in me ipso sum expertus. Et RONSÆUS de *Scorbuto pag. 72.* inquit: non paucos novimus, quos profusio sanguinis ex hæmorrhoidibus a scorbuto præservavit. PETRUS MONAVIUS de se ipso ad *Cratonem Epist. 235.* conqueritur: se a suppressis hæmorrhoidibus, quæ antea fluxerant, in arthritidem incurrisse. Et ALPINUS in *medicina methodica Lib. II. pag. 371.* hæc præclara de hæmorrhoidibus habet: in melancholia incipiente sæpius hæmorrhoids profuisse visa est, & perfectam quoque sanavisse: contra, si cohibeatur, homines in gravissimos morbos labuntur. Solet in hepate ac liene fieri scirrhostas & refrigeratio caloris nativi, unde aqua intercus, præterea vertiginosi ac melancholici fiunt, quibus dictæ venæ cohibentur. Illustrissimus

Senator Venetus proximo anno a suppressis hæmorrhoidibus, quas multos annos habuit, in affectum scotomaticum incidit. Bene monet HIPPOCRATES Sect. VI. aph. 12. Hæmorrhoides sananti diuturnas, si non una servata fuerit aperta, periculum est hydropem aut tabem accedere. Quandoque etiam suppressa vel deficiens in senibus hæmorrhoids in mictum cruentum transnigrat, uti id HILDANUS in sene *Cent. II. obs. 11. observavit.* Idem confirmat HEURNIUS *Comment. in aph. X. L. VI. vidi, inquit, qui, cum hæmorrhoidibus tentari solebant cum urina sanguinem effundebant certis spatiis, sine noxa.* Interdum etiam hæmorrhoidum ruber fluxus in album commutatur. Qua de re consule *M. N. C. A. I. D. I. obs. 75.* Evenit quoque non raro in mulieribus menses in hæmorrhoides transmutari. Hinc HEURNIUS *loco cit.* ita scribit: novi mulieres, quæ mensium vice hæmorrhoides fundebant.

§. XII.

Ex hisce jam clarissime deductis multa utilia & salutaria in praxi medica præcepta sunt haurienda. Primo enim nihil perniciosius est, quam hæmorrhoidum fluxum, etiam nimium, violenter & celeriter ope cohibere. Habuimus hac de re triste non ita pridem exemplum in hac urbe, ubi generosus vir, quinquaginta annos natus, aliunde ad nos accessit; hic ex suppressis hæmorrhoidibus per potum aquarum salubrium frigidum & balnea podagram & malum hypochondriacum spasticum sibi contraxit, nostra vero ope, per divinam gratiam, multum sublevatus fuit, adeo ut hæmorrhoides, quæ diu subsisterant, redirent, paulo largiori tamen effusione facta, quam, ut ego medicina reprimerem, instanter a me petiit. Sed nolui ejus precibus assurgere, quin potius, ut sibi gratularetur & in sinu gauderet de redeunte fluxu, regerebam. Hic vero metuens inde magnum periculum ac debilitatem non satisfactum sibi dolebat, petiit pro hoc fine obtinendo ab extraneo quodam medico hunc fluxum suppressum, qui, promptissimus ad hoc petendum, remisit medicamenta, quibus opiata & martialia immixta erant, iisque creberrimis vicibus usus est. Sed quid factum? tertio post die ab eorum usu simul & semel substitit omnis fluxus; Pateriens vero per quatuor adhuc dies medicina, donec omnis consumpta fuit, usus est, inde in incredibiles præcordiorum anxietates, inquietudinem & atrocissimos ventris dolores & insuperabilem alvi constrictionem incidit, tantaque erat vis morbi, ut omnia antispasmodica, cinnabarina & clysteres oleosos eluderet. Quo in affectu, data occasione, ira correptus mox in delirium & convulsionem incidebat, ut tertio post die obiret. Altero mane, facta sectione, vidimus cum stupore non modo intestinum rectum, sed & totum coli tractum in sinistro latere ita contractum, ut digiti minoris magnitudinem vix superaret, ventriculus vero erat inflatus & in quibusdam locis inflammatus, in cujus cavitatem serum quoque sanguinis putridum innatabat, reliqua omnia viscera optime constituta erant, neque dubium erat, quin, si capitis fuisset apertio concessa, celeris mortis causa ibi reperta fuisset, videlicet sanguinis extravasatio aut inflammatoria stasis, quia fortissima intestinorum & nervosarum partium strictura sanguis, ad membranas ventriculi & cerebri delatus, hanc funestam catastrophem procul omni dubio perfecit. Sicuti enim nunquam hæmorrhagia, licet fuerit enormis, quando a causa interna proficiscitur, fortiori medicina styptica reprimenda est: ita multo magis id in hæmorrhoidibus nimium fluentibus observandum, siquidem non tantum, secundum *Hippocratis aph. allegatum, hydropis vel tabis metus, sed & aliorum gravissimorum affectuum, de quibus supra facta mentio, periculum inde nascitur, idque eo magis in iis accidit, qui jam per ipsum copiosum fluxum vel aliis ex causis imbecilliores facti fuerunt.* Etenim hanc regulam practicam quisque Medicorum, ut curæ cordique habeat, vehementer optarem, videlicet, nihil ad perniciem magis perducere, quam valde debilitatis corporibus adstringentia, opiata vel alia fortiora remedia adhibere. Neque corporis humani natura a validiori sanguinis effusione unquam tantum patitur, quantum damni ab importuna sistente medicina accipit. Deinceps & illud utile monitum prudens practicus inde capere debet, quod in ejusmodi affectibus, qui retentis hæmorrhoidibus supervenire solent, nihil prius antiquiusque habeat Medicus, quam ut iis aperiendis, sive per interna, sive externe per hirudines, invigilet. Placida sunt, quæ hac de re in medium adducit BAGLIVUS *in praxi Lib. I. pag. 143. Plurima, ait, hic adducere possem exempla, de eximia utilitate, quam non obstante sanguinis circulatione, apertio venarum hæmorrhoidalium, præ aliarum venarum apertione, afferre solet iis, qui hypochondriorum morbis, doloribus scilicet, & caloribus, lumborum gravitate, flatibus, tensionibus, borborygmis &c. laborant.* Quandoque vero harum venarum apertio non facili negotio perficitur, tunc hoc naturæ consilium in ejusmodi morbis Medici imitari debent & etiam pedum venas aperire. Ita novimus ischiadicum dolorem, ex hæmorrhoidibus suppressis, apertione venæ in pede, protinus ex toto sublatum fuisse, neque minus recordamur in atrocibus, totum abdomen, ob male fluentes hæmorrhoides, adfligentibus doloribus venæ-sectionem in pede institutam, pariter & nitrofa atque emollientes clysteres omne curationis punctum tulisse.

§. XIII.

Gravia etiam sunt, quæ puerpuræ à lochiis suppressis patiuntur. Plures exinde fatalem diem ob-eunt; nam quo major corporis in puerperis est debilitas, eo gravius periculum à stagnante lochiali sanguine est expectandum. Differunt vero etiam symptomata, prout sanguis regurgitans varia loca & partes occupat, ipsaque corporum natura differt; si enim impurus sanguis fertur ad caput, vertigo, paralysis, apoplexia inde suscitatur. Qua de re consule FONTANUM *in Respens. Lib. I. pag. 25.* Si inclinat ad pectus tussis, phthisis, totalis pulmonum corruptio & exulceratio cum febre fit. Nihil verò frequentius fit, quam quod gravia pathemata hysterica febri adfociata lochiorum suppressionem consequantur, si nempe in visceribus abdominis & mesaraicis vasis congestus sanguis nervos ibi plexus afficit. Notabilis hanc in rem est, *Obs. 45. Cent. II. BINNINGERI, ubi puerpera, paucis à puerperio diebus, mediocriter a lochiis purgata, lectum deserit & rigido coelo se commisit, unde penitus suppressa uteri purgamenta, hinc diversa pro differentia partium accesserunt symptomata, in capite, ejus gravitas & in somnum propensio; in thorace sputum sanguineum, subflavum, pituitosum, noctu maxime longis intervallis cum levi tussi ægram exercens; in collo quasi suffocantem globum sensit; in corde vero & universo vasorum genere febrem continuam, cum pulsu debili & celeri a siti inexhausta, excitavit cum animi quoque deliquio; in abdomine alvum durum & laboriosam fecit, in partibus externis dolorem lateris dextri ac scapularum pungitivum ac vagum concitavit, post sanguinis emissionem alvique apertionem & adsumta*

anthysterica demum hæc omnia symptomata conquieverunt. In nostris regionibus nihil frequentius accidit, quam quod, lochii non rite fluentibus, sub alvo præsertim duriori, febres continuæ cum purpura fiant, magna circumspeditione tractandæ, hæc enim si regreditur, non modo vires penitus dejicit, sed & sæpius in dispositis hecticam febrem, universum sanguinem in excrementa pituitosa, falsa, (quæ copioso sputo, crassa urina, sudore multo & alvo laxiori ejiciuntur) lente convertit. Cum itaque tam funesta mala à fluxu hoc non rite succedente expectanda sint; hinc tanto majori cura ac sedulitate Medicus id suo consilio atque auxilio intendere debet, ne intercipiatur, vel interceptus mox restituatur & gravissima symptomata præcaveantur, quod matura venæ-sectione in pede, apertione alvi per clysteres vel pilulas polychrestas balsamicas & pulveres antispasmodicos cinnabarinos, commode fieri posse crebra experientia didicimus.

§. XIV.

Quemadmodum vero non tantum moles & copia humorum ac sanguinis peccans vitali negotio infesta est; sed & materia perversa qualitate imbuta œconomiam corporis nostri interturbat: ita providentissimo divini artificis & conditoris nostri benignissimi consilio debemus, quod ejusmodi motibus corpus nostrum instruxerit, quibus, quod & quantitate & qualitate alienum est, remove possit, ut sic immune ab omni noxa & corruptione præstetur. Ex quo patet, quam perniciosa & exitialis res sit, illud, quod debebat e corpore expelli, per temerariam medicationem malamque vivendi rationem intus retinere, salutare & frugiferas excretiones sistere aut materiam peccantem in corpus repellere, siquidem hi Medici saluberrimam naturæ curam ac methodum male intelligunt. Quæ veritas summi in praxi medica momenti ut paulo clarior atque illustrior evadat, laboris ac operæ pretium erit efficere. Quare aliquot exemplis ac observationibus hanc corroborabimus. Et, ut ab ipso capite ordiamur, quid frequentius in infantibus visitur, quam a crusta lactea, solo frigore repulsa, febrem continuam excitari, qua desinente demum illa revertitur, quæ, quoties repulsa fuit, toties de novo subortam febrem annotavimus. Quid denique periculosius est, quam in tinea capitis improvide exterius unguenta vel lavamenta adplicare; repulsa enim materia corrupta acri ad cerebrum & ejus meninges atque nervorum principia epilepsiæ, præsertim in infantibus, fiunt. AMATUS LUSITANUS *Cent. I. obs. 36.* in puella undecim annorum, obesa & sanguinea, a capitis lotione apoplexiam, quæ intra horam superveniebat, annotavit. Pariter etiam ex capitis lotionem sordiditatem concitatam *Misc. Nat. Curios. D. III. A. III. obs. IX.* commemorant.

§. XV.

A retropulsa scabie, quæ non periculi plena & funesta vitia nascuntur? Sicuti enim falso, acri, impuro & corrupto humore corpus per scabiem liberatur: ita nihil magis ad perniciem fruendam confert, quam turbulenter & temerarie vel materiam hanc in corpus repellere vel eam, quo minus egrediatur, impedire. Prout vero hæc maligna materia ipsas adoritur in corpore nostro partes vel diversam occupat sedem; hoc magis differentes affectus prodeunt, si enim ad caput fertur, periculosissimi ibi morbi suscitantur. Ita apoplexiam lethalem ex scabie ortam notarunt *Misc. Nat. Curios. D. I. A. I. obs. 58.* quod etiam annotavit MOEBIUS in *institut. p. 65.* Cœcitatem exinde profectam idem-

tidem *Misc. Curios. D. II. A. VIII. pag. 255.* & SENNERTUS *prax. part. 3. f. 2. c. 44.* recensent. RIEDLINUS in *lin. med. ann. 1696. mens. maj. obs. 1.* narrat de ancilla, quæ horrenda scabie laboravit, quæ post inunctionem, binis vicibus factam, in epilepsiam incidit. Videatur quoque SENNERTUS *l.c.* Si vero materia prolabitur ad pectus, periculosi asthmatis fit generatio, quod in juvene viginti annorum a scabie, intempestive & empirice externis inunctionibus curata, vidit HILDANUS *Cent. III. obs. 39.* ubi ægrotus tanta pectoris angustia torquebatur, ut vix spiritum trahere posset & pulsus vix apparet, tandemque catarrho suffocativo exstinctus fuit. Frequentissime vero a retrocedente scabie febris continua in corde & genere vasculoso accenditur, cum magna virium prostratione. Vidimus, hac cessante, septimo die scabiem rursus ad habitum corporis salutariter fuisse propulsam. Senes scabies, maxime sicca, infestat, quæ si reprimitur, quartana fieri potest: & scabie rursus apparente hæc cedit, adeoque perite LANGIUS in *Epist. 16. Lib. I.* scribit: ego scabiem & crurum œdemata, cum post aliarum febrium, tum præcipue quartanæ febris crisin obortam sponte exolescere, citra omne medicamentorum subsidium, plus centies vidi. Quando vero materia, a scabie temere suppressa, in viscera abdominis inclinat, tumores œdematosos, anasarcam, in pueris præsertim productam, animadvertimus. Eximiam historiam hydropis a retropulsa scabie producti habet HIPPOCRATES in *Epidemiis.* Erat homo quidam Athenis foedissima scabie laborans atque ut sanaretur, accessit Milos, ubi calidæ sunt thermæ, quarum usu convaluit a scabie, sed paulo post incidit in hydropem & exinde mortuus est. In intestinorum membranas si incumbit, gravia ventris tormina vel etiam dysentericæ fieri possunt. Notabile hac de re exemplum extat in RIVERIO *Cent. III. Obs. 85.* ubi arthriticus, ab usu aquarum medicatarum, magnam stomachi refrigerationem passus est, ac deinceps scabies pruriginosa, admodum molesta, totum corpus invasit, quæ confestim curata est unguento quodam mercuriali carpis manuum & plantis pedum admoto, quam inunctionem mox secuta est ingens diarrhæa, per viginti dies perseverans cum gravissimis ventris tormentis, ita, ut ab iisdem alvi fluxus dysentericus apparuerit. In infantibus scabies oborta magna est medicina præservatoria, quia plures superfluitates atque excrementa hoc modo ad exteriora propelluntur, qui, si per scabiem non expurgantur, aut suffocantur, aut morbis gravissimis obnoxii fiunt. Inde colligendum est, quam imprudenter illi agant, qui inunctionibus vel lotionibus ejusmodi scabiem mox sanant, siquidem in tenella ætate hac ratione sæpius epilepsiam succrevisse auctor est HILDANUS *Cent. III. obs. 10.*

§. XVI.

Multa etiam ex jam dictis utilia ad scopum curandi feliciter obtinendum elicere possumus. Primo, quod nihil periculosius sit, ac, antequam corpus ab omni impuro humore liberatum fuit, per convenientia evacuantia, poros linimentis mercurialibus & sulphuratis constringere & materiam, quæ in vitio est, repellere, vel ejus excretionem ulteriorem impedire. Quod si vero jam morbus indefectus fuit, in id maxime allaborare debet Medicus, ut corticem cutis constrictum rursus aperiat & liberiores transpiratus adjuvet, minime vero in febribus vel aliis inde obortis symptomatibus sanguinem mittat aut fortiter purget, ne materia impura ad interiora, præsertim ventriculum, funeste retrahatur.

hatur. Quare non sine insigni ratione JOH. LANGIUS *Lib. I. Ep. 16.* monet, ne quando natura per habitum corporis materiam peccantem, ut propellere velit, intenta est, phlebotomiam administremus aut pharmaca exhibeamus, ne ingens inde periculum enascatur, quod etiam notandum est, si scabies extrema corporis occupet, ne per eas venas, per quas materia morbi expulsa fuit, rursus ad interna viscera retrahatur. Juvat potius vesicatoriis in ejusmodi morbis, ex scabie transmutatis, virus, quod nervosas præcipue partes exagitavit, foras extrahere. Quandoquidem si in ullo morbo certe in iis, qui a retrocedente excremento subcutaneo fiunt, vesicatoria commodam locant operam.

§. XVII.

Idem periculum, eademque, si non major, noxa est expectanda, quando in affectu arthritico, in podagra vel etiam erysipelate, materia, quæ in vitio est, corrupta vel acris ex habitu corporis, vel ex artubus ad interiora repellitur. Quemadmodum enim semper exclusio ab intus foras in partes infirmas ac ignobiles & externas laudatur: ita nunquam non retrusio ex cute ad viscera, præsertim ubi materia est copiosa & maligna ac natura debilis & in spasmos prona, periculi plena existit. Et, uti HIPPOCRATES *Lib. VI. aph. 25.* de erysipelate pronuntiat, quod malum sit foris introverti: ita etiam id valet in omni arthritidis specie. Mala autem, quæ hanc metastasin consequuntur, sint plura, quæ etiam pro natura corporum ægrotantium & partium, quas causa morbi invadit & periculo & indole valde differunt. Ubi enim ad supremam capitis regionem vergit materia retropulsa, perquam facile suscitatur epilepsia, sicuti hac de re egregium exemplum edidit RIVERIUS *Cent. III. Obs. 85.* ubi quidam, doloribus arthriticis cessantibus, correptus fuit insultibus epilepticis, qui per dilucida intervalla redibant & post exactum biennium prorsus desinebant; cum eodem tempore dolores arthritici reversi fuerint, qui per totum illud tempus, quo insultus epileptici sæviebant, omnino delitescabant. Ex podagra emanante apoplexiam fieri, auctor est WEPFERUS in *Lib. de apoplexia pag. 2. & 3.* Et Cl. SIMON PAULI in *Quadrip. Botanico p. 25.* refert historiam, ubi quidam in levicula podagra, spretis medicamentis internis, repellentibus usus est, ubi mox de dyspnœa conquerebatur & cordis palpitatione ac lipothymiis correptus fuit: insculta est epilepsia, quæ tandem in apoplexiam lethalem abiit. Ubi vero arthritica materia intempestive propellitur & pectus invadit, convulsivum asthma excitatur, quod à linimento, alias egregio, quod ex camphora, opio, spiritu vini rectificato compositum erat, vel solo etiam camphoræ pulvere exterius applicato, in cachecticis non semel observavimus, accessit præcordiorum anxietas & summa spirandi difficultas atque angustia, ut strangulari sibi ægri viderentur: tumor postea pedum successit & hydrops. Et CRATO in *Consiliis pag. 1015. Consil. 367.* ex abusu narcoticorum & stupefacientium podagram transiisse in asthma refert. Et TRINCAVELLIUS *de ratione curandi partes humani corporis Lib. XII. Cap. I.* scribit: nihil gravius est, quam, usu adstringentium & repellentium, præcavere in podagra, consuetam fluxionem, inde asthmate gravissimo cum febre continua duo nobiles Veneti affecti, cum tremore totius corporis & omnium sensuum stupore. Plura vide exempla allegata in nostra *Diss. de podagra retrocedente in corpus pag. 12.* Materia vero vitiosa delata in ventriculi membranas, singultus, cardialgiæ, lipothymiae & lethalis ventriculi inflammatio sæpissime sequuntur.

Ita B. CRAMERUS *Prof. Erfurtensis Diss. de podagra* refert: quendam podagricum nudos pedes ventis frigidis exposuisse, unde continuos & lethales passus est singultus. Et MOINICHEN in *Obs. 8. pag. 245.* prodidit: dolore arthritico per frigida repulso, cardialgiam & lipothymiam inscutam fuisse, quæ omnia symptomata per frictiones & vesicantia genibus adplicata, cessarunt. Et in *Misc. Nat. Curios. D. III. A. VII. Obs. 147.* casus refertur, ubi quidam frigida aqua, pro potu, dolores arthriticos suppressit, ubi, emetico assumpto, integro mense enormes vomitus secuti fuerunt intercurrente singultu, appetitu abolito, siti aucta, febre continua, urina suppressa, post mortem ventriculus inflammatus repertus fuit. Materia vero arthritica tartarea, præsertim in senibus, vergente ad renes & urinarias vias arthritidem in calculum transmutari, frequenti compertum est experientia. Nihil enim in praxi frequentius visitur, quam arthritidem in calculum transmigrare, unde scribit SOLENANDER *Secl. I. Cons. 20.* qui uno laborat ex iis, alterum vix efugere potest & pauci arthritide affecti sunt, qui non in renibus calculum ingenerant. Et Cl. STISERUS in *Tr. de podagra* advertibat, podagricos dolores in nephriticos, colicos æmulantes, hos vero, vice versa, in arthriticos & podagricos non semel abiisse. Fit quoque arthritidis vel podagræ retropulsæ facilis transmutatio in acerbum colicum dolorem. Nam materia arthritica, propter affinitatem texturæ ac stricturnæ, quam ligamenta articulorum nerveo-tendinosa ac glandulosa cum membranis intestinorum invicem alunt, expedite ex articulis ad intestina & ex ipsis rursus ad articulos promptissime transfertur. Quæ HIPPOCRATI jam suo tempore transmutatio nota fuit, quod ex *Lib. VI. epid. Part. IV. aph. 30.* clarissimum evadit, qui articulari morbo detentus intestini dolore vexabatur, quietior erat, hoc autem curato, magis dolebat; quod SOLENANDER in *Consil. pag. 77.* confirmat, dum inquit: foemina arthritide semper laborabat, quando a doloribus coli libera erat & cessantibus coli doloribus misere ex juncturis afficiebatur. Et RAYGERUS in *Misc. Curios. D. I. A. VI. & VII. Obs. 208.* scribit: notus est mihi quidam, qui colica immani torquebatur, superveniente autem podagra nihil penitus sentiebat. conf. *Obs. 42. D. II. A. in Misc. Curios. it. DRABIZIUS in Tr. de scorbuto pag. 244.*

§. XVIII.

Ex præfatis historiis illud in praxi addiscendum est, quod nihil perniciosius sit, quam erysipelaceam & arthriticam materiam, præsertim in senibus & imbecillioribus & cachecticis, repellere. Nam quod pueris sunt exanthemata & juvenibus catarrhi atque hæmorrhagiæ, id sunt senili ætati articulorum dolores, qui, ubi accedunt, à magnis morbis liberant, si non adsunt, graves morbi fiunt, hinc HOFFMANNUS in *Institut. Lib. III. Cap. 107.* scribit: Videre nos podagricos mori, tum si humores influentes repellantur ad viscera aut si viscera tam sunt debilia, ut humores ad superficiem pellere non possint. Deinceps illud monitum practicum probe servandum est, ut quantocyus deliberemus ac procuremus, quo materia intus pulsa, rursus foras ejiciatur, quod per pediluvia, frictiones, diaphoretica vel etiam vesicatoria applicata, commode perficitur.

§. XIX.

Quam gravem sudor axillarum vel pedum in quibusdam exhalet foetorem, non sine sanitatis commo-

do, res pervulgata & notissima est, siquidem corpus nostrum per hæc emunctoria ab exitiali & corrupto putrido humore egregie purgatur. Patet hinc quam periculi res plena sit, hanc salubrem excretionem imprudenti consilio sistere: quo fine calceis limaturam ferri, aurichalci & terras calcareas uistas inspergere solent. Novimus vero exinde vertiginem aut capitis gravitatem, aurium tinnitum, difficilem respirationem, ventris tormina atque vagos artuum dolores subortos, qui nulla arte vel consilio superari poterant. Facit huc quoque egregia historia, quam narrat SIMON PAULI in *Quadripartito Botanico* pag. 215. ubi quis a suppresso pedum foetore in gravem cordis palpitationem, postea in atrocem & nodosam podagram incidit.

§. XX.

Antiqua ulcera corpori nostro medicinam præbere res extra omnem dubitationem posita est, siquidem animadvertimus, iis persanatis, graves prodire affectus, pro varia conditione partium & corporum multum differentes. Nam in capite, ulcus in crure sanatum, epilepsiam produxisse *Misc. Nat. Curios. testantur D. III. A. II. Obs. 29.* Et NIC. TULPIUS *Lib. I. Obs. Cap. VIII.* narrat, duos infantes per manantia capitis ulcera ab epilepsia liberatos, qui improvide hisce aliquando suppressis in terribiles iterum nervorum tractiones incidebant. Neque minus ex ulcere in crure consolidato epilepsia subnata, quo rursus aperto, eam cessasse legitur apud AMATUM LUSITANUM *Cent. II. Hist. VI.* item BARTHOLINUM *Cent. III. Hist. 20.* HILDANUM *Cent. II. Obs. 10.* item in *Miscell. Nat. Curios. D. III. A. II. Obs. 29.* item LENTILIUM in *Miscell. Part. I. pag. 3.* Denique pedes ulcerofos sanatos guttam serenam produxisse, auctor est TIMÆUS, in *opere posthumo*; item FORESTUS *Lib. I. Obs. 35.* Ita quoque ulcus vetus consolidatum capitis atrocem dolorem & cœcitatem induxisse, putrida materia odore per tussim rejecta, vide apud HILDANUM, *Cent. III. Obs. 39.* qui varia exempla recenset & inter alia hoc, quod vir sexaginta annorum cum per multos annos ab empirico illud quidem curatum fuisset post menses aliquot in sinistro latere pleuritide cum maximis doloribus & punctationibus, correptus fuerit; exspuebat cruorem, qualis ex ulcere manare solebat. Et idem gravissimus auctor, *Cent. V. Obs. 91.* enarrat historiam, quod quis ex gravi ulcere thermarum usu curatus fuerit; sed inde non modo in maximam virium debilitationem, sed & nauseam & frequentem eructationem atque in ejusmodi symptomata incurrit ac si venenum fumisset. Et cum fonticuli sint quasi ulcera artificialia, quæ ad impuram nocentem materiam nervis maxime subtrahendam in morbis capitis multum conferunt, hinc quoque iis curatis priores morbos vel novos ortos multæ observationes contendunt. vid. *D. II. Obs. 213.* *Miscell. Nat. Curios. D. II. A. VI. Obs. 201.* item PECHLINUS in *Obs. Lib. II. Obs. 30.*

§. XXI.

Apparet ex his deductis, quantum emolumenti in inveteratis morbis & antiqua ulcera, & fonticuli præstent, & quantum periculi improvida eorum occlusio habeat, unde discant exinde juniores Medici, nunquam hanc esse tentandam, maxime in imbecillioribus, nisi prius corpus a pravis humoribus fuerit expurgatum & nisi optima victus ratio accesserit & robur toti corpori ejusque partibus additum fuerit: prorsus vero ab ea esse abstinendum in senioribus, & qui ab iis ulceribus prospera gaudent valetudine.

§. XXII.

Longe vero deteriora & magis funesta mala enascuntur, si in morbis acutis, ad habitum corporis propulsa materia virulenta putrida in corpus repellitur. Sicuti enim vigorem naturæ indicat prompta ad partes externas variolarum, morbillorum, petechiarum, purpuræ & bubonum vel carbunculorum in peste secessio: ita res periculi plenissima est, si, deficiente hoc robore, vel non prodeunt vel facile retrocedunt. Contingit id facillime a refrigeratione, a potu frigido, terrore, animi affectu vel erecto corporis situ, in corporibus præsertim, quæ viribus destituta sunt, & ubi impulsus, renus cordis & arteriarum & motus a centro ad circumferentiam, languescit. Et plerumque hanc fatalem repulsionem mors consequitur, nam maligna materia ad meninges cerebri vel ventriculi & intestinorum membranas aut præcordiales nervos si incidit, harum partium inflammationes, spasmi, vel convulsiones, subito perimentes, imbecilli jam a morbo corpore nascuntur. Memorabile est exemplum, quod ALPINUS *de medicina Ægyptior. pag. 76.* de foemina refert, quæ in peste tumore inguinis laboravit, qui, si minutus fuit, attulit delirium, quod statim cessavit revocato tumore per cucurbitulas. Purpura miliaris seu alba retrocedens summas anxietates, virium prostrationem, pulsum debilem animique deliquium plerumque infert; variolas vero retrocedentes ut plurimum convulsio, delirium & mors subsequitur. Quod vero majori virulentia exanthemata retropulsa, quam antea, sese exferant, hæc videtur esse causa, quamdiu nempe humor, sive putredine sive caustica natura alienus, succis & sanguini involutus est, ingenti noxa vacat, quando autem sui juris fit & ab involucro sanguinis liber, tunc naturam suam validam prodit & funeste in corpus agit. Ubi vero materia exanthematum in glandulis cutis diu hæret, ex mora, ob perpetuam & intestinam fluidi ætherei agitationem & transfluxum, subtilior & malignior redditur, quæ, si repellitur, respuit illud, quod antea habuit, cum lymphæ vel sanguine conjugium, sed potius instar veneni subtilis nervosis sese insinuat partibus, ibique spasticas atroces stricturas efficit.

§. XXIII.

Bubones venerei, ubi glandularum ductus tenaci caustica lymphæ infarcti sunt, quando imprudenter a Chirurgis vel Medicis adstringentibus aut repellentibus tractantur, humor ex mora & stagnatione etiam virulentior redditus, & cum lymphæ ad vasa lymphatica translatus, universam ejus massam inquinat, unde non modo ulcera & pustulæ in facie, sed & atrocissimi dolores in periosio aliisque sensibilibus partibus suscitantur. Idem fit, quando gonorrhœa, impurioris coitus soboles, nimis cito adstringentibus vel calidioribus balsamicis cohibetur, virulenta enim materia, quæ debebat potius ex corpore expelli, intro subiens vel remanens, totam lymphæ massam inficit atque corrumpit, unde luis venereæ origo. Gonorrhœam enim male curatam demum in luem veneream transmutari nostra est sententia.

§. XXIV.

Ex hisce jam omnibus clarissime apparere arbitror, in ejusmodi excretionibus malignis cautissime sese debere gerere Medicum, ne ea, quæ repellendi facultate donata sunt, adhibeat, nisi in ingens vita

vitæ discrimen ægrum conijcere velit. Peccatur vero in eo toto die, dum non tantum malo regimine ægrotantium, improvide aëre vel potu frigido admisso, aut animi commotione graviori, liberior perspiratio impeditur, sed & quando Medici vel alvum vel urinam aut vomitum moventia propinant, aut sanguinem temerarie emittunt. Maxime omnium vero peccant, quando validioribus calidis sudoriferis, & in gonorrhœa balsamicis acrioribus utuntur, eo fine, ut expellant peccantem materiam. Verum enim vero sciendum hoc loco est, quod ejusmodi calida propinata in omnibus exanthematibus vel glandularum tumoribus & malignis defluxionibus plus noceant, quam profint. Hæc enim remedia ejus sunt indolis, ut non tantum, majori facta intestina agitatione, virulentam materiam agiliorem reddant, sed & ipsas fibrillas cutis & glandularum, sub cute positarum, constringant ac angustiores efficiant, quo minus libere per has & ferri materia corrupta possit. Vidimus gonorrhœam malignam nimio balsami Peruviani vel de Copaiba usu cohibitam & repulsam ad sanguinem, pustulis in facie, ossium doloribus & in inguine bubonibus succedentibus. Consultius itaque est, ad omnis generis excretiones per ambitum corporis promovendas & temperato calore externo & blandis diaphoreticis ac roborantibus uti.

§. XXV.

Ultimo loco nec illud prætereundum est, vitiosi feri copiam per glandulosam emunctoria, præsertim in naribus & faucibus existentia, in coryza & catarrhis, in foeminis vero per uteri glandulas, non

sine sanitatis emolumento, evacuari; prudentiæ igitur Medici est, ejusmodi in casu præcavere, ne salubres hi fluxus variis modis ac causis cohibeantur. Ita novimus a vento frigido, & etiam a purgante adsumto, coryzam repulsam dolores & anxietates ventriculi, abdominis tormina cum febre lenta & inappetentia ac virium languore excitasse, in aliis capitis dolorem, debilitatem, torporem, vertiginem productam. A fluore albo, per balnea vitriolacea suppresso, phthisin insanabilem secutam *Miscell. Nat. Curios. D.I. A.VIII. Obs. 331.* commemorant. Fiunt quoque exinde sæpius hypochondriaca, hysterica & asthmatica pathemata. Tumores quoque pedum diuturni, variis artificiis ad interiora repressi, non vacant periculo: vidimus exinde asthma & catarrhum suffocativum productum, vidimus diabetem & febrem lentam, cum omnimoda virium prostratione obortam. Optimum tunc consilium, hos tumores revocare, quo facto mox ægroti liberius transpirant. Denique paucis adhuc attingere volumus, mirabilem morborum transmutationem, quæ fit tempore pestis grassantis, dum omnes fere morbi, qui incolas, ubi pestis grassatur, adfligunt, in pestem conversos Medici adnotarunt. Fit autem id potissimum in iis, quibus febrilis quædam intemperies juncta est & causam rejicimus in terrorem & fortissimam de contagio pestilentiali impressionem, quia tunc temporis omnes, quos horripilatio vel calor præternaturalis corripit, firmiter sibi persuasum habent, se peste adfectos esse. Quanta autem terroris vis sit, in similibus pesti symptomatibus cendis, ii, qui praxin inter affectos pestilentia exercent, optime norunt atque perspiciunt.



EXERCITATIO MEDICA

PATHOLOGIAM

DUUMVIRATUS HELMONTIANI

SISTENS.

Primum edita Anno 1704.

PROOEMIUM.



BIENNIUM est, & quod excurrit, ex quo in regia Borussorum Academia Duumviratum Helmontii publicæ Eruditorum disquisitioni speciminis Academici loco exposui. Duumviris ibidem, stomacho puta & liene, physiologice consideratis, actione & usu eorum ex mente HELMONTII recensitis, in quantum digestiones & fermenta locum invenire queant, determinavi; somni præterea locum centalem, venerisque diversorium, animæ demum sensitivæ & mentis hospitium aliunde, quam è Duumviratu deduci debere conclusi. Morbos autem diversos è Duumviratu male disposito, stomacho nimirum & splene, aut alterutro, aut utrisque male habentibus HELMONTIUM derivare, scripta ejusdem vel perfunctorie legenti innotescere poterat, eoque respectu sub finem dictæ exercitationis morbos e Duumviratu HELMONTIO deduci solitos data occasione me pertracturum promisi. Qua fide hac inaugurali dissertatione me liberaturus Te L. B. compellandum prius duxi, velis ea, quæ pro ingenioli tenuitate

tenuitate afferuntur, non nisi in bonam partem interpretari. Sicubi autem erratum aut omissum quid deprehendes, illud humanæ conditioni inevitabile, hoc per chartæ angustiam condonandum reputabis. Ne vero ἀμείδιος procedam, hoc ordine placuit incedere, ut perlustratis morbis universalibus, i. e. totum corpus aut maximam ejus partem afficientibus, cujusvis sic dicti ventris & denique artuum affectus, quos e Duumviratu suo deducit HELMONTIUS, pertractem, visurus paucis, quantum veritatis & lucis rationes & remedia ejusdem praxi afferant clinicæ. Faxit, qui supplex in auxilium vocatur, DEUS, ut propositum hoc in sui gloriam proximique salutem ex voto cedat feliciter!



S E C T I O I.

De Morbis universalibus, Febris, Peste, Atrophia, Ictero.

§. I.

CUM febres totam corporis machinam inſeſtent, reliquis affectibus unam vel alteram partem obſidentibus, plerofque morbos aut antecedant, aut comitentur, aut ſequantur, noſtraque ſaginent cœmeteria & caſtra depopulentur, morbi univerſalis & communiffimi nomen jure merentur: peculiarem de his tractatum conſcribere placuit HELMONTIO, e quo & aliis ejus libellis placita ipſius excerptere & ventilare, non inutilem, difficilem tamen materiam aggredi animus eſt. Febres ille ex Duumviratu male affecto deduxit (tr. Jus Duumvirat. n. 30.) ſtomachum nidoſum allegat (de Febris. c. 12. n. 4.) in quo centrum & palæſtra certaminis febrilis (ibid. c. 17. n. 4.) Febris habet virus, eſtque ſerpens multiceps, qui circa pylorum vel paulo infra hoſpitatur, vel inſidet convexo ſtomachi (ibid. n. 8.) Et antea (c. 10. n. 3.) Nidus febriliſ eſt in primis officiis; extenditur ſcilicet a pyloro per duodenum & vaſa ibidem multiplicia, inteſtina, venas meſenterii, Lienem, uſque ad Hepar, quod ipſum e ſymptomatibus febres comitantibus explanat. Quod ſi pylorus nimia erret ſtriſtura, potius ibidem quandoque toto triduo perſeſerat, atque tandem plus unico vomitu rejicitur, quam bido ſit aſſumptum (Sextupl. Digest. aliment. human. n. 41.) adeoque in febris peccet & digeſtio & expulſio. Laudat igitur FERNELIUM, qui (lib. 6. pathol. c. 7.) nidum intermittentium circa ſtomachum, duodenum ac pancreas primum ſubodoratus eſt (de febris. c. 3. n. 18.) Ipſa vita autem ſemper eſt intimum principale, formale atque eſſentiale febriliſ efficiens. (ibid. c. 16. n. 5. & 16.) Omnis vero materia viſibilis atque peregrina vel foras adveniens, vel ſponte ſua intus prognata, quantumvis fuerit de ipſa ſolidorum nutritione degener, atque ſeparatus liquor proprio nomine ſemper ſe habet per modum occaſionis & cauſæ irritantis (de id. morboſ. n. 24.) Quoties vero vitale (cauſa occaſionalis) in agrum vitalem eſt inſertum, indignatur Archeus & incandeſcit, ut iſtud peregrinum e ſui Anatomia excludat. (de febr. c. 13. n. 3.) Degenerant autem partes alimentofæ in ſanguine vel admiſſione rei extraneæ, vel impreſſione peregrina, vel demum errore indignati vel advocati Archei. Altera cauſa occaſionalis eſt, quando venæ meſeraicæ ex ilei inteſtini extremis hiſce cognatis groſſioribus inteſtinis aſſugunt ſuccum quendam ſ. Ens anonymum, ipſi ſcoria ſive ſtercus liquidum vocatum, urinæ tingendæ deſtinatum, (c. 11. n. 5. & 6.) Quamdiu enim ſcoria recta fertur ad lotium, velut naturale ſibi emunctorium, bene eſt, & ſi oblique alio feratur, ſit febris continua. (n. 14.) Cruor

nullo modo eſſe poteſt febriliſ cauſa conſtitutiva, imo ne quidem cauſa occaſionalis, niſi ſit extravenatus priuſque corruptus, i. e. niſi priuſ deſinat eſſe cruor. Denique aliud quodcunque excrementum a ſubſequenti digeſtione deſædatum cauſæ occaſionalis juſ in ſe transfert. (ibid. c. 16. n. 15.) Quod ad differentias febriliſ, ſedes continuarum non differt ab intermittentium (c. 1. c. 10. n. 1.) Diaria ipſi ſedet in ſtomachi cavo, & plerumque ex vitio cibo. Febris tabida ſeu heſtica ipſi quædam eſt quotidiana. Quartana in ſplene ipſo veniſque ſibi contiguis hoſpitiuſ delegit, (ibid. n. 6.) Si de prima digeſtione aciditas chyli immediate deferatur ad ſplenem, mox adeſt quartana. (Traſt. Recent. p. m. 499.) Sola quartana exlex extra contubernia ſtomachi ad ſplenem porrigit. (de febris. c. 17. n. 9.) Sciendum etiam, diſſerit, ſedem quartanæ nedum eſſe in ipſo lienis corpore, verum in ipſiſmet ejus arteriis, ſi non omnibus, ſaltem aliquibus. Quod punctum unicuſ ſecit ſanationem quartanæ difficilem (c. 6. n. 11.) Dum aut ſplen ſub quartanæ torturiſ toleravit plurima, tumeſcit ex producto per quartanam (ibid. n. 9. & 10.) Eſt denique malignarum caſtrenſium purpurearum &c. aliena proriſus & inſolita admodum ſedes, propagatio, ac inſueta medendi anxietas: dum ſcilicet per inſpirata endemata locorum, paludum, mineralium, fumorum, hoſpitalium, inſirmorum, putidorumque odorum, hauriuntur fœtores &c. qui dum per pulmonem in thoracem penetrant, trans diaphragma connexam ſtomachi ſuperficiem feriunt, ac ſuæ virulentiaſ ideam depingunt in alimento proxime aſſimilando (ibid. c. 17. n. 9.) Maligna ſola aliquid putridi peculiariter ſibi vendicat circa oriſiciuſ ventriculi. Sunt autem tanto peiores, quæ non in ejus concavo, ſed in convexo ſedent, eo quod non niſi extraordinarium arcanuſ ad iſta attingit loca. Ideo namque Caſtrenſes & Endemicæ omnes cæteriſ ſunt pervicaciores, ac plerumque citra ſitim. Quibus vix perceptibilis calor eſt, ſolaque ægras continua anxietas ad feretrum ducit (c. 10. n. 6. & 7.) Hæc HELMONTIUS. Ubi quidem febres ſtomachi, ſplenis & meſenterii incolæ dari non nego, monet id ſymptomatum phalanx, naulea ciborum, ructuſ, vomituſ, aut ſaltem creber vomendi conatuſ, ſtomachi dolor, ſtomachi & lienis tumor, rugituſ hypochondriorum & diarrhœa, alvi etiam quandoque obſtrictio. Cum vero calorem nimium, ſitim, pulſum, inflammationem, exanthemata & alia accidentia probe quiſ penſitet in vaſiſ ſanguineis, quin in ipſo ſanguine febriliſ niduſ & focuſ quæret, & forſan etiam inveniet. Nobiliſſ. JOH. DOLÆUſ (Encyclop. Medic. lib. 4. c. 1. §. 2. p. m. 683.) febrim deſinit per pluſ minus ſanguiniſ turbatam mixtionem cum Cartefianis, quam tamen potiuſ febris effectum declarat celeberrimuſ Dn. Præſeſ, Patronuſ & Præceptor colendiſſimuſ, (Traſt. de febris. Poter. oper. annex. c. 1. p. 856.) exiſtimans febrim eſſe turbatam & inæqualem ſanguiniſ circulationem a motu cordiſ arteriarumque aucto, nec non a vitioſo partium ſolidarum tono productam ad materiam vel quantitate vel qualitate,

vel

vel etiam solo motu atque activitate fluidis machinae nostrae partibus insensam exterminandam aut subigendam. Quos in scenam protraxit HELMONTIUS Archeos, quorum Duumviratui peculiaris est, (vid. *Exercit. de Duumvirat. Helmont. Sect. V. §. 3.*) eos cum similibus portentis explosit Sagacissimus DN. D. STAHL (*positio. d. mechanis. mot. progress. sangu. thes. 26.*) hinc Archei indignationem furorem & accensionem in febribus amplectatur cui volupe est. Nullam noxam a sanguine intra venas, sed tantum ab hostilibus & peregrinis incrementis insultare: Deum quoque sufficientia fecisse sordium quarumcunque emundioria, nec laceratione venarum opus esse, pro februm victoria docuit HELMONTIUS (*de febr. c. 4. n. 44.*) Cruorem culpa carere (*c. l. c. 17. n. 12.*) per totum, vanasque inde venarum in cura depletiones virumque furta audacter declaravit. Cur vomitiva in febrī maligna nequicquam sublevent, ratiocinatur, *ibid. n. 10.* quod etsi productum febrile vomitiva domare videantur, non tollunt tamen occasionale producens in convexo externoque stomachi plantatum. Speciosus sane titulus purgatio sive depuratio: sed doli plenus exclamat *c. l. c. 5. n. 8.* Conclufit igitur cum HIPPOCRATE ad Democritum omne solutivum depradari de viribus & substantia nostri corporis, adeoque purgationes medentium exilio damnat. (*n. 26.*) Vomitoria febres curare, aut purgationes & venae-sectionem, & sagaciores Medici dudum negarunt; in praeservatione tamen haec auxilia non esse proscribenda, experientia firmat. Nec omnibus eadem individuis praescribunt, sed venae-sectionem plethorae (quam quidem obelo notat [*ib. c. 4. n. 4.*] & sanguinem bonum nunquam peccare posse nimietate, eo quod vires vitales & sanguis sint correlativa, nec vires abundant, ne quidem in Mathusalem) ffordibus stomachi vomitiva & purgantia. Febribus autem praesentibus illa indifferenter in usum vocanda, nemo è sapientioribus inculcavit, praepriis ubi mali moris febres corpus invadunt, contagioque sanitatem pessundant. Non igitur Dictatori assurgendum, quando (*c. l. c. 13. n. 8.*) inculcat: probo Medico magni non est momenti diversitates Februm juxta materiae proprietates & loca curiose indagasse, cum nec praecavisse sic, datum neque dici possit remedio. Vade tu ad talem venam vel ad istum locum. Totumque medentis studium sit invenisse remedia, apud quae omnes febres ejusdem sunt pretii & ponderis. Alia sane ratione, ut hoc saltem moneam, tractandae sunt febres benignae, alia malignae. Continuae aliā, aliā intermittentes. Et cur potentioribus incisivis egere intermittentes quam continuas astruxit? (*c. 11. n. 14.*) quia pertinaciorē magisque glutinosam materiam occasionalem habent. Cur pestem vocat febre ardentissimam, acutissimam, & celerrimam? (*c. 12. n. 7.*) Cur causae occasionalis diversitates admittit? (*c. 13. n. 6.*) Medici nomine indignos quod pronunciat, qui febrientem non restitunt ante quadriduum, (*c. 12. n. 6.*) Thrafonem agit. Antifebrilia die accessus & hora opportuna propinanda recte censuit. (*c. 9. n. 11.*) Et est ista opportunitas in spatio horula ante paroxysmum, quantum scil. exigit aetuatō medicaminis & stomacho vacuo. Nam si detur diebus quietis intermittētiū, vel dudum ab incepto paroxysmo, dum medicamen non praesentit naturam sibi auxiliatricem, tam ad aetuantum seu animandum, quam expellendum materiam occasionalem febris, incassum propinatur. Imo tum angit medicamen magis, quam juvat, quatenus naturam, dum quiescere mallet, ad proscriptionem stimulat. Quod si in Corticis Peruviani adhibitionem quis inclinet, Excell. Praesidis monita (*in not. ad Poter. Cent. 2. c. 80. p. 242.*) ad animum sibi revocet, autor sum.

Sudorifera autem diligenter nec sine causa HELMONTIUS (*tr. de Febr. c. 2. n. 10. c. 9. n. 18. c. 11. n. 7. & c. 14. n. 7.*) suavit, sudorifera tamen non esse debere calida, judiciose laudatus DN. Praeses (*tr. de Febr. c. 1. p. 860.*) injunxit. Sunt, qui arsenici opem in quartana cum castrensibus Chirurgis advocant, & inde forsan etiam quibusdam in Armeno & Lazuli lapidibus, cum opinione HELMONTII (*c. l. c. 6. n. 5.*) in his arsenicum hospitetur, quaedam spes. Sed arsenici salis corrosione nesciunt, qui id agunt. Arsenicum, auripigmentum &c. quantumvis fixentur & dulcorentur, nunquam tamen sunt introsumenta rectius suadet HELMONTIUS (*tr. Pharmac. & Dispensat. mod. n. 52.*) De siti in Febribus philosophatur, quod oriatur propter nidorosa, putrida, coagulataque; non autem quod appetatur humidum nutritivum & refrigerans: sed resolutivum nocui. Adeoque non tam nutrimentum indicat & exposcit, quam remedium. Ideoque nec sitis cessat per potum, nisi hic medium attulerit capeffendo fermento consymbolum. (*tr. Pylor. Reetor. n. 26.*) Et hinc non nisi in suis stationibus affligit, (*tr. conf. morb. sed in anim. sensit. n. 11.*) ubi autem Archei sive sensitivae furor deferbuit, in intermittētibz remittit. Sitim igitur fraudulentam appellat (*d. Febr. c. 17. n. 5.*) & hanc stigma sulphuris restinguere innuit. (*c. l. c. 1. n. 4. & c. 17. n. 6.*) Potum autem, licet largiorem admittit. Detestor, scribit, in Febribz abstinentiam a potu. (*c. 12. n. 2.*) Nam si febris sit calida & siticulosa, privetur autem potu humectante, depopulatur cruorem & solidarum partium alimentum cum viribus, satisfaciunt tum potissimum, pergit (*n. 6.*) cerevisiae tenues vino nuptae, quibus panis admiscetur prius in aqua separatim coctus, usque in collam sive mucilaginem, & frigide haec sumta, cruda & non cocta. De vino tandem concludit (*n. 7.*) qui vino modice utuntur in febribz, facilius convalescunt, vires conservant & in pristinum ocyus restituuntur. Et paulo post: Vinum petuliarem habet indicationem: non solum quia vires addit, quibus natura exosam materiam domat; verum insuper quod sit plastrum medicaminum conveniens. Est enim nuntius, qui vias novit, itineri accinctus, charus intimis, & admissus in penetralia. Solvitur & lenia pertinaciorque febris frequenter per appetitum rerum insolitarum (puta halleis rerumque fumatarum.) Sperans per rem ejusmodi inauspicatam subigere hospitem hostem. Arrident nempe ejusmodi insolita, non quidem quod digestionī (quippe quae tum nulla ibidem est) sint aut alimento apta, sed quia impressionem ideam Archei atque sigillum febrile obliterent non secus atque alias cibi inordinati exoticas silentesve in Archeo ideas occasionaliter excitant. (*c. 17. n. 7.*) De quartana quaedam adhuc addere non inconveniens erit. Puer quidem mox a cunis cum quartana toto biennio dimicans praeter spem omnium per crisin multasque sedes convaleuit, (*Asthm. & tuss. n. 26.*) vidit saepius quartanam solis unguentis superatam (*imag. ferment. n. 17.*) solitus est etiam eandem depellere emplastro e paucis solventibus & abstergentibus composito. (*de Febr. c. 17. n. 13.*)

§. II.

Pestis in hoc a ceteris malignis distat, quod, cum non sedeat in sordibus febrilibz, ut neque in cruore; afficiat tantum ipsum spiritum vitalem sui odore; ob id quoque intret & exeat necessario cum aere per poros diaphragmatis, adeoque tendit sic primario ad stomachum, nec potens pergere ulterius motu locali, suam ibidem sistit impressionem in nutrimento stomachi. Unde mox vomitus, cephalalgia, sopores, deliria, syn-

copes;

copes, & quæ vitiati oris stomachi consequuntur dominium. (d. Febr. c. 10. n. 8.) Impetus primi confusio-
nis, terroris atque imaginationis circa os stomachi con-
tingunt. In liene nimirum, cujus emunctorium est pro-
pe os stomachi, adeoque scopus illius sagittarii. (Tu-
mul. pest. p. 891.) Nam in juvene sano, quem pestis
septem horarum abripuerat, instituta anatomia reperi
escharam oblongam jam constitutam, ut prius vomitus
motricem, ac dein syncopum continuarium authoricem:
ita & mortis occasionem dedisse, prout in aliis sede-
cim horarum spatio triplicem in stomacho escharam no-
tavi patratam. Os stomachi escharam una tantum cau-
terisatum antea (c. l. p. 853.) tradiderat. Pestis cir-
ca orificium stomachi prima tenet conciliabula. (De
concept. n. 4.) Si in aliquo affectu, sane in hoc fe-
brium malignarum & morborum facile Coryphæo
suum Noster exercuit ingenium, suum collocavit stu-
dium. Longum nimis foret, mentem ejus e Tra-
ctatu, quem Tumulum pestis appellat, prolixius huc
transcribere. Adeat istum benevolus Lector, cu-
riosa multa & lectu digna videre ibidem poterit,
judicio Excellentissimi JOH. DOLÆI (Encyclop. Me-
dic. l. 4. c. 5. §. 5.) In quantum ratione subjecti
Duumviratum tangit ejus dogma, paucis enodabo.
Scilicet ut habet FRANC. OSWALD GREMBSIUS (Arb.
integr. & ruin. hom. l. 2. c. 4. n. 18. p. 436.) pestis
causam immediatam constituit imaginem genitam ab
Archeo & panicum Archei terrorem, accedente ta-
men etiam Archei furore, qui imaginem virulentam pa-
rit & penetrat cum imagine terroris &c. Cum autem
terrorem & reliqua animi pathemata in præcordiis,
quo nomine os stomachi intelligit, stabulari asseveret,
non poterat non stomachum pro subjecto pestis ven-
ditare, quod ex præmissis patescit. Verum ut, quid
sentiam, aperiā, imaginationem, terrorem, ad causas
potius procatacticas, quam ad immediatam referendas
puto, siquidem disponunt solummodo corpora, ut pe-
stis semina eo citius recipiant & postmodum inficiantur.
Neque stomachum pro subjecto, nisi remotiori, ag-
nosco; radix enim & fermentum proxime latet in
sanguine & hujus individuo comite lymphā, quibus
mediantibus communicatur conceptum miasma omni-
bus corporis partibus. Remotius tamen hoc recipi-
tur & hæret præcipue in primis viis, ventriculo, in-
testinis &c. Hinc qui pravis humoribus in his viis
scatent, facilius lue corripuntur, & contra minori
calamitate premuntur & evadunt, qui ab hoc vitio
liberi aut purgati sunt. Accedit *Euroſia*, quando
in demortuis corporibus ventriculus & intestina ni-
gricantia, liquore instar atramenti repleta, imo in
ipsis orificiis ventriculorum carbunculi fuerunt reper-
ti. vid. JAC. ROESERI *Disput. de Lue pestifera*, qui
taliam in famulo & filiolo observasse refert, indeque
fortassis escharæ productæ, quas in ventriculis Peste
defunctorum deprehendit HELMONTIUS. Quibus ge-
mella consignavit TH. BARTHOLINUS (centur. 3.
Epist. 42. p. 158.) De cætero meum ex parte facio
judicium ATHANASII KIRCHERI (Scrut. pest. Sect. 2.
p. m. 187.) Philosophia de peste ex mente HEL-
MONTII ingeniosior fortassis, quam intelligibilior.
Equidem fateor, acutum virum in suo, quod Tu-
mulum pestis nuncupat, opusculo nonnulla attigisse,
quæ Physicam reconditiorem sapiunt: attamen ne-
que in omnibus ei subscriberem, præsertim cum om-
nium cœlestium corporum influxum jam tot seculo-
rum experimento comprobatum proscribat: dein
quod pestis essentiam & quidditatem in sola terre-
facti Archei imagine & idea constituat, neque pe-
stem ulla ratione extra hunc conceptæ contagionis
accessum existere & subsistere posse dicat, quod ex-
perientia pariter reclamat.

Atrophie sat manifesto apparent in Duumviratus la-
bore, ait HELMONTIUS (tr. Retent. p. m. 495.) A-
trophie notio non abolitam prorsus, sed imminutam
saltem nutritionem denotat, quod si enim plane non
nutriretur corpus, vitæ finis sensim sensimque in-
grueret, quod nutritio & vita pari passu ambulant.
Universalem vero atrophiam in præmissis axiome
indigitasse videtur, quando corporis mole decre-
cente carnes ejusque fibræ flaccescunt, concidunt,
& imminuuntur. Nec a scopo aberravit, morbi
hujus natales e Duumviratu & stomacho, præsertim
in quo Duumviratus majestatem constituit, derivan-
do, in eo enim sapissime hæret causa tabis seu a-
trophie, quando accumulatae in eo cruditates alimen-
ta corrumpunt, eaque non in chylum fluidum, sub-
dulcem, nutritium, sed in spissum, mucilaginosum,
falsum, acrem, verbo partibus nutriendis propor-
tionatum immutant, vitio imprimis lymphæ stoma-
chalis, quin & assumptorum. e.g. in Picâ. Consentit
in hoc LINDENIUS, qui hanc esse causam atrophie
constanter asseverat. Omnis, inquit, tabes, quæ vulgo
a destillatione capitis oriri dicitur, fit a sanguine ejus-
que cruditate seu acrimonia, quæ originaliter e ven-
triculo ortum habuit. Idem LINDENIUS pro curanda
tabe vomitoria maxime necessaria judicat, & se sæ-
pius tabidos curasse ait vomitu etiam repetito, &
quisquis, pergit, vult curare tabem feliciter, statim
ad vomitoria accedat. (vid. ETTMULLER d. nutrit.
part. l. 1. p. m. 279.) PETRUS POTERIUS in ob-
servationibus suis diversas atrophie species vitio
ventriculi subnatas recenset, auro suo diaphoretico
& stomachicis curatas; (vid. Cent. 1. c. 61. Cent.
2. c. 87. Cent. 3. cap. 82.) Juvât in hectica e-
tiam magis expurgare leniter primam regionem &
temperatis balsamicis instaurare ventriculi actionem,
consulit Excell. Præses (ad Cent. 1. Poter. Obs.
c. 40. p. 66.) Absolvendus vero hoc in affectu
alter e Duumviris, lien, qui forsan ipse nutrimento
vitioso corrumpitur. Hinc de nihilo sunt, quæ (Tr.
A. sed. anim. ad morb. n. 10.) dictitat: atrophie
quandoque contingit ob parcum fermentum ad stoma-
chum affluens; e liene nimirum per vas breve, quod
commentum in priore exercitatione Sect. 4. §. 14. re-
futatum.

§. IV.

Pervulgata ac omnium ore trita circa icteri scatu-
riginem est opinio, oriri eundem ex obstructione aut
glandularum aciniformium hepatis, ita ut secretio bi-
lis a sanguine plane non contingat, aut ductus cho-
ledochi, quo obturato bilis ad intestinum duodenum
non excernatur. Huic tanquam a tramite rationis &
veritatis aberranti sententiæ mascule semet opposuit
HELMONT asserens, icterum non esse a retentis, (Ig-
not. ad Regimin. n. 43.) sed a stomacho deficiente,
(sed. anim. n. 32.) & icterus ipsi nunquam alibi viget
magis, quam in atrio stomachi. (conf. morb. sed. in
anim. sensitiv. n. 13.) Nidum sive officinam icterici
mali esse a pyloro usque ad finem duodeni (Schol. Hu-
morist. passiv. decept. n. 35.) Contra bilis effusionem
veram porro argumentatur; (Sextupl. digest. alim.
human. n. 30.) Sunt fellis vulnera confestim mortalia,
non autem ita hepatis. Si fel saltem bilis esset, mors
sequeretur quamlibet fellis effusionem de necessitate.
Attamen icterus non est mortalis, licet fel nedum su-
per intestina, sed per totum corpus æqualiter, longe,
late, profunde, ac per minima sit diffusum. Ergo vel
vulnus fellis plus importat, quam bilis effusionem, vel
icterus non est bilis effusa, vel utrumque est necessarium.
Statuit igitur, in stomacho fundamentum ac primor-
dium icteri delitescere, ibi, si debilitatus is sit, fla-
vam

vam faburram generari, & propterea chyli degenerationes atque cruditatum hinc oriundarum corruptiones, quas *stercus liquidum* vocat, propullulare, hoc præter naturam fursum per venas melaericas rapto, totum corporis habitum inquinari. Paucis dicam, quod res est. Hic, ut alibi, fallaciam a dicto secundum quid ad dictum simpliciter commisit HELMONTIUS; Veritati enim non repugnat, in ictero quandoque in stomacho subesse vitia primæ coctionis, in sequentibus non corrigenda, humores nimirum graviter corruptos, qui, quod HELMONTIUS innuit, fermento suo virulento quicquid attingunt confestim inquinant, & in consimile virus transmutant, ita ut chylus his vitiose contaminatus & ad massam sanguineam delatus totam corporis superficiem flavo, viridiusculo, aut alio suspecto colore inficiat, quo in casu energia salutaris vomitoriorum cum HELMONTIO, FABRO, LANGIO & aliis pro evacuando in primis viis contento mali fomite commendanda. At vero propterea bilis vitia, unde non rarius confurgit icterus, excludenda non erant. Concedi equidem potest, quod statuit (*Sextupl. Digest. n. 34.*) *fel esse viscus vitale, & ipsum corpus ejus liquorem amarum, ex optimo cruore paratum, balsamum jecoris & sanguinis continentem.* Sed inde non sequitur, quod obstrui ductus ejus, quod tartarea aut viscida amurca scatere nequeant. (*vid. Magnif. Dn. D. Wedelii, Patroni & Præceptoris Venerandi Pathol. Med. Dogmat. S. 3. c. 13. p. 682.*) Faceffit hæc amurca in calculos sæpe, ipsaque, si egressus denegetur, lapidescit bilis, unde icterus pertinax, omnium medicamentorum dotes & labores Medici eludens. Et tunc excrementa alvi pallescunt, quod *vitio potius digestivæ quam distributivæ* imputavit HELMONTIUS (*Schol. Humorist. pass. decept. c. 5. n. 15.*) rectius tamen obstructioni chole-dochi debetur. Dum igitur per quædam calcinata alcalia icterum se sanasse prodit, (*c. l. n. 35.*) id præstitit, quatenus deobstruentia illa sint partim, partim absorbentia. Unicum adhuc addam e vulgi contra icterum remediis superstitiosis. Memini, (inquit HELMONTIUS *c. l.*) *lucium piscem quandoque vivum in dorso a capite ad caudam apertum, superligatum transversim in regione stomachi intra paucas horas fœtuisse putidum cadaver, totamque ejus carnem, quæ antea erat albissima, flavam evasisse. Vulgus medentum reebatur, se traxisse bilem ab icterico. Ego vero ratus sum, piscem calore icterici putruisse, suamque flavedinem a corruptione mutuassee.* Tincas vivas alligant umbilico & plantis pedum nostræ mulierculæ, quæ etiam colorem icteri cum cadaveroso fœtore consequuntur; nescientes, non squamosos pisces, qualis tinca, mustela, anguilla, auratas etiam mortuas putrere incipientes eodem ex sua natura tingi colore.



SECTIO II.

De Morbis supremi Ventris, Cephalalgia, Vertigine, Epilepsia, Apoplexia, Lethargo, Phreniide, Melancholia, Mania.

§. I.

Cephalalgia citra vapores per nudam actionem regiminis e Duumviratu procedit (*Duumvirat. n. 14.*) *E stomacho dolor capitis* (*Ignot. Hosp. morb. n. 74. Cust. Err. n. 46.*) Ut in aliis, sic & in hoc affectu multum defudavit HELMONTIUS pro antiquiorum dogmatibus evertendis plane, suis autem cui-libet, velit, nolit, obtrudendis. Scholæ, per *vaid. Hoffmanni Oper. Supplem. II.*

porum ad caput ascensum cephalalgiam oriri, asserant, unde exoptatam occasionem indeptus *Noster* adeo eas exagitavit, ut stylo plus quam sarcastico (*Duumvirat. n. 14.*) scriberet, caput non magis a stomacho per vapores lancinatur, quam mentum a vaporibus testium in barbatis. Potius cephalalgiam citra vapores, e Duumviratu per nudam actionem regiminis procedere statuit, in cujus explicatione adeo intricatus est, mentemque suam premit, ut fere idem accidat Lectori, quod Appiano Grammatico, qui Homeri manes ab inferis vocare voluit, percontaturus quæ patriâ quibusve parentibus esset genitus. Recte quidem eliminavit e foro Jatrigo vanam vaporum ascensionem, quam vel hodiernum sibi imaginantur, & plebeculæ persuadent, aut, si mavis, largiuntur Medicorum non pauci; inde vero non obtinuit, quod molitur, omnem nimirum cephalalgiam Duumviratu, & in specie stomacho in acceptum ferendam. Distinguendum enim erat inter cephalalgiam, quæ fit per essentiam & per consensum. Hæc partium inferiorum & potissimum ventriculi vitio sæpe contingit, nec e vaporum transmissione, nec per actionis Helmontianæ regimen, ita ut caput auscultet stomacho, sed ex communicatione membranarum & nervorum. Ut enim ex contusione vel vulneratione membranarum cerebri concitatur quandoque vomitus, ita per eundem symbolismum & consensum ex labe ventriculi capitis dolor non rarius observatur. Exempla apud autores practicos passim prostant. E bile ad stomachum retrocessa hemisphericam ortam notavit PETR. BORELLUS (*Cent. 2. obs. 1.*) E frigida ventriculi dyscrasia immanem capitis dolorem refert AUGUSTUS THONERUS (*lib. 3. obs. 2. p. 141.*) eundem cum compressione & vomitu ex philtro JOH. PETR. LOTICHIIUS (*lib. 2. c. 1. obs. 1. & 2. p. 152. seqq.*)

§. II.

Vertigo omnis ab inferis scandit citra vaporem aut fumum, sed per solum actionis regimen caput auscultat stomacho. (*Jus Duumvirat. n. 19.*) *Vertigines sentiuntur manifeste e stomacho manare.* (*Sed. Anim. n. 7.*) *vertigo ex deficiente stomacho.* (*ibid. n. 30.*) *Non a catarrhis* (*catarrh. delirament. n. 67.*) Neoteriorum plerique in eo conveniunt, quod in vertigine vitiosus & inordinatus sit spirituum motus; circa subjectum primarium autem in diversas opiniones distrahuntur. Oculum non esse *πρῶτον πάσχω*, quæ assertio P. J. FABRO aridebat, ab Excellentissimis viris WEDELIO & HANNEMANNO declaratum est argumento potiori per experientiam desumpto a vertigine cæcorum. (*vid. Miscellan. Natur. Curios. Decur. I. ann. 6. & 7. p. 159. Decur. II. ann. 1. p. 170. seqq.*) Præterea non in solo oculo, sed simul in reliquis sensuum organis similis fit inordinata agitatio, unde & aurium tinnitus, & minus firma objectorum apprehensio solet adesse; imo hoc spirituum motu inordinato ad musculos usque continuato etiam convulsiones nunc graviores nunc leviores superveniunt. HELMONTIUS ventriculum primario, cerebrum per regimen sive *δευτεροταξία* affici, hinc omnem vertiginem in ventriculo stabulari contendit, quod in se ipso tanquam *expertus*, cui credat, qui volet, ROBERTUS observavit. (*Jus Duumvirat. n. 19.*) Verum quod in prioribus jam factum, denuo infusurandum venit HELMONTIO. Distinguendum est inter vertiginem idiopathicam & sympathicam. In illa primario cerebrum afficitur, tametsi non adeo frequens sit; siquidem practicum observationes monstrant, omnem fere vertiginem contingere partium inferiorum vitio, utut diutius affligens & crebrius recurrens usque eo spiritus animales & cerebri texturam alterare

valeat, ut tandem ex vitio cerebri proximo suam ludat tragoediam. Ventriculi labe frequentissime variis modis oboritur, imprimis in quibusdam jejunium ferre nequit, unde tales vertigine corripuntur, quamdiu vacuus est stomachus, subito autem atque unam vel alteram buccellam comederunt, omne malum cessat. Hinc etiam matutinis horis tantillum comedendo vertiginem sæpius præcavent, qui ejusmodi imbecillitate ventriculi laborant. Tale quid in juvene, qui, cum tardaret prandium, vertiginem passus est, observavit Anton. Frachanzanius apud Laurent. Scholzum *Consil.* 311. p. m. 887. Modus, quomodo fiat talis vertigo per consensum stomachi, contrahitur. Vulgo ad vapores in caput elevatos confugiunt, quorum transitus cum sit impossibilis, omnibus viis sufficientissime munitis, HELMONTIUS eorum defensores in scriptis suis passim deridendos propinat, actionis regimen allegando, quod, cum tantum obscuritatis possideat, quantum impossibilitatis vapores, rationem cum JOH. DE MURALTO hancce reddo: Materia quædam pungens aculeataque in ventriculo hospitans, cum otiosa est, & nihil invenit, in quod agat, in ventriculo vellicationem & crispationem fibrillarum nervearum instituit, quæ vellicatio, ut omnis alius motus spasmodicus, communicatur cerebro, quod ex fidi-bus evidenter demonstratur, unde fibrillis commotis spiritus animales turbantur, sanguinis motus simul augetur, quodque heterogeneum in sinu continet, in cerebrum ablegat, unde spiritus tenebris offunduntur, visus obscuratur, alique sensus hebescent, donec nube discussa serenitas iterum accedat. (*vid. Miscellan. Nat. Curios. Dec. 2. ann. 8. obs. 5. schol. p. 28.*) Idem docet JOH. DOLÆUS (*Encyclop. Med. lib. 1. c. 8. §. 10. p. m. 109.*) Vomitu autem abradendas e stomacho sordes non sine causa præcipit HELMONTIUS (*Jus Duumvirat. n. 19.*) quibus idea illa rotans est impressa.

§. III.

Epilepsia frequentius sentitur e penu stomachi in cor & caput attolli. (Conf. Morb. sed. in anim. sensitiv. n. 3.) Comitiale virus circa stomachum primitus elucescit, ac dein maxime in capite percipitur. (tr. de morb. archeal. n. 17.) Divisio Epilepsiæ in idiopathicam probe inculcanda fuisset HELMONTIO, ne, quod secundum quid erat intelligendum, simpliciter asseruisset. Quoties enim a peculiari cerebri & generis nervosi constitutione, in malo præsertim hæreditario, aut a singulari spiritum ataxia, quæ vel a levissima causa externa ad incompósitos ejusmodi tumultus concitari valet, Epilepsia exoritur, insonte ut plurimum stomacho? Quoties etiam lapsus, vulnera, commotiones cerebri vehementiores, animi pathemata &c. determinationes spirituum irregulares & eccentricitates inducunt, ut epileptici motus proveniant, absque vitio ventriculi? Tametsi vero subjectum principale morbi caduci cerebrum cum nervorum profapia jure venditatur, materia tamen peccans, unde epilepsia resultat, non semper inibi progignitur, verum per quandam quasi irradiationem & transmissionem eo tendit. Huc respiciens HELMONTIUS apposite omnino asseruit, comitiale virus circa stomachum elucescere, ac deinde in cor & caput attolli. Suo jam dudum tempore epilepsiam vitio stomachi subortam annotavit GALENUS (*lib. 5. d. loc. affect. c. 5.*) Quin & ipse lien, Duumvirorum alter, suum multoties contribuit symbolum; a vaporibus lienis epilepsiam menstruam habet HOLLERIIUS (*prax. cap. de Epileps. in schol.*) LINDANUS curavit puellam epilepticam obstructione lienis simul laborantem, quæ tempore invasionis auram quandam e sinistro hypochondrio assurgentem observavit, epilepsiæ subsecutæ prænuntiam. Et vero mirabile

quid est, epilepticos ante paroxysmum percipere aut imaginari sibi materiam subtilem, aut, ut vocant, auram, ex uno alterove membro ita sursum repentem, ut ubi ad cerebrum pervenerit, convulsiones demum epilepticas inferat. Exempla quidem apud Practicos passim prostant; epilepsiam e manuum pedumve digitis ascendentem habet FERNELIUS (*l. 5. Pathol. c. 3.*); e dextro crure KERCKRINGIUS (*spicileg. obs. anat. 71. p. 143.*); e tibia GALENUS (*l. 3. de loc. affect. c. 7.*) Imprimis autem curiosum videtur illud LINDANI. Refert ille de quadam muliere, quæ, quoties paroxysmus epilepticus instaret, intra pubem sentire se levem quandam morsiuunculam dicebat, & surgentis auræ locum accurate designabat? Hæc a medio corpore infra & supra umbilicum versus superiora non surgebat celeriter, sed paulatim, & cum cordi approximaret, cor palpitabat, post unum vel alterum pulsum animi deliquio afficiebatur. Postmodum cum pulsus denuo inciperet, tota convellebatur, superata convulsione ad se redibat, donec novus succederet paroxysmus. Ratio hujus phænomeni hæc circiter reddi poterit: Dum in isto loco remotiori exoritur convulsio, primo saltem est quædam fibrarum levis contractura, quæ secundum tractum nervi ipsique annexarum fibrarum sursum pergit, donec ad principium nervorum, motu convulsione continuato, spiritus ibidem violentius agitati facto quasi agmine explodi & expandi incipiunt, unde non tantum omnium sensuum perturbatio, sed etiam totius corporis convulsio subsequitur. Quod si partis, ubi ista aura residere creditur, conditio ferat, ligatura quandoque injicitur, qua auræ ascensus quasi inhibetur, & paroxysmus incipiens præcavetur. (*vid. Philipp. SALMUTH Cent. 1. Obs. 90. p. 55.*) Hoc ipsum tamen fit non propter auræ ascendens inhibitionem, sed quia ligaturâ parti stupor infertur, irritationis sensus & spirituum motus, & tandem fibrarum convulsiones aut omnino tolluntur, aut saltem, quominus adeo vehementes sint, impediuntur.

§. IV.

Apoplexia sive ex vita inordinata, sive demum ex ira vel mœrore erumpat, semper e stomacho surgit, sagittaturque in caput (confer morbor. sed. in anim. sensitiv. n. 12.) it. Nusquam actio regiminis in Duumviratu magis elucescit, quam in Apoplexia & similibus (Asthm. & Tuss. n. 49.) Apoplexiam, alias sideratio & gutta vocatam, radicaliter in stomachum tanquam πρῶτον πᾶσιν defert HELMONTIUS. Cerebrum autem, quod inferiorum regimini auscultare deberet, per deuteropathiam affici & in Duumviratus famulatum, velit, nolit, traduci contendit, non secus, ac si foramen subito claudatur, per quod lumen in locum obscurum alioquin diradiatur. Verum uti cerebrum principale motus ac sensus organum contra HELMONTIUM satis recte asseritur, ita & in eo apoplexiam tanquam motus & sensus abolitionem ob denegatum in ductus & fibras, ut & medullam spinalem spiritibus influxum, residere, cuivis colligere in proclivi est. In specie ventriculos cerebri obstructos veteres incusabant, utpote spirituum animalium elaborationi destinatos. Ast cum basis, cui hæc opinio innitur, firma ac stabilis haud sit, siquidem in cerebri ventriculis nec generantur, nec ex iis pro distributione viæ ad nervos patent, verior eorum habetur sententia qui in principio medullæ spinalis seu basi cerebri obstructionem contingere autumant. Hujus natales vel ex interno vel externo principio derivandi, prout nimirum vel ab extravasatione, stagnatione, visciditate feri aut sanguinis oritur, vel a cranij

cranii depreffione, aut aliarum rerum cerebro incumbentium mole dependet; quorum pertinent omnes ictus, vulnera, casus, tum ipsius capitis, tum cervicis, ex cujus latione apoplexiam inductam mirum casum recensuit WEDELIUS (*Pathol. Dogm. Sect. 3. c. 10.*) Imo hodiernum adhuc solenne est venatoribus ac lanionibus animalia grandiora, e. g. boves, cervos, &c. aut securi valde ad frontem percussa aut cultro acuto in cervicem adacto subitanæ neci, quæ non nisi apoplexiæ species, tradere. Ut vero ad HELMONTII placita redeam, non parum roboris suam sententiam circa partem in apoplexia affectam nancisci judicat ex methodo curationis, quam in eodem morbo adhibuit: *Apoplexiam recentem, inquit, multoties superavi, procurato vomitu, vel destillatis stomachicis validioribus, rebusque aromaticis. (conf. morb. sed. in anim. sensitiv. n. 3.) Apoplecticos juvant remedia pro Duumviratu. (Jus Duumvirat. n. 17.)* Quod vomitoria concernit, verum omnino est, esse eadem insignis efficaciam in apoplexia leviori. Tegularius Jenensis apoplexia correptus adhibito emetico plenissime mox restituebatur. (*vid. WEDELIUS c. l. p. 635.*) CHRISTIANUS LANGIUS (*Miscellan. Curios. Medic. p. 9. & 10.*) non satis deprædicare valet vomitoriorum virtutem plus quam Herculeam in debellanda hac hydria, præsertim in invasionis principio. Egregia pariter sunt exempla duo, quæ c. l. in medium protulit. In specie sal vitrioli albißimum tanquam apoplexia curandæ secretum consilio HELMONTII & FABRI miris inactat præconiis. Tantum vero abest, ut solis vomitoriis cura apoplexiæ semper absolvatur, ut in fortiori eorundem conatus sufflaminet & illudat mali vis. Quod si vero desideratus effectus subsequitur, ratio operationis hæc reddi poterit. Per vomitum illum ventriculus & pectus sursum deorsumque commoventur, excrementa viscosa & glutinantia discerpuntur & protruduntur. Atque cum ob nervorum plexus etiam superioris cavitatis viscus prænobile in commotionem non levidensem rapiatur, obstructio illa oppido sic tollitur. Remedia stomachica, aromatica, & Duumviratui servientia, quæ laudat HELMONTIUS, talia sunt, quæ partibus suis volatilibus capiti simul conducunt egregie, eoque respectu apoplexiæ contratendunt, obstructions referant, liberumque spiritibus in partes inferiores influxum concedunt. Ea vero cum in spirituosus aquis ut plurimum consistant, ne confertim ingerantur, ut ægros inebrient, summopere cavendum. Spirituum namque arcem invadunt, illos incendunt, deflagrare faciunt, deflagrandoque in vappam transmutant, ut ideo aquas apoplecticas ipsius apoplexiæ fomenta appellitet Dn. D. JOH. LUD. HANNEMANN (*diff. de us. & abus. inebriam. §. 36. p. 42.*)

§. V.

Sopor seu lethargus e Duumviratu. (Jus Duumvir. n. 3.) Sopor ab ore stomachi. (de Febr. c. 10. n. 29.) Sopor tam morboßi quam artificiales sive opiatorum optime debellantur per lixiviam, quæ tamen nullatenus agnoscuntur pro remediis cephalicis. (Jus Duumvirat. n. 31.) Somnum naturalem e Duumviratu derivat HELMONTIUS, quod vel ex unico loco in priori exercitatione jamjam allegato, hic autem repetendo, satis apparebit: *Somnus (scribit Jur. Duumvirat. n. 39.) in præcordiis suscitatur, & in capite nobiliter se manifestat, adeoque caput ad consensum præcordiorum parere non erubescit.* Ex hoc fundamento vel invitus compellebatur, ut in sopore præternaturali, sive affectibus soporosis, lienem & stomachum pro subiecto primario declararet. Uti vero somnus naturalis ex imminuto spirituum in organa externa influxu, *Frid. Hoffmanni Oper. Supplem. II.*

& ex aliquali eorundem torpore rectius deducitur, ita in somno præternaturali nimius spirituum torpor incusandus, adeoque nec stomachus nec lien subiectum erit primarium, sed cerebrum & cerebellum, meatusque seu pori eorum, per quos spiritus animales ad officia sua obeunda vel in ipso cerebro vel ad externa sensoria demandandi sunt. Hanc quidem opinionem probatissimorum Medicorum pro cerebro militantium debellare machinatur, quando ratione curationis lixiviam in soporosis affectibus valde proficua pro remediis cephalicis nullatenus agnoscit. Si ex hoc argumento stramineo contra adversarios aliquid obtinuisse sibimet imaginatus, quam bene Duumviratui consulatur, non video, quando lixiviam nec pro remediis stomachicis nec spleneticis, nisi certo respectu, agnoscuntur, ita nimirum, ut & capiti quandoque conducant egregie. Sunt autem non contemnendi usus in sopore præternaturali, quatenus spiritus torpidos volatilisare & agiles reddere valent, unde etiam ex hoc capite contra HELMONTIUM cephalica dici queunt non inconcinne. Stomachicis curari bene *Idem* advertit. (*c. l. n. 26.*) sed & stomachica cephalica esse expendendum *Ipsi* erat.

§. VI.

Amentia omnes e stomachi regione manant (Conf. morb. sed. in anim. sensit. n. 3.) Amentia notio in sensu generali sumitur HELMONTIO, ita ut quasvis mentis abalienatæ species, e. g. delirium phreniticum, melancholiam, maniam &c. complectatur. *In penitiori tunica stomachi, velut thalamo, habitare animam mortalem, eamque intra sinum suum obvolvare mentem immortalem, expressis verbis docuit c. l. n. 2. & ex hoc fundamento quasvis animæ & animi motiones & læsiones deducere ipsum oportebat, ne se dictorum immemorem mendacii notâ infamem redderet.* Inde etiam amentias, quæ omnium fere suffragio cerebri sacellum tanquam fixum domicilium incoluerant, e pristina sede dejecit in stomachum. *E liene spinoso absque materiali errore prodire easdem alibi statuit. (Jus Duumvirat. n. 1.)* Id vero nemini paradoxon videbitur, nisi cui artificissimum, quod ex mente ejus lienem & stomachum intercedit, connubium haud innotuit. Brevitatis studiosus provoco ad prioris exercitationis *Sect. V.* ibi radicem huic sententiæ præcisam inveniet Lector benevolus. His prælibatis ad aliquas amentiarum species ut progrediar instituti ratio monet.

§. VII.

Deliria testantur Duumviratum male affectum (Jus Duumvirat. n. 30.) habitant in præcordiis. (de Febr. c. 11. n. 3.) Delirium in sensu strictiori, quatenus cum febre conjunctum, accepisse videtur HELMONTIUS, quod alias Phrenitidis notione, *Ipsi* quidem insolitâ, exprimitur; in cujus tamen etymologia pro roboranda sua sententia, proque asserenda Duumviratus prærogativa egregii quid, scilicet quod pueri in faba, invenisse sibi abblanditur. Nimirum, *ἀπὸ τῶν φρενῶν* phrenitis dicitur; *φρένες* autem præcordiorum nomine os stomachi denotare, non veretur obtrudere, quem errorem in prioris exercitatione *Sect. V. §. 11. n. 1.* refutavi. Hinc tantam prærogativam stomacho vendicare nititur, eo quod cordis nomen (*vel quasi*) auctoritatem ac proprietates præ ceteris visceribus ad se rapuerit; (*Sextupl. Digest. n. 18.*) & concludit locum affectum in deliriis, & proinde etiam in phrenitide non in cerebro, sed in præcordiis potius, h. e. Duumviratu stomachi & lienis esse indagandum, utpote quorum viscerum archeo, Qq 2 qui

qui tunc ad furorem redactus est, placato mitigatoque symptomata illa funditus demum eradicari possint. Verum his ipsis male nobis consuluit HELMONTIUS, neque partem affectam, neque causam ex rei veritate indigitans. Tametsi enim in hac hypothesei iudicio CHRISTIANI LANGII (*Pathol. animat. p. 67.*) quædam subsint, quæ non statim fusque deque habenda; potior tamen & experientiae conformior eorum habetur sententia, qui in phrenitide inflammationem cerebri aut ipsius aut membranarum ejusdem contingere asserunt, oriundam a rapidiori motu humorum & spirituum, qui si a miasmate febrili ejusque intensiore commotione inordinatis & tumultuariis motibus ferantur, judicia hinc in mente enata non possunt non a sanorum regularibus magis judiciis longissime recedere. Antiqui Medici urinas nimis dilutas (quas in malignis & acutis febribus funestum semper indicium notavit *Excell. Præses Tr. de Febr. ad Poter. p. 870.*) indicare phrenitidem prodiderunt, & respondet quoque experientia, testantur enim de ingenti secessione feri a sanguine, unde ipse crassior redditus per venas angustissimas cerebri non bene circulatur, sed inflammationem ibi parit. Quod curam HELMONTIANAM concernit, *deliria remediis stomachicis, non cephalicis mitigari, aboleri*, scribit; (*Jus Duumvirat. n. 26.*) Ast nec stomachica, nec cephalica stricte sic dicta curare phrenitidem affirmaverim, quin potius ratione inflammationis impetus sanguinis affluentis refræmandus, tum per sanguinis missionem, (quam aliqui adeo necessariam judicant, ut arteriotomiam commendent, quam magna cum felicitate administratam expertus est DOMINIC. PANAROLUS *Pentec. 1. obs. 29.*) tum per præcipitantia, sanguinis stagnationem resolventia, non neglectis pro re nata velicatoriis, clysteribus, pediluviis, e blandis nervinis & paregoricis: ratione delirii vero motus spirituum inordinatus corrigendus per succinata, camphorata, cinnabarina, castoreata, præcipitantia, moderatiora tamen, quibus etiam, si vires plenarie non sint dejectæ, opiata in parca dosi sunt associanda, ita ut, quando illa motum inordinatum, hæc nimium & impetuosum respiciant & suspendant lienem secundum HELMONTIUM (*Jus Duumvirat. n. 40.*) ab operosa phantasmatum seriorum exercitatione. Quò autem hisce indicationibus fiat satis, & in hoc peracuto affectu, quin & aliis morbis malignis cura auspiciato procedat, probe observentur saluberrimæ cautelæ, quæ habet *laudatus Dn. Præses (c. l. p. 870. seqq.)*

§. VIII.

Amentia hypochondriacæ extra controversiam sunt præcordiales. (*Dem. Id. n. 5.*) melancholia ratione significationis sua gaudet latitudine, modo enim humorem antiquis dictum melancholicum, atrum nempe & ex flavo nigricantem, aut si mavis statum sanguinis & feri acetosum fixumque variis gradibus differentem, modo delirium melancholicum ab illo feri & sanguinis statu oriundum denotat. Prout autem dicta sanguinis crasis & motus spirituum variat, ita mens in ratiocinando varia quoque concipit deliria; id quod vel in fanis a vini largiori usu videre est, quando e multis ebriis eodem vino delibutis hic tristes cogitationes volvit, ille in risus & jocos solvitur, iste lites ferit, alius in somnum fertur aut Venerem; de quo Lyricorum Pater HORATIUS (*Carmin. l. 3. od. 21.*) eleganter cecinit:

O nata mecum Consule Manlio,
Seu tu querelas, sive geris jocos,
Seu rixam & insanos amores,
Seu facilem, pia testa, somnum.

Quod ad subjectum principale morbi & delirii melancholici, victoriam ante triumphum cecinisse videtur HELMONTIUS, quando melancholias extra controversiam præcordiales esse pronunciat, i. e. oriri stomacho male habente. Qui cerebrum imaginationis & rationis sedem contra ipsum vindicant, rectius in hoc melancholiam nidulari reputant. Sicut enim status animæ naturalis ejusque functiones & operationes e sanguinis circulatione per capitis vasa optime enucleantur, (*vid. Disputat. de morbis mentis Præside Dn. D. Frid. Hoffmann a Joh. Jac. Stangio habitam*): ita ex ejusdem circulationis sanguineæ per vasa cerebri tenore ac statu præternaturali hicce morbosus mentis affectus omnino derivandus est. Tales enim in mente oriuntur cogitationes, tales ideæ & inclinationes, qualis solet esse in capite sanguinis circuitus. Ipsa vero experientia stabilitur, melancholicos omnes ferme sanguine copioso, crasso, viscidiori, verbo: pro motibus naturalibus debite perficiendis improporcionado abundare, qui in capitis vasis subtilioribus hæsitans perversas phantasias producit. Hinc melancholia hypochondriaca omnium est decantatissima; eo quod ad eandem facillime disponuntur hypochondriaci. Unde vero affectio hæc hypochondriorum oritur, nisi a sanguine, quem dixi, crasso? Hoc respectu subjectum causæ omnino quandoque constituunt infimi præsertim, quin & medii ventris viscera, quæ sanguinis generationi & diathesi *πρώτως* vel *δευτέρως* velificantur, dum alia magis, alia minus concurrunt. Imprimis ventriculus tanquam publicus corporis promus condus suos hic patitur manes. Neque lien insons semper est, qui in demortuis melancholicis sæpe tumidus aut aliis vitiosis qualitatibus destructus ab anatomicis observatus fuit. (*vid. THEOPH. BONET. Anat. præct. lib. 1. Sect. 9. obs. 24. 26. 27. seqq.*) Proinde in cura melancholicorum, altero oculo hypochondria, altero caput respiciendum esse optime monent practici.

§. IX.

Infantia, sive continuo æstu ferociant, vel per intervalla repetant, spiritum Duumviratus inquinant. (*Dem. Id. n. 36.*) *ἔθεν ἐστὶν ἄλλο μανία ἢ ἐπίτασις τῆς μελανχολίας ἐπὶ τὸ ἀγριότερον*, i. e. Mania nihil aliud est, quam intensio Melancholiæ ad majorem ferocitatem, TRALLIANUS perbelle dixit. Non modo enim melancholici in maniacos exacerbantur & transeunt, (*vid. HILDANUS Cent. 4. obs. 8. & 9.*) sed & maniacorum exempla suppetunt, qui melancholici facti, quale est illud observatu dignissimum, quod allegat LAZAR. RIVERIUS (*obs. 32. a Sam. Form. communicat.*) Nec ergo ratione partis affectæ inter se different affectus hi in se invicem facile convertibiles. Equidem quam in reliquis deliriis extollit, eam quoque hic ingeminat sententiam HELMONTIUS, nempe sedem mania esse in Duumviratu. Ast rectius alii cerebrum, in cujus poris spiritus hospitantur & ideæ formantur, mania officinam constituunt. (*vid. JOH. DOLÆI Excyclop. Medic. l. 1. c. 4. p. m. 57.*) in quantum illud a naturali statu deflectat, apparet ex anatome mania defunctorum, (*vid. Miscellan. N. C. Dec. II. obs. 234. p. 546.*); adeoque HELMONTIUS suo asserto nihil aliud evincet, quam dari quandoque maniam per consensum hypochondriorum. Ut *Idem* annotavit (*tr. Dem. Id. n. 42.*) *singulare est maniacos, quod utcumque nudus cubet humi, vel in marmore pernoctet, severissimo Boreæ flatu non glaciatur, vel artus commoriantur sibi*; quod phænomenon ex statu massæ sanguineæ vitiose exæstuantis explicandum venit. Hæc tamen frigoris tolerantia non semper solet adesse; siquidem & observantur maniaci,

maniaci, qui vestes non modo non dilacerant, sed etiam contra hybernū gelu eas exposcunt; quin & PLATERUS maniacum frigore periisse & quasi congelatum altero mane inventum refert. (*observat. lib. I. p. 82.*) Quod ad curam consideravit per ignem philosophus (*c. l. n. 45.*) ideam amentem jam impressam in radicalia vitæ principia non posse auferri una cum subiecto, quod vestivit. Idcirco inveniendum erat remedium, quod posset occidere, necare, tollere, sive obliterare præfatam illam amentie imaginem, sive maculam jam characterizatam, non secus atque macula fœtui impressa, admota manu cadaveris longâ tabe extincti, omniq̃ vitæ proprietate exuti, donec frigus partem maculatam penetraverit, (quod fit spatio unius miserere.) de cætero sponte evanescit. Eodem modo & mania ideam perire debere, sospite interim subiecto immediato, cui inhæret; sive id fiat introducendo mortem ideæ, vel ingenerando æquivalentem ideam, aut præpollentem fatuæ ideæ. Quæ ipsa philosophia non spernenda, quam pluribus (*c. l.*) prosequitur. Quod ad soporifera, sanæ rationi consona (*tr. Duumvirat. n. 56.*) protulisse videtur. Sæpe per immania soporifera mania succurrere frustra est tentatum. Ita etiam eos, qui maniam opiatu compescere satagunt, insigniter errare docet, (*tr. de Lithias. c. 9. n. 84.*) cum omne opiatum in se sit amens, quia amentia nil præter somnium vigilans, siquidem vix decupla dosis somnium amenti conciliat, minori autem dosi efficitur nihil. Si vero aucta dosis somnus amenti obrepit, dementiam & somnium vigili augebit, ac disparatas insomniorum vanitates. Decepit autem scholæ, pergit *n. 85.* somnus sponte propriâ amenti obveniens. Nam is aut ex bona causa provenit, ita & sanitatis præcursor index amentiam solutam iri spondet. Addit, quod in opio sit connexum, virus aliquod, unde lethalia papavera somno decantantur a poetis. Ipse autem extollit miris præconiis (*n. 86.*) in sulphure vitrioli delitescens somniferum saccharinum, quod suavem apportat somnum cum facultatum principalium restauratione. Simile in sulphure etiam agnoscit. Somnum autem laborem afferentem (qualis ex opiatu) malum judicat. Hæc quidem auditu non injucunda, & ex parte vera, nec tamen scrupuli expertia, qui sane sublatus fuisset, si PARACELsus aut HELMONTIus pro integritate, quam crepant, legitimam sulphuris hujus præparandi rationem addidissent, quam quidem HELMONTIus indigtasse videtur *Tr. Duumvirat. n. 9.* Illæ enim præparationes, quas HARTMANNUS, QUERCETANUS, ZWELFFERUS, SCHROEDERUS &c. proponunt, expectationi non satisfaciunt. Imo paucissimi hodiernum credunt, virtutem vitriolo inesse talem, quæ ad somnum inducendum & dolores sedandas opio præferri mereatur. (*vid. FRID. HOFFMANN Clav. ad Schröder. l. 3. c. 26. p. 364.*) Interim cum certum propter incertum deferendum haud sit, opium per correctionem a vitiosis qualitatibus, quas HELMONTIus (*c. l. n. 8.*) taxat, liberatum, pro re nata & prudenti administratione Medici nec in mania rejiciendum.

SECTIO III.

De Morbis medii Ventris, Asthmate, Incubo, Syncope.

§. I.

Asthmatis sedes est in Duumviratu, unde videlicet totius moderamen pendet. (*Tr. Asthm. & Tuss. n. 28.*) Asthmatis nidus circa stomachum. (*Cust. Frid. Hoffmanni Oper. Supplem. II.*

Err. n. 40.) Asthma nominare licet caducum pulmonis; est quidem nidus ejus in Duumviratu, attamen in area thoracis fructificat. (*Asthm. & Tuss. n. 29.*) Sagittator asthmatis sicci est in Duumviratu, scopus vero ejus est pulmo (*ibid. n. 59.*) Asthma siccum epilepsiam pulmonum vocat (*n. 69.*) Anhelitus difficultas confirmavit Helmontium, totam illius difficultatem ad stomachi contermina loca sitam esse, ac insontem pulmonem haberi. (*Jus Duumvirat. n. 62.*)

Satis operosus fuit HELMONTIUS in evolutione hujus affectus contumacissimi, quo inter incommoda corporis SENECAE effato nullum molestius. Duplex autem statuit asthma, unum quidem muliebri, ex solo uteri regimine pendens, alterum vero promiscuum, utrique sexui commune. (*Asthm. & Tuss. n. 9.*) quod ratione excretionis distinguit in humidum & siccum. Ut ratione partis affectæ scopum feriret, varia tela vibravit. Mox enim membranam pulmonem ambientem & pulmonem ipsum, mox stomachum, lienem aut uterum pro sede hujus mali agnoscit. Ad Duumviratum tamen & stomachum imprimis collimavit, quod ex præmissis apparet. Et sane quod humidum attinet, non negandum est, hæere illud sæpius in stomacho, quam ipsis pulmonibus. Quod si enim stomachus infarctus est saburra quadam crassa, viscida, mucilaginosa, eaque ex quacunque causa occasionali in motum traducitur, ut incipiat turgescere & quasi inflari, periculosa satis producit asthmata, partim quod nimia distensione ventriculi impediatur motus diaphragmatis pro respiratione maxime necessarius, partim quod diaphragma ipsum in consensum non levidensem rapiatur, ut illius convulsio & perversus motus subsequatur. Nec stertor, qui vulgo habetur signum infarctionis, semper a pulmonibus oritur, sed observante ETTMULLERO a materia viscidiori in stomacho collecta sæpè confurgit. Imo scorbutici & hypochondriaci post pastum difficillimo asthmate non raro vexantur, quod non nisi ex vitiata ventriculi digestionem contingit. Huc respiciens HELMONTIUS vomitoria commendat, quibus spinam extrahendam annitur; nec infelicitè, calculus suum addentibus Practicorum celeberrimis, rationibus sat manifestis adjutis. Æqualiter enim materiam haurit vomitus, sive hæreat in stomacho sive in pectore. Notum est, quod in omni vomitu simul insignis fiat constrictio pectoris, & quod per motum gulæ sursum simul moveatur arteria aspera, ut adeo ex ventriculo & pectore simultanea fiat evacuatio. PETRI POTERII primaria methodus curandi asthmatis consistit in vomitorio reliquis medicamentis præmittendo. (*vid. obs. cent. 2. c. 16. cent. 3. c. 22.*) TIMÆUS A GULDENKLEE (*lib. 2. epist. 13. p. 122.*) pertinacissimum hunc affectum nullisque cedentem remediis superavit per aquam benedictam Quercetani procurato vomitu. Legi meretur circa vomitoriorum in asthmate usum eruditus discursus ROSINI LENTILII in *Miscellan. Medic. Pract. p. 2. p. 626. seq.* (*Add. HOFERI Herculi. Medic. p. 118.*) Quin & ipsa natura monstrat interdum usum vomitoriorum fore proficuum. BENED. SYLVATICUS (*Cent. 3. Consil. 49.*) refert asthma singulis noctibus recurrens cum suffocationis periculo, a quo non prius liberatus æger, quam sponte succedente vomitu tam assumptorum, quam materiæ pituitosæ. Siccum quod concernit, citra materiæ sensibilis excretionem contingit, & ab inordinatis motibus aut distorsionibus spasmodicis tum in organis respiratoriis, tum extra ea originem sumit. Helmontio caducus aut epilepsia pulmonum vocatur, quam bene, meum determinare non est. Male habet ista appellatio RIVINUM (*Disput. de Asthma. Qq 3 §. 30.*)

§. 30.) non incongrua tamen videtur WEDELIO (*Disputat. de Asthm. Mechanic. Sect. I. p. 19.*) Commendandum interim salutare consilium HELMONTII in curando asthmate sicco, quando (*Asthm. & Tuss. n. 64.*) scribit, *remedia asthmati debentur sicco, quæ epilepsiæ inveteratæ; antispasmodica enim cum antihysteriis pro sexus conditione maritata hic omnium sunt convenientissima. Frustraneas recte dicitur in Asthmate, præsertim sicco, expectorationum sollicitationes per linctus, looch, syrupos, per phlebotomiam, ac solutiva, per chinæ, sarzæ aut sassafra potus, (quos falso exsiccantes nominant) perque Dietæ parsimoniam, (qui tamen in sene asthmatico observaverat, eum melius habuisse subter jejunia & sub quadragesima, quam mox a Paschate (n. 70.) cui & postmodum parciolem & duriolem cibum præscripserat (n. 72.) sudores, balnea, & cauteria (n. 36. 37.) ridetque, quod hæserint circa pulmonem vulpis, quam indefesse currentem scirent (n. 76.) miraturque (tr. pleura furens n. 30.) cur looch sanum pariter non paraverint ex cauda equi tota æstate verrendis muscis agitata.*

§. II.

Incubus sive Ephialtes suscitatur e præcordiis. Advenit enim plerumque summa durioris cibi largiore cœna vel alias laborante stomacho; ideoque id contingit non quidem cubanti latere dextro, sed tantum dormienti in lumbis supino, vel saltem latere sinistro, dum scilicet pene est dormitum satis. Est nempe onustus ac oneratus stomachus, ejusque nondum absoluta concoctio, ideoque contingit sinistro latere cubantibus, quorsum nempe os stomachi contortum est. (Jus Duumvirat. n. 15.)

Tamet si a nonnullis parvi pendatur & magis pro vexamine ludibrioque nocturno, quam pro gravi affectu habeatur incubus, attamen si penitus consideretur, pro naturæ ludo ac joco minime, sed pro satis portentosa & periculosa ægritudine habendus, quia non solum per vigilias invasit, (JOH. RHODII *Cent. I. obs. 54.*) sed in epilepsiam, (TIMÆUS A GULDENKLEE *Cas. lib. I. c. 17. p. 44.*) apoplexiam (JOH. RHODIUS *c. l.*) mortemque desinit. (*vid. Miscellan. Nat. Cur. Dec. 2. ann. 5. p. 446.*) Circa subjectum sive partem primario affectam varii varias foveant sententias. Cerebrum affici opinantur SENNERTUS, (*Medic. Pract. lib. I. part. 2. c. 29. p. 150.*) LUD. MERCATUS (*lib. I. de intern. morb. curat. c. 10. fol. 21.*) PETRUS FORESTUS (*lib. 10. de cerebr. morb. obs. 50.*) alique. Verum cum sit læsæ respirationis symptoma, unde & asthma nocturnum vocatur, merito sedes ejus in organis respiratoriis quærenda est. In præcordiis Incubus suscitatur, HELMONTIUS docuit, quo nomine os stomachi indigitavit; potiori tamen jure diaphragma, quod & præcordiorum titulum a priscis mage temporibus obtinuit, pro parte affecta agnoscitur, non exclusis thoracis musculis præsertim intercostalibus, qui pro dilatatione thoracis in respiratione suam eamque egregiam conferunt symbolam, siquidem juxta experimentum PECQUETI (*dissert. anatom. de circul. sangu. p. 250.*) omnibus aliis musculis in pectore & abdomine rescissis, si diaphragma & intercostales illæsi maneant, æque respirare animal ac si nullum esset vulnus, observatur. Ad nervos autem musculis respirationi servientibus dicatos una respiciendum est, quorum nempe aliquali obstructione, compressione, &c. liber spirituum influxus præpeditur, hinc facile dilucidari valet illud phænomenon, quod a nervi intercostalis & phrenici irritatione, musculis thoracis & diaphragmatis convulsis, larynx etiam convellatur, ut cum sensu strangulationis loquela

postmodum impediatur, aut saltem sonus inconditus proferatur; ex eodem enim nervo, qui intercostales movet, dimissus ramus laryngi prospicit. Utut vero præcordiorum titulo diaphragma potissimum afficiatur in incubo, extra culpam tamen stomachus omnino non est, utpote si alimentis durioribus & copiosis infarciatur, aut flatibus distendatur, diaphragma sursum pellit. Hinc est, quod dorso dormientibus & quibus ex nimia ingurgitatione vel voracitate in cœna diaphragma sursum repellitur, incubus sit frequentior, cum ii, qui strictiori utuntur diætâ & cœna moderatori, rarius aut nunquam eo corripiantur.

§. III.

Syncope immediate ab ore stomachi manat. (Jus Duumvirat. n. 21.) Syncope ab ore stomachi originem sumit. (sed. anim. n. 7.)

Syncopis tractationem imprimis circa subjectum difficilem esse præter ALEXANDRUM MASSARIAM & HIERONYMUM MERCURIALEM etiam alii præclarissimi autores docuere. Interim si phænomena in dicto morbo occurrentia rite examinentur, illi facile assensum merebuntur, qui a tot seculis cor pro subjecto syncopis constanter agnoverunt. Equidem hoc ipso tanta cordi dignitas, quantam olim obtinuit, denuo non conciliatur, quâ nimirum præsuppositâ syncopen explicatum ibant Veteres. Si enim certum est, quod certum esse sensuum ope adjuncta evincit ratio, in corde nihil desiderari, quod musculo datum, nec, quod musculo denegatum, in corde reperiri, non erit cor amplius sui generis substantia, adeoque nec certæ substantiæ, ut ignis, calidi innati, animæ, &c. sedes, nec certi humoris, ut sanguinis generator, nec spirituum quorundam vitalium productor; uti eleganter philosophatur NICOL. STENO (*de muscul. & glandul. p. 27.*) Neutiquam tamen adduci possum, quin cum HELMONTIO e corde in os stomachi sedem syncopis transferam. Cum enim ejusdem formalitas in pulsu minuto & ad sensum fere abolito consistat, cor quoad systolen suam insigniter lædi divinor vitio tum sanguinis, tum, qui ipsius conditiones sequuntur, spirituum. Remotius tamen quandoque concurrat ventriculus, præsertim si in eo acidum prædominetur, ita ut cruditates acidæ ad sanguinem delatæ ejusdem spiritualescentiam & elasticitatem impediant, spissitatem contra & stagnationes inferant; hinc scorbuticis & hypochondriacis familiare malum existit syncope. Sic GALENUS stomachicæ syncopis mentionem fecit, (*de symptom. caus. lib. I.*) qualis illa, quæ quandoque oritur ex vitio oris ventriculi vehementer dolentis ab acri, venenoso aut crudo adhærente, vel falso pungente humore, adeo ut præ dolore dissipentur spiritus, ac si in syncopen acerbissimam & non raro in mortem ocysime prolabantur ægri; quam syncopis speciem inter eas numerat, quæ fiunt per consensum, LUDOV. MERCATUS (*de intern. morb. curat. l. 2. cap. 10. fol. 224.*)

S E C T I O I V.

De Morbis Infimi Ventris, Apepsia, Fame canina, Cæliaca passione, Lienteria, Vomitu.

§. I.

Apepsia, bradypepsia, appetitus dejectus, ciborum nausea oriuntur a splenis fermento deficienti.

te. (*A. sed. anim. ad morb. n. 10.*) Cramben dum appositam plus quam semel recoxisse viderer, si de fermento splenis in stomachum spirando impræsentiarum vellem esse sollicitus, aut in eodem iterum iterumque refutando prolixus. Evolvat L. B. prioris exercitationis *Seet. 4. §. 14.* ibidem plura hanc materiam concernentia inveniet. Quapropter sponte sua corruisse videtur præmissum HELMONTII dictærium, falsiori thesi superstructum. Ne tamen durius in HELMONTIUM memet egisse quis judicet, non rejiciendum plane arbitror, quicquid de fermento deficiente arbitratus est, ita tamen, ut commentum de splenis elaboratione & transmissione separetur. Quemadmodum enim in statu secundum naturam menstruum, aut si mavis, fermentum illud in glandulis œsophagæis & stomachalibus elaboratum, inque ventriculum deciduum & congestum appetitus genuina causa existit: ita si illud aut in sufficienti copia non præsto sit, aut quoad suam energiam non satis efficax pro vellicandis leniter ventriculi tunicis, non potest non appetitus prostratus & ciborum nausea oriri. Eadem ratione si illud aut in quantitate, quam par est, minori seceratur & colligatur, aut qualitatibus vitiosis imbutum sit, quid aliud sperandum, quam apepsiæ, bradypepsiæ incommoda, & per consequens cruditates nunc acidæ, nunc pituitosæ, nunc nidorosæ, pro conditione fermenti acidi, pituitosi aut biliosi, verbo: cibis solvendis impropportionati. De cætero bene se habet, quod statuit HELMONTIUS fermentum per atates & morbos minui. (*Retent. p. m. 495.*) Recte enim acida desidi appetitui quandoque propinanda censuit, (*cal. eff. non diger. nu. 24.*) quæ ideo esurina ipsi dicuntur, & (*c. l. & Sextupl. digest. alim. human. n. 12.*) recensentur.

§. II.

Sub fame canina duplatur lienis fermentum. (*Retent. p. m. 496.*)

Contrariorum contrariam esse rationem *Nostro* probe innuit. Hinc cum ex fermento deficiente apepsiam & inappetentiam dependere statuisset, per bonam consequentiam in fame canina fermentum duplicari asseruit, quæ assertio saniori Philosophiæ & Medicinæ non repugnat, nec cæteris paribus, i. e. remotis, quæ lienem tangunt, removendis, requirit, ut prolixius eidem inhæream.

§. III.

In Cœliaca passione Pylorus nunquam clauditur. (*Pylor. Rect. n. 2.*) *Pertinax pylorus est in apertione, qualiter cœliacis evenit* (*ibid. n. 5. p. 181.*)

Aut pro synonymis lenteriam & cœliacam habuit HELMONTIUS, aut, quod probabilius, invicem confudit, cum tamen affectus sint invicem distincti, tum ratione excretionis, tum partis affectæ. In illa alimenta parum aut nihil immutata per alvum excernuntur, in hac autem cum excrementis confectus chylus rejicitur. Ibi ventriculus, hic intestina laborant, adeoque præmissa duo axiomata quadrassent potius pro declarando subiecto lenteriæ, quæ vitio pylori sæpe contingit, quando ejusdem fibræ adeo laxæ & resolutæ sunt, ut massam alimentarem prius elabi concedant in intestina, quam chylus exinde elaboratus est, quandoque etiam ventriculi nimia sensibilitas adest, e. g. ab excoriatione, ulcere, acrimonia scorbutica, &c. ut alimenta justo citius expellat. Sed nec menstruum stomachale semper immune, si pro extrahendo chylo iners existat. In cœliaca intestina affici dixi. Sicut enim ventriculi functio in eo maxime consistit, ut alimenta non solum contineat, sed & motu suo activitatem sol-

venti majorem imprimat, imo ipsam massam magis subigat, atteret, ejusdemque resolutionem adjuvet: ita intestinorum erat particulas evolutas laudabiles lacteas ab excrementitiis separare, illas ad venas lacteas urgere, has autem foras eliminare. Quod si igitur eveniat, ut intestinorum tonus sit nimis laxatus, aut orificia venarum lactearum sint obstructa, e. g. per cicatrices post dysenteriam, aut pituitam latera intestinorum investientem, cœliacus fluxus subsequitur.

§. IV.

Vomitum fit, dum clauso pyloro sese sursum contrahit, non quidem per corrugationem stomachi, sed motu totali stomachi ad gulam, adeoque pylorus vomitum imperat & retentivæ non auscultat. (*Pylor. Rect. n. 6.*) *Vomitum non fit, nisi clauso & inverso pyloro.* (*ibid. n. 21.*) Pylori munus probe perspexit HELMONTIUS eum videlicet esse rectorem & præsidem retentionis in stomacho, dum sui apertura naturali transmittit inferiora versus ventriculi contenta, ut sui contractura præternaturali superiora versus regurgitare facit eadem. Quo præsupposito difficile ipsi haud erat, modum quo vomitus contingit, adeo belle describere. Et revera, dum pylorus fortiter se constringit, subito totius ventriculi motus invertitur, qui propter fibras circulares a pyloro progreditur ad orificium sinistrum, quod convulsam ob fibrarum identitatem gulam in consensum rapit, ut contenta stomachi per os foras protrudantur. Ex ipsa rei veritate hæc esse desumpta, confirmat *avro-phia anatomica OLAI RUDBECK Patris*, (*obs. anat. 20. vid. Sibold. Heemsterhuys. Mess. Aur. p. 332.*) ita vero inquit ille: *Canis vivus sectus vomitionis actum palam fecit, primo pylorus se contraherebat; mox systole totius ventriculi ab orificio inferiori ad superius sequebatur, ac tandem œsophagi, materiam effundentis.* Idem illustrat observatio KERCKRINGII (*spicileg. Anat. c. 1.*) de nummo a puella improvide deglutito, ac intra pylori circulum hærente, hincque ad vomitus pertinaces ac tandem lethales stimulantem add. SALMUTH. (*Cent. 1. obs. 20.*) BENIVENIUS (*de abdit. morb. caus. c. 36. p. 239.*) quorum ille vomitum a pylori scirrho, hic ab ejusdem callo recenset. Quicquid autem horum, duo tamen circa *Helmontianum* hoc dogma monenda veniunt, quorum prius, omnem quidem vomitum supponere pylori convulsionem, minime tamen semper adeo arctam ejus occlusionem & quasi sigillationem, ut instar janitoris peruinacioris non emittentis contenta se habeat. Cum non raro infra hunc janitorem & in tractu intestinali stimulus ille everforius spasmodicus hæreat, qui per pylorum ad gulam usque continuatur, quod vel sola sæcum per os in morbo iliaco exclusio evincit. Nec de nihilo est, quod RIOLANUS (*Enchirid. Anat. Patholog. l. 2. c. 17.*) differit, illam duodeni ad spinam replicationem non raro vomitibus occasione existere, quatenus bilis transfluxus in hac aliquando prohibeatur, hinc ad ventriculum regurgitet. Deinde nec ideo HELMONTIO concedenda monachalis illa pylori potestas, quam in fibras totius stomachi habere credit; quatenus instinctus vomituriendi non semper pylorum afficiunt, sed intermediam utrique orificio non raro partem, imo alterum orificium, quemadmodum HILDANUS (*Cent. 5. obs. 36.*) vomitum ab ulcere orificii superioris testatur, ita ut sine pylori retractione hæc quidem excretio vix unquam concipi queat, non tamen semper hic primo irritetur, sed aliquando a fundi fibris in consensum trahatur, adeoque ejus functio naturalis pariter alterius facultatis, scilicet fibrarum contractricis, sit pedissequa, & harum mo-

tui simpliciter subiecta, fecus ac HELMONTIUS sibi concepit eandem. vid. Magnif. BOHNII dissert. de Vomitu §. 3.

SECTIO V.

De Artuum Morbis, Arthritide, Podagra, Ischiadico malo.

§. I.

A Rthritis pro causa agnoscit acidum, quod licet stomacho sit gratum, in fundis tamen alienis evadit inimicum. (*A sed. anim. ad morb. n. 5. 6. & 11.* In arthritide præcedit stomachi quædam indispositio cum febricula, antequam ullum signum in artubus elucescat. (*Ignot. act. regim. n. 40.*) Podagrici accusant stomachum, seque ibidem primos sentire motus ac velut agitationes febriles tanquam præcursores accessus. (*A sed. anim. ad morb. n. 9.*) Podagrici plures sibi instantem accessum prædicere norunt ex mutato excremento intra pedis digitos nascente. (*Volup. vivent. morb. n. 19.*) Ischiadica passio a pyloro male affecto. (*Jus Duumvirat. n. 20.*)

Arthritis notio generalis est, & quatuor vulgo complectitur species, pro diversitate articulorum diversa nomina sortitas. Chiragra dicitur, cum manuum; Ischia, cum circa coxendicem; gonagra, cum genuum, podagra cum pedum articulos dolor immanis invadit & laceffit. Verum intra arctiores hos cancellos non terminatur hujus mali furia, sed ejusdem activitatis sphaera in omnes totius corporis articulos extenditur, ita ut Trachelagram, Rachidagram, Cleidagram, Pechyagram, Rhinagram, imo & Glossagram passim deprehendas penes auctores, prout nimirum nunc cervicem, nunc dorso spinam, nunc claviculas, nunc cubitum, nunc narium, nunc linguam affligit. De dentium podagra etiam STROBELBERGERI exstat libellus. HELMONTIUS originem & causas hujus morbi explicaturus stomachum primario inculcat, cujus indispositio semper præcedat, antequam doloris signum in artubus compareat; deinde aciditatem hostilem in habitum corporis deferri atque ibidem instar spinæ pungentis mordicare statuit, & hinc etiam synovia ab aciditate grumescat, caseiformis & opaca fiat. Synoviae autem notione intelligit mucilaginem quandam pellucidam, qualis vitulo mactato amputatis pedibus e tibiis stillat, unde producat degener morbosus partus, infelix nodorum mater, illa nimirum calx & creta, qua synovia reddatur inepta, ut juxta solitum tenorem sanitatis tota exhalet absque capitis mortui residentia. (*Volup. vivent. morb. antiqu. putat. n. 20. 21.*) Porro vini meracioris potu largiori arthritidem accelerari, nec non per libidinem a concubitu excitari posse, hinc inde in allegato Tractatu judicat. Hæc *Helmontiana* nec rationi, nec placitis celeberrimorum Practicorum contrariari, est in propatulo. Quod stomachum attinet, TH. SYDENHAM accuratissimus podagræ observator, cujus dolores, cum *Tractatum de Podagra* ederet, per triginta & quatuor annos sustinuerat, (*c. l. p. m. 27.*) ita scribit: omnes animi nervos variis hujusce morbi phenomenis acriter intendens, illum ἀπὲς seu labefactatæ tam in partibus quam succis corporis universis concoctioni ortum debere existimo. Experientissimus DOLÆUS in *Encyclop. Med. Theoret. Pract. Lib. 3. c. 14. §. 10.* his consentit: Nos hujus affectus causam statuimus primum vitium in depravata alimentorum

digestione, in ventriculo, aliisque visceribus & glandulis digestionem dicatis facta. Quæ de acido differit Noster, ab eodem confirmantur egregie *c. l. Hostes*, inquit, in arthritide fixa sunt particulae acidæ, quæ partes membraneas & nerveas seu ligamenta & tendines rodunt. Nec dissentit judiciosissimus olim Lipsiensium Medicus ac Professor Etmullerus in *Colleg. Pract. cap. xi. fol. m. 469.* Ita enim ille: Quoad causam efficientem omnium optime eadem a TACHENIO expressa videtur; nempe acidum volatile spirituosum, sui tamen generis seu specifici saporis spiritui influo maritatum, synoviam imprimis & partes vicinas membranaceas inquinans & affligens primarius tortor est. Prima hujus acidi spirituosissimi origo est ex primis viis, quam potius ex depravata digestionem prima cum TACHENIO, quam ex pancreate aut glandulis cum SYLVIO derivare placet, &c. Neque topiorum & nodorum arthriticorum generationem ineleganter descripsit Noster. Revera enim ros ille dulcis, chylosus, alkali temperata turgidus, qui ceu nutrimentum ligamentorum & membranarum ipsorumque forsan ossium intra articulos pro motu facilitando colligitur, & instar axungiae ossium articulationes oblinat, hæc, inquam, synovia acidi illius peregrini spicula potissimum experitur, ita ut successive instar albuminis ovi siccet, & tandem in cretaceam seu gypseam substantiam coaguletur. De materia tali podagrica chymice per ignem examinata videri poterit KERCKRINGIUS (*Spicil. Anatom. obs. 28. p. 66.*) Nec in causarum remotarum scrutatione & indicatione aberravit; in quarum censum vini & veneris intempestivum & immoderatum usum maxime retulit, probe forsan gnarus illius Græcorum antiquissimi & verissimi epigrammatis.

Λυσιμελὲς βάκχε, καὶ λυσιμελὲς ἀφροδίτης,
Γεννᾷται θυγατὴρ λυσιμελὲς ποδᾶγρα.

Quod HUMMELBERG ita reddidit ad *Sammonic. c. 41. p. 196.*

Connuptis Venere & Baccho solventibus artus,
Nata artus solvens nascitur his podagra.

Unde procul dubio Nostratum πολυθρίλητον.

Bacchus der Vatter / Venus die Mutter /
Ira die Hebamme / Zeugen Podagram.

Quas de podagræ præcursoribus præmissi observationes binas HELMONTII, de febrilibus agitationibus, quas ad febrium catharralium naturam accedere SYLVIVUS asserit, nec non de materiae tophaceæ alteratione, experientia approbat. Saltem ratione passionis Ischiadicæ, quando pylorum male affectum tradit, qui furiose impellatur, & per actionis regimen os ischion afficiat, meum moror calculum, quin potius eandem cum arthritide fixa, cujus species est, originem ipsi assigno.

Et hæc quidem de pathologia Duumviratus Helmontiani delineasse sufficiat. Primæ lineæ sunt Pathologiæ, non Pathologia completa. Quis enim hanc Iliadem concinne includeret nuci, & variam variorum morborum historiam tenui & brevi exercitationi? HELMONTIUM secutus morbi naturam breviter recensui, curam etiam aliquando, si quidem eam attigit, si non, sicco præterii pede. Poterunt adhuc aliquot superesse ab HELMONTIO Duumviratui assignata corporis pathemata, qualia *Tr. Sed. Anim. n. 32.* allegavit pallores, tremores, siccitates, tormina, paralyseis, contracturas, & forsan alibi alia; sed cum in sola horum denominatione acquieverit, plura super illa non commentando, chartæ & temporis parcendum fuit, & ne limites Exercitationis transgrediendo L. B. nauseam moveam, benevolentiaque ejus abutar. Quod deest, supplebit forsan Franciscus Oswald Grembsius, & futuro tempore in

re in Pathologia Helmontiana, quam in Introductione in Archivum Archei vitale & fermentale Joh. Bapt. van Helmont in dedicatione promisit DN. D. MARTINUS HEER. Deo interim O. M.

humillimas ago gratias pro largita hactenus studiis meis benedictione. Illius gratia etiam praxi futuræ adsistat, ut & ex hac in ipsius gloriam proximus uberrimum capiat emolumentum.



DISSERTATIO FERMENTORUM MORBIFICORUM E MEDICINA EJECTIONEM SISTENS.

Primum edita Anno 1697.

§. I.



ON minus vere, quam sapienter scribit ingeniosissimus philosophus DES CARTES *Medit. IV. & Princ. phil. P. I. §. XLIII.* Certum est, nihil nos unquam falsum pro vero admisso, si tantum iis adsensum præbeamus, quæ clare & distincte concipimus.

Prima & principalis hæc regula omnis veritatis indagandæ est, secundum quam ceu ad lydiæ lapidem dogmata, an vera vel falsa sint, examinari ac perpendi a philosopho debent. Hanc nisi attente observemus, res sensuales & imaginationis facile venditantur pro rebus intellectus ac conceptus, unde magnus errorum fons in disciplinas promanat. Etenim omne, quod clare & distincte concipitur, verum dici potest, & ex adverso, ubi non talis conceptus formari potest, nulla veritas habetur. Axioma hoc, quamvis non ignotum quibusdam philosophis, in dies tamen peccari contra hoc solet. Imbecillitas enim humani intellectus est, quæ facile confundit entia imaginativa cum entibus rationis & realibus. Fusius hac de re legi merentur P. MALLEBRANCHE *de inquirenda veritate*, ac Illustris Dominus de TSCHIRNHAUSEN in *Tractatu de Medicina mentis & corporis*. Quod si convertimus oculorum aciem in rerum naturalium ac medicarum scriptores, tot ibi occurrunt falsæ, ineptæ, atque a vero alienæ sententiæ ac hypotheses, quæ certe nullam aliam agnoscunt causam atque originem, quam saluberrimæ, quam diximus, regulæ neglectum. Nata hinc fuerunt monstrosa illa nomina, intelligo qualitates reales, formas substantiales, materiam primam seu ens pure passivum, attractionem, sympathiam, antipathiam, fugam vacui, & horrendum phantasma spiritum inexistentem omni materiæ. Accessit, quod cæco quodam impetu effata & opiniones antecessorum, auctoritate præprimis valentium, oraculorum ad instar exosculati fuerint miseri homines, ad errores semper quam veritatem capiendam procliviores, inque ipsorum verba tanquam in articulos fidei juraverint. Hinc fieri aliter haud potuit, quam ut chimæræ tales speciosæ jure quodam hæreditario ad posteros turpissime propagatæ fuerint. At vero nec etiam illorum conatus, si di-

cam, quod res est, laudare possumus, qui ultra limites intellectus sapere, & subtilissimarum rerum naturam ac originem plane incognitam ac occultam mentis acie penetrare voluerunt, unde vim imaginativam, quoniam cessavit vis mentis puræ ac intellectus, in auxilium vocarunt; quo nomine complector illos per ignem philosophos, multosque recentiorum.

§. II.

Nec meliora fata experta est ars medendi, utpote hujus antistites perversa imbuti philosophia similes chimæras & entia rationis, totidem obstacula ulterioris incrementi ac progressus, turpe dictu, ast verissimum, introduxerunt in saluberrimam hanc artem. Magnam enim cognationem inter se alunt & vinculo quodam communi continentur philosophia naturalis & theoria medica. Ita elementorum commentum, quod avide a medicis acceptum, quatuor humorum, quatuor primarum qualitatum, temperamentorum, intemperierum conjugationes tanquam malignum & infaustum aliquod sidus post se traxit, ac infinita non minus medicinæ, quam compluribus rebus mechanicis sterilitatem attulit, uti scite ac vere scribit VERULAMIUS. Accessere inania illa vocabula facultatum animæ, calidi innati, humidi radicalis, spiritus insiti & influi, quibus ceu notionibus ignotis explicare voluerunt machinæ humanæ effectus. Infelicia hæc medicorum commenta egregie perstringere & convellere æque argumentis & experimentis annisus est JOH. BAPT. VAN HELMONT. Hic pyrotechniæ operam navans postquam fermentationis insignem advertisset efficaciam, in rebus mixtis alterandis & immutandis, chylificationem, sanguificationem, secretionem, totiusque œconomiae corporis effectus fermentatione & fermentis ipsis visceribus innatis explicare nullus veritus est. Cujus quidem sententia primum maximo cum applausu excepta, successive emendata, postea exosa fuit solidiori philosophiæ imbutis, postquam deprehendissent, male fermentationem & fermenti vocabulum applicari functionibus animalium, quoniam structura viscerum & sanguinis ac humorum natura fermentationi contrariatur, imprimis cum fermentationum requisita necessaria minime inveniantur, & fermentorum animalium natura ac vis agendi pla-

di plane incognita ac obscura sit. Cumque mechanica ratione explicari posse, quæ fermentis attribuantur, observassent, deseruerunt hanc opinionem recentissime viri perspicacissimi JOH. ALPH. BORRELLUS *de motu animal.*, BOHN *in Circ. Anatom.* & FRIDER. GEUDERUS *Tr. de Fermentis*.

§. III.

Hæc de fermentis doctrina latius subinde sepsit, vires acquirens eundo, ut etiam ad statum præternaturalem in auxilium vocata fuerit. Et quamvis solidis argumentis è physiologia proscripta hæc sit, nihilominus retenta adhuc in pathologicis fuit. Unde nil frequentius audies in medicorum scholis, quam de fermentis morbificis dici ac scribi, quàm nimirum ratione illa sanguini & humoribus mixta, transmutationem, destructionem causentur, fluidaque corporis in fermentativum quendam motum conjiciant. Cum autem horum fermentorum ingenium, efficaciam, atque operandi modum nondum hucusque eorundem strenui assertores clarissime demonstraverint, ita ut concipi & assensum veritatis cupidis extorquere queant; utile ac operæ pretium fore existimavi, thema hoc de fermentis morborum paulo penitius examinare atque excutere, simulque tentare, an non clariori explicatione, & quidem mechanicâ fermentis adscripti vulgo effectus proponi queant. Utar itaque philosophandi, quam Deus concessit, libertate, nec ullius autoritate, quam veneror semper in hac materia, stringar, sed tantummodo illud affirmabo vel negabo, de quo clarum & distinctum formare possum conceptum. Cui quidem telæ feliciter pertexendæ, ut adsistat Divina clementia auxilio suo, pia mente precor.

§. IV.

Primum autem ipsius vocabuli vim atque significationem indagare necessum est. Multum siquidem dissentientes invenimus fermentorum autores, cum non unum & eundem, sed diversum conceptum passim in scriptis suis insinuant. HELMONTIUS, qui primus quasi in scenam produxit fermenta, *in Tr. Caus. & init. Nat.* §. 24. obscuram & intricatam affert descriptionem, nimirum, fermentum esse ens creatum, formale, quod neque substantia, neque accidens, sed neutrum, per modum lucis, ignis, formarum, a mundi principio in locis suæ monarchiæ, ut semina præparet, excitet, & præcedat. Idem *in Tr. sextupl. Digest.* p. 168. §. 112. ait: Fermenta nihil habent pariter aut extra se, in natura, quod sibi digne queat assimilari, cum sint dona specifica naturæ vitalis. JOH. PASCHAL. *Epist.* II. p. 23. fermenta definit corpora mole minimâ, insigni activitate prædita & acuta, sive particulas subtilissimas, quæ modo nisum ac motum exserant, & frequentes concussiones faciant, postea denuo in proprio suo corpore evoluta quiescant, modò iterum expergescant, excussiones faciant, & ita frequentes fermentationes excitent. At vero convenire in eo videntur omnes fermentorum morbificorum patroni, quod sint corpora tenuissima, in minimâ mole summe activa. 2.) quod in sanguinem & humores corporis agant motu quodam concussivo, organo ac ebullitione, 3.) quod vim immutandi & transmutandi possideant, seu in similem sibi substantiam humores fermentatos convertant. 4.) quod minima humorum sic fermentorum portio novam sanguinis massam in eandem cum ipsis naturam transmutet, sicque virtutem multiplicandi communicet, non secus ac exigua fermenti panifici portio addita farinaceæ massæ ipsam in motum ac turgescentiam adigit, singularique acore imbuat, ita ut hujus mas-

sæ exigua portiuncula in massam ingentem aliam iterum vim suam exercere queat, 5.) quod talia morbosa fermenta in latibulis partium diu quiescentia & sine activitate delitescere queant, donec a causâ quadam, v. g. ætheris singulari influxu, certo spirituum animalium motu excitentur & actuentur. Multum ostentationis, coloris, vel etiam verisimilitudinis primo intuitu habere videntur fermenta hæc in scholis medicis: verum si accuratius & attentius rem considerabimus, liquido apparebit, entia esse imaginationis, & præposteram applicationem fieri fermenti panifici ac fermentationis, quæ in farina aliisque vegetabilibus observatur, ad causas & motus, qui in microcosmo nostro notantur, morbosos.

§. V.

Primum autem non negamus, dari in natura corpora mole minima efficacissima summæque activitatis. Sic phosphori tantillum per magnum temporis spatium lucem de se spargit; unicum mercurii sublimatii corrosivi granum heminas aliquot aquæ austeritate sua imbuat; vitrum antimonii, crocus metallorum, & mercurius absque virtutis & ponderis fere imminutione in exilissima quantitate magnas virtutes medicamentosas in corpore exserunt, opii unum granum motus totius machinæ ad tempus suspendere ac incredibiles effectus producere potest. Effluvia Zibethi quàm horrenda & sæva symptomata in hysteris excitent, notissima res est: Qua de re plura qui desiderat, evolvere potest BOYLEI *Tr. de mira Effluvior. subtilit.*, item *de insigni Effluv. Efficac.* Compertum porro est ex Mechanico-Chymicis, unicum reguli antimonii vel arsenici granum unam auri unciam ita immutare posse, ut friabile reddatur, colore genuino privetur, particularum ac pororum ejus texturâ valde immutatâ. Ita quoque aliquot æris grana auro admixta ipsi ductilitatem adimunt. Artifex fuit Londini, qui paucis granis cujusdam pulveris, anti-elixir dicti, aliquot uncias auri sic destruere ac immutare potuit, ut in arsenicalem volatilem naturam transierit, nec ullo modo reduci in pristinum aurum potuerit. De quo videatur tractatus Anglico idiomate conscriptus, *Ant-Elixir of gold.* Ut adeo tantæ difficultatis res non sit, minima etiam & sensus nostros crassiores fugientia corpuscula in suscitandis morbis longe gravissimis maximam habere posse efficaciam. Horum autem effectum nullus facile mirabitur, nisi qui in naturalium philosophia plane hospes fuerit; Fateamur enim necesse est, & apertis ratiociniis ac experimentis convicti, stupendam dari corpusculorum exiguitatem, cum materia in indefinitum sit divisibilis, quæ tamen certâ figurâ ac magnitudine non careat, item materiam quò subtiliorem, eò majores movendi vires a summo & primo motore accepisse. Quis autem activa hæc corpuscula ob efficaciam suam velit appellare fermenta, vel corpora, in qua agunt fermentescibilia, nisi & pulverem pyrium, cujus summam activitatem splendidissimorum munimentorum ruinæ, imo cadavera quasi testantur, fermenti nomine salutare velis? Et quis porro effectum, quem in corpora exserant, virtuti cuidam transmutanti & in suam naturam vertenti (quamvis non negemus immutationem quandam particularum) adscribat? In negotio fermentativo farinæ aquâ subactæ, vel succi cujusdam vegetabilis, motus intestinus non procedit a principio quodam transmutante, quale fingitur in fermento, sed potius in hac particulâ subtiliores & æthereæ in majori jam motu versantur, quam in succis illis, ideoque fermenta ipsis addita motum saltem promptiorem particulis in musto v. gr., aliisque succis ad illum jam per se proclivibus, addunt:

dunt: illud enim, quod in motu constitutum est, corpus alterum, quod quiescit, facilius impellere potest. Etenim ipsa farina aqueis particulis intime immersa, ac plantarum succi citra fermenti cujusdam adjectionem etiam per se leni calore accedente fermentationem subeunt, utut longiorem moram & tempus requirant. Præterea nec fermentatio, qualis observatur in vegetabilibus, ullo modo locum habere potest in fluoribus corporis nostri, qui fermentationi neutiquam auscultant, cum necessaria requisita ad fermentationem pertinentia minime contineant. In sanguine gelatinosa & viscida deprehenditur copiosa substantia, nulla autem gelatina fermentescibilis, verum magis in minus gratam putrilaginem faceffit. Nec ex ipso sanguine, lymphâ, vel chylo ullo artificio spiritus quidam inflammabilis parari poterit, sed magis quando quiescunt, fatiscunt putredine in humorem sulphureo-salinum tetri odoris: neque liquidum, quod in perpetuo ac perenni motu est, ac per minimas & angustissimas vias trajicitur, fermentationem suscipit, potius hæc indiget quiete, aërisque sufficiente appulsu.

§. VI.

Quod si itaque corporis nostri fluores ad fermentationem inepti sunt, unico sic ictu cadit operatio fermentorum in massa sanguinea, quæ nec secundum nec præter naturam fermentationem concipit. Si quis autem velit hic objicere, sanguinem tamen intestino motu particularum in corpore agitari, quem corpuscula peregrina nobilissima adaugeant; tunc sciendum est, sanguinis particularum exactissimam divisionem & solidi cum fluido unionem ac tenuitatem non tam deberi substantiæ cuidam tenui, v. g. auræ æthereæ per ejus poros simpliciter fluenti, sed magis partium solidarum motui. Dum enim partes solidæ visceraque ex fibris motricibus varie & affabre contexta, imo geometricæ & mechanicæ composita constringuntur & coarctantur, liquidum intus contentum impellitur, dividitur, attritione conquassatur, subtilifatur, sicque crescente intrinseco illo motu crescit & calor. Unde etiam solo motu partium externarum fortiori sanguis vehementius incalescit, fluidior redditur, ut hinc solus motus optima sanguinis melancholici crassioris sit medicina. Nam motu conquassativo viscerum sanguis in tenuissimas partes dissolvitur, qui quo fluidior, eo majorem habet intestinum motum, cum particula quævis in minimam molem redacta circa suum centrum moveatur. Tandem qua ratione fermentum summe activum sine actione tamen quietum integrâ textura ejus manente in parte quadam solidâ vel minimâ cujusdam nervei aut lymphatici tubuli valvulâ hære, certoque saltem tempore in motum excitari queat, nemo erit, qui sibi imaginari, tantum abest, concipere queat. A sanguinis enim fluidique nervei vel lymphatici celeri ac perenni motu per solidarum etiam partium minimos mæandros non poterit non immutari, alterari, in motum cieri, vel etiam eliminari e corporis sphaera. Equidem dicunt certum ac singularem ætherem, qui ingressum inveniat in ejus poros ad evolvendum fermentum tale requiri; at vero æther cum simplicissimum sit elementum, prorsus capi non potest, quomodo ipse in se peregrinam naturam ac indolem induere queat, licet ipse, prout materia, in qua vel per quam agit, ratione magnitudinis, figuræ, ac texturæ variat, specificum edat effectum.

§. VII.

Utile autem operæque pretium esse existimo, ut

ad specialiora descendamus, clarissimeque detegamus, quo pacto morborum causæ, quæ fermentorum occultæ virtuti hætenus medicorum etiam coryphæi adscripserunt, longe clarius ac manifestius per mechanicam explicari ac declarari queant. Et initium quidem merito facimus a febribus imprimis intermittentibus, quarum ætiologiam recentiores maxime ex natura fermentationis & fermentorum deducere sibi proposuerunt. Veteres humorem aliquem excrementitium in minerâ quadam delitescentem supponebant, qui sensim & statotempore ad incrementum proventus & commotus cum corpore fermentescat: at vero, cum materiam hanc statuunt bilem, pituitam & melancholiam, qui humores sinceri, ac quales describuntur, non dantur, neque talis stagnatio in vasis stante circulatione locum habere possit, opinionem hanc merito suspectam reddidit TH. WILLIS. *Tr. de Febr.* Verum & hic ipse autor plus, quam par est, fermento ac fermentationi in tradenda febrium ætiologia favet. Ex ejus enim sententia non tantum ratione fermentorum nascimur & nutrimur, sed & morimur, imo quilibet morbus virtute fermenti cujusdam suas excitat tragœdias. Et hinc magno conatu ac studio sanguinis fermentationes in statu naturali, quas a propria ejus crassi & constitutione, nec non a fermento cordi insito deducit, explicare contendit, atque in fermentationis æquabili tenore sanitatis rationem consistere afferit; progreditur porro ad fermentationem præter naturam, in qua sanguis instar ollæ super ignem ebullientis ultra modum effervescat vasque distendat; quem in finem præsupponit heterogeneum fermentum sanguini confusum. GUILLIEMUS COLE *Tr. de Febr.* existimat, ad subitam turgescientiam concitandam identidem necessum esse fermentum aliquod activum, sanguinique incongruum, cujus sedem ponit in cortice cerebri, ubi prius in nervis ferociam suam exercent, deinde sanguini affundatur. Alii non incelebres Doctores ac scriptores sine fermento febrium genesin concipi non posse edicunt, & a lymphæ vitio stagnantis fermentescibilem peregrinam naturam inducentis ipsas deducunt & derivant, focumque residere credunt in glandulis intestinalibus, mesentericis, pancreaticis. Cæteri originem fermenti febrilis accersunt ex pravis & corruptis humoribus, vel aëris vitio, vel diætæ excessibus auctis, quod igne animali motum & agitatum propriâ vi sanguinem, cui permixtum est, intempestive ac ignotâ naturæ ratione moveat & perturbet. Quidam essentiam febrium in turbata mixtione sanguinis collocant, fermentum autem peregrinum sanguini confundi volunt, quod generetur in viarum anfractuosa angustia, ex stagnante lymphâ, succo pancreatico, vel bile, per longum vero tempus in tubulis istis lateant, donec causa aliqua accesserit, quæ fermentum hoc ejiciat atque excludat, quod deinde sanguini intimatum, cum ipso conflictum ac turbas excitet.

§. VIII.

At vero præter ea, quæ jam supra de fermentorum insufficientia ac falsa ad morbos applicatione tetigimus, paucis saltem nos jam expediemus. Et primum quod attinet *Willisianam* hypothesein de fermentatione naturali & præternaturali, remittimus B. L. ad citatum COLE p. 7., ubi fusius refutando hac de re agit. Verum ejusdem valoris & COLE sententiam esse statuimus, cum eadem ratione concipi nequeat in cortice cerebri latitare tale fermentum, nec satis appareat, qua ratione generetur, sanguini commisceatur, inque illum agat, & de novo

novo semper ibi progerminet. Nec sufficienter succus ille nutritius, cui ceu fundamento superstructa hypothesis est, hucusque probatus est. Glandulas autem fermenta febrilia fabricari, non videtur verosimile, & sequeretur, hypochondriacos, hydropicos, febre intermittente semper laborare, cui tamen experientia contradicit. Deinde notum est, febres intermittentes ut plurimum esse epidemicas, & a solo aëris vitio nasci; sic autem non video, qua ratione tam facile generari queant in glandulis obstructions. Tandem etiam repugnat huic hypothese cita & expedita febrium sanatio, quæ unico sale abstersivo, purgante, emetico, vel aliquot dosibus chinæ quandoque perficitur; quod non fieri posset, si glandulae & quidem in remotissimis partibus obstipatae essent, ad quas non tam facile medicamentorum virtus pertingere potest. Et quid dicendum est de doloribus gravioribus, inflammationibus, etiam a causa externa introductis, quas pressio pede subsequi solet febris? numne & hæc pariter fermentum aliquod pro causa agnoscunt? Nihil solennius est, quam ex vehementiori animæ affectu, maximo terrore, ira, vel etiam solo conspectu nauseosæ rei in cibis, exquisitè aliàs sanos corripere febribus tam continuis, quam intermittentibus. Ubi autem hic tam subito concipi potest generatio fermenti peregrini? Denique fermenta peregrina, ætherem peregrinum, occultas ac sensibus & rationi peregrinas qualitates esse existimamus, de quibus non tantopere philosophari deberent sapientiores.

§. IX.

Statuendum itaque, intermittentes omniaque illarum symptomata ex inæquali sanguinis & humorum motione proficisci, dum nimirum tempore horroris extrema cutis aliarumque partium spasmo constricta sunt, & arteriis sic venisque compressis sanguinis ad illas partes liber influxus & refluxus impeditur. Quapropter ipse regreditur ad interiora, ibique collectus majori in copia viscera ac vasa majora cordisque musculos aggravat, distendit, tandem aëris subtilioris per respirationem hausti collisus ac reflexione, propter poros valde constrictos rarefit, incalcescit, magnam vim in arteriarum partes solidas exserit, sicque impulsu cordis celerrimo tandem repagula extremarum partium vi quadam dissolvit, quibus ruptis sudor effluit, paroxysmus cessat, pulsus & sudor naturalis fluit, ac sanguini liber & æqualis suus circulus restituitur, quam hypothesin fufius declaravit alibi Dn. Præses. Hic autem notandum, spasmo in omni intermittente affici corticem cutis, & quidem sæpius duplici ex causa, dum spiritus animales in motum furibundum adiguntur vel ab ipsa anima, uti in affectibus, vel quod particulae irregulares vitiosæ, acidæ, vel salsæ, poris cutis se infinuant, ibique impactæ hareant, donec sub certa mole & quantitate spiritus animales ad spasmodicam aliquam commotionem excitent, unde novus semper oritur paroxysmus. Materiæ ejuscemodi vitiosæ peccantis minera & fomes quod lateat in prima regione, quæ facile sordes propter concursum bilis, salivæ, succi pancreatici ac alimentorum diversæ indolis recipit, nemo est, qui dubitet, meaque sententia in plicis intestinalibus & valvulis illorum existit, ex quibus non tam facile extricatur. Hæc vero chylo & lymphæ successive immixta sanguinis & humoris massam inficit, nec non obstructions in corporis extremis parit, sicque transpirationem imminutam, postea spasimum in iis efficit. Quocirca cura harum febrium in eo consistit, ut primam regionem ac intestinorum valvulas probe detergamus

& liberemus a vitiosa tali amurca per salia abstersiva, alcalia, mercurium dulcem, martialia, antimonialia, aliaque quæ radicem hujus morbi extirpant, postmodum meliori cum succellu sanguinis texturam firmantia ac viscera roborantia, uti china chinæ aliaque balsamico constringente principio imbuta propinari possunt.

§. X.

Transeamus ad febres malignas, contagiosas, ipsamque pestem, febrium quintam essentiam, in quibus morbis passim etiam celeberrimi viri accusare solent miasma quoddam infensum, minimâ mole summe activum, quod instar fermenti massam sanguinis sibi reddat similem, se ipsum in immensum multiplicet ac diffundat, ut deinde minima portio talis fermenti de novo alterius hominis sanguinem peregrina fermentatione destruere possit. Verum enim vero ad gravissimorum horum morborum naturam explicandam minime quadrare videtur meâ opinione hæc de fermentis & fermentatione idea. Non enim concipi potest, quo pacto immediate tale miasma totam sanguinis massam & innumeras ejus partes immutare & talis liquoris texturam, qui in perenni motu est ac dispersus per tam innumeras vias ac canaliculos, destruere queat. Dicendum potius est, miasma seu contagium constare ex corpusculis tenuissimis salino-causticis, quæ tenuitate sua angustissimos etiam nervorum ac cerebri poros, quos aliæ partes non attingunt, intrant, ibique irregulari motu fluidi maxime nervei crasin ac motum mirum quantum turbant. Quanta autem turbatio ac confusio in tota œconomia animali contingat, quando nervorum fluidum, quod primum humorum corporisque movens est, irregulari motu cietur, affectus animi ex graviore causa enati spirituumque ab his perturbationes ac dolores sæviores, maxime in tenellis subjectis & infantibus faciunt testatum. Proinde verosimillimum esse credo, solo terrore vehementissimo, tempore pestis propter ejus metum, licet nullum verum contagium præsens sit, morte quem affici posse, ut talismodi exempla etiam antea dederint scriptoribus tantummodo in terroris idea essentiam pestis ponere. Quod vero virulentum pestis aliorumque morborum contagiosorum ac malignorum miasma, propter subtilitatem intimioris admissionis nerveum fluidum maxime immediate aggreddatur, ex eo clarum evadit, quod vires corporis subito post invasionem præcipitet ac prosterneat usque ad lipothymiam sæpe, item vertiginem producat, somnum inquietum pariat, & mentis actiones sensibilibus perturbet ac imminuat. Sunt namque spiritus animales effato VERULAMII primum movens & rota suprema, quæ alias rotas in corpore humano circumagit; qualis enim illorum motus & temperies, talis etiam sanguinis reliquorumque humorum esse solent. Cum itaque in dictis jam morbis totum negotium mechanice a mira subtilitate, efficacia, ac determinata effluviis natura ac actione in spiritus animales explicari queat, non video, quare ad perplexos & ignotos terminos, fermentum, vel fermentationis & transmutationis actum confugere malimus.

§. XI.

Proximum jam est, ut variolarum atque morbillorum sic dicta fermenta perlustremus. Et WILLIUS quidem fermentum quoddam in utero muliebri supponit, quod statis periodis turgescit & sanguinis superflui excretionem procuret; hinc tempore con-

re conceptus cum menstrua desistunt, plurimum huius fermenti vult foetui impendi, cuius particulæ, veluti extraneum quoddam, humorum ac sanguinis massæ confunduntur, cui involutæ & ab invicem separatæ diu delitescunt, donec a causa evidenti commotæ cum sanguine fermentescant, & symptomata in variolis conspicua producant. Alii, qui foetum chylo materno, non vero sanguine menstruo, nutrirî supponunt, statuunt, quod in illa teneritudine fibrarum, inque illa debilitate fermentationum, humores his vel illis fibrarum tubulis inclusi hæreant, reliquos ab ingressu arcetes, qui humores, uti liquores alii, stagnando, acrimoniam tractu temporis acquirant notabilem, sicque in fermentum faceffant: quod demum e latibulo suo ejiciatur, postquam nempe causa aliqua, vel æther peregrinus aliquis accesserit, qui aptus cum hoc fermento fermentari, vel illud actuare. Quo facto majus affectans spatium in latibulo isto contineri amplius nequit, sed vim facit tubulo incluso, illum aperit, vicinis humoribus, ac demum ipsi purpureo latici admiscetur, cuius mixturam consuetam, maxime particularum suarum contrarietate, non solum turbat, verum ad canaliculos aliarum partium dum devolvitur, nec earum diametris accurate quadrat, hærendo, parit variolarum & morbillorum diversa symptomata, vellicando, dissolvendo, erodendo.

§. XII.

Recepta hæc circa variolarum causas opinio est, quæ au fundamento nitatur, paucis discutiemus. WILLISIANA hypothesis superstructa falso fermento uterino, cuius existentia non datur, vid. GEUDER *Tr. de Ferm. c. XII.* sua sponte ruit & refutationem minime meretur. Nec reliquorum sententia consensum & applausum meretur, cum talismodi fermenti delitescantis in tota machina vix nobis imaginari queamus locum vel tubulum, in quo a sanguinis & lymphæ perpetuo motu, vaporum transpiratione, tot interdum annos immobile & naturâ suâ illibatum manere queat. Deinde si quoddam fermentum variolarum morbum excitaret, tunc haud dubie pro indole huius vel benigna vel maligna morbus hic bonam vel malam acciperet indolem, quod tamen minus accidit, sed pro ratione variolarum grassantium juniores vel benigne vel maligne succumbunt; ut etiam, ubi benignæ dominantur, jubeant infantes variolosis adfoiari, quo ipsi benignatum contagio adficiantur. Proinde sic potius colligere licebit, in tenello embryone propter transpirationem lentiores & præpeditam, varios vitiosos humores acres sive recremento succi nutritii in utero hausti accumulari, quæ impuritates partibus solidis ac lentis viscidis intime nuptæ ac implicitæ citra incommodum quoddam latitare queunt, donec certo spirituum animalium motu vel extraordinaria aeris intemperie, aut similis salis contagio, laxato sanguinis vinculo ab involucribus extricentur & liberentur, sicque pro naturâ suâ salina, acri, caustica, principaliter spiritus animales & sanguinem in crassi & motu turbent, solidas partes spasmo afficiant, & protrusæ ad exteriora, in cutis cortice inflammationes leviores & ulcuscula pariant. Idem nostrum iudicium est circa morbillos, qui identidem a sale quodam, alterius tamen naturæ, recrementitio, forsan a depravata lactis qualitate extra uterum dependente, & massæ sanguinis ac lymphæ nupto, certoque tempore ab illo separato originem suam petere ac nancisci videntur. Quapropter matres, quæ in gravidationis tempore parcâ manu laudabiles adsumunt cibos ac bonâ fruuntur diætâ, infantes pariunt paucis vel nullis variolis obnoxios. Quod vero per

Frid. Hoffmanni Oper. Supplem. II.

longum temporis spatium excrementitia salia peregrina, contextu sanguinis viscido excepta, citra ullum incommodum circumferre queamus, res adeo mirâ non est. In catarrhosis & arthriticis salia copiosissima per sudorem, urinam, ac lympham secedunt, quæ non in instanti a fermento vel aeris vitio generantur, sed diu inclusa ac intricata ramosis ac viscidis sanguinis partibus fuerunt, donec certo aeris influxu a vinculis istis liberentur, ac morbos istos maxime dolorificos prognerent. Dicuntur quoque varia venena, quale est *la poudre de succession*, per annum & ultra in corporis sphaera hære, antequam perniciousam suam vim exferant. Prout itaque aeris præcedit temperies, magis vel minus ad putredinem humores disponens, vel prout aer contagiosus effluviis variolosis magis vel minus malignis stipatus est, salia hæc meliorem vel pejorem indolem assumunt, ac sæviora vel mitiora producant symptomata. Sufficiantur autem variolæ latitantes lubentius per contagium, quoniam aer simili sale extricato turgidus faciliorem ingressum in sanguinis poros habet, ex quibus peregrina illa salia specifica quasi præcipitat, & a vinculis suis dissolvit. Quocirca non mirum est, nullis purgationibus vel sanguinis missionibus perire posse in totum vel excludi salia hæc heterogenea, sed certum requiritur medium, quod sopitum latitanteque a multo retro tempore virus evolvit.

§. XIII.

Sequitur jam truculentus ille morbus venereus, cuius naturam ac vehementiam identidem per fermentum quoddam explicare recentiores assolent. Et putant, illud ipsum per coitum impurum communicari, quod deinde humoribus peregrinam suam ideam imprimat, sicque varias ulcerum protuberantias, bubonum & tumorum diversas species, maculas & pustulas per cutis superficiem disseminet, dum nimirum particulis fermentativis ad putredinem & inordinationem corruptivam lympham sanguinemque disponit. At vero qualis idea fermenti huius, & in quo consistat, nemo asserit, & idem esse mihi persuadeo, ac si quis dicat, fermentum venereum habet vim excitandi luem veneream. Concludendum itaque verosimiliter est, quod inter lacertos viri foemina, dum fervet lue hac conspurcata, actuentur & in motum cieantur illa effluvia, quæ ingrediuntur turgidi membri poros, cum omnia sint rimarum plena, admixtaque humoribus & spiritibus, eodem characterem partim illos imbuunt, perinde ac pomum sanum ab alterius putridi superficiali contactu putredinem pariter contrahit; partim etiam spirituum motum retardat, unde lymphæ corporis in coagulum acredinis insignis particeps facillime abit, a quo omnium symptomatum ratio petenda venit. Videntur autem mihi effluvia luis virulentæ participare de ingenio salium solidissimorum rigidorum, mole quidem minimorum. Quemadmodum itaque crassiora rigida lubentius in durissima ac resistentia agunt corpora, quam in molliora, uti aqua fortis metalla destruit, in ceram autem nullum habet effectum, sic quoque effluvia venerea virulenta non tam mollem carni contextum, quam ossium stamina, fundamenta & columnas machinæ nostræ aggrediuntur. Et notabile est circa fulminis effectum, quod illud interdum ossa carnibus integris confringere, vel vaginâ illæsa gladium liquefacere possit. vid. CARTESIUS in *Tr. de Meteor. cap. VII.* Spectat huc quoque familiare experimentum, dum pauca salis communis rigidiora spicula effluviis activitate tantum frigus nivi conciliare queunt, ut in calido etiam hypocausto aqua circumstans protinus in glaciem mutetur.

tetur, ubi nunquam transmutatio quædam occurrit; & ridiculum esset explicare tales effectus per fermentum quoddam singulare.

§. XIV.

De morfu canis rabidi, quem & hydrophobiam nominant, dicere nunc aggredior, cujus initia fermento cuidam deberi Autores passim loquuntur. Persuasum scilicet sibi habent famigeratissimi Medici, salivam in rabidis fermento bilioso volatili sulphureo-salino inquinatam esse, quæ per vulnus demorsione facta ad massam sanguineam aditum inveniens in eadem fermentationem imo graviore statu confermentationem inducat, unde spiritus turbantur, & cum similem rabido animali dispositionem nanciscantur, mirandum non est, consimilem insaniam oriri. Alii non possunt determinare, an fermentum illud volatile vel fixum sit, sed contenti sunt, secum illud vehere sanguini nostro valde peregrinum ætherem, qui humores sibi reddat similes, ut paulatim in similem abeant naturam, quique, dum vires eundo acquirunt, tandem totum sanguinem cum omnibus humoribus subigat, totusque homo nil nisi tale fermentum sit. Rectius & manifestius hæc omnia explicari queunt mechanice, statuendo, in omni nimia excandescencia, multo magis furore, cerebri nervorumque fluidum in summe irregulari actuosissimo perverfoque esse motu, unde reliquæ fluidorum motiones ac texturæ facile evertuntur, œconomia & secretionis animalis actiones perturbantur, omniaque in statu præternaturali sunt. Conjicere hinc licet, salivam spiritibus animalibus ordinarie semper turgidam, imbui quoque in furore simili spirituum motione, qui ceu corpora subtilissima & penetrantissima, poros nervorum & fibrillarum nervearum facile transeunt, similemque motionem violentissimam ibi excitant, inprimis si propter singularem dispositionem ad similes motus facile inclinent, uti in subjectis calidis, biliosis, mobilibus accidit, secus in crassioris texturæ hominibus. Notissima res in praxi est, epilepsiâ corripit infantem, quando a matre vehementissimo terrore affectâ lac cum lymphatico lactice assumit. Non alia hic est ratio, quam quod idem perturbatus spirituum motus mediante saliva communicetur cum infante, qui celerrimâ irregulari vi invadit spiritus animales infantis, illosque in similem motum facillime conjicit, unde perversi motus in toto systemate nervoso & totâ microcosmiâ tennerrimâ machina contingunt. Mirabile est, irâ vel vehementiore terrore in consensum trahi etiam remotissimas partes, ibique alterationes intensissimas, dolorem gravativum, spasnum vehementem fieri, cor & arterias palpitatione concuti, pulsus evadere inæqualem, dolores & sensus gravativos in partibus inferioribus percipi. Perversus spirituum motus propagatur etiam per dicta sic philtrea seu pocula amatoria, quæ ex lactice salivali vel seminali spiritibus abundante parari solent, unde similis inordinata spirituum motio, qualis observatur in subjectis insano amore tactis, in alterum individuum diffundi potest. Verum an tam longo tempore, uti Autores scribunt, sine noxa hospitari possit activum furibundum virus in corpore, valde dubito. Committitur namque sæpiissime in medicina fallacia causæ ut causæ. Quis enim quæso pro certo hoc asserere potest, morbum, qui post annos invadit furiosum, non ab alia præsentiori causâ esse, quam a morfu canis rabidi facti ante aliquot annos? Ubi itaque in tradenda causa morsus canis rabidi longe manifestior, & clarior explicandi modus in promptu est, ibi merito entia rationis & ficta exulare debent.

§. XV.

Quod Tarantismum, rarissimum quidem in nostris terris morbum, attinet, nil nisi fermentum & fermentationes hic quoque exaudies, ubi peregrinum fermentum, subtile, corrosivum, per morsum communicatum, ideas consimiles spiritibus & humoribus inferat, & pro varia temperamentorum diversitate modo hæc modo illa symptomata excitet. Verum ut breviter agamus, eadem hic applicari debent, quæ diximus ac notavimus circa causas morsus canis rabidi. Imo affectus hic multo magis nostram sententiam confirmat, nimirum virus illud (quod est latex salivalis spirituum celerrimo & perturbato motu prægnans) relegit sua vestigia, & immediate in spiritus animales operatur, violentum nimirum motum ipsis imprimendo citra quendam transmutationis actum vel certæ ideæ communicationem: siquidem symptomata infectis familiaria a subsultu spirituum nervorumque irritatione proficiscuntur, & cuncta quoque, quæ spiritus immediate alloqui solent, uti musica, medelam promittunt.

§. XVI.

Plurima jam morborum fermenta vidimus, quædam adhuc restant investigatione digna, nimirum in epilepsia, herculeo illo morbo, ut plurimum in tabulis solidarum partium fermentum quoddam peregrinum latere scribunt, quod data aliqua occasione, motu scilicet humorum adaucto indeque reclusis valvulis ad humores & sanguinem deferatur, cui peregrinas & enormes inducat fermentationes, ut inde phænomena epileptica eveniant. Fermenti autem existentiam probare maximam partem nituntur ex sensu auræ cujusdam adscendentis inferioribus ex partibus ad caput ante paroxysmi tempus, uti ex observationibus Practicorum plurimis id clarum sit. Verum enim vero cum in generatione epilepsiæ causæ longe evidentiore occurrant, non video, cur ad supposita minus intelligibilia & in phantasia solummodo radicata confugere necessum habeamus fermenta. Mea enim sententia epilepsia est universalis partium nervosarum ac musculosarum convulsio, fitque ab inæquali spirituum animalium per cerebrum ac nervosum systema motu ac circulatione, dum vel dura mater, quæ totum cerebrum ac medullam investit, aliqua in parte fortissimo spasmo constringitur, ut compressis tabulis corticalibus suppositi cerebri spirituum influxus per illos cesset, unde maximo cum impetu per tubulos cerebri nervulorumque tubulos apertos ab altera parte maximo impetu irruunt, illos plus justo distendunt, & ob nimiam violentiam, motum plane irregularem a naturali discedentem contractivum, unde omnia symptomata oboriuntur, producunt: vel in chronica & habituali epilepsia obstructio tubulorum cerebri ingens propter cerebri humiditatem nimiam & robur fibrillarum dejectum deprehenditur, quæ minus sanabilis existit. Quapropter omnia, quæ epilepsiam provocare solent, vel singulari activa acrimonia instructa sunt, vel cerebri tubulos humiditate replent & obstruunt, aut immediate spiritibus irregularem quendam motum conferunt, uti animæ commotiones ejusque perturbationes vehementiores. Qualis itaque fermenti idea concipi potest in cicuta aquatica, in corrupto vel sanguine circa duram matrem stagnante, in lacte acescente corrupto, doloribus gravioribus, sanguinisque ebullitionibus, lumbricis vel cachectico corporum habitu: omnia revera manifestissimæ causæ debentur. Et quod adscensum auræ frigida concernit, ex partibus frigidioribus ad caput,

caput, persuasissimus sum, hoc rarissime fieri. Uti autem id non plane negamus, sic dicimus, esse magis signum, quam causam impetuosi spirituum motus, qui in extremis partibus primum quandoque sentitur, dum in illis vel spasmus quidam incipit, quamvis causa lateat in cerebro, vel sufficienti spirituum influxu defraudantur, unde sensus auræ frigidae; etenim sicut sensus in sano corpore, multo magis in ægroto corpore, mirum in modum fallunt, uti id apparet in frigore & horrore totius corporis a causa intrinseca, vertigine, aurium tinnitu, similibusque.

§. XVII.

Idem nostrum iudicium de epilepsia valet etiam de fermento maniaco, ubi non opus est fingere peculiare fermentum in solidis partibus stabulans, quod vehementior ira, terror, ebrietas, lunæ, aerisque fermenta e suis focus expellant; sed sufficit morbi huius productionem concipi posse, si crassiores & terrestres spirituum aliorumque fluidorum partes in vehementissimum motum rapiantur a variis causis externis. Ubi autem impetus, qui materiæ moli competit, cum celeritate conjungitur, ibi stupendi motus effectusque procedunt; cumque extra æquilibrium motus spiritus constituti sunt, mens recte ratiocinari nequit. Plura possent dici etiam de fermentis in scabie, elephantiasi, erysipelate, arthritide, hemicrania, ulceribus, variisque morbis periodicis, quibus morbos hos explicare nituntur; verum cum brevitatis nobis pro lege sit, & prudens ex supra adductis sponte refutare hæc horumque falsitatem perspicere possit, merito calamum sistimus.

§. XVIII.

Illud coronidis loco subungere placet, spem nempe imbibi certissimam, illum, qui libero, solido, nec præoccupato iudicio pollet, & hæc, quæ obiter jam delibavimus in superioribus, sedulo ac attente perpendit, consensum nobis plenissimum daturum, nimirum per longe evidentius & magis intelligibile suppositum hypothesin mechanicam, explicari memoratos affectus posse, quam per ignota, incongrua,

ac perplexa vocabula, & notiones magis imaginarias, quam veras. Illud autem jam ex Theoria hac clarius detectum fuit, multum illos errasse, qui remedium dictis morbis oppositorum energiam & modum agendi per fermenti huius immutationem vel extinctionem explicarunt. Uti itaque fateri tenentur, se plane ignorasse horum morborum causas: sic etiam diffiteri non possunt, ipsis minime fuisse perspectum ac cognitum, quomodo agant, v. gr. China chinæ in expugnatione intermittentium, viscus quercinus, cinnabaris antimonii, pulvis lumbricorum terrestrium in epilepsia, camphora & nitrum in peste & morborum malignitate depulsanda, theriacalia & ex cancri remedia in morsu canis rabidi sanando; Dum enim dicunt, se fermentum his ipsis extirpassse, nihil dicunt, quam quod morbum curaverint. Nobis autem planum ac perspicuum est, remedia hæc non aliâ quàm mechanicâ ratione, quæ consistit in certa materiæ & motuum correctione, operationes suas exserere. Argumentum de hac re tractandi uberius in aliud forsitan oportunius tempus bono cum Deo rejicimus. Cæterum tenuitatis meæ probe memor hæc omnia prudentiorum iudiciis submitto: Nec pudebit sententiam mutare, sicubi meliora edoctus fuero. *Licet autem sententiam mutare, (ut verba Illustris BOYLEI mea faciam, atque in solatium illorum, qui forsitan sententiæ hæcenus defensæ renunciare velint, illa addam) Tentam. physiol. p. 15. citra potiores rationes, quam quæ primum assensum pepererunt, sit animi non sibi constantis culpanda nota, attamen opinioni, quæ aliquando vera visa est, adhærere, licet ipsius falsitas majori luce redarguatur, superba est contumacia, veritati inimicissima, quæque parum convenit cum tenuitatis humanæ conscientiæ. Quippe minus indecorum censeri debet, errori veritatis gratia renuntiare, quam fastuose & præfractæ sententiam aliquam etiam tueri tantum, quia eam olim veram esse existimavimus. Et sane quousque se quis infallibilem certo crediderit, immutabilem esse non oportet.*

DEO autem ter Opt. Max. pro exantlatis feliciter studiorum academicorum laboribus æternas persolvimus gratias.



DISSERTATIO MEDICA

D E

EO QUOD NEMO ÆGROTORUM
MORIA TUR EX MORBO.

Primum edita anno 1717.

§. I.



QUEMADMODUM in tota nostra arte plura adhuc sunt sensui ac rationi abscondita, præsertim quæ ad primas causas motuum in corpore nostro & modum operandi tam causæ morbificæ quam remediorum attinet: ita etiam maxime omnium illud observandum in pathologicis, ubi magna rerum eò spectantium confusio reperitur. Perpauci enim morborum origines atque primordia, eorumque progressum veramque indolem, & quomodo has vel illas corporis actiones lædant vel symptomata lethalia producant, recte & debito ordine prosequuntur. Plurimi nesciunt verum & formalem conceptum morbi, causæ morbificæ & symptomatum; sæpius promiscue hi termini sumuntur & inter se confunduntur, adeo ut res præternaturalis, quæ alias sub nomine causæ morbificæ veniebat, jam morbus dicatur, alio tempore

pore symptoma audiat, aut vice versa; & ob tantam rerum & veri nexus causalis confusionem plures nesciunt, quomodo ex morbo oriatur symptoma, quis verus morbus sit dicendus, & quam causa sit hujus vel proxima vel remota. Nesciunt præterea sæpius, num æger ex morbo acuto vel etiam chronico defunctus, morbo aut symptomate perierit. Communis est opinio, morbo stricte sic dicto interire homines; si autem rem medice & paulo accuratius examinamus, nostra est sententia, non morbo, sed effectibus morbi, qui sunt symptomata, corporis nostri machinam destrui & tristissimum ejus interitum sequi; id quod jam in præsentis exercitio inaugurali secundum doctrinam & ductum *Exc. RIVINI, Lipsiensis Professoris* celeberrimi, Præceptoris summopere devenerandi, demonstrare propitio Numine annitar.

§. II.

Ut autem nostra hæc, quam suscepimus, tractatio non careat suo usu atque fructu, & totum negotium paulo clarius dubitantibus vel harum rerum ignavis elucescat, præmittendum esse duxi, quid per morbum, quid per symptoma, quid per causam morbi intellectum velim. Morbus itaque mihi est partis cujusdam internæ ad vitam spectantis præternaturalis constitutio sive læsio. Illud vero, quod hanc læsionem proxime & immediate inducit, veræ & proximæ morbificæ causæ titulum meretur; id vero, quod ad generationem hujus causæ proximæ contribuit, vel etiam ipsam partem ad recipiendam hanc causam disponit, causa mediata vel etiam antecedens, procatartica, vel etiam remota, quæ dispositively agit, vocari solet; effectus vero læsæ & præternaturaliter constitutæ partis, qui consistunt in læsionibus functionum corporis nostri, quæ sunt vel vitales, vel naturales aut animales, vocantur symptomata. Nunc vero quæstio occurrit, num homo, qui vitam cum morte commutavit, mortuus fuerit morbo, an potius symptomate? Nos tuemur hanc sententiam, hominem non proxime & immediate ex morbo, sed ex hujus symptomatibus perire.

§. III.

Ut autem hæc assertio ex mente *Excell. Prædis* probetur ex paulo evidentiori fundamento, placet primò per diligentiorum anatonem corporum ex morbis defunctorum perscrutari veras mortis causas. Jam vero illud memoratu admodum dignum est, quod, sive quis ex violenta, sive naturali morte intereat, plerumque causa mortis visceris vel partis cujusdam sphacelatio seu putrida & foetida corruptio aut purulentus abscessus, partium quarundam consumptio, aut pernicialis sanguinis vel humoris in cavitatibus, vel in capite, vel thorace vel abdomine extravasatio sit. Hæc vero & proximæ sunt causæ mortis, quia nempe ejus ingenii sunt, ut motus istos vitales, qui sunt in corde atque arteriis, inque fibris corporis nostri, & qui universum sanguinis circuitum & ab eo dependentes secretiones & excretiones moderantur, plane extinguunt. Hæc vero extravasationes & corruptiones non sunt ipse morbus, sed demum ex morbo producuntur, quæ si adsunt, mors in procinctu est. Quis enim vellet adfirmare in phthisi, in hydrope, in inflammationibus, in acutis & malignis febribus ejusmodi graves & abominabiles læsiones & corruptiones jam tum, cum morbus incepit, vel etiam progressus fuit, adfuisse, sed potius hæc omnia successive e morbo evadunt, ac fiunt; & mors etiam paulatim & successive paratur atque ex morbo progignitur. Ex quo jam clarissime apparet, quam perverse & vulgus & magna etiam Me-

dicorum cohors judicet, si post mortem alicujus hominis anatome factâ sphacelosâ ejusmodi partium corruptiones vel extravasationes deprehendantur, morbum plane fuisse insanabilem, neque ullo modo, per medicinam etiam exquisitissimam tam feralem & funestam læsionem tolli potuisse, audacter pronunciant. Verum enim vero perversissimum certe hoc est judicium, quo imperiti Medici sæpius apud rerum medicarum ignaros pro magno præsidio utuntur. Illud quidem certum est, mortem habere adæquatam & veram causam, sine qua non mors fieri potest; sed quæstio est, an morbus, quo laboravit æger, in hac exitiali læsione constiterit, quod nequam adfirmare possum, quia hæc demum ex morbo sæpius male curato progenita fiunt. Igitur quæstio ita formari debebat, annon mortifera hæc læsio, quæ anatome manifestatur, potuerit convenienti remedio averti & præcaveri.

§. IV.

Sed ut hæc assertio, quæ est, ex symptomatibus magis, quam ex morbo perire homines, adhuc clarius evadat, in medium jam placet adducere eos, qui ex venenis moriuntur. Notissimum est, penetranti corrosione operari illa metallica arsenicalia & mercurialia, vel ex regno vegetabili drastica purgantia in tunicas ventriculi & intestinorum nerveas, illas lancinando, exedendo. Hinc etiam post mortem & maculæ sanguineæ vel dilacerationes tunicarum membranarum imo foramina visuntur, vel etiam inflammationes has partes obsidentes conspiciuntur. Læditur itaque membranosa ventriculi & intestinorum pars a veneno, inque eo consistit morbus. Equis vero est, qui ausit adfirmare, hanc dilacerationem vel erosionem tenuissimarum fibrillarum ventriculi in se spectatam, aut etiam sanguinis in vasis stasim, mortis tam celeris & inopinatæ fuisse necessariam & absolutam causam? præsertim cum experientia testetur, sæpius exulcerationes ventriculo & intestinis per longa tempora insedisse. Profecto nemo ex harum tunicarum exesione poterit sublationem motuum vitalium demonstrare. Res itaque profecto aliter se habet, moriuntur nempe homines ex symptomatibus gravibus, quæ hanc læsionem sequuntur. Nam si a veneni particulis corrosivis & causticis celerime & vehementissime subtiles & teneræ nerveæ membranæ vellicantur, arroduntur, tunc spastica & fortior constrictio harum membranarum fit, ita ut ab hac constrictione sanguinis circuitus per partem affectam cohibeatur, qui violentus spasmus mox universum systema nervosum in consensum trahit, adeo ut ipsum gravissima symptomata, dolores horrendi, tormina, anxietates, extremus virium languor, partium externarum refrigerationes, alvus adstricta, pulsus debilis & parvus, animi deliquium, quinimo delirium & epilepsia insequantur. Si quis itaque velit avertere mortem, oportet has spasticas constrictiones generis nervosi impedire, quod fit oleosis, pinguibus, copioso lacte adsumto; unde videmus, circulatorum ingentem horum venenorum copiam citra singularem noxam ad stuporem populi subinde devorare, quorum arcanum unice in eo consistit, ut oleosis & pinguibus adsumtis spicula salium causticorum obtundant & sic spasmos præpediant & avertant. In hujus rei ulteriorem probationem suscipiam primùm exempla morborum vere internorum, & quidem acutorum, deinde chronicorum, postmodum morborum quorundam sic dictorum ab autoribus externorum.

§. V.

§. V.

Itaque primum exemplum sint febres sic dictæ acutæ seu ardentes. Describuntur autem ab autoribus sequentem in modum, quod in illis reperiatur æstus, sitis plane intolerabilis, & durantes ab invasione ut plurimum ad septimum vel nonum, rarius ad decimum quartum diem. Positâ descriptione auctores reducunt morbos ad certam classẽ & hæc febres aliqui ad morbos spirituum, dum omnes morbos generaliter vel in humoribus, vel in spiritibus, vel in partibus solidis hæere adferunt; alii autem ad morbos turbatæ mixtionis sanguinis referunt, hi enim omnes morbos vel in cacochymiâ vel in turbata mixtione sanguinis consistere affirmant. Post morbum inquirunt in subiectum seu partem affectam, eandemque juxta diversam hypothesein vel spiritus vel massam sanguineam esse dicunt. Cognitâ parte affecta causas cognoscendas esse monent, easdemque juxta priores spiritus, qui vel ab injuria aëris, vel a frigore, æstu radiorum solarium, vel ab erroribus dietæ, vigiliis diuturnioribus, motu corporis nimio, metu, ira, terrore, mœrore irritati sunt; juxta posteriores vero sanguinis maximam perturbationem esse ajunt, dum particularum ejus dispositio adeo immutata est, porique adeo materiâ heterogenea repleti, ut materia subtilis ubique in transitu suo impedimenta nanciscatur, vimque inferre necesse habeat iis omnibus in locis, ad quæ appellit, unde sanguinis insignior & acceleratior motus.

§. VI.

Symptomata juxta nominatam descriptionem sunt præsertim æstus, sitisque plane intolerabilis. His accedunt adhuc alia, videlicet sudor nimius, inquietudo, &c. Ex hisce circumstantiis sensibilibus seu symptomatibus, ex morbo atque causis nunc formant indicantia & indicationes, juxta quæ postmodum therapiam instituunt; scil. colligunt symptomata, & contra quodvis remedium aliquod formulas ingreditur, v. g. contra æstum nitrata, sal ammoniacum; contra sitim spiritus nitri dulcis &c., contra inquietudines cinnabarina, tanquam specifica, castoreata, cordialia, ut lapis bezoardicus orientalis, lapides quinque pretiosi, perlæ &c. Sed curaturne hisce febris ardens! Experientia quotidiana aliud quid monstrabit, nempe æstus & sitis, sudor, inquietudo, &c. ex hisce adhibitis medicamentis adaugetur; superveniunt læsæ functiones animales; exinde oritur epilepsia, deliria; hæc introducunt plenariam resolutionem massæ sanguineæ, ut ex hac functiones vitales ultimato lædantur & aboleantur; sic provenit mors non placida, sed summe violenta, maximisque symptomatibus urgentibus stipata, quod & vulgus jam novit, inquiens, *der Mensch hat einen schwehrend Tod ausstehen müssen / und wolte sich das Herze nicht brechen.*

§. VII.

Nunc quæro; interiitne ægrotus ex morbo, aut symptomatibus? Ex morbo eundem interiisse quidam affirmant, quando ajunt: *der Erlische Man ist am hiesigen Fieber gestorben* / quod tamen nequitquam ab iisdem probari poterit, cum hæc omnia, tam febris, æstus, sitis, sudor nimius, inquietudo, quam ultimato superveniens epilepsia, deliria, tantummodo symptomata sint, minime vero morbi. Non enim sunt læsiones actionum, sed ipsæ actiones læsæ, quod quilibet judicare poterit, qui legitima fundamenta *Frid. Hoffmanni Oper. Supplem. II.*

pathologiæ noverit. Igitur hæc febres sic resolventes esse puto. Scil. affectus primarius est intemperies, & quidem calida partis alicujus internæ, quæ plerumque ignoratur & non attenditur. Hujus intemperiei vero formalitas & causa proxima consistit in motu spirituum accelerato, progressivo, ac intestino, tam spirituum vitalium in sanguine, quam animalium in substantia partis læsæ; causa vero antecedens vitium aliquod humorum, quod ordinarie in hisce febribus autoribus sic dicta acrimonia biliosa diversæ speciei pro diversitate subiecti esse solet. Causæ procatarticiæ seu primitivæ sunt sex res, dictæ nonnaturales, ex quibus ultimato commissus error causæ occasionalis nomen obtinet.

§. VIII.

Ex qua formalitate morbi & connexionẽ causarum nunc sequuta sunt primo symptomata functionum animalium, scil. tactus læsus, ut frigus & calor, quæ proprie febrem constituunt; ex calore postmodum functio naturalis læsa, scil. sitis intolerabilis, ac symptomata excretorum, sudor immodicus ortus; hisce continuantibus porro functiones vitales læduntur, videlicet massa sanguinea resolvitur, circulatio sanguinis turbatur, quod monstrat pulsus febrilis atque anxietates præcordiorum & respiratio præternaturalis, spirituum in sanguine vitalium dictorum motu antea tantum progressivo, nunc & intestino summe accelerato introducto. Tandem etiam motus spirituum animalium dictorum primario & potissimum intra cerebrum hoc modo oritur, dum sanguis arteriosus per arterias carotides ad cerebri substantiam adducitur, spiritibus summe accelerate commotis. Hi spiritus vitales ex sanguine arterioso, ubi cum succo sic dicto nervoso per extremitates ultimas arteriarum in substantiam cerebri & in spiritus animales abeunt & convertuntur, ipsos spiritus animales in cerebro jam jam existentes ad eundem motum acceleratum pariter abripiunt; hinc deliria, motus convulsivi, & horum summus gradus epilepsia, & tandem symptomata functionis vitalis plenarie abolitæ seu circulatio sanguinis atque respiratio plane cessans, i.e. mors. Ergo ejusmodi subiecti interitus nequitquam immediate ex morbo, videlicet intemperie calida alicujus specialis partis, sed potius ultimato & formaliter ex functionibus vitalibus extinctis extincta quoque vita; & sic ex symptomatibus.

§. IX.

Converto me ad aliud exemplum, & quidem ad febres malignas cum exanthematibus, petechiis &c. Describuntur vero hæ, quod ab initio malignitatem suam quidem occultent; circa accessum autem statim vires cum appetitu prosternant, æstus autem & anxietas præcordiorum cum inquietudine summa in quibusdam mature, in aliis tardius notetur. Cum autem hæ febres ab initio suam malignitatem occultent, probe easdem a catarrhalibus distinguendas esse monent, ne ab iisdem decipiamur, ex pulsu. Scil. in hisce febribus, si ab initio pulsus inveniatur debilis, tardus, ac tardior, quam secundum naturam, non erit febris catarrhalis, sed maligna. Pro parte affecta seu subiecto venditant aliqui cor, idque probant primo exinde, quia cor fons caloris nativi dicitur, & ex quo calor præternaturalis corpori communicatur; secundo ex pulsu, quia is a cordis actione & pulsifica facultate spiritibusque vitalibus sanguini arterioso immerfis dependet. Alii iterum in spiritibus, ac alii in massa sanguinea sedem hujus mali quærunt.

§. X.

De causa varie judicant. Alii enim spiritus quidem accusant, irritatos vero multifarie, v. g. a metu, ira, mœrore; alii feminium verminosum, ac iterum alii miasmata provenientia a particulis arsenicalibus e terræ visceribus avolantibus, quæ aëri commissa, ac cum eo per inspirationem hausta sanguinem subeunt, & in ipsius particularum poros sese insinuant; æther vero consuetus accedens aditum per jam occupatos poros occlusum reperiens particulas istas duras scindentes profundius in particularum sanguinis poros adigit, duratque ista sanguinis turbatio, donec easdem difsecaverit & æther cruoris massam libere iterum permeare possit. Symptomata circa easdem occurrentia sunt prostratio virium simul cum appetitu, æstus, fitis, anxietas præcordiorum cum inquietudine summa, purpura, petechiæ &c.

§. XI.

Hisce præmissis nunc tendunt ad formanda indicantia & indicationes juxta diversitatem symptomatum & causarum, juxta quæ postmodum therapiam instituunt, quæ quidem cum antecedentibus febribus ardentibus convenit, exceptâ malignitate, purpura ac petechiis, quæ sui expulsionem juxta autores per expellentia & alexipharmaca postulant, v. g. liquorem cornu cervi succinatum, essentiam castorei, tincturam corollariorum cum spiritu cornu cervi; in forma sicca nitrum antimoniatum, arcum duplicatum, cinnabarium nativum & antimonii &c., sed infelici ut plurimum eventu; omnia symptomata enim exacerbantur; purpura, quæ antea rubra forsitan fuit, evadit alba, aut ultimato nigra; accedunt deliria, epilepsia, deinde leipyrria & epialla, & sic mors maxime violenta.

§. XII.

Quid vero sentis de hisce febribus? putasne, hunc ex morbo, scil. febre maligna diem obiisse supremum? Valde dubito. Lubenter autem scire vellem, quid sit malignitas. Hujus formalitatem nondum sufficienter explicatam deprehendi, ut in curatione firmum concefferit fundamentum; quot capita enim, tot sensus & explicationes malignitatis. Veteres exprefferunt eandem per occultam qualitatem: Hanc tanquam obscuram & nihil significantem Recentiores rejecerunt, & turbatam mixtionem sanguinis malignitatem esse ajunt. Quid autem vult hæc turbata mixtio sanguinis? naturalis enim mixtio sanguinis adhuc ignoratur, quia deficit vera ac naturalis physica & physiologia, quod satis posset demonstrari. Quid nunc de præternaturali & turbata certi determinari poterit? Prorsus nihil. Alii malignitatem in morbis sic explicant, scil. quando morbus pejora symptomata secum fert, quam pro ratione suæ naturæ ipse morbus est. Sed unde novi, hæc symptomata pejora esse aliis? Regeris, ex eventu, quando scil. hæc symptomata concomitantia ægrotum perimunt. Respondeo, parum aut nihil utilitatis exinde nascitur respectu ægrotorum. Sic enim nunquam certus esse potero de malignitate, usque dum ægrotus e vivis excesserit.

§. XIII.

Et ex quonam indicante fluit hæcce indicatio: ergo dentur expellentia? Respondebis forsitan, malignitas adest, & illa expellenda; unde autem rationaliter, non nominaliter hæc indicatio fluit, cum formalitas malignitatis adhuc ignoretur, committis petitionem principii, & sic semper obscurum per æ-

que obscurum ac falsum per æque falsum probas. Adhuc alii acu rem tetigisse putantes adducent forsitan sic dictum feminium verminosum tanquam ultimum refugium ad explicandam & probandam hanc indicationem. Sed quibus rationibus? Utique maxime lubricis, & judicio humano aliquid tantum persuadentibus probabilibus, non vere probantibus. Lubenter enim scirem, qua ex ratione lethiferum evadat hocce feminium verminosum, quando retrocedit ab adsumto & lenissimo purgante, cum tamen antea in corpore sine symptomatibus adeo atrocibus adfuerit? Respondes, experientia id nos docuit. Rationem quæsi, non experientiam. Hæc enim teste HIPPOCRATE fallax, & per se nihil probat, cum tantummodo provocatio ad auctoritatem sit, quæ autem intellectum hominis non convincit, sed eundem tantummodo credulum existere efficit.

§. XIV.

Me judice fortassis melior, quod tamen aliis judicandum relinquo, & in praxi majorem utilitatem præbens ex malignitatis formalitate desumptus conceptus sequens esse poterit: nempe motus spirituum vitalium progressivus & intestinus acceleratus massam sanguineam ad resolutionem disponit sequentem in modum. Scil. morbus intemperiei calidæ alicujus partis internæ est affectus primarius, uti in antecedentibus febribus, quod comprobat primario & magis sensibilibus læsa functio sub nomine symptomatis in hac vel illa regione corporis, potissimum post mortem, cum in quibusdam febri maligna interemptis pars quædam interna sphacelata deprehendatur. Hujus morbi intemperiei causa proxima itidem motus spirituum acceleratus, progressivus & intestinus tam in spiritibus vitalibus in sanguine, quam animalibus in substantia partis læsæ.

§. XV.

Causa antecedens vero vitium aliquod humorum, & quidem autoribus sic dicta acrimonia biliosa, vere abundans in principio, post usum vero horum medicamentorum salinorum, volatiliu inepte applicatorum, spiritus animales dicti in substantia partis læsæ magis irritantur & in motum magis inordinatum concitantur: hicce motus propter summam mobilitatem spirituum animalium & vitalibus in sanguine communicatur. Hi primum partes sanguinis aquosas sub nomine insensibilis transpirationis adauctæ, i. e. sudoris minimi, expellunt. Hisce expulsis salia in massa sanguinea existentia, liberata a vinculo suo, in poros substantiæ partium solidarum sese magis insinuant, & sic ingrate afficiunt, ac spiritus insitos magis magisque commovent, & simul cum iisdem, poris dilatatis massa sanguinea quoad totam substantiam per poros partium solidarum transgreditur ad habitum corporis externum, ibidemque spiritus fere plane evanescunt, relictis sub nomine purpuræ malignæ & petechiarum colore rubrarum, si scil. massa sanguinea quoad totam substantiam egressa fuerit. Si autem partes salinæ magis cum partibus terreis aquosis & paucissimis sulphureis unitæ fuerint, purpura alba exinde evenit. Si vero spiritus in totum guttulas sanguineas quoad totam substantiam ad habitum corporis delatas deferant, purpura nigra, tanquam pessima, oritur; revera enim est sanguis sphacelatus, i. e. omni vitalitate prorsus destitutus. Exinde nunc & hoc phænomenon explicari facile potest, quare purgantia hisce in morbis non convenient. Partes enim ex massa sanguinea resolutæ non sunt e corpore eliminandæ, sed potius cum reliqua massa combinandæ. E contrario in purpura benigna, i. e. a salibus vere abundantibus

bus proveniente, purgantia egregio cum effectu adhibentur; aliter enim sese causæ internæ in hac purpure habent.

§. XVI.

Causæ procatarcticae sunt nominatae sex res non naturales, ex quibus ultima, quæ ut plurimum pathemata animi graviora esse solent, causæ occasionalis sub nomine venit. Quod reliqua symptomata concernit, nempe deliria ac motus convulsivos, in antecedentibus §o. 5. horum modum fieri descripsi. Superest vero adhuc leipyria, in qua scilicet calor & frigus simultanee adsunt; nempe spiritus motu summe accelerato constituti ad hancce partem internam læsam copiosius affluentes ibidem inflammationem instituunt, & sic, dum se ab hac causa molesta liberare conantur, habitum corporis externum derelinquunt. Hinc oritur calor maxime internus, exteriora vero frigent. Econtrario in epiala sic sese res habet, adest enim plenaria substantiæ partis affectæ mortificatio, i. e. sphacelus, si spiritus hocce membrum sphacelatum tanquam vere mortuum & cadaverosum, ideoque summe nauseabundum, derelinquunt, & in habitum corporis externum maximo cum impetu irruunt. Hinc aderit frigus internus & calor adauctus externus, imo & cor ipsum hoc modo derelinquunt; unde tandem ob sanguinem spiritibus orbatum fluiditas & circulatio desinit, & ex hac & respiratio cessare & sic subjectum vitam cum morte necessario commutare debet. Ergo & hujus ægroti obitus non ex necessitate ac magnitudine morbi, videlicet intemperiei calidæ partis alicujus internæ, sed ex symptomatibus, & quidem ob illegitimam cognitionem malignitatis per remedia morbum, causam morbificam, ac ipsam vitam, expellentia est introductus.

§. XVII.

Ex numero acutorum affectuum adhuc adducam apoplexiam tanquam affectum sæpe accidentem, & in quo plurimi ægroti aut interire, aut paralyti postmodum ad minimum correpti miserandam degere vitam coguntur. Describitur autem, quod in ea subito sensus deficient cum motu & loquela, pulsus vero & respiratio non desinant, nec faciei color mutetur. Pro parte affecta veteres cerebrum, quia in eodem principes animæ facultates peraguntur; alii nervos cum spiritibus animalibus, & adhuc alii partem cerebri internam diversam venditant. Causam vere unanimi consensu defectum spirituum a refrigerio esse affirmant, ac denegatum influxum ob poros cerebri pituita seu viscidioribus humoribus repletos ac obstructos. Alii credunt, hoc in morbo adest nimiam pororum cerebri ac plexus choroidei apertionem ac dilatationem, ob quam facile obstructio plenissima cerebri & principii nervorum ab humore affluente peregrino oritur, quo facto influxus spiritibus animalibus denegatur, & exinde omnia membra flaccida ac mortuis similia redduntur. Remote vero sanguinem ac lympham crassam & in aliis acrem accusant, quatenus hæc magna in copia extravasata, cerebri poros ejusque superficiem & principia nervorum obstruere potest. Hinc & duplex apoplexia oritur, nempe humoralis & sanguinea. Symptomata seu signa hujus morbi sunt subitaneus defectus sensuum cum loquela ac motu; pulsus vero ac respiratio non desinit, etsi difficulter & cum stertore instituitur, nec color faciei mutatur.

§. XVIII.

Ex hisce indicantibus, nempe morbo, causâ ac symptomatibus, nunc indicationes formant sequentem

in modum, scilicet morbo occurrendum esse & quidem curatorie sic dictis antapoplecticis, quæ simul defectum ac influxum restituunt & excitant, pituitamque viscidam resolvunt. Hinc in subjectis plethoricis venæ sectionem instituunt, vesicatoria, aut cucurbitam cum multa flamma, aut clysmata acerrima adhibent, interim spirituosâ, volatilia, acria, totam absolvunt curam. Sed quo eventu? In plurimis ægrotis symptomata exacerbantur, nempe color faciei antea naturalis, postmodum rubicundus & tandem lividus evadit; stertor ac difficultas respirandi continuo adaugentur, & ultimato æger suffocatur, & cum morte commutat vitam. Post mortem sectionem instituunt, causamque hujus mali quærunt, & inveniunt pulmones ac reliqua organa vitalia nigra, i. e. gangræna & sphacelo correpta. Si tunc ex iisdem quæratur, quonam morbo hicce ægrotus extinctus sit, statim provocant ad gangrænam, & sphacelum organorum vitalium, inquiennes, *er hätte sterben müssen / denn der kalte Brand hätte darzu geschlagen.* Sed audi, an hæc gangræna & sphacelus evitari potuerunt? aut ex inepta applicatione medicamentorum sic dictorum antapoplecticorum, illegitimaque cognitione theoretica ortum traxerunt? Idque probabo. Agnoscitur difficultas respirandi cum stertore. Causam, quam in theoria posuisti defectum spirituum, nunquam id demonstrabis.

§. XIX.

Igitur juxta antecedentem methodum & hujus morbi modum fieri & resolutionem pathologicam tentabo, ut appareat, quod & talis miser non ex morbo, sed ex symptomatibus mortuus sit. Scilicet apoplexia juxta modum fieri in illis, qui moriuntur, i. e. in summo gradu, nihil aliud est, quam merus spasmus seu contractio fibrarum, principiorum nervorum, & organorum ad vitalitatem concurrentium, utpote pulmonum, cordis, diaphragmatis, &c. Pars affecta sunt organa vitalia & principia nervorum. Causæ vero hunc spasmum introducentes sic se habent: nempe procatarcticae sunt sex res nonnaturales vel materialiter vel idealiter ad productionem salium aut vere abundantium, aut successive ex resolutione massæ sanguineæ resultantium conferentes. Hæ partes autem salinæ in corpore existentes causam constituunt antecedentem omnium spasmodum, quæ tamdiu in corpore circa has vel illas partes insensibiles delitescit, & quidem in specie hoc loco in apoplexia circa partes vitales, donec ex iisdem rebus nonnaturalibus quædam contingat causa occasionalis, hanc antecedentem commovens & in actum deducens, quales ordinarie pathemata animi graviora, ac spirituosior potus excessive haustus esse solent, unde motus spirituum progressivus summe acceleratur. Potissimum circa eas contingit partes internas, circa quas causa antecedens specialiter collecta, & quas magis sensibilibus afficere potest; qui motus spirituum summe acceleratus, ut causa apoplexiæ proxima morbum spasmum nomine in pulmonibus, corde, diaphragmate introducit; unde corde, pulmonibus, cum diaphragmate legitime sese non moventibus & circulatio sanguinis & respiratio imminuitur, ac turbatur ab initio, & successu temporis ultimato plenarie desinit; quæ functiones læsæ seu symptomata primario cognoscuntur ex pulsu & respiratione, ac tandem secundo externa symptomata producant, nempe inirum motum & sensus externos ad tempus abolitos; & id quidem hoc modo.

§. XX.

Dum natura occupata est in hisce partibus circa hanc causam antecedentem molestam removendam, ideo majori in quantitate ad cor, ac reliqua organa vitalia affluit, fibrasque corporis contrahit, ut cor legitime pulsare, & circulationem sanguinis promovere nequeat. Corde nunc legitime non pulsante, sanguis ubique stagnat, & colligitur præter modum, quod iterum innotescit ex facie primum rubesciente & tandem livescente. Ita præcipue subtilioribus in ramusculis sanguiferis, quales in cerebro existant, quibus a sanguine stagnante repletis & intumescantibus principia nervorum comprimuntur, motus spirituum influus ad organa sensoria & partes externas reliquas impeditur, & sic sensus & motus externus abolentur. Ex quo sanguine nunc stagnante & nervos comprimente si etiam infundibulum comprimatur, perfacile erit demonstrare, quid sibi velit differentia inter apoplexiam sanguineam & humoralem, quando talem sanguinem & lympham post mortem intra cerebrum deprehendunt.

§. XXI.

Ex hoc modo fiendi & formalitate apoplexiæ nunc non sequitur indicatio: *Ergo dentur antapoplectica*, i. e. salia volatilia, acria, aromatica, spiritus ardentes &c. Hisce enim adhibitis spasmi causa proxima i. e. motus spirituum summe acceleratus adaugetur, qui & in organis vitalibus inflammationem & gangrænam instituit. Ex hoc oritur sphacelus; & sic plenarius usus functionum primum animalium, ultimato vitalium abolutus, i. e. mors per suffocationem introducta. Ergo & hujus ægri nex quoque non ex apoplexia, tanquam ex morbo i. e. obstructione cerebri ab autoribus descriptâ, sed juxta antecedentem demonstrationem ex solis symptomatibus vel absolute vel respectively concurrentibus, scil. gangræna, sphacelo, & suffocatione non impeditis fuit accelerata.

§. XXII.

Demonstrata atque comprobata thesi mea aliquot exemplis mortuorum non ex sic dictis morbis acutis, conferam me ad morbos chronicos, ex quibus & mihi incumbet probare, neminem mori posse ex iisdem, sed potius semper ex symptomatibus supervenientibus. Sit ergo primum exemplum sic dictus calculus renum, qui describitur, quod in regione lumbari dolorem secum ferat; conjunctum vel cum suppressione lotii vel stranguria, vel ardore urinæ, vel mictione cruenta purulentave. Pars affecta in eodem sunt præcipue urinæ organon secretorium, scil. renes. Causam si quæras, autores valdopere inter se dissentiunt. Alii enim humorem crassum, lentum & pituitosum a calore exsiccatum, alii mucilaginem tartaream, alii spiritum lapidificum, alii bilem viscidiorum cum acido concurrentem accusant. Symptomata præcipua sunt dolor in regione lumborum, febris ex dolore, vomitus, suppressio lotii & alvi, stranguria, ardor urinæ, mictio cruenta, stupor cruris, singultus, &c.

§. XXIII.

Hisce præmissis tendunt ad therapiam, formant indicationes, nempe primo curatoriam, calculum esse frangendum & e corpore eliminandum. Medicamenta autem ad eandem absolvendam adeo varia reperies. Ex omnibus enim classibus materiæ medicæ quædam aliquando proficua fuisse, autorum observationes testantur, v. g. aliquando aquosa, ter-

rea, lapidosa, salina, sulphurea diversimode inter se mixta & sæpe adeo imbecillia atque debilia calculum frangentia, quæ nec stramen destruere queunt, ut saxifraga &c. tot specifica & appropriata & diuretica, tot tincturas, balsamos, ac olea nephritica a magnis viris maximopere commendata, quæ certe non nisi ex occulta qualitate operationem & effectum suum exercere queunt. Sæpissime quoque hæc omnia frustra adhibentur; accedit mictio cruenta, suppressio urinæ ac stranguria, dolor in dies augetur, concurrunt vomitus, sitis, febris leipyria, singultus, epiala, & tandem ex cruciatibus summis horrenda mors.

§. XXIV.

Nunc quæritur, an hic miser discesserit ex morbo, nec ne? Sed quis est morbus in hoc affectu? putasne calculum? Nego ac pernego. Morbus enim est læsio substantiæ. Calculus vero est ipsum lædens substantiam partis solidæ, quod & veteres jam cognoverunt, ideo calculum rem toto genere præternaturalem esse dixerunt, & inter causas retulerunt. Quamdiu enim calculus læsionem seu morbum non introducit, tamdiu nemo in semet ipso calculum adesse novit. Morbus autem sine sensatione ingrata seu læsâ functione, i. e. symptomate, existere nequit. Ergo calculus non est morbus, sed ipsa causa morbifica, nempe vitium humorum pro differentia temperamenti, subjectorum quoad partes nunc magis terreas, nunc magis lapidosas, nunc magis salinas diversi generis, & sulphureas diversimode inter se mixtas ac prædominantes, partibus aquosis & spiritibus animalibus nunc magis nunc minus destitutas, quod monstrat diversa substantia & soliditas calculi, causam proximam constituens morbi alicujus vel positionis vel solutæ unitatis in renibus, dum fibræ harum partium aut comprimuntur, aut distenduntur, aut plane lacerantur, unde nunc symptomata in antecedentibus nominata proveniunt.

§. XXV.

Causa antecedens vero in fiendo calculo est motus spirituum acceleratus, primum progressivus, deinde & intestinus, qui partes hæc nominatas, alias massam sanguineam constituentes, nunc vero in renibus vel vere abundantes, vel ex resoluta massa sanguinea hoc modo colligit, scil. partes fluidas aquosas cum sua propria substantia copiosius eliminando & sic debilitando. Hinc consistentia collecta hujus substantiæ oritur, ac figuram assumit pro conditione loci, ubi hæret. Causæ procatacticæ in aliis sunt excessus alimentorum magis terreorum, lapidosorum, ac salinorum, in aliis in specie abusus Veneris, refrigeratio, ac nimia commotio regionum lumbarium; quod vitium humorum specialiter jam collectum, præexistens in renibus, sub nomine calculi tandem a causis occasionalibus, mediantibus spiritibus in actum deducitur, ut tale vitium humorum collectum & concretum sub nomine calculi suis extremitatibus acutis pungentibus diversimode ipsam substantiam renum lædat, & sic spiritus animales in eadem hærentes ingrate afficiant. Hinc symptoma dolor, qui, dum spirituum motus quotidie adaugetur & spiritibus animalibus communicatur, tandem febrem symptomaticam producit, & quidem primum intermittentem, postmodum continuam & continentem, ac in specie tandem leipyriam, i. e. inflammationis majorem gradum seu gangrænam, ultimato & epialam seu sphacelum, & sic ex circulatione sanguinis ac respiratione, ut symptomatibus functionum vitalium, abolita provenit mors illa horrenda ac violenta. Ergo nec hujus subjecti

sumat

fatum a calculo tanquam a morbo immediate, sed a symptomatibus summe urgentibus, minime vero convenienter mitigatis, fuit exortum.

§. XXVI.

Alterum exemplum sit sic dicta hydrops seu anasarca; quæ describitur ab autoribus, quod in ea universum corpus pallescens ac aqua turgidum existat. Pro parte affecta venditant veteres hepar, tanquam instrumentum sanguinis generativum, alii mesenterium, alii lienem, ac alii universum corpus, genus venosum ac nervosum. Ad causas si deveniunt, Veteribus causa proxima est materia ad nutritionem inepta, i. e. serosa, inter carnem & cutem collecta, sua copia partes corporis distendens; antecedens vero est sanguificationis frustratio a frigida hepatis intemperie producta. Juxta Recentiores est feri abundantia & visciditas, ob quam circulationem respuit; interdum quoque oritur ex vasorum lymphaticorum læsione a casu. Symptomata in eadem reperiuntur color pallidus totius corporis, frigus, foveæque digitis impressæ diu durantes, retentio urinæ, respiratio difficilis, sitis intolerabilis Tantalea.

§. XXVII.

Finitâ hac theoria brevibus commemorata curationem hujus morbi incipiunt formatione indicationum ac indicationum, ac cum juxta eosdem ipse morbus indicet curatorie, indicationem hanc efficiunt sic dictis antihydropsicis, iterum tantopere a se invicem discrepantibus, ut neo-medicus vix noscat, quod ex tot medicamentis ab initio sumere debeat. Præcipue autem commendant viscidiores humores resolventia, calida &c. sæpiissime autem sinistro cum eventu. Dum enim differentiam temperamentorum in ægrotis non attendunt, acceleratum & retardatum iisdem medicamentis tractant. Hinc accedunt dolor, satis atrox, suppressio major urinæ, stranguria, febris, ulcera sphacelata, motus convulsivi, & sic mors ipsa.

§. XXVIII.

Nunc iterum oritur quæstio, an præsens ægrotus ex morbo, i. e. hydrope mortuus sit, nec ne? Autores affirmabunt; ego autem ex symptomatibus supervenientibus eundem interiisse, postmodum demonstrabo. Hydrops enim est ipsa abundantia feri seu partium aquosarum excrementitiarum in corpore quomodocunque facta, & sic non morbus, sed ipsa causa morbifica proxima hujus intumescentiæ; remota vero seu antecedens est vitium spirituum, & quidem defectus. Causæ procatacticae sunt illæ, quæ non solum principio activo sentiente seu spiritibus animalibus, sed etiam ipso principio activo simpliciter destituuntur, & sic ad corpus pervenientes principium activum sentiens non solum non restitunt, sed etiam idem adhuc magis imminuunt, ex quorum numero præcipua sunt omnia excessiva aquosa, frigida, potulenta, fructus horæi sic dicti frigidi, ut cucumeres, melones, &c., etiam omnes excessivæ refrigerationes quocunque modo factæ vel in aëre vel in aqua; quæ causa antecedens seu defectus spirituum præexistens a causa occasionali quacunque hoc modo in actum deducitur, dum in ejusmodi subjectis semper debiliores & parciores excretiones reperiuntur propter ipsum debile principium activum sentiens.

§. XXIX.

Hoc modo sese habente hydrope & hæc remedia

proficua esse credo. Quid si autem temperamentum sit magis acceleratum, i. e. humoribus magis acribus seu sic dictæ autoribus acrimoniæ obnoxium, quod sæpiissime accidere solet, in eodem quoque causæ internæ longe aliter sese habent, ac symptomata longe diversa a præcedentibus combinata adfunt, scil. calor, sitis, ac dolor. Causa proxima enim non solum serum viscidum abundans, sed etiam serum fluidum diversimode salibus mixtum. Hinc causa antecedens quidem defectus spirituum, sed etiam simul motus acceleratus eorundem particularis postmodum excitatus. Si nunc hic ægrotus iisdem remediis prout antecedens tractatur, aliter fieri nequit, quam ut ab hisce medicamentis salinis, spirituosus, acribus, drasticis purgantibus, vehementioribus diureticis, symptomata functionum naturalium, sitis & stranguria augeantur, motus spirituum animalium in nervis irregularis concitetur. Hinc motus convulsivi. Si nunc hic motus irregularis & sanguini communicatur, oritur febris, exinde postmodum sphacelus & ex hac circulatio sanguinis, & per consequens respiratio impedita & ultimato plane abolita, i. e. mors. Ergo & hinc ægrotus non ex morbo, i. e. hydrope, sed ex concurrentibus symptomatibus, brevi ante commemoratis, diem obiit supremum.

§. XXX.

Tandem ex numero chronicorum affectuum sit sic dicta podagra, affectus, inquam, qui simul cum febre ac hydrope, Medicorum scandalis juxta proverbium, annumeratur. Describitur autem ab autoribus, quod sit dolor articuli partiumque vicinarum circa articulum, ab humore acri articulos cingente & irritante ortus. Pro parte affecta veteres cerebrum, tanquam fontem ablegantem catarrhos humoresque acres ad articulos, alii ventriculum, ac alii membranacea ligamenta ipsos articulos cingentia ac colligantia, accusant. Causam veteres tradunt humorem acrem ac articulorum infirmitatem. Recentiores vero insignem humorum acrimoniam vel ex acido, vel falso, vel bile acriore constantem &c. Ex hac theoria nunc therapiam inchoant ab evacuantibus. Partes affectas illinunt variis remediis spirituosus, volatilibus, oleis narcoticis, involvunt emplastris &c., sæpiissime autem & interitu ægroti. Retrocedit enim & oritur crisis per metastasin, Germani ajunt, *er hat ihm das Podagra zurück in den Leib getrieben*. Partes enim internæ exinde corripiuntur inflammatione, gangræna & sphacelo, concurrunt diarrhœa, motus convulsivi, & sic postmodum mors gravissimis hisce symptomatibus stipata.

§. XXXI.

Nunc quæritur, an hic ægrotus ex morbo scil. podagra e vivis discesserit. Plurimi non negabunt, ac culpam transferent in retropulsionem. Quid autem hæc sibi vult? Estne podagra vermis, qui expelli ac retropelli potest? Igitur meliorem conceptum formalitati rei & praxi magis convenientem liceat mihi tradere de hoc affectu. Nempe causa proxima est vitium humorum, & quidem lymphæ articularis seu synovia, salibus vel acidis, vel falsis, vel acribus, vel adstringentibus, &c. magis abundans, quæ magis minusve successu temporis inspissatur, & sic dolorem diversum pro diversitate salium inibi stagnantium in perioestio, ligamentis atque tendinibus superjacentibus introducit. Causa antecedens motus spirituum summe acceleratus, majori in quantitate hancce lympham acrem ad hosce articulos cum aliis humoribus adducens specialiter, quod cognos-

cognoscitur ex causis procataceticis & occasionalibus, qui spiritus interim expelluntur lymphâ hac acri remanente & collecta, in parte affecta autem spiritus insitus ab hac lymphâ acri in maiorem motum acceleratum concitatur. Hinc dolor, fibrarumque contractio seu spasmus, sanguinis impeditus regressus, & hoc modo tumor, rubor, & calor, quod demonstrari potest ex antea nominatis causis procataceticis & occasionalibus, quæ præcipue sunt abusus ciborum salitorum ac aromatizatorum, potulentorum spirituosiorum, ac nimius motus & incallescencia corporis ex abusu veneris.

§. XXXII.

Retropulsionem autem si mihi concipio, nempe humores inibi stagnantes ex usu discutientium, resolventium, & repellentium ad fluiditatem & motum iterum sunt redacti, & sic ad massam sanguineam reducti circulantur cum eadem, ac viscera permeant. Datâ nunc levissima causa occasionali vel in hoc vel in alio viscere novum morbum antecedenti longe periculosiorem introducunt. Stagnant enim in iisdem salia, spiritus animales in hisce visceribus existentes stimulant, & in maiorem acceleratum motum concitant. Hinc dolor & calor, inflammatio & motus convulsivi. Si autem hæc non mitigantur, motus acceleratus & inordinatus spiritibus vitalibus in sanguine communicatur & magis universalis redditur. Hinc oritur febris, accedit gangræna & sphacelus, ut sic sanguis vitalitate destitutus, ad circulationem plane ineptus, & respirationem impediat, & ex hisce functionibus intermissis ultimato mors proveniat. Ergo & hicce æger non ex morbo, i. e. podagra, siquidem podagra retrocessa amplius non adsuit, sed ex functionibus, primum animalibus, postmodum vitalibus interruptis & plane abolitis, ultimum vitæ halitum emisit.

§. XXXIII.

Absolutis nunc exemplis adductis ex morbis internis, & quidem acutis & chronicis, convertam me quoque ad probationem thesios meæ a morbis autoribus dictis externis desumptam. Ex quibus sit primum vulnus, quod describitur per solutionem continui partium solidarum flexilium a variis instrumentis introductam. Hæc nunc solutio continui si a causa externa i. e. instrumento aliquo profundius facta in corde contingat, vulnus ab autoribus nominatur per se & simpliciter lethale. Etsi in ejusmodi defuncto quæratur, quonam phænomeno præternaturali perierit, statim provocant ad vulnus, quod sanari non potuerit, quia remedia externa eò pertingere nequeunt, interna vero capacia non sunt hanc solutionem continui counire, nec hæmorrhagiam supervenientem sistere. Quid vero est hæmorrhagia? nonne symptoma excretorum, & quidem in hoc casu circa organa vitalia contingens, qua superveniente circulatio sanguinis impeditur, respiratio aboletur, & sic corpus spiritibus ac sanguine orbatum animam & vitam exhalat. Ergo & hic infirmus non ex morbo, scil. soluta unitate immediate, sed ex symptomatibus simul accedentibus, i. e. ex hæmorrhagia & consequenter functionibus vitalibus extinctis vitam ac animam efflavit.

§. XXXIV.

Tractant & autores sub nomine morborum externorum inflammationem. Describunt, quod tumor sit rubicundus, æstuans, cum dolore pulsatorio. Cum

vero morbi externi ad chirurgiam pertineant, & hæc inflammatio in chirurgia tractetur, ideo eundem ad chirurgos relegant, qui nunc suis spiritibus, cataplasmatibus, emplastris, unguentis, &c. eandem mitigare tentant. Experientia autem teste sæpe ex inflammatione simplici faciunt gangrænam, sphacelum, & sic mortem introducunt. Hicce nunc ægrotus an ex morbo i. e. inflammatione mortuus? Autores affirmabunt, nego vero, & eundem ex symptomatibus interiisse, sequenti modo affirmo: Nempe hic affectus non est vere externus, quia a veris causis externis non provenit, sed a vitiis humorum & spirituum, quæ veræ omnium affectuum internorum sunt causæ. Ergo & hic affectus internus est.

§. XXXV.

Causa autem proxima, quatenus tumor rubicundus & ipse sanguis stagnans in aliqua parte, & antecedens vitium spirituum, & quidem motus eorundem acceleratus progressivus; pro varietate autem sanguinis stagnantis, i. e. si partibus salinis, acribus, magis minusve commixtus sit, qui substantiam membranofam ac nerveam partium vellicat, & a remediis inepte applicatis & intestinus spirituum motus acceleratus ac inordinatus oritur, qui massæ sanguineæ in parte affecta resolutionem introducit, ac si hic motus spirituum animalium non mitigatur, summus gradus inflammationis, i. e. gangræna exinde provenit, & postmodum motus hicce progressivus ac intestinus summe acceleratur & spiritibus vitalibus in sanguine refluenti hærentibus communicatur, hinc vibices. Tandem vero oritur plenaria mortificatio membri læsi, i. e. sphacelus, si sanguis totaliter vitalitate destituatur, qui & momentanee spiritibus reliquarum partium communicatur, qui ob ingratham sensationem remanent, nec influunt, & sic circulatio sanguinis & ex hoc respiratio primum imminuitur, & tandem harum functionum usus plane aboletur, & sic ex hisce symptomatibus provenit mors. Ergo & hujus infirmi interitus non ex magnitudine morbi immediate, sed propter ignorantiam Chirurgi, qui symptomata, i. e. calorem, dolorem, juxta causas non rationaliter & legitime mitigavit, ac ex symptomatibus ultimato supervenientibus i. e. functionibus vitalibus læsis tandem fuit introductus.

§. XXXVI.

Ex hisce nunc patebit, quam imbecillia sint fundamenta pathologica autorum. Dum enim hodiernis temporibus morbus primarius ut plurimum negligitur, nec causæ in legitima connexionione traduntur, aliter evenire non potest, quam quod & illegitima indicantia ac indicationes exinde oriantur, & sic ex collectione symptomatum, neglectâ formalitate morbi, tota nostra pathologia hæctenus cognita consistat, & cura instituitur non rationalis, sed pure empirica, sapissimè cum maximo detrimento & morte sæpe inopinata ac improvise ægrotorum juxta hæc regulas artis.

§. XXXVII.

Si autem hæ indicationes desumerentur ex causis vere internis, i. e. humoribus ac spiritibus vitiosis, longe melior theoria & postmodum utilior cura exinde institui posset, quod in adductis morbis demonstratum, & per omnia morborum genera demonstrare possem, nisi me pagellæ huic dissertationi destinatae

finatae avocarent. Interim concludo, non solum ægroti in morbis internis, & quidem acutis, ex febre ardente, maligna, ac apoplexia; in morbis chronicis, ex calculo, hydrope, & podagra; in morbis externis ex vulnere ac inflammatione non moriuntur, sed etiam in reliquis morbis omnibus nullus hominum moritur nec mori potest ex morbo, sed omnes ex symptomatibus supervenientibus, ultimato functiones vitales abolitas introducentibus. Hisce enim integris & præsentibus vivimus, & hisce non nisi extinctis morimur.

§. XXXVIII.

Cui coronidis loco adhuc apponam, quod inique & contra conscientiam judicetur, hominem mortuum esse, si externæ functiones animales desinant, & apparenter saltem externe etiam functiones vitales, quippe pulsus & respiratio, cessare videantur & appareant. Quamdiu enim cordis & pulmonum functio seu motus pro emittendo & recipiendo sanguine & aëre non plenarie & omnimode extinctus fuerit, tamdiu vere & absolute homo mortuus dici nequit. Ergo ultimato omnis ægrotus hisce functionibus plenarie extinctis & abolitis vitæ subit finem.

DISSERTATIO MEDICA

DE EO

QUOD PLURIMI ÆGROTORUM

MORIENTUR CONTRA LEGES ARTIS.

Primum edita Anno 1704.

LECTOR BENEVOLE.



IVINÆ læsæ majestatis justissima vindicta nos mortales reddidit, partim per subtractionem & remotionem arboris vitæ, partim per perturbationem principiorum seu elementorum corporis primorum parentum, nimirum vi tantorum horrendorum pathematum animi durante lapsu contingentium, cujus mortalitatis restitutionem in integrum nemo per artem unquam præstare poterit; reluctaretur enim invincibili divinæ omnipotentiae; quatenus autem eadem principia corporis in quocunque individuo humano a prima nativitate jamjam debilitata & turbata existentia, ulterius ab innumeris causis externis magis magisque alterantur & enormius turbantur, eatenus citius ad mortalitatem hancce properamus, i. e. morbofi reddimur, cujus mortalitatis accelerationem impedire ac evitare soli homini relictum est sub nomine artis medicæ. Si enim Deus ad hancce mortalitatis accelerationem auferendam, sive morborum curationem instituendam regulas & leges constituisset & homini contulisset, necessario & absolute eadem infallibiles forent; ast hæc ipsa regularum artis medicæ quotidiana, ut ita loquar, fallibilitas sensibilibus testatur, eandem artem non nisi inventum solius hominis esse, quæ juxta hætenus cognitæ hypotheser ex sola ratione & experientia construitur; qualia duo principia tamen nullam sufficientem cognitionem suppeditant principiorum ac elementorum corporis humani, ratione eorundem primæ originis, substantiæ, ac proprietatum genuinarum, multo minus ratione eorundem primæ depravationis &urbationis, i. e. primæ mortalitatis introductæ, quum ad illa tempora creationis & depravationis primorum parentum nec ratio nec experientia pertingat; ita pariter hac cognitione deficiente sola ratio & experientia non sufficiunt ad cognitionem formalitatis modi fiendi morborum, seu ad cognoscendum modum lædendi substantiam corporis nostri, a causis externis introductam, mediantibus internis, i. e. elementis, seu principiis corporis per se jam depravatis. Proinde quales leges & regulæ artis ex hoc fundamento reliquæ omnes jam eveniant, facile patet, quippe conjecturales, a particularibus observationibus & per mortes ægrotantium confirmatæ, formalitati mortalitatis acceleratæ, seu morborum i. e. naturæ ægrotorum haud quaquam convenientes. Hinc quid mirum, quod homines tot & quam plurimi contra veras & genuinas regulas artis moriantur, non solum ratione regularum ineptæ & perversæ applicationis, sed etiam, & potissimum

num propter regularum artis insufficientem nimirum artificialem constitutionem, quod jam in præfenti differtatione secundum doctrinam Præceptoris de me optime meriti, Excell. RIVINI, quantum paginæ concedent, paucis investigare animus est: quod institutum cœlestis Archiater ita clementer dirigere velit, ut plures in posterum ægrotantes juxta regulas artis conserventur, quam contra easdem moriantur.

§. I.

Cum juxta definitionem autorum medicina sit ars aut scientia sanitatem præsentem conservandi, & labefactatam iterum restituendi, attamen experientia quotidiana confirmet, quod plurimi moriantur, id necessario contra definitionem i. e. primariam regulam totius artis fieri debet, nam juxta eandem omnes ægroti conservari & restitui deberent, si hæc definitio universalis esset, quemadmodum ubique docetur; & si huic jam definitioni eodem modo correspondent etiam reliquæ regulæ seu leges totius medicinæ, utique, qui moriuntur, contra hæc regulas omnes artis mori debent, nam juxta easdem nemo mori debet.

§. II.

Præsertim quum tot innumeræ hypotheses in medicina existant, quot Medicorum capita; Sic alii ægrotos tractant juxta regulas artis Veterum, alii juxta regulas artis PARACELSI, alii juxta regulas artis HELMONTII, WILLISII, SYLVII, CARTESII, DOLÆI &c., qui tamen nunquam circa ægrotos inter se conveniunt, sed unus alterum inculpat, eundem ægrotum, si res deterior evaserit, non legitime juxta regulas artis tractasse, videlicet juxta regulas suæ hypotheseos; si hic iterum ad aliquod tempus pari modo ægrotum copiosis specificis & appropriatis medicamentis juxta suam hypothesin frustra vexaverit, i. e. definitionem medicinæ non adimpleverit, ac tertius accedat, hic similiter, antecessorem suum experientissimum contra regulas artis processisse, asseret cum modestia & respectu quodam, si senior fuerit, rationem adjungens, quia hic juxta CARTESIUM curasset, cum juxta HELMONTIUM tamen cura instituenda fuisset; ergo eandem Helmontiano more instituit, donec moritur æger, post cujus mortem si exaudiverit quartus historiam ægroti & methodum medendi, renunciat, hosce omnes contra regulas artis egisse, quia talis morbus nunquam lethalis est, si juxta regulas artis SYLVII legitime tractetur. En contra regulas artis mortuum juxta propriam confessionem practicantium.

§. III.

Hinc adparet, quid emolumenti expectandum sit ægroti, si ad consultandum plures simul convocentur Medici, utpote unus semper alteri contrarius esse debet, cum quilibet alias atque alias foveat regulas artis, & per puras contradictiones ad conclusionem seu remediorum applicationem perveniant. Quod si igitur tres ad levamen ægroti præstandum concurrant, v. g. in febre ardente, symptomatibus in tantum gravioribus stipata, prima quæstio & controversia oritur, quid in tam periculoso morbo ab initio faciendum? ad quam primus suadebit, vomitoria esse danda, ut saburra ex primis viis ejiciatur; alter magis consultum fore arbitrabitur, si Venæ sectio instituatur ad depletionem vasorum; tertius magis alterantia, mitiora salina, sudorifera cum alexipharmacis mixta serio commendabit, metuens nimirum malignitatem delitescentem.

§. IV.

Expectant jam æger atque adstantes auribus oreque apertis, quid hinc consilii fluat, & majori in autoritate existens primo incipit, se id in Galliis per tot annos vidisse & observasse, in omnibus febribus ardentibus inox ab initio venæ sectionem institui juxta primarios & maxime honoratiores Medicos; ergo &c.; alter autem duos vel tres annos tardius titulum Doctoris possidens quasi per instantiam regerit, se ex intimiore amicitia & familiaritate hujus vel illius Archiatri, qui per integros sexaginta annos aulae & jam duobus tribusve Principibus mortuis inservivit, audivisse & observasse, eundem in omnibus febribus ardentibus vomitorium ab initio dedisse; tertius tandem indicationis vitalis rationem habendam esse monet, quæ tamen per venæ sectionem & vomitorium non obtinetur, addita admonitione, si mox ab initio vires ægri prosteruntur, postmodum natura insufficiens est ad materiam peccantem expellendam, quod sub manu ductione perantiqui practici didicerit, qui primus & immediatus HELMONTII discipulus fuerit.

§. V.

Cum autem morbi & symptomatum urgentium vehementia diuturniorem deliberationem non permittant, posteriores duo primo propter majorem auctoritatem assentiunt venæque sectionem ex instanti fieri unanimiter jubent, circa noctem remedium confortans cordiale exhibent; ast integram noctem & turbulentam & molestissimam degit æger cum insigni exacerbatione symptomatum.

§. VI.

De mane iterum convenientes Medici ab effectu vident, quod contra leges artis tractatus fuerit, quod nunc etiam reliqui duo urgent, quippe si venæ sectio omissa fuisset, & juxta unius mentem vomitorium datum, aut juxta alterius mentem alterantia, & alexipharmaca, sudorifera fuissent adhibita, omnino sese melius haberet ægrotus; proinde primus quasi attentus secum deliberando tandem, ne quid neglexisse & prætermisisse videatur, etiam nunc condescendit cum altero, ac, vomitorium porrigendum esse, annuit, quia prima saltem dies præterlapsa, & sic adhuc ab initio morbi, festinanter igitur præscribitur vomitorium, & quia adhuc de mane, mox assumi jubetur; interim secedunt conciliatores sanitatis.

§. VII.

Circa horam quartam pomeridianam simul iterum visitantes ægrum insigniter delassatum, symptomatibus urgentibus in summo gradu decumbentem; ob imbecillitatem respondendi & loquendi ejusdem adstantes referunt, quantis frustraneis vomendi conatibus æger exagitatus fuerit, licet calidum fluidum magna in quantitate superhauserit, ita ut omni temporis momento expectaverint evomitionem animæ. Hinc jam gaudet prior, quod alter contra regulas artis suaserit vomitorium, provocando ad hunc effectum, qui tamen cum modestia huic venerando seni regerit, nunquam talem sinistram hujus vomitorii effectum subsecutum fuisse, nisi præcedanea die venæ sectio,

fectio, instituta fuisset, hoc modo enim saburræ, cruditates, materia peccans &c. ex primis viis abiisset ad massam sanguineam in tanta quantitate, in quanta sanguis evacuatus fuerit. Quisnam juxta leges artis egerit, judicet alius.

§. VIII.

Tandem auditur & tertius, ejusque commendatis alterantibus, sudoriferis, alexipharmacis applauditur, quæ circa noctem & per integram noctem ut exhibeantur, sedulo injungitur adstantibus. Sic inter spem & desperationem ægrum derelinquunt mire defatigatum. Sequenti mane summa cum curiositate visitant ægrum; ast adeo delassatum hi tres sanitatis conservatores illum deprehendunt, ut oculos amplius aperire nequeat, auditus admodum difficilis, anhelatio insignis, pallidus totius faciei color, labia exsiccata & plenarie decolorata, pulsus circa tempora magnus, nares collapsæ, & sic plenaria facies Hippocratica.

§. IX.

Quem statum priores considerantes tertii commendata remedia pariter contra leges artis fuisse, discursive asserunt, ast heroico animo tertius sui defensionem instituit, monstrando iis, se utique ab initio præfagiisse & prædixisse, indicationis vitalis rationem habendam esse; cum autem vires adeo deperditæ sint, partim per venæ sectionem, partim per vomitorium, non mirandum, quod hæc remedia alterantia; sudorifera, alexipharmaca aliàs adeo insignia & toties per experientiam comprobata, suum non sortita fuerint effectum legitimum, siquidem in ægroto hoc modo debilitato *Kan sich die Natur ohnmöglich helfen*; ergo jam ad alia remedia progrediendum esse, ego suaderem, de quo deliberant & reliqui duo.

§. X.

Tandem unanimi consensum concludunt, *Wir müssen nur was geben das Hertz zu bewahren mit allerhand hergstärckenden Dingen* ex margaritis orientalibus, unicornu vero, dente equi marini, osse de corde cervi, magisterio perlarum, ac ultimato fructibus arboris vitæ simile aurum potabile; ergo detur. Cum apprecatione beatæ noctis ab ægroto & a se invicem iterum secedunt; ast vix undecimâ horâ præterlapsâ ex somno primarius medicus excitatur, cum relatione, quod ægrotus in agone existere videatur, cum epilepsiâ in summo gradu ferociente atque deliriis. Extemporaneum suum consilium suppeditat; quod bis terve intra horam cochleatim hesternâ præscripta potio confortans assumatur, cum addito:

Rec. liquoris Cornu Cervi fuccinati drach. ij.
essentiæ Castorei dr. j.

M. Dr. Sr.

Schwere Noths- und Wahnsinnigkeits-tropfen
25. bis 30. auf einmal.

Ita recreatur æger, ut vitam adhuc protrahat usque ad horam subsequentem matutinam octavam, donec in horum trium sibi contrariantium præsentia sub summis anxietatibus realem contradictionem definitioni medicinæ exhibeat, quippe cum sanitate præsentente conservandâ integram expiret vitam. Nunc L. B. judica ipse juxta conscientiam, an talis ægrotus juxta, an contra leges artis mortuus sit.

§. XI.

Moriuntur adhuc longe plures contra regulas artis, quod ut clarius adpareat, exempla quædam adducam; e. g. Medici alicujus consilium & auxilium expetitur ab ægroto; hic accersitus summa attentione enumerationem symptomatum exaudit, ut ex his colligat, circa quam partem ægrotus dolorem exquisitorem sentiat, ut illi nomen imponere possit, (vulgo, *damit das Kind nur einen Namen habe*) sine examinatione causæ occasionalis, quæ fuerit ex re nonnaturali circa quam ultimato excessum commiserit, & in quam partem primario operata fuerit.

§. XII.

Verbi gratia ægrotus dolorem sentit pectorium in latere pectoris sinistro vel dextro inter respirandum, cum tussi & dolore capitis conjunctum. Hisce auditis concludit Medicus, pleuritide laborare ægrotum. Imposito nomine huic affectui in memoriam revocat juxta hypothesein suam experientissimi Professoris sui commendata in hoc affectu remedia, præcipue specifica, si adhuc nec Medicus fuerit; aut si jam per plures annos praxin exercuerit, propria sua probata & observata prius iterum adhibere intendit, inconsiderato, quod hoc subjectum longe differat ab illo, in quo hæc probata proficua fuisse ex bono successu observavit. Præscribit ergo e. g.

Rec. spiritus nitri dulcis semiunc.
Bullii dr. j.

M. Dr. Sr.

Herliche Brust- und Seitenstechende
Tropfen 20. auf ein mal.

Has quantocyus assumere jubet, cum hac promissione, *es wird mit Gottes hülffe nun schon besser werden*; ne fortasse autoritati ejus aliquid derogetur, si effectus juxta intentionem non succederet; Deum adiutorem esse in curatione, ægrotum certum reddit, cujus protectioni eundem relinquit.

§. XIII.

Alterâ die ægrum deprehendit longe difficilioribus symptomatibus laborare; ideo hanc hypothesein & leges artis insufficientes agnoscit, quare de alterius autoris observatione particulari in pleuritide recordatur, properatque domum & alia præscribere promittit remedia post semi-horam, & quidem, quæ invenit in observatione alicujus Itali de pleuritide sub forma alicujus potionis summe refrigerantis, qua per diem & noctem utitur æger cum longè deteriori exacerbatione totius status præter naturam, quæ & in sequentem diem perdurat, donec ante consuetam visitationis horam Medicus advocatur, qui triste hocce spectaculum cum summa alteratione considerat, jubens tamen, usque ad vesperam eodem remedio ut continetur.

§. XIV.

Sic recedens iterum domi ex pretiosa & pomposa sua bibliotheca mortuum consultorem de exquisita pleuritide ante decennium scribentem in Gallia præ inquietudine animi arripit, & deprehendit, venæ sectionem esse instituendam ac clyisma applicandum, ut sic materia peccans a parte affecta derivetur, quo consilio instructus nunc festinat ad ægrum, jubetque apozema ex tempore in officinis præparari, & chirurgum adesse, ut venæ sectionem instituat; quibus factis jubet more Gallico, ægrotum præparari *un bouillon* seu offam carnis magis dilutam, cum magisterio perlarum, antihectico Poterii, nitro depurat. &c. circa noctem sumendo. Expectans sequentem diem, quo de mane tempestive adest, praxeos suæ Gallicæ mutuata effectum

Sf. opta-

optatum ut videat; ast invenit ægrotum nunc febre ardente plenarie correptum, & præ dolore pectoris vix amplius respirantem, nisi cum summis cruciatibus.

§. XV.

Hinc satis mirari nequit infelicem hancce imitationem observationum, aut execrationibus relegat eandem ut falsissimam fictionem. Jam urgetur febris ardentis curationem instituire, attamen cum pleuritide conjunctam, & meminit alicujus Angli scriptoris ante biennium ex aula regia ejusmodi observationem scribentis; propterea cum priori potione continuare jubet, donec domo aliam mittat formulam, & sic festinanter domum redit, evolvit hunc Anglum, legitque julepum, ex aquis destillatio, syrupo florum cordialium atque tincturis eorundem florum, contra calorem & sitim in tali affectu miraculi ad instar deprehensum fuisse, ergo hunc describit.

§. XVI.

Simul cum potiuncula nova, quam hicce Anglus de optima nota commendat ex WILLISIO, videlicet ex aquis cardui benedicti, cichorei, steicore equi recenti, syrupo papaveris rhœados, spiritu falis ammoniaci volatili; hæc formulas proprio pedissequo, quia ablegationem ægroti expectare nequit, transmittit, injungendo, ut cito citius in officina præparentur, & per intervallum duarum horarum semper duo cochlearia exhibeantur, & julepus instar potus ordinarii ægroti concedatur iterum usque ad diem sequentem; qua nova spe fretus visitationem instituit, ac semidelirantem ægrotum deprehendit, quare pulverem ex oculis cancrorum, mandibula lucii piscis, osse de corde cervi, & antimonio diaphoretico præscribit, cujus quantitatem aliquam bis adhuc ante prandium ægroti exhibere jubet, ac post prandium eodem modo continuare, cum admonitione, si necessarium foret, ut eundem mature revocare debeant.

§. XVII.

Circa vesperam consueta hora ægrum aggreditur, ex omnibus sensibus externis læsis de novo hæmorrhagia narium correptum invenit; propterea minime contentus etiam hisce Gallicis regulis artis ad hæmorrhagiam sistendam diversa externa humida atque sicca capiti & naribus imponere jubet, tam ex fonte pharmaceutico, quam domestico, quod tamen pariter juxta intensionem succedere non videt, quare & adstringentia interna ex marte, tormenilla, aliisque, & externa ex vitriolo &c. commendat, addito prognostico, quod res periculo plena sit, & ad consolandos adstantes inquit: *Wir müssen doch einmal alle sterben / dann unser Leben stehet ja in Gottes Hand / und wenn ein Medicus könnte den menschen vom Tode erretten / wäre er der reichste in der Welt.*

§. XVIII.

Interim domum revertitur, secumque deliberans nunc sensibiliter percipit, quid autorum speciosissimæ observationes valeant, quibuscunque nundinis editæ, quidque in regionibus & subjectis diversis particularis experientia facta, & longe aliis atque aliis iterum applicata; videlicet juxta suam intensionem & hæc leges artis se voluisse ægri sanitatem præsentem conservare, & labefactatam restituere, ast convictus sibimet ipsi fateri debet, eundem ægrotum contra hæc leges artis mortuum esse.

§. XIX.

Simili morte an non succubuerit pariter plane contra regulas artis sequens ægrotus, judicet quilibet legitimis artis fundamentis instructus. Quippe re-dux quidam ex bidua aut tridua peregrinatione conqueritur de lassitudine aliquali totius corporis, prostrato appetitu, dolore obscuro dorfi, integram noctem inquietus consumit, circa exortum diei corripitur frigore manifesto, subsequente calore universo ad plures horas durante cum aliis symptomatibus gravioribus. Medicus adveniens judicat, morbum esse febrem intermittentem, quare post paroxysmum laxantia & antifebrilia exhibentur. Tertia die idem paroxysmus redit, & sic determinationem morbi facit, quod sit febris intermittens tertiana; specificis antifebrilibus variis per octiduum & diutius exhibitis, frigus plenarie cessare videtur, & calor magis magisque adauctus & fere continuus, hinc omnia symptomata vehementiora reddita.

§. XX.

Ideo convocatur & alter Medicus. Hic non tam febrem ardentem, sed potius continuam absolute declarat, propterea tanquam morbum acutum tractandum judicat, ideo venæ sectionem instituunt, alexipharmaca, malignitatem expellentia, ac naturam juvantia adversus delitescentem & clam absconditam purpuram sudorifera cum cinnabarinis, castoreatis, antimoniatibus dantur, nullis omissis pretiosissimis etiam, siquidem honoratior & ditior persona id postulat; ita ad 14. aut 15. diem summis cruciatibus æger emaciatus & delassatus moritur, non nisi singulari dolore adstantium.

§. XXI.

Ut autem & hoc in passu juxta leges artis omnia fierent, quæ fieri debuerunt, diffecatur corpus demortuum, & nullibi sedem febris deprehendere licet; ast ad abdomen tandem devenientes, & in specie ad sinistrum renem, calculum monstruosæ & horrendæ magnitudinis & figuræ inveniunt non sine singulari admiratione & declaratione, *das hätte ich nimmermehr gedacht.*

§. XXII.

Ubi jam quæritur, annon cura institui debuisset hujus calculi ut primarii affectus circa autores? Certe quilibet affirmabit, si leges & regulas artis recte intelligat. Cum autem febri potius medicamenta fuerint opposita, nonne contra regulas artis talis ægrotus mortuus fuit? Hæ enim regulæ artis ex calculo desumptæ jubebant symptomata urgentia, i. e. inflammationem, & calculum aut ad alium situm commode reducere, aut, quantum possibile, eundem remove.

§. XXIII.

Cui tamen indicationi seu regulæ artis an satisfactum sit per sudorifera, expellentia, salina aliaque medicamenta motum spirituum atque humorum magis acceleratum introducentia, minime credō, sed potius demonstrabile est, causas symptomatum urgentium a calculo introductorum ab iisdem remediis adhuc magis adauctas fuisse, & sic contra hæc causas indicantes, & consequenter contra regulas artis adhibita sunt usque ad mortem ægroti.

§. XXIV.

Quotiescunque non contingit, ut ob symptomata seu circumstantias accidentales externas in subjecto feminino apparenter hydropi convenientes per plu-

res septimanas talis ægra draſticis & vehementioribus medicamentis quibufvis enervetur, donec contra ſpem & intentionem Medici moriatur? qui tamen ſe juxta regulas artis ejufmodi ægrotae ſanitatē præſentem conſervare & labefactatam reſtituere ſedulo annifum fuiſſe ſatis probabiliter aſſerit, dum indicantia ſua ut regulas artis, juxta quas egerit, adducit, v. g. tumor abdominis adfuit cum frigidityte aliqua, tandem etiam pedum tumores œdematoſi frigidi, unde concludit: ergo tumores hi ſunt diſcutiendi, & ſtagnatio aquarum removenda & evacuanda; ergo dentur hydragoga, fortiora purgantia, diuretica atque ſudorifera. Porro adefſt difficultas reſpirandi cum anhelatione, ſitis vehementior, appetitus proſtratio; ergo dentur expectorantia, ſitim exſtinguentia, in ſpecie nitrata, ſtomachica, appetitum excitantia &c. & ſic rationalem ſuam methodum medendi utique juxta regulas artis eleganter defendit.

§. XXV.

Aſt hac demonſtratione exaudita urgetur Medicus a quadam demortuæ conſanguineo, ut cadaver curioſitatis gratia aperiat & diſſecet, quod ex infanti in actum deducitur. Inter viſitandum cavitates ac viſcera deprehendit, nec guttulam aquæ in abdominis cavitate abundantem eſſe, in progreſſu autem uterum inſigniter intumeſactum invenit, hinc methodi medendi ſuæ certitudinem comprobans argumentum ſe deprehendiſſe lætatur, nimirum digito monſtrando adſtantibus, adfuiſſe hydropem uteri. Interim curioſus idem conſanguineus ulterius urget, ut & uterus aperiat, quod pariter inſtituitur; aſt in ejus cavitate loco aquæ collectæ mortuus deprehenditur embryo, non ſine terrore ingente Medici & adſtantium, quod videant contra regulas legitimas artis duplex ſubjectum morti traditum.

§. XXVI.

Aut etiam in alio ſubjecto feminino ut hydropico curato, eodem modo exſtincto, per eandem inveſtigationem anatomicam omnia viſcera abdominis plane illæſa obſervantur, & nihil minus, quam aquarum collectio deprehenditur; ad thoracis cavitatem autem deveniens inveſtigat utrumque pulmonum lobum putredine & exulceratione correptum, & fere conſumtum cum inſigni foetore contra omnem ſpem & opinionem intuetur; ubi iterum adſtantes & Medicus cognoscunt, non hydropem, ſed inflammationem pulmonum in hoc ſubjecto neceſſario curandam fuiſſe, & ſic mortuum contra illas regulas ſeu leges artis, juxta quas Medicus curam inſtituit.

§. XXVII.

Facile nunc alii cum hoc Medico a poſteriori diſcunt, quod regulæ & leges artis noſtræ inſufficientes, conjecturales & minus certæ hætenus cognitæ ſint, dum verum primarium affectum incognitum & intactum dereliquerit, & non niſi ſecundarium affectum ſymptomatice præſentem fruſtra tractaverit ob adeo debilem ſemeioticam, dum juxta autorum propriam confeſſionem nullum detur ſignum pathognomonicum alicujus morbi ſolitarium, ſed unice ex collectione plurium ſignorum talis certitudo conjecturari debeat; quæ ſigna tamen cum & aliis morbis communia ſint, adeo ſæpe fallunt Medicos, ut inconvenienter progrediantur ad regulas therapeuticas, & contra convenientes & huc pertinentes regulas artis ægrotum uſque ad mortem torqueant; qualis incertitudo cognoscendi morbum, diſtinguen-

Frid. Hoffmanni Oper. Supplem. II.

di cauſas morbificas, & veras & legitimas regulas therapeuticas inveniendi, unde proveniat, partim in præſatione jam commemoratum, partim mox adhuc ſub finem paucis declarandum erit.

§. XXVIII.

Supervacaneum quilibet judicabit plures tales demonſtrationes per exempla in comprobationem hujus thematis adducendas eſſe, cum quotidie adhuc talia experimenta circa hominis vitam ubique obſerventur, quod ſanitas præſens nec conſervetur, nec amiſſa reſtituatur, & longe alio morbo labore & ſuccumbat æger, quam qui a Medico curatur, propter adeo imbecilles & nimis artificiales leges ſeu regulas artis, ex tot innumerorum autorum hypothefibus collectas & in formam artis eclecticæ redactas, quæ difficilem demonſtrationem connexionis a priori in uno nexu alicujus ſtatus morboſi concedunt, talem videlicet, quæ cum effectu therapeutico juxta definitionem medicinæ conſentiat.

§. XXIX.

Quapropter quamplurimi contenti ſunt collectaneis & obſervationibus particularibus, juxta nomen nudum externum famigerati autoris aut morbi, & circumſtantiarum accidentalium analogiſmum ſuam praxin inſtituere quod poſſint, non attendentes, quid ad ſanitatem ſeu ſtatum ſecundum naturam corporis humani pertineat, ſed negligentes utplurimum ex inſtituto doctrinam de elementis, temperamentis, humoribus, ſpiritibus, partibus ſolidis, facultatibus ſe ſatiſfeciffe arbitantes, ſi ſolam functionum integrarum explicationem corporis humani ſibi acquiſiverint, & id quidem ubique ſatis artificialem, quæ magis in oculos & manus incurrit, quam naturalem, quæ in tantum obſcurior & remotior videtur.

§. XXX.

Unde nec in ſtatu præternaturali ſeu pathologia nec in therapia definitioni aliſque legibus ſeu regulis medicinæ ſatiſfacere poſſunt, præſertim in materia medica nominalem tantum appellationem nomini morborum convenientem amant, abſque ſufficienti cognitione ſubſtantię medicamentorum ac eorumdem naturalium proprietatum eſſentialium, firmiter ſibi imaginantes, hæſce proprietates, v. g. contra hydropem, febrem tertianam, quartanam, paſſionem hyſtericam, colicam, dolorem capitis, oculorum, aurium, podagram &c. ſpecificas hiſce medicamentis a Deo eſſe concreatas.

§. XXXI.

Non conſiderantes, quod omnia medicamenta non niſi tanquam corpora naturalia juxta proprietates ſimplicium ſuarum partium conſtitutivarum, diverſimode inter ſe mixtarum, agant & operentur, quicquid præſtant, ſive ut nativa, ſive ut præparata adhibeantur, nam artifex chymicus non niſi corpora naturalia tractat, ut vires efficacioreſ in iſdem deliteſcentes vel per ſeparationem vel per compoſitionem diverſorum ingredientium inter ſe magis concentratas reddat; neutiquam vero iſdem ullas artificiales vires & qualitates medicamentofas concedere poteſt.

§. XXXII.

Hinc jam concluſionis loco colligo, dum ipſa ſcientia de corporibus naturalibus in genere, i. e. phyſica, non legitime ſeu naturæ non convenienter pertractatur, nec phyſiologia ſeu doctrina ſpecialis de corpore humano ſecundum naturam conſtituto,

nec pathologia seu doctrina de statu præternaturali corporis humani, tam quoad morbum, quam causas atque symptomata, nec therapia seu doctrina de indicantibus, indicationibus & indicatis, nec doctrina de materia medica legitima & sufficiens esse poterit, & sic cunctæ regulæ seu leges artis naturæ

humanæ minus congruæ imo ubique fere contrariæ sunt, cum quilibet alterius hypothesein insufficientem reprehendat, unde ægrotus juxta hæc regulas artis modo in antecedentibus monstrato curatus & tractatus moriens necessario & absolute moritur contra sibi inconuenientes & insufficientes regulas artis.



DISSERTATIO

DE

MEDICIS MORBORUM

CAUSA.

Primum edita Anno 1728.

§. I.

NULLA certe disciplina vel ars est, cujus applicatio adeo anceps, cujusque exercitium tanto stipatum periculo, quam ea, quæ tuendæ cum sanitate vitæ præest & circa morbosas affectiones, tam præcavendas, quam sanandas, occupata est. Hac, si recte colitur & agitur, uti præstantius & optabilius nihil; ita vicissim eadem nihil perniciosius, quando a temerariis & imperitis tractatur. Dolendum hinc magnopere est, quod tam pauci sint, qui divinam hanc artem recte calleant, innumeri vero idiotæ & solidæ scientiæ plane expertes, qui turpis lucri & quæstus causa, audaci & frivolo ausu ipso opere eam profitentur, de quo jam pridem HIPPOCRATES, *Libro de arte*, conquestus est, multos esse Medicos fama ac nomine, re & opere paucos.

§. II.

Quod vero magis mirandum, ars hæc adeo ardua atque difficilis, vulgo tamen tam obvia & exercitu facilis esse creditur, ut nemo non eidem manum admoveere audeat & non tantum simplices & plebei, verum prudentes alias etiam & splendido loco nati, cuilibet morborum artificem sese venditanti, fidem habeant & quod omnium bonorum præstantissimum, vitam, imprudenter in aleam dent. Invehit, & quidem merito, in perditum hunc morem ipse PLINIUS, *lib. XXIX. cap. I. in hac artium* inquiens *sola evenit, ut cuicumque Medicum se profuenti statim credatur, cum sit periculum in nullo mendacio majus*. Et paucis interjectis, hanc subiungit rationem: *nulla lex est, quæ puniat inscitiam capitale, nullum exemplum vindictæ. Discunt periculis nostris & experimenta per mortes agunt, Medicoque tantum hominem occidisse impunitas summa est*.

§. III.

Causa vero & origo communis & fere epidemici hujus valde detestabilis mali, certe nulla alia, quam quod homines ad unum fere omnes, nullum verum conceptum de arte sanandi ipsisque medica-

mentis habeant. Perverfa enim & quasi innata hæc omnium animis hæret opinio, quod medicamenta prostant, quæ morbum quendam certo semper & absolute curent; unde, quando semel, vel iterum felix a sumto remedio in certo morbo effectus sequutus fuit, protinus soli pharmaco adscribunt efficaciam, perpetuam postea in tali morbo semper futuram, cum tamen alio tempore in simili morbo idem datum medicamentum, vel exiguum utilitatem, vel prorsus damnum, afferat. Enimvero sanare morbum, nil aliud est, quam ejus causas tollere, quæ, quum sint in eodem morbi genere plures & plane differentis indolis, immo pro diversitate corporum & naturarum, alia atque alia inferant symptomata, paucissimi etiam has morborum causas recte cognoscere & intelligere possint; evenit utique, ut sapissime frustra, vel plane cum detrimento, causis his morbum inducentibus vincendis remedium opponatur.

§. IV.

Mirum profecto est, quam varias, immo plane alias, pro differente natura corporum, quæ ratione ætatis, temperamenti, structuræ partium, locorum, victus, etiam ipsius animi habitus, varia est, idem medicamentum datum efficiat operationes. Porrigat exempli causa quispiam decem ejusdem etiam ætatis pueris, idem laxans, ad præservandos, uti vernali hoc tempore moris est, morbos, in singulis alium & admodum differentem observabit effectum, unum valide purgabit & sex vel septem sedes movebit; alii tormina creabit in ventre cum exiguo sæcum secessu; tertius nauseam & vomitum experietur & alvus simul solvetur; in aliis cito, in aliis tardius, in nonnullis nullam plane edet efficaciam. Id quod tamen non tantum valet de laxantibus, verum etiam aliis remediorum generibus, diureticis, sudoriferis, anodynis aliisque. Neutiquam igitur medicamentis absolutæ quædam insunt vires & virtutes ad salubritatem, vel insalubritatem, nihilque in se & sua natura salutare, vel noxium dici potest, nisi relatione facta ad ipsam naturam corporis vita & sensu præditi, sed quod uni est venenum, alteri sæpe cedit in salutem & medicinam, & vice

& vice versa. Ingens præterea individuorum, eodem licet morbo laborantium, varietas, diversam in quovis poscit medendi rationem, quam cuivis accommodam & invenire, & instituere, summi certe res est iudicii.

§. V.

Hæc jam qui novit & curatius secum pensitat, is profecto non tam facilem, sed plane difficilem, imo multis periculis expositam, hanc artem in imperitis, certissime ultro iudicabit, neque tam facile illis assensum ac fidem præbebit, qui speciosas laudes & grandia encomia de hoc vel illo medicamento, seu arcano, in sanandis morbis impudenter non minus, quam insipide jactitant, etiam si, vel miracula eodem sese præstitisse asseverent. Ita quidem stolidè gloriari & de humano ludere corio imperitum Medicorum vulgus, quod vera rationalis medicæ scientiæ requisita ignorat & ad iudicandum de morborum causis & remedium effectibus plane est ineptum, non adeo mirandum, sed id utique censura dignum, quod inter Medicos etiam hodiernum plurimi dentur docti atque in reliquis partibus medicinæ, physica, anatomica, physiologica, botanica & materiæ medicæ scientia probe instructi, qui tamen veræ therapiæ fundamenta non recte perspecta tenent, eoque inducuntur, ut specifica contra morbos arcana credant, ac vel iis conquirendis avidè inhient, vel ipsi gloriose talia jactitent, parum ceterum solliciti de morbi causa & corporis ægrotantis natura, de modo agendi & quo pacto morborum causæ oppugnandæ & removendæ. Deterioris adhuc conditionis his sunt illi sic dicti medicinæ Practici, a rationalibus & veris Medicis longe distincti, qui ipsi consilii & iudicii inopes, ex libris & manuscriptis practici tantum sapiunt, vel collecta formularum sarcina opulenti ad artis exercitium accedunt, oblato postea ægrotante primum ex supellectili promunt remedium, hoc irritum alterum, post alterum tertium, eo usque, donec æger vel forte fortuna convalescat, vel medicationis sterilis pertæsus peritorem in consilium asciscat, vel etiam interea methodice trucidetur.

§. VI.

Hac utique crebra medicamentorum mutatione ad salutem nihil pestilentius, ad crumenas ægrotantium emulgendas nihil commodius, hæc apertius prodit ignorantiam veræ pathologiæ, & luculento indicio est, latere non modo ejusmodi Practicum veras morborum causas, quæ in uno subiecto non tam sunt multiplices, sed & fugere ipsum efficaciam ac veras vires remedium, quibus morborum causæ corrigendæ & tollendæ. Interim quia ægrotantes, tam qui plebeia, quam qui nobilioris sortis sunt, rationalem & peritum Medicum, ab imperito & uti modo delineavimus Practico, discernere nequeunt, pessime sæpe de ipsorum luditur corio ipsique graves subinde hujus adeo frequentis inter medicinam exercentes ignorantia pœnas luere debent; si vero demum evadunt ejusmodi medicationem, verum esse HIPPOCRATIS effatum deprehendunt lib. de vet. medic. perhibentis: ut aliarum artium cunctarum opifices plurimum inter se differunt; sic etiam in medica evenit arte. Nam inter Medicos sunt alii mali, alii vero multum præstantes.

§. VII.

Sed mittemus jam quotidiana illa & cuivis obvia damna, quæ ab idiotarum, agyrtarum, circulatorum ac ejusmodi impostorum putidis mendaciis & temerariis moliminibus, morbos augendo, exacerbando ipsamque mortem accersendo, inferuntur; ac

Frid. Hoffmanni Oper. Supplem. II.

potius id inpræsentiarum agemus, ut clare evictum demus, ipsos Medicos, nomine & fama sæpe claros, multum subinde in artis exercitio delinquere, tanto vero magis a Practicis imperitiis morbos graviores reddi mortemque induci, quando in perspicienda vera morbi & symptomatum causa errant & veras quoque remedium vires & efficaciam ad vincendam morbi causam ignorant. Et sic demum omnibus quam clarissime patebit, medicam praxin, rem non tam facilem & expeditam esse, uti vulgo putatur, sed præter multarum ipsi servientium rerum scientiam, exquisitum iudicium magnamque postulare peritiam, quorum omnium ea amplitudo isque ambitus, ut Medico per omnem ætatis flexum sint excolenda, semperque aliquid, quod in usum suum convertere possit, supersit. Hoc igitur erit dissertationis hujus argumentum, penitus a nobis evolvendum; quod ut feliciter cedat, divinamque annuat labori clementiam, supplices devote rogamus.

§. VIII.

Novimus quidem, Dn. PRÆSIDEM passim jam in scriptis suis idem hoc argumentum attigisse, & maxime quidem binis dissertationibus, de differentia Medici & Medicinæ Practici, nec non de imprudenti medicatione multorum morborum causa, & rationibus, & exemplis, uberius hæc exposuisse. Interim tamen, quia nunquam satis dicitur, quod nunquam satis dicitur, & damna hæc bonum omnium præstantissimum, vitam hominis, attingunt, ac plerumque irreparabilia sunt; necessarium utique est, ut serio iisdem occurratur ac iterato imminens periculum inculcetur. Deinceps quum Medicina non tantum salubrium, verum etiam insalubrium & nocentium sit scientia; eo minus a medico scopo aliena hæc erit disquisitio, quo frequentior a perversa medicatione noxa & quo magis ad auspiciatum artis exercitium confert, ut alieno periculo sapiamus PLAUTIQUE effato triv. Act. I. scen. 2. mala nota res optimas habeamus. Recensebimus hinc iterum ex multis novas quasdam notatu dignas observationes, de agris ab ipsis medentibus gravi damno, quin morte affectis, simulque causas eruemus, propter quas pernicies inducta, ne impofterum in eodem quispiam impingat.

§. IX.

Initium faciemus de insigni noxa, quæ ex inconsulto & præpostero eorum usu, quæ ventriculum utrumque, tam majorem, quam minorem, quo nomine duodenum insignimus, vitiosorum humorum illuvie deplent atque exinaniunt, præsertim si fuerint prosapiæ antimonialis, resultant. Hanc per superiora evacuationem non sine inverso, tam stomachi, quam duodeni peristaltico motu, & convulsiva quadam harum partium contractione fieri posse, inter omnes constat, quod si vero paullo pensiculus causas, quæ eandem provocant, inquirere lubet, varii eas generis esse inveniemus. Vel enim a mole, seu saburra humorum vitiosorum, præsertim acido, viscidorum, in his latibulis hærentium, vel a subtili acrimonia humoris caustica tunicis ventriculi inhaerente, vel etiam a solo vitioso motu partium nervosarum, ventriculi & duodeni nervoso - musculosa systole & diastole gaudens machina ad inversionem, contenta cum violentia expellentem, exstimulatur. Jam facile quisque ex sagacioribus Medicis perspiciet, si causam nauseæ & conatus ad vomendum humores mole & vitio peccantes præbent, salutarem quam maxime esse horum per vomitum excretionem, quam, si natura paulo languidior est, sublevare utique & adjuvare per idoneum emeticum oportet. Contra vero quando dispositio ad motum harum partium inversum & moli-

men vomitorium ab exigua quidem, sed causticæ & virulentæ indolis materia, eaque intra tunicas ventriculi hærente, vel a solo animi perverso motu, vel a consensu partium nervosarum ex spasmo evenit, plane nullum locum habere, sed potius perniciosissima esse, quæ penetranti & valentiori stimulo, ut sibiata solent, ventriculum & totum systema nervosarum partium graviter afficiunt atque exagitant, ut tristissima etiam mortis exempla inde in promptu habeamus.

§. X.

Licebit proinde ex multis quædam tantummodo memoratu digna exempla enumerare, quæ aliis, quam maxime in meliorem cautionem, cum deliberatione & prudentia exhibendi emetica inservire poterunt. Vir circiter quinquagenarius sanus & integer viribus, gravissima correptus ira, ac tremore, horrore & frigore extremorum, cum ingenti præcordiorum anxietate viriumque dejectione mox tentabatur & sequentem noctem insomnem, persistentibus adhuc hisce symptomatibus, transigebat, continuam percipiebat nauseam & ad vomendum dispositionem atque conatum, una cum labiorum tremore & oris amaritie. His symptomatibus jactatus importune flagitabat a Medico vomitorium, qui dare illud primum renuebat, victus tamen continuis precibus, porrigebat, sed quia sumto pharmaco cum summa difficultate & anxietate bis, vel ter tantum, pauca mucosa & biliosa vomebat, ad meliorem operationem efficiendam, aliam poscebat dosin, quæ ipsi etiam concessa. Hinc non ita multo post in deterius versa omnia, aderant quidem continui singultuosi ructus, sed nullæ rejectiones humoris, affligebat præterea summa inquietudo, oppressio, spiritus gravis, intolerabilis, ardens & anxius dolor in epigastrio, una cum extremorum refrigeratione, pulsu parvo & nonnihil intermittente. Petitum demum a Dn. PRÆSIDE auxilium, qui accedens, ægrum extrema fere agentem invenit, eo quod vehementia spasmodorum omnes fere corporis nervosas sensui & motui vacantes partes occuparat. Et quum hic secum perpenderet, a sumto veneno arsenicali eadem suborta symptomata, largiori potu lactis & olei cujusdam expressi, v. g. amygdalini, felicissime sæpe sublata & hominem ex mortis faucibus ereptum, pariter lac bubulum temperate calidum successive, at copiose, ebibendum suavit. Inde insigniter quidem atrocitas hæc symptomata conquiescere & remittere per noctem videbantur, sed subsequenti mane ipse patiens, sine Medici præscitu, unciam unam salis Ebshamensis ad aperiendam quæ firmiter clausa alvum, flatusque & anxietates tollendas sumsit, quo priora symptomata & majori adhuc atrocitas reversa, ut assumtis licet analeptis, antispasmodicis, animam, intra tertium a sumto primo emetico diem, efflaverit.

§. XI.

Est certe allata hæc historia vel hanc ob causam memoratu digna, ut quisque Medicorum inde discat, innocens alias emeticum sibiatum, moderatiori dosi, uti tartarus emeticus, ad grana duo datum, pro certa dispositione spasmodica, nempe ventriculi & partium nervosarum, veri veneni vim habere & lethalem effectum exferere posse. Qua de causa quisque circumspectior Medicus, non tam facilis ad dandum emeticum esse debet, nisi prius probe corporis ægrantis natura, ventriculi dispositione & causa urgente ejusmodi remedium, perspecta. Deinceps illa quoque utilissima cautio ex funesto hoc casu elicienda: salia neutra eaque amaricantia, ut sal Egranum, Ebshamense, Sedlicense, ad deducendos efficaciter & sine

molestia per alvum vitiosos humores egregia, tali in casu, ubi primæ viæ spasticis stricturis tenentur, neutiquam posse habere locum, adeo ut præsentissimam etiam hoc modo & hac ratione possint noxam inferre.

§. XII.

De eodem hoc incongruo & lethali emeticorum usu, ob Medici errorem, falso causam morbi dijudicantis, digna notatu hæc est historia, quo inde Medici in inquirendis causis circumspectiores esse discant. Generosa erat puella, annos habens quindecim, tenerioris admodum ratione corporis constitutionis, sedati etiam valde & compositi animi, quæ nondum passa mensium profluvium, per aliquot hebdomades male habuerat & ingenti pressa fuerat languore, qui vires dejecerat, ad animi fere usque defectionem, una cum anxio quodam circa præcordia sensu, quem Germani dicunt, *das Uebelsenn*; deecerat præterea ciborum appetentia & paucis sumto cibo, non tantum compressionem, sive pressorium dolorem in epigastrii regione senserat, verum etiam eructationem nauseosam & vomibundam, urgente simul tussi sicca, alvo clausa & paucis somno. Medicus consultus firmiter sibi persuadebat, contradicente licet matre, causam horum malorum esse pituitam tenacem, copiose ventriculo inhærescentem, quæ vomitu sit ejicienda, eamque excretionem ac viam quoque ipsam commonstrare naturam. Annuit tandem mater assumtumque emeticum, nescio quod, quo puella ingentem pituitæ viscidæ copiam multumque liquaminis pituitosi quidem ejecit, sed tantum ab eo virium sensit decrementum, ut quum erecta in statura esset, mox animo linqueretur, respuit simul omnem medicinam & cibum, eo quod anxius dolor inde augeretur, & tertio a sumto pharmaco die placide expiravit.

§. XIII.

Medicus in hoc casu ad menses, qui sub hac ætatis periodo erumpere solent, neutiquam respexit, & quod a sanguine per uteri osiola liberum exitum non inveniende, sed refluyente ad superiora, præsertim ventriculum, illa symptomata, quibuscum conflictata fuit virgo, originem suam traxerint. Hoc enim si incidit, emetica omni modo evitare expedit, ne impetuosiori concitato sanguinis ad venas stomachi affluxu, vel ipsæ ruptæ cruentum cieant vomitum, vel sanguis, præsertim impurus, ibi incarcerationis, lethalem sphacelum producat, maxime in tenerioribus, delicatis & sensibilibus naturis. Vidimus quidem, emetica purgantibus in pilulari forma admixta, in habitioribus & plebeiis, ubi menses retardati fuerunt, non sine fructu data, sed tamen ubi nondum fluxerunt, vel per uteri vias exitum inveniunt, aliter longe procedendum & hæc medendi ratio neutiquam locum invenit.

§. XIV.

Pari ratione periculosum est, vomitorium propinare medicinam, quando ventriculus citra materiam ibi inhærentem peccantem, solo motu per consensum & actu quodam, quasi immateriali, ad fastidium & vomendum laceffit. Meminit Dn. PRÆSES femina, quæ post annum quinquagesimum, quo ordinario mensium finis esse solet, propter congestionem sanguinis circa venas & vasa majora in lumbis, & ob urinam secedentem sabulosam, quæ exquisite sentientem ureterum substantiam arrodere & irritare solet, dolores pressorios in ventriculi regione usque ad dorsum pertingentes, cum nausea & stimulo

mulo ad vomitum subinde, præsertim noctu, patiebatur, sanguine nimium a situ in dorso incalescente. Medicus hujus symptomatis causam esse censebat cruditates in stomacho & suadebat mixturam, quæ grana duo tartari emetici habebat, quæ quidem vomuit multa cruda & pituitosa, ab eo vero tempore id consequutum est, ut gravissimi cardialgici dolores, siue vehementes spasmi præcordialem regionem per intervalla & sæpius tenuerint, quotiescunque vel dolor circa renes suscitaretur & sabulosa urina secederet, vel cibus difficilioris solutionis, aut flatulentus assumeretur, vel femina leviter ita commoveretur. Nam mira est consensus renum, seu potius ureterum, cum ipso stomacho, propter communem, valde nervosam harum partium texturam; quo etiam fit, ut, quod quotidianæ observationis, a calculo firmitus & diutius ureteri impacto, nulla cibi sit appetentia, sed continua nausea, ructatio & ad vomendum dispositio, cum summa molestia.

§. XV.

Neque minus crebriori experientiæ suffragio constat, quod ubi genus nervosum in quadam parte, etiam remota, in morbis patitur, ventriculus non modo inde afficiatur, sed & ipsa emetica & purgantia illum plus debilitent ejusque functionem lædant; id quod etiam sequens historia uberius confirmat. Novimus feminam septuaginta annorum, quæ post refrigeratum nimis tempore hiemali corpus, in vertiginem incidebat, quam brevi post insultus sequebatur apoplecticus, convulsivis colli motibus stipatus. Venæsectione in pede & antapoplecticis refocillata, conatum experiebatur ad vomitum, & assumpto calido juscule, multum etiam pituitæ viscidæ eructavit. Medicus igitur causam hujus insultus in ventriculo delitescere ratus, ad hanc novique paroxysmi recursum præscindendum, postquam ægra noctu bene dormiisset, sequenti mane porrexit emeticum, ex granis XX. radices hypecacuanhæ & grano uno tartari emetici, quo tres provocati vomitus cum maximis cruciatibus & angustis, paullo vero post novus accessit insultus apoplecticus, cum intumescencia & magno circa oculum tumore, difficillima respiratione & stertore, donec post duodecim horas ægra animam efflaret, effluente post mortem ex naribus, auribus & oculis ingenti feri putridi copia. Perperam oblatum esse huic apoplexia tactæ vomitorium merito judicandum; quandoquidem in ventriculo nec vomitus, nec apoplexiæ fuit causa, sed is potius fuit symptomaticus. Notum enim est, in omnibus capitis & nervorum, etiam a causa externa, morbis, stomachum in consensum trahi & ad vomendum adesse inclinationem, eaque propter sistendos potius esse hos spasmos, quam promovendos & intendendos. Compertum quoque ex pathologicis est, apoplecticum insultum a sanguinis & humorum congestione ad caput, ob spasmos inferiorum partium oboriri, quumque hæc congestio sub vomitu augeatur, patet utique, novo insultui per emeticum ansam fuisse suppeditatam.

§. XVI.

Porro securus quidem emeticorum usus est in febribus, si prima regio sordium sentina scatet ac remissionis tempore evacuatio instituitur; sed quando sub ipso paroxysmi cum frigore accessu, quo ventriculus & partes nervosæ spasmo afficiuntur propinquantur & corpus præterea commotum ira, quam semper spastica circa ventriculum comitantur stricturæ & qua totum nervorum systema præter naturam afficitur, veneni naturam & virtutem induunt. Confir-

matum id habemus memorabili exemplo feminæ viginti & quod excurrit annorum, ad iram admodum pronæ. Hæc quippe iracundiæ affectu percita, refrigerato simul corpore cibisque pravæ materiæ ingestis, incidit in tertianam, gravibus symptomatibus, horrore, rigore, stimulo ad tussim ac vomitum, nec non anxietate stipatam. Instante tertio paroxysmo, paullo ante ipsius accessionem, à Chirurgo tria tartari emetici sumisit grana, sed adeo exasperata inde symptomata, cum extremorum frigore, horrore, rigore, vomitu alvique dejectione, ut lethalem adesse catastrophem putarent omnes, subsequente tamen æstu, atrociam remisit sensimque conquievit febris impetus. Interim remansit virium prostratio insignis, & redeunte nova accessione, eadem symptomata eadem reversa sunt vehementia, licet nullam plane interea assumserit medicinam, & plus quam decies vomuit totiesque etiam alvus secessit. Repetente æstu, iterum remiserunt symptomata, sed magis quam antea languit nihilque cibi vacuo die assumere potuit ægra, ac insultante vehementiori adhuc quam antea unquam paroxysmo, ob virium defectionem in lipothymiam incidit, cum sudore frigido, pulsu parvo & inæquali perpetuoque ad vomendum conatu, mens quoque emota ac demum mors successit, halitu ex ore reddito frigidissimo. Licet igitur ea motuum spasticorum sit ratio, ut ab impetu ad tempus remittant ac postea iterum repetant; sumto tamen in paroxysmo emetico & introducto per illud pejore in nervorum & nervosarum partium systema ad spasmos dispositione, non mirandum, insigniter increvisse motuum febrilium vehementiam & junctas febrium insultui vomitiones & alvi dejectiones adeo fuisse adauctas.

§. XVII.

Luculenta porro de noxa emeticorum præpostere datorum hæc est observatio. Generosa quædam femina sexaginta & quod excessit annorum, sanguinea, ob diuturnum mariti morbum ipsiusque obitum gravi & longo afflictæ fuit mœrore & ab aliquot hebdomadibus multum conquesta de summo languore virium, de tensivo circa hypochondrium sinistrum dolore, nec non de ardore sub cordis scrobiculo. Alvus simul erat valde adstricta, noctes insomnes, appetentia dejecta, omnia cum nausea & fastidio ingererat, neque propter impensam debilitatem lectum relinquere poterat per integrum mensem. Secta fuerat vena in pede, data analeptica temperata, quia calida ferre non poterat, alvus per clysteres aperta, liquor anodynus & pulveres temperantes nitrosi propinati, sed eo usque incassum. Visitabat autem interea ægram alius quispiam Medicus, qui primum Medicum malum non intelligere & ventriculum saburra vitiosa obsessum penitus esse asseruit, simulque se brevi tempore ægram sanaturum esse confidenter pollicitus est. Obtulit hinc postera die pharmacum, quo sumto mox ejecit miram cruoris nigri quantitatem, ita ut sex vomitibus plusquam sex libræ eructarentur, videbatur etiam ægra a vomitu melius se habere, sed mox in tam grave animi incidit deliquium, ut paucis post horis obdormisceret. Femina hæc, omni dubio procul cachectica, viscera, præsertim lienem, hepar, sanguine infarcta habuit, vasaque ventriculi cruore turgida. Id enim post impensiolem luctum ac diuturnum mœrorem sæpe evenire solet in feminis maxime debilibus & ætate gravibus, ut lenta gliscere videatur febris & quasi hectica, cum dolore circa hypochondrium sinistrum, languore & inappetentia. Licet igitur hæc femina ab interitu vindicari non potuisset, Medicus tamen mortem ex errore acceleravit, quia mali causam in ventriculo hæere judicans,

dicans, vomitus elicuit, quibus vasa stomachi breviter rupta & cruor tam copiosus per os egestus, cum lethali lipothymia.

§. XVIII.

De cruenta vomitione quoniam jam facta est mentio: incidit in memoriam observatione non indignus casus, de femina idemtidem generosa, vix XXII. ætatis annum egressa, tenerioris & sensibilibioris constitutionis, a matre hysterica prognata & ipsa hysterici passionibus obnoxia alvique adstrictioris. Laborarat hæc duobus abhinc annis tertiana, quæ a Medico, quibus nescio, abacta fuerat quidem, sed languebat ex eo ciborum appetentia, ægra male semper habuerat mensesque per tres menses restitabant. Primus in consilium vocatus Medicus gravidam ipsam esse judicabat, quod tamen plane ipsa negabat; alter vero extraneus Medicus ad menses emovendos misit elixirum quoddam aloeticum, succinatum, amarum, cum oleo sabinae mixtum, quod ter quotidie ad gtt. XXX. sumsit, a quo tamen aucta circa præcordia anxietas & ardor cum virium languore. Accersitur hinc Dn. PRÆSES, ædesque intrans obvium habuit in hypocausti limine maritum, phialam argenteam liquamine instar loturæ carnis, innatantibus atris grumis, repletam, quod vomitu rejecerat ægra, manu gerentem, & lecto postea affidens, iterato ægram majorem grumosi & corrupti cruoris quantitatem eructare vidit, donec accedentibus lipothymiis pulsique facto inæquali, viginti quatuor post horas, mors vitæ faceret finem. Scilicet sæpe accidit, ut post febrem, præsertim male curatam, mensium subsistat fluxus, & regurgitante ab utero ad ventriculum, lienem & hepar sanguine, ejusmodi quam quæ meminimus ingruant pathemata. Sed hoc ubi contingit, perniciosum maxime est emmenagoga calida offerre, eo quod sanguinem exagitant eidemque orgasmum & turgescientiam inducunt, qua facile ventriculi venæ demum rumpuntur.

§. XIX.

Præter emetica in heroicorum numero quoque est venæsectio, cujus imprudentem administrationem, pariter multum detrimenti attulisse, compertum habemus. Vir erat triginta & aliquot annorum, constitutionis admodum teneræ, hypochondriacis symptomatibus a prima juventute obnoxius, maximeque ventriculi inflationibus cardialgicis & asthmaticis divexatus. Hic tempore hiemali, post intensiorem corporis refrigerationem, pessime se habuit summoque affectus est languore, & subito quodam ita afflictus dolore, ut per tres fere hebdomades somno plane caruerit, appetentia simul pereunte & corpore contabescente. Medicus currente Martio mense, quo ægro antea sanguinis missio semper solennis fuerat, eandem iterum suavitatem & aliquot uncias extraxit, sed longe alio quam sperarat effectu, ægro scilicet altero statim die post placide expirante. Ex funesto hoc eventu nemo non videt, summe perniciosam esse sanguinis missionem, ubi vires penitus ob inopiam succorum & sanguinis exhaustæ, in causario jam & debilitato corpore, & tum potius analeptica, diætetica & pharmaceutica, vires & succos roscidos restaurantia, ex usu esse. Et quamvis æger hic in Martio sanguinem mittere sœtus, perperam tamen Medicus tempori adstrictum esse hoc auxilium judicavit, eo quod venæ sectio non propter tempus juvat, sed quia circa hoc sanguis, calidiori aëre facto, majus spatium affectat seseque expandit, ac venis eodem nimium oppletis periculum minatur.

§. XX.

Idem fere contigit viro macilentæ & cholericæ constitutionis, qui ex hæreditaria quadam & nativa dispositione pulmonum aluit vitium ac præterea ob nimias lucubrationes vitamque nimis sedentariam variasque animi ex ira commotiones, corporis & stomachi sibi contraxit imbecillitatem. Hic ab aliquot jam annis magnam pituitæ viscidæ copiam sœreatu ejecerat, hæcque ejectio mirum demum copia increvit & per duos fere menses cum lenta febre, spirandi difficultate viriumque jactura, nec non exquisito sub urinæ emissionem ardore, duravit. Tum quidem æger emulsionibus, jusculis medicatis & decoctis demulcentibus, interpositis clementer alvum laxantibus, cum sanitate in gratiam rediit; exacto vero circiter anno, eidem malo denuo implicatus est. Alium igitur in consilium adscivit Medicum, qui licet semper adfuisset anxiosa respiratio, tussim tamen non phthisicam, sed ex stomacho æstuante & hypochondriacum symptoma esse judicavit, putavitque, cessatura omnia, si tempestivus prodiret hæmorrhoidum fluxus. Variis denique incassum adhibitis, de vena secanda consilium dedit, floridumque e pede extraxit sanguinem. Sed eodem adhuc die, vespere ægrum horror per universum corpus incessit, subsequente intenso æstu, nocte insomni, virium jactura gravi & perfecta accessit hæctica.

§. XXI.

Eadem ratione quam in priori casu factum, Medicum alium in pernoscenda vera causa morbi aberrare vidimus in generoso quodam viro, quinquagenario majore. Solenne huic erat, ut vernali & autumnali tempore podagræ experiretur insultum, cum febre catarrhali, appetentiæ defectu, torminibus ventris, doloribusque dorsii accedentem, ita ut his tres vel quatuor dies affligentibus, dolor postea & tumor in majoribus utriusque pedis digitis prodiret. Licet autem nunquam hæmorrhoidum fluxum habuisset, Medicus tamen hypothese addictus, quasi omnis podagra a defectu hæmorrhoidum ortum traheret, autumnali tempore, quo podagra impetere solebat, paulo ante sœtam periodum, venæsectionem instituit, sed paucos post dies atrocia tormina & dolores pressorii in latere sinistro, cum appetitu prostrato invaserunt accessitque febricula circa tertium diem auctior facta. Erant qui morbum colicam esse asseverabant, sed a carminativis internis & externis exacerbabatur; alii febrem vocabant; Dn. PRÆSES vero quum dolores subito sæpe in digitum pedis transire exaudiret, subesse materiam arthriticopodagricam intus retentam judicavit, quæ symptomata suscitet, febrem autem catarrhali similem, a refrigeratione corporis post venæsectionem, ortum ducere. Suavitatem hinc liquorum anodynum minorem essentia scordii nuptum, cum aliquot granis extracti croci & guttis aliquot olei sceniculi, exhibuit quoque pulverem bezoardico-nitrosam, cum infuso theiformi ex veronica, scordio & liquiritia, quietem & decubitus in lecto injunxit ægro ac ut pediluviiis uteretur. Ita demum comparuerunt dolores in pedibus & per aliquot hebdomades persistebant, cessantibus penitus internis passionibus. Primus Medicus ulterius quidem urgebat, adhuc ob hæmorrhoidale negotium venam esse secandam, sed æger damno sapiens constanter renuit, & recte quidem, quum ipse non esset plethoricus, sed ad cachecticum magis affectum inclinaret, neque dubium est, quin si iterata sanguinis missione naturæ subtracta fuisset energia materiam nervis inimicam internis partibus altius infixam ad exteriora pellendi, infelix subsequuturus fuisset eventus.

§. XXII.

§. XXII.

Multa certe nobis nota sunt exempla, ubi instante podagrico morbo, abortis torminibus in ventre & spastico dorsi dolore, affectus, praesertim in plethorico corpore, pro sanguinea, sive haemorrhoidali colica fuit habitus, & ad provocandum fluxum iterato venæsectio administrata, oblata carminativa & pilulae balsamicae polychrestae; quibus tamen nihil aliud effectum, quam ut dolores tensivi in abdomine, inflationes & anxietates mirum adauctae, propinatis vero diaphoreticis fixioribus & mineralis prosapiæ, mox conquieverunt omnia, simulac rubor ac tumor in extremis pedum prodiit. Sæpius tamen ejusmodi intus latitans arthritica acris materia medentibus imponit, ut omnia alia subesse putent, ac, ut subinde vidimus, oborto hinc asthma convulsivo, tumore pedum oedematoso abdominisque inflatione stipato, hydropem præscindere velint & fortiora purgantia, ex gummi guttae, extracto esulae aliisque offerant, invalescente inde malo, tumore crescente, anxietate adaucta, inquietudine, inappetentia, quin morte subsequente, quum alii, asthma ex hac causa laborantes, potu thermarum Carolinarum tempestivo, facile convalescant, propulsa ad extrema ab interioribus perniciofa materia.

§. XXIII.

Ita vero est, ex speciali observatione, universalem formant inductionem plurimi medentum, alii ex sola plethora, alii ex sola scorbutica succorum dyscrasia, morborum originis petunt, quum tamen plures sint morborum causae, de quibus singulis, obveniente uno morbo, Medico cogitandum, quo accommodam inveniat & instituat medendi rationem. Qui secus procedit, non potest non falli & errare, uti quidem hæc etiam testatur observatio. Degit in vicina urbe generosus quidam vir, ætate quadragenarius, floridæ faciei, aulicæ vitæ addictus & lautiori victui ac vini generosioris potui assuetus. Is currente autumno, in vehementem in regione lumbari dolorem, qui ad coxas & genua porrigebatur, noctuque maxime ingravescens, somnum impediabat atque quietem. Implorabat opem Medici, qui affectum esse arthritico-scorbuticum & originem ex acri & scorbutica humorum dyscrasia trahere fategit, decocta antiscorbutica & sanguinem repurgantia ex radicibus & lignis ad sudorem mane eliciendum porrexit, pilulisque ex mercurio dulci, resina jalappæ, gummi ammoniaco extractoque panchymagogo Crollii, viscidos & tenaces humores per alvum exturbare contendit. Sed tantum absuit, ut quicquam levaminis attulerit, ut potius dolores perseverarint in affecta non modo parte, sed & caput, collum manuumque articulos adhuc infestarint, cum notabili virium decremento. Alius itaque morbi artifex advocatus, qui curam per inedia, (*die Hunger-Cur*) ceu probatissimum præsidium in scorbuticis & arthriticis ejusmodi affectionibus, mire commendavit; tertius vero accitus, hanc improbavit, & thermarum Teplicensium usum unice proficuum fore edixit. Demum ad Dn. PRÆSIDEM res delata, qui de omnibus certior factus, judicavit, mali, quod jam per aliquot menses ægrum misere torserat, causam, neque in humorum tenacitate, neque scorbutica quadam acrimonia, esse quærendam, sed potius in abundantia sanguinis, ejusdemque non modo stagnatione, in vasis mesaraicis, sed & lentiori circuitu per iliaca, ac secedente ob moram hanc serosa parte atque ad articulationes, ossis coxendicis descendente, fieri. Jussit igitur, ut, quam priores Medici neglexerant, venæ-

sectio in pede, adornaretur, qua depletis canalibus per ilia excurrentibus, dolor in parte affecta ipsoque capite remisit ægerque insequenti nocte melius dormivit. Ex medicamentis vero usurpata mixtura ex aqua florum sambuci, rob sambuci, antimonio diaphoretico & nitro, cum liquore anodyno minerali, nec non pulvis bezoardicus, sulphure antimonii correcto maritatus & potui data ptisana. Et quum pulsus validus ac venæ tumidae essent, sanguinem exundare adhuc conjecit, eaque propter iteratam venæ sectionem tam salutari effectui instituit, ut æger pristinam intra mensem perfecte reciperet sanitatem.

§. XXIV.

Eandem in rem apprime facit hic casus. Laborabat ante annum illustrissimus Comes impenis abdominis cruciatibus, qui ad vesicam & genitalia propagabantur, ac non modo lumbos, sed & ilia infestabant, aderat continuus ad mingendum stimulus, urina vero difficulter reddebatur, interdum tenuis, interdum rufa, quandoque sabulum ponens. Pugnabat contra hæc pathemata Medicus ordinarius carminativis & discutientibus, nec non diureticis ad calculum cum urina pellendum, sed invalescebant inde magis symptomata. Quum vero Dn. PRÆSES in consilium vocaretur, omissam ab Ordinario venæsectionem cumprimis necessariam esse edixit eamque in pede instituendam curavit, tam præsentaneo salutari effectui, ut illico æger notabile continui doloris perciperet levamentum. Adhibita præterea essentia corticum aurantiorum, liquori anodyno nupta, nec non pulvis præcipitans nitrosus, ac demum Carolinis internis & Teplicensibus exterius usurpatis, disparuit omnis dolor, nec postea rediit.

§. XXV.

Patet igitur plethoricum statum, praesertim in spongioso corpore, sub lauto & vinoso victu, circa ætatem virilem, insignem morbos eosque graves inferendi vim habere, nisi tempestive, vel per sanguinis missionem, vel per abstinentiam, aut aquarum mineralium usum, Medicus eosdem avertat; vel ipsa natura per salubres superflui sanguinis per sedis venas diminutiones sese levet. Licet autem longæ hinc oriundæ ægritudines potissimum doloribus in intestinis viisque urinariis contineantur; neuiquam tamen, nec nephritici, nec ischiatici, aut colici dolores, semper a sanguinis mole exundante, sed sæpius a sero impuro tartareo, vel scorbutica humorum impuritate, incunabula trahunt. Hinc perperam Medici horum affectuum curationes moliuntur per repetitas venarum in pedibus sectiones, per crebriorem usum pilularum ex aloë & gummatibus resinosis extractisque amaris, atque adeo frustra haemorrhoidum elicere nituntur fluxum, qui nunquam adfuit, neque per vias minus dispositas exitum habere potest. Vidimus certe gravia & diuturna mala hac medendi ratione inducta, dum intercepta per crebriorem sanguinis missionem sordium per cutis poros excretionem, sanguis impuris scorbuticis salibus conspurcatus, ad partes in pelvi sitas, vesicam & rectum intestinum allectus, intolerandos dolores in regione pubis, cum continuo ad meiendum & desidendum stimulo, urinæ difficili mictu, vel plane retentione, stipatos creavit. Quin occurrunt exempla, hac medendi ratione, inflammationes, exulcerationes & sphacelationes vesicæ & adjacentium partium lethales, fuisse productas.

§. XXVI.

Potissimum dolor ille intestinorum acerbissimus & per intervalla affligens, cum extremorum frigore sum-

summaque virium dejectione, sæpissime exercet scorbuticos, suamque trahit originem a fero acri impuro, quod alias naturæ beneficio ad summam cutim sub forma exanthematis ablegatur, ac purpura dicitur. Quod si enim cuticularis hæc excretio, vel frigore, vel alia causa intercipitur, inquinatus & falsus hic humor ad intestinorum tunicas, nec non vesicæ membranas, admodum nervosæ & sensibilis texturæ, recedit, iisdemque sese insinuans, acutum in abdomine dolorem & enormem simul dysuriam, qua urina difficillime & cum summo ardore ac dolore exprimitur; ingignit. Quam gravia damna sic laborantibus intulerint, qui molimina hæmorrhoidalia subesse rati, unico venæsectionis in pede, hirudinum aliorumque huc facientium usu medicationem aggressi, pluribus quidem confirmatum habemus exemplis, quæ tamen cum circumstantiis enarrare studio prætermittimus. Id tamen in genere asseverare licet, sopitum quidem subtracto sanguine, esse doloris ad tempus sensum, sed brevi post majori recrudescente atrocitate, quin, quum ob crebram sanguinis depletionem, impulsus materiæ perniciosæ ad exteriora magis fuerit cohibitus, in humoribus vero impuritas falsa scorbutica magis adaucta, quandoque funestus plane est subsequutus eventus.

§. XXVII.

Non minus censura digni sunt illi medendum, qui symptomata, neglecta morbi causa, oppugnant, & quando a solo motu per consensum vitiato oboriuntur illa, causam eorundem materialem quærunt falsasque sibi formant medendi indicationes, in cujus confirmationem hanc adjicimus historiam. Femina spongiosioris & sanguine turgidi corporis habitus, superato quinquagesimo ætatis anno subinde media nocte gravem dolorem pressorium ex dorso ad scrobiculum cordis excurrentem, cum summa anxietate, extremorum frigore & languore virium patiebatur; qui post quinque vel sex horas sponte iterum evanescebat, tertia vero, vel quarta quavis nocte iterum repetebat. Quum igitur ob victum lautum, vitam sedentariam ac cessans mensium profluvium, sanguis & humores nimium redundarent, idque si non causam, effectum tamen ipsa causa deteriore præstare posset, e pedis vena sanguinem detrahi iussimus, quo facto, exspiravit hic dolorifico-spasmodicus affectus ac per mensem & quod excurrit siluit, postea vero recrudit & non interrupta serie, non quidem interdiu, sed noctu, afflixit. Stipabatur tamen longe aliis quam antea symptomatibus, continuo scilicet vomendi conatu, eructationibus & dolore, qui in regione lumbari incipiens, omnem abdominis regionem cum torminibus occupabat, aderat quoque ictericus faciei color. Medicus alius causam horum pathematum esse impeditum sanguinis per hepatis infarctum, vel obstructum, cursum, autumans, elixiria & extracta amara, nec non salia aperitiva neutra & alcalia, pilulas etiam Beccherianas frequentius obtulit, sed sæpius inde & sævior rediit affectus, appetentia penitus destructa, color ictericus intensior factus, vires quoque magis fractæ. Demum Dn. PRÆSES non modo in, sed & extra paroxysmum liquoris anodynii usum suasit, cum pulvere præcipitante nitroso, ter intra diem & noctem ex aqua menthæ & ceraforum nigrorum sumendum, quo etiam feliciter evanuerunt dolores cum vomitionibus, & urina prodiit rufa sabulumque crassum cum concrementis calculosis dimisit, disparente sensim flavescente faciei colore, licet postea ægra sæpius iisdem adhuc pathematibus fuerit attentata, quæ tamen urina secedente sabulosa iisdemque remediis semper iterum conquieverunt. Scilicet ventriculi spasmus, sive

dolor cardialgicus, nec non ictericus color, non modo a calculo & obstructione in receptaculis biliaris, sed & a rudiori sabulo, quod in angusto ureterum canali hæret, oboriri possunt. Accessit vero etiam in hac ægra nimia sanguinis congestio ad renes; ejusdemque regurgitatio ad ventriculum & intestina, dolori in lumbis totoque abdomine, nec non vomitioni ansam præbuit, ipseque affectus hanc ob causam merito pro nephritide cardialgica & colica venditari potest. Pro præservatione hujus mali venæsectio cum fructu imperata fuit.

§. XXVIII.

Et profecto mirandum est, adeo nonnunquam incuriosos esse in conquenda morbi historia medentes, ut haud raro ne quidem de mali origine sint solliciti, sed pathemata vix inaudientes, cæco ausu medicationem aggrediantur non modo frustraneam, sed & perniciosam, cujus rei illustre præbuit exemplum, Vir generosissimus XXXVIII. annorum, aulæ Saxonicæ minister, sanguineæ constitutionis. Commotus hic fuerat gravi iracundia, & post hanc sumserat cibum in convivio simulque liberaliter hauserat vinum, ex eo vero pessime habuerat, asthmate nempe convulsivo spasmodico oppressum fuerat pectus, noctu maxime ingravescente somnumque impediens, nil fere appetere potuerat, sed anxio pressus fuerat dolore quotiescumque nonnihil assumerat, hinc corpus contabuerat, facies facta icteritia summaque imbecillitas subsequuta, ut Medici ipsi ægrum pro conclamato habuerint. Demum accessit ad Dn. PRÆSIDEM formularumque medicamentosarum a variis Medicis præscriptarum apparatus, ad octogenarium fere numerum adscendentem, eidem exhibuit, in quo nullum fere medicamenti genus omissum, sed purgantia, laxantia, emetica, salina aperientia, anodyna, carminativa, confortantia, stomachica, comprehensa, omnia tamen incassum usurpata. Et enim omnium, quotquot in consilium asciverat æger, indicationes & consilia, scripto etiam tradita, eo tendebant, ut crederent, hepatis esse obstructum & sanguinis per hoc viscus progressum non recte succedere naturamque moliri hæmorrhoidalem fluxum, ideo promovendum, ut æger ne vestigium de hoc unquam percepisset. Dn. vero PRÆSES expensis curate singulis, in hanc ivit sententiam, ab ira sola subnatum fuisse hunc affectum & ex eo spasmodicas & convulsivas in nervis, qui ad ventriculum excurrunt, esse strictiones itemque in tunis nervosis ductuum biliariorum, nec non in nervis diaphragmatis. Hinc medicationem aggressus est pulvere diaphoretico, nitroso-cinnabarino & liquore anodyno minerali, loco potus ordinarii suasit decoctum demulcens, una cum infuso theiformi ex summitatibus millefolii, floribus chamomillæ, cum semine fœniculi, post aliquod vero tempus datum fuit sal Dn. PRÆSIDIS aperitivum, cum pilulis balsamicis, & sic, adspirante divina gratia, intra mensem, derelictus ab omnibus æger, perfectæ sanitati fuit reditus.

§. XXIX.

Perpatici etiam sunt Medici, qui naturam & causas intermittentium, præsertim earum, quæ ex intertemperata & diuturna aëris constitutione oboriuntur ac populares habent circuitus, recte perpendunt atque pernoscent. Vidimus id elapso anno, quo ob tempestatem per totam æstatem & Septembrem nimis calidam & siccam, invaserunt intermittentes frequentissimæ, tertianæ, quartanæ, quotidianæ, mirum anomalæ & pertinaces, quippe quæ ex simplicibus in duplices, ex quartanis & tertianis in quoti-

tidianas

tidianas degenerarunt, sæpe ac, ut annotavi, vel decies recidivarunt, nonnunquam etiam purpura chronica demum accessit. Causa vero hujus irregularis & refractaria indolis, meo quidem judicio, vix alia esse videtur, quam quod Medici firmiter persisterunt in præjudicio pathologico-therapeutico, febrium causam esse humores tenaces primas vias obstruentes & in visceribus infimi ventris hærentes. Hinc enim factum, ut nonnisi evacuantibus, aperientibus & incidentibus totum curationis negotium conficere annisi sint & datis liberali manu, vel quadragesies salibus neutris & absorbentibus, item pilulis ad imitationem Beccherianarum confectis, alvinam evacuationem provocare voluerint; omissis antispasmodicis & roborantibus, inter quæ utique chaccarillæ & chinæ cortex, crocus martis ignem non expertus, liquor Dn. PRÆSIDIS anodynus mineralis, nec non extractum & pulvis florum chamomillæ, primas tenent; utpotè quæ sanguinis motum ad corporis ambitum dirigunt & perspirationem, qua ad febres sanandas nihil salutarius, insigniter promovent. Sic igitur non mirum est, deteriores factas febricitantium res, ut diu & misere fuerint afflicti, quin novi exemplum tertianarii, qui mole absorbentium & incidentium obrutus, prævia lipothymia, plane fuit extinctus.

§. XXX.

Detrimentosum non minus his in febribus eorum fuit molimen, qui autumarunt, declinante paroxysmo, sudorem, qui sponte prodit, medicamento sudorifero, tinctura, vel essentia alexipharmaca, esse eliciendum, quo natura in salutari hoc negotio adjuncta febrilem eo facilius e corpore proscribere possit materiam. Tametsi vero & rationis & experientiae suffragio nitatur, tempore a febre vacuo, quo sanguinis proventus, pulsu teste, lentior, cum bonis ægrorum rebus perspirationem congruis præsidii secundari; nihilo tamen minus, quum superioris anni febres ex valde biliosa, salina, sulphurea sanguinis & humorum intemperie ortum traxerunt, minus tutum ac e re fuit, medicamentis sanguinem commoventibus, nec non pulveribus stomachicis ex radice ari, pimpinellæ, galangæ aliisque acrioribus compositis, extra paroxysmum exhibitis, magis adhuc rarefacere succos & ad progignendas ejusmodi acres biliosas fordes disponere, a quibus postea summæ virium dejectiones ad lipothymiam usque, sudores colliquativi cum purpura prognati. Magis potius rationi & experientiae consentaneum fuit, succurrere pulveribus temperantibus, roborantibus nitrosis & leniter evacuantibus mannatis, unacum recto corticis chinæ usu, nec non leniter roborantibus salinis, cujus generis sunt mater perlarum & conchæ succo citri irroratæ &, quæ magni usus sunt; testæ ovorum in spiritu salis maceratæ.

§. XXXI.

Alii epidemicis his febribus decumbentibus incongruo corticis chinæ usu nocuerunt. Fuerunt enim qui hunc in pulvere, una vel altera ante paroxysmi accessionem hora, plena dosi ad drachmam unam exhibuerunt, quum febris jam per aliquot menses corpus detinisset. Tum quippe paroxysmus sequutus longe acerbior, majori anxietate, inquietudine & corporis jectigatione, ob auctos internos spasmos, stipatus, horror longe diutius persistit viresque longe gravius fuerunt attritæ. Nihil enim perniciosius quam chinam chinæ paullo ante paroxysmum, antequam fordes biliosæ in primis viis, vel sanguine contemperatæ & leniter expurgatæ, offerre, eo quod

hæ sic retinentur, & spasmi horum symptomatum auctores intenduntur.

§. XXXII.

Majoris momenti est curatio intermittentium in gravidis, de qua bina notatu digna memoria tenemus exempla. Corripiebatur scilicet generosa femina sanguinea, septimestrem foetum gerens, quartana, gravibusque jactabatur pathematibus, Medicus tamen opinioni addictus, sanguinis missionem in intermittibus nunquam esse utilem, sed exacerbare febrem, ut vena pertunderetur, admittere noluit, sed essentis amaris, spiritu vini extractis, nec non pilulis balsamicis, iterato & larga manu datis, contra febrem pugnavit. Aegra vero inde ardorem persensit acriorem & calorem intensiorem, ad viginti horas durantem, cum exquisito dolore & ventris torminibus, præsertim paroxysmi tempore, ut metus etiam esset abortus. Secta demum tamen fuit vena & pulveres temperantes nitrosi cum aliquot granis corticis cascarillæ & chinæ fuerunt exhibita, tam salubri effectu, ut febris omniaque symptomata brevi post evanuerint penitusque desierint. Etenim a nullo facile, vel efficacissimo remedio, tantum levaminis, in intermittibus, si manifesta plethoræ adsunt indicia, expectandum, quam a tempestiva venæsectione, eo quod exsuperante nimium sanguine & in majoribus ac mesaraicis abdominis vasis progressu libero intercluso, nec natura, nec ars, officio in curando morbo rite potest defungi.

§. XXXIII.

Altera femina, cholericæ constitutionis, octavo mense gravis, incidebat in tertianam simplicem, quæ illico quidem electuario cum cortice chinæ sistebatur, sed relinquebat pressorium & cardialgicum quendam circa præcordia dolorem, qui post sumtum cibum ingravescerebat. Paulo post rediit non tertiana simplex, sed quotidiana, longe acerbioribus symptomatibus stipata, dum continui vomitus sub paroxysmo urgerent æstusque nimium intensus corpus & vires mirum consumerent. Sanguinis missionem interdicebat virium defectus & crebra vomitio, optime vero profuerunt pulveres temperantes bezoardici nitrosi, infusum florum chamomillæ & externe cataplasma, quod ex fermento panis, aceto, spiritu vini, nucista, caryophyllis & cardamomo paratum, calide ventriculo post paroxysmum impositum. Censura merito digna est prima medicatio, qua electuarium tempore quidem intermittente, sed non proportionata dosi propinatum, neque correctis prius & liberatis a saburra vitiosa primis viis. Nunquam enim hoc medicamentum antifebrile dare expedit, sub nimia sanguinis & humorum redundantia, nisi ubi prius omnia emunctoria aperta & excretiones recte succedunt. Liberior etiam esse debet perspiratio, urina crassa & sedimentum ponens & viscidarum & biliosarum fordinum prompta per alvum egestio, procurante hæc natura, sive sola, sive arte adjuncta.

§. XXXIV.

Ex pluribus quæ nobis ad manus sunt, pauca hæc tantum adduxisse sufficiat exempla, eum in finem, ut quisque, qui cum cautione & prudentia in artis medicæ exercitio versari cupit, luculenter perspiciat, quam noxii errores & perniciosæ hallucinationes in medendo committantur, si quis veram morbi vel symptomatum causam non scrutetur, sed ignoret, neque medicamentorum vires, quæ remo-

vendis

vendis causis respondere debent, cognitae habeat, adeoque remedia, quae plane corrigendis & tollendis iis, e quibus morbi nascuntur, sunt inidonea adhibeat. Id enim omnes, qui praxin aggrediuntur, primo omnium scire oportet, eaque propter neque satis serio inculcari posse censeo, ad tutam certam

& efficacem morborum therapiam, non alium patere aditum, nisi per exquisitiorem & rationalem pathologiam, sive causarum morbi notitiam, cujus defectu multum adhuc artem nostram laborare, est manifestissimum.



DISSERTATIO MEDICA

D E

MORBIS A NIMIA

ET INTEMPESTIVA VENERE ORIUNDIS.

Primum edita Anno 1725.

§. I.



IS rebus, quibus homo ad vitae sustentationem & sanitatis tutelam opus habet, & quae a veteribus nonnaturales appellari solent, excreta & retenta non sine ratione annumerantur. Quod si enim vitae & sanitatis negotium paulo accuratius consideramus, & causas genuinas, quibus formalis ratio conservationis nostrae vitalis continetur, perpendimus; maxime omnium id observamus, sine continuis ingestionibus & egestionibus, nec vitam salvam, nec sanitatem integram, diu persistere posse. Ea enim est motuum, qui vitae praesunt, quos inter progressivus & intestinus sanguinis principem merito sibi vindicant locum, natura atque conditio, ut humores vitales, sanguinem & lympham, benignos & probe temperatos ex alimentis digestis & subactis extractos, jugi agitatione & partium inter se attritu, collisu atque inde proveniente calore, sensim paulatimque intemperatos atque inutiles reddant; sive quod majus est, in excrementitiis falso-sulphureo-viscidis sordes, quae foras e corpore propelli debent, convertant; quorum in locum omnino novi, recentes, temperati & blandi succi, ex alimentis per convenientem digestionem & extractionem eliciendi, substitui & surrogari debent. Inde fit, ut sine alimentis, nec homo, nec ullum animal, diu vivere queat. Ex ingestis enim elaborantur succi valde nobiles, qui boni sanguinis, lymphae, humoris nutritii & mobilissimi istius fluidi, quod a sanguine in cerebro separatur & per nervos dimittitur, materiam suggerunt, & utique ad tempus retineri debent; postea vero, calore & motu effocti & inutiles redditi, rursus excernendi sunt. Quae retentiones & excretiones, si debito modo, tempore & per congrua organa succedunt, functiones utique corporis nostri rite procedunt, sive secundum naturam & ordinem perficiuntur: contra vero si in iis est vitium, & quod excernendum erat intus manet & retinetur, sive id quod in usum vitae intus asservari & retineri debuerat, plus justo excernitur, & sanitas & vita valde periclitatur.

§. II.

Neque vero tantum humores, qui noxii & conservationi vitali infesti sunt, foras e corpore proscribendi sunt, sed etiam, quod mirum videtur, succi nobilissimi, ex delibatissima & subtilissima sanguinis & lymphae & fluidi nervei parte conflati, cujus generis est liquor ille seminalis lymphaticus valde spirituosus, qui in testibus virilibus singulari atque stupendo artificio conficitur, & si nimia ejus est abundantia, utilissime effunditur, quod licito modo fit in conjugio, ad procreandam sobolem destinato, viam monstrante ipsa natura, quae a nimia hujus liquoris copia per nocturnas sic dictas pollutiones sese sponte liberat, & quae, si non excedunt, non adeo etiam sunt perniciosae. Etenim observatione & indagine certe non indignum est, quod ipsa natura, humorum, qui vires & vitam sustinent, qui robur, sensum & motum praestant partibus, & functionibus obeundis praesunt, optimorum & benignissimorum superfluum abundantiam ferre plane nequeat, exemplo sanguinis & seminis, ut potius in sanitatis & vitae destructionem iidem convertantur. Et de sanguinis abundantia, si excedit, quam graves & periculi plenas, tam in sequiori, quam in nobiliori sexu, afflictiones ingignat, res inter omnes est notissima. Quare ad plethoram tanquam foecundam morborum genitricem minuendam, & morbos exinde pullulantes arcendos, vel sanguinis missione, vel salutari naturae in mensum, haemorrhoidum vel etiam narium fluxu, nihil salutaris, nihil praestantius contingere potest. Idem accidit circa nimiam seminis, in organis generationi dicatis asservati, copiam. Haec quantas noxas & quantum damna inferat, & graves morbosas afflictiones pariat, ex Medicorum observationibus sollicita cura conscriptis & memoriae proditis constat. Plures enim ex diuturna retentione seminis superflui atque ejus prohibita ejectione, in insaniam, melancholiam & maniam conjecti sunt, pluresque difficilis sanationis nervorum morbos convulsivos, spasmodicos, febres quoque acutas, atque etiam languorem totius corporis, sibi contraxerunt.

§. III.

§. III.

Si rationem, quare optimi etiam succi in perniciales transmutentur ac degenerent, investigamus, præter vehementem eorum exagitationem & acceleratum nimis motum, stagnatio potissimum est, quæ omnis generis fluidorum in corpore naturam, crasin ac indolem plane turbat, pervertit ac destruit, dum humore immobili facto, mora vinculum mixtionis solvitur, partes secedunt & corruptionem subeunt. Quare sicuti sanguis, si ob redundantem molem lentius circumagitur, aut plane in canalium alveis subsistit, alienam prorsus inimicam naturam induit & corrumpitur: ita etiam genitura virilis, simile vitium & exitiosam valde labem contrahit, si organa & receptacula, ejus susceptioni & custodiæ servientia, vasa maxime deferentia & vesiculæ seminales, exuberante copia opplentur & infarciuntur. Et hæc quæ in liquorem seminalem cadit corruptela eo perniciosior est, quo subtilior & spirituosior ejus est substantia, & quo magis, altius & promptius, ob penetrantiam & partium tenuitatem, in ipsius vitæ principia, & eas maxime partes, quæ exquisito sensu & motu pollent, sese insinuat iisdemque exitialem noxam affricat.

§. IV.

Quamvis igitur ex his liquido pateat: laudabiles etiam & utilissimos humores nonnunquam corpori oneri, quin detrimento esse posse, si nempe plus justo retinentur, accumulatur & stagnatione labem suscipiunt; vicissim tamen constat, eorundem profusam nimis & excessivam excretionem, corpus gravi damno afficere & cum sanitatis dispendio stare. Ut enim producto insistamus exemplo, si sanguis, a quibusdam haud absone vitæ thesaurus dictus, immoderatus effunditur, aut largius quam corporis constitutio fert exantlatur, virium, quas conficit & custodit, cum magno integritatis detrimento ingens fit jactura, & varii ex debilitate oriundi morbi ingruunt ac pressio sequuntur pede. Pari ratione seminalis in viris liquor, sanguinis delibatissima pars, eodemque longe nobilior & ad vires fovendas aptior, si immodice profunditur & crebrius quam par est evocatur, longe magis inde virium robur labefactatur atque prosternitur, & gravissima in corpus ejusque incolumitatem redundat noxa, quæ eo frequentior & periculosior est, quo magis veneræ voluptatis lenociniis animus occæcatur, ne ingruens periculum animadvertat & prudenti consilio sensim obrepens damnum præscindat. Quod quemadmodum experientia calculo constat: ita, ut idem eo testatius elucesceret, placuit in præsentiarum utilissima nec adeo trita meditatione, observatius paullo in morbos, qui ab immoderatiore vel etiam intempestivo veneris exercitio incunabula trahunt, inquirere, eorundemque natales, causas ac indolem uberius evolvere atque exponere. Faxit Deus feliciter!

§. V.

Ut igitur morborum, qui a nimia & intempestiva venere proficiuntur, originem, sedem, indolem, causas & modum quoque generandi, paulo specialius & fusius explicemus; primo omnium nobis indicanda sunt, præcipua illa momenta & palmaria causa, a quibus ceu a fonte omnia illa subsequenter damna promanant. Horum maxime duo sunt: alterum est ingens virium, per crebrum & repetitum veneris actum & largam feminis emissionem, vitæ & vitalibus negotiis summe infensum, inductum

Frid. Hoffmanni Oper. Supplem. II.

dispendium ac decrementum: alterum, illa vehemens animæ sub ipso actu & coitu passio atque commotio, cum phantasia veneris ideis firmissime inhaerentis, quippe quæ, non modo vehementissime liquidum nervi massam, sed & totum nervorum & nervosarum partium systema commovet atque exagitat, & hac ratione æquilibrium motuum vitalium atque animalium tollendo, legitimum partium usum earumque functiones mirifice pervertit & conturbat.

§. VI.

Quod itaque primum concernit membrum: videlicet nimia feminis excretionem virium, quæ cum vita pari passu ambulant, ingentem fieri jacturam; maximè omnium hujus rei genuinas & sufficientes causas ordine evolvere oportet. Nolumus vero in hujus veritatis confirmationem, plures ex veterum & recentiorum monumentis auctoritates allegare, sed paucissimas adduxisse nobis suffecerit, inter quas jure meritoque primum & principem locum HIPPOCRATIS obtinet, qui *L. de genitura* §. 1. scribit: *Genituram ab humido provenire, quod in corpore robustissimum est. Quod robustissimum secernatur argumentum hoc est, quia a veneris usu, tam pauca materia emissæ, imbecilles reddimur.* Plures non imperiti Medici in hac fuerunt sententia: in uno coitu tantum virium consumi, quantum una libra sanguinis per venæ-sectionem subtrahitur. Ita GLISSONIUS sentit, in *L. de anatom. hepat. c. 45.* inquiens: *exiguum seminis dispendium plus damni infert spiritibus, ac si vigesies tantum sanguinis detractum fuerit.* Neque hac in re dissentit elegantissimus LOMMIUS, qui *de sanitate tuenda p. 45.* hæc prodidit: *Nulla res vires impensius frangit immodico concubitu. Nam profunditur sincerior humorum particula, caloris spiritusque vitalis plenissima, cujus jactura, tanto magis, quam effusus sine modo sanguis corpus affligat, quanto semen illo calidius atque elaboratius est.* Atque hinc etiam innotescit, quam recte olim Poëta quidam cecinerit:

*Crebra venis nervos, animi vim, lumina, corpus
Debilitat, molliat, surripit, orbat, edit.*

Non minus memorabilia sunt, quæ de nimia veneris noxa CASP. A REIËS in *camp. elys. quæst. 46. p. 565.* judicat: *concubitus immodicus vires exhaurit, spiritus consumit, calorem innatum mortificat, & quo plus detraxeris, de vita minues, cum cerebrum suapte natura frigidum & exsangue enervet, nervorum robur dejiciat, oculos & articulos debilitet cruditatesque pariat.*

§. VII.

Verum enim vero non sufficit in confirmationem veritatum medicarum cum auctoritatibus pugnare, sed firma adducere oportet argumenta, quibus de certa ratione rei quisque convinci possit. E re itaque erit, paulo subtilius & accuratius generationem liquoris seminalis in corpore humano investigare, atque ejus elementa & ingredientia ex quibus constat, sollicitè eruere. Quem in finem maxime omnium ex anatomicis structura ductuum seminalium & testiculorum organica, atque elaboratio in iis succi genitalis, inquirenda erit. Primus omnium ex Anatomicis, REGNER. DE GRAAF nominandus est, quo nemo rectius structuram testium explanavit. Is enim præter alia pulcherrima observavit: totam testis molem ex innumeris candidis columnaribus filamentis vasculosis, repletis subtilissimo succo seminali, constare, & nonnisi congeriem

T t

&

& complicationem esse innumerorum minutissimorum tubulorum. Porro etiam annotavit: arteriam spermaticam, partim testium substantiam penetrare, partim per epididymides & per tunicam albugineam spargi, illudque injectione aquæ coloratæ per siphonem demonstravit. Foramen quoque epididymidis vidit, longitudinem ejus ductus explicuit ejusque tortuosam & serpentinam cavitatis productionem, aqua per siringam infusa, in conspectum produxit. Ex præstantissimis clarissimi hujus viri observationibus denique compertum habemus: quod arteriæ sanguinem ad testes deferant, insuperque nervea vasa propria candida testium componant substantiam eorum, quæ in ductu nervoso per axim extenso, & postea in singulari longissimo canali epididymidis producta, desinunt in vasa semen deferentia, quæ ad vesiculas seminales exonerantur, & hinc unacum succo ex parastatis expresso, in urethram semen evomant. Neque prætereundum erit paucis adhuc obvium experimentum, quo, in vasa deferentia aer validius per tubulum insufflatus, non modo vesiculas seminales, sed & vasa omnia in abdomine lymphatica, cum ductu thoracico, simul flatu distenduntur & pulchre conspicua evadunt. Quod experimentum felicissime in tenerioris infantis corpore confectum fuit. Ex quo communicatio & commercium ductuum & vesicularum feminalium, cum universo vasorum lymphaticorum systemate, luculenter apparet.

§. VIII.

Quod ergo ad elaborationem succi feminalis in canaliculosa testium substantia attinet, hoc tenendum est: illum ex puriori, spirituosa, elastica, æreo-ætherea & subtiliori oleaginosa, lymphatica, arteriosi sanguinis parte, a minimis vasculorum feminalium orificiis excipi, & tanquam per cribrum separari, artificio mere mechanico, & per spongiosas columnulas in vasa deferentia advehi, dum interea ipsæ venæ intra profundam testis molem dispersæ, nec non vasa lymphatica, reliquam crassiorem sanguinis & lymphæ partem reducunt. Quum vero subtilissima hæc sanguinis & lymphæ portio, per prolixum & intricatum labyrinthum testium ductum transeat & pervolvatur; nullum est dubium, quin in transitu, & quasi terebratione horum ductuum, succus hic, per ulteriorem divisionem in minimas partes, majorem subtilitatem atque penetrantiam ineffabilemque *ἐνεργίαν* & vim motivam acquirat, quæ utique in semine admiranda est, dum in momento per poros uteri penetrat, & in ovulo *αὐτόμα* embryonis efformatum animat, ejus partes motu vivido expandit & ad nutritionem & auctiorem idoneas reddit.

§. IX.

Artificiosissima igitur illa testium, ex meris exilissimis vasculis constans fabrica, exquisitissime structuræ cerebri respondet, cujus cortex identidem ex congerie minutissimorum canaliculorum compositus est. Quare aptissime testes & cerebrum similem usum & functionem habere colligitur, ut scilicet in utrisque tenuissima & spirituosa expansiva sanguinis & lymphæ portio separetur & successive exaltetur. Et hinc forsitan est, quod in testibus tam pauci & exiles nervorum rami appareant, quum illi communi cum cerebro & eodem fungantur munere, neque succo nervoso egeant. Hinc etiam nemo non sine erroris labe asserere poterit: liquidum illud spirituosum, quod in testium mæandris separatur, consimilis admodum indolis, mixtionis, facultatis & virtutis esse cum fluidissimo illo succo, qui per ce-

rebrum & medullam spinalem transcolatur, & per nervos in universum corpus diducitur. Nam quemadmodum magna vis & potentia movens, expandens & roborans in liquido cerebri & nervorum est; ita etiam illa ipsa ad animandam, & in majus evolvendam embryonis in ovulo machinulam necessaria est. Et sicuti fluidum cerebri, quod spiritus animalis nomine Veteres insigniverunt, ad ideas & vestigia rerum sibi imprimenda, retinenda & in actum deducenda, capacissimum est: sic eidem spiritui liquoris feminalis tribuendum, quod in foetum multoties cum paterno semine notæ, configurationes partium, faciei, oculorum, digitorum, deformationes quoque & labes viscerum propagentur, item bonæ & prævæ animi dispositiones hæreditario quasi jure in liberos transeant.

§. X.

Præterea scire hoc loco convenit: liquoris feminalis usum non tantum ad procreandam sobolem sese extendere; verum etiam ad vitale corporis robur, seu vires augendas, admodum conferre. Siquidem observamus, in pubertate, quando potentia generativa & elaboratio feminis in testibus incipit, vocem augeri, tracheam dilatari, barbam & pilos crescere, totumque corpus robur & firmitudinem accipere, ingenii quoque acumen augeri & judicandi facultatem incrementum capere; quum pueri & eunuchi voce, robore & moribus, foeminas magis, quam viros referant. Idem quoque videmus in animantibus, quæ castratione alacritatem, vigorem, robur & audaciam amittunt & deponunt, ac longe imbecilliora & timidiora sunt non castratis, quippe quæ, vernali potissimum tempore, quo generationi vacant & eorum testiculi semine turgidi sunt, valde animosa, impavida, robustiora & generosiora esseprehenduntur.

§. XI.

Ex quo clarissime quidem patere arbitror: semen etiam ad robur & vires fulciendas & augendas plurimum facere; sed quo pacto, & per quas vias liquor feminalis ad interiora corporis remeet atque pertingat, ut eidem vigoris augmentum majoremque firmitudinem inspirare possit, jam in quaestionem venit. Quum vero superius jam experimento anatomico exquisitam vesicularum feminalium & vasorum lymphaticorum, ipsiusque thoracici ductus connexionem & commercium adstruxerimus; non sine gravi ratione in hac versamur sententia: si capsulæ seminis asservationi dicatæ nimium succo feminali turgent, neque tamen is foras dimittitur, delibatissima ejus portio in connexa apposita vasa lymphatica resorbetur, & horum ope ad massam sanguinis neque minus ad cor & cerebrum advecta, vivifico quasi rore, tum fluidas, tum solidas partes perfundit, illis spiritualescentiam, his vero movendi potentiam ac robur conciliando & insinuando.

§. XII.

Quæ quum ita sint, prona utique exinde consequentia elici posse putamus: immoderatam & sæpius repetitam feminis emissionem, vicissim robur suffurari ac prostrernere, & totius corporis partes, maxime eas, quæ motui & sensui præfunt, cerebrum scilicet & universum nervosum genus, mirifice debilitare, infirmas & imbecilles reddere, ut non mirum sit, quod attritis his & imbecillitate affectis, maximum sanitati injungatur detrimentum & tot tantaque mala pullulent, quæ ordine jam recensere & observationibus accuratis confirmare non erit

erit inconsultum. Et primo occurrit memorabilis casus quem TIMÆUS A GULDENKLEE *L. II. Cas. 17.* consignavit, fidem faciens: quendam tam intemperanter veneris castra esse sequutum, ut asfuntis etiam stimuli loco pharmacis, nullam omnino prætermitteret noctem, in qua non strenue pugnaret: donec tandem viribus deficiens, oculis caligans, vertigine & tremore artuum afflictus, lipothymia quoque correptus, libidines coercere & abstinere coactus sit. Idem affirmat ZACUTUS LUSITANUS *T. III. fol. 10.* Quinimmo non modo animi deliquium, sed & ipsam mortem sequutam esse GALENUS *L. I. de semine c. 16.* auctor est. Et PLINIUS *Lib. VII. c. 53. Hist. Nat.* refert: Corn. Galum & Tit. Æterium, equites Romanos, in ipso opere fuisse suffocatos; id quod etiam pluribus exemplis testatur ALEX. BENEDICTUS *L. 24. de curand. morb. c. 22.* alique plures.

§. XIII.

Deinceps quum a crebriori coitu cerebrum & functiones animales quam maxime debilitentur; non est quod magnopere quis miretur, memoriam inde quoque valde imminui & tandem plane deficere, qua de re exempla prostant apud VIT. RIEDLINUM, *Linear. Med. A. 1697. mens. Jul. observ. I.* & JO. CHRYSOST. MAGNENIUM *de tabac. Exercit. 6. p. 121. seq.* Neque tantum memoriæ alacritatem, sed & ingenii & iudicii acumen nimium & intempestivum veneris exercitium labefactat & frangit, adeo ut observationum fide constet, quosdam inde in amentiam delapsos esse, teste PHIL. SALMUTH *Cent. I. observ. 61.* Præter sensus internos etiam externi a virium per largiorem seminis emissionem jactura graviter luunt. Hinc enim aurium murmura & susurri, præsertim in phlegmaticis & senibus fiunt, acies oculorum obfuscat, immo cœcitatem inde subortam fuisse testatum faciunt D. FRANC. PAULINI *observ. med. Physic. Cent. 1. observ. 64. & M. N. C. D. II. An. V. append.* GODOFR. MOEBIUS *Physiol. c. 20.* PANAROLUS *observ. med. Pentecost. 2. observ. 6. & 28. &c.*

§. XIV.

Actiões porro naturales, non leve inducta per intempestivos & repetitos coitus imbecillitate patiuntur detrimentum. Inde enim inappetentia, nausea cum ventriculi subversione oritur, & copiosæ a cibis male digestis ingignuntur cruditates, abdomen flatibus distendentes; id quod etiam ab HIPPOCRATE olim notatum *Lib. 6. Epidem. Quibusdam, dum venere utuntur, inflatur venter, ut Damagoræ: & quibusdam in hoc strepitus fiunt.* Lienteriæ quoque & cœliacæ passiones non raro inde sumunt initium, quæ omnia de summa atonia, seu tono intestinorum & ventriculi dejecto, clarum exhibent documentum. Et quum imbecillitas effato CÆLSI omnibus morbis pateat, certe id ipsum etiam in iis observamus, qui nimio veneris exercitio vires profuderunt & debilitati sunt. Certa enim & firma experientia constat, qui mature nimis & crebrius veneris rebus indulgent, raro ad senectutem pertinere, sed effœta, languida & morbis obnoxia reddere corpora, quod etiam Historicorum princeps notat TACITUS. Si autem corpora venere exhausta morbo corripuntur, difficulter evadunt, & imprimis multiplici observatu compertum habet D. D. PRÆSES, juvenes, qui Baccho & Venere vires consumserunt, si in morbum acutum, vel etiam in variolas & morbillos inciderunt, difficillime admodum consanuisse.

§. XV.

Meretur huc adduci egregius locus ex FONSECA *de sanit. tuenda p. 110.* Multi, inquit, juvenes & robusti, tot vicibus una nocte venerem aliquando repetunt, ut vel brevi acuto morbo correpti moriantur, vel in graves incidant morbos, a quibus vix resurgere possunt. Nam ubi corpus aliquod ex nimia venere debilitatum morbo acuto apprehenditur, nullus datur remedio locus. Inprimis autem hanc in rem perquam notatu dignum est, quod qui intemperantius veneri litant, ob infirmum & imbecille spiritibus & succis defraudatum corpus, rarius fœcundum semen alant; id quod etiam a JUL. ALEXAND. observatum legimus, qui *libr. XXII. salubrium* ita differit: *Venus est munus vigentis naturæ, quando hæc adest, utile & proliferum semen fortibus & robustis procreandis liberis habetur.* Nam ex immaturo semine, quale teneriorum annorum, aut senili homini, non satis utilis & rebus gerendis imbecillis generatur homo. Quare nondum natorum incolumitati semper consulere debemus.

§. XVI.

At vero ex abusu veneris non solum morbi, ex atonia partium solidarum viriumque imbecillitate incunabula trahentes; prodeunt, sed etiam gravissimæ illæ afflictiones subnascuntur, quarum origo & genesis spastica partium internarum stricturæ debetur. Scilicet sub ipso congressu & fervidiori venereo actu, ea animi habitudo & corporis conditio est, ut universum nervorum systema, unà cum contento in eo fluidissimo & impetum faciente liquido, gravius exagitetur & in motum extraordinarium abripiatur, quo fit, ut sub ipso coitu pulsus valde citatus & vehemens manum vibret, cor palpitet, partes tremant, pedes post actum vacillent, & omnium humorum fiat ebullitio & commotio. Quare non mirum est, si pro diversitate temperamentorum, ætatum & pro differente partium fluidarum intemperie, & solidarum imbecillitate, varii & gravissimi oboriantur morbi, qui plerumque nimiae exagitationi sanguinis & validiori impulsui humorum ad partes debiles, ibique factæ stagnationi, vasorum distensionis, aut rupturæ, ortum debent.

§. XVII.

Hos inter maxime eminet apoplexia, qua non paucos inter amplexus uxorios correptos esse observationum fide constat, cujus rei testes citamus HENRICUM AB HEER *observ. 9. p. 103. it.* DAN. LUDOVICI *M. N. C. Dec. 1. A. 9. observ. 159.* nec non BARTHOLINUM, qui *Cent. 6. Hist. 94.* memorat: Liburni mercatorem Belgam desideratæ amicæ complexui tam avide & insatiabiliter indulgisse, ut in sinu ipso exspiraverit. Et nosmetipsi haud ita pridem funestum ejusmodi casum vidimus prope Vitebergam in milite, qui venereo æstro percitus, puellam arreptam tam impense compressit, ut inter concumbendum apoplecticus interiret, reperto post mortem in cerebri ventriculis sanguine extravasato. Eidem quoque causæ tribuendum, quod nonnunquam furore maniaco corripiantur immoderate libidinantes, de quo obviæ sunt in commentariis historiæ, quibus, præter superius allatam, addimus quam memoriæ prodidit SCHENCKIUS *in observat. med. Lib. I. fol. 41.* item GRUNDELIUS *in M. N. C. Dec. II. an. 4. observ. 166.* de melancholico quodam, qui æstate media uxorem juvenculam ducens, tam profuse & intemperanter cum noviter nupta congressus est, ut brevi post in furorem delaberetur. Quod si e-

nim sanguis copiosus & nimis crassus, qualis est melancholicorum, cum impetu urgetur ad cerebrum, & per ejus vasa valde distenta celeriter cum incallescencia truditur, furibundum incidit delirium.

§. XVIII.

Porro sunt inter exempla, qui ab immoderatiore concubitu epilepsiam incurrerunt: id quod neutiquam mirum, quum DEMOCRITUS jam olim coitum parvam epilepsiam dixerit. Etenim sub vehementi illa nervosarum partium commotione, ipsius cerebri meningēs, in dispositis facile in vehementem spasmus, quo epilepsiæ natura maxime continetur, cientur & abripiuntur; qua de re historiæ narrantur ab HENRICO AB HEER *observ. XVIII. p. 176.* & LÆLIO A FONTE *in Consult. med. 95. p. 176.* Neque minus memorabilis est casus, quem D. D. PRÆSES ad confirmandum veneris nimiae & intempestivæ detrimentum, quod capiti injungit, benevole mecum communicavit. Videlicet ante plures annos contigit, ut adolescens quidam, XVIII. ætatis annum agens, subito semianimis concideret, cum horrore & artuum tremore, facie tamen rubicunda & pulsu adhuc micante. Et licet elapsa hora remediorum ope refocillaretur, ingentem tamen non solum languorem totius corporis persensit, sed etiam haud ita multo post eodem paroxysmo, post gravem præcordiorum anxietatem & artuum lassitudinem, correptus est, qui aliquoties intra hebdomadem repetens, ardentem attulit in dextri cubiti angulo dolorem, tumore & contractura brachii demum stipatum, & augmento suo & exacerbatione ipsum insultum prænunciantem. Medici in consilium vocati, jam vermes, jam aliam fonticam causam subesse autumantes, variis contra atrox hoc malum pugnabant præsidis: sed tantum aberat, ut iidem illud abigerent, ut potius ejus atrociam magis exacerbaretur & cresceret. Tandem D. D. PRÆSIDIS auxilium imploratum, qui solo decocto ex antispasmodicis, demulcentibus & nervinis anodynis parato, & mane aliquandiu poto, morbum superavit & ægrum liberavit, causa postmodum in apricum producta per ancillam parentum adolescentis, quæ gravida & partui vicina facta est, illum singulis fere noctibus, antequam morbo correptus sit, cum ipsa concubuisse.

§. XIX.

Præterea quam perniciosum sit veneris exercitium iis, quibus cerebrum affectum, confirmatum habet D. D. PRÆSES, alio notabili exemplo juvenis cujusdam viginti annorum. Is sclopetum explodens, dissiliente eo, gravius læsus erat in fronte, ita, ut clavus ossi frontis impactus, ambas ejus laminas perforaret, & festucæ ad interiora adactæ cerebrum comprimerent. Nihilominus tamen exemptis caute fragmentis ossis, & indita, ad corruptionem quæ in læsa cerebri parte apparebat arcendam, essentia balsamica cum melle rosato, exterius quoque applicatis commodis præsidis, eximia salutis spes affulsit, & vulneratus ab omnium symptomatum incurfu liber, in vado propemodum constitutus visus est. Sed contigit forte, ut elapsis quatuordecim post inflictum vulnus diebus, ipsum inviseret foemina, qua concubitu vetito familiaris uti sueverat, cum qua incontinens & viribus nimium fidens matutino tempore ardentius coit, quo facto, tremor artus occupavit caputque dolore ac vertigine affectum fuit, & vesperscente coelo, miser apoplexia tactus, convulsionibus periit. Secto post mortem cadavere & calvaria demta, aliquot feri sanguinei extravasati cochlearia in basi cerebri inventa sunt, & ipsa læ-

sio, una cum circumjecta cerebri parte, subflava in conspectum prodiit. Eandem quoque in rem conferri meretur casus, qui ab HILDANO *observat. 22. Cent. I.* narratur, luculenter adstruens quam detrimetosa sit venus in vulneribus nervosarum partium, & quem inferere non abs re erit: Amputarat Chirurgus juveni manum ex ictu sclopeti penitus contusam, & ægotanti, venereis exercitiis admodum dedito, serio injunxerat, ut a congressu venereo penitus abstineret. At is cupiditatibus magis quam monito obtemperans, consolidato propemodum truncatæ manus vulnere & symptomatibus sedatis, foeminam iniit, funesto cum successu, quippe recidit illico in febrem, deliria, spasmos aliaque gravia mala, & tandem quarto post die interiit.

§. XX.

Quemadmodum igitur veneris usus in affectibus nervosarum partium nocentissimus est; ita pari etiam ratione in acutis febribus, ubi universum systema vasorum sanguineorum, nec non nervorum, universali quasi spasmō detinetur, multum habet periculi, qua de re egregia exstat observatio apud HILDANUM *Cent. IV. observ. 26.* Ibi meminit civis, qui vera pleuritide laborarat, eademque septimo die per copiosum sudorem cum symptomatum cessatione jam soluta, decimo die, denuo febre maximisque rigoribus correptus, decimo tertio subita morte obiit, & causam inopinatæ lethalis catastrophen addit, quod æger adhuc & a morbo debilitatus cum formosa uxore rem habens, sibi interitum consciverit. Similis fere, non tamen funestus casus, D. D. PRÆSIDIS animo adhuc obversatur præfecti cujusdam militum, temperamento sanguinei, quinquagenarii circiter & cælibis adhuc, qui quum unctius vivendi genus sectaretur, vinosa diæta uteretur & crebrius veneri litaret, podagricis & arthriticis doloribus subinde excruciabatur, & haud ita pridem a retropulsa per improvide adhibita exterius topica, in pleuritidem spuriam, intensa febre, tussi sicca & maxima respirandi angustia stipatam, inciderat; misso autem tempestive sanguine & congruis discutientibus usurpatis, per largiorem sudorem, septimo morbi die erumpentem, haud fallacem sanitatis spem recipiens, venustum quod ad corporis curam alebat mancipium fervide comprimens, post venereum actum non solum tremorem omnium artuum cum rubicundo atro faciei colore sensit, sed etiam in priorem morbum recidit, longe graviolem redditum, accedente sanguinis per tussim sreatu, deliriis & tandem sopore, e quo nonnunquam expergefactus, de summa præcordiorum anxietate & ventris torminibus conquerebatur, ita, ut metus subesset funestæ inflammationis ventriculi & intestinorum. Nihilominus tamen, quum in auxilium vocatus D. D. PRÆSES contra hanc pugnaret medicamentis analeptis, demulcentibus, blande discutientibus, emulsionibus quoque largius subinde exhibitis, simulque ptisanæ usum suaderet copiosius bibendæ, factum est, ut oborto alvi ad aliquot dies continuante fluxu, morbi atrociam mitigaretur, & æger intra mensis spatium, adspirante Deo, cum sanitate in gratiam rediret.

§. XXI.

Ceterum haud rarum observatu est, a profusa nimis venere febres accendi & generari. Novimus plures, qui immoderatus libidines, in lentas febriculas, cum partium tabescentia corporisque macie, inciderunt. Compertum quoque nobis est exemplum Nobilis cujusdam, qui toties febre intermittente affligebatur, quoties intemperantius veneri indul-

indulgebat, eademque per octiduum detinebatur. De acuta autem febre, post immodicum veneris usum oborta, observationem consignavit BARTHOLINUS, *Centur. VI. hist. 94. Novi sponsum*, inquit, *qui primo noctis conflictu crebriori in febrem incidit acutam, cum virium defectu, ventriculi subversione, immoderata siti, lipothymia, delirio, insomniis & inquietudinibus, ut pene de novo sponso fuerit clamatum, solis vero cordialibus & quiete restitutus est.*

§. XXII.

Accedit palpitatio cordis, frequentissimum Hectorum venereorum symptomata. Nam uti hæc species quædam convulsionis cordis & inprimis annexarum arteriarum est: ita eandem sub vehementi illa nervosarum partium in actu venereo commotione ex facili oriri posse, admodum credibile est. Fidem facit JO. DOLÆUS in *Encyclop. med. L. II. c. 6. p. 347.* memorans: quendam, in exsequendo coitu nimis incontinentem, in tam gravem cordis tremorem incidisse, ut pene de eodem actum fuerit. Similiter obvium admodum est, ut sub ipso exercitio veneris, vel ante illud meditatione impensius præconceptum, crebra suboriatur sternutatio, quæ itidem levis est convulsionis species, potissimum in tunica interiora narium investiente nervosa, qua ob consensum rami nervi quinti paris, per eandem dispersi, cum intercostali, thorax & diaphragma simul concutiuntur & commoventur. Ejusmodi exempla annotata & memoriæ prodita sunt apud STALPARTIUM VAN DER WIEL, item AMATUM LUSITANUM *Cent. IV. curat. 3.* & BONETUM in *anatom. præct. Lib. I. sect. 20. Schol. ad observat. 17.* Neque hoc loco prætereundus est morborum, qui articulis incumbunt, ac inprimis podagræ, ex nimia venere ortus ac generatio. Tritum enim vetustate est proverbium, Bacchum & Venerem esse podagræ parentes; id quod etiam firmo, tam rationis, quam experientiæ, stat talo. Quippe profusa luxuria & immodico vini potu benigna humorum indoles admodum corrumpitur, variisque impuritatibus inficitur, veneris autem exercitio crebriori, artus eorumque ligamenta nerveo-tendinosa debilitantur, ut ex facili acris rodens humor ibi colligatur ac dolorum scenam instruat.

§. XXIII.

Tot ac tam gravia sunt mala, quæ ex intempestivo & nimio veneris usu in corpus redundant; & quorum ortus ac generandi ratio facili negotio suppeditari potest. Scilicet præter ea, quæ passim de horum morborum natalibus inseruimus, ex gemino superius exposito fonte, debilitate nempe & impetuosa per animi affectum inducta commotione, eorundem originem apposite & intelligenter duci ac derivari posse censemus. Etenim effrenis libido, non tantum calorem nativum consumit & cum eo ipsas vires exhaurit, verum etiam ventriculi robur ac tonum destruendo, concoctionem turbat ac tardat, & ad cruditates ingignendas plurimum confert. Inde ructus, flatus, nausea, ciborum inappetentia, lienteria, nonnunquam etiam catarrhi & coryzæ, proveniunt, corpus marcescit & imbecillitatem contrahit, memoriæ & ingenii vis hebetatur & somnus quoque placidus turbatur, adeo, ut ejusmodi subjecta ad res peragendas tardi admodum & lassii fiant, prout in quibusdam a me observatum est. Hinc quoque ratio petenda est, cur tale corpus imbecille redditum, omnibus morbis prompte pateat & crebrius obnoxium sit. Facilius enim læditur a causis externis, vitiis scilicet diætæ, incle-

Frid. Hoffmanni Oper. Supplem. II.

mentia aëris, & animi affectibus; inprimis vero frequentius & citius a morbis epidemicis apprehenditur iisdemque frequentius succumbit. Præterea in ejusmodi corporibus, abusu tam Bacchi, quam Veneris, enervatis & debilitatis, morbi quoque alias benigni, plerumque funesti fiunt, naturamque & genium malignorum imitantur, utpote quorum ratio formalis, nonnisi summa virium prostratione & somni defectu, pulsu parvo ac debili continetur.

§. XXIV.

Quum vero per crebriorem & immoderatum coitum summa imbecillitas, non modo cerebro, sed universo etiam generi nervorum & nervosarum partium inferatur, & propter robur deperditum, quam facili in hisce locis sanguinis & humorum stagnationes & congestiones oboriantur: profecto ad graves capitis morbos immodicus ejusmodi concubitus disponit ac viam sternit. Hinc enim promptum ad funestam apoplexiam esse aditum superius exemplis quibusdam adstruximus, quando nempe sanguis in corpore exundans, per nimium actus veneris fervorem commovetur & ad caput urgetur, ubi canales cerebri distendit, & tandem ruptis iis, effluit & truculentum hunc gignit morbum. Si autem sanguis copiosius eo congestus vasa non perumpit, sed eadem tantum nimis infarcit & ampliat, in iisdemque stagnans difficiliter progreditur, mitior apoplexiæ species, a nobis spasmodica dicta, oritur, in qua omnes quidem sensus, tam interni, quam externi concidunt, pulsus tamen & motus cordis remanet, facies rubicunda totumque corpus calore perfusum est, quale exemplum notavimus olim in adolescentulo XV. annorum. Porro quando ij, quibus caput debilitate affectum, ætas junior & phlegmaticum temperamentum est, venereo oestro agitantur, & sanguine impetuosius ad cerebrum rapto, serosa materia secedens, ad interiora ejus ipsamque medullam oblongatam & cerebellum serpit ac penetrat, memoriæ oritur debilitas. Pari ratione si impetus sanguinis & congestio nimia ad caput vergit, & principiis potissimum nervorum opticorum incumbit, oculorum caligo & cæcitas inducitur, præsertim si serosus humor ibi deponatur. Vidimus exemplum in militia præfecto quinquaginta annorum, macilento, temperamento sanguineo-melancholico, qui per longum temporis spatium veneris prælia acris & insatiabiliter miscens, primum non modo languorem, maciem & consumptionem totius corporis, sed visum quoque deperditum sibi attraxit, & postea oculorum aciem plane amisit, ut omnia quasi per nebulas cerneret, donec tandem ingesta avidius carne fuilla, fumo indurata, febrem timens, vomitorium usurparet, & post ejus usum, capite mirum intumesciente, cæcus prorsus redderetur.

§. XXV.

Notandum quoque hoc loco est, quod ejusmodi corpora, quæ frequentiori & intempestivo coitu valde debile & imbecille cerebrum sibi contraxerunt, non tantum ob animi in ipsa venere violentiori affectum, sed etiam ob alias causas, quæ sanguinem ad caput commovendi facultate pollent, maxime eas, quæ spasticam strictionem partibus inducunt: ut sunt externum frigus, corporis refrigeratio, ira, terror, vel imprudens administratio emetici, purgantis, aut balnei nimis calidi, in ejusmodi graves capitis morbos incurrant. Quapropter & noviter nuptis, plerumque fervidius opus maritale suscipientibus, moderamen & temperamentum suadendum ac injungendum. Nocet enim quam

maxime commotio illa venerea juvenilibus corporibus, si nempe subito in motum perversum & tam insolentem rapiuntur, ut non modo febres, sed & nervorum affectus exoriantur, inprimis quando heterogeneis & alienis materiis succi scatent. Eandem quoque ob causam utilissimum conjugium ineuntibus est monitum: ut paullo ante nuptias, non balneis ex aqua simplici, ut plerumque moris est, sed congruis auxiliis internis corpora expurganda curent, ne subsequentes animi & corporis motus tam facile gravia damna inferant. His enim neglectis, accidit quandoque, ut paulo post nuptias, dolor gravis lumbis quasi ex frigore incumbat, cum urinam reddendi difficultate & tenesmo, quod factum in hæmorrhoidario quinquaginta annorum referunt M. N. C. Cent. I. obs. 16. qui dolor procul dubio ex commotione sanguinis per venerem ad hæc loca originem traxit.

§. XXVI.

Sed hæc de morbis qui in sexum nobiliorem per veneris intemperantiam incidunt: nunc paucis adhuc mentio injicienda eorum incommodorum & affectuum, quos ipsæ foeminae a nimio in veneris exercitio fervore frequentius experiuntur. Quamvis vero non tantus sit numerus eorum, neque tantum periculum, ac in viris, eo quod in ipso actu mulieribus nihil virium per emissionem materiae spirituosæ subtrahitur: attamen quum eadem plerumque, ob imbecillius minusque excultum rationis & iudicii acumen, phantasia pertinacior & vehementiori polleant, fit, ut subinde ob graviores animi in oestro venereo affectum, non levia experiantur mala, quæ inter præcipuum & valde frequens est furor sic dictus uterinus, perquam familiaris viduis præsertim libidinis, lauta diæta fruuentibus & sanguinem copiosum in venis alentibus. Non minus pathemata ista spastica, quæ vulgo hysterica nominantur, plerumque a fortiori phantasia, quæ in res venereas libidinose fertur, vel plane ducunt originem, vel saltem exasperantur. Nota nobis est mulier admodum salax & veneri dedita, quæ plerumque a coitu epilepsia, a Medicis hysterica dicta, attentabatur. Porro oculis etiam nimiam venerem in foeminis esse inimicam, innotuit nobis exemplo cujusdam mœchæ, libidini vagæ indulgentis, quæ quotiescunque venereis amplexibus sese subiciebat, oculorum caligine visusque hebetudine afficiebatur, donec tandem inconsulto emetici validioris usu in guttam serenam incidens, luminibus penitus orbaretur.

§. XXVII.

Expositis sic & definitis varii generis afflictionibus, quas in utroque sexu profusior & intemperantior veneris usus concitare solet; sequitur jam, ut quibusnam corporibus maxime immoderatus & intempestivus concubitus sit infestus, & quæ ab eodem sibi temperare debeant, paulo accuratius determinemus. Neque enim existimandum est, omnem omnino veneris usum esse adeo exitiosum & semper cum maximo sanitatis detrimento conjunctum, eamque ob causam pertimescendum & penitus intermittendum, præsertim si paulo frequentior allubescat. Quippe exempla & usus docent, eos, quibus corpus firmum & robustum obtigit, ætas vegeta, juvenilis decurrit, & temperatura calida & humida, seu sanguinea, cum unctius vivendi copia est, qui bene appetunt, digerunt & egerunt, sine ullo gravi incommodo, languore & subsequente noxa, veneris exercitia, si modo non excessiva sint, ferre posse, adeo ut, si consueta diutius o-

mittant & abstineant, atrocibus malis uterque sexus oppugnetur, ut sunt languor totius corporis, melancholia, anorexia, delirium, in foeminis convulsio epileptica, subita præfocatio, & quæ plura sunt, de quibus videatur FRANC. PAULINI M. N. C. Dec. II. An. IX. observat. 89. &c. GALENUS quoque L. VI. c. 5. Loc. affect. memorat, in quibusdam, nisi assiduo coiverint, capitis molestias, ciborum fastidium & febres excitatas fuisse, & affert exemplum cujusdam, qui, quum uxoris obitum dolenter ferens, multo luctu sese conficeret, omnem cibi cupiditatem amisit & alia gravia symptomata passus est, nec prius sese in sanitatem vindicavit, quam ad foeminæ consuetudinem rediisset. Hinc cum CELSO L. de sanit. tuenda sentiendum est; concubitus, modo non nimis frequens sit, corporis vires excitare.

§. XXVIII.

Sed ut rem, quæ explicanda restat, exponamus, inprimis monendum est: quod maxime omnium sibi ab affectu venereo & feminis immoderata emissionem in crebriori coitu temperare debeant omnes infirmi & imbecilles, ne vires, quæ etiam secundum CELSUM adversæ valetudinis præsidia sunt, nimium profundant & varia damna sibi consciscant. In numero autem imbecillium sunt primo loco ii, qui a natura tales, hoc est, qui a parentibus infirmis, valetudine quadam afflictis & in senectute constitutis geniti sunt, temperamento phlegmatici & melancholici, ætate pueri & adolescentes, quibus ipsa natura provido admodum consilio, & studio quasi, pauci feminis generationem concessit, ut ejus excretio vix necessaria sit. Eundem quoque in censum referendi valetudinarii, quibus appetentia prostrata & concoctio vacillat, senes minus vegeti, omnesque ii, qui a præcedente morbo, sive acuto, sive diuturno, per immodicas sanguinis profusiones & emissiones, aut diuturnum mœrorem, inedia, vires consumserunt & attriverunt.

§. XXIX.

Multo vero magis inimica est iis venus, qui valetudine adversa adhuc detinentur, ut sunt phthisici, hypochondriaci, arthritici, podagrici, cachectici, quibus non potest non hic affectus veneris magno detrimento esse, quandoquidem quo magis vires corpori afflicto detrahuntur, eo magis vehementia morbi crescit ipsaque sanatio difficilior redditur. Inutilis quoque, immo prorsus noxii veneri congressus sunt, corporibus, quæ sanguine crasso & minus fluido, quin etiam impuro redundant, qui, si paulo intensiori animi fervore & libidinosa cupiditate commovetur & cum impetu ad partem hanc vel illam debilem fertur, sæva protinus mala concitari possunt. Quare sicuti melancholicis, qui sanguinem plerumque copiosum & spissum alunt, repentina, fortior & insueta corporis motio & exercitatio admodum adversa est, eo quod sanguinem crassiorem in velociorem motum ciet, ut ad minima vasa impetuosius appulsus iisdem impingatur ibidemque stagnet: ita etiam vehementior animi in venere passio & libidinosi desiderii impetus, non potest non iis esse valde detrimentosus.

§. XXX.

Præterea moderamen in venere servant litterarum studiis invigilantes, præsertim ii, qui assiduis meditationibus & lucubrationibus caput fatigant, vires labefaciunt & corpus enervant, quippe qui, jam tum ob hanc vivendi rationem & litterarios labores ad malum hypochondriacum, maxime omnium concoctionem

coctionem & digeſtionem ventriculi depravatam, foecundam plurimorum morborum cauſſam, proni, longe citius hæc vitia ſibi contrahunt & gravius iisdem affliguntur, ſi frequentius veneri litant. Quin immo juvenes etiam, qui litterarum culturæ animum adjiciunt, ſi præmaturè libidine & luxuria vires diſſipant & exhauriunt, rariſſimè ſenectutis principia attingunt, ſed anticipato termino mortem oppetunt. Neque denique prætereundum eſſe arbitror, pernicioſam admodum eſſe actum venereum iis, qui vehementi animi affectu, ira, terrore correpti, mox ad illum descendunt, vel etiam qui die, quo multum ſanguinis per venam emiſſum, aut fortiter ſurſum ac deorſum pharmaco purgatio inſtituta, eidem indulgent. Perpetua enim eſt regula: veneris exercitium nunquam eſſe admittendum, ubi motuum turbæ adſunt & corpus iisdem gravius jactatur. Vidit quoque DN. PRÆSES non levia incommoda accidiſſe iis, qui aquarum mineralium potui vacantes, in exſequendis venereis actibus nimii fuerunt, & felicem earundem operationem inde non parum turbatam eſſe ac retardatam.

§. XXXI.

Quamvis igitur maximè imbecillis & debilibus nimia venus ſtudioſè facienda ſit; ſunt tamen ex horum numero non pauci, qui eximios ad ejus exercitium perſentiſcunt ſtimulos. Et hi ſunt imprimis, quorum ſucci multis ſalibus ſubtilioribus ſtimulantibus onuſti ſunt, ut arthritici, nephritici, podagrici & ſcorbutici; hanc forſan ob cauſam, quod humores lymphatici, quibus organa generationi inſervientia imbuta & perfuſa ſunt, ſubtilem & vellicantem acredinem ex impura ſanguinis & humorum maſſa ſuſcipiant, & inducto per hanc partibus ſtimulo, major affluxus ſanguinis, uberior liquoris ſeminalis ſecretio & inde turgeſcentia in ductibus ſeminalibus fiat, qua præſente, ob commercium, quod inter corpus & animam, præſertim ejus vim imaginativam, intercedit, homo rerum venerearum & coeundi deſiderio inflammatur. Idem evenit in vegetioribus adhuc ſenibus, quorum humores ad ſalinam ſcorbuticam indolem admodum proni, ſubinde cupiditatem ad concubitum ingignunt. Quod enim a ſpiculis acribus ſubtilioribus genitales partes ad veneris exercitium exſtimulari poſſint, teſtantur aphrodiſiaca, quippe quorum non nulla & præcipua, uti ſunt cantharides aliaque ex animalium & vegetabilium familia deprompta, acri ſale imbuta ſunt, eodemque virtutem ſuam præſtant. Eidem quoque cauſſæ tribuendum, quod nonnulla purgantia ſubtiliori acredine pollentia, uti ſunt colocynthiaca, helleborina, extractum panchymagogum Crollii, præter alvum vacuantem effectum, ſub ipſa operatione quandoque genitalia ſtimulando, veneream appetentiam excitent, cujus rei exempla perhibent TIMÆUS A GULDENKLEE *Conf.* 50. SALMUTH *Cent.* I. *obſerv.* 71. *it. Dec.* III. *Obſerv.* 146. M. N. C.

§. XXXII.

Ultimo loco ſupereſt, ut ſalutare etiam conſilium addamus, & doceamus: quomodo ii, qui a nimia & intempeſtiva venere noxam ſibi jamjam contraxerunt, majorem arcere ac declinare poſſint. In hoc autem pariter prudens & peritus Medicus ad duas palmarias damnorum cauſſas animum & auxilium dirigere debet, ut videlicet vires proſtratas ac diſſipatas repararet per analeptica & roborantia, & effrenes ac turbulentas ſolidorum & fluidorum commotiones, demulcentium, anodynorum, refrigerantium & antiſpaſmodicorum ope placet atque componat. Quod ſi igitur vires exhaustæ refocillandæ ſunt, præſtat id potius alimentis bene nutrientibus & cum bonis ſuccis robur ingenerantibus, perficere, quam medicamentis calidis & ſpirituosis; quam in rem juſcula & brodia, ex ſalubribus carniū generibus, cancris & raſpatis ac contuſis quoque oſlibus, decenti enchiriſi per decoctionem in clauſo vaſe, extracta (*die Krafft Brühen*) plurimum commendamus. Quando autem ob veneris immoderatum uſum & ad eundem effrene deſiderium, corpus calore lento & tabe conſumtum, aut arthriticis, podagricis, ſcorbuticis & ſenibus, venereis ſtimulis agitatis, conſulendum; certe vix ullum præſtantius præſidium lactis, ac inprimis aſinini, decenter adminiſtrato potu eſt, quo ſimul labes & dyſcraſia falſo-ſcorbutica humorum emendatur, corpus nutrimentum accipit ac vires dejectæ ſoventur. Poterunt tamen etiam fructuoſe admodum in uſum vocari & diæteticis interponi medicamenta nonnulla, e quorum numero omnibus palmam præripiunt, quæ ex cinnamomo, corticibus citri, meliſſa & ambra parata ſunt.

§. XXXIII.

Ad alterum quod attinet, quando nempe mox a coitu corpus enormibus motuum turbis gravius jactatur & grave periculum ac damnum metuendum, tunc alia longe curationis via eſt ineunda. Compescendæ nimirum & coercendæ ſunt nimis exorbitantes ſolidorum & fluidorum commotiones, cui ſcopo egregie emulſiones ex ſeminibus quatuor frigidis, ſemine papaveris & aquis blande anodynis, ut primulæ veris, liliorum convallium, roſarum, acaciæ, tiliæ concinnatæ, ſatiſfaciunt. Eodem quoque nomine laudem merentur pulveres antepileptici & cinnabarini, etiam nitrati, eſſentia croci, nec non liquor DN. PRÆSIDIS anodynus mineralis. Neque inutile ſed ſæpius neceſſarium fore judico, ſi corpus ſucco & ſanguine fartum venereo æſtro agitur, & metus gravioris capitis morbi, ut apoplexiæ vel etiam mania ſubeſt, ut antiſpaſmodicis non ſufficientibus, ſanguis e vena ſecta ſubtrahatur, pediluvia adhibeantur & ad potum non cereviſia, ſed aqua decocta propinetur. Optime autem rebus ſuis conſulunt, qui temperamentum ſibi indicunt & medica ope non indigent.



DISSERTATIO PHYSICO-MEDICA

D E

AERIS POTENTIA

IN EPIDEMICORUM MORBORUM GENERATIONE.

Primum edita Anno 1727.

§. I.



ULTI dantur morbi, qui uno eodemque tempore, iisdemque symptomatibus maximam hominum partem corripunt. Ii uti simul & semel invadunt mortales, ita eodem quoque modo rursus evanescunt. Atque hi morborum epidemicorum nomine veniunt. Horum quidam truculentissime grassantur magnasque strages edunt, & lue sua infectos brevi temporis spatio interficiunt, vel pristinae valetudini restitutos deserunt. Ejus generis sunt: pestis, febres malignae, exanthematicae, petechiales, variolae, morbilli, dysenteriae, anginae, pleuritides &c. Alii vero licet etiam epidemice grassentur, attamen fere nunquam sunt funesti, nisi ab improvido Medico male tractentur; contra vero sunt eo diuturniores, adeo, ut aegroti per multas hebdomades, imo menses, saepissime illis crucientur. Tales sunt, tussis, catarrhi, febres quotidianae, tertianae, quartanae, catarrhales, arthritides, rheumatismi, diarrhoeae &c. Hi igitur omnes epidemici morbi, quia multos simul & eodem tempore corripunt, non possunt suam trahere originem a causis internis, neque a sanguinis vel impuri copia, neque ab humorum stagnationibus, viscerum infarctu, obstructione, vel induratione, alias non simul & semel omnes homines uno tempore invaderent, sed necesse est, ut eorum causae sint externae, ita tamen comparatae, ut plures simul possint adficere. Jam autem nihil in tota rerum externarum classe, quibus homo ad vitam & sanitatem eget, praeter aërem invenimus, qui horum morborum causis progignendis aptissimus est, etiam HIPPOCRATE teste, qui *lib. de flatibus*, aërem, maximum auctorem in omnibus, quae corpori accidunt, adpellat. Quod etiam in aëre quaerendae sint illae causae, vel exinde satis evidentiter judicare licet, quod non à crudi & crassa mole atque materia, sed valde tenui & agilissima, at pernicialis & virulentae indolis, inque primis sulphureo-causticae nascantur & foveantur, id quod eorum morborum symptomata, inflammationes, spasticae contractiones nervosarum partium, subitae putredines & sphacelationes, erosiones, exanthemata abunde testatum faciunt. Talismodi vero agilis & venenatae naturae partes & moleculas in catholico illo aëris & aethæris fluido hospitari, imo de novo gigni & produci posse, opus est, ut paulo clarius

demonstremus. Primo vero examinabimus aëris naturam, qui profecto nihil aliud est, quam corpus fluidum, grave, elasticum, globum nostrum terraqueum circumcingens, omnium corporum poros replens.

§. II.

Hæc aëris definitio quamvis sit tantum nominalis, attamen ad explicanda, quæ in generatione morborum epidemicorum contingunt phaenomena, satis sufficiet. Cum enim aër sit fluidum sphaeram nostram circumdans, fluidorum vero ea sit natura ac indoles ut corpora ipsis leviora a fundo ad extremam tollant superficiem, atque ita natantia illa efficiant; ita etiam aër complura corpuscula in se recipiat; necesse est. Innumera enim effluvia quotidie ex animantibus tam vivis, quam mortuis aërem ingrediuntur, & quod fere omnia corpora effluvia in auras spargant, BOYLEI experimenta abunde testantur. Quis est, quem fugiat, quot vapores ex lignis combustis sub fumi specie aërem ingradientur? Quis nescit quantum aquae exhalet non tantum e culinis cum aliis esculentorum particulis intermixtis, verum etiam ex fluviis, lacubus, stagnis, paludibus? An vero quemquam præterit, quot ex vegetabilibus effluvia spargantur e. g. flores odoriferi, aromata, quorum odor fragrantissimus per distantiam aliquot milliariorum, aëre peregrinantibus advehitur. Exinde itaque elucet, diversissimas particulas in aëre semper contineri.

§. III.

Hæc vero omnes particulæ, quomodo nocivam indolem inducere possint, jam merito in disquisitionem venit. Illæ enim dum per se consideratae, tales perniciosos effectus producere non sunt aptae; inde magna suspicio cadit in earum diversimodam mixtionem, ut inde vis illarum activa virulenta dependeat. Quod vero corpuscula talia in aëre conubium inire possint, tonitrua probant. Hæc enim sulphuris inflammabilis præsentiam in aëre exquisite docent, cujus odor est signum sulphuris vulgaris. Hujus vero ortum à sulphureis mineralium exhalationibus derivare non possumus, cum sulphur vulgare ita sit comparatum, ut difficillime in substantia evaporet, sed magno ignis gradu sublimari tantum possit. Accedit, quod sulphur minerale tam profundum sit situs ut à calore solari, qui vix tres vel quatuor ulnas terram penetrat, tangi vix possit. Inde non

imme-

immerito judicamus, sulphur illud non e terræ fontibus produci, sed in ipso aëre generari.

§. IV.

Hujus generationis ratio facile concipi, experimentisque illustrari potest. Illustris DN. HOFFMANUS (*Patronus atque Præceptor summo honoris cultu æternum colendus*) mixtione opii cum Spiritu Vitrioli, & subsequenti destillatione per retortam, in ejus collo invenit sulphur, quod odore, consistencia & colore sulphur vulgare plane æquabat. Notum quoque est illud BOYLEI experimentum cum oleo therebinthinæ & spiritu vitrioli institutum, qui mixtione horum liquorum facta, sulphur produxit inflammabile, quod a vulgari minerali non differbat. Hæc igitur experimenta magnam inducunt probabilitatem, eadem ratione sulphuris in aëre generationem fieri. De requisitorum enim ad hujus productionem necessariorum præsentia dubitare non possumus, dum pinguium, oleosorum, resinosorum effluviorum continuo magna copia aërem ingreditur. Acidi vero in aëre præsentiam experimenta quoque ostendunt. Caput mortuum enim, quod post destillationem Spiritus Vitrioli, ab omni plane acido destitutum relinquitur, si diutius aëri expositum fuerit, denuo suo acido sale fecundatur. Nec minus alumen ustum, ab igne omni suo spiritu acido orbatur, etiam in aëre acidum liquorem in suos poros iterum recipit, indeque etiam longe gravius evadit. Hæc experimenta itaque luculenter testantur de sale acido in aëre contento.

§. V.

Cum igitur me satis ostendisse existimem, diversas particulas in aëre connubium inire posse, sulphure teste in illo generato; inde ex analogia non inconvenienter concludimus, non solum sulphur, sed etiam alias materias in aëre posse produci, & quidem tales quæ supra recensitos morbos in scenam proferre possunt. Supra memoratæ enim particulae si coeunt, inter se fermentant, ac a solis calore valde exaltantur & subtiliscentur, fieri non potest quin earum textura plane invertatur, ac alterentur. Sola enim immutatione texturæ, constat, venenum transire in medicinam & contra medicinam in venenum, uti hoc accidit in præparatione mercurii sublimati & mercurii dulcis. Neque enim mercurius crudus venenosus est, neque alia ingredientia, cum quibus ille conficitur; attamen ex mera sublimatione in venenum penetrantissimum convertitur. Hoc vero si de novo cum mercurio miscetur ac sublimatur, inde mercurius dulcis, medicamentum non exiguae virtutis, exurgit. Tali modo etiam illas in aëre hospitantes particulas, in dispositione sua & configuratione ita inverti posse, ut virulentam causticam ac perniciosam indolem acquirant, res extra dubium est. Quia autem tonitrua in superiori aëre oriuntur, ita etiam alias illas mutationes & generationes harum materiarum nocivatum ibi contingere, non immerito existimamus. In illo vero animantibus in inferiori aëre viventibus nocere haud possent, nisi ad nos descendant. Idcirco non inutile quidpiam me commissurum existimo, si in rationem hujus rei paulo altius inquiram.

§. VI.

Hæ igitur particulae, quin cum pluvia descendere possint, nullum est dubium. Dum enim illa adhuc in forma vaporum in superiori aëre hæret, particulas tunc ibi existentes in se recipere debet. Vapores vero isti si tandem coeant, & inde majorem gravitatem acquirant, ac in forma pluviae in

terram cadant, particulas istas secum rapiendo ad nos ferunt. Hoc pacto vero perniciosissimæ particulae, cum valde distributæ sint, nullum adferre damnum possunt. Notum enim, quod ipsa aqua fortis, vel oleum vitrioli, quorum exigua quantitas, interne adsumta, mortem conciliat, si cum sufficiente aquæ quantitate diluantur, sine omni noxa ingeri possint.

§. VII.

Longe vero aliter res se habet, si hæ particulae in vehiculo ad nos deferantur, in quo non sunt tam dilutæ. Hoc contingit cum rore, si is ejusmodi particulis sit repletus. Ros igitur, qui non cum impetu se effundit, neque ex tanta aquæ copia constat, qua pluviae, ita quoque si noxiis particulis imbutus in terram se dimittat, non mirandum est, si istæ tunc effectus suos exerant. Ros enim, si talibus particulis causticis corrosivis, sulphureis contaminatus, vegetabilibus infundatur, ea non tantum exedit, sed & varias maculas arborum & plantarum foliis inducit. Ac observationes quidem docent, fructus vel gramina, rore hoc infecta hominibus & brutis maximam intulisse perniciem. Sic anno 1692. & 94. in Hassia tali rore cum infecta essent vegetabilia, & boves & vaccæ coacervatim extinctæ sunt phthisi pulmonali. De hac materia etiam RAMAZZINUS *de constitutione aëris* 1690. egregias habet observationes.

§. VIII.

Nec minus solis calor vehemens etiam contribuere potest, non tantum ad generationem tam nocivorum miasmatum, sed etiam ad eorum descensum. In illo enim aër valde expanditur, ac cum hac expansione vapores humidi aquosi valde distribuuntur. In hac distributione, illi magnam copiam subtilium talium molecularum facile imbibere & in se recipere possunt. Remissione vero hujus caloris facta, quod vesperi post occasum solis contingit, aër, mediante vi sua elastica, se iterum contrahere incipit, quo fit, ut vapores expansi iterum etiam condensentur; coeant, graviores evadant, & tali modo in aërem inferiorem se dimittant, nebulamque constituent, quæ miasmata illa secum vehit. Hæc nebula, quod sæpissime fit valde pernicialis, de eo abunde testantur observationes, quod nempe homines, cum illi nimis corpora sua exposuerint, graves epidemicos morbos sibi inde attraxerint. Non vero, secundum meam sententiam, semper miasmata talia in crassa nebula, quæ oculis conspicitur, ad nos feruntur, sed etiam hoc accidit, in vaporibus humidis valde distributis, insensibilibus, ita ut isti cum aëre ubique fluctuent, & quidem ex hoc fundamento; quia morbi epidemici sæpissime tales invadunt homines; qui neque in aërem nebulosum venerunt, neque infectos visitaverunt, uti præcipue animadvertitur in variolis epidemicæ grassantibus. Infantes enim licet hoc tempore non ex hypocausto emissi fuerint, tamen sæpissime a variolis corripuntur.

§. IX.

Supereſt jam, ut ostendam, quomodo istæ in aëre procreatæ materiae, corpori nostro nocivæ, vim suam in corpus exerant, & qua ratione perniciosos producant effectus. At vero non inutile erit, perscrutari, per quas vias hæc miasmata ingrediantur corpora nostra. Ac in rore quidem infecto manifestum satis est, eum cum vegetabilibus ingeri. Verum tamen, si libere in aëre natant particulae res non tam perspicua est. Hoc igitur ut eo clarius eluceat,

luceat, ideo non inconsumtum erit, generalem communicationem indagare, quam aer cum corpore habet, praesertim cum viri docti hac in re non sint ejusdem sententiae.

§. X.

Aërem igitur non tantum per asperam arteriam pulmones ingredi, sed etiam in vasis reperiri, testantur experimenta. Animal enim a subtracto aëre sub campana extinctum in vacuo mire distenditur, admissio vero aëre de novo rursus detumescit. Hoc experimentum docet, aërem in intima corporis nostri receptacula se insinuare. Neque enim alia potest dari ratio intumescitiae animantis in vacuo, nisi quod haec fiat per elasticitatem aëris intus in vasis inclusi & ob defectum aëris interni vim suam expansivam exercentis. Inde nihil certius est, aëris praesentia in corporibus animantium, quod quidem etiam non facile quenquam in dubium vocaturum existimo.

§. XI.

Deinde quoque experimenta nos faciunt certiores, in omnibus alimentis, tam esculentis quam potulentis, insignem valde reperiri aëris copiam. Atque hoc etiam ex ipsius definitione facile dijudicari potest. Definatur enim aer, quod omnia spatia repleat. Omnium vero alimentorum textura ita est comparata, ut in illis innumerabilia interstitia, quae vulgo pororum nomine veniunt, inveniantur. Igitur illa, tanquam spatiola a propria corporis materia vacua, ab aëre expleri debent. Atque id non solum de solidis sed etiam de fluidis valet. Hinc nihil certius est, quam quod aer cum alimentis illis quotidie ingeratur. Nulla enim adest ratio sufficiens, quare remanere vel post assumptos cibos rursus avolare debeat. Ita Oesophagus est via certissima, qua aer corpus nostrum ingreditur.

§. XII.

Alias adhuc vias magni quidam nominis viri sibi persuadent. Etenim defendere conantur, aërem etiam in pulmonibus immediate sanguini admisceri, atque id quidem hac ex ratione, quia in dissectis cadaveribus, aliquando in pulmonum cellulis reperiuntur materia glutinosa, & viscida, quae dum non aliunde nisi transudatione per vasorum poros derivari possit, inde concludunt; ergo etiam aërem illos posse intrare.

§. XIII.

Ego vero quomodo haec omnia inde consequantur non video. Neque enim ab ista materia ad aërem argumenta inferre possumus. Quid quod experimentum illud quod acutissimus CHRIST. WOLFIUS cum instrumento hydraulico ab ipso invento, & siphonem anatomicum adpellato, instituit, satis superque ostendit, de eadem materia non praesudicandum esse, ut quos poros penetravit ab uno latere, illos etiam ab altero penetrare debeat. Hoc enim instrumento, experimentum instituit cum vesica urinaria, cujus latus externum cum illi applicaverit, & aqua repleverit, magna aquae copia per omnes poros profilit. Atque hoc ipso experimento, etiam cum latere interno instituto, ne gutta quidem aquae adparuit.

§. XIV.

Praeterea etiam notiones elasticitatis opinioni huic refragantur. Illa enim ita est comparata, ut a certo caloris gradu ad certum expansionis gradum redigatur. Atque in hoc statu, licet etiam minima

aëris portio tubo inclusa per calorem in tantum quantum fieri potest spatium extendatur, attamen tam diu aequilibrium cum externis fluidis tenet quamdiu contractio impeditur. Et hoc quidem testatur experimentum quod cum cucurbita vitrea facili negotio institui potest. Hujus enim orificium si aquae immittatur eique ignis a posteriori parte admoveatur, tunc accrescente in vitro calore, aer ex illo per aquam in forma bullularum magna copia egreditur, adeo ut portio remanens vix alicujus sit momenti: nihilo tamen secius ejus tanta adhuc vis existit, ut aqua spatium illud ab expulso aëre relictum haud occupare possit, antequam decrescente calore in pristinum statum deveniat. Hoc experimentum luculenter satis testatur, ingressum aëris per poros vasorum pulmonalium, meram esse opinionem, nullis superstructam fundamentis.

§. XV.

Adductum enim hoc experimentum facillime quoque ad corpus humanum applicari posse, quis est, qui non videat? existente enim aëre in vasis sanguiferis, quod jam supra demonstravimus, necesse est, ut hic a calore interno etiam expandatur, & pro diversitate hujus caloris majus vel minus spatium occupet, vasaque distendat. Idem quoque contingit cum aëre in pulmonibus, nimirum, ut etiam aer attractus a pulmonum calore expandatur, quo etiam accidit, ut illi distendantur, quocirca nulla adest ratio, quamobrem pressio aëris in pulmonum cellulis major fortiorque esse debeat, quam in vasis, cum hic actio & reactio sit aequalis. Qua de re tantum abest, ut opinionem hanc admittendam arbitremur, ut potius inde recte concludamus, solam ingredientis aëris viam esse oesophagum, istumque deinde per vasa lactea sanguini admisceri.

§. XVI.

Jam vero facile concipi poterit, quomodo aer infectus, pro particularum diversitate, diversos quoque possit seminare morbos. Cum enim omnis aer, corporis interiora ingrediens, per ventriculum & intestina viam capiat, facile judicari poterit, aërem multis naturae nostrae insensibilis particulis refertum, necessario esse perniciosum. Etenim jam supra demonstratum est, miasmata haec, quae jam memoratos morbos producunt, venenorum modo agere. Horum vero vis nociva in eo consistit, ut arrodendo, pungendo, lancinando tunicas intestinalium, spasticas in illis stricture, & crispaturas efficiant, quae variis anomalis motibus & gravibus morbis, inflammationibus, sphacelationibus causam praebent. Tum etiam miasmatum horum effectus hac ratione se exserere potest, ut, quoniam saepius sulphureae, putridae, fermentescibilis indolis sunt & in fluida agunt, horum crasin invertant & putredinem impuritatemque illis inducant. Verum enim vero quamvis tantum haec duae epidemiorum morborum causae generales emineant, illae tamen tantum inter se differre possunt, ut diversissimos progignere queant morbos. Cum enim talium miasmatum vis nociva diversa sit, pro diversa illorum textura, ex supra dictis vero satis liqueat, quam varia eorum configuratio, dispositio, mixtioque esse possit, tot diversorum morborum generatio amplius non est miranda. Perquam notum enim est, venena etiam in corpus adsumpta, non eodem modo potentiam suam exerere. Arsenicum enim vomitionibus, enormibus convulsionibus, atrocissimis tormentis & sphacelatione tunicarum intestinalium necat. Contra mercuriale venenum peculiari agit ratione in fauces, earumque glandulas, eas constringendo & exulcerando.

ando. Semen daturæ infaniam parit. Pari ratione à diversa causæ indole ac schemate diversitatem horum morborum dependere, dubio caret.

§. XVII.

Postquam itaque possibilitatem ostendimus, quomodo epidemici morbi generari possint, quæ consistit in varia particularum in aëre facta configuratione, unde quoque vassî pro diversitate ipsarum in corpore effectus dependent; jam quoque facile, de eminentibus causis, si quæ inveniuntur, quæ talium nocivarum molecularum productioni inservire possunt, perniciosos fecuturos effectus prædicere possumus, vel etiam si jam præcesserint, tragœdialique suas ludant, facile ab eis derivari queunt, quæ causæ etiam plerumque reperiuntur. Sic post Suecorum in Polonia victorias secuta fuit pestis. Accidit enim post magna prælia, ut interfectorum hominum cadavera, superficialiter valde humentur, ita ut tam ab aqua pluviali quam a solis calore facile attingi atque ad corruptionem præparari possint. Idem Wratislaviensia *naturæ & artis* testantur de febribus exanthematicis, malignis, petechialibus, post insignem insectorum copiam exortis. Ac de inundationibus quidem LANCISIUS Italus celeberrimus annotavit; quodsi Ægyptorum regio aliquando plus quam ordinario modo a Nilo fluvio inundetur, inde propemodum semper pestis quædam propullulet. Ratio in promptu est: uti enim in hominibus in corruptionem abeuntibus fit, ut magna effluviorum sulphureorum, volatilium, putridorum copia in aërem disseminetur; ita etiam ab infectis extinctis eorumque excrementis hoc accidit. Nec minus id contingit in magnis inundationibus; aqua enim post illas stagnans, quoniam non tam cito in vapores redigi, neque a ventis diffilari potest, in putredinem transit. Nimirum experientia docet, aquam quantumvis purissimam si per aliquot temporis spatium a commotione vacua quiescat, tantam putredinem adsumere, ut ejus odor vix sufferri possit. Ex hisce itaque omnibus effluviis non nisi perniciofa miasmata gigni possunt.

§. XVIII.

Cave vero existimes, in generandis ejusmodi morbis, semper moleculas nocere & ad generationem eorum sufficere. Sed etiam alia adhuc sunt in aëre, quæ multum conferre possunt ad productionem horum morborum. Etenim ipse quoque aër pro diversa ejus gravitatis & elasticitatis conditione, corpora animantium ad diversimodas mutationes disponit. Quod ut eo clarius liqueat, opus est ut antea usum aëris paulo penitius curatiusque perscrutemur. Hoc fluidum catholicum itaque, non tantum eo inservit, ut pulmones attollat, & sic per eos circulum sanguinis promoveat, verum etiam ejus præsentia in vasis non est minoris momenti. Aër enim quod gravitate sua vehementissime corpora, ab ipso destituta, comprimat, prolixè satis ostendunt experimenta instituta cum scypho ab aëre evacuato, cui orbis vitreus super impositus fuit, qui vero ab incumbente aëre in minutissimas partes disrumpitur. Adeo valida hæmisphæriorum ista evacuationum compressio! Hinc patet, quod nisi aër in vasis adesset, illa eadem ratione comprimerentur, unde quoque sanguinis & humorum circulatorius motus plane impeditus sisteretur. Jam autem vitalis hic circulus imprimis dependet ab aëris gravitate & elasticitate. Aër enim ille venis inclusus, si ab interno calore expanditur, impedit, quo minus aër externus molestus nobis esse vasaque comprimere possit. Atque hac vi expansiva, intestinus

fluidorum motus, illorumque attenuatio & spirituscentia conservatur. Præterea hæc expansio dum id efficit, ut vasa in figura circulari maneant, eorumque fibræ nerveæ sic in situ aptissimo ad commodum fluidi nervei tranfluxum existant, cordi, arteriis, ac fibris musculosis vigorem, motum, robur conciliat. Verum enim vero ad hæc quoque non parum externus aër contribuit; solus enim internus aër, tanta vi sua expansiva, nimis expansurus esset vasa, ita ut omnis fibrarum nervearum motus mox defineret. Inde externus, gravitate sua & pressione ubique æquabili, fibras, ne nimium extendantur, reprimat. Atque hoc quidem sequenti ratione contingit. Si enim interni aëris rarefactio & externi pressio recte se habent, id est, si eorum actio & reactio sunt æquales, circulus sanguinis, indeque dependens tota œconomia vitalis viget. Ex hæcenus dictis facile adparet, fluidum illud aëreum esse ipsum vitæ ac sanitatis fontem ac fundamentum. Nec minus patet, qualia inde detrimenta capere debeant animantia, si in hac interna expansione & pressione externa, æquilibrium vacillet. Ad hoc vero æquilibrium servandum nullus aëris status accommodatior est sicco & sereno. In hoc enim maxima elasticitate & vi expansiva præditus est aër, unde fit, ut valde subtilis & agilis existat, ita, ut motum intestinum, attenuationem, & divisionem humorum in minimis etiam partibus facile conservare possit, ideoque hic optimus & saluberrimus est.

§. XIX.

Contra ab humido aëre plane quoque contraria prædicamus. Hic enim ab incumbentibus & in illo fluentibus humiditatibus valde est compressus, nec tanta elasticitate gaudet, uti aër siccus. Testantur hoc barometra, in quibus mercurius in hoc aëris statu valde descendit, quod ex nulla alia ratione contingit, quam a diminuta vi elastica. Talis igitur aër quod minime aptus sit ad robur in fibris nerveis servandum, ex antecedentibus clarum est. Contra vero aër si humidus est, fibræ fiunt flaccidæ, indeque tonus & robur vacillat. Consequens est, ut etiam circulus sanguinis turbetur ac detrimentum capiat. Turbato vero circulo sanguinis inutilia ab utilibus non separantur, & ita se- & excretionis negotium languet, quo languente sanitas etiam est læsa. Inde enim impuritates multæ in vasis colliguntur, & lente progrediens sanguis ferum suum acre dimittit; quodsi in partibus glandulosis capitis vel in ejus membranis decumbat, gravedines, raucedines, tusses, coryzas profert. Non vero solum hi capitis affectus inde oriuntur, sed etiam omnes cæteri morbi, qui a depravato se- & excretionis negotio, circuloque sanguinis, ob atoniam fibrarum nervearum, non recte se habente, exurgere possunt, ut febres quotidianæ, tertianæ, quartanæ aliæque erroneæ febres, ab aëre humido producuntur. Quinimo excrementa remanentia gravissimos etiam morbos putridos, malignos, contagiosos facillime gignere possunt.

§. XX.

Humidum aërem magnam generi humano noxam adferre, inde confirmatur, quod, qui in editioribus locis habitant, montani, rarissime morbis epidemicis sint subjecti, sed fere semper inconcussa sanitate ævum transigant; cum e contrario illi, qui in depressioribus locis, atque in planitie domicilia habent, sæpissime morbis istis adficiantur, & multo magis adhuc illi, qui in locis paludosis commorantur, utpote qui quotannis fere morbis epidemici-

cis cruciantur. Ratio hujus rei in aprico est. Aërem enim in altioribus locis nunquam tam gravem & compressum existere posse, uti in humilioribus, & consequenter illum majori elasticitate præditum esse, ex principiis physicis facili negotio demonstrari potest. Hoc vero existente leviori magisque elastico in altioribus locis, tonus & robur fibrarum etiam melius conservatur, unde sanguinis & humorum circulus, qui ab eo dependet, etiam melius se habet. Illius vero bona constitutione quia sanitas subnititur, sequitur etiam, ut montium incolæ, saniores aërem haurientes, ab epidemicis hisce morbis non tam sæpe adfligantur. In paludosis vero & simul depressis locis habitantibus perfamiliares esse hos morbos epidemicè grassantes, ex iis, quæ antea dixi, jam abunde liquet. Illi enim in aëre degunt, ubi non tantum continui adscendunt vapores, qui aeris vim elasticam valde imminuunt, verum etiam, ob paludum stagnationes, putridæ fiunt aquæ. Hinc fit, ut aer putridis ibi exhalationibus repleatur, quæ quoniam cum aëre, alimentis incluso, quotidie ingeruntur, fieri non potest, quin earum regionum incolæ, varii generis morbis, pro diverso vitæ genere, sint obnoxii. Præterea sensibilitatem aeris humidi etiam corroborant præfagia animalium, de ingruente pluvia, quæ ante illius adventum, varios insolitos motus, & vociferationes edunt. Has variationes ab aeris diminuta vi elastica provenire arbitror, ita ut eorum fibræ flaccidæ evadant, & fluidorum circulus impeditior reddatur, ipsaque animalia inde angustia quendam sensum percipiant, qui ea ad tam infuetos motus disponit.

§. XXI.

Tempus brumale etiam valetudini nostræ non magnoperè conducere, vel inde elucet, quod ad vitam calor naturalis, isque in toto corpore existens, necessarius sit, cum contra in mortuis omnis calor cesset. Atque id vel lippis & tonsoribus notum est, quod corpus frigidum, si tangat calidum, huic etiam frigus inducat. Id etiam ab aere frigido fieri necesse est, cujus quidem rei experientia etiam testis existit. Aer vero quia corpora nostra undique circumfluit, si acri frigore adstringatur, uti in hyeme contingit, tunc etiam extremam corporis nostri corticem, quæ multo calidior est aere, frigore quodam adficere debet. Quo illi inducto, non tantum fibræ universi corporis contractæ evadunt rigidiores, ac consequenter pori occluduntur, sed etiam quoniam exteriora corporis ex meris propemodum vasis consistunt, humores in illis contenti & sanguis in pulmonibus coagulantur. Hos igitur frigoris effectus maximum sanitati hominum detrimentum adferre quis negabit? Obstructis enim poris impeditur excretio feri excrementitii, quod si ad partes glandulosas capitis manet, ibique stagnet, tussim, raucedinem, gravedinem, coryzam, progignit. Quodsi vero ad membranas propellatur, tunc intra costas pleuritis spuria, inter membranas muscutorum rheumatismus, inque capitis membranæ maximi dolores oriuntur. Si vero in pulmonum vasculis sanguis coaguletur, ab aere frigido attracto, ita ut in illis subsistat, tunc vel inflammatio superficialis, ut pleuritis vera, vel profundior, nempe peripneumonia nascuntur.

§. XXII.

Venio nunc ad aerem æstivalem, quem etsi facile quis pro minus apto ad morbos epidemicos procreandos existimare possit, tamen certum est, eum non minus varios epidemicos morbos excitare posse. Quoniam enim natura nulla amat extrema, ideo etiam aer nimis fervidus, æstivus, naturæ nostræ

haud amicus esse potest. Hoc enim motus humorum intestinalis valde increfcit. Is quo vehementior est, eo major etiam copia bilis & falsi excrementi, generatur. At vero quia in magno æstu externus aer maxime levis est, expansusque, internus quoque aer non sufficientem resistantiam habet ab externo, atque ita vim suam expansivam exercens, mirum distendit vasa, inde fit, ut fibrarum tonus majorem in modum debilitetur, nec expulsio excrementorum rite succedat. His igitur remanentibus, impuritatis labe inquinantur humores. Unde postea fit, ut secretoria illa, quæ laudabiles succos secernere debebant, jam impuros in se recipiant. Quodsi itaque succus pancreaticus hujuscemodi sordibus excrementitiis contaminatus sit, ac bilis eis scateat, & ambo duodeni ac ventriculi cavitates ingrediantur, ibique diutius paulo morentur, tunc facile corruptionem quandam induunt. Hæc excrementa vero corrupta, lancinando, ac inflammando has nerveas partes, partim febres conciliant ardentes, partim tertianas intermittentes, tam exquisitas, quam nothas; vel simplices vel continuas, nec minus hæc materiæ dysenteria ansam præbere possunt. Ab hisce acribus enim sordibus alvi profluvia oriuntur. Non tantum vero hæc sordes & impuritates falsæ, biliosæ, in duodeno morbos producant, sed etiam aliis in locis acerbos cruciatus efficiunt. Sic in auribus excitant dolores, in oculis lippitudines, &c. & præsertim in melancholicis sapissime febres quartanas: sed hic generaliter tenendum, quod transpiratione insensibili impedita, multum etiam ad hos morbos generandos contribuat, quod contingit, si quis post æstum diurnum vespertino vel nocturno aeri se exponat.

§. XXIII.

Restat, ut de subitis aeris mutationibus nonnulla adjiciam, quæ profecto in procreandis omnis generis epidemicis morbis sunt fecundissimæ. Aer enim ille internus, pro varia externi constitutione, subitis etiam mutationibus est obnoxius. Hinc aer valde mutabilis insignes etiam in corporibus nostris mutationes producit. Aere enim externo mox existente calido, mox frigido, mox humido, mox sicco, fieri non potest, quin internus etiam mox expandatur, mox comprimatur, & consequenter sanguis mox valde fluidus sit, mox vero magis crassus. Hisce vero anomalis motuum & inordinato fluidorum circulo, necesse est, ut se- & excretionis negotium valde turbetur & invertatur. Quo turbato ex antecedentibus satis clarum est, qualia inde detrimenta in corpus redundant. Ac quoniam ab inversione hujus negotii fons & origo omnium fere morborum dependet, non mirandum, aeris statum valde mutabilem, tot imo fere omnium epidemicorum morborum auctorem esse posse, veluti coryzae, tussis, rheumatismi, dolorum, inflammationum, alvi fluxionum, dysenteria, febrium intermittentium, tam tertianarum, quam quartanarum, nec minus febrium acutarum, exanthematicarum, putridarum, malignarum &c. quorum omnium, & plurium adhuc morborum hic aeris status fons autorque est.

§. XXIV.

Ex iis, quæ adduxi hætenus, facile explicari poterunt illæ ventorum prædicationes, quorum alii salubriores, alii vero insalubriores dicuntur. Ventus enim nihil aliud est quam commotio aeris, a diversa ejus expansione in aliis regionibus orta. Atque id quidem hoc modo contingit. Si enim in quadam regione magnus æstus, in altera vero paulo remissior caloris

caloris gradus, imo aliquando frigus adest, tunc aer, qui expanditur, successive in alias regiones pro parte pellitur, quarum aer inde augmentum capit, & vi elasticitatis comprimitur, atque tunc ventus gignitur. Alio modo id contingit, si in ferventioribus regionibus ingens aestus cessat; ac tunc quidem aer, in alia regione compressus, continuum se expandendi fervans nisum, in aerem attenuatum ac levem majori cum vehementia irrumpit, quæ commotiones ventorum nomine veniunt.

§. XXV.

Cum igitur ventus nihil aliud sit, quam aer ex una regione in alias cum impetu transiens, hinc palam est, talem aerem, qui in illa regione existit, ad nos advehi. Aerem vero, pro diversitate regionum, diversis modis esse constitutum, tam certum est, quam quod certissimum. Etenim aer illarum regionum, quæ siccae sunt, ubi nulla adsunt maria, pauci lacus ac paludes, etiam aere sicco gaudent. Contra maritimus aer humidus valde est, ob vapores, qui nulla intermissione e mari exhalantur. Igitur ventos ex siccis regionibus, dum aerem siccum ad nos ferunt, salubres esse debere ex antea dictis patet. Contrario vero ex locis maritimis venientes longe insaluberrimi esse debent. De hac materia quia *Excell. Dn. HOFFMANNUS* peculiarem conscripsit dissertationem, inde nos fusius de ea differere superse-
demus.

§. XXVI.

Dum ad finem properare me jubent paginarum angustiae, sentio tractandum mihi adhuc esse, de modo, quo hæ memoratae afflictiones, ab aere ortæ, evitari possint. Ne vero aliquid agam, quod rationi minus congruat, inde secundum diversam aeris constitutionem atque hinc pullulantes effectus procedam. Ac quoniam primo sermo fuit de aere, particulis no-
civis referto, & quidem de acribus, causticis, tum etiam de putridis, fermentescibilibus, sequitur jam, ut regulam hic aliquam generalem ponam. Tenendum igitur est, quod, quia antea dictum est, particulas istas sæpissime cum rore ad nos advehi, omnia vegetabilia, fructus, olera, probe sint abstergenda, antequam comedantur. Quod si vero miasmata in aere inferiori natent, tunc ille, quantum fieri potest, corrigendus accensione rerum resinifarum, ac foetidarum, quæ spiculas particularum causticarum infringant, vel eas distribuant, quod vero difficillimum est, ob nimiam eorum subtilitatem. Inde in omni aere nebuloso contaminato commendandum est, ne quis in libero aere sputum deglutiat, dum in illo particulæ tales in aere hospites facile nidulantur. Inde etiam convenit valde usus tabaci, eam ob causam, ut sputum infectum ejiciatur. Cæterum maximopere ad præservationem commendanda est exacta diæta, ne primæ viæ cruditatibus obruantur, & sic corpus ad ægotandum magis disponant. Si vero illæ adsunt, tunc corpus ad præservationem, vel emeticis, vel laxantibus, expurgandum est. Neque

minus transpirationis insensibilis cura gerenda est, ut illa semper recte sit constituta.

§. XXVII.

Quod ad præservationem in aere humido pertinet, in illo optimum est, ut habitaculum in altioribus con-
clavibus quæretur, quoniam in editioribus locis purior existit aer, neque tot repletus est humiditatibus, ac in humilioribus. Melius hoc adhuc est in rure, quam in urbibus, propter multas exhalationes, quæ hic in aerem adscendunt, eumque humidiores adhuc reddunt. Ac quoniam, quod supra ostendi, humidi aeris is est effectus, ut tonum & robur fibrarum destruat, inde maximopere cavendum ut hæc, quantum fieri potest, conservetur, eaque omnia fugiantur, quæ destructionem istam adaugere queunt. Neque vero melius quodquam confortans invenitur vino bonæ notæ, quale est Rhenanum. Cavendum vero est, ne nimius sit vini usus, sed moderatus. Omnis enim excessus in rebus non naturalibus valde noxius est.

§. XXVIII.


Venio jam ad detrimenta ex aere valde frigido venientia. Atque hic ratio dicitur, quod facillime præserventur, si corpus aeri illi haud nimis exponatur, sed vestibus probe muniatur. Caveas etiam a frigido aere, si corpus antea calefactum valde sit, quoniam sanguis tali modo facillime incarceratur, unde lethales morbi proveniunt. Convenientissimum vero cum infusis calidis theiformibus transpirationem insensibilem conservare.

§. XXIX.

In aere fervente cum jam nimius sit præsens motus, ille non est augendus nimis corporis commotionibus, multo minus corpori, ab exercitiis vel aliis commotionibus calefacto, ingerendus est potus frigidus, qui sæpissime pleuritides veras, peripneumonias, imo ventriculi inflammationes produxit. Convenit vero, post corporis commotiones, infusis calidis uti quo transpiratio bene succedat, & particulæ falsæ, biliosæ, in fortiori sanguinis motu generatæ diluantur, ac per cutis poros aliaque emunctoria ejiciantur.

§. XXX.

In mutatione aeris inæquabili ac subita, quia œconomia vitalis mire quantum turbatur, & transpiratio impeditur, illius etiam cura imprimis suscipiatur, necesse est. Neque vero melius conservatur, quam si caveamus ab ingressu in publicum, atque ita omnem excessivum aerem vitemus. Sic dissuademus matutinum, vespertinum, & nocturnum, dum ille etiam tanquam aer subito mutatus considerari debet, quia ab illo diurno multum differt. Ac sicuti in omnibus epidemicis morbis temperantia diaphoretica, ita etiam in hoc statu, ad eos præcavendos, magni usus sunt. Hæc de aeris potentia dicta sunt.



DISSERTATIO MEDICA

D E

PLETHORA INSUFFICIENTE
MORBORUM CAUSA.*Primum edita Anno 1713.*

P R O O E M I U M.



UO maxime sunt, quæ universæ artis medicæ naturam complectuntur, videlicet, scientia & prudentia: illa ad theoriam medicam sive accuratam corporis humani ejusque læsionum cognitionem pertinet; hæc vero ad praxin & artem exercendam per quam necessaria est. Sicut verò scientia physica rerum & effectuum naturalium indolem causasque rimatur & distincte eas proponit ac demonstrat: ita scientia medica non modo vitæ & sanitatis naturam, sed & variarum corporis læsionum earumque causarum generationem, quæ potest fieri solertia, inquirat & explicat, neque minus detegit, quæ prompta in auxilium & removendis morborum causis sint idonea. At prudentia de hisce applicandis est sollicita, ut pro differentia circumstantiarum conveniente methodo, i. e. recto ordine, loco, tempore, mensura, regimine in ægrotantium salutem exhibeantur. Apparet ex eo, scientiam ratione ordinis prudentia esse priorem, quæ tanquam illius pedissequa videtur; siquidem prudens remediorum usus & declinandus abusus supponit utique exquisitam causarum morbi notitiam, sine qua praxis medica penitus infida & fallax neque minus intuta ac periculosa est. Nam qui bene morborum causas intelligit, is etiam bene sanat. Videtur exinde quam necessaria ad praxin bene fundandam sit solida & bona theoria. Plurimum itaque refert, nosse ortum & generationem morborum & quomodo ipsi fiant. Nihil jam dicamus de abditis morborum causis, quarum natura ferme incomprehensibilis est, ut sunt, quæ pestem & plures epidemicas afflictiones faciunt, vel quæ phantasie morbos mirabiles proferunt aut quomodo ab animi adfectu universum corpus vehementer pati possit; sed de evidentioribus & sensui & rationi obviis morbificis causis sermo noster erit, cujus generis est plethora sive immodica sanguinis copia, quæ ut nonnullis placet morborum plurimorum, a quibusdam verò paulò infrequentior, causa judicatur. Operæ itaque pretium existimavimus paulo diligentius, quid plethora possit, quid non possit, in morbis generandis inquirere. Id quod cum præsentī inaugurali specimine aggredi institimus, Benignissimum Numen, ut nobis suam gratiam ac benedictionem elargiatur, est, quod humillima mente ac demissa prece efflagitamus.

§. I.

Prius verò quam hujus prænobilis materiæ tractationem suscipiamus, opus erit, ut vocum ambiguitatem removendo de nomine Plethoræ conveniamus. Non vero per plethoram hoc loco absolute ingentem sanguinis quantitatem intelligimus, sed eam tantum, quæ superflua, ad tuendam vitam ac sanitatem inutilis, & potius noxia est. Siquidem sanguinis copia in se & principaliter non sanitati vel vitæ officit, sed tunc demum nocet, quando non libere & prompte per universi corporis canales fertur, & elaterem vasorum nimia distensione minuendo

impeditiorem ejus motum efficit. Quare is non statim plethoricus dicitur, qui magnam sanguinis copiam in vasis obtinet, quia, si ille ob vasorum capacitatem & fibrarum robur libere & expedite fertur, minus meretur plethoræ titulum, quam ubi minor ejus quantitas in alio corpore ob vasorum exilitatem & languidam fibrarum vim tardè admodum progreditur.

§. II.

Secundum est, ut animadvertamus non omnem succorum abundantiam, quæ naturæ est oneri & segni progressu morbis progignendis lenocinatur, plethoram debere salutari, sed eam tantum, ubi sanguis bonus

bonus i. e. bene mixtus & gelatinosus, nutritivus exsuperat. Copia enim sanguinis tantum ex alimentis quæ multum gelinosi succi possident, ut sunt ex animantibus sumpta, prompte fit. Nam recte secundum HIPPOCRATEM lib. 4. de morbis §. 10. amplior in corpore generatur sanguis postquam bibit aut comedit homo aliquid, quod sanguineum est. Deinde monendum est, non omnem impeditiorem sanguinis humorumque motum fieri a plethora. Incidit enim sæpenumero, ut ob fibrarum tonum valde languidum ab aliis causis factum per universum corpus interdum in certis partibus sanguis & succi subsistant, stagnent & tardius provolvantur: qualis status non apte & proprie audit plethoricus. Sed per plethoram, quatenus infert morbum, eam sanguinis copiam intelligimus, quæ fibrarum robur ac vigorem nimia resistentia debilitat sicque languidiorem sanguinis universi circulum facit.

§. III.

Veteres & maxime Galenici plethoram ad vasa & ad vires distinguebant; cuius differentiam cum FERNELIUS Cap. I. lib. 2. de venæ sectione perspicue proponat, non inutile judicavi hunc locum inferere. Plethora ad vasa est, quum succi in qualitatis mediocritate positi, supra justam & naturæ congruentem mensuram accumuluntur & crescunt; tum corporis universa moles intumescit & venæ supra modum plenæ tensionis sensum invehunt, omniaque membra, præsertim ab exercitatione, exporrigi videntur; hæc constitutio, tametsi bonis conferta est humoribus & vires obtinet robustas, hoc tamen malum circumgerit, quod ad immodicam pervenit redundantiam, quæ in gravia periculosa præceps ferri solet; hæc simpliciter & absolute plenitudo censetur, quam etiam ad vasa jam trito & apud omnes pervulgato nomine celebrant, quod amplam vasorum capacitatem prorsus impleat, etiamsi vires non premit. Alterum genus est plenitudinis, quæ ad vires refertur, in qua tametsi vasa non tument, nec copia distenduntur, plus tamen utilis sanguinis & alimenti continent, quam à natura regi gubernarique possit; mediocre alimentum sæpenumero infirmiori natura molestum est & grave, quod licet per initia sit purissimum, diu tamen vix tale persistit; sed à nostri caloris gubernatione destitutum, tempore dierumque numero corrumpitur, sitque morborum causa. Recentiores hanc distinctionem nolunt admittere & pro imaginaria habent. vid. CRANIUS in Operibus posthumis. WALÆUS in meth. med. scribit, se nunquam plethoram ad vires invenisse. Et CASPARUS HOFFMANNUS lib. 3. institut. p. 53. unam saltem ad vasa plethoram admittit, ubi nempe sanguis in tanta copia est, ut venæ & arteriæ continendo illi non sufficiant & plus sanguinis adest quam natura subjecti ferre potest. Veruntamen distinctio hæc, si res recte explicetur, tolerari potest. Sunt enim corpora, quæ capacia & magna habent vasa; sunt, qui minora & exiliora foveant. Si nimius sanguis in capacioribus consistit, fit plethora ad vasa; si in angustioribus dicitur, ad vires. Atque adeo & major & minor sanguinis quantitas pro diversa corporum natura plethoram gignit, quæ in utroque casu vires onerat morbumque facit.

§. IV.

Posthæc plethoram autores diducunt in puram & exquisitam, item in impuram ac notham, sive mixtam; prior fit, quando bonus & nutritivus sanguis in vasis est; altera quando sanguis impurus & corruptus factus est. Veteres cacochymia vocabulo id indicant. Equidem nequit aliter contingere, quin sub sanguinis segniori progressionem non modo ipse

spissior evadat, sed & ob excretionis negotium languidius factum plures impuræ partes remaneant, unde utique plethoram paulatim sequitur cacochymia: sive sanguinis boni & benigni transitus fit in impurum. Respexit ad hanc rem HIPPOCRATES, qui lib. 3. de Diata §. 15. ita scribit: ubi labores superantur a cibis talia homines patiuntur. Incipiente repletionem somni largi & dulces ipsis contingunt & interdum etiam dormiunt, cum vero non suscipiat amplius corpus repletionem, secretionem intro remittit propter circuitus læsionem, quæ sane secretio contraria alimentis animam perturbat, quo tempore non amplius jucundi ipsis sunt somni, sed necesse est hominem perturbari. Cum igitur ad hæc pervenerit homo prope est ut ægrotet. Hoc loco eleganter SAPIENTISSIMUS vir innuit, sanguinem bonum tempore impurum, non mediocri cum sanitatis detrimento fieri.

§. V.

Tum monendum etiam duximus, non quamlibet repletionem a cibis factam plethoram sive sanguinis abundantiam esse dicendam, tametsi quævis impletio nimia inutilis noxiaque corpori sit, sed eam demum, quæ fit alimentis boni succi, sub vita otiosa, tranquilla, sine curis, sine labore & exercitatione, in temperato corpore, somno moderato, verno præsertim tempore: vel quæ post consuetæ sanguinis excretionis salutaris intermissionem contingit. Quapropter incommoda illa, quæ HIPPOCRATES lib. 3. de Diata a nimia repletionem orta recenset, non omnia plethoræ, sed nimia succorum impuritati, eorumque motui impeditiori & stagnationi debent adscribi. Igitur neque obesi, neque qui repleti sunt impuris succis, recte & proprie plethorici nominantur, sed, qui bene temperatum & nutritivum ac ratione mixtionis laudabilem sanguinem in vasis custodiunt nimium. Hic enim, cum cordis & vasorum elaterem nimis premit & distendendo vehementer debilitet, minus prompte atque libere circulator, sed tensivum, gravativum & oppletorium sensum cum lassitudine infert, difficilemque spiritum reddit, maxime sub corporis majori motu & qualicunque exæstuatione. De tali itaque plethorico statu in sequentibus noster erit sermo, & de hoc quos morbos ingeneret & quinam cum hoc statu parum vel nihil commercii habeant, paulo fusius infra tractationem instituemus.

§. VI.

Hiscæ expositis haud difficili negotio adhuc inter nonnullos agitata controversia decidi poterit, an sanguis bonus abundans causa morbi fieri possit? Negavit id quam maxime HELMONTIUS, eo quod talis sanguis sit vitæ æque ac virium thesaurus, & quod bonum non possit peccare copia. At vero occasio hujus erroris ex ignorantia sanguinis circuli, qui olim laudato viro incognitus fuit, videtur profuisse, utpote bonus sanguis non æque is densus est, qui bene & temperate mixtus gelatinosus & ad nutriendum idoneus est, sed is maxime bonus dici meretur, qui motum vitalem progressivum sustinet, i. e. qui libere, prompte ac expedite per omnis generis tubulos, colatoria & emunctoria circumvolvitur. Sub quo regulari motu omnes actiones corporis & animi s. n. & ordinem recte se habent. Ecquis vero dubitabit, optimum etiam sanguinem ratione mixtionis suæ ob bona alimenta aliasque causas mole ita crescere posse, ut elater cordis & vasorum systalticus majori facta resistentia minuatur, adeoque fluidorum motus fiat lentior & impeditior. Etenim instar axiomatis mechanici tenendum, actionem & reactionem corporum inter se esse

æqualem. Ex quo fluit, quod quo major sit resistentia a sanguine in corde ac vasis, eo minor eorum actio, ac motus fluidorum fiat.

§. VII.

Evoluto sic plethoræ nomine ac indole, sequitur jam, ut melioris perspicuitatis ergo, quid per causam morbi intelligamus, nostram sententiam exponamus. Neque vero in ulla disciplina causarum nexus & ordo tam necessarius est, quam ubi de morborum generatione ortu ac causis tractatio instituitur. Siquidem plura ac varia sunt, quæ intrinsecus & extrinsecus corpus nostrum afficiendo ad morborum productionem symbolum suum conferunt. Quo ordine vero id succedat & quæ remotius quæque proximius ad morbum tanquam effectum contribuant, scire ante omnia oportet Medicum. Ex hujus enim rei ignorantia non leves etiam in praxin ipsam errores influunt. Igitur, quæ potest fieri brevitate causarum morbosarum ordinem recensemus. Nolumus vero in hanc rem inanes Metaphysicorum & Terminologorum loculos excutere eosque imitari, qui non ex ipsis rebus sapiunt, sive qui minus ex realium effectuum distinctione distinctas causas constituunt, sed potius neglectu naturæ ejusque operationis ordine, innumeros terminos & distinctiones causarum mente sibi fingunt, quas postea nec clare explicare, nec cominode rebus applicare norunt: quare distinctas causas ex ipsis rebus distinctis eruamus. Primo itaque notandum est, omnis morbi interni formalem causam consistere in eximia læsione & perturbatione actionum corporis nostri, quæ in vitales, animales & naturales vulgariter solent dispesci. Harum læsionum causa immediata, qua scilicet posita læsio ponatur, est turbatus fluidorum circulus, qui secundum naturam liber & æqualis est. Cum vero fluidorum in corpore nostro progressionem solidorum tonus robur ac pulsus unice moderetur; hinc facile patet causam proximam circuli sanguinis læsi in pulsu vasorum & tono fibrarum ac membranarum esse quærendam. Etenim motus in systemate vasculoso dicitur pulsus; in fibroso & membranoso tonus sive elater: uterque secundum naturam in proportionata & reciproca compressione & dilatatione sive systole & diastole consistit. Hujus motus enormis læsio proximie lædit corporis actiones & morbum producit. Si que nimium pulsus seu motus systematis vasculosi intenditur, fit febris: si in genere musculofo nimis augetur, fit convulsio; quando vero in membranosis nervosis & fibris musculosis tonus & elater fit auctior, spasmus nascitur; si vero ille tonus tam in genere membranoso & musculofo quam etiam vasculofo admodum se remittit sive laxatur, atonia sive resolutio fit. Ad hæc causarum quatuor proximarum genera omnes morbi referri possunt: sive in omnibus morbis læsio quædam circa motum solidorum observatur. Ad istiusmodi vero causas morborum principales plures etiam serie & numero concurrunt, quæ mediarum nomine veniunt. Et hæc rursus proximiores vel remotiores sunt; priores proximius ad læsionem motum solidarum partium, insequentes vero paulo remotius sive magis dispositivæ agunt. Proximiores sunt vel immateriales vel materiales. Illæ quæ motu celeriter & vehementer actionem solidarum alterant, uti sunt animi vehementes impetus & affectus, cupiditates fortesque impressiones, quæ jure principem locum inter causas morbiferas occupant. Vel sunt materiales: hæc rursus dividi possunt in eas, quæ summa tenuitate & agilitate partium vel mole ac sensibili qualitate agunt: illæ virulentæ sunt, has vero vel co-

pia vel defectus aut intemperies humorum absolvit.

§. VIII.

Causæ remotiores agunt magis dispositivæ & numero plures simul concurrere debent ut causa proxima morbi vel mediata proximior elaboretur: hæc vero vel intra corpus vel extra hoc ipsum quærendæ sunt. Illæ dicuntur naturales ut sunt ætas, sexus, temperamentum, habitus corporis, a parentibus per hæreditatem vel etiam a morbis prægressis in partibus relicta prava dispositio, consuetudo. Hæ non naturales quia extra corpus nostrum sunt, neque ipsius corporis naturam constituunt, appellantur. Et hæ secundum nostram mentem sunt elementa, ut æther, aer, aqua. Secundo alimenta tam solida, quam fluida. Tertio, excreta & retenta, quando ea quæ debebant retineri excernuntur, & contra excernenda retinentur. Quarto: motus, labor & exercitatio corporis vel nimia quies aut otium. Quinto vigiliæ & somnus. Deinde vitæ genus, quod utique ad morborum generationem multum tribuit & merito locum sextum qui secundum Galenum affectibus animi tribuitur, inter res non naturales occupat.

§. IX.

Hi sunt a nobis distincti morbificarum causarum constituti fontes, ubi quisque mediocri judicandi facultate imbutus facile intelligit in theoreticis neque minus in practicis quoad remediorum indicationes hos causarum ordines eximio gaudere usu, neque inter se invicem esse confundendos, quod sæpe sapius ab iis, qui in pathologicis usque eo quædam memoriæ prodiderunt, factum esse memini. Evidenter quoque ex dictis cognoscimus, quod una causa remota non producendo morbo sufficiat, sed quod plures simul, antequam generetur proxima causa, conspirare debeant. Atque adeo elici jam potest vera ratio, cur morborum detur infrequentia, sive quare homo per omnem ætatem rarius, quando inspicimus ad ingentem morborum eorumque causarum classem, ægrotet & perpauca saltim ægitudines experiatur. Quodsi vero una causa ex dictis proximioribus & remotioribus satis potens esset proferendo morbo, consequeretur, ut innumeris malis corporis homo afficeretur, quod tamen minus accidit, eo quod plures sic dictæ mediatae causæ indole subinde dissimiles minus sæpe in unum effectum conspirent. Non est igitur ille error mediocris, qui apud Practicos frequentius occurrit, cum ex una causa e. g. acido vel viscido, plethora, intemperie salsa & acri, bile, acido & pituita ut SYLVIO placuit, vel ex obstructionibus omnes & singulos derivare morbos contendunt. Quo magis etiam vulgus delinquit, quod cum videat ab assumpto acido vel dulci vel inflante cibo pathemata quædam excitata, illa sumpta horum causas protinus sibi imaginetur.

§. X.

Hiscæ expositis jam facile ac promptum erit ostendere, nimiam sanguinis redundantiam solam neque satis sufficientem neque tam frequentem, ut non nullorum nostris temporibus fert opinio, morborum esse causam. Equidem non negandum est, plethoram morborum causis utique esse annumerandam. Nam siquando nimius in vasis congeritur sanguis, membranarum, ex quibus ipsa constant, elater valde debilitatur; quo fit, ut tardius fluida progrediantur: ex lentiori vero progressu opifusus evadit humor, recrementorum secretio perquam necessaria impeditur & ita interposito

terposito tempore non potest non pravam intemperiem sanguis contrahere. Deinde plethora gravativum & tensivum corpori inducit sensum, ejusque membris languorem & lassitudinem affert, maxime omnium vero difficilem respirationem accedente exæstuatione vel nimio motu parit. Tum sanguis nimium in vasis congestus & tardius progrediens hinc inde in vasis præsertim venosis & ubi ejus recursus fit difficilis, stagnat: & hoc ipsum contingit potissimum in venæ portæ multis & sinuosis ramificationibus. Præterea in hæmorrhoidalibus & uterinis vasis, per quæ in universum ob perpendicularē situm difficilis est sanguinis ascensus, facile stagnat, vasa infarcit & distendit, liberamque sic circulationem impedit. Sanguis autem hoc modo in vasis stagnans & subsistens in activioribus subjectis motrices membranarum & musculorum fibras ad spasmos sollicitat, quos pressio pede vel congestiones sanguinis ad alia loca vel ejus excretionem consequuntur, salutari sæpe effectu, quum superfluo sanguine detracto reliquus postea promptius & expeditius circumvolvatur. Ubi tamen hæc differentia observatur, quod ordinarie in viris per hæmorrhoides, in foeminis per uterum extraordinarie abundans sanguis, in prima vero & vegeta ætate per nares, in provectiori per partes inferiores, urinarias quandoque vias, in media & juvenili ætate per pulmonis vasa sese exoneret. Quodsi vero in subjectis senioribus & debilioribus hi spasmi excretorii deficiunt, vel consuetæ hæc sanguinis excretionem varias ob causas supprimuntur, tunc nimius in vasis congestus sanguis tempore vasa p. n. obstruit, viscera, emunctoria & colatoria universi corporis infarcit vel in sensibilibus spasmodicas hinc inde in partibus contractiones causatur. Ex quo apparet, quod utique plethora multorum admodum & longorum & acutorum morborum causa præsertim antecedens & originalis fiat, quæ concurrentibus adhuc aliis causis vires sumens perpetua & habitualia mala inducit.

§. XI.

Deinceps longa & multiplici experientia exploratum habemus, quod omnes plethorici ex acutis passionibus nec non epidemicis affectionibus, ut sunt pestis, variolæ, morbilli, febres continuæ & intermittentes, catarrhales, inflammationes, apoplexiæ, gravius & periculosius ægrotent, quam alii, quorum vasa non tanta sanguinis copia turgent. Postea certa & evidens quoque docet experientia, omnem vehementem animi commotionem multum periculi intendere plethoricis: quod etiam observatur, si improvido usu purgantium, emeticorum aut sudorem moventium, ingens commotio illorum sanguini & humoribus inducitur. Quæ omnia nos monent, solvendam omnino quantocius esse plethoram, sive id fiat motu corporis ac labore, sive alimentorum detractioe sive sanguinis missione: utpote hac ratione multorum morborum ortus poterit anticipari. Verum enim vero, utut plethora magnum in generandis morbis afferat momentum, minime tamen omne hac in re absolvit punctum, partim quod non omnes morbos proferat, partim etiam quod eos, quos producit, non sua natura tantum inducat. Etenim neque omnes in vasis & visceribus humorum & sanguinis stagnationes, neque omnes spasmi & inde sanguinis factæ congestiones, ex quibus tanquam causis & fontibus multa ægritudinem genera propullulant, tantum a plethora fiunt, sed longe aliæ plures subsunt causæ, quæ robur fibrarum minuunt, quæ elaterem solidorum destruunt, ut inde fluidorum motio languescat. Quem effectum enim in hisce gignendis præpotentem, vehemens animi commo-

tio, prava a parentibus corporis vel viscerum dispositio, ætas, & nativa fibrarum debilitas, mala identidem vivendi ratio ac regimen, præcedens morbus & inopportuna medicatio præstent, res quam notissima est.

§. XII.

Ut vero assertionis nostræ evidentia paulo clarius pateat, non infelicem operam me navaturum esse existimo, si paulo specialiori tractatione hæc inquiramus. Primo itaque omnium quæstio non incongrua occurrit, num videlicet sæva illa sic dicta hypochondriaca affectio, qua subinde foeminæ & viri longo tempore premi solent, plethoræ, maxime ex suppressione mensium aut hæmorrhoidum ortæ, soboles sit. Veri id videtur ex eo simile, quod consuetæ & solennes dictæ evacuationes in hypochondriacis æque ac hysteris plerumque imminutæ vel inordinatæ aut suppressæ observentur: quibus restitutis vel sanguine emissio pathematum vis ac impetus mitigetur. Quibus equidem evincitur, non parum utique ad hæc mala non recte se habentes has sanguinis excretionem facere, numvero inde secuta plethora sive sanguinis in vasis accumulatio unica & principalis horum gravium pathematum sit causa, plura obstant, quo minus in hanc sententiam descendere possimus. Etenim sæpe occurrit, menses in foeminis stagnare ipsosque diu suppressi, & hæmorrhoides in viris non recto ordine & tempore fluere, ubi non affectio hypochondriaca protinus gignitur. Animadvertimus plures in perfecto statu plethorico constitutos, ut sunt gravidæ, monasticæ vitæ addicti & laute sub otiosa vita comedentes, sanguine & succis repleti, qui hisce affectibus plane vacant. Neque sanguinis missio etiam in tempore facta, corpora ab hisce passionibus liberat, vel annuam saltem bonam valetudinem præstat. Nobis potius videtur consuetæ talismodi sanguineæ evacuationis depravata conditio vel suppressio frequentissime potius symptoma & effectus, quam causa hujus mali esse. Quis enim non videt? sub talismodi spasmis internis partium, quibus horum malorum natura potissimum continetur, subinde vel nullas vel parcas aut magnas sanguinis per menses & hæmorrhoides fieri debere excretionem. Non vero negamus, sanguinem postea stagnantem symptomata horum morborum exasperare, neque inficiamur, a suppressis mensibus vel hæmorrhoidibus sæpe similia hypochondriacis solita pathemata, quæ transeunt, observari. Minime tamen omnium concedimus, hos affectus primario & principaliter inde originem suam ducere. Sed longe alia, re accuratius considerata, horum affectuum videtur genesis. Quodsi enim ea qua potest fieri solertia in primum horum malorum ortum inquiramus, animadvertimus primo, hæc ipsa quam maxime incidere corporibus imbecillibus & quorum robur valde minutum ac enervatum est a variis causis præcedentibus, ut sunt: morbus longus ac gravis, enormior sanguinis profusio, bonorum alimentorum defectus, immodica venus, diuturna tristitia, inquieta animi meditatio, puerperium. Observamus præterea, corpora spongiosa teneriora & natura debiliora patere maxime hisce morbis. Deinceps intemperantia, crapula, quies, diætæ valde perversa, acidorum & refrigerantium pravus usus, malorum horum generi admodum velificatur. Accedit quod usus & attenta experientia doceat, ab imprudenti morborum medicatione, intempestiva videlicet febrium per Chinam Chinæ, diarrhœæ per opiata, & criticarum sanguinis vel aliarum evacuationum per adstringentia suppressione, neque minus validiorum purgantium emeticorum & mercurialium abusu, paratissimam ad hos graves & longos morbos

viam pandi. Quo magis id fieri observamus, si quando hæ ipsæ recensitæ causæ plures junctæ videntur. Hæc enim omnia & singula ejus naturæ sunt ac indolis, ut partibus nervosis, imprimis ventriculo & intestinis, suum tonum & universo corpori suum robur minuant atque defraudent; unde motuum ataxiæ, quæ flatulentiarum & spasmodum, quibus symptomatum hypochondriacorum natura continetur, pleno fœnore exsurgunt. Neque adeo aliter evenire potest, quin sub tanta inordinatione motuum non modo sanguinis excretiones in quantitate, tempore & loco turbentur, sed & viscera ob impeditiorem sanguinis motum obstruantur, infarciuntur & indurentur: quæ omnia potius fructus & effectus, quam prima causa horum malorum sunt; tamen non negaverim, utique hæc ipsa malum amplius exasperare & novam quasi materiam sæviorum symptomatum subministrare. Videmus ex hisce, solam succorum præternaturalem collectorum in vasis abundantiam, adeoque mensium vel hæmorrhoidum imminutionem his morbis progignendis minus sufficere, sed longe alia majora vitia, ingentes videlicet generis nervosi debilitates requiri & concurrere; unde etiam in procinctu est ratio, quare difficillime hi affectus, præsertim si inveteraverint, curentur, & quod optimum horum præsidium sit in iis remediis, quæ, sive ex alimentorum sive medicamentorum classe fuerint, vires reparant, robur partium fœnerant & universo corpori benignos ac laudabiles succos suppeditant: sicuti contra omnia intemperata, frigida, acida, animi motus, dulcia, infantia & valida remedia non modo præsentissime pathemata irritant, sed & graviora inducunt.

§. XIII.

Non dissimilis est ratio arthritici & podagrici doloris, qui identidem magnæ imbecillitatis nervosi generis, præsertim ligamentorum, quæ artus vincunt, fœtus est, tantum abest ut unice a plethora vel suppressa quadam evacuatione sanguinis deduci possit. Quot sunt omni ætate sanguine repleti ab hoc malo immunes? quot sunt qui sub solennibus evacuationibus sanguinis, quæ natura vel arte fiunt, artuum doloribus divexantur, quamvis fateamur soluta plethora minus acerbos eos esse. Plures sunt qui a parentibus podagricis nati mox in juventute, antequam sanguis per venas sedis evacuari soleat, molestos hos dolores experiuntur. Neque sanguinis missionem annuam saltem valetudinem & securitatem ab acerbitate dolorum præstare; res est notissima. Rectius igitur arthritica non secus ac hypochondriaca affectio imbecilli generis nervosi insignis fructus est. Siquidem omnia ea, quæ nervis robur, fibris tonum, & universo corpori benignos succos defraudant, generandæ podagræ admodum velificantur: qualia sunt immodica & vaga venus, vehemens & frequentior animi motio, crapula a vino, maxime propter alienum acorem & sulphur cerebro & nervis inimicum: quæ cuncta genuinos podagræ esse parentes etiam in vulgus constat. Accedit etiam, in universum omnes natura imbecilliores & habitu spongiosos ad arthriticam æque ac hypochondriacam passionem ceu congeneres & affines morbos valde disponi. Quapropter podagra non secus ac hypochondriacus morbus difficillimam sanationem recipit, & omnia ferme remediorum genera spernit, usque eo, ut solum auxilium minuendi doloris in exacta diæta, tranquillo animo & convenienti lactis vel aquarum mineralium usu sit querendum. Sin autem in fluidorum copia, vel suppressa sanguinis evacuatione solenni, mali consistat

causa, tunc commodam ipsi medelam quam facillime afferre poterimus.

§. XIV.

Neque plethora sola febrium, cujuscunque etiam generis fuerint, ullo modo causa dici meretur. Quot sunt febres vehementia non minus quam periculo terribiles, quarum origo vel externo virulento miasmati vel internæ succorum corruptioni aut graviori visceris inflammationi debentur? ubi nihil commercii cum sanguinis abundantia visitur. Quot febres singulis annis surgunt & grassantur epidemice, quarum causa in prava & aliena exhalatione ore suscepta investiganda est? Intermittentium origo omnium consensu ex transpiratione cohibita, & cruditate in primis viis vel corrupta bile intra duodenum versante, peti debet: hæ docente quotidiana experientia plethoricos æque ac minus tales aggrediuntur. Neque sanguinis missio ab ulla præservat febre, sed potius, ut testis est usus, corpora ad eas suscipiendas præparat. Castrenses malignæ plerumque corpora, non sanguine, sed impuris succis repleta, ob alimentorum defectum adoriuntur inque illis maximam stragem edunt. Attamen certum est, plethorica corpora si febribus tentantur, graviter exerceri eaque propter ante omnia primis curationis diebus Medicum vasa sanguine deplere oportet, ut facilior & benignior febris sit decursus. Ex quo tamen minime sequitur, plethoram hujus febris esse causam.

§. XV.

Acuti non minus ac periculosi morbi sunt inflammationes, quæ ferme omnes universi corporis partes occupant, pro causa autem neutiquam plethoram agnoscunt: sed a stasi & incarceratione sanguinis in capillaribus primo, deinde majoribus, vasis fiunt, inde sanguinis motus per partem affectam interceptus citatiorem pulsum, dolorem, ruborem, febrem, quæ inflammationis indicia sunt, suscitatur. Neque sanguis nimis abundans facile in vasis stases sed potius stagnationes efficit. Plerumque vero impetuosa crassi sanguinis in venas angustiores impulsio facta a calore nimio, a frigore, dolore aut spasmio, fibrarum strictura, vera inflammationis causa est. Et quamvis venæsectio in omnibus inflammationibus, maxime vero in plethoricis, perquam necessaria sit, ut remoto majori sanguinis affluxu amplior ejus stasis inflammatoria impediatur; nihilo scilicet sanguis, quatenus in se & quantitate spectatur, non est hujus mali vera causa. Venena tenuissima mole vim suam lethalem celeriter exerunt per spasmos & inflammationes partium nervosarum, nulla habita sanguinis quantitatis ratione.

§. XVI.

Immodicas sanguinis profusiones, per quæcunque etiam loca factas, communiter autores a plethora deducere contendunt. Nobis autem harum videntur longe aliæ subesse causæ, maxime si nimix fuerint & sæpius revertuntur. Siquidem in cruento vomitu inque magis nigro sic dicto Hippocratis morbo lienem valde obstructum vel induratum, in hæmorrhoidalis sanguinis enormiori profluxione hepatis oppilationes & indurationes: in uteri gravibus & repetitis hæmorrhagiis ac abortibus, ejus substantiam læsam, in hæmoptysi vitia quoque viscerum abdominis inventa fuisse, ex cadaverum dissectionibus cognitum atque perspectum est. Quibus vitiis si dolor, spasmus, sive strictura partium internarum a quacunque causa orta, superveniat, inæqualitas circuitus sanguinis fit, ipseque magno nisu ac impetu in alia loca ac vasa

vasa fertur : quæ nimium distendendo, tandem ruptur, & talismodi immoderatas profusiones causantur. Quare docet experientia, cachecticos, scorbuticos, imo hydropicos perniciosis talismodi sanguinis excretionibus graviter sæpenumero tentari. Fateamur tamen necesse est, & mensium & hæmorrhoidum vel sanguinis per nares consuetas profusiones, a sanguinis & humorum exsuperantia & inde facta ejus in vasis stagnatione & inæquali motu vigore legum hydraulicarum etiam fieri, quod tamen in præternaturali statu neutiquam semper, sed minus sæpe contingit.

§. XVII.

Ex longis, gravibus & frequentibus morbis principem merito locum scorbutus obtinet, qui certis locis, tractibus & universis regionibus insensu est, acerbissimis & multis admodum symptomatibus stipatus. Hic certe succorum & sanguinis abundantiam pro vera & principali causa, tametsi quandoque antecedens & concurrens sit, minime agnoscit, sed domicilium ac fundamentum suum in ventris visceribus & recrementorum emunctoriis, hepate, liene, pancreate ac glandulis, si morbus inveteraverit, positum habet. Glandularum etiam & vasculorum minimorum obstructions causæ sæpissime sunt, cur sanguis, lymphæ cæteraque fluida a naturali sua temperie mire deflectant & corrosivi, falsi, impuri fiant : a quibus postea graves exulcerationes, corruptiones, dolores, spasmi aliaque mala subnascuntur. Quorum malorum generationi gravis, densus & vappidus aer, aquæ ponderosæ & crassæ, vita otiosa, victus nimis durus, viscidus, falsus, acidus, diuturna que animi tristitia mirifice velificantur. Memorabilis in hanc rem est locus EUGALENI lib. de scorbuto : *Quos cum crassiore victus ratione diuturnior mœstitia exercuit, de his ægrotantibus constanter semper prædicare ausus fui, eos a scorbuto morbo vel solo vel aliis permixto teneri. Neque ab his deceptum me fuisse scio, quin conjecturam ac συζασιόν meum comprobavit felix cum ratione eventus. Quod quoque ita esse experientur, qui post me animum ad hanc rem adjicere volent.* Quæ omnia & singula ejus sunt naturæ, ut crassitiem & impuritatem humoribus foenerando ad obstructions vasorum viam dent paratissimam, quæ nisi convenientibus remediis removeantur supervacua omnis curatio est.

§. XVIII.

Præterea plura adhuc dantur corporis nostri mala ac vitia, quorum causa minime plethora potest haberi. Truculentissima pestis, petechiales & maligno charactere notatæ febres, quæ contagio serpunt & latius sese diffundunt, quam maxime corporibus iis sunt insensæ, quæ sanguine & bonis humoribus sunt destituta; quare famem & annonam frequentissime sequuntur : hinc magna ratione pestis a peritioribus antiquorum Medicorum pauperum morbus salutatur. Usus etiam in nuperrima peste docuit, eam plus pauperibus, indigis & fame confectis obfuisse, quam iis, qui alimentorum copiam habuerunt. Atque adeo profecto plethora ad genesin harum peracutarum passionum parum vel nihil contribuit, sed virulentia miasmatis aeris vehiculo primas in vias & succos impuros translatis celeri putrefactione universi corporis vires defraudando vehementiam symptomatum non minus quam periculum causatur : Quod etiam de aliis malignis contagiosis in universum tenendum est.

§. XIX.

Deinceps affectuum plurimi, qui corpora nostra

afficiunt, imo perimunt, ex epidemiorum numero sunt, & aeris vitio debentur, qui tetræ exhalationibus repletus vel etiam inæqualis aut intemperatus factus differentes morbos pro diversa dispositione partium, quibus recipitur, progenerat : quales sunt febres continuæ & intermittentes genio admodum differentes : purpuratæ, catarrhales, erraticæ : quo spectant etiam arthritides, rheumatismi, diarrhœæ, dysenteriae, ophthalmiæ, morbilli, variolæ magis vel minus malignæ, apoplexiæ, tussis, coryzæ, raucedines, pleuritides & id genus plures. Certis temporibus hi solent morbi grassari & homines, sive plethorici, sive tales minus sint, corripere, nullique ætati vel etiam temperamento parcere, modo obsequentes & impuros, qui horum vim mirifice augent & propagant, prima in regione humores collectos inveniant. Quam ob rem dictorum morborum tam malignorum quam epidemiorum curandi ratio & medentium intentio neutiquam esse debet sanguinem mittere, alvum ducere & varias evacuationes moliri : sed potissimum sanationis negotium in temporis beneficio, & natura, sive succorum corporis indole ac solidarum partium tono consistit. Neque alia quam temperantia blandaque diaphoretica cum convenienti regimine subministrare convenit.

§. XX.

Febres profecto principes epidemiorum morborum, minus recte naturæ molimina secundum nostram mentem & doctrinam, ad sanguinis quantitatem motu intensiori consumendam directa dicuntur, utpote plurimæ febrium ne ullum cum plethora habent commercium. Has frequentissime nasci ex solo animi motu, gravi partium nervosarum dolore, vulneratione, suppuratione & subtili tetra in aere exhalatione indies animadvertimus. Habemus hujus rei grande & luculentum documentum in aere Romano, qui æstivis mensibus, facta mutatione aeris urbani cum suburbano, vel secessione ex alio loco urbis in alterum, subito inducit graves & periculosas febres. Catarrhales & epidemicæ plures in corpore nostro producuntur, si quis sub prava & præternaturali aeris constitutione liberius aeri vespertino & nocturno corpus exponat. Præter hæc curiosa admodum res & observatio est : pro lubitu in Carolinis thermis febrem posse produci, nempe, si quis non prius bene evacuatus, in balneo nimis calido paulo diutius moretur, tunc intermittentes & continuæ cum gravi æstu, siti, vigilia, capitis dolore, virium dejectione sæpe non sine periculo indies fere observantur. Quæ de causa incolæ peregrinis & hujus rei ignaris magna cum cautione præposterum secessum in balneum calidum dissuadent. Neque hoc nisi valde temperatum & per viginti quatuor horarum spatium prius tepefactum in usum cedere debet. Ceterum nulla febris in se considerata necessario sanguinis mittendi remedium indicat vel postulat, sed tunc demum, quando plethora conjungitur, prodest, ut liberius sic facto ampliori spatio sanguinis massa possit progredi & circulari.

§. XXI.

Neque omnes qui certis ætatibus per quam familiares sunt adfectus, a plethora sunt deducendi. Quid enim consortii infantum tormina, spasmi, pavores, convulsiones, epilepsia, asthmata, febres habent cum sanguinis abundantia? potius hæc omnia vel a corrupto & corrosivo lacte membranas intestinorum lancinante vel a gravi dentitione & nervearum membranarum tensione proficiuntur. Neque putridæ febres vel horrendæ artuum convulsiones, atrophix, tussis, epilepsix infantum, quæ a vermibus intra in-

testinis contentis fieri sæpe sæpius solent, ullam cum plethora habent affinitatem. Glandularum quoque circa collum tumores, quos diuturnæ lippitudines, ophthalmiæ, crusta lactea, tinea capitis comitari confuescunt, potius feri viscidi & corrupti in minimis vasculis, quam copiosi sanguinis fructus sunt. Infantis ætas admodum epilepsiæ est obnoxia, quod non sanguinis debetur copiæ, sed potius teneritudini & nimiae sensibilitati membranarum adscribendum est. Capitis dolores, qui omnis sexus & ætatis homines vehementer sæpe excruciare solent, non semper a translatione sanguinis ad caput fiunt, sed sæpe inflatio, cruditas & tensio nervorum ventriculi, vel impuritas feri in hypochondriacis, hysteris, scorbuticis, lue venerea infectis causa est. Hæmoptysis, phthisis, spirandi difficultas, quibus obnoxia est juvenilis ætas, non tam sanguinis quantitatem, sed potius nativam pulmonum & sæpe hæreditariam debilitatem nimiamque laxitatem sequuntur, ut ibi hærens & stagnans sanguis pulmonum molle lædat viscus atque corrumpat. Languores, spirandi difficultates, pruritus corporis, vigiliæ, vertigines, nephritides, visus hebetudo, auditus difficultas, quibus senes ordinario premi solent, a labefactato fibrarum tono, viriumque defectu, impeditiori humorum circulatione vel prohibita impuritatum excretionem plus quam a sanguinis & succorum abundantia debent arcessi. Equidem plethorici senes facile fiunt apoplectici, quod tamen non principaliter ob plethoram fit, sed ob cerebri ingentem debilitatem, ob quam sanguis in copia ibi congestus extravasationem patitur. Fate-mur, hæmorrhoidum fluxum proveciori ætati affinem sæpenumero ob abundantiam nimiam sanguinis salutariter fieri, eumque suppressum multa admodum & gravia inducere symptomata; sæpe vero accidit hunc etiam enormem in non adeo plethoricis corporibus esse & vel præpostere suppressi, unde graves fiunt passionibus. Suppressionis vero vel nimiae profusionis non semper plethora sed alia potius causa est.

§. XXII.

A morbis ætatum veniendum est ad eos, qui hæreditario quasi jure ex parentibus in liberos transferuntur, quorum causa certe non in partium fluidarum quantitate aut qualitate quærenda est, sed potius in vitio seu depravata conformatione & dispositione fibrarum & solidarum partium consistit, ut vel ad nimiam laxitatem & debilitatem, vel ad nimiam constrictionem sive spasmus sint proclives: ubi itaque certarum partium a prima nativitate vitiosa quædam dispositio reperitur, ibi dein multis causis, non vero sola plethora, concurrentibus, calculus, podagra, epilepsia, melancholia, affectio hypochondriaca, hydrops, apoplexia, phthisis facile sistitur & producit: Utpote hi singuli peculiarem in parte ratione toni debilitatem vel læsionem agnoscunt, ad quam inducendam parum hic facit plethora.

§. XXIII.

Sunt quoque certis locis proprii & quasi vernaculi quidam morbi, qui identidem nihil commercii alunt cum plethora: Græcis endemii appellari solent. Strumosi colli tumores Helvetis & Rhetis ob aquas valde crassas, crudas, calcarias, aeremque ibi frigidiores sunt familiares. In Gallia Narbonensi hydrocele & sarcocoele sæpius videtur, nam propter castaneorum & nucum crebriorem usum sanguis lentus & viscidus factus per spermaticas venas ob perpendicularem, qua ingredi debet, viam, tardius provehitur, sed subsistens hos facit tumores. In

Anglia præsertim Londini tertia pars hominum tabe extinguitur, cui victus lautus, aer gravis & crassus & fumo lythantracum admodum refertus multum lenocinatur. In Occidentalibus Angliæ locis alius morbus est, qui pueros invadit. Macrocephali fiunt cum laxa membrorum compage, turgido abdomine, ossa fiunt spongiosa: videtur esse affectus nervorum a parentum debilitate & teneritudine nervorum in liberos translatus. In Hispania visitur inter nobiles sæpe melancholia, quæ non plethora, sed potius speculationis & inquietæ meditationis, cui admodum literati indulgent, soboles est, unde robur cerebri & nervorum minuitur. In Gallia vermium intra intestina datur copia, ob alimenta valde temperata, dulcia, gelatinosa & fructuum horarum copiam. Marinis Septentrionalibus locis familiaris admodum scorbutus est ut supra visum, tum ob victum durum salsum, marinos pisces, tum ob aerem crassum & aquarum insalubritatem. In Belgii fœderati Provinciis, imprimis Hollandia, Seelandia, item Helvetia, calculo renum & vesicæ frequentissime incolæ laborant: nec puerili ætati parcat. Causa procul dubio in liberaliorem lactis & acidorum usum transferri debet, quia hæc fercula singulis ferme diebus mensis apponuntur. Præterea in frigidioribus locis regnat frequentius peripneumonia & sphacelus. Multum huc confert ingens frigus, quod ad stasim sanguinem disponit, item victus durus humores viscidiores ingenerans. Et hæc quoque est causa, cur Westphalis & Pomeranis, duro victu, præsertim carne suilla gaudentibus, is morbus familiaris sit. Polonica gens peculiari malo premitur, quod plica appellatur, ubi prolixus capillus in scirrhus inexplicabiles contortus monstrosam speciem præbet. Cujus causam a sordido vitæ genere, potatione immodica spiritus vini & aquarum crudarum, & quod dormiant in humidis & depressis locis accersimus. In Hungaria febris cujusdam maligna species indigenas pariter & peregrinos graviter affligere solet, præsertim, ubi prava diæta, somnus in aere humido & super terram accedit: morbus dici solet Hungaricus. Hujus generationis causa non modo sanguinis impuri ad corruptionem proclivitas, sed potius prava terræ exhalatio est, quæ intensiori diei æstu in aerem concedens nocte postea frigidissima condensata per poros cutis sese insinuat, succisque & sanguini febrilem intestinam agitationem inducit. In medietate Germaniæ, præsertim Misnia peculiaris morbus regnat, qui raro aliis in locis visitur & dicitur purpura. Hæcque duplex est, rubra & alba: posterior maxime infensa est puerperis & per frequenter aliis passionibus epidemicis malignis, item petechiis, variolis, morbillis in fine sese associat. Per sæpe omnia videntur in febre acuta salva, facta mali remissione, protinus vero purpura propullulans magnum rursus periculum machinatur. Soboles videtur hic affectus corruptæ ac vappescentis lymphæ, qualis redditur ex nimio otio, abusu dulcium, placentarum & ciborum ex farina, ovis, butyro & saccharo paratorum, quorum usus in his locis fere quotidianus est.

§. XXIV.

Sunt præterea alii morbi, quorum origo ad sanguinis vel succorum abundantiam nullo modo potest referri, sed summa lymphatici succi corruptio cum caustica acrimonia juncta in culpa est. Spectant huc venerea lues, elephantiasis, herpes, scabies, cancer, ulcera maligna, tinea capitis, gutta rosacea: qui parum vel nihil cum plethora habent commercii, sed vel ob malignum miasma, texturam humorum penitus invertens ac corrumpens, vel etiam ob diuturnam stasim

stas & obstructionem canaliculorum minimorum praesertim glandulorum fluores longe alienam & corrosivam naturam induunt: hi postea fibras & stamina corporis destruendo varie ludunt tragœdiam suam. Deinceps haud obscurum est, praesertim practicis, quam corrosiva & caustica bilis vel etiam aliorum humorum colluvies saepenumero prima in regione stabuletur, quae variorum pathematum, ut cholerae, torminum, spasmodum, dysenteriae, quandoque etiam tussis convulsivae, anxietatis praecordialis, cardialgiae causa atque origo est.

§. XXV.

Ceterum dantur affectus, quorum incunabula nequaquam a sanguinis & bonorum succorum affluentia, sed potius ab eorum defectu petenda sunt. Novum non est, post longam inedia, duos labores, diuturnas vigilas, enormem haemorrhagiam & gravem morbum, bonos in corpore succos ipsasque vires deficere, & ob id minima viscerum & emunctoriorum vasa concidere, subsidere, adeoque graves obstructions fieri: quae postea rebellium & chronicorum morborum, ut cachexiae, febris lentae, hecticae, scorbuti, phthisis, hydropis sunt productrices. Per saepe etiam accidit, quod valde debilitata & exsanguia corpora, si nimium appetunt & cibos liberalius ingerunt, in graves morbos incidunt. Plures ex castris, qui in hyberna secedunt, milites, quando fame emaciati alimentis nimium corpus replent, incidunt inde in mortiferas & putridas febres. Et quemadmodum plethorici ab animi affectu, fortiori corporis motu aut medicina validiori, emetica, purgante aut opiata vel repellente vehementer laedi solent: ita longe amplius emaciatis & sanguinis expertibus id accidit, ut omnis gravior animi affectus, nimia evacuatio, vel refrigeratio, aut praepostera medicina magna & immedicabilia mala iis corporibus inferat.

§. XXVI.

Supereft jam, ut etiam eos morbos afferamus, qui citra ullius materiae molem vel intemperiem solo motu inordinato & actu quasi immateriali producuntur. Profecto, si paulo accuratius primum ortum & genesis gravissimorum, qui corpora nostra affligunt, affectuum intueamur, facile convincemur, nihil celerius & gravius sanitati nocere & morborum tam acutorum quam chronicorum fundamenta struere ipsis animi affectibus. Nos ipsam morborum causam, & maximam circumgerimus: haec potior nostri pars est animus videlicet, cujus moderatio uti totius hominis perfectio est: ita ejus immoderatio omnis miseriae, infelicitatis & morborum quoque foecunda mater existit. Hunc igitur ante omnia observare, attendere, & christianae & moralis doctrinae praecipis bene nutrire ac fovere, omnem hominem decet, si bene valere & firma valetudine frui velit. Permagna res est, solum animi inordinatum motum corpori instar veneni esse posse, usque eo, ut saepe major perniciēs a terrore, ab ira, quam a vero veneno sit metuenda. Longior tristitia febres benignas reddit malignas: sique diu premit impura corpora, tumores glandularum malignos, cancrum nempe inducit. Solet praeterea omne robur tonum ac vim corpori subtrahere: unde sanguinis lentior fit progressus, humorum stagnatio & corruptio, appetitus emoritur, nec retinere debite intestina possunt contenta. Novimus ex terrore plures in epilepsiam chronicam & motus convulsivos saevissimos incidisse. Abortus, suppreSSIONES & menses & lochiorum perniciosissimae a terrore quotidie fiunt. Non semel sed frequentius ab animi gravi affectu, diuturno mœrore, vel terrore debili corpori

superveniente morbum notavimus hypochondriacum gravissime longo tempore homines affligentem. Vehemens & impetiosa ira, praesertim si hanc potus frigidus vel validior purgans aut emetica medicina exceperit, plures ad orcum deduxit: subsequente inde vel apoplexia vel ventriculi aut intestinorum lethali inflammatione. Pejus adhuc est suppressa iracundia, quae lentas febres, icterum, phthisin & primarum viarum spasmos facile ingenerat. Solet autem saeva talis animi commotio non modo repletis, sed & extenuatis, debilibus & sanguine destitutis vehementer nocere.

§. XXVII.

Ultimum est, ut quoque proponamus, multos admodum & graves morbos ab imprudenti medicatione fieri. Turpe est dictu, attamen verissimum: ipsos nomine Medicos rudes nempe & ratione & prudentia ac peritia destitutos frequentissime morborum gravissimorum & mortis causas existere. Peritus Medicus talia cum dolore quotidie intueatur. Incredibilis enim est ea noxa, quam per intempestivas venæsectiones, purgantia, repetita emetica, opiata, repellentia praepostere adhibita & nobilissimae Chinae Chinae abusus, neque minus per mercurialia non debito modo, forma, tempore, dosi loco neque convenienti subjecto vel morbo imprudentissime oblata, corporibus humanis, cujuscunque generis vel dignitatis fuerint, non solum medicastri sed & magno titulo Medici inferant. Pudet & tædet talismodi exempla nobis satis superque cognita publico proponere. Quid enim est in rerum natura perniciosius? quid est quod tam celeriter tonum & robur solidarum destruat & fluidorum crasin pervertat quam sinister usus remediorum sic dictorum heroicorum; quo certe ipsa veri veneni naturam induunt. Quot sunt, qui ab intempestive sumptis valentioribus remediis in ventriculi & intestinorum inflammationes, lentas febres, flatulentias & primarum viarum spasmos, paralyses, artuum contracturas, hydropes, convulsiones & febres inflammatorias, nulla habita ratione plethorae inciderunt?

§. XXVIII.

Ex hisce igitur dictis & adductis haecenus clarissime apparere arbitror, longe majorem esse eorum morborum numerum, qui aliam, quam plethoram causam agnoscunt: qui aliam etiam medendi rationem, siue ea fiat natura siue arte, quam sanguinis consumptionem aut vacationem exigunt. Utique venæsectioni & vacationi sua virtus & laus in medendo constat, sed cum natura non tam a quantitate sed magis ab insensa qualitate & motu lædatur, certe haec remediorum genera neque sufficiunt, neque satis potentia sunt. Quis enim in morbis a contagio, ab aeris vitio, ab animi affectu, humorum defectu, prava medicatione, haereditaria quadam dispositione ortis evacuantia vel sanguinem minuentia audet proponere? ubi magis temperantia, sedativa, anodyna analeptica, & blanda diaphoretica omne absolvunt punctum. Quem usum ac fructum in gravioribus ac rebellibus chronicis morbis, qui ab obstructis ac induratis visceribus foveantur, evacuationes vel sanguinis missiones aut excretiones promittunt? Quae utilitas in stasibus sanguinis inflammatoriis, plurimarum acutarum passionum genitricibus, a remediis vacuantibus poterit expectari? haec erit certe prava vel nulla. Ex quo certe apparet, negotium secretionum & excretionum tam in theoria, quam praxi medica non absolvere punctum, sed plura adhuc alia ad artem bene fundandam scitu esse perquam necessaria.



DISPUTATIO MEDICA

D E

MALIGNITATIS NATURA,
ORIGINE ET CURA, IN MORBIS ACUTIS.

Primum edita Anno 1695.

§. I.



I qui morbi sunt, qui insidiantur generi humano, & non tantum periculo, sed & symptomatum magnitudine atque sævitiâ terrent, sunt certe morbi dicti Maligni, qui longe lateque serpendo brevi tempore totâ œconomîâ microcosmicâ perversâ interficiunt, maximamque mortalium stragem inferunt; & quod potissimum est, sæpius inter initia tam levibus signis ac symptomatibus veneni vis occultatur, ut difficillimè dignosci queat, & ubi tuta ac secura omnia dixeris, mox funesta imò ipsam repentinam mortem cernere licet. Varium autem malignitatis est ingenium, & pro diversitate temporum, constitutionum & morborum, quibus sese associat, varias ludit tragœdias. Et quamvis ejus naturam, originem indagare admodum arduum sit, & perplexam contagii indolem nosse non promptum ac facile, institui tamen, ratus sine hujus cognitione curandi rationem vix ac ne vix quidem feliciter dirigi posse, loco speciminis Inauguralis ex principiis mechanicis veritati admodum consonis, nec non ipsis Practicis præstantissimorum Medicorum experientiæ suffultis, Malignitatis naturam, originem causasque, quantum humanæ mentis imbecillitas patitur, penitus paululum evolvere, ac his perspectis certam medendi methodum subjungere. Divinum Numen conatibus hisce meis ex alto gratioso suo auxilio assistat!

§. II.

Antiquiores Medicorum prudentissimè morbos distinxerunt in boni vel mali moris, & ipse *Medicinæ parens Prorrhæta* libr. 2. 6. in scriptis suis frequenter inculcat Medicum non tantum ægrotantium sed & morborum mores nosse debere & bonos morbos *εὐνδες*, malos *κακόνδες* nominat. Item libro de locis in homine titulo 41. item de Morbis Endemiis. *κακόνδες* malignas ferinas appellat, multasque harum historias cum accurata symptomatum recensione adducit, unde patet jam dudum ipsis Veteribus malitiosas & perniciosas has febres cognititas fuisse. Germani hos morbos pro diverso malignitatis gradu, vel prout hæc variis sese complicat morbis, diversis nominibus exprimunt: communiter audiunt *die hitzige giftige Krankheiten und Fieber*; item *die Haupt-Krankheit / Flecken-Fieber / pestilentialische Fieber / Giftige Pocken / Mäfern* &c. Plures autem sunt morbi, in quibus observatur malignitas, sic notum est Luem Gallicam, Gonorrhæam virulentam, Ele-

phantiasin, Herpetem, Ulcera aliosque morbos chronicos truculentos malignitatis charactere notari, ita quoque lethales qui à veneno assumpto vel morfu animalium venenato oboriuntur morbi, venenati & maligni dicuntur; hoc loco saltem illorum, qui acuti contagiosi & epidemici sunt & populariter grassantur rationem habere animus mihi est.

§. III.

Malignitatem optime distinguit gradus, prout nimirum morbi hi majori vel minori periculo & symptomatum vehementiâ stipati sunt, citiusque vel tardius internecioni dant homines. Pestis omnium malignissima, quæ brevi actiones vitales extinguendo e medio tollit; subsequuntur febres pestilentes & sic dictæ petechiales, quæ sphacelo interiora quasi corripiendo, magna ægrorum strage tyrannidem suam exercent: si de perniciæ sua paululum remittunt, satis tamen infestæ symptomatum anomalîâ & diritate, vocantur acutæ malignæ & morbi maligni, uti variolæ, morbilli, dysenteria, anginosæ inflammationes & febres puerperarum malignæ.

§. IV.

Unanimi Cl. Medicorum consensu & evidenti experimento clarum est; malignos omnes morbos non una incedere facie, sed diversimode sese habere ratione temporum quibus exsurgunt, nec non ratione individuorum quæ affligunt; multifaria enim horum morborum sunt signa atque symptomata, nec observantur in omnibus epidemiis constitutionibus eadem, nec in omnibus ægrotantibus similia, sed diversa & contraria quandoque; ut plurimum autem in initio leniter blandeque procedunt, & blanditiæ suæ tam ipsos ægrotantes quam Medicos fallunt, ob id observatur in Praxi malignas, petechiales pro hectica, catarrhalibus primo intuitu à Medicis minus expertis haberi, de quo conqueruntur fere omnes veteres & recentiores; inter alios legi meretur FORESTUS libr. 6. de Febr. pestilentibus, & SPINDLERUS observatione Medica 39. Ante omnia itaque operæ pretium duco, certa ac infallibilia quædam ponere signa & notas, quibus malignus morbus à benigno discerni queat. Hæ autem individui & essentielles malignitatis characteres esse debent, quibus præsentibus & ipsa malignitas aderit. Desumuntur autem talia signa optime ex destructione actionum vitalium; cum notum sit, malignitatem potissimum vitæ insidias struere, & actiones, quibus vita perficitur, principaliter ac potissimum labefactare. Sunt itaque primò malignitatis in morbis signa: præ-

cepte

ceps & subita virium prostratio, secundò mentis turbatio, & sensuum tam internorum quam externorum læsio, tertio insolitæ excretiones humorum vel macularum & pustularum eruptiones cum morbi incremento, quartò diuturnum pervigilium & appetitus omnis prostratus. Hæc simul conjuncta, prout plus minusque affligunt, intensiorem vel remissionem veneni vim patefaciunt.

§. V.

Præter jam recensita signa ulterius actionum vitalium destructionem aperiunt sequentia, & quidem vitalis actionis: animi defectio, pulsus arteriarum exilior & imbecillior, simul tamen frequens, lassitudo corporis maxima, membrorum immobilitas, decubitus supinus, pedes molles ac laxi nullam habentes firmitudinem, æstus internus maximus cum extremorum frigore; præterea nervorum cerebrique fluidum sic dictum animale in hoc morbo affectum esse testantur oculi rubentes, truculenti, sermones deliri maleque coherentes, actiones furibundæ, nullus doloris & sitis sensus, amissio pudoris, & convulsivæ membrorum agitationes, inquietudo & jactatio corporis maxima, anxietas præcordiorum dolorifica & intensissima cephalalgia: Tandem humorum, excretionum, & digestionum vitia aperiunt lingua urens faucesque aridæ, dejectiones copiosæ agrè olentes, vel per alvum vel vomitum, urinæ multæ parum à statu naturali mutatae & quandoque insigni foetore molestæ, sudores frigidi colliquativi, maculæ & pustulæ variegati coloris cum majore vel minore ardore, respiratione difficili, flatus & murmura hypochondriorum ab assumpto alimento vel medicamento.

§. VI.

Notabile autem est hoc loco, prout individua diversæ sunt complexionis & constitutionis, atque prout variant causæ occasionales malignitatis, variare quoque symptomata, quibus premuntur ægrotantes, diversissimamque esse malignæ perniciæ indolem ac genium. Qui calidioris & biliosæ constitutionis sunt, majorem experiuntur æstum majoremque anxietatem, vehementissimam cephalalgiam, sitim inexhaustam, pulsum celeriores: similiter delirio corripiuntur magis furioso, & inflammationibus meningum cerebri, faucium, œsophagi & ventriculi perniciosissimis; contra qui frigidi sunt, laxioris, & mollioris habitus, non tanto corripiuntur æstu, sudores magis habent frigidos, copiosos, syncopicos, delirio tentantur mitiori & ad taciturnitatem composito, pulsum habent exilem & copiosas sputi pituitosi excretiones, nonnunquam cum tussi & respirandi difficultate. Illud ipsum quoque valet, prout morbus malignus epidemicus ex diversa constitutione aëris tempestatum temporisque anni producit. Æstate præeunte fervidissima sub autumnû principium qui grassantur maligni, ob intensam humorum acrimoniam majores ardores, siccitates, inflammationes, & deliria efficiunt. Quodsi autem ab humidiori aëris temperie proveniat malum, corpora magis exsolvuntur, putredo humorum & excrementorum intensior cernitur, & dejectiones copiosiores, maximâ tamen cum virium jactura & animi deliquio ac sphacelo interiorum partium; cumque in his pacata & tranquilla omnia magis fiant, sedulo caveat Medicus, ne ægrotantes habeat pro catarrhosis vel febre catarrhali aut lenta laborantibus, id quod sæpius contingere quotidianam practicum cito experientiam.

§. VII.

Positâ jam norma, secundum quam cujuscunque malignitatis examen institui potest, proximum jam est, ut descendam ad indagandam genuinam malignæ perniciæ, quæ in morbis observatur, naturam. Antequam autem id fiat, placet quædam ex physiologicis præmittere, quo cognito statu secundum naturam, eo facilius aberrationem in statu præternaturali perspicere possim. Certissimum autem est & ex principiis mechanico-physicis clarissimum, sanitatem omnesque actiones, quibus vita perficitur, dependere à partium corporis nostri fluidarum & præcipue tenuium magna vi motrice instructarum, juxta HIPPOCRATEM impetum facientium, æquabili motu ac legitima temperie & crasi. Cum autem sanguis radicalis corporis fluor sit, ex quo ceu fonte tam lymphaticum quam animale cerebri nervorumque fluidum derivatur, quare si hic legitime mixtus, bene temperatus est, & jugi motu secundum naturæ leges tam intestino quam circulari evolvitur, necessum est totam machinam ejusque omnes actiones salvas esse, & secundum naturæ ordinem peragi.

§. VIII.

Ut autem naturalis sanguinis temperies eo melius pateat, elementa ejus, quibus compositus est, accuratius pensitanda sunt. Sepositis autem particularum sanguinis figuris tanquam magis remotioribus ad sensum, quodsi illum quis examinet, offerunt sese principia notiora & propinquiora, & primum deprehendimus in cujusvis animalis sanguine fluidum quoddam insipidum aqueum, 2) oleosum sulphureum inflammabile principium, quod ex sanguinis exsiccatione inflammabilitate, & decenti per ignem destillatione manifestum evadit: 3) concurrit sal sensorii gustus fibrillas satis notabiliter afficiens & volatile ex quovis sanguine copiosum debita encheirisi instituta obtinendum; tandem mucilaginosa viscida quædam substantia ipso tactu & visu teste in sanguine & ferro observatur: & ob hanc exsiccatus sanguis à spiritu vini rectificato agrè, à liquore autem aqueo facile dissolvitur. Quatuor hæc distinctæ naturæ elementa mutuum connubium ad unum fluidum constituendum constanter respuunt. Apparet id maxime in sanguine è vena emissio, qui protinus pristinam suam fluiditatem amittit & in coagulum abit, secedentibus à se invicem particulis serosis & sanguineis crassis: Præterea sanguis ob diversissima illa principia, in quiete relictus, facile concipit putredinem, ipsa experientia teste. At verò in vivo animali sanguis arcte inter se his principiis unitis fluidum tenuem constituit liquorem omnis putredinis expertem, sed qui ipse à corruptela alias partes defendit; causa intimæ hujus unionis & fluiditatis motus est tam intestinus quam progressivus; motus enim est, qui distinctissimas has sanguinis substantias intime miscet, unit, conjungit: motus est qui non tantum liquores impellit & per corporis sphaeram circumagit, verum etiam à recrementis salino-sulphureis aqueis superfluis illum depurat, conspirante ad id omnium viscerum dispositione transcolatoria. Quodnam autem illud motus principium sit, & quod sanguinem cæterosque fluores, tam centrali quam in lineam abeunte motu rotat, de hoc magnus in scholis Medicis dissensus est. Vocabulis naturæ, calidi innati, ignis vitalis, spiritus, animæ sensitivæ, archæi, variis id exprimunt, alii de motore interno, alii de externo certant. Ego vero præter vim illam divinam connatam materiæ seminalis rectricem, fluidum æthereum subtilissimum, intrin-

intrinsecum illud principium, omnium viventium animans & roborans agnosco, & ex aëre, qui catholicum fluidorum omnium seminarium & astralium corporum vehiculum est, petendum esse cum *Divino Sene tractatu de flatibus* existimo. Inevitabilis animantibus est usura aëris, qui æthere vividiori motus celerrimi donatus fluidorum omnium, sic quoque sanguinis particularum, intestinum conservat motum. Hic particulis sanguinis sulphureis specificatus subtilissimis, constituit partes sic dictas spirituosas corporis nostri, rectores ac conservatores omnium vitalium actionum, sensusque ac motus præsidēs. Spiritus hi & unionem corpusculorum sanguinis efficiunt, ejusque circulum perpetuo, in cordis musculis, arteriis impulsu, viscerum & carnosarum partium tono conspirante, servant; hi à putredine corpus & humores defendunt, & non solum in cerebro & nervis, sed & in sanguine & partibus omnibus solidis, quas animant, præsentēs sunt.

§. IX.

Hiscē jam prælibatis, liquido constat, morbi malignitatem, quæ in destructione actionum vitalium consistit, unice & optimè quarendam esse in putredinosâ ac destructoria elementorum sanguinis dissolutione, & inde exsurgente spirituum corporis nostri, quoad crasim & motum, depravatione; Veteres incusare solebant excellentiam putredinis in corde existentis, actionesque vitales exstinguentis, & hinc febres pestilentes malignas omnes putridas dixerunt, nec sine ratione: corporum namque putrefactio & corruptela nihil aliud est, quam dissolutio vinculorum rerum compositarum particulas tenantium, sive secessio particularum à situ & ordine suo, quem habent secundum naturæ leges: quæ de re videre est in putrefactis, mixtum deferere principia illud constituentia: particulae volatiles sulphuræ sub tetro foetore abeunt in auras, quod reliquum est colliquescit, & aliam naturam ac indolem adipiscitur.

§. X.

Quod autem in ipsis malignis mixtura corpusculorum sanguinis non tantum turbata, sed & pro differentia causarum plus minusque destructa, cum putredinosa particularum sanguinem componentium secessione sit, præter alia symptomatum ratio evidenter comprobatur; sic vinculum feri & sanguinis violatum testantur secessiones, stagnationes & excretionēs copiosæ feri in malignis frequentissimæ. Nihil enim frequentius accidit, quam ægros sudoribus modo criticis, modo symptomaticis, ad animi usque deliquium colliquativis, frigidis corripī. Urinæ tenues naturali similes ut plurimum apparent, æstu interiorum utut maximo, quod sero limpidio copioso, à sanguine secedenti, haud dubie adscribendum est, & ob id largus quandoque urinarum tenuium limpidarum fluxus, in pessimo malignarum statu observatur. OLAUS BORRICHIVS *Acta H. f. niensis anno 1673. obs. 34.* Diabetem in malignis non semel vidit. Veteres talismodi urinas phrenitidem indicare semper observarunt, ob raptum bilis, secundum illorum opinionem, ad caput. Pessimas quoque illas judicō, non tamen ob jam dictam rationem, sed quod testentur de majori particularum serosarum à sanguineis crassis secessu. Huic secessui debentur quoque copiosæ feri foetidi per alvum dejectiones malignis familiares; non raro observantur quoque in epidemicis inter initia feri copiosi per tussim ejectiones, unde hac ratione sub specie tussis & catarrhorum Medicos misere fefellerunt venenatæ

febres; postremo fluit ex antea dictis ratio, quare involuntaria lachrymarum effusio malo habeatur signo in malignis.

§. XI.

Porro phænomena circa horum ægrotantium sanguinem observata, quam commodè explicari posse per dissolutionem mixturæ sanguineæ crediderim; notum est sanguinem in malignis observari ratione consistentiæ & coloris varium, sic non nunquam nigerrimus & coagulatus visitur; SYLVIVS *Methodo medendi libr. 2. cap. 26.* in malignis solito fluidiorem; in venis arteriis quoque *Ephemerid. N. C. Decad. 2. anno 9. observ. 208.* observarunt & BONETUS in *Sepulchreto libr. 4. Sect. 1.* & instar medullæ sambucinae concretum intra venas RIOLANUS *Enchiridion. Anatomic. libr. 2. cap. 27.* fibras & filamenta crassa lumbricis non dissimilia ex pituita confecta VOLCHERUS COITERUS *obs. Chirurg. & anat. p. 110.* annotarunt.

§. XII.

Inflammationes faucium anginosæ, meningum cerebri phreniticæ, œsophagi & orificiorum ventriculi cardialgicæ, maculae, pustulae & exanthemata varia magis vel minus dispersa vel unita, quid aliud indicant, quam particularum sanguinis acrium sulphureo-volatilem ab acredine venenata miasmatis magis exaltatarum evaporationem ab aliis cruoris partibus? Notabile est, sudorem quandoque acerrimum ob id secedere, confirmat id ipsum historia ab Excellentissimo DOLÆO in *Chirurgia pag. 884.* descripta sequens. Chirurgus quidam invisebat quendam febrem maligna laborantem, & postquam manu pulsum ægri tetigerit eamque admoverit faciei, & imprimis naso, statim ibidem pustulas nactus est.

§. XIII.

Quod autem destructio illa mixturæ sanguineæ in malignis putredinosa, & cum cadaverosa corruptelâ conjuncta sit, clarum sit maxime ex viscerum sphacelo, corruptione, eaque quandoque verminosa. Nigras variolarum, petechiarum maculas & pustulas anthracum atro colore imbutas de sphacelo testari, rem apertissimam esse, nemo negabit. Sectis cadaveribus peste defunctorum intestina sphacelata & nigricantia observarunt Celeberrimus D. DOLÆUS *libro 4. Chirurg. pag. 744.* item SPIGELIVS *libro I. de Semitertianis cap. 14. & 16.* Interiorem ventriculi tunicam & intestinum ileon gangrænosum & putridum vidit BARTHOLINUS *Centuria 3. epistola 2.* Hepar & cerebrum male affectum RULANDUS *libr. de Lue Hungariae pag. 695.* item HIERONYMUS OCCHUS *de peste & venenatis morbis cap. 15. p. 48. anno 1694.* & CORNELIVS GEMMA in *descriptione hæmitritici pestilentis*, in Calvaria magnam putredinis vim circa substantiam cerebri ipsiusque ventriculos viderunt; Et si quis mortem eorum, qui sphacelo partis alicujus perit, sibi proponat, plures ex malignis febricitantium eadem fere morte obire notabit, maxime si defectionem virium, sudorem frigidum & interiorem æstum respiciat. Eminenter autem humorum putredinem patefaciunt præter alia, excrementa alvina, urinæ teterissimo odore adversæ. Graveolens alvi profluvium jamdudum in his morbis observavit HIPPOCRATES *de morbis endemicis*; sudores foetidos hircum redolentes ex universo corpore promanantes in peste Basiliensi memorie mandavit PLATERUS *libro 2. observ. p. 299.* Intumescantiam omnium partium mirandam cum flatu ex ore emissionem foetoris intolerabilis in virgine 22. annorum maligno morbo extincta notarunt M.

N. C. observ. 176. Dec. 2. ann. 1. Caterum & verminosa putredo his in morbis cernitur: notari meretur, quod scribit *FORESTUS libr. 6. observ. 4. in scholiis*, febre maligna mense Augusto ad Novembrem grassante, omnes ægrotantes dejecisse vermes cum fluxu alvi foetido: circa hanc rem quoque confer. *M. N. C. Decuria 2. ann. 5. observ. 99. KIRCHERUS de peste Lect. 2. cap. 4.* Vermiculos è corporibus demortuorum peste, confestim prorepisse animadvertit, ut hoc adductus per vermiculos etiam propagari, & in verminosa putredine pestis naturam residere argumentatus fuerit.

§. XIV.

Statutâ sic essentiâ malignitatis diductisque præcipuorum phænomenorum causis, ordo institutique ratio nunc postulat, in procatacticas & antecedentes inquirere. Lubens fateor, arduum esse in hac re bene versari, dum doctrina de pestis contagii natura scopulosa multisque difficultatibus circumsepata videtur. Ex duplici tamen fonte omnis malignitatis ortum causamque derivari posse, vero videtur simillimum; Nimirum in supra dictis elucescit, vitam consistere in spirituum corporis nostri motu æquabili, qui ex aere temperato puro & legitima corpusculorum sanguinis temperie ac unione mutua deduci debet; eadem ratione malignitatis seu motus spirituum destructi causæ, ex aeris vitio illisque rebus, quæ ad sanguinis elementorum constitutionem tribuunt, deducendæ sunt. Aer, si sincerus & purus est, si temperatus & vividiori elastica aura instructus, dispensat omnes actiones vitales, humorum motus moderatur. Aer namque spirituum, tam illorum, qui in sanguine hospitantur, quam qui in cerebro & nervis undulantur congruum præbet pabulum, & qualis aer, talis quoque solet esse motor machinæ nostræ. Quodsi itaque impurus sit, septico miasmate seu corpusculo subtilissimo improporcionado ad sanguinis mixturam & spirituum generationem confertus, respiratione intrò subeat, modo sanguinem, modo ipsum nervorum fluidum in motu suo turbat. Videmus enim minime heteroclitæ figuræ corpuscula cum aere vecta, totam liquidam massam alterare posse: sic pauca salis muriatici vel ammoniaci portio nivi addita in vase stanneo, protinus inferius positam aquam concreescere in glaciem facit, teste *CARTESIO meteorog. cap. 3. pat. V. Morbosius libro de scypho vitreo humana voce rupto*, meminit artificis, qui vitro aquâ pleno exiguum pulveris molem indidit, unde illa brevi post nullo alio intercedente adminiculo ita induruit, ut instar nativi crysalli manibus tractari posset. Sic quoque ab *Excellentissimo Domino Præsidente, Fautore ac Promotore colendo* communicatum accepi liquorem, qui affusus aquæ simplici, hujus portionem in verum lapidem firmum ac stabilem mutat. Notatu dignum est, quod scribit *Johan. Aventinus Annales Bojorum libr. 7. 348. in descriptione horrendi terræ motus* horrendo terræ motu scilicet quinquaginta homines, rusticas item mulgentes cum vaccis extinctas diriguisse, & paulo post sævissima in universum orbem grassabatur pestilentia: Plerique mortaliū extincti sunt, & subita lue correpti dicto citius interibant. Ex hisce jam liquet quanta contagii seu miasmatis virulenti possit esse vis & potentia in destruenda sanguinis & humorum textura; corpuscula enim virulenta subtilissima arctissimos poros subeunt & vi sua potenti centalem fluidorum dissolutionem machinantur.

§. XV.

Constat observatione attentâ, aerem in locis calidissimis inquinatum halitibus putridis, seu vaporibus subterraneis vehementiori terræ motu excussis, vel infectum cadaverum non humatorum vel infectorum exhalationibus, constituere ut plurimum pestis, & virulenti contagii ortum. Miasma tale aere vectum & ad mixturam spirituum prorsus improporcionado introsubiens, animale maxime destruit fluidum, & sanguinis miscelam vel nimium dissolvit vel coagulat & ubique machinatur subruere functiones naturales: & quod maximum est, semper instar fermenti se multiplicat, ita ut ex corporibus ejusmodi infectis, copiosissima ejusdem naturæ exhalent corpuscula, quæ à dispositis subjectis recepta, eandem ludunt tragoediam. Videtur tamen ut ingeniosissimi *JOH. NICOL. PECHLINI observat. med. physic. 17.* verbis utar, in tam affini hominum animantiumque constitutione uni saltem speciei sic alligari contagium, ut non temerè in aliam proserpat. Sic bestiarum, suum, pecudumque contagium nihil habet cum hominum commune, hominum contra bestiarum nihil morantur, sed in suo quoque genere determinatum grassantur & enecant. Neque etiam cujusvis constitutionis homines contagium tale æquè afficit. Præclare monet *HIPPOCRATES libr. de flatibus cap. 8. parag. 4. differt corpus à corpore, natura à natura, nutrimentum à nutrimento: non enim omni animantium generi eadem aut non conferunt, aut commoda sunt, sed sunt alia aliis convenientiora.* Maxime autem contagium morbosum in illis individuis vim suam exserit, quæ similem, quoad humores & corpus infecti, possident dispositionem. Nonnulli temperamento gaudent quasi alexipharmaco, quod prorsus à contagio non movetur, vel turbatur, sed vis ejusdem prorsus eluditur. At vero aer non solum malignorum miasmatum vehiculum constituit, sed & pro diversitate locorum, climatis & soli varians, cereis temperamentis magis averfatur, vel ipsis congruit, & turbas excitando humorum mixturam pervertit. Non enim aer incolis & advenis infestus est & qui his familiaris & salubris, illis nocivus & exitialis existit. Atmosphæra Hungariæ peregrinis maxime insalubris & quidem Germanis, uti Siciliensis Gallis; quod autem aeris textura cuivis regioni peculiaris ad mixturam liquidam modificandam, multum faciat, unico vulgari quidem experimento liquet, dum in certo tractu propter aeris varietatem ex iisdem ingredientibus, eadem præparandi licet via, diversa, non ejusdem saporis ac virtutis, coquitur cerevisia.

§. XVI.

Sicuti autem ad cruoris nostri in vasis conservationem & spirituum generationem non tantum sincerus aer, nullo peregrino miasmate inquinatus, requiritur, verum etiam temperatus, nec nimis calidus, æstuanis, nec nimis humidus, ita è contra omnis intemperatus excessive calidus, vel humidus lædit spiritus, debilitat, morbosque malignos progignit. Jamdudum *HIPPOCRATES & GALENUS* epidemiorum morborum causas in aerem vel nimis humidum aut calidum & siccum retulerunt, ac ex temporum & tempestatum mutationibus dictorum morborum originem derivarunt. Quod humidum concernit, ille maxime nocivus est, qui ex inferioribus, velut ex stagnis, paludibus putridis spirat. Ex veneficis vaporibus in aerem à putrida aqua fluminis Caleg vocati sublatis plurimas variolas pestiferas

ras notavit ALPINUS *tractat. de medicina Aegyptiorum lib. 1. parag. 25.* Continuos imbres, nebulosum ac pluviolum coelum multum facere ad excitandam putredinem apprime in corporibus mollibus, iisque humidis, crebra tam veterum quam recentiorum experientia notavit. GALENUS *libro de temperamentis* scribit, aerem nimis humidum ad pestilentiam excitandum aptissimum esse & HIPPOCRATES *libro 3. aphorism.* edocuit, putredines humidis temporibus fieri atque videri. FERNELIUS inquit, *de abditis rerum causis libr. 2. cap. 76.* pestilentiam graviolem evadere in regionibus putridis exhalationibus infestis, quam in sicca & pura, & rursus graviolem aestate, quam hyeme, & austrina tempestate, quam aquilonia, inaequali intemperatoque coelo, quam aequali atque temperato. Ita DIEMERBROECK duobus tribusque diebus ante & post novilunium ut & plenilunium pestem exacerbata fuisse & plures corripuisse, invadentes vero omnes mortuos esse. Rationem si expetas, quare nimis humidus sub calore moderatus aer ad putredinem sanguineam humoresque disponat, talis videtur, nimirum aere existente nebuloso, aetheris vis, quae alias in celerrimo motu versatur, ab humidi exsuperantia nimium retunditur. Curiosum est, tali dispositione aeris mercurium in barometro notabiliter ad aliquot gradus descendere, quoniam motum aetheris, à quo corporum gravitatem recentiores, inter quos elucet M. HUYGHENS *traité de la pesanteur*, deducunt, humidi copia multum retardat. Et quandoquidem aer aethere vividiori donatus tam spirituum machinae nostrae materiam praebere, quam elementa sanguinis invicem miscere, & cunctas partes fluidas impellere debeat; facile perspicere liquet, aethere sic refracto, labascere humorum sanguinisque motus, spirituum vim debilitari & ad putredinem inclinationem fieri.

§. XVII.

Præterea subito post humidam aeris temperiem irruens frigus maligna quadam vi morbos gignere solet, forsitan quod expiratione seu evaporatione excrementorum corporis retardata, major vitiosorum humorum in vasis fiat collectio, & ad putredinem dispositio. Experti id sumus, inquit OLAUS BORRCHIUS *Acta Hassnensis p. 65.* febres malignae plerumque evadunt pertinaciores, quod magis gelu urget, sed quamprimum circa veris initium remittit gelu, remittit etiam violentia febris; eadem ratione variolae observantur maligniores hyeme, quam tempore vernali, ubi benigniores sunt.

§. XVIII.

Præter humidum autem aerem, & excessive calidus ad putredinosam sanguinis & humorum dissolutionem quoque facit, omnia quippe sub calidissimo coelo degentia corpora, dissipato homogeneo humido, facile concipiunt putredinem; unde colligunt multi, in locis sub frigidiori coelo positis, mitiores morbos malignos homines pati, ac in regionibus septentrionalibus, & aliis frigidioribus orbis plagis. In Barbaria propter immodicum coeli calorem, corpora excellentissimas suscipere putredines, pestemque produci, quae dein in Græciam & Syriam transfertur, autor est ALPINUS *de Medicina Aegyptiorum p. 31.* Sic quoque PLATERUS *libro observationum secundo p. 302. Basileæ 1559.* post aestatem maximam vulgo *der heiße Sommer* dirissimam notavit pestem. Dysentericum malignum morbum sub autumnii initium post ferventissimam, diuturnam tamen aeris constitutionem, oboriri, res est notissima. HIPPOCRATES *Epidemiorum libr. 7.* testa-

tur, siccitates, maxime sub cane ventisque calidis, febres malignas, sudatorias gignere; Facilis ergo ratio est, quare ex regionibus orientalibus pestis ut plurimum ad nostra feratur loca. Morbilli, qui in his locis non adeo maligni sunt, in orientales insulas à Belgis delati, tertiam fere hominum partem in Insula Moa interemerunt vide M. N. C. *Decuria 1. obs. 194. ann. 16.* Accedit, quod tam calida tempestate, aer insectorum copia, quae tum temporis facile generantur, confertissimus sit; hæc autem subtili caustico sale abundant, & atmosphæram sic tetrâ & nocivis exhalationibus imbuunt; quare post insolitum talismodi insectorum in aere conspectum, ut plurimum fiunt morbi epidemici malignitate notati. Aer enim tam excessive calidus, quam acerrimis evaporationibus repletus, contextum sanguinis & humorum vitalium dejicit, salia acuit, solidas sanguinis moleculas solvit & destruit, serosas & evaporabiles dissipat: paucis ut complectar, humorum atque cruoris fusionem vel colliquationem vehementissimam producit.

§. XIX.

Præter dicta aeris vitia, qui superius elementum & pabulum spirituum suggerit, magnam quoque potentiam naturalem sanguinis schesin destruendi possidet ipsaque elementa sanguinem immediate componentia, vel ex illis enatas intemperies, quibus sanguis ac humores afficiuntur. Non minus verè quam mechanice, HIPPOCRATES *de prisca Medicina* loquitur. *Inest in homine & amarum & salsum, & dulce, & acidum, & acerbum, & fluidum & alia infinita, varias facultates habentia, copiamque & robur, atque hæc quidem mixta ac inter se temperata neque conspicua sunt, neque hominem lædunt, ubi vero quid horum secretum fuerit, atque ipsum in se ipso fuerit tum & conspicuum est, & hominem lædit;* quod si itaque in M. S. vel humidum iners, viscosum principium nimis abundat, subjugato principio oleoso sulphureo, quod custos solet esse putredinis, sive etiam fluidum salinum sulphureo-volatile principium prædominetur, nativa sanguinis crasis mox invertitur, & via ad malignitatem & interitum sternitur. Ex hoc jam intelligi potest, quare, qui humidi sunt temperamenti, qui obesi & corpus spongiosum laxum possident, multoque humore scatent, malignis morbis magis afficiuntur, & difficilius quoque evadant, quam qui corpore sunt moderato, frigido & sicco. Elogio HIPPOCRATIS *libr. 2. aphor. 44.* omnes obesi citius moriuntur quam graciles, qui corpora magis habent perspirabilia. Et hæc porro ratio est, cur infantes, mulieres, eaque gravidae à peste morbisque malignis facilius afficiantur, quam viri. Pestis Basilienensis gravidis mulieribus insensa præprimis fuit, & plures, quæ utero gestabant, invasit & vel foetu nondum excluso, vel per abortum prius rejecto, enecavit; de quo videatur PLATERUS *libr. 2. pag. 305.* Ob hanc rationem quoque, qui copiosos ac impuros cibos ingerunt, corporibus fatigatis ac delassatis, facile labuntur in morbos malignos: copiosæ enim ciborum moleculæ & non rite à menstruo gastrico subactæ, non adeo facile in mutuos cum sanguinis elementis abeunt amplexus, nec ejus obsequuntur motui, sed lentore suo vel resistunt, vel contentum humorem turbant, & impuritates ad putredinem maxime proclives, generant. Spectant huc curæ, sollicitudines, terror ac immoderatus moeror, metus; de quo vide PECLIUM *Observ. physic. 121. pag. m. 445.* Hi affectus animi spiritus mixturæ sanguineæ consumunt, unde facilis suboritur malignitas. Ex nimio moerore malignam

malignam febrem ortam vide *M. N. C. Decad. 1. anno 3. observ. 235.* & ex terrore: vide *Acta Hassnien- sia anno 72. p. 168.*

§. XX.

Deinceps diathesis sanguinis scorbutica, sulphurea; acris ad vincula ejus laxanda, & naturam ac crasin deiciendam, magnum confert momentum: proinde qui biliosi sunt & rarioris texturæ, qui scorbutici & hypochondriorum vitio laborant, malignas humorum ebullitiones frequenter experiuntur. In Dania majorem in febribus esse malignitatem propter scorbutum ibi grassantem, docent *Acta Hassnien- sia observ. 150. anno 1673.* Elegans observatio est Clarissimi CRANII tractatu de homine; graviter vulneratos, si sanguinem acrem scorbuticum habent; (quod apparet si illorum sanguis ex linteis agrè detergitur) ut plurimum mori; patet inde ratio cur tempore pestis morbi istiusmodi chronici, ut passio hysterica, scorbutus, phthisis, arthritis vaga facile induant malignitatem. Observatur quoque indies in subjectis cacochymicis, morbos, alias qui boni moris sunt, uti erysipelas, pleuritis, anginae, arthritis, malignam vim exerere. Ebrii & qui spirituofo potu abutuntur, præ aliis morbis malignis tentantur. Annotavit PLATERUS *libr. 2. pag. 244.* crapula deditos viros triginta una nocte post publicum quoddam epulum lue pestifera affectos, è medio sublato fuisse. Ebrietas enim spiritus dissipat, cruditates in biliosam & acidam putrilaginem fatescentes, parit: spectat huc quoque ira & nimia ex- candescencia, quæ spiritibus furorem conciliat, & de statu suo dejicit humores, hæc uti magnos morbos, sic quoque malignos generat. Ira qua ratione spiritus & sanguinem afficiat, vel exinde constat, quod in contusionibus capitis, inflammando cerebri membranas, mortem accersat; de qua re vid. HILDANUM *Centur. obs. 17. & 18.* Dysenterias lethales potissimum sub æstate ferventissima generari; superiori loco dixi, & subjecta biliosa dysenteria valde obnoxia esse, invenio in *Ephemerid. anno 3. obs. 96.*

§. XXI.

Tandem malignitatem morbis infert præpostera etiam benignorum tractatio; tam quoad regimen quam quoad medicamentorum usum. Notum est; quantum damnum afferant in variolarum febrium acutarumque curatione venæsectio intempestiva, phar- maca fortiora, sudorifera calida, volatilia; opiata; & regimen nimis calidum. Plures hac ratione pereunt, qui si totum negotium saltim naturæ commissum fuerit, servati essent, talia enim vires optimas morborum medicatrices penitus absumunt; spiritus nimium dissipant. Ex tertiana intermittente purgantium fortiorum exhibitione in diebus canicularibus malignam febrem ortam in discursu suo practico me docuit Excellentissimus D. A. Q. RIVINUS *Fautor ac Præceptor olim æternum colendus;* de qua re pluribus legi meretur jam laudatissimi Viri tractatus de peste *Lipsiensis.* Febrem singultuosam malignam ex intempestiva suppressa diarrhœa describunt *M. N. C. decur. 2. anno 8. obs. 212.* quod regimen nimis calidum & sudorifera fortiora in variolis & malignis valde noceant. vid. SYDENHAMII *opuscul. Sect. 2. cap. 2.* Venæsectionem in morbis malignitatem augere magno ægotantium damno testantur *Acta Hassnien- sia observ. 115. ann. 1673.* morbi alias benigni, si corpora viribus & spiritibus exhausta adoriuntur, malignam naturam præ se ferunt. Sic recidivæ ut plurimum sunt lethales, quoniam in illis, quibus superveniunt, vires omnes fractæ sunt, &

Frid. Hoffmanni Oper. Supplem. II.

mixtura ac crasis humorum de naturali statu penitus dejecta. Idem accidit, si acutæ febres, inflammationes, dysenteria, corpora affligant, inedia, vel nimis curis, mœrore confecta, quia paucos habent spiritus. Milites in castris labore; inedia fracti, domum reversi, quando largiori diætæ indulgent, malignis febribus, morbo sic dicto Hungarico tenentur: ubi enim spiritus deficiunt, ibi motus sanguinis & humorum vitales labascunt, & unio mixturæ sanguineæ periclitatur; hinc copiosæ ciborum moleculæ accedentes, à natura minus subigi queunt, sed ad manifestam disponunt putredinem. Nullam aliam ob rationem puerperarum morbi tanto periculo expositi sunt; quam quod in illis vires à partu collapsæ, sanguis copiosus profusus, & venæ impuris à tempore ingravidationis collectis succis turgent. Excieta & retenta; si modum excefferint, corpus itidem debilitant, ut contagium vel promptius recipiatur, vel etiam simplex morbus malignam vim assumat; accidit hoc si catamenia, si sanguis ex naribus immodice fluat; imminuto etiam sanguine imminuuntur etiam vires; notabile est quod scribit DIEMERBROECK *de peste libr. 1. cap. 5.* si quis veneri nimis strenuè in peste litasset, id suo damno expertum esse, & plurimis sponsis secunda tertiae post tædam nuptialem die, funebrem telam accensam. Adeo ut ex jam dictis pateat, malignitatis causam non tantum in extrinseco quodam principio quarendam esse, sed in ipsis individuis sapius latitare.

§. XXII.

Prognosis his in morbis valde est difficilis, & HIPPOCRATES *aphorism. 19. Sect. 2.* acutorum morborum prædictiones, ratione salutis & mortis, valde esse incertas observavit. Sapius in morbi exordio, blanda & tuta omnia videntur; pulsus naturali similis apparet, urinæ satis bonæ, ardor non adeo mordax, nec sitis veheimens; quare etiam se perituros vix credunt Medici æque ac ægotantes; mox circa quintum vel sextum diem omnia in deterius labuntur, inexpectata virium fit prostratio, inquietudo; pulsus exilis, intercisus est, mens turbatur, de nulla alia re conqueruntur, nullo dolore, quam virium lapsu, & sic præter omnem spem intereunt. E contra sæpe in initiis gravissima videntur symptomata; anxietates cardialgicæ, inquietudines, ardor corporis maximus cum cephalalgia intensa, pulsu celeri, delirio furioso, & tamen præter omnem expectationem evadunt, ut adeo Medicus, si famam suam vult tueri; in prædictionibus cautus; juxta monitum HIPPOCRATIS, se gerere debeat: grave tamen semper subesse periculum liberè pronunciare potest. Dantur tamen quædam signa, quæ statum morbi periculosissimum indicant, & omnem spem vitæ decollant, & viceversa quæ spem aliqualem reconvalescentiæ promittunt, quorum notitiam ut habeat Medicus, multum interest. Pessimum autem & plerumque funestum indicant eventum, virium summa jactura, syncope, exanthematum eruptio cum subsequente majori debilitate: nullus doloris sensus; pustulæ & maculæ nigrae, vel dispersæ, vel collectæ, membrorum convulsivi subsultus, extremorum frigus cum æstu interiori, delirium taciturnum cum floccorum collectione, deglutionis difficultas, urina in variolis cruenta, de qua legi potest HOECHSTETERUS *observ. Med. Decad. 1. c. 7. 8. 9.* & hæmorrhagiæ in principio enormes. Spem autem faciunt constans obauditio vel surditas, somnus paucus licet interruptus; & cum terrore conjunctus post exanthematum eruptionem, & evacuationes vel sudorem vel alvum, mutatio pulsus &

symptomatum levamen. Et ut in summam seu compendium omnem prognosin redigam; quo magis vires morbi crescunt & naturæ decrescunt, eo semper pejor status est: & contra, quo magis vires morbi decrescunt, & naturæ crescunt, eo melior apparet status.

§. XXIII.

Deinde circa morborum prognosin notanda frequentia veniunt; si morbi epidemici à statu aëris humido proveniunt, & illi, qui his tentantur, humidæ constitutionis habitusque corporis laxioris sunt, simul & pingues, tunc res periculosior; item accidit, si à nimio fervore orti hi morbi biliosas teneras complexionibus adoriuntur; & vice versa qui obesi sunt, venas habet angustas & corpus laxius, vel scorbuticis salibus onustum, vires paucas, difficilius evadunt, & in præsentiori vitæ periculo constituti sunt, quam macilenti, & ubi spiritus magis sunt uniti & concentrati. Verissimum est elogium HIPPOCRATIS *aphorism. 44. libr. 2.* crassi admodum secundum naturam citius moriuntur, quam graciles. CELSUS *libr. 2. cap. 1.* consentit dicendo: *obesi plerumque acutis morbis, & difficultate spirandi strangulantur, quod in corpore tenuiore vix evenit; graciles enim corpus habent æquum ac perspirabile.*

§. XXIV.

Quod horum morborum medelam concernit, hæc propter diversitatem individuorum, morbi genii & symptomatum, varia sæpe & dubia est. Nulla ad istiusmodi morbos curandos dantur specifica, certa & infallibilia remedia, nec una eademque medendi methodus in omnibus obtinet: morbi enim epidemii toto differunt cœlo, ut ad mentem SYDENHAMII *de morbis endemiis*, methodo, quâ corrente anno liberaſti, eadem ipſo anno jam vertente forſan è medio tolles. Aureum hinc monitum est laudati SYDENHAMII, *tractatu eodem Sect. 1. cap. 2.* In tam spissa hac rerum caligine nil mihi prius est quam, quando novæ febres grassari incipiunt, cunctari paulisper, & ad magna remedia non nisi suspensò pede ac tardius procedere, diligenter interim illarum ingenium & morem observare, quibus itidem præsidiorum generibus ægri juventur vel lædantur, ut quam primum his repudiatis illis utamur. Cunctatio hic vincat præcipitium & recte perpendas illud THUCYDIDIS: *Inſcitia fiduciam, prudentia cunctationem gignit.* Interim tamen generales quædam in omni morbo maligno curando indicationes & regulæ attendendæ sunt, quas summam, paucis tamen, perstringere animus est, subjungendo dein monita circa usum magis specialem remediorum & quidem heroicorum. 1. Ergo in omnium morborum perniciosorum cura spiritus ac vires corporis conservatrices & morbi medicatrices omni modo servandæ, roborandæ ac generandæ sunt; morbi enim hi spirituum sunt, illos immediate quasi afficiunt, motum eorum ac crasin invertendo. 2. humores & sanguis in mixtura sua ac vinculis quovis modo firmandi, & defendendi à putredinosa dissolutione sunt. Potest in cura horum morborum teneri illud PINDARI *Oda 5.*

Χρὴν ὅαν ἐπὶ τὸν τ' ἀμάρτυρας τὸν ἐχθρὸν.

Oportet quodlibet faciendo labefactare hostem.

§. XXV.

Servant autem, recreant, & restituunt spiritus maximè aer purus, temperatus. Dici vix potest, quantum aer ad sanitatem & ad morborum curatio-

nem conferat; qualis enim aer, tales solent esse spiritus, & quales spiritus, talis dispositio & motus sanguinis & humorum. Aer quippe superius illud elementum est ac pabulum, quo ipsi spiritus nostri vivunt & nutriuntur, & uti; qui nimis est calidus, ficcus, frigidus & humidus nocet: sic è contra temperatus, & sincerus, recens & blandè agitated confert, & hisce in morbis maxime expetendus, & quo magis conducatur, suavis odoramentis vel effluviis alexipharmacis corrigendus est v. gr. floribus rosarum, camphora, corticibus citri, quæ appendi possunt. Deinde confortant suaveolentia & cordialia sic dicta frigida, in quam classem referri possunt aquæ destillatæ ex variis floribus, v. gr. rosarum, borraginis, buglossæ, primulæ veris, acaciæ, florum tilia, aurantium, sambuci & quæ sunt ejusdem generis; flores namque subtilissimo blando sulphureo principio spiritibus grato abundant. Ex horum censu quoque sunt Tincturæ quatuor florum cordialium, violarum, julepus rosarum, syrupus granatorum, rubi idæi. Deinceps in dispositione sanguinis humida omnium cordialium præstantissimum est vinum, quod modicè & circumspectè exhibitum, mirum recreare & vires augere solet, modò non offeratur in tali statu, ubi graviores inflammationes adsunt, vel æstus corporis maximus, cutis arida & furiosum delirium præsens. De vini usu eximio in malignis legi merentur BARTHOLINUS *Centur. 6. hislor. 7. Ephemerides Decur. 2. ann. 4. obs. 169. & 49.* Prisci Medicinæ Autores rarissime ægris vini potum prohibebant, ut bene notat MERCURIALIS *annotat. in 5. epidem. p. 165.* Ipse HIPPOCRATES *libr. 3. de morbis pag. 161.* vinum in febre ardente commendat. Refert ZACUTUS LUSITANUS *libr. 1. praxeos admirand. obs. 93.* se in febre maligna, præsentē siti intensā cum linguæ siccitate & nigredine, ægro jam desperato vinum cum successu exhibuisse, ut perfectè restitutus fuerit. In petechialibus vinum cum magno emolumento exhibitum tradunt *M. N. C. decad. 2. ann. 7. obs. 145.* In variolis vini rubri usum vide quoque in *M. N. C. decad. 2. anno 9. obs. 102.* Præter hæc jam dicta mirè vires in morbis restaurant ambrata, moderatè tamen, & non nisi cum refrigerantibus & acidulis exhibita. Instar omnium esse potest spiritus dictus Regius, ex spiritu rosarum, spiritu salis, ambra & confectione Alkermes paratus. Descriptionem vide in Thesauro Pharmaceutico B. FRIDERICI HOFFMANNI, *Patris.* Commode hic spiritus instillari potest ordinario potui. Spectant ad hanc classē quoque externa epithemata & linimenta varia, pulsibus & regioni cordis applicata e. gr. ex aceto rosaceo, theriaca, camphora, oleo ligni rhodii, cortice citri, composita.

§. XXVI.

Quod alteram indicationem concernit, quæ in eo consistit, ut mixturæ sanguineæ vincula illibata servantur, varia hic in usum trahi possunt; omnibus autem palmam præripiunt diaphoretica blandiora & fixiora, à veteribus κατ' ἐξοχὴν sic dicta cordialia & bezoartica. Talia sunt ex simplicibus antimonium diaphoreticum, bezoarticum minerale, solare, terra sigillata, bolus armenia, quem GALENUS *libr. 9. de simpl. medicam. facultatibus*, in peste ceu verum antidotum extollit, lapides cancrorum, mater perlarum, cornu cervi philosophice præparatum, unicornu fossile, lapis bezoarticus, Cinnabaris nativa. Ex compositis præstantissimæ virtutis, & usus ferè quotidiani sunt, pulvis bezoarticus Sennerti, Anglicanus ex globulis, quem descriptum vide in WILLSII *pharmacia rationali*; pulvis pannonicus ruber, Ludovici

Ludovici &c. Remedia hæc terrea, uti notum est, difficillime concipiunt putredinem, sed magis illi resistunt, dum stabilibus & non facile divisibilibus partibus motui fluidarum partium intestino obicem ponunt, & ne miasma venenatum disturbet sanguinis mixturam, impediunt. Secundæ indicationi satisfaciunt vulgo sic dicta alexipharmaca, quæ vi secundum veteres occulta, & tota substantia veneni vi resistunt, & illud expellunt. Laudem hic merentur ex usitatissimis: theriaca coelestis, mixtura simplex, & famosa tinctura bezoardica, radix nisi, contrayervæ, tormentillæ, vincetoxici, angelicæ. Omnibus autem præeunt duo hæc alexipharmaca quasi catholica, quæ omne fere punctum absolvunt, nimirum camphora & scordium. Camphora sale suo oleoso tenuissimo transpirationem & humorum ventilationem egregie adjuvat, si apprimè cum nitro, quod ejus vim calidam temperat, misceatur. In malignitate morborum ejus usum non satis extollere possunt, CRATO *epist. med. p. 103.* FERNELIUS *libr. 5. meth. medend. cap. 21.* MINDERERUS *de pestilentia cap. 15.* RIVÉRIUS *Centur. 1. cap. 21.* & CRAANEN passim in praxi. Scordium propter alliacum subtilem suum odorem & amaritiam omni putredini adversam à multis seculis ad malignorum morborum vim infringendam habitum fuit. Diascordium Fracastorii & Sylvii passim adhuc in usu quotidiano est. Commendo quoque in hunc finem liquidum bezoardicum ab *Excellentissimo D. Præsede in Collegio suo Experimentalis Chymico* paratum, maximæ virtutis & efficacæ, quod constat ex essentia scordii saturata, extracto quodam theriacali & camphora roborata, cui pro re nata laudanum opiatum liquidum admisceri potest. Plus hoc medicamentum præstat quam tinctura bezoardica: quæ propter aciditatem non omnibus convenit.

§. XXVII.

Ulterius contra veneni vim sanguinem armant acidula imprimis volatilia, a veteribus in cura horum morborum semper magni æstimata, imprimis si cum alexipharmacis; antea dictis, maritentur. Sunt autem hæc acetum destillatum, bezoarticum, sambucinum, aqua prophylactica Sylvii, pomum citri in substantia, spiritus salis, nitri, vitrioli, volatiles, & bene rectificati vel etiam dulcificati, aquæ cordiales ex succis & similia. Postremo loco massam sanguineam in mixtura sua firmant humectantia & fluiditatem foenerantia, quæ ad æstum compescendum, sitim extinguendam & acridinem peccantium humorum infringendam præsentissimi usus sunt. Ejus generis autem sunt decoctum scorzonæræ, ptisanæ, decoctum cornu cervi citratum, emulsionem amygdalis & seminibus 4. frigidis majoribus paratæ, gelatinæ cornu cervi, eboris, julapia varia: nitrofa, v. gr. nitrum vitriolatum, nitrum depuratum: hæc enim vel sola, vel cum superius allatis lege artis mixta, in acri humorum ebullitione compescenda, vix paria habent remedia.

§. XXVIII.

His tam in theoria quam praxi clarissime diductis, liquido intelligi posse arbitror, quid de remediis vehementioribus heroicis vocatis, venæ sectione, purgantibus, vomitoriis, sudoriferis vehementioribus, opiatibus, volatilibus, calidis, vesicatoriis statuendum vel judicandum sit? Notum est illa, à plerisque iisque solidioribus Practicis prorsus daminari, ab aliis vero ex parte adhuc, certis positis circumstantiis defendi, ab empiricis autem indies adhuc maximo cum ægrotorum damno adhiberi. Ego breviter judicium hic meum interpono. Quo-

niam nempe antea dicta remedia talis naturæ ac indolis sunt, ut partim spiritus & vires auferant, dissipent, partim adhuc magis dissolutionem sanguinis elementorum inimico suo motu promoveant; hinc illorum usum prorsus damno, vel sub cauta circumspeditione saltem, aliis id exigentibus, admitto. De venæ sectionis usu mirum inter se certant practici. Ad meam vero mentem venæ sectio nunquam accommodata videtur malignitati curandæ. Potest tamen admitti in plethoricis, & qui adsueta missione & excretioni sanguinis sunt, venas habent majores, sique intemperies sanguinis biliosa magis peccet quam humida. Illud autem fiat statim in principio, quando vires constant, & pulsus robur indicat.

§. XXIX.

Purgantia omnia fortiora tam in principio quam in progressu morbi dissuadeo, ut pote quæ vires consumunt, & sanguinem ac humores ad majorem turbationem & ebullitionem disponunt, ferumque laudabile detrahunt. Leniora tamen, sine præservandi vel etiam in morbi exordio si statim Medicus adfuerit, admitti possunt; hæc enim evacuando primam regionem, pabulum morbo subtrahunt, & quò vis medicamentorum minus obtundatur, causantur. De illorum autem usu latius videri potest HORSTIUS *tract. de febr. malignis.* PLATERUS *in praxi p. 295.* DIEMERBRÖECK *obs. med. 24. & 25.* DONCKERS *libr. de ideâ febris pestilent. pag. 288.* Idem tenendum est de vomitoriis, quæ, nisi in principio, ubi ventriculus saburra scatet vitiosorum humorum, & malum per contagium haustum in ejus pomœriis adhuc hæreat, plus damni quam emolumenti afferunt. Vide de hac re PLATERUM *prax. pag. 209.* Sudorifera fortiora & calida quod cernit, illa quantum noceant & debilitent, practici optime norunt; vulgaris quidem, sed pessimus est mos, in principio vel progressu horum morborum sudorifera volatilia exhibere, & ad sudorem ægrotos cogere. Methodus hæc revera omnes morbos malignos, & ubi exanthematum est eruptio, sic tractandi, pessima est, utpote volatilia, sanguinis elementa magis dissolvunt & malignam acrimoniam augent. Ex malignis intempestivo sudoriferorum usu petechiales; & ex variolis benignis malignas progenitas fuisse non semel observavit Excellentissimus D. Præsides. Opiata quantum noceant, dici vix potest, & nullus dubito damno suo id experturos esse, qui liberaliter illis utentur; qua ratione enim talia, quæ spiritus suffocant, prodesse possint, non video. Non quidem nego, papaveracea quandoque, ubi magna humorum acrimonia adest, vires tamen adhuc robustæ, quæ ex pulsu dignosci possunt, circumspecte adhibita proficua esse, in pure tamen malignis omni modo reformidanda sunt. Vesicatoria, de quorum usu & abusu mirum certant Auctores, vix aliqualem usum afferre posse, dicere ausim, nisi quando soporosum accidens urgeat.

§. XXX.

Hiscæ discussis restat saltem, ut pauca monita, magni tamen usus ad felicem curam subjungam, nimirum ante omnia, 1. prudens medicus his in morbis quantum fieri potest, cito auxilio succurrere suo debet; quicquid enim laudabile hic præstari potest, id in principio fieri debet, 2. quantum possibile, blande ac leniter semper procedat, nec nimium moveat, aut irriter, 3. motus naturæ criticos nunquam turbet, vel illos supprimat aut ante tempus accersat. Spectat huc illud LIVII *libr. 22.*

cap. 18. medicos interdum plus quiete quam movendo vel agendo, perficere. 4. morbi naturam ac mores, ægri constitutionem, habitum corporis, consuetudines, victum & causas epidemii mali procatacticas exactè noscat; sic feliciter curam, assistentem gratiâ Divinâ & prudentiâ propria peragere poterit.

§. XXXI.

Ultimo loco quoad præservationem quædam subjungenda restant. Ad hanc autem valde commendatur usuram aeris puri, temperati, non infecti, corporum munditiem, exercitium moderatum, mentem tranquillam, & usum vini optimi, nec non acidorum, non tamen nimium; Ex remediorum classe myrrhata laudo impense, myrrham in substantia vel mastigando assumptam, vel in essentiam balsamicam roborantem cum spiritu cinnamomi redactam, item salia volatilia oleosa, blandam sanguini & humoribus spiritualescentiam foenerantia, hu-

miditates absumentia, spiritus excitantia & per consequens circulationem sanguinis promoventia, quorum usus cum cibis potest esse creber; eminent autem ex omnibus spiritus oleosus volatilis caryophilatus vel ex nucista, oleo cardamomi & corticibus citri recentibus lege artis paratus longe elegantissimus. Præterea alvus pilulis Rufi vel ex gummatibus; si non respondeat, blande stimulanda est. Si æstas ferventissima minatur morbos acutos epidemios, aer temperatus seligendus & alimenta blandè humectantia & refrigerantia suadenda sunt, non omisso moderato nitroforum usu. Sed hæc de morborum malignitate ejusque origine & cura dicta sufficiant; specialiora & medicamentorum formulas prudens quivis pro morbi & circumstantiarum, symptomatum ac individuorum differentia ac conditione facile diducere poterit. Atque sic vela disputationis meæ contraho atque pro concessis viribus Deo O. M. laudem, honorem & sempiternam gloriam persolvere gestio.



DE MODO VETERUM

BALSAMANDI CORPORA.

Magnificum ac utilissimum inventum balsamatio corporum est ab antiquissimis temporibus jam dum celebrata. Fluxa ac caduca tam mixta quam viventia sunt, & post interitum brevi in fœtidam deliquescunt putrilagine. Hoc autem portento simile, quo nobiliora videntur, hoc ad cadaverosam corruptionem magis facilia & prona sunt. Ex metallico regno pauca alterationem, multò minus putredinem subeunt: Vegetabilia magis eò inclinant, omnium maximè animalia, quæ, quo perfectiora sunt, eò lubentius abominabilem suscipiunt fœtorem. Rerum omnium, quæ naturæ lege imperioque continentur, princeps homo mentis diversorium habet, si ullum, certè hoc fragile & occisimè putredini expositum. Simul ac soluta ab eo est anima summum splendorem cum fœtore permutat, & invisa putrilago mox pulcherrimum machinæ artificium delet. Videtur in animantibus functionum præstantia in eo posita, quod partes illorum fluidæ ex diversissimis sibi repugnantibus principiis sub vitali unione composita sint, quæ conjugii vinculo excusso propter mutuam repugnantiam motus contrarios subeunt invicem se destruentes. Ut autem illa, quæ grata fuerunt, certis usibus vel saltem memoriæ servandæ accommodata, incorrupta conserventur, varios ab omni ævo excogitarunt modos, variasque encheireses illa condiendi vel balsamandi. In duas vero classes commodè omnes redigi possunt: nimirum balsamatio via procedit, vel sicca vel humida. Sicca fit, si corpora, humido suo prius dissipato, obliniuntur liquore oleoso-balsamico putredini resistente. Humida autem fit, si citra præviam humiditatis abstractionem immerguntur saltem liquori subtili putredini non obnoxio. De sicca & quidem Veterum balsamandi viâ hoc loco saltem verba facturus sum, reliquam tractationem in aliud tempus rejiciens. Prius autem quam de hac re specialius & fusius edisseramus, noscenda sunt omnis destructionis & putredinis principia, quo eo melius fundamentum conservationis inde nobis in-

notescat. Duo maximè sunt, quæ vincula mixtorum, in quo corruptionis ratio consistit, dissolvunt. Primum est aer, alterum humidum. Aer fluidum est summè actuosum & primum quasi movens, quod menstrualis vi mixtorum partes aggreditur, illorum vincula laxat; sicque alterationem, in viventibus autem corruptionem causatur. Sine aeris accessu vix ac ne vix quidem corpora mutantur, sed integra custodiuntur in instrumento, cui aer evacuatus est: Simul ac autem aeris patet accessus, invisa putrilago cernitur. Videtur autem calidus & humidus maxime, vel ipso GALENO teste ad putredinosam talem dispositionem valde disponere. Alterum destructionis principium est humidum, hoc quippe salia contraria solvit, vincula laxat, & ut facilius intestina motio peregrina oboriri queat, efficit. Ex hisce jam clarissime apparere arbitror, aerem arcendum esse, & humidum absumentum, si illibata conservare illa velimus, quæ grata nobis visa sunt. Ægyptii in balsamandi arte celebratissimi hunc in finem exsiccarunt primum corpora, quo reliquæ partes humore excusso arctius sibi implicentur & firmiter coeant. Deinde obdixerunt illa vel cedri oleo, vel asphaltu, vel myrrha, aloë, melle aut cera, sicque per longissimum tempus incorrupta servarunt.

Opportune de hac re scribit PLATO in *Phædone*: *Corpus exaresfactum & conditum, quemadmodum in Ægypto faciunt incredibile quoddam tempus ferme integrum manet.* Pulchrè balsamandi Ægyptiorum modum tradit DIODORUS SICULUS in *Libr. II. rerum antiquarum cap. 5.* Nimirum cadaver apertum vino phœnico lavant, deinde corpus totum ex cedro cum aliis pretiosis unguentis ungunt dies amplius triginta: Myrrha deinceps ac cinnamomo, cæterisque rebus liniunt: quæ non solum id servare diutine sed odoriferum reddere queant. Curatum cadaver cognatis tradunt defuncti, ita singulis ejus partibus etiam superciliorum, palpebrarum pilis integrè servatis, ut omnis corporis species dormientis more integra perduret. Corpora sic diu servarunt domi, hinc POM-

FONIVS MELA *libr. 1. cap. 9.* de Ægyptiis loquitur: *nec cremare nec fodere fas putant: verum arte medicatos intra penetralia collocant.* Item CICERO *Tusc. condiunt Ægyptii mortuos & eos domi servant.* Apprimè autem hunc in usum adhibuerunt cedrum de quo PLINIUS *l. 24. c. 5.* Cedrus magna dat picem, à quâ cedria vocatur: defuncta corpora incorrupta ævis servat, viventia corrumpit mirâ differentiâ: cum vitam auferat spirantibus, defunctis pro vita fit. Huic Cedro inesse vim *ἔχειν καὶ ἀσπὴν φυλάττειν τὰ τεθνεώτα μορία* GALENUS scribit *l. 7. de simpl. medicam. quam* DIOSCORIDES *φυλακτικὴν τῶν ἐκ τῶν σωματίων* appellavit *l. 1. de Cedro.* Porro peregerunt balsamationes etiam inaximè asphalto seu bitumine, quod colligitur in Sodomæorum mare, de hoc STRABO *lib. 6. Geograph. pag. 526.* Ægyptii asphalto ad mortuorum condituras utuntur. Myrrha mortuorum corpora condita fuisse, ne putrescerent scribit PHILO in *Cantica* & PRUDENTIUS in *Cathem. de defunctis.* Corpus Christi Salvatoris myrrha & aloë bal-

samare voluerunt discipuli, de quo vide Joh. XIX. v. 39. Mel autem apprime ad balsamationes in usu veteribus fuisse invenio apud Autores. Ipsum Alexandri M. corpus quod Julius Cæsar & Augustus teste DIONE salvis cute, membris, pilis integrum viderunt, melle conditum fuisse, STATIUS *libr. 3. Syl. indicat.*

*Duc & ad Æmathios manes ubi belliger urbis
Conditior Hibleo perfusus nectare durat.*

Babylonios hoc ritu cadavera sua condiisse memorie prodidit HERODOTUS *lib. 1. Mellis natura talis est* scribit PLINIUS, *ut putrescere corpora non sinat* *lib. 22. pag. 14.* Usus mellis ad consistentiam spissiore prius redacti oleo quodam resinoso destillato roborati in condiendis cadaveribus hodiernis non possumus non admittere, præprimis si debite applicetur. Sed hæc jam de veterum modo balsamandi sufficiant.



DISSERTATIO PHYSICO-MEDICA

D E

AFFECTIBUS HEREDITARIIS ILLORUMQUE ORIGINE.

Primum edita anno 1699.

P R O O E M I U M.



IPPOCRATIA & antiquissima est parœmia: *Qui bene cognoscit, bene etiam curat.* Etenim cognitio exquisita physico-medica, non modo mechanismi microcosmici in genere, quoad statum secundum & præter naturam, sed potissimum specialissima hujus vel illius individui ægrotantis, est profecto præcipuum totius scientiæ & Artis medicæ fundamentum. Quomodo enim quis convenienter languoribus corporis nostri mederi, & ex arte remedia ipsis opponere idoneus est, qui ignorat causas & modos læsionis in genere, speciatim autem in certo individuo. Quamobrem nihil antiquius, nihil magis curæ cordique debet esse Philosophiæ medicæ cultori, quam ut solidam & accuratam sibi comparet particularis cujusvis mechanismi humani scientiam. Desumitur autem illa ipsa ex variis circumstantiis, & essentialibus quibusdam notis ac characteribus, ex quibus primas tenet Temperamentum, sive temperies elementorum, quæ vitales humores uniunt, Habitus corporis sive structura solidarum partium, item vires motrices cujusvis corporis, quæ invicem collata sistunt complexionem, sive naturam secundum Veteres ipsius individui. Hisce porro accedere etiam debet consideratio consuetudinis, quæ in variis actibus tam animalibus quam vitalibus, inprimis autem humorum evacuationibus & secretionibus sese sistit, & maximi momenti est; Ulterius autem considerari merentur, Aetas, vivendi genus, Sexus, Aër, Clima; Quæ cuncta probe invicem pensitata perito Medico subministrant intimam hominis in individuo cognitionem, quæ effato HIPPOCRATIS, principium & primus sermo Artis medicæ esse debet. Verum enim vero omnibus his dictis præferenda jure meritoque est indagatio atque notitia parentum a quibus aliquis genitus fuit. Quemadmodum enim parentum semini debemus prima stamina, elementa ac fundamenta corporis nostri, ita re vera multum interest scire a qua corporis dispositione, quam exacte retinere vi Benedictionis solet semen, aliquis prognatus fuit. Confirmatum enim habemus indubitata experientia, a bona seminis dispositione sanos & valentes, a morbosa debiles, imbec-

cilles, ac morbosos liberos generari; Imo quod magis est, deprehendimus iisdem morbis, quibus detenti fuerunt in vita parentes, affligi, defungi etiam ipsos natos, & quoniam hereditario quasi jure ex parentibus transeunt in genitos, hinc *Hereditarii morbi* vulgò appellantur. Horum itaque consideratio cum summi in praxi medica sit momenti & ad prognosin ac curam perite & prudenter instituendam multum faciat, suscepi in me inauguralis speciminis loco, horum affectuum naturam atque originem pertractare & qua possibile est evidentia enodare. Cui labori ac conatui ut Altissimum Numen auxilio ac gratia sua adesse velit, ardentissimis exigo precibus.

§. I.

UT autem omnia recte & planius intelligantur, primum omnium significatio & vis nominis mihi erit enucleanda. Neutiquam autem complector sub nomine Affectuum hereditariorum illos morbos & vitia quæ a primo ortu infanti communicantur, quod interdum accidit ob turbatam vel impeditam naturam in conformatione a gravi terrore & impressione, vel phantasia vehementi perversa, & maxima cujusdam rei aversione, a quibus causis deinde initium ducunt Nævi materni, Idiosyncrasie, pravæ partium, in figura vel magnitudine, conformationes: Neque etiam sub hereditariis comprehendo illos affectus, quibus mater tempore gestationis laboravit & qui postea etiam mox natos corripunt infantes, uti id ab *Excellentissimo Dno. PRÆSIDE Patrono ac Præceptore meo filiali cultu devenerando* observatum est in matre quartana laborante, quæ etiam filium ex utero emissum, per aliquot annos maceravit: Quale exemplum etiam memorat FERNELIUS *Pathol. libr. I. c. XI.* Neque sub titulo horum intellectos volo Endemios seu certæ regioni aut climati proprios morbos, quorum origo à peculiari soli constitutione, aquarum vel aëris natura, aut perversa victus ratione repetenda est, sicuti in borealibus regionibus est scorbutus, in Anglia phthisis, circa Alpes scrophulæ. Minime quoque omnes illi morbi quibus olim laborarunt parentes & postea liberis communes & familiares fiunt, statim hereditarii dici merentur, possunt enim ex vivendi simili ratione & prava temporum constitutione, identitate temperamentorum iisdem morbi procreari in infantibus, quam olim in parentibus. Tandem etiam nec sano sensu variolæ & morbilli huc merentur accenseri, utpote qui ex impuritate alimenti in utero suscepti originem suam agnoscunt. Sed potius intelligo per morbos hereditarios tales affectus, quorum fundamenta, elementa, & principia constitutiva in parentum corporibus, & imprimis illorum partibus solidis diu præexistunt, qui postea mediante semine, quod quasi in compendio & abstracto totius corporis formam atque imaginem exprimit, in liberos & posteros, hereditario, ut si loquar, jure transfunduntur. ROLFINGIUS *Method. special. Med.* hos morbos vocat, Gentilitios, parentales, connatos; MERCATO habituales; HELMONTIO feminales audiunt. Dicuntur alias familiares, natalitii, originales, connaturales; Germanico idiomate: *Erb- & Kranchheiten / von Eltern oder Groß- Eltern herstammende Kranchheiten.*

§. II.

Evoluta sic nominis ratione, primum omnium erit utile recensere Veterum præcipuas sententias, quosnam speciatim morbos agnoverint pro talibus, qui spargant suas radices in Consanguineos. HIPPOCRATES *libro de Morbo sacro. §. V.* inquit: Ex pituitoso pituitosus, ex bilioso biliosus gignitur, & ex tabido tabidus, & ex splenico sive lienoso lienosus, & cujus pater & mater morbo sacro correpti fuerunt, etiam posterorum ac nepotum aliquis eo corripitur. *Idem*

gravissimus Auctor, in libr. de Aëre, Aquis & locis, effatur, semen genitale, cum ab omnibus corporis membris procedat, à sanis quidem sanum, à morbidis morbidum, & efficit ut ex calvis calvi, ex cæsis cæsi, ex distortis distorti generentur. ARISTOTELES *lib. VII. Histor. Animal.* Læsi, ait, ex læsis gignuntur, v. g. claudi ex claudis, cæci ex cæcis. *Idem l. c. c. XVIII.* manci ex mancis procreantur, & cum parentes cicatrices habuerunt, filii quidam parte eadem similes erant, denique & signa habentes sibi cognata hereditaria, ut verrucas & nævos & cicatrices, aut quid aliud generis ejusdem. ABENSINA *Dec. II. c. 8.* hereditariam proclamat ægritudinem, vitiliginem albam, tineam sive calvitiam naturalem, podagram, phthisin & lepram. PARÆUS *libr. XXIII. 22.* hereditario vitio, inquit, ut claudi & gibbi, sic & luscii sæpe evadunt pueri, vidimusque qui naturali jectigatione capitis continuo moverentur, filium similiter affectum progenuisse. Stolidi etiam ac dementes parentes, vix aliquando ingeniosos generant. PLUTARCHUS *de sera Num. vind.* aquam inter cutem, morbum regium, melancholiam manifeste hereditariis annumeravit. VALLESIUS quoque *in libr. HIPPOCRATIS de Aliment.* multas fluxiones soboles multarum ægritudinum, imo gallicam luem hereditariam agnovit. Ex hisce colligere est quam late pateant, & sese diffundant hereditaria mala.

§. III.

Recensitis sic veterum quorundam de hereditariis morbis sententiis, operæ quoque erit pretium, speciales quasdam allegare observationes certorum morborum à Præcticis hinc inde notatas. Primo autem loco se mihi exhibet *Apoplexia*, quam ex parentibus susceptam observavit FORESTUS *lib. X. obs. 47. 80. item SENNERTUS libr. II. part. I. c. XI. Vertigo* in prolem derivata notatur à ROLFINGIO *Method. cognosc. & cur. affect. capitis. Memoria debilitatem parentalem* describit PHILIPPUS GRULINGIUS *in Med. pract. libr. I. part. I. c. 8.* Item FELIX PLATERUS *in Praxi c. i. Somnambulationem* in parente & natis omnibus cujusdam familiæ notavit THOM. WILLISIUS *de Anima brutor. part. I. c. 16.* Ab eodem Auctore, *capitis dolor diuturnus*, liberis omnibus connatus, descriptus quoque est *l. c. part. II. Pathol. c. 11. Doloris* in capite periodice recurrentis notabile etiam exemplum communicat JOH. DE MURALTO *in M. N. C. dec. II. Ann. VIII. obs. XII.* ubi tota familia huic passioni obnoxia fuit. *Amaurosin* ex dispositione paterna acquisitam recenset MAJOR *in disput. de Amaurosi.* De hereditaria *Cataracta* mentio reperitur in GREGOR. HORSTIO *Epist. medicinal. part. I. l. 2. Ep. I. Hæmoptysin* hæreditariam esse *Celeberrimus WEDELIUS Patronus ac Præceptor meus colendissimus adfert in disput. de Aegro hæmoptoë laborante. Phthiseos* in infantes ac posteros propagatæ mentionem injicit ABENSINA, cujus assertum B. ETTMULLERUS *in disert. de Chir. infusor. affirmat.* Notabile admodum exemplum apud REMBERTUM DODONÆUM *in praxi medica cap. XXXI.* videre est, ubi Avum, patrem &

& omnes liberos tabe extinctos notat. Ita etiam Phthisin ad quintam imo sextam generationem se propagasse & cunctos consumpsisse, HIERONYMUS FRACASTORIUS *Lib. de morb. contagios. cap. 9.* attestatur.

§. IV.

Asthma hereditarium vidit FORESTUS *lib. VI. obs. 9.* item ROLFINGIUS *Epit. pract. libr. 2. Nauseam* connotatam & ciborum quorundam naturalem abhorrescentiam notatam vide a MAUR. HOFFMANNO *Instit. disput. IX. Scorbuto* hereditarium plerumque esse, in confesso est, qua de re si quis dubitat, evolvere potest, REUSNERUM *de Scorbuto*, DRAWITZ *in Symptom. Scorbuto*. FRIDER. DECKER *not. ad prax. Barbett. Cap. III. §. 17.* item GUALTER CHARLETON *de scorbuto p. 157.* *Nephritidem* præ cæteris morbum maxime hæreditarium proclamat FERNELIUS *lib. VI. Vesicæ* quoque *calculum* ex dispositione parentali multos acquirere frequenti constat observatione, & maxime hic locum habet si juniores hujus cruciatus experiantur. De hac re egregius quoque locus videri potest in *Dissertatione de Nova Pathologia Calculi renum*, sub præsidio *Excellentissimi Dni STAHLII Patroni ac Præceptoris mei devenerandi* habita; *Qui inquit*: Velim exempla mihi dari infantum, hoc affectu verè detentorum; quorum parentes non calculosi, aut arthritici, aut podagrici fuerint, aut ad minimum aliquis è proximis agnatis lineæ ascendentis. Sane quotquot mihi observare contigit, hujus generis omnino evidentissime fuerunt, quo nomine allegare possum duos ex una Illustrissima familia filios, quorum alter 7 anno ætatis è calculo vesicæ dimidium ovum gallinaceum mediocre exæquante, obiit; alter ex simili, sed ovum anatis fere superante, 16 ætatis anno cum summis doloris spasticis decessit.

§. V.

Lues venerea, infamis illa infirmorum afflictio; infantes quoque infantes per generationem aggreditur; experientia id satis corroborante. Circa quam rem evolvendus FORT. FIDELIS *de Medicor. Relation. libr. III. sect. III. cap. III.* LAZARUS RIVERRIUS *obs. comm. 26. it.* GREGOR. HORSTIUS *I. II. obs. med. II. Articulorum dolores* & spasticas pressiones omnes hereditarias esse scribit JOH. DE CONCAREGIO. In specie autem podagram auctores passim seminalis originis esse proclamant, experientia siquidem id satis edocti; videri potest GALENI *Commentar. in HIPPOCRATIS Aphor. Sect. VI. 28. item obs. 2.* FEL. PLATERI. WILLISIUS *in Anima brutorum part. II. pathol. 2. c. XIV.* Et HERMANN GRUBE *de Transplantat. morborum. Arthritidem vagam scorbuticam* notat idem GRUBE, quæ filium eadem ætate, & symptomatibus iisdem vexavit, sub qua, & quibus pater symptomatibus ea detentus fuit. *vid. l. c. c. 3.* *Variolas* lethales in generosa familia affligentes, ex qua stirpe juvenis quidam hic Halæ ante annos aliquot illis succubuit, *Excellentissimus Dn. PRÆSES* observavit.

§. VI.

Scabiem præsertim *siccam* in genitos propagari, observatione non una constat. Imo *Ulceræ*, quibus parentes fuerunt afflicti, natos quoque aggredi passim apud Auctores videre licet. *Herniam intestinalem* in tertiam generationem durantem vidit VALESCUS DE TARANTA *lib. VII. cap. 7.* id quod HILDANUS propria experientia confirmat. *Verruæ cicatrices*, in posteris quoque cernuntur, sicuti ARISTOTELES *meminit lib. I. histor. animal. p. 17.* Duo

adhuc sunt affectus, de quibus pauca vel nulla reperitur mentio apud Auctores, quos in praxi sua *Excellentissimus Dominus PRÆSES* aliquoties notavit, à parentum dispositione prognatos, nempe *Hypochondriacus affectus*, & *dispositio ad hæmorrhoidum fluxum*, quo etiam puer ex Illustri familia, quinto ætatis anno & repetitis vicibus fuit correptus. Plura exempla in medium proferre hac vice supervacaneum duco, cum cuivis curioso & solerti ingenio amplissimus pateat campus, similes aliosve casus, vel ex libris colligendi, vel ipsa praxi annotandi.

§. VII.

Non autem soli affectus morborum & defectus corporis in infantes solent propagari, sed mentis & animi quoque vitia, in majoribus radicata, posteris quoque videmus agglutinari. Conspicimus enim iracundos generari ab iracundis, ebriosos ab ebriosis, rixosos à rixosis, avaros ab avaris, & nescio cui vitio obnoxii parentes, in id proclives heredes non relinquere soleant, cujus rei veritas adstruitur quotidiana experientia, unde proverbium enatum: *Non procul a proprio stipite poma cadunt.* Confiteor tamen, educationem, cujus vis & ratio in consuetudine, quæ altera quasi natura est, consistit, in corrigendis & emendandis animi vitiis maximum afferre momentum. Inprimis autem in illatio veræ pietatis ac Christianismi fundamentorum tanta efficacia pollet, ut pravas hominum voluntates ex parentibus impiis prognatas, corrigat & ad meliorem frugem reducat, si in tempore & primis statim annis conveniens hæc medela adhibeatur. Ex adverso etiam conspicuum est, filios sæpe ex assè heredes fieri virtutum paternarum & majorum, ita ut non minus verum Horatianum illud sit, quod fortes ac boni fortibus ac bonis creentur, nisi educatio perversa & malum consortium bonum & nativum mutet, & vitiis imbuat genium. Præterea etiam observatione constat frequenti, natos parentibus etiam evadere simillimos, ita ut formam, figuram, pulchritudinem, structuram partium solidarum & lineamenta exacte repræsentent ac exprimant, unde pulchri parentes nitidos etiam & elegantes infantes, deformes etiam deformes solent progignere, unde est illud *Celeberrimi Poætæ*: *Sic oculos, sic ille manus, sic ora gerebat.* Quinimo animadvertimus etiam temperamenta parentum transire in ipsos infantes, unde scitissime edixit HIPPOCRATES *lib. de Morbo sacro §. V.* *Ex pituitoso pituitosus, ex bilioso biliosus progignitur*, unde nati sæpius ejusdem coloris crines, colorem faciei, habitum corporis strictum vel laxum, staturam corporis similem, vasa majora vel minora habent communia cum ipsis parentibus.

§. VIII.

Ordo jam postulat ut rationes inquiram, quibus demonstrare valeam, quomodo fiat quod non tantum naturalis, sed præternaturalis corporis ac animi status atque habitus mediante semine & per generationis actum, cum ipsis natis ac liberis communicetur. Fateor scrutinium hoc esse summi momenti & difficultatibus non paucis & levibus esse implicitum atque immersum, ut rectius inagnum & mirabile mysterium dicatur, quod mentis humanæ natura assequi vel penetrare nequit. Nihilominus Auctorum quorundam hac de re sententias afferam & quid veri vel falsi subsit, quam poterit, brevissime exponam. Veteres unanimi ferme consensu cum HIPPOCRATE, quod liberi parentibus sive patri sive matri simillimi fiant, deduxerunt ex semine, quod, quoniam tempore coitus ab omnibus corporis partibus procedit, etiam partium omnium formam & ideam

ideam in se contineat. Quomodo sano sensu hæc sententia admitti & explicari possit, infra docebo. Ex Recentioribus **DERMUTIUS DE MEARA Medicus Hibernus** in *Pathologia sua hereditaria cap. IX.* aliud quærit fundamentum quo morbositatis hereditariæ causam ac ortum ducat atque derivet; nempe ipse **QUERCETANI** vestigia secutus, sal fixum, ceu veram morborum à majoribus propagatorum causam, incusat. inquit: Quicumque de salis fixi natura participant morbi ad posteros provenire solent; nullumque morbum fieri posse hereditarium contendit, qui de natura salis non participet. Quo ipso equidem innuit, morbos qui transfunduntur in liberos fixam & firmam debere habere originem; Attamen quod causa illorum sit sal quoddam fixum minime credibile est: Quid enim commercii, pravæ conformationes partium, similis structura corporis, item mores, vitia, virtutes parentum, eademque lineamenta, habent cum salibus. Silentio prætermitto, in plurimis morbis habitualibus & chronicis nullum sal fixum in sanguine & humoribus reperiri, sique in ipsis consistat, neutiquam concipere possum, quomodo in semen transire possit, cum ipse sit succus gelatinosus, spirituosus, delibatissimus sanguinis & feri, in vasis spermaticis & ductibus testium tenuissimis, qui non tam crassas & rigidas partes admittunt, secretus atque elaboratus. Deinde etiam, ut velim admittere sal vitiosum semini inesse, quomodo tamen tam diu naturam suam retineat & non immutetur atque se multiplicet & postea certum morbum, in certa parte efficiat, intelligere & concipere plane nequeo.

§. IX.

HELMONTIUS pro more suo ac hypothesi, in his quoque morbis dilabitur ad suas ideas; mens ejus hæc est: Cum morbi parentum chronici, v. g. podagra, graviter afficiant eorum spiritus, hinc ex dolore vel alia ratione in his producit character idealis istius affectus, qua morbi idea in spiritum characterisata, in generationis actu, una cum ideis naturalibus traducta, causa sit morbi, hinc tandem subnascentis hereditarii. Statuit enim **HELMONTIUS** latere morbum a parentibus traductum characteraliter in archeo seminali, cujus sigillum in semine parentum antea depictum sub sua dierum maturitate erumpat: Sicut enim nonnulli morbi liberis in tertio gradu sæpe evigilant. Sigillatus hic in spiritu seminali character tam diu dormit, & sui maturitatem exspectat, donec a causa occasionali quadam expergefiat, suaque jam olim conceptarum imaginum explicet ideas. *vid. ETTMÜLLERI Oper. Tom. I. p. 202.* & ipse **HELMONTIUS Tractat. Invent. Tartari §. 21. Morbi Archæal. §. 15. Volupe Vivent. §. 7. Verum hic non sufficit ideam morbi translati allegare, ita enim non satisfit illis, qui claram & perspicuam intellectui patientem veritatem desiderant, manet enim difficilis hæc quæstio in quonam illa idea sive character consistat, & quomodo a parentibus semini adjungatur. Nonnulli ipsum Creatorem dicunt immediate formare & fabricare corpora in utero, & in confirmationem suæ sententiæ nonnulla loca, & Scripturam in subsidium vocant; Verum utut causæ secundæ & vires rebus concreatæ ex sua natura agere nequeant, nisi perpetuo & universali impulsu atque influxu causæ primæ excitentur atque fuscitentur, ut nimirum agant secundum potentiam a Deo concessam, neutiquam tamen ipse Deus immediate producit & efformat corpora; notum enim est depravatam matris phantasiæ turbare negotium formationis posse; quis autem dicere vellet phantasiæ, quæ tamen actus noster, non **DEI**, est, facultatem habere suspendendi & immutandi opera quæ **DEUS** facit immédia-**

te. Alii, ad explicandum hoc magnum secretum, existimant opus esse virtute plastica conformatrice, sive Ente quodam intelligentia prædito, quod justo tempore, justa mensura ac proportionem corpus efformet simile, quale nimirum ipsum inhabitet. Verum enim vero, cum ens intelligens sit ens spirituale, adeoque & moraliter & libere agens, hinc non video, quomodo proprie sumtam talis modi substantiam assignare velint semini animantium. Deprehendimus enim vegetabilia sub eadem forma & specie, etiam ex semine propagari; quis autem vellet hic edicere in horum feminibus delitescere quoque ens intellectus vel notitiæ particeps. Quod autem non ex libertate & quodam arbitrio, sine actu quodam morali, formatio corporum fluat, exinde elicitur, quod non idem specie corpus, si ens hoc haberet libertatem efformandi, sed sub diversa prorsus & aliena forma construeretur, quod tamen minime accidit.

§. X.

Itaque in tam difficili ac perplexo negotio, mentem **DN. PRÆSIDIS** hic exponam. Primo omnium in antecessum monendum hic non admittendum ullam efficaciam spirituales, quæ in eo consistit, ut aliquid insit semini, quod indifferentiam agendi, seu activam habeat, sive ad certas externas impressiones & receptiones agere vel non agere possit; hoc enim competit tantum substantiis spiritualibus, menti seu animæ rationali; Sed potius asserendum, omnia hæc fieri rationibus mere corporeis, physicis ex necessitate agentibus, adeoque mechanicis, voco enim id cum sagacioribus Philosophis Mechanismum, ubi unum corpus agens in alterum quod est passivum, in ipso excitat, pro diversitate agentis & recipientis; certam reactionem, quam reactionem ipsum patiens corpus non invertere, immutare, aut huic resistere potest; verbo: quando ex movente & mobili certus semper & harmonicis profluit effectus. Lubenter confiteor mechanismum talem qui fit in minimis & subtilissimis corporibus, quæ sensus plane eludunt, difficillimæ esse cognitionis & applicationis quoad *τὸ διότι*. Attamen explicandi difficultas non statim tollit ipsam rem, præsertim quando conceptui quadrat atque conveniens est. Nostra itaque hæc est sententia: contineri nempe in quovis semine animantis totius corporis a quo desumptum est lineamenta & stamina vera, quamvis sensu incomprehensibilia, sive totius corporis quasi compendium & structuram. Quemadmodum enim in feminibus & bulbis plantarum, tradente accuratissimo **MALPIGHIO** & **MALLEBRANCHE**, oculo armato, radix, truncus, folia, accuratissime delineata cernuntur, præcipue autem in juglande, phaseolo, convolvulo indico, lupino, tulipa, nasturtio indico majori, conspicua sunt: Ita etiam probabile est, illud ipsum fieri quoque in feminibus fecundatis animantium. Stupenda hic merito in considerationem venit exiguitas partium; at vero ejus exempla habemus quotidiana, dum nempe minimum acari insectum vix sensibus obvium, corpus organicum est, quod ex diversis partibus, fluidis, solidis, visceribus, intestinis, artubus, nervis, tendinibus contextum esse debet. Curiosum est quod **LEUWENHOECKIUS**, accuratissimus minimarum rerum ruspator, microscopiis suis artificiosissimis demonstrare possit in guttula aquæ, in qua per tempus jacuerunt semina piscium, pisciculos aliquot vivos minimos natantes, exactissime cognoscibiles, quod nempe sint lucii, carpiones; Id quod a fide dignissimis oculatis testibus communicatum habemus.

§. XI.

Quomodo autem id contingat, & in unica tantum guttula

guttula feminis foecundati lateat totum animal, fateor rem supra captum esse, & verum naturae miraculum ac mysterium. Conabimur tamen, quantum conjectura humana assequi possumus, conceptum quendam hac de re formare atque exhibere; nempe si perlustramus feminis tam maris quam foeminae naturam, duplex potissimum in utroque deprehendimus principium, unum tenuissimum, simplicissimum, fluidum, quod spirituosum audit; alterum crassius, aquosius est, quod in sensus incurrit, & illius quasi existit vehiculum atque involucrium. Tenuissima portio elastica est & agitatissimi motus; originem suam habet ex sanguine in arteriis contento & nervorum ac cerebri fluido, unde accidit quod insignem in modum illi debilitentur, & vigorem prorsus ingenii amittant, qui semen paulo insolentius, inque majori quantitate profundere assolent. Fluidum autem hoc actuosissimum quod regit ac movet partes fluidas & solidas corporis nostri, quod animae rationalis est accommodatissimum instrumentum, à divino Opifice vi verbi ejus efficacissimi, & à primordio rerum adhuc durantis, concreatam hanc possidet efficaciam, ut ab externis rebus corporeis in illud agentibus recipiat atque retineat certam figuram, formam ac motum, & secundum hæc proportionatam quoque reactionem & effectum accommodatum in aliis rebus producat. Id quod dilucide conspiciamus in sensationibus, perceptionibus & exinde resultantibus passionibus, quomodo nempe rerum externarum ideæ, quæ nihil aliud sunt quam vestigia actionum sensorio impressarum, reactionem & affectum in partibus liquidis ac solidis corporis nostri producant admirandum. Et quemadmodum luminis radii, corporis à quo reperiuntur imaginem delineatam continent, ita quoque statuentum videtur tenuissima corpuscula spiritus qui continentur in sanguine & mediante hoc ad omnes partes transfertur, radiorum instar omnium membrorum a quibus reperiuntur imagines impressas habere, ipsasque in materia crassa feminis retinere & conservare. Item porro sicuti aer tremulum corporum motum suscipit & accuratissime sonum articulatum propagat: ita etiam non absonum & rationi inconveniens videtur, agitatissimam fluidam & spirituosam sanguinis materiam imaginem omnium partium impressam firmiter retinere & propagare posse: quæ impressio cum non diversa sit ab aliis accidentibus corporis, ideo non magis intellectu prædita judicanda, quam lux ab opaco corpore remissa, sive aeris tremulus & undulatorius motus, quorum illa colores, hic autem sonos secum fert. Spiritum autem feminalem ab omnibus corporis membris impressionem acquirere posse, exinde concludendum, quoniam feminalis liquor ex sanguine oritur & secundum GALENUM *libr. III. de sanitate. c. 7.* nihil aliud est, quam sanguis à venis, quæ ipsum continent, exquisitè confectus. Jam autem certum, sanguinem rigare omnes corporis partes, & nullam, etiam minimam esse, ubi non sanguis accedat, adeo ut spiritus, in ipso contentus, ubivis impressionem quandam recipere queat. Quod autem imago cujusdam rei, tenuissimo cerebri fluido, quod nihil est quam spiritus ille in sanguine contentus, & in cerebro separatus, impressa, in corpore realem & certum effectum producere possit, quamvis operandi modo inperscrutabili, dilucidum fit per matrem phantasia firmiori affectam, quæ vitium etiam foetui tenello affricare poterit.

§. XII.

Nullum itaque dubium, vi isti sola atque opera-

tione spiritus, qui in maris & foeminae genitura continetur, corporis propagationem & multiplicationem perfici atque absolvi. Et quemadmodum semen, tam maris quam foeminae, impressas habet sui corporis partes, ita certum quoque, neutrum horum separatim ad foecunditatem esse aptum, sed tunc demum fieri foecundum & multiplicativum; quando utrumque probe inter se fuerit mixtum. Et quanquam quodvis sui corporis imaginem secum fert, tamen quod magis concoctum est & spirituosius illud alterum subigit & superat, adeo ut differentia sexus dominio feminis, jam dudum notante ARISTOTELE, accepta sit referenda. Causam hujus rei gravissimus Auctor libro IV. *Generat. Animal.* vere mechanicam allegat, quoniam nimirum patiens ab agente patitur, quanta vis fuerit ab agente in patiens, & contra omne agens a patiente etiam agente quoque pati, unde necessum quidem sit, tanto agentis retundi motum, quanta videlicet vis fuerit patientis in agens. Videmus enim *inquit*, quod secatur hebetari ab eo quod secatur; Et exinde etiam elicit causam quare nepotes avis interdum, non autem parentibus, similes sunt. Unde ait *l. c.* si motus ejus qui generat solvatur. i. e. à semine foeminae prorsus invalidus & imbecillis reddatur in superiorum, atque majorum à quibus prognati sumus, transitum fieri; majorum enim propria, hoc est, quæ in ipsis peculiare notæ sunt, ac delineationes, potentia insunt in semine quo geniti nepotes sunt, unde causa est quod interdum nepotes avis, non vero parentibus qui eos genuerunt, similes reddantur.

§. XIII.

Postquam itaque in tam ardua materia mentem nostram exposuerim, quomodo nempe humanum corpus ex semine parentis, ceu puncto quasi, ut divinae providentiæ oeconomia eo clarius appareat, propagetur, facile hinc deduci posse arbitror; quare etiam morbi parentum simul in ipsa natorum corpora transferantur. Notum autem hic est omnes fere Auctores affectuum hæreditariorum originem hactenus semper deduxisse vel ex prava partium solidarum conformatione, vel ex partium liquidarum aut ipsorum spirituum originali & prima quadam vitiosa dispositione, quæ per semen transfluat in ipsos genitos, unde deinde morbi vel in ipsis spiritibus aut sanguine & humoribus, vel in ipsis partibus solidis radicati oriantur. Verum pace horum omnium non vereor affirmare, morbos in spirituum motu ac vitio vel sanguine aut humoribus fundatos, prorsus non propagari, sed tantum illos, qui radicem habent in viscerum vel partium solidarum certa & prava dispositione. Mala enim illa quæ tantum in spiritibus & humoribus consistunt superficialia sunt & facilius transeunt. Neque video quomodo v. g. ex intemperie licet semen ortum fuerit, ejusdem naturæ vitium propagari & multiplicari possit, per longos & diuturnos annos. Largiar & morbosum quoddam excrementitium sal, quod tamen tubulosa & capillaris testium structura excludit, transire una in semen, minime tamen intellectu sano concipi potest quomodo illud tam diu queat durare, cur non per excretoria & colatoria viscerum tandem exterminetur, qua ratione in tam exilissima mole integrum semper maneat, non alteretur vel immutetur, à tanto concursu rerum, alimentorum, remediorum in illud agentium, & quo pacto deinde certo tempore ætatis transrumpat & tantas tragoedias ludat. Talismodi vis, quam nonnulli fermentalem & multiplicativam vocant, est revera non ens, & sanæ rationi contraria, sicuti id fusiùs ostensum est in dissertatione

tatione de Fermentis Morbificis, sub *Excellentissimo* Dno. PRÆSIDE habita. Pari ratione plane concipi nequit quomodo perversus & morbosus spirituum motus in parentibus, utut transfundatur in semen, morbum & motum similem producere possit in genito, 10. 20. vel interdum 50. demum anno ætatis, & cur tam diu quiescat, & deinde de novo talem motum repetat, cum valde probabile sit per tantam quietem & moram, vel alium interdum etiam contrarium ex consuetudine motum vigesies fortiorrem & crebriorem inductum, illum tandem penitus abolitum fuisse. Firmissime itaque judico & affirmo omnes hereditarios morbos, quicunque etiam sint, ex prava partium solidarum, non tam externarum, quam internarum, viscerum, emunctoriorum dispositione, configuratione, quæ deinde partes fluidas & spirituosas insignem in modum afficiat, oboriri & nasci. Res enim nota ac jam decisa est, præcipuum robur atque temperiem & naturam accipere partes fluidas à partibus solidis, hinc istis vitiatis & à tono, robore ac motu suo dejectis, non potest non maxima labe ac vitium transire ac redundare quoque in partes liquidas, & impetum facientes corporis nostri.

§. XIV.

Objici quidem hoc loco potest, infantes sæpius exquisitissime imitari parentes in vitiis, virtutibus, moribus, & temperamenti, identitate; ex quibus judicandum temperiem etiam partium fluidarum ac spirituosarum transire in foetum. Verum enim vero ad hæc repono, temperamentum, sive stricte dictam temperiem ac mixtionem & proportionem elementorum sanguinis dependere maxime à partium solidarum structura, conformatione ac motu, unde quo majora & copiosiora sunt vasa, quo stricteior habitus corporis, eo calidioris naturæ existunt homines, etiam juxta effatum HIPPOCRATIS *de morbis vulgar.* p. 277. Tametsi largiar originalem & primum partium fluidarum motum à motu intestino spirituofo seminali dependere, exinde tamen neutiquam fluit, nisi partium solidarum peculiaris cuivis temperamento propria structura accedat, temperamentum corporis exinde fieri, multo minus autem morborum semina ita propagari.

§. XV.

Hisce generatim deductis operæ quoque est pretium, ut hanc meam sententiam speciatim applicem ad quosdam affectus, qui per parentes infantibus fiunt communes, ostendendo quomodo ex prava partium solidarum conformatione originem suam ducant. Jam autem circa luxationes, gibbositates, claudicationem, contracturam, hernias, cœcitatē, scrophulas, nemo mihi dubium movebit, quod hæc mala omnia sita sint in prava partium solidarum dispositione. Magis itaque internos morbos sub examinis incudem revocabo; Ex istis autem primum se mihi offert *Apoplexia*. Statuo itaque hanc fieri hereditariam, ob temperamentum primo sanguineum, vel habitum corporis spongiosum, angustis & copiosis venis refertum, postea etiam ob dispositionem quandam arteriolarum in cerebri substantia existentium, ad rupturam & apertionem violentam propensarum. Est enim mea opinione apoplexia ut plurimum sanguinea, & non nisi hæmorrhagia arteriolarum cerebri, sive facta extravasatio sanguinis in cerebro, propter rupta ibi vasa sanguifera; accidit præsertim in corpore sanguineo, plethorico, ubi copiose sanguis congestus & viscosus existens, impeditus per viscera circulatur, & obice posita, magno impetu ruit in alia vasa, quæ nimium disten-

dendo tandem disrumpit, & ita sanguinis causatur profusionem. *Vertiginis*, item *affectuum soporosorum* causam, per hereditariam & cerebri peculiarem debilitatem transferri in liberos, mihi valde videtur probabile. Cerebri enim nimia laxitas & pororum ac tubulorum teneritudo, congestioni ac stasi recrementorum serosorum & morbidorum, in medutullo cerebri, perfacile ansam præbet, quæ impuritates, si spiritibus sese immiscent, hos in vorticosos, enormes agunt motus; aut nimium congestæ, lentæ, glandulosum cerebri corticem comprimendo, affectus comatosos efficiunt. Quod *Epilepticum malum* attinet, perquam difficile est, certi aliquid hic determinare; videtur tamen probabile epilepsiam omnem idiopathicam fieri à violenta spasmodica constrictione duræ matris, quæ nervorum, omniumque totius corporis membranarum nervearum quasi mater existit, qua constricta, influxus spirituum animalium inæqualis redditur ac inordinatus, sive in quibusdam nervorum poris plane intercipitur, in aliis vero longe violentior & impetuosior contingit. Causa autem hujus spasmi universalis, videtur esse sanguis circa interna capitis vasa excessive congestus, ibique moram neccens, qui deinde quantitate & qualitate simul peccante sollicitat & irritat ad ejusmodi motum membranam illam sensibilibissimam; stasis autem hæc sanguinis à tono cerebri ejusque membranarum debilissimo & valde destructo, commode deducenda videtur.

§. XVI.

Deliriorum quoque, *Melancholiæ* & *Maniæ*, causa eodem modo à dispositione & conformatione quadam cerebri vitiosa, vel maxime à dispositione prava viscerum in infimo ventre locatorum, hypochondriaca dicta dependet. Siquidem ex hac causam nativæ *stoliditatis* cum WILLISIO non incongrue deduco, præcipue autem ratione magnitudinis defectus cum aliquid reperitur in cerebro, uti id observavit in quadam persona à nativitate fatua, *vid. ejus Neurolog. c. XXVI.* substantia nimirum cerebri mole justo minor, poris gyrisque debitis privata, spiritibus vapidis, aquosis & terrestribus in talismodi subjectis plerumque existentibus, denegat eorum emanationem & dispensationem, sicque functiones animales inturbantur, & similem in modum talia cerebra male figurata, ut distorta specula, rerum species non recte colligunt. *Somnambulos* similiter prava ac vitiosa cerebri configuratione laborare, haud incongrue adserit idem WILLISIUS de *Anima Brutorum*. Hac enim præsentē, spiritus ubivis æqualiter influere nequeunt, sed in quibusdam partibus intercipiuntur & commorantur, in aliis contra effrato & tumultuario motu, extra regimen animæ & voluntatem, discurrunt, & talem affectum producunt. Hinc pari ratione à parentibus in sobolem transferri posse, nullus dubito. Similiter judico de *Oculorum vitiis* per hereditatem acquisitis; hi enim affectus a pororum, tunicarum & optici nervi conformatione, situ, deducere haud absonum erit, nimis enim laxi, partes plane incongruas ac irregulares, crassas, terrestres admittunt, & ita ansam ac occasionem hisce malis subministrant.

§. XVII.

Phthisica dispositio principio seminali liberis facile communicatur, dum pulmonum debilitas stasi sanguinis aptissima, vel etiam viscerum ac emunctoriorum dispositio prava, ad sanguinis acrimoniam & dyscrasiam notabilem non parum afferens, natis imprimitur. Ipsa hæc connaturalis pulmonum teneritudo, ad *pleuritidem*, *peripneumoniam* facile disponit,

nit, sanguini nimirum ab ambitu corporis ad hæc partes cum impetu ruenti statim ejus non denegans. Ita & *Asthmati* non levis panditur occasio, si angusta structura thoracis, pulmonum, ad debitum aëris introitum, non admittens expansionem, vel si nimia laxitas ac debilitas hujus visceris præsto est, tunc ad suscipiendos & detinendos affluentes humores thorax aptus natus est. *Hypochondriaca, Hysterica & scorbutica affectio* cum ex obstructione & scirrhotate glandularum ac viscerum suam ducant originem, hæc autem ad retinenda impura salia promptissima sit; facillime quoque patet, mala illa, præsentibus casibus, è viscerum prava constitutione auguranda esse. *Ad calculum inclinatio*, quod à parentibus natis insit, nihil alit novi, hanc autem non tantum à copia tartarearum, viscosarum, & mucosarum particularum deduco, verum maxime à glandularum renalium nimia laxitate, quæ non solum falsum, tenue solum, sed crassas, mucidas sanguinis partes simul admittunt, quæ commorantes in renum siphunculis, præterlapsuras salinas, tartareas, scorias retinent, & subsistentes concrectiones talismodi stabiles, firmas, causantur; quas urina crassa alluens, ac per ureteres secum ducens in vesicam, hujus calculum producit. *De Arthritidis speciebus* res quoque indubitata veritatis est, eas à parentibus in liberos transmigrare, sed vero nec in his solum partium fluidarum vitium inculpandum puto, impossibile enim est, salia quædam tartarea arthritica semine transfusa, tam diu salva & integra latitare posse, ut deinde morbum producant, aut fermenti instar alios humores in suam naturam transmutent. *Hæmorrhoides* quoniam ut plurimum symptoma affectus hypochondriaci existunt, facile ita ratio hereditarii hujus fluxus patebit. Rationi itaque magis conveniens esse arbitratus sum, si hos hereditarios affectus potissimum derivem, a partium tendinosarum, nervosarum & ligamentorum prava dispositione, atque tono destructo glandularum & emunctoriorum: non parum quoque meam confirmat opinionem, quod plerumque arthritici & podagrici, simul etiam hypochondriaci reperiantur.

§. XVIII.

Demonstrata sic de malis hereditariis opinione mea, eaque enucleatione aliquot affectuum corroborata, ad quasdam quæstiones adhuc mihi respondendum erit; Cur nimirum ex Parentibus morbosus infans sapius procreetur, in quibus vel plane non, aut tardissime hereditarium propullulet malum? Huic quæstioni pro responsione locus quidam insignis quadrat ex FORT. FIDELIS *de Relationibus Medicor. Sect. III. c. III.* ita sonans: Tametsi parentes ipsi ex vitiatò semine fuerint constituti, ac tale etiam in liberis procreandis emittant, non id tamen satis est ut ægrotet posteritas, sed præterea necesse est, ut vitia humorum in corpore aggregentur, ex vitæ nimirum intemperantia, ex temporum injuriis ac similibus de causis, quæ si non adsint, nunquam ægrotare hominem dicam concretum licet ex semine vitiatò. *Et l. c. c. IV. Inquit Auctor*: Nam quem paternum semen exempli causa ex sua natura præstare effectum potest, eundem maternum retardare ac destruere solet, in quo certamine, is omnino potior effectus resultabit, qui à majori efficacia & à robustioribus viribus est inductus. Ergo demus quempiam esse distortum ac claudum, atque etiam si libet à nativitate, asseram equidem, hunc distortos etiam filios sua natura esse generaturum, verum si fiat, ut illi talis uxor contingat, cujus robustius sit semen atque efficacius, mihi non dubium est, inte-

Frid. Hoffmanni Oper. Supplem. II.

gros liberos ex eo conjugio prodituros. Quam meam sententiam illud etiam non mediocriter probat, quod cum filii integri vitiatò patre nascantur, matris potius similes esse deprehenduntur, quippe cujus semen ut alterius vitium corrigere potis est, ita propriam in cæteris multis qualitatem inducere. Quod si fiat ut imbecillius sit semen foemineum, aut æquis viribus concurrat, promptum erit, ut filii paterna vitia ubique referant.

§. XIX.

Difficilior adhuc quæstio est, qui fiat, quod manci mutilique parentes integros sæpe liberos progignant, iis membris præditos, quibus ipsi parentes sunt destituti, & tamen semen utrumque sigillatione hujus vel illius partis careat. Puto hic confugiendum esse cum DIEMERBROECKIO in *Anat. hum.* ad parentum imaginationem, quæ defectum istum denegatarum idearum ab absentibus organis refarcit, hæ enim cum continuo oculis alios obversantes videant membris omnibus organisque perfectos, similesque per phantasiam ac imaginationem sibi promittant, deficientium partium ideas sanguini & spiritui feminali non minus imprimunt, quam si ex partibus ac organis præsentibus modificatio ista facta esset. Hujus vero phantasie ac imaginationis vis, in foetu formando & deformando, quotidiana experientia satis superque adstruitur; De modo vero ac agendi ratione, videbis MARCUM MARCI in *Philos. Veter. restit.* DYGÆUS de *Sympath.* Deinde etiam ad quæstionem illam: an à matre facilius & frequentius propagentur morbi quam à patre, affirmative respondendum esse existimo; nam præter tenuem spirituosam seminis substantiam, etiam nutritio foetui communicatur à matre. Accedit præterea, matres magis corruptum pati appetitum, & animi motibus magis quam patres agitari vehementioribus.

§. XX.

Quod autem parens uterque sanus nec morbo gravi detentus, debilem & multis morbis obnoxium generet infantem, etiam suas physicas ac necessarias agnoscit causas. Si enim à parentibus non satis adultis debitum virile robur nondum nactis, vel semio jam confectis, procreantur, aut ex semine debili, ebrietate, vel alia intemperantia contracto, concipiuntur, tunc utique necesse, ut corpora infantum debilia quoque fiant, languoribus multis ac malis epidemicis patentia; qualis enim indoles, natura ac status seminis, tales quoque natura fiunt geniti: Si spiritu orbatum & aquosum est, uti in phlegmaticis ac senibus, pituitosas quoque proles proferre solent parentes. Adeo parentum vitia, delicta & errata luere debent miseri infantes. Porro exinde etiam commode derivatur ratio, cur sæpiusculè languidos ac imbecilles infantes sanissimi alias parentes nanciscantur, quod illis multæ adventitiæ causæ labein hanc struere soleant, uti accidit, si tenella adhuc ac infirma corpora incongruis eduliis aluntur, & istis rebus tractantur, quæ vires prosterunt & subfurantur, & ad debitum robur membra transire non sinunt, cujus furfuris sunt spirituosæ, acida, saccharata, & similia. Tandem illud obiter quasi adhuc disquirendum est, cur morbosæ illa & prava dispositio, à semine majorum ac parentum contracta, non statim in omnibus individuis & æquali ratione sese exerat, sed in aliis mox in pueritia, in aliis contra demum fera ætate prorumpat; ratio autem hæc est: Quod omne agens agat simul omnibus ad agendum requisitis positis. Tametsi itaque semina parentalia præsentia sint in corporibus pro-

Yy gnatis,

gnatis, non tamen sese produnt nisi actuantur & excitantur, ac dispositam inveniant materiam, in quam eorum activitati aditus non sit reclusus; jam autem certæ ætatis familiaris ac propria temperatura obicem ponit, vel etiam consuetudo, vitæ temperantia, & feminalis morbosæ dispositioni contraria victus ratio, propullulationem plane inhibent. *vid. FORT. FIDELIS l. c.* Contra vero omnia illa quæ congenerem cum morbofo seminio habent naturam, five in ætate, five temperamento, aëre, alimentis, ac animi consistant affectibus, illa ipsa latitantem morbosam in semine vim, statim primis annis & juvenili ætate movere, ac promovere, aptissima existunt.

§. XXI.

Postquam itaque theoretice affectus hereditarios tractaverim, utile jam erit monstrare, quænam usum cognitio hæc in Prognosi & Praxi suppeditet. Cernens nempe ejusmodi connaturalem morbum Medicus certò ejus pertinaciam & sanationis difficultatem edicere potest; Certissimum enim est inveterata, chronica mala haud leviter dimoveri posse, quoniam in habitudinem quasi abiire, & fixam sibi confirmarunt sedem, nullum vero potest esse antiquius, quam quod nobis inesse cœpit, antequam eramus, quale est hereditarium; pertinaciæ autem ratio radicatur in eo, quoniam in prava partium conformatione potissimum nidulantur talismodi nativi, congeniti morbi; plane nonnullos itaque excludit e plenaria sanatione RODERICUS A CASTRO in *Med. Polit. libr. III. c. 18.* Incurabiles, inquit, sunt plerique omnes morbi hereditarii & congeniti, ut cœcitas nativa, surditas, gibbositas, aut congenita fatuitas, quæ nulla omnino arte curari possunt; & multo minus defectus originalis membrorum, item elephantiasis ex utero contracta, calculosa & podagrica dispositio, quæ etsi aliquando summa cura & victus accuratissima observatione non nihil sublevari queant, nunquam tamen proclivitas ad hæc mala ita eximitur, quin levissimo errato commisso redeant. Si autem vitium fluidis partibus solum inesset, illæ certæ corrigi, depurari, immutari & laudabiles reddi, per bonam diætam, & appropriata pharmaca, omnino possent. De curatione, licet, eam in hisce rebellibus morbis perfici posse, non prorsus negem, hac vice haud ero sollicitus, quoniam specialem quandam hereditariis affectibus medendi methodum, in præsentiarum adjicere apud me non constitui; Sed in eo saltem occupatus erò, quomodo generatim vèrenda illa mala averti, præcaveri, mitigari convenientibus remediis possint, ita & in hoc Medicus officio suo satisfaciet. Scite monet PLUTARCHUS de *Sera Numinis vindicta.* ut liberis quorum parentes graviore quodam morbo extincti sunt, quosque ejusmodi ægritudinis timor habet, antequam incipiant ægrotare, *exercitium, diætâ & pharmaca* adhibean-

tur. Hic autem in genere moneo omnia illa, quæ ad temperiem sanguini, & humoribus inducendam faciunt, quæ porro ad motum temperatum & circulationem eorum disponunt, ac omnia evacuatoria & emunctoria corporis humani decenter aperta servant, ad vitam sanam ac longam efficiendam optima, & ad cunctos morbos avertendos, præsidia maxima & certissima existere. Nihilominus autem specialia, ad quorundam morborum præservationem necessaria adducam. Si quis v. g. *Phthisin* metuat, caveat sibi ab omnibus acerbis alimentis, falsis, acidis, ab ebrietate, exercitio & motu corporis violento; si quis ad *Podagram* propensus, temperantiæ studeat, complexus venereos vitet & animi affectus. Quem *Calculi* tenet metus, acida, viscida, spirituosâ nimisque calida pellentia omni studio vitet. Si quis ab *Epileptici* prognatus est parentibus, à teneris annis ita educatur atque assuefiat, ne facile in vehementiora animi pathemata, terrorem præsertim ac iram, præcipitetur, præterea omnia spirituosâ, acria stimulantia, cane pejus & angue vitanda sunt. *Me-lancholicorum* parentum liberi ad colloquia, & familiarem conversationem liberalium & affabilium hominum deducantur & ad hilaritatem sæpius invitentur.

§. XXII.

Præter diætam autem accurate servatam, non possum non hic maximopere commendare remedia naturam singulari modo roborantia, qualia sunt Balsamica, spirituosâ temperata, ambrata, succinata, myrrhata, & sâlia volatilia oleosa, quæ decenter & crebrius usurpata pro circumstantiis morbi & subjecti, vires motrices humoribus & sanguini infundendo horum circulum in perenni & jugi conservant motu, eoque legitimo, nec non ipsis partibus ac fibris debitum fœnerant tonum ac robur, ut deinde non facile humor in quadam parte subsistere, vel qualitate vitiosa imbutus congeri possit. Firmissimum enim est, si motus sufficiens cordis & arteriarum impulsorius, & partium solidarum tonus ac robur legitimum, cum legitima & pacifcente humorum harmonia, & exinde resultans sanguinis circulus ad naturæ leges æquabilis præsto est, non facile materiam & causam morbi intra corpus generari posse. Sed sufficient hæc; plura & præservationis & curationis præsidia ad hereditaria mala præcavenda, avertenda, vel extirpanda, vice hac enarrare animus non fuit, nec temporis, nec instituti permittit ratio, ut specialissime pertractarentur, itaque pro individui ægrotantis conditione Medico præsentî perficienda & tentanda relinquo. Tibi vero Benignissime DEUS pro concessis viribus in exantlandis studiis meis Academicis immortales habeo gratias, utque porro meis conatibus ex alto benedicere velis devote precor.

DISSERTATIO MEDICA

D E

CONVERSIONE MORBI BENIGNI IN MALIGNUM, SIVE GENERATIONE VENENI IN CORPORE PER IMPERITIAM MEDICI.

Primum edita Anno 1701.

P R O O E M I U M.



LURA in Medicina sæpius eveniunt, quæ tum à scopo Medici, tum à medicaminum effectu planè sunt aliena, & quæ evenire nec posse nec debere peritior quidam crederet. Etenim inexhausta naturæ microcosmicæ vis ac potentia est, præsertim in certis individuis. Quandoque ita favori Medicorum natura militat, ut etiam contrariorum remediorum usum in commodum suum convertat, interdum autem præter omnem exspectationem remedia optimâ ratione adversus vim morbi opposita spernit, eludit, eorumque operationi resistit, ut ægerrime scopum suum Medicus consequi possit. Sunt hæc fata naturæ, quæ vel in bonam vel in malam ægrotorum sæpiusculè cedunt partem. Majus autem quid est, tale fatum, quod ægro accidit per errorem, culpam vel ignorantiam Medici. Turpe equidem dictu est, ast minime inficiandum, perire multos ex medentum inscitia, qui morbi naturam ac genium non penetrant, neque individua aut morbi tempora dignoscere sciunt, sed perversâ plane methodo vel medicina utuntur, quò fit, ut non modo vehementia morbi augeatur, sed & insolita & exitiosissima symptomata provocentur, quin imò morbus benignus in malignum funestum in modum convertatur. Imitantur hac in re imperiti Medici malos advocatos, qui bonam causam sæpius pessimè defendunt, vel eam incauta tractatione ita lædunt, ut nullius remedii spes amplius maneat relicta. Per exempla hoc confirmare, quod ad forum nostrum attinet, cum quotidiana ubivis exstet experientia, nimis foret longum; id tantum in præsentiarum evincere conabor, temerarium & imperitum Medicum præpostera sua methodo formale venenum intus in humani corporis fluoribus de novo producere & generare posse, ex humore & materia in se malignitatis experte. Credidi argumentum hoc esse in praxi Medica haud ignobile, quod mereatur accuratorem evolutionem & tractationem, quam sub favore divino suscipere jam loco speciminis inauguralis placet.

§. I.

CUM demonstrare animus sit, formale venenum per male & intempestivè administrata medicamenta posse corporis nostri succis ingenerari, quod vitales motus pervertere & præsentissimum exitium afferre sit idoneum, perquam utile fore censeo, prius exponere, quid per venenum intelligamus. Constat autem unanimi Medicorum sententia, veneni naturam & essentiam in eo positam esse, ut brevi tempore & valdè exili quantitate, totius corporis œconomiam evertat, motus vitales & animales turbet vel planè destruat. Videntur autem hæc quatuor esse essentialia veneni requisita, ut exiguo tempore adeoque celeriter operetur; secundo si quantitatem spectes paucâ mole datum; tertio spasmos inducat & Sanguinis motus invertat viresque destruat: quarto ut medicamentorum vires si sanguini

& succo nerveo commixtum fuerit, eludat. Equidem non ignotum est, veneni nomen latius paulò extendi, adeò ut etiam omnis valida morbi causa & corruptionis species in corpore malignitatis & venenositatis titulum in praxi medica recipiat. Nos autem strictè hic vocabulum hoc sumimus, respiciendo maximè ad ejus actionem non tam corpoream, sed virtualem, quâ celerrimè validissimas destructorias sanguinis & spirituum motiones suscitatur.

§. II.

Id itaque hoc loco jam annotare aggredimur; possitne tale venenum in animalis corpore nasci, vel à Medico per medicamenta naturâ suâ virulentia expertia generari atque produci? Hanc scitu & explicatu dignissimam rem antequam dissolvamus, opus est ut prius notas essentielles & symptomata propria accepti veneni pernoscamus, ut ex his cognitis discernere postea queamus, num similes proficisci à

veneno per artem ingenerato possint. Tametsi autem symptomata pro diversa veneni indole variant, in eo tamen maxime convenire videntur, quod post epotum lethale venenum repentina virium prostratio cum syncope, pulsuum defectione, extremorum refrigeratione & anxietate incredibili sequantur, quibus jungi soent singultus, morsus & ardor ventriculi, atrocissima abdominis tormina, cardialgiae, & ejectiones nigrae vel per vomitum vel per alvum, urinae suppressio vel mingendi desiderium: tandem circa animales functiones insania, tremores, rigores, vertigo, epilepsia, artuum convulsiones se sistunt, quae vitae comœdian claudunt. Ubicunque autem eadem vel similia, licet non omnia, confestim oriantur symptomata, ibi venenum vel veneno simile quippiam praesens esse dicendum est. Non tamen hic praetereundum silentio est, quod sicuti venena gradu differunt, & alia aliis sunt valentiora, ita etiam operationes & effectus quos edunt gradu quodam sint distincti, tam ratione vehementiae, quam ratione celeritatis, cum unum praeter altero celerius vel tardius agat & noceat.

§. III.

Perspectis jam signis & symptomatibus venenorum propriis, devolvimur jam ad principium eorum agendi & operandi. Veteres fere omnes ad occultas qualitates & spirituosam quandam actionem refugium sumserunt; verum enim vero nos, sub hodierna Medicinae facie, ubi ex motuum legibus & materiae affectionibus, sive mechanice tam ea quae in macrocosmo, quam in microcosmo eveniunt, solide & curiose solent explicari, contenti talis modi inanibus vocabulis esse non possumus, sed quae propinquiora sunt, & quae in sensus incurrunt principia debent in subsidium advocari. Jam verò si universam classem Venenorum, quae larga manu in triplici regno prostant & lethalibus infamata exemplis sunt, paulo attentius perlustremus, experimenta faciendo per sensus & à posteriori judicando, certissime apparebit, universa, quae veneni nomine vulgò suspecta sunt, ex partibus composita esse summè tenuibus, agilissimis, adeoque penetrantissimis & mobilissimis, denique etiam acerrimis causticis, corrosivis plus minus sulphuri immersis, quibus instar fulguris totum corpus perreptant, poris nervorum ac fibrillarum intimius se insinuant, quas validissimè arrodunt, vellunt, stimulant, sicque horribiles spasmos efficiunt, quos mox totius circuli sanguinei ingens turbatio, omniumque excretionum immutatio & functionum corporis impedimentum subsequitur: Brevibus: Venena agunt validissime, circulum sanguinis a quo vita pendet, invertendo, idque per substantiam corpoream summe corrosivam, quod assertum clarissimum apparebit, si paulo specialius per exempla ire velimus. Tarantula, Scorpio, Aranea, Cantharides, Vermes majales sale caustico summe tenui inflammatorio vesicante praedita sunt, ut etiam in corpus nec externe, nec interne sine noxa quadam adhiberi possint. Ex vegetabilium censu, purgantia validiora, uti gummiguttæ, euphorbium, elaterium, colocyntidem, cataputiam, esulam, veneni quid alere, constans practicum sententia est, cum symptomata gravissima, spastica & inflammatoria, quae eorum improvidum usum sequuntur, id diserte ostendant; jam autem non alio, quo operentur principio, quam acri tenui caustico, tam gustus, quam vesicans & erodens fauces, intestina, nec non stimulans nares, virtus prodit. Napiellum, cicutam, aconitum & fungorum nonnullorum species deleteriam & exitialem vim possidere, tristissimis passim exemplis notatum est, quo autem alio quam caustico igneae naturae penetranti operentur

elemento, adhuc nemo reperit. Insuper hyoscyamus, mandragora & solanum sic dictum furiosum inter comperta & multiplici experientia teste venena referre nemo dubitat. Agnoscunt & hæc nullum aliud principium, quam foetidum quoddam sulphur, cui salina, acria caustica indolis spicula immersa sunt. Ex eodem genere etiam est tabacus, cujus oleum vulnere inditum BORELLUS credidit summe venenatum. Emetica etiam & purgans vis, nec non insolentia tetra, quae recentes potatores afficiunt pathemata id faciunt testatissimum. Ex Minerali regno non reperiuntur potentiora vitae destructiva, cum ex hoc regno deprompta plane abludant à natura nostra, quam Mercurius acidorum additione causticus factus, Antimonii regulus ejusque vitrum, viride æris, Venerisque Vitriolum, quae cuncta & carnes & ossa corrodendo produnt suam causticam & septicam acrimoniam. At vero non sufficit in veneno corrosiva & acris qualitas, verum etiam summa & stupenda partium tenuitas & exiguitas requiritur. Visitur illud ipsum manifeste in peste & iis malignis febribus, quae ex miasmate contagioso originem suam ducunt; tenuissima enim quædam aura & vapor est, qui mediante aëre catholico illo effluviis receptaculo vectus & cum saliva communicatus ad ventriculum descendit & mox in totius corporis sphaerâ summas motuum vitalium anomalias producit. Quam exigua moles sit salivæ, quae per canem rabidum, viperas, tarantulam, morsu vel ictu immittitur, facile intelligi potest; nihilominus atrocissima in toto corpore pathemata subsequuntur. Ex omnibus metallica & mineralia, partium soliditate & firmitate constare videntur, nihilominus operationes validissimæ, quae paucam portionem assumpti arsenici sublimati, vitri antimonii excipiunt, in diffitis etiam corporis regionibus satis superque ostendunt summam partium agilitatem ac tenuitatem; Minime enim hoc loco censendum est, dicta hæc ex mineralibus venena solâ corrosivitate & ventriculi ac intestinorum erosionem suam ludere tragœdiam, cum notum sit & vulnera & ulcera in hisce partibus consistere posse sine praesenti vitae discrimine & atrocissimorum talis modi, quae veneni naturam excipiunt, productione. Tenuis itaque & summe penetrans corrosivitas est, quae tam potenter in praefatis venenis nocet, quae totum corpus derepente pervolat, quae nervorum ac membranarum porulis sese insinuat, subtilissimum ibi contentum fluidum in inordinatas motiones suscitatur. Summa hæc partium tenuitas in causa quoque est, quod per medicinam tam ægre symptomatibus à veneno inductis auxilium ferre possit Medicus; minutiae enim hæc nunquam moræ vel quietis sunt patientes, sed semper in perpetua motione ac actione versantur, unde nec mutari nec ligari vel irretiri commode possunt: Neque Medicinae eas in partes ac poros datur facilis aditus atque ingressus, qualem habent ob suam penetrantiam venena. Optandum itaque vehementer foret, ut ea, quae specioso titulo vulgò alexipharmacorum celebrantur, melius suam in domando & emendando veneno prouiderent efficaciam, quam reuera accidunt.

§. IV.

Equidem non me latet, moneri hic posse cum ejusmodi stupenda partium exiguitate causticam virtutem non posse consistere: at verò qui non hospes in physicis est, facile animadvertet, propositionem hanc repugnare experientiae. Magnetis enim effluvia, ex solido corpore emanantia minutissima, per vitrum aliquot libris mercurio repletum, item triginta orbis stanneos operantur & aciem ferream libere

in aëre suspensam movent. Unum granum plumbi ingentem massam argenti, unicum stanni granum magnam copiam auri ductilitate sua privare artis chimicæ peritis non ignotum est. Veneris granum per spiritum volatilem urinosum mirifice virtutem, tinctoriam & saporem suum extendit. Ita quoque vidi apud *Dn. Præsidentem* exilissimam dosim pulveris vegetabilis uncias octo spiritus vini imprægnasse saturato pereleganti purpureo colore. Silentio transmittimus alia experimenta, quorum hoc vulgatissimum ad illustrationem nostræ materiæ meretur attendi, nempe pauca zibethi effluvia naribus hysterica suscepta in momento animi deliquia cum strangulationis metu, & mirabilibus partium spasmodis inducere idonea esse, ex quibus merito concluditur cum tenuitate & subtilitate partium earum texturam, figuram, virtutem utique subsistere posse.

§. V.

Ex hisce adductis perspicuum esse arbitror; non ab occulta quadam ideali spiritali vel astrali vi dependere venenorum agendi efficaciam, sed in sola magnitudine, figura ac dispositione partium mechanica collocatum eorum agendi principium esse; quæ sententia, ut clarius appareat, demonstrabimus solius texturæ immutatione venenum virulentia sua exui & contra, corpus vehementiæ pernitialis expers per eandem rationem in formale venenum posse transmutari. Evidentissimè id videmus in arsenico, regulo antimonii & mercurio sublimato, quæ potentissima, omnium consensione, sunt corporis destructiva, horum quodvis seorsim, quando cum sulphure metallico amicum init conjugium, sicuti id conspicitur in magnete arsenicali, antimonio regenerato & cinnabari antimonii, protinus omni virulentia orbantur, ut etiam tutò, imò sine noxa, intra corpus queant admitti. Et contraria ratione nitrum & vitriolum innoxia corpora sunt, quin imò magnæ efficaciam remedia, nihilominus solo forti igne, mutata eorum textura ac figura, in summe corrosivos liquores vertuntur. Aurum & argentum in pulvere sine damno, imò cum effectu quodam laudabili, propinquantur; à spiritus nitri autem & spiritus salis paucâ quantitate, quæ per se non nocet, in noxia & corrosiva concreta mutantur, id, quod multo magis conspicitur in argento vivo si ipsi additur spiritus salis, cum utrumque citra damnum corpori humano possit offerri.

§. VI.

Quodsi itaque, ut modo demonstratum est, veneni actio in sola mechanica partium dispositione fundetur, & ex materiæ duplicis per se benignæ commixtione sisti & de novo produci possit virulentia, quæ in sola tenuitate partium causticarum acerrimarum consistit, quidni etiam vero simile ac possibile est, in corpore nostro diversis succis, imò per imprudentem medicinam & medici incuriam varia facta mixtione resultare & progigni malignæ indolis principium morbosum posse. Cum autem notæ & characteres veneni quatuor à nobis notentur: nempe (1) summâ partium tenuitas, (2) earum corrosiva acrimonia, (3) quod celeriter & in pauca mole per totum corpus motuum alterationes & immutationes præter naturam efficiat & (4) quod præstantissimis remediis non obtemperet; perspicimus jam, an hæc ipsa opportune præsentî nostro scopo ac negotio possint accommodari.

§. VII.

Existimamus igitur (1) in variolarum & morbillorum morbo, nec non purpura & petechiis, posse
Frid. Hoffmanni Oper. Supplem. II.

à Medico generari formale venenum duplici nempe ratione, si materiam in cute apparentem retropellat, & (2) si nimis calidis spirituosus & sanguinem exagitantibus utitur. Foveri dictos hos morbos à principio quodam materiali acris causticæ indolis nemo dubitabit, qui consideret pruritus, fibrillarum cutis erosionem & stimulum illum, antequam materia foras ejiciatur in partibus membranosis, qui per vomitus, diarrhoeas, spasmos, anxietates, tormina se sufficienter prodat. Quin imò medicamenta inviscantia, diluentia, acrimoniam contemperantia, acrem materiæ morbosæ genium satis patefaciunt. Quodcumque materia hæc exitiosa caustica ex sanguinis oleosi & visceri contextu explicata, decenter per cutis spiracula & glandulas expellitur, evaporat, in pure oleoso probe contemperatur, placide & tranquille universa peraguntur; citissime vero lethale venenum producere potest Medicus, si transpirationem & per habitum cutis distillationem hujus materiæ impediat, quod tum per ingentem corporis refrigerationem tum per opiata aliaque sedativa nimia in copia propinata, uti talia exempla nobis notissima sunt, fieri facile potest: mox enim hujus materiæ in corpus retrocessionem pressio pede sequuntur anxietates summæ, virium prostratio, pulsus defectio, animi deliquium, delirium, convulsio & mors, medicamentis, nisi mox in principio administratis, raro felicem effectum præstantibus. Causa quare tam virulenter sese exerat materia hisce in morbis retropulsa, quæ tamen antea cum succis & sanguine mixta videbatur omni malignitate orbata, hæc nobis videtur, quamdiu principium, quod naturæ microcosmicæ summe infensum est, quale causticum spirituosum, sub involucro partium oleosarum delitescit, omni noxia activitate privatum est; simulac autem ex hisce sese evolvit, explicat & sui juris fit, indolem suam acrem causticam prodere incipit. Tale jam si debite per emunctoria expellitur, omnia fausto atque auspiciato cedunt, quando autem talis materia in porulis subsistens & moram neccens per continuum transfluxum materiæ subtilis æthereæ, intestinamque agitationem subtilior & acrior redditur, & rursus cum lymphâ & fluido nerveo ac sanguine miscetur, non talem nexum, qualem habuit, invenit, uti in inferioribus fusius demonstrabimus; sed instar veneni subtilis corpus pervadit, & truculenta symptomata & spasmos horribiles producit.

§. VIII.

Secundo loco principium illud tenue acere in variolis, morbillis, petechiis, imo purpura peccans, manifesta imbuatur virulentia, per intempestivum calidiorum, sudoriferorum & sic dictorum fortium expellentium abusum. Peccatur in eo toto die, dum imperitiores non modo per hypocaustum & lectum præcalidum; sed & medicamina, quæ sanguinem accendunt, uti sunt volatilia oleosa regni vegetabilium & animalium præpostere vi quadam excretionem & ejectionem materiæ peccantis per cutis habitum urgent. Clarissime testatur experientia, imo hinc inde ex observationibus hanc in rem notatis constat, complures hoc modo fuisse interfectos, qui poterant servari, utpote gravissima symptomata, nempe anxietates maximæ; hæmorrhagiæ enormes, virium cum animi defectione everfiones, quin imo deliria, convulsiones horum incautum usum consequi plus vice simplici vidimus; cum ex adverso, si blandioribus temperatis, acrimoniam demulcentibus & quæ nimium ardorem deprimunt, morbus tractetur, universa feliciter eveniant, placideque ac tranquille morbus sua decurrat tempora & laudabilis cum euphoria materiæ hostilis à sanguine fiat sequestratio & ad

corporis habitum protrusio. Ex hisce patet optima & tutissima alias remedia, non legitimo tempore imprudenter adhibita, nocentissima esse.

§. IX.

Causam singularis hujus effectus si inquiremus non alia occurrit, quam quod per ejusmodi remedia materiae dictis in morbis peccantis textura & *Kpáois* ita invertatur ac immutetur, ut venenum æmuletur. Dictum fuit in superioribus, venenorum naturam in subtilissima & penetrantissima acrimonia positam esse. Jam autem sal acre dictis in morbis delinquere nemo negabit; hoc igitur si motu intestino sanguinis calido, quem volatilia & sudorifera suscitant, excrementitia hæc salia valde agitantur, atteruntur, sicque ad summum volatilitatis gradum accedunt, intimioris admissionis fiunt & sic plus damni inferent, quam antea sub textura crassiori. Accedit & illud, quod sæpius natura & conditio hæc nimii caloris sit, quod partes heterogeneas cum corpore mixtas non tam separet, quam intimius eas combinet atque jungat: perspicimus id clarissime in experimentis quibusdam chemicis. Ita exempli gratia sal tartari cum sulphure remixtum igne si tractetur & fundatur, sulphur non totum avolat in auras, sed firmiter implicitum manet, cum particulis tartari alkalinis, quod vel ex colore rubicundo, sapore foetido, & tinctura sulphuris, quæ cum spiritu vini extrahitur luculenter apparet. Simili ratione sulphur vulgare cum stanno, plumbo vel argento mediante igne fufum, etiam vehementissimo dato igne ab hisce non separatur, sed metalla friabilia reddit & strictissime cum ipsis manet unitum. Quod si autem dictæ mineræ, vel salia alkalina sulphurata leni calore seu igne calcinatorio subjiciuntur, sulphuris separatio & evaporatio commode potest obtineri. Quapropter etiam in corpore nostro vehemens intestinalis calor fordes excrementitias non tam separat, quam eas cum sanguine & lymphâ arctius conjungit. Unde videmus secretionem & excretionem omnis materiae peccantis fieri magis sub calore sanguinis temperato & per blanda diaphoretica, quam sub magno ardore.

§. X.

Datur & alius modus, qui venenum dictis antea in morbis in corpore nostro constituat, qui est, si critica & salutaris excretio per medicamenta anodyna motum sistentia impediatur. Possem hic recensere aliquot mihi nota exempla, ubi in variolis plus justo adhibita papaveracea, theriacalia præcipitaverint ægrum, qui alias bene se habebat, in maximum periculum. Sic memini ante aliquot annos generosi juvenis ex variolis laborantis quæ benigne fatis se habebant, cum autem præter necessitatem Medici medicamentis continuo utebantur, quorum præcipua virtus erat, incrassans, anodyna, effectum est, ut præter omnem expectationem juvenis circa diem decimum anxietate, sopore, tremore, convulsionibus fuerit correptus, quæ sine omni dubio, nisi mature medicamentum analepticum & volatile discutiens fuisset propinatum, ægrum jugulassent, qui tamen per divinam gratiam fuit servatus. In puerperarum purpura similes tragici casus mihi noti sunt, ubi Medici nimium utentes anodynâ id effecerunt, ut anxietas, animi defectio, virium languor & insultus apoplecticus lethalis inde fuerit suscitatus. De malignis morbis & febribus res notissima est; opiata nempe hic vera esse venena. Observatione enim hoc loco perquam dignum est in omnibus morbis acutis, qui cum excretionem juncti sunt Medicum peccare posse utroque modo, nempe vel nimium commovendo vel nimium motus sistendo, illa ratione venenum in cor-

poris succis remanet & subtilius redditur & sic etiam in corpore relinquitur, accumulatur & mora pejus redditur. Ex quibus clarissime intelligitur prudentem horum morborum medicationem in eo maxime sitam esse, ut sciat Medicus in temperato motu cuncta servare sive motus moderari, excessivos compescendo, languidos autem revocando.

§. XI.

Deinceps non modo in morbis acutis, verum etiam in chronicis dictis, imò adhuc aliis modis fabricari in corpore venenum potest. Exemplo sit nobis scorbutus, ubi per experientiam deprehenditur, si sudores consueti foetidi pedum per adstringentia terrea v.g. calceis inspersa sistuntur, gravissime inde luere ægros. Ita vidimus vertiginem, dolores præcordiales, aurium tinnitum, auditus gravitatem, difficilem respirationem, ventris immanes torsiones, & vagos in artibus dolores ortos qui per plures annos nulla arte vel consilio abigi vel sanari poterant. Causa est conspicua, materia enim sudoris acris volatilis & vaporosa est, quæ ad extremos relegata artus majus ibi concipit vitium, hæc dum repellitur & vestigia sua relegit, nervosis partibus longè magis quam antea est infesta, & ægerrimè rursus vel corrigitur, vel evacuatur. Ita etiam comparatum est in quamplurimis aliis affectibus v.g. in podagra, ubi excrementa volatilia vaporosa & causticæ indolis ad membranas tendinoso-nervoso-glandulosas pedum articulos colligantes deferuntur; hæc si adstringentibus, poros obstruentibus, vel nimia refrigeratione repelluntur ad interiora, non alia, quam quæ ex veneno solent proficisci mala & symptomata sequuntur. Nempe fiunt exinde immanes dolores ventriculi & intestinorum, cardialgiæ, asthmata convulsiva, febres, deliria, incredibiles anxietates, sopores, motiones convulsivæ, virium languores alvique adstrictiones, quæ nec præstantissimis nec ulla arte vinci ac superari possunt, ut plerumque post diuturnas immanes passionem tandem fatis cedere cogantur. Latius hæc omnia deducta & compluribus exemplis illustrata leges in Dissert. Dn. Præsidis de Podagra retrocedente in corpus.

§. XII.

In scabie aliisque exulcerationibus & defœdationibus cutis, nec non capitis tinea & achoribus, serum falsum, acre, in subcutaneis glandulis ac vasculis stagnare & cutis fibrillas erodendo destruere nemo inficias ibit: quam atrocia & veneni effectus æquantia pathemata hos excipiant affectus, si cutis constrictione facta, tum per nimia frigora, tum per poros obstruentia & inviscantia unguenta, exitus materiae excrementitiæ præpediatur, eaque in corpus repellatur res in foro medico notissima est. Communissima sunt febres acutæ, imò malignæ, convulsiones, epilepsiæ, asthmata, tormina aliaque non admodum dissimilia pathemata, quæ à veneno hausto scaturire solent, v. *Miscell. Curios. Dec. II. Anno I. p. 93. & Dec. II. Ann. V. p. 451. & TRINCAVELLIUS Lib. II. Cap. VI. de ratione curandi partium corporis humani affectus*: Causam cœcitatæ à scabie retropulsa obortam vid. *Dec. II. Ann. VIII. p. 255*. Ulcera diuturna si consolidentur, omissis internis depurantibus & evacuantibus, in longe majus periculum conjiciunt ægros. Instar omnium sit exemplum nobilis istius, cujus TIMÆUS A GULDENKLEE *Lib. I. de affect. Capitis Casu XXVIII.* meminit: cum enim hic ipse ab ulcere multis annis durante liberaretur, elapso mense incidit in vehementissimos capitis dolores, in sputi foetidi per tussim rejectionem. Plura exempla collecta vide in *Miscell. curiosis Decur. II. A. V. p. 318. & Dec. II. A. VIII. p. 197.*

§. XIII.

§. XIII.

Gravius autem venenum exsurgit, quando excrementitiæ salinæ volatiles sordes, quæ ad cutis habitum relegantur, intempestivè facta inunctione mercuriali ad interiora pelluntur. Ita narrat RIEDLINUS *Lin. Medic. Anno 1696. Mens. Maii obs. I.* de ancilla quadam quæ horrenda scabie laboravit, tandem post inunctionem binis vicibus factam incidit in epilepsiam. HILDANUS in *Epist. ad Michaelem Doeringium*, p. 1184. refert nobilem arthritide nodosa & foeda serpigine laborantem unguento mercuriali inunctum fuisse, ex quo salivatio primum vehementior, tandem gangræna & sphacelus, denique mors secuta sunt. Quænam mala funesta, cingulum mercuriale, à sene arthritico in remedium scabiei adhibitum, cum salivatione lethali secuta sint, pluribus refert HOECHSTETERUS *observ. Decur. III. Casu XI.* Nuper Lipsiæ studiosus scabie laborans, unguento ex mercurio & sulphure eam tollere tentabat, inde autem in iliaca tormina coniectus fuit, quibus miserrimè correptus diem suum obiit. Et cum quotidiano compertum sit experimento, hydrargyrum foris illitum in corpore minus præparato & ubi languida transpiratio est, & impuris salis excrementiis sordibus cutis scatet, horrenda & lethalia sæpius celerrimè inferre pathemata, non aliter judicari potest, quàm quod materia peccans non modo ex prohibita evaporatione majorem perniciem contrahat, sed & ab admixtione hydrargyri, quod unione cum salibus totum septicum fit, majorem sævitiam adipiscatur, unde commendatissima practicis, qui ad rebelles morbos domandos extrinsecus utuntur hydrargyro, esse debet regula, ut omnibus viribus omnique cura acrimoniam humorum temperent & motum sanguinis ad partes extremas seu habitum corporis dirigant, ne quid venenosi humoris ex cute in corporis penetralia transmittatur.

§. XIV.

Quemadmodum autem acuti morbi, ubi excrementorum acrium subtilissimorum copia peccat ex nimio sanguinis motu per volatilia sudorifera exitiosissimam suscipiunt naturam, ita etiam nonnulli chronici satis alias benigni, qui salinam acrimoniam pro causa & fundamento agnoscunt, mirum exacerbantur, deleteriamque indolem contrahunt ex intempestivo volatilium abusu. Quartana morbus est extra controversiam periculi expers, nihilominus ex vehementi sudatione, frequenti volatilium usurpatione, degenerat in affectum periculi plenum, dum capitis dolor & purpura incorrigibilis exinde sæpius nascitur, notante id WEDELIO, in *Amoen. Materiae med. L. II. Sect. II. Cap. VI.* Febris tertiana, præsertim epidemica, ex principio salino acri bilioso nostra sententia originem suam ducit, sive hoc ipsum per tempestatum anni præternaturalem constitutionem & inde pendens aeris vitium, sive per pravam dietam & transpirationem interceptam in corporis succis fuerit productum, quod anxietatibus, molestâ vomitione, tensionibus spasmodicis, labiorum exulceratione satis se manifestat. Hanc febrem, si quis ineptè tractare velit, per alexipharmaca, tincturas bezoardicas, salia volatilia & actu ac potentia calida sitim & calorem inextinguibilem cum delirio provocabit, & simplicem facile in duplicem, intermittentem in continuam transmutabit. Consentit quoque hanc in rem WEDELIUS l. c. qui scribit, à spiritibus volatilibus cornu cervi & viperarum in intermittentibus adhibitis eas redditas fuisse continuas: ita & *Excell.* RIVINUS Præceptor ætatem colendus mihi retulit, de studioso quodam tertiana laborante

qui singulis paroxysmis bezoardicæ tincturæ portionem assumerat, & inde se in febrem continuam cum summo ardore & siti conjecerat. Hac præterita æstate vidi cura perversa, & spirituosorum abusu tertianam mutatam in malignam cum petechiis & purpura, quæ ægram exstinguebat.

§. XV.

Scabies satis benignus morbus est, si rectè tractetur; per nimis calida verò & sudorifera exitialis reddi potest. Facit hanc in rem nuper notatus casus: Vir honestus scabie per plures annos vexatus, quærebat ubivis auxilia, sed incassum; suavis tandem fuit laconicum balneum, quo per aliquot dies usus est, & largissimè sudavit, quo autem vires largissime consumsit, quas infirmas restaurare tentabat liberaliori vini Seckt haustu; fefellit autem successus, & mox in febrem malignam cum petechiis & purpura alba, qua etiam exstinctus fuit, incidebat. Lues venerea à caustico putredinoso & coagulante principio foveri, symptomatum ortus ac genesis edocet. Notum autem nobis est exemplum, ubi juvenis 24. annorum, truculento hoc malo afflictus ob continuum sudoriferorum usum ab empirico administratum, irreparabilem virium defectum sibi contraherat, doloribus, convulsionibus hinc inde partes occupantibus, quibus tandem mors succedebat. In mentem quoque hic nobis venit casus, ubi mulier ex mammarum cancro ad ulcerationem prono laborabat periculose, cujus perniciem volatilibus alexipharmacis crebrius propinatis edomare quærebat Medicus: paucis autem tempore miserrima mulier pustulis valde dolentibus, tumentibus, per totum corpus diffusis corripiebatur, subsecuto virium languore, syncope & morte. Adeo fixæ corrosivæ indolis materia intestinâ motione nimis exagitata & subtilis reddita, instar veneni per totum corpus penetrat & noxam infert præsentissimam. In praxi quid magis occurrit, quam quod scorbuticorum fixa salia, per essentias & spiritus præcalidos specierum & herbarum antiscorbuticarum in volatilitatis statum redacta, & penetrantiora reddita, in instanti, anxietates, dolores, ardores, nervosarum partium concussiones non sine vitæ periculo causentur?

§. XVI.

Datur præterea alius modus, quo Medicus imperitus in morbis ab acrimonia salina ortis, venenosam in corpore progignere possit materiam. Videlicet inter omnes convenit, arthriticos dolores à sero tenui falso acri membranas articulorum rodente excitari. Jam verò si quis per purgantia caustico sale perfusa morbum hunc tollere intendat, vel salinæ profapiæ remediis copiose utatur, ex facili virulenti quippiam producere valebit. In hujus sententiæ illustrationem non possum non brevibus recensere historiam, quæ ante aliquot menses sese obtulit *Dn. Præsidi.* Juvenis hic loci viginti sex annorum in servitiis Illustrissimi viri constitutus, temperaturæ admodum cholericæ, corripiebatur arthritide vaga cum calore præternaturali; hic dolorum & temporis quod legitima exigit cura impatiens, empirici ope utebatur, qui brevi dolorem se extinguere velle promittebat, quem in scopum sæpius administravit purgantia fortiora, nec non pulveres salinos, & quod notabile fuit, pro ordinario potu, acetum vini cum aqua & saccharo commixtum commendabat. Melius elapsa septimana se habere visus est æger, utpote dolores artus deserebant, tandem ab omnibus quasi immunis veste se induebat & ambulare volebat. Insequente autem nocte præter ad-

stantium opinionem gravissimis pathematibus torquebatur, delirabat vehementissimè & membra hinc inde convulsionibus agitabantur, & inter eas spasmus cynicus horribilis per multos dies conspiciebatur, caruit omni somno & cibo, pulsus æqualis, sed satis vehemens & paulo creber notabatur: Plura fuerunt in cassum usurpata, tandem visus morbus est quasi in furorem transiisse, dum stupendo robore instructus perpetuò ridebat vel cantabat, blasphemias atroces eructabat, & ex fenestra se præcipitare moliebatur, adeò ut vix à tribus hominibus potuerit contineri: perseverarunt hæc cuncta per 14. dierum fermè spatium. Tandem pulvis mineralis, qui ex regulo antimonii medicinali, mercurio dulci, nitro, camphora paucis guttulis adjectis essentiae castorei & opii, compositus erat, repetito usu mirabilem & divinam fermè tulit opem, utpotè mox post ejus usum dolor pristina loca occupabat, & manus abominabili tumore inflatæ conspiciebantur, per totum quoque corpus sudor, qui nullâ arte prius poterat extorqueri, apparebat. Quo facto successivè symptomata illa gravissima exspirabant, convulsiones desinebant, & menti ratio reddebatur: memorabile autem est, pulverem hunc diarrhæam, lenem tamen simul concitasse, quæ per septimanam fermè durabat. Interea æger analeptica & laudabili diætâ nutritus vires & sanitatem divina gratia recuperavit perfectam. Nullum hic dubium est præpostera medicatione truculentam hanc naturam induisse affectum, utpote purgantia, acrimoniam causticam, veneno analogam, salii morbofo addunt, & dum ferum laudabile, quod diluendo ejus ferociam minuit, detrahunt, & sal à conveniente cutis emunctorio introrsum ad viscera revocant, non potest non inde ratione acrimonie & penetrantie suæ multum augeri: Neque improbabile est salina remedia, quæ minus quadrant morbis à sale ortis, symbolum suum hic addidisse. Quamobrem non sine ratione purgantia in podagra & arthritide maximoperè damnat SYDENHAMIVS *Lib. de Podagra*, dum scribit; *Tam mei ipsius, quam aliorum periculo compertissimum habeo, catharsin quovis tempore administratam, ita parum votis respondisse, ut malum, quod debebant averruncare & avertere, accerferent.*

§. XVII.

Ultimo loco subjiciendum adhuc aliquid est, circa mercurialium usum: hæc ipsa imprudenter intrinsecus adhibita, gravissimam non modo virium jacturam, sed & imminens periculum producant, & veri veneni naturam exactissime quandoque æquant, præsertim si in scorbuticis subjectis & in morbis salinis improvide usurpantur; etenim vehementer, imò cruentas dejectiones cum atrocibus tormentis, foedam & sphacelofam oris salivationem, contracturas, tremores, convulsiones, tristibus id testantibus exemplis, non rarò excitant. Non alia atrocium hujusmodi symptomatum indagari potest causa, quam quod atomi mercuriales in corpus diffusæ ad mixturam salium in lymphâ contentorum corrosivam & virulentam naturam induant, non fecus ac illud accidit in Mercurio sublimato; quapropter prudentiores practici ab omni Mercurialium usu abstinent, nisi corporis fluores probè fluxiles redditi & à salibus fuerint depurati; Et eum in finem etiam convenientissimè inter lignorum & decocta & balnea ad rebelles morbos edomandos, mercurialia tam interne quam externe solent adhiberi.

§. XVIII.

Ex iis omnibus, quæ hactenus in medium adduximus, evidentissime apparere arbitror genuinum &

formale venenum, tam natura quam agendi vehementia tale, Medici culpa in humano corpore posse produci atque elaborari, idque variis modis, qui tamen omnes in eo conspirant, ut salia morbofa acris & erodentis indolis vel nimium subtilizando augentur, vel morâ aciora in emunctoriis reddita revocentur, aut diu in corpore detineantur nec debite eliminantur, vel etiam per alia corrosiva adjecta eorum virulentia adaugeatur: Quod tum nimis volatilia spirituosâ tum opiata, purgantia, mercurialia & quæ transpirationem liberam intercludunt præstant, qua de causa etiam atque etiam monendi sunt Medici, ut cautissime cum dictis in sanandis morbis mercentur, & magna prudentia iis utantur, ne plus damni quam emolumenti ægrotantibus afferant.

§. XIX.

Postremo è re quoque fore duco ut quædam subjungamus circa correctionem vel expulsionem talismodi veneni perniciosissimi, quod de novo ex Medici errore in corpore fuit productum. Dictum autem jam fuit in superioribus, tenuissimum quidem esse illud principium, at summa potentia motus infestum, quod ægerrime in loco, vel à materia quadam detineri, corrigi vel immutari possit. Unde medicamenta venenum per habitum corporis diffusum alterantia pauca vel plane nulla adhuc cognita sunt, sed quicquid hoc loco à Medicina expectandum est, id in eo fere unice consistit, ut subtilis hæc acrimonia sanguini innata blandissime tractetur, neque vi sed successive & leniter ex glandulis subcutaneis expellatur. Si quæ autem ex remediorum genere laudem merentur, certe adversus omnia cujuscunque naturæ venena, palmam mihi præripere videntur, acida ex vitriolo vel sulphure & nitro elicita, unde mixtura simplex & solus spiritus vitrioli cum pauca quantitate spiritus eboris mixtus, item spiritus nitri dulcis præparatus omnibus aliis alexipharmacis nobiliorem exerunt virtutem; hæc namque blande roborant & expellunt, & acre subtile sal figunt atque enervant. Omnium acidorum ea natura ac conditio est, ut tenuia salium spicula septicæ indolis figant atque infringant, quod vel evidentissime patet in drasticis emeticis & purgantibus, quorum vis per acidus spiritus penitus domatur atque exstinguitur. Insuper magnificimus ad cujuscunque generis venenatos morbos curandos nitri usum inter pulveres terreos sic dictos bezoardicos & cordiales, utpote in nitro singularis delitescit virtus acrimoniam sulphuream volatilem mitigandi: mediante nitro ipsum antimonii vitrum & regulus, deposita sua virulentia, diaphoretica evadunt & ipsum veneris vitriolum septicum fusione cum nitro per ignem mansuescit; unde in morbis malignis & quavis acrimonia, etiam quæ vomitiones, diarrhæam, tormina movet, nitrum moderata dosi cum bezoarticis terreis mixtum levamen solet afferre desideratissimum. Tandem etiam omnia diluentia mucilaginosa incrassantia, uti sunt gelatinæ, emulsionnes, decocta ossium, dentium, ex animantium genere sumptorum, nunquam non in infringendis salium spiculis & sic virulentia emendanda operam locare solent præsentissimam. Ubi tamen monendum & antispasmodica præsertim ex succino, croco, castoreo desumpta non esse omittenda. His & similibus qui non laude dignum quid in memoratis affectibus præstare potest, certe aliis etiam speciosissime excogitatis id non efficiet. At cum angustia temporis circa nobilissimam hanc materiam ulteriora prohibeat, hisce meditationibus cum gratiarum actione divina imponimus finem.

DISSERTATIO MEDICA

D E

PINGUEDINE

SEU SUCCO

NUTRITIO SUPERFLUO.

Primum edita Anno 1718.

§. I.



X pingui quadam substantia generamur & formamur. Est enim semen secundum divinum Hippocratem τὸ ὑγρὸν τὸ ἰσχυρότατον καὶ τὸ πικρότατον (a):

pingui quodam liquore nutrimur in tenera adhuc ætate, nam lac, quod tum ex mammarum haurimus fontibus, est ex ejusdem Senis mente τὸ πικρότατον ἀπὸ τῶν βρωτῶν καὶ τῶν ποτῶν. (b) Post ubi per ætatem solidiores adpetere licet cibos, succo non nisi pingui, ex ipsis chylicationis ope expresso sustentamur, augemur, crescimus, ac valemus, prout in sermonis demonstrabitur progressu. Sic nempe idem Hippocrates alio loco, sicut ille olim a me fuit emendatus, quod & Zuingerum. ex parte subodoratum fuisse postea didici; Πικρὸν τὸ ἐκ σαρκὸς, πικρὸν τὸ ἐκ αἵματος καὶ ἐκ ἄλλης ὑγρασίας. Πικρὸν τροφήν αἰκίμῳ. Πικρὸν τροφήν φλεβὸς, ἀρτηρίας. (c) Dum autem pingui illo & oleoso nutrimur succo, ac per eundem crescimus, naturæ eo non tendit labor, ut pinguescamus, sed ut potius sufficienti carne induti commode & libere vivamus. Videtur ergo pinguedo, quæ in animato conspicitur corpore, naturalis non esse, sed ceu superfluum nutrimentum, quodque a natura partibus nutriendis commode adglutinari haud poterat, & hinc, quantum possibile, foras expulsum, omnino consideranda. Hoc quod nec temere nec audacter statuatur, Specimine hocce Inaugurali, ut vocant, breviter, & sufficienter, nisi fallor, a me demonstrabitur. Cui conamini ut eruditi faveant, enixe rogo atque obtestor.

§. II.

Ut vero hoc negotium ordine tractetur, atque ex ipso, ut aiunt, fundamento eruatur, differendum nunc esse video cum de nutritione corporis animati, tum de nutrimento ipso. His enim rite explicatis sua sponte elucebit, quousque mea tendat meditatio, quantumque ponderis habeat aut roboris. Postquam Andry, Leeuwenhoeckius, Malpighius, Du Hamel, Borellus, alique sagaciores solertioresque naturæ mystæ argumentis sat gravibus, ipsaque cum ex ratione tum autopsia petitis evicerunt, animalium nutritionem & augmentationem secus fere non fieri, ac vegetabilium, quæ in feminibus suis, etiam si minutissimis, v. g. papavere, sinapi, cerasi nucleo, &c. stupendo quodam & humanas cogitationes excedente propemodum modo effigiata & in compendio quasi delitescencia, per humorem ex terra ipsis appropriatum (d) blandumque solis calorem rupto repagulo seu cortice extenduntur, sicque in alterum porriguntur: dubium pene nobis superest nullum, quod illud dogma admittere vetat, quod & illustrissima ævi nostri ingenia defendere non erubuerunt, statuentes nimirum, foetum delineatum jam suisque partibus artubusque instructum latere in femellæ ovario, immo distinctius ovulo, ita tamen, ut motu ille careat (e), tamque tener sit ac parvus, ut omnem omnium oculorum eludat aciem; simulac autem ab aura maris plastica spirituosâ fuerit adflatus, hincque in peculiarem quendam motum adactus & actus, post per tubas sic dictas Fallopianas in uteri cavitatem abactus; tunc accedente chyloso nutri-

(a) In gratiam τῶν ἀνελόντων hic & in seqq. ubi Græca occurrunt, addam versiones: Humidi robustissimum & pinguisissimum.

(b) Pinguisissimum de cibis & potibus.

(c) Quum olim πικρὸν & πικρὸν nullo pene legentur sensu, πικρὸν & πικρὸν substitui, item αἰκίμῳ loco τῆς ἐλκίμῳ, itidem vitiose scripti. Versio hæc est: Pingue ex carne, pingue ex sanguine & ex alia humiditate, pingue nutrimentum generosum, pingue nutrimentum veræ & arteriæ.

(d) De quo eleganter differuit Hippocrates Lib. de

Nat. pueri, item iv. de morbis, &c. qui & ipse ait, ubi homines vegetabilibus simillimos esse, abunde demonstravit, τὴν φύσιν πᾶσιν παρὰ πλησίον ἔσσαν, τῶν τε ἐκ γῆς φερόμενων, καὶ τῶν ἐκ ἀνθρώπων, Naturam omnem consimilem esse & Vegetabilium & hominum. Qualia etiam apud Aristotelem & Galenum Musoniumque &c. leguntur.

(e) Unde non inepte dixit Aristoteles de Gen. An. L. V. 1. eum primum dormire, somnoque immensum sensu motuque carere.

de Nat.
Pueri.

Arcan.
Nat. p. 1.
p. 164.

N. A. L.
III. c. x.

§. xxv.
p. 38.

nutrimento, primo pauciore, ratione tenelli ovuli, post paulatim auctiore, ut recte annotat Hippocrates, illum incipere augeri, h. e. extendi, adeo ut facilius conspici queat & contrectari. (f) Sic supra laudatus Leeuwenhoeckius ex ovilla matrice foetum quondam exemit dierum septendecim, omnibus suis membris & visceribus perfecte instructum, licet octavam pisi partem proportionem ille haud excederet. Sic & ipse Hippocrates sive Auctor libelli de *Ætate*, inter Hippocratea vulgo relati, foetum humanum septem tantum dierum se vidisse testatur, qui in aquam coniectus sicque explicatus omnia membra habere repertus est; quam sententiam M. quoque Varro adprobavit, ut ex A. Gelio docemur. Taceo in præsentia, quæ Cl. Brendelius, & quem ille allegat illustris Bergerus observarunt in hanc rem, stupenda plane & fidem pene omnem superantia, sufficiat jam prioris viri doctissimi allegasse dissertationem de *Embryone in ovulo ante conceptionem præexistente*.

§. III.

Hæc igitur auctio, hæc inquam extensio in utero materno inchoata, & ad exactum partus usque tempus sensim continuata continuatur post majori nisu, quum foetus exclusus liberiori exponitur aëri, hincque citatiorem sanguinis inchoat circuitum, & perficitur demum, ubi natura metam attingit sibi a summo Creatore præfixam, i. e. ubi ad adultam ætatem homo pervenit, quod post aliquot viginti annorum decursum fieri solere adferunt. Est scil. unicuique sua mensura suumque pondus (g), ad quæ ubi perventum est, sine detrimento altius assurgere nequit naturæ operantis conatus. Hinc perfectam illam quam dixi, ætatem Thucydides ut & Plato vocarunt *καθυσκυίαν*, *constantem*, ut vertit Tullius, teste Galeno, & qui ad illum provocat, Foessio; & Hippocrates illos, qui in ea sunt constituti, *καθυσκώτας*, *consistentes*, *haud amplius crescentes*, quos & ex eodem capite rectissime dixit *εὐφορώτατα νησεῖν φέγειν* (h), de quo infra pluribus. Huic autem mensuræ, h. e. corporum extensioni absolum est limites ponere, imo in ipsum Creatorem naturamque injurium. Quidam in longum porriguntur adeo, ut portentosum quid habere videantur. Alii e contrario adeo depressi sunt atque exiles, ut pigmæorum esse possent nepotuli. Multi etiam, iique fere plurimi medium magnos inter parvosque obtinent locum. Sed hos omnes perfecta autumo habere corpora, modo iusta gaudeant

membrorum symmetria ac proportionem. Hæc enim si adfuerit, nemo mihi vel *ἀγρία φύλα γιγάντων*, ut Homerus canit (i), i. e. ingentis staturæ homines, nec pumiliones, h. e. homunciones, & hominum quasi compendia monstra esse persuadebit, sicuti nec arbusculas humilesque myricas, nec sidera ferientes abietes protinus pro naturæ errantis aut languentis operibus habere convenit. Videatur præter Hippocratis de A. A. & L. librum, Elsholt. in *Anthropometria*, & B. MEUS C. C. IX. PARENS de usu proportionis in mundo, item & x. de *statura longa personarum illustrium*. Quomodo vero hæc fiat extensio, paullo infra dicam.

§. IV.

Postquam igitur homo iustam suam mensuram, ad quam acquirendam plurimum sanè requirebatur nutrimenti, perfecte explevit, amplius augeri sive expandi nequit, *ἀλλ' ἔσκειν ἀτρέμιζον τὸ σῶμα τῆς αὐξήσεως πυκνότητι ἰὼν καὶ ἀτρέκεις* (l), ut perbelle noster inquit dictator. Hinc nec tanto opus est alimento, quanto scil. antea, quum adhuc cresceret, sed tantum ipsi saltem est necessarium, quantum ad refarciendum illud, quod vel per insensibilem transpirationem, vel salivam, &c. quotidie perditur. Id vero priorum impensarum respectu longe minoris videtur momenti, & nutritionis vix est perdignum nomine, unde etiam notha quibusdam audit nutritio. Eleganter hinc Theodoretus de nutritione verba faciens inter alia ita ait: *Οὕτω τὸ σῶμα τριφόμενον ἐν μὲν τοῖς βρέφειν αὐξεται καὶ μακρύνεται καὶ ἐκτείνεται, καὶ πρόσφορον κατὰ βραχὺ προσλαμβάνει ὄγκον, ὅταν δὲ εἰς τὸ ὠρεσμένον ἀφίκηται μετρον* (de quo ante diximus,) *τηνικαῦτα τῆς μὲν αὐξῆς πάυεται, τρέφεται δὲ μόνον.* (m) Imo ipse Hippocrates Lib. de *dieta Nat. pueri*, & alibi sapius distinguit inter *αὐξῆσιν* & *τροφὴν*. Adde imprimis Auctorem definitionum medicarum, Galenum vulgo creditum, item Plutarchum. Sed de hac re inferius agam pluribus. Jam ad ipsum progredior Nutrimentum.

Lib. I. de
Diet. &
de Glandul.

Serm. III.
de Provi-
denia.

§. V.

De Nutrimento ejusque essentia dictum est difficile, quantæ Physiologos inter & Anatomicos lites fuerint motæ. Sanguis scil. non omnibus pro commodo & adproprio partium omnium nutriendarum sufficiebat nutrimento, licet præter Hippocratis, Democriti, Platonis, Aristotelis, aliorumque veterum consensum fere unanimem ipsa illud suaderet, imo postulare ratio. Sanguis enim ex chylo paratus

(f) Hinc & Aristoteles egregie marem dixit foetum vivificare, ipsique animam quasi & motus principium indere, femina subministrante tantum materiam, de Gen. An. L. II. IV. Quod & Scaliger propugnat contra Cardanum, Exercit. cccxviii. Vide maxime Almelooven Amoen. Theolog. philos. p. 143.

(g) Nisi forsan Nili incolam, crocodilum velis excipere, quem, quamdiu vivit, in longum crescere ferunt quidam apud Plinium L. VIII. 25. Quod & illustris confirmat Thevenotus Itiner. Orient. p. 1. L. II. c. 72.

(h) Facillime jejunium sustinere. Ceterum miror, hunc locum ab interpretibus, paucos si exceperim, secus fuisse explicatum, quod obiter noto.

(i) Odyss. VII. 206. Rusticae gigantum nationes.

(l) Sed stat corpus ab augmento quiescens dum compactum est & consummatum. Vulgo legebatur *ἀτρέκεις*, quæ vox nihil significat. Ego legendum censeo *ἀτρέκεις*, quem in sensum sapius hac voce usus est Hippocrates. Foessii emendationes videri possunt in ejus œconomia sub *ἀτρέκεις*, & ab aliis laudari. Mihi certe illæ nimis visæ sunt duræ & allegoricae.

(m) Corpus sic nutritum in infantibus quidem augetur, & in longum latumque extenditur, & adæquatum paulatim assumit pondus. Quando vero ad definitam pervenit mensuram tunc cessat augeri, & nutritur solum.

paratus omnes habet qualitates & proprietates, quæ variæ variarum partium nutritioni commode inservire possunt, quod omni alii succo, qualiscunque ille tandem sit, a natura denegatur, quum & ille ceu ad veram catholicamque nutritionem ineptus, a sanguine sit sepositus, in unum alterumque tantum usum. Adeo remotiora atque abstrusiora mortales quærunt, propria eaque certiora negligentes. Audiendi igitur non sunt Glissonius, nec strenuus ejus defensor Charletonus, nec his consentiens Consentinus, nec alii & Angli & Itali. Pauci admodum Ettmullero teste eos sequuti, qui præter sanguinem quendam nervorum succum pro vero & efficacissimo corporis animati venditarunt nutrimento. Eorum enim argumentis, utut prima fronte speciosis, satis valide obviam itum fuit a viris per universum orbem clarissimis, Bartholino, Baylio, Bétto, Bohvio, Brunone, Cole, Deusingio, Ettmullero, Regio, Rivino, Stenone, Verheyenio, Wedelio, Willisio, aliisque pluribus, quos hic allegare tantum, non exscribere mens est, quum eorum scripta nemini non sint & esse debeant notissima. Potius cum iisdem, imprimis Bohvio, Ettmullero, Harveo, & Verheyenio, &c. asserimus, sanguinem, arteriosum puta, corpusque universum perenni alveo percurrentem, ejusque cum primis partem serosam seu gelatinosam & pinguem, Hippocrati *πύκνῃ δυνάμει* (n) vocatam, partibus nutriendis ceu aptam & adæquatam massam a natura impendi, quod & ipsa docet autopsia, in iis præsertim subjectis, quæ, dum *πολύσαρκα* sunt atque subpinguia, ideoque succo nutritio non indigent, in sanguine monstrant serum quoddam pingue supernatans, lacti fere simile, ut in anseribus frumentaceis turundis diu pastis observavit Olaus Borrichius, cui aliud addi potest experimentum, quod apud Willisium legere licet. Videmus præterea in corporibus fame emaciatis sanguinem & perpaucum esse, tenuemque, (o) & quod imprimis huc facit, succo illo gelatinoso seu pingui destitutum, ut celeberrimus observavit Bohvius, item Bartholinus. Taceo alia. Verissimum ergo est, pingue sanguinis serum, h. e. quintam quasi chyli essentiam, Cambium veteribus Arabibus dictam, corpus animatum & nutrire & apte nutrire posse.

§. VI.

Dixi superius paullo, veram nostram nutritionem seu augmentationem fieri per exten-

sionem. Hic ergo demonstrandum nunc restat, qua ea fiat ratione. Extendi jam incipinus in materno utero, de quo supra actum. Hæc autem extensio cum ea comparari haud potest, quæ tunc demum incipit, quando foetus in liberiores protrusus aërem, organisque chylicationi inservientibus ita fuit instructus, ut iis uti possit commode. (p), & majore demum naturæ peragitur conamine, in tenello, ut dixi, luci publicæ exposito & per os alimenta sua avidè hauriente, post in ventriculo & intestinulis digerente, digestaque in sui augmentationem impendente. Videtur autem hic mihi succus ille nutritivus, quem & in utero & postea ex nutricis mammis imbibit tenellus, sufficiens non esse ad corpus ejus, quod quidem per illius adfluxum sensim sensimque extenditur, consolidandum, illaque, quæ per illam extensionem patefunt, interstitia & variæ figuræ angulos porosque ad suam forte, ut ita loquar, aquositatem apte complendum. (q) Nam dum & mater & nutrix de eodem succo participant nutritio, priusque fere nutriuntur, ac ipse quidem foetus & infans: una cum succo alibili multas particulas aqueas minusque tenaces ad ipsos remeare credo. Huic meæ meditationi ansam dederunt caro infantum succulenta & quasi spongiosa, ossiumque substantia ut plurimum cartilaginea. Fieri ergo tum demum perfectam nutritionem h. e. extensionem cum consolidatione simul, adsero, quando pueri solidiores cibos per dentes comminutos, aut his deficientibus per gingivas attritos, adsumere possunt, sui que juris sunt ita, ut de ipsorum alimento nemo participet amplius. Tunc enim *τοιαῦτα ἀρροῦνται τὰ παῖδια, ὡς περ οἱ ἄνδρες* (r), ut magnus ait Hippocrates, alia licet de re; nec nostræ inepte prorsus dicunt mulierculæ: *Das Milch = Gleich muß ihnen erst weg fallen.*

§. VII.

Hæc autem, de qua dixi, consolidatio secus concipi nequit, quam per durabilem aptamque interstitiorum & angulorum modo dictorum repletionem. Inde & eleganter Alcmaeon apud Plutarchum dixit embryonem seu corpus *ἀναλαμβάνειν ὥσπερ σπογγίαν τὰ ἀπὸ τῆς τροφῆς θρεπτικά*. (s) Necessaria ergo erat massa, quæ nec rigida nimis esset, nec fluida nimis ac aquea, sed media potius inter utramque, i. e. succus, ut Verulamius loquitur, *subdurus*, *subpinguis*, aut *subroscidus*. Quum enim rigida esset & minus flexilis, haud commode insinuare sese poterat in intersti-

Pl. Ph.
V. 16.

(n) pinguem potentiam.
(o) quod quidem Charletonus, Borellus, alique in dubium vocant, sed a Diemerbroeckio variis exemplis fuere refutati.
(p) Quod non ab initio, ut Democritus & Epicurus apud Plutarchum *Pl. Ph. v. 16.* putarunt, sed ultimis potius gestationis mensibus contingit, uti post Hippocratem *de Carn. §. VIII.* certatim probarunt viri maximi Backius, Bartholinus, Bohvius, Cartesius, Coiterus, Harveus, Hoffmannus, Schöockius, Segerus, Velthuisius, Verulamius, Veslingius, alique. Nuperrime accidit ut mercenarii cujusdam in vicinia uxor infantem partu satis eniteretur difficili, cujus funiculus umbilicalis a putredine totus fere erat exesus. Hic impossibile fuisset, ut vixisset, nisi aliunde, quam per funiculum illum ipsi

suggestum fuisset nutrimentum.
(q) Simile notat Hippocrates de plantis, quarum & generationem & nutritionem cum natura humana exacte convenire, fusius edisseruit, ut supra jam me observare memini. Putat nimirum *Lib. de Nat. pueri §. XXIII.* eas, priusquam adolescant & firmas agant radices, tenui tantum & aquoso nutriri nutrimento. Tunc vero, ubi solidiores fieri inceperint, *ὅτι τῆς γῆς ἔλκεν ἕκαστος ὕδατος, ἀλλὰ παχύτερα καὶ πικρὸν καὶ πλεόν*, ex terra non amplius aquosum attrahere nutrimentum, sed crassius, pinguius, & copiosius.
(r) His investiantur pueri, quibus viri.
(s) Veluti spongiam imbibere ex alimento particulas nutritivas.

Hermet.
Anti-Con-
ring. L. I.
C. x. Anat.
Cerebr.
c. xx.

Progymn.
VII. sub
fin.

interstitia illa, quæ ratione varii fibrillarum flaminumque plexus flexusque, suppono nunc coniformia quadrangularia, triangularia, rotunda, &c. nec iis apte inherere. Sin fluida, nimiumque flexilis, metus suberat, ne eadem illa interstitia per lubricitatem suam relinqueret vacua & incassum pertransiret; quod tabidorum imprimis testatur sanguis ferrosior iusto & aquosior, unde & vera deficit nutritio. Nulla igitur ad condensationem seu completionem massa erit aptior, quam subpinguis, & gelatinosa. Hæc enim per flexilitatem cujuscunque figuræ replere poterat spatium, & per tenacitatem eidem apte satis & firmiter adherere atque adglutinari, demumque accedente imprimis calore, & ex hoc enata coctione & agitatione in corpus converti solidum, ita ut illi tandem, cui adhæsit, parti omnino evaderet similis, quod uno verbo alimenti physiologi vocant *ὁμοίωσιν*, five *assimilationem*, magno ipsis facem præferente Hippocrate, qui & alibi vocem *ἀλλοίωσιν* usurpat, i. e. *permutationem* succi nutritii in ipsam, cui inhæsit, partem; sensu nihil plane differente. Quod autem pingui & chyloso succo animata nutrantur corpora, eleganter quoque illustri Verulamii demonstrat experimentum, quo omnem pene carnem minutim dissectam vitro membrana clauso inditam & aquæ ebullienti per 6. 7ve horas impostam, in pinguem quandam gelatinam, h. e. in sua primordia, resolvi posse docet. Cui simile est, quod de struthione refert Thevenotus, qui captus & per tempus agitato volutatusque penitus tandem in butyrosam quandam liquefcit materiam (solis remanentibus capite ossibusque) quam Arabes *Mantegue* vocant. Ut illud jam omittam, quod Willifius in eandem rem habet cap. xx. de Cerebri Anatomie superius allegato.

§. VIII.

Hæc alimenti *ὁμοίωσις* & interstitiorum repletio durat, quousque corpus crescit, i. e. quousque extendi potest, ut sæpius dictum; quod ad pubertatis usque annos contingere, magnus adserit Bohnius, certe ad aliquot viginti præter propter annos, quibus acquisitis definit omnino corpus in longum latumque extendi atque amplius augeri, quum nulla supersint interstitia, nullusque sit *ὁμοίωσις* locus. Interim vero nihil detrahatur nutritioni; eadem, imò & majori alimentorum fruimur copia, licet haud amplius crescimus. Et quamvis nutritione carere non possimus, ad statum illum extensarum partium integrum conservandum, partesque ipsas, quibus per insensibilem transpirationem, vehementiores motus, &c. multum quotidie decedit roboris, quod *Sanctorii Medicina*

statica accuratissima lance trutinat, dum eæ quasi arescunt, liquore illo generoso & virtuoso perfundendas & irrorandas. Videtur tamen plus quotidie post expletum scilicet accretionis terminum, elaborari succi nutritii, quam corpori nostro reficiendo opus est.

§. IX.

Atque sic sua, ut supra dixi, sponte ad pinguedinem deducimur. Ea nimirum est superflua illa succi nutritii portio, nec ullam ad corporis perfectionem & integritatem requiri credo pinguedinem, sive ea sit *radicalis* sive *secundaria*, ut Molinettus, & ex eo Major distinxerunt apud Bartholinum. (1) Dum enim succus nutritius largo quasi flumine ad corporis propellitur partes, ibi autem ipsi, ut dixi, locus non conceditur ob corpus jam auctum & completum, transudat ille per carnis poros & ubi locum nactus est commodum, præsertim in membranis, ibi adhæret, & dum augetur indies & quasi consolidescit, i. e. dum sacculi illi & utriculi oleosa substantia turgidi arctius sibi invicem imponuntur, sub massa quadam albicante sive flavescente oleosa comparet, quam *pinguedinem* appellare collibitum fuit (2). Hoc ut probemus, ad ipsos statim provocamus pingues & obesos, qui inedia facillime ferre solent & possunt, ex nulla alia, opinor, ratione, quam quod natura ex superfluo hoc succo nutritio sive pinguedine illud retrahere quasi vel resorbere potest, quod ad amissum restaurandum sufficiebat. Tale exemplum recenset Th. Bartholinus de puella quadam. Provocamus porro ad ipsa, quæ saginantur animalia bruta. Ea enim, quo pinguiora, eo pauciora adsumunt alimenta. Immo hæc ipsa hunc in finem iusto copiosiore & lautiore infarciuntur nutrimento, ut pinguescant, i. e. ut superfluous succus nutritius pro palati desiderio, carnem sub pinguedinis forma obducatur atque investiat. Videmus præter hæc in morbis pinguedinem in nostro sæpiissime deficere corpore. Nam quia per materiam, ut loquuntur, peccantem, seu motus in nostra machina contrarios, quos morbum vocamus, chylicationis aequæ ac nutritionis plerumque impeditur negotium: illud, quod in œconomia animali superfluum erat, revocatur quasi, quo ipsum aliquo saltim modo sustentetur & refocilletur corpus, de quo paullo infra distinctius. (x)

§. X.

Hæc argumenta ut majorem apud eos inveniant fidem, quibus forte hoc meum paradoxum videbitur assertum, firmabo jam aliquot & veterum & recentiorum Auctorum testimoniiis. Aristoteles: *Πιμνή ἐστὶ αἷμα περι-*

Anat. Ref.
L. I. c. 3.
p. 24.

Hist. Anat.
C. III.
LXXX.
VIII.

de Part.
Animal.
L. II. c. 5.

(1) Nullam enim radicalem dari, ipse fatetur Bartholinus l. supr. cit. qui eam ad membranas potius referendam censet, quales in embryonibus pinguedine destitutis. Secundaria multo minus est naturalis, ubi scil. successu temporis superflua succi nutritii copia membranarum illarum foveolas & cellulas occupat, easque implet atque extendit, &c.

(2) Atque sic iterum vel in hocce passu analogum quid nobiscum habent vegetabilia, quæ supra jam allegavi. Lacrimæ enim & gummi, quæ sæpius

plorant & exsulant; non tam excretiones, ut multi putant, quam succi nutritii nimii per radices ascendentes exuberantia sunt, quod & recte asseruit summus Verulamius Hip. V. & M. ad Art. IV. §. 7.

(x) Non nescio, aliam plerumque hujus rei dari rationem, nempe intensum in morbis calorem citissime absumere pinguedinem, utpote dissipatu facilem. Highmori imprimis, aliorumque, qui eum sequuti, hoc est commentum; a Verheyen tamen recte in dubium vocatum. Anat. Tracl. II. c. IV.

Silv. Silv.
Cent. VII.
678.

Itiner.
Orient.
P. I. L. II.
c. xxv.

περιμένον δ' εὐτροφίαν, καὶ τὸ μὴ καταναλισκόμενον
εἰς τὸ σαρκώδες μέρος τῶν ζώων. (γ) Quod &
idem bis repetit Lib. I. de Animalium Ge-
neratione. Auctor Medicarum definitionum
apud Galenum: Πιπελή ἐστὶ παρέρχυμα τροφῆς,
περὶ τῆς ὑμένας μάλιστα πηγνυμένη, ἀναίδνηται.

Lib. de
Anim.
f. 97. 6.
H. V. &
M. ad Art.
xvi. §. 2.
p. 253.
Physiol.
c. 11. §. 9.

(z) Philippus Melanchton ex veterum senten-
tia: *Pinguedo quædam est humiditas superflua
ex bono sanguine redundans.* Verulamius:
*Pinguedo nihil est aliud, quam exuberantia
alimenti ultra id, quod excernitur, aut per-
fecte adsimilatur.* His addo Ettmullerum,
Medicum, dum fata sinerent, undiquaque
celeberrimum. *Pinguedo*, inquit ille, *non est
proprie e partium solidarum numero, quin po-
tius per accidens, ex abundantia succi nutriti-
tii, post auctioris annos membranis adherere
& sensim adfixa coagulari (pro earum vel hu-
meclatione vel blando subjacentium partium fo-
tu) videatur, unde nec propriam circumscri-
ptam a se continet figuram, & nunc augetur,
nunc minuitur; Ubi & Sebizium Lib. de
aliment. facultat. V. allegat. Imprimis ejus-
dem doctissimi viri legi meretur dissertatio
de Corpulentia nimia, quæ octava est, ubi
multa, quæ huc faciunt, lectu dignissima;
maxime autem, quum ita concludit: adeo ut
dicendum videatur, pinguedinem per accidens
ex abundantia succi nutritii & chylosi sub &
post augmentationis annos generari, membra-
nosa locis adherere, & intra sua membranosa
receptacula pedetentim dilatata inclusam suc-
cessive coagulari. Uno nomine, esse quasi oleum
uberius, aut potius butyrum densius, firmitus
paullo inspissatum & coagulatum &c. &c., ut
taceam hic elegantem ejus demonstrationem,
qua nimirum ratione chylosus ille succus nu-
tritius superfluo ob spatium ipsi interne de-
negatum & a fibris carneis sanguine investi-
tis occupatum, per membranas elastica vir-
tute præditas exsudat, iisdem adhæreat &
coaguletur. Conferri quoque possunt Sen-
nertus, item Cæcilius Folius, qui de gene-
ratione & usu pinguedinis elimatum com-
posuisse dicitur Tractatum, a laudato Ett-
mullero eodem loco, ut & Bartholino alle-
gatus, aliique plurimi. Et sic facile dirimi
poterit lis illa notissima, num pinguedo pars
sit corporis solida, an vero fluida, nam dum
ea & adesse potest & abesse, ad neutram
cenfeo referendam, nisi eam vocare malimus
accessoriam; hoc enim nomen ipsi, si quid
indicem, revera competit.*

§. XI.

In eo igitur omnes fere conspirant unani-
miter, pinguedinem superfluo succi nutritii
esse copiam. Et nihilo tamen minus iidem
adserunt, eam esse naturalem & ad varios in
corpore animato usus a natura destinatum;
Quod sane postulatum, non dicam parado-
xum videtur haud adeo parvum. Quicquid
enim superfluum, illud non est necessarium;
Frid. Hoffmanni Oper. Suppl. II.

quod vero necessarium non est, impedimen-
to potius esse videtur, quam emolumento.
Et ipsa natura, quæ secundum magnum Hip-
pocratem διαγοράτη h. e. accuratissima & justæ
symmetriæ ac proportionis est observantissima,
(aa) omne nimium respuit ac superfluum.
Quum vero post cuticulæ cutisque remotio-
nem in omnibus fere subjectis pinguedinem
Anatomicorum inveniret solertia, eam natu-
ralem & ex propriis corporis partibus esse pu-
tarunt, licet alibi, ut jam monui, illam su-
perabundare adfererent. Sed ipsos illos, quos
pinguedini adscribunt, usus breviter lustrare
& examinare animus fert. Horum enim plu-
rimi ita sunt comparati, ut rite non videan-
tur Auctores distinxisse inter succum illum
chylosum, vel, ut aliis loqui placuit, buty-
rosum, quatenus ille massæ sanguineæ inna-
tans partium πῆξαι, ut loquitur Hippocrates,
h. e. nutritioni primariæ, item & secundariæ
seu earundem irrorationi impenditur, & qua-
tenus peculiare extra corporis limites occupat
spatium. Quantum enim ad prius, largior
pinguedinem improprie sic dictam suos præ-
stare usus eximios, dum ea scilicet nutrit &
auget, proprie autem sic dictæ pinguedini il-
los adscribere omnino dubitamus, prout mox
patebit ex usibus illis jam cum nostra ἐμπρίσει
recensendis.

§. XII.

Primo pinguedinem illam, quæ inter inte-
gumenta corporis naturalia & propria haud
opportune referunt, impedire nimiam dicunt
transpirationem. Sed qui pinguedinis textu-
ram, ejusque particularum globosarum con-
tigitatem, non continuitatem consideravit,
quam iidem ipsi omnes fere admittunt, sta-
tim videt, eam transpirationem non impedi-
re, quam potius eidem liberum relinquere
exitum. Secundo ajunt pinguedinem partes
subjectas calefacere atque fovere; sed nec hoc
stringit, nam nostri corporis partes externo
illo fotu indigere non videntur, quum ce-
lerrimus iste & perennis sanguinis per easdem
circuitus ipsas interne satis foveat blandoque
calore adspiret. Præterea & ipsi cuti &
membranæ carneæ sive panniculo, ut in bru-
tis audit, carnosio, illud, si necessum, com-
mitti poterat officium. Tertio pinguedo frigus
impedire dicitur, quo minus interiora versus
penetret. Ad hoc responderi potest, quod
ad prius jam dictum. Nam per porosam sa-
tis pinguedinis substantiam libere penetrare
possunt rigida frigoris spicula. Sæpius quo-
que non obstante egregio pinguedinis umbo-
ne obriguisse notum est obesiora corpora;
quin & pingua animalia, v. g. ursi, porci,
glires &c. hyemis tempore sua latibula frigo-
ris metu æque quærunt, ac ea, pinguedine
quæ destituuntur. Nec frigus profecto pin-
guedinem ut perforet, opus habet, quum
facilior longe ipsi concedatur aditus per fau-
ces

Z z

(γ) Pinguedo est sanguis coctus & inspissatus propter
nimiam nutritionem, quique in carneam animalium
partem impendi nequit; sive illud, quod in partium
nutritionem consumi non potest.

(z) Pinguedo est affusio nutrimenti circa membranas
maxime fixa, sensus expers.

(aa) Sic recte hanc vocem explicant Palladius, & Ero-

tianus, Galenus, veterumque alii; quod contra
Cl. Clericum noto, qui eam moraliter interpreta-
tur; quod adversus mentem est Hippocratis, ut
alibi demonstrabo distinctius; ubi & illum, qui
Clericum temere sequutus, & hinc in Hippocra-
tem summe injurius, in viam reducam.

Lib. de Loc.
in Hom.

ces & primas sic dictas vias. Idem statuen-
dum, quum *Quarto* adserunt, *calorem im-
pedire pinguedinem, ne ille penetret.* Radii
enim solares facillime sese insinuant, imo ip-
sam illam quodammodo resolvunt pinguedi-
nem, quod sudor abunde emanans manife-
sto testatur. Nec *Quinto* necesse est, ut pin-
guedo partes unctuositate, ut ferunt, *lubricet,*
easque ad motum hinc aptiores reddat, nisi
eatenus hoc intelligatur, quatenus particulæ
illæ oleosæ & pingues cum sanguinis Euri-
po per totum corpus disperguntur, ut supra
monui; alias enim motus fiunt ab intra.
Quid ergo pinguedo ab extra poterit con-
ferre? Præterea ossa habent suam medullam
suaque vasa ad eam tendentia, succumque
nutritium deferentia, & articuli succum suum,
sive mukum, motibus optime inservientem,
teste Hippocrate nostro, ut adeo commode
carere possimus externa illa pinguedine. *Sex-
to* perhibent, *pinguedinem interstitia supplere,*
*adeoque habitum reddere levem ac venustio-
rem.* Et hic solus mihi videtur usus, quem
habere potest, si quem habeat, pinguedo. Hoc
ipsum tamen caro etiam præstare potest suc-
culenta & plena; nec est, quod vetulas hic
allegent & silicernia, in quibus omnes sub-
sidunt partes exluccæ tonoque suo naturali
privatæ, & tota in universum ob virium de-
fectum cessat vivacitas. *Septimo* nec *pulvinar-
is ad instar & propugnaculi contra ictus &
compressiones pinguedo,* ut commentantur,
esse potest, quum potius eo facilius penetrent
ictus ob denegatam natura pinguedini ela-
sticitatem, quam nemo ipsi poterit adstrue-
re. *Octavo* *pinguedo sales aliasque acriores
particulas vinculum coercere* creditur, neque
id injuria, quatenus ea sanguini innatat. Si-
mulac autem ceu superfluum quid fuerit eje-
cta, cessat omnino & hic usus, quem &
Malpighio, ejus auctori, dubium jam fecit
Bartholinus; cujus etiam, (ut id obiter hic
inferam) vasa, quæ fingit, adiposa non si-
ne ratione destruxere Verheyen & Rivinus
aliique. *Nono* de Omento ut plurimum pin-
guedine investito statuunt, *illud ventriculi
juvare coctionem ipsumque fovere; & hinc eo
exciso flatus oboriri & ructus &c.* Sed hoc
omentum præstare potest, si præstet, (bb)
non qua pingue, sed qua omentum, & glan-
dulis suis vasisque donatum, quod Democri-
tus τὸν κύριον ἀπάσης κοιλίας totius ventris vo-
cavit dominum; & ipse de hoc usu dubitare
videtur Verheyen, inprimis autem Excell.
Rivinus in nupera de Omento Exercitatione,
ubi novam plane de illius usu fovet opinio-
nem. *Decimum* argumentum levissimum sane
est, quum putant, *pinguedinem nativi caloris
esse pabulum flammamque vitalem ceu oleum
ellyphnii conservare.* Diu enim jam est, ex
quo flamma illa vitalis Willifiana, Helmon-
tiana Horstianave per ignea nostri sæculi in-
genia extincta fuit, hincque & illius pabuli
usus vel sponte in fumum abit & auras. Nec raro
ii citius exstinguuntur, quibus multum suppete-
ret istius pabuli ad illam sustentandam; nisi ita il-
lud velimus interpretari, quod substantia illa pin-
guior & oleosa, quæ corpus auget & nutrit, de

qua hætenus dictum, dum vitalitatem præstat,
vitæ sit nuncupanda pabulum. Sed majoris
videtur momenti *Undecimum*, quando hario-
lantur, *naturam providam succum illum nu-
tritium superfluum sub pinguedinis forma ideo
foras protrudere, quo deficiente forsitan alio or-
dinario alimento habeat, unde corpus suum
quodammodo possit sustentare & recreare,*
quod & supra adseruimus; sed nobis natura
mechanice agit ad summi Hippocratis men-
tem, nec a Lipsio, Gassendo, Boyleo,
Clerico, Dolæo, Gundlingio &c. hac qui-
dem in parte intellectam, ut alibi ostendam,
non quasi prudentia quadam sit instructa,
multo minus quasi ipsa sit anima rationalis,
ut recentiorum quidam haud circumspecte
postulant. Ideo fieri secus non potest, quam
ut deficiente alimento ordinario ab alluente
sanguine particulis illis nutritiis i. e. pingui-
bus depauperato hincque acriori & ad rapien-
dum quid de pinguedine aptiore, illud ab-
radatur in nutritionem, quod erat superfluum.
Hi sunt, quantum scio, illi usus omnes,
saltem plurimi, quos pro defendenda pingue-
dine ceu naturali & necessaria allegant Ana-
tomicorum principes; quibus tamen hæc,
quæ hætenus dicta sunt, breviter & decen-
ter regerere visum fuit. Jam ea, quæ forte
restant, ad finem properantes consideremus.

§. XIII.

Usus igitur perexiguos corpori nostro præ-
stat, ut vidimus, subcutanea illa pinguedo,
de qua potissimum hic fuit sermo; nec eos
curaremus adeo, modo eadem non ferale sæ-
pius foret pulvinar, corpusque nostrum fo-
vendo, ut ajunt, plane suffocaret. Scilicet
ea est pinguedinis conditio, immo maligni-
tas, ut accedente quotidie succi nutritii su-
perflua copia nova indies augeatur illa & at-
tollatur. Cutis enim, cui substrata est, ra-
tione suæ sese expandendi virtutis facillime
eidem cedit; hinc & observante apud Bar-
tholinum Veslingio plerumque laxius ipsi in-
hæret; unde in immensum prope accrescere
commode admodum potest, ut exempla le-
gere est apud Bartholinum, Pechlinum, Ti-
mæum a Guldenkleee, Tulpium, Schenckium,
Marcellum Donatum, Platerum aliosque.
Immo non extra carnis musculosæ periphe-
riam sese tantum prodit illa tot malorum ge-
nitrix, sed & internas corporis partes & vis-
cera sæpissime occupat. Sic in thorace pul-
monibus imposita abundare visa fuit Bartho-
lino toties allegato; renes sæpius ita eidem
fuerunt immersi, ut illos vix invenire licuerit,
uti apud eundem legitur; adglutinat se cor-
dis basi, immo, quod etiam vidimus, cono
seu cuspidi, quin & in ipsis cordis thalamis
adiposa frustula oblonga lumbricorum instar
vidit Bartholinus, qui & alibi ex Spigelio,
Riolano Jessenioque adnotavit, totum cor
nonnunquam adipe plane fuisse occultatum,
ita ut illud adstantibus deficere visum fuerit.
De polypo infra dicam; de omento supra
jam dictum fuit. Ipse præterea muliebre vidi
ovarium, pingui substantia seivique æmula tur-
gidum. Alia jam non attingo, quæ medico-
rum

H. A. C.
II. 15.

H. A. C.
v. 7.

(bb) Scrupulum enim injiciunt exempla a Foresto
atque Riolano allegata, quæ citat Bartholinus A-

Morb.
Chron. L.
V. c. xi.

rum observationes larga quasi manu suppe-
ditant. Nisi igitur aut per diætā tenuem
& parcam, aut motus & exercitationes cre-
briores, vigilias, aut opportuna Venere, de
quibus præter Hippocratem (cc) Plutarchum
aliosque eleganter Cælius Aurelianus, ut re-
centiores, (ex quibus supra aliquos allegavi)
taceam, huic hosti sensim vires acquirenti
obviam eatur, eique illis, quos dixi, modis
remora injiciatur, quominus majorem excres-
cat in molem, quam machina ferre potest
corporea, i. e. *ultra naturæ modum*, ut Cælius
loquitur modo allegatus; vita sane morta-
lium in novaculæ, ut ajunt, posita est acie.
Dum enim grave pinguedinis pondus venas,
arterias, nervosque una cum musculis insi-
gniter comprimit, & spirituum in nervos in-
fluxus sufflaminatur, & circulus purpurei li-
quoris retardatur, & musculi tono suo pri-
vantur, inde repentini & atrocissimi morbi &
inexorabiles mortes, scilicet paralyxis, apople-
xia, dyspnœa, asthma, carus, coma, &c.
In sequiori sexu potissimum in pinguedinem
prono *δυστονία*, immo & sæpe *ἀτενία* teste Hip-
pocrate Lib. de Sterilibus de Aëre, aquis & Lo-
cis & alibi. Simili quoque modo in ipso nobiliori
sexu *τενυτοσίαν* nimia impedit pinguedo, ut
adferunt Avicenna, Laurentius, Ettmullerus,
contradicente licet Timæo a Guldenkleee. Huc
etiam refero protuberantias illas monstrosas,
quæ externe propendentes mortales adeo de-
formant, v. g. melicerides, atheromata, steo-
tomata, fungos, & id genus alias, ubi seba-
cea quædam inest substantia. Insigne steato-
ma a se feliciter abscissum insignis exhibet
Pechlinus in observationibus. Nec reticendus
hic est Polypus sic dictus cordis, qui in ve-

L.III.46.
adde Bar-
thol. H.A.
C.1.2.3.

(cc) Hic in Libro de diætā salubri concise pro more,
at nervose regulas præscribit, quibus rite observa-
tis pingue corpus iterum redigi potest in gracile.
Verba latine hic adscribam, ne nimia græca nau-
seam pariant lectoribus: *Pingues, inquit, & qui
graciles fieri volunt, omnes labores jejuni facere de-
bent, & cibos assumere anhelantes adhuc ex fatiga-
tione, & vinum bibere dilutum nec valde frigidum,
& obsonia ex sesamis aut condimentis hortensibus*

nas atque arterias suos lethiferos ramos spar-
git, ut iconem repræsentat sæpius laudatus
Bartholinus. Is enim ad plurimorum men-
tem ex gelatinosa quadam & pingui sangui-
nis substantia ortum ducit, quibus merito ac-
cedimus, licet celeberrimo aliud sciamus vi-
sum Malpighio, illud coagulum substantiæ, si
qua natura est (dd) sanguinis filamentosæ
ac fibrosæ adscribenti. Nec illos moramur,
qui nunc ex pituita, nunc ex crudo quodam
humore a jecore cordi suppeditato polypos
oriri crediderunt, ab aliis quippe & ipso etiam
Malpighio refutatos.

H. A. C.
III. 17.

Diff. de
Cordis
Polypo.

§. XIV.

Sed hæc ferè sunt, quæ de pinguedine
tanquam parte corporis superflua & non na-
turali in medium adferre libuit, imo per
angustos dissertationis, quibus includimur,
cancellos licuit. Longe plura, non nego,
poterant dici; quædam etiam, quæ dicta
sunt, uberius illustrari & explicari, nam pin-
guis aderat, ut ita loquar, materia, cum de
Nutritione, tum de Nutrimento ipso, de quo
tot olim & nunc quoque lites. Interim ta-
men non spero, vel in hisce pagellis jure
mihi a quopiam, occini posse illud Virgilia-
num:

*Eheu! quam pingui macer est (tibi) tau-
rus in arvo.*

Lectorem autem, quem supra jam alloquutus
sum, item & Auditorem meum, quem jam
alloquor, VALERE jubeo, mihiq; ubi pin-
guis aliquanto meum fuerit ingenium, ut
ignoscant, rogo.

*hujusque generis aliis sibi præparare. Sini autem pin-
guia, quæ offeruntur obsonia; sic enim impleri po-
terit a quam paucissimis. Sed & semel in die cibum
sumere & illotos manere & strata dura habere &
nudos deambulare ipsos oportet, quantum hujus fieri
potest maxime.*

(dd) Legi potest celeberr. Bohnii Progymn. XIII.
p. 169.

OPUSCULA THERAPEUTICA.

DISSERTATIO MEDICA

DE

MEDENDI METHODO
VARIA PRO CLIMATUM DIVERSITATE.

Primum edita Anno 1734.

P R O O E M I U M.



DIFFERRE pro natura locorum genera medicinæ, ut aliud opus sit Romæ, aliud in Ægypto, aliud in Gallia, jam antiqua est observatio, & a CORN. CELSO relata, tamquam telum quod empiricæ sectæ addicti in illos, qui rationalem artem profitebantur, olim emisserunt. Accipimus illud assertum verissimumque judicamus, sed empiricis neutiquam concedimus, quod in eo quicquam sit, quo damnari studium rationibus requirendis impensum queat. Tantum enim abest ut hæc assertio, experientiae solidæ conformis, ad empiriam vitiosam ducere possit ac debeat: ut potius quam maxime excitare erectam mentem rationalis Medici valeat, ad quærendas & investigandas hujus diversitatis rationes verosque gradus: quo iis inventis regulam certam sibi comparet, qua actiones suas metiatur, discatque ab uno, quod ad omnia similia transferat, neque opus habeat per longam experimentorum seriem, decumbentiumque pericula demum invenire quid in hoc vel illo casu agendum sit, quo progredi liceat, infra quem gradum subsistere oporteat, ultra quem provehi nefas sit. Neque solum Medicum ad praxin apud decumbentes instituendam præparat hæc meditatio, verum etiam judicium maxime informat & dirigit in lectione omnis generis auctorum, qui de medicina aliquid litterarum monumentis consignaverunt. Nam quum legendi sint qui in Ægypto, immo apud Indos orientales, experti ea fuerant, quæ in libris docent; quumque Græci, Afri, Itali, Hispani, Galli, Helvetii, Germani, Belgæ, Britanni, Dani, Sueci, Hungari, Transylvani de medicina scripserint: quum medicamenta ex omni tam veteribus cognito orbe, quam ante pauca sæcula reperitis terris, Europæ invec̃ta commendentur, afferanturque testimonia effectuum, quos suis quæque locis natalibus, & inter homines ibi degentes, ediderunt: quis non videt, quam multum tam in historia morborum, quam medicinarum ad tales morbos expertarum viribus agendique modis perpendendum sit, ante quam pro certo corporibus morbo aliquo tentatis. Equidem ita existimo, sicque mentem induxi meam, non alimenta solum aut medicamenta, & utrisque inditas a natura vires agendi, spectandas esse, sed naturam omnesque conditiones illius individui, quod hoc

hoc aut illo alimento vel medicamento utitur. Quod si itaque diversis corporum viribus præditi uno eodemque utantur, non posse eundem aut per omnia similem effectum expectari & consequi tam plane persuasum habeo, quam certum est, unam eandemque clavem non omnibus seris recludendis quadrare & sufficere, eam autem referare posse, cujus interior structura talis est, ut ad removendum vectem adire viresque ejus superare queat. Existimavi autem dignum esse hoc thema, quod ad considerationem revocetur, & in quo expendendo ingenii vires, quas modicas esse sentio, periclitarer. Enimvero aggressus illius scrutinium, tam multa mox inveniebam, quæ me deterrebant a proposito, ut omnino illud abjecissem, nisi Illustris Dom. PRÆSIDIS, patroni ac præceptoris mei æratem venerandi, auctoritas & adhortatio animum adjecisset, ut a lectoris benevoli æquitate veniam mihi promitterem, si ipsum certiozem reddidissem itineris in remotam urbem suscipiendi necessitatem, celerius quam speraveram mihi impositam, effecisse, ut minus, quam voluissem, indulgere tam jucundo quam utili scrutinio potuerim. Fretus itaque humanitate & benevolentia æqui lectoris, amplissimo huic pelago me committo, Deum precatus, ut navigationem secundam velit tribuere.

§. I.

Climatis nomine a Geographis Græcis designatur tractus cœli, aut spatium duobus parallelis inclusum, sub quo diei longitudo ad dimidiam horam variatur. Scilicet ab æquatore ad utrumque polum excurrentia spatia dimensi, circulis parallelis signaverunt in tabulis geographicis illos tractus, quibus ipso solstitii æstivi die longitudo ejus triginta minutorum spatio distat a proximo climate. Tales itaque circulos, æquatori parallelos, antiqui doctrinæ causa invenerunt, notarunt, deque eis multa disputaverunt: nec recentiores Geographi in suis tabulis eosdem omittunt: etsi revera eorum minor hodie, quam olim, usus est, quum nemo satis accurate se loqui de situ alicujus loci existimet, nisi elevationem poli sollicitè annotet. Plura de his cupientem merito dimittimus ad geographiæ, præsertim veteris, auctores, inter quos eminet Academiæ hujus magnum quondam decus, b. CHRISTOPH. CELLARIUS, qui veteris orbis climata ex mente Strabonis singulari tabula exhibet conspicienda. Vi vocis denotat *inclinationem*, seu *declinationem*, scilicet ab æquatore ad alterutrum polum.

§. II.

Enimvero Medici, quando de climatibus loquuntur, non tantopere rationem habent longitudinis vel brevitatis dierum, quam illius, quæ pro climatibus etiam differt, discrepantiæ ratione caloris & frigoris, interque hæc ambo vicissitudinis: porroque in omni ex terra & supra terram talem nascente, sive vegetabili sive animali corpore, obvenientes proprietates attendunt, quibus plerumque conveniunt sub eodem climate nata & educata, ab illis vero, quæ diversus terrarum tractus protulit & educavit, notabili discrimine distare cognoscuntur. Huc referunt animi inclinationes & mores gentium sub tali cœli tractu degentium, illorumque victum, habitationem, vitæ genus, exercitia, otium, oblectationes, dispositiones ad morbos, & quæ sunt alia; quæ, si recte attendatur, ad causas naturales isti tractui proprias & indigenas, manifestam relationem habent, ipsisque arcto nexu implicantur. Atque sane necessarium existimo simul spectare quid terræ cælique natura ferat, & quid vitæ genus & victus ratio vel addat vel mutet, quidque educatio in gentibus efficiat, publicæque leges coerçant aut producant. Manifesto documento esse possunt Græciæ hodierni incolæ, quorum, qui hodie priscas Athe-
Frid. Hoffmanni Oper. Supplem. II.

nas vel Lacedæmonem aut Thebas obtinent, litterarum & artium antiqua laude jam pridem carent: quod educationis vitio tribuas: sed & minus frequenter podagra vexantur, quod antiquis & mediæ ævi gentibus familiare erat morbi genus, postquam, cum reliqua abundantia rerum ad victum pertinentium subtracta, vini etiam cultura pluribus locis sublata est, & ab eo, quicumque Muhammedis impietatem sectantur, legibus omnino prohibentur.

§. III.

Medici igitur climatum diversitatem in præscribenda tam diætæ ratione quam pharmacia respicientes, considerant primo quidem aeris temperiem, quæ omnia ibi nascentia corpora non potest non pro sua ratione disponere: deinde eorum, quæ in quotidiano victu adhibentur, inque illis terris nata sunt, conditiones & indolem; quum certum sit, vel fructuum horarum ac vinorum exemplo, quam diversa ista diversis locis proveniant: tum quo modo se gerere in talibus assumendis plerique soleant, utrum temperanter & moderate iis utantur, an intemperanter, copiose & sine certo modo certave lege fruuntur. Denique videndum est, quo se pacto uni vel alteri excessivæ qualitati suæ regionis perferendæ aut vincendæ comparent, & quænam hinc nova & singularis corporum conditio enascatur: tandem non omittendum est, si quid ex religionis aut aliarum legum præscripto perpetuum & firmum perque consuetudinem in alteram naturam mutatum populo alicui aut inhæret aut ita incumbit, ut discedere hinc nullo pacto liceat. Quæ singula si quis in climatis ejusdam incolis probè explorata & perspecta habuerit, poterit facile alius climatis, præsertim paulo remotioris, diversas rationes cognoscere ac dijudicare quid conveniat, quid, quantumque discrepet, ubi addere medicamentis aut detrahere deceat, quæ methodus curandi magis vel minus quadret, aut prorsus fugienda & abjicienda sit. Sed hæc singulatim deinceps considerare & exemplis illustrare aggrediar.

§. IV.

Differentia illa, quam positus ad æquatorem propinquior vel remotior efficit, clarissime cognoscitur, si intueamur clima aliquod calidius & cum boreali frigidior conferamus, omniumque ibi nascentium indolem ac proprietates inter se comparemus. Factum id est præclaro studio ab Illustri D. PRÆSIDE in differt. *de temperamento fundamento morum & mor-*
borum

borum in gentibus: quo magis nobis licebit brevitati studere & rem in pauca contrahere. Igitur qui terras calidiores, Ægyptum puta, Arabiam, Africam & Asiæ longe maximam partem, inde ab elevatione graduum triginta & quinque cis & ultra æquatorem inhabitant, aerë plerumque circumfunduntur æstuoso & tam parum a frigore vexantur, ut sint inter illos homines integræ nationes, quæ ne nomen quidem norunt, quo glaciem exprimant, tantum abest ut sibi imaginari possint, qui fiat ut in septentrionalibus terris flumina frigore condensentur, totaque maria glacie consternantur, ut magna pondera super illa transvehi, integrique exercitus transferri possint. Atque hæ terræ abundant ferocissimis animalibus, leonibus, tigris, serpentibus & draconibus venenatis plurimis ac nocentissimis. Vegetabilia ibi proveniunt plurima varii generis, oleis ac resinis acerbis sulphureis foeta, fructus odorem & saporem maxime afficientes, ut dulcissimi dactyli, ficus, ananassæ, pinangæ, longeque plura alia, sed & amarissima aloë & nuces vomicæ, similiaque complura. Verbo dicam, quicquid ibi provenit, in suo genere maximam virium intensiorem possidet, & plerumque, nostrorum corporum intuitu, excessum aliquem supra blandam alimenti temperiem possidet, ut ad medicamentosorum classem & censum referri debeant.

§. V.

Etiam hoc observatum est in istis valde calidis regionibus, quod raræ sint densa atque simul ædificiis parandis idonea ligna præbentes silvæ, usque adeo ut & pro ignis necessario pabulo deficient: tantum abest, ut magnis ædificiis exstruendis classibusque ædificandis suppetant aut sufficiant. Quæ proceritatem densitatemque accipiunt, satis plerumque tarde adolescunt, aut saltem longe tardius, quam nostræ abietes, pini, ulmi, quercus, quibus regiones septentrionales copiosis & optimis abundant. Atque toti huic animalium ac vegetabilium indoli respondent incolarum corpora. Et quamquam difficile est de omnibus in tanto terrarum spatio aliquid æque perpetuum & firmum pronunciare: de plerisque tamen certum est, quod corpora sicciora calidioraque, minus decora & procera nacti sint, ad militiæ labores minus apta, animosque feroces, iracundiæ præcipiti obnoxios, plerumque malitiosos, perfidos, & nisi metu & inopia coerceantur, rerum novarum cupidos. Morbis quoque obnoxii sunt vehementissimis, ut cholera, febribus acutissimis, pestilentialibus, quæ vix unquam ad Europam, nisi ex calidissimis illis regionibus translata, perveniunt, spasmodicis truculentissimis & celeriter jugulantibus, apud nos, DEI beneficio, inauditis; deinde siccitatis magnæ effectibus, lepræ pessimi generis, lippitudini difficillime curabili, & similibus.

§. VI.

Ferunt hæ gentes facillime calidiores medicinas, aromata acriora, quin ad opiata etiam ac narcotica & expansiva longè magis idonea corpora habent, quam aliæ quæcunque nationes, unde incredibilem varietatem & copiam habent talium expavere, cannabi, datura, hyosciamis, aliisque nobis vix suis nominibus bene cognitis, concinnata, quæ cum ambra & moscho copiosè, & tantum non quotidie adhibent, satisque facile perferunt. Ad quam facilem patientiam fortè etiam consuetudo aliquid facit: sed me non magnoperè peccatum confisus sum, si ipsorum corporum naturæ tam faci-

lem tolerantiam tribuerem: præsertim quum vero simile sit à parentibus ad natos aliquam dispositionem ferendis illis idoneam transferri posse & solere; ut in pluribus ostendi posset, si hic locus permitteret.

§. VII.

Si consideramus effectum caloris corpus perpetuò ambientis, ille quidem habitum externum densat & constringit, præcipuè in illis, qui vel omnino nudi vel levissimè tantum tecti incedunt; ut solent in istis terris plurimi, saltem infantes ac pueri, & puellæ, qui sine vestibus plerumque incedunt, aut circa mediam corporis regionem levi tantum linteolo cincti. Calidus autem aer & siccus nudo corpori aut semper aut plurimo tempore circumdatus, illud stringit, porosque angustat, ut non nisi tenuissimis halitibus emittendis pateant, sudorem autem vix extrudant: quæ observatio ab omnibus Europæis nostris confirmatur, qui mirantur subinde bajulos suos per calidissimas arenas incedentes, totoque corpore, quando requiescere licet, super eis decumbentes aut sedentes, absque eo ut guttulam sudoris effundant, dum ille Europæus in sua lectica pensili velata, & umbraculo magno tecta, tantum non diffluit & colliquatur sudoribus. Patet igitur hominum, addo aliorum animalium in istis regionibus, corpora densiorem magisque strictam habere cutem: quod forte etiam discas ex Æthiopum crispo ac lanæ instar tenui ac tenero capillo, per angustissimos cutis poros sic propullulante.

§. VIII.

Cutis densior minusque patulis poris prædita minorem permittit fieri distensionem, quam cutis rarior magisque pervia. Ex eo quidem fructus is accidit, ut humiditas minus diffletur, viresque minus cito deficient; quod multum sudantibus usu venit: sed & magis acervantur interius halituosæ particulæ sulphureæ salinæ, illæque crebriori celeriorique circuitu in corpore exaltantur, acrioresque fiunt. Hinc fit, ut amplior materia adsit biliosa, quæ humoribus continuo interversans, quando calor ambiens eos expandit, vasorum, quibus continentur, latera distendit & ampliora reddit: quod quum a teneris annis fiat, temperamenta nanciscuntur cholericæ & melancholicæ, vasis amplis, non valde multis, prædita, minusque in tenues ductulos & plexus divisa: unde porro accidit, ut cor atque fibræ reliquæ solidarum partium firmiores densioresque impulsu suo sanguinem etiam expansum & turgentem per calorem externum & assumpta vaporosa expansiva, facillime propellant, minusque molestiarum illis inducant, quam aliis corporibus, nec ita ab ætate tenera dispositis, nec longa consuetudine in eodem habitu confirmatis. Quod si vero per multarum procatarcticarum causarum vitia morbofi tales fiant, minime mirum est, obvenire impetuosissimas evacuationes cholicas, motuum diras perversiones spasmodicas, aut externum habitum vel celerrime inflari vel foedis ulcerationibus obsideri: quum halituosarum acriumque particularum congeries magna continuo adsit, quæ turgens & ad ventriculum intestinave effusa evacuationem sibi ipsa sua acrimonia quærit: aut detenta & nervosis partibus incumbens ad anomalos motus eas exstimulat, irritat, aut ad cutim decumbens & propulsa, crassior forte & tenacior reddita, per tenuissimos meatus difficillime expellitur, adeoque arrodendo & erodendo ulcera inducit.

§. IX.

§. IX.

Non omnia licet accuratissime exsequi, aut con-
fectaria prono alveo hinc fluentia adducere: puto
tamen multarum curationum a Græcis & Arabibus
potissimum adamatarum, aut ab Indis acceptarum,
rationes hinc posse colligi. Illud seorsim intelli-
gimus, cur in omni cholera potissimum adhibuerint
tamarindorum infusum; aliaque acidula; & cur in
genere omnes fere curationes per decocta, infusa;
syrupos; julepos aliaque id genus instituerint. Ma-
nifestum enim est; & fibras talium hominum soli-
das opus habuisse humectantibus; & fluida indigui-
se diluentibus; quæ & spissitudinem emendarent &
salia acia humorum infringerent. Eandem puto ra-
tionem esse, cur Indi, quantum ex tot virorum re-
lationibus de suis itineribus constat; nullum frequen-
tius norint & ament medicamenti genus, quam po-
tiones; quibus suos pastillos, pulveres & quæcun-
que alia habent, diluta offerunt: nostro autem mo-
do paratæ cum spiritu vini essentia; tincturæque
plane illorum corpora lædant; prorsus ut ipsi Euro-
pæi ad eos delati in plerisque curandi methodum il-
lorum imitentur, eandemque felicissimam experian-
tur: quin plerique libentius se Medico Indo quam
Europæo curandos permittant. Quod vero apud
modo dictas gentes, calidissimum clima incolentes;
videmus, idem plane in comparate quidem minus
calidis istis Europæ partibus, ut Italia & Hispania;
magnaue parte Gallia; observamus, scilicet quod
nulla ipsis curatio magis conducatur, quam veteri Ga-
lenicæ simillima, per decocta; ptisanas, julepos,
syrupos, serum lactis & fontes medicatos, itemque
oleum amygdalarum; mannâ, tamarindos: prorsus
ut absorbentia terrea minus, quam nostrates fe-
rant: mercurialia autem difficillime tolerant, & a
purgantibus plerisque abhorreant, essentias vero &
tincturas nostras tam multas vel ignorent, vel ad-
spernentur, tamquam ipsis vere supervacuas, si non
etiam noxias.

§. X.

Jam vero ut contraria juxta se posita magis con-
spiciam sistant differentiam, paucis etiam intuebi-
mur sub climate septentrionali degere adfuetum ho-
minem. Circumdatur magna anni parte aere inten-
se frigido; a quo fluvii rapidi glacie constringuntur,
& stagna, quin maria integra, congelantur. Hunc,
etsi non nudus toto corpore; satis aliquando diu
perfert, & per os ac nares ad pulmones suos de-
mittit. Deinde ubi ad domum quisque suam perve-
nit, calefacta & sæpe æstuantia conclavia intrat;
ibique subsistit, noctu lectis molli pluma suffarctis
tectus decumbit, & sæpe totus sub iis sudat; dum
interim in frigido conclavi aerem frigidissimum facie
perfert & intro admittit. Quando æstas redit; lon-
gissimi dies solis radios continuo præbent; & satis
plerumque intensos calores faciunt, ut breves, quæ
succedunt, noctes vix exstinguere calorem interdiu
accensum valeant. Et quamquam calor non tantus
est, qui corpora torreat & exsiccet; satis tamen no-
tabiliter ea exhaurit, inducta sudandi necessitate:
quippe septentrionales homines ad sudorem magis
quam austro propinqui; sunt dispositi.

§. XI.

Recte æstimando rem, illam diversitatem debere
videntur perpetuæ per totam hyemem, quæ anni
longior pars est, vicissitudini frigoris & caloris. Fri-
gus enim corpora densat & humores a superficie
intus ad centrum compellit & detinet: calor autem

rediens ad superficiem eosdem invitat & revocat.
Quoniam autem, quantum quisque valet; munire
se vestibus adversus frigora adfuevit, raro magnam
ejus vim perentiscit, nisi quando in frigido loco
diutius quiete stare vel sedere necesse est, ut calor;
quem motus corporis conciliat; supprimatur; sicque
frigori; motu rectilineari undiquaque impressionem
facienti, cedere humores cogantur, & in partibus
interioribus detineantur. Quam verò primum ad
motum redire homini licet; ille, propulsis ad super-
ficiem humoribus; calorem refert; porosque cutis
vestimentis tectæ facile iterum recludit: prorsus ut
homo septentrionalem plagam habitans; sub labore
& motu, quem hiberno tempore perfert; si non
magis, æque tamen multum transpirando & exha-
lando consumat humorum; quam æstivo tempore so-
let dissipare.

§. XII.

Hæc vicissitudo toties modo constrictæ per frigus
superficie, modo per calorem reclusæ, facit in no-
stris corporibus singularem quandam dispositionem;
ipsa tam crebra alternatione inductam & habitualementem
nobis redditam. Scilicet quum toties intendatur
transpiratio ad sudorem usque, necesse est toties val-
de repleri vasorum per pinguedinem ad cutis textu-
ram excurrentium extremas & minimas ramificatio-
nes: quando vero eadem a frigore constringuntur;
progressum humorum ad extrema vasorum plus mi-
nuve impediri, pro eo scilicet ac frigus magis vel
minus profunde constrinxit. Primus utique gradus
& frequentissimus est ad simplicem cuticulæ constri-
ctionem & exhalationis suppressionem. Quò factò
in proximo subsistentes, jamque ad exhalandum pa-
rati vapores detinentur: quos, quum sint impene-
trabiles, in aliquo spatio ultimi tubuli excretorii sub-
sistere necesse est; & ab eo spatio, ubi subsistunt;
excludere progressurum sive sanguinem; sive serum.
Id quum in tubulis indefinite multis simul accidat;
atque a calente sanguine continuo plures vapores;
ipsum sanguinem; quo leviores sunt; præcurrentes;
accedere necesse sit: fieri tandem non potest, quin
vapores isti irrumpant in arteriolas lymphaticas; quæ
per membranaceum genus potissimum excurrunt;
easque ampliores reddant. Ex quo intelligi potest;
cur sub frigidiori cælo habitantes plerique corporis
habitu laxiore præditi sint, longeque plures incolæ;
in quibus cetera conspirant; cum vasto corpore etiam
arvinæ & pinguedinis multum colligant; quam in
calidioribus regionibus. Indidemque colligere pos-
sumus; cur in illis; qui impuris succis turgent; scor-
buticæ dictæ impuritates partes lymphæ multa irriga-
tas potissimum occupent, ibique se variis molestiis
& plerumque vagis doloribus prodant; omninoque
pertinaciter inhæreant; quod septentrionalibus æque
familiare est; ac australioribus accidere solent spas-
modici convulsivi iidemque acutissimi affectus; &
febres malignæ acutissimæ.

§. XIII.

Quemadmodum vero laxiora corpora & humidio-
ra, minusque rigidas fibras nacti sunt, humoresque;
dum frigori non sunt expositi, plerumque copiose
exhalant; adeoque salinas valde acres & activas im-
puritates raro colligunt; sic humectantibus; & di-
luentibus non tantopere indigent, neque illa tam be-
ne ferunt; ac australiores, sed melius tractantur
diapnoicis & diaphoreticis fixis, absorbentibus. Pur-
gantia quoque satis acia longe facilius patiuntur; &
ab iis minus commoventur, quam magis calido &
sicco cælo attemperati. Testem hujus rei habeo il-

lustrem quondam archiatrum Wurtembergicum D. ROSINUM LENTILIUM, qui *miscell. medico-pr. tom. I. p. 214.* exponit de Curlandorum ad medicinas fortiores habitudine, testaturque a se datas pilulas hujusmodi; Rec. Gummi sagapeni aceto soluti & inspissati, dr. dimidiam; resinæ jalappæ scrup. 1. magisterii gummi guttæ, gr. X. olei baccarum juniperi, gtt. II. Misce, fiant pilulæ pro una dosi. Præmiserat pulveres digestivos, & nihilo minus tamen adeo parum efficiebat hoc cuneo, ut enemate opus esset ad operationem promovendam, quo facto ultra quaternas dejectiones non consequebantur. Plura exempla etiam de medicamentorum diaphoreticorum, diureticorumque magna & potenti dosi, si ex Germaniæ superioris usu rem judices, mediocri tamen apud Curlandos effectu, idem vir doctissimus proponit: quæ loco indicato possunt evolvi.

§. XIV.

Progredimur ad alterum, quod spectari a Medicis diximus, quando climata diversa medendi methodum differentem exposcere docent: scilicet ad considerandum ea, quibus apud se natis vitam sustentent diversarum regionum incolæ. Terræ autem proventus variam sortiri differentiam, quoad vires majores, vel minores, docere possunt varia vegetabilia, quæ in regionibus diversis non eodem modo perficiuntur. Quid notius est immensa illa vinorum diversitate, quæ ab eadem vite proveniunt: aut quis ignorat aliqua non sua in patria fructus omnino nullos proferre, aut succos certos & lacrymas non fundere, ut patet in larice, itemque fraxino & orno, a quibus apud nos resinam terebinthinæ succedaneam aut mannam non colligimus, etsi arbores ipsæ succrescunt & perdurant. Ex quo judicare etiam de aliis licet, quamquam in singulis non adeo manifeste conspicitur. Nolumus autem minima conscriptari, sed ea quæ maximam diversitatem sistunt, potissimum expendemus.

§. XV.

Sic populi Germaniæ inferioris, & qui ulterius circa mare Balthicum degunt, plurimum victitant carnibus salitis & fumo induratis, piscibus quoque salitis vel exsiccatis, cum brassica tam rubra, quam capitata, eaque recenti & muria condita; addunt radices raparum, dauci, pastinacæ; sunt etiam in honore pisa & fabæ, subjungunt caseum & butyrum, pastasque farinaceas & opus pistorium ex farina, lacte, ovis. Potu tantum non omnes utuntur cerevisia, vel ex hordeo cum multo lupulo cocta, vel ex tritico, parum lupulata, utraque tamen nutriendo valde idonea. Subjungunt his multum spiritus destillando ex frumentis elicitos: quanquam in eo adhibendo aliqui satis moderate se gerunt; alii vero longe copiosius eum ingurgitant. Sed Galli, Italique in multis diversum sequuntur victum; quippe fumo induratis & salitis vel prorsus non utuntur vel rarissime, carnibus piscibusque magis delectantur recentibus, & juniorum animalium; jusculis autem delectantur consummatis, oleribusque tenerioribus: sitim aqua & vino restringunt: butyro in mensa vix utuntur, sed oleo. Æstu urgente potus quarunt refrigerantes, ex vino aqua distemperato, addito citri aut limoniorum succo, decocto hordei, emulsionibus.

§. XVI.

Apparet facile quantum diversitatis insit expositis victuum generibus. Quanquam enim Germani,

Sueci, Dani, ceterique eodem modo victitantes, quia talibus adsueverunt, & ventriculos calidiores, menstruaque talibus vincendis apta possident, non facile ab illis læduntur, & modo labor accedat, satis salubriter cum tali diætâ degunt; succos tamen inde provenire crassiores, graviore, minusque mobiles, necesse est: identidemque remanere aliquid falsi aut acris verosimile fit, quoniam scorbutica humorum dyscrasia hos homines, præter cæteros, facile occupat, inque iis confirmatur, præsertim ubi a consuetis laboribus cessare, ingratoque otio marcere contingit, quod accidit sæpe præsidiariis castellorum militibus, aut classiariis per maria vagantibus, insuperque aere humido frigido circumfusis. Quibus, inquam, tales causæ non adsunt, hi plerumque satis salubriter degunt, minimeque febribus acutis malignis corripuntur: utique comparate loquendo. Nam pestilenciales & malignæ exanthematicæ febres calidioribus terris frequentissimæ, rarius istis corporibus inolescunt, quin si contagione eo delatæ fuerint, longe mitiorem genium ostendunt, modo non exacerbentur regimine aut medicinis incongruis.

§. XVII.

Sed ob sanguinem gravem, solidisque & gelatinosis partibus abundantem, inclinant ad morbos exstasi humorum subortos, inflammatorios, ut pleuritidem & peripneumoniam, aliosque similes, quibus plerumque venæsectione tempestiva opus est, non tam ob illam rationem, quæ in regionibus calidioribus allegatur, ut sanguinis orgasmus minuatur, & contemperetur; quam potius ut graviore spissiori-que motus promptior ac velocior pareatur, si abundantia imminuta contractioni arteriarum majus spatium præbeatur. Plerique etiam morbi chronici tales sunt, qui ex spissitudine difficilius mobilis sanguinis sensim subnascuntur, & a quotidiano victu e longinquo traxerunt originem, ut rheumatismi, arthritides, hydropes, phthisis, scorbutus. Singulare est, quod plures annotaverunt, chronicos fere omnes morbos ibi, si mature adhibeas, mercurialibus facile sublevari: quod sine dubio hinc est, quia sanguis spissus organis secretoriis & præcipue lymphæ viis, noxas transmittit, unde constipantur: quibus si virtute mercurialium resolvente & aperitiva occursum fuit, cetera facillime superari possunt.

§. XVIII.

Septentrionalium populorum plerisque spirituosum potum ex frumentis destillando paratum in quotidiano usu, aliquibus etiam excessivo abusu esse notissimum est. Sequitur hinc, ut medicinæ hoc menstruo paratæ his populis, utpote familiares ipsorum naturæ, maxime quadrent. Atque hoc ipsa res docet & consideratio praxeos medicæ per Europam. Nullibi enim frequentius, quam in Germania illæ essentia & tincturæ reperiuntur, quo magis hinc ad septentriones excurris, eo magis sunt frequentes, faciliusque tolerantur, sic ut dari integræ drachmæ possint & debeant, ubi in Germania superiori aut media guttæ forte viginti aut triginta satis faciunt. Etiam cerevisiæ medicatæ, quibus præ aliis nationibus Angli frequentius utuntur, operæ ibidem faciunt pretium, & plerisque melius quam infusa & decocta aquosa, aut serum lactis, conveniunt. Enimvero hæc omnia de iis potissimum valent, qui in illis terris victu, quo populus utitur contenti sunt: nam qui exquisitius victitant, utunturque illis, quæ ad diætam aliarum gentium propiora sunt, vinisque etiam ex variis locis subjectis quotidie utuntur, eos par est humores assumtis magis similes nancisci.

§. XIX.

§. XIX.

Pergimus ad alia, quæ efficiunt, ut Medicus in faciendis operibus artis distinguere climata & nationes debeat. Sunt scilicet populi qui moderate & satis temperanter certis vel alimentis vel alio nomine appellandis vitæ sanitatisque conservandæ subsidiis utuntur: sunt vero, qui iisdem intemperanter immodiceque semet addixerunt. De quibus ita discrete ferendum est iudicium, ne quod in una observatum est inde incommodum, rei tribuamus, sed abusu: rursusque quod ab abusu venit, ne climati imputemus, aut aliis causis non causis adscribamus. Sic in Germania multi intemperanter utuntur potibus calidis Theæ & Coffee, eamque mentibus imbibere persuasionem, tunc demum præclare ab iis corpora juvari, si quam optime hinc sudaverimus. Persuasio hæc facit, ut non solum copiose bibant, sed calido conclavi inclusi, sæpe etiam vestimentis pellicea fultura præditis induti aut stragulis tecti. Quum tales videmus ad purpuraceas excretiones disponi, male argumentaremur, vel potum in se hoc efficere, vel clima, aut urbem, ubi multi peccata sua diætetica sic luunt, causam esse illius morbi, qui multis infestus evadit. Nam neque de Chinesibus, quibus Theam debemus, neque Arabibus, qui fructum, ex quo potus Coffe conficitur, transmittunt, purpura familiaris est, sed Europæis & inter hos potissimum Germanis quibusdam, qui ad reliquam suam in sudores proclivitatem immodicum & vitiosum usum adjiciunt. Longe nobis sapientiores sunt in hac parte aliæ gentes, quæ rarissime uno cyatho plures exsiccant, & ab illo more sudorem invitandi longissime distant.

§. XX.

Longius patet hic campus, quam ut emetiri illum liceat, aut libeat, quia gentium vitia notare odiosum est, plurimique monitoribus sese asperos præbent. Medico suggessisse sufficit, ne in curandis talium hominum morbis multum exspectet ab illis adversæ valetudinis præsidii, quæ in secunda fuerunt consumpta: sed nec pertinaciter illa deneget, quæ per longam consuetudinem altera natura facta sunt. Quis homini vinoso, si *ναυσοδόμαχος* factus fuerit, medico vini usu multum succurrere poterit; nisi hunc intelligas medicum usum, ut ab intemperantia ad modicum usum voces, quod in paucissimis licebit? Aut quis homini pulverum errhinorum creberrimo usui a multis annis adfucto, si catarrhalibus decubitus in tunica narium laboret, magnam utilitatem ab errhinis porro spondebit? sed quis abstinere ab iisdem omnino suadebit, nisi oleum & operam perdere sciens velit, postquam major pars Europæorum vivere sine hac narium titillatione nescit. Quicquid igitur, ut paucis multa complectar, de vini, spiritus vini & aquarum vitæ, de theæ & coffee, de aliorum similium laudibus, vel vitiosis qualitatibus, scriptum est a Medicis diversarum gentium, id omne puto semper intelligendum esse cum ea conditione, ut dijudicetur, quantum raro vel quotidiano usui, quidque abusu in his adscribendum sit.

§. XXI.

Respicendum etiam esse in diversorum terræ tractuum incolis ad varios modos, quibus se muniant adversus excessivas qualitates quasdam, patriæ suæ molestiam aut valetudini periculum afferentes, supra posuimus. Id quo pacto intelligamus, paucis indicandum est. Adversus frigora sese muniunt borealium regionum incolæ hypocaustis suis fornacibus in-

structis, quibus sæpe tantum calefaciunt conclavia ut pene æstuent. A magno frigore ad talia subito irruentes, præsertim jam senes, satis magnam hinc alterationem percipere opus est, ut mirum non sit, si apud scriptores legimus, multos quotannis apoplexia abreptos mori: magis autem mirandum sit, non quotidie casus tales occurrere. Tenuioris plebis casus, easque, quas sibi erigere milites ad fines præsidio muniendos collocati, debent, sine fornacibus, solo tantum foco calefieri debere, & luculento igne, legimus, cumque fumo exeundi sufficientia spiracula non dentur, saltem non satis apta: fumus insuper & hominum cum animalibus eodem loco inclusorum acervata effluvia, aerem talem reddunt humidum & calidum, fibras relaxantem, quo non parum faciunt vestimentorum a pluvia madefactorum, circa focum suspensorum, exhalationes multæ: unde talis casa balneo vaporoso, sed non optimis vaporibus referto, simillima redditur, cui inclusi fibras relaxatas & flaccidas nanciscuntur. Atque hæc superficiei corporis dispositio, una cum victu crassiore non optimo conjuncta, plebeios homines, maxime milites, scorbuto suscipiendo reddit idoneos: quod bene animadvertit Fautor meus plurimum honorandus D. D. NITZSCHIIUS in suis de scorbuto Wiburgensi observationibus *Commerc. litterar. Norimberg. Hebdom. XXI. hujus anni p. 162.* insertis. Seorsim autem hinc intelligitur, qui fiat ut inflationes œdematosæ, anasarcodes, asciticæ talibus locis frequentes sint: quum per cutim tantopere relaxatam, vappidi & acres vapores non erumpant, sed in cellulosa membranarum interstitia irrumpant ibique acerventur. Celebrissimus quondam Archiater Regis Poloniæ in sua *Warsovia physice illustrata* idem fere de Polonis mediterraneum tractum habitantibus observat, hincque inter alia valetudinis incommoda crebros catarrhos suffocativos derivat.

§. XXII.

Qui calidissima climata inhabitant, æstum aeris calidissimorum dierum vincunt fere eo, quod locis maxime umbrosis & inclusis latitant, aut lintribus aqua repletis abditi degunt & dormiunt: quo quidem nimiam suæ cutis siccitatem emendant & relaxant. Qui urbibus felicioribus utuntur, balnea habent publica, ut Ægyptii Cairum inhabitantes, quibus die jam inclinato jucunde & salubriter utuntur: in quo nihil est, quod non salutari consilio fieri intelligamus: nisi hoc unum hinc consequeretur, ut ingruente morbo populari contagioso, idem facillime ad plures propagetur, quando a morbo jam languentes, lassitudinem id existimantes, ad balneum cum aliis progressi, sui mali initia cum aliis communicant. Idemque modus est longe lateque propagandi malum venereum, mulierumque fluorem album, etiam non malignum. Atque ni fallor, hæc causa est, cur balneorum usus in Germania olim etiam frequentissimus, multis locis exspiravit, indiesque magis exspirat: utique quod ad publica balnea attinet. Potest ejus rei exemplum conspici in morbo, quo circa annum 1577. Brunna Moraviæ urbs celebris implebatur, magno incolarum incommodo & terrore: quem tunc variis causis, partim cæli influxionibus, satis certe e longinquo petitis, aliqui imputabant, quum tandem clarissimè intelligeretur ex unica balneatoris officina, quæ morbo gallico infectum susceperat, totam hanc calamitatem profluxisse in populum. Quis vero dubitet pluribus locis similia fieri, satisque injuste endemium aliquando factum aliquid tribui climati, quod causam in vitæ genere & conversatione fundatam habet.

§. XXIII.

§. XXIII.

Ad perfectius inspiciendas rationes omnes, quibus diversorum climatum incolæ ab incolis aliorum differunt, itemque unius ejusdemque regionis homines, religionibus & moribus distincti, a se invicem diversi evadunt, pertinent non pauca a legibus præscripta, vel ab usu tyranno inducta & constanter permanentia, ad quæ Medicus respicere debet, non solum in causis morborum indagandis, verum etiam in præscribenda & ordinanda therapia, sive ex diætæ legibus, sive ex apparatu pharmaceutico. Clarius dicam quo hæc tendant. In universa prope Europa & Asiæ bona parte Christianis permixti habitant Judæi: per omnem Asiam Christiani inter Muhammedanos aut gentili aliqua superstitione imbutos habitant. Inter ipsos Christianos dantur diversi cœtus, quorum aliqui nullis se adstringunt statis & lege aliqua canonica injunctis jejuniis: alii ea observant aliquando laxiora, ut tantum abstineant certis carnibus, piscibus tamen & ovis, ac lacticiiniis uti permissum sit; alio tempore, aliisque locis & regionibus, omni cibo, ab animata creatura profecto, interdictum sit, & tantum vegetabili liceat perfrui. Præter hæc dantur inter quasdam gentes a sola consuetudine pendentes, & ob politicas rationes toleratæ, hilaritates publicæ, ut bacchanalia, quibus in omne genus voluptatum, sæpe etiam libidinum, complures laxatis quasi habenis procurrunt, indeque in negotium vitæ ac sanitatis redundantia multa & varia reportant. Quæ singula non sine attentione observanda esse mihi videntur Medico, qui ex una regione in aliam medicinæ exercendæ causa proficiscitur.

§. XXIV.

Sic tempore quadragesimali prope instanti, quo abstinendum sibi a carnibus norunt, qui jejunium ex lege observare tenentur, quam plurimi comestationibus indulgent, ut quasi in antecessum se repleant, quo perdurare melius possint. Quando ex intemperantia ista gulæ in febres vernaes incidunt, male mihi videtur accusari aeris intemperies: quam si quis pro causa accipiat, & cruditates a voracitate negligat, a scopo rectæ curationis aberrare necessario debet. Sic eodem peccatur modo non dicam in temperantiæ Christianæ leges, sed in conservandæ

valetudinis regulas, quando jam superatis jejuniis diebus, per paschales ferias, ad comestationem reditur, nec solum carnes copiose assumuntur, verum etiam varia placentarum genera large devoranda familiæ tunc otiosæ præbentur. Nihil itaque mirum videri debet, si ab illo tempore febres intermittentes majori numero obveniunt Medicis: puto tamen, si res ad liquidum deducenda sit, minimam partem culpæ vere in temporis aut regionis vitio hære, maximam diætæ vitio, consuetudinis diuturnæ culpa quotannis repetito & repetendo,tribuendam esse.

§. XXV.

Severioris ac strictioris jejunii necessitas magis affligit pauperes, & in regione frigidiori viventes, quam feliciores & opum aliqua copia affluentes, & clima temperatius incolentes, in quo fructuum, qui adservari possunt, major est abundantia, & olerum maturior ex terra proventus, citius appropinquante vere. Etiam in hanc rem advoco asserti mei testimonium, quem supra laudavi, D. D. NITZSCHUM, qui, indicato superius loco, tenuissimum Russorum jejunii temporibus victum inter causas scorbuti militaris rectissime refert, quippe dum a carnibus, ovis, lacte, butyro arcentur, solo pane cum alliis, cepis, brassica muriatica, & cucumeribus victitare debent. Bene concinit cum hujus viri relatione aliud testimonium de ejusdem gentis jejuniis quod in eodem *Commerc. litter. A. 1733. hebdom. 35. pag. 274.* legitur: eundemque rigorem apud omnes Græcæ Ecclesiæ ritum sequentes, ut & Armenios, observari, multorum, qui itinerum descriptiones dederunt, testimoniis perspicuis cognoscitur.

§. XXVI.

Non parum valet ejusmodi consideratio in morborum veris causis indagandis. Enimvero ad indicationes therapeuticas non minus momentum afferre debet. Nam qui prægressa tali diætâ morbo corripuntur, malis certe rebus suis tractabuntur purgantibus aut sanguinis missionibus: quippe virium ratio omnino habenda consiliis istiusmodi intercedere debet. Possent plura similia adjici, sed nunc quidem temporis angusti limites necessitatem abrumpendi tandem sibi imponunt. Benevolum lectorem iterum rogo, velit brevius strictiusque dictis veniam impertiri, nostrisque conatibus favere.

DISSERTATIO PHYSICO-MEDICA

D E

NATURA MORBORUM
MEDICATRICE MECHANICA.*Primum edita anno 1699.*

P R O O E M I U M.



MODUM mihi semper placuit illorum institutum, qui omnibus præjudiciis mentisque anticipationibus exutis, libero animo solidoque judicio rerum naturalium veritatem scrutantur, & æquabili sine partium studio pensitatione veterum & recentiorum sententias invicem conferunt, illaque, quantum possibile, inter se conciliare & ad veritatis harmoniam reducere conantur. Fuerunt certe prisca Medicorum sapientissimi, e quorum monumentis multa utilia & salubria, præsertim, quæ ad exquisitam morbi historiam acquirendam vel prognosin prudenter instituendam spectant, abunde peti possunt. Equidem non negandum, ex temporis infelicitate ipsos non sufficienti experimentorum, circa rerum naturalium indolem pernoscendam, copia fuisse instructos, unde philosophandi accurata methodo caruerunt: nihilominus experientiam magnam atque mirabilem in praxi Medica passim in illorum scriptis deprehendere curiosius perscrutanti licet. Nostrarum itaque est partium, ut hoc tempore, quo philosophia naturalium rerum ad ingens fastigium ferme perducta est, a veteribus omissa supplere, defectus corrigere, illorumque observationes, monita atque notata circa morbos & illorum curationes in ordinem ac normam redigere, & ad solidum rationis calculum omnia revocare, quæ unica & principalis cura atque solertia nostra esse merito debet. Ita enim firmiora & majora incrementa sentiet atque experietur ars nostra saluberrima. Laborabo in præsentiarum secundum mentem ac ductum Excell. Dn. Præsidis, sapientissime quædam a Magno HIPPOCRATE & prudentissimis veterum practicis pronuntiata, circa naturam humanam, quatenus efficaciam medendi morbis habeat, paulo curatius evoluerè, examinare, atque qua poterimus evidentia explicare, & quidem secundum recentiorum doctrinam atque Philosophiam, ut mutua harmonia atque conciliatione facta, veritas apertissimis oculis conspiciatur. Divinum numen omnis veritatis fons gratiæ suæ radiis mentem nostram illustrabit, ut puram ac simplicem veritatem etiam in hoc instituto inveniamus, ac Deum celebremus.

§. I.

Non minus scite quam verissime magnum medicinæ nostræ oraculum passim in suis scriptis præsertim *lib. Epidem.* naturam morborum curatricem appellat. Secutus hunc est GALENUS, qui variis locis, præsertim in *lib. de arte medica cap. 87.* naturam opificem omnium, quæ in corpore fiunt, actionum salutat, quæ & sanitatem in nobis tueatur, & morbos pellat, quæ sibi vias inveniat, quibus id citra Medici opem sæpe numero perficere queat. Idem gravissimus auctor *Lib. I. de arte*, optima ratione affirmat, naturam suis viribus usam, quæ noxia sunt expellere, quæ autem utilia servare: Quin imo si veterum monumenta cum cura evolvimus,

ubivis ferme deprehendimus, naturam vocari providam & sapientissimam vitæ & sanitatis conservatricem, corporis nostri formatricem, quæ perpetuo operi insitens facultates cunctas ad actiones concitet, quæ nos conservet, custodiat & a morbis liberet. Observarunt nempe attento animo scientissimi illi mortaliū, in processu formationis humani corporis in ejus nutritione & actibus, qui ad vitam & sanitatem imo liberationem a morbis spectant, certos semper gradus, tempus determinatum, proportionem convenientem & ubique moventis cum mobili harmoniam quandam atque habitudinem accommodatam inveniri. Et cum deinceps multiplici experientia addiscerent, frequentissime ægrotantes sine ulla Medici opera, sine remediorum ope ac usu, cum morbo in gratiam rediisse, concluderunt inde, non

non sine ratione, subesse aliquod ens has actiones efficiens, ad certum destinatum & utilem finem ac scopum omnia regulans, accommodans, quod intelligentia ac sapientia instructum sit, & id vocant naturam. Ex quo postea confectum, Medicos nominatos fuisse Ministros naturæ qui nempe notitiam naturæ ejusque effectuum, virium atque operationum cognitionem accuratam tenere, & cum naturæ instituto legibus omnia consentanea efficere debeant. Quo circa quid veri gravissimis hisce veterum dictis subsit, quid natura, cui tanti effectus assignantur, proprie sit & per illam intelligatur, utique optimo jure meritoque requirit utile non minus quam curiosum scrutinium, quod in præsentia suscipere, quantum intellectus humani vires patiuntur, bono cum Deo apud animum constituimus.

§. II.

Primum omnium autem statim in limine monendum ducimus, nullum ferme in scholis philosophorum & Medicorum vocabulum exstare, quod tanta obscuritate, tantaque ambiguitate laboret, & quod tam plures & varias habeat significationes, quam nomen naturæ. Neutiquam autem par ac venia dignum mihi videtur, omnes hoc loco allegare receptas hujus vocabuli significationes, cum jam solidi ferme philosophorum libri hisce impleti sint. Hoc saltem nostrum in scopum omittere non debuimus, quod hic naturam Physicam & Medicam, quæ partim pro principio in corporibus activo, specialissimè autem in corpore humano pro principio illo agente & vitaliter omnes actiones dirigente ac moderante sumitur, intellectam velimus. Quodnam autem illud sit, & cujus naturæ ipsa natura physica & medica, à multis sæculis controversum est, quæ dissensio ad hodierna etiamnum tempora durat. Initium autem merito facere allubescit, quid in genere per naturam, quæ omnibus corporibus, dictis ab hac naturalibus, competit, & ipsorum existentiam, durationem, actionem atque operationem efficit, intelligatur. Ex veteribus, præsertim Stoicis, fuerunt, & nominatim SEXTUS EMPIRICUS & SENECA, qui corporum principium activum habuerunt, idem cum Deo pronunciantes: naturam nihil esse sine Deo, nec Deum sine natura, sed idem esse utrumque & totum hoc, quo contineamur, esse unum & Deum. Eandem Stoicorum philosophandi viam infaustissimam ingressus est ipse SPINOSA, qui in scriptis suis hanc quoque tuetur sententiam. Absit autem, ut creatorem cum creatura, substantiam & vim infinitam cum substantia & vi finita, ens independens cum dependente unire, commiscere atque committere invicem velimus: planissime enim hoc modo ad atheismum sternitur via, & infinitæ absurditates, religioni e diametro adversissimæ, inde emergunt.

§. III.

Cautiores qui volunt esse, principium corpora constituens activum dicunt esse ens spirituale, creatum, a Deo dependens; & horum sententia brevibus consistit in eo: asserunt nempe infinitum numen corpora finita innumera creasse, quorum unumquodvis ex ente mere passivo, inertis, omni vi atque actione destituto, saltem quod eandem ab alio recipere capax sit, quam materiam & extensum appellant, & postea ex ente activo movente, quod spiritus nomine insignitum, composuisse qui spiritus, ad motum & actionem iners passivum ens, jugiter excitare & effectus producere debeat secundum potentiam a Deo ipsi concessam, hæc autem substantia spiritualis corporum naturam secundum illorum

mentem conficit. Quamvis autem opinio hæc sano sensu admitti possit, quando nempe vocabulum spiritus improprie sumitur pro vi activa, neutiquam vero approbationem invenire poterit, si spiritum proprie & recepto sensu, qui nempe sit substantia cogitans, intelligens, & libere agens, accipiat, sicuti patroni hujus sententiæ facere non erubescunt, qua de re latius egit in dissertatione *de Universalis agente* ante aliquot annos habita Dn. Præses. Ab utraque hac recensita opinione mediam quasi tueri viam videtur celeberrimus CARTESIUS, quam etiam plurimi ex orbe litterato recentiores & celebratissimi viri, mathematica & physica scientia instructissimi, defendere in scriptis suis hactenus non dubitarunt, & ipsa hæc est. Dicunt corpora esse materiam, quæ mere se habeat passive, omni vi activa movente destitutam, tantum quod apta sit aliunde recipere hanc actionem vimque moventem, hanc autem immediate ipsi materiæ communicari a Deo, adeo, ut ipse infinita sua virtute materiam ubique actuet, moveat & per ipsam in toto universo operetur. Quo sensu natura ipsis nihil aliud esse potest, quam Deus. Opinionem hanc egregiis sane ratiociniis a celeberrimo Viro stabilitam atque propositam felicissimo successu tamen nuperrime aggressus est Vir in judicando incomparabilis in Actis Eruditorum Lipsiensis. Non est animus litem, quæ adhuc seritur inter duos eruditissimos viros, facere nostram, vel decisionem quantam ipsi controversiæ adjicere: non vereor tamen affirmare, longe verisimiliorem magisque pietati congruam apparere illorum sententiam, qui Deum ab immediata creaturarum actione & operatione secludunt atque distinguunt. Enim vero mere passivum est ens hoc quod nihil efficit, nullam virtutem existendi, durandi propriam habet, & tale revera est nihil, abstractum tantum est in ipsa mente, non autem separatam extra mentem, i. e. realem, involuit existentiam. Equidem non ignarus sum sententiæ hujus patronos materiæ motum recipiendi habilitatem ac dispositionem, quæ apta hinc reddatur, jam non simplicem, sed infinite variantes motus efficere, assignare. Quando autem animo exactius hæc nobiscum pervolvimus, nullum passivum videtur aliquid retinere vel recipere posse, sed requiritur semper quædam vis recipiens & retinens; alias, si hæc non adest, nulla realis virium impressarum retentio esse poterit, sed ad quamcunque externam vim dissipari debet ista habilitas sive forma, figura, magnitudo, dispositio partium, adeoque ut necessum habeamus statuere in corporibus vim quandam realem activam ipsis propriam, quæ non tantum recepit, sed & retinuit voluntatem creatoris in primordio creationis, juxta quam adhuc agunt corpora. Nisi enim creaturæ haberent vim propriam agendi, adeoque activam, nam vis tantum passiva non est aliquid reale, certissime consequeretur, Deum & creaturas non esse entia distincta, ad minimum quoad actus realitatem & operationes. Neque mea mente perspicere possum, quomodo sufficienter hujus sententiæ affectu a Spinossimo se purgare ac liberare, & religionem salvare velint. Nostra autem hæc est inconcussa, ut existimo, veritatis sententia, Deum infinitæ virtutis extra suam essentiam, ex suis tamen viribus, produxisse universum, omniaque corpora, id est, vires finitas, limitatas, activas, extensas tamen, cum corpora, mea sententia, nihil aliud sunt, quam vires extensæ reales. Ex quo consequitur, vim creaturarum sive corporibus concreatam, intrinsecam & propriam, minime divinam essentialem dici debere; quod si autem non esset concreta & creaturis propria, sed divina, immediata, utique necesse est consequi,

sequi, omnium corporum actiones esse immediatas Dei. Quis autem vellet dicere, quando bestia lædit hominem, quando perverso ordine foetus in utero formatur a phantasia matris, esse hæc actionem Dei, vel etiam minus pium & rationi conveniens esset statuere phantasia matris, opera, quæ Deus ipse infinita sua virtute efficit, invertendi potentia gaudere, cum perspicuum sit firmiori impressione materna foetus in utero sapius manum & mutilum efformari. Largimur lubentissime, quod corpora effectum producant finitum, ad vim ipsis concētam finitam concurrere debere universalem impulsum, qui faciat, ne otientur creaturæ, sed ut perpetua & omnipotenti excitatione corpora in perpetua actione & nisu ad agendum consistant, non aliter ac ad nostras cogitationes, quæ sunt actus mentis ex sua intrinseca finita virtute provenientes (utpote Deus non est, qui in nobis cogitat & vult; sed potius mens nostra propriam virtutem excogitandi habet) universali vi & impulsu opus est, sine quo nec actualement cogitationem formare possumus. Brevibus: universalis ille Dei impulsus non ipse agit omnia, sed ipse excitat corpora, ut juxta vires suas a Deo ubivis extenso impenetrabili concessas agant, inducit rebus non motum ipsum, sed necessitatem immutabilitatis ad motum, cujus motus principium tamen ipsis rebus non est mere externum, sed internum.

§. IV.

Ex hisce jam dictis intelligi facile potest, Deum corpora neque composuisse ex substantia spirituali activa una & altera passiva, neque ex mere passiva, quam deinde ipse in motum excitet atque animet: sed potius in primordio creationis statim produxisse substantias sive vires extensas, quæ & movere, sive vim suam internam activam aliis communicare, sive motum seu vim ab aliis recipere seu moveri aptæ fuerunt. Non me hoc loco latet, nonnullos futuros, præsertim ex Cartesiana schola, qui quæstionem ac dubium mihi moveant, nempe illam vim corporibus innatam neque substantiam neque accidens vocari posse: si enim substantia esset, spiritus aut corpus foret, quorum tamen neutrum: deinde etiam illam vim non posse intelligi quid ipsa sit? Verum enim vero hisce respondere perfacile esse duco. Vis enim creata, quæ agit & patitur, nihil aliud est, quam substantia: & hæc cum duplex sit alia extensa, movens & mobilis: altera inextensa, intelligens & libere agens, illa autem corpus, hæc spiritus nominari solet. Quid autem sit corpus, sufficienter cognoscimus, intelligimus, concipimus, at vero activum a passivo in corpore abstrahere & separatim sibi imaginari velle, utique impossibile videtur, intimam enim entium realium & creaturarum naturam humanæ mentis conjectura, propter finitum nostram intellectum & sensuum imbecillitatem, assequi non valemus. Si quis autem sigillatim considerare ac in mente abstrahere activum a passivo in qualibet creatura velit, & illud spiritum, hoc materiam appellare, mihi perinde est, modo circumspiciat, ne spiritum proprie sumat, ad evitandam maximam confusionem in theologicis & physicis, neque illud activum pro substantia sive ente extra mentem separatim existente habeat, cum nulla substantia pure activa sit, nisi increata & solus Deus.

§. V.

Perspecta sic cujusunque corporis in genere natura, quæ in connata vi movendi & motum recipiendi consistit, sive juxta ARISTOTELEM in principio motus & quietis, proximum jam est, ut majori

Frid. Hoffmanni Oper. Supplem. II.

solertia investigemus atque inveniamus naturam corporis organici sive animantis in specie, præsertim humani; cujus gratia Medicus noster labor potissimum fuit institutus. Corpora organica, qualia sunt animalium, dicuntur illa, quæ non ex partibus similaribus, homogeneis, sed ratione figuræ, magnitudinis, texturæ, consistentiæ diversissimis constructa & composita sunt. At vero cum quævis suos peculiare, certos atque determinatos exerant motus atque operationes ab aliis plane distinctas, merito indagandum est, a quonam principio illud ipsum dependeat. Hoc principium specificas actiones & motiones, vitam, nutritionem, sensationem, in corporibus efficiens, variis ab auctoribus insigniri solet nominibus. Veteres dixerunt illud naturam, item animam; uti ARISTOTELES; HIPPOCRATES calidum omniscium, impetum faciens, GALENUS calidum innatum, spiritum insitum, SCALIGER sapientissimam vim plasticam; HELMONTIUS Archæum, alii animam vitaliter agentem. At vero vocabula hæc obscura non minus quam ambigua nequiquam rem claram ac perspicuam reddunt, sed potius obscuritatibus magis adhuc implicant. Recentiores, inter quos vir incomparabilis doctrinæ BOYLE in tract. de natura, naturam corporis cujusunque speciatim particularem, seu individualement mechanisum appellat, neque, si omnia bene trutinantur & recte intelligantur, sine ratione ac fundamento. Cum autem vocabulum hoc summe odiosum compluribus & invidiosum existat, imo nonnullis qui nesciunt quid per illud designetur, plane bilem commoveat, operæ duxi pretium, nostram hic mentem apertius exponere, quid per vocabulum hoc, notatum velimus, ne cuidam adhuc scrupulum movere possit. Est itaque nobis mechanisus, effectus quidam seu motus vel operatio corporis, ex causa physica semper & necessario talem effectum producente dependens; unde quicunque effectus mechanice fiunt sive per mechanisum, perficiuntur causis necessariis i. e. non alia ratione agentibus vel agere aptis, ita v. g. ignis producit effectum mechanicum, dum flammam profert in ligno; dum illud comburit & in cineres vertit: posita enim flamma & corpore resinoso apto, impossibile est, ut alius effectus quam ille ipse ex necessitate causarum profluere possit: quando autem plures materiales causæ ita coordinatæ ac dispositæ sunt, ut effectus fluant, ideæ artificis, qui certum finem propositum habeat, correspondentes, dicitur etiam mechanisus; sed perfectior, & a nonnullis organisus, quoniam in organicis corporibus existit. Ita in horologiis certa supposita constructione variarum rotularum, & applicato determinato pondere vel elasticitate, non potest alius effectus per naturam, i. e. per necessitatem naturalem effici, quam ut intra horæ spatium tales pulsationes & vibrationes producantur, quo tale spatium index percurrat, id quod intendebat artifex. Opponitur itaque mechanisus, qui ex causis merè necessariis sive una eademque ratione agentibus agit, moralismo sive moralitati, ubi causa indifferens non harmonice & uno eodemque modo, sed diversis rationibus, id est, libere vel agere vel non agere potest, sive plane diversum motum producere. Talis moralitas competit entibus, seu substantiis spiritualibus, sicuti mechanisus corporeis. In mea enim potestate est ac libertate, movere corpus & ejus certa membra, vel non movere, resistere vel non resistere externis impressionibus. Spiritus itaque & animæ nostræ rationalis est libere agere, sive indifferentem habere vim ad agendum: corporis autem, ex necessitate, harmonice, similinimum & eadem ratione. Ubi tamen & hic statim monendum ducimus, causam quandam existere

A a a

posse

posse libere agentem, ubi tamen si agere incipiat, seu effectum producere in corpore, ille nonnisi mechanicus, incompletus tamen ex parte causæ, sequatur, ita si artifex horologium construit, causa est libera, potest hoc facere vel non, si tamen agit, effectus nonnisi mechanicus resultat, ita ut omnes effectus in corporibus sint mechanici, quamvis causam primam agentem interdum liberam & spiritua-lem habeant. Ita quando certo externo objecto movemur ad iram, anima rationalis, seu ens liberum, hanc actionem recipere sive resistere potest, & tunc libere seu moraliter agit. Quando autem impressionem illam recipit, exoritur passio, quæ nomine venit iracundiæ, quæ in corpore effectus producit plane irregulares, & quidem modo mechanico, dum nervorum fluidum in impetuosum & actuosum motum concitat, nec non spasmodicas contractiones in nervosarum ac musculosarum systemate circumquaque producit, a quibus postea humorum variæ excretiones, scilicet diarrhœæ, vomitiones, bilis ascensionem in os, aliaque sæva symptomata dependent.

§. VI.

Præmissis itaque illis, quæ ad accuratam evolutionem nominum spectant, applicare jam ea ad præsens negotium facilius erit. Quando ergo natura certi cujusdam animantis vel etiam corporis nostri dicitur Mechanismus, nihil aliud subintelligitur, quam maximum artificium, ubi nempe summa intelligentia, ratione, intentione ac consilio partes corporis varia figura, magnitudine, consistentia diversissimæ tam apte invicem constructæ mixtæ atque ordinatæ sunt, & agentia, patientia tali proportionem atque harmoniam applicata & disposita, ut effectus quidam seu motus ex necessitate causarum agentium inde profluat, qui motus in animantium corporibus appellatur vitalis sive ipsa vita, quæ ad conservationem & durationem principaliter corporis mixti & structi, postea etiam ad nutritionem, item sensationem & motus, mentis imperio obsecundantes, tendit atque conspirat. Quoniam autem mechanismus hic artificium est, quod supponit artificem seu causam omnia tam apte ordinantem, dirigentem ac disponentem certum in scopum ac usum, necessario consequitur; ipsum notitia, intelligentia & ratione instructum esse debere. Jam autem merito exoritur hic quæstio, quinam sit ille artifex, qui omnia tam sapienter non solum in machina macrocosmica, verum etiam in particularibus & individualibus machinis, infinito modo variantibus, adornavit, concinnavit atque disposuit. Hic autem nemo non affirmavit, cum artificium hoc sit infinitæ sapientiæ, artificem quoque a quo hoc dependet, ens infinitæ virtutis ac sapientiæ illudque increatum, in quo omnia vivunt atque moventur, esse debere, quod sicuti ex liberrimo suo beneplacito, infinita sapientia atque potentia, ex nihilo, tantam corporum multitudinem atque amplitudinem immensam produxit, ita etiam illa ipsa juxta certam proportionem, harmoniam & leges ita coordinavit, ut innumerabiles effectus, inenarrabilem sapientiam & benignitatem summi architecti celebrantes, producerent. At vero lubentius hæc omnia mihi concessa video, sed tantum illud adhuc discutiendum remanere dubium prævideo. Utrum Deus, postquam semel condidit corpora, immediate adhuc ipsa vegetabilia & animalia efformet, hominemque in utero fabricet, an potius ipsa corpora, præsertim organica, in se custodiant talem vim, sui multiplicativam & similem speciem propagantem, concreatam, generali tamen divino impulsu atque concursu perpetuo egentem? quod uti-

que cum sacra scriptura, quæ dicit unumquodque corpus suum semen secum habere, affirmare debemus. Quid autem principium illud seminale sit, quod prima struat lineamenta ac rudimenta corporis, quod hominem ipsum efformet, an ex intelligentia, an citra ipsam agat, res certe videtur altioris indaginis & humanum captum exsuperare. Attamen in difficili & arduo negotio conceptum nostrum ita exponere & declarare allubescit. Statuimus nempe corpora quævis organica, quæ viva & animata dicuntur & propagantur, habere in se principium quoddam non libere, secundum suum arbitrium agens, neque intelligentia propria præditum, sed tenuissimum, actuosissimum, ad immateriales impressiones & vires suscipiendas aptissimum, juxta quas deinde effectus mere necessarios, non ex suo arbitrio dependentes, producat. Unde etiam propagatio hujus vel illius individui, a certo semine necessario subsequitur, quod neutiquam fieret, si ex quadam libertate agenti & pro suo lubitu principium hoc formaret corpora. Quomodo autem ideales & quasi immateriales impressiones effectum realem & materialem producere possint, profecto res est difficillimi scrutinii, at vero difficultas explicandi & ignorandi modum, non ipsam rem, quæ in sensum incurrit & facti est, tollit. Res sane admiratione digna, quod radii corporis in speculo repræsentent totum corpus, & aeris fluidum tremulum corporum elasticorum motum sive sonum certum atque articulatum diffundat ac propaget, quidni etiam tenuissimum, simplicissimum, magna potentia motus instructum fluidum æthereum, quod omnia viva & animantia corpora animat & actuat, habeat talem concreatam a Deo facultatem idealiter, incognito tamen sensibus modo, formam, figuram corporis & partium in se recipiendi & secundum tales receptiones & impressiones agendi; & hoc est in quo consistit operatio seminis & propagatio corporis viventis, intellectus humani vires & captum penitus transcendens. Quod autem immaterialis quædam idea in fluido cerebri suscepta atque impressa realem effectum materiam varie modificantem & disponentem producere valeat, evidenter apparet ex fortiori phantasia matris, tenellum embryonem variis modis dehonestante & mutilante, unde videtur valde probabile, in universo fluido animali, quod principaliter in cerebro ac nervis continetur, inque ejus minima portione separata, non secus ac in speculo, quando in minora frustula diffringitur, totius corporis lineamenta & rudimenta contineri, secundum quæ seu ad exemplar partes corporis fabricentur atque elaborentur, idque pure lege mechanica. Et ita commode vis ista plastica architectonica veterum & recentiorum explicari poterit.

§. VII.

Verum instituti nostri ratio postulat, adjicere etiam discrimen mechanismi divini sive naturalis, & humani seu artificialis: Differunt itaque machinæ humanæ quæ κατ' ἐξῆν dici solent artificiales in eo, quod ars & ratio construendi superficialis, simplex, exigua & finita tantum sit, in divinis autem modis construendi longe excellentior, infinitis modis varians; unde rectissime ars humana, simia naturæ, quæ a PLATONE ars divina in materia scitissime vocatur, vulgo appellari solet. Insulsum itaque esset, si quis sibi vellet imaginari, Deum non modis aliis usum fuisse mechanicis, quam qui nobis noti sunt, & secundum quos nostra construimus corpora, neque excellentiorem ideam ipsa formandi habuisse, quam artifex homo, sed potius edicimus atque aper-

te fatemur, mechanismum divinum infinitis modis ac parafangis exsuperare, præsertim in subtilissimis ac minimis, artem hominis. Deinceps differentia etiam in eo posita est, quod animantia & viva corpora a principio movente æquabiliter diffuso moveantur, in automatibus autem, tam pneumaticis quam hydraulicis, illud magis externum. Palmarium autem, quo invicem distant, id est, quod quæ dicuntur naturalia, organica, feminali virtute sese invicem multiplicent ac propagent; artificialia autem neutiquam.

§. VIII.

Hicce discussis, paulo propinquius ad ipsam rem, ejus gratia hic labor institutus est, revertamur: subintelligimus per naturam, quando dicitur ab antiquissimis Medicis corporis conservatrix & morborum medicatrix, hic non tantum principium machinam nostram movens activum, sive motus in partibus celebrans & externorum objectorum ideas recipiens, sed simul comprehendimus totum mechanismum seu organismum, id est, partium fluidarum legitimam quantitatem, temperiem, solidarum debitam constructionem ac configurationem, exclusa tamen anima rationali. Hæc enim ordinatio non præsidet corporis actionibus, quæ ad vitam & corporis conservationem spectant, sed hæ sunt plane necessariae & involuntariæ. Anima autem ceu substantia intelligens & libertate agendi pollens, intrusa est a Deo in hoc terrenum domicilium, ea conditione ac lege, ut ideas externarum rerum median- tibus sensoriis hausas, intelligat, inter se conferat & ex istis ratiocinetur, & postea liberam agendi juxta intellectum illarum habeat facultatem. Equidem certum est, & ipsam animam singulari a Deo concessam facultatem habere in certas corporis partes agendi, uti videmus ex animi pathematibus & vice versa, quomodo corporis habitus, humorum dispositio ac motus, mentem varie afficiat ac disponat, unde merito non tantum corpus humanum, sed totus homo ex animo & corpore constans, ut recte monet HEURNIUS in *Institutionibus* pag. 58. Medicinæ objectum esse debet. Præclare enim HIPPOCRATES *Lib. de Natura hominis: ubi corporis habitus ægrotat, neque mens ipsa alacritatem habet ad virtutis meditationem. Morbus enim præsens animam vehementer obscurat, intelligentiam ac affectionem per consensum ducens.* Attamen vita, nutritio, actus secretionum, excretionum, sanguinis & humorum circulatio, impressiones rerum externarum in ipsa sensoria, motus partium & musculorum involuntarii, mere mechanice a causis corporeis physicis conficiuntur & absolvuntur, citra ullum necessarium auxilium, concursum, vel operam principii cujusdam libere agentis. De hoc itaque mechanismo pronunciamus, esse ipsum opus summæ sapientiæ, ordinis, intelligentiæ, & ita a Deo summo intelligente dispositum ac instrumentis & mediis munitum, ut non tantum machinam conservare, a putredine & destructione mixtionis suæ defendere, sed & læsiones quasvis internas, perniciem machinæ intentantes, propulsare atque propellere, sufficientibus viribus instructum sit, quamvis hæc omnia fiant sine quadam intelligentia, ratione ipsius corporis interna & propria. Meretur adduci elegantissimus circa hanc rem locus, qui exstat in VALLERIOLA *lib. I. Locor. Com. cap. 5. Indoctas quidem animantium naturas dixit Hippocrates, hoc est, non consilio, neque delectu agentes: sed profecto quasi edoctæ operantur, impelluntque ad id, quod usui sit animanti; artificiosa ipsa hominis, miraculum omne superans, structura facile declarat. Eam enim* Frid. Hoffmanni Oper. Supplem. II.

tam mirabili partium nexu, firmitudine, forma, atque usu architectata natura est, ut neque ad usum accommodatius quicquam, neque ad speciem & ornatum pulchrius spectari possit: providam vero & sollicitam indicant ea, quæ in morbis gravissimis & exitiabilibus natura, ut servetur æger, molitur. Siquidem adversus morbificam causam impetu valido insurgens, & decretoria, excretionisque vehementes molitur, & concoctione, discretione, tandemque vacuatione à lethalibus morbis ægrum sæpè liberat. Confirmationem hisce addit doctissimus SYDENHAMUS, qui ita scribit: *Sect. II. de morb. acut. p. 158. Ego quoties naturam nomino, toties causarum naturalium complexum, quendam significari volo; quæ quidem causæ brutæ licet atque omni consilio destitutæ, non tamen sine summo consilio reguntur, dum suas quæque operationes edunt suosque effectus exsequuntur. Nimirum supremum illud numen, cujus vi producta sunt omnia, & à cujus nutu dependent, infinita sua sapientia sic disponit omnia, ut ad opera destinata se certo tempore, quodam ordine atque methodo accingant; neque frustra quicquam molita, neque nisi quod optimum est ac toti rerum fabricæ, suisque privatis naturis maxime accommodum exsequentia, perinde atque automata, non pro suo sed artificis consilio moventur.*

§. IX.

De proposito itaque mechanismo sententia HIPPOCRATIS est rationi ac veritati convenientissima, quod corpus conservet ac tueatur a corruptione & morbos etiam sanet ac amoliat. Admirabilis certe providentiæ divinæ œconomia ostenditur, quando machina nostra, quæ ex principio corruptibilissimo, sicuti omnia animantia, ex mixtura nempe fluidi, aquei, sulphurei, oleosi, mucidi & salini volatilis composita ac contexta sit, se tueatur etiam in aëre humido, calido, ad putredinem aptissimo, ad quam etiam facillime brevi tempore, si vita destituta est, tetro cum fœtore transit, tam diu salva, incolumis & incorrupta duret atque a putredine præservetur. Ubi asserimus Deum artificiosissime in hunc finem mechanico-hydraulico-statice composuisse partes nostræ machinæ, ut officio suo ac munere harmonice conspirent, in perpetuum ac jugem circularem succorum, & præsertim sanguinis motum, quo perenni, vita sive duratio corporis non potest non servari salva, utpote tali motu continuo per tubulos majores & minimos capillares heterogeneus ille humor, ad coagulationem ceu discessionem elementorum suorum stasi valde proclivis, in fluiditate utilissima servatur, in qua persistens putrescentiam concipere ægerrimè potest. Accedit, mediante circumvolutorio hoc motu, & transitu solennium & copiosissimorum emunctoriorum, sanguinem & flores corporis nostri a particulis agitativissimis, aqueis, salino-sulphureis, mucidis ad corruptionem admodum pronis simul depurari, quæ sequestratio, uti in scriptis suis, *Vir excellentissimus D. STAHLIUS, Patronus & Præceptor meus plurimi faciendus,* optime monet, ad impediendam corruptionem utilissimum opus est. Finis enim totius artificiosissimi mechanismi in corpore nostro manifestati, eo principaliter collineat, ut non tantum humor ex alimentis præparetur, qui ad mixturam tenuissimi aeris vaporem ceu spiritum præbeat mobilissimum animæ rationalis instrumentum: verum maxime ut totum illud mixtum diu salvum maneat & a destructione & putredine quoad omnia membra mediantibus actibus secretoriis, expulso-riis & attenuato-riis conservetur. Officium & usus omnium viscerum, quæ in thorace & abdomine sunt & perennis spirituum in fibras motrices, quibus ferme om-

nes partes constant, influxus a quo motus cordis & arteriarum sanguinis impulsorius, itemque robur ac tonus partium solidarum influxum sanguinis in partes moderans, ac dirigens, dependet, non alium finem habent, quam ut vita dictis rationibus serveatur diutissime, sicuti ex anatomicis & physiologicis illud scientifica connexionione fufius demonstrare in proclive esset, modo temporis & instituti ratio uberio-rem discussionem suaderet.

§. X.

Quemadmodum autem varia organorum dispositione variisque motibus impulsoriis, secretoriis, attenuatoriis & excretoriis partim vita efficitur, partim instrumentum mentis idoneum, in quo ipsa functiones & operationes suas, ex jussu Dei sic volentis, exserere possit, elaboratur: ita etiam providentissimum Numen machinæ nostræ talismodi mediis, viribus ac instrumentis consuluit atque mirabiliter prospexit, ut etiam contra insultus causarum innumerarum perniciem corpori intendentium, se defendere ac vindicare possit. Instrumentum autem præcipuum & huic operi accommodatum identidem motus sanguinis & spirituum est, sed hunc in finem naturali intensior, unde præternaturalis dicitur, ut ut semper utiliter & bonum in finem instituatur. Dignum enim attentione est, nullum ferme fieri morbum internum, nullum paroxysmum vel morbi solutionem, ubi non adsit simul præsens vehemens & intensior spirituum per genus nervosum & musculorum, vel sanguinis & humorum per arterias & venas motio ac impulsio, quorum ille dicitur Medicis spasmodicus & convulsivus, alter febrilis. In hisce motionibus solennibus atque fundamentalibus, quamvis præternaturalibus, absolvitur certe omnis morbi sive luctæ naturæ, contra causam lædentem atque perniciem, natura atque essentia. Etenim motione hac concitatissima humor stagnans vel impeditus se circulans, adeoque ad putredinem & corruptionem proclivis, qui ut plurimum est causa morborum principalis, in ordinem redigitur, vel si qualitate nocet, alteratur, aut plane e corpore discutitur atque ejicitur; quando autem vel ex virium motricium sive spirituum defectu, vel ex magnitudine causæ morbificæ, motus talis validus morbosus non instituitur, præsentissimum damnum inde resultat: nempe ex stasi illa diuturna vel obstructions viscerum contumacissimæ & scirrhusæ, vel corruptela putredinosa aut sphacelosa, aut apostemata truculenta, vel periculosissimi ad lethum deducentes morbi inde subnascuntur. Quare rectissime olim CAMPANELLA febrem dixit, esse medicinam corporis, magnumque remedium & præsidium pro causis morbificis perniciosissimis amovendis, & quasi naturæ bellum: non alio modo ac si hostis ex urbe expellitur, ubi omnino sine tumultus excitatione, qui tamen bonum in finem fit, illud evenire non potest. Cui adserto adstipulatur etiam laudatus SYDENHAM *lib. de morb. acutis sect. I. c. I.* quod febris nihil aliud sit quam *naturæ conamen, materiæ morbificæ exterminationem in ægri salutem omni ope molientis.* Et quando animum attentionemque diligenter in praxi adhibemus, deprehendimus, nullum ferme gravem morbum internum solvi & curari, nisi per motionem quandam febrilem, sive sanguinis motum intestinum & progressivum intensiorem, qui frequentiori pulsu, respiratione adaucta, & calore majori optime dignoscitur. Etenim impulsu cordis & arteriarum facto vehementiori, & celeriori, sanguinis fluxilitas, intestinus ejus calidus motus increscit, & maxime sub finem paroxysmi, relaxatis partium solidarum poris, motus quoque pro-

gressivus citatior fit, quo postmodum obstructions solvuntur, sanguis & humores subsidentes attenuantur, eluuntur, discutuntur, humores acres, corrosivi, maligna qualitate imbuti, cum viscosarum mixtura & unione ita corriguntur, ut fiant innocentes. In hac correctione veterum consistit coctio, in malignis & acutis morbis admodum necessaria. Tandem autem per emunctoria aperta illud ipsum correctum, quod vel quantitate vel qualitate delinquebat, & machinæ insensum erat, resurgente quasi vi motrice sanguinis, felicissime expellitur, ut sic a morbo, periculo mortis, non tantum homo liberetur, sed etiam circulo æquali sanguine & humoribus restituto, omnia rursus fiant secundum consuetum naturæ ordinem.

§. XI.

Est sane admiratione dignum, quando sanguis vel humor in inflammationibus propter quantitatem vel qualitatem vitiosam in certa parte stagnans in corruptionem tendit, quomodo motus calidus & impulsus arteriarum maximus non tantum in parte laborante, uti id videmus ex rubore, calore, tumore & pulsatione, verum in toto corpore excitetur, non alium in finem, quam quod motu circulari sanguinis adaucto, humor subsistens & vitium contrahens in motum & ordinem reducatur, vel per insensibilem transpirationem discutatur. Ita inflammatoriæ febres fiunt etiam a natura utilissimum in finem. In quibuscunque autem morbis acutis remissior observatur motus sanguinis & minor calor, pulsus autem frequentior, debiliior atque imbecillior existit, illos longe periculosiores, & pejoris moris esse, magisque interficientes, quam ubi febris excessiva est, experientia certum deprehenditur. Verissimum enim indicium est, naturam ob magnitudinem causæ lædentis deficere vel victam iri. Observamus & illud, in quibuscunque morbis inflammatoriis, dolorificis, dolor existit acutior & febris major, eo citius reconvallescere ægros, ceteris nempe paribus, quam si motus sanguinis segnis est, dolor remissus, ætas senilis, viriumque defectus: tales enim personæ longe diutius cruciantur ac macerantur. Ex hisce porro patet, quod digito saltem hic loci tangimus, quam imprudenter illi Medici, imo ægrotantes faciant, qui talismodi molimina naturæ febrilia inflammatoria intempestive opiat, acidis, refrigerantibus, externis & internis intercipiunt, sistunt ac cohibent. Nascuntur exinde chronici & periculosissimi affectus, lentæ & hæcticæ febres, apostemata vel etiam ipsa mors hac ratione advocatur, facto materiæ morbificæ majori incremento, & aucta corruptione putredinosa. Verum illud adhuc meretur inquisitionem, qua ratione nempe febrilis talis motio, præsentem materiam morbificam excitetur; sunt hic qui secundum veterum placita existimant morali æstimatione id fieri, cum principium corporis nostri intelligens, & prævidens noxam instantem, dirigat spiritus ad cor & musculos, pro excludenda, mediante motu, causa peccante. Verum quoniam intelligentia, scientia, voluntas rei plane corporeæ competere neutiquam potest, neque rationale principium dirigit plane automaticas humorum motiones, sicuti id inferius deducemus, pace horum dixerim, fieri hæc omnia mechanice, non tamen citra providentiam Dei, quæ etiam hic apparet maxima. Nostra hæc nempe est sententia divinum Numen ita præparasse & construxisse machinam nostram, ut omne illud, quod læsurum est, motum quandam irregularem fibræ musculosis ac nerveis partibus inducat, quo ipso fluidum istud mobili-

bilissimum, in nervis & fibrillis musculosis contentum, in motum vehementiorem cieat atque invitet lege mechanica, dum unus motus semper producit reactionem in corpore mobili, & actio causae morificae sub nulla alia, nisi motionis forma atque specie concipi potest, sive jam ex nimia mole, pressione aut lincinatione, acredine corrosiva id exequatur. Talis autem fluidi nervorum motus, violentior naturali, vocari solet spasmus, qui ferme omnibus partibus; visceribus, emunctoriis, glandulis, cuti & quaecunque fibris motricibus ac nervis gaudent, familiaris & proprius est, & nihil aliud est quam violentior fibrarum constrictio, cum pororum interjacentium angustia. Talem jam spasmus subsequitur semper, vigore legis hydraulicae, motus sanguinis a circumferentia ad centrum, sive reprimatur sanguis ad interiora, videlicet ad cor & vasa majora, ubi subsistens partim quantitate, partim qualitate sua, primo anxietatem circa praecordia, quae ferme comitatur omnes species febrium, postea denuo hic influxum spirituum animalium in cordis musculos invitando, ejus systolem vehementiorem & crebriorem, & huic proportionatam respirationem & pulsum efficit, adeoque febrem producit. Et hic est universalis processus ac modus febrem in corpore nostro producendi. In febribus intermittentibus spasmus ille exterioris corticis corporis, nempe cutis, manifestissimus est, ubi excrementa per sudorem & transpirationem evacuari solita, in arteriis capillaribus & glandulis subcutaneis subsistentia, & certo tempore, certa quantitate vel qualitate ibi collecta, motu quodam irregulari invitante spiritus, efficiunt spasmus sive pororum cutis constrictioem, & tubulorum una compressionem, quod maxime apparet ex detumescentibus & evanescentibus vasculis sanguineis, ex coincidentia cutis, horrore, rigore, frigore, livore unguum. Quo spasmo repressus sanguis ad cor & pulmones efficit primo oppletivas angustias, postea sollicitando instillationem violentiorem, & crebriorem fluidi nervei in cordis musculos & arteriarum tunicas, impulsus facit frequentem, & nonnunquam vehementem, & consequenter sanguinis intensissimum calorem. Quo motu fluiditatis & progressivo postea majori, tollitur illa obstructio in poris subcutaneis facta, & materia peregrina subsistens felicissime sub declinatione per sudorem discutitur, donec ex fomite vel minera in intestinorum canali aut visceribus haerente, nova semper materia adducatur, quae deinde sub certa quantitate vel qualitate novum semper proritat paroxysmum, certa saepius hora recurrentem, qui si materiae aliquid subtrahitur, vel postponitur, vel etiam si augmentum accipit, vel qualitas acuitur, anticipatur, imo saepe numero tertiana simplex in duplicem vel continuam, praesertim ab intempestivo & praepostero usu remediorum volatiliu convertitur.

§. XII.

Eadem ratione in febribus acutis, ardentibus, continuis, sanguis vel humor subsistens, in visceribus internis vel emunctoriis, varie afficiendo motuque irregulari stimulando, spasmus producit, & inde acutiorem febrem, praesertim in aetate juvenili, temperamento cholericum vel tantum acris, sulphureis ex stagnante humore elevatis effluviis, spiritus ad irregulares & crebros motus urgentur atque humoribus putredinosa elementorum dissolutio inducitur, unde malignae putridae fiunt febres. In affectibus partium nervosarum ac tendinosarum spasmus & exinde dependens dolor est manifestissimus a sanguine vel sero stagnante ibi factus, non alium in finem, quam ut fibris in una parte sic dolore affe-

Frid. Hoffmanni Oper. Supplem. II.

ctis, spasmus ille & constrictio continuet per totum corpus, praesertim cutem, id quod solenne est in omnibus doloribus & spasmodis, ex quo deinde producat febris, pariter etiam ut in constricta parte laborante, ubi vitium haeret, citior & celerior fiat sanguinis transcursus, & ita humor stagnans vel discutatur vel resolvatur, & ejus ulterior subsistentia & corruptiva stasis motu hoc calido discussivo impediatur, qui si subito in inflammationibus profundis remittit, corruptio humoris stagnantis partisque solidae, seu sphacelus & mortificatio ejus accedit.

§. XIII.

In affectibus chronicis, viscerum infarctu, obstructionibus, excrementorum in toto corporis ambitu accumulatione, pathemata illa quae excitantur, praesertim in paroxysmis hystericiis & hypochondriacis, non nisi spasmodica & febrilia sunt, eum in finem, ut motu fortiori facto tam spirituum in nervis, quam sanguinis in vasis, excutatur & separetur illud ipsum quod molestum est. Nempe nullus motus morbosus fit nisi ut, quod qualitate molestum est, vel corrigatur, immutetur, ad temperiem reducat, seu secundum veteres coquatur; vel per debita emunctoria expellatur, unde ex coctione vel cruditate in urina aliisque excretis apparente, prudens & peritus Medicus de statu morbi, judicium ferre ac formare merito debet. Et observamus nullum ferme esse morbum acutum, ubi non notabiles & apparentes excretiones, praesertim sub solutione & declinatione adfectus, contingunt; terminantur ut plurimum per insensibilem transpirationem & diaphoresin, maxime inflammationes internae, pleuritides, anginae, nephritis, hepatitis, peripneumonia, & omnis generis febres malignae & benignae. In malignis autem, a sale tenui, acri corrosivo ortis pustulae & exanthemata, item tumores, abscessus ad cutim emittuntur, uti in peste, petechialibus febribus, purpuratis, scorbuticis, purpura puerperarum, variolis, morbillis, erysipelate. Affectus chronici, hydrops, arthritis, scorbutus, cachexia, feliciter saepius terminantur evacuatione facta sordium peccantium viscosarum, salino-tartarearum, partim per urinam, partim per alvum. Pathemata hypochondriacorum, melancholicorum, affectus nephritici, ischiadici, per haemorrhoidum fluxum: hystericum malum per uterinam sanguinis excretionem auspiciatissime solvuntur; ita etiam humores acres biliosi in ventriculo nauseam, cardialgiam, anxietatem producentes, magno cum levamine saepius excluduntur per vomitum vel etiam per alvum. Phrenitis, capitis gravativus dolor, succedente largiori narium haemorrhagia, sponte saepius cessant. Cunctae haec evacuationes, quae criticae, salutares & utilissimae sunt, observantur semper ferme fieri, cum motu aliquo praecedente partium spasmodico & hunc subsequente motione sanguinis inaequali, intensiore, febrili.

§. XIV.

Tantis nempe praesidiis instruxit divinum Numen corpus nostrum, ut sufficiat saepe numero sibi ipsi se tueri & defendere mechanicis rationibus a corruptione & morte, dum, uti dictum, illud ipsum quod perniciosum & insensum mixturae & motui vitali est, proritat violentum & extraordinarium spirituum in partes musculosas influxum, qui deinde serviat causae morificae laedenti vel corrigendae vel exterminandae. Ita natura certe optima est morborum medicatrix. Confirmatur hoc experientia, dum plebei, rustici, & qui natura aversari solent remedia, solius naturae ope ac beneficio ut plurimum sa-

Aaa 3

nescunt,

nescunt, & sæpe longe felicius, ac si copiosa & pretiosissima acceperint medicamenta, vel Medicis celeberrimis usi fuerint; & inde quoque ratio deducenda, quare agyrtae, anus & imperitiores, medicina utentes levissima v. g. decocto herbæ cujusdam vulnerariæ, aqua destillata, vel pulvere simplici quodam, præsertim in febribus malignis, inflammationibus, variolis, morbillis, hæctica, phthisi, podagra, & similibus; successum sæpe numero in morborum curis feliciorem habeant, & inde applausum inveniant, quam magni chymiatristi pretiosis suis arcanis, elixiriis & specioso titulo ornatis remediis, quibus frequenter naturæ motus plus turbantur quam adjuvantur.

§. XV.

Verum enim vero natura humana non tantum modo sibi sapius sufficit ad morbos curandos; verum etiam talibus viribus instructa est, ut morbos avertere & ab ipsis se præservare possit, luculentissime undiquaque divinæ providentiæ œconomia se manifestante. Noto notius est, ab exsuperantia sanguinis & humorum in vasis, impeditiorique illorum motu, magnos propullulare & progerminare morbos; hisce jam mirabiliter succurrit natura, dum in locis externis, cute tenuiore tectis; vasorum orificia aperit, & superabundantem sanguinis quantitatem excludit, idque in viris ac juvenibus vel per nares; vel si ætas sit consistentior per hæmorrhoides: In foeminis, quæ natura sunt serosiores & sanguinis abundantioris, propter generationis negotium, singulis mensium spatiis, superfluous sanguis maximo cum naturæ levamine per uteri venas ejicitur. Solennes hæ & consuetæ sanguinis evacuationes, si eadem permanet ex æquali victu & diætâ sanguinis quantitas, cohibita & suppressa, quantum damni & quam sævissima symptomata, nempe spasmos, dolores, inflammationes, tumores, humorum congestiones vel plane irregulares sanguinis excretiones suscitet, quotidiana pro dolor addiscitur experientia. Fiunt autem saluberrimæ hæ sanguinis evacuationes, identidem ex mechanica dispositione & habitudine corporis, utpote quando animo attento advertimus, antecedit vel comitatur perpetuo ferme talem criticam sanguinis extrusionem, spasmodica quædam partium, sive subcutanearum, vel etiam extremarum, pedum, aut magis interne vasorum circa mesenterium, hepar, lienem & lumbos, contractio, quo ipso sanguis vel in juvenibus & viris floridioris ætatis, in quibus sanguis celerius & maxime in partibus superioris regionis circulatur, ad caput; in viris autem hypochondriacis & ætatis consistentis & senilis, in quibus segnior est cruoris per abdominis viscera circulatio, ad venas ani, ubi congestus, vasorum ora disrumpit exitumque affectat. In foeminis id eodem modo contingit menstruationis tempore: nam lumborum spasmi & dolores circa hypochondria & inguina gravativi, cum horripilatione quadam cutis, ordinario antecedunt vel comitantur sanguinis per uterum fluxum: fit autem illud ipsum eum in finem, ut sanguis ex habitu corporis & visceribus internis ad uterum commoveatur & dirigatur, in cujus spongiosa substantia postmodum congestus, ac refluere nescius, per orificia vasculorum dilatata, exitum quærit: quæ solennis evacuatio, providentissime a magno machinæ nostræ Opifice per hæc media ordinata, non tantummodo foeminarum sanitati utilissima, verum etiam ad generationis negotium, ac foetum alendum, summe est necessaria. Quando itaque pressius & attentius consideramus omnes ferme evacuationes sanguinis & humorum irregulares, aut alias impetuosas fluo-

rum motiones, deprehendimus illas fere semper spasmi dirigi, ita tamen ut omnia mechanico-hydraulicis principiis ac legibus conformia fiant. Verum enim vero hic maximi momenti occurrit quæstio: an nempe spasmi tanquam individui motionum morbosarum comites & prodromi, a principio quodam intelligente & moraliter agente, dum, læsiones secuturas sentiens, præcavere vult, formentur, an ex causis potius mere necessariis & naturalibus suboriantur? Quod postremum adferere non dubitamus, & in inferioribus latius hæc deducendi occasionem subministratam habebimus.

§. XVI.

At vero natura hominis, ex mechanica sua constructione, sanitatis conservandæ causa, non modo sanguinem exsuperantem in debita quantitate evacuat, verum etiam alios humores, præter naturam & modum congestos, eadem ratione utiliter proscribit. Conspicimus illud ipsum dilucide tempore verno & autumnali, vel sub aeris notabili alia inæqualitate, quomodo in coryza, tussi, raucedine, & aliis catarrhalibus affectibus, in ingenti copia per ductus salivales faucium & sinuum osseorum capitis tunicam glandulosam, pulmonum bronchia, serosus, viscidus & crassus humor, copiose summo cum levamine evehatur. Similiter biliosi & serosi stimulantur humores, sapiusculæ motione quadam critica, spontanea, magna cum euphoria per alvum educuntur, quod etiam observatur de vomitu, qui sive nimia alimentorum congestio, sive alius stimulant humor in causa sit, suscitari solet, cum fructu interdum insignissimo. Compertum id quoque habemus circa sudores, qui quando natura est copia vel qualitate nocentium humorum onerata, sponte sæpius excitantur, insigni cum levamento. Dictæ hæ evacuationes, quando congrue & opportune succedunt, servant corpora a gravissimis morbis; quod si autem deficiunt vel cohibentur, præsentem tamen vitiosam materiam, certo prædicere morbum futurum possumus. Quandocunque autem harum criticarum evacuationum ortum attendimus, eadem ratione animadvertimus, præcedentem quandam spasmodicam systematis fibrosi agitationem: plerumque sub dictis excretionibus, horripilatio quædam sentitur in cute, vasorum in habitu corporis detumescencia, & partium extremarum frigiditas, quæ cuncta designant humorum motum a circumferentia ad centrum, sive ab exterioribus ad interiores esse auctiorem. Possemus certe hanc materiam longe uberius pertractare, & ulteriori experientia firmare ac illustrare, ut clarissime appareat veritas asserti *Hippocratici*, quod nempe natura sit optima morborum præservatrix & medicatrix; quoniam autem & instituti & temporis ratio habenda est, sufficiant hoc loco illa quæ diximus.

§. XVII.

Verum enim vero, & summum rei momentum poscere etiam videtur, ut dubitationes quasdam, ad impugnandam hanc doctrinam mechanicam a viris quibusdam doctissimis, quibus tamen nullam litem movere animus est, excogitatas, probe ponderemus atque expendamus. Nempe sustinent, naturæ principium esse vitale, quod notitia instructum, morali quodam actu, corporis actiones internas sanguinisque & humorum motiones pro suo arbitrio dirigat ac moderetur, certum tamen in finem, hoc est ad vitæ conservationem & morborum propulsationem, idque facere certis temporibus, certa proportionem, mensura ac gradu motus. Deinceps principium hoc non aliud esse existimant, quam animam

nam rationalem, quæ in cerebro quidem per sensoria haustas rerum ideas percipiat ac invicem comparet; in internis autem partibus moraliter, ea quæ fiunt & futura sunt, ex præsentis materiæ conditione cognoscat, & secundum illam cognitionem dirigat actus vitales; sanguinisque motus. Probandi ratio desumpta maxime est exinde: quoniam qualis in homine sano animi habitus, status & dispositio sive ad iracundiam sive ad terrorem sit, talis quoque inclinatio sit ad morbos, sive ad calidos impetuosos, sive ad frigidos lentos; imo talis quoque in ægris actionum animalium turbulentia sive trepida, meticulosa, sive impatiens & impetiosa. Ad quod reponimus utique maximam deprehendi convenientiam actionum vitalium, nempe motus sanguinis & humorum cum actionibus animi, inclinationibus, affectibus & propensione ad morbos: exinde tamen neutiquam, ut opinor, colligere licet, animam rationalem etiam sanguinem movere, vel motus humorum dispensare. Etenim ex natura intelligentiæ & libertatis agendi, in quo, saniorum philosophorum consensu, genuina animæ rationalis essentia consistit, non fuit vis movendi vel motum recipiendi, id quod corporeis rebus tantum proprium & essentiale est. Equidem lubenter admittitur, ex voluntate & concessione singulari divina, multas actiones hominis esse mixtas, ex unione sive concursu animæ rationalis & animæ sensitivæ pendentes, cujus generis sunt appetitus, naturales sensationes, impressiones, phantasie & memoriæ actus, inclinationes, & ita quidem, ut animalis spiritus habitudo ac dispositio dictas has actiones varie modificare ac permutare valeat. Quod autem essentia diversa sit anima rationalis a spiritu corpus nostrum moverite, exinde apparere existimo, quoniam a Mose, corpus humanum sub primordio rerum creatum & architectatum dicitur ex terrestri materia, tanquam perfectum priusquam anima ipsi uniretur. Deinde iudicium, prudentia & sapientia non cessant etiam in senibus imbecillissimis & morti proximis, ubi jam illæ functiones, ad quas spiritus & materia concurrunt, plane debilitari & languescere incipiunt.

§. XVIII.

Uterius quod principium illud machinæ movens non moraliter, sive sine morali pensatione mali imminentis vel futuri agat, & in hunc finem motus dirigat, ex eo intelligitur, quod omnis moralitas supponit intelligentiam; intelligentia cogitationem, cogitatio rerum ideas, & cogitatio certa certam etiam ideam. Quomodo autem jam materiæ utilis vel nocentis in corpore latitantis idea considerari queat, a principio illo vitali & morali, cum sensoria deficient, per quæ alias ordinario ideæ rerum externarum enti cogitanti accedunt, concipi neutiquam potest: multo minus autem scire poterit læsionem, quam secum foveat materia peccans: tunc enim consequeretur, principium hoc vitale non esse ejusdem naturæ cum anima rationali, quæ certe rerum corporearum naturam, essentiam, modum operandi, nisi per varias mediantibus sensibus effectuum collationes, plane ignorat. Imo venenum ex externa figura & dispositione nunquam ratio dijudicabit. Quoniam autem notitia illarum rerum, quæ fiunt in corpore, in principio illo movente demonstrari non potest; cessabit etiam voluntas, arbitrium, intentio, directio motuum vitalium ad hoc vel illud malum præcavendum vel avertendum. Deinceps & illud obijci poterit, quare principium hoc, si res nocituras jam exacte calleat, non statim in primo limine illas fugiat & aversetur, & cur, non quoniam emunctoriorum dispositionem secundum illo-

rum opinionem perspectam habet, cito & in tempore statim & quidem per commodissimas & brevissimas vias humores noxios educat? Jam vero docet experientia contrarium, dum acida, spiritiosa, dulcia, & quæ sanguinis mixturæ & fluiditati sapius nocentissima sunt, homines frequentissime magna cum delectatione accipiunt, & diutius retinent; contra ea, amara, insipida, aquea, ad conservandam sanitatem admodum idonea, fugiunt & averfantur. Ita etiam porro si tanta prudentia, intelligentia, perspicientia, & organorum causarumque morbificarum notitia agens imbutum est, quare tam frequenter etiam in illis, qui sanissimam & tranquillissimam mentem habent; plane irregulariter, & inconvenienter sanguinem, etiam non abundantia peccantem, evacuet per loca plane incongrua, nempe per ventriculum, renes, pulmones? item cur salia corrodentia, in arthriticis, podagricis, non per commodas vias, urinarias, alvinas, sed ad articulos, imo aliquando ad alia membra sensibilissima, magno cum vitæ periculo viriumque gravissima jactura deducat.

§. XIX.

Deinceps singulare adhuc dubium in disquisitionem veniat necesse est, quod mechanismo contrarium videtur, cum nempe certo tempore v. g. anno, mense, die & hora, certi actus humani, item morbofi motus ac paroxysmi redire atque converti consuecant, ubi nulla causa corporea, necessitatem actus inferens, subesse apparet. v. g. quod certa hora de nocte si semel evigilemus, eadem hora accedente per aliquos dies vel septimanas id rursus accidit: paroxysmi febriles in intermittentibus exquisitè diem & horam ut plurimum servare solent, etiam jam tum expurgata materiæ peccantis quantitate. Sanguinis evacuationes, imo aliorum humorum excretiones, præsertim criticæ, statuta sua tempora servare solent. Curiosum est, si quis assuetus est certo anni tempore sanguinem emittere, vel per scarificationem, vel sectionem venæ, quando illud tempus recurrit, & missio sanguinis omittitur, circa locum sectionis assuetum sentiri tensiones, dolores, & interdum intumescientiam. Compertissimum porro est, quas vires habeat consuetudo, ita ut rectissime altera appelletur natura. Apparet id in moribus, vitiis, virtutibus, victu, vitæ genere, ubi omnis subita mutatio, vel valde difficilis, vel interdum etiam periculosa est. Largimur hic ultro consuetudinis rationem, quæ non tantum in corpus, verum etiam in animam maximam habet potentiam, difficillime dari ac explicari posse, & est quasi lex divina indita naturæ animantium, ut motus semel spiritui animali firmiter impressus non modo retineatur, sed & certo tempore & in eadem proportionem sapius revertatur: minime autem ab ente intelligente & libero, consuetudinis vis dependeat. Si enim ex arbitrio animæ, tales actus fierent, certus ordo ac tempus non tam accurate observaretur, neque etiam tunc a causis physicis & mechanicis agentibus, nempe per remedia, alimenta, aliud vitæ genus, & quæcunque materiam aliter disponunt, consueti morbi, actus naturales, evacuationes interturbari, accelerari, vel impediri possent. Neque hic argumentari licet: Hæc dicta non explicari posse mechanice, ergo principia non esse sufficientia. Huic objectioni reponimus, illud non fieri propter principiorum insufficientiam, sed propter sensuum nostrorum defectum, & intellectus humani imbecillitatem. Ita etiam ex principiis æternæ veritatis geometricis phænomenon illud, ubi mutatio circuli in quadratum, item quadrati in circulum,

quæ sanæ rationi non repugnat, deduci non potest, non propter elementorum Geometriæ insufficientiam, sed propter mentem nostram finitam, certis limitibus constrictam. Difficultas itaque aliquid explicandi vel sibi imaginandi, non ipsam rem tollit, vel illud exigit, ut principia, in sano conceptu fundata, deferamus, & alia intellectui non omnium convenientia amplectamur.

§. XX.

Uterius moralitas agendi in principio vitali exinde etiam comprobari solet, quod hoc ad causas lædentes, læsuras, & diversæ læsionis gradus, proportionem & rationem habeat, ita ut causa præsentē insigniter læsura, motus efficiat longe impetuosiores, quam si levis causa fuit, ubi languidiores tantum instituuntur. Ita explicatur motus agendi in venenis, dum nempe perniciem ac periculum anima prævidens ad illud avertendum concitatissimos in systemate nervoso ac musculofo efformet motus, a quibus postea ultro propter vehementiam causæ deficere debeat, quæ causa & origo mortis sit. Observatum hic velim, non ex causa quadam morali sed mere physica & necessaria fieri. Nam si ex morali fieret, consequeretur, quando assumuntur venena sic dicta frigida narcotica, stupefacientia, similes motus impetuosos institui debere a principio sentiente & vitaliter agente: jam autem contrarium testatur experientia, motus potius a veneno tali intercipi atque sufflaminari. Causa autem quare ob assumpta venena mercurialia, arsenicalia, tam atrocia pathemata motuumque ataxiæ insensibilissimæ succedant, est illorum corrosivitas spirituosa ac tenuissima indolis, qua totam corporis sphaeram pervolando, poris nervorum intimius se insinuant, & violenta irritatione ac corrosione ibi facta, spirituum motus exsuscitant impetuosissimos, quibus totum œconomiam animalis fundamentum sæpe numero pervertitur. Etenim venena, sicuti & causæ morbificæ, item medicamenta non sunt corpora passiva, inertia, agendi virtute destituta, sed revera activa sunt, motu actuosissimo instructa, unde agendo producunt in corpore reactionem. Est profecto ex præcipuis lex mechanica microcosmica ea, ut ad certas actiones & motiones causarum corporearum in corpore nostro certi effectus, sive reactiones producantur, quamvis connexionem causæ cum effectū, non semper sensibus vel intellectu clarissime penetrare possimus. Consistit in eo fundamentum operationis remediorum, dum ferme omnia evacuantia, sunt commoventia & principio quodam motus instructa, in certam partem agunt, & ibi influxum spirituum animalium invitando, certam reactionem & motum producunt, uti latius de ea re dictum est *ab excell. Dn. Præs. in Dissertatione de Mechanica operatione remediorum evacuantium & alterantium.*

§. XXI.

Majoris momenti autem videtur hoc dubium esse, quod principium illud, quo vivimus & movemur, in prima formatione corporis nostri, ejus ulteriori nutritione & perfectione, exquisitissimo ordine, mensura, proportionem, & justo ferme tempore mutatur, quando nempe certo tempore foetus concipitur, moveri incipit in utero, gestari solet: porro etiam certis temporibus dentium eruptio, illorum casus, corporis nutritio, potentia generativa in utroque sexu absolvuntur. Verum principium quoddam notitia imbutum ex dictis colligere velle, res mihi videtur valde difficilis & perplexa. Nam in vegetabilibus etiam, ex semine efformatio fit plantæ ejusdem speciei, quæ statim tempore producit flo-

res, fructus, & semina sua profert, ubi tamen minime rationale quoddam agens est supponendum. Quod autem in corporis nostri formatione cuncta tam justo temporis articulo observentur, id potius adstruit mechanismum. Quando enim agens in certa proportionem patienti applicatur, necesse est resultare certum & specificum effectum, certo etiam tempore. Inde etiam animadvertimus, quando proportio causarum, inter se agentium, in recensitis rebus non adest; tempus quoque & ordinem variare, hinc fit, ut interdum quarto vel etiam sexto mense percipiatur motus infantis in utero, quandoque septimo & octavo, interdum etiam decimo excludatur; in quibusdam infantibus dentes citius, in aliis tardius prorumpant, & homo unus præ altero citius ad generationem aptus, vel etiam ineptus rursus fiat.

§. XXII.

Tandem & illud mechanicam rationem agendi in corpore nostro infringere videtur, quod ad quosdam actus perversæ phantasie seu pravæ ratiocinationis, sicuti accidit in terrore, tristitia, nausea, iracundia, motus sanguinis vitales alterentur, suspendantur, vel augeantur, & excretionum œconomia pervertatur, subsequens læsionibus gravissimis. Huic dubio ut medeamur, in antecessum teneri velim, nos mechanismum perfectum & absolutum, qui causis necessario agentibus & certæ actioni adstrictis absolvitur, tantummodo in actionibus mere corporeis & involuntariis statuere, minime autem ubi concurrat anima rationalis in agendo. Certissimum enim hoc est, causas posse esse liberas, sive ad agendum indifferentes, quæ tamen si se determinant agere, effectum non alium nisi mechanicum producere possunt. Ita etiam anima nostra rationalis, tanquam substantia agens & intelligens, terreno corporis domicilio insidens, tantis facultatibus a Deo concessis gaudet, ut non tantum intelligat, verum etiam pro arbitrio suo, in certa corporis membra, sicuti apparet in motibus voluntariis, habeat imperium, quomodo id procedat & qualis sit nexus substantiæ immaterialis cum substantia corporea, iterum ignorantiam ingenue fatemur, & quidem eo consultius, quo minus accurate rationes alias non intelligibiles administramus. Gravissima tandem adhuc superest difficultas, quæ hic possit moveri, circa principium bestiarum corpora actuant, utrum nempe cum spontaneæ in ipsis plures conspiciantur actiones, omnia procedant ex mechanica dispositione. Fateor difficultatem hanc pressisse & torfisse a longo tempore etiam ingenia philosophorum præstantissima: non video tamen, quid absurdi statuatur, si corpori ipsarum pure mechanico, assignemus etiam principium quoddam immateriale, percipiens, & spontaneos motus efficere aptum. Videtur enim probabile, Deum condidisse non unum ordinem spirituum sed diversissimos, nobiliores ac ignobiliores, & quemadmodum anima nostra, ad imaginem ipsius Dei condita est, infinitis tamen modis ab ipso Deo superatur: ita etiam non inconveniēns videtur concludere, bestiarum animam ad imaginem ipsius animæ rationalis, quæ tamen innumeris modis ab ipsa differt & nobilior est, architectatam fuisse. Et sicuti Deus per verbum suum promisit, quod animas nostras integras & a corpore separatas, salvas servare, & corpus quoque in individuo resuscitare velit: ita talem promissionem nullibi habemus vel de anima, vel de corpore bestiarum, unde illas cum corporibus & mundo interire & morituras esse concludendum.

§. XXIII.

Hic itaque adductis & declaratis luculenter apparere arbitror, ad actiones voluntarias & automaticas in corpore nostro perficiendas non esse opus auxilio vel subsidio ullo substantiæ cujusdam cogitantis, vel moraliter aut libere agentis, utut non negemus animam quoque suas actiones in spiritus & consequenter in corpus, sicuti id patet ex animi vehementibus affectibus, habere. Et quoniam deprehendimus totam universi machinam, quæ artificiosissime ex globis majoribus, inorganicis impuris, nempe planetis constructa & tam apte disposita est, mediante interfuso agitativissimæ motionis fluido æthereo, regi ac gubernari, ut certo ordine ac tempore planetæ isti volvantur, tempestatum vicissitudines, diei ac noctis fiant, calor etiam ad fecundationem vegetabilium & vitam animalium sustentandam ubivis attemperatus sit, sine ullo ente cognitione sive intelligentia prædito, quod hos effectus immediate dirigat atque absolvat: ideo multo magis palpabile est, cum tota natura corporea ejusmodi substantia dirigente & operationes moderante careat, etiam machinas particulares viventes operationes suas mere corporeas exserere posse, sine hujusmodi substantia interna, in finem certum agendi, supposita tamen semper immensa Dei sapientia, quæ corpus ex variis partibus ita construxit, ut ex necessitate fabricæ certi effectus consequantur.

§. XXIV.

Postquam itaque nostram sententiam circa naturam humanam quatenus medeatur morbis, qua potuimus evidentiā deduximus, eaque a dubiis & difficultatibus, ut opinor, liberata, mentem nostram declaravimus; superest jam, ut ex dictis usum quoque medicum practicū eliciamus & ostendamus. Omnis enim medica theoria, nisi in praxi habeat usum, nullius momenti, sed vana ac sterilis est speculatio. Quamobrem Medicus practicus, qui felicem curationis suæ fructum atque eventum expectat, primo omnium debet probe nosse atque inquire naturam seu mechanismum individuale corporis ægotantis. Rectissime sapientissimus HIPPOCRATES *Lib. de loc. in hom.* naturam corporis artis medicæ principium appellavit. Hanc enim si Medicus exquisite noverit, v. g. ex ætate, temperamento, habitu corporis, dispositione parentum, victu, vitæ genere, actionibus consuetis, excretis, retentis, moribus, ingenii actionibus demonstrative ex causis mere necessariis physicis, non tantummodo ipsis hominibus prædicere ac prænunciare poterit, ad quos morbos sint proclives, quibus anni temporibus, tempestatum mutationibus sint futuri, quibus symptomatibus complicari, & qua ratione terminari soleant; insuper & periculum & morbi magnitudinem indicare, & quæ alimenta, quæ remedia, quæ diætæ, certæ naturæ ad conservandam sanitatem ipsamque amissam restituendam conferant, perspicere & scientificè demonstrare poterit. In eo itaque situs est totius nostræ medicinæ rationalis cardo, ut non tantum effectuum corporeorum in genere, quomodo a suis causis procedant & cum his cohæreant, notitiam habeamus, eamque physicam; sed speciatim frequenti experientia addiscamus, quomodo effectus certi, in sano ac morbofo statu contingentes, ex causis partim libere agentibus, partim mere physicis, corporeis, certis in individuis profluant & subsequantur. Quamobrem fundamentum medicinæ rationalis merito esse debet cognitio accurata mechanismi universalis: postea particularis seu humani & cujusvis individui.

§. XXV.


Intelligi ex dictis facillime poterit, quinam homo jam dicatur, uti vulgus loqui solet, robustæ vel imbecillis naturæ. *Robusta natura* nobis illa dicitur, ubi iusta proportio est inter movens & mobile, sive inter spiritus rectores & motores corporis nostri, & inter partes fluidas ac mobiles: ubi porro iusta est temperies & mixtio elementorum, sanguinem & humores constituentium, & ubi debita quoad magnitudinem, amplitudinem, numerum, configurationem, partium solidarum structura: contra *imbecillam naturam* vocamus, ubi hæc omnia non recte & secundum ordinem sese habent, & præcipue, ubi deficiunt vires motrices sive spiritus. Horum enim qui copiam habet, is naturæ robustæ nobis est, & vincere morbum facile poterit, & vice versa. Perspicuum quoque ex hisce est, quid veteres voluerint, cum Medicos naturæ ministros nuncuparunt. Passim enim HIPPOCRATES, naturam rite operantem imitari debere Medicum proclamat, quomodo autem imitari illam vult, vel ipsi servire, si illam non cognoscat, id est si non effectuum notitiam habeat ex causis suis ad minimum proximis: si ignoret, quomodo res externæ innumerales, aër, alimenta, medicamenta, venena agant in corpus, illudque bene vel male afficiant: quando nullam scientiam habet effectuum, qui fiunt a natura bonum vel malum in finem. Ex quibus patet quam necessaria sit ipsa scientia physica & anatomica, non exclusa experientia, quæ primas tenet semper & ubique in omnibus partibus. Unde merito concludimus, felicissimum & prudentissimum illum esse Medicum, qui novit agere convenienter cum natura, non contra ipsam: qui observat ordinem & tempora, quibus natura utitur, in curando vel expellendo morbo; qui porro perspicit, quinam motus naturæ sint salutes, completi, sufficientes, critici, & qui minime: & quinam porro sint temperandi, moderandi, cohibendi, vel stimulandi, aut promovendi: & qui per loca convenientia, consueta secundum naturæ ductum expellere causam morbificam, novit. Multum etiam refert, Medicum peritum scire, a quibus causis ortus fuerit morbus, utrum a materiæ quantitate vel qualitate peccante, an potius ex solo motu vitioso, sicuti in animi pathematibus accidit & perversæ imaginationis viribus. Hæc enim si nescit in inveniendis vel applicandis remediis, etiam sine suo & scopo penitus frustratur.

§. XXVI.

Et ita jam clarissime apparere arbitror, totam medicinam esse mechanicam, sive principiis mere mechanicis esse superstructam, tam quoad affectus in statu naturali & præternaturali contingentes, quam quoad medicamentorum efficaciam, modum agendi & operandi. Et sicuti principia mechanica sunt duo, materia & motus; ita tantum ipse Medicus versari debet circa materiam & motum, illam variis remediis ex fonte chirurgico, diætetico & pharmaceutico desumptis alterando, immutando, imminuendo, augendo; & motus vel promovendo vel temperando: nam omnis remediorum vis in eo collocata est, ut vel materiam vel motum in corpore nostro afficiat. Et utut non semper cognitio scientifica causarum, quomodo hic vel ille effectus resultet, in sanatione morborum, intellectui satisficiat & perspicua sit: interim explicandi difficultas, ut sæpius diximus, non sufficit ad res rejiciendas. Existimamus itaque, ex hujusmodi principiis junctis cum accurata, attenta & solida experientia & observatione rerum, quæ

quæ facti & effecti sunt, pathologiam medicam condi ac stabiliri posse meliorem, certiorẽ & magis rationalem, quam hætenus habuimus. Utinam omnes, omnibus nervis omnique animo ac labore in id incumberent, sine hac autem via ac methodo non

potest non omnis cognitio morborum & curationum esse confusa, obscura, vagabunda, fallax & laboriosa. Sed hæc jam in hac materia difficillima sufficiant. DEO autem optimo maximo gratias persolvimus & persolvemus æternas.



DISSERTATIO MEDICA

D E

NATURA OPTIMA

FEBRIUM PESTILENTIUM MEDICATRICE.

Primum edita Anno 1713.

§. I.



QUOD si usquam magni nostri HIPPOCRATIS, aliorumque præstantiorum veterum Medicorum sapientissimum dictum *Naturam esse optimam morborum medicatricem* locum invenit, & meretur commendari: certe id accidit, quoties perniciosæ, contagio infestæ, vitæque admodum infestæ febres grassantur. Parum in hisce Medicum suis panaceis, antidotis, bezoardicis & maximopere laudatis alexipharmacis efficere quotidiana, prohi dolor! optima rerum magistra, confirmat experientia. Quis enim gloriari potest, inter tam numerosa adversus pestem laudata remedia vel unum saltem probatum ac perspectum proflare, quod certo cum corpora a maligna hac lue præservet, tum ipsam profliget; Observatum potius est, quæ adhuc commendantur a Medicis, alexipharmaca & spem deslituere & fidem suam penitus amisisse, adeo, ut plures adhibitis medicamentis, quam sine illis, moriantur. Attamen datur utique magnum auxilium & præstantissima adversus hos summi periculi morbos medicina, quam pauci Medicorum capiunt & intelligunt. Et hæc est sapientissima corporis nostri structura, & ab ea dependens solidarum ac fluidarum partium motus, optimus ad conservandum corpus & ægrum restituendum magister, quem Veteres, qui ejus effectum, minime vero ejus formalem causam perspiciebant, Naturam appellabant. Hæc, quo periculosior est morbus, quod mirum videtur, eo magis virtutem suam a contagio corpus defendendo & ab interitu illud vindicando ostendit, & plus præstat, quam omnis ars Medici, quæ magis ad chronicas, quam acutas passiones profligandas comparata est. Hæc enim sæpe sola, sine Medicis & eorum medicamentis sanat pestem, malignasque febres, & feliciori successu id facit, ac si copia remediorum a Medico fuissent impugnata. Rectissime itaque scribit SANCTORIUS in *Medicina statica, Sect. prima, §. 139. Nobilium fere nemo cum remediis, plebei vero sine iis plures sanantur: & addit rationem in aphorismo sequenti, quia utuntur remedio interno pro peste, cum tamen*

nullum detur, quod non noceat. Hisce clarissimus hic Medicus innuit, naturam præstantiorem esse arte in ipsa peste sananda, & remedia usitata, quæ ipsi opponi solent, plus nocere quam prodesse. Cujus suffragio & nos accedimus, & in ea sumus sententia, Naturam suis motibus, quibus corpus tuetur, præcipuum in curandis malignis & acutis febribus ferre punctum, & remedia alexipharmaca, quæ contra hanc malignitatem mirifice vulgo laudantur ac usurpantur, plus exitii, quam salutis, afferre. At vero quum non omnis Natura sanet pestem, malignasque febres, neque omnia auxilia, quæ naturam adjuvare debent, removenda sint: hinc eximia certe emergit quæstio, quænam natura sive corporis dispositio sanandis perniciosis febribus idonea sit, quæ vero minus idonea, & quænam remediorum genera hoc in negotio naturæ possint esse auxilio, & quænam ipsi contraria sint? Quem laborem ac disquisitionem annuente Divina gratia in præsentia hac inaugurali dissertatione suscipere nobiscum constituimus.

§. II.

Prius vero, quam in utilissimam hujus argumenti tractationem ulterius penetremus, opus est, ut paucis saltem, quid per naturam indigemus, exponamus. Neutiquam vero secundum Veterum sententiam, qui scientiæ naturalis, præsertim de corpore nostro, maximè rudes & expertes erant, divinam quandam atque occultam vim, eorum, quæ in corpore sint & fiant, omnisciam, & quæ prudenter omnia gubernet ac dirigat, intelligimus: eo quod talis rei vel substantiæ existentia omnem humanum intellectum vel conceptum exsuperat, sed potius per naturam medice intelligimus sapientissimum illud Dei in corporis nostri structura artificium, quo omnes partes fluidæ æque ac solidæ, mirabili ordine ac nexu dispositæ atque constructæ sunt, ut motus fiant certo tempore, mensura, loco, numero ac ordine, ad conservationem machinæ corruptibilis tendentes, idque ex causis mere physicis & necessariis. Principalis vero scopus est fluidorum perpetuus circulus, quo mediante utiles & corpori amicæ partes retinentur, & superfluæ atque alienæ excernuntur. Hæc enim ratione corporis nostri vi-

ta maxime conservatur, quæ sine ingestionibus egestionibusque, & humorum perenni progressu persistere haud possit. Quando itaque, natura dicitur mederi morbis, hoc ita interpretandum est, sanguinis & humorum circulum, qui debito pulsu ac tono partium solidarum, & convenienti fluidarum copia ac temperie sit, ejus esse indolis, ut morbi causam, sive quantitate, sive intemperie & motu peccet, vel resolvendo, vel emendando, aut expellendo a corpore removeat, & sic morbum propulset.

§. III.

Quicquid itaque agit natura in sanando, id agit motu tam intestino, quam locali, tam secretorio quam excretorio. Hi motus sunt instrumenta, imo remedia naturæ, qui si bene procedunt, valida: sin minus recte & prompte fiunt, imbellis & minus valens dicuntur natura. Quum vero valens natura, ut recte SEIDELIUS *lib. de morbis incurabilibus*, p. 64. observat, morborum sit medicatrix, non valens vero non possit malo par esse; hinc in quonam vis & robur naturæ, ejusque imbecillitas consistat, & quæ eam aut robovent, aut debilitent, auxilia, præsentis in negotio maxime opus est, ut inquireamus.

§. IV.

Per valentem itaque naturam, quæ morbo profligando idonea est, intelligimus, talem corporis structuram, in quo fibræ cordis, arteriarum, & motrices musculorum tensæ sunt, debitoque pulsu, tono, ac elatere vel fluido elastico, quod Veteres impetum faciens, Recentiores spiritum vocant, animatae sunt. Deinde benignam & validam naturam vocamus, quando in corpore vasa satis sunt capacia, meatus patuli & ampli, quo expeditior per hos ipsos progressio fiat fluidorum, atque excrementorum propulsio. Imbecillis vero & languida propulsando morbo minus idonea nobis est ea corporis structura in qua sunt fibræ motrices valde spongiosæ laxiusque cohærent, fluidum spirituosum deficit, copiosa denique & exilia vasa sunt, quæ sanguinem vehunt, & humores secernunt, atque excernunt. Talismodi corpora ordinarie plus ægrotant, & cum majori periculo decumbunt, citiusque moriuntur, quam ubi fibræ sunt robustæ, & vasa corporis ampliora. Inde fit, ut sicuti perite scribit HIPPOCRATES *Sectione II. §. 44. crassi admodum secundum naturam magis cito moriuntur, quam graciles*, qui ordinaria vasorum capacitate gaudent, fibræque musculorum valde tensas atque sensibiles obtinent.

§. V.

Hiscæ perspectis nil dubii est, quin ea natura in persanandis malignis & contagiosis febribus melior & validior sit, ubi in corpore promptissime motus succedunt, quod fit magis in ætate virili, sexu nobiliori, & in temperamento sic dicto cholerico, sanguineo-cholerico, & cholerico-melancholico; quam ubi vires motrices elanguescunt, excretiones sunt segniores & difficilior sanguinis progressio est, id quod in infantibus, pueris, mulieribus præsertim gravidis, & ubi menses non bene succedunt, deinde sanguine plenis & temperamento sic dicto sanguineo & phlegmatico & habitu corporis spongioso subinde contingit; qui omnes & facilius acutis passionibus sunt expositi & periculosius decumbunt.

§. VI.

Proximum jam est, ut eorum, quæ naturam roborandi, eandemque debilitandi facultate gaudeant, cognitionem habeamus: ut, quid tempore grassan-

tium pernicialium passionum conducat, & quid noceat, intelligamus. Jam vero nullum aliud tam potenter & celeriter regulares naturæ motus, æquabilem fluidorum progressum, solidarum moderatum impulsu ac tonum, neque minus secretionum atque excretionum negotium turbat, pervertit & naturam inidoneam ad morbos sanandos reddit, quam vehemens animi commotio, qualis visitur in gravi terrore, metu, magna & diuturna tristitia & fortiori de præsentis malo imaginatione. Noto notius est, has animi perturbationes, si morbos præcedunt, vel iis sociantur, plane eos reddere immedicabiles. Notissimum porro est, his solis corpora sævissimis & lethalibus symptomatibus sæpenumero sine accessu ullius noxiæ materialis causæ, graviter corripit. Periculosissime itaque in pestifero malo terror vehemens, & mortis miseræ cum anxietate metus, neque minus ob cognatorum mortem diuturnus mœror, affligit corpora nostra, viresque perfundat, quo minus postea prompte succurrere & malo mederi possint. Neque dubium est, quin terror contagioso tempore magis noceat, & plures interimat homines, quam ipsa contagii vehementia: & videtur in eo maxime posita esse divinæ poenæ atque vindictæ magnitudo, quod tam pernicioso imo in se pestilenti terrore miseri peccatores corripiuntur. Benignissimi itaque Dei beneficium est, si quis eo tempore, quo grassatur maligna lues, fortis, constantis, tranquillæ, ac metus expertis sit animi; quem piis, voluntati suæ obedientibus, & qui saluberrimis moralibus præceptis, & verbi divini assidua meditatione mentem imbuunt atque perficiunt, elargitur.

§. VII.

Deinceps corporis nostri naturam plura alia enervant ac debilitant, quo minus vincendo morbo par atque idonea esse possit. Ex horum vero censu inter alia sunt, quæ vires prosterunt, & minus laudabiles venis ingenerant succos, quæ excretiones retardant & multas in ventriculo cruditates congerunt; qualia sunt immodica venus, crapula, vappidus, putridus & minus perflabilis aer, cibus digestionem refractarius, præsertim post gravem animi motum sumptus, aqua porro impura, intemperantia, diuturna vigilia, fames, nimium otium, profundior meditatio, nimius porcinarum carniū & facile corruptibilium comestio, quæ omnia ejus sunt indolis, ut cum semper, tum maxime contagioso tempore noceant. Siquidem hæc omnia ita sunt comparata, ut partim vires corporis, quibus vita & motus vitales consistunt, imminuant, partim impuros & corruptibiles succos in universo corpore colligant, qui putredini, qua unice agit pestilens contagium, & propagandæ & augendæ quam maxime sunt idonei. Contra vero temperantia, purus, serenus & ventis agitatus aer, boni succi alimenta, potus laudabilis, & qui facile transit, conveniens motus, moderata venus, mens tranquilla, debita per alvum & perspirationem excretio, opportunissima sunt ad validam reddendam naturam & morbum profligandum auxilia. Non vero datur præstantius, quod naturam ejusque vires firmet, remedium, & quod perinde malignitati adversetur, quam vinum, non quodvis tamen & promiscue adreptum, sed spirituosum acidulum, quale est excellens Rhenanum. Hoc moderatius sumptum vires mirifice reficit, torpentemque metu animum excitat, timorem expellit, digestionem adjuvat, excretionem promovet, & hinc optimum est naturæ debiliori præsidium. Deinceps singulari modo resistit putredini, dum subtili ac spirituosum, quo pollet, acore fibras ad motum excitat.

Cum

Cum enim omne acidum putredini resistit, tum etiam specificè acidum, quod vino inest, subtile putridum miasma figit atque coercescit. Nihil enim stagnanti in vasis & putrescenti sanguini in contusionibus & metu sphacelationis magis adversum est, quam bonum & laudatissimum vinum: Nihilque putridos morbos, vermiumque generationem a corpore feliciter arcescit eodem vino. Unde etiam in omni peste & malignis morbis vinum, præsertim præservandi causa adhibitum, semper salutis fuisse, omnes, qui huic calamitati interfuerunt, dudum observarunt.

§. VIII.

Hicce jam præsidii instructa natura utique vincendo etiam malignissimo morbo sola sæpius sufficit. Nihilominus tamen, quænam auxilia in sanando naturæ succurrant, & quod regimen in morbo servari debeat, inquisitione perquam dignum est. Primo vero ex omnium remediorum generibus noxia, & quæ naturam, optimam medicatricem debilitant, ejusque laudabiles motus turbant, & pervertunt, proponemus. At vero ipsa natura in peste optime docet, quid agere quidve omittere deceat. Indubitata enim est experientia, quam fere omni tempore, & nuper etiam grassantes pestes confirmant, hæmorrhagias omnes, nimias vomitiones, diarrhoeas, ventrisque tormina, pessimum imò funestum præbere signum, præsertim inter initia accidunt. Hæc vero Medicum docent atque admonent, ab omnibus sanguinis missionibus, nisi præservandi causa suadeantur, a purgantibus fortioribus, ab ipsis quoque emeticis penitus esse abstinendum. Etenim miasma malignum, operationem suam maxime exercet in ventriculo, ad quem primum cum salivali latice tanquam vehiculo congruo descendit, ibique more omnium venenorum vel inflammationem vel sphacelationem minatur. Jam vero satis superque constat, & *Dissertatione quoque de Medicamentis inscure* a Dno Præsidente demonstratum est, omnia emetica & purgantia aciora, ventriculum & intestina lædere, eaque facile ad inflammationem disponere: Tacemus, quod nimia evacuationes vires exauriant. Sanguinem etiam mittere intutum est, quandoquidem id non modo vires debilitat, sed & perspirationem minuit, qua tamen id, quod naturæ insensum est, exhalari & expelli oportet. Quare non sine ratione omnes, qui perite & docte observationes de peste memoriæ prodiderunt, venæ sectionem, purgationem & emetica veluti ex compacto damnant. Qua de re legi meretur DN. PRÆSES in *Dissertatione medica de Peste ejusdemque curandæ ratione*. Monendum tamen hoc loco duximus, emeticum leniens & refracta dosi cum alexipharmacis datum, si quando miasma intra ventriculum, magnas & corruptibiles cruditates, quæ fomentum insigne miasmatis præbent, offenderit, protinus sub prima invasione propinatum, magnum esse præsidium, quod progressui morbi non potest non esse valde exitiosum. Neque de lenientibus, temperatis & balsamicis, quorum usus in præservando ingens est, hæc ipsa, quæ diximus, intelligenda sunt. Nam hæc evectis e primis viis cruditatibus succumbenti naturæ robur potius addunt, cum quibus tamen sub infectionem morbi, exceptis iis, quæ per inferiorem partem injiciuntur, cautissime mercandum est.

§. IX.

Uterius benigna corporis nostri natura monstrat medentibus viam, cui ipsi, si intentione & scopo suo potiri velint, etiam insistere debeant. Ipsa enim natura si sola curat; non saltu, non repente, vel

cum violentia, sed successive, gradatim ac suo tempore, & maxime per lenem diaphoresin & perspirationem id præstat, qua vel insensibiliter corruptum e corpore expellit vel sensibiliter ad habitum corporis illud dimittit, & eo ipso interiores & nobiliores partes a veneno liberat. Ex quo patet, quam imprudenter illi Medici agant, qui cum violentia quadam, simul & semel adhibitis fortioribus & calidioribus expellentibus, sudoriferis & sic dictis alexipharmacis, morbum superare & virulentum, quod intus est, expellere conantur, eumque in finem, spiritus volatiles urinosos, & cornu cervi, viperarum, fuliginis, eorumque salia volatilia, item balsamum sulphuris, Oleum succini, juniperi, camphoram, radices angelicæ, zedoariæ, petasitidis, enulæ, levistici, contrayervæ, serpentariæ virginianæ, & ex iis paratos Spiritus, pulveres, essentias in usum frequentem trahunt: qui error est omnium pestilentissimus. Tantum enim abest, ut hisce calidioribus, quæ fervidam commotionem sanguinis augent, noxium expellatur, ut potius & retineatur iisdem, & altius partibus vitalibus insinuetur: quare vires magis debilitantur, major quoque præcordiorum fit anxietas, iniquies & ad internas inflammationes ipsumque delirium dispositio. Accedit, quod ubi miasma malignum adhuc in ventriculo moratur, sudoriferorum vi facilius & cum impetu in sanguinem, inque corporis intimiora transfertur. Præterea, perpetua naturæ lex est, secretionem, quæ præcedunt excretionem inutilium in corpore partium, melius sub liberiori & moderatiori sanguinis ad emunctoria appulsu succedere, quam ubi est frequens & celer ejusdem commotio. Quare etiam videmus, ea, quæ motus effrenes, ubi expelli aliquid debet, quodammodo cohibent, remedia, accommodatissima esse. Atque adeo omnia calidiora, pellentia, in medendo malignis contagiosisque febribus non modo fallere spem, de eorum virtute conceptam, sed periculosius etiam nocere, & faces furenti intra præcordia malo subicere, non difficile erit multis observationibus asseverare. Suffecerit saltem in testimonium citare peritissimos viros, ut CALDERA DE HEREDIA de *Peste Hispalensi*, & HILDANUM, de *Peste Bernensi*, Cent. V. *Observat.* 5. & qui inprimis commendandus videtur, THONERUS, qui plurimis observationibus adstruere satagit, omnes peste absumptos fuisse, qui alexipharmacis calidioribus usi sint. Vide potissimum lib. I. p. 64. Id quod etiam UNTZERUS de *peste* confirmat. Frequenti quoque observatione a Dno Præsidente notatum est, in omni maligna grassante lue, exempli causa, petechiis, purpura, dysenteria, item variolis mali moris, omnia sic dicta alexipharmaca, vel calida expellentia, theriaca, essentias alexipharmacas, plus detrimenti, quam emolumenti attulisse. Nam quo gravior & malignior morbus est, eo leniori ac tranquilliori modo vult tractari, ut pote putredo, in qua malignitatis natura residet, aucto intestino præcalido motu vires eripit & sic multiplicatur & ulterius serpit. Et hæc quoque est ratio, quare omne externum nimis calidum regimen, ratione sive lecti, sive conclavis, in omnibus id genus morbis diligenter fugiendum sit. Laudatur magis temperatus lecti & hypocausti calor, qui longe feliciter exclusioni halitusarum per cutis corticem sordium, quam immodicus fervor velificatur. Sicuti autem nimius calor laudabilem diaphoresin impedit; ita etiam ingens frigus occludendo & constringendo cutis extrema, tam utilem, inque hoc morbo pernecessariam perspirationem non sine periculo retardat. Unde aerem, frigidum præsertim & humidum evitare in hujus generis morbis utilissimum est.

§. X.

§. X.

Deveniendum nunc est ad ea, quæ nimium sedant, & istunt motus, qui tamen custodes & defensores vitæ & sanitatis esse debent. Nam in motu est vita, in quiete autem mors. Motus enim defendit a putredine & interitu corpora, quem ejus inertia & defectus causatur. Sicuti vero nimia intensio motus, ita etiam ejusdem nimia remissio & neglectus in sanando perniciosus est. Quare opiata, anodyna, adstringentia nimis, refrigerantia, nitrosa etiam majori dosi oblata, quanta potest fieri cautione & prudentia, usurpanda sunt.

§. XI.

Nil jam reliquum est, quam ut genuinam viam ac methodum, qua pestiferæ & contagio infestæ febres tractari debeant, sincerius exponamus. Placet vero exordium capere a præservatione, quando cum infectis conversamur, ne miasma pestiferum succos vitales subeat, & ne salivales intra primas vias stagnantes humores, ejus genium, quod facile fit, trahant. Commendamus hunc in finem frequentes oris, cum aceto vini, vel vino, quod subtile acidum fovet, colluvionem, vel etiam in nares attractionem: Efficacia major erit, si scordio, ruta, vel corricibus citri fuerit imbutum. Videtur enim acidum genuina miasmatis, putridæ & sulphuræ indolis, antidotus, quum omnia acida sulphur & sal volatile figere ac enervare, ex chymica mechanica constet. Quare longe tutius est, acida degustare, vel in ore detinere, si cum infectis versamur, quam calidiora, ut radicem zedoariæ, angelicæ, ostrutii, masticare, siquidem hæc, prima quasi sub herba, vim veneni infringunt. Convenit quoque eo tempore, vel vinum rhenanum, vel aceti bezoardici aliquot cochlearia, cum aqua vel vino diluti assumere. Turcæ tempore pestis, quæ in orientalibus quibusdam locis fere endemia est, ut COLE libro de morbis acutis, pag. 88. refert, frequentius utuntur succo limonum quem liberaliter omni juscule instillant. Quod confirmat FORESTUS, qui se ipsum hac Medicina contra pestem muniebat. Ego, inquit, cum grassante peste nusquam trepide plenus civium studio me conferrem, illis potissimum auxiliis, ac potissimum mali citrei putamine succulento dentibus attrito me munire soleo. Et hujus quidem pomi virtutem contra venenum passim vetustissimi autores prædicarunt, unde & VIRGILIUS canit. Georg. lib. 2. v. 126.

*Media fert tristes succos tardumque saporem,
Felicis mali; quo non præsentius ullum,
Pocula si quando sævæ infecere novercæ,
Miscueruntque herbas, & non innoxia verba,
Auxilium venit; ac membris agit atra venena,
Flos ad prima tenax, animas & olentia Medi
Ora fovent illo, & senibus medicantur anhelis.*

Conducit præterea, si metus est infectionis, nunquam salivam deglutire, sed semper exspuere, cum pestiferum miasma beneficio aeris circumfusi, intra os acceptum, salivæ admisceatur, & cum ea in ventriculum descendat. Hac ratione factum, ut plures, sicut nobilis Bohæmiæ Medicus: DORSENSKY refert, servati fuerint. Præter hæc aerem, si in vicinia morbus pestifer est, condire præstat evaporatione aceti, fumo sulphuris, succini, vel pulveris pyrii accensione, aut admissio vento orientali, vel septentrionali, qui domum & ejus conclavia bene expurgant. Siquidem flantibus ventis meridionalibus & Zephyro ordinario contagium vehementius

Frid. Hoffmanni Oper. Supplem. II.

serpit, ac si sereni venti atmosphæram nostram perstringunt. Quia illi effluvia concentrant, quod venatores optime intelligunt, hi vero resolvunt ea, ac dissipant. Cæterum ut præparemus & præserve-mus corpora, quo minus contagium facile recipi, vel potentiam suam exerere possit, alexipharmacorum etiam calidiorum usum non penitus improbamus: præsertim ubi nimia feri copia, tempestas diuturna, australis & humida, aut habitus corporis laxior, vita otiosa, internam quandam humorum corruptelam minatur, quo casu sic dictæ alexipharmacæ radices, aliaque balsamica præsertim myrrhata, succinata, juniperina optime conveniunt: ex quibus laudanda Elixir proprietatis sine acido, Elixir balsamicum Excellent. Du. Præsidis, ejusque balsamum liquidum sic dictum vitæ, utpote quæ egregie sanguinis & humorum massam a plurimis excrementitiis & corruptibilibus partibus liberant atque vindicant. Nihil enim transpiratione auctiori ad avertendam internam humorum corruptionem, quæ mirifice contagii propagationi & vehementiæ velificatur, utilius est.

§. XII.

His perspectis deveniendum est ad ea, quæ corporibus ubi jam infecta fuerint proficua judicantur. Quemadmodum vero, ut supra diximus, vehemens qui mentem infectorum percellere solet, mox ab invasione terror, ipso veneno perniciosior est: ita maximopere opera danda, ut remediis convenientibus pravum ejus effectum avertamus. Opportunissimum vero tali in casu est, analeptica cum nervinis & resolventibus æque ac diaphoreticis propinare, injuncto simul blando in lecto sudore. Commendamus hunc in finem aquam liliorum convallium cum & sine vino, melissæ, florum sambuci, ceraforum nigrorum, acetum destillatum, lapides cancrorum, pulverem Marchionis, cinnabarina, mixturam simplicem, ex quibus confici potest mixtura. Utilissima quoque erit temperata quædam essentia alexipharmaca, cum spiritu vitrioli, vel cum spiritu anodyno, qualis est Præsidis, acuata, quæ præterquam quod resolvit, & diaphoresin promovet, & spasms internarum partium præsidio est. Ceterum inter initia mali tinctura bezoardica correctæ, qualem descripsit DN. PRÆSES in Dissertatione de Medicamentis selectis, vel acetum quoddam bezoardicum theriacale, aut acetum vini destillatum, cum drachma una lapidum cancrorum ex vino propinatum expectando simul sudorem, erit proficua. Si enim ullo in morbo occasio agendi præceps est, certe est in pestilentialibus febribus, ubi dilatio insignis affert periculum. Occasio enim medendi curationis anima recte dicitur, & sæpe est momentanea & captu difficilis, qua elapsa inclinatio fit in deterius.

§. XIII.

Prodest itaque quam maxime inter initia strenuum remedium diaphoretico-resolvens & analepticum apponere, & dosin aliquoties repetere: hac tamen injecta cautela, ne nimis corpus ad sudorem cogatur, sed blanda magis diaphoresis expectetur. Et quoniam acida subtiliora, bezoardicis vel alexipharmacis juncta, longe promptius sanguinem a centro ad circumferentiam movent, & coagulatos humores discutunt & resolvunt, quam bezoardica volatilia & calidiora, hinc eorum usus sit commendatissimus. Quemadmodum enim acida præservat-ionis causa magni æstumantur; ita etiam in cura præcipuum punctum ferunt, cum omnes quoque peritiores ea in peste non satis laudare possint. Nota-

Bbb

bile

bile est, quod scribit THONERUS in *Observationibus* p. 21. nil profuisse in peste, præter acetum theriacale inter initia ad eliciendos sudores datum, eodemque remedio anno 1643. grassante inter milites febre maligna totam gregariorum cohortem servatam fuisse; convalescentibus quippe omnibus, quotquot tempestive eodem aceto utebantur, exceptis paucis, quibus serius a chirurgo oblatum fuit. De ipsa quoque acetum virtute KIRCHERUS *lib. de peste*, p. 375. manifesto testatur, Romana dominante peste, quotquot illo usi fuerint, quamvis etiam cum infectis intra easdem ades morarentur, pestem evasisse. Componebatur autem hoc medicamentum ex speciebus domesticis, uti sunt acetum exquisitissimum, ruta, radix pimpinellæ, betonica, allium, baccae juniperi, addito pauxillo camphoræ, quæ per infusionem in aceto, 40. horarum spatio digesta, ad solem vel intra hypocaustum, percolentur & ad usum reponantur. Propter acetum præcipuum ingrediens aqua Sylvii prophylactica magni semper æstimata fuit in morbis malignis ipsaque peste. GESNERUS *lib. III. Epistol. 87.* omnia alexipharmaca ex vino, cui admixtum sit acetum, ut assumantur, consulit. Hæc acida alexipharmacis mixta, primo maxime die, ubi resolutione & sudore opus est, conveniunt. Recte enim MINDERERUS asserit, nisi intra 24. horas ab invasione alexiteria exhibeantur, omnia medica præsidia fore irrita.

§. XIV.

Ceterum acida & terrea fixiora, nec non humectantia diluentia sunt sola & unica remedia, quibus transigi debet omne reliquum curationis tempus. Profecto omnes, qui ex praxi & experientia aliquid prodiderunt de peste, in eo consentiunt, quod acida & terrea præsentissima sint dictis in morbis efficaciam. Ita FRACASTORIUS *de morbis contagiosis lib. III. p. 246.* sequens commendat: Recipe succi acetosellæ uncias duas; succi citri, unciam unam; diascordii Fracastorii drachmam unam, specierum cordialium scrupulos duos; acetum unciam unam; ad præservationem & curationem. MINDERERUS, nulla, inquit, *C. XV. de peste*, est putredo, nulla infectio, quam non superat, nulla humorum depravatio, quæ per acida non superetur. Sane ut liberrime loquar, si mihi vitriolicorum medicamentorum usus vel interdiceretur, ego ad curationem pestis nunquam, vel certe inermis accederem. FONSECA *de vera ratione curandi pestem* ita scribit: Joh. Crato, Augenus de Monte Sancto, Martin. Rulandus & alii in febribus pestilentialibus spiritum vitrioli summopere prodesse testantur, & ego id testari ingenue possum, non modo cum syrupis, sed etiam cum conserva rosarum mixtum felici cum successu eum exhibuisse. Ex terreis vero & bezoardicis fixioribus singulari virtute fulgent antimonium diaphoreticum, bezoardicum minerale, lapides cancrorum, cornu cervi ustum, cornu cervi philosophice præparatum, mater perlarum, succinum, terra sigillata, bolus armenia, cinnabarina. Bolum armenia GALENUS *lib. IX. de Simplic. Medicament. Facult. c. 6.* in peste mirifice commendat, dum prodit, in peste quæ Thucydidis memoria grassabatur, quotquot bolum armenia assumere, celeriter eos esse curatos. At quibus non profuit, omnes interiire: scilicet, cum

nec alio quovis curarentur; unde colligitur, quod iis tantum non fuerit auxilio, qui plane erant incurabiles. Bibitur, autem ex vino albo; consistentia tenui, modice diluto, si aut plane febre careat, aut leviter ea teneatur. Ex humectantibus decocta hordei, avenæ, scorzonera, rasura cornu cervi, pro potu erunt commendatissima. Sique roborandum est, aquæ confortativa augustana, florum aurantiorum, rosarum, melissæ, liliorum convallium, cerasorum nigrorum mixturis adjici possunt.

§. XV.

Ultimo loco & ea subjienda esse arbitror, quæ symptomatum exacerbationi dicata sunt. Inter hæc vero gravissima sunt inflammationes tam ventriculi & intestinorum, quam laryngis & œsophagi, item membranarum cerebri. Nihil vero præter jam dicta diaphoretica magis hisce resistit, quam nitrum, cui pauxillum camphoræ adjectum fuerit: illudque vel solum, vel bezoardicis mixtum exhiberi potest. Hoc medicamentum potenter æstum mitigat, delirium & anginam discutit, & furentes spasmos consopit. PABACELSIUS ad sedandum internum ardorem in peste præscribit nitrum hac ratione adhibendum: Recipe salis petrae drachmam semis, aquæ puræ mensuram unam, pro potu ordinario; discutit etiam anginam, & sedat sitim: ideoque hanc aquam mirifice extollit KORNHAUERUS in febribus putridis & a verminibus ortis. Idem nitrum par Nobilissimorum Medicorum ROGERUS & RIVERIUS, ille in peste, hic etiam in aliis malignis morbis passim laudat, manifesto argumento, huic medicamento in acutis morbis plurimum esse tribuendum. Hisce remediis merito quoque externa adjicienda sunt, ut in phrenitide & ubi sopor adest in malignis febribus: Recipe acetum uncias tres, nitri unciam unam, camphoræ grana duodecim, quod epithema fronti & temporibus applicetur.

§. XVI.

In diarrhoeis, quibus interdum morbus feliciter finitur, cave ab omnibus opiat, theriacalibus & adstringentibus: Profunt magis pulveres temperati & temperantes. Exterius si necessitas urget Balsamum vitæ D. Præsidis, vel oleum menthae destillatum, aut sacculum herbis aromaticis, roborantibus, in vino coctis repletum calide applicare convenit. Si vero in principio, quod pessimum semper signum est, vomitus & diarrhoea infestat, essentia bezoardica cum liquore anodyno minerali Dn. Præsidis in moderata dosi, nec non fixioribus bezoardicis utendum est. Exterius vero cataplasma, quod fit ex fermento panis, absynthio, mentha, nucifera, caryophyllis, baccis juniperi, aceto vini & spiritu vini, calidè ventriculo applicatum, effectus est præstantissimus. Si bubones & anthroces adsunt, emplastra emollientia, cataplasmata maturantia, & unguentum quod componitur ex croco, terebinthina, & sevo hircino, omnia facile externa exsuperant. Cetera prudentiæ Medici sunt relinquenda, qui semper in contagiosis malis eo respiciat, ut nunquam motus, & vires naturæ supprimat, neque etiam eosdem nimis intendat, sed potius, si immodici sint, temperet, sin vero torpent & inertes sunt, ac si quid expellendum est, promoveat & maxime tempora & dies criticos cum natura probe observet.

DISSERTATIO MEDICA

D E

EYKAIPIA PRAXEOS
MEDICÆ.*Primum edita Anno 1724.*

PROOEMIUM.

INTER salutaria illa ac celebria septem Græciæ sapientum apophthegmata primas merito tenet insigne istud, quod PITTACO adscribitur: *Καὶ ἐν γὰρ τῷ, occasionem cognosce.* Quo ipso præcipitur, ut mortales in eo defigant cogitationes omnemque navent operam, quo omnes, quas moliuntur, quarumque exoptatum finem desiderant, actiones temporis opportuno respondeant. Ea namque a sapientissimo Creatore posita est rerum naturalium coordinatio, qua omnes in hoc universo res ad certas statasque temporum vices suos nanciscuntur ortus, sua incrementa, suas *ἀνμὰς*, sua denique decrements; & uno ut dicam verbo, perpetuas & virium & ceterarum qualitatum vicissitudines, atque alternos status subeunt, & hoc maxime non tantum ratione sui ipsius, sed & respectu destinatae utilitatis rerum aliarum vicinarum & circumjacentium. Hic enim semper unius corruptio est alterius generatio: hic manus lavat manum. Dum nempe res secundum diversa temporum momenta diversas acquirunt aptitudines, tunc iisdem sibi invicem inserviunt, ac in suo esse & promovent & conservant, & occasionem, ad hanc vel illam mutationem subeundam, magis pronam sibi subministrant. Ista, inquam, corporum naturalium harmonia temporaria & visu & consideratu omnium est jucundissima. Agnovit illam dudum sapientissimus SALOMO, qui omnia stato tempore fieri & solere & deberi, & arreptis quasi ex hujus alternatione provenientibus occasionibus, tandem fixam & propositam suæ quoque mutationis metam attingere, affirmavit. Ecquis non videt, quam peculiariter corpora hujus mundi non solum certis periodis certas subeant alterationes, sed & ad hasce facilius exsequendas certa temporis momenta & futura anxie expectent, & præsentia avide arripiant. Longum nimis foret hujus rei multa allegare exempla, suffecerit unius meminisse, & illius quidem ipsa sacrorum oraculorum auctoritate suffulti, a divino nempe Propheta allati, qui avium exemplo docuit quam scite illæ temporis opportunitati invigilare studeant, & præcipue græves & ciconiæ suo præcise tempore, eoque apto, loci mutationes suscipere sciant, & hoc ipso humanum genus, occasione servire sæpius nescium, pudore suffundant. Quum itaque omnes, quæ oculos nostros subeunt, res creatæ tam studiosæ quasi, tam pronæ, tamque faciles sint ad sua quæque suis propositis magis faventia temporis momenta apprehendenda, cunctaque examussim debito loco, congruo tempore atque concinno ordine exsequi soleant; majori hinc industria homo, cui rationalis anima & liberum arbitrium concessum fuit, opportunitati temporis custodiendæ vires intendere, debitoque actionum modo servando operam insumere debet omnem. Nulla enim actio vel moralis vel physica potest suscipi, quæ non ad exoptatum finem obtinendum omnino requiratur, ut *tempore fiat debito.* Omnium verò maxime hoc alta ut reponatur mente necesse est in arte salutari, ubi maxima occasionis vis est. Sed hoc opus, hic labor! hic præcipue exercentur hominum curæ, hic habent, de quo animum sollicitent omnes. Operæ hinc pretium duximus præsentis tractatione considerationem EYKAIPIA PRAXEOS MEDICÆ suscipere, ubi opportunitatem temporis in methodo medendi maxime necessariam trademus, non quidem secundum conjecturas, sed secundum attentiorum Practicorum fidorumque naturæ ministrorum observationes perpetuas; certas, œconomiae natu-

ræ consentaneas & circumspecta experientia comprobatas: Et hoc quidem eo ordine peragemus, ut primo loco magis necessaria quædam præcognoscenda de *Eukairias* veritate, fundamento, indole & necessitate generatim præmittamus, dein vero illam ipsam in methodo medendi specialius applicandam liquido, qua fieri potest brevitate, commonstremus. Adsit nobis propitium NUMEN, quo verum derégatur, nosterque labor in illius gloriam & veritatis medicæ incrementum dirigatur.

§. I.

EYKAIPIAS nomine quid velimus, neminem, qui Græcæ linguæ non prorsus ignarus est, latebit. Opportunitatem Latini vertunt, ipsisque nihil aliud est, quam *peculiaris quædam habilitas, vel, si mavis, facilitas rei exsequendæ, a concursu circumstantiarum indole ac natura sua nobis magis faventium, profecta*. Cui è diametro opponitur *Anæxia*, qua ob aliam, eamque plane diversam circumstantiarum rationem, eventus exoptatus resultare nequit.

§. II.

Ea enim est omnium rerum tam corporearum quam incorporearum in hoc universo conditio, ut non adeo simpliciter & nude unum ab altero possit moveri vel alterari, sed requiritur omnino ad mutationem qualemcumque ac multo magis determinatam & certam inferendam & qualitatis, quantitatis, temporis & virium motricium numerus & mensura specialissime quoque determinata, & exquisita proportionē gaudens. Illis gradibus causarum accurate Phyci dimetiuntur effectus inde provenientes, & hi semper respondent indole sua ac natura quantitativæ illarum. Ista hinc determinata temporis, nexus, ordinis & ceterarum qualitatum in quolibet corpore conditio, illud ipsum est, quo hoc & certos ac determinatos effectus exserere, & ab aliis potest dignosci. Unde notum illud lemma huc jure potest referri: Tempore, mensura, ordine DEUS omnia fecit.

§. III.

Præcipuum vero has inter rerum naturalium qualitates obtinet locum *tempus*, in quo omnes illæ subsistunt, utut non omnes ejus pari quantitate gaudeant; unde res omnes in durabiles magis, magisque caducas & brevi perituras dispescere solemus. Habent vero posteriores æque ac priores illud commune, quod in ipsa hac sua vel brevi vel longa duratione per certa intervalla pariter nunc durabiliora, nunc momentanea quasi, quæ periodos appellare suevimus, certas quoque subeant qualitatum suarum alterationes & mutationes, easdemque in relatione ad circumstantias antecedentes vel intensiores vel remissiores, quo ipso in dies, in horas, immo in momenta & acquirant certas habilitates atque dispositiones ad hos vel illos effectus specialiter producendos, & easdem iterum amittant, earumque loco alias adipiscantur & agendi & patendi habitudines, usque dum ipsarum novissima tandem & violentissima omnium ingruit alteratio, quæ ipsius rei destructione omnium actionum & passionum finem imponit.

§. IV.

Quum itaque nulla res sit, quæ non cum reliquis suis qualitativis exacta temporis mensura gaudeat, & eandem ad mutationem qualemcumque subeundam iusta quantitate exposcat: hinc sua sponte fluit, nullam posse suscipi actionem, quæ non ad faustum obtinendum finem temporis rationem quam maxime requirat. Sin minus, spes agentis fru-

stratur. Quæ cum ita sint, nullus reperietur, qui non, quantum intersit occasioni servire, propria & non numquam tristi experientia fuerit edoctus.

§. V.

Si vero ulla umquam ars vel scientia fuit, in qua debita constitutionis temporis consideratio magni habeatur necesse est, certe illa est ars medica, in qua utile hoc momentum quotiescumque posthabetur, toties in theoria multas tricas peperit, & in ipsa praxi magno ægrotantium ac famæ artificis detrimento fuit. Infaustus sane habendus est ille dies, quo rudis illa empiricorum cohors primum opinari ausa fuit, ac si effectus remediorum in medicamento inhærens quædam qualitas esset, quæ nullam plane relationem neque ad internam corporis dispositionem, neque ad tempus, neque ad alias circumstantias haberet. Quibus etiam non nulli ex iis accedunt, qui non tantum specioso labore qualitates remediorum experimentis explanare fategerunt, sed & oblitivæ veræ theoriæ corporis humani, quatenus vivi, eadem secundum abstractos suos i. e. ex mera ipsorum hypothesei derivatos effectus propinare intenderunt, autumantes, effectum medicamenti in corpore quoque humano insitæ suæ energiæ esse adscribendum, & hinc absque temporis ratione adhibendum: vel si tandem ejus limitationes agnovere, deduxerunt illas ex meris phycis correlationibus, infinita materiarum temperie, sexcentis saporibus, ejusque farinæ commentis aliis, ad veram medicinam nihil facientibus, ideoque in praxi inutilibus. Ex utrorumque errore materia medica quidem in ampliorem farraginem in dies excrevit, sed simul divina hæc ars evilit, ac tempestiva medendi methodus neglecta fuit, cum tamen vel juxta poëtam æterna hæc sit veritas:

*Temporibus medicina valet, data tempore prorsum,
Et data non apto tempore vina nocent.*

§. VI.

Inter præcipuas igitur veritates quibus rationalis nostra ars medica contra ejus obrectatores suffulcitur, haud ultima hæc est: *quod remedia certo tempore oblata prosint, & rursus certo tempore obsint*. Quum vero juxta Philosophi effatum veritatis comes sit evidentia, evidenter hinc vel rudissimus quivis, vel ex facibus hominum Medicaster non potest non colligere, in adhibitione remediorum temporis habendam esse rationem. Immo plebejus quivis, quotiescumque vel a Medico, vel ab alio medicamentum accepit, primo statim hoc quærit: quando remedium sit propinandum. Omnibus enim abunde patet, alium esse rerum statum in initio morbi, alium in ejus incremento &c. item morbos plerosque versus certum temporis momentum exacerbari quasi & intensiores fieri, quod Medicis paroxysmi nomine venire solet; hinc non potest non prono alveo sequi, quod alius effectus a remedio in morbi initio, alius in ejus decremento oblato expectari debeat, eoque ipso jam indagandum sit, uter ex hisce diversis effectibus ad salutarem & exoptatum eventum magis quadret.

§. VII.

§. VII.

Quum ergo simplex hæc medica veritas, quod opportunitas temporis in methodo medendi haud fluctu pendenda sit, sua jam radiat luce, hinc uberiore probatione merito supersedemus. Quod vero mox in limine hujus dissertationis dicendum, in omnibus hominum actionibus, rite exsequendis, non tam quæritur *quod* occasione sit studendum, sed *quomodo* hoc potissimum facere conveniat: illud & in nostræ artis salutaris operationibus mentem sollicitat, ubi non tam de existentia & veritate, quam de fundamento & accurata determinatione *εὐκαρίας* multæ anxie jactantur quæstiones. Veteres Medici, qui in id sedulo incumbabant, ut juxta certas & completiores morborum historias, & inde collectas observationes, suas stabilirent methodi medendi regulas, hanc *εὐκαρίας* veritatem probe agnoverunt, ejusdemque usum & adplicationem ipsi firmæ superstructam experientiæ, inter præstantissima artis præcepta posteritati commendare, summo annisi fuere studio. Sic magnus medicinæ parens HIPPOCRATES in aureo Aphorismorum libello non tantum primo statim loco *καρὸν δὲν, occasionem præcipitem ac momentaneam*, ideoque haud negligendam esse, adserit, sed & utilissimæ hujus veritatis adplicationis specimen Aph. XXII. Sect. I. magna adfert auctoritate, dicens: *concocta medicamento purgare ac movere oportet, non cruda, neque ineunte morbo, nisi materia turgeat: plurimum vero non turget.* Cui alterum respondet effatum, haud minus præstans, quod Aph. XXIX. Sect. 2. his profert verbis: *Ineuntibus morbis si quid movendum videatur, movendum: nam iis vigentibus quiescere satius est.* Quo etiam spectat notatu dignissimum sapientis SENECE adsertum: *in morbis nil magis periculosum, nec perniciosum, quam immatura medicina.*

§. VIII.

Hæc fuit laudatissima mens priscorum Medicorum principum. Jam Neotericorum scripta si consulamus, in duas præcipue circa hoc *εὐκαρίας* negotium abire videntur sententias: Alii in eum errorem delapsi sunt, ut maximam partem occasionem medendi pro ludibrio haberent, præcipue autem ad salutaris crises tempora, a veteribus Medicis tanta diligentia tradita, & memoriæ infixæ, plane nihil respiciendum esse contenderent: quorum in numero ponendus est HELMONTIUS, WALDSCHMIDIUS & alii Cartesiani. Alii vero, licet melius senserint, in hunc tamen incurrerunt errorem, ut illud ipsum medicandi tempus non secundum naturæ humanæ consuetas periodos dirigerent, sed potius juxta suam semel conceptam quilibet hypothesein, & secundum ipsorum meram opinionem tempus medicamina propinandi seligerent. Hinc evenit, ut mira inter eos coorta fuerit dissensio, quod enim medicamentum alii in ipso cujusdam morbi initio offerebant, illud alii in ejusdem decremento solum propinandum esse credebant. Porro hic dum v.g. venæ sectionis remedium in ipso etiam morbi acuti statu magnificiebat, ille contra idem circa morbi *ἀκμὴν* adhibitum, proximam ad mortem viam pandere vociferabatur. Adeo in hac quoque pugna & opinionum discrepancia verum fuit illud proverbium: *quot capita, tot sensus.*

§. IX.

Sed meliora nunc fortuna sperare jubet, ac rursus ex labyrinthis istis flexibus egrediendi, & confusis opinionum fluctibus emergendi, nostris maxime temporibus regia via monstratur. Hæc vero ea

sola est, quam *natura* felici multorum morborum eventu prosequitur, eandemque Medicus propius inquirere debet & imitari. Quid enim ipsi sanæ rationi magis consentaneum est, quam quod Medicus ad ductum naturæ, cui auxiliatrices præbere studet manus, omnes suas dirigat medicationes? Erit ergo omnino sedula attentio medico-practica ad accuratam morborum historiam & præcipue spontaneam illam multorum ægotantium restitutionem optima *εὐκαρίας* nostræ cynosura. Videmus enim, nisi mens nostra de industria caligare velit, methodum; quam natura in oppugnandis morbis servare studet: videmus quantum in certis morbis per certa loca materiam nocivam expellat, omnium denique optime hoc videmus in morbis *acutis*, ubi *statim* dierum *periodis*, ut plurimum vero singulis septenariis, motus suos determinare solet ac absolvere. His ergo observationibus tuto & constanter insistendum, ex his, non vero ex fictitia hypothesi, una nobis petenda sunt veræ *εὐκαρίας* fundamenta. Hoc magnus comprobavit HIPPOCRATES, cujus scripta adhuc fera admiratur posteritas. Hoc recentiores quoque nostri ævi Medici solidius & luculentius adhuc demonstrarunt. Confer. omnino scripta IL- LUST. D. PRÆSIDIS, præcipue differt. de *prudenti medicamentorum applicatione in tempore.*

§. X.

Perpecto jam genuino *εὐκαρίας* medico-practicæ fundamento, in proclivi est ejusdem *indolem* cognitam habere ac perspectam. Qualis enim ejus origo, ex qua prognata est, talis & ipsa esse deputatur: haud secus quam acus magnetica semper versus poli regionem directæ cernitur. Alienissima ergo a vero scopo prorsus est nonnullorum *εὐκαρίας*, quin dicam *ἀναρίας*, qua secundum certos astrorum & stellarum, quos vocant, adspectus sua exhibere medicamenta injungunt: alienissima porro, immo impia illa gesticulosa ad medicationem electio dierum, quæ ex inani superstitione originem traxit, & mulierculis præsertim usu solemnus est. Aliena denique & illa est, quæ ex meris curiosis physicis speculationibus prognata, jam scrupulosa nimis, nimis jam secuta, multorum hinc graviorum mater fecunda, & medentibus imponit ac ægotantibus. Illud interea circa *indolem* veræ *εὐκαρίας* adhuc probe notandum, quod illa ipsa non solum secundum certos morbos, sed & secundum tempora cujusque morbi multum variet: alia enim est in primo morbi initio, alia in ejus incremento, alia in statu, alia denique in decremento; porro alia ante paroxysmum, alia in paroxysmo, & alia post eum servanda & adplicanda. Diversa dein anni tempora haud exigui sunt momenti, utpote diversimode ad hoc vel illud medicationis genus apta, vel unico, eoque non futili venæ sectionis circa æquinoctia administrandæ, exemplo. Uti & HIPPOCRATES in evacuationibus anotericis & catotericis rationem temporis anni serio inculcat Sect. IV. Aph. 4. 5. 6. Tandem denique non adeo rejicula est, uti multi volunt, exhibitio remediorum versus certas lunæ phases, licet enim ratio hujus rei non adeo in promptu sit, docuit tamen optima rerum magistra, experientia, dari adfectus, præcipue maniacos, epilepticos, &c. qui ad incrementam & decrecentiam lunæ, exactissima quoque sua sumant incrementa & decrementa, suasque nanciscantur statas exacerbationes atque remissiones. Spectat huc elegans illud SENECE: *multa sunt, quæ esse se concedimus, qualia sint ignoramus.*

§. XI.

Quemadmodum autem opportunitas temporis in

remediorum oblatione observanda quam maxime necessaria est, uti ex jam dictis adparet; ita operæ pretium erit, eandem *necessitatem* ulterioribus argumentis adstruere. Si enim juxta SENECAE effatum, *illud numquam nimis dicitur, quod numquam satis discitur*, æquissimum est, utile hoc momentum, cujus neglectu vel ignorantia in praxi quotidiana sæpius errores committuntur, pluribus documentis, quantum nunc quidem fieri potest, declarari. Ante omnia vero ipsam hanc *εὐκαιρίαν* servat, immo dirigit, natura humana, quæ certa mensura atque numero motuum non solum corpus suum sanum conservat, sed & labefactatum propria energia in integrum restituere allaborat. Illa, inquam, naturæ consueta periodorum directio non solum simpliciter indicat, omnia, quæ ab artificis manu proficiuntur, adminicula non solum tempestiva, sed & præcise juxta specialissima naturæ usu recepta temporis momenta, directa & instituta esse debere. Quid? quod necessitatem hujus *εὐκαιρίας* mirum quantum ostendit ex neglectu ejus proveniens incertitudo medica. Nimis longum foret, immo forsan odiosum, si ex Auctorum libris recenseremus & commendationes circa multorum remediorum virtutes longis verborum encomiis prolatas, & his oppositas alias aliorum querelas, de irritis plurimorum ab aliis magnis nominibus contra certos morbos celebratorum remediorum usu in contrariam partem jactatas. Quæ alia lugentis hujus mali subest origo? quam quod in ipsa remediorum adhibitione, præter specialiores circumstantias, temporis ipsius, quo tale medicamentum exoptatos produxerat effectus, debita observatio neglecta fuerit & nihili habita. Præcipue vero dignitas pariter ac efficacia *εὐκαιρίας* elucet ex admirandis illis curationibus, quibus *præservando* ægris succurrere possumus. Valet certo, si ullibi, maxime in methodo medendi, vis noti illius diverbii: *satiùs est prævenire, quam præveniri*. Qua de causa præcipue laudandi sunt B. ETTMULLERI conatus, qui in dissert. *de parvis magnorum morborum initiis*, magno medentium emolumento monstravit, quam facile sit, ideoque ab omnibus Medicis maximopere arripiendum, morbum, alias plane insuperabilem, v. g. hydropem, phthisin, podagram &c. in prima herba suffocare. Dolendum quidem, quod multi ægrorum non statim circa morbi incrementa, præcipue si ea leniora videntur, Medicum accersant: sed magis adhuc dolendum, quod multi Medicorum ex perversis suis, solitis magis, quam solidis theoriis, illa ipsa gravissimorum adfectuum initia non rite intelligant, ideoque salutaris immo exoptatissimæ *εὐκαιρίας* ignari, ex minori sæpius majus malum efficiant. De quo pluribus agit ILLUST. D. PRÆSES, Patronus ætatem sancte habendus, variis in scriptis suis.

§. XII.

Quemadmodum vero omnes ii, qui salutaris hujus medicæ *εὐκαιρίας* ignari sunt, adsimilandi sunt adverso flumine navigantibus: ita contra quibus juxta præfixa a natura tempora suas instituere medicationes curæ est cordique illis omnia in vado, omnia in proclivi sunt, immo hi ipso facto experiuntur, dimidium operæ possidere, qui & in hac parte ad normam ipsius autocratæ naturæ suas instituunt operationes. Vident, inquam, manifestam debitæ & ad naturæ intentionem directæ *εὐκαιρίας* utilitatem. Vident quam præstantissimos exserat effectus levissimi alias momenti medicamen, dummodo exquisito tempore subministretur. Vident quoque quam exigua sit ipsa remedii virtus, & quam maxime omnis effectus & a peculiari ægrotantis na-

tura, & a modo propinandi vel salutariter vel sinistre determinetur. Vident porro quantum remedia, quæ alias heroica vocare solemus, tempore modo opportuno oblata, omnis plane damni sint expertia, immo præsentissimo suo effectu haud parvam prudenti suo directori laudem concilient. Vident denique ipsius medicamenti efficaciam, pro diversa, qua exhibitum fuit temporis ratione, quasi mutatam esse, ita ut remedium, quod alias alexipharmacæ est virtutis, jam analeptici præstantissimi vices supplere videatur.

§. XIII.

Constitimus hucusque in generalioribus *εὐκαιρίας* medicæ proprietatibus expendendis, jam vero pes ad specialiores ejus adplicationes indagandas promovendus erit. Equidem inficias ire non possumus, quod sicuti in omni re, ita præcipue in hac necessaria methodimedendi materia, in generalioribus facilis reperiatur apud scriptores consensus, in specialioribus vero accuratius determinandis immanis existit inter eos dissensus, aliis hoc, aliis aliud suadentibus. Verum enim vero hæc omnia animum a proposito non absterrent. Rixentur illi, quibus mos est, non ad naturæ ductum, sed ad voluntarium ingenii lusum, theorias fingere; disceptent inter se mille modis, quibus propria culpa lubrico incedere fundamento allubescit. Nobis plana, vera & expedita est via. Semitam calcamus ab ipsa, cum qua res est, natura monstratam. Quid vero? dicis si natura aberraverit? annon tua tunc claudicabit imitativa curatio? neutiquam. Non imitamur malos, sed bonos morborum eventus, & hos quidem non extraordinarios, sed ordinarios, naturæ propria energia susceptos, usu receptos, a prisca antiquitate collaudatos ac in quotidiana praxi comprobatos. Hisce ergo suffulti fundamentis *Εὐκαιρίαν* nostram medico-practicam jamjam specialius deducemus, & per singula therapie medicæ capita pertractabimus.

§. XIV.

Therapia generalis haud inconcinne in binas dividitur partes: quarum altera *evacuationes*, altera *alterationes* respicit. Quælibet autem harum ad ordinatum sui decursum pariter ac felicem eventum, uti ceterarum circumstantiarum, ita præcipue *temporis* rationem habendam esse exigit. Non possumus autem non mentionem facere egregiæ illius differentie, quæ in vera *εὐκαιρία* adhuc attendenda est: dum alia dirigi & disponi debet secundum ea, quæ intus & ab ipsa natura in corpore aguntur, alia vero secundum ea, quæ tamquam mere materialia externe saltem sui perceptionem corpori imprimunt. In posteriorum numero sunt præcipue atmosphæræ alternationes, ad quas Medicus nonnumquam mentis aciem dirigere debet. Dicimus nonnumquam, quia priores, tamquam longe majoris considerationis, sæpe sæpius efficiunt, ut posteriorum ratio plane nulla sit habenda. Sic e. g. sanguinis ventilatio, si causæ internæ illam non quantocumque suis efflagitant efferis commotionibus, commode potest institui versus æquinoctium, tempore matutino, die serena, luna decrescente; si vero aliæ in ipso corpore obortæ morbosæ indicationes grave minantur periculum, tunc ningat, pluat, exteriora nullius hic sunt æstimationis, succurrendum est principali.

§. XV.

Prodeat jam omnium primò ad veram *εὐκαιρίαν* stabiliendam EVACUATIO: ubi mox in genere, quæ de occasione & temporis opportunitate erunt obser-

vanda,

vanda, ante monenda sunt, quam ad specialiora hujus capitâ, ut emesin, catharsin, &c. nostrum vertamus calamum. Primo in omni evacuatione, ad quam vitalis aliquis motus concurret, uti sunt vomitio, purgatio, sudor &c. maxime periculosum est, illam tempore minus opportuno, quo natura neque ad hos actus proclivis est, neque etiam materiam noxiam per hos evacuandam præparavit, suscipere velle; pressio enim pede excipiunt vel nimii, vel turbulenti motus, non modo circa eandem partem, ubi talis præmatura evacuatio proritata fuit, sed & diversis aliis in corpore partibus. Quæ generalis cautela non tantum in acutis, sed & in chronicis morbis firma mente tenenda est. Dein quoque in omni evacuatione, rite & opportuno tempore instituenda, ad viarum, quas natura eligit, constitutionem magis aut minus aptam & patulam, tandem denique ad materiæ evacuandæ mobilitatem attentis oculis respici debet, secundum illud HIPPOCRATIS si quid *mobile movendum*. Primum itaque fundamentum quærendum hic in ipsa naturæ humanæ proclivitate, quæ in corpore humano uti omnes actiones vitales suis peragit motibus, ita etiam evacuatorium ejus modi actum ipsis suis propriis administrat viribus motricibus. Si ergo ex consilio & statâ ratione ad hanc illamve evacuationem instituendam prona est & proclivis, tunc eo ipso optima erit Medico, naturæ ministro, *ἐναρπία*, qua auxiliatrices suas vocanti naturæ feliciter potest porrigere manus. Hoc vero neglecto, omnia tunc difficulter, immo sæpius infausse procedunt. Alterum, quod attendi meretur, materiæ evacuandæ fundamentum, in ipsis viis, per quas illæ evacuationes contingunt, deprehenditur, quæ nunc laxitate nimia, nunc quoque stricturâ, in evacuatione instituenda Medico haud parvo impedimento sunt. Equidem mirari quis posset, quomodo res toto, quod aiunt, coelo diversæ, atonia nempe & spasmus unum eundemque possent producere effectum, difficilem nempe vel plane impeditum evacuationis cujusdam successum: ex spasmō quidem hunc resultare posse, haud facile quispiam negabit, sed quomodo ex causâ atoniæ id contingat, res est, quæ peculiarem sui probationem meretur. Id vero facile ex quotidiana experientia confirmatum deprehendimus, in promotione mensium per activa adstringentia, martialia nempe; qua ratione enim adstringentia contrarium planè suo nomini effectum exserere possent, nisi adesset contraria causâ, relaxatio nempe fibrarum motricium, ex qua sanguinis circa uterum subsistentia suam duxit originem. Sed hæc *ἐν παρόδῳ*. Tertium jam fundamentum, quod optima opportunitatis medicandi indicatrix est, in ipsa materia quærendum, prout nempe illa magis cocta, id est, in sua consistentia illis ipsis viis, per quas ejici debet, adæquata est; magni enim interest, si hæc vel tenuis nimium, vel spissior justo deprehenditur, vel etiam, si in ipsa sua & consistentia & crasi, & temperie & quantitate demum illi ipsi, quo exterminari debet, modo nondum ex affe respondeat, neque etiam in unum collecta sit: quibus omnibus circumstantiis decantatam illam atque Veteribus præcipue acceptam materiæ crudæ vel majorem vel minorem concoctionem dimetiendam esse, haud immerito judicamus.

§. XVI.

Quemadmodum vero in omni morbo, qui evacuationem quamdam, vel liberationem hostilis materiæ exigit, triplex iste respectus pernecessarius est, simulque secundum hunc ipsum præstans remedium propinandi tempus eligi debet: ita sedula & exquisi-

sita hujus adfert attentio medico-practica in curatione *februm* utramque absolvit paginam. Hic enim luce meridiana clarius conspicitur quam accurate, quam juxte, quamque proportionate omnes in corpore humano materialium & commotiones & emotiones juxta *statum* tempus, & hoc quidem juxta morbi diversitatem variant, semper tamen ad salutarem eventum directum exerceantur, & prudente consilio, non vero cæco & irrationali impetu promoveantur, modo increcendo, modo decrecendo, ut vel unico hoc exemplo tempestivitas incedendi edoceri possit. Hic porro manifeste adparet quantum fibrarum motricium major minorve intensio, & hanc pressio pede insequens ipsarum viarum major minorve ad excernendum habilitas, variare soleat juxta certa & dimensa temporis intervalla. Hic denique videmus, quantum ipsa materia excernenda peccans, vel saltem ex certis causis naturæ infensa, per certas periodos in crasi sua mutetur, subigatur, colligatur & sic successivo temporis spatio ad ejectionem præparetur. Quum vero in omni febre natura ejectionem materiæ cujusdam efficaciter intendit, hoc vero gradatim quasi statò tempore exsequitur; hinc prono fluit alveo, quod Medicus non tantum eandem, a natura indicatam, evacuationis speciem, sive sit emesis, sive catharsis, sive diaphoresis &c. promovere, sed & hanc ipsis statis temporibus instituere debeat. Integrum autem istud negotium, quo natura & coctionem & evacuationem materiæ, & dispositionem viarum periodice administrat, & corporis denique conservationem molitur, est illud, quod Veteres criseos nomine insignitum voluerunt. Hujus equidem existentiam a multis negatam fuisse in superioribus jam attulimus, & quo pessimo ausu hoc factum sit commonstravimus; non possumus tamen non & hic loci adhuc allegare egregiam CL. BAGLIVII hac de re sententiam, quæ *Prax. libr. II. c. XII.* ita habet: *Mirari desinent Practicantes, si hodie nec frequenter, nec perfecte succedant crises, uti olim in Græcia, si quidem illi Græcarum legum ignari, vel obtrectatores a principio morbi ad declinationem usque purgantibus, diaphoreticis, phlebotomiis, aliisque imprudenter & intempestive adhibitis, ægros suos fere conficiunt, unde impossibile est, ut humores per tam diversas remedium seditioes distracti, ad criticæ despumationis negotium suo tempore disponantur, neque dicuntur criticorum regula, ab Antiquis tradita, observari queant.*

§. XVII.

Pertractavimus hætenus generaliora quædam in opportuna remediorum, quæ evacuatorio scopo dantur, adhibitione observanda. Per aliquot nunc therapie evacuatorie species *ἐναρπία* hanc stabilitam dabimus. Prodeat ergo prima omnium *emesis*, actus a sano corporis statu planè alienus, quo naturæ res quasdam adversas viâ, qua potest proxima; extra corporis sui terminos proscribere satagit. Hæc evacuatio, quo magis drastica est, eo magis exquisitam temporis & aliarum circumstantiarum rationem exigit: Inter heroica enim remedia haud ultimum locum obtinet, idèoque maxima cum circumspeditione & prudentia medica in usum vocanda. Si ergo emesin exposcant subiecta euemeta, & ubi sentina ventriculorum vel duodenum obsidens turgent & urget, ibi matutinum tempus ad actum hunc instituendum haud temere seligitur, præmissa præcedente vespere pulvillo digestivo ac incidente. Nec flocci pendendum est HIPPOCRATIS effatum, qui S.IV. Aph. 4. *Æstate*, inquit, *superiores potius, hyeme inferiores ventres medicandi.* Deinde in morbis malignis,

præcipue castrensis, cum manifesta saburra in primis viis præsentem, si primo statim die emeticum exhibetur, tunc certe morbi impetus uno quasi ictu dejicitur. Hinc factum quoque, ut in ipsa peste emetica remedia, certo temporis momento, in prima scilicet morbi invasione oblata, mirum in modum ægros citissime sanitati pristinae restituerint, & ab omni recidiva immunes dederint. Nuspiam vero magis emetica felicissimum post se relinquunt effectum, quam si, certis observatis temporum momentis, aliisque circumstantiis, in morbis quibusdam periodicis exhibentur. Non in illis morborum periodicorum speciebus, quæ ex impeditis salutaribus ac criticis sanguinis per certa loca fluxibus, ortum traxere, sed in morbis spasmodico-convulsivis, ex terrore subortis, & per certa temporis intervalla recrudescentibus, ægrosque misera omnium membrorum distorsione & distensione crudelissime affligentibus. Hic vero, quod præcipue indicasse nostri est instituti, in curatione per emeticum instituenda temporis ratio ad felicem exsequendum effectum est maxima. Res vero paucis huc redit: Observavit ILLUSTR. D. PRÆSES plurimos morbos per certa temporis intervalla recrudescentes, utut initium nonnumquam a causa morali, v. g. terrore, sumferint, postea tamen a causa materiali, saburra nempe acido-caustica, in primis viis stabulante, ali quasi, & per longam temporis seriem continuari; quibus oppugnandis nullum præstantius invenire potuit remedium, quam efficax ipsius morbi sedis, canalis nempe alimentarii abstersio, nunc anoterica, nunc quoque catoterica, pro circumstantiarum diversitate, ubi sublata dicta modo causa omnis subito evanuit effectus. Notanda vero hic *εὐκαιρία*. Si quis enim statim in principio morbi ejusmodi convulsivi, ex subito terrore oborti, & per statuta temporis momenta recurrentis, vomitorium propinare ausus fuerit, is omnia in deteriore statum deferret: hic enim causa illa immaterialis, nocentissimum animi pathema, terror nempe, adhuc viget, & accedente tam violento actu, vomitu nempe, mille modis exacerbaretur. Ubi vero morbus ejusmodi periodicus per aliquot hebdomades duravit, & non nihil habitualis factus, & evanescente terrore, ex causa materiali tristissimas suas scenas ludere coepit, tunc longe felicius emetico remedio speratus acquiritur effectus.

§. XVIII.

Sequitur jam *Catharsis*, vel laxatio primarum viarum per inferiora instituta. Hæc evacuationis species a præcedenti toto cœlo in eo differt, quod in statu naturali quoque sit receptissima, immo adeo solemnis, ut integritatem reliqui corporis ad hujus conditionem dimetiri possimus. Occurrunt vero in ejusdem medica promotione certa & utilia temporis momenta, sollicitè custodienda. Multi sunt, quibus usu receptum est singulo vere & autumnò, vel etiam alio certo tempore, purgationem artificialem tempestivam quasi, quæ vulgo *Frühlings-Cur / Mayen-Cur* dicitur, suscipere. Nos vero adeo sollicitam ad hanc evacuationem temporis electionem instituere non omnibus sua demus. Ubi vero illa jam in consuetudinem demigravit, ibi omnino ejus usum statim & semel receptis temporibus magna cura continuandum esse, ne gravioribus malis ansa detur, maxime judicamus. Consuetudo enim est altera natura. Accedit & hoc, si peculiaris quædam individui sensibilitas & proprius quasi circa hoc tempus purgandi conatus occurrit, tunc omnino hæc medicandi *εὐκαιρία* in hoc temporis momento

haud est adspicienda, cujus rei rationem in inferioribus trademus. Alii sunt, qui purgantia remedia, certo tempore ipsis ægris, qui febris acuta, maligna, præcipue exanthematica decumbunt, offerre haud verentur. Nos vero statuimus omnem plane purgantium usum in istis morbis cane pejus & angue fugiendum esse, ideoque frustra de tempore eligendo certari. Loquitur quotidiana experientia, quantum a præpostera ejusmodi naturæ revocatione ab exteriori corporis regione ad intima ejus viscera, noxæ sæpius surgat, & vitæ ægroti cum fama medentis maximum incurrat periculum. *Conf. Diagramm. ILLUSTR. STAHLII.* Interim in quibusdam, ubi impuritates crassiores (ut fere fit) in intestinis depositas remansisse suspicamur, superato morbo, & recuperatis aliquantum viribus, blanda laxatio convenit, præcipue post variolas. Tutissimus usus est pilularum STAHLII aut BECHERI correctarum, utpote quæ, si saburra largius præsto sit, satis abundanter eam ex omni ætatis, ordinis, sexus subjectis tuto exhaustiunt, sin minus, id quod adest abstergere, ceterum nullum nocumentum inferre, nec vires debilitare, observantur. Porro evacuatio opportune adhibetur in febre quartana, die intercalari, præmissis incidentibus & resolventibus, & febris hæc, pro scandalo Medicorum habitata, felicem obtinebit decursum. Maxime vero convenit hæc evacuatio in febribus intermittentibus suppressis, ut revocentur, & legitima postmodum methodo curentur. Quantum emolumenti adferat in febribus intermittentibus lentescentibus, quotidiana loquitur praxis. *Εὐκαιρία* porro evacuandi contra vulgarem illam, summe nocivam, methodum adstrictoriam in diarrhoeis spontaneis suo jam gaudet jure. Adfensum opportunitatis hujus faciles præbent arthritici, podagrici, quieducta leniter materia biliosa acri se tot ac tanta dolorum genera haud perferentiscere sciunt, quid? quod succedens tumor podagricus nullo, nisi matura evacuatione, depellitur remedio. In obstructionibus tandem alvi cum colica maturum, ne malum iliacum superveniat, requiritur evacuatorium, ut & in congestionibus versus partes corporis superiores.

§. XIX.

Haud minus in *diaphoresi*, quæ satis placida est medicationis species, permulta occurrunt temporis momenta, in remediorum propinatione accurate servanda. Primo res est extra omnem dubitationis aleam posita, quod tempore matutino homo ad sudationem maxime sit pronus, ideoque & hoc potissimum tempore Medicus ad auxilium præstandum animum intendat. Dein diaphoreseos *εὐκαιρία* ante omnia quam diligentissime est attendenda in febribus, de quibus jam dudum, experientia adstipulante, Veteres dixere, quod vix ulla earum sine largo, vel ad minimum satis notabili, sudore salutariter cessare soleat. Sed quantum ad hunc salutarem eventum non tam simplex, quam tempestiva hujus excretionis promotio valeat, & quantum contra hanc in quotidiana praxi errare soleant, res est noto notior. Ut plura brevibus dicamus, sciendum est, quod opportunitatis sudorem movendi nulla melior certiorque detur indicatio, quam illa, quæ superius jam in generalioribus evacuatorii actus indicationibus allegata fuit, mobilitas nempe materiæ, ubi simul illa media, a quibus hæc dependet, naturæ nempe statam methodi medendi rationem, permeabilitatem viarum & ipsius materiæ debitam consistentiam, quam coctionem vocant, liquido monstravimus. Licet autem aurea hæc veritas sit manifestissima, videlicet materiam

riam peccantem, præcipue in febribus, nunquam extra corporis terminos salutariter ante excerni, quam illa cocta i. e. in sua consistentia subacta, & ad excretionem disposita sit, atque hoc omne pro morbi diversitate, diverso quidem, sed tamen certo statoque temporis decursu ad finem deduci solere, nihilo tamen minus contrarium in praxi, præcipue merè empirica, observamus. Quid enim usitatus est, quam ut motibus qualibuscumque febrilibus mox diaphoresis cum regimine insuper coacto opponatur? Quid solemnius, quam ut ad febres intermittentes supprimendas ante paroxysmum promoveatur sudor, qui, natura duce, in declinatione demum illius promovendus esset? Qui insignes contra *ἐναρπία* committuntur errores in exanthematicis morbis, dum specioso quidem prætextu, nullo autem habito temporis discrimine, per coactam diaphoresin venenum, ut judicant, de corde propellere intendunt, eoque ipso autem efficiunt, ut exanthemata nonnumquam per totum corpus, tempore prorsus præmaturo, non tam prolecta, quam violentia quadam expulsa, sua inintima corporis retrocessione, vel etiam sine hac ægrum ex hac viventium aura tollant. Aliter longè rem suam peragat Medicus rationalis, cui fidum naturæ ministrum se gerere curæ est cordique: huic enim auro carior habenda illa divi *Senis* regula, quod in evacuatione cujuscumque materiæ nocivæ prospiciendum sit, ut non cruda, sed cocta & conveniente loco contingat. Maximopere ergo conducit primis illorum morborum, qui per sudores solvuntur, diebus, placidis abstergentibus & præparantibus coctionem materiæ adjuvare, immo si ipsa natura nimium festinans esset; & præmaturas exanthematum propulsiones moliretur, eandem placidis refrigerantibus, tamquam errantem, in viam reducere: Deinde autem, præcipue diebus indicatoriis & criticis, diaphoresin per lenia diapnoica & placidum regimen promovere. Tandem si exanthemata vel sudor saltem; debito tempore prorumpere, vires autem ægrotantis decrescere incipiunt, tunc exoptatissima erit *ἐναρπία* ipsa alexipharmaca, eaque temperata, subministrandi. Hæc enim, si hoc præcipue temporis momento offerantur, duplicem præstant effectum, videlicet expulsionem materiæ promovent, & naturam debilitatam tam præsentanee erigunt, ut a quolibet analeptico melior effectus haud sit sperandus. Ad omnia hæc feliciter exsequenda, necessaria omnino res est, ut Medicus decantatum criseos negotium perspectum habeat, diversum enim hoc est in diversis febrium speciebus, sic v. g. febres acutæ malignæ versus noctem exacerbantur, versus diluculum vero mitiores fiunt; synochales contra & sanguineæ tempore matutino, cholericæ autem meridiano paroxysmos subeunt. Quæ de re sedulo consulendi sunt attentiorum Medicorum libri, quos inter nominari meretur CONSPECTUS MEDIC. PRACTIC. EXPERIENTISS. D. D. JÜNCKERI, *Fautoris ac Præceptoris ætatem sancte habendi.*

§. XX.

Præstantissimum porro *venæ sectionis* remedium, quod inter præcipua & præsentissima artis salutaris adminicula jure refertur, si debito non adhibetur tempore, quid erit aliud, quam gladius in manu furiosi? Videmus quantum damni ab iis adferatur, qui sub inepta Medicorum heroicorum specie, in febribus acutis quolibet tempore sanguinis per venam sectam missionem instituere haud verentur. Hac enim ratione natura in instituto suo, materiam peccantem per diaphoresin expellendi, pessime turbatur, & ad aliud evacuandi genus, sanguinis nempe sinceri eje-

ctionem, perverso modo invitatur. Unde etiam versus diem septimum ex præpostera hac medicatione obtingunt motuum contentiones hæmorrhagicæ, sed irritæ, abalienationum mentis, immo nonnumquam mortis causæ. Sic porro sæpius est *ἀνὰ πύλα* nociva in ipsis intermittentibus venam secare, quo immaturo remedio non solum ipsi febriles insultus exacerbantur, sed & eo tempore, quo paroxysmus frigoris ingruere solet, diri sæpius oboriri solent motus convulsivi. Hisce præposteris sanguinem emittendi modis adhuc annumerare convenit, si eo ipso tempore, quo natura jam criticam quamdam salutarem, moderatam atque usu receptam excretionem, hæmorrhoidum nempe vel menstruum sanguinis fluxum, vel sudorem periodicum annum instituere cœpit, artificialis sanguinis missio instituitur. Observavit ILLUSTR. D. D. PRÆSES intempestiva planè ejusmodi medicatione excitatam fuisse plenariam & irrevocabilem salutaris hujus excretionis emanationem, nullo post modum remedii genere in pristinum statum restituendam. Haud minus inconveniens, vel ad minimum anceps est illa venæ sectio, quæ eo ipso tempore, quo ægri catarrhalibus quibusdam defluxionibus, vel rheumaticis, vel etiam podagricis doloribus, vel aliis qualibuscumque naturæ molimini- bus hæmorrhagicis adfliguntur, administratur. Sæpissime enim hoc modo pessima fit & defluxionis & dolorum præcipue podagricorum exacerbatio, morbique intensio status. Contra vero si opportunitatem sanguinis per venam sectam mittendi paucis explanare lubet, valet hic de præstantissimo hoc remedii genere vetus illud veriverbium: *principiis obsta, sero medicina paratur.* Quicquid enim salutare venæ sectionis remedium potest, potest autem plurimum, illud efficit scopo *præservativo*, in ipso autem vehementiore morbi statu, si apoplexiam, catarrhum suffocativum & pauca alia excipias, raro emolumentum, sæpius detrimentum adfert. Hic certe tutius, longeque utilius est prævenire, quam præveniri. Notum est ipsam podagram perservatoriis hisce sanguinis missionibus, maximam partem posse averti. Pari modo erysipelatis & plerorumque catarrhalium adfectuum insultus tempestiva venæ sectione præscinduntur. Abortus nullo remedio melius præcaveri potest, quam eadem venæ sectione, quæ tamen ipso jam ingruente rarissime speratum exferit effectum. In febribus denique malignis, acutis, inflammatoriis, præcipue autem catarrhalibus, quæ ex accumulatione humorum per hyemem inprimis ingruunt, vel aliis quibuscumque, in quibus sanguinis exturgescencia gravia minatur symptomata, maxime expedit, omnemque curationem optime juvat, si sub prima statim morbi invasione, vel ad minimum secundo mox die vena fecetur; sequentibus vero diebus ex ratione supra jam allata, hoc remedii genus ne in pleuritide quidem suaserimus.

§. XXI.

Nullibi autem attentè salutarium ejusmodi temporis momentorum observatio, & juxta hanc directà ipsorum medicamentorum adhibitio magis conducit, immo summe necessaria ab artifice exigitur, quam in *evacuationibus sanguinis*, quæ per remedia interna, hæcque ut plurimum calidiora, commoventia, exagitantia in actum deduci debent. In mensium nempe vel hæmorrhoidum, vel narium quoque hæmorrhagiæ promotione, si temporis opportuni nulla habetur ratio, tunc certe, nisi in graviora mala præceps detur patiens, molestissimæ tamen concitantur in corpore turgescientiæ sanguinis circuitus commotiones ac turbæ, *es wird lauter blinder Lärm gemacht.*

Ad

Ad quem pessimum, utut vulgatissimum in communi praxi, errorem evitandum, omne fert punctum, tempestiva ac ordinata ejusmodi evacuationis susceptio. Hæc autem præstantissima erit, si eo fit tempore, quo natura ipsa jamjam propriis motibus id moliri coepit, quod omnium maxime in mensium, qui in aliis versus novilunium, in aliis autem versus plenilunium fluere solent, promotione multum valet. Porro e re est eo potissimum tempore hoc instituere negotium, quo sanguis ipse & quantitate & præcipue qualitate sua ad felicem successum conspirat. Denique hujus medicationis opportunitas maximam partem circumscribitur a dispositione viarum: hæc si desideratur ante omnia sollicite procuranda est, in quibusdam per relaxantia, in quibusdam vero per leniter constringentia. Summa autem est *ἀναψία* promotionem hanc eo tempore suscipere velle, ubi jam natura a loco solito, versus alium insolitum, versus pulmones nempe, vel stomachum, sanguinem congeffit, ejusque evacuationem per spasmodicas constrictiones intendit, facile enim accidit, ut leni superveniente stimulo, remedio e. g. emmenagogo, calidiori, ipsa vel hæmoptysis, vel vomitus cruentus sequatur.

§. XXII.

Ast vero vela nunc contrahenda, & quæ dicenda adhuc supersunt, arctius, ne in voluminis molem nostra excrescat dissertatio, colligenda. De *expulsionem* tantum earum rerum, quæ toto genere *præternaturales* vocantur, adhuc notandum, quod utique multum referat, tempestivo tempore hunc actum suscipere, quo natura adhuc integra virium panoplia instructa est, & propriis suis motibus ipsam rei peregrinæ exterminationem efficaciter adjuvat. Cujus rei exemplum, etiam in vulgus notum, luculentissimum exhibent conamina illa parturientium, quæ *Behen* dicuntur, quibus præsentibus foetum, vel mortuum extrahere, res artifici est facillima.

§. XXIII.

Sed ulterius jam progrediendum, & altera therapie pars, quæ *ALTERANTIA* complectitur & temperantia, nunc paucis pertractanda est. *Alterare* Medicis nihil aliud est, quam materiam quamdam, præternaturaliter constitutam, in alium, eumque corporis conservationi magis congruum, statum reducere. Ex qua alteratione materiae secundario fluit temperatio motuum, qua motus nempe vel excedentes nimium sedantur, vel deficientes excitantur, utroque autem modo in justam & sano corpori adæquatam temperiem reducuntur. Sic e. g. humores præter solitum crassi & tenaces, ope *resolutionis*, quæ therapie alteratorie species est, attenuantur, & in salutem corporis restituuntur. Sic quoque partium solidarum fibræ nimia & præternaturali relaxatione laborantes, per convenientia tonica alterantur, i. e. debitum tensionis gradum nanciscuntur. Magni fuit habita superioribus temporibus *alteratio*, ubi Medici, non nisi de correctionibus materialium, de resolutione viscerum, de obtusione acrimoniae, de edulcoratione acidi, deque mutatione figurarum varii generis, corpus infestantium somniabant, indicio admodum manifesto, quam inconcinnae speculationes physicae nonnumquam ad corpus vivum adplicentur. Verum enim vero æterna manet laus ILLUSTRIS D. PRÆSIDI, qui in *Tractat. de Acidi & Viscidi pro stabiliendis omnium morborum causis insufficientia*, hanc destruxit opinionem falsissimam, & simul perspicue docuit, immo demonstravit, non sufficere morbi causam solum in peregrina materiae constitutione quærere, alias totam medicinam *alteratione* posse absolvi, sed

omnino respiciendum quoque esse ad evacuationem, ad materias non tantum qualitate, sed & quantitate peccantes, ad plethoræ imminutionem, & tandem ad ipsorum motuum, qui minus ordinate in corpore humano contingunt, emendationem.

§. XXIV.

Fluit jam ex præcedentibus pessimam esse in medicina *ἀναψία*, si medicamentis alterantibus ibi locus concedatur, ubi jam integra partis corruptio successit, utpote ad recipiendam ullam correctionem medicam prorsus inepta, illud potius tunc in usum trahendum: *ense recidendum est, ne pars sincera trahatur*. Manet interim & alterantibus remediis laus, manet necessarius ipsorum usus. In superioribus enim therapie evacuatorie opportunitatem juxta mobilitatem materiae dimetiendam esse adstruximus, hanc vero dependere a naturæ, vel si mavis, motuum proclivitate, viarum dispositione, & ipsius materiae coctione. Jam vero si unum horum alterumve vel motus nempe, vel materiae, vel viæ, ad obtinendum exoptatæ hujus vel illius excretionis successum, deficit & obicem ponit, tunc auxilium petendum ex alterantium medicamentorum penu, ubi nempe vel sedativis motus excedentes compeſcimus, vel excitantibus, analeptis eosdem, depressos nimium, quasi erigimus. Alterantia quoque sunt, quibus vias ex fibrarum relaxatione nimium patulas, adstringentibus scilicet adhibitis, leniter constringimus, vel easdem plus justo obstrictas vel obstipatas referamus. Alterantia denique sunt, & quidem incrassantia, involventia, præcipitantia, quibus materiam nimis fluxilem, vel etiam acrem, biliosam, malignam corrigimus, eandem autem crassam nimis atque ad viarum obstructions producendas pronam, per incidentia, aperiencia resolvimus. Utroque autem modo decantatam materiae coctionem adjuvamus. Ex his itaque omnibus, quam arctus sit nexus inter utramque therapiam, tam alteratoriam, quam evacuatoriam, & una semper alteri ministret & subserviat, cognoscimus.

§. XXV.

Nunc quoque paucis de opportunitate, *temperantia* & *alterantia* remedia fructuose exhibendi, specialiora quædam sunt adferenda. Ex priorum numero primo occurrunt *refrigerantia* remedia, quæ inter nitrum eminet, utut per se sint securissima, quantum tamen in variolis, præcipue apud juniores, item die critico in febribus malignis, ubi natura per sudorem morbi impetum infringere enititur, nocere possint, supra jam demonstravimus. De *præcipitantibus* idem valet, quod de venæ sectione attulimus, satius nempe esse prævenire, quam præveniri: pulveres nimirum temperantes vel præcipitantes, si præservando & anticipando exhibentur, plurimum valent, in ipsa vero motuum exacerbatione parum conceptæ spei respondent. Haud ultima vero & maxime culpanda est illa *ἀναψία*, quæ tamen admodum familiaris est, intensius refrigerantia in febribus malignis, biliosis exhibere. Vice enim plus una hoc modo pessimi moris diarrhoeas, cum subsequente sudorum repressione, summa anxietate, immo nonnumquam morte, fuisse excitatas, constat. Sic quoque motus in corpore humano ad salutarem finem directos, quales sunt febriles omnes, utut molestissimam agrypniam producant, hos, inquam, opiatum consopire conari, summam argueret & *ἀναψία* & *ἀταξία* medendi. Motus vero a natura per aliquot temporis spatium plenarie omissos *excitantibus* calidioribus, nervinis, balsamicis, vi quasi revocare velle, idem est, quod plebs dicit: *post festum venire*.

§. XXVI.

§. XXVI.

Nuspian autem *Eυνασία* medica tam præclara sui habet documenta, quam in *adstringentium* remediorum adplicatione, qua iusto tempore in usum vocata, effectum a nomine suo plane alienum, aperientem nempe exserunt. Primus, qui hanc veritatem agnovit, quod scio, fuit TACHENIUS, qui in *Hippocrat. Chymic. c. XVII. p. 127.* notatu dignissimam recenset observationem, de mensium obstructione per tempestivum corticum granatorum, valentissime omnium adstringentium, usum feliciter curatæ. Subministravit hoc occasionem non solum martialium medicamentorum, tamquam optimorum nonnumquam emmenagogorum, modum, quo operentur, agnoscendi, sed & tempus, quo illa adplicari debeant, rite seligendi, de quo supra. Addimus tandem de tempestivo *resolventium* atque aperientium remediorum usu, quod ille admodum fructuose in subiectis, præcipue sensibilibus, vernali tempore possit suscipi. Hoc enim tempore ita omnia sunt comparata, ut cuncta quasi reviviscant, calor Solis identidem sit auctior, at-

mosphæra rarefit, hinc inutile illud in corpore pondus, quod ei secundum solidissimam SANCTORII in *Medicin. Static.* experientiam, per hyemem accessit, sensim sensimque transpiratione liberiori decrescit & absumitur, omnesque in corpore motus novum nanciscuntur vigorem. Ex quo & a priori intelligimus, si quis adhuc refectioni visceris cujusdam obstructi supersit locus, eam omnium efficacissime hoc ipso tempore posse suscipi.

§. XXVII.

Sed finem nunc huic tractationi imponere & temporis & chartæ angustia jubet, licet plura adhuc, utique necessaria, quæ de *ευνασία* hac medica dici possent, supersint. Ignoscat B. L. si non omnia ea, qua hodie die homines delectantur, styli elegantia refulgeant, talia enim a me, qui, multis aliis negotiis distractus, specimen hoc conscripsi, postulare velle, *ἀποπον* pariter ac *ἀκρίπον* foret. Ardentissimis NUMEN indulgentissimum compellamus precibus, velit porro nostris favere conatibus, quo omnia cedant in ipsius gloriam, aliorumque salutem.



DISSERTATIO MEDICA

D E

MORBIS

PEREGRINANTIUM.

Primum edita Anno 1734.

PRÆFATIO.



ETERES, valetudini hominum consulturi, eos distinguebant in tales qui vitam certis legibus, & per has aliorum arbitrio subjectam ducunt, & tales, qui nullis certis legibus obligantur: quorum illos non suæ spontis, hos vero homines suæ spontis nuncupaverunt. Ita enim non solum HIPPOCRATES, aut, quod GALENO placet, POLYBUS, qui libellum de salubri diæta nobis exaravit, in illo se præcepta tuendæ valetudinis τῷ ἰδιώτῃ scribere diserte proficitur; verum etiam CORN. CELSUS idem exemplum sequutus, in ipso limine suorum de Medicina librorum innuit, se scribere homini qui suæ spontis est. Quis sit homo suæ spontis GALENUS in commentario suo exponit, ostendendo nobis aliquot vitarum genera, quibus adstricti, non possunt accenseri illis, qui suæ spontis sunt. Sic Athletico instituto dediti, quam nulla in re suo arbitrio vivere potuerint, vel ex EPICTETO disci potest, qui, postquam candidatum coronæ Olympicæ longis præmonuisset, dicit: *ad summam, tanquam Medico, sic Gymnasiarchæ te tradas oportet.* Eodem pertinent milites, qui ad orci patentes fauces a Duce collocati, stationem fortiter tueri, aut honeste

honeste oppetere debent. Hujus certe generis hominibus, ut & quibusdam Religiosis, parum profunt præcepta tuendæ valetudinis, quippe quibus per omnia obsequi non licet ob ipsas illas leges, quibus illos vitæ genus adstrinxit.

Cum igitur difficile sit quicquam de sanitate conservanda & morbis avertendis scribere, cui obsequium ex æquo omnes præstare possint; nec meum institutum justam reprehensionem merebitur, spero, si præcipuos PEREGRINANTIUM MORBOS cum suis causis consideravero, ut caveri possint; sique initia morborum jam persentiscentibus, ut effugere majus periculum debeant, ostendero, jamque in discrimine constitutis, viam exitium devitandi recuperandæque valetudinis, indicavero. Id certe est, quod mihi præfixi, atque utinam summus Archiater successus voto ac desiderio pares indulgeat. Dum autem optime cognitum habeam omnes peregrinantes iis esse accensendos, qui multis circumstantiis adstricti sunt, ut non possint omnia ad votum ita habere comparata, ne unquam servire tempori & præsentī necessitati cogantur; meæ meditationi illos potissimum præfigere volui, qui & libera voluntate peregrinationes susceperunt, & tantum juris in se habent, iisque opibus instructi sunt, ut manifestum periculum minitantiā evitare, seque contra plurimas molestias præmunire, aliquando etiam itineris laboribus iusta interquiescendi tempora interponere, & reficiendo corpori valetudinique refarciendæ indulgere possint. Tales dum animo præcipue præfixos intueor, ipsisque consilia destino, nihil peccasse me existimo, si in ostendendis periculis & noxis rectæ valetudinis, aliquando exempla hominum magis necessitati & coactis itineribus adstrictorum adduxero: præsertim cum sciam eos, quantum ab itineris incommodis læsi sunt, pertinere sane inter exempla morborum qui peregrinantibus accidunt.

Si vero a consiliis nostris, quibus obsequi non licet, minus juvantur, id imputandum est illis, quæ ipsos circumstant, vitæ rationibus, quæ ab arte nec emendari nec tolli possunt. Varietate exemplorum lectoris rædio mederi cupivimus; unde studiose conquisivimus, quotquot ex lectis quorundam veterum historicorum monumentis, & Medicorum, quos quotidie terimus, observationibus, occurrerunt. Sed potiora ex privatis pariter ac publicis prælectionibus *Excell. HENR. SCHULZE Fautoris ac Præceptoris nostri gratiosissimi* collegimus: quædam etiam, quæ mihi aliquantulum jam peregrinato videre aut experiri licuit, intermiscui, tunc præsertim, quando ex historiis non suppetebant talia. Lectorem benevolum rogo, velit nostris conatibus favere, & quod viribus decedere intelliget, favore ac benevolentia sua supplere.

§. I.

Peregrinantes
qui.

Peregrinantes non uno modo vocantur in veterum monumentis. Sunt enim olim Romæ peregrini omnes dicti, qui cives non erant, quamvis in illa urbe per complures annos negotiorum aut quæstus causa remanebant: atque de talibus etiam dici poterat quod Romæ peregrinentur. Deinde vero non raro sumuntur pro iis, qui terras & regiones peragant, visendi eas desiderio aut negotiorum quorundam causa: & sic de ULYSSE aut DEMOCRITO Philosopho rectissime dicitur, quod longe lateque sint peregrinati. Medio ævo peregrinos hos maxime dicebant, qui religionis causa Romanam, vel alia ob sanctos celebritatem acta loca adibant. In vocabulario vetere, quod a MART. MARTINIO adducitur, peregrini omnes, qui a loco domicilii sui proficiscuntur, proprie autem dicuntur Romipetæ Apostolorum & aliorum Sanctorum. Nos ut paucis nos expediamus, peregrinantes il-

los intelligimus, qui quancunque ob causam domo proficiscuntur & alias urbes atque regiones peragant.

§. II.

Quid morbus sit, explicari hoc quidem loco non est opus. Sufficit paucis dixisse, id omne nos intellectum velle, quod rectam valetudinem quoviscunque modo infestat, hominemque eo deducit, ut actiones sibi debitas non possit solita facilitate & alacritate peragere. Quin nec omnino negligemus ejusmodi labes, quæ actionibus quidem non magnopere officiant, habitui autem externo qualitatem inimicam, ut in scholis loquimur, affricant, aut excretiones certas, eas vel intendendo vel depravando lædunt. Neque tamen eosdem morbos amplius ad nos spectare credemus, nisi quatenus a causa quadam inter peregrinandum oblata vel inducuntur, vel si jam antea illius initia inhæserunt, exacerbantur. Ex ipsius autem causæ potissimum vel evitacione vel correctione aut ablatione medendi rationes

Morbus
quid, &
qui morbi
hic tra-
dentur.

nes ostendere adnitemur, pauca ubi opus est subjecturi remedia, eaque fere tantum euporista, quibus principiis occurri possit, ne in nervum omnemque ferociam suam erumpant. Nam plenissimam tractationem totius therapiae, quæ singulis debetur, non dissertationem brevem capere, sed amplum volumen deponere facile intelligitur.

§. III.

Causæ morborum peregrinantium.

Fiunt autem peregrinantibus morborum causæ res omnes, quæ etiam aliis fieri possunt: præcipue tamen illæ, quas *non naturalium* nomine ab antiquo designavit schola medica. Nulla fere harum est, circa quam non creberrimæ mutationes & vicissitudines obveniant itinera facientibus, quod CÆLUS noster intelligit *rerum novarum* nomine. Atque hinc merito adducimus gravissimi hujus viri consilia aliquot, quæ Libr. I. Cap. 3. proposuit: *Quum quis mutare aliquid velit, paulatim debeat adsuescere: neque ex nimio labore subitum otium, neque ex nimio otio subitus labor sine gravi noxa est. Neque ex salubri loco in gravem, neque ex gravi in salubrem transitus satis tutus est.* Ex quo discimus solam mutationem subitam efficere posse, ut quis morbis inter peregrinandum subjiciatur; etiam si in pluribus rerum illarum, quibus se exponit, nullum sit conspiciendum insigne & proprium vitium. Quanto autem magis opportuna morbis corpora peregrinantium reddentur, quum præter insuetum etiam vere insalubria aut excessiva multa obvenierint? Sed hoc pertinet eo, ut tanto diligentius valetudini conservandæ intenti simus. Nunc ordine percurramus res sic dictas *non naturales*, visuri quæ a singulis peregrinanti homini enasci possint morborum causæ. Sit igitur

CAPUT I.

De Morbis ab Aere.

§. I.

Aer quot modis agat in corpus humanum.

AEr, fluidum illud catholicum mobilissimum ac penetrantissimum, quod non solum corpora nostra ambit, verum etiam in illa intimius per inspirationem admittitur, ut & cum cibis & potulentis eadem subit, eadem valde ac præsentissime lædere, quin extinguere valet, quando intemperatus est, & vel frigore vel calore excessivo pollet, aut impurus existit, & multis heterogeneis ac mixtioni nostræ inimicis refertus.

§. II.

Morbi a frigore.

Non adeo rarum in nostris terris est hyeme præter modum sæva aliquos iter noctu facientes extinguere: sed in regionibus magis frigidis admodum sæpe fieri legimus, ut homines trahis super nive vecti ab animalibus viæ gnaris & ad nota hospitia sponte currentibus, mortui deferantur. Aliis partes extremæ & exstantes, ut manus, pedes, nasus, auriculæ *sphacelo* omnino corruptæ, decidunt: quibusdam *phlyctenæ*, *pernionesque*. *Frid. Hoffmanni Oper. Supplem. II.*

oriuntur: non paucis membra ita debilitantur, ut vix unquam ad pristinum vigorem possint reduci. Quin ipsa ossa *t. m. rigida redduntur*, ut facillime possint confringi, testante id experientia, quod nullo anni tempore plures fracturæ obtingant, quam quando gelu est intensissimum.

§. III.

Si causam tam gravium nozarum consideremus, physicæ scientiæ doctores non unum eundemque modum indicant, quo in nos agat frigus. Alii nihil nisi caloris aut ignis absentiam, adeoque meram privationem volunt, scilicet caloris: alii materiam frigorificam aliquam supponunt, quæ in corpus penetret undique a superficie motu rectilinerari, eaque rigida magis reddat. Meum non est hoc loco agere physicum; sufficiat nunc verbis *Illustris Præceptoris Fautoris ac Patroni mei colendissimi FRIDER. HOFFMANNI Med. rat. syst. Tom. I. effectus frigoris in corpus humanum tradere: humores spissat, condensat, poros & capita tubulorum constringit, & humores ab ambitu corporis retro ad interiora urget: unde fieri haud aliter potest, quam ut sanitatem multis iisque gravioribus maclet incommodis.*

Effectus frigoris in corpus humanum.

§. IV.

Docuit autem experientia peregrinantes complura circa frigoris damna: quæ recensere juvat. Vehementius a frigore adficiuntur, qui illud corpore quiescente & in eodem situ manente admittunt. Sic equo insidentes, ubi consistendum alicujus negotii causa est, intensius frigent, quam ubi equus cursum suum absolvit, sicque in sefforem commovet. Veredis publicis insidentes longe plus afficiuntur, quam qui eodem cœli frigore pedibus viam emetiuntur. Quibus vestimenta sunt corpus arctissime cingentia & includentia, hi facilius noxas frigoris suscipiunt, quam quibus sunt laxiora & exhalanti a corpore calori divertendi spatium præbentia. Sic chirothecæ ex corio arte manum & digitos complexæ frigus minime arcent: si habeas laxiores, quibus villosum & laneum aliquid inter cutim & chirothecæ corium laxè continetur, longe præstantissimas eas experieris. Sic ocreæ quantumvis ex crasso corio factæ pedes parum muniunt, si arctissime eos includant: adhibe laxiores, quibus etiam tibialia ex crassiori texto laneo subducas, aut fœnum insuper intrudas, satis vehemens & rigidum gelu diutius sustinebis. Quin experiendo disces stapedem metallicum, cui equo insidens niteris, frigus vehementissime per duras ocrearum soleas ad plantam pedis transmittere: Si stapedem stramine obducas, longe tolerabilius iter prosequeris, longiusque durabis. Omnium vehementissimum senties frigus, si ante lucem profectus obvertaris soli exorienti: & qui tota nocte satis facile toleraverunt frigus, tunc maxime ab illo lædi poterunt, nisi optime semet communiverint.

Quæ docuit experientia circa frigoris damna.

§. V.

Exempla quædam liceat adjungere morborum gelu intensissimo inductorum. Quam multa passi sunt Græci ad juvandum Cyrum

Exempla morborum gelu intensissimo inductorum.

minorem profecti, docet XENOPHON expedit. Cyri. Libr. IV. *Iter multo difficillimum erat. Flabat enim adversus boreas, urens homines ac plane congelans: nix vero nihilo duobus passibus minus alta erat: quare & jumentorum & captivorum magnus numerus periit ac milites ad XXX--relictis de nostris multi sunt, qui oculos ex perpetuo nivium adspectu amisserunt: multi item, quibus gelu pedum digiti obstupuerant: Hic unicum erat oculis praesidium, si quid ante eos nigri praetendissent: pedibus si corpus assidue moverent, & nunquam omnino quiescerent, ac si noctu calceamenta detraxissent. Nam si calceati decubuisent, tumentibus pedibus alte vincula imprimebantur, atque ita, ut calcei pedibus adstricti resolvi nullo modo possent. Adscripsi locum integrum quod & testimonio serviat, & remedia edoceat. Subjiciam casum ab Excell. SCHULZE Praecept. ac Patrono meo astumatissimo in privatis lectionibus communicatum: Nobiles aliquot juvenes post medium Februarii, quum aliquot sereni dies fuissent, trahis impositi in proxima urbe amicos visitare volebant. Ipso diluculo proficiscebantur, quum in urbe nihil magni frigoris sentiretur, adeoque nolebant se valde sollicitè munire. Sed cum medio itinere per tractum montanum versus orientem via duceret, solisque exorientis radii emicarent, tam intensum frigus cum vento non vehementissimo in illos incidebat, ut omnino obrigescerent, adeoque in proximo pago aliqui tantisper subsistere cogerentur. Unus horum durior videri cupiens, iter cum socio, qui infidebat trahere, ambitiosius prosequeretur ad proximam urbem: cui, quum chirothecas manibus detraheret, ambae tanquam emortuae livebant. Nive multa eas fricabat & fovebat: sed vix sensus recuperabatur aliquis. Domum relatus vix integris duobus mensibus exactis restituebatur, exortis scilicet phlyctænis per omnes digitos, digitorumque unguibus omnibus ablati, satis tarde nova carne, tardius autem novis unguibus subnatis.*

§. VI.

Sphacelus
a frigore.

Sphaceli a frigore inducti satis fonticam & malignam indolem cognoscimus ex eo, quod AMBROS. PARÆUS refert Libro XI. Cap. 12. Scilicet nec amputatio corruptae partis hic plerumque satisfacit, quae ultimum est in tali malo praesidium. Commemorat utique se ex compluribus, quibus frigoris vehementia necrolin pinnis narium induxerat, quatuor delegisse quibus corruptam partem amputaret. Horum duo incolumes evaserunt: reliqui serpente malo interierunt. Servi etiam exemplum adducit, cui crus a gelu sphacelatum nosocomii Parisiensis Chirurgus amputaverat, nullo solido fructu: gliscente enim in supernas partes necrosi intra triduum mortuus est, cum laboriosis ructibus & singultibus, deliriis, frigido sudore & crebra syncope.

§. VII.

Dolor tre-
morque
pedum:
perniones,
& alia.

Meretur etiam adduci quod HENR. MUNDIUS Oper. Med. Physic. p. 23. commemorat in expeditione quadam hybernis mensibus in regno Scotiae suscipienda, plerisque militum pedes & manus adeo gelu contractos

fuisse, ut multi ægre incedere deinceps valerent, quidam non omnino, nec arma tractare potuerint. BORELLUS Cent. I. obs. 84. memorat aliquem, qui a frigore nimio in dolorem tremoremque pedum maximum inciderat, tunc praecipue furentem, quum ad ignem propius accederet: alique plures auctores debilitatem partibus nimis olim refrigeratis, cum doloribus quasi rheumaticis, tandem in veram arthritidem transeuntibus, enatam commemorant. Mitissimus omnium eventus sunt perniones, tumores hiberno tempore rubentes, saepe atro-rubri & ad aeris quamcunque mutationem valde prurientes, saepe ad exulcerationem, eamque satis aliquando gravem & difficilem prodeuntes.

§. VIII.

Videbimus nunc, (ne his diutius immorando reliquis locum praeripiamus) quid ad salutem suaderi debeat homini a frigore laeso & ambusto. Ante omnia caveatur subitus a summo gelu ad positivum calorem transitus. Nihil hoc periculosius esse adfirmant omnes in illis regionibus versati, ubi tales laesiones frequentissime obveniunt. Membrum, quod stupet, aquae frigidae immergatur ac nive fricetur tamdiu, donec frigus percipiatur. Secus si fiat, pars omnino rigida facta a sana secedit. Si quoque non omnino penetrata a frigore & rigida facta pars sit, dolores immanes percipiuntur: & tanto certius perniones remanent. Antea laudatus BORELLUS l. c. adducit hominem, qui frigore congelatus reperiebatur. Hunc, reparandi caloris vitalis causa in fimo collocabant. Is vero, ubi paululum ad se rediit iratus, postquam paucula verba protulit, animam efflavit. Si quis etiam non fuerit extreme & ad rigorem vel totius corporis, vel extremitatum quarundam refrigeratus, cavere tamen debet ne ad calorem celeriter accedat, praesertim magnum & astantem, ut saepe in hospitibus deprehenditur. Terrere nos debet quod ex SCHEFFERI LAPPONIA citatum legi, frequenter ibi accidere, ut rustici, qui ad sacra celebranda e longinquo confluunt, quando iis finitis ad hospitia redeunt, apoplectici cadant. Id si hominibus frigori adsuets & durissimis evenit, quid non metuere debent minus firmi, minusque adsuets?

A frigore
laesis quid
agendum.

§. IX.

Si cui a magno gelu laeso phlyctenae, id est pustulae lividae, pallidae, aut, quod pessimum, nigrae exortae sint, ne adspersetur malum, sed mature se curandum committat Medico aut Chirurgo experientia confirmato: neque citissimam ab eo expostulet sanationem. Certum enim est subesse multum jam corruptae substantiae; quae debet a sano separari & discedere, ad quod tempore omnino opus est in corporibus antea sanissimis, tanto autem magis in cacoehymicis & humorum corruptorum abundantia oneratis. Quod si omnino aliquis ita sit a fortuna destitutus, ut non possit Medici opera uti, illi suaserim rapam radula comminere & vel butyro vel oleo percoquere: colatum cum mucilagine seminis cydoniorum agitare & inducere: aut, si rapa non adsit oleum seminum raparum vel lini

Phlyctenae
quam ex-
poscantu-
rationem
& pernio-
nes.

lini simili ratione temperatum imponere. Si jam separatio incipit & succedit, loco mucilaginis vitellus ovi addatur: tandem ad exsiccantia & consolidantia progredi oportet, quo scopo bene facit emplastrum aliquod saturninum; cujus generis plura extant, ut de spermate ranarum camphoræ, Noribergenſe &c. hujusque generis alia. Si profundior corruptio fit, non tamen offa tangat, unguentum fuscum Fel. Würtzii vel Aegyptiacum requiruntur: magis tamen suadeo hæc ex consilio peritorum quam proprio ausu adhiberi. *Pernionibus*, non exulceratis, sed tantum prurientibus, satis commode adhibetur litus olei petrae, aut, quæ æquipollent, succini, templinum. Alii mane & noctu pedes ungunt felle porcino, cataplasmate postmodum imposito ex pisces aridis, jejuno ventriculo in pultis formam massicatis & calefactis optimo cum effectu. Exulceratis juvat imponere litum ex oleo aut vitello ovorum cum calce viva, lapide calaminari, paulillo myrrhae & camphoræ: post repurgationem sufficientem ad consolidationem ducet emplastrum diapalmæ.

§. X.

Enim vero non solum externa hæc damna artubus infert frigus, verum etiam interioribus multum nocere idem valet. Nam dum exterior habitus constringitur, ut humores per eas libere decurrere nequeant: necessarium est ut in interioribus illi magis coacerventur & detineantur, vasorumque illorum diametri ultra solitum distendantur. Hoc vero cum inter alias partes capiti etiam accidat, cujus arteriæ cerebrum subingressæ tunicam suam crassiorem & contractilem deponunt: nihil mirum videri debet, si illis ultra modum infarctis & nervorum principia prementibus, sensuum torpor & ad somnum fere invincibilis inclinatio suboritur: in aliis autem subitanea sensuum ac motuum abolitio, quam Apoplexiam dicimus, consequitur. Probe hoc observavit AVICENNA, qui summe refrigeratos, tanquam narcotico sumto, doloris expertes mori docuit: ipseque vidi in talibus vere insuperabilem propensionem in somnum, ut omnino vi propelli & ad motum incitari, vitæ conservandæ causa debuerint.

§. XI.

Ipsa hæc ad interiora compulsio & detentio humorum, si non ad hunc feralem effectum properat, sanguini tamen inducit ad spissescientiam & coagulationem non tam dispositionem, quam summam facilitatem. Si vero accedat tali flatu, ut ita constituti, semet ab intra calefaciendi spe, multum vini sublimati hauriant, liquoris ad humores coagulandos aptissimi; facile accidit firma gelatinosæ sanguinis portionis coagulatio, vix postea resolubilis. Atque sic homini subito enascuntur *polypi* per vasa sanguinea ampliora, & ab his valetudo valde afflictæ & in morbos immedicabiles omnino præceps. Hujus noxæ exemplum notatu dignissimum legitur in ACTIS PHYS. MED. ACAD. N. C. Volum. I. obs. 220. p. 492. Quum porro in superficie corporis pori omnino clausi sint, ut per illam nihil, aut non æquabili modo, ut par est, exhalet: illæ halituosæ particulae subsistentes folliculos pororum sub cuticula ex-

tendunt, & detenta humiditate vaporosa implent, quæ tandem ad ductulos, qui lymphaticorum in & sub cute initia constituunt, regurgitant, & cellulas pinguedinosas inflant & extendunt, unde brevi sæpe tempore leucophlegmatia insignis exoritur: illis utique qui & succorum pleni sunt, & antequam se frigori exponerent, humores potu calido & spirituoſo plus justo expanderunt. Qui status, si non cito & scite expediatur, in *hydropem anasarca* facile transit. conf. Excell. D. Prof. SCHULZE *diff. de Emphysemate* hic loci tradita.

§. XII.

Frigidus aer, tantoque magis frigidissimus, illas partes per quas inspiratus transire debet, immediate lædit. Sunt autem illæ nares, cum connexis cavitatibus seu sinibus ossium capitis, quæ communi cum naribus tunica pituitaria cinguntur, fauces postremæ, palatum summum, aspera arteria & bronchia: quæ tunica admodum porosa & sensibili nervea obducuntur, sibi invicem perpetuo tractu continua & connexa. Hac si transit aer, tunc eo magis has vias lædit, quo magis ibi viget successus excretionum. Magis autem viget, si nos diluentibus calidis & spirituosissimis, loco bene calente diu assumtis implemus, & deinde itineri ac aeri frigidissimo exponimus, præsertim quieturi in rheda undiquaque aperta. Hinc oriuntur *gravedines*, tussis, tonsillæ, angina, pleuritides: nec raro cephalæ diuturnæ & gravissimæ causa colligitur pituita tenax sinum unum & alterum implens, ibique diuturniori mora corrupta & membranam acriter vellicans.

§. XIII.

Ex iis, quæ tribus paragraphis præcedentibus dicta sunt facile colligimus, salutare in primis esse peregrinantibus, quamprimum obrepere sub maximo frigore gravem somnum intelligunt, illi omni modo reluctari, minimeque indulgere, nisi itineris & vitæ finem simul velint attingere. Multum hic ad salutem facit itineris comes, qui urgendo & excitando operam fidam præstat. Deinde etiam illud consequitur, male sibi consulere, qui spirituosos liquores multum tunc adhibent, sese interius calefaciendi spe & blanda fiducia. Longe melius cerevisiam aut vinum adsumimus, quæ particulis spirituosissimis multo humido aqueo intermixtis sanguinem & diluunt & diapnoen promovent. Sed & illud consequitur, illis, qui noverunt horam, qua se exponere frigoribus deinceps debent, consultissimum illud esse, ut provideant ne ad contraria subito fiat transitus. Si quis vero talium vel ignarus vel incurius læsionem se incurrisse sentiat, illi ad salutem brevissima quidem via profutura duo proponam, quibus sumto interquiescendi spacio utatur. Si habitus totius inflatio sentiat, utilis erit *essentia croci diluta* spiritu debiliore extracta, per aliquot dies interne adhibita, corpore per omnia sic disposito, ne quid restituendæ transpirationi insensibili officiat. Si catarrhus, tonsillæ, tussis, pleuritides, angina pituitosa corripuerunt, officium facit sulphur citrinum aut flores ejus, cum ossæ mandibulæ lucii piscis, Cornu Cervi philosophicè præparato aut similibus ad

gravedines, pleuritides, & alii.

Morborum internorum a frigore curatio.

Morbi interni a frigore: ad somnum inclinatio, Apoplexia,

polypi, emphysema, hydrops, anasarca,

exemplum pulveris pleuritici Mynsichti, permixtum, & per duos tresve dies, corpore ad transpirationem recte disposito, adsumendum.

§. XIV.

*A frigore
ventricu-
lus & in-
testina
laeni;*

*appetitus
augetur.*

Aliquibus sub gravi frigore diutius commoratis omnis noxa ad ventriculum & intestina convertitur. Scilicet antiqua est observatio HIPPOCRATIS *ventres hyeme esse humidiores*: utpote plurima humiditate, quæ ad superficiem alias confluit, ibique exhalat, illuc confertim ruente, quando ab exitu impedita per corporis ambitum fuerit. Accedit autem, quod iter hyberno tempore peragendum appetitum valde auget, & quibusdam ad vitiosum excessum, quem BULIMON vocant, provehit: observante illud PLUTARCHO *Sympof. VI. Cap. 8.* Valde notabilis videtur locus, cujus partem adscribam: *qui per nives multas incedunt, intensissima fame, & præ hac sæpe lipothymia corripiuntur.* Accidit hoc BRUTO, qui Dyrrachio ad Apolloniam tendens vitæ periculum sic incurrit. Profundæ erant nives, & qui sarcinas cum cibis ferebant longo intervallo aberant. Quum itaque dux animo prorsus linqueretur, præfenti necessitate coacti milites ad moenia urbis obsessæ accesserunt, panem ab hostibus petitori, quem cum illico acciperent, eo ducem Brutum refecerunt, qui hujus beneficii gratiam insignem expugnatae urbi retulit, mitissimum semet victis exhibendo. Atque idem auctor testatur, tale quid jumentis per nives procedentibus sæpe accidere, quibus jam omnino deficientibus celerrime succurri possit pane ingesto, quo præcipue reficiantur. Plutarchi fidem in hoc confirmat SENNERTUS *Lib. III. P. I. Sect. II. Cap. 4.* qui testatur, si quis in Alpibus Rhætici hyberno tempore iter faciat, etsi ab una radice montis ad alteram vix bina milliaria germanica intersint, neminem tamen jejunum eas superare audere.

§. XV.

*Alvi fluxus,
tormina
dolorum
colici,
iliaci.*

Quæ cum ita sint, cogitandum permitto, an male suspicer *alvi & ventriculi tormina, dolores, fluxus*, a duplici causa pendere, nimia scilicet ciborum, invitante appetitu auctiore, ingestione, eorundemque crudorum & male concoctorum, a nimis copiose eo compulsis humoribus, nimia dilutione, ut modo superius modo infra crudi expellantur. In aliquibus, qui excessiva frigora diutius toleraverunt, *dolores gravissimi colici & iliaci* accedunt, de quibus digna sunt, quæ ex supra laudato MONDIO adscribam: Gallus Nobilis a BOYLEO citatus, qui in istiusmodi locis meruerat, narrat, se olim quosdam ab hac colica seu ileo extinctos vidisse, quibus abdomine post mortem aperto intestina livida & glutinosa sanie sibi invicem adhærentia inventa sunt. Grangræna enim a frigore inducta siderata erant & putrefacta.

§. XVI.

*Quid his
in casibus
peregrinanti
augendum.*

Adduxi hæc, ut peregrinatorem meum moneam, ne in semet magnorum morborum parva initia negligat, sed ubi ventris tormina, dejectiones, appetitus insolitam ve-

hementiam animadvertit, sollicitè suæ invigilet salutem. Ante omnia interquiescendi & valetudinem refarciendi locum idoneum quærat, ibique donec satis confirmatum se sentiat, subsistat. Utatur mature theriaca, & transpirationi ad ordinem naturæ revocandæ studeat. In cibis assumendis ad satietatem plenam numquam accedat. Vino probo veteri modice sumto concoctionem juvet. Cruditates, si opus videtur, pilulis blandis balsamicis educat. Cascarillæ pulverem cum flavedine corticis aurantiorum assumat. Calida stomachica & anticolica evitet, quoniam illa, quæ subest diathesis inflammatoria, talibus non magnopere irritari omnino non potest. Tandem clysteribus ex carminativis & oleosis satis diu indulgeatur, quibus addi aliquid de vino utiliter potest. Atque hæc nunc de morbis peregrinatori a frigore metuendis dicta sufficiant.

§. XVII.

Progredimur ad exponendum de noxis, quas *aër nimis calidus & æstuosus* inducere valet, quæque inferri illis possunt, qui ex borealibus frigidis regionibus in australiores proficiscuntur, ibique mensibus calidioribus sub dio versari debent. Talis aer ex doctrina Illustr. FRIDERICI HOFFMANNI *Præsidis ac Patroni nostri gratiosissimi Med. Syst. Tom. I. humores corporis immodice attenuat ac rarefacit, dumque pororum hiatus latiores facit, inconspicuas diffusiones nimis auget. Atque hac ratione sanguinis particulas subtiliores, quæ virium effectrices ac motuum opifices sunt plus justo eliminat, gelatinosas vero, quæ in corporis alimentum cedunt, resolvit, dissipat, magnamque inducit debilitatem.* Excessivus calor illis potissimum regionibus accidit, ubi campi deserti & arenosi longe lateque extenduntur, ex quibus nihil humiditatis temperando ipsi admisceri potest, unde radii solares recta linea in corpus objectum pergunt, illudque non secus ac de excessivo frigore diximus, adurunt. Pulcherrimus hanc in rem exstat locus apud STRABONEM Geogr. Libr. XV. quo describit quid ALEXANDRO Magno per Gedrosiam iter cum exercitu facienti acciderit: unde paucissima afferemus. *Alii, inquit, ob solis ardorem siti confecti in media via jacebant, deinde tremuli inter manuum ac pedum quassationem moriebantur, similia fere passi illis, qui magno frigore ac rigore detenti fuerant.* Meminit in eodem discursu magnæ ad somnum capiendum inclinationis, sub quo plerisque mors surrepsit. Graviora hæc omnia sunt, quando calidissimus aer vento supra hæc deserta loca vagante abductus confertim in hominem incidit: cujusmodi per aliquas Persiæ regiones certis mensibus, regnans ventus *Badshmur* cum repentina hominum iter agentium strage, efficit: de quo legi debet elegantissimus medicus peregrinator KÆMPFERUS in amœnit. exot. fascic. IV. & Germaniæ medicorum decus b. D. D. LOCHNERUS in Nerio p. 57. sequ. Italis ob malignitatem & insalubritatem notus est ventus *Sirocco*, æstuosissimus, de quo idem LOCHNERUS l. c. p. 60.

*Aër nimis
calidus
quomodo
noceat:
exempla.*

§. XVIII.

§. XVIII.

Quid cavendum
sub aere
nimis ca-
lido pere-
grinanti.

Adversus immodicos æstus nihil æque facit, quam si itinera noctu potius, quam interdiu fiant: ubi vero partem diei impendere debemus, umbraculo aut velamine obducto radios solares arceamus. Vitanda sunt omnia quæ humores amplius expandunt & exagitant, spirituosus potus, aromata: contra assumantur, quæ humores a resolutione nimia cohibent, ut acida temperata, pomum citri, granatum, similesque fructus, quibus numen regionibus talibus fere abundantius prospexit, ut sunt citrulli, pepones, modo justam maturitatem adepti sint, neque excessiva quantitate ingerantur. Maximopere cavendum est nimis calefacto, ne se frigido aëri & loco subito committat, ut sunt forte obtingentes specus aliaque loca adversus calorem optime munita. Scilicet hic quoque ad contraria lento gradu prodeundum est, maximeque caveri debet, ne quis summe æstus & defatigatus balneo aquæ frigidaë semet illico committat. Deterreant nos ALEXANDRI milites, de quibus STRABO l. c. multos, aquam nactos, subitoque semet in eam immergentes, spe citius inflatos fuisse scribit, & exanimatos super aquas natavisse: deterreat ipse ALEXANDER qui in *fluvio Ciliciæ Cydno*, cujus aquas frigidissimas perhibent, lavando vitæ periculum subiit, sed effugit, felicior *Imperat. FRIDERICO BARBAROSSA*, qui in eodem vitæ suæ exitum invenit. Sed adfuetis balneo, ubi se aliquantulum a lassitudine collegerunt, jamque deferbuerunt, illius usus in primis confert, suadente etiam GALENO *Meth. Med. X. Cap. 10.*

§. XIX.

Quid agendum.

Diximus quid cavendum sit, ne magnus æstus facile nobis noceat. Addere his monitis liceat, ut juvenes, quibus sanguis est fervidior, quique hæmorrhagiis obnoxii sunt, mature sanguinis superflui onere se levant phlebotomi opera, diligentiusque etiam vitent spirituosos potus, venerem, iracundiam: vitantur vero refrigerantibus & attemperantibus, ut acidis, nitrosis. Atque hæc ne differant, quando se valde motos & exagitatos sentiunt: potiusque viam interrumpant, quam vitam sibi abrumpi patiantur. Quibus partes aperto & fervidissimo soli diutius expositæ in tumorem ac ruborem sublatae sunt, quod accidere tenerioribus solet: his saluti erit acetum lythargyrii, aliquantulo aluminis, aqua soluti turbatum, quod vocant lac virginis, non quidem saturatissimum, sed aqua plantaginis aut rosarum, aut denique quacunque alia bona distemperatum, quo pars abluenda est. Si tale nihil ad manus sit, succus citri aut acetum vel albumen ovi cum sale aut alumine conquassatum proderit. Orientales populi, quando tale quid patiuntur, fantali frustum super lapide arenario, affusa aqua, terunt, idque quod sic detritum fuit, præsentaneo fructu imponunt. Ubi hoc corporibus impuris accidit vitium, sæpe fonticarum exulcerationum initium præbet, ut phlyctenæ prius exsurgant, mox cutis spatium sensu omnino privatum, decolor & emortuum subesse deprehendatur, cui si vulnera scalpello infliguntur, omnino sphacelosa

Frid. Hoffmanni Oper. Supplem. II.

corruptio sub cute in partibus cellulosis membrana pinguedinosæ procurrens deprehenditur, cujus curatio amplior est, quam ut hic tradi possit, ubi tantum paucos morbos & breviter proponere institutum patitur.

§. XX.

Transimus tandem ad morbos, qui peregrinantibus ab aeris impuritate possunt enasci & ingenerari. Impurum aërem vocamus eum, qui particulis heterogeneis refertus est. Hæ vero diversorum generum dari possunt in atmosphæra nobis circumfusa, ut *aquosæ, terrea, sulphurea, sulphureo-salinæ* a diversis corporibus & elementis in aërem immixtae: estque difficile verbis satis exprimere diversitatem, quæ se ipsa re & effectibus demum prodit & comprobatur. Non licet hic nobis esse physicis, & ex illa utilissima scientia adferre, quæ ad hanc rem illustrandam facere possent. Percurremus autem paucis accusatas impuritates, initio facto ab ea, quam *aquosam* diximus. Equidem probe teneo atmosphæram hanc nostram humiditate aut vaporibus aqueis numquam carere aut carere posse: morbificam autem impuritatem aquosam illam imprimis dico, quando humiditas vappida est, ut in locis subterraneis & vallibus profundis, a vento non perflatis, vel aquis stagnantibus & inertibus calore radiorum solarium in sublime ducta: vel nebulosa ex locis uliginosis adscendens.

§. XXI.

Ejusmodi autem aer duplici modo nocet, primo quidem quod destitutus est particulis purioribus ab aethere liberius accedente immiscendis, quæ expansivam virtutem possident, nostrisque humoribus largiuntur: deinde, quod fibras laxas & flaccidas reddendo, transpirationis & perpetuæ per superficiem exhalationis successum supprimit: ex quo fit ut illi, qui diutius tali aere circumfusi degunt, cachexiam vel scorbutum cito contrahant. Quod si ad vappidam humiditatem accedat calor, corpora cito resolvuntur, debilitantur, sudoribus diffluunt. Talem, antequam morbidum corpus reddat, deferendum peregrinanti suademus: quod si non licet illico facere, emendet ipsum luculentum igne succenso, interioribus autem succurrat, si frigus est, vino generoso, si calor jungitur, aceto, cum theriacæ modico. Quin ipsum conclave, si pernoctandum ibi est, aceto prunis insperso, aut vino sparso qualitercunque emendabimus: aut suffumigio alio, quod ad manus est bene impleatur, deinde per fenestras & fores emittatur fumus, humiditatem vappidam simul secum educturus.

Aeris a-
quosi im-
puritas
quomodo
nocet, &
qui corri-
genda.

§. XXII.

Impuritates aeris pulverulentæ terrea diutius susceptæ & in asperam arteriam atque bronchia admissæ, illis præcipue nocent, quibus respiratio jam antea difficilis est, facileque tussis excitant ferociore. Cavebitur magna ex parte, si ori & naribus linteum rarius obducatur per quod aerem introducamus: deinde ad hospitium delati & puriori aere gaudentes potu largiori, & potissimum calido, humores diluant, fermocinando au-

Aeris im-
puritates
pulveru-
lentæ ter-
rea, & no-
xarum in-
de enata-
rum præ-
sidia.

tem vel clare legendo aut cantando moveant partes illas, quo citius tussiendo deinceps emoliri possint haustum pulverem. Si quid puncturæ & dolorum accedat, oleum amygdalarum dulcium cum spermate ceti in jusculo vel carniū gelatinoso non salito, vel decocto avenæ exsiccatae cum saccharo aut syrupo quodam pectorali assumant. Ut nares & cavitates ossium capitis, quæ in eas hiant, citius liberent, super decocto calido coffee vel infuso thee os naresque aliquandiu teneant, ut vapor calidus subeat: deinde pulverem sternutatorium adhibeant.

§. XXIII.

Impuritates
aeris
sulphureæ
vitandæ.

Impuritates aeris sulphureæ vel maxime cavendæ sunt itinera agentibus. Illæ quidem multis locis obtingunt ab exhalante e cavernis subterraneis suffocativo & vitæ inimicissimo vapore, ut in omnibus itinerum scriptoribus refertur de *Charontis specu Puteolano*, cujus pestilentes vires præstat in canibus spectare, quam in seipsis experiri. Quando terra vehementiori motu tremuit, subinde fissuræ profundæ aguntur, ex quibus similes vapores longe pestilentissimi exsurgunt, a quibus quantum fieri potest fugiendum est. Sæpe per minerarum metallicarum fodinas subito erumpunt tales vapores, a quibus metallifossore illico sese recipiunt, ni velint sopore æterno sepeliri: quare curiosi peregrinatores, qui naturæ operum scrutandorum desiderio tenentur, ante quam se in hos puteos demittant, sciscitari oportet numquid hujusmodi aliquando aut certis temporibus ibi accidere observatum sit: ubi melius est cohibere discendi studium, quam de vita periclitari. Juvat tale quid passos & recens subductos illico aqua frigida perfundere, ut partibus externis a frigore contractis motus humoribus stagnantibus restituatur, sicque auram illam sulphuream in bronchiis & pulmonibus stagnantem & ingressum purioris aeris præcludentem expellant.

§. XXIV.

Vapor carbonum
nocivus.

Non pauci iter cœlo frigido & nebuloso facientes, ubi divertendum fuit in obviis potius ædibus quam commodis hospitibus, vitæ periculum insigni incurrerunt, quando frigoris arcendi causa prunas clausis conclavibus imposuerunt. Quo magis locus angustus est, quoque frigus intensius urget, eo potentius iste a carbonibus prodiens vapor nocet, præsertim homini per itineris molestias defatigato & cibus potuque repleto, & si ipsum conclave recenti calcis tectorio obductum fuerit. Hæc singula concurrerunt ad Imperatorem JOVIANUM interficiendum, docentibus AMMIANO MARCELLINO Lib. XXV. EUTROPIO Lib. X. extremo & S. AUR. VICTORE p. 493. edit. Erasmi. Quam noxius sit iste vapor luculenter docuit Ill. PRÆSES Med. Syft. Tom. II. (vel Opp. T. I. p. 229. seqq.) pluresque auctores indicavit, ubi exempla sic enecatorum adducta legi possunt. Insidiosum est venenum, quodque vix sentientibus blandi specie somni subrepat. Felices sunt quibus illico superveniunt, qui fenestris foribusque reclusis libero aeri accessum permittunt, aut potius illico extractos ad aerem puriorem reponunt. Magis jam læsis profundioreque le-

thargo sopitis profunt illa, quæ ad apoplecticos & lethargicos excitandos idonea sunt; extremum tentamen sit cauterium plantis pedum aut vertici applicatum, vel utrique loco simul admotum.

§. XXV.

Aer impuritatibus sulphureo-salinis repletus morbos populares contagiosos inducit. Si ergo peregrinanti per loca, ubi morbi contagiosi in propinquo grassantur, iter faciendum est, optime sibi consulat, si quam longissime ab ipsis infectis deflectat: nihil enim certius pestilentiam quamlibet avertit pilulis istis de tribus: *fuge cito, longe abi, tardè redi*. Si verò omnino incautus inciderit in talia loca, aut fugere nesciat, exitu regionis undiquaque clauso & obseffo, nihil æque juvat quam animus imperterritus & metum ac terrorem vincere doctus. Neque tamen negligat præsidia artis salutaris. Moderationi in omnibus studeat, temperans sit, infectorum ædes fugiat, rus quærat, utatur theriaca aut diascordio *Fracaflorii* cum multo aceto, floribus sulphuris cum rob sambuci aut juniperi in bolum redactis & devoratis haustum aceti vel succi citri superingerat. Nec insuper habeat amuleta quædam, quæ iter ingredientibus secum ducere suaserim. Talia sunt radix colchici auctumno effossa & de collo gestata, amuletum ex bufone HELMONTII in *Dispensatorio Brandenburgico*, ut & a JOH. ZWELFFERO descriptum. Sæpe etiam parvis rebus magnam inesse gratiam compertum est illa pestilentia, quæ ante aliquot annos per Hungariam & Austriam grassabatur, ubi multi muniti sunt a mali contagio, qui radicem plantaginis sindoni inclusam e collo gestarunt: siue remedium ipsum valuerit, siue profuerit ejus fiducia metus & terroris partem animo eximens. Qui fumo nicotianæ sugendo adsueverunt, illius usum ne seponant isto tempore; fidem faciente ISBRANDO DE DIEMERBROECK sibi aliquoties levamen ab eo esse allatum, quando ab agrotorum visitatione plane languens & male habens domum redierat, contagiumque manifestis signis in se perceperat.

§. XXVI.

Impuritates aeris salino-sulphureæ non solum pestilentiam populariter inducunt, verum etiam *dysenterias, variolas, morbillos*. Duorum ultimarum respectu peregrinanti morbis hisce nondum defuncto, magnopere suaserim vitare illa, ubi grassantur ferocius, loca, ne extra patriam sepeliri debeat. Nimis jam multi etiam summi ordinis viri suo exemplo comprobaverunt, quam grave sit adultum hominem extra patriam hoc morbo laborare, corpusque suum curandum methodo exteris consueta permisisse. Quanquam enim nec patriæ cujusque suæ optimus Medicus cuivis varioloso salutem certo potest promittere; quoniam epidemiæ constitutiones infinitis modis diversæ sunt; adeoque nec aliorum annorum optima curatio præsentī quadrare sæpe solet: semper tamen inter duos pluresve Medicos æque doctos & expertos peregrinanti præferendum existimo familiarem suæque patriæ utilis ac proficua methodi gnarum, cuivis peregrino. Nimis sunt multa, quæ

Aeris impuritates sulphureo-salinæ pestilentiam inducunt. Præsidia.

& dysenterias, variolas, morbillos. Præsidia.

quæ de curatione varia hic dicenda essent, unde nihil malo dicere, quam, quæ non sufficienter explicata, potius implicare, quam instruere valeant. Dysenterijs grassantibus inprimis suadendum est, ut caveatur usus fructuum horæorum fermentescentium, quippe ab his occasione arrepta malum facillime insidere consuevit. Si quis mali primordia in se senserit, mane theriacam cum aceto sumat, deinde post prandium & coenam frugalem fecalis tosti in farinam comminuti cochlear unum cum vitello ovi crudo subactum devoret, seque ita domi contineat, ut blandæ transpirationi ac miasmatis suscepti eliminationi nihil impedimenti objiciatur. Purgantia, ipsaque laxantia rhabarbarina, spem & expectationem sapissime fallunt idque jactatum specificum antidysentericum Ipecacuanha, fidem jam pridem decoxit. Si augeat malum & sitis urgeat, fiat emulsio ex amygdalis cum decocto hordei, cum cornu cervi, ipsique vitellus ovi admisceatur. Vigeat inter hæc, quantum fieri potest, regimen diapnoicum, neque omittatur febris accessoria, quæ plerumque adest, prospicere, quod majorem circumspeditionem postulat, quam paucis, ut nostrum fert institutum, includi queat.

CAPUT II.

De Morbis Peregrinantium ex cibo & potu ortum ducentibus.

§. I.

Nimia vel intempestiva ciborum ac potuum assumptio peregrinantibus noxia.

E Adem, quæ vitæ conservandæ, legitimo usu recteque comparata inserviunt, morborum quoque causæ fiunt, si minus recte offerantur, aut vitio quodam corrupta sint. Vidimus id aeris exemplo: sed nunc per classem ingerendorum vel ingestorum ciborum ac potuum ibimus, visuri quos morbos ab his sibi peregrinantes extimescere debeant. Lædunt autem talia etiam in se rectissime constituta & inculpata, si nimia copia vel intempestive assumantur: quod evidentibus noxis quidam expecti, cavere deinde didicerunt. Sic omnis cibus, tantoque magis solidus, post longam & insuetam famem avidius ingestus, multis fuit citæ mortis causa. Et qui celerrimum iter equis velocibus peragunt, & longius progredi eadem diligentia coguntur, inprimis sibi cavent a refectioe per alimenta solida, & plerumque ovi unius vel alterius vitello, vino bono permixto contenti sunt. Si vinum hospitii paupertas negat, cerevisiam calidam immisso vitello hauriunt, & forte buccellam panis optimi subjungunt. Vitæ inimicissimum est a motu & calore ambiente æstuantî corpori potum gelidum infundere, omninoque cavere ab hoc errore oportet. Paululum requiescendum & deambulandum est, dum æstus maximus deferbeat, tum vero parvis haustibus aliquid licet assumere. Pulcherrime præcepit CORN. CELSUS Lib.I.cap.3. *Si quando insuetus quis laboravit, aut multo plus, quam solet, etiam is qui adsuevit, huic jejuna dormiendum est. Illud quoque nosse*

oportet, quod ex labore sudanti frigida potio perniciosissima est: atque etiam quum sudor se remisit, itinere fatigatis inutilis.

§. II.

Inducit talis potus intestinis calentibus infusus, in illorum repletis vasculis circulantibus humoribus, lentescientiam & stagnationem; unde sæpe nimis cito febres inflammatoriae oriuntur, quæ se ad mesenterium, hepatis, lienem extendunt, & vel acuto schemate, cum summo periculo, decurrunt, vel ad lentam & hecticam consumptionem viam sternunt. Si quis incautus ita peccaverit, si mali initium magna cardialgia & anxii vomendi conatibus sentiat, ante omnia caveat sibi ne novo errore malum suum augeat & salutem præcipitet, vomitoria medicina sumpta, sub vana spe & præfiguratione naturæ conatus adjuvandi. Illico potius veniat ad efficaciam discutientia & resolventia, quæ jam incipientem stasim expedire valeant. Conatus vomitorii compescantur blando quodam anodyno, ut aqua theriacali cum diapnoicis distemperata, mixtura simplici, paucisque guttulis laudani liquidi Sydenhami, vel modico theriacæ veteris. Exterius imponatur emplastrum de baccis lauri cum saponato æqualibus partibus mixtum, addito, si placet, illo de ammoniaco Foresti. Si in via id accadat, ubi pharmacopolium non suppetit, coquatur fagopyrum cum aqua ad molliem, addantur, si ad manus sint, flores chamæmeli, & crocus: hæc puls linteo inclusa ventriculo & hypochondriis imponatur. Ægrotus quiescat, & ad diapnoen dispositus maneat: manus etiam ac pedes admotis calidis foveat, ut blando ac universali sudore sponte erumpente liberetur. Fracto jam mali impetu pergat aliquot diebus uti antipleuritjcis. Satis citam opem tali casu affert infusum arnicæ florum verorum, sed cautam & modestam in exhibente circumspeditionem requirit. Potest infusum pugillare præscribi ex floribus dictis additis floribus bellidis minoris & papaveris rheados. MINDERERUS floribus bellidis tantum hic fidit, ut optet in omnibus hospitij suspendi tabulam, qua peregrinatores de virtutibus hujus plantulæ adimoneantur.

A potu frigido intestinis calentibus infuso, mala: & eorum curationis ratio.

§. III.

Omniū quidem rerum moderatus usus efficit, ut minus lædi etiam ab incaute assumpto noxio possimus. Sed sunt tamen aliqua, ubi vix satis sibi cavere peregrinantes possunt. Quid enim tutum satis erit, si ipse panis, ipsa cerevisia, ita sæpe per integros tractus vitiantur, ut quasi epidemios morbos inducant. Id vero sæpe factum fuisse, ubi lolium temulentum, aut secale corniculatum nigrum, (quod veteres cornu spicæ vocabant) in frumentis pani pinsendo destinatis aut cerevisijs coquendis, vel incaute relictum, vel ab avaris, aut ex necessitate parvis, adjectum fuit, addocet Illustr. FRID. HOFFMANNUS l. c. p. 230. §. 13. Sed monendus mihi videtur peregrinator noster, ut illis annis, quibus ante messem, eaque durante multæ pluvie decidunt, panes aliquid in colore & sapore suspectum offerentes observet, præsertim in vicis & pagis, tanto

Vitia cibi & potus a lolio temulento, &c.

magis, si jam auditur de morbis spasmodicis, qui multos simul in eadem regione aggre-
diantur. Eodem tempore vitet carnes co-
turnicum, qui lolio temulento se libenter im-
plent, comestæ autem convulsiones homini-
bus inducunt: unde jam olim infamatae fue-
runt, quamquam ex alia, nescio an vera an
commentitia, ratione, quod ellebororum se-
mina devorent, indeque venenatam indolem
induant. Nec alaude refugiant hoc lolium,
indeque sæpe accidit ut integris familiis, quæ
illis largius usæ sunt, graves noxæ eveniant,
quod ante tres quatuorve annos sæpius per
Franconiam, etiam in aulis, accidisse a vi-
ro fide dignissimo accepi. Et quoniam de
avibus sermo incidit, memini me in Tran-
sylvania vidisse qui turdorum assatorum ven-
triculos jucunde exfugerent. Innoxie hoc
fieri credo in illis, quibus ventriculus juni-
peri baccis impletus est: an æque impune la-
turi sint, si inciderint in aves fructibus sola-
ni furiosi pastas, (quo pasci eos satis certum
est,) cogitandum relinquo.

§. IV.

*Carnes a-
nimalium
morbo ex-
stincto-
rum as-
sumta vo-
mitu reji-
ciendæ.*

Quis omnia paucis includet, quæ de no-
xiis cibis dicenda essent? Compertum est bo-
nis peregrinantibus in cauponis miseris diver-
tere coactis, carnes animalium morbo exstin-
ctorum, præsertim in lue pecorum epide-
mia, elixas, sæpius sale conditas aut fumo
induratas fuisse appositas: quod periculo &
abominatione non carere potest. Consultum
erit, ubi suspicio iusta oboritur, abstinere
carnibus, nisi videamus esse ex recens ma-
ctatis, potiusque famem expugnare mollibus
ovis, caseo, butyro, pane, piscibus atque
similibus, cum nullo periculo conjunctis. Si
vero iusta suspicio incaute assumti talis noxii
edulii oboritur, consultissimum est illico vo-
mitum procurare, ut expellatur, qua brevif-
sima via licet, periculosum epulum. Prom-
te autem vomitum, utique in evemetis, pro-
moveret aqua tepida largius assumpta, aut radi-
cula præmansa copiosius, deinde faucibus in-
trusus digitus, aut penna oleo illita ad fau-
ces immissa & circumacta, ut titillationem
faciat. Post vomitum peractum juvat vinum
sublimatum bibere cum tantillo theriacæ,
aut, ubi illa officinalis non adest, cum al-
lio, quæ rusticorum theriaca non male ab
antiquo audit, cujus utriusque remedii ope
transpirationis successus impetratur, ut no-
xium omne tanto citius expelli possit.

§. V.

*Potuum
corrupto-
rum, cere-
visiæ lolio
temulento,
vini li-
thargyrio
infecti,
notæ.*

Potuum corruptorum varia genera pere-
grinanti obvenire solent, quorum alia cau-
ponum ingens malitia obtrudit incautis, alia
intolerabilis necessitas sitis cogit non spernere.
Cerevisiæ incoctis temulentiam facientibus,
ut lolio temulento, de quo ante diximus,
aut cisto rorismarini foliis ferrugineis, medi-
cata vix ulla perspicacia a peregrinatore co-
gnoscentur, sed altero die sentiet maleficium,
si dolore capitis gravativo & temulento pre-
metur. Vinum austerum & acidum corri-
gunt justitiæ vindice gladio ferendi caupo-
nes injecto lithargyrio: unde multi homines
in morbos incurabiles fuere conjecti, ob pro-
fundam adstrictionem, quam perpetrat hic
potus in minimis colatoris & visceribus nos-

tris. Cavere hic sibi melius est, quam cu-
rationem optare & querere, vix tamen in-
venire. Ubi quam minima est suspicio, ma-
lit aquam potando saluti consulere, quam
vinum bibendo eam pessumdare. Faciet au-
tem suspicionem, si in regione acida vina
suppeditante, quando autumnii frigidiores &
humidiores præcesserunt, vina offeruntur pa-
lato gratiora, sed in recessu aliquam adstri-
ctionem in faucibus relinquentia. Propius
nos peregrinationem subituros juvabit recens
paratus liquor exploratorius, ex auripigmen-
to nativo cum lixivio calcis vivæ decocto,
qui omnem plumbi miscelam sedimento ni-
grescente, ex vino in fundum projecto, de-
teget: in quo tamen aliqua exercitatione o-
pus est, quum cautelæ adsint longiores,
quam ut hic satis exponere de illis nunc li-
ceat.

§. VI.

Dura necessitas sæpe compellit peregrina-
torem ad potandas aquas obvias, quas non
optimas esse pluribus etiam signis agnoscit.
Deliberationem sæpe omnem aufert sitis ve-
hementia & festinatio necessaria. Hæc nisi
adsit, ante omnia suadendum est, ut aquæ,
quas bibituri sumus, per rarum linteum co-
lentur, ut insecta & insectorum aliorumque
similium inhaerentia ovula removeantur, a-
lias lubricitate sua facile ad ventriculum per
fauces ingressura. Si plus moræ indulgea-
tur, amplius etiam corrigere eas coctione &
nova percolatione ac refrigeratione licebit.
Qui vero sine tali præcautione aquas ex qua-
vis lacuna obvia imbibunt, hæd raro simul
deglutiant teneras hirudines, magna in ven-
triculo & intestinis mala daturas, aut ovula
ranarum lacertulasque juvenes nuper exclu-
sas, quæ incredibili hominis calamitate vale-
tudinem adfligunt sæpe per multos annos,
donec casu potius quam certa curantis co-
gnitione deprehendantur. Multa leguntur
exempla talium morborum, sed unum inf-
tar omnium adducam ex *Annalibus physico-
medicis Wratislav.* a D. D. KANOLDO
collectis. Femina paupercula Memmingen-
sis, calidissimo coelo per agros vagata, siti
intensissima premitur. Bibit ex lacuna ob-
via, ovulis ranarum, ut credere par est,
repleta. Ab eo tempore per XVIII. annos
miserrime excruciatæ est intestinorum dolo-
ribus, quibus omnia se jungebant, quæ hy-
stericæ mulieres perpeti solent, suffocationes
præcipue uterinæ & aphonia, cum raucedine
insigni. Huic quum remedium daretur
linctus ex oleo amygdalarum dulcium cum
syrupo violarum & spiritu salis ammoniaci
anisato, mox mire exacerbatis doloribus pro-
dibant ranæ multæ vivæ, quibus plene ex-
pellendis purgatio efficax feliciter subjunge-
batur.

§. VII.

Plura commendantur emendandis noxis ab
aqua insalubri proficua, quæ inter non po-
stremum nec contemnendum est allium, quod
transpiratione conservata & intensa halituoso-
salinam corruptionem sensim emolitur. Si
quis illico ab haustu male habet, neque id
ex solo errato, quod §. 2. notavimus, esse
constat, juvabit vomitu evocare noxiam a-
quam

*Præcau-
tiones in
aquis ex
lacunis
obviis bi-
bendis, &
femine
hoc in ca-
su incau-
tæ exem-
plum.*

*Noxæ ab
aqua in-
salubris
haustu or-
ta quomo-
do tollan-
tur.*

quam & cum ea absorptas fordes. Si metuitur alterius noxæ conjunctio, oleum quidem camino addere nefas est: sed periculo illo jam superato post aliquot dierum decursum purgante medicina, subjunctis multis liquidis, intestina juvat eluere.

§. VIII.

*Cibum ac
potum no-
xiis medi-
camentis
infectum,
philtrum
peregri-
nans fu-
giat.*

Gravioris momenti sunt illæ noxæ, quæ peregrinantibus aliquando ab impiis & insidiis hominibus metuendæ sunt, qui cibum & potum noxiis medicamentis inficiunt, ut vel vitæ & fortunæ insidias faciant, vel amorem perditum homini infundant: quam potionem philtrum dicere solemus. Optandum est, ut illico sentiat quisque, qui hoc evenit, præsens vitæ rectæque valetudinis, ac inprimis bonæ mentis periculum, & ut mature revomere omne virus possit, antequam in humorum societatem abripiatur. Nam per antidotos singulis venenis contrarias parum efficitur, nisi illa quantocyus expulsa fuerint. Hoc facto reliquias vincere satis sæpe est difficile negotium, & longam curationem requirit, quæ massam omnem humorum repurget, & ex ipsis solidis jam imbutis per aliquam quasi recorporationem illud removeat, quod perversum & alteratum est. Notabile hanc in rem exstat exemplum apud HENR. AB HEER¹ obs. Lib. I. 13. ubi juvenis philtro accepto in extremam calamitatem conjectus sistitur, quem forte sola naturæ vis periculo eripuit, ejecto tandem ad superficiem corporis omni noxiæ, ablatisque per magnas & crustosas fissuras, cuticula, cuti, omnibusque pilis & unguibus, per alvum autem expurgatis limacibus magnis, vivis, rubris & repentibus. Totus sibi & rectæ valetudini redditus, omnium præteritorum, quæque in bonis litteris profecerat, quin proprii nominis prorsus immemor fuit, ut discedere ab integro omnia opus ipsi fuerit. Docere exemplum hoc potest, quam dira res sit veneficium & præcipue exoticum: simulque ostendere, quorsum Medicus respicere debeat, si quid ad salutem afferre desiderat. Sed hic locus plura nunc dici de hoc argumento non permittit. Peregrinatio autem suasit aliquas antidotos in promptu habere: quarum aliquas describit HENR. RANZOVIVS in libro *de conservanda valetudine*, haud certe contemnendo, quas inter HELMONTIVS miratur antidotum Saxoniam, eamque non humanæ sapientiæ sed nobilioris originis inventum judicat.

§. IX.

*Monita
generalia
circa esculenta &
potulenta.*

Generalem subjungo circa esculenta & potulenta admonitionem peregrinatio cuius saluberrimam futuram: Scilicet quotidie fere horum intuitu rebus novis se expositum meminerit: unde si quid insuetum primo offeratur, ne se largius illo impleat, sed per exiguas portiones illi adfuescat, ac subinde, dum licet, ad consueta redeat. Sic qui vini potum quotidianum habuerunt, cerevisiis lente se tradant: qui cerevisiam in patria quotidie potaverunt, vino blandienti non multum fidant, donec consuescant. Vinis Germaniæ adfueti non perinde ferent Hungarica, vel Gallica aut Italica. Minus periculi

incurrunt, si vinum aqua temperaverint, modo bona suppetat: aut oligophora præ generosioribus elegerint. Sic cerevisiæ tenuiores semper præferendæ sunt saturatioribus & generosis. Multum etiam moderationis adhibendum est in usu fructuum horæorum, illis utique, qui ex frigidioribus terris ad calidiores, talibus deliciis abundantes, transferunt: tantoque magis, quando jam alvi fluxus & dysenteria populariter grassantur, quippe ab his occasione arrepta facile in plures transeunt. Tali constitutione consultum est omnes fructus, imo & olera vitare, & potius oryza, pultibus farinaceis, ut & ex milio, fagopyroque coctis, multum uti, hordeoque mundato & decorticato cum aromatibus temperatioribus, pauxillo croci adjecto: vinum quoque paulo meracius magis tunc, quam alio tempore convenit.

§. X.

Inter edulia noxia & periculosa plurimum infamati sunt fungi, plenique sunt omnes historicorum, nedum Medicorum, libri exemplis hominum, qui ab esu eorundem fungorum, quos alias sine periculo assumerat, graviter fuerunt læsi, & ad orcum præcipitati. Id si domi suæ non satis cavere quisquam potest, quanto magis consultum erit peregrinanti, ut suspecta habeat hæc gulosorum hominum periculosa oblectamenta? Si quis vero passus illis fuerit, & a cibo perceperit angustiam quandam, nec non gravitatem cardialgicam, cum frictura pectoris tanquam suffocatoria, nolit sibi diu deesse, sed illico vomitum, quo licet cunque pacto, promoveat, ne syncope cum sudoribus frigidis superveniens vitæ finem imponat. Hauriat illico aceti bonam portionem, huic aquam tepidam multam cum oleo super ingerat, tuncque digito faucibus immisso vel penna oleo intincta vomitum proritet, semper superbibendo tepidam, donec se levatum & ab assumpto edulio liberatum sentiat. Superato jam maximo periculo curet etiam intestina ab ingresso jam & profundius demisso cibo liberari per potionem laxantem, & infusa enemata: quibus etiam acerrimis utendum tunc est, quando constrictio suffocatoria vomitum fieri non patitur; aut factus non satis pro ratione levat. Dicunt Arabes mel esse fungorum certissimam antidotum: de aceto Galenus idem promittit. Juvabit igitur maxima periculi parte depulsa reliquum deinceps oxymeliti permittere: quin inter vomendum oxymeli continuo ingerere.

*A fungorum esu
noxæ, &
curatio.*

§. XI.

Admonendi etiam sunt peregrinantes de spirituum ardentium abusu cavendo. Blanditur multis nomen aquæ vitæ impositum; sed cautione opus est, ne mortem inferat abusus. Modica quantitate, quæ drachmam non excedat aut certe non alteram, indulgeri potest cœlo humido frigido & nebuloso, præsertim si non jejuno ventriculo infundatur. Neque reprehendi magnopere potest, ubi potu aquoso vappido utendum fuit. Sed ubi magnus æstus est, itemque quando excessivum gelu perpetimur, tantoque magis, quando sedentibus & quiescentibus perpetiendum est, magnopere nocere potest, de quo

*Spirituum
ardentium
abusus vitandus.*

quo me superius aliquid jam dixisse memini. Illis cum saccharo & odoratis rebus jucundioribus redditis tanto minus indulgendum est, quanto facilius est gulæ delinimento hoc ad excessum invitari: & quoniam oleosæ aromatum partes admixtæ sanguinem vehementer incendunt. Nostra quoque memoria homines scelerati invenerunt rationem hoc potus genus insensibili fere modo venenatum reddendi: credoque apud Neapolitanos superesse memoriam damnatæ aquæ de *Tuffano* dictæ, quæ multis perniciem attulit: cujus memorem esse, locis utique suspectis, decebit peregrinatorem, ne dulce venenum ære suo emat, hostibusque ludibrium debeat, quando ipsi sera pœnitentia non profutura est.

§. XII.

*Cur nobis
filum ul-
terius du-
cere non
licuerit.*

Atque hæc sufficiant de morbis peregrinantium illis, qui ex assumtis vel esculentis vel potulentis originem trahunt. Superesset nunc, ut per reliquas res non naturales in scholis dictas eundo, morbos eorum culpa & vitio enasci solitos, exhiberem: jamque a me multa, quæ huc pertinent, collecta & ex parte maxima in ordinem digesta præsto erant; neque pœnituisse sumtuum in cetera capita typis etiam exscribenda impendendorum, nisi præter opinionem citius peregrinandi necessitas imponeretur, quæ moram non patitur. Consilio itaque Patronorum & Præceptorum tanto libentius imperiosæ necessitati acquiesco, quum data hæc & exhibita pro specimine inaugurali sufficientia benigne judicent. Ego vero, si Deus adspiraverit votis & consiliis, efficiam, ut quæ porro in itineribus experientia suggeret, quæque ab expertis didicero, colligam, justumque opusculum de his exhibeam illis profuturum, quibus salutem & vitam inter peregrinandum conservare studium homine dignum videbitur. Dum hæc fiant, addo monita quædam, quæ proficua fore existimo; ut & formulas quasdam remediorum, quibus utatur peregrinator, si medico omnino destituatur.

I. Notabile iter aggressurus consideret: an impuris humoribus, aut alioqui bonis quidem, sed multis corpus suum abundet: illos corrigentibus, hos evacuantibus, decenter, antequam itineri sese committat proportioni resiliuat.

II. Iter acturus, cum in sex rebus non naturalibus mutationem facere vel ex parte vel ex toto debeat: præincipiat domi suæ illi cibo, potui, exercitio, aut aliis rebus, nisi malæ sint, adflescere: ut cum in via fuerit, facilius talia ferat: in reliquis sciat **VICTRICEM FORTUNÆ PATIENTIAM** dici.

III. Peregrinaturus, nisi res aliter facere urgeat, aut nivosos Rhaetorum ac similes montes pertransire oporteat, tempus sibi eligat veris, quod a Medicis saluberrimum, aliarum anni partium respectu, pronuntiatur.

IV. Si in aerem calidiorem suo nativo pergat, locum, in quo residebit, eligat septentrionem versus: & contra si in frigidiorum.

V. Satagat, ut quovis mane ante excessum alvi & vesicæ evacuationes habeat.

VI. Si loca, in quibus morbi epidemii grassantur, visitare cogitur, omni mane, ex magni illius trium Imperatorum Medici **CRA-
TONIS** consilio tincturam aliquam bezoardicam vel essentiam ambrae in usum ducat: & pulvere catarrhali ex succino, styrace, mastiche composito, pileum, manicas, imo hospitium diligenter perfumet.

VII. Majorem partem itineris ante meridiem absolvere contendat, ne concoctio impediatur: hinc

VIII. Cibus in prandio sit bonæ substantiæ & quantitatis paucæ: cœna vero largior non nocebit.

IX. In hospitiiis caveat a piscibus vel pridem asservatis vel recoctis: præsertim si in vasis æneis aut cocti aut contenti fuerint. Ova potius forbilia modo recentia sint, cum potenti vino, sed paucò, præsertim in prandio proderunt.

X. **ORIBASII** æstate peregrinanti fasciam mollem latitudinis 6. aut 7. digitorum longitudinis autem non minoris quam 5. cubitorum, lumbos usque ad laterum mollitudinem circumdantem, commendat: hyeme vero post peractam unctionem etiam spinam & pectus tali circumdare fascia, præcipit.

XI. Humidos ac madidos pedes diu ferre, & maxime, si insuper cibus se repleat, peregrinanti est perniciosissimum.

XII. Famem, quam peregrinantes quandoque experiri coguntur, assata jecinora, præsertim anserum ficibus pastorum, bene pellunt: delicatioribus panis martius proderit: pauperiores in locis sterilibus peregrinaturi secum ferant pulverem ex tostis carnibus siccatis.

XIII. Iter agens potus penuria pressus, non multum loquatur, cum ex hoc non parum sitis accendatur: nec cibus duris, bene salitis, aut aromatizatis utatur: Acetosella potius, lactuca, portulaca, vitium capreoli masticati proderunt. Nec minus nimiam sitim posca ex aceto & aqua parata, exstinguit. Ultimum vero ad sitim mendosam remedium est, dormire sine potu.

XIV. Cochlear, cultros, mantilia mensæ propria habeat, nec cum ignoto uno utatur poculo. Culcitram & tapete lecto insisterendo proprio utatur, omnesque conditiones lecti, ipsiusque cubiculi, antequam decumbat, visitet, ne quid mali sanitatem vel ipsam vitam lædens experiri cogatur.

XV. In locis secretis observet, ne, priusquam papyro detergat asserem, desideat: aut si aperta sunt, ventusque ea perflat, ne nimis calens desideat: nam observavi, ex hoc colicas passiones, mulieribus autem mensium vitia, ex illo vero infectiones esse subortas.

XVI. Si ad vomitum celeriter movendum supra commendata non sufficiant, in promptu sit pulvis ex radicis ipecacuanhæ gr. xx. tartari emetici gran. j. aut ij. Notandum tamen est quod longiori durationi inepta sit radix hæc comminuta: adeoque si trimestrem ætatem adeptus pulvis fuerit, præstat eum abjicere. Durabilior erit sequens, qui recipit pulveris radicis ari, animonii diaphoretici, singulorum grana viii. tartari emetici gr. iii.

XVII. Si alvi beneficio ad plures dies destitu-

destitutus capitis dolores & alvi tormina incurras, illico tibi capias drachmas duas, tresve foliorum fennæ optimæ. Superfundas illis aquæ ferventis libram dimidiam, & illico absque prævia ebullitione, incipe haurire infusum, addito pro edulcoratione saccharo viliori, aut, si placet manna. Miraberis blande efficacem medicinam.

XVIII. Sit quoque in promptu pulvis radicis jalappæ, cujus xx. grana aut xxiv. assumes, quando efficacius purgare animus est, & necessitas requirit.

XIX. Si ventriculus diu cibos nauseat, aut ardore oris ventriculi vexaris, adhibe pulverem digestivum ex lapidibus cancerorum præparatis & radice ari, singulorum gr. viii. tartari vitriolati, salis absynthii singulorum gr. iv. pulverem hunc fume ex aqua frigida hora una ante cibum. Eundem potes vespere sumere cubitum iturus, si altero die jalappa te expurgare constituisti.

XX. Quando febres populariter grassantur, aut aer nebulosus frigidus febres & catarrhos minatur, optime tibi consules, si quotidie talem pulverem sumseris. Recipe cornu cervi sine igne præparati, mandibularum lucii piscis, singulorum drachmam dimidiam, flo-

rum sulphuris gr. xx. misce, dividatur in 4. part. æquales.

XXI. Si nimii calores æstuaræ te faciunt, sumas drachmam dimidiam hujus pulveris: Recipe nitri optimi, tartari vitriolati, singulorum drachmam unam, antimonii diaphoretici, lapidum cancerorum ana drachmam unam cum dimidia, cinnabaris præparatæ scrupulos duos.

XXII. Si tibi contigerit magno terrore affici, aut gravi iracundia concitari, ad manus sit mixtura simplex: cujus guttas xxx. cum aqua vel vino assumes. Potes, si nondum ad quietem omnia redierunt, post aliquot horas remedium repetere.

XXIII. Si a conversatione cum hominibus scabiosis aut lue venerea adfectis aliquid contagii te suscepisse metuis, per aliquot continuos dies cape viginti grana æthiopis mineralis, & aliquando jalappam interpone.

Hæc nunc sufficiant. Ultimo commendamus peregrinanti præclaram *Illustris Dn. PRÆSIDIS Dissertationum trigam: De peregrinationibus sanitatis causa instituendis. De morbis certis populis & regionibus familiaribus, & eam quæ septem leges sanitatis exhibet*, hac in materia evolvendam.



DISSERTATIO MEDICA

DE

MORBIS INCONGRUIS.

Primum edita Anno 1702.

PROOEMIUM.



X profundo creaturarum rerum scrutinio immensam divini artificis sapientiam clarissimis elucescere documentis nemo nisi qui plane hospes in physicis est, in controversiam vocabit. Quemadmodum autem omnis artificii ratio ac essentia in certo versatur ordine ad certum finem tendente, ita etiam nulla creatura est, præsertim ex animantium genere, ubi non mirabilis ac perfectissimus ordo à Deo, qui ipse summus ordo est, omnisque ordinis Autor collocatus deprehendatur. Et quo perfectior est creatura, eo major ordo, & ordinis ratio conspicitur, unde corpus humanum præ omnibus aliis machinis & organis mirabile Divini artificii exemplar nobis sistit atque exhibet. Ordinis autem naturam si quis quærit, ille nihil aliud est, quam certa partium ratione numeri, mensuræ & ponderis proportio, structura, connexio; qua integra & salva resultant inde effectus seu motus secundum naturam, id est, ordini isti congrui: Turbato autem vel impedito hoc ordine, turbantur inde regulares & ordinati isti motus & præternaturales eveniunt. In homine ex naturali partium constitutione actiones naturales, vitales & animales proveniunt, in quarum debito exercitio consistit sanitas. Verum enim vero sicuti corpus humanum ratione ætatum, ratione mixtionis ac temperiei humorum, vitæ quoque generis, aeris & hæreditariæ dispositionis multum differt, adeo ut hujus partes non ejusdem sint structuræ, magnitudinis, figuræ, & ad motum habitudinis: ita etiam pro harum rerum differentia actio-

actiones non sunt ejusdem valoris, ejusdem virtutis ac naturæ effectus morborum. Et cum actiones secundum naturam dependeant a proportione, magnitudine, robore, structura, temperie partium corporis, ita etiam læsæ actiones sive morbi ex eodem fonte ducuntur ac derivantur. Habet itaque quævis ætas, quodvis temperamentum, corporisque habitus mechanicam ac necessariam quandam dispositionem ad certum morbum, qui quando correspondet huic dispositioni solet vocari congruus & conveniens, incongruus autem vocatur, qui non fluit ex tali dispositione morbosa humorum, quæ certis temperamentis ætatibus correspondere solet, unde vocatur incongruus, & causam magis violentam & plus a statu secundum naturam recedentem designat. Cum itaque non levem in praxi medica distinctio inter morbos congruos & incongruos habeat usum, dudum id monente Magno HIPPOCRATE S. 2. *aph.* 34. nihilominus in recentiorum scriptis pauca hujus doctrinæ reperiatur mentio, placuit speciminis loco hoc argumentum enucleatius paulo evolvere, & imprimis incongruorum morborum historiam ac rationes tradere, quod ut in emolumentum proximi cedat, Deum humillimis precibus veneramur.

§. I.

Primus & omnium optimus qui solide & recte recensuit & tradidit historiam affectuum cuivis tempori atque ætati congruorum, est ipse Magnus noster HIPPOCRATES, cujus *liber III. aphorism.* penè totus in hoc argumento occupatissimus est, & maximopere omnibus practicis commendandus, ut vel ex hoc unico liquidissime appareat, quanta sapientia ac notitia veræ pathologiæ instructus fuerit judiciosissimus vir, cujus unicus in scriptis fuit scopus, ut naturam humanam præcipue in individuo, facto respectu ad multas causas externas cognosceret, & inde habitudinem morbosam eliceret, imo prudenter prædiceret. Sique ullo ponderoso argumento veritas mechanicæ medicinæ & philosophiæ stabiliri potest, certe occasionem amplam præbet doctrina, quam tradit in dicto libro HIPPOCRATES de morbis ex certa ætate, tempestate, anni tempore profluentibus, ubi manifesto conspiciamus, causas illas externas, physicas, ex necessitate mechanica agentes, tantum jus ac potentiam habere in corpus nostrum ut ordinatos motus turbare in œconomia animali ac pervertere possint.

§. II.

Merito autem statim sub limine hac occasione quæstio occurrit non levis momenti brevibus saltem discutienda, quare si quævis ætas, sexus, habitus corporis, clima, anni tempus, hæreditaria dispositio, vitæ genus, suos peculiare & quasi sibi proprios foveat ac sustentet morbos, non plus ægrotent homines, sive morbos plus quam fieri solet experiantur, cum sæpius contingat plures per totam vitam nullo periculoso conflictari morbo. Hujus problematis solutioni inservit hoc, quod quoniam non una res v. g. sola ætas vel temperamentum ad certum morbum dispositionem secum gerat, sed plura sint, nempe sexus, vitæ genus, aër, quorum quodvis peculiarem habitudinem & dispositionem ad hanc vel illam intemperiem custodiat; inde fit, ut cum causæ hæc similis effectus & naturæ rarius in uno individuo conspirent sive conveniant, rarius etiam homines afficiantur morbis; utut enim v. g. ætas juvenilis inclinet ad impetuosos sanguinis motus, humorum calorem atque acredinem & hinc ad febres ardentes, hæmoptyses, febres biliosas; quod si tamen temperamentum non cholericum sed phlegmaticum adsit, sique alimenta non multum caloris & acridinis recondentia assumantur, clima quoque temperatum sit, juvenis ille tales morbos ad quos ratione ætatis dispositus est non experietur, &

sic quoque illud valet in cæteris; nam certe non una causa remota, quæ tantum disponit, non necessitat, sufficit ad morbi genesin, sed plures in eundem finem, inque eundem scopum, conspirare debent, id est, si ætas juvenilis concurrat cum temperamento cholericum, si insuper accedunt alimenta calida, æstus, corporis nimia exercitatio, utique dicti morbi expectandi sunt; ut etiam vel ex hisce sapientissimus benedicti Creatoris ordo conspici possit, qui in eo versatur, ut cum corpora inter mille res invicem repugnantes & contrarias degunt, nihilominus noxas exinde sentiant pauciores, dum unius causæ vis alteram extremam temperat ac moderatur.

§. III.

Sed ut ad institutum nostrum revertamur, placet primo dispositionem corporis in quavis ætate & hinc morbos breviter strictimque tradere, una statim annectendo morbos rariores dictos incongruos. Nempe in infantili ac puerili ætate partes musculosæ & fibrosæ nimis sunt teneræ, motus languidus est, & quoniam copioso egent ob corporis nutritionem alimento, multæ superflue humiditates & impuritates in corpore colliguntur, præsertim si nimis cibis saginantur. Copiosæ hæc humiditates, viscidæ, lentæ, dulces, si motu tandem auctiori propter varias externas non modo sed & internas causas aucto expelluntur, variæ ægitudines resultant, quapropter aphthæ, achores capitis, vomitiones, tussis, aurium & oculorum defluxiones, diarrhœæ, ulcera: faciei, pustulæ, variolæ, purpura perquam familiares sunt ætati infantili, item tumores glandularum colli, lumbrici, stranguriæ, calculosæ quoque in vesica concretiones, sique humores acredinem concipiunt, tormina, epilepsia frequentissime infestant tenellam hanc ætatem, & hi recensiti affectus ætati huic congrui sunt. Incongruus itaque illis morbus est, qui non ex superfluo humido oritur, sed ex principio quodam acri salino fixo in lymphâ contento, utpote ubi humidum exsuperat salia minus ferociam suam exercere possunt. Est itaque talis morbus e. g. arthritis & podagra. HIPPOCRATES *aph.* XXX. §. 3. *scribit*; puer podagra non laborat ante veneris usum; ratio procul dubio hæc est, quod tunc temporis, quando pubertas accedit corporis magna fit mutatio, robustior ac validior fit motus, major etiam calor, vox fit magis sonora, unde etiam tunc acriores evadunt humores sique delibatissimus succus roscidus lymphaticus seminalis, qui spirituum pabulum est, partiumque solidarum alimentum subducitur, imbecillis tota natura redditur, impuritates falsæ colliguntur, & inter articu-

lorum interstitia subsistentes cruciatus efficiunt. Quod si itaque puer ante usum veneris prolabatur in talem affectum, merito dicitur incongruus, & indicat magnam acredinem humorum & imbecillitatem nervearum partium, quæ vel a parentibus vel ab ingenti vitio ob errata commissa ipsi fuit ingenerata. Observationes autem, ubi pueri podagra laborant, hinc inde exstant, & consulenda cum in finem est HAGENDORNII *histor. medico-physic. XXVI. cent. III. it. SALMUTH. observatio LIII. cent. 3.* qui puerum octennem podagra affectum annotavit. Faciunt quoque hujus rei mentionem *M. N. C. D. I. A. VIII.* ubi trium subjectorum in tenella ætate constitutorum fit mentio, alterius pueri, XII. annorum, alterius filiolæ quadriennis & tandem puellæ XVI. annorum. HOLLERIUS in *comment. ad dictum aphorismum* scribit; Vidimus natos tantum decem annos laborasse. Ipse meminit Excell. DN. PRÆSES juvenis generosi, qui in XII. ætatis anno horrenda laboravit podagra & chiragra & quidem tophosa, & per multos annos cruciatus maximos expertus est, qui tandem Lipsiæ anno XVIII. fatis ob vehementiam affectus cessit.

§. IV.

Sanguinis ejectio per hæmorrhoides virilis & feminis ætatis ordinariò est affectio, ipsius etiam HIPPOCRATIS *aph. XXX. l. 3.* testimonio, ipsaque experientia; per nares enim experiuntur magis profluvium pueri & adolescentes; ratio hujus rei hæc est, quod excretio sanguinis per venas sedales à motu ejus impedito per abdominis viscera & inde facto infarctu, distensione & subsequente spasmodica contractione, quæ ordinario fere præcedere solet sanguinis effusiones, dependeat. Qui impeditior sanguinis circulus per mesenterium & intestina ordinario in omnibus subjectis, ita maxime debilis est in senibus provectioris ætatis hominibus præsertim hypochondriacis. Pueri autem sanguinem exsuperantem per nares magis solent excernere, quoniam respectu aliarum partium corporis proportio capitis nimis magna in iis est, dum ab eo totum robur membris accedit reliquis, unde etiam vasa majora & ampliora in capite existunt; quare ad caput, si in reliquis partibus ejus circulus est impeditus, ruere solet magno impetu. In viris autem & senibus contrahuntur potius partes superiores vel strictiores evadunt, abdomen autem crescit & vasa ampliantur, quo circa extraordinarius & plane incongruus est huic ætati fluxus hæmorrhoidalis. Sique res est illustranda exemplis, evolvi possunt *M. N. C. D. III. A. IV. obs. V. ubi Cl. FRANCKUS DE FRANCKENAW.* hæc scribit; Puer 8 annorum æstate hæmorrhoidalem fluxum cum ingenti sanguinis excretionè patiebatur: verum sequenti autumnò quartana corripiebatur ultra tres menses, methodicè exhibitis remediis paulo post convaleuit. Legenda quoque est observatio in *M. N. C. D. I. A. VIII. p. 42.* ubi duorum puellorum hæmorrhoidibus correptorum mentio fit; ut & ibidem *D. II. A. IX. obs. 124. p. 216.* FROMMANNUS in *Tract. de hæmorrhagiis p. 1. probl. 28.* tubicinis cujusdam filiolum duorum annorum, quod mirandum est, hæmorrhoidibus fluentibus & cæcis laborantem describit, pluresque alios DANIEL MATTHIÆ in *obs. med. num. XIV.* memorat. Novimus insuper adolescentem Halberstadiensem civem qui patre natus est hypochondriaco & hæmorrhoidali fluxui assueto, qui omni mensis spatio hæmorrhoides large fluentes non sine noxa experitur, in cute simul apparentibus maculis vulgo *leber flecken* / quæ disparuere accedente fluxu hæmorrhoidali: similem historiam vid. apud PANAROLLUM *obs. XLVII. Frid. Hoffmanni Oper. Supplem. II.*

Ita quoque hic locorum illustrissimi viri filius cum ageret quartum annum binis vicibus sanguinem per alvum excrevit, & postea per duos annos conquessus est de dolore in dextro hypochondrio gravativo, sanus de cætero & floridissimus, Septimo ætatis anno corripitur variolis, succedebat febris intermittens erratica & tandem lenta, a qua non poterat liberari, sed convulsione gravissima accedente moriebatur.

§. V.

Apoplexia ordinario morbus est senum vel provectioris ætatis hominum, dudum id quoque animadvertente HIPPOCRATE *S. VI. aph. 57. it. S. III. aph. 31.* Hac corripit solent plethorici vel ferofioris qui sunt naturæ, facilius enim in hac ætate sanguis nimis densus spirituascencia orbatus propter cerebri imbecillitatem ac toni relaxationem ibi hæret stagnat vasque disrumpit, vel secessionem feri parit. In puerili autem ætate cum sanguis satis tenuis, fluidus & spirituosus sit, non tam facile sistitur in circulo vel hæmorrhagias efficit internas, nihilominus testatur experientia quandoque, utut rarius, apoplecticum morbum cadere in ætatem teneram, talem in filia 4 annos agente notavit HAGENDORN *C. I. obs. XXXII.* hæc per intervalla auditus difficultate laboravit inque somnum semper fuit proclivis; & cum aliquando patris ædes repetere volebat, fortissima apoplexia in via corripitur, ut antequam fores domus paternæ attingere potuisset, animam tenellam exhalaverit. Ita etiam idem autor hemiplexiam in puella memorat, quæ vero pristinae sanitati fuit restituta. Deinceps BINNINGERUS *cent. IV. obs. IV. p. 371.* apoplexiam in juvene observavit. AMATUS LUSITANUS *cent. 7. curat. med. 139.* paralyseos in puero meminit.

§. VI.

Catameniorum fluxum circa tempus pubertatis foeminas tantum pati, ordinarium & regulare est, quoniam tunc temporis sanguis purus incipit abundare & naturam ad motus & contractiones stimulare. Non tamen ignota sunt exempla ubi ante statum tempus ordinarium menses prodierunt. Ita TULPIUS in *obs. med. L. III. obs. XXXVI.* meminit filiolæ quadrimæ cujusdam, cui in octavum usque ætatis annum fluxere menstrua; Accidit fortè, pergit, ut illis suppressis omnis ipsorum sanguis conversus sit in caput, producens illic dolorem dentis, mox autem sordidum ac sinuosum ulcus gingivarum, & tam pertinacem maxillæ inferioris cariem, ut non nisi tardissimè potuerit ulceris cavum carne iterum impleri. Vid. quoque THEOD. KERCKRINGIUS, *obs. anatom. LXXXVII.* Puellæ quoque sexennis menstruatae mentio fit in *Misc. N. C. d. II. A. V. obs. LXXVIII.* quam Excell. WEDELIUS observavit, & millena exempla idiosyncrasias, ita idem speciatim quoad tempus eorundem, serius vel ocysus contingit. Anno 1684. consultus sum de puella nobili, quæ sextum ætatis ingressa annum a tribus mensibus menses erat experta, cæteroquin bene valens, sed tenerissimæ texturæ: Causa sine dubio extraordinariorum ejusmodi casuum quærenda est vel in ipsa massa sanguinea, vel utero ejusque poris ac vasis. In tenerioribus facilius onerosus status sanguinis accidere potest, facilius ad porosas uteri partes decumbere & ab elatere ejusdem expelli: textura corporis & sanguinis symbolisant; quando vero semel iterumque exoneratio facta est, natura ordinis & loci amans illuc amandat superfluum, ubi id convenientius invenit. Curationis cardo in eo consistit, ne temere fluxus sistatur, vel motus natura

turæ, quousque ἐνφύωσιν procederet, inturbetur; dedimus hoc in casu tincturam martis cum succo cydoniorum extractam; Hæc WEDELIUS.

§. VII.

Quoniam hætenus de morbis qui infantili ac puerili ætati minus conveniunt, verba fecimus, placet quoque hoc loco mentionem facere perversæ inappetentiæ, quæ picæ nomine venit, hæc uti notum est ordinario gravidis foeminis vitio phantasiæ ob cacochymici sanguinis abundantiam affectis peculiaris esse solet. Attamen prostant exempla, ubi non modo atas foemina, sed & sexus masculinus hoc malo fuit afflicta. Ita in *M. N. C. D. III. A. II.* mentio fit puellæ quæ nondum pubertatis annos attigit, cretam tamen iterum iterumque devoravit, leucophlegmatia demum tamen correpta. Picam ac malaciam puerorum insinuavit SIMON SCHULZIUS *D. I. D. VI. obs. 143.* ubi alter puer terram nigram cum appetitu, alter eandem materiam ingessit; postea vero cum terræ hujus amplius non posset particeps fieri cretam comedit. De pica hæreditaria vid. HORSTIUS *l. 4. obs. medic. de morbis visc. concoct. obs. V.* conferantur quoque observationes MICH. FEHRII *A. I. D. IV. obs. 38. it.* HAGENDORN. *cent. III. obs. 95.*

§. VIII.

Ordo jam postulat ut speculemur etiam eas ægritudines, quæ juvenes & viros quandoque extra ordinem exercent, eorumque corporibus ac naturis minus aptæ ac congruæ sunt. Ex horum censu autem locum inveniunt maxime omnium variolæ & morbilli. Notum est hos ipsos proprie competere infantibus ac pueris, utpote hi ipsi ad fermentativam quasi sanguinis resolutionem & salis excrementitii ex ejus contextu sequestrationem propter humidi exsuperantis copiam admodum idonei sunt, & quoniam in hac ætate sal acre causticum à succorum lentore temperatur, insuper & fibræ cutaneæ ac musculosæ relaxatæ ac flaccidæ sunt, hinc minus periculi alunt, & lenioribus symptomatibus ordinario stipatæ sunt, quam in ætate juvenili & virili; quocirca perperam agunt illi parentes, qui infantes ac pueros eo tempore quo grassari hæc lues solet, ab omni contagio follicite præservant ac custodiunt, imo in alia loca non infecta fugiunt, ut malum avertant, quo fit ut nihil aliud agant, quam quod eos tantum in ipsorum damnum ac perniciem referent in ætatem juvenilem vel virilem, quæ minime respondet huic affectui, siquidem juvenes non modo intemperantiæ magis dediti sunt, & sanguinem admodum sulphureum calidum in venis foveant, qui vim ac efficaciam principii morborum plus auget, verum etiam fibræ artuum magis sunt strictæ, rigidæ, tensæ, hinc major oritur dolor, inflammatio, adeoque convulsio & febris.

§. IX.

Multo magis autem mirandum est, si senes infantili hoc morbo inficiantur, nec pauca hac de re prostant exempla, quorum perpauca saltim allegabimus. Variolas in vetula quadam notat D. JOSEPHUS LANZONUS *Miscell. N. C. D. II. A. X.* quæ ita se habet, Ego, inquit, Anno MDCXCI. mense Septembri vidi foeminam septuaginta & duorum annorum variolis in magna copia correptam, quæ in septimæ diei principio mortua; exitiales adeoque fuerunt propter senectutem, id est vires insufficientes, depravatos & cacochymicos humores, & spirituscentiæ sanguinis & roboris partium solidarum debilitatem ac defectum, unde non potest non mor-

bus hic brevissimam ludere tragoediam. Similes observationes me legisse memini apud FRANCISC. IGNATIUM THIERMAIRIUM *L. I. consil.* Monialem septuaginta annorum variolis laborasse, identidem apud CORNEL. STALPART. VAN DER WIEL *Tom. II. obs.* Memorabile tamen est, quod nonnunquam etiam senectus contagio inficiatur, cum undiquaque in libris medicis senes a contagio præsertim varioloso liberos evadere uno ore consentiant; miranda tamen est historia, quæ recensetur in *M. N. C. D. II. A. V. Append. p. 44. obs. LXXIV.* Civis quidam honestus annum agens LXI. filiolum triennem variolis tunc decumbentem matre absente reponit in lectum suum & ex amore paterno dormituram pectori propius admovet. Paucis inde diebus foedæ effluere variolæ: quæ tamen paulo post datis alexipharmacis propulsæ fuerunt ægro in integrum restituto. Variolis identidem mortuum senem sexagenarium notavit eadem *Academia Curiosa D. II. A. IV. p. 82. in annexis litteris.* Circa senum morbos incongruos coronidis loco ridiculum pene est memorabile exemplum apponere decet de senes quodam centum & octodecim annos nato, cujus mentio fit in *M. N. C. D. A. III. obs. XV. p. 57.* cui dentitio integra obtigit in senectute, eademque symptomata vigilias, insignes dolores capitis & maxillarum, quæ pueris & infantibus dentitionis tempore familiaria sunt, passus est, adeo ut visus fuerit supremum obire diem, paulo post tamen ineffabili cruciatu dentes omnes ipsi successive sunt enati, ut ipsos tam superiores quam inferiores margaritarum instar candidissimos videndos præbuerit.

§. X.

Menstruorum fluxus ordinario incipit ab anno decimo quarto, & durat ad 49. & 50imum annum. Incongruum itaque & irregulare plane quid est in foeminis, si menses plane non fluunt, & eorum plenaria fiat emanatio. Talismodi exempla non raro occurrunt in praxi, ubi tamen probe notandum, quod plerumque tales foeminae non modo sint steriles, sed & nunquam bona ac prospera fruuntur valetudine, & ad morbum cachecticum, phthisicum, febremque lentam admodum inclinent. Incongruum etiam quid est, si hic fluxus statim desinat anno quadragesimo, & ante ordinarium tempus; nascuntur exinde varia pathemata hypochondriaco-hysterica a sanguine circa uterum & mesenterium congesto, exitumque non inveniēte, ubi Venæ sectio moderata prudenter instituta, martialia blandaque discutientia egregiam navare solent operam. Extraordinarium etiam quid est, quandocunque hic fluxus sanguinis ad sexagesimum imo septuagesimum & ultra perseverat, ita mentionem faciunt *M. N. C. D. II. A. VI. obs. 15. p. 305.* HILDANUS *cent. 2. obs. 61.* meminit foeminæ cui menstrua ad annum usque septuagesimum octavum ætatis ordinarie profluxerunt. Quo anno cum ab ordine discedere & inordinatius prodire cepissent, in febrem continuam incidit. Cum vero natura per criticam expulsionem sese in crus sinistrum exonerasset, exorta est inflammatio dolor maximus cum gangræna. Ex qua paucos post dies Coloniae pie ac placide e vita discessit. Fuerat matrona illa sanguinea robusta & morbis parum obnoxia, interim tamen sterilis. Tale exemplum vid. quoque apud TIMÆUM A GULDENKLEE *Libr. IV. Cas. XIV.*

§. XI.

Inter incongruas excretiones referenda quoque venit, quando foeminæ loco fluxus sanguinis per uterum eruptionem cruoris per venas hæmorrhoidales expe-

experiuntur, & talia exempla non admodum rara sunt. Ipse HEURNIUS *aph.* 2. §. 3. Novi, inquit, mulieres, quæ mensium vice hæmorrhoides fundebant. Memorabile quoque est quod scribit WEDELIUS *M. N. C. D. I. A. III. obs. XXII.* Anno hoc, inquit, consulit me rhedarii aulici conjux 66. annorum, faciei colore ad viriditatem vergente (quod experimento FORESTI pathognomonicum est signum hæmorrhoidibus laborantium.) Hæc mihi retulit se & olim mensibus non minus fluentibus, hæmorrhoidum fluxum passam esse, & etiamnum eodem laborare, licet naturalis mensium terminus dudum cessaverit, cum dorsi & hypochondrii sinistri dolore, sanguinem ut plurimum esse rurum, & cum saltu non raro exire instar siphunculi; quo factum est, ut sæpe nimium eundem experta sit, & vires labantes adstrictionem urserint. Ejusdem valoris exempla quoque legi possunt in *Act. Hassniens.* THOM. BARTHOLINI *P. I. observat. LXXXI.* item in SOLENANDRI *consil. medic.* Eleonoram Reginam Galliarum & Comitissam Waldecciam fluxionem menstruum pariter ac hæmorrhoidalem passas fuisse FERNELIUS *Consil. XXXIX.* memorat, it. *Eph. G. D. I. A. IV.* Mensium & hæmorrhoidum fluxum alternatim factum vid. *Ibid. D. II. A. V. Appendic. obs. LXXX.* it. SCHENCKIUS *L. 4. observ. 273. ex Kentmanni literis.*

§. XII.

Podagra morbus est sexus masculini non autem foemini, testante id quoque HIPPOCRATE *S. 6. aph. 29.* dum ait: *Mulier podagra non laborat nisi ipsi menstrua defecerint.* Quemadmodum enim magnum mulieri adversus omnes morbos præsidium est excretio menstrua; ita etiam eadem defendit hanc ab arthriticis & podagricis insultibus, utpote hi affectus plerumque oriuntur ex copia sanguinis impuri tartareis acribus salibus referti. Generatur autem hic ipse in naturis ob Veneris & Bacchi usum, intemperantiam vel malam corporis ex parentibus dispositionem imbecillioribus, in quibus propter motum tardiorum & infirmiorum cruditates multæ accumulantur, hinc per evacuatoria superflua & excernenda non ejiciuntur; quodcumque autem natura sese exonerat singulis mensibus a colluvie superflui sanguinis, necesse est, ut reliquus cruor eo melius circulari & a falsedine acri tartarea depurari possit, unde in foeminis sanguinis ejectio dum plethoram imminuit, intemperies, multasque impuritates, & ex iis varias profluentes ægritudines avertit. Nihilominus quando vita mulierum ad luxum & libidinem convertitur, sicque natura mirum debilitatur atque impuritates sanguini & lymphæ nimium ingenerantur, podagrâ, antequam menses deficient, laborant foeminae. Ob id SENECA in quadam Epistola invehitur in mulieres Romanas, quod sua vitæ ratione immoderata & intemperante fecerint HIPPOCRATEM mendacem. Notatu dignum exemplum prostat apud SOLENANDRUM *S. V. cons. I.* ubi foeminam viduam veneri ac luxui nimium litantem podagra correptam fuisse meminit, quæ diæta strictiori imperata podagrico dolore non fuit amplius tentata. Diætam neglectam in mulieribus, arthritidis sive podagræ causam subministrasse inter alia commonstrant observationes, quas collegit HAGENDORNIUS *Cent. III. histor. XXIII.* qua memorat matronam nobilissimam quadragenaria majorem toto corpore præsertim ossibus prætumidam esse, & cum doloribus artuum, compressione pectoris, febricula per mensis unius spatium afflictam fuisse. Causam innuit fuisse sacchari abusum, quod crudum nonnunquam, imo cibo ac potu immixtum, ingessit.

Frid. Hoffmanni Oper. Supplem. II.

Quod tamen cum interdiceretur, salva postmodum ac immunis ab hoc malo permanfit. *vid. id. Autor. l. c. obs. XXIV.* Item *Miscell. N. C. D. I. A. VI. p. 208.*

§. XIII.

Sexui foeminino familiaris quoque est vomitus cruentus seu sanguinis puri; non rarius visitur in praxi propter diuturnam mensium retentionem circa ordinarium fluxus tempus absque omni periculo excretio sanguinis per vomitum. TIMÆUS VON GÜLDENKLEE in *Cas. Med. L. IV. cap. XIV.* meminit cujusdam nobilis Matronæ XL. annorum, quæ retento ultra biennium fluxu menstruo singulis mensibus circa ultimam lunæ quadraturam copiosissimum sanguinem vomitu rejecit, & hæc, cum a Chirurgo sanguinem sistentia exhibita erant, pessimè sese ab ipsorum usu habuit. Et notabile est, quod scribit autor, quod cum nullis remediis fluxus mensium restitui potuisset, duraverint hi vomitus citra ullum valetudinis incommodum, usque ad quadragesimum octavum annum, quo sponte desierunt, valetudine corporis deinceps variis morbis subinde tentata, ut plerumque deficientibus per ætatem mensibus fieri solet. Ita notabilis quoque est historia, quam refert JOH. RHODIUS *cent. 2. obs. 64.* dum Patavii duas foeminas vixisse tradit; alteram Deo dicatam, cœlibem alteram, quæ imminenti fluxu mensium pridie sanguinem absque incommodo rejecerint, imo vomitum præferant, quem si Medicus cohibere tentaret, varia suboriebantur symptomata ipso vomitu sublato. Eadem sanguinis excretio per vomitum in viris plus monstri vel periculi alit, plane enim incongrua illis ipsis est, & sæpissime ipsis lethalis; plerumque enim non modo cruor per vomitum, sed & per alvum aterimo colore tinctus ejicitur, & tunc morbus niger Hippocratis vocatur, de quo vid. *dissert. ante annum habitam sub Præsidio Excell. Dni Præsidis.*

§. XIV.

Non possum non hac data occasione percuriosam hujus affectus historiam proxime annotatam recensere. Ante mensem servus Viri Illustriss. per multos annos infirma gaudens valetudine & coloris in facie pallidi iter pronuper faciens per pedes, motu nimium calefecit corpus, domum reversus conqueritur de torminibus abdominis, anxietatibus; nocte augentur hæc symptomata, & subsequitur vomitio purissimi sanguinis ultra duas mensuras, mox adest animi defectio, virium collapsus & somnolentia perpetua, facies similis moribundo, pulsus adhuc salvus, aliquot horis elapsis in tali statu existens per alvum rejecit ingentem humorum copiam picei coloris, nulla remediorum efficacia poterat reduci ad mentem, sed nocte subsequente moriebatut. Altero die aperiebatur cadaver, sed quod mirum dictu & vix credibile apparet, nam per dies saltem duos ægrotavit & mortuus fuit, tam abominabilis putridus foetor afficiebat nares adstantium ut nulla ratione emendari vel corrigi potuerit, & cunctis fere gravem dolorem in capite reliquerit; Cujus notatu digni phænomeni ratio procul dubio fuit quod vasa, exceptis venis in abdomine, mesenterio & omento, sanguine penitus fuerint exhausta, ille ipse autem in ventriculi cavitatem & intestini ilei dimidiam partem, colon & rectum fuerit exoneratus, ubi fermentativa motione subactus, foetidissimum hunc exspiravit odorem. Notabile insuper fuit, quod lien in convexa parte instar chartæ albæ apparuerit, membrana existente durissima callosa ad minimi digiti crassitiem, hepatis dimidia pars erat constricta ac dura, rami majores venæ

portæ angustæ & contractæ, & quod curiosum aspectu fuit, in venis splenicis multi varices seu tumores sanguine coagulato infarcti conspiciebantur, omenti quoque & intestinales venæ turgidæ erant sanguine, inque ventriculo non vasa brevia sed in fundo ejus capillares gastroepiploicæ arteriæ apertæ sanguinem dimiserunt. Duodenum autem & jejunum ut & dimidia pars ilei bilioso succo multo scatebant, alba apparebant, reliqua autem intestinorum portio plumbeo colore tincta videbatur in eorum cavitate existente aterrimo succo. Ratio quare non extravasatus fuerit sanguis in superioribus intestinis, hæc mihi videtur, quod hæc intestina interiorum tunicam villosoglandulosam crassam possident, per quæ non facile sanguis erumpere potest, reliqua autem teneriori, quæ ex facili perrumpi potest, vestita sint. Plerumque autem si vomitus cruentus in sexum masculinum cadit, hypochondria non esse sana ac salva indicium est.

§. XV.

Dicendum etiam quid est de excretionibus sanguinis incongruis ratione viarum. Accidit quandoque ut viri per ipsum virile membrum sine mictione sanguinem emittant, tale exemplum observavit olim in typographo Mindensi Excell. Dn. Præses qui omni trimestri spatium talem passus est fluxum quandoque ad unam mensuram; ante hunc fluxum experiebatur immanes dolores in inguine, in femoribus, & in perineo; vir erat sanguineo-melancholicus, sedentariæ vitæ, vinum autem largius bibebat. Ex aliis quoque egregium est exemplum, quod *Eph. N. C. D. II. A. VI. observ. LXXXIII.* subnectit GEORGIUS FRANKUS, Septuagenarius, inquit, Dn. D. Houst, se vidisse olim Sedani in patria lanionem, mihi retulit, qui singulis mensibus per urethram sanguinem reddidit purum. Quod in vulgus cum emanaret, abhorruit a viro, nemoque deinceps carnes ex ejus macello coemere voluit. Vid. quoque THOM. BARTHOLINUS *cent. V. histor. XXXIII.* Quemadmodum autem ex mensium stagnatione contingere solet quandoque vomitus sanguinis, ita etiam hæmoptysis menstrua, tunc temporis quando menses solent fluere, exercet quandoque mulieres. Tale exemplum non ita pridem occurrebat Excell. Dn. Præsidi cum foemina rustica XL. annorum per tres annos insignem aluit hæmoptysin singulis mensibus accedebat, & quod notabile fuit cum mensium fluxu, paucos tamen ipso, & cum semel fuit gravida, emanavit etiam per tussim cruenta excretio. Postea vero ab infante libera rursus eodem modo & per easdem vias reversum est malum, quo in hodiernum diem adhuc divexatur. PETRUS SALIUS *comment. in Hippocr. scribit se observasse laudabilis habitus mulieres tempore mensium naturali proportionatam mensibus sanguinis quantitatem per tussim excreare, quod & NICOL. CHESNEAU simili experientia corroborat. Meminit quoque insuper Exc. Dn. Præses puellæ octodecim annorum, quæ in tibia ulcus gerebat cacoeticum, per hoc singulis mensibus effluxit in notabili quantitate sanguis, paucos per uterum transeunte, imo reperiuntur hinc inde annotata exempla, ubi ipse hic sanguis per mammarum foramina, per vulnera, per urinariam vesicam prodiit non sine euphoria, qua de re consuli potest KERKRINGIUS *obs. LXXXV. & LXXXVI.* PECHLINUS *obs. 38.* TIMÆUS *I. IV. c. XII.* RIVERIUS *Cent. II. obs. LXIII.* AMATUS *Cent. 2. curat. 21.* RHODIUS *cent. III. obs. LI.* PANAROLLI *Pentecost. II. obs. 4.**

§. XVI.

Supereff jam ut brevibus eos nunc attingamus

morbos, qui anni temporibus non respondent. Egrege hoc argumentum tractat HIPPOCRATES *L. III.* & quidem aphorismo dum scribit 8vo, certis temporibus & suam tempestivitatem servantibus certi & tempestivi ac judicatu faciles morbi fiunt; & ad judicandum difficiles, adeoque si incongrua sunt tempora anni, incongrui etiam fiunt morbi, hi enim efficientium causarum naturam potissimum sequuntur, & sunt fere ejusmodi, cujusmodi est ipsum tempus, nam ubi inconstans est annus, & unius temporis anni natura transit ac degenerat in alteram, natura redditur infirma, inæquibilis est sanguinis motus, transpiratio, morbi fiunt instabiles, non servant suas periodos, nec edunt signa tempestivæ coctionis, mali sunt judicii, facile recidivant, & graviora sociantur symptomata. Ita superioribus annis cum æstates ut plurimum frigida humidæ ac pluviosæ fuerunt, febres putredinosæ, exanthematicæ, purpuratæ, petechiales, pediculares, epidemicæ per aliquot annos grassatæ sunt; Talis enim aeris status imbecillam naturam efficit, id est, labefactat motum sanguinis, transpirationem impedit, multasque serofas excrementitias sordes colligit, unde dispositio sanguinis & humorum ad putredinem inclinat. Febres putridæ tempore autumnali & hyemali solent esse familiares, exquisitæ autem tertianæ cholericæ & ardentes cum vomitu, alvi profluvio stipatæ ordinarii ferventis solis & æstus morbi sunt. Et sicuti ver saluberrimum est & minus exitiosum, cum vires ibi robustæ, spiritualescentia ab aëre subtili sereno temperato augeatur, hinc etiam morbi hac tempestate excitati periculo vacant, magis salubres sunt, & melius multo ac facilius obsecundant medicamentis: Pessimum itaque indicium est, si tempore vernali grassentur morbi, v.g. febres, variolæ, morbilli, malignitatis symptomatibus stipati, & difficilius convalescunt & vires recuperant ægri, hæc universa enim ingentem deflexionem temporum superiorum autumnis nempe ac hyemis à statu sibi debito congruo significant.

§. XVII.

Tertianæ febres sunt ordinario vernaes, & hæc etiam saluberrimæ, & proficiscuntur à biliosis copiosis sordibus circa hepar & primas vias accumulatis, & valido naturæ motu ac impetu invadunt, hinc etiam celerius expulsa & discussa materia hostili finiuntur. Si hæc ipsæ eveniunt autumnis cum natura ibi sit imbecillior, humor autem tunc vitiosus crassior & fixior longe diuturnioris & difficilioris curationis sunt, adeo ut longe aliud prognosticon in vernalibus, quam in autumnalibus tertianis aliisque intermittentibus febribus valeat: Hinc SYDENHAMIIUS vernaes ab autumnalibus tota sua natura & essentialiter distingui scribit. Quartana HIPPOCRATIS *aph. 22. §. 3.* autoritate & experientiæ testimonio morbus est ordinario autumnis soboles & oritur ab humore maxime viscido & acido in ventriculi glandulis, pancreate, hepate & vasis mesaraicis hærente ac vitato & postea sanguini permixto, unde cum in autumnis aeris constitutio humida & frigida sit, elateris robore debito defraudata, languidiores fiunt sanguinis intestinae & progressivæ commotiones; hinc difficilior est causæ febrilis vitiosæ resolutio, & ex corpore excretio, incongruæ itaque dicuntur quartanæ æstivæ, & indicant tunc hyemis & veris statum inordinatum ac conditionem depravatam præcessisse, rectissime monente HIPPOCRATE, quartanæ æstivæ magna ex parte breves sunt. Caloris enim beneficio sanguis crassus facilius attenuatur & lenti tenaces humores excernuntur, calor enim multum adjuvat harum curationem, unde experientia constat diuturnas autumnales

nales & hyemales non prius curatas fuisse, nisi accessu mensis Junii, quo cerasa fiunt matura, unde vulgo persuasum est, ea sanare quartanas, sed bene monet HOLLERIUS in *aphor. Hipp.* calor sanationis causa est, non fructus ille.

§. XVIII.

Dysenteriam nulla anni parte magis nasci, quam ultima æstate & autumno, experientia constat, nihilominus & alia tempestate vere & æstate epidemice non raro hunc morbum grassari observavit SYDENHAMIIUS *constitut. epid. ann. 1669. p. 215.* dysenteria, inquit, etsi morbus autumno maxime proprius, nonnullos etiam vere & æstate infestabat, quando-cunque enim ver autumno simile sit, frigida ac humida tempestate cœlum implet, accedente æstu intensiori, ac factò motu sanguinis intestino fortiori, non potest non ejusmodi morbos in medium proponere, hyems enim cacochymia & impuris falsis humoribus corpus humanum implet, donec ver & æstas, accedente calore ac humida constitutione, & corporis singulari dispositione, ea quæ hætenus accumulata sunt resolvat, excuset ac moveat. Autumnus æstati similis quanta creet incommoda humano generi, sat sufficienterque hætenus fuit observatum, præsertim alvi fluxus, febres varii generis calidæ, genitalium putredines & pustulæ miliares æstivo tempore congrui morbi grassantur & hominum maximam partem affligere assolent. Conferatur hanc in rem RAMAZZINI *observ. meteorol. & epid. Mutinens. constitut. it.* SYDENHAMII *constitut. epidem. it. Eph. Barometric. meteorolog. constitut. Hallens. a Dn. Præsidente ante annum exhibitæ.*

§. XIX.

Diffimilis etiam vocari solet morbus ratione habitus corporis, quando nempe carnosus & obesus tabe vel phthisi corripitur. Ordinario macilenti teneræ constitutionis homines & cholericæ temperaturæ tabido & phthifico morbo detinentur, quoniam in iis sunt acriores succi & nutritiæ laudabilis materiæ major defectus; obesi autem & pleni succorum ad tumores œdematosos & hydropem magis inclinant, quoniam in iis tardior est humorum evolutio, hinc major & facilior proclivitas ad stases obstructions ferique extravasationes. Quod si itaque obesus sit, phthificus, indicium est eum ingentem passum fuisse laudabilium humorum & spirituum deperditionem a causa nimis violenta: Nec minus si macilentus sit hydropicus, designat magnam decessionem factam a statu naturali. Tandem inter dissimiles morbos non immerito referendum est, quando vir robustus alias sanus rarius ægrotans morbo gravi afficitur, unde non vanus vulgi metus est, periculosius decumbere robustos quam debiles, indicium enim est, magnam violentiam esse causæ morbificæ, cui robur ac vigor naturæ, qui in motu consistit, non poterat resistere.

§. XX.

Tandem de usu morbi congrui & incongrui quædam superaddere, non supervacaneæ operæ vel laboris esse arbitror; Instar omnium sit HIPPOCRATES, qui *aph. 34. l. 2.* scribit. In morbis minus periclitantur, quorum naturæ, ætati, & habitui, & tempore congener est magis morbus, quam quibus nulla ex parte est consentaneus. Ad hunc aphorismum Doctissimus HEURNIUS commentatur hæc; videtur, inquit, prima fronte absurdissimus hic aphorismus, & qui minime omnium demonstrari possit, nam quo-

ties ad exitiosam vim morbi accesserit naturæ consensio, periculosissime se habere debet æger. Ut si tabidus natura (quales hi quibus alarum more scapulæ in dorso prominent, nam pectus his angustum est) in tabem inciderit maxima ex parte moriuntur ex HIPPOCRATIS sententia, ubi ait, moriebantur, quorum natura vergebat ad phthisin, item adolescens calidissimus si in calidissimam febrem inciderit, quomodo non potest periculosissime laborare? cum malum malo cumuletur, & ad intemperiem ipsam calidam accesserit morbosa intemperie calida, hæc omnia, inquit, solvo unica ratione, quod morbi pares magnitudine, causa, symptomatis & curandi opportunitate facilius curantur in iis quibus sunt congeneres quam in aliis, habitum enim extra naturæ lineam non grandem significant. Et utique quamvis neque morbi consensionem ex similitudine habentes cum natura morborum non sint sine periculo, attamen non tantum illud ipsum est, quam quod conjunctum habent ii morbi qui proveniunt ex causis nullam vel paucam cognationem alentibus cum ætate, humorum dispositione, temporis anni, corporisque animi. Ponamus, inquit HOLLERIUS in eundem *aphor.* duas febres ardentes, unam, quæ sit genita hieme, alteram, quæ æstate. Quæ orta est hieme, (cum causa violenta magis sit) periculosior erit ea quæ æstate, ut in qua causa sit minus violenta, & quæ magis tempore cognata sit quam illa. Videmus etiam porro experientia, Anglos & Scotos magis febre ardente periclitari, quoniam eorum naturæ non tam est familiaris quam nostræ. Certissimum etiam hoc quod lues venerea in Anglia, Scotia & regionibus septentrionalibus longe sit rebellis & difficilius sanationis quam in Gallia, Italia, & regionibus percalidis, adeo ut attendendæ etiam sint in hisce rebus regiones quarum quædam sanando morbo plus vel minus favent, utpote lues venerea, quæ a fixioris & corrosivioris corruptivæ indolis principio oritur, ubi corpora sunt rara molliora humidioris habitus corporis, quam ubi corpora sunt strictiora, humores fluxiliores & immobiliore. Notabile est porro, quod in regionibus perfrigidis polo septentrionali vicinis læsiones & percussiones in capite minori periculo stipatæ sint, quam sub temperiori & calido climate, ubi leviter capite percussi in convulsionibus apoplexiam vomitus & paralyses incidunt. E contra minimæ læsiones externæ factæ in artubus in regionibus frigidioribus facile degenerant in sphacelum, apud nos neutiquam. Ratio nulla alia est, quam quod cranium frigidiores habeant durius, nos tenerius, & in illis impeditior sanguinis circulus procedat, in nobis velocior. Ideoque si ex capitis percussione convelluntur septentrionales populi, indicium est violentissimæ causæ externæ; contra vero, si nostrarum regionum incolæ in artubus sphacelo corripuntur, potentia etiam ingens causæ significatur. At vero monendum hic quoque est, non morbos, præsertim ratione temporis quo fiunt, esse semper magis exitiales quam qui respondent cum indole temporum, habemus exemplum in quartanis, ipsius HIPPOCRATIS testimonio, hæc est morbus autumnalis adeoque in suscipienda curatione magis renitens, si jam talis incidit extra ordinem in æstatem ex ipsius etiam HIPPOCRATIS assertione brevior est, nam utut causam talis quartana habeat a naturali temporum statu plane degenerem, non tamen sequitur exinde, majus adeste periculum, nam revera æstatis calor favet egregie discussioni & expulsionem humorum morbosorum.



DISSERTATIO MEDICA DE SALIVA, ET EJUS MORBIS.

Primum edita Anno 1694.

CELSUS in Præfatione.



NATURÆ rerum contemplatio quamvis non faciat Medicum, aptiorem tamen Medicinæ reddit. Profecto verisimile, & Hippocratem & Erasistratum & quicumque alii non contenti febres & ulcera agitare, rerum quoque naturam ex aliqua parte scrutati sunt, non ideo quidem Medicos fuisse, verum ideo quoque majores Medicos extitisse.



CAPUT I.

Prodromus simul evolvens etymon salivæ.

§. I.

*Nihil
contem-
nendum.*

PULcherrimum, & aureis asteriscis dignum cujusdam Sapientis elogium: *Μὴδ' ἐν ἀναβαλλόμενον, nihil contemnendum.* Natura quippe sibi nunquam non sufficit; in minimis maxima nonnunquam apparet. Non itaque cum vulgo sentiendum, ea demum, quæ utilitate sese commendant, aliis, quorum usus latet, mirum præferente, hæc vero ceu res ficulneas & steriles nauci faciente. Testantur in contrarium experimenta summe curiosa & effecta saluberrima e vilissimis rebus instituta. Etenim tota Natura mechanica est, & in minimis quoque viget mechanismus, cujus facultates quisquis summa prudentia & judicii acumine penetrare satagit, is portentosa sæpe producere valet.

§. II.

*Phospho-
rur.*

Notissimum jam est magnum illud inventum, nimirum ignis lucidissimus, qui citra omnem læsionem manibus tangi & tractari potest, quem Chymicorum filii phosphorum nuncupant, educi ex sordidissimo corporis excremento, videlicet urina. Quem latet, spiritum salis ammoniaci genuinum urinæ foetum esse? Qui tamen quam præstantissimæ ac polychrestæ sit virtutis ad debellandas gravissimorum morborum causas, Clinicam praxin exercentes toto die admirantur. Ve-

rus itaque naturæ scrutator nihil contemnit, sed in quisquiliis aurum, & margaritas in fimentis, aut si mavis, in lacunis & sentinis subinde latitare secum serio perpendit, neque per transfennam, sed per dioptram vel microscopia intimas rerum essentias perlustrat.

§. III.

Non tangam in præsentiarum alia plura, sed saltem liquorem, quem plures Medicorum & Philosophorum hætenus pro excremento prorsus inutili habuerunt, puta *Salivam*, in scenam producam. Hanc equidem, quod menstruum verum microcosmicum universale sit, & usus insignissimi, sine cujus præsentia ac temperie vitæ nostræ incolumitas conservari nullatenus potest, Dissertatione hac inaugurali luculentissime demonstrare conabor. Varios affectus ex prava Salivæ constitutione scaturire solitos; hætenus ignotos simul inferendo, singulisve morbis & symptomatibus convenientia remedia brevissimis indicando.

Saliva.

§. IV.

Prius autem quam singula seorsim in apertum sistam, pauca de vocis origine rei naturam illustrantia, præmittere libitum. Salivam itaque dici quasi salis viam, extra dubitationis ansam videtur positum: salis puta essentialis balsamici & spirituosissimi seu spiritibus foeti. Sic suis sæpe rebus conveniunt nomina, ut ex ipsa salivæ natura plenius suo loco demonstrabitur. Nec male scribi potest *salivia*, prout in Manuscripto Anatomico ante sexcentos annos conscripto & in Bibliotheca Romana in hunc usque diem conservato legisse Vir magnæ famæ aliquoties mihi retulit. Minus autem convenienter pronunciatur ab aliis

*Etymon
& Syno-
nymia sa-
livæ.*

aliis salivum, depravata tum euphonia tum etymologia.

§. V.

Græcis audit *σπάλος* a *σείω*, moto, quod sic dictum opinor, sive quod perpetuus quasi fluxus, seu motus ejusdem sit, sive quod motu magis magisque e ductibus & glandulis salivalibus eliciatur. Aliis *πτύελος* a *πτύω*, quo quidem ipse sacer textus, salivæ dum meminit, uti consuevit. Hinc nonnullis recte nuncupatur sputum, ab obsoleto spuo, Germanis *Speichel*. Quamvis alii sputi nomen salivæ crassæ inutili & præternaturali per screationem ejectæ dare maluit. Verum non adeo strictis cancellis includenda hæc vocum differentia. Neque si quis utilem & naturalem salivam sputum dixerit, ideo erraverit. Adprime cum Viris *δωπνύουσιν* saluberrimæ atque utilissimæ salivæ mentionem facientibus eandem per *πτύοις* sputum emittens, efferre pulchrum visum.

CAPUT II.

Fontes salivæ rimatur.

§. I.

Veterum
fictitii
salivæ
fontes.

Missa *λογομαχία* fontes salivæ rimandas & brevissime delineandos aggredior. Ignorabat hos antiquitas; aliis vappidum ventriculi ad caput elevatum in humidum resolutum salivæ nomine venire putantibus; aliis ex capite per membranas & nervos gliscere & depluere quasi statuentibus; aliis vias alias occultas fingentibus & aliunde, nescientibus unde, derivantibus, nubem pro Junone singulis amplectentibus.

§. II.

Recentiorum
verum.

Recentiores currentis semiseculi felicitate rectius edocti ipsis salivalibus ductibus salivam e glandulis in oris cavitatem effundentibus imaginarii istius vappidi locum concedunt, & viis occultis satis manifestas substituant. Cum his fontes salivæ dico glandulas e sanguine per ramulos arteriarum huc delato (communicatis una per ramulos nervos in easdem glandulas sese terminantes, spiritibus animalibus, hunc spirituosum liquorem sequestrantes & per ductus salivales in oris cavitatem fundentes.

§. III.

Materia
ex qua.

Obveniunt hinc tria plenius demonstranda: (α) Materia ex qua, (β) Glandulæ salivales, (γ) ductus. Materiam ex qua suppono sanguinem arteriosum cum subtilissimo fluido nerveo, quod vocant spiritus animales. Viæ quippe per quas sanguis arteriosus & spiritus animales huc perferuntur (arteriæ puta & nervi) cum sint manifestæ & ex ipso sanguine arterioso omnes corporis succi tam utiles & nutritii quam inutiles & excrementitii omnium consensu scaturiant, salivæ materiam in glandulas inde derivatam nemo facile ibit inficias. Nervorum quidem fluidum ad salivæ productionem aptum natum esse, pluribus inferius evincam. Interim ex dictis elu-

cescit, ex latice, quem glandulas salicere & salivam efficere scribit HELMONTIUS in *Tr. latex humor neglectus*, sive e rorifero succo, quem per vasa lymphatica advehi probare suffinent alii plures, elaborari salivam, credibile non esse; tum quia vasa lymphatica in glandulas salivales se exonerantia nondum demonstrata, tum quia salivæ natura diversa prorsus a lymphæ seu latice, quin imo illa nobilior longe quam lymphæ sit, ut ex dicendis patebit.

§. IV.

Arteriarum itaque & nervorum succi in glandulas admissi per earum porulos & tubulos veluti per cribra filtrantur, particulis homogeneis & ad salivam aptis ad ductus salivales transmissis, heterogeneis ad venas remissis. Nimirum in vasa salivalia spectantes poruli & canaliculi angusti admodum, & minutissimi tales sunt, qui non nisi unius generis particulas, ex pluribus tamen compositas, suscipiunt. Reliquæ vero viæ continuatæ venis majores sunt, nec certis humoribus recipiendis destitutæ. Hinc solam glandularum structuram salivæ separandæ idoneam, nec fermento peculiari diacrisin adjuvante opus esse, certum est. Ubique enim transitus est momentaneus, & humor moram nullam necit, fermentatio concipi non potest. Ergo præter necessitatem entia multiplicat, quisquis in angustos talismodi meatus fermenta collocat.

§. V.

Accuratius autem Glandulas salivales per-lustrando inventas hæctenus in majores & minores dispeſco: perinde, ut ab iis oriundi ductus alii majores, alii minores sunt, ac dici possunt. Ex majoribus primum nominari merentur Maxillares superiores, vulgo Parotides nuncupatæ, glandulæ conglomeratæ prope aures conspicuæ & ob tumores in iisdem frequentius generatos lippis ac tonforibus notæ. Ex his orti ductus ampliores *Stenoniani* intra cavitatem oris tendentes & in mediis buccis circa secundi & tertii molaris contiguitatem desinentes salivam in glandulis filtratam eructant. Dein maxillares inferiores itidem conglomeratæ intra maxillam inferiorem sitæ per ductus *Warthonianos* in papillis sublingualibus sese terminantes humorem salivalem ori communicant. Denique ut ipsæ sublinguales glandulæ majoribus accensendæ, ita ab his orti peculiare ductus ab incomparabili Anatomico C. BARTHOLINO *Præceptore meo Honoratissimo* recenter propositi & cum reliquis ductibus Hafniæ mihi sæpius demonstrati cum *Warthonianis* in iisdem quidem papillis sublingualibus, distinctis tamen ostiis, sese apertientes. Non nescius sum, *Curiosos Lipsienses in actis suis* eosdem ductus a *Celeberrimo RIVINO* inventos referre. Manet interim utrique sua laus, quam illius dexteritas & laudatissima Anatomiae peritiæ & hujus solertia jure sibi vendicant. Apprime cum judice THOMA BARTHOLINO *Instit. Anatom. l. i. p. 92.* novum & inauditum non sit, plures eandem rem uno vel diverso tempore observare posse.

Error
Helmontii
& aliorum
plurimorum
Medicorum.

Filtratione
fit saliva.

Fermentum
non
ens.

Glandulæ
& ductus
salivales.

Majores.

Stenonia-
ni.

Warthon-
niani.

Bartholi-
niani seu
Rivini-
ni.

§. VI.

Glandulæ
& ductus
minores.

Labiales.

Sublin-
guals.

Palatini.

Ceterum minores glandulas salivares plures hinc inde dispersas ac fere infinitas in labiis, in palato & sub lingua positas esse, visus & tactus testantur sensus. Ab his orti ductus salivales minores, alii sunt labiales, quorum quidam magis, quidam minus manifesti, nihilominus omnes per humorem pressione elicitem conspicendi. Alii sublinguales a minutissimis glandularum glomeraminibus, circum glandulas sublinguales majores jacentibus, veniunt. Alii palatini in palati tunica nigris ostiis conspicui, subtiles quidem, nihilominus seta porcina immissa clarissime demonstrari possunt.

§. VII.

Glandulæ
& ductus
salivales
remotio-
res.

Lachry-
marum
& salivæ
conve-
nientia.

*Sexus fe-
quior ad
lachrymas
pronior.*

Nec pede sicco prætereundæ in oculi anatomia conspicuæ glandulæ, puta Lachrymales & Innominatæ; quæ, licet non immediate liquorem, quem filtrant, in oris cavitatem eructent, dum in orbitas oculorum, in quibus eorum ductus terminantur, talem fundunt, mediate tament sive per puncta lachrymalia & ductus ab oculis in nares tendentes in illarum cavitatem derivare, & ex his unicum liquore in glandulosa narium tunica secreto intra oris cavitatem illum effundere certissimum est. Hinc manifesta fit magna inter lachrymas & salivam convenientia, a nemine, quantum scio, notata, quam plura confirmant insuper phænomena. Venis quippe jugularibus subducto filo in cane arcte ligatis, non solum lachrymas copiosius prædire, sed & salivam tam copiose profluere, ac si Mercurio assumpto fluxus ille concitaretur, elegantissimum. KUCKII est in *Sialographia* experimentum. Præterea videmus, eos, qui ad lachrymas facile proni, ipso lachrymationis actu tam e naribus, quam ex ore simul egerere liquorem non pituitosum sed limpidum & salivæ conformem. Videmus etiam eadem objecta, quæ salivam movent, sæpius una movere lachrymas. Adde sexum sequiorem ob affectatum decorem salivæ exspuitioni & per nares expurgationi minus adfuetum ad fusiores lachrymas esse magis pronum. Quin humorem salivalem, non synoviam, fuisse aquam illam puram & limpidam, quam ab ossibus narium ad anteriorem oculi canthum plane effractis per 14. dies insigni copia ad plures libras effluxisse, notavit in *observationibus suis* RIEDLINUS, probabile est. Nimirum humor talismodi ex glandulis dictis in orbitas oculorum effusus a laudatorum ductuum orificiis continuo exceptus, exitum qua data porta affectat. Præsentibus igitur atque conspicuis adeo numerosis (pluribus forsan adhuc latentibus) viis, non mirum, in tanta quantitate separari salivam. Scilicet hominem adultum in statu naturali 12. horarum spatio ad uncias decem vel libram unam exspuendo reddere posse, experimento constat. In statu vero præternaturali longe majorem quantitatem excerni posse, ab *Excellentissimo Dno. D. PRÆSIDE in Exercitat. de acido & viscido* notata observatio probat, omnesque, qui per mercuriales inunctiones curantur, abunde testantur.

C A P U T III.

Naturam salivæ perscrutatur.

§. I.

Essentiam salivæ plus quam cymeriis te-
nebris hæctenus involutam, ut in apri-
cum proferrent recentiores, nihil reliquerunt
intentatum. Ipso quidem externo quali ad
internum quandoque viam pandente, sen-
sum nostrum protinus frustrari viso. Colore
videlicet aqueo parum dissimili, odore nullo
aut vix dijudicando, quibusdam acutiori sen-
su præditis subacido, putato, nec sapore sub-
acido forsân ob innatam consuetudinem recte
dignoto.

Saliva
sensibus
occulta &
a priori

§. II.

Nihilominus a posteriori mirificas salivæ vires abstrusioris indices essentiaë toto die sese exferentes notarunt & admirati sunt. Ita viderunt salivam quibuscvis assumtis sine difficultate dictum factum se commiscere, duriuscula mollire, v. g. panem bis coctum in ore detentum mediante saliva, quam alius cujusvis liquoris affusione citius mollescere, gummosa & resinosa, exemplo myrrhæ &c., extrahere atque resolvere. Viderunt, eandem in aliis rebus mutationem prorsus admirabilem causare, Mercurio currenti compedes injicere eumque coagulare, aliave metalla arrodere, serpentes, scorpiones & insecta quædam necare. Visitur fermenti loco ad multas res fermentandas inservire, v. g. vino permixta novam fermentationem inducit, ut ipsi pharmacopolaë, ne præparata ipsorum, bene licet fermentata, nova fermentatione ab admixto salivæ momento exitium contrahant, cavere debeant.

Phænomenismiran-
da & ab
effectu.

§. III.

Quibus phænomenis permoti curiosiores per anatomen pyrotechnicam veram salivæ essentiam rimati sunt. Ita quidam salem, simplici nimirum evaporationeprehenderunt. Accuratiores spiritum volatilem & minimum salis lixiviosi cum olei, spiritus acidi tantillomissi temperatque acquisiverunt. Alii ex saliva collecta cum calce viva menstruum quasi universale destillaverunt. Talia igitur *philosophi per ignem* principia salivæ demonstrarunt. Constat insuper *experimento per antliam*, salivam particularum ætherearum tantam copiam, quantam vix ullus alius liquor, ne ipse quidem spiritus vini vel spiritus salis ammoniaci, in se habere reconditam. Ex quibus luculentissime liquet, salivam fungi vice menstrui alkahest analogi, adeoque maximarum virtutum admirandis particulis scatere; quas licet quodammodo recludant experimenta citata, nequaquam tamen salivæ naturam sufficienter explicant.

Anatome
chymica
saliva.

§. IV.

Itaque præter elementa dicta seu particulas salinas volatiles acidis mixtas &c. salivam præ reliquis animalis machinæ liquoribus spiritibus animalibus imprimis esse dotatam & im-

*Spiritus
animales
salivæ.*

impregnatam, verisimile videtur, confirmantibus assertum rationibus & experimentis sequentibus: 1.) Nervi seu spirituum animalium tubuli copiose comitantes arterias in glandulas salivales cum iisdem terminentur; at Natura nihil frustra. 2.) Ligatura in nervum ad glandulam tendentem injecta aut transversim dissecto nervo, licet secretio salivæ non statim cesset, tardior tamen & magis tenta procedit. 3.) Motu animali cessante & affectibus animi feriantibus, tempore somni cessat etiam salivæ fluxus, indicio manifesto, spiritus animales tum sopitos huc maxime suum conferre symbolum. 4.) A majori salivæ fluxu & frequenti exspuitione mire solemus defatigari, quod spirituum animalium depauperationem digito quasi monstrat. Videri in hanc rem possunt *Miscellan. Curios. ann. 4. Dec. 2. p. 208.* 5.) ad mentis nutum sive motum major salivæ copia profunditur, ut hinc proverbium enatum sit: hæc movet salivam; quasi dicere velint: hoc mentem ad attentionem alliciendo salivam & spiritus animales in singularem rapit motum. 6.) Ex communicatione salivæ duarum diversarum personarum sympathia sive consensus oritur, iidem nempe affectus animi, qui spirituum animalium foetus sunt. Sic ex iteratis osculationibus, quibus linguas committunt amantes, salivam sibi communicant, & naturali quasi philtro fascinant affectus amoris ardentissimi novi productos. Et a saliva furibundi parilis furor inducitur, &c. 7.) Maximus usus, quem ad masticationem & digestionem ciborum præstat, nuda sine spiritibus animalibus lymphâ absolvi minime posset.

§. V.

Definitio.

Prælibatis ita fontibus & elementis sua sponte nunc fluit salivæ definitio, quæ talis esse potest: saliva est liquor sale penetrante subtili solvente scatens, e glandulis stomacicis majoribus & minoribus innumeris per certos ductus in oris cavitatem effusus ad masticanda, ingerenda, & digerenda alimenta necessarius.

CAPUT IV.

Salivæ necessitatem considerat & utilitates.

§. I.

Amplissimus hic aperitur campus de usibus salivæ differendi prolixius. Ac ne confuse tradam, quæ mihi de iis innotuere hæcenus, ut in Naturales, Medicos, & Chymicos dispescam, commodum duco.

§. II.

Saliva menstruum universale microcosmi.

Naturalium salivæ usuum a recentioribus Physiologis traditorum plurimorum præcipuos saltim summeque necessarios in medium afferam. Instar omnium laudari meretur usus decantatissimus, quem ad masticationem perficiendam præstat. Est enim saliva primum veluti menstruum microcosmicum, quævis assumpta penetrando, emolliendo, & imminutan-

do ad digestionem præprimis adaptans, quo sive depravato sive ablato mox deficit appetitus, vitatur masticatio & deglutitio, turbatur concoctio atque digestio; uno verbo labascit tota œconomia animalis, ut in febrilibus insultibus & variis affectibus toto die notamus. At pristino salivæ vigore sive medicaminibus sive diæta accommodanda in integrum restituto, quantas quæso & quam subitaneas alterationes animadvertimus? Sæpius equidem, qui heri visus habere alterum pedem in tumulto, hodie deambulat, appetit, optime valet.

§. III.

Cujus rei causam ut rimer accuratius paulo, instituti ratio suadet. Verisimile duco, spiritus animales hæcenus quasi ligatos affectuissimo cibo vel potu impetrato, vel remedio conveniente adhibito suscitatos & sui juris factos ἀσπόμενους & βλαβερούς confluere, obstructos glandularum atque vasorum salivalium porulos, tubulos, & fores aperire, in oris cavitatem mediante saliva penetrare, alimentisque desideratissimis & gratissimis permisceri. Qui spiritus, sive subtilissimi succi, licet ita sint comparati, ut facile queant evanescere, ab assumtis tamen mox irretiti, vel quasi capti & ad ventriculum delati, coctionem mire juvant, fermentationem & chylicationem faciunt, sibi que particulas similes ex alimentis elicitas associando & tum per viam regiam, tum per poros, ductus atque meatus alios proximiores in massam sanguineam ferendo sanguinem vegetant, mixtionem & circulationem turbatam in integrum restituunt, totamque œconomiam animale sui juris reddunt.

Subitaneæ reconvalescentiæ causa.

Objectio.

Responsio.

§. IV.

Ex his genuina deduci potest ratio phænomeni naturæ occultis accensiti, quare scilicet ea, quæ nimis ardentem atque constanter appetimus, licet aliàs minus salubria, magis prodesse soleant, quam alia maxime salubria appetitui pro tempore minus apta. Nimirum impetratis illis cum salivali succo spiritus animales ab objecto morbofo prius defatigati in centro quasi detenti ac pene suppressi denuo eriguntur, novis fomentis recreantur, exsuscitantur, & in pristinum motum rediguntur. Desideratis e contrario negatis & ipsa salivæ ostia manent reservata, spiritus in horas magis magisque fatiscunt, languescunt, tandemque prorsus opprimuntur & evanescunt, talesve non tam fato suo, quam ob denegatum bonum appetitum vivere defuisse videntur.

Phænomeni occulti ratio, ex aphorismo Hippocratis.

§. V.

Hoc ipso masticationis munere dum fungitur saliva, simul saporum dignotioni interfert, gustumque ex cibis elicit. Omnem quippe saporem a sale provenire, experimenta chymica demonstrant, ut ipsa culinaria non laudem. At salia non nisi solutione mediante saliva facta elici posse, quotidiana dicit experientia. Illi enim, qui febribus ardentibus vel aliis affectibus cum oris & faucium siccitate conjunctis correpti, neque masticare cibos assumptos, neque sapes dijudicare possunt. Adde, quod solida quævis, quam-

diu

Vera sa-
porum
causa.

diu integra, vix ac ne vix quidem linguam afficiant, exemplo granorum paradisi, piperis, sinapios, quæ tamen masticata contrita atque soluta maxime sunt sapida. Ideoque certum, particulas sapidas quasque non nisi diminutas & saliva solutas in papillarum nervorum e lingua exsurgentium poros tanquam nervorum quinti & sexti parium gustatorio- rum extremitates deferri, a sensorio communi percipi, & cujus saporis sint, dijudicari posse.

§. VI.

Ciborum
deglutitio.
Faucium
irrigatio.

Nec masticatione peracta cessat usus salivæ, sed ad ciborum masticatorum deglutitionem summopere conducit. Quippe tum pro facilitanda hac, tum pro faucium cavitate irriganda (molestissima nempe foret siccitas & exitiosa machinæ nostræ) non solum majores ductus copiosam salivam eructantes esse voluit Creator, sed infinitos pene minores, quo undiquaque continuo a larga veluti pluvia fauces irrigari commodius possint.

§. VII.

Genui-
num ven-
triculi
men-
struum.

Maximus denique videtur usus nostræ salivæ, quem genuinum tanquam ventriculi menstruum ad concoctionem, fermentationem, & digestionem ciborum, uno verbo ad chylificationem confert. Equidem deridendi videntur plures scriptores fermentum ventriculi tam sollicitè quærentes, & salivam tali negotio veluti minus accommodam negligentes. Nimirum cum ipsam salivam sola masticatione quævis assumpta tantopere mutantem & prima alterationis rudimenta ponentem toto die notemus, quid, quæso, posset ob stare, quominus spirituosus ejusmodi liquor universum coctionis negotium absolvat? apprime cum in tanta præsto sit abundantia, ut non solum copiosissime cum cibis absorbeatur, verum etiam continuo fluxu deglutitis superingeratur: alius autem succi fermentifici ductus & scaturigo inter occulta & postulata referri mereatur. Falsa enim sunt, quæ de vase brevi nonnulli fingunt; (nihil enim per vas breve defertur, sed per illud a ventriculo in ramum splenicum revertitur sanguis) nec ipsæ miliares glandulæ ventriculi minutæ & paucae tam copiose requisito succo præbendo sufficientes esse possunt, vel aptæ natæ.

§. VIII.

Usus me-
dicus
divinitus
revelatus.

Non ruminabor alios usus naturales. Inquiram potius in usus medicos prorsus neglectos hactenus. Equidem ipse *Salvator Mundi* nobis hos usus digito quasi monstrasse videtur, dum cœcum & surdum mediante saluberrima saliva sua curare voluit. Facile enim vel unico nutu potuisset afflictissimos hos ægrotos per sanare, nisi forsan salivæ usum voluisset reddere manifestum.

§. IX.

Oculorum
medicina.

Manent itaque salivæ jejunorum præprimis vel ex fundamento suæ laudes in quam plurimis oculorum affectibus, in ophthalmia, visus lippitudine, tumoribus atque ulcusculis, rationibus clarissimis effectum comprobantibus, dum particulæ ejus salinæ particulis mucosis purulentis extergendis & abster-

gendis; roscidæ, balsamicæ, acribus hamatis temperandis & inviscandis; spirituosæ autem & volatiles poris obstructis referandis aptæ natæ sunt. Observationibus pluribus evincam dicta: Laborabat foemina Ophthalmia contumacii variisque collyriis & aliis remediis frustra adhibitis, ab illinita vicibus iteratis saliva, dum alia foemina paupercula frequenter lamberet affectum oculum, brevi curabatur. Nutricem quoque oculos infantis variolis decumbentis periculose tumefactos frequenter allambisse, citoque feliciter per sanasse, dudum notavit BARTHOLINUS *Pater in Cent. I. Hist. anatom. Hist. 29.* Quin imo teste LANGIO *in epist. 4. l. 3.* Cœcus prorsus Alexandrinus civis, dum *Vespasianus* supplicis ad genua devoluti cœcos oculorum orbes salivali oris excremento adpersisset, visum recuperavit.

§. X.

Par ratio quorumvis aliorum cutaneorum affectuum, in quibus actualis salivæ contactus fieri commodè potest. Sic tineam frontalem medicinis aliis cedere nolentem post axungiam porcinam frequenter illitam & lingua canis, qui sæpius affectum locum delin- gebat, rursus abstersam, Hafniæ me suadente sanatam vidi. Quale remedium & Lazaro ulceribus summe dolorificis enecato ferme levamen dedisse, *sacra novi fœderis testatur historia.* Canes ipsos, ut quibusvis vulneribus sibi inflicta saliva sua mederi queant, docuit natura. Præterea serpiginem & scabiem abigi posse saliva, experimentum vulgi est. Nævus etiam rebelles sæpè facilius illitu salivæ, quam remediis aliis fugatos notavi. Ex quibus phænomenis liquere puto, esse præstantissimum cosmeticum sanorum salivam. Sic referebat foemina Nobilis Scania, se toto vitæ tempore nullo alio liquore, quam saliva sua faciei sordes abstersisse. Erat autem, sexagenaria licet, satis adhuc bella. Quare vino, aquæ reginæ Hungaricæ, spiritui vini Francici, queis Boreales uti solent, vel aquæ simplici & lacti a nostratibus adamato virginibus salivam nostram longe præferendam esse censeo.

§. XI.

Porro Vulnere & Ulcera, tum partium reliquarum, tum præprimis oris, labiorum & linguae sola saliva curari possunt. Vulnerum sanatorum exempla jam inde antiquitus percepimus, quando foeminas Romanas charissimis maritis a telis & hastis inflicta vulnera labiis & lingua emundasse, & puris sive grumescens loco sanguinis salivam, individuum linguae comitem, immisisse testantur Historici. Longe felicius autem in affectibus oris hæc medendi ratio succedit, defensis saltem ab externis aëris injuriis; quod labiis, gingivis, lingua, & faucibus vulneratis aliquoties notavi. Studiosus aliquot ab hinc annis furca vulnerabatur adeo graviter, ut inferiori labio perosso gingivisque contusis dentes alii exciderent, reliqui vacillarent omnes. Hic neglectis aliis a sola saliva levamen & medicamen intra triduum deprehendebat.

§. XII.

§. XII.

Morbis
internis
medetur
saliva.

Nec erravero forsan, si morbos internos mediante sani hominis saliva curari posse credam, siquidem cibus *ευχύμοις & ευπύκτοις* a sano homine masticatis aliquandiu vesci velit ægrotans. Confirmat meam sententiam *Sagacissimus* PARACELsus, qui, cum Basileæ nobilem quendam deploratæ valetudinis hominem restituere vellet, laudanum suum, medicamenti genus, quo in extrema utebatur necessitate, saliva, forte ut fermentum ægri deficiens (ægrorum nempe saliva qualitate peccans fermentationi est inepta, perinde ut fermentum vitiosum massam fermentandam corrumpit) erigeret suo, quod adhuc sanum erat, penetrantique medicamini conveniens adderet vehiculum. *vid. TACK. Chrysolog. p. 17.*

§. XIII.

Sal poly-
chrestum
Chymicus
usus.

Quod quidem tanto verosimilius duco, si mecum reputo, quendam e saliva puerorum (ut nunc ad chymicos usus deveniam) parare salem ad plures affectus polychrestum, febres fugantem, morbis ventriculi medentem, quin cachexias & hydropes domantem aliæque mirifica præstantem. TACKIO l. c. quoque notum fuisse virum quendam nobilem, qui egregium ex saliva salem præmissa putrefactione elicit, tam volatilem, quam fixum, quem magnis usibus destinavit.

§. XIV.

Lapis phi-
losophicus
an ex sa-
liva possit
impetra-
ri.

Plura mysteria, quæ in saliva volunt recondita Filii Artis seu Adepti, leviter saltem attigisse sufficere, utpote mei tenuitatem ingenii superantia. Cognovi ex Chymicis celeberrimis auri folia cum saliva diutius trita nigredinem acquirere. E lachrymis autem (quas ejusdem cum saliva naturæ esse dixi) confici posse liquorem aurum solidum ac compactum in terram damnatam mutantem, valde dubito. Nec possum a mente mea impetrare, ut credat, ex saliva parari posse menstruum universale, alkahest seu mercurium illum philosophicum tantopere postulat, quævis metalla solventem, viamque pro impetrando summo bono pretiosissimo immensarum divitiarum, sanitatis & longæ vitæ thesauro, pendentem. Taceo illos, qui jactitant, se mercurii vivi ponderosam quantitatem ex saliva impetrasse; Et quod a Viro curioso Hamburgi degente monstretur auri particula in examine chymico salivæ reperi; ut non repetam plura ab aliis prolixius hunc in finem scripta & typis divulgata.

CAPUT V.

Salivæ noxas admiratur.

§. I.

CÆterum plurimarum animos in admirationem rapere posset versipellis salivæ natura, qua ad instar *Protei* sæpius mutatur in horas. Quippe quæ modo balsamici liquoris instar æstimabatur maximi, modo quod paradoxon videri posset, in venenorum clas-

sem referri meretur. Ita salivam placidi hominis homini ex amico affectu communicatam non solum amorem concitasse, verum a molestis etiam morbis incolumes præstitisse, superius innuimus. At hominis irati saliva quantum ab illa mutata? Hanc sane venenosam reddi, satis abunde testantur symptomata, quæ ab iratorum morfu læsi sunt obnoxii, haud absimilia ab animantium venenatorum, viperarum v. c. (foemellarum præprimis, quatuor dentes uncinatos habentium) morfu contingere solitis.

§. II.

E quibus diversissimis ab eadem saliva phœnomenis apparentibus intimius rimatis colligere licet, in universo regno animali non aliud actuale venenum dari, quam salivam sive liquorem salivæ conformem. Nec tamen liquorem talem esse vel dici posse venenum, nisi ab animalibus prius irritatis ictu, vel morfu, vel ad minimum halitu communicatum. (Basiliscos enim solo adspectu venenare, fabulosa credat antiquitas.) Tum vero mediante fermentatione maxime subitanea (ad quam scilicet ob particulas salinas subacidas ac spirituosas volatiles maxime proclivis) tantas in læsis turbas concitare, motum peregrinum causare, sanguinis mixtionem turbare, circulationem impedire, tandemque nisi mature certis antidotis eliminetur, toti machinæ exitium inevitabile parare.

Regni
animalis
venenum.

Basilisci
fabulas.

§. III.

Rem ita se habere, ambabus, quod dicitur, manibus largietur, quisquis sibi posuerit ob oculos hominem ira quasi furibundum; quam totus a se ipso mutatus; in quam celerem & peregrinum motum spiritus ejusdem omnesque corporis liquores, apprime *Democriti* particulæ biliosæ redundantes rapiantur? in quam rapidum fluxum ejusdem saliva præcipitetur? quantove impetu e ductibus consuetis extrudatur? ut sibi ne conformis quidem maneat amplius, sed æmula spumæ fiat, ut hinc loquendi modus sit enatus pluribus nationibus usitatus: ipse vehementissima ira spumat, *il écume de rage*, *Er schäumt vor Zorn und Bosheit*. Taliter itaque comparata saliva in corpus adversarii illata quantas excitarit tragœdias, ab HILDANO, SENNERTO, pluribusve dudum conscriptæ observationes eloquuntur. Ita *Clarissimus* TEN RHYNE refert, accidisse, cum degeret Parisiis, ut coram Parlamento causa ageretur de homine, qui in irascentia vulnus insanabile prorsus adversario dentibus inflixerat. Et ego haud ita pridem Molhusæ notavi, quendam conviciis affectum, armis destitutum, vindictæ nihilominus cupidissimum dentium acumine menti barbati frustum haud exiguum antagonistæ evulsisse, vulnere brevi post vehementissimis symptomatibus malignitatis haud expertibus stipato, forsanque lethali, nisi præter externa interna quoque bezoardica sudorifera mature fuissent adhibita.

Iratus
venenosus.

Morsus
humani
venenosus.

§. IV.

Atrociora pene singula notamus ab animantium brutorum (non eorum saltem, quæ vulgo pro venenosis habentur, sed quorumvis alio-

Morsus
brutorum
magis ve-
nenosus.

Canina
& viperina
saliva
com-
moda.

aliorum, exemplo equorum, mustelarum, canum, apum &c.) morfu vel ictu nobis communicata saliva, quamvis non nisi irritatorum. Placidorum vero tantum abest, quin nociva sit, ut salutiferam potius certis casibus reputandam notem. Ita canis, quia suaviter lambendo saliva sua dolorum levamen afferre novit, domini sui medicus & fidelis amicus a non nemine per jocum nuncupatur. Idem vero vel irritatus vel rabie correptus morfu communicat salivam desperatae rabiei causam. Et viperæ antipathia naturali nobis exosæ illatâ morfu salivâ lædunt, mortemque, nisi præsto sit antidotus, læsionemque, quas tamen eadem saliva saluberrimum ad desperatos affectus medicamen præbere, *Celebris Scriptor ERASMUS FRANCISCI ex aliorum autoritate alicubi testatur.*

C A P U T VI.

Pathologiam Salivæ theorematibus nonnullis exponit.

Sicut reliqua machinæ humanæ fluida, ita saliva variis mutationibus obnoxia, solidis etiam partibus affricare solet labes suas non unimodas, sed pro diversitate pororum & particularum quoad magnitudinem, figuram, nexum, motum, & quietem multivarias; quarum præcipuas dum hic & nunc generice saltem tam pathologice quam therapeutice delineare meditor, me theorematibus aliquot explicem, commodum duco. Itaque

§. I.

Contagii
vehicu-
lum.

Saliva miasmatis contagiosis & particulis peregrinis morbiferis quibusvis facile recipiendis apta nata est. Quemadmodum enim alimentosis & medicamentosis quibusvis se facile permiscet: ita subtilissimas ejusmodi particulas, quæ miasmata constare necessum est, longe facilius admittet. Ipsa remedia præservativa cum successu in ore detenta, & hinc contagiosas particulas aut alterantia aut non admittentia satis id evincunt, ut plures rationes non afferam. Ex hoc ergo fundamento quivis morbi contagiosi tam maligni quam benigni optime deduci possunt ac debent. De malignis v. g. febribus & peste ipsa nemo dubitabit, quin hac via tantopere diffeminantur suique multiplicativæ fiant. Cumque talismodi effluvia contagiosa in affectibus exanthematicis, Variolis puta, Morbillis atque Petechiis in majori copia protrudantur foras, & hinc dicto modo pluribus aliis communicentur, quid mirum, tales affectus præ reliquis magis esse contagiosos? Benignos quod attinet morbos, sæpiusculum cum saliva communicari, & radicales in sanguine fieri, non est, quod dubitem. Præsertim si quis assiduus accubus & indivulsus contagioso morbo laborantis comes sit, & peregrinæ salivæ particeps fiat. Dolendum profecto est, omnes ferme infantes nutritionis annis tali contagio esse obnoxios. Est enim illaudabili prorsus more receptum, matres, nutrices, vetulas, &c. variis sæpe morborum generibus afflictos, quævis alimenta ab infantibus comedenda masticare, aut saltem, siquidem pul-

Morbi
contagiosi
maligni.

Infantes
cur mor-
bis pluri-
mis obno-
xii.

tibus masticatione via opus habentibus vescantur, ne tenella infantum labia a calore lædantur, juscula & pulmenta prælibare, eoque ipso salivam suam prius commiscere, quam pusillis absorbenda propinent. Quæ salivæ commixtio quam nociva ac detestanda sit, incredibile profecto dictu. Hoc quippe modo sæpius unâ cum saliva particulæ variæ, salinæ, sulphuræ, acres, ponticæ &c. scorbuticos & multivarios, Arthriticos, Calcululosos, Convulsivos, Cachecticos, Phthisicos, Venereos, Scabiosos affectus causantes cum alimentis in massam sanguineam inferuntur, & in sanissimas quidem infantum machinas derivantur. Verisimile est, hanc præcipuam esse causam, quare tot infantes brevi, postquam hanc videre lucem, in ipsis nempe nutritionis annis rursus exstinguantur. Atque alii, licet hos annos superent, morbis rebellissimis ac vix radicitus extirpandis, quos vocant hæreditarios, toto vitæ tempore misere discrucientur. Scilicet adeo flexibiles atque subtiles tenellulorum pori atque meatus sunt, ut quibusvis peregrinis particulis (in visceribus tanquam cribris naturaliter sequestrandis & eliminandis) recipiendis instar regulæ Lesbiæ se accommodent. Semel autem admixtæ velut hospites ingrati fiunt inquilini, in diesque ad certissimam machinæ perniciem multiplicantur. Quinimo ex saliva peregrina ac morbosa cibando, potando, osculando vel alio quovis modo communicata adultis etiam labem affricari posse, facile adducor ut credam, dum mecum pondero, quosdam Luis Venereæ causam hinc derivasse. Alios iterata meretricum basia in nefandam libidinem rapuisse & contaminasse.

Morbi
contagiosi
benigni.

§. II.

Saliva in quali vel quanto seorsim, sive in utroque conjunctim peccans plurimorum symptomatum, præsertim in faucibus & ore se exerentium, fertilissima mater esse solet. Adeo tenellæ structuræ sunt, quas alluit saliva partes, ut sæpius ad qualvis ejusdem alterationes, molestis magis, quam periculosis obnoxie sint noxis. Has inter primas sibi vendicare videtur Gingipedium, symptoma faucium ut frequentissimum (est enim oris cavitas scorbuti velut campus martius) ita molestissimum dum dolore dentium, pruritu, tumidis leviterque contactis sanguinem emittentibus gingivis, vacillantibus dentibus & cariosis conjunctum. Singulis a saliva particulis salinis, acidis, corrosivis poros glandularum & gingivarum plus justo aperientibus, admixtis una particulis crassis, terrestribus, præ crassitie ad circulationem minus aptis, ideoque tumores, dolores & pruritus stasi sua causantibus, gingivas depopulantibus & ossa dentium erodentibus inquinatâ deducendis. Ad quales particulas in massam sanguineam & consequenter in salivam introducendas maxime conferre videntur omnis generis alimenta crassa, viscosa & dura sale, aceto condita, ventoque fumoque indurata. Quibus cum mire delectentur Batavi & accolæ maris Baltici, Dani & Sueci, quid mirum, iisdem præ nationibus reliquis illud malum esse quasi endemium? Non dicam de aëre maritimo, paribus particulis referto, pariaque

Gingipe-
dium &
alia sym-
ptomata.

Scorbutus
cur Ende-
mius.

riaque symptomata causante. Cumque a data causa non solum carioli fiant dentes & narium os ethmoideum, sed & nauseosa putrilagine & graveolenta gingivæ consumantur, ex eodem fonte foetor oris & narium intolerabilis videtur arcescendus. Sicut etiam saporibus naturales (de quibus supra) ita & præternaturales quicunque depravato salivæ quali debentur. Nam si cum subtilissimo D. TEN RHYNE in *Meditat. in Magni Hippocr. textum* p. 81. ad singulas salivæ læsiones attenderemus Practici, facile depravatorum in ægris saporum rationes expediremus. Ubi vel brassicæ truncum vel aliam ignotam illis rem phantastice rebus, quas comedunt, asfingunt. Febricitantibus & Ictericis esculenta & potulenta quævis amaricantia sunt; amarore vix aliunde, quam a saliva particulis biliosis inquinata, proveniente. Par ratio est aluminosorum, acidorum, ponticorum saporum a similibus salivæ particulis undecunque acquisitis derivandorum. Infantum vero saliva abundantior dictis particulis apprimè simul acrioribus infecta, pustulis & ulcusculis in faucibus & lingua conspicuis, vulgo vocantur Aphthæ, Germanice *der Soor* / sese manifestare solet, quales Aphthæ summe dolorificæ cum deglutitione difficili & oris ardore conjunctæ, pro majori acrimoniæ gradu malignæ quandoque sunt. Indubium est, infantilem talismodi affectum aut ab alimentis viscosis, crassis, a nutritibus pessimo exemplo exhibitis, aut a saliva peregrina esculentis admixta causari. Catarrhorum denique doctrinam ab Autoribus prolixè descriptam ex his fontibus nonnunquam scaturire, valde probabile. Quid enim aliud Catarrhi tenues vel crassi, quam salivæ abundantis (acrimonia serosa in arterioso sanguine magis turgente) & vel particulis acribus tenuibus ac falsis, vel crassis, glutinosis, ac viscidis scatentis per cribra consueta excretio? Coryza plerumque ab iisdem causis producta simul conjuncta.

§. III.

Pororum atque meatuum glandularum & ductuum salivalium tam laxatio nimia, quam obstructio plures parturit affectus. Hinc glandularum salivalium poris laxioribus ductibusve magis apertis sialismus seu salivatio (a ventriculi cruditate pituitosa vulgo sed falso deducunt *Autores*) accidere solet. Quo casu adeo copiosa salivæ in ore fit collectio, ut fere singulis momentis illam exspuere cogamur, cum virium prostratione, si diutius dureret, quandoque rarius tamen ipsa morte subsequente; quod cuidam sacerdoti contigebat, ipsam tandem animam cum sputo emittenti. Frequentius evenit idem ab acido sanguinem coagulante, eoque ipso, ut serum præcipitatum a sanguine liberalius per glandulas salivales filtretur, efficiente. Et hinc acido abundantes Melancholici sputatores dicuntur. Modernis frequentissime notatur a Mercurio & mercurialibus, quo casu pluribus symptomatibus, dentium dolore & vacillatione, linguæ tumore, aphonia, deglutitione læsa &c. stipulari solet. Oppositum hujus affectus videmus poris & meatibus glandularum obstructis, vasisque salivalibus coarctatis, vel a saliva viscidis, cœnosis, crass.

Frid. Hoffmanni Oper. Supplem. II.

sis, & tenacibus particulis scatente, vel a sero sanguinis deficiente. Inde præter ariduram faucium angina, siccitas linguæ sitisque intolerabilis observari solet. Ubi obiter meminisse lubet, cujusvis fere morbi statum facilius ac certius innotescere ex inspectione salivæ, quam urinæ, vel sanguinis venæ sectione emissi. Taceo glandularum salivalium tumores parotides, bubones &c. easdem causas agnoscentes.

§. IV.

Saliva a fluxu naturali deflectens & in irregularem præcipitata motum morbifera evadit. Regularem & pacatum salivæ fluxum coctionis, digestionis, circulationis, & mixtionis sanguinis naturalis & legitimæ autorem esse, superius innuimus. Itaque ab irregulari salivæ motu ab animi pathematibus illato singula in contrarium vergere, vi oppositorum manifestum fit. Exemplo sit affectus iræ. Certe si saliva iratorum & irritatorum aliis communicata tantorum lerna malorum, quis eandem, quæso, deglutitam nobisque servatam putabit innoxiam? Hinc pueros & infantes ab ira, quasi ab emetico assumpto vomentes, acrimoniâ peregrinâ salivæ dubio procul nervosum ventriculi orificium vellicante, vidi. Inter adultos autem ira vehementissima excandescentes alios copiosum emisisse sputum, proprioque naturæ instinctu ab imminentibus noxis se præservasse; alios salivam talem absorbentes desperatis febribus, præsertim cibo vel potu brevi ante vel post iram assumpto, correptos fuisse; vitioso scilicet tali menstruo, coctionem ventriculi depravante & sanguinis crasin turbante. Talis enim sanguis, qualis chylus; talis chylus, qualis saliva. Alios, ut senes imprimis, lassitudines, lipothymias, syncopes, imo apoplexias ab eadem causa passos. Sexum denique sequiorem passionibus hysteris ab eadem causa subortis obnoxium, sæpius animadvertimus. Ut nihil dicam de ægrotis ipsis, quævis pessime plerumque cedit ira & sæpe lethifera esse suevit, non ex alia, quam dicta ratione. Par ferme ratio nimii mœroris, effusioris lætitiæ, & aliorum animi affectuum naturalem & legitimum salivæ motum nimis alterantium pariave symptomata causantium. Sicut e contrario mansuetos ac lenes homines, uno verbo *ἀπαθείους* plerumque saniores, longævos, morbifere minus obnoxios tota die videmus.

Ira salivæ morbifera causa.

Animi pathemata quævis alterant salivam.

Mansueti saniores.

CAPUT VI.

Therapiam morborum salivæ per theoremata tradit.

Quandoquidem sanguini arterioso tanquam reliquorum succorum omnium scaturigini morbi salivæ (perinde ut ipsa saliva) magnam partem suos debent natales. (Talis enim juxta CRAANEN in *Oecon. animal.* salivæ constitutio, qualis ipsius sanguinis, ex quo secernitur. Si enim sanguis est aquosior, saliva etiam aquosa est & inefficax. Si sanguis acidior, falsior, vel pituitosior, ejusmodi quoque provenit saliva.) Ad eos-

Ecc dem

Fetorum oris & narium causa. Vitiatorum saporum ratio.

Aphthæ.

Catarrhi.

Coryza.

Salivatio.

dem radicitus extirpandos feliciter non tam specifica & topica, quam ipsa quoque universalis primis viis & universae massae sanguineae debita ut vocemus in usum, puto necessarium. Itaque eandem, qua pathologicae pertractavi, servando methodum nunc breviter singulorum therapiam theorematibus aliquot tradam. Hinc

§. I.

Præservatio a contagioso.

Miasmata contagiosa ne contaminent salivam nostram, quovis modo declinanda; admissa cito rursus eliminanda. Declinantur miasmata partim, si non admittatur & non deglutatur saliva, sed continua exspuitione rejiciatur, quo pacto se quosdam a peste præservasse, *Clariss. Pragensis Practicus DOBRKINSKI Tr. de peste* testis est; partim vero & majori cum successu si saliva particulis balsamicis conditur, qua ratione universo simul prospicitur. Gaudet etiam saliva speciali quasi privilegio præ ceteris œconomiae microcosmicæ succis, ut non tam ipsa remediis in ore detentis a contagio præservari, sed & machinam nostram præservare queat. Et ut continuus salivæ fluxus, ita & continua medicamentorum præservantium fieri potest ac debet permixtio, quo particulis balsamicis imprægnata non admittat miasmata peregrina foris communicanda. Præservatur hoc pacto ipsa sanguinis massa, dum saliva ad instar vehiculi naturalis medicamenta in ore detenta successive sanguini infert; idque vel regia ac ordinaria via, quâ deglutita una cum saliva in ventriculum, ex ventriculo per venas lacteas, ductum thoracicum, & venam subclaviam, cordi inferuntur, tam proximiori via, quâ pitissando quasi per glandularum poros & tracheæ canales in vesiculas pulmonales unâ cum aëris particulis sanguini communicatis in sinistram cordis ventriculum per venam pulmonalem effunduntur, & in universum corpus circulationis lege ablegantur. Hinc in morbis contagiosis malignis, præsertim exanthematicis, ut in variolis, petechiis, &c. rotulæ, pilulæ, morsuli, & trochisci ex balsamicis, bezoardicis, & aromaticis confari & cum successu in ore detineri possunt; non neglectis tamen internis singulis auroris sumendis. Ita præ reliquis bezoardicis & theriacalibus commendari meretur spiritus volatilis bezoardicus à *D. W. Archiatro Danico* mihi communicatus, quo anno 89. Variolarum epidemico malo plus mille homines perimente, Hafniæ grassante, plures, imprimis primariæ virgines, præservabantur; nec minoris virtutis est tinctura prophylactica, quam ex balsamicis & bezoardicis extrahere novi, qua, DEO sit laus, memet ipsum, eodem tempore ex Germania in Daniam advenam, & alios a variolis optato cum successu præservabam. Non minoris efficaciam forsan his casibus esse Tincturam Antimonii tartarizatam, Excellentissimus *D. BLUMENTROST*, Physicus quondam Molhusinus, & Senator primarius, num Magni Ducis Moscoviæ archiater in Pharmacia sua portatili pluribus confirmat. Pari modo contagia reliqua, benigna vocata, declinanda, quantum fieri potest. Consortium nimiamque familiaritatem, quin & oscula (imprimis meretricia, a quibus sibi caveat, cui sanitas & ca-

Præservatio variolis.

Præservatio a variolis.

Contagia benigna quomodo declinanda.

stimonia cordi) talismodi morbis obnoxiorum vitando; imprimisque ab eorum saliva tanquam a sanguine viperino abhorrendo. Cumque infantes semet ipsos præservare nesciant, parentum cura ipsis quoad hæc prospiciat oportet, saniores eligendo nutrices & servas, illisque interdicens, ne masticatos aut prælibatos cibos propinent, (cum solum lac possit sufficere & pulmenta, donec ipsimet dentibus sufficienter armati masticare discant) nec sæpius tenellos osculentur.

§. II.

Vitiosa salivæ qualitas in particulis variis peregrinis radicata corrigenda, quantitas deplenda & divertenda. Corrigunt particulas peregrinas in Gingipedio præprimis manifestas varia antiscorbutica, aperientia, hepatica, splenetica, & ex his parata infusa & decocta ex radicibus, herbis, corticibus, lignis, seminibus, &c. tum solis alterantibus, tum laxativis, v. g. radice mechoacannæ, hellebori; *rhobarbaro Alexandrino, foliis sennæ* quandoque superadditis. Qualia sæpius, imprimis in Dania, summopere profuisse notavi. Delicioribus, quorum palato illa minus grata, satisfaciunt chymicæ mixturæ ex aperitivis, antiscorbuticis, blande sudoriferis, paratæ ex spiritibus cochleariæ, tartari, salis fassifrata, tinctura martis antiscorbutica &c. combinatæ, non omittis pulveribus terreis præcipitantibus & absorbentibus acidum peregrinum, ex bezoardico martiali, pulvere cachectico, cinnabari, lapidibus cancrorum, coralliis, pulvere stomachali *Quercetani*, cachectico ejusdem &c. Inter topica varia laudem merentur tincturæ terræ catechu, gummi laccae, imprimis Odontalgica Celeberrimi *D. D. WEDELI*, præceptoris mei ad cineres colendi, quæ omnibus symptomatibus ex voto satisfacit. Et non tam antiquitate, quam utilitate nobile unguentum ægyptiacum, quod in matelotis, quibus hoc malum frequentissimum, in gingivis cruentis & putredinosis egregio cum successu in Nosocomio regio adhibitum vidi. Pulveres etiam dentifricii ex terra catechu, conchis præparatis, coralliis, iride florentina, sanguine draconis, alumine usto &c. compositi, oleo caryophyllorum, quod & putrilaginis & cariei summum remedium, roborati. Eadem medicamenta interna antiscorbutica ad oris & narium foetorem valent, præsertim balsamicis seu putrilagini resistentibus aucta; quo spectant tincturæ balsami de Peru, antimonii vera, tartari fassifrata, bezoardica, myrrhata, prophylactica mea, essentia myrrhæ balsamica, salia volatilia, oleosa varia, imprimis *Excellentissimi D. Doctoris Præsidis*, quod instar omnium odore, sapore, & virtute commendari meretur. Pilulæ catholicæ *Illustriss. BURRH*, a quarum continuato usu non solum respiratio, sed sudor etiam & urina balsamicum spirant odorem, ut interna plura non laudem. Adhibendis unâ vicibus iteratis externis curativis & quasi palliatis, v. g. pulveribus dentifriciis, ambra, moscho, & aliis gratioribus additis rotulis & pilulis Catechu ambratis &c. In narium foetore pulveribus sternutatoriis odoriferis, *Hispanico, Hafniensi*, & ad horum normam compositis aliis vel ex sola Nicotiana balsamicis & oleosis suaviori reddita; aquis

Gingipedii cura.

Fœtorum oris & narium cura.

item

item & liquoribus ptarmicis ex oleo majoranæ cum spiritu salis ammoniaci aut aqua majoranæ cum essentia terræ catechu extemporanea mixtione parandis; qualibus & obstructio glandularum referatur & putredo corrigitur. Quin sapes etiam vitiosi, acidi, vitriolici, aluminosi, uti scorbuti sunt progenies, ita medicamentis antiscorbuticis laudatis facile quidem cedunt; non neglectis tamen emeticis, sentinam in primis viis stagnantem ἀδρῶς & βίαιως exturbantibus & salivæ circulationem suam restituentibus. Sic nuper foemina primaria vitioso sapore cum appetitu prostrato, ventriculi dolore gravativo & anxietatibus aliquandiu mire vexata, laxativis, stomachicis, carminativis, volatilibus, & aliis frustra adhibitis, tandem vomitorio (quod ob violentam operationem primo valde renuebat) exhibito, cum amurca biliosa viscidam tenacem pituitam screatu ejiciebat, & hinc ex voto reconvalefcebat. Eodem pacto vel centum alios febricitantes apprime (est enim vitiatu sapor ἐπιγενόμενον febrium symptoma) feliciter cum DEO curavi; nec omittenda contraria præcipitantia absorbentia. Ita sapor acidus per terrea, conchas præparatas, oculos cancrorum; amarus per acida, spiritum vitrioli, clyssum antimonii, tincturam aperitivam Moebii, hepaticum rubrum Dresdense corrigendus & invertendus.

Aphtharum curatio.

Alia vero protinus Aphthas curandi ratio, quibus sudorifera, bezoardica, verbi causa tinctura bezoardica, mixtura simplex, pulvis bezoardicus, cornu cervi philosophicum, lapis bezoardicus, antimonium diaphoreticum, bezoardicum minerale, admixtis dosi refracta anodynis pro affluxu inhibendo & acrimonia mitiganda debentur. Externis vero mixturis ex aquis & syrupis, spiritu nitri, vitrioli, vel sulphuris leviter acidulatis levamen afferentibus, solis nunquam fidentum. Catarrhales fluxiones salivæ, quanto & quali debitæ, præter laxantia, divertentia, sudorifera postulant ex tinctura bezoardica, liquore cornu cervi succinato, spiritu volatili pectorali, essentia glycyrrhizæ, succini, &c. varianda, prout acres & tenues, vel pituitosæ, glutinosæ, ac viscidæ magis sunt, additis illo casu anodynis, hoc ex auctoritate Celeberrimi BORRICHII Præceptoris mei quandam charissimi ὡς ἐν ἀγίῳ in dissert. de somno & somniferis caute vitandis.

§. III.

Meatus & pori glandularum & ductuum salivalium laxiores constringendi, obstructi referandi. Constringuntur divertentibus, sudoriferis, addendis dosi paulo majori anodynis & adstringentibus, quo fine valde proficua sunt mixturæ ex tinctura bezoardica, liquore cornu cervi succinato, spiritu salis ammoniaci, essentia succini, theriacali, terræ catechu, anodyna. Cum vero ad instar universalis regulæ in scholis medicis valeat, humidiores affectus siccioribus facilius & felicius curari, majoris efficaciz sunt pulveres ex speciebus diatrion fantalorum, diarrhodon abbatis, pulvere pannonico rubro, succino præparato, coralliis rubris, croco martis saccharino, bezoardico martiali, terra sigillata, catechu, &c. conflati. Quin & ipsa alimenta medicamentosa & potulenta, v. g.

Frid. Hoffmanni Oper. Supplem. II.

vinum Hispanicum, malvaticum, vin de Grave, vin de Champagne, & rubrum fere quodvis, sunt summopere qui commendant. Fine secundo & ipsa gargarismata adstringentia ex decocto foliorum quercus, salviæ, plantaginis, florum rosarum rubrarum, &c. aquis & syrupis similibus, addito aluminis, boli armænæ tantillum, non sunt de nihilo. Et ab his salivæ, quacunque dictarum causarum productus facile sisti potest, dum hoc pacto affluxus salivæ divertitur, qualitas corrigitur, & pori laxiores constringuntur. Interim suscitata ab usu mercurii salivatio temere vel præmature non sistenda, sicut illi testantur, qui crebrius hac medendi methodo utuntur. Referantur iidem pori, & fluxus cessans restituitur, si particulæ viscidæ tenaces incidantur, attenuentur, earumque stasis in motum redigatur. Faciunt hic officium præ reliquis nitrosa & salina, v. g. spiritus nitri dulcis, clyssus antimonii sulphuratus, spiritus aperitivus Penoti, salis, sive potui ordinario indere talia, sive per se sumere malis. Quin & ipsa resolventia lympham simul fundentia hoc fine commendanda ex nativa cinnabari & antimonii, oculis cancrorum, antimonio diaphoretico, nitro anodyno, lapide prunellæ, salibus volatilibus succini, &c., qualia in faucium ariduris, linguæ siccitate, sitique præsertim vix tolerabili plus sæpe profuisse visa sunt, quam julapia ὁλῶ διχάνω præscripta, aliave potulenta copiosius absorpta. Neque enim sitis semper a defectu humidi, sed sæpius & fere ut plurimum ab obstructis glandulis & ductibus salivalibus, prout rectissime Celeberrimus D. CRAANEN ad Regii Praxin medicam med. I. p. 4. commentatur, deduci potest ac debet. Unde & gargarismata calida nitrosis roborata magnopere solent proficere. Interim nec tyrannica methodo potus omnino prohibendus, sed largior etiam concedi quandoque potest, imprimis calidior, utpote ad poros aperiendos aptior. Sæpius enim notavi, agros siti nullo potu frigido restinguenda summisve anxietatibus miserrime cruciatos a calido Thee infuso copiose hausto, subsequente cum euphoriz sudore, insignissimum sensisse levamen. Quo casu paribus equidem, si non majoribus, infusum veronicæ pollere viribus, Excellentissimus D. PRÆSES in doctissima de infusi veronicæ efficacia Dissertatione prolixius observationibus plurimis probavit.

Curatio sitis & ariduræ faucium.

Potus Thee & Veronicæ.

§. IV.

Irregulari motu deturbata atque inversa saliva, imo venenosa quasi reddita vel eliminanda vel alteranda est. Naturam ipsam, quæ morborum medicatrix optima, dixi teneras infantum & puerorum machinas, quin adultos etiam hoc pacto præservare, spontane nimirum vomitu producto, vel expuitione crebra facta. Hinc nec inconsultum putarem post vehementem abira alterationem, ventriculo præsertim cibus repleto, vomitorium propinare, aut si tale minus arrideat, laxativum quoddam. Curavi nuper virum primarium senem, molestò quodam & chronico affectu laborantem; qui, licet post continuatum per quatuordecim dierum spatium medicamentorum usum degeret optime; tanta ta-

Alterata ira salivæ medicamina.


Salivatio- nis medi- cina.

*Egrorum
ira mor-
tis causa.*

men sub coenam vehementer iratus denuo corripiebatur infirmitate & lipothymia, ut aut apoplexiam aut mortem instare putasses. Assumptis autem pilulis laxativis *εὐφώρος* a sarcina molesta liberabatur, & mixtura ex sale volatili oleoso, tinctura bezoardica, elixirio stomachico brevi restituebatur. Plurimis aliis eodem casu pulverem ex rhabarbaro, oculis cancerorum vel cremore tartari combinatum pari cum successu suasi. Neque alterantia successibus optatis carent, sed absorbendi & precipitandi virtute pollentia particulis acribus, acidis, peregrinis domandis valde sunt idonea. Novi personam illustrem ad frequentiores affectus iræ non sine sanitatis dispendio proclivem, nihilominus pulvere ex cinnabari & oculis cancerorum ana scrupul. semis ab omni noxa sensibiliore se præservantem. Sic quoque pulvis absorbens *Wedelii*, variaque ad hujus modulum ex bezoardico minerali, martiali, joviali, coralliis, cornu alcis, &c. composita dictum factum sustulerunt, quod imminebat malum. Colophonis loco addidisse juvabit, agrotantium iram, præsertim iteratam certissimam portendere mortem, ac ferme impossibile ex dictis causis esse, tales facile feliciter curari posse, observationibus non unis idem confirmantibus, aliâ vice, si vires & vitam Deus concesserit, referen-

dis. Nunc brevitatis monet studium, rivulos esse claudendos; alias operæ pretium fore putassem tum citatorum morborum, tum multorum aliorum a saliva derivandorum pathologiam therapeuticam paulo prolixius recensuisse. Tu vero, Lector honorande, si fortasse quædam tuo minus arriserint palato, noli, quæso, flocci pendere, quæ dixi, cuncta. Noli, inquam, negligere quædam, quia nova videntur & a novello Medico profecta. Nihil equidem sine ratione dixi, ut nihil sine lege Jcti, sed singula demonstrationibus, experimentis, phænomenis, observationibus satis abunde puto probata. Itaque cum GERHARDO JOHANNE VOSSIO *de Philosophorum sectis cap. 21. §. 4.* Non tam vide, quis aliquid dicat, quam quid aliquis dicat. Ego cum certus sim, neminem erroris esse expertem, demonstrationibus accuratioribus & experimentis firmiter convictus non erubescam aut ignominia ducam mea derelictui habere, & meliora sequi. Interim, quod unicum superest, TIBI O NUMEN TRIUNE ET TRISMEGISTE, pro clementissima directione & omnigena salute, qua hucusque indignum me dignatus es, gloriam, benedictionem, honorem, virtutem, gratias & laudes rependo nunquam intermoriturus.





OPUSCULA
DE REMEDIIS,
EORUM GENERIBUS, OPERANDI
ET APPLICANDI MODO, UNA CUM CAUTELIS,
ET OBSERVATIONIBUS NECESSARIIS.

DISSERTATIO MEDICA

DE

MODO OPERANDI REMEDIORUM
PHYSICO-MECHANICO.

Primum edita Anno 1718.

PROOEMIUM.



UICUNQUE, non empiricorum more, hoc est, temere & confuse, sed potius tuto, considerate & quadam cum certitudine in artis nostræ operibus versari, gravesque ægitudines vel præcavere vel à corpore humano amoliri studet, eum quam maxime quatuor tenere & observare oportet. Primo opus est, ut corporis afflicti naturam & indolem probe cognitam & perspectam habeat, utrum scilicet debile & infirmum, an robustum & validum sit, qualis solidorum æque ac fluidorum ad motum sit dispositio, & quæ generis nervosi cum actionibus animalibus, nec non viscerum, imprimis ventriculi, sit constitutio. Deinde morbi genius & causæ, earumque producta, quæ symptomata sunt, curate ac diligenter explorari debent. Tum remedia, quæ ab HIPPOCRATE instrumenta artificis, & à GALENO manus Dei auxiliatrices vocantur, ad unguem scire oportet, ut statim judicari possit, quænam remediorum generâ removendis his causis quam maxime sint accommodata. Denique etiam methodus sive ordo, quo illa prudenter applicari debeant, inquirendus est. Hæc sunt præcipua & palmaria requisita, quæ ad artem dextre & auspicio exercendam scitu sunt necessaria. Quum vero Medicus curas & cogitationes suas maxime in eo defixas habere debeat, ut auxiliante natura, quæ sola sæpius ac sua sponte sine Medici ope medetur, causas nocentes à corpore propellat, (siquidem sanare nihil aliud est, quam causas morborum per remedia adjuvante natura opprimere) facile apparet, Medico laborandum esse, ut omnium remediorum vires ac proprietates plenius ac perquisitius calleat.

Ut enim recte docet GALENUS *lib. V. de Method. medicamentorum*, inquit, facultates nosse medendi methodum præcedit; ita profecto dolendum est, multorum simplicium remediorum, quibus quotidie utimur, veras ac genuinas facultates maximam partem adhuc esse incognitas, & saltem inter paucissimos constare, quibus elementis vel principiis suam in corpus nostrum operationem exequantur. Neque vero una, sed plures existunt causæ, quod genuinæ remediorum vires plurimis obscuræ & incompertæ sint. Est primo ingens ac pene infinitus remediorum numerus, quibus Medicorum vulgus ad medendum utitur, quorum proprietates figillatim nosse labor propemodum immensus foret. Deinde rarius simplicia, pauca, selectiora, & quæ aliis virtute præcellunt, sed potius ex ingenti farragine confarcinata, & sæpius inepte ac sine ullo delectu commixta in usum trahuntur, ubi certe singulorum facultates nulla ratione explorari possunt. Accedit, quod effectus, qui remediorum usum sequuntur, nimis plerumque præcipitantur ac temerarie ipsis ac solis remediis tribuant, qui tamen sæpius à natura vel morbi vehementia proficiuntur. Quam vero arduum ac difficile sit effectus naturæ ac remediorum probe à se invicem distinguere, artis peritiores optime norunt. Perpauci etiam perpendunt, omnium remediorum vires maxime esse relativas, variisque conditionibus limitatas, non absolutas, neque unice à sphaera activitatis suæ, sed simul etiam, ut Philosophi loqui amant, à modo receptivitatis, sive, quod unum idemque est, à dispositione interna partium & naturæ auxilio dependere. Tandem rari apparent, qui remediorum elementa ac principia, quibus in corpus nostrum agunt, ibique mutationem inferunt, recte intelligunt, id quod præcipue ex ignorantia veræ ac solidioris theoriæ medicæ contingit, si nimirum mechanicæ, physicæ & chymicæ scientiæ non superstructa est. Dici enim vix potest, quas nugas atque ineptias cum veteres tum nonnulli recentiorum, quos inter Chymici & Cartesianæ sectæ addicti præcipue nominandi sunt, hac quidem in re explicanda proferre soleant. Quid enim est ineptius, quam ex qualitatibus calidis & frigidis, ex activitate totius substantiæ, ex speciali crasi, textura, syncrasia, vel cum chymicis ex mercurio, sulphure, spiritu, principio irradiativo, lumine remediorum facultates deducere. Neque recentiorum quorundam ex Cartesianâ philosophia desumpta placita ullius hac in re momenti sunt, dum ex varia particularum figura, situ, structura, contextu & materiæ æthereæ influxu vel effluxu operationes remediorum derivare volunt; quæ omnia, utut penitus negari non possint, quoniam omnes effectus in universa natura à causis mere mechanicis ac proportionatis perficiuntur; sed tamen, quum nec sensibus obviæ sint, nec intellectui pateant, frustra allegantur ejusmodi principia, quæ jure ac merito inter occultas qualitates referuntur. Longe autem obscuriori via mihi incedere videntur, qui omnibus causis physicis externis in corpus nostrum motum, adeoque influxum, qui sine motu concipi non potest, penitus præscindunt, omnesque actiones, mutationes & motus interno cuidam agenti ac moventi principio, quocunque etiam nomine veniat, in acceptis ferunt. At vero qua ratione hoc admissio principio diversissimas remediorum, imo venenorum vires atque effectus, quos in corpora animantium exerunt, explicare eorumque rationem reddere velint, ego quidem non video. Neque hanc hypothesin ulterius hoc loco excutere instituti nostri permittit ratio, sed potius labor noster unice in eo occupatus erit, ut omnia remedia ad pauca genera certasque classes reducamus, simulque breviter & strictim ostendamus, hæc ipsa manifestis simplicissimis causis physicis suam exerere efficaciam, & naturam in sanationis negotio insigniter juvare posse. Quemadmodum enim paucissima dantur morborum genera, & causæ simplicissimæ, ita etiam perpaucæ sunt vires & classes remediorum, quæ ad illos profligandos adhibentur. Atque hoc est, quod in præsentī dissertatione loco speciminis inauguralis præstare apud nos constituimus. Faxit Divinum numen, ut suscepti conatus in nominis sui gloriam, generis humani salutem & artis nostræ incrementum feliciter & ex voto succedant.

§. I.

QUUM Medicus in profligandis morbis non alium scopum sibi præfixum habeat, quam ut motus morbosos tollat, vel materiam horum motuum opificem à corpore removeat, facile apparet, omnia remediorum genera ad duas potissimum clas-

ses reduci posse, quarum una ea complectitur, quæ motibus morbosus dicata sunt, altera vero ea continet, quæ causas eorum materiales maxime respiciunt. Quemadmodum enim materia, per quam nihil aliud quam dispositionem corporis ad motum intelligimus, & ipse motus, qui est actio unius corporis in alterum, duo illa sunt universalis naturæ principia, à quibus omnis actio, omnis operatio & effectus

fectus in universa rerum natura occurrentes proficiuntur, indeque rationali modo explicari debent: ita etiam motus & materia illa sunt medicinae principia, ex quibus non modo vitæ, sanitatis, & conservationis corporis humani fundamentum, sed omnium quoque morborum indoles, causæ, eorumque sanatio & remediorum operationes derivari debent. Jam vero accuratiori facta considerationeprehendimus, omnes, qui in morbis obvii sunt, motus optime in duas classes dispesci posse, videlicet ad motum solidorum æque ac fluidorum vel nimis auctum vel præter naturam imminutum. Hinc omnia remedia, quæ motibus morbofis in ordinem redigendis dicata sunt, vel debilem & languidum augere atque intendere, vel enormem & nimis auctum compescere ac sedare debent. Illa commodissime roborantia, hæc vero sedativa appellari possunt. In pathologicis enim à nobis satis superque ad liquidum perductum est, omnis generis morbos vel motu solidorum aucto, quem Græci *σπασμὸν* vocant, vel imminuto, quem *ἀτονίαν* appellant, sua habere incunabula. Quum vero Medici officium in eo versetur, & ipsa etiam artis nostræ definitio, quam antiquissimus medicinae parens, HIPPOCRATES *Lib. de Flatibus* proponit, id exigat, ut quæ deficiunt, restituantur, & augeantur, & quæ abundant ac modum excedunt, temperentur ac detrahantur, quo motuum & humorum temperies, vitæ ac sanitati amicissima perpetuo conservetur, illud, opinor, in aprico est, duplicis generis dari remedia, quorum quædam spasmos sive universales, ut fit in febribus, sive particulares, qui certas tantummodo partes obsident, sedant & leniunt, quædam vero deperditum robur solidorum resuscitant atque restitunt.

§. II.

Neque vero solum Medico incumbit, motus vitæ ac sanitati adversos accommodatis remediis moderari, inque debitum temperamentum reducere, sed etiam eo ipsi respiciendum est, ut materiales causæ, morbosorum motuum effectrices, jugulentur, & a corpore propellantur. Quam ob rem sedulo & cum cura inquirere oportet, quotuplicis generis existant omnes morborum causæ, quibus cognitis cuilibet primum erit dijudicare, quam apte, apposite & congruenter omnium quoque remediorum facultates in easdem classes distinguere possint. Inter omnes autem, qui vel levissimam in arte salutari operam collocarunt, constare arbitramur, omnes morborum causas noxiæ aut qualitati aut quantitati esse assignandas, quarum utraque convenientia, & ab ipsa quasi natura huic scopo dicata remedia sibi vindicat. Quod enim quantitatem attingit, illud, opinor, in confesso est, ad vitæ & sanitatis conservationem non nisi definitam, certoque pondere ac mensura circumscriptam fluidorum, quæ a solidorum impulsu reguntur, quantitatem esse necessariam, quæ si vel abundantia vel defectu à naturali statu deflectit, varias corporis afflictiones progenerat. Quum itaque materiae quantitas vel supra vel infra modum sit, hinc duplicis generis resultant remedia, quæ morbosam quantitatem respiciunt, & recepto in scholis loquendi more evacuantia ac replentia appellantur. Jam vero ex pathologicis satis superque notum est, hanc ipsam, quæ quantitate excedit, materiam ratione indolis & mixtionis suæ variam esse ac distinctam & per diversa corporis emunctoria esse eliminandam. Atque hinc est, quod remedia, quæ ad morbosam hanc quantitatem educendam spectant, in varias classes disponi possint. Et hæc sunt vomitoria, laxan-

tia, purgantia, diaphoretica, sudorifera, diuretica, salivantia, errhina ac sternutatoria, quorum quolibet noxiam quantitatem pro diverso ejus respectu per idonea emunctoria evacuant. Longe aliter autem se res habet, si materiae quantitas in defectu peccat, sique laudabiles, & qui corpori nutritionem, robur ac vires suppeditant, humores deficiunt. Quis enim non videt, hic ea in usum vocanda esse, quæ fractum corporis robur instaurant, ac detractos humores refarciunt. Atque huc referenda est universa classis replentium, qua continentur nutritiva & analeptica, quorum omnium effectus ad vires reparandas & laudabiles succos ingenerandos collineat.

§. III.

Supra dictum est, corporis nostri passiones non modo à noxia materiae quantitate, sed ab ejus quoque depravata & naturæ inimica qualitate suam trahere originem. Hinc illud emergit genus remediorum, quæ depravatæ qualitatis emendationi inserviunt. Quemadmodum vero non una est exsuperantis materiae indoles, quæ per diversa emunctoria ejici & exturbari debet: ita etiam variæ dantur nocentium humorum intemperies & qualitates, quarum quævis peculiaris & appropriata remedia desiderat. Quot igitur pravis humorum qualitatibus corpus obnoxium est, tot etiam classes remediorum, quæ ad illarum emendationem spectant, constituendæ sunt. Si enim corpus nimia laborat succorum crassitie, sub qua omnis generis humores tardius per vasa feruntur, locum obtinent diluentia, quæ materiam ad motum ineptam mobilem reddunt, & spissis humoribus debitam fluiditatem conciliant. Si tenax & glutinosa materia in tenuissimorum vasorum angustis fixa atque impacta hæret, & succedentibus à tergo humoribus viam præcludit, operam ac præsidium ferunt aperientia, quæ obstructions referant, & incarceratos humores vasis excutiant. Ubi vero universa sanguinis massa acrimoniam induit, quæ fibras stimulo & convellendo infesta est, tunc auxilium expectari debet ab emollientibus, quæ acrimoniam leniendo solamen ferunt. Ad acidum porro, & corrosivos humores corrigendos faciunt absorbentia, quæ acidum primis præsertim vis infensum infringunt, & nimiam acridinem egregie temperant. Ad refræmandam denique calidam & biliosam qualitatem, quæ sanguinem & humores in præternaturalem motum conjicit, maxime accommodata sunt præcipitantia & refrigerantia, quæ nimium æstum restringunt, & molestas ebullitiones sufflaminant.

§. IV.

Constitutis sic summis remediorum generibus, quæ partim morbosos motus, partim quantitate vel qualitate nocentem materiam respiciunt, ordinis ratio nobis imperat, ut ad priorem classem revertamur, & paulo pensiculatus inquiramus illa agendi principia, quibus remedia, quæ perversis motibus mendentur, instructa sunt. Atque hic primo omnium consideranda veniunt roborantia, quorum classe ea comprehenduntur, quæ fibris elasticis tam carneis quam nervosis vim, robur, ac movendi potentiam foenerant, quæ naturalem earum motum tuentur, vel nimis languentem ac depressum excitant atque erigunt. Qua ratione non modo vitalium humorum circuitum juvant, & militantes pro sanitate excretiones cum necessariis secretionibus promovent, sed etiam aucto fibrarum tono impediunt, quo minus periculosa humorum stases vel stagnationes progenerentur. Quum autem ex physiologicis cognitum ac

perspectum sit, omnes motus, qui in corpore humano celebrantur, partim a fibrarum elatere, partim a sufficiente generosi & subtilissimi sanguinis ac fluidi ex cerebro & nervis influxu gubernari, inde ex facili apparet ratio, quare hujus generis remedia maxime in solidas partes operentur, & quare ita esse debeant comparata, ut solidorum augeant elaterem, & majorem temperati ac spirituosissimi sanguinis influxum procurent. Prout igitur partes, quæ roboratione egent, a se invicem differunt, ita veteres his remediis pro diverso roborandæ partis respectu nomina quoque diversa imposuerunt. Si enim capiti robur conciliandum erat, accommodata huic scopo remedia vocabant cephalica; si debilitatum nervorum genus firmandum, nervina; si stomacho vigor excitandus, stomachica; si hepar roborandum, hepatica; si lienis debilitati succurrendum, splenetica; si dejectus intestinorum tonus restituendus, carminativa; si uterus fulciendus, uterina; si denique universa partium fibrosarum compages ad motum erigenda erat, ac totius corporis vires instaurandæ, tonica, confortantia & cordialia solebant appellare. Sed venia hac in re concedenda est veteribus, qui humorum circuitus ignari tot tamque diversas roborantium species excogitarunt. Persuadebat enim ipsis ætatis suæ simplicitas, ut firmiter statuerent, certa remedia certis tantummodo partibus dicata esse, neque unum idemque remedium per omnes corporis partes suam dispertiri posse efficaciam. Nos vero invento humorum circuitu longe meliora edocti, omnes has, quæ a rei anatomice inscitia profluxerunt, distinctiones nullo prorsus in numero habemus, easque velut vanas persuasiones in totum rejicimus. Quum enim nostris temporibus fide satis liquenti constet, omnem humorum massam per universum corporis ambitum jugi ac perenni motu circumvolvi, eandemque sanguinis guttam, quæ modo per vasa capitis ferebatur, brevi post etiam ad extremos pedum digitos penetrare, jam, puto, in aprico est, omne remediorum genus sanguini associatum per universas corporis partes virtutem suam diffundere, adeo, ut idem remedium, quod capiti fuit præsidio, etiam utero, licet ab eo sit remotissimus, auxilium præstare possit.

§. V.

Instructa igitur sunt roborantia principio partim salino volatili, & acri sulphureo, partim terreo subadstringente, quorum utrumque ejusmodi est, ut eo ad partes roborandas nihil sit accommodatius. Sulphur enim illud subtilissimum & sal volatile, quo roborantia pollent, non modo sanguinem & humores expandunt, & majorem eorum affluxum ad partes invitant, sed etiam fibras blanda irritatione ad constrictionem cient. Accedit deinde elementum terreum & adstringens, quod fibrarum humiditatem imbibendo, poros coarctat, & hac ratione compagem fibrarum tensiorem reddit. Prout vero principium hoc salino-sulphureum cum terreo subadstringente elemento variam init societatem, varia etiam exurgit roborantium textura, a qua diversus eorum sapor, diversaque operatio derivanda est. Operantur enim roborantia primo oleo quodam subtili balsamico & resinoso, paulo tamen temperiori, partibusque gummosis ac terrestribus immerso. Et hic classem ducunt ex gummatibus mastiche, thus, succinum, myrrha, labdanum, olibanum, benzoe, storax & tacamahaca. Ex lignis huc referenda sunt lignum aloes, saffrafras cum ejus cortice, fantalum citrinum. Ex balsamicis hunc censum subeunt balsamum de Copaiva, de Tolu, Peruvianum, quibus tamen omnibus ambra virtute ante-

cellit. Deinde agunt quædam roborantia oleo subtili & fragrante, particulis terreis permixto, quo præcipue ex vegetabilibus gaudent melissa, mentha, origanum, serpillum, thymus, origanum creticum, flores lavendulæ, spicæ, majorana, rosmarinum, mentha saracenica, omnesque sic dictæ herbæ cephalicæ, quæ igni commissæ oleum fundunt subtile & fragrantissimum, cujus ope suam maxime præstant efficaciam. Hunc quoque in numerum ex aromatibus cinnamomum, nucifla, macis, caryophylli, cubebæ, cardamomum transferenda sunt. Sunt vero quædam ex roborantibus, quæ oleo valde subtili puro æthereo & fragrante suam perficiunt operationem. Et huc pertinent ex præparatis & compositis olea destillata, ut cinnamomi, nuciflæ, macis, caryophyllorum, cubebarum, cardamomi, menthæ, melissæ, rosmarini, majoranæ, lavendulæ, calami aromatici, serpilli, chamomillæ Romanæ, essentia succini, spiritus balsami Peruviani, spiritus succini & mastiches bene destillatus, essentia cinnamomi, balsamum apoplecticum, balsamum nostrum sic dictum vitæ, & varia elixiria stomachica, ut Michaëlis, elixir vitæ Mynsichti, balsamum embryonum & omnis generis salia volatilia oleosa. His merito etiam accensenda est camphora, quæ nihil aliud est, quam oleum subtile, sed coagulatum, cujus virtus, in quacunque etiam forma exhibeatur, in roborandis partibus vix satis digne de prædicari potest.

§. VI.

Altera roborantium species est, quæ principio gaudet subadstringente & simul amaricante, particulis paucioribus balsamicis interspersis, quo in numero maximè sunt radix caryophyllatæ & aristolochiæ, cortex chinæ, cascarillæ, tamarisci, capparum, fraxini, succus catechu, quorum virtus in debellandis intermittentium paroxysmis est spectatissima. Quod quidem non alia ratione præstant, nisi quod membranaceas partes, ab hostili materia in molestas constrictiones lacescitas, vi sua subadstringente corroborant, & ita impediunt, quo minus acris & inimicus humor, qui maximè primis in viis stabulatur, has partes ad præternaturales contractiones irritare possit. Accedit & hoc, in quo plurimum momenti situm est, quod hujus generis roborantia particulis suis amaricantibus crassos & viscidos humores incidant, vasorum obstructions recludent, & hac ratione impeditum sanguinis & humorum circuitum faciant liberiores. Ad hanc vero roborantium classem merito accedunt ea, quorum mixtionem principum terreum, amaricans, terebinthinæ æmulum ingreditur. Hæc maximè virtutem obtinent vulnerariam, & partium læsarum consolidationi egregie patrocinantur. Siquidem non modo feri superflui, quod consolidationi adversatur, excretionem promovent, sed etiam vi sua balsamica & adstringente laceratis partibus suam & integritatem & pristinum robur restitunt. Hæc maximam partem regnum vegetabile nobis suppeditat, inter quæ præcipue eminent veronica, scolopendrium, pyrola, hypericum, millefolium, capillus veneris, marubium, scabiosa, chamædrys, agrimonia mortua, consolida saracenica, hepatica, sanicula, betonica, artemisia rubra, melissa, flores rosmarini & chamomillæ vulgaris, quorum virtus in decoctis & extractis est laudatissima.

§. VII.

Roborandi etiam eximia facultate pollent nonnulla ex mineralium regno petita, quæ sulphure inflammabili cum partibus terreis subtilioribus mixto con-

constant, ut ferrum ejusque limatura in tenuissimum pulverem redacta, & puriores mineræ martiales, sicut est hæmatites, qui dum ignem nondum expertus est, copioso adhuc sulphure metallico scatet, & in roborandis relaxatis visceribus medicamentis ex auro desumptis longe est superior. Ejus flores cum sale ammoniaco parati tenuiores ab hæmatite separatas sulphureas partes complectuntur, hinc non modo elegantem croceum colorem, sed etiam fragrantissimum odorem præ se ferunt, quibus spiritus vini rectificatissimus superfusus, partem sulphuream extrahendo, essentiam mineralem tonicam & roborantem egregiam constituit, cujus usus profecto omnes essentias solares & alia arcana tantopere celebrata chymica longissime exsuperat. Splendet etiam ejusmodi virtute roborante sulphur vulgare, purissimum tamen & stillatitium, vel si impurius est, in flores sublimatum, quod prudenter applicatum virtutem purificantem, diaphoreticam, discutientem non alia ratione exercet, quam quod partibus ac visceribus a tono dejectis robur ac tonum restituat. Ad roborantia, quæ fixiori terreo ac tenuiori argillaceo unctuofo principio agunt, spectant ossa, cornua & dentes animantium coctione & evaporatione emollita & in pulverem redacta, cujus generis sunt cornu cervi, ebur, unicornu animale, ungula alcis, dens hippopotami, rhinocerotis, lapis manati, philosophice præparata; item unicornu fossile, terræ sigillatæ, bolus Armeniæ. Ex mineralibus crystallus & omnes gemmæ præparatæ. Ex animalibus lapis bezoar orientalis & occidentalis, & ex compositis huc referri debent pulveres sic dicti bezoardici & cordiales, ut Sennerti, Ludovici, Dorncrellii, lapis de Goa, pulvis bezoardicus Anglicanus ex globulis. Monendum vero hoc loco duximus, ad roborantium classem minus recte referri debere adstringentia, stiptica, ex principio terrestri & acido invicem combinata, quæ fibras nimium confringendo, poros concludendo, & fluxiles humores incrassando, vitalium humorum progressui valde inimica sunt; quare eorum internus usus, tanquam structuræ animali insensibilissimus, ex praxi medica jure meritoque relegandus est. Horum in numero sunt radix tormentillæ, bistortæ, cortices granatorum, flores balaustrorum, rosarum rubrarum, nux cupressa, alumen, vitriolum, caput mortuum vitrioli, & omnes tincturæ martis adstringentes cum menstruo acido fixiori paratæ, liquor martialis ex capite mortuo florum salis ammoniaci martialium resultans, pulveres stiptici, quorum usus non alius, nisi interdum externus esse poterit.

§. VIII.

Consideratis itaque iis auxiliorum generibus, quæ motum, tonum ac robur partibus solidis ac fluidis reddunt, & magnam in sanando & sanitate tuenda promittunt efficaciam, sequitur jam, ut ad ea deveniamus, quæ nimis effrænes & validiores solidorum & fluidorum motus ac impetus componunt, eosque pacatiores reddunt. Et hæc non inepte vocari solent in genere sedativa, quorum quædam, dum spasticas solidorum contractiones solvunt, antispasmodica, quædam, dum simul dolores levant, anodyna vocantur. Quorum remediorum amplissimus etiam patet usus, sique ulla polychresta & universalis sunt, & quæ multis in curando indicationibus satisfaciunt, certe sedativa sunt, quorum in convulsivis & epilepticis commotionibus, in atrocioribus doloribus levandis, vel nimis excretionibus sistendis, iisdemque ex spasmo suppressis restituendis magna & excellens est efficacia. Quemadmodum autem principio, quo agunt, non uno eo-

demque, sed paulisper diverso instructa sunt, ita etiam quodammodo differentem producant effectum.

§. IX.

In genere vero sedativa & quæ motus nimios moderantur, agunt principio quodam vaporoso sive evaporabili sulphureo, idque vel naturæ maxime blandum atque amicum est, & fragrantem ac suaveolentem odorem exhibet. Quo pertinent ex vegetabilibus maxime flores, ut rorifinarini, acaciæ, ulmariae, liliorum alborum, salviæ, hormini, fraxinellæ, chamomillæ, tiliæ, croci, aurantiorum; ex herbis basilicum, mentha, horminum, salvia; ex aromatibus cortices citri, aurantiorum, macis, nucistæ, & eorum olea, cortex thymiamatis; ex feminibus femina anisi, fœniculi, nuclei cerasorum, persicorum, prunorum, amygdalarum amararum, qui cum aqua ex vesica destillati exhibent aquas egregii saporis & odoris: ex animantibus moschus & zibethum; ex marinis ambra; ex mineralibus spiritus nitri, vitrioli, salis dulcificati & præparati, liquor noster mineralis anodynus; ex oleis destillatis oleum de cedro, menthæ, basilici, chamomillæ verum, millefolii, quæ omnia blanda sua anathymias discursivum ac tumultuarium fluidi nervei motum componendi eximia virtute prædita sunt, neque vires, ut alia graveolentia, deprimunt, sed potius erigunt. Quod vero in genus nervosum ejusque fluidum hæc ipsa primario suam potentiam exerant, vel ex eo abunde comparet, quod in quibusdam, præsertim fœminis, imbecillioris & sensibilibioris naturæ, & ad paroxysmos hystericos proclivibus, motus illos spasticos non imminuant, sed potius exacerbent.

§. X.

Vel nonnulla ex sedativis sulphure vaporoso, graveolenti, naturæ non adeo amico vel blando motus, dolores & spasmos sistunt. In horum numero præcipuum locum habent papaveracea, & omnia ex iis desumpta simplicia & composita, ut flores papaveris hortensis & rhœados, eorum essentia, extracta, aquæ destillatæ, syrupi, semina papaveris & oleum ex illis expressum, maxime omnium vero eorum lachryma, sive gummi resinofum, quod opii nomine venit, quod vario modo correctum & compositum copiosa & magni usus remedia medentibus præbuit. Inter quæ præcipua sunt theriaca Andromachi, mithridatum, theriaca coelestis, aqua theriacalis cum & sine vino, essentia theriacalis, diascordium Fracastorii, laudanum cynodiatum per fermentationem paratum Helmontii, laudanum Sydenhamii, massa pilularum de styrace, Starckii, Wildegansii. Ex vegetabilium familia huc trahi debet pœonia planta, ex qua desumpti flores, radices, aquæ destillatæ, syrupi, extracta, & ex compositis pulvis Marchionis, sua laude in sedandis spasmodis non debent defraudari. Ex regno vero animantium ex eodem principio & elemento agunt & spasticas nervosarum partium contractiones sistunt lumbrici terrestres, castoreum, testiculi equini, secundina humana, intestina lupi, sanguis asininus, spinæ, hepata & corda viperarum, anguillarum, ranarum exsiccata & in pulverem redacta. Ita etiam sola rasura ossium, v. g. cranii humani, ungulæ alcis, lapidis manati, dentis hippopotami, medulla ossium, cornu cervi; ex compositis aquæ typhorum cornu cervi, picarum, hirundinum, peculiari antispasmodica facultate polent, unde específicos & secreta pulveres antepilepticos tanquam basis ingrediuntur. Neque eorum virtus in spasmodis deliniendis, modo dextre adhibeantur, suo usu ac laude destituitur.

§. XI.

§. XI.

Vel sedativa agunt principio quodam pingui oleoso & vaporoso, constrictas nervosas partes demulcente & relaxante, ac potissimum usu externo juvant. Hujus generis sunt pinguedines & axungiae animantium, v. g. humana, canina, vulpis, taxi, cati silvestris, viperarum, ursi, equina. Quo etiam pertinent viscera ex animantibus vivis desumpta, ut pulmo, hepar, omentum, ex bobus, vervecibus; agnis, item columbae vel gallinae in medium dissectae, quibus dolentes & spasmo afflictæ partes foveantur.

§. XII.

Cæterum inter valentiora, quæ potius stupefaciendi & motus penitus sistendi, quam levandi ac sedandi facultate gaudent, & rarius usurpari debent, numeranda sunt narcotica, quæ ejusmodi principio vaporoso sulphureo instructa sunt, quod tenuissimum & mobilissimum illud sanguinis & nervorum fluidum proxime & immediate afficiendo ejus naturam & crasin contaminat, ejusque laudabilem motum atque influxum extinguit: cujus indolis sunt omnia, quæ ex hyoscyamo, mandragora, stramonio, datura, corona imperiali & ejus speciebus desumuntur. Ex compositis unguentum narcoticum Valerii Cordi, trochisci narcotici Plateri eminent. Paulo autem mitioris naturæ sunt massa pillularum de cynoglossa & oleum hyoscyami expressum vel destillatione rectificatum. Horum omnium usus in medendo cautissimus esse debet, quia infirmos, senes & morbis acutis oppressos facile necant, dum inflammationes in sphacelum convertunt, capiti stuporem ac dementia inducunt, vires frangunt, & conservationi vitali necessarias excretiones vehementer sufflaminant.

§. XIII.

Pertractavimus hætenus ea remedia, quæ perturbatis motibus in ordinem redigendis inserviunt. Nunc ordinem rei sequuturi contemplationem nostram ad ea transferemus, quæ nocentis materiæ emendationi velificantur. Hæc in Medicorum scholis temperantia vel alterantia vocantur, quoniam intemperatos succos corrigunt, & humoribus noxia qualitate imbutis naturalem temperiem restitunt. Quemadmodum verò, ut ex superioribus patet, non uno habitu incedit depravata humorum qualitas: ita etiam huic opponenda remedia in diversas classes abeant necesse est. Est enim primo acida & corrosiva humorum intemperies, quæ plurimis in morbis accusanda venit, nec aliis remediis debellari potest, quam quæ acidum hoc destrunt, & vulgo absorbentia appellantur. Horum virtus & efficacia unice derivanda est a principio terreo alcalino, quo median- te corrodentis acidi aculeos retundunt, & universam humorum in primis viis massam edulcorant. Atque in his classem ducunt terrea ac testacea, ut conchæ, ostreae, cochleæ, perlæ, mater perlarum, os sepia, corallia, lapides ac testæ cancrorum; ex animantibus dentes & cornua usta, ut cornu cervi & ebur ustum, cochleæ ustæ, viperæ & cancriusti, dens apri, hippopotami philosophice præparatus, unicornu: ex volatilibus omnes ovorum testæ; ex mineralibus marga, creta, unicornu fossile, limatura martis; ex piscibus mandibulae lucii piscis, lapides percarum & carpium. Hæc recensita remedia amplissimi usus sunt in praxi medica, quæ iis haud facile carere potest. Est enim acidum, quod maxime primis in viis oberrat, multarum corporis passionum causa, ad quod statim prima in corporis

regione invertendum, antequam ad ipsum sanguinem & reliquos humores transeat, hujus generis remedia cum insigni fructu adhibentur.

§. XIV.

Deinde intemperies datur sulphurea, calida & volatilis, quæ maxime regnat in febribus, quæ excessivus calor, sitis, vigilia & virium consumptio comitantur. Hæc perversa humorum qualitas remedia flagitat sic dicta præcipitantia ac refrigerantia, quæ sanguinis incendium restinguunt, & ferventes præternaturali calore humores moderantur. Præstant hoc præ aliis ea, quæ sua in mixtione alunt principium subadstringens acidum; quo pollent ex vegetabilibus succus citri, berberum, ribium, cerasorum, acetosæ, fragorum, acetosellæ, & omnes paratæ ex iis aquæ ac syrupi. Faciunt huc quoque acetum, vinum purum, præcipue Rhenanum ac Mosellanum, spiritus nitri ac vitrioli bene rectificati, tincturæ rosarum & papaveris cum spiritibus paratæ, item clysfus antimonii sulphuratus. Neque hoc loco prætereundum est nitrum purum & ex eo arte paratus lapis prunellæ, cujus virtus in temperanda sulphurea humorum qualitate prorsus egregia est. Hæc remedia maxime febribus sanandis dicata sunt, & quoniam partim nimium calorem refranando, partim etiam spasmos leniendo sitim alleviant, hinc merito quoque sitim sedantia appellantur.

§. XV.

Progredimur nunc ad illam intemperiem, quæ particulis acribus causticis, nerveas partes graviter vellicantibus debetur. Atque in hac emendanda locum obtinent emollientia, quæ blanda mucilagine acrium particularum spicula oblinunt, & involucro quasi circumdato impediunt, quo minus fibras exquisito sensu præditas ad spasmos laceßere, vel hostili rosione lacerare possint. Hac emolliendi virtute splendent ex vegetabilibus radices althææ, liliorum alborum, consolidæ majoris, rapæ exsiccatae, herba althææ, malvæ, millefolii, flores chamomillæ vulgaris, liliorum alborum, croci, meliloti, sambuci, verbasci, semen lini & foeni græci. Vel operantur emollientia principio pingui & oleoso, quali instructæ sunt animantium pinguedines & axungiae, ut axungia taxi, vulpis, canis, equi, hominis, medulla ossium vituli, pinguedo caponis; ex vegetabilibus oleum amygdalarum dulcium, oleum liliorum alborum, olivarum, anethi, chamomillæ; semina quatuor frigida majora, semen papaveris, nuclei pini & persicorum. Vel agunt principio terreo pingui & unctuosissimo, quale reperitur in omnibus marginis, bolis ac terris sigillatis, & ex parte etiam in antimonio diaphoretico. Vel denique suam operationem præstant substantia terrestri ac viscida, quam in se reconditam habent dactyli, ficus, mel, passulæ, saccharum lactis, cremor lactis, & omnium denique lac animantium, cui insignis inest acrimoniam temperandi ac permulcendi efficacia. Hæc remedia non modo interne in venenis causticis & corrosivis humoribus corrigendis egregiam opem ferunt, sed etiam externe cum fructu usurpantur, siquidem suppurationem promovent, fibras spasmo vel ariditate contractas emolliunt, & ab humorum acrimonia oriundos dolores insigniter levant.

§. XVI.

Ex iis, quæ crassos viscidos humores, tubulis viscerum inhærentes, resolvunt, præter superius recensita roborantia præcipuum locum obtinent vulgo sic dicta incidentia & aperientia, quæ non alio modo obstructa & infarcta vasa referant, quam quod solidorum

lidorum motum & contractionem promoveant, quo fit, ut fluidorum motus celerior & citatior stagnantes humores dissolvat. Ex universa vero aperientium classe omnibus aliis palmam dubiam reddunt salia, quæ aciebus ac spiculis suis acrioribus fibras ad motum & contractionem intensiorem armant, ac delassatis vigorem suum restitunt. Hæc vero varii sunt generis: vel enim summe volatili urinoso principio id præstant, ut sunt spiritus salis ammoniaci cum aqua vel etiam spiritu vini destillatus. Vel sale operantur volatili oleoso, quo spectant herbæ sic dictæ antiscorbuticæ, cochlearia, nasturtium Indicum, hortense, aquaticum, trifolium fibrinum, beccabunga, sedum minus, sinapi; radix armoraciæ. Vel sale agunt puro alcalino fixo, quo instructa sunt omnia salia vegetabilium per incinerationem parata; ex mediis terra foliata tartari, tartarus tartarizatus, tartarus vitriolatus, arcanum duplicatum, nitrum antimoniatum, sal digestivum Sylvii, sal ammoniacum, sal Glauberianum, sal Epsoniense & salia ex fontibus medicatis parata, præsertim sal fontium Egranorum, quorum singulorum magna & quasi universalis in re medica est utilitas.

§. XVII.

Ex aperientium vero classe omnibus palmam præripiunt aquæ sic dictæ minerales medicatæ, atque inter has maxime eæ, quæ acidularum ac thermarum nomine veniunt, quarum virtus in aperiendis obstructis visceribus, & crassis viscidis humoribus incidendis ac resolvendis, omnium, quæ in præxi nota sunt, remediorum facultates longissime exsuperat. Quare etiam non sine magno fructu ad chronicas passiones avertendas, quæ ut plurimum a veteribus & rebellibus vasorum obstructionibus foveantur, eorum usus est celebratissimus. Eorum vero modus operandi non alius est, quam quod partim copia aquarum diluant ac dissolvant humorum crassitiem, partim etiam stimulo, quem præstant salia, quibus imbutæ sunt, vasa ad vegetiorem motum, contractionem & impulsum animent. Elementum enim illud activum minerale, quo ab aqua pura hi fontes medicati differunt, tantummodo est salinæ indolis. Siquidem vel subtiliori & purissimo vitriolico sali, vel etiam alcalino fixo aut neutro omnes suas, quas possident, vires acceptas ferre debent.

§. XVIII.

Vel aperientia agunt sale quodam acri sulphureo resinoso, quo languidas fibras stimulant, & stagnantium humorum progressum accelerant. Ad quorum classem ex vegetabilibus præcipua illa gummatosa resinosa, ut gummi ammoniacum, galbanum, sagapenum; bdellium, benzoe; ex lignis guajacum, sassafras, lignum aloes, lignum Rhodii; ex radicibus radix pimpinellæ, lapathi acuti, levistici, sassaparillæ, ex arboribus strobili pini, abjectis, referri debent, quæ si decenti modo in aqua decoquantur, & debile usurpentur, obstructiones aperiendo & liberiores humoribus motum & excretionem fœnerando, sanguinis & humorum massam a multis excrementitiis fordibus depurant, & magna in debellandis chronicis passionibus præstant.

§. XIX.

Neque in aperientium familia ultimum locum sibi vindicant amara, ut absinthium, carduus benedictus, fumaria, scabiosa, scordium, trifolium fibrinum, flores chamomillæ, liliorum convallium, quorum extracta copioso sale sic dicto essentiali, quod naturam terræ foliatæ tartari habet, atque alcalinum

& incidentem effectum præstat, & in aere humido facile colliquescit, imbuta sunt; quo & stimulando & colligando acidos viscidos humores in morbis ab obstructione ortis, præsertim usu continuato, virtutes possident nobilissimas.

§. XX.

Inter activiora aperientia ex mineralibus reponi merito ea debent, quæ mercuriali principio, quod in tenuissimas solidissimas agilissimæ tamen indolis particulas facile dissolvitur, suas dotes debent, quo minimos partium solidarum poros penetrando vascula ad validiorem contractionem & humorum impulsu potentius stimulant. Quo effectum splendent varia ex mercurio præparata, ut mercurius dulcis, mercurius diaphoreticus jovialis, item noster fixus diaphoreticus, arcanum corallinum, mercurius præcipitatus albus cum foliis auri tritus, & ex tutioribus, quæ simul connubio sulphuris mineralis quodammodo cicurata sunt, æthiops mineralis, cinnabaris antimonii & nativa.

§. XXI.

Perspectis itaque iis, quæ intemperatos humores corrigunt, immobiles, viscidos, fluxiles & mobiles reddunt, adeoque ad excretionem & secretionem idoneos efficiunt, sequitur jam, ut ad evacuantia nos transferamus, quæ præter naturam exundantes humores & ad exitum jam præparatos per omnis generis emunctoria educunt. Hæc prout materia evacuanda variat, vel etiam emunctoria, per quæ excretio fit, varia sortiuntur nomina. Quæ enim biliosam saburram ex ventriculo & primis intestinis educunt, vocantur emetica; quæ fordes ex universo intestinorum canali blande evehunt, lenientia sive laxativa; quæ vero validius operantur & nimias ferositates etiam ex habitu corporis per intestina exturbant, purgantia audiunt. Deinde sunt hac in classe remedia, quæ vel blandius vel vehementius transpirationem movent, quorum illa diaphoretica, hæc sudorifera appellantur. Quæ autem urinarios renum tubulos ad motum sollicitant, & majorem feri falsi secretionem efficiunt, nominantur diuretica; quæ lympham commovent, eamque per glandulas salivales ejiciunt, salivantia; & quæ denique mucum ex naribus proliciunt, ea sub errhinorum & sternutatoriorum nomine in medendo adhibentur.

§. XXII.

Dicendum est primo de emeticis, quorum operandi modus quærendus est in principio subtili volatili acri caustico, quo nervosas ventriculi & duodeni tunicas ad ejiciendam nocentis materiæ colluviem exstimulant. Atque ejusmodi elemento agunt ex vegetabilibus radices asari & ipecacuanhæ, quæ simul aliquid aromatici in se reconditum habent; ex mineralibus eodem principio operantur mercurius vitæ rite paratus, pulvis Munckii, crocus metallorum & ex eo paratus tartarus emeticus Mynsichti, aqua benedicta Rulandi, syrupus emeticus dispensatorii Brandenburgici, aqua nostra vitæ emetica, panacea Glauberiana, quæ nihil aliud est, quam sulphur auratum antimonii cum solutione tartari præcipitatum. Vel operantur emetica sale quodam metallico venero, quo maxime pollent vitriolum album, vitriolum cyprum, & ex præparatis tinctura veneris Helvetii. Omnia enim vitriolacea, ut ex chymicis rationibus & diuturniori usu perspectum est, per se stimulandi virtute carent, sed tum demum hanc vomitum proritandi facultatem induunt, si cum veneris connubium inierunt. Nam omnia, quorum mixtionem venus ingreditur, vim emeticam obtinent.

§. XXIII.

§. XXIII.

Quod laxantia attinet, quæ vitiosam saburram intra primas vias collectam blande evacuant, eorum virtus unice à stimulo salino leniori derivanda est. Quum vero salinum hoc principium etiam alias quæ ejus texturam ingrediuntur particulas sibi admixtas habeat, facile perspicitur ratio, quare laxantia diversam inter se naturam, saporem & vires obtineant. Ita enim in cassia, manna & polypodio acre hoc sal conjunctum est cum dulci & mucilaginoso elemento: in rhabarbaro cum amaro terrestri; in aloë cum amaro & gummoso principio; in tamarindis cum acida & tartarea substantia; in agarico & foliis sennæ cum terra quadantenus viscosa; in floribus denique violarum, persicorum, acaciæ & semine violarum cum mucilagine subtiliori. Atque hinc est, quod hujus generis remedia, non quibuslibet humoribus evacuandis accommodata sint, sed quædam saltem quibusdam convenient, quæ tanquam specifica usurpari possunt. Sic in pectoris affectibus manna & polypodium egregiam nec ab ullo alio laxante expectandam opem præstant: cassia renibus dicata est; in sanguine depurando aliis præcellit polypodium: in sanandis hepatis & intestinorum vitiis, inque temperanda biliosa humorum qualitate reliquis merito antepositur rhabarbarum; in capitis vero morbis agaricus & folia sennæ cum fructu insigni adhibentur.

§. XXIV.

Ex laxantibus vero compositis maxime commendanda sunt aqua laxativa Viennensis, extractum rhabarbari, elixir proprietatis purgans cum rhabarbaro & arcano tartari paratum, pilulæ aloeticæ Francofurtenses, Glassianæ, tartaræ Schroederi, Becheri, & ad harum imitationem factæ Hermannianæ, Stahlianæ, nostræ; Syrupus cichorei cum rhabarbaro, roob tamarindorum, syrupus de manna solutivus cum extracto rhabarbari exaltatus. Hæc mitiora laxantia, quoniam non nisi lenissimo stimulo superfluos & intemperatos humores educunt, summo jure ac merito anteferenda sunt fortioribus illis ac drastice purgantibus, quæ caustico quasi principio instructa ventriculi & intestinorum membranas vehementer exagitant, eorumque tonum graviter lædunt. Neque vero à clementiorum laxantium classe excludenda sunt varii generis salia, quorum usus in alvo cito ac tuto movenda esse debet commendatissimus. Talia sunt ex acidis cremor tartari, tartarus crudus, ex alcalinis sal tartari, sal thermarum Carolinarum; ex mediis tartarus vitriolatus, arcanum duplicatum, sal Glauberianum, Egranum, Epsomense, quæ cum aqueo vehiculo ad aliquot drachmas exhibita fere acidularum virtutem in alvo cienda æmulantur. Neque hoc loco silentio prætermittenda sunt quædam insipida, quæ licet nullum eminentem saporem præ se ferant, intra primam tamen regionem assumpta laxandi vim exerunt satis conspicuam; ut sunt magnesia, nitrum, & ex mineralibus mercurius dulcis. De his vero notatu dignum est, quod non nisi cum salibus primis in viis combinata operentur. Magnesia enim, quæ nihil aliud quam flos calcis vivæ est, tum demum alvinas excretiones promovet, quando in primis viis acidum offendit, cui associatum in sal transit amaricans, quod intestinorum fibras irritando sedes satis interdum copiosas excitat. Neque mercurius suum in ducenda alvo officium præstat, nisi in ventriculi vel intestinorum canale junctus fuerit cum salinis humoribus, quorum conjunctione quædam laxandi vis ipsi conciliatur, ita, ut nunquam solus, sed cum aliis laxativis mixtus exhiberi debeat.

§. XXV.

Transeundum nunc est ad purgantia, quæ principio agunt vehementiori, sale nimirum caustico inflammatorio, cujus vi superfluas serositates ex habitu corporis & vasis interioribus per glandulas intestinales potenter & copiose evacuant. Inesse autem tale sal causticum inflammatorium vehementioribus ac drastice illis purgantibus, vel exinde colligere licet, quia externe cuti applicata illam in vesicas attollunt, interne autem paulo largiori dosi exhibita ventriculum & intestina in gravissimas inflammationes conjiciunt, & quidem iisdem cum symptomatibus, quæ venena intra corpus assumpta comitari solent. Neque eorum noxa aliis remediis averti potest, quam iis, quibus venenorum vis frangitur, nimirum oleosis, pinguibus & incrassantibus, quæ sal illud acre drasticum obtundunt, attemperant, & constrictas partes emolliunt. Est vero hoc sal causticum acre vel purum & sibi relictum, quali præcipue grana tilii & femina cataputiæ suam operationem exercent: vel cum aliis particulis temperatioribus commixtum: ita enim sal hoc deleterium immersum conspicitur partibus resinosis in mechoacanna & jalappa: gummeis ac sulphureis impurioribus in scammonio, gummi guttæ, esula, elaterio: amaricantibus in colocynthide; terrestrioribus in utroque helleboro; adeo, ut ex varia hujus caustici salis cum heterogeneis partibus commixtione diversus purgantium effectus sit derivandus. Prostant vero ex purgantibus plura in officinis composita & præparata, inter quæ tamen veluti de meliori nota commendari merentur extractum panchymagogum Crollii, (quod omnibus præferendum est) extracta colocynthidis, elaterii, esulæ, diagrydium cydoniatum purgans, pulvis Comitæ de Warwick, resina jalappæ, de cujus usu illud tenere oportet, quod non facile in pulvere præscribenda sit, sed potius in liquore, qui commodissime in pilularem formam redigitur. Quod si non observatur, resinofum hoc principium in spissum coagulum abit, quod intestinorum tunicis diu infixum hæret, iisque gravissimas sæpe inducit convulsiones.

§. XXVI.

Deducit nos ordo rei ad diaphoretica, quæ non sine ratione universalia & polychresta remedia appellari merentur, siquidem universam sanguinis & humorum massam expurgant, & sordes in iis collectas per cutaneam distillationem eliminant. Ex pathologicis enim satis abundeque perspectum est, plurimos morbos a prohibita transpiratione suam trahere originem, quia illa excretio, quæ per summam cutim fit, omnes reliquas vincit, quæ per diversa corporis emunctoria celebrantur. Sunt vero diversa principia, quibus hujus generis remedia suam in movenda diaphoresi operationem perficiunt. Quædam enim gaudent principio terreo leniter constringente, quo laxatam fibrarum compagem firmant, & ad intensiorem motum impellunt; Quorum in numero continentur antimonium diaphoreticum, cinnabaris antimonii, antihecticum Poterii, cerussa, bezoardicum minerale, sudoriferum Fabri, regulus antimonii medicinalis, mercurius diaphoreticus solaris, flores sulphuris. Ex animalium regno eodem agendi principio pollent lapides cancriorum, lapis bezoar orientalis & occidentalis, cornu cervi & ebur philosophice præparatum, unicornu fossile: ex compositis lapis de Goa, pulvis Anglicanus, pulvis bezoardicus, Pannonicus ruber, pulvis bezoardicus Senneri, Ludovici, species de hyacintho; ex radicibus
radix

radix contrajervæ, quorum omnium in provocanda transpiratione magna & excellens est efficacia. Deinde agunt nonnulla ex diaphoreticis principio subtili acido cum volatili oleoso mixto, quali instructa sunt acetum vini cum cancrorum lapidibus mixtum, aqua prophylactica Sylvii, mixtura simplex, acida bezoardica, tinctura bezoardica Michaelis, liquor bezoardicus Bussii cum liquore nostro anodyno mixtus. Hæc liquida & temperata diaphoretica in febribus præcipue acutis & malignis præstantissimi usus sunt, quoniam sanguinem non adeo vehementer exagitant, sed mitiori saltem commotione impeditam transpirationem præstant liberiores.

§. XXVII.

Plane autem contrario modo illa operantur diaphoretica, quæ prædita sunt principio sulphureo ac sedativo, quo spasmi constricta cutis colatoria blande relaxant, & largiorem sanguinis affluxum efficiunt. Et huc referri debent omnia theriacalia, theriaca vetus, theriaca cœlestis, aqua theriacalis, discordium Fracastorii; ex mineralibus nitrum, spiritus nitri & vitrioli rite dulcificati; ex vegetabilibus crocus, aqua florum sambuci, roob sambuci, & ex floribus parata essentia. Notandum vero hoc loco est, quod hujus generis diaphoretica insigni cum fructu adhiberi possunt in iis affectibus, ubi fibræ spasmico contractæ sunt; neutiquam vero in iis, ubi fibræ atonia laborant, motusque vitales tardius procedunt. Denique etiam diaphoreticis merito accensenda sunt infusa calida cum aqua parata, quorum expansivus calor sanguinis circuitum augendo transpirationem egregie juvat. Acuitur autem aquarum virtus, si iis infunduntur varii generis herbæ ac flores diaphoretici, ut sunt flores sambuci, rorismarini, herba scordii, veronica, cardui benedicti, scabiosæ, quorum virtus in passionibus tam tardis quam acutis satis spectata est.

§. XXVIII.

Diaphoreticis proxime subjungenda veniunt sudorifera, quæ ab illis saltem in eo differunt, quod fortiori stimulo instructa, motum humorum auctiorem reddant, & sanguine ad habitum corporis externum propulso, serum ex tubulis cutaneis proliciant. Horum autem agendi modus valde diversus est, cujus respectu etiam in varias classes disponi possunt. Primo enim quædam ex sudoriferis operationem suam absolvunt sale acri sulphureo, quo fibrosas partes ad majorem motum excitulant, cujusmodi sunt omnes sic dictæ radices & herbæ alexipharmacæ, ut radix pimpinellæ, anthoræ, angelicæ, levistici, ostruthii, petasitidis, imperatoricæ, helenii, valerianæ; vince-toxici, carlinæ; ex herbis scordium, ruta, carduus benedictus, alliacea. Hæc veteribus audiebant alexipharmaca, eam maxime ob rationem, quia iis magnam & peculiarem venenis resistendi virtutem tribuebant. Sed, ut nostram hac de re sententiam ingenue profiteamur, hujus notæ remedia haud quam sic comparata sunt, ut tam speciosum nomen sustinere possint. Quæ enim ipsis in veneno expellendo virtus adscribitur, ea profecto exigua valdeque inermis est, ita, ut potius corpori a venenis præservando, quam illis exturbandis inserviant.

§. XXIX.

Deinde peculiarem classem ea constituunt sudorifera, quorum virtus a sale quodam volatili oleoso empyreumatico deducenda est. Atque huc spectant

Frid. Hoffmanni Oper. Supplem. II.

varii generis salia volatilia, spiritus, & olea ex animalium partibus parata, ut spiritus & sal volatile cornu cervi, spiritus & sal volatile eboris, spiritus & sal volatile viperarum, mandibularum lucii piscis, lumbricorum terrestrium, tinctura sudorifera ex oleo cornu cervi foetido in rectificato spiritu vini soluto parata, & spiritus noster eboris balsamicus. Alia rursus ex sudoriferis sale agunt subtili ac resinoso, quo imprægnata sunt ex lignis lignum guajaci, santalum citrinum; ex corticibus cortex cassiafras, guajaci, chacharillæ; ex radicibus radix ligni Rhodii, zedoariæ, contrajervæ, serpentariæ, lappathi acuti, ex quibus famosa illa decocta parantur, quæ in debellanda lue venerea, inque salina humorum impuritate edulcoranda opem prorsus divinam ferunt. Neque vero hoc loco ea reticenda sunt sudorifera, quorum operandi modus a sale acido cum oleo empyreumatico mixto dependet, cujus participes sunt spiritus tartari simplex & volatilis, spiritus succini, spiritus lignorum, spiritus mannæ, spiritus corticis betulæ, qui omnes acidum subtile cum oleo empyreumatico sibi admixtum habent, & ex horum facto per digestionem connubio rubrum colorem induunt. Pertinent huc etiam tinctura coralliorum cum modo recensitis spiritibus parata, tinctura bezoardica Michaelis simplex & volatilis, spiritus Bussii, elixir antipestilentiale Crollii, essentia pimpinellæ cum essentia scordii mixta, & omnes essentiæ alexipharmacæ, ut spiritus cornu cervi succinatus, spiritus cornu cervi cum spiritu vini & oleo essentificatus, camphora, essentia lignorum cum spiritu tartari volatili parata, elixir camphoratum, ex spiritu vini camphorato & croco compositum & pulvis noster bezoardicus cum nitro & camphora mixtus. Sunt etiam nonnulla ex sudoriferis, quorum virtus maxime in sale nitroso acri sulphureo sita est, quo præcipuæ foeta sunt excrementa animalium, ut sunt stercus vaccinum, equinum & paratæ ex eo aquæ, stercus ovillum, quod solutum fortissimum expellens constituit; urina quoque vac-carum, quæ sudorem & urinam potenter movet.

§. XXX.

Præterea dantur quædam sudorifera, quæ humido & vaporoso principio sudorem provocant, dum nimirum secretorios cutis tubulos aperiendo & nimis contractos emolliendo efficiunt, ut sanguis ad laxata emunctoria accedere, ibique serositates secer-ni possint. Et hæc magis externe adhibentur, ut sunt balnea laconica, fots & infessus in aquis calidis, cataplasmata ex speciebus alexipharmacis, & aromaticis cum fermento panis, aceto & spiritu vini camphorato parata, & calide regioni umbilicali applicata. Certe mirum est, quam insigniter hæc externe adhibita sudorifera interne assumtorum virtutem augeant. Frustra enim ad sudorem prolicendum interna adhibentur remedia, quæ sanguinem & humores graviter commovent; nisi pori cutis patuli atque aperti sint, id quod maxime in acutis morbis, in quibus exterior corporis cortex spasmi constringitur, summa circumspeditione observandum est. Si fecus sit, tunc hæc remedia sub externo corporis habitu constricto propinata non modo medentis expectationem eludunt, sed etiam internum calorem augendo malum exacerbant, & agrum in gravissimas sæpe passiones conjiciunt. Caterum in genere circa horum remediorum usum illud notandum est, quod eorum operatio feliciter succedat, si in vehiculo calido, & cum sufficiente humido, aut etiam in lecto vel hypocausto temperate calido assumantur.

Fff

§. XXXI.

§. XXXI.

Verſata eſt haſtenus noſtra tractatio circa illud genus remediorum, quæ ſudori ciendo dicata ſunt, & quorum uſus ſeſe latiffime extendit; ſiquidem ex horum claſſe varia alexipharmaca, antiſcorbutica, antivenerea, & ſanguinem depurantia depromi poſſunt. Jam nos ad ſui conſiderationem vocant diuretica, quæ ſalinas ſeroſitates per tubulos renales evacuant. Quamvis autem omnia ea remedia, quæ viſcidos & tenaces humores incidunt, obſtructiones reſerant, & jam ſupra ſub aperientium claſſe reſenſita fuerunt, vim quoque diureticam obtineant; præter illa tamen ſuperſunt quædam paulo ſpecialiora, quæ renale colatorium vel ſtimulando vel relaxando urinæ fluxum ſingulariter juvant. Operantur vero diuretica duplici modo; vel enim renales tubulos vellicando efficiunt, ut copioſior in iis urinoſi humoris fiat ſecretio; vel vaſculoſam renum compagem laxando, majorem ſanguinis & humorum copiam ad illos invitant. Quod modum priorem attingit, præſtant hoc primo ea, quæ ſale ſubtiliſſimo acido imbuta ſunt, quo inter alia pollent tinctura aperitiva Moebii, ſpiritus aperitivus Penoti, ſpiritus tartari acidus, vinum Moſellanum, Rhenanum, ſpiritus formicarum acidus, & qui inſtar omnium eſt, ſpiritus ſalis, præſertim ad methodum Glauberi ex ſale communi & oleo vitrioli præparatus. Hic principio conſtat tenuiſſimo volatili ſulphureo acri, quo ſe non modo in tubulos urinales inſinuat, ſed etiam ad aſperam arteriam tranſit, eamque ſæpius ad tuſſim moleſtam ſollicitat.

§. XXXII.

Vel operantur diuretica principio quodam alcalino fixiori cauſtico, quo ſecretionem urinæ promptiorem reddunt. Hujus generis ſunt corallia uſta, conchæ uſtæ, pulvis Volckameri ex lapidibus pretioſis paratus, cochleæ uſtæ, magnēſia, tinctura calcis vivæ, tinctura ſalis tartari, tinctura antimonii acris, liquor ſilicum Glauberi. Vel etiam ſale neutro agunt, quod ſecum ſovent terra foliata tartari, ſolutio oculorum cancri, liquor nephriticus ex ſpiritu ſalis & lapidibus uſtis paratus, ſal Epſonienſe, ſalia fontium medicatorum, nitrum antimoniatum, arcanum duplicatum. Quædam vero ſale conſtant accerrimo volatili cauſtico, quo imprægnata ſunt ex vegetabilibus omnes alii ac ceparum ſpecies, ex animali regno millepedes, vermes majales, cantharides earumque eſſentia, buſones exſiccati, pulvis viperarum, aranearum, ſcorpionum. Hæc accerrimo & cauſtico ſale imbuta diuretica vehementiſſime agunt, & magnam in medendo cautionem requirunt. Facile enim renali ſubſtantie labem aſſerant, tenuiſſimos tubulos diſcindendo, ex quo fit, ut calculus ex ſtagnante terreſtri ac tartarea materia facillime progeneretur. Cavendum quoque ſedulo ac diligenter eſt, ne fortiſſima hæc diuretica in renum exulceratione adhibeantur. Tantum enim abeſt, ut illam aliquantum levent, ut potius multo reddant graviorem.

§. XXXIII.

Poſt hæc diuretica, quæ principio ſalino acri ſtimulante urinam cient, proximum locum tenent ea, quæ renale viſcus a tono ſuo dejectum roborando, urinoſi liquoris ſecretionem inſigniter promovent. Faciunt huc primo omnia terebinthinata, ut terebinthina Veneta, terebinthina cocta, vel in ſpiritu

vinii rectificato ſoluta, item ſpiritus & oleum terebinthinæ: deinde juniperina, ut baccae, roob & oleum juniperi; tum etiam ſuccinata, ut ſuccinum in ſubſtantia, ſal, ſpiritus & eſſentia ſuccini. Neque alia ratione operantur ea, quæ principium reſinoſum balſamicum obtinent, ut ſunt ex herbis petroſelinum, hederæ terreſtris, chereſolium; ex radicibus radix eryngii; ex ſeminibus ſemen apii, anifi, ſoeniculi, fructus alkekengi, cynosbati; ex corticibus cortex ligni ſaſſafras; ex reſinis maſtiche, ex balſamis balſamus de Peru & Copaiva. Hæc ſimplicia ſatis fortem diureſin movent, ideoque cavendum, ne corporibus ſucco & ſanguine plenis, & ubi humores ad turgelcentiam inclinant, exhibeantur. Alias enim facile contingit, ut, ſi incaute uſurpentur, periculoſas ſtagnationes & inflammationes renibus inducant. Accedit, quod non tantis inſit efficacia calculum jam præſentem expellendi, quam quidem vulgo exiſtimatur; ſiquidem potius præſervationi a calculo inſerviunt, dum ſcilicet urinam frequentius movendo, impediunt quo minus ſtagnans ſabuloſa materia in calculoſum concretum abire queat. In hac denique diureticorum claſſe merito etiam ea reponi debent, quæ principio conſtant balſamico terreſtreo fixiori, & vulgo vulneraria audiunt, e. g. virga aurea, equiſetum, hederæ terreſtris, conſolida ſaracenica, veronica, cortex & radix acaciæ, ſemen lycopodii, fructus cynosbati, nuclei dactylorum, quorum omnium magna & ſpectata vis eſt in ſanandis diuturnis renum læſionibus; ſiquidem non modo renum atoniam tollunt, ſed eoſdem etiam ulcere exeſos vel acutiori calculo laceratos conſolidant, & ad priſtinam integritatem reducunt.

§. XXXIV.

Longe autem alia ratione operantur, quæ tubulos renales ſpaſmo conſtrictos relaxando, urinoſi humoris affluxum liberiores reddunt. Et hoc præſtant principio quodam leni nitroſo ac permulcente anodyno, cujus generis ſunt nitrum omniaque nitroſa, lac & ſerum lactis, ſemina quatuor frigida majora, amygdalæ dulces & amaræ earumque olea, ſuccus betulæ, ſuccus fragorum, crocus, pulveres ex ſeminibus malvæ, ſaxifragiæ, milii ſolis, lycopodii, violarum parati, & omnia denique refrigerantia & anodyna, quæ ſpaſticas partium internarum conſtrictiones tollunt. Frequenter enim evenire ſolet, ut non niſi parcum fiat urinæ profluvium, ſi nimirum gravioreſ dolores ac ſpaſmi partes internas torquent, & ſimul per conſenſum viſcus renale corripunt, unde accidit, quod ſerum valde aquoſum & pauca ſaltem in quantitate tubulos renales tranſeat. Quo in caſu omnia calida & acriora diuretica, quæ ſanguinem & humores in vehementiorem motum abripiunt, non ſine inſigni noxa adhibentur. Tutiores vero hic faciunt medicinam, quæ dolores demulcent, fibras ſpaſmo conſtrictas blande relaxant, & hac ratione ſecretionem urinæ præſtant liberiores.

§. XXXV.

Deveniendum jam nobis eſt ad expectorantia, quæ viſcidos ac tenaces humores ex bronchiis pulmonum mediante tuſſi ejiciunt. Horum operandi modus, ut generatim loquamur, a principio mere ſalino dependet, quo nervoſas tracheæ tunicas irritando tuſſim provocant. Eſt vero ſalinum hoc principium vel acre ſulphureum, quale reperitur in extracto tabaci, in gummi ammoniaco, gummi benzoe, balſamo Peruviano, radice ari & iridis Florentinæ;

retinæ : vel particulis mucilaginosi immersum , ut in floribus violarum , earumque syrupo , in croco , in radice glycyrrhizæ ejusque essentia & extracto : vel denique cum subtili acido mixtum , cui præcipue suas vires debent spiritus salis dulcis , spiritus asthmaticus Michaelis , spiritus tartari , gummi ammoniaci , myrrhæ , acetum squilliticum , acetum destillatum cum cancrorum lapidibus mixtum , quæ pituitosi humoris expectorationem in asthma suffocativo , inque reliquis pectoris affectibus , ubi pulmonum vascula crasso & glutinoso humore infarcta sunt , egregie juvant. Abstinentum tamen ab iis est , si falsi acres & nondum cocti humores pectus obsident , qui siccam tussim proritant , & respirationem difficilem reddunt. Nihil enim magis dispositionem ad phthisin & pectoris morbos corpori inducit , quam imprudens & inconsideratio expectorantium usus ; quippe quæ sanguinem & humores magno cum impetu & larga in quantitate ad pulmones impellunt , unde graves decubitus vasorumque obstructions oriuntur.

§. XXXVI.

Properamus nunc ad illa remedia , quæ mucosam materiam ex narium tunicis , vel cum sternutatione vel sine ea eliciunt , quorum illa sternutatoria , hæc errhina appellari solent. Sternutatoria ipsam duram matrem afficiunt eam irritando & convellendo , ipsumque pectus simul in consensum trahunt ; quod maxime efficiunt principio subtili acri caustico , quale obtinent helleborus albus , helleborus niger , euphorbium ; in quibusdam tamen acre hoc sal minus causticum , sed magis temperatum reperitur , ut in pulvere majoranæ , pulvere florum liliorum convallium. Mitius agunt errhina , quæ subtili acri salino stimulo collectas in narium tunicis mucositates leniter educunt , cujusmodi sunt herba betonicæ , organi , thymi , saturejæ ; ex gummatibus benzoe , ejusque flores , gummi guajacum , resina guajaci , rasura ligni aloes , caryophylli , & varia ex aroma-

tibus parata olea ; ex radicibus pulvis betæ rubræ , flores rosarum , flores tunicæ , & maxime omnium variæ species tabaci. Ex mineralibus denique huc spectat vitriolum album , quod in aqua majoranæ probe dilutum & postea naribus ad aliquot grana attractum mucositates potenter educit.

§. XXXVII.

Reliquum est , ut etiam salivantium principia modumque agendi inquiramus. Operantur hæc subtili stimulo salino minerali , quo glandulas salivales & vasa lymphatica paulo acrius stringunt , & ad majorem salivæ lymphæ secretionem adhortantur. Atque in his principem locum tenent mercurialia , ut mercurius dulcis , mercurius præcipitatus albus , arcanum corallinum , turpethum minerale , flores mercurii Untzeri. Mitiolem vero indolem induunt mercurialia , quando cum sulphure minerali combinantur , quo pertinent ex cinnabarinis cinnabaris vulgaris nativa , cinnabaris antimonii , æthiops mineralis , mercurius dulcis cum floribus sulphuris mixtus ; ex antimonialibus eminent tinctura antimonii tartarifata , tinctura antimonii secundum Basilium Valentinum parata , it. panacea Glauberiana , sulphur auratum , sulphur auratum martiale , & mercurius noster diaphoreticus fixus. Hæc remedia magni usus sunt in sananda lue venerea , siquidem lympham leniter commovent , & obstructions expediunt. Neque facile in refractiori dosi adhibita salivam cient , sed potius diaphoresin procurant , eorumque operatio feliciter succedit , si cum decoctis lignorum sudoriferis temperatioribus propinantur. Ex quibus jam dictis & in medium adductis clarissime apparere arbitror , omnes , cujusunque etiam generis fuerint , remediorum vires , facultates & modum operandi principiis & causis manifestis , sensibus & rationi obviis , physico-mechanicis superstructas esse & ad eas classes optime reduci posse , quibus causæ , quæ morbos inferunt , & naturalem corporis statum perturbant , continentur.



DISSERTATIO MEDICA

D E

DIFFERENTI MEDICAMENTORUM OPERATIONE SECUNDUM DIVERSAM CORPORIS HUMANI IDIOSYNCRASIAM.

Primum edita Anno 1721.

Q. D. B. V.

§. I.

Vires medicamentorum scire & explorare, inter præcipua docti & periti Medici pertinet officia; hæc autem scientia præter judiciose instituta experimenta physico-mechanica & propriam experientiam, nullo ex alio melius est comparanda fonte, quam ex observationibus magna longaque diligentia accurate notatis. Si vero practicos celeberrimorum Medicorum libros evolvimus, atque observationes de medicaminum effectibus examinamus, quem prohi Deum immortalem! non invenimus dissensum cum quosdam certum remedium in morbis ad cælum usque extollere, alios contra idem illud maxime vituperare sæpenumero animadvertatur; & præterea quilibet horum dissentientium nihilominus ad experientiam tanquam ad anchoram sacram confugiat. Verum multos culpandos esse Practicos ideo existimaverim, cum fallaci & temeraria sapius experientia, annotati fausti vel infausti a medicamento dato effectus causam, nullo habito ad individua & causas concurrentes respectu, mox ipsi remedio tanquam causæ adæquatæ adscripserint. Quem frequentem Medicorum errorem bene quoque observavit BAGLIVUS *L. I. prax. c. 5. §. I. & 8.* ubi ita ait: *multi siquidem ob faustos eventus semel vel bis observatos ex aliquo remedio, vel potius ob innatam quandam proclivitatem tum laudandi, tum fingendi ad lulum medicamentorum vires, ita erga remedium aliquod afficiuntur, ut putent, illud unum ad curandos quosque morbos summam vim ac veluti imperium obtinere. Sed progressu temporis re melius perspecta, illud particulare & instabile, non vero commune ac perpetuum fuisse, animadverterunt.* Hæc igitur cum ita sint, eo omnium maxime allaborandum est, ne temerariis ejusmodi observationibus, temerariam facile demus fidem, sed ut omnia prius accurate examinemus, & veras tam differentis medicaminum operationis causas solerti indagemus studio.

§. II.

Ast cum experientia quotidiana, me tacente, cui libet luculentissimis demonstret exemplis, medicamenta hoc corpus non eadem semper ratione quam alterum afficere, nunc modo ante omnia quæstio o-

ritur, quæ sit differentis medicaminum operationis causa? Necessarium est, ut aut in medicamento, quod agit in corpus humanum, aut in corpore humano, lateat fundamentum. Medicamentorum naturam & vires si penitus scrutamur, admodum bene cognoscimus vim agendi ipsorum esse physico-mechanicam, nec itaque sine evidenti fictione facultatem diversimode agendi medicamenti adscribi posse, nisi corpus humanum pure passivum esse, falso præsupponeremus, atque Archæum sive alium spiritum secundum ideas agentem in naturam medicamentorum intrudere vellemus. Primo autem corpus nostrum inachina est, quæ sine motu & activitate non concipi potest; secundo argumentis solidissimis, & omnium primo quidem ab Illustri PRÆSIDE, & postea per Illustrem LEIBNITIUM, consentientibus id aliis celeberrimis Viris dudum demonstratum fuit, nullum corpus pure esse passivum, sed activum, nimirum quod vis movens nitens & renitens omni corpori innata sit & essentialiter inhæreat, sequitur abhinc & corpori humano propriam inesse activitatem. Archæi dudum ex orbe relegati, aut alius spiritus in omnibus corporibus existentia nunquam demonstrari potest, quamvis nonnulli maximi nominis Viri id irritò conatu ausi fuerint. Cum igitur ex modo medicamentorum in corpus humanum agendi physico-mechanico, differens ipsorum operatio non deduci possit, neque insuper principium secundum ideas agens in natura medicaminum existat, neque corpus humanum per se pure passivum sit, luce clarius patet, causam diversæ operationis non ex natura pharmacorum solum sed ex alio insuper fonte esse petendam.

§. III.

Si itaque variantium ab applicatis remediis effectuum causa, non in natura medicamentorum inveniri potest, ut illud ipsum in alio subjecto quæramus, noster labor esto. Nullum vero aliud subjectum notum est, in quo hæc causa existere posset, quam corpus humanum, in quod agunt medicamenta, & in quo differens ipsorum observatur operatio. Quemadmodum vero unius effectus plures possunt esse causæ, ita & in corpore humano variæ deprehenduntur, quæ maxime medicamentorum operationem modificare possunt. Superfedeo hic eas omnes ordine longo recensere, sed IDIO-

SYNCRASIAM

SYNCRASIAM saltem paulo accuratius considerare mecum constitui, quomodo scilicet ipsa, & pro diversitate ipsius in individuís occurrente, diversam efficere possit remediorum operationem. Nemo autem a me expectet, omnes hac in dissertatione me adduxisse medicaminum operationes, quas per Idiosyncrasiae vires diversimode mutatas attentiores observarunt, cum alias magnum conscribere necesse habuissem volumen, sed nostrum institutum saltem eo directum est, ut demonstrem, Idiosyncrasiam ea pollere facultate, pro ipsius diversitate differentem remediorum edendi effectum.

§. IV.

Verum nunc ante omnia demonstratione opus est, cur nimirum Idiosyncrasia pro causa differentis medicamentorum operationis sit agnoscenda. Canon Philosophorum est: *Causae non tantum ratione activitatis, sed etiam receptivitatis operantur*; sive ex activa rei virtute & reactione corporis quod recipit actionem, demum certus producit effectus. Et quemadmodum in toto universo, ita & in corpore humano sive sano sive male affecto, omnes effectus & operationes non nisi motu fiunt; ex physicis vero & mechanicis notum, non in uno & simplici corpore motum existere, sed demum ex duorum congressu & reactione emergere, ipsamque vim motricem unius corporis ab alterius reagentem mirifice modificari, adeoque de nullo etiam medicamento in se considerato, certus quidam effectus salutaris vel minus talis praedicari potest, licet eidem vis quaedam ad exerendam actionem insit. Ex quo igitur consequitur nullum medicamentum absolutae esse virtutis, efficaciamque medicamenti non solum a se ipso, sed potissimum a corpore, quomodo nempe hoc recipit actionem medicaminum, & in hanc reagit, dependere. Pro reactione igitur corporis humani in medicamenta, diversa resultat operatio. Reactio autem corporis cum a natura solidorum & fluidorum utrorumque motu dependeat, atque solida & fluida in corporibus maxime differant, quae naturalis corporum differentia Idiosyncrasia a nobis appellatur, non ulterius obscurum erit, cur quoque differens medicamenti diversis natura individuís oblata observetur operatio.

§. V.

Veram Idiosyncrasiae dare definitionem, difficilis admodum labor erit, praecipue cum multi adhuc Idiosyncrasiae effectus maxime obscuri sint, & a perspicacissimi etiam ingenii viris solide explicari haut possint. GALENUS & cum eo plurimi Idiosyncrasiam definiunt, quod sit cujuslibet hominis peculiaris temperatura. Terminus temperaturae autem, cum non accuratum ex ipsa corporis humani natura subministret conceptum, & praeterea Veteres eodem sub temperaturae termino certas saltem humorum in corpore humano existentium intellexerint qualitates, nostris vero temporibus a praestantissimis Medicis in saniori Physiologia, quae solidis physico-mechanicis fundamentis superstructa est, evictum sit, a solidorum structurae diversitate, diversitatis operationum in omnibus corporis humani functionibus causam esse repetendam, ut & crasin sanguinis atque humorum, horumque motum in circulum abeuntem, unde secretiones & excretiones, a solidorum horum constitutione & actione in hac ipsa fluida, potissimum dependere; mallem Idiosyncrasiam dicere: naturalem & multis individuís particularem corporis humani, imprimis vero partium solidarum, generisque nervosi constitutionem, ad certos atque insolitos saepe motus & effectus edendos aptam. At quod

Frid. Hoffmanni Oper. Supplem. II.

attinet differentem medicamentorum operationem, per illam equidem intellectam volo tam fortiolem & debiliolem, quam citatorem & tardiolem, imo alias prorsus insolitam; interea illud hoc loco maxime monitum cupio atque urgeo, quod adhibita summo studio observationes symptomatum & concomitantium & subsequentium, quae post usum pharmacorum ex diversa Idiosyncrasia unice resultant, ad intime cognoscendam hancce differentiam omne fere absolvant punctum.

§. VI.

Poscit nunc tractationis nostrae ratio, ut videamus & exploremus, quae in diversis individuís observetur Idiosyncrasia, in quo consistat, & quomodo hac tam diversimode modificare possit medicaminum operationes. Ubi primum eminentiores, frequentiores, & quae pluribus simul conveniunt Idiosyncrasiae species examinare consilii erit, antequam ad particulares Idiosyncrasiae effectus nos convertimus, quorum multi adhuc fere nodi gordii Medicorum merito dici merentur. Veniat igitur omnium primo nostrum sub examen robur atque imbecillitas, praecipua illa corporum humanorum qua inter se differunt, proprietas. Quod illi homines, qui strictiori corporis habitu, majoribus nervis, tendinibus & vasis gaudent, robusti, omnesque in illis functiones vegetae deprehendantur, ideoque constantiori fruuntur sanitate, & non adeo facile afficiantur laedanturque, illi vero qui spongiosiore constitutionem, minores nervos & vasa sanguifera & quidem copiosa habent, in omnibus functionibus languore, & verbo imbecillitate laborent, eamque ob causam ad motus anomalos data levi occasione maxime proclives sint, experientia pro me loquitur. His igitur ita constitutis, facili perspicitur negotio, cur idem dosi pharmacum, valide vel leniter alvum aut vomitum moveat, & materia noxia in quibusdam corporibus e. g. rusticis nil quicquam moveat, sive perturbet, in aliis vero ingentes turbas faciat. Vulgare & frequentissimum hoc est, ubi manifeste videmus causam diversae medicamentorum operationis non in medicamento, sed in differenti corporum robore atque imbecillitate sitam esse. Quare & suo tempore jam venerabilis Medicorum Parens HIPPOCRATES *Lib. de locis in homine, haec bene observans inculcat: medicamentum singulis secundum naturam, debilibus debilia, fortibus vero fortis naturae pharmaca exhibenda sunt*; ut & CELSUS: *Imbecillibus hominibus rebus infirmis opus est, mediocriter firmos media materia optime sustinet, & robustis apta validissima est*. Nec mirum, inde videri potest, cur hanc ob notabilem corporum differentiam medicamen aliquod fortius sapius huic aegroto oblatum insigne afferat levamen, in alio vero subiecto nullum, in quo haud raro potius symptomata morbi exasperat. Namque ad omnes salutares in corpore humano perficiendos effectus, exquisita inter agentis & reagentis vires requiritur aequabilitas atque proportio, & natura humana, ut ex vero dicit HIPPOCRATES, ab omni excessiva qualitate laeditur, id quod imprimis in imbecillibus observatur. Quare illi non leviter in leges artis impingunt, qui hancce corporum differentiam haud attendentes, natura debilibus heroica remedia porrigunt, quippe quae vires eorum opprimunt, & penitus saepe prosterunt. Idem esset error si robusto nimis debilia offerre vellem remedia, ubi quidem materia, quae in vitio est, & quam evacuare volo, iisdem commoveri, non vero e corpore proscribi, malumque ideo exacerbari potest. Et cum ad salutarem medicamentorum effectum ap-

prime pertineat, ut hunc ipsum morbi symptomatumque mitigatio sequatur, in quem unicum etiam finem ægrotis medicamina porriguntur, ita quamvis acrius e. g. purgans in debili subiecto per copiosum alvi secessum, sicuti in robusto suam operationem felicissime exferere videatur, tristes vero concomitantiae & consequentiae satis superque testantur operationis differentiam. Possem dicta a me optimis illustrare exemplis, cum copiosa in Medicorum scriptis prostant, sed quia hæc Idiosyncrasiae species aliis quoque naturalibus corporis constitutionibus juncta est, ne hic præter necessitatem nimis longi videamur benevolum lectorem illuc remissum cupimus.

§. VII.

Accedimus ad ætates, & quemadmodum hæ ipsæ in pathologicis haud immerito magnæ sunt considerationis, & præterea mirum in modum remediorum operationem variam causantur, eorumque selectissimorum etiam vim infringunt, imo creberrime prorsus eludunt, ita non sine ratione me facere arbitror, si & illas paulo accuratius considerare operam impendam. GALENUS ejusque sectatores causam quidem mutationum corporis per ætates in certis humorum qualitatibus quæsiere, sed falso, quare hodie ex autopsia corporis humani & experientia rectius in foro medico per ætates, eminentes partium quidem omnium, sed præcipue solidarum, quæ certis temporibus accidunt, intelliguntur mutationes, annique quivis septimi; ubi ut plurimum hæ ipsæ mutationes in corpore se manifestant, secundum etiam Veteres dicuntur climacterici. Nam procedente ætate & quolibet septenario peculiarem & novam quasi partium solidarum fieri texturam & constitutionem, fluidorum ipsiusque sanguinis crasin atque temperiem, adeoque & motum humorum multum immutari, quotidiana docemur experientia. In pueritia nempe insignis fibrarum mollities, remissio, laxus & rarus habitus, cum feri abundantia adest, juvenes autem fibras strictas & tensas obtinent, sanguinemque calidiorem & mobiliorem alunt; senibus denique propria est magna solidarum rigiditas, & viarum atque canalium angustia, nec non falso-sulphurea humorum dyscrasia.

§. VIII.

Cum igitur diversis ætatibus, diversa sit partium corporis humani conditio, non mirandum erit, differentem medicamentorum in praxi clinica experiri efficaciam. Etenim non aliter fieri potest, quam ut pro diversa partium & per consequens motuum microcosmicorum indole variet quoque receptio actionis remediorum, & in ea reactio. Sic e. g. constat infantibus oleis anethi, liliorum alborum &c. interne assumtis & etiam abdomini saltem illinitis optime alvum solvi posse, quæ operatio in adultioribus subiectis ob strictiorem corporis habitum haut obtineri potest. Quare pro hac ipsa corporis per ætates varietate, varia & accommodata methodus medendi excogitanda est & adhibenda; omnibus ætatibus enim non eadem convenire auxilia, quippe quæ ab illis mire modificari possunt, ratio suadet, experientiaque luculenter confirmat. Quamlibet insuper ætatem ex natura ipsius suos proprios alere morbos certum est, quos & suo jam tempore HIPPOCRATES satis descripsit *sect. III. aph. 24-31*. Et hi morbi optime commonstrare poterunt, quæ naturali corporis per ætates conditioni insit facultas infringendi medicaminum vires alias se exferentes. Copiosæ enim Autorum observationes, proh dolor! satis superque testantur, plurimos certæ ætati pro-

prios morbos ita esse pertinaces & inexpugnabiles, ut optimis & iisdem alias morbis longo usu probatissimis nihilominus non cedant remediis, minimum admodum raro veram admittant curationem, ut tinea capitis, epilepsia, memoriæ debilitas, convulsivi artuum motus, insania, mania, in sequiori sexu defectus fluxus menstrui justo tempore non erumpentis, passionisque hystericae, in senio confectis scorbutus, calculus, arthritis, podagra nodosa, dysuria &c. Et nisi alio accedente ætatis periodo multi horum morborum ex mutata corporis natura sponte sanentur, miserior sane adhuc esset hominum calamitas. Vehementer autem dolendum, quod nec hocce naturæ beneficium semper præsto sit, ubi demum eo minus salutis & convalescentiæ spes per medicamenta expectanda est. Confirmat id HIPPOCRATES *sect. III. aph. 28*. dum ait: *Quicumque pueriles morbi perdurant nec desinunt, quum ex ephebis egressi sunt, aut feminae, quum menstruales esse inceperunt, consenescere consueverunt*. Nec non testimonio esse potest CELSI sententia *L. II. c. II.* dicentis: *si quæ genera morborum in infantem inciderunt, ac neque pubertate, neque primis coitibus, neque in femina primis menstruis finita sunt, fere longa sunt*. Neminem interea, qui de rebus medicis cum ratione judicat ideo concludere puto, ac si hoc vel illud remedium, quoniam in ejusmodi difficilibus ætatum morbis non deprædicatum edit effectum, in ejusmodi generis morbis debellandis, si ab aliis causis hi ipsi alia infestant individua, nullius sit usus & præstantiæ, cum semper in praxi eo respiciendum, an causæ quæ morbos efficiunt sint mobiles, & an ad has feliciter eradicandas vires medicamentorum sufficiant.

§. IX.

Hæreditariæ dispositiones, ab illa corporis humani Idiosyncrasia quæ ex ætatibus resultat, non multum recedunt, eas enim insigni pollere facultate medicaminum effecta varie mutandi ex eo colligere licet, cum præstantiam optimorum etiam remediorum non raro dubiam faciant, adeo ut illas hic nostro subicere examini omnino operæ pretium sit. Crebriori observatu in comperto est firmos & robustos corpore ac animo parentes, valentes ac sanos: imbecilles contra, valetudinarios e. g. phthificos, hypochondriacos, calculosos, podagricos, epilepticos, melancholicos, quin haud raro hydropicos & cachecticos; senes quoque & ebrios, debiles teneros ad eosdem morbos proclives iisdemque plerumque obnoxios gignere infantes. Refert copiosa ejusmodi exempla ex Autoribus medicis fide dignis *Illustris PRÆSES* in *diff. de affectibus hæreditariis*, illorumque origine Anno 1699. Halæ habita, quæ hic quoque fusius allegare, non necessarium duco. Verum quod hæreditaria ejusmodi labes, si invalescit, & in morbum erumpit apertum, ut ab omnis ævi celeberrimis, ita & hodiernis practicis uno ore consentientibus, maxime difficilis sit curatu, & ægre admodum sanationem admittat, facillime recrudescat, & plurimum negotii Medicis faciat, optime testatur RODERICUS A CASTRO in *Med. Polit.* qui *L. III. c. 18.* inquit. *Incurabiles sunt plerique omnes morbi hæreditarii & congeniti, ut cæcitas nativa, surditas, gibbositas, aut congenita fatuitas, quæ nulla omnino arte curari possunt, & multo minus defectus originalis membrorum, item elephantiasis ex utero contracta, calculosa & podagrica dispositio, quæ etsi aliquando summa cura & victus accuratissima observatione nonnihil sublevari queant, nunquam tamen proclivitas ad hæc mala ita eximitur, quin levissimo errato commisso redeant*. Cum igitur hæreditaria il-

la corporis humani vitia tam pertinacis ab omni memoria observata sint indolis, ut selectissima & prudenter exhibita remedia raro ex voto, sed crebrius nihil prorsus juvent, uti frequentissimæ Practicorum querelæ testimonio sunt, non immerito genuina congenitorum ejusmodi malorum considerata est causa. Et hæc dum in vitiata staminum, fibrarum, vaporumque, e quibus corpus coagmentatum est, structura & illorum nimia sive laxitate, sive strictura atque tensione, ac horum nimia vel amplitudine vel angustia ab ipsis parentibus connata, quærenda est, non ulterius quæ hucusque protulimus obscura esse poterunt; difficillimum enim esse cujusdam partis conformationem aliam facere & immutare, ratio agnoscit, & experientia confirmat. Ex his itaque allatis luculenter apparet actionem optimorum etiam medicaminum in corpus nihil juvare, salutaremque non edere posse effectum nisi adsit in corpore dispositio, quæ actionem illam debite recipere valet.

§. X.

Temperamentorum ut quoque hic injiciamus mentionem, quorum inter Medicos magna semper habita fuit consideratio, admodum consultum erit, quippe illa ad varietatem corporis humani, tam in ipsis partibus solidis & fluidis, quam in motibus vitalibus animalibus & naturalibus magnum conferunt momentum. Et cum nostra sit sententia a reactione corporis maxime dependere remediorum effectum, quilibet perspiciet merito temperamenta nostra in tractatione suum invenire locum. Nos equidem non latet, multos existimasse Medicos, frustraneo conatu temperamenta in forum medicum fuisse introducta, cum re ipsa non existerent. Nec male hancce aluerunt opinionem, si nimirum temperamenta sensu Veterum sumuntur, & inter illos præcipue inventoris GALENI, qui ea ex certis humorum deduxit qualitatibus. Interea quia experientia nos docente nihilominus in confesso est, observari eminentiores quasdam subjectorum differentias, quæ suum quoque in corpore humano habent fundamentum, ne præter necessitatem terminologia medica augeretur, non adeo male terminus hic temperamentorum nomine veniens retentus fuit, modo quod naturam individuorum ejusque diversitatem accuratiori studio scrutantes, & ab antiquorum sententia in multis prorsus inani recedentes, temperamenta ex evidentioribus & revera in natura humana existentibus causis deducant, eaque in verum praxeos usum explicent. Nolo autem nec differentias temperamentorum, nec veras eorum proprietates jamjam fusius ex brevitate studio recensere, cum cuilibet artis medicæ addicto eas ex præstantissimis celeberrimorum Medicorum scriptis optime perspectas esse, præsupponam.

§. XI.

Facultates temperamentorum varie operationem remediorum modificandi, ex natura & pro diversitate illorum me non adeo difficulter demonstrare posse confido. Etenim si considero in sanguineis & cholericis, sanguinem solummodo illum calidum, atque activæ indolis, motu solidorum admodum vegeto in circulum abeuntem, in phlegmaticis contra humores serosos & impuriore, laxiorem solidorum habitum, motusque languidiore, & denique in melancholicis majorem fibrarum densitatem & rigiditatem, unde circuitus sanguinis difficilior & tardior resultat, ratio dicitur, dissidentem ejusmodi & variam solidorum ad fluida, & fluidorum ad solida habitudinem ad medicamentorum aliam atque

aliam operationem plurimum valere. Sic e. g. validius purgans pituitosum sive phlegmaticum subjectum, debilius vero quod bile laborat, aut cholericum requirit. Quo autem majus a me dicta accipiant robur, e re erit allegare exemplum quoddam ex *Illustris PRÆSIDIS T. IV. med. rat. syst.* ubi in prima morborum enarratione, cholerici cujusdam Viri febre tertiana laborantis meminit, qui cum a Medico in auxilium vocato non aliis quam salinis medicamentis liberali manu & repetitis dosibus exciperetur, nullum, his quantumvis diu usurpatis, sensit levamen sed potius gravioribus magis magisque incrementibus misere affligebatur symptomatibus. Salia quam præstantis alias in intermittentibus sint virtutis notissimum est, illam vero per salia medendi methodum hoc in ægro tam malum habuisse successum, secundum etiam *Illustris PRÆSIDIS* additam epicrasin, ratio a cholerica corporis constitutione, aliis non exclusis circumstantiis deducenda est. Namque alia sepositis omnibus salinis methodo medendi *Illustris PRÆSIDIS*, cui postea committetur hic ægrotus, afflictas has partes mulcente, spasmos complacante, & febriles demum motus diu jam corpori inhærentes sistente atque compescente, non solum symptomata omnia mox mitigata fuerunt, sed & febris fugata nunquam rediit. Addatur *Observatio IX. sect. I. c. I.* jam citati libri, ubi aliud adhuc refert *Illustris PRÆSES* exemplum, quod huc maxime spectat, cum luculenter ostendat, quæ temperamentis insit facultas mutandi medicaminum operationes. Optandum itaque esset ut omnes medicinam exercentes temperamentorum rationem curæ cordique haberent, & tandem cognoscerent morbos non semper una medendi methodo esse excipiendos. Verissimum enim manet, & nunc citata exempla luce clarius illustrant effatum HIPPOCRATIS qui libro de arte §. 7. ita ait: *quæ profuerunt ob rectum usum profuerunt, quæ vero nocuerunt, ob id quod non recte usurpata fuerunt, nocuerunt.*

§. XII.

Præterea exacte ratio habenda est sexus, qui non raro etiam multum confert, ut solitus & desideratus medicamentorum haud obtineatur effectus. Etenim systema nervorum in feminis admodum imbecille & sensile est, ut abhinc non mirum sit, si ipsæ motibus spasticis & convulsivis vehementius & levi de causa afficiantur, quam virilis sexus, ubi majus ut plurimum adest robur, atque motus constantiores non adeo facile in anomalos abeuntes præsto sunt. Cui enim ignotum est feminas ex Idiosyncrasia quadam, i. e. ex congenita ipsis nimia generis nervosi sensibilitate ad passiones hystericas maxime inclinare, & illis levi saltem facta partium nervosarum irritatione misere affligi; id quod curioso exemplo, quod apud PANAROLUM *Pentec. III. obs. 17. p. 76.* existat, confirmare potest foemina, quæ pudenda aqua florum aurantiorum abluens hysterica correpta fuit passione. SYDENHAMIVS itaque *Diff. epist. p. 515.* non male agit, dum serio animadvertendum esse monet, nonnullas foeminas Idiosyncrasia quadam ab hysterice illis medicamentis (quæ plerisque hujus morbi symptomatibus levamen adferunt & solatium) ita penitus abhorrere, ut non solum non juventur, sed etiam insigniter ab eorum usu ledantur. Crebriori enim constat observatione, foeminas ex odore e. g. Ambræ, Moschi, &c. ob particulas nimis subtiles, membranis se insinuantes, fluidumque nerveum in motus anomalos cientes, in hysterica non sine periculo incidisse symptomata. Verum insignem ejusmodi sequioris sexus Idiosyncrasiam,

siam, non solum quoad hysterica, sed quoad multa etiam alia remedia notam esse testis est jam allegatus SYDENHAMUS, qui c. l. refert: *fœminas nonnullas variolis laborantes syrupi e meconio usum ferre non posse, utpote a quo vertigines, vomituritiones, & id genus symptomata ad affectus hystericos pertinentia accersantur, quibus tamen laudanum liquidum apprimere conveniat*; additque exemplum nobilis adolescentulæ, ubi ipse hæc omnia observavit. Vidimus hucusque quam mirifice variata medicamentorum operatio ex imbecillitate & sensibilitate feminis quasi propria resultare possit, nunc saltem restat paucissimis adhuc considerare, illum sequioris sexus statum, quem menstruus sanguinis fluxus causatur. Perpetua constat experientia inordinate succedentem fluxum mensium (cujus causa haud raro in labefactato a natura uteri vasorumque tono latet, qui tanquam Idiosyncrasia quædam huc spectat) multa eademque atrocita excitare mala, quæ multum laboris Medico faceffunt, quoniam optima quoque adhibita medendi methodus, turbatam exinde corporis œconomiam difficillime in ordinem redigere potest. Quid enim emmenagoga & roborantia medicamina in ejusmodi uteri affectibus valeant, copiosæ Autorum docent observationes, ex quibus satis superque discimus, quam varie modificari soleant pharmacorum operationes, & eorum vires infringi. Nec rara sunt exempla emmenagoga remedia alias non contemnenda, martialia &c. ob improvidum paulo eorum usum, multa periculi plena produxisse symptomata, ut sæpenumero vehementes in nobilioribus locis hæmorrhagiæ, magnæ congestiones sanguinis, stases ejusdem, inflammationes, obstructions pertinaciores, indurationes viscerum, tumoresque pedum œdematosi, imo hydropis species, ortum suum traxerint. Ex quibus vero dictis luculenter apparere arbitror, sexus considerationem a Medicis utique magni habendam esse, imprimis dum perspeximus, differentem admodum exinde medicamentorum dependere operationem, & non probe observata sequioris sexus Idiosyncrasia ægras per innocens remedium in discrimen vitæ conjici posse.

§. XIII.

Restat adhuc alia Idiosyncrasia species ratione affectum animi, ad quos multi homines præcipue vero sensibilibus & imbecillioris naturæ ab incunabulis ita proclives sunt, ut hi ipsi affectus in ipsis levissima data occasione non sine damno excitentur. Experientia crebriori constat, pathemata animi sanguinis circulum, & ab eo dependentes partium functiones, vehementer celeriter & diversimodo perturbare posse, ut in gravi ira & terrore maxime conspicuum est. Quam etiam ob rem Pathologi hodierni in arte exercitatissimi non immerito ab antiquorum sententia abierunt, qui animi commotiones inter causas morborum remotiores referunt, cum affectus animi celerrimæ sint activitatis, & jure maximo immateriales causæ, quæ motus morbosos proxime efficiunt, appellari possint. Nolo hic truculenta illa præter necessitatem multis recensere symptomata, quæ affectus sequi solent, nec pathematum animi in corpus agendi modum sollicite adeo explicare, sed potius me eo convertere consilii erit, ut licet paucissimis demonstrarem, eam pathematum animi esse facultatem in corpus agendi, ut exinde etiam diversi medicaminum resultent effectus. Emetica enim & purgantia paulo fortiora nec non aquam frigidam in subjectis ab ira commotis non medicamentorum sed venenorum instar operari, & lethalia non raro inducere symptomata multa Autorum testantur observationes, videaturque imprimis *Illustris*

PRÆSIDIS Diff. de Medicina emetica & purgante post iram veneno anno 1721. Halæ habita (insertaque Tom. VI. ejus Operum) Terrorem atque mororem singulari pariter pollere efficacia microcosmicos turbandi motus, & his mediantibus effecta medicaminum diversimode modificandi imo ipsorum vim insitam non raro augendi atque infringendi, crebriori id confirmante experientia non adeo difficulter demonstrari posset, cum autem mihi properandum sit ad examinandos particularis Idiosyncrasia effectus, nolo ulterius huic tractationi insistere, sed coronidis loco practica saltem monita allegare ex TULPIO Lib. IV. c. 49. ita dicentis: *convenit ægros securos agere, ut corpore tantum non etiam animo laborent, & si quæ sunt quæ ipsorum animos exasperatura sint, optimum est dum ægrotant ea ipsorum notitia subtrahere, & ex BAGLIVO in prax. med. p. 133. cujus verba ita sonant: anima quamdiu in perturbatione est, remedia nequicquam proficient, & licet ea quis recipiat, viribus tamen non auscultatur natura*. Tandem & phantasiæ quæ naturali eademque insigni ad immutandas actiones naturales, & per consequens etiam ad varianda medicamentorum effecta, potentia in multis subjectis gaudet, ut curiosa hinc inde eademque mirabilia in Autoribus existent exempla, nec illas Idiosyncrasias, quæ ratione functionum eveniunt, cum in quibusdam individuis functiones auctas in aliis imminutas, in aliis iterum depravatas observaverint Practici, unde etiam diversæ medicamentorum operationes resultare solent, nostrum vocare sub examen consultum esset, nisi nimiam materiæ ubertatem non mihi, me tamen illi defuturum subens confiteri necesse haberem.

§. XIV.

Examinatis igitur eminentioribus & quæ pluribus simul conveniunt individuis Idiosyncrasia speciebus, nunc merito ad peculiare illos & certis saltem subjectis proprios Idiosyncrasia effectus me converto, qui summe differentes, inconsuetas, mirabilesque medicaminum nobis sistunt operationes, & Autorum observatorumque medicorum studio & fide memoriæ proditæ sunt. Namque omnia alia Idiosyncrasia singularis exempla, quorum ingens ubique habetur farrago & quæ curiosa lectoremque summopere delectare possunt, ad me non pertinent, sed saltem illa quæ luculenter ostendunt Idiosyncrasia inesse facultatem diversimode efficiendi pharmacorum effectum. Sed ut ad rem propius accedam, animus est omnium primo exempla ex Autoribus huc spectantia in medium proferre, & deinde eo quo fieri poterit studio causas eruere, quibus tot mirabiles & maxime obscuri Idiosyncrasia effectus adscribi possint.

§. XV.

Initium faciat celeberrimus BOYLE, de util. phil. experiment. c. 16. p. 321. qui dominam quandam mel ita abhorruisse refert, ut etiam ex adhibito ad vulnus pedis linimento cum melle facto pessime se habuerit. Simili id exemplo confirmat BONETUS, Med. sept. P. 11. p. 381. aliquem nempe fuisse qui assumpto cochleari uno mellis undique intumuit. HENRICUS AB HEER Obs. 29. p. 331. Matronæ cujusdam meminit, quæ degustato saccharo similibusque dulcibus dentium dolore afflicta fuit, imo ex aniso saccharo obducto dentium dolorem, maxillæque tumorem passa. Quosdam in medicamentis rosas, cinnamomum, aut aurantium flores non tolerare posse testis est BARTHOLINUS Hist. cent. III. hist. 28. Sic quoque de aqua rosarum, recenset DOERINGIUS de Medicina L. II. p. 242. Ita nobilem Romanum

sine periculo tertiana laborantem, ob propinatum syrupum rosarum solutivum a quo abhorruit, extinctum narravit HORAT. AUGENIUS commemorante JOH. DOM. SALA, *Art. med. c. 40.* eademque fata mulieri in Batavia contigisse Autor est RHODIUS *Cent. 3. obs. 99.* Quendam porro percepto rosarum odore, aut iis ex longinquo visis, illico in animi deliquium & syncopen incidisse, & mortuum quasi humi prostratum jacuisse refert AMATUS LUSITANUS *Cent. II. Curat. 36.* In alio, quoties florens rosetum intrasset, aut rosam recentem olfecisset, toties catharrum ad nares molestum observavit naturæ quidam curiosus. *Vid. Ephem. Nat. Cur. Dec. II. A. V. Obs. 22.* Alii sternutationem ex rosarum odore contigisse asserit RHODIUS *Cent. 3. obs. 99.* alteri hæmorrhagiam narium concitasse refert ALEX. TASSONUS *L. I. Meditat. c. 14.* & ex eo Rhodius *l. c. Acta Hafniensia A. 1673. p. 206.* de cinnamomo affirmant, quosdam illud hostili odio ita persecutos fuisse, ut dapes aromate illo conditas ne degustare quidem ausi fuerint, esurituri potius quam attacturi. Ex esu corticum aurantium quendam semper colica affectum fuisse, ut & de alio fumto cibo macis floribus aromatizzato testantur *Ephemerides Nat. Cur. D. II. A. VIII. Obs. 169.* MARANTA *L. 3. c. 13. p. 262. Meth. cognosc. simpl. recenset aliquem nullum obsonii genus assumere potuisse, quod tantillum saltem salis admixtum habuit. Multos etiam butyrum non tolerare posse confirmat BARTHOLINUS Hist. Cent. III. hist. 28. qui refert: quosdam saltem butyrum crudum repudiare, liquatum vero in cibis appetere; adducit præterea domesticum hujus averfationis exemplum ad nepotes translatum, quod nempe si vel vi vel blanditiis puerulis butyrum obtrudatur, superveniant vomitus, anxietates, & narium hæmorrhagiæ. Huc quoque refertur quod BORELLUS Cent. 4. Obs. 61. p. 320. testatur de fene quodam, qui lac tanto persecutus est odio, ut nunquam illud degustare voluerit, potueritque, nec in tenella sua ætate materno lacte usus, sed folis jusculis enutritus educatusque fuerit. Curiosum præterea est, quod HENR. AB HEER Obs. 29. p. 320. observavit, quendam nimirum alio rarissime usam fuisse laxante medicamento, quam jure carnis bubulæ, ejusque solo odore, alvum sibi reddidisse laxiorem. Simile exemplum habent *Misc. Nat. Cur. D. II. A. VIII. Obs. 169.* ubi alia assumtis jusculi carnis vitulinæ aliquot cochlearibus purgantem experta est effectum. Alium iterum ex duobus vitellis jusculo mixtis in alvi fluxum pervenisse testis est JOH. HEURNIUS *de febribus c. 14.* De decocto salubri Caffée, quod hodie in deliciis habetur, etiam inconsuetum observavit effectum BOYLE *de util. phil. experim. c. 16. p. 321.* Nimirum cuidam cyathus ordinarius decocto Caffée calido repletus & ante meridiem assumtus, octo decem & nonnunquam duodecim excitavit vomitus, majori cum vehementia, quam ab infuso croci metallorum, vel ab alio emetico solet fieri, qui etiam in progressu odore ex ædibus venditorum Caffée percepto se male habuit.*

§. XVI.

Pergimus exempla Autorum allegare cum tantus eorum numerus exstet, quæ mutatas per singularem Idiosyncrasiam remediorum operationes confirmant. Prodeant *Ephem. Nat. Cur. Dec. I. Ann. 7. 8. Obs. 199.* ubi de absynthii una cum salis fixi averfatione observatio habetur. BONETUS *Med. Sept. P. II. pag. 385.* memoriæ prodidit, quendam nec tartarum ejusque sal cum crySTALLIS, neque spiritum neque tincturam etiam inscie porrectam aliter tolerasse,

quam sudore, angustis, ac lipothymiis. Idem Autor etiam refert, quendam Ischuria laborantem accepisse a medico pulverem antispasmodico-diureticum ex cinnabari natica, lapide cancrorum & sale volatili succini ana drachm. semis, & cum solutione Ischuriæ fuisse purgatam, eundemque pulverem hanc a Medico acceptum non una vice pro purgandi intentione, successu non infelici sumisse. Quendam opiata propter hæreditariam dispositionem a parente translata penitus non perferre potuisse testantur *Miscell. Nat. Curios. Aromat. Ind. hist. l. 1. c. 4.* GARZIAS AB ORTO *l. 9. c. 18.* confirmat contrario exemplo, quosdam ingenti opii dosin impune uti, & meminit cujusdam Viri, qui singulis diebus tres opii laminas, decem drachmas & amplius pendentes, comedit & tamen docte & apte de omnibus disputavit. Quendam porro hellebori totos manipulos sine noxa devorantem THEOPHRASTUS *de hist. plant. l. 9. c. 18.* alium scammonium idque ad drachmam unam atque alteram, imo unciam integram citra alvi laxationem ingerentem, FALLOPIUS *Tr. de simpl. purg. c. 48.* recenset. BONETUS *Med. Sept. P. II. p. 385.* contra ex usu castanearum, ut & PECHLINUS *Obs. 61. Lib. II. de mespilis aliisque adstringentibus fructibus assumtis alvum quibusdam motam fuisse observarunt.* PANAROLUS *Pentec. V. Obs. 23. p. 158.* monialem ob assumtum sassafras ab imperioso Medico præscriptum, cujus odore tamen lædebatur, frigido sudore correptam, totam lividam repente factam, & fere morti proximam fuisse memoriæ prodidit. Simile exemplum de alio, qui lignum sassafras tolerare non potuit, habet HORSTIUS *Manud. ad Med. p. 122.* Alius ex odore liliorum in vomitum incidit *M. N. C. D. III. A. 7. 8. obs. 103.* Quidam vero flores calendulæ *l. jam c.* & generosa femina violarum odorem abhorruerunt, uti testis est BARTHOLINUS *Hist. Cent. III. hist. 28.* Nonnulli mentham odio ita prosequuntur, ut odorem præsentiamque ejus maxime averfentur *M. N. C. D. II. A. IV. obs. 51.* aliusque ejus odore cephalalgia affectus fuit *D. III. A. 7. 8. obs. 103.* femina ejus fragrantiam sudore colliquativo luit *in App. ad Cent. I. II. p. 191.* Neque defunt abstemii a vino, quemadmodum crebrius jam citata *M. N. C.* testantur, de ancilla quæ solo vini odore vomitu affecta fuit *D. III. A. 7. 8. obs. 103. p. 171.* ut & de juvene, qui ab ineunte ætate ne quidem vini odorem perferre, aut cibos cum vino coctos degustare potuit *D. II. A. 9. obs. 108. pag. 346.* De spiritu vini observatum est, quendam eum abhorruisse, imo etiam omnium cum eodem preparatorum medicamentorum odorem pariter ac saporem detestatum fuisse *D. III. A. 2. obs. 78. p. 92.* GREGORIUS HORSTIUS ex aceti odore lipothymiam & syncopen ortum traxisse notavit *L. III. Epist. med. 193.* & PECHLINUS *Obs. 38. p. 515.* de femina refert, in qua minimus aceti usus hæmorrhagiam provocavit.

§. XVII.

Exemplis de diversa peculiarique individuorum idiosyncrasia diversissimæ medicamentorum operationis causa adductis, multis omissis quæ ex Autorum scriptis sed præter necessitatem adducere potuissem, operæ pretium omnino est, causas superaddere, quibus tam insolita effecta non sine sufficienti ratione adscribere possint. Fateor hocce causarum scrutinium difficile admodum opus esse, omni tamen allaborabo studio, ne pro evidentibus causis occultas secundum morem præcipue antiquorum, qui speculationibus inanibus unice intenti erant, proferam. Celeberrimus ETTMULLERUS *Operum T. II. P. II. p.*

117. 118. edit. *Francos. ad Mœnium in fol.* putat, diversæ individuorum Idiosyncrasiae causas non tantum in crasi succorum, sed etiam in partium mechanica conformatione consistere, eamque in singulis individuis quoad porulos differre, genus vero nervosum ejusque majorem vel minorem sensibilitatem maximum esse Idiosyncrasiarum fundamentum asserit. Et huic sententiæ meum quoque addere symbolum nullus ambigo, plurima enim Idiosyncrasiae effecta ex naturali & diversa in individuis generis nervosi constitutione deduci posse, firmiter mihi persuasum habeo. Sic consideramus partes corporis humani nervosas, fluido illo subtilissimo activo nerveo quasi animatas, unde causa proxima omnium motuum microcosmicorum ordinariorum & extraordinariorum; si examinamus maximum illum generis nervosi & motuum consensum, majorem & minorem sensibilitatem, non adeo arduum erit negotium uti alios, ita & idiosyncrasiae insolitos explicare effectus. Ex nimia abhinc illa, multisque individuis particulari partium nervosarum sensibilitate, & ex illarum & motuum consensu non adeo mirum cuidam videre poterit, quosdam hoc vel illo objecto sensibus externis percepto variis correptos fuisse symptomatibus, cum omnium illorum instrumentorum, quibus mediantibus videmus, odorem percipimus &c. structura ex membranis nerveis, insignibusque nervorum propaginibus potissimum summo creatoris artificio conflata sit, atque insuper rerum externarum eos magis vel minus afficiendi facilis detur aditus. Porro experientia constat nonnullos ab illis, a quibus ex idiosyncrasia abhorrent, licet inscie assumtis, truculenta nihilominus perferre symptomata. Quis autem nescit ventriculum cum annexis intestinis esse nervosissimum, & in quo consensus maximus cum omnibus aliis corporis humani partibus observatur, ut hinc naturæ inimico in his partibus hærente motus facile conturbati resultent, & nunc vomitus, diarrhoeæ, nunc syncope atque lipothymia aliaque multa progenerentur mala. Præterea succorum crasin etiam quandoque aliquid conferre, facile quidem concedere possum: siquidem in illis subjectis, qui a drastringentibus, aliisque heroicis pharmacis ut opio, parum commoventur, humores tenaciores, bilemque non adeo fluidam, sed activitate debita destitutam secerni, maxime probabile est, eam quidem ob rationem, quia bilem humorem esse solventem ex physiologicis, & ingesta plurima in ventriculo hærentia non nocere, quæ vero simulac in intestinum duodenum, ubi bilis conjungitur, pervenerunt sua demum damna exferere, humorum insuper crassitiem & tenacitatem spicula acriorum corporum infringere & retundere, subtilesque narcoticorum particulas involvere, experientia constat. Nec a vero absimile videtur, iisdem contra copiosam, fluidam, justo acriorem & penetrantiorē obtigisse bilem, qui e. g. ab alias adstringentibus &c. laxiorem experti fuerunt alvum. Ad nativam porro nimium activæ indolis bilem, quoque referre potest, colicus ab esu corticum aurantiorum aliorumque aromaticorum excitatus affectus, quippe accessione calidorum penetrantia bilis augetur, ut deinde non possit non intestina acius vellicare. Interea quamvis sic diversam humorum crasin, tanquam causam Idiosyncrasiarum esse agnoscendum videatur, ille tamen, qui accuratius paulisper perpendet omnes in corpore humano secretiones & excretiones humorum a diametro canaliculorum dependere, in naturali & peculiari partium solidarum structura maximum positum esse momentum, mecum consentiet. Tandem minime negandum esse contendo, phantasiæ parentum & præcipue matris utero gerentis

imaginationi, & acceptis eo tempore objectorum averfationibus &c. multum esse tribuendum, quippe hæc omnia tanquam causæ remotiores ad peculiarem ingenerandam foetui, ob teneras & mobiles admodum partes imprimis nervosas, Idiosyncrasiam aptissima sunt. Mirandam enim matri cum foetu esse partium harmoniam, & hinc resultare pariter insignem in utroque functionum conformitatem, certum est. Ex his itaque luculenter ut puto intelligimus, causam tam mirabilium effectuum in differenti corporum humanorum natura latere, nosque non opus habere, ut ad alia eademque falsa anxie confugiamus principia, quæ alios adducere scripta testantur. Interea me non obligo, omnes & singulos ex adductis causis Idiosyncrasiae effectus explicare posse, dum multi adeo difficiles & obscuri sunt, ut præstantissimorum etiam Medicorum & Physicorum ingenia superent.

§. XVIII.

Hæc autem, quæ hucusque ex instituti ratione fusius pertractavimus, in pleniorē rerum medicarum nos deducunt cognitionem, quæ amplissimi & eximii est usus. Namque satis vidimus, quid illa differens & in multis individuis prorsus peculiaris Idiosyncrasia in varie modificanda medicaminum operatione valeat; ut exinde necessarius ille in praxi clinica maxime observandus Canon quam optime resultet: *Naturam cujuslibet aegroti ante omnia a Medico accurate esse explorandam.* HIPPOCRATES & CELSUS differentiam corporum pro primo artis Medicæ habuerunt fundamento, & omnes qui in artis apollineæ exercitio cum judicio & salutariter versari gestiunt, eandem ambabus manibus amplectabuntur sententiam. Accuratior enim subjecti cognitio, unice ad detegendam multorum morborum atque symptomatum mire sæpiusculè dissidentium rationem, felicemque inveniendam medendi methodum, viam sternit, ut & quibus remediis præservatio morborum instituenda sit, quis & rerum nonnaturalium usus huic vel illi individuo maxime competat, exinde quam facile patet. Ex sedula insuper & sollicita individuarum proprietatum observatione cognoscimus, multa in arte medica occurrere, ubi ab arte recedere ars est. Namque idiosyncrasia medelam sæpissime dirigit & variat, illa interdum suadens, quæ vulgaris usus dissuadet, contra dissuadens, quæcunque usus apta judicavit; & prudentem obligat medicum, ut non raro spectatorem in morbis potius agat quam actorem, cum optima sæpenumero, secundum etiam Hippocratis effatum, sit medicina, nulla ūti. Præterea quicunque sollicite Idiosyncrasiarum rationem habet, ille optime morbos congruos & non congruos distinguere, & qui curabiles & non curabiles scire poterit, imo in nobilissima arte prædicendi felicius quam ullus alius insigne sibi comparabit decus suamque amplificabit famam. Namque si quod naturale in ægroto deprehendet, id etiamsi per se malum sit, pro adeo malo recte non pronunciet; cum e. g. immoderatiorem quandoque in feminis mensium fluxum, copiosas alvi dejectiones & id genus plures excretiones inconsuetas tanquam malas velle exclamare, quæ tamen in salutem naturæ beneficio nocua & superflua removenēte fiunt, nihi aliud esset, quam artis nostræ destruere præstantiam. Non equidem negandum est, accuratam naturarum cognitionem poscere non solum exercitatum in arte virum, sed etiam magnam & operosam observationem; interea qui res medicas cum judicio & conscientia tractat, ille omni allaborabit conatu relationes ad tot diversa individua probe intelligendi & inveniendi, id quod præcipui in medicina studii, laboris atque momenti est, & inter ea jure referendum, quæ vulgus atque empirici

rici non capiunt, ideoque Medicum prudentiorem quoque ab empirico distinguunt.

§. XIX.

Ille differens porro corporis humani indoles, qui tam differentis medicaminum operationis causa, admodum bene demonstrat, quam necessarium sit, ut in remediorum dispensatione valde cautus sit Medicus, qui semper tutiori incedit via si lenioribus, quam pharmaceuticis activioribus sive sic dictis heroicis medicamentis corpora humana excipit. Celebrerrimus & in praxi exercitatissimus THONERUS *obs. suarum L. I. de feb. intermitt. p. 73.* id confirmat, ita scribens: *oportet Medicum esse cautum in prescribendis remediis, prius diligenter perscrutando cujusque naturam prout per vires humanas licet.* Per fortiora autem medicamenta intelligimus, quæ parva dosi magnis agendi viribus instructa evacuandi & adstringendi, commovendi & sistendi, calefaciendi & refrigerandi, lenia contra ac debilia nuncupanda sunt Galenica vulgo dicta, quæ non vi sed blande ac successive operationem suam exsequuntur, nec majori etiam dosi facile nocent. Et cum heroica hæc remedia tam ad juvandum quam nocendum parata esse tristis sæpenumero confirmet experientia, quæ sine dubio etiam fundamentum est, ut antiqui hancce legem artis jam agnoverint, & observaverint, uti testis est HIPPOCRATES *aph. 36. sect. II. de fortibus exempli causa purgantibus hunc in modum dicens: sana etiam corpora cito exsolvunt, multo magis senilia & imbecillia labefactant & detrimento maculant; & CELSUS Lib. V. c. 25.* ubi de anodynis monet: *non nisi nimia necessitas urgeat, ea esse usurpanda.* Idem judicium esto, de aliis penetrantibus & activis medicamentis ut emeticis, sudoriferis & diureticis, quibus applicatis damna ægrotantium non raro intenduntur, & oleum quasi igni admoveatur. Legi hac de re meretur MEIBOMII *celebris Diss. de eximio leniorum medicam. usu*, ubi heroicorum pharmacorum noxam fufius demonstravit. Quam maxime itaque optandum esset, ut omnes, quibus medicamina facere & dispensare licitum est, eo omnes intenderent nervos, ne improvida tam heroicorum quam illorum remediorum, a quibus ex Idiosyncrasia quadam individua abhorrent applicatione miseris ægris morborum symptomata augeant, suæque conscientiae præbeant offendiculum, modo illud probe considerantes, quod de humano ludatur corio. Quare felicem illum non immerito appello Medicum, qui semper caute procedendo cum felicissimo SYLVIO, nunquam

hypercatharsin movisse se gloriari potest. Et quamvis minime negandum sit ex cauta & conscientiosa paucorum Medicorum medendi methodo insignia prorsus in genus humanum redundare beneficia; interea vehementer dolendum est, plurimos ægrotos ex perversa empiricorum, agyrtarum, balneatorum, & id genus medicastrorum cura, in majus adhuc incidere periculum. WILLISIUS itaque *Pharmacœut. rat. P. I.* non sine ratione sollicitè monet: ut quisquis vivere & sanitatem retinere cupit, empiricos cum suis ut plurimum mercurio, elaterio, similibusque paratis drastrictis cane pejus & angue devitet. Verum nemo putet, ac si omnia activioris indolis rejicerem pharmaca; juxta enim COTI regulam in robustis subjectis fortioribus utendum est. Nec desunt, qui e. g. strictam nimis vel immorigeram habent alvum, in quibus passularis & tamarindinatis parum aut nihil efficiemus, ubi jure helleborata & id genus validiora in usum vocare, consultum erit. Præterea difficiles sæpenumero Practicis accidere possunt casus, ubi periculum in mora, & morborum causa quasi vi & aggredienda & exterminanda est, convenit tamen ubique, si lenioribus securis & naturæ amicis pharmacis atrocía non cedant symptomata, activiora parva & repetita potius dosi ægris porrigere, & ut semper accuratum præsto sit Medici judicium.

§. XX.

Et hæc sufficiant, quæ breviter de differenti corporis humani Idiosyncrasia, differentis medicamentorum operationis causa, commentari animus fuit. Potuisssem equidem varia alia ad hanc rem spectantia in medium proferre, & potissimum illum multorum medentium exprobare errorem, qui nulla habita subjectorum ratione, morbos semper eadem ipsis semel edocta & consueta medendi methodo excipiunt, non observantes symptomata morbi ejusque decursum atque remediorum alias non inutilium operationes pro differenti ægrotantium natura variare. Accedit quosdam ægrotos ex Idiosyncrasia nonnulla non tolerare posse medicamina, quæ adeo ab imperioso Medico exhibita, non possunt non maxime nocere, imo quandoque ipsum mortis inferre periculum. Absit igitur a Medico semper naturæ agere velle Directorem, cum ut plurimum ipsi incumbat Ministrum audire, ejusque naturæ tanquam optimæ morborum medicatricis ductum sequi, si in artis exercitio felici versare cupit successu. Ne autem propositos nostra Dissertatio excederet cancellos, ultro alia omittere volui.



DISSERTATIO MEDICA
DE
REMEDIORUM
EVACUANTIUM MECHANICA
OPERANDI RATIONE.

Primum edita Anno 1698.

§. I.

Qui cum certitudine & rationali methodo humani corporis languoribus opportune mederi & succurrere allaborat, eum exquisita remediorum, quæ manus Dei auxiliatrices à GALENO salutantur, notitiâ instructum esse debere, neminem, qui rem penitus inspicit, inficias ire posse arbitror. Optima ratione docuit GALENUS *Libr. III. Methodi V. Medicamentorum facultates nosse methodum medendi præcedit.* Equidem ab omni ævo Medici in eo sedulam navarunt operam, ut remediorum vires atque potestates partim experientiâ, partim ratiocinio explorarent atque inquirerent, verum non æquè felici successu, utpote destituti vera experientiæ clave, philosophiâ, nimiaque ad credendum propensione imbuti, complura sibi aliisque imponebant, & imponi patiebantur, ratione effectus medicamentorum, adeo ut si attenta, sollicita & patienti observatione citra omnem mentis anticipationem in tantopere decantatas undiquaque remediorum vires inquirimus, ea quæ promittuntur minimè vera inveniamus, ut potius conqueri necesse sit, paucorum adhuc simplicium virtutes, quid in morbis sanandis præstent rectè & pleniùs perspectas non esse. Longe autem majores hallucinationes deprehendere est, quando virium rationes reddere nituntur. Dici vix potest, quanta nugamenta atque ineptiæ tunc afferantur, nec subit mirari, siquidem corrupta philosophandi apud veteres in naturalibus ratio non potuit non progignere multas perversas malè intelligibiles in rebus medicis rationes atque hypotheses; Quid enim ineptius est? quam ex qualitatibus primis it. secundis, ex proprietatibus totius substantiæ, idiosyncrasiæ, & specificâ peculiari proprietate, remediorum efficaciam exponere ac declarare. Nec meliori via ingrediuntur chymicæ sectæ addicti, qui ex luminoso irradiativo elemento vel substantia certa mercuriali sulphurea, spirituosa accersunt facultates remediorum, multò minus illorum sententia albo comprobari potest calculo, qui non dubitant asserere, principium corporis nostri movens certa quadam intelligentia, cognitione, directione certum in finem instructum esse, quod vel ipsa remedia averfa prorsus refugiat, & contra ipsa motum instituat, vel cum amicis sese uniat, ipsisque gaudeat. Tandem nec sufficit, recentissimorum philosophorum placitum, qui ex primo primis elementis & à priori ex

atomorum & minutiarum varia figura, situ, structura, varia ætheris dispositione ducere ac derivare amant medicinæ operationes. Quamvis hæc ratiocinandi methodus suo loco & tempore non penitus sit negligenda, non video tamen quomodo intellectui sufficere, & insignem fructum in rem medicam asferre possit.

§. II.

Quocirca placuit & placebit mihi semper ista philosophandi ratio, quæ saltim causas rerum naturalium proximiores in sensus incurrentes persequitur, atque inquirat, & quæ ex cognitione materiæ & naturæ motuum genuinas effectuum causas explicat. Certo enim persuasus sum: quicumque motuum leges probe intelligit, & quomodo motus varie determinet, modificet, ac disponat materiam & vice versa materia variè disponat motum, cognoscat, ille profecto in absconditas causas penetrare, & quæ aliis insolentia & prodigiosa videntur, plane perscrutari potest. Et cum hætenus non infelici successu dicta principia commodissime ad multorum affectuum pathologiam applicata fuerint, experimentum quoque facere volumus applicando ea ipsa ad vires remediorum. Equidem non plane novum hoc institutum est, sed jam dudum ex recentioribus plures contenderunt ex vario remediorum schematismo, crassi, textura, potentiis salinis, particularum gravitate, tenuitate, explicare non inconcinne plurimorum remediorum effectus; Verum enimverò principale ac præcipuum, quo natura in suis operibus gaudet, activum instrumentum, nimirum motum, ejusque leges ferme neglexerunt, & hinc non sufficienter negotium hoc est ab illis exhaustum. Prosequemur autem illud ipsum in quantum virium à Deo nobis concessum est, præsentī inaugurali specimine, in quo tamen propter materiæ prolixitatem tantum evacuantium materiam pertractare atque evolvere allaborabimus.

§. III.

Primum omnium autem memoria illud tenere oportet, princeps naturæ instrumentum quo vita efficitur esse motum. Vita enim præsertim sana corporis nil nisi motio æquabilis partium fluidarum tam sensibilibium, quam insensibilibium per partes solidas est. Motu tali vitali, non tantum totum corpus liberum ac immune redditur ab omni putredinosa corruptione,

ne, sed idoneum efficitur, sensus, motus, nutritio-
nem, & functiones mentis præstare promptissimè.
Motus enim est, qui intimè unit heterogenea san-
guinis elementa in liquorem fluidum: motus est,
quo mediante & concurrente simul mechanica par-
tium dispositione heterogeneæ non miscibiles corrup-
tionem minantes particulae secernuntur ac evacuan-
tur: motus porro est, quo natura sanat morbos he-
terogenea temperando, secernendo & evacuando.
Scitè hanc in rem scribit GALENUS *Libr. IV. Aphor.
Commentar. XXII. & XXIII. Naturæ tria sunt ope-
ra, quæ se consequuntur in morbis, concoctio, secretio,
& evacuatio.* Cum itaque ipsa natura, sub qua non
modo principium vitale movens, impetum faciens,
seu spiritum, seu totam structuram & dispositionem
mechanico-organicam partium solidarum cum fluidis
comprehendimus, morborum optima & certissima
medicatrix ac curatrix sit, passim id inculcante DIVO
HIPPOCRATE, idque ipsum solo motu perficiatur fa-
cilis consequentia est, Medicum, qui naturæ, cujus
constructio à summa divina architectonica ratione cer-
tum in finem dependet, imitator ac minister est,
ante omnia motus in corpore attendere, inordinatos
ac præternaturales sistere, eosque in temperiem &
æquabilitatem reducere, cessantes autem & langui-
dos erigere, & pro te nata ipsos excitare debere.
Medicus enim reverà mechanicè in sanatione mor-
borum procedere debet, motus vel faciendo vel si-
stendo, sive immediate spiritus afficiendo, sive me-
diante materiam vel humores disponendo, ut proinde
non inconvenienter medicina ab HIPPOCRATE Me-
dicorum sapientissimo in *libro de victus ratione* defi-
nita fuerit per artem corporis humani vitia additio-
ne vel subtractione emendandi, quod principaliter
de motu, secundario de humorum temperie ac mix-
tione est intelligendum.

§. IV.

Quando enim recto ac solido iudicio expendimus
atque investigamus morborum genium, apertissimum
est ipsos, quatenus præsentis sunt, & exacerba-
tiones suas habent & lædere dicuntur actiones secun-
dum naturam, nihil aliud esse, quam motiones san-
guinis & spirituum violentas, inordinatas, vel planè
cessantes aut languidas. Febris & spasmus, qui pro-
pmodum cunctorum morborum rationem formalem
absolvunt, quid aliud sunt, quam motiones sangui-
nis vel spirituum intensiores? illius per cor, arterias
& venas, hujus per fibrillas musculares & nerveas.
Optimo jure tota morborum internorum syndrome,
ad duo genera, motum auctum vel imminutum,
potest referri, sanitate in æquilibrio motus, & san-
guinis temperie consistente. Ex eo promptè intel-
ligitur, medicamenta quibus ceu instrumentis utitur
Medicus, ad motus præternaturales nimios cohiben-
dos, vel languidos suscitandos identidem agere vel
operari debere ex eodem motus principio, sive poten-
tia movendi, vel motui resistendi, & hoc negotium
est, quod demonstrandum suscepimus in præsentia.

§. V.

Dicimus autem remedia esse corpora naturalia in-
structa certa ac determinata efficacia movendi, vel
motum sistendi, ad sanitatem hominis amissam re-
cuperandam. Generosa appellantur illa, quæ nacta
sunt magnam potentiam & impetum motus sive quæ
in exigua mole spiritus fortiter commovent, & ita
in morbis refractariis rebellibus magnos effectus præ-
stare possunt; talia sunt vomitoria, purgantia, mer-
curialia, salia volatilia, olea destillata; Generosa
quoque & ea audiunt, quæ ingenti facultate pollent
in parva quantitate magnos & copiosos motus cohi-
Frid. Hoffmanni Oper. Supplem. II.

bendi, cujus generis sunt narcotica, opiatà, anodynà.
Unde facile intelligi potest, quanta cautio, circum-
spectio & prudentia requiratur magnæ efficacæ hæc
remedia debite & congruè adhibendi, ne intempe-
stiva & temeraria exhibitione maximum detrimen-
tum sanitatis vel vitæ efficiamus. Quodocunque
enim peccatur à Medico in curatione morborum,
profecto hoc potissimum accidit circa recensita reme-
dia generosa, non tamen exclusa venæ sectione,
quando nimirum non habito respectu temperamento-
rum, ætatum, habitus corporis, virium, consuetudi-
num, excretionum, vivendi rationis, causarum mor-
bi promiscuè inconvenienti dosi vel tempore illa ipsa
exhibet atque propinat.

§. VI.

Ut autem hanc rem paulò exquisitius & specia-
lius excutiamus, allubescit in medium afferre in præ-
senti evacuantia sic dicta remedia, (rejiciendo cate-
rorum considerationem in aliud tempus,) & breviter
strictimque ostendere, illa ipsa operationes suas unice
exerere per potentiam movendi, vel humores ad mo-
tum naturalem disponendi. Inter hæc autem primum
locum obtinet venæ sectio, generosum ac utilissimum
in permultis magnis morbis remedium. Hæc potissi-
mum vocatur in usum, ut motus vitalis sanguinis &
humorum progressivus languidior, debiliior, ob ni-
miam ejus copiam vasa distendentem & expansivam
spirituum virtutem suffocantem factus promoveatur &
restituatur. Quandoquidem evacuata portione sangui-
nis superflua restituitur proportio inter vim naturæ seu
spiritum in partibus solidis moventem, & inter ipsum
mobile sive sanguinem & humores. Quando enim ni-
mum vasa sanguineo humore infarcta sunt, motus spi-
rituum vitalis ad ipsum regendum, subigendum, in
fluore servandum ipsumque depurandum ab hetero-
geneitatibus suis non sufficit. Sine enim circulari pro-
gressivo libero, ac sufficiente sanguinis motu & traje-
ctione per viscera excretoria, sanguinis textura ac cra-
sis ab omni labe salva ac immunis persistere diu ne-
quit, sed mox impuritates maximæ, obstructions,
stases, inflammationes, dolores, aliaque gravissima
mala subsequuntur, quæ unice & optimè avertere po-
test venæ sectio, motum sanguini liberiores & ex-
crementis secretionem faciliorem concedendo.

§. VII.

Accedimus jam ad ipsa purgantia, quæ non nisi
motu suam exerunt operationem; movent enim in-
testinorum membranas nerveas & carneas, violenter
& fortiter ipsas contrahendo non sine insignibus tor-
mentis, quæ violentiori constrictione & compressio-
ne, partim ipsa contenta intestinorum, partim etiam
varii generis humores per plexus glandulosos, per
ductus ac vias huc terminantes, sæpe magna in co-
pia eliciuntur & exprimuntur. Activum autem &
& movens purgantium principium, quo agunt, est
sal sulphureum, vel etiam resinofum magis vel
minus subtile causticum. Etenim salis crasis ac na-
tura valde est activa, abundantissimè ibi recondita
sunt particulae mobilissimæ, æthereæ, sub figura si-
mul activa: ejusdem commatis quoque est sulphu-
reum principium, in quo concentratus & in vehe-
menti motu inhabitat ather sub contextu ramoso,
activam materiæ subtilis vim remorante ac detinen-
te: & ita ratione principii salino-sulphurei, mo-
tum, irritationem & vellicationem in fibrillis ner-
veis intestinorum tenuissimis efficiunt, à quâ velli-
catione spiritus in maxima copia influunt. Solen-
nis enim & universalis lex est in mechanismo mi-
crocosmico subinde occurrens, membranis nervosis
vehementius à causa externa commotis, affectis, ir-
Ggg titatis,

ritatis, mox subsequi motum partium musculosarum circumjacentium citatiorem, sæpius spasmodicum, constrictivum, propter spirituum ad hanc partem influxum liberalius suscitatum, ut arduum ac difficile sit, à priori propter sensuum imbecillitatem demonstrare, quomodo externum activum corpus, partium solidarum vellicatione provocare possit in tantum tumultum ipsos spiritus; ubi autem spiritus copiosius influunt in partes musculosas, ibi necessario subsequitur in ipsis intensior motus contractivus, qui ad excretionem & expulsionem humoris mobilis requiritur.

§. VIII.

Ex hisce adductis facile intelligi potest, quare activioris temperamenti ac naturæ cholerico-sanguineæ, ætatis juvenilis personæ, omnesque qui mobiliores possident humores, & majorem vim motus in fibris continent, item sub æstivo tempore, longe citius, expeditius, & felicius minima purgantis dosi purgentur & exerceantur, quam phlegmatici, segnioris naturæ & crassioris texturæ homines, nec non tempore autumnali vel hyemali. Perfrequenter occurrit in praxi medica, in quartanariis, hypochondriacis, melancholicis, purgantia difficillime operari, dum etiam drasticorum vim eludunt: hunc effectum hodierni Medici educere amant ex præsentia acidi primæ in regione stabulantis, & purgantis principium alcalinæ causticæ indolis enervantis. Enim vero tametsi dictis in personis acidum frequentius peccaminosum exsuperet, non semper tamen & unice hic effectus ab eo est derivandus; observavimus enim, in quartanariis & melancholicis, quamvis longo tempore remedia potenter acidum destruentia fuerint præmissa, nihilominus purgantia parum vel nihil profecisse. Mea itaque sententia, acceptum referre hoc ipsum debemus tardo & minus vegeto spirituum motui, & crassis & segnioribus partium fibris motricibus, quod etiam valet in ipsis hydropicis, ubi humores non nisi valentissimis ejiciuntur pharmacis, ipsaque emetica defraudantur sua vi, & cedunt in purgantia. Et hæc porro est ratio, quare spirituosæ una cum purgantibus vel etiam emeticis propinata illorum effectum secudent & promoveant. Mirabile alias est, præsentissime supercatharsin sisti spirituosis, aromaticis; quando autem cum purgantibus exhibentur, ipsorum efficaciam adaugere. Ita nobis solenne est aquam menthæ spirituosam loco vehiculi in exhibitione emetici præscribere, vel etiam purgans cum jusculo vinoso assumendum suadere, semper succedente felicissimo effectui. Famigeratissimum est Elixir Thomsonii purgans, quod ex purgantibus lenioribus, carminativis, dulcibus & spiritu vini conficitur. Faciunt hæc omnia ad meliorem purgationem, quatenus motum spirituum augent, & ipsum principium purgantis salino-acre sulphureum in majorem actum & motum deducunt. Et hæc quoque est ratio, quare calor & motus imperetur illis ipsis, qui purgans assumerunt, nimirum ad faciliorem operationem secundandam: & vice versa quies, omniaque anodyna actionem purgantis suspendant, suppriment vel plane exstinguant. Ut itaque nullum dubium remaneat, purgantia agere motu; verum non modo in intestina vasaque ipsis annexa, sed etiam in remotiores corporis partes evibrant suas vires, quod manifestum evadit ex majore pulsu, salivæ fluxu citiori & obstructionibus etiam inveteratis viscerum sublati. Equidem non negamus, in illis remediis quæ in finem purgandi exhibentur, præter particulas salino-acres stimulant, nauseam manifestam creantes, recondi etiam alias alterius indolis ac naturæ, nihilominus vis purgans tantum ab

acribus illis salinis sulphureis dependet, ita tamen ut admixtæ reliquæ etiam non sine usu sint, quippe quæ sæpius egregie qualitatem vitiosorum humorum temperant, corrigunt, vel etiam simul ipsis partibus robur ac tonum foenerant. Ita mirabile est rhabarbarum & fovere partes subtiles acres, stimulant, purgantes, insuper & terreas constringentes quæ tamen minime remorantur illarum activitatem, sed potius roborando fibras excretorias adjuvant vim purgantem.

§. IX.

Quod diximus & statuimus de purgantibus, id ipsum quoque valet de vomitoriis & illorum modo agendi; & quemadmodum purgantia fixiori gaudent elemento, quod majorem resolutionem desiderat, quam ob causam etiam magis operantur in intestina: ita emetica cum subtiliori salino-sulphureo activo principio promptius resolubili instructa sunt, statim in ipsum ventriculum operantur, ipsum fortiter constringendo, & spasmodica tali constrictione ad expulsionem contentorum urgendo. Petuntur emetica potissimum ex regno minerali, quod abundantissimum est substantiis activis tenuissimis simplicissimis, salino-sulphureis, causticis. Fovere ipsa emetica partes acres irritantes causticas, apparet ex antimoniatibus, item venereis, quæ in absumenda luxuriante carne & ulcerum callis dissolvendis egregie sese exerunt. Subtilitas in antimonio luculenter apparet, dum unum granum vitri antimonii per infusionem cum vino tractatum sufficit pluribus expurgandis. Veneris stupenda exiguitas partium intestinalia elucet ex colore cæruleo, mirum in modum sese diffundente, dum unum granum veneris convenientibus menstruis solutum & tractatum mensuram unam & ultra aquæ inficiat colore pulcherrimo saturatè cæruleo. Quicquid itaque agunt vomitoria, agunt motum excitando, & fortiolem peristalticum ventriculi efficiendo, ut hujus adminiculo à colluvie & saburra copiosa vitiosorum humorum sese liberare & exonerare possit.

§. X.

Placet nunc sub rationis examen revocare ea, quæ sudorem movent remedia. Solent vulgariter triplicem in classem dispesci, nimirum in volatilia, media, & fixa. Volatilia nominatim sunt omnia salia oleosa, subtilissima, ex animantium partibus parata, item spiritus salini oleosi ex ungulis, carnibus, ossibus destillati: Ex vegetabilibus eminent resinae & radices, sale volatili tenuissimo sulphureo prægnantes, hæc cum valde activis & tenuissimis gaudeant partibus, quæ partim ex penetranti odore, partim & sapore dignoscuntur, non possunt non in corpus intromissa motum vehementem in ipsis spiritibus accelerare, dum non tantum intestinum sanguinis motum ac rarefactionem intendunt, verum etiam ipsas fibras motrices cordis arteriarum & nervorum agitando celerrimum influxum spirituum ac motum in dictas partes injiciunt. Et quoniam horum remediorum actio potissimum est in spiritus corporis nostri motores, ideo unica guttula olei ex animantibus destillati, vel decem grana salis volatilis, accedente debito regimine diaphoretico externo satis idonea sunt, universam sanguinis & lymphæ massam celerrima motionem per vasa & solidarum partium tubulos trajicere, simulque expellere serum subtile salino-sulphureum per glandulosum & tubulosum cutis contextum. Vulgata est opinio, dicta remedia & speciatim salia volatilia immediate in ipsum sanguinem & humores agere acidum destruendo, & fluiditatem ipsis conciliando; quanta verò requireretur copia

§. XII.

Pervolvimur jam ad classem diureticorum, ubi multifaria & discrepantia cernere est; referuntur enim inter ea non tantum caustica, salina, oleosa subtilia, alkalina, acida, sed & terrea, semina oleosa, aquea, diluentia; quod si autem probe illorum effectum atque facultates inquirimus, observamus illa potissimum virtutem diureticam manifestam exerere, quæ sale fixo sive acido, sive alkalino plus minus sulphureo caustico abundant, quare præsentissimi effectus deprehenduntur insecta sale caustico refertissima, uti millepedes, vermes majales, cantharides, bufones, araneæ, grylli; deinceps insigni virtute urinam inovente fulgent calx viva, conchæ, conchilia, corallia vehementi igne in calcem usta, item salia vegetabilium recenter calcinata, quæ omnia propter sal causticum operantur; ita etiam porro spiritus acidi, nominatim salis, nitri, vitrioli, sal succini acidum, horum catalogum subeunt, qui minime præcipitando uti vulgaris opinio est serum à sanguine agunt, quanta enim requirerentur acida ad sanguinem calidum & fluxilem præcipitandum. Postremo eminent ex vegetabilibus hac virtute, quæcunque sale nitroso abstersivo imbuta sunt, uti asparagus, petroselinum, baccæ juniperi, alkekengi, fructus fragorum, cynosbati; Huc quoque spectant serum lactis, vinum. Horum si operandi rationem evolvimus, non possumus aliter statuere, quam quod suum effectum præstent propter motum quem introducunt ipsum in sanguinem, stimulando ac vellendo aculeis suis, non tantum venales tubulos ac glandulas secretorias, sed revera fibras quasque partium solidarum motrices musculosas nerveas, adeo ut tono partium & motu pulsorio arteriarum adaucto sanguis celerius circumvolvatur. Quod si itaque est præsens in sanguine serum superfluum, salibus fixis tartareis onustum, quod conveniens est renum excrementum, promptissime illud ipsum absorbetur, transcolatur per dictam glanduloso-tubulosam renum substantiam, motu nimirum sanguinis arteriosi appulsorio ad hanc ipsam citatiore facto; quando autem non sufficiens serum falsum tartareum in sanguine continetur, parcius etiam succedit urinæ fluxus post assumpta diuretica, quamvis non plane sine omni effectu sint; enimvero dum sanguinis motum adaugent, obstructions & stases humorum in visceribus remonent, & magnorum morborum radicem etiam sine subsequente diuresi aggrediuntur & evellunt. Quod autem diuretica calida, dum circularem sanguinis motum promovent, non proliciant sudorem, ratio hæc est, quoniam ipsa non solemus usurpare cum regimine diaphoretico, calido & humido, habitum corporis relaxante; quocirca experientia deprehendimus, diaphoretica, imo potentiora sudorifera citra consuetum sudoriferum regimen adhibita, ne guttulam sudoris elicere, & sæpius effectum diureticum præstare.

§. XIII.

Ordo jam postulat, ut potentissimum in debellandis refractariis chronicis morbis minerale remedium nempe mercurium examinemus. Hic non tantum fortiter humores corporis nostri movet, sed & evacuationem copiosam excrementorum potissimum per glandulas oris vasaque salivalia molitur, neque insolitum est, ipsum quoque expellere humores per alvum, urinam, sudorem & transpirationem. Res fuit valde dubia atque abscondita hætenus inter medicos, qua ratione agat mercurius. Veteres confugiebant ad proprietates totius substantiæ, vel speci-

§. XI.

Quod attinet sudorifera sic dicta media, quæ aliis diaphoreticorum nomine veniunt, sunt illa temperatiora volatilia oleosa, sicuti mixtura simplex, tinctura bezoardica acidula, acetum theriacale, spiritus cornu cervi succinatus, sal volatile salis ammoniaci cum sale succini in mediam naturam conversum, & cuncta salia volatilia animalium, cum subtili volatili oleo ligata; Hæc simili ratione, dum sudorem promovent motu id peragunt. Equidem non diffitendum est, non adeo activa sed debiliora esse hæc quam volatilia, & non nisi in dispositis calidioribus naturis & sensibilibus texturæ, morbisque calidis, vel sub externa sufficiente calidi & humidi admissione effectum quendam exerere; quicquid tamen agunt, agunt etiam motu, dum oleosis suis salinis partibus similiter stimulant fibras cordis & arteriarum motrices, partesque nervosas, quo ipso uberior fluidi nervei copia in partes instillatur musculosas. Tertiæ generis sudorifera & quæ fixa dicuntur duplicis sunt conditionis, vel enim sunt anodyna & sulphure blando vaporoso poros nervorum & cerebri opplente constant, uti sambucina, crocus, opiata, papaveracea, & ob hanc rationem theriaca cœlestis, diascordium Fracastorii; vel terrea aut salia fixa; illa sudorem promovent, at non motum augendo, sed potius illum sistendo. Notabile enim hoc loco est, nullam humoris secretionem vel excretionem legitimè peragi vel succedere, si motus nimis in corpore est auctus; ita videmus in sævissimis doloribus ac cruciatibus, nimioque corporis ardore & incallescencia cutem totam esse exsuccam, aridam & occlusam, ita ut ne unica guttula humidi ibi appareat, propter violentam pororum cutis constrictionem, à citatissimo spirituum influxu in fibras, quibus pori cutis constant nerveas. Tali itaque in casu, quæ spirituum tumultum componunt & ad placidum statum illos reducunt quod præstant dicta anodyna, redit naturalis tonus partibus solidis, & universali corporis emunctorio cuti; redit & motus ac circulatio secundum naturam ipsi sanguini ac humoribus, quæ duo ad omnem secretionem expeditam & liberam admodum sunt necessaria requisita. Exinde quoque colligere licet, quam ob causam sub gravi dolore nephritico urinæ fluxus per frequenter contingat suppressus, vel sub doloribus atrocioribus aut convulsionibus alvus firmiter constringatur. Reliqua terrea & alkalina quod attinet, statuendum esse existimo, illa ipsa non tam uti vulgaris est opinio propter absorptionem & saturationem acidi tantum prima in regione contenti, adeoque privative, sed etiam positivè simul agere, dum acidum vertunt in falsum vel austerum, quod deinde irritando ac stimulando, & fibras excretoriarum vasorumque lymphaticorum & glandularum promptiorem & expeditiorem sanguinis & lymphæ circulum procurat.

ficam naturam veneno veneneo adversam. Recentiores discrepantes hanc in rem afferunt sententias, dum nonnulli per sal volatile, alii per acidum ipsum operari adstruunt. Chimici luminosam & irradiativam virtutem ipsi affingunt; Nos neglectis & remotis istis sententiis quæ nullo nituntur ratiocinio vel experimento ponimus ac statuimus omnem qui à mercurio fit in sanandis morbis effectum dependere ex motu partium fluidarum corporis citiori. Etenim quando probè ejus texturam ac crasin consideramus, fluidum est omnium, quæ in rerum natura dantur specie gravissimum, simul tamen summè actuosis mobilissimis partibus repletum; Experimentum elegans est, & attentione dignum nuper à Domino Præsidente adornatum, quo egregie mercurialium partium agilitas & penetrantia aperitur, nimirum quando sumimus tubulum vitreum, qui ex majori capacitate definit in magnam angustiam, ita ut pilum vix capere possit, ejusque portionem immittimus in vasculum mercurio repletum, superiore tubuli parte aperta, in instanti ipse tubulus repletur mercurio, quousque fuerit immixtus. Difficillime hic potest concipi, quo pacto tam celeriter per angustissimum canalem infernum, & minimum ejus non visibile foramen, tanta mercurii quantitas ascendat in tubi insignem capacitatem. Deinceps quam penetrans in mercurio sit principium, inter alia declarat ejus actio in metalla, quorum poros, ferro excepto, mox subit, firmiorem illorum nexum ac compagem dissolvit ac disgregat. Mirabile est, quod gravissimum hoc corpus calore debito ignis brevi temporis articulo in tenuissimum vaporem possit dissipari. Nostra itaque sententia est, mercurium & gravitate partium suarum, quæ universa fluida ratione molis ejusdem longissime superant, nec non ratione salis mineralis simplicissimi, primigenii, mobilissimi, operationes suas exerere. Accedit quod mercurii talis sit textura, ut lubentissimè in amplexus rapiat salium occurrentia spicula, quibus associatis majorem acrimoniam & quidem penetrantissimam, cujus respectu venenum fit, acquirit. Quando itaque in corpus assumitur, ratione tenuitatis partium angustissimos etiam corporis poros penetrat, ratione gravitatis motum intestinum humorum excuscat, ratione penetrantis mobilis substantiæ, simulque causticæ propter connubium salium factæ vehementer vasa excretoria, præsertim glandulas conglobatas (quæ ex meris fibrillis motricibus contextæ sunt, & lymphæ progressui, propter illarum contractionem perennem ac vegetam, inserviunt) vellit atque influxum spirituum copiosorem invitat, unde contractione adaucta premuntur liquida in iis contenta, ut non tantum lymphæ impura per vasa salivalia, sed serum quandoque per sudorem, urina per renes maxima copia excernantur. Neutiquam enim statuendum est, mercurialia peculiari ratione tantum agere in fauces, & salivam provocare, sæpius enim effectus hic non contingit; quando autem humor serosus lymphaticus in corpore peccat, in coagulum abit, & deinde per mercurialia resolvitur, non potest per alia emunctoria, quam quæ ipsi congrua sunt, nempe per glandulas faucium salivales secerni, quas deinde exulcerat, nimiumque relaxat, & ita fluxum salivæ copiosorem producit. Ubique itaque talis lymphaticus humor in corpore non peccat seu quantitate, seu qualitate, ibi mercurialia per salivales glandulas etiam rarius operantur; ex adverso, ubi præsens talis humor est impurus, lymphaticus, sicuti in scorbuticis & lue venerea affectis contingit, etiam exigua mercurii quantitas applicata copiosum salivæ ciet profluvium. Ex quibus adductis facile colligitur, non existere in re-

rum natura potentius remedium, quod tantam vim movendi & commovendi humores possideat, tantoque effectus præstare possit in obstructionibus etiam rebellibus vincendis ipso mercurio ritè præparato & cum prudentia applicato. Ad horum catalogum spectant mercurius dulcis, mercurius diaphoreticus jovialis, mercurius præcipitatus albus bene edulcoratus & cum foliis auri exactissime mixtus ac trituratus, mercurius juxta processum Philalethæ cum luna & regulo antimonii depuratus & spirituosus redditus, postmodum cum limatura auri decenti ignis temperamento fixatus & coctus in tutissimum divinæ virtutis remedium.

§. XIV.

Provolvitur jam ad sternutatoria, errhina; horum operandi ratio facillimo negotio, etiam ex motu quem excitant in partibus, ubi applicantur explicari potest. Deprehendimus experientia, omnia quæ hunc censum subeunt sale subtili volatili plus minus acri sulphureo irritante gaudere; si principium illud moderatius est sine sternutamento operantur, sed tantum mucum colliquant & e naribus educunt, si autem fortius est sal illud acre, etiam sternutationem simul movet, sicuti faciunt purgantia & maxime nicotianæ species, quæ ferè omnia naribus admissa excitant sternutationem. Ex mirioribus sunt majorana, flores lavendulæ, liliorum convallium, origanum, satureja, ruta, basilicum, serpillum, thymus, beta rubra, oleum succini, majoranæ, flores benzoë. Apophlegmatizantia, uti sinapi, radix pyrethri, angelicæ, ostrutii, tabacus, quid aliud continent, quam subtile acre sal & odore & sapore dignoscendum. Operantur itaque hæc dicta in emunctoriis, naribus, faucibus, non aliter ac purgantia in intestinis, vel emetica in ventriculo, stimulo enim fibras nerveas magnum spirituum motum provocant ad dictas partes tunica musculosa & glandulosa constantes, quæ valida constrictione exprimit succum lymphaticum copiosissimum.

§. XV.

Restant adhuc sic dicta expectorantia, quæ mucidam & viscosam materiam ex bronchiis & aspera arteria expellunt; celebria inter hæc sunt radix iridis florentinæ, ari, enulæ, glycyrrhyzæ, herba erysini, hyssopi, gummi ammoniacum, myrrha, benzoë, flores violarum, crocus, mel, passulæ, quæ omnia sal subtile sub recessu acre etiam gustu dignoscendum custodiunt, ut etiam copiosius intra corpus assumpta alvum ad excretionem sollicitent. Quando itaque illorum partes acres successivè cum saliva ad arteriam asperam descendunt, nerveam tunicam irritant, tussim, & expirationem adauctam validè suscitant, quo motu illud, quod in bronchiis molestum hæret, felicissimè excutitur.

§. XVI.

Inter evacuantia passim à medicis etiam recensentur vesicatoria, fonticuli, setacea, hæc dicta, utut non principaliter sine evacuatorio in foro medico commendari soleant, sed potius ad derivandum humorem peccantem versus alium locum, exerunt tamen identidem suum effectum, quem præstant in sanandis morbis per motum. Siquidem fonticuli qui nihil aliud sunt quam ulcera artificialia, laxando, debilitando & destruendo fibras cutis, illarumque tonum labefactando efficiunt, ut humores evacuentur, circa partes vicinas stagnantes, non exclusa pororum ab acido ulceroso emergente dispositione singulari mechanica, quæ non omnis generis humores,

res, sed tantum falsos acetosos transmittat, non secus ac charta bibula oleo prius intincta oleum tantum, non autem unà aquam cum oleo mixtam, recipit. Vesicatoriorum effectus mea sententia tantum accersendus venit ex dolore, qui à vesicis excitatis & apertis oboritur, concurrat ibi copia spirituum, ut deinde alias partes, quas spasmus occupavit, lubentissime deferant spasmō remittente. Quocirca usum vesicatoria non contemnendum habent in paralyfi, apoplexia, epilepsia, gravi odontalgia, otalgia, hemicrania, ophthalmia, interdum quoque ad motum spiritibus injungendum usurpantur in affectibus soporosis & morbis malignis.

§. XVII.

Sufficiant hæc de evacuantibus & illorum agendi modo mechanico, pauca saltem adhuc allubescit subjungere quæ circa illorum providum usum & circumspectam applicandi rationem videntur utilissima; sufficienter uti arbitror evictum est, remedia dicta motu omne illud quicquid agunt in corpore præstare, adeoque potentiam activam seu vires motrices diversas in se recondere. Ut itaque desideratum consequantur effectum neque in operatione sua impediuntur, rursus quædam leges ac regulæ mechanicae tenendæ sunt. Primum enim extra dubium positum est, ad omnem motum requiri non tantum movens, seu corpus sufficientibus viribus motricibus instructum, verum etiam materiam mobilem sive ad motum dispositam, quæ non majores in resistendo habeat vires, quam movens; secundo ad omnem motum requiri vias liberas, seu medium liberum, non resistantia majori corporum stipatum, per quod mobile transire debet; tertio ad omnem motum concurrere proportionem inter movens & mobile. Ex istis facile colligitur, si motum seu evacuationem humorum Medicus moliri instituit, primo evacuos humores adesse debere: quocirca ante usum evacuantium, præsertim quæ vehementi motu agunt, Medicus bene attendat, utrum adsint humores, quantitate peccantes secernendi & excernendi: quando enim hi deficient, frustra commotiones in machina efficit, corpus debilitat, & sæpius illud quod servari debet, infeliciter ad expulsionem cogit: secundo animadvertat, si humores excrementitii adsint utrum etiam sint mobiles, fluxiles, ad motum dispositi, quod requisitum si deest, rursus intempestive & frustraneo conatu commotiones in corpore instituit: itaque allaborandum est ut primum reddat illos mobiles ac fluxiles. Perperam itaque agunt illi practici, qui morbum melancholicum, hypochondriacum, hydropicum statim inter initia purgantibus fortioribus adoriuntur, antequam obstructa fuerint referata, & humores ad evacuationem dispositi facti fuerint: Et non tantum hoc valet de purgantibus, sed etiam talis abusus circa diuretica, sudorifera subinde observatur. Aureus itaque est canon HIPPOCRATIS *vid. Libri II. Aph. X. Si quisquam corpora purgare velit, meabilia ut reddat, erit necesse.* Ob quam causam etiam non nulli practici prudenter purgantibus fortioribus præmittunt sic dicta digestiva, præparantia, diluentia, absorbentia, ut inde felicius subsequatur effectus. Ita etiam non parum secundant mercurialium effectum usus decoctorum seu infuso-

rum herbarum aperientium, deobstruentium, laxantium, balneorum, omneque humidum & calidum externè & internè admissum. Ex adverso nihil magis contrariatur operationi evacuantium, sive sint purgantia, sive sudorifera, sive salivantia quam frigus & acidum omniaque medicamenta & alimenta, quæ coagulando motum humorum retardant. Tertio, cum ad omnem motum liberæ viæ requirantur, probe consideret, si v. g. per alvum educere vult humores, ut intestina crassa ab infarctu secum sint liberata, sive id fiat per clysteres sive per laxantia. Ad sudorem eliciendum convenit ad cutem admittere aërem humido calidum, vel etiam balneo vaporoso cutis à mucō constrictos poros relaxare, emollire, vel si a spasmō oclusio est, apertionem illorum tentare per anodyna antispasmodica. Maxime omnium autem respiciendum est in exhibitione sudoriferorum, diureticorum, salivantium, ne sanguis abundans sive plethora quæ libertatem viarum impedit, resistat horum operationi. Cum enim, uti fufius declaratum est, hæc ipsa operentur mediante circulo sanguinis, facile patet, nisi vias liberas per venæ sectionem vel alia sanguinem imminuentia facias, non bene succedere evacuationem & expulsionem humorum. Quartò cum in omni motu debeat esse portio inter mobile & movens, imperitè illi faciunt Medici, qui v. g. per purgantia vel sudorifera fortiora tenuissima & virulenta pestis & aliorum contagiosorum morborum miasmata in sanguinem suscepta & quidem statim inter morbi initia vi exturbare ac præcipitare conantur; paucum enim & exile si est id quod peccat, minus commode movetur & expellitur, sed potius illud alterandum, immutandum; cum aliis crassioribus immiscendum est, antequam ipsum evacuetur. Spectat huc *Aphorismus HIPPOCRATIS: Concocta medicamento purgare ac movere oportet, non cruda, nisi turgeat materia, plurimum autem non turgent.*

§. XVIII.

Tandem, & illud circa usum evacuantium memoria tenendum est si quis movere atque evacuare velit fortiter, ante omnia ut vires sufficienter adsint requiri; evacuatio enim & motus in corpore omnis non nisi mediante spiritu corporis movente peragitur, medicamenta enim tantum dispositivè agunt, id est motu suo sollicitant motum spirituum in fibrillis. Ubique itaque fortiori expulsionem opus est, ubi autem spiritus deficient, vires motrices deficient, ibi per consequens etiam ipse motus excretionis. Quando autem pauci adsint & in motum aguntur, non potest aliter fieri, quam quod ipso motu sese frangant, enervent, consumant, ut adeò hoc respectu nunquam magnæ commotiones instituendæ sint in corporibus languidis, & in morbis ubi vires collapsæ & exhaustæ sunt: dignissimus hinc notatu est *Aphorismus Libri II. HIPPOCRATIS. Plurimum & repente vacuare, aut replere, aut calefacere, vel refrigerare, vel quovis alio modo corpus temerè movere, periculosum, omne enim nimium naturæ bellum indixit; quod autem fit sensim ac vicissim, periculi expers est, idque cum alias, tum si quis ab uno ad aliud se convertat; sed hæc pro tempore circa hanc materiam utilissimam sufficiant.*



DISSERTATIO MEDICA

DE

MECHANICA OPERANDI

RATIONE MEDICAMENTORUM

SIC DICTORUM ALTERANTIUM.

Primum edita Anno 1698.

§. I.



SAPIENTISSIME divus HIPPOCRATES libro de morbis popularibus nos hortatur medicamentorum naturas addiscere, & libro de locis in homine scite tradit: si medicamenta morborum clara sunt & manifesta, non est expectanda fortuna ad sanandos morbos: Principale enim methodi medendi momentum in eo situm est, ut medicamenta probata & experta virtutis adversus quemvis morbum pernoscat Medicus, illorumque vires & effectus solido ratiocinio ex indubitata veritatis principiis clarè demonstrare atque ostendere possit, ita enim cum certitudine, cum ratione, imo tutissimè procedit in medendo. Quantus autem & hodiernum defectus? quanta inscitia veræ pathologiæ? quantæ hallucinationes in assignandis remediorum viribus, etiam inter illos, qui præ aliis rationales esse, & ab empiricis distingui volunt, deprehendatur, res in promptu est. Equidem non deficiunt medendi & procedendi rationes, sed quivis etiam ex vulgo Medicorum copiosissimas allegare & proferre non ignorat; quando autem accuratius istas expendimus, sæpius nihil aliud quam nugamenta & verba tantum invenimus, quæ, eadem facilitate quâ adducuntur, etiam iterum convelluntur; Annon quivis secundum suam perversam in physicis & medica theoria hypothesein, quæ non ex rebus ipsis & experientia desumpta est, forinsecus sibi morborum causas, & explicat inde remediorum effectus. Tædiosum est, secundum seriem sectarum, hæc omnia ab ovo quasi repetere, illud saltem de recentissimis qui sectantur philosophiam experimentalem, & secundum rationem mechanicam rerum medicarum effectus æstimare allaborant, etiam atque etiam monere necessum habemus, quod in causis reddendis non tam ad motum, qui tamen præcipuum est naturæ instrumentum quam ad ipsam variam materiæ affectionem & dispositionem respiciant. Multum omnino ipsa materia disponit ac determinat motum, & viceversa motus potenter & cum majori effectū brevi tempore ipsam materiam alterare, & immutare aptissimus est. Prudenter itaque illos facere existimo, qui ex duobus hisce principiis mechanicis conjunctim remediorum vires inquirere, & recte explicare allaborant. Nos in præsentiarum cum jam alio tempore & loco de evacuantium mechanico operan-

di modo dictum fuerit, instituiamus ad rationem solidam revocare remediorum sic dictorum alterantium, quæ magis in materiam operari solent, effectus. Divinum numen supplices precamur, ut suo auxilio hos conatus dirigat unice in veritatis inquisitionem jucundissimam.

§. II.

Quemadmodum evacuantia in medendo magis respiciunt humorum copiam & quantitatem, & circa motum versantur, ita alterantia magis in mutatione qualitatis, temperiei, crasseos, & mixtionis materiæ occupata sunt; quoniam autem elementa fluores, præsertim sanguinem constituentia non homogeneæ ejusdemque naturæ sunt, sed valde inter se dissident ac discrepant, facile potest colligi, pro diversa mixtionis ratione varias & differentes subnasci fluorum intemperies, quæ vitiosum inordinatum & per consequens morbosum humorum motum non possunt non sistere atque producere. Confusus autem est, uti notum, sanguis, ex principiis, quæ etiam sub sensu incidunt, præsertim sequentibus, nimirum salinis, oleosis seu sulphureis, aqueis, terreis, quæ motu intestino & progressivo per partes solidas, qui vera intimæ unionis causa est, probè permixta constituunt illum rubicundum spissescentem fluxilem tamen humorem, qui fundamentum totius vitæ ac sanitatis est. Prout itaque hæc elementa ratione quantitatis vel etiam volatilitatis, fixitatis ingrediuntur mixturam sanguinis, variæ intemperies naturales seu sic dicta temperamenta vel etiam morbosæ, quæ plurimorum affectuum causæ antecedentes, continentesque sunt, proficiscuntur. Has itaque intemperies Medicus rationalis probe dignoscere, illas convenientibus remediis corrigere, prædominantes partes tollere, & omnia ad justum temperamentum atque æquilibrium reducere debet. Ex quo facile intelligitur, media quibus opus habet, diversa etiam potentia ac indole debere esse instructa, ut commodam correctionem atque immutationem instituere, sive illorum, quæ supersunt imminutionem, & eorum, quæ deficiunt additionem possit procurare. Quando itaque totum amplissimum alterantium campum percurrimus, illa ipsa commode 1. ad salina, urinosa, volatilia, 2. acida, 3. spiritiosa sulphurea, 4. sulphurea fixiora, 5. salina media, 6. aquea, 7. mucilaginosa, 8. fixa terrea, salina, redigi ac dispesci posse, deprehendimus. Equidem haud mihi ignotum est, communiter inter alterantia, specifica recenseri

cenſeri ſolere, quæ nimirum certo cujuſdam partis morbo, præ aliis remediis magis accommodata ſunt, & ſingularem atque præſentiſſimum effectum, qui aliis negatus eſt, producant, & ob hanc rationem vel a parte affecta, vel à morbo nanciſcuntur ſuum nomen, & dicuntur alexipharmaca, antifebrilia, antiſcorbutica, antepileptica, dolorem ſedantia, antiarthritica, antihyſterica, & ſimilia. Attamenſt noſtra mens eſt, illa ipſa ab alterantibus ſeparare, utpote hæc magis ſunt univerſalia, dum humorum correctionem in genere reſpiciunt, illa autem magis ſunt particularia, certo morbiſico humori corrigendo, certæ etiam partis robori conciliando dedita atque dicata, quæ ſuo tempore etiam examinanda erunt. Noſ jam in præſentiarum alterantium operationem tantum ſcrutabimur.

§. III.

Primum autem locum merito obtineant *ſalia volatilia* ex partibus durioribus animantium parata, vel ſi mavis ſalia volatilia cum oleis deſtillatis gratiſſimis, v. g. oleo aniſi, macis, corticum citri recentis, caryophyllorum eſſentificata & nobilitata, ſive in forma ſicca ſerventur, ſive in fluorem redigantur. Magnificæ famæ hæc ſunt remedia, quorum uſus præſertim hodierno tempore tam ad præſervandos quam ſanandos morbos creberrimus. De hiſce vulgaris opinio eſt, quod acidum non tantum in primis viis ſed etiam in ſanguine exiſtens morboſum pariter & viſcidum, præcipua illa morborum chronicorum elementa, promptiſſimè deſtruant & extinguant, inſuper & ſanguinem fluxilem, floridum, tenuem, ad circulationem aptum efficiant, deſumpta ratione ex experimento, quo ſalia volatilia liquida inſuſa ſanguini coagulato craſſo, atro, illum pulchre diſſolvunt, attenuant, & colore coccineo imbuunt. Utut autem ipſa virtus acidum & viſcoſitatem deſtruens in ſalibus iſtis negari nequeat, ſtatuiſmus tamen, dicta remedia potiſſimum agere in ſpiritus & hiſce mediantibus operationes ſuas exerere in ſanguinem & humores. Etenim cum ex tenuiſſimis ſalino-ſulphureis naturæ gratiſſimis conſtent partibus, non tantum in ſanguine expansionem ſpiritus promoveant, ſed poris nervorum ac cerebri ſeſe inſinuando fluidi nervei motum valdè adaugent, ut deinde aucto in machina motu ſpiritus, ceu partium impetum facientium, ſanguis circuletur felicius ac liberius, excretiones, præſertim tranſpiration, ſuccedant expeditius, ipſeque ſanguis ſub tali motu attritivo & depuratione coagulum ac ſpiſſitudinem deponat, & fluidus, benignus, purus, ad ſanitatem aptiſſimus evadat, quocirca verò ſimillimum videtur, ſanguinis fluiditatem, quæ ſubſequitur uſum ſalium volatilium, magis dependere ex motu ſanguinis, quam ex mixtione horum ſalium cum ſanguine. Quanta enim requireretur copia huius medicamenti, ſi univerſa ſanguinis maſſa ipſo eſſet imprægnanda? Ex hiſce dictis promptum jam erit invenire ſalium volatilium oleoſorum applicandi modum & rationem, quod nimirum præſentiſſimam opem ferant illis, qui ſanguinem craſſum, denſum, mucosum in venis alunt, ex diætâ craſſa, ſalfa, dura, ſub vita otioſa, ætate ſenili, ac tempeſtate frigida & humida. Præſervantur talia ſubjecta peropportune horum uſu à graviſſimis chronicis morbis, nominatim cachexia, hydrope, ſcorbuto, affectione hypochondriaca. Conveniunt & porro, ubi ſpirituſcentia opus eſt, vires deſciunt, diſgeſtio eſt depravata, flatulentiis ſtipata, & ſpiritus animales in movendis membris non rite officium ſuum faciunt. Nociva autem obſervantur, quando humores ſunt ſalibus ſulphureis bilioſis reſerti, ſpiritus ad motuum ataxias valdè diſpoſiti, ibi facile intempe-

ſtivo uſu dolorem capitis, hæmorrhagias, calorem lentum producere atque excitare idonea ſunt.

§. IV.

Secundo loco ſub examen ſiſtimus *acida*. Aſcribitur hiſce teſte experientia egregia vis calorem præternaturalem extinguendi, appetitum provocandi, urinam ciendi, nec non ſitim tollendi. Operari illa ipſa perhibent, dum particulas ſulphureas bilioſas exſuperantes, ſive ſtatim primis in viis, ſive in ſanguine contentas, anguloſis ſuis ad motum verticillarem ineptis enervant, concentrant, inque motu intelliſtino, qui cauſa originalis nimii caloris eſt, ſiſtunt. Comprobant illud ipſum ſequenti experimento, dum olea ætherea deſtillata penetrantiſſima cum ſpiritibus mineralium acidiſ permixta, non modo abeunt in coagulum, ſed & odore, ſapore, ac virtute penetrante inde orbantur. Poſſet quidem hoc loco in contrarium moveri, ſpiritus acidos concentratos, præſertim nitri, qualem poſſidet Dn. Præſes, ſumantem affuſis oleis deſtillatis ſale volatili turgidis graviſoribus, vehementiſſimam efferveſcentiam cum rubicundiſſimo vapore ſimul & flammâ lucidiſſima eructante, excitare, ut adeò hæc acida calorem in corpore noſtro non parum adaugere queant. Enimverò experimentum præſatum perperam ad noſtrum corpus applicatur; Primò enim acida concentrata, inque tanta quantitate in corpus non aſſumuntur, neque immediate horum cum oleoſo corpore mixta ſit. Secundo aſſumuntur diluta, quando autem ſpiritus noſtro ſumanti aſſundimus dimidiam partem aquæ, experimentum non amplius ſuccedit. Noſtra autem ſententia eſt, acida non ſolum operari in materiam, figendo & detinendo in limitibus ſuis ſanguinis ſulphur, quod matrix caloris eſt præternaturalis, nimis exaltatum, ſed & inſuper motum in fluores introducendo agere. Quod aſſertum ex eo clarum evadere poſſe cenſeo, quod omnis generis acida arteriæ aſperæ communicata irritatione ſua tuſſim provocent promptiſſimè. Imò curioſum eſt acida in corpus aſſumta titillationem & pruritus quendam in fonticulis excitare conſueſcere. Deinceps comprobatur & illud exinde, quod acida ſubtiliora, uti ſal acetofellæ eſſentiale, ſal ſuccini, cremor tartari, debita quantitate adhibita, non modo alvum egregie proritent, & purgantium vires valde adaugeant, verum inſuper ſerum ſalfum potenter per renes educant. Elixir proprietatis cum acido ſpiritu paratum revera purgantem vim plus exerit, quam ſi cum alcali ejus præparatio fuerit adornata. Eandem ob cauſam, nimirum ſtimulantem, acidula præſertim ſubtilia, uti vinum, & ſpiritus mineralium dulcificati, appetitum emortuum efficaciter erigunt atque exſuſcitant, partes oriſicii ventriculi nervoſas blande vellendo.

§. V.

Inter alterantia tertium locum inveniunt *ſpirituſoſa*. Sunt hæc nihil aliud quam ſulphura expanſa & reſoluta, ſicuti enim oleum eſt nihil aliud quam ſpiritus inflammabilis concentratus, ita ſpiritus *φλογιſτός* eſt oleum mediante fermentatione vel ſolutione ſubtiliſſimè reſolutum, prout chymica experientia id eſt clarifiſſimum. Intelligimus verò per ſpirituſoſa talia, quæ ſulphur ſubtile odore non minus quam ſapore gratum ac ſuave complectuntur, quod abundantiffimè reperitur in aromatibus, à quibus ſi avocaveris oleum, illud quod remanet inutile ac effectum terreum magma eſt. Agunt hæc dicta ſulphurea ſpirituſoſa procul omni dubio non tantum immediate in humores, materiam præbendo illorum ſpirituſcentiæ ac ſubtilitati, verum etiam eodem modo ipſos

in spiritus, motores ac rectores machinae nostrae: spiritus enim, sive adhuc cum sanguine sint mixti, sive mediante tenuissima corticali glandulosa cerebri substantia separati, indolis aereo-aethereae, nec non blandae sulphureae salinae sunt. Conspicimus id manifestum, dum dicta spirituosae languentes vires in momento erigunt, & spiritus ipsos restituunt, quocirca magnum usum habent in lypothimia, syncope affectis, virium imbecillitate ex causâ frigida, protinus subsequi solet pulsus citior, facies rubicunda, calor in extremis partibus major, qui effectus non bene derivandus venit ex eo, quod in totam massam humorum agant, pauca enim spirituosorum quantitas etiam tantum odoretenus admissa sufficit ad syncopicum excitandum, animique deliquium auferendum. Calorem solent foenerari corpori maximum si in forma olei usurpentur, cuius rei alia ratio non videtur esse, quam quod totam corporis nostri supremam seu spiritus vehementer moveant ac circumagant, quo efficitur, ut etiam sanguinis circulatio promptior & expeditior per partes solidas celebretur, & eo ipso ex motu isto attritivo partium solidarum aucto calor haud exiguus producat. Solent haec dicta spirituosae, quo etiam spectant superius recensita salia volatilia oleosa, praestantissimam vim carminativam exere in intestinis, non quod tantum mineræ flatuum viscosae adversa sint, sed potissimum, quod fibras & tunicas intestinales spiritibus animent ac vigorent, à quo harum partium tonus robor, ac vis flatus propulsoria dependet. Flatus enim molestant intestina maxime tum temporis, quando ipsorum robor fractum ac debilitatum est, unde validissime a flatuum expansiva elastica vi distenduntur, non sine acuto per frequenter dolore. Quodcumque itaque intestina ad tonum & constrictionem naturalem reducit, illud & ad expulsionem flatuum maximum absolvit punctum.

§. VI.

Dantur & alia confortantia naturae mediae, inter quae primas facile tenet ipsum vinum optimae notae, quod ex particulis spirituosiss sulphureis, nec non aqueis ac acidulis aequabiliter bene mixtum temperatum ac excoctum est, quod cæteris, quae insignem dulcorum in recessu habent, & majorem quantitatem spiritus possident, praferendum esse existimo, quamvis & haec laudabilem suum usum habeant. Profecto tale vinum palmam praeripit cæteris confortantibus; Est enim praestantissimum cordiale, analepticum, diureticum, diaphoreticum, alexipharmacum, sanguinis spirituoscentiam & ejus circulationem promovens, secretiones & excretiones oeconomiae animalis laudatissime adjuvans, & uno verbo moderatè sumtum certissimum est omnium morborum praeservativum. Sanitatis enim conservatio in eo maxime consistit, ut sanguis probè circuletur, sub qua circulatione postea omnes inutiles heterogeneas corruptibiles sanguineae mixturae insensas feliciter deponit partes, ut machina tali ratione quam optime praeservetur ab omni corruptione. Neque dubitabit quidam, vinum praeter humores etiam in spiritus, & motu agere in corpus, quare etiam olim ORIBASIVS *vinum optimum mentis medicamentum* dixit; & PLATO in *Phaedone*: *Vinum animum cum corpore calefacit.*

§. VII.

Ex dictis facile colligendum esse judico, cautè administrandum horum remediorum usum esse, & valde nocere, ubi in actuosae inordinata spiritus & humores sunt motione, in febrilibus insultibus, spasmodicis affectibus, doloribus, deliriis, haemorrhagiis, & ubi complexio corporis tenera, sensibilis, activa,

biliosa praesens est. Nocent & in majori dosi propinata illis, qui sanguinem copiosum, crassum, & spissum habent; quodcumque enim talis sanguis forti motu exagitatus majus occupat spatium, & in tubulos corporis saepe intruditur, ubi rursus sese bene expedire nequit, unde fiunt stases, secretiones imminutae, quae viam pandunt ad cephalalgias, inflammationes viscerum, obstructions, arthritidem, hydropem, asthma, paralyfin. Familiaris res est, quando illi, qui otiosam vitam degunt, & corpus male perspirabile possident, paulo largiori quantitate assument vinum, praesertim generosum, dulce, oleosum, quod multum habet sulphuris fixi, nec tam facile transit secretoria, incurrunt in gravissimos saepe numero dolores capitis; qui autem vino per aliquot saltem dies assueti sunt, tale incommodum nequaquam sentiunt, quoniam fluxiliores humores in corpore recondunt. Deprehendimus etiam experientia, quando phlegmatici, obesi, torpidae naturae subito & fortiter incipiunt corpus movere & exercere, quod notabilem lassitudinem, gravitatem membrorum, respirandi difficultatem, cephalalgiam persentiant; Adeo ut & hic locum habeat aureus canon HIPPOCRATIS: *Aphor. 51. Lib. 2. Omne nimium naturae inimicum; plurimum & repente vacuare, aut replere aut calefacere, vel refrigerare, vel quovis alio modo corpus temerè movere, periculosum; quod autem fit sensim ac vicissim periculi expers est, idque cum aliis, tum si quis ab uno ad aliud se convertat.*

§. VIII.

Referuntur etiam inter summe confortantia & analeptica, corpora fragrantissima, bene odorata, uti moschus, zibethum, ambra, & flores vegetabilium varii suaveolentes: Haec ipsa subtilissima sulphurea de se spargunt magna in copia effluvia, quibus non tam in humores, quam ipsos in spiritus per angustissimos nervorum porulos transeunt, quorum motum valde tenuitate sua vigorant, & accelerant, simul quoque ipsis materiam pro generatione aptam praebendo. Quocirca ubi spirituum languor & defectus est, ubi vires collapsae, sive per aetatem, sive per laborem, nimiam venerem, haec ipsa, non tamen exclusis aliis substantiis, interne & externe praesentissimum auxilium etiam in exigua mole afferunt. Quod autem talia spiritus immediate afficiant, ex eo constare posse arbitror, dum pauca effluvia naribus suscepta in foeminis quibusdam tenerrimae constitutionis horrenda pathemata hysterica, convulsiva, spasmodica, quae non nisi per graveolentia vel alia spirituum discursivum motum componentia fisci possunt, excitant.

§. IX.

Progressum jam facimus ad ipsa sulphurea fixiora, seu temperata, sub qua classe comprehendimus corpora resinosa, sulphure temperato suavissimo constantia, quae solent dici ab hodiernis balsamica; Hujus generis solent esse myrrha, succinum, storax, benzoë, balsamum peruvianum, opobalsamum, mastiche, cortex ligni sassafras, lignum aloes ambratum, cortices citri, resinae ligni aloes, ladani, ambra, rosmarinus, omnesque herbae cephalicae ac plantae verticillatae & ejusdem generis plura. Remedia haec sunt magnae & commendatissimae efficaciae, & inter nervina & cephalica primum facile obtinent locum. Solent assumi vel in substantia, in forma pilulari, vel sub formâ liquida in essentiam redigi. Illorum usus praecipuus est in vertigine, paralyfi, apoplexia, catarrhis, aurium tinnitu, epilepsia, cephalalgia pituitosa, glandularum nimia laxitate, lymphæ impurae abundantia, ac viscerum debilitato tono.

Modus

Modus ac fundamentum operationis in eo statuentum esse credibile videtur, quod partim sulphureis suis blandis, ramosis particulis, motu intestino sanguinis & humorum spiritualescentiam blandè ac successivè promoveant, partim etiam fibrillis nervorum, nec non cerebri ab humido valde relaxatis robur quoddam, levemque constrictionem concilient, quæ constrictione & quod robur est revera motus quædam species, cujus beneficio fluidi cujuscunque progressus ac circulatio cum efficacia promovetur, adeoque & balsamica motum fluorum promovendo potissimum exerunt suam efficaciam longe nobilissimam.

§. X.

Accedimus jam ad examen *amarorum*, quæ si ulla certè hæc nobilissima & polychresta sunt. Amari- ties ad vitam valde videtur necessaria, nam nullum est animal quod bile careat, & quod sine bile vivat, ideo etiam providissime bilis in hepate separata protinus cum alimentis in ventriculo digestis ceu balsamum utilissimum miscetur, cum si excrementum fuisset magis natura per intestinum rectum illam ipsam exterminare allaborasset. Equidem amara ipsam mixtionem succi nutritii & ipsius sanguinis intimam, nec non fluidi spirituosum crasin minime ingrediuntur, ut potius sequestrentur ab ipso, nihilominus usum præbent excellentissimum. Consistit autem ipse in eo, ut partim acidum primarum viarum venis juxta HELMONTIUM inimicum (dum sanguinem spissum ac crassum reddendo in motu sistit) destruat, & viscositatem dissolvat; ante omnia autem ut blanda irritatione & vellicatione ad motum stimulet intestina, quo ipsorum motu peristaltico vegeto reddito alvi excrementa inutilia, ad corruptionem humores diuturna mora valde disponentia, felicissime eliminantur. Quare si bilis deficit, si sal sulphureum fixum, quo omnia amara gaudent, in exigua quantitate ineat, obstructions alvi fecundæ, morborum chronicorum matres, propullulant. Quo circa observamus sollicita experientia, omnia amara convenienti dosi exhibita laxantia esse, & alvum admonere sui officii. Præterea omnia remedia amara, & inter hæc extracta herbarum amarificantium, aloetica, præsentissima sunt remedia ac præservativa in morbis refractariis, chronicis, qui ex obstructione & infarctu viscerum subnascuntur, quales sunt icterus, febris quartana, scorbutus, hydrops, asthma, cachexia, malum hypochondriacum, scirrhus hepatis, lienis, non quod acidum, quod tantum peccare putant multi recentiorum hisce in morbis destruant atque enervent, sed quod materiam bilis præbeant, & præcipuè blandè totius corporis excretoria stimulent, maximeque glandulas bilarias, renales, subcutaneas, irritent, ut officio suo fungantur, & fluorum excrementitiorum secretio promoveatur. Adscribitur etiam recensitis amaris singularis vis sanguinem depuratoria, quæ identidem non aliter explicari potest & debet, quam quod facultate gaudeant deobstruendi viscera, non ipsam materiam subsistentem crassam fluidificando, sed motum introducendo, in excretoriorum fibrillas, unde robore ipsarum incrementum, prompte contenta, prius tamen ad fluiditatem quandam disposita, resolvuntur, & ad excretionem accommodantur: Etenim sanguinis impuritas omnis sive viscida sit, sive salina, sanguinis circulo debiliori & excretoriis obstructis, vel in tono suo ac robore lassatis adscribenda est. Quicumque itaque vult sanguinem depurare, & illum liberare à sordibus morbosus excrementitiis, is ut excretionem tantum promoveat, necesse habet,

ita enim sua sponte humorum edulcoratio succedit.

§. XI.

Ex alterantibus remediis splendent etiam *salia* sic dicta *neutra* seu *media*, qualia nominatim sunt, arcanum duplicatum, tartarus vitriolatus, nitrum purificatum, terra foliata tartari, solutio oculorum cancri, sal ammoniacum, tartarus tartarificatus, sal digestivum *Sylvii* bene præparatum. Habent hæc ipsa magnum usum in medicina, dum fine aperiendi ferme in omnibus morbis, ubi obstructions & viscositates reperiuntur, sicuti sunt chronici inveterati, magno cum effectu præscribuntur, & commendantur. Quæstio autem est de modo operandi. Complures existimant illa ipsa spiculis & aculeis suis, quibus constant, discindere & dividere viscosæ materiæ plicas & contextum, & ita mucosum in tenuem humorem convertere; quamvis autem illum effectum non plane negare velim primis in viis, non tamen perspicio, quomodo sanguis universus mucosus ac viscidus illis ipsis sufficienter possit dissolvi, cum nulla intercedere soleat proportio inter cruoris molem & dosin salium. Agunt itaque potius stimulando singula corporis excretoria. Quam egregie sedes promoveant laudata salia, si in sufficiente quantitate assumuntur, noto notius est, & quam valide purgantis, etiam in minore dosi, virtutem acuunt, intendunt, Practici optime norunt. Revera enim unum granum resinæ jalappæ cum granis decem vel duodecim dicti cujusdam salis maritatum plus efficit quam resina jalappæ ad grana quinque sumpta. Nec ignota potest esse horum salium efficacia diuresin movendi, cum ferme inter singulas formulas diureticas ipsa relata undique invenias, neque res est de nihilo: salia enim utique amant quasi ex consymbolismo rerum evacuandarum, cum eorum particulae poris admodum congruæ ac confines sint, ut adeo in dicto secretorio vim suam stimulantem irritantem longè feliciter exerere possint, quam in aliis visceribus. Ex salibus autem neutris singulare quid fovet ipsum nitrum, divinum certè remedium; compositum hoc sal inflammabile est ex spiritu acido sulphureo subtilissimo, ac terra alkalinæ; Hoc sola depuratione præparatum inter calorem excessivum deprimentia, inflammationes & sitim inexplebilem extinguentia, viscidumque humorem resolventia vix par & sui simile habet; & quando bene ejus vires ponderamus & experientia inquirimus, est illud ipsum laxans, item diureticum, diaphoreticum, aperiens, anodynum, refrigerans præstantissimum, quo vix bonus & exercitatus Medicus carere commode potest. Quæstio autem hic est de modo operandi? Dicimus autem & asserimus, illud ipsum revera non tam in humores totius corporis nostri agere posse, quam potius in spiritus. Experientia enim, quando ipsam sollicitè consulimus, testimonium nobis præbet, decem tantum grana nitri, cum pulvere præcipitante fixo, sæpius notabiliter calorem & ardorem corporis, ipsamque sitim extinguere posse. Impossibile autem est, ut omnes humores paucis istis granis imbuere ac impleri possint. Remanet itaque, ut statuamus, sal hoc esse talis naturæ, ut cum lymphæ corporis mixtum, subeat poros ipsius cerebri, quod aliis negatum est, immediate ejus particulis abeuntibus ad massam spirituum, quos in motu suo quodammodo sistunt, & ob hanc rationem virtutem anodynam, refrigerantem, etiam diaphoreticam exercent, unde etiam nitrum anodynum minerale à quibusdam exercitatissimis Practicis salutatur. Probabile hoc assertum videtur ex eo, quod tam potenter refrigerat, quod omnibus aliis salibus

salibus concessum non est, quæ potius calorem ac sitim accendunt; Deinde quod spirituum motum furibundum, impetuosum sistat, unde in inflammationibus, it. in mania, phrenitide non datur remedium efficacius, quod omnino alia acida, bilem & sulphureas volatiles particulas longè potentius figentia, non præstant; Et tertio, quod tonum non tantum ventriculi sed & aliorum viscerum ac glandularum relaxet, unde serositates in corpore à nimio usu nitri augentur. Ex quibus jam facile intelligitur, nitrum illis remediis accensendum esse, quæ motus fluorum ac spirituum in corpore sistunt, nam non tantum Medicus facere in morbis motus, sed & sæpenumero nimios sedare ac sistere debet, inter hæc autem tutissimum referimus nitrum.

§. XII.

Ex salibus mediis singularis quoque considerationis est vitriolum, per quod intelligimus sal ex acido & martiali corpore concretum. Tincturæ martiales quæ mirificè & passim dilaudari solent, ad rebelles etiam morbos persanandos, nil nisi solutiones martis sunt per acidum menstruum institutæ adeoque vitriolicæ. Ipsæ acidulæ, decantatissima remedia, mutantur maximè suam virtutem à vitriolo, quod primum illarum est ingrediens. Vulgaris jam est opinio, tincturas martiales seu martem potabilem operari edulcorando sanguinem & quidem acidum absorbendo & præcipitando. At vero quis sibi imaginari potest, tam paucas guttulas, quæ vix decimam partem grani martis occupant, acidi exsuperantis portionem posse absorbere, maximè, quoniam jam martiales partes sufficienter acido menstruo in tincturis saturatæ sunt. Nihil itaque remanet, quam ut confugiamus in horum explicationem. Nostrium proinde iudicium est, ipsa in corpus assumpta & cum lymphâ ad sanguinem deducta, ad glandulas & fibras motrices partium appulsa, relinquere in minutissimis earum poris ac tubulis partes suas paululum scindentes ad motum ineptas, quæ dum influxum spirituum invitant, lenem constrictionem ac tonum partibus hisce inducunt; quo facto progressivus motus tam sanguinis & humorum, quam etiam secretio & propulsio excernendorum promovetur, adeo ut sic dicta constringentia, quod innumeris exemplis esset roborandum, sæpissimè egregiè aperiant & excretionem promoveant. Videmus autem hunc vitrioli effectum manifestò, quando tantum dimidium grani vitrioli albi attrahitur in nares, quanta copia muci, per illud eliciatur, constringendo enim tunicam glandulosam ac nerveam, in magna copia exprimit mucum ac lymphaticum succum. Eadem est ratio, quare vitrioli sal ad drachmam unam assumptum interdum per vomitum, interdum etiam per alvum copiosum serum tenax, pellucidum ejiciat. Rimari etiam hoc allubescit operationem acidularum. Certè in compluribus gravissimis morbis acidulæ magnos præstant effectus & quidem non tam propter copiam aquæ, quæ revera & utilissima est, sed & propter vitriolum, quod stimulando alvum aliaque excretoria humorum ejectionem nec non partium deobstructionem promovet, ac secundat. Notabile enim est nullum remedium magis universale evacuans esse, quod per singula solennia evacuatoria & non rarò uno tempore satis fortiter operatur, quam sunt ipsæ acidulæ. Hæ enim in copia haustæ, in nonnullis subjectis & alvum & urinam, & sudorem & vomitum satis validè provocant, quæ sane virtus a vitriolicis partibus ad omnia evacuatoria allatis, quod dependeat ex superiori allata ratione clarum evadere potest. Cæterum de martialium modo agendi & illorum usu

legi possunt notæ Dn. Præsidis in cap. 25. Cent. II. Poterii.

§. XIII.

Ordo nunc postulat, ut remediorum aqueorum, fluidorum naturam ac indolem examinemus. Veteres quod infusa & decocta herbarum cum aqua facta in morborum curatione mirum æstimaverint, ex monumentis ejus si consulimus constat; Neque remedia hæc sunt vilipendenda, sed revera in medendo maximas prossident vires. Horum autem virtus non principaliter ab herbis, sed potius à copia aquæ derivanda est. Aqua humor est fluidissimus, cujus minimæ partes in perenni ac perpetuo juxta se invicem versantur motu. Aqua liquor est, cujus interstitia materia subtili aereo-ætherea repleta sunt, qui aptus est diversissimas partes salinas viscosas in suos poros recipiendi, & quo levior est, purior, à variis heterogeneis talibus particulis privatus, eo majori emolliendi, resolvendi, fluidificandi gaudet potentia. Et quoniam vita & conservatio corporis nostri consistit maximam partem in sanguinis temperie, fluiditate, motu circulari, & partium heterogenearum expulsionem, in promptu est colligere, aqueum fluidum, quod lubricis flexilibus, evaporabilibus constat particulis, aptissimum esse sanguinis spissitudinem & crassitiem præcavere, ipsumque in fluiditate debita & motu conservare, adeoque a gravissimis chronicis morbis qui ex obstructionibus, liquorum impuritatibus oriuntur, præservare. Ut adeo meritò aqua pura & convenientibus ingredientibus correctæ, calideque in conveniente dosi assumpta simplicissimum quidem sed revera summum, universale & efficacissimum remedium sit, quod ad multorum morborum præservationem & curationem magnum attribuit adjumentum. Omnes morbi qui à salibus peregrinis impuris oriuntur, quorum plurimi sunt, non melius possunt debellari, quam infusis & decoctis salia diluentibus, & per debita evacuatoria e corpore evehentibus. Ex hoc fundamento petenda quoque est aquarum salubrium, quæ sæpius non nisi aqua purissima sunt, æthereo subtili spiritu abundans, efficacia. Agunt nimirum hæc diluentia utique principaliter ipsum in sanguinem & humores, & quoniam in magna quantitate assumi solent, in parva enim vix aliquid præstant, idonea sunt totam humorum & sanguinis massam alterare, & ad fluxilitatem disponere; Neque tamen inficiendum est, remotè etiam operationes exerere in spiritus, nam quando calore & motu fluiditatis circulatio sanguinis promovetur, sanguis fluidus redditur, & excrementa ab eo probè sequestrantur, spiritus etiam & copiosi, laudabiles generantur & expanduntur, & ob hanc causam potus theè commendari solet ipsis literatis & valdè celebrari, ad torporem & somnolentiam ex capite dissipandam, ad hilaritatem, ad studia & res cum alacritate peragendas; Excitatis enim spiritibus, qui primi ac præcipui reliquorum fluorum motores ac impulsores sunt, moventur & ipsi humores secundum regulam. Inanis autem à Medicorum vulgo metus est, aquea hæc in copia assumpta disponere ad cachexiam, leucophlegmatiam, hydropem. Ex nostra sententia potius infusa calida sat larga quantitate exhibita, ab ascitico morbo egregiè defendunt, imo ipsum serum reddendo fluxile, ut deinde eo melius cedat purgantium virtuti, magna præstitisse observavit aliquoties Dn. Præses. Modum tamen & hic tenere oportet, cum utique continuo aquarum calidarum usu ventriculi & intestinorum tonus ac robur propter nimiam distensionem successive resolvatur, nec non menstruum salivale & biliosus liquor nimium diluantur, ut deinde

dige-

digestioni & resolutioni ciborum ac chyli spirituscentiæ ritè præesse nequeant.

§. XIV.

Medicamentorum probatæ virtutis catalogum subeunt *emollientia* seu *mucilaginosæ* quibus revera haud exigua existit efficacia, præsertim si decoquantur, & principium illud mucilaginosum & ramosum probè extrahatur. Ex horum numero sunt radices liliorum alborum, altheæ, scorzonæræ, rasura cornu cervi, herba malvæ, consolidæ majoris, buglossæ, flores violarum, borraginis, buglossæ, cynoglossæ, papaveris rhœados, semen cydoniorum, bombacis, amygdalæ dulces aliaque semina, olea expressa, ficus, passulæ, hordeum; Hæc decenter decocta maximum habent usum in morbis, quales sunt scabies, lepra, ulcera, scorbutus, dolores arthritici, diarrhœæ, hæmorrhagiæ, qui à sale exsuperante, erodente, partesque nervosas ad spasmodum concitante, natales suos petunt. Agunt autem dicta remedia omnino principaliter in humores, quorum spicula salina, acia, ramosa, anfractuosa suo contextu excipiunt, involvunt, intricant, ut aculeis & cuspidibus ipsorum infractis, non amplius irritare, partes solidas discindere & præternaturales motus spirituum amplius efficere possint. At verò si aliquod singulare debent præstare etiam in larga quantitate suadenda sunt, & opus tunc est ventriculo vacuo, visceribus non obstructis, scirrhis, corruptis, intestinis & chyloferis viis liberis, nec non bono ventriculi tono &c.

§. XV.

Ultimo loco sistimus sub examen medicamenta terrea, quæ duplicis sunt generis, vel enim quædam sunt naturæ alkalinae, texturæ levissimæ, facile solubilis, uti sunt lapides cancrorum, testæ cancrorum, conchæ præparatæ: quædam autem ex crassioribus, solidioribus, minus promptè solubilibus, composita sunt partibus, uti sunt unicornu fossile, variæ species terræ sigillatæ, bolus armenia, hæmatites, ossa & cornua philosophicè præparata, bolus rubra, alba. Prioris generis terrea in humores acidos prima in regione subsistentes magnum habent jus, istos invertendo, corrigendo, & absorbendo, unde etiam acidorum correctoria & absorbentia nuncupantur. At verò insuper & urinam & sudorem cedere solent, quod ita procedit: dum nimirum exsuperans in affectione hypochondriaca, hysterica, arthritica, calculosa, absorbent acidum, degenerant in sal falsum, amarum, egregium deterisivum, quod cum lymphâ deductum ad sanguinem excretoria ferri subtilis & crassioris, glandulas nimirum subcutaneas & renales, blandè stimulat, & ad excretionem sollicitat, ita diuresin ac diaphoresin accedente debito regimine frequenter provocant. Solent hæc absorbentia esse polychresta, & non tantum in morbis chronicis ab acido oriundis, sed & in acutis cujuscunque generis inflammationibus, febribus, excretionibus morbosus ad corporis peripheriam operam locant laudatissimam. Differt autem ab ipsis reliquorum terreorum crassioris consistentiæ operatio, dum hæc in corpus admissa, præsertim si cum acido occurrente in austeritatem degenerent, motum fluorum intestinum tardum ac lentum efficiunt, quoniam multas graves, crassas, ad motum intestinum

& progressivum ineptas, sanguini communicant particulas, poris fluorum ubivis sese interponentes. Quocirca ubi humores nimis sunt tenues, rarefacti, expansi propter nimium motum, nec non salibus acribus subtilibus stipati, uti in multis doloribus, spasmodis, febribus inflammatoriis cum excretionem conjunctis, hæmorrhagiis, diarrhœis accidit, ibi dicta terrea constringentia laudatissimum depromunt effectum. Minus autem proficua sunt, ubi sanguis est crassus, densus, viscosus, & prima regio pituita & tenaci materia obfessa est, visceraque obstructa, sanguinisque ventilatio debilis, tunc enim obstructions & infarctus magis adaugent, secretiones impediunt; quocirca in febribus quartanis intermittentibus, maxime in principio, mensium vel hæmorrhoidum obstructione, expulsionibus criticis, & ubi sanguis vel lymphâ evacuari solet consueto tempore, nocentissima sunt. Quod diximus de terreis, constringentibus, illud ipsum quoque optimo jure valet de celebratissima china china, aliisque v. g. visco quercino, radice plantaginis, cortice quercino, tincturis adstringentibus ex hæmatite, marte paratis, aluminosis, quæ ad paroxysmos febrium tollendos nonnulli mirifice commendare solent; Et faciunt profecto suum officium egregie, si febres sunt tertianæ, biliosæ, magno cum motu conjunctæ, vernales, æstivæ, subjecta sanguinea, cholericæ, præmissis illis, quæ motu sanguinem viscosum dissolvunt, & obstructa viscera liberant, tunc enim & roborando & constringendo crasin sanguinis, & roborando glandularum subcutanearum omniumque viscerum tonum felicissime febris reliquias ex corpore ejiciunt & motus febriles consuetos prohibent ac perfectæ sanitati homines restitunt. Ex adverso si improvidè & intempestivè adhibentur, ibi majorem crassitiem humoribus fœnerando, & obstructionem firmando, lethales etiam morbos, febrem hecticam, hydropem, producere apta sunt. Nulla enim remedia majori cautione & circumspeditione opus habent, quam adstringentia, quorum effectus valde dubius, & contrarius est, prout nimirum ipsa subjecta differunt, vel humorum varia est dispositio.

§. XVI.

Ex hisce omnibus adductis si bene ponderentur, facillimè intelligimus remedia hætenus recensita alterantia non aliter operari in corpus nostrum, quam vel materiam vel ipsum motum afficiendo, adeoque mechanicè; & quoniam conservatio corporis in certa materia sive temperie sanguinis, certo in motu circulatorio & excretorio versatur, non potest aliter evenire, quin omnium morborum causæ ex eodem fundamento ducendæ ac derivandæ sint, & deinceps consequi necesse est, ut omnia remedia, quæcunque aliquid contribuant ad sanationem, ex eodem fundamento agant & operentur, nimirum materiam variè alterando, disponendo, & motum nimium vel sistendo, vel deficientem & languentem promovendo ac erigendo. Natura quippe in omnibus suis operationibus est simplicissima, paucis principiis magna mirabilia machinatur. Et quicumque non medicamentorum effectus ex eodem fundamento deducit, ille quod valde hallucinetur in ratiocinando firmissimè persuasus sum. Sed hic subsistendum est & Deo pro concessis viribus gratiæ agendæ.

DISSERTATIO MEDICA

D E

PURGANTIBUS SPECIFICIS.

Primum edita Anno 1696.

§. I.



ANCEPS ac misera est, quam quotidie experitur Medicus, fortuna; nec minus fata, quibus premitur, calamitosa sunt. Vix enim ulla existit ars, vix ulla scientia, quæ tot immaturis ac sæpenumero acerbis perversorum hominum judiciis exposita est, ac Medicina; adeo ut nec vilissimus histrio in messem medicarn suam immittere falcem dubitet. Hinc quilibet fere sordidus futor ultra crepidam sapit; Barbitonsor sphaeram barbæ suæ temerario pene ausu transcendit; imo quævis superstitiosa vetula hic suo indulget genio, suæque superbe jactat mysteria, quibus & plerique plus adhibent fidei, quam peritissimo Medico. Verbo ut me expediam:

*Fingunt se medicos quivis Idiotæ, Sacerdotes,
Judæus, Monachus, histrio, rasor, anus.*

Nempe usque adeo cæca est pleraque mortalium turba, ut aniculas potius, negromanticos, veneficas, agyras, circulatores, similesque plebeios, quam rationales Practicos consulant, ab iisque auxilia extorqueant. Eximiæ profecto farinæ consortia, cum quibus ipsi sæpe medici pari passu ambulant. Sed neque fas est credere, talia medicinæ monstra casu & fortuito fuisse orta. Quin potius existimaverim, Medicos ipsos hujus suæ fortunæ fabros & architectos esse. Quot enim illorum deprehenduntur, qui spreta omni causarum morbi theoria solas imaginarias crepant experientias? Quot adhuc hodie in radiantissimo scientiæ medicæ sole ostenduntur, quibus fere semper in ore hæret: *Secare venam, purgare, clysteres immittere*. Hos jamdudum risit ingeniosissimus MOLIERE in quadam comœdiarum suarum, cui titulus: *Le Médecin malgré lui*. Lepide etiam HIPPOCRATEM introducit loquentem *Arlequin* hunc ferme in modum: *Si vous êtes chagrin, saignez vous, purgez vous, prenez un lavement, & enfin saignez vous: Si vous avez mal à la tête, saignez vous &c.*, atque ita ratiocinatur de reliquis affectibus cunctis. vid. *Arlequin Nouvell. historiq. & allegoriq.* Atque sub hunc censum semper etiam PURGANTIA SPECIFICA reducenda esse putavi, quibus crediderunt Medici, se ex quibusvis partibus solidis, cerebro, corde, pulmonibus, hepate, pancreate, & miror, cur non etiam ex pollicum pedis extremo vitiosos atque peccantes humores ad intestina invitaturos, sicque per communem illam fistulam elutriaturos esse, in quos tamen merito quadraret illud VIRGILII:

O Corydon, Corydon, &c.

§. II.

Genuinam itaque purgantium specificorum indolem rite expiscaturo ante omnia conveniet indagasse curiosius, quotuplici nimirum sensu remedia specifica salutare queant. Non est autem, quod vel momentum in specificorum vulgo sic dictorum naturæ moreretur. De talium enim remedium certo & infallibiliter in profligandis certis quibusdam affectibus energiam suam exerentium, nec Medicum intentione ac scopo suo unquam frustrantium existentia vix ac ne vix quidem cogitandum. Unde fortasse magis e re nostra futurum esset inquisivisse, numne salva ratione talia liceat concipere specifica, quæ peculiari plane ac mystica quasi virtute huic potius, quam illi parti solidæ medeantur, vel noxam eidem minentur? h. e. quæ cerebro, cordi, pulmonibus, hepati, utero, similibusque visceribus potius consecrata sint, quam aliis partibus, adeoque potiori etiam jure vel cephalicorum, vel cardiacorum, vel bechicorum, vel hepaticorum, vel uterinorum titulum sibi vindicent? Sed nec hoc modo præstare in nigro, quod promisi in rubro. Vix tamen impedire me possum, quominus cæcutienti antiquitati catacactam hanc in parte subducam, eamque singulorum horum specificorum futilitatem manibus veluti palpare doceam; quamvis superba omnino videatur temeritas tantæ venerandorum senum authoritati impune sese opponere.

§. III.

Labili enim ac singulis momentis ruinam minanti fundamento quis unquam vidit solidum superstructum fuisse ædificium? Ex turbido fonte quis observavit unquam claros manasse rivulos? Philosophia veterum est ruinosa illa moles, motibus sympathicis & antipathicis tanquam basi superinædificata, cui proinde & ædificium similis farinæ superimponetur. Phænomena in macrocosmo observata, quæ mutuam invicem amicitiam vel inimicitiam mentiri videntur, si lubeat cum Philosophiæ antiquæ antistitibus sympathias & antipathias appellare, per me quidem id licebit; sed an propterea in microcosmo, ejus diversis organis ac partibus, earumque alimentis ac medicamentis similes quoque sympathias & antipathias fingere liberum erit? quod quidem an sanior philosophia unquam admiserit, admodum dubito. Universa corporis humani machina hydraulico-pneumatica est, particulis partim solidis partim fluidis constans. Solidæ artificiosam telarum fabricam haud incongrue æmulantur; componuntur enim ex meris fibrillis, modò grossioribus, modò delatioribus, concinno ordine ac situ dispositis, certaue figura donatis,

donatis, quæ proinde & porulos certarum magnitudinum ac figurarum circa sese relinquunt. *Fluidæ* vero tunc demum in naturali suo temperamento esse creduntur, si singulæ earum moleculæ jugi ac perpetuo cieantur motu, eundem constanter ordinem ac situm servent, quamvis interea variis particulis diversarum magnitudinum ac figurarum gaudere queant, dummodo tales simul sint, ut totum fluidum in amicam miscelam harmonicumque motum conspiret. Atque adeo secundum hanc hypothesin omnia specifica in hoc tanquam centro communi concurrent, quod aut partibus solidis aut fluidis dicta ratione affectis famulatura sint, h. e. vel naturales fibrarum magnitudines atque figuras, nativam earum connexionem & resultantes inde porulos tuitura, vel motum sanguinis, feri, spirituum animalium, reliquorumque fluidorum factum tectumque conservatura. Cur igitur speciali privilegio cephalica potius audiant, quam cardiaca? aut cardiaca potius, quam cephalica? splenetica potius, quam hepatica? aut hepatica potius, quam splenetica? Mera igitur præjudicia sunt specifica in favorem credulæ plebis a Medicis excogitata, sicut id in cephalicis vulgo sic dictis manifestum reddam.

§. IV.

Cephalica dicuntur pharmaca, capiti & imprimis cerebro opitulancia, ejusque vitiis quibuscunque medicinam adferentia. Jam sexcenti fere concipiuntur modi, quibus cerebrum labefactari atque a temperie sua naturali desciscere queat. Mox enim viæ ac canaliculi, quibus sanguis, spiritus animales, serumque lymphaticum advehuntur ac revehuntur, præternaturaliter dilatantur ac expanduntur, imo quandoque veluti emolliuntur; mox fibrillæ legitimum suum tonum amittunt, paralyticæ evadunt, atque adeo relaxantur; mox eadem nimium exsiccantur abbrevianturque; mox vero aliis afficiuntur modis. Ipsi etiam humores, cerebrum perpetuo irrigantes, non minus tristitia ibidem dramata ludunt. Interdum enim ipse latex nervosus, vigoris & efficaciam omnis fons atque origo, in suo motu nimium torpescit, crassus ac languidus evadit; interdum vero læviente orgasmo concitatur, rationis regimen fastuose negligit; &c.

Fertur equis auriga, nec audit currus habenas.

Quandoque nimium vappidus atque aquosus existit, virtutisque omnis expers; quandoque vero nimia peccat acredine, eademque delicatos nervulos mordicat, atque ad convulsivos & epilepticos motus disponit. Nonnunquam determinatus per lineam rectam gyratur in circulum atque ad vertiginem viam pandit. Et quis cuncta enarrabit vitia, quibus humores cerebri affici queant? Quotquot autem illa fuerint, singula tamen speciales subministrant indicationes curatorias, specialiaque efflagitant remedia, quibus e medio tolli ac secure averruncari queant. Ut adeo hinc manifeste appareat, famosa illa cephalica, omnes hucusque enarratos morbos unico veluti ictu prosternentia, inania non nisi figmenta esse. Quis enim uno eodemque cephalico poros compressos aut plane obstructos referabit, aut eosdem nimium apertos ac dilatatos constringet? Quis partium fibrillas tono suo destitutas & relaxatas exsiccat, aut easdem exsiccatas nimiumque abbreviatas denuo emolliet, humectabit atque ad nativam suam indolem revocabit uno eodemque remedio cephalico? Quis sanguinem, spiritus animales, reliquosque humores in circuitu suo languentes ac torpidos factos, ex orco denuo revocabit, attenuabit, ac nova de-

Frid. Hoffmanni Oper. Supplem. II.

nique virtute imprægnabit? Aut eosdem nimium effrænes ac impetuosos domabit & sub rationis jugum reducet uno eodemque pharmaco cephalico? Aut quis non potius, cui de meliori luto finxit præcordia Titan, intelligit, tot diversa debere esse medicamina, quod diversi fuerint scopi curatorii? neque proinde ullo speciali jure cephalicorum nomen promereri. Quasi non possent eundem quoque fortiri effectum in corde, pulmonibus, hepate, aliisque visceribus, simili labe notatis, atque adeo eodem privilegio vel cardiaca, vel pulmonica, vel hepatica &c. appellari. vid. B. WALDSCHMID *Inst. Med. rat. lib. 5. cap. 20. §. 7. & 8.* Superbiant igitur alii fictitiis suis cephalicis, cardiacis, pulmonicis, spleneticis atque hepaticis, eaque in coelos usque extollant; nos iis solum contenti erimus remediis theoriæ hætenus indicatæ conformibus, atque indicationibus curativis ex asse satisfaciendis, parum aut nihil morantes, quocunque quis titulo eadem salutare gestiat.

§. V.

Specificæ secundi ordinis, quæ certis quibusdam morbis sacra eorumque amuleta esse putantur, iisdem laborant difficultatibus. Quid enim? Absurdumne, morbos ab una eademque causa oriundos, eandemque materiam peccantem agnoscentes, similem quoque efflagitare curam? Sic *pleuritis*, *peripneumonia*, *angina*, *tumores erysipelatosi*, similesque affectus natales suos debent humoribus acidis, austeris atque terrestribus, obstructions parientibus, rapidissimumque ætheris subtilissimi transitum retardantibus, aut plane renuentibus, sicque partem, in qua hærent, inflammantibus. Unde postmodum *febris acuta simulque continua*, tanquam frequentissimum omnium inflammationum symptoma, exoritur. Quis autem theoriæ horum morborum convenienter non videt, indicationes curatorias nullas alias esse posse, quam discussionem acrium spiculorum salinorum, in poris partium sive membranarum, sive glandularum, sive musculorum hærentium, atque ita obstructionum ibidem natarum reserationem? Sive igitur jam vitium hæserit in tunica pleura, sive tunica pulmonum, sive in musculis intercostalibus internis, sive in glandulis & musculis linguæ, sive in quacunque alia parte solida, perinde fuerit, dummodo talia applicentur remedia, quæ humores in poris partium stabulantes discutere, porosque reserare apta nata sint. Aequè enim facile curabitur pleuritis, peripneumonia, angina, cæterique affectus erysipelatosi omnes. Videant igitur & hac in parte specificorum patroni, quomodo in tam æqua theoriæ cum praxi harmonia sibimet ipsis satisfaciunt.

§. VI.

Devolvimur itaque tandem ad contemplationem *specificorum tertii ordinis*, & quidem *Purgantium*, in quibus & cardo dissertationis nostræ versatur; quæ proinde & summa, qua potero, brevitate ad rectæ rationis lancem revocabo, quia & temporis & summi habenda mihi est ratio. Neque tamen in generalissimo suo sensu purgantium vox hic est accipienda; sic enim & *sudorifera*, *diuretica*, *diaphoretica*, *sternutatoria*, *errhina*, *salivantia*, *expectorantia*, & sexcenta alia ad remediorum purgantium seriem pertinerent, atque ita respectu partis, ex qua humores vitiosos eliminant, forte specificorum titulum mererentur. Sed de illis solummodo purgantibus sermo nobis est, quæ humores vitiosos non solum ex intestinis, tenuibus æque ac crassis, sed & ex partibus quibusvis solidis ad fistulam majorem in-

Hhh

testi-

testinalem tanquam communem cloacam alliciunt, atque per illam eliminant. Atque de illis quæstio non exigui ponderis occurrit, num dentur? Ne autem meum de problemate tanti momenti iudicium temerarium sit aut imprudens, examinare prius lubet hypothesin, cui tota de purgantibus specificis doctrina innititur, satis fidei mihi promittens, si ex ipsis Medicinæ patribus, HIPPOCRATE & GALENO repetam, quicquid ex centenariis aliis hoc in casu allegari posset. Prior existimat, singula purgantia speciali virtute ac proprietate gaudere, qua specificum humorem attrahant atque ad sese alliciant. Posterior vero facultati attractrici non penitus quidem repudium mittit, sed majus tamen quærit præsidium in quadam substantiarum similitudine, quam concipit intercedere remedio purganti cum humore expurgando; exemplo magnetis & ferri, sese mutuo propter substantiæ suæ similitudinem trahentium in subsidium vocato. Sed uterque prolixa non meretur encomia, partim quod verbis nihil significantibus ludant, partim quod facultati attractrici, idolo jam dudum in cineres redacto, sacra faciant, quam non immerito *ens vix etiam notionale & speciem sine corpore* appellavit PECHLINUS *Exercit. de Purgant. Sect. I. cap. I.* Talis autem cum sit fundamenti hujus generis, quid quæso de ædificio reliquo illi superstructo sperandum erit? Cum & eodem PECHLINO rectissime pronunciante *maxima errorum materies ex falsis hypothesebus sit enata.*

§. VII.

Pedem itaque jam promoveo ad purgantium specificorum historiam, præcipua de illis rerum momenta tantum indicaturus; ubi prima statim fronte offerunt sese decantata illa *Cholagoga*, *Hydragoga*, *Phlegmagoga*, & *Melanagoga*, quibus nonnulli & *Panchymagoga* adjungunt, bili, fero, pituitæ & succo melancholico expurgandis dicata. Et quid quæso sperari poterat aliud? Cum enim ex quatuor istis humoribus primitivis universam sanguinis massam conflare bona fide crederent, totidem quoque purgantium specificorum classes effingere necessum habebant, ut, si forte unus illorum prædominaretur atque cristas præ altero erigeret, appropriato illo purgante compesci & evacuari posset. Sed vanitatem hujus hypotheseos risit jam suo tempore HIPPOCRATES, graviter pronuncians, in sanguine non solummodo bilem, serum, pituitam, succosque melancholicos, sed sexcenta alia particularum genera deprehendi, quæ cum cuncta pro genio suo abundare atque præ aliis prædominium habere queant, sequeretur, sexcenta quoque purgantium specificorum genera excogitanda esse, quæ purgandis singulis istis peculiaribus humoribus, excessu suo peccantibus, sanguinemque gravantibus sufficerent. Sed partus ejusmodi abortivos hodierna Medicina abominatur, de foetibus longe felicioribus abunde sibi gratulans, quos & sollicitè lambit, suæque cura dignatur. Percurram tamen ea brevibus, ut officio meo aliqua saltem ex parte satisfaciam.

§. VIII.

Cholagoga illa audiunt purgantia, quæ vulgo bilem flavam, h. e. succum ex pluribus particulis salino-acribus, paucis phlegmati, oleo ac terræ involutis conflata evacuare dicuntur. Sub quorum catalogum reducuntur *cassia*, *tamarindi*, *aloë*, *rhabarbarum*, aliaque plura. *Hydragoga* ea vocantur cathartica, quæ humoribus serosis, a phlegmatibus tantum gradu discrepantibus, expurgandis dicata sunt.

Et celebrantur sub hoc titulo *gummigotta*, *elaterium*, *soldanella viridis*, *mechoacanna*, *esula*, *succus iridis*, & similia. *Phlegmagoga* dicuntur medicamenta humores pituitosos, h. e. viscidos, glutinosos, tenaces, instar ramorum arboris sibi invicem implicatos, ventriculūque & intestina gravantes, evacuantia. Quorum reducuntur *jalappa*, *euphorbium*, *sagapenum*, *gummi ammoniacum*, *mercurius dulcis*, & plura alia. *Melanagoga* denique illa appellantur purgantia, quæ succos atrabilarios sive melancholicos, h. e. humores acidos, fixos ac terreos, in ventriculo & intestinis pertinacissime stagnantes, expellunt atque eliminant. Atque in horum catalogo primas tenet *helleborus*, *folia sennæ*, *myrobolani indi*, *lapis lazulus*, &c.

§. IX.

Sed quis non videt, diversas hæc purgantium denominationes non aliunde suos traxisse natales, quam ex similitudine colorum, quos observabant in medicamento purgante & humoribus purgatis nonnunquam ex asse congruentes? unde jam satis proclives erant, ut adorabilibus suis sympathiis & antipathiis altaria erigerent. Ast quæso potestne in coloribus aliquid fingi, quod vel ullo modo electivæ purgationis genium ostendat? Cum enim colores nihil aliud sint, quam certæ solummodo radiorum cœlestium in certas corporum superficies, ex varia humorum mixtura oriundas, incidentium modificationes; annon verosimillimum est, purgantia, diversis licet colorum vestibus induta, nihilominus unum eundemque humorem expurgare posse, quemadmodum & pari felicitate una eademque colorum facies in purgantibus nihilo secius succos diversi generis evacuare potest. Et licet objiciant, experientiam tamen testari, excrementa eo exactè colore tingi, quo imbuta erant purgantia, turpem tamen committunt fallaciam causæ non causæ. Unde enim, quæso, hanc veritatem didicerunt, colores sæcum alvinarum dependere a purgantibus? credendumne, flavedinem bilis a rhabarbaro ortam? aut nigredinem succi melancholici ab helleboro nigro? Quasi scilicet mirus ille humorum in intestinis concursus non posset esse genuinus istorum colorum parens. Taceo, quod excrementorum colores, quamdiu in ventriculo & intestinis latent, ne definiri quidem possint, sed tunc demum, ubi radiis solaribus exposita diversimode ab iisdem modificantur. Majori itaque certitudinis fiducia credere licet, purgantia eliminare humores, quicumque ipsis primo occurrunt, quique ad motum omnium primò suscipiendum sunt aptissimi. Efflagitant enim hoc inevitabiles mechanicæ motuum leges, ut fæces aliis subtiliores & mobiliiores omnium primo excutiantur, subsequen-
tibus sensim scybalis crassioribus, fixioribus & immobilibioribus, a quocunque demum id fiat purgante. Quas constantes motuum leges & quilibet Chirurgiæ tyro, qui vel semel venam secare vidit, intrepide confirmabit.

§. X.

Supereff tandem, ut priusquam vela dissertationis meæ contraham, famosa illa antiquorum *cephalica*, *cardiaca*, *pulmonica*, *hepatica*, *splenetica*, & quæ similibus superbiunt titulis, in scenam adhuc producam, visurus, numne refutationem an commiserationem potius promereantur. Ignarissimus sit oportet in accurata œconomiae animalis cognitione, qui chymæricis ejusmodi non-entibus album adjece-
rit calculum. Utut enim ex mera liberalitate concesserim, dari ejusmodi vehementiora purgantia, non primam tantum, sed & secundam & tertiam regionem

nem peragrantia, ibidemque humores vitiosos præparantia & ad exitum disponentia. Ostende mihi fodes, qui asseris tales chymaras, vias, & canaliculos, per quos commode ex cerebro, corde, hepate, & similibus aliis partibus solidis peccantes humores derivari ad fistulam intestinalem queant, eaque mediante foras emitti. Si supponas arterias esse, regero, munus arteriarum esse sanguinem ex ventriculis cordis excipere, atque ad universas corporis humani partes solidas deferre ad easdem nutriendas. Demonstrandum itaque tibi foret, extrema arteriolarum oscula in cavum intestinorum hiantia huic soli usui dicata esse, ut partes sanguinis sæculentiores a reliquis totius massæ laudabilioribus sequestrent, atque ope illorum osculorum in intestina eructent. Si credas venas esse, repono, venarum officium esse sanguinem a nutritione partium residuum remittere versus cor, ut novis spiritibus nitro-aëreis denuo imprægnari queat in pulmonibus. Si denique velis glandulas, serum suum in cavitatem intestinorum evomentes sæcum istarum excretoria esse, modo pari graviter falleris; respondeo enim, lympham in glandulis intestinalibus secretam non esse excrementitiam, sed succum quam maxime laudabilem, & propter egregios, quibus œconomiam animalem ditat, usus vix unquam satis deprædicandum. Ut adeo herculeæ illa cephalica, cardiaca, &c., quibus virtute veluti miraculosa & ipsos morbos herculeos prostrernere sese posse gloriati sunt, efficaciam omni exuta vel sua sponte concidant & evanescant.

Colophonis loco officii monet ratio, ut tribus adhuc verbis ostendam modum, quo cuncta hæcenus indigitata purgantia suum producant effectum. Ubi equidem Galenicorum vulgus attendi non meretur, quippe quod imaginariam quandam *facultatem expultricem* cæco velut impetu adorat, quod tamen philosophema ne simplicissimum quidem rusticum latet. Rectius proinde purgantium virtutem & operandi rationem explicuisse putandi sunt illi, qui aut sub forma *dissolutionis*, aut *irritationis*, aut denique *fermentationis* eandem concipiunt. Prout enim diversa purgantium est indoles, h. e. vel particulis gaudent aquosis vel salinis acuminati, vel inultum ætheris subtilissimi secum vehentibus, vel *dissolvendo* sæces alvinas, vel *irritando* fibras motrices, vel *præcipitando* operabuntur. Quæ quidem singula enucleatius a me illustranda essent, nisi vel intra præfixos disputationis meæ cancellos consistere constituissem. Polliceor tamen, me in conflictu cuilibet satisfacturum, cui ea de re examinare me lubuerit.

Nil itaque restare videtur aliud, quam ut benevolum Lectorem rogitem, velit theses hæcæ rudi Minerva conscriptas æquiori beare censura, ac serio cogitare, nos in seculo admodum delicato vivere, ubi ne ipse quidem Jupiter omnibus placet. Neque enim usque adeo stolidus sum, ut vane mihi blandiar, me omnibus placiturum; Cæterum, quibus vel maxime displiceo, iis nunquam non placere summo studio contendam. Est enim temperies animi genio seculi quodammodo accommodanda. TANTUM.

SPECIMEN MEDICUM

D E

CAUTO ET INCAUTO SEDATIVORUM USU.

Primum edita Anno 1724.

P R O O E M I U M.



APIENTER non minus quam verè, gravissimus ille Medicinæ auctor, HIPPOCRATES, *libr. de arte §. 7.* fatur: *quæ profuerunt, ob rectum usum profuerunt; quæ vero nocuerunt, ob id, quod non recte usurpata sunt, nocuerunt; & paucis his omne id, quod artis nostræ exercitium felicissimum reddit compendio exhibet.* Omnia enim medicaminum genera haud aliter sunt consideranda, quam instrumenta in manu artificis, quæ licet affabre sint fabricata & quam optime constituta, eodem tamen modo rudi & incomto producto efformando quam summo ad miraculum usque artificio exasciando & perpoliando inservire possunt, nisi ingeniosa, provida & artificiosa manus accesserit. Eodem modo non quidem negandum est, remedia activa agendi possidere principia, quibus cum operationem suam edunt; sed id certum etiam est atque explorarum, præter divinam benedictionem, determinatum, siue potius salutarem illorum effectum, neutiquam sine directione & prudenti administratione,

stratione, hoc est, recto usu, obtineri. Quo magis itaque is, qui felicem operam artis exercitio admoveere gestit, nihil prius, nihilque posterius sibi habere debet, quam ut præter genuinam morbi & subjecti dignotionem, nec non remediorum eorumque virium notitiam, medicamenta summo cum judicio, sollicita prudentia & congrua opportunitate propinare & applicare calleat, eo acerbius sane dolendum est, ipsa hæc auxilia, quæ à Summi Numinis clementia mortalibus concessa sunt, ut iisdem divinum illud sanitatis donum conservent amissumque recuperent, imprudenti exhibitione à communi medicastrorum turba tantopere deturpari ac infamari, ut cum irreparabili ægrotantium damno maximum inde opprobrium in salutarem omnium nobilissimam artem redundet. Facillimum sane esset innumera propemodum exempla in testimonium arcessere, si placeret morborum tantum corruptorum species enumerare, sed ultro supersedebimus labore, quem tot præstantissimi viri jamjam exantlarunt, nec eorum querelas repetemus. Quodsi vero ullum remediorum genus providam a Medico exposcit administrationem, id certissime sunt ea quæ motus sopiunt atque componunt remedia, quæ, quo præstantiori pollent virtute, eo major labes, eoque gravius damnum imprudenti eorum usu toti œconomix vitali infertur. Ecquis enim est, qui ignoret, præsentissimam non solum omnium sedativorum esse opem, sed eadem latissime quoque eximiam suam efficaciam diffundere & in morbois tam solidorum, quam fluidorum afflictionibus exoptatissimam spondere medelam? At quem etiam latet, gravissimas & immedicabiles noxas, immo mortem ipsam sæpissime eorum excipere usum, adeo ut experientia firma compertum sit, plus detrimenti, quam emolumenti, à solenni & communi sedantium applicatione morbo afflictos experiri, & eorum abusum hodiernis temporibus ferme prævalere usui. Neque ea propter mirum est in tam diversas opiniones abire in sedativorum commemoratione Medicos; quot enim sunt, qui hæc ad cælum usque tollunt divinisque laudibus celebrant; e contra quot sunt, qui hæc deprimunt atque in orcum usque damnant? quot sunt, qui hæc optima quasi deprædicant antidota; aut quot sunt, qui hæc veneni nomine dehonestant, atque reformidant? quot sunt qui absque sedativorum usu se Medicos esse futuros renuunt, at quot sunt, qui hæc cane pejus & angue fugiunt inque totum deprimunt? denique quot sunt, qui medium tenentes hæc tantummodo infecuris remediis accensent? & singuli ad experientix fulcrum confugiunt. Postremi hi omnium optime mihi sentire videntur, utpote qui nimium iisdem nec tribuentes nec dementes, infecurorum nomine sedativa insigniendo, circumspectam Medici dexteritatem in applicandis iis requirunt, ne ab improvido usu irreparabile oboriatur damnum, nec plenaria eorum proscriptione præstanti Medicina in debellandis morbis instrumento privetur. Proinde cum mihi ab Alma & Gratiola in Illustri hac Fridericiana Facultate medica injungeretur, ut ad honores adspirans, specimen quoddam meorum qualiumcunque in re medica profectuum exhiberem, dignum omnino mihi visum fuit *de cauto sedativorum usu* tractatio, argumentum, in quo ingenium pro tenuitate exercerem. Faciam itaque periculum & quid humeri ferant tentabo, atque ex vastissimo Medicinæ practicæ campo quædam delibare conabor, enucleaturus, quid potissimum in sedativorum interno usu observandum, quo rectus evadat & salutaris obtineatur effectus. Nolo autem in hoc specimine tractando verbosæ & in longum nimis excurrenti disquisitioni studere, sed breviori, quam GALENUS optimum dicendi genus appellat, operam dabo, ita tamen, ut rem succincte exponam paucisque multa comprehendam. Quod ut ex voto & ad optatum finem succedat, humillime ardentissimis ante omnia Numinis Divini imploro & sollicito auxilium precibus & suspiriis, cui soli quævis dicta facta & cogitata, accepta referenda sunt; ut sua gratia, sua benedictione hisce meis conatibus quam clementissime adsit, laborisque præsentis ornet ingressum, dirigat progressum, compleat egressum, quo omnia cedant feliciter, ad sempiternam Nominis sui gloriam & utilitatem proximi promovendam.

§. I.

Cum meum propositum sit de sedativis eorumque circumspecto usu fusius paulo atque curatius differere, ordo tractionis utique postulat, ut statim in limine exponam, quid per ea intellectum velim. Sunt itaque sedativa ea remedia, quæ doloribus tollendis, & præternaturalibus excretionibus com-

pescendis, inserviunt; five, quæ validiores & effrenes solidorum & fluidorum motus ac impetus componunt eosque paciores reddunt. Hæc sedantium notio generalis admodum est, & tam late patet, ut in complexu suo complura alia, tanquam species subordinatas, foveat, licet ab auctoribus variis subinde denominationibus insigniantur. Nemini enim ignotum esse poterit, passim in scriptis medicis memorari demulcentia, anodyna, opiata, narcotica, sop-

ſoporifera , ſtupeſactoria , paregorica aliaque id generis medicamina , alia his , alia aliis morbis dicari , quadam interne , nonnulla externe applicari , quorum omnium tamen effectus ita conſpirat , ut ſola motuum ſedatione perficiatur & abſolvatur.

§. II.

Edunt autem hæc quæ motus moderantur remedia differentem maxime effectum ratione gradus ; dum alia mitius , alia validius , alia validiſſime operantur , ob diverſa quibus agunt principia. Quamvis enim omnia ſulphureo quodam ſubtili vaporoso elemento operentur , illud tamen pro differente conſtitutione ſua , nec non varia aliarum particularum intermixtione , diverſæ quodammodo indolis eſt ; ita , ut quædam horum ſuaveolens , alia graveolens , nonnulla denique ſtupeſactivum plane & narcoticum contineant ſulphur. Aſſero itaque cuſtodire ſedativa remedia ſulphureum quoddam principium & hoc mediante ſuam potiſſimum exſerere efficaciam , neque quenquam futurum ſpero , qui hanc in dubium vocet ſententiam , cum plurimis eadem adſtrui & confirmari queat argumentis. Etenim hæc quæ motus componunt & aſſopiant medicamina non ſolum fortem & diu durantem ſpargunt odorem , ſed etiam uti præclare pro more ſuo monuit ILLUSTR. DN. HOFFMANNUS , *Patronus atque Præceptor meus demiffe colendus* , *Diff. de Opiatorum novæ eaque mechanica operandi ratione* §. 3. coctione vaporabili hoc ſuo elemento orbata longe mitioris & debilioris quam ante evadunt efficaciæ ; ſubtiliſſimas vero ſulphureas particulas odorem ſuſcitare & coctione promptiſſime in auras diſjici , nemo ſane negabit. Neutiquam tamen hanc aſſertionem ad finiſtrum hunc ſenſum detorqueri volo , quod omnia , quæ ſulphureo pollent principio , ſint anodyna , ſed potius diſtinguendum eſſe cenſeo illud , quod ſedativis ineſt , ab aliis. Nimirum non tam craſſum & unctuoſum eſt , quam illud , quod ſovent olea expreſſa , pinguedines , axungia , utpote quod ægerime reſolvitur in vapores , neque tam ſubtile atque æthereum eſt quam id , quod in oleis deſtillatis deliteſcit & celerrime diſſipatur , ſed temperatæ indolis eſt , ex humido , ſale & terra ſolubili ætherea plus minus fixiori emergens.

§. III.

Dixi modo antea inſtructa eſſe ſedativorum quædam ſuaveolenti , alia graveolenti , nonnulla narcotico & ſtupeſactivo plane ſulphureo principio : hæc itaque quæ molliſſimum & ſuavem diſſant odorem naturæ blando atque amico ſulphure inſtructa ſunt , adeoque mitioris indolis & ſecutioris uſus exiſtunt. Annumerantur hiſce cum herbis baſilico , mentha , hormino , ſalvia , millefolio , flores chamomillæ , tiliæ , pœoniæ , acaciæ , liliorum alborum , convallium , ulmaria , nec non ſemina aniſi , nuclei perſicorum , ceraſorum , amygdalæ amaræ & inprimis ex iis deſtillatæ aquæ , porro cortices citri , aurantium , thymiamatis , moſchus , ambra , zibethum , ſpiritus nitri & vitrioli dulcis , & denique is , qui primus nominari meruiſſet ILLUSTRIS DOMINI HOFFMANNI liquor anodynus mineralis. Validioris vero efficaciæ ſunt illa , quæ ſulphure vaporoso graveolenti , naturæ non adeo amico , motus cum doloribus & ſpafmis componunt , quæ quidem haud exiguum uſum præſtant laudemque merentur eximiam , ſummam tamen Medici & prudentiam & dexteritatem requirunt. Hunc cenſum ſubeunt papaveracea , variaque ex floribus atque ſeminibus horum præparata remedia , inprimis vero huc referenda lacryma *Frid. Hoffmanni Oper. Supplem. II.*

papaveris , quæ opii nomine venit , cum omnibus iis , quæ ingreditur correctum & diverſimode compositum cum aliis medicaminibus. Eodem quoque principio & elemento agunt ea , quæ ex animantibus deſumuntur , ut ſunt caſtoreum , lumbrici terreſtres , ſecundina , alliaque , quæ paſſim ab auctoribus hunc in finem commendantur. Validiſſima denique ſunt ea , quæ ſulphure vaporoso , valde gravi , naturæ fluidi nervei inimico admodum & infeſto agunt , & dici ſolent narcotica , ſtupeſactiva , quæ quoniam virtute motus penitus ſiſtendi potius ac extinguendi , quam ſedandi ac levandi gaudent , rariſſime vel plane non in uſum vocanda ſunt. Horum in numero locum habent hyoſcyamus , mandragora , ſtramonium , datura , corona imperialis , lolii farina aliaque ex his conſecta.

§. IV.

Omnia hæc quæ jam memoravi ſedativorum genera , primario efficacia ſua fluidum illud tenuiſſimum & ſubtiliſſimum , quod motibus & ſenſibus in corpore præeſt , afficiunt , tum vero eandem etiam in fluidas , æque ac ſolidas corporis noſtri partes diſfundunt. Jam dudum enim a Medicorum & Phyſicorum clariſſimis indicatum & ex phyſiologicis notum eſt , liquidum , quod nervi vehunt , æthereo-elatiſticum , omnium in machina animali motuum cauſſam eſſe proximam , adeoque etiam etiam exorbitantium ; hinc ea quæ motus moderantur remedia , in principalem eorum cauſſam primario operari pro-na admodum conſequentia elicitur. Præterea firma conſtat experientia in quibusdam , præſertim foeminis , imbecillioris & ſenſibilioris naturæ & ad ſymptomata hyſterica pronis , a ſedativorum uſu ſpafmos non tam imminui , quam potius augeri atque exacerbari , indubio utique teſtimonio , exſerere hæc ipſa primario ſuam potentiam in genus nervoſum ejuſque fluidum. Nimirum quodocunque ſedativa interius aſſumta in ventriculo ac inteſtinis motu , calore & humido diſſolvuntur , accedente inſuper menſtruo ſalivali , particulae eorum tenuiſſimæ a nexu ſuo liberantur & diſpergunt vapores ſuos , qui membranarum & nervorum poris ſeſe inſinuantes , puriſſimum illud ac mobiliſſimum fluidum afficiunt , ut in motu ſuo ſiſtatur. Hinc ejuſmodi remedium ſedans , inprimis opiatum , ſimulac fuerit aſſumptum , illico inclinationem ad ſomnolentiam producit , & atrociffimi dolores , qui inteſtina torſerunt , conquieſcunt.

§. V.

Præter primariam hanc ſedativorum in fluidum nerveum operationem , notatu & conſideratione digna non minus eſt illa , quam in maſſam ſanguineam exſerunt expansiva. Scilicet pollent hæc ipſa ſulphureo , uti jamjam diximus , principio , quod ejuſmodi eſt indolis , ut in tenuiſſimos halitus expandi & mirum in modum rareſieri queat ; hinc ſi aſſumuntur & in corpore diſſolvuntur , vaporosum hoc ſulphur ſanguinis ingreditur maſſam , eandemque vaporoso hoc principio imbuunt , ita ut is accedentibus in pulmonibus particulis æreis elatiſticis mirum in modum expandatur , attenuetur majorique elatiſticate inſtruatur. Hoc modo conſtitutus ſanguis mirifice vaſa diſtendit , eorumque elatere & reſiſtentia debilitata , tardiori circumvehitur motu , immo , ſi ita inturgeſcens fertur ad cerebri tubulos arterioſos , qui calvariam ſubeunt , externam ſuam tunicam deponunt , adeoque teneriores ac minus elatiſticae ſunt , eoſdem magis adhuc expandit & regreſſum ſanguinis e capite impedit ; unde accidit , ut parcius ſecedat liquidum nerveum , & tonus ac

tenfio nervorum, quæ ab ejus debito influxu dependet, quodammodo debilitetur motusque augmentum remittat. Rarefactivam vero & expansivam sedativorum esse virtutem luculentissime demonstrant omnia illa phænomena, quæ post eorum usum, inprimis nimium, corpus infestare solent, qualia sunt intumescencia faciei, inflatio venarum, pulsus debilis, somnus, stupor mentis, sopor, memoriæ & phantasiæ læsio; eodem modo ac videmus spirituosa nimia copia assumpta mentis alienationem, soporem atque stuporem producere.

§. VI.

Denique illa etiam sedativorum pensanda est efficacia quam in solidis partibus earumque motibus componendis ac complacandis exserunt, quæ ex prævia eorum in liquidum nerveum & massam sanguineam operatione emergit. Duplex autem sedativorum in solidis est effectus, unus, quo motus impetuosiores moderantur, alter, quo dolores consopiantur; prius quæ præstant antispasmodica, quæ posterus anodyna appellantur remedia. Cum vero omnis in machina animali motus non tam a partium solidarum mechanicâ ad motum dispositione & structura, quam potius a debito liquidi, quod in nervis vehitur, elastici, nec non sanguinis arteriosi influxu proveniat, dilucide omnino patescit, sedativorum operationem fluidis his prius impressam, ad solida demum transferri, & cohibito illorum impetuosiori motu, vehementiorem horum quoque motionem componi. Eodem modo abunde quidem compertum est, existere in corporibus animantium principium quoddam, quod impressionem ab objectis percipiat; id vero etiam indubiæ veritatis est, operari hoc ipsum mediante liquido nerveo, ita ut per hoc actiones & motus objectorum ad sensorium commune in cerebro deferantur, licet dictu & perceptu difficillimum sit, quomodo fiat rerum sensillum in nervos agentium perceptio. Porro in propatulo est, dolores a multiplicibus quidem causis produci posse, sed sedem perceptionis dolorificæ tantum in membranis nerveis tensilibus esse constituendam, quæ, quo major tensio & vehementior ab externo objecto agitatio est, eo acutiore & sensibiliore dolore afficiuntur, quo magis vero relaxantur, eo hebetioris sensationis sunt. Denique etiam extra dubitationem positum est, turgescenciam nervorum & tensionem membranarum nervosarum ab influxu fluidi elastici, quod in iis hospitatur, dependere, hinc si per sedantia remedia fluxus & aditus ejus præter naturam auctus cohibetur, tensio remittit, & dolor evanescit. Luculentissime hanc nostram assertionem confirmant membra paralyti tacta, quæ omni sensatione & motu carent, propterea quod secedens a sanguine stagnante serum, medullæ spinalis nervos occupat & efficit, ut iidem fluido elastico, quod tensionem efficit, destituantur.

§. VII.

Hactenus sedativorum principia, varias classes modumque operandi excussimus: transgredimur jam ad applicationem hujus theoriæ in diversis morborum generibus. Quemadmodum vero sanitas a temperato, libero & æquabili solidorum ac fluidorum motu, sanguinisque & humorum temperie neque minus a convenientibus secretionibus & excretionibus dependet, ita vicissim morbus dicitur, quando turbata vel sublata proportione & ordine motuum in solidis & fluidis, temperies sanguinis & humorum depravatur ac secretionum & excretionum ne-

gotium insigniter læditur. Morbi itaque, qui considerationem medicam incurrunt, sunt vel solidorum, vel fluidorum, vel utrorumque simul. Ad tres has classes omnes quidem morbosarum affectionum species referri possunt, sed pro instituti nostri ratione, eæ tantum impræsentiarum nostram subibunt meditationem, quæ motuum vitio peccant; ubi tamen notandum, nos non tantum de perversa illa motuum constitutione esse locuturos, quæ sola morbum efficit, sed etiam de illa quæ aliis morbidis afflictionibus, a quacunque etiam causâ hæ fuerint ortæ, complicatur, easque gravissime exasperat. Neque mihi sermo erit de vitiis motuum, quatenus iidem defectu & imminutione morbofi existunt, sed quatenus excessu nimioque augmento delinquant; utpote quibus sedativa remedia dicata tantum sunt, & accommodata. Nimis autem longum foret omnes morborum species perlustrare, qui motibus depravatis vel plane absolvuntur, vel saltim exacerbantur; quippe qui labor angustis mei instituti cancellis neutiquam posset circumscribi, sed potius integrum vastumque requireret volumen. Proinde licebit mihi quædam tantum ægritudinum genera exempli quasi loco afferre, & generales quasdam subnectere cautelas, ex quarum sollicita comparatione & prudenti applicatione, rectus sedativorum usus in aliis quoque morbis addisci poterit & derivari.

§. VIII.

Prima itaque quam ex morbidarum afflictionum censu jam in scenam producere placet, est ille dolorum atrocissimus, qui ex calculo oritur, & tam gravis est, ut in epilepsiam, convulsiones, delirium, animi deliquium, cœcitatem quoque homines dejiciat. Crudelissimi hujus doloris causam in nihil aliud rejiciendam esse censeo, quam in eximiam angustorum canalium, per quos calculus transgressum molitur, sensibilitatem, quæ tanta est, ut universum genus nervosum in consensum rapiatur, gravissimaque producantur symptomata. Comperit enim ex anatomicis est, ureteres ex membranis nerveo-musculosis, quæ exquisitissimæ semper existunt sensationis, esse constructos; hinc, si calculus vel sponte, vel motu corporis, animi affectu, aut etiam per pellentia remedia, ex ampliori renum pelvi dimovetur & urinariis canalibus infigitur, tunc irritatio & dolorificus oritur sensus, maxime si calculus grandior fuerit, asperior aut acutior; dolorem excipiunt spasmi, & hos denique omnia illa mala, quæ præter intolerabiles dolores, calculosos miserrime excruciare solent, ischuria nempe, nausea, vomitus, alvi adstrictio, pulsus debilis, horripilatio, aliaque. Cum itaque calculus ureteri infixus unica & vera dolorum sit causâ, sub hoc autem spasmorum impetu & dolorum acerbitate, exitus ejus & propulsio magis impediatur quam promoveatur; ratio utique dicitur, omnia illa remedia, quæ spasticis fibrarum tractionibus & constrictionibus leniendis ac componendis dicata sunt, qualia maxime sunt sedativa, interne & externe applicata, præstantissimi esse effectus. Commendandus hunc in finem cum aliis mitioribus ac securissimis anodynis quam maxime est supra quidem laudatus, spiritus anodynus mineralis HOFFMANNIANUS, qui præter præsentissimam, quam in doloribus & spasmodicis sopiendis efficaciam possidet, id quoque peculiare habet, quod non communi anodynorum more vires prosterneat, sed potius easdem erigat. Si vero mitioribus non obtemperare velit dolorum sævitia, ad validiora progrediendum est, & theriaca cœlestis, massa pilularum Starckeiana, de cynoglossa,

sa, laudanum opiatum per fermentationem paratum, aliaque id generis in usum vocanda sunt. Caven- dum tamen semper est quam solertissime, ne nimius horum fiat medicamentorum usus, adeo ut omnes motus & dolores iisdem fiant, quoniam hac ratione, robore partium penitus dejecto & tono, calculi excretio non contingere potest, sed is, propul- sione deficiente, impactus manet, & nonnunquam experientia teste lethalem urinæ suppressionem pro- ducit. Præterea si corpus senile, infirmum per prægressum morbum, viribusque exhaustum, tutius utique est, ut a sedativorum, & imprimis opiato- rum, usu abstineamus, quam ut ægros gravissimo exponamus periculo. Etenim attritis post gravem dolorem viribus, ut plurimum resolutio & atonia partium excipit, quæ si sedativorum usu augetur adhuc, calculus non solum remanet, sed etiam la- borantes partes facile in sphacelum conjiciuntur.

§. IX.

Aliud dolorum genus non minus acutissimum est, quod podagræ nomine venit. Hic morbus in ludi- brium pene Medicorum abiit, & omnium pertina- cissimus est, ita ut vix medicamentis cedat, & Me- dicos tandem cogat, ut querelis & clamoribus æ- grotantium moti, ad sedativa confugiant, & hisce allevamentum afferre conentur, licet infelici ple- rumque successu. Cum enim ex pathologicis notum sit, materiam podagrici doloris esse serum acre, sti- mulans, ex tunicis glandulosis & glandulis junctur- arum separatum, & in articulationibus stagnans, quod circumjacentes membranas nerveas vellicat, stimulat atque dolorem producit, cui denique su- pervenit spasmus; dilucide utique patescit, sedativa & anodyna, sive exterius sive interius usurpata, neutiquam ejus esse efficaciam, ut morbum hunc ra- dicitus tollere queant, sed potius dolorem tantum obtundendo palliativam præstare curam, relicta in corpore materia peccante. Immo relictum & sta- gnans hoc modo serum, mora majorem acquirit a- crimoniam, donec tandem ad alias partes deferatur, inque iis multo pejora concitet mala, cardialgias, colicas convulsivas, convulsiones, inflammationes, paralyfes, apoplexias aliaque id generis plura. Sane si observatorum Medicorum evolvimus libros, nihil frequentius occurrit, quam allegationes pericu- losæ metastaseos materiæ podagricæ, & imprimis quam plurimæ funestæ ejusmodi historiæ exstant in M. N. C. & *Actis Hassniensibus*, quibus accedit CRATO, qui in *consiliis* pag. 1015. *conf.* 367. ex abu- usu narcoticorum & stupefacientium podagram tran- siisse in asthma, annotavit; & WEPFERUS *lib. de Apopl. p. 2. & 3.* ex podagra emanente apoplexiam fieri auctor est. Denique etiam de externo sedati- vorum usu in podagra tenendum est, quod eadem, imprimis si validiora fuerint, mitigent quidem dolores, ast torporem & motus impotentiam relinquunt atque ad toporum generationem disponant. Summa itaque cum prudentia & sollicita cautione in doloribus po- dagricis adhibenda sunt sedativa, & plane omitten- da, nisi cum diaphoreticis misceantur, aut lenissi- ma saltem eorum, qualia sunt emulsiones papavera- ceæ, propinanda. Eo majori autem cum periculo, uti præcedente paragrapho fuit monitum, adhiben- tur sedativa, imprimis opiata, in personis imbecilli- bus atque senilibus, siquidem natura ipsa per æta- tem & vim morbi subinde debilitata, fatiscit de- mum atque inidonea fit ad serum illud extus pro- pellendum; deinde eadem tonum partis nimis def- truunt, ut major stasis fiat & depositio; cujus fu- nestissimi eventus testis etiam est sequens historia.

Vir quidam, diu excruciatu podagræ doloribus, o- pii essentiam assumpsit, sperans hac ratione fractam iri mali vehementiam, sed falso. Paulo post enim podagra, in corpore velut vinculo quodam retenta, dolores summos procreavit, qui infixi velut præcor- diis, circa cordis scrobiculum maxima cum anxie- tate emicabant; crescebat mox valetudo, incref- cebant dolores, & accedente singultu, post gravissi- ma tormenta ægrum conficiebant & opium non do- lores, sed vitam potius extinxit. Sic vir quidam generosus, longa & iniqua podagra conflictatus, re- medium doloris in externis quærere coepit, igitur admotis linimentis ex spiritu vini, camphora, & opio paratis, egregie sibi allevatus videbatur, re- mittente nempe per aliquot annos dolorum incle- mentia; at latet anguis in herbis, incidit enim in cachexiam, pedum tumorem, tandem in asthma convulsivum lethale.

§. X.

Denique doloribus adhuc accensendus est ille, qui potissimum in colo sævit, & inde colicus dicitur: oritur hic vel a flatibus colon cum jejuno nimium distendentibus, vel a materia acri biliosa intestina stimulante & ad spasmos disponente. Priori in ca- su omnia exulent sedativa, omniaque motus immi- nuentia, propterea, quod tonum intestinorum, qui tamen ad propulsionem flatuum summe necessarius est, magis deiciunt, eoque destructo variis aliis morbis ingenerandis ansam præbent. Cum enim fla- tus nunquam intestina expandere valeant, nisi fibris eorum nimis relaxatis, hæc autem relaxatio & de- bilitas distensione augeatur, damnosissimum utique erit motum peristalticum per anodyna & sedantia magis adhuc deicere, siquidem hac ratione plena- ria producitur atonia, quam presso pede in aliis quo- que partibus motuum vitia defectiva insequuntur. Nihil sane communius est, quam ut colicam per sedativa sopitam excipiat paralyfis; id quod BAGLI- VUS præclare notat *Prax. med. lib. 1. pag. 100.* dum scribit: *nihil familiarius colicæ supervenit, quam pa- ralyfis: cave igitur ne opiata copiosius in ea exhibeas; solet enim post opiata magnus sudor supervenire & ex- inde paralyfis.* Ejusdem quoque sententiæ est RAY- GERUS *Obs. 50.* qui in crudeli intestinorum dolore pilulas Wildegansii rejicit, quia facile in somno su- dor & paresis succedit; & WILLISIUS *de anima brut. cap. 3.* exemplum affert, ubi vir quidam ro- bustus colica atroci vexatus ingentem opii quantita- tem incaute sumsit, paulo post conquestus est onus ingens ventriculum aggravare & durissime oppri- mere, secuta sunt deliria & mors. Quod si vero colica a materia acri biliosa intestina vellicante fue- rit concitata, locum quidem habere possunt sedan- tia, sed non prius, quam causa illa, quæ dolori- bus ansam præbuit, fuerit submota, & dolorifica sensatio lenioribus obsequi nolit; nec tum quidem copiosa & sola sunt offerenda, sed cum talibus mis- cenda, quæ excessivam eorum operationem quo- dammodo compescere valent, qualia maxime sunt diaphoretica. Egregium hanc in rem *Baglivi l. c.* est monitum, dum p. 101. *ante usum opiati*, inquit, *semper enema injicias. Diaphoretica cum opiatis mix- ta felicissima sunt in colicis.*

§. XI.

Progredimur ad vomitum, qui fit, quando spas- modice constricto pyloro, ventriculi motus peristal- ticus pervertitur, & ad superiora vergens efficit ut contenta per os egerantur. Hic vomitus, quoniam

plerumque corpus a subiecto aut qualitate aut quantitate molesto & noxio per ejus eliminationem liberat, vix unquam exposcit sedativa, nisi aut nimius sit, aut incongruus. In genere autem distinguendus est vomitus in idiopathicum & symptomaticum, sive qui per consensum venit. Symptomaticus est ille, qui læsiones partium sensibilibus, retrocessiones exanthematum, dolores calculi, cohibitam dysenteriam & diarrhoeam excipit & in omnibus spasmodicis & convulsivis affectibus conspicuus est. Hic, quoniam causæ morbi tollendæ non accommodatus, sed potius impetuosus motibus vires destruit morbumque corrumpit & graviores ac periculosiores reddit, immo si diu durat, mortem ipsam infert, commodissime & maxime cum euphoria blandis anodynis sisti & complacari potest; idiopathicus vero, cum materias vel mole vel qualitate peccantes, quales sunt cibus & potus nimia quantitate ingesti, saburra in primis viis hærens, venena assumpta, lac coagulatum in infantibus, exturbet, non facile sistendus est, sed potius leniter promovendus, nisi vires nimium exhaustat, diuque duraverit, alioquin graviora mala subsequi solent. Testantur enim observationes a vomitu ejusmodi præpostere sedato cardialgiam, singultum, lipothymiam, summam anxietatem præcordialem cum extremorum frigore, calore interno, immo interdum ipsam mortem fuisse secutam. Idem sentiendum est de critico, in tertianis & quartanis, vomitu, nec non de illo, quem gravidæ primis statim ingravitationis mensibus experiuntur; quandoquidem gravidæ, quæ multum vomunt, ex observatione ILL. D. HOFFMANNI Patroni atque Præceptoris mei æternum colendi, ipso puerperii tempore minus incommodi sentiunt & non facile febribus tentantur. Verbo: si ex quantitate humorum vitiosorum ortum traxerit, neutiquam vomitus sistendus est, si vero ex inordinatis & impetuosis generis nervosi motionibus subnascatur, tunc utique citra incommodum sedari non solum potest, sed etiam debet. Peculiaris adhuc vomitus species est sic dicta sanguinea vomitio, quæ familiarior sexui sequiori est, & ex turbato mensium fluxu ortum trahit, quæ itidem non præpostere sistenda est sedativis, sed eadem tum demum adhibenda sunt, quando post prægressam sanguinis in ventriculo resolutionem, & apertis ordinariis sanguinearum excretionum viis is ipse non conquiescit.

§. XII.

Eadem ferè ratio est diarrhoeæ quam vomitus, nisi quod in hac per inferiora fiat evacuatio, in illo verò per superiora, hinc eadem propemodum cautio circa usum sedativorum tenenda est ac observanda. Nimirum per motum intestinorum auctum ejici hæc ipsa solent foetida, viscida, tenuia, biliosa, flava, spumantia, quandoque etiam nigra, quæ si ex latibulis suis non exturbarentur, gravissimum corpori minarentur periculum, adeoque optimo consilio hæc materia excrementitia è corpore proscribitur, id quod testantur innumera illorum exempla, qui post superatum hunc morbum eo firmiorem nanciscuntur valetudinem; contra verò si relicto fomite motus excretorii tantum per remedia sedativa sistuntur, nihil sanè aliud, quam graviora exinde emergere possunt mala. Duplex autem potissimum noxa est quam sedativa inprimis validiora in diarrhoeis excitant, una, qua directè robur & tonum intestinorum destruant, altera, qua compluribus aliis morbidis afflictionibus per indirectum ortum præbent atque occasionem. Jam dudum observarunt Medicorum sagacissimi, o-

piata aliaque sedantia maximè ventriculo & intestinis esse aliena, eo quod immedicabilem ventriculi & intestinorum atoniam, digestionis vitia, enormes cum spasmis flatulentias alvique suppressionem gi-gnunt. Alterum quod inde propullulat damnum, est, quod repressa & retenta sic materia, eadem acrimonia sua vicinas partes infestet & cardialgias, singultus, anxietates & complura alia inferat symptomata. Licebit mihi huic rei fidem facere notabili quodam exemplo. Nimirum: Vir LI. annorum, temperaturæ cholericæ, a multis annis arthriticus, vino liberalius paulo indulgens & salitis ac induratis delectatur cibus, a vino ebrius factus autumnali tempore iter facit nocte, domum reversus, sentit diarrhoeam, cum quodam horrore & lassitudine membrorum & appetitus prostratione, & quoniam tormina non levia simul passus est, Medicus hisce succurrens præscripsit pulverem ex cornu cervi usto, coralliis rubris, una cum grano uno laudani opiatum, quem pulverem quater assumpsit de die, a cujus usu sentit quidem dolorum abdominis mitigationem & secretionum imminutionem, ast loco horum molestissimum, qui ad tres dies durans ægrum misere conficiebat, percipiebat singultum, omnibus viribus consumptis somnoque defraudato. Equidem conquievit per intervalla, ad dimidium horæ, ad tempus quoque sistebatur assumptione infusi herbarum Theæ & remediorum antispasmodicorum; mox autem revertebatur, & quandoque ad quadrantem horæ, interdum etiam per integram continuabat, omniaque remedia pertinaciter spernebat, donec tandem in consilium adhibito alio Medico, ferocia mali frangeretur & æger cum pristina in gratiam rediret sanitate.

§. XIII.

Hæc de diarrhoeis idiopathicis, jam etiam quædam de symptomaticis. Symptomaticus alvi fluxus dicitur is, qui aliis morbis supervenit, sive cum euphoria decurrat sive non. Compluribus autem morbis complicatur quidem diarrhoea, sed inprimis nobilis est illa, quæ sæpius continuas & malignas febres stipare solet. De hac communis Practicorum sententia est, eandem pessimæ notæ symptoma esse, eo quod vires debilitet, motus febriles turbet & materiam peccantem per habitum corporis eliminandam ad interiora revocet, hacque opinione inducti, si compareat & crebriores fiant dejectiones, eandem theriacalibus, opiatibus & adstringentibus cohibere conantur. Verum enim vero cum sub ipsis febrilibus paroxysmis & commotionibus, humores ac sanguis in succos excrementitios, acres, sulphureos, viscidos varique generis excrementa resolvantur, adeoque corpus non tantummodo per corticem cutis, sed etiam per inferiores partes a fæculentis & crassis for-dibus repurgandum sit, clarissime utique innotescit, toto eosdem errare coelo, & nimis meticulosa sua prudentia mortem nonnunquam procreare. Quod si enim hæc excrementa non debite per emunctoria excernuntur, neque Medicus hunc defectum compensat, sed potius opiatibus magis adhuc promovet, non potest aliter fieri, quam ut materia illa intus retenta, vel in excretionem suppressa, graves postea noxas, & inprimis in aliis partibus inflammationes & damna, producat, immo lethalem vitæ catastrophem inferat, maxime si circa critica contigerit tempora. Interea tamen, si forte nimix fuerint diarrhoeæ ac vires exhaustant, de lenissima earum complacatione cogitandum, quamvis & tum quoque non alia nisi roborantia, maxime extrinsecus admota, locum in-veniant & ultra theriacalia & diascordium Fracastor-

rii ad summum, ut bene monet ILLUSTR. DON. HOFFMANNUS in dissertatione sua *de diarrhœa in febribus malignis saluari* non adscendendum sit. Memorabilis hanc in rem sequens est casus. Juvenis biliosus XXV. annorum, mense Junio corripitur lassitudine, ciborum fastidio, frigore extremorum, altero die æstu vehementissimo, lumborum dolore, siti, anxietate præcordiorum, cephalalgia gravissima, dati fuerunt pulveres bezoardici, mixturæ bezoardicæ &c. alvus erat sicca, pulsus vehementis, de nocte leviter delirabat, dabantur clysteres, qui ad tempus levamen adferebant, circa diem septimum intestina murmurabant, & mordicantia circa umbilicum sentiebantur tormina, & incipiebat æger dejicere flava biliosa. Medicus præmetuens diarrhœam, & quasi illa nociva sit in febre, quam putabat malignam, omni studio illam impediens electuario, quod ex rob cydoniorum, theriaca cœlesti boloque armeniacæ confectum erat, quod assumebatur cum aqua menthæ & cinnamomi. Mox æger summe debilitabatur, anxietas præcordiorum augebatur, cum æstu intenso ardoreque vehementissimo circa orificium ventriculi, extrema corporis frigebant, pulsus evadebat debilis & inæqualis, delirium accedebat gravius, & die nono moriebatur.

§. XIV.

A diarrhœis transgredior ad dysenteriam, quæ etiam excretionis per inferiora genus est, & a diarrhœa differt, quod in ea materia, quæ excernitur cruenta, vel purulenta sit, majorque torminum atrocitas conjungatur. Quanta damna ab inconsiderate & turbulenter adhibitorum opiatorum usu suscitentur hoc in morbo, quotidiana loquitur experientia. Nihil enim in visceribus a spasmodis tantopere debilitatis & acerrima materia arrosis magis inflammationem & subsequenter exulcerationem ac sphacelum promovet, quam sedativorum usus, quæ quamvis ad tempus inducias dent, mox tamen gravius prorumpit malum & ipsa mors inducitur. Hinc solite Medici dissuadere solent usum sedativorum in dysenterico alvi fluxu, e quorum numero sunt verba ILLUSTR. DN. HOFFMANNI, quæ in *Medic. system. Tom. II. Part. II. Cap. VII. §. XI.* & in *scholio* exstant: *Res periculi plenissima est, ubi ventriculus & intestina ad inflammationem & sphacelum inclinant, vel ubi magna humorum in corruptionem prona impuritas est, opiata & anodyna propinare. Prudentis itaque est, in dysenteria, in passione iliaca, colica spasmodica & atroci cardialgia, probe & vires agrotantium & tempora morbi atque humorum dispositionem intueri, si sedativa exhibere velimus: alias, loco exoptati solaminis, mortem accersimus.* Quinimmo frequentissima apud observatores exstant funesta usus opiatorum in dysenteria exempla. Sic THONNERUS *lib. 3.* annotavit, quod videlicet omnes illi dysenterici, qui laudanum opiatum assumerant, fuerint mortui. Et WALDSCHMIDIUS in dysenterico, cui tantum enema cum modica opii quantitate erat applicatum, mortem subsecutam fuisse memoriæ prodidit. Quod si vero ob nimium motuum excessum opus sit sedatione quadam, eadem maxima cum circumspectione & prudentia est perficienda, adhibendo selectissima tantum & mitiora, lenientibus aliisque congruis remixta.

§. XV.

Excipiunt febres, quæ nonnisi affectus generis nervosi sunt, & cum insigni totius œconomiae vitalis turbatione, immo gravissima functionum tam animalium quam vitalium & naturalium læsione decurrunt.

Harum familiarissimæ & communissimæ sunt sic dictæ intermittentes, quarum causa materialis plerumque in primis viis delitescit, quæque certis statisque temporum periodis paroxyzantes semper cum excretionem quadam finiuntur. In harum curatione palmarium & principalissimum momentum a Medico perquam studiose tenendum est, ut excretionem febribus hisce solennes rite procedant, nec typus febrilis immutetur & majores motuum turbæ invalescant. Quod si enim prius contingat, materiæ quæ febrem suscitavit indoles eo magis depravatur & gravioribus morbis inducendis apta fit & habilis: si vero posterius accidat, transit morbus febrilis in longe graviores & periculosiores, immo mors ipsa testante experientia excipit. Ex adductis hisce clarissime utique innotescit, sedativa, quæ ita disponunt nervos, ut ad actiones & insultus materiæ peccantis minus se commoveant, in febribus non proficua, sed maxime perniciofa existere, eo quod suspendant quidem motus febriles & paroxysmos suppressant, sed motum & secretionem humorum validissime impediant, causamque magis firment, ut eadem solidis partibus & visceribus impacta maneat & longas atque periculosas ægritudines excludat. Notissima sane sunt exempla, quæ fidem faciunt, præposterum hunc sedativorum usum viscerum obstructions, febres lentas, pedum tumores, hydropem, affectus flatulentos & spasmodico-convulsivos fuisse subsequutos.

§. XVI.

Quemadmodum febrium frequentissimæ sunt intermittentes, ita periculosissimæ sunt malignæ, quæ cum subita virium prostratione, animi defectione, pulsu debili, turbatione actionum animalium, agrypnia, deliriis, nonnunquam etiam convulsivis plane motibus invadere solent. Præterea communi ferme omnium Medicorum suffragio, malignitatis ratio potissimum versatur in elementorum sanguinis dissolutione & secessione, totiusque massæ sanguineæ putredinosa destructione, ita ut hausto miasmate & ad sanguinem delato, is ipse in ejusmodi motum concitetur, quo sudores largi, colliquativi, symptomatice, urinæ tenues, copiosæ, stagnationes feri in partibus oboriantur & destructa magis magisque sanguinis mixtione vires labascant & funestus tandem emergat finis. Quæ cum ita sint, nemo profecto negabit, non solum periculosum sed etiam lethiferum in hisce anodynorum esse usum, quippe quæ vires magis dejiciunt, deliria augent, motumque sanguinis retardando efficiunt, ut virulentum miasma non tam per corporis peripheriam excernatur, quam potius sanguini intermixtum maneat, eundemque eo citius & certius ad putredinosam indolem disponat. Egregia sunt verba quibus ILLUSTR. DN. HOFFMANNUS huic sententiæ suffragatur, dum *Medicin. ration. Tom. II. pag. 52.* scribit. *Omnibus anodynis in acutis & malignis morbis, & opiatas nihil perniciosius est, quia horum usu tristissimam mortem acceleratam fuisse, tristissimis aliquot exemplis edocti sumus.* Inprimis autem perquam studiose cavendum, ne urgentibus vigiliis quisquam anodynis somnum procurare audeat, præterea, quod post nimias vigilias extreme debilitatæ sunt cerebri ac partium fibræ, & dejecto adhuc magis per sedativa earum robore, facillime exitialis humorum stasis vel plane stagnatio oriri potest. Eadem cautio eo diligentius tenenda est, si morbus jam cum notabili gravitate aliquandiu urserit, & partes interiores nobiles, quæ plerumque post mortem sphacelo correptæ deprehenduntur, jam in putredinosam dispositionem vergere incipiant; siquidem si hoc tempore etiam lenissima tantum offeruntur remedia anodyna,

dyna, sphacelum certissime promovent, adeoque ipsam accelerant mortem.

§. XVII.

Inter inflammationes, quæ interiora attentare solent, frequentissima est pleuritis & peripneumonia, quæ cum horripilatione, pulsu celeri, respirationis difficultate & dolore acuto pungitivo in pectore infestare solent. Quemadmodum autem hæ, uti in genere omnes inflammationes, a sanguine in minimis vasis stagnante oboriuntur; ita primaria utique artificis in earum perfanatione intentio esse debet, ut stagnantem humorem, quanta quidem potest celeritate, discutiat, ne mora diuturniori dispositionem ad putredinem concipiat, ipsique parti gravissimam læsionem ac corruptionem inferat: adeoque nocentissima omnia ea sunt, quæ resolutionem & discissionem quovis modo impediunt. Proinde elucescit, sedativa omniaque opiata, quorum ea est efficacia, ut debilitato fibrarum elatere, dolores quidem obtundant, sed retardato sanguinis motu, eo majori & graviori stagnationi ansam præbeant, in his affectibus esse perniciosissima, utpote quæ partem inflammatam in putredinosam aut ulcerosam corruptionem præcipitant, & coctionem materiæ impediendo, ægrum subita tandem suffocatione jugulant: quinimmo commotum ab inflammatione sanguinem ad cerebri minus elastica vasa invitant, ut somnolentiæ atque sopores lethales inde propullulent. Quod ut eo certius innotescat, licebit interferere funestum exemplum. Vir L. annorum, plethoricus, crassiori diætæ & vini usui adsuetus, nocte & sub frigido aëre iter suscipit, domum reversus summam debilitatem artuum & partium extremarum sentit, in specie *als wann ihm an den Händen die Finger eingeschlaffen waren* / horrore corripitur, vomitu, dolor lateris ad scapulas & claviculas extenditur, respiratio summe anxiosa est & anhelosa, pulsus inæqualis, urina rubicunda & turbida, sed citra sedimentum, administrata fuit venæsectio, sed non adeo larga, exhibita etiam fuerunt diaphoretica cum antipleuriticis specificis mixta, ast difficilis semper manebat respiratio, nihil ferme ejiciebat, nisi parum sputi albi, visceri, facies rubebat, de summa querebatur pectoris anxietate suffocatoria, vigilia assidua aderat, ad quam dissipandam alius Medicus accedens opponit medicamentum, pulverem scilicet antipleuriticum, mixtum cum floribus papaveris rhœados & theriaca coelesti, a quo autem anxietas major facta cum sudore frigido mentisque insigni turbatione atque delirio, & ita quarto a decubitu die æger moriebatur.

§. XVIII.

Ab inflammationibus transcendimus ad hæmorrhagias, quæ arctissimo quodam inter se cohærent nexu. Quemadmodum enim inflammatio a sanguinis congestione & stasi in substantia maxime porosa partium accidit, ita excretio sanguinis per partes extimas, vel cute firmiore minus investita, a liberiori sanguinis circulatione impedita per vasa atque viscera ortum suum ducit; immo inflammationi sæpius conjungitur hæmorrhagia, & hæmorrhagia etiam inflammationem post se trahit, uti apparet in mictu cruento, quem subsequi solet nephritis & ulcus renum; in hepatico fluxu, cui non raro succedit hepatitis; in hæmoptysi, quam inflammatio pulmonum & phthisis frequentissime excipit. Quapropter non sine ratione concludo, sicuti in inflammationibus noxius & perniciosus sedativorum & opiatorum usus deprehenditur, ita idem quoque, ob rationes superius alle-

gatas, in hæmorrhagiis tenendum est. Sane si experientia duce omnes hæmorrhagiarum species perlustramus, tam grave est damnum, quod adhibita in iis gignunt sedativa, quam quod gravissimum. Nam quid frequentius est, quam quod opiata, in narium hæmorrhagia usurpata, cephalalgias acutissimas & gravativos quoque capitis dolores, apoplexias, vertigines, capitis erysipelata, asthmata, scotomias, in senibus affectus soporosos produxerint, quemadmodum id cum aliis confirmat sequens casus. Quæstor quidam cachecticus in hæmorrhagiam narium incidit gravissimam, cui cohibendæ datum fuit electuarium ex conserva rosarum, semine hyoscyami, papaveris & hæmatite præparatum, quod assumsit ad nucis juglandis magnitudinem, & sedatus fuit fluxus. Tertio die revertitur malum & cum pristina dosis non operaretur, accepit duplicatam, & cum hæc esset sine effectu, adhuc duas doses superingessit, unde omnis rationis fuit expers, locutus est multa male cohærentia, præsagiebat futura, nec dormiebat, nec comedebat per 24. horas, tandem ad se rediens, ipsum quasi in somniis fuisse detentum, dicebat; mortuus autem tandem est hydrope. Hæmorrhoides quemadmodum excedentes ad cachexiam, anasarcam, ascitem, hæcticam viam pandunt, ita si intempestive sedativis supprimuntur, iisdem malis ingenerandis apta sunt, & præterea colicas atrocissimas, raptus humorum ad caput & turbas in actionibus ratiocinationis relinquunt. Tristissimum hujusmodi exemplum notavit Excellentissimus Dn. Hoffmannus in viro hypochondriaco, ubi immoderatio hæmorrhoidum fluxus ab improvida opiata medicina confestim fuit cohibitus, secuta hinc fuit coli, quod sinistrum latus occupat, firmissima contractio, qua sanguis impetuosius ad ventriculum & caput urgebatur, unde ventriculi & meningum inflammatio lethalis cum convulsione intra duos dies coorta est. Hæmoptysin per anodyna sedatam respirationis difficultatem, pectoris angustiam ipsamque phthisin excipere in propatulo est. Nivius mensium fluxus si per sedativa sistatur, in plenariam mensium suppressionem, fluorem album, varia quoque ulcera, inflammationes cum hæctica febre, tumores abdominis & uteri, cachexias variaque spastica hypochondriaco-hysterica pathemata terminatur. Sanguinis profusiones, quæ abortum, vel legitimum & difficilem partum stipare solent, si quis sedativis, opiatibus vel plane narcoticis compescere conabitur, is profecto malum longe deterius reddet, ut hæmorrhagia cum summa virium defectione ad lipothymiam usque procedat viresque pessundet penitusque extinguat. Eo majus autem damnum, eoque gravior noxa a sedativorum usu expectanda est, si eadem adhibeantur in largissimis sanguinis profluviis, quibus animi deliquia junguntur; siquidem ab eorum usu syncope fit gravior majorque virium jactura, & licet sanguis nonnunquam subsistat, majori tamen vehementia & impetu redit, ut tandem succumbendum sit. Quamvis vero uti jam jam deduximus, multiplicia & gravissima sint damna, quæ hæmorrhagias per sedativa cohibitas subsequi solent; non tamen negandum est, eadem remedia sub certis circumstantiis & conditionibus admitti posse, modo artifex solerter inquirat in morbum, solite consideret subjecti rationem, & denique post temperantium & lenientium usum, selectissima tantum proponet.

§. XIX.

Commemoratis sic & perlustratis morborum quibusdam, superest adhuc ut quemadmodum superius promisi, cautelas quasdam & regulas subnectam, quæ illa

illa quæ adhuc deesse videntur suppleant & genuinam monstrent viam, qua rectus & salutaris sedativorum usus obtineri queat. Proinde in horum remedium administratione & applicatione hæc perquam curiose tenenda sunt.

I. Semper tutius est ab anodynis debilioribus & magis antispasmodicis, naturæ amicis, ad vehementiora narcotica, stupefacientia procedere.

II. Securius est per externa sistere dolores magis, quam internis.

III. Si indicantur opiata vel narcotica, opportune & maturius, neque eo tempore, ubi virium est infirmitas, ubi pulsus, qui semper ab opiatibus minor fit, est debilitas, ne dicam ubi omnes vires jam penitus exhaustæ vel funestæ sanguinis stases sunt, eadem adhibere oportet.

IV. Sedativa exoptatissimam spondent medelam, ubi nimia adest dolorum & spasmodorum ferocia, ex animi affectu, vel principio subtilissimo, aut materia externa producta, vel ubi natura sensibilior & anomalis motionibus nervosis afflueta est, ætas præterea juvenilis viget motuumque concitata urget vehementia.

V. Nocent eadem, quando ingens sanguinis & humorum est impuritas, ut in cacochymicis, scorbuticis, in quibus ad sistendum dolorem vel spasmus paulo immoderatus datum opiatum lethiferum est, sphacelum quia inducit paratissime.

VI. Ubicunque alvus est clausa, humores acidi viscerum in primis viis stabulantur, viresque imbecilles sunt, ibi opiata instar veneni sunt; possunt tamen habere locum, si refracta dosi cum purgantibus pilulis misceantur, stratagemate felicissimo, quo passim in praxi usi fuerunt RIVERTUS & POTERIUS, cujus consummatissimus interpres in *notis præclare* monet. *Si ullum datur opii correctivum sanè purgans est vel etiam emeticum, horum enim amico conjugio deponit vim suam stupefacitivam, & magis acquirit virtutem solventem, mitigativam tamen.*

VII. Ubi nervi non tam a mole materiæ, quam ejusdem acri & virulenta qualitate vellicantur, anodyna rite præparata & cum diaphoreticis mixta, egregiæ sunt virtutis; horum enim usu non quiescunt solum spasmi, sed materia etiam relaxatis viis ad exitum per salutarem sudorem præparatur, adeoque torpor, somnolentia, nimia vertigo, dolor capitis gravativus, alvi contumax adstrictio & mineræ morbificæ in partes major impactio avertitur.

VIII. Anodyna semper meliori cum effectu cum humectantibus soluta, nec non circa tempus somni ordinarium exhibentur.

IX. Nunquam ex toto & vi dolores penitus dissipandi atque delendi sunt, cum hac ratione & ipsius quoque naturæ motus sistantur; quapropter melius semper est & tutius, nisi id urgeat dolorum vehementia, causam doloris aggredi remediis, quam ipsa neglecta; dolorem ceu productum tantummodo sanare.

X. Ubi viscerum adest infarctus & atonia, nunquam fere utilia sunt sedantia; quare Medicus magna solitudine in hydrope, cachexia, chlorosi &c. fugiat usum anodynorum, sive illum ipsum indicent dolores, vigiliæ, hæmorrhagiæ &c. ne incautus ex improviso mortem procuret.

XI. Opiata cautissime in epilepsia danda sunt, nisi eadem fuerit ex gravi dolore orta; licet enim paroxysmum suspendant, fortius tamen revertentem efficiunt, simulque memoriam debilitant, ad affectus soporosos, nec non apoplexiam maxime disponunt.

XII. Paralytici a suaveolentibus & vaporosis admodum læduntur, immo iisdem ex facili iterum in motuum defectiva vitia præcipitantur; eo quod post paralytin superatam, plerumque capitis debilitas, torpor & somnolentia remanere soleat.

XIII. Noxa quæ ab improvido & præpostero opiatorum & narcoticorum usu in corpore suscitatur, melius & citius non emendatur quam per emetica.



D I S S E R T A T I O

D E

OPII CORRECTIONE GENUINA
ET USU.*Primum edita Anno 1702. recusa anno 1730.*

P R O O E M I U M.



ECULIARIA fata non modo habere Medicorum opiniones, sed & ipsa medicamina, res est extra omne posita dubium. Ita deprehendimus, certis temporibus, certas esse familiares sententias, imo aestimari & magno ubivis recipi cum applausu. Alio autem tempore eadem rursus deferuntur, damnantur, & novæ exsurgunt, mox tamen etiam, prioribus repetitis, obsolescunt. Simili ratione procedit cum medicamentis, & cum ipsa medendi nonnullis morbis methodo. Mox enim hæc vel illa magnificæ sunt famæ remedia, quæ divinam, hoc vel illo morbo laborantibus, præstent opem, sive certissima morborum sint præsidia. Pari ratione hæc vel illa methodus, sanandi v. gr. febrem, pro certa infallibilique traditur ac venditur: paucò sæpius tempore interjecto, alii accedunt, qui hanc spernunt, & meliorem substituere ac in scenam producere conantur, sique speciem quandam auctoritatis & existimationis habent, & & speciosum accedit verborum artificium, atque ex novitate rerum (cujus natura humana est appetentissima) ebuccinatio, priora rejiciuntur, & hæc acceptantur. Hoc per aliquot annos continuato, ubi sibi tributam famam ac laudes non sustinent, in alia mox animus convertitur. Merito autem ille deplorandus mos est; quod certi Medici quandoque plane in contrarium currant, dum scil. unus hoc remedii genus ad cælum usque extollit, inque omnibus morbis, ceu panacæam, commendat: alter ex converso pro noxiosissimo illud declarat. Luculentum hujus rei exemplum habemus in opio; quot enim diversæ penes Practicos exstant & exstiterunt circa ejus usum opiniones? Quidam familiarissime ipso utentes, legitima dosi exhibitum, in omnibus ferme morbis ceu Divinum extollunt præsidium. Alii idem instar veneni timeant, & fere nunquam suadere ejus usum volunt, &, quod maximum est, quævis pars suam allegat experientiam, suas item quævis rationes. Et hoc in aliis quoque contingit. Certe qui talem Medicinæ faciem speculatur, is, ut plane ab ea addiscenda abhorreat, non mirum est. Quod si autem rem penitus, ut meretur, aestimemus & pensitemus, culpa profecto non est rejicienda in artem, non est rejicienda in remedia, neque etiam in experientiam: sed in ipsas personas, quæ vel ex magna credulitate, vel ex affectu, aut intempestiva sui æstimatione, dum se corrigere postea nolunt, citra præcedentem accuratorem pensitationem, examen, & effectuum, secundum solida & vera, corporeis rebus competentia, principia, ponderationem, & ex falsa quadam hypothesi, rationum deductione, in hujus vel illius remedii nimiam commendationem vel contemptum incidunt. Existimavi semper, sicuti in compluribus rebus, multisque actionibus, ita quoque in Medicina, tritum illud commendatissimum esse debere:

- - - - *Medio tutissimus ibis,*

& extrema omnia evitanda. Hoc autem medium ut inveniamus, & solido judicio ab affectibus vacuo, & solidis principiis in Medicina, & attenta effectuum observatione, sive experientia, opus est. Et videtur jam, DEO sit laus, meliori facie nostris

nostris temporibus Medicina splendere, ubi non tam facile auctoribus, etiam cum maxima asseveratione dicentibus, fidem habemus, & nihil approbamus, nisi accuratum prius sustinuerit examen, per experientiam & rationes, quæ non amplius, ut olim, ex cerebro petuntur, sed ex principiis & legibus motus demonstrativis solis atque unicis. Placuit autem nobis, cum specimen inaugurale edere fuerit mandatum, præ aliis, in exemplum sumere *opium*, ceu vexatissimam hodiernis moribus medicinam, breviter ostendendo, an, & qualem habeat usum? & maxime omnium, qua ratione præparari ad usum medicum opportunissime, & tutissime componi ac misceri possit. DEUS T. O. M. sicuti aliis nostris laboribus huc usque clementissime benedixit, ita & huic gratiam suam non denegabit, cujus benignissimam opem humillimis imploramus precibus.

§. I.

Primarius equidem nobis est scopus, demonstrare: quisnam melior sit correctionis opiatorum modus, quænam præparatio ac compositio? nihilo minus, antequam nos ad hoc accingamus negotium, operæ erit pretium, discernere prius ac definire, an nempe opium in praxin medicam tuto recipi, & quendam medentibus usum foenerari queat, nec ne? Nisi enim hæc res prius fuerit expedita, reliquus omnis labor irritus erit atque frustraneus. Placet itaque breviter strictimque argumenta, quæ proferri possunt & solent ab iis, qui opiatorum usum perfundare student, perspicere atque evolvere. Primo autem dicunt opium crude esse venenum, sive animantium naturæ & vitæ admodum infensum, quoniam nonnullas bestias in paucis granis necat, quales sunt feles, qui, deglutita pauca opii quantitate, mox convulsionibus, & miris membrorum agitationibus torquentur, & brevi animam efflant, cum tamen alias, si ulla animantia, certe iidem vita stabili, nec facile a quadam injuria destructibili, fruuntur. Talismodi exempla pulchre annotata legere licet in BORRICHII commendatissimo tractatu *de somno ac somniferis*. Deinceps assertum suum comprobant variis observationibus & lethalibus exemplis, ubi opium non tantum pejorem reddidit morbum, recidivas produxit lethales, verum etiam multos e vita subtulit & æternum iis somnum conciliavit. Tertio loco hanc afferunt rationem, quod opiata motus naturæ sistant, cum tamen vita & corporis nostri conservatio, unice dependeat a motu sanguinis, cui deinde subordinati sint debita spirituum secretio, nutritio & perneccessaria excrementorum separatio: quæ cuncta, non sine dispendio sanitatis, ab opiatorum exhibitione labefactantur, vel destruuntur. Quarto loco, utut negari non possit, in doloribus, spasmis, convulsionibus, febrili humorum commotione, motus esse excessivos, exorbitantes; nihilo minus eosdem a prudentissima natura bonum in finem excitari afferunt, ut nempe expellatur, quod infensum est & hostile naturæ microcosmicæ: ideo finendos illos motus, minime autem sistendos esse arbitrantur. Verum enim vero, quamvis non exigui momenti hæc sint rationes, placet tamen de his omnibus nostram sententiam, cum pace vero omnium, (animus enim non est quenquam in tota vita, multo minus quando placide & modeste opiniones examinamus, vel tantillum lædendi) brevibus exponere.

§. II.

Ad primum itaque reponimus, opium neutiquam in venenorum classem esse referendum. Tota enim Turcarum & Indorum natio contrarium per tot sæcula confirmat, dum eo partim ad delectationem, *Frid. Hoffmanni Oper. Supplem. II.*

partim ad animositatem, Venerem & majorem mentis aciem utuntur. Prostant etiam passim memorabilia exempla & observationes, ubi in nostris regionibus opium in magna quantitate, citra ullam noxam vel sanitatis detrimentum, fuit assumptum. Legi hac de re possunt *Miscellanea Nat. Curios. Dec. I. A. II. p. 127. 395. Dec. I. A. VII. p. 104. Dec. I. A. IV. & V. p. 290. Dec. II. A. V. p. 364. Dec. II. A. X. p. 77. 152. & 154. &c.* Notum mihi inter alia est exemplum amplissimi cujusdam viri Berolini degentis, perpetuo valetudinarii, hypochondriaci & podagrici, qui ad minimum bis in septimana pilulas Wildegansii assumere cogitur, a quarum usu insignem actionum alacritatem, robur, placidumque somnum experitur. Lubenter autem fatemur & admittimus, si in administrando ullo remedio opus sit prudentia quoad dosin, temperamenta, morbos & morborum tempora, certe in opiatis esse, maxime vero omnium, si sint male præparata. Si enim eadem tunc propinare velimus, quando motus & vires deficient, uti non raro ab imprudentibus Medicis fieri solet, utique de sanitate, imo de vita, in morbis præsertim acutis & malignis, actum fore quis dubitabit? Omnibus porro generosis, etiam analeptis & volatilibus remediis, hoc solenne est, ut, si intempestive vel præpostere usurpentur, perniciosum, instar veneni, vim exferant, imo in venenum materiam peccantem non adeo mali moris quandoque transmutent. Deinceps certum quidem est, felles a minima opii quantitate protinus necari: ex eo tamen minime inferre licet absolutam venenosam ejus qualitatem. Notum enim est, ab unico cochleari spiritus vini identidem mox concidere mortuos, quod etiam curiosi observarunt de amygdalis amaris, quæ homini egregia sunt medicina, felibus autem venenum. *Vid. Beati WEPFFERI elegantissimus, de Cicuta Aquatica, tractatus Cap. XIX. hist. IV. p. 241.*

§. III.

Præterea certum ac verissimum est, corporis nostri durationem, sive vitam, sine perenni ac jugi sanguinis & humorum motu ac circulo durare non posse, utpote hoc eodem non modo particulæ impuræ, heterogeneæ separantur, partesque nutriuntur, & spiritus, sive tenuissimum cerebri ac nervorum fluidum generatur, sed & omnis putredo atque corruptio, tam per impurarum istarum sordium secretionem, quam quod potentiæ externi fluidi intestinus ac progressivus sanguinis motus resistat, ac sic putredinosam mixti dissolutionem impediat, a corpore avertitur. Certissimum porro est, & a sapienti antiquitate dudum notatum, atque a SYDENHAMO feliciter & sobrie repetitum, naturam, sive totum illud corporis humani artificium, motibus, quos tam res naturales, quam morbificæ causæ subinde excitant, non modo se ipsum conservare, sed & mor-

borum fomitem temperando, sive coquendo, & exterminando, tam quantitate, quam qualitate infensam materiam, certis temporibus per congrua evacuatoria eliminare: quam sententiam jam ante hos octo annos tractavit & illustravit *Excellentissimus Dn. Praeses, cui pro summis in me collatis beneficiis aeterno me nexu devinctum pia mente agnosco, in dissertatione de prudenti medicamentorum applicatione in tempore, & postea in illa, de naturae morborum medicatrice mechanica.* Nullum hinc est dubium, quod motus hi, antequam sublata fuerit causa morbifica, sive ab ipsa natura sola, sive arte adjuta, sisti nequam debeant, quod & nullus unquam, ut ego quidem memini, ex recentioribus, qui ex physicis principiis Medicinae praecepta tractant, asseveravit; & utique tunc omnia motus sistentia, adstringentia, pessime cedunt. Aliter autem comparatum est, si motus isti, qui in corpore per & ob causam morificam activam excitari solent, quales febriles, spasmodici, convulsivi nimii sunt & excessivi, ubi non amplius materiae peccantis, sed motuum laesio corpori minatur periculum, sunt temperandi, moderandi, & annon id commode praestari possit anodynis decenter adhibitis? ubi utique tuemur hic affirmativam sententiam, utpote saepius accidit, ut ex nulla materiae praesentia, solo animi motu, vel per consensum, vel etiam a causa quadam externa laedente, sicuti fit, quando tendo vel nervus punctura laeditur, enormes motus, absque ulla necessitate, absque ullo scopo concitantur plane aberrantes, tales motus utique mature sistere oportet, unde etiam non absque ratione theriaca, quamvis sola non sufficiat, venenorum antidotus certissima habita fuit a veteribus, utpote venenatae particulae non tanta facultate pollent corpori nocendi, quam intensissimi isti motus, qui a veneno producuntur. Accedit & illud, quod secretio & expulsio cujuslibet peccantis materiae in corpore, non commode sub violento sanguinis & spirituum motu expediri possit, sed potius requirat pacatum quodammodo statum, ac motum non adeo fortem, maxime, cum sub tali concitatissimo sanguinis intestino motu, materia peregrina plus intime cum sanguinis particulis jungatur ac uniat, quam ut ab illis secessionem faciat. Sedativis itaque & opus esse in foro medico, ex eo firmiter existimo concludi posse. An autem praesentius detur opio, rite preparato & correcto, praesertim ubi graviores motus sedandi sunt, merito dubitandum est. Et quando vetustissima Medicinae respicimus tempora, nulla remediorum genera per tot seriem seculorum in usu, ac aestimatione magis constanter permanerunt, quam quae opium habent pro basi, ex quorum censu eminent *theriaca, mithridatum*, aliaque. Confirmat & hoc nostrum assertum auctoritas gravissimorum & solidissimorum Practicorum recentiorum, inter quos merito reponimus, viros omni laude majores, PLATERUM, SYLVIVM, ETTMÜLLERUM, CRAANIUM, DAN. LUDOVICI, MICHAELIS, WALDSCHMIDIUM, WEDELIUM, ALBINUM, SYDENHAMUM &c. ex quibus, si quid solidi in praxi addisci potest, certe ex iis haurietur, aliis tamen minime neglectis: hi autem omnes in frequentissimo opium habuerunt usu: Equidem fateor lubenter, si ullum medicamentum circumspectionem & prudentiam postulat Medici, & si ullo quoque vulgo graviter peccatur, certe id fieri per opiata & narcotica, experientia optima veritatis parens, confirmat; abusus tamen nunquam tollit & tollet usum. Placuit mihi in eo valde LUDOVICI sententia, qui scribit: ob meticulosam opiatorum intermissionem, aequae multos, dirissimis confectos symptomatibus, vel vigiliis continuatis exhaustos, occidisse, atque per Empiricorum periclitaciones.

Clarissimus HELMONTIUS in *Tr. Duumv. p. m. 64.* scite scribit: Felix ager, cujus auxiliator Medicus novit lethalia e papavere separare, alioquin sane nocuum cum proficuo simul assumunt, unumque impedit alterius profectum. Equidem crudum opium non est venenum, sed saepius hoc praferendum duco opii tosti, seu exusti, aut inconcinnorum ex eo praeparatorum extractorum nimis dosibus: nihilominus tamen firmiter cenfeo, praeparatione indigere, ut utile ab inutili separetur, & nova etiam cum aliis unione seu compositione, ut ejus vis vel corrigatur, vel emendetur. Primo omnium autem spectanda est opii origo. Est nempe illud succus inspissatus, qui ad nos ex diffitis locis venit. Duplex autem secundum accuratiores historiae naturalis scriptores datur, nempe purum, quod nihil aliud est, quam liquor albus instar lactis, qui emanat ex capitibus papaveris nigri, mediante incisione apertis, qui successive in sole coagulatur, & mutat colorem suum album in brunum, quod verum est opium, quo Turcae utuntur, tam ad famem sustinendam, quam ad alacritatem in praeliis & conflictibus sibi comparandam: tale autem ad nos propter raritatem non amplius adportatur, sed hoc quo nos utimur est succus, per expressionem capitum & foliorum papaveris factus, deinde in consistentiam extracti, mediante igne, redactus. Veteres vocarunt meconium.

§. V.

Res jam postulat, ut paulo sollicitius inquiramus, in elementa, sive principia, opium constituentia: animadvertimus autem in eo diversas & distinctas inter se substantias: quod si enim calidam opio affundimus aquam & solutionem leni coctione decenter facimus, binæ ferme opii partes in ipsam transeunt; inspissata hæc solutio extractum constituit, quod rursus in omni liquore aqueo est solubile, nequam autem in spirituosum & oleosum; unde patet, ex gummeis, mucilaginosi, viscido-terreis hanc partem esse compositam magis, quam ex resinosis & pure sulphureis oleosis, utut hæ ipsæ non penitus a gummosa opii parte possint excludi, utpote & hoc, igni admotum, ardet; indicio, sulphur inesse, sed immersum lentis, gummeis partibus, non secus ac sanguis exsiccat ardet, nec tamen solvitur in spiritu vini rectificato. Substantia autem quæ remanet ab extractione gummosa, magma est terreum, viscosum, quod tamen particulas quasdam pure resinosas adhuc fovet sub sinu suo: etenim si ipsi affundimus spiritum vini rectificatissimum, sub debita digestionem imbibit ipse insignem adhuc portionem ex opio, & tingitur colore ex bruno rubicundo: Essentia hæc si instillatur aquæ, lactescit, manifesto documento, resinosa & oleosa substantiam fuisse resolutam: Quando inspissatur, largitur extractum resiniforme, quod promptissime suscipit flammam, & totum consumitur, id quod cum gummea parte non æque facile accidit. Curiosum est, quod in inspissatione spiritus vini sal quoddam tenuissimum, spiculatum, albicans, instar florum benzoës, quod & *Excellentissimus WEDELIUS* annotavit in *opiologiae p. 70.* jucundo spectaculo sese simul praesentet. Tertia substantia, quæ remanet a gummosa & resinosa extractione, terra est inutilis & effoeta. Insuper memorandum etiam quid est de peculiari opium constituyente principio, quod nempe exiguum quidem, sed magnæ soporiferæ virtutis est; & deprehenditur illud in superficie solutionis opii factæ cum aqua, nihilque aliud est, quam pinguedinosa quædam, spumans, viscida materia, quæ supernatat, odoris valde graveolentis, foetidi.

§. VI.

§. VI.

Examinatis sic opii diversis partibus, necessarium jam est, ut inquiremus, quænam maxime utiles, & desideratam sedativam vim custodiant, quæque inutilis, imo magis damnosæ existant? Paucis autem & sine ambage, nostram hac de re sententiam declarare hoc loco allubescit. Statuimus nempe, elementum illud, quo opium agit, anodynum & soporiferum, esse nihil aliud, quam sulphur ejus tenuissimum, evaporabile, sive, quod in copiosissimos vapores dispergitur, & in auras avolat: hoc vel immediate ipsos nervos & membranas nerveas sua replens vaporositate, spirituum distributionem atque influxum impedit, vel adhuc magis in sanguinem delatum, mirifice sese expandit, & hac facta expansione rarefactiva, arteriolas minimas in cerebri corticali substantia distendit, sanguinisque liberiores circulum impedit, sicque spirituum genesin imminuit, & ita motus omnes in toto corpore segniores efficit, uti fusius ab Excellentissimo Dn. Præsidente notatum in *diff. de mechanica operandi ratione opiatorum*. Quod autem in tenuitate partium sulphurearum, earumque blanda *ἀναδυσίδος* consistat opii vis, vel ex eo liquido apparet, quod etiam forinsecus tantum admotum, nempe temporibus, in emplastro, linimento, vel clystere, effectum suum exserat. Clarius autem illud apparet, si destilletur cum aqua simplici, vel spiritus vini super id abstrahatur, inde enim producta aqua nobilissima vi pollet anodyna, tutissima, contra vulgarem opinionem: Spiritus autem vini opiat, & externo, & interno usu indentidem probatissimus ad eosdem reperitur effectus. Simile quoque deprehendimus in floribus papaveris rhœados, ubi aqua ex ipsis parata, longe tutior ac melior est omnibus aliis ex eis paratis; unde jam perspicua fit ratio, quare, si, in præparatione ejus extracti, opium diu in aqua coquatur, & ingens aquæ copia affundatur, ac vehemens calor subministretur, extractum anodyna sua virtute privetur, adeo, ut ejus modi extracti, fortiter sic excocti, grana decem non tantum efficiant, quam duo grana lenissimo calore præparati extracti. In universum enim hoc tenendum est, volatile esse soporiferum principium, unde aqua, calore & aëre transmittitur in auras. Manifesto id quoque apparet in absinthio, quod est herba sulphurea, caput sua replens vaporositate, si autem in aqua coquitur, virtute hac penitus defraudatur, in auras nempe avolante tenui, quo constat, sulphure.

§. VII.

Quodsi jam secundum hæc principia, ipsamque experientiam examinemus quatuor distinctas ex opio præparatas substantias, quænam ex iis præcipua splendeat sistente tumultuantes motus virtute, per se jam liquet, eam esse, quæ maxime est volatilis: & contra, fixiorem, inertem, segnem & penitus orbam hac virtute. Afferimus itaque, eandem quæ supernatat, exiguam quidem, sed omnium esse efficacissimam. Unde est, quod canes, qui ab integra opii drachma non pereunt; aliquot hujus substantiæ granis interficiantur. WILLISIUS *Pharm. Rat. part. I. Sect. VII. cap. 3.* hoc fecit experimentum, gregario nempe cani exhibitæ duæ opii drachmæ ipsum non interficiebant, sed stupidus inde factus difficulter respirabat, & intra semihorulam alvum cum foetore teterrimo copiose dejiciebat, & vegetus evasit. Ita nuper quoque ipsemet, binis successive vicibus XV. grana opii devoranda cani domestico porrexī, a quibus plane non alterabatur. Postea illud idem insti-

Frid. Hoffmanni Oper. Supplem. II.

tui experimentum cum substantia illa pinguedinosa spumante, quæ ordinario supernatat solutioni opii cum aqua factæ XII. granis: scil. objeci ea cani in pane butyraceo recondita devoranda; inter quatuor autem horarum spatium e vivis excessit. In hujus rei confirmationem allegare hoc loco possum simile experimentum, in huperis Hanovia ad me datis literis, mecum communicatum a *Clarissimo Domino Doct. VAN DEN VELDE, Fautore nostro integerrimo*. Hic cani domestico mediocris magnitudinis, vigili de cætero & satis petnici; haud ita pridem humoris illius pinguis, ex opii coctione collecti, grana X. masticatæ panis medullæ subacta, ingessit: quibus devoratis, elapso horæ unius quadrante, oculis nivere, capite nutare, & ad somnum se componere coepit, sed frustra. Mox enim quasi expavescens sutrexit pedibus, tremuit, ejulavit, crebro & concitato respiravit, linguamque æstu squalidam, tanquam cursu defatigatus; exseruit, & hinc illinc incerto & titubante latus gressu, donec labantibus pedibus succubuerit, & in terram prostratus, alto quasi sopore oppressus fuerit: sonoros hinc & crebros edidit ronchos, quos inter frequentes, ingentes primò tendinum subfultus, mox convulsiones atrocissimæ sequutæ, quibus per bihorium varie jactatus, tandem intercepto spiritu, vivere desiit; adeo ut pateat, longe majorem efficaciam subtilissimam hanc opii partem præ cæteris habere. Jure elicere quis poterit ex his allatis experimentis, virulentam hanc esse opii partem, quoniam animalia interficit. At verò, potius statuimus, non ratione venenositatis cujusdam occultæ mortem sequi, sed propter nimiam hujus substantiæ activitatem: probe enim custodiendum est, ex libra una opii vix duas vel tres drachmas separari posse hujus materiæ, quæ quasi illud principium vaporosum, quo operatur opium, concentratum, sibi que relictum est: Unde concludimus, unum ejus granum plus præstare, quam decem extracti. Utique igitur cautissime est procedendum cum subtiliori hac parte, quæ non, nisi in minutissima quantitate, est propinanda.

§. VIII.

Quod attinet ad resinofam substantiam, quæ ex imagnate terreo, mediante spiritu vini extrahitur, hanc, uti dictum, virtute anodyna cassam deprehendimus, & cum grana hujus quindecim canis devorasset, nil inde sensit incommodi, nec levem quidem somnolentiam induxit, adeo ut errare mihi illi videantur, qui opii virulentiam in resina collocarunt, quasi ventriculi & intestinorum membranis nimis adhærescens, nauseam, anxietates & cardialgiam efficeret. Id quidem verissimum deprehenditur, quod, uti jam dudum Celeberrimus WEDELIUS annotavit, opium cum spiritu vini solutum, & in essentia vel extracti forma propinatum, symptomatibus variis magis sit insensum, vomitusque excitet, quam si cum phlegmate aceti extractum præparetur, ubi nunquam vomitum, vel saltem nauseam contigisse observavit. Hujus autem effectus atque phænomeni rationem mox suggeremus: Omnium autem solertissimorum consensione gummea pars; quæ cum aqua extrahitur, celebratur pro optima & tutissima: quæ nec vomitibus, nec diarrhœis, nec anxietatibus facile insensa est, tamen activitatem in sedativo effectui satis luculenter præstat. Hæc quoque in insigni quantitate a cane devorata, truculenta nulla symptomata excitavit, ut potius post lenem somnum, vigor & alacritas major fuerit notata. Merito autem hic quæstio oritur, in quonam principio lateat perniciosa & noxia opii vis, cum experientia confirmet, non tam a crudo opio, quam essentia ejus

cum spiritu vini parata, item extractis ejus, magnas anxietates, cardialgias, nauseas, subsequi, & mori animalia? Videtur itaque nobis verosimile, in sulphure opii sibi relicto, & a mucilagine sua separato, & acriori facto, conquiescere soporiferam & nervis etiam molestam virtutem, quæ sæpius diarrhoeas, vomitus & anxietates causetur, non modo acris sale stimulante, sed & dum in instanti nimia sua activitate sanguinis motum circa primas vias sistit: unde natura quasi hac ratione irritata violentas istas motiones efficit: ut a resinoso principio hæc pathemata minus congrue deducantur. His positis non amplius ignota erit ratio, qua de causa opium solutum in spiritu vini plus damni inferat, quam si in aqua solvatur; quod non, uti diximus, fit ob resinam, quæ expers omnis activæ noxiæ virtutis est: sed quoniam spiritus vini, particulas oleosas, pure sulphureas, cui tenuissimum sal implicitum est, extrahat & liberet ab involucris ac compedibus mucosis, viscidis, quæ nimiam ejus activitatem ac volatilitatem temperare ac refrænare aptæ erant. Quod autem hæc sententia fundamento non destituta sit, considerare placet oleum ex tabaco extractum, quod pariter sale acris stimulante turgidum est, & verum venenum, si vulnere immittatur in animantibus, vel nervus sauciatus ipso tangatur, uti probe annotavit BORELLUS, mox fuisse convulsionem, & lethalia infecuta symptomata. Consensum enim ferme inter omnes eruditos reperimus, oleum in opio quod continetur, esse matricem atmosphæræ copiosissimæ anodynæ & soporiferæ, quæ per sanguinem in corticem cerebri recepta, & sanguinis ibi motum, & spirituum genesin pacatiorem efficiat: In sententiam autem adducamus PETRUM SEVERINUM, qui in *idea Philosophiæ cap. 7.* refert, se in opio, facta substantiarum separatione, deprehendisse sulphur, seu oleum plane narcoticum. HELMONTIUS, in *Tract. duumvir.* invenit salem acrem sudorificum, & oleum amarum soporiferum. QUERCETANUS *Lib. I. defensio-num, cap. 20.* reperit in eo oleum narcoticum flammam concipiens. *Excellentissimus WEDELIUS in Opiol. lib. I. Sect. I. cap. 9.* oleum nigricans copiosum per destillationem extorsit; probe autem hic tenendum est, oleum quo opium agit non esse crassius, sed valde tenue & volatile: crassum enim sulphur, quoniam difficulter explicatur, tales effectus, opio proprios, minime præstare poterit. Conspicimus id clare in semine papaveris, ex quo *Celeberrimus BORRICHIIUS* magnam olei per destillationem elicit quantitatem: quod tamen in somno provocando longissime cedit opio.

§. IX.

Judicamus utique, desideratissimam anodynâ vim in temperata opii parte esse quærendam, quæ est ipsa gummosa: hæc alit sulphur in magna quantitate, nam accenditur: interim tamen, innexum, implicitum & intricatum illud est variis particulis viscidis, mucilaginosis, & tenerioribus terreis, quæ ejus nimiam activitatem & celerrimam operationem moderantur, refrænant atque dispensant: omnia enim temperata & moderata quæ successive & sine impetu agunt, naturæ magis grata & amica sunt, quam quæ summa agendi activitate sunt instructa, simul & semel, uno impetu ac celerrime corpus alterant. Quapropter optima ratione *Celeberrimi Viri, LUDOVICI, WEDELIUS, FEBVRE, LEMERY, GLASERUS & alii* extractum opii cum aqua simplici vel phlegmate aceti præparatum omnibus aliis præparationibus & correctionibus præferunt. In *Act. Erud. Lips. Mens. Octobr. Anno 1701. p. 44.* recensetur mysterium opii revelatum *Dn. D. JONES*: Recipit nem-

pe opii octo uncias, aquæ pluvialis destillatæ uncias XXIV. In loco temperato & vase probe obturato reponit, quotidie ter quaterve agitando; post sex dies per chartam bibulam solutionem filtrat & oleo dulci affuso sub titulo panaceæ liquidæ asservat: qua obtenta, mox ad omnem gummosam opii portionem aqua pluvia destillatam tamdiu affunditur, quousque rubicunda elicitâ tinctura fuerit omnis, pariter filtranda, simulque in balneo ad extracti, solidam opii panaceam constituentis, inspissanda consistentiam. Notandum hic merito est, etiam differentiam quandam dari in parte gummosa quæ aqua extrahitur, dum nempe illæ partes, quæ leni calore vel infusione calida in aquam cedunt ex opio, longè teneriores & subtiliores, adeoque ad anodynâ & somniferam vim aptiores sunt, quam illæ, quæ coctione demum cum aqua solvuntur, ceu crassioris texturæ, & paulo fixioris indolis: unde non incon-sulto, sed optimo ac felicissimo successu, præclarus ille Auctor infusionem tantum cum aqua, calido in loco, vase probe obturato, celebrat, ne volatilis portio desideratissima secedat in auras, sed potius ipso in menstruo conservetur: hinc priorem infusionem tanquam laudanum liquidum in usum servat; reliquam autem crassiorem portionem solutam in extractum coagulat. Ex eodem fundamento procedit quoque laudatissimi SYDENHAMI liquidum laudanum, qui vinum Hispanicum opio in frustula conciso infundit una cum croco, caryophyllis, nucifla & cinnamomo, & sic citra coctionem adeoque deperditionem substantiæ tenuis sulphureæ, vel im-mutationem texturæ opii, præstantissimi usus remedium parat.

§. X.

Ex his jam dictis & adductis, nemo non facile perspiciet, subtiliorem & solubiliorem in aqua opii partem partem esse selectissimam, ad usum maxime internum accommodatam, neque eam ullo modo in crasi & textura sua immutari ac destrui debere: nam innumeris experimentis mechanico-chemicis compertum est, in textura, crasi ac nexu partium energiam atque virtutem potissimum conquiescere, quæ sublata & immutata, mox evanescit cum ea pristina efficacia, adeo ut sæpius quod antea erat medicina, jam veneni indolem redeat. Ex hoc jam principio & fundamento in proclivi erit dijudicare de variis & diversissimis institutis veterum & recentiorum præparationibus & compositionibus ipsius opii. Et primum patet, effumationes, tostiones quas veteres habebant in usu, nullius esse momenti vel pretii, cum hac ratione penitus nobilissimum hoc simplex privatur activo suo elemento. Et rursus non amplius ignotum erit, quare correctiones istæ cum acidis vehementioribus spiritibus nullum invenire possint locum, quoniam hoc pacto volatile illud tenue sulphur figitur, coagulatur & obtunditur; omnia enim acida concentrata, quæ cum oleis destillatis mixta sunt, eorum penetrantiam & agilitatem non modo retundunt, sed & firmum stabile corpus fixioris naturæ, mutuo connubio facto, inde formant: quapropter non immerito improbamus omnes extractiones opii factas cum spiritu vitrioli, spiritu salis; item cum languidioribus, cum succo citri, aceto destillato &c. Quod attinet ad spirituosâ menstrua, in superioribus jam deductum est, iisdem magis efferrari opiatorum vires; hæc enim, cum nexum mixti disjungant atque immutent, oleosas, salinas, volatiles a mucidis terreis separando, non possunt non & vires quoque simul immutare: utut enim oleoso principio opii narcotica vis maximam partem sit ascribenda, nihilominus sibi relicto & purum, plus nocet

nocet nervis, & texturæ spirituum infensum est, nisi sub involucrio & contextu particularum temperatarum, mucilaginosarum, terrestrium involutum custodiatur: hanc ob causam jure meritoque repudiamus omnes illas essentias, omniaque extracta cum spiritu vini facta. Si enim quippiam deleteriam vim huic simplici affricat, certe est menstruum spirituosum. Et tamen olea tam destillata, quam expressa, nullum jus vel potentiam in dissolvendo opio exercere valeant, menstrua autem spirituosæ, oleis istis æthereis essentificata & imbuta, extractionem quandam moliantur, nihilominus & talem correctionis rationem privamus atque excludimus a legitimo & convenienti usu. Restat jam, ut etiam circumspiciamus, quid alcalina menstrua, tam fixa, quam volatilia, præstent in emendatione & exaltatione opiatorum virtutis. Solenne pluribus fuit, cum tinctura salis tartari, cum tinctura antimonii acri, vel tartarifata, debita digestionem facta, elegantem tincturam, summa rubedine infectam extrahere, cujus generis laudana WILLISIO, ETTMULLERO, TACXENIO & Dn. Præsidi olim etiam perquam familiaria fuerunt. Jam autem compertum est, quod alcalia salia texturam sulphurei principii maxime recludant, unde etiam spiritus, qui præparantur ex mastiche, benzoë, succino, myrrha, balsamo Peruviano, si prius hæc resinosa corpora oleo tartari per deliquium probe fuerint materata, longe fortiores, penetrantiores sunt, & oleo tenui balsamico imbuti, quam si destillatio tantum cum solo spiritu vini rectificato celebretur. Curiosum hoc est, quod, si opio soluto in aqua affundatur oleum tartari per deliquium ebullitio quædam observetur, & odoris immutatio, dum maleolentes vapores assurgunt. Statuimus itaque, alcalia sulphureas quidem tenues oleosas opii partes a suis separare compedibus & vinculis, sed simul etiam texturam oleosi opii principii quodammodo immutare, quod patet ex ebullitione & odoris immutatione, unde fit, quod essentia cum alcalinis & spirituosus mensuris parata, longe meliores sint ac tutiores, quam si cum solo spiritu vini fuerint adornata. Et utut per hanc rationem non penitus repudiandæ sint, nihilominus, cum crasin mixti aggreantur, abstinere consultius duco ab iis, dum selectiora nobis cognita sunt. Tandem etiam aliquid monendum ducimus circa fermentationem opii, quæ cum variis vegetabilium succis, præsertim succo cydoniorum, institui solet; sua non sunt laude defraudandæ, & usu hætenus egregio se approbaverunt, dum nempe cydoniorum succo gummea opii pars solvitur, & facta deinde cum sale tartari fermentatione, sulphurea opii pars subtilisatur & exaltatur. Possent quidem hic quispiam interponere, mixturam ac crasin opii hoc pacto etiam destructam iri, & secessionem principii oleosi a mucido terrestri fieri: at vero, utut talis mixti alteratio utique quodammodo hic concurrat, nihilominus mucilaginosum illud & blandum terrestre acidum, quod in cydoniis est, separatum & exaltatum illud sulphur denuo in se recipit, & cum ipso sese connectit, ut noxa ac damnum inde expectari non debeat. Si tamen fateri licet quod res est, & hanc corrigendi methodum longe postponimus simplici solutioni opii cum aqua pluviali factæ sub lenissimo calore in vase clauso, uti optime JONES hoc ipsum jam monuit; hæc via valde est compendiosa, facilis & tuta, cæteris omnibus magis operosis, quibusdam plus damni quam emolumenti adducentibus.

§. XI.

Hiscæ discussis, ordo jam postulat, ut varia ex opio composita paulo accuratius consideremus, & selectiores mictiones tradamus: antequam autem hoc

Frid. Hoffmanni Oper. Supplem. II.

demus effectui, paucis tantum inquirere placet, in quam forma opiata commodissime possint propinari. Habemus maxime formam solidam & fluidam seu liquidam; ubi non possumus dissimulare convenientissimum nobis videri usum opii liquidi, paucis tantum casibus exceptis: utpote non modo celerioris operationis perpetuo fere medicamenta liquida sunt, dum citius dispensantur per totum corpus; verum etiam facilius rursus effectui præstito transeunt & exhalant. Illud autem habent incommodi in solida vel pilulari forma exhibita opiata, quod vel difficilius solvantur, membranis & valvulis intestinalibus firmitus adhæreant, & eas partes ubi jacent maximis incommodis, præsertim stupore, vellicatione, afficiant. Unde non sine ratione conquestum est sæpius inter Medicos, opium ventriculo esse hostile: meretur adduci in hanc rem egregius locus ex ETTMULLERI *dissert. de opii virtute diaph. qui cap. 111. §. 3. scribit: sane non leviter hostile videtur ventriculo opium, cujus ut digestionem ordinario turbare observatur, ita etiam gravaminis & pressionis circa ventriculi regionem sensum, & vix explicabilem ab ægris molestiam circa præcordia opiata inducere solent, idque præsertim sicca in forma, omnium maxime pilulari si propinentur.* Unde etiam conqueritur WEDELIUS in *Opiol. p. 32. & 33.* ab opio pilulari in forma exhibito, vomitum inprimis oriri. Ulterius, liquidum laudanum solido eam ob rationem videtur præferendum, quod in evaporatione, dum solutio redigitur in extractum, multum perire solet de substantia subtiliore desideratissima anodyna. Attamen existimamus, ubi opium in primis viis sedativum & sistentem quemdam usum præstare debet, uti in diarrhœis & dysenteriis, plus efficaciam tunc a solidis, quam liquidis expectari debere.

§. XII.

Nunc e re quoque fore existimo, ut varias opiatorum compositiones correctionis causa potissimum institutas perlustremus. Veteres probe perspectum, & experientiæ sensu cognitum habebant, opium pacativam & somniferam quidem custodire facultatem: at sæpius magna simul creare symptomata, imo vitæ esse infensum; unde omne studium ac operam collocarunt in eo, ut eam, quæ noxia esset, virtutem corrigerent ac emendarent. Constans autem tunc fuit sententia, opium in extremo gradu frigidum esse, siue corpus frigefacere, cum tamen in humido & calido vita radicaretur. Ipse HIPPOCRATES *Lib. de flat. sect. I. p. m. 411.* ait *hypnoticis frigefaciendi vis inest, a qua sanguis frigesit: & eapropter cum calidis illud esse miscendum judicarunt.* Unde si evolvimus vetustissimas quas opium ingreditur, compositiones, complura calida ibi mixta videbis, nempe aromata, imo ipsum piper, zingiber, euphorbium, pyrethrum, semen erucæ &c. sicuti id apparet in diascordio Fracastorii, philonio Persico, Mesue, philonio majore Nicolai, ipsaque theriaca. Deinceps, quoniam observabant ab opiatis præcordiorum anxietates, animi deliquia, vertiginem, capitis torporem ac stuporem, hinc cordiali, confortante ac cephalica virtute præstantia miscebant, & hac ratione succurrere istis noxis studebant: unde videmus hinc inde electuariis, laudanis, extractis, confectionibus admixtum cinnamomum, essentiam citri, oleum cinnamomi, lignum aloës, semen citri, ambram, moschum, terram Lemniam, bolum Armeniæ, magisterium perlarum, matris perlarum, coralliorum, crocum: item ex cephalicis nardum Indicum, schoenanthum, stœchadem Arabicam, styracem calamitam, nardum Celticam, cardamomum, cubebas, castoreum, opobalsamum, flores lavendulæ, salviæ, rosmarini. Præterea, si quis evolvere

& paulo accuratius examinare quævis hinc inde profantia ex opio composita velit, utique deprehendet, complures ineptas mixturas, sine ulla ratione factas, dum ex farragine multorum inertium & inter se repugnantium, & ubi unum alterum destruit, invicem confarcinata sunt, ut inepta hac medicamento- rum compositione veterum, in vera theoria, & principiis genuinis physicis, quæ vera medica sunt, ignorationem abunde demonstrent. In alexipharmacum scopum plura videbis adornata ex opio & variis creditis bezoardicis, cephalicis, alexipharmacis, viperinis, scordio &c. Non negare in totum volumus, theriacam, aliaque alexipharmaca opiata in certis malignis & venenatis morbis quandoque locum invenire posse: nam temerarium esset experientiam per tot secula penitus velle pernegare atque rejicere; illud tamen non possumus non monere, compositiones has longe concinniori, meliori ac tutiori potuisse via, scopo, hoc, institui. Equidem contractionem theriacam ante aliquot lustra, non sine laudabili more, nonnulli præstantes Chemiatri efficere sunt conati: verum si fateri rem licet, & nimis diffusa mixtura est, copiaque ingredientium, etiam incongruorum, laborat. Non de nihilo est, theriacam hanc, quæ nomine venit cœlestis, commode & compendiose, imo secure in quibusvis morbis per se vel cum aliis medicamentis posse misceri & propinari; maxime ubi fluxiones nimiae sunt sistendæ, & impetus motuum refranandus. At meliori adhuc virtute gaudebit, si selectioribus ac paucioribus tantum ingredientibus præparetur. Non possum quin hic compendiosam talem theriacam *nulla mihi unquam intermoritura pietate colendi Excellent. Domini Præsidis* commendem, quam ipse jam olim Mindæ Westphalorum, & Halberstadii introduxit in pharmacopœas, & per multos annos ibi praxin exercens probatissimam invenit: Compositio ejus videre est in notis ad Poterium.

§. XIII.

Tandem, si verum fateri licet, ex omnibus compositionibus veterum, laudanis, præparatis, extractis, & correctionibus vix unica mihi placet, maxime propter diffusam & inertium quoque ingredientium farraginem & copiam. Et, utut theriaca & diascordium Fracastorii non ignobili virtute sese, si recte adhibeantur, commendent, meliori tamen, tutiori & concinniori ratione hæc omnia posse perfici nullus dubitabit, qui experientiam & rationem pro fundamento habet. Quodsi autem rem paulo consideremus attentius, non ex alio fundamento correctionis, cujus in finem compositio instituitur, ratio peti ac duci debet, quam ex eo unico, quod est hoc: Opium potenti pollet motus machinæ nostræ sistendi facultate: Ne itaque vis noceat corpori, sistens quodammodo retundatur, sive ad æquilibrium & temperamentum redigatur eum in finem cum iis quæ motus faciunt & promovent in corpore, misceatur; ut ex duobus hisce, nempe motum sistente & promovente remedio, quasi neutrum desideratissimæ virtutis producat. Insulsum quidem primo intuitu videtur, talia, quæ e diametro sibi opposita sunt, invicem miscere, cum unum alterum sua privet activitate: attamen experientia in plurimis remediis contrarium docet, exsurgere nempe hac ratione sæpius præstantissima ac divinæ virtutis remedia: sic v. gr. videmus sal succini acidum cum sale cornu cervi urinoso mixtum, duo esse contraria, nihilominus constituere expertissimæ virtutis remedium: in mixtura simplici, tincturis bezoardicis, acida mixta sunt cum alexipharmacis calidis, sale volatili acri subtili turgidis, & hac ratione exopta-

tissima hinc resultat medicina; mercurius, summe penetrans & volatile corpus, cum auro fixioris indolis decenter mixtus, incomparabilem, in chronicis morbis, constituit medicinam. Tacemus salia neutra egregiæ efficacæ, quæ tamen ex acido & alcali composita sunt. Proinde non inconsultum esse arbitror, cum sudoriferis, iisque alexipharmacis, item cum purgantibus, miscere opium. Olim in hoc districtu Practicus celeberrimi nominis vixit, KEULINGIUS, qui instar panaceæ usurpavit in chronicis & acutis morbis, ut *Manuscripta* docent *Beati Frider. Hoffmanni*, constantem ex spiritu cornu cervi volatili probe rectificato, & essentia opii tincturam. Ita etiam Lipsiæ virum practicum famigeratissimum in frequentissimo usu spiritum cornu cervi cum essentia anodyna, etiam in acutis morbis habere, certe scio. Bezoardica tinctura Michaelis, magnifici nominis viri, recipit quoque opium: Omittimus theriacalia & notissima alexipharmaca diascordii Fracastorii, Sylvii, theriacam cœlestem, Andromachi, theriacam de citro, suscipere omnia in se opium, variaque alexipharmaca & diaphoretica. Quod autem tam veteres, quam hodierni Medici opium alexipharmacis permiscuerint, hæc mihi causa videtur, ut nempe eo felicius in peste, febrium acutissima, imo in haustis venenis maximum impetum sanguinis & spirituum, quem tenuissima hæc corpora machinæ inferunt sollicitando naturam, sive principium movens musculos, paululum moderarentur. Nam extra dubium est, effrenem & nimium motum, secretionem & excretionem, quæ tamen intenditur, plane pervertere, & officium quoque glandulosorum emunctoriorum perturbare: ideo, sunt verba *solidissimi OLAI BORRICHII de somno & somniferis p. 31. nihil mihi securius observatum in peste, quæ urbi nostræ A. MDCLIV. ferocissime incubuit, sola theriaca, sed liberalius, non improvide tamen, propinata. Plures enecti, qui drachmam hauserant, etiam subinde drachmæ geminæ nihil afferant opis, eoque in adultis nonnunquam ad tres ascendendum fuit, non sine periculo quidem, minus tamen, quam malum ipsum periculoso. Vivit apud nos hodieque celebris Musicus, Joh. Erius, quem tum lue illa sæviter correptum hoc modo, propitio Numine, restitui. Præterea, eandem theriacam in vomitu, alvi fluxu, diarrhoea, symptomaticis, nec non dysenteria, tam externe, quam interne, desideratissimam opem ferre, & vulgo notum est. In rheumatismis, capitis erysipelate, odontalgia, otalgia, nil præsentius invenit, *Dn. Præses*, quam essentias alexipharmacas cum laudani liquidi aliquot guttulis roboratas, debita & repetita dosi porrectas, quod etiam in catarrhalibus febribus, arthriticis affectibus, interpositis etiam aliis non est de nihilo: Ex compositis diascordium Fracastorii, licet inepta appareat ejus compositio, egregii usus est, quod cum lapide prunellæ & diaphoreticis mixtum frequentissimo in usu olim habuit *Exc. Dn. Præses*, etiam in ipsis lenioribus pleuriticis febribus, in ætate maxime juvenili. Approbamus itaque, & unam ex optimis commendamus mixtionis methodum opii, nempe cum alexipharmacis & sudoriferis.*

§. XIV.

Provolvitur jam ad alterum mixtionis modum, qui est cum purgantibus: videtur & hic modus plane absonus, & a ratione alienus, cum opium purgantiam sistat effectum, sed fuit vetustissimus mos hæc invicem combinare. Ipse GALENUS *Lib. VIII. de comp. med.* laudat pharmacum quoddam Asclepiadis stomachi vitiis opponendum, quod inter cætera recipit, nardum, costum, psyllium, rosam, aloën, asarum. Postea frequenti in usu habuerunt purgan-

purgantium cum opio miscelam optimi Medici, præsertim in compescendis doloribus, qua de re legi potest RONDELETIUS *Lib. XI. cap. XXVI.* DEODATUS in *Valetudinario*, p. 191. Ipse POTERIUS in dolore oculorum inveterato nihil præsentius invenit, quam pilulas suas catholicas, cum aliquot granis opii correcti mixtas, optatissimo insecuto successu. RIVERIUS passim in *praxi & observationibus*, in funestissimo dolore colico, purgantes pilulas cum laudani opii uno vel altero grano miscet. Idem facit THONNERUS *lib. 3. obs. 5.* id quod etiam sæpius in praxi præstitit *Exc. Dn. Præses*, & observavit, primo ex usu harum pilularum dolorum mitigationem, post XII. horas alvus deinde fuit soluta & sudor subsequutus. HORSTIUS in febrium intermittentium, præcipue quartanæ, paroxysmis, præparato prius corpore, mixturam præmittit ex hellebori nigri extracto, laudanoque opiato, addito tartari vitriolati & antimoni diaphoretici momento. Imo in colica TILEMANUS laudat opiata solutivis lenientibus mista, & RUDIUS addito diagrydio; ut & CAPIVACCIUS aliis purgantibus in eodem affectu. De connubio opiatorum cum purgantibus hæc habet Ingeniosus PECHLINUS *obs. 62. p. 363.* *Insulsissima, fateor, videtur purgantium cum opiatis mixtura, & tamen sunt, qui in doloribus colicis hystericisque feliciter se illa usos jactitant, imo novi olim Empiricum, qui aloes, hellebori opiique conjugio magna cum nominis celebritate medicinam faceret.* Cognatæ illi sunt *Rhumelii pilulæ antipodagricæ*, nunc quoque famosæ, nec destitute fortuna. Vocatæ fuerunt dictæ hæc pilulæ, *Veni Amice, Surge & Ambula*: & sic fiunt: *R. Massæ Pilularum Aloëphanginarum drach. ii. Laudani opii drach. semis.* has pilulas compertas prædicat ETTMULLERUS in *Comment. ad Schræderum* in paroxysmo colico, in quo sedando vim eis magnam tribuit STOCKERUS. *Dn. Præf.* aliquot experimentis in doloribus dentium mirabiles eas deprehendit, talem autem correctionem earum fecit *R. Extracti Massæ Pilularum Aloëphanginarum scr. i. Extracti opii, camphoræ, ana gr. j. M. pro j. dosi.* Famosæ pilulæ WILDEGANSI recensendæ quoque sunt & sic se habent: *R. opii depurati unc. ij. corallii rubri ppt. croci, trochiscorum de vipera, myrrhæ electæ, aloes socotrinæ ana. drach. ij. auri fulminantis drach. j. olei caryophyllorum gtt. XX. f. l. a pil. ex drachma j. 90. obduc. auro.* Notabile hoc loco est, has pilulas præter virtutem anodynam, simul etiam diaphoreticam possidere: observatione enim compertum habemus, opium cum purgantibus mixtum non modo sedare tumultuarios motus, sed & alvum, sudorem, imo urinam, pro ratione circumstantiarum, ducere. Monenda etiam adhuc quædam restant circa pilulas MATTHIÆ s. STARCKII, de quibus extat peculiaris liber Belgico idiomate conscriptus: Conficiuntur autem seq. modo: *R. Extracti opii unc. semis, Spiritus terebinthinæ cum sale tartari diligenti tritura in saponiformem substantiam mutati drach. j. Extracti hellebori nigri drach. ij. extracti glyzyrrh. drach. iij.* Novissima compositio recipit etiam pulveris hellebori albi drach. j. & ultra, hæc invicem accurate primo tritu, postea in digestionem leniorem ac diuturniorem conjunguntur ac miscentur: ita evadit massa quæ provide ad certa grana exhibita, morborum, præsertim chronicorum, indicationibus exacte satisfacit, crebrioribus vicibus eam adhibuit sæpius laudatus *Excellentissimus Dn. Præses*, & expertus inde est, quod non modo alvum apertam simul servaverint, sed & torpor capitis, vertigo, somnolentia, quæ alias opiatorum usum subsequi solent, plane non fuerint animadversa. *Celeberrimus ETTMULLERUS in diss. de virt. opii diaph.* scribit de iis, ipsas, crebriori ex-

perientia confirmatas, plus in recessu habere, quam ut obiter a WILLISIO in *pharm. rat. P. I. Sect. VII. cap. 3.* ad Empiricorum remedia sint referendæ.

§. XV.

Præterea, opiata medicamenta, tam liquida, quam solida, pro variis indicationibus, varioque scopo, & morborum circumstantiis, cum aliis quoque remediis percommode possunt remisceri. Ita in affectibus hystericis-spasmodicis laudanum liquidum opportunissime cum essentia castorei, croci, succini & spiritu salis ammoniaci propinatum, optatissimam fert opem, una cum linimentis anodynis atque carminativis; in epilepticis & convulsivis pathematibus, cum essentia moschi, ambra, castorei, succini, spiritu salis ammoniaci, summo cum fructu & effectu administratur; in doloribus atrocissimis calculi non semel, sed pluribus vicibus anodyna expertus est probatissima *Excell. Dn. Præses.* Matrona hujus loci honesta quæ 56. annum jam superavit, tribus vicibus, singulis fere annis infestata fuit gravissimis doloribus ex calculo renum, quibus urinæ suppressio, convulsiones, visus & sensuum imminutio accesserunt, unicum & certissimum solamen experta est a clysteribus oleosis, & a medicamento quod constabat ex tinctura tartari, laudano liquido, essentia castorei & essentia croci ana mixtis: post aliquot hujus remedii successive administratas doses mitigata fuerunt symptoma & calculos successive excrevit. Cæterum ad somnum placidum conciliandum in iis qui vigiliis & laboribus debilitati fuerunt, laudanum liquidum, seu Sydenhamii, seu Jones, cum elæosacharo cinnamomi, cortice citri, ambra, moscho mixtum, quod etiam ad effectum aphrodisiacum simile vix reperiet, erit effectus præsentissimi.

§. XVI.

Ultimo loco pernecessarium erit quasdam, circa opiatorum usum, subnectere cautelas. Non negari potest, in foro medico graviores & frequentiores non committi errores, quam cum dictis his remediis: hinc si in ullo administrando remediorum genere cautione opus est, profecto valet in opiatis. Primo enim deprehendimus, nonnulla individua plane contrariari & adversari medicamentis ex opio, ita ut tam in statu sano, quam ægroto, etiam in minima dosi, ipsa ferre nequeant, sed mox gravativi ventriculi dolores, diaphragmatis compressiones, animi defectiones, debilitates, torpor, extremorum perfrigerationes inde sequantur. Etenim in eo peculiare quid habent ipsæ non modo nationes, sed & temperamenta & ætates, ut non quodvis medicamentum, neque alimentum æque bene ferre possint. Probe scribit BORRICHIVS *l. c. Nostratum corporibus, quæ pituitosi frequentius sunt habitus, statim insidiatur, nisi agas circumspiciatissime.* Populi ad Orientem, item Afri, ferent longe facilius; imo Germanos videas non raro minus inde periclitari, quam nostros. Quam ob causam verissime ait HIPPOCRATES: natura a natura differt, corpus a corpore: unde prudentiæ Medici est, singulares individuorum habitudines probe scrutari. Secundo, ad hanc sedantium & sistentium usum non facile deveniendum est, nisi necessitas postulat, & enormes, & excessivæ commotiones spirituum periculum virium & vitæ minitentur. Tertio, perpetua hæc esse debet regula: si compescere nimios motus lenioribus, v. g. nitrosis, acidulis, emulsionibus seminis papaveris & aliis ex papavere paratis possumus, neutiquam ad opiata, multo minus ad narcotica esse confugiendum: Adeoque valet ibi vetustissimus & verissimus canon C. CELSI: non de-

veniendum ad validiora remedia, si imbecilliora sufficiunt. *Quarto*, in motibus criticis, quales sunt omnis generis febres, in quibus natura, secundum Veteres, siue sapientissimum structuræ humanæ artificium, motu intensiori secludere vel corrigere nititur peccantem materiam, cautissime cum opiatis mercandum est: & rarius, nisi in principio, nunquam autem circa statum & tempus criseos, exhibenda sunt. Sæpius accidit, ut variolarum, morbillarum, purpuræ, erysipelatis materia maximos tumultus efficiat, nec egredi velit, ubi experientia id confirmante, non tantum acidulæ & nitrosæ, sed & papaveracea & leniora opiata efficacissimam produnt virtutem. *Quinto* in omnibus malignis morbis, ubi malignitas intra sanguinem ex pravo sanguinis & humorum vitio, nascitur atque concipitur, nunquam hæc ipsa felicem fuisse finem consequuta, a Practicis notatum fuit. *Sexto* in gravioribus inflammationibus, præsertim peripneumonia, gangræna partium, inflammatione hepatis, securissime abstinemus ab opiatis, nec non in omnibus subjectis ubi status sanguinis & humorum plethoricus & cacochymicus adest. *Septimo*, in affectibus quoque cerebri & nervorum frigidis, affectibus chronicis, hydrope, asthma, eorum usus plane sit interdictus.

§. XVII.

Usum autem egregium inveniunt, ipsa experientia, ad quam confugimus, teste, in nimis doloribus, & gravissimis inde nascentibus symptomatibus, quæ ex læsionibus, nervorum distorsionibus, tendinosarum partium fauciationibus, vulnerationibus, ambustionibus, exulcerationibus, adeoque a causa externa proveniunt. *Secundo* in excessivis colicæ & calculi doloribus, dentium dolore, dentitione difficili, otalgia, gravibus rheumatismis, prudenter associata sudoriferis, vel purgantibus, egregium usum habent. *Tertio*, in ferina & sicca tussi, falsis defluxionibus, hæmoptysi, vomitu enormi, diarrhœa, dysenteria, dolore hæmorrhoidum, doloribus iliaceis promittunt insignem efficaciam, aliis tamen non neglectis. Sed quoniam egregie hac re defunctus est, *Laudatissimus* OLAUS BORRICHIVS in *Tr. de somno & somnif.* ubi solide & practice genuinum opiatorum usum & abusum tradit, hinc Lectorem Benevolum eo remittimus, cum nullum sciamus, qui cum meliori judicio & experientia hac de re scripserit.



DISSERTATIO MEDICO - CHIRURGICA

D E

Ἰ Σ Χ Α Ι Μ Ο Ι Σ

Seu

SANGUINEM SISTENTIBUS,

Primum edita Anno 1698.

§. I.



U M non omnino Doctores de significato vocis, quam frons disputationis gerit, inter se conveniant, ante omnia vera ejus enucleanda est acceptio, quo posthac differentiarum, modique agendi sic nuncupatorum remedium, fisci sine offendiculo valeant. Nam ἰσχαίμα, juxta lexicon Castelli-Brunonianum, sunt illa tantum remedia, quæ sanguinem præter naturam fluentem vi caustica & escharotica sistunt; tali enim in sensu, Fautores hujus opinionis, nomen hoc GALENUM usurpassè perhibent; ideo quod omnes formulæ ab ipso sub hoc titulo exhibitæ, ex urentibus, & crustam inducentibus constent. Sed hi nimis omnino angustis ἰσχαίμα videntur includere cancellis, cum equidem caustica & escharotica sub illis, tanquam species sub genere comprehendantur, minime tamen sola sunt, quæ arceant fluxum sanguinis, obicemque ponant moto extra sua pomeria cruori, quin plura longè, eaque penitus ab his diversa, huic intentioni inservientia insuper dentur.

Hinc rectius a MOEBIO *Epitom. Institut. med. c. 34.* omnia refrigerantia, incrassantia, congelantia, adstringentia & narcotica per ἰσχαίμα intelliguntur, imo & plura adhuc alia ab his distincta quoque remedia summo jure isto ornantur titulo; Et quid multa, cum vox a græco verbo ἰσχω, quod cohibeo significat, & αἷμα, hoc est sanguis, descendat, universa sanguinem sistentia, quæ germanice Blutstillungen / Blutstillende = Mittel / audiunt, mihi cum *Clar. WEDELIO in Amæn. m. m. lib. 2. sect. 2. c. 19.* & aliis viris doctis hoc nomine veniunt.

§. II.

Ex hisce adeoque constat, unico hoc sub titulo multifaria comprehendere remedium genera, quorum omnium tamen effectus semper in id collimat, ut præter naturam stillantem è corpore sanguinem inhibeant, sistant, ac suppriment. Quo vero id ipsum præstent modo, & quibus gaudeant nominibus, vix commodius tradi poterit, nisi fluxus hujus sanguinis causæ ad examinis incudem prius vocentur, ac quodammodo hæmorrhagiarum exponatur ætiologia.

§. III.

§. III.

Proinde scire est, sanguinem extra suos à natura concessos limites ferri nunquam, nisi vis quædam, vel vasa ipsum detinentia, vel partes aperiat illas, quibus ex arteriis fluens ante instillatur, quam a venis suscipitur. Ist hæc vero vasorum præternaturalis apertura, communi antiquorum sententia, modis fit tribus: (1) per ἀνασφύζουσιν, hoc est, notabilem vasorum quoad ostia, seu extremitates refertionem: (2) per διαίρειν, sive solutam vasorum unitatem, quam ab erosione ortam, διαίρωσιν dicebant, & πύξιν vel πύσιν, si externum rumpens vel secans in culpa fuerit: & (3) per διατηνέουσιν, nempe transfusionem per parietes vasorum extenuatos & rarefactos, quæ tamen omnium rarissime, imò vix unquam observatur, cum potius, si quandoque obex sanguinis circulationi positus animadvertatur, serum tantummodo tenue & limpidum, minime vero sanguis ipse tunicas ipsorum transfudare cernatur, quod ipsum eleganti experimento docet LOWER Tr. de Corde, cap. 2. pag. 124.

§. IV.

Causæ ἀνασφύζουσιν producentes, quæque intra corpus unice hærent, vel mole sua nimirum vasa distendendo, vel relaxando saltem, ostia & extremitates solvunt: Priori occasionem dat potissimum sanguis abundans, præsertim, quando in impetuofum motum & orgasmum concitatur, per affectus animi, motum corporis violentum, spirituofam diætam, balnea, medicamenta sudorifera, calida, volatilia oleosa, purgantia drastica; in partes enim cum impetu delatus, quoniam non liberè per venas reflueri potest, ibi stagnat, & distensione ora vasorum aperit, & qua data porta erumpit. Nec minor inest vis cruori, si remeare saltem ab extremitatibus nesciat, à quodam obstaculo impeditus. Unde hypochondriaci, hydropici, cachectici, & qui gravioribus viscerum obstructionibus, & inflammationibus tentantur, aut contusionibus affecti sunt gravioribus, enormes & frequentius recurrentes patiuntur hæmorrhagias. Ferè enim semper hæmorrhagia, orta à causa interna, ex motu sanguinis liberiori impedito derivanda est; quando enim obice in parte posito, sanguis minus commode redire atque transfluere potest, regurgitat in partes patentes, quas accedente impetu sanguinis, à tergo tandem p. n. aperit, non secus ac in hydraulicis, obstructo uno canale, impetus aquæ in apertos abit, quos vi interdum perumpit; Qua de re, tanquam ex professo tractata, videri potest disputatio *Excellentissimi Dn. Præsidis de Hæmorrhagiis*. Relaxationi vero ostiorum in vasis sanguiferis inservit dyscrasia cruoris serosa, quæ in subjectis cacochymia, catarrho & hydropè laborantibus, item, hyemali tempore, ubi transpiratio à frigore externo, corporis peripheriam circumambiente, impeditur, sola sæpenumero efficit, ut hæmorrhagiæ ejusmodi enascantur.

§. V.

Sic quod διαπύρειν concernit causas, illæ parili ratione haud raro in corpore latitant, frequentius tamen ab extra advenientes deprehenduntur. Conveniunt vero ambæ in eo, quod discerpatur ab ipsis, ac scindatur partium sanguinem continentium unitas. Nam dum, v. g. æger scorbuticus, vel variolis, aliove morbo, qui sanguinem acrem pro causa agnoscit, correptus, hæmorrhagiam patitur, id non tantum impetuofæ sanguinis commotioni, sed & aculeatis, ac rodentibus salium spiculis, tyrannidem

suam in vasorum parietes exercentibus, eosque tandem scindentibus, in acceptis ferendum est. Quod clarius adhuc, ex fluxu sanguinis præternaturali patet in ulceribus, utpote, in quibus rodens talis acrimonia magis in aprico posita est. Omnium vero evidentissima ex his causis est unitatis solutio, per vulnerantia exterius illata, utpote, quorum effectus nunquam non in sensus incurrere solet.

§. VI.

Cum itaque non solum primariæ hæmorrhagiarum causæ, sed magis adhuc remotæ adeo discrepent, patet clarissime, pro harum circumstantiarum diversitate, judiciosum semper selectum esse faciendum inter hæc sanguinem sistentia, dum huic vel illi individuo, hæc vel illa ex causâ hæmorrhagiæ laboranti, ea cum fructu applicare conamur. Quare non inutilem me suscepturum laborem confido, si in certis capitibus ea nunc sistam, prout scilicet, singulis, nunc remotis, nunc proximis causis aptè observantur.

§. VII.

Ergo inter ῥοχαψία, in fluxu sanguinis ex plethorâ nato, primum merebitur locum Venæ Sectio; quod maxime valet in illis, qui sanguinei sic dicti sunt, item qui venas sanguine tumentes habent, multum comedunt, & parum moventur, quibus solennes evacuationes sanguinis, mensium in fœminis, hæmorrhoidum in senibus, narium in juvenibus, suppressæ fuerint, aut assueta sectio venæ intermissa. Nullum enim remedium magis adæquatum abundantem tollendi in corpore sanguinem hac ipsa reperitur, quicquid etiam contradixerint adversarii ex antiquis pariter ac recentioribus. Etenim, ut plurimum in momento, & dum adhuc salit è tussa vena cruor, rivulum, vel è naribus, vel alia quacunque ex parte manantem ficcari observamus. Confer. JACOB. HOLLERIUM in *Comment. ad Aphorism. Hippoc. Sect. 5. Aph. 50.* ROLFINGIUM in *Consil. Med. Consult. 2. Lib. 3. p. 339.* Opus vero est, ut non exigua, h. e. unius uncix forsan, aut duarum, aut trium ad summum, sed quantitati sanguinis superfluxæ respondens copia detrahatur. Alias, si effectus haud sequatur desideratus, tuæ id habeas timiditati. Nolo tamen eapropter cum CAPIVACCIO, citante PETRÆO in *Nosolog. Harmon. Lib. I. Dissert. harmonicarum 12. p. 229.* missionem humoris hujus laudabilis ad animi deliquium usque commendare, cum periculosum simulque crudele hoc mihi videatur consilium. Potius satis puto, si uncix octo & in robusto ac firmiori subjecto libra j. educatur. Et quamvis hoc ipsum pondus nimium videatur quibusdam, eapropter suadentibus, ut non uno actu, sed partitis vicibus sanguis proliciatur superfluus: vid. præ reliquis RIVERIUS in *Prax. Tom. 2. cap. de Hæmorrhag. & in observationibus Cent. I. obs. 2.* minime tamen ipsis subscribere possum, cum adeo multum intersit, ut, quantocyus fieri potest, cohibeatur hæmorrhagia. Vereor itaque, ne opportunitatis tempora haud prudenter prætermittant, ægrisque eo ipso male consulant, qui per plures ambages attingere scopum annuntunt, quem recta via, h. e. unica Venæ sectione, cito, tuto & jucunde obtinere valent. Conf. GALENUS lib. de curandi ratione per sanguinis missionem. Cap. II.

§. VIII.

Venæ sectioni hoc in casu, à non paucis medicis, substituuntur scarificationes & hirudines, cum RHODIO in *Observ. Cent. 3. obs. 71.* utpote, quorum ope non minus imminui posse abundantem sanguinem

nem credunt. Nihilominus, nisi extrema urgente necessitate ea usurpare cogamur in huiusmodi subiectis, quæ ex naturali quodam vitio, aut summa pusillanimitate reformidant venæsectionem, non facile ista suaferim, cum scarificatio cum cucurbitulis, monente WALLÆO in *Method. medendi* p. 209. minus amicum, sed magno cum dolore conjunctum sit remedium; sine cucurbitulis vero celebrata, nimis parce semper detrahat sanguinem, si non corporis exæstuatio præcedat, aut in conclavi probe calefacto ea administretur, quod utrumque tamen, durante hæmorrhagia, haud invenit locum. Taceam, non tam pro universali, quam particulari sanguinis evacuatione, quæ tamen in præsentī casu nullius est usus, illam inservire, ut recte jam citatus WALLÆUS l. c. p. 191. quoque monuit. Quod hirudines vero attinet, præterquam, quod sæpe frustra in illorum applicatione laboret Chirurgus, aut saltem terat longum tempus cum summo ægrotantium tædio, antequam cuti adhærescant, sanguinemque fugant, nec illæ universaliter & sufficienter evacuant, quod tamen absolute ad imminuendam sanguinis copiam requiritur.

§. IX.

Manet igitur inter ἰσχυμῶς, pro tollenda hæmorrhagia, quam plethora gignit, palma venæsectionem, imo manet quoque, si ab infarctu sanguinis ea exsurgat. Id notetur solum: non promiscue licere quamcunque venam tunderè, quod integrum erat in plethora, sed si fieri potest, vas inter locum affectum & extrema corporis, à quibus fluit sanguis, positum, pro scopo derivatorio, & in aliis remotioribus adhuc locis, pro revulsorio secare conveniet; e. g. in hæmorrhagia narium, aut hæmoptysi vena aperiatur in pede; in mensium nimio, aut hæmorrhoidum fluxu, vena manus; De quo venarum selectu videri potest ex antiquis GALENUS *supra citato lib. c. 14.* TRALLIANUS l. 2. c. 5. l. 7. c. 1. ZACUTUS LUSITANUS *Prax. lib. ult. Num. 4. de Hæmorrhagia*, & ex recentioribus HIGHMORUS *disquisitionum Anatom. Part. 2. c. 11.* SPIGELIUS *de humani corporis fabrica l. 5. c. 7.* SENNERTUS in *Prax. lib. 4. Part. 2. Sect. 2. c. 6. in Paralipom. ad Institut. c. 23. p. 92.* SCHLEGELIUS in peculiari dissertatione, *de saluberrimo venarum in corpore humano secandarum selectu*; BAYLE *Problem. Physic. Med. 10.*

§. X.

Hujus intentionis gratia etiam non male, si venam aperire displicet, talia exhibentur remedia, quæ fluores sanguinis sustinere in aliis locis ad tempus, eoque ipso obstructions referare præsentēs valent, ex quibus ut experta ab AVICENNA *lib. 3. Fen. 10. Tr. 3. c. 6.* laudantur cucurbitæ siccae non minus quam ligaturæ & frictiones artuum dolorosæ. De cucurbitis siccis plurima Autorum adsunt testimonia, instar omnium sint HIPPOCRATES l. 5. *Aphor. 50.* & GALENUS in *Comm. in hunc locum* & c. 5. *meth. &c.* In ipsis vero adhibendis sequentes cautelæ commendantur, scilicet, ut ventosæ magnæ cum magna applicentur flamma, quo felicius suspendere, & retinere sanguinem possint. Ratione autem loci variant, pro morborum varietate. Jubent enim applicare mammis, aut immediate infra ipsas, in regione dorsi ad scapulas, in brachiis, supra hepar, in nucha, hypochondriis, lumbis, natibus, pedibus &c. de quibus videantur præter citatum HIPPOCRATEM & GALENUM, SENNERT. *Pr. lib. 4. Sect. 2. c. 6.* RIVERIUM *Prax. cap. de hæmorrhag.* WINCKLERUS in *Ephemerid. Germ. Dec. I. A. 76. Obs. 90.* FORESTUS l. 13. *Obs. 14.* Cavendum tamen,

ne hepatis regioni nimis importune imponantur, ob metuendam inflammationem, qualem ex hac causa commemorat FABR. HILDANUS *observ. Chirurg. Cent. 2. obs. 47.* qui ea de causa locum, summe ab antiquis ex falsa opinione præconcepta adeo commendatum, penitus rejicit, atque damnat.

§. XI.

Quoad ligaturas, eas pariter laudibus egregie extulit HIPPOCRATES *Lib. 2. Sect. 5.* morbis mulierum, jubens: ut laquei supra genua & cubitos, in nimio mensium & lochiorum fluxu stringantur, cui subscribit GALENUS *lib. ad Glaucon. c. 14.* AETIUS *de re medica l. 14. c. 25.* PAULUS ÆGINETA l. 3. c. 63. AVICENNA in *cap. de Ligaturis.* ZACUTUS LUSITANUS *Prax. Histor. Lib. 3. c. 11.* FONSECA *Tom. I. Consult. 55. &c.* damnarunt e contra illas ASCLEPIADES, citante SCRIBONIO LARGO, *vid. AUGENII FERRERII Castigationes c. 27. & ALEXAND. BENNETI Theatrum Tabidorum, Exerc. 26.* Veruntamen, si modo partium ligatarum & ipsius ligaturæ habeatur ratio, non penitus improbari debent; Nam, quis non intelligit, fortius brachia cruraque posse stringi, quam testiculos, aut digitum minimum quos ligare jubet RONDELETIUS *method. curand. morbos. c. 63. p. 281.* CRATO in *Consil. l. 5. Conf. 7.* HILDANUS *obs. Cent. 2. obs. 15. p. 91.* Deinde observe-tur, ne fasciæ nimis diu locis his injectæ relinquantur, ob metuendam gangrænam & sphacelum, qui ex nimia sanguinis stagnatione facile nasci potest, quod rectissime monet ZYPÆUS in *Fundam. medic. physic. anatom. Artic. XI. p. 377.*

§. XII.

Et sic de frictionibus partium dolorosis quoque dissentientes observo medicos. Laudat illas egregie citatus modo BENNETUS c. 1. referens: Ligaturis omnibus in cassum adhibitis, semper se proficuas deprehendisse eas, imprimis in narium hæmorrhagiis, vomituque cruento, sed contrarium statuit TIMÆUS von GULDENTLEE *Casuum medicin. Lib. 1. C. 34. & GUILLIELM. FABRICIUS Cent. 2. obs. 15.* ex hac ratione, quod ab ipsis, si asperæ & duriores fuerint, massa sanguinea incalescat, hincque subtilior, fluidiorque reddita, ad excretionem magis disponatur. Ast, modo moniti AVICENNÆ *Lib. 3. Fen. 3. Tr. 3. c. 6. & SENNERTI, quod legitur in Pr. lib. 1. D. 3. Sect. 4. c. 8.* haud simus immemores, hoc est, ut frictio fiat deorsum versus extremitates, tam in pedibus, quam brachiis, utique & ab illis hæmorrhagiam sisti posse extra omnem positum est controversiam. Ante omnia illud meretur attendi, quando in superiori corporis regione est hæmorrhagia, frictio in inferiori, & vice versa, quando in inferiori, in superiori instituatur; frictione enim laxatur habitus corporis porosus, unde major sanguinis copia ad hunc affluit, quam antea, itaque decedit quodammodo impetus & decubitus ad partem affectam. Eadem est ratio: quare pediluvia, si è naribus fortius erumpit sanguis, conveniunt, quando autem ex utero, vel ani venis nimium profluit, immisiones manuum in aquam vel vinum calidum præsentissimam opem ferunt.

§. XIII.

Sed missis his, progredior ad ἰσχυμῶς, cum spuria sic dicta plethora, seu orgasmus sanguinis ad hæmorrhagias magis disponit; ubi apparatus omnino se nobis iterum offert multifarius. Equidem in quamplurimis evacuantia & derivantia modo adducta locum quoque inveniunt, adeo ut vel præmittere, vel mox nominandis fociare illa sæpius cogamur.

mur. Quandoquidem vero ea sola non omnem in cura absolvunt paginam, sed juvant tantummodo palliative, ad tempus scilicet deplendo vasa nimium turgida; igitur ad novas hujusmodi impediundas recidivas, causamque mali penitus removendam, opus erit insuper in tali orgasmo sanguinis scorbutico adhibere temperantia & inviscantia, quæ sua glutinosa & viscosa substantia, dum involvunt salia, scorbuti causam ad actionem ulteriorem, h. e. tam vellicationem partium sensatarum, quam fibrosarum in sanguine resolutionem ea reddunt inepta. Qua propter huic intentioni inservire observant præ aliis alimenta medicamentosa, uti sunt lac, farina triticea, amyllum, oryza, pineæ, amygdalæ dulces, castaneæ, semina quatuor frigida majora, albumen & vitellus ovorum, butyrum ac caseus recens cum carnis animalium juniorum ac pedibus & capitibus illorum, de quibus videatur RIVERII *Pr. Med. Tom. II. Sect. III. c. 7. p. 136.* SENNERTI *Institut. Part. I. Cap. 6. p. 829.* Addi his insuper possunt gummata minus acria: ceraforum, tragacantha, colophonium, mastiche, bdellium, quæ JACOBUS FONTANUS in *Praxi Medica lib. I. c. 32.* & VELSCHIIUS *Mistomim. p. 11.* laudibus ornare non veriti sunt. Præ cunctis tamen PROSPERO ALPINO de *plantis Ægyptiacis p. 5.* gummi arabicum, utpote cujus ope hæmorrhagiam quamvis ab incolis sanari perhibet, summis extollitur præconiis, non secus ac sperma ranarum vere collectum ac siccatum, postmodumque ad castaneæ magnitudinem exhibitum, de quo vid. JOH. LANGII *Epist. p. 834.* majora vero adhuc de isthoc spermate ranarum ejusque aliquamdiu continuato usu, nimirum quod habeat facultatem ita condensandi sanguinem, ut per decem imo viginti annorum spatium licet graviter interea vulneretur homo, nil quicquam effluere possit, pollicetur PARACELSUS; quæ tamen veritati consona mihi haud videntur.

§. XIV.

Efficaciora his inviscantibus à non paucis Medicorum in sanguinis scorbutici fluxu coercendo statuunt acida adstringentia; quippe quæ partibus suis gravioribus angulosis, ad motum non tam promptis, sulphureas volatiles tenuissimas sanguinis figunt & in motu sistunt: Cum enim viderent Practici, à vino, spiritu vini, aliisque similibus causis, æstuantem cruorem posse compesci, cum phlogosi, talismodique symptomatibus ex ea enatis v. g. per crystallos, aut cremorem tartari, vel spiritum salis dulcem, aut julepum acidulum; acida quoque in summa hac sanguinis turgescencia ac ebullitione, à qua & ipsa sanguifera rumpuntur vasa, ægris propinare didicerunt. Ex vegetabili igitur regno celebrantur HILDANO *Obs. Chirurg. p. 91. & 92.* citri succus, vel qui ex fructibus ribium, berberum ac granatorum obtinetur aut acetum factaque cum ipso acetaria. Ex minerali spiritus acidi, salis, nitri, vitrioli, clyffus mineralis &c. vel solitarii vel cum tinctura violarum ad imitationem WEDELII in *Ephem. meridibus Germ. D-cur. I. A. 3. obs. 106.* aut cum essentia opii tantillo, quod remedium maximo cum fructu ab *Excell. Dn. D. LANGIO, Lipsiensi Practico celeberrimo, Præceptore meo æternum devenerando*, pluribus exhibitum fuisse ægris memini.

§. XV.

De adstringentibus plura adhuc, universus pene tam empiricorum, quam rationalium medicorum chorus sibi promittit, hinc sexcenta hujus generis euporista plenis decantant buccis. Nominasse ex his

sufficiet, radices bistortæ, tormentillæ, pimpinellæ, sanguisorbæ, pseudoireos palustris, symphyti majoris, cortex granatorum, folia myrthi, quercus, cupressi, urticæ, burfæ pastoris, plantaginis, millefolii, muscum terrestre, tegularum ac calvaria, qui usineæ titulo alias venit: flores balaustiorum, rosarum, malvæ arboreæ, gallas, sumach, cupressi nucem, sanguinem draconis, corallia, terram sigillatam, bolum, alumen, terram vitrioli dulcem, vitriolum martis ad rubedinem calcinatum, crocum martis adstringentem, hæmatitem, saccharum saturni, liquorem martialem, tincturam hæmatitis terræ catechu, traumaticam Wedelii &c. plura desiderans adeat SENNERTI *Institutiones Medicas p. m. 820.* RIVERII *Cent. II. obs. 32.* MOEBII *epitomen Institut. Medicin. p. 603.* compositorum vero major adhuc, imo infinitus plane datur numerus, sub titulis syruporum, confectionum, tincturarum, essentiarum &c. imo nec excrementa animalium in usum vocare veriti sunt. Stercus puta asininum & suillum, quæ sub forma pulveris, syrupi aliaque propinant, conf. RODERICUS A CASTRO de *morbis mulierum l. I. c. 5.* ZACUTUS LUSITANUS *Pr. histor. lib. ultimo. c. 2. p. 638.* HILDANUS *Cent. V. obs. 73. p. m. 615.* WEDELII *Amœnit. mat. Med. lib. 2. Sect. 2. c. 19. p. 507.* Ast si fateri velimus, quod res est, plane infida atque infecura sunt; testatur enim experientia, majorem illis narium fieri fluxum, præsertim, si ex obstructione viscerum, ex spasmo partis nobilioris malum oriatur, item, si in principio ante debitam venæ sectionem, vel purgationem, aut obstructionum liberationem assumuntur: juvant, si exortus sit ex fero tenui incrassando sanguinem, & tenorem vasis nimium relaxatis foenerando.

§. XVI.

Placent igitur magis refrigerantia, quorum sub nomine ingens ab Autoribus, ex adstringentium, acidorum, & sedativorum catalogo, communiter refertur numerus; quæ tamen hic minime, ut intelligentur, intendo, cum sermo mihi tantum sit, de frigidis acta, & per se facultate tale præditis. Talia autem sunt: balnea aquæ frigida, de quibus vid. GALENUS *5. meth. c. 13.* HILDANUS *centur. 2. obs. 17. cent. 3. obs. 2.* Aqua frigida naribus attracta, aut imperialis prius aquæ frigida immersus fronti cum fasciis alligatus, vel glaciei frustum (quod rustici cujusdam est experimentum) hyemali tempore capiti, ad futuram coronalem impositum, vel oxycratum, aut succus plantaginis cum linteo manibus, spinæ dorsi, & regioni renum admotum, item hæmatitis, vel crystallo frustra majora, aut jaspis vel carneolus manibus & sub axillis detentus; tandem si ranæ vivæ plantis pedum apponantur &c. quorum omnium successum referunt exoptatum: HIPPOCRATES *V. Aph. 23. VII. Aph. 37.* RIVERIUS *Prax. Tom. 2. p. 132.* FONTANUS *Pr. pag. 170.* HILDANUS *cent. 6. observat. 13. Ephem. German. Dec. II. A. 10. obs. 136.* FRANCISC. REDI in *Experiment. circa liquorem stypticum factis à Caspar. Bartholino in Exercit. misc. 7. pag. 129. 103.* WEDELIUS in *Amœn. m. med. loco sæpius citato.* BORELLUS *centur. 4. obs. 7.* KOZAK *Tract. de hæmorrhagia lib. 2. c. 12. p. 688.* LANGIUS *lib. 3. Epist. 1. p. 941.* BOETIUS DE BOOT *lib. 2. de gemmis & lapidibus c. 102.* PARACELSUS in *chirurg. magn. lib. 1. T. 2. c. 10. &c.* Modum operandi horum remediorum si quæris, admodum probabile est, compesci hæmorrhagias, dum ab his frigidis partes cutaneæ sensiles spasmodicæ constriunguntur, simulque cum iis interiores in consensum rapiuntur, eoque ipso vasis sanguiferis, hinc & inde coarctatis, effluxus

effluxus sanguinis sufflaminatur, vid. Excellentiss. Præsidis Dissert. de Hæmorrhagiis. §. 17. Circa horum usum tamen illud vulgatum in auribus medici semper resonare debet:

*Est modus in rebus, sunt certi denique fines,
Quos ultra citraque nequit consistere rectum.*

§. XVII.

Pergo, his absolutis, ad alia, quæ tamen rursus alio ex capite commendari debent; nempe, quod in agens vitale, illius motum retardando vim suam exferere videantur. Quo in casu etiam sanguinis motus simul notabiliter infringitur; scilicet, cum extra omnem controversiam positum sit, ab hujus agentis principii, (quod alias spiritus nomine venit) præsentia & motu fluiditatem humorum dependere maximam partem. Primum nunc stupefacientia sisto remedia, quæ sedativa HELMONTIO in operibus p. 498. audiunt, à quibus annotamus, spiritus in suo motu torpidos reddi, & prout loqui quidem amant, ligari. Inter hæc leguntur à RIVERO in sua Praxi Tom. II. Sect. 3. cap. 7. p. 128. aliisque pluribus multum commendari nitrata; sed quoniam non adeo clarum, num jure ista sedativis accenseantur, potius nominabo ex illis hyoscyamum cum papaverinis ac opiatibus, de quibus videantur JAC. FONTANUS lib. I. Pr. c. 32. TIMÆUS A GULDENKLEE l. 4. Cap. 49. GRULINGIUS Cent. 3. Curat. I. HORSTIUS dec. I. Problem. 24. decad. IX. Problem. 2. SCHENCKIUS Observ. l. I. p. 279. HILDANUS observ. Chirurg. 46. p. 556. M. N. C. D. I. A. 4. p. 292. Nihilque interest, seu ea sub forma sicca, cum HORATIO l. 10. Obs. 3. & WEDELIO Amœnit. mat. Med. p. 505. aut laudani liquidi, seu paregorici cum SYDENHAMO, operum p. 161. vel sub titulo diascordii Fracastorii præsertim Amstelodamensium cum SYLVIO Pr. l. 3. c. 3. p. 491. vel Philonii Persici cum MATTHIA DE GRADIBUS Comment. ad c. 35. RHASES ad Almanforem & EPIPHANII FERDINANDI, Hist. med. 33. p. 104. adhibeas, seu solitarie, seu cum adstringentibus terreis, aut acidis propines, id enim circumstantiæ, & subjectorum diversæ conditiones facile peritum docebunt Practicum. Necessum tamen semper erit, vires ægrorum observes, & ad illas dosin remedii sedativi vel augeas, vel imminuas, cum nunquam, nisi insequente aliquali languore ægrorum, ea operari animadvertamus. Hinc recte PETRÆUS in Nosologia Harm. p. 232. monet; quod summa cum prudentia aut non nisi urgente summa necessitate in usum sint vocanda.

§. XVIII.

Uti vero hæc cuncta vi sua narcotica, habenas spiritibus injiciendo, sanguinem simul sistunt, ita alio tempore vel solis verbis, vel amuletis, aut ore detentis, aliisque ceremoniis ac actionibus eisdem humorum motores coerceri cum sanguine posse observare licet. Non enim carmina Homeriana Odyss. l. 19. descripta, aut illa, quibus recitatis Ulyssis hæmorrhagiam Antolyci liberos fuisse refert LANGIUS epist. 9. p. 705. vel quæ JOB. A MECKEREN obs. med. Chirurg. p. 40. & JOEL. in operibus Medicis Tom. VI. p. 414. ex Cardano commemorat; Aut verba illa tacite mustitata, quorum mentionem facit BORELLUS Cent. I. Obs. 94. aliter egisse credo. Idem judico, dum scilicet jubetur, bufo siccatus, vel muscus arboreus sub axillis geri, vel fanicula, aut fragaria plantis pedum alligari; Radix pseud-melantherii, aut cichorii flore albo in signo virginis collecta, vel lapides carpiorum sub lingua detineri, aut usnea crani humani manibus ad incalescentiam usque comprehendi, vel cingulum ex foliis recentibus hellebori

veri circumjici. confer. CRATO lib. 5. consil. 7. UNZERUS de Peste lib. 3. p. 267. M. N. C. D. I. A. I. obs. 24. & Append. ad Annum 7. p. 144. 154. SENNERTI Prax. lib. 1. Part. 3. sect. 4. c. 8. lib. 4. Part. 2. sect. 2. c. 6. SIMON PAULLI Q. P. B. p. 94. HARTMANNI Prax. chymiat. p. m. 204. Eandem agendi rationem inesse puto, si sanguis fluere cesset a nomine agrotantis in sacro baptismo imposito, fronti literis latinis cum illo stillante inscripto, juxta PETRÆUM in Nosol. Harm. p. 235. aut si ad imitationem AGRICOLÆ in Chirurgia parva Tr. 2. p. 93. & HUNERWOLFII Ephem. German. Dec. 2. A. 8. obs. 19. frons sequentibus signetur literis O. I. P. U. L. U. vel si sanguis effluens supra lignum fraxini certo tempore scissum mittatur, aut araneam vivam, talum leporis, culmen filiginis in crucis formam stratum, cretam, aut pulverem sympatheticum Digby. vid. BORELLI observat. cent. 3. obs. 78. Acta Hassniensium An. 3. obs. 18. Paucis, hæc cuncta phantastice solum agere, hoc est agrotantis imaginationem corroborare, firmiter mihi persuasum habeo, dum scilicet hæc ipsa, ægris ut certa, pluriesque experta, & tantum non infallibilia ab aliis commendantur; inde namque anxii antea, & pene desperabundi exfuscitantur rursus, roburque novum vitali agenti additur: videantur, quæ in specie de pulvere sympathetico sentit PAUL. BARBETTE in Chirurg. Part. 2. lib. 2. c. 7. Horum autem agendi ratio longe mihi videtur probabilior, si quandoque (sæpe enim imo sæpissime fallunt,) effectus sequatur exoptatus, quam si ad satanæ adjumentum, & nescio ad quod pactum cum ipso statim confugiant. Qui vero, quædam ex his appensis, aut manu detentis juvare putant, quod æthereas partes per poros transmittant, quarum ope placido in motu massa sanguinea conservari valeat, illos, ut clarius paululum has, quas se intelligere videri volunt, operandi rationes, eloquantur, rogatos volo, præter nuda enim verba, ut verum fateor, nil ego percipio.

§. XIX.

Pro mea è contra Thesi confirmanda, h. e. ex alia potentiori impressione facta, agens vitale ex voto, una cum sanguine coerceri posse, insuper quoque pugnat terror, ægris ex improvise incursum. Hunc enim turbare dictum agens, nemo, nisi hospes & peregrinus in Physiologia facile negabit. Effectum vero promissis responderè, res jam dudum in vulgus nota est, sive etenim percellas illud clamore insigni, alioque strepitu horrendo, v. g. bombardæ explosione a tergo facta, seu quod vulgi est experimentum, aquæ frigidæ perfusione, aut linteorum aqua, tali immerforum applicatione improvise ad testes, si vir fuerit, & ad mammas si foemina postulet remedium. Præprimis tamen opem affert præsentaneum terror subitaneus gravisque, si imprimis animi deliquium eum sequatur. de quo vid. GALENI 5. Meth. c. 5. RIVERII Prax. p. 128. PANAROLLUS Pentecost. obs. 27.

§. XX.

Satis proinde & nunc dictum de ἰσχυμοῖς sanguinis orgasmo opponendis. Pergo itaque jubente sic ordine ad ea, quibus ex dyscrasia serosa proveniens fluxus inhibendus est. Nam tali in casu sæpe irritato conatu universa huc usque recensita, imprimis tamen coagulantia sanguinem implorari, imo ab eorum usu interdum magis ipsam augeri, palam est. Quid igitur hic consilii? Respondeo: serum ut removeatur superfluum unice allaborandum est. Ergo sanguinem sistunt tunc (1) purgantia, à quibus tamen præeunte SENNERTO Pr. lib. 4. Part. 2. Sect.

Seft. 2. c. 6. commendare malo præ fortioribus mitiora, & quæ, dum virtutes suas exerunt, massam sanguineam minus agitant. Hinc non displicet methodus CÆSALPINI in *Catoptro Artis med. lib. 6. 16.* tradita, qui rhabbari pulverem ad scrupulum unum singulis diebus ante passum, aut drachmam unam semel, aut bis intra septimanam, si inprimis æger debilis fuerit, exhibet. Quod si tamen horum in loco quis hydragoga quondam dicta, e. g. Gummi guttæ, mechoacannam, jalappam &c. substituere velit, non aberrabit facile, modo dosin adhibeat debitam; *Confer. Ephemer. German. Dec. 2. A. 9. obs. 126.* BONETUS in *medicinâ septentrionali lib. 24. c. 32.* Huc quoque faciunt pilulæ Becherianæ, quæ non tantum serum educendò superfluum, sed etiam viscera obstructa referando & postea roborando illorum tonum mirifice a nonnullis practicis tali in casu æstimantur. (2) Inservient huic intentioni diaphoretica terrea, & antimonialia fixa, tam simplicia quam martialia, it. decoctum radicis chinæ, de quibus *vid. SENNERTUS loco ante citato, ZECCHIUS Consult. med. 14. p. 40.* BONETUS in *Med. septentrion. Vol. 2. p. 32.* WEDELIUS in *Amæn. m. m. lib. 2. sect. 2. c. 6. p. 344.* Summa tamen, cum illis utamur, adhibenda erit cautela, ne nimium sanguis commoveatur, quod tamen vix quidem evitari potest. (3) Si spatium cunctandi superfit, fonticuli etiam, & illa ejusmodi pedetentim evacuantia non minus laudem merebuntur. *vid. ZACUTI LUSITANI Pr. admirand. lib. 1. obs. 72. RHODIUS Cent. 1. obs. 35.* His præmissis, si satis abundans serum fuerit educitum, adhibenda quoque sunt inviscantia, §. 13. nominata, aliquamdiu si fieri potest continuanda, non neglectis tamen incrassantibus alimentis, juxta HIPPOCRATEM *lib. V. Aphor. 2. & 3.* RIVERIUM *Pr. I. p. 136.* RONDELETIUM *Method. curandi morbos p. 168.* PETRÆUM in *Nosol. Harmon. p. 233.* ZECCHIUM in *Consult. Med. 4. p. 39. &c.*

§. XXI.

Sed præterquam quod hæc incrassantia seu inviscantia tenues incrassent humores, conveniunt quoque, si acria ac sale caustico prædita salia erodant vasa, ubi illorum substantiam aculeatam obtundunt ac involvunt. Acidum tamen si prævaleat, quod sæpissime contingit, universa antacida, tam terrea v. g. corallia, ipodium, dens Hippopotami, testæ ovorum, lapides cancerorum, ἰσχάμια fiunt. *vid. WEDELIUS Amæn. mat. med. l. c.* ANTONIUS HEYDE *obs. 35. Anatomia Mytuli annex. p. 98.* Idem quoque prædicandum jure de martialibus, vel in substantia, aut aliis sub formulis propinatis, v. g. croco martis, antimonio diaphoretico martiali, tinctura martis Zwelfferi, vel cum succo pomorum paratæ, aqua extinct. fabr. & acidulis. Num verò & mercurialia tuto possint adhiberi, v. g. in hæmoptysi, ex acrimonia venerea, vix asserere possum, vereor potius, ne mercurius pulmones jam læsos magis adhuc lædat, & miseros tales plane suffocet, quæ damna suffitu ejus jam dudum observavit FALLOPIUS *de morbis Gallicis c. 69.*

§. XXII.

Et sic tandem devenio ad ἰσχάμια vulneribus inservientia, quo in casu commendatur præ omnibus topicis a WEDELIO in *Am. m. m. lib. 2. sect. 2. c. 19. p. 511.* Venæ sectio, nec sine ratione; interea enim, dum fluit ex vena aperta sanguis, vasa fauciat, ob imminutum quodammodo ejus egressum se corrugare possunt, quod nunquam contingit, quamdiu sanguis erumpens ora servat distenta. Nihilominus per solam Venæ sectionem non penitus absolvitur cura, sed utique opus habemus insuper, vel vasis fauciatæ, vel simul *Frid. Hoffmanni Oper. Supplem. II.*

sanguini erumpenti convenientiora opponere remedia.

§. XXIII.

Primum ergo dum hiant ora sæpe satis notabiliter, cogitandum erit de remediis, quæ portas has claudant, e quibus, si in aprico fuerit læsio, ita ut per labia vulnerum vasorum dictorum orificia pateant, ea quæ comprimunt margines dictorum ostiorum, obicem sanguini ponere omnium felicissime possunt. Et licet, primo intuitu, ea momentaneum tantummodo afferre auxilium videantur, cum illis remotis, sæpe redeat hæmorrhagia; tamen si diutius ostia sibi approximata teneantur, sponte extremitates vulnerum corrugantur interea. Parum vero refert siue spleniolum tantum super imponas, quod usitatum est in Venæ sectione; seu digito aut pollice vulnus compriminas, quale exemplum VERULAMIUS *Histor. natural. cap. 1. n. 66.* de Principe Guilielmo Auriaco tradit, cujus cruentatio ex vena jugulari dissecta, non nisi pollice adstantis chirurgi per biduum imposito curari poterat. Quod si tamen non suffecerit manus, jubente HORNIO in *Microtechn. §. 14.* feramentis perficiatur labor, qualia itidem commendat SCULTETUS *Tab. 18. §. 55. obs. 96.* suadens ut omnes Chirurghi parata semper habeant talia, quo in fortuitis carpi vulneribus, ubi locus vix aliis relinquitur remediis, succurrere valeant ægris. Ejus tamen in locum alii argenteam monetam, vel, ad imitationem jam citati SCULTETI, nucleum mali perfici suo adhuc lapideo cortice vestitum vel convexam partem corticis durioris nucis juglandis imponunt, & ligatura strictiori muniunt.

§. XXIV.

Jucundiora, imo & tutiora hæc sunt comprimentia deligationibus ostiorum hiantium cum filo fericeo, aut cannabino, de quibus *vid. HILDANUS de Gangræn. & Sphac. c. 19. 1064.* FRID. HOFFMANNUS *Pater. method. med. lib. 1. c. 20.* vix enim dici potest, quantus dolor ex vinculo circumjecto in vasis sanguineis oriatur, quod sæpe in canicidiis vivis animadverti. Deinde & illud incommodum, imo periculum imminet, quod ex ligatura nimis stricta facile scindantur vasa. Pro quibus equidem avertendis HILDANUS *l. c.* jubet, ut filum cera obducatur; Alii ex recentioribus relegimen membranæ, quod Germani Bergament / vocant, prius circumjiciunt vasorum extremitatibus, filoque illi imposito demum ea constringunt. Veruntamen, quamcunque etiam adhibeas enchiresin, laboris tamen & difficultatis plenissima manebit operatio dicta, partim ob sanguinem indefinenter fluentem, qui ostia vasorum continuo subducit Chirurgo; partim ob ipsum constrictionis modum, quod si etiam blanda fuerit illa, sanguinis impetu mox iterum solvitur; si nimis arcta aut fortis, vel vasa penitus scindit, aut summos ad minimum dolores, aliaque gravissima, uti modo dictum, parit symptomata.

§. XXV.

Ea igitur evitare offendicula annisi sunt antiquiores, juxta ac recentiores aliqui, futuras venarum arteriarumque dissectionum præ ligaturis extollentes. Verum quod olim jam adversus hanc chirurgiam urisit GALENUS *lib. 5. Meth. c. 3.* & cum ipso NICOLAUS *Serm. 7. summar. 1. Tr. 4. c. 33.* GOURMELENUS *syntagm. artis chir. pag. 125.* nempe: contraindicare tendinosam vasorum horum texturam id nostrum quoque hic facimus, imprimis, si circulares vasorum horum fibras a recentioribus inventas insuper considerare velimus, utpote nullam plane futuram feren-

tes. Nec dubio huic ZACUTUS LUSITANUS distinguens inter futuras, satisfacit; nam incarnativa illa recentioribus sic dicta, quæ vas cum carne adstante unit, quamque cum GUIDONE futuræ simplici præfert, nil quicquam obtinet. de qua ille, *de Medic. Princip. Lib. 2. Histor. 42.* legi meretur.

§. XXVI.

Quapropter, si ullum ex comprimentibus adhuc remediis approbandum, erunt *ligaturæ fortiores*: vid. JOB A MECKEREN *obser. chirurg. p. 163.* quorsum illud quoque remedium referri debet, Gallis *un Touriquet*, vocatum, cujus mentionem facit NUCKIUS in *Experiment. & operationibus chirurg. p. 99. ac figura IX. eleganter* depingit, quodque sub titulo Torcularis, a MUYS *Praxeos Chirurg. rational. Decad. 5. p. 62.* exprimitur. Commendatur vero hoc vel ideo, quod non tantum ipsa ostia dissectorum vasorum dolorosa, sed truncos simul remotiores, sub cute carneque latitantes stringat. Et licet illo solitarie haud absolvatur cura, attamen interea, dum ejus ope ad aliquod temporis spatium sanguinis fluxus arcetur, Chirurgus datur occasio, alia *ἰσχυρὰ* accersere, & ex voto applicare. Cæterum, quæ supra §. 12. de ligaturis monui, ne scil. diutius quam par est partibus circumjectæ maneant, hic quoque repeti debent.

§. XXVII.

Satis sic vasis fauciatis succurritur, sed dantur & alia nunc commemoranda, quæ sanguini simul effluenti obviam eunt, ipsumque retinent, ac sistunt, e quibus primo nominari debent *Caustica*, eaque tam *actualia*, quam *potentialia*; sub *actualibus* intelligo ferum candens, vel aliud etiam corpus ignitum. de quo apparatu diverso, fusius verba faciens videatur MOEBIUS in *Epitom. Inst. med. de Cauteriis, p. m. 694.* Job. VON HORNE, *Microtech. p. 140.* Applicantur vero talia ipsis, si fieri potest, læsis vasorum extremitatibus, dumque eæ aduruntur, simul corrugari notabiliter, & constringi non solum observantur, verum insuper etiam ignis contactu sanguinis textura egregiè mutatur, dum ejusque fluiditas in coagulum satis crassum abit. Hinc ab HILDANO *obs. chir. p. 1034. 1061. seqq.* SEVERINO in *Chirurg. Efficaci p. 265.* FABRICIO AB AQUAPENDENTE *lib. 2. de vulneribus, p. 88.* MINDERERO *Medicin. militar. p. 319.* remedium hoc omnibus aliis præfertur externis. Ast profecto, hæc ferri candentis admotio res plane horrenda, & abominanda non paucis videtur, hinc vix dici potest quantum metuatur a nostratibus, ut nescio quæ non alia libentius ferant. vid. JAMES YONGE in *Tr. Anglico, cujus titulus, Currus Triumphalis e Terebintho. p. 13. 14.* Deinde non certum est semper remedium *juxta* HORNE *Microtech. p. 137.* Memini enim non ita pridem post pedis gangrænosæ remotionem illud fuisse adhibitum, a cujus applicatione equidem prompte sistebatur cruor, sed toties ac ferrum retrahebatur, ipsa simul eschara, cum novi sanguinis profusione, labi videbatur, adeo, ut tandem Medicus coactus fuerit, cauterium in loco relinquere adusto, fasciisque firmare circumjectis, donec insequentibus diebus sine cruentatione ulteriori se demitteretur.

§. XXVIII.

Seligunt itaque quidam Chirurgorum præ his, *caustica potentialia*, e. g. oleum vitrioli, aquam fortem, aquam regiam, butyrum antimonii, lapidem infernalem, seu lunam causticam, mercurium sublimatum, & mercurium præcipitatum, sandaracham, arsenicum album, sal alcali ex lixivio, pro sapone

nigro, paratum, pluraque hujus generis alia. Nam per hæc summe acria atque mordacia corrugari vasorum fauciatorum ostia, sanguinemque fluidum in instanti condensari, animadverterunt. *confer.* BARTHOLINUS *de Cauteriis*, SEVERINUS *de Efficac. Chirurg. Part. 2. p. 51.* HEURNIUS *lib. 1. med. ad Praxin.* SENNERT. *Institut. med. p. 1191.* alique plures. Habent nihilominus & hæc sua, eaque maxima incommoda, præsertim, si nervosæ & tendinosæ partes simul cum vasis sanguineis dissectæ fuerint. Hæc enim corrosiva, non solum dolorum atrocissimorum, inflammationum, & spasmodorum intolerabilium, verum etiam convulsivorum motuum & plurium præterea gravissimorum symptomatum existunt autores. Imo quædam ex illis plane exitiosa deprehenduntur, quorsum WEDELIUS in *Amæn. m. m. de ἰσχυαίμοις & Tr. de medic. simpl. fac. p. 64.* mercurium sublimatum, arsenicum album & aquam fortem refert, non obstante felici illa observatione, quam de ultimo ex adductis remediis, h. e. aqua forti aurifabrorum, PLATERUS *obs. lib. 3. p. 773.* recenset.

§. XXIX.

Adeoque tantum abest, ut indifferenter ea, ad coercendum sanguinem e vulnere quovis stillantem commendare valeamus, quin potius, cum haud destituamur mitioribus, quibus æque feliciter arctari vasa, possint, quam sanguis condensari, hæc præ illis commendare non dubitamus. Talia vero sunt *adstringentia & vi styptica* prædita: v. g. frustum aluminis, in formam penicilli figuratum, vulnerique intrusum. *confer.* BORELLI *Cent. 4. obs. 50.* vel quod DIEMERBROECK in *suis operibus obs. 62.* laudat: nempe cretam in forma turundæ, foraminibus vasorum patulis immissam. His substituantur ad imitationem RIVERII & HENRIC. AB HEER colcothar seu caput mortuum vitrioli vid. prioris *Prax. c. de Hemorrhagia p. 132.* & posterioris *obs. 23. p. 269.* Alii applicant vitriolum cyprinum gossypio involutum, exoptato pariter effectu. vid. *Ephem. Germ. Dec. 2. A. 3. obs. 120.* Placet aliis argilla fornacum cum aceto mixta. *confer.* JONSTON. *Idea med. lib. V. Tit. 6. c. 2.* SCULTET. *Tab. chir. 29. pag. 11.* Et qui enarraret universa adstringentia hinc inde ab Autoribus insigni numero collecta? Unum tamen, adhuc ut nominem, necessum esse arbitror, fungum nempe Chirurgorum, quem Botanici crepitum lupi, & Germ. *Bovist* communiter salutare amant, cujus frustum vulnere intrusum pene sollemniter satisfacit Chirurgorum intentioni, ita ut nullus eorum ipso non utatur. Omnem tamen ejus virtutem ab atomis adstrictoriis, intus in ipso sub forma pulveris subfusi conclusis, dependere, egregie probat MUYS *Chirurg. rat. Dec. 1. obs. 1.*

§. XXX.

At enim vero, non semper opus est ut sub solida & sicca ejusmodi usurpentur forma, cum etiam sub fluida feliciter suas has virtutes exerant. Provoco ad liquores stypticos ex vitriolo martis & alumine factos, in *Actis Hassniens. Vol. 2. p. 349.* WEBERO *de liquore stypt.* DOLÆO *Encyclop. chirurg. p. 1459.* & in *Cap. de Hemorrhagia Narium* descriptos. Quod si enim solummodo vel cum linteolis, aut bombace imponantur, vel, si profundiora fuerint vulnera, cum siphone injiciantur, stabit sanguis sæpe in momento. Eiusdem virtutis & alii occurrunt liquores, v. g. STISSERI in *Actis Laborator. Chym. Part. 3. c. 1. descript.* ex solutione aluminis, supra limaturam martis digesta, constantes; aut qui ex aqua plantaginis & saccharo saturni, vel ex aliis adstringentibus, aut spiritibus acidis componuntur, de quibus tamen brevitati

vitati studens nil ulterius addo. Minime tamen sicco pede præterire possum, tria ista sanguinem egregie sistentia, quorum primum est, oleum caryophyllorum ab HARTMANNO in *Prax. chymiatr. p. m. 96.* admodum commendatum. Alterum debemus Excell. D. BOHNIO P. P. *Lipsiensium gravissimo, Patrono & Præceptoris meo multis nominibus devenerando*, qui spiritum vini rectificatum æque feliciter, ac quemvis alium liquorem stypticum, sanguinem sistere observavit, prout id docet in *Actis Erudit. Lipsiens. An. 83. mens. April. & in Programmate publico in Licentiaturam Henisii scripto.* Tertium suppeditat JAMES YONGE in *Curru Triumphal. a Terebintho à p. 40. ad finem usque*, scil. oleum Terebinthinæ, quod universis palmam videtur reddere dubiam, non solum ex prompta sanguinis coagulatione, sed etiam, quod non adeo infensum partibus tendinosis, aliisque se sistat.

§. XXXI.

Restant adhuc ex topicis *ἰσχυραῖς* glutinosa, s. *emplastica & obturantia.* Ad priora refertur Gluten vulgare in aqua solutum, ac vulneribus instillatum, quod vulgi est experimentum. it. farina volatica. ex consilio PARACELSI *Chirurg. magn. P. 1. T. 2. c. 10.* TABERNÆMONT. *Lib. 1. Theat. Botan. p. 647.* pulvis Radicis symphiti majoris cum albumine ovorum. vid. FRANCISC. REDI in *Experim. de liquore styptico a Casp. Barthol. Exercitat. miscellan. 7. p. 129. exhibitis.* Sanguis calidus alius animalis vulnere infusus. confer. PLATERUS *observ. lib. 3. p. m. 726.* verbo: universa emplastra ex viscosis concretis composita, & ad ignem liquefacta, de quibus vid. WEDELIUS *Amœn. m. m. Lib. 2. sect. 2. c. 19. p. 507.* ZACUTUS LUSITANUS *Prax. hist. lib. ult. p. 629.* si

fluida hæc displicuerint, substituatur sanguis siccatus ægri, vel animalium aliorum, sub forma pulveris inspersus. *juxta TAGAUTIUM Instit. Chirurg. p. 646.* JOEL *Prax. Tom. 6. p. 234.* RONDELETIUM *method. curandi morb. p. 283.* vel Pulvis aloes, sanguinis draconis, colophonæ, mastichis &c. quales pulveres stegnotici passim describuntur a Practicis. Quod si horum omnium petas operandi rationem, scias, dum beneficio glutinositatis suæ adhærent vulneribus, exitum sanguinis eo ipso impedire. vid. SENNERTI *Instit. p. m. 829.*

§. XXXII.

Obturantia s. obstruentia quod concernit, volo sub istis intelligas spongiosa & lanuginosa, tam naturalia, quam arte facta; vel per se, vel sub forma pilularum, aut turundarum applicata. Ea sunt, spongia marina aqua prius aliquoties cocta; fungus coriaceus quernus, lanugo salicis platani, fructuum cydoniorum, castanearum corticis interiori parti adhærens; pili leporini, telæ araneæ, muscus arboreus, linteamina usta sive in fomitem conversa, lanugo rasilis linteorum, gossypium, charta bibula, imprimis, inter quam folia auri bracteata reconduntur, & sexcenta alia, quorum vires laudantur à RONDELETIO *meth. curandi morbos p. 283.* HORNIO *microtech. p. 140.* MUYS in *Pr. chir. rat. D. r. p. 11. & 12. Ephem. Eruditorum Germ. Dec. 1. A. 5. obs. 150.* BLEGNY in *Zod. Gallico Part. 1. 49.* GEHEMA in *der Feldscheer Kunst.* DOLÆO *Encyclop. chir. lib. 6. p. 1458.* Obstruere autem hæc sanguinem vi suæ lanuginosæ texturæ palam est, cui glutinosæ ipsius cruoris, vel ab aere externo, vel sola stagnatione condensatæ, tam firmiter implicantur, ut posthac exitus sanguini non concedatur ulterius.



DISSERTATIO MEDICA

D E

ANTHELMINTHICIS.

Primum edita Anno 1698.

§. I.



T in nominis etymon primum inquiram, methodus imperat, hucusque in conscribendis dissertationibus pene solenniter observata. Descendunt itaque *Ανθελμινθικά* à Græcorum *ἀντί* adversus; contra, & *ἔλμινς* vermis, adeoque ea denotant, quæ vermibus sunt adversa seu contraria. Equidem non sum nescius, haud quam omnes vermes, quos in humano corpore generari observamus, *ἔλμινθας* nominari in medicorum scholis, sed certam tantum speciem intestinorum tubum inhabitantium, qui teredes seu rotundi à figura & à lubricitate lumbrici latinis audiunt, confer. GALENUS *Lib. 14. meth. cap. 17. 18.* SPIGELIUS *cap. 2. de Lumbrico lato.* Verum tamen nec ignoro, minime omnes de vocis hujus significatu sic sentire *Frid. Hoffmanni Oper. Supplem. II.*

Doctores: Quin plures invenias, qui *ἔλμινθας* genus faciunt, & tanquam species post modum *τρογγύλας, πλατείας & ἀσκαρίδας* h. e. rotundos, latos & ascarides sub illis comprehendunt, prout id videre est apud HIPPOCRATEM in *Prognost. p. 138. 139. & Coac. prænot. p. 443. aph. Lit. 3. 26.* PAULUM ÆGINETAM *Lib. 4. Cap. 57. 58.*

§. II.

Duces igitur hos ultimos dum sequor, anthelminticorum titulo universa intelligo remedia intestinalibus non solum & jam nominatis vermibus contraria, sed insuper quoque illa, quæ inimica aliis sunt cujuscunque etiam fuerint formæ, quamcunque partem corporis inhabitent, aut qualia qualia producant symptomata. Plura namque quoad singula hæc capita annotata sunt à recentioribus ad supplendam vermium historiam, de quibus antiqui ne per insomnia quidem cogitarunt.

Kkk 2

§. III.

§. III.

Nam formam, vel si mavis, figuram & conformationem quod attinet, maximæ parti priscorum Medicorum, solum rotundi, lati, & ascarides fuerunt cogniti: videatur ARISTOTELES *Hist. Animal. Cap. 19.* GALENUS *Lib. 3. Comment. in aph. 26.* Alii tamen ex antiquioribus præter hos plures adhuc species litterarum monumentis consignatos reliquerunt; scilicet AVICENNA *Fenn. 3. Lib. 4. Tract. 2. cap. 21.* RHASIS *L. 2. C. 2.* HALY ABBAS *L. 9. Pract. Cap. 60. & 67.* Vermes in brachiis ac pedibus genitos sub titulo *Dracontii vel Dracunculi, Venæ medinæ, Venæ Civilis, Venæ Saniosæ &c.* Describunt subsequentes Medici plures adhuc & tantum non infinitos alios, penitus à prædictis diversos, annotarunt, nempe cornutos, alatos, hirsutos, bicipites, cum & sine pedibus: de quibus videantur AMATUS LUSITANUS, HORATIUS AUGENIUS, FORESTUS, HILDANUS, ZACUTUS LUSITANUS, SENNERTUS, SCHENCKIUS, BONETUS aliique. Imo subinde infecta alia, uti sunt *Bufones, Ranae, Lacertæ, Scarabæi, Hirudines, Serpentes, Mures & similia* visa sunt occupasse interiora corporis: conf. *Acta Hafn. Vol. 2. Ephem. Germ. D. 2. A. 9. obs. 66.* CORNELIUS GEMMA, *Cosmocrit. Lib. 1. C. 6.* GESNER. *Epist. Lib. 3.* SCHENCKIUS *Lib. 4. Cap. de Molis.* ZACUTUS LUSITANUS *L. 2. Prax. admirand. obs. 140.* RIVERIUS *Cent. 2. obs. ultima.*

§. IV.

Quoad habitaculum illorum, creditum est quondam, uti jam monitum, vix extra intestina vermes occurrere; hinc lites prolixæ de loco generationis motæ sunt, num scilicet credibile sit & stomachum fovere eos posse? vid. ARISTOTELES *L. 4. Meteor. Cap. 3.* ALDROVANDUS *de insectis Lib. 6. Cap. 2.* SCALIGER *Exerc. 26.* FABR. HILDANUS *obs. Cent. 2. 72.* nihilominus non in ventriculo solum observati sunt, testante SCHENCKIO *Lib. 3. obs. 205.* FORESTO *Lib. 9. obs. 4. Lib. 21. obs. 26.* BARTHOLINO *Cent. 4. Hist. 77. Ephem. Germ. D. 1. A. 3. & 4. obs. 38. & 80. D. 2. A. 4. obs. 39. A. 6. obs. 33.* SOLENANDR. *Conf. Med. p. m. 490.* verum in universis corporis partibus sæpe adesse illas palam est. Nam viderunt tales in Capite HILDANUS *Cent. 1. obs. 16.* BARICELLUS in Hort. *Gen. p. 135.* SACHSIUS in *Gammalog. p. 275.* PARÆUS *Chir. Lib. 9. Cap. 22. Ephem. Germ. D. 1. A. 2. obs. 147.* PAULINI *Cynograph. p. 218. in Capillis,* BORELLUS *Cent. 1. obs. 23.* JOEL *Lib. 3. Prax. sect. 3. §. 11.* WARENIUS in *Nosol. Disp. 21. In Oculis* AMATUS LUSITANUS *Cap. 8. Curat. 36.* JOH. NICOL. PECHLIN. *Lib. 2. obs. 35. In Naribus* HILDANUS *Cent. 1. obs. 8.* FORESTUS *Lib. 21. obs. 26. Ephem. Germ. D. 1. obs. 4. p. 35. D. 2. A. 3. obs. 99.* TULPIUS *Lib. 4. obs. 11.* BORELLUS *Cent. 3. obs. 45. & in observat. Microscop. 31.* HORSTIUS *Lib. 1. obs. p. 139. Hornungi Cist. med. epist. 112. 214. In Auribus* Eph. *Germ. D. 1. A. 2. obs. 24. A. 3. & 4. obs. 75.* GRULINGIUS *Cent. 1. Obs. 79.* VELSCHIIUS *Cent. 3. Misc. Med. obs. 73.* FORESTUS *L. 21. obs. 26.* RULANDUS *Cent. 10. obs. 82.* PLINIUS *Hist. N. Lib. 20. Cap. 14.* MOENICHEN *obs. 16.* PANAROLLUS *Pentecost. 4. obs. 27.* SALMUTH. *Cent. 2. obs. 39.* BARTHOLINUS *Cent. 3. Hist. 96. In Gingivis* HILDANUS *Cent. 1. obs. 59. In Dentibus* Act. *Hafn. vol. 5. obs. 108.* DODONÆUS in *Comment. ad Benivenium de abditis Morb. Causis. obs. 100.* PECHLINUS *Lib. 2. obs. 36.* BONETUS *Med. septent. S. 4. Cap. 16.* SALMUTH. *Cent. 3. obs. 32. In Lingua* Ephem. *Germ. D. 1. A. 8. obs. 100.* SMETIUS *Miscell. L. 10. p. 582.* SCHENCKIUS *Lib. 1. obs. 387.*

§. V.

Nec aliter se res habet in Thorace, subinde enim vermes hospitari in Pulmonibus autor est BENIVENIUS *de abd. Morb. Caus. Cap. 77.* ALOYSIUS MONDELLA *dialog. 6.* FERNELIUS *de Pathol. morb. & Symp. Cap. 10. p. 568. In Pleura & Pericardio* Act. *Hafn. Volum. 3. obs. 56.* FORESTUS *Lib. 21. obs. 26.* SCHENCKIUS *Lib. 2. obs. 194.* SACHSIUS *Oceano Macro-Microcosmico §. 39. In Corde.* MARCUS AURELIUS SEVERINUS *Lib. 4. de Recond. Abscess. p. 281.* HORSTIUS *Manud. ad med. part. 1. Cap. 1. sect. 2. §. 3.* SCHENCKIUS *L. 2. obs. 119.* HARTMANNI *Prax. Chym. p. 154. Ephem. Germ. D. 2. A. 9. & 10. obs. 13.* BONETUS *med. sept. C. 2. sect. 19. Cap. 15.* VELSCHIIUS in *peculiare Disp. de Verme Cordis.*

§. VI.

In medio ventre nullum quoque viscus, (si lienum excipias quod verminosum haud reperire potui) liberum est. Etenim corpus vermibus oblitum annotarunt WIERIUS *de præstigiis Dæmon. Cap. 16.* BARTHOLINUS *Anat. refor. Cap. 14. Eph. erud. Tom. 4. p. 85.* CRATO *Lib. 6. epist. 34. Ephem. Germ. D. 1. A. 1. obs. 50.* BORELLUS *Cent. 3. obs. 33. In fellis vesicula* deprehendit HILDANUS *Cent. 1. obs. 60.* MERCURIALIS *lib. 4. de Morb. Mulier. Journal des Savans, A. 1668. p. 100.* RUYSCH. *obs. 48.* BARTHOLINUS *L. 1. Anat. reform. Cap. 17. p. m. 116.* HILDANUS *Cent. 1. obs. 56.* GULDENKLEE *Lib. 3. Conf. 38. Acta Hafn. vol. 5. obs. 105.* SALMUTH. *Cent. 1. obs. 49. Ephem. Germ. D. 2. A. 1. obs. 104.* BONETUS *Med. Sept. Lib. 3. sect. 29. obs. 33. In Utero* Ephem. *Germ. D. 1. A. 9. 10. obs. 7. d. 2. A. 8. obs. 24.* PANAROLLUS *Fent. 4. obs. 12.* FORESTUS *lib. 21. obs. 37. in Schol. In spermaticis vasis,* MERCURIALIS *lib. 4. de Morbis Mul. In Testibus* PLUTARCHUS *lib. 8. Sympos. qu. 9.*

§. VII.

Nec externus corporis habitus ac subtus positi musculi immunes sunt ab his importunis hospitibus. Adfunt enim Crinones dicti, poros cutis in infantibus ut plurimum & subinde in adultis occupantes: conf. HERCULES DE SAXONIA *Lib. 10. Panth. med. ET-MULLER valet. infant. SCHULTZIUS Vol. 2. epist. 27.* REUSNERUS *exerc. 1. de Scorbuto.* Adfunt Sirones veluti PLATERUS *L. 3. Pract. Cap. 13. vocat Chirones aut Cirones, volas manuum perreptantes. Conferatur REUSNERUS de Scorb. cit. loc. HAUPTMANNUS in epist. ad KIRCHERUM de viva mortis imagine,* SCALIGER. *exerc. 174. sect. 7.* Adfunt qui sub cute latitant, quos ex antiquis ALZAHRAVIUS in sua *Prax. sub titulo passionis bovinæ exhibet, & illi in bobus & cervis frequenter observantur. Adfunt dracunculi, de quibus jam §. 3. dictum est, vide sis quoque* Ephem. *Germ. D. 1. A. 3. & 4. obs. 173.*

§. VIII.

Sed ecce vermes quoque in humoribus & quidem in sanguine apud KIRCHERUM *artis mag. Luc. & Umbr. lib. 10. part. 2. cap. 2. §. 15. de Peste part. 2. p. 240.* CHRISTIANUM LANGIUM *Disp. de morbilis §. 57. Ephem. Germ. D. 1. A. 1. obs. 50. A. 2. obs. 154.* BORELLUM *Centur. 3. obs. 4. In Urina* apud NICOLAUM PECHLINUM *L. 2. obs. 18. Acta Hafn. vol. 5. obs. 21.* SOLENANDRUM *sect. 5. Conf. med. p. 488.* RHODIUM *Cent. 3. obs. 31. Ephem. Germ. Dec. 1. A. 4. obs. 156.* TULPIUM *lib. 2. cap. 50.* HENRICUM AB HEER in *Spadacrene cap. 8. In Saliva* Ephem. *Germ. d. 2. A. 9. 10. obs. 130. In Semine* LEUWENHOECK, *videantur Acta Erud. Lips. An. 82. p. 32.*

Acta Hafn. vol. 5. obs. 7. Plura de his vermibus qui desiderat, adeat CHRISTIANUM FRANCISC. PAULINI *Cynograph. sect. 4. 66. p. 177. & seqq.* LANGIUM in *pathologia animata Cap. 65.* HAUPTMANNUM in *Epist. de viva mort. imag. Tractatu de Therms Wolckensteinensibus inserta p. 206.* LANZONUM in *Scholiis ad obs. 16. Moinichenii.*

§. IX.

Et sic quoque, quod symptomata à vermibus oriunda concernit, imperfecte & ista à Priscis recensentur. Nec mirum! cum alios vermes vix cognoverint quam intestinales. Fufius igitur clariusque ea ex recentioribus dabo. Notetur modo, non cuncta recensenda in cunctis reperiri ægris, sed alia in his alia in aliis. Quæ igitur intestinorum spectant incolas, sunt morsus & lancinationes inflationesque ventris conjunctæ una cum alvina stipticitate, nunc cum ejus fluxu. Appetitus jam adest auctus præter naturam, jam deficit cum nausea, vomitu crebriori & stillicidio copiosæ salivæ per os. Malum si ingravescat, oris supervenit foetor, genæ per intervalla rubent, inter dormiendum dentibus strident & contorquent labia, sitiunt circa auroram, vexantur cardialgia & lipothymiis cum motibus convulsivis sæpe universalibus. Ab aliis autem & alia proveniunt mala, adeo ut vix morbus reperiatur, sub cujus pallio non suas subinde agant personas: aut quos non ipsi fabricent. Paucis: ab illis nascuntur cephalalgia, hemicrania, agrypnia diuturnæ, strangulationes faucium, tumores linguæ, motus convulsivi artuum, spasmi, epilepsia, phthisis, colica, dolores ischiatici & arthritici, dysenteria, contracturæ, tumor ventris, polypus narium, aphonia, deliria, phrenitis, apoplexia, rabies, inquietudines, incubus, odontalgia, otalgia, hæmorrhagiæ narium, pleuritis, cordis palpitatio, cancer ulcerosus, fames canina, hydrops, atrophia, dolor renum, mictus cruentus, passio hysterica, insatiabilis coeundi cupiditas, febres tam benignæ quam malignæ, scabies, lues gallica, purpura, variolæ, morbilli, pestis, & quis universa enarraret! Plura tamen si nosse cupias, evolve citatum jam PAULINI *Cynograph. sect. 4. Cap. 8. & sequens. it. indicem Ephem. Germ. ad binas priores decur.*

§. X.

His prælibatis, de causis vermium, adhuc binis dicam verbis scilicet me iterum deferere in ea determinanda antiquitatem alias venerandam, utpote quæ ope caloris nativi ex humoribus in nostro corpore putrefactis, nasci hæc animalia uno docet ore. Talis siquidem generatio, non sine fonticis causis à modernis plane negatur, utpote, quæ nec rationi, nec experientiæ ulterius conformis deprehenditur, quod primus omnium satis docte demonstravit FRANCISCUS REDI in *eleganti Tract. de Insectis.* Nec obstat, quod PATER PHILIPPUS BONANNI in *obs. circa viventia in non viventibus reperta*, adversus hoc assertum urget priscorum philosophorum juxta ac patrum ecclesiæ autoritas; ex sola præconcepta opinione majorem fidem non merentur, quam aliis tribuere solent ipsi, quorum opiniones haud raro deferunt. Qua propter firmiter mihi persuasum est, non nisi ex seminali quodam præcedaneo principio, quod ut plurimum sub forma ovuli intra corpus cum alimentis aut aere inspirato, vel in corpore ipso genitum, beneficio vaporosi caloris fovetur & excluditur. Cum infantes non solum incurii magis sint in assumendis haud debite purgatis alimentis, prætereaque debiliorem calorem naturalem genesi vermium magis faventem possideant quam adulti, frequentius in illis,

Frid. Hoffmanni Oper. Supplem. II.

quam in his quoque reperiri animalcula ista, mirum non est.

§. XI.

His itaque præmissis ad scopum propositum jam propius pervenire mihi conceditur, adeoque absque ulla ulteriori verborum ambage ipsa Anthelminthica sub examinis incudem hunc fumo. Parum vero abest, ut, quemadmodum innumeras pene species vermium symptomatum ex illis nata, modo recenseri, ita quoque numero infinita dari anthelminthica dicam. Sed saltem citra crimen læsæ veritatis asserere nullus dubito, vix ullum genus medicamento-rum nominari posse, à quo non adversus vermes apparatus mutuo quandoque fumant Medici. Veniæ igitur locum futurum mihi polliceor, si non universa hæc præsentibus in chartis, sed potiora tantum & selecta indicavero; plus enim de illorum operandi modo quam de numero nominibusque sollicitum me esse jubet instituti ratio.

§. XII.

Ne tamen sine ordine & methodo rem hanc arduam aggrediar, in quatuor distinctis capitibus placeat sermonem instituere de ipsis. Primo igitur sisto, quæ vermes satiant: Admodum famelica namque sunt hæc insecta, adeoque potissimum pariunt molesta symptomata, dum osculis seu rostellis suis fodiunt ac pungunt partes, quas inhabitant, aut saltem dum se circumvolutant in illis aut repunt per domicilia sua quærendæ alimonie causa. Vera equidem anthelminthica hæc non sunt, sed tantum palliativa, nihilominus subinde se mirum commendant in modum, quod atrocia ista symptomata, ex vellicatione sensatarum partium oriunda, mitigent leniantque, imo ad tempus plane removeant, dum à morfu vermes avocant. Nec sine methodo talia adhibentur, nil enim frequentius in Praxi medica occurrit, quam, ut neglectis aliquandiu morbi causis, quantocyus fieri potest, primariis ac urgentibus symptomatibus occurramus.

§. XIII.

Apparatum hunc si scire aveas, primo tibi nominanda erunt dulcia, & ex illis saccharum & mel, illecebræ istæ vermium oppido famosæ, utpote quæ exhibita tam avide deglutiunt importuni hi hospites, ut statim vexare sensatas habitaculorum suorum partes cessent. Audio hic equidem plures mihi reclamantes, dulcia potius generare vermes: & hi provocant ad vulgarem & quotidianam experientiam, & asserunt saginari, adeoque ad excludenda sua semina, & augendam progeniem aptiores magis reddi vermes dulcium frequenti degustatione. Unde concludunt, inconveniens plane esse, morbum nutriendo oppugnare velle. Non tamen video, quomodo veritatem asserti prioris stabilire valeant dogmatis hujus patroni. Quod si enim non ex putredine vermes fiant, quod hodie nemo amplius defendit, sed ex seminali substantia, non aliter saccharo aut melli prærogativa in producendis vermibus competet, quam aliis alimentis, quibus subinde adhærescunt hujusmodi semina, proinde inanis mihi videtur distinctio JOH. MATTHIÆ *Cent. diff. Quest. 57.* dum liberaturus saccharum aut mel à culpa hac, distinguit inter dulcedinem in nimia humiditate & ex opposito in siccitate fundatam, concedens de priori aptitudinem ad gignendos vermes, de posteriori vero, qualem saccharata & mellita possident, negans & pernegans.

Kkk 3

§. XIV.

§. XIV.

Illis vero, quibus saccharata & mellita displicent, quod faginari per ea vermes observentur, repono, me istud dubium non curare, cum neutiquam enecandi gratia commendem, sed tantum ut saturentur ipsis, eoque consopiantur ad tempus. Minime igitur perpetuæ veritatis regulam credo, adductum axioma: scil. nutriendo haud oppugnari morbum. Nam contrarium video in raphano aliisque flatulentis carminativis, quæ flatus suggerendo, flatus pellunt, non aliter ac unda undam cuneusque cuneum trudit. Si tamen hac responsione non contenti fuerint, putarim quoque posse quodammodo defendi virtutem saccharatorum & mellis necandi vermes; quid enim notius est, quam dulcia hæc acescere & in acrimoniam degenerare satis manifestam, quæ dubio sine potis est mortem inducendi animalculis his. Adeoque non penitus respuenda venit SCIPIONIS MERCURII opinio de saccharatorum usu Anthelminthico: quæ in *obstetricum Libro Part. 3. cap. 51. p. 89. legitur*; suffulta enim est non propriæ solum, sed totius gentis Lombardicæ experientiæ, imo ne dubium remaneat ullum, stabilitur hæc sententia insuper per FRANCISC. REDI *experiment. p. 112. & 113. tradita in tractatu Italico, cui tit. Osservazioni intorno agli animali viventi che si trovano negli animali viventi*, quæ etiam citatur à RAMAZZINO in *epist. 1. de morbo epidemico rurali*; nempe lumbricos terrestres in solutione sacchari, mellis & syrupi violarum citissime & in momento quasi emori.

§. XV.

Sed non sola nominata dulcia sunt, quæ usui huic inserviunt, quin pene universa reliqua ex vegetabili regno petita, similes possideant vires, plus tamen & minus manifestas; è quibus nominandi sunt ficus, dactyli, passulæ majores & minores, tandemque fructus sebesten, quorum decoctum ut expertissimum medicamentum infantibus singulis diebus ante cibum laudat SENNERTUS *Prax. lib. 3. part. 2. sect. 1. cap. 6. p. 420.* Ex animali autem regno prætereundum haud est lac, quod vel recenter mulctum, vel cum dulcibus & jam laudatis saccharatis maritatum vix unquam etiam in atrocissimis doloribus aut aliis diris symptomatibus incassum assumitur; videatur FORTIS *Cent. 2. Conf. 96.* Miror hinc tanto odio insons hoc alimentum prosequi quosdam; è quibus instar omnium mihi nominandus est ATHANASIUS KIRCHERUS in *Mund. subt. lib. XII. sect. 2. cap. 1. p. 357.* & JOH. BETTUS de *Natura sanguinis cap. 1. sect. 3. §. 6. p. 25.* qui vermium partem maximam ex lacte esse petendam statuunt: utpote quod ex KIRCHERI sententia, seu à vaccis seu à nutribus petatur, omnino rurgent animalculis his. Illud enim ex solo nimio amore pathologiæ animatæ, minime experientia aut ratione edoctus, ista statuit. Valet igitur de ipso vulgatum illud paululum saltem mutatum: Qui amat vermes, vermes putat esse omnia.

§. XVI.

Sed cum adhuc dubius possit esse aliquis, num adeo grata sint dulcia vermibus, ut ad præsentiam illorum fodicare ad tempus habitacula sua cessent, illis pro confirmanda hac hypothese sisto experimenta, quibus etiam extra corpus & sua adeo commoda domicilia ab esca grata externè applicata, protrahi posse ipsos quovis tempore demonstrari potest. Certè quid notius est quam crinones melle infantum corpori nudo ad fornacem calidum inuncto, undiquaque ex poris cutis, capita exerere sua sub ma-

gnitudine feminis papaveris, coloris cinerei, quæ novacula vel crusta panis arida detruncari ac dera-di solent à mulierculis, antequam se rursus abscondant. *conf. SCHOLTZII Epist. Volum. 2. 27. GEORG. KUFNERUS Cap. 12. appendice ad Faventini de morbis puerorum. PARÆUS lib. 7. Cap. 21. chirurgiæ, ETTMULLER in valetud. infantil.* Et nonne vermes aurium ficubus, aut passulis inversis & antro illorum intrusis, extrahuntur? aut lacte tepido externe cum spongia aut linteis imposita, evocantur? illustre tale exemplum refert JOH. ANDREAS STISSER in *Actis Laborat. Chym. Specim. 2. Cap. 4. de quodam caupona, cujus in aurem lacerta se recondemat, horrenda symptomata pariens, quæ non nisi lacte tepido instillato consopiri per sex integros annos se passa erant, usque donec ad caseum veterem externe applicatum, prodiret.* Nec plures desunt observationes: ad alia alimenta grata, ex abditis recessibus provocata fuisse insecta hæc: vid. *Ephem. Germ. D. 1. A. 3. p. 530.* Ubi beneficio applicatæ tunicæ interioris ventriculi suis vermum cruris incolam, fuisse elicitum, refertur. Huc spectat quoque illa plane singularis methodus, qua vermi umbilicali ab HOECHSTETTERO *dec. 2. obs. 6. der Geiß Wurm nominato*, insidiæ strui solent, quæque describitur in *Fürstlichen Anhaltischen Arzneibuch lib. 5.* Scilicet infanti fundulus vivus ad umbilicum alligatur, qui elapso bihorio exesus in illo latere, ubi umbilicum tangit, observabitur. Apponatur igitur ad noctem novus pisciculus & mane totus consumptus & iste apparebit. Applica dein medietates corticis lignei, nucis juglandis cum melle & vitri pulvere, idque repete altera quoque vice, & enecabitur vermis ab acuta deglutita tali massa, *conf. FORESTUS lib. 7. obs. 35. BORELLUS cent. 1. obs. 41. SENNERTUS lib. 3. part. 10. cap. 4.* Tandem ne quicquam scrupuli remaneat, provoco ad extractionem ascaridum per infessus supra lac tepidum, aut ad suppositoria ex carne veteri salita, caseo hollandico, melle inspissato facta, quibus firmiter adhærescentes educi feliciter possunt, *Vid. AETIUS Tetrabib. lib. 3. c. 39. & seq.*

§. XVII.

Mittamus nunc suavia hæc anthelminthica, & ad ingrata magis pergimus. Durum namque nodum durus cuneus decet. Quare, cum satiati his, antiquum mox rursus obtineant vermes, sævitiamque suam nativam denuo exerceant; cum maxima importunitate iterum sensatas partes sollicitantes, pessimi hi hospites fugandi & expellendi sunt amaricantibus datis. Quorum numerum insignem nobis recensent Medici. Præ aliis tamen proficua per longa tempora observantur: tanacetum, absinthium, centaurium minus, marrubium album, agrimonia, scordium, ruta, sabina, radix zingiberis, costus amarus, radix cichorei recens, aloe, myrrha, cortices aurantiorum sicci, radix cardui benedicti, & crocus, quibus accedit *ex obs. LANZONI in Ephem. Germ. D. 2. A. 10. obs. 140.* pulvis chinæ chinæ.

§. XVIII.

Facile possem de singulis multifariam afferre experientiam, cum pene à cunctis Medicis ad ista tanquam ad anchoram sacram confugiatur; sed nolo in re, de qua nemo dubitat, verba proluxa facere; potius erit necessarium, quomodo operentur, expone-re. Dixi jam amaris fugari vermes, quod facile patet, si ea repetantur quæ de dulcibus modo monui; Nempe inest utique in his insectis sensus & appetitus animalis, ut grata avide expetant & fugant, ingrata, uti sunt amara, fugiant ac reformident. Hinc sedes

sedes suas deferere aliaque loca occupare, & ex auribus, instillato decocto cardui benedicti aliisque amaricantibus, prorepere & ex superioribus intestinis ad inferiora & versa vice propelli, observantur. Adeo ut non omnino contemnenda videatur ista methodus, ubi per usum continuatum amaricantium ad inferiora intestina propulsis vermibus, enema purgans sub tegmine lactis, aut liquoris sacharati injicitur, quo ipso incauti extra limites œconomiae animalis facile pelluntur.

§. XIX.

Nec in folis intestinis hærentes per hæc amara in fugam dantur, quin etiam aliarum partium incolæ subducere se solent his adhibitis amaricantibus. Probat id RAMAZZINUS in *diff. de constitut. ann. 90. §. 49. & rurali epidemico morbo Mutinensis agri*, in quo malo chinam chinæ non tam ut antipyretum, sed ut anthelminthicum profuisse docet. Illustrationis ulterioris loco inservire etiam potest observatio in *Eph. Germ. D. 1. A. 2. obs. 53.* annotata de quodam puero variolis correpto, cui ex usu theriacæ cum aqua cardui benedicti post insignes morificationes, prurigines, & vellicationes, undiquaque minutissimi vermiculi è poris cutis egrediebantur, qualem etiam historiam narrat SCHMIDIUS *Gedanensis, famosus quondam Physicus citatus in Ephem. Germ. An. 8. obs. 185.* cui adde HENRICI AB HEER *observ. 23.*

§. XX.

Caute tamen semper procedendum est his remediis, cum vix dici valeat, quam horrenda excitent symptomata, si nimio amaricantium usu vexare vermes pergas. Idem enim accidit tum sæpenumero, quod in hostibus undiquaque pressis notatur, nempe, ut vel quascunque vias legant aut metus vel fuga, in desperationem aut mœrorem convertantur. Hinc cum ubique in intestinis ingratum observent saporem, rostellis suis profundiora fodicant loca, sæpeque intestina aliasque partes plane exedunt, cum extremo agrorum periculo. Ut igitur ea evitentur, cum dulcibus hæc amara commiscere, vel cum aliis sapidis alimentis, adeoque alii immediate à pastu exhibere ea jubent. At enim vero non adeo stupida sunt hæc animalcula, ut sibi imaginantur hi, sed vel penitus respuunt mixturas has, vel tantum ex illis, quæ palato arrident, seligunt. Hinc recte monet WEDELIUS *Amœnitat. materiæ med. p. 370.* dato ciborum delectu non facile anthelminthica nocere vermibus.

§. XXI.

Jam tertiam classẽ anthelminthicorum aggredior, quæ enecant vermes. Antequam vero ista explicanda sumam, satisfaciendum erit illis, qui jam exhibita amara, horum quoque catalogo esse inferenda existimant. Veruntamen ut non penitus negem, tandem & illa posse interficere vermes in infantibus tenuioribus & ubi animalcula hæc non adeo adoleverint: tamen in adultis subjectis vermibusque robore necessario instructis extra dubium effectus iste desideratus non sequitur, sed statim ac vim medicamenti per os assumpti sentiunt, repunt versus inferiora & ex inferioribus versa vice ad superiora, si sub clysmatum forma injecta fuerint, uti jam antea monui. Et ne suspensus maneat animus, in his observavit REDI in *citatis observat. p. 127.* aquam aloë imprægnatam, per triginta horas & ultra, duos servasse lumbricos vivos. Ergo non adeo prompte amara enecant vermes, uti sibi adversarii imaginantur.

§. XXII.

Sed ad rem; Remedia vermium enecantia multiplicia sistuntur ab Autoribus. Primo sic vocantur terrea: v. g. cornu cervi & ebur ustum, muscus marinus seu corallina, calcanei, s. astragali bovis vel vaccæ usti, unicornu marinum, lapis bezoar tam orientalis quam occidentalis, terra lemnia & sigillata, bolus armena, corallia rubra, ebur fossile &c. deinde martialia, ut limatura martis & alia ex iis huc pertinentia parata: vid. FORESTUS *obs. med. lib. 6. obs. 4. lib. 21. obs. 25. in scholiis*, RIVERIUS *obs. cent. 1. obs. 91.* SENNERTUS *lib. 3. part. 2. sect. 1. cap. 5.* GLAUBERUS *Furnorum part. 2. cap. 9. 23.* STISSER *Actorum laboratorii Chymici part. 2. cap. 4.* ALEXANDER BENEDICTUS *lib. 21. cap. 2.* de his igitur admodum magnifice sentiunt, adeo ut in omnibus vermibus pro compertis ea habeant, nullaque præstantiora remedia admittant. Alii tamen contrarias tuentur partes, quibus se associat REDI in *obs. jam citatis p. 118.* qui terram sigillatam & alio tempore lapidem bezoardicum orientalem, uti etiam occidentalem, aquæ admiscuit, in qua lumbrici ad 20 diem vixerunt incolumes. Non obstante tamen hac experientia, utique facio cum prioribus, quoniam semper argumentari tuto à lumbricis terrestribus haud licet ad illos qui humani corporis sunt incolæ. Quod si vero aliquando terrea enecent hos, puto fieri exsiccando & absorbendo humiditates, in quibus hospitari solent, vel quod cum acido primarum viarum abeant in falsum ipsis insensissimum.

§. XXIII.

Hæc enim falsa secundum locum inter vermes necantia merito tenent, & eatenus videntur nocere ipsis, quatenus non solummodo viscositates intestinorum, in quibus nidulantur, dissolvunt & abradunt, sed etiam, si degustentur, aut saltim externe corpora illorum attingant, mortis fiant causa in illis. Norunt id Chirurghi, qui sanguisugis tantillum solum de sale adspargunt, unde statim ulterius sugere sanguinem cessant, imo & jam assumptum celementer iterum respuunt, quæ salis virtus minime later hortulanos nostros, utpote, qui cochleas juniores, tenellulorum germinum illam pestem, non citius enecant, quam si areolis gramine fecundis salia falsa adspargunt; sunt vero falsa hæcce, sal marinum, sal gemmæ, sal culinare, alumen, sal ammoniacum, tartarus vitriolatus, de quo ultimo videatur AGRICOLA in *Poppium, part. 2. p. 699.* Non quoque deficiunt experimenta, si solis his verbis fidem adhibere recuses: adornavit enim talia REDI *citato scripto. p. 141.* cum aqua marina, sale gemmæ, sale fossili polonico & æthiopico, vitriolo, alumine &c. & ex tempore perire ab illorum actu lumbricos vidit, modo aquæ sufficientem copiam salium in se continuerint.

§. XXIV.

Tertio acida sistuntur, spiritus & oleum sulphuris, vitrioli, clyffus mineralis, spiritus salis & nitri, acetum, succus granatorum, berberum, citri, & aurantium acidus: tinctura florum violarum cum phlegmate vitrioli, spiritus terebinthinæ &c. videantur BARICELLUS in *hortulo geniali P. 4. pag. 52.* ZAPATA in *clave med. p. 15.* FORESTUS *lib. 21. obs. 26. & 27.* BARTHOLINI *epist. cent. 4. 54.* WEDELIUS in *Amœnit. materiæ med. p. 365.* Operationem communiter deducunt à virtute acidorum putredini adversa, ex quo fundamento etiam peregrinantes aquarum vitia instillatione spiritus salis emendare feliciter posse perhibent. Sed cum putredo minime sit

vermium materia ex qua, non adeo arridet dicta ratio. Quare statuo, acida vel coagulando chylum aut lympham, nutrimenta illa vermibus necessaria, ne fame pereant, efficere vel sua aculeata mordaci ac caustica textura ipsis fieri lethifera. Suffulcitur hæc conjectura observationibus REDI p. 119. quæ lumbricos in vino, succo citri, aurantiorum aliisque liquoribus cum spiritibus acidis imbutis, brevi perisse, testantur. Minime tamen suaserim, ut indifferenter cunctis ægris adhibeantur; sed illis solum, in quibus sitis urgeat, in reliquis enim facile alia pariunt symptomata; videatur SYLVIVS in *appendice ad tract. I. cap. 10.*

§. XXV.

Sequuntur quarto salia alcalia, eaque tam fixa, quam volatilia: Fixa equidem hucusque nondum satis pro hoc scopo fuere cognita, quantum tamen anthelminthicorum possideant virtutes, didici ab *Excellentissimo, fidelissimo & nunquam satis laudando Præceptore meo Dn. D. LANGIO, Lips. Practico optimo*, qui lixivio quodam, post præparationem tincturæ metallorum, aquæ beneficio ex capite mortuo elicit in puerulis vermes enecare & feliciter exturbare solet. De volatiliis vero virtute testatur SYLVIVS l. c. WEDELIUS de *Medicam. Facult. p. 188.* STISSERUS in *actis labor. Chym. P. 1. cap. 10.* facileque id credere possum, cum sciam ex observatione *Joh. Jacobi WILLIS in act. Hafn. vol. 3. obs. 63. p. 117.* hirudines, si spiritui cornu cervi immergantur, in momento mortem subire, è contra vero in aquis acidulatis aliisque liquoribus similibus, superstites manere aliquamdiu. Sed quoniam infantibus sapor non minus, quam odor illorum summopere est ingratus, ita ut vix dici possit, quam mire se habeant ab ipsis exhibitis; prætereaque facile ex abusu damna possint enasci, eaque satis gravia, prout id demonstravit JACOBÆUS in *Act. Hafn. vol. 1. obs. 113.* cave ne quid nimis, aut ne puerulis, nisi cum quodam syrupo, aut largo vehiculo, eorum dosim minimam exhibeas.

§. XXVI.

Jam quinto loco commemoranda sunt remedia acria: v. g. raphanus, marum, allium, cepæ, fucus nasturtii, sedum minus, hyperici flos & semen, Spiritus vini, vinum &c. de quibus consulantur SEBIZIUS *Præxeos T. 1. Part. 4. sect. 2. cap. 2.* WITTICHUS in *vademeco p. 344. & sequent.* HOFFMANNUS in *methodo medendi cap. 19.* FONTANONUS de *morbis inter. lib. 2. cap. 5. Eph. Germ. D. 1. A. 6. & 7. p. 248. Acta Hafn. vol. 1. obs. 40. p. 55.* BARTHOLINUS *hist. cent. 4. 19.* REDI *observ. citat. pag. 118.* Horum vero singulorum pluriumque aliorum ad hanc classẽ pertinentium decantare laudes si vellem, non sufficerent pagellæ hæ. Proinde id solum noto: inter principalia ea pertinere anthelminthica non solum, quod vi gaudeant incidendi & resolvendi mucum viscidum, verum quod ipsi vermibus sua hac acrimonia vere veneni loco sint. Confirmat hanc assertionem observatio à SCHENCKIO *lib. 2. obs. 197. allegata* de verme albo, corneo rostellum instructo, cordi Principis cujusdam adhærente, qui cadavere aperto exemitus mensæque impositus alio adjecto mire se aliquamdiu contorsit, paulo tamen post odore isto penitus succubuit.

§. XXVII.

Sexto his affociantur oleosa & pingua, de quorum virtute jam olim ARISTOTELES testatum reliquit: omnes eorum actu interfici posse. In specie vero lumbricis & aliis intestinorum incolis olea

olivarum, amygdalarum amararum & nucleorum persicorum, aut per infusionem parata olea hyperici, hyssopi, abrotani, &c. contraria notantur à PETRÆO *Nosolog. T. II. p. 143.* FORTIS. *Cent. 2. Conf. 96. in Actis Hafn. vol. 1. obs. 49.* FORESTO *lib. 21. obs. 28.* Si scire cupis, quomodo agant, puto enecare illa vermes, quatenus organa respiratoria, quæ teste MALPIGHIO *Tr. de Bombyce p. 19.* & passim in habitu corporis sub forma plurium osculorum occurrunt, viscositate sua obliterant, adeo ut ob denegatum aeris accessum mileri suffocentur, hincque convulsi aut paralyti affecti intereant. Quapropter non semper consultum est clysmatibus addere pingua & olea; tum enim ea averfantur vermes, ex inferioribus ad superiora non sine symptomatum exacerbatione repunt. Quod vero destillata olea attinet v. g. tanaceti, spicæ, succini, coryli, cornu cervi, tartari foetidi, quæ his anthelminthicis à quibusdam accensentur, extra controversiam ea interimunt vermes per inclusa salia volatilia, utpote quæ non tam copiose sibi habent juncta, quod nec tyronibus artis pharmaceuticæ ignotum est, quum teste STISSERO *Actor. Laborat. Chym. Part. I. c. 4.* tota in purum nitidumque tale sal converti possunt.

§. XXVIII.

Septimo huc pertinent aquæ suaveolentes, v. g. rosarum, aurantiorum, pulegii, calamenthæ, thymi, hyssopi, salviæ, florum sambuci &c. miraberis & his me assignare vim enecandi vermes, cum tamen teste WEDELIO de *simpl. Medicam. facult. p. 178.* aquæ vehicula aliorum remediorum tantum sint, minime virtute anthelminthica instructæ. Verum cum non commendem hæc ut aquea, sed potius ut suaveolentia, veniæ futurum locum spero. Nam & sensu olfactus eoque exquisito satis, dicta hæc insecta esse prædita, lumbrici probant terrestres ad pluviam descensum ejusque odorem suavem statim è latebris suis egredientes, ut exempla supra allegata taceam, nempe in seßu parato ex lacte, ascarides & lacertam casei veteris odore elici potuisse. Cum igitur tenera admodum & summe delicata sit horum animalium textura, à fragrantibus his illorum nervoso generi inferri injuriam, persuasum mihi habeo; idem enim hoc in plurimis foeminis & quibusdam sexus potioris accidere, nemo non novit; minime tamen negaverim, simul hæc suaveolentia fieri vermibus exitiosa, ob oleum, quod fragrantibus his aquis semper admixtum est; de quorum virtute anthelminthica §. præcedenti dixi. Ast ne sola speculatione inniti hoc assertum quis credat: adsunt experimenta cum singulis his aquis facta apud REDI *observ. citat. p. 120.* Ex antiquioribus autem JULIUS CÆSAR CLAUDIUS in *Empirica Rationali lib. 3. sect. 31. Tr. 2. c. 6.* aquam rosarum & RIVERIUS aquam florum aurantiorum adversus vermes convenire deprehenderunt.

§. XXIX.

Octavo mercurialia remedia titulo hoc insigniuntur, & quidem in eminentissimo gradu. Unanimi enim consensu recentiores Medici vivum hoc metallum pestem vermium asserunt, non solum in substantia, sed etiam ejus decoctum aut infusum in aqua simplici aut alia destillata vel vino, imo & reliqua universa præparata acrimonia aut caustico sapore destituta, uti sunt cinnabaris antimonij, mercurius dulcis, æthiops mineralis: confer. ANTON. MUSA BRASSAVOLA *Examen Metall. p. 422.* MATTHIOLUS in *Dioscoridem lib. 5. c. 78. l. 6. Ephemerid. Germ. D. 1. A. 4. & 5. p. 230.* HELMONTIUS *sextupl. Digest. p. 180.* POTERIUS *Pharmacop. spagy. l. 1. p. 327.*

SIMON

SIMON PAULI *Tr. de febr. malign.* VERZASCHA in *Riverio contraſto* l. 10. c. 9. MAYERNE in *sua Pr.* Non equidem adeo multum retro medicamenta hæc-
ce adverſus vermes uſurpari ceperunt à Medicis; Quondam enim metallum hoc venenis accenſebatur, veruntamen ex quo infinitis experimentis ficta illa mercurii deleteria qualitas poſteris eſt demonſtrata, impune non ſolum, verum quoque cum maximo uſu illud dare conſueverunt. Sed in aprico non eſt ſtatim quomodo mercurius agat. Sunt qui in ejus ſumma mobilitate aut virtute alkalina quærunſ culpam, aliſque alia arridet operandi ratio, quibus tamen reſutandis inhære non eſt animus; ne extra oleas, uti in proverbio dicitur, vagari deprehendamus; adeoque quid credam, paucis ſolummodo ſubjungam. Habere videtur mercurius omnis, etiam purgatus, acidum quoddam aut falſum deliteſcens in ſe, quod inter alia amalgamata metallorum diverſa clariuſque adhuc experimentum OLAI BORRICHII in *Act. Haffn. vol. 1. obſ. 67. p. 147.* evincit, quod brevitati ſtudens tranſcribere nolo.

Ag medicat. nat. XXX.

Subjungo nono aquam extinctionis metallorum liquefactorum, videlicet auri, chalybis, ſtanni, & ſimiles, de quibus vid. POTERIUS in *ſuis operibus*, KESLERUS in *Proceſſ. Chym.* & WELSCHIUS in *Micro- mem. obſ. 90. p. 24.* qui ultimus occasione obſervationis cujuſdam cum aqua, in qua plumbum liquefactum aliquoties extinctum erat, reliqua laudat. Nam cum Carolus IX. Gallorum Rex extreme vermibus vexatus, D. Harlæus aquam hanc cum fructu præſcripſit, quam deinde alii in pluribus ægris optimam deprehenderunt, imprimis in infantibus ex morbo hoc jam morti proximis. Exiſtimo vero pariter, uti de mercurio modo comprobavi, in quibuſvis metallis acorem quendam concludum eſſe, qui liquefacto prius aut ſaltim extreme ignito metallo, ob poros hac methodo patefactos citius exire, & aquæ communicari poteſt, quod ipſum tamen feliciuſ tardiuſque accidit pro diverſitate compagis metalli. Ino tandem reiterato hoc labore vera etiam ramenta minutiffima ab ipſo metallo abraduntur, quod facile ex ſapore communicato aquæ nunc adſtringenti vitriolaceo, aut empyreumatico; ſimulque ex textura metalli immutata, tandemque ex ſedimento denuo fuſo probari poteſt. *Conf. Epist. FRANCISCI JOSEPHI BURRHI de Oculo ad Barthol. ſcripta*, & JOH. DANIEL MAJOR in *Genio errantē*, c. 15. 16. 17. 30. 35. Insuper tamen acorem illum augeri ignitione ipſa puto; omnibus enim notum eſt, ignem actualem in ſinu fluidi aut candentis metalli latere, & ſub illo acidum, quod TACHENIUS in *Hippocrate chym. & clave*, ſufficienter demonſtrat. Ea propter igitur evitetur abuſus horum remediorum; exinde enim oriuntur damna diverſa, quæ VELSCHIUS c. 1. per ventriculi refrigerationem & POTERIUS per vim artubus & interaneis inimicam efferunt.

§. XXXI.

Decimo & ultimo, cum à non paucis catalogo horum anthelminthicorum, terreſtrium lumbricorum, vel humanorum pulvis inferatur, de hoc quoque dicendum eſt aliquid. Putant autem, huic qui favent remedio, ex charactere naturali virtutem hanc laberi poſſe, non ſecus ac ex aliis remediis ope ſignaturæ virtus ſpecialis eruitur. Quapropter juxta canonem illum univerſalem medicum, ſimilia ſimilibus curari dicunt. Veruntamen committunt iſti fallaciam non cauſæ ut cauſæ, cum tantum abſit, quod pel-
lant hi pulveres aut enecent jam in corpore latentes vermes, quin potius certiffimum ſit illis dari anſam

generationi plurium, dum ſemina copioſa in pulveribus hiſ abſcondita eo ipſo corpori communicantur, quæ progenies nova poſthac, ſi exeat ſponte, decipit incautos. *Conf. WEDELIUS in Amœnit. mater. med. p. 369.*

§. XXXII.

Sed tempus jubet, ut miſſis hiſ ad ultimam claſſem deſcendam, quibus vermes enecti educuntur. Ubi ſtatim in limine reclamantes aliquos audio, inutilem hunc apparatus eſſe, cum etiam ſine hiſ ejicere cadavera iſta valeat, imo ſoleat natura. Addunt inſuper utut ſub forma tali non proſcribantur, nulum tamen adeo inſigne damnum inde metuendum eſſe, cum facile ſola digeſtione blandâ in mucum quendam ſeu colliquamentum viſcidum abeant hæc mortua animalia, hinc ſæpe fit, ut poſt enecantia exhibita, ne tantillum de illis cum ſæcibus prodeat. vid. RIVERII *obſ. Commun. p. 308.* Veruntamen cunctis objectionibus haud moveor, eſto enim, aliquando ſponte a natura ejici vermes, dantur tamen alio tempore caſus, ubi ex relictis & corruptis exuviis horrenda fuerint nata ſymptomata. Boni igitur Medici erit, imitari prudentem belli ducem, qui proſtratos hoſtes vel terræ vel fluviis mandat, ut imminentem exinde peſtem avertat. Quod vero attinet alteram inſtantiam, concedo à quibuſdam ex enecantibus remediis peracta operatione mortuos evacuari vermes, ideo quod vim ſimul poſſideant purgandi, qualia ſunt falſa, acria, mercurius dulcis &c. Sed quid fiet cum reliquis, quibus hæc virtus laxativa alvum non ineſt! Quoad tertium dubium non valet argumentum: ſponte reſolvuntur vermes in mucum, ergo illos emortuos evacuantia fruſtranea ſunt, cum ſemper, antequam illa totalis vermium reſolutio fiat, putredo cum ſymptomatibus gravibus præcedat, quæ noſtris commendatis remediis omnino evitari poſſunt.

§. XXXIII.

Ipſa autem educentia hæc ſi ſcire aveas, deſumuntur ea ex claſſe purgantium, nihilque refert, ſeu per os aſſumuntur, vel ſub forma clyſmatis ano injiciantur, aut denique externe ſaltem ventri applicentur; a ſingulis namque idem effectus ſequitur. Nec facile in ipſo remedio aberrari poteſt. Nam mitiora juxta ac fortiora purgantia, modo in debita doſi dentur, ſunt proficua: præ aliis tamen laudatur aloes & exinde parata. Hinc quoque pilulas peſtilentiales Ruffi SENNERTUS lib. 3. Part. II. ſect. I. c. 3. p. 216. commendat; FORTIS Cent. 2. Conſul. 69. mannam laudat; EUSTACHIO RUDIO *artis med. cap. 27. lib. 2.* muſcerda arridet; in *Actis Haffn. vol. 2. Diacatholicum & Diaphœnicum* extollitur. Et quis cuncta recensuerit tam ſimplicia quam compoſita, paſſim à Medicis comprobata, neque aliter de clyſmatibus judicandum; ſæpe enim clyſma domeſticum ex jure carniū, lacte aut decoctum quoddam ſimplex cum ſalino ſtimulo ſufficit, aliis tamen in ægris cum colocynthide & fortioribus adhuc ſtimulis præſcribendum eſt, quod ipſum quoque de externis ventri impoſitis moneo. In junioribus enim ſubjectis ſatiſfaciunt cataplaſmata ex foliis perſicorum & felle bovis ad imitationem Louiſe Bourgeois in *Hebammen Buch Part. IV. c. 13.* adultioribus autem præſcriptum DYGBÆI *experimentorum p. 114.* pomum colocynthidis cum felle bubulo toſtum & umbilico impoſitum vel unguentum de Agrippa vel oleum ſclareæ infuſum cum colocynthide adhibendum eſt, vid. OSWALDUS GREMBS in *Arbore integra & ruinoſa* l. 2. c. 1. p. 208. PAULUS BOCCONE *obſ. 7. p. 130.*

§. XXXIV.

§. XXXIV.

Num præstent sola hæc evacuantia? vel num cum enecantibus maritari debeant? adhuc disputant Doctores. Dico tamen responsionis loco: subinde sola sufficere, si jamjam mortui fuerint vermes; quod si autem adhuc vivant, non male sociantur enecantibus. Nec audiendus est hic SENNERTUS, combi-

nationem educantium ideo reprobans, quod purgantia non sinant agere enecantia in intestinis, sed statim, antequam præesse munio suo possint, simul cum excrementis ea ejeciant. Non enim adeo longum tempus ad interficiendos vermes requiritur, quod experimentis REDI aliquoties in antecedentibus adductis sufficienter constat. Addo, purgantia ipsa sæpe vermes simul interimere, quod observatio in *Actis Hassn. vol. II. obs. 47.* adducta probare videtur.



DISPUTATIO MEDICO-PRACTICA

D E

REMEDIIS ANT-ODONTALGICIS.

Primum edita Anno 1698.

P R Æ F A T I O.



QUIBUS Medicum cum Duce rei militaris perito comparare placet, meo judicio à vero haud adeo aberrare censentur. Etenim uti talem fortitudo, constantia, astutia, vigilantia, & reliqua virtutum militarium turma condecorare solet: sic Medicum quoque verum iisdem stipatum, suum quod ornat officium, requirit. Ambo hostem aggrediuntur, hinc ut armorum, quibus oppugnare illum cupiunt, applicationem probe noverit uterque, apprimè opus erit. Certè ridendus esset Thalassiararcha, qui muricibus, tribulis ac hastarum oblongarum mucronibus objectis, imperum classis reprimere, aut cuniculis structis vincere eandem ausit. Et copiarum ductor, qui sclopetis manuariis, ficis & rhomphæis, muros sternere aut subruere, aut equitatu mœnia superare sibi sumeret, imprudens crederetur. Idem prorsus de Medico esto judicium, si evacuantibus, ubi alterandi humores, aut alterantibus ubi evacuandi sunt, ineptè usus fuerit. Testatur id prudens SOPHOCLIS *sententia*:

Οὐ δεῖς ἰατρὸς ποδὲς
θρῶν ἐποδαὶς προστομῶντι πῆματι.

*Non est Medici sapientis
Uti cautionibus in ulcere, quod ferrum poscit.*

Nec sapientis est, ulterius ego addo, Emollientia, Repellentia, Avertentia, Interceptientia, Diaphoretica, Apophlegmatizantia, Errhina, Vesicatoria, Anodyna, aut ullum aliud promiscue adhibere remedii genus, ni à morbo aut junctis simul symptomatibus id postuletur. Verissimum namque OVIDII manet effatum:

*Temporibus medicina valet, data tempore profunt,
Et data non apto tempore multa nocent.*

Hæc quo clarius pateant, ad remedia provoco Ant-Odontalgica, quæ thematis inauguralis loco publico Eruditorum examini sistere, mecum constitui. Varia ac diversa adeo sunt illa, ut nullum penè evacuans, alterans nullum, nullum repellens vel leniens, aut quodcunque aliud remedium in armamentario occurrat Medico, quod non pro hac etiam intentione medentibus inservire, si necessitas id urgeat, cogatur. Videbis tamen cuncta hæc arma frustra tota adhiberi die, tempore scilicet & loco

loco inconvenienti usurpata si fuerint. Volui hinc periculum meorum in Medicina profectum facere & genuinum remediorum horum applicandi modum æque ac veram operandi rationem exhibere. Devotissimis igitur precibus, ut S.S. Trinitas labori huic ex alto clementer assistere velit, precor. A Te verò, L. B., ut æquam de labore feras sententiam, subnixè rogo.

§. I.

Fuit jam primis artis Medicæ ætatibus in usu solenni, nominum ante omnia accuratius cognoscere usum, quo res, quarum notitia acquirenda erat, facilius pateant. Majorum inde dum sequor vestigia, me à scopo haud aberraturum confido, si in primo statim paragrapho, de significato Rubricæ dissertationis sollicitus fuero. Loquitur ea remedia, ut vides, Ant-Odontalgica, quæ nunc accuratius ad examen vocanda erunt. Ea propter quod nomen attinet remedii, varius ejus apud diversos Auctores est significatus, quos omnes adducere nec temporis nec chartæ permittet angustia. Satis erit indicasse, innui hac voce auxilium seu medicamentum quodvis, externum vel internum, alterans vel evacuans, ad tollendum symptoma aut morbum, aut ad præcavendum ab imminentibus illis aptum natum. Et generalis licet sit hicce vocis significatus, Etymologiæ tamen ipsius admodum respondens, fecit, ut tam in Medicorum quam ægrorum ore familiarius versetur. Imo suppeditavit etiam Doctoribus nostris ansam, ut diversas remediorum constituerent classes, petentes cognomina vel ab operatione eorundem, vel a partibus quibus succurrunt, vel tandem a morbo, quem curant vel tollunt. Resonant hinc in nostris scholis remedia vomitoria, purgantia, stomachica, anthelmintica, ant-Epileptica, & sic quoque Ant-Odontalgica. Alteram partem Rubricæ formans vox, natales Græcos agnoscit, & ex ἀντι contra, ὀδὺς dens, & ἄλγος dolor componitur. Ea ergo, ut paucus sim, innuit auxilia, quæ dentium succurrunt doloribus illosque curant.

§. II.

Equidem, si firmam & plus quam osseam dentium consideres texturam, intuitu primo Odontalgicæ vox contradictionem in adjecto involvere videtur, dolorem prædicans de corporibus, quæ ferrum & limam, ignem, quodvisque aliud secans, pungens ac faucians eludunt instrumentum. Ast, salva est res, pugnat enim a partibus meis strenue experientia in infinitis agris, qui ex symptomate hoc miserè subinde decumbunt. Nec ratio deficit, quæ insignis pariter dictis addit robur. Erras enim, si totam dentium compagem solidissimam hanc possidere texturam credas, aliæ namque compactissimis corporibus simul insunt & adsunt exquisitissimo sensu præditæ partes. Non te fugiet dentes ab Anatomicis dividi in partem extra gingivas eminentem & sub gingivis, intraque maxillarum loculos absconditam. Dabo, externam illam alimentorum comminutioni sacratam partem, ob soliditatem summam, texturamque firmissimam non esse ad sentiendum, nec ad dolorem perferendum aptam, non tamen idem de radicibus dentium, gingivarum carne circumvallatis & per gomphosin cum maxillis connexis jure pronuntiabitur.

§. III.

Cernis siquidem in iis texturam à reliquis admodum diversam, quæ ob mollitiem suam, aliam planè præ se fert faciem. Insuper sensata admodum va-

sa sanguifera & nervosa his inferuntur, & quod maximum est, membranâ quâdam tactu exquisito prædita, quæ alveolis maxillarum adhæret, firmiter teguntur. Hujus ergo membranæ pariter ac nervorum sanguineorumque vasorum ratione, primariò oboriri dentium dolorem, satis interdum atrocem, patet. Insuper tamen nec substantia radicum dentium ossea à culpâ omni immunis æstimanda est, quippe quæ in primâ teneraque ætate membranacea compage gaudet, quam nec in adultis in totum destrui subjectis, sed primitivo sensu præditam remanere judico. Id tamen ambabus largior, illam, quoad partem maximam, ab offescente humore temporis tractu incrustari, eoque ipso maximopere insensatam reddi, cui asserto lucem insignem addit Dn. du VERNEY, ubi dentium generationem exponit in Zodiaco Gall. à Nicolao Blegny in lucem emissio, P. II. p. 130.

§. IV.

Patet sic abundè nihil absurdi inesse titulo seu Rubricæ dissertationis, cum ea firmo nitatur fundamento. Convenit ergo nunc explicare, quid membranaceis, nerveis ac vasculosis dentium partibus, dum exquisitus summusque adeo in iis excitatur dolor, accidat. Ubi sciendum, durius quam par est vellicari has partes, hoc est, pungi nunc, nunc divelli, tendi, aut disrumpi, indeque inhabitantes spiritus nostros animales ad motus irregulares seu ἀταξίαν adigi. Ex allisione namque & percussione hujus vitalis nostri elateris ad fibras nerveas à prædicta vellicatione crispatas contractasque, dolor ille acerbus tristisve oritur. Prout igitur vellicans hæc variat causa, spiritusque ad majorem nunc, nunc minorem disponit impetum, sic & dolorem plus minusve exquisitum & atrocem exsurgere admodum est probabile.

§. V.

Talem verò causam esse necessariò admittendam, ratio pariter ac experientia dictitat. Variat enim aculeata hujus irritantis causæ textura insigniter, nec semper eandem præcisè in dente uno pluribusve attingit partem, quæ malè tractata ad præternaturales agitationes tam prompte disponat spiritus. Alias ut taceam circumstantias, quæ pro hoc stabiliendo asserto adduci possent, unica mihi adsit experientia, quæ diversas insigniter adeo odontalgias tota die sistit. Videmus enim quosdam ægrorum per certa solum intervalla insultus sentire dolorosos eosque haud adeo graves, alios è contra sine ulla etiam levissima remissione, exquisitissimis & acerbissimis torminibus cruciari. Testem hic allego CELSUM, qui syncopes non raro, motus convulsivos, febres ardentes, imo delirium, aliaque graviora symptomata ex odontalgia enata, recenset, adeo ut miseri tales subinde penitus succumbere, & manus violentas sibi inferre observentur.

§. VI.

Omnia quo ulterius clariora fiant, causas has irritantes & vellicantes examinis subicere incudi, nunc me jubet necessitas, quæ latent primo in sanguine circulationis lege ad dentes vel plures vel unum saltem

tem allato. Quod si enim acrimonia quadam hocce laboret fluidum, statim ac sensatis infigitur dentium partibus, præsto est vellicatio, & ex illa dolor. Salutari tum catarrhorum nomine solet hæc morbi causa communiter, nec male; quæ enim differentia juxta antiquorum dicendi stylum, alias assignatur catarrhis, dum quidam frigidi & calidi alii audiunt, eam & hic annotari posse distinctionem, cuivis apparet. Prout enim vel sub tegmine magis viscido pituitosove dicta latet acrimonia, vel libera ab his deprehenditur compedibus: ita nunc hoc, nunc illo jure insignitur titulo.

§. VII.

Ast uti mobilis ac vaga hæc causa est, ita nec fixi adeo exin oriuntur dolores, sic ut & nunc effectus secundum Philosophorum effata causæ respondeat. Inprimis ergo exagitata a causis externis, suam exercet tyrannidem, hincque isto solenniter tempore affligit ægros, cum solem nostram deferere atmosphæram & tristem noctis imminere faciem sentimus. Nec mirari illud potest, quoniam istis horis aer gravis factus, ob radiorum solarium absentiam, premendo corpus, vitiatos urget ac trudit humores, quare etiam reliquos catarrhos ad alias partes ruentes ad crepusculum exacerbari ordinarie deprehendimus. Differt ergo hæc causa multum ab illa, quæ altas fixasque diu egit radices, sedemque sibi circa affectum locum paravit firmissimam. Colliges id inprimis, si ex vellicatione molestiore, doloreque aliquandiu continuato, motus humorum retrogradus vel ex toto, vel ex maxima parte impediat. Sævit namque tum majori sensus hic tristis impetu, nullamque miseri experiuntur remissionem, potius tumores & abscessus in gingivis molestos, imo cariem quandoque in maxillis infaussto successu patiuntur.

§. VIII.

Causæ, quæ ut procatacticæ humorum hunc peccantium affluxum promovent, præ omnibus sunt cibi potusque errores antehac commissi. Succedit his aer ventusque impense frigidus, qualis est in specie borealis, austrinus, & qui ad crepusculum vel de nocte flans, corpus ingrato suo tactu afficit. Crispat ille fibras partium motrices ad oculum non raro, eoque ipso recursum humorum ordinarium insigniter cohibet. Insuper tamen isthanc aeris inclementiam propria etiam virtute, & ut causam proximam ad dolores dentium excitandos concurrere, haud diffiteri possum. Quis enim nescit a frigore, qualemqualem etiam ejus supponamus naturam aut substantiam, fibras sensatas vexari & irritari, summa non raro cum importunitate? Mirum inde non est, si ex potu frigido aut aqua, aliove quocunque tali fluido, in ore diutius detento, dolores in dentibus gigni, in dies notemus.

§. IX.

Apparet sic, quid acrimonia frigusque in producendo dentium dolore valeant, reliquæ ergo nunc quoque ad examen vocandæ erunt causæ, quas inter flatus quoque mereri locum, partibus his incuneatos, ex innumeris venerandæ antiquitatis scriptis video. Et licet ab omnibus pene recentioribus hæc rejiciatur hodie causa, tamen haud prorsus contemnendam eam puto. Latet enim humoribus nostris solenniter inclusus aer, qui rarefcere non solum potest, sed vere data occasione rarefcit, unde instantur dubio sine cum dolore tubuli, quibus elastica hæc infarcta est substantia, indeque fit, ut consopitum haud ita pridem penitus dolorem, statim ac ægri molli incalescunt lecto, aut brevem sal-

tem in hypocausto probe calefacto trahunt moram, denuo dolores experiantur. Ad quod comprobandum assertum produco Thermometra, in quibus aerem externum ejusque qualitates ac conditiones, internum, qui humores intra vasaque latet, aerem, alterare, hoc est, expandere nunc, nunc comprimere, tota die docemur.

§. X.

Quartam jam ex causarum ordine produco classem, vermium nempe progeniem. Pariter hæc aculeatis suis rostellis pungere ac rodere dentium partes, tenera adeo textura prædita, affolet. Varia sub figura ab Autoribus hæc describuntur insecta, pediculisque planioribus similia in *Misc. N. C. Dec. I. An. 9. & 10. obs. 25.* referuntur. Frequentius tamen sub anguillarum seu lumbricorum minutissimorum forma apparent, & nudum fugientes sæpe visum, non nisi microscopio armato oculo patent. Capitibus nunc nigris, nunc rubellis, pro ætatis differentia apparent, & discrepans corporis color ipsis incarnatus puta, aut albus inest. Alimenta dum sibi sumunt, proboscide aculeato, profunde partibus infixæ, ad imitationem culicum aut pulicum hirudinumque id præstant. Insuper mire famelici, & foecundi maxime sunt, unde dici vix potest, quantas molestias, si sedem sibi semel illis in locis paraverint, producant. Ortum eorum Medici antiquiores putrescenti deberi materiæ communiter credebant, quod SENNERTUS in sua praxi fusius exponit. Ast rectius recentiores ex ovulis horum insectorum, cum alimentis, aliove modo ad hæc loca translatis, inibi que a vaporoso calore exclusis, natales eorum cum FR. REDI in tract. de insectis derivant.

§. XI.

Commodum vero vermibus his dentes cariosi & diffracti præbent domicilium, quas intra cavernas delitescere, suamque fortiter exercere tyrannidem tuto possunt. Insuper tamen hæc dentium cavitates aliis quoque causis sedes infausas suppeditant, intra quas inter masticandum illapsa vel frigida, vel acida salitaque, aut quævis alia vel esculenta vel potulenta, subito dolores excitant, si inprimis ad meditullium usque tetra penetraverit cavitas, utpote quo in loco nudæ membranarum ac nervorum apparent propaggines, celerrime tristia hæc symptomata admittentes. Illustre exemplum assertum hoc meum confirmans BARTHOLINUS in *Anat. Reform. lib. IV. c. 12.* de moniali quadam recenset, quæ habens dentem præ aliis longissimum, quem cum secari curaret, statim ob nervum simul sectum, cujus manifesta in conspectum veniebant vestigia, convulsa gravissime, imprudens hoc suum factum luebat.

§. XII.

Hæc præmittere volui specialiori Ant-odontalgicorum remediorum examini. Propius igitur ad propositum accedo scopum, eorundem naturam seu operandi rationem expositurus. Sistit vero remediorum Ant-odontalgicorum numerum adeo insignem Medicorum non minus quam vulgi chorus, ut singula hoc titulo insignita tradere, merito pro absolute impossibili habeam. Veniam ergo mihi polliceor, si potiora tantum his in pagellis stitero, quorumque effectus causis odontalgicæ jam nominatis respondet. Neque enim aliud quid meum postulat institutum, quam operandi modum a tot diversissimis remediis expectandum, luculenter tradere. Rideo itaque merito absurdissimam illorum sententiam, qui unigo remedio, omnes dentium dolores, sanari posse, vano glorianur ausu, cum extra omnem con-

controverſiam poſitum ſit, alia ex humorum acrimonia oriundum dolorem poſcere remedia, alia illum, qui flatulentæ materiæ, vel frigori aut vermibus denique ac cariei ſuos debet natales.

§. XIII.

Quo igitur ordine ac methodo quantum possibile distincta, rem, ut vides, difficilem, tradam, binis quasi dicenda includam capitibus, e quibus primum, quæ primariis removendis causis sunt apta, continebit, alterum vero, quæ dolori ipsi satisfaciunt, comprehendet. Sunt namque hæ binæ indicationes curativæ, quæ in Odontalgia se sistunt primariæ, & quas ut judiciosus respiciat Medicus, sublimioris judicii Practici mecum ad unum omnes jubent.

§. XIV.

Si in acrimonia igitur sanguinis causa hæreat, uniuersa, quæ dyscrasiam hanc emendant, Ant-odontalgica dici debent. Varia vero illa acrimonia, ut notum, apparet facie, h. e. nunc acida, nunc salia, nunc ex his mixta deprehenditur. Prima igitur si adfuerit ad ant-acida confugies, quæ utramque hic absolvent paginam. Poteris ex his feligere terrea, corallia puta, lapides cancrorum, ossa sepia, matrem perlarum, ebur, cornu cerviustum & philosophice præparatum, vel martialia, limaturam martis, aut crocos, essentiasque ejus aperitivas. Si magis placuerint alcalia fixa volatiliaque jungere potes, aut substituere his, sal tartari, centaurii minoris, absinthii, tincturam tartari acrem, spiritum cornu cervi, salis ammoniaci &c. si vero composita potius arriferint, & ea adhibere licebit. Id tamen obserues moneo, ut in larga sæpiusque reiterata dosi cuncta hæc ægris tuis exhibeas, si imprimis abundare acidum in corpore noveris.

§. XV.

Præfente vero falſa acrimonia , quæ nunc nomi-
navimus,haud æque quadrabunt , potius tum aquea ac
diluentia ſubſtituenda erunt, utpote quæ diſcontinuant
falium aculeos , illoſque ad ulteriorem actionem red-
dunt ineptos , ſimiliter per vias urinarias extra po-
moeria œconomia animalis illa proſcribunt. Haud
igitur male agunt , qui adverſus hoc ſanguinis vitium
inſuper ut ſpecifica commendant , diuretica , quor-
ſum refero præ aliis anti-ſcorbutica ſic dicta , naſ-
turtium puta , cochleariam , folia recenter germinantis
ſiliginis , beccabungam , ſedum minus , piperit idem ,
dracunculum eſculentum , armoracia radicem &c.
Nam ſi fatendum quod res eſt , vix felicius virtus
horum in ſcorbuto explicari meo iudicio poteſt , quam
ſi illa ut urinam pellentia agere dicas. Quod ſi vero
tibi nec hæc ſuffecerint , mucilaginoſa , inviſcantia &
glutinoſa invocabis , e quibus lacticina nomino ,
gummata minus acria e. g. maſſiches , gummi ara-
bicum , juniperi , tragacant. ſimiliaque , quæ invol-
vent vellicantes falium falſorum aculeos , illoſque ad
ulteriorem actionem eo reddendo ineptos , tuo agri-
que ſatiſfacient deſiderio.

§. XVI.

Hæc sunt, quæ communi Medicorum consensu acrimoniæ opponuntur remedia. Veruntamen si illa Odontalgiam producat, non omnem curæ absolvere paginam videntur. Monitum enim est altero ab hoc paragrapho, largam frequentemque horum adhibendam esse dosin, si abundans sapius enormiter sanguinis vitium corrigere animus fuerit, quod longum adeo spatium, graviores dolorum cruciatus vix permittent. Præ internis ergo his externa potius seligere Doctores nostri jubent, immediate partibus

Frid. Hoffmanni Oper. Supplem. II.

Frid. Hoffmanni Oper. Supplem. II.

dolentibus, pro eodem, acrimoniam nempe corrigendi scopo, applicanda. Extollunt ex his præ cæteris butyri recentis, nec adeo saliti frustulum, quod supra dentes dolentes, donec colliquescat, ponunt. Huic alii medullam crurum vituli saccharo cantho mixtam, vel oleum commune recens aut lentisci substituunt. Aliis oleum amygdalinum, haud ita pridem expressione elicited, vel si hoc defecerit, lac tepidum aut quodcunque carnis pinguioris jusculum, placet. Quibus vero nec pingua hæc arri- dent, illi decocta radicum liliorum alborum, al- theæ, foliorum malvæ, florum tilia &c. calefacta, in ore aliquandiu detenta, commendata sibi habeant. Sunt etiam qui alcalica præ aliis probant, quæ ipse mira stabilita experientia aliquando vidi. Erat mihi in itinere constituto equorum moderator, auriga puta, quem cum acerbissimi vexarent dentium dolo- res, ad latus junctus socius lixivium commune haud adeo acre ipsi commendabat. Detinere illud in ore cogeatur ingressus diversorium, & vix elapsum e- rat quadrantis horæ spatium, cum se ex voto resti- tutum clamaret. Idem hoc remedium postmodum laudatum a DOLÆO in *Encyclop. Chirurgic.* p. 528. annotavi.

§. XVII.

Huc referri etiam merentur, quæ ex eadem intentione temporum regioni, seu potius foveæ, quæ inter frontem & tempora media est, inunguntur. FORESTUS *lib. 14. obs. 5.* oleum infusum anethi & chamomillæ pro hoc scopo mire extollit. Alii temperantia magis medicamenta, ut corpus pro balsamo sive oleum nucistæ, axungiam recentem cati sylvestris similiaque laudant. His merito etiam oleum amygdalarum auri immisum annumero, quod RIVERIUS in *Prax. lib. VI. c. 1.* magnis adeo decantat laudibus. Si operandi desideras rationem acria dubio sine salia cum sanguine ad dentes affluentia, per hæc pingua temperantur. Procedunt enim isto in confinio ex arteriis carotidibus rami, quorum unus antitragum & anthelicem perreptans, ad superioris maxillæ dentes fertur, *vid. DIEMERBROECK. Anat. lib. v. c. 13.* Judicat hinc STROBELBERGERUS vix alibi quam in dentium superioris maxillæ doloribus, hoc in loco applicata convenire remedia. Sed huic subscribere asserto minime possum, cum ex eodem trunco arterioso pone aures, rami quoque ad inferiorem abeant maxillam, unde sanguinem dentibus inferioribus destinatum, temperari pariter his externis posse, non minus mihi credibile ac prius videtur.

§. XVIII.

Ast si nimia sanguis turgeat acrimonia, his solis omnem velle hanc corrigere causam, & irritus & inanis erit labor. De aliis itaque simul nunc cogitare sana suadet ratio. Eminere hic evacuantia cernis facile, cum quæ abundant in corpore juxta majorum dicta, evacuanda sint. Hinc si sanguinea vasa cruore tumeant, & simul adsit Ilethora, venæ sectionem ex Practicorum Celeberrimorum jussu celebrabis. Nec sollicitus nimium de loco sectionis sis, seu enim venas raninas, juxta VALESIIUM & HEURNIUM, seu cephalicam aut medianam, juxta PLATERUM & NONNIUM, seu saphænam, juxta THONNERUM tundas, nihil intererit. GALENI tamen observabis præceptum, qui largam semper evacuationem & plenitudini respondentem suadet. Habebis sic promptissimum dolorum horum remedium, & felicem ejus effectum tuo experieris commode. Testem tibi RIVERIUM allego, qui frequentissima experientia asserti veritatem comprobat.

§. XIX.

§. XIX.

§. XIX.

Qui ex venæ sectione metuunt periculum, scarificationem cum cucurbitulis substituent, qua largam magis sanguinis copiam, minori difficultate, quam per venam tusam educi posse, observabunt. Rarum scilicet non est de sanguine ad libræ pondus & ultra hac methodo subduci, antequam illud animadvertat æger, aut ullum exin sentiat molestiam. Nimum si id tibi forte videtur, quotidiana pro me testimonia scias, & si rationem desideras, WALÆUS illam in *methodo medend.* tibi suppeditabit. Quo vero in loco illam adornes, non multum intererit, cum diversæ Autoribus & placeant & displiceant partes. Sunt qui sub mento cum RHASE, aut potius ipsi mento cucurbitulas applicandas statuunt. Alii FORESTI *lib. 33. c. VI.* sequuntur auctoritatem & maxillas sibi seligunt. PIGRÆUS pro sede manus externæ partem, inter indicem & pollicem, & auriculam alio tempore commendat. Omnium tamen frequentissime in collo, scapulis, humeris, & supra genua juxta PLATERUM aliosque applicantur.

§. XX.

Accensentur equidem hæ sanguinis missiones remediis non immerito optimis, cum subito haud raro ægrorum satisfaciant desiderio. Verum non ubique fida sunt, quin sæpenumero spem nostram fallant ac eludant. Inprimis tamen si cacochymia simul adfuerit, irritum hæc tentari ausu, certissimum est, cum per alia longe evacuantia ea educi amet. Commendabunt igitur se tum præ reliquis purgantia, & quidem illa, quæ antiquis hydragoga audiebant, dum stimulant fortius intestina, nec ex his solum, sed e toto corpore colliquamentum serosum educunt. Faventem habeo hic PLATERUM in sua *Praxi*, PISONEM *de colluvie serosa, libr. XI. c. III.* FABRUM in *Mycrothecio Spagyrico libr. XI. c. 19.* FORESTUM *lib. XII. obs. 345.* aliosque plures, qui nunc jalappæ resinam, nunc quintam colocynthidis essentiam, nunc alia hujus indolis purgantia laudant, effectumque eorum non nisi felicissimum prædicant, cum rebelles ante hac Odontalgia horum unice usu penitus evanuerint. Alii tamen magis clysmata purgantia laudant, nec inani id successu faciunt, cum sacra anchora fere sint illis subjectis, quæ pharmaca abhorrent, largam namque ut plurimum humorum pravorum copiam non minus quam purgantia, repetita præprimis si fuerint, subducunt.

§. XXI.

Et licet subinde ab his assumtis simul provocetur vomitus non tamen inde damnum aliquod est metuendum, quin potius hæc evacuatio sit perquam utilis. Etenim si ventriculus teneat saburram, mali fomitem, quod rarum non est in praxi, maximum levamen ex laudabili hocce naturæ conatu ægro præfigere licebit. Suspiciari autem hanc poteris causam, si dolor qui non adeo vehemens antea erat, circa prandii tempus, majori acerbitate ingravescat. Annotavit vero præ aliis felicem hanc vomitus operationem PISO, a vulgari quodam purgante assumpto, quod ex improvise notabilem lymphæ copiam per superiora educens, omnes non solum in momento sustulit dolores, sed effecit insuper, ut ad decem postea annos ab omni immunis dolore vixerit. Fidem inde facile crebriores CRATONIS A CRAFFTHEIM observationes merentur, quæ *Epist. penult. lib. 4.* adducuntur, gravissimos nempe dentium dolores a vomitoriis exhibitis evanuisse sæpissime. Quibus RIVURIUS quoque favet testimonium *cap. 4. obs. 31.* traditum, aliquando scilicet a masticata Nicotiana, vo-

mituque inde provocato, intra duas horas gravi Odontalgia vexatum convalescere feliciter.

§. XXII.

Nec minor a diaphoreticis speranda est salus cum constet, per hæc æque ac per cathartica feri immuni abundantiam. Ex his autem præ cæteris volatilia se commendant, utpote quæ promptius ratione texturæ suæ ad massam abeunt sanguineam, vimque simul ant-acidam insignem possident, & quod maximum est, potentius quam terrea, aliaque fixiora stimulando, sudores quoque copiosiores provocant. Magni igitur facio *Medici cujusdam Celeberrimi* experientiam, qui pluries horum usum miraculose profuisse, retulit. Idem tamen plus ea præstitisse, adhibitis antea citatis evacuantibus, cum DOLÆO me simul monuit. Sed ea propter reliquis diaphoreticis laus demi omnis haud debet, cum stupendum non raro illa quoque præstent effectum. Novi ipse lapides cancrorum cum aceto, & cornu cervi cum rob. sambuci, ut Ant-Odontalgica exoptatissima se comprobasse. Alii a theriaca sumpta, aut pilulis theriacæ cœlestis Greifianis idem se annotasse referunt. Extra ergo controversiam competit diaphoreticis Ant-Odontalgicorum nomen, nihilque opus habet praxeos tyro, quam ut cognoscat certo, num talis feri alluvies inculanda sit, ne cum umbra inanem suscipiat pugnam. Colliget vero eam, jubente RIVURIO, si animadvertat salivationem largam, comitem dolorum adesse perpetuum.

§. XXIII.

Huc usque cominus apertoque Marte causam aggressi sumus morbosicam, contra eam in aciem adducendo, alterantium & evacuantium remedium turmas. Nunc igitur adversus illam, quæ intra mœnia jam jam se recepit, hoc est fixam ad dentium radices sibi paravit sedem, copias ducemus. Sequi vero, & prudentes belli imitari Duces consultum erit, qui hostem obsidione dum cingunt, primario omnem copiarum auxilium adventum impediunt, ut res hostium angustæ eorum citius pareant armis. Dein altius penetrant, & adversarios in castris & mœniis hærentes, ut vel evocent, vel depellant, cunctis laborant viribus.

§. XXIV.

Priori igitur inserviunt intentione remedia avertentia seu intercipientia veteribus dicta, e quibus eminent apophlegmatizantia nuncupata, quæ nunc ex oris cavitate, nunc ex naribus educunt serum. Priora sputatoria audiunt, quod lymphæ viscidæ seu sputi excretionem promoveant; educunt illa ex glandulis oris diversis, majoribus æque ac minoribus, serum, quas comprimendo & stimulando ad copiosam dictæ Lymphæ secretionem adigunt. Adduci hic meretur FORESTI *experimentum Obs. 3. lib. 14.* qui mastichen & semen staphisagriae in petia ligat, binosque tales globulos, unum post alterum agris dat masticandum. Huic PLATERI observationem *pag. 403.* adductam ad latus pono, qui ex radice pyrethri, angelicæ, semine staphisagriae, cubebis, cum gummi tragacantha rotulas masticandas parat. Plura hic facile, quæ dentibus comminuta nunc, nunc in ore saltem volutata conferunt, adduci possent, ni superflua ea ob chartæ angustiam censeam. Sicco tamen præterire non valeo pede, quæ LAZARUS RIVURIUS alia inter de foliis Nicotianæ refert, si masticentur nempe ea, cunctis Ant-Odontalgicis aliis palmam reddere dubiam, quod proprio edoctus usu, literarum monumentis consignatum reliquit *Cent. 4. obs. 31.*

§. XXV.

§. XXV.

Minime tamen sola horum masticatio hanc lymphæ excretionem uberiores promovet, quin ipsa eorundem textura insimul ad producendum ptyalissimum suum quoque contribuat symbolum, quatenus tunicam oris internam ubique pungendo, subtus positis buccarum ac palati glandulis calcar stimulumque addit, ut copiosius largiusque suum eructent serum. Perinde igitur erit sub gargarismatum & essentiarum, seu sub quacunque alia formula hujus indolis exhibeas remedia, cum felicem semper eorum liceat sperare effectum. Largus vero horum adeo apud Auctores prostat numerus, ut sine Lectoris nausea, nomina omnium dari non possint. Brevis ergo ero, quædam solum ex illis producendo, quorum usus faustus a pluribus Practicis jactatur.

§. XXVI.

Ex gargarismatibus igitur primum meretur locum, quod PETRUS BEYERUS *de Med. hum. corp. lib. 6. p. 144.* ex pulvere diatrion piperion, cubebis, cortice radiceis mori, & saxifragiæ cum vino coctis parat. Huic radicem sambuci, vel serpillum, vel flores lavendulæ, aut folia sabinæ ac persicariæ in aceto cocta succedent. Miris namque hujus virtus superbit encomiis apud MINDERERUM *in Med. Milit. c. X.* & BRENDELIUM *in Cons. Med. 57.* Ex infusis in spiritu vini factis CUNRADUS A KUNRATH ligni sancti ornat laudibus: CRATO A KRAFFTHEIM radicem pyrethri & caryophyllorum aromaticorum, & THEODORUS DE BRY *in introd. in vitalem Philos. semen lentisci, deprædicant.* Alii essentias laudant saturejæ, thymi, calaminthæ & zingiberis &c. Cuncta tamen hæc si consideres, non equidem inani ea niti fundamento videbis, similem tamen ab aliis etiam aromaticis aut aromatibus ipsis operationem quoque expectabis. Nec cum oleis destillatis aliter se res habet, vix namque ullum ex acribus sapidisque destillando paratum invenies, quod non Practici quidam in usum vocarint. SENNERTUS *Praxeos lib. XI. P. I. pag. 266.* oleum spicæ, thymi, juniperi, ligni guajaci & cinamomi suadet. WILLISIUS caryophyllorum oleum, & CLAUDINUS terebinthinæ & buxi approbant. HEREDIA, FONSECA & FORMIUS oleum coryli, quod heraclinum RULANDUS dicit, præ aliis decantant. HARTMANNUS vero cum THONERO & MOEBIO, camphoræ oleum omnibus præferendum judicant. Id modo circa omnem horum observes usum, ne in nimia dosi ori committantur, alias ob summam acrimoniam sensatis ejus partibus certo erunt damnosa. Erit igitur satis, guttulas solum aliquot bombaci instillare, & sic dentibus admoveere dolorosis.

§. XXVII.

Altera nunc apophlegmatizantium sequitur classis, quæ ex naribus aufert lympham, communiter ptarmicorum & errhinorum titulo ornata. Longus & horum existit apud Practicos catalogus, quem recensere facile, nisi id dissuaderet instituti ratio, ipsaque hodie maxime cuivis nota scirem. Crevit namque usus horum adeo, ut nihil frequentius sit, quam indefinenter illis vexare nares, sic ut in conventibus Ecclesiasticis, salutationum officiis, & conviviorum apparatu, prætermissum quid æstimetur a pluribus, nisi isto quoque tempore turpem rivum mittant nares, & futilis mixturæ inspiratio, horrissono sternutantis clamore prodatur. Dabo ergo & ex his solum, quæ præ aliis experta sunt. ZAPATA *in Clav. Med.* ejusque commentator SPLEISUS aquam sic dictam Reginæ Hungariæ, quæ ex rorismarini floribus

Frid. Hoffmanni Oper. Supplem. II.

bus cum spiritu vini per destillationem paratur, divinis pene extollunt laudibus. PLATERUS jubet betæ vel anagallidis, aut calendulæ succo, penna illico, vel majoranæ foliis conquassatis nares irritare. Calculum addit PETRUS BORELLUS *obs. Med. Phys. cent. III. obs. 8.* de betonica naso indita, idem affirmans, quendam namque qui gravissimos dentium diu toleraverat cruciatus, hoc ipso curatum fuisse, refert. Addi his quoque meretur HEURNII *observatio ex lib. 1. Method. ad Praxin*, qui liquore flavo, e naribus decocti nicotianæ ope prolicito, se ipsum ab Odontalgia liberatum testatur.

§. XXVIII.

Excipiunt apophlegmatismos vesicatoria, quæ pariter ac illa avertendo humores, celebria evadunt Ant-Odontalgica. Parum vero vel nihil hic intererit, ex quam ea consent materia, modo nostro satisfaciant desiderio, & pungendo fortiter cutim, serum ex illa elicatum intra cuticulam tanquam vesicam quandam proliciant. Vera me dixisse, Auctorum, quæ nunc adducam observata, probabunt. BUSCOVIUS, TEN. RHYNE & MUYS pro hac intentione moxam seligunt Chinesium, eaque accensa vesicam inurunt ac escharam. Hujus loco cineribus candentibus, digitali inclusis, & temporibus applicatis, BALLONIUS utitur. FIENUS & GABELCHOVERUS rapas sub cineribus assatas, & adhuc ferventes usurpant. RIVERTIUS sal fraxini extreme calcinatum adhibet. SENNERTO & universo hodiæ Practicantium choro cantharides probantur. Allium GALENO, FORESTO atque BORELLO placet: Aliis alia arrident. Locum quod attinet, cui affigantur, quemcunque tu seligere pro lubitu potes, cum notabilis adeo hic non notetur differentia. Suadent equidem alii, ut plantis pedum vel carpo aut manus sedi externæ, intra pollicem & indicem applicentur. Quibusdam, utpote aut intra aures, aut in illa capitis parte, qua maxilla superior inferiori connectitur, excitentur, jubent. Sub mento quondam ea adhibita, sequentes probant rythmi.

*Linitam pastam sub mento nocte ligabis
Pulvere cantharidum, sic rupta pelle notabis
Et per vesicas dentis tormenta fugabis.*

In locis igitur diversis licet adhibeas, effectum tamen eorundem sperare potes optatum, cum unus fere semper eorundem operandi modus sit. Quod si vero immediate supra arterias, quæ ad maxillas tendunt, quodcunque etiam applicueris vesicatorium, illud non solum avertet humores, sed illos quoque intercipient, dum subtus posita vasa, irritatione hac importuna arctat & constringit.

§. XXIX.

Clarius asserti veritatem imposita locis his adstringentia probant. Famosa ex illorum numero sunt, quæ sub emplastrorum forma adhibentur, & pro sacra anchora a vulgo non minus quam Medicis pluribus habentur. Conflantur illa communissime ex gummi, mastiche, tacamahaca, elemi, carannæ, ac pice Burgundica. Quæ tamen ex consolda majore, gallis & alumine, nuce cupressæ, rosisque rubris fiunt, non minorem merentur laudem, quibus ultimis secreti loco RIVERIUM usum esse, observationes ejus loquuntur. Sunt hæc, ut facile vides, adstrictionis validæ quoad maximam partem participes, mirum inde non erit, si affluentes humores ex voto intercipient. Ad tempora ut plurimum, aut po-

ne aurem unam vel utramque, applicantur, unde defluentes per arterias humores quodammodo reprimuntur, quod STROBELBERGERUS *de dentium Podagra*, & PLATERUS *in praxi*, erudite fatis declarant. Approbo itaque hæc, his applicata in locis, & consilio HEURNII præfero, qui universo capiti raso ea circumjicere jubet, cum ejus hoc consilium admodum mihi periculosum videatur, humores enim acres ad futuras & pericranium retinet & arcet, sicque sensatis maxime cerebri integumentis, cum quibus per futuras illa externa cohæret membrana, injuriam infert maximam, & gravissimis symptomatis viam parat. Nec semper consultum erit maxillis ea applicare, quod consilium aliis probatur Practicis; horum enim ope humores ad fauces repulsos, ægrum aliquando suffocasse VALESCUS DE TARANTA & RIVERIUS observarunt.

§. XXX.

Sinistram hanc quam modo adstringentia inepte adhibita tulerunt censuram, eam quoque quæ intra aures pro scopo Ant-Odontalgico immittuntur remedia, mereri videntur. Seligunt vero locum hunc non pauci Practicorum, illumque præ aliis cunctis aptissimum, cui adhibeantur remedia, judicant. Et quidem si anatomicam hic in auxilium vocites scientiam, non inani assertum niti fundamento prima fronte censebis. Apparent enim primo hic arteriolaræ, quæ has ante perreptant partes, quam nutrimentum dentibus adferant, unde immediate in illorum contenta h. e. sanguinem agi posse, rectissime colligitur. Accedit secundo, glandulosam internam aurium tunicam horum beneficio irritari, & ad copiosius reddendum serum eo disponi posse. Tandem totius corporis excalescentia, ex his irritatis locis, suboritur, unde produci maximam in humoribus æque ac spiritibus agitationem, rursus non male argumentatur RIVERIUS. Verum his non obstantibus, meo judicio, summa requiritur circumspectio in eorum usu, sive adhibeatur acetum simplex, aut fumus ejus, in quo pulegium aut origanum cocta sunt, aut allii bulbus ejusque succus, quæ modo citatus RIVERIUS probat, aut succus rutæ, hederæ terrestris, radicis asphodali, juxta JOHANNEM ANGLICUM, vel oleum amygdalinum cum cepis, euphorbio & castoreo infusum, ex commendatione HEURNII, seu petroselini succus cum granis 4. piperis conditus, vel bursa pastoris contusa, aut tandem aqua simplex piperata, quæ a DYGBÆO, BORELLO & WEDELIO laudantur. Universa enim hæc ob acredinem quam secum habent, adstantes membranas & nervosas expansiones principio nervi acustici proximas, facile irritare possunt, unde oralgis periculosissimis, moribusque convulsivis universalibus infaustæ dabuntur ansæ.

§. XXXI.

Vides sic, adhibita hæc in capite intercipientia remedia, ancipitis, ni cautissime procedas, esse aleæ, aliis ergo remotioribus partibus ea sunt applicanda tutius. Pertinent huc fortiores ac dolorosæ artuum ligaturæ, quas SENNERTUS *lib. XI. part. I. c. XI. p. m. 265.* utilissimas dicit. Operandi si desideras rationem, comprimuntur illarum ope venæ, adeoque sanguinis retrogradus motus aliquandiu impeditur, unde copia ejus ad caput æque ac dentes alias abitura imminuitur, quod ipsum sufficit subinde nostroque satisfacit desiderio. Et hac aliquali sanguinis suppressione esse possumus contenti, cum omnem ex toto interciperi velle affluxum, absurdissimum omnino sit. Minime hinc approbo arteriarum,

quæ ad dentes pertingunt, sectionem, licet SCULTETUS *in Armament. Chirurgico obs. 38.* magni eandem faciat. Certe, quid nutrire posthac dentes debeat, si vasa hæc nutrimentum advehentia dissecantur penitus, nec videre nec imaginari mihi possum. Idem quoque de ambustione arteriarum harum a PARÆO laudata judico, his enim qui suis prospicere ægris conatur, in scyllam incidit, dum charybdim vitare cupit. Hæc de intercipientibus.

§. XXXII.

Ordo nunc jubet, ut ea quoque remedia, quæ incuneatum jam jam firmius peccantem humorem vel eliciunt vel expellunt, recenseam. Prius impetrabitur emollientibus sic dictis quæ vel in ore detinere, vel buccis vicinisque imponere partibus decet. Pro hac tibi intentione lac tepidum vel solitarie, vel cum malva, melitoto, chamomilla, sambuco, parietaria, branca ursina, radice liliorum alborum, liquiritiæ, semine lini, fœnu Græci &c. decoctum, inserviet. Si displicent epithemata, cum medulla panis similaginei aut bis cocto pane in cataplasma formabis hæc universa emollientia, aut pulvem ex ptisana, vel ex farina fabarum cum aqua factum, calide, pro eadem applicare intentione, integrum tibi erit. Imo juxta FORESTUM *in scholiis ad observationem quintam lib. 14.* oleum chamomillæ vel anethinum cum lana admotum alio tempore tuo desiderio faciet satis. Operari vero hæc cuncta calore pariter ac vi obtundendi acrimoniam palam est, adeo ut spasmi, a quibus egressus materiæ antea impediebatur, posthac feliciter ab his relaxentur. Insuper vero hoc accidit, ut emolitione hac spasmio antehac correptarum fibrarum adstantium, humoribus peccantibus, jam jam e sedibus suis a calore pulsus, eo ipso commodissimum exstruatur diverticulum, cui inhærere aliquandiu possint. Mitius hinc meliusque incipit solenniter esse Odontalgia correptis, si gingivæ aut genæ, seu sponte id fiat, seu arte, spectabili inflentur tumore, nam quæ dentibus antea molesta erat materia ad externas nunc transferri partes, patet ad oculum.

§. XXXIII.

Rebelle si fuerit malum, & blandis his non aufcultat remediis, alia potentiora magis implorata juvabunt, nempe dissipantia dicta, quæ materiam nimis spissam discontinuant partim, partim fibras, quarum interstitiis infarcitur, ad ejiciendum hospitem hunc importunum stimulant. Eminent ex horum numero primo diaphoretica, quæ fusus supra parag. 22. licet ob alium, nempe evacuandi effectum exposui. Secundum locum merentur vomitoria, quæ pariter paragrapho 21. jam jam adduxi. Concutiunt autem hæc ultimo nominata vehementer totum adeo corpus, ut in remotioribus etiam partibus sæpe referantur obstructions v. g. uteri, hæmorrhoidum &c. Quare mirari non debet, si ad dentes factum humorum decubitus his quoque feliciter dissipari videas, quod ipsum ante hac jam jam docui fusus.

§. XXXIV.

Nunc sequuntur repellentia. Novi equidem Recentioribus quibusdam in totum negari hæc remedia, quoniam cum circulari sanguinis motu non bene conveniat eorum effectus. Sed cur non stante etiam hac doctrina, repellentibus inter remedia maneat locus, me fugit; inprimis si illis adhibeantur in casibus, ubi intra partium poros relaxatos ac extensos nimium, humorum hæreat copia. Dantur ergo remedia, quicquid etiam alii in contrarium dixerint, quæ

influxum

infixum firmitus humorem ejiciunt ac repellunt, præstantque id vel adstringendo vel refrigerando. Inter adstringentia primum meretur locum acetum simplex, quod GALENUS diu extulit, non minus ac STROBELBERGERUS, sed cum radice tormentillæ aut gallis decoctum, cui ad latus etiam jungunt rosarum rubrarum, cupressi, & myrti foliorum decoctum in vino factum. AGRICOLA & BARTHOLINUS solutionem aluminis, aut aquam simplicem sufficienter cum spiritu vitrioli acidulatam, commendant. Aliis eadem remedia, sub aliis tamen arrident formulis. Sunt quibus suffitus placent, ita ut per infundibulum ad dentes mittant fumum tacamahacæ, olibani, mastiches, gummi elemi, anime, ac succini &c. aut linteis solum eum excipiant & posthac genis applicent. Quidam in formam unguenti hæc reducant & gingivis imponunt, quæ formula BARTHOLINO in Historiis c. V. obs. 54. arridet, qui tale ex alumine usto, nuce moschata & melle parat. Hæc de adstringentibus. Quæ nunc sequuntur refrigerantia, pariter experimentis nituntur pluribus. Testem hic JOHANNEM HIERONYMUM PULVERIUM allego, qui aqua cum nive mixta, summos dentium dolores in pluribus se sanasse refert. Calculum huic ZACUTUS LUSITANUS obs. 80. lib. I. addit, militem, cui innumera antea, sed in cassum adhibita erant remedia, nive demum fortuito in ore detenta miraculose restitutum allegans. Quibus hæc ut vulgaria minus arrident, ex ROSENBERGIO *Rhodolgia* p. 333. albumen ovi cum aqua rosarum conquassatum sumant, illudque nunc cum stuppa cannabina buccæ dolenti imponant, aut si placuerit, in ore detineant.

§. XXXV.

Si nimia humoribus insit crassities, aut diutius stagnando ad suppurationem peccans pervenerit materia, nullus erit omnium horum usus, imo augendo dolores plus nocebunt quam juvabunt. Satiùs ergo tunc erit ea applicasse, quæ hos emmolliunt ac rumpunt tumores. Fusius supra de Emollientibus jam dictum, nunc ergo ruptioni abscessus inservientia dabo remedia. Meminit BORELLUS cap. I. obs. 86. aliquando dentium dolorem catarrhosum, ob pluvias immodicas, populariter fuisse grassatum, omnesque, qui ficum inversum gingivis admoverant, breviter fuisse restitutos, ad maturitatem scilicet gingivarum tumore deducto. Plura huic sacrata intentioni mittam nunc, & bina saltem de gingivarum tunica verba addam, quæ haud raro nimis existit crassa, adeoque non prompte adeo rumpi se patitur abscessus, quin aliquot sæpe prætereant dies, antequam ægrotautes miseri voti reddantur compotes, quod ipsum quoque, si pus nimia labore spissitudine, experieris. Tali igitur in casu, cum remedia nobis deficient, quæ prompte adeo emollire & rumpere hæc integumenta possunt, Chirurgica in auxilium vocanda instrumenta veniunt, quibus in momento scinditur tumor, via materiæ paratur purulentæ, dolorque simul omnis abigitur.

§. XXXVI.

Sed satis tandem sit dictum de remediis humorum acrimoniæ destinatis, quorum dum crevit præter intentionem enarratio, in reliquis brevior me esse decet. Si igitur frigus odontalgiam pariat, primum in thermanticis quærendum erit solatium, quorum binæ se iterum sistunt classes, potentialia nimirum & actualia. Potentialia sunt, quæ acri ac mordaci sua textura, tam vellicando sensatas solidas partes, quam exagitando sanguinem æque ac spiritus, calorem in corpore nostro augment. Refero huc aro-

Frid. Hoffmanni Oper. Supplem. II.

matica aliaque acria, quorum apparatus supra §. 26. abunde exposui. Pertinent etiam ad hanc classem vinum generosum, & vini spiritus, modo simplex, modo ab aromatibus abstractus aut camphoratus, quorum omnium vim Ant-Odontalgicam insignem infinita experimenta probant, licet modus applicandi diversus sit. Nunc enim Practici jubent, ut ipsis os eluatur, aut supra dentes dolentes detineantur, vel externe saltem cum linteis, buccis, ubi dolor est, imponantur. Thermantica actualia, utpote magis familiaria, frequentius quoque experta sunt. Vulgatissimum est, facculis calidis, floribus chamomillæ & sambuci infarctis, aut linteo quadruplicato calefacto, loco dolenti applicato, dentium pellere dolores.

§. XXXVII.

Si flatulenta in culpa fuerit materia, resolventia & carminativa omnem absolvant curæ paginam, adeoque cum virtus ultimorum in acrimonia quadam aromatica lateat, de illis vero alibi jam sit dictum, omittere eorum nomina cogor, ne crambe toties recocta nausea moveatur. Pergo hinc ad alia, quibus pariter vim flatus dissipandi non contemnendam inesse, quotidiana loquitur praxis. Innuo hic caleficientia sic dicta, quibus obex elasticæ huic substantiæ contra stans, spasmus puta, ex voto aufertur. Nec te terreat, si ad initium curæ, ad calida hæc applicata pessime se habeant ægri, modo enim aliquandiu continentur illa, raro Medicum deferent. Ratio hujus phænomeni est, quod ad initium magis expandantur flatulentæ partes a calore externo, si vero quis diutius ea applicare non grave ferat, tandem cessante fibrarum crispatura optatus sequitur effectus.

§. XXXVIII.

Nunc ad illa devenio Ant-Odontalgica, quibus vermium progenies, dentium rodens membranas, debellari potest. Agmen ex his dulcia ducunt, quibus adeo delectantur hæc insecta, ut ex suis haud raro latibulis prompte prorepent. Eminent inter illa mel, quod PECHLINUS in *Misc. N. C. Dec. I. anno 9. & 10.* ut specificum Ant-Odontalgicum allegat. Huc quoque mucus in pyloro ventriculi hærens pertinet, quem foemina quædam denti applicans dolenti, mire in evocandis his insectis proficuum annotavit. Testem si asserti desideras, JOHANNEM BURGIUM adire poteris, qui in eodem citato *Ephemeridum* anno pag. 435. seqq. fusius hanc historiam exponit. Nec alia operandi ratio sevo inesse cervino videtur, quod liquefactum linteoque exceptum vermes elicere, a rustico quodam Medicaastro BARTHOLINUS *Historia* 96. cap. 3. se didicisse refert. His in cassum usurpatis ad amara fiat progressus. Commendantur se tum absynthium, tanacetum, sabina, cortex fraxini, fructus halicacabi, myrrha ac aloes, & exin paratæ pestilenciales Ruffi pilulæ. Plura de hac materia si scire aveas, adibis RIVERIUM, SENNERIUM, SOLENANDRUM, CRATONEM A KRAFFTHEIM & *Misc. N. C. Dec. II. anno VI.*

§. XXXIX.

Adduci insuper adversus vermes semen hyosciami, tanquam remedium a tot Medicis decantatum, debet, quod sub forma suffumigii ad dentes mittitur. Constat namque vermes haud ferre salia volatilia, quæ tamen ex accenso hoc semine, & ex cunctis forsan aliis vegetabilibus, si in usum hac methodo traherentur, inter deflagrandum copiosissime exsurgunt, prout ad oculum fuliginis analysis chymica id

demonstrat. Non audiendus itaque est HOLLERIUS, qui ex hoc hyosciami seminis fumo in momento vermes generari docet, fallaciam non causae ut causae subesse putans, si vermes ab ipso evocentur. Certe nunquam talis imaginari potest vivi animalis generatio ex fumo scilicet aut flamma, nisi forsan ex fabulosa Pyraustarum aut Phoenicis avis familia istos quoque credideris vermiculos. Reliqua quae prostant Anthelmintica, & ex his mercurialia in specie, in odontalgia ut minus tuta, rejicio penitus, cum nunquam metallum hoc, nec membranæ, nec dentium nervi impune ferant.

§. XL.

Supereft adhuc ex odontalgiae causis dentium caries seu erosio consideranda. Concedit illa, uti jam monitum humoribus acribus, aeri puta frigidiori vermibusque, & inprimis alimentorum reliquiis, ad interioris dentium sensatas partes aditum. E re itaque nunc erit, ut illapsa peregrina corpora quanto citius extrahantur, aut si sordes aut reliquiae alimentorum mucaginosa adfint, studiose abstergantur. Quod si vero frigus subintraverit, calefacientibus, & si infensa vermium adfuerit praesentia, anthelminticis propicies. Cedere sic dolorem, & in illo saepius momento ac causae tolluntur, sed redire quoque celeritate simili, quamdiu porta causis istis patens fuerit, tibi annotare licebit. Recte ergo agunt, qui hunc aditum infaustum obstruunt, nunc cera alba sola, aut mastiche vel thure mixta, quibus alii pro consistentia magis firma concilianda, corallia rubra, stannum vel aurum bracteatum, gummi laccae aliaque admiscunt. Plura qui pro hoc desiderat scopo, ea apud RONDELETIUM in *Prax. libr. I. c. 83*. SENNERTUM *part. I. libr. 2. p. m. 262*. & WILLISIUM inveniet.

§. XLI.

Sunt autem, ut vides, haec ipsa tantum praeservatoria remedia, ipsa caries namque jam nata manet prorsus intacta; quare alio obviam ire remedium apparatu malo huic, necessum omnino habes. Equidem illuc quodammodo respexisse videntur, qui modo indicatis pro scopo obturandi & obstruendi dentium cavernas adhibitis, jungunt myrrham, aloen ac asphaltum, gummiata scilicet illa pro balsamandis cadaveribus olim usitata; vel ad imitationem DOLÆI in *Encyclopædia Chirur. pag. 529*. alumen & sal fossile cum melle subacta cavernis immittunt. Verum intentio horum licet optima sit, raro tamen respondentem habet effectum, quin potius caries haec ipsa eludat ac penitus spernat. Ea propter magis illorum arrident consilia, qui ad cauteria confugiunt potentialia non minus quam actualia. Potentialium nomine veniunt, quae caustica sua textura rodunt emortuas in dente partes, easque a sanis separant ac auferunt. Tale est helleboraster seu veratrum nigrum, ex commendatione RIVERII, vel decoctum radice lapathi acuti, quinquefolii ac lentisci cum aceto, vid. FORESTUS *lib. 13. obs. 6. in scholiis*. Irritus si & horum fuerit usus ad aquam fortem & regiam, spiritusque mineralium acidus, nitri puta, salis, sulphuris & vitrioli, ejusque oleum confugies, instillando erosio cavernis nunc guttam unam vel alteram, aut si acor forsan nimius tibi fuerit suspectus, mixtos hos spiritus cum saccharo vel melle simplici aut rosato applicabis. Praeentes habes CRATONEM A KRAFFTHEIM, MONTANUM, RULANDUM, QUERCETANUM, RIVERIUM, FABRICIUM HILDANUM & RONDELETIUM, qui ad unum omnes egregios horum effectus celebrant. Nec sine ra-

tione hac adhibita esse tibi persuasum sit, habent enim cuncta vim corrodendi in se maximam, unde cariem castigant, dentesque ab illa feliciter liberant. Insuper ipsas sensiles partes, quae intra dentium cavernas denudatae prius jacebant, corrodunt penitus & destruunt, unde immediate ab usu eorum magis exacerbantur nunquam non dolores, hoc vero superato insultu, consopiantur penitus ac cessant, quod vulgus exprimit: Das remedium heist den Zahn zu Tode. Circa applicationem horum unicum id observabis adhuc, ne gingivae aut dentium radices causticis his simul tangantur; quare proxime adstantia loca cera aut emplastro quodam accurate tegere consultum erit.

§. XLII.

Sed praeter cauteriis potentialibus actualia commendantur ab aliis. Olim jam HIPPOCRATES *de loc. affect. num. 5*. & RHASES ferrum candens extulerunt. GARIOPONTUS cupreum commendat clavum, quod ipsum tamen a nullo alio hucusque imitatum vidi. FONSECA *Tom. I. Consult. 46*. stilum aureum & argenteum ignitum suadet. Ast SENNERTUS & HOLLERIUS contrariam ex asse tuentur sententiam, haecque cauteria penitus damnant, urgentes exquisitum nervorum sensum, & ex eorum irritatione adeo importuna metuendam cerebri ac nervorum irritationem infaustam. Verum hoc quod sibi imaginantur periculum, tanti non est, quippe effectum ferri candentis felicem innumera Practicorum testimonia narrant, statimque ab ambustione omnem cariem simulque dolorem cessasse. Observabis tamen, ut hoc dentibus adhibeas remedium, statim ac nasci cariem videas, si enim jam jam ad radices usque penetraverit malum, voti vix fies compos, juxta Poetam enim,

*Sero medicina paratur,
Cum mala per longas invaluere moras:*

Conf. pluribus de hac materia SEVERINUS in *Med. effic. pag. 296*. Caeterum monendus est aeger, ut operationis tempore, ab aeris inspiratione abstineat torus: dici enim vix potest, quam insignis fauces ad suffocationem usque irritans foetor, ex ambustione putridi dentis exsurgat. Chirurghi vero de officio erit, ut inter operandum pedem suum patientis supponat pedi, ut premere illum, eoque signum dare possit hic, si alias forsan, vicinasque simul amburat partes, aut profunde nimium cauterium immittat. Vociferatione namque aut alio motu vel manuum aliarumque partium corporis indicare dolorem illatum sine periculo enormis ambustionis gingivarum aut buccarum nequit.

§. XLIII.

Ast si nec haec tibi arriserit operatio chirurgica, unica dentis evulsio manu dentifrangibuli expectanda adhuc supereft, quae nunc ope pelicani, nunc pedis caprini, nunc rostri corvini, (his enim nominibus diversa sua instrumenta salutare solet hoc genus hominum) fit. Observandae tamen haec sunt Dentario-Chirurgo cautelae, 1. ne in gravidis hanc temerarie administret operationem, admonitus a SALMUTHO, qui refert, aliquando gravidam quandam ocularem dentem sibi extrahi passam, paulo post foetum fuisse enixum sinistro destitutum oculo. 2. Observet, ne in aetate confectis eam molietur, senem enim subito & inter operandum in foro publico inde extinctum esse, FORESTUS indicat. 3. Caveat, ne dens eo tempore quo fluxio ruit ad locum affectum evellatur. Nec 4. violenter aut affatim trahat dentem, firmitus si iste mandibulis connexus fuerit,

rit, cum constet aliquando ex impetu tali cerebrum fuisse commotum, febremque excitatam periculosissimam, alioque tempore ossis maxillæ fracturam, pluraque alia gravissima æque ac periculosissima symptomata inde fuisse nata. 5. Attendat, ut dente evulso, gingivarum adstans caro, digitis undique comprimatur, & os ægri aceto vel vino austero eluatur. 6. Tandem prospiciat sedulo, ut omnem aeris frigidioris ad locum illum accessum, studiose arceat.

§. XLIV.

Multum præfero Chirurgicum hunc dentes exstirpandi modum illis remediis, quæ solum imposita aut admota dentes extrahere dicuntur. Laudat hunc in finem ÆLIANUS radicem lappæ, vermiumque terrestrium impositos cineres. LIBAVIUS grana mastiches & thuris commendat. *Ephemerides German. Decur. II. anno II. pag. 373.* fenum tabaci admisum extollunt. Verum, si fatendum quod res, mitiora hæc vix, ut dentes cadant, facere solent. Alii proinde acriora magis merito implorant. Miris laudibus extollit RIVERIUS lac ficulneum aut tithimalinum foliaque helleborastri, & radices ranunculi. JOEL gummi ammoniacum & galbanum in succo esulæ coctum suadet. Pastinacam cum helleboro albo PLINIUS, & radicem pyrethri in aceto maceratam GALENUS laudant. Cuncta vero hæc, ut ut prorsus negari eorum nequeat efficacia, merito tamen ex rationibus, tertio ab hoc §. allegatis, mihi redduntur suspecta.

§. XLV.

Hucusque remedia causis odontalgiae primariis sacra exposui, nunc illa, quæ dolori satisfaciunt, etiam in apicum ponenda sunt. Poscit illud lex mihi ipsimet §. 13. imposita, quo secundæ quoque indicationi in odontalgia fiat satis. Vocantur hæc anodyna seu paregorica, & spiritibus a dolore exagitatis, motum eorum sufflaminando, vel ut aliis loqui placet, eos ligando, succurrunt. Eminent ex his opium & inde parata, quibus ex hyosciami radice aut semine confecta, & papaverina quævis succedunt, quæ simili, mitiori tamen sedativa, vi gaudent. Optima sane & divina fere, si judiciose adhibeantur, hæc sunt remedia, doloresque, qui per longa jam temporis spatia, ad rabiem & extrema quævis deduxerant ægros, post breve tempus mitigant, concilians simul placidum diuque desideratum ab ægro somnum.

§. XLVI.

Modus applicandi illa variat, nunc enim externe, nunc interne solum adhibentur. Externe opium crudum calefactum ita, ut ceræ ad instar mollescat, MONTAGNANA *consil. 87.* denti dolenti circumponit. BARTHOLINUS *cist. Med. loco 31.* pilulas de philonio Romano loco affecto adhibet, quibus si haud succederint, granum j. opii PLATERUS adjicit. RIVERIO linimentum ex opio, myrrha & labdano factum, addita sufficiente vini albi quantitate, arridet. Interne laudanum vel liquidum vel solidum, aut theriaca, inprimis coelestis dicta, aut pilulæ de cynoglossa sufficient. Observetur tamen ne dosis sit nimia, inde enim indolentia perpetua, h. e. mors excitari potest, qualia tristissima exempla ALEX. BENEDICTUS *libr. 6. c. 13.* ZACUTUS LUSITANUS *Prax. admirand. lib. 5. c. 86. recensent.* Aliud adhuc monitum adjicit RIVERIUS, scilicet, ne opiata, nisi fluxione ad dentes jam jam sedata, exhibeantur. Sed hæc tanti non est cautela, cum ipsas has fluxiones opiatis hodie cohibere usitatissimum sit. Una ergo fidelia duos

dealbabis parietes feliciter, si prudens modo fueris.

§. XLVII.

Sed nec his semper stupefacientibus indiges, cum adhuc alio duplici modo sisti hic possit dolor, nempe vel per dolorem seu sensum tristem in alia parte excitatum, vel per imaginationes. Ex primo capite vesicatoria, item rubificantia, frictiones dolorosæ ac cæsiones extremarum partium cum urticis, aut ambustiones per moxam Sinensium aliasque res combustibiles, merentur laudem. Invitantur namque alliciunturque spiritus, statim ac dolor ab his excitatur remediis, ad læsum locum, & quidem sæpe tanta copia, tantoque impetu illuc feruntur, ut ulterius circa dentes sensum tristem dijudicare relictæ copię insufficientes sint, cumque toties hæc ipsa a quamplurimis Medicis salubria fuerint visa, dubitari ulterius de felici eorum experientia non debet. Confer observationes supra de vesicatoriorum usu adductas.

§. XLVIII.

Ex altero capite dolorem demulcere solent universa, quæ sentiendi principio alias imprimunt ideas. Avertunt ista similiter ac modo dictum spiritus, eoque ipso, ut nec ulterius sentiant accurate, aut priorem dijudicent molestiam, efficiunt. Novum non est in Medicina gravioribus animi commotionibus, atrocissimos omnis generis mitigari dolores, & tota hinc die, curæ morborum plurium unice fiducia in medicamentum aut Medicum fiunt. Fidem namque si adhibuerit æger pollicitationibus & persuasionibus, mox salva res erit. Hinc in tali casu vix quicquam adeo absurdi excogitari potest, quod non statim Ant-Odontalgicum fiat egregium. Hæc ne sine firmis Doctorum loqui videar testimoniis, præsto sint universa illa, quæ antiquis proprietate occulta agere dicebantur. Excellit inter illa os brachii vel tibie bufonis, quod solo tactu omnem dentium compescere dolorem, HELMONTIUS *tract. de mens idea*, perhibet. Sic juxta AETIUM, RHASEM, FORESTUM, DYGBÆUM, HARTMANNUM & alios, dolens dens curabitur, hominis mortui si tangatur dente. Ex eodem fundamento ungula avis, quæ vulgo *Roßdrommel* audit, dentiscalpii loco adhibita, sensum tristem sedat. DOLÆUS canis violenter interemti dentem, vel hyenæ extollit. Alii dentiscalpium ferreum, magnete prius aliquoties tactum, aut ligneam festucam ex sambuci, aut quercino ligno fulminis vi ab arbore decussam, aut de patibuli trabe abscissam laudant, *vid. STROBELBERGERUS de dentium Podagra.*

§. XLIX.

Hæc phantasiæ seu fiduciæ operatio se quoque in amuletis exerit. Commendat, ut Ant-Odontalgicum singulare hominis demortui dentem de collo suspensum GOCLENIUS *de mirabilibus naturæ.* Talpæ dentes a CASPARE JUNGELIO, lupi a MACASIO, & equi a SEXTO PLATONICO laudantur. Sargi piscis & Rhinocerotis arina GESNERUS magni facit. Alii cum CAMERARIO Molybdenæ frustum carpis alligant, vel Cervinum aut Picæ rostrum cum PORTA appensum suadent. Qui DIOSCORIDIS, SCHROEDERI & HEURNII tuentur auctoritatem, Lepidii radicem & gramen trium nodorum, vel corallam ex coralliis factam gestare jubent. His merito SYLVATICI annecto experimentum, quod *obs. 2. cent. 2.* adducit, referens, gentem Farnesianam, parvam quandam ferream possidere laminam, qua si infernæ aurium extreminates ad incalcescentiam usque fricen-

tur, certo & infallibiliter inde cessare odontalgiam. Alia nunc inscripta nempe membranæ carmina, aut characteres secum gestatos taceam, cum temporis & chartæ rationem habere cogar. Veniæ vero locum mihi futurum polliceor, quod ex dicta hac solum ratione operari talia externe adhibita credam, si enim hoc meum displiceat effatum, permittant quæso aliter sentientes, ut ingenue fatear, nullam

me prorsus aliam eorum operandi rationem comprehendere posse. Nam quæ de anti- & sympathiis loquuntur, præter pomposa ac grandifona verba, nihil plane, quod effectum exponat aut declaret, supeditant. Parum hinc abest, quin sympathetica remedia universa, quæ vim quandoque possident Ant-Odontalgicam, ex hoc unice agere capite, pronuntiem.

DISPUTATIO MEDICO-CHYMICA

D E

NITRO, EJUS NATURA ET USU IN MEDICINA.

Primum edita Anno 1694.

§. I.



MILES, qui hostem vincere cogitat, meritò de aptis armis sibi prospicere debet, ut non tam cominus quam eminus hostem strenue invadere, opprimere, & sic victoriæ palmam reportare queat. Inter hæc arma principem locum meretur pulvis nitratus seu pyrius dictus, qui stupendos effectus in dejiendis ac diruendis propugnaculis, hostium copiis profligandis ac fundendis edere solet. Medicus, cujus officium est insensissimos machinæ humanæ hostes morbos expugnare, profligare & procul arcere, in id quoque incumbere omni cura debet, ut armis aptissimis, hoc est medicamentis præstantissimis id præstet, ex horum censu non infimum locum quoque meretur ipsum *Nitrum*, quod efficacissimâ virtute delendi multorum morborum causas instructum est, modo ritè illud præparetur & circumspectè adhibeatur. Non dubitavi itaque loco speciminis disputatorii Nitrum ad manus sumere, illius naturam ac indolem explicare, annectendo simul præstantissimorum ex hoc medicamentorum præparationem & usum. Assistat divinum Numen ex alto nostris conatibus gratiofo suo auxilio.

§. II.

Communitè nomen Nitri deducitur à Nitria, Provincia Ægypti, ubi ex aqua stagnante Nili in istius tractus convallibus solis aestu arefacta colligitur. Alii vocabuli hujus natales è Græcia derivant, ut dicatur à *νίτρο*, eo quod abluendi purgandique polleat facultatè. Nec desunt, qui incunabula ejusdem in Latio ponunt, scil. ut Nitrum dicatur à Niteo, quoniam ipsius abstergens & saponaria virtus olim nota fuit, unde ipsius usus frequens erat in balneis. Sic dicit JEREMIAS cap. 2. v. 22. *Et si laveris te nitro, & multiplicaveris tibi borrib, tamen maculata es in iniquitate tua coram me, dicit Dominus Deus.* Ad quem locum commentando LYRANUS ait: Ni-

trum, quo utuntur purgatores vestium, dicitur à Niteo, quia facit vestes nitidas. Et JORDANUS dicit, si Nitrum terræ misceatur, abstergere ut saponem. Germano idiomate exprimitur *Salpeter*.

§. III.

Nitrum nostrum differt ab antiquorum nitro, quod est spuma nitri, quæ in antris & specubus subterraneis reperta fuit. Differt autem & illa spuma ab aphronitro, quod medium quoddam est inter nitrum & spumam nitri, uti annotat NIEREMBERGIUS in *historia Naturali* L. XVI. c. 29. Spuma Nitri, quæ rara ac candescens in meatibus subterraneis invenitur, & è muris deraditur, soboles est salis aërei, in lapidibus calcariam naturam habentibus coagulati, hæc spuma non tam sulphurea & inflammabilis est, quam ipsum nostrum nitrum. Aphronitrum, quod identidem ex ipsis specubus lapide calcario elaboratis generatur, est sal falsum leniter amaricans, solubile, minus autem inflammabile & oritur ex sale universali acido aeris concentrato ac fixato in fixioribus alcalinis lapidum particulis, quæ cum ipso sale acido intimè combinantur. Propter alcalinas lapideas particulas calcis naturam æmulantes aphronitrum insigni gaudet vi diuretica & expertissimum est medicamentum contra concreciones calculosas in tubulis renalibus existentes, dantur, qui medicinam universalem ex hoc aphronitro parare conantur.

§. IV.

Nitrum vulgare est sal falsum inflammabile, pyramidalem figuram habens, ex sale acido aëris catholico & particulis sulphureis volatilibus alcalinis ortum suum trahens. Sal est, quia dissolvitur in aqua & linguam sapore afficit. Dicitur sal falsum seu neutrum, quoniam acidum & alkali ita inter se in ipso temperata sunt, ut illud ipsum aptum reddatur, neutram, seu ab acrimonia & aciditate distinctam sensationem, salsedinem dictam producere. Acidum nitri patet ex ejus spiritu per destillationem elicitum, qui summè corrosivus atque acidus est. Alkali nitri patet ex nitro fixato, siquidem nitrum cum pulvere

pulvere carbonum mixtum & calcinatum constituit sal summè alcalinum, quod admixtione spiritus nitri transit iterum in nitrum, quod dicitur artificiale, manifesto indicio, ex acido & alkali nitrum esse conflatum. Cum sulphurebus sal inflammabile dicitur nitrum, quoniam carbonibus ignitis injectum accenditur, vel mixtum cum corporibus sulphureis v. g. cum antimonio in flammam inflammatur & in fumum abit. Per se quidem nitrum non sulphureum seu inflammabile est, quoniam flammæ admotum non ardet neque etiam diutius in crucibulo ignito contentum in flammam eructat; simul ac autem nitrum carbonibus ignitis injicitur, vel fortissimo igne in crucibulo tractatur, statim abit in flammam & deflagrat; ratio procul dubio hæc est, quoniam particulæ æthereæ elasticæ in nitro contentæ rigidioribus acidis particulis nitri nimis immersæ ac implicite sunt, ut fortissimus ac vehementissimus materiæ æthereæ motus sive ignis immediatè requiratur, qui ratione similibus particularum intricatum sulphur nitri, seu particulas æthereas elasticas fundat, liquefaciat atque ob adhærentes particulas salinas in fermentativum motum abripere possit: nimirum sulphure in motum incitato & adacto, particulæ rigidiores & solidiores salis acidi, quibus innexæ erant, cum vi & magno impetu disrumpuntur & perfringuntur, & quoniam propter soliditatem maximè resistunt elasticis æthereis, hinc motus fit vehementior, maxime ipsius aeris ambientis, qui ab impetuose motis particulis nitri mirum expanditur, dilatatur, hinc maximam acquirit potentiam, & quo magis aer compressus est v. g. in sclopetis & cuniculis subterraneis, eo fortiori vi pollet: ex hoc fluit jam ratio, cur pulvis pyrius accensus tantâ polleat efficaciam disrumpendi solidissima corpora, montes, saxa. Porro figura pyramidalis & prismatica nitro propria est, quam etiam semper in omnibus crySTALLIFICATIONIBUS retinet, quamdiu nitri corpus non est destructum, quamdiu autem inflammabile est, illam habet pyramidalem figuram, & è contra.

§. V.

Quod attinet ipsam generationem nitri, res sanè abstrusa & pluribus difficultatibus cincta est. Quemadmodum autem omnium salium varietatem ex universalissimo unico primigenito sale acido aeris pro diversâ admixtâ terrâ deducimus, & originem salium inde derivamus, sic quoque ipsius nitri generatio non ex alio fonte derivanda est, quàm ex ipso aëre, qui quasi sal universale, simplicissimum, æthereum ad acidi naturam accedens in se continet, quod pro variâ naturâ & indole terræ diversam induit formam ac naturam. Sic v. g. terræ sulphureæ petrosæ admixtum & cum ipso intimè combinatum constituit alumen; cum terra martiali vitriolum; cum alcalinâ sulphurea pingui, sal & ipsum nitrum, uti id artificiosæ salium ex aëre regenerationes, beneficio convenientis terræ seu suæ matricis, testantur. Quod autem nitrum pro matrice habeat terram alcalinam sulphuream, in quo coaguletur sal illud universale acidulum, patet, quia ipsa salia fixa, uti cineres clavellati, si diu stant in aëre, in sal quasi medium nitriforme abeunt. Quo magis autem illud sal alkali est sulphureum, eo majori in copiâ ex illo generatur nitrum; sic scorie antimonii sulphure antimoniali & sale fixo copiosissimo stipatæ, si diutius aëri exponuntur, nitrosos flocculos in magnâ quantitate emittunt, qui flammæ injecti inflammabilitatem suam produnt: eandem ob rationem, ad fertilitatem terris sterilibus conciliandam, gramina accenduntur, ut abeant in cineres & in sal fixum,

vel ipsæ terræ effœtæ liquoribus salis lixiviosi imprægnantur, ut sal in aëre contentum se in sale hoc alcalino figat, & nitrum, quod omnis fœcundationis primaria causa est constituat. Porro quando consideramus productionem nitri ex terris, patet, terras illas, quando destillantur igne aperto, semper fundere liquorem quendam urinosum, sulphureum, qui promptè ebullitionem & conflictum excitat cum quovis acido confuso. Imo observamus in illis locis, ubi nitrum maximâ in copiâ producitur, ut in agris *Halberstadiensibus*, terras esse admodum sulphureas, quæ tempore æstivo accedente sufficiente quantitate humidi teterrimum odorem, non absimilem illi, qui provenit in præparatione lactis sulphuris, emittunt. Et hæc etiam est ratio, quod illæ terræ, quæ imprægnatæ sunt excrementis & urinis animalium, utpote quæ copiosissimo sale volatili sulphureo pollent, ad nitri generationem sint aptissimæ.

§. VI.

Nitrum ob diversitatem locorum differt, unde non semper æquales obtinet virtutes. Quod sponte è terra erumpit & cirtra artificis opem habetur, de naturâ salis ammoniaci participat & copiosè colligitur, attestante POTERIO in *P. S. L. 2. c. 7.* in pluribus locis agri Bononiensis & maximè in montibus ad meridiem expositis; quo loco marcasita alba & citrina copiosè reperitur. Quod artificiosè ex muris & antiquis ruderibus colligitur, nihil quicquam de ammoniaci natura participat, *vid. & l. c. 15.* In India optimum reperitur nitrum grysei coloris, quod nostro nitro viribus multum antecedit. Cæterum discrepat tum ratione coloris, saporis, tum denique gravitate & levitate, partim ratione soli & virtute aquarum, in diversis locis stagnantium, quarum exhalationes in imbres desinunt, unde vel nitrosæ simpliciter, vel simul aluminosæ, vitriolicæ &c. partim naturâ terrarum, petrarum & lapidum, quas transeunt, unde vel argillosæ vel sabulosæ & arenae existunt.

§. VII.

Nitri natura clara & manifesta evadit, primò ex inflammatione seu deflagratione; omne enim nitrum carbonibus vivis injectum deflagrat, & quò magis purius est nitrum & ficius, eò deflagratio felicius succedit; quod si autem sal muriaticum immixtum sit, vel aliud terrestre principium, deflagratio minor fit, & dicta hæc heterogenea relinquuntur in ipso carbone, quare tali experimento optimè examen cum nitro institui potest, an purum vel impurum sit. Secundo nitri natura patescit ex figura prismaticâ & pyramidali, eleganter sanè aliorum salinorum exemplo, quicquid nitri est in certa particularum modificatione & configuratione quasi mathematicâ consistit, hinc quamdiu nitrum in crasi suâ non est destructum, tamdiu servat suam figuram, simul ac autem acidum vitrioli in præparatione arcani duplicati aut acidum sulphuris vel antimonii in sale polychresto aut nitro antimoniato cum principio nitri alcalino sese conjungit, spiritu nitri acido à terra sua ignis beneficio dejecto, figura nitri pyramidalis mutatur & vertitur in sexangularem. Tercio omne nitrum additione decenti vitrioli constituit aquam fortem, quæ nil nisi spiritus est, per fermentationem cum terra vitrioli summè sulphureus redditus, extraverso ipso sulphure nitri, quod foetore molesto penetranti manifestum evadit, & hæc est ratio, quare nitro fixo affusus spiritus vitrioli, vel omni nitro leniter alcalisato spiritus salis, vitrioli vel ipsum vitriolum admixtum sufficit tetrum odorem aquæ fortis: simul ac enim acidum

dum cum alcali miscetur, mutuâ actione & reactione sulphur nitri sive in acido, sive in alcali latitans extrahitur, exaltatur & subtilitur. Quod autem aqua fortis nil nisi spiritus nitri sit, in quo sulphureæ particulæ extraxerunt, patet exinde, quia tota aqua fortis destillari potest per alembicum, ubi remanet spiritus vitrioli, qui magis est fixus: deinde cum aqua forti æquè ac cum nitro, addito sale alcali quodam, potest fieri nitrum artificiale, tandem spiritus aquæ fortis non aliter ac spiritus nitri, addita sufficiente quantitate salis ammoniaci, abit in aquam regis aurum solventem: denique spiritus nitri destillatus super limaturam martis extemporaneam aquam fortem constituit.

§. VIII.

Porro ad nitri naturam cognoscendam facit & hoc, quod nitrum verum & genuinum cum tribus partibus argillæ mixtum largiatur spiritum acidum, qui formâ rubicundissimorum fumorum in recipiente visorum per destillationem prodit, quod peculiare solum spiritus nitri habet. Spiritus hic acidus corrosivus est volatilis, hinc non modo per alembicum destillari potest, sed & si in calore stet, evaporationi est obnoxius. Optimè autem ejus effluvia per evaporationes cognosci possunt, quia spiritus salis ammoniaci urinosis prope vitrum positus, in quo continetur spiritus nitri, fumos ac nebulas satis crassas producit, evidenti documento: spiritum nitri continuo emittere effluvia, quæ cum salinis volatilibus urinosis particulis mixta, & quasi in minutissimis particulis congregientia, constituunt fumum. Adhæc spiritus nitri hoc singulare fovet præ aliis spiritibus acidis, quod cornibus, ossibus & aliis animalium partibus affusus, summa flavedine illa corpora induat, quare etiam vesicam suillam, cujus beneficio custodiri solet in vitris, flavedine summâ tingere, illam simul corrodere solet. Hæc flavedo oritur à particulis sulphureis terreis, quæ cum spiritu nitri intimè commixtæ sunt, à quibus nanciscitur & acquirit non solum odorem aquæ fortis, verum etiam rubicundum in destillatione colorem, proinde si in spiritum nitri frustula cornuum creberrimè injiciantur, particulæ sulphureæ sese hisce apponunt: spiritus quoque nitri crebriori harum particularum segregatione per præcipitationem factâ, tandem prodit per destillationem limpidus, destitutus colore. Spiritus nitri compendiosè sine majori igne, saltim per arenam ex retortâ destillari potest, si nitro addatur sufficiens quantitas olei vitrioli, quo artificio etiam spiritus salis igne arenæ, ex sale communi elici potest: processum vide in *Laboratorio Ceylonico*, p. 162. Et notabile hoc est, quod caput mortuum hujus spiritus ex acidissimo oleo vitrioli & nitro compositum, cum debitâ quantitate pulveris carbonum mixtum & calcinatum constituat sal summè alcalinum, manifestò experimento, acidum facilè verti posse in alcali. Uterius spiritus nitri coagulatus in cretâ, constituit sal summè alcalinum in deliquium abiens, quod fortiori igne sublimatum in phiola constituit flores, qui aeri expositi lucem colligunt & phosphorum *Balduni* constituunt, propter sulphur in nitro latitans, quod matricem luci seu ætheri lucido in aëre undulanti præbet. Tandem eximia boni nitri nota est, si cum carbonibus vel corpore quodam sulphureo, v. g. antimonio, sulphure communi, igne fortiori abeat in nitrum fixum merè alcalinum.

§. IX.

Examinatâ sic genuinâ naturâ atque indole nitri,

restat jam, ut etiam inquiramus in ejus effectus, quos edere solet in corpora, maximè mineralia, imo in ipsum corpus nostrum humanum. (1) Itaque nitrum cum tartaro ana mixtum & in retortâ tubulatâ deflagratum constituit spiritum volatilem tartarifatum, qui etiam nomine Tincturæ *Ammelungii* venit, & per rectificationem dat sal volatile tartareum elegantissimum. Relinquitur per deflagrationem in retortâ tubulatâ caput mortuum nigerrimum, quod constat sale alcalino & dicitur *Schwarzer Sluß*, qui pulvis ad reducenda metalla ex mineris probatissimæ virtutis, & docimastis notissimus. (2) Nitrum anaticâ proportionem cum antimonio mixtum extrahit ejus sulphur emeticum, & sic crocum metallorum summæ in ciendis vomitibus efficaciam constituit; quod si autem tres partes nitri ad unam antimonii fumantur & calcinatio fiat, tunc antimonium in calcem penè effectam, orbatam omni sulphuris volatilis activitate redditur, quæ antimonii diaphoretici nomine venit. (3) Nitrum in arte docimasticâ summæ est efficaciam, utpote ab auro omnia heterogenea metalla, v. g. cuprum, stannum, plumbum, imo ipsum antimonium separare potest: hinc arcanum est aurifabrorum, aurum per antimonium fusum & regulinis particulis adhuc imbutum separandi ab antimonio, quod felicissimè efficitur per ipsum injectum nitrum, quo antimonium intimè auro adhærens calcinatur in pulverem album relicto auro purissimo. Sic parili modo quando v. g. Jupiter cum auro mixtus est, qui alias difficillimè separatur, & tractetur mixtura cum antimonio, quod Jovem imbibit, is iterum beneficio nitri facilè separari potest ab aureo corpore, quod semper ab omnibus operationibus à nitro intactum & illibatum relinquitur. (4) Nitrum non solum mixtum cum sulphure, antimonio, sulphure aurato antimonii, verum etiam cum sale ammoniaco, tartaro, & ipso Jove, quia ille summè sulphureus est, flammam concipit, si in crucibulum ignitum mixtura injiciatur. (5) Nitro fuso, si per breve temporis spatium immittantur ossa seu cornua durissima, illa statim friabilia & mollissima redduntur, ut pulverisari possint, & hæc calcinatio philosophica quasi est, brevissima & sicca, & idem præstat, quam quæ fit viâ communi, humidâ & vaporosâ. (6) Nitrum singulari vi pollet refrigeratoria, hinc non modo coniectum in aquam vel vinum, mirum in modum refrigerat, ita ut sæpe frigus ipsam nivem vincat, verum etiam glaciei vel nivi injectum ipsum nitrum efficit mixturam glacificantem, quæ in momento aquam suppositam in perfectissimam glaciem constringit & firmat, qualem effectum etiam edere solet sal commune eodem modo tractatum. Quare qui æstivo tempore potum palato gradum reddere intendunt, nitrum aquæ vel nivi commiscunt, cui vasa liquoribus repleta postea imponunt, qui inde redduntur frigidissimi. (7) Notabile est nitrum cum vitriolo veneris mixtum ipsi alias summè corrosivo præbere quasi dulcem saporem & omnem amaritiam metallicam ingratam tollere. (8) Ingentem vim habet fulminantem, non solum patet ex pulvere pyrio, pulvere fulminante, qui componitur ex nitro, sale tartari & sulphure, sed & ipso auro fulminante.

§. X.

Quod concernit ipsos effectus, quos edit in corpore nostro humano, vel etiam in liquores corporis nostri, (1) Nitrum solutum & sanguini mixtum eum diluit & reddit tenuiorem ac floridiorem: deinde balsamicâ virtute imprægnat, ut non facilè putrescere incipiat: quare nonnulli beneficio nitri norunt sibi conciliare elegantissimum thermometer ex

ex ipso sanguine humano. (2) Nitrum aquis immixtum pinguescere facit animalia, quod observavit VERULAMIUS, p. 529. Porro sitim sedat in febribus & perniciosos ardores compescit, alvum laxat, habet etiam vim diureticam & diaphoreticam nitrum, maxime in aestibus febrilibus & summo cutis ardore. (3) Libidinem exstinguit, delirium tollit, dolores compescit. Notatu digna est historia TIMÆI à GULDENSTEELE cujusdam extremè libidinosi, qui nitri continuato usu curatus fuit, ut sibi & aliis desierit esse molestus. (4) Abstergit & ulcera fordida & cacoethica, ipsam scabiem curat, de qua virtute potest videri LANGIUS, L. 2. *epist.* 4. p. 410. putredinem humorum arcet, imo ipsos vermes necat.

§. XI.

Omnes hi dicti effectus, quos exerit partim in metalla, partim in mineralia, partim in corpus nostrum humanum, adscribendi sunt singulari structurae & configurationi ipsius nitri, & ipsis particulis acidis volatilibus ac sulphureis ligatis in particulis terreis; superius enim satis docuimus nitrum esse corpus conflatum ex particulis copiosissimis sulphureis volatilibus acidis in terrâ quadam fixâ alcalinâ congestis & coagulatis. Deinde hæ particulae simul mixtae constituunt figuram pyramidalem oblongam, acutam, rigidam; hisce inhærentibus nitro dispositionibus debentur omnes effectus nitri. Propter particulas sulphureas, æthereas ligatas & intricatas, habet vim suam elasticam, expansivam, inflammatoriam, quod patet in pulvere pyrio & pulvere sclopetante, cujus omnis & principalis vis dependet ab ipso nitro, in quo aeris vis elastica quasi concentrata & coarctata est; porro acido & sulphuri debentur calcinationes ac destructiones metallorum ac mineralium, imò ipsorum durissimorum corporum, ossium & cornuum. Porro sulphuri volatili debetur spiritus nitri volatilitas, ejus color rubicundus in destillatione, flavedo quo imbuere solet partes animalium, itemque attractio lucis in phosphoro & quod per fermentationem exhalet teterrimum odorem & constituat sic dictam aquam fortem, quæ nil nisi spiritus est, in quo sulphur nitri per fermentationem extraversum. Porro figuræ oblongæ pyramidalis debetur, quod frigus promoveat & glaciem efficiat; Quoniam frigoris ratio consistit in quiete partium & motu rectilineo particularum minutissimarum, quem rigida ejusmodi & oblonga corpuscula facile conciliare solent. Præterea quod sanguinem reddat tenuem & fluxilem, atque insuper sudorem, urinam, ventrem moveat, obstructions referat, catarrhos abigat, sitim sedat & calorem præternaturalem extinguat, id unice debetur particulis acutis, oblongis, quibus crassa corpuscula incidit & resolvit, partim etiam particulis acidis, quibus subtilissimum sal volatile & particulas summe volatiles sulphureas figit, in motu sistit; hinc motus intestinalis, adeoque delirium, calores, dolores, vigiliæ, sitis &c. fiunt mitiores; uti enim à motu humorum adaucto præternaturalis calor, adeoque sitis, vigiliæ, delirium dependent; sic motu illo intestino depresso & sufflaminato, quod felicissime peragitur per particulas nitri rigidas & acutas, quæ ætherem in motu suo circulari adauctum sistunt, cætera dicta omnia tolluntur.

§. XII.

Perspectis itaque non solum naturâ, principiis constitutivis ac modo agendi sive operandi nitri, restat ut de usu ejus medico aliquid insinuemus. Nitro jam olim usi sunt summi medicinae antistites.

Nitri inter medicamenta, maximè autem lapidis prunellæ apud HIPPOCRATEM quater fit mentio, nimirum semel in libro 3. de morbis: bis in lib. de internis affectionibus, & in l. 1. de morbis mulieris adhuc semel. It. Lapis prunellæ PLINIO fuit notus l. 31. c. 10. (2) Igitur si velimus motum intestinum inflammatorium, furibundum ac vehementissimum humorum & sanguinis sistere, sicque sitim, delirium, calorem præternaturalem, seu symptomata ab illo dependentia dissipare atque abigere, nitrum vulgare saltem purum & ab omnibus aliis heterogeneitatibus separatim optatius longeque felicius id præstat, quam omnia alia ex hoc præparata medicamenta: imò ipsi præfertur lapidi prunellæ. Quandoquidem lapis prunellæ jam deperdidit quantitatem ætherei acidi salis & degeneravit quodammodo in alcali, quod patet exinde, quod lapis prunellæ mixtus cum acido spiritu effervescentiam edat: igitur ubi acidi peccant humores, ejus usus magis est proficiuus; interim ad sitim sedandam & calorem præternaturalem extinguendum nitrum simplici modo purificatum, longè præstantius est ipso hoc lapide prunellæ. Optimus hinc fit pulvis ex coralliis rubris & lapidibus cancerorum si sumantur ana ad drachmam unam, nitri purificati scrupulus semis: in omnibus præternaturalibus fermentationibus atque ebullitionibus sanguinis, capitis doloribus, febribus acutis & inflammatoriis præstantissimi effectus est. Nonnulli tingere solent ipsum Nitrum cum succo papaveris rhœados vel ad majorem aciditatem præstandam cum succo berberum, effectum haud contemnendo. Alii etiam, ubi nim. nimii ardores sunt, saccharum saturni ad pauca grana admiscere solent, idque egregium effectum habet in deliriis, furore uterino, maniâ, &c. (β) Arcanum duplicatum & nitrum antimoniatum, quod sexangulari figura gaudet, egregium quidem abstersivum, incidens & deobstruens sal est, minimè autem tantos edit effectus in extinguendo calore præternaturali, quam nitrum purum. (γ) Quoniam nitrum fluxum alvi causari solet, hinc ejus usus vitandus est in illis morbis, ubi adsunt diarrhœæ & alvi fluxus: notabile tamen hoc est, quod ipsum nitrum aliquoties observatum fuit alvi fluxum sustulisse, qui alias febribus inflammatoriis, petechialibus, variolis supervenire solet, utpote hic fluxus plerumque oriri solet ab inflammatione tunicarum intestinalium, quam egregiè tollunt ipsa nitrosa. Ad præcavendum autem alvi fluxum optimè nitrosa miscentur cum terreis, coralliis, terra sigillata, antimonio diaphoretico, theriaca celesti &c. talis pulvis quàm commodissime etiam dari potest in ipsis dysenteriis & diarrhœis, quæ ab inflammationibus ortum suum habent. (δ) Nitrum quàm optimè miscetur cum ipsa camphora, v. g. Rec. Nitri purificati scrup. unum, camphoræ gr. iii. Misce, Fiat pulvis: talem pulverem mirè commendant RIVERIUS in *praxi* & CRAANIUS passim in *praxi* ad extinguenda deliria, melancholiam hypochondriacam, ad malignitatem arcendam in febribus, ad calorem præternaturalem dissipandum, imò ipse D. D. PRÆSES non satis laudare potest hujus pulveris efficaciam in omnibus inflammationibus & febribus inflammatoriis, delirium extinguit cum calore p. n. sudorem colliquativum curat, & sitim sedat. Camphora, quæ sale volatili oleoso pollet, per se sumpta sæpè omnia symptomata febrilia auget, motum intestinum humorum acuendo; mixtura autem nitri quoniam resolvit, incidit, motum intestinum humorum sistit, effluviis suis volatilissimis malignas heterogeneas particulas ex sanguine dissipat, & per poros apertos excludit, sicque ejus vis mirum intenditur & cicuratur admixtione ipsius nitri. (•) In personis

nis frigidis, fenibus, catarrhosis & in quibus sulphur sanguinis paucum & calor natus debilis & appetitus dejectus, nitrosa fugienda vel cautissime propinanda sunt, aut si propinanda, semper admiscenda sunt aromatica vel olea calida, sic enim nitri vis refrigeratoria aliquomodo refringitur. Hic etiam notandum, quod illi qui frigidioris sunt stomachi in calido, qui calidioris in frigido vehiculo pulverem nitri sumere debeant. vid. LAURENT. HOFFMANNUS *de usu & abusu med. chymicor.* p. 135. (ζ) Nitrum singularem vim obtinet purgantium drasticorum acrimoniam corrigendi, hinc nitrum præparatum mixtum cum purgantibus illa corrigit & noxam, quam talia purgantia affricare solent ipsis corporis partibus, tollit: hinc optimus est pulvis talis, v. g. R. Nitri purificati gr. vj. diagrydii sulphurati, resinæ jalappæ ana gr. ii, antimonii diaphoretici gr. iii. Misc. F. Pulvis, qui innoxie humores vitiosos educit & in illis morbis, ubi calor etiam p. n. præsens est, commode propinari potest citra ullum incommodum. (η) Cum lapidibus cancrorum nitrum mixtum additis pauculis guttulis olei juniperi, evadit summè diureticum & lithontripticum, ad calculos renales abigendos aptissimum.

§. XIII.

Præterea nitrum externe egregium medicamentum est, si misceatur cum sale armoniaco, & solvatur in aqua: ista aqua non solum scabiem curat, sed & ulcera cacoëthica sanat, & fistulas mundat & abstergit, tumores frigidos dissipat. Deinde nitrum in spiritu vini solutum, additâ camphorâ & spiritu salis ammoniaci, exsurgit medicamentum externum, quod in erysipellate capitis & aliarum partium, in inflammationibus, arthritide præsentissimum est topicum; in aqua rosarum si nitrum solvitur addito oleo ligni Rhodii & camphora, egregium fit epithema ad capitis dolores molestissimos abigendos. PARACELsus nitrum cum aceto rosaceo ac succo fem-

pervi mixtum, in omnibus inflammationibus ad demulcendum calorem & narcosin inferendam mire commendat, *in p. VI. p. 151.*

§. XIV.

Tandem ex nitro possunt etiam varia præparari medicamenta Chymica. Spiritus nitri propter corrosivitatem non amplius in usu est, magis expetendus est dulcificatus, qui emergit ex commixtione & destillatione spiritus nitri & spiritus vini rectificatissimi; prodit Spiritus elegantissimus odore sulphureo volatili seu violaceo imbutus, qui cum syrupo papperis rhædos mixtus oculis gratissimâ rubedine tingitur, & in omnibus morbis nervorum, sanguinis ebullitionibus & impetuoso spirituum animalium motu egregiam præstat opem. In colica & torminibus ejus usus optimus, si ad unum cochleare assumatur cum aquâ carminativâ. Porro ex nitro & tartaro, addito spiritu vini, fit spiritus anticolicus *Michaëlis* summe volatilis ac penetrans: Spiritus nitri dulcis cum spiritu tartari & cornu cervi mixtus egregie evadit diaphoreticus, in omnibus morbis, ubi diaphoresi opus, maximè proficuus. Si spiritus nitri dulcis parum acidulus affundatur coralliis, exurgit inde Tinctura coralliorum flavescens, amaricans, omninò elegantissima, quæ in epilepsia, scorbuto, in malo hypochondriaco, variolis & aliis ebullitionibus sanguinis, excellentissimum habet usum: si paucae guttulæ liquoris Martis adduntur, summè rubicunda evadit, & tinctura Martis coralliata exurgit, quæ in omnibus morbis, ubi martialibus opus est, egregie se exerit. Atque hæc sunt, B. L. quæ impræsentiarum de Nitro breviter dicenda fuerant: Tui erit, omnia æquâ judicii lance perpendere, & sicubi fortè in aliquibus erratum fuerit, illa æqui bonique consulere. Tibi verò, ò DEUS immortalis, immortales ago, pro immensâ huc usque mihi præstitâ gratiâ, grates.

DISSERTATIO MEDICA

SISTENS

SACCHARI HISTORIAM
NATURALEM ET MEDICAM.

Primum edita anno 1701.

I. N. I.



OLI mirari, L. B. quod eorum haud premam vestigia, qui cum HELMONTIO usum Sacchari, salium suavissimi, non tam commendare, quam è foro Medico ferè penitus exterminare annituntur. Alii namque uti gratissima ejus dulcedine pro demulcendo palato multum alliciuntur, ita ego abusum potius sacchari ab usu legitimo probe discernens viribus ipsius mire delector non contemnendis. Nempe cum speciminis inauguralis vice aliquid mihi literis consignandum fuerit, placuit vel ipsa Sacchari commoda & incommoda attentius considerare, ita tamen, ut naturam ejusdem, generationem, differentiam, selectum atque producta excuterem prius. Benedicente proin Numine supremo ac favente Lectore benigno, sit.



CAPUT I.

THEORETICUM,

Sacchari indolem, genesin, discrimen, selectum atque producta exhibens.

§. I.

Sacchari vocabulum cum multis aliis, quibus Medicorum antistites vel corporis nostri affectus praternaturales, vel remedia etiam solent efferre, in Latium e Græcia migrasse videtur, dum τὸ σάκχαρ apud GALENUM, apud DIOSCORIDEM τὸ σάκχαρον legere est. Equidem non desunt, qui referentente JOH. HENR. MEIBOMIO (a) τὸ σάκχαρ ab Hebræo שֶׁכֶר *Schechar*, inebriativum, quod à שֶׁכֶר *Schachar*, inebriari, descendit, malint derivare, quia talis ex Saccharo parari queat potus inebrians, Græcis etiam hinc σίμερα, & Latinis Sicera dictus. Verum hæc ratio tunc demum fortassis obtinebit, quando omnia concreta, è quibus potio aliqua inebriativa fermentationum adjumento valet produci, titulo Sacchari indigitabuntur; prout liquorem etiam in specie vinosum, e pomis pyrisve elicatum, Galli hodie *Cidre*, *Frid. Hoffmanni Oper. Supplem. II.*

Angli *Cider*, & Itali *Cedra*, appellitant. Mox tamen in limine, antequam ipsam sacchari naturam distinctius evolvam, vexata illa quæstio, num antiquorum Saccharum cum nostro, quod adhuc in usum revocamus, pro uno eodemque debeat haberi, eo magis à me paucis ventilanda venit, quo plures ferram contentionis circa eandem strenue reciprocare, aliique pro affirmativa, pro negativa alii pugnare observantur.

§. II.

De negantium qui stant partibus, præeunte imprimis MANARDO (b) urgent prolixè silentium quam plurimi ex antiquis Naturæ-Consultis, & quod illi, qui adhuc videantur habuisse aliqualem ejus cognitionem, sæpè nec de nomine ejus genuino, nec de forma, nec de materia ex qua, nec de modo fiendi, nec de usu & effectu &c. sint certi, sed ubique hæreant, hallucinentur & labantur. Quoad nomen enim, (ut ex multis pauca solum apponam) mel dicitur arundinaceum (c), aut Cannæ (d), & Sal Indus (e); quoad formam, duplici sub facie delineatur, vel fluida paululum (f) instar mellis, vel sicca magis satisque solida (g) consistentia, sic ut dentibus frangi non sine aliquali vi debuerit. Ad materiam modumque fiendi quod attinet, a quibusdam pro mellis sive mannæ quadam specie habebatur, a sole, cogente rores, in talem dulcedinem producta (h), hinc illi non aliter ac manna in Apulia & Calabria

Mmm

Calabria

(a) de Cerevisiis c. 2. §. 52.

(b) in suis Epistolis passim.

(c) ab Archigene.

(d) Avicenna L. 4. tr. 2. c. 8.

(e) Paul. Aeginet. l. 2. c. 54. Avicenn. l. c.

(f) Dioscorid. l. 2. c. 75. Plin. l. 9. c. 8. Galen. l. 7. de Sim-
pl. med.

(g) Dioscorid. & Plin. l. c.

(h) Galen. l. c. Alexand. Aphrodisæus. L. 2. problem 74.

Calabria supra ornum & fraxinum ex rore delapso, ita Saccharum in certis arundinibus nasci docebant (i). Alii tamen dulce hoc corpus ex ipsa quidem Canna derivabant, sed non nisi solarium radiorum ope ex medullari illarum substantia per fissuras ad internodia & passim factas, evocatum, in lachrymas gummosas primum, tandemque in solida hujusmodi corpora, cantum saccharum æmulantia, converti arbitrabantur (k). Et sic quoque circa usum & vires veritatis à tramite aberrarunt, nam cum in copia adeo exigua se sisteret hoc corpus veteribus, parva aut nulla ejus habita est cura, solumque alvo idoneum est creditum (l) & ut sitis ejus ope falleretur (m).

§. III.

Hæc tamen argumenta non obstant, quo minus affirmativam sententiam amplectantur alii, quorum antesignanum si dixerò VALERIUM CORDUM (n), à vero vix declinaverò. Impugnant autem hic MANARDUM viribus omnibus, omniaque ejus emissæ tela eludere audent. Ad primum namque argumentum, à silentio quorundam Autorum nullam valere consequentiam ad ignorantiam absolutam, respondet, cum ad infringendam vim ejus satis sint testimonia DIOSCORIDIS, PLINII, GALENI &c. ab ipso adversario jam adducta. Nec aliter sentiendum de altero autumat; Saccharum enim a nonnullis mel cannæ & falem Indum dici nihil referre, quod rem unam variis insigniri appellationibus novum haud sit, neque Sacchari & Zuccari denominatio negligatur ab aliis. Et licet primo intuitu plus inesse roboris videatur dubio tertio, figura tamen sola cum merum sit accidens, rursus nec exinde ignorantia Sacchari satis probabitur; notorium quippe esse, Saccharum partim mollioris aeræ texturæ, quale hodie existit Thomæum, aut quale à prima statim succi Cannæ Sacchariferæ inspissatione obtentum, ac teste AMAT LUSITANO (o) in utribus inclusum de loco ad locum Lusitani primitus transferebant, partim maxime quoque solidum haberi, quale ab ipso adversario adducitur, Canti nunc fusci, nunc albi nomine communiter veniens; utrumque nihilominus, h. e. tam molle, quam solidum nec nomen nec indolem ea propter deponere. Atque sic tandem de quarto & ultimo judicium ferens, ordinarium id esse reponit in cunctis rebus noviter inventis, quod vires & usus non penitus sint perspecti, ab insufficienti tamen minusque accuratæ efficaciae cognitione omnimodam ejusdem ignorantiam, quam Autor intendit, minimè colligi posse.

§. IV.

At enim verò quamvis haud abnuam ex responsionibus CORDI satis patescere, qualitercunque Saccharum innotuisse antiquis, adeo tamen manca, mutila ac imperfecta quoad omnia hæc notitia, ut jure rectius dixeris, nihil plane scivisse ipsos de hoc nostro concreto; Inprimis vero errorem sapit maximum, quod de modo generationis instar mannæ fabulati sunt; ex asse namque contrarium isti contingit concreto à radiis solaribus, dum statim, ac ho-

rum sentit attactum liquefcit & disparet, uti *ἀπορ-της* testis, SYLVIIUS BOCCONE (p), fufius id recenset. Neque facile quis probaverit, num ista Canna, quæ antiquis dabat Zuccarum, sit ea ipsa, ex qua hodie elicitor Saccharum, quoniam descriptio illius non respondet huic, quam hodierni rerum exoticarum secretarii exhibent. Provoco ad AVICENNAM, SERAPIONEM (q) aliosque Arabes, qui clarè satis nec quoad magnitudinem, nec folia, imò nec quoad nomen arundinis Sacchariferæ veræ Alhaffer (sic enim salutant Cannam, ex qua Zuccarum transfudat,) innuunt convenire. Quare probabile est, illam speciem (r), ab Indis Mamba & a Lusitanis Bambou dictam, quæ proceritate populum arborem superat, internodiaque habet tam capacia, ut loco doliorum navigiorumque facile inserviat incolis, ab antiquis fuisse intellectam, veluti à qua adhuc hodie medullam dulcissimam reddi, lachrymamque fundi Zuccaro antiquorum plane respondentem, quam Tabaxar voce Persica & Sacchar Mambu dicunt, attestantur PISO (s), LINDSCHOTTEN (t), PALUTANUS (u), GARZIAS (v) alique.

§. V.

Sed missò antiquorum Saccharo, missis itidem iis vitrioli speciebus ac salibus, quibus ob aliquam dulcedinem nomen sacchari indiderunt Chymici, dum v. g. vitriolum saturni & sal aliquod aluminosum saccharum saturni atque aluminis (x) vocant; de nostro potius officinarum, in cuius gratiam hæc exarantur, convenit esse sollicitum. Indolem autem hujus satis expressisse mihi videor, si concretum illud asseruero salino-sulphureum, ex cannæ Sacchariferæ succo per reiteratas inspissationes ac depurationes paratum, apparens nunc in forma sicca & solida, in metas vel crystallos coactum, nunc tanquam pulvis plus minus siccus aut glebosus, sub colore albicante plus minus aut fusco, saporem maximè habens dulcem. Sicut enim Saccharum alias Pharmacopæorum sal consuevit (y) audire, quod in horum laboratoriiis usum eundem ac in culinis sal commune, præstet egregie; ita & titulum eundem intuitu texturæ meritò gerere, sal sulphureum revera existere, varia declarabunt, quæ ejusdem vel cum aliis salibus congruentiam vel ab ipsis etiam discrepantiam non obscure persuadent.

§. VI.

Scilicet salium si proprium habeatur, in aqua dissolvi, saccharum consortio salium adscribi omnino meretur, quia molecularum aquearum impetum, quem hæc & ratione ponderis & ratione motus instantini jugiter exerunt, instar meræ terræ, merique sulphuris quæ ab aqueis menstruis nequaquam discernuntur, sustinet, sed omne in homogeneous redigitur liquorem. Saccharum hinc in aqua solutum post convenientem hujus evaporationem more aliorum salium, præcipue essentialium, in elegantes concrefcit crystallos, in Saccharo canto, de cuius præparatione §. 13. agetur pluribus, satis conspicuas; quemadmodum & sacchari genesis ipsa cum essentialium, quæ

(i) Manard. Fuchsius.

(k) Dioscorid. & Plin. l. c. Amat. Lusit. in Dioscoridem.

(l) Dioscorid. l. c.

(m) Galen. & Aegineta l. c. Avicenn. Canon. l. 757.

(n) in Dioscorid. l. 2. c. 104. de Saccharo p. 36. & seq.

(o) Comment in Dioscorid. l. 1. p. 227.

(p) Euriðe Anmerkungen obs. 1.

(q) vid. Matthuol. in Dioscorid. l. 2. c. 75. p. m. 314.

(r) Clusius Hist. aromat.

(s) Mantiss. Arom. p. 187.

(t) Navigation. S. Itinerar. c. 58. p. 66.

(u) In Annotat. ad hunc Lindschotti locum.

(v) c. 12.

(x) Schroöder pharmac. l. 3. p. 282. & 471.

(y) Wedel. Pharmac. in art. form. redact. p. 108.

quæ dicuntur, salium e vegetabilibus productione ad amissum convenit. In destillatione porro sacchari, nunc spiritum acidum, nunc ardentem acquiri, prout vel siccum, vel fluidum ac fermentationis ope reclusum examini ignis subijcitur, inferius §. 15. itidem innuetur, indicio evidenti, saccharum, si non totum sal, de sale tamen multum participare; de quo ulterius vix dubitare poterit, qui laticem sacchareum recenter expressum, ultra diem haud durare, sed mox acescere, PISONI (z) atque MARGRAVIO (a) habuerit fidem. Et sapor denique sacchari gratissimus annon de salinorum corpusculorum præsentia tanto certius fert testimonium quanto luculentius, absque principio salino nullum dari saporem, ab aliis passim demonstratum?

§. VII.

Ingenue nihilominus fatendum, nonnulla in Saccharo occurrere, quæ peculiare sal, sulphureum ipsum esse, sicque à reliquis differre, manifesto evincant. Flammam quippe dum Saccharum liquefactum seu fusum, ubi copiosiores particulae aquosæ cum nonnullis salinis exhalavere, concipit, refinam magis seu sulphur quam sal mentitur, corpusculisque salinis particulas phlogistas & terreas, uno verbo, sulphureas quam plurimas esse admixtas prodit. Salia reliqua spiculis suis rigidis acrimoniam organo gustus imprimunt. Saccharum autem ob moleculas acidas a sulphureo-terreis in exactiori proportionem ac in saccharo Saturni temperatas, adeoque ob spicula perquam flexilia à LEEUWENHOECKIO (b) ob servata, linguam sapore titillat dulcissimo. Neque visciditas, quæ saccharo soluto sensorio tactus adhærescit, alia insuper corpuscula, quam sulphureo-terrea in Sacchari destillatione oleum foetidum constituentia, ostendit, cum pulvis aliquis mere terreus, v. g. ebur ustum non nisi ab instillatis cujusdam olei guttulis deprehendatur viscidus. Ratione demum coloris, magna quidem saccharo albo cum salibus intercedit conformitas, fuscum tamen, propter texturam, pauciores luminis radios minusque vividè ad oculos nostros reflectentem, oppido ab iisdem discrepat. Verum ad generationem Sacchari differentiamque prope- randum, quo reliqua pariter in definitione ejusdem proposita patefiant.

§. VIII.

Ut genesis itaque rite evolvatur, liceat omnium primo verba facere de materia sacchari ex qua, h. e. arundine saccharifera. Jam superius monitum est §. 4. reperiri in India, tam orientali, quam occidentali; aliquam Cannæ sacchariferae speciem, Mambu dictam, præaltam, adpectu amœnam & admodum crassam; sed hæc usui isti minime impenditur. Neque illa arbor adhibetur, quam luxuriare in Insula Zeylon refert Saar (c), cujus nomen est Hakra, utut succo dulcissime turgeat, imo substantiam quandam nigram sacchariformem incolis præbeat, qualem dulcem succum etiam suggerunt Cannæ Sinicæ, populari lingua Rotang, & a PISONE (d) Roting dictæ.

Frid. Hoffmanni Oper. Supplem. II.

§. IX.

Unice igitur canna seu arundo illa Indica apta deprehenditur ad isthoc opus, quam *νατ'ίζοχην* Sacchariferam appellant Botanici (e) Germanice *Zucker Rint oder Zucker-Rohr*. Media est hæc Canna inter milliaceas & arundinaceas plantas, exsurgitque quoad caulem, solenniter ex flavo viridescentem, magnitudine sex vel septem pedes, crassitie vero raro tres pollices superat. Secatur in internodia plura quatuor digitorum interslitio plerumque à se distantia. In summitate coronatur pluribus foliis bicubitalibus plus minus acuminatis, sursumque erectis, panniculamque producit adinstar arundinis sagittariæ, medullam habet solidam, succulentam, dulcem, albam, radicemque obliquam, quodammodo dulcem & succulentam (f).

§. X.

Inculca provenit in variis tum orientalis, quum occidentalis Indiæ locis, latius tamen crescit accedente cultura diligenti. Id verò si in animum sibi sumunt incolæ, seligunt ante omnia terram pinguem ac glebosam, eamque planis in locis positam, utpote quæ magis ad hoc opus apta observarunt, quam montes & colles. Scindunt hanc vomere aut aliis instrumentis ferreis in rectos ac æquali distantia inter se distinctos sulcos, quibus postmodum imponunt arundinem, terraque obtegunt, copiosiori quidem æstate, propter intensiorem solis æstum, quam hyeme. Singulare autem est, quod sulcis istis in agris Surattinis pisciculi, gobionibus nostris fluviatilibus similes, committantur prius, quam cannarum taleæ ipsæ, quasi hac ratione memorante THEVENOTIO (g) generosior proveniret arundo immediate iisdem instrata, atque ad singula alias internodia germen aliquod seu novam cannam protrudens. Cannam progerminantem ab herba, ne nimium hæc luxuriaret, singulis tribus vel quatuor mensibus eo usque purgant, donec in magnitudinem debitam adoleverit. Id quod pro soli habitudine octavo, decimo vel duodecimo a plantatione mense fieri affolet, (h) quemmadmodum & tempus plantationi ipsi commodum pro locorum diversitate variat, dum in Brasilia v. g. mensis Januarius vel Augustus seligitur (i), in Insulis autem Caribibus quodvis anni tempus eidem aptum traditur (k). Neque dubium est, quin & in Insulis Canariis, Lusitania, Hispania, Sicilia, Creta, Cypro aliisque locis, in quibus Saccharifera itidem Canna seritur, certam rationem, certumque & plantandi, & metendi tempus observent Incolæ.

§. XI.

Hinc, ut ipsum Sacchari conficiendi modum persequar, arundines maturas in primo geniculo vel super hoc etiam rescissas (l) ac a frondibus mundatas in fasciculos & acervos, æque ac nostrates frumenta, Indi reponunt, curribus vel equis ad molendina quam primum transportandos. Molendina ejusmodi, rotis gravissimis imprimis axibus ligneis, circulis ferreis obductis ac perpendiculariter erectis constructa, jumentis vel aqua versant, dum inter

M m m 2 axes

(z) Histor. Nat. Brasl. l. 4. c. 1.

(a) Brasl. l. 2. c. 8.

(b) Agar. & Coenopter. P. 1. n. 16.

(c) In 15. Jährigen Ost-Indischen Kriegs-Diensten fol. 72.

(d) Maubl. Aro. nat. c. 11. p. 188.

(e) C. Bauhin. Pinax l. 1. f. 3. p. 18.

(f) Marggrav. Brasl. l. c. Barlæus de rebus gestis sub C. Mau-

ritio in Brasl. p. 120. Rajus Histor. p. 1278.

(g) Ost-Indische-Reise l. 1. c. 14.

(h) Rajus l. c.

(i) Piso. l. c.

(k) Hugsius Medic. Americ. p. 29.

(l) Hugf. Medic. Americ. p. 30. Pomet Histor. Simplic. p. 94. Piso Histor. Brasl. l. c.

axes fasciculos arundinum assidue inferunt, axiumque se contingentium angustia ita comprimunt, ut liquor promanet dulcissimus, à vasis suppositis per canalem ligneum, oblique derivandus in inferiorem cacabum æneum amplissimum. In hoc, igne modico substructo, leviter primum ebullire sinunt succum, quo spuma tantum sæculentior & copiosior, pecoribus in victum cedens, secedat. Successive mox eundem succum in secundum ahenum, tertium ad sextum usque, proportionaliter humiliora, latiora tamen, memorante HUGESIO, transfundunt, igneque vehementiori, partim depurant, hunc in finem forti etiam lixivio calcis vivæ (m) in cacabo secundo addito, partim in consistentiam eam caute inspissant, qua in fictilibus vasis, metas aut pyramides referentibus, possit concentrari atque salis instar granulati concrefcere. Porro formas tales fictiles in apice perforatas ac luto munitas, ubi succo plus minus fluido implevere, ordine asseribus perforatis in aliis ædibus (Casa de purgar vulgo) aut ollulis imponunt superioremque partem latiore luto albicante pariter tegunt. Tandem elapsis viginti quatuor horis per apices adapertos mellagineum effluentem syrupum, sub fusco qui antea colore Saccharum infecerat, nomine Melaffos in vasculis excipiunt, saccharumque coagulatum è formis excutientes candidum à nigricante, Moscovadò dicto, secernunt ac in frustra redactum probe exsiccant, donec cistis veniat recondendum. Apparatum tantum non omnem PISO figura, elegantiori autem POMET curavit exprimi.

§. XII.

Ex dictis quamvis abundè elucescat, quanto labore quantoque molimine saccharum elaboretur ab Indis, ad Europæos tamen delatum vix tantæ puritatis reputatur, quin solutionibus novis, despumationibus, clarificationibus, atque nunc fusionibus in pyramides, nunc crySTALLIFICATIONIBUS habeat opus. Unde cum ingens sacchari occurrat varietas, dubiumque emergat, quodnam saccharum altero in Medico usu præstet, lubet potiores ejusdem differentias ita percurrere, ut figuræ externæ depurationisque potiorè quam loci natalis, rationem habeam. Ad externam nempe figuram sacchari attendens, pyramidale aliud, aliud farinaceum, aliud cantum deprehendo, quemadmodum depurationis intuitu non tantummodo idem cantifatum, sed & saccharum vel crudum seu non finum, vel finum seu refinatum adest. Pyramidale, nostratibus *Hüt-Zucker* audiens, ab ipsa meta sive modulo pyramidalis, in quo fluiditatem cum soliditate mutavit, mutuatur nomen, pro diversitate tamen locorum, a quibus ad nos transmittitur, maxime diversum. In forma enim indigitatà prostant quidem tum saccharum Maderense & Canariense, tum Valentinum, Melitæum & Thomæum; sed Maderense & Canariense, ab Insulis Canariis, quas fortunatas olim vocabant, in specie, à Madera & Canaria transmissum, una cum Valentino adhuc nobiliori, quod Valentia Hispanorum conficitur, multum nobilitate saccharum & Melitæum & Thomæum antecellunt, quorum hoc sive Thomasinum, Germanicè *Thomas-Zucker* / ab Indiæ occidentalis Insula S. Thomæ denominatum, colore fusco seu subruffo gaudet, illud au-

tem, sive Melisium, Germ. *Melis* - vel *Speise-Zucker* Insulam Melitam, vulgo Maltham, pro patria agnoscit, atque Thomæo purius adhuc candidiusque existit. (n)

§. XIII.

Saccharum farinaceum, farinæ crassioris plus minus glebosæ formam præse ferens, miscellaneum quoque & confusaneum, & aromatariis vulgò *Cassaun-Zucker* appellatur, quod farrago sit quisquiliarum seu reliquiarum cujuslibet sacchari, speciatimque ea pariter fragmentula tam fusca quam alba comprehendat, quæ in India cistis (Germ. *Kasten*) recondi atque in Europa magis depurari sub finem §. 11. & princip. §. 12. fuit traditum. Hoc ipsum quippe sacchari genus maximè illud est, quod in forma pulveris grumosi sive glebarum, præter pyramidale Thomæum & Melitæum, ob impuritates copiosius admixtas appellationem sacchari crudi seu non fini meretur; cum titulum è diverso fini purive, seu finalis, quasi puritatis & candoris finem ac apicem acquisiverit, tam in specie Valentinum fortiatum quam in genere quodvis aliud, quod alibi, v. g. in Batavia, Hamburgi &c. nova sacchari in calcis vivæ lixivio solutione, despumatione, albuminis ovorum conquassati medio instituta, atque in metas transfusione uberius depuratum, i. e. refinatum fuit, pro refinationis gradu & ipsum discrepans. Solum superest saccharum cantifatum, quod non tam a candore candum aut candidum, quam ab angulis Cantum aut Cantium esse vocandum, quia Recentiores Græci *κάντι, καντόν ή κάντιον* dixerunt, probè monent LINDANUS (o) & SALMASIUS. (p) Atque tale saccharum Cantium, German. *Zuckerandt* / tum candidum, tum fuscum seu subruffum, crySTALLIFICATIONI suas debet natales. Pro candido namque Saccharo Canto Saccharum Canariense vel finum, pro fusco autem Thomasinum Saccharum in aqua solvunt, solutumque ad crassioris syrupi consistentiam inspissant, quem in ollam fictilem injiciunt, in qua bacilli lignei cancellatim ac decussatim fuere aptati. Ollam super asseri in loco calido repositam quindecim aut viginti dies relinquunt, tum syrupum non concretum effundunt, ac paucam aquam calidam ad elevandam syrupi pinguedinem effundunt, qua denuo effusa reponunt vas in loco calido, & die sequenti frangunt inveniuntque bacillos saccharo Cantio sive crySTALLIFATO onustos. (q)

§. XIV.

Sed quid de selectu Sacchari nunc dicendum esse videtur, num in tam multiplici ejusdem varietate unum genus præferendum alteri? certe si puritatem spectemus, non solum unum genus altero, sed & una eademque species altera præstat. Sic tam in genere omni cantifato & refinato prærogativam tribuunt præ crudo, quam in specie e Canario cum CORDO (r) eligunt, quod nivis instar candidissimum, aridissimum, minime lentum aut pingue, sed malleo percussum in solidas partes diffiliens, dum dentibus atteritur, cum strepitu quodam crepans, atque si resolvatur ac despumetur, aqueam claritatem habens; è Melisso, quod tam intus, quam foris candidissimum; è Thomæo, quod pingue, densum, candidius, & quod non adeò lentum & contumax fractu

(m) Piso atque Pomet l. c.

(n) Sebizius de Aliment. Facult. p. 521. Schroöder. Pharm. l. c. Mylius Basilic. Chemic. l. 6. c. 4.

(o) Select. Medic. p. 275.

(p) Exercit. Plinian. c. 52. p. 718.

(q) Renodæus Pharmacop. L. 1. S. 1. c. 5. Mylius Basilic. Chemic. l. 6. c. 4.

(r) Histor. Stirp. l. 4. c. 111.

estu est, cum mallo percutitur. Usus tamen medicum si respiciamus, de Sacchari quidem cantii eminentia nemo hactenus dubitavit, de refinato autem harent nonnulli, (s) quia acrimoniam quandam à calcis vivæ lixivio adscivisse videatur. Verum verius rectiusque alii (t) reponunt, quod finum Saccharum eò minus propter lixivium calcis vivæ sperni debeat, quo tenuius ac volatilius ejus habeatur sal, noxam nullam inferens. Adeoque refinatum Saccharum non refinato & Medici anteponunt, quandoque nihilominus crudum quoque adhibentes, prout imprimis circa commoda sacchari mox in capite altero indigitabitur, ubi ejusdem adhuc præparata in medium produxero.

§. XV.

Præparatorum Sacchari nomine haud alia hic intellecta cupio, quam quæ vel arte chymica ex eodem hucusque elaborata fuerunt, vel ubivis etiam in Pharmacopœorum officinis elaborantur. Ex omnibus tamen non nisi spiritum, acetum, oleum siue liquorem, & de saccharis compositis, elæosaccharis, conservis &c. perpauca commemorasse mihi sufficiat, ne rationem conficiendi tot infinitas confectioes sacchareas, quales in Pharmacopoliis prostant, magnam etiam partem inutiles, è dispensatoriis exscribendo, Lectori moveam nauseam. Spiritum non minus acidum suggerit saccharum, quam ardentem: si saccharum namque vel per se, vel pro ebullitione cohibenda cum arena, aut in aqua solutum & à lateribus candefactis imbibitum, aut cum dimidio florum salis ammoniaci, destillationi exponatur, in receptaculo cum phlegmate & oleo foetido acidus colligitur spiritus, concretis terreis æque ac metallicis solvendis proportionatus (u). Si liquor autem sacchari destilletur vinosus, quem e sacchari v. g. libra una, in sex vel octo libris aquæ soluta, post cochleare unum recentis fermenti cerevisiæ adjectum, per fermentationem acquirunt, prodit spiritus ardens fortissimus (x). Acetum cui placet, potentissimum pariter intra breve tempus è saccharo impetrabit, aceto vini per omnia simile, modo omnem materiam fermentantem in calore continuo servaverit seu communia addiderit, quæ vino in acetificatione addi solent (y). Oleum seu liquor potius sacchari obtinetur, quando spiritus vini saccharo canto pulverisato ad digiti eminentiam affusus accenditur atque ad crassitiem syrupi efflagrat. (z) Quam sacchari quintam essentiam, quemque lapidem ex eodem vegetabilem jactant alii (a) lubens transeo, quod processus ejusmodi ænigmatici oedipum requirant lectorem, me autem haud fugiat, saccharum tantum vel finum a spiritu vini rectificatissimo solvi nequaquam, nisi in rubram ejusmodi massam, seu resinofam magis, igne colliquatum fuerit, cujus Magnificus D. D. PRÆSES, Patronus meus atque Præceptor omni observantiæ cultu ætatem prosequendus, ad mechanicam saporis & odoris genesis confirmandam, itidem injicit mentionem.

(b) Frid. Hoffmanni Oper. Supplem. II.

§. XVI.

Ex compositis saccharis, non tam penidium, nec rosatum, violatum &c. quam ambratum eo magis proponere liceat, quò mirabilius fragrantia ab ambræ gryseæ scrupulo uno ad libram integram sacchari refinati absque sensibili molis decremento transfertur, postquam in hujus pulverisati medio reconditum, ac in loco calido vaseque probe obturato per aliquod temporis momentum asservatum fuit (c). Dum eadem autem ambra grysea, saccharo canto alias interveniente quæ in essentiam redigitur, (d) saccharo adjungitur borraginato, cardiacum nonnullorum cœleste (e) constituit, æque potens, etiam si auri folia omittantur. Elæosacchara uti olea accedunt destillata cum saccharo incorporata, (f) ita a sacchari fini vel canti uncia una ordinario scrupulus unus vel drachma dimidia olei destillati, nunc unius, nunc multorum solet excipi, ut tanto commodius ejusmodi olea cum liquoribus aquosis combinentur. In specie nihilominus elæosaccharum citri vel aurantium gratius nonnemo (g) sibi comparat, succum ipsum è nominatis corticibus expressum pulverisato saccharo admiscendo. Conservæ denique cum à simplicium conservatione in saccharo denominentur, sola plerumque trituratione vegetabilium recentium humidiorum, in pulpam redigi aptorum, parantur, eo majori quantitate sacchari adjecta, quo succulentiora hæc fuerint, (h) secus ac nonnullis (i) videtur. Elegantiores tamen atque efficaciores conservæ è succo aliqujus vegetabilis rite evaporato, floribus, foliisque tenellis conquassatis, atque oleo stillatitio adornari valent; (k) prout Experientissimus etiam D. D. PRÆSES conservam rosarum palato gratiorem fieri docet, (l) si folia pro amaritie eluenda ferventi immittantur aquæ, atque manibus denuo expressa in aqua rosarum, in qua saccharum solutum, debite coquantur.

CAPUT II.

PRACTICUM,

Sacchari commoda & incommoda ostendens.

§. I.

Sacchari commoda jam & incommoda tradituro, quamplurima quidem emolumenta ejus mihi observantur, a præsentis tamen scopo, quæ prolixius enumerentur, aliena. Haud enim est, cur multum expendere velim, vel fortunatum earum insularum statum in quibus saccharum in nostrum primum conficitur usum, vel amplissimos etiam redditus, in summum earundem imperium tenentes qui inde redundant. Satis constat eas reliquias, quæ à secunda saccharei liquoris expressi ebullitione remansere, loco

M m m 3

victus

- (s) Tabernæmontan. Herbar. l. 1. c. 41. Mœbius instit. Med. l. 4. c. 3.
 (t) Angel. Sal. Saccharolog. Patt. I. c. 4. Tackius de Aurō, p. 15.
 (u) Schroöder l. c. Hoffmann. Clav. Pharm. Schroöd. p. 598. Lemery Curs. Chym. Edit. 9. p. 522.
 (x) Becher. Physic. subterr. l. 1. Sect. 5. c. 2. p. 578. Sala Saccharolog. p. 2. c. 5.
 (y) Becher. ibid. p. 579. Sala ibid. c. 13.
 (z) Schroöd. ibid.
 (a) Joh. Isaac. Hollandus Oper. Vegetab. Tr. 2. Mylius Basilic.

- Chym. l. 2. c. 10. Khunrath Medull. Destillat. p. 1. Tr. 163.
 (b) Demonstrat. Phys. Curios. 42.
 (c) Salmon Pharmacop. Bat. L. 1. c. 20. n. 7.
 (d) Lemery Edit. cit. p. 434.
 (e) Salmon. ib. n. 1.
 (f) Wedel. Pharmac. in art. form. redact. p. 161.
 (g) Barchausen Pyrotoph. p. 313.
 (h) Wedel. ibid. p. 110.
 (i) Schroöder Pharm. l. 2. c. 48.
 (k) Le Mōrt. Pharmac. Medic. Phys. p. 116.
 (l) In Not. ad Poter. p. 219.

victus mancipiis sufficere, tam improbos in parando saccharo labores exhaurientibus; præter acetum autem, vinum sacchareum atque vinum adustum, è primo itidem liquore expresso quæ concinnantur, ab omnibus incolis expeti avidissimè (a). Quis de ingentibus autem redditibus, quos a saccharo Superiores reportant, dubitaverit, qui in insula Jamaica sacchari quotannis vel ducenties mille libras elaborari à Richardo Blome (b) resciverit. Multo minus de fructu ero sollicitus, quem pistorum dulciarii saccharum in innumeras quotidie cogendo, pinfendo, fingendoque formas, aliisque idem cum fructibus in varia potuum exaltando genera affatim capiunt (c). Unice siquidem machinæ nostræ corporeæ omnium artificiosissimæ, vel in integritate conservandæ, vel a labe reparandæ, intentus vix alia sacchari indagare jubeor commoda, quam quæ ad utrumque istum finem colliment.

§. II.

Verum videlicet sacchari usum, a Medico trutinandum, dixero, si hoc, aut alimentum, aut medicamentum, aut condimentum utriusque, dixero. Facultas quippe alimentosa & medicamentosa cum nihil absoluti, sed meram involvant relationem sive habitudinem, qua aliquod concretum ad corpus nostrum vel conservandum, vel restaurandum refertur, nullum video obstaculum, quo minus utramque de saccharo, æque ac de oryza v. g. milio, amygdalis &c. liceat prædicare. Et certe alimentum primo denominari saccharum meretur, cum aptum existat, quod à liquore gastrico promptè ac rite subactum tam ratione particularum sulphurearum ipsas rubicundas massæ sanguineæ moleculas adaugeat, quam ratione texturæ viscidæ particulas lymphæ gelatinosas, roridas & omnium maxime nutritivas refarcat. Qualem sacchari cum humoribus nostris universalibus convenientiam abunde omnino Indorum comprobant mancipia, quibus in saccharo conficiendo strenuè occupatis non aliam alimoniam suppetere, quam remanentias sacchari, jam dum §. proximo indigitatum fuit. Ne porcos a crassioribus sacchari facibus & mirandum in modum pinguescere, & carnem adeò delicatam & sapidam contrahere memorem, ut gallinacea haud inferior in agrorum victum cedat optime (d). Neque sine hoc saccharum penitus excidit, etiamsi apud nos vicem condimenti magis ciborum obtineat, horum nonnullos, v. g. e vegetabilium fructibus, tum gratiores, tum concoctu, ut loquuntur, faciliores reddendo. Num veritate autem nonnullorum (*) innitatur assertio, quod nullum cibi genus condimentum sacchareum respuat præter intestina, a quibus saccharo conditis non alium odorem, ac à recentibus boum excrementis exhalari, in medio relinquo.

§. III.

Sed plura longè circa alterum nunc venient monenda usum, quo Saccharum morbidis hinc inde in corpore nostro dispositionibus, vel ut remedium, vel saltem ut vehiculum remedii, porro inservire

asserui. Etenim ad experientiam non minus quam ad texturam concreti saccharini §. 6. & 7. cap. 1. evolutam sedulo attendens, multiplicem potius, non simplicem in saccharo virtutem medicamentosam videre videor, generali partium nostri corporis divisioni respondentem, simulque aliquam rem, quam toto genere præternaturalem vocant, respicientem. Clarius ut eloquar, saccharum nunc solidas partes fauciatas conglutinare, nunc humores varie alterare, nunc spiritus animales afficere, nunc in lumbricos denique acre deprehendo, tot egregias sacchari virtutes uberius ac distinctius eruendi paratus.

§. IV.

Respectu solidarum partium, quas κατ'ἑξοχὴν quondam titulo partium honorabant, (e) ante omnia traumaticas saccharo adjudicavi vires, jure optimo ab ejusdem visciditate derivandas, prout vulgo fabri lignarii in vulneribus etiam conglutinandis glutine vulgari consuevere uti. Solo quandoquidem saccharo ingentia vulnera sanari novum haud est (f); nec Turcæ talem ignorant efficaciam, dum vulneribus recentibus, postquam vino absterfa fuerunt, saccharum dicuntur inspergere (g). Et quid solennius, quam in foeminis lactantibus mammillarum papillis, quo dolorosæ fissuræ deleantur, vel saccharum tantum, vel liquorem hujus adaptare (h). In ipsis autem ulceribus, in quibus aliqua partis sive substantiæ mollioris jactura facta, qui detergens una & sarcoticum desideraverit medicamen, saccharum thomæum eò aptius adhiberi poterit, quo felicius ejus medio ulcus virgæ a CUMANO, aliaque ulcera fistulosa a SPIGELIO ad sanitatem leguntur perducta (i). Quo itidem spectat, quando pulvis aliquis terreus scaber cum saccharo canto commixtus vel albicantem in cornea oculi cicatricem (k), vel maculam tunicae conjunctivæ (l), dicitur abradere, in puero tamen cicatriculam aliquando, à variolis in oculo sinistro superflitem, solo saccharo canto, superficiem corneæ lævigante, novi sublatam.

§. V.

Hinc ratione humorum vim varie alterativam saccharo haud licebit denegare, quod tum humori tenuiori inspissando, tum acri temperando, quandoque & viscido incidendo atque è corpore ejiciendo habeatur proportionatum. In principio nempe raudedinis atque tussis, ubi lymphæ glandulis tenuior ac salior exsudat, ac laryngem irritando molestiam creat, vulgus etiam in saccharo canto, lympham talem commode inviscante, ac temperante, præstantissimum quærit invenitque levamen. Eodem pariter modo, si lachrymæ in epiphora atque opthalmia stillent acriores, ex optato saccharum tantum confert, sive simplex, sive, quod LINDANUS (m) præfert, joviale, longa ejus in vase stanneo trituratione ad lividum colorem redactum. Nec dispari rationi in phthisi aliquando saccharum prodesse videtur, dum CRUGERUS (n) & se ipsum ex mesenterii apostemate hæcticum, & alios, ex pulmonum ulcere phthysicos, sola rosarum conserva, cum

pti-

(a) Piso Histor. Nat. Brasil. l. 4. c. 1.

(b) In descriptione Insularum & Regionum Americanarum Angliæ Regi subjectarum, recensita in Act. Eruditor. A. 1689. p. 147.

(c) Sebitz. de Aliment. facult. L. 2. p. 526. & Jonston. Hygien. p. 218.

(d) Scaliger de subtilitat. Exercitat. 164.

(*) Pisanellos de Aliment. Facult. p. 243. G. Horn. in Arc. Mos. p. 51.

(e) Bartholin. Anat. Reform.

(f) Misc. Acad. Nat. Curios. Dec. 2. A. 4. Obs. 9.

(g) Staricius im Felden Schatz p. 2. 531.

(h) Velschius in obs. Cumani p. 76.

(i) Velsch. ib. p. 85.

(k) Nuck. Experim. Chirurg. p. 38.

(l) Purmannus Chirurg. P. I. c. 16.

(m) In Colleg. M. S. ad Prax. Hartmann. c. 32.

(n) M. A. N. C. Dec. 2. A. 4. obs. 9.

ptisana hordeacea vel multo lacte haurienda, servavit in vivis. Ut multos alios (o) fileam, miris encomiis rosarum in specie conservam recentem in curatione phthysicos extollentes.

§. VI.

Circa acidum fortassis primarum viarum hærebunt plerique, num & huic infringendo saccharum opponi tuto queat. Verum perpendenti vinum austerrum ac acidum a sacchari admiscela adeò edulcorari posse, ut haustu evadat salubre (p), non adeò videtur improbabile, ipsum quoque ventriculi acidum præternaturale, imprimis levius puriusque seu pinguedinis consortio vacans, a suavissima sacchari dulcedine temperiem admittere. Unguis forsan oculorum atque pannus eatenus à saccharo canto & Canariensi removentur (q), quatenus ab utroque acidum & austerum coagulans irretitur; quale quid fortassis etiam accidit, quando beneficio pinguedinis viperinæ unguiculi una nocte curati fuere (r). Insigni sanè præjudicio laborant, quot, saccharum vel ex eo, quod ipsum intra se aliquod acidum recondat, tantum non ubique jubeant exesse; quasi & panis, acidum in sinu suo fovens, exulare deberet omnis, nec dulcedo gratissima acidum in saccharo fatis a corpusculis terreis & sulphureis contemperatum patefaceret (s). Dulcedini tamen qui fidere renuit, intueatur velim sacchari cum lacte miscellam, an hanc ulla concomitetur coagulatio, consideretque ulterius, quam merito sacchari cum lacte connubium præcipiant alii (t), ne in ventriculo hoc acefcat. Curiosum omnino habetur problema: Cur saccharum lacti injectum omnem ab hoc butyri secessum coagulationemque impediat; quod nihilominus non tam a putatio sacchari alcali, uti G. HORNIUS (u), quam a viscido, pingues in lacte moleculas æque strictè cum salinis & aqueis connectente, ac in corpore alias nostro assumptorum particulæ oleosæ cum salinis & aqueis a bile & succo pancreatico viscidis uniri solent mallem deducere.

§. VII.

Ast quomodo vis sacchari incisiva & laxativa a me demonstrabitur? omne quidem sal ritè usurpatum visciditatem humorum attenuando resolvit, omneque falsum in majori paulo dosi ingestum sufficientique aqua dilutum parietes una intestinorum vellicando ad excretionem contentorum stimulat. Saccharum tamen cum peculiare sal existat, dulce, non acre, conglutinans potius, inviscans atque contemperans, vires incidentes atque laxantes vix exeret, nisi aut spiritus ejus, sive acidus, sive ardens, destillatione fuerit prolicitus, aut oleum sociatum, vel fermentum extraneum saccharo soluto adjunctum, aut saccharum denique impurius adhibitum, clysmatis loco inferiori gutturi infusum. Spiritus videlicet Sacchari acidus, uti extra corpus nostrum duriorum concretorum compagem dirimit, ita & assumptus in nostro corpore pituitam plus minus viscidam, more aliorum acidorum, comminuit (x); qualis effectus à spiritu quoque sacchari ardenti; item ab elæo-Sac-

charis, ratione oleorum destillatorum potenter incisivorum, haud frustra expectatur. Ipsum autem saccharum nudum, ut in nostro corpore in fermentationem motusque laxativos erumpat (y), tum copiosius humidum, tum fermentum extraneum ideo requiritur, quod saccharum aqua dissolutum non æque promptè fermentescat, ac ubi fermentum aliquod associatum, vel saccharum ipsum cum succo aliquo vegetabili, fermentationis motum jam inchoante, commixtum fuerit. Fermenti istiusmodi vices sacculentia aliquando obire poterunt in saccharo impuriori superflites, veluti quod magis nauseosum intestina magis stimulat citiusque in fermentationem abripitur. Unde thomæum saccharum cum clysteribus injectum non solum instar purioris sacchari viam lubricando, sed & abstergendo (z) operationem suam videtur absolvere.

§. VIII.

Verum relictis viribus, quas Saccharum in humores nostri corporis edere deprehenditur, inquirendum porro venit, annon saccharo spiritus animales erigendi competat efficacia. Fateor talem vim evidentius longè observari in Saccharo ambrato, in vino spirituque vinoso è saccharo paratis, atque elæo-saccharis, quam in saccharo simplici quocunque, exquisite licet refinato vel crystallisato. Si opio tamen virtus assignari meretur analeptica, (a) quod suavi sensatione ventriculum afficiat, non video, quidni major spirituum animalium corroboratio à provido usu sacchari, gratissima titillatione & palatum & ventriculum demulcentis, debeat sponderi. Et sanè non quævis analeptica spirituum animalium quantitatem adaugere, sed pleraque gratâ interveniente sensatione vel motum eorundem seigniores suscitare, vel impetuosiores consopire videntur. Qua ratione a nostro quoque saccharo spiritibus animalibus aliquod addi robur tanto minus dubito, quanto sensibilius ab eodem dolores subinde deprehenduntur sedati. Sic colicos namque dolores à sacchari cum oleo amygdalarum dulcium deglutitione placatos; sic cephalalgias urgentes à solo saccharo vertici insperso cum fructu lenitas observarunt, forsan quod utrobique rigida membranarum contractio suavioris sensationis occasione cessans viam denuo aperuerit spiritibus animalibus per nerveas fibras sine molestia influendi.

§. IX.

Tandem ut constet, quomodo saccharum in lumbricos tanquam verum anthelminthicum operetur, neutiquam verò eosdem ex veterum sententia producat, tres lubet referre hypotheses, quas amicâ qui voluerit copulâ combinare, vix me dissentientem habebit. Etenim Celeberrimus AUTOR (b) postquam præconceptam opinionem vulgarem quasi in tenellis corpusculis a saccharo pullularent vermes, meritò perstrinxit, saccharum atque saccharata saturandorum lumbricorum gratia commendat, ad tempus quò quiescant. Alii tamen (c) saccharum in vermibus ipsis enecandis mirum valere observant, & ne exceptioni pateat locus, insignem talem sacchari virtutem

M m m 4

(o) Valesc. de Tarantal. 3. c. 11. Valleriola l. 5. obs. 5. Thiermaier. Consultation. p. 137.

(p) Riedlin. Lin. Med. A. 3. p. 122.

(q) Dolæus Chirurg. p. 191. & 192.

(r) Wedel. Amœnit. Mat. Med. p. 133.

(s) M. A. N. C. Dec. 2. A. 4. obs. 9.

(t) Baglivus de Prax. Med. l. 2. c. 11. p. 244.

(u) In Arca Mosis p. 198. 210.

(x) Lemery l. c.

(y) Pechlinus obs. p. 357.

(z) Pifo l. c.

(a) Jones in mysteriis opii recens revelatis, c. 17.

(b) In Dissert. de Remed. Anthelminth. §. 14.

(c) Redi in observationibus circa animalia viventia, quæ reperiuntur in animalibus viventibus p. 112. Nicol. Andry de Generat. Vermium. c. 9.

tutem anthelminthicam evidenti experimento Clar. REDI comprobatur, dum eos lumbricos, quos tincturae aloes aqua factae indidit, post effluxum viginti quatuor horarum etiamnum vivos, eos autem, quos saccharo itidem aqua soluto immerfit, post duas quatuorve horas extinctos deprehendit. ZAPATA (d) magnam demum sacchari in vermibus eliminandis praedicat efficaciam, cum à multis solius sacchari rofati ope plures excretos viderit lumbricos, qui aliis remediis cessere nullatenus.

§. X.

Si saccharum itaque, salium gratissimum, tot tantisque viribus pollet, quot luculenter haecenus ostensae fuerunt, nunquam in castra Helmontii licebit transire, qui (e) aliorum quoque remediorum virtutes à saccharo immutari & retundi, adeoque nec vehiculi quidem partes in medicaminum distributione saccharum sustinere posse, universaliter clamat. Reclamant omnino saccharata cuncta quotquot debitis observatis circumstantiis a celeberrimis Practicis quotidie solent praescribi cum successu. E magna horum catervâ duo tantummodo in praesenti prodeant: Syrupus alterum, alterum electuarium. Syrupum Experientissimus, nunquam sine honore nominandus PRÆSES suppeditet balsamicum, fragrantissimum & gratissimum, è Balsamo Peruviano, aqua hordei & saccharo certis enchirilibus paratum; Electuarium autem antipyreticum SYDENHAM famigeratissimum sui temporis Practicus, (f) suggerat è cortice peruviano atque syrupo rosarum aliove concinnatum. Provoco jam ad experientiam, an decantata corticis Chinae Chinae virtus febres profligandi velamento syrupi alicujus alterata sit atque hebetata, numque Balsami de Peru virtus balsamica combinatione Sacchari mutetur & deprimatur, annon exaltetur potius. Utriusque certè viri immortalis nominis experientia mirifica cum quotidiana in efficacia ulterius remedii analeptici & Balsamici alterius autem antifebrilis conspirat vindicanda.

§. XI.

Lectoris nisi patientia abuterer, sine negotio cunctas percurrere possem formulas, in quibus a Sacchari saccharatorumve connubio singularis obtinetur gratia, sicque potiora, si non omnia, recensere, quæ ad elegantiores potiones, decocta, emulsiones, julepos, bolos, electuaria, rotulas, morsulos &c. pertinent. Talia tamen cum non ignorentur, majorem conveniet gerere curam, ut saccharum & saccharata in ejusmodi formulis circumspectè propinando ansa post hac adversariis praescindatur innoxio saccharo dicendi pessimè, illudque, ceu deleterium, (g) proscindendi. Optime autem legitima saccharum usurpandi methodus ex opposito, è perversa videlicet saccharatis utendi ratione, elucescet, utpote ex qua incommoda universa, quæ à saccharo perhibentur inferri, deducere animus est. Non possunt siquidem non saccharum & saccharata nocere, si in quantitate nimia, tempore inconvenienti, atque ab iis, quorum dispositio obstat mor-

bida, aliis remediorum jam dum generibus ne minimum correctæ, absorbeantur avidè.

§. XII.

Scilicet omne nimium quia verti solet in vitium, saccharum pariter à gulosis in nimia mole devoratum tam dentibus, quàm humoribus, quin universo habitui, labem affricat non parvam. Primam plagam, quam saccharum copiosius masticatum infligit, sentiunt dentes, dum hosce vestimenti loco primum crustâ viscidâ obducit, mox ratione spiculorum salinorum, salivæ & aëris motu perenni successive evolutorum, corrodit ac nigredine inficit (h). Quod malum nihilominus in comparatione ad damna, quæ humores cum integro habitu a sacchari copia perpetiuntur, debet censerì leve, facile etiam elidendum, si ab ejusdem usu os aqua frigida sedulo colluatur (i). Etenim humores inter tum liquor gastricus tum chylus & massa sanguinea eò gravius afficiuntur, quo ab abundantiori saccharo humor ventriculi, quem hujus glandulæ una cum salivalibus jamdum plus minus glutinosum fecerunt, magis inspissatur digestionis negotium depravatur, chylusque crassior ad massam sanguineam propagatur. Quam increassatam læsio circulatorii ejusdem per partes omnes, simulque secretorii lymphæ per glandulas motus, læsio demum nutritionis corporis totius, uno verbo cachexia, necesse habet insequi (k).

§. XIII.

Quodsi verò Saccharum uberius à ventriculo excipiat, in quo acidum turgere, ructus acidi erumpentes cum borborygmis flatus copiosissimos citò designabunt, cardialgiæ ac colicæ causam frequentissimam (l). Propullulant hinc malum hypochondriacum, scorbutus, arthritis, icterus &c. (m) ipsaque phthisis multum exasperatur, augmentum tam inmanis scorbuti WILLISIUS (n) haud immerito imputat Saccharo, quod irretitæ hujus particulæ acidæ ab acido in primis viis prædominante, veluti fermento extraneo, fermentationis p.n. medio extricentur sanguisque porro acrimonia acido-salsa, nido viscido implicita, inficiatur, varia pathemata hypochondriaca, scorbutica, arthritica, icterica &c. producente. Acidum enim in ventriculo tunc luxuriare, quando scorbutus a Saccharo gignendus est, vel Indi Saccharum elaborantes attestantur, quos sicuti ob Sacchari abusum imprimis scorbutico obnoxios HUGESIUS (o) notat; ita eosdem non tantum Sacchari reliquiis, sed & liquore Sacchari vinoso, acescente promptissime, palam est sustentari. Quæ pariter ratio magis subesse videtur, cur phthysicorum aliqui usu Sacchari interdiciantur (p), quam quod saccharum, nonnullorum (q) opinione, carnes citò corrumpat, totaque substantia pulmonibus adversetur; carnes quandoquidem auxilio Sacchari non minus ac salis communis à putredine praeservari, verius observant alii (r). Ex dictis itidem satis intelligitur, quare Saccharum & saccharata scorbuticis, hypochondriacis, hysteris, epilepticis, pueris &c. cautè praescribenda

(d) In secretis Med. Chirurg. a Spleissio editis. p. 155.

(e) Pharmac. & dispensat. Modern. §. 30.

(f) Oper. p. 723.

(g) Garencieres de Tabæ Anglic. p. 108.

(h) Craanen de Homine. p. 14.

(i) Sebiz de aliment. Facult. l. 2. p. 525.

(k) Gladbach prax. med. p. 207.

(l) Dolæus Encyclopæd. Med. p. 425.

(m) M.A.N.C. Dec. 2. A. 9. Schol. ad obs. 203. p. 364.

(n) De Scorbuto l. 10.

(o) Medic. American. p. 35.

(p) Dolæus Encyclopæd. Med. p. 301.

(q) Garencieres de tabæ Anglic. p. 102. 106.

(r) Hugelius l. a.

benda dictitem. (s) Nec cum morte semper ægrorum saccharata affatim ingesta fermentescere cessant, sed in motus ejusmodi impetuosos semel abrepta post mortem etiam non raro hosce adeo continuant, ut cadavera cum spuma deprehendantur intumescere. (t)

§. XIV.

Perverse dein agunt inque propria viscera sæviunt, qui maxime post pastum & assumptos cibos plurimos adeoque tempore inconvenienti se infarciunt saccharatis, cum chylicationis negotio maxima sic vi illata necessario cruditates omnis generis in primis viis producantur. Unicè hic commemorare liceat vomitum biliosum, quem capitis oculorumque dolore immani aliisque symptomatibus stipatum Generosiss. Dn. FRANCUS A FRANCKENAU (u) in subiecto cholerico ægrè compescere valuit, postquam ortum huic dederat vespertina confectionum saccharinarum assumptio, ubi ventriculus multo adhuc vino rhenano, tempore prandii ingesto, turguerat. Tandem namque Saccharo potissimum abutuntur, quorum stomachus jam cruditatibus onustus, palatum nihilominus saccharatis delectatur, absque eo, ut morbidæ tali dispositioni convenientibus prius prospiciant remediis. Atque tunc demum HELMONTII (x) valet effatum,

quod saccharum sanis licet gratum, mox tamen ægris horridum fiat in plerisque morbis stomachi; non quidem ratione alcalici in Saccharo salis imaginarii, quasi ob hoc stomachi obtunderetur fermentum, quod naturaliter acidum, sed falso supponit, verum quia saccharum cruditates pituitosas & biliosas insigniter augeat, cum acidis autem, jam plus minus turgentibus, fermentescat enormiter. Saccharum quippe dum dulcedine sua facile in bilem converti, uno verbo, bilescere reputatur, non tam in omnibus promiscue, quam in iis solum, in quibus nidorosa habentur cruditates bilisque abundat, locum invenit. Certe quemadmodum bilis alias, evaporato phlegmate, concretum æque existit resinofum, atque saccharum, ita ab hoc cruditatibus stomachi biliosis bilique copiosiori toties cum totius damno pabulum largius subministrari, quoties saccharata remediis omnibus neglectis ingurgitentur, in propatulo est. Unde multam merentur laudem, qui in cholera, dysenteria, febribus, peste ipsa, morbisque omnibus, à bile qui oriuntur aut foveantur, penitus à saccharatis jubent abstinere. (y) Et tantum de Sacchari cum commodis, tum incommodis. Deo autem triumpho pro viribus benignissime concessis laudes maneant in secula!

(s) Horst. in Cent. Probl. p. 8. Moebius instit. Med. P. 2. c. 3. Moellenbrocc. de Arthrit. vag. scorbut. p. 93. & de Cochlearia. p. 108. Riedlin. Lin. Med. A. 5. p. 1261. Baglivi. de prax. Med. l. 1. c. 13. p. 119.

(t) Moellenbrocc. de Arthritid. Vag. scorbut. p. 93.

(u) M.A.N.C. Dec. 2. A. 9. obs. 202.

(x) Pharmac. & Disputator. Modern. §. 30.

(y) Henr. ab Heer. obs. L. 1. p. 202. Wedel. de Composit. Medicam. extempor. p. 117. 124. Diemerbroeck de Peste c. 7. Annot. §. 11.



DISSERTATIO MEDICO - PHYSICA

D E

CARYOPHYLLIS AROMATICIS.

Primum edita Anno 1701.

P R Æ F A M E N.



I quid in arte saluberrima futuro Medico Practico præ aliis scitu maxime necessarium est, id sane exactior. Materiæ ut dicitur Medicæ notitia videtur. Utut enim is reliquis hujus artis principiis de cætero satis imbutus fuerit; praxin ipsam tamen aggressurus, si instrumentorum ad medendum necessariorum apparatu & cognitione sufficienti destituatur, felicem in ea progressum expectare poterit nullum. Et quomodo quæso, qui remedii naturam & virtutem, methodumque adhibendi non callet, illud morbo applicabit debite? Hoc ipsum autem dicta scientia feliciter monstrat. Hinc non inepte agere videmus Mechanicos & Artifices manuarios, qui discipulos suos mox in tyrocinii principio usualibus instrumentis adsuafaciunt, eorumque declarant usum, non alium quidem in finem, quàm ut postea feliciter iisdem uti & commodius operari discant. Non tamen sufficit hic, quoad nomen saltem aut faciem externam cognovisse remedia morbis opponenda, (de eo namque & Myropola, aut tyro Pharmaceutices, aut Rhizotomus vel Anus herbaria gloriari possunt) sed requiritur, ut intrinsecam eorum naturam

naturam & texturam, usum item & efficaciam paulo penitius quis peruestiget, sic postmodum, ubi eadem Indicationibus debito modo ac tempore applicuerit, optatum quoque eventum sperare poterit. Quare, cum adeo necessarium deprehenderim scrutinium remediorum, omnino è re fore existimavi, thema aliquod ex Materia Medica eligere, & loco speciminis Inauguralis *Caryophyllorum aromaticorum* examen pro virium imbecillium modulo tentare, Tuæque L. B. placidæ Censuræ hac vice exhibere: quod ut fiat feliciter, viresque ad hoc opus necessarias mihi benigne concedat Omnipotens Rerum Conditor, devoto animo ab ipso precor. Cæterum, ut meos, qualesquales conatus æqui bonique consulas B. L. ea qua decet observantia rogo atque contendo.

CAPUT I.

De Onomatologia.

§. I.

EXamen itaque *Caryophyllorum aromaticorum* ubi instituendum, more usitato pauca *Onomatologiam* spectantia præmitti debent. Et quidem vocis originem si spectemus, facile apparet, esse illam Græcæ linguæ sobolem, compositam ex *καρυον*, quod nucem significat, & *φύλλον*, folium, ita ut, si verbum verbo reddatur, *καρυόφυλλον* idem denotet, ac Nucis folium, cum quo tamen, annotante C. BAUHINO *Pin. p. m. 410.* similitudinem nullam habet, sed (sunt verba GORRÆI, prout ipsum citat M. MARTINI *Lex. Philol.* sub voce Caryophyllum) longe abest ab eo, quod nomine videtur significare; quoniam sc. nec nucis nec folii formam aut naturam habet. conf. PAUL. ÆGINETA *l. 7.* J. FRAGOSUS *Arom. Hist. per Spachium p. 24.* C. HOFFMANNUS *de Med. Off. l. 2. c. 53.* Quare G. PISO *Mant. Arom. p. 180.* græcam hanc appellationem, utpote ineptam, & rei nullatenus convenientem, rejiciendam omnino censet, nisi ista apud Botanicos jam recepta foret, & Latinis itidem Caryophyllum, frequentius etiam hodie Caryophyllus, audiret.

§. II.

Neque ullo modo nostri Caryophylli conveniunt cum floribus istis pentapetalis, ex calice oblongo in summitate dentato exsurgentibus, qui pariter *Caryophylli*, aut etiam *Flores Tunicae*, dici solent, si forte abhinc nomen suum sumxisse credidisses; Si quidem hos maxime ab illis differre, tam ratione figuræ & modi crescendi, (quicquid etiam afferat J. RAJUS *H. Pl. p. 986.* forte similitudinem aliquam habere florem hujus Caryophylli expansum cum suo calice, cum caryophyllo dicto aromatico) quàm ratione virium, facile patet, prout id recte quoque monet E. FRANCISCI *O. und W. Ind. Lustg. p. 379.* Ut igitur cum aliis potius existimem, tunicæ flores ob qualemqualem odorem caryophylleum ita nuncupatos fuisse à Botanicis, quemadmodum & radix caryophyllata propter eundem odorem nomen istud accepisse videtur, fatentibus hoc C. BAUHINO *Pin. p. 207.* & ipso etiam RAJO. *l. a.* alios ut taceam.

§. III.

Non tamen video, quo jure alio tempore Caryophylli nomen gerat flos ille discoides radiatus, ex duplicis generis irregularibus compositus, qui aliis etiam *Flos Africanus & Mexicanus*, vel *Tagetes* ap-

pellatur, ac sub titulo ultimo à TOURNEFORTIO *Inst. Rei Herbar. p. 488.* describitur, RAJO vero *Chrysanthemum* feminibus longis compressis, C. BAUHINO *Pin. p. 132.* Tanacetum Africanum, forte ob folia tanaceto similia, ac tandem FR. HERNANDEZ. *Rer. Med. Nov. Hisp. Histor. l. 5. c. 29.* & FRANCISCO. *l. a. p. 378.* *Caryophyllus Indicus & Mexicanus* audit. Sive enim florem, sive fructum, saporem aut odorem respicias, nullo certe modo huic neque cum caryophyllo præcedenti §. descripto, neque etiam cum nostro aromatico aliquid commercii intercedere videbis, ex quo denominandi ratio evidens peti commode possit.

§. IV.

Hinc accommodatius forsàn & rei paulo convenientius nomen aromati nostro dedere Belgæ, ipsosque secuti postmodum Germani, Angli, & Galli cum Hispanis, vocantes illud *Kruyt Naghel / Nägelein* oder *Würznäglein / Cloves, Clou, & Clavo*, scil. à latino clavus, quoniam figura sua minorem clavum sic satis exacte refert, & ad ejus modum inferius paulo acuminatum, superius vero capitatum existit v. C. BAUHINI *Pin. p. 410.* G. PISO *l. a.* RAJUS 1508. Dicitur insuper ab Incolis sua lingua *Tshinka*, & in Moluccis potissimum *Chamque vel Chamke*, conf. GARZIAS AB ORTA *Hist. Arom. l. 2. c. 21.* LINDSCHOT. *Itin. p. 72.* aut si fides habenda JAC. CORN. NECKIO *Navigat. Ind. l. 2. p. m. 32.* *Chimke* etiam ibidem appellatur. Arabibus vero, Persis, Turcis, & quibusdam quoque Indis *Calafur* audit, testantibus modo citatis Autoribus, conf. C. DE ACOSTA *lib. de Arom. c. 15.* Nomina autem illa, quæ huic concreto in Pandectario imponuntur, *Arumfel & Carumfel*, aut librarii arabici imperitia, aut ætatis vitio corrupta esse, censet jam nominatus GARZIAS AB ORTO.

§. V.

Præterea tribus quoque nominibus Caryophyllos salutaris asserit JUL. CÆS. SCALIGER. *de subtil. ad Cardan. Exerc. 141.* nimirum *Gomode, Chianche & Bugalavan*, ab aliis procul dubio insulani alio, uti arbitratur PISO *l. c.* Juxta AVICENNAM *lib. 2. c. 311.* dicitur etiam *Caryophyllus femina*, an recte, judicent alii. Cæterum Galli adhuc *Girofle* appellare consueverunt, quam vocem aliqui ex arabica lingua derivare conantur, unde etiam græcum nomen *καρυόφυλλον*, corrupte quidem, formatum fuerit, qualem sententiam ex *Raph. Lex. Arab.* à M. MARTINI in *Lex. Philol. l. c.* allegatam legerè potest, qui circa verborum origines adeo anxius desudat. Reliqua synonyma, dum sc. in officinis κατ' ἐξοχὴν *Caryophyllus* appellatur, item *Caryophyllus aromat. vulgaris* juxta JONSTON *Dendrol. p. 174.* *Indicus* J. BAUHINI *H. Plin. l. 1. p. 425.* &c. libens præmitto. Non tamen reticendum est, eodem Caryophylli

phylli nomine insigniri etiam arborem ipsam, quæ aramo illud nobile proferre solet.

§. VI.

Num concretum hoc nostrum GALENO & DIOSCORIDI fuerit cognitum, anxie non disquiram, sufficiat hoc saltem annotasse ex FRAGOSO *Hist. Arom.* p. 23. C. BAUHINO l. c. AMATO LUSITANO *Comm. in l. 2. Dioscoride Enarr.* 153. p. 279. RUELLIO *de Nat. Stirp. l. 1. c. 30. p. 107.* & IONSTON. *Dendrol. p. 173.* prænominatos Autores nullam ipsius in suis scriptis fecisse mentionem, & licet SERAPIO c. 307. *Galenum* citarit, falsò tamen id factum esse, & forsan *Paulum Æginetam* aut *Sethum* nominare eum voluisse; Minus enim probabile, uti sibi persuadet GARZIAS AB ORTO l. c. & MATTHIOLUS in *Dioscoridem l. 2. c. 153. p. 435.* librum Galeni, in quo de Caryophyllis egit, periisse. Tandem nec attingam prolixè, an illud aroma, quod à PLINIO l. 2. c. 7. Caryophyllon vocatur, idem sit cum Caryophyllis aromaticis; ista sane descriptio aromati nostro nullo modo quadrare videtur, hinc potius ex odore atque sapore, ad Caryophyllos quodammodo accedente, cum CAR. CLUSIO *Exot. lib. 1. c. 16. p. m. 17.* colligo, illum hoc nomine indigitasse amomum. Hæc de Onomatologia. Progredior nunc ad ipsorum Caryophyllorum aromaticorum considerationem.

CAPUT II.

De Quidditate & differentiis Caryophyllorum.

§. I.

SI diversos Naturæ consultos reique medicæ Scriptores evolvamus, haud difficulter deprehendere licet, ipsos in danda historia naturali & descriptione hujus aromatis non ubique convenire. Sunt enim (1) qui Caryophyllos nostros aromaticos, annotantibus C. BAUHINO & E. FRANCISCI, pro flore arboris Caryophylliferæ indurato reputant, ex Veteribus non minus atque Recentioribus. Veteres inter, ab Arabibus flores dictæ arboris, ubi induruerint, Caryophyllos appellari, memorat MAFFÆUS *Hist. Ind. l. 5.* Nec Caryophyllum pro alio, quam flore indurato habent PAULUS ÆGINETA l. 7. p. m. 370. FRAGOSUS & GARZIAS AB ORTO l. c. Ex Recentioribus autem eandem sententiam non solum FR. HERNANDEZ, dum l. 2. *Rer. Med. Nov. Hisp. c. 10.* flores clavorum instar oblongos in Caryophyllos evadere tradit, sed & SCHROEDERUS *Pharm. p. m. 552.* PATER PHILIPPUS *Itiner. Oriental. l. 7. c. 9. p. m. 302.* atque recentissimus Scriptor Gallus, PETR. POMET, in *Histoire generale des drogues* p. 198. amplectuntur. Quibus tamen eo minus ad stipulari licet, quo minus tale assertum autopsia ipsa valet confirmari, utpote qua prælucente in Caryophyllorum potius sphaerula, qualem in capitibus gerunt, rudimentum ipsius distincti floris in sequentibus §§. demonstrabitur; unde in specie opinio HERNANDEZ magis videtur contradictoria, quasi flos in Caryophyllum emergens alium acquireret florem. Hinc (2) alii pro fructibus arborum venditare malunt immaturis, quorsum plerosque ex Antiquioribus paulo atque Recentioribus rerum naturalium ruspatoribus inclinare video. Ex omnibus CLUSIUM *Exot. l. 1. c. 16. p. 15.* C. BAUHINUM l. a. F. HOFFMANNUM *Clav. Schröed. p. 432.* G. PISONEM l. a. LINDSCHOTT. & in hanc *Not. Pa-*

ludani, DALEUM *Pharmacol. p. 420.* NEUHOFF. *De-scr. Sin. p. 357.* WURFFBAIN D. 3^{nd.} *Kriegs-Dienste pag. 46.* AMMANNUM *Manud. ad Mat. Med. p. 69.* & M. N. C. D. II. A. 1. obs. 20. 21. in *Schol.* indigitasse sufficiat: Qui quamvis veritatis scopum attingant propius, cur subscribere nihilominus etiam hisce impediatur, ea uberius dabunt, quæ mox proferentur.

§. II.

Rectius namque (3) Dn. GEORG. EVERHARD-RUMPHIUS, Medicus in India celeberrimus, in *Epistola*, quam ad Dn. D. MENZELIUM dedit, quamque *Acad. Nat. Curios. Misc. Dec. II. A. 1. obs. 21.* inseruit, videtur statuere, Caryophyllum aromaticum in officinis usitatum fructus tantummodo esse rudimentum, veros autem fructus baccas existere triplo vel quadruplo majores, Anthophyllorum nomine alias insignitas. Quod ipsum tanto verius ex veteribus jamtum CLUSIUS in *Auctario ad libros Exoticorum*, & in *Notis ad l. 1. c. 21. Hist. Arom. Garzia ab Orto*, MATTHIOLUS in *Dioscoridem l. 2. c. 153. p. 435.* alique nonnulli, attestante JOH. TERENT. LYNCEO in *Not. ad l. 2. c. 10. Rer. Med. Nov. Hisp. Histor. Fr. Hernandez*, & ex recentioribus C. BAUHINUS atque RAJUS l. a. afferuerunt, quanto exactius cum autopsia ipsaque Caryophylli structura consentit.

§. III.

Nempe si accuratius concretum hoc intueamur, ipsa ejus conformatio suadere videtur, esse tantum initia fructuum, quoniam scilicet in summitate sui gerit sphaerulam, quæ ex communi Autorum consensu nihil aliud est, quam floris rudimentum, aut flos nondum expansus. Hinc colligo: quemadmodum solenniter in omnibus fere plantis flore adhuc clauso rudimenta fructuum equidem adsunt, nihilominus nonnisi post casum floris, aut ad minimum ipso emissio atque debite expansio, aliquam fructus perfectionem acquirunt, ut jure fructuum titulum mereantur; ita quoque hic rem se habere: hoc est, cum in Caryophyllis appareat flos adhuc clausus, idcirco fructus titulum gerere nondum posse. Ut autem non negaverim, jam ante floris comparisonem in quibusdam vegetabilibus fructum aliqualem apparere, & quasi filium ante patrem prodire, uti de Chamænerio seu Lysimachia, quæ & hac de causa filius ante patrem quibusdam audit, id notum est; tamen tunc nondum adesse fructum perfectum, sed pariter saltim ejus adhuc rudimentum & initium, evincitur ex eo, quod indies indiesque una cum flore augmentum capiat, usque debitum perfectionis statum & magnitudinem acquirat, flos expandatur ac decidat, quo tempore nihil restat amplius, quam ut fructus hic immaturus maturescat. Idem etiam in cunctis aliis plantis accidere, si dixerò, non adeo erravero, adsunt enim ubivis etiam initia seminum vel fructuum, utut flores nondum adeo conspiciantur aut expansi fuerint.

§. IV.

Prolatam sententiam perspicue confirmat quoque LUC. SCHROECKIUS in *Schol. ad O. 21. A. 1. D. II. Ephem. Germ. jam citatorum*, dum Caryophyllum aromaticum nihil aliud esse innuit, quam, quod v. g. in rosa calyx & hujus capitulum, cynosbati tandem fructum constituens, vocari soleat. Ne autem gratis hæc dicta videantur, similitudinem ejusmodi ulterius deducit, adstruendo, quod quatuor illi

illi in summitate Caryophylli occurrentes apices decussati, cum lacinioso rosarum perianthio, quod alabastri nomen apud Botánicos accepit, apte conveniant. Ex quibus satis apparet, à vero non adeo aberrasse CLUSIUM, quando *Exot. lib. cit.* alabastros dicit esse ipsos Caryophyllos, subintelligens tamen, si cum rudimento fructuum jam memorato spectentur. Tandem, & si fructus arboris caryophylliferæ fere ad maturitatem evectos, aut penitus maturos, quos Anthophyllos appellare solent, adspicias, sphaerulam illam in summitate penitus abesse, & decidisse observabis, ac non nisi quatuor apiculos seu alabastros adhuc comparere, indicio certo, demum post secessum florum perfectionis suæ statum attigisse fructum. Ut taceam denique, in Caryophyllis aromaticis, prius aliquandiu in aqua simplici maceratis, nullum me nucleum deprehendere potuisse cum AMMANNO *l.c.* qualis tamen in cunctis fructibus, five maturis, five nondum ad maturitatis statum evectis, nunquam non observatur, unde rursus fluit, non fructum, sed fructus saltem rudimentum esse Caryophyllos.

§. V.

Ex hætenus igitur dictis & mox subnectendis talis dari poterit Caryophyllorum aromaticorum descriptio, quod sint rudimentum seu initia fructus arboris caryophylliferæ, figuram clavi minoris generis, oblonga, semiunciam emetientia, angulosa atque rugosa, in summitate quatuor apiculis decussatis, quibus insidet sphaerula seu capitulum convexo concavum, futuri floris rudimentum, coronata, colore ex fusco rubentia & tantum non nigricantia, odoris fragrantissimi, saporis acris ac fervidi, maxime tamen grati & aromatici specifici. Ut hinc mirari subeat, cur FRANC. ALEXANDER in *Apoll. Pharm. rad. I.* PAULUS ÆGINETA *l. 7.* & BEN. CURTIUS in *lib. Hortor.* longitudinem fere digitalem Caryophyllis attribuerint, & cur N. ANT. RECCHUS *Hist. Mexic. l. 2. c. 10.* trifidum tantum capitulum esse dixerit, cum tamen adeo frequens aroma sit, & sic per autopsiam hæ circumstantiæ facile haberi queant.

§. VI.

Non tamen confundi debet hoc nostrum concretum cum ipsis arborum fructibus, potissimum maturis, quos AVICENNA *l. 2. c. 311.* & EBENSINA *l. 2. tr. 2. cap. 19.* Caryophyllos mares appellant, ac aliàs sub Anthophyllorum quoque nomine in tabernis asservantur, NIC. MYREPSUS *lect. I. c. 39.* Caryophyllum magnum denominat; Galli vocant *Clou Matrix* aut etiam *Mere de Girofle.* vid. POMET *l.c.* Germanis Mutter = Nelken / Indis denique Matres fructuum audiunt. Hi namque facie quidem, colore fusco, atque sapore Caryophyllos referunt, sed non modo tumidiore & crassiores supra descriptis apparent, verum insuper sphaerula ista, quæ floris initium est, in summitate destituuntur, ac sub tenuiore paulo cortice intus conclusum gerunt semen, seu officulum duriusculum, substantia baccas lauri adæquans, atque in duas partes, instar amygdalarum commissas, fissile, gemmulam intus vel radiculam germinationis principium includens, prout delineationem talem legere licet in citatis *M. N. C. D. II. A. I. obs. 21. in Schol.* NEUHOFF. *Descr. Sin. p. 346.* RAJO *Hist. Pl. p. 1508.* Interdum tamen & hic, uti in aliis, ludit natura, dum nucleum talem aliquando in quatuor partes, duabus gemmulis distinctas, L. SCHROECKIUS reperit *M. N. C. l.c.* Post anni aliàs decursum sponte sua ex arboribus decidunt Anthophyl-

li, saporem quidem, odorem ac vires remissiores obtinentes, quam Caryophylli, nihilominus non omni destituti virtute, sed iudice POMETO peculiari prorsus efficacia præditi. Cariores interim & rariores ab Incolis habentur ipsi, ideo scil. quoniam eorum ope arbores caryophylliferæ propagari solent. Cæterum bina Anthophyllorum genera nominat G. H. WELSCHIUS *Hec. I. obs. 21. p. 32.* unum capitatum, quod tam inferiori, quam superiori parte tenuius existit, atque in media, (unde *Sphaecodes* appellari posse tradit) in cuius fastigio æque ac in reliquis corona pentacronia seu quinquecuspidata, absque tamen sphaerula spermatophora, qualis in plerisque vulgaribus conspicitur, emineat: alterum vocat *ἀσέυμαλον*, i. e. sine coronamento, cuius corpus facile in duas partes dividi possit.

§. VII.

Neque negligenda hic alia Caryophylli species, quæ *Caryophyllum regium* aut *spicatum*, vel juxta alios *dentatum* appellatur; Incolis audit *Tshinka Popoua*, quasi dicas Caryophyllum dentatum vel crispatum, prout id explicat PISO *l. a.* spicatum potius ideo appellans, quoniam instar spicæ e summis ramorum furculis enascitur. OL. WORMIO in *Mus. pag. 203.* vocatur *Thinca Radoi* i. e. Caryophyllus regius, cuius denominationis rationem aliam WORMIUS ipse, PISO aliam, aliam AMMANNUS suggerunt. WORMIUS ejusmodi nomen ei autumat impositum, quod reliquæ arbores caryophylliferæ vulgares huic, quæ talem Caryophyllum regium fert, regium quasi honorem, versus ipsam se incurvando, & homagium ut ita dicam præstando, exhibeant, omnesque suos flores dejiciant, quamprimum hæc florere incipiat. PISO autem eundem titulum arcessit non tam a sapore & fragrantia, utut eam præ reliquis excellentiorem possideat, quam quod partim Regulis & Magnatibus Moluccensibus, propter singularem scil. formam & raritatem, ad superstitionem usque sit in pretio. AMMANNO denique, quò incertior sententia Wormiana, pro mera etiam fabula ideo à SCHROECKIO reputata, eò verosimilius, cum in summitate corona quasi exornetur, Caryophyllus dictus creditur regius.

§. VIII.

Esse vero *Caryophyllus* hic *regius* nihil aliud videtur supra laudatis RUMPHIO & SCHROECKIO, quam *Caryophyllus aromaticus vulgaris*, in plures cuspidulas sensim enatas, ac in quatuor ordines dispositas, sphaerula tamen florifera destitutas, divisus, hinc vegetabilibus monstrosis ab ultimo annumeratus. Magnitudinem grani hordei tribuit ipsi WORMIUS, atque pro fructu arboris habet, quamvis subjungat, quod florem citius, quam fructum referat. Binas ejus species ad Dn. Menzelium misit modo nominatus RUMPHIUS, unam, quæ in sola insula Machian, (Moluccarum una) olim nascebatur, hinc rarissima existit; alteram ex insula Amboina, cuius unica arbor adhucdum restat. Quibus accenseri meretur *tertia* species, è miranda arbore, qualis per quadraginta annos in mundo non visa, in ejusdem Amboinæ insulæ parte boreali, seu ora Hittunenfi, curiose collecta, & Anno 1696. ad sæpius nominatum Dn. Schroeckium transmissa, atque ab hoc in *M. N. C. D. III. A. 5. & 6. obs. 148. p. 308.* communicata. Dictæ tamen species quoad faciem multum inter se differunt, uti videre est in figuris *M. N. C. II. aa.* adjectis.

§. IX.

§. IX.

Quod ipsum etiam magis mihi confirmavit autopsia, utut enim rarus admodum & carus sit hic Caryophyllus, contigit tamen, ut apud B. Dn. CHRISTIANUM JOH. LANGIUM, *Phil. & Med. D. Celeberrimum, Facult. suæ in Acad. Lips. quondam Assess. gravissimum, Patronum, Hospitem ac Præceptorem meum, dum viveret fidelissimum*, qui ob affectum in me vere paternum innumeraque exhibita beneficia, post fata etiam non sine veneratione à me nominandus, ramulum aliquem minorem ex arbore hac cum binis foliis & adhærentibus quibusdam Caryophyllis regiis, pluribusque seorsim apparentibus, haud ita pridem ex Indiis, una cum aliis rarioribus Indicis, transmissum & inter curiosiora asservatum, conspiciere liceret, in quo alter Caryophyllus regius non adeo longe differebat à Caryophyllo vulgari, nisi quod in summo ejus intra quatuor apices nulla sphaerula florifera, sed in aliquot cuspides saltem divisum capitulum se exhiberet, alter vero eandem faciem exacte exhibebat, qualem antea descriptam dedimus, qualemque M. N. C. D. II. A. 1. l. a. nomine Caryophylli regii in Machian regno olim nati, & PISO *Mant. Ar. p. 179.* delinearunt. Imo cum Pisonis iconem paulo accuratius postea considerare, nonnullos etiam Caryophyllos regios, qui à vulgaribus non multum abluunt, & istis, quos in jam memorato furculo ipsis meis oculis vidi, in totum fere similes sunt, simul expressos deprehendi, ut ita de allatae sententiæ veritate nullum amplius supersit dubium. Sed contemlemur nunc quoque arborem, cui innascuntur Caryophylli aromatici.

CAPUT III.

De Arbore Caryophyllifera, ejusque loco natali.

§. I.

Arborem proin caryophylliferam, seu quæ nobile hoc aroma nobis suppeditat, quod concernit, dicitur illa C. BAUHINO *Pin. l. a. Caryophyllus aromatica fructu oblongo.* PLUCKNET. *Phythogr. Tab. 155. Caryophyllus arom. Indiae Or. fructu clavato.* Indis vero audit *Tshinkā*, Arabibus *Siger*, uti refert C. DE ACOSTA *l. a.* Javani vocant *Chamke*. Facies ipsius diversa à diversis Autoribus describitur; scil. altitudinem & magnitudinem nunc mali aut pyri nostratis, folia itidem pyri, cum C. BAUHINO *l. a.* NEUHOFFIO *Descr. Sin. pag. 334.* CLUSIO *Exot. l. 1. p. 16.* DAN. PARTHEY *Ost. Ind. und Persian. Reis-Beschreib. p. 141.* nunc vero cerasi, foliis pyri, adæquare eandem asserunt cum PISONE & RAJO *ll. aa.*; nunc formam, magnitudinem & folia lauri ipsi tribuunt, eique adeo similem dicunt, ut fratres facile credideris, nisi quod folia paulo angustiora sint. v. GARZIAS ab Orto *Hist. Arom. l. 1. c. 21.* CLUSIUS *l. 1. Exot. p. 16.* & in *Not. ad Garziam ab Orto*; MAFFÆUS *H. Ind. l. 5. p. 84.* FRAGOSIUS *H. Arom. p. 23.* LINDSCHOTT. *Itin. p. 73.* NECKIUS, C. DE ACOSTA *de Arom. c. 15.* HERNANDEZ. *l. supr. cit. it.* PATR. PHILIPPI *Itin. orient. L. 7. c. 9. p. m. 302.* Arbores tamen has quibusvis lauris celliores esse scribit RUMPHIUS *M. N. C. D. II. A. 1. obs. 21.*; nunc quoque folia amygdali vel salicis arbori adscribunt. v. *Frid. Hoffmanni Oper. Supplem. II.*

FRANCISCI *p. 379.* nunc tandem folium cinnamomi & buxi, cum MATTHIOLO *in Dioscoridem l. 2. c. 153. p. 435.* & AMATO LUSITANO *in eundem Dioscoridis locum p. 278.* Sed an autopsia cunctis sententiis respondeat, imposterum audiemus.

§. II.

Caudex ejus, qui nunc incurvatus, nunc vero rectus existit, ad corporis humani crassitiem accedere dicitur à cunctis pene Scriptoribus, & meminerat WURFFBAIN *l. a.* se vidisse arbores caryophylliferas, quæ binas cum semisse emensæ fuerint ulnas. Non itaque audiendus RUELLIUS, quando *l. r. de nat. stirp. c. 30. p. 107.* ut fruticem sambuci forma describit; nec in eo assentiendum MATTHIOLO & AMATO LUSITANO, *ll. cc.* qui caudicem buxo simillimum, eandemque ejus materiam esse scribunt, nam utut duritie, colore vel pondere similis sit, non tamen erit eadem, hinc comparisonem eam paulo liberius prolatam non sine ratione suspicatur J. BAUHINUS *H. Pl. p. 425.* Interim à veritatis tramite neutiquam recedere NEUHOFFIUM, dum *p. 334.* corticem hujus arboris oleæ cortici haud dissimilem esse asserit, ipsa me edocuit autopsia. Etenim cum eodem tempore, quo superius *c. II. §. 9.* nominatus Caryophylli regii ramulus ad B. Dn. D. Christ. Joh. Langium ex India transmittabatur, alterius quoque ramuli majoris, ex descripta arbore caryophyllifera, cum adhærentibus pluribus Caryophyllis mihi concederetur copia, in hoc folia laurinis latioribus similia, corticemque oleaceum, ac alia mox commemoranda ad vivum deprehendi evidentissime.

§. III.

Folia videlicet, Persis *Naraqa* dicta, quemadmodum interveniente petiolo longiusculo, qui medium nervum, singula folia per longitudinem in medio secantem, multisque venis ad latera utrinque excurrentem constituit, ramulorum alis alternatim ex adverso adnascuntur; ita extremi ramuli in plures tenuiores terminantur, quibus deni aut viceni pediculi seu festucae adstant, sustinentes totidem Caryophyllos seu fructuum initia, vel ut alii expriment, alabastrum, in summa parte in quatuor apices divisos, medioque sui sphaerulam, floris nondum expansi rudimentum ferentes. *Pediculi* ejusmodi sive *festucae* Gallis audiunt *Fust*, Lusitanis *Baston*, Belgis *Rompam*, attestante LINDSCHOTT. *p. 73.* Latinis etiam *Fustigi*, notantibus AMMANNO, J. BAUHINO & GARZIA AB ORTO. Minime vero auscultandus venit POMET, dum sub nomine *Fust* se intelligere scribit capitulum sive sphaerulam in Caryophylli summo occurrentem, cum propria omnino vocabuli reclamet significatio, non summam, sed imam potius partem indigitans; Ut taceam, ex adverso stare reliquorum scriptorum omnium auctoritatem, qui indigitato nomine eam partem, cui Caryophyllus suo extremo insidet, adstruunt: citatus namque sapius LINDSCHOTT *p. 73.* expressis verbis scribit, quod *Baston* caulis sit, quo Caryophylli adhærent arbori. Nec fides adhibenda est C. DE ACOSTA, qui *lib. Arom. c. 15.* binos, ternos, quaternos, & interdum quoque unicos Caryophyllos sparsim per ramos ad foliorum basin, in modum ficus, nasci asserit; contrariari enim hoc & aliis autoribus, qui historiam Caryophyllorum dederunt, & ipsius arboris naturæ, probe monet CLUSIUS *in Not. ad hunc locum.*

Nnñ

§. IV.

§. IV.

Florem summe haberi fragrantem, magis tamen fudo, quàm pluvioso coelo, attestantur FRANCISCI & SAAR *ll. aa.* Hunc aliqui Autores cum CLUSIO cerasorum flori similem describunt, non tamen candidum, sed eleganter (lineolis solum tribus albicantibus sive venulis in quovis petalo interspersis) cœruleum & staminibus purpureis splendidum; Alii verò cum GARZIA AB ORTO potius viridem; Alii demum cum FRAGOSO, PISONE, NEUHOFFIO, J. CORN. NECK. & RAJO primum albicantem, postea viridem, & tandem rufescentem esse dicunt. Ubi se expanderit, tetrapetalos à CLUSIO, RAJO aliifque annotatur; & quamvis TOURNEFORTIO *Instit. Rei Herb. p. 661.* polypetalum rosaceum dicere placeat, contrarium tamen inspectione & examine exactiori observari potest facillime. Nam si, post macerationem & emollitionem aliquot Caryophyllorum in aqua, removeas externe quatuor petala modo indigitata, alia deprehendes nulla, qualia quidem citatus hic Autor sub *lit. B.* æri incisa *Tab. 432.* exhibet, sed mera esse stamina in fundo cohærentia apparebit evidentissime.

§. V.

Fructus postmodum, ubi adoleverit, & flos deciderit, magis magisque quoad ventrem ita intumescit, ut oblongam figuram retineat, sub cortice autem paulo crassiore semen concipit vel ossiculum, nunc simplex nunc duplex, duriusculum fractuque contumax, sed quod remoto cortice non adeo difficulter in duas vel quatuor partes *εἰς ὄνυχας* commissas, (ut cum RAJO & J. BAUHINO loquar,) instar amygdali dividi potest, ac insuper gemmulam vel radiculam, pariter nunc simplicem nunc duplicem, germinationis principium, inclusam gerit, attestante hoc citato SCHROECKIO in *M. N. C. D. I. A. 2. obs. 21.* Unde patet, rursus falli POMETUM, quando tractatu gallico cit. assèrit, concludi in fructibus his tumidis gummi aliquod durum & nigricans, odoris grati, & saporis aromatici penetrantis, cum nihilominus consistentia tantum non ossæa appareat, adeoque non videam, quomodo pro gummi haberi possit. Fructus vero ille debitam adeptus maturitatem, elapso præterpropter anni spatio decidit sponte, diciturque communiter *Anthophyllum* vel mater fructuum. conf. §. 6. *Cap. præc. II.*

§. VI.

Patriam agnoscunt prænominatæ arbores *Indiam orientalem*, ac speciatim insulas illas circa Asiam sub æquatore sitas, quæ uno nomine à Geographis *Moluccæ* communiter vocantur. Earum autem olim numerabantur quinque, scil. *Ternate*, *Machian*, *Modiera*, *Bacciam* & *Tidor*, quibus tamen hodie accensentur proxime adjacentes, *Amboina* putata, *Certam*, *Marigora*, *Banda*, *Mindano*, *Meno*, uti asserit SAAR *D. J. R. p. 33.* Pristinis equidem temporibus omnes abundabant Caryophyllis, quod videre est apud J. CORN. NECKIUM *lib. 2. Navig. Ind. p. 32.* & PISONEM *l. a.* sed his diebus priores quatuor insulæ nullos amplius ferunt, cuius rei rationem redditurus PISO aperte scribit, non fieri illud culpa novercantis naturæ, sed largissimæ & benignissimæ matri invidentis fortunæ, quatenus Reguli istarum insularum, aliquot millenis imperialibus à Batavis occœcati, ex pacto omnes ibi caryophylliferas arbores eradicarint. Hos enim (pergit,) ut uni lucro studere solent, sua interesse pu-

tare, ne tam nobile aroma vilesceret copia & fertilitate divina; ita avaritiam lege, modo, ac ratione carentem audere ipsi naturæ Autori omnisque boni largitori tantum non suam exprobrare benignitatem & liberalitatem. Et sic Batavi ex nimia lucri cupiditate omnes arbores caryophylliferas non modo in dictis, sed etiam aliis minoribus insulis, ubi, propter Caryophyllorum in propinquioribus locis copiam, omnes colligere nolebant, vel prorsus eradicarunt, vel excorticarunt, quo exarescerent sponte, ut teste VOLQU. IVERSEN. *Itin. p. 183.* sæpe intra mensem spatium ultra 15. vel 16. mille arbores hac ratione perdiderint. conf. etiam WURFFBAIN *l. c. p. 49.* Quamvis aliam adhuc illius extirpationis rationem reddi à Batavis, citatus modo IVERSEN addat, scil. quod ingentes adeo sumptus ad navigationes has insinuere ipsi cogantur, cum metu tamen semper futuri naufragii vel alius periculi, hinc si omnes mercatores Indi adventantes suas naves Caryophyllis onerare possent, elocati sumptus ne quidem inde restituerentur.

§. VII.

Unde quatuor tantum ex Moluccis insulas largam Caryophyllorum copiam proferre, videlicet *Amboinam*, *Ellias*, *Seram* & *Bouro*, à *Tavernier Reisbeschr. P. 2. l. 2. p. 111.* memoratur, quarum speciatim prima adeo arboribus caryophylliferis luxuriare dicitur, ut SAAR *l. c. p. 35.* testetur, se integras sylvas earum in ipsa vidisse, & MANDELSLOO *Itin. p. 228.* asserat, Belgarum ibidem commercia frequentissima esse Caryophyllos, atque aliquot centena millia librarum hujus aromatis ab ipsis ex dicta insula quibusdam annis transmissa fuisse. conf. WURFFBAIN *l. a. p. 46.* Imo perhibente AMMANNO *p. 97.* Belgis loco monopolii inserviunt Caryophylli, adeo, ut Rex quoque Angliæ, qui tamen maris Dominus dicitur, aroma hoc ab iis emere cogatur. Miror proin POMETUM, quod *tr. sæpe all.* asserat, arbores caryophylliferas olim quidem admodum copiose extitisse in insulis Moluccis, sed paucis retro annis cœpisse Batavos, cum sc. impedire non potuerint, quin & Angli, Lusitani, & Galli eo navigarent, atque aroma hoc exportarent, cunctas arbores caryophylliferas eradicare, & in insulam Ternate transplantare, unde jam cunctæ gentes Caryophyllos ab ipsis emere cogerentur, nullis amplius alibi provenientibus: constat enim ex *præc. §. 5.* & hujus initio, in Ternate extirpatas fuisse arbores, & hodie in quatuor tantum insulis reperiri.

§. VIII.

Equidem & in *Sina*, juxta NEUHOFFIUM *Desc. hujus regni p. 375.* & in *Ceylon* atque *Bantam*, nec non aliis Indiæ orientalis insulis arbores tales crescere, GARZIAS AB ORTO aliique tradunt; steriles tamen penitus esse, nec nisi in *Moluccis*, insulis caryophylliferis merito a *Mandelsloo* vocatis, fructum ferre, omnes facile concedunt. Unde quando ab incolis insulæ Macassar Anglos aroma hoc acquirere TAVERNIER indicat, fatetur ipse, beneficio demum commercii ad eosdem pervenisse Caryophyllos aromaticos. Præter hosce enim, insulæ Moluccæ quoad alia, quæ cultum & victum spectant, adeo steriles a MAFFÆO & PISONE pronunciantur, ut earum incolæ cuncta ex vicinis insulis petere habeant necesse. Primam autem occasionem, qua Moluccani ejusmodi nobile aroma, antea neglectum, pluris æstimare didicerunt, Sinenses perhibentur dedisse, ubi magnam Caryophyllorum copiam primitus exportare cœperunt.

§. IX.

§. IX.

Solum dictarum insularum, cui innascuntur præ-nominatæ arbores caryophylliferæ, aridum omnino est, atque pumicis ad instar fistulosum, imo perhibente MAFFÆO, adeo sitibundum, ut non solum cadentes è cœlo imbres momento imbibat, verum etiam à montibus manantes aquas ante absorbeat, quam colligere se in rivum vel flumen aliquod possint, & ita directo alveo in mare dilabantur. Ex quo etiam evenire credo, quod testantibus LINDSCHOTT. p. 73. & FRAGOSO p. 23. nullum ibi gramen nec aliud vegetabile proveniat aut crescat. conf. GARZIAS AB ORTO & POMET. An vero siccitatis illius causa præcise ex nimia harum arborum caliditate eveniat, prout quidem asserit P. PHILIPPUS *Itin. Or. l. a.* an potius ex æstu climatis deduci debeat, ambigo; adeoque non immerito mirum videtur NECKIO, quomodo istæ arbores, cum tanto Solis æstui expositæ sint, virefcere queant: sed cadentes ex benedictione divina quotidie pluvias procul dubio id efficere, subjungit.

§. X.

Proveniunt vero caryophylliferæ arbores non plantatæ nec cultæ ex Anthophyllis, seu fructibus à Caryophyllorum messe relictis maturis, sponte in terram decidentibus, ibidemque relictis; hi enim, si solum fuerit conveniens, germinant postmodum, radices agunt, ac furculos emittunt, adolescentes intra octennium in arbores fructiferas, ac centesimum usque annum duraturas. Nunquam enim istis in locis, ob insularum sub æquatore situm, deesse pluvias fructibus, quæ his alimentum largiantur in terram decidentibus, ex incolarum testimonio referunt GARZIAS AB ORTO l. c. FRAGOSO p. 24. & LINDSCHOTT. p. 73. conf. etiam NECK. Hinc levem laborem levemque operam impendere tenentur incolæ in arbores caryophylliferas, nec majorem, quam ut justo tempore ac methodo Caryophyllos colligant & asservent, de qua re mox agetur fusius in subsequentibus.

§. XI.

Quod *Modum* namque arbores has colendi & propagandi concernit, de illo silent Autores plerique, qui Indiam aut inhabitant, aut peregrarunt, & circa ejus historiam naturalem aliquid literarum monumentis consignatum reliquerunt. Et quidem non immerito id factum animadverto, siquidem pluries laudatus RUMPHIUS in *allegata toties Ep. ad Cl. Menzelium data*, & *M. N. C. D. 2. A. 1. o. 21.* inserta, scribit, quod superiorum interdicto cautum sit, ne multa de Caryophyllorum satione & cultura transcriberentur. Nihilominus *duplicem propagandi methodum* eo ipso exponere videtur, *unam* scil. *per sationem*, quando fructus maturi seu Anthophylli, vel sponte decidunt, vel studio terræ mandantur, ex quibus postmodum arbores excrescunt, prout §. præc. dictum fuit; *alteram per transplantationem*, dum ita loquitur: posse Anthophylla terræ concredita iterum effodi, & pro lubitu ita arbores transplantari. Imo asserunt alii, quod, si arbusculæ minores singulis ternis aut quaternis annis sic transponantur, ipsæ citius desideratos adeo fructus proferant. Sed addit insuper modo nominatus Autor, nulla cura efficere potuisse homines, ut extra circum Moluccum arbores caryophylliferæ crescerent & fructus ferrent perfectos, nam ne per octo quidem dies vegeta in ædibus servari Antyophylla, quin statim exsiccentur, & nunquam germinant. POMET interim l. a. exhibet arbusculam caryophyll-

Frid. Hoffmanni Oper. Supplem. II.

leam æri incisam, qualem Cl. TOURNEFORT, *Regius Botanicus Parisiensis*, brevi temporis spatio ex binis Anthophyllis in terram coniectis impetraverit

§. XII.

Pauca tandem etiam commemorari debent de *arbore Caryophyllum regium seu spicatum ferente*, cujus iconem nobis exhibet PISO l. a. p. 179. referens simul, quod earum altera altera sit major, utraque tamen vulgaribus similis, excepta proceritate. Ejus *folia* cum foliis caryophylli aromaticæ convenire, testatur RUMPHIUS *M. N. C. D. 2. A. 1. O. 21.* & ipsa me docuit autopsia, saltem quod alterum foliorum ramulo adhærentium in apice magis obtusum, alterum vero paulo acuminatius, & isti, quod novissime in *M. N. C. D. III. A. 5. & 6. O. 148.* delineatum exhibetur, exacte simile deprehenderim: id quod tamen non mirum videbitur illi, qui noverit, quod in aliis quoque arboribus folia, quæ circa imum ramuli reperiuntur, obtusiora sæpe appareant iis, quæ in summo furculi locantur, & quod solenniter in foliis lauri tale quid observetur. Accedit, exhiberi à POMETO l. a. figuram arboris caryophylliferæ vulgaris, in qua pariter obtusum aliquod ejusmodi folium cernere licet, ut hinc lusus naturæ eo reddatur evidentior. Arborum, Caryophyllum hunc regium ferentium, unam vel alteram saltem in toto orbe hætenus fuisse repertam, & quidem in sola insula *Machian*, quæ una ex Moluccis est, scribit PISO, idque jam ante violentam istam arborum caryophylliferarum vulgariarum extirpationem animadvertum fuisse à plurimis hanc in rem cum studio inquirentibus, præfecturam ibi locorum tenentibus. Sed testante RUMPHIO *M. N. C. D. 2. l. a.* periit hæc arbor jam dudum, nec ei par surrexit unquam; addit tamen hic Autor paulo post, extare adhuc unicam similiter arborem, in *Amboina* insula natam, quæ Caryophyllum regium, priori equidem nonnihil æmulum ac congenerem, sed multum ab ipsius figura recedentem, & vulgaribus similiorem proferat. Et demum in *Epistola ad Dn. Schroeckium Anno 1696. ex Amboina missa*, atque *Dec. III. A. 5. & 6. Ephem. Germ. antea citat. exhibita*, refert ulterius, ante quadriennium prodiisse in *Insulæ Amboinæ parte Boreali*, quæ *Ora Hittunensis* dicitur, arborem, ejusmodi Caryophyllum regium largientem, qualis per 40. annos in mundo non fuerit visa.

§. XIII.

In medio quondam insulæ *Machian* istam arborem repertam, atque satellitibus à Rege insulano stipatam fuisse, eo potissimum tempore, quo Caryophyllos hos ferebat, (ne scil. præter ipsum nemo iisdem potiretur), ex relatione fide dignorum virorum asserit WORMIUS *Mus. p. 203.* Cæterum, dubitari merito posse, scribit PISO, de raritate hujus fructus egregii & arborum infrequentia, annon ex naturæ instituto, an potius ex incolarum negligentia contigerit, cum fructus earum Caryophylla in terram decidua sponte ibidem germinant. Ast aliam magisque applausum promerentem rationem illius raritatis exhibet RUMPHIUS *D. 2. A. 1. M. N. C.* quando l. c. ait, Caryophylla regia nunquam in Anthophylla abire, adeoque arbores tales propagari non posse. Atque hæc etiam dicta sunt de arbore caryophyllifera, ejusque loco natali. Videbimus igitur, qua ratione Caryophylli aromatici colligendi, asservandi atque eligendi veniant.

CAPUT IV.

De Ratione Caryophyllos colligendi, asservandi & eligendi.

§. I.

E Quidem plerique alias fructus nonnisi maturi solent decerpi; vindemia tamen nostrorum Caryophyllorum, rudimentum saltem fructus exhibentium, à RUMPHIO *obs. alleg. M. N. C. D. II. A. I.* tunc instare perhibetur, quando ipsi e viridi aut pallido rubescere incipiunt, antequam emittantur flores. In *tempus* igitur *collectioni destinatum* si inquiramus, quod una cum methodo singulari omnem *Caryophyllos colligendi rationem* absolvit, diversi respondebunt diverse. Uti enim SCALIGER *de Subtil. ad Cardan. Exerc. 146.* cum omnibus haud congruit, num annis singulis aroma hoc colligendum occurrat; ita nec PISONI *l. c.* cum SCALIGERO de numero vindemiarum, nec cum aliis nonnullis de tempore anni adeo exacte convenit. Per triennium nempe vacare messem, quarto autem quolibet anno liberiores Caryophyllorum haberi proventum, ex VARTOMANI relatione tradit SCALIGER; caryophylliferas tamen arbores verosimilius singulis annis MAFFÆUS *pag. 84.* pronunciat fertiles, etiam si flagellorum vel acrioris decussus injuria, PISONE & GARZIAS AB ORTO *l. I. c. 21.* consentientibus, vindemiæ subsequenti anni noceat certissime. Hinc porro, dum *Scaliger Vertomano* fidem adhibet, quasi Caryophylla bis in anno legantur, Decembri & Junio, merito à PISONE refellitur, quod semel tantummodo in anno, ab Octobri ad Februarium eadem colligi observentur. Idem plane NEUHÖFF. *p. 358.* FRANCISCI *p. 381.* & RAJUS *l. c.* sentiunt. Neque plures etiam unicâ vindemiâ GARZIAS AB ORTO *l. I. c. 21.* & LINDSCHOTT. *p. 73.* annotant; utrique nihilominus posteriorum cum *Fragoso* initium hujus in mense potius Septembri placet quærere, nonnisi ad Januarium & Februarium juxta LINDSCHOTT atque eundem FRAGOSUM protrahendæ.

§. II.

Ut de *methodo* proin constet, qua Caryophylli vindemiæ tempore quamprimum colligendi *excipiuntur* partim, partim *asservantur*, ante omnia universum sub arbore solum, in gratiam decussorum eo facilius tollendorum, juxta FRAGOSUM, PISONEM aliosque purgatur; mox pars manibus legitur, pars arundine longa, aut è funiculis flagello decutitur, annuentibus NEUHÖFF. *pag. 358.* PARTHEY *Reiße-Beschr. p. 141.* SAAR *l. a.* & FRAGOSO *p. 25.* Interdum forsan linteamina, referente PARTHEY *p. 142.* substernuntur, ipsæque arbores succutiuntur, quo Caryophylli decidant: id quod sponte vix contingit, prout quidem WURFFBAINIO *p. 46.* videtur, nisi perquam maturi extiterint fructus, tunc enim proprio magis pondere delapsos, atque in terram quasi sepultos, novas proferre arbores §. 10. *Cap. III.* fuit monitum. Omne quidem manuum hic officium in gratissimo tali aromate immediate decerpando cupiunt exclusum GARZIAS AB ORTO & LINDSCHOTTUS, violentam jam flagellationem, vel funes ramis alligandas sufficere reputantes; sed probabilius crediderim, avulsionem ejusmodi aliquando manibus quoque, si non semper, saltem in ramis inferioribus, præstari posse commodissime. Tum qualicunque ratione decussa collectaque Caryophylla, præeunte

sæpius laudato RUMPHIO, cratibus imponuntur, & latis ari foliis tecta per aliquot dies in fumo macerantur, inque sole dein exsiccantur, ubi fulvum illum colorem acquirunt, quali vulgo cernuntur. An denique semper aqua marina tepida, ne teredine carie corrumpantur, aliquantum macerari debeant, rursusque exsiccare, quemadmodum FRAGOSUS, GARZIAS AB ORTO, PISO & SAAR ex NEUHÖFFIO *p. 350.* adstruunt, in medio relinquo.

§. III.

Ex omnibus jam quaquaversum per orbem distractis Caryophyllis, ea cum POMETO eligi merentur, quæ crassiora, sicca, fractu quidem facilia, inter conterendum tamen digitos afficientia, colore fusco prædita, capitulis rudimenta flosculorum comprehendentibus instructa, saporeque acri, aromatico & adurente linguam ferientia. Seponantur vero cum eodem atque LINDSCHOTTO, quæ tenuiora, nigriora, molliora, ac sapore & odore fere destituta, petiolis seu festucis, pulvisculis item, aut aliis etiam Caryophyllis, à quibus oleum jam tum per destillationem fuit separatum, commixta. Quod ultimum sine dubio cognoscere licebit, si Caryophylla diffracta unguibusque compressa nihil prorsus aut perparum oleosæ humiditatis, flammam ad candelam promptissime concipientis, exsudaverint. Ex opposito forsitan etiam detegentur, quæ multa aqua fuere imprægnata, ubi copiosior humiditas extillans non tam inflammabilis, quam aquæ instar aliquem strepitum in candelæ excitaverit flamma; Commemorant quippe PISO atque LINDSCHOTTUS, aquam juxta Caryophylla positam non solum brevi exhalare omnem, sed & Caryophylla ingredi, eaque reddere ponderosiora. Imo P. PHILIPPUS *Itin. Or. l. a.* affirmat, nautas aromata talia ferentes cogi, marina sæpius ista perfundere, ne aquam dulcem, potui necessariam, exsiccent. Plures mercatorum fraudes studio reticet POMET, ne aliis ignaris suppeditetur occasio, easdem pariter adhibendi. Caryophyllis vetustate inodoris fragrantiam restitui, si vino maduerint, tradit RENODÆUS *Instit. Pharm. l. 4. c. 17.* satis tamen eam esse fugacem, brevique rursus disparere, una notant. Denique præstat Caryophylla *asservare* integra, & ita quoque coëmere, cum alias non modo virium suarum maximam partem perdant, verum etiam pulvere cassiæ caryophyllatæ adulterata pro genuinis facile accipi queant.

CAPUT V.

De usu Caryophyllorum aromaticorum, eoque potissimum medico.

§. I.

Variis in usum quoque varium cedunt Caryophylli aromatici, dum nunc Coqui, nunc Aromatarii, nunc Oenopolæ eosdem adhibent frequentissime. In *culinis* non condimentis solum & embammatis, sed etiam caponibus, gallis, indicis, perdicibus ac carnibus ferinis, aliisque assatis, quin & fructibus conditis, uti malis cotoneis, nucibus juglandibus &c. transfigendis inserviunt. In officinis autem *Odorariorum*, in quibus pulveres fragranter studiosius præparantur, aut diversa concreta suavioribus odoribus imbuuntur, haud leve subsidium à Caryophyllis nostris petitur. Nec in tabernis *Oenopolarum* hi negliguntur, quando vel vinis gratia major concilianda, vel corrupta etiam vina restituen-

tuenda sunt, attestantibus iis, qui mysteria vinariorum detexere; prout Caryophyllos aromaticos vinum cerasorum, fructuum rubi idæi &c. ingredi omnes norunt. Transeant tamen in præsentis dicti similesque usus alii, majorem siquidem curam gerens, ut sanitas morbo decumbentibus ex voto restitueretur, eas potius vires hic commemorare aggredior, quas Caryophylli aromatici in corpus humanum morbidum egregie exerunt, sive interne, sive externe, sive integri aut saltem pulverisati, sive præparata ex ipsis usurpentur.

§. II.

Quamprimum videlicet isti oris cavo induuntur, inque hoc dentibus comminuti & saliva subacti hinc inde circumvolvuntur, tum animam foetidam gratis exhalationibus aromaticis corrigunt, tum particulis acerbis viscidioribus æque salivam incidendo, ac sensibilem oris membranam laceffendo, instar aliorum masticatoriorum uberius salivæ stillicidium eliciunt. Sicuti enim Indorum foeminae propter gratiorem oris halitum Caryophyllos aromaticos, teste RAJO aliisque, frequenter manducant, ita & ab iisdem masticatis multum obtunditur foetor, quem ciborum reliquiarum, modo circa dentes, modo in dentium cariosorum cavernis corruptæ, solent spirare, consentientibus WEDELIO *Amæn. M. M. p. 462.* & FRAGOSO *l. a. p. 24.* Masticatoria autem dum DECKERS *Exerc. Pr. c. 3. pag. 76. seqq.* apophlegmatismos pronunciat, qui in forma solida dentibus confracti copiosiore phlegmatis ex oris glandulis excretionem procurando, in pituitosis capitis affectibus, oculorum hebetudine, auditus gravitate, linguæ paralyti, olfactu deperdito vel imminuto, dentium dolore, lethargo, caro, comate &c. insigniter valeant, efficacioribus etiam atque frequentiori usu comprobatis Caryophyllos nostros accensere eo minus veretur, quo notabiliore hi acredine polleant, ut Syncopticis pariter excitandis a FISCHERO *Corp. Med. p. 372.* observentur commodi. Imo in forma fluida apophlegmatismus ex Caryophyllis aromaticis sine negotio acquiritur, si cum WEDELIO *de Med. Fac. p. 216.* ex ipsis atque ligno sancto & radice pyrethri &c. odontalgica extrahatur tinctura, tam in dentium doloribus compescendis expertissima, quam aliis quoque scopis abunde satisfaciens.

§. III.

Ast ubi Caryophylli aromatici deglutiti ventriculolum ingrediuntur, in hoc non minus, quam in continuato tubo intestinali potentes, in spiritus animales, cruditates pituitosas, bilem inertem atque flatum, edunt operationes. Si enim Caryophylli vel odoretenus spiritus egregie reficiant, multo magis in primis viis excepti, partim subtilissima & suavissima effluvia emittendo, partim nerveam tunicam pergrata ratione vellicando, atque segniores spirituum motum incitando hosce refocillabunt, annuentibus SYLVIO *Pr. l. i. c. 41. §. 42.* AMMANNO *Man. ad M. M. p. 148.* Merito proin Veneris incentivum sunt SERAPIONI, referente RAJO, partumque feliciter promovent, quatenus juxta WEDELIO *de Med. Fac. p. 193. & 221.* hic naturam confortant, ibi autem sale imprimis acris oleoso semen turgidius, spirituosius & acrius reddunt. Et ne nutritiva una defint corpuscula, Caryophyllos aromaticos pulverisatos loco aphrodisiaci cum lacte assumere jubet LINDSCHOTT. *p. 73.* & C. DE ACOSTA *l. a.* Hinc, dum Caryophylli nostri cruditates pituitosas in ventriculo collectas, quæ hunc gravando appetitum & chylicationem lædunt, ratione acrimoniæ seu salis ejusdem oleosi acris efficaciter attenuant, simulque

Frid. Hoffmanni Oper. Supplem. II.

nervos vellicant, haud ultimum locum inter stomachica remedia, in anorexia & dyspepsia proficua, apud WEDELIO *Am. M. M. p. 156.* merentur. Num acidis etiam cruditatibus aroma hoc medeatur, prout quondam SYLVIO *Pr. l. i. c. 19. §. 75.* & B. ETTMULLERO *Oper. T. i. p. 536.* visum fuit, vel ideo licebit dubitare, quod acida Caryophyllis affusa sapore suo haud priventur, acria autem cum fermento acido combinata genesin aceti multum promovere à LE MORT. *de Chym. Nob. & Util. p. 66.* communi Chymicorum consensu observentur.

§. IV.

Porro, quemadmodum Caryophylli aromatici in intestinis bilem, aut ratione visciditatis, aut deficientium particularum salino-sulphurearum intuitu, inertem, moleculis oleosis & acerbis, confirmante WEDELIO *Am. M. M. p. 168.* commode acuunt; ita ubique in primis viis humores viscidos attenuando, nidumque flatuum resolvendo, hosce, *eodem ibid. p. 356.* notante, potenter discutiunt. Nondum tamen hic omnes vires deposuisse nostri videntur Caryophylli, sed eorum spicula aromatica, cum chylo vel lymphâ intestinorum per varios anfractus ad massam sanguinem delata, occasione ubivis data, more aliorum aperientium humores non minus crassos & lentos atterunt, quam colatoria ad majorem secretionem & excretionem irritant. Unde ad plurimos nunc excurrendum mihi esset morbosos affectus, ubi omnes enarrare vellem, qui à cruditatibus ventriculi pituitosis, bile inertis, flatibus, humoribus crassis, atque viscerum obstructionibus scirrhisve dependentes, haud postremum in Caryophyllis nostris inveniunt remedium. Ex omnibus cum ROLFINKIO *Meth. Med. spec. p. 993.* BONETO *Thef. Pr. T. i. p. 977.* HOFFMANNO *Clav. in Schroed. p. 434.* BAUHINO *H. Pl. p. 424.* GRULINGIO *Pr. Med. p. 57. 94. 95. 436. 452.* HOFFERO *Medic. fam. p. 234. 285.* atque WEDELIO *de Med. Fac. p. 92. 103.* cardialgiam, colicam, suffusionem, vertiginem, cephalalgiam, catarrhos, paralytin, stuporem, affectus soporosos, memoriae atque visus debilitatem, sterilitatem foeminarum, mensium defectum, cachexiam &c. sufficiat nominasse. Nec in hydropis principio, quando à FISCHERO *Corp. Med. pag. 518.* Caryophylli commendantur, alia ratione, quam virtute incisiva, videntur prodesse, neutiquam vero ob efficaciam aliquam humiditates attrahendi & exsiccandi, quam Veteres quondam sibi imaginabantur. Horum namque nonnulli, observantes aquam juxta Caryophyllos positam evanescere, ipsos abhinc majus pondus acquirere credebant, ideoque peculiarem vim attractivam eisdem assignabant, & hydropicos quoque in Caryophyllorum conditorio repositos à malo suo ita liberari posse affirmabant. Verum etiam si tale experimentum de aquæ juxta Caryophyllos locatæ prompta exsiccatione cum ponderis horum incremento superius *c. IV. §. 3.* ex PISONE, LINDSCHOTTO & P. PHILIPPO recensuerim, hic tamen de successu ejusdem potiori hæsito jure, postquam brevi abhinc ad latus Caryophyllorum unciarum duarum duas tantum drachmas aquæ, tantamque aquæ quantitatem in remotiori conclavis loco collocavi, elapsis autem 8. diebus utrobique eandem aquæ partem, h. e. dimidiam exhalasse, Caryophyllos vero minime ponderosiores annotavi.

§. V.

Sed quando externe in usum vocantur Caryophylli aromatici, diversis partibus pro scopo diverso adaptantur diversimode. In cephalalgia & gravedine pulverem Caryophyllorum vertici inspersum com-

mendant SCHNEIDERUS *de Catarrh. l. 4. c. 6. p. 452.* GRULINGIUS *Med. Pr. p. 78.* J. BAUHINUS *H. Pl. p. 429.* & LINDSCHOTT. In Epilepticis infantum insultibus à cucupha, ex Caryophyllis aromaticis aliisque speciebus parata, & capiti imposita, paulatim omnes motus convulsivos cessasse, atque intra duodecim horas prorsus evanuisse, deprehendit DIEMERBROECKIUS *o. 76.* Pro Vomitu compescendo epigastrio DECKERS *in Not. ad Prax. Barbett. p. 135.* applicat emplastrum, quod nostri itidem ingrediuntur Caryophylli, aut pulverisatos panis crustæ aceto madefactæ inspersos pro hypercatharsi compescenda calide abdomini insternit HOFERUS *Med. Fam. p. 441.* Eundem pulverem pani tosto & vino malvatico ebrio jubet adspergere ETTMULLERUS *Op. T. 2. p. 83. & 110.* ut nempe Vomitus sedandi gratia ventriculo, & ad nothos parturientium dolores placandos regioni lumbari accommodetur. In quem finem & mulierculæ panem piperatum melle largiter illinire, Caryophyllos aromaticos admiscere, atque sic lumbis tepide admoveere non ignorant. Ut Memoria reparetur, nunc vino, nunc lixivio, quibus Caryophylli cum aliis aromatibus incocti fuere, caput lavant alii, tradentibus ZACUTO LUSITANO *Prax. Hist. l. 1. c. 219.* & BAUHINO *H. Pl. l. 1. a.* GRULINGIUS *Med. Pr. p. 58.* pro roboranda memoria omni mane tempora & nucham singulari aqua, quæ Caryophyllos pariter recipit, dictitat inungere. Et novi ipsemet, in Oculorum debilitate & caligine, incipienteque Cataracta, aliquot guttulas decoctionis Caryophyllorum & zingiberis in aqua simplici factæ, cum fructu oculorum cantho fuisse instillatas. Haud reticendus denique usus, quem Caryophylli aromatici loco suffimenti subinde præstant vix contemnendum, quando sc. accensi pestiferum ærem corrigere BAUHINO & DEODATO, Coryzam curare, fluxumque mensium provocare GRULINGIO *Med. Pr. p. 79. & 437.*, atque arthriticos dolores lenire HOFERO *Med. fam. p. 565.* perhibentur. Prostant hinc in *Pharmacopœa Londinensium Bateana p. m. 24.* Caryophylli odorati, e storace, labdano, benzoino, caryophyllis aromaticis & carbonibus, interveniente aqua gummosa, artificialiter formati, ægrorum cubiculis fumigandis inservientes.

§. VI.

Moluccani, GARZIA & PISONE testibus, Caryophylla non solum viridia, aceto & sale, atque teneriora saccharo in magnam palati amoenitatem condiunt, sed & nunc acetum ex infusione Caryophyllorum viridum parant, cibis non minus condiendis, quàm ventriculo roborando & coctioni promovendæ aptissimum, nunc aquam vel spiritum è floribus aut iisdem Caryophyllis viridibus destillando eliciunt, mira odoris suavitate fragrantem, & cerebri affectibus singulari virtute convenientem, atque imprimis isti Paralyseos speciei, Beriberi dictæ, accurateque à JAC. BONTIO *Hist. Nat. & Med. Ind. Or. l. 2. c. 1.* descriptæ, medentem, referentibus FRANCISCO & RAJO. *ll. cc.* Europæi tamen Medici ægrorum in emolumentum longe plura è Caryophyllis aromaticis conficere solent medicamina, ipsos modo ut partem simul primariam, inodo tanquam corrigens, v. g. opii atque purgantium, recipiendo. Supervacaneum nihilominus foret, si non molestum, omnes pulveres, trageas, aquas destillatas antapoplecticas, antepilepticas, stomachicas, decocta, elixiria, tincturas, vina medicata, syrupos, electuaria &c. in quibus Caryophylli aromatici præsto sunt, ex omnibus autoribus, vel solo etiam MYNSICHTO corradere & huc transferre. Neque attinet tincturam antepilepticam De-

ckeri, ex hujus *Exerc. Pract. pag. 234.* neque Mætsii essentiam alexipharmacam vel spiritum antinephriticum, ex ejusdem *Chym. Rat. p. 11.* atque *Prax. Chym. Rat. p. 111.* hic describere; ex cunctis Caryophyllorum aromaticorum præparatis unice oleum eorum destillatum cum essentia nunc lubet feligere.

§. VII.

Equidem in Oleo ex Caryophyllis nostris destillando non omnes eandem tenent viam; multis enim aquæ affusio cum insequente digestionem haud sufficit, sed vel cremorem tartari aut cineres clavellatos cum VIGANO *Medull. Chym. p. 27.* vel spiritum salis cum oleo vitrioli præparatum, ac sal commune cum LE MORT. *Chym. Med. Phys. p. 53.* Caryophyllis destillandis simul adjiciunt. Nonnullis, ut oleum album & penetrantissimum acquirant, destillatio Caryophyllorum siccorum per descensum magis placet, ea ratione instituta, quam CHARRAS *in Pharm. sua Reg. Chym. c. 40. 94.* & LEMERY *in Curs. Chym. P. 2. c. 7.* edocent. Imo sola Caryophyllorum per longum tempus digestionem, & aquam & oleum, non æque tamen subtile ac diaphanum, quam destillatum, posse obtineri testatur VIGANUS *l. c.* Ut plurimum tamen quia illud Caryophyllorum Oleum destillatum in usum venit, quod à Batavis transmittitur, veluti leviori comparandum pretio, ideo potissimum hic opus, ut à spurio, quale sæpe infusum, si non tinctura ipsa, probe discernatur genuinum. Hocce videlicet, coloris aurei vel rufescentis, aquæ instillatum nequitiam supernatat, quemadmodum in eo bonitatis notam falso quærit POMET *l. c. p. 200.*, sed fundum potius petit, ROB. BOYLE *Chym. Scept. p. 88.* & WEDELIO *Ph. Acroam. p. 367.*, præter Chymicos hætenus allegatos, annotantibus. Si Oleo itidem Caryophyllorum non adulterato aliquot guttulæ aquæ subinde instillantur, paucorum dierum spatio incorporari & imbibi easdem deprehendit laudatus WEDELIUS *ibid. p. 357.* E contra ubi mera Caryophyllorum in oleo v. g. been infusione concinnatum fuerit Oleum, nequitiam sub aquam mergetur, neque illitum cuti æque prompte penetrabit, sed majoris pinguedinis relinquet vestigium: Tincturam autem Caryophyllorum, à falsariis pro destillato eorum oleo, teste VIGANO, venditam, aptitudo cum aqua misceri facile monstrabit, prout spiritus vini rectificatissimi saltem præsentia detegatur, si guttulæ quidem nonnullæ Olei ab aqua separatæ persistant, aliquid tamen præcipitetur, quod aquam reddat lacteam.

§. VIII.

Vires jam genuini Caryophyllorum alei aliæ celebrantur, quando externe, aliæ quando adhibetur interne. Externe omnia recentia vulnera, punctum vel cæsum inflicta, illud sanare, ac hæmorrhagiam sedare, tradit HARTMANNUS *Prax. Chym. p. m. 410.* Nec in fistulosis ulceribus & excrescentiis variis, hyperfarcosis, fungis, verrucis, polypo, carunculis penis, clavis &c. idem dissuadet WEDELIUS *Am. M. M. p. 95.* In Odontalgia cum bombace denti carioso Oleum Caryophyllorum inditum egregie confert, quod ratione acrimoniæ igneæ, non minus quam cauterium actuale, humiditates exsiccare, fibrillasque nerveas adurere videatur, confirmantibus BONETO *Thef. Pract. T. 3. p. 254.* P. J. FABRO *Myrothec. Spag. c. 40.* C. LANGIO *in Pathol. animat. p. 37.* & MAETSIO *Prax. Chym. Rat. p. 46.* In quo casu majorem adhuc efficaciam ejus pollicentur CROLLIUS *Basil. Chym. p. 275.* RIVERIUS *Pr. l. 6. c. 2.* atque ETTMULLERUS *in Schræd. dilucid.,*

lucid., si camphora in eodem soluta fuerit. THEOPHR. PARACELSUS *Chir. magn. tr.* 3. c. 7. in aliorum quoque ossium carie felicissimam Olei Caryophyllorum extollit opem. In Oculorum suffusione, à materia potissimum crassiore, externe ut efficacissimum remedium hoc Oleum commendat BONETUS *Thef. Pr. T. I. p.* 977. In Paralyfi linguæ hanc Oleo Caryophyllorum fricandam curat GRULINGIUS *Med. Pr. p.* 164. & in vermibus aurium enecandis unguentum ex pinguedine caponis & Oleo Caryophyllorum cum pauxillo mercurii dulcis *p.* 126. laudat; sicuti obtusum auditum ab eodem reparari DEODATUS *Panth. Hygiast. l. 2. p.* 35. & BONETUS *Thef. T. I. p.* 1018. innuunt. Pro ventriculo pariter roborando atque vomitu refrænando scrobiculum cordis Oleo Caryophyllorum inungunt HOEFERUS *Med. Fam. p.* 422. 491. 777. & DIEMERBROECKIUS *O. 31.*, ab eodem vero ventri illito & diarrhoeam & colicam cessare HOEFERUS *ib. p.* 643. HARTMANN. *l. a.* & MAETS *Prax. Chym. rat. p.* 151. commemorant. In Febribus denique intermittentibus rigores à nullo alio promptius coerceri, quam ab Oleo destillato Caryophyllorum, sive externe, sive interne usurpato, per experientiam constitit SYLVIO *Pr. l. 1. c.* 30. §. 143.

§. IX.

Interno itaque usu cum Oleum Caryophyllorum destillatum majori longe efficacia in spiritus animales, humores viscidos, inertem bilem atque flatulentias operetur, quam Caryophyllos ipsos agere §. 3. & 4. indigitavi, ratio omnino habetur in promptu, cur idem interne ipsum cor, hepar & ventriculum confortare, lienis inflationes & intumescen- tiam corrigere, foetorem anhelitus emendare, cruciatus colicos sedare, uterum mirifice corroborare, icterumque album eradicare asseratur ab HARTMAN- NO *l. a. p.* 413. Cur adhæc balsami naturalis vice caput firmare, catarrhos exsiccare, sensus omnes vi- gorare, memoriam firmare, ingenium acuere, ver- tiginem, lipothymias ac syncopas curare, ab epi- lepsia præservare, frigidos capitis affectus & melan- cholica deliramenta præcavere, pectoris angustias, raucedines, tusses à frigidis crassisque humoribus progenitas sanare, viscerum obstructions referare, ac torpentem venerem excitare prædicetur à DEO- DATO *l. c.* Ast quemadmodum pro scopo externo balsamus etiam Caryophyllorum in officinis prostat, juxta SCHROEDERUM *Pharm. l. 4. p. m.* 553. ex Oleo Caryophyllorum atque nucistæ paratus, & pulvere Caryophyllorum tinctus; ita pro usu interno Oleum Caryophyllorum destillatum nunc solum, nunc sac- charo vel pulvere terreo exceptum, nunc in tinc- tura tartari acri aut spiritu salis ammoniaci vino- so solutum, nunc purgantibus additum, solet assu- mi. Sic WEDELIUS *Ph. Acroam. p.* 372. & *Amæn. M. M. p.* 159. & 359. solo Oleo Caryophyllorum cum conchis præparatis remixto obtundere consuevit ardores, singultus & cardialgias in dysenteria &


alias extra febrim; Ex eodem & piperis oleo cum camphora teste *Ejusd. Disp. de Aromatic. nat. p.* 16. parat oleum febrifugum antiquarium in spiritu sa- lis ammoniaci vinoso assumendum, appetitui alias etiam augendo admodum, juxta *Tr. de Med. Fac. p.* 97. interserviens.

§. X.

Pauca de Essentia Caryophyllorum proferenda re- stitant, quam simpliciore spiritu vini communi- ter extrahi omnes inter constat. Saturatiorem tamen & acriorem e Caryophyllis tincturam elici spiritu vini vulgari, quàm rectificato, curiosius annotat ANT. DE HEIDE *Obs. Anatomia Mytuli annex. 73.* In Surditate ejusmodi Essentiam c. goffypio auribus inditam commendat BONETUS *Thef. T. I. p.* 1020. quin vero in omnibus affectibus eadem pro- fit, in quibus efficacia & Caryophyllorum & Olei horum destillati hætenus celebrata fuit, nullum relinquitur dubium. Quodsi acidum una cum viscido contige- rit in corpore peccare, potentior adhuc e Caryo- phyllis nostris facile obtinetur Essentia, utrique sco- po satisfaciens, ubi loco menstrui oleum tartari per deliquium vel lixivium cinerum clavellatarum affusum fuerit. Cui autem essentia magis compo- sita placuerit, poterit pro lubitu seligere vel essen- tiam carminativam *Wedelii, in Opiol. p.* 119. ab ipso descriptam, vel Elixir balsamicum *Magnif. bo- die PRÆSIDIS, Dn. D. Fr. Hoffmanni*, quod in *Not. ad Poter. p.* 313. ex radice zedoariæ, chi- næ chinæ, gentianæ, herba scordii, corticibus aurantiorum & citreorum recentibus, nucista, suc- cino, Oleo Caryophyllorum, croco, camphora, myrrha, interveniente spiritu menthæ & spiritu salis ammoniaci elaborandum tradit.

§. XI.

Tandem quid de *Anthophyllorum & Caryophyllo- rum regionum* censendum usu? In Anthophyllis sin- gularem plane vim suspicatur POMET *l. c.* qualem nihilominus exprimere ignorat. Foeminis plerum- que iidem, non tam ob peculiarem signaturam, in quantum intra se fructum fovent, quam ob odorem remissiorem minusque ipsas lædentem, convenien- tiores reputantur. Anthophylli hinc in mensibus retentis à GRULINGIO *Med. Pr. p.* 453. & in fluore albo ac sterilitate mulierum à MICHAELE *Prax. Clin. p.* 246. & 255. nec non à DOLÆO *Encyclop. Med. p.* 901. 908. deprehenduntur præscripti. Caryophyl- li autem regii à Regulis quondam insulani filo tra- jecti instar armillarum, ob odoris gratiam gestaban- tur in brachiis, recensente WORMIO *l. a.* nunc ve- ro à Magnatibus & Curiosis inter Cimelia reponun- tur, notante RUMPHIO *O. all. Dec. 2. A. I.* Rari- tas quippe atque caritas talium Caryophyllorum op- pido insignis impediunt, quo minus eorum vires, quas easdem plane cum Caryophyllis aromaticis vul- garibus sapor & odor suadent, ipsa queant expe- rientia comprobare.



D I S S E R T A T I O
D E
CORTICE CASCARILLÆ,
E J U S Q U E
INSIGNIBUS IN MEDICINA VIRIBUS.

Primum edita anno 1738.

P R Æ F A M E N.



Si quicquid tellus alit & triplex naturæ regnum producit ad examen physico-chemicum vocandum sit, habebunt quo se exerceant tantum non omnes, cum primis illi, qui facto adcuratori rerum per σύνθεσιν & ἀνάλυσιν scrutinio, ad intimam naturæ cognitionem pervenire contendunt. Certe si unum tantummodo spectes corticum in regno vegetabili amplissimum adparatum, summam principiorum, cum ratione qualitatis tum quantitatis, deprehendes differentiam: a quorum vel excessu vel defectu variaque mixtione, corporum in iis contentorum dependet varietas. Differunt autem pro aëris ac terrarum conditione. Nostri in regionibus gignuntur cortices crudiores, adstringentes terrei, crassius resinosi, rudiori sulphure & sale præditi: veluti sunt avellanarum, fraxini, betulæ, abietum, alique. E calidioribus vero plagis, in quibus sal & sulphur magis excoquantur, oleum cum resina subtilius redditum intimiusque mixtum, prodeunt ut plurimum cortices odore fragrantès & sapore aromatici, cujus phænomeni rationem a puritate & subtilitate partium sulphurearum, quæ magis digestæ & maturatæ sunt, deducit ILLUSTRIS HOFFMANNUS (a); quum contra evidens sit, ingratis corticibus nostris inexistentem saporem odoremve a crudo potius & rudiori sulphure & sale ad alcalinam & volatilem magis ac ad subtilem acidam naturam vergente provenire (b). Jam facile ratio reddi poterit, cur in climate calidiori particulæ resinoso-sulphureæ subtiliores, & salinæ volatiliores fiant. Ea enim est caloris temperati vis ac potentia, ut fluida expandat, humidum separet, ac fortiori circuitu motuque attritivo fluidum tenuissimum, quod per angustissimos tubulos longo ductum itinere fertur, intimius misceat, principia inter se mixta mirifice alterando & confundendo. Præclare vero sentit P. PERRAULT (c) qui ad particularum sulphurearum saliumque volatilium generationem non calorem solum, sed terræ etiam requirit necessitatem. Ita enim, dum horum principiorum in pluviis demonstrat originem, ait: *Il est aisé d'entendre que la chaleur féconde du soleil, & l'agitation salutaire des vents, n'est pas absolument ce qui produit les sels volatiles & sulfurés, qui sont dans la pluie; mais c'est ce qui fait, que ces sels, qui sortent de la terre inféconds & inutiles, acquièrent cette qualité*

(a) *Observ. Physico-Chemic. XVI. p. 64.*

(b) *IDEM l. c.*

(c) *dans ses Oeuvres diverses de physique & de mécanique p. m. 110. add. les répliques de Mr. du Clos à l'examen de ses remarques, apud eundem p. 114. seqq.*





lité feconde par l'action du soleil & des vents. Uti vero ex his cœli terræve in miscendis ac struendis corporibus cernimus amicum consensum; ita præcipue eundem in generandis corticibus observamus, qui, quo magis ex corpusculis valde activis, & ex parte naturæ amicis conflati sunt, eo efficacius secundum sphæram receptivitatis cujusvis individui operantur; quum ea sit structuræ partium corporis animalis conditio, ut non tam crudioribus resinosis terreisve adstringentibus, sed solventibus potius, quæ humores abstergunt, sensus reficiunt, ac virtute balsamica labascentes vires erigunt, tractanda sit. Quæ quum ita sint, operæ præmium facturus visus sum, si ex numeroso corticum adparatu *corticis cascarillæ* virtute præclaræ omnique laude majoris naturam, indolem, virtutesque explorare conarer. Quum enim in eo sim, ut jactis studiorum in hac musarum sede fundamentis, & per sex, quæ Dei gratia est, annos, super imposito artis salutaris ædificio, colophonem imponam; necessarium fuit vires in publice differendo iterum experire. Elegi itaque argumentum, in quo me exercerem, quod parum aberat, quin defererem, quum cognoscerem, quam multis, quamque gravibus difficultatibus involutum. Quanto enim faciliora & planiora mihi visa fuerant, quæ postremo loco posui; quippe clarissimorum artis antistitum testimoniis comprobata, tanto mihi gravior initii aditus patebat, quum ea, quæ ad naturalem historiam pertinent, fere leviter tantum tacta apud obvios scriptores viderem, nec nisi maximo labore conquirenda ex multis monumentis mihi fuerint. In quo si defecisse, aut omnino posteris, certiora forte edoctis, aberrasse videbor; veniam me spero tanto facilius consequuturum, quanto magis diligentiam & bene merendi studium æqui lectores spectare & in arduis voluntatem quoque laudare consueverunt.



CAPUT I.

De Historia naturali corticis Cascarillæ.

§. I.

Cascarilla quid?

Quando in schola medica *casçarilla* celebratur, intelligitur involucrum exterius arbusculæ cujusdam Indiæ occidentalis fatis compactum, intus concavum & coloris subfusco ferruginei, extus convexum, sed tegumento adhuc cinereo albicante obductum, saporis amaricantis, aromatici, odoris grati, principiis gaudens sulphureis, blande vaporosis, resinosis, ac gummoso-terreis. (a) Placuit descriptionem hanc præmittere, ut quid illud sit, de quo disputetur, intelligamus, cujus explicationem, tradita prius historia na-

turali fruticis apud Indos satis notæ, ulterius profequi, partesque ejus constitutivas, experimentis & rationibus physico-chemicis, evincere conabor.

§. II.

Jam inquirendum est, quid *casçarilla* proprie significet. Originem vox hæc debet Hispanorum *casçara*, quæ *corticem* denotat, in vernacula dicimus, *eine Rinde oder Schale*. Hinc *casçara di novo*, ovi testa, *casçara de naranja*, cortex aurantiorum vocantur; ut taceam varias denominationes, v. g. *casçara de limon*, *casçara de granada*, *casçara del arbore* &c. Itali dicunt *corteccia*, ceu patet ex GIOVANNI TORRIANO lexico, (b) ubi v. *casçara* seu *corteccia* ait: *the ut most Barck or Kind af any Tree*, h. e. *Schale oder Rinde eines Baums*. Corticula vero hispanice significat *casçarillam*, adeoque est diminutivum vocis *casçaræ*. Inde corticem Peruvianum *casçarilla de la Oja*; (c) Sieber. *Rinde*

Etymologia casçarillæ.

(a) Descripsit corticem *casçarilla* POMET in appendice oper. *Histoire generale des drogues*, quando: *Kinkina femelle*, inquit, ou *Falsa-Kaskarina*, est d'une figure de canelle, mais d'une couleur plus pâle, d'un gout dans le commencement insipide; mais au bout d'un petit moment, il donne une amertume assez désagréable. STISSERUS actor. laborat. chem. spec. II. cap. IX. de cortice eleuterii, pro cortice Peruviano china-china vendito ex parte tantummodo corticem hunc delineavit, eumque aromatici odoris & saporis, particulis balsamicis resinosis reserissimum, tradit. Dans L'HISTOIRE DE L'ACADEMIE ROYALE DES SCIENCES A. MDCCXIX. p. 67. ita describitur: Le Chacril, remède peu connu, & dont les livres qui traitent des Drogues médicinales, du moins ceux de ce pays-ci, ne font nulle mention, est une Ecorce assez ligneuse, épaisse depuis une ligne jusqu'à une ligne & demie, de la couleur à peu-près du Quinquina ordinaire,

d'un brun plus pâle, moins compacte, & plus friable, d'un goût amer, un peu stipique, piquant la langue avec assez d'acrimonie, & laissant à la fin une impression d'amertume mêlée de quelque chose d'aromatique. Cette écorce est couverte d'une pellicule blanchâtre, mince & insipide, ridée & sillonnée légèrement en divers sens. C'est l'écorce d'une Plante de Perou encore inconnue.

(b) Titulus est: *Vocabolario Italiano ed Inglese*, Londini 1688. f.

(c) Quantum mihi intueri licuit Hispanicorum vocabulorum thesauros inveni vocem *Oja* non denotare febrem, sed folium; seu ut LORENZO FRANCIOSINI FIORENTINO in *vocabolario Italiano e Spagnuolo* p. 203. col. 3. explicat, parte escrementosa & quasi chioma della pianta. Addit pro explicatione vocis, folium auri hispanice dici, *Oja de Oro*.

Kinde vocari, nonnulli scriptores (d) referunt; tanquam signum, denominationem Hispanos Peruviano cortici κατ' ἐξοχὴν tribuisse. (e) Itaque tam late patet Hispanis significatus hujus vocis, ut non in genere solum pro corticibus intelligatur, verum etiam ad speciem quandam corticum referatur. Quomodo vero ab hac generica denominatione cortex noster *casçarilla* proprie dictus fuerit, aliam non invenio rationem, quam quod botanices ignari illam ad speciem nullam referre sciverint, vel quod, ut verisimile mihi videtur, propter tenuiorem corticularum texturam aliter denominare, ipsis non displicuerit, quam *casçarillam*.

§. III.

Varius
ejus signi-
ficatus.

Præter veram significationem diversa & incongrua nomina sortita est *casçarilla*. Nul-
libi enim evolutione nominum magis opus videtur, quam in regno vegetabili, & adsignandis herbarum speciebus, quæ adeo sæpe luxuriant, ut, monente B. WEDELIO (f) quot auctores, tot nomina occurrant. (g)

§. IV.

Quinam
casçaril-
lam ad
corticem
Winteranum
referant?

Ex variis ineptis denominandi rationibus ac diversis sententiis conjicere licet, plures eruditos in eruendis corticis genere & specie occupatos hæcenus latuisse veram historiam naturalis cognitionem; inter quos e recentioribus eminet auctor speciosi operis *Botanici*, qui arborem corticis nostri dicit *canellam laurifoliam*, (h) & ad descriptionem ejus figuram arboris delineari & vivis depingi coloribus annisus est. Sed parum considerate. Videtur enim vitulo VALENTINI

arasse, qui corticem nostrum cum *periclymeno odorato* DALEI confudit, quum ille potius corticem *Winteranum* intelligat, tantum abest, ut ibi *casçarillam* descripserit. (i) Neque enim cortex noster, quemadmodum de *periclymeno odorato* tradit DALEUS, (k) tam crassus, fungosus, inæqualis, fissus multisque rimis hians existit, neque ratione virtutum ab ullo auctore tanquam *specificum in scorbuto* habitus fuit; sed duo hi cortices a diversis regionibus & arboribus natalem ducentes, prorsus a se invicem distincti nullam vel externa facie, vel virtute exprimunt similitudinem. Quod vero WEIMANNUS per *canellam laurifoliam cortice acri*; CASP. BAUHINUS per *arborem Magellanicam cortice acri*; SAM. DALEUS per *periclymenon odoratum* intelligunt, id optime de cortice *Winterano*, quem ex oris freti Magellanici afferunt, interpretatur HERMANNUS (l). Cujus rationis, quum antea citati auctores non meminissent, mirifice eos cœcutire oportuit circa naturam ac indolem corticis *casçarillæ*.

§. V.

Alii *casçarillam* ad speciem *chinæ chinæ* referunt, quam confusionem exortam judico, quum propter ignorantiam asylum nonnulli Botanici crediderint, corticem hunc, qui ex regno Peruviano ad nos adfertur, & externa facie similitudinem aliquam refert, esse speciem corticis *febrifugi Peruviani*, (m) ceu ex dictis (n) APINI clare patet. Hinc a POMETO (o), LEMERY (p), WEIMANNO (q), aliisque habitus & dictus fuit *china-china spuria*, & pro illa a pharmacopolis & mercatoribus sæpius vendita, quale exemplum recen-

An ad
speciem
Chinæ
Chinæ
referenda sit?

(d) vid. STISSERI *act. laborat. chym. spec. II. cap. IX.* & de febr. intermitt. consult. nov. cap. XVI. p. 95. VALENTINI *historia simplic. reform. lib. II. sect. IV. p. 174.*

(e) APINUS in præfatione *historicæ relationi febris epidemicæ* præmissa.

(f) *dissertat. de aro cap. I.*

(g) Inter hos sequentes eminent. STISSERUS & DALEUS per vocem *eleuterii* intelligunt *casçarillam*. LEMERY autem dans son *dictionnaire des drogues simples* p. 302. per *eleuterium*. POMETUS dans les *additions de histoire generale des drogues* falsam *Kaskarinam* vocat; cum contra WEIMANNUS in opere *Botanico*, cui titulus: *Phytanthozaiconographia tom. II. lit. C. p. 33.* illam *canellam* nominet, forte ob figuram ejus, cum qua, uti POMETUS l. c. tradit, aliquatenus convenit. Ab his denominationibus plane recedit VALENTINUS *histor. simplic. reform. p. 175.* quippe qui *casçarillam* cum cortice *Winterano* confundens, illi etiam denominationem *Winterani corticis* vel *canellæ albæ* tribuit. ZORNIUS denique in *Botanologia medica* p. 202. varias & corruptas *casçarillæ* conquisivit denominationes v. g. *chaquarillam*, *schacharillam*, *casçarillam*, *schachrinillam*, *scasçarillam*, *corticem chinæ chinæ novum*, *chinam chinam spuriam*, *chinæ chinæ femellam* & *kaskarillam falsam*, quas vel ideo adduxi, ut quivis statim percipiat, quot auctores quam varias, uni tantum rei designandæ appellationes adhibuerint. Addatur L'HISTOIRE DE L'ACADEMIE ROYALE DES SCIENCES l. c.

(h) in *phytanthozaiconographia* l. c. delineat folia *laurina*, florem *pentapetalum album*, odoratum, in singulis pediculis binos, ternos, quaternos vel plures, baccas *subvirides*, multis *feminibus angulosis* *uvæ* *vinaceis* *similibus* refertas.

(i) Hinc mirum non est, adductos viros in des-

criptione *casçarillæ gummi alouchi* commemorasse, quod ex trunco arboris exsudaret. Sed oportuit eos hic cœcutire, quum non meminerint differentiarum inter corticem *casçarillæ* & *Winteranum*. Recte enim judicat POMETUS dans son *histoire generale des drogues lib. IV. c. IV. p. 130.* resnam hanc a *canella laurifolia* provenire sequentem ejus subjungens descriptionem: *Il découle de ces arbres une gomme noirâtre grasse & fort odorante, de différentes couleurs, fort sale & fort vilaine, qui est cette gomme, que quelques Droguistes appellent gomme alouchi. Les habitants de l'Isle Saint Laurent employent cette gomme, qu'ils nomment Liemangits, dans la composition de leurs parfums, à cause que son odeur n'est pas tout à fait désagréable.*

(k) P. II. *Phytolog. p. 379.*

(l) *Cynosur. mater. medic. p. 96. seqq.*

(m) L'HISTOIRE DE L'ACADEMIE ROYALE DES SCIENCES l. c. ubi: *Elle a tant de ressemblance au Quinquina, que comme on en compte presentement jusqu'à six espèces, on la met pour une septième. Aussi quelques-uns la nomment-ils kina kina spuria, ou falsa, ou kinakina urens, ou kinakina odorifera.*

(n) in præfatione *historicæ relationi febris epidemicæ* præmissa, ibi: *mea, inquit, Schacharilla non nisi est species quædam corticis Peruviani; sed addit, quod interim, dum certiora de hujus corticis natalibus docebit dies, & in melius mox restituenda temporis & mercaturæ nauticæ conditio, statuere, me non irascetur quisquam.*

(o) l. c. (p) l. c.

(q) l. c. p. 33. 34. ubi observat, propter convenientiam quandam cum cortice Peruviano, *casçarillam* a nonnullis dictam, *die graue China*, corticem autem *Peruvianum*, *die braune China*.

recenset STISSERUS. (r) Sed aliam esse corticis Peruviani ratione arboris, a qua colligitur ab Indis Querango dictæ, fructuum, foliorum, plane diversam a nostro structuram accurate describunt TRANSACTIONES ANGLICANÆ, (s) ut taceam partes ejus constitutivas, quibus uti infra demonstrabitur, a nostro longe discedit.

§. VI.

Verior
exponi-
tur sen-
tentia.

Sed non juvat solum errores aliorum ostendisse, mea potius hac in re exponenda est sententia. Licet vero prius irritum quantumvis multo labore historiam hujus corticis perlustrans incerta omnia & lubrico fundamento superstructa deprehenderim; quum nec volam nec vestigium confessæ rei in scriptis eorum, qui historiam exoticorum nobis reliquere, invenerim, qua animus hac in re sciendi cupidus satiari potuisset; contigit tamen mihi postea a viro excellentissimo atque doctissimo antecessore medicinæ in academia Philurea longe celeberrimo, D. D. PLATNERO, quem honoris causa nomino, plenius hac in re erudiri, qui in magno illo opere Londini impresso, & hoc frontispicio exornato: MARCK CATESBY *Natural History of Carolina Florida and the Bahama Islands* h. e. MARCI CATESBY *historia naturalis Carolinae Floridae & insularum Bahamæ*, historiam, quam quæsieram, descriptam ac ramum arboris cum floribus & fructu æri incisum ac vivis coloribus naturæ æmulis representatum invenit. Quum vero opus hoc admodum pretiosum sit; ut plures habeat admiratores quam emtores, & auctor celeberrimus omnibus, qui adhuc de cortice cascarillæ aliquid memoriæ proderet tentarunt, palmam manibus plane extorsisse videatur: figuram ejus æri incidi atque historicam descriptionem adjuncta translatione ex lingua Anglica in idioma latinum, imprimendam, curavi. En igitur illam!

An Ricinoides Elæagni folio?
The Ilathera Bark.

» These Shrubs grow plentifully on most
» of the Bahama Islands, seldom above ten
» Feet high, and rarely so big as a Man's
» Leg, tho'tis probable, that before these
» Islands were exhausted of so much of it,
» that is grew to a larger Size: The Lea-
» ves are long, narrow and sharp-pointed,
» and of a very palelight green Colour; at
» the Ends of the Smaller Branches grow
» spikes of Small hexapetalous white Flo-
» wers, with yellow Apices, which are
» succeeded by tricapsular pale green Berriers
» of the Size of Peas, each Berry contain-
» ing three Small black Seeds, one in
» every Capsule. The Bark of this Tree
» being burnt, yields a fine Perfume; infu-
» sed in either Wine or Water, gives a
» fine aromatic Bitter. Ut vero quivis sta-
» tim rerum ac verborum in hac historia con-
» tentorum cognoscat vim, ita erit interpre-
» tanda.

Descrip-
tio arbus-
culæ an-
glica.

Ricinoides elæagni folio. Cortex qui
vocatur cascarilla.

Arbusculæ hæ copiose crescunt in plurimis Bahamæ insulis. Raro attingunt altitudinem decem pedum, & vix crassitiem pedis superant; quamquam verisimile est, crassiores olim hic fuisse inventas, antequam magna hinc efferrî cœpit copia. Folia horum fruticum sunt oblonga, angusta, acuminata, pallideque viridia. In extremis & minimis ramificationibus e calycibus surgunt flosculi exigui, hexapetali, albicantes, flavis apicibus. Hos excipiunt baccae ex albo viridescentes, distinctæ in tres loculos magnitudine pisi, quæ tria nigra semina continent, ac in singulis horum loculorum hæret unum. Cortex hujus arboris dum ardet, naribus acceptum spirat odorem, & infusum ejus vinosum & aquosum saporem præbet amarum grate aromaticum.

Explica-
tio ejus-
dem lati-
na.

§. VII.

(r) Actor. lab. chemic. spec. II. c. IX. de cortice eleuterii pro cortice Peruviano china-china vendito. Ante biennium, inquit, aliquot libras hujus corticis penes Dn. Joh. Petrum May pharmacopolam Brunsvicensem vidi, corticis Peruviani seu chinæ-chinæ loco missas; nec adeo dudum in nundinis Brunsvicensibus similem corticem pro cortice Peruviano a nonnullis rerum exoticarum minus gnavis venditum novi. Quamvis autem, pergit, callidi seplasiarii fallaciam suam velantes corticem eleuterii sub nomine cascarilla de la Oja vel palo de calenturas, credulis obtruserint, quibus tamen nominibus Hispani corticem Peruvianum denotant china china dictum: sciant tamen corticem eleuterii a cortice Peruviano illo, quoad texturam & virtutes multum differre.

(s) The Philosophical Transactions abridgd, Vol. IV. P. II. p. 323. by Dr. W. Olinier sic habent: Peru Bark comes from a Tree of about the Bigness of a Plumb Tree with Leaves like Ivy but not quite so big, and are always green. The Indians call it Querango. It is gather'd in Autumn, and the Rind taken off all round, as well from the Trunk, as Boughs, which grows again in four Months, as Cork does; The Trunk is about the Bigness of a Man's Thigh; it bears a Fruit not unlike a Chestnut, (except in its outer Rind or Schell) which is properly called China China, and is esteem'd by the Natives beyond the Bark taken from the Trunk or

Boughs. This Account, I receiv'd from an ingenious Apothecary at Cadiz in Spain, A. D. 1694. who had liv'd in Peru and had seen it growing and gather'd it several times. From this History I made this observation, that probably China China, or the Rind of the Fruit, was first on ly in use, and that the Bark of the Tree came not into Use till some Time after; when the Virtues of it known in Europe, occasioned a greater Demand for it. h. e. Cortex Peruvianus ab arbore, Indis Querango dicta, provenit, quæ magnitudine & crassitie accedit ad prunum. & folia hederæ aliquatenus similia fert, nec tamen adeo magna, nec semper virescentia. Cortex autumnali tempore a trunco & ramificationibus penitus detrahitur, qui vero instar suberis quadrimestri spatio rursus producit. Truncus crassitie æquat femur, fructum fert castaneæ similem, dissimilem cortici ejus externo, proprie dicto china-china, qui majoris pretii apud incolas est, illo, qui a trunco & ramificationibus colligitur. Retulit mihi hoc tunc temporis commoranti in Hispaniæ portu Gaditano experientissimus pharmacopola a. r. f. 1694. qui in regno Peruano corticem crescentem videns sapius defregit. Collegi inde, proprius vero esse, chinam-chinam seu corticem externum fructus, usu prius fuisse comprobatum, cum paullo post arboris cortex in usum converit, & exploratis ejus virtutibus avidius in Europæ regionibus requiri cœperit.

§. VII.

Ulterior
explanatio
fruticis
quoad
genus &
speciem.

Ex arbusculæ hujus supposita descriptione paret illam satis recte referri inter frutices, quum frutex a JOANNE RAJO (t) dicatur *stips* inter lignosas altitudine & crassitudine mediocris, quæque facile in naturam arborum, stolonum abscissione, transcendit. Genus ad quod laudatus vir hanc speciem refert, est plantæ triangiæ tricocæ, quæ gerunt *vasc la frugifera*, distincta in tres loculos, quorum singuli habent unum modo semen; (u) cujus opinioni recte adfentiuntur TOURNEFORTIUS (x), BURMANNUS (y) alique. Hæc vero similitudo generica in nonnullis tantum partibus requirenda est. Fieri enim nequit, ut plures species ejusdem generis occurrant, quarum radices, folia, caules, flores, seminaque similia sint, ceu probe observavit TOURNEFORTIUS (z). Variis, quæ genus hoc constituunt speciebus, adscribitur *casçarilla frutex*, seu ille, qui cum *Ricinoide elæagni folio* (a) convenit, a *Ricinoide* in eo differens, ut figuram foliorum partim oleæ, partim viticis, uti dixi acuminosa, oblonga, tenuia, pallideque viridia contineat. (b)

§. VIII.

Nova
quædam
casçarillæ
species
recensetur.

Novam speciem *casçarillæ* ex nova Hispania ad nos transvectam, hæcenus minus cognitam, aut minus saltem usitatam refert ALBERTUS SEBA in *historia exoticorum quorundam medicamentorum simplicium*, sequentem ejus subjungens historicam relationem. (c)

Cortex Cascali, ex nova Hispania.

Casçarillæ similis at longior est & arctius

convolutus, extus coloris ex albo cinerei, intus ruffi, saporis amaricantis aromatici. Natalis ei locus idem est qui cortici china china, cui etiam proxime accedit. In febribus tam continuis quam intermittentibus usurpatur vel solus, vel cortici Peruviano remixtus, cujus vim auget & emendat. Extractum ejus cum spiritu viri paratum ventriculo debiliore egregie medetur. Patet ex supposita descriptione, recte corticem hunc ad speciem *casçarillæ* referri, quia continet similitudinem principiorum, seu quoad texturam & virtutes cum nostro fere convenit.

§. IX.

Quod ad natale solum hujus corticis at-
tinet, in eo quidem consentiunt auctores, ut
ipsi *Indiam occidentalem* adscribant, licet in
diversis adsignandis regnis, provinciis ac in-
sulis differant. Præter ea quæ adduximus in
§§. antec. de *casçarillæ cortice ex insulis Ba-*
hamæ, & nova ejus specie ex nova Hispa-
nia ad nos allata, perillustri HANS SLOANE
in oris maris austrini copiose colligi tradit.
Laudatur etiam a nonnullis regnum *Perua-*
num, ex quo per Dn. LEGERAS ad Gallos
a. 1670. primum fuisse advectum, POMETUS
auctor est. (d)

§. X.

Circa collectionem hujus corticis nonnulla
observanda veniunt, quam tradidit perillu-
stris HANS SLOANE. (e) Ex relatione au-
tem ejus notanda est præcipue cautela in col-
ligendo hoc cortice adhibenda, diversa omni-
no ab illa, quæ in conquirendo *Peruviano*
cortice solet observari, (f) quam describunt
TRANSACTIONES ANGLICANÆ. Refert, sed
ambigue, abscisso circa radicem cortice, re-
liquam

(t) In *methodo plantarum nova*. p. 24.

(u) BOERHAAVIUS in *indice alter. plant. hort. acad.*
Lugd. Batav. §. 1. pag. 253.

(x) l. c.

(y) Confer. *Thesaurum Zeylanicum*.

(z) in *instit. rei herbar.* p. 55. 56. & lib. c. in ap-
pend. pag. 565. Per *Ricinoidem* intelligit plantæ ge-
nus flore rosaceo, ex plurimis scilicet petalis in orbem
positis constante, calyci multifido insidentibus, sed sterili.
Embryo enim in aliis plantæ partibus nascitur calyce
obvolutus, abique deinde in fructum, in tres capsu-
las fissilem semine foetus oblongo.

(a) hujus speciem refert I. P. TOURNEFORT l. c.

(b) BURMANNUS in *thes. Zeylanico* p. 230. TOURNE-
FORT in *instit. rei herb. class. XX.* p. 603. 598. 599.
BOERHAAVIUS l. c. P. II. p. 218. 221. 222.

(c) conf. *acta physico-medica natur. curiosorum. vo-*
lum. IV. pag. 230. observ. LXX. no. VII.

(d) l. c. Le *Quinquina*, inquit, nous a été apporté
du Perou l'an 1670. par Monsieur Legeras. Les In-
diens en usent infusé dans l'eau froide du poids de
deux gros. Et pour mon particulier je crois que c'est
ce que les Indiens appellent Falsa Kaskarina. LE-
MERY l. c. p. 203. in genere tantum contendit,
casçarillam esse corticem *Indicum*, cui adfentitur
STISSERUS auctor. laborat. chym. spec. II. c. IX. qui
perhibet, non adeo multis abhinc annis India quen-
dam corticem innotuisse, eleuterii nomine insignitum,
cujus particulam se ante aliquot annos a perillustri
& excellentissimo quodam viro, qui ex Anglia se-
cum attulerat, dono accepisse. DALEUS demum,
utramque corticis Peruviani speciem veram & falsam
per quam chinam-chinam & *casçarillam* intelligit
ex India occidentali adferri adfirmat l. c. Adde
L'HISTOIRE DE L'ACADEMIE ROYALE DES SCIEN-
CES l. c.

(e) *Voyage to Jamaica Vol. I. in the Introduction* p. 85.

Relatio ejus hæc est: „One Doctor Fritz a
„ German Chirurgeon and Chymist who had be-
„ en in the southseas with Captain Townley,
„ told me he had seen of the Casçarilla-Trees,
„ or those on which grows the Peru or Jesuits
„ Bark: that they grow near the sea side and
„ are very large Trees; that they cut a piece
„ of the Bark round the Trunk of the Tree near
„ the ground; that a while after the Bark wi-
„ thers on the whole Tree, and falls off; that
„ they had taken a Ship named the Casçarilla,
„ and had thrown most of that Bark her loading,
„ in to the sea to make room for Provisions. That
„ the Leaves generally found in the Bags of the
„ Bark, was of that Tree, and Plenty of the
„ Trees is to be met wit in the South-Sea., h. e.
Retulit mihi Doctor quidam nomine Fritzius, na-
tione Germanus, chirurgus & chymicus, qui cum
Townlyo navis præfecto ad mare austrinum pro-
fectus erat, se quasdam *casçarillæ arbores*, seu illas
vidisse, quibus cortex Peruvianus vel Jesuitarum ad-
nascereetur. Commemoravit eas gigni in oris, &
in altis extendi arbores, a quibus corticis parte, quæ
terram truncumque tegit, penitus abscissa, reliqua
portio, arborem involvens, sicca mox fieret decidua.
Narravit quoque, sese navem quandam, dictam *Cas-*
çarilla ingressos, multum corticis, quo navis præci-
pue fuit onerata, in abyssum projecisse, quo necessa-
riis vitæ alimentis locum facerent. Folia demum,
quibus sulci hujus corticis plerumque oppleti sunt,
ejusdem arboris esse, ac maris austrini oram, ejus-
modi arboribus multis refertissimam, indicat.

(f) vid. not. ad §. V.

liquam ejus partem a trunco & ramis penitus decidere. Vera ratio consistit in impedito fluidorum per minimos tubulos circuitu ac nutritionis defectu. Demonstrat enim præclare MARCELLUS MALPIGHIIUS, veræ plantarum anatomes optimus magister, plantas componi ex fistulis & vesiculis, circulationi succorum alimentisque convehendis inservientibus (g). Itaque si prope radicem, ubi fistulæ omnes coeunt, tanquam ex fonte præparatum alimentum per minimos canaliculos totius arboris vehementes, *cortices cascarillæ* abscinduntur, reliqua etiam per partes connexas perit nutritio: hinc fit, ut exsucco cortices plane siccescant (h).

C A P U T II.

De principiis & ingredientibus corticis cascarillæ.

§. I.

Principia cascarillæ experimentis demonstrantur.

Dictum superius est, *cascarillam* præter *externa*, quibus a reliquis corticibus distinguitur, constare *principiis sulphureis blande vaporosis, resinosis, ac gummoso-terreis*, de quorum luculenter probanda veritate jam erimus solliciti, illam demonstraturi, non quidem ex auctoritate & theoria aliorum, sed ex variis cum *hoc cortice institutis experimentis*; quæ jam sequuntur.

- I. *Cascarillæ* libræ p. c. in moleculas minimas comminutæ infudimus aquæ puræ fluviatilis mensuras quatuor, ac per tempus nocturnum pro intimiori particularum resolutione digestionem, ac dein destillationi e vesica commisimus, sub qua prodierunt libræ quatuor aquæ admodum fragrantis, quibus supernatabat olei ætherei blande vaporosi, odore penetrantis, & colore viridis drachma una.
- II. Mensuras duas *aquæ cascarillæ destillatæ*, miscuimus cum æquali portione vini Rhénani ac e vesica destillavimus. Sub destillatione accepimus aquæ prius spirituosæ, lactescentis, particulis oleosis refertæ & saporis aromatici libram unam, quam debiliior excepit, quæ demum in aquam odore & sapore penitus destitutam abiit.
- III. *Oleum* vero æthereum cum flammifero HOFFMANNI spiritu confudimus, sub qua mixtione magnam quidem effervescentiam & calidissimum fumum, nullam tamen exhibuit flammam.
- IV. Porro infudimus libræ p. c. *corticis cascarillæ alcohol vini* ad eminentiam trium digitorum, tamdiu repetendo novam infusionem, donec odor, color & sapor nullam amplius resinam cortici inesse, certum sit. *Frid. Hoffmanni Oper. Supplem. II.*

tum præbebant indicium. Spiritum odore aliquatenus resinam referentem abstraximus ad spissam fere consistentiam, cui infudimus sufficientem aquæ frigida quantitate ad præcipitandam *resinam*, quæ in fundo cucurbitæ collecta, pondere uncias tribus constabat.

- V. Residuum a præparatione essentiae siccatum ponderis libræ medicæ, denuo *aqua simplici* sufficienter fuit decoctum, expressum, filtratum & ad consistentiam *extracti* redactum, ponderis uncia unius, dimidiæ & trium drachmarum, remanentibus terrestribus cascarillæ portio uncias septem.
- VI. Rursus libræ p. c. *corticis cascarillæ* prius infudimus aquæ sufficientem quantitatem, quæ post decoctionem, expressionem, clarificationem & inspissationem reliquit *partis gummosæ* uncias duas atque dimidiam.
- VII. Residuum post expressionem siccatum ponderis libræ medicæ spiritu *vini rectificatissimo* solvimus & accepimus *resinæ* uncias duas & dimidiam, remanentibus uncias sex, certo indicio, si cum aqua prius infundatur, aliquam partem *resinæ cascarillæ* in decocto aquoso solvi, præprimis si *sale tartari* acuat.
- VIII. Deinde commisimus *destillationi siccæ* ex retorta vitrea libram semis p. c. *corticis cascarillæ* in pulverem redacti; sub qua prodierunt phlegmatis acidi uncia duæ, cui supernatabat oleum summe volatile instar cornu cervi ponderis drachmarum duarum. Hoc excepit oleum admodum spissum & foetidum, priore specificè gravius, pondere æquans unciam, remanentibus terræ nigrae insipida uncias tribus.
- IX. Phlegma acidum separavimus, infundendo ipsi solutionem salis tartari, cum qua magnam effervescentiam excitavit.
- X. *Olei* vero phlegmati supernatantis & ab illo *separati* partem dimidiam in spiritus vini rectificatissimi libra medica solvimus, & destillationi ex arena subjecimus, qua *spiritum* accepimus penetrante olei odore refertum ac instar spiritus cornu cervi summe volatilem.
- XI. Alteram *ejus* partem confudimus cum *spiritu vitrioli* acido corrosivo, sub qua mixtione ad fundum *resina* præcipitabatur.
- XII. Ab uncias autem tribus *terræ* a destillatione sicca residuis post calcinationem in crucibulo igne aperto, coctionem cum aqua, & inspissationem, remanebat tantum *salis alcalini* scrupulus semis.
- XIII. Denique *resinam* exploravimus ejusque unciam unam cum quadruplo cornu cervi usi destillationi commisimus, sub qua prodit phlegmatis uncia una & semis, cui supernatabat olei odore instar resinæ grati drachma, succedente fortiore ignis gradu oleo crasso foetido.
- XIV. Suave *resinæ oleum* in spiritu vini rectificatissimo solutum gratum ac volatilem
Ooo illum

(g) *Fistulas*, ait, esse duplicis generis, vel alimento convehendo, vel aeri excipiando inservientes, easque in ipsis radicibus veluti colligi, ibique dispergi, ac in ramis eorumque propaginibus vario ac multiplici contextu arctius aut laxius conjunctas vesiculas intersitiis suis complecti, quas amplificari cogit ali-

mentum, veluti in carnem concrevens. vid. TOURNEFORT in *instit. rei herbar.* p. 55. 56.

(h) Fusius hac de re egit PERRAULT in *operib. physico-mechanic.* quibus inseruit librum, de la circulation de la sève des plantes p. 71--126.

illum reddit, ejusque saporem resinoso-amaricantem.

XV. *Idem* ad mixturam spiritus flammiferi HOFFMANNI validissimam quidem effervescentiam edit, nulla tamen subsequente flamma.

XVI. Denuo unciam ejus unam retortæ vitreæ inditam destillationi subjecimus, sine additione alicujus terre, sed ut vi ignis ejus contextus inverteretur. Accepimus a destillatione phlegmatis unciam dimidiam, olei empyreumatici drachmas duas, relictis in fundo retortæ terræ fragilis scrupulis duobus, quæ post calcinationem, elixivationem, & inspissationem reliquit *salis alcalini* aliquot grana.

XVII. *Resina* in oleo æthereo, v. c. laven-
dulæ ope caloris solvitur, sed pars tantummodo aliqua in *expresso* v. g. amygdalarum.

XVIII. *Eadem* cum triplo amygdalarum dulcium trita in *pulverem* saturati coloris abit, & saporem exhibet amaricantem, qua in forma usibus medicis cedit.

XIX. In igne detenta *lucidam* exhibet *flammam*, sub mitiori ignis gradu fluxilis redditur, gratum spargens odorem, a frigore vero in corpus redigitur *durum* atque *tenax*.

XX. *Lixivium* cum *sale tartari* paratum, vel *aqua calcis vivæ* aliquam *resinæ* solvunt partem, quod non solum ex tinctura ejusmodi infusi, imminutione ponderis resinæ, verum etiam ex sapore grate amaricante instar resinæ percipitur. Hinc decoctum *corticis cascarillæ*, cum *menstruo dissolvente salino* paratum, colore saturatius fit illo, cum *aqua simplici tantum facto*.

XXI. Demum *partem gummosam igni aperto* commisimus, ac uncias ejus duas atque dimidiam ex retorta vitrea destillavimus. Accepimus a destillatione phlegmatis unciam unam, olei foetidi drachmas duas, & terræ levis fragilisque drachmas sex.

XXII. *Terra hæc leviter calcinata* post extractionem cum aqua calida, transmissionem per filtrum, & in auras exhalationem, reliquit *salis alcalini* instar illius, quod a tartaro cremato accipitur gr. XXXV.

XXIII. Tandem *combussimus cascarillæ* libras duas p. c. flamma aperta, quam propter copiam olei & resinæ facile concepit. Sub deflagratione percipiebatur fumus odorem spargens instar ambrae gratum, relictis *cineris albi* unciis tribus, quibus tandem adfundebatur aqua, donec lixivium non amplius spiculis salinis gustum feriret. Solutionem filtratam sub leni evaporatione ad siccitatem reduximus, residuis *salis alcalini* oleo adhuc grato imbuti scrupulis duobus.

XXIV. *Magmatis* hujus *salini* deflagrato per calcinationem in crucibulo principio inflammabili, supererat *salis alcalini* aëris accessu deliquescentis scrupulus unicus.

§. II.

Differen-
tia casca-
rillæ &
chinæ
chinæ ex-

Quum vero in Cap. I. commemoratum fuit, *corticem cascarillæ* a plurimis & aliquin doctis viris ad *chinæ chinæ speciem* referri, necesse est, ut *experimenta* nonnulla cum *Peruviano cortice* instituta adduca-

mus, quo eo melius pateat ex relatione utriusque corticis summa inter *cascarillæ* & *chinæ chinæ cortices* differentia. perimen-
tis osten-
ditur.

I. Infusum *corticis cascarillæ* cum aqua simplici saturati est coloris, & saporis amari: *chinæ chinæ* vero exhibet colorem flavum instar corticum aurantium, & saporem adstringentem austerum.

II. Si *lixivium* paratur ex tribus unciis aquæ & salis tartari drachma una ac in *corticis cascarillæ* uncia una decoquitur, saturatior fit colore ejusque amarities corrigitur; quantitas vero eadem *corticis Peruviani* in lixivio salis tartari eodem modo præparato soluta, infusum exhibet rubicundi coloris instar sanguinis, & saporem amaricantem, cum principium ejus acidum admixto alcali sub decoctione saturatum fuit.

III. *Infuso cascarillæ*, si admisceatur *vitriolum martis*, non colore illo nigro tingitur, qui sub mixtione ejus cum decocto *chinæ chinæ* observatur.

IV. Unciæ quatuor *corticis Peruviani* triplici aquæ infusione decoctæ post expressionem, filtrationem, & inspissationem præbent *extracti aquosi*, adstringentis unciam dimidiam & drachmas tres. Residuum siccatum & spiritu vini solutum *nihil fere resinæ* continet, sed terram potius subtilem cum sulphure in spiritu vini solutam, quæ saturate rubicundum essentia inducit colorem, eamque leniter adstringentem reddit; unde post adfusionem aquæ frigida nihil in fundum præcipitatur & ad latera vasis, sed turbida potius redditur, & post inspissationem levi caloris gradu relinquit *extracti spirituosi* leni ignis gradu in pulverem redacti drachmam unam & scrupulum unum; amaricantis tamen, & colore magis saturati illo, quod a *chinæ chinæ* prius spiritu vini soluta & aqua postea decocta accipitur.

V. *China china* vero triplici spiritus vini infusione prius soluta, ac postea aqua decocta, & ad consistentiam extracti inspissata, elargitur *extracti spirituosi* unciam dimidiam, cui aqua infusa, sub leni calore solvit & extrahit particulas quasdam sulphureo-terreas, quæ & colorem flavum & saporem amaricantem ipsi inducunt. Residuum vero aqua decoctum, filtratum & inspissatum continet *partis aquosæ* drachmas duas.

VI. *Eadem* per destillationem humidam *nulum* fundit *oleum essenziale*, sed potius igne aperto oleum empyreumaticum.

VII. Libra una *corticis Peruviani* combusta, soluta ac inspissata relinquit *salis alcalini* drachmam.

§. III.

Ex hætenus adductis *experimentis* clare, opinor, patet, primo *cortici nostro* admodum fragranti inexistere *oleum admodum subtile æthereum*, quod odorem spargit blande vaporosum, ac per destillationem humidam e cascarilla elicitur (§. I. n. I.); quum constet, quod omnia ex vegetabilibus, quæ attritu & calore forti odore fragrant, per destillationem humidam oleum fundant subtile, idque eo gratius,

Ingre-
dientia
casca-
rillæ con-
stituunt:
1) Oleum
æthe-
reum.

tius, quo fragrantior odor fuit (c). Tenuitatem parium, quibus oleum hoc componitur ex eo discimus, quod non solum odore sese valde expandit, verum etiam propter levitatem ac visciditatem terræ subtilis actioni spiritus flammiferi resistere, adeoque particularum elasticarum rapidissimum motum, seu flammam, concipere nequit. (n. III.)

§. IV.

1) Resina.

Deinde cognoscimus, non solum generationem resinæ, verum etiam multum ejus in cascarillæ cortice contineri. Ad genesin hujus indagandam & probandam confert non solum resolutio cascarillæ ejusque resinæ per destillationem siccam (n. VIII.) in principia, qua resinam ex phlegmate acido, teneiori terra, & suavi oleo constare deprehendimus, (b) verum etiam præparatio resinæ artificialis per commixtionem olei cum spiritu vitrioli. (n. XI.) Hoc vero oleum admodum volatile (n. X.) cum phlegmate acido tam arcte in resina cohæret, ut sola ignis vi (c) retortam non transcendat, (n. XVI.) nisi ipsi admisceas principium aliquod terreum, quo acidum sulphuris se jungat, & principium inflammabile e compedibus suis liberet atque dimittat. (n. XIII.) Exinde patescit, resinam nihil aliud esse, quam oleum subtile ab acido admixto in coagulum redactum. Propter copiam vero olei & phlegmatis acidi, (n. IX.) quam sub destillatione elargitur (n. VIII.) cascarilla, non multum solum resinæ (n. IV. VII.) continet, tantum, quantum vix ac ne vix quidem in reliquis regni vegetabilis corticibus & radicibus deprehenditur, verum etiam resina hæc ob principii inflammabilis abundantiam admodum calida est atque elastica.

Frid. Hoffmanni Oper. Supplem. II.

- (a) Vid. Illustris HOFFMANNUS observ. phys. chem. I. I. obs. I. p. 2.
 (b) IDEM l. c. p. 60. seqq.
 (c) Hæc enim ad texturam resinofarum partium dissolvendam non est aptissimus artifex; efficit potius, ut oleum resinæ cum acido sulphuris & copiosiori terra arctius unitum in motum fluiditatis abripiatur, & oleum copiosius sætidum priori specificè gravius constituat. Etenim post humidi exhalationem & principii pinguis deflagrationem remanet terra fixa nigra, quæ sub rectificatione ejus fatis copiose colligitur. Nam destillatione & adfusione aquæ repetita, monet Celeb. BOERHAAVIUS in elem. chem. P. II. p. 365. 66. olea sætida in tam magnam copiam terræ, in tam parvam veri olei reduci. Exinde constat, oleum empyreumaticum non naturæ, sed artis productum esse, ac ignis violentia ex iis maxime elici corporibus, quæ copioso pingui abundant principio. Deinde evidens fit, causam foetoris olei hujus materialem ac præcipuam consistere in principio, quod mixtis materiam ad ignem, vel flammam concipiendam subministrat, fortiter salium actione agitur, quemadmodum inter alia egregie advertit venerandus senex HOFFMANNUS lib. III. obs. phys. chem. select. obs. X. Subtiliora enim salia ignis calore exagitata, adoriuntur principium pingue, & sub hoc intestino motu destructionem pristini corporis & mutationem odoris saporisque conciliant. Ex his omnibus apertius conjicimus, ignis potentiam in immutando odore saporeve, in destruendis compositis plurimisque mixtis, ea repentino & extremo subtili motus impetu non longo temporis intervallo

§. V.

Resina cascarillæ (d) requirit menstruum aptum & veluti sui simile, (e) seu spiritum vini rectificatissimum, (n. IV. VII.) quem cum illustri HOFFMANNO (f) voco: oleum vegetabilium per fermentationem in phlegmate solutum & cum illo arctius unitum. Itaque quæcunque ex fluidis principio æthereo inflammabili constant, illa ad resinam solvendam omnino apta sunt. Jam vero præter alcohol vini olea ætherea & expressa continent το φλωγιστόν, adeoque ad resinam solvendam, prout majori vel minori scatent humiditate, idonea magis deprehenduntur. Ex his clarum ac manifestum fit, menstruum, quod cum corpore solubili uniri nequit, rei solvendæ non esse idoneum (g). Hinc ratio in promptu est, cur resina renuat unionem aquæ, ac in spiritu vini ardente soluta adfusa aqua præcipitetur, seu nova unio menstrui cum alio corpore instituitur.

§. VI.

Interim tamen liquidum aquoso-alcalinum non gummosas solum particulas, sed quasdam quoque resinas solvere, experimenta (§. I. n. XX. & §. II. n. II.) instituta docent. Ratio hujus solutionis consistit in intimiori connubio salis alcali cum principio sulphureo, ita, ut ambo sal neutrum constituent, quod expedite aquæ motui obsecundando facile solvitur. (h).

§. VII.

Porro in cascarilla animadvertimus principium gummosum (n. V. VI.), seu subtilem terram leviter sulphuream in phlegmate solutam (n. XXI). Requirit hoc menstruum aliquod

- dissolventem, ut docente B. STAHLIO in opusc. physico-chymic. medic. p. 400. e pristina cohesione disturbet & in aliam ac novam plane transponat & convertat, ut non modo longe diversa a priori textura inde nascantur, sed & frequentissime aliena ab omni solito naturæ ordine & spontaneo proveniunt.
 (d) STISSERUS laborat chemic. spec. II. c. 9. Cortex, inquit, eleuterii particulis resinosis urget, quæ diffractæ cortice statim in conspectum prodeunt. Hinc renax observatur & difficulter in pulverem abit.
 (e) BARCHAUSEN in elem. chem. Lib. II. cap. 4. p. 123. oleosum, inquit, sulphureum menstruum ut alcohol vini vel oleum quodvis sui similia vel sibi cognata pro re nata, vel ex parte, vel omnino dissolvit.
 (f) Lib. II. obs. IV. p. 128. & obs. IX. p. 151.
 (g) Copiose deducit Illustris HOFFMANNUS lib. II. obs. VIII. solutionem fieri unione solventis & rei solubilis, & BARCHUSEN l. c. p. 122. docet, magnam extrahendarum rerum esse diversitatem ratione commixtionis principiorum, alias aliis habere vel solidiores compactioresque, vel molliores particulas, & alias copioso oleo, alias sale, alias alio principio ceteris dominante scatere: ita, ut secundum horum varietatem, aliud atque aliud adhibendum sit menstruum.
 (h) vid. Illustris PRÆSES l. c. obs. VIII. p. 144. cui suum addit symbolum BARCHUSEN l. c. p. 123. & 354. quippe qui contendit, menstruum alcalicum, ut salia quævis alcalia aquæ stimuli loco addita & in liquorem resoluta, oleosa, resinosa ac sulphurea dissolvere, seque eorum poris interponere, ut inde haud ægre extrahantur sine aquoso sive spiritu ardente instantia, obsequantur.

Quo menstruo resina solvatur?

Menstruum salinum dissolvit aliquam resinæ partem.

3) Gummi.

Ooo 2

aliquod liquidum, (i) quod ipsi adfusum e cascarilla mediante calore partes subtiles salino-terreas extrahit, eo facilius sejungendas, quo laxius coherent, & secum in motum abripit, quarum specificum quasi menstruum aqua constituit, quæ in poris semper aliquid olei abscondit, dissolutum abducit, ita, ut ipsi aquæ contraria alioquin innatare videatur natura.

§. VIII.

4) Terra
fixa.

Terræ fixæ parum cortex cascarillæ continet (n. VIII. XXIII.), quæ post calcinationem mixtum leve & admodum fragile relinquit, simile illi, quod B. STAHLIO teste, (k) in igne in *pollinem & summe pumicosam, porosam & veluti vesicularem raritatem expulso humore exurit*. Solidum vero hoc friabile ac in igne constans principium, non basin solum fere omnium corporum mixtorum præbet, verum etiam pro varia sulphuris & salis in illam actione (l) diversæ corporum structuræ causa existit.

§. IX.

Terra
continet
aliquid
salis al-
calini.

Formale
salium al-
calino-
rum.

Hinc deprehendimus, *terram corticis nostri calcinatam* largiri aliquid *salis alcalini*. Quæstio vero hic occurrit: utrum *salia* ista a terra post destillationem ficcā (n. VIII.) & deflagrationem, (n. XXIII. XXIV.) imo extractionem aquosā (XXII.) & resinosā, (XVI.) residua ante analysin chemicā terræ *formaliter* inexistērint, an *materialiter*? Sed omnia, respondeo, mixta non continent *formaliter* *salia*, quæ igne producuntur, sed materiam tantum ad generationem eorum præbent, sub motu vero ignis naturam salium, veluti alcalinorum induunt. Nam rerum materialium motus tendit ad salium genesis, & omnis, quæ in rebus contingit mutatio, fit quoad figuram, motum intestinum, & locum totius (per leges motuum). Jam vero constat consensu chemicorum & physicorum omnium, *ignem* nihil aliud esse, quam materiæ subtilissimæ æthereæ rapidissimum motum. Hinc sponte sua

sequitur, sub motu ignis auferri & aliter transponi terræ particulas, sub qua mutatione nova forma & qualitas pro varia particularum textura rebus inducitur. (m) Itaque si particulae salinæ sub ignis violentia nimis crassæ fiant, ac difficilius sub ejus motu in auras rapiantur, *salia* producuntur *alcalina fixa* (n), qualia e vegetabilibus combustis extrahuntur. Unde facile est ad intelligendum, cur ignis violentia *terræ corticis nostri* prius insipida sapore alcalinum (o) acerrimum induxerit? tanquam signum, terram, utpote principium salium constitutivum hospitium ipsis præbuisse, sed sub alia forma, situ & figura, quæ vero igne mutata & concentrata actionem ejus mirifice auxerunt.

§. X.

Materiam ad salium alcalinorum genesis Eorum suppeditant principium *inflammabile & sal acidum*. Ex his ad naturam salis alcalini fir- materia-
mum esse consequutionis filum; tradit B. le.
NEUMANNUS (p); siquidem ex conjunctione & resolutione horum corporum generationem salium demonstrat. Pro principii hujus inflammabilis & salis acidi proportionem & constitutionem differt etiam quantitas salis alcalini, (q) id quod cognoscimus ex experimento (n. XXII.) adducto. Principium enim acidum cum post destillationem extracti cascarillæ ficcæ cum principio *φλωγιστῶ* in terra ejus fixa probe subactum fuit, mirum non est, si post calcinationem, accedente motu ignis rapidissimo, sal alcali in majori copia fuerit productum. Hinc varietas reliquorum salium alcalino fixorum variis operationibus chemicis (n. XII. XVI. XXIII. XXIV.) e *cortice nostro* productorum deducenda est ab excessu, vel defectu, aut insufficiente utriusque principii ad producenda salia alcalino-fixa necessarij proportionem.

§. XI.

Denum cum sub operationibus chemicis Specifica
cum *cortice cascarillæ* institutis materiam sem- cascaril-
per læ gravi-
tas unde?

(i) Quantitas extracti cascarillæ accurate determinari nequit, quum pro vario parandi modo proventus ejus differat. Si aqua simplici tantum paratur, observatis cautelis necessariis, plus extracti præbet (n. VI.), quia menstruum hoc non gummosam solum, sed aliquam etiam resinæ sub decoctione cascarillæ soluit partem. Idem quoque contingit, quando cum lixivio salis tartari extractio instituitur. Sub hac enim operatione non solum intimius pars gummosa solvitur, verum etiam resinæ multum in modum fluiditatis abripitur. (§. VI.) Si vero post extractionem resinosam residuum prius siccat, & aqua postea solvitur, minor pars extracti obtinetur, (n. V.) certo indicio, quod gummosæ particulae propter terram leviter sulphuream non renuant unionem spiritus vini rectificatissimi. Deinde nisi despumando & filtrando crassior terræ portio separatur, majorem quidem quantitatem extracti, virtute tamen debiliorem accipimus. Denum extractum cascarillæ aquosum ad præscriptum APINI præparatum, seu uti illud vocat in *relat. hist. febr. epid. ληξυπεριτόν* suum in eo a nostro differt, quod parti gummosæ addidit pulverem subtilissime tritum, id quod vindiciæ celeb. TREWII contra Cl. WERLHOFFIUM luculenter probant. Sequentia enim in *commercio liter. noric. hebdom. LII. p. 410.*

commemorantur: Cum ex cascarillæ nimis caro tunc pretio vendita parum extracti obtineretur, decoctum per cribrum setaceum trajiciebatur, ut pulvis subtilissimus simul transiret, ex quo per inspissationem paratum, remanens vero in cribro ad suffimigia habitum fuit.

(k) l. c. p. 146.

(l) Hinc terra chemicis audit corpus passivum: conf. BARCHUSEN in *elem. chem. Lib. I. sect. I. cap. VII. p. 39.*

(m) Plura hac de re sciendi cupidus adeat illustr. BOYLE, qui in *chem. scept.* ingeniose non minus quam docte ostendit, ignis vi corpusculorum figurarum magnitudinem mutari, novamque rerum texturam prorsus produci.

(n) conf. ill. PRÆSIDIS *differt. de generatione salium §. VIII.*

(o) IDEM in *medic. ration. system. t. I. lib. I. sect. I. cap. V. p. 101.* Motu, inquit, calido intestino aucto partes unitas a se invicem discerpi, dissolvi, fixas volatilisari, insipidas sapidas & salsas reddi, pingues ac temperatas acres & valde calidas fieri, compluribus experimentis physicis ac chymicis comprobari potest.

(p) in *lect. chem. de salibus alcalino fixis p. 16. seqq.*

(q) IDEM l. c.

per pondere decrefcere observatur, recte colligimus: *specificam* corporum gravitatem non tantum a mole, quam a firmiori potius vel laxiori particularum cohæfione & subtili ætheris vorticofo motu ac preffione effe deducendam, quamobrem *Illustris Hoffmannus* (r) gravitatis duplicem effe cauffam adfirmat, *alteram externam & communem*, motum nempe fluidi ætherei vorticosum circa globum nostrum terraqueum, versus centrum terræ corpora comprimentem; *alteram internam & cuius corporum specificam*, quæ a dispositione & structura partium mixtum constituentium proficiscitur, & quæ variis modis impulsu fluidi determinat. Itaque si cascarilla igne aperto in principia resoluitur, vel partes ejus constitutivæ extrahuntur, non modo firmior & arctior particularum cohæfio destruitur, porique antea minores distenduntur, sed & fluidum subtilissimum æthereum magis expanditur, ut observante *Illustri Hoffmanno*, (s) pro laxiori corporis nexu, porisque amplis & fluido ætherico plus repletis minoris ponderis ac gravitatis corpora fiant.

§. XII.

Cortex cascarillæ ratione principiorum differt a china china.

Tandem ex relatione experimentorum cum *Peruviano & cascarillæ* corticibus factorum ingens discrimen cognoscimus, siquidem *china china* nihil continet principii ætherei oleosi ac resinosi (t), sed potius terram adstringentem, & sal aliquod fixum amarum (u). Terra hæc stipticæ indolis prout rudior, aut subtilior existit, una cum sulphure crudiori in menstruo spirituofo & aquoso facile solvitur, ac efficit, ut sub mixtione ejus cum vitriolo martis præcipitatio & turbatio mixti oriatur, (§. II. n. III.) a conjunctione vero principii sulphurei & terræ alcalinæ rubicundus producat color, (§. II. n. II.) nec non major salis alcalini pars propter copiam acidi per combustionem ex illo (§. II. n. VII.) eliciatur. Quum igitur cortices hi a se invicem valde differant, quod ex determinatione & dissimilitudine eorum, quæ ipsis insunt, adparet, dissimilia ad similia, seu *utrumque corticem*, ad *unam speciem* (x) referre velle, audax sane foret conatus.

Frid. Hoffmanni Oper. Supplem. II.

(r) Lib. III. obs. phys. chemic. p. 362.

(s) l. c.

(t) *Stisserus* act. labor. chemic. c. X.: confirmat experimenta §. I. n. IV. & VII. & §. II. n. IV. & V. Cum spiritui vini ait rectificatissimo ex uroque quidem cortice tinctura extrahitur; magis saturata tamen ex cortice Eleuterii quam ex peruviano illo obtinetur, cujus tinctura facta abstractione spiritus vini per distillationem, neuiquam extractum spissum sed turbidum saltem diluuium relinquit, ulterius ad siccitatem usque evaporatum, in pulverem abiens, cum tamen corticis Eleuterii tinctura spiritui vini per distillationem avocado extractum plane resinofum & balsami instar crassum largiatur.

(u) vid. *HERMANNUS* in cynosur. mat. medic. p. 98.

(x) In discrimen inter *Peruvianum & cascarillæ* cor-

CAPUT III.

De insignibus corticis cascarillæ virtutibus.

§. I.

Quum secundum *GALENI* dictum (a) *medicamentorum vires nosse methodum medendi præcedat*, necessarium æque ac utile erit, expositis partibus corticis nostri constitutivis veras, quas pro tam diversa corporum structura exferit, virtutes perscrutari easque sibi reddere cognitatas atque perspectas. Per vires autem quas cascarilla edit, intelligo potentiam ejus agendi in corpora. Quum vero sub actione status, mutatio accadat, quia actio dicitur mutatio status, cujus ratio in ente, quod eundem mutat, continetur, sub actione cascarillæ & corporum reactione variæ producuntur mutationes, quas paullo penitius jam nobis intueri liceat.

Quid per vires intelligatur.

§. II.

Vires vero corticis nostri sunt vel generalioris, vel specialioris considerationis. In genere ipsi competunt virtutes sedativa, tonica ac balsamica, diaphoretica & discutientes. Sedativas dico, quia excedentes in solidis & fluidis partibus motus reddit pacatiores doloresve sedat. Operatur enim suo sulphure volatili blande vaporoso (cap. II. §. I. n. I. & §. III.) quo fluida expanduntur, solida vero nimis tensa relaxantur. Quum vero principia, quibus sedativa agunt, quam maxime a se invicem diversa sint, differentes quoque producuntur effectus; quare in cortice nostro conspicimus blandum ac naturæ admodum amicum sulphur, odore fragrantissimum & virtute præstans diversum omnino ab illo, quod uti opium, hyoscyamus, &c. odore graveolente & vapore crassi sulphuris naturæ adverso capiti stuporem conciliat, narcosin inducit, ac motus in corpore auferendo vires prosternt, stagnationes, stases, inflammationes, sphacelum aliaque dira excitat symptomata.

Virtutes generales sunt 1) blande sedativæ.

§. III.

Altera virtus est tonica, quam principio amaricante resinoso partibus gummoso-terreis

2) tonicæ.

Ooo 3

remixto

tices inquiruntur dans L'HISTOIRE DE L'ACADEMIE ROYALE DES SCIENCES an. MDCCXIX. p. 67. 68. ubi: Malgré sa ressemblance avec le Quinquina, le Chacril en differe beaucoup. Au goût il est plus amer, plus acré, & presque brûlant; au lieu que le Quinquina est d'une amertume plus desagréable, & a plus d'astringtion, ou de stipticité. Le Chacril échauffé ou brûlé donne une agréable odeur aromatique que n'a point le Quinquina. Enfin le Chacril allumé a la Bougie jette une fumée épaisse & beaucoup de fuliginosités, & ce qui en reste est un Charbon boursoufflé & rarefié, pareil à celui des résines brûlées, ce qui marque une grande quantité de matière résineuse par rapport à ce que le Quinquina en peut contenir.

(a) De methodo.

remixto edit, quo non solum in partes solidas fibras intendendo, verum etiam spiritaliscentiam inducendo humoribus, vel deficientes particulas æthereas motu intestino aucto restituendo operatur (b). Principium hoc cum sulphure blande vaporoso intime junctum, motum spasticum, vel universalem, vel particularem sedat, ac æqualem reddit motum progressivum. Unde iis in morbis, quorum ratio in turbato solidorum motu quoad excessum vel defectum motus tonici continetur, quam maxime conducit.

§. IV.

3) diapnoica & discutientes.

A primariis nobilioribusque his virtutibus reliquæ *discutientes* & *diapnoica* dependent. Constat enim ex pathologicis, sub spastica strictura defectum perspirationis & sudoris esse, quia tubus capillaris ad extremitatem impleri nequit, nisi sit pervius. Quum vero *casçarilla* spasmos relaxet (§. II.) ac virtute sedativa & tonica æqualem motum efficiat (§. III.) reliquæ se- & excretiones, imprimis quæ fiunt per cutis spiracula, (c) rite peraguntur, cum vasa secundum naturam patula ad omne punctum corporis liberum aditum permittant. Itaque motu tonico aucto fluida citiori cursu per corpus feruntur, eoque globuli sanguinis motu circa axin rotatorio celerius agitati in minimas dividuntur moleculas, humores spissi ac viscosi attenuantur, & fluidiores redduntur obstructionsque referantur. Unde *corticem casçarilla* optimas exferere virtutes experimur in morbis acutis, qui a stasi, & chronicis, qui a stagnatione humorum seu impedita spissi sanguinis per minima vascula circulatione oriuntur.

§. V.

Virtutes non absolutæ, sed relativæ sunt.

Jam vero laudatæ *virtutes* non absolutæ sunt (d) sed *relationem* habent ad internam corporum dispositionem, ut pro æqualitate & proportionem agentis & reagentis determinati in corpore producantur motus, quum secundum leges motuum nullam fieri actionem sine reactione, ejusque vim a reagente in conflictu varie modificari, constet. *Casçarilla* igitur non eandem & specificam in omnibus ac singulis corporibus virtutem edit, sed requiritur conditio certa individuorum, secundum quam ad determinatos effectus capax est.

§. VI.

In quibus subjectis magis

Quicumque igitur corpora a se invicem discernendi & pro horum differentia diver-

simode *corticem casçarilla* adplicandi gaudet facultate, is via recta incedit. Corticem enim ejusque resinam admodum vim habere elasticam liquet, propter olei, quo abundat, copiam (Cap. II. §. IV.): hinc *siccioribus & calidioribus* non convenire naturis, sed *frigidioribus* potius & *languidioribus* prodesse discimus, qui propter tenacitatem humorum & motum depressum indigent stimulo & resolutione. Et vel ideo *illustris* HOFFMANNI (e) elegans observatio imis sensibus notanda est, aientis: quia (cortex casçarilla) *sanguinem exæstare & calorem accendere solet, in biliosis ad motuum impetus pronis subjectis minus, & nonnisi in refracta dosi, ex usu est; in segnioribus vero, in phlegmaticis & mulieribus magis & tunc commodissime cum cortice china china miscetur.*

§. VII.

Cognitis jam virtutibus generalioribus, specialiores quasdam observationes ab experientissimis Medicis variis in morbis notatas proferre, operæ pretium videtur, si prius meminere illorum, qui hujus remedii usum & virtutes nostris in terris indagarunt. Præter APINUM in hunc censum veniunt principes medicorum nostri ævi, *illustris* HOFFMANNUS & B. STAHLIUS, siquidem ab illis variis in casibus & adfectibus commendatus fuit, quorum experientia reliquorum cl. virorum, imprimis celeb. JUNCKERI assidua in observando comprobavit industria, ut taceam Gallos, inter quos præ reliquis Mrs. FAGON & BOULDUCE eminent, qui B. STAHLII & reliquorum vestigia prementes, *casçarillam* maxime in spasticis & internis inflammatoriis morbis profuisse animadverterunt.

Quinam virtutes corticis hujus specialiores primum indagaverint?

§. VIII.

A doctissimis his viris primo quidem celebratur *cortex noster* vel solus, vel china china remixtus, in *febris intercurrentibus* ad motus totius generis nervosi & vasculosi spasticos sopiendos, si prius materia fuerit expulsa; quo in casu non solum non nocere, sed illo quam maxime opus esse consentiunt. (f) *Illustris* enim HOFFMANNUS testatur (g) *corticem casçarilla accommodatissimum esse remedium in febris intercurrentibus, ob principium quo instructus est balsamicum & sulphureum anodynum* (h). Exhibet vero in *tertiana casçarillam* cum *cortice china china* & *sale* quodam *medio & digestivo* ac *nitroso* combinatam. His enim non solum vis adstringens *corticis Peruviani* corrigitur, ac principium nimis elasticum in *cortice casçarilla* tempe-

Laudatur in febribus intercurrentibus.

(b) Hinc Ill. HOFFMANNUS t. III. medic. systemat. rat. p. 519. & 521. inter balsamica refert corticem, quæ calidioris & acrioris sunt indolis.

(c) Corticem hunc vel in substantia vel in extracti forma sudores provocare, variis observationibus convictus memoriæ prodidit APINUS in Febr. epidem. hist. relat. §. L. p. 91.

(d) Ill. HOFFMANNUS in medic. rat. system. t. III. sect. II. cap. III. p. 454. 56. omnes omnino, inquit, corporum in rerum natura vires neutiquam sunt absolutæ, sed relativæ & conditionatæ, certis respectibus & circumstantiis limitatæ.

(e) Medic. rat. system. t. IV. P. I. p. 31.

(f) Illustr. HOFFMANNUS in medic. ration. system. t. IV. P. I. & B. STAHLIUS in dissertat. de tertiana, febris genium universum manifestante p. 56.

(g) l. c. p. 31.

(h) Mrs. FAGON & BOULDUCE, præstantiam corticis casçarilla in his febribus confirmant observationibus, a quibus tamen in eo dissentimus, quod ad febrium curationem partem tantummodo requiri resinam autumant. Quum enim febris fundamentum consistat in motu auctiori a spastica totius generis nervosi & vasculosi strictura proveniente, non modo

in quar-
tana &
quotidia-
na.

temperatur, verum etiam materia in primis viis forte latitans ad evacuandum præparatur. IDEM in febribus quoque *quartanis cascarillam* admodum commendat (i); nec non in *quotidianis*, ubi ad promovendam cuticularem excretionem, quam compescendam successively febrilem habitualement commotionem, pulvere ex antimonio diaphoretico, cornu cervi philosophice præparato, tartaro vitriolato & cortice cascarillæ bis quotidie ad drachmam dimidiam per octo dies uti jubet (k).

§. IX.

nec non
in conti-
nuis.

APINUS celeberrimus Medicinæ Professor Altorfinus (l) in febribus *continuis* magni facit cascarillæ corticem, eumque non minus felicem, sed quod plus est, ut plurimum sensibiliorem præstitisse testatur effectum, quam in *intermittentibus*. Novam hanc ac expeditam vocat curandi methodum; tantum vero abest, ut inventi laudem sibi vindicet, ut potius MORTONO & ANGLIS potius deberi lubens fateatur (m). Ex *historica febris epidemica relatione*, quæ a. 1694. & 95. in Noricæ ditionis oppido Hersprucensi & vicino tractu grassabatur, liquet, illum hoc cortice usum fuisse in febribus *petechizantibus*, *cattarrhalibus* *malignis*, & *epidemicis intermittentes ab initio simulantibus*, cet. vel in substantia, essentia, pilulis, vel extracto, quod vocat *ληξοπυρετόν*, modo supra (Cap. II. §. VII. lit. i) descripto. Præprimis commendat extractum suum antifebrile cum aquis diapnoicis, ejusque maxime notabilem in ætate *juvenili* ac *puerili* deprædicat efficaciam (n). Quod vero de usu corticis cascarillæ vel in substantia, vel extracti forma præscripti adse-

in febribus
cattarrhalibus
malignis
& petechizantibus.

verat, dum medio morbi cursu & secundo vel tertio die in integrum ægros restitui contendit, id non ubique aliorum experientiæ respondet (o). Interim tamen in febribus *intermittentibus epidemicis anomalis* malique *moris corticem nostrum* celebrat illustris HOFFMANNUS (p), qui extra paroxysmum drachmam dimidiam pulveris ex absorbente terreo, antimonio fixo, nitrato & tonico ex china china & cortice cascarillæ bis vel ter quotidie in aquis diapnoicis suadet.

In epidem-
icis in-
termittentibus
anomalis
malique
moris.

§. X.

Deinde cascarilla commendatur in febribus *acutis inflammatoriis*. Specifico cum effectu illum adhibuit B. STAHLIUS in pectoris adfectibus, præprimis vero in *pleuritide* vera & *peripneumonia* (q) ob virtutem lenientem, sedantem, ac discutientem. Specialem, quæ B. vir in curandis hisce morbis usus fuit, methodum, retulit mihi affinis honoratissimus G. E. STAHLIUS, quæ in eo consistit, quod in principio præscripserit essentiam corticis cascarillæ cum resolvente & discutiente catharrhali v. g. pimpinellæ albæ remixtam, a guttis XXX. usque ad XL; in incremento vero & statu pulverem *resolventem compositum* (r), tempore nimirum matutino & versus noctem, a dimidio ad scrupulum unum; circa declinationem vero cascarillam in subtilem pulverem redactam, sed in refracta, nec sæpius repetita dosi a gr. scilicet X. ad XV.

In febribus
acutis
inflammatoriis.

in pleuritide
&
peripneumonia.

§. XI.

Deinde singularem & specificam quasi exferit virtutem in febre *intestinorum inflammatione*. In dysenteria.

O o o 4

toria

do tonica propter atoniam, quæ spasmodum excipit, quam potius sedativa ad excedentes motus compescendos hic conveniunt. Merentur hic adponi, quæ dans L'HISTOIRE DE L'ACADEMIE ROYALE DES SCIENCES an. MDCCXIX. p. 68. 69. traduntur: Feu M. FAGON avoit dit plusieurs fois à M. BOULDUCE que dans le tems où le Quinquina étoit encore rare en France il avoit souvent employé le Chacril avec succès dans les fièvres intermittentes. Apparemment sa partie résineuse & penetrante divise & atténue les matières mal cuites, épaisses, visqueuses qui sont le levain de la fièvre. Ce febrifuge a cet avantage sur le Quinquina qu'il agit en plus petite dose, & n'a pas besoin d'être si longtems continué. En general M. FAGON, au rapport de M. BOULDUCE, étoit si persuadé que dans les Febrifuges c'est la partie résineuse qui agit le plus pour la guérison de la fièvre, qu'il faisoit souvent faire une infusion du Quinquina avec l'Eau de vie, pour l'ajouter aux infusions ordinaires, & hâter par là l'effet du Quinquina. Quelques-uns y ajoutent d'autres matières résineuses en suivant la même idée. Longe aliter quidem sentit STISSERUS, sed inepte. Existimat enim Corticem nostrum virtute febrifuga notabili haud pollere; interim tamen in illis concedit ejus usum, cum particulis resinosis & balsamicis corpori nostro haud ingratis refertus sit. vid. act. laborat. chem. spec. II. cap. IX. Meliora certioraque ex praxi nobis reliquit Exc. vir I. JUNCKERUS, quippe qui in conspectu therapie generalis p. 302. majore cum fructu ipsum præberi adserit in febribus intermittentibus; upote quas, aliis congruentibus additis aut subjunctis, sæpe feliciter perfanat.

(i) l. c. t. III. P. I. §. I. p. 69.

(k) S. III. p. 103.

(l) In hist. relat. febr. epidem. ejusque præfat.

(m) l. c. p. 82. & præfatione historice relationi febris epidemicæ præmissa.

(n) l. c. obs. XLII. p. 267. seqq. Magna lis est inter eruditos, cortex cascarillæ, an Peruvianus sit, quem APINUS adhibuerit? Verum quidem est, APINI descriptionem corticis numeris Platonice esse obscuriorem: unde non mirum, si Cl. WERLHOFFIUS illum pro china china habuerit; interim tamen faciem prætulit Celeb. TREWIIUS, & indubitata veritatem cascarillæ ab APINO adhibitæ simulacrescens evicit, pro qua stabilienda relationem pharmacopœi KIRSTENII inseruit commerc. litterar. Noric. utpote qui non solum ALTORFII, verum etiam Hersprucci eo quidem, de quo APINUS loquitur, tempore epidemico, provisoris, ut loqui amant, munus sustinens, medicamenta præscripta paravit. Idem quoque l. c. tradit, quo die, quo mense, sub quo nomine prius fuerit usus APINUS cortice cascarillæ vid. Hebd. LI. p. 401. seqq. & Hebd. XX. p. 153.

(o) Conf. Exc. Vir. JUNCKERI conspectus Therapiae generalis, p. 302. & conspect. medic. theor. pract. p. 478. & 599.

(p) l. c. §. IV. p. 110.

(q) Vid. L'HISTOIRE DE L'ACADEMIE ROYALE DES SCIENCES an. MDCCXIX. pag. 69. ubi: L'illustré M. STAHL Medecin du Roi de Prusse, a étendu son usage aux pleuresies, aux Peripneumonies, & à ces Toux acres & convulsives qu'on appelle Quintes. C'est encore en incisant & en atténuant des viscosités que le Chacril produit ses bons effets. Par la même raison il est fort utile dans les cas où il faut aider ou augmenter la transpiration. Specialissime quoque laudatur in his pectoris adfectibus ab excellent. vir. Jo. JUNCKERO in consp. med. theor. pract. p. 435. 437. & ACTOR. ERUDIT. suppl. a. MDCCXXVIII. T. VIII. Sect. XI. p. 476.

(r) Descriptionem hujus pulveris vid. in dispens. Reg. & Elect. Borussæ Brandenburg. sub tit. pulvis resolvens compositus B. STAHLII p. 173.

toria ex mesenterio seu dysenteria: in his non solum dolores acutos sedat, sed diarrhoeam quoque cruentam secure sistit. Commendatur autem pulvis *casçarillæ* cum *pilulis balsamicis* ad eliminandam e corpore materiam subtilissimam fermentativam. Unde *illustris* HOFFMANNUS (s) pilulas balsamicas cum pulvere roborante, cujus basis *casçarilla* & *succinum est*, exhibet. Cognitum quoque est B. STAHLII (t) specificum in curanda *dysenteria* fuisse pilulas balsamicas, quas vel in forma illa, vel in pulverem redactas. una cum *casçarillæ cortice* præscripsit. Eandem ingressus est viam *Excell. vir* J. JUNCKERUS (u), quippe qui non balsamicas solum commendat pilulas tempore matutino, verum etiam antidysentericas versus somnum reliquisque diebus sumendas, quæ componuntur ex pulveris *casçarillæ* scrupulo dimidio, extracti *Casçarillæ* & *Tormentillæ* ana gr. VI. & massæ pilularum de cynoglossa gr. II. Si vero opus videatur, hanc methodum quotidie duplicandam jubet. Solet etiam cum pilulis balsamicis tantum pulverem *casçarillæ* bis vel quater post meridiem a gr. X. ad XV. vel sequentem mixturam scopo sistendi præbere. R. Aquæ millefolii, uncias tres, extracti *casçarillæ* & millefolii aquos. ana scrupulos quatuor, essentia *casçarillæ*, millefolii, ana drachmas duas M. cujus dosi pro ætatum ratione indicanda est. Eadem medendi methodo summo cum emolumento in *dysenteria* Tranquebariæ usus est D. CNOLL Missionis Danicæ Medicus, qui in litteris ad Viros *Excell. JUNCKERUM* & *SCHULTZIUM* anno MDCCXXXVI. transmissis magni eam fecit. His enim in regionibus morbus veluti endemius est, quia calore diurno humores nimis rarefacti aciores redduntur, a frigore vero nocturno transpiratio prohibetur, & materia acris intestina erodens ad interiora facile pellitur. (v)

§. XII.

In febribus lentis & hecticis.

Demum observante *Illustri PRÆSIDE* (x), *casçarillæ* usus sese commendavit in febribus lentis & hecticis. In illis post absterfionem primarum viarum pilulis balsamicis, subjun-

genda esse monet laudatus vir analeptica & stomachica, inter quæ præ reliquis refert *casçarillæ* & *gentianæ rubræ* essentias, item *elixir suum balsamicum*, quod præter extracta amara & balsamica ingreditur *cortex casçarillæ*. Deinde suadet etiam electuarium ex *cortice casçarillæ* cum syrupo acetositis citri adjecto nitro paratum (y). Conducit hic quoque pulvis resolvens compositus B. STAHLII, quippe qui leniter tonicus & diapnoicus est. Si in febribus lentis concurrat alvi fluxus excedens, *corallia rubra præparata cum cortice casçarillæ* laudantur a viro excell. Jo. JUNCKERO (z).

§. XIII.

In reliquis etiam sine febre sæpius stipatis adfectibus *spasticis*, & *dolorificis* morbis conspicuos edit effectus. Quas enim *clarissimus* STAHLIUS B. Parentis mecum communicavit observationes, iisdem ex aliorum commendatione robur accedit (a). Præscripsit enim B. vir. hunc *corticem* quoad pectoris affectus in *hæmoptysi* excedente in substantia, essentiam vero ejus cum aliis resolvablebus & catarrhalibus mixtam in *tussi qualicunque*. Adhibuit illum cum insigni fructu in adfectibus *spasmodicis*, in *flatulentia*, *colica*, *vomitu excedente*, *morbis inflammatoriis internis*, *hæmorrhagiis*, *diarrhæis simplicioribus*, *lientericis*, & *symptomaticis* (b). In *diarrhæis variolarum* nimis & defectum virium inferentibus, quas cum sistere periculosum sit, commendat *illustris* PRÆSES (c) bezoardici pulveris & *casçarillæ* circumspectum usum.

§. XIV.

Alii rursus *casçarillæ* virtutem *emmenagogam* & in promovendis *hæmorrhoidibus* efficacem observarunt, (d) nec non in sedandis doloribus capitis *cephalalgia*, *cephalæa* prorsus singularem. Observationem enim in *cephalæa* notatu dignam mecum communicavit *Excell. Vir* JOAN. JUNCKERUS, quam, quum sententiam nostram apprime illustrat, adponere juvat.

In spasticis adfectibus, hæmorrhagiis & diarrhæis excedentibus.

In doloribus capitis sedandis, ac promovendis mensibus & hæmorrhoidibus.

„ Matrona

(s) l. c. p. 545. 547.

(t) Vid. schediasm. Germ. cui titulus: *Wohlmeynen de Erinnerung vvegen einiger bey noch anhaltend und hie und da grassirender rothen und vveissen Ruhr zu verlassigen Artzeney-Mitteln.*

(u) Conf. *Conspect. med. Theor. pract.* p. 639.

(v) His adjungi merentur, quæ inveniuntur dans L'HISTOIRE DE L'ACADEMIE ROYALE DES SCIENCES an. MDCCXIX. p. 70. Mais ce qu'il a vu de plus particulier & de plus avantageux au Chacril, c'est le grand secours, dont il a été dans les Dissenteries de 1719. soit qu'elles ayent été accompagnées de fièvre ou non.

(x) *Med. ration. system. t. IV. p. 1. Sect. II. c. XIII. p. 565.*

(y) l. c. p. 575.

(z) In *conspect. medic. theor. pract.* p. 567.

(a) Hinc *Excellentissimus Vir* J. JUNCKERUS in *conspectu medicinae theoretico-practicae* p. 28. *casçarillam* commendat in hæmorrhagiis efferis, p. 28. in dolorum atrocibus, p. 145. 355. tanquam egregium pectorale discutiens & sedativum p. 276. in hæmoptysi p. 48. in vomitu cruento p. 56. ad vomitum & diarrhæas impetuosas sistendas p. 487. 494. 513. in turbis venæ portæ & hæmorrhoidibus p. 89. 333. item in fluxu lochiorum nimio p. 129. In

genere verò monet, si *casçarilla* cum pulvere antispasmodico remixa non conspicuas in sistendis hæmorrhagiis edat virtutes, in usu ipsi sequens esse medicamentum. R. coralliorum rubrorum præparatorum, *casçarillæ* præparatæ, specierum de hyacintho ana drachmam dimidiam, massæ pilularum de cynoglossa scrupul. dimidium, m. d. in part. X. His addi merentur observationes, quæ exstant dans L'HISTOIRE DE L'ACADEMIE ROYALE DES SCIENCES an. MDCCXIX. pag. 69. ubi M. BOULBUC, a éprouvé lui-même la vertu du Chacril dans des Coliques venteuses, dans des affections Hysteriques ou Hypochondriacques qu'on appelle communément Vapeurs.

(b) Virtus sedativa *casçarillæ* in diarrhæis observata exponitur in *Act. Berol. Dec. II. vol. VII. p. 68.* Conf. etiam opus Botanicum WEIMANNIANUM T. II. p. 36.

(c) l. c. f. I. c. VII. p. 172.

(d) Notari merentur quæ exstant dans L'HISTOIRE DE L'ACADEMIE ROYALE DES SCIENCES l. c. p. 70. Le Chacril en substance réussit pour les Hémorrhoides internes, qui ont peine à fluier, pourvu que le Malade ait l'habitude du corps un peu grasse.

„Matrona quædam nobilis ex præmatura
 „mensium cessatione cephalalgia diu adficie-
 „batur. Tantum enim absuit, ut industria
 „medicorum & usus medicamentorum leva-
 „men attulerint, ut potius sex annorum spa-
 „tio cephalalgia simplex in cephalæam perti-
 „nacem transmigraret. Quare tandem medici
 „hostem quemcumque sub cranio latere suspi-
 „cabantur, & trepanationem instituendam ju-
 „bebant. Ast heroicum hoc remedium nec
 „hostem detegebat, nec dolores mitigabat.
 „Quum vero hæc afflictio ad octavum us-
 „que annum continuasset, factum est, ut
 „matrona adflicta alios adflictos inviseret, no-
 „bilem scilicet familiam, cui ob grassantem
 „tum dysenteriam in qualemcumque præser-
 „vandi finem ordinaveram essentiam *casca-*
 „*rillæ*. Cujus cum XL guttas versus fom-
 „num sumsisset, sudore largissimo, quem an-
 „tea nullo modo obtinere medici potuerant,
 „ea nocte difflebat, & ingruente aurora
 „cephalææ exoptatissimam solutionem amicis
 „suis lætabunda significabat. Ut autem cer-
 „tior fieret, num sudor ille casu forte an-
 „vero essentiæ adsumtæ effectum excitatus fuil-
 „set, altera nocte sine medicamine lectum
 „petebat. Cumque illo die capitis dolores
 „paullulum repullularent, tertia nocte essentiæ

„usum repetebat, & eandem largissimi su-
 „doris & ablati doloris effectum experieba-
 „tur. Quæ curatio sicuti inopinabilis fuit:
 „ita pluribus postea experimentis hoc reme-
 „dium optime se commendavit.

§. V.

Quod ad specialissimam hujus *corticis* ad-
 plicationem adinet, ultimo loco notandum
 adhuc est, illam & genio morbi & indivi-
 duo esse adcommoðandam. Unde liquet ju-
 dicio practicum, exactam causæ morbifi-
 cæ, viriumque hujus medicamenti & stru-
 cturæ corporis requiri cognitionem, quæ ut-
 pote fundamentum constituunt pathologiæ &
 therapiæ; ita & felicem in curando reddunt
 medicum. Dari autem poterit *cascarilla* pro
 individui ac morbi ratione in substantia a
 gr. X. ad scrupulum unum, in essentia a gut-
 tis XX. ad LX. in extracto a gr. II. ad gr.
 V. & VI. in infuso aquoso, melius tamen
 in vinoso, quia menstruum hoc partem resi-
 nosam & aquosam solvit. Et hæc sunt quæ
 de *corticis cascarillæ natura, indole, ac vir-*
tutibus breviter exponere annisui fui. Tu ve-
 ro C. L. omnia a me dicta scriptave in bo-
 nam interpretare partem.

Cascaril-
 la genio
 & indivi-
 duis varia
 in forma
 ac dosi
 adcom-
 modanda
 est.

C'est qu'alors le tissu de la peau n'étant point trop
 serré, le Chacril augmente la transpiration, toutes
 les liqueurs ont plus de liberté, & les Hemorrhoi-
 des s'ouvrent. Peut-être aussi le Chacril contribue t'il
 à les faire couler en resserrant les vaisseaux qui cen-

tiennent le sang hemorrhoidal. M. BOULDUK a été
 témoin du fait. Conf. quoque Ephem. N. Curios.
 dec. III. a. II. obs. XLIX. p. 60. & APINUS l. c.
 p. 94.



DISSERTATIO MEDICA

D E

PRÆSTANTIA MALORUM
CITRIORUM IN MEDICINA.*Primum edita Anno 1715.*

P R O D R O M U S.



ADMIRANDÆ corporis humani machinæ, quales quantasque fluat atrox Morbona insidias, quis est, quem lateat? sive enim morborum intuearis multitudinem, sive eorum ineffabilem pensites varietatem, sane immensa stupori tuo se sistit amplitudo, identidem sanitati nostræ lacunam minitans. Sic inter minime spernandos, sed maxime cavendos, valetudinis hostes prodit exitiosum virus, detestabile venenum, ex qualicunque etiam trium regnorum scaturigine profluens, quod tam agilissimæ est indolis, ut profecto exili licet mole, potenter tamen ac celerrime spiculis suis salinis summe causticis, telis illis intoxicatis, solidorum pariter ac fluidorum penetralia pervadere, horum accuratissimum æquilibrium destruere, sicque commercium animæ rationalis (ut vitam hominis veteres Philosophorum haud incongrue definiunt) tollere capax sit. Sed quanto etiam morborum ac symptomatum exercitu & σύνδρομῳ inexpiabilis Morbona genus humanum debellare audeat; quanto etiam pernicioso torturæ apparatu miseram mortalium naturam invadat, Natura tamen naturans D. T. O. M. valvas jam armamentarii, en instructissimi! universæ puta materiæ medicæ, nobis referavit, ex quo arma ad profligandos sanitatis hostes capacissima depromere possumus, obseffo corporis humani castello suppetias laturo. Et hæc inter arma, hæc inter efficacissima, inquam, auxilia, quæ inprimis potentissimis nostris inimicis, venenorum puta atrocissimis viribus, omnium maxime machinæ nostræ interitum parantibus, resistere valent, primario fulgent titulo MALA CITRIA, tota quanta alexipharmaca & teste ETTMÜLLERO *Colleg. pharmaceut. in Schroeder. p. 426.* omnibus theriacis, mithridatis ac confectionibus magistralibus longe præferenda, quod etiam ipsa dissertatio curatius in scenam est productura, & quibusdam de stupenda fere eorum virtutis alexiteriæ efficacia historiis forsan dilucidatura. Insignem interim pomorum horum præstantiam, adeo antiquitas jam venerata est, ut tantum abesset, ut esu ea consumerent, ut potius dulci tantum eorum delectarentur fragrantia. Conf. PLINII *Hist. nat. Lib. 12. c. 3.* C. BAUHINI *Pin. p. 435.* Imperatores ac Consules Romani erubescabant aurea hæcce poma comestura dilapidare, sed ut maxime pretiosa ea amantes pro pastu oculorum epulari (zum Schau-Gerichte) ea asservabant, vel ad plurimum illis ut medicina fruebantur. Persæ persuasi erant se nec fame, nec siti, præsentibus tantum pomis citriis, perire posse, sed hisce solis absque alio adminiculo vitam posse vivere perfectissimam. Bœotica gens mala hæcce, a Jove primum fata, putans, Herculi litavit; imo gentilium fere plerique, necdum invento thure sacra facientes, hisce diis suis adoluere. Ipsa amorum Dea Paphia Citria sibi cum Hesperidum hortis ut sacra vindicavit, pro gratissimis templorum suorum divitiis, pro amœno amoris pignore, proque dignissimis donis nuptialibus ea æstimans. Spartanis Idola sua, consueta devotione veneraturis, ea citri frondibus coronare solenne erat. Julius Cæsar, sub potestatem reducta Gallia, mortalitatis limites transcendens, spretis palmis & lauris, sertum sibi victorialem ex Citri foliis imposuit, ut testis horum omnium est incomparabilis LOHENSTEINIUS *Armin. part. 2. l. 2. p. 342. & 343.* Et quid antiquitas? Nonne modernis nostris magnatibus (haud dicam omnis conditionis homini) citria sunt in maximis deliciis?

liciis? Nonne illis inter splendidissima ac lautissima convivia oculorum luxuriæ subinde indulturis, Citria decus suum fœnerare oportet? Nonne in omnibus culinis, quibus parsimonia non nimis rigorosas præscripsit leges, ubique in parandis cibis palato gratissimis, suum contribuere Citria tenentur? Nonne denique ad festivitatum, imo inferialium pompas splendidiore reddendas adjumento vocantur Citria? Sane nemo hæc omnia, pluraque alia, quæ pagina transilire suadet, inficias iturus est. Insignes autem, nec satis laudandas, eorum in Medicina vires hic reticendas & ad ipsam dissertationem fusius hæc pertractaturam restringendas esse censeo. En igitur æstimationem! en pretium malorum Citriorum! quæ & prosperæ & adversæ valetudini solatium præbent; non pigebit itaque, cum exantlatis, per aliquot annos, laboribus, musis academicis valedicere fata jubeant, horum præcipue *Præstantiam in Medicina* dissertatione inaugurali dilucidius paulo perlustrare ac perspicaciorem de his anatomen pro virium qualiquali facultate proponere. Sed apprehendo jam, transgresso ulteriori præfaminis ambage, mala illa delicatissima, eo quo polleo gustus judicio delibanda, hoc tantum prius ardenti ad cœlum fuso suspirio: Deus adspira coëptis!

CAPUT I.

Onomatologiam, differentias & species malorum Citriorum, sistens.

§. I.

PRæstantiam malorum Citriorum in medicina explicaturus, in primo quidem hujus opusculi limite, nisi de trito methodi tramite deflectere animus sit, quadantenus in horum *ὀνομασίαν* inquirere fas esse arbitror, quo sic decorticato prius nominis putamine, ipse rerum nucleus eo melius delibandus pateat.

§. II.

Malum in Hellade *μῆλον* nuncupari, ibique pariter ac in Latio genus fructuum designare, cujus caro esculenta, nec duro admodum includitur putamine, cuivis facile innotescit; nostra autem mala, quæ in præsentiarum accuratiori, quo fieri poterit, penicillo adumbranda suscepi, vario ab Autoribus salutaris solent nomine, frequentiori, & in officinis receptiori appellatione audiunt mala Citria, uti pariter vult GALENUS *L. 7. Simplic.* dicens: non amplius malum Medicum, sed ab omnibus Citrium appellari affolere, item ISIDORUS *Origin. L. 15. c. 7.* & HOFFMANNUS in *Schroederum §. III.* Citrium dici debere exigunt, quod scilicet a colore corticis nomen sit adeptum, omiſſis recentioribus Botanicis; vel mala Citrea vid. PALLADIUM *singulari de Citreis capite*, & MACROBIUM *L. 2. Saturn. c. 15.* aliosque, aut uno verbo Citra ab arbore nimirum Citro. Aliis dicuntur mala Medica, a solo Medorum illis olim patrio; verum mihi liceat potius hoc nomen derivare ab insigni eorum, qua scatent, virtute medica, & sic appellare tota quantâ medica. Ab aliis nuncupantur Persica, ut etiam a dicto MACROBIO, item Assyria, PLINIO tamen *L. 12. c. 3.* de arbore id magis intelligente, utrumque nomen itidem a patriis laribus sumitur. Ab aliis Citromela vel Græce *κίτρομηλα* ut a DIOSCORIDE *Lib. 1. c. 166.* quod scilicet secundum THEOPHRASTUM arborem Citrum cedri foliis putarent. Aliis ea placet nominare Citrones, quod tamen RAUWOLFF potius de arbore quam de fructu intelligit. Aliis mala Citrinata ut TABERNÆMONTANO *p. m. 1385*; MATTHIOLO *Comment. in Dioscoridem p. m. 204.* Citromala dicuntur. Aliis

poma Adami, Mala Citroniata, Ponceria, Melangula, Citrangula, quæ tamen nomina de certis generibus potius intelligenda, & de quibus distinctius paragraphis sequentibus differendi dabitur occasio. Germanice usitatori nomine appellari consueverunt Citronen / interdum Adams Aepffel / vel secundum TABERNÆMONTANUM Citron Aepffel / imo aliis Gucen Aepffel / ob consuetudinem vel potius legem specialem Judæis solennem, qua scilicet quævis stirps tenetur unum malorum Citriorum & quidem mole grandius, annuatim in ædibus suis asservare, annotante prædicto Autore pariter ac VALENTINO *Musæorum p. 306.* & memet ipso id observante Francofurti cis Viadrum. VIRGILIO placuit *L. 2. Georg.* fructum nostrum appellare felix malum; & sæpissime apud Autores aureorum pomorum nomine salutaris affolet, uti plus vice simplici apud laudatum LOHENSTEINIUM *Armin. Part. 2. L. 2.* præsertim dum asserit Consules ac Imperatores aurea poma in ciborum usus trahere erubuisse, quod in annotationibus ad PLINII *Hist. natural.* confirmatur his verbis: Fructum hujus arboris (nempe Citri) aureum malum dictum volunt, cujus etiam meminit Orpheus crepundia Bacchi & suppellectilem infantum enumerans:

Κῶνος, ἢ ῥόμβος, ἢ πᾶλιν καμπύλαινα
Μῆλα τέ χρύσεια καλὰ παρ' ἑσπερίδων λιγυράντων.

§. III.

Sed haud diutius immoraturus sum *ὀνοματολογίας* criterio, si imprimis GALENO fidem dare animus est *L. 3. de differ. puls. c. 1.* affirmanti: de nominibus laborare est operam ludere; lubet itaque definitionem DIOSCORIDIS fructus nostri adducere, quæ ita se habet, quod scilicet sit malum oblongum, rugosum, colore aurum imitans, cum gravitate odoratum, semen habens pyri. Sed cum hæc definitio non æque mihi arrideat, & haud sufficiens etiam videatur, aliam substituere non incongruum erit, sit igitur talis: Malum Citrium est fructus plerumque oblongus, interdum tamen etiam sphaericus, cujus cortices foris ex auro flavescent, intus pallent; exterior eorum superficies est inæqualis, porosa, saporis subamari, acris, odoris suaveolentis, sub quibus continetur succus aliquatenus flavescent, acidus, per loculamenta varia plerumque 7. 8. 9. succi & vesicularum pellucidarum plena dispositus, in quibus sparsim latent grana vel semina pallida oblonga, ventricosa, obtusa, quæ sub putamine albo & adhuc

huc una pellicula ruffa, molli & tenui includunt nucleum mollem albicantem saporis amaricantis aromatici.

§. IV.

Verum enim vero cum varietate sua, variam & animo & oculis nostris foenerent mala Citria delectamentum, eorum differentias pariter examinare, ac perlustrare consultum judico. Satis autem manifeste ea differre advertere est, primo ratione magnitudinis & formæ, secundo ratione saporis & denique ratione substantiæ, quæ differentia maxime ex maturatione, & diversitate regionum solique petenda est, vid. VALENTINI *l. c. pag. 306.* Magnitudine quidem adeo ludunt, ut quædam Melonum adinstar increfant, & hæc sunt præprimis illa, quæ ex insulis maris Adriatici adportantur, observante TABERNÆMONTANO *p. m. 1365.* quædam mole sua quoque Meloepones æmulantia, plane pondus decem librarum adæquant, annotantibus CARDANO & GESNERO ap. C. BAUHINI *Pin. Theatri botan. p. 435.* hæc autem succo fere depauperata esse dicuntur, & ex Liguria & Adriatici Ægeique pelagi insulis originem trahunt. conf. MATTHIOLUS *Commentario in Dioscor. p. 205.* maxima cum VALENTINO *l. c.* dicuntur poma Adami; apud CASP. BAUHINUM Ponzires secundum *Cæs.* appellantur, qui hæc a Citriis melopeponis magnitudine distinguit, & Ponzires inter Limonem & Aurantium ambigere asserit; hæc poma palato non æque arrident, ob pulpæ tamen copiam in officinis desiderantur saccharo vel melle asservanda. vid. C. BAUHINUS *l. a.* porro dantur Melangula dicta, quæ prædicto Autori sunt fructus ingens tuberosus & *Cæs.* Citrangula. Germanice quibusdam *Citronaten* annotante VOLCKAMMERO *Flora Norimbergens. p. 276.* Monachi vero in MESUEN *cap. de oleo e pomis Citranguli*, hoc nomine non duntaxat Citria, sed etiam Aurantia & Limonia intelligenda esse cupiunt. Alia superioribus sunt minora, & vel majora, vel minora limoniis, hæc, suafore TABERNÆMONTANO *l. c.* & C. BAUHINO *Pinac. l. c.* ex lacu Benaco adportantur & in cibis potissimum expetuntur. Et sane adeo variat eorum forma, ut alia prælonga, alia rotundiora sint, uti quotidie in splendidissimis hortis sub speciali nomine *Orangerie* nobis cernere licitum est. Liceat hic inferere observationem *Ephemerid. Germ. N. C. A. III. Observ. 261.* ubi Citrium parvum in alio Citrio, ut foetus in matrice, repertum est. Conf. similis observatio in *Museo Wormiano p. 206.* Ratione saporis alia etiam sunt dulci medulla, quale FERRARIUS *Hesper. 73.* annotat, & ex eo pariter TOURNEFORT. *Instit. rei herbar. p. 261.* quod me tamen iudice erit forte Pomum Sinense, seu Pomme de Sine, Germanice *Aepffel-Sin* dictum; alia acidiori. Quibusdam tandem tres duntaxat statuere placet differentias malorum Citriorum utpote sunt: Limonium, Citrium *κατ' ἐξοχὴν* ita dictum, & Poncerium. Limo seu Limonium putatur, quod est oblongioris figuræ & ex herbaceo colore viret, succoque turget acidiore, acerbior ac frigidior, cortice satis tenui. Citrium quod colore magis est luteo, cortice rugosior, ac crassior; hincque ipsum crassius & odoratius. Poncerium quod & Citroniatum, Pomum Assyrium, Pomum Adami, salutatur, supra reliqua magnitudine eminet, melonum modo orbiculatum est, cortice calloso, carnosio, pollicem nonnunquam crasso, superficieque concolore, describente sic RENODÆO in *Dispensatorio medico.*

§. V.

Ast non meo duntaxat levi arbitrato, verum & celeberrimorum Botanicorum sententia adslipulante, male confunditur Limo cum Citrio malo, utpote diverso fructus genere, quamvis D. BEHRENS *Select. dietet. pag. 113.* putet, vix inter mala Citria & Limonia esse discrimen, atque Limoniam arborem ex Citri genere pronunciet. Vulgus alias haud dijudicare solet Citria & Limonia, unumque pro altero exposcit, licet, ut rectissime animadvertit SIMON PAULI in *Quadripart. botan. p. 59. edit. Fickian.* & sapore, & magnitudine, & qualitatibus aliis a se invicem differant. Quidam, ut sæpius observare licet, Limonia nil nisi immatura esse Citria sibi imaginantur, sed falsissime, diversa enim sunt, ut jam dictum quoad magnitudinem & sapor, imo colorem & ipsam substantiam, maxime quoad characterem folii. Limonia, teste RAJO *methodo plantarum emendata p. 153.* sunt fructus minores cortice tenuiore; Citria, majores plerumque & longiores, cortice crassior; Limonia, succo acidior & pulpa copiosior, coloreque ex viridi magis flavescente pallido; Citria vero non ita. Affirmat etiam hanc differentiam *Museum Wormianum l. c.* his verbis: nescio qui factum, quod Nostrates Limoniis Citriorum dent titulum, multum enim inter se distant, tam magnitudine, quam succi & pulpæ quantitate, ac sapore, corticum quoque crassitie & viribus. Ab Aurantiis vero secundum RAJUM *l. c.* differunt Citria, quod nimirum sint majora, longiora, pallidiora, corticeque crassior, imo, adde, alio plane odore, colore, sapore, & hinc haud accurate depinxisse RENODÆUS *Lib. I. Sect. 6. c. 4. Inst. pharmac.* mihi videtur, dum inquit: idem est (arboris scilicet in qua nascuntur aurantia) color, odor, flos &c. Interim tamen & in hoc variare sæpe numero cernimus; rectissimam vero & plenariam distinctionem hos inter fructus exhausturus est subsequens capite succedente character.

§. VI.

Inter species tandem, quæ in antecedentibus etiam jam attractæ, enumerantur (1) Citreum vulgare *Tournefort. l. c. p. 620. & 621. Ferrarii Hesperid. 61.* (2) Citreum magno fructu *Tournefort. l. c. Joh. Bauhini 1. 94. Volkameri Flor. Norimb. p. 276. Joh. Parkinson. Theatr. botan. Anglice conscr.* (3) Citrium fructu ingenti tuberoso *Tournefort. l. a. C. Bauhini Pin. p. 435. Volkameri l. a.* eoque annotante a quibusdam Citrangula, Germanice *Citronaten* dicta. (4) Citrium fructu mediocri *Joh. Bauhini 1. 94.* (5) Citrium Corcyraeum, ab insula haud dubie Corcyra ita dictum. *Ferrarii Hesp. 58.* annotante *Tournefort. l. a.* (6) Citrium Cretense *Tournefort. l. a.* ex *Ferrario* pariter forte a loco natali insula Creta. (7) Malum Citrium dulci medulla *Volkamer. l. a.* ex *Ferrario l. c.* (8) Malum Citrium cucurbitinum *Volkamer. l. a.* ex *Ferrario l. a.* (9) etiam hic annectendum censetur Limonium Citratum quoniam laudato *Volkamero* hoc non sub Limoniis, sed potius malis Citriis collocare placuit, confer de hoc etiam *Hermanni Hort. Acad. Lugd. Batav.* (10) tandem malum Citroniatum, seu Assyrium ac Poncerium, mole sua reliqua superans, ac melonum modo orbiculatum cortice carnosio, pollicem nonnunquam crasso, superficieque concolore, uti describit *Behrens Select. dietet. p. 32. & 33. & Renodæus in dispensat. medico.* quod tamen idem esse censeo ac *Tournefortii l. c. & C. Bauhini* Citreum fructu ingenti tuberoso.

beroso. Erunt equidem, quod non diffitendum, plures adhuc Citriorum species, præprimis in hortis hinc inde splendidissimis reperiundæ, sed omnium acquirere notitiam difficile fuit; interim tamen curiosis amatoribus *der Orangerie* satisfactorius, triginta duas species (licet non omnes sub Citriorum strictè dictorum signo militent) communicare placet, non ubique sane obvias, quas in alma Salana apud Prænobilissimum & Consultissimum Dominum Wilhelmum Reinecke, J. U. Licentiatum & Consullem spectatissimum, ornatioris alias horticulturn peritissimum, in horto ejus perquam nitido, non vassitate, sed concinna elegantia sese commendante, plerasque cernere & annotare licuit; & quanquam in jamjam ex Autoribus recensitis quædam sint, quæ & in hac serie reperiuntur, licebit tamen eo, quo communicatæ sunt, ordine, huc collocare, nec obstabit, puto, Germanico idiomate, & tali, quali ordinario salutantur, sequenti modo enumerare: 1. Adams-Äpfel mit der krausen Frucht. 2. Adams-Äpfel mit der glatten Frucht. 3. Große Citronat mit der krausen Frucht. 4. Gemeiner Citronat mit der glatten Frucht. 5. Die Orientalische Bombelmus. 6. Die Occidentalische Bombelmus. 7. Die ordinaire Citron. 8. Die lange Citron. 9. Die grosse süße Citron. 10. Die runde Citron / so die Coulour hat / als wie eine Pomerange. 11. Citron von Spongino. 12. Citron mit der grossen weissen Blüth von Genua. 13. Cedrato von Florenz. 14. Citron mit der grossen rothen Blüth. 15. Limonia Spatafera die große. 16. Limonia de Salerna. 17. Die süße Limonia von Neapoli. 18. Birn-Limonia. 19. Süße Limonia. Cedrato. 20. Große Limonia, Cedrato. 21. Das lange Silber-Blat. 22. Türckin / die grosse und die kleine. 23. Kleine Bergamotte. 24. Große Bergamotte. 25. Äpfel von Portugal. 26. Eckern / große krause Pomerange. 27. Süße Pomerange so man mit der Schaale isst. 28. Gefüllte Pomerange. 29. Süße Pomerange mit dem krausen Blat. 30. Süße Pomerange mit dem verguldeten Blat. 31. Limonia mit dem verguldeten Blat. 32. Stern-Pomerange mit dem krausen Blat. Et tantum de speciebus.

CAPUT II.

Investigans Locum natalem, plantam, characterem, colendi, eligendi & asservandi modum.

§. I.

DEfunctum jam & *διοργανολογίας* & differentiarum, specierumque tractatione ad ulteriora etiam memet accingere præstabit, investigaturum scilicet malorum Citriorum patrios lares. Hic autem Persiam, patriæ prærogativa gloriantem, comperio, atque volentem poma hæc, (quæ Alcinoi Hesperidumque hortos reddidere adeo celebres) in suis duntaxat terris esse indigenas, aliis vero in oris profectos hospites. Ex Persia & Media in Æthiopiam, hinc vero sub Atlantem & in Cyrenem urbem translata feruntur, Hesperidumque hortos (liceat hic in antiquitatem Gentilium aliquatenus excurrere) ob huncce thesaurum, pro sanctuario a dracone, invidia puta, custodito, habitos, fuisse. Hercules vero, cui Prometheus consilium mala illa impetrandi dederat, intersector draconis illius, a Junone ad custodienda aurea poma illuc demandati, in orbe proclamabatur, quoniam inæstimabiles hosce fructus

Frid. Hoffmanni Oper. Supplem. II.

primus in Italiam & Græciam transportasset: & hanc ob causam statuum ejus æneam, Romæ, in foro boario, tria ferre Citria; hujusque ad exemplum imagini Alexandri magni quoque unum pomorum horum in manum calatum esse putatur. Imò non solummodo Mauritania & Cyrene, verum & omnis regio, cujus solum poma hæc tantum progerminantia vidit, sibi possessione Hesperidum hortorum blandita est. Et Atlas, Mauritanie Rex, hortos suos, fructu illo superbientes, altissimis munivisse montibus dicitur, quoniam Themis divinasset filium quendam Jovis ipsi quædam fore ablatum. Qua de re vide celeberrimum LOHENSTEINIUM *Arminii sui l. c.*

§. II.

Mediæ interim strictè sic dictæ etiam natales suos debere mala Citria plurimi Autorum consentiunt, eoque magis veritati consentaneum videtur, cum appellatio malorum Medicorum hinc suam trahat derivationem, sic VIRGILIUS *L. 2. Georgic.* Mediæ ferre felix malum, i. e. Citrium, refert. Malus Medica & Assyria dicitur, utroque nomine a regionibus ducto, inquit THEOPHRASTUS *L. 4. Histor.* annotante C. BAUHINO *Pin. p. 435.* Malus Medica asserit PLINIUS *L. 12. c. 3.* non nisi apud Medos & in Perside nasci voluit. Notandum enim, ejus ævo non fuisse in Italia, ut ipse ibidem testatur his verbis: tentavere gentes transferre ad sese, propter remedii præstantiam, fictilibus in vasis: sed, ut dictum, nisi apud Medos & in Perside nasci noluit, & quanquam eo adductæ, magnæque cultorum solertia fuerint enutritæ, tamen diu hoc in solo vivere nequiverunt; non enim omnis his ferendis conveniens, nec omnis fert omnia tellus, ut *Poeta VIRGILIUS l. Georg.* canit; plerumque loci genius est advertendus, non minus ratione soli, quam cœli ac aeris, sic Citrus cœlum amat calidius, uti pariter alia ex oris remotioribus ad nos advecta aromata. CLAUDERUS *Dissert. de Tinctura universali c. 5. pag. 225.* asserit, aromata aliaque innumera sub nostro climate non crescere, ob radios solares magis opacos & steriles, & cuicque regioni, inquit LEVIN. LEMNIUS *L. 1. c. 17. de occult. naturæ miracul.* certæ herbarum species sunt peculiare, suisque natalibus singulæ stirpes delectantur. Ex nullo alio fonte etiam Alpes Belgicæ, observante prædicto LEMNIO *l. a.* omni-genas stirpes proferunt, in locis illis arenosis sponte emergentes, nulla cura, nullaque hominis industria. Cum itaque tanta sit vis & soli & cœli, palam est, quare plantas exoticas, in hortos nostros translatas aut prorsus non aut difficulter tamen progerminantes spectemus, aut, si laboriosus cultus has eo deducat, non æque cito, ut in patriis suis pulvinis, nec ad eandem emergant proceritatem, multum interdum de pristinis suis viribus remissæ. Multum igitur huc culturæ sedulitatem conferre, satis elucet, quæ & causa, ut, quæ olim solo nostro assuescere nolle visæ sunt plantæ exoticæ, sedula atque assidua cultura, huic tamen assuesfactas esse videamus: non autem ex nimis longè petita ratione DIGBÆI *Tract. de pulvere Sympat.* attrahere scilicet plantas atomos ex locis suis patriis, licet interdum vel remotissimis.

§. III.

Et sic etiam successu temporis, cum omnem transplantandi hosce fructus movissent lapidem, sed frustra, PALLADIUS tamen primus cultu ac diligentia singulari effecit, ut arbores Citri, ex Media in Ita-

liam translata, ibidem profuerint, seque propagaverint, ubi sic semel translatae factae, tantam cum Italo solo iniere gratiam, ut non modo in maritimis, verum & in mediterraneis tum hortis, tum viridariis, tum nobilium lacuum ripis frequentissimae feliciter germinant, ut & Regnum Neapolitanum hoc germine successive gavifum est. Postea & Hispania earum possessionem adepta est & ad propagationem adeo frequentem deduxit, ut nemora ac campos occupare coeperint, teste C. BAUHINO *Pin. p. 435*. In specie Regnum Valentiae tanta gaudet Citriorum abundantia, ut praerimis circum circa amoenissimam ejus, & ab ipsis Hispanis formosam dictam metropolin, Valentiam, jucundissimas constituere porticus (*Allée*) cernantur, observante HübNERO in *Geographia sua*. Sic pariter, Galliam illis jam jam gloriari, constat. Et hisce igitur ex locis, ingens malorum Citriorum ubertas hodie ad nos quotannis deferri affolet, in specie loca copiose hac porrigentia, esse asserit VALENTIN. *l. c. p. 306*. S. Reme, Nice, & Menthon oppidum quoddam Pucis Sabaudiae. Germaniam autem nostram non minus praesentis saeculo amoenissimo hocce fructu superbire, tantus magnificorum, splendidissimorumque hortorum numerus, ubique testatur luculenter. Etenim ubi tantum magnatum, imo privatorum, introeas viridaria, statim Citriorum nitidissimarum, Italas & Hispanicas exacte aemulantium, serie quadam superbe splendente (quam hodie Gallico idiomate *Orangerie* exprimimus) & oculum & animum pascere poteris. Exemplo se sistant horti celebres, & fere Alcinoi dicendi, tantum quos proprio oculo lustrare licuit, ut Gedanenses, Berolinenses, Wratislavienses, Lipsienses, Naumburgensis, Jenenses, praecipue Reineckianus, Wittembergensis, Altorfinus, Norimbergenses &c. Citri fructibus suis Italas ac Hispanicis palam reddentes dubiam.

§. IV.

Plantam porro poma nostra progerminantem, ejusque characterem consideraturo statim occurrit sat evidenter, esse arborem fructiferam, non nimis proceram, Aurantiorum ac Limoniorum plantas magnitudine aequantem. VIRGILIO *L. 2. Georg.* Lauro simillima visa est, ita enim canit:

*Ipsa ingens arbor, faciemque simillima Lauro;
Et, si non alium late jactaret, odorem,
Laurus erat ---*

quantquam autopsia satis manifestam demonstret disparitatem. Collocatur secundum RAJUM *methodo plantar. emendata p. 153*. inter arbores, quarum flos basi fructus cohaeret, fructu polypyreno, h. e. plura uno semina ambiente, pomo majore, sive pomiferas non umbilicatas, fructu corticoso, pulpa in plurimos lobos divisa: conferatur adfertiens RUDBECK *Dissert. de fundamentali plantar. notit. p. 42*. Ipsa arbor omnibus anni temporibus pomifera est, aliis nimirum cadentibus, aliis subnascentibus, aliis adultioribus, aliis maturescentibus, ramos habet flexiles, spinosos, viridique libro vestitos. Lignum ejus etiam a quibusdam Citrum vocatur, praesertim ex Mauritania adportatum, & unde pretiosas Romani conficiebant mensas. Conf. PLINII *L. 13. c. 15*. item MARTIALIS *L. 10. epigr. 98. L. 2. epigr. 43*. & in spec. FARNABII *notae ad hunc locum*. item LUCANI *L. 9. vers. 426. & seq.* delectati forte illo, quoniam, & colore & odore, se commendare videmus, hinc etiam OPIUS forte apud MACROBIUM *c. 14. L. 3.* & Citrum & θύαν (i. e. arborem odoratam) vo-

catam arborem putat, & de illa versum hunc Homeri exponendum:

Ἐμματα δ' ἀμφίσασα θυώδεια σιγαλόεντα.

§. V.

Folia autem quod attinet, ea hic etiam, ut EMAN. KOENIG *Regn. vegetab. p. 60*. inquit, sunt plantae ornatus, orta ex corticis cui adnascuntur, ultima fibrarum desinentia, praesente nodo umbilicari. PLINII *L. 12. c. 3*. autumat, arboris hujus folium esse unedonis folium intercurrentibus spinis: ast ad recentiorum Botanicorum examen reductum, est folium simplex, planum, nervosum, margine integro, foraminibus visum fere effugientibus, ubique veluti acu tenuissima punctum trajectum, perpetuoque virens, quod hinc etiam laudatus LOHENSTEINIUS *l. a.* dixerit, immarcescentia Citri folia immortalitatis imaginem significare, Medisque (ui pariter & nobis hodie) esse ferculorum ornamenta, adde & condimenta. Saepius enim observare mihi concessum, coquos ad parandum certum ferculum, *bœuf à la mode* dictum, folia Citri adhibuisse. Verum quod arbor nostra, uti & aliae hujus generis, comam suam nide virentem perpetuo retineat, ratio mihi videtur arcessenda, non tam a soli atque coeli temperie ac diversitate, secundum COSTÆUM *de univers. stirp. natur.* quam potissimum a pingui, resinoso, tenaci, nec aeris injuriis facile parente, in qua residet quasi calidum innatum, substantia. Observamus enim, si eadem sit tenuis & aquosa, facillime perniciem pati atque marcescere, & sic pro diversitate illius substantiae nostris etiam in terris cernere licet, alias plantas comam suam deponere citius, alias tardius, alias retinere prorsus. Exemplum praebet inter alia Aizoon, quod in ipsis etiam hypocaustis suspensum, suum servat virorem, qui alias confestim evanescere solet, in plantis a terra, ceu a matre sua, avulsis, alimentoque sic suo orbatis. Pari ex ratione allata, pinguis puta atque viscosa substantia, perennem quoque ostendant virorem arbores resiniferae, similique gaudentes natura, uti arbor Thuris, Lentiscus, Terebinthus, Balsamus, Cupressus, Cedrus, Pinus & id genus aliae lata serie a BELLONIO in *suis observationibus* recensitae.

§. VI.

Characterem ulterius quoad florem delineandum esse, & ratio, & necessitas, distinctioris plantarum cognitionis ergo, postulat, non enim flores solummodo sunt quasi gaudium plantae, atque futuri veris spes, ut notat ex HESIO DO ZACUTUS LUSITANUS *Oper. Tom. II. p. 78*. & ex his EMAN. KOENIG *l. c.* sed sunt praecipui indices, quibus mediantibus & genera & species plantarum dijudicaturi sumus; stirpibus dati sunt, ut fructum plerumque ceu uterum cum ovo, includant ac foveant, donec ille paulo firnior, & ad aeris inclementiam tolerandam fiat aptior. A VIRGILIO *Lib. 2. Georg.* olim dicebatur: Flos apprime tenax; quid vero per florem tenacem (nisi substantiam ejus tenacem) intelligat, me quidem latet, curiosus tamen Lector in *annotat. ad Plin. Histor. natur. ad VICTORIUM c. 8. obs. 32*. id diligenter explicantem ablegatur. Juxta TOURNEFORTIUM *l. c. p. 620. & 621*. Citrium est plantae genus, flore rosaceo, plurimis scilicet petalis in orbem positis, constante, ex cujus calice surgit pistillum, quod deinceps in fructum abit. MATTHIOLO *l. c. p. 204. & 205*. describente Citrus flores edit subpurpureos, solidos, calathi effigie, capillamentis quibusdam

busdam e medio emergentibus. DALE *Pharmacolog. p.* 436. floribus calathoidibus arborem Citrum præditam esse asserit. Normam autem recentioris & accuratioris Botanices methodi secutus, brevem characteris delineationem trado talem; quod nimirum Citrus habeat florem perfectum, simplicem, pentapetalum regularem, exterius aliquatenus purpurascentem, interius vero albicantem, odorem, haud ingratum, sed suaveolentem, spirantem.

§. VII.

Navantibus vero operam nostris in terris fructus illos adipiscendi, id primo plerumque felicissime succedit in vasis fictilibus, semina scilicet malorum Citriorum terræ inferendo, unde mensis spatium, imo citius egregie proficiens planta sese oculo nostro sistit, quæ tum non minus expertum, quam sedulum sui requirit cultorem, qui omnem gerat curam, ut quam optime adolescat, ad inoculationem evadat aptior, & sic fructus nobis foeneret exoptatissimos; secundo etiam malorum Citriorum possessione potimur, advehendo scilicet aliis ex locis, ut ex Italia, Hispania, & aliunde ipsos stipites jam adultos, eosque nostro demandando solo. Utroque modo sedulo observandum, ut plantæ huic delicatiori prospiciamus terra quadam recenti & putrefacta, qualis speciatim etiam ex lignis corruptis gigni assolet, imo pingui & non exarefacta, quod præcipue experientia comprobatum affirmat SCHWIMMERUS *delic. physico-hortens. p.* 83. & 148. asserendo nimirum: Citriorum & Aurantium arbores terram exigere pinguem, quæ optime paratur ex jumentorum cornubus (*Hörnern von Hind-Vieh*) emollitis, si nimirum hæc in aquam quandam mucilaginosam redigantur, hacque ipsa humectetur tellus, quod eandem evidenter pinguefacit, fructusque maxime promovet. Non minus etiam solum tale, fimo equino, columbino, & gallinaceo imprægnandum, terraque quotannis renovanda est, arbores enim hæc succum & humiditatem omnem nutritivam imbibunt, ut tandem terra remaneat nutrimento orbata, & sterilis, licet etiam illa, alias utilis, accedat terræ evolutio, quæ humidum aëreum, ad nutrimentum alioquin harum arborum multum conferens, liberius admittit. Locis tandem solaribus, ubi potissimum reflexio radiorum adest, exponendæ sunt, quo sic continua fere aëris temperie calida frui possint, calidum enim & humidum amat Citrus annotante etiam LOHENSTEINIO *l. c.* & boream, austrum, etiam ac mare averfatur; præcipit SCHWIMMERUS *l. c.* omnes arbores exoticas, ex Italia vel Hispania advectitias, si bene succedere debeant, aqua tepida esse irrigandas, & inoculationem Citriorum non statim initio veris esse suscipiendam, ob sufficientem succum nutritivum temporis adhuc deficientem.

§. VIII.

Cultis sic & impetratis pomis illis nitidissimis, eorum etiam asservationi studendum est, quæ tamen non de fructu, arbori adhuc insidente, intelligitur, hanc enim cultura modo præmonita, ad perfectionem pomorum usque instituta ac continuata, assequimur, sed de fructu jam jam ab arbore decerpto & in futurum usum asservando; modum autem conservandi & a corruptione præservandi COLUMELLA præcipit talem, asserens nempe, omne pomum quod in vetustatem reponitur, cum pediculo suo, & si sine arboris noxa fieri potest, etiam cum ramulis legendum (hæc enim res plurimum ad perennitatem conferre fertur.) Hoc ingens nobis documentum

Frid. Hoffmanni Oper. Supplem. II.

suppeditat quod mala Citria, Aurantia &c. ex Hesperia ad nos, annexis adhuc ramulis, advecta, longe vegetiora sint illis, solo pediculo instructis, pediculo vero etiam destituta facillime omnium corrumpi observentur, vid. SIMON. PAULLI *Quadripart. botan. p.* 424. De duratione porro malorum Citriorum, aliorumque fructuum horarum ex instituto egit APICIUS CÆLIUS *in art. coquin. L. 1. cap.* 18. 19. 21. hunc vero egregio commentario Gabriel Humelbergius ex variis Autoribus, ut Plinio, Columella, Paladio, Constant. Cæsare, illustravit. Diutius incorrupta asservantur annotante Dn. BEHRENS *Select. Diet. p.* 113. 114. si scilicet poma Citria hordei vel milii acervis obruantur, adde cum VALENTINO *l. c.* paleæ immissa & in cellam siccam reposita, quod & quotidiana luce apud Italos, ea venum exponentes, observare licet, sic & SCHROEDER *Pharmacop. c.* 29. *p.* 71. videtur assentire, dum fructus v. g. poma, frumento, scilicet hordeo, imponenda & ita collocanda esse, ut pediculi deorsum, flores vero sursum spectent, suasor est.

§. IX.

Selectus denique pomorum nostrorum, si instituendus, cum Dno. BEHRENS *l. c.* eligenda quidem esse concedo minora, ut carnosiora, & quæ potissimum circa Genuam crescunt, interim tamen & mole grandi, & facie pulcherrima sese commendantia, non minus apprehendenda, cum plerumque hæc, æque ac altera, pulpa sat foecunda scatere cernamus. Virentia magis quam ex auro flavescencia, segreganda, quoniam virore illo immaturitatem produnt, & hinc, ut imperfecta, seponenda potius, quam ad Medicos aut etiam cibarios usus trahenda. Cortex ultimo tenuior etiam notam characteristicam suppeditare valet, cum de magis succulenta carne, & flavedine delicatiori testetur.

C A P U T III.

Analysin atque virtutes Citriorum medicas examinans.

§. I.

PERPENSIS hætenus ad malorum Citriorum conditionem magis externam spectantibus, intimius etiam jam jam eorum viscera, distincta quadam analysi perscrutari, viresque salutares eruere, animus est. Cum autem maxime se initio prodat odor, quasi index utilium nutrimentorum & inutilium juxta MAGIRUM *Commentar. in physiolog. suam L. 6. c.* 9. *p.* 549. hic etiam aliquatenus examinandus erit. De colore enim flavo & vi corticum antiictérica, secundum JOH. BAPT. PORTAM *Lib. de Phytognom.* exinde haurienda, filere, quam vanitatem cumulare præstat. Latitat vero odor in corticibus (nam his mediantibus odoriferum est Citrium) qui est fragrans & mirifica suavitate sua nares olfacientium recreans, constans, ut omnis odor suavis, natura sua, ex particulis salino-sulphureis, volatilibus, subtilissimis, flexilibus, glabris, obtusioribus, balsamicis, quæ eminentias papillarum nervearum narium molliter & blande contingunt, & sic titillationem quandam efficiunt gratam, quam per odorem suavem exprimimus, qui nervos simul penetrando, spiritus animales roborat & auget. vide Excellentissimi Dni D. TEICHMEYERI, Patroni, Hospitis, ac Præceptoris mei, omni amoris ac pietatis conamine prosequen-

di, *Amœnitates Philosophiæ naturalis* p. 49. Concludendum autem exinde satis aperte 1. cortices nostros esse temperamenti calidi & sicci, assentiente etiam HOFFMANNO *Clav. Schroederian. p. m. 444.* & quidem ob particulas suas sulphureas, aromaticas, oleosas, volatiles, adde & inflammabiles, quoniam cortices recentes versus candelam ardentem pressi, oleositatem quandam subtilissimam respergunt, jucundo spectaculo se inflammantem, quod ut mihi sæpius, ita & cuivis tentanti, succedet. 2. reperiri in illis vim attenuandi & incidendi, ex tenui atque volatili eorundem substantia natam, quam exhalabilis fragrantia prodit. Palam itaque est præstantia Citriorum ex odore oriunda, & si verum est, homines vixisse solo odore, prouti Democritus septuagesimum annum agens panis odore vitam triduo protraxisse, Philosophus quidam, solo mellis odore vitam sustentasse, alius in carcere ex nidore carnis assatæ, quotidie ipsi oblatae, servatus fuisse, feruntur, annotante MAGIRO *l. c. p. m. 553.* etiam statuere licebit solum odorem Citriorum nostrorum ad vitam longam producendam esse satis capacem.

§. II.

Succedit jam sapor, is vero cum ratione partium fructus nostri variarum & ipse varius sit; alius nimirum corticum, alius pulpæ, alius seminum, singularum quoque censuram sigillatim suscipiendam esse reor. Acredo corticum, uti acidum pulpæ, & amaror seminum, neminem gustu id explorantem fugiet, præsertim Medicum, qui juxta GALENUM gustum habere debet exercitatum ut coquus & ex his de qualitatibus solidius quidem, quam ex odore, formari potest iudicium. Cortices acres testantur manifeste de calore, cum ex particulis igneis oriatur sapor acris, adeoque, quo quid acrius, eo exquisitioris caloris notam arguat, exemplo pyrethri, laureolæ, piperitidis, &c. Non tamen tanta cortices hi pollent acrimonia, ut lædant, & modum excedant, sed temperata saltem, statim se sub lingua exerente, & ex qua caliditas in secundo gradu censeferi affolet. Sic & acrimonia illa virtutis attenuandi, resolvendi, & incidendi index est; etenim cum particulis constet volatilibus, sulphureis, hæ vero non calefaciant solum, sed & attenuent, incidant ac intimius penetrent, hæ qualitates haud ipsi denegandæ erunt. Pulpam vero illam internam carnosam, pellucidam, refrigerandi pariter & humectandi, imo attenuandi & resolvendi virtute præditam esse, succus ejusdem acidus evidenter demonstrat, qui sapore suo gustantium linguas & de priori & de altero certiores reddit, acida enim maxime refrigerant, & humida humectare vix in dubium revocandum; acida vero attenuare mucumque resolvere, autor est DOLÆUS *Encyclop. Chirurg. rational. L. 5. p. 474.* Seminum tandem amaror manifestus, calidæ naturæ manifestum quoque suppeditat argumentum, & hinc vires calefacientes, attenuantes, incidentes, merito feminibus attribuendæ, uti & suo modo vis adstrictoria, quæ fere amaroris communis est, illis jure est tribuenda, de quibus tamen omnibus, in paragraphis sequentibus, spatiosior se aperturus est differendi campus.

§. III.

Instituendum itaque est specialius examen; & cum mala Citria variis gaudeant partibus, quæ singulæ diversum agnoscunt temperamentum, singularum quoque virtutes speciatim scrutandæ venient. Liqueat autem cortices, ut primo conspicuos, primum etiam aggredi, atque, methodo quidem anatomica

duce, quales in ventre supremo, seu capite, vires exerant, inquirere. Hic igitur in genere cephalicam, & tandem nervinam illis adscribere virtutem, haud iniquum erit. 1) enim sunt aromatici; aromata autem omnia sunt cephalica & nervina, quoniam fibras cerebri, meningum & nervorum roborare, eorumque tonum collapsum erigere valent. 2) sunt suaveolentes; suaveolentia vero omnia itidem sub cephalicorum censum trahenda, quoniam spiritus animales recreant, augent, atque resuscitant, ut propterea in apoplexia, syncope, lipothymia & capitis debilitate ad confortandam memoriam, singulari cum successu, teste HERMANNO *Cynof. mater. med. p. 92.* adhibeantur; sic *Excell. WEDELIUS Amœnit. mat. med. p. 210.* essentiam corticis Citri nervinis addit; sic RIVINUS *dissert. de medicamentor. propriet. §. 8.* excitantibus, quæ adversus torporem spirituum valent, illos annumerat. Etenim ut spiritus excitentur, inquit, & ad motum reducantur debilitum, irritamento opus est, id vero præstant inter alia, sapore ac odore forti & fragranti gaudentia, cortices Citri; & hac porro ex ratione aquam apoplecticam, multaque generosiora medicamenta cephalica & nervina, quorum catalogum hic contexere non una sufficeret plagula, ingrediuntur.

In specie sunt apophlegmatizantes, quoniam partibus suis aromaticis volatilibus lympham viscidam, in excerniculis capitis stagnantem, incidunt atque resolvunt, & sic e capite per nares materiam peccantem evacuant, si verbi gratia essentia vel spiritus ex iis paretur, & ut aqua ptarmica Langii, seu essentia majoranæ, interne & externe adplicetur. Ita a WEDELIO *l. c. p. 462.* apophlegmatizantium includuntur seriei. Inter masticatoria quoque militant; stimulant enim glandulas salivales, sua, qua pollent, acrimonia, hinc ut masticatorium egregium in foetore oris commendatur a WEDELIO *l. c.* item BORRICHIO *Tract. de usu plantar. indig. in medic. p. 28.* Cortices potui infusi, seu quoque manducati, bonum odorem efficiunt. vid. BEHRENS *Select. diat. p. 114.* Decocto corticum cum vino, si os eluatur, anima foetida corrigitur, & dentium vigor conservatur, suadente TABERNÆMONTANO *p. 1365.* & MATTHIOLO *Commentar. in Dioscor. p. 205.* Conf. & PLINIUS *L. 12. c. 3.* hunc usum proceribus Parthorum solennem fuisse, affirmans; huc spectat etiam locus VIRGILII *Lib. 2. Georg. canens:*

*Flos apprime tenax, animas & olentia Medi
Ora sovent illo, & senibus medicantur anhelis.*

Ut masticatorium balsamicum profunt in morbis malignis, imo peste, ad defendendum a malignitate. Medicus quidam Hamburgensis in Tractatu *von der ansteckenden Seuche / so in Nieder - Oesterreich 1713. eingeschlichen /* ex propria sua praxi in præfamine affirmat, se tum temporis non nisi cortices Citri recentes manducasse, & sic felicissimo cum successu, suspectas etiam, imo infectas ingressum esse domos, cujus & salutaris remedii ipse recordor in peste Gedanensi usurpati.

§. IV.

Mediæ cavitati solatium redundat ex corticum insigni, & in vulgus nota virtute cardiaca, καὶ ἐξ ὧν enim salutandi sunt cardiaci, quatenus vi sua balsamica, principia vitalia & ipsos spiritus, fibrasque cordis motrices roborare, sanguinis circulum conservare & restituere, atque iniasinata contagiosa diffilare solent. Sic *Excellentissimus Dn. Præses Dissertat. de medicament. select. §. 22.* inter præstantissima roborantia & confortantia refert cortices nostros.

Conf.

Conf. etiam ETTMULLERUS *Colleg. pharm. in Ludov. p. 394.* Et cortex leniter deralus vinoque infusus, ubi lipothymia ingruit, mirum dictu quantopere prodest, affirmante SIMON. PAULLI *Quadripart. Botan. p. 59.* In virium languore, præter eorum præparata interne adhibenda, externe carpis manuum, nec citra fructum, adplicantur, cui & assentit PANCIVS *Herbar. portatil. p. 22.* alique. Sic JUNGKEN *Chym. experimental. p. 448.* inter cordialia externa, quæ spiritibus reficiendis optime succurrunt, epithema aliquod cordiale maxime commendat, quod cortices Citri, uti pariter ejus flores ac folia, ingrediuntur. Merito huc etiam refertur præstans eorum vis bezoardica, qua, ex superius allato fundamento, conspicua sunt; hinc in morbis malignis, contagiosis, peste, &c. quam optime adhibentur, sic TIMÆUS A GULDENKLEE *L. 6. epist. medic. 10. ad filium transcripta p. 413.* in condiendis funeribus Balsamatori trochiscos de cortice Citri, præservationis ergo, commendat, & inter pulveres sparadapis, pro involvendo corpore, inspergendos, cortices Citri ad libram unam recipit. Idem facit SEBIZIUS *disput. de conditura cadaverum.* WEDELIUS *l. c. p. 320.* pariter in ordinem bezoardicorum cortices collocat. Et sane optimas compositiones bezoardicas, quavis etiam forma paratas, prolixitatis tamen evitandæ ergo hic omittendas, ingrediuntur, assentientibus omnibus Practicis, qua de virtutē tamen, ubi de toto Citro acturus sum, plura.

§. V.

Infimo ventri cortices nostri prospiciunt præprimis virtute sua stomachica, cum principio aromatico, ad calorem ventriculi conservandum ac restituendum, tonumque pariter ejusdem destructum erigendum, faciunt, & hinc in stomachicorum syllabis a Medicis non infimo collocantur loco vid. WEDELIUS *l. a. p. 156.* BORRICHIUS *l. c. p. 38.* qui in ventriculi debilitate a pituita nimia maxime commendat cortices Citri; sic cortices conditos convenire ventriculo, atque digestionem pariter ac appetitum promoveri, asserit SCHROEDERUS *Pharm. p. 935. edit. in fol.* assentit BEHRENS *l. a.* inquit saccharo conpersi aut conditi ventriculum roborant & flatu diffutunt. confer. etiam MATTHIOLUS *l. c.* In vomitu & nausea gravidarum LUDOVIC. MERCATUS *Tom. 3. L. 3. c. 11.* magnis extollit laudibus sequentem formulam. *Recipe Seminis Anisi, Corticis Citri aa. drachm. unam. Pulveris rosarum rubrarum, Coralliorum rubrorum, Margaritarum ppt. Electuarii de Gemm. ana Scrup. unum, Sacchari q. s. M. F. Tabellæ cum aqua ferrata.* Porro virtute carminativa & specifica anticolica pollent, ex tenui ac calida eorum substantia oriunda, qua intestinorum flatulentias dissipant, borborygmos sedant, ac pituitam viscidam poros intestinorum obstruentem, resolvunt; hinc in colica passionē, a flatibus maxime orta, multis nihil frequentiori in usu quam soli cortices pulverisati, quod asserit PANCIVS *l. c.* multique alii, præter experientiam quotidianam id comprobantem. Sic pariter virtute antihypochondriaca præditi sunt. Insigne enim hoc in malo solamen pollicentur, cum variis indicationibus satisfaciant, non aliunde etiam quam ex dicto principio calido, volatili, aromatico, resolvēte & deobstruente, hinc & in obstructionibus pancreatis & mesenterii referendis auxilium præstant. Vis antiscorbutica etiam ipsis non neganda est, quatenus virtute sua balsamica volatili, ad acrimoniam in scorbutico fixam, acidam, tartaream, temperandam, resolvendam ac e sede sua movendam, idonei sunt. Ne dicam vim etiam cortices hos obtinere diureticam, quæ non parum auxilii scorbuticis affert.

Frid. Hoffmanni Oper. Supplem. II.

ferre possit, quæ virtus tamen magis toti Citro inest, utpote ex quo major, isque insignis & præstantissimus fructus impetratur, de quo in sequentibus. Virtute tandem antifebrili non destitutos esse, ex allegatis sæpius agendi principiis constat, & experientia celeberrimorum Practicorum confirmatur. DOLÆUS *Encyclop. sua dogmat.* in febribus malignis frequenter adhibet laudatos cortices uti & eosdem inter vermes pellentia adsciscit *ibid. p. 581.* alii tamen in intermittentibus majori eos efferunt laude. Sic in quartanis etiam ex corticibus cum spiritu vini parata Essentia laudari solet, propinanda cum aqua Melissæ, Petroselinii, Pulegii &c. Virtus interim hæc efficaciori adhuc modo sese manifestabit in pulpa seu succo jam jam delibando.

§. VI.

Consideratis ergo corticum viribus, succi etiam censuram facere, instituti ratio postulat: hujus vero indolem porro brevibus attingere volumus. Scatet quippe acido, & quidem blando, non ingrato, volatili, testante etiam SCHROEDERO, DOLÆO, ETTMULLERO &c. Quod quidem ultimum, nisi aliunde, ex effectu palam fieret, vel exinde saltem conjiciendum, quoniam succus talis acidus expressus, in vitro, negligenter tamen a me clauso, asservatus; spatio aliquod hebdomadam, omnem fere amiserat aciditatem. Acidum vero hocce interim sat penetrans esse, vel hoc demonstrat, quod SIM. PAULLI *l. c. p. 59.* annotet: frustulo pulpæ acidæ aceto injecto illud magis acescere, & ad solvendas margaritas succum hunc adhiberi, ut, pariter tincturæ Coralliorum parandæ inservit. Vires autem, si priori ordine indagari debent, obiter annotasse sufficet, certo sine succum adhibitum, cephalico etiam usui inservire posse, inter epithemata scilicet, in capitis dolore a causa calida, usurpatum; item interne ad sanguinis motum p. n. inhibendum. Sic MESUES, annotante TABERNÆMONTANO syrupum acetositis Citri in vertigine commendat, atque ebrietati resistere affirmat, refrigerat enim & æstum mitigat. Porro externe est egregium abstergens & smeeticum, sexus foeminei delicatioribus maxime commendabile, sordes enim & mucorem, in poris cutis hærentem, absorbet & mundificat, hinc & commendatur in lentigine, serpigine, pustulisque faciei, (Sinnen) confirmante etiam PANCIVIO *l. c.* & SCHROEDERO *l. c.*

§. VII.

Cardiacam virtutem possidere succum, extra controversiam puto esse positum, quatenus nempe, ut bezoardicum generosum, malignitatem expellit, & ut refrigerans, æstum intempestivum coerces. Hinc SYDENHAM *de febrib. c. 4. p. 31.* inquit: cardiaca, quæ adhibeo passim, sunt ejusmodi, quorum moderatioribus utor in morbi initio, æstuatione maxime fervente. Illa vero fiunt ex aquis destillatis v. g. borraginis, citri, scordii vel admixtis syrupis mellisso-phyllii Fernelii, caryophyllorum & de succo Citri. In febribus sane malignis, acutis, continuis, ardentibus, imo contagiosis, & peste ipsa, maximam meretur laudem, cum enim bilis acrimoniam, in febribus hisce sæpe peccantem, temperat, tum etiam reficit partes flaccidas, & laxiores acore suo corroborat, tonum earum restituens, intolerabilem præterea restinguit sitim, & malignitatis focum expellit. Hinc etiam ut nobilissimum alexipharmacum in febribus illis venenosis, tam præservandi quam curandi fine, est usitatissimus, quo penetrantior & simul blandior, in regno vegetabili, non reperitur, ut nulla, in dictis febribus, adhiberi debeant me-

dicamenta, quæ non succus Citri ingrediatur. vid. ETTMULLERI *Colleg. pharm. in Schroed. p. 426. Sic Excell. Dn. D. STAHL Observ. Chymico-physico-Medic. Mens. Maj. 1698. de febris petechizante epidemica p. 593. inquit: In paroxysmo ordnete Julepos ex aquis diaphoreticis und Syrupo acetositis Citri. Porro p. 541. acetositatem Citri brauchte in etwas mehrerer dosi bey anxietatibus præcordiorum sonderlich zu rechter Zeit. Dn. D. VATER dissert. de venenis eorundemque Symptomat. p. 6. Thes. 8. in cura a morsu canis rabidi & viperarum, etiam inter alia succum Citri commendat.*

§. VIII.

Succum porro etiam ventriculo conducere, affirmare haud erubesco, dum scilicet, blando & volatili acido, viscositates residentes attenuat, dissolvit, acidumque interdum deficiens aliquo modo restituendo, appetitum excitat, anorexiæ & dyspepsiæ medetur. In malacia quoque gravidarum egregium est remedium. vid. ETTMULLERUS *l. c.* PANCIVIVS *l. a.* TABERNÆMONTANUS & MATTHIOLUS *l. c.* Huc referri etiam potest, quod nucis vomicæ improvidum usum infecuta incommoda (annotante Domino VATERO ex Sennerto de Venen. *l. 6.*) vomitum nempe biliosum, ardorem & angustiam præcordiorum, aliaque symptomata, optime sistat atque cohibeat. Conf. & BORRICHIVS *l. c. p. 69.* Virtus præterea insignis antiscorbutica reperitur in succo illo acido. Acrimoniam enim & acidum illud tartareum ac rancidum scorbuti, volatili suo & blando acido corrigit. Et affirmat ROSEUS in *epist. suis*, solo succo Citri scorbuticos etiam gravissime decumbentes esse curatos. Et certe in scorbutico, ex salium acriorum copia contracto, præsentissimum est remedium. Belgæ in Indiam orientalem navigationem facturi, ut a scorbutico, sub zona torrida fere endemico, illosque tantum non semper invadente, se præservent, malis Citriis sibi prospiciunt, & lagenas eorum succo plenas secum vehunt, pro scorbuti remedio, uno ore id testantibus BAUHINO *Lib. 1. Histor. plant. c. 28.* SCHROEDERO *edit. in fol. p. 935.* ETTMULLERO *Colleg. pharm. in Schroed. l. c.* BEHRENS *Select. diet. l. c.* VALENTINI *l. c.* SIMON PAULLI *l. c.* qui scorbuticorum artus, Limonio vel Citrio malo per medium dissecto, perfricandos adferit, idque remedium ceu euporiston & præsentissimum afferens levamen, eximie commendat.

§. IX.

Anthelminticus quoque Citri succus judicatur, nec sine ratione; utpote putredini, vermium fomento, admodum adversus est, & penetranti suo acido corpuscula vermium aggrediendo, enecat optime. Hoc assertum REDI *observationibus p. 119.* iustificatur, quæ testantur lumbricos a succo Citri, quo imbuerat, brevi periisse. Annotavit id quoque Excell. Dn. Præses *dissert. de Anthelmint. p. 19.* calculumque huic addit WEDELIVS *l. c. p. 365.* Diuretica pariter pollere virtute & hinc ad affectus nephriticos commendari a Practicis, non aliunde quam ex vi sua attenuandi & resolvendi, deduci posse existimaverim. Qua de causa vis ejus diuretica laudatur a BEHRENS *l. c.* ETTMULLERO *l. c.* Lithonripticum dici potest, quoniam eadem efficacia, incidendi scilicet, attenuandi, ac resolvendi, ad saburram & mucorem aliquem tartareum coagulatum comminandum & resolvendum, viribus instructus est. Uti vero Lithonriptica talia dari, quæ calculum perfectum & solidum frangere & actu conterere valeant, multi, gravissimis rationibus adducti, dubitant: ita nec succo nostro potentiam illam adscripserim, aut

cum quibusdam mihi eandem operationem intra corpus humanum, quam extra, in dissolvendis gemmis, unionibus, & coralliis, promisero. Nephriticum meliori jure ex adducta ratione dicendum, arenulas enim, si cum saccharo jejuno stomacho sumatur, promovet, testante BEHRENS *l. c.*

§. X.

In tantis virtutibus etiam conspicitur vis illius antaphrodisiaca. Ut refrigerans enim turgescientiam sanguinis & seminis suppressere, & ipsos spiritus acido suo figere valet; hinc, teste MERCURIALI *L. 4. de morb. mul. c. 5.* mirifice ad seminis copiam extinguendam confert. Conf. PANCIVIVS & SCHROEDERUS *l. c.* Pro extinguenda gonorrhœa primas tenet, ut milles expertus est, PANCIVIVS ibidem citante, AMATUS LUSITANUS *Cur. medic. Cent. 5. cur. 71.* Licebit etiam hic casta mente inseruisse, quod magnum afferat emolumentum, si congressu impuro mentulæ communicata sit materia quædam acris, corrosiva, putrida, quæ, intra glandem & præputium stagnans, inflammationem tunicæ glandem tegentis efficit, quâ continuata per totam urethram, suppurationem, ulcera, & sic gonorrhœam producit. Hoc facto igitur statim mentula mundificanda & abluenda est succo Citri, aqua simplici, aut etiam plantaginis, mixto & diluto, sic nimirum sale hoc blando volatili in acido Citri contento, sal illud corrosivum, quo materia talis putrida communicata, scatet, corrigitur, & inflammatio, cum omnibus diris sæpe subsequen- tibus symptomatibus præcavetur, quod Excell. Dn. D. TEICHMEYERUS, *Præceptor meus Venerandus, in Collegio nostro pathologico-practico*, vehementer commendavit. In corpulentia denique nimia, acida & inter illa speciatim succum Citri, commendat DOLÆUS *Encyclop. Chirurg. p. 474.* Vulnerarium ultimo esse, & doloribus etiam arthriticis mederi, ex LOHENSTEINIO *l. c.* commemorasse sufficiet, addendo brevibus & usui mechanico vel œconomico inservire, dum nempe maculas ab atramento, imo aliunde, in linteaminibus contractas, evanescere facit, & scripturam in charta delere potest.

§. XI.

Progredior jam ad semina, eorumque virtutes eruendas: cum vero in pluribus ferme cum ante dictis convenient, hic brevitati magis studebo. Sunt vero itidem, ut cortices, calida, amara, & aromatica, & hinc etiam interdum medicamenta cephalica ingredi possunt. Cardiaca audiunt, quatenus sunt bezoardica, diaphoretica & alexipharmaca, & sic ad malignitatem cordi molestant expellendam faciunt. Hinc in febribus malignis, imo petechialibus, variolis, morbillis egregii usus sunt, præprimis in emulsionibus, vid. ETTMULLERUS *l. c. p. 426.* In peste, ut efficax remedium deprædicat LEVIN. LEMNIUS *L. 4. de occult. nat. mirac. c. 17.* In sudoriferorum ordinem collocantur à WEDELIO *l. c. p. 346.* Semen etiam Citri Scorpionum ictibus & potum & adplicatum mirifice mederi, affirmant MATTHIOLUS & BEHRENS *l. c.* Ventriculo conferre non inepte statui potest, quatenus aromaticum est & contra gravidarum vomitus cum fructu adhibetur, teste SIMON. PAULLI *l. c.* Anthelmintica denique virtute non defraudanda sunt hæc semina, eò quod amaror vermibus maxime sit inimicus, hinc SENNERTUS in vermibus necandis multum ea commendat, item BEHRENS *l. c.* SIM. PAULLI *l. c.* uti pariter in pulveribus contra vermes adhibentur v. g. in illo CRATONIS *Consil. Medic. 13. Recipe Coriandri ppt. unc. sem. Seminum Portulacæ, Citri, Limoniorum ana drachm. duas. Zedoariæ drachm. 1. Cornu Cervi usti unc. 1.* Misce:

Misce : fiat Pulvis: dosis drachm. sem. Et hæc de feminibus dicta sunt.

§. XII.

Cum itaque partes singulæ Citrii mali fuerint explicatæ, ipsum pomum sub examinis jam incudem revocandum est. Et hic inficiari haud licet, emolumentum fere uberius impetrari posse ex toto, maxime propter stupendam ejus vim alexipharmacam; malum enim hocce instar compositi generosi est, quod partibus gaudet & juvantibus & corrigentibus sese mutuo. Capiti pro diversis indicationibus auxilium præbere vix negandum, sic in mania, melancholia & deliriis, ad spiritus irrequietos blando acido figendos & placandos, balsamica autem ac bezoardica vi corroborando prædesse possunt; & sane in philtis jam laudavit VIRGILIUS *Lib. 2. Georg. vers. 126.* & seq. canens :

*Media fert tristes succos, tardumque saporem
Felicis mali, quo non præsentius ullum.
(Pocula si quando sævæ infecere novercæ,
Miscueruntque herbas & non innoxia verba)
Auxilium venit, ac membris agit atra venena.*

Citria adversus atram bilem & morbis moestis opitulari afferit MATTHIOLUS *l. c.* Ventriculo & cordi salutaria esse ex prioribus patebit, quod etiam affirmat VALENTINI *l. c.* & Citrio quasi inesse generale confortativum cum ETTMULLERO *Colleg. pharm. in Ludov. p. 984.* audacter statuo. Ut hepatica & splenetica consideranda etiam, quatenus modo ut aromatica balsamica, modo ut refrigerantia & aperientia, pro diverso utendi modo, usui veniunt. Sic hanc in classem referuntur a WEDELIO *l. c. p. 167.* & 179.

§. XIII.

Citrium porro totum, in usum assumptum, bezoardicum est præstantissimum & lapidi Bezoar multis parasangis præcurrens. Præterquam enim quod lapis Bezoar rarissime sit genuinus, (assentiente MARNARDO in *Tr. de Bezoar & Scorzon.*) unde alia quam absorbendi potentia ex eo sit arcessenda, penetrare non valeo, cum sit saporis omnis pariter ac odoris, in quibus, tamen vis medica potissimum querenda, expers. Alexipharmacum denique proprie ita dicti titulo pomum Citrium fulget, & quidem tanto jure, ut ex vasto materiæ medicæ penu generosius, præstantius & efficacius depromi posse omnino dubitem; omne enim hic desiderium implet, & non sine ratione ab ETTMULLERO in *Colleg. pharm. Schroed. p. 426.* omnibus Theriacis, Michridatiis, & confectio-nibus magistralibus quoad usum antiloimicum & alexipharmacum præfertur. Viennæ & Basileæ quam ingentem & exoptatum præstiterint mala Citria usum, historiæ commemorant & VALENTINI *Mus. Mus. l. c.* notat. Sic in peste laudantur a JOH. DAN. MYLIO in *Basil. chym. L. 6.* AUGENIO *L. 3. de Pest. c. 9.* FIGINO in *Epidem. c. 6.* CRATONE *L. de Pest. POPPEO in enchirid. experim.* Conf. præterea UNZERI *antidotar. pestilent. L. 2. p. 1895.* ut taceam Celeberimorum Medicorum coævorum, hac de virtute antiloimica, elogia. Et sane cujuslibet veneni malum Citrium est alexipharmacum. Ad illustrandam vero mirificam & incredibilem fere efficaciam alexiteriam, non possum non adducere historiam ex ATHENÆO *Deipnosophist. Lib. 3.* Princeps nimirum quidam Ægyptius, maleficos quosdam nebulones, aspidibus, secundum leges Ægyptiacas, in prædam exponendos, damnaverat : in itinere vero, ad bestiarum pabulum illos ducente, caupona quædam mulier

eorum vicem dolens, cuivis malum Citrium dederat; in theatrum ergo lethiferum deducti nebulones, ab ictibus immanium ferarum nihil quicquam sentire, qua de re Princeps valde miratus, post inquisitionem de citriis comestis certior factus est. Postero igitur die, uni vicissim Citrium dare, alteri denegare jussit, quo facto is, qui pomum comederat, immunis mansit, alter vero ab aspide ictus, undique lividus factus miserrime interiit. Pariter THEOPOMPUS CHIUS duodequadragesima sua historia narrat Clearchum Heracleotam Ponti Tyrannum multos veneno necasse, sed ille, inquit, adhuc plures interfecisset, si populum præstantissimæ vis Citriorum latuisset. vid. MATTHIOLUS *l. c.* BEHRENS *l. c.* qui hujus historiæ veritatem etiam sequenti affirmat : quod scilicet Studiosus quidam Medicinæ, Parisiis morfu viperæ lethaliter tactus, frustra adhibitis omnibus aliis medicamentis, pomo Citrio, quod a Nobili quodam eidem porrectum erat, vix odoratu, ne dum gustu & acido succo delibato, brevi iterum ex voto convaluerit. En igitur stupendam & ineffabilem virtutis prophylacticæ efficaciam, qua Citrium nostrum præ aliis gloriatur! Non itaque supervacuo conatu virium prolixius necere filum, sed colophonem huic capiti imponere placet.

CAPUT IV.

Varia ex Citriis parata, cum usu therapeutico, proponens.

§. I.

ANte egressum tandem, quænam ars pharmaceutica nobis ex malis Citriis suppeditare queat medicamenta, explorandum restat; & ut naturali ordine procedatur ulterius, primo cortices examinandi erunt. Horum vero flavedo oleum delicatissimum pariter ac efficacissimum nobis offert, quod hodie plerumque nomen Cedro sibi arrogavit ex Italo idiomate. *Quinta Essenza di Cedro* autem interdum Italici stricte dicitur oleum ex floribus Citri paratum, quanquam VALENTINI *l. c.* etiam hoc ex corticibus paratum illis *Essenza* appellari putet. In officinis nostris dicitur oleum Citri verum, & datur duplex, unum ex flavedine cum aqua destillatum, quod est fragrantissimum, & cujus nota characteristica est albedo aquam limpidam æmulans. Tale ex corticibus recentibus pomorum numero 100, absque maceratione vel fermentatione, statim destillatis, spatio quatuor vel quinque horarum, ab aqua separandum, impetrari affirmat SCHROEDERUS *l. c.* & quidem ex pomorum mediocris magnitudinis, indicata multitudine, 10 ad 12 drachmas. Alterum commune quod ex corruptioni proximis malis citriis paratur, vilius, minusque priori fragrans est, atque magis ad usum externum quam internum commendabile. E corticibus siccis & aridis, quales in officinis venum prostant, etiam quidem per destillationem cum aqua acquiri potest oleum, sed parum. Ipse enim experimento facto ex libris duabus corticum paucam olei quantitatem impetrabam, quod plane æmulabatur illud descriptum, ex putridis malis elicatum. Viridem enim præ se ferebat colorem, odorem vero spirabat non ingratum quidem illum & Citriis satis similem, sed tamen longe a fragrantia & penetranti gratia illius destitutum, quod vulgo de Cedro dicimus. Sapor etiam non adeo acris & igneus erat, ut illius, quod ex recenti

flavedine fieri indicavimus: aqua tamen satis fragrans deprehendebatur. Exprimi denique, secundum VALENTINUM, oleum potest ex flavedine, quod vero asservari nequit & minus usitatum est. Prodest autem quam maxime oleum Citri verum in ventriculi debilitate, interno & externo usu, calefacit enim maxime & flatus discutit; in anxietatibus præcordiorum laudante WEDELIO *Pharm. acroamat. p. 370.* multum conducit; in colica vero specificum est præstantissimum, nec satis laudandum & experientia sæpissime confirmatum. In febribus omnibus malignis notissimæ & comprobatae ejus virtuti non opus est suspensa hederæ. Plurimis porro medicamentis tam corrigendi, quam juvandi, maximamque gratiam conciliandi sine additur. Omnes autem Practicorum formulas & compositiones, quas ingreditur, recensere, res magis integri voluminis quam aliquot plagularum est, cum ubique fere desideretur & ametur. In potu interim Théæ quantum non palato solum sed & sanitati vi sua balsamica & fragranti conducit, quemlibet experiri volentem exoptatissimus fructus convincet. Pulveribus sternutatoriis additum, desideratissimam & gratiam & utilitatem conciliare certissimum est. Ab ETTMULLERO, annotante WEDELIO *differt. de camphora*, laudatur Medici cujusdam Veronensis Henisii felicitas, qui oleis Citri & succini cum camphora mixtis tantas res perfecit, ut ipsi columna triumphalis erecta fuerit. Et hujus genii etiam est oleum bezoardicum, cujus non infimum ingrediens constituit laudatum oleum Citri verum, ex quo scilicet, & camphoræ q. s. in illo dissoluta. *Excell. Dn. Præses* illud parare consuevit. WEDELIO vero ex camphoræ drachma una in oleo amygdalarum dulcium cum radice alkanna tincto, & olei Citri veri drachma semis addita, id parare placet. Utroque modo se ut remedium insigne bezoardicum cordiale, balsamicum, in febribus malignis, aliisque morbis commendat, defendit ab inflammatione, imo stomachicum & uterinum est ad guttas duas, tres, vel quatuor propinandum. Jenæ sub titulo Doctor Wedels *leste 3. Tropffen* adeo inclauit, ut plerumque agonizantes etiam, ad hoc, quasi ad ultimum refugium, & sacram anchoram confugere soleant. Ex hoc tandem oleo bezoardico, oleo ligni guajaci, & caryophyllorum paratum oleum odontalgicum in dolore & carie dentium egregii usus commendat *Dn. D. TEICHMEYERUS in Collegio Chymico*. Paratur etiam Balsamus ex oleo Citri & nuce moschata, qui & capiti, & nervis amicissimus erit.

§. II.

Ex oleo tandem nostro Citri, saccharo & aqua rosarum MYNSICHTUS suum parat elæolaccharum, alias vero ex solo tantum cum saccharo mixto oleo paratur, quod *Excellentissimus Dn. D. a BERGEN Professor Francofurtensis ad Viadrum dignissimus, Patronus atque Præceptor meus, omni honoris ac obsequii cultu suspiciendus* in cardialgia specificè commendare solebat; sic pulveri digestivo ordinario, qui S. R. M. Uladislao IV. in usu fuit, addit *Dn. D. CNOEFELIUS* saccharum Citratum, it. Essentiam Citri extractam; compositionem vide in *Appendice ad ann. VI. Ephemer. Germ. N.C.* Saccharum vero Citratum, nihil aliud est, quam dictum elæosaccharum. Et hunc sub censum trahenda etiam est Essentia Citri sicca *Hoffmanno Clav. Schroed.* ita dicta, quæ conficitur ex Corticibus Citri recentibus mediante sacchari albissimi aspersione, quod abraditur vicissim inverso cultello in orbem stanneum, usque dum saccharum succi ad instar ap-

pareat, hoc repetitur tam diu, usque dum saccharum consistentiam acquirat siccam. Non displicebit hic ob convenientiam cum prioribus, inseruisse medicamentum aliquod elegantissimum, sub Essentiæ Citri trochiscatæ nomine ab Amico quodam Medico communicatum. Ita autem parandum est: Recipe pomorum Citri recentium, a sorditie superficiali bene mundatorum no. 2. affricetur ipsorum flavedini frustum sacchari Canariensis indeterminatæ molis, abradatur semper quantum sacchari oleo appareat inundatum, & de novo affricione ulteriori continuatur. Sacchari hæ miculæ oleositate saturatæ, & collectæ cum una adhuc sacchari Canariensis parte, (vel minus potius) probe in mortario lapideo terantur, quibus in pollinem conversis, pro massa exin paranda, addatur s. q. ipsius pomorum succi. Ex massa hac quam optime subacta, trochisci, stellæ, si placet, caractere insigniendi, formantur, magnitudinis arbitrariæ, modo, ne gratia medicamenti cum puritate simul externa periclitetur, omnia circumspecte, & lotis suscipiantur manibus. Vires illius medicamenti analeptici eadem sunt cum illis, quas fructus, unde conficitur, possidet, nisi quod ars principia illa duo essentialia inter se diversa, acidum nempe & oleosum hoc pacto uniendo, præcellere videatur ipsam naturam, unde una quasi fidelia duobus succurrit dealbandis parietibus. Quippe acido blando, sacchari dulcedine involuto, temperatur æstus præternaturalis humorum, attenuatur pituita particulis æthereæ naturæ oleosis, & tonus partium labefactatus corroboratur. Delicatus vix bibitur Théæ infusum ac trochiscorum horum nonnullis in illo solutis, & æmulatur tunc acidulas præstantissimas. Vino dulciori si remisceantur, qui illud bibunt mirantur ejus suavissimum odorem ac saporem. Cæterum cum totius pomi conveniunt viribus.

§. III.

Cortices porro 1. suppeditant Essentiam Citri, infusi scilicet in spiritu vini rectificato, digerendo eandem producant. Essentia hæc ut stomachicum, & carminativum, in variis affectibus usurpari potest cum fructu. WEDELIUS eandem medicamenti nervinis addit; 2. Spiritum, qui parari potest per fermentationem, recipiendo corticum q. v. ab albo separatorum: his concisis addatur sacchari s. q. in aqua tepida soluti & pauxillum sæcum cerevisiæ: in vase clauso per 7. dies digerantur, & tum ex arena destillantur, sic prodit spiritus elegantissimus, qui aliquot guttulis datus in convenienti vehiculo vires deficientes egregie restaurat, variæque indicationi pro Medici judicio respondet. Elegantissimum Spiritum & Essentiam Citri vide in MOELLENBROCCI *Tract. de Varis*. Simili ratione etiam paratur Spiritus bezoardicus ex Corticibus Citri libr. 3. Floribus Sambuci Man. 12. & Spiritus Vini non rectificati Menf. 14. vel 16. per destillationem: egregie inservit extractioni Tincturæ bezoardicæ 3. aquam per destillationem factam, quæ secundum SCHROEDERUM l. c. est carminativa & anthelmintica; non minus etiam stomachica, 4. acetum, per infusionem scilicet paratum, quo utitur ETTMULLERUS l. c. in morbis epidemicis, acutioribus, malignis. 5. Syrupum, potissimum medicamenti bezoardicis ad gratiam addendum; ingreditur Electuaria purgantia, aliaque. PANCIVIUS l. c. eundem laudat ut cephalicum, stomachicum & cordiale, orisque halitum corrigere & palpitationi cordis item melancholiæ mederi statuit. Meminisse hic etiam juvat ex flavedine corticum Citri recentium cum nucleis melonum contusis parari Italorum *Orsato*, quod non minus proficuum quam

quam delicatum est, & in febribus malignis, variolis, morbillis, variisque morbis concedi potest. Ita pariter cortices citri recentes una cum cinnamomo constituunt gratissimam aquam illam Tappianam, *Tappen-Wasser* / id vero præterquam quod palato satis arrideat, etiam ventriculum roborat, digestionem promovet, & analepticum atque cardiacum est egregium. 6. Conditum, quod BEHRENS *l. c.* ut præservativum ab aëre nocivo & rore matutino, commendat. 7. Etiam ex corticibus calcinatis per elixivationem sal parari potest, quod tamen vix alibi, quam apud SCHROEDERI *Pharmac.* invenies.

§. IV.

Ex ipso vero succo & pulpa, paratur cum saccharo quasi conserva quædam, quæ ex Italia allata, nomine *Agre di Cedro*, salutatur, cujus usus in æstu febrili, alibique non inconveniens est. Porro syrupus acetositatis Citri, tam in potionibus & julepis, quam etiam electuariis, aliisve formulis, pro debito fine, usurpandus. Electuarium etiam egregium, una tamen cum flavedine, constituit sequenti modo: Recipe Pulpæ pomorum Borsdorffianorum libras 3. Pulpæ pomorum Citri, Succi Citri ana libr. I. flavedinis corticum Citri minutim incis. unc. 4. Sacchari albi libr. 4. coque blando igne in vase terreo vitreato ad electuarii consistentiam. vid. ETTMULLERI *Colleg. Pharmac. in Ludov. p. 984.* in nostris vero officinis absque pulpa pomorum Borsdorffianorum parari consuevit. Confortativum est præstantissimum. Tandem habetur ipse succus expressus & ad usum aservatus, qui à quibusdam *Citron-Wein* appellatur, præsertim si cum saccharo fermentatus sit; adportatur talis etiam, ex parvis & immaturis confectus Citri pomis, ex Italia. Turcis ex succo parere potum aliquem solenne est, qui illis dicitur *Sorbec*, & ex saccharo pariter & acido succo consistit. vid. VALENTINI *Mus. l. c.* Inservit itidem succus laudatus conficiendæ tincturæ coralliorum sic dictæ, nec non in usu est frequenti serum lactis caprini cum solo succo Citri paratum, & idcirco dictum serum lactis caprini Citratum, quod commendatur in febribus ardentibus, nisi adsint usum ejus dissuadentia symptomata, in scorbuto illi adhuc adjungi possunt succi antiscorbutici v. g. ex fumaria, cochlearia &c. Et ultimo succus Citri cum camphora & addito vino albo, egregium, & sexui amabili se quam optime commendans constituit cosinecticum.

§. V.

Succedunt autem semina eorumque præparata examinanda: Ex illis I. mediante expressione elici potest oleum, id licet non sit officinale, adeoque nec in frequenti usu, tamen virtute sua specifica anthelmintica sese commendat, & majori cura advertendum esset. Ut vehementissimum antidotum adversus pestem aliaque venena oleum ex seminibus extractum laudat JOH. BAPTIST. PORTA *Mag. natural. L. 8. c. 9. & L. 10. c. 5.* 2. inter emulsiones frequentius usurpantur semina, in febribus ardentibus hujusque generis morbis aliis. 3. pulveres ingrediuntur contra vermes quod etiam commendat SENNERTUS in *Prax.* nec non decocta & aquas alexipharmacas;

recipiuntur pariter in pulverem contra variolas & morbillos vid. *Dispens. Brandenb. p. 144.* 4. Mucilago etiam ex semine sed paulo difficilius impetrari potest, quæ ut mucilagines v. g. seminis cydoniorum, plantaginis &c. usui Medico suum contribuere posset. Ingreditur, quod obiter adhuc notandum, ut præstans bezoardicum & antiloimicum, semen Citri Theriacam Andromachi, in *Dispensatorio Brandenburgico* optime & cum ratione farragini illi ingredientium insertum, in aliis vero descriptionibus Theriacæ negligenter ab Autoribus omissum.

§. VI.

Sed videamus adhuc paucis, qualia ex toto Citro simul sumto prostant præparata. I. igitur se offert pomum totum conditum, quod maxime nondum perfecte maturum, cortice & carne incisis, nucleisque exemptis, condiri solet, cujus usus ex antecedentibus sat patet. 2. Syrupus ex toto Citro, qui alias bezoardicus Prævotii dictus fuit, cum vero, ob ingredientes radices, saporem ingratum habuerit, suaviorem Autores Dispensatorii Brandenb. conscribere, qui videre est ibid. *p. 196.* 3. Electuarium de Citro, cum quo incidit Theriaca de Citro sive Theriaca Citrata, *l. c. p. 206.* descripta. 4. Aqua ex pomis Citri, videatur apud SENNERTUM *L. 5. part. 3. Sect. c. 5.* it. in FEHRII *Traçtatu de Scorzonera c. 7.* quam, cum non inelegans sit, hic subnectere placet. Rec. Pomorum Citri recentium no. II. incidantur cum cortice in taleolos tenues, addantur Sacchari albissimi unc. III. radices Scorzonæræ mundificatæ drachm. II. aquæ fontanæ libr. VII. coquatur ad tertias, coletur.

§. VII.

Ultimo loco memorandum est, quod ex Citro gratissimi saporis decoctum laxativum, in calore nimio valde proficuum, præparari possit, si nempe tamarindorum uncia una, cum mannæ duabus, pomo citrio in taleolos discisso, exemptis prius corticibus, in aquæ mensuris duabus coquantur & colentur. Redditur inde potio, propter blandam aciditatem, palato gratissima, quæ in febribus biliosis, ad bilem nimis acrem fervidam præcipitandam & educendam, non sine insigni fructu adhibetur. Perquam etiam nota & usitata est præparatio illa ptisanæ, quæ ex solo hordeo, rasura cornu cervi, pomo citri, addito pro edulcoratione saccharo, parari solet, inque febribus ad extinguendum calorem nimium, sitimque sedandam convenientissimum remedium est. In fine adhuc occurrit potus ille delicatus, refrigerans & æstate a solis calore languentibus amoenissimus *Limonade* dictus, qui ex succo Citri, aqua simplici, vino & saccharo, addita ipsa corticum flavedine paratur; usus ejus est, ut gulæ, ita & sanitati acceptus, abusus vero perquam noxius. De omnibus ante dictis præparatis usum pharmaceuticum, qui est idem cum sæpe commemoratis repetere nolui, cum crambem toties coctam apponere palato minus arrideat. Sed, cum sat præta bibere, claudere jam rivos, Dissertationisque meæ filum abrumpere placet.



D I S S E R T A T I O

D E

N O X I S

E X

R E M E D I I S D O M E S T I C I S
I N C O N G R U E A P P L I C A T I S.*Primum edita anno 1729.*

P R Æ F A T I O.



EDICINAM incrementum suum maxima ex parte experimentis vulgaribus debere, nemo facile in dubium vocabit, qui historiae ipsius non sit ignarus. Neque ex simplici hac origine ars salutaris ignominiam quandam patitur, cum potius inde elucescat, statim ab initio illam securissimo fundamento, experientiae scilicet fuisse superstructam, cui ratio dein eo facilius inniti possit. Affirmat hoc antiquus & solertissimus medicinae nostrae Parens HIPPOCRATES in *libr. de Prædict.* ubi, *ne pigeat, inquit, a plebejis sciscitari, si quid ad curationem utile.* Ejusdemque sententiae fuisse GALENUM, ex *libro de simplicium facultatibus* patet. Ipse enim plebejos & imperitos, piscatores aliosque infimae fortis homines consulere non erubuit. Confirmat hoc quoque WOLFFG. GABELCHOVERUS *Obs. Med. Cent. VI. Curat. 21. in Schol. p. 63.* scribens: *anuum remedia non temere contemnenda sunt, veluti ab anu aliqua, aut agyrta, aut vespillone quodam, reperta; nam subinde ab istis hominibus quaedam inveniuntur, quae dein a medicis in artis operibus versantibus probantur propter utilitatem, quam ex eorum usu consequi experiuntur.* Equidem laudabilis haec methodus, ex simplici experientia edoceri, superiori aetate non exiguum jacturam pati potuisset; cum orbis Medicus jactantia PARACELSI seductus, laboriosa tantum praeparata chymica & arcana affectaret, simplicia vero & multum experta Galenica ad nauseam usque sperneret, aut Neotericorum quorundam more, exotica, pretiosa & curiosa quaereret, obliviscens rerum, quae domi quotidie agebantur. Nascebatur inde ingens medicamentorum farrago merae ignorantiae filia. Verum cum nostris temporibus solertia tot eruditorum virorum matricem hanc confusionis practicae destrueret, rudimenta illa venusta veri augmenti medicinae erueret & quo pacto haec recte in artis incrementum applicanda, solide monstraret, de novo ars nostra vigere incipiebat & praestantissimum usum ex simplicissimis etiam remediis debite exhibitis experiebatur. Optandum quidem, ut methodus haec curandi per simplicia & domestica, inter Medicos rationales & prudentiores tantum vigeret, sed experientia docet, quod indifferenter ab omnibus fere, ignaris, audacibus, temerariis etiam, quotidie adhibeatur, quare non potest non aliter fieri, quam ut abusus & damnum fere praeponderet usum exoptatissimum, cum nullum in natura detur remedium certo morbo dicatum, quod juvet & quod etiam non noceat, si perverse & indiscretim adhibeatur. Et cum artis nostrae salutaris certe non infimum sit momentum, abusum medicamentorum probe scire, quod etiam HIPPOCRATES affirmat in *libr. de arte* §. 7. dicens: *Quae profuerunt ob rectum usum profuerunt, quae vero nocuerunt, ob id; quod non recte usurpata sunt, nocuerunt; nam non minus ea, quae damno sunt, quam ea, quae opem ferunt, testantur,*

quod

quod ars sit medicina; non incongruum duco, nocumenta quædam circa remedia hæc simplicia, tanquam documenta producere, & loco Dissertationis inauguralis Observationes quasdam de noxis ex remediis domesticis incongrue applicatis tradere. Quod cœptum, ut in emolumentum proximi cedat, divinam clementiam humillimis precibus rogo.

§. I.

ANtequam ad ipsas observationes progrediar, necessarium omnino duco exponere, quid per remedia domestica intellectum volo. Hæc sunt mihi præsidia domi usualia, simplicia, suavis communita, facile parabilia, a plebeiis plurimum commendata, quibus medentes, aut experientia sufficienti edocti, aut figmentis, credulitate, superstitione, aut traditione anili seducti, morbos sine Medico tollere tentant.

§. II.

Quod primum concernit, ubi ab experientia rationali edocti medentes subsidia hæc, in præservationem, aut curationem morborum, qui corpus humanum affligunt, adhibent, minime hîc erit sermo, ne actum agere videar, cum materia hæc hinc inde sufficienti eruditione agitata a celeberrimis viris, inter quos primum pono *Magnificum Dnum Præsidentem in Diss. de præstantia remediorum domesticorum*. Huic adjungo catalogum hanc materiam tractantium autorum, qui legi potest in *Excellent. Dn. ALBERTI Diss. de cura per domestica*, ubi §. 6. recensentur illi, qui ex instituto de hac scripsere & qui aliqualem mentionem de usu ex remediis domesticis provenienti adjecerunt. His adhuc addo *D. CARLS Medicinam & Apothecam pauperum*. Quæ singula scripta sufficienter probare possunt, quod usus horum remediorum nunquam spernendus sit.

§. III.

Alterum vero, quod spectat, ubi medenti traditio vel superstitio imponit, disquisitioni brevi subjiciam & imprimis noxam, quæ ex horum remediorum incongrua adhibitione provenit, quæque consistit in deterioratione morborum, ubi ex levi sæpius morbo gravis satis, pertinax & periculi plenus evadit affectus, & huic simplici & sæpe facilis curationis morbo præter spem associantur tanta symptomata, quæ damnum evidens, imo interdum mortem ipsam, corpori ægrotanti inferunt.

§. IV.

Causæ primariæ hujus noxæ in corpus humanum redundantis sunt ipsi medentes, qui incongrua, fugaci, audaci & superstitiosa applicatione, imperita & indiscreta consultatione, inepta & temeraria dehortatione, ægrotum ex morbi præsentis scylla, in symptomatum charybdim injiciunt. Confer. *Diss. Magn. Dn. Præsidis de Medicis morborum causa*. Quo major itaque Medentum imperitorum copia, eo numerosiores etiam erunt noxam inferendi causæ. Datur autem innumera cohors juvantium; ex omnibus enim vitæ stationibus, etiam desperatissimi quique, quorum profligatissima est vita, in campos medicinæ insiliunt, &

*Fingunt se Medicos, quivis idiota, sacerdos,
Judæus, pastor, histrio, rasor, anus,
Miles, mercator, cerdo, nutrix & arator,
Rastricolæ, molitor, pistor, agaso, faber.
Ambubajarum collegia, lamia, sartor,
Sutor, decoctor, pharmacopola, magus &c.*

Et hac de causa etiam dantur innumeri & quotidiani errores & noxæ.

§. V.

Veritatem & certitudinem hujus asserti, prohi dolor! confirmat quotidiana observatio, quæ de damnis vulgi testatur. De hoc enim pauci ægrotantium Medicum rationalem adire solent, priusquam consultationibus domesticis morbum auferre tentaverint. Et ego non morbum credo, contra quem numerosa hæc cohors nesciat remedium, quod audacissime & interdum fat infelicitè adhibendum suadet.

§. VI.

Ad specialius hocce probandum suffecerit observationes quasdam nunc tradere, quas mihi intra tempus, quo artem Hippocraticam colui, observare licuit, aut quas hinc inde observatas deprehendi, quæ testatam facient evidentem noxam ex remediorum horum innocentium sæpe inepta & præcipiti adhibitione provenientem.

§. VII.

Initium faciam a febribus, communissimum generis humani morborum genus, quod quo sæpius corpora affligit, eo sæpius quoque medicationibus domesticis obnoxium fit, & quamvis per se rarius patienti exitiale sit, (exceptis febribus malignis,) tamen ineptis his consultationibus & incongruis curationibus quotidie fere ita turbatur, ut multis mortem, aut saltem rudimenta hujus inferat.

§. VIII.

Comprobatur hoc dictum curâ domesticâ generali omnium febrium acutarum, dum, tanquam ex consuetudine, ineunte affectu sudorifera & calidiora, interdum fat potentia, ægrotanti propinantur, cui simul regimen ad sudorem commendatur, dum hypocaustum æstuat, æger lectis & stragulis obruitur, ut sæpius vix respirare possit. Uni obtruditur cibus, alteri denegatur potus; aut incongruus, uti est nimis calidus potus Théë, Coffée substituitur; nunc loco analepticorum dantur potus spirituosi, vina; nunc ad æstum moderandum incongrua refrigerantia. In his turbantur salutare admodum eventus, crises nempe, in aliis curantur infelici successu symptomata. Proveniunt ex hac incongrua medicatione totius morbi exacerbationes, intolerabiles æstus, inquietudines continuæ, jactationes irrequietæ, anxietates summæ, infarctus & inflammationes viscerum insolitæ, abalienationes & delirationes mentis, virium maxima prostratio, crismus salutariumurbationes harumque in locum irrepit febris lenta vel hectica, patientem non raro morti tradens.

§. IX.

Testantur hæc duo sequentia exempla, quæ hic observata allegare libet. Primum est juvenis 20. annorum, qui post consuetas hactenus computationes & prægressam mentis quandam alterationem satis sensibilem, subibat horrorem, ut lectum petere oporteret. Advolabat sapiens Senatulus mulierum & unanimiter vulgare illud ignorantiaæ asylum (*das Weibethum*) accusabant, hinc more solenni super sellam traher

trahatur, quo facto prudentior ex medicastrulis commendabat vinum calefactum & aromatizatum (Glühwein) copiose ingurgitandum simulque urgebat conatum ad sudorem, quem insuper accelerare debebat hypocaustum calens & accumulatio lectorum. Pateriens ad nutum obediens restitutionem predictam crastinam anxie sperabat, sed frustra; caput enim suffurris, tonis & choris replebatur, oculi mire dolabant & nifer ante hos muscas volare putabat, mensque abalienari incipiebat; Interea sudor frustraneo conatu urgebatur, medicamentum sudoriferum de novo assuiri concludebatur, cum tamen ne maior quidem appareret; accrescebant dolores & confusiones capitis inde mirum in modum, aestus erat intolerabilis, anxietates pectoris summæ, quæ ad tertium usque diem augebantur; in hoc erumpebat hæmorrhagia narium, quæ omnino ægro levamen attulisset, nisi pessime iterum consultum fuisset, critica hanc profusionem sistere, cum fomes ignarii (der Zunder aus dem Feuerzeug) aceto imbutus narium intruderetur & sic hæmorrhagia sisteretur. Horis 6. post æger de ardore faucium querebatur, quibus inspectis hæc & lingua valde tumefacta reperiabantur & n alium jam adeo incrementum sumserat, ut pateriens vix deglutire posset. Re sic periculi plena, cura Medico tradebatur, qui circumspicienti methodo ægrum a morbo hoc liberabat.

§. X.

Alterum exemplum constituit femina 28. annorum, sensibilibus conditionis, quæ dum motus quosdam febriles sentiret, jussu mulierculæ agnatæ, mixturam ex spiritu vini & calamo aromatico, non parca in quantitate assumebat per dies duos repetitis vicibus; sudor inde speratus non apparebat, in hujus autem locum prodibant summæ anxietates præcordiales, aestus ardens & continuæ inquietudines, & quod primam medicationem insciis postulare videbatur, erant dolores & puncturæ dorsales, quæ mirum in modum ægram vexabant. Ex consilio mariti totum dorsum butyro insulso inungebatur, unde dolores aliquantulum remittebant, die vero undecimo pateriens materiam purulentam ejiciebat, & in febrem lentam, imo hecticam incidebat, quæ adhuc hodie mortis pabulum ab illa vocatur. Annectere hic libet observationem HAGENDORNI, de mixtura quadam antifebrili vulgo consueta, ex spiritu vini cum cineribus, pipere, zingibere, sale culinari &c. composita, quam in accessione febrium dare mos erat, sed impari sæpe fortuna, quod duobus exemplis confirmat, ubi mixtura hæc lethali cum eventu exhibita fuit; vid. ejus *Histor. Med. Phys. Cent. II. Hist. 51.*

§. XI.

Errorem quoque in patria jam notatum non possum præterire, qui sapissime obvenit, quando a medicastrulis incongrue his in febribus vinum Hungaricum loco analeptici propinatur, unde supra recensita symptomata & morbiurbationes provenire non semel observavi.

§. XII.

Quos in præcedentibus de febribus acutis simplicioribus notavi errores & inde evenientes noxas, hæc pari modo in febribus acutis exanthematicis observantur, imprimis quoad exhibitionem calidiorum remedium & regimen æstuans, causamque non levem in hunc errorem pono, cur affectus hi sapius tam finistri sint eventus: & qui temperatissime tractari volunt, æstuantibus sudoriferis ita male inveniuntur, ut inopinato mortem ægro inferant.

§. XIII.

Hoc fatum experiebatur hujus urbis vegetus incolæ, qui febre hæcenus grassante petechiali correptus, antidotum suum domesticum, quod ex camphoræ (quæ alias cum s. q. nitri aliisque diluentibus data, egregium habet usum) larga portione & lapidibus cancrorum constabat, per tres dies repetitis vicibus assumebat, die quarto experiebatur immania deliria, quæ morbi periculum annunciabant, quod etiam die sexto appropinquabat, ubi accedente inflammatione faucium & supervenientibus aphthis æger vix deglutire poterat; septimo die apparebat purpura alba & medicum hunc sui ipsius incongruum morti tradebat.

§. XIV.

Certum quidem est, hacce in febre multum emolumenti ferre alvum laxiorem, tam ratione præservationis, quam ratione curæ & mitigationis symptomatum, aut ubi pro hoc scopo purgantia fortiora propinantur, præter debilitatem corporis, quam inferunt, maximam quoqueurbationem totius morbi pariunt, ut inde lethales non raro eventus proveniant. Quale quid observavi in viro sensibilibus & vegetioris alias naturæ, qui febre petechiali correptus, assumebat pulverem ex radice Jalapæ & foliis fennæ largiori in dosi, inde patiebatur plus quam 40. sedes, quæ ipsum adeo enervabant, ut propter summam debilitatem petechiæ retrocederent, ita ut vitam cum morte mutare cogeretur. Simile quid observaverunt *Annal. Vratisl. 1726. April. Claf. IV. p. 499.* in rustico optimæ ætatis viro, qui febre hac grassante & illum invadente a balneatore pilulas acceperat, quibus assumtis secuti sunt enormes vomitus & incompefcibilis diarrhœa, tam diu durans, usque dum e vivis excederet.

§. XV.

In variolarum morbo eadem noxæ ex calidis remediis exhibitis progenitæ annotandæ veniunt. Pecatur enim hic quotidie a vulgo tam quoad regimen, quam quoad ipsam curam. Quoad regimen censenda veniunt conclavia æstuantia, nimia lectorum accumulatio &c. quoad curam vero consueta sudorifera & remedia calidiora, inter quæ unum nominare libet, quod exhibitionis hic loci vulgarioris est. Est hoc sterus ovillum, quod patientibus offertur, vel solum siccatum in pulvere, vel cum spiritu vini mixtum, a quo tandem sudor expectatur. Duabus vicibus inde notavi enormes aestus, anxietates maximas, inquietudines & debilitationes summæ, quæ aut pustularum eruptionem impediabant, aut tamen harum maturationem. In aliis quoque observavi majori in copia protrusa fuisse exanthemata, quæ singula morbum periculosiorem, diuturniorem & graviorem reddebant.

§. XVI.

Solennior tamen noxa infertur a vulgo remediis domesticis in curatione symptomatum, quæ non raro variolis superveniunt. Imprimis quotidie fere pecatur in præservandis cicatricibus. Ex oleosis, unguinosis & butyraceis, observavi in puero octo annorum post retrocessionem exanthematum epilepsiam; in alio catarrhum suffocativum, post illinitas in facie pustulas cum butyro insulso, addo observationem, quam *Annal. Vratisl. Ann. 1721. Mart. Claf. IV. p. 320.* habent, ubi parentes puero variolis confluentibus laboranti totam superficiem cutis, pustulis nondum maturatis oleo olivarum illiverunt, unde puer catarrho suffocativo mortuus. Nuperrime no-

va mihi methodus obvenit, ubi satis incongrue vetula quædam tribus infantibus ad præcavendas cicatrices in facie frustulum plumbi frigidi per vices imprimebat exanthematibus, sinistro tamen eventu, uni enim ex infantibus inflammabantur fauces & pustulis obsidebantur copiosissimis, a quibus tamen antea fuerant liberæ; alter subibat asthma humidum, ut catarrhus suffocativus inde timeretur; ultimus patiebatur enormia tormina abdominis, quæ tandem cum levamine diarrhoea foetidissimæ materiæ sequebatur.

§. XVII.

De febre catarrhali placet in fine acutarum adhuc noxam quandam notare, quæ ex remediis domesticis provenit. Manifestat se febris hæc primario cum tussi quadam, ob quam vulgo nil familiarius est, quam dulcibus uti. Quantum quidem hîc profint, ego non video, cum magis noceant. Placet hac de re iudicium Magn. Dn. Præsidis ex *diff. de remediorum benignorum usu & abusu* allegare, ubi §. 9. inquit: *Ratio, cur dulcia in febribus noceant, in procinctu est, nam in omni febris genere natura corporis occupata est, illud, quod superfluum, quod ipsi inimicum, quod stagnat, quod obstruit aut putrescit, auctiori motu resolvere, amovere & foras eliminare. Jam vero per talismodi dulcia, viscidioris & immobilioris indolis, natura in resolutionis & excretionis desiderato negotio non modo multum impeditur, quin potius novus quasi fomes & materia febrium hac ratione subministratur.* Annecto adhuc hac de re questionem HENRICI ab HEER lib. 1. Obs. 5. ubi ait: *multos agrorum divitum interire in febribus propter abusum syruporum & dulcium saccharatorum, utpote, quod nimium febres exasperent.*

XVIII.

Digredior nunc ad febres intermittentes, & noxas, quæ mihi innotuere, proferam, quæ ex cura domestica originem trahunt. Multo numerosiores sunt illis, quæ in febribus acutis eveniunt, & credo hanc ob rationem, quia in initio non tantum periculum produnt, aut si diuturniores sint & pertinaciores, ægris malum intolerabile fiunt & sic ausibus temerariis sæpe ansam dant, unde vulgare illud: *Wenn nichts hilft / so wollen wir doch unsre Haus-Mittel probiren.* In genere vero peccatur in cura domestica horum remediorum duplici modo, vel febris exacerbatione, unde ex intermittentibus continuæ, vel ex præpostera suppressione, infarctus, obstructions & inflammationes viscerum, scirrhi, hydrops, œdemata pedum, icterus, lentæ & hæcticæ febres &c.

XIX.

Non possum approbare morem solennem, quo ingruentibus motibus febrilibus & quoque jam repetitis, imprimis brevi ante paroxysmum, remedia calidiora, spirituosiora ordinantur, quibus nil aliud efficitur, quam ut materia morbi in initio ut plurimum ventriculo & intestinis inhærens resolvatur, subtilisetur & sic ad sanguinem feratur, ubi omnino auctiores motus causari debet. Tribus ego vicibus observavi febrem tertianam in continuam mutatam ex immoderato spiritus vini haustu, imprimis ingruente paroxysmo, quod aliis quoque evenit, qui spiritui vini piper, aut cineres clavellatos, aut calamum aromaticum, admiscere in usu habent. Tale quid observarunt quoque *Annal. Vratisl. Ann. 1721. Mens. August. Clas. IV. p. 189.* ubi febris tertiana, post assumpta novem grana piperis nigri cum spiritu vini, *Frid. Hoffmanni Oper. Supplem. II.*

mutata est in febrem continuam ardentem, & in alio eadem cura somnum lethalem post se traxit.

§. XX.

Domesticis remediis annumerare non erubescō corticem exoticum Chinam de China, quia vulgo admodum innotuit, ut toto die in curatione febrium intermittentium adhibeatur. Cortex hic cum iudicio & debita circumspeditione datus omnino laudem suam meretur his in febribus, uti hoc fusiùs & sufficienter demonstravit Magnif. Dn. Præsides in *diff. de recto corticis Chinæ usu in febribus*; Imperitè vero, indiscretim, injusto tempore, incongrua dosi ineptoque regimine adhibitus, tristissimos sapius exerit effectus, quos quotidiana experientia probare potest. Dolendum certe, quod hoc remedium in apotheculis domesticis inter prima inveniat & tam imperitos & multiplices exhibitores habeat. Binis vicibus noxam annotavi ab exhibitione solius ejus pulveris (*vor 6. Pfennige braune China*) ubi in femina pedum tumores œdematosos, in juvene vero artuum stupores, causabat.

§. XXI.

Innumeri certe sunt vulgo familiares modi, quibus febres intermittentes curationibus & consiliis suis domesticis sæpissime satis incongruis turbant vel supprimunt, quos vero hic recensere nimis prolixum foret. Mitto lectorem ad *Annal. Vratislav. ubi Ao. 1720. Decembr. Clas. II. p. 608. Ao. 1721. August. Clas. IV. p. 189. Ao. 1724. April. Clas. IV. p. 440.* varias absconditas, superstitiosas & ineptas curationes febrium intermittentium videre licet.

§. XXII.

Recensitis sic communioribus, quæ obveniunt inter vulgus, noxis ex incongrua applicatione remediorum domesticorum in febribus, nunc videam, quid mali ex hac eadem perversa methodo in congestionibus sanguinis & inflammationibus inde propullulet. Non minus enim ac febres hi affectus subjecti sunt medicationibus domesticis, ita ut hujus veritatem quotidiana experientia confirmet.

§. XXIII.

Communiter obvenit feminis non rite menstruatibus, ut fere semper querelas ferant de primis viis, nunc flatulentias accusant, nunc cruditates ventriculi, nunc aliud quid, cum tamen causam morbi radicatam magis esse circa ventriculum in vasis sanguineis puto, quæ a congesto sanguine distenta, tensa & compressa, has turbas primis viis inferunt. Sanguine sic circa has partes accumulato, quid inconvenientius dari potest, quam purgans drasticum? quod tamen expertus sum in femina, quæ ingurgitato pulvere ex radice Jalappæ loco laxationis, enormes patiebatur conatus ad vomitum, paucamque materiam evomebat; concurrebant simul anxius & ardens æstus cum dolore strictorio circa præcordia, virium aderat dejectio evidens extremarumque frigus, quæ testes erant de inflammatione ventriculi. Nec minus res male cedit, si tali in statu vomitorium assumitur, observare mihi licuit inde vomitum cruentum & satis pertinacem, qui miseram vitæ periculo evidenti exponebat. Eandem noxam spondent similes medicationes in viris, qui hæmorrhoidum irregularitate aut plenaria suppressione laborant, & observavi virum æquali periculo expositum fuisse, cum de nausea per dies continua conquestus esset & loco vomitorii fumum tabaci ingurgitasset.

§. XXIV.

Damnum, quod stimulantia hæc acria ventriculo sanguine turgido inferunt, simile creare possunt refrigerantia, inter quæ tribus vicibus eventum finistrum produxit aqua frigida largiter ingurgitata, unde intensior inflammatio ventriculi cum febre & summa prostratione virium originem traxit. Sic vir potui spiritus vini addictus tale quid experiebatur, cum spirituosus hic liquor summos ardores præcordiorum causaret, & ad hos moderandos potum aquæ frigidæ superfunderet.

§. XXV.

Erysipelas, licet cautissimam requirat externorum applicationem, quotidie tamen topicis oleosis, unguinosis, refrigerantibus, repellentibus & adstringentibus satis incongrue tractatur. Surditatem, ex retropulso erysipelate per vaporem aceti faciei admisum, ante annum in puero 14. annorum observavi, quæ tamen sponte intra paucos menses, effluxione materiæ foetidæ, ex auribus solvebatur. Catarrhum suffocativum, post inunctionem erysipelatis faciei cum butyro sequutum, observavit Cel. D. JUNKERUS *Conspect. Medic. p. 176. Ed. nov.* Quid possit aqua frigida in hoc affectu testari potest HAGENDORN *Hist. Med. phys. Cent. I. Hist. 38.* ubi femina inflammatione faciei laborans, pessimo ausu lintamina aqua frigida imbuta parti affectæ applicaverat, inde dolor quidem sopitus, ast malum interiora petens, delirium tam horrendum causavit, ut mortem inferret. *Idem autor* gangrænam ex applicatione aquæ frigidæ faciei observavit. Et ego ex hacce eadem methodo periculosam faucium inflammationem ortam fuisse recordor, quæ adeo increvit, ut deglutitionis actum etiam impediret.

§. XXVI.

Ulceræ cacoëthica, gangrænosa, quæ vulgo dicuntur *Todten-Brüche* huic eadem incongruæ curæ non raro originem suam debere, pluribus practicis observationibus demonstrari potest. Relatum mihi a viro tale ulcus gerenti, ex erysipelate femoris retropulso per albumen ovorum alumine mixtum, provenisse. Nec mihi ignota sunt exempla, ubi post applicatum cataplasma ex herbis emollientibus, lacti incoctis, item ex oleo terebinthinæ applicato, ulceræ mali moris, difficillima curatu, præsertim in subjectis impurioribus, prodire. Id quod nuperime quoque observavi ex applicato plumbo frigido.

§. XXVII.

Ne omnes alias inflammationes & damna ex cura incongrua domestica in iis provenientia sicco pede transeam, annectam errorem communissimum plebis, quæ in inflammatione gingivarum & inde proveniente dolore sic dicto dentium, temerario consilio applicat sive nivem, sive aquam frigidam, sive etiam acetum parti affectæ & inflammata, & inde sæpius oris abscessus, satis ingratos, molestos & dolentes efficit. Nec præterire volo consuetam noxam, quæ inducitur pleuritidi sub inunctione oleorum aut unguinosorum topicorum, unde malum multo magis augetur, aut in majora mala transmutatur.

§. XXVIII.

Nunc me ad hæmorrhagias accingam, quæ plus, quam optandum est, perversis domesticis consiliis obnoxia sunt & quotidie fere inconsulto adstringen-

tibus, repellentibus, refrigerantibus, imo stypticis tractantur, ut inde nisi mala plurima redundant. Initium faciam faciam ab hæmorrhagia narium, salutari certe ut plurimum sanguinis excretionem, quæ variis modis ab imperitis medicastis sistitur; vel enim commendatur aceti, aut aquæ frigidæ, aut spiritus vini, aut alius adstringentis attractio in nares, vel hæc obstitantur crassiori methodo, vel lintaminibus soluto alumine imbutis, vel quod sæpius evenit telis araneorum. Sistitur ut plurimum quidem inde fluxus, sanguis autem huc translatus exitu tamen prohibitus, ad alia loca transit & ibi sæpius tragoedias suas ludit. Si ad interiora cerebri ruit, cephalalgias, phrenitidem & apoplexias, si ad aures, surculos aut surditatem, (quod in puero 12. annorum vidi) si ad oculos, dolorificas inflammationes, sive cœcitates, si ad fauces inflammationes anginodes, vel dolores dentium, si ad pectus, summas anxietates præcordiales, quin in magis succulentis catarrhum suffocativum causat, quod in puella irregulariter menstruata aliquando annotavi.

§. XXIX.

Non inconsuetus vulgo mos est hanc excretionem sanguinis per terrorem sistere, ad quem excitandum varia adhibent subsidia, vel enim improvviso superfundunt capiti aquam frigidam, vel nivem, aut glaciem, imo ferrum candens nuchæ applicant. Methodus vero hæc æquales sæpius habet eventus, quos superiori paragrapho enumeravimus, imo interdum periculosiores, diuturniores, perfacile etiam lethales. Cœcitatem ex hæmorrhagia per terrorem obstructa observarunt *Annal. Vratisl. an. 1726. April. Cl. IV. p. 503.*

§. XXX.

Annectere hic placet observationem & cautionem, quam *Magn. D. Præses* habuit, ex *diff. de erroribus vulgaribus circa usum topicorum in praxi*, ubi ait: *Vulgus in usu habet, in nimia hæmorrhagia nummum argenteum, aqua frigida madidum, fronti vel toti collo injicere, at verò, si tale quid factum fuerit in initio, non sine periculo apoplexiæ instituitur.* Notabilis quoque observatio HAGENDORN. *l. c. Cent. I. Hist. XX. p. 35.* huc quadrat, ubi scriniarius Goricensis inter labores familiarem hæmorrhagiam narium experiens iteratis vicibus redeuntem, hinc tædio molesti hujus fluoris ductus, apprehendit lignosas particulas (*Nobel-Späne*) quas naribus intrudit, spe citius certiusque sopiendæ hæmorrhagiæ; quod etiam fit & fluxus sistitur. Sed altero die experitur vertiginosam capitis gyrationem, quam infelicitèr infecuta est epilepsia, nulla arte tollenda, usque dum penitus viribus orbatus, diem suam supremam obire cogeretur.

§. XXXI.

Valent hi errores vulgi ex incongruis applicationibus remediorum domesticorum etiam in aliis hæmorrhagiis, de quibus omnibus exempla dare nimis prolixum foret. Sufficiat dixisse, nos hæcticam lethalem in sartore quodam annotasse, ex adstricta & obstitata hæmoptysi, per vaporem ad pulmones admissum ex aceto vini, in quo alumen erat solutum, omnibus aliis remediis omissis. Dignum tamen est, quo adducam observationem *Magn. Dn. Præsidis* ex *diff. de erroribus vulgaribus circa topica*, ubi femina hujus loci, dum nimio mensium profluvio laboraret, hoc sibi sistebat injectione decocti millefolii cum alumine acuat, & inde sibi ulcus cum tabe & hæctica febre lethale contrahebat.

§. XXXII.

§. XXXII.

Adeam nunc affectus, qui cum dolore fiunt; incommoda certe hæc sunt, quæ totum corpus ita excruciare possunt, ut tam hujus, quam animi functiones inde mire turbentur. Rite & ordinarie quidem tractati hi affectus corpori rarissime lethalem noxam inferunt, imprimis si spectes dolores arthriticos, contra vero temerariis ausibus, incongruisque medicationibus tractati, sæpius homini vitam adimunt.

§. XXXIII.

Primo loco ponimus dolores arthriticos & in specie podagricos. Incredibile est, quantis hi damnis obnoxii fiant ab imperitissimis juvantibus. Primum quod censendum venit, est, quod præcipua fere intentio vulgi sit, quo dolores sopiantur, materia, morbo fomitem præbens, in corpore relicta, & tantum a partibus ignobilioribus ad magis nobiliores protrusa, a qua curatione maximum infertur sanitati corporis damnum. Proveniunt inde periculosissima interdum mala. Si materia morbi protrudatur ad caput, facit epilepsiam, uti habet RIVERIUS *Cent. III. obs. 85.* vel apoplexiam, vid. WEPFERUS *de apoplexia p. 2. 3.* Si fluit ad pectus, oriuntur inde anxietates pressiones, respiratio difficilis, tussis feroces, sicca, & nonnunquam catarrhus suffocativus; si ruit ad ventriculum, fiunt inde singultus, cardialgiæ, inflammationes, si ad intestina, creat dolores colicos immanes, si ad renes, producit calculum, quid quod plures alios faciat sinistros eventus, uti infarctus viscerum, inflammationes, & non raro hecticas febres, de quibus plura leg. in *diff. Magn. Dn. Præsidis de Podagra retrocedente in corpus.*

§. XXXIV.

Subsidia, quibus vulgus ad sistendos & demulcendos dolores utitur, innumera fere sunt, hinc tantum mihi notata proferam, quæ sunt: I. Pedum immissio in aquam frigidam, vel nivem, vel in aquam, in qua plumbum ustum solutum; observavi a methodo priori immanes dolores colicos, a posteriori vero tumores pedum aquosos, quibus ulcera mali moris supervenerunt. II. Alumen & acetum linteaminis additum & pedibus applicatum, unde dolores intermittebant, sed die post vomitus repetiti ægrum vexabant cum enormi anxietate præcordiorum, quæ inflammationem ventriculi detegebat. III. Farina fabarum succo citrorum immaturorum incocta & parti affectæ admota, a quo dysuria insignis & tandem mictus cruentus oriebantur. Addam similis farinæ observationem, quam habent *Acta Hassniensa Vol. III. obs. 50.* de cataplasmate ex farina triticea aceto incocta, quod post applicationem & inde cessantes dolores, maximas anxietates, febrem, deliria & denique mortem produxit.

§. XXXV.

Notabilem adducit HAGENDORN *l. c. Hist. 28. Cent. I. p. 50.* observationem, ubi mercator quidam podagricus per epithema, ex aquis destillatis cum cerussa, camphora &c. confectum & applicatum, dolores sibi leniit, inde visus est loquelam amittere, nec brachium sinistrum movere potuit, sequentibus pectore asthmatico & mortis jam signis non obscuris. Lethalis quoque eventus incongruæ curæ narratur in *Act. N. C. dec. III. an. VII. Obs. 147.* ubi quidam dolores podagricos per potum frigidæ aquæ suppressit, & tunc emetico sumto enormes vomitus per mensem passus est, intercurrente sin-

Frid. Hoffmanni Oper. Supplem. II.

gultu, appetitu abolito, siti aucta, febre continua, urina suppressa & tandem superveniente morte, post quam ventriculus summe inflammatus fuit repertus.

§. XXXVI.

Non inconsumetum quoque est vulgo, ad discutendos tumores podagricos camphora, alias non spernendo, si debite & circumspecte adhibetur, remedio uti, unde plus vice simplici relictos observavi nodos, qui ægro vexas non exiguas sub qualicunque mutatione aëris ferebant. Majorem multo vero creant noxam emplastra, partibus dolentibus applicata, quas tamen hic recensere supersedeo, ne dissertationis terminum transcendere videar; allego tantum super hanc materiam *Annal. Uratislaviens. 1718. Octobr. Clas. IV. p. 1752.*

§. XXXVII.

Pervenio ad errores, qui medicationibus incongruis domesticis in colicis doloribus inducuntur. Duabus vicibus inflammationem observavi intestinorum, quando ad colicas passiones leniendas, quæ ex suppressis hæmorrhoidibus provenerant, remedia dolorem sopientia in usum vocarunt, inter quæ unum erat acetum semini papaveris albi contusi superfusum & assumptum, & alterum larga ingurgitatio potus frigidi. In viro annotavi, qui colicis doloribus ex impuritatibus primarum viarum laborabat, incongrue applicatum unguentum ex oleo lini & theriaca compositum, quod efficiebat, ut dolores adeo augerentur, ut motibus convulsivis per vices afficeretur. Ex decocto papaveris seminis cum lacte, quod infanti propter tormina, quæ à matre tunc purgante proveniebant, propinabatur, observarunt collectores *Uratisl. Annal. 1719. Maj. Clas. IV. p. 604.* post gravem somnum convulsiones, dolores punctorios pectoris & colorem subluridum totius peripheriæ corporis.

§. XXXVIII.

Pauca adhuc notare animus est de morbis serosis, & quomodo & hi remediis domesticis perperam applicatis deteriorescentur. Primum aggredior quosdam affectus, qui exanthematibus seroso-lymphaticis stipati sunt, inter quos primus sit scabies. Incredibile est quam incongruis medicationibus hæc subjecta sit, imprimis quod spectat ad remotionem pustularis excretionis, in hac quotidie peccatur unguentis, oleosis, mercurialibus, adstringentibus, refrigerantibus, omissis fere omnibus internis evacuantibus & alterantibus; proveniunt inde pessimæ transmutationes morbi, ut sunt angustia præcordiorum, cardialgiæ, asthmata, catarrhus suffocativus, tussis, febres intermittentes, inflammationes, tormina colica, febres hecticae, cachexia, oedemata pedum, quin hydrops universalis, deliria, anasarca. Mihi observare contigit post inunctionem butyri sulphurati tumorem totius corporis & in femina asthma humidum molestissimum. Sartoris filius ad scabiem amovendam se lavabat aquâ extinctionis fabrorum, unde immania tormina post siccata humidam scabiem ventris experiebatur, cui tandem febris tertiana superveniebat & ægrum sanitati restituebat. Nullis autem magis nocetur remediis quam mercurialibus, de quibus certe optandum, quod non tam communis essent compositionis ac usus inter vulgum. Testatur hac de re sæpius citatus HAGENDORN *l. c. Cent. I. hist. 9. p. 17.* ubi epilepsiæ mentionem facit, quæ post retropulsam scabiem cum mercurialibus orta est, & idem autor *Cent. II. hist. 92,* ex eadem causa catarrhum suffocativum pro-

nitum fuisse profert; quibus *Aff. N. C. cent. I. obs. 75. & dec. I. an. 8. obs. 77. it. cent. VII. p. 303.* addi possunt.

§. XXXIX.

Postpono scabiei perversæ curationi æqualem excretionum exanthematicarum capitis, quæ vulgo communis est; veniunt hæc pustulares excretiones primario sub nomine achorum & tineæ capitis, de quarum cura *Magn. Dn. Præs. in diss. de errorib. vulg. circa topica* ita sentit: *Quod attinet achores & tineam capitis in infantibus, nil magis solemne est imperito vulgo, quam ut lotionibus cum variis lixivis, decoctis, inunctionibus, tam sulphure & oleo olivarum aliisque unctuosus & linimentis, remove querant hoc malum: nil etiam porro est, quod accuratiori observatione teste majora incommoda post se trahat, quam hæc sanandi ratio, sequuntur enim ex ea epilepsia, inflammationes oculorum, suppurationes eorum, epiphora, imo quandoque gutta serena, vel graves peripneumonia, asthmata & ejusmodi generis plura.* Ut specialius per observationes veritas hujus fundatissimi asserti pateat, adducam pauca quædam exempla. Ipse in puero ex tineâ capitis per butyrum majalem, cui creta immiscebatur, retropulsa, notavi sequentem graviolem inflammationem oculorum. In duobus aliis observavi, quod ex lotionibus repetitis capitis cum aqua sulphurata, in uno post retrocessionem tineæ, motus epileptici, in altero vero asthma humidum, originem traxerint. Ab oleo olivarum capiti inuncto provenit in puella achorosa surditas per 7 menses durans. Notatu digna legi potest de achorum repulsum noxa observatio apud *HAGENDORNIUM Cent. I. hist. 8. l. c.* quæ ab inunctione olei amygdalarum dulcium amararum initium fuit. Et nuperrime mihi obvenit, ut causam eruerem suppurationis oculi dextri infantis cujusdam, quæ accusabatur prægressa inspersio pulveris cerussæ in achores, postquam evanuisent.

§. XL.

Restat sic ut quasdam observationes de morbis ferosis simplicioribus tradam, qui sine exanthematicis obveniunt. Familiaris catarrhalis defluxio, coryza nempe, magnum levamen capiti inferens, rarius quidem remedium requirit, cum ordinario fere per se intra paucos dies terminetur; attamen impatientioribus intolerabile malum fit, præsertim cum diuturnioris quandoque sit indolis, hinc auxilia querunt. Ex subsidiis domesticis vidi contrario eventu acetum naribus attractum fuisse, quod fluxum sistebat, inde autem asthma humidum molestissimum oriebatur. In juvene vero observavi, cum coryza laboraret & defluxionem sisteret per adductum in nares fumum tabaci, sed hac emanente & obstructa, tumor magnus totam faciem occupavit.

§. XLI.

In pectoris morbis, qui cum seroso-lymphatica acri excretionem stipantur, nil communius est observare, quam vulgi abusus in dulcium, inviscantiumque exhibitione, quem morem & inde provenientem noxam solide detexit *Magn. Dn. Præs. diss. de remediorum benignorum abusu & noxa, §. 9.* quæ monita ob prolixitatem vitandam hic nolo rescribere. In diarrhœis curandis etiam atque etiam medicationibus domesticis damnum infertur & imprimis

ex præcipiti nimis harum cohibitione, succedunt inde dolores colici acutissimi, translationes materiæ in alia loca, ad caput, pectus &c. hinc catarrhi suffocativi, tusses, vertigines oriuntur, quin & ob immoderatam adstrictionem obstructions viscerum &c. Talem eventum animadverti in fabro ferrario, qui fluxionem ventris sistebat per ingurgitatum acetum, qui postea pedes œdematosos hac ex cura sibi contraxit. Vulgare hic est remedium nucem moschatam cum vitello ovi incoquere & assumere, unde sæpius diarrhœa sistitur, sequuntur vero adhuc sæpius prædicta molesta & periculosa symptomata.

§. XLII.

Ultimo loco tradere volo noviter annotatam noxam de incongrua suppressione sudoris pedum, excretionis certe momentosæ & salutaris. Patiebatur Studiosus quidam continuas has excretiones cum foetore ingratisimo, quæ magno erant ipsi incommodo. Impatiens igitur hujus morbi, consilium petiit a contubernali; hic pediluvia commendat multæ, uti jactabat, experientiæ, ex aqua simplici, in qua alumen dissolutum. Fit hoc & continuatur consilium per duas septimanas, unde pedetentim sudores supprimuntur & emanent. Succedunt vero vertigines capitis, foetor oris intolerabilis & sæpius in die tremor artuum gravis, multisque negotiis patientem ineptum faciunt. Consequentia hæc perniciosæ adhuc usque durant, nullaque arte hæcenus sudor pedum iterum proliciendus fuit. In viro ex eadem hac inconsulta suppressione rheumatismos artuum gravissimos observavi, cum in aceto cretam solvisset & massam hæc pedibus applicasset. Non præterire possum *Magn. Dn. Præsidem*, qui de hac noxa in *diss. de Transmutatione morborum p. 31.* ita inquit: *periculi plena res est, hæc salutem excretionem imprudenti consilio sistere. Quo sine calceis limaturam ferri, aurichalci & terras calcareas ustas inspergere solent. No imus vero exinde vertiginem aut capitis gravitatem, aurium tinnitum, difficilem respirationem, ventris tormina atque vagos artuum dolores subortos, qui nulla arte vel consilio superari poterant.* Spectat huc, quod *SIM. PAULLI in Q. B.* ait: *Valitudini male consulunt, qui foetorem pedum retropulsuri calceis myrti folia, limaturam martis &c. imponunt & ibid. p. 215.* notabilem habet historiam, ubi quis a suppresso pedum foetore in gravem cordis palpitationem, postea in nodosam podagram incidit. Quibus merito adjungam sententiam & observationes, quæ habentur in *Annal. Uratist. 1722. Jan. p. 88. & 1724. Febr. p. 203.* lectu certe dignissimas.

§. XLIII.

Sufficiat, has paucas observationes de noxis ex remediis domesticis incongrue adhibitis in morbis quibusdam tradidisse, ne præter opinionem dissertatio mea excreseat. De singulis enim morbis singulos errores tradere, neque mearum est virium, neque meæ intentionis, potius tale quid exercitatoribus practicis relinquo; addo tantum in fine adhuc, non exiguam ex hisce observationibus fluere posse ægrotis emolumentum, si in juvantium, eventibus finitris his deterritorum, manus imposterum non amplius incidant, & si tamen factum sit, magnam lucem hæc accendunt Medico in curatione turbati morbi, quid quod hic utilissimas cautelas exinde excerpere possit magno cum fructu usurpandas.



D I S S E R T A T I O

D E

E R R O R I B U S

CIRCA VENENA VULGARIBUS.

Primum edita Anno 1718.

P R O O E M I U M.



Nulla materia in universo artis nostræ ambitu digna est, quæ alta indagine & accuratiori scrutinio evolvatur, certe eam esse existimamus, quæ venenorum naturam ac proprietates perquisitius investigat, eorumque vires exitiosas & modum agendi rationali modo explicat, & vulgares, qui circa hoc argumentum foveantur, errores fideliter detegit. Est venenorum ingens ac celerrima in animantium corpora vis ac potentia vitales eorum motus insigniter labefactandi, vel penitus destruendi. Qui igitur nocentissimos eorum effectus rite scit enodare, & quomodo vel cujus elementi ope perficiantur, luculenter exponere, illi in gravissimorum morborum causis & truculentis symptomatibus recte explicandis non adeo multum laborandum erit. Neque ulla doctrina nobis aptior videtur ad mechanicam pathologiæ tractationem cum asserendam tum illustrandam, quam quæ, cujuscunque generis sint, venenorum naturam, peculiare operationes & cuius dicata vel quasi specifica remedia explanat. Exinde enim clarissime patet, qua ratione minima materiæ moles totam motuum vitalium œconomiam pervertere, & quomodo certum remedium sola texturæ immutatione hanc nocendi potentiam infringere vel prorsus amoliri possit. Et qui præcipites ac subitaneos venenorum effectus scire & intelligenter explicare potest, illi citra omne dubium aliarum quoque nocentium causarum, quæ venenis activitate longe inferiores sunt, omniumque ex iis dependentium effectuum ac symptomatum perfacilis & expedita erit enodatio. Quamvis autem præter hoc, quod circa venena versatur, argumentum nihil in universa re medica inveniatur, quod latius pateat, vel cum majori utilitate conjunctum sit: illud ipsum tamen hucusque minus digne a Medicis excussum ac pertractatum esse, ipsa res loquitur. Siquidem non modo vulgus fabulosas de venenis opiniones fovet; sed ipsi etiam Medici ac Physici miris circa hanc rem præjudiciis laborant, & perversa subinde judicia de venenis proferunt, dum quædam pro venenis habent, quæ ab eorum natura prorsus aliena sunt, alia vero venenis jure ac merito accensenda ex eorum numero excludunt. Taceo quod nec modum eorum agendi, neque eorum proprietates ac characteres cognitos & exploratos habeant. Quibus causis permoti non incongruum, sed maxime opportunum duximus loco speciminis inauguralis nobilissimam hanc de venenis materiam ea, qua fieri poterit, brevitate ventilare, & communes circa illa hallucinationes publico conspectui exponere. Deus autem favore suo huic labori adspiret, nostrisque conatibus ex alto benedicat.

§. I.

Quemadmodum vero omnis solida, quæ de re explicanda instituitur, investigatio a vera ac reali ejus definitione suum capere debet exordium: ita etiam scopo nostro valde accommodatum videtur breviter indigitare, quid per *venenum* intel-

Frid. Hoffmanni Oper. Supplem. II.

lectum velimus, ne commoda neglecta explicatio-
ne variis confusionibus, a quibus omnium errorum
origo promanare solet, causam & occasionem sub-
ministremus. Per *venenum* itaque talem intelli-
mus materiam, quæ summa partium suarum tenui-
tate & activitate interne vel externe animantium
corporibus admota celeriter & exigua in quantitate
universum genus nervosum adficiendo vel magnam

Q 99 3

perniciem.

perniciem vel ipsam mortem infert. Tres autem characteristicas quasi proprietates, quibus venena ab aliis nocentibus causis discriminantur, constituimus. Prima est summa partium tenuitas atque activitas, ita ut minima mole operationem suam exequantur; altera, quod intus vel externe corpori admota celeriter noceant vel prorsus jugulent; tertia, quod maxime genus nervosum aggrediantur, & ob mutuum partium consensum in universo corpore gravissimas læsiones & truculenta symptomata producant.

§. II.

Præmissis hisce venenorum proprietatibus & notis essentialibus jam facillimum est judicare, venena multis intervallis distincta esse ab aliis rebus corporeis, quæ nocendi & intra exiguum tempus occidendi facultate pollent. Notum est quam quod notissimum, aquam frigidam intra corpus calore ac sudore perfusum copiosius assumptam tam insignem inferre noxam, ut celeriter vitam extinguere possit, quia nempe frigus sanguinem coagulando ejus circulum per ventris viscera penitus sistit. Notissimum quoque est, fumo sulphuris accensi omnium animantium genera facile exstingui. Sed quia hujus actio non in nervorum genus est, sed in aërem, quem ad respirationem inutilem reddit, hinc venenum dici nequit. Testis enim est experientia, quod spiritus minerales acidi, ut aqua fortis, spiritus nitri, spiritus & oleum vitrioli, spiritus salis paulo majori in copia hausti, erodendo ventriculum & intestinorum tunicas insanabiles læsiones, imo ipsam mortem inferre queant. Sed quia hæc non adeo singulari partium tenuitate, nec tam exigua mole, neque etiam celerrime suam exerunt efficaciam, non immerito illa ex venenorum consortio relegamus.

§. III.

Præter hæc autem plura adhuc alia in omnibus naturæ regnis obvia sunt, quæ non mediocri, sed maxima nocendi & interficiendi facultate instructa sunt. Hæc tamen ad venenorum classem proprie non pertinent, licet a veteribus, exquisitori venenorum cognitione destitutis, in horum censum relata fuerint. Ex regno enim minerali calx viva majori in copia assumpta, omniaque fere præparata ex saturno, ut cerussa, lithargyrium, minium; ex venere crocus veneris, viride aeris, vitriolum venerum, & hujus mineræ misy, sory, chalcytis, propter vim corrodentem, septicam, vel nimis constriquentem animantium corporibus, eorumque partibus solidis valde infensa sunt, quippe quæ gravissimas ac lethiferas læsiones excitare possunt. Et quis in rebus medicis leviter saltem versatus ignorat, a solis topicis in scabie, podagra, variolis ac morbillis perperam & inconsiderate adhibitis, vel interne ab intempestivo sudorifero & acri alexipharmaco aut purgante lethalia symptomata produci posse? quæ tamen remediorum genera alias per se satis tuta venenorum numero minime adscribi debent. Veteres lac in ventriculo coagulatum & sanguinem taurinum potum vera venena pronuntiare non dubitarunt, quam tamen appellationem, licet corpori vim & noxam inferant, ob rudiores, qua constant & agunt, molem, nequaquam merentur. Denique nullum cum venenis commercium habent ea corpora, quæ crasso quodam, ut ita loquar, mechanismo corpori animantium exitiosam calamitatem afferre possunt, ut sunt acidulæ, vel aliæ res acuto cuspidem gaudentes deglutitæ, a quibus atrocia & mortifera symptomata excitata fuisse, cum HILDANO plures iique gravissimi rerum medicarum scriptores memoriæ pro-

diderunt. Ejusmodi venenum mechanicum conflatum ex crichalci tenuissimis lamellis, vulgo *Glithers Gold* / dilcissis, & cum liquore aliquo assumptum, ut referunt *Miscell. Nat. Cur. Decur. III. an. 1. pag. 83.* fatalem diem acceleravit.

§. IV.

At enim ipsa res & instituti nostri ratio poscere videtur, ut brevem quasi nomenclatorem eorum, quæ proprie & κατ' ἐξοχὴν venena, & quæ non appellari debeant, exhibeamus, quo deinde melius in eorum principia & modum agendi atque antidota inquirere possimus. Quemadmodum vero universa rerum natura solemni in scholis more in tria regna dispescitur, quorum primum animantia, alterum vegetabilia, tertium mineralia seu subterranea complectitur: ita etiam hunc ipsum ordinem in recensendis & examinandis virulentis corporibus observare nobis consultum videtur. Et primo quidem, quod regnum animale attinet nullum in hoc dari venenum præter putredinem & morsus animantium irapercitorum, confidenter asseveramus. Nullum enim ex animantium vel insectorum familia nobis cognitum est, quod in substantia, vel in pulvere, vel in liquore exhibitum, enecet, vel omnes supra recensitos characteres possideat. Equidem non inficimus, plura insectorum sal quoddam acre causticum, quod exterius applicatum vesicas excitat, intus vero sumtum vias urinarias potenter stimulat, fovere, & improvide adhibita maximum afferre posse nocumentum; cujus generis sunt araneæ, bufones, scorpiones, cantharides, millepedes, ac vermes majales. Sed tamen ex fide dignis historiis vel certa experientia nequam probari poterit, ab horum vel externo vel interno usu in sanis beneque valentibus corporibus mortem fuisse productam. Quamobrem etiam ea, quæ de venenosa sanguinis mensuræ qualitate, & quod ex eo philtrea veneni naturam æmulantia parari possint, vulgo proferuntur, pro mere fabulosis commentis agnoscimus. Neque facile adduci me patior, ut fidem habeam efficaciam magni & famosi istius veneni, cujus mentionem facit AMMANNUS in *Irenico* pag. 209., quod Madame Voisin suggestu diaboli præparasse fertur ex abortibus, partu abacto, foetuque occiso meretricum in cineres redacto, qui cinis veneni vel cito vel tardius necantis naturam pro lubitu exhibentis, induebat. Illud vero infallibili experientiæ fide ab antiquissimis autoribus confirmata constat, quod morsus & ictus insectorum, præsertim in terris calidioribus, ut phalangum, tarantularum, scorpionum, viperarum, brevi tempore sanos ac validos homines in subitanam mortem præcipitare, & universam nervorum compagem violenter convellendo gravissima symptomata producere possint.

§. V.

Non possumus autem, quin hoc loco vulgarem fere errorem, qui etiam nonnullorum Medicorum animis insidet, commemoremus. Multi in ea sunt opinione, morsum serpentum, quos nostræ regiones alunt, esse venenosum, & homines celeriter interficere; de cujus rei veritate non sine gravi ratione penitus dubitamus. Primo enim inter vipers ac serpentes magna intercedit differentia. Illæ ex utero vivæ prodeunt, & hinc vipera, quasi viviparæ, dicuntur; hi vero ovis sole vel fimo foecundatis excluduntur. Accedit, quod viperae dentibus instructæ sint, quibus ira affectæ, in regionibus præsertim calidioribus, sæpe lethalis morsus hominibus imprimunt. Serpentes vero non dentati sunt, nec uspiam lethalis ab iis effectus annotatur. Præterea etiam

etiam serpentes magnitudine vyperas longissime exsuperant. Vanæ igitur & inanes sunt quorundam præstigiatorum de suis antidotis contra serpentum morsus jactationes, quibus suam theriacam & mithridatium aliaque præsentissimæ adversus serpentum morsus efficaciam remedia extollunt, ut sub credulitatis patrocinio plebem pecunia frudulenter emungant. Atque eandem ob causam explodendum est illud remedium, quod ceu certissimum adversus venenatos serpentum morsus præservatorium commemorat WALVASSOR in *descriptione Carniolæ*, Tom. I. Lib. III. p. 360., dum nempe ejus regionis incolæ ex serpente vivo summo mane cor eximunt, & calide in aqua frigida devorant. Ejusdem valoris est illud, quod vulgo Italiam imputatur, atramentum viperarum sanguine infectum, cui tantam nocendi vim tribuunt, ut si quis litteras virulento hoc atramento scriptas legat, statim sensu ac ratione privetur, brevique post animam expiret. Nam si tanta huic veneno inest penetrantia, nescio sane, quomodo sine noxa præparari possit. Sed quis ejusmodi commentis inhæreat, quorum plerique libri pleni sunt.

§. VI.

Neque vero tantum insectorum sed grandiorum quoque animalium, ut canum, vulpium, luporum, imo hominum ira percitorum morsus veneni perfecti naturam præ se ferunt, & nocentissimam ac necantem vim exhibent, id quod extra omnem dubitationem positum est. Nec immerito miasinata, sive exhalationes subtilissimæ indolis, in peste infectis vel morbis ex penetrante putredine in sanguine & lymphâ subortis ex venenorum classe repudianda sunt, quarum nociva & mortifera vis satis superque per se nota ac manifesta est. Sed quoniam hæc animantium venena non in arbitrio & potestate hominum posita sunt, ut pro lubitu iis uti vel abuti possint, ideo illis relictis nostrum sermonem ac meditationem potissimum de iis venenis instituemus, quæ in hominum potestate sunt, & quibus alter alteri noxam inferre potest.

§. VII.

Reliqua igitur sunt duo naturæ regna, vegetabile nimirum & minerale, ex quibus ejusmodi venena, circa quæ nostra occupata erit tractatio, depromenda sunt. Quemadmodum vero venena merito in nativa & artificialia dividi ac diduci debent, ita animadvertimus, in vegetabili plus nativa, in minerali vero plus arte facta existere. Et quoniam veteribus ob artis chymicæ ruditatem non adeo cognita fuerunt illa mineralia, ex quibus venena nostris temporibus parantur, hinc veterum venena tantum ex regno vegetabili desumpta fuisse observamus. Quæ vero de mineralibus eorumque venenis veteres scripserunt, ea magis ad rerum noxiarum classem spectant, quam ut iuste venenorum numero associari possint. Si enim antiquissimorum Græcorum monumenta consulimus, vix alia venenorum genera, quibus solenni more vel sibi vel aliis mortem inferendi usi fuerunt, invenimus, quam cicutam, cujus succus leni insolatione inspissatus publice in poenam Athenis olim adservabatur. Post cicutam napellum sive aconitum ob virulentam suam vim cetera fere omnia longissime superat, cujus rei documentum funestæ hinc inde adnotatæ historiæ perhibent. Hæc duo admodum virulentæ indolis simplicia præcipue in terris calidioribus, ubi a solis æstu penetrantior, quam nostris in regionibus, naturam induunt. Commodissime etiam hæc duo venena insciis homini-

bus propinari potuerunt, quia obtusa & particulis terrestribus involuta acredine linguam non adeo multum feriunt.

§. VIII.

Sunt alia adhuc, quæ ex terra nascuntur deleteria vehementiæ non expertia, quæ tamen non tam exili, sed potius majori in dosi exhibita lethales sæpe effectus produxerunt. Sunt nempe certæ fungorum species, qui venenato acri caustico succo scatentes inter edulia assumti & antiquis & nostris temporibus funesta virulentia suæ exempla ediderunt, nisi mature sumto emetico ex ventriculi sinu rejecti fuerint. Exstant præter hæc in regno vegetabili plura, quæ licet communiter a Medicis inter venena non referantur, revera tamen iis annumerari debent. Et hæc sunt drastica illa, acria & vehementiora purgantia, ut colocynthis, helleborus albus, elaterium, grana tilli, semina cataputiæ, esulæ, sive tithymali species, quæ quamvis gradu quodammodo a validioribus venenis differant, omnibus tamen istis characteribus ac proprietatibus, quibus venenorum essentia continetur, instructa sunt. Denique vegetabile regnum quædam adhuc alia nocentissima & virulenta qualitate imbuta profert, ut sunt hyoscyami, stramonii & solani species, quæ vitales motus, narcosin & stupiditatem inducendo destruere solent.

§. IX.

In regno minerali nativa venena perquam pauca nobis cognita sunt. Antimonium quidem crudum seu stibium veteres venenis adscribere non dubitarunt, quod tamen experientia teste insigni potius medicamentosa quam venenata virtute gaudet. Tutissime enim animantibus, ut suibus, equis exhibetur, & ad sanguinem depurandum, ad morbos, qui ab impuritate humorum proveniunt, arcendos, nec non ad pinguefacienda animalia cum fructu usurpari potest. Præterea in forma sicca vel in liquida, sive in decocto multis ægrotantibus in lue venerea, scabie, phthisi, lepra, & atrophia plurimum affert adjumenti. Eadem ratione argentum vivum sive hydrargyrum semper ab antiquitate pro veneno habitum fuit, cui tamen sententiæ, præsertim quod usum ejus internum attinet, quotidiana experientia adversatur. Quem enim fugiat, hoc ipsum ad libram vel ultra cum oleo amygdalarum dulcium atrocissima iliaca passione laborantibus non sine felici successu propinari, ubi pondere suo firmiter occlusas feces in herniis incarceratis vel in intestinis complicatis colliquando liberum iter illis restituit. Et quod hoc minerale diutius in corpore retentum parum damni inferat, id nobis ante aliquot annos perspectum fuit, quum femina honesta ultra dimidiam hydrargyri libram in hernia inguinali datam successu five mensis demum spatio alvo excerneret, & nihil inde mali præter manuum tremorem experiretur. Licet vero hæc duo mineralia, antimonium & hydrargyrum, per se & in sua natura satis innocentia sint, chymica tamen arte per ignem aliisque adjectis in fortissima venena, ut videmus in antimonii vitro, regulo, & mercurio sublimato, converti possunt.

§. X.

Alia jam incidit quæstio de auripigmento, quod etiam nativum est, num illud inter vera venena locum habere debeat. Veteres teste CELSO L. V. c. V. illud arsenicum vocarunt, & GALENUS Lib. IX. *Simplic.* illi erodentem & psilothram facultatem tribuit, quod DIOSCORIDES etiam Lib. VI.

e. 28. confirmat. Ipse quoque CELSUS *l. c.* inter externa, quæ vulnera purgant, erodunt, & crustas inducunt, illud reponit. Quamvis vero antiquiores Physici ac Medici paulo mitius de ejus virulentia interna senserint, qui alias faciles erant in amplificando venenorum numero: a recentioribus tamen non sine admiratione conspicimus auripigmentum arsenicum citrinum & sandaracam arsenicum rubrum vocari & venenorum numero accenseri, ita ut celeberrimum Medicorum collegia in responsis suis hoc ipsum asserere non dubitaverint. Ita extat responsum celeberrimi collegii medici in VALENTINI *pandectis pag. 384.*, in quo auripigmentum arsenicum citrinum vocatur & solenniter pro veneno declaratur. Idem factum ab eodem collegio fuisse in responso, quod in ZITTMANNI *medicina Forensi Cent. 1. casu 62.* continetur, observamus. Ita etiam Cl. AMMANNUS in *Medicina Critica casu 98.* auripigmentum sandaracam vocat, & pro veneno a medico collegio habitum fuit. Neque ita pridem etiam a collegio celeberrimi alius academici auripigmentum arsenicum citrinum nativum fossile in responso vocatum, & venenum minerale corrosivum, quod causa proxima mortis fuerit, pronuntiatum fuit.

§. XI.

At vero re accuratius pensitata libere hic & aperte, pace tamen omnium & sine ullius injuria profitemur, auripigmentum nullo modo inter venena locum mereri, neque recte arsenicum citrinum vocari posse; id quod etiam de veterum sandaraca valet, cujus eadem vis est, CELSO *l. c.* teste, cum arsenico, quæ ex auripigmento sola fusione per ignem in olla obturata, recte, id notantibus PLINIO, AGRICOLA, MATTHIOLO, & WORMIO, præparata fuit, quæ saturatiorem rubrum colorem acquirit. Equidem non negandum, a veteribus auripigmentum, arsenicum, & sandaracam realgar & arsenicum rubrum dicta fuisse, toto tamen coelo hæc veterum arsenica differunt a tribus speciebus arsenici flavi, rubri & albi, quæ nostro jam tempore præparantur, & vehementissima venena sunt, utpote quæ omnis generis animantia, & ipsos quoque homines tam celeritate, quam ingenti symptomatum atrocitate brevi tempore interimunt. Jam vero observamus, inter auripigmentum & arsenicum citrinum, interque sandaracam & arsenicum rubrum a recentioribus magnam factam esse confusionem, quum hæc pro synonymis habuerint; cujus magni erroris occasio procul omni dubio inde mihi enata videtur, quod plures ex scriptoribus medicis superioris seculi, ut GEORGIUS AGRICOLA in *lib. de re metallica*, MATTHIOLUS in *comment. in Dioscoridem Lib. 5. cap. 81.* SCHROEDERUS in *pharmacopœa pag. 498.* OLAUS WORMIUS in *Museo pag. 29.* ex recentioribus WEPFERUS in *Libro de cicuta aquatica pag. 290.* & D. BARCKHUSEN in *chymica p. 260.* aperte & confidenter asserunt, summum illud venenum arsenicum crystallinum ex auripigmento & sale communi invicem aliquoties sublimatis parari, quod tamen a veritate longissime abest. Et quoniam GEORGIUS AGRICOLA, Misniæ incola, qui suo tempore sagacissimus rerum naturalium scrutator æstimabatur, in opere suo hoc primum affirmavit, exteri huic fidem habentes errorem ab eo acceptum posteris per manus quasi tradiderunt. Veteres enim arsenicorum illæ venenatæ tres species plane latebant, quæ non ultra duo secula orbi innotuerunt. Neque enim plures ex recentioribus auripigmenti & sandaracæ veterum arsenicalium venenorum nostri temporis naturam, originem, vires cognitæ perspectasque habuisse videntur.

§. XII.

Ut vero arsenicorum illorum, quæ veteribus nota fuerunt, & quæ demum nostris temporibus inclaruerunt, ingens differentia omnibus constet, singulorum proprietates breviter strictimque enarrare commodum nobis visum fuit, eo quod res non parvi momenti sit hanc confusionem evitare, quia salus sæpe ac vita hominum ex ea periclitatur. Auripigmentum est minerale aurei coloris, sulphureum, ex tenuibus crustis tanquam squamis, instar lapidis specularis fissilibus compositum, quod in Græcia, Mysia nempe Hellesponti, ex montibus eruitur & ad nos advehitur, & tempore GALENI ac DIOSCORIDIS jam cognitum fuit. Hoc in pulverem redactum & flammæ admotum fluit, accenditur & flammam emittit cum fumo albo, subflavo, qui cultrum superpositum albo luteo & subrubro colore, pulchro spectaculo, obducit, relictis in fundo arenosis & lapidosi particulis. Fumus odorem habet foetidi sulphuris. Idem auripigmentum in cucurbita vitrea vehementiori igne liquatum massam dat instar cinnabaris rubicundam, in superficie instar rubini splendentem, quam veteres sandaracam appellarunt. Arsenicum vero album, flavum, & rubrum nostrum est factitium, & patriam habet Misniam, ubi tantummodo, inque nullis aliis terris, idque in pago *Jhren-Friedrichsdorff* / conficitur ex minera grysei coloris, quæ vocatur cobaltum, *Sliegen-Pulver* / quia muscas hujus pulvere enecare solent. Processus autem sequentem in modum se habet. Miscetur cobaltum cum calcinatis filicibus & cineribus clavellatis, qui invicem fortissimo igne in vitrum saturati cærulei coloris transeunt, quod in minimum pollinem redactum dicitur smaltum, germanice *die blaue Farbe* / cujus ingens quantitas quotannis in exterarum regiones transmittitur. In præparatione hujus vitri copiosiores fumi albi seu potius flores in sublime feruntur, qui fornacis parietibus appositi & collecti pulverem præbent album, qui vocatur *Gist-oder Arsenical-Mehl* / qui fortissimo igne in crucibulo tecto liquatus in massam ponderosam albam duram compactam vitream fatiscit. Et hæc est arsenicum illud album crystallinum, summum illud venenum, compluribus funestis exemplis infamatum. Quando vero ad partes decem pulveris prioris albi una additur sulphuris vulgaris & simili fusione tractatur, tunc arsenicum prodit citrinum. Si vero duæ partes sulphuris cum decem partibus pulveris albi miscentur, igne fusionis rubicunda massa emergit, quæ nomine arsenici rubri venit. Et hæc tres species arsenici veteribus plane incognitæ fuerunt, quæ ratione virulentiae gradu tantum differunt. Unum ex illis cochleari vel tigillo inditum & igni impositum totum evanescit, ut nec in fundo vestigium ejus supersit. Album densissimum fumum spargit, & laminam ferream floribus albis densis obducit, nunquam vero flammam concipit, qualem exiguam dat arsenicum rubrum propter sulphur admixtum; fumi etiam non penitus albi, sed leviter colorati exurgunt, odorem vero spargunt alliaceum foetidissimum, totum conclave occupantem. Unum quoque ex hisce speciebus in retorta vel cucurbita vitrea vehementia ignis tractatum totum in altum sublimatur, neque quicquam in fundo relinquit.

§. XIII.

Quod ad usum auripigmenti attinet, eo utuntur pictores ad aureum colorem exhibendum, ut & mechanici ad plumbum colliquandum in globulos dueros, vulgo *Schroot* / neque a materialistis pro veneno

veno habetur, hinc etiam cuiusvis petenti venditur. Arsenico vero crystallino ad pelluciditatem vitris conciliandam a vitriariis, ad porcellanam albo vitro obducendam, pariter & ab aurifabris ad metalla vitro subtiliori obducenda, vulgo emalliren, usurpatur. Flavovero & rubro identidem pictores utuntur ad flavum colorem exprimendum. Quod vero usum internum & vires auripigmenti attinet, nullum prostat luculentum & clarum exemplum in Medicorum cum veterum tum recentiorum monumentis, quod funesta symptomata vel mortem intulerit. Sed potius DIOSCORIDES *Lib. V. cap. 22.* ejus usum interne contra inveteratam tussim & empyema cum mulso suadet; & AVICENNA *Lib. III. tradition. 1. pag. 262.* hæc prodidit: *Ex medicinis fortibus est arsenicum (per quod indigitat auripigmentum) ex quo cum gummi pini fiant pilule ad asthma, aut detur in potu cum aqua mellis.* Ejus suffitum in lue gallica insigniter laudat FALLOPIUS *cap. 72. de morbo Gallico.* Denique auripigmentum caret sapore acri, neque cuti admotum septicam & psilothram vim exerit, nisi calx viva admixta fuerit, quod per experientiam constat. Caret quoque omni drastica, purgante, vel emetica virtute, multo minus vero animantium vitam destruit, quod frequenti experimento compertum habemus, dum illud non tantum ad drachmam, sed etiam ad unciam semis pro dosi canibus & felibus sine omni noxa obtulimus, in quibus etiam postero die sectis nulla intra primas vias mutatio conspecta fuit. Neque multum sandaraca ab auripigmenti viribus distat. Fecimus experimentum & in vitro clauso auripigmentum fortiori igne colliquavimus in massam, quæ partim granati, partim cinnabaris colorem referebat, cujus scrupulos duos cani devorandos dedimus, qui tamen nihil incommodi inde expertus est. Quia vero in præparatione hujus rubri corporis flores crocei coloris in cucurbitulæ superiorem partem simul elevati fuerunt, experimentum etiam cum illis instituimus, & scrupulum unum eidem cani dedimus, a quibus enormes vomitiones sequuntur, sed ipse canis postea bene valuit & comedit. Ex quibus liquidissime apparet, auripigmentum esse minerale sulphureum, & in se crudum innoxium; sub hujus sulphuris vero involucro alias adhuc minus benignæ indolis, mercurialis forsan naturæ delitescere particulas, quemadmodum id quoque deprehendimus in antimonio, quod crudum plane innoxium est, cujus tamen flores igne elevati, albi & rubri, drastica & emetica virtutis non sunt expertes.

§. XIV.

Quia vero GEORGIUS AGRICOLA & alii cum illo constanter asseverarunt, auripigmentum cum æquali salis communis portione sublimatum transire in arsenicum album virulentum, hoc etiam experimentum examinare non recusavimus. Miscelam itaque salis communis cum auripigmento æqualem retortæ vitreæ indidimus, & vehementissimo suppressorio igne subiecto obtinuimus primo phlegma acidulum, deinde flores flavos instar croci in retortæ collo collectos; tum facto intensiori ignis gradu rubicundam instar rubini coeuntem pellucidam massam, remanente loco capitis mortui sale communi cum particulis terrestrioribus auripigmenti mixto, quod sublimatum ad scrupulum canibus sine noxa obtulimus. Hinc permotus Dn. D. Gumprecht ipse ad grana sex sumsit & aliis quoque dedit, atque observavit, quod fortem semper sudorem provocaverint.

§. XV.

Ex quibus jam dictis luculenter apparere arbitror, longissime ratione virium auripigmentum ab arsenico nostro distare, & ob id nullo modo a Medicis hæc invicem esse confundenda. Quis enim ignorat, quam funesta & lethalia brevi tempore omni animantium generi tres hæc arsenici species, maxime vero album, vulgo *Ratten-Pulver* / symptomata inferant, & quam commode homines, quia omnis acrimoniæ expertes sunt, ab iis interficiantur, tot tristissimis exemplis ac historiis passim in libris & responsis Medicorum annotatis id confirmantibus. Quade causa etiam triplex hoc arsenicum a pharmacopœis & materialistis seorsim in scriniis servatur, neque omnibus nisi notissimis venditur.

§. XVI.

Recensuimus jam ex triplici naturæ regno ea simplicia nativa æque ac factitia, quibus deleteria & necandi vis inest, ubi illud notandum occurrit, quod nostris temporibus ad veneficia nullum fere aliud, præterquam arsenicum illud factitium in usum trahatur. Napelli enim & cicutæ vires pluribus ignotæ sunt. Mercurius vero sublimatus, licet unum ex vehementissimis venenum sit, ob causticam tamen acrimoniam, quæ mox in lingua & ore se prodit, ad veneficia perpetranda plane inidoneus est. Neque facile, quod sciam, ullum reperitur exemplum, quo demonstrari possit, hoc ipso quendam fuisse ex composito interfectum. At vero quod acriora illa purgantia & emetica antimonialia spectat, hæc quidem venena sunt, sed ad usum empiricorum, quibus impune licet occidere, magis reservata sunt. Quare non sine insigni ratione ab HELMONTIO & BONTEKOE *Mordt-Mittel* vocantur, quod experientia docemur, multos, præsertim qui tenerioris constitutionis sunt, & ventriculum in inflammationem jam primum habent, valentissimis hisce remediis a vulgo practicum interiri.

§. XVII.

Quum autem varia sint venenorum genera, & multum inter se ratione vehementiæ & indolis, nec non principii, quo instructa sunt, activi differant, non inconsultum, sed scopo nostro maxime consentaneum fore judicamus, qua ratione & quibus symptomatibus, & quo agendi principio singula motus vitales extinguant, paulo penitus excutere.

§. XVIII.

Quemadmodum vero duo in rerum natura activa quibus maxima operandi vis inest, dantur principia, salinum nempe & sulphureum: ita quoque venena ad duo genera, quorum unum ex salino, alterum ex sulphureo elemento operatur, reduci possunt. Deinceps sicuti duæ motuum vitalium in solidis partibus sunt species, constriction & dilatatio, quarum beneficio omnis fluidorum progressus cum utilissimis secretionibus & excretionibus & omnium functionum œconomia perficitur: ita animadvertimus, venena acriora caustica agere in solidas partes, quas ad constrictionem vehementissimam, quam spasmus Græci dicunt, sollicitant. Quæ vero sulphure vaporoso inimico imbuta sunt, ea nimiam in vasis diastolen producant; atque adeo utroque modo vitales conservatorii motus destruantur.

§. XIX.

Quæ tenuissimo sale caustico in universum genus nervosum illud in consensum trahendo agunt, &
violenti-

violentioribus spasminis universam motuum vitalium œconomiam perturbant atque evertunt, inter ea ex vegetabilium classe maxime cicuta & napelli species eminent; inter purgantia vero aciora illa draffica, quæ a colocynthide, elaterio, esula, helleboro albo proficiscuntur, præcipuum locum obtinent; ex mineralibus antimoniatæ emetica, mercurius corrosivus redditus & arsenici factitii tres species virulenta vehementia omnibus anteferri debent. Horum vero operandi modus ita se habet: Quamprimum intra corpus sumpta fuerunt, subtilissima, qua pollent, acrimonia poris ventriculi, qui maxime nervosus est, & ob id cum universo systemate nervorum consensum habet, altius sese insinuant, & hostili fibrarum nervearum irritatione atque erosione, non modo in ventriculo & intestinis, sed & in remotis partibus, subtiliori sensu & motu exquisitiori præditis, spasmos concitant, unde gravissimorum symptomatum fit origo, quæ omnes motus & functiones corporis nostri secundum naturam plane destruant. Nam singula hæc recensita venenorum genera in ventriculo ingentes anxietates cardialgicas, nauseam, vomitiones, in intestinis tormina atrocissima, diarrhoeas vel etiam alvum contumacissime clausam efficiunt. In thorace & diaphragmatis musculis singultum, constrictiones thoracis vehementes, angustiam spirandi, & summam præcordiorum anxietatem inducunt. Ad cordis vero musculos eorum pernicialis vis delata languorem omnium virium, syncopen cardiacam cum extremorum frigore & sudore frigido, vel debilem & celerem pulsum planeque intermittentem causatur. Si vero ad cerebrum ejusque nervos & membranas venenata illa vis pertingit, tunc convulsiones, epilepsiæ, inquietudines & deliria se manifestant, quæ tandem lethiferam vitam catastrophem inducunt. Hæc sunt solennia & ordinaria illa symptomata, quæ si non omnia, tamen pleraque venena jam dicta interius sumpta proferunt. Cadavera si dissecantur, hæc insolita conspectui sese objiciunt. Primo ordinario totum abdomen ab intestinorum toto volumine flatibus nimium distento valde tumidum apparet, & externa cutis, præsertim in dorso ac pedibus, amplissimis maculis ex livido nigris obsita est; in ventriculo ut plurimum gravis residet inflammatio, vel maculae purpureæ aut nigrae cum frequenti erosione, imo perforatione, conspiciuntur; interdum etiam liquamen nigrum fœtidum in eo reperitur, intestina hinc inde inflammata vel maculis purpureis aut nigris, erosionibus quoque manifestis in certis locis obsitæ videntur. In thorace sanguis in ventriculis, præsertim dextro, cordis coagulatus & feri in pericardio copia in conspectum veniunt; sique mors cito inducitur, reliqua viscera plerumque sunt sana ac salva. Si vero symptomata longius ad aliquos dies infestant, quod interdum vidimus ab improvide absumentis purgantibus & emeticis, viscera illa sanguinea, lien præsertim & pulmones, in sphacelosam corruptionem abeunt.

§. XX.

Alia vero & differens quodammodo est operatio eorum venenorum, quæ narcotica dicuntur, cujus generis sunt stramonii, solani, hyoscyami species; quorum etiam spectat succus ille papaveris Asiatici opium, licet mitiori gradu operetur. Hæc majori in dosi adsumpta nauseam & conatus ad vomendum faciunt, torporem & stuporem sensuum tam externorum quam internorum, atque soporem gravem inferunt, dementiam quoque cum oblivione provocant. Spectant huc quoque cocculæ Orientales, vulgo *schärner / Zoufärner* / item furnus carbonum ac-

cenorum angusto conclavi inclusus. Neque minus coronæ imperialis vel etiam croci copiosior & concentratior diutius corpori inhærens vapor venenatus est. Homo atrocitate horum symptomatum si extinctus fuerit, in dissectione non modo ventriculus, sed meninges maxime inflammatae apparent, & vasa, quæ ad cerebrum & caput tendunt, sanguine turgida & distenta conspiciuntur. Quemadmodum vero acria venena spasmo necant motus violentos inducendo, ita narcotica vapore sulphureo graveolenti sanguini commixta non modo vasa arteriosa cerebri tam fortiter expandunt, ut systole eorum sive contractio ad ulteriorem sanguinis progressum valde necessaria pereat, sed & eorum vapor hostilis, alias in nervosas & membranosas partes penetrans, fluidum illud tenuissimum, quod ibi continetur, penitus contaminat, quia naturæ fluidi, quod robur, tonum, motum & sensum partibus fœnerat, plane est adversum.

§. XXI.

Perspectis itaque truculentis illis, quæ venena inferunt, symptomatibus, sequitur jam, ut etiam tam subitæ mortis ab illis illatæ genuinas causas indagemus. Certe non sola illa inflammatoria stasis sanguinis in ventriculo & intestinis cum maculis vel etiam erosionibus tam subitæ inferendæ morti sufficere mihi videtur; quandoquidem notum est, quod inflammatio, imo erosio atque exulceratio ventriculi & intestinorum satis diu sæpius adfligere soleant; hinc aliam certe tam repentinæ necis causam subesse rectissime concluditur. Nos vehementes spasticas nervosi & membranosi generis in universo corpore constrictiones, quas acerrimæ indolis venena concitant, pro vera causa subitanei interitus agnoscimus, quibus fluidi nervi & tenuioris sanguinis in organa motuum & sensuum influxus, quo cessante omne robur, tonus, & motus partium perit, partim interceptitur, partim etiam ad alia loca majori copia impellitur. Idem contingit a narcoticis venenis adsumtis, quibus non modo fluidi nervei in organa sensuum & motuum influxus, sed & sanguinis circuitus ob nimiam vasorum distensionem impeditur. Inflammationes igitur & exesiones, quæ in ventriculo & primis viis reperiuntur, tantummodo signum certissimum præbent de ejusmodi rebus adsumtis, quæ erodente & caustica facultate præditæ sunt, & quæ spasticam stricturam istis partibus induxerunt, quibus effectum est, ut sanguinis liber progressus interceptus ejusmodi stasibus inflammatoriis & sphacelationibus occasionem subministraverit.

§. XXII.

Ad ejusmodi itaque spasmos producendos, qui universum genus nervosum ac membranosum afficiunt, utique non sufficiunt talia acria & caustica, quæ crassioris texturæ & fixioris naturæ sunt, utpote quorum actio & irritatio non ultra primas vias sese extendit. Hinc nec spiritus minerales concentrati, spiritus nitri, aqua fortis, spiritus vitrioli, unquam tam subitos & lethales effectus relinquunt. Et simplicia satis acria, ut zingiber, piper, folia vel radices ari in ingenti copia sumpta non aliam ventriculo, quam ardoris quandam molestiam exhibent. Quapropter necesse est, ut illa acrimonia caustica, qua venena agunt, sit summæ penetrantiæ & activitatis, qua in omnes nervosas partes se altius insinuare possit, in qua vera mihi natura & indoles veneni consistere videtur. Qua de causa etiam non adeo magna moles ad funestos effectus requiritur.

§. XXIII.

§. XXIII.

Plura vero sunt, quæ tenuissimam & plane suspendam exiguitatem partium hostilium, quibus venena agunt, egregie ac manifesto declarant. Ab hac enim mira tenuitate illud proficiscitur, quod vera venena non solum interne, sed & exterius tantum corporis nostri partibus, præsertim prius sauciatis, applicata, si non lethalia, valde tamen truculenta symptomata inferant. De istibus insectorum ira pericitorum, ut scorpium, tarantulæ, viperæ, & moribus canis, vulpis vel lupi rabidi res notissima est. Venena quoque vegetabilium exterius applicata perniciosam suam in exteriora corporis nostri vim exerant. Ita scribunt CÆSALPINUS in *tract. de venenis* pag. 141. SCHOLZIUS in *Epist. med.* pag. 139. & CRATO *Lib. II. pag. 227. ad Th. Jordanum* de succo hellebori albi, quod hoc ipso Hispani venatores tela illinant & venenata reddant, unde herbam palæstricam vocant. Ab helleboro albo fonticulis indito JOH. BAPT. DU HAMEL *de corp. affect. ventriculi* subversionem notavit. Tanta quoque aconiti carulei sive napelli vis est, ut eo telorum mucrones imbuti lethalem vulneratis noxam adferant. vid. DODONÆUS *Lib. 3. de purg. herb. hist. c. 12. & stirp. hist. l. c.* C. GESNER *de lunar. herb. pag. 77.* THOM. JORDANUS in *Luis novæ in Morav. exors. Descript.* p. 76. HIER. CAPIVACC. *Præst. Med. L. VII. c. 7.* A napello in manibus detento anxietates præcordiorum, debilitatem, & animi deliquia secuta esse referunt *Misc. Nat. Curios. Dec. III. A. IX. & X. obs. 92.* Cicuta exterius si improvide usurpetur, testibus BORELLO *Cent. II. obs. 3.* & SIM. PAULLI *Quadrip. Botan. class. III.* pernicialia symptomata concitat. Ranunculus hortensis flore pleno miniato omnis quidem odoris expers est, spargit tamen de se virulenta effluvia, præsertim si naribus admoveatur, unde angustias præcordiorum, capitis dolores & vomitus ortos fuisse legitur in *Misc. Nat. Curios. Dec. III. A. IX. & X. obs. 92.*

§. XXIV.

Et quod vitæ inimica non modo his dictis, sed & purgantibus acrioribus vis insit, vel ex eo colligendum, quia hæc exterius applicata pediculis enecandis aptissima sunt, quod etiam de tabaco valet, cujus oleum ad guttas tantum aliquot instillatum vulneratæ parti felis, juxta experimenta BORELLI in *Tr. de motu animalium*, eam in convulsiones lethales conjicit. Insignem vero purgantibus acrioribus ineffe particularum causticarum tenuitatem, vel ex eo satis abundeque apparet, quod exterius paribus applicata vesicas excitant, & ventri imposita alvum aperiant, ac interius data corporis succos nutritios, ipsam etiam lac, dum infantes lactentes purgat, subtilissimis suis particulis imprægnant. Hinc quoque petenda est ratio, quare purgantia animalium venis infusa purgent, & quare gummi guttæ in pluviali aqua solutum & infusum venæ canis ad drachmas sex, experimento HEYDE *obs. 90.* statim motus convulsivos excitaverit.

§. XXV.

Incredibilis vero illa partium sulphurearum, quæ narcotica operantur, subtilitas extra omnem dubitationem posita est, dum hæc ipsa capiti & temporibus applicata non modo torporem & stuporem inferunt, sed & enormes vomitus cohibent. Atque hæc mirabilis partium, qua venena agunt, tenuitas, non tantum in vegetabilibus, sed etiam in mineralibus animadvertitur. De noxa arsenici loco errhini in nares attracti vide *Miscell. Nat. Curios. Dec. III. A. X.*

p. 391. Et quod arsenicum externis adplicatum in cancriosis ulceribus febrem, deliria, convulsiones excitaverit, aliquot observationibus HILDANUS *Cent. VI. obs. 80. & 81.* confirmat. Cujus experientiæ CL. WEPPIERUS in *tr. de cicuta aquatica* pag. 281. adimplatur, qui ab arsenico capiti inuncto cum butyro febrem, deliria, vigiliam, syncopem, atque totius capitis intumescientiam & mortem ipsam annotavit.

§. XXVI.

Quam periculosa symptomata ab inunctione mercurialium proficiscantur, complures historiæ & observationes id satis luculenter evincunt, cujus rei notata exempla profert HILDANUS *Cent. III. obs. 92.* cum a mercurio vivo vel ejus pulvere ulceribus insperso, corpora tenella protinus de dolore dentium & gingivarum inflatione conquesta fuerunt. Idem alio casu ab inunctione mercurii vivi mortem secutam commemorat. Et BORELLUS *Cent. II. obs. 92.* testatur, aquam mercurii sublimati in scabie exterius usurpatam paulo post lipothymiam excitasse.

§. XXVII.

Uterius, quod omnia valentiora ex purgantibus & ex venenorum classe desumpta ob summam partium teneritudinem vim suam exitialem exerant, inter alia hoc potest esse insigni documento, quod omnia illa drastica tam sale caustico acri quem sulphure graveolenti prædita, ut napellus, cicuta, hyoscyamus, asarum, tabacum, opium, helleborus albus, esula, scammonium, diuturniori cum aqua coctione deposita virulenta sua vi mitiora evadant. Neque id tantum de valentissimis, sed & de iis, quæ laxativa vocantur, ut sunt aloe, rhabarbarum, folia sennæ, valere, experientia edocti sumus, quorum virtus laxans longiori coctione valde imminuitur. At vero mirum est, eam coctionis vim esse, ut vehementiora ex mineralium familia petita mitiora quoque reddat, sicuti id non semel, sed iterum atque iterum observavimus in præparatione tartari emetici, si crocus metallorum cum tartaro crudo nimis diu coquatur, vim ejus emeticam valde castrari atque imminui. Præterea ex jam dictis liquidissime jam patebit ratio, quare venena insectorum & animantium, neque minus cicuta & aconitum in regionibus calidioribus Græciæ & Italiæ magis nocentis & virulentioris sint indolis, quam in regionibus frigidioribus, ubi nulla vel perpauca animantia venenata conspiciuntur.

§. XXVIII.

Investigato sic agendi principio eorum corporum, quæ in parva dosi lethales in animantibus effectus proferunt, non amplius in difficili positum erit venenorum, cujuscunque etiam generis fuerint, convenientia antidota & præstantissimæ virtutis adversus ea præsidia exquirere, quæ non modo experientia, sed etiam ratione certa cognoscenda sunt. Quemadmodum enim causa, qua agunt venena, jam manifesta est, quæ in summa partium hostilium tenuitate consistit: ita etiam rationi non amplius occulta esse queunt remedia, quæ venenis cum fructu opponi possunt; qualia sunt, quæ facultate pollent partium deleteriarum subtilitatem infringendi, figendi & temperandi. Hæc vero duo sunt, nempe acida, & pingua mucilaginosa, quæ crasso suo acramoso contextu minimas acies & spicula caustica venenorum involvunt, obtundunt, & virtute sua irritandi & erodendi privant. Et ut rem apertius exprimamus, duo maxime sunt simplicia eaque domestica, ubivis obvia & omnibus nota, quibus benignissimus naturæ parens tam mirabilem facultatem indidit,

indidit, ut nocentissimam venenorum vim domare ac expugnare quam felicissime possint. Sunt hæc acetum, & omne animantium lac, quæ duo eximia venenorum antidota ipsa quoque veneranda antiquitas jamdudum agnovit; nam adversus ictum insectorum, imprimis aspidis, acetum bibendum suaserunt, ut perhibet CELSUS *lib. V. cap. XXVII.*, ubi meminit cujusdam pueri, qui, cum ab aspide ictus, partim ob ipsum vulnus, partim ob immodicos æstus siti premeretur, ac locis ficcis alium humorem non haberet, acetum, quod forte secum habebat, ebibit, & liberatus est. Super vulnera quoque a scorpionibus vel phalangis inflicta furfures ex aceto vel ruta sylvatica non sine utentium fructu imposuerunt. vid. idem CELSUS *l. c.* Præter acetum vero vinum quoque pro magno alexipharmaco veteres habuerunt, hinc adversus cicutam vini calidi quamplurimum ingerendum esse statuerunt. Et PLUTARCHUS in *Sympos. pag. 653.* hæc prodidit: *post cicutam si bibas vinum, veneni vires retundit.* Rabiosi enim canis morsus olim meraco vino curabatur, quia omnibus venenis, uti scribit CELSUS *l. c.* contrarium est. Et PHILIPPUS GUIBERTUS *de tuenda valetudine Cap. III.* vinum venenorum omnium longe certius antidotum fictitio lapide bezoardico adpellat. Neque ignotum est, quod ad pestis præservationem hoc ipso nihil præsentius unquam repertum fuerit. Nul- lum quoque est dubium, quin vinum propter subtile acidum admixtum præstantissimam hanc virtutem possideat. Hinc etiam ipsum acetum vini omnibus malignis morbis ipsique pesti insigniter resistit, ut constans eorum, qui accurate & solide de pestilentia scripserunt, est sententia. Atque ob hoc acidum coagulans succus citri, spiritus vitrioli & famigeratissima mixtura simplex in peste & omnibus malignis contagio infectis morbis reliquis facile palmam præripiunt. Neque ullum datur simplex; quod purgantium acrimoniæ causticæ refrænandæ magis idoneum sit, quam acidum, unde helleborus albus in aceto maceratus mitescit. Fumo sulphuris scammonium, quod tithymali succus est, longe mitius evadit. Sagittas succo hellebori albi infectas, si cydoniorum succo tangantur, omnem lædendi facultatem amittere, auctor est SCHOLZIUS *loc. cit.* Præterea acida resistunt quoque iis; quæ narcosi vim & vitæ & menti inferunt. Ita ejusmodi in casibus aceto fortiter rutaceo interne, & externe usurpato nihil est præstantius. Et *Miscell. Curios. Dec. III. A. IX. & X. obs. 92.* acetum forte in ore detentum adversus solani vim deleteriam commendant. Nos tamen ad aver-tendum summum illud periculum, quod ab ejusmodi narcoticis certo imminet, omnibus aliis emetica, utpote quæ simul & semel infensum illud venenum ejiciunt, præferri debere existimamus.

§. XXIX.

Ad acrimoniam vero causticam venenatam, qua arsenicalia, antimonialia, mercurialia, purgantia aciora & reliqua omnia ex regno minerali perniciose agunt, infringendam lac majori in quantitate epotum, præsertim butyrosus commendamus, quippe quo ejusmodi in casibus nihil aut præsentius aut efficacius natura suppeditat. Perquam notatu dignus aliquot abhinc annis hic obtigit casus. ubi tredecim ex nobilibus studiosi in juscule avenaceo arsenicum crystallinum cum saccharo mixtum in prandio inficii adsumserunt, omnesque & singuli truculenta symptomata, ventris tormenta & vomitus experti fuerunt. D. Præses advocatus solo lactis cum oleo olivarum usu benedicente Deo eos restituit & morte liberavit. Tandiu autem lactis usus continuatus est, usque dum non amplius vomitu fuit rejectum. Ita

etiam solo lactis usu largiori hypercathartes & gravissima symptomata partim ex errore, partim ex imprudentia medicastro- rum a purgantibus validioribus & vomitoriis datis inducta felicissime & curavimus & avertimus. Neque hic immerito improbamus eam methodum, qua nonnulli theriacalibus & opiatibus medicinis nimios vomitus vel purgationes sistere vel compescere solent, ubi quidem dolores & spasmi fi- stuntur, vis tamen illa pernicialis caustica in corpore remanet, quæ nunquam non est detrimentosa. Lactis vero usus adversus venena summe proficius etiam veteribus, maxime DIOSCORIDI, ut patet ex ejus *Lib. VI. de venenis*, jam tum cognitus perspe- ctusque fuit.

§. XXX.

Neque vero hoc loco intermittere possumus, quin mentionem faciamus erroris nostris adhuc temporibus solennis, dum arsenici crystallini præstantissimum antidotum crystallum fossile censetur in tenuissimum pulverem contritum & drachmæ pondere adsumtum. Hujus remedii primam mentionem facit MATTHIOLUS *Comment. in Dioscorid. Cap. 29. Lib. VI.* Id quod deinde CRATO in scriptis suis sæpius repetit atque commendat. Eamque ob causam, nempe propter deliniendam acrimoniam, idem autor in morbo cholero hoc ceu specificum laudat, cum tamen neque ad acidum & acres humores imbibendos, multo minus ad arsenici virulentiam mitigandam quicquam laude dignum perficiat.

§. XXXI.

Perspectis sic paulo interius venenorum indole, proprietatibus & viribus, modoque & principio agendi, sequitur jam, ut quænam certa & infallibilia propinati vel sumti veneni cujusdam indicia haberi possint, aliquanto majori cum cura exponamus. Accuratori enim indagine utique hæc digna nobis videtur tractatio, quia in foro sæpiissime contingit, ut Medici vel collegia medica de veneno dato vel sumto judicia ferre debeant, quibus deinde Jurisperiti, plerumque in hisce rebus plane rudes, suam sententiam firmiter atque unice superstruunt. Commendari hic meretur AMMIANI MARCELLINI dictum: *de vita & spiritu hominis laturum sententiam diu multumque cunctari oportet, nec præcipiti studio, ubi irrevocabile factum est, agitari.* Optandum foret, ut hoc saluberrimum Marcellini monitum & Medici in proferendis sententiis circa vitam hominis rectius pensitarent; tunc enim non tot tantæque hallucinationes in artis opprobrium occurrerent. Brevissimis itaque de iis, quæ necessaria sint, veneni hausti indiciis, & quæ minus sufficiant, nostram sententiam pronuntiabimus. Primo enim, ut ut omnis fere generis venena intus sumta pernicialem suam vim plerumque testante id experientia in ventriculum ac intestina exserant, eas partes inflammando, sphacelando, erodendo; quamvis etiam fere in omnibus, qui venenis interemti fuerunt, abdominis partes valde intumescant, & externæ partes livido & nigro colore obductæ conspiciantur; tamen nec ex hisce singulis neque etiam conjunctis certa veneni indicia haberi possunt; siquidem ab humoribus corrosivis & corruptis intus genitis eadem in ventriculo ac intestinis phænomena, quæ ab adsumto veneno proveniunt, observantur. Perite hanc in rem SENNERTUS *Lib. II. Instit. Med. Part. II. Cap. XII.* æque cito interimuntur homines ab humoribus, qui generantur in corpore nostro, atque illi, qui necantur a veneno lethali. Sicut enim venena adsumta gravia symptomata afferunt, dolores, lipothymias, demencias, & infinita alia. Sic quoque humores

res pravi in corpore nostro geniti (i. e. insigniter putridi, peculiariter corrupti, vel alia quavis maligna & occulta qualitate præditi): & similia, imo majora his inducunt. Et quod a bile subita mors cum maximis præcordiorum anxietatibus & sanguinis vomitu accersi possit, historiam proponit WEPFERUS in *Lib. de cicut. aquat. p. 186.*, ubi aperto abdomine ventriculi dorsum & pylorus admodum fuit infectus bile ex vesica eo transudante, a qua etiam pylori fibræ corrosæ & ventriculus flatu distentus mirum tumebat, & intestina tenuia duodenum & ilcon quatuor in locis rubicunda & inflammata reperta fuerunt. Graves inflammationes & sphacelationes ventriculi & intestinorum non modo in iis, qui cholericæ, iliaca passione & ardentibus febribus defunguntur, conspici, sed & has partes inflammatas in iis, qui variolis, morbillis, purpura moriuntur, reperiri, nos sapissime facta dissectione cadaverum observavimus. Sique cum attentione historias anatomico-præcticas perlegamus, liquidissime apparebit, in compluribus, qui ex morbo acuto vel etiam phthisi, asthma convulsivo & hæctica moriuntur, inflammatas, imo erosas has partes deprehendemus. Et licet etiam maculæ exterioris cutis & intumescencia corporis cum ejusmodi inflammationibus internarum partium concurrant, neutiquam tamen exinde quoque adsumti veneni certum indicium promendum est. Recte enim AMMANNUS in *Irenico* scribit: quod concernit maculas post mortem lividas & purpureas in toto corpore, eæ quoque frequentius in subjectis cachecticis, scorbuticis, imo & plethoricis, præsertim si morte subitanea corripuntur, conspectui se sistunt, quatenus scilicet copiosa materia peccans vi caloris, etiam post mortem supersit, a centro ad circumferentiam corporis movetur. Et in *praxi vuln. lethalium* idem AMMANNUS *Dec. IV. Hist. IV. intumescencia ventris*, inquit, non est signum infallibile adsumti vel propinati veneni. Et pag. 259. *Signa externa nil testantur præcise de propinato vel adsumto veneno.* At vero si notabilis hæc occurrit circumstantia, quod suspecta quædam, minus fere cognita, v. gr. in pulverem redacta materia in iis locis ventriculi & intestinorum hæreat, quæ inflammata vel erosa sunt, in ceteris vero non, tunc majoris utique momenti incidit quæstio, annon magna suspicio veneni dati moveri queat. Verum enim vero & hic aperte negamus, nisi jam certissime & de hujus materiæ venenata indole constet, ex hac circumstantia certam dati veneni suspensionem haberi posse; nam pulvis loco medicamenti innoxius datus in ejusmodi partibus, quæ ob corruptionem omni robore, tono & motu propulsorio destitutæ sunt, facile & firmiter ibi inhærescere posset. Potius itaque suspensiones veneni dati hæ sunt, si quis antea sanus & bene valens a quadam re adsumpta brevi tempore de anxietate præcordiorum, ardore, intolerabili dolore & cruciatu abdominis intenso, vomitu & conatu ad vomendum conqueritur, omniaque adsumenda respuit, si postea convulsiones superveniunt, & homo subito moritur. Si deinde corpore dissecto inflammatio, sphacelatio, & corruptio in ventriculo deprehenditur, neque alia causa, v. g. vermis visitur, non sine ratione increpescit & firmatur hæc suspicio. Nam proprietates & characteres omnium venenorum acrium & causticorum hi sunt, ut celerrime gravissima symptomata, & maxime omnium vomitus, summas anxietates cum sudore frigido, pulsu intercepto, & intolerabiles dolores inferant. Hæc si non adfuerint, plane non cogitandum est de ullius veneni præsentia aut periculo ab eo accepto. Certissimum vero præter hæc jam dicta indicium est, si corpus adfuerit delicti, vel si illud jam in ventriculo & intestinis re-

Frid. Hoffmanni Oper. Supplæm. II.

periat, vel certum sit, quod ejusmodi materia virulenta propinata sit. Non parum vero etiam hic refert, varia illa ingesta, & quæ in ventriculo & intestinorum sinu post dissectionem reperiuntur, recte examinare. Et quicumque in physica & chymia experimentalis non est versatus, ab eo etiam certum & indubitatum judicium non erit expectandum.

§. XXXII.

Quamvis vero plurima veneficia perpetrentur nostris temporibus cum arsenico, tamen quum ejus proprietates superius satis detectæ sint, nolumus jam in iis repetendis esse longiores. Evenit vero interdum, ut casu stupefactivo & amentiam inferente veneno quidam necentur: tunc nobis non alia suppetunt indicia, quam si subita in homine sano dementia cum stupiditate & omnium rerum oblivione, aut ingens somnolentia cum anxietate, vomitu, singultu, convulsionibus & paralyfi superveniat. Ex purgantibus vero & emeticis acrioribus imprudenter ægrotantibus exhibitis mortem insecutam fuisse, ex eo apparet, si ante adsumptionem æger satis adhuc bene se habuerit; deinde statim de horrendis anxietatibus, ardore interno, conatu ad vomendum conqueratur, postea vero mentis alienatio & convulsiones accedant, & dissectis denique corporibus ventriculi & intestinorum partes inflammatae, erosæ & etiam sphacelatae aut maculis purpureis obsessæ deprehendantur.

§. XXXIII.

Tandem circa venenorum operationem illud adhuc tenendum esse arbitror, quod pro diversitate corporum non secus ac alia activorum medicamentorum genera diversos effectus producant, dum vel major vel minor veneni dosis, si corpora vel robusta vel imbecillia, valetudinaria & jam morbida sint, ad necem inferendam requiratur, in quibusdam etiam citius, in aliis tardius vim suam exitialem exercent, & symptomata etiam in quibusdam quodammodo differentia producant.

§. XXXIV.

Denique etiam nostra exponenda erit sententia de venenis lentis, quæ nempe lento gradu operantur, & tempus requirunt summam corpori perniciem inferendi; num ejusmodi dentur, & quomodo judicari debeant. Galli propter abominandum eorum usum ejusmodi venena *la poudre de la succession* appellant. De horum existentia diu multumque inter rerum physicarum & medicarum peritos dubitatum fuit, cum nullæ res hac virtute conspicuæ cognitæ sint. Verum enim vero quisquis paulo sollicitius causas vitæ nostræ & sanitatis considerat, quod nempe illæ in libero fluidorum per angustissima & capillaria vasa progressu potissimum sitæ sint, is perquam facile perspiciet, multas dari in rerum natura exitiosas & vitæ ac sanitati insidiosas res, quarum frequentiori usu non potest non ea in extremum periculum adduci. Et talia sunt nostro quidem judicio illa pessimæ indolis & virtutis adstringentia, præsertim ex minerali regno, quorum virtus constans est, eo quod eorum textura difficulter ab alio immutari potest. Et ut brevibus nos expediamus, ejusmodi lenta venena ex plumbo præparari posse persuasissimi sumus. Quam nociva vis, quæ a constrictione partium nervosarum maxime petenda est, saturninis insit, symptomata illa, quæ plumbum intus adsumtum insequi solent, id satis superque declarant, maximeque omnium suo exemplo docent metallurgi, qui mineras saturninas tractant, urunt,

fundunt, ponderant, dum a fumo ad intestina descendente non statim, sed successive in alvi adstrictiones pertinaces, asthma sicca & convulsiva, artuum paralyse, contracturas, colicam spasmodicam incidunt. Quidam ut umbræ hominum apparent, elumbes, pendulis artubus & resolutis enervati; qualia symptomata etiam illi experti fuerunt, qui vina Neccarina ante aliquot annos lithargyrio injecto adulterata biberunt, quemadmodum *Miscell. Curios. Dec. III. A. IV. obs. 30.* id confirmant. Quae de causa non sine ratione CELSUS *Lib. V. cap. 27. p. 1314.*, item CÆSALPINUS *Lib. III. c. 24.* cerussam & lithargyrium venenis accensent, & jam prolata symptomata ab iis inducta notarunt. Hinc SCRIBONIUS LARGUS *de compositione medicamentorum*, oleum, lac cum melle, cremorem pisanæ suadet iis, qui cerussam potarunt. Nullum hinc dubium

est, quin saturninis pulveribus, qui acido primarum viarum solvuntur, homines in tantam perniciem conjici possint, qua tandem ipsis pereundum est. Et quo horum corporum operatio magis successive & lente fit, & hæc ipsa omni sapore carent, hoc difficilius cognoscuntur ac dijudicantur, & eo pestilentiori dolo ac fraude administrantur. Nihilominus tamen, si homo perfecte sanus ac vegetus, nulloque morbo antea corruptus, vel alia adstringente medicina imprudenter tractatus, citra omnem causam manifestam in ejusmodi incidit symptomata, quæ saturninis quasi propria sunt, non immerito de iisdem adsumptis suspicio crescere poterit, præsertim aliis circumstantiis concurrentibus. Sed quia pagina nos destituit, coronidem auspicatam imponimus huic dissertationi.



DISSERTATIO MEDICA

D E

CAUTA ET CIRCUMSPECTA VENENI DATI ACCUSATIONE.

Primum edita Anno 1734.

P R O O E M I U M.



INTER tot vias, quibus humanum genus ad vitæ exitum ducitur, haud infrequenter & illa teritur, quæ florentissimam sanitatem per venena aut incaute sumpta, aut malitiose propinata, aut denique ab hominibus de salute sua desperantibus, inconsulta moriendi voluntate, sponte hausta in perniciem præcipitat. Incidunt vero sæpe casus, ubi veneficii suspitione exorta, Medico, super tali quæstione consulto, non minimum existimationis suæ rectæque conscientiæ periculum imminet, si judicio temere lato vel innocentibus molestias inextricabiles creat, vel nocentes promeritæ pœnæ subducit. Utrumque enim fieri potest, ac plerumque solet, pro eo, ac Medico visum fuit de præsentī, quod incidit, negotio ferendum esse judicium. Et quamquam raro unius, qui primum rogatus sententiam dixit, arbitrio tota causa permittitur, sed antequam gravior sententia feratur, ad integra collegia cognitio illa deferatur: satis tamen multum molestiæ, tædiorum & impensarum interea creari illis potest, qui suspicionibus inique gravati fuerunt: a quibus deinde tanto certius indignatio & lites infinitæ originem ducunt certissimam. Atque hoc ita accidere solere satis multis compertum est exemplis: plenique eorum sunt omnes libri celeberrimorum virorum, qui de medicina forensi commentarios ediderunt, aut collegiorum medicorum responsa cum publico communicaverunt. Aliqui enim venenum datum accusaverunt, ubi compertum fuit nullum exterius accessisse, sed causas in corpore præsentēs cum rerum, quæ vocari solent non-naturales, singulari concursu damnum & exitum attulisse; alii nomine suo indicarunt venenum, quod tale esse neutiquam probare potuerunt, sed patrum narrationibus crediderunt. Quæ quum ita sint, facile sane cognoscitur, quam multum intersit in hoc negotio haud obiter versari, sed omnes ingenii judicii vires intendere, ut veram, certam, matureque exploratam proferamus sententiam. Sentio autem quantum onus, majus certe quam pro viribus, humeris meis imposuerim, qui de argumento tam difficili differere aggressus sum. Enim vero non

vaca-

vacarem culpa arrogantiae, si vel ipsemet sponte hoc argumentum elegissem, vel electum atque pro viribus elaboratum ita proponerem tanquam erudiendis aliis inserviturum. Nam quum Illustr. Dn. PRÆSIDIS consilium de eligendo dissertationis argumento expetivissem, isque mihi hoc commendaret; nec volui nec debui subterfugere auctoritatem Patroni ac Promotoris omni pietate colendi: præsertim quum bene perspicerem, quantum mihi emolumentum allatura esset industria omnibus huc quidem pertinentibus relegendis considerandisque impendenda: & illud insuper cogitarem, sperari ab æquo quovis lectore recta cum ratione posse, ut veniam tribuat scriptioni, quæ non alio quam tentaminis ac speciminis nomine in publicum emittitur. Idque ut mihi eveniat, ea, qua decet, modestia rogo atque contendo.

§. I.

Venenum usque adeo sæpe multumque in ore hominum frequentatur, inque doctorum libris legitur, ut vix videatur ulla declaratione indigere. Veteres, ut ex ARISTOTELE *problem. I. 47.* discimus, assumpta omnia in tres ordines redegerunt, quorum primo continentur, quæ vinci a ventriculi actione & mensuris possunt, ceduntque in *alimentum*: altero, quæ vel plane non vincuntur, vel aliqua tantum parte sui, qua corpus alterant, id est præsentem ejus statum mutant, sicque fiunt *medicamentum*, si gnari artificis manu tempestive & debita lege exhibentur: tertio, quæ cum eo, quod vinci nequeunt, possident vires corruptivas, atque parva etiam quantitate ingesta necem inferunt; *δαρτηρόφα, venena, deleteria* appellantur. Atque hæc veneni notio plurimis satis recte convenit, præsertim illis, quæ inter nos frequentius occurrunt, atque Medico occasionem præbent, judici sententiam suam requirenti, ex artis medicæ principiis respondendi. Quodsi vero totam rem accuratius intuemur, ad omnem venenorum speciem denotandam nondum satis adæquata est, quum nostra ætate ars perniciofa veneficiorum magis exulta sit, ut non solum talia exhibere solent, quæ lentam mortem inferunt, verum etiam, quæ ore non recipiuntur, sed ipso halitu excepta, aut per nudum contactum, perniciem inferre valent, ut nullo fere pacto sensibus exhiberi possint, adeoque nec fieri queat, ut, quod vocant, & in foro desideratur, corpus delicti, sectionis imperatæ subsidio eruatur & exhibeatur.

§. II.

Accusationis vocabulum ita posuimus, ut nativo & etymologico suo sensu valet, tanquam causæ vel culpæ collatio. Ut si judex, vel quicumque alius, cujus scire interest, a Medico quærat, cujus rei culpa vel causa factum existimet, ut hic vel ille tam male habuerit, aut mortem oppetierit, isque deprehensam a se causam indicet, accusasse illud, quod causam denotavit, vulgari sermone recte dicitur. Parum itaque solliciti sumus de acceptione forensi vocabulorum *accusator, accusatio*: quippe quæ a juris peritis petenda esse constat. Quum vero haud raro accadat, ut minus circumspecti & in judicio ferendo cauti hic aberrant, sibi & aliis molestiam creent, datum fuisse venenum & ab hoc orta mala symptomata & mortem consequutam, pronuntiando, ubi nullum tamen datum fuit: aut in denominatione illius, quod vere datum fuit, subinde aberretur: hinc cautam & circumspectam esse debere hanc accusationem facile intelligitur.

§. III.

Quando percurrimus historiarum medicarum monumenta, vitamque etiam communem consulimus, venenati homines occurrunt, qui inscii venenum assumerunt, quod nunquam degustaturi fuissent, si id cognovissent: alii, qui malesuada desperatione compulsi, ut vitæ finem invenirent, scientes volentesque noxiam deleteriamque rem ebiberunt, vel quocunque alio modo in viscera sua dimiserunt: rursusque alii, qui vel ob ætatis imbecillitatem, vel ebrietatem, vel denique delirium animi vires pervertens sibi ipsis attendere non valent, adeoque prioribus in eo quidem similes sunt, quod ignari admiserunt venenum, dissimiles tamen, quod certum quid de vitæ suæ rationibus respondere medico omnes circumstantias requirenti nequeunt. Placuit ita qualiscunque ordinis causa dividere subjecta, quo magis distincte de tota re differere liceat.

§. IV.

Si itaque obveniat homo, qui, quum ante paucas horas optime valuisset, post assumptum cibum potumque pessime habere cœpit, animo angi, cardialgia vehementissima vexari, vomiturire, mox anxie vomere, circa pectus constringi, sudore frigido perfundi, ardore faucium torqueri, siti immodica & torminosis dejectionibus excruciar: Medico tunc ad opem ferendam vocato suspicio non oriri non potest, vehementem aliquam subesse debere causam, quæ optimæ aut saltem inculpatae valetudinis prægressæ statum simul ac semel adeo labefactavit. Quærere itaque ante omnia debet, quali victu potuque usus sit, & solusne cibum assumerit, an plures in eadem mensa convivas habuerit. Nam si plures eodem victu usi eadem pati deprehenduntur, vix dubium superest, fuisse aliquid vel cibis vel potui communibus immixtum, quod tam vehementes læsiones pluribus simul ac semel intulit. Hoc intellecto examinentur singula, quæ a cibis potibusque apposis supersunt, inspicianturque vasa, quibus vel apparatus vel indita fuerunt. Vix poterit fieri, quin solers Medicus hac viâ tandem deprehendat malorum originem, & ad medendi justas vias deducatur. Atque tali ratione Illustris Dom. PRÆSES usus est quum ante multos annos in hac Academia factum esset, ut nobilissimi convictores complures incuria quadam coquæ in magnum periculum adducerentur non exigua arsenici in pollinem comminuti quantitate juscule immissa pro saccharo: de quo videatur *Medicin. consultat. tom. I. p. 35. & 251.*

§. V.

Leguntur complura hujus generis exempla integrarum familiarum a pastu simul pessime mulctatarum,

rum, ex quibus etiam unus alterque vitæ jacturam fecit. Sic D. D. MAUCHARTUS in *Ephemerid. A. N. C. Cent. I. obs. 13.* refert de generosissima persona mox a pastu sumto vomitibus enormibus correpta, idem patientibus coqua, nutrice & tribus ejusdem familiæ ancillis. Causa inventa fuit caseus ex lacte vaccino in vase cupreo paratus, de quo pariter omnes comederant. Plura exempla in scholio isti observationi subjuncto adducuntur, quibus admonemur de insigni virulentia æruginis, quæ inter coquendum cibus admiscetur, aut a vasis cupreis in eosdem ibi asservatos transit. Sic memorantur ibi tres moniales pessime mulctatæ ab esu pastæ ex farina, butyro & caseo paratæ in vase æneo, ibidemque diutius asservatæ. Harum una mortem ex hoc edulio oppetiit. Integer cœtus puellarum orphanarum in urbe Italiæ Regio horrendis vomitibus, torminosis ventris excretionibus, dirisque aliis symptomatibus oppressarum ibidem p. 62. adducitur, ad quarum curationem accitus D. D. VALLISNERIUS, in prægressum cibum inquirens invenit pastam fuisse in vase æneo, æruginoso a negligente coqua paratam.

§. VI.

Atque talibus signis in suspicionem veneni acris, erodentis & caustici facile adducimur, sequente vero indagatione de reali ejus assumptione convinci possumus. Sed non solum talia sunt, quæ ab incautis devorantur, venena, verum etiam alia dantur non minus quidem perniciofa, sed quæ se aliis signis patefaciunt. Talem casum invenimus in D. D. WEPFERRI doctissimo tractatu *de cicuta aquatica noxis* p. 231. Scilicet integer conventus Benedictinorum Rhinoviensium anno cdo Idc xxxxi. una cœna in magnum periculum adducebatur, quum hyoscyami radices cichorei radicibus permixtæ in acetarium appararentur: unde caput vertigine corripiebatur, linguæ ac labra torrebantur, asperabantur fauces, nonnullorum ilia torquebantur, omnesque artus male habebant: gesticulabantur alii & delira loquebantur, visus acies corrumpebatur, ut qui legere vellent, litteras ambulare putarent, & confusim discurrere, duplicataque vel triplicata objecta cernerent. Tam commune inque multos simul diffusum malum fecit, ut in culinam inquireretur: factaque indagine cognitum est, puerum hortulani noxias radices edulibus per imprudentiam mixtas coquo tradidisse, indeque hanc iliadem malorum traxisse. Sine dubio recte judicavit ad opem ferendam vocatus celeberrimus Jo. SCRETA, gravissima sequi potuisse, nisi vis hyoscyami noxia sale & aceto ac oleo fuisset infracta: forte & ipsum cichoreum ad minuendas noxas fecit: quippe quod DIOSCORIDES hyoscyami corrigens esse perhibet.

§. VII.

Pertinet huc quoque egregia observatio D. D. NEBELII, quæ *Ephemerid. A. N. C. Cent. IX. obs. 60.* legitur, sistitque conjuges, qui in cœna coturnices affatas comederant, hora vero exacta in sinistro corporis latere spasmodicam tensionem senserunt valde molestam in cervice & dorso, quæ ad os claviculæ, moxque ad maxillam sinistram ascendit, cum delirio in marito, & palpitatione cordis in foemina. Medicus advocatus auditis circumstantiis & explorato quod tres liberi in eadem mensa pasti, sed coturnicibus omissis, nihil mali sentirent, culpam merito rejecit in has aves, diu jam infamatas a GALENO aliisque Medicis, quod musculorum distentiones inducere soleant: non quidem quod eleboro pascantur, quem in nostris terris non inve-

viunt, sed quod lolio temulento vescuntur, ut C. BAUHINUS & RUD. Jo. CAMERARIUS observaverunt. Quod de coturnicibus constat, de alaudis forte etiam non injustissime metuetur, illo tempore captis, quo messis nondum peracta est, multaque pluviae ceciderunt per æstatem, quæ lolii illius proventum valde foveant & adaugent. Certe ante non adeo multos annos per Franconiam multæ querelæ auditæ sunt, quod alaudæ comestæ multis noxam intulerint: quamquam id in nostro & reliquo Misnico tractu unquam compertum esse nullibi reperiam.

§. VIII.

Quum plura hujus generis exempla afferre liceret; parcimus tamen operæ & tempori, atque illico nos convertimus ad ostendendum quem fructum ad caute circumspecteque agendum capere hinc oporteat. Primo quidem cognoscere licet fieri posse, ut venenum accipiat, ubi nemo dedit illo consilio, ut veneni noxas exferat, errore scilicet, non malitia aut dolo. Patet id exemplo arsenici pro saccharo ad ptisanam avenaceam edulcorandam adhibiti, ut & radicum hyoscyami & cichorei infausto errore junctarum. Sed huic non immorabimur, quum ad Medicum non pertineat quærere, qua intentione venenum datum sit, sed datum remove, si tempestive venerit, viresque infringere: aut si re jam confecta vocatus sit, præsentiam ejus invenire & comprobare. Deinde & illud discimus, edulium aut potum in se saluberrimum veneni indolem veram consequi posse, si minus decenti vase vel præparetur vel asservetur: quo in genere multum invigilandum est/ex argento factæ suppellectili, quippe semper cupri societatem habenti, magis autem cupreæ & orichalceæ, tum vero etiam stanneæ, præsertim elegantiori cum regulo antimonii & orichalco, quin arsenico ipso, paratæ. Tum quoque apparet, quod multis simul pransis aut cœnatis accidere potuit, sæpiusque accidit, idem etiam singularibus evenire posse, si quis scilicet talem cibum vel potum acceperit, simili noxa infectum. Exemplum chirurgi a caseo in cupreo vase facto & in eodem mensæ imposito mortis periculum incurrentis legitur in *Ephemerid. A. N. C. Cent. I. obs. 13.* ibidemque de puella quadrienni ex simili noxa mortua legitur. Confer Illustr. Dom. PRÆSIDIS *Medic. consult. tom. VI. dec. I. cas. IX.* Tandem & hoc elucet diversorum venenorum diversas esse operationes, quibus consideratis, tanquam signis, Medicus dirigitur ad facilius detegendum illud, quod præsentis in ægro tante molestias inducit: de quo deinceps pluribus agendum est.

§. IX.

Juvabit autem scrutinium hoc ipsemet ægrotus, si ad mentis adhuc compotem vocati accessimus, recensendo, quæ ante paucas horas egerit, ederit, assumerit. Idem si ab æneo vase in apparatus vel asservatos cibos metallicum æruginosum quid migraverit, ex sapore nauseoso faucibus immorante, & per singulos vomitus renovato, conjecturam nostram aut confirmabit, aut aliorum excurrentem revocabit. Quodsi vero aut infans sit, aut etiam deliret, & extrema patiat, longo quidem scrutinio tempus non suppetit, sed ante omnia prospiciendum est ægroto, & ex signis præsentibus colligendum, quo maxime remedio opus sit, ne vitæ jacturam faciat. Quodsi itaque signa adsint caustici veneni, ut æruginis, arsenici, cobalti & similium, nihil magis conducet involventibus oleosis, pinguibus, mucilaginosi: ut oleo quovis culinæ usibus apto, lacte, cremore ejus, butyro

butyro cum jusculo avenaceo, jusculis carniū gelatinosis & pinguibus, nihil aut parum salitis, quibus evomendi conatus adjuvabuntur. Quibus jam cum euphoria patientis conquiescere incipientibus, locus est theriacæ cum aceto aut succo citri, mixturisque diapnoicis & alexipharmacis.

§. X.

Si vero nullum adsit caustici veneni signum, sed omnia potius indicia prodant venenum in fluidum nervorum expansiva sua indole agens, solidorumque per vitiatum hoc, motus pervertens sensusque corrumpens: non male quidem his etiam opponitur lac tepidum cum oleo & pinguibus, ut evomatur noxium, quod in primis forte viis adhuc obhærescit: sed & simul jungenda sunt, quæ propius ad rem faciunt. Si igitur multum tempus a pastu jam excessit, nihilque vomitu eliminatur, quanto citius ad acetum veniendum est vel simplex vel calendulatum aut bezoardicum, cujus ope nimia humorum expansio compescetur, & per blandam diapnoen dissipabitur id quod peregrinum ac noxium eos subiit. Si sopor urgeat, injiciendus est clyster initio acior, ut per alvum deorsum evocentur noxia in intestinis commorantia, deinde mitiores, oleosi, demulcentes. Si inter hæc de assumpti veneni specie accuratius aliquid rescire licuerit, adhibenda quoque sunt, quæ specificè adversus singula valere constat: de quibus hic prolixius agere non licet mihi, qui non tam curationem venenatorum tradere cupio, quam edisserere, quæ cautio in veneni dijudicatione adhibenda sit.

§. XI.

In hominibus, qui se potibus inebriantibus impleverunt, satis sæpe accidit, ut vehementibus cardialgiis corripantur, immanibusque vomitionibus torqueantur: aliqui etiam diris convulsionibus tententur. Et choleriodes quidem ejusmodi evacuationes plerumque concutiunt variorum assumptorum pinguium, salinorum, dulcium, acidorum, aromaticorum & quorum non aliorum, quæ in unam cœnam acervari solent, deberi videntur; præsertim si vel vinum vel cerevisiæ variæ commixtim bibuntur, vel mangonifata vina, aut admodum generosa, nervos, ex Hippocratis effato, ferientia, affatim fuere hausta. Retulit mihi vir fide dignus, quod duo juvenes, inter complures alios uni prandio admoti, ubi die cetera æstivo & calido multum vini ebiberant, convulsionibus gravibus correpti fuerint; quorum unus corpore cetera valetudinario præditus, minorem admirationem faciebat, alter vero floridissimus & vegetissimus, quum mox etiam corripere, panicum terrorem reliquis injiciebat, quorum tamen nemo quicquam sinistri sensit. Erat autem prior vini potui a teneris annis adsuetus, alter a pueritia quidem cerevisiæ addictus, sed sæpe antea computationibus interfuerat. Vinum accusatum fuisset, nisi complures alii sine ulla noxa a convivio isto discessissent.

§. XII.

Vehementius tamen lædi tales ad ebrietatem potibusque repleti possunt & solent, si iracundia gravius commoventur, & post illam cibos potusque ingurgitare pergunt, aut motu, ut saltatione, concalescentes frigidam corpori infundunt, aut magno se frigori postea diutius permittunt: unde aliquos vitæ præsens periculum incurrisse constat. Quin sola cor-

Frid. Hoffmanni Oper. Supplem. II.

poris ad magnam æstuationem incallescencia, si frigidus potus intemperantius assumatur, veri veneni effectus in nobis patrare potest: in cujus asserti probationem multa adduci exempla possent, nisi obvia ubique esse scirem. Unicum tamen non possum, quin adferam, quia veneficii suspicionem movit, & forte, nisi amici Medici suppressissent, & causam veriore ostendissent, magnis contentionibus occasionem præbuisset. Persona honorata amicos visum peregre abierat, pridieque ejus diei, quo summo mane proficiscendum erat, convivio excipiebatur, ubi in seram noctem usque hilariter saltabatur. Quum tempus discedere juberet, a motu calidissima pincernam adibat, ebibebatque satis magnum vitrum aqua frigida repletum. Post non longum tempus vomendi conatus emergebant, cum vehementi cardialgia: sed iter tamen per loca confragosa suscipiebatur. In singulas horas graviora omnia reddebantur, & ne multa cumulem, post paucos dies febrem inflammatoriam mors insequiebatur, prægressis convulsionibus. Quum ad viscera interiora lustranda cultro aditus pararetur, totus intestinorum tractus quasi cyaneus conspiciebatur.

§. XIII.

Vehementius sese exerunt noxæ veneno assumpto analogæ, funestumque eventum accelerant, si homini a magna exæstuatione potu frigida infuso vomituri, aut post magnam iracundiæ excaulescentiam id patienti, medicina vomitoria aut purgans exhibetur. Facile eo ruunt homines & quasi sponte sua, persuasi bilem ad ventriculum regurgitasse, ibi plures molestias creaturam, nisi proxima evacuetur via, quam ipsam naturam indicare judicant, cujus ductum se maxime sequi credunt; quum evacuantem medicinam exhibent. Quam vero perniciosus sit hic error singulari commentatione ostendit Illustr. Dom. PRÆSES de medicina emetica post iram veneno inscripta, clareque demonstravit iram vehementiori partium nervoso-musculosarum constrictione totum systema nervosum commovere, & cordis vasorumque systolen, partiumque fibrosarum in universo corpore tonum intendere: potissimam vim autem exserere in ventriculum & intestina, ceu partes membranosas & valde nervosas. Quumque in valde calefactis & æstuantibus potus frigidus large haustus easdem partes proximè & immediate contingat, & pro natura frigidorum tum fluida gelatinosa coagulet, tum solida constringat: effectus quadantenus idem ab utroque nascitur, scilicet circuli humorum vitalium in membranosis illis partibus impedimentum in stasim & corruptionem inflammatoriam præcipiti gradu tendens. Ejus primum indicium præbent vomitorii illi motus: quos qui medicina quacunque spasmos inducente augent, oleum camino addunt, funestumque eventum accelerant.

§. XIV.

Facillimum jam erit ad judicandum, quanto potentiores effectus consequuturi sint, si ebrietas, prægressis variis cibis, jungatur cum graviore excaulescentia, motuque defatigante inter saltandum, aut prorsus luctandum & digladiandum, deindeque frigidus potus superingestus sit, sicque læsus tam multis delictis diætetici frigido loco male munitus decumbat. Quid enim mirum, si gravissime mulctetur talis homo, qui in omnes leges sanitatis conservandæ tanta infania impingit, easque migrat. Quamquam & hic subinde petulantium sodalium ludibria

accedunt, qui hominibus sui non amplius compotibus infundunt pulverem nicotianæ aut ellebori, ea intentione, ut citius evomant: quod non potest non male sæpius cedere. Quin ipsi caupones aliquando malas artes adhibere solent, quibus cerevisiæ acfcentis noxas emendent: ut factum meminimus ab aliquo, qui cerevisiæ albæ immiscebat lixivium saponariorum: quod cum largius factum esset, satis multi, qui in eadem caupona illo die græcati fuerant, morbis acutis inflammatoriis corripiebantur, quorum non pauci celeriter exstinguebantur, ut de eventu tam infauisto, sed mendacibus circumstantiis interpolato, multæ fabulæ per integram Germaniam, & forte ulterius spargerentur.

§. XV.

Atque hæc hætenus differuimus, ut cognoscatur, quam multa sint, quæ speciem venenorum habent, effectusque veris venenis malitiose datis analogos edunt: quorum memorem esse Medicum decet, ut mature deliberatum certoque exploratum respondere magistratui possit. Quamquam enim in effectu vitam in periculum adducendi, quin abrumpendi, cum quovis veneno certare possint: de talibus tamen venenis, quibus nomen non nisi æquivoco competit, in foro non solet quæri. Medico autem hæc omnia explorata beneque considerata esse debent, ne iudicium ferat, cui tuendo impar sit, si alius, re melius expensa, errorem ipsius arguat: deinde ne ad curationem vocatus, dum indicationibus veri veneni, univoce talis, satisfacere per evacuantia cupit studetque, salutem hominis pessundet. Nam in plerisque veris venenis ore assumtis prima curandi spes in eo residet, si involvantur atque celerime evacuentur: ubi vero iracundiæ excandescencia, aut potus frigidus post incalescentiam mali originem induxit, hanc spem exfulare debere jam supra ostendimus.

§. XVI.

Hætenus loquuti sumus de talibus casibus, ubi venenum absque malo proposito, per incuriam aut errorem aliquem, datum sumtumve fuit, Medicoque in omnia inquirenti verum fateri nemo facile dubitat: aut ubi sine veneni veri aut univoce talis præsentia, ex multorum in sex rebus nonnaturalibus errorum concursu, effectus verorum venenorum effectibus similes resultant. Superest nunc ut circumspiciamus de illis casibus, ubi tam illi, qui malitiose dederunt, factum suum dissimulant, quam hi, qui ex vitæ tædio sumserunt, strenue negant, Medicoque requirenti omnia potius alia, quam verum profitentur. Satis rari sunt illi casus, quando Medicus ad hominem vocatur, qui vivendi tædio noxiam medicinam accepit: nam id fere provide curat, ut remotis arbitris finem suum consequatur. Factum tamen legimus, ut aliquos poenitentia tentatæ autochiriæ ad opem quærendam compelieret: alios dirorum symptomatum syndrome proderet domesticis, ut rem denunciarent. Priori quidem casu non magno labore rescimus, quodnam venenum sumtum sit: nam periculi effugiendi desiderium confessionem ingenuam extorquet. Sed difficilius sit negotium in homine pertinaciter mori cupiente. Sæpe tamen produnt arcanum circumstantiæ quædam. Sic memini hominis, qui furiis conscientiæ agitato aquam fortem, arbitris remotis, biberat, vitrumque per fenestram in hortum proximum projecerat. Viderat hoc ejus amicus in horto deambulans, ab altero non visus,

quumque vitrum considerasset, odoremque cognovisset, mox vero illum vomere, & valde tussire animadvertet, ad cubiculum ejus properavit, aditumque, quo licuit modo, patefecit. Vere jam agonizantem inveniebat, quum vero non ignarus medicinæ esset, interim dum Medicus accederet, multa infusa aqua vim concentrati acidi infregit, sicque salutis auctor exstitit.

§. XVII.

Rari sunt, fateor, tales casus: sed Medicum omnia circumspicere tunc oportet, si quod forte indicium nancisci possit. Os itaque ægroti inspiciat, consideret vomitu projectam materiam; sed ante omnia symptomata præsentia recte æstimet. In illustri quadam schola nobilis adolescentulus, nescio quid metuens, exitiale sibi consilium agitabat: cumque pingendo operam daret, bonam quantitatem guinni guttæ, aqua dissolutam, hauserat. Vomebat flava, eoque prodebat, quid sumfisset; ejusque moderator, excussa suppellectile pictoria, quum non inveniret ante paucos dies emtum pigmentum, Medico facile indicabat certum, unde periculo subtrahebatur, medicina convenienti tempestive suggesta. Enim vero non frequentissime licet tam brevi labore verum reperire, aut subvenire in tempore; fereque ex symptomatum consideratione, aut in demortuorum corporibus per sectionem eruendum est. Atque eandem esse conditionem eorum, quibus a flagitiosis hominibus venenum sceleratâ manu porrectum est, facile cognoscitur. Quare opus est certis & diagnosticis venenorum, si non omnium, potissimorum tamen & frequentissimorum, signis, de quibus deinceps ordine dicam, quam bene potero.

§. XVIII.

Si itaque homo, qui ante paucas horas perfectissime valuit, aut ita tamen, ut de nulla molestia conquereretur, nec iracundia percitus fuit, aut post magnam incalescentiam frigidus potu sese implevit, post sumtum cibum aut potum grævia patitur, ea scilicet, quæ §. IV. attigimus, quærendum est de assumtis, an forte pulvis, pasta, pistorium aut dulciarium opus fuerint, aut chocoladam biberit, & num quid in istis offenderit, quod insolitum saporem haberet. Si assumpta talia fuerint, haud levis erit suspicio arsenici albi simul admixti, quippe quod gustum facile fallit, & inter talia absconditur. Juvabit itaque curationem ita instituere, ut noxis ejus sit opposita. Arsenico suppar est mater ejus cadmia fossilis sive cobaltum; eodemque pertinent arsenicum citrinum & rubrum, quippe ex albo, additione sulphuris, facta: quamquam omnino aliquantum debiliora albo arsenico, sufficientibus tamen ad enecandum hominem viribus instructa: ceterum vero insipida, ut facile inter assumpta spissiora possint abscondi & ingeri. In iis, qui demortui secantur, ventriculus sese offert inflammatus, quibusdam locis stigmatibus nigricantibus, sphacelatis distinctus. Si pulvis inhærens tunicæ ventriculi & intestinorum colligatur, eluatur, siccetur, laminæque ferreæ prunis impositæ injiciatur, foetorem spargit alliaceum, & admotum metallum frigidum adspergine alba obducit, aut ad citrinum vel rubrum inclinante, si citrinum vel rubrum arsenicum fuerit.

§. XIX.

Post arsenicum in classe venenorum causticorum & erodentium sunt metallica quædam per salia in vitrio-

vitriolicam naturam conversa, ut mercurius sublimatus, ejusque in aqua solutio, quam vocant aquam Polonicam, solutiones metallorum in spiritibus acidis, ipsum vitriolum, praesertim lunae & veneris, ærugo, & id genus alia; quæ tamen vix quisquam incaute assumserit, quoniam se horribili sapore facile produnt: unde nec fieri potest, quin venenatus per talia homo saporem æruginosum metallicum in ore & faucibus diu retineat, idemque toties renovetur, quoties repetito vomitu aliquid emolitur. Hinc Medico adhibito non obscurum esse potest, quorsum conjecturis suis ferri, & in quæ porro indagare debeat. Jungi vero plerumque solet vehementibus & ferocibus evomendi conatibus urinæ pertinax suppressio, quæ etiam a solis spiritibus acidis concentratis consequitur: teste THEOD. ZWINGERO in *theatr. prax. med.* Ad opem ferendam cito accedat oportet Medicus, beneque instructus, ne mors miserabilis, cum diris convulsionibus, consilium & juvandi studium antevertat. Diluentia cum antacidis præcipuam spem ostendunt: quorum illa concentrati acidi spiritus vires debilitant, hæc infringunt, & armis suis exuunt. Legi scriptum publico Illustriss. Comitum Hohenlœnsium testimonio munitum, quod homini mortis supplicio addicto gratia facta sit hac lege, ut mercurii sublimati drachmam dimidiam, ni fallor, aut integram assumeret, denique terræ sigillatæ Silesiacæ certam quantitatem subjungeret, quo constaret de remedii, tunc tantopere deprædicati, efficacia. Satis graviter afflictus homo tamen eluctabatur hoc solo remedio, & modica vini veteris quantitate, quæ pro terræ vehiculo indulta erat.

§. XX.

Si mortuorum a talibus venenis corpora inciduntur, gulam & ventriculi interiora erosa, inflammata & corrupta inveniri annotatum est: ut & plerumque ante mortem sanguinolenta evomuntur & per alvum secedunt, quæ postrema excretio etiam post mortem aliquamdiu durare visa est. An vero fieri ulla arte queat, ut hujusmodi venena, utpote solubilia, in defunctorum ventriculo aut intestinis detegantur, & sensibus percipienda fiantur, valde dubito; nisi forte excessiva quantitate ingesta mortem citius induxerint, quam per intestina diffundi, ac muco & lymphæ gastricæ intestinalique latici copiosius effluenti permisceri possent, & cum illis, majori quidem sui parte, per superiora & inferiora expelli. Forte aliquid effici posset, si ventriculi & intestinorum contenta elota per præcipitantia explorarentur, secundum eas leges, quas chymia suppeditat. Sed quoniam nondum succurrit, qui illam *ἀντίδοτον* vel requirat, vel a se felici experimento comprobata doceat: nolo ulterius huic negotio immorari. Ad celerem perniciem rodendo, inflammando, necrosinque inducendo, etiam ducunt quæcunque salia concentratissima in ventriculum delata, & spiritus omnes acidi fortissimi, salis communis, nitri, vitrioli: quin & alcalina fortissima, praesertim cum adjectione calcis vivæ facta: quibus certissimam medelam affert, quicumque satis diluit, & deinde eorum naturæ contraria subjungit. Hæc quidem ratione progressus læsionis impeditur: sed illa, quam inter deglutendum gulæ & faucibus intulerunt, plerumque pertinaciter affligit, & mortem inferre etiam valet: qualem casum refert supra laudatus ZWINGERUS *part. II. pag. 251.* Et sane vix fieri aliter posse experiuntur illi, qui inter labores chymicos tales concentratissimos spiritus manibus vel digitis suis affundunt, ubi cuticula, sæpeque satis notabilis cutis por-

tio, abscedit, tanquam fuisset cauterium adhibitum. Loquor autem de concentratissimis & fumantibus spiritibus, quibus multis gradibus debiliores sunt, qui in officinis ordinarie prostant. Facile itaque cognoscitur noxios effectus in his, qui tali modo mortui sunt, in summis faucibus & œsophago potissimum esse quærendos & reperiundos.

§. XXI.

Venenis septicis annumerantur antimoniata, male præparata, & ubi vel non decebat, vel modo ac dosi indecentibus, exhibita. Quum tot querelæ de hoc toties damnato & magno molimine proscripso tam simplici ac crudo, quam præparatis legantur: mirum tamen videri debet, quod tam raræ sint historiarum sectionum in cadaveribus per talia neci traditis institutarum. Illud hodie puto indubium esse, quod antimonium crudum venenis injuste annumeretur. Sed flores ejus, itemque crocus metallorum dictus, vitrum, mercurius sic dictus vitæ, aliaque præparata omnino venenorum effectus edere valent, unde vel plane hodie omittuntur talia suis nominibus indicata, vel non nisi determinatis casibus, addita summa cautela, reservantur. Equidem prorsus persuasum habeo longe plurima funestorum exemplorum, quæ jactantur, non tam ad antimoniata medicinam per se pertinere, sed propterea male cessisse, quoniam exhibita fuerunt, ubi oleum camino affundi non decebat. Satis de eo diximus superius. Reliquorum tragicorum eventuum causa forte frequentissima fuit illa epidemia persuasio, quod antimonium crudum tam horrendum sit venenum: unde superioribus annis, pro sua quisque phantasia, torrendo calcinandoque, veneno suo castrare illud conatus, quo diligentius id fecit, eo reddidit nocentius. Id ante sat multos annos in hac ipsa urbe factum fuisse discere licet ex KUNCKELII *Laboratorio*, Hamburgi typis exscripto. Si quis læsus ab antimoniato fuerit, feroces vomitus experietur, fereque cetera omnia, quæ affligunt arsenico sumto. In demortuis ventriculum inflammatum & gangræna corruptum inveniri par est. Quod vero semper fieri possit, ut aliquid, quod exhiberi & ab antimonio esse probari queat, sectionis ope eruatur, valde equidem dubito: quum non solum valde exigua portio assumatur, verum aliqua etiam solubilia aut fluida sint, in quibus antimonium ostendere optimus chymicus non valuerit, etsi integras uncias isti examini impenderit.

§. XXII.

Venenis septicis & solutionem continui inferentibus accensentur ex mineralium familia auripigmentum & adamas; utrumque tamen sine solida & vera causa eo referri existimo. Et quod ad auripigmentum quidem pertinet, loquor tantum de nativo, haud vero de factitio, quod ex arsenico albo decima sulphuris parte colliquata paratur in Misnia: hoc enim venenum esse amplissime concedo. Sed alterum illud nativum non minori injuria, quam antimonium crudum, venenis accensetur, diuque a Jo. PLATEARIO internis usibus adhibitum fuit; qui idem quoque auctor antimonio crudo frequenter usus fuisse deprehenditur. Sed de auripigmento remitto lectorem ad Illustr. Dom. PRÆSIDIS *medic. consultat. vol. I. p. 249.* ut & ad Eiusdem dissertationem *de erroribus circa venena vulgaribus.* Adamantem inter venena Arabes primum retulerunt, ut SERAPION & AVERRHŒS: sed in multis auctoribus, qui de venenis amplissime egerunt, quum ceterum Arabes

sequerentur, omiffum tamen adamantem mireris. Primum fere ex recentioribus puto esse SANTEM ARDOYNUM, qui ante trecentos, & qui excurrunt, annos *de venenis* amplum opus scripsit, cujus *libr. II. cap. 23.* adamas inter venena refertur, sed admodum timide. Nec invenio illam accusationem magis fuisse frequentatam, quam post mortem Theophrasti Paracelsi, cui, tanto remediorum ad vitam longam pollicitatori, quum mors præmatura ab aliis probro objecta esset, discipuli culpam in hostes ejus conjiciebant, qui ipsum enecassent exhibitio adamantis pulvere, veneno omnium, quæ dari possunt, invictissimo. Ab eo tempore a maximis viris, quos inter FERNELIUM unum ostendisse sufficit, venenum declaratus est, quamquam ANSELMUS BOETIUS in sua *gemmarum & lapidum historia* innocentiam ejus, quin vires medicas laudatissimas, ostendit.

§. XXIII.

Qui venenum perhibent, partim naturam ejus accusant, quam SERAPION declaravit frigidam & siccam in quarto gradu, partim proprietatem, quod frangat omnia præter plumbum & hircinum sanguinem: apparere hoc, credunt, quod vitrum scindat, & quod polline ejus omnes gemmæ atterantur: adeoque fieri non posse, quin ventriculus & intestina etiam ab eo discendantur. Quantum subinde trepidatum fuerit, quum aliqui per errorem deglutiissent adamantem, notum facile erit: sed in India non metuitur hæc noxa ab illis, qui fiscum regium defraudaturi multos sæpe adamantes deglutire solent, ut itinerum scriptores referunt. Quum multa exempla metum illum refutassent, accusari tantum pollen cœpit. Sed præterquam quod antea laudatus BOETIUS innoxium illum pulverem comprobavit: absonum sane videtur concludere ab eo, quod intervenienti forti attritu & celerrimo peragitur a duris in dura corpora agentibus, & ab iisdem patientibus, in mollia, sequacia & nulli tali motui obnoxia. Scire per quam velim quanto durior utique sit adamas rubino aut smaragdo vero orientali; quarum gemmarum fragmenta, in pollinem redacta, etiam recens natis exhibentur, si non singulari fructu, tamen plerumque innoxie, & sub auctoritate publica, quum in libris pharmacopœorum normalibus præscripti sint. Memini casus, quem ab Excell. D. D. SCHULZIO benevole mecum communicatum, impetrata ejus venia, exhibebo. Is familiariter quondam usus est celeberrimo gemmarum cælatore Norimbergensi, CHRISTOPHORO DORSCHÆO, ante paucos annos mortuo, qui sæpius ipsi & amicis retulit, quid domi suæ cum adamantis pulvere gestum sit. Scilicet imbutus persuasione de summa venenositate hujus pulveris, omnibus domesticis, ut sibi ab eo caverent, severe injungebat. Aliquo die observabat magnam sibi quantitatem recenter parati deesse, inque furti auctorem diligenter inquirebat. Deprehendebatur ancillam domesticam, mortis consciscendæ causa, illum assumpsisse, quæ patefacto facinore aufugerat. Sed spem ancillæ, dominique metum, eventus æque destituit, quum ultra viginti annos salva ac incolumis illa maneret, & neque tunc quicquam sinistri experta esset, neque postea labem valetudinis sentiret: forte etiam nunc superstes.

§. XXIV.

Nolit itaque cautus & circumspēctus Medicus in veneno indagando atque accusando ad talia impingere & offendere: diu potius omnia deliberet, an-

tequam experimenta, extra corpus instituta, ad corpus humanum transferat, quum facile vitiosa *μετάβασις εἰς ἄλλο γένος* fieri possit, aut fallacia causæ non causæ committi. Ac nescio sane an ab hac accusatione absolvi omnino possit illud alicubi inventum & descriptum *venenum mechanicum*, quod scindendo & exulcerando lentam mortem inducere perhibetur. Scilicet bractæ tenuissimæ orichalceæ, in tenuissima fragmenta forfice dissectæ, & animali exhibitæ, hac ratione mortem inferre scribuntur: quoniam acutis suis angulis scissura & vulneratura sint intestina, & hinc orta exulceratio mortem debeat inferre. An vero a placidissimo motu peristaltico, contenta intestinalia super plano lubrico promovente, illa infixio, istaque impulsio metuenda sit, gnaris harum rerum permitto judicandum: a me tantam credulitatem impetrare non possum. Neque tamen propterea innoxium tale assumtum declaravero: noxas autem non alias inde metuo, quam ab æruginē, in quam fragmenta illa tandem abitura cognosco. Adeoque non tam qualitatem noxiam impugno, quam suppositum agendi modum, propter quem mechanici veneni nomen consequutum est.

§. XXV.

Satis diu immorati sumus venenis regni mineralis causticis, violentas erosivas & inflammatorias operationes habentibus. Sunt vero etiam in hoc genere tarde & insidiosæ agentia; ut & legi ac audivi superiorum quædam ita fuisse attemperata, ut noxam non nisi tardo progressu possent exserere. Non me hic immitto disputationi illi de venenis ad certum tempus agentibus, utrum dentur vel non dentur: gloriatur enim me nec præceptores habuisse, qui talia docere vellent, nec me unquam desiderasse talia discere. Si tamen de re ignota, ex principiis cetera notis, concludere licet, equidem puto, neminem posse credere, quod dentur venena, quæ quemcunque datum hominem, mortem promeritum, ne dicam ad præstitutum diem, sed ad mensem, certo possint interimere. Quemadmodum enim de medicamentis, quin alimentis etiam, certum est, quod non agant secundum suas tantum vires, sed simul consideranda veniat subjecti receptivitas & reactio: ita etiam de venenis quibuscunque idem pronuncian- dum esse persuasissimum habeo. Credo tamen, si quicquam aliud, saturnina ad lentas & chronicas contabescencias, hecticisque morbos haud facile vincibiles, disponere. Cerussam veteres catalogo venenorum publice inseruerunt, ac credo totam profapiam plumbi non esse innocentem: plures tamen ex imprudentia forte lædi, quam ex malitioso proposito. Malitia fuit, quoniam publicis S. R. J. sanctionibus pridem interdicta fuerat illorum solers improbitas, qui vina lithargyrio mangonifaverunt, longeque plurimis hominibus dederunt valetudinis irreparabilia damna. Quæso autem lectorem benevolum, quam multos oporteat lædi quotannis ipsemet cogitet ex hoc uno, quod in scriptis summorum virorum invenimus, vina revera sincera & purissima omnes mangonifatorum notas præbuisse, si ex lagenis stanneo operculo munitis fuere infusa. Quid non fiet in familiis ubi lagenæ totæ stannæ vino excipiendo & ad convivas apportando adhibentur: quid non in hospitibus & cauponis, ubi canthari stannei ubique regnant? Quid non in mensis, ubi acetaria, fructus horæi cocti & apparatus stanneis patinis apponuntur? Sed omne stannum, Germanorum more fabrefactum, plumbi miscelam habet, quod a vino, aceto, fructibus horæis prompte exeditur.

Miramur

Miramur cur ætas parentum, pejor avis, nos magis morbosos minusque valentes ferat, & forte non satis cogitamus elegantius sæculum minus valentes necessario debere ferre.

§. XXVI.

Sed saturninorum noxam complectar unico exemplo. Juvenis generosissimus, quum gonorrhœa laboraret, iter ad urbem aliquam suscipiebat, ubi multi erant præsidarii milites, quorum præfecti plerique certabant in honore, ut loqui solet sæculum, ipsi exhibendo. Deprecabatur vinum, quod generosissimum offerebatur homini non nisi ex Medici præcepto abstinere consueto. Intelligebant socii, quid rei subesset, suadebantque, ut pudore seposito, quum corrumpere & corrumpi sæculum sit, genio indulgeret, certoque Chirurgo crederet, qui medelam promptam facere nosset. Paret, ut solent homines, quod volunt, facile credere. Dat Chirurgus pulverem, in quo erat saccharum saturni. Post aliquantum tempus obstinata alvi retentio inducit tormina tantum non convulsiva, ad iliacam passionem vergentia. Recluditur tandem victa alvus, superest febris mesenterica, typo quotidianæ incedens, sed vix intermittens. Hac diu conflictatus in quartanam pertinacem incidit, superveniente abdominis dura inflatione pedumque tumore: ut vix longo tempore & patientissima medela periculo eriperetur, & cum valetudine in gratiam reduceretur. Ponamus nunc succubuisse hunc ægrotum, Medicoque injunctum fuisse, ut viscera scrutaretur; vix utique credo futurum fuisse, ut præter labem, multis diuturnis communem, quicquam inveniret, quod ad Chirurgi arguendam culpam faceret: forteque hic accusatus tantum invenisset patrocini, ut bonus Medicus, verum professus, injuriarum actionem vix potuisset effugere. Scilicet pluribus exemplis constat bonos viros causa cecidisse, ubi judicium non ab artificibus æquis latum fuit. Quis enim nescit figulum odisse figulum? aut veritatem odia parere?

§. XXVII.

Sed satis jam multum immorati venenis causticis & mineralibus, transimus tandem aliquando ad consideranda signa diagnostica venenorum ex prosapia vegetabili: quorum aliqua sunt strangulatoria, alia narcotica & facultates animales pervertentia, aut omnino ad tempus abolentia. Jam attigimus ex genere narcoticorum & insaniam facientium hyoscyamum §. VIII. de cujus signis plura addere non est opus. Inter hujus generis reliqua venena eminet cicuta, ab antiquissimis temporibus notissima, quæ nec nostro tempore desinit noxas facere. Insaniam cum somnolentia insigni infert, testibus auctoribus, quorum indicem hic cumulare non placeat: inflatur ventriculus, ructus a stomacho emittuntur, pisces corruptos sapientes ac redolentes. Qui moriuntur, vix sine convulsionibus decedunt: qui vero medicinarum viribus servantur, exanthemata expellunt ex rubro subnigra, subaspera ac scabra: teste SIMON. PAULLI in *digress. de febr. mal.* §. 2. In sectis a morte ventriculus valde inflatus deprehenditur striis & maculis ex flavo livescens notatus: apertus spirat flatum olidum, exhibetque saburram ex viridi nigricantem, foliis cicutæ permixtam: teste WEPFERO de *cicut. aqv.* p. 112.

§. XXVIII.

Cicuta aquatica radicibus suis albis, dulcibus, sæpe aliquos ad comedendum invitavit, ignaros noxiæ qualitatibus. Modo laudatus vir non minus doctissimus quam diligentissimus, aureum tractatum de hujus plantæ historia & noxis conscripsit. Septem pueri & puellæ radicibus his passi exhibentur, quorum unus sex annorum intra dimidium horæ misere periit. Hilaris ac ridens a pastu isto, mox de præcordiorum dolore conquerebatur, humum prostratus urinam magno impetu emittebat: mox omnes sensus abolebantur, convellebatur, dentibus stridebat, oculos mire torquebat, sanguis ex auribus manabat, singultiebat, artus contorquebat, caput retrorsum trahebatur. Ab obitu abdomen & facies intumuerunt, & ex ore cadaveris spuma viridis largissime emanabat, quæ sæpe quidem deterfa identidem reparabatur. Soror ejus felicior fuit, quod repetito vomitu maximam partem ejecit. Epilepsia tamen corripiebatur, deindeque per complures horas tanquam mortua jacuit: rediit tamen ad vitam & sensus. Alius puer octo annorum, qui etiam nihil evomuit, pari fere ratione ac alter, cum diro opisthotono, exstinctus est. Cicutæ minoris petroselinii similis effectus noxii leguntur in *Commerc. litter. phys. medico Norimb. Ann. I. p. 178.* Scilicet hæc quoque cardialgiam inducit, tumorem magnum abdominis, totam superficiem ex cæruleo lividam reddit, respirationem difficilem facit, tandemque plane sufflaminat, simulque vitam aufert. In alio, qui evomuerat, mira deliria, seorsim metus a canibus, & felibus, quos multos videre credebat. Atque hæc omnia in ætate infantili ac puerili sic visa sunt in nostra Germania. Sed ATHAN. KIRCHERUS in *scrutin. pestis* refert de duobus monachis, qui Romæ a comestis radicibus cicutæ mente capti insignis & exoticæ insanie signa dederunt, quum alter anserem se factum ratus in vicinum lacum se præcipitem daret, alter, anatem se credens, internum incendium exstingui non posse, nisi in amne, crederet.

§. XXIX.

Cicutæ in multis convenit solanum, sive vulgare illud bacciferum officinarum, sive majus illud, quod furiosum, & Italico nomine Belladonna vocatur. Solani vulgaris baccarum noxas apud WEPFERUM docet D. D. EL. RUD. CAMERARIUS. Scilicet tres unius rustici liberi his comestis cephalalgia & cardialgia corripiebantur. Dabatur oleum olivarum: major natu vomebat, duo minores nihil excernebant. Jacebant torvo aspectu, jactitabant membra, furibundi delirabant, alta petebant, vociferabantur, mire torquebantur, per intervalla mortuorum instar jacebant: medicinis datis post triduum convalescebant. De herba solani pro atriplice imprudenter cocta & comesta Erlangæ, utilissima expositio legitur, & unica, quantum memini, in hoc genere, in laudatissimo *commerc. litterar. Norimb. Ann. I. specim.* 47. Longum esset chronici mali in pluribus personis decursum referre: sufficiat notasse, quod in plerisque tumor nigerrimus, ad exulcerationem gravem vergens, hinc inde enatus multum medentibus tædium objecerit: quod comparandum est illi observationi SIM. PAULI de cicuta comesta. Solani autem fruticosi, quod furiosum vocatur, noxæ sunt magis cognitæ & a viro insigniter docto D. D. Jo. MATTH. FABRO declaratæ memorabili scripto,

ſcripto, cui *ſtrychnomania* titulum fecit. Quid cſo
 locLXVII. Neoftadii ad Cocharum viro adulto, mul-
 tiſque puerulis ab eſu baccarum hujus ſolani even-
 rit, tredecim exemplis oſtendit ille auctor, deinde-
 que obſervationes quindecim aliunde petitas affert. Ne
 multus ſim in omnibus recensendis, ſufficiat retuliſſe
 hujus ſolani pathognomonica ſigna, delirium ineptum,
 oculorum ſplendorem & caliginem, deglutiendi dif-
 ficultatem, urinæ frequentiam, ac tandem cutis de-
 colorem aſperitatem.

§. XXX.

Inter venena narcotica regnat datura, ſeu ſtram-
 monia exotica, quam Solanum Indicum ſpinoſum
 aliqui vocant. Non tam enecandis, quam injuria
 afficiendis & ludibrio habendis hominibus datur:
 de quo pauca addo, lectoremque remitto ad Illuſtr.
 Dom. PRÆSIDIS *medic. conſult. tom. IV. p. 45. & 50.*
 Mandragoram quoque, utpote ſolanorum familiæ
 accenſendum vegetabile, quod ſomnum & dulces
 phantaſias inducere perhibetur, cum aliis hujus ge-
 neris indigenis & exoticis, indeque præparatis, ip-
 ſiſque opiatis, ſomnum profundum inducentibus,
 & ſæpe æternum ſoporem, leviter tetigiſſe mihi ſuf-
 ficiat, quum ſignum in ſenſus ſatis manifeſte incur-
 rens præbeant, a quo ductus Medicus in examen
 omnium prægreſſorum & conjunctorum descendere
 debet.

§. XXXI.

Venena ſtrangulatoria ſunt varia, quæ vel in ci-
 bum apparatus cupide devorantur, vel medicinarum
 inſtar infauſta manu offeruntur. Reſero huc fun-
 gos, quos ATHAN. KIRCHERUS *ſcrutin. peſt. cap.*
 VI. vivas toxici burſas eleganter dixit. Quam-
 quam enim ſunt inter illos edules, qui pro inno-
 xiis habentur: ſat tamen multis, quin ſæpe integris
 familiis, exitium attulerunt; cujuſmodi hiftorias a
 LEONARD. BOTALLO aliisſque conſignatas multas af-
 ferre liceret. Sunt valetudinariis & imbecilibus om-
 nibus omnino relinquendi, ut optime conſulit GA-
 LENUS *de aliment. facult.* Videtur plane eoſdem
 ſpecie fungos aliquo tempore inſalubri ſucco foetus
 eſſe, ut valetudinem in præceps periculum adducere

poſſint, pro eo forte, ac humiditas, quam imbiber un-
 a rore & pluviis, magis vel minus innoxia, vel qualita-
 te, vel quantitate, acceſſit. Alii accuſant noxia ani m a
 lia, quæ illis inſederunt, & ſua effluvia in poroſa
 eorum corpora immiſerunt: quod ego quidem in
 medio relinquo. Ad hujus generis venena perti-
 nent etiam alia ſtrangulativo principio pollentia,
 ſed cum ſalino cathartico conjuncto. Talia ſunt
 elleborus uterque, in quo omnes veteres ſtrangu-
 latorias vires extimuerunt, eaſque ſuperare docue-
 runt. Inter recentiores eaſdem confirmat FR. VAL-
 LERIOLA *lib. III. obſ. II.* & CONR. GESNERUS *in*
epiſtolis. Eademque virtus cum ſale eroſivo inflam-
 matorio conjuncta cernitur in aconito & napello,
 toto genere noxiis plantis, magis tamen per Italiam
 & magis calidas regiones, quam in noſtratibus plus
 temperatis.

§. XXXII.

De venenis, quæ aliunde, quam per os, corpo-
 ri inferuntur, parum habeo explorati. Arma tali-
 bus infici ſolere nimis quam certum eſt: ex quo
 fit, ut vulnera talibus inſicta mox initio mala ſigna
 ac funeſta oſtendant, quæ a vulneris æſtimatione tan-
 ta exoriri non poterant. Signa talium exponit AM-
 BROS. PARÆUS *lib. X. Cap. 21.* idemque *capite*
XIII. graviter differit adverſus eos, qui ſine neceſ-
 ſitate venenata arma clamant & accuſant, ubi aëris
 circumfuſi malignitas gravia ſymptomata acceſſivit,
 ſive ille ſit hyemalis frigidiffimus, ſive æſtivo tem-
 pore vappidus & paludoſis exhalationibus impuris in-
 ſectus: quod totum caput conſideratione digniſſi-
 mum exiſtimo. Subtiliores venena inferendi mo-
 dos per chirothecas, ſedilia, epiſtolas, ſuffimenta,
 pulverem ſternutatorium, & ſimilia dari, legi & a
 multis audivi. Retulit mihi vir fide dignus, quod
 viderit baſamum, qui naribus illitus ſtatim mentem
 perverterit ad aliquot momenta; eumque Roma al-
 latum. Diabolicas tales artes toto animo abominor
 & abhorreo, meque de illis erudiri noluiſſe glo-
 rior. De venenis a morſu & iſtibus venenatarum
 & rabioſarum beſtiarum vix oritur in foro quæſtio,
 reſque aliunde facile innotefcit: quare telam abrum-
 pimus atque huic commentatiunculæ facimus finem.

FINIS PARTIS PRIMÆ.





